


Tnúhu ní cáháⁿ yă
ndiŏxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	67
SAN LUCAS	107
SAN JUAN	170
LOS HECHOS	213
ROMANOS	270
1 CORINTIOS	296
2 CORINTIOS	322
GÁLATAS	339
EFESIOS	348
FILIPENSES	357
COLOSENSES	363
1 TESALONICENSES	369
2 TESALONICENSES	374
1 TIMOTEO	377
2 TIMOTEO	385
TITO	390
FILEMÓN	393
HEBREOS	395
SANTIAGO	416
1 PEDRO	422
2 PEDRO	429
1 JUAN	434
2 JUAN	440
3 JUAN	441
JUDAS	442
APOCALIPSIS	444

TNÚHU NÍ CHÍDÓ TNÙNÍ TÉ MÀTEÚ

Nchaa cue téé ní xíndecu ndéé sanaha cùtnàhá vátá quíxí-gǎ Xítóhó Jesucristú (Lc. 3:23-38)

¹ Te ñaní tnáhá Xítóhó Jesucristú ní cuu ndíi Dàvíí ndíhi ndíi Àbrahám, cue téé ní xíndecu ndéé sanaha vǐhi-gǎ ñuyíú-a. Te duha ndúu cuendá dava-gǎ cue téé ní cuu ñaní tnáhá-gǎ ní xíndecu ndéé sanaha.

² Ndíi Àbrahám ní xóo ìíⁿ déhe ndíi, te ndíi-ánⁿ ñí xínani ndíi Isàác. Te déhe ndíi Isàác-ánⁿ ñí cuu ndíi Jàcób, te déhe ndíi Jàcób-ánⁿ ñí cuu ndíi Jùdá, te diu-ni ndíi Jàcób-ánⁿ ñí cuu tǎtá dava-gǎ cue ñaní ndíi Jùdá-ánⁿ. ³ Te déhe ndíi Jùdá-ánⁿ ndíhi ñadìhí ndíi, ndíi Tàmár ní cuu ndíi Fàrés ndíhi ndíi Zàrá. Te déhe ndíi Fàrés-ánⁿ ñí cuu ndíi Èsróm, te déhe ndíi Èsróm-ánⁿ ñí cuu ndíi Àrám. ⁴ Te déhe ndíi Àrám-ánⁿ ñí cuu ndíi Aminàdáb, te déhe ndíi Aminàdáb-ánⁿ ñí cuu ndíi Nàsón, te déhe ndíi Nàsón-ánⁿ ñí cuu ndíi Sàlmón. ⁵ Te ñadìhí ndíi Sàlmón-ánⁿ ñí xínani-aⁿ Ràháb, te ní xóo ìíⁿ déhe-yu ní xínani-dě Bòóz. Te ñadìhí ndíi Bòóz-ánⁿ ñí xínani-aⁿ Rùt, te ní xóo ìíⁿ déhe-yu ní xínani-dě Òbéd, te déhe ndíi Òbéd-ánⁿ ñí cuu ndíi Isàí. ⁶ Te déhe ndíi Isàí-ánⁿ ñí cuu ndíi Dàvíí téé ní xíndaha ñàha xii cue ñáyiú isràèl. Te déhe ndíi Dàvíí-ánⁿ ndíhi ñadìhí ndíi ní cuu ndíi Salòmón. Te díhna-gǎ ndíi Ùriás ní cándeca ndíi ñadìhí-ánⁿ te dàtnùní ní naqueheⁿ ñàha ndíi Dàvíí-ánⁿ.

⁷ Te déhe ndíi Salòmón ní cuu ndíi Ròboám, te déhe ndíi Ròboám-ánⁿ ñí cuu ndíi Àbíás, te déhe ndíi Àbíás-ánⁿ ñí cuu ndíi Àsá. ⁸ Te déhe ndíi Àsá-ánⁿ ñí cuu ndíi Josàfát, te déhe ndíi Josàfát-ánⁿ ñí cuu ndíi Jòrám, te déhe ndíi Jòrám-ánⁿ ñí cuu ndíi Ùziás. ⁹ Te déhe ndíi Ùziás-ánⁿ ñí cuu ndíi Jòtám, te déhe ndíi Jòtám-ánⁿ ñí cuu ndíi Àcáz, te déhe ndíi Àcáz-ánⁿ ñí cuu ndíi Ezèquiás. ¹⁰ Te déhe ndíi Ezèquiás-ánⁿ ñí cuu ndíi Manàsés, te déhe ndíi Manàsés-ánⁿ ñí cuu ndíi Àmón, te déhe ndíi Àmón-ánⁿ ñí cuu ndíi Jòsiás. ¹¹ Te déhe ndíi Jòsiás-ánⁿ ñí cuu ndíi Jecòniás. Te diu-ni

ndíi Jòsiás-ánⁿ ñí cuu tǎtá nchaa dava-gǎ cue ñaní ndíi Jecòniás-ánⁿ. Te dàvá-ánⁿ ñí quide yica cuè téé ñuú Babiloniá ndécá-güedě ñáyiú isràèl cuáháⁿ ñuú-güedé cuendá yàcáⁿ cundecú-yu.

¹² Te sátá ñí yáha ducaⁿ ñí cuu, te ndíi Jecòniás ní xóo ìíⁿ déhe ndíi ndíhi ñadìhí ndíi, te téé-ánⁿ ñí xínani-dě Salàtiél. Te déhe ndíi Salàtiél-ánⁿ ñí cuu ndíi Zorobàbél. ¹³ Te déhe ndíi Zorobàbél-ánⁿ ñí cuu ndíi Àbíúđ, te déhe ndíi Àbíúđ-ánⁿ ñí cuu ndíi Eliàquím, te déhe ndíi Eliàquím-ánⁿ ñí cuu ndíi Àzór. ¹⁴ Te déhe ndíi Àzór-ánⁿ ñí cuu ndíi Sàdóc, te déhe ndíi Sàdóc-ánⁿ ñí cuu ndíi Àquím, te déhe ndíi Àquím-ánⁿ ñí cuu ndíi Èliúđ. ¹⁵ Te déhe ndíi Èliúđ-ánⁿ ñí cuu ndíi Eleàzár, te déhe ndíi Eleàzár-ánⁿ ñí cuu ndíi Mátán, te déhe ndíi Mátán-ánⁿ ñí cuu ndíi Jàcób. ¹⁶ Te déhe ndíi Jàcób-ánⁿ ñí cuu ndíi Chèé téé ní cuu yì tá Màriá xíchí ñí cuu nǎná Jèsús Yaa ní tendaha Dütú Ndiõxí ní quixi ñuyíú-a.

¹⁷ Te sa ní cuu úxúú tnáhá cue téé cùu ñaní tnáhá ndíi Àbrahám ndécú dàvá-ánⁿ, te dàtnùní ní cacu ndíi Dàvíí diu-ni ñaní tnáhá ndíi. Te núú tnáhá méé ndíi Àbrahám ndíhi ndíi Dàvíí ní cuu úxícúmí tnáhá-güedé. Te ducaⁿ te sa ní xínu úxícúmí-gǎ tucu-güedé ní cacu, te dàtnùní ní tniⁿ ñàha cuè téé ñuú Babiloniá xii ñáyiú isràèl ndécá ñàha-güedé xii-yu cuáháⁿ ñuú-güedé cuendá yàcáⁿ cundecú-yu. Te sátá ñí yáha sá dúcáⁿ ñí cuu, te ní cacu úxúní tucu cue téé ní cuu ñaní tnáhá ndíi Àbrahám ndíhi ndíi Dàvíí, te dàtnùní ní cacu Xítóhó Jesucristú ñuyíú-a. Te núú tnáhá méé-gǎ ní cuu úxícúmí tnáhá-güedé.

Ní cacu Jèsús

(Lc. 2:1-7)

¹⁸ Te duha ní cuu cùtnàhá ní cacu Xítóhó Jesucristú, chí dàvá-ánⁿ ñí xíndecu ìíⁿ xíchí cuéchí ñí xínani Màriá. Te xíchí-ǎⁿ sa ní cundáá tnúhu sá tnándaha-xi ndíhi ìíⁿ téé nani Chèé. Te cùmání-gǎ tnándaha-xi ndíhi téé-ánⁿ te Espíritú Yá Ndiõxí ní quide ní ngúhuⁿ déhe-xi. ¹⁹ Te té Chèé téé cuíni cándeca ñàha xii xíchí-ǎⁿ ñí cutnùní iní-dé sá ñúhú déhe-xi. Te cùu-dé ìíⁿ téé quide ndáá, núu xíáⁿ duuⁿ duuⁿ ní sani iní-dé sá vǎ tnándaha-gǎ-dé ndíhi-xi, te dícó-ni sá ñà túú ní cǎháⁿ-dé chí ní cuíni-dé sá vǎ cǎháⁿ cuèhé cǎháⁿ duha ñáyiú cuendá-xi. ²⁰ Te sátá dúcáⁿ ñí sani iní-dé te ní ngáva-dé ní

xidí-dé, te núú sàní-dé ní sáháⁿ ìⁿ espíritú xínú cuèchi núú Yă Ndiôxí ní xáhaⁿ-xi xii-dé: —Yòhó té Chèé téè cùu ñaní tnáhá ndîi Dàvíí, yúhú càchí tnúhu-í xii-n sã ñà túú nã cani iní-n, tnãndaha nahi-ni-n ndîhi tá Màriá cuèi ñùhu déhe-xi, chi mee Espíritú Yă Ndiôxí ní quide-xi ducaⁿ nî ngúhuⁿ déhe-xi. ²¹ Te na càcu déhe-xi-áⁿ te danàni-n-dé Jèsús. Te ducaⁿ cùnani-dé, chi téé-áⁿ cada-dé cuendá sá vã cùndècu-gá cue ñaní tnáhá-dě ñáyíu isràél ichi cuèhé ichi duha —duha ní xáhaⁿ espíritú-áⁿ xii té Chèé-áⁿ núú sàní-dé.

²² Te ducaⁿ nî cuu chi ní quee ndáá-xi nàcuáa ní xáhaⁿ Yă Ndiôxí xii ìⁿ téé ní cáháⁿ tnúhu-gá ndéé sanaha. Te téé-áⁿ nî chídó tnùní-dé núú tùtú-gá nàcuáa ní xáhaⁿ-gã xii-dé, te duha ní xáhaⁿ-gã:

²³ Cundecu ìⁿ xíchí cuéchí ndéé cuèé-gá. Te òré ndécú ìí-xi vátá ñihí-gá yî-xi te ngúhuⁿ déhe-xi.

Te òré ná cácu dèhe-xi te danàni ñahá-yu Emànuél.

Duha ní xáhaⁿ-gã xii téé-áⁿ nî chídó tnùní-dé núú tùtú-gá. Te tnúhu Emànuél-áⁿ quéé-xí: Yá Ndiôxí ndécú ndîhi-o. Núú xíãⁿ ducaⁿ nî cuu vitna.

²⁴ Te òré ní ndiquíú iní té Chèé-áⁿ te ní quide-dé nàcuáa ní xáhaⁿ espíritú-áⁿ xii-dé chi ní tnãndaha-dé ndîhi tá Màriá. ²⁵ Dico ndi díⁿ nî xíndecú-yu ndéé ní sáá nduu nî cacu déhe-xi. Te òré ní cacu déhe-xi-áⁿ te ní dánání ñaha-dé Jèsús.

2

Cue téé cuángoto ñaha xii Jesús

¹ Te Jèsús ní cacu-gá ìⁿ ñuú nání Bèlén, te ñuú-áⁿ yíndèhu-xi distritú Jùdeá. Te dàvá-áⁿ cùnùu té Hèrodés yíndàha-dé ñáyíu. Te ñuú Jerusálén ní quexìo cue téé véxi ndàa xio nacuáa quène nchíanchii, cue téé túha dàcuaha cuendá nchaa sá ndéé andíu. ² Te ndùcu tnúhu-güedé núú ñáyíu ñuú-áⁿ, te xãhaⁿ-güedé:

—¿Vã cùndèe iní-ndó càchí tnúhu-ndo ndéé ndécú téè quíndaha ñaha xii ñáyíu isràél-ãⁿ? Chi ní xiní-ndí ní quene chódíní-dě ndàa xio nacuáa quène nchíanchii, núú xíãⁿ véxi-ndí chi cuíní-ndí quíní-ndí-dé te chiñuhu-ndí-dé —càchí-güedé xãhaⁿ-güedé xií-yu.

³ Te òré ní níhí tēe cùnùu nani Herodés tnúhu sá ndécú tnúhu cue téé-áⁿ ndéé ndécú téè quíndaha ñaha xii ñáyíu isràél, te ñà túú tnáhí ní cùu váha iní-dé, te diu-ni ducaⁿ ñà túú ní cùu váha iní tnáhá nchaa ñáyíu ñuú-áⁿ. ⁴ Te ní cana-dé cue téé cùu dútú cùnùu, ndîhi cue téé dàcuaha ñaha xii ñáyíu nchaa tnúhu ní chídó tnùní ndíi Moisés, te ní xícáⁿ tnúhú-dě núú-güedé ñuú xiní-güedé ndéé cacu Crístú téè tendaha Yă Ndiôxí quixi ñuyíú-a. ⁵ Te ní xáhaⁿ-güedé xii-dé:

—Ìⁿ ñuú yíndèhu distritú Jùdeá cacu-dé, te ñuú-áⁿ nání-xí Bèlén, chi quee ndáá-xi nàcuáa ní xáhaⁿ Yă Ndiôxí xii ìⁿ téé ní xóo cáháⁿ tnúhu-gá ndéé sanaha. Te duha ndùu tnúhu ní chídó tnùní-dé núú tùtú-gá:

⁶ Ñuú Bèlén cúú-xí ìⁿ ñuú líhli yíndèhu distritú Jùdeá, te ío-gá cùnùu-xi dacúúxí dàva-gá ñuú cùnùu yíndèhu distritú-áⁿ,

chi diu ñuú-áⁿ quee ìⁿ téé ío cùnùu.

Te téé cunuu-ãⁿ quíndaha-dě ñáyíu cùu cuendá-í ñáyíu isràél.

Duha ní xáhaⁿ-gã xii téé ní xóo cáháⁿ tnúhu-gá, te ducaⁿ nî chídó tnùní-dé núú tùtú-gá —càchí-güedé xãhaⁿ-güedé xii té Hèrodés.

⁷ Te sátá dúcáⁿ te té Hèrodés dayuhu nî cana-dé cue téé ndùcu tnúhu ñuú ndéé ní cacu téè quíndaha ñaha xii ñáyíu isràél, te ní xícáⁿ tnúhú-dě núú-güedé ná nduu cùu-xi nduu díhna nuu nî xiní-güedé chódíní. ⁸ Te sátá dúcáⁿ te ní xáhaⁿ-dě xii-güedé:

—Chí cuáháⁿ ñuú Bèlén te nducu tnúhu váha-ndo ñuú ndéé ní cacu téé ducaⁿ quíndaha ñaha xii ñáyíu isràél. Te òré ná náníhí-ndó-dě te quixi-ndo càchí tnúhu-ndo cuendá quíhíⁿ-í tnáhá-í chiñuhu-í-dé —càchí-dé xãhaⁿ-dě xii-güedé.

⁹ Te sátá dúcáⁿ nî xáhaⁿ tē Hèrodés-áⁿ te ní xica-güedé cuáháⁿ-güedé. Te chódíní nî xiní-güedé ní quene ndàa xio nacuáa quène nchíanchii-áⁿ yòdo nuu-dí núú-güedé cuáháⁿ. Te ní ngüíñí chódíní-ãⁿ, te núú nî ngüíñí-dí-áⁿ yíndáá núú ndécú Jèsús. ¹⁰ Te òré ní xiní cue téé-áⁿ nî ngüíñí chódíní-ãⁿ núú yíndáá ndécú-gã, te ní cudíí víhí iní-güedé. ¹¹ Te ducaⁿ te ní quexìo-güedé ndéé núú cáá vèhe ndecu Jesús. Te òré

cuánguihu-güedé xítí vehe te ní xíní-güedé Jèsús ndécú-gã ndihí nãná-gã Màriá. Te ní ngüíñí xítí-güedé, te ní ngüíta-güedé ní cachí-güedé sá ïo càhnu cuu Jèsús. Te dãtnùnì ní nacaáⁿ-güedé càjà xĩnehe-güedé, te ní tava-güedé díhúⁿ cuàáⁿ, ndihí dúsa sá ïo váha sàháⁿ tnámí nàni insiensú, ndihí yúcu sã nání mirrá ní taxi ndecu-güedé núú Jèsús cuendá cuu-xi ìⁿ táhú sã cúú-xí-gã. ¹² Te Yá Ndiõxí ní cáháⁿ-gã núú sàní-güedé, te xãháⁿ-gã xii-güedé sã vã náyãha-gã-güedé cáháⁿ ndihí-güedé té Hèrodés. Núú xiãⁿ cue té-áⁿ cuãnuhú-güedé ingá ichi, te ñá túú-gã ní náyãha-güedé núú ndécú té Hèrodés.

Cuáháⁿ-yu ndihí Jèsús nacióⁿ Ègiptú

¹³ Te sátá ñí yáha cuãnuhú cue téé ní sãngoto ñaha xii Jèsús, te ní quexìo ìⁿ espíritú xínú cuèchi núú Yá Ndiõxí núú sàní té Chèé, te xãháⁿ-xi xii-dé:

—Véxi-í càchí tnúhu-í xii-n sã ndácóo-n, te ndee-n ñuú-a ndihí Jèsús, ndihí nãná-gã cunu-ndo quíhíⁿ-ndó nacióⁿ Ègiptú, chi té Hèrodés tendaha-dé cue téé quixi nanducu ñaha xii Jèsús cuendá cahni ñaha-güedé. Te yacáⁿ cundecu-ndo ndéé cachí tnúhu-í xii-n ndùu ndixi-ndo —cachí espíritú-áⁿ xãháⁿ-xi xii té Chèé núú sàní-dé.

¹⁴ Te té Chèé-áⁿ ñí ndacóo-dé, te niú ní xica-dé ndihí tá Màriá ndécã-yu Jèsús cuáháⁿ nacióⁿ Ègiptú. ¹⁵ Te nacióⁿ Ègiptú-áⁿ ndécü-yu ní xihí té Hèrodés. Te ducaⁿ ñí cuu chi ní quee ndáá-xi nãcuáa ní cachí ìⁿ téé ní xóo cáháⁿ tnúhu Yá Ndiõxí ndéé sanaha ñí quide-dé núú-gã ní cáháⁿ-dé yuhu-gã, te duha ní xãháⁿ-gã ní cáháⁿ-dé: “Nacióⁿ Ègiptú ndécú Dèhe-í ní cùu, te ní xãháⁿ-í xii-dé sã ndéé-dé ñuú-áⁿ vã cündècu-gã-dé”, duha ní xãháⁿ-gã xii téé ní cáháⁿ tnúhu-gã ní quide-dé núú-gã.

Té Hèrodés ní táuchíúⁿ-dë cahni-güedé cue landú

¹⁶ Te cue téé ní sãngoto ñaha xii Jèsús ní dándàhú-güedé té Hèrodés, chi ñá túú ní náyãha-güedé cúñaha-güedé sã ñí naníhí-güedé Jèsús. Te sátá ñí cutnùnì iní té Hèrodés sã ñí dándàhú ñáhã-güedé xii-dé te ní cudééⁿ víhí-dé, te ní tendaha-dé cue téé cuáháⁿ ñuú Bèlén, ndihí nchaa dava-gã ñuú cáá yàtni xiãⁿ cuendá cahni-güedé mee-ni

cuè landú téé. Te ndéé cue landú íchí ñí cacu, ndihí ndéé cue landú sa ní nútahá úú cuíá-xi nchaa-güexi cahni-güedé ní xãháⁿ-dë. Te ducaⁿ ñí quide-dé chi ní quide cuendá-dé nãcuáa ndùu tnúhu ní xãháⁿ cuè téé ní sãngoto ñaha xii Jèsús nduu ñí xíní-güedé chódíní, núú xiãⁿ ducaⁿ ñí táuchíúⁿ-dë ní quide cue téé-áⁿ. ¹⁷ Te ducaⁿ ñí cuu chi ní quee ndáá-xi nãcuáa ní cachí ndí Jeremiás téé ní xóo cáháⁿ tnúhu Yá Ndiõxí ndéé sanaha, te duha ní cachí ndí:

¹⁸ Ní tecú ndàhí víhí ñãyiu ñuú Rámá sã ndihú iní-yu, te ñãyiu xĩndáhyú-áⁿ cúú-yu ñani tnáhã tá Ràquél, te ndàhyú-yu cuendá sã ñí xihí déhe-yu.

Te ñãyiu-áⁿ ñá túú ní cuíní-yu dàñã-yu sã ndihú iní-yu cuendá sã ñí xihí déhe-yu.

Duha ní cachí ndí Jeremiás.

¹⁹ Te sátá ñí xihí té Hèrodés te ní sáhãⁿ tucu espíritú xínú cuèchi núú Yá Ndiõxí núú sàní té Chèé òré ndécú-dé nacióⁿ Ègiptú, te ní xãháⁿ-xi xii-dé:

²⁰ —Véxi tucu-í càchí tnúhu-í xii-n sã ndácóo-n, te núhú-n ndihí Jèsús ndihí nãná-gã ñuú cue ñani tnáhã-n ñãyiu isràél cundecu-ndo, chi sa ní xihí cue téé cuíní cahni ñaha xii Jèsús ní cùu —cachí espíritú-áⁿ xãháⁿ-xi xii té Chèé núú sàní-dé.

²¹ Te té Chèé-áⁿ ñí ndacóo-dé, te ní ndee-dé ndihí Jèsús ndihí nãná-gã cuãnuhú-yu ñuú cue ñãyiu isràél ñãyiu cùu ñani tnáhã-yu. ²² Te té Chèé ní níhí-dé tnúhu sã té Arquèlaú ní nucúnutñíⁿ-dé núú tãtã-dé té Hèrodés distritú Jùdeá yíndàha-dé ñãyiu. Te ní yùhú té Chèé-áⁿ, te ñá túú ní cuíní-dé quíhíⁿ-dé cundecu-dé distritú-áⁿ. Te Yá Ndiõxí ní cáháⁿ-gã núú sàní-dé, te ní xãháⁿ-gã xii-dé sã quíhíⁿ-dé distritú Galileá, núú xiãⁿ yacáⁿ cuáhãⁿ-yu. ²³ Te òré ní quexìo-yu distritú Galileá, te ní sáhãⁿ-yu ìⁿ ñuú nání Nàzarét ní xíndecú-yu. Te ducaⁿ ñí cuu chi ní quee ndáá-xi nãcuáa ní cachí cue téé ní xóo cáháⁿ tnúhu Yá Ndiõxí ndéé sanaha sã Jèsús cuu-gã téé ñuú Nazàrét.

3

Té Juáá téé dàcuandute ñaha xii ñãyiu

càháⁿ-dé tnúhu Yá Ndiõxí xití yucu**(Mr. 1:1-8; Lc. 3:1-9, 15-17; Jn. 1:19-28)**

¹ Te ní xica nduu sá dúcáⁿ nǐ cuu, te té nàni Juaá té dacuàndute ñaha xii ñáyiú ní quexìo-dé yucu distritú Jùdeá càháⁿ-dé tnúhu Yá Ndiõxí núú ñáyiú xití yucu-áⁿ. ² Te xãhaⁿ-dẽ xií-yu:

—Chí dándixi túu iní sá ñà túú quide váha-ndo ndècu-ndo, te dañà-ndo nchàa ichi cuehé ichi duha, chi sa ní cuyatni nduu ndíhu ndaha ñàha Yá Ndiõxí xii-ndo —càchí-dé xãhaⁿ-dẽ xií-yu.

³ Te diu cuendá té Juáá-áⁿ nǐ chídó tnùnì ndí Chàiaá té ní xóo cáháⁿ tnúhu Yá Ndiõxí ndéé sanaha, te duha ndùu tnúhu ní chídó tnùnì ndí cuendá-dé:

Tècú càháⁿ níhi ìⁿ té yìhi xití yucu, te càchí-dé:

“Chí dáñá nchàa ichi cuehé ichi duha ndècu-ndo, te tñi-ndo ìchi váha,

Te ducaⁿ càda-ndo cuendá cundecu túha-ndo chi véxi Yaá ío cùnùu”, duha quesaha tẽe-áⁿ.

Duha ndùu tnúhu ní chídó tnùnì ndí Chàiaá-áⁿ cuendá té Juáá.

⁴ Te té Juáá-áⁿ nǐ xóo cuihnu-dé dóo idi càméyu, te ìⁿ ñi ní cuu pañú xití-dé, te ní xóo caxi-dé tíca làngóstá ndíhi ndudí ñúñú cuéchí. ⁵ Te ñáyiú ñuú Jerusalén, ndíhi ñáyiú nchaa ñuú yíndèhu distritú Jùdeá, ndíhi ñáyiú nchaa ñuú cáa yàtni yúte Jòrdán ní sáháⁿ-yu ní xíndedóho-yu nàcuáa ní cáháⁿ té Juáá. ⁶ Te ní ngúita-yu ní náhmá-yu nchaa cuéchi-yu núú Yá Ndiõxí. Te òré ducaⁿ nǐ náhmá-yu te ní dacuàndute ñaha té Juáá xií-yu yúte Jòrdán.

⁷ Te vài cue té cùu fariséu ndíhi cue té cùu saducéu cuáháⁿ-güedé núú ndécú tẽ Juáá cuíní-güedé dacuàndute ñaha-dé xii-güedé. Te òré ní quexìo-güedé núú ndécú-dé, te ní xáhaⁿ-dẽ xii-güedé:

—¡Nchaa nchòhó cúu-ndó dàtná ìⁿ cóo dééⁿ chi ío cuihna iní-ndó! ¿Te nása ní cuu núu tnàhá nchòhó ndúcú-ndó nàcuáa cada-ndo càcu nihnu-ndo núú tnúndòho cahnu vihi ta cuyatni ñaha xii-ndo véxi-í?

⁸ Te chí cáda váha vitna cundecu-ndo cuendá ducaⁿ cùtnuní sá nǐ dáñá-ndó nchàa ichi cuehé ichi duha ndècu-ndo. ⁹ Te vá càchí-ndó sã ío cahnu cuu-ndo cuendá sá cúu-ndó ñàní tnáhá ndíi Àbrahám. Chi cuèi ndéé yúú te ndacu Yá Ndiõxí ndada-gá

ñáyiú te cuú-yu ñàní tnáhá ndíi Àbrahám. ¹⁰ Te caá chi ndècu túha-xi sá quèndé-xi nchaa yutnu sá dúcáⁿ ñà túú càváha sávidí-xi-áⁿ, chi nchaa yutnu-áⁿ tẽhndé-xi te cuánee-xi núú ñùhú càyú-xi. Te duha sãtnáhá-xi ndoho nchaa ñáyiú ñà túú quide váha-áⁿ chi nchaa ñáyiú ñà túú quide váha cùu-yu dàtná nchaa yutnu sá ñà túú càváha sávidí-xi. ¹¹ Te na càchí tnúhu ndáá-í xii-ndo sã yùhú dacuàndute-í mee-ni ñáyiú ní dáñá nchàa ichi cuehé ichi duha. Dico nchicúⁿ tucu ingá té véxi, te tẽe-áⁿ taxi-dé Espiritú Yá Ndiõxí cundecu ndíhi-ndo. Te cùu-xi datná ìⁿ ñuhú, chi ndada ndoo ndada nine-xi iní-ndó. Te tẽe-áⁿ ío-gá cùnùu-dé dàcúxí yùhú, chi yùhú cúu-í ìⁿ té duuⁿ ñà túú tàú cuita nehe ni chàu-dé dico quide-í chiúⁿ-dé. ¹² Te tẽe-áⁿ sa véxi túha-dé sá cáda dèⁿ ñaha-dé xii-o dàtná quidé ñáyiú ndàda ndoo triú, chi ñáyiú-áⁿ sa nèhe túha-ná-yu yaxíⁿ-yu òré náñani cuendá ndada ndoo-yu. Te òré ndádá ndòó-yu triú-áⁿ te dàquee dèⁿ-yu mihi-xi, te tàxúha-yu mee-nã triú-áⁿ te sãhmí-yu mihi-xi-áⁿ. Te dàtná quidé-yu mihi triú-áⁿ ducaⁿ sãtnáhá-xi cada ñaha tẽe-áⁿ xii nchaa ñáyiú ñà túú quide váha, chi daquihíⁿ ñáhá-dẽ xií-yu núú ñùhú núú càyú, te ñuhú-áⁿ ñà túú tnàhí ndàhvá —càchí-dé xãhaⁿ-dẽ xii-güedé.

Sàndute Jesús**(Mr. 1:9-11; Lc. 3:21-22)**

¹³ Te Jèsús ní quee-gá distritú Galileá cuáháⁿ-gá yúte Jòrdán núú ndécú tẽ Juáá cuendá dacuàndute ñaha-dé xii-gá. ¹⁴ Te òré ní quexìo Jesús núú ndécú tẽ Juáá, te ñà cuíní-dé dacuàndute ñaha-dé xii-gá ní cùu, te ní xáhaⁿ-dẽ xii-gá:

—Yùhú tàú-í sá dacuàndute ñaha-n xii-í, te ñà díú dà yùhú dacuàndute ñaha-í xii-n —càchí-dé xãhaⁿ-dẽ xii-gá.

¹⁵ Te Jèsús ní xáhaⁿ-gá xii-dé:

—Queheⁿ dañá, chi dacuití xini ñuhu-xi ducaⁿ cada-o nacuáa cundáá-ó núú Yá Ndiõxí —càchí-gá xãhaⁿ-gá xii-dé.

Te té Juáá-áⁿ nǐ sáháⁿ uuⁿ-dé tnúhu ní xáhaⁿ Jèsús xii-dé. ¹⁶ Te ní dacuàndute-dé Jèsús. Te òré ní nene-gá xití ndute te ní xiní-gá nchíi andíu, te ní quee Espiritú Yá Ndiõxí véxi cuuⁿ-xi ngúndecu ndíhi ñaha-xi

xii-gá, te dàtná cáá ìn lómá cáá Espiritú-án vèxi cuuⁿ-xi. ¹⁷ Te òré-án nǐ tecú ní cáháⁿ Yá Ndiòxí ndéé andi, te xǎhaⁿ-gǎ xii Jèsús:

—Yòhó cúú-n Dèhe-í tée ío cùu iní-í te ío cùdí iní ñáhà-í xii-n —càchí-gá xǎhaⁿ-gǎ xii Jèsús.

4

Sácuíhná quidé yíca-xi cada Jesús sá ñà túú tàù-gá cada-gá ní cùu

(Mr. 1:12-13; Lc. 4:1-13)

¹ Te Espiritú Yá Ndiòxí ndécá-xí Jèsús cuáhán ìn xití yucu cuendá yàcáⁿ cundecu tnaa-gá, te yàcáⁿ quexìo sácuíhná coto ndeé ñáhá-xí xii-gá te núu ndisa sá vǎ cádá-gǎ ìn sá ñà túú tàù-gá cada-gá.

² Te Jèsús ñá ní xèxi-gá údico nduu údico niú, te ducaⁿ te dàtnùní ní xicáⁿ iní-gá caxi-gá. ³ Te sátá dúcáⁿ te ní quexìo sácuíhná quidé yíca-xi cada Jesús ìn sá ñà túú tàù-gá cada-gá, te xǎhaⁿ-xi xii-gá:

—Te núu ndisa sá cúú-n Dèhe Yá Ndiòxí te cúñaha xii yúú-a na ndùu-xi paá —càchí-xi xǎhaⁿ-xi xii-gá.

⁴ Te Jèsús ní xáhaⁿ-gǎ xii-xi:

—Núu tütú Yá Ndiòxí càchí-xi: “Ñá díú mèe-ni paá candeca-xi iní ñáyiú ñuyíú, chi tnàhá nchaa tnúhu càháⁿ Yá Ndiòxí candeca-xi iní-yu”, duha càchí-xi núu tütú-gá —càchí-gá xǎhaⁿ-gǎ xii-xi.

⁵ Te dàtnùní sácuíhná-ǎⁿ ndécá ñàha-xi xii-gá cuáhán ñúú Jerusálén, te yàcáⁿ ní xáhaⁿ-xi xii-gá cuásaá-gá díquí véñúhu càhnu sá ío cùnuu núu ñáyiú isràél, ⁶ te dàtnùní ní xáhaⁿ tùcu-xi xii-gá:

—Te núu ndisa cùu-n Déhe Yá Ndiòxí te cuandèe ndava núu ñúhú cuendá quee ndáá-xi nàcuáa càháⁿ-xi núu tütú-gá núu càchí-xi: “Yá Ndiòxí tendaha-gǎ cue espíritú xínú cuèchi núu-gǎ quixi-xi cuendá coto ñaha-xi xii-n, te núu ndáhá-xí càundodo-n cuendá sá vǎ dánícuèhé yúú sǎhá-n”, duha càchí-xi núu tütú-gá —càchí sácuíhná-ǎⁿ xǎhaⁿ-xi xii Jèsús.

⁷ Te Jèsús ní xáhaⁿ-gǎ xii-xi:

—Te càchí tucu-xi núu tütú Yá Ndiòxí: “Vá cání iní-n còto ndeé-n Dütú Ndiòxí Yáa cúú Ndiòxí-n cuendá-ni sá cuíní-n sǎ dácäcu nihnu ñaha-gǎ xii-n ìn sá sání iní-n càda-n”, duha càchí-xi núu tütú-gá —càchí-gá xǎhaⁿ-gǎ xii-xi.

⁸ Te sácuíhná ndécá tùcu-xi Jesús cuáhán ìn núu tìndúú dùcúⁿ, te uuⁿni ní dánèhé núu ñáhá-xí xii-gá nchaandi tühú nacióⁿ cáá ñùyíú, ndihí nchaa sá vǎha ío ìn ìn nacióⁿ-án. ⁹ Te ní xáhaⁿ-xi xii-gá:

—Te núu yòhó ngüíñí xití-n nùu-í chiñuhu ñaha-n xii-í ñá, te taxi cuendá-í nchaa sá ní dánèhé ñáhà-í-a cuu cuendá-n —càchí-xi xǎhaⁿ-xi xii-gá.

¹⁰ Te Jèsús ní xáhaⁿ-gǎ xii-xi:

—Xocuíñí yòhó sácuíhná núu ndécú-í-a, chi vá cúú càda-í nàcuáa càchí-n, chi núu tütú Yá Ndiòxí càchí-xi: “Chiñuhu-ndo Dütú Ndiòxí Yáa cúú Ndiòxí-ndó, te diu-ni-gá cada-ndo nchàa nacuáa càháⁿ-gá”, duha càchí-xi núu tütú-gá —càchí-gá xǎhaⁿ-gǎ xii-xi.

¹¹ Te dàtnùní sácuíhná nǐ dáñá-xí Jèsús ní xica-xi cuáhán-xi. Te sátá dúcáⁿ te ní quexìo cue espíritú xínú cuèchi núu Yá Ndiòxí ní xinu cuechi-xi núu Jèsús.

Distritú Galileá ní chisaha Jèsús chiùⁿ ní táhú Tǎtá-gǎ Dütú Ndiòxí cada-gá

(Mr. 1:14-15; Lc. 4:14-15)

¹² Te òré ní níhí Jèsús tnúhu sá nǐ ngava té Juáa tée dàcuandute ñaha xii ñáyiú vecaá, te ní xica-gá cuáhán-gá distritú Galileá. ¹³ Te ní ñà túú ní xíndecu-gá ñúú Nazàrét, chi ní yáha-gá cuáhán-gá ndeé ñúú Capèrnaúm yàcáⁿ ní xíndecu-gá, te ñúú-án cáá yatni yuhu lagúná, te yatni xíán cáá ñuhu nani Zabulón, ndihí ñuhu nani Neftalí. ¹⁴ Te ducaⁿ nǐ cuu chi ní quee ndáá-xi nàcuáa ní chídó tnùní ndí Chàíá tée ní xóo cáháⁿ tnúhu Yá Ndiòxí ndeé sanaha núu tütú-gá núu càchí-xi:

¹⁵ Ñuhu nani Zabulón, ndihí ñuhu nani Neftalí, ñuhu-án yíndèhu-xi distritú Galileá,

te xíán xíndecu cue ñáyiú ñà túú cùu ñáyiú isràél,

te càa-xi yatni yuhu lagúná te ndàa ingá xio yúte Jòrdán cúú-xí.

¹⁶ Te cue ñáyiú-án ndécü-yu ìn núu néé chi ndécü-yu ichi cuèhé ichi duha,

te sáa nduu te cada iní-ndó sǎ ñáyiú-án queé-yu núu ditó chi vá cùndecu-gá-yu ichi cuèhé ichi duha.

Te diu-ni ñáyiú-án cúú-yu ñáyiú ta xíta nihnu duuⁿ cuáhán,

dico sáa nduu te vá cuíta nihnu-gá-yu.

Duha ní chídó tnùnì ndíi núú tütú-gá.

¹⁷ Te dàvá-án nǐ ngüíta Jèsús ní dánhèhé-gá ñáyíu, te ní xáhaⁿ-gá xií-yu:

—Chí dándixi túu iní sá ñà túú quide váha-ndo ndècu-ndo te dañà-ndo nchàa ichi cuehé ichi duha, chi sa ní cuyatni nduu ndíhu ndaha ñàha Yá Ndiöxí xii-ndo — càchí-gá xáhaⁿ-gá xií-yu.

Jèsús càháⁿ-gá cúmí tnàhá cue téé tnè chácá

(Mr. 1:16-20; Lc. 5:1-11)

¹⁸ Te Jèsús ñúhú-gá ichi cuáhán-gá tá yáha-gá yuhu làgúná Galileá, te ní xiní-gá úú tnàhá cue téé xídáquèe-güedé ñunu-güedé xití ndute tnè-güedé chácá, chi quiti tnàhí-án cúú chiúⁿ-güedé tnè-güedé-di. Te ñⁿ-dé nání-dě Xímú, àdi Pelú chi úú diu-dé, te ñaní-dé cúú ìngá téé ndihí-dé te téé-án nání-dě Ndrìxí. ¹⁹ Te Jèsús ní xáhaⁿ-gá xii-güedé:

—Chí dáñá chiúⁿ quide-ndo-án te quixi-ndo chìtnahá ñáhá-ndó xii-í, te taxi-í ìngá núú chiúⁿ cada-ndo chi quíhíⁿ-ndó dàcaháⁿ-ndó ñáyíu cuendá tuha ñàhá-yu xii-í — càchí-gá xáhaⁿ-gá xii-güedé.

²⁰ Te òré-ni-án nǐ dáñá cuè téé-án ñunu-güedé, te ní tuha-güedé Jèsús.

²¹ Te ní xica tucu Jèsús cuáhán-gá luha-gá, te ní xiní tucu-gá úú-gá tnàhá cue téé tnè chácá. Te ñⁿ téé-án nání-dě Jàcobó, te ñaní-dé cúú ìngá téé ndihí-dé te téé-án nání-dě Juàá, te ndi nduú-güedé cúú-güedé déhe té Zebèdeú. Te xixínucóo-güedé ndihí tātá-güedé xití bàrcú xinatícu-güedé ñunu-güedé, te Jèsús ní cana ñàha-gá xii-güedé.

²² Te òré-ni-án nǐ dándöo-güedé bàrcú-güedé, ndihí tātá-güedé, te ní tuha ñàha-güedé xii-gá.

Jèsús dánhèhé-gá cuéhé víhí ñáyíu

(Lc. 6:17-19)

²³ Te Jèsús tá xica ndodo-gá ñihí distritú Galileá cuáhán tá dánhèhé-gá ñáyíu tnúhu váha tnúhu sá sánú ichi ñàha xií-yu nàcuáa ndíhu ndaha ñàha Yá Ndiöxí xií-yu. Te ndi tnahá ñⁿ ñⁿ ñuú sàá-gá te ducaⁿ cuànguìhu-gá xití veñúhu dánhèhé-gá ñáyíu tnúhu-án. Te ndi dííⁿ ndi dííⁿ núú cuéhé tnàhá ñⁿ ñⁿ ñáyíu dico nchaa-ní-yu ta quide

tátna-gá cuáhán. ²⁴ Te ndéé nchaa ñáyíu yíndehu distritú Síríá ní níhí-yu tnúhu nchaa nàcuáa quide Jesús. Te ní queé-yu ñuú-yu te ndècá-yu nchaa ñáyíu tnàhá ndi dííⁿ núú cuéhé cuáhán núú ndécú Jèsús. Te cuèi ñáyíu xiyíhí, ndihí ñáyíu ñá túú-gá càndá nihnu, ndihí ñáyíu yíhí ñàha espíritú cúndihí yucu ñávàha ndècá-yu cuáhán núú-gá, te ncháa-yu ní quide tátna ñàha-gá xií-yu. ²⁵ Te ío vài ñáyíu ní chinchícúⁿ ñáhá xii Jesús, chi ní chinchícúⁿ ñáhá ñáyíu distritú Galileá, ndihí ñáyíu nchaa ñuú xíndáa Dècápolís, ndihí ñáyíu ñuú Jerusalén, ndihí cue ñáyíu nchaa ñuú yíndèhu distritú Júdeá, ndihí ñáyíu xíndecu yatni yúte Jòrdán ndàa xio quene nchícanhí.

5

Jèsús núcöo-gá ñⁿ núú tìndúú dánhèhé-gá ñáyíu

¹ Te sátá nǐ xiní Jèsús sá cuéhé víhí ñáyíu nchícúⁿ ñáhá xii-gá, te ní xica-gá cuásaá-gá ñⁿ núú tìndúú te xíaⁿ nǐ ngóo-gá, te cue téé xica cuu ndihí-gá ní nadúcúⁿ ndéé ñáhá-güedé xii-gá. ² Te ní ngüíta-gá dánhèhé ñáhá-gá xii-güedé ndihí cue ñáyíu-án, te xáhaⁿ-gá:

Cuendá ñáyíu ío váha táhú-xi

(Lc. 6:20-23)

³ —Váha táhú nchaa ñáyíu cùtnuní iní-xi sá ío-gá cúmāñí-yu cudíu-yu núú Yá Ndiöxí, chi ñáyíu-án nduu táhú-yu ndíhu ndaha ñàha-gá xií-yu.

⁴ Váha táhú nchaa ñáyíu ndàhyú sá ndíhú iní-yu, chi Yá Ndiöxí cuáñàha-gá tnúhu ndee ìní cundecu ndihí-yu.

⁵ Váha táhú nchaa ñáyíu ndàhú iní-xi, chi ñáyíu-án nduu táhú-yu cundecú-yu ñⁿ xichi núú cuáñàha Yá Ndiöxí xií-yu.

⁶ Váha táhú nchaa ñáyíu ío cuìní cada nchaa nàcuáa càháⁿ Yá Ndiöxí, chi ñáyíu-án ío nduu vétú iní-yu.

⁷ Váha táhú nchaa ñáyíu cùndahú iní tnàha ñáyíu-xi, chi ñáyíu-án diu-ni ducaⁿ càda ñàha Yá Ndiöxí xií-yu cundàhú iní ñáhá-gá.

8 'Váha táhú nchaa ñáyiú ní nduu ndoo ní nduu nine iní-xi, chí cue ñáyiú-áⁿ nduu táhú-yu cundecú-yu ndíhi Yá Ndiöxí.

9 'Váha táhú nchaa ñáyiú càháⁿ dóho tnàha ñáyiú-xi nàcuáa cundecu ndíhi váha tnàhá-yu, chí cùtnuní sá ñáyiú-áⁿ cuú-yu déhe Yá Ndiöxí.

10 'Váha táhú nchaa ñáyiú ío ndòho ndecu ñuyíú-a sá cuendá sá quidè-yu nàcuáa càháⁿ Yá Ndiöxí, chí ñáyiú-áⁿ nduu táhú-yu ndíhu ndaha ñàha-gá xii-yu.

11 'Te cùu-ndo ñáyiú ío váha táhú-xi te núu na cùcuèhé ñáhá ñáyiú, àdi cada úhú ñáhá-yu xii-ndo, àdi dacao díquí ñáhá-yu nándi cuéchi neñúú xii-ndo sá cuendá-í. 12 Te òré ducaⁿ na càda ñáhá-yu xii-ndo te cudíí víhí-ní iní-ndó cundecu-ndo, chí ío váha càa sá ndécú àndiú nduu táhú-ndó cundecu ndíhi-ndo nduu na saá-ndó yàcáⁿ cundecu-ndo, chí ñiú-ni ducaⁿ ní xóo cada ñaha cuè ñaní tnáhá-yu xii cue téé ní xóo càháⁿ tnúhu Yá Ndiöxí ní xíndecu ndéé sanaha.

*Cuendá ñíí ndíhi cuendá ñuhú
(Mr. 9:50; Lc. 14:34-35)*

13 'Te nchòhó cada iní-ndó sá cúú-ndó dàtná ñíí cuendá ñuyíú-a. Te ñíí chí nàndíhi-xi dico núu na ndúu víxiⁿ-xi, te ñá túú-gá nándíhi-xi chí dǎngoyo-ná-ó, te yáha ñáyiú xènihnú-yu. Te ducaⁿ sǎtnahá-xi cùu nchohó chí cùu-ndo datná ñíí váha te núu na càda váha-ndo, te núu vá càdá váha-ndo te quee tíhú-ndó.

14 'Te nchòhó cada iní-ndó sá cúú-ndó dàtná ñíí sá dáyèhé ndécú ñuyíú-a, chí sànu ichi-ndo ñáyiú ichi váha. Te nchòhó xíní-ndó sá nùu ñíí ñúú cáá ñíí núú tìndúú te vá cúú càchí-ó sá nguiváha-xi. 15 Te ñá túú xíní-ó ñíí ñáyiú teñuhú-yu ñíí lìntérná te chiváha-yu xítí ñíí càjá, chí tàxi ndecú-yu núú ñíí cuendá cutnùní núú nchàa ñáyiú ndècu vehe. 16 Te ducaⁿ càda nchohó cada váha-ndo dàtná quidé ñíí ñuhú dayèhe-xi núú ñáyiú, te ducaⁿ quíní ñáyiú nàcuáa quide-ndo ndecu-ndo, te tnàhá-yu cachí-yu sá ío càhnu cuu Dútú Ndiöxí Yáá cúú Tàtá-ndó ndècu àndiú chí quíní-yu sá quidé váha-ndo ndècu-ndo.

Cuendá tnúhu ní chídó tnùní ndíi Moisés

17 'Te vá cání iní-ndó sá yùhú véxi-í xocàni-í tnúhu ní chídó tnùní ndíi Moisés, te ní vá cání iní-ndó sá vèxi-í xocàni-í tnúhu ní chídó tnùní cue téé ní xóo càháⁿ tnúhu Yá Ndiöxí ndéé sanaha, chí yùhú véxi-í sá càdà-í nàcuáa càháⁿ nchaa tnúhu-áⁿ. 18 Te na càchí tnúhu ndáá-í xii-ndo sá tnúhu ní chídó tnùní ndíi Moisés ío ndáá càháⁿ-xi, chí dacuití cùu nchaa nacuáa càháⁿ-xi. Te yáchí-gá naa àndiú ndíhi ñuyíú dàcúxí sá quèe cáva ñíí tnúhu-áⁿ. 19 Núu xiáⁿ nchaa ñáyiú na càchí sá dává tnúhu ní chídó tnùní ndíi Moisés ñá túú xini ñuhu-xi chí ñá túú cùnùu-xi, te ñáyiú-áⁿ ñiú-ni ducaⁿ dǎnehé-yu nchaa dava-gá tnàha ñáyiú-yu, te sá dúcáⁿ quidé-yu te vá cùnùu víhí-yu núú ndécú Yá Ndiöxí táxi tnùní-gá, chí cuú-yu dàtná ñíí ñáyiú nchìcúⁿ cuíí-ñá. Dico nchaa ñáyiú nchìcúⁿ nihnu quide nchaa nacuáa càháⁿ nchaa tnúhu-áⁿ, te ñiú-ni ducaⁿ dǎnehé-yu nchaa dava-gá tnàha ñáyiú-yu, te ñáyiú-áⁿ ío cùnùu-yu núú ndécú Yá Ndiöxí táxi tnùní-gá. 20 Te na càchí tnúhu-í xii-ndo sá ío xini ñuhu-xi cada-ndo nchaa nacuáa càháⁿ Yá Ndiöxí, te vá càdá-ndó dàtná xiquide cue téé dǎnehé ñáhá xii ñáyiú nchaa tnúhu ní chídó tnùní ndíi Moisés, ndíhi dàtná xiquide cue téé cùu fariséú, chí núu na càda-ndo datná xiquide cue téé-áⁿ ñá, te vá ndúú táhú-ndó ndíhu ndaha ñàha Yá Ndiöxí xii-ndo.

*Jèsús càháⁿ-gá cuendá ñáyiú cùdèéⁿ
(Lc. 12:57-59)*

21 'Te nchòhó sa xíní-ndó sá ncháá ñáyiú ní cuu ñaní tnàhá-ndó ní xíndecu ndéé sanaha ní níhi-yu tnúhu sá vá cúú càhní-yu tnàha ñáyiú-yu, chí núu ducaⁿ na càdá-yu te nacháhu-yu cuéchi-yu. 22 Dico vitna na càchí tnúhu-í xii-ndo sá nùu ndèdani càa-ndo na cudééⁿ-ndó nùú tnàha ñáyiú-ndo, te nacháhu-ndo sá dúcáⁿ quide-ndo, àdi núu na cùcuèhé-ndó-yu te núú chítú nùú tàcá cundáá cuéchi-ndo te núu ducaⁿ na càda-ndo, àdi núu na cùu-ndo tnàha ñáyiú-ndo ñíí tnúhu véé víhi, te cucuéchi víhi xii-ndo chí quíhíⁿ-ndó nùú úhú núú ndàhú.

23 'Te xiáⁿ nùu nchòhó òré ndécú ndíhi-ndo ñíí sá cuíní-ndó cuáha-ndo Yá Ndiöxí nduu táhú-gá, te òré cuáháⁿ-ndó cuáñaha-ndo xii-gá, te òré ní quexìo-ndo núú dúcáⁿ cuáñaha-ndo xii-gá sá ndúú

tǎhú-gǎ, te ní ndacu iní-ndó sǎ ndécú ñáyiú ñá túú cùu váha iní ñáhá xì-ndo cuendá ìñ sá ñí cumání núú tnáhá-ndó. ²⁴ Te dǎndóo-ndo sǎ dúcáⁿ nèhe-ndo cuáháⁿ nduu táhú Yǎ Ndiöxí, te díhna-gá quíhíⁿ-ndó nàcaháⁿ cáhnú ìní tnáhá-ndó ndìhí ñáyiú ñá túú cùu váha iní ñáhá xì-ndo-áⁿ, te dǎtnùní ducaⁿ te quíhíⁿ-ndó cuáha-ndo Yǎ Ndiöxí sá ndúú tǎhú-gǎ.

²⁵ 'Te núu íó ìñ-ndo ñí sáháⁿ ñáyiú núú tée cùchiuⁿ ní sacáⁿ cuéchi-yu cuendá-ndó cuendá ìñ sá ñí quide-ndo, te òré ní naníhí tnáhá-ndó ndìhí-yu cuáháⁿ-ndó núú tée cùchiuⁿ-áⁿ, te nacáháⁿ cáhnú ìní tnáhá-ndó ndìhí-yu cuendá sá vǎ cuáha cuendá ñáhá-gǎ-yu xii-ndo núú tée cùchiuⁿ, chí núu ducaⁿ na càdá-yu te tée cùchiuⁿ-áⁿ cuáha cuendá ñáhá-dě xii-ndo núú cuè tée cùu poleciá, te cue tée-áⁿ chíhí ñaha-güedé vecaá xii-ndo. ²⁶ Te na càchí tnúhu ndáá-í xii-ndo sǎ vǎ cǎcu-ndo te núu na ngáva-ndo vecaá ndéé nacháhu-ndo ncháa sá tàú-ndó.

Cuendá cue ñáyiú ñá túú quide váha

²⁷ 'Te nchòhó sa xìní-ndó nàcuáa ndùu tnúhu ní cǎháⁿ cue tée ní xíndecu ndéé sanaha, te duha ní cachí-güedé: "Nchaa cue tée vá cúú cǎháⁿ ndìhí-güedé ñadìhí te núu ñá díú ñadìhí-güedé cúú-yu, te diu-ni ducaⁿ tùcu nchaa cue ñáyiú díhí vá cúú cǎháⁿ ndìhí-yu tée te núu ñá díú yí-yu cùu-güedé", duha ní cachí-güedé. ²⁸ Dico yúhú càchí tnúhu-í xii-ndo sǎ ndèda-ni càa cue tée na cùndehe ìñ ñadìhí te núu na càni iní-güedé cundecu díí iní-güedé ndìhí-yu te cada iní-ndó sǎ dǎtná sá sà ní cǎháⁿ ndìhí ñaha-güedé xii-yu sá dúcáⁿ ñí sani iní-güedé.

²⁹ 'Te núu ìñ xio tñnu-ndo quide-xi quide-ndo nándi sá cuèhé sá dúhá te tava-ndo, chí váha-gá sá ná cuíta te ñá díú ñíhí ní ndúú yìquì cuñú-ndó quíhíⁿ-xi núú ùhú núú ndàhú. ³⁰ Te núu ìñ xio ndaha-ndo quide-xi quide-ndo nándi sá cuèhé sá dúhá te quehndé-ndó, chí váha-gá sá ná cuíta ìñ xio ndaha-ndo te ñá díú sǎ ñíhí ní ndúú yìquì cuñú-ndó quíhíⁿ-xi núú ùhú núú ndàhú.

Jèsús cǎháⁿ-gá cuendá cue ñáyiú dàña tnaha
(Mt. 19:9; Mr. 10:11-12; Lc. 16:18)

³¹ 'Te nchòhó sa nàha tucu-ndo nacuáa ní cǎháⁿ tucu cue tée ní xíndecu ndéé sanaha, te duha ní cachí-güedé: "Te núu ìñ tée na dàña tnaha-dé ndìhí ñadìhí-dé, te xìni ñuhu-xi cadúha-dé ìñ tutú cuáñaha-dě núú cǎháⁿ-xi sá ñí dáña ñaha-dé", duha ní cachí-güedé. ³² Dico yúhú càchí tnúhu-í xii-ndo sǎ cúú dàña ìñ tée ñadìhí-dé, te núu cùtnuní ndáá iní-dé sá cǎháⁿ ndìhí-aⁿ ingá tée. Dico núu ñá túú dùcaⁿ quide-aⁿ te ñá túú ndùu váha-xi dàña ñaha-dé. Te núu ñá túú dùcaⁿ quide ñadìhí-dé, te cada iní-ó sǎ mée-dě ní sanu ichi ñaha-dě xii-aⁿ cǎháⁿ ndìhí-aⁿ ingá tée te núu na dàña ñaha-dé. Te tée na nàqueheⁿ ñaha xii ñaha ní dáña ñaha yí-xi-áⁿ, te diu-ni ñá túú ní quide váha-dé sá dúcáⁿ ñí nàqueheⁿ-dé ñaha-áⁿ.

Ñáyiú càcunehe ñaha xii Yǎ Ndiöxí cuendá cutnùní iní tnàha ñáyiú-yu sá ndáá cadá-yu ìñ sá sání iní-yu cadá-yu

³³ 'Te sa nàha tucu-ndo nacuáa ní cǎháⁿ tucu cue tée ní xíndecu ndéé sanaha, chí cue tée-áⁿ ñí cachí-güedé: "Te núu càcunehe-ndo Yǎ Ndiöxí núú tnàha ñáyiú-ndo nàcuáa cutnùní iní-yu sá ndáá cada-ndo ìñ sá sání iní-ndó càda-ndo, te cada-ndo", duha ní cǎháⁿ dóho tnàha-güedé. ³⁴ Dico yúhú càchí tnúhu-í xii-ndo sǎ ñá túú nǎ cacunehe-ndo sǎ ndáá cada-ndo ìñ sá sání iní-ndó càda-ndo. Te ñí vǎ cǎcú nèhe-ndo andiú chí yàcáⁿ cúú-xí núú núcõo Yǎ Ndiöxí táxí tnùnigá. ³⁵ Te ñí vǎ cǎcú nèhe-ndo ñuyíú-a, chí tnàhá ñuyíú-a ndècu-gá, te ñí vǎ cǎcú nèhe-ndo ñuú Jerusàlén chí ñuú-áⁿ cúú cuendá-gá, te diu-gá cúú-gǎ Yaá ío cùnuu. ³⁶ Te ñí vǎ cǎcú nèhe-ndo díquí-ndó chí nàha-ndo sá ñí ìñ idi díquí-ndó ñá ndácú-ndó ndàda cuixíⁿ-ndó àdi ndada tñuu-ndo. ³⁷ Te váha-gá sá núu ìñ sá sání iní-ndó càda-ndo, te cachí-ni-ndo: "Cuu cada-ndí, àdi vá cúú càda-ndí", cachí-ni-ndo. Chí nchaa dava-gá sá chídó-ndó cǎháⁿ-ndó òré ducaⁿ sàni iní-ndó càda-ndo ìñ sá càdá-ndó cùu-xi sá dǎcàhu iní ñáhá yùcu ñávàha.

Cuendá ñáyiú nàchinaa sá quidé ñaha tnaha ñáyiú-xi

(Lc. 6:29-30)

³⁸ 'Te sa nàha tucu-ndo nacuáa ní cǎháⁿ tucu cue tée ní xíndecu ndéé sanaha, chí

cue téé-áⁿ ñí cachí-güedé: “Ñáiyu na càda ñaha tnaha ñáiyu-xíⁿ ñí sá ñà túú vâha, te nanchòcáva-yu nachinaá-yu sá ñí quide ñaha tnaha ñáiyú-yu”, duha ní cachí-güedé. ³⁹ Dico yúhú càchí tnúhu-í xii-ndo sá ñà túú nã cada-ndo nchàa cue ñáiyu cuihna ìní-xí te núu quide ñahá-yu ñíⁿ sá ñà túú vâha xii-ndo. Te núu ní canihá-yu ñíⁿ xito te cuení tucú-yu canihá-yu ñngá xito te dañá-ndo na canihá-yu. ⁴⁰ Àdi ní sacáⁿ cuéchi-yu núu cuè téé cùchiuⁿ cuendá-ndó, te cuení-yu quendeé-yu dúhnú-ndó te dañá-ndo na canehé-yu quíhíⁿ, te tnàhá-ni dóó ndíxí ndòdo-ndo dañá-ndo na canehé-yu quíhíⁿ. ⁴¹ Te núu quide yicá-yu caca-ndo dàtná úú kilómetrú cuido-ndo ndàchiúⁿ-yu ña, te chido-ndo úú-gá tucu kilómetrú cuido-ndo ndàchiúⁿ-yu. ⁴² Te núu íó ñíⁿ sá xicáⁿ-yu núú-ndó te cuañaha-ndo, àdi íó ñíⁿ sá sánúú-yu núú-ndó te cuañaha nùu-ndo.

Cuu iní-ó nchàa ñáiyu cùu úhú iní ñáhá xii-ó

(Lc. 6:27-28, 32-36)

⁴³ Te sa naha tucu-ndo nacuáa ní cachí tucu cue téé ní xindecu ndéé sanaha, chi cue téé-áⁿ ñí cachí-güedé: “Cuu iní-ndó cuè ñáiyu ndècu ndíhí váha-ndo, te cuu úhú iní-ndó cuè ñáiyu cùu úhú iní ñáhá xii-ndo”, duha ní cachí-güedé. ⁴⁴ Dico yúhú càchí tnúhu-í xii-ndo sá cúú ìní-ndó cuè ñáiyu cùu úhú iní ñáhá xii-ndo, te cáháⁿ váha-ndo cuendá cue ñáiyu càháⁿ úhú ñáhá xii-ndo, te cada-ndo sá vâha sá cúú-xí cuè ñáiyu cùu úhú iní ñáhá xii-ndo, te cáháⁿ ndíhí-ndo Yã Ndiõxí cuendá cue ñáiyu xícuèhé ñáhá xii-ndo, ndíhí cuendá cue ñáiyu quide úhú ñáhá xii-ndo. ⁴⁵ Te núu na càda-ndo nchaa nacuáa càháⁿ-í-a, te ducaⁿ te cutnùní sá cúú-ndó dèhe Tãtã-ndó Dútú Ndiõxí Yaa ndécú àndíu. Te ñíu-gá cúú-gã Yaa quidé quène nchícanhii, te ñíu-ni-gá cúú-gã Yaa dácùⁿ dáú ñuyíú-a, te ducaⁿ quide-gá cuendá cuu-xí sá vâha sá cúú-xí cuè ñáiyu quide váha, ndíhí sá cúú-xí cuè ñáiyu ñá túú quide váha. ⁴⁶ Te núu nchòhó ná cúú ìní-ndó mèe-ni ñáiyu na cùu iní ñáhá xii-ndo, te vá càchí-ndó sã Yã Ndiõxí taxi-gá sá ndúú tãhú-ndó sã dúcáⁿ quide-ndo, chi cuèi cue téé cuihna ìní-xí quide cobrá ñáhá xii cue ñáiyu cuendá

impuèstú ducaⁿ xíquide-güedé. ⁴⁷ Te núu mee-ni ñáiyu ndècu ndíhí váha-ndo ño váha cáháⁿ ndíhí-ndó-yu, te vá càchí-ndó sã ño váha quide-ndo sá dúcáⁿ quide-ndo, chi cuèi ndéé nchaa ñáiyu ñá túú xini dana cuendá Yã Ndiõxí ducaⁿ xíquide-yu. ⁴⁸ Te duha ndúu tnúhu càháⁿ-í cuendá sá nchòhó cada ndáá-ndó cùndecu-ndo datná quidé ndáá méé Tãtã-ndó Dútú Ndiõxí Yaa ndécú àndíu —duha ní dánèhé ñáhá Jèsús xii cue téé xica cuu ndíhí-gá ndíhí nchaa ñáiyu.

6

Jèsús dánèhé-gá ñáiyu nacuáa cada-yu sá vâha

¹ Te Jèsús ndécú-ni-gã dánèhé-gá cue téé xica cuu ndíhí-gá ndíhí nchaa ñáiyu, te xãháⁿ-gã:

—Te òré quidé-ndó sã vâha te vá cáda-ndó núú ñáiyu cuendá-ni sá cuení-ndó cáháⁿ váha-yu cuendá-ndó, chi núu núú ñáiyu ducaⁿ na càda-ndo te Dútú Ndiõxí Yaa cúú Tãtã-ndó vã táxi-gã sá ndúú tãhú-ndó. ² Te xíãⁿ núu nchòhó òré chindèe-ndo ñáiyu ndàhú, te vá cùñaha-ndo xii cue ñáiyu sá chindèe-ndo cue ñáiyu ndàhú-áⁿ dàtná xíquide cue ñáiyu dándahú méé-xí sã quidé ndáá te ñá ndáá sá quidé ndáá-yu, chi ñáiyu-áⁿ ducaⁿ xíquide-yu òré sãháⁿ-yu veñúhu, chi dâtecú tnúhu-yu nchaa ñáiyu òré ducaⁿ chindeé-yu ñáiyu ndàhú. Te ñíu-ni ducaⁿ quidé-yu xãháⁿ-yu xii cue ñáiyu sá chindèe-yu cue ñáiyu ndàhú-áⁿ nchaa núú xicá cùu-yu, te ducaⁿ xíquide-yu cuendá cuení-yu cáháⁿ váha ñáiyu cuendá-yu. Te yúhú na càchí tnúhu ndáá-í xii-ndo sã ñà túú nã nduu tãhú ñáiyu-áⁿ núú Yã Ndiõxí sá dúcáⁿ quidé-yu chi mee-ni núú tnaha ñáiyú-yu cùú-yu. ³ Te nchòhó òré chindèe-ndo ñáiyu ndàhú, te cuèi ñáiyu ío-gá váha ndècu ndíhí-ndo dico vá cùñaha-ndo sã dúcáⁿ chindee-ndo cue ñáiyu ndàhú-áⁿ, te ni cuè dava-gá ñáiyu vá cùñaha-ndo. ⁴ Chi váha-gá sá ñí méé-ni-ndó ná cùhuⁿ sá dúcáⁿ chindee-ndo cue ñáiyu ndàhú-áⁿ. Te núu ducaⁿ na càda-ndo ña, te Dútú Ndiõxí Yaa cúú Tãtã-ndó tàxi-gá sá ndúú tãhú-ndó chi ñíu-ni mee-gã ndéhé-gã nacuáa quide-ndo ndecu-ndo.

Jesús dánèhé-gá ñáiyu nàcuáa cáháⁿ ndihí-yu Yá Ndiöxí (Lc. 11:2-4)

⁵ 'Te nchòhó òré càháⁿ ndihí-ndo Yá Ndiöxí, te vá cádá-ndó dàtná xíquide cue ñáiyu dándahú méé-xí càchí sá quidé ndáá te ñá ndáá sá quidé ndáá-yu, chi ñáiyu-áⁿ tnàhá iní-yu cunutnii-yu càháⁿ ndihí-yu Yá Ndiöxí òré yíhí-yu veñúhu. Te diu-ni ducaⁿ xíquide-yu nchaa núu xíca cùu-yu, te ducaⁿ quidé-yu cuèndá sá cuìní-yu quini ñáiyu nàcuáa xíquide-yu. Te na càchí tnúhu ndáá-í xii-ndo sá ñà túú nã nduu táhú ñáiyu-áⁿ núu Yá Ndiöxí sá dúcáⁿ quidé-yu chi mee-ni núu tnàha ñáiyú-yu cùdú-yu. ⁶ Te nchòhó òré cuìní-ndó cáháⁿ ndihí-ndo Yá Ndiöxí, te ndíhu ndedí nihnu-ndo xití vehe-ndo, chi diu-gá cúu Tátá-ndó te ndècu ndihí ñaha-gá xii-ndo, te diu-ni mee-gã ndéhé ñaha-gá xii-ndo nàcuáa quide-ndo, te núu ducaⁿ na càda-ndo te taxi-gá sá ndúú tãhú-ndó.

⁷ 'Te òré càháⁿ ndihí-ndo Yá Ndiöxí te vá sùúni cuèndá-ni dacáa-ndó tnúhu cáháⁿ ndihí-ndo-gã dàtná xíquide cue ñáiyu ñá túú xini tnúhu-gá, chi ñáiyu-áⁿ sání iní-yu sá tédòho ñaha vihi-gá Yá Ndiöxí xií-yu sá dúcáⁿ sùúni dàcaá-yu tnúhu càháⁿ ndihí ñàhá-yu xii-gá dico ñáhá. ⁸ Dico nchòhó, vá cádá-ndó dàtná xíquide cue ñáiyu-áⁿ, chi mee Tátá-ndó Dútú Ndiöxí sa ñaha-gá ná cúu nchaa sá xini ñuhu-ndo cuéi òré vátá càcáⁿ-gá-ndó núu-gã. ⁹ Te duha cáháⁿ-ndó òré càháⁿ ndihí-ndo Yá Ndiöxí:

Yòhó Tátá-ndí Dútú Ndiöxí Yaá ndécú àndiu, nchaa ñáiyu na càháⁿ-yu sá cúu-n Yáá ío yíñúhu.

¹⁰ Te xícaⁿ táhú-ndí núu-n sã ná sàá nduu ndíhu ndàhá-n-yu.

Te cada-n dàtná càchí iní-n ñuyíú-a dàtná quidé-n àndiu.

¹¹ Te xícaⁿ táhú-ndí núu-n sã táxi-n sã cóhó-ndí sá cáxi-ndí ñá nduu ñá nduu.

¹² Te cada càhnu iní-n nchaa yíca cuèchi-ndí, chi tnàhá nchúhú quidé càhnu iní-ndí nchaa sá quidé ñaha tnaha ñáiyu-ndí.

¹³ Te vá dáñá-n dàcaháⁿ ñáhá yùcu ñávãha xii-ndí cada-ndí sá ñà túú vãha, chi coto ñaha-n xii-ndí cuèndá sá vã dúcáⁿ càda ñaha-xi.

Te diu-n cùu-n Yaá ío cùnuu nchaa nduu nchaa quíú, te ío càhnu cuu-n, te diu-ni-n quindaha ñaha-n xii-ndí ni caa ni quíhíⁿ. Te ducaⁿ na cùnduu.

Duha dènehé ñàhá-í xii-ndo cáháⁿ ndihí-ndo Yá Ndiöxí.

¹⁴ 'Te núu nchòhó quidé càhnu iní-ndó nchaa sá quidé ñaha tnaha ñáiyu-ndo, te ducaⁿ te Tátá-ndó Dútú Ndiöxí Yaá ndécú àndiu cada càhnu iní-gá nchaa sá ñà túú vãha quide-ndo tucu. ¹⁵ Dico núu nchòhó vá cádá càhnu iní-ndó nchaa sá quidé ñaha tnaha ñáiyu-ndo ña, te ni Dútú Ndiöxí Yaá cúu Tátá-ndó vã cádá càhnu iní-gá nchaa sá quidé-ndó tucu.

Cuèndá ñáiyu ñá túú tnàhí ná xéxi ãma càháⁿ ndihí-yu Yá Ndiöxí

¹⁶ 'Te nchòhó, nduu ñà túú tnàhí ná xéxi-ndó càháⁿ ndihí-ndo Yá Ndiöxí, te vá cùndiyí-ndó dàtná xíquide nchaa ñáiyu dándahú méé-xí càchí sá quidé ndáá te ñá ndáá sá quidé ndáá-yu, chi ñáiyu-áⁿ ducaⁿ xíquide-yu cuèndá sá cuìní-yu cutnùni iní ñáiyu sá ñà túú tnàhí ná xéxi-yu càháⁿ ndihí-yu Yá Ndiöxí. Te yúhú càchí tnúhu-í xii-ndo sã sã dúcáⁿ quidé-yu te ñá túú nã chindee ñaha-xi xií-yu cuèndá níhí-yu ñá sá ndúú tãhú-yu núu Yá Ndiöxí. ¹⁷ Dico nchòhó, nduu dùcaⁿ quide-ndo ñá túú tnàhí ná xéxi-ndó càháⁿ ndihí-ndo Yá Ndiöxí, te vãha vãha naquete-ndo núu-ndó, te vãha vãha chihi-ndo cùcá ¹⁸ cuèndá sá vã cùtnùni iní ñáiyu sá ñà túú nã xéxi-ndó nduu ducaⁿ cáháⁿ ndihí-ndo Yá Ndiöxí. Te Dútú Ndiöxí Yaá cúu Tátá-ndó ndècu ndihí-ndo diu-ni mee-gã ndéhé-gã nàcuáa quide-ndo ndècu-ndo, te diu-gá taxi-gá sá ndúú tãhú-ndó.

Cuèndá nchaa sá vãha nduu táhú-ó (Lc. 12:33-34)

¹⁹ 'Te vá cání iní-ndó cùu-ndo ñáiyu cuica nãndí sá cùndècu ndihí-ndo ñuyíú-a chi vá cùdii-xi, chi dava queue tíquidi, te dava caxi cudi ñuhu, àdi quíhu ñadúhú vehe-ndo te duhu-güedé. ²⁰ Te vãha-gá chí ndúcú nàcuáa cada-ndo cuèndá ducaⁿ ngündècu sá ndúú tãhú-ndó àndiu, te xíáⁿ cudii-xi cundècu ndihí-ndo nì caa ni quíhíⁿ, chi yacáⁿ vá quéé-gã tíquidi, te ni vã cáxi-gã cudi ñuhu, te ni vã quini-gá-ndó ñadúhú duhu-güedé

ndachùⁿ-ndo. ²¹ Te núu cùu-ndo ñáyiu cuica ndècu ñuyíú-a, te ñu-ni nchaa sá ndécú ndihí-ndo ñuyíú-a ñuhu iní-ndó. Àdi cuu-ndo ñáyiu quide nacuaá ngúndecu sá ndúú tǎhú-ndó àndiu, te ñu-ni sá ndúú tǎhú-ndó ndècu andiu-áⁿ ñúhú iní-ndó.

Núú-ó cùu-xi datná #ⁿ ñuhú
(Lc. 11:34-36)

²² Te cada iní-ndó sǎ núú-ndó cùu-xi datná #ⁿ ñuhú. Te núu núú-ndó cǎváha te cùtnuní iní-ndó nǎ cúú sǎ ndécú núú-ndó, ²³ Dico núu cùhú núú-ndó ñà túú cùtnuní cundehe-ndo ña, te ñà túú cùtnuní iní-ndó nǎ cúú sǎ ndécú núú-ndó. Te sá dúcáⁿ cùhú núú-ndó te cada iní-ndó sǎ ndécú-ndó dàtná #ⁿ núú néé. Te duha ndùu tnúhu cǎháⁿ-í chi núu sǎni váha iní-ndó cuendá Yá Ndióxi ñá, te cùu vii cuu váha iní-ndó ndècu-ndo. Áⁿ te núu ñà túú sǎni váha iní-ndó cuendá-gǎ ñá, te ñà túú tnàhí cùu váha iní-ndó ndècu-ndo. Te sá dúcáⁿ ñà túú sǎni váha iní-ndó cuendá-gǎ te cada iní-ndó sǎ ndécú-ndó dàtná #ⁿ núú néé.

Vá ndácú #ⁿ téé cunu cuechi-dě núú úú pàtróóⁿ
(Lc. 16:13)

²⁴ Te ni #ⁿ téé xínu cuechi vá ndácú-dě cunu cuechi-dě núú úú pàtróóⁿ, chi téé-áⁿ cuu váha iní-dé núú #ⁿ pàtróóⁿ-dě te tní-dé nchaa tnúhu cǎháⁿ pàtróóⁿ téé cùu váha iní-dé núú-xi-áⁿ. Te núú ìngá tucu pàtróóⁿ-dě vá cúú váha iní-dé, te ni vá tní-dě tnúhu cǎháⁿ ìngá téé-áⁿ. Te ducaⁿ sǎtnahá-xi cùu nchóhó chi vá ndácú-ndó cunu cuechi-ndo núú Yá Ndióxi te cuhuⁿ iní-ndó nchaa sá ío ñuyíú-a.

Yá Ndióxi xító-gǎ nchaa ñáyiu cùu déhe-gǎ
(Lc. 12:22-31)

²⁵ Te na cǎhí tnúhu-í xii-ndo sǎ vǎ ío cani iní-ndó núu nása níhí-ndó sǎ cóhó sǎ cǎxi-ndó, te ni vǎ ío cani iní-ndó núu nása níhí-ndó dǎo cuihnu-ndo, chi cùnuu-gǎ méé-ndó dàcúúxi sǎ nchító-ndó, te ducaⁿ cùnuu-gǎ yiqui cùnú-ndó dàcúúxi dǎo sácuihnu-ndo. ²⁶ Te chí cǎdá cuendá sǎ ncháá quiti ndava ñà túú tnàhí ná xítú-güedi, te ni ñà túú ndèe cuáháⁿ-güedi nǎtahu-güedi, te ni ñà túú nǎ nǎtaxúha-güedi, te ni ñà túú ndèe cǎá yácá-güedi, chi mee Tǎtá-ó Dütú Ndióxi Yá ndécú àndiu xito ñaha-gǎ xii-güedi nihí-güedi sá xéxi-güedi. Te núu cue quiti-áⁿ

ducaⁿ xito ñaha-gǎ xii-güedi, jte uuⁿ-gǎ xító ñaha-gǎ xii nchóhó, chi nchóhó ío-gǎ cùnuu-ndo dàcúúxi cuè quiti-áⁿ! ²⁷ Te cuèi nándi sǎ sǎni vihi iní-ndó ndècu-ndo, dico ñà ndácú-ndó cǎda-ndo nacuaá cuehnu-ndo cuédico #ⁿ yiqui-gǎ.

²⁸ Te vá ío cani iní-ndó núu nása níhí-ndó dǎo cuihnu-ndo. Te chí cǎdá cuendá nǎcuáa sǎhnu nchaa itá ío yucu, chi nchaa itá-áⁿ ñà túú quide chiuⁿ-xi, te ni ñà túú quèheⁿ-xi idi. ²⁹ Te na cǎhí tnúhu-í xii-ndo sǎ ndíi Salómón cuèi ío vii ní xínduu dǎo ní xóo cuihnu ndíi, dico ñà túú nǎtnahá-xi nǎcuáa cǎa nchaa itá, chi ío-gǎ vii cǎa nchaa itá. ³⁰ Te nchaa itá ío yucu tnaa-ni cùdí-xi, te yìhí-xi te sǎhmi ñáyiu. Te cuèi ducaⁿ dico mee Yá Ndióxi quidé-gǎ ío vii sǎcúnduu-xi. Te núu nchaa itá-áⁿ ducaⁿ quide-gǎ xító-gǎ sǎcúnduu vii-xi, te xǎáⁿ cùtnuní sǎ ío-gǎ coto ñaha-gǎ xii-ndo, dicó-ni sǎ ñà túú sǎndáá váha iní-ndó-gǎ. ³¹ Te xǎáⁿ núu ñà túú xini ñuhu vihi-xi cani iní-ndó núu nása níhí-ndó sǎ cóhó sǎ cǎxi-ndó, àdi nása níhí-ndó dǎo cuihnu-ndo. ³² Chi nchaa ñáyiu ñà túú xini nǎcuáa cǎháⁿ tnúhu Yá Ndióxi mee-ni nchaa xǎáⁿ ñúhú iní-yu. Dico nchóhó chi mee Tǎtá-ndó Dütú Ndióxi sa naha-gǎ ná cúú sǎ xini ñuhu-ndo. ³³ Te xǎáⁿ núu ío xini ñuhu-xi sǎ cùhúⁿ iní-ndó sǎ Yá Ndióxi yíndaha ñaha-gǎ xii-ndo, te ducaⁿ cǎda-ndo nchaa nacuaá cuini-gǎ, te ducaⁿ te taxi-gǎ nchaa sǎ xini ñuhu-ndo. ³⁴ Núu xǎáⁿ vá ío cani iní-ndó nása cundecu-ndo ndùu tneé, chi cani iní-ndó nǎcuáa cǎda-ndo cùndecu-ndo vitna, chi nduu tneé-áⁿ te òré-nǎ te cùtnuní núu nása cǎda-ndo cùndecu-ndo. Chi nchóhó sa naha-ndo sǎ ío titní núú sǎ quidé-xi #ⁿ nduu #ⁿ nduu —duha ní dǎnèhé ñáhá Jèsús xii cue téé xica cuu ndihí-gǎ ndihí nchaa ñáyiu.

7

Vá cǎháⁿ cuèhé-ó cuendá tnàha ñáyiu-o
(Lc. 6:37-38, 41-42)

¹ Te Jèsús ndècuu-ni-gǎ dǎnèhé-gǎ cue téé xica cuu ndihí-gǎ ndihí nchaa ñáyiu, te xǎhaⁿ-gǎ:

—Vá cǎháⁿ cuèhé-ndó cuendá tnàha ñáyiu-ndo, te ducaⁿ te Yá Ndióxi ñà túú nǎ tnúhu cùñaha-gǎ xii-ndo. ² Chi núu na cǎháⁿ cuèhé-ndó cuendá tnàha ñáyiu-ndo, te Yá Ndióxi ío #ⁿ sǎ cǎdá ñaha-gǎ xii-ndo.

Te núu nchòhó ná càháⁿ cuèhé víhí-ndó cuendá tnaha ñáyiú-ndo te Yá Ndiöxí ío-gá dandòho ñaha-gá xii-ndo. ³ ¿Te ná cuendá ndéhé-ndó ìⁿ sá ñà túú vâha quide tnaha ñáyiú-ndo te mee-ndo vîhi-gá quidé-ndó-í? Te sá dúcáⁿ quide-ndo te cada iní-ndó sã ndéhé-ndó dàtná ìⁿ mihi líhli ñùhu núú tnaha ñáyiú-ndo te mee-ndo ñùhu ìⁿ mihi cahnu-gá núú-ndó te ñá túú quide cuendá-ndó. ⁴ Te núu na nàcanu ichi-ndo tnaha ñáyiú-ndo cuendá sá ñà túú quide váha-yu ndécú-yu, te mee-ndo vîhi-gá quidé-ndó ñá, te cada iní-ndó sã xâhaⁿ-ndo xii tnaha ñáyiú-ndo sã nátava-ndo mihi líhli ñùhu núú-yu sá dúcáⁿ quide-ndo, te mihi càhnu ñùhu núú méé-ndó ñà túú quide cuendá-ndó. ⁵ Te sá dúcáⁿ quide-ndo te ío dândahú-ndó mée-ndo sá quidé ndáá-ndó te ñá ndáá sá quidé ndáá-ndó, te xini ñùhu-xi díhna-gá ñàha-ndo nchâa sá ñà túú vâha quide-ndo, te dàtnùní ducaⁿ te cuu nacanú ichi-ndo tnaha ñáyiú-ndo cuendá nchaa sá ñà túú vâha quidé-yu.

⁶ Te nchaa ñáyiú ío sáá iní-xi, te vá cadá yica-ndó-yu cundedóho-yu tnúhu Yá Ndiöxí, chi núu na càda yica-ndó-yu te ngóo-yu cuu úhú iní ñáhã-yu xii-ndo. Te ñáyiú-áⁿ cúú-yu dàtná iná chi quití-áⁿ núu na cuãñaha-o ìⁿ sá cuãñaha-o, te núu ñá túú cùtnuní iní-dí ná cúú xîãⁿ te tnî ñaha-dí xii-o. Te cùu tucú-yu dàtná cùchí chi quití-áⁿ núu na chùcu-o núú-dí yúú vâha sá ío vii càa nani pérlá, te dìcò-ni cùnu sáhá-dí chi ñá túú cùtnuní iní-dí sá cúú-xí yúú vâha.

*Cácáⁿ-ó núú Yá Ndiöxí núu ná cuiní-ó
(Lc. 11:9-13; 6:31)*

⁷ Te na càchí tnúhu-í xii-ndo sã cãcáⁿ-ndó núú Yá Ndiöxí te núu ná cuiní-ndó te taxi-gá, te vá dáñá ndéé-ndó cãcáⁿ-ndó núú-gã núu ná cuiní-ndó te ducaⁿ te níhí-ndó. Te cada iní-ndó sã ñi quexìo-ndo vehe ìⁿ tnaha ñáyiú-ndo te ní cãháⁿ-ndó, te ñáyiú-áⁿ ñi tedóho ñàhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiöxí tedóho ñaha-gã xii-ndo, te taxi-gá sá ná cãcáⁿ-ndó núú-gã. ⁸ Chi nchaa ñáyiú ducaⁿ xiquide, te Yá Ndiöxí tédòho ñaha-gã xii-yu te níhí-yu sá cuiní-yu. Te ñi-ni ducaⁿ tùcu nchaa ñáyiú na cãcáⁿ núú-gã ìⁿ sá cuiní-yu, chi sãñaha-gã sá xicáⁿ-yu núú-gã. Te ñi-ni ducaⁿ tùcu nchaa

ñáyiú ñá túú dàña ndéé xicáⁿ núú Yá Ndiöxí sá cuiní-yu chi níhí-yu.

⁹ Te nchòhó cue téé cùu tátá, ñá túú cùndee iní-ndó cuãñaha-ndo xii cue déhe-ndo ìⁿ yúú caxi-güexi òré xicáⁿ-güexi ìⁿ pãá núú-ndó cãxi-güexi. ¹⁰ Te ni ñà túú cùndee iní-ndó cuãñaha-ndo ìⁿ cóo caxi-güexi òré xicáⁿ-güexi ìⁿ chácá núú-ndó cãxi-güexi. ¹¹ Te nchòhó cuèi ndéé dau-na sáá iní-ndó dico sãha-ndo cuè déhe-ndo sã vâha xèxi-güexi òré ná cúú sã xicáⁿ-güexi núú-ndó cãxi-güexi. Te núu nchòhó ducaⁿ quide-ndo, ñe uuⁿ-gá ducaⁿ quide Tátá-ndó Dütú Ndiöxí Yaá ndécú àndiú, chi taxi-gá sá vâha sá cúú-xí-ndó te núu na cãcáⁿ-ndó núú-gã!

¹² Te nchaa sá vâha cuiní-ndó càda tnaha ñáyiú-ndo, te cada-ndo tnàhá-ndó ndìhí-yu, chi ducaⁿ sànu ichi ñaha tnúhu ní chídó tnùní ndí Moisés, te ñi-ni ducaⁿ sànu ichi ñaha tucu nchaa tnúhu ní chídó tnùní cue téé ní xóo cãháⁿ tnúhu Yá Ndiöxí ndéé sanaha.

Yuyèhe cuiñi

(Lc. 13:24)

¹³⁻¹⁴ Te xini ñùhu-xi nducu-ndo nacúáa cada-ndo tnî-ndo ichi Yá Ndiöxí. Te ichi-gá-áⁿ cúú-xí dàtná ìⁿ ichi cuiñi, àdi datná ìⁿ yuyèhe cuiñi. Te duha càháⁿ-í chi ío úhú xínu iní-ndó tnî-ndo ichi Yá Ndiöxí, te sacú-ni nchòhó cue ñáyiú ndècu ñuyúú-a tnî-ndo ìchi-gá. Te nchaa ñáyiú ndècu ichi cuehé ichi duha ta xíta níhí-yu cuáháⁿ. Te ichi ndécú-yu-áⁿ cada iní-ndó sã cúú-xí ìⁿ ichi cahnu ichi quehéⁿ, àdi ìⁿ yuyèhe quehéⁿ. Te duha càháⁿ-í chi ío vai ñáyiú ndécú-yu ichi-áⁿ.

*Ndì ñiⁿ núú yutnu xini-ó ñá yutnu cùu-xi
cuendá sá sãvidí-xi*

(Lc. 6:43-44)

¹⁵ Te càchí tnúhu-í xii-ndo sã ío quihí iní-ndó cùndecu-ndo cuendá sá vã dândahú ñáhã cuè téé càchí sá cãháⁿ tnúhu Yá Ndiöxí te ñá ndáá sá cãháⁿ-güedé tnúhu-gã. Chi cue téé-áⁿ sànuu sá quidé-güedé dàtná quidé mbéé quití ío váha iní-xi, dico ñá ndáá chi ñá túú ñùhu váha iní-güedé, chi quide-güedé dàtná quidé quití dééⁿ quití nani yíhí. ¹⁶ Te òré quexìo-güedé núú ndécú-ndó te cada cuendá-ndó nacuáa quide-güedé cuendá ducaⁿ cùtnuní iní-ndó

nã ñáiyu cùu-güedé. Te nchòhó xìní-ndó sã ñà túú cùuⁿ ndéhé yoho yàha stilé tnu iñu, te ni ñà túú xìní-ndó cùuⁿ ngúxí ìⁿ tnu iñu. 17-18 Te xìní tucu-ndo sã ncháá yùtnu váha cùuⁿ sávidí váha, te nchaa yutnu váha-áⁿ ñà túú cùuⁿ sávidí sá ñà túú váha. Te nchaa yutnu sá ñà túú váha ñà túú cùuⁿ sávidí váha, chi mee-ni sávidí sá ñà túú váha cùuⁿ. 19 Te nchaa yutnu sá ñà túú cùuⁿ sávidí váha xèhndé-güedé, te cuánguee-xi núú ñùhú càyú-xi. Te ducaⁿ sãtnahá-xi yáha nchaa cue téé dándahú ñáhá càchí sá càháⁿ tnúhu Yá Ndiòxí te ñà ndáá sá càháⁿ-güedé tnúhu-gá, chi quíhíⁿ-güedé núú ñùhú núú càyú. 20 Te nchòhó cutnùní iní-ndó nã ñáiyu cùu cue téé-áⁿ cuendá nchaa sá quidé-güedé.

Ñá ncháá ñáiyu ngúndecú-yu núú ndécú Yá Ndiòxí táxí tnùní-gá
(Lc. 13:25-27)

21 Te na càchí tnúhu-í xii-ndo sã ìo vài ñáiyu cachí-yu sá yùhú cùu-í Xítohó-yu, dico ñà ncháá-yu nduu táhù-yu cundecú-yu núú ndécú Tàtà-í Dútú Ndiòxí táxí tnùní-gá, chi mee-ni nchàa ñáiyu na càda nchaa nacuaá càháⁿ-gá ñáiyu-áⁿ nduu táhù-yu cundecú-yu núú ndécú-gá táxí tnùní-gá. 22 Te na sàá nduu càda ndáá Yá Ndiòxí cuéchi nchaa ñáiyu, te vài-yu cúñahá-yu xii-í: “Yòhó Xítohó Jesucrístú nchúhú cúú-ndí ñáiyu ní càháⁿ tnúhu-n nàcuáa ní cachí-n, te ñu-ni-n ñi cacunehe-ndí te ní sándáá iní ñáhá nchàa espíritú cùndíhí yucu ñávàha xii-ndí ní quee-xi yiqui cùñú ñáiyu, te ñu-ni yòhó ní chindee ñàha-n xii-ndí ní ndacu-ndí ní quide-ndí titní núú sã vã yòo tnàhí ndàcu cada”, duha cúñahá-yu xii-í dàvá-áⁿ. 23 Dico yúhú cúñaha-í xii-yu: “Ñá túú tnàhí xìní ñáhà-í xii nchòhó nùu ndéé ñáiyu cùu-ndo, te chí xócúñíⁿ nchaa nchòhó ñáiyu quide nchaa sá cuéhé sá dúhá nùú ndécú-í-a”, duha cúñaha-í xii-yu.

Ìⁿ vehe ndècu cimientú-xi ndihí ìⁿ vehe ñá túú cimientú-xi
(Mr. 1:22; Lc. 6:47-49)

24 Te nchaa ñáiyu sàcúndedóho tnúhu càháⁿ-í te núu na tníⁿ-yu, te ñáiyu-áⁿ cúú-yu dàtná ìⁿ téé ìo váha cùtnuní iní-xi. Chi téé-áⁿ ñi dácáá-dé ìⁿ vehe, dico díhna-gá ní xete-dé ndéé ní tnahá-dé yúú cáxíⁿ

te dàtnùní ní tava-dé cimientú-xi. 25 Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, dico ñà túú ní ndàcu-xi cuido-xi. Te ní quene tucu táchí ñíhi dico ñà túú ní ndàcu-xi cuido-xi vehe-áⁿ, te ducaⁿ chi téé ní dácáá vèhe-áⁿ ñi tava-dé cimientú-xi núú yúú cáxíⁿ. Duha sãtnahá-xi cùu nchaa ñáiyu tníⁿ tnúhu càháⁿ-í. 26 Dico nchaa ñáiyu sàcúndedóho tnúhu càháⁿ-í te ñà túú cuíní-yu tníⁿ-yu, ñáiyu-áⁿ cúú-yu dàtná ìⁿ téé ñà túú tnàhí cùtnuní iní-xi. Chi téé-áⁿ ñi dácáá-dé ìⁿ vehe núú yúú mée-ni ñuhu cúchí. 27 Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, te ní quene táchí ñíhi te ìí-ni ní xido-xi vehe-áⁿ cuendá sá nùú ñuhu cúchí ñi sáá. Duha sãtnahá-xi cùu nchaa ñáiyu sàcúndedóho tnúhu càháⁿ-í te ñà túú cuíní-yu tníⁿ-yu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáiyu.

28 Te òré ní ndihí Jèsús sá dúcáⁿ ñi càháⁿ-gá, te nchaa ñáiyu ní xíndedóho nchaa tnúhu ní càháⁿ-gá ìo ní cuñúhu-yu nàcuáa ní dánèhé ñáhá-gá xii-yu. 29 Chi ní càháⁿ-gá dàtná càháⁿ cue téé cùnuu, te cùnuu ndisa-gá, te ñà túú ní càháⁿ-gá dàtná càháⁿ nchaa cue téé dàcuaha ñaha xii ñáiyu nchaa tnúhu ní chídó tnùní ndíi Moisés.

8

Jèsús quidé tãtna-gá ìⁿ téé tnàhá cuéhé sã dátèhyú nihnu-xi yiqui cùñú-ó
(Mr. 1:40-45; Lc. 5:12-16)

1 Te Jèsús ní xica-gá cuánuu-gá ñi ñi tindúú nùú dúcáⁿ ñi xíndecu-gá ní dánèhé-gá ñáiyu-áⁿ, te cuéhé víhí ñáiyu nchícúⁿ ñáhá xii-gá cuánuu. 2 Te ní quexìo ìⁿ téé tnàhá cuéhé sã dátèhyú nihnu-xi yiqui cùñú-ó nùú Jèsús, te ní ngúñíⁿ xítí-dé núú-gã, te xãhaⁿ-dè xii-gá:

—Mèstrú, véxi-í càháⁿ ndàhú-í núú-n nùú vá cùndèe iní-n càda tãtna ñaha-n xii-í, chí cùtnuní iní-í sá ndácú-n —càchí-dé xãhaⁿ-dè xii-gá.

3 Te Jèsús ní dácáá-gá ndaha-gá ní tendaha ñàha-gá xii-dé, te xãhaⁿ-gã:

—Cuu cada tãtna ñaha-í xii-n, te vitna ndúha-n —càchí-gá xãhaⁿ-gã xii-dé.

Te òré-ni-áⁿ ñí xócuñí cuéhé tnàhá-dé.
 4 Te Jèsús ní xáhaⁿ tùcu-gá xii-dé:

—Te vitna cuanùhú te vá yõ ñⁿ cúñaha-n sã yùhú ní quide tátna ñaha-í xii-n, núú dùtú-ni cuáháⁿ cuendá sá ná quini ñáhá-dé xii-n sã ñí ndúha-n, te cuáñaha-n sã ndúú tãhú Yã Ndiõxí dàtná ní cachí ndíi Moisés. Te ducaⁿ càda-n cuendá cutnùní iní ñáyiu sá ñí ndúha-n —càchí-gá xáhaⁿ-gã xii téé ní quide tátna-gá-áⁿ.

Jèsús quidé tátna-gá ñⁿ téé xìnu cuechi núú ñⁿ téé cùu capitáⁿ

(Lc. 7:1-10)

5 Te Jèsús ní xica-gá cuáháⁿ-gá ñuú Capèrnaúm. Te òré cuánguihu-gá ñuú-áⁿ te ní quexìo ñⁿ téé cùu capitáⁿ càháⁿ ndàhú-dé núú-gã, 6 te xáhaⁿ-dè xii-gá:

—Mèstrú, véxi-í càháⁿ ndàhú-í núú-n nũu vá cùndèe iní-n càda tátna-n ñⁿ téé xìnu cuechi núú-í, chí cùhú-dé te càhú víhí tnàhá-dé, te ío ndòho-dé te ní ñã cùndèe-gá-dé candá nihnu-dé —càchí-dé xáhaⁿ-dè xii-gá.

7 Te Jèsús ní xáhaⁿ-gã xii-dé:

—Te na quíhíⁿ-ó càda tátna-í-dé —càchí-gá xáhaⁿ-gã xii-dé.

8 Te téé cùu capitáⁿ-áⁿ ñí xáhaⁿ-dè xii-gá:

—Mèstrú, ñá túú tàú-í sá quíhu-n ndèe xití vehe-í, chí cùu-í ñⁿ téé cùtèxínu sá cúú-xí-n, te càháⁿ-ni sá ndũha téé xìnu cuechi núú-í te ndúha-dé. 9 Chí yùhú ndècu cue téé tàxi tnuní ñáhá xii-í, te ducaⁿ yùhú tucu ndècu cue sandadú táxi tnùn-í. Te òré xáhaⁿ-í xii ñⁿ-dè quíhíⁿ-dè ñⁿ chiùn te cuáháⁿ-dè, te òré xáhaⁿ-í xii ingá-dé quixi-dé te véxi-dé, te òré xáhaⁿ-í xii ñⁿ téé xìnu cuechi núú-í cada-dé ñⁿ chiùn te quide-dé. Núu xíáⁿ yòhó càháⁿ-ni sá ndũha téé xìnu cuechi núú-í te ndúha-dé —càchí-dé xáhaⁿ-dè xii Jèsús.

10 Te Jèsús ío ní cuñúhu-gá sá dúcáⁿ ñí càháⁿ téé cùu capitáⁿ-áⁿ, te ní xáhaⁿ-gã xii nchaa ñáyiu nchícúⁿ ñáhá xii-gá:

—Na càchí tnúhu ndáá-í xii-ndo sã vãtá quini-gá-í ní ñⁿ ñáyiu isràél, ñáyiu súúni ío váha sãndáá iní ñáhá xii Yã Ndiõxí dàtná sãndáá iní ñáhá téé-a xii-gá. 11 Te na càchí tnúhu ndáá tucu-í xii-ndo sã ío cuéhé ñáyiu quixi ndàa xio nacuáa quène nchíanchii, te ñu-ni ducaⁿ ío cuéhé tucú-yu quixi ndàa xio nacuáa quée tucu nchíanchii. Te nchaa

ñáyiu-áⁿ naníhí tnáhã-yu ndihí té Àbrahám, ndihí té Isàác, ndihí té Jàcób núú ndécú Yã Ndiõxí táxi tnùn-í-gá te yàcáⁿ cundecu ndihí ñáhá-yu xii-güedé. 12 Te nchaa ñáyiu tàú nduu tãhú cundecu núú ndécú Yã Ndiõxí táxi tnùn-í-gá ní cùu, ñáyiu-áⁿ quee tíhũ-yu, chí quíhíⁿ-yu ñⁿ xichi núú néé núú ío ndohó-yu cundecú-yu, te yàcáⁿ ío ndáhí-yu, te dícó rúhñú-nã cuu núhu-yu sá sätú iní-yu cuendá sá ndòhó-yu —càchí-gá xáhaⁿ-gã xii-yu.

13 Te Jèsús ní xáhaⁿ tùcu-gá xii téé cùu capitáⁿ-áⁿ:

—Yòhó téé ndècu ndihí téé cùhú cuanùhú vehe-n vitna chí ndúha-dé chí ní sãndáá iní-n Yã Ndiõxí —càchí-gá xáhaⁿ-gã xii-dé.

Te ñu-ni òré ducaⁿ ñí xáhaⁿ Jèsús xii téé cùu capitáⁿ-áⁿ ñí ndúha téé xìnu cuechi núú-dè.

Jèsús quidé tátna-gá nãná ñadìhí té Pèlú

(Mr. 1:29-31; Lc. 4:38-39)

14 Te Jèsús ní xica-gá cuáháⁿ-gá vehe té Pèlú, te òré ní quexìo-gá vehe-dé te ní xiní-gá cáá nãná ñadìhí-dé cùhú-aⁿ ñùhu vihi-aⁿ cahni. 15 Te Jèsús ní tñi-gá ndaha ñaha cùhú-áⁿ, te òré-ni-áⁿ ñí nchíco-aⁿ cahni te ní ndacóo-aⁿ ní xinu cuechi-aⁿ núú-güedé ndihí-gá.

Jèsús quidé tátna-gá vãi ñáyiu cùhú

(Mr. 1:32-34; Lc. 4:40-41)

16 Te òré ní dáhu nchíanchii te ní quexìo ñáyiu núú ndécú Jèsús, te ndècá-yu vãi ñáyiu yìhí ñaha espíritú cùndihí yucu ñávãha ní sáá núú-gã te ndèca tucú-yu vãi ñáyiu tnàhá dava-gá núú cuéhé. Te ñⁿ-ni tnúhu ní càháⁿ Jèsús ní tenàá-gá nchaa espíritú cùndihí yucu ñávãha yìhí ñaha xii nchaa ñáyiu-áⁿ, te ní quee-xi yiqui cùñú-yu cuáháⁿ-xi. Te tnàhá nchaa dava-gá ñáyiu cùhú-áⁿ ñí quide tátna-gá. 17 Te ducaⁿ ñí cuu chí ní quee ndáá-xi nãcuáa ní càháⁿ ndíi Chàíá téé ní xóo càháⁿ tnúhu Yã Ndiõxí ndéé sanaha, te duha ní cachí ndíi: “Mee-gã cada tátna ñaha-gã xii-o, chí ñu-gá xocàni-gá nchaa sá quidé ùhú yiqui cùñú-ó”, duha ní cachí ndíi.

Ñáyiu cuini tuha ñaha xii Jèsús

(Lc. 9:57-62)

18 Te òré ní xíní Jèsús sá ìo cuéhé ñàyiú xìxúcu núú ndécú-gǎ, te ní xáhaⁿ-gǎ xii cue téé xìca cuu ndìhi-gǎ sá quée-gǎ ndìhi-güedé bàrcú cuèndá téhndé-gǎ ndìhi-güedé ndàa ìngá xio yuhu làgúná. 19 Te mei òré-án nǐ quexìo ìⁿ téé dàcuaha ñaha xii cue ñàyiú nchaa tnúhu ní chídó tnùnì ndíi Moisés, te xáhaⁿ-dè xii-gǎ:

—Mèstrú, cuínì-í canchicúⁿ ñáhà-í xii-n ndèni ní cuu na quíhíⁿ-n —càchí-dé xáhaⁿ-dè xii-gǎ.

20 Te Jèsús ní xáhaⁿ-gǎ xii-dé:

—Nchaa ñúcuu chi ndècu yaú cúú vèhe-güedi saquíhi-güedi, te nchaa cue quiti ndàva caa tacá-güedi díquí yutnu. Dico yúhú Téé cùu ñaní tnáhá-ndó nchàa-ndo chi ñá túú ndèé cáá vèhe-í ñuyíú-a ndetatú-í —càchí-gǎ xáhaⁿ-gǎ xii-dé.

21 Te ìⁿ téé ní chitnahá ñáhá xii Jèsús ní xáhaⁿ-dè xii-gǎ:

—Jèsús, dañà na nùhú-í cundetu-í cuú tǎtǎ-í te chindúxi-í-dé dàtnùnì quixi-í chitnahá ñáhá dùcaⁿ-ná-í xii-n —càchí-dé xáhaⁿ-dè xii-gǎ.

22 Te Jèsús ní xáhaⁿ-gǎ xii-dé:

—Daña ñàyiú ñá túú sàndáá ìní ñáhá xii-í ná chindúxi tnàha meé-yu, chi ñàyiú-án cúú-yu dàtná ñàyiú ní xíhí cuèí ndècu-ní-yu núú ñuyíú-a, te yòhó canchicúⁿ ñáhá-ní xii-í —càchí-gǎ xáhaⁿ-gǎ xii-dé.

Jèsús ngánì-gǎ táchí ndìhi ndute làgúná
(Mr. 4:35-41; Lc. 8:22-25)

23 Te sátá dúcáⁿ te Jèsús cuánguee-gǎ bàrcú ndìhi cue téé xìca cuu ndìhi-gǎ, te ní xìca bàrcú-án cuáháⁿ-xi. 24 Te nìni ñùhu bàrcú-án ichi cuáháⁿ-xi núú ndute ní xídí Jèsús, te ní ngúíta-xi níhi vèhi quene táchí, te ta nàdachitú-xi ndute xití bàrcú cuáháⁿ. 25 Te cue téé xìca cuu ndìhi-gǎ cuáháⁿ-güedé núú cáá-gǎ xídí-gǎ, te xáhaⁿ-güedé xii-gǎ:

—ìMèstrú, ndíquúú ìní chi dàcácu ñaha-n xii-o chi quée naa-o cuínì-xi! —càchí-güedé xáhaⁿ-güedé xii-gǎ.

26 Te Jèsús ní xáhaⁿ-gǎ xii-güedé:

—¿Ná cuèndá ndéé ducaⁿ ìo yùhú-ndó? ¿Náa ñá túú sàndáá ìní ñáhá ndìsa-ndo xii-í-áⁿ? —càchí-gǎ xáhaⁿ-gǎ xii-güedé.

Te Jèsús ní ndacóo-gǎ te ní tenáa-gǎ táchí-áⁿ ndìhi ndute-án, te ní ngúíñí táchí-áⁿ te ní nucúndecu nahi-nǎ ndute làgúná-án.

27 Te nchaa cue téé ñùhu xití bàrcú-án nǐ cuñúhu-güedé sá dúcáⁿ nǐ quide-gǎ ní xínì-güedé, te ní xitnàha-güedé:

—¿Te ná téé cùu téé-a núu duha ní cáháⁿ-ni-dé te ní ngúíñí táchí te ní nucúndecu nahi-ni ndùte làgúná-a-i? —càchí-güedé xitnàha-güedé.

Cue téé ñúú Gàdará cue téé yìhi ñaha espíritú cùndìhi yucu ñávàha
(Mr. 5:1-20; Lc. 8:26-39)

28 Te òré ní quèxio Jèsús ndàa ìngá xio yuhu làgúná yucu cue téé ñúú Gàdará, te úú tnàhá cue téé quide vehe núú yíndüxi ndíyì ní quee-güedé cuáháⁿ-güedé núú ndécú Jèsús, te ndi ndùú-güedé yíhí ñàha espíritú cùndìhi yucu ñávàha xii-güedé, te ío màñá-güedé chi vá yòo tnàhí dàña-güedé yáha yatni núú ndécú-güedé. 29 Te cue espíritú yíhí ñàha xii-güedé-án nǐ quide-xi níhi ní cáháⁿ-güedé, te xáhaⁿ-güedé xii-gǎ:

—¿Ná cuèndá véxi-ò Jèsús Déhe Dútú Ndiòxí chidácá ñáhá-n xii-ndí? ¿Áⁿ sàma véxi-n dàndoho ñaha-n xii-ndí? Te vátá sàá-gǎ nduu dùcaⁿ cada-n —cachí-güedé xáhaⁿ-güedé xii-gǎ.

30 Te yatni xiáⁿ xìxica cuu vài cuchí xìxexi-güedi. 31 Te cue espíritú cùndìhi yucu ñávàha yìhi ñaha xii cue téé-án nǐ cáháⁿ ndàhú-xi núú Jèsús, te xáhaⁿ-xi:

—Te núu vá dàñá-gǎ-n quíhi-ndí yiqui cùñú cue téé-a, te càháⁿ ndàhú-ndí núú-n sǎ dàña-n na quíhíⁿ-ndí quíhu-ndí yiqui cùñú nchaa cùchí-áⁿ —càchí cue espíritú-án xáhaⁿ-xi xii-gǎ.

32 Te Jèsús ní xáhaⁿ-gǎ xii cue espíritú cùndìhi yucu ñávàha-án:

—Chí táquèe yiqui cuñú cue téé-án te quíhíⁿ-ndó nùu ndèé ichi quíhíⁿ-ndó —càchí-gǎ xáhaⁿ-gǎ xii nchaa espíritú-án.

Te cue espíritú cùndìhi yucu ñávàha-án nǐ quee-xi yiqui cùñú cue téé-án, te cuáháⁿ-xi cuánguihu-xi nchaa cùchí-án. Te cue quiti-án nǐ xínu-güedi duha ní quée-güedi ndàa núú dèhvá yuhu làgúná-án, te ní ngauni-hnu-güedi xití ndute, te ní ndìhi-güedi ní cáhá.

33 Te cue téé xitò ñaha xii nchaa cuchí-án nǐ yùhú-güedé te ní xínu-güedé, te ní

sáháⁿ-güedé ní cani-güedé cuendú núú cuè ñáyiú ndècu xítí ñuú nchaa nàcuáa ní cuu cuendá cue téé ní xíhi ñaha nchàa espíritú cundíhi yucu ñávãha-án. ³⁴ Te nchaa ñáyiú ñuú-án ñí queé-yu cuáhán-yu núú ndécú Jèsús. Te òré ní quexió-yu núú ndécú-gã te ní cáháⁿ ndàhú-yu núú-gã sá ná queè-gã yucu ñuú-yu núhú-gã.

9

Jèsús quidé tãtna-gã ñí tée cùhú ñá cúú-gã candá nihnu

(Mr. 2:1-12; Lc. 5:17-26)

¹ Te sátá dúcán ñí cuu te Jèsús cuánde-gã bàrcú cuáhán-gã ní natehdé-gã ndàa ingá xio yuhu làgúná. Te xíán ñí ndexió-gã ñuú núú quidé ñuú-gã. ² Te xíán ndécú-gã ní quexió cue téé nchìdo-güedé ñí tée cùhú ñá cúú-gã candá nihnu ñùhu-dé xító, te Jèsús ní cutnùnì iní-gã sá sàndáá ndisa iní ñáhá-güedé xii-gã núu ní xáhaⁿ-gã xii tée cùhú-án:

—Yòhó tée cùhú vá ndìhú-gã iní-n, chi sa ní quide càhnu iní-í nchaa cuéchi-n — càchí-gã xáhaⁿ-gã xii-dé.

³ Te sá dúcán ñí cáháⁿ-gã núu xíán cue téé dàcuaha ñaha xii ñáyiú nchaa tnúhu ní chídó tnùnì ndíi Moisés ní sani iní-güedé: “Tée-a càháⁿ cuèhé-dé cuendá Yã Ndiõxí”, duha ní sani iní-güedé. ⁴ Te Jèsús ní cutnùnì iní-gã nàcuáa sàni iní-güedé núu ní xáhaⁿ-gã xii-güedé:

—¿Ná cuendá ducaⁿ sàni cuèhé sání dùha iní-ndó? ⁵ Te sá dúhá ñí xáhaⁿ-í xii tée cùhú-a sá ñí quide càhnu iní-í nchaa yíca cuéchi-dé, te xíán nchòhó ñá túú cutnùnì iní-ndó núu ndáá càháⁿ-í àdi ñá ndáá. Dico núu cúu-í-dé sá ndácóo-dé te caca-dé, te cutnùnì ndáá iní-ndó núu ndáá càháⁿ-í àdi ñá ndáá, chi cundehe núu-ndó nàcuáa cada-í. ⁶ Te vitna na càda-í nàcuáa cutnùnì iní-ndó nchàa-ndo sá yùhú Tée cùu ñani tnáhá-ndó nchàa-ndo ndecu ndìhi-í tnúhu ndee iní ñuyúú-a sá cáda càhnu iní-í nchaa cuéchi ñáyiú —càchí-gã xáhaⁿ-gã xii-güedé.

Te sátá dúcán te ní xáhaⁿ-gã xii té cùhú-án:

—Ndacóo, te ndocani-n xító ñùhu-n véxi-án te núhú-n vèhe-n —cachí-gã xáhaⁿ-gã xii-dé.

⁷ Te òré-ni-án ñí ndúha tée cùhú-án te ní ndacóo-dé te ní ndocani-dé xító ñùhu-dé ní

quexió-án te ní xica-dé cuánuhú-dé vehe-dé. ⁸ Te nchaa ñáyiú xíndecu-án ño ní cuñúhu-yu sá dúcán ñí quide Jèsús ní xiní-yu, te ní cachí-yu sá ño càhnu cuu Yã Ndiõxí cuendá sá ñí sáñaha-gã xii Jèsús tnúhu ndee iní cada-gã nchaa sá vã yõo tnàhí ndàcu cada.

Jèsús càháⁿ-gã ñí tée nàni Mateú chitnahá ñáhá-dé xii-gã

(Mr. 2:13-17; Lc. 5:27-32)

⁹ Te Jèsús ní nucúhuⁿ tucu-gã ichi cuáhán-gã, te ichi ñùhu-gã ní xiní-gã núcõo ñí tée nàni Mateú quidé còbrá-dé ñáyiú chi cobràdór impuèstú cúú-dé, te ní xáhaⁿ-gã xii-dé:

—Màteú, néhé chitnahá ñáhá-n xii-í — càchí-gã xáhaⁿ-gã xii-dé.

Te té Màteú-án ñí ndacuíñí-dé ní chitnahá ñáhá-dé xii-gã.

¹⁰ Te ñí xito ndècu Jèsús ñí vehe, te yíhi-gã mèsá ndìhi cue téé xica cuu ndìhi-gã xéxi ndìhi ñaha-gã xii-güedé. Te tnàhá cue téé cuihna iní-xi quide cobrá ñáhá xii ñáyiú cuendá impuèstú yíhi ndìhi-gã mèsá, te tnàhá tucu dava-gã cue téé ndècu ichi cuèhé ichi duha yíhi ndìhi-gã mèsá. ¹¹ Te sá ñí xiní cue téé cùu fariséú xéxi Jèsús ndìhi nchaa cue téé-án, te ní xicán tnúhú-güedé núú cuè téé xica cuu ndìhi-gã, te xáhaⁿ-güedé:

—¿Ná cuendá ducaⁿ quide téé cùu mestrú-ndó xèxi-dé ndìhi cue téé cuihna iní-xi quide cobrá ñáhá xii ñáyiú cuendá impuèstú, ndìhi nchaa dava-gã cue téé ndècu ichi cuèhé ichi duha-í? —càchí-güedé xáhaⁿ-güedé.

¹²⁻¹³ Te Jèsús ní tecú dóho-gã nàcuáa ndùu tnúhu ní xáhaⁿ-güedé xii cue téé xica cuu ndìhi-gã, núu ní xáhaⁿ-gã xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í cáháⁿ-í ñáyiú cutnùnì iní-xi sá ndécú cuéchi-xi cuendá dàñá-yu nchaa sá cuèhé sá dúhá quidé-yu, te ñá túú véxi-í cáháⁿ-í ñáyiú càchí sá ñá túú ndècu cuéchi-xi. Te chí cáda cuendá váha nàcuáa càháⁿ Yã Ndiõxí núú tütú-gã núú càchí-xi: “Yúhú cuíní-í sá cundàhú iní-ndó cuè tnaha ñáyiú-ndo, te ñá díú mèe-ni sá cáhni-ndó quiti nduu

táhù-í", duha càchí-gá núú tütú-gá —càchí Jèsús xàhaⁿ-gã xii-güedé.

Cue téé ndücu tnúhu núú Jèsús cuèndá ñáyiú ñá túú tnàhí ná xéxí áma càháⁿ ndihí-yu Yá Ndióxi

(Mr. 2:18-22; Lc. 5:33-39)

14 Te cue téé xica cuu ndihí té Juàá téé dàcuandute ñaha xii ñáyiú ní sáháⁿ-güedé núú ndécú Jèsús, te xicáⁿ tnúhú-güedé núú-gã, te xàhaⁿ-güedé:

—Cuini-ndí cachí tnúhu-n nã cuèndá nchúhú, ndihí cue téé cùu fariséú ñá túú tnàhí ná xéxí-ndí áma càháⁿ ndihí-ndí Yá Ndióxi, te cue téé xica cuu ndihí-n ñá túú dùcaⁿ quide-güedé —càchí-güedé xàhaⁿ-güedé xii-gá.

15 Te Jèsús ní xàhaⁿ-gã xii-güedé:

—Nchòhó xini-ndó sã vã cúú cùñaha-o xii ñáyiú ñuhu vico tnándaha sã vã cúú càxi-yu nini ndècu ndihí ñaha téé tnándaha xií-yu, dico sáá nduu vã cùndècu ndihí ñaha-gá téé tnándaha-áⁿ xií-yu, te dàvá-áⁿ te cahni iní-yu vã càxi-yu cuèndá sã ndihú iní-yu.

16 Te ni vã yõo dándée luha dóó sáá ñⁿ dóó sa ní cuu tühú víhí, chi dóó sáá-ãⁿ nãndiyi-xi te uuⁿ-gá ndata-xi dóó sã ñⁿ cuu tühú-áⁿ.

17 Te ni vã yõo chihí ndidí sáá xití ñⁿ lamba sa ní cuu tühú víhí, chi núu yoo ducaⁿ na càda te ndava lamba sa ní cuu tühú-áⁿ chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu, núu xíã xini ñuhu-xi quée ndidí sáá-ãⁿ xití ñⁿ lamba saa cuèndá ducaⁿ ñà túú nã cuu cováha-xi —càchí-gá xàhaⁿ-gã xii-güedé.

Cuèndá déhe yoco té Jàirú ndihí cuèndá ñⁿ ñaha ní tnándeé dóó Jèsús

(Mr. 5:21-43; Lc. 8:40-56)

18 Te càháⁿ dúcáⁿ-ní Jèsús ní quexìo ñⁿ téé cùnuu núú ndécú-gã, ñⁿ téé tàxi tnuní veñúhu, te ní ngüíñí xití-dé núú-gã càháⁿ ndàhú-dé, te xàhaⁿ-dè xii-gá:

—Véxi-í càháⁿ ndàhú-í núú-n ñuu vã cùndèe iní-n quihíⁿ-ó vèhe-í dandòto-n déhe yoco-í chi ní xihí-xi tnáví, te yúhú cútnuní iní-í sã ñuu quihíⁿ-n tëndaha-n yiqui cuñú-xi te ndoto-xi —càchí-dé xàhaⁿ-dè xii-gá.

19 Te Jèsús ní xica-gá cuáháⁿ-gá ndihí-dé ndihí cue téé xica cuu ndihí-gá. 20 Te ichi ñuhu-gá cuáháⁿ-gá ní sáháⁿ ñⁿ ñadhí ní

tnándeé-aⁿ yuhu dõo-gã ndàa sátá-gã, te ñaha-áⁿ sa ní cuu úxúú cuíá sã cùhú-aⁿ ngòyo ñaha níñí xii-aⁿ. 21 Te ducaⁿ ñⁿ quide-aⁿ chi ní sani iní-aⁿ sã ñuu ndacu-aⁿ tnándeé-aⁿ cuèdicó luha yuhu dõo Jèsús te ndúha-aⁿ ní sani iní-aⁿ. 22 Te Jèsús ní nchócótó-gã ndàa sátá-gã te ní xini-gá ñadhí-áⁿ, te ní xàhaⁿ-gã:

—Yòhó ñaha cùhú, vã ndihú-gá iní-n vitna chi sa ní ndúha-n, chi ní sándáá iní ñáháⁿ xii-í —càchí-gá xàhaⁿ-gã xii-aⁿ.

Te òré-ni-áⁿ ñⁿ ndúha ñaha cùhú-ãⁿ.

23 Te òré ní quexìo Jesús vehe téé cùnuu taxi tnuní veñúhu-áⁿ, te ní xini-gá xindáhi víhí ñáyiú, te xíndecu müsicú. 24 Te ní xàhaⁿ-gã xií-yu:

—Chí táquèe xití vehe-a, chi xichí-a ñá túú ní xihí-xi chi dícó xidí-xi —càchí-gá xàhaⁿ-gã xií-yu.

Te ní sácú ndeé ñáhã-yu xii-gá sã dúcáⁿ ñⁿ càháⁿ-gá, chi sã cúú-xi mèe-yu te ní xihí ndisa xichí-ãⁿ. 25 Te ñáyiú-áⁿ ñⁿ queé-yu te cuánguihu Jèsús núú cándòdo xichí ñⁿ xihí-áⁿ, te ní tñi-gá ndaha-xi te òré-ni-áⁿ ñⁿ ndacóo-xi. 26 Te nchaa ñuu cáá yàtni xiáⁿ ñⁿ níhi ñáyiú tnúhu nàcuáa ní quide Jèsús.

Jèsús quidé tátna-gá núú úú tnàhá cue téé cuáá

27 Te sátá dúcáⁿ ñⁿ cuu te ní xica Jèsús cuánuhú-gá, te ichi ñuhu-gá ní chinchícúⁿ ñáhá úú tnàhá cue téé cuáá xii-gá, te níhi càháⁿ-güedé, te xàhaⁿ-güedé xii-gá:

—Yòhó Jèsús, téé cùu ñani tnàhá ndii Dáví, cundàhú iní ñáhá xii-ndí —càchí-güedé xàhaⁿ-güedé xii-gá.

28 Te òré ní nasáá Jèsús núú quidé vèhe-gá, te cue téé cuáá-áⁿ ñⁿ quexìo-güedé ndeé núú-gã, te ní xicáⁿ tnúhú-gã núú-güedé, te xàhaⁿ-gã:

—¿Sándáá iní-ndó sã yùhú ndacu-í cada tátna-í núú-ndó-ãⁿ? —càchí-gá xàhaⁿ-gã xii-güedé.

Te ní xàhaⁿ-güedé xii-gá:

—Sándáá iní-ndí sã díú yòhó Jèsús ndacu-n càda tátna-n núú-ndí —càchí-güedé xàhaⁿ-güedé xii-gá.

29 Te Jèsús ní dácáá-gá ndaha-gá ní tendaha-gã núú-güedé, te ní xàhaⁿ-gã xii-güedé:

—Te vitna, ndúha núú-ndó chi ní sándáá iní-ndó sã díú yúhú ndacu-í cada tátna-í núú-ndó —càchí-gá xãhaⁿ-gã xii-güedé.

³⁰ Te òré-ni-áⁿ ñí ndúha núú-güedé, te Jèsús ní cáháⁿ víhí-gã dóho-güedé cuendá sá vã càháⁿ-güedé nàcuáa ní cuu ní ndúha núú-güedé.

³¹ Te cue téé-áⁿ òré ní ndee-güedé núú ndécú Jèsús, te ní ngüíta-ni-güedé ní cani-güedé cuendú núú ñáyiú nàcuáa ní quide ñaha-gã xii-güedé. Te nchaa dava-gã ñuú cáá yàtni xíaⁿ ñí sáháⁿ-güedé ní cani-güedé cuendú núú ñáyiú nàcuáa ní quide ñaha Jèsús xii-güedé.

Jèsús quidé tátna-gá ñí tée ñíhí

³² Te íchí ñí ndee cue téé ní ndúha núú-xi-áⁿ núú ndécú Jèsús, te ní quexìo ñí úú ñáyiú ndécá-yu ñí tée ñíhí yíhí ñaha espíritú cündìhi yucu ñávãha. ³³ Te Jèsús ní queñuhu-gá espíritú cündìhi yucu ñávãha yíhí ñaha xii téé-áⁿ, te òré-ni-áⁿ ñí cuu ní nacáháⁿ-dé. Te nchaa ñáyiú xĩndecu-áⁿ ño ní cuñúhu-yu, te ní xítnahá-yu:

—Ñá túú tnàhí xìní-ó ñí tée duha cada ñuú nchoo cuè ñáyiú israél ní cuu —cachí-yu xítnahá-yu.

³⁴ Te cue téé cùu fariséú ní ngüíta-güedé xítnahá-güedé:

—Tée-a chi sácúhná chĩndèe ñaha-xi xii-dé queñuhu-dé nchaa espíritú yíhí ñaha xii ñáyiú te díu-ni sácúhná-áⁿ táxi tnùnì-xi nchaa espíritú-áⁿ —càchí-güedé xítnahá-güedé.

Jèsús cündàhú iní-gá ñáyiú

³⁵ Te Jèsús cuáháⁿ-gá nchaa ñuú náhnú ndìhi nchaa ñuú líhli, te ndi tnahá ñí ñí ñuú sãá-gá te ducaⁿ cuãnguìhu-gá ñí ñí veñúhu càa nchaa ñuú-áⁿ dánèhé-gá ñáyiú tnúhu váha, tnúhu sá sánú ìchi ñaha xií-yu nàcuáa ndíhu ndaha ñaha Yá Ndióxi xií-yu. Te ducaⁿ-ni ta quide tátna-gá nchaa ñáyiú cùhú cuáháⁿ cuèi ndi dííⁿ ndi dííⁿ núú cuèhé tnàhá-yu ñí ñí-yu. ³⁶ Te sá ñí xini Jèsús sá ño vãi ñáyiú nchìcúⁿ ñáhá xii-gá, te ní cündàhú iní ñáhá-gã xií-yu chi ño ndìhú iní-yu, te vá yõ nèhe cuendá ñáhá xií-yu, te cùú-yu dàtná cue mbèé cue quiti ñá túú tòli-xi.

³⁷ Te Jèsús ní xáhaⁿ-gã xii cue téé xica cuu ndìhi-gá:

—Nchòhó xìní-ndó sã òré ná sãá nduu cùu nchaa sá xítú ñáyiú te ño vãi cuu. Te na càchí tnúhu ndáá-í xii-ndo sã dàtná ño vãi sá xítú ñáyiú cùu, ducaⁿ ño vãi ñáyiú cùmání cundedóho tnúhu-í, te ño sacú ñáyiú dàcuaha ñaha xií-yu. ³⁸ Núu xíaⁿ xini ñúhu-xi cácaⁿ-ndó núú Yá Ndióxi Yáa cùú Xitohó-ndó ndìhí-yu cuendá sá ná dàcáháⁿ-gá iní-yu cáháⁿ-yu tnúhu-gá núú nchaa dava-gã tnàha ñáyiú-yu cùmání cundedóho tnúhu-gá —càchí-gá xãhaⁿ-gã xii-güedé.

10

Jèsús sãñaha-gã tnúhu ndee iní xii ndi ùxúú cue téé xica cuu ndìhi-gá

(Mr. 3:13-19; Lc. 6:12-16)

¹ Te Jèsús ní cana-gá ndi ùxúú cue téé xica cuu ndìhi-gá, te ní sãñaha-gã xii-güedé tnúhu ndee iní cundecu ndìhi-güedé cuendá queñuhu-güedé nchaa espíritú cündìhi yucu ñávãha yíhí ñaha xii ñáyiú, ndìhi cuendá sá cáda tátna-güedé nchaa dava-gã ñáyiú cùhú cuèi nándi núú cuèhé tnàhá-yu.

² Te duha xĩnani ndi ùxúú cue téé-áⁿ: téé cùnuu-gá nání-dé Ximú, àdi Pelú chi úú díu-dé, te ñaní-dé cùú tã Ndrìxi, te tnàhá téé-áⁿ cùú-dé téé xica cuu ndìhi Jesús, ndìhi té Jàcobó ndìhi ñaní té Jàcobó-áⁿ tãe nani Juaá, te ndi ndúú cue téé-áⁿ cùú-güedé déhe té Zebèdeú. ³ Te tnàhá té Lìpé xicá cùu ndìhi-gá, ndìhi té Bartolòmé, ndìhi té Mãxi, ndìhi té Mâteú téé cùu cobradór impuèstú ní cùu, ndìhi té Jàcobó déhe té Àlféu, ndìhi té Lèbeú téé dãnani-güedé Tàdeú, ⁴ ndìhi té Ximú téé ní cündìhi cue téé canànistá, ndìhi té Jùdás Iscarioté téé ní sãá nduu ñí sãha cuendá ñáhá xii Jesús núú cuè téé cùu úhú iní ñáhá xii-gá.

Jèsús téndàha-gá ndi ùxúú cue téé xica cuu ndìhi-gá quíhíⁿ-güedé cáháⁿ-güedé tnúhu-gá núú ñáyiú

(Mr. 6:7-13; Lc. 9:1-6)

⁵⁻⁶ Te Jèsús ní xáhaⁿ-gã xii ndi ùxúú cue téé xica cuu ndìhi-gá sá quíhíⁿ-güedé cáháⁿ-güedé tnúhu-gá núú ñáyiú, te

cùmání-gã caca-güedé quíhíⁿ-güedé, te ní xáhaⁿ-gã xii-güedé:

—Na càchí tnúhu-í xii-ndo sã méé-ní ñúú núú xíndecu cue ñáyíu isràél quíhíⁿ-ndó cãháⁿ-ndó tnúhu-í, te vá quíhíⁿ-ndó nì ìⁿ ñúú yíndèhu distritú Sàmariá, te nì vã quíhíⁿ-ndó dàva-gã ñúú núú xíndecu ñáyíu ñá túú cùu ñáyíu isràél. Te cue ñáyíu isràél-án cùu-yu dàtná cue mbéé cue quítì ní xíta chi ta xíta nihnú-yu cuáhán. ⁷ Te cúñaha-ndo xii-yu sá sà ní cuyatni nduu ndíhu ndaha ñaha Yá Ndiöxí xii-yu. ⁸ Te cada tátna-ndo nchàa ñáyíu cùhú cuèi ñáyíu tnahá cuéhé sã dátèhyú nihnu-xi yiqui cùñú-yu, te queñuhu-ndo nchàa espíritú cùndíhi yucu ñávãha yíhi ñaha xii ñáyíu, te dandòto-ndo cue ñáyíu sa ní xíhí, te vá càcáⁿ-ndó yãhu-ndo núú ñáyíu òré cada-ndo nchàa chiuⁿ-án, chi sa ñaha-ndo sá dìcò ducaⁿ nì taxi-í tnúhu ndee ìní ndécú ndíhi-ndo.

⁹ Te vá cànèhe-ndo díhúⁿ cuu ichi-ndo, ¹⁰ te nì vã cànèhe-ndo ñunu cuhuⁿ ndachiuⁿ-ndo, te nì vã cànèhe-ndo ìngá ichi dóo-ndó nàdama-ndo, te nì vã cànèhe-ndo úú-gá chàu-ndó chi diu-ni chàu yíhí-ndó-án xiãⁿ-ni quíhi-ndo, te nì vã cànèhe-ndo tatnu, te ducaⁿ càda-ndo chi nchòhó sa ñaha-ndo sá nchàá ñáyíu quide chiuⁿ te diu-ni cuendá chiuⁿ quidé-yu nihí-yu sá xéxi-yu.

¹¹ Te ndi tnahá ñúú ná quèxio-ndo te nducu-ndo ñáyíu cùtnuní ìní-ndó sã cùu-yu ñáyíu váha, te vehe ñáyíu-án cundecu-ndo ndèé sáá nduu ndèe-ndo ñúú-án. ¹² Te òré quexio-ndo vehé-yu te cúñaha-ndo xii-yu: “Yá Ndiöxí chíndèe chitúu ñaha-gã xii-ndo ndècu-ndo”, duha cúñaha-ndo xii-yu. ¹³ Te núu ní cãháⁿ váha ndíhi ñahá-yu xii-ndo, te cuu-xi sá vãha sá cùu-xi-yu cuendá tnúhu ní xáhaⁿ-ndo-án, dico núu ñá túú ní càháⁿ váha ndíhi ñahá-yu xii-ndo, te cúñaha-ndo xii-yu sá vã cùu-xi sã vãha xii-yu tnúhu ní xáhaⁿ-ndo-án. ¹⁴ Te núu ní sáá-ndó ìⁿ ñúú àdi ìⁿ vehe, te núu ñá túú ní cãháⁿ ndíhi ñaha vãha-yu xii-ndo te nì ñà túú ní cuíní-yu cundedóho-yu tnúhu càháⁿ-ndó te ndee-ndo ñúú-án àdi vehe-án, te naquidi-ndo tícá chúhmá nì tní sáhá-ndó cuendá ná cùtnuní ìní-yu sá ñà túú quide váha-yu. ¹⁵ Te na càchí tnúhu ndáá-í xii-ndo

sã sáá nduu te ío-gá dandòho ñaha Yá Ndiöxí xii ñáyíu ducaⁿ na càda ñaha xii-ndo-án dàcúxí ñáyíu ní xíndecu ñúú Sòdomá ndíhi ñúú Gòmorrá.

Ndoho tnahá-ó cùndecu-o ichi Xítohó Jesu crístú

¹⁶ Te cada ìní-ndó sã cùu-ndó dàtná cue mbéé cue quítì cuáhán núú ío yíhí. Te ducaⁿ sãtnahá-xi cùu-ndo chi yúhú tendaha ñaha-í xii-ndo quíhíⁿ-ndó núú xíndecu cue ñáyíu cuihna ìní-xi, te ío váha cuáha-ndo cuendá nàcuáa cada-ndo dàtná quidé cõó, dico cunduu váha ìní-ndó ñà túú ñà cada-ndo dàtná quidé lómá. ¹⁷ Te quíhi ìní-ndó chi cue ñáyíu na cùu úhú ìní ñahá xii-ndo, te cuáha cuendá ñahá-yu xii-ndo núú cuè téé cùchiuⁿ, te caniha-güedé xii-ndo xití veñúhu-güedé. ¹⁸ Te dava tucu ñáyíu cuu úhú ìní ñahá xii-ndo candeca ñahá-yu xii-ndo quíhíⁿ núú cuè téé cùnunu yíndaha nacióⁿ, àdi núú dàva-gã cue téé cùnunu sá cuendá-í. Te nchòhó níhí-ndó nàcuáa cada-ndo cãháⁿ váha-ndo cuendá-í núú-güedé ndíhi núú cuè ñáyíu ñá túú cùu ñáyíu isràél. ¹⁹⁻²⁰ Dico òré cuáha cuendá ñahá-yu xii-ndo núú nchàa cue téé-án, te vá cání ìní-ndó núú nása cunduu tnúhu cãháⁿ-ndó núú-güedé, chi òré-ñà te níhí-ndó tnúhu cãháⁿ-ndó. Te ñá díú mèe-ndo cahu ìní-ndó tnúhu cãháⁿ-ndó, chi mee Espíritú Yá Ndiöxí Yá cùu Tátá-ndó dàcãhú ìní ñahá-xi xii-ndo nacuáa cunduu tnúhu cãháⁿ-ndó.

²¹ Te dava cue téé cuáha cuendá-güedé ñaní-güedé núú cuè téé cùchiuⁿ cuendá cahni ñaha-güedé, te dava cue téé cùu tátá diu-ni ducaⁿ càda-güedé déhe-güedé, te diu-ni ducaⁿ càda ñaha dava cue ñáyíu cùu déhe xii tátá-yu ndíhi ñanã-yu, chi cuáha cuendá ñahá-yu núú cuè téé cùchiuⁿ cuendá cahni ñaha-güedé xii-yu. ²² Te nchòhó chi nchaa ñáyíu ngüíta-yu cuu úhú ìní ñahá-yu xii-ndo sã cuendá-í. Te núu na càda ndee-ni ìní-ndó cànchicúⁿ nihnu-ni-ndo ìchi-í cuèi nándi sá ná càda ñahá-yu xii-ndo ndèé ná sáá nduu vã cùndècu-gá-ndó ñùyíú-a ña, te nduu táhú-ndó cùndecu-ndo nì caa nì quíhíⁿ ndíhi Yá Ndiöxí. ²³ Te núu ìⁿ ñúú cuíní-güedé tní ñaha-güedé xii-ndo càda úhú ñahá-güedé sá cuendá-í, te cunu-ndo núú-güedé quíhíⁿ-ndó ìngá ñúú. Te na càchí tnúhu ndáá-í xii-ndo

să cùmání-gă quíhíⁿ-ndó nchàa dava-gă ñuú núú xĩndecu ñáyiu isràél cáháⁿ-ndó tnũhu-í, te sa quixi tucu yúhú, Tée cùu ñaní tnáhá-ndó nchàa-ndo ñuyíú-a.

24-25 'Te nchòhó xìní-ndó să nì ìⁿ tée dâcuaha ñá túú cùnũu-dé dâcúúxí mèstrú-dé, te núu mèstrú tée-áⁿ nãndi yãha-dé ndécú-dé te tàú-dé nduu vétú iní-dé te núu tnáhá-dé yãha-dé dàtná yãha mèstrú-dé-áⁿ. Te ñiu-ni ducaⁿ sãtnahá tucu-xi cùu ìⁿ tée xĩnu cuechi, chi ñá túú cùnũu-dé dâcúúxí pãtróóⁿ-dê, te nchaa sá yãha pãtróóⁿ-dê-áⁿ te tàú-dé nduu vétú iní-dé te núu tnáhá-dé yãha-dé dàtná yãha pãtróóⁿ-dê-áⁿ. Te núu yúhú Yaá táxí tnùnì ñáhá xii-ndo cachí-yu sá cùu-í sácúíhná, te uuⁿ-gá ducaⁿ cũñáhá-yu xii nchòhó cue tée cùndihí-í.

Vá yùhú-ó cuendá nchaa sá cádá ñaha ñáyiu xii-o

(Lc. 12:2-7)

26 'Te nchòhó vá yùhú-ndó nũú ñáyiu. Chi nchaa tnũhu sá cùú yùhu ni cuu vá cùú yùhu-gá, chi nchaa dacuitíi sã quée tũu-xi núú ñáyiu. 27 Te nchaa tnũhu sá càchí tnũhu-í xii-ndo nũú mée nũú ìⁿ-ó, cùu-xi tnũhu sá ndúú yùhu ni cuu datúu-ndo nũú cuè ñáyiu cuèi núú chítú nũú tàcá. 28 Te xini ñuhu-xi sá vã yùhú-ndó cuè ñáyiu cuèi na càhni ñahá-yu xii-ndo, chi ñiu-ni yiqui cũñú-ndó ndácú-yu cahní-yu, dico ñá túú nãgá ndacú-yu cada ñahá-yu xii-ndo. Te tàú-ndó sã Yã Ndiõxí yùhú-ndó chi Yaá-áⁿ ndacu-gá danàa-gá yiqui cũñú-ndó, te ndacu-gá daquihíⁿ ñáhá-gã xii-ndo nũú úhú núú ndàhú.

29 'Te nchòhó xìní-ndó să ndée úú tnáhá tĩlaá cùyãhu-di núú ìⁿ-ní dĩhúⁿ, te ni ìⁿ-di ñá túú xihí cùtexĩnu-di chi ndée nũu mee Yã Ndiõxí Yaá cùú Tãtã-ndó ná càchí-gã te xihí-di. 30 Dico nchòhó chi ío-gá néhe cuendá ñáhá Yã Ndiõxí xii-ndo chi ndée idi díquí-ndó yĩndehu. 31 Núu xiãⁿ càchí-í sá vã yùhú-ndó chi cùnũu-gá-ndó dâcúúxí tĩlaá cuèi vãi vihi-güedi.

Nchaa ñáyiu datúu núú tnàha ñáyiu-xi sá ndécú ndihí-yu Xitohó Jesucrístú

(Lc. 12:8-9)

32 'Te na càchí tnũhu-í xii-ndo sã ncháá ñáyiu na datúu núú tnàha ñáyiu-xi sá ndécú

ndihí ñahá-yu xii-í, te ducaⁿ te tnáhá yúhú datúu-í núú Tãtã-í Dútú Ndiõxí Yaá ndécú àndiu sá ndécú ndihí-í-yu. 33 Dico nchaa ñáyiu na cũñaha xii tnaha ñáyiu-xi sá ñà túú ndecu ndihí ñahá-yu xii-í, te ñiu-ni ducaⁿ càda yúhú tucu chí cũñaha-í xii Tãtã-í Dútú Ndiõxí Yaá ndécú àndiu sá ñà túú ndecu ndihí-í-yu.

Ñá túú cùu ìⁿnuu ñáyiu

(Lc. 12:51-53; 14:26-27)

34 'Te na càchí tnũhu-í xii-ndo sã vã cáni iní-ndó sã yúhú véxi-í ñuyíú-a te cuu ìⁿnuu-gã ñáyiu cundecú-yu, chi da ngũita-yu vá cùú ìⁿnuu-gá-yu cundecú-yu, te ducaⁿ chi nchaa ñáyiu vá quĩndáá iní ñáhá xii-í ñáyiu-áⁿ ngõo-yu cuu úhú iní-yu nchaa ñáyiu quĩndáá iní ñáhá xii-í. 35 Te dava cue tée xĩndecu tãtã-xi te ngõo-güedé cuu úhú iní-güedé tãtã-güedé, te ñiu-ni ducaⁿ càda cue ñáyiu dñhí xĩndecu nãná-xi, chi ngõo-yu cuu úhú iní-yu nãñá-yu, te ñiu-ni ducaⁿ càda tucu cue ñáyiu cùu sãnu, chi ngõo-yu cuu úhú iní-yu nãná yĩ-yu. 36 Te ndi mèé-yu vehé-yu ngõo-yu vá cùú ìⁿnuu-gá-yu cundecú-yu.

37 'Te na càchí tnũhu tucu-í xii-ndo sã ncháá ñáyiu ío-gá ná cùu iní tãtã-xi àdi nãná-xi dâcúúxí yúhú, te ñáyiu-áⁿ ñà túú tàú-yu cundecu ndihí ñahá-yu xii-í, te nchaa ñáyiu ío-gá ná cùu iní déhe ducuⁿ-xi, àdi déhe yoco-xi dâcúúxí yúhú, te ñiu-ni ducaⁿ ñà túú tàú-yu cundecu ndihí ñahá-yu xii-í. 38 Te nchaa ñáyiu vá cáncñícúⁿ nihnu ñaha xii-í cuendá sá yùhú-yu ndohó-yu dàtná ndoho-í ñáyiu-áⁿ ñà túú tàú-yu cundecu ndihí ñahá-yu xii-í. 39 Te cue ñáyiu na yùhú cuú sá cuendá-í te ñáyiu-áⁿ cuĩta nihnú-yu, dico nchaa ñáyiu vá yùhú cuú sá cuendá-í, te ñáyiu-áⁿ nduu táhũ-yu cundecú-yu ni caa ni quíhíⁿ ndihí Yã Ndiõxí.

Cuendá sá ndúú tãhú-ó

(Mr. 9:41)

40 'Te nchaa ñáyiu na quèheⁿ cuendá ñáhá xii-ndo te cada iní-yu sá tnáhá yúhú ní quèheⁿ cuendá-yu. Te nchaa ñáyiu na quèheⁿ cuendá ñáhá xii-í, te cada iní-yu sá tnáhá Tãtã-í Dútú Ndiõxí Yaá ní tendaha ñaha xii-í véxi-í ñuyíú-a ní quèheⁿ cuendá-yu. 41 Te nchaa ñáyiu na

quèheⁿ cuendá ìⁿ téè càháⁿ tnúhu Yá Ndiöxí cuendá sá quidé-dě chiuⁿ-gá, te dàtná-ni càa táhú cuǎñaha-gǎ nduu táhú tée ducaⁿ càháⁿ tnúhu-gá-áⁿ, ñiu-ni ducaⁿ cùnduu táhú cuǎñaha-gǎ nduu táhú ñǎyiu ducaⁿ na quèheⁿ cuendá ñáhá xii-dé. Te nchaa ñáyiu na quèheⁿ cuendá ìⁿ téè quide váha cuendá sá dúcáⁿ quide váha-dé, te dàtná-ni càa táhú nduu táhú tée-áⁿ ñiu-ni ducaⁿ cùnduu táhú nduu táhú ñáyiu na quèheⁿ cuendá ñáhá xii-dé. ⁴² Te nchaa ñáyiu na cuǎñaha ìⁿ yaxiⁿ ndute coho ìⁿ ñáyiu cùu cuendá-í cuendá sá ñi tuha ñáhá-yu xii-í cuéi ñá túú cùnuu vihi-yu, te ñáyiu ducaⁿ na cuǎñaha ndute-áⁿ ñihí-yu sá ndúú táhú-yu núú Yá Ndiöxí — càchí Jèsús xǎhaⁿ-gǎ xii-güedé.

11

Jèsús càháⁿ ndihí-gá cue tée xica cuu ndihí té Juàá

(Lc. 7:18-35)

¹ Te sátá ñi yáha ducaⁿ ñi xáhaⁿ Jèsús xii ndi ùxúú cue tée xica cuu ndihí-gá, te ñi xica-gá cuáháⁿ-gá nchaa ñuu cáá yàtni xiáⁿ dánèhé-gá ñáyiu tnúhu-gá.

² Te té Juàá yìhi-dé vecaá te ní níhí-dě tnúhu nchaa nàcuáa quide Xítóhó Jesu-crístú. Te sátá dúcáⁿ te ní tendaha-dě ìⁿ úú cue tée xica cuu ndihí-dé cuáháⁿ-güedé núú ndécú Jèsús. ³ Te òré ní quexio-güedé núú ndécú-gǎ, te xicáⁿ tnúhú-güedé núú-gǎ nàcuáa ní xáhaⁿ tē Juàá xii-güedé, te xǎhaⁿ-güedé xii-gá:

—Véxi-ndí xicáⁿ tnúhú-ndí núú-n nùu sá díú-n cùu-n Crístú Yaá ní tendaha Yá Ndiöxí véxi ñuyíú-a, àdi sá cùndètu nahi-ni-ndí mei Yáá-áⁿ —càchí-güedé xǎhaⁿ-güedé xii-gá.

⁴ Te Jèsús ní xáhaⁿ-gǎ xii-güedé:

—Chí cuánùhú te cani-ndo cuèndú núú tē Juàá nchaa sá ñi xini-ndó quide-í, ndihí nchaa nàcuáa nduu tnúhu ní càháⁿ-í ní xíndedóho-ndo. ⁵ Te cúñaha-ndo xii-dé sá quidé tátna-í núú cuè ñáyiu cuàá, te quide tátna-í cue ñáyiu yacua, ndihí cue ñáyiu tnàhá cuéhé sǎ dátèhyú nihnu-xi yiqui cùñú-yu, ndihí cue ñáyiu doho, nchaa ñáyiu-áⁿ quidé tátna-í, te ndúha-yu, te ndéé tnàhá cue ñáyiu sa ní xihí dándòto-í cúñaha-ndo. Te cúñaha tùcu-ndo xii-dé sá ndècuu-í dánèhé-í nchaa ñáyiu ndàhú, tnúhu sá sánú ìchi ñaha xií-yu nàcuáa

naníhí tàhú-yu. ⁶ Te cúñaha tùcu-ndo xii-dé sá ìo váha táhú nchaa ñáyiu ñá túú quide sáá iní-xi nchaa tnúhu càháⁿ-í, duha cúñaha-ndo xii-dé —càchí-gá xǎhaⁿ-gǎ xii-güedé.

⁷ Te sátá ñi yáha-güedé cuánuhú-güedé te ní ngüíta Jèsús ní càháⁿ-gá núú ñáyiu cuendá té Juàá, te xǎhaⁿ-gǎ xií-yu:

—Nchòhó ní sáháⁿ ndéhé-ndó ìⁿ téè ndècu xití yucu, te tée-áⁿ ñá túú sàni ìⁿ sàni úú iní-dé, chí ñá túú quide-dé dàtná quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné tàchí. ⁸ Te ñi ñá túú ní sáháⁿ ndéhé-ndó ìⁿ téè nihnu dóó vǎha dóó vii càa. Te nchòhó xini-ndó sǎ ncháá ñáyiu nihnu dóó vǎha dóó vii càa xíndecú-yu vehe cue tée cùnuu yíndaha ñáyiu. ⁹ Dico nchòhó chí ní sándéhé-ndó ìⁿ téè càháⁿ tnúhu Yá Ndiöxí, te ndáá sá díú ìⁿ téè càháⁿ tnúhu-gá cúú-dě, te cùnuu-gá-dé dàcúxí dàva-gá cue tée càháⁿ tnúhu-gá. ¹⁰ Te ñiu cuendá té Juàá-áⁿ càháⁿ-xi núú tùtú Yá Ndiöxí nàcuáa ní xáhaⁿ-gǎ xii Crístú, te duha ní xáhaⁿ-gǎ: Tendaha-í ìⁿ téè càháⁿ-dé tnúhu-í codonùu-dé núú-n, cuendá dàtúha-dé ñáyiu cuendá quíndáá iní-yu tnúhu-n.

Duha ní xáhaⁿ-gǎ, te ducaⁿ ñi ngódó tnùní núú tùtú-gá. ¹¹ Te na càchí tnúhu ndáá-í xii-ndo sǎ ñi ìⁿ cue tée ñuyíú-a ñá túú cùnuu-güedé dàtná cùnùu té Juàá tée dàcuandute ñaha xii ñáyiu. Te nchaa ñáyiu sa ta ndíhu ndaha ñaha Yá Ndiöxí vitna cuáháⁿ cùnùu-gá-ni tucú-yu dàcúxí té Juàá cuéi cùú-yu ñáyiu ñá túú cùnuu dàcúxí dàva-gá ñáyiu yíndaha-gá.

¹² Te ndéé cùtnàhá ní ngüíta té Juàá tée dàcuandute ñaha xii ñáyiu càháⁿ-dé tnúhu Yá Ndiöxí ñuyíú-a, ndéé dàvá-áⁿ ñi ngüíta ñáyiu cùní-yu sá ndíhu ndaha ñaha Yá Ndiöxí xií-yu te ndècu ndeé-yu quidé-yu nàcuáa ndíhu ndaha ñaha-gá xií-yu. ¹³ Te nchaa cue tée ní xóo càháⁿ tnúhu Yá Ndiöxí ndéé sanaha ñi càháⁿ-güedé sá díú-gǎ ndíhu ndaha-gǎ cue ñáyiu, te ñiu-ni ducaⁿ ñi càháⁿ tucu ndíi Moisés ní ngódó tnùní núú tùtú ndíi. Te ñiu-ni ducaⁿ cùnuu nchaa tnúhu-áⁿ càháⁿ-xi nàcuáa ndíhu ndaha Yá Ndiöxí ñáyiu ndéé ní sáá nduu ñi ngüíta té Juàá càháⁿ-dé tnúhu-gá ñuyíú-a. ¹⁴ Te na

càchí tnúhu-í xii-ndo sã cádá cuendá-ndó, chí núú tütú Yá Ndiöxí càchí-xi sá ndíxí tẽ Èliás, te ñiu núú tẽ Èliás-áⁿ ñi quide té Juáá.

¹⁵ Te nchaa nchòhó ñáyiú ndèdóho nchaa tnúhu càháⁿ-í-a te ío váha chí cuáha cuendá.

¹⁶ Te na càchí tnúhu tucu-í xii-ndo nàcuáa sãtnahá-xi cùu ñáyiú ndècu vitna. Chí ñáyiú-áⁿ cúu-yu dàtná cue landú sácõo núú yáhu dàdiqui-güexi te níhi càháⁿ-güexi, te xĩtnàha-güexi ndi mee landú-güexi: ¹⁷ “Ní tiú-ndí yaá ndihí vĩlu te ñá túú ní cuíní-ndó càta-ndo. Te ío yica iní ní xita yuhu-ndí te ñá túú ní ndàhyú-ndó”, càchí-güexi xĩtnàha-güexi. Te ducaⁿ sãtnahá-xi cùu ñáyiú ndècu vitna, ¹⁸ chí té Juáá ío ndàhú ní xóo caxi-dé, te ni ñà túú ní xóo coho-dé ndudí ndéhé yoho yàha stilé sá sà ní nduu-xi ndidí, te sá dúcáⁿ ñi xóo cada-dé te ní cachí-yu sá ñi xĩndecu ndihí-dé espíritú cùndihí yucu ñávàha. ¹⁹ Te sátá ñi quexió yúhú Tée cùu ñaní tnàhá-ndó nchàa-ndo, te xèxi-í xihí-í quidè-í, te càchí-yu sá yúhú cúu-í ñⁿ tée xèxi vihi te xihí vihi, te càchí tucú-yu sá cúu-í tée xica cuu ndihí cue tée cuihna iní-xi quide cobrá ñháá xii-yu cuendá impuèstú ndihí nchaa dava-gá cue tée ndècu ichi cuehé ichi duha, duha càchí-yu. Te ñáyiú ní tnàhá tnúhu ndihí Yá Ndiöxí, ñáyiú-áⁿ quidè-yu sá váha nàcuáa cutnùní sá méé-gã ío ndècu ndihí-gá sá xini tnùní-gá —càchí-gá xãhaⁿ-gã xii-yu.

Cuendá ñáyiú dava ñuú ñá túú sàndáá iní tnúhu Xitohó Jesucrìstú

(Lc. 10:13-15)

²⁰ Te Jèsús ní ngüíta-gá càháⁿ-gá dóho nchaa ñáyiú ñuú núú ío-gá vai núú sã vã yõ tnàhí ndàcu cada ní quide-gá, chí nchaa ñáyiú ñuú-áⁿ ñà túú cuíní-yu ndixi túu iní-yu sá ñà túú quide váha-yu ndècú-yu, te xãhaⁿ-gã xii-yu:

²¹ —¡Ndàhú nchòhó cue ñáyiú ñuú Corazín! ¡Te ndàhú nchòhó cue ñáyiú ñuú Bètsaidá! Chí núú dicó ñuú Tìrú ndihí ñuú Sidón ní quide-í nchaa sã vã yõ tnàhí ndàcu cada datná ní quide-í ñuú-ndó-á ñi xini-ndó ñá, te sá ndéé ama-gá cuihnú-yu dóo ndàhú te cunu cóo-yu núú yáá cuendá sá ndíxí cuèchi iní-yu sá ñà túú quide váha-yu ni cùu. ²² Dico sáá nduu te ío-gá dandòho ñaha Yá Ndiöxí xii-ndo dàcúxí

ñáyiú ñuú Tìrú ndihí ñáyiú ñuú Sidón.

²³ Te nchòhó cue ñáyiú ñuú Capèrnaúm ío quide cahnu-ndo mee-ndo, te quide iní-ndó sã sã cuándaa-ná-ndó àndiu, dico ñháá chí núú ùhú núú ndàhú nduu táhú-ndó cùndecu-ndo. Te núu dicó ñuú Sòdomá ní quide-í nchaa sã vã yõ tnàhí ndàcu cada datná ní quide-í ñuú-ndó ñi xini-ndó ñá, te ñáyiú-áⁿ vã náá-yu chí cundecu-ní-yu ndéé vitna ni cùu. ²⁴ Te na càchí tnúhu-í xii-ndo sã sáá nduu te ío-gá dandòho ñaha Yá Ndiöxí xii-ndo dàcúxí ñáyiú ñuú Sòdomá —càchí-gá xãhaⁿ-gã xii nchaa ñáyiú ñuú-áⁿ.

Jèsús cuíní-gá sá túhá ñàha ñáyiú xii-gá
(Lc. 10:21-22)

²⁵ Te sátá xãⁿ te Jèsús ní ngüíta-gá càháⁿ ndihí-gá Tãtã-gã Dútú Ndiöxí, te xãhaⁿ-gã:

—Yòhó Tãtã-í Dútú Ndiöxí, ío chìñuhu ñaha-í xii-n chí ñiu-n tàxi tnùní-n àndiu ndihí ñuyíú-a, te dànehé-n cue ñáyiú nchaa tnúhu váha, te ñiu-ni ñáyiú-áⁿ cúu-yu ñáyiú ñá túú cutnùní iní-xi nchaa tnúhu càháⁿ cue tée càchí sá ío túha, te nchaa tnúhu váha-áⁿ ñà túú dàtúu-n núú ñáyiú càchí sá ío túha te ío váha sãá díquí-xi. ²⁶ Chí ducaⁿ cuíní-n cùnduu —cachí-gá xãhaⁿ-gã xii Tãtã-gã.

²⁷ Te xãhaⁿ-gã xii nchaa ñáyiú xĩndecu-áⁿ:

—Mee Tãtã-í Dútú Ndiöxí ní cachí-gá sá cùnu-í núú nchàandi túhú sá ío. Te vá yõ ñⁿ-gá xini nàcuáa sàni iní yúhú Déhe Dútú Ndiöxí, chí ñⁿ-dìi díi-ni mee-gã xini-gá nàcuáa sàni iní-í, te mee-í xini-í nàcuáa sàni iní méé-gã. Te nchaa ñáyiú càchí iní-í sá quíní-yu nàcuáa sàni iní Tãtã-í Dútú Ndiöxí te xĩtnúhu-í-yu, te vá yõ ñⁿ-gá xini chí ñiu-ni ñáyiú ducaⁿ xĩtnúhu-í-áⁿ xini-yu. ²⁸ Te nchaa nchòhó ñáyiú ñá túú ndècu váha, ñáyiú ñá túú nihí nàcuáa cada cundecu váha iní-xi quixi-ndo túha ñaha-ndo xii-í nàcuáa ducaⁿ cundecu váha iní-ndó. ²⁹ Te cuu vii cuu váha iní-ndó tnii-ndo nchaa tnúhu càháⁿ-í, te ío dacuàha-ndo, te ducaⁿ càda-ndo chí yúhú ío cahnu iní-í, te ío ndàhú iní-í. Te núu ducaⁿ na càda-ndo te ío váha cuu iní-ndó cundecu-ndo. ³⁰ Te tnii-ndo nchaa tnúhu càháⁿ-í chí ñá túú cùu-xi ñⁿ sá vèe, chí cada iní-ndó sã cúu-xi dàtná ñⁿ chìuⁿ ñamá —càchí-gá xãhaⁿ-gã xii-yu.

12

Cue tée xica cuu ndihi Jesús sàhnú-güedé yoco triú nduu ndetátú ñáyi

(Mr. 2:23-28; Lc. 6:1-5)

¹ Te ìⁿ nduu cùu-xi nduu ndetátú ñáyi ñùhu Jesús ichi ndihi cue tée xica cuu ndihi-gá, te ta yãha-gá ndihi-güedé ìⁿ xichi núú cáá triú te xixíhi-güedé docó ñúu xíãⁿ ní ngüíta-güedé sàhnú-güedé yoco triú-áⁿ, te ndihi ndaha-güedé quíⁿ-güedé quéé triú-áⁿ tá xèxi-güedé cuáháⁿ. ² Te cue tée cùu fariséú ní xiní-güedé nàcuáa quide cue tée xica cuu ndihi Jesús, núú ní xáhaⁿ-güedé xii-gá:

—¿Ná cuendá ducaⁿ quide cue tée xica cuu ndihi-n sahnú-güedé yoco triú, te vitna cùu-xi nduu ndetátú-í? Te ñá túú tàú-güedé ducaⁿ càda-güedé —càchí-güedé xáhaⁿ-güedé xii-gá.

³ Te Jèsús ní xáhaⁿ-gã xii-güedé:

—¿Náa ñá túú dàcuaha-ndo núú tùtú Yã Ndiòxí núú càháⁿ-xi nàcuáa ní quide ndí Dàvíí cútnàhá ní xíhí ndí docó ndíhi cue tée ní xica cuu ndihi ndí-ãⁿ? ⁴ Chi ndí-ãⁿ ní quíhu ndí vehe Yã Ndiòxí ní queheⁿ ndí pàá ní cuu í ndécú-ãⁿ ní xexi ndí ndíhi cue tée ní xica cuu ndihi ndí, te ñá túú tàú ndí sá dúcáⁿ càda ndí ndíhi cue tée-áⁿ ní cùu, chi mee-ni cuè dútú tàú-güedé caxi-güedé pàá-áⁿ ní cùu. ⁵ ¿Te náa ñá túú xini-ndó nàcuáa càháⁿ-xi núú tùtú ndí Moisés sá ncháá cuè dútú vã ndetátú-güedé nduu cùu-xi nduu ndetátú-ãⁿ? Te ñá díú ìⁿ cuéchi cùu-xi sá dúcáⁿ ñá túú ndetátú-güedé nduu cùu-xi nduu ndetátú. ⁶ Te na cächí tnúhu-í xii-ndo sã yùhú cùu-í tée ío-gá cùnùu ndecu ndíhi-ndo dacúxí veñúhu sá ío cùnùu. ⁷ Dico nchòhó chi ñá tècú tnùnì-ndó nàcuáa càháⁿ Yã Ndiòxí núú tùtú-gá núú cächí-xi: “Yùhú cuiní-í sá cùndàhú iní-ndó cuè tnaha ñáyi-ndo te ñá díú mèe-ni sá cáhni-ndó quiti nduu táhù-í”, duha cächí-gá núú tùtú-gá. Te núú dicó nchòhó tècú tnùnì-ndó ñá, te vã càháⁿ cuèhé-ndó cuendá nchaa ñáyi ñá túú ndècu cuéchi-xi. ⁸ Te yùhú Téè cùu ñani tnáhá-ndó ncháa-ndo, tnáhá-í ndécú ndíhi-í tnúhu ndee iní sá cùu-í nchaa ñáyi nàcuáa cáda-yu nduu ndetátú-ó-á —cächí-gá xáhaⁿ-gã xii-güedé.

Ìⁿ tée ní yíchí ìⁿ xio ndaha-xi
(Mr. 3:1-6; Lc. 6:6-11)

⁹ Te Jèsús ní xica-gá cuáháⁿ-gá, te cuánguihu-gá xití ìⁿ veñúhu. ¹⁰ Te xíãⁿ ndécú ìⁿ tée ní yíchí ìⁿ xio ndaha-dé. Te dava cue tée xíndecu-áⁿ ndúcú-güedé nàcuáa cada-güedé cacáⁿ cuéchi-güedé cuendá-gá núú cuè tée cùnùu, te ní xicáⁿ tnúhú-güedé núú-gã, te xáhaⁿ-güedé:

—Cächí tnúhu xii-ndí ñúu cuu cada tátna-o ìⁿ tée cùhú nduu cùu-xi nduu ndetátú-ó áⁿ ñáhá —cächí-güedé xáhaⁿ-güedé xii-gá.

¹¹ Te Jèsús ní xáhaⁿ-gã xii-güedé:

—Te nchòhó òré ná ngàunihnu ìⁿ mbéé-ndó ìⁿ déhvã cùnú te nàtava-ndo-dí cuéi cùu-xi nduu ndetátú-ó. ¹² Te ìⁿ ñáyi ío-gá cùnùu-yu dàcúxí ìⁿ mbéé, núú xíãⁿ tàú-ó sã cáda-ó sã vãha sá cúu-xi-yu cuéi cùu-xi nduu ndetátú-ó —cächí-gá xáhaⁿ-gã xii-güedé.

¹³ Te dàtnùnì ní xáhaⁿ-gã xii tée cùhú ndaha-xi-áⁿ:

—Ndacani ndaha-n —cächí-gá xáhaⁿ-gã xii-dé.

Te tée-áⁿ ñi ndacani-dé ndaha-dé, te òré-ni ní ndúha ní nduu-xi dàtná cáá íngá xio ndaha-dé. ¹⁴ Te cue tée cùu fariséú ní ndee-güedé xití veñúhu, te ní ngüíta-güedé ndátnúhu-güedé ñúu nása cada-güedé cahni-güedé Jèsús.

Nàcuáa sa ndéé tnunì cuendá Jèsús

¹⁵ Te sátá ñi cutnùnì iní Jèsús nàcuáa cuiní-güedé cada ñaha-güedé xii-gá te ní xica-gá cuáháⁿ-gá, te ío vãi ñáyi nchícúⁿ ñáhá xii-gá cuáháⁿ, te tnáhá cue ñáyi cùhú nchícúⁿ ñáhá xii-gá cuáháⁿ, te ní quide tátna-gá cue ñáyi-áⁿ. ¹⁶ Te ní xáhaⁿ-gã xii-yu sá vã càháⁿ-yu yoo cùu-gá. ¹⁷ Te ducaⁿ ñi cuu chi ní quee ndáá-xi nàcuáa ní xáhaⁿ Yã Ndiòxí xii ndí Chàíá tée ní xóo càháⁿ tnúhu-gá ndéé sanaha ñi chídó tnùnì ndí núú tùtú-gá, te duha nduu tnúhu ní xáhaⁿ-gã:

¹⁸ Téè-a cùu-dé tée ní sani iní-í sá cùnú cuéchi-dé núu-í,

te ío cùu iní-í-dé, te cùdí iní-í-dé.

Te yùhú cuañaha-í Espiritú-í cundecu ndíhi-dé,

te díu-dé cúñaha-dé xii nchaa ñáyi ñuyú sã yùhú ío ndáá quidè-í.

19 Te vá dácáá-dé tnúhu cáháⁿ-dé ndíhi ñáyiú, te ni vǎ cáná sàa-dé òré cáháⁿ-dé,

te ni vǎ yǒ níhí tnúhu nása cáháⁿ-dé cuhuⁿ-dé ichi.

20 Te ni ñà túú ñà cada-dé cue ñáyiú cùu datná ìⁿ tnu ndóó sá cuíní-xi tnáhnú, te ñiú-ni ñáyiú-áⁿ cúú tucú-yu dàtná ìⁿ mèchá càndíl sá ïo quène ñúhmá te cuíní-xi ndahvá.

Te ducaⁿ sàtnahá-xi cùu ñáyiú-áⁿ chi ñá túú níhí ndéè-yu cundecú-yu sá cúú-xi-í, te mee-ni sǎ vǎha cada ñaha-dě xii-yu,

te ñiú-ni ducaⁿ càda-dé ndéé sáá nduu cùtnuní iní nchaa ñáyiú sá ïo ndáá quidé-dě.

21 Te nchaa ñáyiú níhí ñuyúú ïo cundee cùu cahnu iní ñáhǎ-yu xii-dé.

Duha ní xáhaⁿ-gǎ xii ndíi Chàíá ní chídó tnùní ndíi núú tütú-gǎ.

Càchí-güedé sá ndécú ndíhi Jesús espíritú cùndíhi yucu ñávǎha

(Mr. 3:20-30; Lc. 11:14-23; 12:10)

22 Te ní quexìo ìⁿ úú cue téé núú ndécú Jèsús, te ndèca-güedé ìⁿ téé ñíhí te cuàá-dé, te yíhi ñaha espíritú cùndíhi yucu ñávǎha xii-dé, te Jèsús ní queñuhu-gǎ espíritú cùndíhi yucu ñávǎha yíhi ñaha xii-dé, te òré-ni-áⁿ ní cuu ní nacáháⁿ-dé te ní ndúha núú-dé. 23 Te nchaa ñáyiú xíndecu-áⁿ ïo ní cuñúhu-yu sá dúcáⁿ ní quide-gǎ, te ní xítñahá-yu:

—Váa téé-a cùu-dé ñaní tnáhá ndíi Dàvíi téé tendaha Yǎ Ndióxi quixi ñuyúú-a — càchí-yu xítñahá-yu.

24 Te cue téé cùu fariséú ní tecú dóho-güedé nàcuáa ndùu tnúhu xítñahá-yu, núu xǎⁿ ní xítñaha-güedé:

—Téé-a ndèñuhu-dé nchaa espíritú cùndíhi sácuíhná yíhí ñaha xii ñáyiú, chi ñiú-ni sácuíhná-áⁿ chíndèe ñaha-xi xii-dé te ñiú-ni-xi tàxi tnuní-xi nchaa espíritú-áⁿ — duha ní xítñaha-güedé.

25 Te Jèsús ní cutnùní iní-gǎ nàcuáa ndùu tnúhu ní xítñaha-güedé, núu ní xáhaⁿ-gǎ xii-güedé:

—Te nchòhó xìní-ndó sǎ nǔu ìⁿ téé yíndaha ìⁿ nacióⁿ vá cúú ìⁿnuu-dé ndíhi cue téé cùndíhi-dé, te vá cùdǐi-dé cunuu-dě. Te ñiú-ni ducaⁿ sàtnahá tucu-xi

cùu tucu cue téé cùchiuⁿ ìⁿ ñuú, chi núu vá cúú ìⁿnuu-güedé cundecu-güedé, te vá cùdǐi-güedé cundecu-güedé taxi tnùní-güedé. Te ñiú-ni ducaⁿ sàtnahá tucu-xi cùu cue ñáyiú xíndecu ìⁿ-ni vèhe,

chi núu vá cúú ìⁿnuú-yu cundecú-yu te vá cùdǐi-yu cundecu càhnú-yu. 26 Te núu sácuíhná ducaⁿ quide-xi queñuhu-xi cue espíritú cùndíhi-xi yíhi ñaha xii ñáyiú ña,

te ñá túú cùu ìⁿnuu-xi ndecu-xi te núu ducaⁿ, te vá cùdǐi sácuíhná-áⁿ cundecu-xi taxi tnùní-xi te núu ducaⁿ quide-xi. 27 Te duha cáháⁿ-í chi nchòhó càchí-ndó sǎ chíndèe ñaha sácuíhná xii-í queñuhu-í nchaa

espíritú cùndíhi-xi yíhi ñaha xii ñáyiú. Te núu yúhú quidé cuèndá-ndó sǎ sácuíhná chíndèe ñaha-xi xii-í, te xìni ñuhu-xi cada cuèndá-ndó yòo chíndee ñaha xii cue téé

xíca cuu ndíhi-ndo queñuhu-güedé nchaa espíritú cùndíhi yucu ñávǎha yíhi ñaha xii ñáyiú. Te mee-güedé càchí-güedé sá nchòhó

ñá túú cáháⁿ ndáá-ndó sǎ dúcáⁿ cáháⁿ-ndó. 28 Dico yúhú chi Espíritú Yǎ Ndióxi chíndèe ñaha-xi xii-í queñuhu-í nchaa espíritú

cùndíhi sácuíhná yíhí ñaha xii ñáyiú, te sá dúcáⁿ chíndee ñaha Espíritú-gǎ xii-í, xǎⁿ cùtnuní sá sà ní sáá nduu cuíní-gǎ ndíhu ndaha ñaha-gǎ xii-ndo.

29 'Te nchòhó xìní-ndó sǎ cuè ñadúhú chi vá ndácú-güedé cuèndá-ni quíhu-güedé duhu-güedé vehe ìⁿ téé ío ndee, chi dǐhna-gǎ xìní ñuhu-xi tníi-güedé téé-áⁿ

dacùtu ñaha-güedé xii-dé dàtnuní ducaⁿ te ndacu-güedé duhu-güedé nchaa sá ndécú ndíhi-dé.

30 'Te nchaa ñáyiú ñá túú cùndíhi ñaha xii-í, te cùu úhú iní ñáhǎ-yu. Te nchaa ñáyiú ñá túú chíndee ñaha xii-í, te dàquee tíhǔ-yu

chìuⁿ quide-í.

31 'Te na càchí tnúhu-í xii-ndo sǎ ncháá ñáyiú quide nchaa sá cuèhé sá dúhá cuu cada càhnú iní ñáhǎ Yǎ Ndióxi xii-yu,

te ñiú-ni ducaⁿ cùu cada cahnu iní-gǎ nchaa tnúhu cuèhé tnúhu duha cáháⁿ-yu. Dico cue ñáyiú na cáháⁿ úhú cuèndá

Espíritú-gǎ, te ñáyiú-áⁿ vǎ cádá càhnú iní ñáhǎ tnáhí-gǎ xii-yu. 32 Te nchaa ñáyiú na cáháⁿ úhú cuèndá yúhú Téé cùu ñaní

tnáhǎ-yu ncháá-yu, te cuu cada càhnú iní ñáhǎ Yǎ Ndióxi xii-yu. Dico cue ñáyiú na

càháⁿ úhú cuendá Espíritú-gá te vá cáda càhnu iní ñáhá tnàhí-gá xii-yu cuèi vitna ndècu vívũ-yu, te cuèi na cùú-yu.

Ndi dííⁿ núú yutnu xini-ó nã yutnu cùu-xi cuendá sã sãvidí-xi (Lc. 6:43-45)

33 "Te nchòhó xini-ndó sã ndi dííⁿ núú yutnu xini-ó nã yutnu cùu-xi cuendá sã sãvidí-xi, te xini-ó sã ncháá yùtnu váha cùuⁿ mee-ni sãvidí váha, dico nchaa yutnu sã ñà túú váha te cùuⁿ mee-ni sãvidí sã ñà túú váha. Te duha càháⁿ-í cuendá cada cuendá váha-ndo nàcuáa ndùu chiuⁿ quide-ndo ìⁿ ìⁿ-ndo cuendá ducaⁿ cùtnuní ná ñáyiú cùu-ndo. 34 Dico nchòhó cúú-ndó dàtná ìⁿ cóo dèéⁿ chi ío cuihna iní-ndó, te vá cání iní-ndó sã ndácú-ndó càháⁿ-ndó ìⁿ tnúhu váha, chi ío cuihna iní-ndó. Te nchòhó xini-ndó sã ncháá ñáyiú càháⁿ-yu nání véxi iní-yu. 35 Te nchaa ñáyiú váha iní-xi càháⁿ-yu tnúhu váha, chi ñu-ni tnúhu váha-áⁿ ñúhú iní-yu. Te nchaa ñáyiú cuihna iní-xi càháⁿ-yu tnúhu cuèhé tnúhu duha, chi ñu-ni tnúhu cuèhé tnúhu duha-áⁿ ñúhú iní-yu. 36 Te na càchí tnúhu-í xii-ndo sã ná sãá nduu càda ndáá Yã Ndiõxí cuèchi nchaa nchòhó ñáyiú ndècu ñuyíú-a, te nchaa tnúhu cuèhé tnúhu duha càháⁿ-ndó càháⁿ-gá sã ñà túú ní quide váha-ndo sã dúcáⁿ ñí càháⁿ-ndó tnúhu-áⁿ. 37 Te nàcuáa ndùu tnúhu ní càháⁿ-ndó ìⁿ ìⁿ-ndo, te ducaⁿ càháⁿ Yã Ndiõxí te núú ndècu cuèchi-ndo àdi ñà túú ndècu cuèchi-ndo. Te núú ñà túú cuèchi-ndo te càcu-ndo, dico núú ndècu cuèchi-ndo te vá càcu-ndo —càchí-gá xãháⁿ-gã xii cue tée cùu fariséú-áⁿ.

Cue tée cuení sã cáda Jèsús ìⁿ sã vã yõ tnàhí ndàcu cada (Mr. 8:12; Lc. 11:29-32)

38 Te cue tée cùu fariséú, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés xãháⁿ-güedé xii Jèsús:

—Mèstrú, cuení-ndí cada-n ìⁿ sã vã yõ tnàhí ndàcu cada cuendá ducaⁿ cùtnuní iní-ndí sã Yã Ndiõxí chindèe ñaha-gá xii-n —càchí-güedé xãháⁿ-güedé xii-gá.

39 Te Jèsús ní xãháⁿ-gã xii-güedé:

—Ñáyiú ndècu ichi cuehé ichi duha ñà túú cuení-yu tníⁿ-yu tnúhu càháⁿ Yã Ndiõxí, te ñáyiú-áⁿ cuení-yu cada-í ìⁿ sã vã yõ tnàhí ndàcu cada nacuaá cutnùní iní-yu

núu ndáá sã Yã Ndiõxí chindèe ñaha-gá xii-í. Dico yúhú chi ñà túú nãgá cada-í quini-yu, chi sa ñihí-yu tnúhu nàcuáa ní yáha ndíi Jònás tée ní xóo càháⁿ tnúhu Yã Ndiõxí ndéé sanaha, te ñu-ni ducaⁿ yáha yúhú tucu. 40 Chi ndíi Jònás-áⁿ ñí xúhuⁿ ndíi úní nduu úní níú xití ìⁿ chácá càhnú vñhi nani ballená. Te ñu-ni ducaⁿ yáha yúhú Tée cùu ñaní tnàhá-ndó nchaa-ndo, chi úní nduu úní níú cuhuⁿ-í xití ñuhu. 41 Te na sãá nduu càda ndáá Yã Ndiõxí cuèchi nchaa ñáyiú ndècu ñuyíú-a, te dàvá-áⁿ cachí nchaa ñáyiú ñuú Nínivé sã ñà túú ní quide ndáá nchaa ñáyiú ndècu vitna, te ducaⁿ càháⁿ-yu chi mèe-yu ní dáñã-yu ichi cuèhé ichi duha cùtnàhá ní sáháⁿ ndíi Jònás ñuú-yu ní càháⁿ ndíi tnúhu Yã Ndiõxí núú-yu. Dico vitna iha ndècu ndihí ñaha-ndo xii yúhú, te ñu-í ío-gá cùnùu-í dàcúxí ndíi Jònás. 42 Te nduu càda ndáá Yã Ndiõxí cuèchi nchaa ñáyiú, te dàvá-áⁿ quini-ndó ìⁿ ñadihí ñaha ní xindaha ìⁿ nacióⁿ cáá ndaa xio datni núú quéné nchicanhii, te ñaha-áⁿ ío xica ñí xíndecu-aⁿ te ní sáháⁿ-aⁿ ní xíndedóho-aⁿ nchaa tnúhu ní càháⁿ ndíi Salòmón, chi ndíi-áⁿ ío ní sáá sã xini tnùní ndíi. Te tnàhá ñaha-áⁿ càháⁿ-aⁿ sã ñà túú ní quide ndáá nchaa ñáyiú ndècu vitna. Dico vitna iha ndècu ndihí ñaha-ndo xii yúhú, te ñu-í ío-gá cùnùu-í dàcúxí ndíi Salòmón.

Espíritú cùndihí yucu ñávãha sã nãchòcãva xito cùu uú (Lc. 11:24-26)

43 "Te òré ná quée ñaha ìⁿ espíritú cùndihí yucu ñávãha xii ìⁿ ñáyiú, te cuáhã-xi ndècu-xi ìⁿ xichi núú cùndècu-xi te ñà ñihí-xi te ní sani iní-xi: 44 "Vãha-gá núhú tucu-í núú ñí xíndecu-í", duha ní sani iní-xi. Te cuánuhú-xi, te òré ní nasáá-xi, te ní xini-xi sã cáá iní ñáyiú-áⁿ dàtná cáá-ñã ìⁿ vehe ní natíhú ní nduu vií-ná te vá yõ-gã ndécú. 45 Te sãtã dúcáⁿ te ní xica-xi cuáhã-xi cuándúcú-xi úsã tnàhá espíritú cùndihí-xi sã nèhé víhí-gã xiquide. Te òré ní ñihí-xi cue espíritú-áⁿ te ndèca ñaha-xi cuáhãⁿ cuendá ngúndecu ndihí-xi ñáyiú-áⁿ. Te ñáyiú-áⁿ uuⁿ-gã nándi yáha-yu dàcúxí ndéé díhna. Te ñu-ni ducaⁿ sãtnahã-xi yáha nchaa ñáyiú cuihna iní-xi ndècu ñuyíú-a vitna —càchí-gã xãháⁿ-gã xii-güedé.

Cue ñani Jèsús ndihi náná-gã
(Mr. 3:31-35; Lc. 8:19-21)

⁴⁶ Te càháⁿ dúcáⁿ-ní Jèsús ní quexìo náná-gã ndihi cue ñani-gã cuini-yu càháⁿ ndihi ñàhá-yu xii-gã, te ní ngúnu tñi-yu ndàa quehé vehe núú ndécú-gã. ⁴⁷ Te ñⁿ cue ñáiyu xĩndecu-áⁿ ní xáhãⁿ-yu xii-gã:

—Ní quexìo náná-n ndihi cue ñani-n xĩnutñi-yu quehé, te cuini-yu càháⁿ ndihi ñàhá-yu xii-n —càchí ñáiyu-áⁿ xáhãⁿ-yu xii-gã.

⁴⁸ Te ní xáhaⁿ-gã xii ñáiyu ducaⁿ xáhaⁿ xii-gã-áⁿ:

—Te cachí tñuhu yóndi-gã ñáiyu cùu datná ñàhá-í ndihi datná cue ñani-í —càchí-gã xáhaⁿ-gã xii ñáiyu-áⁿ.

⁴⁹ Te ní dánèhé ñàhá-gã nchaa cue téé xica cuu ndihi-gã, te ní xáhaⁿ-gã xii ñáiyu-áⁿ:

—Cue téé-a cùu-güedé datná ñàhá-í, ndihi datná cue ñani-í. ⁵⁰ Te nchaa ñáiyu na càda nchaa nacuáa càháⁿ Tàtà-í Dútú Ndiöxí Yaá ndécú àndiu, te ñáiyu-áⁿ cùu-yu datná ñàhá-í, ndihi datná cue ñani-í, ndihi datná cue cùu-í —càchí-gã xáhaⁿ-gã xii ñáiyu ducaⁿ ní dáyaⁿha tñuhu núú-gã-áⁿ.

13

Nàcuáa quide téé cuángacáⁿ triú
(Mr. 4:1-9; Lc. 8:4-8)

¹ Te ñi-ni nduu-áⁿ ní quee Jèsús vehe núú ndécú-gã, te ní xica-gã cuáhãⁿ-gã ní ngóo-gã yuhu làgúná. ² Te ío cuéhé ñáiyu ní tacá núú ndécú-gã. Te sá dúcáⁿ ño cuéhé ñáiyu núu ní quée-gã xití ñⁿ bàrcú nùtñi xití ndute làgúná-áⁿ, te núú xĩãⁿ ní ngóo-gã, te nchaa ñáiyu-áⁿ xixúcu-yu yuhu làgúná-áⁿ. ³ Te Jèsús ní ngüíta-gã ní cani-gã titñi cuendú núu-yu nacuáa tecú tñuni-yu nchaa nacuáa ndùu tñuhu-gã, te xáhaⁿ-gã xii-yu:

—Ñⁿ téé cuángacáⁿ-dé triú, ⁴ te òré ní ngüíta-dé dāngoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní nadatàcá-güedi. ⁵ Te dava ní ngava ñuhu yadi núú yíhí vihi yúú, te ndiñi-ni ní xínu-xi chi ñá túú càvihi ñuhu. ⁶ Dico òré ní nayehe te ñá túú ní cùndee iní-xi chi ní yíchí-xi, chi ñá túú ní ñihí quíhíⁿ cùnú yóho-xi. ⁷ Te dava ní ngava núú yúcu

ndiquíⁿ tnu ññu, te ñⁿnuu-ni ní xínu-xi ndihi tnu ññu. Te tnu ññu-áⁿ ní sañu-xi te ní dánáá-xi nchaa triú sá ní xínu-áⁿ. ⁸ Dico dava-gã triú ní ngava núú ndécú ññu cocoⁿ te xĩãⁿ ío váha ní cuu, chi núú ñⁿ-ní triú-áⁿ te dava yoco-xi ní nguíhi ócò úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ñⁿ ciendú triú-xi. ⁹ Te vitna nchaa nchòhó ñáiyu ní xĩndedóho tñuhu ní càháⁿ-í-a, te ío váha chí cuáha cuendá —càchí-gã xáhaⁿ-gã xii-yu.

Cue téé xica cuu ndihi Jèsús ndúcu tñuhu-güedé núú-gã ná cuendá caní-gã cuendú núú ñáiyu

(Mr. 4:10-12; Lc. 8:9-10)

¹⁰ Te cue téé xica cuu ndihi Jèsús ní sáhãⁿ-güedé ndéé núú-gã, te xáhaⁿ-güedé xii-gã:

—Ndùcu tñuhu-ndí núú-n núu ná cuendá ducaⁿ mée-ni cuendú caní-n núu ñáiyu —càchí-güedé xáhaⁿ-güedé xii-gã.

¹¹ Te ní xáhaⁿ-gã xii-güedé:

—Nchòhó chi sa càchí tñuhu Yá Ndiöxí xii-ndo ñⁿ sá vātá quini-gã-ndó, chi càchí tñuhu-gã nacuáa quide-gã ndiñu ndaha-gã ñáiyu, dico dava-gã ñáiyu chi ñá túú nã xáhaⁿ-gã xii-yu. ¹² Te nchaa ñáiyu sa tècú tñuni te uuⁿ-gã cuita tecú tñuni-yu quíhíⁿ, te nchaa ñáiyu ñá túú tècú tñuni te uuⁿ-gã vá tècú tñuni-yu. ¹³ Te xĩãⁿ núu duha caní-í mee-ni cuendú núu-yu, chi cuéi na quini-yu nchaa nacuáa cuu dico ní vã cútnúni iní-yu ná cuendá ducaⁿ cùu, te cuéi na cùndedóho-yu dico ní vã tècú tñuni-yu. ¹⁴ Te ñi cuendá ñáiyu-áⁿ ní xáhaⁿ Yá Ndiöxí xii ndí Chàíá téé ní xóo càháⁿ tñuhu-gã ndéé sanaha ní chídó tñuni ndí núú tütú-gã núú càchí-xi:

Nchaa nchòhó cùndedóho-ndo tñuhu càháⁿ-í, dico ní vã tècú tñuni-ndó, te cuéi na quini-ndó nchaa nacuáa cada-xi, dico ní vã cútnúni iní-ndó nã cuendá ducaⁿ quide-xi.

¹⁵ Te ducaⁿ chí cùu-ndo ñáiyu ío sàá iní-xi, te cùu-ndo ñáiyu ñá túú tècú tñuni tñuhu càháⁿ-í,

te cùu tucu-ndo datná cue ñáiyu cuáa chí ñá túú cuini-ndó càda cuendá-ndó tñuhu-í,

te ní ñá túú cuini-ndó cùndedóho-ndo,

te ni ñà túú cuiní-ndó tècú tnùnì-ndó,
te ni ñà túú cuiní-ndó nàtuha ñaha-ndo
xii-í cuendá cada càhnu iní-í nchaa
yicá cuèchi-ndo nàcuáa ío váha cuu
iní-ndó cùndecu-ndo.

Duha ní xáhaⁿ Yá Ndiõxí xii ndí Chàíá ní
chídó tnùnì ndí núú tütú-gá.

¹⁶ 'Dico nchòhó chi ío váha táhú-ndó
chi cùtnuní iní-ndó nchàa nacuáa quide-í,
te cùtnuní tucu iní-ndó nchàa nacuáa
ndùu tnúhu càháⁿ-í. ¹⁷ Te na càchí tnúhu
ndáá-í xii-ndo sã ío vâi cue téé ní xóo
cáháⁿ tnúhu Yá Ndiõxí ndéé sanaha ndíhi
nchaa dava-gá ñáyiú váha iní-xi ní cuiní-yu
cundehé-yu nchaa sá ndéhé-ndó vitna
quide-í dico ñà túú ní xìní-yu, te ní
cuiní tucú-yu cundedóho-yu nchaa tnúhu
ndédóho-ndo vitna càháⁿ-í te ñà túú ní
xíndedóho-yu.

*Jèsús càháⁿ-gá nàcuáa quèe-xi cuendá téé
cuángacáⁿ triú*

(Mr. 4:13-20; Lc. 8:11-15)

¹⁸ Te vitna cundedóho váha-ndo na càchí
tnúhu-í xii-ndo nàcuáa quèe-xi cuendú téé
cuángacáⁿ triú ní cani-í núú-ndó. ¹⁹ Te
triú sá ñi quene ndava ní ngava ndéé
ichi, xíãⁿ cúú-xí dàtná ñáyiú ní xíndedóho
tnúhu sá càháⁿ nàcuáa ndíhu ndaha ñaha
Yá Ndiõxí xií-yu, dico ñà túú ní cuiní-yu
tní-yu, chi sácuhná cuáháⁿ-xi nàdatuhú-xi
iní-yu cuendá sá vã cànchicúⁿ nihnú-yu
nàcuáa càháⁿ tnúhu-áⁿ. ²⁰ Te triú sá ñi
ngava ñuhu yadi núú yíhi víhi yúú-áⁿ, xíãⁿ
cúú-xí dàtná ñáyiú ní xíndedóho tnúhu Yá
Ndiõxí te díí iní ní tní-yu tnúhu-gá, ²¹ dico
òré ná ngüíta ñáyiú cúcuèhé ñáhã-yu xií-yu
àdi nándi-gá sá yãha-yu sá cuendá tnúhu-gá,
te ñà cùndèe iní-yu chi dàñá-yu tnúhu-gá
cuendá sá ñà túú nihí ndéé-yu. ²² Te triú
sá ñi ngava núú yúú ndíquíⁿ tnu ìñu-áⁿ,
xíãⁿ cúú-xí dàtná ñáyiú ní tecú dóho-xi
tnúhu Yá Ndiõxí dico cuèé cuèé ní nacua-
naá-yu tnúhu-gá, chi cuendá mee-ni sã ío
ñuyíú-a ñuhu iní-yu, ndíhi cuendá sá ío
sàni iní-yu cuu cuicá-yu, te mee-ni nchàa
xíãⁿ ñúhú iní-yu te ñà túú ñuhu iní-yu
tnúhu sá ñi xíndedóho-yu-áⁿ nàcuáa cada
váha-yu cundecú-yu. ²³ Dico triú sá ñi
ngava núú ndécú ñuhu cocoⁿ-áⁿ, xíãⁿ cúú-xí
dàtná ñáyiú ní xíndedóho tnúhu Yá Ndiõxí
te quide-yu nàcuáa càháⁿ tnúhu-gá. Te cada

iní-ndó sã ñáyiú-áⁿ cúú-yu dàtná triú sá ñi
ngüihi yoco-xi ócú úxí triú-xi, ndíhi triú sá
ñi ngüihi yoco-xi únídico triú-xi, ndíhi triú
sá ñi ngüihi yoco-xi ñi ciendú triú-xi. Ducaⁿ
sãtnahá-xi cúú-yu chi ío váha quide-yu —
càchí-gá xãhaⁿ-gã xii-güedé.

*Cuendá nchaa cúhú sã ñà túú vãha xñu
xiti triú*

²⁴ Te Jèsús ní cani-gá ñi cuendú núú ñáyiú
nàcuáa tecú tnùnì-yu tnúhu-gá, te xãhaⁿ-gã
xií-yu:

—Te vitna na càni-í ñi cuendú núú-ndó
nàcuáa tecú tnùnì-ndó nàcuáa cada-xi òré
ndíhu ndaha ñaha Yá Ndiõxí xii ñáyiú. ñi
téé ío váha triú ní sacáⁿ-dé núú ñúhú-dé.

²⁵ Dico xiti níú ní sáháⁿ ñi téé cùu úhú iní
ñáhá xii-dé, te ní dǎngoyo-dé ndíquíⁿ yúú
sã ñà túú vãha núú ñi sacáⁿ-dé triú-áⁿ.

²⁶ Te òré vitna váha váha ní ngüíta-xi quene
yoco nchaa triú-áⁿ, te ní xínu coyo nchaa
yúú sã ñà túú vãha-áⁿ. ²⁷ Te cue téé xínu
cuechi núú téé ní sacáⁿ triú-áⁿ ñi xítnúhu
ñaha-güedé xii-dé sá dúcáⁿ ñi xínu cúhú sã
ñà túú vãha-áⁿ núú triú-dé, te xãhaⁿ-güedé:
“Patróóⁿ, ¿nása ní cuu núú ní xínu cúhú sã
ñà túú vãha núú triú-n, te ío váha càa triú ní
sacáⁿ-n ní cùu?”, cachí-güedé xãhaⁿ-güedé.

²⁸ Te téé cùu patróóⁿ-güedé-áⁿ ñi xãhaⁿ-dè
xii-güedé: “Ñi téé cùu úhú iní ñáhá nahi
xii-í ducaⁿ ñi quide-dé ní sáháⁿ-dé ní
dǎngoyo-dé ndíquíⁿ cúhú sã ñà túú vãha-áⁿ
núú triú-í núu ducaⁿ ñi xínu coyo-xi”,
càchí-dé xãhaⁿ-dè xii-güedé. Te cue téé
xínu cuechi núú-dé ní xãhaⁿ-güedé xii-dé:

“Te núu cuiní-n te quíhíⁿ-ndí tnuhu-ndí
nchaa cúhú sã ñà túú vãha ní xínu núú
triú-n”, càchí-güedé xãhaⁿ-güedé xii-dé.

²⁹ Te téé cùu xitohó triú-áⁿ ñi xãhaⁿ-dè xii
cue téé xínu cuechi núú-dé-áⁿ: “Ñáhá, vá
quíhíⁿ-ndó tnúhu-ndo, chi òré tnuhu-ndo
te tnáhá-ni triú quene chi càa víhi cúhú-áⁿ.

³⁰ Vãha-gá chí dáñá ná cuíhnu nahi ndéé
ná cùu triú, te dàtnuní nducu-í cue téé
quíhíⁿ-güedé tnuhu-güedé nchaa cúhú sã
ñà túú vãha-áⁿ, te dacùtu nuhní-güedé te
cahmi-güedé, te dàtnuní nàquehdé-güedé
triú nacani-güedé te nataxúha-güedé xiti
yacá-í”, càchí-dé xãhaⁿ-dè xii-güedé —duha
ní cani Jèsús cuendú núú-yu.

Cuendá ndíquíⁿ yutnu nàni mostázá
(Mr. 4:30-32; Lc. 13:18-19)

³¹ Te Jèsús ní caní tucu-gá ingá cuendú núú ñáyíu nàcuáa tecú tnùnì-yu tnúhu-gá, te xáhaⁿ-gá xií-yu:

—Na càni-í ìⁿ cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiöxí xii ñáyíu. Ìⁿ téé ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dé.

³² Te ndíquíⁿ yutnu-áⁿ ìo chàhu, dico òré ná xĩnu-xi te sàhnu-gá-xi dàcúúxí nchàa cùhú, te cue qui^ti ndàva núú tàchí cádũha-güedi tacá-güedi núú dìté-xi —càchí-gá xáhaⁿ-gá xií-yu.

Nàcuáa quide levadurá
(Lc. 13:20-21)

³³ Te Jèsús ní xáhaⁿ tucu-gá xii ñáyíu:

—Te na càchí tnúhu tucu-í xii-ndo nàcuáa cada-xi òré ndíhu ndaha ñaha Yá Ndiöxí xii ñáyíu. Ìⁿ ñadìhí ní chihi-aⁿ levadurá úní arròbá yuchi triú, te levadurá-áⁿ ñí quide-xi ní ndaa nihí yusaⁿ-áⁿ —càchí-gá xáhaⁿ-gá xií-yu.

Mee-ni cuendú ní caní Jèsús núú ñáyíu
(Mr. 4:33-34)

³⁴ Te mee-ni cuendú ní caní Jèsús núú ñáyíu ndí tnahá òré ní dánèhé ñáhá-gá xií-yu tnúhu-gá. ³⁵ Te ducaⁿ ñí quide-gá chi ní quee ndáa-xi nàcuáa ní chídó tnùnì ìⁿ téé ní xóo cáháⁿ tnúhu Yá Ndiöxí ndéé sanaha núú tütú-gá núú càchí-xi:

Mee-ni cuendú caní-í núú ñáyíu òré danèhé-í-yu tnúhu-í cuendá tecú tnùnì-yu,

te nchaa tnúhu sá vätá yõo-gá cundedóho danèhé-í-yu, te nchaa tnúhu-áⁿ ndúú yùhu-xi ndéé cúnàhá ní ngáva ñuyíú. Duha ní chídó tnùnì téé-áⁿ núú tütú-gá.

Jèsús càháⁿ-gá nàcuáa quèe-xi cuendá cùhú sã ñà túú vãha càa xití triú

³⁶ Te Jèsús ní dándácá-gá ñáyíu te cuánuhú-gá vehe, te cue téé xica cuu ndìhi-gá ní xáhaⁿ-güedé xii-gá:

—Cachí tnúhu xii-ndí nása quèe-xi cuendá cùhú sã ñà túú vãha càa xití triú —càchí-güedé xáhaⁿ-güedé xii-gá.

³⁷ Te Jèsús ní xáhaⁿ-gá xii-güedé:

—Téé càchí-í ní sacáⁿ triú cávãha-áⁿ cùú yùhú Téé cùu ñanì tnáhá-ndó nchàa-ndo.

³⁸ Te nchaa núú ñí sacáⁿ téé-áⁿ triú cùú-xí ñuyíú. Te tatá váha-áⁿ cùú-xí cuè ñáyíu yìndaha ñaha Yá Ndiöxí. Te nchaa cùhú sã ñà túú vãha-áⁿ cùú-xí ñáyíu yìndaha ñaha sàcuíhná.

³⁹ Te téé ní dãngoyo ndíquíⁿ cùhú sã ñà túú vãha núú triú-áⁿ cùú-dé mee sàcuíhná. Te nduu nàtehndé-ñã triú-áⁿ cùú-xí nduu ndìhi nihnu-ná nchaa sá ìo ñuyíú-a. Te nchaa ñáyíu nàquehndé triú-áⁿ cùú-yu mee-ni cuè espíritú xínú cuèchi núú Yá Ndiöxí.

⁴⁰ Te dàtná cada cue téé qui^hiⁿ tnuhu nchaa cùhú sã ñà túú vãha-áⁿ dàcùtu nuhní-güedé te cahmi-güedé, ducaⁿ sãtnahá-xi yáha nchaa ñáyíu cùndìhi yucu ñávãha na sàá nduu.

⁴¹ Te yúhú Téé cùu ñanì tnáhá-ndó nchàa-ndo tendaha-í nchaa espíritú xínú cuèchi núú-í qui^hiⁿ-xi nadatácá-xi nchaa ñáyíu sànu ichi cue tnaha ñáyíu-xi ichi cuèhé ichi duha, ndìhi nchaa dava-gá ñáyíu ñã túú quide váha, te nchaa ñáyíu-áⁿ xĩndecú-yu nchaa núú ndécú cuè ñáyíu yìndaha-í.

⁴² Te cue espíritú-áⁿ daqui^hiⁿ-xi cue ñáyíu-áⁿ núú ñúhú núú càyú, te yàcáⁿ ìo ndáhyú-yu te dicó rúhñú-ñã cuu núhu-yu sá sàtú iní-yu sá ndóhõ-yu. ⁴³ Te nchaa ñáyíu quide nchaa nacuáa cuínì Tãtä-yu Dútú Ndiöxí, ñáyíu-áⁿ ìo cunúú-yu cundecú-yu núú ndécú-gá táxi tnùnì-gá, chi cuú-yu dàtná nchícanhii dayèhé-yu cundecú-yu núú ndécú-gá. Te nchaa nchòhó ñáyíu ndédóho nchaa tnúhu càháⁿ-í-a, te ìo váha chí cuãha cuendá —càchí-gá xáhaⁿ-gá xii-güedé.

Cuendá ìⁿ sá ìo ndèyáhu

⁴⁴ Te Jèsús xáhaⁿ tucu-gá xii-güedé:

—Na càni tucu-í ingá cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiöxí xii ñáyíu. Ìⁿ téé ní naníhí-dé ìⁿ sá ìo ndèyáhu yìndúxi ìⁿ xichi, te ní nachindúxi tucu-dé ñu-ni núú ñí naníhí-dé-áⁿ, te ìo ní cudí^hi iní-dé sá dúcáⁿ ñí naníhí-dé xíãⁿ. Te ní xica-dé cuánuhú-dé te ní nadico-dé nchaa sá ndécú ndìhi-dé, te ní nacuaaⁿ-dé ñuhu núú dúcáⁿ ñí naníhí-dé xíãⁿ.

Cuendá ìⁿ sá ìo ndèyáhu nàni pèrlá

⁴⁵ Te na càni tucu-í ingá cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiöxí xii ñáyíu. Ìⁿ téé quide ndáhú ndúcú-dé sá naní pèrlá sá

io ndèyáhu. ⁴⁶ Te ní naníhí-dě ñáyi ndècu ndihí ìⁿ pèrlá sá io-gá ndèyáhu, te ní xica-dé cuánuhú-dé te ní nadico-dě nchaa sá ndécú ndihí-dé, te ní sáháⁿ-dé ní saaⁿ-dé pèrlá sá io-gá ndèyáhu-áⁿ.

Cuèndá ñunu tñi-güedé chácá

⁴⁷ Te na càni tucu-í ingá cuèndú núú-ndó nàcuáa tecú tñuní-ndó nàcuáa cada-xi òré ndihu ndaha ñaha Yá Ndiöxí xii ñáyi. Cue téé tñi chácá ní dáquëe-güedé ñunu-güedé xití ndute làmár tñi-güedé chácá, te dàcá nuu dàcá nihnu chácá cuànguee-güedi xití ñunu-áⁿ. ⁴⁸ Te òré ní cutnùní iní-güedé sá ní chítú ñunu-güedé, te ní natava-güedé ní nene yuhu làmár, te ní ngüíta-güedé nácaxi-güedé nchaa chácá-áⁿ. Te nchaa chácá vâha dàquëe-güedé-di xití tídihi, te nchaa chácá nèhé dāngoyo-güedé-di. ⁴⁹ Te dàtná ní quide cue téé-áⁿ ducaⁿ càda cue espíritú xínú cuèchi núú Yá Ndiöxí ná sàá nduu vâ cùndècu-gá nchaa sá iò ñuyú-a, chi cue espíritú-áⁿ daquëe diiⁿ-xi nchaa ñáyi ní quide váha tnuú nchaa ñáyi ñá túú ní quide váha. ⁵⁰ Te nchaa ñáyi ñá túú ní quide váha-áⁿ daquihíⁿ ñáhá-xí xii-yu núú ñùhú núú càyú, te yàcáⁿ ío ndáhyú-yu, te dícó rúhñú-nâ cuu núhu-yu sá sàtú iní-yu cuèndá sá ndóhõ-yu —càchí-gá xâhaⁿ-gá xii cue téé xica cuu ndihí-gá.

Cuèndá cue téé ndècu ndihí sá ñi quee túu díhna ndihí sá ñi quee túu saa

⁵¹ Te Jèsús ní xicáⁿ tñuhú-gá núú-güedé, te xâhaⁿ-gá xii-güedé:

—¿Ní tecú tñuní-ndó nàcuáa ndùu nchaa tñuhu ní cáháⁿ-í-áⁿ? —càchí-gá xâhaⁿ-gá xii-güedé.

Te ní xâhaⁿ-güedé xii-gá:

—Ní tecú tñuní-ndí —càchí-güedé xâhaⁿ-güedé xii-gá.

⁵² Te ní xâhaⁿ tucu Jèsús xii-güedé:

—Te núu ìⁿ téé dàcuaha ñaha xii ñáyi nchaa tñuhu ní chídó tñuní ndii Moisés ná cùtnuní iní-dé nàcuáa quide Yá Ndiöxí ndihu ndaha-gá ñáyi, te téé-áⁿ cúú-dě dàtná ìⁿ téé cùu xitohó vehe. Te téé cùu xitohó vehe-áⁿ ñi queñuhu-dé nchaa sá ñi quee túu díhna ndècu ndihí-dé, ndihí nchaa sá ñi quee túu saa. Te ducaⁿ sãtnahá-xi cùu téé-áⁿ te núu na cùtnuní iní-dé nàcuáa quide Yá Ndiöxí

ndihu ndaha-gá ñáyi —càchí-gá xâhaⁿ-gá xii-güedé.

Jèsús ndécú-gá ñuu núú ñi sañu-gá (Mr. 6:1-6; Lc. 4:16-30)

⁵³ Te sàtá ñi yâha ducaⁿ ñi cani Jèsús cuèndú núú-güedé, te ní xica-gá cuánuhú-gá. ⁵⁴ Te ní ndexìo-gá ñuu núú cúú ñuu-gá, te cuànguihu-gá xití veñúhu càa ñuu-áⁿ te ní ngüíta-gá dánèhé-gá ñáyi. Te nchaa ñáyi ndèdóho nchaa tñuhu càháⁿ-gá xicũñuhu-yu, te xitnàhá-yu:

—¿Nása ní cuu núu ío váha cùtnuní iní téé-a nàcuáa cunduu tñuhu cáháⁿ-dé, te quide-dé nchaa sá vâ yõ tñahí ndàcu cada-i? ⁵⁵ Te dícó déhe téé cùu carpinterú ndihí tá Màriá cúú-dě, te ñaní-dé cúú tẽ Jàcobó, ndihí té Chèé, ndihí té Ximú, ndihí té Jüdás. ⁵⁶ Te cue cúha-dé ndécú ndihí ñahá-yu xii-o ñuu-a. ¿Te nása ní quide-dé núu ndéé dàcáⁿ ío váha cùtnuní iní-dé nàcuáa cunduu tñuhu cáháⁿ-dé-i? —càchí-yu xitnàhá-yu.

⁵⁷ Te ñá túú ní cuini-yu cáháⁿ ndihí váha-yu Jèsús, dico mee-gá ní xâhaⁿ-gá xii-yu:

—Te núu ìⁿ téé càháⁿ tñuhu Yá Ndiöxí ná nàsáá-dé ñuu-dé, te nchaa ñáyi ñuu-dé-áⁿ ndihí nchaa ñáyi cùu ndimee-dé ñá túú nèhé-yu sá yíñuhu núú-dě, dico cue ñáyi nchaa dava-gá ñuu chi nèhé-yu sá yíñuhu núú-dě —càchí-gá xâhaⁿ-gá xii-yu.

⁵⁸ Te ñá túú ní quide Jèsús titní núú sã vâ yõ tñahí ndàcu cada ñuu-áⁿ, chi ñá túú ní cuini-yu quindáá iní ñáhã-yu xii-gá.

14

Nàcuáa ní cuu ní xihí té Juáá tée dàcuandute ñaha xii ñáyi

(Mr. 6:14-29; Lc. 9:7-9)

¹ Te diu-ni dàvá-áⁿ ñi níhí tẽ Hèrodés tñuhu nchaa nàcuáa quide Jèsús, te té Hèrodés-áⁿ cúú-dě téé tãxi tñuní distritú Galileá. ² Te ní xâhaⁿ-dè xii nchaa cue téé ndècu ndihí-dé:

—Téé dii cuèndú-xi nihí-ó-áⁿ cùu-dé té Juáá tée dàcuandute ñaha xii ñáyi, téé ní xihí ní cùu te ní ndoto-dé núu dàcáⁿ ndácú-dě quide-dé nchaa sá vâ yõ tñahí ndàcu cada —cachí-dé xâhaⁿ-dè xii-güedé.

³ Te ducaⁿ ñi cáháⁿ té Hèrodés chi mee-dè ní táuchíúⁿ-dè ní tñi ñaha-güedé xii té

Juàá, te ní dácútú ñàha-güedé xii-dé, te ní chihi ñàha-güedě vecaá. Te ducaⁿ ñi quide té Hèrodés-áⁿ sã cuendá ñàha nani Herodiás, ñàha ní cándeca ñani-dé té Lìpé, te ní naqueheⁿ ñàha-dě xii-aⁿ ndèca ñàha-dé.

⁴ Te té Juàá ní xáhaⁿ-dě xii té Hèrodés:

—Ñá túú ní quide váha-n dùha ní naqueheⁿ-n ñàha ní cándeca ñani-n —duha ní xáhaⁿ tẽ Juàá xii té Hèrodés.

⁵ Te sá dúcáⁿ ñi xáhaⁿ tẽ Juàá-áⁿ xii té Hèrodés, te ní cuini té Hèrodés-áⁿ cahni-dé té Juàá-áⁿ, dico ñá túú ní cùyi-dé chi ní yùhú-dé núú cuè ñáyiú, chi nchaá-yu ní cutnùni iní-yu sá tẽ Juàá cúú-dě ñi tée càháⁿ tnúhu Yá Ndiõxí. ⁶ Te ñi nduu ní quide té Hèrodés vico vehe-dé ní quide càhnu-dé nduu ñi cacu-dé. Te ndècu ñi déhe yoco ñàha nani Herodiás-áⁿ, te xíchí-áⁿ ñi quíhu-xi xití vehe núú cúú vico-áⁿ ñi xita saha-xi. Te núcóo té Hèrodés ndihi cue tée ní cáháⁿ-dé ndéhe-güedě, te ío ní cudíi iní-dé nàcuáa ní xita xíchí-áⁿ. ⁷ Te té Hèrodés-áⁿ ñi cacunehe-dé ndéé Yá Ndiõxí nàcuáa cutnùni iní xíchí-áⁿ sã ndáa cuañaha-dě núú ná cúú sã ná càcáⁿ-xi núú-dě. ⁸ Te xíchí-áⁿ ñi dácáhú iní ñàhá náná-xi xii-xi ná cúú sã càcáⁿ-xi núú tẽ Hèrodés, núú xiáⁿ ní xáhaⁿ-xi xii-dé:

—Cuini-í quehdé-n díquí tẽ Juàá tée dàcuandute ñàha xii ñáyiú te taxi-n, dico na cùhuⁿ ñi xití cóhó taxi-n —càchí-xi xáhaⁿ-xi xii-dé.

⁹ Te sá dúcáⁿ ñi xáhaⁿ-xi, te ní cundiýi té Hèrodés, dico ñá túú ní ñihí-dě nása cada-dé, chi ndèdóho ñáyiú òré ní cacunehe-dé Yá Ndiõxí sã ndáa cuañaha-dě ñi sã ná càcáⁿ-xi núú-dě. Te ní quide-dé nàcuáa ní xáhaⁿ-xi. ¹⁰ Chi ní táuchíúⁿ-dě ní sáháⁿ cue tée ní xehndé-güedé díquí tẽ Juàá òré yíhí-dě vecaá. ¹¹ Te ní chihi-güedé díquí-dě ñi xití cóhó te nèhe-güedé cuánuhú ní sãñaha-güedě xii xíchí-áⁿ, te xíchí-áⁿ ñi nacuáñaha-xi xii náná-xi.

¹² Te cue tée xica cuu ndihi té Juàá-áⁿ ñi sáháⁿ-güedé ní naqueheⁿ-güedé yiqui cùnú-dé ní chindúxi-güedé, te dàtnùni ní sáháⁿ-güedé ní xáhaⁿ-güedě xii Jèsús nàcuáa ní cuu.

Jèsús dácàxi-gá úhúⁿ mĩl cue tée te dèiⁿ ñáyiú dèhí ndihi landú
(Mr. 6:30-44; Lc. 9:10-17; Jn. 6:1-14)

¹³ Te Jèsús ní ñihí-gã tnúhu nàcuáa ní cuu ní xihí té Juàá. Te sátá xiáⁿ te cuánguee-gá ñi bàrcú cuáháⁿ-gá ñi xichi núú ñá túú ñáyiú ndècu, dico nchaa ñáyiú xĩndecu nchaa ñuú cáá yàtni xiáⁿ ñi ñihí-yu tnúhu sá cuáháⁿ-gá, te ní queé-yu ñuú-yu xica sahá-yu cuáháⁿ núú quidě-yu cuendá quexio Jèsús. ¹⁴ Te òré ní quexio Jèsús núú cuáháⁿ-gá, te ní quene-gá bàrcú, te ní xini-gá cuéhé víhí ñáyiú xixúcu-yu xiáⁿ, te ní cundáhú iní ñàhá-gã xii-yu, te ní quide tátna-gá nchaa ñáyiú cùhú ndihí-yu. ¹⁵ Te sátá ñi cuaa te ní sáháⁿ cue tée xica cuu ndihi Jèsús núú-gã, te xáhaⁿ-güedě xii-gá:

—Sa ní cuu dandàca-n nchaa ñáyiú-a chi sa ní cuaa, te na quihíⁿ-yu nchaa ñuú cáá yàtni iha cuaaⁿ-yu sá caxí-yu, chi núú ndécú-ó iha ñá túú tnàhí ná ío —càchí-güedé xáhaⁿ-güedě xii-gá.

¹⁶ Te Jèsús ní xáhaⁿ-gã xii-güedé:

—Ñàhá, vá dándàca-í-yu, váha-gá mee-ndo chĩ cuañaha sã ná caxí-yu —càchí-gá xáhaⁿ-gã xii-güedé.

¹⁷ Te ní xáhaⁿ-güedě xii-gá:

—Ñá túú nãgá ndécú ndihi-ndí, chi úhúⁿ duha-ná pàá ndihi úú-nã chácá ndécú ndihi-ndí —càchi-güedé xáhaⁿ-güedě xii-gá.

¹⁸ Te Jèsús ní xáhaⁿ-gã xii-güedé:

—Chí cánèhe paá-áⁿ ndihi chácá-áⁿ tàquixi iha —cachí-gá xáhaⁿ-gã xii-güedé.

¹⁹ Te Jèsús ní xáhaⁿ-gã xii nchaa ñáyiú sá ná ngõo-yu nchaá-yu núú ité cuíi càa xiáⁿ, te ní queheⁿ-gá ndi ùhúⁿ pàá-áⁿ ndihi ndi ndiúú chácá-áⁿ te ní ndacoto-gá andiú, te ní ndacáⁿ táhú-gã núú Yá Ndiõxí, te dàtnùni ní táhú cuèchi-gá pàá-áⁿ te ní sãñaha-gã xii cue tée xica cuu ndihi-gá ní dácãñu-güedé cue ñáyiú ní xexí-yu. ²⁰ Te nchaá-yu ní xexí-yu ní ndahá xití-yu. Te sátá ñi túhú cóhõ-yu te ní nadatàcá-güedé nchaa sã ñi quendóo, te ní chítú ùxúú tnàhá tídihi mee-ni sã ñi quendóo. ²¹ Te nchaa ñáyiú ní xexi-áⁿ ñi xínu úhúⁿ mĩl mee-ni cuè tée chi mee-ni cuè tée-áⁿ ñi quiúndehu, te dèiⁿ cue ñáyiú dèhí ndihi cue landú.

Jèsús xicá-gã núú ndute
(Mr. 6:45-52; Jn. 6:16-21)

²² Te òré-ni-áⁿ ñi xáhaⁿ Jèsús xii cue tée xica cuu ndihi-gá sá quèe-güedé bàrcú

téhn-dé-güedé ndàa ingá xio yuhu làgúná, te mee-gã quendóo-gá cada ndee ìní tnáhá-gã ndihi cue ñáyiú. ²³ Te sátá nǐ yáha ní quide ndee ìní tnáhá-gã ndihi cue ñáyiú, te medii-gá ní xica-gá cuásaá-gá ñí tǐndúú cáá yàtni xiáⁿ cuendá cáháⁿ ndihi-gá Yã Ndiöxí, te ðiu-ni medii-gá ndécú xiáⁿ nǐ cundiquiⁿ. ²⁴ Te bàrcú sá ñúhú cuè téé xica cuu ndihi-gá-áⁿ sa cuáháⁿ-xi ndéé cuádava xití làgúná-áⁿ, te níhi vìhi quene táchí ndàa ichi cuáháⁿ-xi, te dàcandau ndeé-xi ndute nchaa ðíñi-xi. ²⁵ Te tàcuíhndá váhi-gá tá xica Jesús núú ndute cuáháⁿ tá cùyatni-gá bàrcú-áⁿ. ²⁶ Te cue téé xica cuu ndihi-gá ní xiní ñáhá-güedé xii-gá tá xica-gá núú ndute cuáháⁿ, te ní yùhú-güedé te níhi ní cáháⁿ-güedé te xǐtnàha-güedé:

—¡ñí àlmá! —càchí-güedé xǐtnàha-güedé.

²⁷ Te Jesús ní cáháⁿ-gá, te xãhaⁿ-gã xii-güedé:

—Ñí cunduu-ndo vã yùhú-ndó, chi yùhú cùú-í —càchí-gá xãhaⁿ-gã xii-güedé.

²⁸ Te té Pèlú ní xáhaⁿ-dē xii-gá:

—Mèstrú, te núu ðiu-n te tauchiuⁿ sá tnáhá-í ná càca-í núú ndute quixi tnahá ñáhà-í xii-n —càchí-dé xãhaⁿ-dē xii-gá.

²⁹ Te Jesús ní xáhaⁿ-gã xii-dé:

—Taquiixi —cachí-gá xãhaⁿ-gã xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáháⁿ cuátnahá ñáhá-dē xii-gá. ³⁰ Te ní cutnùní iní-dé sá ïo níhi xico táchí, te ní ngüíta-dé yùhú-dé. Te òré-ni-áⁿ tá quèe naa-dé xití ndute cuáháⁿ ní cùu, te níhi ní cáháⁿ-dē xãhaⁿ-dē xii Jesús:

—¡Mèstrú, vá dáñá-n quèe naa-í xití ndute! —càchí-dé xãhaⁿ-dē xii-gá.

³¹ Te òré-ni-áⁿ nǐ tñi Jesús ndaha-dé, te ní xáhaⁿ-gã xii-dé:

—¿Ná cuendá ñá túú sàndáá ndisa iní ñáhá-n xii-í sàni ñí sàni úú iní-n-i? —càchí-gá xãhaⁿ-gã xii-dé.

³² Te òré cuánguee Jesús ndihi té Pèlú xití bàrcú, te òré-ni-áⁿ nǐ ngüíñi táchí. ³³ Te cue téé ñùhu xití bàrcú-áⁿ nǐ ngüíñi xití-güedé núú-gã, te xãhaⁿ-güedé xii-gá:

—Sá ndàá sá cuítí sã díú yòhó cúú-n Dèhe Dútú Ndiöxí —càchí-güedé xãhaⁿ-güedé xii-gá.

Jèsús quidé tãtna-gã ñáyiú cùhú ñí xichi núú nání Gènesarét
(Mr: 6:53-56)

³⁴ Te ní quexìo Jesús ndihi cue téé xica cuu ndihi-gá ndàa ingá xio yuhu làgúná, te núú nǐ quexìo-gá ndihi-güedé-áⁿ nání-xi Gènesarét. ³⁵ Te nchaa ñáyiú xǐndecu xiáⁿ nǐ cutnùní iní-yu sá díú-gã ní quexìo, te ní dátécú tnùhu-yu nchaa dava-gá ñáyiú xǐndecu yatni xiáⁿ sã nǐ quexìo-gá. Te ndécá-yu nchaa ñáyiú cùhú ndécú ndihí-yu cuáháⁿ núú ndécú Jesús. ³⁶ Te nchaa ñáyiú cùhú-áⁿ nǐ ngüíta-yu càháⁿ ndàhú-yu núú Jesús sá ná dàña-gá tnándeé-yu cuèdicó luha yuhu dõó-gã cuendá ndúha-yu, te cue ñáyiú cùhú, ñáyiú ní tnándeé yuhu dõó-gã ní ndúha-yu.

15

Cuendá nchaa sá quidé-xi ngündecu cuèchi ñáyiú

(Mr: 7:1-23)

¹ Te sátá dúcáⁿ te ñí ùú cue téé cùu fariséú ní quee-güedé ñúú Jerusàlén, ndihi cue téé dàcuaha ñaha xii ñáyiú nchaa tnùhu ní chídó tnùní ndíi Moisés ní quexìo-güedé núú ndécú Jesús, te xãhaⁿ-güedé xii-gá:

² —¿Ná cuendá cue téé xica cuu ndihi-n ñá túú nàquete-güedé ndaha-güedé òré caxi-güedé nàcuáa ní cachí cue ñaní tnáhá-ó nǐ xǐndecu ndéé sanaha-i? —càchí-güedé xãhaⁿ-güedé xii-gá.

³ Te Jesús ní xáhaⁿ-gã xii-güedé:

—Te nchòhó tucu, ¿ná cuendá ñá túú quide-ndo nacuaa ní cachí Yã Ndiöxí cada-ndo, núu da nàcuáa ta quide cue téé ñuyíú-a quide-ndo-i? ⁴ Te Yá Ndiöxí càchí-gá núú tütú-gá: “Canehe-ndo sã yíñùhu núú tãtá-ndó ndihi núú náná-ndó”, càchí-gá. Te càchí tucu-gá ingá xichi núú tütú-gá: “Nchaa ñáyiú na càháⁿ úhú tãtá-xi àdi náná-xi te cahni ñaha-güedé xií-yu”, duha càchí-gá núú tütú-gá. ⁵ Dico nchòhó càchí-ndó sã cuè ñáyiú chi cuu cùñahá-yu xii tãtá-yu àdi náná-yu: “Vá cúú chindee ñaha-ndí xii-n, chi sá táxi-ndí xii-n ni cùu, xiáⁿ ní nduu cuendá Yã Ndiöxí”, cuu duha cùñaha ñáyiú xii tãtá-yu àdi náná-yu càchí-ndó. ⁶ Te càchí-ndó sã cuè ñáyiú ducaⁿ na cùñaha xii tãtá-xi àdi náná-xi te ñá túú-gã

tàu-yu chindèe-yu ni tătă-yu ni nănă-yu. Te ducaⁿ quide-ndo chi ní dáquée tihú-ndó nàcuáa ní cachí Yă Ndiôxí cada-ndo, te mee-ni nàcuáa ta quide cue tée ñuyíú-a véxi nchícúⁿ nihnu-ndo quide-ndo. ⁷ Te nchòhó cúú-ndó ñăyiu ío dândahú méé-xí, chi cächí-ndó sã quidé ndăá-ndó te ñá ndàá sã quidé ndăá-ndó! Te ní quee ndăá-xi nàcuáa ní chídó tnùní ndíi Chàíá tée ní xóo cãháⁿ tnúhu Yă Ndiôxí ndéé sanaha núú tütú-gá núú cãháⁿ-xi nàcuáa ní cãháⁿ-gá cuendá-ndó, te duha ní cachí-gá:

⁸ Ñáyiu-a cächí-yu sã ío cãhnu cuu-í dico dicó-ni yuhu cãháⁿ-yu, chi duuⁿ duuⁿ ñá túú ñùhu iní ñáhă-yu xii-í. ⁹ Te àúⁿ nă cuu chîñuhu ñahá-yu xii-í chi ñá túú vèdana ndéé nândîhi-xi, chi cue ñáyiu-a dàcuahá-yu cue tnàha ñáyíú-yu nàcuáa cundecú-yu, dico mee-ni tnúhu sã ní cahu iní cue ñáyiu ñuyíú-a cãháⁿ-yu.

Duha ní chídó tnùní ndíi Chàíá núú tütú Yă Ndiôxí nàcuáa ní cãháⁿ-gá cuendá-ndó — cächí-gá xãháⁿ-gã xii-güedé.

¹⁰ Te ní xãháⁿ-gã xii cue ñáyiu:

—Chí táquixi ndehe iha, te cundedóho váha-ndo tnúhu na cãháⁿ-í, te ío váha cuáha-ndo cuendá. ¹¹ Nchaa sã xéxi-ndó chi ñá túú nă quidé-xí iní-ndó, dico nchaa sã cuèhé sã dúhá sàni iní-ndó cãháⁿ-ndó nchàa xiãⁿ quidé-xí ndècu cuéchi-ndo — cächí-gá xãháⁿ-gã xii-yu.

¹² Te cue tée xica cuu ndihi-gá ní sáháⁿ-güedé ndéé núú-gã, te xãháⁿ-güedé xii-gá:

—Véxi-ndí cächí tnúhu-ndí xii-n sã cuè tée cùu fariséú ñá túú cùu váha iní-güedé cuendá tnúhu ní cãháⁿ-n — cächí-güedé xãháⁿ-güedé xii-gá.

¹³ Te ní xãháⁿ-gã xii-güedé:

—Nchaa ñáyiu ñá túú cùu cuendá Tătà-í Dútú Ndiôxí cuíta nihnú-yu, chi ñáyiu-án cúú-yu dàtná nchaa cúhú sã ñà túú nândîhi te tnúhu ñáyiu. ¹⁴ Te vá cádá cuendá-ndó nàcuáa cãháⁿ cue tée-án, chi cùu-güedé dàtná cue ñáyiu cuáá sácúita nehe tnàha. Te nchòhó xini-ndó sã núu ìñá ñáyiu cuáá ná cuíta nehe tucú-yu ingá ñáyiu cuáá, te ndi ndúú-yu quée-yu déhvá — cächí-gá xãháⁿ-gã xii-güedé.

¹⁵ Te té Pèlú ní xãháⁿ-dè xii-gá:

—Cachí tnúhu xii-ndí nàcuáa quèe-xi tnúhu ní cãháⁿ-n-ãⁿ — cächí-dé xãháⁿ-dè xii-gá.

¹⁶ Te Jèsús ní xãháⁿ-gã:

—¿Náa tnàhá nchòhó ñá túú ní tècú tnùní-ndó nàcuáa ndùu tnúhu ní cãháⁿ-í núú ñáyiu-ãⁿ ñă? ¹⁷ Nchaa sã xéxi-yu cuánguee-xi xití-yu, te dàtnùní náyãha ñaha-xi xii-yu. ¹⁸ Dico nchaa tnúhu cuèhé tnúhu duha cãháⁿ-yu xiãⁿ véxi quene-xi iní-yu, te ñiu nchaa xiãⁿ quidé-xí ndècu cuéchi-yu. ¹⁹ Te iní-yu-án cãcú nihnu nchaa sã cuèhé sã dúhá, chi sàni cuèhé sání dùha iní-yu, te sàhni-yu tnàha ñáyíú-yu, te cue tée cãháⁿ ndihi-güedé ñáyiu ñihí te ñá díú ñàdihí-güedé cúú-yu. Te ñiu-ni ducaⁿ quide cue ñáyiu ñihí cãháⁿ ndihí-yu cue tée te ñá díú yí-yu cùu-güedé, te cuèi tée te cuèi ñadîhi mee-ni ìchi díi ñíí iní-ndó iní-yu cundecú-yu, te dùhu ndachiuⁿ tnàhá-yu, te dàcuandehndé-yu, te cãháⁿ cuèhé-yu cuendá tnàha ñáyíú-yu. ²⁰ Te nchaa xiãⁿ quidé-xí ndècu cuéchi-yu, dico ñá díú sã ñà túú ndàhá-yu dàtná ní cachí cue tée ndéé sanaha, chi xiãⁿ ñá túú quide-xi cuendá ngündecu cuéchi-yu — cächí-gá xãháⁿ-gã xii-güedé.

Ìñá ñadîhi ñaha cùu ñaní tnàhá ñáyiu canàneá ní sãndáá iní-án Jèsús

(Mr. 7:24-30)

²¹ Te Jèsús ní xica-gá cuáháⁿ-gá ní sáá-gá yucu cue tée ñuú Tirú, ndihi yucu cue tée ñuú Sidón. ²² Te ìñá ñadîhi ñaha cùu ñaní tnàhá ñáyiu canàneá ndécú yàtni-án xiãⁿ, te níhi ta cãháⁿ-án ní quexìo núú ndécú Jèsús, te xãháⁿ-án xii-gá:

—¿Mèstrú, ñaní tnàhá ndíi Dàvíi, cundàhú iní ñáhá xii-í cada tátna-n dèhe yoco-í! Chi yíhi ñaha espíritú cündîhi yucu ñávãha xii-xi te ío dândoho ñaha-xi — cachí-án xãháⁿ xii-gá.

²³ Dico Jèsús ñá túú tnàhí ni cãháⁿ-gá, te cue tée xica cuu ndihi-gá ní sáháⁿ-güedé núú-gã, te xãháⁿ-güedé xii-gá:

—Cúñaha xii ñaha-án ná nùhú-án, chi ío níhi cãháⁿ-án nchícúⁿ ñáhá-án xii-o — cächí-güedé xãháⁿ-güedé xii-gá.

²⁴ Te Jèsús ní xãháⁿ-gã xii-güedé:

—Yă Ndiôxí ní tendaha ñaha-gá xii-í véxi-í mee-ni ñuú núú xíndecu cue ñáyiu

isràél, chi ñáyi-u-áⁿ cúu-yu dàtná cue mbèé cue quití ní xíta, chi ta xíta nihnú-yu cuáháⁿ —càchí-gá xáhaⁿ-gã xii-güedé.

²⁵ Te ñadìhí-áⁿ ñí sáháⁿ-aⁿ ndéé núú Jèsús ní ngüíñí xítí-áⁿ, te xáhaⁿ-aⁿ xii-gá:

—¡Mèstrú, chindee ñàha xii-í! —càchí-aⁿ xáhaⁿ-aⁿ xii-gá.

²⁶ Te Jèsús ní xáhaⁿ-gã xii-aⁿ:

—Vá cúú chindee-í cue ñáyi-u ñá túú cùu ñáyi-u isràél, chi ñⁿ-ní cùu-xi núu na quèheⁿ-o paá cúú cuèndá cue landú te cuáha-o iná caxi-di —càchí-gá xáhaⁿ-gã xii-aⁿ.

²⁷ Dico ñaha-áⁿ ñí xáhaⁿ-aⁿ xii-gá:

—Ndáá càháⁿ-n, dico cue iná chi nàdatacá-güedi sá ngóyó yùhu cóhó xítóhó-güedi —càchí-aⁿ xáhaⁿ-aⁿ xii-gá.

²⁸ Te Jèsús ní xáhaⁿ-gã xii-aⁿ:

—¡Yòhó ñaha cùhú déhe-xi, ío váha sàndáá iní ñáhá-ñ xii-í! Te na càda-í nàcuáa cuèní-n —càchí-gá xáhaⁿ-gã xii-aⁿ.

Te òré-ni-áⁿ ñí ndúha déhe-aⁿ.

Jèsús quidé tãtna-gá vai ñáyi-u cùhú

²⁹ Te sátá dúcáⁿ ñí cuu te Jèsús ní xica-gá cuáháⁿ-gá ní yáha-gá yuhu làgúná distritú Galileá, te cuásaá-gá ñⁿ tìndúú te xíaⁿ ñí ngóo-gá. ³⁰ Te xíaⁿ núcõo-gá ní quexìo cuéhé víhí ñáyi-u, te ndècá-yu ñáyi-u yacua, ndihí ñáyi-u ní yíchí ñⁿ xio ndaha-xi, ndihí ñáyi-u cuáa, ndihí ñáyi-u ñihí, te vai dava-gá cue ñáyi-u cùhú tnhá dáva-gá núú cuéhé ndécã-yu ní quexìo núú ndécú-gã. Te ní taxi ndecu ñáhá-yu núú Jèsús te ní quide tátna ñaha-gã xií-yu te ní ndúha-yu. ³¹ Te nchaá ñáyi-u xíndecu-áⁿ ío ní cuñúhu-yu sá dúcáⁿ ñí xini-yu ní cuu ní nacáháⁿ nchaá ñáyi-u ñihí, ndihí cuèndá sá ñí ndúha nchaá cue ñáyi-u yacua, ndihí cuèndá sá ñí ndúha cue ñáyi-u ní yíchí ñⁿ xio ndaha-xi, ndihí cuèndá sá ñí ndúha núú cuè ñáyi-u cuáa. Te nchaá-yu ní cachí-yu sá ío càhnu cuu Yá Ndiõxí Yaá cúú Ndiõxí cue ñáyi-u isràél.

Jèsús dácaxi-gá cúmí mĩl cue téte te dñⁿ ñáyi-u dñhí ndihí landú

(Mr. 8:1-10)

³² Te Jèsús ní cana-gá cue téte xica cuu ndihí-gá, te ní xáhaⁿ-gã xii-güedé:

—Yúhú cùndàhú iní-í nchaá ñáyi-u-a, chi sa ní cuu úní nduu ndècu ndihí ñáhá-yu

xii-o ìha, te ñá túú tnhí-gá sá caxí-yu, te ñá túú cuèní-í natendaha-í-yu núhú tnhá-yu vehé-yu, chi ná ndèé cuáháⁿ cuneé-yu docó ichi —càchí-gá xáhaⁿ-gã xii-güedé.

³³ Te ní xáhaⁿ-güedé xii-gá:

—¿Te ndèé níhí-ó sã cuñaha-o càxi nchaá ñáyi-u-a, te ío cuéhé-yu te ñá túú ñá ío ìha chi cùu-xi xití yucu-i? —càchí-güedé xáhaⁿ-güedé xii-gá.

³⁴ Te Jèsús ní xicáⁿ tnhú-gã núú-güedé, te xáhaⁿ-gã:

—¿Ná daha-gá paá ndécú ndihí-ndo-i? —cachí-gá xáhaⁿ-gã xii-güedé.

Te ní xáhaⁿ-güedé xii-gá:

—Ndècu ndihí-ndí úsá-gá tnhá paá ndihí ñⁿ úú-gá chácá —càchí-güedé xáhaⁿ-güedé xii-gá.

³⁵ Te Jèsús ní xáhaⁿ-gã xii nchaá ñáyi-u sá ná ngõo-yu nchaá-yu, te ní ngóo-yu.

³⁶ Te ní queheⁿ-gá ndi úsá paá-áⁿ ndi ñⁿ úú-gá chácá-ãⁿ, te ní ndacáⁿ táhú-gã núú Yá Ndiõxí, te dàtnùní ní táhú cuèchi-gá paá-áⁿ ndihí chácá-ãⁿ te ní sãñaha-gã xii cue téte xica cuu ndihí-gá ní dácãhñu-güedé nchaá ñáyi-u-áⁿ. ³⁷ Te nchaá-yu ní xexí-yu ní ndahá xití-yu. Te sátá ñí túhú cóhõ-yu te ní nadatácá-güedé nchaá sá ñí quendóo, te ní chítú úsá tnhá tídihi mee-ni sã ñí quendóo-áⁿ. ³⁸ Te núú ncháá ñáyi-u ní xexi te ní xínu cúmí mĩl mee-ni cuè téte chi ñi-u-ni cue téte-áⁿ ñí quíúndehu, te dñⁿ cue ñáyi-u dñhí ndihí cue landú. ³⁹ Te sátá dúcáⁿ te Jèsús ní dándacá ñaha-gá xií-yu, te cuánguee-gá bàrcú cuáháⁿ-gá yucu cue téte ñuú Magdalá.

16

Cue téte cùu fariséu ndihí cue téte cùu saducéu xáhaⁿ-güedé xii Jèsús cada-gá ñⁿ sá vã yõ tnhá ndàcu cada

(Mr. 8:11-13; Lc. 12:54-56)

¹ Te cue téte cùu fariséu ndihí cue téte cùu saducéu ní sáa-güedé núú ndécú Jèsús xitó ndèé ñáhá-güedé xii-gá, te xáhaⁿ-güedé sá ná cáda-gã ñⁿ sá vã yõ tnhá ndàcu cada cundehe-güedé nàcuáa cutnùní iní-güedé nñu ndáa sá Yá Ndiõxí ní tendaha ñaha-gá xii-gá véxi-gá ñuyíú-a. ² Te Jèsús ní xáhaⁿ-gã xii-güedé:

—Nchòhó chi òré tá cuáa cuáháⁿ te ndàcoto-ndo andi-u, te càchí-ndó: “Ío váha

cada-xi tneé chi càa vícò tícuèhé andíu”, duha càchí-ndó. ³ Te òré dátneé ndácòto tucu-ndo andíu, te càchí-ndó: “Vá cada vâha-xi nduu vitna chi tícuèhé andíu, te càa vícò”, duha càchí-ndó. ¡Dico nchòhó cúu-ndó ñâyíu ío dândahú méé-xí sã quidé ndáá te ñá ndáá sã quidé ndáá-ndó! Te cùtnuní iní-ndó nâcuáa quíde-xi andíu, dico ñá túú cùtnuní iní-ndó nâcuáa quèe-xi nchaa sã quidé Yã Ndiõxí vitna. ⁴ Dico nchaa nchòhó ñâyíu ndècu ñuyíú vitna ío cuihna iní-ndó, te ñá túú cuíní-ndó càda ndáá-ndó núú Yã Ndiõxí, te cuíní-ndó càda-í ñá sã vã yõ tnàhí ndàcu cada dico ñá túú nãgá cada-í, chi ñu-ni nâcuáa ní quíde Yã Ndiõxí ndíi Jónás ñu-ni ducaⁿ càda tucu-gá vitna —càchí-gá xãhaⁿ-gã xii-güedé.

Te ducaⁿ te ní xica-gá cuáhãⁿ-gã ndíhi cue téé xica cuu ndíhi-gá.

Cuendá cue téé cùu fariséú ndíhi cuendá cue téé cùu saducéú
(Mr. 8:14-21)

⁵ Te òré ní quexìo ndíhi ñaha-gá xii-güedé ndáa ingá xio yuhu làgúná, te ní ndacu iní-güedé sã ní cunaa-güedé canehe-güedé pàá quíhíⁿ caxi-güedé. ⁶ Te Jèsús ní cáháⁿ-gã dóho-güedé, te xãhaⁿ-gã xii-güedé:

—Na càchí tnúhu-í xii-ndo sã ío quíhi iní-ndó cùndecu-ndo, te vá cada cuendá tnàhí-ndo lèvadurá cue téé cùu fariséú ndíhi cue téé cùu saducéú —càchí-gá xãhaⁿ-gã xii-güedé.

⁷ Te ní ngüíta-güedé xítnàha-güedé:

—Cuendá sã ñá túú ní cãnehe-o pàá quixi xíãⁿ duha càháⁿ-gã —càchí-güedé xítnàha-güedé.

⁸ Te Jèsús ní cutnùní iní-gá nâcuáa ndúu tnúhu xítnàha-güedé, núu ní xãhaⁿ-gã xii-güedé:

—Nchòhó chi ñá túú sãndáá iní ñáhã vâha-ndo xii-í núu xíãⁿ da sã ñá túú ní cãnehe-ndo pàá quixi càháⁿ-ndó. ⁹ ¿Te náa ñá ndácú iní-ndó sã núu ùhúⁿ-ni pàá, te ní taxi-í ní dácãhñu-ndo ñí xexi ùhúⁿ mĩl cue téé, chi ñu-ni cue téé-áⁿ ñí quíúndehu, te sátá ñí túhú cóhó-güedé te ní chítú títní tídihi mee-ni sã ñí quendóo-ãⁿ? Te ñá tècú tnùní-ndó nâcuáa quèe-xi nâcuáa ní quíde-í. ¹⁰ ¿Te náa ñá ndácú tucu iní-ndó sã núu ùsã-ni pàá te ní taxi-í ní dácãhñu tucu-ndo ñí xexi cúmí mĩl cue téé, chi ñu-ni

cue téé-áⁿ ñí quíúndehu, te sátá ñí túhú cóhó-güedé te ní nadatácã-ndó nchãa sã ñí quendóo, te ní chítú títní tídihi mee-ni sã ñí quendóo-ãⁿ? ¹¹ Dico nchòhó chi ñá túú ní quíde cuendã-ndó nâcuáa ndúu tnúhu càháⁿ-í òré ní cachí-í sã vã quèhéⁿ cuendã-ndó lèvadurá cue téé cùu fariséú ndíhi cue téé cùu saducéú, chi ñá díú cuendã pàá ní càháⁿ-í —càchí-gã xãhaⁿ-gã xii-güedé.

¹² Te sátá dúcãⁿ ñí xãhaⁿ Jèsús xii cue téé xica cuu ndíhi-gã, te ní tecú tnùní-güedé sã xãhaⁿ-gã xii-güedé sã vã tníi-güedé tnúhu càháⁿ cue téé cùu fariséú ndíhi cue téé cùu saducéú, te ñá díú cuendã levadurá sã quíhu yuchi cuãha pàá ní càháⁿ-gã.

Té Pelú xãhaⁿ-dè xii Jèsús sã díú-gã cúu-gã Crístú

(Mr. 8:27-30; Lc. 9:18-21)

¹³ Te Jèsús ní quexìo-gã yucu cue téé ñuú Cèsareá Filipú, te ní xicãⁿ tnúhú-gã núu cuè téé xica cuu ndíhi-gã, te xãhaⁿ-gã xii-güedé:

—¿Yoo cùu yúhú Téé cùu ñaní tnáhã-ndó nchãa-ndo cachí cue ñâyíu-va? —càchí-gã xãhaⁿ-gã xii-güedé.

¹⁴ Te ní xãhaⁿ-güedé xii-gã:

—Davã-yu càchí-yu sã cúu-n ndíi Juáa téé ní xóo dacuãndute ñaha xii ñâyíu, te davã-yu càchí-yu sã cúu-n tẽ Èliás, te davã-yu càchí-yu sã cúu-n ndíi Jeremiás téé ní xóo cáháⁿ tnúhu Yã Ndiõxí ndéé sanaha, àdi cuu-n ingá téé ní xóo cáháⁿ tnúhu-gã ndéé sanaha, duha càchí-yu —càchí-güedé xãhaⁿ-güedé xii-gã.

¹⁵ Te Jèsús ní xicãⁿ tnúhú tucu-gã núu-güedé, te xãhaⁿ-gã xii-güedé:

—Te nchòhó, ¿yoo sãni iní-ndó cùu-í-i? —càchí-gã xãhaⁿ-gã xii-güedé.

¹⁶ Te té Xímú, àdi Pelú chi úú ñu-dé, ní xãhaⁿ-dè xii-gã:

—Yòhó cúu-n Crístú Yaa ní tendaha Yã Ndiõxí véxi ñuyíú-a, te ñu Yã Ndiõxí cúu-gã Yaa ndécú nchãa nduu nchaa quíú, te yòhó cúu-n Dèhe-gã —càchí-dé xãhaⁿ-dè xii-gã.

¹⁷ Te Jèsús ní xãhaⁿ-gã xii-dé:

—Yòhó té Xímú dèhe té Jónás, ío váha táhú-n chi mee Tãtã-í Dútú Ndiõxí ní dácãhú iní ñáhã-gã xii-n nâcuáa cunduu tnúhu cáháⁿ-n, te ñá díú ñí ñâyíu ñuyíú-a ducaⁿ ni dàcahu iní ñáhã-yu xii-n tnúhu-áⁿ.

18 Te yúhú xǎhaⁿ-í Pèlú xii-n, te tnúhu-án quée-xí yúú, chi quèe ndáá-xi nàcuáa nàni-n, chi cuu-n ìⁿ téé vá cání ìⁿ cani úú iní-xi canu ichi-n cuè ñáiyu nàcuáa cundecu ndihí ñàhá-yu xii-í. Te nchaa ñáiyu cùu cuendá-í vá ndácú yùcu ñávǎha dacuíta nihnu ñaha-xi xii-yu. 19 Te yúhú taxi-í tnúhu ndee iní cundecu ndihí-n cuendá cunuu-n núú cuè ñáiyu yíndaha ñaha Yá Ndiöxí, te nchaa sá ná càháⁿ-n sǎ cúú-xí sǎ vǎha, te ñu-ni ducaⁿ cǎháⁿ Yá Ndiöxí, te nchaa sá ná càháⁿ-n sǎ ñà túú cùu-xi sǎ vǎha, te ñu-ni ducaⁿ cǎháⁿ tucu-gá, chi quide-n nacuáa cuení-gá —càchí-gá xǎhaⁿ-gǎ xii-dé.

20 Te sátá dúcáⁿ te ní xǎhaⁿ Jèsús xii cue téé xica cuu ndihí-gá sǎ vǎ yóo cúñaha-güedé sǎ díú-gǎ cúú-gǎ Crístú Yaá ní tendaha Yá Ndiöxí véxi ñuyíú-a.

Jèsús càháⁿ-gá sǎ cáhni ñaha-güedé xii-gá (Mr. 8:31-9:1; Lc. 9:22-27)

21 Te ndéé dǎvá-áⁿ ñí ngüíta Jèsús xǎhaⁿ-gǎ xii cue téé xica cuu ndihí-gá:

—Dacuitíi sǎ quihíⁿ-í ñuú Jerusálén, te yácáⁿ cue téé cùu sacuéhé núú ñáiyu isráél, ndihí cue dútú cúnúu, ndihí cue téé dàcuaha ñaha xii ñáiyu nchaa tnúhu ní chídó tnùní ndíi Moisés, nchaa cue téé-áⁿ ño dandòho ñaha-güedé xii-í, te cahni ñaha-güedé, dico nduu úní sǎ cùú-í te ndoto-í —càchí-gá xǎhaⁿ-gǎ xii-güedé.

22 Te té Pèlú ní cana-dé Jèsús ìⁿ xio, te ní ngüíta-dé ténáá ñàhá-dé xii-gá, te xǎhaⁿ-dè:

—¡Sǎ vǎ càchí Ndiöxí sǎ dúcáⁿ ndòho-n chi ñà túú tàù-n sǎ dúcáⁿ ndòho-n! —cachí-dé xǎhaⁿ-dè xii-gá.

23 Te ndàa sátá Jèsús nútníi té Pèlú òré ducaⁿ xǎhaⁿ-dè xii-gá núu ní nchócuíhnu-gá, te xǎhaⁿ-gǎ xii-dé:

—¡Xocuíñí yòhó yucu ñávǎha núu-í-a chi dicó quidé tnèñu-n! Chi ñà túú sàni iní-ò dàtná sání iní Yá Ndiöxí chi ìⁿ-ni sàni iní-ò ndihí dava-gá cue ñáiyu ndècu ñuyíú-a —càchí-gá xǎhaⁿ-gǎ xii-dé.

24 Te sátá dúcáⁿ te ní xǎhaⁿ-gǎ xii nchaa cue téé xica cuu ndihí-gá:

—Nchaa ñáiyu cuení chitnahá ñàhá xii-í, te xini ñuhu-xi dañá-yu vá cádá-gǎ-yu sǎ sání iní méé-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. 25 Te

nchaa ñáiyu cuení sǎ ñà túú tnàhí ná yáha cundecu ñuyíú-a cuíta nihnú-yu, dico nchaa ñáiyu ñà túú tnàhí yùhú cuèi nándí sǎ ná yáha-yu cundecú-yu ñuyíú-a sǎ cuendá-í, te ñáiyu-áⁿ naníhí tàhú-yu. 26 Te cuèi nchaandi túhú sǎ ío ñuyíú-a na nihí ñáiyu cundecu ndihí-yu, dico núu ñu nchaa xǎⁿ ná càda cuíta nihnú-yu te ñà túú vèdana nàndíhí-xi sǎ dúcáⁿ ndècu ndihí-yu nchaa xǎⁿ. Te ní ìⁿ sǎ ío ñuyíú-a vá chíndèe ñaha-xi xii-yu cuendá naníhí tàhú-yu. 27 Te ndáá quée-xí tnúhu càháⁿ-í, chi na quixi tucu yúhú Téé cùu ñaní tnáhǎ-yu ncháá-yu, te dǎvá-áⁿ quini-yu sǎ ío càhnu cuu-í dàtná càhnu cuu Tàtá-í Dútú Ndiöxí, te quixi-í ndihí cue espíritú xínú cuèchi núú-gǎ, te dǎvá-áⁿ cuáha-í nchaa ñáiyu sǎ ndúú tàhú-yu nàcuáa nduu sǎ ñí quidé-yu ìⁿ ìⁿ-yu. 28 Te na càchí tnúhu ndáá-í xii-ndo sǎ ío dava nchòhó ñáiyu ndècu iha vitna vá cùu-ni-ndo, chi cundecu-ni-ndo ndèe quini-ndó quixi tucu yúhú Téé cùu ñaní tnáhá-ndó nchàa-ndo taxi tnuní-í nchaa ñáiyu —càchí-gá xǎhaⁿ-gǎ xii-güedé.

17

Ní nadáma dóo Jèsús ndihí núú-gǎ (Mr. 9:2-13; Lc. 9:28-36)

1 Te núú ñúu nduu sǎ dúcáⁿ ñí cáháⁿ Jèsús, te ní xica-gá cuásaá-gǎ ìⁿ yucu dùcúⁿ, te ndèca-gá té Pèlú, ndihí té Jàcobó, ndihí té Juáá ñaní té Jàcobó-áⁿ cuásaá. Te úní tnàhí-ni cue téé-áⁿ ndécá-gǎ cuásaá. 2 Te yucu-áⁿ ndécú-gǎ ní nadáma núú-gǎ ndihí dóo-gǎ, te núú-gǎ súúni dàtásaⁿ-xi dàtná quidé-xí núú nchíanchii, te dóo-gǎ súúni ñí nduu cuixíⁿ dàtná cáá ñùhú cuixíⁿ. 3 Te òré-ni-áⁿ ñí xini-güedé ndíi Moisés ndihí té Èliás nútníi-güedé ndihí-gá ndátnúhu ndihí ñaha-güedé xii-gá. 4 Te té Pèlú ní xǎhaⁿ-dè xii Jèsús:

—Mèstrú, ¡váha ní cuu sǎ ndécú-ó iha vitna! Te núu cuení-n, te na dàcaa-ndí úní tnàhá vehe tnuvixíⁿ, te ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èliás —càchí-dé xǎhaⁿ-dè xii-gá.

5 Te ñini dùcaⁿ caháⁿ té Pèlú ní quexío ìⁿ vico núú ndécú-güedé ní dádǎhu ñaha-xi xii-güedé te súúni chàhnchí. Te xití vico-áⁿ

nǐ tecú ní cáháⁿ Yă Ndiöxí, te xăhaⁿ-gă xii-güedé:

—Tée-a cùu-dé Déhe-í tée ío cùu iní-í, te ío cùdíí iní-í-dé, te cundedóho-ndo nchàa tnúhu càháⁿ-dé —duha ní xăhaⁿ-gă xii-güedé.

⁶ Te sá dúcáⁿ nǐ cáháⁿ Yă Ndiöxí ní tecú dóho cue tée xica cuu ndihí Jesús te ío ní yùhú-güedé, te ní ngüñí xítí-güedé te ní nuu núú-güedé ndàa núú ñúhú. ⁷ Te Jèsús cuáháⁿ-gă núú xĩndecu cue tée xica cuu ndihí-gă, te ní tendaha ñàha-gă, te xăhaⁿ-gă xii-güedé:

—Chí ndacuíñí, vá yùhú-ndó —càchí-gă xăhaⁿ-gă xii-güedé.

⁸ Te òré ní ndanehe núú-güedé, te ñá túú-gă ní xìní-güedé cue tée úú-áⁿ chi mee-nă Jèsús. ⁹ Te òré cuánuu ndihí ñaha Jèsús xii-güedé tĩndúú-ăⁿ, te ní xăhaⁿ-gă xii-güedé:

—Vá yõ cúñaha-ndo nǐ ñá sá ní xìní-ndó nǔú nǐ sáá-ó-á, te cuu cáháⁿ-ndó dico ndéé ná yăha ndoto yúhú Tée cùu ñaní tnáhá-ndó nchàa-ndo sá cùú-í —càchí-gă xăhaⁿ-gă xii-güedé.

¹⁰ Te cue tée xica cuu ndihí-gă ní xăhaⁿ-güedé xii-gă:

—Cuíní-ndí cachí tnúhu-n nă cuendá cue tée dăcuaha ñaha xii ñáyiu nchaa tnúhu ní chídó tnùní ndíi Moisés càchí-güedé sá dǐhna-gă té Èliás quixi, te dătnùní quixi Yaá tendaha Yă Ndiöxí quixi ñuyíú-a —càchí-güedé xăhaⁿ-güedé xii-gă.

¹¹ Te Jèsús ní xăhaⁿ-gă xii-güedé:

—Ndáá sá códó nǔu ñá tée quixi-dé te cada-dé dătná ní quide té Èliás te tée-áⁿ cada ndáá-dé nchaa năcuáa cùu. ¹² Te na càchí tnúhu-í xii-ndo vitna sá sá ní quixi tée ní quide dătná ní xóo cada té Èliás, te cue ñáyiu ñá túú ní cùtnuní iní-yu sá díú-dé, te ní quide ñáhá-yu xii-dé nchaa năcuáa ní quixi iní méé-yu, te díu-ni ducaⁿ càda ñaha tucú-yu xii yúhú Tée cùu ñaní tnáhá-yu ncháa-yu, chi dandòho ñáhá-yu xii-í —càchí-gă xăhaⁿ-gă xii-güedé.

¹³ Te cue tée xica cuu ndihí-gă ní cutnùní iní-güedé sá cuendá ndíi Juáa tée ní xóo dacuandute ñaha xii ñáyiu ní cáháⁿ-gă.

Jèsús quidé tătna-gă ñá tée cuechi tnàhá cuéhé xiyíhí

(Mr. 9:14-29; Lc. 9:37-43)

¹⁴ Te Jèsús ní nasáá-gă ndihí cue tée ní sáa ndihí-gă tĩndúú-ăⁿ núú xĩndecu vai ñáyiu, te ní quexìo ñá tée núú-gă ní ngüñí xítí-dé, te xăhaⁿ-dē xii-gă:

¹⁵ —Mèstrú, cundàhú iní déhe-í chi tnàhá-dé cuéhé xiyíhí, te ío dândoho ñaha-xi xii-dé, te ní cuu vai xito daquée ñaha-xi nǔú ñùhú xii-dé, te ní cuu vai tucu xito dangaunihnu ñaha-xi ndute xii-dé. ¹⁶ Te sa ndèca-í-dé ní quixi núú cuè tée xica cuu ndihí-n dico ñá túú ní ndàcu-güedé cada tătna ñaha-güedé xii-dé —càchí-dé xăhaⁿ-dē xii-gă.

¹⁷ Te Jèsús ní xăhaⁿ-gă xii nchaa ñáyiu xĩndecu-áⁿ:

—Nchaa nchòhó ñáyiu ndècu ñuyíú-a, ío sáa iní-ndó chi ñá túú cuíní-ndó quĩndáa iní-ndó Yă Ndiöxí, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gă cada-ndo-í? Te chí cándèca tée cùhú-áⁿ táquixi iha —cachí-gă xăhaⁿ-gă xii-yu.

¹⁸ Te Jèsús ní tenáa-gă espíritú cundihí yucu ñávàha yíhí ñaha xii tée-áⁿ, te ní quee ñaha-xi xii-dé, te òré-ni-áⁿ nǐ ndúha-dé.

¹⁹ Te sáta dúcáⁿ te òré ndécú mèe Jesús ndihí cue tée xica cuu ndihí-gă, te ní xícáⁿ tnúhú-güedé núú-gă, te xăhaⁿ-güedé xii-gă:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cundihí yucu ñávàha yíhí ñaha xii tée-áⁿ —càchí-güedé xăhaⁿ-güedé xii-gă.

²⁰ Te Jèsús ní xăhaⁿ-gă xii-güedé:

—Te ñá túú ní ndàcu-ndo, chi ñá túú sàndáa ndisa iní-ndó Yă Ndiöxí. Te na càchí tnúhu ndáá-í xii-ndo sá nǔu nchòhó quĩndáa ndisa iní-ndó Yă Ndiöxí cuèdicó luha líí dătná lihli ndíquín yutnu nàni mostázá, te ducaⁿ te cuu cúñaha-ndo xii ñá tĩndúú xocuíñí-xi núú ndécú-xí te xocuíñí-xi. Te nchaa núú sá vâha ndacu-ndo càda-ndo te núu na quĩndáa iní ndisa-ndo Yă Ndiöxí. ²¹ Te xini ñuhu-xi sá ío cáháⁿ ndihí-ndo-gă te ñá túú tnáhí ná caxi-ndo cáháⁿ ndihí-ndo-gă, te ducaⁿ te ndacu-ndo queñuhu-ndo espíritú cundihí

yucu ñávaha yíhi ñaha xii ñáyiu, dàtná cúú espíritú sá yíhí ñaha xii téé-ǎⁿ ní cùu — cachí-gá xǎhaⁿ-gǎ xii-güedé.

Jèsús càháⁿ tucu-gá sá cáhni ñàha-güedé xii-gá

(Mr. 9:30-32; Lc. 9:43-45)

²² Te nini xica cuu Jèsús ndihi cue téé xica cuu ndihi-gá distritú Galileá, te ní xáhaⁿ-gǎ xii-güedé:

—Yúhú Téé cùu ñaní tnáhá-ndó nchàa-ndo sáá ìⁿ nduu te cuáha cuèndá ñáhá-güedé xii-í núú cuè téé cùu úhú iní ñáhá, ²³ te cahni ñaha-güedé xii-í dico nduu úní sá cùú-í te ndoto-í —càchí-gá xǎhaⁿ-gǎ xii-güedé.

Te sá dúcáⁿ ñí xáhaⁿ-gǎ xii-güedé, te ío ní ndíhú iní-güedé.

Díhúⁿ cuèndá veñúhu

²⁴ Te òré ní quexio Jèsús ndihi cue téé xica cuu ndihi-gá ñúú Capèrnaúm, te cue téé quide cobrá díhúⁿ cuèndá veñúhu ní sáháⁿ-güedé ní cáháⁿ ndihi-güedé té Pèlú, te xǎhaⁿ-güedé:

—¿Chǎhu mèstrú-ndó úú díhúⁿ sǎ nání drǎcmá cuèndá veñúhu ǎⁿ ñáhá? —càchí-güedé xǎhaⁿ-güedé xii-dé.

²⁵ Te té Pèlú ní xáhaⁿ-dě:

—Chǎhu-dé —càchí-dé xǎhaⁿ-dě xii-güedé.

Te té Pèlú cuánguihu-dé xití vehe núú ndécú Jèsús, te díhna-gá ní cáháⁿ-gá, te xǎhaⁿ-gǎ xii-dé:

—Xímú, ¿nása sàni iní-n, ná cúú ñáyiu quide cobrá ñáhá cuè téé yìndaha ñáyiu ndècu ñuyíú-a cuèndá nchaa sá ndúú yǎhu ñúú-güedé ndihi cuèndá nchaa díhúⁿ sǎ ngàútnàha, cue ñáyiu ñúú-güedé ǎⁿ cuè ñáyiu véxi xica quide cobrá-güedé? —càchí-gá xǎhaⁿ-gǎ xii-dé.

²⁶ Te té Pèlú ní xáhaⁿ-dě xii-gá:

—Cue ñáyiu véxi xica quide cobrá-güedé —càchí-dé xǎhaⁿ-dě xii-gá.

Te Jèsús ní xáhaⁿ-gǎ xii-dé:

—Te núú ducaⁿ te cue ñáyiu ñúú-güedé ñá túú nǎ chǎhu-yu te núú ducaⁿ. ²⁷ Dico cuèndá sá vǎ yõo dasátú-ó ìní-xi, te cuáháⁿ làgúná te dàquée-n sǎ tníí-n chǎcá xití ndute, te chácá díhnanuu na tàva-n te cundehe-n yùhu-di, chi yíhi ìⁿ díhúⁿ cuixíⁿ. Te díhúⁿ-ǎⁿ canehe-n quíhíⁿ cháhu-n

cuèndá-í ndihi cuèndá-n, chi díhúⁿ-ǎⁿ sa tnahá quéyǎhu cuèndá-ó ndí ndúú-ó —càchí-gá xǎhaⁿ-gǎ xii-dé.

18

Cue téé ndücu tnúhu núú Jèsús yoo ío-gá cúnüu

(Mr. 9:33-37; Lc. 9:46-48)

¹ Te sátá dúcáⁿ te cue téé xica cuu ndihi Jèsús ní sáháⁿ-güedé núú-gǎ, te xǎhaⁿ-güedé xii-gá:

—Cachí tnúhu xii-ndí, yoo ío-gá cúnüu núú cuè ñáyiu yìndaha ñaha Yá Ndiõxí —càchí-güedé xǎhaⁿ-güedé xii-gá.

² Te Jèsús ní cana-gá ìⁿ té líhli te ní sanutníi ñaha-gǎ xii-dé cuádava tnuú-güedé.

³ Te xǎhaⁿ-gǎ xii-güedé:

—Na càchí tnúhu ndáá-í xii-ndo sǎ nõu vǎ dáñá-ndó nchàa sá ñà túú vǎha quide-ndo, te nduu ndàhú iní-ndó dàtná ndàhú iní té líhli-a, te vǎ ndúú tǎhú-ndó ndíhu ndaha ñaha Yá Ndiõxí xii-ndo. ⁴ Te ñáyiu quide datná quidé tè líhli-a ndàhú iní-yu, te ñá túú quide cahnú-yu mèé-yu, ñáyiu-áⁿ ío cunúú-yu núú ndécú Yá Ndiõxí táxí tnúni-gá. ⁵ Te nchaa ñáyiu na quèheⁿ cuendá ìⁿ landú dàtná té líhli-a cuèndá sá cúú iní ñáhá-yu xii-í ñá, te cada iní-yu sá yúhú ní queheⁿ cuèndá-yu —càchí-gá xǎhaⁿ-gǎ xii-güedé.

Quihi iní-ó vǎ cündècu-o ichi cuehé ichi duha

(Mr. 9:42-48; Lc. 17:1-2)

⁶ Te Jèsús xǎhaⁿ tucu-gá xii-güedé:

—Te núú ìⁿ téé na dàcaháⁿ-dé cue ñáyiu sàndáá iní ñáhá xii-í cadá-yu nándi sá cuèhé sá dúhá, te vǎha-gá sá ná dàcutu ndeé-güedé ìⁿ yúú yõdó dúcúⁿ-dě, te dàquée ñaha-güedé xii-dé xití ndute làmár, te ñá díú sǎ cündècu-dé ducaⁿ càda-dé. ⁷ ¡Te ndàhú ní cuu nchaa ñáyiu xìndecu ñuyíú-a, chi coo cue téé dacáháⁿ ñáhá xii-yu cadá-yu nándi sá cuèhé sá dúhá te dacuítí sǎ dúcáⁿ càda-xi! ¡Dico ndàhú ní cuu cue téé ducaⁿ na dàcaháⁿ ñáhá xii-yu cadá-yu nándi sá cuèhé sá dúhá!

⁸ Te núú ìⁿ xio ndaha-ndo àdi ìⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chi vǎha-gá sá nánihí tǎhú-ndó cuèi na cuíta ìⁿ

xio ndaha-ndo àdi ìⁿ xio sáhá-ndó, te ñá díú sã quíhíⁿ-ndó ñihí ní ndúú-ndó nũ ñùhú núú càyú. ⁹ Te núú ìⁿ xio tìnùu-ndo guide-xi guide-ndo nándi sá cuèhé sá dúhá, te tava-ndo na cuíta-xi, chi váha-gá sá nánihí tànhú-ndó cuèi na cuíta ìⁿ xio tìnùu-ndo, te ñá díú sã ndì ndúú xio núú-ndó quíhíⁿ-ndó nũ ñùhú núú càyú.

*Cuendá ìⁿ mbéé quiti ní xíta
(Lc. 15:3-7)*

¹⁰ Te vá dáquèe tihú-ndó cuè ñáyiù cùu cuendá-í cuèi cùú-yu ñáyiù ío ndàhú iní-xi. Te na cächí tñúhu-í xii-ndo sã cuè espíritú xínú cuèchi núú Yá Ndiõxí, cue espíritú néhé cuendá ñáhá xii-yu ñuyíú-a, nchaa-ni nduu nchaa-ni òré ndécú-xí nũ Tàtá-í Dútú Ndiõxí Yaá ndécú àndiù. ¹¹ Te ducaⁿ chi yúhú Tée cùu ñani tñáhá-ndó nchaa-ndo véxi-í ñuyíú-a dàcácu nihnu-í ñáyiù núú ùhú núú ndàhú, ñáyiù ta xíta nihnu cuáháⁿ.

¹² ¿Te nása sàni iní-ndó cuendá ìⁿ tée ndècu ìⁿ ciendú mbéé-xi?, chi núú na cuíta ìⁿ-di te dándóo-dé cúmídícó sáhúⁿ cúmí-di cundecu-di ìⁿ yucu te quíhíⁿ-dé cúnúndúcú-dé quiti ní xíta-áⁿ. ¹³ Te núú na nánihí-dé-di, te nchòhó sa cùtnuní iní-ndó sã ìo-gá cudíí iní-dé cuendá quiti ní xíta-áⁿ òré naníhí-dé-di dàcúúxí cúmídícó sáhúⁿ cúmí quiti ñá túú ní xíta-áⁿ. ¹⁴ Te ducaⁿ sãtnahá-xi quide Tátá-ó Dútú Ndiõxí Yaá ndécú àndiù, chi cuení-gá sá vã cuíta ni ìⁿ cue ñáyiù cùu cuendá-gá.

Cada càhnu iní-ó sã quidé ñàha tñaha ñáyiù-o

(Lc. 17:3)

¹⁵ Te núú ìⁿ ñáyiù ndècu ndihí-ndo ní quidé-yu ìⁿ sã ñà túú tàú-yu cadá-yu sá cúú-xí-ndó, te cáháⁿ-ndó dõho-yu núú méé nũ ìⁿ-ndó ndihí-yu cuendá sá ná ndìxi cuèchi iní-yu sã ñà túú quide váha-yu. Te núú ní tñí-yu tñúhu ní xáhaⁿ-ndo xii-yu, te ní ndacu-ndo ñi nacanu ichi-ndõ-yu. ¹⁶ Te núú ñá túú ní cuení-yu tñí-yu tñúhu xáhaⁿ-ndo xii-yu, te nducu-ndo ìⁿ àdi úú tñáhá cue tée canehe núú-güedé cuendá cundedóho-güedé nàcuáa ndùu tñúhu ndàtnúhu-ndo ndihí-yu. ¹⁷ Te tñáhá cue tée-áⁿ cáháⁿ-güedé dóho-yu, dico núú ni tñúhu càháⁿ cue tée-áⁿ ñà

túú ní cuení-yu tñí-yu, te dàtúu-ndo nũ dáva-gá ñáyiù ndècu ndihí-ndo ichi Xitohó Jesucristú cuendá cutnùní iní-yu nàcuáa quide ñáyiù-áⁿ. Te núú ñáyiù ndècuéchi-áⁿ ñà túú ní cuení-yu tñí-yu tñúhu sá ñi xáhaⁿ dáva-gá cue ñáyiù ndècu ichi-gá, te cada-ná iní-ndó sã cúú-yu ñáyiù ñá túú ndècu ichi Yá Ndiõxí dàtná cue tée cuihna iní-xi quide cobrá ñáhá xii ñáyiù cuendá impuèstú.

¹⁸ Te na cächí tñúhu ndáá-í xii-ndo sã nũ nchòhó ná cächí-ndó sã ndécú cuèchi ñáyiù, te diu-ni ducaⁿ cáháⁿ Yá Ndiõxí, àdi cachí-ndó sã ñà túú cuèchi-yu te diu-ni ducaⁿ cáháⁿ tucu-gá, te ducaⁿ chi nchòhó quidé-ndó nàcuáa càháⁿ-gá.

¹⁹ Te na cächí tñúhu-í xii-ndo sã nũ úú tñáhá-ndó cùu ìⁿ nuu-ndo cáháⁿ ndihí-ndo Tàtá-í Dútú Ndiõxí Yaá ndécú àndiù xicáⁿ-ndó nũ-gã nũ ná cúú sã cuení-ndó, te taxi-gá nũ ná cúú sã xicáⁿ-ndó nũ-gã. ²⁰ Te núú úú tñáhá-ndó àdi úní tñáhá-ndó ñi natacá-ndó ìⁿ xichi cuendá sã ñùhú iní ñáhá-ndó xii-í, te xíaⁿ ndécú ndihí ñaha-í xii-ndo —cächí-gá xáhaⁿ-gã xii-güedé.

²¹ Te té Pèlú ní sáháⁿ ndehe yatni-dé núú Jèsús, te xáhaⁿ-dè xii-gá:

—Mèstrú, cachí tñúhu xii-í ná daha xito cada càhnu iní-í tñaha ñáyiù-í te núú ìⁿ sá ná cada ñahá-yu xii-í. ¿Cuèdícó úsá xito-áⁿ? —cächí-dé xáhaⁿ-dè xii-gá.

²² Te Jèsús ní xáhaⁿ-gã xii-dé:

—Yúhú cächí-í sã ñà díú-ní úsá xito cada càhnu iní-n-yu, chi únídico úxí xito ndihí úsá ndihí úsá xito cada càhnu iní-n-yu —cächí-gá xáhaⁿ-gã xii-dé.

Cuendá tée ñá túú quide càhnu iní tñaha ñáyiù-xi

²³ Te xáhaⁿ tucu-gá xii-güedé:

—Na càni-í ìⁿ cuendú núú-ndó nàcuáa tecú tñuní-ndó nàcuáa cada-xi òré ndihu ndaha ñaha Yá Ndiõxí xii ñáyiù. ìⁿ tée yíndaha ñaha xii ñáyiù ní sani iní-dé sá cadá ndáá-dé ndihí cue tée xínu cuechi núú-dé cuendá nchaa sá tàú-güedé núú-dé. ²⁴ Te òré sa ní ngúndecu túha-dé te ní quexìo ìⁿ tée xínu cuechi núú-dé. Te tée-áⁿ tàú-dé cuèhé víhí díhúⁿ nũ-dé, chi tàú-dé úxí mĩ díhúⁿ sã nání tàlentú. ²⁵ Te tée xínu cuechi-áⁿ ñà túú díhúⁿ ndécú ndihí-dé nacháhu-dé sá tàú-dé núú patróon-dé-áⁿ, núú xíaⁿ ní táuchíúⁿ tée cùu patróon-dé-áⁿ

dico ñàha-güedé xii-dé ndihi ñadìhí-dé ndihi cue déhe-dé ndihi nchaa sá ndécú ndihi-dé cuendá nchaa-yu cuú-yu ñáiyu ñá túú tnàhí dàñá quee núú chíúⁿ pàtróóⁿ-xi, te ducaⁿ te ndéyáhu sá tàú-dé núú pàtróóⁿ-dë. ²⁶ Te tée xìnu cuechi-áⁿ ñí ngüíñí xítí-dë núú pàtróóⁿ-dë, te xàhaⁿ-dë: “Pàtróóⁿ, càháⁿ ndàhú-í núú-n sá ïo ndee ïo càhnu cada iní-n sá dúhá tàú-í núú-n, te ñá túú ná caní iní-n chí nacháhu-í nchaa sá tàú-í núú-n”, càchí-dé xàhaⁿ-dë xii pàtróóⁿ-dë. ²⁷ Te tée cùu pàtróóⁿ-dë-áⁿ ñí cundàhú iní ñáhá-dë xii-dé, te ní quide càhnu iní ñáhá-dë, te ní dàñá ñàha-dé cuánuhú-dé. ²⁸ Te tée xìnu cuechi-áⁿ ñí naníhí-dë ìⁿ tée xìnu cuechi ndihi-dé ichi cuánuhú-dé, te tée ní naníhí-dë-áⁿ tàú-dé sacú-ni díhúⁿ núú-dë chí ìⁿ ciëndú-ni díhúⁿ denariúⁿ tàú-dé. Te ní tñii-dé tée tàú núú-dë-áⁿ dácuehné ñáhá-dë xii-dé, te xàhaⁿ-dë: “Nacháhu sá tàú-n núú-í”, càchí-dé xàhaⁿ-dë. ²⁹ Te tée tàú-áⁿ ñí ngüíñí xítí-dë núú tée dii núú-xi tàú-dé-áⁿ, te xàhaⁿ-dë: “Càháⁿ ndàhú-í núú-n sá cada càhnu iní ñáhá-n xii-í sá tàú-í núú-n, te nacháhu cuéé-í nchaa sá tàú-í núú-n”, càchí-dé xàhaⁿ-dë. ³⁰ Dico tée dii núú-xi tàú-dé-áⁿ ñá túú ní cuíní-dé cada ndee ìní-dé cundetu-dé nacháhu cuéé téé-áⁿ sá tàú-dé, chí ní chihi ñàha-dë vecaa cuendá yàcáⁿ quihi-dé ndéé nacháhu-dé nchaa sá tàú-dé. ³¹ Te dava-gá cue tée xìnu cuechi ní xini-güedé nàcuáa ní quide téé-áⁿ, te ní cudééⁿ-güedé núú-dë, te ní sáháⁿ-güedé ní xitnùhu-güedé téé cùu pàtróóⁿ-güedé sá dúcáⁿ ñí quide-dé. ³² Te téé cùu pàtróóⁿ-güedé-áⁿ ñí cana-dé téé ducaⁿ ñí quide-áⁿ, te ní xàhaⁿ-dë: “Yòhó cúú-n ìⁿ téé ïo cuihna ìní-xi xìnu cuechi núú-í, chí yúhú ní quide càhnu iní ñáhà-í xii-n cuendá nchaa sá tàú-n núú-í òré ní càháⁿ ndàhú-n. ³³ Te tnàhá yòhó tàú-n dùcaⁿ cada-n cada càhnu iní-n tée xìnu cuechi ndihi-n núú-í cuendá nchaa sá tàú-dé núú-n dàtná ní quide ñàha-í xii-n ñí quide càhnu iní-í cuendá nchaa sá tàú-n”, càchí téé cùu pàtróóⁿ-áⁿ xàhaⁿ-dë xii téé ducaⁿ ñí quide-áⁿ. ³⁴ Te téé cùu pàtróóⁿ-áⁿ ñí cudééⁿ víhí-dë sá dúcáⁿ ñí quide téé-áⁿ, te ní táuchíúⁿ-dë dandòho ñàha-güedé xii-dé ndéé nacháhu-dé nchaa sá tàú-dé —duha ní caní Jèsús cuendú núú-güedé.

³⁵ Te xàhaⁿ tùcu-gá xii-güedé:

—Dàtná ní quide téé cùu pàtróóⁿ-áⁿ

ñí dándóhó-dë téé tàú núú-dë-áⁿ ducaⁿ càda ñàha Tàtá-í Dútú Ndiòxí Yáá ndécú àndiu xii-ndo, te núú vá ní yùhu ñí iní-ndó càda càhnu iní-ndó sá quidé ñàha tnaha ñáiyu-ndo xii-ndo —cachí-gá xàhaⁿ-gá xii-güedé.

19

Jèsús càháⁿ-gá cuendá cue ñáiyu dàña tnaha

(Mr. 10:1-12; Lc. 16:18)

¹ Te sáta ñí yáha ducaⁿ ñí càháⁿ Jèsús, te ní ndee-gá distritú Galileá cuáháⁿ-gá ndàa ìngá xio yúte Jòrdán yucu distritú Jùdeá. ² Te ïo cuéhé ñáiyu nchìcúⁿ ñáhá xii-gá cuáháⁿ, te yàcáⁿ ní quide tátna-gá nchaa ñáiyu cùhú.

³ Te ní quexìo ìⁿ úú cue téé cùu fariséú núú ndécú Jèsús xító ndéé ñáhá-güedé xii-gá núu nása cunduu tnúhu càháⁿ-gá, te xàhaⁿ-güedé xii-gá:

—Véxi-ndí xicáⁿ tnúhú-ndí núú-n, ¿cuu dàña ìⁿ téé ñadìhí-dé núu ndédani càa ìⁿ sá ñà túú cundáa-yu-áⁿ? —càchí-güedé xàhaⁿ-güedé xii-gá.

⁴ Te Jèsús ní xàhaⁿ-gá xii-güedé:

—Te nchòhó, ¿náa ñá túú dàcuaha-ndo núú tùtú Yá Ndiòxí, te diu núú tùtú-gá càháⁿ-xi sá cùtnàhá ní cadúha-gá ñáiyu, te téé ñadìhí ní cadúha-gá-áⁿ? ⁵ Te duha càchí tucu-xi núú tùtú Yá Ndiòxí nàcuáa ní càháⁿ-gá: “Cue téé na ñihí ñadìhí-xi te dèⁿ-ná cada-güedé tátá-güedé ndihi náná-güedé, chí ñadìhí-ná-güedé cuu cuu ndihi-güedé, te cada iní-ndó sá ìⁿ-ná yìqui cùñú cuú-yu cundecú-yu”, duha càchí Yá Ndiòxí núú tùtú-gá. ⁶ Te xíáⁿ núu cada iní-ndó sá cué ñáiyu úú-áⁿ ìⁿ-ná yìqui cùñú cúú-yu, te ñá túú-gá ndí dèⁿ ndí dèⁿ yìqui cùñú cúú-yu. Núu xíáⁿ ñá túú ndùu váha-xi dàña cué téé ñadìhí-güedé, chí mee Yá Ndiòxí ní cachí-gá sá cúú úú-yu cundecú-yu —càchí Jèsús xàhaⁿ-gá xii-güedé.

⁷ Te ní xàhaⁿ-güedé xii Jèsús:

—Te núu ducaⁿ, ¿te ná cuendá ndí Moisés ní cachí ndí sá núu ìⁿ téé cuíní-dé dàña-dë ñadìhí-dé, te cuu cadúha-dé ìⁿ tutú núú càháⁿ-xi sá ñí dàñá-dë ñadìhí-dé, te ducaⁿ te cuu dàña ñàha-dé ní cachí ndí vãⁿ? —càchí-güedé xàhaⁿ-güedé xii-gá.

⁸ Te Jèsús ní xáhaⁿ-gã xii-güedé:

—Te ducaⁿ ní cachí ndíi Moisés sá cúú dàña-ndo ñadihí-ndó, chi nchòhó ío sàá iní-ndó, dico ndéé díhna chi ní tecú tnúhu nchaa cue téé sá vã dáña-güedé ñadihí-güedé. ⁹ Dico yúhú cächí tnúhu-í xii-ndo sã nüü ìⁿ téé na dàña-dé ñadihí-dé te naqueheⁿ-dé ingá ñadihí te ío nèhé quidé-dé, te núu ñá díú cuendá sá cãháⁿ ndihí-aⁿ ingá téé ducaⁿ na dàña ñaha-dé. Te sá dúcáⁿ cuendá-ni na dàña ìⁿ téé ñadihí-dé, te ìⁿ-ni cuèchi cùu-xi ndihí cuéchi quide téé ndèca ñadihí te cãháⁿ ndihí-dé ingá ñadihí —cächí-gã xáhaⁿ-gã xii-güedé.

¹⁰ Te cue téé xica cuu ndihí-gá ní xáhaⁿ-güedé xii-gá:

—Te núu ducaⁿ cùu cuendá cue téé ndihí ñadihí-güedé, te váha-gá sá vã cándèca cue téé ñadihí —cächí-güedé xáhaⁿ-güedé xii-gá.

¹¹ Te Jèsús ní xáhaⁿ-gã xii-güedé:

—Ñá ncháá ñáyiú ducaⁿ ndüü táhü-yu cundecú-yu, chi mee-ni ñáyiú ní cachí Yã Ndiöxí sá dúcáⁿ tnàhí ndüü táhü cundecu mee. ¹² Te ío cue téé ducaⁿ tnàhí ní ndüü táhü-güedé ndéé òré ní cacu-güedé sá vã cándèca-güedé ñadihí. Te ío cue téé ñá ndácú-güedé candeca-güedé ñadihí cuendá sá ní quide ñaha dàva-gá cue tnàha téé-güedé xii-güedé. Te dava-güedé ñá túú cándèca-güedé ñadihí chi cuiní-güedé sá vã dáña ndéé-güedé cunu cuechi-güedé núú Yã Ndiöxí. Te nchaa cue téé ducaⁿ ní ndüü táhü núú Yã Ndiöxí cundecu mee, te váha-ni te núu na cundecu mee-güedé —cächí-gã xáhaⁿ-gã xii-güedé.

Jèsús xicáⁿ táhü-gã núú Yã Ndiöxí cuendá landú

(Mr. 10:13-16; Lc. 18:15-17)

¹³ Te ìⁿ úú ñáyiú ndècá-yu landú líhli cuáháⁿ núú Jèsús, chi cuiní-yu sá téndaha ñaha-gã xii-güexi, te cacáⁿ táhü-gã núú Yã Ndiöxí cuendá-güexi. Te cue téé xica cuu ndihí-gá ní ngüíta-güedé ténáá ñáhá-güedé xií-yu, te xáhaⁿ-güedé sá vã dúcáⁿ cadá-yu.

¹⁴ Te Jèsús ní xáhaⁿ-gã xii-güedé:

—Chí dáña ná quixi nahi cue landú líhli-áⁿ nüü-í-a, te vá cãdí-ndó ìchi-güexi, chi dàtná cúú váha iní cue landú líhli-áⁿ ducaⁿ

cùu váha iní cue ñáyiú yíndaha ñaha Yã Ndiöxí —cächí-gã xáhaⁿ-gã xii-güedé.

¹⁵ Te ní tendaha ñaha-gã xii-güexi, te ní xicáⁿ táhü-gã núú Yã Ndiöxí cuendá-güexi, te sátá dúcáⁿ ní quide-gã te ní xica-gã cuáháⁿ-gã.

Ìⁿ téé cuica cãháⁿ ndihí-dé Jèsús

(Mr. 10:17-31; Lc. 18:18-30)

¹⁶ Te ìⁿ téé cuechi ní quexìo-dé núú ndécú Jèsús, te xicáⁿ tnúhú-dé núú-gã, te xáhaⁿ-dè xii-gá:

—Yòhó Mèstrú, cùu-n téé ío váha iní-xi, te cuiní-í nüü vá cündèe iní-n cächí tnúhu-n ná cúú sã váha cada-í cuendá ndüü táhü-í cundecu-í ndihí Yã Ndiöxí ni caa ni quíhíⁿ —cächí-dé xáhaⁿ-dè xii-gá.

¹⁷ Te Jèsús ní xáhaⁿ-gã xii-dé:

—¿Te cùtnuní iní-n nàcuáa ndüü tnúhu cãháⁿ-n sã yúhú váha iní-ãⁿ?, chi ìⁿ dîi díi-ni Yã Ndiöxí ío váha iní-gá. Te núu cuiní-n nàníhí táhü-n te tnîi-n nchaa tnúhu cãháⁿ Yã Ndiöxí, tnúhu sá sánú ìchi ñaha xii ñáyiú nàcuáa cadá-yu cundecú-yu —cächí-gã xáhaⁿ-gã xii-dé.

¹⁸ Te téé cuechi-ãⁿ ní xáhaⁿ-dè xii-gá:

—¿Te ndèndida cãa tnúhu cãháⁿ Yã Ndiöxí cada-í-i? —cächí-dé xáhaⁿ-dè xii-gá.

Te Jèsús ní xáhaⁿ-gã xii-dé:

—Te duha ní cachí Yã Ndiöxí cada ñáyiú: “Vá cãhní-ndó tnàha ñáyiú-ndo, vá cãháⁿ ndihí-ndo ñadihí te núu ñá díú ñadihí-ndó cùú-yu, te ducaⁿ-ni nchòhó cue ñáyiú díhí tucu vá cãháⁿ ndihí-ndo tée te núu ñá díú yîi-ndo cuu-güedé, te vá dúhü-ndó sã ndécú ndihí tnaha ñáyiú-ndo, vá dácacu-ndo cuéchi neñúú sá cúú-xí tnàha ñáyiú-ndo.

¹⁹ Te canehe-ndo sã yíñühu núú tãtá-ndó ndihí núú nãná-ndó, te cundàhú iní-ndó tnàha ñáyiú-ndo dàtná cündàhú iní-ndó mèe-ndo”, duha ní cachí Yã Ndiöxí cada ñáyiú —cächí-gã xáhaⁿ-gã xii-dé.

²⁰ Te téé cuechi-ãⁿ ní xáhaⁿ-dè xii-gá:

—Nchaa xîãⁿ ní ngüíta-í quidé-í ndéé cùtnàhá cúú làndú-í, ¿te vitna nágá cúmãní cada-í-i? —cächí-dé xáhaⁿ-dè xii-gá.

²¹ Te Jèsús ní xáhaⁿ-gã xii-dé:

—Te núu cuiní-n cùu-n ìⁿ téé ío váha cada ndáá, te cuáháⁿ dico-n nchaa sã ndécú ndihí-n, te díhüⁿ-n cuãha táhü-n cuè ñáyiú ndàhü, te ducaⁿ te ndüü táhü-n ngündecu

váha-n núú ndécú Yá Ndiõxí táxi tnùní-gá. Te sáta ná yáha ducaⁿ càda-n te quixi-n chitnahá ñáha-n xii-í —càchí-gá xáhaⁿ-gá xii-dé.

²² Te sá dúcáⁿ ñí xáhaⁿ Jèsús xii-dé te ío ní cundìyí-dé, chi ío cuica-dě, te ní xica-dé cuáháⁿ-dé.

²³ Te Jèsús ní xáhaⁿ-gá xii cue téé xica cuu ndihi-gá:

—Na càchí tnúhu ndáá-í xii-ndo sã ño úhú quíndáá iní ñaha cuè ñáyiú cuica xii Yá Ndiõxí cuendá ndíhu ndaha ñaha-gá xii-yu. ²⁴ Te na càchí tnúhu tucu-í xii-ndo sã yáchí-gá yáha ñⁿ caméyu yaú ñⁿ yiqui tícú dàcúúxí sã quíndáá iní ñⁿ ñáyiú cuica Yá Ndiõxí cuendá ndíhu ndaha ñaha-gá xii-yu —càchí-gá xáhaⁿ-gá xii-güedé.

²⁵ Te sá dúcáⁿ ñí cáháⁿ Jèsús, xíãⁿ ío ní cuñúhu cue téé xica cuu ndihi-gá, te ní ngúíta-güedé xitnàha-güedé:

—¿Yoo naníhí tãhú te núu ducaⁿ vàiⁿ? —càchí-güedé xitnàha-güedé.

²⁶ Te Jèsús ní ndacoto-gá núú-güedě, te xáhaⁿ-gá xii-güedé:

—Nchaa ñáyiú ñuyú-a chi vá ndácú-yu ná cadá-yu nàcuáa ndíhu ndaha ñaha Yá Ndiõxí xii-yu, dico mee-gá chi ndacu-gá ndíhu ndaha ñaha-gá xii-yu chi nchaandi túhú sá vaha ndàcu-gá quidé-gá —càchí-gá xáhaⁿ-gá xii-güedé.

²⁷ Te té Pèlú ní xáhaⁿ-dě xii-gá:

—Nchúhú ní dándõo-ndí nchaa sá ndécú ndihi-ndí, te ní tuha ñaha-ndí xii-n, ¿te ná cúú sã ñihí-ndí nduu táhú-ndí sá dúcáⁿ ñí quide-ndí-i? —càchí-dé xáhaⁿ-dě xii-gá.

²⁸ Te Jèsús ní xáhaⁿ-gá xii-güedé:

—Na càchí tnúhu ndáá-í xii-ndo sã ná sáa nduu, nduu saa nchaa sá ío andiú ndihi ñuyú-a, te dàvá-áⁿ cunucóo yúhú Téé cùu ñaní tnáhá-ndó nchàa-ndo ñⁿ núú xilé váha, te nchaa ñáyiú quini-yu sá ño càhnu cuu-í, te nchòhó cue téé ní tuha ñaha xii-í tnáhá-ndó cùnucóo-ndo núú ñⁿ caa xilé váha ndi ùxúú tnáhá-ndó, te xíãⁿ cunucóo-ndo càda ndáá-ndó cuèchi ndi ùxúú xichi cue ñáyiú isràél. ²⁹ Te nchaa ñáyiú na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na cadá-yu sá cuendá-í te ío-gá

cuéhé sã cuãñaha Yá Ndiõxí cundecu ndihi-yu, te ñá díú-ní xíãⁿ chi tnáhá nduu táhú-yu cundecú-yu ndihi-gá ñí caa ñí quíhíⁿ. ³⁰ Te dava ñáyiú cùnnuu ndecu ichi Yá Ndiõxí vitna, ñáyiú-áⁿ sáa nduu te vá ño-gá cunúú-yu dàtná cùnúú-yu vitna, te dava ñáyiú nchicúⁿ ñá túú cùnnuu vitna, ñáyiú-áⁿ sáa nduu te ío cunúú-yu —càchí-gá xáhaⁿ-gá xii-güedé.

20

Cuendá cue téé quide chiuⁿ

¹ Te xáhaⁿ tucu Jesús xii cue téé xica cuu ndihi-gá:

—Na càni-í ñⁿ cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyiú. ñⁿ téé ní xitu-dé yoho yáha stilé, te ñⁿ nduu ní quee-dé nehé-ñí cuándúcú-dě cue téé cada chiuⁿ núú dúcáⁿ ñí xitu-dé yoho yáha stilé-áⁿ. ² Te òré ní ñihí-dě cue téé cada chiuⁿ-áⁿ, te ní quide ndáá-dé ndihi-güedé sá chãhu ñaha-dě xii-güedé ñⁿ díhúⁿ denàriú ñⁿ nduu. Te sáta dúcáⁿ te ní tendaha ñaha-dé xii-güedé cuáháⁿ-güedé cada chiuⁿ-güedé núú dúcáⁿ ñí xitu-dé yoho yáha stilé-áⁿ. ³ Te dàtnùní ní xica tucu-dé cuáháⁿ-dé dàtná òré caá ñⁿ dátneé cuándúcú-gã-dé cue téé cada chiuⁿ núú ñí xitu-dé yoho yáha stilé-áⁿ, te ní xiní-dé xĩnutnĩ ñⁿ úú cue téé núú yáhu te ñá túú ñã chiuⁿ xiquide-güedé.

⁴ Te ní xáhaⁿ-dě xii-güedé: “Ñá túú cùdana cuyáchí-ndó càda-ndo chiuⁿ-í te cháhu ñaha-í xii-ndo nàcuáa tàú-xi cunduu-ãⁿ”, càchí-dé xáhaⁿ-dě xii-güedé. Te cue téé-áⁿ ñí sáha-güedé tnúhu cada chiuⁿ-güedé te ní xica-güedé cuáháⁿ-güedé. ⁵ Te téé ní xitu yoho yáha stilé-áⁿ ñí xica tucu-dé dàtná òré caúxúú nduu cuándúcú-gã-dé cue téé cada chiuⁿ-dé, te ní ñihí tucu-dé cue téé cada chiuⁿ. Te ní quee tucu-dé dàtná òré caá úní sacuaa, te diu-ñí ducaⁿ ñí quide tucu-dé. ⁶ Te ní quee tucu-dé dàtná òré caá úhúⁿ sacuaa cuándúcú-gã-dé cue téé cada chiuⁿ-dé, te ní xiní-dé xĩnutnĩ ñⁿ úú cue téé diu-ñí núú yáhu-áⁿ te ñá túú ñã chiuⁿ quide-güedé, te ní xáhaⁿ-dě xii-güedé: “Sànuu sá nchòhó ní cuu nchàca vitna ñá túú ñihí-ndó chiuⁿ cada-ndo”, càchí-dé xáhaⁿ-dě xii-güedé. ⁷ Te cue téé-áⁿ

nĩ xáhaⁿ-güedě xii-dé: “Ñá túú nihí-ndí chiuⁿ cada-ndí chi vá yõo ndücu ñaha xii-ndí”, cächí-güedé xáhaⁿ-güedě xii-dé. Te ní xáhaⁿ-dě xii-güedé: “Yúhú taxi-í chiuⁿ cada-ndo, te quíhíⁿ-ndó nũú nĩ xitu-í yoho yàha stilé yàcáⁿ cada chiuⁿ-ndo, te cháhu ñaha-ĩ xii-ndo nàcuáa tàú-xi cunduu”, cächí-dé xáhaⁿ-dě xii-güedé. ⁸ Te sátá nĩ dáhu nchíanchii, te téé dii chiuⁿ-xi-án nĩ xáhaⁿ-dě xii téé tàxi tñuní ñáhá xii cue téé quide chiuⁿ-án: “Cúñaha xii nchaa cue téé quide chiuⁿ-án ná quíxí-güedě te cháhu-n-güedě, te díhna-gá cue téé nchícúⁿ cuií-nã cuánguihu núú chíúⁿ ngũita-n cháhu-n, te ndéé núú nĩ ndihí-ná cháhu-n cué téé cuánguihu díhna nuu-gã núú chíúⁿ”, cächí-dé xáhaⁿ-dě xii téé tàxi tñuní ñáhá xii cue téé quide chiuⁿ-án. ⁹ Te díhna-gá cue téé cuánguihu caá úhúⁿ sacuaa ní quexio-güedé cuendá cháhu ñaha-dě, te ní cháhu ñaha-dě ìⁿ caa díhúⁿ denàriú xii ìⁿ ìⁿ-güedé. ¹⁰ Te sátá nĩ cháhu-dé dava-gá cue téé ní quide chiuⁿ. Te ndéé núú nĩ ndihí-ná ní cháhu-dé cue téé cuánguihu díhna nuu-gã núú chíúⁿ. Te cue téé-án nĩ sani iní-güedé sá vái-gã cháhu ñaha-dě xii-güedé, dico ñáhá chi ìⁿ caa-ni díhúⁿ denàriú ní cháhu ñaha-dě xii ìⁿ ìⁿ-güedé. ¹¹ Te cue téé-án nĩ queheⁿ cuendá-güedé díhúⁿ-güedé dico ñá túú ní quide váha-xi iní-güedé. ¹² Te ní xáhaⁿ-güedě xii téé dii chiuⁿ-xi ní quide-güedé: “¿Ná cuendá cue téé nchícúⁿ cuií-nã cuánguihu núú chíúⁿ ìⁿ-ni nĩ cháhu ñaha-n xii-ndí ndihí-güedé, te ìⁿdií oré duha ní quide chiuⁿ-güedé? Te nchúhú nchàca nchaa ní sahani iní-ndí ní quide chiuⁿ-ndí, te ní ndoho-ndí cahni, te ìⁿ-ni nĩ cháhu ñaha-n xii-ndí ndihí-güedé”, cächí-güedé xáhaⁿ-güedě xii téé dii chiuⁿ-xi ní quide-güedé. ¹³ Te téé dii chiuⁿ-xi ní quide-güedé-án nĩ xáhaⁿ-dě xii ìⁿ téé-án: “Yòhó, ñá túú quide-í ìⁿ sá ñà túú tàú-í cada-í sá cúú-xí-n, chi ní quide ndáá-ó sã díú-ni ìⁿ díhúⁿ denàriú cháhu ñaha-ĩ xii-n ìⁿ nduu. ¹⁴ Te vitna queheⁿ díhúⁿ cuendá nduu-n te núhú-n, chí yúhú cuiní-í sá ìⁿ-ni cháhu ñaha-ĩ xii-n ndihí cue téé nchícúⁿ cuií-nã cuánguihu núú chíúⁿ. ¹⁵ Chi yúhú cuu-ni cada-í nani cuiní-í ndihí díhúⁿ-í, ¿adi dico ñá túú quide váha-xi iní-n

sã dúhá cundahú iní-í cue téé-ãⁿ ducaⁿ cháhu-í-güedé?”, cächí téé cùu patróoⁿ-án xáhaⁿ-dě xii téé-án. Duha nduu cuendú caní-í núú-ndó. ¹⁶ Te duha cãháⁿ-í chí dava ñáyiú cùnuu ndecu ichi Yá Ndiõxí vitna sáá nduu te vá cùnùu vihi-gá-yu dàtná cùnùú-yu vitna, te dava ñáyiú ñá túú cùnùu vitna sáá nduu ìo cùnùú-yu. Te ío cuéhé ñáyiú cãháⁿ ñáhá Yá Ndiõxí xii-yu dico sacú-ni-yu nduu táhũ-yu cundecú-yu ndihí-gá —cächí-gá xáhaⁿ-gã xii-güedé.

Jèsús cãháⁿ tucu-gá sá cáhni ñaha-güedé xii-gá

(Mr. 10:32-34; Lc. 18:31-34)

¹⁷ Te ñùhu Jèsús ichi cuásaá-gá ñúú Jerusálén ndihí cue téé xica cuu ndihí-gá, te ní cana ñaha-gã xii-güedé ní naníhí tñáhá-güedé ndihí-gá, te ta ndàtnúhu ndihí ñaha-gã xii-güedé cuáhán, te xáhaⁿ-gã xii-güedé:

¹⁸ —Vitna ñùhu-o ichi cuásaá-ó ñúú Jerusálén, te yàcáⁿ cuáha cuendá ñáhá-güedé xii yúhú Téé cùu ñaní tñáhá-ndó nchàa-ndo núú cué téé cùu dútú cùnùu, ndihí núú cué téé dàcuaha ñaha xii ñáyiú nchaa tñúhu ní chídó tñuní ndí Moisés. Te diu cue téé-án cùñaha-güedé xii dava-gá cue téé sá cáhni ñaha-güedé xii-í. ¹⁹ Te cuáha cuendá ñáhá-güedé xii-í núú cué téé ñá túú cùu cue téé isràél, te cue téé-án cudíquí ndéé ñáhá-güedé xii-í, te caniha-güedé ndihí ñi, te dàtnùní cata caa ñaha-güedé xii-í núú cùrúxí te núú cùrúxí-án cuú-í, dico nduu úní sá cùú-í te ndoto-í —cächí-gá xáhaⁿ-gã xii-güedé.

Náná tẽ Jàcobó ndihí té Juàá cuiní-aⁿ sá cùnùu-güedé ndihí Jèsús

(Mr. 10:35-45)

²⁰ Te cue déhe té Zebèdeú té Jàcobó ndihí té Juàá ndéca ñaha náná-güedé xii-güedé cuáhán núú ndécú Jèsús, te òré ní quexio-aⁿ ndihí-güedé núú ndécú-gã te ní ngüíñí xítí-án nũú-gã cuendá cuiní-aⁿ ndàtnúhu ndihí ñaha-aⁿ xii-gá cuendá sá cúú-xí cue déhe-aⁿ. ²¹ Te cùmání-gã cãháⁿ-aⁿ te ní xicán tñúhú Jèsús núú-aⁿ, te xáhaⁿ-gã:

—¿Ná cuiní-n? —cächí-gá xáhaⁿ-gã xii-aⁿ.

Te ní xáhaⁿ-aⁿ xii-gá:

—Véxi-í cãháⁿ ndàhú-í núú-n nũu vá cùndèe iní-n cùnucóo ìⁿ déhe-í-a xio cùha-n,

te ingá-dé cunucóo-dé xio dàtni-n na saá nduu cùnucóo-n núú táxi tnùnì-n —càchí-áⁿ xáhaⁿ-aⁿ xii-gá.

²² Te Jèsús ní xáhaⁿ-gã xii úú cue téé-áⁿ:

—Nchòhó, ñá túú cùtnuní váha iní-ndó nàcuáa ndùu sá xicáⁿ-ndó núù-í. ¿Te náa cundee iní-ndó dàndoho ñaha ñáyiú xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-áⁿ? —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —càchí-güedé xáhaⁿ-güedé xii-gá.

²³ Te Jèsús ní xáhaⁿ-gã xii-güedé:

—Ndáá sá cündèe iní-ndó ndòho-ndo nchaa nacuáa ndòho-í, dico sá dúcáⁿ cuìní-ndó sã ñá-ndó cùnucóo-ndo xio cuhá-í, te ñá-ndo cùnucóo-ndo xio datni-í, te xíáⁿ chi ñá díú yùhú tàú-í cachí-í núu sá cúú cùnucóo-ndo àdi sá vã cúú cùnucóo-ndo, chi mee Tãtà-í Dútú Ndiöxí cachí-gá te núu ná cúú ñáyiú nduu táhú cunucóo ñá-í-í dàvá-áⁿ —càchí-gá xáhaⁿ-gã xii-güedé.

²⁴ Te òré ní níhí ùxí-gá cue téé xica cuu ndihí-gá tnúhu nàcuáa ndùu sá cuìní cue téé úú-áⁿ, te ní cudééⁿ-güedé núú cuè téé úú-áⁿ.
²⁵ Te Jèsús ní cana-gá nchaa cue téé xica cuu ndihí-gá, te ní xáhaⁿ-gã xii-güedé:

—Nchòhó xìnì-ndó sã cuè téé yìndaha nacióⁿ quidé-güedé sá ño cùnuu-güedé, te nchaa dava-gá cue téé cùnuu ndihí-güedé quidé-güedé tnàhá-güedé sá ño cùnuu-güedé.

²⁶ Dico nchòhó chi vá dúcáⁿ càda-ndo, chi núu dava-ndo cuìní-ndó cùnuu-ndo, te xini ñuhu-xi cunu cuechi núú tnàhá-ndó te vá càdá-ndó sã cùnùu-ndo. ²⁷ Te núu dava-ndo cuìní-ndó quène cáva-ndo, te cuu-ndo dàtná cue ñáyiú ñá túú tnàhí dàná quee núú chíúⁿ pàtróóⁿ-xi cunu cuechi núú tnàhá-ndó.

²⁸ Te cada-ndo dàtná quidé yùhú Téé cùu ñanì tnàhá-ndó nchaa-ndo, chi yùhú véxi-í ñuyíú-a dico ñá díú sã cúnú cuèchi ñáyiú núù-í chi véxi-í sá cúnú cuèchi-í núù-yu. Te cuú-í ñuyíú-a cuèndá vai-yu cácu nihnú-yu núú ùhú núú ndàhú —càchí-gá xáhaⁿ-gã xii-güedé.

Jèsús quidé tãtna-gá núú úú tnàhá cue téé cuáá

(Mr. 10:46-52; Lc. 18:35-43)

²⁹ Te òré ní quee Jèsús ñuú Jericó ndihí cue téé xica cuu ndihí-gá, te cuéhé víhí ñáyiú nchicúⁿ ñahá xii-gá cuáháⁿ. ³⁰ Te yuhu ìchi cuáháⁿ-gá xìnucóo úú tnàhá cue téé cuáá, te cue téé-áⁿ ñi cutnùnì iní-güedé sá Jèsús ñúhú-gã ichi-áⁿ te ní ngüíta-güedé níhi càháⁿ-güedé, te xáhaⁿ-güedé xii-gá:

—¡Yòhó Mèstrú, ñanì tnàhá ndí Dàvíí, cundàhú iní ñahá xii-ndí! —càchí-güedé xáhaⁿ-güedé xii-gá.

³¹ Te cue ñáyiú tèná ñahá-yu xii-güedé, te xáhãⁿ-yu sá ná càdí-güedé yuhu-güedé, dico uuⁿ-gá níhi ní cáháⁿ-güedé, te xáhaⁿ-güedé xii-gá:

—¡Yòhó Mèstrú, ñanì tnàhá ndí Dàvíí, cundàhú iní ñahá xii-ndí! —càchí-güedé xáhaⁿ-güedé xii-gá.

³² Te ní ngüíñí Jèsús te ní cana ñaha-gã xii-güedé, te ní xicáⁿ tnúhú-gã núú-güedé, te xáhaⁿ-gã:

—¿Ná cuìní-ndó càda ñaha-í xii-ndo-i? —càchí-gá xáhaⁿ-gã xii-güedé.

³³ Te ní xáhaⁿ-güedé xii-gá:

—Mèstrú, cuìní-ndí sá càdá tãtna-n núú-ndí cuèndá cundehe-ndí —càchí-güedé xáhaⁿ-güedé xii-gá.

³⁴ Te Jèsús ní cundàhú iní ñahá-gã xii-güedé, te ní tendaha-gã núú-güedé. Te òré-ni ní ndúha núú-güedé, te nchicúⁿ ñahá-güedé xii-gá cuáháⁿ.

21

Jèsús cuánguñihu-gá ñuú Jerusalén

(Mr. 11:1-11; Lc. 19:28-40; Jn. 12:12-19)

¹ Te òré sa ta cùyatni Jèsús ndihí cue téé xica cuu ndihí-gá ñuú Jerusalén, te ní quexio-gá ndihí-güedé yatni vií-nã ñuú Bèttagé, te xíáⁿ cáá yùcu nani Olivú. Te ní ndatnúhu-gá ndihí úú cue téé xica cuu ndihí-gá, ² te ní xáhaⁿ-gã xii-güedé:

—Chí cuáháⁿ ñuú cáá yàtni yacáⁿ, te òré quexio-ndo yacáⁿ te nanihí-ndó ñi búrru ñíhí ndètní-í ndihí déhe-í, te nandaxi-ndo-güedé te candeca-ndo-güedé quixi. ³ Te núu ió ñáyiú dàdahaⁿ ñaha xii-güedé, te cúñaha-ndo xii-yu sá yùhú

Yaá xícá cùu ndihi-ndo xini ñuhu-í-güedi, te ndihi-ni natendaha-ï-güedi nùhú-güedi cúñaha-ndo —càchí-gá xáhaⁿ-gã xii-güedé.

⁴ Te ducaⁿ ñi cuu chi ní quee ndáá-xi nàcuáa ní chídó tnùní ñⁿ téé ní xóo cáháⁿ tnúhu Yá Ndiöxí ndéé sanaha núú tütú-gá núú càchí-xi:

⁵ Chí cùñaha cuè ñáyiú ñuú Sìón ná cáda cuendá-yu, chi véxi téé yíndaha ñaha xii-yu yòdo-dé ñⁿ búrru líhli déhe ñⁿ búrru quiti sa xido,

te cùu-dé ñⁿ téé ío ndàhú iní-xi.

Duha ní chídó tnùní ñⁿ téé ní xóo cáháⁿ tnúhu Yá Ndiöxí ndéé sanaha núú tütú-gá.

⁶ Te cue téé xica cuu ndihi-gá ní xica-güedé cuáháⁿ-güedé, te ní quide-güedé nàcuáa ní xáhaⁿ-gã xii-güedé cada-güedé.

⁷ Te ní ndexìo-güedé ndécá-güedé ñⁿ búrru dìhí ndihi déhe-di, te ní sacáⁿ ndodo-güedé dóo-güedé sátá-güedi, te dàtnùní cuásaá Jèsús sátá ñⁿ-di ní ngódó ñàha-gá xii-di.

⁸ Te ío cuéhé ñáyiú ta sàcáⁿ-yu dóo-yu ichi cuáháⁿ-gá cuendá núú dõo-yu-áⁿ yàha-gá ndihi quiti yòdo-gá. Te davá-yu xèhndé-yu ndaha yùtnu ñuú tá sàcáⁿ-yu cuáháⁿ. ⁹ Te nchaa ñáyiú yòdonuu núú-gã ndihi nchaa ñáyiú nchìcúⁿ ndàa sátá-gã ní ngüíta-yu níhi càháⁿ-yu, te càchí-yu:

—Ío càhnu cuu Yaá cúú ñàní tnáhá ndí Dàvíí! ;Te Yá Ndiöxí ío na chìndee ñaha-gá chi cùu-gá Yaá ní tendaha Yá Ndiöxí véxi quide núú-gã! ;Te ndéé nchaa sá ío andiu na càchí-xi sá ío càhnu cuu-gá! —duha càchí-yu.

¹⁰ Te òré cuánguihu Jèsús ñuú Jerusalén, te nchaa ñáyiú ñuú-áⁿ ñi ngüíta-yu xicuáa-yu, te davá-yu ní ngüíta-yu xitnàhá-yu:

—¿Yoo cùu téé-áⁿ? —càchí-yu xitnàhá-yu.

¹¹ Te davá-yu xitnàhá-yu:

—Téé-áⁿ cúú-dé Jèsús téé càháⁿ tnúhu Yá Ndiöxí, te cùu-dé téé ñuú Nazàrét ñuú yíndèhu distritú Galileá —càchí-yu xitnàhá-yu.

Jèsús ñá túú tnáhá iní-gá nàcuáa xiquide ñáyiú xití veñúhu

(Mr. 11:15-19; Lc. 19:45-48; Jn. 2:13-22)

¹² Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xíndecu ñáyiú quide ndáhú nádìcò-yu, ndihi ñáyiú

xísaⁿ, te ncháa-yu ní queñuhu ñaha Jèsús xii-yu quehé, te ní dándüá-gá mèsá nchaa ñáyiú dàma díhúⁿ, ndihi nchaa xilé sácõo nchihi ñáyiú dìco lómá xíndecu xití veñúhu-áⁿ. ¹³ Te ní xáhaⁿ-gã xii-yu:

—Núú tütú Yá Ndiöxí càháⁿ-xi nàcuáa ní cáháⁿ-gá, te ní cachí-gá: “Vehe-í cúú-xi núú càháⁿ ndihi ñaha ñáyiú xii-í”, duha ní cáháⁿ-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáhaⁿ-gã xii-yu.

¹⁴ Te xíaⁿ ndécú Jèsús ní quexìo cue téé cuáa ndihi cue téé yacua, te ní quide tátna ñaha-gã xii-güedé te ní ndúha-güedé.

¹⁵ Te cue dütú cùnùu ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés ní xiní-güedé ní quide Jèsús sá vã yõo tnàhí ndàcu cada, te ndèdóho tucu-güedé níhi xicáháⁿ cue landú xití veñúhu càhnu sá ío cùnuu-áⁿ, te càchí-güexi: “Ío càhnu cuu Yaá cúú ñàní tnáhá ndí Dàvíí”, càchí-güexi. Te ní cudééⁿ-güedé, ¹⁶ te ní xáhaⁿ-güedé xii Jèsús:

—¿Ndèdóho-n nàcuáa càháⁿ cue landú-áⁿ ñã? —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Ndèdóho-í, te nchòhó náa ñá túú dàcuaha-ndo núú tütú Yá Ndiöxí núú càháⁿ-xi cuendá cue landú-áⁿ, te duha càchí-xi:

Yòhó ní quide-n sã cuè landú vitna sàdi, ndihi cue dava-gá landú, chiñuhu ñaha-güexi xii-n nàcuáa tàú-xi cundu.

Duha càchí-xi núú tütú-gá —càchí-gá xáhaⁿ-gã xii-güedé.

¹⁷ Te xíaⁿ ñi dándõo ñaha Jèsús xii-güedé, te ní xica-gá cuáháⁿ-gá ñuú Bètaniá, yàcáⁿ ní xíndecu-gá niú-áⁿ.

Jèsús xáhaⁿ-gã xii yutnu ngüxi sá vã cúú-gã sávidí-xi

(Mr. 11:12-14, 20-26)

¹⁸ Te nduu tnèé-áⁿ nehé-ni cuáháⁿ tucu Jèsús ñuú Jerusalén, te ichi ñuhu-gá ní xihí-gá docó. ¹⁹ Te ní xiní-gá ñⁿ yutnu ngüxi nútñi ñⁿ xio yuhu ìchi, te ní xica-gá cuáháⁿ ndéhé-gã núu ndéé sávidí-xi, dico ñá túú ñã ndéé chi mee-ni ndàha-xi ndeé. Te ní xáhaⁿ-gã xii yutnu ngüxi-áⁿ:

—Ívitna te vá ñⁿ ndúu-gá cuuⁿ sávidí-n! —càchí-gá xáhaⁿ-gã xii-xi.

Te òré-ni-áⁿ nǐ yíchí yutnu ngǔxí-áⁿ. ²⁰ Te sá dúcáⁿ nǐ cuu ní xiní cue téé xica cuu ndihí Jesús, te ío ní cuñúhu-güedé, te ní xicáⁿ tnúhú-güedé núú-gǎ, te xáhaⁿ-güedé:

—¿Ná cuendá ndéé dácáⁿ ío ndihí ní yíchí yutnu ngǔxí-áⁿ-í? —càchí-güedé xáhaⁿ-güedé xii-gá.

²¹ Te Jèsús ní xáhaⁿ-gǎ xii-güedé:

—Na càchí tnúhu ndáá-í xii-ndo sǎ nǔu nchòhó quindáá ndisa iní-ndó Yǎ Ndiòxí, te vá cání ìⁿ cani úú iní-ndó, te ñá díú-ní sǎ nǐ quide-í-a ní xiní-ndó ndàcu-ndo cada-ndo, chi ndéé tǐndúú-a xocuíñí-xi núú ndécú-xí te núu cúñaha-ndo sǎ xocuíñí-xi te quihíⁿ-xi quée-xi xití làmár. Te diu ducaⁿ càda-xi te núu na quindáá iní-ndó. ²² Te nchaá sá ná càcáⁿ-ndó nǔú Yǎ Ndiòxí òré càháⁿ ndihí-ndo-gǎ te taxi-gá te núu sàndáá ndisa iní-ndó sǎ táxí-gǎ sá xicáⁿ-ndó nǔú-gǎ —càchí-gá xáhaⁿ-gǎ xii-güedé.

Jèsús ndécú ndihí-gá tnúhu ndee ìní
(Mr. 11:27-33; Lc. 20:1-8)

²³ Te Jèsús cuánguihu-gá xití veñúhu càhnu sá ío cùnuu danehé-gá ñáyíu, te xíáⁿ ndécú-gǎ ní quexìo cue dútú cùnùu ndihí cue téé cùu sacuéhé nǔú ñáyíu isràél, te xáhaⁿ-güedé xii-gá:

—Cuíní-ndí cachí tnúhu-n xii-ndí nása ndùu tnúhu ndee ìní ndécú ndihí-n núu quide-n nándí sá quidé-n, ¿te yoo ducaⁿ nǐ taxi tnúhu ndee ìní-áⁿ xii-n-í? —càchí-güedé xáhaⁿ-güedé xii-gá.

²⁴ Te Jèsús ní xáhaⁿ-gǎ xii-güedé:

—Yúhú tnàhá-í cuíní-í càcáⁿ tnúhu-í ìⁿ sá càcáⁿ tnúhu-í núú-ndó, te núu na càchí tnúhu-ndo te cachí tnúhu-í xii-ndo yòo ní taxi tnúhu ndee ìní duha quide-í. ²⁵ Te chí càchí tnúhu xii-í yoo ní táuchíúⁿ nǐ dácúándüte ndí Juáá ñáyíu, ¿Yá Ndiòxí áⁿ cuè téé ñuyíú-a ní táuchíúⁿ dùcaⁿ ní quide ndíí?, te chí càchí tnúhu —càchí-gá xáhaⁿ-gǎ xii-güedé.

Te ní ngúíta-güedé xǐtnàha-güedé:

—¿Nása cúñaha-o? Chi núu na cúñaha-o sǎ Yǎ Ndiòxí ní táuchíúⁿ dùcaⁿ ní quide ndí Juáá ñá, te quesaha-dé: “¿Ná cuendá ñá túú ní sàndáá iní-ndó tnúhu ní càháⁿ ndíí vǎíⁿ?”, quesaha-dé. ²⁶ Te núu na cúñaha-o sǎ cuè ñáyíu ñuyíú-a ní táuchíúⁿ dùcaⁿ ní quide ndíí ñá, te cudééⁿ ñáyíu núú-ó, chi

nchaá-yu càchí-yu sá Yǎ Ndiòxí ní xáhaⁿ-gǎ xii ndíí sá càháⁿ ndíí tnúhu-gá núú ñáyíu —càchí-güedé xǐtnàha-güedé.

²⁷ Te ní xáhaⁿ-güedé xii Jèsús:

—Ñá túú xiní-ndí yoo ní táuchíúⁿ dùcaⁿ ní dácúándüte ndíí Juáá ñáyíu —càchí-güedé xáhaⁿ-güedé xii-gá.

Te ní xáhaⁿ-gǎ xii-güedé:

—Te núu ducaⁿ te ni yúhú vá càchí tnúhu-í xii-ndo yòo ní taxi tnúhu ndee ìní duha quide-í —càchí-gá xáhaⁿ-gǎ xii-güedé.

Cuendá ìⁿ téé ndihí úú déhe-dé

²⁸ Te Jèsús ní xáhaⁿ tucu-gá xii-güedé:

—Na càni-í ìⁿ cuendú núú-ndó nàcuáa tecu tnúni-ndó tnúhu càháⁿ-í. Ìⁿ téé ndécú úú déhe-dé, te ní xáhaⁿ-dē xii déhe-dé téé sacuéhé-gǎ: “Yòhó déhe-í, véxi-í càháⁿ ndàhú-í núú-n nǔu vá cùndèe iní-n cuánùndaha ñaha-n xii-í cada chiuⁿ-o núú ní xitu-í yoho yàha stilé”, càchí-dé xáhaⁿ-dē.

²⁹ Te ní xáhaⁿ dēhe-dé xii-dé: “Vá quihíⁿ-í cada chiuⁿ-í núú chíúⁿ-n”, càchí-dé xáhaⁿ-dē xii tǎtá-dē. Dico cuèé ní nacani iní-dé te ní sáháⁿ-dē ní quide chiuⁿ-dē núú chíúⁿ tǎtá-dē. ³⁰ Te téé-áⁿ nǐ sáháⁿ tucu-dé ní xáhaⁿ-dē xii déhe-dé té líhli-gá nǔu vá cùndèe iní-dé cuánùndaha ñaha-dé, te ní xáhaⁿ dēhe-dé-áⁿ xii-dé: “Cuu cuánùndaha ñaha-í xii-n”, càchí-dé xáhaⁿ-dē. Dico ñá túú ní sáháⁿ-dē cada chiuⁿ-dē. ³¹ Te vitna chí càháⁿ nǔu ndédacàa cue téé úú-áⁿ ní quide-güedé sá cuíní tǎtá-güedé —càchí-gá xáhaⁿ-gǎ xii-güedé.

Te ní xáhaⁿ-güedé xii-gá:

—Tée cùu sacuéhé-gǎ, téé ní càháⁿ ndihí-dé díhna —càchí-güedé xáhaⁿ-güedé xii-gá.

Te Jèsús ní xáhaⁿ-gǎ xii-güedé:

—Na càchí tnúhu ndáá-í xii-ndo sǎ ncháá cuè téé cuihna ìní-xi quide cobrá ñáhá xii ñáyíu cuendá impuèstú, ndihí cue ñáyíu dǐhí xǐndecu ichi dǐí ìní yáchí-gá ndíhu ndaha ñaha Yǎ Ndiòxí xii cue téé-áⁿ ndihí cue ñáyíu dǐhí-áⁿ dácúúxí nchòhó. ³² Chi ndíí Juáá téé ní xóo dácúándüte ñaha xii ñáyíu ní càháⁿ ndíí nàcuáa cadá-yu cundecú-yu, dico nchòhó chi ñá túú cuíní-ndó quindáá iní-ndó nàcuáa ní càháⁿ ndíí, dico cue téé cuihna ìní-xi quide cobrá ñáhá xii ñáyíu cuendá impuèstú, ndihí cue ñáyíu dǐhí xǐndecu ichi dǐí ìní, chi sàndáá iní-güedé

ndihí-yu tnúhu ní cáháⁿ ndíi. Te nchòhó cuèi ndèhe-ndo sá sàndáá iní cue ñáyiú-áⁿ nchaa tnúhu ní cáháⁿ ndíi, dico ñá túú cuíní-ndó ndixi cuéchi iní-ndó cuendá nchaa sá cuèhé sá dúhá quide-ndo cuendá tñi-ndo tnúhu ní cáháⁿ ndíi —càchí-gá xáhaⁿ-gã xii-güedé.

*Cuendá cue té cuihna iní-xi
(Mr. 12:1-12; Lc. 20:9-19)*

³³ Te xáhaⁿ tucu Jesús xii-güedé:

—Cundedóho-ndo na càni tucu-í ingá cuendú núú-ndó cuendá tecú tnúni-ndó tnúhu càháⁿ-í. ñⁿ téé ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vã cúú dàñú, te ní cadúha-dé núú quíhni-dé ndéhé yoho yaha stilé-áⁿ òré ná cùu, te ní cadúha-dé ñⁿ xító dùcúⁿ núú cáúndòdo cue téé coto nchaa yoho yaha stilé-áⁿ.

’Te ní sáá ñⁿ nduu quèe-dé quíngaca cuu xica-dé te ní dándòo ndaha-dé sá ñi xitu-dé-áⁿ xii ñⁿ úú cue téé xini tnáhá ndíhi-dé cuendá cada chiúⁿ-güedé, te ní ndatnúhu-güedé sá òré ná cúú te cuu cuendá dava-güedé, te ducaⁿ te ní quee-dé cuáháⁿ-dé. ³⁴ Te sátá ñi sáá nduu ñi cuu ndéhé nchaa yoho yaha stilé sá ñi xitu-dé-áⁿ, te ní xáhaⁿ-dè xii ñⁿ úú cue téé xinu cuechi núú-dé: “Chí cuáháⁿ cácaⁿ-ndó sá cúú cuendá-í núú cuè téé ní dándòo ndáha-í nchaa yoho yaha stilé sá ñi xitu-í”, càchí-dé xáhaⁿ-dè xii-güedé. ³⁵ Te cue téé ní dándòo ndaha-dé nchaa yoho yaha stilé sá ñi xitu-dé-áⁿ ñi tñi-güedé cue téé xinu cuechi núú-dé-áⁿ, te ñⁿ-dé ní cani-güedé, te ñⁿ-dé ní sahani ñaha-güedé, te ingá-dé ní sáñaha-güedé yúú. ³⁶ Te téé ní xitu yoho yaha stilé-áⁿ ñi tendaha-dé titní-gá tucu cue téé xinu cuechi núú-dé cuáháⁿ-güedé cuángacáⁿ-güedé sá cúú cuendá-dé núú cuè téé ní dándòo ndaha-dé sá ñi xitu-dé-áⁿ, dico ñi-ndi ducaⁿ ñi quide ñaha cuè téé-áⁿ xii cue téé xinu cuechi núú-dé-áⁿ.

³⁷ Te téé cùu xítóhó nchaa yoho yaha stilé-áⁿ ñi sani iní-dé: “Váha-gá ñu tendaha-í déhe-í-a núhú-dé, chi òré quini ñáhá-güedé xii-dé te canehe-güedé sá yíñúhu núú-dé”, duha ní sani iní-dé. Te ní tendaha-dé déhe-dé cuánuhú-dé. ³⁸ Dico òré ní xini cue téé quide chiúⁿ-áⁿ dèhe téé cùu xítóhó nchaa yoho yaha stilé-áⁿ, te ní xitnáha-güedé: “Téé-áⁿ téé véxi nduu táhú

ñuhu-a ndíhi nchaa sá cáá núú-xi, dico cahni-o-dé te mee-o nduu táhú-ó sã ndúú táhú-dé”, càchí-güedé xitnáha-güedé. ³⁹ Te ní tñi-güedé téé-áⁿ te ndèca ñaha-güedé cuáháⁿ ñⁿ xio yuhu ñuhu-áⁿ, te ní sahani ñaha-güedé xii-dé —duha cuáháⁿ cuendú ní cani Jesús núú-güedé.

⁴⁰ Te ní xáhaⁿ tucu Jesús xii-güedé:

—¿Te nchòhó sa cùtnuní iní-ndó ñaha cada ñaha xítóhó ñuhu-áⁿ xii cue téé-áⁿ ñã? —càchí-gá xáhaⁿ-gã xii-güedé.

⁴¹ Te cue téé-áⁿ ñi xáhaⁿ-güedé xii-gá:

—Téé cùu xítóhó ñuhu-áⁿ núhú-dé, te vá cùndáhú iní-dé cue téé cuihna iní-xi-áⁿ chi cahni ñaha-dé xii-güedé, te dándòo ndaha-dé ñuhu-dé xii cue téé cùtnuní iní-dé cada ndáá cuendá ndi tnáhá cúúⁿ ndéhé nchaa yoho yaha stilé sá ñi xitu-dé-áⁿ te cuáñaha-güedé xii-dé sá cúú cuendá-dé —càchí-güedé xáhaⁿ-güedé xii-gá.

⁴² Te Jesús ní xáhaⁿ-gã xii-güedé:

—Te nchòhó, náá ñá túú dàcuaha-ndo núú tütú Yá Ndióxi núú càchí-xi: Yúú sã ñi dáquéé tñú cue téé dàcaa vehe, ní cuu-xi yúú cùnùu vitna.

Chi mee Dütú Ndióxi ducaⁿ ñi cachí-gá cunduu, te cùu-xi ñⁿ sá ño cùñúhu-o vitna. Duha càchí-xi núú tütú-gá. ⁴³ Te duha càháⁿ-í chi Yá Ndióxi cada-gá te vá ñihí-ndó tnúhu ndee iní cundecu ndíhi-ndo cuendá ndíhu ndaha ñaha-gá xii-ndo, chi tnúhu ndee iní-áⁿ cundecu ndíhi cue ñáyiú cada ndáá cuendá ndíhu ndaha ñaha Yá Ndióxi xii-yu. ⁴⁴ Te yúú sã cùnùu-áⁿ cúú-xi yñhú, te nchaa ñáyiú ñá túú tñi tnúhu-í cùú-yu dàtná ñⁿ ñáyiú ndúá núú yñú-áⁿ te tnáhnú duúⁿ-yu, àdi núu na tàú ñáhá-xi xii-yu, te dacàchi duuⁿ ñaha-xi —cachí-gá xáhaⁿ-gã xii-güedé.

⁴⁵ Te sá dúcáⁿ nduu cuendú ní cani Jesús te cue téé cùu dütú cùnùu-áⁿ, ndíhi cue téé cùu fariséú ní cutnùní iní-güedé sá cuendá-güedé ní cáháⁿ-gá.

⁴⁶ Te ní cuíní-güedé tñi ñaha-güedé xii-gá òré-áⁿ dico ñá túú ní cùyi-güedé, chi ní yñhú-güedé cue ñáyiú, chi ní cutnùní iní-yu sá cúú-gã ñⁿ téé càháⁿ tnúhu Yá Ndióxi.

22

Cuendá ñⁿ vico trãndaha

¹ Te Jesús ní ngúita tucu-gá caní-gã ingá cuendú núú-güedé, te xáhaⁿ-gã:

2 —Na càni tucu-í ingá cuèndú núú-ndó cuèndá tecú tnùn-ndó nàcuáa cada-xi òré ndíhu ndaha ñaha Yá Ndiõxí xii ñáyiu. Ìn tée yìndaha ñaha xii ñáyiu ní quide-dé ìn vico ní dátñandaha-dé déhe ducu-dé. 3 Te ní tendaha-dé cue tée xìnu cuechi núú-dé cuáhá-güedé cuángana-güedé cue ñáyiu sa ní cáhá-dé cuhuⁿ vico, dico ñáyiu-án ñà túú ní cuíní-yu quíhíⁿ-yu. 4 Te ní xáhaⁿ tùcu-dé xii dava-gá cue tée xìnu cuechi núú-dé: “Quíhíⁿ-ndó cñaha-ndo xii cue ñáyiu sa ní cáhá-í cuhuⁿ vico sá sà ní quide túha-í sá cáxí-yu, te sa ní sahní-í ndicutu ndíhi nchaa dava-gá quíti ní dánúcuíhnu-í, te nchaa sa ní quide túha-í, te na quixí-yu cuhúⁿ-yu vico càchí-í cúñaha-ndo”, càchí-dé xáhaⁿ-dè xii cue tée xìnu cuechi núú-dé-án. 5 Dico ní ìn ñáyiu ní cáhá-dé-án ñà túú ní cuíní-yu quíhíⁿ-yu cuhúⁿ-yu vico. Chi ìn-yu ní sáháⁿ-yu ní quide chiúⁿ-yu núú ñúhú-yu, te ingá-yu ní sáháⁿ-yu ní nadìcò-yu núu nándi cùu ndáhú quidè-yu. 6 Te dava-gá-yu ní tñí-yu dava cue tée xìnu cuechi núú tée quide vico-án, te ní canihá-yu ndéé ní sahní ñàhá-yu xii-güedé. 7 Te tée yìndaha ñaha xii ñáyiu quide vico-án ñí cudééⁿ víhí-dé sá dúcáⁿ ñí quidè-yu, te ní tendaha-dé cue sandàdú-dé ní sáhá-güedé ní sahní-güedé cue ñáyiu ducaⁿ ñí quide-án, te ní sahní-güedé nchaa vehe càa ñuú-yu. 8 Te sátá dúcáⁿ te ní xáhaⁿ-dè xii dava-gá cue tée xìnu cuechi núú-dé: “Nchaa sa ndècu túha, te cue ñáyiu ní cáhá-í cuhuⁿ vico-a ní cùu ñá túú-gã tàú-yu sá cùhúⁿ-yu. 9 Te chí cuáháⁿ ndèni ní cuu te cáháⁿ-ndó nchàa ñáyiu na nàníhí-ndó ìchi na quixí-yu cuhúⁿ-yu vico-a”, càchí-dé xáhaⁿ-dè xii-güedé. 10 Te cue tée xìnu cuechi-án ñí quee-güedé cuáhá-güedé, te ní cáhá-güedé nchaa ñáyiu ní naníhí-güedé ichi, te cuèi ñáyiu váha iní-xi, te cuèi ñáyiu cuihna ìní-xi, te ní chítú-yu núu cúu vico-án.

11 Te sátá dúcáⁿ te tée yìndaha ñáyiu quide vico-án ñí quíhu-dé xítí vehe ní xíndéhé-dé cue ñáyiu ñùhu vico-án, te ní xíní-dé ìn tée ñùtnahá tnuú-yu te ñá túú càa dóó-dé dàtná cáá dõó níhnú cuè ñáyiu ñùhu vico-án. 12 Te ní xáhaⁿ-dè xii tée-án: “¿Tãta, nása ní cuu cuánguihu-õ iha, te

ñá túú càa dóó-n dàtná cáá dõó níhnú cuè ñáyiu ñùhu vico tnándaha-i?”, càchí-dé xáhaⁿ-dè xii tée-án. Dico tée-án ñà túú ní níhí-dé tnúhu cáháⁿ-dé. 13 Te tée yìndaha ñáyiu quide vico-án ñí xáhaⁿ-dè xii cue ñáyiu xìnu cuechi núú mèsá: “Chí tñí tée-án te dacùtu-ndo-dé, te queñuhu-ndo-dé ná quíhíⁿ-dé cundecu-dé ìn xichi núú néé núú ìo ndoho-dé, te yàcáⁿ ìo ndáhyú-dé te dìcò rúhñú-nã cuu núhu-dé sá sätú iní-dé sá ndóhó-dé”, càchí-dé xáhaⁿ-dè xii cue ñáyiu xìnu cuechi núú mèsá-án. 14 Te duha ndùu cuendú càháⁿ-í chí ìo cuéhé ñáyiu càháⁿ ñáhá Yá Ndiõxí xii-yu, dico sacú-ni-yu nduu táhú-yu cundecú-yu ndíhi-gá —càchí-gá xáhaⁿ-gã xii-güedé.

Cuèndá impuèstú

(Mr. 12:13-17; Lc. 20:20-26)

15 Te cue tée cùu fariséu ní sáháⁿ-güedé ìn xichi ní ndatnúhu-güedé nàcuáa cada-güedé datìcánuu-güedé Jèsús núu tnúhu càháⁿ-gá cuèndá ducaⁿ níhí-güedé nàcuáa cada-güedé cacáⁿ cuèchi-güedé cuèndá-gá. 16 Te ní tendaha-güedé ìn ùú cue tée cùndíhi-güedé, ndíhi cue tée cùndíhi té Hèrodés cuáháⁿ-güedé núu ndécú Jèsús. Te òré ní quexìo-güedé núu ndécú-gã, te ní xáhaⁿ-güedé xii-gá:

—Mèstrú, níhí-ndí tnúhu sá ìo ndáá càháⁿ-n, te càháⁿ ndáá-n nàcuáa càháⁿ Yá Ndiõxí cundecu-o ñùyíu-a, te cuèi ndèda-ni càa ñáyiu ìn-ni càháⁿ-n ndíhí-yu chí ñá túú quide cuèndá-n cuèi ná ñáyiu cùu-yu.

17 Te cachí tnúhu xii-ndí, núu váha-ni quide-ndí sá chãhu-ndí té Cèsár tée ìo cùnuu cuèndá impuèstú áⁿ ñáhá —càchí-güedé xáhaⁿ-güedé xii-gá.

18 Dico Jèsús ní cutnùn-í iní-gá sá xító ndéé ñáhá-güedé xii-gá, núu ní xáhaⁿ-gã xii-güedé:

—Nchòhó cue tée dàndahú méé-xí sã quidè ndáá te ñá ndáá sã quidè ndáá-ndó, ¿ná cuèndá xító ndéé ñáhá-ndó xii-í? 19 Chí dánèhé ñáhá xii-í ìn díhúⁿ sã chãhu-ndo cuèndá impuèstú núu nása càa —cachí-gá xáhaⁿ-gã xii-güedé.

Te ní dánèhé ñáhá-güedé xii-gá ìn díhúⁿ sã nání dènariú. 20 Te òré ní xíní-gá díhúⁿ-ãⁿ te ní xícáⁿ tnúhú-gã núu-güedé, te xáhaⁿ-gã:

—Chí cächí tnúhu yoo núú-xi ndèé ndihí yoo ñiú-xi ndeé —cächí-gá xáhaⁿ-gã xii-güedé.

²¹ Te ní xáhaⁿ-güedé xii-gá:

—Núú tē Cèsár ndèé ndihí ñiú-dé —cächí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Te núú ducaⁿ te chí nácuáha té Cèsár sá cúú cuendá-dé, te sá cúú cuendá méé Yá Ndiöxí te xíãⁿ nacuáha-ndo-gã —cächí-gá xáhaⁿ-gã xii-güedé.

²² Te cue téé-ánⁿ ño ní cuñúhu-güedé sá dúcáⁿ ñí cáháⁿ-gá, te ní natnii-güedé ichi cuánuhú-güedé.

Cuendá cue ñáyiú ndoto

(Mr. 12:18-27; Lc. 20:27-40)

²³ Te ñiú-ni nduu-ánⁿ ñí quexiò ñíⁿ úú cue téé cùu saducéú núú ndécú Jèsús. Te cue téé-ánⁿ ñá túú sándáá iní-güedé sá ndótó cuè ñáyiú ní xíhí, te ní xáhaⁿ-güedé xii-gá:

²⁴ —Mèstrú, ndíi Moisés ní cachí ndíi sá ñúu ñíⁿ téé ndècu ñadihí-xi cuú-dé te quendóo ñadihí-dé, te núú ñá túú ñéhe-dé ní xóo ndihí-aⁿ te téé cùu ñaní-dé naqueheⁿ-dé ñaha ní quendóo quèé-ánⁿ cuendá coo ñéhe-dé ndihí-aⁿ cuendá ñaní-dé téé ní xíhí-ánⁿ. ²⁵ Te ñúú-ndí-a ní xíndecu úsá tnàhá cue téé mee-ni ndí ñaní-güedé. Te téé díhna ní níhí ñadihí-dé te ñá túú ní cùdí-dé cundecu-dé chi ní xíhí-dé, te ní ñíⁿ ñéhe-dé ñá túú ní xóo ndihí ñadihí-dé-ánⁿ. Te téé cùu uú ní ñaqueheⁿ-dé ñaha ní quendóo quèé-ánⁿ.

²⁶ Dico ní xíhí tucu-dé, te ní ñíⁿ tucu ñéhe-dé ñá túú ní xóo ndihí ñaha-ánⁿ, te ñiú-ni ducaⁿ ñí yáha téé cùu uní, te ní xínu ndí ùsá-güedé ní cándeca ñaha-güedé xii ñaha-ánⁿ dico ñiú-ni ducaⁿ ñí xíhí-güedé. ²⁷ Te ndeé núú ñí ndihí-ná te ní xíhí tnàhá ñadihí-ánⁿ. ²⁸ Te na sàá nduu ndòto-güedé ndihí ñaha-ánⁿ, ¿te ndédacáa-güedé ñadihí-güedé cuu-aⁿ-i? Chi ndí ùsá-güedé ní cándeca ñaha-güedé xii-aⁿ —cächí-güedé xáhaⁿ-güedé xii-gá.

²⁹ Te Jèsús ní xáhaⁿ-gã xii-güedé:

—Ní xíta nchòhó tnúhu cáháⁿ-ndó, chi ñá túú xíní-ndó nácuáa cáháⁿ Yá Ndiöxí núú tütú-gá, te ní ñá túú cùtnuní iní-ndó sá díú-gã ndácú-gã quídé-gã nchaandi túhú sá vaha. ³⁰ Te na cächí tnúhu-í xii-ndo sã òré ná sàá nduu ndòto nchaa ñáyiú ní xíhí, te ñává-ánⁿ vã yõo-gã dasaⁿ ñéhe yoco-xi chi

vã yõo-gã cándeca tnàha, chi cuu-ná-yu ñatná cue espíritú xínú cuèchi núú Yá Ndiöxí. ³¹ ¿Te náá ñá túú quide cuendá-ndó nácuáa cáháⁿ Yá Ndiöxí núú tütú-gá núú cáháⁿ-gã cuendá cue ñáyiú ní xíhí-ánⁿ? Te duha cächí-gá: ³² “Yúhú cúú-í Ndiöxí tē Àbrahám, ndihí té Isàac, ndihí té Jàcób”, duha cächí-gá núú tütú-gá. Te cue téé-ánⁿ chi cuèi ní xíhí-güedé núú ñúyú-a, dico sá cúú-xí Yá Ndiöxí chi ndècu vívú-ni-güedé. Chi ñiú-gá cúú-gã Ndiöxí mee-ni cuè ñáyiú xíndecu vívú, te ñá túú cùu-gá Ndiöxí cue ñáyiú ñá túú ndècu vívú —cächí-gá xáhaⁿ-gã xii-güedé.

³³ Te sá dúcáⁿ ñí cáháⁿ-gá ní xíi-gá cue téé-ánⁿ, te ío ní cuñúhu nchaa ñáyiú cuendá sá ño váha nduu tnúhu ní cáháⁿ-gá.

Tnúhu sá ño-gá cúnúu

(Mr. 12:28-34)

³⁴ Te cue téé cùu fariséú ní xíní-güedé ní sadí Jèsús yuhu cue téé cùu saducéú, chi ñá túú ní níhí-gã-güedé tnúhu cúñaha-güedé xii-gá, te cue téé cùu fariséú-ánⁿ ñí nat-acá-güedé te cuáháⁿ-güedé núú ndécú Jèsús. ³⁵ Te ñíⁿ téé cùu fariséú-ánⁿ ño váha cùtnuní iní-dé nácuáa nduu nchaa tnúhu ní chídó tnùní ndíi Moisés te xító ndeé-dé Jèsús, te xáhaⁿ-dè xii-gá:

³⁶ —Mèstrú, cachí tnúhu ndédacáa tnúhu sá ñí chídó tnùní ndíi Moisés ío-gá cúnúu cada-o —cachí-dé xáhaⁿ-dè xii-gá.

³⁷ Te Jèsús ní xáhaⁿ-gã xii-dé:

—Duha cáháⁿ tnúhu sá ño-gá cúnúu: “Cuu iní-ndó Dütú Ndiöxí Yaá cúú Ndiöxí-ndó ñí yuhu ní iní-ndó, te caní iní-ndó cáda-ndo ñatná cuimí méé-gã, te mee-ni tnúhu váha caní iní-ndó nácuáa cuu vii cuu váha-ndo núú-gã”, ³⁸ duha cáháⁿ tnúhu sá ño-gá cúnúu. ³⁹ Te duha cáháⁿ tucu ñngá tnúhu cùu uú sá ño cúnúu, te sa yatni ñíⁿ-ni cùu-xi ndihí tnúhu díhna nuu, te cächí-xi: “Cuu iní-ndó tnàha ñáyiú-ndo ñatná cúú iní-ndó mèe-ndo”, duha cáháⁿ tnúhu cùu uú-ánⁿ. ⁴⁰ Te cuendá úú tnúhu-a ní cáá nchaa tnúhu ní cáháⁿ ndíi Moisés nácuáa cada ñáyiú, te ñiú-ni cuendá úú tnúhu-a ní cáá tnúhu ní cáháⁿ nchaa cue téé ní xóo cáháⁿ tnúhu Yá Ndiöxí ndeé sanaha —cächí-gá xáhaⁿ-gã xii-güedé.

*Yoo cùu Xítóhó Jesucrístú
(Mr. 12:35-37; Lc. 20:41-44)*

⁴¹ Te ndècu ducaⁿ-ni cue tée cùu fariséu núu ndécú Jèsús. ⁴² Te ní xícáⁿ tnúhú-gã núu-güedé, te xãhaⁿ-gã:

—Cuiní-í cachí tnúhu-ndo yòo déhe-xi cùu Cristú Yaá tendaha Yã Ndiöxí quixi ñuyíú-a —càchí-gã xãhaⁿ-gã xii-güedé.

Te ní xãhaⁿ-güedé xii-gã:

—Déhe ndíi Dàvíí cúú Yàá-áⁿ —càchí-güedé xãhaⁿ-güedé xii-gã.

⁴³ Te Jèsús ní xãhaⁿ-gã xii-güedé:

—¿Te nása càchí-tu-ndo sã dèhe ndíi Dàvíí cúú Cristú Yaá tendaha Yã Ndiöxí quixi ñuyíú-a, te mee ndíi Dàvíí-áⁿ ñí dácáhú iní ñãhá Espíritú Yã Ndiöxí xii ndíi, te ní cachí ndíi sá Cristú Yaá tendaha Yã Ndiöxí quixi ñuyíú-a cùu-gã Xítóhó ndíi? Te duha ní cachí ndíi:

⁴⁴ Dútú Ndiöxí ní xãhaⁿ-gã xii Yaá cúú Xítóhó-í:

“Ngóo xio cùha-í, te yúhú cada-í te nchaa sá cúú ùhú iní ñãhá xii-n canehe-xi sá yíñùhu núu-n.”

Duha ní xãhaⁿ Dútú Ndiöxí xii Yaá cúú Xítóhó-í, càchí ndíi. ⁴⁵ ¿Te nása cùu Cristú déhe ndíi Dàvíí, te mee ndíi ní cachí ndíi sá cúú-gã Xítóhó ndíi? —càchí Jèsús xãhaⁿ-gã xii-güedé.

⁴⁶ Te ní ñí-güedé ñá túú-gã ní ñíhí-güedé tnúhu cùñaha-güedé xii-gã. Te ndéé nduu-ãⁿ ñà túú-gã ní cùyí-güedé ná tnúhu cácaⁿ tnúhú-güedé núu-gã.

23

*Jèsús càháⁿ-gã cuendá cue tée cùu fariséu ndíhi cuendá cue tée dàcuaha ñaha xii ñáyíu
(Mr. 12:38-40; Lc. 11:37-54; 20:45-47)*

¹ Te Jèsús ní cáháⁿ ndodo-gã núu nchaa ñáyíu, ndíhi núu cuè tée xica cuu ndíhi-gã, te xãhaⁿ-gã:

² —Cue tée dàcuaha ñaha xii ñáyíu nchaa tnúhu ní chídó tnùní ndíi Moisés, ndíhi cue tée cùu fariséu ndécú ndíhi-güedé tnúhu ndee iní cáháⁿ-güedé nchaa tnúhu sá ñí chídó tnùní ndíi Moisés-áⁿ. ³ Te cada-ndo nacuáa dānehé ñãhá-güedé xii-ndo, dico vá cáda-ndó dàtná xíquide-güedé, chi tucu ndúu tnúhu càháⁿ-güedé, te tucu quide-güedé. ⁴ Te quide-güedé dàtná quidé ñáyíu dàcuído ñí tnaha ñáyíu-xi ñí sá ïo

vée, te mèé-yu ni lùha ñá túú cuiní-yu cuidó-yu. Te ducaⁿ sãtnahá-xi cùu-güedé chi dānehé ñãhá-güedé xii-ndo nacuáa cada-ndo, dico mee-güedé chi ni lùha ñá túú cuiní-güedé cada-güedé nacuáa dānehé ñãhá-güedé xii-ndo. ⁵ Te mee-ni ndūcu-güedé nacuáa quide-güedé cuendá quini ñáyíu sá ïo cùu cahnu-güedé. Te ndéé xindá sá ndéé ñí tnúhu Yã Ndiöxí tneé-güedé ndíhi ndaha-güedé, te tnãhá iní-güedé sá ïo-gã cunduu quèhéⁿ xindá-áⁿ dàcúxí xindá dava-gã ñáyíu. Te tnãhá tucu iní-güedé sá ïo-gã cunduu nãni núu dōó sácūhnu-güedé dàcúxí dōó sácūhnu dava-gã-yu. ⁶ Te ndi tnahá òré sácōo vico, òré quíhu-güedé mèsá caxi-güedé te ïo-gã cúú ñí iní-güedé cunucóo-güedé núu xilé núu sácōo cue tée cūnuu-gã, te ñíu-ni ducaⁿ quide tucu-güedé cuèi xití veñùhu. ⁷ Te nchaa núu xícá cùu-güedé cuiní-güedé sá ndíhi tnúhu yíñùhu cáháⁿ ndíhi ñaha ñáyíu xii-güedé, te cuiní tucu-güedé sá cùñahá-yu xii-güedé mèstrú.

⁸ Dico nchòhó vá cùñaha-ndo xii ñáyíu sá cùñahá-yu mèstrú xii-ndo, chi nchòhó ñí cùu-ndo ndecu-ndo, chi ducaⁿ ñí ndii-ni yúhú Yaá ní tendaha Yã Ndiöxí véxi ñuyíú-a cùu-í Mèstrú ndécú ndíhi ñaha-í xii-ndo. ⁹ Te ñí ndii-ni Dútú Ndiöxí Yaá ndécú àndíu cuu-gã Tãtá-ndó, núu xíáⁿ vá càháⁿ-ndó sã dàva cue tée ñuyíú-a cùu-güedé tãtá-ndó. ¹⁰ Te ni vã cání iní-ndó càda-ndo nacuáa cáháⁿ ñáyíu sá cūnūu-ndo, chi ñí ndii-ni yúhú Cristú Yaá ní tendaha Yã Ndiöxí véxi ñuyíú-a cūnuu-í. ¹¹ Te ñáyíu ïo-gã cūnūu ndecu ndíhi-ndo, ñáyíu-áⁿ cúú-yu ñáyíu xínu cuechi núu-ndó. ¹² Te nchaa ñáyíu quide cahnu mee-xi ñáyíu-áⁿ vã cúú-yu ñáyíu cūnuu, te nchaa ñáyíu ñá túú quide cahnu mee-xi ñáyíu-áⁿ cūnūu-yu.

¹³ Te nchòhó cue tée dàcuaha ñaha xii ñáyíu nchaa tnúhu ní chídó tnùní ndíi Moisés, ndíhi nchòhó cue tée cùu fariséu, cùu-ndo cue tée ïo dāndahú mée-xí sã quidé ndáá te ñá ndáá sá quidé ndáá-ndó, te ndàhú ní cuu-ndo chi sādí-ndó ìchi ñáyíu ñá dáñá-ndó ndíhu ndaha ñaha Yã Ndiöxí xii-yu, te ni mèe-ndo ñá túú quide-ndo nacuáa ndíhu ndaha ñaha-gã xii-ndo, te ni dàva-gã cue ñáyíu cuiní sá ndíhu ndaha

ñaha-gá xií-yu ñá dáñá-ndó.

14 'Te nchòhó cue tée dàcuaha ñaha xii ñáiyu nchaa tnúhu ní chídó tnùnì ndíi Moisés, ndíhi nchòhó cue tée cùu fariséu, cúu-ndó cuè tée ío dándahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chi quèndeé-ndó vèhe cue ñáiyu quèé, te ío naha càháⁿ ndíhi-ndo Yá Ndióxi cuèndá cuìní-ndó sá vǎ yǒo cutnùnì iní-xi nàcuáa quide-ndo. Te sá dúcáⁿ quide-ndo te ío-gá ndoho-ndo núú ùhú núú ndàhú dàcúúxí dàva-gá ñáiyu.

15 'Te nchòhó cue tée dàcuaha ñaha xii ñáiyu nchaa tnúhu ní chídó tnùnì ndíi Moisés, ndíhi nchòhó cue tée cùu fariséu, cúu-ndó cuè tée ío dándahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chi sàhni iní-ndó cuáháⁿ-ndó ndèni ní cuu dàcaháⁿ-ndó ñáiyu cuèndá cuìní-ndó tníi-yu ichi ndècu-ndo. Te òré ná xǐnu iní-yu tníi-yu ichi ndècu-ndo-áⁿ te uuⁿ-gá cuíta nihnú-yu dàcúúxí mèe-ndo.

16 'Te nchòhó cúu-ndó dàtná cue ñáiyu cuáá, chi ñá cùtnùnì iní-ndó nàcuáa canu ichi-ndo ñáiyu, te ndàhú ní cuu-ndo chi càchí-ndó: "Íiⁿ ñáiyu na càcunehe veñúhu càhnu sá ío cùnuu òré cuìní-yu cutnùnì iní tnàha ñáiyú-yu sá ndáá cadá-yu ìⁿ sá sání iní-yu cadá-yu, te vǎ cúu cuèchi xií-yu cuèi vǎ cadǎ-yu. Dico núu na càcu nehé-yu díhúⁿ cuááⁿ yíhí xítí veñúhu-áⁿ te cuu cuèchi xií-yu te núu vǎ cadǎ-yu sá ñí cachí-yu cadá-yu", duha càchí-ndó.

17 'Nchòhó cúu-ndó cuè tée ío ñí dǐquí-xi, te cùu-ndo datná cue ñáiyu cuáá chi ñá tècú tnùnì-ndó! Te vǎ càchí-ndó sǎ ío-gá cùnùu díhúⁿ cuááⁿ dàcúúxí veñúhu, chi diu cuèndá veñúhu-áⁿ ñí cuu íí díhúⁿ cuááⁿ-áⁿ.

18 Te càchí tucu-ndo: "Íiⁿ ñáiyu na càcunehe xító núú sácòdó sǎ ndúú tǎhú Yá Ndióxi òré cuìní-yu cutnùnì iní tnàha ñáiyú-yu sá ndáá cadá-yu ìⁿ sá sání iní-yu cadá-yu, te vǎ cúu cuèchi xií-yu cuèi vǎ cadǎ-yu, dico núu na càcu nehé-yu sá ndúú tǎhú Yá Ndióxi yódó núú xító-áⁿ te cuu cuèchi xií-yu te núu vǎ cadǎ-yu sá ñí sani iní-yu cadá-yu", duha càchí-ndó. 19 'Te cùu-ndo cue tée ío ñí dǐquí-xi, te cùu-ndo datná cue ñáiyu cuáá chi ñá tècú tnùnì-ndó! Te vǎ cánì iní-ndó sǎ ío-gá nándíhi sá ndúú tǎhú Yá Ndióxi sácòdó núú xító núú sácòdó tnàhí

sá ndúú tǎhú-gǎ-áⁿ dàcúúxí mèe xító-áⁿ.

20 Chi nchaa ñáiyu ducaⁿ càcunehe xító-áⁿ, te tnàhá-ni sá yódó núú-xi càcu nehé-yu òré ducaⁿ càháⁿ-yu. 21 Te nchaa ñáiyu ducaⁿ càcunehe veñúhu càhnu sá ío cùnuu te ñá díú mèe-ni veñúhu càcu nehé-yu òré ducaⁿ càháⁿ-yu, chi tnàhá-ni Yá Ndióxi Yáa cúu cuèndá veñúhu-áⁿ cácu nehé-yu òré ducaⁿ càháⁿ-yu. 22 Te nchaa ñáiyu càcunehe andíu cuèndá cutnùnì iní tnàha ñáiyú-yu sá ndáá cadá-yu ìⁿ sá sání iní-yu cadá-yu, te ñá díú mèe-ni andíu cacu nehé-yu chi tnàhá-ni núú núcòo Yá Ndióxi táxi tnùnì-gá cácu nehé-yu òré ducaⁿ càháⁿ-yu, te tnàhá méé-gǎ cácu nehé-yu òré ducaⁿ càháⁿ-yu.

23 'Te nchòhó cue tée dàcuaha ñaha xii ñáiyu nchaa tnúhu ní chídó tnùnì ndíi Moisés, ndíhi nchòhó cue tée cùu fariséu, cúu-ndó cuè tée ío dándahú méé-xí sá quidé ndáá te ñá ndáá sá quidé ndáá-ndó. Te cuèi núú ùxí xichi yúcu mèntá nihí-ndó, te sǎñaha-ndo ìⁿ xichi xii Yá Ndióxi, te diu-ni ducaⁿ quide-ndo yúcu nání ànís, ndíhi yúcu nání còminú, dico ndàhú ní cuu-ndo chi ñá túú quide cuèndá-ndó nàcuáa càháⁿ nchaa tnúhu sá ío-gá cùnùu sanu ichi ñaha xii-ndo, te tnúhu-áⁿ càchí-xi sá ío xini ñuhu-xi cada ndáá-ndó cùndecu-ndo, te cundàhú iní-ndó cuè tnàha ñáiyu-ndo, te quíndáá iní-ndó Yá Ndióxi, te cada-ndo nchaa nacuáa ndùu tnúhu càháⁿ-ndó, te nchaa tnúhu-áⁿ cúu-xí tnúhu sá ío cùnuu xini ñuhu-xi cada-ndo nacuáa càháⁿ-xi, dico vǎ dáñá ndèé-ndó cada-ndo nchaa dàva-gá nàcuáa càháⁿ tnúhu sá sánú ichi ñaha xii-ndo. 24 'Te nchòhó cúu-ndó dàtná cue ñáiyu cuáá, chi ñá túú cùtnùnì iní-ndó nàcuáa canu ichi-ndo ñáiyu, chi quide cuèndá-ndó mèe-ni nchaa tnúhu sá ñá túú ío cùnuu, dico nchaa tnúhu sá ío-gá cùnùu xini ñuhu-xi cada cuèndá-ndó ñá túú quide cuèndá-ndó!

25 'Te nchòhó cue tée dàcuaha ñaha xii ñáiyu nchaa tnúhu ní chídó tnùnì ndíi Moisés, ndíhi nchòhó cue tée cùu fariséu, cùu-ndo cue tée ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná cue ñáiyu nàquete sátá-ni tàsáⁿ ndíhi sátá-ni còhó te xítí-xi càndehe caduha-ni. Te ducaⁿ sǎtnahá-xi cùu-ndo chi mee-ni sǎ ndécú ndíhi tnàha ñáiyu-ndo ñuhu iní-ndó, te

nándi dándahú-ndõ-yu te quèheⁿ-ndo sá ndécú ndìhí-yu. ²⁶ Te nchòhó cue téé cùu fariséú, cúú-ndó dàtná cue ñáyiú cuàá, chi ñá túú cùtnuní iní-ndó nàcuáa ndùu sá quidé-ndó. Te ío xini ñuhu-xi sá cáda-ndó nàcuáa nduu ndoo nduu nine iní-ndó cuèndá ndacu-ndo càda-ndo sá vâha, te xiáⁿ núu chí cáda dàtná xiquide ñáyiú nàquete ndaa xití tàsáⁿ ndihí ndàa xití cóhó.

²⁷ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchòhó cue téé cùu fariséú, cùu-ndo cue téé ío dándahú méé-xi sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná núú yíndüxi ndíyi núú nì cuáha vii te ní nacáhyú sá cuixíⁿ, dico xití yaú-áⁿ chi càndehe caduha chi mee-ni yiqui ndíyi ñuhu. ²⁸ Te ducaⁿ sãtnahá-xi cùu-ndo chi sãnuu sá cúú-ndó cuè téé vâha dico iní-ndó chi mee-ni sá cuèhé sá dúhá ñuhu, te ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó.

²⁹ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchòhó cue téé cùu fariséú, cúú-ndó cuè téé ío dándahú méé-xi sá quidé ndáá te ñá ndáá sá quidé ndáá-ndó. Te ndàhú ní cuu-ndo chi càduha-ndo nchaa núú nì nguíndüxi cue téé ní xóo cáháⁿ tnúhu Yá Ndiõxí ndéé sanaha, te ío vii quide-ndo nchaa núú sá nì cuáha núú yíndüxi cue ñáyiú ní quide vâha ní xíndecu ñuyíú-a. ³⁰ Te càchí-ndó: “Te núú dicó nchoo nì xíndecu-o cùtnahá ní xíndecu cue ñaní tnáhá-ó ndéé sanaha, te vá chítnahá-ó-güedé cahni-o cuè téé ní xóo cáháⁿ tnúhu Yá Ndiõxí dàvá-áⁿ ní cùu”, duha càchí-ndó. ³¹ Te sá dúcáⁿ càháⁿ-ndó, te xiáⁿ cùtnuní sá ííⁿ-ní cùu-ndo ndihí cue ñaní tnáhá-ndó cuè téé ní xíndecu ndéé sanaha, cue téé ní sahani ñaha xii cue téé ní cáháⁿ tnúhu Yá Ndiõxí dàvá-áⁿ. ³² Te núu ducaⁿ te chí dáxínu cava chiúⁿ ní tausaha-güedé.

³³ Te nchòhó cúú-ndó cuè téé ío cuihna iní-xi, chi cùu-ndo datná cóo dèéⁿ! Te nchòhó vá nihí-ndó nàcuáa cada-ndo càcu nihnu-ndo núú úhú núú ndàhú. ³⁴ Te cuèndá xiáⁿ núu tendaha-í cue téé càháⁿ tnúhu Yá Ndiõxí quixi núú-ndó, ndihí cue téé cùu mestrú danèhé ñáhá xii-ndo tnúhu-gá, ndihí cue téé ío vâha cùtnuní iní-xi cuèndá cáháⁿ-güedé tnúhu-gá núú-ndó.

Dico nchòhó chi da cùu úhú iní-ndó-güedé, chi dava-güedé cahni-ndo-güedé, te dava-güedé cata caa-ndo-güedé núú cùrúxí, te dava-güedé cani-ndo-güedé xití veñúhu, te ndi tnahá ñuu ndi tnahá ñuu quíhíⁿ-ndó nànducu-ndo-güedé cuèndá cada úhú iní-ndó-güedé. ³⁵ Te sá dúcáⁿ ná càda-ndo, te ndadíquí-ndó cuè téé ní quide ndáá ní xíndecu ní xihí ní sahani ñaha cuè ñaní tnáhá-ndó. Te ndéé ndíi Abél téé ío vâha ní quide ndáá ní xíndecu ní sahani-güedé ndadíquí-ndó, ndihí nchaa dava-gá cue téé ní sahani-güedé, ndihí ndéé ndíi Zacariá déhe ndíi Berèquiás téé ní sahani-güedé ndéé núú nì ndihí-ná ndadíquí-ndó, te ndíi-áⁿ nì sahani-güedé mei tnúú veñúhu càhnu sá ío cùnuu ndihí xito núú sácódó sá ndúú tãhú Yá Ndiõxí, te nchaa cue téé-áⁿ ndadíquí-ndó chi dàtná tnúhu mee-ndo nì sahani-ndo cuè téé-áⁿ, chi diu-ni ñaní tnáhá mèe-ndo ducaⁿ ní sahani ñaha xii-güedé. ³⁶ Te na càchí tnúhu ndáá-í xii-ndo sá nchaa cue téé ní quide ndáá ní xíndecu ní sahani-güedé, nchaa cue téé-áⁿ ndadíquí nchaa ñáyiú ndècu vitna — cachí-gá xãhaⁿ-gã xii-güedé.

Jèsús càháⁿ-gá cuèndá ñáyiú ñuu Jérusalén (Lc. 13:34-35)

³⁷ Te xãhaⁿ Jèsús xii ñáyiú ñuu Jérusalén:

—Nchòhó ñáyiú ñuu Jérusalén sahani-ndo cue téé ní tendaha Yá Ndiõxí véxi càháⁿ tnúhu-gá núú-ndó, te mee-ni ndihí yúú sãhni-ndó dàva-güedé. ¡Te yúhú titní xito ní cuiní-í coto ñaha-í xii-ndo dàtná quidé nchùxi xito-güedi déhe-güedi sãquíhí-güedi xití ndíxíⁿ-güedi, dico nchòhó ñá túú ní cuiní-ndó, te diu-ni ducaⁿ sãni iní-í ndéé vitna! ³⁸ Te na càchí tnúhu ndáá-í xii-ndo sá sãá nduu te ío ndàhú yãha ñuu-ndó, te vá cùndècu-gá-ndó. ³⁹ Te na càchí tnúhu tucu-í xii-ndo sá vã quini ñáhá-gã-ndó xii-í, dico sãá nduu quini ñáhá tucu-ndo, te dàvá-áⁿ cachí-ndó: “Ío càhnu cuu Yaá ní tendaha Dütú Ndiõxí véxi”, duha cachí-ndó —càchí-gá xãhaⁿ-gã xii-yu.

24

Jèsús càchí-gá sá ngóyó veñúhu (Mr. 13:1-2; Lc. 21:5-6)

¹ Te Jèsús ní quee-gá veñúhu càhnu sá ïo cùnuu, te mei òré ní queheⁿ-gá ichi quíhíⁿ-gá ìⁿ xichi, te ní sàndehe yatni cue tée xica cuu ndihi-gá dìñi-gá, te xàhaⁿ-güedë xii-gá:

—Cundehe veñúhu-a nã ío váha ní sáá — cachí-güedë xàhaⁿ-güedë xii-gá.

² Te Jèsús ní xàhaⁿ-gã xii-güedë:

—Na càchí tnúhu ndáá-í xii-ndo sã ncháá sã ndéhé-ndó-á vitna saá nduu te vá cúndüu-gá-xi dàtná cáá-xí vitna, chi ni ìⁿ-gá yúú vã códó nchíhi tna-ha-xi chi ndihi ngoyo —càchí-gá xàhaⁿ-gã xii-güedë.

Nàcuáa cada-xi nduu ta cùyatni naa ñuyú-a

(Mr. 13:3-23; Lc. 21:7-24; 17:22-24)

³ Te Jèsús ní sáá-gá ndihi cue tée xica cuu ndihi-gá yucu Òlívú, te xiáⁿ nĩ ngóo-gá te núú núcóo-gá-áⁿ nĩ sáháⁿ cue tée xica cuu ndihi-gá, te dayuhu nĩ xàhaⁿ-güedë xii-gá:

—Cuíní-ndí cachí tnúhu-n nã nduu dùcaⁿ cada-xi ngoyo veñúhu càhnu sá ïo cùnuu, ndihi náandi cùu sá cáda-xí òré sa ta cùyatni nduu quixi tucu-n ñuyú-a, ndihi òré sa ta cùyatni naa-xi —cachí-güedë xàhaⁿ-güedë xii-gá.

⁴ Te Jèsús ní xàhaⁿ-gã xii-güedë:

—Ío quíhi iní-ndó cùndecu-ndo cuendá sá vã yóo dandàhú ñáhá xii-ndo. ⁵ Chi ío cuéhé cue tée coo ñuyú, te danàni-güedë méé-güedë dàtná nání-í, te cachí-güedë: “Yúhú cù-í Crístú Yaá ní tendaha Yá Ndióxi véxi ñuyú-a”, duha cachí-güedë. Te sá dúcáⁿ cáháⁿ-güedë te ío vai ñáyiú dandàhú-güedë. ⁶ Te níhí-ndó tñúhu nàá-güedë ndëni ní cuu, dico vá yùhú-ndó chi dacuití sã dúcáⁿ càda-xi, dico vátá sáá-gá nduu nàa ñuyú òré ducaⁿ càda-xi.

⁷ Chi cue tée ìⁿ nàcióⁿ nàá-güedë ndihi cue tée ingá nàcióⁿ, te titní ñúú ngüíta-güedë nàá-güedë, te titní xichi ñuyú coo tnamá, te titní tucu xichi ñuyú quixi cuéhé, te titní tucu xichi ñuyú ïo níhi tnáa. ⁸ Te nchaá xiáⁿ cuu-xi tñúndòho sá vítná vãha váha quèsaha sá cúu-xí cuè ñáyiú xíndecu ñuyú.

⁹ Te cue ñáyiú na cùu úhú iní ñáhá xii-ndo cuáha cuendá ñáhá-yu núú cuè tée cùchiuⁿ cuendá caniha-güedë xii-ndo, te dava-ndo càhni ñaha-güedë, te nchaá ñáyiú

cúu úhú iní ñáhá-yu xii-ndo sã cuendá-í.

¹⁰ Te dàvá-áⁿ ïo vai ñáyiú dàñá-yu sá sàndáá iní-yu Yá Ndióxi, te ngóo-yu cuu úhú iní tnáhá-yu, te cuáha cuendá tnáhá-yu núú cuè tée cùchiuⁿ. ¹¹ Te ío vai cue tée cachí-güedë sá cáháⁿ-güedë tñúhu Yá Ndióxi te ñá ndáá sá cáháⁿ-güedë tñúhu-gá, te ducaⁿ ïo vai ñáyiú dandàhú-güedë. ¹² Te dàvá-áⁿ cunuu mèe-ni nchaá sá cuéhé sá dúhá càda-yu, te vai-yu vá cúu iní-gá-yu tnàha ñáyiú-yu. ¹³ Dico nchaá ñáyiú na càda ndee-ni iní canchicúⁿ nihnu ñaha-ni xii-í, ñáyiú-áⁿ naníhí tãhú-yu. ¹⁴ Te nihí ñuyú quíhíⁿ ñáyiú cáháⁿ-yu tñúhu váha, tñúhu sá cáháⁿ nàcuáa ndíhu ndaha ñàha Yá Ndióxi xii ñáyiú, te sátá ná nihí nchaá ñáyiú tñúhu-áⁿ te naa ñuyú.

¹⁵ Te ndí Dániel tée ní xóo cáháⁿ tñúhu Yá Ndióxi ndéé sanaha nĩ chídó tñúni ndí cuendá ìⁿ sá dáquèe tihú Yá Ndióxi cundecu ìⁿ xichi núú nĩ cuu íí, te xiáⁿ cada-xi sá vã cùndecu-gá ni ìⁿ ñáyiú xiáⁿ. Te cada cuendá váha-ndo nàcuáa ní cáháⁿ ndí, chi nduu na quíní-ndó xiáⁿ cundecu-xi núú dúcáⁿ nĩ cuu íí, ¹⁶ te dàvá-áⁿ nchaá ñáyiú xíndecu distrítú Júdeá xíní ñúhu-xi cunú-yu quíhíⁿ-yu xití yucu. ¹⁷ Te nchaá ñáyiú ndáa ndódó díquí vehé-xí vã ndíhu-gá-yu vehé-yu quehé-yu ìⁿ ndachíuⁿ-yu canehé-yu quíhíⁿ. ¹⁸ Te nchaá ñáyiú cuáháⁿ yucu vá nùhú-gá-yu vehé-yu cúnúquehéⁿ-yu dóo-yu. ¹⁹ Te ndàhú ní cuu nchaá ñáyiú dìhí ñúhú dèhe-xi, ndihi cue ñáyiú dìhí xíndeca déhe vitna sàdi na saá nduu dùcaⁿ cada-xi! ²⁰ Te nchòhó, chí cácaⁿ tãhú núú Yá Ndióxi cuendá sá vã dúcáⁿ ndòho-ndo yóo quidé víxiⁿ-xi, te ni vã dúcáⁿ ndòho-ndo nduu cuu-xi nduu ndetatú-ndó. ²¹ Chi dàvá-áⁿ coo tñúndòho cahnu vihi ñuyú, te vátá ìⁿ ndúu-gá coo tñúndòho cahnu vihi-áⁿ ndéé cùtnáhá ní ngáva ñuyú, chi diu-ni dàvá-áⁿ coo tñúndòho cahnu vihi-áⁿ, te ni núú cuáháⁿ núú véxi vá cóo-gã tñúndòho-áⁿ. ²² Te Yá Ndióxi càchí-gá sá vã ïo vai nduu coo tñúndòho cahnu vihi-áⁿ sã cuendá nchaá ñáyiú ní cáháⁿ-gá cundecu ndihi-gá. Chi núu vai nduu na coo tñúndòho-áⁿ te vá yóo cácu nihnu.

²³ Te núu ìo ñáyiú càchí-yu xii-ndo: “Chí cùndèhe iha, chi iha ní quexío Crístú Yaá

ní tendaha Yă Ndiöxí véxi ñuyíú-a”, àdi cachí-yu: “Chí cündèhe yacáⁿ chi yacáⁿ ndécú-gă”, cächí-yu ña. Te vá quindáá iní-ndó tnũhu cãháⁿ-yu. ²⁴ Chi coo cue tée cachí-güedé sá cúú-güedë Yaá ní tendaha Yă Ndiöxí véxi ñuyíú-a, te dava-güedé cachí-güedé sá cúú-güedë cue tée cãháⁿ tnũhu Yă Ndiöxí dico ñá ndáá sá cúú-güedë cue tée cãháⁿ tnũhu-gá, te cada-güedé titní núú sã vã yõ tnàhí ndàcu cada cuendá dandàhú-güedé ñáyíu. Te caní iní-güedé dandàhú-güedé ndéé cue ñáyíu ní cãháⁿ Yă Ndiöxí cundecu ndihí-gá. ²⁵ Te duha ndùu tnũhu cãháⁿ-í dátũha ñaha-ĩ xii-ndo. ²⁶ Te núu cächí-yu xii-ndo: “Xití yucu-ãⁿ ní quexìo Yaá ní tendaha Yă Ndiöxí véxi ñuyíú-a”, cächí-yu. Te vá quindáá iní-ndó quihíⁿ-ndó, àdi cachí-yu: “Vehe-ãⁿ ndécú Yáá ní tendaha Yă Ndiöxí véxi ñuyíú-a”, cächí-yu. Te vá quindáá iní-ndó tnũhu cãháⁿ-yu. ²⁷ Chi dàtná xìní nchaa ñáyíu quide-xi oré sáá ndúté dàyehé-xi ní cãa xico ñuyíú ducaⁿ cãda-xi oré quixi tucu yúhú Tée cùu ñaní tnáhã-ndó nchãa-ndo chi nchaa-yu quini ñáhã-yu xii-í. ²⁸ Te nchòhó xìní-ndó sã nchãá núú yúcu yiqui cuñú ní xihí te yacáⁿ tàcã nchaa ndixíí xéxí-güedë.

Nàcuáa cada-xi òré quixi tucu Tée cùu ñaní tnáhã cuè ñáyíu

(Mr. 13:24-37; Lc. 21:25-33; 17:26-30, 34-36)

²⁹ Te na yãha-ni coo tnúndòho cahnu vihi-áⁿ, te vá dáyèhé-gá nchícanhii, te ni vã dáyèhé-gá yóó, te ngoyo nchaa chódíní ndéè andíu, te quidi-xi andíu ³⁰ nàcuáa cutnùní iní ñáyíu sá sã véxi yúhú Tée cùu ñaní tnáhã-yu nchaa-yu. Te cue ñáyíu nihí ñuyíú ndãhyú-yu sá ndihú iní-yu òré ducaⁿ cãda-xi, te nchaa-yu quini ñáhã-yu xii-í quee-í andíu quixi-í ichi xití vícò, te quini-yu sá ïo cãhnu cuu-í, te quide-í nchaa sã vãha. ³¹ Te tauchíuⁿ-í cue espíritú xínú cuèchi núú-í níhí tũ-xi cútú nadatãcã-xi nchaa ñáyíu ní cãháⁿ-í chitnahã ñáhã xii-í xíndecu ní cãa xico ñuyíú.

³² Te nchòhó sa xìní-ndó nàcuáa quide yutnu ngúxí, chi yutnu-áⁿ ndúú yùte núú dité-xi te natáhú ndaha-xi. Te òré ducaⁿ quide-xi te cächí-ndó sã sã ní cuyatni nuu

cahni. ³³ Te diu-ni ducaⁿ sãtnahã-xi cada-xi ñuyíú-a òré ná quini-ndó cãda-xi nchaa nacuaa ní cãháⁿ-í, te cutnùní iní-ndó sã sã ní cuyatni vii-nã nduu nãa ñuyíú. ³⁴ Te na cächí tnũhu ndáá-í xii-ndo sã òré vátã cùú-gã nchaa ñáyíu xíndecu ñuyíú-a vitna, te cada-xi nchaa nàcuáa ní cãháⁿ-í. ³⁵ Te andíu ndihí ñuyíú-a chi ndihí nihnu-xi, dico tnũhu-í chi vá ndihí nihnu-xi chi cùu-xi tnũhu ndáá cuiti.

³⁶ Dico ñá túú cùtnuní ná nduu quixi tucu-í, te ni ñá túú cùtnuní ná òré chi vá yõ xìní, te ni cuè espíritú xínú cuèchi núú Yă Ndiöxí ñá túú xìní-xi ná nduu quixi-í, te ni mèe yúhú Tée cùu Déhe Dútú Ndiöxí ñá túú xìní-í ná nduu quixi tucu-í, chi ñⁿdií díí-ni mee-gã xìní-gã núu ná nduu quixi-í.

³⁷ Te nduu na quixi tucu yúhú Tée cùu ñaní tnáhã-ndó nchãa-ndo ñuyíú-a te cada-xi dàtná ní quide-xi cùtnahã ní xíndecu ndíi Nõé. ³⁸ Chi nchaa ñáyíu ní xíndecu dàvã-áⁿ òré vátã ndáá-gã ndute ñuyíú, te xèxí-yu xihí-yu quidé-yu, te davã-yu ió-yu vico tnãndaha, te davã-yu dásãⁿ-yu déhe yòcò-yu candeca ñaha tée, te ducaⁿ-ni xíquidé-yu ndéé ní sáá nduu cuãnguee té Nõé xití bàrcú. ³⁹ Te ñá túú ní cùtnuní iní-yu nàcuáa cada-xi ñuyíú ndéé ní sáá nduu ní ngúita-xi ní cuuⁿ dáú ní ndaa ndute ñuyíú ní dánáá ñaha-xi xií-yu. Te diu-ni ducaⁿ sãtnahã tucu-xi cada-xi nduu na quixi tucu yúhú Tée cùu ñaní tnáhã-yu nchaa-yu ñuyíú-a, chi nduu ñá túú nã yihí iní-yu te quixi tucu-í. ⁴⁰ Te dàvã-áⁿ núu úú tnáhã cue tée yihí-güedé xití yucu, te ñⁿ-dé ndanchita te ñⁿ-dé quendóo. ⁴¹ Àdi úú ñáyíu dihí nchíçõ-yu ñⁿ-ni vèhe, te ñⁿ-yu ndanchita te ñⁿ-yu quendóo.

⁴² Te duha ndùu tnũhu cãháⁿ-í cuendá nchòhó cundecu túha-ndo, chi ñá túú xìní-ndó nã òré quixi tucu yúhú Yaá cúú Xítohó-ndó. ⁴³ Te nchòhó xìní-ndó sã núu ñⁿ tée cùu xítohó vehe xìní-dé ná òré cúú-xi niú quíhu ñadúhú vehe-dé duhu-güedë, te quihí iní-dé cundecu-dé cuendá sã vã dáñã-dé quíhu ñadúhú-ãⁿ vehe-dé duhu-güedë, dico ñá túú xìní-dé. ⁴⁴ Te duha cãháⁿ-í chi nchòhó xìní ñũhu-xi cundecu túha-ndo, chi na cuáhãⁿ òré ñá túú nã yihí iní-ndó quèxio yúhú Tée cùu ñaní tnáhã-ndó nchãa-ndo.

Cuendá ñí tée xínu cuechi
(Lc. 12:41-48)

45 Te na càni-í ñí cuendú núú-ndó. ñí tée xínu cuechi núú ñí patróón cúú-dě ñí tée ío váha tècú tnùnì, te quide ndáá-dé ndécú-dě. Te ñí xito ní dándõ ndaha ñaha patróón-dě xii-dé nchaa cue ñáyiú ndècu vehe-dé cuendá coto ñaha-dě xií-yu cuáñaha-dě sá cáxi-yu òré tàú-xi cáxi-yu, te tée cùu patróón-án ñí quee-dé cuáhán-dé. 46 Te váha táhú tée xínu cuechi-án te núu ndècuu-dé quidé-dě nchaa nàcuáa ní xáha patróón-dě cada-dé mei òré ní nasáá patróón-dě-án. 47 Te na càchí tnúhu ndáá-í xii-ndo sã tée cùu patróón-dě-án cũñaha-dě xii-dé sã quíndaha-dé nchaa sá ndécú ndíhi-dé. 48 Dico núu tée xínu cuechi-án ní cùu-dé ñí tée cuihna iní-xi, te ngóo-dé canì iní-dé sá cùyaa patróón-dě vá nasáá ndíhi-dé. 49 Te ngúita-dé canì-dé nchaa dava-gá cue ñáyiú xínu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quihu. 50 Te ñí nduu òré ñá túú yíhi iní-dé nasáá patróón-dě, 51 te ío dandõho ñaha patróón-dě xii-dé, chí daquihí ñáhá-dě xii-dé núu xíndecu cue ñáyiú ní cachí sá ñí quide ndáá te ñá ndáá sá ñí quide ndáá-yu. Te ducañ sãtnahá-xi dandõho ñaha Yá Ndiõxí xii ñáyiú, chí daquihí ñáhá-gã xií-yu ñí xichi núú ío ndohó-yu te yacá ío ndáhyú-yu, te dícó rúhñú-nã cuu núhu-yu sá sätú iní-yu sá ndóhõ-yu —càchí-gá xáha-gã xii-güedé.

25

Cuendá úxí ñáyiú dñí

1 Te xáhañ tucu Jesús xii-güedé:

—Na càni-í ñí cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiõxí xii ñáyiú. Te úxí tnàhá ñáyiú dñí ñáyiú cuechi ñí quehé-yu lintéñá-yu, te cuáhán-yu ñí xichi núú cóo víco tnándaha cuendá cundetú-yu quexío tée tnándaha. 2 Te úhúñ ñáyiú cuechi-ãñ ío váha cùtnuní iní-yu, te úhúñ-yu ñáhá. 3 Te ndí ùhúñ ñáyiú cuechi dùcañ ñá túú cùtnuní iní-xi-án ñá túú ní cãnehé-yu sá ndée lintéñá-yu. 4 Dico ndí ùhúñ ñáyiú cuechi cùtnuní iní-xi-án néhë-yu sá ndée lintéñá-yu. 5 Te tée tnándaha-án cùyaa-dé quexío-dé núú ndétú ñáhá-yu-án, te ñíni

dùcañ cuyaa-dé ní tní ñaha sàní xií-yu ní xidí-yu. 6 Te cùu-xi datná dava niú níhi ní cáháñ dava-gá ñáyiú, te càchí-yu: “Sa véxi tée tnándaha, chí táquè quehé queheñ cuendá-ndó-dě”, càchí-yu. 7 Te ndí ùxí ñáyiú cuechi-ãñ ñí ndacóo-yu quide túha-yu lintéñá-yu. 8 Te ndí ùhúñ ñáyiú cuechi ñá túú cùtnuní iní-xi-án ñí xáhãñ-yu xii cue ndí ùhúñ ñáyiú cùtnuní iní-xi-án: “Chí táxi núu luha sã ndée lintéñá-ndó ná ndée lintéñá-ndí chí ñá cuínì-xi cáyú mee-ñí ndàhvá”, càchí-yu xáhãñ-yu. 9 Te cue ñáyiú cuechi cùtnuní iní-xi-án ñí xáhãñ-yu: “Vá táxi núu-ndí chí vá tnàhá canehe chiuñ mee-ndí, te váha-gá chí cuáhán cuaañ-ndo núu cuè ñáyiú xidícó cuendá sá vã cùmãní xii-ndo, te vá cùmãní xii nchúhú tucu”, càchí-yu xáhãñ-yu. 10 Te ñíni cuáhán ndí ùhúñ ñáyiú ducañ ñá túú cùtnuní iní-xi-án cuãguaañ-yu sá ndée lintéñá-yu ní quexío tée tnándaha. Te ndí ùhúñ ñáyiú cuechi cùtnuní iní-xi-án ñí queheñ cuendá ñáhãñ-yu xii-dé, te cuãguihu ndíhi ñáhá-yu xii-dé núú cóo víco tnándaha, te sätá dúcáñ te ní nandedí yuyèhe. 11 Te òré ní nasáá cue ñáyiú cuechi ñáyiú ní sãnguaañ sá ndée lintéñá-xi-án, te ní ngúita-yu càháñ-yu xínutnñí-yu ndàa sätá yuyèhe ndaa quehé, te xáhãñ-yu xii tée tnándaha-án: “¡Tãta, nacaañ yuyèhe na quihu-ndí!”, càchí-yu xáhãñ-yu xii-dé. 12 Te tée tnándaha-ãñ ñí xáhañ-dě xií-yu: “Na càchí tnúhu ndáá-í xii-ndo sã nchòhó ñá túú tàú-ndó quíhu-ndo víco-a, chí ñá túú tnàhá tnúhu ndíhi ñaha-ndo xii-í”, càchí-dé xáhañ-dě xií-yu —càchí Jesús xáhañ-gã xii-güedé.

13 Te xáhañ tucu Jesús xii-güedé:

—Ío quíhi iní-ndó cùndecu-ndo, chí ñá túú xínì-ndó nã nduu, te ñí ñá túú xínì-ndó nã òré quixi tucu yúhú Tée cùu ñaní tnàhá-ndó nchaa-ndo —cachí-gá xáhañ-gã xii-güedé.

Cuendá cue tée ní ndóo ndaha dñú
(Lc. 19:11-27)

14 Te xáhañ tucu Jesús xii-güedé:

—Na càni tucu-í ingá cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiõxí xii ñáyiú. ñí tée sa ñíhu ichi-ná-dé sá cáca-dě quíngaca cuu xica-dě, te ní cana-dé cue tée xínu

cuechi núú-dě cuendá dándóo ndaha ñaha-dé dǐhúⁿ-dě xii-güedé.

15 Te nàcuáa nduu chiuⁿ quide ñⁿ ñⁿ-güedé te ducaⁿ dǐhúⁿ ñí sáñaha-dě xii-güedé, te ñⁿ-dé ní sáñaha-dě úhúⁿ tnàhá dǐhúⁿ sǎ ïo yahu nàni talentú, te ñngá-dé ní sáñaha-dě úú tnàhá dǐhúⁿ-ǎⁿ, te ñngá-dé ní sáñaha-dě ñⁿ dǐhúⁿ-ǎⁿ, te dǎtnùní ní quee-dé cuáháⁿ-dé. 16 Te téé ní queheⁿ cuendá úhúⁿ tnàhá dǐhúⁿ sǎ nání tàlentú ní quide-dé ndáhú ndǐhi-xi te ní níhí tucu-dé úhúⁿ-gá tucu tnàhá dǐhúⁿ-ǎⁿ. 17 Te ñⁿ-ni ducaⁿ ñí quide tucu téé ní níhí úú dǐhúⁿ sǎ nání tàlentú-áⁿ, chi ní quide-dé ndáhú te ní níhí tucu-dé úú-gá tucu tnàhá. 18 Dico téé ní níhí ñⁿ-ni dǐhúⁿ-ǎⁿ chi da ní chiváha-dé dǐhúⁿ patróóⁿ-dě, chi ní xete-dé ñⁿ yaú te ní chindúxi-dé.

19 Te ní cuu cuéhé nduu sǎ ñí quee patróóⁿ-güedé-áⁿ ní sǎngaca cuu-dé, te ní nasáá-dé te ní ngüíta-dé quidé ndǎá-dé ndǐhi-güedé cuendá dǐhúⁿ sǎ ñí dándóo ndaha ñaha-dé xii-güedé. 20 Te téé ní quendóo ndaha úhúⁿ tnàhá dǐhúⁿ-ǎⁿ ñí xáhaⁿ-dě xii patróóⁿ-dě: “Patróóⁿ, náu úhúⁿ tnàhá dǐhúⁿ sǎ ñí dándóo ndaha ñaha-n xii-í-a, te ní sáháⁿ-í ní quide-í ndǐhi-xi ndáhú te ní chídó-xí úhúⁿ-gá tucu tnàhá, te náu-a naqueheⁿ cuendá-n”, cǎchí-dé xáhaⁿ-dě xii patróóⁿ-dě. 21 Te téé cùu patróóⁿ-dě-áⁿ ñí xáhaⁿ-dě xii-dé: “Ío váha ní quide-n, te vitna quide ñaha-í xii-n ñⁿ téé váha téé quide ndáá, te sǎ sǎcú dǐhúⁿ ñí dándóo ndaha ñaha-í xii-n te ní quide ndáá-n, te sǎ dúcáⁿ ñí quide-n te vǎi-gá taxi cuendá ñáhà-í xii-n. Te vitna cuu cundecu-n núú ndécú-í, te ío cudǐí ñí-ó cundecu ndǐhi tnaha-o”, cǎchí téé cùu patróóⁿ-dě-áⁿ xáhaⁿ-dě xii-dé. 22 Te sǎtá dúcáⁿ te téé ní quendóo ndaha úú tnàhá dǐhúⁿ sǎ nání tàlentú-áⁿ ñí xáhaⁿ-dě xii patróóⁿ-güedé: “Patróóⁿ, náu úú tnàhá dǐhúⁿ sǎ ñí dándóo ndaha ñaha-n-a, te ní sáháⁿ-í ní quide-í ndǐhi-xi ndáhú, te ní chídó-xí úú-gá tucu tnàhá, te náu-a naqueheⁿ cuendá-n”, cǎchí-dé xáhaⁿ-dě xii patróóⁿ-güedé. 23 Te ní xáhaⁿ téé cùu patróóⁿ-áⁿ xii-dé: “Ío váha ní quide-n, te vitna quide ñaha-í xii-n ñⁿ téé váha téé quide ndáá, te sǎ sǎcú dǐhúⁿ ñí dándóo ndaha ñaha-í xii-n te ní quide ndáá-n, te sǎ dúcáⁿ

ñí quide-n te vǎi-gá taxi cuendá-í. Te vitna cuu cundecu-n núú ndécú-í, te ío cudǐí ñí-ó cundecu ndǐhi tnaha-o”, cǎchí téé cùu patróóⁿ-áⁿ xáhaⁿ-dě xii-dé. 24 Te téé ní ndóo ndaha ñⁿ-ni dǐhúⁿ-ǎⁿ ñí xáhaⁿ-dě xii téé cùu patróóⁿ-dě-áⁿ: “Patróóⁿ, yúhú sa ñaha-í sǎ yòhó cúú-n ñⁿ téé ndùcu mee-ni sǎ cúú-xí mèe-xi te tàhu-n chiuⁿ cuáháⁿ nchúhú cue téé xínu cuechi núú-n sǎcáⁿ-ndí triú, te òré ná nàtaxi tnaha-ndí, te yòhó dícó-nǎ náqueheⁿ cuendá-n tàxúha-n. 25 Te núu xǐǎⁿ ní yúhú-í cada-í ndáhú ndǐhi dǐhúⁿ-n, te ní sáháⁿ-í ní xete-í ñⁿ yaú te ní chindúxi-í, te náu dǐhúⁿ-n-áⁿ naqueheⁿ cuendá-n”, cǎchí-dé xáhaⁿ-dě xii téé cùu patróóⁿ-áⁿ. 26 Te téé cùu patróóⁿ-áⁿ ñí xáhaⁿ-dě: “Yòhó cúú-n ñⁿ téé cuihna ñí-xi xínu cuechi núú-í te cuhndu-n, te núu yòhó sǎní ñí-n sǎ cúú-í ñⁿ téé tàuchiuⁿ cuáháⁿ-ndó sǎcáⁿ-ndó triú te òré nàtaxi tnaha-ndo, te yúhú dícó-nǎ náqueheⁿ cuendá-í nàtàxúha-í. 27 Te núu sǎní ñí-n sǎ dúcáⁿ quide-í, te dasaⁿ núu-n dǐhúⁿ-í te cúñaha-n chǎhu-yu díquí-xi ni cùu, te òré ndexío-í te sa ngódó lùha-gá díquí-xi naqueheⁿ-í ní cùu”, cǎchí-dé xáhaⁿ-dě xii téé xínu cuechi-áⁿ. 28 Te téé cùu patróóⁿ-áⁿ ñí xáhaⁿ-dě xii dava-gá cue téé ndècu ndǐhi-dé: “Chí quéndéé ñⁿ dǐhúⁿ sǎ nání tàlentú néhé téé-áⁿ, te cuáha-ndo téé nèhe úxí tnàhá ñⁿ-ni dǐhúⁿ-ǎⁿ. 29 Chi cue téé sa ndècu ndǐhi te níhí-gǎ-güedé cundecu ndǐhi-güedé, te ni vǎ ñíhí-gǎ-güedé ndéé cundecu nchaa sǎ cundècu ndǐhi-güedé. Te cue téé ñá túú nǎ ndécú ndǐhi vai, te nchaa sǎ ndécú ndǐhi-güedé vá cundècu ndǐhi-gǎ-güedé. 30 Te téé xínu cuechi ñá túú vèdana nǎndǐhi-áⁿ, chí tnǐí-dě te daquǐhíⁿ-ndó-dě ñⁿ xichi núú néé núú ïo ndoho-dé, te yàcáⁿ ndáhyú-dé, te dícó rúhñú-nǎ cuu núhu-dé sǎ sǎtú ñí-dé sǎ ndóhó-dě”, cǎchí téé cùu patróóⁿ-áⁿ xáhaⁿ-dě xii-güedé. Duha sǎtnahá-xi ndoho nchaa ñáyiu ñá túú quide váha —cǎchí-gǎ xáhaⁿ-gǎ xii-güedé.

Cuendá cue ñáyiu ní quide váha ndǐhi cuendá cue ñáyiu ñá túú ní quide váha

31 Te xáhaⁿ tùcu Jesús xii-güedé:

—Te nduu na quixi tucu yúhú Téé cùu ñaní tnàhá-ndó nchàa-ndo, te quixi-í ndǐhi

nchaa cue espíritú xínú cuèchi núù-í, te nchaa ñáyiú quini-yu sá ïo càhnu cuu-í, te dàvá-áⁿ cunucóo-í núú táxi tnùn-í, te ío cuñúhu ñáyiú sá ïo càhnu cuu-í. ³² Te dàvá-áⁿ nataká nchaa ñáyiú xíndecu ni caa xico ñuyíú cundecú-yu núù-í, te cada-í-yu dàtná quidé ìⁿ toli oré táú dèⁿ-dé nchaa mbéé ndìhi nchaa chivá chi dèⁿ taxi ndecu-dé nchaa mbéé, te dèⁿ taxi ndecu-dé nchaa chivá. ³³ Te ducaⁿ sãtnahá-xi cada-í chi nchaa ñáyiú ní quide ndáá núù-í ñáyiú-áⁿ taxi ndecu-í-yu xio cùha-í, te nchaa ñáyiú cuihna ìní-xi ñá túú ní cuini cada ndáá núù-í ñáyiú-áⁿ taxi ndecu-í-yu xio dàtni-í. ³⁴ Te ducaⁿ te yúhú téé ío cùnunu cúñaha-í xii ñáyiú na cùndecu xio cuha-í: “Nchaa nchòhó ñáyiú ní quide váha ñaha Tàtá-í Dútú Ndiòxí, chí nèhé chi vitna ní sáá nduu cùndecu-ndo núú ndécú-gã táxi tnùn-gã, chí ndéé cútnahá ní ngáva ñuyíú sa ndècu túha tnàhí núú ndécú-gã-áⁿ sã nchòhó nduu táhú-ndó cùndecu-ndo. ³⁵ Te ducaⁿ chi òré xihí-í docó te ní taxi-ndo sã ní xexi-í, te òré yìchí-í ndute te ní taxi-ndo ndùte ní xihí-í, te òré ñùhù-í ichi te ní taxi-ndo vehe ní ndetatú-í. ³⁶ Te òré xini ñùhu-í dóo cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vecaá te ní quixi tucu-ndo ní quixi coto ñaha-ndo xii-í”, duha cúñaha-í xii nchaa ñáyiú-áⁿ. ³⁷ Te nchaa ñáyiú ducaⁿ ní quide ndáá-áⁿ cùñahá-yu xii-í: “Yòhó Yaá cúú Xìtohó-ndí, ni ìⁿ xito ñá túú ní tàxi-ndí sá cáxi-n òré xihí-n dòcò, te ni ìⁿ xito ñá túú ní tàxi-ndí ndute coho-n òré yìchí-n. ³⁸ Te ni ñá túú ní tàxi-ndí vehe ndetatú-n òré ñùhú-n ichi, te ni ñá túú ní tàxi-ndí dóo cuihnu-n òré xini ñùhu-n. ³⁹ Te ni ñá túú ní quixi coto ñaha-ndí xii-n òré ní cuhú-n, te ni ñá túú ní quixi coto ñaha-ndí xii-n òré ní xihí-n vecaá”, duha quesàhá-yu cúñahá-yu xii-í. ⁴⁰ Te yúhú téé cùnunu cúñaha-í xii-yu: “Na càchí tnúhu ndáá-í xii-ndo sã ncháá sã vaha ní quide-ndo sã cúú-xí ncháa ñáyiú xíndecu ichi-í cuèi ío ndàhú xíndáa-yu, te sá dúcáⁿ ní quide-ndo sã vaha sá cúú-xí-yu, te cada iní-ndó sã mèe-í ducaⁿ ní quide-ndo ní xito ñaha-ndo xii-í”, duha cúñaha-í xii-yu. ⁴⁶ Te nchaa ñáyiú-áⁿ quihíⁿ-yu núú ùhú núú ndàhú ni caa ni quihíⁿ. Te nchaa ñáyiú ní quide ndáá núù-í ní xíndecu ñuyíú-a, ñáyiú-áⁿ nduu táhú-yu ío váha cundecú-yu ni caa ni quihíⁿ —càchí-gã xãhaⁿ-gã xii-güedé.

⁴¹ Te dàtnùn-í cúñaha-í xii ñáyiú na cùndecu xio datni-í: “Nchaa nchòhó ñáyiú

ní xita nihnu chí xócuñí núú ndécú-í-a, chí nchòhó ní nduu táhú-ndó cùndecu-ndo núú ñùhú núú càyú, ñu-ni núú ní quide túha-í cundecu sácuíhná ndìhi nchaa espíritú cùndèhi-xi, te yàcáⁿ cundecu-ndo ni caa ni quihíⁿ. ⁴² Chi yúhú òré xihí-í docó te ñá túú ní tàxi-ndo sá cáxi-í, te ni òré yìchí-í ndute te ñá túú ní tàxi-ndo ndute coho-í. ⁴³ Te ni òré ní xúhuⁿ-í ichi ñá túú ní tàxi-ndo vehe ndetatú-í, te ni òré xini ñùhu-í dóo cuihnu-í te ñá túú ní tàxi-ndo, te ni òré ní cuhú-í te ñá túú ní quixi-ndo quixi coto ñaha-ndo xii-í, te ni òré ní xihí-í vecaá te ñu-ni ducaⁿ ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í xii-yu. ⁴⁴ Te ñáyiú-áⁿ cùñahá-yu xii-í: “Yòhó Yaá cúú Xìtohó-ndí ni ìⁿ xito ñá túú ní xini-ndí òré xihí-n dòcò cuendá taxi-ndí sá cáxi-n, te ni ìⁿ xito ñá túú ní xini-ndí òré yìchí-n ndute cuendá taxi-ndí ndute coho-n, te ni ìⁿ xito ñá túú ní xini-ndí cuhú-n ìchi cuendá taxi-ndí vehe ndetatú-n, te ni ìⁿ xito ñá túú ní xini-ndí òré xini ñùhu-n dóo cuendá taxi-ndí dóo cuihnu-n, te ni ìⁿ xito ñá túú ní xini-ndí òré cùhú-n cuendá quixi coto ñaha-ndí xii-n, te ni ìⁿ xito ñá túú ní xini-ndí quihí-n vecaá cuendá quixi coto ñaha-ndí xii-n”, duha quesàhá-yu cúñahá-yu xii-í. ⁴⁵ Te yúhú cúñaha-í xii-yu: “Na càchí tnúhu ndáá-í xii-ndo sã sã cuendá sá ñá túú ní quide-ndo ìⁿ sá vaha sá cúú-xí cuè ñáyiú ndècu ichi-í cuèi ío ndàhú xíndáa-yu, te sá dúcáⁿ ní quide-ndo ñá túú ní quide-ndo sá vaha sá cúú-xí-yu, te cada iní-ndó sã mèe-í ducaⁿ ní quide-ndo ñá túú ní quide-ndo sá vaha sá cúú-xí-í”, duha cúñaha-í xii-yu. ⁴⁶ Te nchaa ñáyiú-áⁿ quihíⁿ-yu núú ùhú núú ndàhú ni caa ni quihíⁿ. Te nchaa ñáyiú ní quide ndáá núù-í ní xíndecu ñuyíú-a, ñáyiú-áⁿ nduu táhú-yu ío váha cundecú-yu ni caa ni quihíⁿ —càchí-gã xãhaⁿ-gã xii-güedé.

26

Cue téé cùu úhú iní ñáhá xii Jesús ndúcú-güedé nàcuáa cada-güedé tñi ñaha-güedé xii-gá
(Mr. 14:1-2; Lc. 22:1-2; Jn. 11:45-53)

¹ Te sáta nǐ yáha ducaⁿ nǐ cáháⁿ Jèsús, te nǐ xáhaⁿ-gǎ xii cue téé xica cuu ndihí-gá:

² —Nchòhó sa xini-ndó sǎ cùmání ùú-gá nduu te coo vico pascuá, te cǎchí tnúhu-í xii-ndo sǎ yǔhú Téé cùu ñaní tnáhá-ndó ncháa-ndo tñi ñaha-güedé xii-í, te cuáha cuendá ñáhá-güedé núú cuè téé cùu úhú iní ñáhá xii-í, te cata caa ñaha-güedé núú cùrúxí te núú cùrúxí-áⁿ cuú-í —cǎchí-gá xáhaⁿ-gǎ xii-güedé.

³ Te ñu-ñi òré cáháⁿ ndihí Jèsús cue téé xica cuu ndihí-gá ní nataká cue téé cùu dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùní ndí Moisés, ndihí cue téé cùu sacuéhé nùú ñáyiú is-ràél. Te mei quèhé vehe núú cúú vèchiuⁿ té Caifás téé cùu dútú ño-gá cùnùu ní nataká-güedé. ⁴ Te xíaⁿ nǐ ndatnúhu-güedé nàcuáa cada-güedé dandàhú-güedé Jèsús cuendá tñi ñaha-güedé xii-gá, te cahni ñaha-güedé. ⁵ Te ní xitnàha-güedé:

—Váha-gá sǎ vǎ tñí-ó Jèsús mei ndùu vico, chi núu ducaⁿ na càda-o te ío dusaⁿ càda ñáyiú —cǎchí-güedé xitnàha-güedé.

*Íⁿ ñadìhí chíhí-áⁿ àcítí díquí Jèsús
(Mr. 14:3-9; Jn. 12:1-8)*

⁶ Te ndècu Jesús ñuú Bètaniá vehe ñⁿ téé nàni Xímú, téé ní tnahá cuéhé sǎ dátèhyú nihnu-xi yiquí cùñú-ó. ⁷ Te xíaⁿ ndécú-gǎ ní quexìo ñⁿ ñadìhí néhé-áⁿ ñⁿ sǎ nǐ cuáha yúú vǎha nàni alabastrú, te xití xíaⁿ ñúhú àcítí sáháⁿ tnámí sǎ ño ndèyáhu. Te yìhí Jesús mèsá xéxí-gǎ, te ñaha-áⁿ nǐ sáháⁿ-aⁿ ní sódó-aⁿ àcítí ñúhú xití xíaⁿ díquí-gǎ. ⁸ Te òré ní xini cue téé xica cuu ndihí Jesús sǎ dúcáⁿ nǐ quide ñaha-áⁿ te ní cudééⁿ-güedé, te ní ngüíta-güedé xitnàha-güedé:

—Ñá túú quide váha ñaha-áⁿ dàcáⁿ quidé-áⁿ dacuíta-aⁿ acítí-áⁿ. ⁹ Chi váha-gá nùu cuyáhu acítí-áⁿ ní cùu chi ío ndèyáhu, te díhúⁿ cuyáhu acítí-áⁿ cuu cuendá cue ñáyiú ndàhú ní cùu —cǎchí-güedé xitnàha-güedé.

¹⁰ Te Jesús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gǎ xii-güedé:

—Vá dásatú-ndó iní ñadìhí-a, chi sǎ nǐ quide ñaha-aⁿ xii-í cúú-xí ñⁿ sǎ vǎha. ¹¹ Chi cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, dico yúhú chi vá ncháá ndùu

cundecu ndihí ñaha-í xii-ndo ñuúyú-a. ¹² Te sǎ dúhá nǐ quide ñaha ñadìhí-a xii-í ní sódó-aⁿ àcítí díquí-í, te xíaⁿ cada iní-ndó sǎ sǎ quide túha-aⁿ yiquí cùñú-í cuendá nguindüxi-xi. ¹³ Te na cǎchí tnúhu ndáá-í xii-ndo sǎ ndèni ní cuu ñihí ñuúyú ná cáháⁿ ñáyiú tnúhu-í, te cáháⁿ-yu tnáhá cuendá ñadìhí-a cuendá quini nchaa ñáyiú nàcuáa ní quide-aⁿ te ducaⁿ vǎ nàcuánaá-yu —cǎchí-gá xáhaⁿ-gǎ xii-güedé.

Té Jùdás ndúcú-dé nàcuáa cada-dé cuáha cuendá-dé Jèsús núú cuè téé cùu úhú iní ñáhá xii-gá

(Mr. 14:10-11; Lc. 22:3-6)

¹⁴ Te sáta dúcáⁿ te té Jùdás Iscarioté ní sáháⁿ-dé ní ndatnúhu-dé ndihí cue téé cùu dútú cùnùu. Te núú tnáhá té Jùdás-áⁿ cúú ùxúú cue téé xica cuu ndihí Jesús. ¹⁵ Te ní xáhaⁿ-dè xii cue téé cùu dútú cùnùu-áⁿ:

—¿Ndédau cháhu ñaha-ndo xii-í te taxi cuendá-í Jèsús xii-ndo-i? —cǎchí-dé xáhaⁿ-dè xii-güedé.

Te cue dútú-áⁿ nǐ xáhaⁿ-güedé xii-dé sǎ cuáñaha-güedé ócú úxí díhúⁿ cuixíⁿ, te ñu-ñi ducaⁿ nǐ sáñaha-güedé xii-dé. ¹⁶ Te ndéé òré ní queheⁿ cuendá té Jùdás-áⁿ díhúⁿ, te ní ngüíta-dé ndúcú-dé nàcuáa cada-dé cuáha cuendá-dé Jèsús núú-güedé.

Cùdini Jesús ndihí cue téé xica cuu ndihí-gá

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Te ní sáá nduu nǐ quesaha vico xexi ñáyiú pàá sǎ ñà túú yìhí levadurá ñu-ñi vico pascuá, te cue téé xica cuu ndihí Jesús ní sàndehe yatni-güedé diñi-gá, te xáhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n nùu ndéé cuini-n càda túha-ndí cuendá cudini-o sacuaa nduu vico pascuá —cǎchí-güedé xáhaⁿ-güedé xii-gá.

¹⁸ Te Jesús ní xáhaⁿ-gǎ xii-güedé:

—Chí cuaháⁿ xití ñuú-áⁿ, te yàcáⁿ naníhí-ndó ñⁿ téé cùtnuní iní-ndó sǎ sǎ xini ñáhá-dé xii-o, te cúñaha-ndo xii-dé: “Yáá cúú Mèstrú cǎchí-gá sǎ ní cuyatni nduu vǎ cùndècu-gá ñuúyú-a, te vehe-n cuini-gá cada-gá vico pascuá ndihí cue téé xica cuu ndihí-gá”, duha cúñaha-ndo xii téé-áⁿ —cǎchí-gá xáhaⁿ-gǎ xii-güedé.

19 Te cue tée xica cuu ndihí-gá-áⁿ nǐ xica-güedé cuáháⁿ-güedé, te ní quide-güedé nàcuáa ní xáhaⁿ-gá xii-güedé, te ní quide túha-güedé sá cudini-güedé ndihí-gá sacuaa nduu víco pascuá-áⁿ. 20 Te òré sa ní cundiquiⁿ te cuánguihu Jèsús ndihí ndi ùxúú cue tée xica cuu ndihí-gá mèsá cuendá cudini-gá ndihí-güedé. 21 Te nini xèxi-gá ndihí-güedé ní xáhaⁿ-gá xii-güedé:

—Na càchí tnúhu ndáá-í xii-ndo sǎ díú ìⁿ nchohó cue tée xica cuu ndihí-í cuáha cuendá ñáhá-ndó xì-í núú cuè tée cùu úhú iní ñáhá —càchí-gá xáhaⁿ-gá xii-güedé.

22 Te sá dúcáⁿ nǐ xáhaⁿ-gá xii-güedé te nchaa-güedé ní ngüíta-güedé cündiyí-güedé, te da ìⁿ da ìⁿ-güedé ní ngüíta-güedé xáhaⁿ-güedé xii-gá:

—Mèstrú, ¿ñá díú yǔhú ducaⁿ sàni iní-n càda-í-u? —càchí-güedé xáhaⁿ-güedé xii-gá.

23 Te ní xáhaⁿ-gá xii-güedé:

—Tée nacaxi ndihí-í ìⁿ-ni cóhó caxi-ndí, tée-áⁿ cuáha cuendá ñáhá-dě xii-í núú cuè tée cùu úhú iní ñáhá. 24 Te yúhú Tée cùu ñaní tnáhá-ndó nchàa-ndo ñuhu ichi-í cuáháⁿ-í yáha-í nàcuáa càháⁿ-xi núú tütú Yá Ndiöxí, dico ndàhú ní cuu tée ducaⁿ na cuáha cuendá ñáhá xì-í núú cuè tée cùu úhú iní ñáhá, chi váha-gá sá vǎ cacú tée-áⁿ cundecu-dé ní cùu, te ñá díú sǎ nǐ cacu-dé te ducaⁿ càda-dé —càchí-gá xáhaⁿ-gá xii-güedé.

25 Te sátá dúcáⁿ te ní cáháⁿ té Jüdás tée cuáha cuendá ñáhá xì-gá, te xáhaⁿ-dě:

—Mèstrú, ¿te náa sàni iní-n sǎ yǔhú cuáha cuendá ñáhá-í xii-n núú cuè tée cùu úhú iní ñáhá xì-n-áⁿ? —càchí-dé xáhaⁿ-dě xii-gá.

Te Jèsús ní xáhaⁿ-gá xii-dé:

—Diu-n —càchí-gá xáhaⁿ-gá xii-dé.

26 Te nini cùdini cue tée xica cuu ndihí Jèsús ní queheⁿ-gá pàá, te ní ndacáⁿ táhú-gá núú Yá Ndiöxí, te dàtnùní ní táhú cuèchi-gá te ní ngüíta-gá dácãhñu-gá cue tée xica cuu ndihí-gá-áⁿ, te xáhaⁿ-gá xii-güedé:

—Chí quéhéⁿ pàa-a caxi-ndo, te cada iní-ndó sǎ yìqui cuñú-í cúú-xí —càchí-gá xáhaⁿ-gá xii-güedé.

27 Te ní queheⁿ-gá vàsú ñúhú ndùdí ndéhé yoho yàha stilé, te ní ndacáⁿ táhú-gá núú Yá Ndiöxí, te dàtnùní ní ngüíta-gá sǎñaha-gá xii-güedé cuendá coho-güedé

luha luha sá ñúhú xìtí-xi, te xáhaⁿ-gá xii-güedé:

—Chí cóhó nchàa nchohó ndudí ndéhé yoho yàha stilé ñúhú xìtí vàsú-a. 28 Te cada iní-ndó sǎ cúú-xí dàtná níñi-í sá catí òré cahni ñaha-güedé xii-í, te sá dúcáⁿ càti níñi-í xiáⁿ cutnùní ndáá sá Yá Ndiöxí cada-gá ingá núú sǎ váha sá cúú-xí vǎi ñáyiú dàtná ní cachí-gá cada-gá, te ío vǎi ñáyiú cada càhnu iní-gá cuèchi-yu. 29 Te na càchí tnúhu-í xii-ndo sǎ vítná-nǎ duha xìhi ndihí ñaha-í xii-ndo ndùdí ndéhé yoho yàha stilé-a, te vá cóhó ndihí ñaha-gá-í xii-ndo, dico na sáa nduu nànihí tnáhá-ó núú ndécú Tǎtà-í Dútú Ndiöxí táxi tnùní-gá te dàvá-áⁿ cada iní-ndó sǎ dàtná sá cóhó ndihí ñaha tucu-í xii-ndo chi ío cudí iní-ó —càchí-gá xáhaⁿ-gá xii-güedé.

Té Pèlú cúñaha-dě xii ñáyiú sá ñà túú xìní-dé Jèsús

(Mr. 14:26-31; Lc. 22:31-34; Jn. 13:36-38)

30 Te Jèsús ní xita-gá ìⁿ ndudú ndihí cue tée xica cuu ndihí-gá, te dàtnùní ní xica-gá cuáháⁿ-gá ndihí-güedé yucu Olívú. 31 Te yàcáⁿ ní xáhaⁿ-gá xii-güedé:

—Na càchí tnúhu-í xii-ndo sǎ ncháá-ndó dándóo ñaha-ndo xì-í niú vitna, chi quee ndáá-xi nàcuáa càháⁿ-xi núú tütú Yá Ndiöxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dě ndihí-güedé cuténuu”, duha càchí-xi núú tütú-gá. 32 Dico na ndòto-í te codonù-í núú-ndó quíhíⁿ distritú Galileá —càchí-gá xáhaⁿ-gá xii-güedé.

33 Te té Pèlú ní xáhaⁿ-dě xii-gá:

—Te cuèi nchaa-güedé ná dándóo ñaha-güedé xii-n, dico yúhú chi vá dándóo ñaha-í xii-n —càchí-dé xáhaⁿ-dě xii-gá.

34 Te Jèsús ní xáhaⁿ-gá xii-dé:

—Na càchí tnúhu ndáá-í xii-n sǎ niú vitna cùmání-gá cana ìⁿ líhi, te úní xito cáháⁿ-n núú ñáyiú sá ñà túú xìní ñáhá-n xì-í —càchí-gá xáhaⁿ-gá xii-dé.

35 Te té Pèlú ní xáhaⁿ-dě xii-gá:

—Cuèi na cùú ndihí ñaha-í xii-n dico vá càháⁿ-í núú ñáyiú sá ñà túú xìní ñáhá-í xii-n —càchí-dé xáhaⁿ-dě xii-gá.

Te nchaa dava-gá cue tée xica cuu ndihí-gá diu-ni ducaⁿ nǐ xáhaⁿ-güedé xii-gá.

Jèsús càháⁿ ndihì-gá Yă Ndiöxí ìⁿ xichi núú nání Gètsemani

(Mr. 14:32-42; Lc. 22:39-46)

³⁶ Te Jèsús ní quexìo-gá ndihì cue tée xìca cuu ndihì-gá ìⁿ xichi núú nání Gètsemani, te xíáⁿ nǐ xáhaⁿ-gă xii-güedé:

—Chí cúnúcoo iha cundetun-ndo na quihìⁿ-í yàcáⁿ càháⁿ ndihì-í Yă Ndiöxí —càchì-gá xăhaⁿ-gă xii-güedé.

³⁷ Te ndèca-gá té Pèlú, ndihì ndi ndùú déhe té Zebèdeú cuáháⁿ, te ní ngüita-xi sùúni ndihù iní-gá. ³⁸ Te ní xáhaⁿ-gă xii cue tée úni-áⁿ:

—Sùúni ndihù iní-í dàtná sá cùú-í, te chí quéndoo nchòhó iha te vâ cùdú-ndó chi yúhú vâ cùdú-í —càchì-gá xăhaⁿ-gă xii-güedé.

³⁹ Te sa ñunchií luha ní xica ndehe Jèsús núú ndécú-güedé, te ní ngüíñí xítí-gă te ní nuu núú-gă ndàa núú ñúhú, te ní ngüita-gă càháⁿ ndihì-gá Tătá-gă Dútú Ndiöxí, te xăhaⁿ-gă:

—Yòhó Tătá mée-í, càháⁿ ndàhú-í núú-n nūu vâ cündèe iní-n tàunihnu ñaha-n xii-í cuendá sá vâ ndòhò-í ná sàá òré, dico vâ cadá-n nàcuáa càchì iní mée-í, chi cada-n nàcuáa càchì iní mée-n —càchì-gá xăhaⁿ-gă xii Tătá-gă Dútú Ndiöxí.

⁴⁰ Te sáta nǐ yáha ní càháⁿ ndihì-gá Tătá-gă Dútú Ndiöxí, te cuánuhú-gá núú nǐ dándoo-gá cue tée úni-áⁿ te xixídí-güedé òré ní nasáá-gá, te ní xáhaⁿ-gă xii té Pèlú:

—¿Náa ñá cündèe iní-ndó vâ cùdú-ni-ndo cuèdicó ìⁿ òré nini càháⁿ ndihì-í Yă Ndiöxí-áⁿ? ⁴¹ Te chí quéndoo tucu te cuhuⁿ iní-ndó vâ cùdú-ndó, te càháⁿ ndihì-ndo Yă Ndiöxí cuendá sá vâ dácàháⁿ ñáhá yùcu ñávàha xii-ndo càda-ndo sá ñà túú tàú-ndó càda-ndo. Te xini ndáá-í sá nchòhó cuini-ndó càda-ndo nchaa nacuáa càháⁿ-í dicó-ni sá ñà túú nihí ndéé-ndó —càchì-gá xăhaⁿ-gă xii-güedé.

⁴² Te xito cùu uú cuáháⁿ tucu Jèsús càháⁿ ndihì-gá Tătá-gă Dútú Ndiöxí, te xăhaⁿ-gă:

—Yòhó Tătá mée-í, te núu vâ cündèe iní-n tàunihnu ñaha-n xii-í cuendá sá vâ ndòhò-í, te cada nàcuáa càchì iní mée-n —càchì-gá xăhaⁿ-gă xii Tătá-gă Dútú Ndiöxí.

⁴³ Te òré ní yáha ní càháⁿ ndihì-gá Tătá-gă Dútú Ndiöxí, te cuánuhú tucu-gá núú xíndecu cue tée úni xíca cùu ndihì-gá-áⁿ, te xidí-ni tucu-güedé òré ní nasáá-gá, te

ducaⁿ nǐ quide-güedé chi sùúni ñuhu saní núú-güedé. ⁴⁴ Te ní dándoo ñaha tucu Jèsús xii-güedé xíáⁿ, te cuáháⁿ tucu-gá xito cùu uní càháⁿ ndihì tucu-gá Tătá-gă Dútú Ndiöxí, te diu-ni tnúhu sá sà ní xáhaⁿ-gă xii Tătá-gă Dútú Ndiöxí, diu-ni tnúhu-áⁿ nǐ xáhaⁿ tucu-gá. ⁴⁵ Te sáta nǐ yáha ní càháⁿ ndihì-gá Tătá-gă Dútú Ndiöxí, te cuánuhú tucu-gá núú ndécú cue tée xìca cuu ndihì-gá-áⁿ, te òré ní nasáá-gá, te ní xáhaⁿ-gă xii-güedé:

—¿Te náa xidí-ni tucu-ndo? Te sa ní sáá òré cuáha cuendá ñáhá-güedé xii-í núú cue tée ndècu ichi cuehé ichi duha. ⁴⁶ Dico vitna chí ndácóo na quihìⁿ-ó, chí sa véxi tée cuáha cuendá ñáhá xii-í núú cue tée cùu úhú iní ñáhá —càchì-gá xăhaⁿ-gă xii-güedé.

Ní tñi-güedé Jèsús ndécá ñaha-güedé xii-gá cuáháⁿ

(Mr. 14:43-50; Lc. 22:47-53; Jn. 18:2-11)

⁴⁷ Te càháⁿ dúcáⁿ-ní Jèsús ní quexìo té Júdás. Te núú tnàhá tée-áⁿ cùú ùxúú tnàhá cue tée xìca cuu ndihì-gá ní cùu te ducaⁿ nǐ quide-dé. Te ndihì-dé vâi cue tée ní quexìo te dava-güedé xínehe-güedé machití, te dava-güedé xínehe-güedé carrutí. Te cue tée-áⁿ nǐ tendaha ñaha cue dútú cúnú, ndihì cue tée cùu sacuéhé núú ñäyiu isràél. ⁴⁸ Te té Júdás tée cuáha cuendá ñáhá xii-gá-áⁿ sa ní xitnùhu-dé cue tée-áⁿ nàcuáa cada-dé cuáha cuendá-dé Jèsús núú-güedé, te duha ní xáhaⁿ-dè xii-güedé:

—Cundehe-ndo tée na tèyuhu-í te tée-áⁿ tñi-ndo-dè chi tée-áⁿ cùú-dè tée ndèe iní-ndó —duha ní xáhaⁿ-dè xii-güedé.

⁴⁹ Te sáta dúcáⁿ nǐ xáhaⁿ-dè xii-güedé, te ní sàndehe yatni-dé núú Jèsús, te ní xáhaⁿ-dè xii-gá:

—¿Ràcióⁿ Mèstrú! —càchì-dé xăhaⁿ-dè xii-gá.

Te ní teyuhu ñaha-dé xii-gá. ⁵⁰ Te Jèsús ní xáhaⁿ-gă xii-dé:

—Yòhó tée ní chitnahá ñáhá xii-í, ¿ná cuini-n nūu véxi-n nūu-í? —càchì-gá xăhaⁿ-gă xii-dé.

Te òré-ni-áⁿ nǐ tñi ñaha cue tée ndihì té Júdás-áⁿ xii Jèsús, te ndèca ñaha-güedé xii-gá cuáháⁿ.

⁵¹ Te ìⁿ cue tée ndihì Jèsús ní tava-dé machití-dé, te ní xehndé-ni-dé ìⁿ xio lóho ìⁿ

tée xinu cuechi núú dütú cúnú te ní quen-deé duuⁿ lóho-dé. ⁵² Te Jèsús ní xáhaⁿ-gã xii tée ducaⁿ nĩ xehndé lóho tée-áⁿ:

—Nachihi machítí-n ñĩ-xi, chi nchaa cue tée na nàa ndihi machítí cahni-güedé tnàha ñáyiu-güedé te ñiu-ni ndihi machítí cuú méé-güedé tucu. ⁵³ Te na càchí tnúhu-í xii-ndo sã nõu yúhú cuíní-í cácu-í te cáháⁿ ndihi-í Tàtá-í Dútú Ndiõxí, te tendaha-gã cuéhé víhí espíritú xínú cuèchi núú-gã quixi-xi dàcácu ñaha-xi xì-í. ⁵⁴ Dico núú ducaⁿ na càda-í te vá queé ndáá-xi nàcuáa càháⁿ-xi núú tütú Tàtá-í Dútú Ndiõxí núú ndéé tnuní sá dàcuítí xini ñuhu-xi náandi ndoho-í —càchí-gã xáhaⁿ-gã xii-dé.

⁵⁵ Te Jèsús ní xáhaⁿ-gã xii cue tée ducaⁿ nĩ tñi ñaha xì-gã-áⁿ:

—Nchaa-ni nduu ní xiní-ndó nĩ xóo cunucóo-í xití veñúhu càhnu sá ño cúnú ní xóo danèhé-í ñáyiu, te ñá túú ní tñi ñaha-ndo xii-í, ¿te ná cuendá vitna quide ñaha-ná-ndó xii-í dàtná quidé-ndó ññadúhú, nèhe-ná-ndó màchítí nèhe-ná-ndó càrrutí ní quexìo ní tñi ñaha-ndo xì-í-í? ⁵⁶ Dico dàcuítí sã dúhá càda-xi nàcuáa quee ndáá-xi nàcuáa ní cáháⁿ cue tée ní xóo cáháⁿ tnúhu Yá Ndiõxí ndéé sanaha nĩ ngódo tnuní núú tütú-gã —càchí-gã xáhaⁿ-gã xii-güedé.

Te nchaa cue tée xica cuu ndihi-gã ní xinu-güedé ní dándõ ñaha-güedé xii-gã.

Jèsús ndécú-gã jùndá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Te cue tée ní tñi ñaha xì Jesús ndécá ñaha-güedé xii-gã cuáháⁿ núú tè Caifás tée cùu dütú cúnú-gã. Te núú ndécú dütú cúnú-gã-áⁿ sa ní tacá cue tée dàcuaha ñaha xii ñáyiu nchaa tnúhu ní chídó tnuní ndí Moisés, ndihi cue tée cùu sacuéhé nõu ñáyiu isràél cuendá cada-güedé jùndá. ⁵⁸ Te té Pèlú xica xica-ni nchicúⁿ ñáhá-dé xii-gã cuáháⁿ ní sáá-dé ndéé quehé vehe núú ndécú tée cùu dütú cúnú-gã-áⁿ, te xíáⁿ nĩ ngóo-dé ndihi cue tée cùu poleciá cuendá cuíní-dé quini-dé nása cada ñaha-güedé xii Jèsús.

⁵⁹ Te cue tée cùu dütú cúnú, ndihi cue tée cùu sacuéhé nõu ñáyiu isràél, ndihi nchaa dava-gã cue tée xindecu jùndá ndúcú-güedé

nàcuáa cada-güedé dacàa-güedé ññ cuéchi díquí Jèsús cuèi cùu-xi ññ sá ñã ndáa cuendá níhí-güedé nàcuáa cada-güedé cahni ñaha-güedé xii-gã. ⁶⁰ Te vãi cue tée ní ngüíta-güedé dacàa-güedé cuéchi díquí-gã, dico ñá túú ní cundee tnúhu-güedé chi mee-ni tnúhu ndehnde cùu-xi. Te sátá dúcáⁿ te ní quexìo tucu úú tnàhá cue tée dàcuandehnde-güedé, ⁶¹ te xáhaⁿ-güedé xii nchaa cue tée xindecu jùndá:

—Véxi-ndí càchí tnúhu-ndí xii-ndo sã tée-a càchí-dé sá dängöyo-dé veñúhu càhnu sá ño cúnú núú chíñúhu-o Yá Ndiõxí, te dandáa-dé ingá veñúhu saa, ñiu-ni núú cáá tnàhí veñúhu-ãⁿ, te xití úní-ni nduu sa nadaxinu-dé, duha càchí-dé —càchí-güedé xáhaⁿ-güedé.

⁶² Te tée cùu dütú cúnú-gã-áⁿ nĩ ndacuñí-dé, te xáhaⁿ-dè xii Jèsús:

—¿Ná cuendá duha nduu tnúhu càháⁿ cue tée-a cuendá-n? Te cáháⁿ nõu nása cunduu tnúhu cáháⁿ-n —càchí-dé xáhaⁿ-dè xii-gã.

⁶³ Dico Jèsús ñá túú tnàhí ní cáháⁿ-gã. Te tée cùu dütú cúnú-gã-áⁿ nĩ xáhaⁿ tucu-dé xii-gã:

—Yúhú, cácu nèhe-í Yá Ndiõxí chi cuíní-í sá càchí tnúhu ndáá-n xì-ndí nõu sá díú Cristú Déhe Yá Ndiõxí Yaá ní tendaha-gã véxi ñuyíú-a cùu-n —cachí-dé xáhaⁿ-dè xii-gã.

⁶⁴ Te Jèsús ní xáhaⁿ-gã xii-dé:

—Ñiu Yaá-áⁿ cùu-í dàtná càchí-n-ãⁿ, te na càchí tnúhu-í xii-ndo sã sáa nduu te quini-ndó yúhú Tée cùu ñani tnàhá-ndó nchaa-ndo cunucóo-í xio cùha Dútú Ndiõxí Yaá ndácú quide nchaandi túhú sá vãha. Te dàvã-áⁿ quini ñáhá-ndó xì-í quee-í andiu quixi-í ichi xití vícò —càchí-gã xáhaⁿ-gã xii-dé.

⁶⁵ Te dütú cúnú-gã-áⁿ nĩ ndátá-dé dóo níhñú-dé cuendá sá ñã túú ní tnàhá iní-dé nàcuáa ní cáháⁿ Jèsús, te ní xáhaⁿ-dè xii nchaa cue tée xindecu jùndá:

—Tée-a càháⁿ úhú-dé cuendá Yá Ndiõxí, te vitna ñá túú-gã xini ñuhu-xi cue tée cáháⁿ ndáa nõu ndáa sá ndècuéchi-dé àdi ñá túú ndècuéchi-dé, chi sa ní tecú dóho-o nàcuáa nduu tnúhu ní cáháⁿ-dè ní cáháⁿ úhú-dé cuendá Yá Ndiõxí. ⁶⁶ Te nchaa-ndo chí càháⁿ vitna núú nása sàni iní-ndó cunduu cuendá tée-a —càchí-dé xáhaⁿ-dè xii nchaa cue tée-áⁿ.

Te cue téé-án nǐ xáhaⁿ-güedě:

—Nchúhú cächí-ndí sá tàú-xi cuú-dé chi ndècuéchi-dé —cächí-güedé xáhaⁿ-güedě.

⁶⁷ Te ní ngüíta-güedé ní tiú díí ñáhá-güedě xii-gá te ní caniha-güedě, te tnàhá núú-gá ní cani-güedé. ⁶⁸ Te ní cudíquí ndeé ñáhá-güedě xii-gá, te xáhaⁿ-güedě:

—Yòhó Téé cächí sá cúú Crístú Yaá ní tendaha Yá Ndiòxí véxi ñuyíú-a, cáhán ná còto yoo ní caniha xii-n —cachí-güedé xáhaⁿ-güedě xii-gá.

Té Pèlú xáhaⁿ-dě xii ñáyíu sá ñà túú xìní-dé Jèsús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Te nini nùcòo té Pèlú quehé, te ní sáhán ñí xíchí xínú cuèchi vehe-án núú-dě, te xáhaⁿ-xi xì-dé:

—Yòhó tnàhá-n cùu-n téé xica cuu ndíhi Jèsús téé distritú Galiléa —cächí-xi xáhaⁿ-xi xì-dé.

⁷⁰ Te té Pèlú ñá túú ní nñuu-dé, te ndèdóho nchaa ñáyíu xíndecu-án nǐ xáhaⁿ-dě xii xíchí-án:

—Yúhú, ñá túú cùtnuní iní-í nása ndùu tnúhu càháⁿ-n —cächí-dé xáhaⁿ-dě xii-xi.

⁷¹ Te ní xica té Pèlú cuáhán-dé ndàa nacuaá nchíi yuyèhe vehe-án, te ní xini ñáhá tucu ingá xíchí xínú cuèchi vehe-án, te xáhaⁿ-xi xì nchaa ñáyíu xíndecu-án:

—Téé-a tnàhá-dé xicá cùu-dé ndíhi Jèsús téé ñuú Nazàrét —cächí-xi xáhaⁿ-xi xì-yu.

⁷² Te té Pèlú ní xáhaⁿ-dě:

—Nchàcuti Yá Ndiòxí sá ñà túú xìní-í téé càcunehe-ndo-án —cächí-dé xáhaⁿ-dě xii-yu.

⁷³ Te tna tnaa-ni ní cuu, te dava ñáyíu xíndecu xíán nǐ xáhaⁿ tucú-yu xii té Pèlú:

—Ndáá sá tnàhá-n xica cuu-n ndíhi téé ndèca-güedé cuánguìhu-án, chi ñáyúhú càháⁿ-n —cächí-yu xáhán-yu xii-dé.

⁷⁴ Te té Pèlú ní xáhaⁿ-dě xii-yu:

—Nchàcuti Yá Ndiòxí sá yúhú càháⁿ ndáá-í sá ñà túú xìní-í téé càcunehe-ndo-án —cächí-dé xáhaⁿ-dě xii-yu.

Te òré-ni-án nǐ cana ñí. ⁷⁵ Te ní ndacu iní té Pèlú nacuaá ní xáhaⁿ Jèsús xii-dé sá cùmání-gá cana ñí lǐhi te úní xito cáhán-dé sá ñà túú xìní ñáhá-dě xii-gá. Te ní quee-dé tnuú ñáyíu-án cuáhán-dé ñí xio ní ndáhyú víhí-dě ní ndixi cuéchi iní-dé.

27

Ndèca-güedé Jèsús cuáhán núú té Pìlatú (Mr. 15:1; Lc. 23:1-2; Jn. 18:28-32)

¹ Te sáta nǐ túndaá te nchaa cue téé cùu dútú cùnùu, ndíhi cue téé cùu sacuéhé núú ñáyíu isràél ní ndatnúhu-güedé nacuaá cada-güedé cahni-güedé Jèsús. ² Te ní dácútú ñàha-güedé xii-gá, te ndèca ñàha-güedé cuáhán núú té Pìlatú téé cùu gobiernú.

Ní xíhi té Jùdás

³ Te té Jùdás téé ní sáha cuèndá ñáhá xìi Jèsús ní cutnùní iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcán nǐ quide-dé ní sáha cuèndá ñáhá-dě xii-gá núú cuè téé cùu úhú iní ñáhá, te ní xica-dé cuáhán-dé danchòcáva-dé ócò úxí díhún cuixín núú cuè dútú cùnùu-án, ndíhi núú cuè téé cùu sacuéhé núú ñáyíu isràél, chi díu cue téé-án nǐ sáñaha-güedé díhún xii-dé. ⁴ Te òré ní quexìo té Jùdás-án núú ndécú-güedé, te xáhaⁿ-dě xii-güedé:

—Yúhú, ñá túú ní quide váha-í sá dúcán nǐ quide-í ní taxi cuèndá-í ñí téé ñá túú tnàhí cuéchi-xi cahni-ndo-dě —cächí-dé xáhaⁿ-dě xii-güedé.

Te cue téé-án nǐ xáhaⁿ-güedé xii-dé:

—Nchúhú, ñá túú nǎgá cuèndú cuìní-ndí cáhán ndíhi ñàha-ndí xii-n, te mee-n nàha núu nása sàni iní-n càda-n —cachí-güedé xáhaⁿ-güedé xii-dé.

⁵ Te té Jùdás ní dǎngoyo-dé díhún-án xìtí veñúhu càhnu sá ìo cùnùu, te ní xica-dé cuáhán-dé ní dácuehñé-dé méé-dě.

⁶ Te cue dútú cùnùu ní naqueheⁿ-güedé díhún-án, te ní xitnàha-güedé:

—Díhún-a ní quéyáhu cuèndá sá cùu ñí ñáyíu, núu xíán vá cúú nàchihí-o xìtí càjá núú ñúhú sá cúú cuèndá Yá Ndiòxí —cächí-güedé xitnàha-güedé.

⁷ Te ní ndatnúhu-güedé te ní cuu ñí nnuu-güedé cuèndá nacuaaⁿ-güedé ñí xichi núú cáá ñúhu danani-güedé Núú Cuáha Nchaa Sá Cuáha Ñúhu, te xíán nǐ saaⁿ-güedé cuèndá xíán nguñdúxi nchaa ñáyíu véxi xica. ⁸ Te ní nadáma díu ñúhu-án, te vitna dānani-güedé Ñúhu Yáhu Níñí, duha dānani-güedé. ⁹ Te ducaⁿ nǐ

cuu chi ní quee ndáá-xi nàcuáa ní cáháⁿ ndí Jeremiás tée ní xóo cáháⁿ tnúhu Yá Ndióxi ndéé sanaha, te duha ní cachí ndí: “Cue tée israél ní cachí-güedé sá òcò úxí díhúⁿ cuixíⁿ cháhu-güedé cuendá ìⁿ tée queheⁿ cuendá-güedé. Te díhúⁿ-ãⁿ nàqueheⁿ-güedé, ¹⁰ te cuaaⁿ-güedé ìⁿ xichi núú nání Núú Cuáha Nchaa Sá Cuáha Nuhu, te ducaⁿ càda-xi chi ducaⁿ ní cachí Yá Ndióxi cunduu”, duha ní cachí ndí Jeremiás-áⁿ.

*Jèsús ndécú-gã núú tẽ Pilatú
(Mr. 15:2-5; Lc. 23:3-5; Jn. 18:33-38)*

¹¹ Te Jèsús ndécú-gã núú tẽ Pilatú tée cùu gobiernú, te tée-áⁿ ní xicáⁿ tnúhú-dẽ núú-gã, te xãhaⁿ-dẽ xii-gã:

—¿Ndáá sá díú-n cùu-n tée yindaha ñaha xii ñáyi israél-ãⁿ? —cächí-dé xãhaⁿ-dẽ xii-gã.

Te Jèsús ní xáhaⁿ-gã xii-dé:

—Díu-í yindaha-í-yu —cächí-gã xãhaⁿ-gã xii-dé.

¹² Te cue dútú cúnú ndíhi cue tée cùu sacuéhé núú ñáyi israél sácáⁿ cuéchi-güedé núú tẽ Pilatú cuendá Jèsús, dico mee-gã ni ìⁿ tnúhu ñá túú ní cáháⁿ-gã. ¹³ Te tẽ Pilatú ní xáhaⁿ-dẽ xii-gã:

—Cáháⁿ, ná cuendá ñá túú cáháⁿ-n, te cundehe ñá ndéé duha títní cuéchi dàcaa cue tée-a díquí-n —cächí-dé xãhaⁿ-dẽ xii-gã.

¹⁴ Dico Jèsús ñá túú tnàhí ni cáháⁿ-gã, te tẽ Pilatú tée cùu gobiernú-áⁿ ìo ní cuñúhu-dé sá dúcáⁿ ñà túú tnàhí ni cáháⁿ-gã.

*Ní quide ndáá-güedé sá cáhni-güedé Jèsús
(Mr. 15:6-20; Lc. 23:13-25; Jn. 18:38-19:16)*

¹⁵ Te ndí tnahá nduu víco pascuá dácacu tẽ Pilatú tée cùu gobiernú-áⁿ ìⁿ tée yíhi vecaá chi ducaⁿ tnàhí quide-dé, te mee ñáyi cáháⁿ-yu te núu ndédacàa tée yíhi vecaá-áⁿ cãcu-dé te tée-áⁿ dácacu-dé. ¹⁶ Te dàvá-áⁿ yíhi ìⁿ tée nani Barrabás vecaá, te tée-áⁿ ìo cuendú-dé sá ìo nèhé ní quide-dé. ¹⁷ Te ní nataká nchaa ñáyi, te tẽ Pilatú ní xicáⁿ tnúhú-dẽ núú-yu, te xãhaⁿ-dẽ:

—¿Ndédacàa núú ùú cue tée-a cuñí-ndó dácacu-í-güedé-í? ¿Té Barrabás ãⁿ Jèsús tée nani Cristú? —cächí-dé xãhaⁿ-dẽ xií-yu.

¹⁸ Te ducaⁿ ní cáháⁿ tẽ Pilatú, chi ní cutnùní iní-dé sá dícó sá cuèdú iní-güedé ducaⁿ ní quide-güedé ní sáha cuendá ñáhá-güedé xii Jèsús núú-dẽ.

¹⁹ Te nini núcóo tẽ Pilatú núú xèndé-dé cuéchi ní tendaha ñàdihí-dé tnúhu cuáháⁿ núú-dẽ, te duha ndúu tnúhu ní tendaha-aⁿ: “Vá cání iní-n ñá cada-n tée ní taxi cuendá ñáhá-güedé xii-n, tée ñá túú tnàhí cuéchi-xi, chi icuini ìo nèhé ní dácótó ñàha saní-í cuendá-dé”, duha ndúu tnúhu ní xáhaⁿ-aⁿ xii tẽ Pilatú.

²⁰ Dico cue tée cùu dútú cúnú, ndíhi cue tée cùu sacuéhé núú ñáyi israél ní xáhaⁿ-güedé xii ñáyi sá ná cuñáhá-yu xii tẽ Pilatú dácacu-dé tẽ Barrabás te cahni-dé Jèsús, te ní quide-yu nàcuáa ní xáhaⁿ-güedé.

²¹ Te tẽ Pilatú-áⁿ ní xáhaⁿ tùcu-dé xií-yu:

—¿Ndédacàa núú ùú cue tée-a cuñí-ndó dácacu-í? —cächí-dé xãhaⁿ-dẽ xií-yu.

Te ní xáhãⁿ-yu xii-dé:

—Té Barrabás dácacu-n —cächí-yu xáhãⁿ-yu xii-dé.

²² Te tẽ Pilatú ní xicáⁿ tnúhú-dẽ núú-yu, te xãhaⁿ-dẽ:

—¿Te ná cuñí-ndó càda-í Jèsús tée nani Cristú tée cächí sá Yá Ndióxi ní tendaha ñàha xii-dé véxi-dé ñuyú-a-í? —cächí-dé xãhaⁿ-dẽ xií-yu.

Te ncháá-yu ní cáháⁿ-yu, te xáhãⁿ-yu:

—Cata caa-dé núú cùrúxí —cächí-yu xáhãⁿ-yu xii-dé.

²³ Te tẽ Pilatú ní xáhaⁿ tùcu-dé xií-yu:

—¿Te ná cúú cuéchi ní quide-dé núu ducaⁿ cuñí-ndó càda-í-dé-í? —cächí-dé xãhaⁿ-dẽ xií-yu.

Dico ncháá-yu uuⁿ-gã níhi ní cáháⁿ-yu, te xáhãⁿ-yu xii-dé:

—¡Cata caa-dé núú cùrúxí! —cächí-yu xáhãⁿ-yu xii-dé.

²⁴ Te tẽ Pilatú ní cutnùní iní-dé sá vã nihí-dé nàcuáa cada-dé, chi uuⁿ-gã ní ngüita ñáyi xicuáá-yu, te xíãⁿ ní xicáⁿ-dẽ ndute ní ndáhá-dẽ núú ncháa ñáyi, te ní xáhaⁿ-dẽ xií-yu:

—Tée-a cùu-dé ìⁿ tée ñá túú tnàhí cuéchi-xi, te nchòhó cuñí-ndó sã cùu-dé, dico díu-ni mee-ndo cuído yáhu-ndo-dé chi yúhú vá cuídó yáhu-í-dé —cächí-dé xãhaⁿ-dẽ xií-yu.

²⁵ Te ncháá-yu ní xáhãⁿ-yu xii-dé:

—¡Diu nchúhú ndihi cue déhe-ndí cuido yáhu-ndí-dé! —càchí-yu xäháⁿ-yu.

²⁶ Te sátá dúcáⁿ te té Pilatú ní dácăcu-dé té Barrábás, te ní táuchíúⁿ-dē ní caní-güedē Jèsús. Te sátá dúcáⁿ nǐ quide ñaha-güedē xii-gá, te ní táuchíúⁿ-dē candeca ñaha-güedē xii-gá quíhíⁿ cata caa ñaha-güedē xii-gá núú cùrúxí.

²⁷ Te cue tée cùu sandadú té Pilatú ndécá-güedē Jèsús cuánguihu xítí vehe càhnu cuu cuendá-dé, te cue tée cùu sandadú-áⁿ nǐ cana-güedē dava-gá cue sandadú núú dúcáⁿ ndèca-güedē Jèsús cuánguihu-áⁿ. ²⁸ Te xíaⁿ nǐ taunuu-güedē dóó-gă, te ní dăcuíhnú ñaha-güedē xii-gá ñⁿ dóó tícuèhé víhí. ²⁹ Te ní cadúha-güedē ñⁿ coróná iñu ní chihí-güedē díquí-gă, te ní chitnǐ-güedē ñⁿ carrutí ndaha cùha-gá, te ní ngüíñí xítí-güedē núú-gă cúdíquí ndeé ñáhá-güedē xii-gá, te xäháⁿ-güedē:

—¡Ío càhnu cuu yohó tée yìndaha ñaha xii ñáyiú isràél! —càchí-güedē xäháⁿ-güedē xii-gá.

³⁰ Te ní tíú díí ñáhá-güedē xii-gá, te ní queheⁿ-güedē carrutí sá nǐ sáñaha-güedē xii-gá te ní ducuⁿ-güedē díquí-gă. ³¹ Te sátá nǐ yáha ní cudíquí ndeé ñáhá-güedē xii-gá, te ní nataunuu ñaha-güedē xii-gá dóó tícuèhé víhí sǎ nǐ dăcuíhnú ñaha-güedē xii-gá, te ní dándíúnuu ñaha-güedē xii-gá dóó méé-gă, te dătnúní ndécá ñaha-güedē cuáháⁿ núú catá càa ñaha-güedē xii-gá núú cùrúxí.

Sàta caa-güedē Jèsús núú cùrúxí

(Mr. 15:21-32; Lc. 23:26-43; Jn. 19:17-27)

³² Te ñuhu-güedē ndihí-gá ichi, te ní naníhí-güedē ñⁿ tée ñuú Cirené nání-dē Xímú, te tée-áⁿ nǐ quide yica-güedē ní xido-dé cùrúxí sá nchídó Jèsús.

³³ Te ní sáa-güedē ndihí-gá ñⁿ xichi núú nání Gólgotá, te tnúhu-áⁿ queé-xí: Núú nání yíquí díquí ndíyí, duha quèe-xi tnúhu-áⁿ. ³⁴ Te xíaⁿ sáñaha-güedē ndudí úá coho-gá ní cùu, te ñá túú ní xihí-gá chi dico-ni ní xito ndeé-gá.

³⁵ Te ní sata caa ñaha-güedē xii-gá núú cùrúxí, te sátá dúcáⁿ te cue tée cùu sandadú-áⁿ nǐ xito ndeé-güedē nùu

ndèdacàa-güedē cuu cuendá-güedē dóó-gă. Te ducaⁿ nǐ cuu chi ní quee ndáá-xi năcuáa ní cáháⁿ ñⁿ tée ní xóo cáháⁿ tnúhu Yá Ndiöxí ndeé sanaha yòdo tnuní núú tütú-gá, te duha càchí-xi: “Ní xito ndeé-güedē nùu ndèdacàa-güedē cuu cuendá-güedē dóó-gă”, duha ní cachí tée-áⁿ te ducaⁿ nǐ ngódó tnúní núú tütú-gá. ³⁶ Te sátá dúcáⁿ nǐ quide-güedē, te ní ngóo-güedē ndeé ñáhá-güedē xii-gá. ³⁷ Te ní taxi ndecu-güedē ñⁿ sá ndeé lètrá ndàa díquí-gă. Te lètrá-áⁿ càháⁿ-xi ná cuendá ducaⁿ nǐ quide ñaha-güedē xii-gá, te duha càháⁿ lètrá-áⁿ: “Tée-a cùu-dé tée yìndaha ñaha xii ñáyiú isràél”, duha càchí-xi. ³⁸ Te tnàhá úú cue tée cùu ñadúhú nǐ sata caa-güedē díu-ni núú cùrúxí tucu, te ñⁿ-dé ní sata caa-güedē xio cùha-gá, te ingá-dé ní sata caa-güedē xio dătni-gá. ³⁹ Te nchaa ñáyiú yáha yatni núú tăcàa-gá-áⁿ, te dăcuicó-yu díquí-yu ndehe ñáhá-yu xii-gá, te xícuèhé ñáhá-yu. ⁴⁰ Te xäháⁿ-yu xii-gá:

—Yòhó càchí-n sǎ dăngoyo-n veñúhu càhnu sá ío cùnnuu, te dandàa-n ingá veñúhu saa, te xítí úní-ni nduu sa nadaxínu-n, te vitna tanúu núú cùrúxí-áⁿ dăcăcu-n mēe-n te núu ndisa sá Dēhe Yá Ndiöxí cúú-n —càchí-yu xäháⁿ-yu xii-gá.

⁴¹ Te díu-ni ducaⁿ cùdíquí ndeé ñáhá cué tée cùu dütú cùnnuu xii-gá, ndihí cue tée dăcuaha ñaha xii ñáyiú nchaa tnúhu ní chídó tnúní ndíi Moisés, ndihí cue tée cùu fariséu, ndihí cue tée cùu sacuéhé nùú ñáyiú isràél, te xitnàha-güedē:

⁴² —Tée-a ní ndacu-dé ní dăcăcu-dé dava ñáyiú, te mee-dé ñá ndácú-dé dăcăcu nihnu-dé méé-dē. Te núu ndisa sá cúú-dé tée yìndaha ñaha xii ñáyiú isràél, te na cùndehe-o nuu-dé núú cùrúxí-a cuendá quíndáá iní-ó-dē. ⁴³ Te càchí-dé sá sàndáá iní-dé Yá Ndiöxí, te mee-gă ná dăcăcu ñaha-gă xii-dé te núu cùndahú iní ñáhá-gă, chi mee-dé càchí-dé sá Dēhe-gá cúú-dé —càchí-güedē xitnàha-güedē.

⁴⁴ Te ndeé tnàhá cue tée cùu ñadúhú tăcàa xio xio díñi-gá xícuèhé ñáhá-güedē xii-gá.

Ní xihí Jèsús

(Mr. 15:33-41; Lc. 23:44-49; Jn. 19:28-30)

⁴⁵ Te òré ní cuu cuádava nduu te ní cunee nihí ñuyú, te ducaⁿ-ni càa ní cuu caá úní

sacuaa. ⁴⁶ Te òré sa ta cùyatni cuu caá úní sacuaa-án, te níhi ní cáháⁿ Jèsús, te càchí-gá:

—Èlí, Èlí, ¿láma sabàctaní? —càchí-gá.

Te tnúhu-án quée-xí: Ndiõxí mée-í, Ndiõxí mée-í, ¿ná cuendá ní dáñá ñàha-n xii-í?, duha quèe-xi tnúhu-án.

⁴⁷ Te dava cue tée xĩndecu yatni núu táca-gá-án nĩ tecú dóho-güedé nàcuáa ní cáháⁿ-gá, te ní xítñaha-güedé:

—Tée-a càna-dé té Èliás —càchí-güedé xítñaha-güedé.

⁴⁸ Te òré-ni-án nĩ quene cunu ìⁿ cue tée xĩndecu-án nĩ queheⁿ-dé luha cáchí, te ní chindóyo-dé xití ndudí íá, te ní chinenu-dé díquí ìⁿ yutnu càni te ní ndocani-dé ní chihi-dé yuhu-gá. ⁴⁹ Te dava-güedé ní xáhaⁿ-güedé xii tée-án:

—Cundetú tnaa na cundehe-o nacoto núu quixi té Èliás dàcácu ñaha-dé xii-dé —càchí-güedé xáhaⁿ-güedé xii tée-án.

⁵⁰ Te Jèsús níhi ní cana saa-gá, te ní xihí-ni-gá. ⁵¹ Te sátá dúcáⁿ te ní ndátá dóo cúu còrtiná xití veñúhu càhnu sá ìo cùnunu ní quée dava ndáá, te ndáa núu ñinu ní ngüita-xi ní ndátá, te ní tnáa, te dava cava nàhnu ní táhú. ⁵² Te dava yaú núu yĩndüxi ñáyiu ní xihí ní sándáá iní ñáhá xii Yá Ndiõxí ní nacaáⁿ te ní ndotó-yu. ⁵³ Te sátá nĩ yáha ní ndoto Jèsús, te cue ñáyiu ní ndoto-án cuãnguihú-yu xití ñuú Jerusalén, te cue ñáyiu ñuú-án ìo vãi-yu ní xiní-yu cue ñáyiu ducaⁿ nĩ ndoto-án.

⁵⁴ Te sá dúcáⁿ nãndi ní quide-xi, ndihi sá dúcáⁿ nĩ tnáa xíãⁿ ío ní yùhú tée cùu capitáⁿ ndihi nchaa dava-gá cue tée ndècu ndihi-dé ndèe-güedé yiqui cùñú Jèsús, te ní xítñaha-güedé:

—Sá ndáá ndisa sá díú tée-a cùu-dé Déhe Yá Ndiõxí ní cùu —cachí-güedé xítñaha-güedé.

⁵⁵ Te xica xĩnutnii vãi ñáyiu dìhí ndéhè-yu nchaa nàcuáa ní quide ñaha-güedé xii Jèsús, te ñáyiu-án cúu-yu ñáyiu ní chindèe-yu Jèsús, te ndéé distritú Galileá ní chinchícúⁿ ñáhã-yu xii-gá. ⁵⁶ Te tnuú ñáyiu-án tnàhá tá Màriá Magdaléná, ndihi tá Màriá nãná tẽ Jàcobó ndihi té Chèé, ndihi nãná cue déhe té Zebèdeú.

Chĩndüxi-güedé Jèsús

(Mr. 15:42-47; Lc. 23:50-56; Jn. 19:38-42)

⁵⁷ Te ndècu ìⁿ tée cuica nàni-dé Chèé te cùu-dé tée ñuú Arimãteá, te tnàhá-dé ní tnàhá tnúhu-dé ndihi Jèsús. Te òré sa ní cuaa, ⁵⁸ te ní sáhãⁿ-dé núu tẽ Pilatú, te xáhaⁿ-dẽ núu vá cùndèe iní-dé dáña-dẽ chĩndüxi-dé yiqui cùñú Jèsús. Te té Pilatú-án nĩ sáha-dé tnúhu, te ní táuchíúⁿ-dẽ sá cuãha cuendá-güedé té Chèé-án yiqui cùñú-gá. ⁵⁹ Te té Chèé-án nĩ queheⁿ cuendá-dé yiqui cùñú-gá, te ní chidúcúⁿnuu-dé ìⁿ dóo cuixíⁿ dóo cándò. ⁶⁰ Te sa nchì ìⁿ yaú sáa nĩ caáⁿ té Chèé-án ìⁿ yiqui naha càva te xíãⁿ cúu cuendá-dé, te yaú-án nĩ chihi-dé yiqui cùñú Jèsús, te dàtnùní ní sadí-dé ìⁿ yúu cáhnú yũ quèhéⁿ yuhu yàú-án, te ní xica-dé cuánuhú-dé. ⁶¹ Te tnàhá tá Màriá Magdaléná, ndihi ingá xíchí nání Màriá ní quexió-yu ní ngóo-yu yatni núu nchì yaú-án.

Cue tée ndèe yaú núu yihí yiqui cùñú Jèsús

⁶² Te sátá nĩ yáha ní quide túha ñáyiu nchaa sá nãndihí-yu nduu tnèé nduu ndètátú-yu-án, te diu-ni nduu ndètátú-yu-án nĩ sáhãⁿ cue dútú cùnù, ndihi cue tée cùu fariséú ní cáháⁿ ndihi-güedé té Pilatú. ⁶³ Te xáhaⁿ-güedé xii-dé:

—Yòhó tée cùnunu, véxi-ndí càchí tnúhu-ndí sá nĩ ndacu iní-ndí sá tõe ndehnde nĩ xihí-ãⁿ càchí-dé òré ndécú-gã-dé sá nduu úní sá cùu-dé, te ndoto-dé. ⁶⁴ Te tendaha-n cuè tée na quihíⁿ-güedé cundeé-güedé yuhu yàú núu nĩ chihi-güedé yiqui cùñú-dé, chi na cuáhãⁿ quihíⁿ cue tée ní xica cuu ndihi-dé duhu-güedé yiqui cùñú-dé, te cùñaha-güedé xii ñáyiu sá nĩ ndoto-dé. Chi núu ducaⁿ na càda-güedé te ío-gá dandàhú-güedé cue ñáyiu dàcúuxí dàtná ní quide mee tõe ní xihí-ãⁿ —càchí-güedé xáhaⁿ-güedé.

⁶⁵ Te té Pilatú ní xáhaⁿ-dẽ xii-güedé:

—Náu cue sandàdú-a candeca-ndo-güedé quihíⁿ, te cadí váha-ndo ndihi-güedé yuhu yàú-án nàcuáa tàú-xi cunduu, te na cundeé-güedé nàcuáa sàni iní-ndó cunduu —cachí-dé xáhaⁿ-dẽ xii-güedé.

⁶⁶ Te cue tée-án nĩ xica-güedé cuáhãⁿ-güedé, te ní tee-güedé ìⁿ sèñá yúu ndèdí yèhe yaú-án, te ní dándõ-güedé cue sandàdú-án

ndèé-güedé yaú-áⁿ, te ducaⁿ ñi quide-güedé cuèndá sá vǎ yǎo quíhíⁿ nacaáⁿ yaú-áⁿ.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sátá ñi yáha nduu ndètatú ñáyiú, te ndumíngú nehé víhí-ñi ñi xica tá Màriá Magdalèná ndíhi íngá xíchí nání Màriá cuángotó-yu yaú núú ñi chíhi-güedé yíqui cùñú Jèsús. ² Te uuⁿni níhi víhi ní tnáa, te òré ducaⁿ ñi quide-xi chí ñiⁿ espíritú xínú cuèchi núú Yá Ndiòxí ní quexìo-xi núú dúcáⁿ nchíi yaú núú ñi chíhi-güedé yíqui cùñú Jèsús, te ní xócání espíritú-áⁿ yúú ndèdí yèhe yaú-áⁿ te ní ngóo-xi núú yúú-áⁿ. ³ Te dátá dátásaⁿ-xi òré sàá nduté dùcaⁿ datásaⁿ-xi núú espíritú-áⁿ, te dóó níhnú-xi cuixíⁿ quiyí. ⁴ Te òré ducaⁿ ñi quide-xi te cue sandàdú ndèé yaú-áⁿ ñi quidi ñaha-xi xii-güedé sá ñi yùhú-güedé, te ní nduá-güedé, te ní xíta sá xíní tnùnì-güedé. ⁵ Te espíritú-áⁿ ñi xáhaⁿ-xi xii cue ñáyiú dèhí cuángoto yaú-áⁿ:

—Nchòhó ñáyiú dèhí véxi coto yaú-a, vǎ yùhú-ndó chí yùhú cútnùnì iní-í sá nchòhó véxi-ndo nànducu-ndo yíqui cùñú Jèsús Yaa ní xíhí núú cùrúxí. ⁶ Dico Yaa-áⁿ chí ñá túú-gǎ ndécú yíqui cùñú-gǎ iha, chí sa ní ndoto-gǎ, te diu ducaⁿ ñi cachí-gǎ sá ndótó-gǎ cútnàhá vátá cùú-gǎ, te chí táquixi cundehe-ndo núú ñi sacáⁿ-güedé yíqui cùñú-gǎ ní cùu te quínì-ndó ñá ñá túú-gǎ. ⁷ Te vitna ío ndíhi chí cuàháⁿ núú xíndecu cue téé ní xica cuu ndíhi-gǎ, te duha cúñaha-ndo xii-güedé: “Ní ndoto Jèsús Yaa ní xíhí ní cùu, te codonùu-gǎ núú-ndó quíhíⁿ distritú Galileá te yàcáⁿ quínì-ndó-gǎ”, duha cúñaha-ndo xii-güedé. Duha ndùu tnúhu ní cachí tnúhu-í xii-ndo —càchí espíritú-áⁿ xáhaⁿ-xi xii cue ñáyiú dèhí-áⁿ.

⁸ Te cue ñáyiú dèhí-áⁿ ñi natnìⁿ-yu ichi, te súúnì ndíhi cuánuhú-yu núú xíndecu cue téé ní xica cuu ndíhi Jèsús cuèndá nacani tnúhu-yu núú-güedé nàcuáa ní xáhaⁿ espíritú-áⁿ xii-yu, te cuèi ní yùhú-yu dico súúnì cùdíⁿ iní-yu. ⁹ Te ichi ñùhú-yu cuánuhú-yu, te na iní-yu ní quexìo Jesús núú-yu ní dándácõ váha ñaha-gǎ xii-yu. Te

ñáyiú-áⁿ ñi ngüñí xítí-yu núú-gǎ, te ní numi ñàhá-yu xii-gǎ, te ní chiñuhu ñàhá-yu. ¹⁰ Te ní xáhaⁿ-gǎ xii-yu:

—Vǎ yùhú-ndó, chí cuàháⁿ cúñaha-ndo xii cue téé ní xica cuu ndíhi-í sá ná quíhíⁿ-güedé distritú Galileá, te yàcáⁿ quínì ñàhá-güedé xii-í —càchí-gǎ xáhaⁿ-gǎ xii-yu.

Nàcuáa ndùu tnúhu ní nacani cue sandàdú

¹¹ Te ñini ñùhu cue ñáyiú dèhí-áⁿ ichi cuánuhú-yu, te dava cue sandàdú cue téé ndèé yaú-áⁿ ní cùu ní xica-güedé cuánuhú-güedé ñuú cuèndá nacani tnúhu-güedé núú cuè téé cùu dútú cùnùu nacuáa ní cuu. ¹² Te cue téé cùu dútú cùnùu-áⁿ ñi quide-güedé jündá ndíhi cue téé cùu sacuéhé núú ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndíhi cue sandàdú-áⁿ sǎ cuñaha-güedé vǎi díhúⁿ cuèndá dacuàndehnde-güedé. ¹³ Te ní xáhaⁿ-güedé xii cue sandàdú-áⁿ:

—Cuínì-ndí sǎ vǎ càháⁿ ndáá-ndó núú ñáyiú nàcuáa ní cuu, chí cúñaha-ndo xii-yu sǎ òré xidí-ndó ñi quixi cue téé ní xica cuu ndíhi-dé ní dúhú-güedé yíqui cùñú-dé nehé-güedé cuáháⁿ, duha cúñaha-ndo xii-yu. ¹⁴ Te núu na ñihí té Pilatú téé cùu gobiernú tnúhu nàcuáa cúñaha-ndo xii ñáyiú, te nchúhú cada ndáá-ndí ndíhi-dé cuèndá sǎ ñá túú ñá cada ñaha-dé xii-ndo —càchí-güedé xáhaⁿ-güedé xii cue sandàdú-áⁿ.

¹⁵ Te cue sandàdú-áⁿ ñi queheⁿ cuèndá-güedé díhúⁿ, te ní xica-güedé cuáháⁿ-güedé te ní càháⁿ-güedé nàcuáa ní xáhaⁿ cuè téé-áⁿ càháⁿ-güedé. Te nchaa ñáyiú isràél ní ñihí-yu tnúhu ní càháⁿ-güedé-áⁿ, te diu-ni tnúhu-áⁿ càháⁿ-yu ndèé vitna.

Jèsús xáhaⁿ-gǎ xii cue téé ní xica cuu ndíhi-gǎ nàcuáa ndùu chiuⁿ cada-güedé

(Mr. 16:14-18; Lc. 24:36-49; Jn. 20:19-23)

¹⁶ Te ndi ùxí ñiⁿ cue téé ní xica cuu ndíhi Jèsús ní xica-güedé cuáháⁿ-güedé ñiⁿ yucu càa distritú Galileá núú ñi xáhaⁿ-gǎ naníhí tnàhá-güedé ndíhi-gǎ. ¹⁷ Te òré ní xínì-güedé Jèsús te ní chiñuhu ñaha-güedé xii-gǎ, dico dava-güedé sàni ñiⁿ sàni úú iní-güedé núu diu-gǎ àdi ñá díú-gǎ. ¹⁸ Te

Jèsús ní sándehe yatni-gá ndéé núú-güedě,
te ní xáhaⁿ-gă xii-güedé:

—Yúhú ndécú ndihí-í tnúhu ndee ìní
táxí tnùn-í cuéi andiu te cuéi ñuyíú-a.

¹⁹ Te vitna tàuchiuⁿ-í sá quihíⁿ-ndó ñihí
ñuyíú cǎháⁿ-ndó tnúhu-í núú ñăyiu cuendá
tuha ñáhá-yu xii-í, te dacuàndute-ndó-yu.
Te òré ducaⁿ càda-ndo, te cacunehe-ndo
tátá-ó Dütú Ndiöxí ndihí yúhú Yaá cúú
Děhe-gá ndihí Espiritú-gá. ²⁰ Te cúñaha-ndo
xii-yu sá ná càdá-yu nchaa nàcuáa sa ní
dánèhé ñáhà-í xii-ndo càda-ndo. Te na
càchí tnúhu-í sá cündècu ndihí ñaha-ni-í
xii-ndo ñuyíú-a ndéé ná sàá nduu nàa-xi
—cachí-gá xáhaⁿ-gă xii-güedé. Te ducaⁿ na
cünduu.

TNÚHU NÍ CHÍDÓ TNÙNÍ TÉ MÀCÚ

*Té Juàá té dâcuandute ñaha xii ñáyi
cáháⁿ-dé tnúhu Yá Ndiöxí xití yucu
(Mt. 3:1-12; Lc. 3:1-9, 15-17; Jn. 1:19-28)*

¹ Duha ní quesaha tnúhu sá cáháⁿ nâcuáa naníhí tãhú-ó tnúhu Xítóhó Jesucrístú Déhe Yá Ndiöxí.

² Te ndí Chàiaá té ní xóo cáháⁿ tnúhu Yá Ndiöxí ndéé sanaha ní chídó tnùní ndí nâcuáa ní xáhaⁿ Yá Ndiöxí xii Déhe-gá, te duha ní xáhaⁿ-gã:

Tendaha-ï ñⁿ téé codonùu-dé núu-n, te dàtúha-dé ñáyi cuendá tñí-yu tnúhu-n.

³ Te téé-áⁿ quihi-dé xití yucu te níhi cáháⁿ-dé cúñaha-dě xii ñáyi:

“Chí dáñá nchàa ichi cuehé ichi duha ndècu-ndo, te tñi-ndo ichi váha, te ducaⁿ càda-ndo cuendá cundecu túha-ndo, chi véxi Yaá ío cùnuu”, duha cúñaha-dě xií-yu.

Duha ndùu tnúhu ní chídó tnùní ndí Chàiaá nâcuáa ní xáhaⁿ Yá Ndiöxí xii Déhe-gá.

⁴ Te téé dii cuendá-xi ní ngódó tnùní-áⁿ naní-dě Juàá, te téé-áⁿ ní xíhi-dé xití yucu ní cáháⁿ-dé tnúhu Yá Ndiöxí, te ní xóo dacuandute-dé ñáyi, te duha ní xáhaⁿ-dě xií-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te Yá Ndiöxí cada càhnu iní-gá nchaa yíca cuèchi-ndo —duha ní xáhaⁿ-dě xií-yu.

⁵ Te nchaa ñáyi distritú Jùdeá, ndíhi ñáyi ñuú Jerusàlén ní sáháⁿ-yu ndéé yúte Jòrdán núu ndécú tē Juàá ní xíndedóho-yu nchaa tnúhu ní cáháⁿ-dé. Te cue ñáyi ní náhmá nchaa yíca cuèchi-xi te ní dacuandute ñaha-dé xií-yu.

⁶ Te té Juàá-áⁿ ní xíhnu-dé dóo idi caméyu, te ñⁿ ñⁿ ní cuu pãñú xití-dé, te ní xóo caxi-dé tíca làngóstá ndíhi ndudí ñúñú cuéchi. ⁷ Te ní xáhaⁿ tùcu-dé xii ñáyi:

—Nchicúⁿ ñⁿ téé véxi, te téé-áⁿ ïo-gá cùnùu-dé dàcúxí yúhú, chi yúhú cùu-í ñⁿ téé duuⁿ duuⁿ ñà túú tàú-í ngúnundeyí-í nandaxi cuèdicó ñⁿ nihnu chàu-dé dico

quide-í chiùⁿ-dé. ⁸ Te yúhú dacuandute ñaha-í xii-ndo, dico mee-dě taxi-dé Espiritú Yá Ndiöxí cundecu ndíhi-ndo —càchí-dé xáhaⁿ-dě xií-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ní quee Jèsús ñuú Nazàrét ñⁿ ñuú yíndèhu distritú Galileá cuáháⁿ-gá yúte Jòrdán. Te yàcáⁿ ní dacuandute ñaha té Juàá xii-gá. ¹⁰ Te òré ní nene-gá xití ndute, te ní xiní-gá nchí andíu, te ní quee Espiritú Yá Ndiöxí véxi cuuⁿ-xi ngúndecu ndíhi ñaha-xi xii-gá, te dàtná cáá ñⁿ lómá cáá Espiritú-áⁿ véxi cuuⁿ-xi. ¹¹ Te òré-áⁿ ní tecú ní cáháⁿ Yá Ndiöxí ndéé andíu, te xáhaⁿ-gã xii Jèsús:

—Yòhó cúu-n Dèhe-í téé ío cùu iní-í te ío cùdí iní ñáhà-í xii-n —càchí-gá xáhaⁿ-gã.

Sácuíhná quidé yíca-xi cada Jesús sá ñà túú tàú-gá cada-gá dico ñà túú ní quide-gá

(Mt. 4:1-11; Lc. 4:1-13)

¹² Te Espiritú Yá Ndiöxí ndécá-xí Jèsús cuáháⁿ ñⁿ xití yucu. ¹³ Te xití yucu-áⁿ ío víhí quiti dééⁿ, te xiáⁿ ndécú Jèsús ní ngúita sácuíhná quidé yíca-xi cada-gá ñⁿ sá ñà túú tàú-gá cada-gá dico ñà túú ní sàndáá iní-gá. Te cue espíritú xínú cuèchi núu Yá Ndiöxí ní xinu cuechi-xi nùu-gã. Te ní xíndecu-gá údico nduu xití yucu-áⁿ.

Distritú Galileá ní chisaha Jèsús chiùⁿ ní táhú Tátá-gã Dútú Ndiöxí cada-gá

(Mt. 4:12-17; Lc. 4:14-15)

¹⁴ Te sátá ní ngava té Juàá vecaá, te Jèsús cuáháⁿ-gá distritú Galileá dānehé-gá ñáyi tnúhu váha, tnúhu sá cáháⁿ nâcuáa ndíhu ndaha ñaha Yá Ndiöxí xií-yu. ¹⁵ Te xáhaⁿ-gã xií-yu:

—Vitna sa ní cuyatni nduu ndíhu ndaha ñaha Yá Ndiöxí xii-ndo, te chí dáñá nchàa ichi cuehé ichi duha ndècu-ndo, te quíndáá iní-ndó tnúhu váha, tnúhu sá cáháⁿ nâcuáa naníhí tãhú-ndó —càchí-gá xáhaⁿ-gã xií-yu.

Jèsús cáháⁿ-gá cúmí tñhá cue té tñí chácá

(Mt. 4:18-22; Lc. 5:1-11)

¹⁶ Te Jèsús ñúhú-gã ichi cuáháⁿ-gá tá yáha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí xídáquée-güedé ñunu-güedé xití ndute

tn̄i-güedé chácá, chi quití tnàhí-án cúu chiun-güedé tn̄i-güedē-di. ¹⁷ Te Jèsús ní xáhaⁿ-gã xii-güedé:

—Chí dáñá chiun quide-ndo-án, te quixi-ndo chitnahá ñáhá-ndó xii-í te taxi-í ingá núu chiun cada-ndo chi quihíⁿ-ndó cãháⁿ-ndó ñáyu cuendá dacuàhá-yu tnúhu-í —càchí-gã xãhaⁿ-gã xii-güedé.

¹⁸ Te òré-ni-án ñí dáñá cuè téé-án ñunu-güedé te ní tuha ñaha-güedē xii-gá.

¹⁹ Te cuáháⁿ-gá luha-gá, te ní xini-gá té Jàcobó ndihi ñani-dé té Juáá ñúhú-güedē xití bàrcú-güedé náticu-güedé ñunu-güedé, te ndi ndúu-güedé cúu-güedé déhe té Zebèdeú. ²⁰ Te ní cana ñaha-gã xii-güedé, te ní dándoo-güedé tátá-güedē ndihi cue téé xinu cuechi núu-güedē xití bàrcú, te ní tuha ñaha-güedē xii-gá.

Ín téé yìhi ñaha espíritú cundìhi yucu ñávãha

(Lc. 4:31-37)

²¹ Te ní quexio Jesús ndihi cue téé-án ñí ñúu nání Cãpernaúm, te yacáⁿ ndécú-gã ní tnahá nduu ndètatú ñáyu, te cuánguihu-gá veñúhu ñáyu isràél dānehé ñáhá-gã xii-yu. ²² Te xicuñúhu vihi-yu nchaa tnúhu cãháⁿ-gá, chi quide-gá sá cúu-gã ñí Yaá táxi tnúni víhi, te ñá túu dàcuaha ñaha-gá xii-yu dàtná dācuaha ñaha cue téé dàcuaha ñaha xii-yu nchaa tnúhu ní chídó tnúni ndíi Moisés. ²³ Te xití veñúhu-án ndécú tnàhá ñí téé yìhi ñaha ñí espíritú cundìhi yucu ñávãha, te espíritú-án ñí quide-xi níhi ní cãháⁿ téé-án, te xãhaⁿ-dē xii Jèsús:

²⁴ —¿Te ná cuini yòhó Jèsús téé ñúu Nazàrét cada ñaha-n xii-ndí ñúu véxi-n núu ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xini ñáhà-í xii-n sã cúu-n ñí téé ñá túu tnàhí cuéchi-xi, chi núu Yá Ndiòxí ní quee-n véxi-n ñùyú-a —càchí-dé xãhaⁿ-dē xii-gá.

²⁵ Dico Jèsús ní tenáá-gá espíritú cundìhi yucu ñávãha-án, te xãhaⁿ-gã:

—¿Cadí yuhu-n, te taquèe yiqui cuñú téé-án! —càchí-gã xãhaⁿ-gã xii espíritú-án.

²⁶ Te espíritú cundìhi yucu ñávãha-án ñí dácüyìhí ñáhá-xí xii téé-án, te ní dácáná sàa ñaha-xi, te ní quee-xi yiqui cuñú-dé

cuáháⁿ-xi. ²⁷ Te nchaa ñáyu xĩndecu-án ño ní cuñúhu-yu, te ní xitnàhá-yu:

—¿Te nása ndúu-tu sá quidé téé-a? ¿Ndudú sáa cãháⁿ-tu-dé sánúu? Te quide-dé dàtná quidé ñí téé cùnúu vihi, chi cãháⁿ-ni-dé te sàndáá iní ñáhá nchaa espíritú cundìhi yucu ñávãha —càchí-yu xitnàhá-yu.

²⁸ Te ío ndíhi ní níhi nchaa ñáyu dava-gá ñúu yíndèhu distritú Galileá tnúhu nchaa nācuáa cãháⁿ Jèsús ndihi nchaa sá quidé-gã.

Jèsús quidé tátna-gá nãná ñadìhí té Ximú
(Mt. 8:14-15; Lc. 4:38-39)

²⁹ Te òré ní ndee Jèsús veñúhu cue ñáyu isràél, te cuáháⁿ-gá ndihi té Jàcobó ndihi té Juáá vehe té Ximú ndihi té Ndríxi.

³⁰ Te nãná ñadìhí té Ximú cùhú-aⁿ ñúu vihi-aⁿ cahni, te ndíhi-ni ní xáhaⁿ-güedē xii Jèsús sá cùhú-aⁿ. ³¹ Te ní sáháⁿ-gá núu cáá ñaha cùhú-án te ní tn̄i-gã ndaha-aⁿ ní ndocani ñaha-gã xii-aⁿ. Te òré-ni-án ñí nchíco-aⁿ cahni, te ní ngúíta-aⁿ xinu cuechi-aⁿ núu-güedē ndihi-gá.

Jèsús quidé tátna-gá vài ñáyu cùhú
(Mt. 8:16-17; Lc. 4:40-41)

³² Te òré sa cuini-xi cundiquiⁿ te ní quexio ñáyu núu ndécú Jèsús, te nchaa ñáyu cùhú ní dátacá-yu ndécá-yu ní sáa núu-gã, te tnàhá cue ñáyu yìhi ñaha espíritú cundìhi yucu ñávãha ndécá-yu ní sáa núu-gã. ³³ Te nchaa ñáyu ñúu-án ñí chítú níhnú-yu yuyèhe vehe núu ñí quexio Jesús. ³⁴ Te Jèsús ní quide tátna-gá nchaa ñáyu cùhú cuèi ndi dííⁿ ndi dííⁿ núu cuèhé tnàhá-yu ñí ñí-yu, te ní queñuhu-gá nchaa espíritú cundìhi yucu ñávãha yìhi ñaha xii ñáyu, te ñá túu ní dàña-gá cãháⁿ cue espíritú cundìhi yucu ñávãha-án ñí ñí tnúhu, te ducaⁿ ñí quide-gá chi cue espíritú-án sa xini-xi yoo cùu-gá.

Jèsús cãháⁿ-gá tnúhu Yá Ndiòxí distritú Galileá

(Lc. 4:42-44)

³⁵ Te òré vátá tũndaá váha-gá ní ndacóo Jèsús cuáháⁿ-gá ñí xio yuhu ñúu núu ñá túu ñáyu ndècu cuendá yacáⁿ cãháⁿ ndihi-gá Yá Ndiòxí. ³⁶ Te té Ximú ndihi cue téé cundìhi-dé nándücu ñaha-güedē xii-gá.

³⁷ Te òré ní naníhí ñáhá-güedě xii-gá, te ní xáhaⁿ-güedě:

—Nchaa ñáyiú nànducu ñahá-yu xii-n — càchí-güedě xáhaⁿ-güedě xii-gá.

³⁸ Te ní xáhaⁿ-gá xii-güedě:

—Chí ná quihíⁿ-ó nchàa ñuú xíndáa yatni-a, chi danèhé-í ñáyiú tnúhu Yá Ndióxi chí ðiú chùⁿ-án vèxi-í —càchí-gá xáhaⁿ-gá xii-güedě.

³⁹ Te Jèsús tá xica ndodo-gá cuáháⁿ nchaa ñuú yíndèhu distritú Galileá dánèhé-gá ñáyiú, te ndi tnahá ìⁿ ìⁿ ñuú sáa-gá te ducaⁿ cuànguihu-gá veñúhu-yu dānehé ñáhá-gá xii-yu tnúhu Yá Ndióxi, te cue ñáyiú yìhi ñaha espíritú cùndìhi yucu ñávāha ta quèñuhu-gá nchaa espíritú-án yiqui cùñú-yu cuáháⁿ.

Jèsús quidé tātna-gá ìⁿ tée tñàhá cuéhé sã dátèhyú nihnu-xi yiqui cùñú-ó

(Mt. 8:1-4; Lc. 5:12-16)

⁴⁰ Te ní quexìo ìⁿ tée tñàhá cuéhé sã dátèhyú nihnu-xi yiqui cùñú-ó núú Jèsús, te ní ngüñí xítí-dě núú-gá càháⁿ ndàhú-dé, te xáhaⁿ-dě xii-gá:

—Vèxi-í càháⁿ ndàhú-í núú-n nñu vá cùndèe iní-n càda tātna ñaha-n xii-í chí cùtnuní iní-í sá ndácú-n —càchí-dé xáhaⁿ-dě xii-gá.

⁴¹ Te Jèsús ní cundàhú iní ñáhá-gá xii-dé te ní dácáa-gá ndaha-gá ní tendaha ñaha-gá xii-dé, te xáhaⁿ-gá:

—Cuu cada tātna ñaha-í xii-n, te vitna ndúha-n —càchí-gá xáhaⁿ-gá xii-dé.

⁴² Te òré-ni-án ñí xócuiñí cuéhé tñàhá-dé.

⁴³⁻⁴⁴ Te Jèsús ní càháⁿ víhí-gá dóho-dé, te xáhaⁿ-gá xii-dé:

—Vitna cuanùhú-na, dico vá yõo ìⁿ cúñaha-n sà ní quide tātna ñaha-í xii-n, te núú dütú-ni cuáháⁿ cuendá sá ná quini ñáhá-dě xii-n sà ní ndúha-n te cuáha-n-dě sá ndúú tãhú Yá Ndióxi dátna ní cachí ndí Moisés cuendá ná quini ñáyiú sá ndáa ní ndúha-n —càchí-gá xáhaⁿ-gá xii-dé.

⁴⁵ Te tée ní cuhú-án ñí xica-dé cuáháⁿ-dé, te ní ngüita-dé xáhaⁿ-dě xii nchaa ñáyiú ta nàníhí-dě nàcuáa ní quide Jèsús ní quide tātna ñaha-gá xii-dé. Te sá dúcáⁿ ñí xité nuu tée-án cuendú nàcuáa ní quide ñaha Jèsús xii-dé ní quide tātna ñaha-gá ní ndúha-dé, te xiãⁿ nñu dayuhu ñí xóo quihu-gá dava

ñuú núú ìo vãi ñáyiú ndèhe ñaha xii-gá, te ní xóo cundecu-gá xítí yucu núú ñà túú ñáyiú ndècu. Te nchaa ñuú ní quee ñáyiú ní sáháⁿ-yu núú ndécú-gá ní càháⁿ ndihi ñáhá-yu xii-gá.

2

Jèsús quidé tātna-gá ìⁿ tée cùhú ñá cúu-gá candá nihnu

(Mt. 9:1-8; Lc. 5:17-26)

¹ Te sátá ñí cuu ìⁿ úú nduu sá ñí quee Jèsús ñuú Capernaúm te ní nasáa tucu-gá, te cue ñáyiú ní níhí-yu tnúhu sá ñí ndexìo-gá núú quidé vèhe-gá. ² Te ndìhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tñàhá-gá-yu. Te ní ngüita-gá ní dánèhé ñáhá-gá xii-yu tnúhu Yá Ndióxi.

³ Te òré-án ñí quexìo cúmí tñàhá cue tée núú ndécú-gá nchídó-güedě ìⁿ tée cùhú ñá cúu-gá candá nihnu-dé. ⁴ Dico ñá túú ní ndàcu-güedě sáa-güedě ndéé núú-gá chí ìo cuéhé ñáyiú ndècu. Te xiãⁿ nñu ní sáa-güedě díquí vèhé nñu yíhí-gá-án ñí caáⁿ-güedé, te ichi ndàa díquí vèhé-án ñí dáquèe-güedé tée cùhú-án, te ñuhu-dé ìⁿ xító ní dáquèe ñaha-güedě ndéé núú-gá. ⁵ Te Jèsús sa ní cutnùní iní-gá sá sàndáa iní ñáhá-güedě xii-gá nñu ní xáhaⁿ-gá xii tée cùhú-án:

—Yòhó tée cùhú, sa ní quide càhnu iní-í nchaa cuéchi-n —càchí-gá xáhaⁿ-gá xii-dé.

⁶ Te xiãⁿ xínucóo ìⁿ úú cue tée dàcuaha ñaha xii ñáyiú nchaa tnúhu ní chídó tnùní ndí Moisés, te sá dúcáⁿ ñí càháⁿ Jèsús núú cue tée-án ñí sani iní-güedé: ⁷ “Tée-a càháⁿ cuéhé-dé cuendá Yá Ndióxi duha càháⁿ-dé, chí vá yõo ìⁿ ndàcu cada cahnu iní nchaa yíca cuéchi ñáyiú chí ìⁿ dñi díi-ni Yá Ndióxi quidé càhnu iní-gá”, duha ní sani iní-güedé.

⁸ Dico òré-ni-án ñí cutnùní iní Jèsús nàcuáa sàni iní-güedé, núú ní xáhaⁿ-gá xii-güedé:

—¿Te ná cuendá ducaⁿ sàni iní-ndó-í? ⁹ Te sá dúhá ñí xáhaⁿ-í xii tée cùhú-a sá ñí quide càhnu iní-í nchaa yíca cuéchi-dé, te xiãⁿ nchòhó ñá túú cùtnuní iní-ndó nñu ndáa càháⁿ-í àdi ñá ndáa. Dico núú cúu-í-dé sá ndácóo-dé, te ndocani-dé xító ñuhu-dé véxi, te caca-dé, te cutnùní ndáa iní-ndó nñu ndáa càháⁿ-í àdi ñá ndáa chí cundehe núú-ndó nàcuáa cada-í. ¹⁰ Te vitna na càda-í nàcuáa cutnùní iní-ndó nchàa-ndo sá yùhú Tée cùu ñani tñàhá-ndó nchàa-ndo

ndecu ndihi-í tnúhu ndee ìní sá cáda càhnu ìní-í nchaa cuéchi ñáyiú ñuyíú-a —càchí-gá xǎhaⁿ-gǎ xii-güedé.

Te sátá dúcáⁿ te ní xáhaⁿ-gǎ xii té cùhú-áⁿ:

11 —Ndacóo te ndocani-n xító ñùhu-n véxi-áⁿ, te núhú-n vehe-n —cachí-gá xǎhaⁿ-gǎ xii-dé.

12 Te òré-ni-áⁿ ñí ndacóo-dé, te ní ndocani-dé xító ñùhu-dé ní quexiò-áⁿ, te ndèhe nchaa ñáyiú xíndecu-áⁿ ñí ndee-dé tnuú-yu cuáháⁿ-dé. Te sá dúcáⁿ ñí quide Jèsús ní quide tátna-gá té-áⁿ, xǎⁿ ío ní cuñúhu nchaa ñáyiú, te ní xítñahá-yu:

—Càhnu vihi cuu Yá Ndiòxí, chi ñá ñíⁿ ndùu quiní-ó dùha cuu datná ní cuu vitna —càchí-yu xítñahá-yu.

*Jèsús càháⁿ-gá ñíⁿ té nàni Leví
(Mt. 9:9-13; Lc. 5:27-32)*

13 Te Jèsús cuáháⁿ tucu-gá yuhu làgúná, te ío cuéhé ñáyiú ní sátnàhá ñáhá xii-gá, te ní dánèhé ñáhá-gǎ xii-yu tnúhu Yá Ndiòxí.

14 Te òré ní yáha ní dánèhé ñáhá-gǎ xii-yu, te ní naqueheⁿ-gá ichi, te ní yáha yatni-gá ñíⁿ xichi núú núcòo ñíⁿ té nàni Leví déhe ñíⁿ té nàni Alfeú quidé còbrá-dé ñáyiú cuèndá impuèstú chi còbrádór cúú-dé. Te òré ní xiní ñáhá-gǎ xii-dé, te ní xáhaⁿ-gǎ:

—Néhe chitnahá ñáhá-n xii-í —càchí-gá xǎhaⁿ-gǎ xii-dé.

Te té Lèví-áⁿ ñí ndacuñí-dé, te ní tuha ñaha-dé xii-gá.

15 Te té Lèví-áⁿ cuáháⁿ-dé ndihi Jèsús vehe-dé. Te yíhi Jèsús mèsá xéxi-gǎ ndihi cue téé xica cuu ndihi-gá, te tnàhá vèi cue téé cuihna ìní-xi quide còbrá ñáhá xii ñáyiú cuèndá impuèstú, ndihi dava-gá cue téé ndècu ichi cuehé ichi duha núcòo ndihi ñaha-güedé xii-gá xéxi ndihi ñaha-güedé, te ducaⁿ chi ío vèi ñáyiú nchìcúⁿ ñáhá xii-gá. 16 Te sá ñí xiní cue téé dàcuáha ñaha xii-yu nchaa tnúhu ní chídó tnùnì ndíi Moisés, ndihi cue téé cùu fariséu xéxi Jèsús ndihi nchaa cue téé-áⁿ núu ní xicáⁿ tnúhú-güedé núu cuè téé xica cuu ndihi-gá, te xǎhaⁿ-gǎ xii-güedé:

—¿Ná cuèndá ducaⁿ quide téé cùu mestrú-ndó xéxi-dé ndihi cue téé cuihna ìní-xi quide còbrá ñáhá xii ñáyiú cuèndá impuèstú, ndihi nchaa dava-gá cue téé ndècu

ichi cuehé ichi duha-i? —càchí-güedé xǎhaⁿ-güedé.

17 Te Jèsús ní tecú dóho-gá nàcuáa ndùu tnúhu ní xáhaⁿ-güedé xii cue téé xica cuu ndihi-gá, núu ní xáhaⁿ-gǎ xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í càháⁿ-í ñáyiú cùtnuní ìní-xi sá ndécú cuèchi-xi te ñá túú véxi-í càháⁿ-í ñáyiú càchí sá ñá túú ndècu cuéchi-xi —càchí-gá xǎhaⁿ-gǎ xii-güedé.

*Cuèndá cue ñáyiú ñá túú tnàhí ná xéxi áma càháⁿ ndihí-yu Yá Ndiòxí
(Mt. 9:14-17; Lc. 5:33-39)*

18 Te cue téé xica cuu ndihi té Juáá, ndihi cue téé xica cuu ndihi cue téé cùu fariséu ñá túú tnàhí ná xéxi-güedé áma càháⁿ ndihi-güedé Yá Ndiòxí. Te ñíⁿ nduu ducaⁿ xíquide-güedé, te ní sáháⁿ ñáyiú ní xicáⁿ tnúhú-yu núu Jèsús, te xǎhǎⁿ-yu xii-gá:

—Cuèní-ndí cachí tnúhu-n ná cuèndá cue téé xica cuu ndihi té Juáá, ndihi cue téé xica cuu ndihi cue téé cùu fariséu ñá túú tnàhí ná xéxi-güedé áma càháⁿ ndihi-güedé Yá Ndiòxí, te cue téé xica cuu ndihi-n ñá túú dùcaⁿ quide-güedé —càchí-yu xǎhǎⁿ-yu xii-gá.

19 Te Jèsús ní xáhaⁿ-gǎ xii-yu:

—Nchòhó xini-ndó sǎ vǎ cúú cùñaha-o xii ñáyiú ñùhu vico tnándaha sá vǎ cúú càxí-yu nini ndècu ndihi ñaha téé tnándaha xii-yu. 20 Dico sáá nduu te vǎ cùndècu ndihi ñaha-gá téé tnándaha-áⁿ xii-yu, te dàvá-áⁿ te cahni ìní-yu vǎ cáxí-yu cuèndá sá ndihú ìní-yu.

21 'Te vǎ yòo ñíⁿ dàndée luha dóo sáá ñíⁿ dóo sa ní cuu tùhú víhí, chi dóo sáá-áⁿ nàndiyi-xi te uuⁿ-gá ndata-xi dóo sà ní cuu tùhú-áⁿ. 22 Te ñí vǎ yòo ñíⁿ chihí ndidí sáá xítí ñíⁿ lamba sa ní cuu tùhú víhí, chi núu yoo ducaⁿ na càda te ndava lamba sa ní cuu tùhú-áⁿ, chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu. Núu xǎⁿ xini ñùhu-xi quée ndidí sáá-áⁿ xítí ñíⁿ lamba saa —càchí-gá xǎhaⁿ-gǎ xii-yu.

*Cue téé xica cuu ndihi Jèsús sàhnú-güedé yoco triú nduu ndètatú ñáyiú
(Mt. 12:1-8; Lc. 6:1-5)*

23 Te ìⁿ nduu cùu-xi nduu ndetatú ñáyiú ññu Jesús ichi ndihí cue téé xica cuu ndihí-gá, te ta yáha-gá ndihí-güedé ìⁿ xichi núú cáá triú, te ní ngüíta-güedé sàhnú-güedé yoco triú-áⁿ. 24 Te cue téé cùu fariséú ní xáhaⁿ-güedé xii-gá:

—¿Ná cuendá ducaⁿ quide cue téé xica cuu ndihí-n sahnú-güedé yoco triú vitna cùu-xi nduu ndetatú-í? Te ñá túú tàú-güedé ducaⁿ càda-güedé —càchí-güedé xáhaⁿ-güedé xii-gá.

25 Te ní xáhaⁿ-gá xii-güedé:

—¿Te náa vátá dácuàha tnahi-gá-ndó nñú tütú Yá Ndiöxí núú càháⁿ-xi nàcuáa ní quide ndíi Dàvíí cútnahá ní xihí ndíi docó ndihí cue téé ní xica cuu ndihí ndíi-áⁿ? 26 Te dàvá-áⁿ ní xíndecu ìⁿ téé ní xínani Abiátár ní cuu-dé dútú cúnú, te ndíi Dàvíí ní quíhu ndíi xití vehe Yá Ndiöxí ní queheⁿ ndíi pàá ní cuu íí ndécú-áⁿ ní dácáhnñu ndíi cue téé ní xica cuu ndihí ndíi ní xexi ndíi ndihí-güedé, te mee-ni cuè dútú tàú-güedé caxi-güedé pàá-áⁿ ní cùu —cachí-gá xáhaⁿ-gá xii-güedé.

27 Te ní xáhaⁿ tucu Jesús xii-güedé:

—Mee Yá Ndiöxí ní taxi ndecu-gá nduu ndetatú ñáyiú, te ñá túú ní càchí-gá sá mée-yu nándi cani iní-yu cadá-yu canehe ñ-yu nduu ndetatú-yu-áⁿ. 28 Te yúhú Téé cùu ññaní tnáhá-ndó nchàa-ndo, tnáhá-í ndécú ndihí-í tnúhu ndee ìní sá cùu-í nchaa ñáyiú nàcuáa cadá-yu nduu ndetatú-ó-áⁿ —càchí-gá xáhaⁿ-gá xii-güedé.

3

*Ìⁿ téé ní yíchí ìⁿ xio ndaha-xi
(Mt. 12:9-14; Lc. 6:6-11)*

1 Te Jèsús cuánguihu tucu-gá xití veñúhu, te xití veñúhu-áⁿ ndécú ìⁿ téé ní yíchí ìⁿ xio ndaha-dé. 2 Te xíáⁿ ndécú cuè téé xito dayuhu ñaha xii-gá, te núú cada tátna-gá téé cùhú-áⁿ nduu cùu-xi nduu ndetatú-güedé ndihí ñáyiú, cuendá ducaⁿ te níhí-güedé nàcuáa cada-güedé cacáⁿ cuéchi-güedé cuendá-gá. 3 Te ní xáhaⁿ-gá xii téé cùhú ndaha-xi-áⁿ:

—Ndacuíñí te ngúnutnii-n cuádava iha —càchí-gá xáhaⁿ-gá xii-dé.

4 Te ní xicáⁿ tnúhú-gá núú-güedé, te xáhaⁿ-gá:

—Chí càchí tnúhu ná cúú sá cúú càda-nduu ndetatú-ó. ¿Sá vaha ñá sá cuéhé? ¿Sá

cadá tátna-o ñáyiú cùhú ñá sá cáhni-ó-yu? —càchí-gá xáhaⁿ-gá xii-güedé.

Dico ni ìⁿ-güedé ñá túú tnáhí ní càháⁿ-güedé. 5 Te Jèsús ní xíndéhé vaha-gá núú nchàa-güedé te ní cudééⁿ-gá, te ní ndíhú iní-gá chi ío sáa iní-güedé, te ní xáhaⁿ-gá xii téé cùhú ndaha-xi-áⁿ:

—Ndocani ndaha-n —càchí-gá xáhaⁿ-gá xii-dé.

Te ní ndocani-dé ndaha-dé, te òré-ni-áⁿ ní ndúha. 6 Te cue téé cùu fariséú ní xica-güedé cuáháⁿ-güedé ìⁿ xichi núú ní naníhí tnáhá-güedé ndihí cue téé cùndihí té Hèrodés cuendá ndatnúhu-güedé nása cada-güedé cahni-güedé Jèsús.

Cuéhé víhí ñáyiú ní quexìo yuhu lagúná

7 Te Jèsús ní xica-gá cuáháⁿ-gá ndihí cue téé xica cuu ndihí-gá yuhu làgúná distritú Galileá, te ío cuéhé ñáyiú distritú-áⁿ nchícúⁿ ñáhá-yu xii-gá cuáháⁿ. 8 Te núú ní quexìo-gá-áⁿ ní sáháⁿ ñáyiú distritú Júdeá, ñáyiú ñuú Jerusalén, ñáyiú distritú Idumeá, ñáyiú xíndecu ndàa ingá xio yúte Jòrdán, ndihí ñáyiú xíndecu yatni ñuú Tirú ndihí ñuú Sidón, te ducaⁿ ío vai-yu ní sáháⁿ núú ndécú-gá chi ní níhí-yu tnúhu nchaa nàcuáa quide-gá. 9 Te Jèsús ní xáhaⁿ-gá xii cue téé xica cuu ndihí-gá sá cáda túha-güedé ìⁿ bàrcú cuendá caa-gá núú-xi cuendá sá vā dádèhnde ñahá-yu xii-gá chi ío cuéhé-yu. 10 Te sá dúcáⁿ ní níhí-yu tnúhu sá quidé tátna-gá ñáyiú cùhú, núú xíáⁿ nchaa dāva-gá ñáyiú cùhú súúni dícó ngõnchihi tnáhá-yu cuáháⁿ-yu núú ndécú-gá cuíní-yu tnándeé ñáhá-yu xii-gá cuendá sá cuíní-yu ndúha-yu. 11 Te cue ñáyiú yìhi ñaha espíritú cùndihí yucu ñávaha ní sanu xití ñaha-xi xii-yu núú Jèsús òré ní xíní ñáhá-xí xii-gá, te xíáⁿ ní quide níhí ní cáháⁿ-yu, te xáháⁿ-yu xii Jèsús:

—¿Yòhó cúú-n Dèhe Yá Ndiöxí! —càchí-yu xáháⁿ-yu xii-gá.

12 Te Jèsús ní tenàa-gá nchaa espíritú cùndihí yucu ñávaha-áⁿ, te ní xáhaⁿ-gá xii nchaa ñáyiú ní xihí-xi-áⁿ sá vā càháⁿ-yu núú ñáyiú yoo cùu-gá.

*Jèsús caxi-gá úxúú tnáhá cue téé dacuàha ñaha xii ñáyiú tnúhu-gá
(Mt. 10:1-4; Lc. 6:12-16)*

13 Te sáta dúcáⁿ nǐ cuu te Jèsús ní sáá-gá ñⁿ yucu, te xíáⁿ ndécú-gǎ ní cana-gá nchaa cue téé cǎchí iní-gá. Te òré ní quexìo nchaa cue téé-áⁿ núú-gǎ, 14 te ní cáxi-gá úxúú tnàhá cue téé caca cuu ndìhi-gá, te ñⁿ ni cue téé-áⁿ tendaha-gǎ quíhíⁿ-güedé cǎháⁿ-güedé tnúhu-gá núú ñǎyiu. 15 Te ní sǎñaha-gǎ xii-güedé tnúhu ndee iní cundecu ndìhi-güedé cuendá cada tátna-güedé ñǎyiu cùhú, ndìhi cuendá queñuhu-güedé nchaa espíritú cündìhi yucu ñǎvǎha yíhi ñaha xii ñǎyiu. 16 Te duha xǎnani ndi úxúú cue téé-áⁿ: ñⁿ-dé nání-dě Xímú, te mee-gǎ ní taudìu ñaha-gá xii-dé sá cúnàni-dé Pèlú. 17 Te ingá-dé nání-dě Jàcobó, te ingá-dé nání-dě Juàá, te ñani té Jàcobó-áⁿ cúú tǎ Juàá te ndi ndúú-güedé cúú-güedé déhe té Zebèdeú, te ndi ndúú cue téé-áⁿ nǐ dánání ñaha Jesús xii-güedé Boànergés, te tnúhu-áⁿ queé-xí: Cue téé ío yáchí cúdeéⁿ, duha quee-xi tnúhu-áⁿ. 18 Te duha xǎnani dàva-gá-güedé: Té Ndríxí, té Lìpé, té Bartolómé, té Mǎteú, té Mǎxí, té Jàcobó déhe té Àlfeú, té Tàdeú, té Xímú téé ní cundìhi cue téé canànistá ní cùu, 19 ndìhi té Jùdás Iscàrioté téé ní sáá nduu nǐ sáha cuendá ñáhá xii Jesús núú cuè téé cùu úhú iní ñáhá xii-gá, duha xǎnani cuè téé ní cáxi Jèsús ní xica cuu ndìhi-gá.

Càchí-güedé sá ndécú ndìhi Jesús yucu ñǎvǎha dico ñǎ ndàá
(Mt. 12:22-32; Lc. 11:14-23; 12:10)

Te sáta dúcáⁿ te cuáháⁿ-gá ndìhi-güedé núú quidé vèhe-gá. 20 Te ío vǎi ñǎyiu ní tacá-ni tucú-yu xíáⁿ, te ní ñǎ ní níhí-gǎ nása cada-gá caxi-gá ndìhi cue téé xica cuu ndìhi-gá cuendá sá ío vǎi-yu. 21 Te cue ñǎyiu cùu ndi mee Jesús ní níhí-yu tnúhu nchaa nàcuáa cùu, te nchaa ñǎyiu ñǎ cùnuni váha iní-xi ní cachí-yu sá ní nduu lúcú-gá núu xíáⁿ cuáháⁿ ñǎyiu cùu ndi mee Jesús núú ndécú-gǎ cuendá candeca ñáhá-yu xii-gá núhú ní cùu.

22 Te cue téé dàcuaha ñaha xii ñǎyiu nchaa tnúhu ní chídó tnùnì ndí Moisés véxi ndéé ñúú Jerusalén ní cǎháⁿ cuèhé-güedé cuendá Jèsús, chi ní xítnàha-güedé:

—Téé-a ndècu ndìhi-dé sácuíhná, te ñⁿ xíáⁿ chíndèe ñaha-xi xii-dé queñuhu-dé nchaa espíritú cündìhi-xi yíhi ñaha xii ñǎyiu,

te ñⁿ ni-xi tàxi tnùnì-xi nchaa espíritú-áⁿ —duha ní xítnàha-güedé.

23 Te Jèsús ní cana ñaha-gǎ xii-güedé, te ní cani-gá ñⁿ cuèndú núú-güedé nàcuáa tecú tnùnì-güedé tnúhu-gá, te xǎhaⁿ-gǎ xii-güedé:

—¿Te nása cada sácuíhná queñuhu-xi cue espíritú cündìhi-xi yíhi ñaha xii ñǎyiu-i?

24 Te nchòhó xínì-ndó sǎ núu ñⁿ téé yíndaha ñⁿ nacióⁿ vá cúú ñⁿnuu-dé ndìhi cue téé cündìhi-dé, te vá cúdí-dé cunuu-dé. 25 Te ñⁿ ni ducaⁿ sǎtnahá-xi cùu tucu ñǎyiu xíndecu ñⁿ-ni vèhe, chi núu vá cúú ñⁿnuú-yu, te vá cúdí-yu cundecu cǎhnú-yu. 26 Te núu sácuíhná ñǎ túú cùu ñⁿnuu-xi ndìhi cue espíritú cündìhi-xi, te vá cúdí-xi cundecu-xi taxi tnùnì-xi te núu ducaⁿ quíde-xi.

27 Te nchòhó xínì-ndó sǎ cuè ñadúhú chi vá ndácú-güedé cuendá-ni quíhu-güedé duhu-güedé vèhe ñⁿ téé ío ndee, chi díhna-gá xínì ñúhu-xi tní-güedé téé-áⁿ dacùtu ñaha-güedé xii-dé dàtnùnì ducaⁿ te ndacu-güedé duhu-güedé nchaa sá ndécú ndìhi-dé.

28 Te na cǎchí tnúhu ndáá-í xii-ndo sǎ ncháá sǎ cuèhé sá dúhá quíde ñǎyiu, ndìhi nchaa tnúhu cuèhé tnúhu duha cǎháⁿ-yu cuendá Yǎ Ndiǒxí cuu cada cǎhnu iní-gá.

29 Dico cue ñǎyiu na cǎháⁿ cuèhé cuendá Espíritú Yǎ Ndiǒxí, ñǎyiu-áⁿ vǎ cadá cǎhnu iní ñáhá tnàhí-gá xii-yu, chi cundecu-ni cuéchi-yu núú-gǎ ni caa ni quíhíⁿ —càchí-gá xǎhaⁿ-gǎ xii-güedé.

30 Te ducaⁿ nǐ cǎháⁿ-gá chi cǎchí-güedé sá ndécú ndìhi-gá espíritú cündìhi yucu ñǎvǎha.

Nǎná Jèsús ndìhi cue ñani-gá
(Mt. 12:46-50; Lc. 8:19-21)

31 Te ní quexìo náná Jèsús ndìhi cue ñani-gá núú ndécú-gǎ xínutnì-yu quehé, te ní xáhǎⁿ-yu xii ñⁿ ñǎyiu xíndecu-áⁿ sǎ dáyǎha-yu tnúhu núú-gǎ cuendá quee-gá ndatnúhu ndìhi ñaha-gǎ xii-yu. 32 Te cue ñǎyiu xínucóo ni cándéé díñi-gá ní xáhǎⁿ-yu xii-gá:

—Nǎná-n ndìhi cue ñani-n ndécú-yu quehé nándùcu ñahá-yu xii-n —càchí-yu xáhǎⁿ-yu xii-gá.

33 Te Jèsús ní xáhaⁿ-gǎ xii-yu:

—Te cachí tnúhu-ndo yõndi-gá ñáiyu cùu datná nãná-í ndihì datná cue ñaní-í — càchí-gá xãhaⁿ-gã xií-yu.

³⁴ Te dãtnùnì ní xíndéhé vãha-gá núu nchaa ñáiyu xĩnucóo ni càndéé dñi-gá-áⁿ, te ní xãhaⁿ-gã xií-yu:

—Nchaa ñáiyu-a cùu-yu datná nãná-í ndihì datná cue ñaní-í. ³⁵ Chi nchaa ñáiyu quide nacuaa càháⁿ Yã Ndiõxí, ñáiyu-áⁿ cúu-yu datná cue ñaní-í, ndihì datná cue cúha-í, ndihì datná nãná-í —càchí-gá xãhaⁿ-gã xií-yu.

4

Nàcuáa quide téé cuángacáⁿ triú
(Mt. 13:1-9; Lc. 8:4-8)

¹ Te Jèsús ní ngüíta-gá dácuaaha tucu-gá ñáiyu yuhu làgúná. Te cuéhé víhì-yu ní tacá xíáⁿ nõu cuásaá-gá núu ñⁿ bàrcú núnñi xití ndute làgúná-áⁿ, te núu xĩáⁿ ní ngóo-gá te ní ngüíta-gá dánèhé ñáhá-gã xií-yu, te ncháá-yu xĩxúcu-yu yuhu làgúná-áⁿ. ² Te ní ngüíta-gá ní caní-gá tñní cuendú nõu-yu nàcuáa tecú tnùnì-yu tnúhu-gá, te xãhaⁿ-gã xií-yu:

³ —Chí cùndedóho váha ñⁿ cuendú ná caní-í-a. ñⁿ téé cuángacáⁿ-dé triú. ⁴ Te òré ní ngüíta-dé dãngoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní nadatàcá-güedi. ⁵ Te dava ní ngava ñuhu yadi nõu yíhì vèhi yúú, te ndihì-ni ní xĩnu-xi cuendá sá ñà túú càvihi ñuhu. ⁶ Dico òré ní nayehé ñà túú ní cùndee iní-xi chi ní yíchí-xi, chi ñà túú ní ñhí quĩhìⁿ cùnú yóho-xi. ⁷ Te dava ní ngava núu yúcu ndĩquìⁿ tnu ññu, te ñⁿnuu-ni ní xĩnu-xi ndihì tnu ññu, te tnu ññu-áⁿ ñi sahnu-xi te ní dánáá-xi nchaa triú sá ñi xĩnu-áⁿ. ⁸ Dico dava triú-áⁿ ñi ngava-xi núu ndécú ññu cocoⁿ, te xĩáⁿ ní xĩnu-xi te ní sahnu-xi te ío váha ní cuu, chi núu ñⁿ-ní triú-áⁿ te dava yoco-xi ní nguĩhì ócò úxí triú-xi, te dava yoco-xi ní nguĩhì únídico triú-xi, te dava yoco-xi ní nguĩhì ñⁿ ciendú triú-xi —càchí-gá xãhaⁿ-gã xií-yu.

⁹ Te xãhaⁿ tucu-gá xií-yu:

—Nchaa nchòhó ñáiyu ní xĩndedóho nchaa tnúhu ní càháⁿ-í-a, te ío váha chí cuãha cuendá —càchí-gá xãhaⁿ-gã xií-yu.

Jèsús càháⁿ-gá ná cuendá ducaⁿ caní-gá cuendú

(Mt. 13:10-17; Lc. 8:9-10)

¹⁰ Te sátá ñi ndaca ñáiyu-áⁿ te ní quendóo mee-nã Jèsús ndihì cue téé xica cuu ndihì-gá, ndihì ñⁿ ùú-nã ñáiyu. Te ñáiyu-áⁿ ndihì cue téé-áⁿ ñi xicáⁿ tnúhũ-yu ndihì-güedé núu-gã, núu nása quèe-xi cuendú ní caní-gá nõu-yu ndihì-güedé. ¹¹ Te ní xãhaⁿ-gã:

—Nchòhó chi sa càchí tnúhu Yá Ndiõxí xii-ndo ñⁿ sá vãtá quìní-gá-ndó, chi càchí tnúhu-gá nàcuáa cada-gá ndihu ndaha-gã ñáiyu, dico dava-gá ñáiyu caní-í mee-ni cuendú nõu-yu. ¹² Chi cuèi na quìní-yu nchaa nàcuáa cuu dico ní vã cútnùnì iní-yu ná cuendá ducaⁿ cùu, àdi cuèi na cùndedóho-yu dico ní vã tècú tnùnì-yu. Te ducaⁿ ndòhó-yu cuendá sá vã quìndáá iní-yu Yá Ndiõxí, ndihì cuendá sá vã cadá càhnu iní-gá nchaa yicá cuèchi-yu —càchí-gá xãhaⁿ-gã xií-yu ndihì-güedé.

Jèsús càháⁿ-gá nàcuáa quèe-xi cuendá téé cuángacáⁿ triú

(Mt. 13:18-23; Lc. 8:11-15)

¹³ Te ní xãhaⁿ tucu Jesús xii cue téé xica cuu ndihì-gá, ndihì cue ñáiyu-áⁿ:

—Nchòhó, ñà túú ní tècú tnùnì-ndó cuendú ní caní-í núu-ndó, te núu ducaⁿ, ¿te nása tecú tnùnì-ndó dava-gá cuendú caní-í núu-ndó-í? Te na càchí tnúhu-í xii-ndo nàcuáa quèe-xi cuendú ní caní-í núu-ndó. ¹⁴ Te téé cuángacáⁿ triú-áⁿ cúu-dé datná ñⁿ téé cuáháⁿ càháⁿ tnúhu Yá Ndiõxí núu ñáiyu. ¹⁵ Te triú-áⁿ cúu-xi datná tnúhu Yá Ndiõxí, te triú sá ñi quene ndava ní ngava ndéé ichi, xĩáⁿ cúu-xi datná ñáiyu ní tnahá iní-xi tnúhu Yá Ndiõxí, dico sácuíhñá cuáháⁿ-xi xòcani-xi tnúhu-gá iní-yu cuendá sá vã cáncñícúⁿ nihnú-yu nàcuáa càháⁿ tnúhu-áⁿ. ¹⁶ Te triú sá ñi ngava ñuhu yadi nõu yíhì vèhi yúú, xĩáⁿ cúu-xi datná ñáiyu ní xĩndedóho tnúhu Yá Ndiõxí te díi iní ní tñí-yu tnúhu-gá. ¹⁷ Dico òré ná ngüíta ñáiyu cúcuèhé ñáhã-yu xií-yu àdi nãndi-gá sá yãha-yu sá cuendá tnúhu-gá, te ñà cùndèe iní-yu chi dàñá-yu tnúhu-gá cuendá sá ñà túú ñhí ndéè-yu. ¹⁸ Te triú sá ñi ngava núu yúcu ndĩquìⁿ tnu ññu xĩáⁿ cúu-xi datná ñáiyu ní tecú dóho-xi tnúhu Yá Ndiõxí, ¹⁹ dico cuèé cuèé ní nacuaaná-yu

tnúhu-gá, chi cuendá mee-ni sã cúu-xí mèé-yu ñuhu iní-yu, ndihí cuendá sá ïo sàni iní-yu cuu cuicá-yu, ndihí cuendá sá ïo cùdí iní-yu nchaa sá ïo ñuyú-a, te ñá túú ñuhu iní-yu tnúhu sá ñi xíndedóho-yu-án nàcuáa cada váha-yu cundecú-yu. ²⁰ Dico triú sá ñi ngava núú ndécú ñuhu cocoⁿ, xíáⁿ cúu-xí dàtná ñáyiú ní xíndedóho tnúhu Yá Ndiöxí te quidé-yu nchaa nàcuáa càháⁿ tnúhu-án. Te cada iní-ndó sã ñáyiú-án cúu-yu dàtná triú sá ñi nguíhi yoco-xi ócó úxí triú-xi, ndihí triú sá ñi nguíhi yoco-xi únídico triú-xi, ndihí triú sá ñi nguíhi yoco-xi ñi ciendú triú-xi. Te ducaⁿ sãtnahá-xi cùu-yu chi ïo váha quidé-yu —càchí-gá xãhaⁿ-gã xii cue téé xica cuu ndihí-gá ndihí cue ñáyiú-án.

*Cuendá iti
(Lc. 8:16-18)*

²¹ Te xãhaⁿ-gã xii nchaa ñáyiú:

—Ñá túú ñi ñi ñáyiú tẽñuhú iti te chiváha-yu ñi xití quídi, àdi chiváha-yu ñi caha camá, chi tàxi ndecú-yu ñi núú dùcúⁿ cuendá cutnùní núú nchaa ñáyiú. ²² Te ñi ñi tnúhu sá ñi tẽcú tnùní ñáyiú vitna cachí-ó sã vã tẽcú tnùní-yu chi dacuítí sã tẽcú tnùní-yu, te ñi ñi tnúhu sá càchí-ó cùu yuhu vitna vá cúu yùhu chi dacuítí sã quée túu-xi núú ñáyiú. ²³ Te nchòhó cue ñáyiú ní xíndedóho nchaa tnúhu ní cáháⁿ-í-a, te ïo váha chí ná cuãha cuendá —càchí-gá xãhaⁿ-gã xii-yu.

²⁴ Te ní xãhaⁿ tùcu-gá:

—Ío váha chí cùndedóho tnúhu na càháⁿ-í-a. Te nàcuáa-ni quide-ndo danehé-ndó ñáyiú tnúhu Yá Ndiöxí, te ñi ni ducaⁿ càda ñaha-gá xii-ndo, te uuⁿ-gá ducaⁿ càda-gá sá cúu-xí-ndó. ²⁵ Te nchaa nchòhó ñáyiú tẽcú tnùní tnúhu Yá Ndiöxí, uuⁿ-gá cuita tecú tnùní-ndó tnúhu-gá quíhíⁿ. Te nchaa nchòhó ñáyiú ñá túú tẽcú tnùní tnúhu-gá, te uuⁿ-gá vá tẽcú tnùní-ndó —càchí-gá xãhaⁿ-gã xii-yu.

Nàcuáa sãhnu triú

²⁶ Te Jèsús xãhaⁿ tùcu-gá:

—Na càni-í ñi cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiöxí xii ñáyiú. ñi tée cuángacáⁿ-dé triú. ²⁷⁻²⁸ Te sáta ñi yãha

ní sacáⁿ-dé triú-án, te cuánuhú-dé vehe-dé ndétátú-dé. Te ducaⁿ-ni ta xica nduu cuáhán te ní xínu triú-án, te nàcuáa ta sãhnu-xi cuáhán te ta quèe ndaha-xi, te ducaⁿ-ni cùu ní sáa nduu ñi quene yoco-xi te ní nguíhi triú-xi, dico téé ní sacáⁿ triú-án ña túú xíní-dé nása ní sãhnu-xi, chi mee ñuhu ní quide-xi ní sãhnu triú-án. ²⁹ Te òré sa ní ndihí ní cuaaⁿ te ní nguíta téé ní sacáⁿ-án náquèhndé-dé nátàxi tnahá-dé —càchí-gá xãhaⁿ-gã xii-yu.

*Cuendá ndíquíⁿ yutnu nàni mostázá
(Mt. 13:31-32; Lc. 13:18-19)*

³⁰ Te xãhaⁿ tùcu Jèsús xii-yu:

—Na càni tucu-í ingá cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiöxí xii ñáyiú.

³¹ ñi yutnu nàni mostázá cúu-xí ñi yutnu sá líhli vìhi-gá ndíquíⁿ-xi dàcúúxí ndíquíⁿ nchaa cúhú, ³² dico òré ná càcáⁿ-güedé núú ñúhú-güedé, te na xínu-xi te sãhnu-gá-xi dàcúúxí nchaa cúhú, te nchaa dité-xi ïo cùu cahnu-xi, te ndéé cue quití ndàva núú tàchí sácõo-güedi nchaa núú dité-xi xínu ndeti-güedi —cachí-gá xãhaⁿ-gã xii-yu.

*Ío titní cuendú ní caní Jèsús núú ñáyiú
(Mt. 13:34-35)*

³³ Te ío-gá vãi cuendú ní caní Jèsús núú ñáyiú cuendá tecú tnùní-yu tnúhu Yá Ndiöxí, dico dava cuendú ñá túú ní càni-gá núú-yu, chi ní cutnùní iní-gá sã vã tẽcú tnùní-yu nchaa. ³⁴ Te mee-ni cuendú ní caní Jèsús núú ñáyiú ndi tnahá òré ní dánèhé ñáhá-gã xii-yu tnúhu-gá. Te òré ndécú mèe Jèsús ndihí cue téé xica cuu ndihí-gá, te ní xãhaⁿ-gã xii-güedé nàcuáa quèe-xi ñi ñi cuendú ní caní-gá núú ñáyiú.

*Jèsús ngání-gã táchí ndihí ndute làgúná
(Mt. 8:23-27; Lc. 8:22-25)*

³⁵ Te ñi ni nduu-án òré sa ta cùndiquíⁿ cuáhán ní xãhaⁿ Jèsús xii cue téé xica cuu ndihí-gá:

—Chí ná quíhíⁿ-ó ndàa ingá xio yuhu làgúná —càchí-gá xãhaⁿ-gã xii-güedé.

³⁶ Te ní quide ndee iní-gá nchaa ñáyiú xíxúcu-án, te ñi ni bàrcú sá ñúhú-gã òré ní dánèhé-gá ñáyiú tnúhu-gá ñi ní xíáⁿ ní dácacá cue téé xica cuu ndihí-gá ndécá ñaha-güedé xii-gá cuáhán, te tnahá ñi

ùú-gá bàrcú ní xica-xi nchìcúⁿ-xi bàrcú ñùhú-gã-áⁿ cuáháⁿ. ³⁷ Te ñùhu barcú ñùhú-gã-áⁿ ichi cuáháⁿ-xi núú ndute, te ní quexìo ñⁿ táchí ñíhi, te ta nàdachitú-xi ndute xití bàrcú-áⁿ cuáháⁿ, te sa cuíní-nã-xi quée naa bàrcú-áⁿ xití ndute ni cùu. ³⁸ Te Jèsús cáá-gã xidí-gá ñⁿ xichi ndàa sátá bàrcú-áⁿ, te yìnchihi ñⁿ dóo ñíquí-gã. Te sá dúcáⁿ cuíní-xi quée naa bàrcú-áⁿ ñùu ní sáháⁿ-güedé ní ndocani ñaha-güedé xii-gá, te xãhaⁿ-güedé:

—¡Mèstrú, ndiquíú ìní! ¿Náa ñá túú ndìhú ìní-n sã tá quée naa-o cuáháⁿ-ãⁿ? — cãchí-güedé xãhaⁿ-güedé xii-gá.

³⁹ Te Jèsús ní ndiquíú ìní-gá te ní ndacóo-gá, te ní tenáá-gá táchí-ãⁿ, te ní xãhaⁿ-gã xii ndute làgúná:

—¡Tnaví-nã cuhuⁿ, chi ío dusaⁿ! — cãchí-gá xãhaⁿ-gã xii ndute-áⁿ.

Te òré-ni ní ngüíñí táchí-ãⁿ te ní nucúndecu nahi-nã ndute làgúná-áⁿ. ⁴⁰ Te Jèsús ní xãhaⁿ-gã xii-güedé:

—¿Náa cuendá ndéé dúcáⁿ yùhú-ndó-í? ¿Náa ñá túú sàndáá ìní ñáhá ndìsa-ndo xii-í-ãⁿ? — cãchí-gá xãhaⁿ-gã xii-güedé.

⁴¹ Dico mee-güedé chi ío ní yùhú-güedé sá ducaⁿ ñí quide-gá ní xiní-güedé, te ní xitnãha-güedé:

—¿Te ná téé cùu téé-a núu ní cáháⁿ-ni-dé, te ní ngüíñí táchí te ní nucúndecu nahi ndute làgúná-a-í? — cãchí-güedé xitnãha-güedé.

5

Íⁿ téé yìhi ñaha espíritú cúndìhi yucu ñávãha
(Mt. 8:28-34; Lc. 8:26-39)

¹ Te ní sáá Jèsús ndìhi cue téé xica cuu ndìhi-gá ndàa ìngá xio yuhu làgúná yucu cue téé ñuú Gàdará. ² Te òré ní quene-gá xití bàrcú te ñⁿ téé yìhi ñaha espíritú cúndìhi yucu ñávãha ní quée-dé núú yíndüxi ndíyí cuáháⁿ-dé núú-gã. ³ Te mee-ni ñùu yíndüxi ndíyí-áⁿ quidé vèhe-dé, te cuèi dàcutu ñaha-güedé cadená xii-dé dico ñá túú tnàhí ndàcu-güedé núú-dé. ⁴ Te ío titní xito ní dácútú-güedé cadená sáhá-dé ndìhi ndaha-dé dico ní dándává-ni-dé, te ní xóo dacàchi-gá-dé nchaa cadená-áⁿ, te

ñá túú tnàhí ni ndàcu-güedé núú-dé. ⁵ Te cuèi nduu cuèi niú ní xóo cana saa-dé, te váha-ni núu xití yucu ndècu-dé àdi núu yíndüxi ndíyí dico càna saa nahi-ni-dé, te ío ní xóo dánícuèhé-dé méé-dé ndìhi yúu. ⁶ Te òré ní xiní-dé Jèsús te xinu-dé ní sáháⁿ núú-gã, te ní ngüíñí xití-dé, ⁷ te espíritú yìhi ñaha xii-dé-áⁿ ñí quide-xi níhi ní cáháⁿ-dé, te xãhaⁿ-dè xii-gá:

—¿Náa cuendá véxi yòhó Jèsús Déhe Dútú Ndiõxí sàdí-n ìchi-í? Te càháⁿ ndàhú-í núú Ndiõxí yuhu ñùu-n sã vã dándòho ñaha-ni xii-í — cãchí-dé xãhaⁿ-dè xii-gá.

⁸ Te ducaⁿ ñí cáháⁿ-dé cuendá sá Jèsús ní xãhaⁿ-gã xii espíritú cúndìhi yucu ñávãha yìhi ñaha xii-dé-áⁿ sã quée ñaha-xi xii-dé.

⁹ Te Jèsús ní xicáⁿ tnùhú-gã núú-dé, te xãhaⁿ-gã:

—¿Náa nàni-n-í? — cãchí-gá xãhaⁿ-gã xii-dé.

Te ní xãhaⁿ-dè:

—Vài Sandadú, duha nàni-í chi ío cuèhé-ndí — cãchí-dé xãhaⁿ-dè xii-gá.

¹⁰ Te cue espíritú cúndìhi yucu ñávãha-áⁿ ñí cáháⁿ ndàhú-xi núú Jèsús sá vã téndàha ñaha-gã xii-xi quíhíⁿ-xi ìngá xichi. ¹¹ Te ñu-ni yatni yucu núú ndécú Jèsús-áⁿ yìhi vài cuchí xíxexi-güedi. ¹² Te nchaa cue espíritú-áⁿ ñí cáháⁿ ndàhú-xi núú-gã, te xãhaⁿ-xi xii-gá:

—Càháⁿ ndàhú-ndí núú-n sã dáñá-n quíhu-ndí yiqui cùñú nchaa cùchí-ãⁿ — cãchí-xi xãhaⁿ-xi xii-gá.

¹³ Te Jèsús ní xãhaⁿ-gã sá cúu quíhu-xi yiqui cùñú-güedi, te xinu dàtná úu míl-güedi yìhi yucu-áⁿ. Te nchaa espíritú cúndìhi yucu ñávãha yìhi ñaha xii téé-áⁿ ñí quée ñaha-xi xii-dé, te cuánguìhu-xi yiqui cùñú nchaa cùchí-áⁿ, te nchaa-güedi ní xinu-güedi duha ní quée-güedi ndàa núú dèhvá yuhu làgúná-áⁿ, te ní ngaunihnu-güedi xití ndute te ní ndìhi-güedi ní cáhá.

¹⁴ Te òré ní xiní cue téé xito cuchí-áⁿ nàcuáa ní cuu te ní xinu-güedé, te ní sáháⁿ-güedé ní caní-güedé cuendú núú cuè ñáyíu ndècu xití ñuú, ndìhi núú cuè ñáyíu ndècu xití yucu. Te nchaa ñáyíu ní níhi tnùhu ní xicá-yu cuáháⁿ ndéhè-yu nàcuáa ní

cuu. ¹⁵ Te òré ní quexìó-yu núú ndécú Jèsús te ní xiní-yu téé ní xíhi ñaha cuè espíritú cùndìhi yucu ñávãha-áⁿ núcõo-dé núú sàhá Jèsús, te ñihnu-ná-dé dóó-dé te núcóo-ná-dé dàtná ìⁿ ñáyiu váha, te ní yùhú-yu òré ní xiní ñáhã-yu xii-dé. ¹⁶ Te nchaa ñáyiu ní xiní nàcuáa ní cuu ní ndúha téé yìhi ñaha cue espíritú cùndìhi yucu ñávãha-áⁿ ní cùu ní caní-yu cuèndú núú nchaa ñáyiu ní quexìo-áⁿ nàcuáa ní cuu ní ndúha téé-áⁿ ndìhi nàcuáa ní cuu cuèndá nchaa cùchí-áⁿ. ¹⁷ Te sá dúcáⁿ ní ñíhi ñáyiu-áⁿ tnùhu nàcuáa ní cuu núú nchaa-yu ní ngúita-yu càháⁿ ndàhú-yu núú Jèsús sá ná quèe-gá yucu ñuú-yu núhú-gá.

¹⁸ Te ní xica-gá cuáhã-gá núú ndécú bàrcú, te òré ndée-gá bàrcú-áⁿ nùhú-gá ní ngúita téé ní xíhi ñaha cuè espíritú cùndìhi yucu ñávãha-áⁿ càháⁿ ndàhú-dé núú-gã nùu vá cùndèe iní-gá quíhíⁿ ndìhi ñaha-gã xii-dé.

¹⁹ Dico ñá túú ní sãha-gá tnùhu quíhíⁿ ndìhi ñaha-gã xii-dé, te ní xáhaⁿ-gã xii-dé:

—Cuanùhú vehe-n, te caní-n cuèndú núú cuè ñáyiu sá Yã Ndiõxí ní cundàhú iní ñáhã-gã xii-n, te ío càhnu cuu nchaa sá vãha ní quide-gá sá cúú-xí-n —càchí-gá xãhaⁿ-gã xii-dé.

²⁰ Te téé-áⁿ ní xica-dé cuánuhú-dé, te ní sáhãⁿ-dé ndì ùxí ñuú nání Dècápolís, te ní caní-dé cuèndú núú nchaa ñáyiu sá ío càhnu cuu nchaa sá vãha ní quide ñaha Jèsús xii-dé, te nchaa-yu ío ní cuñùhu-yu.

Cuèndá déhe yoco té Jàirú ndìhi cuèndá ìⁿ ñadìhí ní tnándeé dóó Jèsús

(Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehdé-gá ndàa ingá xio yuhu làgúná, te ío vãi ñáyiu ní tacá núú ní quexìo-gá-áⁿ, te xíáⁿ ndécú-gã ²² ní quexìo ìⁿ téé tàxi tnuní veñùhu núú-gã, te téé-áⁿ nání-dé Jàirú, te ní ngúíhí xítí-dé núú-gã. ²³ Te ní ngúita-dé càháⁿ ndàhú-dé núú-gã, te xãhaⁿ-dè xii-gã:

—Ío càhú tnàhá déhe yoco-í cùhú-xi, te ndècu-ná-xi sá cùú-xi, te véxi-í càháⁿ ndàhú-í núú-n nùu vá cùndèe iní-n quíhíⁿ-ó vèhe-í tendaha-n-xi cuèndá ndúha-xi, te cundecu-xi —càchí-dé xãhaⁿ-dè xii-gã.

²⁴ Te Jèsús ní xica-gá cuáhã-gá ndìhi téé-áⁿ, te ío vãi ñáyiu nchìcúⁿ ñáhã xii-gã

cuáhãⁿ, te dàdehnde ñaha-ná-yu xii-gã ní cùu. ²⁵ Te tnuú nchaa ñáyiu-áⁿ ñútnàhá ìⁿ ñaha cùhú, te ñaha-áⁿ sa ní cuu úxúú cuíá sã cùhú-aⁿ ngòyo ñaha níhí xii-aⁿ. ²⁶ Te ío ta ndòho-aⁿ véxi, te ío cuéhé ñátátná ní cuu ta quide tátna ñaha xii-aⁿ, te sa ní ndìhi nchaa sá ndécú ndìhi-aⁿ ní nadico-aⁿ cuèndá ní níhí-aⁿ díhúⁿ ní queheⁿ nchaa ñáyiu ní quide tátna ñaha xii-aⁿ dico ní ìⁿ-yu ñá túú ní ndàcú-yu ndúha-aⁿ, chí da uuⁿ-gã tá cùu cahú-aⁿ cuáhãⁿ. ²⁷ Te òré ní níhí-aⁿ tnùhu cuèndá Jèsús, te ní xica-aⁿ cuáhãⁿ-aⁿ núú ndécú-gã. Te òré ní quexìo-aⁿ núú ndécú-gã te ní sáhãⁿ ndehe yatni-aⁿ ndàa sátá-gã ní tnándeé-aⁿ dóó-gã. ²⁸ Te ducaⁿ ní quide-aⁿ chí ní sani iní-aⁿ sá nùu ndacu-aⁿ tnándeé-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. ²⁹ Te òré ducaⁿ ní quide-aⁿ te ñá túú-gã ní ngòyo ñaha-gã níhí xii-aⁿ, te òré-áⁿ ní cutnùní iní-aⁿ sá ní ndúha-aⁿ cuéhé tnàhá-aⁿ. ³⁰ Te Jèsús ní cutnùní iní-gã sá ìⁿ ñáyiu ní ndúha sá cuèndá-gã, núu ní nchócótó-gã ndàa sátá-gã te ní xicáⁿ tnùhú-gã núú nchaa ñáyiu nchìcúⁿ ñáhã xii-gã, te xãhaⁿ-gã xií-yu:

—¿Ndèdacàa-ndo ní tnándeé ñáhã xii-í? —càchí-gá xãhaⁿ-gã xií-yu.

³¹ Te cue téé xica cuu ndìhi-gã ní xáhaⁿ-güedè xii-gã:

—Mèstrú, ndèhe-n sá vái ñáyiu nchìcúⁿ ñáhã xii-n, te texio texio dàdehnde ñahã-yu xii-n te xicáⁿ tnùhú-gã-n yòo ní tnándeé ñáhã xii-n —cachí-güedé xãhaⁿ-güedé xii-gã.

³² Te Jèsús ní xíndéhé vãha-gã xio xio dñí-gã nùu ndèdacàa ñáyiu ní tnándeé ñáhã xii-gã. ³³ Te sá dúcáⁿ ní cutnùní iní ñadìhí-áⁿ nàcuáa ní cuu, núu yùhú yùhú-aⁿ ní sáhãⁿ-aⁿ ní ngúíhí xítí-áⁿ núú Jèsús, te ní xáhaⁿ ndãá-aⁿ xii-gã nàcuáa ndùu cuèndá-aⁿ. ³⁴ Te Jèsús ní xáhaⁿ-gã xii-aⁿ:

—Yòhó ñaha cùhú ní cùu, ní sándáá iní ñáhã-n xii-í, núu ní ndúha-n, te vitna cuanùhú te vá ndìhú-gã iní-n, chí vá dúcã-gã ndòho-n —càchí-gã xãhaⁿ-gã xii-aⁿ.

³⁵ Te càháⁿ dúcãⁿ-ní Jèsús ní sáá cue téé xínu cuechi vehe té Jàirú téé tàxi tnuní veñùhu-áⁿ, te xãhaⁿ-güedè xii-dé:

—Sa ní xíhí déhe-n, vá chíchìuⁿ-gá-n Mèstrú —càchí-güedé xǎhaⁿ-güedé xii-dé.

³⁶ Dico Jèsús ñá túú ní quide cuendá-gá nàcuáa ndùu tnúhu ní cáháⁿ cue téé-áⁿ, te ní xáhaⁿ-gǎ xii téé tàxi tnuní veñúhu-áⁿ:

—Ñá túú nǎ cani iní-n, quindáá iní ñáhá-ní-n xii-í —càchí-gá xǎhaⁿ-gǎ xii-dé.

³⁷ Te Jèsús vá yǒo-gá ní cuíní-gá canchicúⁿ ñáhá xii-gá quíhíⁿ, chí té Pèlú-ni, ndihí té Jàcobó-ni, ndihí ñaní-ni-dé té Juáá cuáháⁿ ndihí ñaha-gǎ xii-güedé. ³⁸ Te òré ní quexìo-gá ndihí-güedé vehe téé tàxi tnuní veñúhu-áⁿ, te ní xiní-gá sá ïo vǎi ñáyiu xǐndecu, te súúni dùsaⁿ quidé-yu te níhi xícáháⁿ-yu te xǐndáhí-yu. ³⁹ Te òré cuànguihu-gá xití vehe, te ní xáhaⁿ-gǎ xii-yu:

—¿Ná cuendá ndéé dúcáⁿ ïo dusaⁿ quide-ndo, te ndàhyú-ndó? Te xíchí-a ñá túú ní xíhí-xi chí dicó xidí-xi —càchí-gá xǎhaⁿ-gǎ xii-yu.

⁴⁰ Te ní sácú ndéé ñáhǎ-yu xii-gá sá dúcáⁿ nǐ cáháⁿ-gá, chí sá cúu-xí mèé-yu chí ní xíhí ndisa xíchí-áⁿ. Te òré-áⁿ nǐ queñuhu-gá nchaá-yu quehé, te cuànguihu-gá núú cándòdo yìqui cuñú xíchí nǐ xíhí-áⁿ. Te ndèca-gá tǎtá xíchí nǐ xíhí-áⁿ ndihí nǎná-xi cuànguihu, te tnàhá cue téé úní ndihí-gá-áⁿ cuànguihu ndihí-gá. ⁴¹ Te ní tñi-gá ndaha xíchí nǐ xíhí-áⁿ, te ní xáhaⁿ-gǎ:

—Tàlíta, cúmí —càchí-gá xǎhaⁿ-gǎ.

Te tnúhu-áⁿ quée-xí: Yòhó xíchí cuéchí yúhú càchí-í sá ndácòo-n, duha quèe-xi tnúhu-áⁿ.

⁴² Te òré-ni-áⁿ nǐ ndoto xíchí cuéchí-áⁿ nǐ ndacòo-xi ní nacaca cuu-xi, te ndècu-xi úxúú cuíá-xi. Te ïo ní cuñúhu nchaa ñáyiu sá dúcáⁿ nǐ dándótó ñàha Jèsús xii-xi.

⁴³ Te Jèsús ní cáháⁿ víhí-gǎ dóho tǎtá-xi ndihí nǎná-xi sá vǎ yǒo ñⁿ cúñàhá-yu sá ní dándótó ñàha-gá xii-xi. Te sátá dúcáⁿ te ní xáhaⁿ-gǎ xii-yu sá cuñàhá-yu xii-xi sá cǎxí-xí.

6

*Jèsús ndécú-gǎ ñuú Nazàrét
(Mt. 13:53-58; Lc. 4:16-30)*

¹ Te Jèsús ní ndee-gá ñuú núú nǐ dándótó-gǎ xíchí nǐ xíhí-áⁿ, te cuánuhú-gá núú cúú ñuú-gá, te tnàhá cue téé xica cuu

ndihí-gá cuánuhú ndihí-gá. ² Te ndècu Jèsús ñuú-gá ní tnàhá nduu ndètatú ñáyiu. Te nduu-áⁿ cuànguihu-gá xití veñúhu dàcuaha ñaha-gá xii-yu. Te vǎi ñáyiu ndèdóho nchaa tnúhu càháⁿ-gá, te xǐcuñúhu vǐhí-yu, te xǐtnàhá-yu:

—¿Ndéé ní sáháⁿ dácuahá tǎe-a núu ndéé duha váha càháⁿ-dé, nása ní quide-dé núu ndéé duha ïo váha cùtnuní iní-dé, te ndàcu-dé quidé-dé nchaa sá vǎ yǒo tnàhí ndàcu cada-i? ³ Te dicó carpintèrú cúu-dé, dicó déhe tá Màriá cúu-dé, te ñaní-dé cúu té Jàcobó, ndihí té Chèé, ndihí té Judás, ndihí té Xímú, te diu-ni cue cúha-dé cúu ñáyiu ndècu ndihí-o ñuú-a —càchí-yu xǐtnàhá-yu.

Te ñá túú ní cuíní-gá-yu cáháⁿ ndihí váha ñàhá-yu xii-gá. ⁴ Te Jèsús ní xáhaⁿ-gǎ xii-yu:

—Te núu ñⁿ téé càháⁿ tnúhu Yá Ndiòxí ná nàsáá-dé ñuú-dé dacuàha-dé ñáyiu tnúhu-gá, te nchaa ñáyiu ñuú-dé-áⁿ, ndihí nchaa ñáyiu ndècu ndihí-dé vehe-dé, ndihí nchaa ñáyiu cùu ndi mee-dé ñá túú nèhé-yu sá yǐñùhu núu-dé, dico cue ñáyiu nchaa dava-gá ñuú chí nèhé-yu sá yǐñùhu núu-dé —càchí-gá xǎhaⁿ-gǎ xii-yu.

⁵ Te ñá túú ní quide tǎtna Jèsús vǎi ñáyiu cuendá sá ñà túú ní sàndáá iní ñáhǎ-yu xii-gá, dico ní quide tǎtna-gá ñⁿ úú ñáyiu cùhú ní sàndáá iní ñáhǎ xii-gá. Te ní tendaha ñàha-ni-gá xii-yu te ní ndúha-yu. ⁶ Te ïo ní cuñúhu-gá sá dúcáⁿ ñà túú ní cuíní-yu quindáá iní ñáhǎ-yu xii-gá. Te sátá dúcáⁿ te ní xica-gá cuáháⁿ-gá nchaa dava-gá ñuú líhli càa yatni xíaⁿ cuendá dacuàha-gá ñáyiu tnúhu-gá.

Jèsús táuchìuⁿ-gá quíhíⁿ cue téé xica cuu ndihí-gá cáháⁿ-güedé tnúhu Yá Ndiòxí núú ñáyiu

(Mt. 10:5-15; Lc. 9:1-6)

⁷ Te Jèsús ní cana-gá ndi ùxúú cue téé xica cuu ndihí-gá, te ní sǎñaha-gǎ xii-güedé tnúhu ndee iní cundecu ndihí-güedé cuendá queñuhu-güedé nchaa espíritú cùndihí yucu ñávàha yìhi ñaha xii ñáyiu. Te ní xáhaⁿ-gǎ xii-güedé sá ndi ndúú ndi ndúú-güedé quíhíⁿ-güedé cáháⁿ-güedé tnúhu Yá Ndiòxí núú ñáyiu. ⁸⁻⁹ Te cùmání-gǎ caca-güedé quíhíⁿ-güedé, te ní xáhaⁿ-gǎ xii-güedé:

—Vá cánèhe-ndo ñunu cuhuⁿ ndachiuⁿ-ndo, te ni vã cánèhe-ndo sá cáxí-ndó, te ni vã cánèhe-ndo díhúⁿ, chi ñⁿ caa-ni tàtnu canehe-ndo, te chàú yíhí-ní-ndó-ãⁿ xíãⁿ-ni quihi-ndo, te vá cánèhe-gá-ndó ìngá ichi dóó-ndó chi ñⁿ dñu-ni dóó níhnú-ndó-ãⁿ xíãⁿ tnàhí-ni cuihnu-ndo te ñá túú tnàhí-gá ná canehe-ndo —càchí-gá xãhaⁿ-gã xii-güedé.

10 Te xãhaⁿ tùcu-gá:

—Te òré ná sàá-ndó ñⁿ ñuú, te ió ñáyiu cáháⁿ ñáhã-yu xii-ndo vèhé-yu, te xíãⁿ-ni cundecu-ndo ndèé ná sàá nduu ndèe-ndo ñuú-ãⁿ. 11 Te núu ió dava ñuú ñá túú cuíní-yu cáháⁿ ndíhi ñaha vãha-yu xii-ndo, te ni ñá túú cuíní-yu cundedóho-yu tnúhu càháⁿ-ndó, te ndee-ni-ndo ñuú-ãⁿ te naquidi-ndo ticáchúhmá ñⁿ tníi sáhá-ndó cuendá ná cùtnuní iní-yu sá ñá túú quide váha-yu. Te na càchí tnúhu ndáá-í xii-ndo sã ná sàá nduu càda ndáá Yã Ndiõxí cuéchi nchaa ñáyiu, te cue ñáyiu ducaⁿ na càda ñaha xii-ndo-ãⁿ ño-gá ndohó-yu dàvá-ãⁿ dàcúxí dàtná ndoho cue ñáyiu ñuú Sodomá ndíhi cue ñáyiu ñuú Gómorrá —càchí-gá xãhaⁿ-gã xii-güedé.

12 Te cue téé-ãⁿ ñⁿ xica-güedé cuáhãⁿ-güedé te ní ngüíta-güedé dácuàha-güedé cue ñáyiu tnúhu Yã Ndiõxí, te xãhaⁿ-güedé xii-yu:

—Chí dándixi túu iní sá ñá túú quide váha-ndo ndècu-ndo, te dañã-ndo nchaa ichi cuehé ichi duha ndècu-ndo. —càchí-güedé xãhaⁿ-güedé xii-yu.

13 Te vãi espíritu cündíhi yucu ñávãha yíhi ñaha xii ñáyiu ta quèñuhu-güedé yiqui cùñú-yu cuáhãⁿ, te vãi tucu ñáyiu cùhú tá quide tátna-güedé cuáhãⁿ chíhí ñaha-güedé acítí xii-yu te ndũha-yu.

Nàcuáa ní cuu ní xíhí té Juàá téé dàcuandute ñaha xii ñáyiu

(Mt. 14:1-12; Lc. 9:7-9)

14 Te nchaa xichi ní níhí ñáyiu tnúhu nchaa nàcuáa quide Jesús, te tnàhá té Hèrodés téé yìndaha ñaha xii ñáyiu ní níhí-dé tnúhu nchaa nàcuáa quide-gá, te ní cachí-dé:

—Té Juàá téé ní xóo dacuàndute ñaha xii ñáyiu ní ndoto núu dàcãⁿ ndácú-dé quidé-dé nchaa sá vã yõ tnàhí ndàcu cada —duha ní cachí-dé.

15 Te dava ñáyiu càchí-yu sá tẽ Èliás téé ní xóo cáháⁿ tnúhu Yã Ndiõxí ndéé sanaha ní nasáá-dé.

Te davá-yu càchí-yu sá cúú-gã dàtná ñⁿ téé ní xóo cáháⁿ tnúhu Yã Ndiõxí ndéé sanaha. 16 Te té Hèrodés ní níhí-dé tnúhu nchaa nàcuáa càháⁿ-yu, te ní cachí-dé:

—Dñu té Juàá téé ní táuchíuⁿ-í ní xehndé-güedé díquí-xi ní ndoto —càchí-dé.

17-18 Te duha ní cuu cùtnàhá ní sahani té Hèrodés té Juàá, chi dàvá-ãⁿ ñⁿ naqueheⁿ té Hèrodés-ãⁿ ñⁿ ñaha nani Herodiás ndécã-dé, te ñaha-ãⁿ sã ní cándeca ñaha ñàní-dé té Lípé. Te té Juàá ní xãhaⁿ-dẽ xii té Hèrodés sã ñá túú ní quide váha-dé sá dúcãⁿ ñⁿ naqueheⁿ-dẽ ñaha ní cándeca ñaní-dé, núu sã cuendá ñaha-ãⁿ ñⁿ táuchíuⁿ tẽ Hèrodés ní tníi-güedé té Juàá ní chíhi ñaha-güedé vecaá, te ní dácútú ñaha-güedé xii-dé, te ducaⁿ ñⁿ quide-dé cuendá sã ndécã ñaha-dé xii-ãⁿ.

19 Te ñaha nani Herodiás ndécã tẽ Hèrodés-ãⁿ ño ní cuu úhú iní-ãⁿ té Juàá, te ní cuíní-ãⁿ cahni-ãⁿ-dẽ, dico ñá túú ní níhí-ãⁿ nàcuáa cada-ãⁿ. 20 Te mee tẽ Hèrodés chí ní cutnùní ndáá iní-dé sá tẽ Juàá cúú-dé ñⁿ téé quide mee-ni sã váha, te quide ndáá-dé núu Yã Ndiõxí, te ní xóo yùhú ñáhã-dẽ núu xíãⁿ ñá túú ní dañã-dé ná cada ñaha ñaha ndeca-dé-ãⁿ xii té Juàá. Te té Hèrodés-ãⁿ ño ní cudíi iní-dé ní xíndedóho-dé nchaa tnúhu ní xãhaⁿ tẽ Juàá xii-dé, dico ñá túú ní sàni iní-dé duuⁿ duuⁿ tníi-dé tnúhu-ãⁿ.

21 Te ñⁿ nduu ní xóo vico vehe té Hèrodés ní quide càhnu-dé nduu ñⁿ cacu-dé. Te nduu-ãⁿ ñⁿ níhí ñaha nani Herodiás-ãⁿ nàcuáa cada-ãⁿ cuendá cuú té Juàá. Te nduu-ãⁿ ní cáháⁿ té Hèrodés nchaa cue téé cùchiuⁿ, ndíhi nchaa cue téé tàxi tnuní ñáhã xii cue sandadú, ndíhi nchaa cue téé cuica ndècu distritú Galileá cuendá cudini ndíhi ñaha-dé xii-güedé nduu-ãⁿ. 22 Te ndècu ñⁿ déhe yoco ñaha nani Herodiás-ãⁿ, te xíchí-ãⁿ ñⁿ quíhu-xi vehe núu cúú vico-ãⁿ ñⁿ xita saha-xi mèi oré yíhí tẽ Hèrodés mèsã ndíhi nchaa cue téé ní cáháⁿ-dẽ, te ío ní cudíi iní-dé ndíhi nchaa cue téé-ãⁿ nàcuáa ní xita xíchí-ãⁿ. Te té Hèrodés ní xãhaⁿ-dẽ xii-xi:

—Cáçãⁿ núu-í núu ná cuíní-n te taxi-í —càchí-dé xãhaⁿ-dẽ xii-xi.

23 Te ní cacunehe-dé ndéé Yã Ndiõxí nàcuáa cutnùní iní xíchí-ãⁿ sã ndáá cuãñaha-dẽ núu ná cúú sã ná càcãⁿ-xi núu-dẽ cuèi ndéé cuádava nchaa sã ndécú ndíhi-dé, te núu na càcãⁿ-xi. 24 Te sã dúcãⁿ

nǐ xáhaⁿ-dě xii-xi núu ní quee-xi quehé ní xáhaⁿ-xi xii náná-xi:

—Náá, ¿ná cúú sǎ càcáⁿ-í núú tǎ Hèrodés?
—càchí-xi xǎhaⁿ-xi xii-aⁿ.

Te nǎná-xi-áⁿ nǐ xáhaⁿ-aⁿ xii-xi:

—Cuàháⁿ cacáⁿ-n dǐquí tǎ Juàá tée dàcuandute ñaha xii ñáyiú —càchí-aⁿ xǎhaⁿ-aⁿ.

²⁵ Te ndǐhi-ni cuándihu xíchí-ǎⁿ xití vehe núú yíhí tǎ Hèrodés-áⁿ, te xǎhaⁿ-xi xii-dé:

—Cuíní-í sá mèi nduu vitna quehndé-n dǐquí tǎ Juàá tée dàcuandute ñaha xii ñáyiú te taxi-n, dico na cùhuⁿ ìⁿ xití cóhó taxi-n —càchí-xi xǎhaⁿ-xi xii-dé.

²⁶ Te té Hèrodés ní ngüíta-dé ndihú víhí iní-dé sá dúcáⁿ nǐ xáhaⁿ-xi xii-dé, dico ñá túú ní cùyí-dé cúñaha-dě xii-xi sá vǎ cúú cuañaha-dě sá xicáⁿ-xi, chi cuendá sá núú nchaa ñáyiú ní xáhaⁿ-dě sá cúú cuañaha-dě núu ná cúú sǎ ná càcáⁿ-xi, te ní cacunehe-dé ndéé Yǎ Ndiõxí nàcuáa cutnùní iní-xi sá ndáa cuañaha-dě sá ná càcáⁿ-xi núú-dě. ²⁷ Te té Hèrodés-áⁿ ndihí-ni ní xáhaⁿ-dě xii ìⁿ sandàdú sá quihíⁿ-dé quehndé-dé dǐquí tǎ Juàá. ²⁸ Te sandàdú-áⁿ nǐ xica-dé cuáháⁿ-dé vecaá núú yíhí tǎ Juàá-áⁿ, te ní quexìo-dé te ní xehndé-ni-dé dǐquí tǎ Juàá, te ní chihí-dé ìⁿ xití cóhó te nèhe-dé cuánuhú ní sáha-dé xíchí xicáⁿ-áⁿ, te xíchí-ǎⁿ nǐ nacuáha-xi nǎná-xi. ²⁹ Te òré ní nihí nchaa cue tée ní xica cuu ndihí ndí Juàá-áⁿ tnúhu sá dúcáⁿ nǐ sahni ñaha-güedé xii ndí, te ní sáháⁿ-güedé ní ndocani-güedé yiqui cùñú ndí te ní chindúxi-güedé.

Jèsús dácaxi-gá úhúⁿ mìl cue tée te dǐñ ñáyiú dǐhí ndihí landú

(Mt. 14:13-21; Lc. 9:10-17; Jn. 6:1-14)

³⁰ Te nchaa cue tée ní táuchíúⁿ Jèsús cuáháⁿ cáháⁿ tnúhu Yá Ndiõxí núú ñáyiú ní ndexìo-güedé núú-gǎ te ní ngüíta-güedé nácàni tnúhu-güedé nchaa nàcuáa ní quide-güedé ndihí nchaa nàcuáa ní dánèhé ñáhá-güedé xií-yu. ³¹ Te Jèsús ní xáhaⁿ-gǎ xii-güedé:

—Chí nèhé ná quihíⁿ-ó ìⁿ xichi núú ñá túú ñáyiú ndetatú-ó —càchí-gá xǎhaⁿ-gǎ xii-güedé.

Te ducaⁿ nǐ xáhaⁿ-gǎ xii-güedé, chi ío cuéhé ñáyiú cuáháⁿ véxi-yu cùú-yu núú ndécú-gǎ. Te ni ñá nihí-gá nása cada-gá

caxi-gá ndihí cue tée xica cuu ndihí-gá. ³² Te Jèsús cuánguee-gá bàrcú ndihí mee-ni cuè tée ní táuchíúⁿ-gǎ cáháⁿ tnúhu-gá, te cuáháⁿ-gá ndihí-güedé ìⁿ xichi núú ñá túú ñáyiú ndècu. ³³ Dico vǎi ñáyiú ní cutnùní iní-yu sá díú-gǎ ñúhú bàrcú-áⁿ cuáháⁿ ndihí cue tée xica cuu ndihí-gá, te nchaa ñúú cáá yàtni xiáⁿ nǐ quee ñáyiú xixinú-yu cuáháⁿ núú nǐ quidé-yu cuendá quexìo Jèsús, te sa ndécú-yu xiáⁿ nǐ quexìo-gá. ³⁴ Te òré ní quene Jèsús xití bàrcú, te ní xiní-gá cuéhé víhí ñáyiú xixúcu núú nǐ quexìo-gá-áⁿ, te ní cundàhú iní ñáhá-gǎ xií-yu chi ndécú-yu dàtná xǐndecu cue mbéé cue quití ñá túú tòli-xi, te ío vǎi núú sǎ nǐ ngüíta-gá ní dácuáhá ñaha-gá xií-yu. ³⁵ Te sátá tá cuàa cuáháⁿ te ní sáháⁿ cue tée xica cuu ndihí Jèsús núú-gǎ, te xáhaⁿ-güedé xii-gá:

—Sa ní cuaa te ñá túú ñáyiú ndècu yatni iha. ³⁶ Váha-gá dandàca nchaa ñáyiú-a chi na quihíⁿ-yu nchaa vehe càa xití yucu-a, ndihí nchaa ñúú cáá nchaa yatni iha cuaáⁿ-yu sá cǎxí-yu —càchí-güedé xǎhaⁿ-güedé xii-gá.

³⁷ Te Jèsús ní xáhaⁿ-gǎ:

—Mee-ndo chí cuañaha sǎ ná cǎxí-yu —càchí-gá xǎhaⁿ-gǎ xii-güedé.

Te xáhaⁿ-güedé xii-gá:

—¿Te nása cada-ndí, chi xini ñuhu-xi datná úú ciendú díhúⁿ denàriú cuendá cuaaⁿ-ndí sá cǎxí-yu? —càchí-güedé xǎhaⁿ-güedé xii-gá.

³⁸ Te Jèsús ní xáhaⁿ-gǎ xii-güedé:

—Chí cuáháⁿ cundehe-ndo núu ná daha pàa ndécú ndihí-ndo te cachí tnúhu-ndo —càchí-gá xǎhaⁿ-gǎ xii-güedé.

Te ní sáháⁿ ndéhé-güedé núu ná daha pàa ndécú, te ní xáhaⁿ-güedé xii-gá:

—Úhúⁿ duha-ná pàa ndihí úú-nǎ chácá ndécú —càchí-güedé xǎhaⁿ-güedé xii-gá.

³⁹ Te Jèsús ní xáhaⁿ-gǎ xii nchaa ñáyiú sá ná nihí tnáhǎ-yu cuu titní xichí-yu, te ngóo-yu nchaa núú cùhú cuíí càa xiáⁿ.

⁴⁰ Te nchaá-yu ní ngóo-yu, te dava xichí-yu ní ngóo ìⁿ ciendú-yu, te dava xichí-yu ní ngóo údico úxí-yu. ⁴¹ Te sátá nǐ ndihí-yu ní ngóo, te ní queheⁿ Jèsús ndí ùhúⁿ pàa ndí úú chácá-áⁿ, te ní ndacoto-gá andiu te ní ndacáⁿ táhú-gǎ núú

Yă Ndiöxí, te dătnùní ní táhú cuèchi-gá pàá-án te ní sáñaha-gă xii cue téé xica cuu ndihi-gá ní dácăññu-güedé nchaa ñáyiu-án nǐ xexi-yu. Te ðiu-ni ducaⁿ nǐ quide tucu-gá úú chácá-ăⁿ. ⁴² Te nchaá-yu ní xexi-yu ní ndahá xití-yu. ⁴³ Te sátá nǐ túhú cóhō-yu te ní nadatácá-güedé nchaa sá nǐ quendóo, te ní chítú ùxúú tnàhá tídihi mee-ni sǎ nǐ quendóo núú ùhúⁿ-ni pàá, ndihi núú úú-ni chácá. ⁴⁴ Te nchaa ñáyiu ní xexi-ánⁿ chi xǐnu ùhúⁿ mǐl mee-ni cuè téé chi ðiu-ni cue téé-ánⁿ nǐ quiúndehu, te ðiⁿ ñáyiu ðihí ndihi cue landú.

Jèsús xicá-gă núú ndute

(Mt. 14:22-27; Jn. 6:16-21)

⁴⁵ Te òré-ni-ánⁿ nǐ xáhaⁿ Jèsús xii cue téé xica cuu ndihi-gá sá quèe-güedé bàrcú codonùu-güedé quihíⁿ-güedé ìⁿ ñúú nání Bètsaidá cáá ndàa ingá xio yuhu làgúná núú ndécú-güedé-ánⁿ, te mee-gă quendóo-gă cada ndee ìní tnàhá-gă ndihi cue ñáyiu. ⁴⁶ Te sátá nǐ yáha ní quide ndee ìní tnàhá-gă ndihí-yu, te ní xica-gă cuáhán-gă ìⁿ tǐndúú cáá yàtni xíánⁿ cuendá cáhánⁿ ndihi-gá Yă Ndiöxí. ⁴⁷ Te òré sa ní cundiquiⁿ te bàrcú sá ñúhú cuè téé xica cuu ndihi-gá sa cuáhán-xi ndéé cuádava xití làgúná-ánⁿ, te mee-gă ndécú-gă ìⁿ núú tǐndúú. ⁴⁸ Te túu ndèhe-gá sá sùúni ndòho-güedé tá dácaca-güedé bàrcú-ánⁿ cuáhánⁿ, chi cuendá ndàa nacuáa cuáhán-xi-ánⁿ duha véxi táchí te nātúndaha-xi. Te ingá nduu-ánⁿ tàculhndá-gă sa ní cuyatni vií-nă Jèsús bàrcú ñúhú-güedé-ánⁿ, dico núú ndute tá xica-gă cuáhánⁿ te luha-ná te yáha ñaha-gă xii-güedé ní cùu. ⁴⁹⁻⁵⁰ Te òré ní xiní ñáhá cuè téé ñúhu bàrcú-ánⁿ xii-gă te ní yùhú-güedé ní cana saa-güedé, chi ní sani ìní-güedé sá ìⁿ almá cúú-gă. Te ní xáhaⁿ-gă xii-güedé:

—ǐÑí cunduu-ndo, vá yùhú-ndó, chi yùhú cúú-í! —càchí-gă xăhaⁿ-gă xii-güedé.

⁵¹ Te Jèsús cuánguee-gă xití bàrcú ñúhú-güedé-ánⁿ, te sátá cuánguee-gă te òré-ni ní ngúíñí táchí, te ní cuñúhu vǐhi-güedé. ⁵² Te ducaⁿ chi cue téé-ánⁿ ñà túú ní cùtnuní ìní-güedé nása quide-gă, chi ñà túú ní cùtnuní váha ìní-güedé nàcuáa ndùu sá nǐ quide-gă òré ní nadacâyá-gă pàá, chi ío ñi ðiquí-güedé.

Jèsús quidé tătna-gă ñáyiu cùhú ñúú Genesàrét

(Mt. 14:34-36)

⁵³ Te ní yáha-güedé ndihi-gă ndàa ingá xio yuhu làgúná, te ní sáa-güedé ndihi-gă yucu cue téé ñúú Genesàrét. Te yàcáⁿ ní dácútú ndèe-güedé bàrcú-güedé yuhu làgúná. ⁵⁴ Te òré ní quene Jèsús ndihi cue téé xica cuu ndihi-gă xití bàrcú, te nchaa ñáyiu xǐndecu-ánⁿ nǐ cutnùní ìní-yu sá díú-gă. ⁵⁵ Te ñáyiu-ánⁿ ndihí-ni ní sáhán-yu nchaa núú xǐndecu cue ñáyiu cùhú, te cue ñáyiu cùhú-ánⁿ nǐ quèe-yu xító nchido ñahá-yu cuáhánⁿ ndi tnahá ìⁿ ìⁿ xichi núú ñihí-yu tnúhu quèxio Jèsús. ⁵⁶ Te nchaa ñúú náhnú ndihí nchaa ñúú líhli núú cuáhánⁿ Jèsús, ducaⁿ xǐndecá-yu nchaa ñáyiu cùhú cuáhánⁿ xití ñúú sàcánⁿ ñáhă-yu núú-gă cuendá cada tătna ñaha-gă xii-yu. Te ðiu-ni ducaⁿ xǐquidé-yu nchaa ðava-gă xichi núú cuáhán-gă núú xǐndecu cue ñáyiu, te càhánⁿ ndàhú-yu núú-gă sá ná ðáná-gă tnàndéé cue ñáyiu cùhú-ánⁿ cuèðicó luha yuhu dǒó-gă cuendá ndúha-yu. Te nchaa ñáyiu cùhú ní tnàndéé yuhu dǒó-gă ní ndúha-yu.

7

Cuendá nchaa sá quidé-xí ngǐndecu cuéchi ñáyiu

(Mt. 15:1-20)

¹ Te ñúú Jerusàlén ní quee cue téé dàcuaha ñaha xii ñáyiu nchaa tnúhu ní chídó tnùní ndíi Moisés, te ní quexìo-güedé núú ndécú Jèsús, te tnàhá cue téé cùu fariséú ní quexìo ndihi-güedé. ² Te cue téé-ánⁿ nǐ xiní-güedé sá ðava cue téé xica cuu ndihi Jèsús ñà túú ndàha-güedé dătñá ndáhá mèe cue téé cùu fariséú-ánⁿ òré caxi-güedé. Te xíáⁿ nùu cue téé ní quexìo-ánⁿ nǐ càhánⁿ cuèhé-güedé cuendá cue téé xica cuu ndihi-gă. ³ Te ducaⁿ chi nchaa cue téé cùu fariséú-ánⁿ ndihi nchaa ñáyiu isràél nchìcúⁿ nihnú-yu quidé-yu dătñá ní xóo cada nchaa cue ñaní tnàhá-yu ní xǐndecu ndéé sanaha, chi nchaa ñáyiu-ánⁿ và caxí-yu te núu vá ndáhă-yu dătñá ní xóo ndaha nchàa cue ñaní tnàhá-yu ní xǐndecu ndéé sanaha-ánⁿ. ⁴ Te ñáyiu-ánⁿ ndi tnahá òré cuáhán-yu núú yăhu te nàsáa-yu, te ndàhá-yu nàcuáa sàni ìní-yu ndùvétú ìní Yă Ndiöxí, te núu vá

dúcáⁿ càdá-yu te vá caxĩ-yu. Te tnàhá náqueté-yu vàsú sá sácũhuⁿ sá xihĩ-yu, ndihĩ lítu, ndihĩ cóhó cää, ndihĩ camá. Te nchaa xéhé náqueté-yu nàcuáa sàni iní-yu ndüvétú iní Yã Ndiõxí. Te ío-gá titní sá nĩ xóo cada nchaa ñáyiú ní xíndecu ndéé sanaha-ãⁿ nchícúⁿ nihnú-yu quidé-yu. ⁵ Te cue téé cùu fariséú-áⁿ, ndihĩ cue téé dàcuaha ñaha xii ñáyiú nchaa tnúhu ní chídó tnùnĩ ndí Moisés-áⁿ nĩ xáhaⁿ-güedé xii Jèsús:

—¿Ná cuendá cue téé xica cuu ndihĩ-ñá túú nàquete-güedé ndaha-güedé òrè caxi-güedé dàtná ní cachí nchaa cue téé ní xíndecu ndéé sanaha-i? —cächí-güedé xáhaⁿ-güedé xii-gá.

⁶ Te Jèsús ní xáhaⁿ-gã xii-güedé:

—Nchòhó cúú-ndó cùé téé ío dàndahú mée-xí chi cächí-ndó sã ìo quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùnĩ ndí Chàíá téé ní xóo cãháⁿ tnúhu Yã Ndiõxí ndéé sanaha nùú tütú-gá núú cãháⁿ-xi nàcuáa ní cãháⁿ-gã cuendá-ndó, te duha ní cachí-gá:

Ñáyiú-a cächí-yu sã ìo càhnu cuu-í, dico dícó-ni yuhu cãháⁿ-yu, chi ñá túú ñùhu iní ñãhã-yu xii-í.

⁷ Te àúⁿ ñã cuu chĩñuhu ñahá-yu xii-í, chi ñá túú vèdana ndéé nándihĩ-xi, chi cue ñáyiú-a dàcuahá-yu cue tnàhá ñáyiú-yu nàcuáa cundecú-yu, dico mee-ni tnúhu sã nĩ cahu iní cue ñáyiú ñuyíú-a cãháⁿ-yu.

Duha ní chídó tnùnĩ ndí Chàíá núú tütú Yã Ndiõxí nàcuáa ní cãháⁿ-gã cuendá-ndó.

⁸ Te nchòhó ní dáñá-ndó nàcuáa ní cachí Yã Ndiõxí cada-ndo, te nchícúⁿ nihnu-ndo quide-ndo nàcuáa ní cahu iní cue ñáyiú ñuyíú-a, chi nàquete-ni-ndo lítu, te nàquete-ni-ndo vasú sácũhuⁿ sá xihí-ndó nàtava-ndo nàcuáa ní xóo cada ñáyiú-áⁿ nĩ xóo naqueté-yu nchaa xíãⁿ, te nándi-gá nchaa núú sã quidé-ndó —cächí Jèsús xáhaⁿ-gã xii-güedé.

⁹ Te ní xáhaⁿ tùcu-gá xii-güedé:

—Te nchòhó, ñá túú cuíní-ndó càda-ndo nàcuáa cuíní Yã Ndiõxí, chi mee-ni nàcuáa ní cachí cue téé ní xíndecu ndéé sanaha nchícúⁿ nihnu-ndo quide-ndo. ¹⁰ Te ndí Moisés ní cachí ndí sá ncháá ñáyiú canehé-yu sã yĩñùhu núú tãtä-yu ndihĩ núú ñãñã-yu. Te nchaa ñáyiú na cãháⁿ

úhú cuendá tãtä-yu àdi cuendá ñãñã-yu te cahni ñaha-güedé xii-yu ní cachí ndí.

¹¹ Te nchòhó cächí-ndó sã nùu ñⁿ téé na cũñaha-dé xii tãtä-dé ndihĩ ñãñã-dé sã sã nĩ sani iní-dé cuãñaha-dé xii-yu cùu-xi Corbán, te ñá túú-gã xíní ñùhu-xi sã cuãñaha-dé xii-yu, te tnúhu Còrbán-áⁿ quée-xi: Sá cúú cuendá Yã Ndiõxí. ¹² Te sã dúcáⁿ ná cãháⁿ ñⁿ téé-áⁿ te nchòhó chindèe tnúhu-ndo-dé cuendá sã vá chindèe-gã-dé tãtä-dé ndihĩ ñãñã-dé. ¹³ Te ducaⁿ quide-ndo chi ní dáquée tĩhú-ndó nàcuáa ní cachí Yã Ndiõxí cada-ndo, te mee-ni nàcuáa ta quide cue téé ñuyíú-a véxi nchícúⁿ nihnu-ndo quide-ndo, te diu-ni ducaⁿ ta sànu ichi tnaha-ndo véxi, te nándi-gá nchaa sã cãhú iní-ndó quide-ndo —cachí-gã xáhaⁿ-gã xii-güedé.

¹⁴ Te Jèsús ní xáhaⁿ tùcu-gá xii cue ñáyiú xíndecu-áⁿ:

—Chí táquixi ndehe iha, te cundedóho váha-ndo tnúhu na cãháⁿ-í-a te ío váha cuáha-ndo cuendá. ¹⁵ Nchaa sã xéxi-ndó chi ñá túú ñã quidé-xi ìní-ndó, dico nchaa sã cuèhé sã dúhá sàni iní-ndó quide-ndo, nchaa xíãⁿ quidé-xi ndècu cuéchi-ndo. ¹⁶ Te nchaa nchòhó ñáyiú ndèdóho nchaa tnúhu cãháⁿ-í-a ío váha chí cuãha cuendá —cächí-gã xáhaⁿ-gã xii-yu.

¹⁷ Te Jèsús ní dándõo-gã nchaa ñáyiú núú xixúcu-yu-áⁿ te cuándihu-gã xití vehe. Te cue téé xica cuu ndihĩ-gã ní xicáⁿ tnúhú-güedé núú-gã nùu nása quèe-xi cuendú ní caní-gã núú ñáyiú-áⁿ. ¹⁸ Te ní xáhaⁿ-gã xii-güedé:

—¿Te náa tnàhá nchòhó ñá túú ní tècú tnùnĩ-ndó cuendú ní caní-í núú ñáyiú-ãⁿ? Nchaa sã xéxi-yu cuánguee xití-yu ñá túú quide-xi iní-yu nàcuáa ngúndecu cuéchi-yu. ¹⁹ Chi ñá díú ìní-yu cuánguee-xi chi cuánguee ndáá-xi xití-yu, te náyáha ñaha-xi xii-yu —cächí-gã xáhaⁿ-gã xii-güedé.

Te sã dúcáⁿ nĩ cãháⁿ-gã te ní dátũu-gã sã cúú càxi-o nchaa núú sã cúú càxi-o. ²⁰ Te ní xáhaⁿ tùcu-gã xii-güedé:

—Nchaa sã cuèhé sã dúhá quide ñáyiú xíãⁿ cãcú nihnu-xi iní-yu, te nchaa xíãⁿ quidé-xi ndècu cuéchi-yu. ²¹ Te iní-yu-áⁿ cãcú nihnu nchaa sã cuèhé sã dúhá, chí sàni cuèhé sání dùha iní-yu. Te cue téé cãháⁿ ndihĩ-güedé ñadĩhí te ñá díú ñadĩhí-güedé

cúu-yu, te diu-ni ducaⁿ quide cue ñáyiú dîhî cãháⁿ ndîhî-yu téé te ñá díú yîi-yu cùu-güedé. Te sàhnî-yu cue tnàha ñáyiú-yu, te mee-ni ìchi díi ìní cúdîi ìní-yu cundecú-yu. ²² Te dùhu ndachiuⁿ tnahá-yu, te xihó-yu cundecu ndîhî-yu sá ndécú ndîhî tnaha ñáyiú-yu, te ío quide úhú ìní-yu sá cúu-xí tnàha ñáyiú-yu, te ío dândahú tnáhã-yu, te mee-ni nchaa sá cuèhé sá dúhá cúdîi ìní-yu quidé-yu, te ío cuédú ìní-yu, te ío yîti yùhú-yu, te ío quide cahnú-yu mèé-yu, te quidé-yu nándi-gá sá ñà túú tàú-yu cadá-yu. ²³ Te nchaa sá cuèhé sá dúhá-ãⁿ cácu ñihnu-xi ìní-yu, te nchaa xíãⁿ quidé-xí ndècu cuèchi-yu, te ñá túú cùu-xi sá vãha sá cúu-xí ìní-yu.

În ñadîhî véxi ñuú xícá ñí sándáá ìní-aⁿ Jèsús

(Mt. 15:21-28)

²⁴ Te ní xica Jèsús cuáhãⁿ-gã ndéé yucu cue téé ñuú Tîrú, ndîhî yucu cue téé ñuú Sidón. Te òré ní quexìo-gã xíãⁿ te cuànguïhu-gã ìⁿ vehe te xíãⁿ cundecu-gã, te cuìní-gã sá vã quèní ñáyiú sá xíãⁿ ndécú-gã ní cùu, dico dai ní níhî-yu tnúhu. ²⁵ Te ìⁿ ñadîhî ndécú ìⁿ déhe yoco-aⁿ, te yîhi ñaha espíritú cündîhî yucu ñávãha xii-xi, te ñaha-ãⁿ ío ndîhî ní níhî-aⁿ tnúhu sá ñí quexìo Jèsús xíãⁿ ñuú ní sáhãⁿ-aⁿ núú ndécú-gã, te ní ngüíñî xítî-ãⁿ núú-gã. ²⁶ Te ní ngüíta-aⁿ cãháⁿ ndàhú-aⁿ núú-gã, te xãhaⁿ-aⁿ sã ñuú vá cündèe ìní-gã queñuhu-gã espíritú cündîhî yucu ñávãha yîhi ñaha xii déhe-aⁿ. Dico ñá díú ñàha israél cúu-ãⁿ chi ñaha ñuú Sirofèniciá cúu-ãⁿ te tnúhu griégú cúu tnúhu-aⁿ. ²⁷ Te xíãⁿ ñuú ní xáhaⁿ Jèsús xii-aⁿ:

—Daña na càxi tnaa nchaa landú chítú xítî-güexi, te dãtnùní caxi cue iná, chi ñá túú ndùu váha-xi queheⁿ-o sã xéxí landú te cuáha-o ìná —càchî-gã xãhaⁿ-gã xii-aⁿ.

²⁸ Te ní xáhaⁿ-aⁿ xì-gã:

—Mèstrú, ndáá-ni cãháⁿ-n, dico iná chi nàdatacã-güedi sá ngóyó yùhu cóhó landú —càchî-aⁿ xãhaⁿ-aⁿ xì-gã.

²⁹ Te Jèsús ní xáhaⁿ-gã xii-aⁿ:

—Ío váha ní cãháⁿ-n, te cuanùhú te ñá túú-gã ná cani ìní-n, chi sa ní quee espíritú

cündîhî yucu ñávãha yîhi ñaha xii déhe-n —càchî-gã xãhaⁿ-gã xii-aⁿ.

³⁰ Te ñaha-ãⁿ ñí nasáá-aⁿ vehe-aⁿ te càa déhe-aⁿ núú cãmá, dico ñá túú-gã espíritú cündîhî yucu ñávãha yîhi ñaha xii-xi chi sa ní quee ñaha-xi.

Jèsús quidé tátna-gã ìⁿ téé ñá cúu cãháⁿ vãha te doho-dé

³¹ Te Jèsús ní ndee-gã yucu cue téé ñuú Tîrú te ní yãha-gã yucu cue téé ñuú Sidón, ndîhî yucu ndi ùxí ñuú nání Dècápolís, te ní sáá-gã ndéé yuhu làgúná distrítú Galileá. ³² Te xíãⁿ ndécú-gã ní quexìo ñáyiú ndéé núú-gã ndécã-yu ìⁿ téé ñá cúu cãháⁿ vãha-dé te doho-dé. Te cãháⁿ ndàhú-yu núú-gã sá ná tëndaha ñaha-gã xii-dé cuendá ndúha-dé. ³³ Te Jèsús ní queñuhu ñaha-gã xii-dé tnuú-yu, te ndèca ñaha-gã cuáhãⁿ ìⁿ xio, te ní dáquïhu-gã díquí ndáhã-gã yaú lóho-dé, te ní dácànùu-gã díí-gã díquí ndáhã-gã, te ní tendaha-gã yàa-dé. ³⁴ Te ní ndacoto-gã andiu te ní sãnuu ìní-gã, te ní cãháⁿ-gã tnúhu mee-gã, te xãhaⁿ-gã:

—ÿfatá! —càchî-gã xãhaⁿ-gã xii-dé.

Te tnúhu-ãⁿ quée-xí: Nacaãⁿ yòhó lóho. ³⁵ Te òré-ni-ãⁿ ñí nacaãⁿ lóho-dé, te ní nduu váha yàa-dé, te ní cuu cãháⁿ váha-dé. ³⁶ Te Jèsús ní cãháⁿ víhî-gã dóho ñáyiú ndîhî ñaha xì téé ní quide tátna-gã-ãⁿ sã vã yòo ìⁿ cüñãhá-yu sá ñí quide tátna ñaha-gã xii-dé, dico uuⁿ-gã ní quidé-yu ní cãháⁿ-yu núú ñáyiú sá ñí quide tátna-gã téé-ãⁿ. ³⁷ Te nchaaⁿ-yu ío ní cuñúhu-yu, te ní xítñãhá-yu:

—Vãha vîhi quide-dé, chi nchaa-ni ndàcu-dé quidé-dé, chi quide tátna-ni-dé ñáyiú doho, te quide tátna-ni-dé ñáyiú ñîhî —càchî-yu xítñãhá-yu.

8

Jèsús dácàxi-gã cúmî mîl ñáyiú

(Mt. 15:32-39)

¹ Te ìⁿ nduu tucu ío cuèhé ñáyiú ní tacá núú ndécú Jèsús, te ñá túú tnàhî sá cãxî-yu. Te ní cana-gã cue téé xica cuu ndîhî-gã, te ní xáhaⁿ-gã xii-güedé:

² —Yúhú, cündahú ìní-í nchaa ñáyiú-a chi sa ní cuu únî nduu ndècu ndîhî ñahã-yu xii-o ìha, te ñá túú tnàhî ná sã cãxî-yu. ³ Te núu na nãtendaha-í-yu núhú

tnámă-yu vehé-yu, te cuneé-yu docó ichi, chi davá-yu ío xica ndécú-yu —càchí-gá xăhaⁿ-gă xii-güedé.

⁴ Te ní xáhaⁿ-güedé xii-gá:

—¿Te ndèé níhí-ó sã cuãñaha-o càxi nchaa ñáyi-u-a, te iha ñá túú nã ío chi cùu-xi xití yucu-i? —càchí-güedé xăhaⁿ-güedé xii-gá.

⁵ Te Jèsús ní xícáⁿ tnúhú-gă núú-güedé, te xăhaⁿ-gă:

—¿Ná daha-gá pàá ndécú ndihí-ndo-i? —cachí-gá xăhaⁿ-gă xii-güedé.

Te ní xáhaⁿ-güedé xii-gá:

—Ndècu ndihí-ndí úsá-gá tnàhá —càchí-güedé xăhaⁿ-güedé xii-gá.

⁶ Te Jèsús ní xáhaⁿ-gă xii nchaa ñáyi-u sã ngóo-yu nchaá-yu, te ní ngóo-yu, te ní queheⁿ-gá ndi úsá pàá-áⁿ, te ní ndacáⁿ táhú-gă núú Yă Ndiöxí. Te dătnùní ní táhú cuèchi-gá te ní sãñaha-gă xii cue téé xica cuu ndihí-gá ní dácăhñu-güedé nchaa ñáyi-u-áⁿ.

⁷ Te ndècu ndihí-güedé ññ úú chácá líhli, te ññ-ndi ducaⁿ ññ quide-gá ní ndacáⁿ táhú-gă núú Yă Ndiöxí. Te dătnùní ní táúchíúⁿ-gă ní dácăhñu ñaha-güedé xii-yu. ⁸ Te nchaá-yu ní xexí-yu ní ndahá xití-yu. Te sátá ññ túhú cóhō-yu te ní nadatácá-güedé nchaa sã ññ quendóo, te ní chítú úsá tnàhá tídihi mee-ññ sã ññ quendóo-áⁿ. ⁹ Te núú ncháá ñáyi-u ní xexi-áⁿ xínu dătná cúmí mĩl-yu. Te sátá ññ yáha ní dácáxí ñaha Jesús xii-yu te ní dándácá ñaha-gá. ¹⁰ Te dătnùní cuánguee-gá bàrcú ndihí cue téé xica cuu ndihí-gá cuáháⁿ-gá ndihí-güedé yucu cue téé ññú Dalmànutá.

Cue téé cùu fariséú xăhaⁿ-güedé xii Jèsús cada-gá ññ sã vã yõo tnàhí ndàcu cada (Mt. 16:1-4; Lc. 12:54-56)

¹¹ Te núú ññ quexìo Jesús xíaⁿ ññ sáá cue téé cùu fariséú, te ní ngüíta-güedé nándi tnúhu xáhaⁿ-güedé xii-gá xitó ndèé ñáhá-güedé. Te xăhaⁿ-güedé sã ná cádá-gă ññ sã vã yõo tnàhí ndàcu cada cundehe-güedé nàcuáa cutnùní iní-güedé nñu ndáá sã Yă Ndiöxí ní tendaha ñaha-gá xii-gá véxi-gá ññuyíu-a. ¹² Te ní sánuu iní-gá te ní xáhaⁿ-gă xii-güedé:

—Nchaa nchòhó ñáyi-u ndècu ññuyíu-a cuíní-ndó càdá-í ññ sã vã yõo tnàhí ndàcu cada nàcuáa cutnùní iní-ndó nñu ndáá sã

Yă Ndiöxí chíndèe ñaha-gá xii-í. Dico na càchí tnúhu ndáá-í xii-ndo sã vã cádá-í sã cuíní-ndó —càchí-gá xăhaⁿ-gă xii-güedé.

¹³ Te ní dándõo-gá ñáyi-u xíndecu-áⁿ, te cuánde-gá bàrcú ndihí cue téé xica cuu ndihí-gá te cuáháⁿ-gá ndihí-güedé ndàa ñngá xio yuhu làgúná.

Nàcuáa quide cue téé cùu fariséú (Mt. 16:5-12)

¹⁴ Te ní cunaa-güedé canehe-güedé sã cáxí-güedé quíhíⁿ, te ññndi-ñi pàá ndécú xití bàrcú-áⁿ ññ naníhí-güedé. ¹⁵ Te Jèsús ní cáháⁿ-gá dóho-güedé, te xăhaⁿ-gă xii-güedé:

—Na càchí tnúhu-í xii-ndo sã ío quíhí iní-ndó cùndecu-ndo te vã cádá cuendá tnàhí-ndo levadurá cue téé cùu fariséú, ndihí levadurá cue téé cùndihí té Hèrodés —càchí-gá xăhaⁿ-gă xii-güedé.

¹⁶ Te ní ngüíta-güedé xitnàha-güedé:

—Cuendá sã ññ túú ní cãnehe-o pàá quixi núu xíaⁿ duha càháⁿ-gá —càchí-güedé xitnàha-güedé.

¹⁷ Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gă xii-güedé:

—¿Ná cuendá da sã ññ túú ní cãnehe-ndo pàá quixi càháⁿ-ndó? Te ññ díú cuendá pàá-áⁿ ní cáháⁿ-í, te dicó-ñi sã mée-ndó ññ túú quide cuendá váha-ndo nàcuáa ndùu tnúhu càháⁿ-í, te ññ ññ tècú tnùní-ndó chi ío ññ díquí-ndó. ¹⁸ Te cuèi ndèhe-ndo dico ññ túú cutnùní iní-ndó ññ cúú nchàa sã quidè-í, te cuèi ndèdóho-ndo nchàa tnúhu càháⁿ-í dico ññ cutnùní iní-ndó ññ nãsa ndùu-xi, te ññ ññ ndácú iní-ndó nchàa sã tá quide-í véxi. ¹⁹ Te chí dándacu iní cutnàhá ní táhú cuèchi-í úhúⁿ-ñi pàá te ní xexi úhúⁿ mĩl mee-ññ cuè téé chí ññ-ñi cue téé-áⁿ ññ quíundehu. Te chí càchí tnúhu ná daha tídihi ní chítú mee-ññ sã ññ quendóo òré ní nadatácá-ndó —càchí-gá xăhaⁿ-gă xii-güedé.

Te ní xáhaⁿ-güedé xii-gá:

—Úxúú tnàhá tídihi ní chítú mee-ññ sã ññ quendóo —càchí-güedé xăhaⁿ-güedé xii-gá.

Te xăhaⁿ tucu-gá:

²⁰ —Te cutnàhá ní táhú cuèchi tucu-í úsá tnàhá pàá ní xexi cúmí mĩl ñáyi-u, te chí càchí tnúhu ná daha tucu tídihi ní chítú mee-ññ sã ññ quendóo —càchí-gá xăhaⁿ-gă xii-güedé.

Te ní xáhaⁿ-güedé xii-gá:

—Úsá tnàhá tídihi ní chítú mee-ni sã ní quendóo —càchí-güedé xãhaⁿ-güedé xii-gá.

²¹ Te Jèsús ní xáhaⁿ tùcu-gá xii-güedé:

—Vitna, ¿te sa ní tecú tnùnín-dó tnũhu ní cáháⁿ-í ãⁿ ñãhá? —càchí-gá xãhaⁿ-gã xii-güedé.

Jèsús quidé tãtna-gá ñⁿ téé cuàá ñuú Bètsaidá

²² Te Jèsús ní sáá-gá ndihi cue téé xica cuu ndihi-gá ñuú Bètsaidá. Te ñuú-áⁿ ndécú-gã ní quexìo ñáyiu núú-gã tánèhé-yu ñⁿ téé cuàá, te cáháⁿ ndàhú-yu núú-gã nõu vá cúndèe iní-gá tendaha ñàha-gá xii-dé cuendá ndúha núú-dé. ²³ Te Jèsús ní tñi-gá ndaha téé cuàá-áⁿ, te ní queñuhu ñaha-gã tnuú-yu, te ndèca ñaha-gá cuáháⁿ ñⁿ xio yuhu ñuú. Te yàcáⁿ ní dácánùu-gá dí-gá núú-dé te ní tendaha ñàha-gá xii-dé, te dãtnùnín ní xicáⁿ tnúhú-gã núú-dé, te xãhaⁿ-gã:

—¿Cùtnunín núú-n-ãⁿ? —càchí-gá xãhaⁿ-gã xii-dé.

²⁴ Te téé cuàá-áⁿ ñí ndonehe núú-dé, te xãhaⁿ-dè xii-gá:

—Cùtnunín núú-í ndéhè-í nchaa cue téé-ãⁿ, dico dà ndáa yutnu cui ndáa-güedé te xica-güedé —càchí-dé xãhaⁿ-dè xii-gá.

²⁵ Te Jèsús ní tendaha tùcu-gá núú-dé te ní cuu ní ndacoto váha-gá-dé, te òré-áⁿ ñí ndúha núú-dé. Te nchaandi túhú sá ndéhè-dé ní cutnùnín váha núú-dé nándé cùu nchaa xiãⁿ. ²⁶ Te ní xáhaⁿ Jèsús xii-dé:

—Vitna te núhú-n, dico ndáá ichi vehe-n nõhú-n te ñá díú dà xití ñuú quihíⁿ-n, te vá yõ ñⁿ cúñaha-n sã yũhú ní quide tãtna-í núú-n ñí ndúha —càchí-gá xãhaⁿ-gã xii-dé.

Té Pèlú xãhaⁿ-dè xii Jèsús sá díú-gã cúú-gã Crístú

(Mt. 16:13-20; Lc. 9:18-21)

²⁷ Te Jèsús ní xica-gá cuáháⁿ-gá ndihi cue téé xica cuu ndihi-gá nchaa ñuú líhli càa ñuú Cèsareá Filipú, te òré ñúhú-gã ndihi-güedé ichi te ní xicáⁿ tnúhú-gã núú-güedé, te xãhaⁿ-gã xii-güedé:

—Chí càchí tnúhu nása càháⁿ ñáyiu cuendá-í. ¿Yoo cùu-í càchí-yu-va? —càchí-gá xãhaⁿ-gã xii-güedé.

²⁸ Te ní xáhaⁿ-güedé xii-gá:

—Davá-yu càchí-yu sá cúú-n ndí Juáá téé ní xóo dacuàndute ñaha xii ñáyiu, te davá-yu

càchí-yu sá cúú-n tẽ Èliás, te dava tucú-yu càchí-yu sá cúú-n ñⁿ téé ní xóo cáháⁿ tnúhu Yá Ndiõxí ndéé sanaha, duha càchí-yu —càchí-güedé xãhaⁿ-güedé xii-gá.

²⁹ Te ní xicáⁿ tnúhú tùcu-gá núú-güedé, te xãhaⁿ-gã xii-güedé:

—Te nchòhó, ¿yoo sàni iní-ndó cùu-í-i? —càchí-gá xãhaⁿ-gã xii-güedé.

Te té Pèlú ní xáhaⁿ-dè xii-gá:

—Yòhó cúú-n Crístú Yaá ní tendaha Yã Ndiõxí véxi ñuyíú-a —càchí-dé xãhaⁿ-dè xii-gá.

³⁰ Te Jèsús ní cáháⁿ-gá dóho-güedé, te xãhaⁿ-gã:

—Vá yõ ñⁿ cúñaha-ndo yòo cuu-í —càchí-gá xãhaⁿ-gã xii-güedé.

Jèsús càháⁿ-gá sá cáhni ñàha-güedé xii-gá (Mt. 16:21-28; Lc. 9:22-27)

³¹ Te Jèsús ní ngüíta-gá xitnũhu-gá cue téé xica cuu ndihi-gá nacuáa yáha-gá, te xãhaⁿ-gã xii-güedé:

—Yúhú Téé cùu ñaní tnáhá-ndó nchaa-ndo chi ío ndoho-í, chi daquèe tíhú ñáhá nchaa cue téé cùu sacuéhé nõu ñáyiu isràél, ndihi cue dútú cúnùu, ndihi cue téé dácuaaha ñaha xii ñáyiu nchaa tnúhu ní chídó tnùnín ní chídó tnùnín ndí Moisés, nchaa cue téé-áⁿ dàquee tíhú ñáhá-güedé xii-í. Te sáa nduu te cahni ñaha-güedé xii-í, dico nduu úní sá cúú-í te ndoto-í —càchí-gá xãhaⁿ-gã xii-güedé.

³² Te ducaⁿ ñí cáháⁿ Jèsús núú cue téé xica cuu ndihi-gá nacuáa tecú tnùnín váha-güedé tnúhu càháⁿ-gá. Te té Pèlú ní cana ñaha-dè xii-gá ñⁿ xio, te ní ngüíta-dé ténàá ñáhá-dè xii-gá ní cùu.

³³ Dico Jèsús ndíhi-ni ní nchócuĩhnu-gá ní ndacoto-gá núú nchaa-güedé chi ndaa sátá-gã xĩndecu-güedé, te ní ngüíta-gá ténàá-gá té Pèlú, te xãhaⁿ-gã xii-dé:

—¡Xocuiñí yòhó núú-í-a, chi dàtná càháⁿ yucu ñávãha càháⁿ-n! Chi ñá túú sàni iní-õ dàtná sání iní Yã Ndiõxí, chi ñⁿ-ni sàni iní-õ ndihi dava-gá cue ñáyiu ndècu ñuyíú-a —càchí-gá xãhaⁿ-gã xii-dé.

³⁴ Te Jèsús ní cana-gá nchaa cue téé xica cuu ndihi-gá, ndihi nchaa ñáyiu xĩndecu-áⁿ, te ní xáhaⁿ-gã:

—Nchaa ñáyiu cuení chitnahá ñáhá xii-í, te xini ñuhu-xi vá cádá-gã-yu sá sání iní

mée-yu, te ío cada ndee ìní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. ³⁵ Te nchaa ñáiyu cuìní sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáiyu ñá túú tnàhí yùhú cuèi nándi sá ná yáha-yu cundecú-yu ñuyíú-a sá cuendá-í, ndihi sá cuendá tnúhu-í, te ñáiyu-án naníhí tànhú-yu. ³⁶ Te cuèi nchaandi túhú sá ío ñuyíú-a na nihí ñáiyu cundecu ndihí-yu, dico núu ñu nchaa xíáⁿ ná càda cuíta nihnú-yu te ñá túú vèdana nàndíhi-xi sá dúcáⁿ ndècu ndihí-yu nchaa xíáⁿ. ³⁷ Te ni ñⁿ sá ío ñuyíú-a vá chíndèe-xi ñáiyu cuendá naníhí tànhú-yu. ³⁸ Te nchaa ñáiyu na cùcahaⁿ núú-xi cáháⁿ váha cuendá-í, ndihi cuendá tnúhu-í núú nchaa ñáiyu dàquee tihú ñáhá xii Yá Ndiöxí, ñáiyu xíndecu ichi cuèhé ichi duha, te tnàhá yùhú Tée cùu ñaní tnáhã-yu nchaa-yu cucahaⁿ núú-í núú-yu òré ná quixi tucu-í ndihi cue espíritú xínú cuèchi núú Tàtá-í Dútú Ndiöxí. Te mee-gã cada cutnùní iní nchaa ñáiyu sá yùhú ío càhnu cuu-í.

9

¹ Te na càchí tnúhu ndáá-í xii-ndo sá ío dava nchòhó ñáiyu xíndecu iha vitna vá cùú-ni-ndo, chi cundecu-ni-ndo ndèé quini-ndó sàá nduu ndíhu ndaha ñaha Yá Ndiöxí xii ñáiyu, te dàvá-án quini-ndó sá ndácú-gã quidé-gã nchaandi túhú sá vaha —càchí-gã xáhaⁿ-gã xii cue tée xica cuu ndihi-gã ndihi cue ñáiyu-án.

*Jèsús ní nadama dóo-gã ndihi núú-gã
(Mt. 17:1-13; Lc. 9:28-36)*

² Te núú ìnú nduu sá dúcáⁿ ñí cáháⁿ Jèsús te ní xica-gã cuásaá-gã ñⁿ yucu dùcúⁿ, te ndèca-gã té Pèlú, ndihi té Jàcobó, ndihi té Juáá cuásaá, te úní tnàhí-ni cue tée-án ndécá-gã cuásaá. Te yucu-án ndécú-gã ní nadama núú-gã, ³ te ní nadama dóo-gã. Te dóo-gã-án sùúní ñí nduu cuixíⁿ quiyíⁿ te tãsaⁿ, te ni ñⁿ ñáiyu ñuyíú-a ñá túú ndácú-yu naqueté-yu ñⁿ dóo nduu cuixíⁿ dàtná ní nduu dóo-gã. ⁴ Te ní xiní-güedé té Moisés ndihi té Èliás nútní-güedé ndihi-gã ndátnúhu ndihi ñaha-güedé xii-gã. ⁵ Te té Pèlú ní xáhaⁿ-dè xii Jèsús:

—Mèstrú, jváha ní cuu sá ndécú-ó iha vitna! Te na dàcaa-ndí úní tnàhá vehe tnuvixiⁿ, te ñⁿ cuu cuendá-n te ñⁿ cuu cuendá té Moisés te ñⁿ cuu cuendá té Èliás —càchí-dé xáhaⁿ-dè xii-gã.

⁶ Te ducaⁿ ñí cáháⁿ-dé chi ío ní yùhú-güedé, te cuendá-ni ní cuu yáchí-dé ní cáháⁿ-dé, te ni mée-dé ñá túú ní cùtnuní iní-dé nása nduu tnúhu ní cáháⁿ-dé. ⁷ Te òré-án ñí quexio ñⁿ vícò núú ndécú-güedé ndihi Jèsús ní dádãhu ñaha-xi xii-güedé ndihi-gã, te xití vícò-án ñí cáháⁿ Yá Ndiöxí ní tecú dóho-güedé, te xáhaⁿ-gã xii-güedé:

—Tée-a cùu-dé Déhe-í tée ío cùu iní-í, te cundedóho-ndo nchaa tnúhu càháⁿ-dé —càchí-gã xáhaⁿ-gã xii-güedé.

⁸ Te òré ní quide cuendá-güedé, te ñá túú-gã ní xiní-güedé cue tée úú-án chi mee-nã Jèsús ndécú.

⁹ Te òré cuánuu ndihi ñaha-gã xii-güedé yucu-án, te ní cáháⁿ-gã dóho-güedé, te xáhaⁿ-gã:

—Vá yõ ñⁿ cúñaha-ndo nchaa sá ñí xiní-ndó núú ñí sáá-ó-á, te cuu cáháⁿ-ndó dico ndéé ná yáha ndoto yùhú Tée cùu ñaní tnàhá-ndó nchaa-ndo sá cùú-í —càchí-gã xáhaⁿ-gã xii-güedé.

¹⁰ Núú xíáⁿ cue tée-án ñí xúhuⁿ nahi-ñí ìní-güedé nchaa sá ñí xiní-güedé núú ñí sáháⁿ-güedé ndihi Jèsús te ñá túú tnàhí ní cáháⁿ-güedé, dico ní ndúcú tnúhu núú tnàhá-güedé ná cuendá ducaⁿ ñí cáháⁿ-gã sá ndéé ná yáha ndoto-gã sá cùú-gã te dàtnùní cáháⁿ-güedé nàcuáa nduu nchaa sá ñí xiní-güedé. ¹¹ Te ní xicáⁿ tnúhú-güedé núú Jèsús, te xáhaⁿ-güedé xii-gã:

—¿Cuìní-ndí cachí tnúhu-n ñá cuendá càchí cue tée dàcuaha ñaha xii ñáiyu nchaa tnúhu ní chídó tnùní ndí Moisés sá dñhna-gã té Èliás ndixi-dé te dàtnùní quixi Yaá tendaha Yá Ndiöxí quixi ñuyíú-a? —càchí-güedé xáhaⁿ-güedé xii-gã.

¹² Te Jèsús ní xáhaⁿ-gã:

—Ndáá sá códó núu ñⁿ tée quixi-dé te cada-dé dàtná ní quide té Èliás, te tée-án cada ndáá-dé nchaa nàcuáa cùu. Dico núú tütú Yá Ndiöxí càháⁿ-xi cuendá yùhú Tée cùu ñaní tnàhá-ndó nchaa-ndo sá ío ndoho-í, te daquèe tihú ñáhá ñáiyu xii-í. ¹³ Te na càchí tnúhu-í xii-ndo vitna sá sá ñí quixi ñⁿ tée ní quide dàtná ní xóo cada té

Èliás, te cue ñáiyu ñá túú ní cãnehé-yu sá yíñuhu núú-dě, te ní quide ñàhá-yu xii-dé nchaa nàcuáa ní quixi iní meë-yu. Te núú tûtú Yã Ndiõxí sa ndéé tnuní nchaa nàcuáa yáha-dé, te nchaa xíáⁿ sa ní quide ñaha ñáiyu xii-dé —càchí-gá xãhaⁿ-gã xii-güedé.

Jèsús quidé tãtna-gá ñⁿ tée cuechi yìhi ñaha espíritú cündìhi yucu ñávãha (Mt. 17:14-21; Lc. 9:37-43)

¹⁴ Te Jèsús ní ndexìo-gá ndihi cue tée úní-áⁿ núú xĩndecu dava-gá cue tée xica cuu ndihi-gá, te vãi vihi ñáiyu ndècu núú ndécú-güedé-áⁿ, te tnàhá cue tée dàcuaha ñaha xii-yu nchaa tnúhu ní chídó tnùní ndíi Moisés xĩndecu, te cue tée-áⁿ nãndi tnúhu xãhaⁿ-güedé xii cue tée xica cuu ndihi Jèsús. ¹⁵ Te òré ní xiní-yu ní ndexìo-gá, te nchaá-yu ío ní cuñúhu-yu, te xinú-yu ní sáháⁿ ní cáháⁿ ndihi ñàhá-yu xii-gá. ¹⁶ Te ní xícáⁿ tnúhú-gã núú cuè tée xica cuu ndihi-gá nõu ná tnúhu ndàtnúhu-güedé ndihi cue tée-áⁿ. ¹⁷ Te ñⁿ ñáiyu xĩndecu xíáⁿ ñí xáhãⁿ-yu xii-gá:

—Mèstrú, ndéca-í déhe-í véxi nãnducu ñaha-í xii-n, chi yìhi ñaha espíritú cündìhi yucu ñávãha xii-dé, te ñⁿ xíáⁿ ní quide ní cuu ñíhí-dé. ¹⁸ Te ío ndòho-dé chi súúní ndèni ní cuu ngòtní ñaha-xi xii-dé, te òré ducaⁿ quide ñaha-xi xii-dé te dànduá ñàhá-xí, te quène tíñú yuhu-dé, te cùrúhñú nõhu-dé, te ndàda ruúⁿ ñàhá-xí xii-dé. Te sa ní xãhaⁿ-í xii cue tée xica cuu ndihi-n sá quèññuhu-güedé espíritú cündìhi yucu ñávãha yìhi ñaha xii-dé dico ñá túú ní ndàcu-güedé queññuhu-güedé-xi —càchí ñáiyu-áⁿ xáhãⁿ-yu xii-gá.

¹⁹ Te Jèsús ní xãhaⁿ-gã:

—¡Nchaa nchòhó ñáiyu ndècu ñuyú-a ío sàá iní-ndó, chi ñá túú cuíní-ndó quìndáá iní-ndó Yã Ndiõxí, te ní cuu vãi nduu quide ndee iní-í nchaa sá quidé-ndó! ¿Te ná ndéé ama vá dúcáⁿ-gã cada-ndo-i? Te chí cándeca tée cùhú-áⁿ táquixi iha —cachí-gá xãhaⁿ-gã xii-yu.

²⁰ Te ñáiyu ndihi ñaha xii tée yìhi ñaha espíritú cündìhi yucu ñávãha-áⁿ ndéca ñàhá-yu xii-dé cuáháⁿ ndéé núú Jèsús, te òré ní xiní ñàhá espíritú cündìhi yucu ñávãha-áⁿ xii-gá, te ní ngüíta-ni-xi sãhni yìhí

ñàhá tucu-xi xii-dé, te ní dánduá ñàhá-xí xii-dé, te ní ngüíta-dé xíchí ñuhu-dé, te quène tíñú yuhu-dé. ²¹ Te Jèsús ní xícáⁿ tnúhú-gã núú tãtá-dě, te xãhaⁿ-gã xii-dé:

—¿Ná ndéé ama ní ngüíta-xi duha ndòho déhe-n? —càchí-gá xãhaⁿ-gã xii-dé.

Te tée-áⁿ ñí xãhaⁿ-dě xii-gá:

—Ndéé cùtnàhá cúú lìhli-dé ní ngüíta espíritú cündìhi yucu ñávãha duha quide ñaha-xi xii-dé. ²² Te ní cùtítñí xito dàngaunihnu ñaha-xi xii-dé núú ñúhú, te ní cutítñí tucu xito dàngaunihnu ñaha-xi xii-dé ndute cuíní-xi cañni ñaha-xi xii-dé. Te ndéca-í-dé véxi núú-n te núu ndacu-n càda tãtna-n-dě, te cundàhú iní ñàhá-n xii-ndí chindee ñaha-n —cachí-dé xãhaⁿ-dě xii-gá.

²³ Te Jèsús ní xãhaⁿ-gã:

—Te ná cuendá càchí-n nõu ndacu-í cada tãtna-í déhe-n, chi nchaa ñáiyu na quìndáá iní ñàhá xii-í te nihí-yu sá ná càcáⁿ-yu núú-í —càchí-gá xãhaⁿ-gã xii-dé.

²⁴ Te tãtá tée cuechi-áⁿ ñíhi ní cáháⁿ-dé xãhaⁿ-dě xii-gá:

—Sàndáá iní ñàhá-í xii-n, dico chindee ñaha xii-í cuendá ná quìndáá iní ñàhá-gã-í xii-n —càchí-dé xãhaⁿ-dě xii-gá.

²⁵ Te Jèsús ndéhé-gã sá ño vãi ñáiyu ta tàcá núú ndécú-gã-áⁿ. Te ní tenàá-gá espíritú cündìhi yucu ñávãha-áⁿ, te xãhaⁿ-gã xii-xi:

—Yòhó espíritú cündìhi yucu ñávãha, ní quide ñíhí-n ñí quide doho-n tée-a, dico vitna yúhú càchí-í sá quée-n yìqui cuñú-dé te vá ndíhu-gá-n —càchí-gá xãhaⁿ-gã xii espíritú cündìhi yucu ñávãha-áⁿ.

²⁶ Te espíritú cündìhi yucu ñávãha-áⁿ ñí dácáná sàa ñaha-xi xii tée-áⁿ, te ní sañni yìhí ñàhá tucu-xi xii-dé, te dàtnùní ní quee ñaha-xi xii-dé cuáháⁿ-xi, dico tée-áⁿ chi dacàa-ni ndíyi càa-dé cãtùu-dé. Te nchaa ñáiyu xĩndecu xíáⁿ càchí-yu sá ñí xíhí-dé ní cùu. ²⁷ Te Jèsús ní tní-gã ndaha-dé ní ndocani ñaha-gã xii-dé, te ní ndacóo-dé ní nucúnutñí-dé.

²⁸ Te Jèsús cuándihu-gá xití vehe ndihi cue tée xica cuu ndihi-gá, te òré ndéhé-güedé ñá túú-gã ñáiyu, te ní xícáⁿ tnúhú-güedé núú-gã, te xãhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queññuhu-ndí espíritú

cúndìhi yucu ñávãha yìhi ñaha xii téé-ãⁿ — càchí-güedé xãhaⁿ-güedé xii-gá.

²⁹ Te Jèsús ní xáhaⁿ-gã xii-güedé:

—Na càchí tnúhu-í xii-ndo sã nõu òré cuiní-ndó quèñuhu-ndo espíritú cúndìhi yucu ñávãha yìhi ñaha xii ñáyiú dàtná cúú espíritú cúndìhi-xi yìhi ñaha xii téé-ãⁿ ní cùu ñã, te xìni ñuhu-xi sá ìo cáháⁿ ndìhi-ndo Yã Ndiõxí te ñã túú tnàhí ná caxi-ndo cáháⁿ ndìhi-ndo-gã, te ducaⁿ te ndacu-ndo quèñuhu-ndo espíritú cúndìhi yucu ñávãha yìhi ñaha xii ñáyiú —càchí-gá xãhaⁿ-gã xii-güedé.

Jèsús càháⁿ tucu-gá sá cáhni ñàha-güedé xii-gá

(Mt. 17:22-23; Lc. 9:43-45)

³⁰ Te Jèsús ní quee-gá núú ndécú-gã-ãⁿ ndìhi cue téé xìca cuu ndìhi-gá cuáhãⁿ-gã ndìhi-güedé distritú Galileá, te cuiní-gá sá vã quini ñáyiú ndèé ichi cuáhãⁿ-gã. ³¹ Te ducaⁿ ñi sani iní-gá, chi mee-gã sa nãha-gá sá ndãá cada-xi nãcuãa xãhaⁿ-gã xii cue téé xìca cuu ndìhi-gá, te duha xãhaⁿ-gã xii-güedé:

—Yúhú Téé cùu ñãní tnáhã-ndó nchãa-ndo sãá ñⁿ nduu te cuãha cuendã ñáhã-güedé xii-í núú cuè téé cùu úhú iní ñáhã, te cahni ñaha-güedé xii-í, dico nduu úní sá cùú-í te ndoto-í —càchí-gá xãhaⁿ-gã xii-güedé.

³² Dico ñã túú tnàhí ni tècú tnùnì-güedé nása ndùu tnúhu ní cáháⁿ-gã, te ni ñã túú ní cùyi-güedé cácaⁿ tnúhú-güedé núú-gã.

Cue téé ndùcu tnúhu núú tnáhã nõu ndédacãa-güedé ío-gá cùnùu

(Mt. 18:1-5; Lc. 9:46-48)

³³ Te Jèsús ní quexìo-gá ndìhi cue téé xìca cuu ndìhi-gá ñuú Capèrnaúm, te òré sa ndècu-gá ñⁿ vehe te ní xicãⁿ tnúhú-gã núú-güedé, te xãhaⁿ-gã xii-güedé:

—¿Nãndi cùu tnúhu ta xitnãha-ndo véxi? —càchí-gá xãhaⁿ-gã xii-güedé.

³⁴ Dico ñã túú tnàhí ni cáháⁿ-güedé cúñaha-güedé xii-gá nõu ná tnúhu xitnãha-güedé òré ñúhú-güedé ichi. Te ducaⁿ ñi quide-güedé chi cuendã tá ndãtnúhu-güedé nõu ndédacãa-güedé ío-gá cùnùu. ³⁵ Te Jèsús ní ngóo-gã, te ní xáhaⁿ-gã xii ndi ùxúú cue téé xìca cuu ndìhi-gá:

—Chí táquixi iha te cundedóho-ndo tnúhu na càháⁿ-í-a. Te núu ìo dava-ndo cuiní-ndó cùnùu-ndo, te cada-ndo sã cúú-ndó ñáyiú nchicúⁿ cuii-ñã, te cunu cuechi-ndo nõú tnãha ñáyiú-ndo —càchí-gá xãhaⁿ-gã xii-güedé.

³⁶ Te Jèsús ní sanutnã-gã ñⁿ té lĩhli cuãdava tnuú-güedé, te dàtnùnì ní nguídèhé ñáhã-gã xii-dé, te xãhaⁿ-gã xii-güedé:

³⁷ —Nchaa ñáyiú na quèheⁿ cuendã ñⁿ té lĩhli dàtnã té lĩhli-a cuendã sã ñúhú iní ñáhã-yu xii-í ñã, te cada iní-yu sã yúhú ní queheⁿ cuendã-yu. Te nchaa ñáyiú na quèheⁿ cuendã ñáhã xii-í te ñã díú-ní mèe-í ní queheⁿ cuendã-yu, chi tnãhá Tãtã-í Dútú Ndiõxí Yaá ní tendaha ñãha xii-í véxi-í ñuyú-a ní queheⁿ cuendã-yu —càchí-gá xãhaⁿ-gã xii-güedé.

Nchaa ñáyiú ñã túú cùu úhú iní ñáhã xii-o te cùndìhi ñáhã-yu

(Mt. 10:42; Lc. 9:49-50)

³⁸ Te té Juãá diu-ni ñⁿ téé xìca cuu ndìhi-gá ní xáhaⁿ-dẽ xii-gã:

—Mèstrú, ní xiní-ndí ñⁿ téé càcunehe ñaha-dé xii-n, te quèñuhu-dé espíritú cúndìhi yucu ñávãha yìhi ñaha xii ñáyiú, te nchúhú ñã túú ní dàña-gã-ndí ducaⁿ càda-dé, chi ñã túú xìca cuu ndìhi ñaha-dé xii-o —càchí-dé xãhaⁿ-dẽ xii-gã.

³⁹ Te Jèsús ní xáhaⁿ-gã xii-güedé:

—Daña-ndo na càda nahi-dé ní cùu, chi ñã túú ni ñⁿ ñáyiú ndĩhi ndĩhi-ni ndacu cáháⁿ cuèhé cuendã-í te núu càcunehe ñáhã-yu xii-í, te quidé-yu sã vã yõo tnàhí ndacu cada. ⁴⁰ Te nchaa ñáyiú ñã túú cùu úhú iní ñáhã xii-o te cùndìhi ñáhã-yu. ⁴¹ Te na càchí tnúhu-í xii-ndo sã cuè ñáyiú na tàxi ñⁿ yaxiⁿ ndute coho-ndo cuendã sã cúú-ndó cuè téé xìca cuu ndìhi-í, te ñáyiú-ãⁿ sãá nduu te dacuèi sã ñihí-yu sã ndúú tãhũ-yu —càchí-gá xãhaⁿ-gã xii-güedé.

Cada cuendã-ó vã cùndècu-o ichi cuehé ichi duha

(Mt. 18:6-9; Lc. 17:1-2)

⁴² Te xãhaⁿ tùcu Jesús xii-güedé:

—Te núu ñⁿ téé na dàcãháⁿ-dé cue ñáyiú sãndãá iní ñáhã xii-í cadã-yu nãndi sã cuèhé sã dúhá, te váha-gã sã nõu na dàcutu ndeé-güedé ñⁿ yúú yõdó ñúcúⁿ-dẽ, te dàquée ñaha-güedé xii-dé xití ndute làmár, te ñã

díú sã cúndecu-dé ducaⁿ càda-dé. ⁴³ Te núu ìⁿ xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tàhú-ndó cuèi na cuíta ìⁿ xio ndaha-ndo te ñá díú sã quíhíⁿ-ndó ñihí ní ndúú-ndó núú ùhú núú ndàhú núú òcò sàá ndáhá itá ñuhú ñi caa ñi quíhíⁿ. ⁴⁴ Chi yàcáⁿ cúú-xí núú ñà túú tnàhí ndàhvá ñuhú, te ío ndoho-ndo cùndecu-ndo xíáⁿ ñi caa ñi quíhíⁿ. ⁴⁵ Te núu ìⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tàhú-ndó cuèi na cuíta ìⁿ xio sáhá-ndó, te ñá díú sã quíhíⁿ-ndó ñihí ní ndúú-ndó núú ùhú núú ndàhú núú òcò sàá ndáhá itá ñuhú ñi caa ñi quíhíⁿ. ⁴⁶ Chi yàcáⁿ ñá túú tnàhí ndàhvá ñuhú, te ío ndoho-ndo cùndecu-ndo xíáⁿ ñi caa ñi quíhíⁿ. ⁴⁷ Te núu ìⁿ xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cúndecu-ndo núú ndécú Yã Ndiòxí táxí tnùnigá cuèi na cuíta ìⁿ xio tinùu-ndo, te ñá díú sã ndì nduú xio núú-ndó quíhíⁿ-ndó núú ùhú núú ndàhú. ⁴⁸ Chi yàcáⁿ ñá túú tnàhí ndàhvá ñuhú, te ío ndoho-ndo cùndecu-ndo xíáⁿ ñi caa ñi quíhíⁿ.

⁴⁹ Te dàtná quidé-güedé quiti sàhni-güedé chihigüedé cuñú-di ñí te dàquée-güedé núú ñuhú, ducaⁿ sãtnahá-xi ndoho cue ñáyiu chi ío ndohó-yu. ⁵⁰ Te ñí chi ío váha nándihí-xi, dico núu na ndùu víxiⁿ-xi te ñá túú-gã nándihí-xi te ñi ñà túú-gã nása cada-o ndùu úhá tucu-xi. Te ío váha cada cuendá-ndó nàcuáa cundecu-ndo cuendá cuu-ndo ñáyiu váha, te ducaⁿ te cuu-ndo dàtná ñí sã ñà túú ndùu víxiⁿ, te ío váha cundecu ndihí tnàha-ndo —cachí-gá xãhaⁿ-gã xii-güedé.

10

Jèsús càháⁿ-gá cuendá cue ñáyiu dàña tnaha

(Mt. 19:1-12; Lc. 16:18)

¹ Te Jèsús ní xica-gá cuáháⁿ-gá ní yáha-gá yucu distritú Jùdeá ní téhndé-gá ndàa ingá xio yúte Jòrdán. Te yàcáⁿ ndécú-gã ní tacá tucu cuèhé víhí ñáyiu, te ní nguíta-ni tucu-gá dánèhé ñáhá-gã xií-yu tnúhu-gá chi ducaⁿ tnàhí quide-gá. ² Te ní quèxio ìⁿ úú cue téé cùu fariséú núú ndécú Jèsús xító

ndéé ñáhá-güedé xii-gá núu nása cunduu tnúhu càháⁿ-gá, te xãhaⁿ-güedé xii-gá:

—Véxi-ndí xicáⁿ tnúhú-ndí núú-n núu cuu dàña ìⁿ téé ñadìhí-dé ãⁿ ñáhá —càchí-güedé xãhaⁿ-güedé xii-gá.

³ Te Jèsús ní xãhaⁿ-gã xii-güedé:

—Te nchòhó, ¿nása ní cachí ndíi Moisés cada-ndo-i? —càchí-gá xãhaⁿ-gã xii-güedé.

⁴ Te ní xãhaⁿ-güedé xii-gá:

—Ndíi Moisés ní cachí ndíi sá cúú dàña ìⁿ téé ñadìhí-dé òcò-ni sá cadúha-dé ìⁿ tutú cuañaha-dé, te núú tütú-áⁿ codo tnùnigá ní dáñá ñàha-dé, te ducaⁿ te cuu dàña-dé ñadìhí-dé —càchí-güedé xãhaⁿ-güedé xii-gá.

⁵ Te Jèsús ní xãhaⁿ-gã xii-güedé:

—Te ducaⁿ ñí chídó tnùnigá ndíi Moisés cada-ndo cuendá sá ío sàá iní-ndó. ⁶ Dico Yã Ndiòxí cùtnahá ní cadúha-gá ñuyú ndihí nchaa sá ío, chi téé ñadìhí ní cadúha-gá. ⁷ Te xíáⁿ núu nchaa cue téé na ñihí ñadìhí-xi, te òcò-ná cada-güedé tãtã-güedé ndihí nãná-güedé, chi mee-nã ñadìhí-güedé cuu cuu ndihí-güedé. ⁸ Te cue ñáyiu úú-áⁿ ñà túú-gã ndí dííⁿ ndí dííⁿ yiqui cuñú cúú-yu, chi cada iní-ndó sã ìⁿ-nã yiqui cùñú cúú-yu. ⁹ Te xíáⁿ núu ñá túú ndùu váha-xi dàña cuè téé ñadìhí-güedé, chi mee Yã Ndiòxí ní cachí-gá sá cúú úú-yu cundecú-yu ndéé naa ndéé cuú-yu —càchí-gá xãhaⁿ-gã xii-güedé.

¹⁰ Te òré yíhí Jèsús ndihí cue téé xica cuu ndihí-gá vehe, te ní xicáⁿ tnúhú-güedé núú-gã nása ndùu tnúhu ní càháⁿ-gá cuendá cue ñáyiu dàña tnaha. ¹¹ Te Jèsús ní xãhaⁿ-gã xii-güedé:

—Te núu ìⁿ téé na dàña-dé ñadìhí-dé te naqueheⁿ-dé ingá ñadìhí, te ío nèhé quidé-dé, te ìⁿ-ni cuèchi cùu-xi ndihí cuèchi quide téé ndéca ñadìhí te càháⁿ ndihí-dé ingá ñadìhí. ¹² Te òcò-ni ducaⁿ sãtnahá-xi cùu tucu ñáyiu òcò-ni te núu na dàñá-yu yí-yu te naquehéⁿ-yu ingá téé, chi ìⁿ-ni cuèchi cùu-xi sá quidé-yu ndihí sá quidé cuè ñáyiu òcò-ni ndécú yí-xi, te càháⁿ ndihí-yu ingá téé —càchí-gá xãhaⁿ-gã xií-yu.

Jèsús xicáⁿ táhú-gã núú Yã Ndiòxí cuendá landú

(Mt. 19:13-15; Lc. 18:15-17)

13 Te ñáñá ùú ñáñá ndécá-yu landú líhli cuáháⁿ núú Jèsús, chi cuíní-yu sá téndaha ñaha-gá xii-güexi. Te cue téé xica cuu ndíhi-gá ní ngüíta-güedé ténáá ñáhá-güedé xií-yu, te xáhaⁿ-güedé sá vǎ dúcáⁿ càdá-yu. 14 Te òré ní xiní-gá sá dúcáⁿ quide-güedé, te ní cudééⁿ-gǎ núú-güedé, te xáhaⁿ-gǎ xii-güedé:

—Chí dáñá ná quixi nahi cue landú líhli-ánⁿ nùú-í-a te vǎ càdí-ndó ìchi-güexi, chi dàtná cúú vǎha iní cue landú líhli-ánⁿ ducaⁿ cùu vǎha iní cue ñáñá yindaha Yá Ndiöxí. 15 Te ña càchí tnúhu ndáá-í xii-ndo sǎ nùu vǎ quíndáá iní ñáhá-ndó dàtná quidé cué landú líhli sàndáá iní ñáhá xii-í, te vǎ ndíhu ndaha ñaha Yá Ndiöxí xii-ndo —càchí-gǎ xáhaⁿ-gǎ xii-güedé.

16 Te sǎtá dúcáⁿ ñí xáhaⁿ-gǎ te ní ngüidéhé-gǎ cue landú-ánⁿ te ní tendaha ñaha-gá xii-güexi, te ní xicáⁿ táhú-gǎ núú Yá Ndiöxí cuendá-güexi.

*Ñáñá téé cuica càháⁿ ndíhi-dé Jèsús
(Mt. 19:16-30; Lc. 18:18-30)*

17 Te òré sa ñúhu ichi Jesús caca-gǎ quíhíⁿ-gǎ ñngǎ xichi ni cùu ní quexìo cunu ñáñá téé ní ngüíñí xití-dé núú-gǎ, te xáhaⁿ-dǎ xii-gǎ:

—Yòhó Mèstrú, cùu-n téé ío vǎha iní-xi, te cuíní-í nùu vǎ cùndèe iní-n càchí tnúhu-n ñá cúú sǎ càdá-í cuendá nduu táhú-í cundecu-í ndíhi Yá Ndiöxí ñi caa ñi quíhíⁿ —càchí-dé xáhaⁿ-dǎ xii-gǎ.

18 Te Jèsús ní xáhaⁿ-gǎ xii-dé:

—¿Te cùtnuní iní-n ñacuáa ndùu tnúhu càháⁿ-n sǎ yǎhú vǎha iní-ǎⁿ? Chi ñndí dí-ñi Yá Ndiöxí ío vǎha iní-gǎ. 19 Te yòhó xini-n ñacuáa ní cachí Yá Ndiöxí cada ñáñá, te duha ní cachí-gǎ: “Nchòhó cue téé vǎ càháⁿ ndíhi-ndo ñàdihí te núu ñá díú ñàdihí-ndó cùú-yu, te ducaⁿ-ni nchòhó cue ñáñá dñí tucu vǎ càháⁿ ndíhi-ndo tée te núu ñá díú yí-ndo cuu-güedé, te vǎ cáhni-ndó tnàha ñáñá-ndo, te ñi vǎ dúhú-ndó sǎ ndécú ndíhi-yu, te ñi vǎ dácacu-ndo cuéchi neñúú sǎ cúú-xi tnàha ñáñá-ndo, te ñi vǎ dácacu-nde-ndo, te canehe-ndo sǎ yíñúhu núú tátá-ndó ndíhi núú ñáná-ndó”, duha ní cachí Yá Ndiöxí cada ñáñá —càchí-gǎ xáhaⁿ-gǎ xii-dé.

20 Te téé-áⁿ ñí xáhaⁿ-dǎ xii-gǎ:

—Mèstrú, nchaa xǎⁿ ní ngüíta-í quidé-í ndéé cùtnàhá cúú landú-í —càchí-dé xáhaⁿ-dǎ xii-gǎ.

21 Te Jèsús ní xindéhé ñàha vǎha-gǎ xii-dé, te ní cuu vǎha iní ñáhá-gǎ, te ní xáhaⁿ-gǎ xii-dé:

—Dico cùmání ñngǎ núú sǎ càdá-n. Vitna te quíhíⁿ-n te dico-n nchaa sǎ ndécú ndíhi-n, te díhúⁿ-n cuáha táhú-n cué ñáñá ndàhú. Te ducaⁿ, te nduu táhú-n núcúndecu vǎha-n nùú ndécú Yá Ndiöxí táxi tnùn-í-gǎ, te sǎtá ná yǎha ducaⁿ càda-n, te quixi-n chitnahá ñáhá-n xii-í cuéi ña ndòho-n datná ndòho-í —càchí-gǎ xáhaⁿ-gǎ xii-dé.

22 Te sǎ dúcáⁿ ñí xáhaⁿ Jèsús xii-dé te ío ní cundiýí-dé chi ío cuica-dǎ, te ní xica-dé cuánuhú-dé.

23 Te ní ndacoto-gǎ ñi càndéé dñi-gǎ, te ní xáhaⁿ-gǎ xii cue téé xica cuu ndíhi-gǎ:

—Cue ñáñá cuica chi ío úhú quíndáá iní-yu Yá Ndiöxí cuendá ndíhu ndaha ñaha-gǎ xií-yu —càchí-gǎ xáhaⁿ-gǎ xii-güedé.

24 Te cue téé xica cuu ndíhi-gǎ-ánⁿ ío ní cuñúhu-güedé ñacuáa ní cáháⁿ-gǎ, te ní xáhaⁿ tucu-gǎ xii-güedé:

—Nchòhó cue téé xica cuu ndíhi-í càchí tnúhu tucu-í xii-ndo sǎ ío úhú quíndáá iní cue ñáñá cuica Yá Ndiöxí cuendá ndíhu ndaha ñaha-gǎ xií-yu, chi sàni iní-yu sǎ ncháá sǎ ndécú ndíhi-yu dácacu nihnu ñaha-xi xií-yu núú úhú núú ndàhú. 25 Te yáchí-gǎ yáha ñáñá caméyu yaú ñáñá yiqui tìcú dácúxí sǎ quíndáá iní ñáñá cuica Yá Ndiöxí cuendá ndíhu ndaha ñaha-gǎ xií-yu —càchí-gǎ xáhaⁿ-gǎ xii-güedé.

26 Te cue téé xica cuu ndíhi-gǎ ní cuñúhu vihi-gǎ-güedé sǎ dúcáⁿ ñí cáháⁿ-gǎ, te ní ngüíta-güedé xitnàha-güedé:

—¿Te yoo sa ndacu naníhí táhú te núu ducaⁿ vǎñá? —càchí-güedé xitnàha-güedé.

27 Te Jèsús ní xindéhé vǎha ñaha-gǎ xii-güedé, te ní xáhaⁿ-gǎ:

—Nchaa ñáñá ñuyíú-a chi vǎ ndácú-yu ná càdá-yu ñacuáa ndíhu ndaha ñaha Yá Ndiöxí xií-yu, dico mee-gǎ chi ndacu-gǎ ndíhu ndaha ñaha-gǎ xií-yu, chi nchaandi

túhú sá vǎha ndàcu-gá quidé-gǎ —càchí-gá xǎhaⁿ-gǎ xii-güedé.

²⁸ Te té Pèlú ní xáhaⁿ-dě xii-gá:

—Nchúhú ní dándöo-ndí nchaandi túhú sá ndécú ndíhi-ndí te ní tuha ñaha-ndí xii-n —càchí-dé xǎhaⁿ-dě xii-gá.

²⁹ Te Jèsús ní xáhaⁿ-gǎ xii-dé:

—Na càchí tnúhu ndáá-í xii-ndo sǎ ncháá ñáyiú na dándöo vehe-xi, àdi ñaní-xi, cúha-xi, tǎtá-xi, nǎná-xi, déhe-xi, àdi ñuhu-xi, te núu ducaⁿ na càdá-yu sá cuendá-í ndíhi sá cuendá tnúhu-í, ³⁰ te ío-gá cuéhé sǎ cuǎñaha Yǎ Ndiöxí cundecu ndíhi-yu, chi níhi-yu vehé-yu, ñuhú-yu, ñaní-yu, cúha-yu, nǎná-yu, déhe-yu, te ñá díú-ní sǎ nchàa xǎá níhi-yu cundecu ndíhi-yu, chi tnàhá nduu táhü-yu cundecu ndíhi ñahá-yu xii-í ní caa ní quíhíⁿ ná sǎá nduu. Dico díhna-gá ndoho tnahá-yu núu ñuyíú-a sá cuendá-í. ³¹ Te dava ñáyiú cùnnuu ndecu ichi Yá Ndiöxí vitna, ñáyiú-áⁿ sǎá nduu te vá ío-gá cunúú-yu dàtná cúnúú-yu vitna, te dava ñáyiú nchìcúⁿ ñá túú cùnnuu vitna ñáyiú-áⁿ sǎá nduu te ío cunúú-yu —càchí-gá xǎhaⁿ-gǎ xii-güedé.

Jèsús càháⁿ tucu-gá sá cáhni ñaha-güedé xii-gá

(Mt. 20:17-19; Lc. 18:31-34)

³² Te ñuhu Jèsús ichi ndíhi cue téé xica cuu ndíhi-gá cuásaá ndíhi ñaha-gǎ xii-güedé ñuu Jerusálén, te yòdo nuu-gá núu-güedé cuásaá. Te cue téé-áⁿ xicuñúhu-güedé sá dúcáⁿ cuǎháⁿ-gá ñuu Jerusálén, te dava cue ñáyiú xǎnchícúⁿ xiyùhú-yu. Te ní taudíⁿ-gá ndí ùxúú cue téé xica cuu ndíhi-gá, te ní ngúíta-gá cání-gǎ cuendú núu-güedé nchaa nàcuáa yáha-gá. ³³ Te xǎhaⁿ-gǎ xii-güedé:

—Vitna ñuhu-o ichi cuásaá-ó ñuu Jerusálén, te yàcáⁿ cuáha cuendá ñahá-güedé xii yúhú Téé cùu ñaní tnahá-ndó nchàa-ndo núu cuè téé cùu dútú cúnúu, ndíhi núu cuè téé dàcuaha ñaha xii ñáyiú nchaa tnúhu ní chídó tnùní ndíj Moisés. Te díu cue téé-áⁿ cùñaha-güedé xii dava-gá cue téé sá cáhni ñaha-güedé xii-í, te cuáha cuendá ñahá-güedé xii-í núu cuè téé ñá túú cùu cue téé isràél. ³⁴ Te cue téé-áⁿ cudíquí ndeé ñahá-güedé xii-í, te caniha-güedé ndíhi ñíi, te tíú díí ñahá-güedé, te cahni ñaha-güedé

xii-í dico nduu úní sá cùú-í te ndoto-í —càchí-gá xǎhaⁿ-gǎ xii-güedé.

Té Jàcobó ndíhi té Juàá càháⁿ ndàhú-güedé núu Jèsús sá càdá-gǎ ñⁿ sá cuíní-güedé (Mt. 20:20-28)

³⁵ Te cue déhe té Zebèdeú té Jàcobó ndíhi té Juàá ní quexìo-güedé núu Jèsús, te xǎhaⁿ-güedé xii-gá:

—Mèstrú, véxi-ndí càháⁿ ndàhú-ndí núu-n núu vá cündèe iní-n càda-n ñⁿ sá cuíní-ndí —càchí-güedé xǎhaⁿ-güedé xii-gá.

³⁶ Te Jèsús ní xícáⁿ tnúhú-gǎ núu-güedé, te xǎhaⁿ-gǎ:

—¿Ná cúú sǎ cuíní-ndó càda-í-í? —càchí-gá xǎhaⁿ-gǎ xii-güedé.

³⁷ Te ní xáhaⁿ-güedé xii-gá:

—Cuíní-ndí sá òré ná sǎá nduu cundecu-n núu táxí tnùní-n, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n —cachí-güedé xǎhaⁿ-güedé xii-gá.

³⁸ Te Jèsús ní xáhaⁿ-gǎ xii-güedé:

—Nchòhó, ñá túú cùnuni iní-ndó nàcuáa nduu sá xícáⁿ-ndó nùú-í. ¿Te náa cundee iní-ndó dándoho ñaha ñáyiú xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-áⁿ? —càchí-gá xǎhaⁿ-gǎ xii-güedé.

³⁹ Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —càchí-güedé xǎhaⁿ-güedé xii-gá.

Te Jèsús ní xáhaⁿ-gǎ xii-güedé:

—Ndáá sá cündèe iní-ndó ndòho-ndo nchaa nàcuáa ndoho-í, te cundee tùcu iní-ndó càhni ñahá-yu xii-ndo, chi yúhú cahni ñahá-yu xii-í. ⁴⁰ Dico sá dúcáⁿ cuíní-ndó sǎ ñⁿ-ndó cùnucóo-ndo xio cuhá-í te ñⁿ-ndo cùnucóo-ndo xio datni-í, te xǎáⁿ chi ñá díú yúhú tàú-í cachí-í te núu sá cúú cùnucóo-ndo àdi sá vǎ cúú cùnucóo-ndo, chi mee Tǎtá-í Dútú Ndiöxí cachí-gá te núu ná cúú ñáyiú nduu táhú cunucóo díñi-í dàvá-áⁿ —càchí-gá xǎhaⁿ-gǎ xii-güedé.

⁴¹ Te òré ní níhí ùxí-gá cue téé xica cuu ndíhi-gá tnúhu nàcuáa nduu sá cuíní té Jàcobó ndíhi ñaní-dé té Juàá, te ní cudééⁿ-güedé núu cuè téé úú-áⁿ. ⁴² Te Jèsús ní cana-gá nchaa cue téé xica cuu ndíhi-gá-áⁿ, te ní xáhaⁿ-gǎ xii-güedé:

—Nchòhó xìní-ndó sǎ cuè téé yìndaha ìíⁿ nacióⁿ quíde-güedé sǎ ìo cùnūu-güedé, te nchaa ðava-gá cue téé cùndihí-güedé tñáhá-güedé quíde-güedé sǎ ìo cùnūu-güedé. ⁴³ Dico nchòhó chí vá dúcáⁿ càda-ndo. Chí núu ðava-ndo cuìní-ndó cùnūu-ndo te xìní ñuhu-xì cunu cuechi núú tñáhá-ndó te vá cádá-ndó sǎ cùnūu-ndo. ⁴⁴ Te núu ðava-ndo cuìní-ndó quène cáva-ndo, te cuu-ndo dàtná cue ñáyiú ñá túú tñáhí dàñá quee núú chíúⁿ pàtróóⁿ-xì cunu cuechi núú tñáhá-ndó. ⁴⁵ Te yúhú Téé cùu ñaní tñáhá-ndó nchàa-ndo, chí ñá túú vèxi-í sǎ cùnú cuèchi ñáyiú núú-í, chí véxi-í sǎ cùnú cuèchi-í núú-yu. Te cuú-í ñuyíú-a cuèndá vǎi-yu cácu nihnu núú ùhú núú ndàhú — càchí-gá xǎhaⁿ-gǎ xii-güedé.

Jèsús quíde tǎtna-gá ìíⁿ téé cuàá nání-dě Bartimeú

(Mt. 20:29-34; Lc. 18:35-43)

⁴⁶ Te Jèsús ní quexìo-gá ñuú Jericó ndihí cue téé xìca cuu ndihí-gá, te ní yáha-gá ndihí-güedé ichi xití ñuú-áⁿ, te ío cuéhé ñáyiú nchìcúⁿ ñáhá xii-gá cuáháⁿ te ìíⁿ xio yuhu ìchi sǎ ñí quee xití ñuú-áⁿ núcòo ìíⁿ téé cuàá nání-dě Bartimeú, te tǎtá-dě nání-dě Tìmeú, te téé-áⁿ núcòo-dé yuhu ìchi-áⁿ xicáⁿ ndàhú-dé. ⁴⁷ Te téé-áⁿ ñí cutnùnì iní-dé sǎ Jèsús téé ñuú Nazàrét ñúhú-dé ichi, te ní ngüíta-dé níhi càháⁿ-dé, te xǎhaⁿ-dě xii-gá:

—Jèsús, ñaní tñáhá ndíi Dàvíí, cundàhú iní ñáhá xii-í! —càchí-dé xǎhaⁿ-dě xii-gá.

⁴⁸ Te vǎi ñáyiú tènaá ñáhǎ-yu xii-dé, te xǎhǎⁿ-yu sǎ ná càdí-dé yuhu-dé dico uuⁿ-gá níhi ní cáháⁿ-dé xǎhaⁿ-dě xii-gá:

—Jèsús, ñaní tñáhá ndíi Dàvíí cundàhú iní ñáhá xii-í! —càchí-dé xǎhaⁿ-dě xii-gá.

⁴⁹ Te Jèsús ní ngüíñí-gá te ní xǎhaⁿ-gǎ xii cue téé ndihí-gá:

—Chí cuǎnguaca téé cuàá-ǎⁿ can-deca-ndo-dě quixi iha —càchí-gá xǎhaⁿ-gǎ.

Te cue téé-áⁿ ñí xica-güedé cuǎnguaca-güedé téé cuàá-áⁿ, te òré ní quexìo-güedé núú-dě te ní xǎhaⁿ-güedé xii-dé:

—Ndacuíñí te vá ndihú-gá iní-n, na quíhíⁿ-ó chí càna ñaha Jesús xii-n —càchí-güedé xǎhaⁿ-güedé xii-dé.

⁵⁰ Te téé-áⁿ ñí xócání-dě dóo ndíxí-dě, te ndíhi-ni ní ndacuíñí-dé te ní xica-dé cuáháⁿ-dé núú Jèsús. ⁵¹ Te òré ní quexìo-dé

te ní xicáⁿ tñuhú-gǎ núú-dě, te xǎhaⁿ-gǎ xii-dé:

—¿Ná cuìní-n càda ñaha-í xii-n-í? —càchí-gá xǎhaⁿ-gǎ xii-dé.

Te téé cuàá-áⁿ ñí xǎhaⁿ-dě xii-gá:

—Mèstrú, cuìní-í cada tǎtna-n núú-í cuèndá cundehe-í —càchí-dé xǎhaⁿ-dě xii-gá.

⁵² Te Jèsús ní xǎhaⁿ-gǎ xii-dé:

—Cuanùhú vitna, chí sa ní ndúha núú-n chí ní sándáá iní-n Yǎ Ndióxi —càchí-gá xǎhaⁿ-gǎ xii-dé.

Te òré-ni-áⁿ ñí ndúha núú-dě te nchìcúⁿ-dé Jèsús cuáháⁿ.

11

Jèsús cuǎnguihu-gá ñuú Jerusalén

(Mt. 21:1-11; Lc. 19:28-40; Jn. 12:12-19)

¹ Te Jèsús ní cuyatni-gá ndihí cue téé xìca cuu ndihí-gá ñuú Bètaniá, ndihí ñuú Bètfaqé, te xíáⁿ cáá yùcu nani Olívú, te yatni víí-nǎ xíáⁿ cáá ñuú Jerusalén. Te Jèsús ní cana-gá úú-ni tñáhá cue téé xìca cuu ndihí-gá. ² Te ní xǎhaⁿ-gǎ xii-güedé:

—Chí cuáháⁿ ñuú cáá yàtni yacáⁿ, te òré quexìo-ndo yacáⁿ te naníhí-ndó ìíⁿ búrru ndètníⁿ-di, te vátá yòo ìíⁿ-gá codo ñàha xii-di, te nandaxi-ndo-di te candeca-ndo-di quixi.

³ Te núu yoo na càcáⁿ tñuhú núú-ndó ñá cuèndá nándaxi-ndo-di, te cúñaha-ndo sǎ yúhú Yaá xicá cùu ndihí-ndo xini ñuhu-í-di, te na yáha canehe chiuⁿ-í-di te ndíhi-ni nattendaha-í-di, duha cúñaha-ndo —càchí-gá xǎhaⁿ-gǎ xii-güedé.

⁴ Te cue téé-áⁿ ñí xica-güedé cuáháⁿ-güedé, te òré ní quexìo-güedé ñuú-áⁿ te ní naníhí-güedé ìíⁿ búrru ndètníⁿ-di ìíⁿ yutnu nihnu yatni ìíⁿ yuyehe vehe caa yatni yuhu ichi, te ní ngüíta-güedé nándaxi-güedé-di.

⁵ Te mei òré nándaxi-güedé-di ní quexìo ñáyiú xǎhǎⁿ-yu xii-güedé:

—¿Ná cuèndá nándaxi-ndo búrru-áⁿ-í? —càchí-yu xǎhǎⁿ-yu xii-güedé.

⁶ Te cue téé-áⁿ ñí xǎhaⁿ-güedé xii-yu nàcuáa ní xǎhaⁿ Jèsús cúñaha-güedé. Te sátá dúcáⁿ te ní dáñǎ-yu ndèca-güedé búrru-áⁿ cuáháⁿ núú ndécú Jèsús. ⁷ Te òré ní quexìo-güedé ndihí-di núú ndécú-gǎ, te ní sacáⁿ ndodo-güedé dóo-güedé sátá-di, ní ngódó ñàha Jesús xii-di. ⁸ Te ío cuéhé

ñáiyu ta sàcáⁿ-yu dóo-yu ichi cuáháⁿ-gá cuendá núú dǒo-yu-áⁿ yáha-gá ndihi quiti yòdo-gá, te davá-yu xèhndé-yu ndaha yùtnu ta sacáⁿ-yu cuáháⁿ.

⁹ Te nchaa ñáiyu yòdo nuu núú-gǎ ndihi nchaa ñáiyu nchìcúⁿ ndàa sátá-gǎ ní ngüíta-yu níhi càháⁿ-yu, te cǎchí-yu:

—¡Io càhnu cuu Yaá-a! ¡Te Yá Ndiǒxí ná chindee ñaha-gá, chi ñu-gǎ cúú-gǎ Yaá ní tendaha-gǎ véxi quide núú-gǎ! ¹⁰ ¡Te ñu-ni Yaá-á cúú-gǎ Yaá véxi quindaha ñaha xii-o datná ní xóo cada ndí Dáví! ¡Te ndéé nchaa sá ío andíu na cǎchí-xi sá ío càhnu cuu-gǎ! —duha cǎchí-yu.

¹¹ Te Jèsús ní quexìo-gǎ ñuú Jerusàlén, te cuánguìhu-gǎ xití veñúhu càhnu sá ío cùnuu, te ní xíndéhé vǎha-gǎ nchaa sá ndécú xití veñúhu-áⁿ. Te sátá dúcáⁿ te ní ndee-gǎ cuáháⁿ-gǎ ñuú Bètaniá ndihi ndi ùxúú cue téé xica cuu ndihi-gǎ chi sa ní cuaa.

Jèsús xǎhaⁿ-gǎ xii yutnu ngǔxí sá vǎ cúúⁿ-gǎ sávidí-xi (Mt. 21:18-19)

¹² Te nduu tnéé-áⁿ ñi quee Jèsús ñuú Bètaniá ndihi cue téé xica cuu ndihi-gǎ, te ichi ñùhu-gǎ ní xíhí-gǎ docó. ¹³ Te xica ñi xini-gǎ nútñí ñⁿ yutnu ngǔxí, te ní xica-gǎ cuándéhé-gǎ ñuu ndéé sávidí-xi te ñá túú ñá ndéé, chi mee-ni ndàha-xi ndéé chi ñá díú yóo sácundeé sávidí-xi. ¹⁴ Te Jèsús ní xáhaⁿ-gǎ xii yutnu ngǔxí-áⁿ:

—Vitna te vá yóo ñⁿ-gǎ caxi sávidí-n, chi vá cúúⁿ-gǎ —cǎchí-gǎ xǎhaⁿ-gǎ xii yutnu ngǔxí-áⁿ.

Te cue téé xica cuu ndihi-gǎ ní tecú dóho-güedé nàcuáa ní xáhaⁿ-gǎ xii yutnu ngǔxí-áⁿ.

Jèsús ñá túú tnàhá iní-gǎ nàcuáa quide ñáiyu xití veñúhu (Mt. 21:12-17; Lc. 19:45-48; Jn. 2:13-22)

¹⁵ Te Jèsús ní quexìo tucu-gǎ ndihi cue téé xica cuu ndihi-gǎ ñuú Jerusàlén, te cuánguìhu tucu-gǎ xití veñúhu càhnu sá ío cùnuu, te xití veñúhu-áⁿ xíndecu cue ñáiyu quide ndáhú nádíco-yu, ndihi cue ñáiyu xísaaⁿ. Te nchaaⁿ-yu ní queñuhu ñaha Jèsús xii-yu quehé, te ní dándüá-gǎ mèsá cue ñáiyu dàma díhúⁿ, ndihi nchaa xilé sácóo

nchihí cue ñáiyu díco lómá xíndecu xití veñúhu-áⁿ. ¹⁶ Te ñá túú tnàhí-gǎ ní dàña-gǎ yáha cue ñáiyu ndihi nchaa sá nchídó-yu ichi xití veñúhu-áⁿ. ¹⁷ Te ní xáhaⁿ-gǎ xii-yu:

—Núú tütú Yá Ndiǒxí càháⁿ-xi nàcuáa ní càháⁿ-gǎ, te ní cǎchí-gǎ: “Vehe-í cúú-xí vèhe núú tàcá ñáiyu níhí ñuyíú càháⁿ ndihi ñàhá-yu xii-í”, duha ní càháⁿ-gǎ cǎchí-xi núú tütú-gǎ. Díco nchòhó quidé-ndó vèhe-gǎ vehe ñadúhú —cǎchí-gǎ xǎhaⁿ-gǎ xii-yu.

¹⁸ Te nchaa dútú cùnuu, ndihi nchaa cue téé dàcuaha ñaha xii-yu nchaa tnúhu ní chídó tnùní ndí Moisés ní tecú dóho-güedé nàcuáa ní càháⁿ-gǎ te ní ngüíta-güedé ndúcú-güedé nàcuáa cada-güedé cahni ñaha-güedé xii-gǎ, chi yùhú-güedé sá ío cunuu-gǎ, te ducaⁿ chi nchaa ñáiyu ío cùñúhu-yu nchaa tnúhu càháⁿ-gǎ. ¹⁹ Te òré sa ní cuaa cuí-ñá, te ní quee tucu Jèsús ndihi cue téé xica cuu ndihi-gǎ ñuú Jerusàlén cuáháⁿ-gǎ ndihi-güedé ingá xichi.

Ní yíchí yutnu ngǔxí (Mt. 21:20-22)

²⁰ Te nduu tnéé nehé-ni ní yáha tucu Jèsús ndihi cue téé xica cuu ndihi-gǎ núú níhnú yùtnu ngǔxí, te ní xini-güedé sa ní yíchí níhí ndéé yóho-xi. ²¹ Te té Pèlú ní ndacu iní-dé nàcuáa ní xáhaⁿ Jèsús xii yutnu ngǔxí-áⁿ, te ní xáhaⁿ-dè xii-gǎ:

—Mèstrú, cundehe ñá ní yíchí yutnu ngǔxí sá ñi xáhaⁿ-n sǎ vǎ cúúⁿ-gǎ sávidí-xi —cǎchí-dé xǎhaⁿ-dè xii-gǎ.

²² Te Jèsús ní xáhaⁿ-gǎ xii-güedé:

—Quindáa ndisa iní-ndó Yá Ndiǒxí.

²³ Te na cǎchí tnúhu ndáa-í xii-ndo sǎ ñuu nchòhó cúñaha-ndo xii tìndúú-a xocuíñí-xi núú ndécú-xí, te quíhíⁿ-xi quée-xi xití làmár. Te ñu ducaⁿ càda-xi te núu nchòhó vá cání ñⁿ caní úú iní-ndó, te quindáa iní-ndó sǎ dúcáⁿ càda-xi. ²⁴ Te xǎⁿ ñuu cǎchí tnúhu-í xii-ndo sǎ nchaa sá ná càcáⁿ-ndó ñuu Yá Ndiǒxí òré càháⁿ ndihi-ndo-gǎ, te taxi-gǎ te núu nchòhó sàndáa ndisa iní-ndó sǎ táxi-gǎ sá xicáⁿ-ndó ñuu-gǎ. ²⁵ Te òré càháⁿ ndihi-ndo Yá Ndiǒxí te dandácu iní-ndó te núu ndècu ñáiyu ñá túú cùu váha iní ñàhá xii-ndo, te cada càhnu iní-ndó-yu cuendá ducaⁿ càda cahnu iní ñàhá Tátá-ndó Dütú Ndiǒxí Yaá ndécú andíu xii-ndo cuendá nchaa sá ñá túú vǎha quide-ndo. ²⁶ Díco

núu nchòhó vá cádá càhnu iní-ndó sá quidé ñàha tñaha ñáyi-ndo xii-ndo, te ní Tātá-ndó Dütú Ndiöxí vá cádá càhnu iní ñáhá-gã xii-ndo cuendá nchaa sá ñà túú vâha quide-ndo —cachí-gá xâhaⁿ-gã xii-güedé.

*Jèsús ndécú ndihí-gá tnúhu ndee iní
(Mt. 21:23-27; Lc. 20:1-8)*

²⁷ Te Jèsús ní ndexìo tucu-gá ñúu Jerusálén ndihí cue téé xica cuu ndihí-gá, te cuánguïhu tucu-gá xití veñúhu càhnu sá ïo cùnunu ndihí-güedé. Te xití veñúhu-án yíhí-gã ní quexìo cue dútú cùnùu ndihí cue téé dàcuaha ñaha xii ñáyi nchaa tnúhu ní chídó tnùní ndí Moisés, ndihí cue téé cùu sacuéhé núú ñáyi israhél. ²⁸ Te xâhaⁿ-güedé xii-gá:

—Cuíní-ndí cachí tnúhu-n xii-ndí nása ndùu tnúhu ndee iní ndécú ndihí-n núu quide-n nándí sá quidé-n, ¿te yoo ducaⁿ ní taxi tnúhu ndee iní-án xii-n-í? —cachí-güedé xâhaⁿ-güedé xii-gá.

²⁹ Te Jèsús ní xâhaⁿ-gã xii-güedé:

—Yúhú tnàhá-í cuíní-í cácaⁿ tnúhu-í ñⁿ sá cácaⁿ tnúhu-í núú-ndó te núu na cachí tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í. ³⁰ Te chí cachí tnúhu xii-í yoo ní táuchíúⁿ ní dácuándùte ndí Juáá ñáyi, ¿Yá Ndiöxí áⁿ cuè téé ñuyú-a ní táuchíúⁿ dùcaⁿ ní quide ndí? Te chí cachí tnúhu —cachí-gá xâhaⁿ-gã xii-güedé.

³¹ Te ní ngüíta-güedé xñnàha-güedé:

—¿Nása cúñaha-o? Chi núu na cúñaha-o sá Yá Ndiöxí ní táuchíúⁿ dùcaⁿ ní quide ndí Juáá ñá, te quesaha-dé: “¿Ná cuendá ñá túú ní sàndáá iní-ndó tnúhu ní cáháⁿ ndí vâⁿ?”; quesaha-dé. ³² Te ní vâ cúú cúñaha-o sá cuè ñáyi ñuyú-a ní táuchíúⁿ dùcaⁿ ní quide ndí Juáá —cachí-güedé xñnàha-güedé.

Te ducaⁿ ní xítñaha-güedé chí ñá túú ní cùtnuní iní-güedé nása cúñaha-güedé xii-gá, chí xiyùhú-güedé cue ñáyi chí nchaa ñáyi-án ní cutnùní ndáá iní-yu sá Yá Ndiöxí ní táuchíúⁿ-gã ducaⁿ ní quide ndí Juáá.

³³ Te ní xâhaⁿ-güedé xii Jèsús:

—Ñá túú xíní-ndí yoo ní táuchíúⁿ dùcaⁿ ní dácuándùte ndí Juáá ñáyi —cachí-güedé xâhaⁿ-güedé xii-gá.

Te Jèsús ní xâhaⁿ-gã xii-güedé:

—Te núu ducaⁿ te ní yùhú vá cachí tnúhu-í xii-ndo yòo ní taxi tnúhu ndee iní duha quide-í —cachí-gá xâhaⁿ-gã xii-güedé.

12

*Cuendá cue téé cuihna iní-xi
(Mt. 21:33-46; Lc. 20:9-19)*

¹ Te Jèsús ní ngüíta-gá cání-gã ñⁿ cuendú núú ñáyi nàcuáa tecú tnùní-yu tnúhu-gá, te xâhaⁿ-gã xii-yu:

—Ñⁿ téé ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vâ cúú dàñú, te ní cadúha-dé núú quíhí-dé ndéhé yoho yaha stilé-án òré ná cùu, te ní cadúha-dé ñⁿ xító dùcúⁿ núú cáundòdo cue téé coto yoho yaha stilé-án.

“Te ní sáá ñⁿ nduu quèe-dé quíngaca cuu xica-dé vâi nduu, te ní dándòo ndaha-dé sá ní xitu-dé-án xii ñⁿ úú cue téé cáháⁿ ndihí-dé cuendá cada chiⁿ-güedé, te ní ndatnúhu-güedé sá òré ná cúú te cuu cuendá dava-güedé te ducaⁿ te ní quee-dé cuáhán-dé. ² Te sátá ñⁿ sáá nduu ñⁿ cuu ndéhé yoho yaha stilé sá ní xitu-dé-án, te ní xâhaⁿ-dé xii ñⁿ téé xínu cuechi núú-dé: “Cuáhán cácaⁿ-n sá cúú cuendá-í núú cuè téé ní dándòo ndàha-í nchaa yoho yaha stilé sá ní xitu-í-án”, cachí-dé xâhaⁿ-dé. Te téé xínu cuechi-án ñⁿ xica-dé cuáhán-dé. ³ Te cue téé-án ní tñⁿ-güedé téé xínu cuechi-án, te ní caniha-güedé xii-dé, te dàtnùní ní nacuícúⁿ ñáhá-güedé, te ñá túú tnàhí ná ní sãñaha-güedé. ⁴ Te téé cùu xítóhó yoho yaha stilé-án ñⁿ tendaha tùcu-dé ñngá téé xínu cuechi núú-dé cuáhán-dé. Te òré ní quexìo téé xínu cuechi-án te cue téé-án ñⁿ sáha ñaha-güedé yúú xii-dé, te ní táhú-güedé díquí-dé, te ní xícuèhé ñáhá-güedé xii-dé. ⁵ Te téé cùu xítóhó nchaa yoho yaha stilé-án ñⁿ tendaha tùcu-dé ñngá téé xínu cuechi núú-dé cuáhán-dé núú cuè téé-án, dico téé-án òré ní quexìo-dé te ní sahní ñaha-güedé xii-dé. Te téé cùu xítóhó nchaa yoho yaha stilé-án ñⁿ tendaha-dé vâi-gá cue téé xínu cuechi núú-dé cuáhán ngácán-güedé sá cúú cuendá-dé ní cùu dico diu-ni ducaⁿ ñⁿ quide ñaha tùcu cue téé ndéé nchaa yoho yaha stilé-án xii-güedé, chí dava-güedé ní caniha-güedé te dava-güedé ní sahní ñaha-güedé.

6 'Te téé cùu xítóhó nchaa yoho yàha stilé-án ndécú ìndii-ná téé tendaha-dě quíhíⁿ núú cuè téé ní dándóo ndaha-dě sá nǐ xítu-dé-án, te téé tendaha-dě-án cúú-dě déhe ducúⁿ-dé, te ío cùu iní ñáhá-dě. Te ní sani iní-dé: “Váha-gá nǔu tendaha-í déhe-í-a núhú-dé, chi òré quini ñáhá-güedě xii-dé te cànehe-güedé sá yíñùhu núú-dě”, duha ní sani iní-dé. Te ducaⁿ te ní xáhaⁿ-dě xii déhe-dé-án sá núhú-dé, te téé-án cuánuhú-dé cuáháⁿ ngácáⁿ-dé sá cúú cuendá tátá-dé núú cuè téé-án. 7 Dico òré ní xiní cue téé quide chiuⁿ-án dēhe téé cùu xítóhó nchaa yoho yàha stilé-án, te ní xítnáha-güedé: “Téé-án téé véxi nduu táhú ñuhu-a ndihí sá cáá núú-xi, dico cahni-o-dě te mee-o ndùu táhú-ó sá ndúú táhú-dě”, duha ní xítnáha-güedé. 8 Te ní tñi-güedé téé-án, te ní sahani ñaha-güedě, te ní dáquéne-güedě yiqui cùñú-dé ìⁿ xio yuhu ñuhu núú cáá yòho yaha stilé-án —duha cuáháⁿ cuendú ní cani Jèsús núú-yu.

9 Te Jèsús ní xáhaⁿ tùcu-gá xii-yu:

—¿Te nchòhó sa cùtnuní iní-ndó nàcuáa cada xítóhó ñuhu-án ãⁿ? Chi núhú-dé te cahni-dé cue téé-án te dándóo ndaha-dě ñuhu-dé xii cue téé cùtnuní iní-dé cada ndáá —càchí-gá xáhaⁿ-gá xii-yu.

10 Te xáhaⁿ tùcu-gá xii-yu:

—Te nchòhó, náa ñá túú dàcuaha-ndo núú tütú Yá Ndiõxí núú càchí-xi: Yúú sá nǐ dáquéé tǐhú cue téé dàcaa vehe, ní cuu-xi yúú cúnùu vitna.

11 Chi mee Yá Ndiõxí ducaⁿ nǐ cachí-gá cundu, te cùu-xi ìⁿ sá ío cùñúhu-o vitna. Duha càchí-xi núú tütú-gá —càchí Jèsús xáhaⁿ-gá xii-yu.

12 Te cue téé ní xíndedóho nàcuáa ndùu tnúhu ní cáháⁿ-gá ní cuini-güedé tñi ñaha-güedě xii-gá ní cùu, chi ní cutnùní iní-güedé sá cuendá-güedé ní cáháⁿ-gá, dico ní yuhú-güedé tñi ñaha-güedě xii-gá cuendá sá ío vài ñáiyu, te ná ío ná cada ñáhá-yu xii-güedé ní sani iní-güedé, te ní xica-güedé cuáháⁿ-güedé.

Cuendá impuèstú

(Mt. 22:15-22; Lc. 20:20-26)

13 Te sátá nǐ xica-güedé cuáháⁿ-güedé, te ní tendaha-güedě ìⁿ úú cue téé cùu fariséu, ndihí ìⁿ úú cue téé cùndihí té Hèrodés cuáháⁿ-güedé núú ndécú Jèsús ndúcú-güedě

nàcuáa cada-güedé daticánuu ñaha-güedě xii-gá núú tnúhu càháⁿ-gá. 14 Te cue téé-án nǐ quexio-güedé núú Jèsús, te xáhaⁿ-güedě xii-gá:

—Mèstrú, cùtnuní iní-ndí sá ío ndáá càháⁿ-n, te ñá túú quide cuendá-n nàcuáa càháⁿ ñáiyu, te cuèi ndédani càá-yu ìⁿ-ni càháⁿ-n ndihí-yu chi ñá túú quide cuendá-n cuèi ná ñáiyu cùú-yu, te càháⁿ ndáá-n nàcuáa càháⁿ Yá Ndiõxí cundecu-o ñuyíú-a. Te cachí tnúhu xii-ndí nǔu váha-ni quide-ndí sá chǎhu-ndí té Cèsár téé ío cùnuu cuendá impuèstú ãⁿ ñáhá —càchí-güedé xáhaⁿ-güedě xii-gá.

15 Dico Jèsús ní cutnùní iní-gá sá xító ndèé ñáhá-güedě xii-gá, núú ní xáhaⁿ-gá xii-güedé:

—¿Ná cuendá ducaⁿ xító ndeé ñáhá-ndó xii-í? Chí dánèhé ñáhá xii-í ìⁿ díhúⁿ sá chǎhu-ndo cuendá impuèstú te núú nása càa —cachí-gá xáhaⁿ-gá xii-güedé.

16 Te cue téé-án nǐ dánèhé ñáhá-güedě xii-gá ìⁿ díhúⁿ sá chǎhu-güedé cuendá impuèstú. Te Jèsús ní xáhaⁿ-gá xii-güedé:

—Chí càchí tnúhu xii-í nǔu yoo núú-xi ndèé ndihí yoo diu-xi ndeé —càchí-gá xáhaⁿ-gá xii-güedé.

Te ní xáhaⁿ-güedě xii-gá:

—Núú tē Cèsár ndèé ndihí diu-dé —càchí-güedé xáhaⁿ-güedě xii-gá.

17 Te Jèsús ní xáhaⁿ-gá xii-güedé:

—Te núu ducaⁿ te chí nàcuáha té Cèsár sá cúú cuendá-dé, te sá cúú cuendá méé Yá Ndiõxí te xiáⁿ nàcuáha-ndo-gá —càchí-gá xáhaⁿ-gá xii-güedé.

Te cue téé-án ío ní cuñúhu-güedé sá dúcáⁿ nǐ cáháⁿ-gá.

Cuendá cue ñáiyu ndoto

(Mt. 22:23-33; Lc. 20:27-40)

18 Te sátá dúcáⁿ te ní quexio ìⁿ úú cue téé cùu saducéu núú ndécú Jèsús, te cue téé-án ñá túú sàndáá iní-güedé sá ndótó cuè ñáiyu ní xihí, te ní xáhaⁿ-güedě xii-gá:

19 —Mèstrú, ndí Moisés càchí ndí núú tütú ndí ndècu vitna sá nǔu ìⁿ téé na cùú-dé te quendóo ñadihí-dé, te núu ñá túú ní xóo déhe-dé ndihí ñadihí-dé-án, te téé cùu ñaní-dé naqueheⁿ-dé ñaha ní quendóo quèé-án cuendá coo déhe-dé ndihí-aⁿ cuendá téé ní xihí-án. 20 Te ní

xíndecu úsá tnàhá cue tée mee-ni ndí ñaní-güedé. Te tée díhna ní níhí ñadìhí-dé, te ñá túú ní cùdí-dé cundecu-dé chi ní xíhí-dé, te ni ñá déhe-dé ñá túú ní xõ ndíhi ñadìhí-dé. ²¹ Te tée cùu uú ní naqueheⁿ-dé ñaha ní quendóo quèé-áⁿ, dico ní xíhí tucu-dé, te ni ñá tucu déhe-dé ñá túú ní xõ ndíhi ñaha-áⁿ. Te ñá ducaⁿ ñá xíhí tée cùu uní. ²² Te ní xínu ndí ùsá-güedé ní cándeca ñaha-güedé xii ñaha-áⁿ, dico ni ñá-güedé ñá túú ní xõ déhe-güedé ndíhi-aⁿ, te ní ndíhi-güedé ní xíhí te ndéé núú ñá ndíhi-ná ní xíhí tnàhá ñadìhí-áⁿ. ²³ Te na sàá nduu ndòto-güedé ndíhi ñaha-áⁿ, ¿te ndèdàcàa-güedé ñadìhí-güedé cuu-aⁿ-i? Chi ndí ùsá-güedé ní cándeca ñaha-güedé xii-aⁿ —càchí-güedé xàhaⁿ-güedé xii-gá.

²⁴ Te Jèsús ní xàhaⁿ-gá xii-güedé:

—Ní xíta nchòhó tnúhu càháⁿ-ndó, chi ñá túú xíní-ndó nàcuáa càháⁿ Yá Ndiõxí núú tütú-gá, te ni ñá túú xíní-ndó sá díú-gá ndácú-gá quídé-gá nchaandi túhú sá vâha. ²⁵ Te na càchí tnúhu-í xii-ndo sá òré ná sàá nduu ndòto nchaa ñáyiú ní xíhí, te dàvá-áⁿ vâ yõ-gá dasaⁿ dèhe yoco-xi chi vá yõ-gá candeca tnàha, chi na ndòtó-yu te cuu-ná-yu dàtná cue espíritú xínú cuèchi núú Yá Ndiõxí. ²⁶ Te núú nchòhó cuèni-ndó càháⁿ-ndó cuèndá nchaa ñáyiú ndoto, te díhna-gá dacuàha-ndo nacuáa ní chídó tnùní ndíi Moisés núú tütú ndíi ni cùu. Chi ñá núú tütú ndíi càháⁿ-xi nàcuáa ní xàhaⁿ Yá Ndiõxí xii ndíi cùtnàhá ní càháⁿ ndíhi ñaha-gá ñá xichi núú níhnú tnùtaú nchìcúⁿ ñuhú. Te duha ní xàhaⁿ-gá xii ndíi: “Yúhú cùu-í Ndiõxí tè Àbrahám, ndíhi té Isàác, ndíhi té Jàcób”, duha ní xàhaⁿ Yá Ndiõxí xii ndíi càchí-xi núú tütú ndíi. ²⁷ Te Yá Ndiõxí ñá túú cùu-gá Ndiõxí cue ñáyiú ní xíhí, chi cùu-gá Ndiõxí cue ñáyiú xíndecu vívú, núú xíáⁿ nchòhó ío xíta-ndo tnúhu càháⁿ-ndó. Te sá dúcáⁿ ñá càháⁿ-gá cuèndá cue téé-áⁿ, te xíáⁿ cùtnùní sá cuèi ní xíhí-güedé sá cùú-xí tnàha ñáyiú-güedé, dico ndécu vívú-güedé sá cùú-xí-gá —càchí-gá xàhaⁿ-gá xii-güedé.

Tnúhu sá ío-gá cúnùu

(Mt. 22:34-40)

²⁸ Te tnàhá ñá téé dàcuaha ñaha xii ñáyiú nchaa tnúhu ní chídó tnùní ndíi Moisés ndèdòho-dé nchaa tnúhu càháⁿ Jèsús ndíhi cue téé cùu saducéú-áⁿ, te ndèdòho-dé sá

sùuní vâha ñíhí-gá tnúhu nàdanchocáva-gá. Te ní sàndehe yatni-dé núú-gá, te xàhaⁿ-dè xii-gá:

—Cachí tnúhu xii-í ndèdàcàa tnúhu sá ñá càháⁿ Yá Ndiõxí ío-gá cúnùu cuu díhna —càchí-dé xàhaⁿ-dè xii-gá.

²⁹ Te Jèsús ní xàhaⁿ-gá xii-dé:

—Duha càháⁿ tnúhu sá ío-gá cúnùu: “Nchòhó ñáyiú isràèl ío vâha chí cùndèdòho tnúhu-a. ñá ndíi díi-ni Yá Ndiõxí ndécú, te ñá ducaⁿ cùú-gá Ndiõxí-ó. ³⁰ Te cuu iní-ndó Dütú Ndiõxí Yá cùú Ndiõxí-ndó ñá yuhu ñá iní-ndó, te cani iní-ndó càda-ndo datná cuèni méé-gá, te mee-ni tnúhu vâha cani iní-ndó cuèndá cuu víi cuu vâha-ndo núú-gá, te coo iní-ndó càda-ndo nacuáa cuu vâha iní-gá”, duha càháⁿ tnúhu sá ío-gá cúnùu. ³¹ Te duha càháⁿ tucu ñngá tnúhu cùu uú sá ío cúnùu: “Cuu iní-ndó tnàha ñáyiú-ndo dàtná cùú iní-ndó mèe-ndo”, duha càháⁿ tnúhu cùu uú-áⁿ. Te uú duha-ni tnúhu-a cùu-xi tnúhu sá ío-gá cúnùu —cachí-gá xàhaⁿ-gá xii-dé.

³² Te téé dàcuaha ñaha xii ñáyiú nchaa tnúhu ní chídó tnùní ndíi Moisés ní xàhaⁿ-dè xii-gá:

—Mèstrú, vâha-ni càháⁿ-n chi ndáá sá ñá ndíi-ni Yá Ndiõxí ndécú, te ñá túú-gá ndèé ndécú ñngá ndiõxí. ³³ Te dàtná ní cachí-n sá ñá yuhu ñá iní-ó cùu iní-ó Yá Ndiõxí, te cani iní-ó càda-o nacuáa cuu víi cuu vâha iní-gá te ío víi ío vâha cuu iní-ó dàtná cuèni méé-gá, te coo iní-ó càda-o nacuáa cuu vâha iní-gá, te cuu iní-ó cuè tnàha ñáyiú-o dàtná cùú iní-ó mèe-o. Te nchaa xíáⁿ ío-gá xíní ñáhu-xi cada-o dacúxí sá cuàñaha-o quèti cahni-güedé te cáyú-di nduu táhú ñáhá Yá Ndiõxí, ndíhi dàcúxí nchàa dava-gá sá sáñaha-o ndùu táhú-gá —càchí-dé xàhaⁿ-dè xii-gá.

³⁴ Te sá dúcáⁿ ío vâha ndùu tnúhu ní càháⁿ téé-áⁿ, núú ní xàhaⁿ Jèsús xii-dé:

—Luha-ná cùmáñí xii-n te ndíhu ndaha ñaha Yá Ndiõxí —càchí-gá xàhaⁿ-gá xii-dé.

Te sá dúcáⁿ ñá xàhaⁿ-gá xii téé-áⁿ, núú vá yõ ñá-gá ní cùyíi nágá tnúhu nducu tnúhu-yu núú-gá.

Yoo cùu Xítóhó Jesucristú

(Mt. 22:41-46; Lc. 20:41-44)

³⁵ Te Jèsús yíhí-gã xití veñúhu càhnu sá ïo cùnunu danehé-gã ñáyiu, te xãhaⁿ-gã xií-yu:

—Cue tée dàcuaha ñaha xii ñáyiu nchaa tnúhu ní chídó tnùní ndíi Moisés càchí-güedé sá Crístú Yaá tendaha Yã Ndiöxí quixi ñuyú-a cùu-gã déhe ndíi Dàvií, te ndíi-áⁿ ñi cunaha vîhi ní xihí ndíi. ¿Te ná cuendá ducaⁿ càháⁿ-güedé? ³⁶ Te mee ndíi Dàvií-áⁿ ñi dácáhu ínî ñáhá Espíritú Yã Ndiöxí xii ndíi nàcuáa cáháⁿ ndíi, te duha ní cachí ndíi:

Dútú Ndiöxí ní xáhaⁿ-gã xii Yaá cúu Xítóhó-í: “Ngóo xio cùha-í,

te yúhú cada-í te nchaa sá cúu ùhú ínî ñáhá xii-n canehe-xi sá yíñúhu núu-n.”

Duha ní xáhaⁿ Dútú Ndiöxí xii Yaá cúu Xítóhó-í.

Duha ní cachí ndíi. ³⁷ ¿Te nása cùu Crístú déhe ndíi Dàvií, te mee ndíi ní cachí ndíi sá cúu-gã Xítóhó ndíi? —càchí Jèsús xáhaⁿ-gã xií-yu.

Te ío cuéhé ñáyiu ní xíndedóho nchaa tnúhu ní cáháⁿ-gã, te ío ní cudíi ínî-yu ní xíndedóho ñáhá-yu xii-gã.

Jèsús càháⁿ-gã cuendá cue tée dàcuaha ñaha xii ñáyiu nchaa tnúhu ní chídó tnùní ndíi Moisés

(Mt. 23:1-36; Lc. 11:37-54; 20:45-47)

³⁸ Te òré dánèhé ñáhá Jèsús xii cue ñáyiu, te xáhaⁿ-gã xií-yu:

—Cada cuendá-ndó vã cadá-ndó dàtná quidé cuè tée dàcuaha ñaha xii ñáyiu nchaa tnúhu ní chídó tnùní ndíi Moisés, chi cue tée-áⁿ tnàhá ínî-güedé cuihnu-güedé dóo nání sã sácuihnu cue tée cùnunu-gã te cuíní-güedé sá méé-ní ndíi tnúhu yíñúhu cáháⁿ ndíi ñaha ñáyiu xii-güedé nchaa núu xíca cùu-güedé. ³⁹ Te nàcáxi-güedé xilé sácóo nchíhi cue tée cùnunu-gã xití veñúhu sácóo nchíhi-güedé. Te ducaⁿ-ni quíde-güedé cuèi òré quíhu-güedé mèsá caxi-güedé òré ndécú-güedé ñiⁿ vico, chi mee-ni núu sácóo cue tée cùnunu cuíní-güedé coo-güedé. ⁴⁰ Te quèndeé-güedé vehe nchaa ñáyiu quèé, te ío naha càháⁿ ndíi-güedé Yã Ndiöxí dándahú-güedé méé-güedé sá ïo quíde ndáá-güedé cuendá sá cuíní-güedé cáháⁿ váha ñáyiu cuendá-güedé. Te sá dúcáⁿ quíde-güedé te ío-gã ndoho-güedé

núu ùhú núu ndàhú dàcúxí dàva-gã ñáyiu —càchí-gã xáhaⁿ-gã xií-yu.

Díhúⁿ nduu táhú Yã Ndiöxí ní dáquëe ñiⁿ ñaha ndàhú ñaha quèé

(Lc. 21:1-4)

⁴¹ Te núcóo Jèsús xití veñúhu yatni núu ndécú àlcanciá te ndèhe-gã xídáquëe ñáyiu díhúⁿ xití àlcanciá-áⁿ, te tnàhá cue ñáyiu cuica xídáquëe-yu vãi díhúⁿ. ⁴² Te ní quexìo ñiⁿ ñaha ndahú ñaha quèé, te ndèhe-gã ní dáquëe-aⁿ úu tnàhá díhúⁿ còbrí xití àlcanciá, te díhúⁿ-ãⁿ ïo sacú yáhu-xi. ⁴³ Te Jèsús ní cana-gã cue tée xica cuu ndíhi-gã, te ní xáhaⁿ-gã xii-güedé:

—Na càchí tnúhu ndáá-í xii-ndo sã ñaha ndahú ñaha quèé-a ío-gã nándíhi díhúⁿ ñi dáquëe-aⁿ xití àlcanciá dàcúxí díhúⁿ ñi dáquëe dàva-gã-yu. ⁴⁴ Chi nchaa ñáyiu-áⁿ ñi dáquëe-yu mee-nã díhúⁿ sã ñi quendóo-ná, dico ñaha quèé-a cuèi ndàhú-aⁿ dico ní dáquëe-aⁿ ñihí díhúⁿ sã cuááⁿ sã cáxi-áⁿ ní cùu —cachí-gã xáhaⁿ-gã xii-güedé.

13

Jèsús càchí-gã sá ngóyó veñúhu

(Mt. 24:1-2; Lc. 21:5-6)

¹ Te òré ní ndee Jèsús xití veñúhu càhnu sá ïo cùnunu, te ñiⁿ tée xica cuu ndíhi-gã ní xáhaⁿ-dè xii-gã:

—¡Mèstrú, cundehe nã ío vii ní sáa veñúhu-aⁿ ndíhi nchaa vehe nèhe tnaha ndíhi-xi, te ío vii ndãa nchaa yúu yíhí! —càchí-dé xáhaⁿ-dè xii-gã.

² Te Jèsús ní xáhaⁿ-gã xii-dé:

—Nchaa nàcuáa càa nchaa vehe sá cúñúhu-n-a vîtna sáa nduu te vá cùndùu-gã-xi dàtná cáá-xí vîtna, chi ní ñiⁿ-gã yúu vã códo nchíhi tnaha-xi, chi ndíhi ngoyo —càchí-gã xáhaⁿ-gã xii-dé.

Nàcuáa cada-xi nduu ta cùyatni naa ñuyúu

(Mt. 24:3-28; Lc. 21:7-24; 17:22-24)

³ Te Jèsús ní xica-gã ndíhi cue tée xica cuu ndíhi-gã cuáháⁿ ndíhi ñaha-gã xii-güedé yucu nàni Olívú, te yucu Olívú-áⁿ túu ndáa núu cáa veñúhu càhnu sá ïo cùnunu. Te Jèsús ní quexìo-gã ndíhi-güedé yucu Olívú-áⁿ, te xíáⁿ ñi ngóo-gã te núu núcóo-gã-áⁿ ñi sáháⁿ té Pélú ndíhi té Jàcobó ndíhi té Juáa ndíhi té Ndríxi, te dayuhu ñi xáhaⁿ-güedé xii-gã:

4 —Cuìní-ndí cachí tnúhu-n nă nduu dùcaⁿ cada-xi ngoyo veñúhu càhnu sá ìo cùnuu, àdi nándi cùu sá cáda-xí cuèndá cutnùnì iní-ndí sá sà ta cuyatni nduu ducaⁿ cada-xi —cachí-güedé xăhaⁿ-güedě xii-gá.

5 Te Jèsús ní xăhaⁿ-gă xii-güedé:

—Ío quihi iní-ndó cùndecu-ndo cuendá sá vă yôo dandàhú ñáhá xii-ndo. 6 Chi ío cuéhé cue tée coo ñuyíú te danàni-güedé méé-güedě dâtná nánì-í, te cachí-güedé: “Yúhú cùu-í Crìstú Yaá ní tendaha Yă Ndiôxí véxi ñuyíú-a”, duha cachí-güedé. Te sá dúcáⁿ cáháⁿ-güedé te ío vâi ñáyiú dandàhú-güedé.

7 Te òré ná ñihí-ndó tnúhu sá nàá-güedé nděni ní cuu, te vă yùhú-ndó chi dacuítí sá dúcáⁿ càda-xi, dico vátá sàá-gá nduu nàa ñuyíú òré ducaⁿ càda-xi. 8 Chi cue tée ìⁿ nacióⁿ nàá-güedé ndihi cue tée ingá nacióⁿ, te titní ñuú ngúíta-güedé nàá-güedé, te titní xichi ñuyíú ñihi vihi tnáa, te titní tucu xichi ñuyíú coo tnamá, te ío-gá cuéhé să yăha ñáyiú. Te nchaa sá dúcáⁿ càda-xi-áⁿ cúu-xí tnúndòho sá vítná văha văha quèsaha-xi sácúú-xí cuè ñáyiú ndècu ñuyíú-a.

9 ’Dico nchòhó ío quihi iní-ndó cùndecu-ndo, chi nchaa ñáyiú na cùu úhú iní ñáhá xii-ndo cuáha cuèndá ñáhă-yu xii dava-ndo nùú cuè tée cùchiuⁿ, te candeca ñaha-güedě xii-ndo quihíⁿ xití veñúhu-güedé, te yàcáⁿ caniha-güedě xii-ndo. Te quihíⁿ-ndó nùú cuè tée yìndaha nacióⁿ àdi nùú dâva-gá cue tée cùnuu sá cuèndá-í, te nchòhó ñihí-ndó nàcuáa cada-ndo cáháⁿ văha-ndo cuèndá-í nùú-güedé. 10 Te cùmání-gă sáa nduu nàa ñuyíú-a te sa cuténuu tnúhu-í ni càa xico ñuyíú-a, te tnúhu-áⁿ cáháⁿ-xi nàcuáa naníhí tăhú ñáyiú. 11 Te òré ná càndecă ñaha ñáyiú xii-ndo quihíⁿ nùú cuè tée cùchiuⁿ cuáha cuèndá ñáhă-yu, te òré vátá sàá-gá-ndó nùú-güedě te vă cánì iní-ndó nùu năsa cunduu tnúhu cúñaha-ndo xii-güedé. Chi òré-nă te Yă Ndiôxí dacàhu iní ñáhă-gă xii-ndo năsa cunduu tnúhu cúñaha-ndo xii-güedé, te ñu-ni tnúhu sá dacàhu iní ñáhă-gă-áⁿ cùñaha-ndo xii-güedé. Te ñă díú mée-ndo cáháⁿ-ndó chi Espiritú Yă Ndiôxí cáháⁿ-xi yuhu-ndo. 12 Te dava cue tée

cuáha cuèndá-güedé ñaní-güedé nùú cuè tée cùchiuⁿ cuèndá cahni ñaha-güedě. Te dava cue tée cùu tátá ñu-ni ducaⁿ càda-güedé cuáha cuèndá-güedé déhe-güedé nùú cuè tée cùchiuⁿ. Te dava cue tée cùu déhe cuu úhú iní-güedé tátá-güedé ndihi nănă-güedé, te cuáha cuèndá ñáhă-güedě xii-yu nùú cuè tée cùchiuⁿ cuèndá cahni ñaha-güedě xii-yu. 13 Te ío cuéhé ñăyiú cuu úhú iní ñáhă-yu xii-ndo să cuèndá-í, dico nchaa nchòhó ñáyiú na càda ndee-ni iní canchicúⁿ nihnu ñaha-ni xii-í te naníhí tăhú-ndó.

14 Te ndíi Dániel tée ní xóo cáháⁿ tnúhu Yă Ndiôxí ndéé sanaha ñi chídó tnùnì ndíi nùú tütú ndíi cuèndá ìⁿ sá dáquèe tihú Yă Ndiôxí cundecu ìⁿ xichi nùú ñă tûú tâu-xi cundecu-xi, te xiăⁿ cada-xi sá vă cùndècu-gá ni ìⁿ ñáyiú xiăⁿ. Te cada cuèndá văha-ndo nàcuáa ní cáháⁿ ndíi, chi nduu na quìní-ndó xiăⁿ cundecu-xi ìⁿ xichi nùú ñă tûú tâu-xi cundecu-xi, te dâvâ-áⁿ nchaa ñáyiú xîndecu distritú Jùdeá xínì ñuhu-xi cunú-yu quihíⁿ-yu xití yucu. 15 Te nchaa ñáyiú ndăa ndódó dîquí véhé-xí vă ndíhu-gá-yu vehé-yu quehéⁿ-yu ìⁿ ndachíuⁿ-yu canehé-yu quihíⁿ. 16 Te nchaa ñáyiú cuáháⁿ yucu ni vă nùhú-gá-yu vehé-yu cúnúquehéⁿ-yu dóo-yu. 17 Te ndàhú ní cuu nchaa ñáyiú dîhí ñúhú dēhe-xi, ndihi cue ñáyiú dîhí xîndeca déhe vitna sâdi na sáa nduu dùcaⁿ cada-xi! 18 Te nchòhó ío chí cacăⁿ tăhú nùú Yă Ndiôxí cuèndá sá vă dúcáⁿ ndòho-ndo yóo quidé vîxiⁿ-xi. 19 Chi dâvâ-áⁿ coo tnúndòho cahnu vihi ñuyíú, te vátá ìⁿ ndùu-gá coo tnúndòho cahnu vihi-áⁿ ndéé cùtnăhá ní cadúha Yă Ndiôxí ñuyíú, chi ñu-ni dâvâ-áⁿ coo tnúndòho cahnu vihi-áⁿ, te ni nùú cuáháⁿ nùú véxi vă cóo-gă tnúndòho-áⁿ. 20 Te Yă Ndiôxí cächí-gá sá vă ìo vâi nduu coo tnúndòho cahnu vihi-áⁿ ñuyíú să cuèndá nchaa ñáyiú ní cáháⁿ-gá cundecu ndihi-gá. Te nùu vâi nduu na coo tnúndòho-áⁿ, te vă yôo cácu nihnu.

21 Te dâvâ-áⁿ cùñaha ñăyiú xii-ndo: “Chí cùndèhe iha, chi iha ní quexìo Crìstú Yaá ní tendaha Yă Ndiôxí véxi ñuyíú-a”, duha cùñăhá-yu xii-ndo. Àdi quesahá-yu: “Chí cùndèhe yacáⁿ chi yàcáⁿ ndécú-gă”, quesahá-yu. Te vă quìndăá iní-ndó tnúhu

càháⁿ-yu. ²² Te coo cue téé danàni-güedé méé-güedé dàtná nánì-í te cachí-güedé sá cúu-güedé Yaá ní tendaha Yá Ndiöxí véxi ñuyíú-a. Te dava-güedé cachí-güedé sá cúu-güedé cue téé càháⁿ tnúhu Yá Ndiöxí dico ñá ndáá sá cúu-güedé cue téé càháⁿ tnúhu-gá, te cada-güedé títí núú sã vã yõ tnàhí ndàcu cada cuendá dandàhú-güedé ñáyíu, te caní iní-güedé dandàhú-güedé ndéé cue ñáyíu ní càháⁿ Yá Ndiöxí cundecu ndíhi-gá. ²³ Te vitna ío váha cuáha-ndo cuendá, te quihi iní-ndó cundecu-ndo, chi nchaa sa ní dátúha ñaha-í xii-ndo.

Nàcuáa cada-xi òré quixi tucu Téé cùu ñaní tnáhá nchaa ñáyíu

(Mt. 24:29-35,42-44; Lc. 21:25-36)

²⁴ Te nã yáha-ni coo tnúndòho cahnu vihi-áⁿ, te vá dáyèhé-gá nchícanhii te ni vã dáyèhé-gá yóó. ²⁵ Te ngoyo nchaa chódíní ndéé andíu, te quidi-xi andíu. ²⁶ Te dàvá-áⁿ quini ñáhá nchaa ñáyíu xii yúhú Téé cùu ñaní tnáhá-yu nchaa-yu quee-í andíu quixi-í ichi xití vícò, te quini-yu sá ño càhnu cuu-í, te quide-í nchaa sã vãha. ²⁷ Te tendaha-í cue espíritú xínú cuèchi núu-í quíhíⁿ-xi nadatàcá-xi nchaa ñáyíu ní càháⁿ-í chitnahá ñáhá xii-í xíndecu ní cà xico ñuyíú.

²⁸ Te cundehe-ndo nàcuáa quide yutnu ngúxí, chi yutnu-áⁿ ndúú yùte núú díté-xi te nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni. ²⁹ Te ducaⁿ sãtnahá-xi cada-xi òré ná quini-ndó càda-xi nchaa nacuáa ní càháⁿ-í, te cutnúní iní-ndó sã sã ní cuyatni vií-nã nduu nãa ñuyíú. ³⁰ Te na càchí tnúhu ndáá-í xii-ndo sã òré vátá cùu-gá cue ñáyíu xíndecu ñuyíú-a vitna, te cada-xi nchaa nàcuáa ní càháⁿ-í. ³¹ Te andíu ndíhi ñuyíú-a chi ndíhi nihnu-xi, dico tnúhu-í chi vá ndíhi nihnu-xi chi cùu-xi tnúhu ndáá.

³² Dico ñá túú cùtnuní ná nduu quixi tucu-í, te ni ñá túú cùtnuní ná òré chi vá yõ xíní, te ni cuè espíritú xínú cuèchi núú Yá Ndiöxí ñá túú xíní-xi ná nduu quixi-í, te ni mèe yúhú téé cùu Déhe Dútú Ndiöxí ñá túú xíní-í ná nduu quixi tucu-í, chi ñndí dítí-ni mee Tãtà-í Dútú Ndiöxí xíní-gá nã ná nduu quixi-í.

³³ Te nchòhó xíní ñùhu-xi sá ño quihi iní-ndó cundecu-ndo, te càháⁿ ndíhi-ndo Yá Ndiöxí, chi ñá túú xíní-ndó nã nduu quixi tucu-í. ³⁴ Te na càchí tnúhu-í xii-ndo cuendá ñⁿ téé cuini quíngaca cuu xica. Te téé-áⁿ cùmání-gã quee-dé vehe-dé te ní xáhaⁿ-dè xii cue téé xínu cuechi núu-dè sã ná càdá cuendá-güedé vehe-dé. Te ní sãñaha-dè xii-güedé ndí dítíⁿ núu-güedé chiúⁿ cada-güedé. Te ní xáhaⁿ-dè xii téé ndéé yuyèhe sã ná cundecu túha-ni-dé yuyèhe ndéé nàsáá-dé. ³⁵ Te duha nduu tnúhu càháⁿ-í cuendá nchòhó cundecu túha-ndo, chi ñá túú xíní-ndó nã nduu te ni ñá túú xíní-ndó nã òré quixi tucu yúhú Yaá cúu Xitohó-ndó, núu òré sa ní cundi quiⁿ, àdi dava niú, àdi òré sa ní cana uuⁿ líhi, àdi òré sa ta cùdító cuáháⁿ, núu xiáⁿ ío chí cùndecu túha. ³⁶ Te duha càháⁿ-í chi na cuáháⁿ òré ñá túú nã yíhí iní-ndó quèxio-í, te ñá túú ndècu túha-ndo. ³⁷ Te dàtná-ni xáhaⁿ-í xii nchòhó sá cùndecu túha-ndo, te diu-ni ducaⁿ xáhaⁿ-í xii nchaa dava-gá ñáyíu sá cùndecu túha-yu —càchí-gá xáhaⁿ-gã xii-güedé.

14

Ndùcu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cùmání úu-gá nduu te quesaha víco pascuá, víco xèxi ñáyíu pàá sã ñá túú yíhi levadurá. Te cue dútú cùnùu, ndíhi cue téé dàcuaha ñaha xii ñáyíu nchaa tnúhu ní chídó tnùní ndíi Moisés ndúcú-güedé nàcuáa cada-güedé dandàhú-güedé Jèsús cuendá tñi ñaha-güedé xii-gá te cahni ñaha-güedé. ² Te ní xitnàha-güedé:

—Váha-gá sã vã tñí-ó Jèsús mei nduu víco, chi núu ducaⁿ na càda-o te ío dusaⁿ càda ñáyíu —càchí-güedé xitnàha-güedé.

Ñⁿ ñadíhí chíhí-áⁿ àcítí díquí Jèsús
(Mt. 26:6-13; Jn. 12:1-8)

³ Te Jèsús ndécú-gã ñuú Bètaniá vehe ñⁿ téé nãni Xímú, téé ní tnahá cuéhé sã dátèhyú nihnu-xi yiqui cùñú-ó. Te yíhi Jèsús mèsá xéxi-gã ní quexìo ñⁿ ñadíhí néhé-áⁿ ñⁿ sã ñí cuáha yúú vãha yúú nání àlabastrú, te xití xiáⁿ ñúhú àcítí sàháⁿ tnámí sã nání ñàrdú sã ño ndèyáhu, te ní táhú-áⁿ xiáⁿ te acítí ñúhú

xítí-xi-án nǐ sódó-aⁿ díquí Jèsús. ⁴ Te ìⁿ úú cue téé xĩndecu-áⁿ nǐ cudééⁿ-güedě sá dúcáⁿ nǐ quide-aⁿ, te ní xĩtnàha-güedé:

—Ñá túú quide váha ñaha-áⁿ dàcáⁿ quidé-áⁿ, chi íí nǐ dácuíta-aⁿ acítí váha-áⁿ. ⁵ Chi váha-gá nǔu cuyáhu acítí-áⁿ sá ùní ciendú díhúⁿ denàriú, te díhúⁿ sǎ cùyáhu acítí-áⁿ cuu cuendá ñáyiú ndàhú ní cùu —cachí-güedé xĩtnàha-güedé.

Te ní tenàá-güedé ñaha-áⁿ sǎ dúcáⁿ nǐ quide-aⁿ.

⁶ Te Jèsús ní xáhaⁿ-gǎ xii-güedé:

—Chí dáñá, vá dásàtú-ndó ìní ñadìhí-a, chi sá nǐ quide ñaha-aⁿ xii-í cúú-xí ìⁿ sá váha. ⁷ Chi cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, te nání òré cǎchí ìní-ndó te chindee-ndó-yu. Dico yúhú chi vá ncháá ndùu cundecu ndìhi ñaha-í xii-ndo ñùyíú-a. ⁸ Te ñadìhí-a ní quide-aⁿ ìⁿ sá váha ndèé není ní ndacu-aⁿ, chi sá dúhá nǐ quide ñaha-aⁿ xii-í ní chíhi ñaha-aⁿ àcítí, te xíáⁿ cada ìní-ndó sǎ sá quide túha-aⁿ yiquí cùñú-í cuendá quíndúxi-xi. ⁹ Te na cǎchí tnúhu ndáá-í xii-ndo sǎ ndèni ní cuu nihí ñuyíú ná cǎháⁿ ñáyiú tnúhu-í, te cǎháⁿ-yu tnàhá cuendá ñadìhí-a cuendá quini nchaá ñáyiú nàcuáa ní quide-aⁿ, te ducaⁿ vǎ nàcuánaá-yu —cǎchí-gǎ xǎhaⁿ-gǎ xii-güedé.

Té Jùdás ndúcú-dě nàcuáa cada-dé cuáha cuendá-dé Jèsús núú cuè téé cùu úhú ìní ñáhá xii-gǎ

(Mt. 26:14-16; Lc. 22:3-6)

¹⁰ Te té Jùdás Iscàrioté ní sáháⁿ-dé ní ndatnúhu-dé ndìhi cue téé cùu dútú cùnùu sá cuáha cuendá-dé Jèsús núú-güedě, te núú tnàhá té Jùdás-áⁿ cúú ùxúú tnàhá cue téé xica cuu ndìhi-gǎ ní cùu. ¹¹ Te òré ducaⁿ nǐ ndatnúhu-dé ndìhi-güedé, te ío ní cudíí ìní-güedé, te ní xáhaⁿ-güedě xii-dé sá cuáñaha-güedě díhúⁿ xii-dé. Te té Jùdás-áⁿ nǐ ngüíta-dé ndúcú-dě nàcuáa cada-dé cuáha cuendá-dé Jèsús núú-güedě.

Cùdini Jèsús ndìhi cue téé xica cuu ndìhi-gǎ
(Mt. 26:17-29; Lc. 22:7-23; Jn. 13:21-30;

1 Co. 11:23-26)

¹² Te ní sáá nduu nǐ quesaha víco pascuá, víco ñá túú xèxi ñáyiú pàá sá ñà túú yìhi levadurá, te diu-ni nduu-áⁿ sáhní-güedě ìⁿ

mbèé líhli xèxi-yu nduu víco pascuá-áⁿ. Te cue téé xica cuu ndìhi Jèsús ní xicáⁿ tnúhú-güedě núú-gǎ, te xǎhaⁿ-güedě xii-gǎ:

—Mèstrú, véxi-ndí xicáⁿ tnúhú-ndí núú-n nǔu ndèé cáá vèhe cuini-n càda túha-ndí sá cùdini-o sacuaa nduu víco pascuá —cǎchí-güedé xǎhaⁿ-güedě xii-gǎ.

¹³ Te Jèsús ní xáhaⁿ-gǎ xii úú-ni tnàhá cue téé xica cuu ndìhi-gǎ:

—Chí cuáháⁿ xítí ñuú-áⁿ, te yàcáⁿ naníhí-ndó ìⁿ téé tànehe yóó ndute, te téé-áⁿ cándèndaha-ndo-dě quíhíⁿ. ¹⁴ Te nǔu ndèdacàa vèhe na ndíhu-dé te xíáⁿ quíhu-ndo. Te cúñaha-ndo xii xítóhó vèhe-áⁿ: “Yáá cúú Mèstrú cǎchí-gǎ sá nǔu ndèdacàa xichi xítí vèhe-n cuáñaha nùu-n xii-gǎ cùdini-gǎ ndìhi cue téé xica cuu ndìhi-gǎ sacuaa nduu pascuá”, duha cúñaha-ndo. ¹⁵ Te dǎtnùní danèhé ñáhá-dě xii-ndo ìⁿ cuartú cǎhnú càa núú nǐnu, chi vèhe yòdo tnaha cuu-xi, te sa ní quide túha-dé nchaá sá nándìhi, te nchòhó dícó-nǎ comidá cada túha-ndo cùdini-o —cachí-gǎ xǎhaⁿ-gǎ xii-güedé.

¹⁶ Te cue téé-áⁿ nǐ xica-güedé cuáháⁿ-güedé xítí ñuú-áⁿ, te nchaá-ni nàcuáa ní xáhaⁿ Jèsús ní cuu. Te ní quide túha-güedé sá cùdini-güedé ndìhi-gǎ sacuaa nduu víco pascuá-áⁿ.

¹⁷ Te sátá nǐ cundiquíⁿ te ní quexìo Jèsús ndìhi ndí ùxúú cue téé xica cuu ndìhi-gǎ.

¹⁸ Te cuánguihu-gǎ mèsá ndìhi-güedé cuendá cùdini ndìhi ñaha-gǎ xii-güedé, te òré yíhí-gǎ mèsá ndìhi-güedé, te xǎhaⁿ-gǎ xii-güedé:

—Na cǎchí tnúhu ndáá-í xii-ndo sǎ ìⁿ nchòhó cue téé xèxi ndìhi ñaha xii-í cuáha cuendá ñáhá-ndó núú cuè téé cùu úhú ìní ñáhá xii-í —cǎchí-gǎ xǎhaⁿ-gǎ xii-güedé.

¹⁹ Te sá dúcáⁿ nǐ xáhaⁿ-gǎ xii-güedé, te nchaá-güedé ní ngüíta-güedé cùndiyí-güedé. Te da ìⁿ da ìⁿ-güedé ní ngüíta-güedé xicáⁿ tnúhú-güedé núú-gǎ, te xǎhaⁿ-güedě xii-gǎ:

—¿Ñá díú yǔhú ducaⁿ sàni ìní-n càda-í-u? —cǎchí-güedé xǎhaⁿ-güedé xii-gǎ.

²⁰ Te Jèsús ní xáhaⁿ-gǎ xii-güedé:

—Diu-ni ìⁿ nchòhó cue téé úxúú xicá cùu ndìhi-í, téé na dàquèndaha còhó òré daquèndaha-í, téé-áⁿ cuáha cuendá ñáhá-dě xii-í núú cuè téé cùu úhú ìní ñáhá. ²¹ Te

yúhú Tée cùu ñaní tnáhá-ndó nchàa-ndo ñuhu ichi-ícuáháⁿ-índoho-ínacuáa càháⁿ-xi núú tütú Yá Ndiöxí. Dico ndáhú ní cuu tée ducaⁿ na cuáha cuendá ñáhá xii-í núú cuè tée cùu úhú iní ñáhá, chi váha-gá sá vǎ cǎcú tǎe-áⁿ cundecu-dé ní cùu, te ñá díú sǎ ñí cacu-dé te ducaⁿ càda-dé —càchí-gá xǎhaⁿ-gǎ xii-güedé.

²² Te ñini cùdini cue tée xica cuu ndihí Jesús ní queheⁿ-gá pàá, te ní ndacáⁿ táhú-gǎ núú Yá Ndiöxí, te dàtnùní ní táhú cuèchi-gá, te ní ngüíta-gá dǎcǎhñu ñaha-gǎ xii-güedé, te xǎhaⁿ-gǎ:

—Chí quéhéⁿ pàá-a caxi-ndo, te cada iní-ndó sǎ cúú-xí dàtná yiqui cùñú-í —càchí-gá xǎhaⁿ-gǎ xii-güedé.

²³ Te ní queheⁿ-gá vǎsú ñúhú ndúdí ndéhé yoho yàha stilé, te ní ndacáⁿ táhú-gǎ núú Yá Ndiöxí, te dàtnùní ní ngüíta-gá sǎñaha-gǎ xii-güedé cuendá coho-güedé luha luha sǎ ñúhú xití-xi, te nchaa-güedé ní xihí. ²⁴ Te ní xǎhaⁿ-gǎ xii-güedé:

—Ndudí ndéhé yoho yàha stilé-a cada iní-ndó sǎ cúú-xí dàtná níñí-í sǎ cǎtí òré cahni ñaha-güedé xii-í. Te sǎ dúcáⁿ cǎtí níñí-í xǎⁿ cutnùní ndǎá sǎ Yá Ndiöxí cada-gǎ ingá núú sǎ váha sǎ cúú-xí vǎi ñáyiú dàtná ní cachí-gá cada-gǎ. ²⁵ Te na càchí tnúhu ndǎá-í xii-ndo sǎ vítná-nǎ duha xihí-í ndudí ndéhé yoho yàha stilé-a te vǎ cóhó-gǎ-í, dico na sǎá nduu cundecu-í núú ndécú Yá Ndiöxí táxí tnùní-gǎ, te dàvá-áⁿ cada iní-í sǎ dàtná sǎ cóhó tucu-í chí ío cudí iní-í —càchí-gá xǎhaⁿ-gǎ xii-güedé.

Jèsús càháⁿ-gá sǎ tǎ Pèlú cùñaha-dǎ xii ñáyiú sǎ ñà túú xini ñáhá-dǎ xii-gǎ

(Mt. 26:30-35; Lc. 22:31-34; Jn. 13:36-38)

²⁶ Te Jèsús ní xita-gǎ ñⁿ ndudú ndihí cue tée xica cuu ndihí-gǎ, te dàtnùní ní xica-gǎ cuáháⁿ-gǎ ndihí-güedé yucu Òlívú. ²⁷ Te yàcáⁿ ní xǎhaⁿ-gǎ xii-güedé:

—Na càchí tnúhu-í xii-ndo sǎ ncháá-ndó dàña nihnu ñaha-ndo xii-í niú vitna, chi quee ndǎá-xi nǎcuáa càháⁿ-xi núú tütú Yá Ndiöxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dǎ ndihí-güedé cuténuu”, duha càchí-xi núú tütú-gǎ. ²⁸ Dico na cùú-í te ndoto-í te codonù-í núú-ndó quíhíⁿ distritú Galileá —càchí-gá xǎhaⁿ-gǎ xii-güedé.

²⁹ Te té Pèlú ní xǎhaⁿ-dǎ xii-gǎ:

—Te cuèi nchaa-güedé ná dǎndóo ñaha-güedé xii-n, dico yúhú chí vá dǎndóo ñaha-í xii-n —càchí-dé xǎhaⁿ-dǎ xii-gǎ.

³⁰ Te Jèsús ní xǎhaⁿ-gǎ xii-dé:

—Na càchí tnúhu ndǎá-í xii-n sǎ niú vitna cùmání-gǎ cana líhi úú xito, te úní xito cáháⁿ-n núú ñáyiú sǎ ñà túú xini ñáhá-n xii-í —càchí-gá xǎhaⁿ-gǎ xii-dé.

³¹ Dico té Pèlú ní cáháⁿ ñí-dé, te xǎhaⁿ-dǎ xii-gǎ:

—Cuèi na cùú ndihí ñaha-í xii-n dico vá cáháⁿ-í núú ñáyiú sǎ ñà túú xini ñáhá-í xii-n —càchí-dé xǎhaⁿ-dǎ xii-gǎ.

Te nchaa dava-gǎ cue tée xica cuu ndihí-gǎ diu-ni ducaⁿ ñí xǎhaⁿ-güedé xii-gǎ.

Jèsús càháⁿ ndihí-gǎ Yá Ndiöxí ñⁿ xichi núú nání Gètsemaní

(Mt. 26:36-46; Lc. 22:39-46)

³² Te Jèsús cuáháⁿ-gǎ ndihí cue tée xica cuu ndihí-gǎ ñⁿ xichi núú nání Gètsemaní. Te òré ní quexio-gǎ ndihí-güedé xíaⁿ, te ní xǎhaⁿ-gǎ xii-güedé:

—Chí cúnúcoo iha cundetú-ndo na quíhíⁿ-í yàcáⁿ cáháⁿ ndihí-í Yá Ndiöxí —càchí-gǎ xǎhaⁿ-gǎ xii-güedé.

³³ Te ndéca-gǎ té Pèlú, ndihí té Jàcobó, ndihí té Juáá cuáháⁿ, te ñá túú tnáhí-gǎ cúú váha iní-gǎ te ní ngüíta-xi súúní ndihú iní-gǎ. ³⁴ Te ní xǎhaⁿ-gǎ xii cue tée úní-áⁿ:

—Súúní ndihú iní-í dàtná sǎ cùú-í, te chí quéndóo iha te vá cùdú-ndó —càchí-gǎ xǎhaⁿ-gǎ xii-güedé.

³⁵ Te sa ñùnchií luha ní xica ndehe Jèsús núú ndécú-güedé, te ní ngáundeyi-gǎ ndéé ñuhu càháⁿ ndihí-gǎ Tǎtá-gǎ Dútú Ndiöxí sǎ ñuu vá cùndèe iní-gǎ taunihnu ñaha-gǎ xii-gǎ cuendá nchaa nǎcuáa yáha-gǎ. ³⁶ Te òré càháⁿ ndihí Jèsús Tǎtá-gǎ Dútú Ndiöxí, te xǎhaⁿ-gǎ:

—Yòhó tǎtá mée-í, nchaandi túhú sǎ váha ndàcu-n quide-n, te càháⁿ ndáhú-í núú-n ñuu vá cùndèe iní-n tàunihnu ñaha-n xii-í cuendá sǎ vǎ ndóhó-í ná sǎá òré, dico vá cǎdá-n nǎcuáa càchí iní mée-í chí cǎda-n nǎcuáa càchí mee-n —càchí-gǎ xǎhaⁿ-gǎ xii Tǎtá-gǎ Dútú Ndiöxí.

³⁷ Te sǎtá ñí yáha ní cáháⁿ ndihí-gǎ Tǎtá-gǎ Dútú Ndiöxí, te cuánuhú-gǎ núú ñí dǎndóo-gǎ cue tée úní-áⁿ, te xixídí-güedé òré ní nasǎá-gǎ, te ní xǎhaⁿ-gǎ xii té Pèlú:

—Ximú, ¿náa sama xidí-n? ¿Náa ñá cùndèe tnahi núú-n vǎ cùdú-ni-n cuèdìcò ìⁿ òré-ǎⁿ? —càchí-gá xǎhaⁿ-gǎ xii-dé.

Te ní xáhaⁿ tucu-gá xii-güedé:

38 —Te chí quéndõo tucu, te cuhuⁿ iní-ndó vǎ cùdú-ndó, te cáháⁿ ndihí-ndo Yǎ Ndiõxí cuendá sá vǎ dácàháⁿ ñáhá yùcu ñávǎha xii-ndo càda-ndo sá ñà túú tàú-ndó càda-ndo. Te na càchí tnúhu ndáá-í xii-ndo sǎ nchòhó cuìní-ndó càda-ndo nchaa nacuaá càháⁿ-í dìcò-ni sá ñà túú ñihí ndéé-ndó —càchí-gá xǎhaⁿ-gǎ xii-güedé.

39 Te Jèsús ní xica tucu-gá cuáháⁿ-gá cáháⁿ ndihí-gá Tǎtá-gǎ Dútú Ndiõxí, te diu-ni nàcuáa ní xáhaⁿ-gǎ díhna xǎhaⁿ tucu-gá. 40 Te òré ní yáha ní cáháⁿ ndihí-gá Tǎtá-gǎ Dútú Ndiõxí, te cuánuhú tucu-gá núú xǐndecu cue téé úní xícá cùu ndihí-gá-áⁿ, te xidí-ni tucu-güedé òré ní nasáá-gá, te ducaⁿ ñí quide-güedé chí súúni ñùhu saní núú-güedé, te ñá ní ñihí-güedé tnúhu cúñaha-güedé xii-gá òré ní nasáá-gá. 41 Te ní sáháⁿ tucu-gá xito cùu úní ní cáháⁿ ndihí-gá Tǎtá-gǎ Dútú Ndiõxí, te òré ní nasáá tucu-gá núú xǐndecu-güedé, te xǎhaⁿ-gǎ xii-güedé:

—¿Te náa xidí-ni tucu-ndo?, te vitna vǎ cùdú-gá-ndó chí sa ní sáá òré cuáha cuendá ñáhá-güedé xii yúhú Téé cùu ñaní tnáhá-ndó nchàa-ndo núú cuè téé ndècu ichi cuehé ichi duha. 42 Te vitna chí ndácõo na quihíⁿ-ó chí sa véxi téé cuáha cuendá ñáhá xii-í núú cuè téé cùu úhú iní ñáhá —càchí-gá xǎhaⁿ-gǎ xii-güedé.

Ní tñi-güedé Jèsús ndécá ñàha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

43 Te càháⁿ dúcáⁿ-ní Jèsús ní quexìo té Jùdás. Te núú tnàhá téé-áⁿ cúú ùxúú tnàhá cue téé xica cuu ndihí-gá. Te ndihí-dé vǎi cue téé ní quexìo, te dava-güedé xǐnehe-güedé machití te dava-güedé xǐnehe-güedé carrutí. Te cue téé-áⁿ ñí tendaha ñàha cue dútú cùnùu ndihí cue téé dàcuaha ñàha xii ñáyiú nchaa tnúhu ní chídó tnùní ndíi Moisés, ndihí cue téé cùu sacuéhé núú ñáyiú isràél. 44 Te té Jùdás téé cuáha cuendá ñáhá xii Jèsús sa ní xitnùhu-dé cue téé-áⁿ nàcuáa cada-dé cuáha cuendá ñáhá-dé xii Jèsús núú-güedé. Te duha ní xáhaⁿ-dé xii-güedé:

—Cundehe-ndo téé na tèyuhu-í, te téé-áⁿ tñi-ndo-dé chí téé-áⁿ cúú-dé téé ndèé iní-ndó, te ío quihí iní-ndó càndeca-ndo-dé quihíⁿ —duha ní xáhaⁿ-dé xii-güedé.

45 Te òré ní quexìo té Jùdás ndihí cue téé-áⁿ núú ndécú Jèsús, te ní xáhaⁿ-dé xii-gá: —Mèstrú —càchí-dé xǎhaⁿ-dé xii-gá.

Te ní teyuhu ñàha-dé. 46 Te nchaa cue téé ndihí-dé-áⁿ ñí tñi-güedé Jèsús cuendá candeca ñàha-güedé xii-gá quihíⁿ. 47 Te ìⁿ cue téé cùndihí Jèsús ní tava-dé machití-dé, te ní xehndé-ni-dé ìⁿ xio lóho ìⁿ téé xinu cuechi núú dútú cùnùu, te ní quendeé duuⁿ lóho téé-áⁿ. 48 Te Jèsús ní xáhaⁿ-gǎ xii cue téé ní tñi ñàha xii-gá-áⁿ:

—Nchòhó, nèhe-ná-ndó màchití, nèhe-ná-ndó càrrutí véxi ní tñi ñàha-ndo xii-í, dàtná quidé-ndó ìⁿ ñadúhú quidé ñàha-ndo xii-í. 49 Te nchaa-ni nduu ní xiní-ndó ñí xǐndecu-í xití veñúhu càhnu sá ío cùnùu ní xóo danèhé-í ñáyiú, te ñá túú ní tñi ñàha-ndo xii-í. Dico dàcuítí sǎ dúhá yáha-í cuendá quee ndáá-xi nàcuáa càháⁿ-xi núú tütú Yǎ Ndiõxí —càchí-gá xǎhaⁿ-gǎ xii-güedé.

50 Te nchaa cue téé xica cuu ndihí-gá ní xinu-güedé ní dándõo ñàha-güedé xii-gá.

Ìⁿ téé cuechi ñí xinu-dé

51 Te ìⁿ téé cuechi ndèndaha-dé Jèsús cuáháⁿ, te lavichi-dé, ìⁿ-ni dóó yadí yidúcúⁿ nuu-dé ñihí-dé, te ní tñi ñàha-güedé xii-dé, 52 dico ní ndacu-dé ní quenuñi-dé te ní dándõo-dé dóó yidúcúⁿ nuu-dé-áⁿ ñí xinu-dé.

Jèsús ndécú-gǎ jùndá

(Mt. 26:57-68; Lc. 22:54-55, 63-71; Jn. 18:12-14, 19-24)

53 Te cue téé ní tñi ñàha xii Jèsús ndécá ñàha-güedé xii-gá cuáháⁿ núú téé cùu dútú cùnùu-gá. Te xíaⁿ ñí tacá nchaa dava-gá cue téé cùu dútú cùnùu, ndihí cue téé cùu sacuéhé núú ñáyiú isràél, ndihí cue téé dàcuaha ñàha xii-yu nchaa tnúhu ní chídó tnùní ndíi Moisés cuendá cada-güedé jùndá. 54 Te té Pèlú xica xica-ni nchicúⁿ ñáhá-dé xii-gá cuáháⁿ ní sáá-dé ndéé quehé vehe núú ndécú téé cùu dútú cùnùu-gá-áⁿ, te xíaⁿ ñí ngóo teté-dé yuhu nùhú ndihí cue téé cùu poleciá.

55 Te cue téé cùu dútú cùnùu ndihí nchaa dava-gá cue téé xǐndecu jùndá

ndúcú-güedë ñáyiú dacàa ìⁿ cuéchi díquí Jèsús cuendá ducaⁿ ñíhí-güedë nàcuáa cada-güedé cahni ñaha-güedë xii-gá, dico ñá túú ní ndàcu-güedé. ⁵⁶ Te cuèi vài ñáyiú dàcaá-yu cuéchi díquí-gã dico mee-ni sã ñí cahu iní mée-yu ní cáháⁿ-yu, chi tucu cáháⁿ ìⁿ tucu cáháⁿ ìⁿ-yu. ⁵⁷ Te davá-yu ní ndacuíñí-yu te ní ngüíta-yu dàcaá-yu ìⁿ cuéchi neñúú díquí-gã, te xãháⁿ-yu xii nchaa cue té cùnnuu:

⁵⁸ —Nchúhú ní tecú dóho-ndí cächí-dé sá dängòyo-dé veñúhu càhnu sá ìo cùnnuu sá ñí dácáá cuè té ñuyíú-a, te dandàa tucu-dé ingá veñúhu saa, ñiu-ni núú cáá tnahí veñúhu-áⁿ te xití úní-ni nduu sa nadaxínu-dé, te vá cúú-gã-xi veñúhu sá ñí dácáá cuè té ñuyíú-a, duha cächí-dé ní tecú dóho-ndí —cächí-yu xãháⁿ-yu xii-güedé.

⁵⁹ Dico ní dùcaⁿ ñá túú ní cùu ìⁿnuú-yu nchaa tnúhu ní cáháⁿ-yu.

⁶⁰ Te té cùu dútú cúnùu-gá ní ndacuíñí-dé tnuú nchaa ñáyiú, te xãháⁿ-dë xii Jèsús:

—¿Ná cuendá duha ndùu tnúhu cáháⁿ ñáyiú-a cuendá-n? Te cáháⁿ nùu nása ndùu tnúhu cáháⁿ-n —cächí-dé xãháⁿ-dë xii-gá.

⁶¹ Dico Jèsús ñá túú tnahí ní cáháⁿ-gá. Te té cùu dútú cúnùu-gá-áⁿ ñí xãháⁿ tùcu-dé xii-gá:

—Cuíní-í cachí tnúhu-n xii-ndí nùu sá díú Crístú Déhe Yá Ndiöxí Yaá ní tendaha-gã véxi ñuyíú-a cùu-n. Te ñiu Yá Ndiöxí cúú-gã Yaá quidé càhnu-ndí —cächí-dé xãháⁿ-dë xii-gá.

⁶² Te Jèsús ní xãháⁿ-gã xii-dé:

—Ñiu Yaá-áⁿ cúú-í, te na cächí tnúhu-í xii-ndo sã sáa nduu te quini-ndó yùhú Té cùu ñani tnahá-ndó nchàa-ndo cunucóo-í xio cùha Dútú Ndiöxí Yaá ndácú quide nchaandi túhú sá vãha. Te dàvá-áⁿ quini ñáhá-ndó xii-í quee-í andiu quixi-í ichi xití vícú —cächí-gã xãháⁿ-gã xii-dé.

⁶³ Te dútú cúnùu-gá-áⁿ ñí ndátá-dë dóo cání ñihnu-dé cuendá sá ñà túú ní tnahá iní-dé nàcuáa ní cáháⁿ Jèsús, te ní xãháⁿ-dë xii nchaa cue té xíndecu jündá:

—Ñá túú-gã xini ñuhu-xi cue té cáháⁿ nùu ndáá sá ndècuéchi-dé àdi ñá túú ndècuéchi-dé. ⁶⁴ Chi sa ní xíndedóho-o nàcuáa ndùu tnúhu ní cáháⁿ-dé ní cáháⁿ

úhú-dé cuendá Yá Ndiöxí, te nchaa-ndo chí cáháⁿ vitna núu nása sàni iní-ndó cùnndu cuendá té-a —cächí-dé xãháⁿ-dë xii-í-güedé.

Te nchaa-güedé ní cachí-güedé sá ná cùú-dé.

⁶⁵ Te dava-güedé ní ngüíta-güedé ní tíú díí ñáhá-güedé xii-gá, te ní dádãhu-güedé núú-gã, te ní ngüíta-güedé cániha-güedé xii-gá, te xãháⁿ-güedé:

—¿Cáháⁿ ná cótó ñá cúú tãe ní caniha xii-n! —cachí-güedé xãháⁿ-güedé xii-gá.

Te cue té cùu poleciá ní cani-güedé núú-gã.

Té Pèlú cáháⁿ-dé núú ñáyiú sá ñà túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xití vehe càa núú ñinu quide-güedé jündá, chí vehe yòdo tnahá cuu-xi, te té Pèlú núcòo-dé quehé vehe-áⁿ. Te ìⁿ xíchí xínú cuèchi núú dútú cúnùu-áⁿ ñí quexìo-xi núú núcòo té Pèlú. ⁶⁷ Te òré ní xini ñáhá-xi xii-dé núcòo teté-dé yuhu nùhú, te ní xíndéhé ñàha váha-xi xii-dé, te xãháⁿ-xi:

—Yòhó tnahá-n cùu-n té xica cuu ndihí Jèsús té ñuú Nazàrét —cächí-xi xãháⁿ-xi xii-dé.

⁶⁸ Te té Pèlú ní xãháⁿ-dë xii-xi:

—Yúhú ñá túú xini-í té-áⁿ, te ní ñà túú cùnndu iní-í nása ndùu tnúhu cáháⁿ-n —cächí-dé xãháⁿ-dë xii-xi.

Te té Pèlú ní xica-dé cuáháⁿ-dé ndàa nàcuáa nchíi yuyèhe vehe-áⁿ, te ní cana ìⁿ líhi. ⁶⁹ Te xíchí xínú cuèchi-áⁿ ñí xini ñáhá tùcu-xi xii-dé, te xãháⁿ-xi xii nchaa ñáyiú xíndecu-áⁿ:

—Ñiu té-áⁿ tnahá-dé xicá cùu-dé ndihí té ndèca-güedé cuánguihu-a —cächí-xi xãháⁿ-xi xii-yu.

⁷⁰ Dico té Pèlú ñá túú ní nùnuu tucu-dé sá xicá cùu-dé ndihí Jèsús. Te tna tnaa-ni ní cuu sá dúcáⁿ ñí xãháⁿ xíchí-áⁿ xii-dé, te ní xãháⁿ tùcu dava cue ñáyiú xíndecu-áⁿ xii-dé:

—Ndáá sá tnahá-n cùu-n té xica cuu ndihí té ndèca-güedé cuánguihu-áⁿ chí cùu-n té distritú Galileá, te cáháⁿ-n dàtná cáháⁿ-güedé —cächí-yu xãháⁿ-yu xii-dé.

⁷¹ Te té Pèlú ní xãháⁿ-dë xii-yu:

—Nchàcuiti Yá Ndiöxí sá yùhú cáháⁿ ndáá-í sá ñà túú xini-í té càcunehe-ndo-áⁿ —cächí-dé xãháⁿ-dë xii-yu.

⁷² Te òré-ni-áⁿ ñi cana tucu ñhi xito cùu uú, te òré-áⁿ ñi ndacu iní té Pèlú nàcuáa ní xáhaⁿ Jèsús xii-dé sá cùmání-gã cana ñⁿ ñhi úú xito te úní xito cáháⁿ-dé núú ñáyiú sá ñà túú xìní ñáhá-dě xii-gá. Te òré ducaⁿ ñi ndacu iní-dé nàcuáa ní xáhaⁿ Jèsús xii-dé, te ní ndáhyú-dé ní ndixi cuéchi iní-dé.

15

Jèsús ndécú-gã núú tẽ Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sátá ñi túndaá te cue tée cùu dútú cúnùu, ndihí cue tée cùu sacuéhé núú ñáyiú isràél, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchaa dava-gá cue tée cúnúu ní xíndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáháⁿ núú tẽ Pilatú. ² Te té Pilatú ní xícáⁿ tnúhú-dě núú Jèsús, te xãhaⁿ-dě xii-gá:

—¿Ndáá sá díú-n cùu-n tée yíndaha ñaha xii ñáyiú isràél-ãⁿ? —càchí-dé xãhaⁿ-dě xii-gá.

Te Jèsús ní xáhaⁿ-gã xii-dé:

—Díu-í yíndaha-í-yu —càchí-gá xãhaⁿ-gã xii-dé.

³ Te cue tée cùu dútú cúnùu daciaa-güedé vài cuéchi díquí-gã. ⁴ Te té Pilatú ní xícáⁿ tnúhú tùcu-dé núú-gã, te xãhaⁿ-dě xii-gá:

—Cáháⁿ, ná cuèndá ñá càháⁿ-n te cundehe nã ndéé duha títñi cuéchi dàcaa díquí ñáhá cuè tée-a xii-n —càchí-dé xãhaⁿ-dě xii-gá.

⁵ Dico Jèsús ñá túú tnàhí ní cãháⁿ-gá te té Pilatú ío ní cuñúhu-dé sá dúcáⁿ ñà túú tnàhí ní cãháⁿ-gá.

Cue ñáyiú xãhãⁿ-yu xii té Pilatú sá cáhni-dě Jèsús

(Mt. 27:15-31; Lc. 23:13-25; Jn. 18:38-19:16)

⁶ Te ndi tnahá nduu víco pascuá dácãcu té Pilatú ñⁿ tée yìhi vecaá chi ducaⁿ tnàhí quide-dé, te mee ñáyiú càháⁿ-yu te núu ndèdacàa tée yìhi vecaá-áⁿ cãcu-dé, te tée-áⁿ dácãcu-dé. ⁷ Te yìhi ñⁿ tée nani Barrabás vecaá ndihí dava-gá cue tée cùndihí-dé. Te té Barrabás-áⁿ ñi sanu ichi-dé ñáyiú ñuú íngá ichi, te ní ngúíta-yu ndihí-dé ní cuu úhú iní-yu cue tée cùchiuⁿ, te ní sahní-dé

ndíyi núu xíáⁿ ní chihi ñaha-güedé vecaá xii-dé. ⁸ Te nchaa ñáyiú ní sáháⁿ-yu núú tẽ Pilatú, te càháⁿ ndàhú-yu núú-dě sá ná cádá nàhi-ni-dé dàtná quidé-dě. ⁹ Te té Pilatú ní xáhaⁿ-dě xií-yu:

—¿Cuíní-ndó sã dácãcu-í tée yíndaha ñaha xii ñáyiú isràél-ãⁿ? —càchí-dé xãhaⁿ-dě xií-yu.

¹⁰ Te ducaⁿ ñi cáháⁿ té Pilatú, chi ní cutnùní iní-dé sá dícó sá cuèdú íní cuè dútú cúnùu núu xíáⁿ ducaⁿ ñi quide-güedé ní sáha cuèndá ñáhá-güedé xií Jèsús núú-dě.

¹¹ Te cue dútú cúnùu ní xáhaⁿ-güedé xii nchaa ñáyiú sá ná cùñáhá-yu xii té Pilatú dàcãcu-dé té Barrabás, te ní quidé-yu nàcuáa ní xáhaⁿ-güedé. ¹² Te té Pilatú ní xícáⁿ tnúhú-dě núú-yu, te xãhaⁿ-dě xií-yu:

—¿Ná cuíní-ndó càda-í tée càchí-ndó yíndaha ñaha xii ñáyiú isràél-í? —càchí-dé xãhaⁿ-dě xií-yu.

¹³ Te ncháá-yu níhi ní cáháⁿ-yu, te xãhãⁿ-yu xii-dé:

—¡Cata caa-dé núú cùrúxí! —càchí-yu xãhãⁿ-yu xii-dé.

¹⁴ Te té Pilatú ní xáhaⁿ-dě xií-yu:

—¿Te ná cúú cuéchi ní quide-dé te núu ducaⁿ cuíní-ndó càda-í-dé-í? —càchí-dé xãhaⁿ-dě xií-yu.

Dico ncháá-yu uuⁿ-gá níhi ní cáháⁿ-yu, te xãhãⁿ-yu xii-dé:

—¡Cata caa-dé núú cùrúxí! —càchí-yu xãhãⁿ-yu xii-dé.

¹⁵ Te té Pilatú ní quide-dé nàcuáa ní xãhãⁿ-yu xii-dé cuèndá sá cúdiu-dé núú-yu, te ní dácãcu-dé té Barrabás, te ní táúchíúⁿ-dě ní caní-güedé Jèsús ndihí ñi. Te sátá dúcáⁿ ñi quide ñaha-güedé xii-gá, te ní táúchíúⁿ-dě candeca ñaha-güedé quíhíⁿ cata caa ñaha-güedé xii-gá núú cùrúxí.

¹⁶ Te cue tée cùu sandadú ndéca ñaha-güedé xii-gá cuáháⁿ vechiúⁿ, te díu-ni xíáⁿ cúú vèhe tée cùu gobiernú. Te xíáⁿ ñi tacá nchaa dava-gá cue tée cùu sandadú.

¹⁷ Te xíáⁿ ñi dácúíhnú ñaha-güedé xii-gá ñⁿ dóó tìcuèhé víhí, te ní cadúha-güedé ñⁿ coróná íñu ní chihi-güedé díquí-gã. ¹⁸ Te ní ngúíta-güedé níhi càháⁿ-güedé cúdíquí ndéé ñáhá-güedé xii-gá, te xãhaⁿ-güedé:

—jío càhnu cuu yohó téé yìndaha ñaha xii ñáyiu isràél! —càchí-güedé xàhaⁿ-güedé xii-gá.

19 Te càni-güedé díquí-gã ndihì ìⁿ carrutí, te tìú dí ñáhá-güedé xii-gá, te ngüñí xítí-güedé núú-gã quidé-güedé sá néhé-güedé sá yíñùhu núú-gã dico ñá ndàá chi dícó cúdíquí ndeé ñáhá-güedé xii-gá. 20 Te sátá dúcáⁿ ñí cudíquí ndeé ñáhá-güedé xii-gá, te ní nataunuu ñaha-güedé xii-gá dóó tícuèhé víhí sã ñí dácúíhnú ñaha-güedé, te ní dándíúnuu ñaha-güedé xii-gá dóó méé-gã. Te dätñuní ndécá ñaha-güedé cuáháⁿ núú cátá càa ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mt. 27:32-44; Lc. 23:26-43; Jn. 19:17-27)

21 Te ichi cuáháⁿ-güedé ndihì Jèsús ní naníhí-güedé ìⁿ téé ñuú Cirené nání-dé Xímú, te déhe-dé cúú ìⁿ téé nàni Lijandrú, ndihì ingá téé nàni Rúfú. Te té Xímú-áⁿ ñúhú-dé ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

22 Te ndèca-güedé Jèsús cuáháⁿ ìⁿ xichi núú nání Gólgotá, te tnúhu-áⁿ quée-xí: ìⁿ xichi núú nání yiquí díquí ndíyí, duha quèe-xi tnúhu-áⁿ. 23 Te ní sáñaha-güedé xii-gá ndudí sá ñí quée yúcu nání mìrrá coho-gá ní cùu dico ñá túú ní xihì-gá. 24 Te ní sata caa ñaha-güedé xii-gá núú cùrúxí. Te sátá dúcáⁿ te cue téé cùu sandadú-áⁿ ñí xito ndeé-güedé ñuu ndèdacàa-güedé cuu cuèndá-güedé dóó-gã.

25 Te cùu-xi caá ìⁿ dátneé òré ní sata caa ñaha-güedé xii-gá núú cùrúxí. 26 Te ní taxi ndecu-güedé ìⁿ sá ndèé lètrá núú táca-gá. Te lètrá-áⁿ càháⁿ-xi ná cuèndá ducaⁿ ñí quide ñaha-güedé xii-gá. Te duha càháⁿ lètrá-áⁿ: “Téé yìndaha ñaha xii ñáyiu isràél”, duha càchí-xi. 27 Te tnàhá úú cue téé cùu ñadúhú ñí sata caa-güedé ñuu-ni núú cùrúxí tucu. Te ìⁿ-dé ní sata caa-güedé xio cùha-gá, te ingá-dé ní sata caa-güedé xio dàtni-gá. 28 Te ducaⁿ ñí cuu chi ní quee ndáá-xi nàcuáa càháⁿ-xi núú tütú Yã Ndiòxí núú càchí-xi: “Ìⁿ-ni ñí quide ñaha-güedé xii-gá ndihì cue téé ndècu cuéchi-xi”, duha càchí-xi núú tütú-gá.

29 Te nchaa ñáyiu yãha yatni núú táca-gá dácucó-yu díquí-yu te xícuèhé ñáhá-yu xii-gá, te xäháⁿ-yu:

—Te ná cuèndá ducaⁿ càa-n tacaa-n xíaⁿ, te càchí-n sã dàngoyo-n veñúhu càhnu sá ìo cùnuu te dandáa-n ingá veñúhu saa, te xítí úní-ni nduu sa nadaxínu-n càchí-n. 30 Te vitna tanùu núú cùrúxí-áⁿ dácácu-n mèe-n —cachí-yu xäháⁿ-yu xii-gá.

31 Te ñuu-ni ducaⁿ ñí quide cue téé cùu dütú cùnùu, ndihì cue téé dàcuaha ñaha xii ñáyiu nchaa tnúhu ní chídó tnùnì ndíi Moisés, chi ní cudíquí ndeé ñáhá-güedé xii-gá, te ní xítnàha-güedé:

—Téé-a ní ndacu-dé ní dácácu ñihnu-dé ñáyiu, ¿te ná cuèndá ñá ndácú-dé dácácu ñihnu-dé méé-dé-i? 32 Te núu ndáá sá díú-dé cúú-dé Crístú Yáá ní tendaha Yã Ndiòxí véxi ñuyíú-a quindaha ñaha xii ñáyiu isràél, te na cùndehe-o nuu-dé núú cùrúxí, cuèndá quíndáá iní-ó-dé —càchí-güedé xítnàha-güedé.

Te ndéé tnàhá cue téé tàcaa xio xio diñi-gá xícuèhé ñáhá-güedé xii-gá.

Ní xíhí Jèsús

(Mt. 27:45-56; Lc. 23:44-49; Jn. 19:28-30)

33 Te òré ní cuu cuádava nduu, te ní cunee ñihí ñuyíú, te ducaⁿ-ni càa ní cuu ndéé caá úní sacuaa. 34 Te ñuu-ni òré caá úní sacuaa-áⁿ ñihí ní cáháⁿ Jèsús, te xàhaⁿ-gã xii Tãtã-gã Dütú Ndiòxí:

—Elói, Elói, láma sabàctaní —càchí-gá xàhaⁿ-gã.

Te tnúhu-áⁿ quée-xí: Ndiòxí méé-í, Ndiòxí méé-í, ná cuèndá ní dáñá ñaha-n xii-í, duha quèe-xi tnúhu-áⁿ.

35 Te dava cue téé xíndecu yatni núú táca-gá-áⁿ ñí tecú dóho-güedé nàcuáa ní cáháⁿ-gá, te ní xítnàha-güedé:

—Chí cùndédóho chi càna-dé té Èlías —càchí-güedé xítnàha-güedé.

36 Te ìⁿ cue téé xíndecu-áⁿ xínú-dé ní sáháⁿ ní chindóyo-dé luha cáchí xítí ndudí íá, te ní chinenu-dé díquí ìⁿ yutnu càni te ní ndocani-dé chíhí-dé yuhu-gá cuèndá coho-gá. Te ní xàhaⁿ cuè téé xíndecu-áⁿ xii téé-áⁿ:

—Cundetú tnaa na cùndehe-o nacoto núu quixi té Èlías nunehe ñaha-dé xii-dé núú cùrúxí —càchí-güedé xàhaⁿ-güedé xii-dé.

37 Te Jèsús níhi ní canasaa-gá te ní xíhí-ni-gá. 38 Te sátá dúcáⁿ te ní ndátá dǒó cúú còrtiná xítí veñúhu càhnu sá ïo cùnunu ní quée dava ndáá, te ndàa núú nĩnu ní ngúíta-xi ní ndátá. 39 Te tée cùu capitáⁿ nùtnĩi-dé ndàa núú Jèsús, te ndèhe-dé nàcuáa ní quide-gá òré ní xíhí-gá, te ní cachí-dé:

—Sá ndáá ndisa sá díú tǔe-a cùu-dé Déhe Yá Ndiǒxí ní cùu —duha ní cachí-dé.

40 Te xica xĩnutnĩi ìⁿ úú ñáyiu dìhí ndéhě-yu nchaa nàcuáa ní quide ñaha-güedě xii Jèsús, te tnàhá tá Màriá Magdalèná, ndihí tá Salòmé, ndihí tá Màriá náná tǔ Chèé ndihí tǔ Jàcobó tée càchí-güedě cúú lĩhli-gá. 41 Te cue ñáyiu dìhí-áⁿ nĩ xica cuú-yu ndihí Jèsús distritú Galileá ní xinu cuèchí-yu núú-gá. Te cue ñáyiu dìhí-áⁿ nchícúⁿ ñáhã-yu xii-gá ní quexiò ndéé ñuú Jerusàlén ndihí dava-gá ñáyiu dìhí nchícúⁿ ñáhã xii-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

42 Te cùu-xi nduu vispré nduu ndètátú ñáyiu. Te nduu-áⁿ xĩquide túha-yu sá cúú ìngá nduu nduu ndètátú-yu-áⁿ, te diu-ni nduu-á sa ní cuaa vñhi, 43 te ìⁿ tée nani Cheé tée ñuú Arimàteá ní cuyi-dě ní sáháⁿ-dé núú tǔ Pilatú, te ní xáhaⁿ-dǔ sá nũu vá cündèe iní-dé dañá-dé chindúxi-dé yiqui cùñú Jèsús. Te tnàhá tǔ Chèé-áⁿ cúú-dǔ ìⁿ tée cùnunu cundihi-dé cue tée quide jundá, te tnàhá-dé ndétú-dǔ sáá nduu ndĩhu ndaha ñaha Yá Ndiǒxí xii-dé ndihí cue ñáyiu. 44 Te tǔ Pilatú ïo ní cuñúhu-dé sá dúcáⁿ ïo ndihí ní xíhí Jèsús, te ní cana-dé tée cùu capitáⁿ ní xicáⁿ tnúhú-dǔ núú-dǔ nũu ndisa sá sà ní xíhí-gá. 45 Te tée cùu capitáⁿ-áⁿ nĩ xáhaⁿ-dǔ xii tǔ Pilatú sá ndáá ní xíhí Jèsús, núu xíáⁿ tǔ Pilatú-áⁿ nĩ sáha-dé tnúhu chindúxi tǔ Chèé-áⁿ yiqui cùñú-gá. 46 Te tǔ Chèé-áⁿ nĩ saaⁿ-dǔ ìⁿ dóó vǎha, te ní sáháⁿ-dǔ ní nunehe-dé yiqui cùñú Jèsús núú cùrúxí, te ní chidúcúⁿnuu-dé yiqui cùñú-gá dóó vǎha sá nĩ saaⁿ-dǔ-áⁿ, te dǎtnùní néhé-dǔ yiqui cùñú-gá cuáháⁿ ní chihi-dé ìⁿ yaú nchii yiqui naha càva, te ní sadí-dé yuhu yaú-áⁿ ndihí ìⁿ yúú quèhéⁿ. 47 Te tá Màriá Magdalèná, ndihí tá Màriá náná tǔ Chèé ní xiní-yu núú nĩ chihi-dé yiqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

1 Te sátá nĩ cundiⁿquì nduu ndètátú ñáyiu, te tá Màriá Magdalèná, ndihí tá Salòmé, ndihí tá Màriá náná tǔ Jàcobó ní saaⁿ-yu acití sàháⁿ tnámí cuendá canehé-yu quihíⁿ chihí-yu yiqui cùñú Jèsús. 2 Te ndumìngú nehé-ni òré vitna vǎha vǎha ní xinú coto núú nchĩcanchii ní quexiò-yu núú nchii yaú yíhí yiqui cùñú Jèsús. 3 Te ní xitnàhá-yu:

—Yoo cúñaha-o xòcani yúú ndèdí yuhu yaú-a, chi vá yǒo tnàhí ndècu iha —cachí-yu xitnàhá-yu.

4 Te òré ní xindéhé vǎha-yu te ní xiní-yu sá yúú cáhnu ndèdí yuhu yaú-áⁿ ìⁿ xio-ná ndécú. 5 Te cuánguihú-yu xití yaú-áⁿ, te ní xiní-yu núcóo ìⁿ espíritú xinú cuèchi núú Yá Ndiǒxí ndàa xio cuhá-yu, te cà-xi datná cáá ìⁿ tée cuechi, te nĩhnu-xi ìⁿ dóó cuixíⁿ dóó cání, te ní yùhú-yu òré ní xiní-yu espíritú-áⁿ. 6 Te espíritú-áⁿ nĩ xáhaⁿ-xi xii-yu:

—Vá yùhú-ndó, chi yùhú sa cùtnuní iní-í sá nchòhó véxi-ndo nànducu-ndo yiqui cùñú Jèsús tée ñuú Nazàrét tée ní sahani-güedé núú cùrúxí, dico ñá túú-gǎ yiqui cùñú-dé ndécú iha chi sa ní ndoto-dé, te chí cündèhe núú nĩ sacáⁿ-güedé yiqui cùñú-dé te quiní-ndó ñá túú-gǎ-dé. 7 Te chí cuáháⁿ núú ndécú tǔ Pèlú ndihí dava-gá cue tée ní xica cuu ndihí-dé, te duha cúñaha-ndo xii-güedé: “Jèsús codonùu-gá núú-ndó quihíⁿ distritú Galileá, te yàcáⁿ quiní-ndó-gǎ dàtná ní cachí-gá xii-ndo”, duha cúñaha-ndo xii-güedé —càchí espíritú-áⁿ xáhaⁿ-xi xii-yu.

8 Te cue ñáyiu dìhí-áⁿ ïo ní yùhú-yu, te ní quene cunú-yu cuánuhú-yu, te quidi ñaha-ná-xi xii-yu sá ïo ní yùhú-yu, te ñá túú tnàhí ná tnúhu ni xáhãⁿ-yu xii cue ñáyiu ní naníhĩ-yu ichi cuendá sá ïo ní yùhú-yu.

Tá Màriá Magdalèná ní xiní-xi Jèsús

(Jn. 20:11-18)

9 Te sátá dúcáⁿ nĩ ndoto Jèsús ndumìngú nehé-ni-áⁿ, te díhna nuu-gǎ tá Màriá Magdalèná ní quee túu-gá núú-xi, te diu tá Màriá-áⁿ cúú-xí xíchí nĩ xíhí ñaha úsá

espíritú cúndìhi yucu ñávãha ni cùu, te Jèsús ní queñuhu-gá nchaa espíritú-án yiqui cùñú-xi. ¹⁰ Te xíchí-ãⁿ ñí sáháⁿ-xi ní xitnũhu-xi cue téé ní xica cuu ndìhi Jèsús nàcuáa ní cuu, te xíndáhí-güedé sá ndìhú iní-güedé òré ní quexìo-xi núú ndécú-güedé. ¹¹ Te òré ní xáhaⁿ tã Màriá xii-güedé sá ñí ndoto Jèsús ndìhi sá ñí xiní ñáhá-xí xii-gá, te ñá túú ní sàndáa iní-güedé.

Jèsús ní quee túu-gá núú úú cue téé ní xica cuu ndìhi-gá

(Lc. 24:13-35)

¹² Te úú tnàhá cue téé ní xica cuu ndìhi Jèsús ñúhú-güedé ichi cuáháⁿ-güedé yucu, te uuⁿi ní quee túu-gá núú-güedé, te ní dácótó ñàha-xi xii-güedé sá ñà túú-gá cáa-gã dàtná cáa-gã. ¹³ Te cue téé úú-áⁿ ñí xica-güedé cuáháⁿ-güedé ní xitnũhu-güedé nchaa dava-gá cue téé ní xica cuu ndìhi-gá sá ñí xiní ñáhá-güedé xii-gá, dico diu-ni ducaⁿ ñà túú ní sàndáa iní cue téé-áⁿ tnũhu ní cáháⁿ-güedé.

Jèsús xáhaⁿ-gã xii cue téé ní xica cuu ndìhi-gá nàcuáa ndùu chiuⁿ cada-güedé

(Mt. 28:16-20; Lc. 24:36-49; Jn. 20:19-23)

¹⁴ Te ndì ùxí ìⁿ cue téé ní xica cuu ndìhi Jèsús yíhí-güedé mèsá xéxí-güedé, te ní quee túu-gá núú-güedé te ní tenáa ñáhá-gã xii-güedé cuèndá sá ìo sàa iní-güedé ñá túú sàndáa iní ñáhá vãha-güedé xii-gá, chi ñá túú ní cuìní-güedé quíndáa iní-güedé nàcuáa ní xáhaⁿ ñáyiú ní xiní ñáhá xii-gá sá tá ñí yáha ní ndoto-gá. ¹⁵ Te ní xáhaⁿ-gã xii-güedé:

—Quíhíⁿ-ndó ñihí ñuyíú cáháⁿ-ndó núú ncháa ñáyiú tnũhu váha tnũhu sá cáháⁿ nàcuáa naníhí tàhú-yu. ¹⁶ Te nchaa ñáyiú na quíndáa iní tnũhu-áⁿ te cuanduté-yu, te naníhí tàhú-yu, dico nchaa ñáyiú vá quíndáa iní tnũhu-áⁿ te cuíta nihnú-yu. ¹⁷ Te nchaa ñáyiú na quíndáa iní ñáhá xii-í te cadá-yu sá vã yõo tnàhí ndàcu cada, te cacunehe ñàhá-yu xii-í, te queñuhú-yu nchaa espíritú cúndìhi yucu ñávãha yìhi ñaha xii ñáyiú. Te uuⁿi ndacú-yu cáháⁿ-yu ingá núú tnũhu sá vã tá dácuàha-gá-yu. ¹⁸ Te cuèi na tní-yu cóo déeⁿ dico ñá túú ñà cada ñaha-di xii-yu, te cuèi venènú ná cáxí-yu dico ñá túú ñà tnahá-yu, te tendàhá-yu cue

ñáyiú cùhú te ndúha-yu —càchí-gá xáhaⁿ-gã xii-güedé.

Jèsús cuánda-gá andiu
(Lc. 24:50-53)

¹⁹ Te sá tá ñí yáha ducaⁿ ñí xáhaⁿ Jèsús xii cue téé ní xica cuu ndìhi-gá, te ní ndanchita-gá cuánda-gá andiu te ní ngóo-gá xio cùha Dútú Ndiõxí. ²⁰ Te cue téé-áⁿ ñí xica-güedé cuáháⁿ-güedé, te ní ngüíta-güedé cáháⁿ-güedé tnũhu Xítohá Jesucristú nchaa xichi. Te mee-gã ní chindee ñàha-gã xii-güedé ní quide-güedé nchaa sá vã yõo tnàhí ndàcu cada cuèndá cutnùnì iní ñáyiú sá ndáa cáháⁿ-güedé tnũhu-gá. Duha ní cuu dàvá-áⁿ.

TNÚHU NÍ CHÍDÓ TNÙNÍ TÉ LÛCÁ

Nàcuáa ní ngódó tnùní tnúhu Yá Ndiöxí

1 Te vâi ñáyiú chîdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nàcuáa ní cuu. 2 Te ñáyiú nchaa tnúhu chîdo tnuní-yu-án cúú-xí tnúhu ní cáháⁿ nchaa cue téé ní xini ndáá nàcuáa ní cuu ndéé díhna, cue téé ní cáháⁿ tnúhu Yá Ndiöxí. 3 Te yúhú sa ní cuu nduu quide cuendá-í nchaa nàcuáa ní cuu, núu xiáⁿ ní sani iní-í tee váha-í nchaa tnúhu-a núu tütú sá cúú-xí yòhó té Tëofilú chi ío váha cùu iní-í sá cúú-xí-n, 4 te tèe-í cuendá cutnùní iní-n sá sá ndáá cúú-xí nchaa sá ní dánèhé ñáhá-güedé xii-n.

Íⁿ espíritú xínú cuèchi núú Yá Ndiöxí cächí-xi sá cácu íⁿ téé cunani Juáá

5 Te cútnàhá ní xindaha té Hèrodés ñáyiú distrítú Jùdeá dàvá-án ní xindecu íⁿ dútú ní xínani-dě Zacàriá, te ní cundihi-dé cue dútú Àbiás. Te ñadihi-dé ní xínani-aⁿ Èlisabét, te ñaha-án ní cuu-aⁿ ñani tnàhá ndii Àrón. 6 Te ndi ndùú-yu ío ní quide ndáá-yu núu Dütú Ndiöxí, chi ní tñí-yu nchaa tnúhu ní cáháⁿ-gá. 7 Te ñá túú nì íⁿ déhe-yu, chi ducaⁿ táhú tá Elisabét sá vâ cóó dèhe-aⁿ, te ducaⁿ ndi nduú-yu ío ní sahnú-yu.

8 Te íⁿ nduu xínu cuechi tucu té Zacàriá ndihi nchaa cue téé cundihi-dé núú Yá Ndiöxí xití veñúhu. 9 Te dàvá-án ní xito ndéé-güedé cuendá cutnùní iní-güedé núu ndèdacàa-güedé quíhu núu nàá xití veñúhu-án cahmi-güedé sá sàháⁿ tnámí, te ní cutnùní sá tē Zacàriá quíhu-dé. Te ducaⁿ ní quide-güedé, chi ducaⁿ tnàhí ní xóo cada nchaa cue dútú dàvá-án. 10 Te ñini sàhmi té Zacàriá sá sàháⁿ tnámí núu nàá, te vâi vihi ñáyiú xindecu quehé veñúhu-án càháⁿ ndihi-yu Yá Ndiöxí. 11 Te ní xini té Zacàriá íⁿ espíritú xínú cuèchi núú Yá Ndiöxí núnñí-xi xio cùha núu nàá núu càyú sá sàháⁿ tnámí-án. 12 Te òré ní xini té Zacàriá espíritú-án te ñá ní cutnùní iní-dé nása cada-dé chi ío ní yúhú-dé. 13 Te espíritú-án ní xàháⁿ-xi:

—Zacàriá, vá yúhú-n chi Yá Ndiöxí ní tedóho-gá tnúhu ní cáháⁿ-n, te vitna coo íⁿ déhe ñadihi-n tá Elisabét te danàni-n-dé Juáá. 14 Te ío cudíí iní-n, te ducaⁿ ío vâi ñáyiú cudíí iní-yu na càcu-dé. 15 Te ío cudíu-dé núú Yá Ndiöxí, te ní vâ cóhó-dě ndidí te ní vâ cóhó-dě ndudí sá ní natiu, te sa cundecu ndihi-dé Espíritú Yá Ndiöxí òré cacu-dé. 16 Te ñáyiú cada te ío vâi ñáyiú isràél natuhá-yu ichi Dütú Ndiöxí Yáá cúú Ndiöxí-ó. 17 Te té Juáá-án codonù-dé núú-gá, te cundecu ndihi-dé Espíritú-gá, te taxi tnùní-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá váha sá cúú-xí cuè téé cuechi, te cuèi cue téé ío sàá iní-xi, te ñáyiú cada te tñí-güedé tnúhu váha, tnúhu càháⁿ ñáyiú quide ndáá. Te ducaⁿ càda-dé cada túha-dé ñáyiú cuendá cunu cuèchi-yu núú Dütú Ndiöxí —cächí-xi xàháⁿ-xi xii-dé.

18 Te té Zacàriá ní ndúcú tnúhu-dé núu espíritú-án, te xàháⁿ-dè:

—¿Te nása cutnùní ndáá iní-í tnúhu càháⁿ-n-í? Chi yúhú ío ní sahnú-í ndihi ñadihi-í —cächí-dé xàháⁿ-dè xii-xi.

19 Te espíritú-án ní xàháⁿ-xi:

—Yúhú cúu-í espíritú nání Gàbriél, te xínu cuechi-í núú Yá Ndiöxí, te mee-gá ní táuchíú-gá náhá-í tnúhu-gá véxi cuendá cutnùní iní-n nàcuáa cada ñaha-gá xii-ndo.

20 Te vitna cuu ñihí-n te vá càháⁿ-gá-n ndéé ná sàá nduu càcu déhe ñadihi-n, chi ñá túú ní sàndáá-ni iní-n tnúhu ní cáháⁿ-í. Te dacuití sáá nduu càda-xi nàcuáa ní cáháⁿ-í-a —cächí espíritú-án xàháⁿ-xi xii-dé.

21 Te nchaa ñáyiú xindecu quehé ndétü-yu té Zacàriá, te xicuñúhu-yu sá ío cùyaa-dé xití veñúhu. 22 Te òré ní ndee té Zacàriá, te ñá ní cùu-gá cáháⁿ ndihi ñaha-dé xii-yu, te òré-án ní cutnùní iní-yu sá ní xini-dé íⁿ espíritú xínú cuèchi núú Yá Ndiöxí xití veñúhu. Te mee-nà ndaha-dé ní quide-dé núu-yu chi ñá ní cùu-gá cáháⁿ-dè.

23 Te ní xínu nduu ní xínu cuechi tē Zacàriá núú Yá Ndiöxí xití veñúhu, te cuánuhú-dé vehe-dé. 24 Te sátá dúcáⁿ ní cuu te ñadihi-dé tá Elisabét ní ngúhuⁿ déhe-aⁿ, te úhúⁿ yóó ñá túú tnàhí-gá ní quèe-aⁿ caca cuu-aⁿ, te ní cachí-aⁿ: 25 “Mee Dütú Ndiöxí duha ní cundàhú iní ñáhá-gá sá cóó íⁿ

déhe-í cuendá sá vǎ cúu yǐchí iní ñáhá ñǎyiu xii-í”, duha ní cachí-aⁿ.

Íⁿ espíritú xínú cuèchi núú Yǎ Ndiǒxí cǎchí-xi sá cǎcú Jèsús

26-27 Te núu iní yóo sǎ ñí ngúhuⁿ déhe tá Elisàbét, te ní tendaha tùcu Yá Ndiǒxí espíritú nání Gǎbriél cuáháⁿ-xi ìⁿ ñúú nání Nàzarét cuáháⁿ ngoto-xi ìⁿ xíchí cuéchi nàni Mariá. Te ñúú-áⁿ yíndèhu-xi distritú Galileá. Te xíchí-ǎⁿ sa ní cundáá tnúhu sá tnǎndaha-xi ndihí ìⁿ téé nàni Cheé ñaní tnáhá ndíi Dàvíi. 28 Te espíritú-áⁿ ñí quíhu-xi ndéé xití vehe núu ndécú tǎ Màriá, te ní xáhaⁿ-xi:

—¡Cóvǎha-n-aⁿ! Dútú Ndiǒxí ío cùu iní ñáhá-gǎ xii-n te ndècu ndihí ñaha-gǎ, te ío-gǎ xító ñaha-gǎ xii-n dàcúxí dàva-gǎ ñáyiu dǐhí —cǎchí espíritú-áⁿ xǎhaⁿ-xi.

29 Dico òré ní xiní tá Màriá espíritú-áⁿ, te ní quiyùhú iní-xi sá dúcáⁿ ñí cǎháⁿ espíritú-áⁿ. Te ní sani iní-xi: “¿Ná cuendá duha cǎháⁿ-tu espíritú-a-i?”, duha ní sani iní-xi. 30 Te espíritú-áⁿ ñí xáhaⁿ-xi:

—Màriá, vá yùhú-n chi ducaⁿ ñí nduu táhú-n ñúu Yá Ndiǒxí. 31 Te vitna ngúhuⁿ déhe-n, te na càcu-dé te danàni-n-dé Jèsús. 32 Te ío cunuu-dě, chi Dútú Ndiǒxí Yaá ío cùnuu cachí-gǎ sá Dèhe-gǎ cúu-dě, te diu-gǎ cada te cuu-dé ìⁿ téé cùnuu núu ñáyiu isràél dàtná ní quide-gǎ ndíi Dàvíi. 33 Te taxi tnùní-dé ñáyiu isràél, te ducaⁿ-ni cùnuu-dé ñí caa ñí quíhíⁿ —cǎchí-xi xǎhaⁿ-xi.

34 Te tá Màriá ní xáhaⁿ-xi xii espíritú-áⁿ:

—¿Te nása cuu tnúhu cǎháⁿ-n te ñá túú yǐ-í-í? —cǎchí-xi xǎhaⁿ-xi.

35 Te ní xáhaⁿ espíritú-áⁿ:

—Espíritú Yǎ Ndiǒxí quixi cundecu ndihí-n, te ducaⁿ Yǎ Ndiǒxí cada-gǎ ìⁿ sá vǎha sá cúu-xí-n ná càcu déhe-n. Te Yá Ndiǒxí cǎchí-gǎ sá ío cundecu yǐñùhu-dé núu-gǎ, chi Dèhe-gǎ cúu-dě. 36 Te tnáhá didí-n tǎ Elisàbét ñúhú dèhe-aⁿ cuèi ío ní sahnu-aⁿ, te diu-aⁿ cǎchí-yu sá vǎ cóo dèhe-aⁿ ni cùu, te vitna sa ní cuu iní yóo ñúhú dèhe-aⁿ. 37 Chi Yá Ndiǒxí ndácú-gǎ quidé-gǎ nchaa sá vǎ yǒo tnáhí ndàcu cada —cachí-xi xǎhaⁿ-xi.

38 Te tá Màriá ní xáhaⁿ-xi:

—Yùhú ná cúnú cuèchi-í núu Dútú Ndiǒxí, te mee-gǎ ná cǎdá ñaha-gǎ xii-í

nàcuáa ní cachí-n —cǎchí-xi xǎhaⁿ-xi xii espíritú-áⁿ.

Te sátá dúcáⁿ te espíritú-áⁿ ñí xica-xi cuáháⁿ-xi.

Tá Màriá cuáháⁿ ngoto-xi tá Elisàbét

39 Te tá Màriá ío ndihí cuáháⁿ-xi ìⁿ ñúú cǎá xití yucu distritú Júdeá. 40 Te ní sǎá-xi vehe té Zacàriá, te cuánguihu-xi ní dándácõo váha-xi tá Elisàbét. 41 Te òré ní tecú dóho tá Elisàbét ní cǎháⁿ tá Màriá, te ní candá déhe-aⁿ xití-aⁿ, te òré-áⁿ ñí ngúndecu ndihí-aⁿ Espíritú Yǎ Ndiǒxí. 42 Te níhi ní cǎháⁿ-aⁿ, te xǎhaⁿ-aⁿ xii tá Màriá:

—Yá Ndiǒxí ío xító ñaha-gǎ xii-n dàcúxí dàva-gǎ tnàha dǐhí-ó, te ducaⁿ-ni xito-gǎ cuèi déhe-n. 43 ¿Te ná cúu yùhú ñúu véxi coto ñaha yòhó nǎná Yaá cúu Xítóhó-í-í? 44 Chi òré-ni ní tecú dóho-í ní cǎháⁿ-n te ní candá-ni déhe-í xití-í sá cùdǐí iní-dé. 45 Te váha táhú yòhó sá ñí sǎndáá iní-n, chi dacuití sǎ cǎdá Dútú Ndiǒxí nàcuáa ní cǎháⁿ espíritú ní tendaha-gǎ ní quixi ní cachí tnúhu xii-n nàcuáa cada-gǎ —cǎchí-aⁿ xǎhaⁿ-aⁿ xii tá Màriá.

46 Te ní xáhaⁿ tǎ Màriá:

Ío cǎhnu cuu Dútú Ndiǒxí,

47 ío cùdǐí iní-í chi diu-gǎ taunihnu ñaha-gǎ xii-í núu ùhú núu ndàhú.

48 Chi ní ndacu iní ñáhá-gǎ xii yùhú, te dǐcò ìⁿ xíchí xínú cuèchi núu-gǎ cúu-í,

te vitna te nchaandi túhú ñáyiu cachí-yu sá ío váha táhú-í.

49 Te Yá Ndiǒxí cǎndòo caa nine iní-gǎ, te ío cǎhnu ìⁿ sá vǎha ní quide-gǎ sá cúu-xí-í.

50 Te cùndahú iní-gǎ nchaa ñáyiu nèhe sá yǐñùhu núu-gǎ.

Te ducaⁿ-ni cuèi ñáyiu sa ndècu ñuyíú-a ndihí ñáyiu vitna véxi.

51 Chi ta quide-gǎ nchaa sá vǎ yǒo tnáhí ndàcu cada véxi,

te ta dándóo canúú-gǎ cue ñáyiu quide cahnu mee-xi.

52 Te cue ñáyiu taxi tnuní ñá túú-gǎ dáñá-gǎ taxi tnùní-yu,

te cue ñáyiu ndàhú ní quide nínu ñaha-gǎ xii-yu.

53 Te cue ñáyiu ndècu ndihí tnúndòho tnúhu ndàhú ní quide váha ñaha-gǎ xii-yu,

te cue ñáyiu cuica ñà túú nǎ ní níhí-gǎ-yu cundecu ndihí-yu.

54 Te chindee-gá ñáyi israhél, ñáyi xínu cuechi núú-gă, te ñá túú dàña ni-hnu ñaha-gá xií-yu, chi cundahú iní ñáhá-gă.

55 Chi ducaⁿ ñí xáhaⁿ-gă xii ndíi Àbrahám, ndihí cue ñaní tnáhá ndíi. Duha ní xáhaⁿ tă Măriá xii tá Elisàbét.

56 Te ní xíndecu tá Măriá dàtná úní yóó ndihí tá Elisàbét te dàtnùní cuánuhú-xi vehe-xi.

Ní cacu té Juàá té dacuàndute ñaha xii ñáyi

57 Te ní sáá nduu ñí cacu ñⁿ déhe té tá Elisàbét. 58 Te nchaa ñáyi ndècu yatni ndihí-aⁿ, ndihí nchaa ñaní tnáhá-áⁿ ñí níhí-yu tnúhu nàcuáa ní chindee ñàha Yá Ndiòxí xii-aⁿ. Te ío ní cudíi iní-yu cuendá-aⁿ. 59 Te núú úná nduu sá ñí cacu déhe-aⁿ, te ní sáháⁿ ñáyi núú ndécú-áⁿ cuendá cuáhă-yu sèná ñí déhe-aⁿ. Te cuini-yu cunani dèhe-áⁿ Zacàriá dàtná nání tătă ní cùu. 60 Te ní xáhaⁿ náná dèhe-áⁿ:

—Ñáhá, chi Juàá cunani-dě —càchí-aⁿ xáhaⁿ-aⁿ xií-yu.

61 Te ní xáhăⁿ-yu:

—¿Te ná cuendá te ñá túú ñí ñaní tnáhá-ndó dùcaⁿ nani-i? —càchí-yu xáhăⁿ-yu.

62 Te ní quidé-yu ndàhá-yu núú tătă dèhe-áⁿ cuendá cuini-yu núú nása cuini méé-dě cunani dèhe-dé. 63 Te ní xícáⁿ-dé ñⁿ tutú ní chídó tnùní-dé nàcuáa cunani dèhe-dé, te duha ní chídó tnùní-dé: “Juàá cunani-dě”, càchí-xi núú tütú ní tee-dé-áⁿ. Te nchaa ñáyi xíndecu-áⁿ ñí cuñúhu-yu nàcuáa ní cuu. 64 Te òré-áⁿ ñí nacáháⁿ té Zacàriá sá ñí cuu ñihí-dé ní cùu, te ní ngúita-dé ní cachí-dé sá ío càhnu cuu Yá Ndiòxí. 65 Te nchaa ñáyi xíndecu yatni ndihí-dé ní cuñúhu-yu, te nchaa ñáyi xíndecu ñihí xití yucu distritú Jùdeá ní níhí-yu tnúhu nàcuáa ní cuu. 66 Te nchaa ñáyi-áⁿ ío vài ní sani iní-yu, te ní xítñáhá-yu:

—¿Ná cúú sã cádá tée-ăⁿ ndéé idá-gá ná cuèhnu-dé? —càchí-yu xítñáhá-yu.

Te ducaⁿ ñí xítñáhá-yu chi Dútú Ndiòxí ndécú ndihí ñaha-gá xii-dé.

Té Zacàriá càchí-dé sá ío càhnu cuu Yá Ndiòxí

67 Te té Zacàriá tătă tẽ lìhli-áⁿ ñí ngúndecu ndihí-dé Espiritú Yá Ndiòxí te ní cáháⁿ-dé nchaa tnúhu sá ñí dánèhé ñáhá-gă, te ní cachí-dé:

68 Ío càhnu cuu Dútú Ndiòxí nchoo ñáyi israhél,

chi ní quixi coto ñaha-gă xii-o, te cùu-o ñáyi cùu cuendá-gá, chi dàcácu ni-hnu ñaha-gă xii-o vitna.

69 Chi ní tendaha-gă ñⁿ tée véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíí tée ní xínu cuechi núú-gă ndéé sanaha.

70 Te diu-ni tnúhu ní cáháⁿ Yá Ndiòxí ní cáháⁿ cue tée ní quide ndáá ní xíndecu núú-gă ñuyíú-a ndéé sanaha.

71 Te ní cachí-güedé sá táunihnu ñaha-gá xii-o núú nchàa ñáyi cùu ùhú iní ñáhá, ndihí núú nchàa ñáyi ñá túú cùu quini ndee ñáhá.

72 Te ní xáhaⁿ-gă sá cundahú iní ñáhá-gă xii-o, te ducaⁿ càda-gá chi vá nàcuànaa-gă tnúhu ní cáháⁿ-gă ndihí-güedé.

73 Te diu ducaⁿ ndùu tnúhu ní xáhaⁿ-gă xii ndíi Àbrahám sá

74 táunihnu ñaha-gá xii-o núú nchàa ñáyi cùu ùhú iní ñáhá,

cuendá sá vã yùhú-ó cùu cuechi-o núú-gă.

75 Te cada ndáá-ó, te cundecu yíñuhu-o núú-gă ndi nchàa nduu cundecu-o ñuyíú-a.

Duha ní cachí té Zacàriá.

76 Te xáhaⁿ-dě xii té lìhli-áⁿ:

Te yòhó té lìhli, cáháⁿ ñáyi cuendá-n sã cúú-n ñⁿ tée càháⁿ tnúhu Dútú Ndiòxí Yá ío cùnuu,

chi quíhíⁿ-n còdonuu-n núú Yáá cúú Xítòhó-ó dàtúha-n ñáyi cuendá cundecu túha-yu òré quexìo-gá.

77 Te cúñaha-n xii ñáyi israhél sá cuini-gá cada càhnu iní-gá nchaa cuéchi-yu, te naníhí tàhú-yu.

78 Te ducaⁿ càda-gá chi ío cùu iní ñáhá-gă xii-o, chi ndéé andíu ñí tendaha-gă ñⁿ tée véxi

cuuⁿ-dé dandixi túu-dé iní-ó cuendá cutnùní iní-ó nàcuáa ndùu cuendá Yá Ndiòxí.

79 Te ducaⁿ dandixi túu-dé iní nchaa ñáyi ndècu ichi cuehé ichi duha ta xíta

nihnu cuáháⁿ cuendá nucúnu ichí-yu
 ìⁿ ichi váha.

Duha ní xáhaⁿ tẽ Zacàriá xii déhe-dé.

⁸⁰ Te té lĩhli-áⁿ tá sàhnu-dé, te ta chĩndee chitúu ñaha Yá Ndiõxí xii-dé cuáháⁿ, te ní xĩndecu-dé xití yucu ndéé ní sáá nduu ñi ngũita-dé ní cáháⁿ-dé núú cuè ñáyiu isràél tnúhu Yá Ndiõxí.

2

Ní cacu Jèsús

(Mt. 1:18-25)

¹ Te dàvá-áⁿ ñi táúchíúⁿ tẽ Àugustú Cèsár nucódó tnùnì nchaa ñáyiu nacióⁿ yĩndàha-dé. ² Te xéhe sã dĩhnanuu ñi nucódó tnùnì ñáyiu, te ñi-ni dàvá-áⁿ ñi cunuu té Cireníu distritú Siríá. ³ Te nchaa ñáyiu ní natacá-yu ñúú núú ñi cacú-yu cuendá nucódó tnùnì-yu. ⁴ Núú xíáⁿ ní quee té Chèè ñúú Nazàrét ìⁿ ñúú yĩndèhu distritú Galileá, te cuáháⁿ-dé ñúú Bèlén ìⁿ ñúú yĩndèhu distritú Jùdeá, chi xíáⁿ ñi cuu ñúú ndí Dàvíí, te ñi-ni ñani tnáhá tẽ Chèè-áⁿ ñi cuu ndí. ⁵ Núú xíáⁿ cuáháⁿ-dé ndéé ñúú Bèlén nucódó tnùnì-dé, te tnáhá tá Màriá xíchí ñi cundáá tnúhu sá tnãndaha ndĩhi-dé cuáháⁿ ndĩhi ñaha-dé, te sa ñúhu déhe-xi. ⁶ Te ñi-ni cùyaá-yu ñúú Bèlén-áⁿ ñi sáá òrè cacu déhe-xi. ⁷ Te ní cacu déhe díhna-xi, te ní chidúcúⁿnuu-xi dóó, te ní sacáⁿ ñáhá-xí ìⁿ vehe núú cúú vèhe quití, chi ñá túú ní ñĩh-yu vehe coó-yu.

Cue espíritú xínú cuèchi núú Yá Ndiõxí ndĩhi cue toli.

⁸ Te yatni ñúú-áⁿ xĩndecu ìⁿ úú toli ndèè-güedé mbéè-güedé ndécú-güedé ma-jadá niú-áⁿ. ⁹ Te uuⁿni ní quexìo ìⁿ espíritú xínú cuèchi núú Yá Ndiõxí, te Yá Ndiõxí ní quide-gá ní dáyèhé-xi ñi càndéé núú xĩndecu-güedé, te ní yùhú víhí-güedé. ¹⁰ Te ní xáhaⁿ espíritú-áⁿ:

—Vá yùhú-ndó, chi nàha-í ìⁿ tnúhu váha véxi sá cúú-xí-ndó, te ío cudíí ñi-ndó ndĩhi nchaa ñáyiu. ¹¹ Chi vitna ní cacu ìⁿ tée dàcácu nihnu ñaha xii-ndo núú ùhú núú ndáhú ñúú ndí Dàvíí, te tée-áⁿ cúú-dé Xítóhó Jesucristú. ¹² Te dàtná ìⁿ sèñá te naníhí-ndó tẽ lĩhli-áⁿ yídücúⁿ nuu-dé dóó cáá-dé ìⁿ vehe quití —càchí-xi xáhaⁿ-xi xii-güedé.

¹³ Te òrè-áⁿ ñi quexìo cuéhe víhí espíritú véxi cuuⁿ andiu ñi naníhí tnáhá-xí ndĩhi espíritú-áⁿ, te ní ngũita-xi ní chiñuhu-xi Yá Ndiõxí, te càchí-xi:

¹⁴ ¡Ío càhnu cuu Yá Ndiõxí Yaá ndécú àndiu, te na cùndecu váha-ñi nchaa ñáyiu cùu iní mée-gã!

Duha càchí cue espíritú-áⁿ.

¹⁵ Te òrè cuándaa cue espíritú-áⁿ andiu, te ní ngũita cue toli-áⁿ xĩtnàha-güedé:

—Na quíhíⁿ-ó ñúú Bèlén quini-ó nacuáa ní cuu, chi Dútú Ndiõxí sa ní cachí tnúhu-gá —càchí-güedé xĩtnàha-güedé.

¹⁶ Te ní tñi-güedé ichi súunì ndĩhi cuáháⁿ-güedé, te ní naníhí-güedé tá Màriá ndĩhi té Chèè, ndĩhi té lĩhli-áⁿ cáá-dé xití ìⁿ vehe quití. ¹⁷ Te òrè ní xiní ñáhá-güedé te ní xáhaⁿ-güedé xii-yu nacuáa ní xáhaⁿ espíritú-áⁿ xii-güedé cuendá té lĩhli-áⁿ. ¹⁸ Te nchaa ñáyiu ní tecú dóho-xi ní cuñúhu-yu nacuáa ní cáháⁿ-güedé. ¹⁹ Dico tá Màriá chi ñúhu nahi-ñi iní-xi, te dícó-ñi sàni iní-xi cuendá nchaa tnúhu-áⁿ. ²⁰ Te cue toli-áⁿ ñi natñi-güedé ichi, te ta xĩtnàha-güedé cuánuhú sá ío càhnu cuu Yá Ndiõxí cuendá nchaa tnúhu ní xĩndedóho-güedé, ndĩhi cuendá nchaa sá ñi xiní-güedé, chi cuendá sá ndàá ní cuu nchaa nacuáa ní tecú tnúhu-güedé.

Ndècá-yu Jèsús cuáháⁿ veñúhu

²¹ Te núú ùná nduu sá ñi cacu té lĩhli-áⁿ, te ní sáha-güedé sèñá ñi-dé, te ní dánání ñaha-güedé Jèsús xii-dé, ñi-ni nacuáa ní xáhaⁿ espíritú xínú cuèchi núú Yá Ndiõxí xii tá Màriá ndéé cùtnáhá vátá ngũhuⁿ-gá-dé xití-xi.

²² Te sátá ñi tnáhá nduu, nduu ìⁿ-yu nacuáa càháⁿ nchaa tnúhu ní chídó tnùnì ndí Moisés, te ndècá-yu té lĩhli-áⁿ cuáháⁿ ñúú Jerusálén cuendá quee túu-dé núú Dútú Ndiõxí. ²³ Te ducaⁿ ñi quide-yu, chi ducaⁿ càháⁿ-xi núú tütú Yá Ndiõxí sá ncháá lándú tée na càcu díhna quetúu-güexi núú-gá cuendá cundecu-ná-güexi cuendá-gá. ²⁴ Te ní quide-yu nacuáa càháⁿ Yá Ndiõxí núú tütú-gá núú càchí-xi: “Canehe-ndo úú lõmá àdi úú cùcu quíhíⁿ nduu táhú ñáhá Yá Ndiõxí”, duha càháⁿ-gá núú tütú-gá.

²⁵ Te dàvá-áⁿ ndécú ìⁿ tée nani Mió ñúú Jerusálén. Te ío váha iní-dé, te chiñuhu-dé

Yă Ndiöxí, te ndètu-dé sáá nduu chindee ñaha Yá Ndiöxí xii ñáyíu isràél. Te ndècu ndihí té Mió-án Espíritú Yă Ndiöxí. ²⁶ Te sa ní xáhaⁿ-xi xii-dé sá vă cùú-ni-dé, chi dacuítí quini-dé Crístú Yaá tendaha Yă Ndiöxí quixi ñuyíú-a. ²⁷ Te té-án ndécá ñaha Espíritú Yă Ndiöxí xii-dé cuáhán veñúhu cànno sá ïo cùnno. Te cuáhán-yu ndihí Jèsús veñúhu-án cuendá cada-yu ndihí-gá nàcuáa cáhán tnúhu ní chídó tnùní ndíi Moisés. ²⁸ Te òré ní sáá-yu, te té Mió-án ní nguídèhé-dé Jèsús, te ní cáhán-dé sá ïo cànno cuu Yá Ndiöxí, te ní xáhaⁿ-dè xii-gá:

²⁹ Yòhó Dútú Ndiöxí sa ní cuu daña-n cùú-í vitna,

chi sa ní quide-n nàcuáa ní cachí-n xii yúhú té xínu cuechi núú-n.

³⁰ Chi sa ní xini núú-í Yaá dácácu nihnu ñaha xii ñáyíu núú ùhú núú ndàhú vitna.

³¹ Te Yaá ní tendaha-n vèxi núú ndécú nchàa ñáyíu ñuyíú-a.

³² Te cùu-gá dàtná ïⁿ ñuhú, chi dandixi túu-gá iní ñáyíu cuendá cutnùní iní-yu cuendá Yă Ndiöxí cuèi ñá díú ñáyíu isràél cúú-yu.

Te diu-gá cada, te canehe ñáyíu dava-gá ñuu sá yíñuhu núú ñáyíu isràél chi diu ñáyíu isràél cúú-yu ñáyíu cùu cuendá-n.

Duha ní xáhaⁿ té Mió xii Yá Ndiöxí.

³³ Te té Chèé ndihí náná Jèsús ní cuñúhu-yu tnúhu ní cáhán té Mió cuendá-gá.

³⁴ Te dàtnùní té Mió ní xicáⁿ táhú-dé núú Yă Ndiöxí cuendá-yu, te xáhaⁿ-dè xii tá Màriá náná Jèsús:

—Cundedóho tnúhu na cáhán-í-a, té lĩhli-a ní nduu táhú-dé nacanu ichi-dé dava ñáyíu isràél ichi Yá Ndiöxí, te davá-yu vá tnĩ-yu tnúhu cáhán-dé, te ñáyíu-án cuíta nihnú-yu, te cada-dé nàcuáa cutnùní iní ñáyíu sá Yă Ndiöxí ní tendaha ñaha-gá xii-dé, dico vá quindáa iní-yu, chi daquèe tíhú ñáhã-yu xii-dé. ³⁵ Te ducaⁿ te cutnùní nàcuáa sàni iní ïⁿ ïⁿ ñáyíu. Dico sá cúú-xí yòhó chi ío cada ndàhú-xi iní-n, chi súúní dàtná sá ní cuèhé iní-n cada-xi —cachí-dé xáhaⁿ-dè xii tá Màriá.

³⁶ Te xíáⁿ ndécú tnàhá ïⁿ ñaha cáhán tnúhu Yá Ndiöxí nání-án Aná, te tātá-aⁿ ní xínani-dè Fànuél ñani tnàhá ndíi Àser. Te ñaha-án sa ní sahnú vèhi-aⁿ, te cuechi-ni-aⁿ ní tnándaha-aⁿ

te úsá-ni cuía ní xíndecu-aⁿ ndihí yíⁿ-aⁿ, ³⁷ te ní quendóo quèé-aⁿ, te sa ñuhu-aⁿ cúmídícó cùmí cuía-aⁿ. Te ñá túú ní xóo quèe-aⁿ veñúhu cànno sá ïo cùnno, chi nduu níú ní xóo chiñuhu-aⁿ Dútú Ndiöxí, te áma ñá túú tnàhí ná ní xóo caxi-aⁿ ní xóo cáhán ndihí-aⁿ Yă Ndiöxí. ³⁸ Te diu-ni òré ndécú-yu ndihí Jèsús ní quexio-aⁿ núú-yu, te ní ndacáⁿ táhú-án núú Yă Ndiöxí cuendá sá ní xini-aⁿ Jèsús, te dàtnùní ní nguíta-aⁿ cáhán váha-aⁿ cuendá-gá núú nchàa ñáyíu, ñáyíu ndètu quini sáá nduu dácácu Yá Ndiöxí ñáyíu Jerusàlén núú tnündòho tnúhu ndàhú.

Cuánuhú-yu ñuu Nazàrét

³⁹ Te sáta ní quidé-yu nchaa nàcuáa cáhán tnúhu Yá Ndiöxí, te cuánuhú-yu ñuu Nazàrét núú ndécú tnàhí-yu, te ñuu-án yíndèhu-xi distritú Galileá. ⁴⁰ Te té lĩhli nani Jèsús-án tá sàhnú-dé, te ta nihí ndéé-dé cuáhán, te ducaⁿ ïo váha ta sáá sá xini tnùní-dé cuáhán, chi Yá Ndiöxí ndécú ndihí ñaha-gá xii-dé.

Jèsús ndécú-gã veñúhu

⁴¹ Te ndi tnàhá cuía ní xóo quíhíⁿ té Chèé ndihí náná Jèsús vico pascuá ñuu Jerusàlén. ⁴² Te cùtnàhá ní chítú Jèsús úxúú cuía-gã, te cuáhán-yu ndihí-gá ñuu Jerusàlén vico pascuá, chi ducaⁿ tnàhí quidé-yu. ⁴³ Te òré ní yáha vico, te ní natnĩ-yu ichi cuánuhú-yu, te ní quendóo-gá ñuu Jerusàlén, te ní náná-gã, te ní té Chèé ñá túú ní xini ní quendóo-gá. ⁴⁴ Chi ní sani iní-yu sá ñútnàhá-gá tnuú nchaa ñáyíu ní sáhán vico cuánuhú. Te ní xúhuⁿ-yu ïⁿ nduu ichi ta nducu tnúhu-yu-gá núú nchàa ñani tnàhá-yu, ndihí núú nchàa ñáyíu xini tnàhá ndihí-yu, ⁴⁵ te ñá túú ní nánihí ñáhã-yu xii-gá. Núú ní nacuicó-yu cuánuhú tucú-yu ñuu Jerusàlén cuendá yacáⁿ nanducu ñàhá-yu xii-gá.

⁴⁶ Te núú ùní nduu sá ní dana núú ñáhã-yu xii-gá, te ní nanihí ñáhã-yu núcóo-gá xiti veñúhu cànno sá ïo cùnno tnuú cue tée dacuaha ñaha xii-yu nchaa tnúhu ní chídó tnùní ndíi Moisés, te ndèdóho ñaha-gã xii-güedé, te nándi sá ndúcú tnúhu-gá núú-güedé. ⁴⁷ Te nchaa cue tée xíndedóho ñaha xii-gá xicuñuhu-güedé sá ïo váha sáá sá xini tnùní-gá, te ío váha nihí-gá tnúhu

nàdanchocáva-gá. ⁴⁸ Te òré ní xini ñhá té Chèé ndihi náná-gã xii-gá, te ío ní cuñúhu-yu, te ní xáhaⁿ náná-gã xii-gá:

—Yòhó déhe-í, ¿ná cuendá ducaⁿ ñi quide ñaha-n xii-ndí? Te tātá-n ndihi yúhú ndihú iní-ndí xicá nànducu ñaha-ndí xii-n —càchí-xi xáhaⁿ-xi xii-gá.

⁴⁹ Te ní xáhaⁿ Jèsús xií-yu:

—¿Ná cuendá nánducu ñaha-ndo? ¿Náa ñá túú xini-ndó sã núú chíúⁿ Tātá-í tâu-í caca cuu-í-ãⁿ? —càchí-gá xáhaⁿ-gã xií-yu.

⁵⁰ Dico mèe-yu ñá túú ní tècú tnùní-yu nàcuáa ní xáhaⁿ-gã.

⁵¹ Te sátá dúcáⁿ te cuánuhú ndihi ñhá-yu xii-gá ñuú Nazàrét, te ío ní sándáá iní ñhá-gã xií-yu. Te nchaá sá ñi quide-gá-áⁿ ñi xúhuⁿ nahi-ni iní náná-gã. ⁵² Te Jèsús ducaⁿ-ni ta sàhnu-gá cuáháⁿ, te ta sàá-gá sá xini tnùní-gá cuáháⁿ, te ducaⁿ cùdiu-gá núú Yá Ndiòxí, ndihi núú nchàa ñáiyu.

3

Té Juàá té dàcuandute ñaha xii ñáiyu càháⁿ-dé tnúhu Yá Ndiòxí xití yucu

(Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuiá sã yíndàha té Tiberiú cuéhé nacióⁿ, te dàvá-áⁿ ñi cunuu té Pilatú distritú Jùdeá, te té Hèrodés ní cunuu-dě distritú Galileá, te ñaní-dé té Lìpé ní cunuu-dě distritú Itùreá ndihi ingá distritú nání Tràconité, te té Lisaniás ní cunuu-dě distritú Abiliniá. ² Te té Ànás ndihi té Caifás ní cuu-güedé dútú cúnùu. Te dàvá-áⁿ ñi cáháⁿ ndihi ñaha Yá Ndiòxí xii té Juàá déhe té Zacàriá xití yucu sá quihíⁿ-dé cáháⁿ-dé tnúhu-gá núú ñáiyu. ³ Te té Juàá ní yáha-dé nchaá ñuú cáá yàtni yúte Jòrdán, te xáhaⁿ-dě xii nchaá ñáiyu:

—Chí dándixi túú iní sá ñà túú quide váha-ndo, te dañá-ndo nchàa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yá Ndiòxí nchaá yicá cuèchi-ndo —duha ní xáhaⁿ-dě xií-yu.

⁴ Te ducaⁿ ñi quide-dé chi ní quee ndáá-xi nàcuáa ní chídó tnùní ndí Chàíá té ní xóo cáháⁿ tnúhu Yá Ndiòxí ndéé sanaha núú tütú ndí núú càchí-xi:

Tècú càháⁿ níhi ñi té yìhi xití yucu, te xáhaⁿ-dě xii ñáiyu:

“Chí dañá nchàa ichi cuehé ichi duha ndècu-ndo, te tnii-ndo ichi váha,

te ducaⁿ càda-ndo cuendá cundecu túha-ndo, chi véxi Yaá ío cúnuu.

⁵ Te nchaá núú cúnú nachítú, te nchaá tìndúú ndihi nchaá yucu ngoyo nihnu cuendá nduu ndáá, te nchaá ichi ñá túú cuáháⁿ ndáá nduu ndáá,

te nchaá ichi ñá túú càváha nduu váha.

⁶ Te nchaá ñáiyu ñuyíú-a níhi-yu tnúhu sá Yá Ndiòxí véxi-gá dàcácu nihnu ñaha-gã xií-yu núú ùhú núú ndàhú.”

Duha ní chídó tnùní ndí Chàíá núú tütú ndí.

⁷ Te òré ní xica ñáiyu cuáháⁿ-yu cuendá dacuandute ñaha té Juàá xií-yu, te ní xáhaⁿ-dě:

—¿Nchaá nchòhó cúú-ndó dàtná ñi cóo dèéⁿ chi ío cuihna iní-ndó! ¿Te nása ní cuu núú tnàhá nchòhó ndúcú-ndó nàcuáa càcu nihnu-ndo núú tnùndòho cahnu vihi sá tá cùyatni ñaha xii-ndo véxi-i? ⁸ Te chí càdá váha vitna cuendá ducaⁿ cùtnuní sá ñi dañá-ndó nchàa ichi cuehé ichi duha ndècu-ndo. Te vá càchí-ndó sã ío càhnu cuu-ndo cuendá sá cúú-ndó ñaní tnàhá ndí Abrahám, chi cuèi ndéé yúú te ndacu Yá Ndiòxí ndada-gá ñáiyu te cuú-yu ñaní tnàhá ndí Abrahám. ⁹ Te caá chi ndècu túha-xi sá quèhndé-xi nchaá yutnu sá ñà túú càváha sávidí-xi, chi nchaá yutnu-áⁿ tènndé-xi te cuánguee-xi núú ñùhú càyú-xi. Te duha sàtnahá-xi ndoho nchaá ñáiyu ñá túú quide váha, chi nchaá ñáiyu ducaⁿ ñà túú quide váha cùú-yu dàtná nchaá yutnu sá ñà túú càváha sávidí-xi. —càchí-dé xáhaⁿ-dě xií-yu.

¹⁰ Te ní xicáⁿ tnúhu-yu núú-dě, te xáhaⁿ-yu:

—¿Te nása cada-ndí váiⁿ? —càchí-yu xáhaⁿ-yu xii-dé.

¹¹ Te xáhaⁿ-dě:

—Te núú ndédacàa-ndo ndecu ndihi-ndo úú dóo te cuáñaha-ndo ñi xii ñáiyu ñá túú ndècu ndihi, àdi núú ndècu ndihi-ndo sá nchító-ó te cuáha-ndò-yu na càxí-yu —càchí-dé xáhaⁿ-dě xií-yu.

¹² Te ní quexìo ñi úú cue té cuhna iní-xi quide cobrá ñhá xii ñáiyu cuendá impuèstú cuendá cuandute-güedé, te ní xicáⁿ tnúhu-güedé núú tã Juàá, te xáhaⁿ-güedé:

—Mèstrú, ¿te nása cada-ndí cuendá cuu váha iní Yá Ndiòxí-i? —càchí-güedé xáhaⁿ-güedé xii-dé.

¹³ Te té Juàá ní xáhaⁿ-dě:

—Vá cuídó-ndó càda cobrá-ndó ñàyiú — càchí-dé xǎhaⁿ-dě xii-güedé.

14 Te tñàhá ìⁿ úú cue tée cùu sandadú xǎndecu-áⁿ nǐ xícáⁿ tñúhú-güedé núú tē Juàá, te xǎhaⁿ-güedé:

—Te nchúhú ñnása cada-ndí cuendá cuu váha iní Yǎ Ndiǒxí-i? —càchí-güedé xǎhaⁿ-güedé xii-dé.

Te ní xáhaⁿ tē Juàá:

—Vá quéndèe-ndó sǎ néhé tñàha ñàyiú-ndo, te ni vǎ dácàa díquí-ndō-yu ìⁿ sǎ ñà túú nǎ quídē-yu, te nduu vétú iní-ndó nàcuáa ñùhu yáhu-ndo —càchí-dé xǎhaⁿ-dě xii-güedé.

15 Te nchaá ñàyiú xǎndetu sǎ quíxí Crístú sàni ìⁿ sàni úú iní-yu núu sǎ díú Crístú Yaa tendaha Yǎ Ndiǒxí quixi ñuyúú-a cùu te Juàá àdi ñáhá. 16 Dico té Juàá ní cáháⁿ ndodo-dé núú-yu nchaá-yu, te xǎhaⁿ-dě:

—Na càchí tñúhu ndáá-í xii-ndo sǎ yǔhú véxi-í sǎ cuendá-ni dacuàndute ñaha-í xii-ndo dàtná ní cachí Yǎ Ndiǒxí, dico nchícúⁿ ingá tée véxi, te tée-áⁿ taxi-dé Espíritú Yǎ Ndiǒxí cundecu ndihí-ndo, te cùu-xi datná ìⁿ ñuhú, chi ndada ndoo ndada nine-xi iní-ndó. Te tée-áⁿ ïo-gá cúnùu-dé dàcúúxí yǔhú, chi yúhú cùu-í ìⁿ tée duuⁿ duuⁿ ñá túú tàú-í nandaxi-í cuèdicó ñì chàu-dé dico quide-í chùuⁿ-dē.

17 Te tée-áⁿ sa véxi túha-dé sǎ cáda ðìⁿ ñaha-dé xii-o dàtná quidé ñàyiú ndàda ndoo triú, chi ñàyiú-áⁿ sa nèhe túha-ná-yu yaxíⁿ-yu òré nǎñani cuendá ndada ndoó-yu, te òré ndádá ndoó-yu triú-áⁿ te dàquee díⁿ-yu mihi-xi, te tàxúha-yu mee-nǎ triú-áⁿ, te mihi-xi-áⁿ sǎhmí-yu. Te dàtná quídē-yu mihi triú-áⁿ ducaⁿ sǎtnahá-xi cada ñaha tée-áⁿ xii nchaá ñàyiú ñá túú quide váha, chi daquìhíⁿ ñáhá-dě xií-yu núú ñùhú núú càyú, te ñuhú-áⁿ ñà túú tñahí ndàhvá — càchí-dé xǎhaⁿ-dě xií-yu.

18 Te titní víhí-gǎ tñúhu váha ní xáhaⁿ tē Juàá xií-yu òré ní dásàhú ñáhá-dě. 19 Te ní cáháⁿ-dé dóho té Hèrodés cuendá sǎ ndécá-dé ìⁿ ñaha nàni Herodiás ñaha ní cándeca ñani-dé té Lipé, te ní xáhaⁿ-dē cuendá nchaá dava-gǎ sǎ cuéhé sǎ dúhá quide-dé. 20 Dico té Hèrodés ñá túú ní quide cuendá-dé tñúhu ní cáháⁿ tē Juàá, chi

nèhé-gǎ tucu ní quide-dé, chi da vecaá ní chihi-dé tē Juàá.

Sàndute Jesús

(Mt. 3:13-17; Mr. 1:9-11)

21 Te òré dacuàndute té Juàá nchaá ñàyiú, te tñàhá Jèsús ní dacuàndute ñaha-dé xii-gǎ. Te nini cáháⁿ ndihí-gǎ Dútú Ndiǒxí ní nacaáⁿ andiú, 22 te ní quee Espíritú Yǎ Ndiǒxí véxi cuuⁿ túu-xi, te càa-xi datná cáá ìⁿ lómá, te òré-áⁿ nǐ tecú ní cáháⁿ Yǎ Ndiǒxí ndéé andiú, te xǎhaⁿ-gǎ xii Jèsús:

—Yòhó cúu-n Dèhe-í tée ío cùu iní-í, te ío cùdíí ìní ñáhà-í xii-n —càchí-gǎ xǎhaⁿ-gǎ xii Jèsús.

Cue tée ní xǎndecu díhna-gǎ ñuyúú-a dàcúúxí Xǐtohó Jesucristú

(Mt. 1:1-17)

23 Te ndècu Jesús dàtná ócò úxí cuiá-gǎ cúnàhá ní chisaha-gǎ chùuⁿ ní táhú Tǎtá-gǎ Dútú Ndiǒxí cada-gǎ. Te ní cuu-gǎ dèhe té Chèé chi ducaⁿ sàni iní ñàyiú ñuyúú-a. Te té Chèé-áⁿ nǐ cuu-dé dèhe té Èlí, 24 te tée-áⁿ nǐ cuu-dé dèhe té Mátát. Te té Mátát-áⁿ nǐ cuu-dé dèhe té Lèví, te tée-áⁿ nǐ cuu-dé dèhe té Mèlquí. Te té Mèlquí-áⁿ nǐ cuu-dé dèhe té Jàná, te tée-áⁿ nǐ cuu-dé dèhe té Chèé. 25 Te té Chèé-áⁿ nǐ cuu-dé dèhe té Matàtiás, te tée-áⁿ nǐ cuu-dé dèhe té Àmós. Te té Àmós-áⁿ nǐ cuu-dé dèhe té Nàhúm, te tée-áⁿ nǐ cuu-dé dèhe té Èslí. Te té Èslí-áⁿ nǐ cuu-dé dèhe té Nagái, 26 te tée-áⁿ nǐ cuu-dé dèhe té Mátát. Te té Mátát-áⁿ nǐ cuu-dé dèhe té Matàtiás, te tée-áⁿ nǐ cuu-dé dèhe té Semèí. Te té Semèí-áⁿ nǐ cuu-dé dèhe té Chèé, te tée-áⁿ nǐ cuu-dé dèhe té Jùdá.

27 Te té Jùdá-áⁿ nǐ cuu-dé dèhe té Jòaná, te tée-áⁿ nǐ cuu-dé dèhe té Rèsá. Te té Rèsá-áⁿ nǐ cuu-dé dèhe té Zorobàbél, te tée-áⁿ nǐ cuu-dé dèhe té Salàtiél. Te té Salàtiél-áⁿ nǐ cuu-dé dèhe té Nèrí, 28 te tée-áⁿ nǐ cuu-dé dèhe té Mèlquí. Te té Mèlquí-áⁿ nǐ cuu-dé dèhe té Àdí, te tée-áⁿ nǐ cuu-dé dèhe té Còsám. Te té Còsám-áⁿ nǐ cuu-dé dèhe té Elmòdám, te tée-áⁿ nǐ cuu-dé dèhe té Èr. 29 Te té Èr-áⁿ nǐ cuu-dé dèhe té Jòsué, te tée-áⁿ nǐ cuu-dé dèhe té Elièzér. Te té Elièzér-áⁿ nǐ cuu-dé dèhe té Jòrím, te tée-áⁿ nǐ cuu-dé dèhe té Mátát. 30 Te té Mátát-áⁿ nǐ cuu-dé dèhe té Lèví, te tée-áⁿ nǐ cuu-dé dèhe té Mió. Te té Mió-áⁿ nǐ cuu-dé dèhe té Jùdá, te tée-áⁿ nǐ cuu-dé dèhe té Chèé. Te té Chèé-áⁿ nǐ

cuu-dé déhe té Jónán, te té-áⁿ nǐ cuu-dé déhe té Eliàquím. ³¹ Te té Eliàquím-áⁿ nǐ cuu-dé déhe té Mèléá, te té-áⁿ nǐ cuu-dé déhe té Mainán. Te té Mainán-áⁿ nǐ cuu-dé déhe té Màtatá, te té-áⁿ nǐ cuu-dé déhe té Nàtán. ³² Te té Nàtán-áⁿ nǐ cuu-dé déhe té Dàvíí, te té-áⁿ nǐ cuu-dé déhe té Isàí. Te té Isàí-áⁿ nǐ cuu-dé déhe té Òbéd, te té-áⁿ nǐ cuu-dé déhe té Bòóz. Te té Bòóz-áⁿ nǐ cuu-dé déhe té Sàlmón, te té-áⁿ nǐ cuu-dé déhe té Naàson. ³³ Te té Naàson-áⁿ nǐ cuu-dé déhe té Aminàdáb, te té-áⁿ nǐ cuu-dé déhe té Àrám. Te té Àrám-áⁿ nǐ cuu-dé déhe té Èsróm, te té-áⁿ nǐ cuu-dé déhe té Fàrés. Te té Fàrés-áⁿ nǐ cuu-dé déhe té Jùdá, ³⁴ te té-áⁿ nǐ cuu-dé déhe té Jàcób. Te té Jàcób-áⁿ nǐ cuu-dé déhe té Isàác, te té-áⁿ nǐ cuu-dé déhe té Àbrahám. Te té Àbrahám-áⁿ nǐ cuu-dé déhe té Tàré, te té-áⁿ nǐ cuu-dé déhe té Nàcór. ³⁵ Te té Nàcór-áⁿ nǐ cuu-dé déhe té Sèrúg, te té-áⁿ nǐ cuu-dé déhe té Ragàú. Te té Ragàú-áⁿ nǐ cuu-dé déhe té Pèlég, te té-áⁿ nǐ cuu-dé déhe té Hèbér. Te té Hèbér-áⁿ nǐ cuu-dé déhe té Sàlá, ³⁶ te té-áⁿ nǐ cuu-dé déhe té Cainán. Te té Cainán-áⁿ nǐ cuu-dé déhe té Arfàxád, te té-áⁿ nǐ cuu-dé déhe té Sèm. Te té Sèm-áⁿ nǐ cuu-dé déhe té Nòé, te té-áⁿ nǐ cuu-dé déhe té Làméc. ³⁷ Te té Làméc-áⁿ nǐ cuu-dé déhe té Matusalén, te té-áⁿ nǐ cuu-dé déhe té Ènóc. Te té Ènóc-áⁿ nǐ cuu-dé déhe té Jàréd, te té-áⁿ nǐ cuu-dé déhe té Mahalàleél. Te té Mahalàleél-áⁿ nǐ cuu-dé déhe té Cainán, ³⁸ te té-áⁿ nǐ cuu-dé déhe té Ènós. Te té Ènós-áⁿ nǐ cuu-dé déhe té Sèt, te té-áⁿ nǐ cuu-dé déhe té Àdán. Te té Àdán-áⁿ chi mee Yá Ndiöxí ní cadúha ndaha ñaha-gá xii-dé.

4

Sácuíhná quidé yíca-xi cada Jesús sá ñà túú tàú-gá cada-gá ní cùu

(Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihí-gá Espiritú Yá Ndiöxí, te Espiritú-áⁿ ndéca ñaha-xi xii-gá cuáháⁿ ìⁿ xití yucu. ² Te yàcáⁿ ní xíndecu-gá údico nduu, te sácuíhná nǐ cuiní-xi coto ndéé ñáhá-xí xii-gá te núu ndisa sá vǎ cádá-gá ìⁿ sá ñà túú tàú-gá cada-gá. Te ñà túú tnàhí ná ní xèxi-gá ndí údico nduu-áⁿ, te sátá dúcáⁿ te ní xicáⁿ iní-gá caxi-gá. ³ Te sácuíhná-áⁿ nǐ xáhaⁿ-xi xii-gá:

—Te núu ndisa sá cúu-n Dèhe Yá Ndiöxí, te cúñaha xii yúu-a na ndùu-xi paá — cǎchí-xi xǎhaⁿ-xi xii-gá.

⁴ Te Jèsús ní xáhaⁿ-gá xii-xi:

—Núú tütú Yá Ndiöxí cǎchí-xi: “Ñá díú mèe-ni paá candeca-xi iní ñáyíu, chi tnàhá nchaa tnúhu cǎháⁿ Yá Ndiöxí candeca-xi iní-yu”, duha cǎchí-xi núú tütú-gá —cǎchí-gá xǎhaⁿ-gá xii-xi.

⁵ Te dǎtnùní sácuíhná ndéca ñaha-xi xii-gá cuáháⁿ ìⁿ núú tǐndúú dùcúⁿ, te uuⁿni ní dánèhé núú ñáhá-xí xii-gá nchaandi túhú nacióⁿ cáá ñùyíú. ⁶ Te ní xáhaⁿ-xi xii-gá:

—Yúhú cada-í, te taxi tnùnín nchàa-ndí túhú nacióⁿ-a ndihí nchaa sá vǎha ió díu-ni nchaa nacióⁿ-a, te cachí ñáyíu sá ío cùnuu-n, chi yúhú cúu cuendá-í nchaa sá ío nchaa nacióⁿ-a, te ndédani càa ñáyíu cùu iní-í te cúñaha-í xii-yu taxi tnùnín-yu. ⁷ Te núu ni yúhu ni iní-n chĩñuhu ñaha-n xii-í ñá, te nchaa taxi-í cuu cuendá-n —cǎchí-xi xǎhaⁿ-xi xii-gá.

⁸ Te Jèsús ní xáhaⁿ-gá xii-xi:

—Xocuíñí yòhó sácuíhná núú ndécú-í-a, chi vǎ cúu cáda-í nàcuáa cǎchí-n chi núú tütú Yá Ndiöxí cǎchí-xi: “Chĩñuhu-ndo Dütú Ndiöxí Yaá cúu Ndiöxí-ndó, te ìⁿdí díí-ni-gá cada-ndo nchàa nacuáa cǎháⁿ-gá”, duha cǎchí-xi núú tütú-gá —cǎchí-gá xǎhaⁿ-gá xii-xi.

⁹ Te sácuíhná ndéca ñaha tucu-xi xii-gá cuáháⁿ ñuú Jerusàlén, te ní xáhaⁿ-xi xii-gá cuásaá-gá díquí veñúhu cǎhnu sá ío cùnuu, te ní xáhaⁿ tucu-xi:

—Te núu ndisa cùu-n Dèhe Yá Ndiöxí te cuandèe ndava ndéé núú ñúhú ¹⁰ cuendá quee ndáá-xi nàcuáa cǎháⁿ-xi núú tütú Yá Ndiöxí núú cǎchí-xi:

Yá Ndiöxí tendaha-gá cue espíritú xínú cuèchi núú-gá quixi-xi coto ñaha-xi xii-n.

¹¹ Te núú ndáhá-xí càundodo-n cuendá sá vǎ dǎncuèhé yúú sǎhá-n,

duha cǎchí-xi núú tütú-gá —cǎchí sácuíhná xǎhaⁿ-xi xii-gá.

¹² Te Jèsús ní xáhaⁿ-gá xii-xi:

—Te cǎchí tucu-xi núú tütú Yá Ndiöxí: “Vǎ cání iní-n còto ndéé-n Dütú Ndiöxí Yaá cúu Ndiöxí-n núu ndisa sá dǎcǎcu nihnu ñaha-gá xii-n cuendá ìⁿ sá sání iní-n cáda-n sá cúu-xí mèe-n”, duha cǎchí-xi núú tütú-gá —cǎchí-gá xǎhaⁿ-gá xii-xi.

13 Te sáta dúcáⁿ te sácúíhná ñà túú-gă ní cùtnuní iní-xi nása cada-xi Jèsús, núu xiáⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tátá-gă Dútú Ndiöxí cada-gă (Mt. 4:12-17; Mr. 1:14-15)

14 Te Jèsús cuáháⁿ tucu-gă distritú Galileá, dico sa ndècu ndihi-gă Espíritú Yă Ndiöxí, te ni càa xico xiáⁿ nĩ níhi-yu tnúhu nchaa nàcuáa quide-gă. 15 Te ndi tnahá ñuú cuáháⁿ-gă ducaⁿ cuãnguihu-gă veñúhu-yu dānehé ñáhá-gă xií-yu, te nchaa-yu cāchí-yu sá ïo cāhnu cuu-gă.

Jèsús ndécú-gă ñuú Nazàrét (Mt. 13:53-58; Mr. 6:1-6)

16 Te Jèsús ní sáháⁿ-gă ñuú Nazàrét ñuú núu ní sahnú-gă. Te nduu ndètatú ñáyiu ní quíhu-gă veñúhu, chi ducaⁿ tnàhí quide-gă, te ní ngúnutnĩ-gă dācuàha-gă tutú ndèe tnúhu Yă Ndiöxí. 17 Te ní sãñaha-güedē xii-gă tutú ndèe tnúhu ní cāháⁿ ndí Chàíá tée ní xóo cāháⁿ tnúhu Yă Ndiöxí ndéé sanaha, te òré ní nandicá-gă núu tütú-áⁿ te ní naníhí-gă núu cāchí-xi:

18 Espíritú Yă Ndiöxí ndécú ndihi ñaha-xi xii-í, chi ní cachí-gă sá cāháⁿ-í tnúhu-gă sá cúu-xi ñáyiu ndàhú, ñáyiu vátá cündèdóho tnàhí-gă.

Te véxi-í cuendá vá ndìhú-gă iní ñáyiu ñá túú ndècu váha iní-xi, te cue ñáyiu sa nèhe váha ñaha-ñă yucu ñăvãha dācācu nihnu-í-yu.

Te cue ñáyiu cuáa nacaáⁿ-í núu-yu, te ñáyiu ndòho dandoho ñaha tnahá ñáyiu-xi taunihnu-í-yu.

19 Te cúñaha-í xii ñáyiu sá sàá nduu càda Yă Ndiöxí ñⁿ sá vãha sá cúu-xi-yu. Duha cāchí-xi núu tütú dācuàha-gă.

20 Te Jèsús ní nacadí-gă núu tütú-áⁿ, te ní nacúaha-gă ñⁿ tée xínu cuechi veñúhu-áⁿ, te ní ngóo-gă. Te nchaa ñáyiu yíhi veñúhu ñá núu núu-yu ndèhe ñahá-yu xii-gă. 21 Te xãhaⁿ-gă xií-yu:

—Mei vitna ní quee ndáá-xi nācuáa cāháⁿ-xi núu tütú Yă Ndiöxí —cāchí-gă xãhaⁿ-gă xií-yu.

22 Te nchaa-yu ní cāháⁿ váha-yu cuendá-gă, te ní cuñúhu-yu tnúhu váha cāháⁿ-gă, te xitnàhá-yu:

—¿Te náa ñá díú tēe-a cūu-dé déhe té Chèé-ãⁿ? —cāchí-yu xitnàhá-yu.

23 Te Jèsús ní xãhaⁿ-gă:

—Na cāchí tnúhu ndáá-í xii-ndo sã ñúhú iní-ndó cūñaha-ndo xii-í ñⁿ tnúhu cūtexínu sá cāháⁿ méé-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tūcu-ndo xii-í: “Sa ní níhí-ndí tnúhu nācuáa ní quide-n ñuú Capèrnaúm, te cada-n tnàhá ñuú núu ní sahnú-n”, duha quesaha-ndo —cāchí-gă xãhaⁿ-gă xií-yu.

24 Te ní xãhaⁿ tūcu-gă:

—Na cāchí tnúhu ndáá-í xii-ndo sã ñⁿ tēe cāháⁿ tnúhu Yă Ndiöxí ñá túú tnàhá iní ñáhá ñáyiu ñuú-dé. 25 Te na cāchí tnúhu ndáá tucu-í xii-ndo sã ïo vāi ñáyiu dīhí ñáyiu quēé ní xīndecu nācióⁿ Isràél cūtnàhá ní xīndecu té Èliás cūtnàhá ñá túú ní cūuⁿ dáu ùní cuíá dava, te dāvá-áⁿ ïo ní ndoho ñáyiu docó nitùhú nācióⁿ. 26 Dico Yă Ndiöxí ñá túú ní tēndaha-gă té Èliás quíhíⁿ-dé vehe ndēdani càa ñáyiu dīhí-áⁿ, chi vehe ñⁿ ñaha ñuú Sàreptá ní xãhaⁿ-gă ní sáháⁿ-dé, te ñuú-áⁿ cáá yātñi-xi ñuú Sídón. 27 Te ní xīndecu tucu ingá tée ní xóo cāháⁿ tnúhu Yă Ndiöxí ndéé sanaha, te tée-áⁿ ní xīnani-dē Eliseú, te dīu-ni dāvá-áⁿ ní xīndecu tucu vāi ñáyiu cūhú nācióⁿ Isràél, ñáyiu ní tnahá cuéhé sã dátèhyú nihnu-xi yiqui cūñú-yu dico ñá túú ní ndúha-yu, chi ñⁿ dīi-ni té Nāamán tée distritú Siríá ní ndúha-dé —cāchí-gă xãhaⁿ-gă xií-yu.

28 Te sá dúcáⁿ ní cāháⁿ-gă te xiáⁿ ní cudééⁿ víhí nchaa ñáyiu yíhi veñúhu-ãⁿ núu-gă. 29 Te ní queñuhú-yu Jèsús yuhu dēhvá tīndúú núu cáá ñuú-yu-áⁿ cuendá yacáⁿ dàquēe-yu-gă déhvá ní cūu. 30 Dico Jèsús vii-ni ní quee-gă tnuú-yu cuáháⁿ-gă.

Ñⁿ tée yíhi ñaha espíritú cündihi yucu ñávãha

(Mr. 1:21-28)

31 Te Jèsús cuáháⁿ-gă ñuú Capèrnaúm, te ñuú-áⁿ yīndèhu-xi distritú Galileá. Te yacáⁿ ndécú-gă ní tnahá nduu ndètatú ñáyiu, te ní ngúita-gă dācuàha-gă ñáyiu. 32 Te xicūñúhu-yu nchaa nācuáa dānehé ñáhá-gă

xii-yu, chi càháⁿ-gá dàtná càháⁿ ìⁿ té cùn^{uu}, te cùn^{uu} ndisa-gá.

³³ Te xití veñúhu yìhi ìⁿ té yìhi ñaha ìⁿ espíritú cùndìhi yucu ñávãha, te espíritú-áⁿ nĩ quide-xi níhi ní cáháⁿ té-áⁿ, te xãhaⁿ-dẽ xii Jèsús:

³⁴ —¿Te ná cuiní yòhó Jèsús té ñuu Nazàrét cada ñaha-n xii-ndí nũu véxi-n nũú ndécú-ndí-i? ¿Áⁿ vèxi-n dànaa ñaha-n xii-ndí? Chi yúhú xini ñãhà-í xii-n sã cúu-n ìⁿ té ñá túú tnahí cuéchi-xi chi núú Yã Ndiõxí ní quee-n véxi-n ñùyíú-a —càchí-dé xãhaⁿ-dẽ xii-gá.

³⁵ Te Jèsús ní tenàá-gá espíritú cùndìhi yucu ñávãha-áⁿ, te xãhaⁿ-gã:

—¡Cadí yuhu-n, te taquèe yiqui cuñú té-áⁿ! —càchí-gá xãhaⁿ-gã.

Te espíritú cùndìhi yucu ñávãha-áⁿ nĩ dándüá-xi té-áⁿ ndèé ñuhu tnuú ñáyiu xĩndecu-áⁿ, te ñá túú-gã ná ní quide ñaha-xi, te ní quee ñaha-xi xii-dé. ³⁶ Te nchaa ñáyiu xĩndecu-áⁿ nĩ cuñúhu-yu, te ní xitnãhá-yu:

—¿Te nása nduu-tu tnuhu càháⁿ té-ãⁿ ñá? ¡Te càháⁿ-dé dàtná càháⁿ ìⁿ té tàxi tnuñí víhí, chi càháⁿ-ni-dé te nchaa espíritú cùndìhi yucu ñávãha quèe-ni-xi yiqui cuñú-yu! —càchí-yu xitnãhá-yu.

³⁷ Te nchaa xichi ní níhí-yu tnuhu nàcuáa quide Jesús.

Jèsús quidé tãtna-gá nãná ñadìhí té Ximú
(Mt. 8:14-15; Mr. 1:29-31)

³⁸ Te Jèsús ní ndee-gá xití veñúhu, te cuáhãⁿ-gá vehe té Ximú. Te nãná ñadìhí té Ximú-áⁿ cùhú-aⁿ ñuhu vihi-aⁿ cahni, te ní cáháⁿ ndàhú-yu núú Jèsús cuèndá-aⁿ.

³⁹ Te Jèsús ní sáhãⁿ-gá núú ndécú-áⁿ, te ní ngúnundeyi-gá te ní xáhaⁿ-gã xii cahni-áⁿ sã ná xòcuñí-xi, te ní xócuñí-ni-xi, te òré-ni-áⁿ nĩ ndúha ñaha cùhú-áⁿ te ní ndacóo-aⁿ ní xinu cuechi-aⁿ nũú-güedẽ ndihí-gá.

Jèsús quidé tãtna-gá vai ñáyiu cùhú
(Mt. 8:16-17; Mr. 1:32-34)

⁴⁰ Te òré ní ngódó tnuú nchíanchii, te nchaa ñáyiu xĩndecu ndihí ñáyiu cùhú vehe-xi ndèca ñahãⁿ-yu cuáhãⁿ núú Jèsús. Te Jèsús ní sacãⁿ ndodo-gá ndaha-gá díquí ìⁿ ìⁿ ñáyiu cùhú-áⁿ, te ducaⁿ nĩ quide-gá te ní ndúha-yu. Te ndí dííⁿ nũú cuèhé tnahãⁿ-yu

ìⁿ ìⁿ-yu ní cùu. ⁴¹ Te tnahãⁿ dava ñáyiu cùhú-áⁿ yíhí ñaha espíritú cùndìhi yucu ñávãha xii-yu ní cùu, te òré ní quee ñaha-xi xii-yu, te xiãⁿ ní quide-xi níhi ní cáháⁿ-yu, te xãhãⁿ-yu xii Jèsús:

—Yòhó cúu-n Dèhe Dútú Ndiõxí —càchí-yu xãhãⁿ-yu xii-gá.

Dico Jèsús níhi ní cáháⁿ-gá ní tenàá-gá nchaa espíritú cùndìhi yucu ñávãha-áⁿ, te xãhaⁿ-gã sã vã dúcãⁿ-gã cada-xi, chi sa xini-xi sã díú-gã cúu-gã Cristú Yaa ní tendaha Yã Ndiõxí véxi ñuyíú-a.

Jèsús dánèhé-gá ñáyiu distritú Galileá
(Mr. 1:35-39)

⁴² Te ìⁿ nduu ní túndaá-ni ní quee Jèsús ñuu núú ndécú-gã-áⁿ cuáhãⁿ-gã ìⁿ xichi núú ñã túú ñáyiu ndècu. Te cue ñáyiu ní ngüita-yu nãnducu ñahãⁿ-yu xii-gá te ní naníhí ñahãⁿ-yu, te cuiní-yu ngani ñahãⁿ-yu xii-gá cuèndá sã ñã túú-gã ndèé quíhíⁿ-gá ní cùu. ⁴³ Dico ní xáhaⁿ-gã xii-yu:

—Dacuití quíhíⁿ-í cúñaha-í xii nchaa ñáyiu dava-gá ñuu tnuhu sã càháⁿ nàcuáa ndíhu ndaha ñaha Yã Ndiõxí xii-yu, chi chiuⁿ tnahí-ãⁿ véxi-í —càchí-gá xãhaⁿ-gã xii-yu.

⁴⁴ Te ní xica cuu Jèsús ní dánèhé-gá ñáyiu tnuhu-gá nchaa xití veñúhu ndãa distritú Galileá.

5

Jèsús ní quide-gá ní níhí-güedẽ chácá
(Mt. 4:18-22; Mr. 1:16-20)

¹ Te ìⁿ xito ndècu Jesús yuhu làgúná Genesàrét, te ío cuéhé ñáyiu ní sãá, te ta dàdehnde ñaha-ná-yu xii-gã cuáhãⁿ sã cuiní-yu cundedóho-yu nchaa tnuhu càháⁿ-gã. ² Te Jèsús ní xiní-gã úú bàrcú cue té tñè chácá xĩnutnii-xi yatni yuhu làgúná-áⁿ, te sa ní quene cue té ñuhu xití-xi-áⁿ xinaquete-güedé ñunu-güedé. ³ Te Jèsús cuásaá-gã núú ìⁿ bàrcú-áⁿ, te bàrcú-áⁿ cúu-xi bàrcú té Ximú, te ní xáhaⁿ-gã xii té Ximú-áⁿ sã dánũndehe-dé-xi luha-gã xití ndute. Te dàtnuní ní ngóo-gã núú bàrcú-áⁿ, te xiãⁿ núcõo-gã ní ngüita-gã dánèhé-gã ñáyiu. ⁴ Te òré ní túhú ní dánèhé ñahãⁿ-gã xii-yu, te ní xáhaⁿ-gã xii té Ximú:

—Daquihíⁿ bàrcú-a xití làgúná mei nũú cùnú-gá, te dàquée-ndo ñunu-ndo tñi-ndo chácá —càchí-gá xãhaⁿ-gã xii-dé.

⁵ Te té Xímú ní xáhaⁿ-dê:

—Mèstrú, ni niú ní quide chiúⁿ-ndí te ni ñⁿ chácá ñà túú ní ñihí-ndí, dico vitna cuendá-ni sá yòhó táuchìuⁿ-n te na dàquée-ndí ñunu-ndí váⁿ —càchí-dé xãhaⁿ-dê xii-gá.

⁶ Te òré ní dáquëe-güedé ñunu-güedé te súúni vai chácá ñí ñihí-güedé, te ta ndátá-nã ñunu-güedé cuáháⁿ ní cùu. ⁷ Núu ní quide-güedé ndaha-güedé núú dàva-gá cue tée cùndihí-güedé xixúhuⁿ ingá bàrcú cuendá quihíⁿ-güedé chindee ñaha-güedé. Te cue tée-áⁿ ñí sáháⁿ-güedé ní chindee tñaha-güedé ní dáchitú-güedé ndi ndúú bàrcú mee-ni chácá, te súúni ñí cuu véé núu cuíni-na-xi quée naa-güedé ndihí bàrcú ní cùu. ⁸ Te sá dúcáⁿ cuíni-xi quée naa bàrcú ní cùu, núu té Xímú, àdi Pelú chi úú diu-dé, ní ngüíñí xití-dé núú Jèsús, te xãhaⁿ-dê:

—Xocuñí yòhó Jèsús núú ndécú-í-a, chi yúhú cúu-í ñⁿ téé ío ndècu cuéchi-xi —càchí-dé xãhaⁿ-dê xii-gá.

⁹ Te ducaⁿ ñí cáháⁿ-dé chi ní yùhú-dé, te ní cuñúhu-dé ndihí nchaa cue téé ndihí-dé-áⁿ cuendá sá ío vai chácá ñí ñihí-güedé. ¹⁰ Te tñahá té Jàcobó ndihí té Juàá cue déhe té Zebèdeú ío ní cuñúhu-güedé, te diu-ni cue téé cùndihí té Xímú-áⁿ cúu-güedé tñahá-güedé. Te Jèsús ní xáhaⁿ-gã xii té Xímú:

—Vá yùhú-n, chi není vitna quihíⁿ-n dàcáháⁿ-n ñáyíu cuendá tuha ñahá-yu xii-í —càchí-gá xãhaⁿ-gã xii-dé.

¹¹ Te ní quexìo güedé ndihí bàrcú ndéé ñuhu yìchí yuhu làgúná-áⁿ. Te òré-áⁿ ñí dándõo-güedé nchaandi túhú sá ndécú ndihí-güedé, te ní tuha-güedé Jèsús.

Jèsús quidé tãtña-gá ñⁿ téé tñahá cuéhé sã dátèhyú nihnu-xi yiquí cùñú-ó
(Mt. 8:1-4; Mr. 1:40-45)

¹² Te òré ní quexìo Jesús ñⁿ ñuú, te ní quexìo ñⁿ téé cùhú tñahá-dé cuéhé sã dátèhyú nihnu-xi yiquí cùñú-ó, te òré ní xiní-dé Jèsús te ní sáháⁿ-dé núú ndécú-gã, te ní ngüíñí xití-dé núú-gã te ní nuu núú-dé

ndàa núú ñúhú te càháⁿ ndàhú-dé, te xãhaⁿ-dê xii-gá:

—Mèstrú, véxi-í càháⁿ ndàhú-í núú-n nũu vá cùndèe iní-n càda tátña ñaha-n xii-í, chi cùtnuní iní-í sá ndácú-n —càchí-dé xãhaⁿ-dê xii-gá.

¹³ Te Jèsús ní dácàá-gá ndaha-gá ní tendaha ñaha-gá xii-dé, te xãhaⁿ-gã:

—Cuu cada tátña ñaha-í xii-n, te vitna te ndúha-n —càchí-gá xãhaⁿ-gã xii-dé.

Te òré-ni ní xócuñí cuéhé tñahá-dé. ¹⁴ Te dãtnuní ní xáhaⁿ tucu Jesús xii-dé:

—Vá yõo ñⁿ cúñaha-n sã ñí quide tátña ñaha-í xii-n, núú dütú-ni cuáháⁿ cuendá sá ná quíni ñáhá-dê xii-n sã ñí ndúha-n te cuáha-n-dê sá ndúú tãhú Yã Ndiõxí dàtná ní cachí ndí Moisés cuendá ná quíni ñáyíu sá ndàa ní ndúha-n —càchí-gá xãhaⁿ-gã xii-dé.

¹⁵ Te ducaⁿ ta xitè nuu-gá tñúhu nchaa nàcuáa quide Jesús, te ío cuéhé ñáyíu ní xóo tacá nchaa núú ñí xíndecu-gá cuendá sá cuíni-yu cundedóho-yu tñúhu càháⁿ-gá, ndihí cuendá sá cuíni-yu cada tátña ñaha-gã xií-yu. ¹⁶ Dico Jèsús ní xóo quee nihni-gá tnuú-yu ní xóo quihíⁿ-gá núú ñà túú ñáyíu ndècu ní xóo cáháⁿ ndihí-gá Yã Ndiõxí.

Jèsús quidé tãtña-gá ñⁿ téé cùhú ñá cúu-gã candá nihnu

(Mt. 9:1-8; Mr. 2:1-12)

¹⁷ Te ñⁿ nduu dànehé-gá ñáyíu, te xínucóo ñⁿ ùú cue téé cùu fariséú, ndihí cue téé dàcuaha ñaha xii ñáyíu nchaa tñúhu ní chídó tñuní ndí Moisés. Te cue téé-áⁿ ñí quee-güedé nchaa ñuú yíndèhu distritú Galileá, ndihí distritú Jùdeá, ndihí ñuú Jerusàlén, te nchaa ñuú-áⁿ ñí quee-güedé cuáháⁿ-güedé núú ndécú-gã. Te Yã Ndiõxí chíndèe ñaha-gá quidé tãtña-gá ñáyíu cùhú.

¹⁸ Te ñⁿ ùú cue téé nchido-güedé ñⁿ téé cùhú ñá cúu-gã candá nihnu ñùhu-dé xító ní quexìo ndihí ñaha-güedé, te cuíni-güedé quíhu ndihí ñaha-güedé ndéé xití vehe, sáa-güedé ndéé núú Jèsús ndihí téé cùhú-áⁿ.

¹⁹ Dico ñá túú ní ñihí-güedé ndéé ichi quíhu-güedé, chi cuendá ío cuéhé ñáyíu ndècu, núu xíãⁿ ní sáa-güedé díquí véhé-ãⁿ ñí caáⁿ-güedé te ndàa díquí véhé-ãⁿ ñí dáquëe-güedé téé cùhú-áⁿ, te ñùhu-ni-dé xító ní dáquëe ñaha-güedé tnuú ñáyíu ní sáa ndéé núú Jèsús. ²⁰ Te Jèsús ní cutnùní

iní-gá sá nì yuhu ni iní-güedé sàndáá iní ñáhá-güedé xii-gá, núu ní xáhaⁿ-gã xii té cùhú-áⁿ:

—Yòhó té cùhú, sa ní quide càhnu iní-í nchaa cuéchi-n —càchí-gá xãhaⁿ-gã xii-dé.

²¹ Te cue tée dàcuaha ñaha xii-yu nchaa tnúhu ní chídó tnùnì ndíi Moisés ndihì cue tée cùu fariséu ní sani iní-güedé: “¿Ná cúu tée-a núu càháⁿ cuèhé-dé cuendá Yá Ndiöxí-i? Te vá yóo ìⁿ ndàcu cada cahnu iní nchaa yíca cuèchi ñáyiu, chi ìⁿdi díi-ni Yá Ndiöxí quidé càhnu iní-gá”, duha ní sani iní-güedé.

²² Dico Jèsús sa ní cutnùnì iní-gá nàcuáa sàni iní-güedé núu ní xáhaⁿ-gã xii-güedé:

—¿Te ná cuendá ducaⁿ sàni iní-ndó-í?

²³ Te sá dúhá ñí xáhaⁿ-í xii té cùhú-a sá cáda càhnu iní-í nchaa yíca cuèchi-dé, te xiãⁿ nchòhó ñá túu cùtnunì iní-ndó núu ndáá càháⁿ-í àdi ñá ndáá. Dico núu cúu-í-dé sá ndácóo-dé, te caca-dé te cutnùnì ndáá iní-ndó núu ndáá càháⁿ-í àdi ñá ndáá, chi cundehe núu-ndó nàcuáa cada-í. ²⁴ Te vitna na càda-í nàcuáa cutnùnì iní-ndó nchaa-ndo sá yùhú Té cùu ñaní tnáhá-ndó nchaa-ndo ndecu ndihì-í tnúhu ndee ìní sá cáda càhnu iní-í nchaa cuéchi ñáyiu ñuyú-a —càchí-gá xãhaⁿ-gã xii-güedé.

Te sátá dúcáⁿ te ní xáhaⁿ-gã xii té cùhú-áⁿ:

—Ndacóo, te ndocani-n xító ñùhu-n véxi-áⁿ, te núhú-n vehe-n —cachí-gá xãhaⁿ-gã xii-dé.

²⁵ Te òré-ni-áⁿ ñí ndúha té cùhú-áⁿ te ní ndacóo-dé, te ní ndocani-dé xító ñùhu-dé ní quexio-áⁿ, te ní natnì-dé ichi ta càháⁿ-dé cuánuhú sá ìo càhnu cuu Yá Ndiöxí. ²⁶ Te nchaa ñáyiu xíndecu-áⁿ ñí cuñúhu-yu, te tnáhá-yu ní cachí-yu sá ìo càhnu cuu Yá Ndiöxí, te ducaⁿ ìo ní yùhú-yu, te ní xítñahá-yu:

—Vitna ní xiní-ó ìⁿ sá ñà túu tnàhí xiní-ó ní cùu —cachí-yu xítñahá-yu.

Jèsús cáná-gã té Leví

(Mt. 9:9-13; Mr. 2:13-17)

²⁷ Te sátá dúcáⁿ ñí cuu te ní quee Jèsús xiáⁿ, te ní xiní-gá ìⁿ té nàni Leví núcúo-dé ìⁿ xichi quide cobrá-dé ñáyiu cuendá impuèstú, chi cobradór cúu-dé, te ní xáhaⁿ-gã xii-dé:

—Néhe chítñahá ñáhá-n xii-í —càchí-gá xãhaⁿ-gã xii-dé.

²⁸ Te té Leví-áⁿ ñí ndàcuñí-dé te ní dándóo-dé nchaa sá ndécú ndihì-dé núu núcúo-dé-áⁿ, te ní tuha-dé Jèsús.

²⁹ Te sátá dúcáⁿ te té Leví-áⁿ ñí quide-dé ìⁿ vico càhnu vehe-dé sá cúu-xí Jèsús, te ní tacá vài cue té quide chiuⁿ quide-dé, te nchaa-güedé cuánguihu-güedé mèsá ní ngóo-güedé ndihì dava-gá ñáyiu ní quexio cuendá caxi-güedé ndihì-yu. ³⁰ Dico cue té cùu fariséu ndihì cue tée dàcuaha ñaha xii-yu nchaa tnúhu ní chídó tnùnì ndíi Moisés ní ngúita-güedé xícuèhé-güedé cue té xica cuu ndihì-gá, te xáhaⁿ-güedé:

—¿Ná cuendá xéxi-ndó xihì-ndo ndihì cue té cuhna ìní-xi quide cobrá ñáhá xii ñáyiu cuendá impuèstú, ndihì nchaa dava-gá cue té ndècu ichi cuèhé ichi duha-í? —càchí-güedé xãhaⁿ-güedé.

³¹ Te Jèsús ní xáhaⁿ-gã xii-güedé:

—Nchaa ñáyiu ñá túu cùhú chi ñá túu xini ñuhú-yu ñátátná, dico nchaa ñáyiu cùhú chi xini ñuhu ñahá-yu. ³² Te yúhú véxi-í càháⁿ-í ñáyiu cùtnunì iní-xi sá ndécú cuèchi-xi cuendá dàñá-yu nchaa sá cuèhé sá dúhá quidé-yu, te ñá túu véxi-í càháⁿ-í ñáyiu càchí sá ñà túu ndècu cuéchi-xi —càchí-gá xãhaⁿ-gã xii-güedé.

Cue té ndècu tnúhu núu Jèsús cuendá ñáyiu ñá túu tnàhí ná xéxi áma càháⁿ ndihì-yu Yá Ndiöxí

(Mt. 9:14-17; Mr. 2:18-22)

³³ Te ní xáhaⁿ-güedé xii Jèsús:

—Te áma ñá túu tnàhí ná xéxi cuè té xica cuu ndihì té Juáá càháⁿ ndihì-güedé Yá Ndiöxí, te diu-ni ducaⁿ quide cue té xica cuu ndihì nchúhú cue té cùu fariséu. ¿Te ná cuendá cue té xica cuu ndihì-n ñá túu dùcaⁿ quide-güedé núu nchaa-ni nduu xéxi-güedé xihì-güedé quidé-güedé-í? —cachí-güedé xãhaⁿ-güedé xii-gá.

³⁴ Te Jèsús ní xáhaⁿ-gã xii-güedé:

—Nchòhó xiní-ndó sá vá cúu cñaha-o xii cue ñáyiu ñuhu vico tnándaha sá vá cúu càxí-yu ñini ndècu ndihì ñaha té tnándaha-áⁿ xií-yu. ³⁵ Dico sáá nduu te vá cùndècu ndihì ñaha-gá té tnándaha-áⁿ xií-yu, te dàvá-áⁿ te cahni iní-yu vá càxí-yu sá ndihú iní-yu —càchí-gá xãhaⁿ-gã xii-güedé.

³⁶ Te ní cani-gá ìⁿ cuendú núu ñáyiu nàcuáa tecú tnùnì-yu tnúhu-gá, te xáhaⁿ-gã:

—Vá yõo ìⁿ dándée luha dóó sáá ìⁿ dóó sa ní cuu tùhú víhí, chi núu yoo ducaⁿ na càda, te dóó sáá-àⁿ nàndiyi-xi te uuⁿ-gá ndata-xi dõó sã ní cuu tùhú-áⁿ, te luha dóó sáá-àⁿ ñà túú nàtaú-xi ndée dóó sã ní cuu tùhú-áⁿ. ³⁷ Te ní vá yõo ìⁿ chihhi ndidí sáá xití ìⁿ lamba sa ní cuu tùhú víhí, chi núu yoo ducaⁿ na càda, te ndava lamba sa ní cuu tùhú-áⁿ chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ. ³⁸ Núu xíáⁿ xíní ñùhu-xi quée ndidí sáá-àⁿ xití ìⁿ lamba saa cuèndá ducaⁿ ñà túú nã cuu cováha-xi. ³⁹ Te ní ìⁿ ñáyiu ñà túú tnàhá iní-yu cohó-yu ndidí sáá, te núu díhna-gá ná cohó-yu ndidí sá ní quene díhna-gá, chi càchí-yu sá xíhí vãha-gá ndidí sá ní quene díhna-gá-áⁿ dàcúxí ndidí sáá —càchí-gá xãhaⁿ-gã xii-yu.

6

Cue tée xica cuu ndihi Jesús sàhnú-güedé yoco triú nduu ndètatú ñáyiu
(Mt. 12:1-8; Mr. 2:23-28)

¹ Te ìⁿ nduu cùu-xi nduu ndetátú ñáyiu ñùhu Jesús ichi ndihi cue tée xica cuu ndihi-gá, te ta yãha-gá ndihi-güedé ìⁿ xichi núú cáá triú, te ní ngúita-güedé sàhnú-güedé yoco triú-áⁿ te ndihi ndaha-güedé quíⁿ-güedé quée triú tá xèxi-güedé cuáháⁿ. ² Te ìⁿ úú cue tée cùu fariséú ní xáhaⁿ-güedé xii cue tée xica cuu ndihi-gá:

—¿Te ná cuèndá ducaⁿ quide nchohó ìⁿ sá ñà túú tàú-ó càda-o vitna cuu-xi nduu ndetátú-ó-í? —càchí-güedé xãhaⁿ-güedé.

³ Te Jèsús ní xáhaⁿ-gã xii-güedé:

—¿Te náa ñà túú dàcuaha-ndo núú tütú Yã Ndiõxí núú càháⁿ-xi nàcuáa ní quide ndí Dáví cúnàhá ní xíhí ndí docó ndihi cue tée ní xica cuu ndihi ndí-áⁿ? ⁴ Chi ní quíhu ndí vehe Yá Ndiõxí, te ní queheⁿ ndí pàá ní cuu í ndécú-àⁿ ní dácãhñu ndí cue tée xica cuu ndihi ndí ní xexi ndí ndihi-güedé, te ñà túú tàú ndí sá dúcáⁿ càda ndí ní cùu, chi mee-ni cuè dútú tàú-güedé caxi-güedé pàá-áⁿ ní cùu —cachí-gá xãhaⁿ-gã xii-güedé.

⁵ Te ní xáhaⁿ tùcu-gá:

—Te yúhú Tée cùu ñaní tnàhá-ndó nchãa-ndo, tnàhá-í ndécú ndíhi-í tnúhu ndee iní sá cùu-í nchaa ñáyiu nàcuáa

cadá-yu nduu ndètatú-ó-á —càchí-gá xãhaⁿ-gã xii-güedé.

Èⁿ tée ní yíchí ìⁿ xio ndaha-xi
(Mt. 12:9-14; Mr. 3:1-6)

⁶ Te ìngá nduu diu-ni nduu ndètatú ñáyiu cuànguihu Jèsús xití veñúhu dànehé-gá ñáyiu. Te xíáⁿ ndécú ìⁿ tée cùhú ní yíchí nihnu ìⁿ xio ndaha cùha-dé. ⁷ Te cue tée dàcuaha ñaha xii ñáyiu nchaa tnúhu ní chídó tnùní ndí Moisés, ndíhi cue tée cùu fariséú ndéhé-güedé nùu cada tátna ñaha Jèsús xii tée cùhú-áⁿ nduu ndètatú-güedé-áⁿ cuèndá níhi-güedé nàcuáa cada-güedé cacáⁿ cuèchi-güedé cuèndá-gá. ⁸ Dico Jèsús sa ní cutnùní iní-gá nàcuáa sàni iní-güedé, te ní xáhaⁿ-gã xii tée cùhú ndaha-xi-áⁿ:

—Ndàcuiñí te ngúnutnñi-n cuádava tnuú-ndí-a —càchí-gá xãhaⁿ-gã xii-dé.

Te tée-áⁿ ní ndacuiñí-dé te ní ngúnutnñi-dé cuádava tnuú-güedé ndíhi-gá. ⁹ Te dătnùní Jèsús ní xicáⁿ tnúhú-gã núú cuè ñáyiu xíndecu-áⁿ, te xáhaⁿ-gã xii-yu:

—Cuíní-í cachí tnúhu-ndo nã cúú sã vãha cada-o nduu ndetátú-ó. ¿Èⁿ chiuⁿ vãha àdi ìⁿ chiuⁿ cuehé, sá cadá tátna-o ñáyiu cùhú àdi sá cáhni-ó-yu? —càchí-gá xãhaⁿ-gã xii-yu.

¹⁰ Te dătnùní ní ndacoto-gá nùu-yu nchaa-yu, te ní xáhaⁿ-gã xii tée cùhú ndaha-xi-áⁿ:

—Ndocani ndaha-n —càchí-gá xãhaⁿ-gã xii-dé.

Te ní ndocani-dé ndaha-dé, te òré-ni ní ndúha. ¹¹ Te cue tée xíndecu-áⁿ sùúní ní cudéeⁿ-güedé sá dúcáⁿ ní quide tátna Jèsús tée cùhú-áⁿ, te ní ngúita-güedé ndátnùhu-güedé nùu nása cada ñaha-güedé xii-gá.

Jèsús cãxi-gá úxúú tnàhá cue tée dacuaha ñaha xii ñáyiu tnúhu-gá
(Mt. 10:1-4; Mr. 3:13-19)

¹² Te sátá dúcáⁿ ní cuu te ní xica Jèsús cuáháⁿ-gá xití yucu cuèndá yacáⁿ cáháⁿ ndíhi-gá Tátá-gã Dútú Ndiõxí, te ní niú ní cáháⁿ ndíhi ñaha-gã. ¹³ Te sátá ní túndaá, te ní cana-gá nchaa cue tée xica cuu ndíhi-gá, te ní cáxi-gá úxúú tnàhá-güedé, te cue tée-áⁿ ní xáhaⁿ-gã sá díú-güedé cuu-güedé cue tée quíhíⁿ cáháⁿ tnúhu-gá núú ñáyiu. ¹⁴ Te duha xñani ndí úxúú cue tée-áⁿ. Té Xímú, àdi

Pelú chi úú òdu-dé, ndihi ñaní-dé té Ndríxí, ndihi té Jàcobó, ndihi té Juàá, ndihi té Lìpé, ndihi té Bartolomé, ¹⁵ ndihi té Mâteú, ndihi té Măxí, ndihi té Jàcobó déhe té Àlfeú, ndihi ingá té Xímú téé ní cundihí cue téé canànistá, ¹⁶ ndihi té Jùdás ñaní té Jàcobó, ndihi té Jùdás Iscàrioté téé ní sáá nduu ñí sáha cuendá ñáhá xii Jesús núú cuè téé cùu úhú iní ñáhá xii-gá, duha xínani cuè téé ní cáxi Jèsús ní xica cuu ndihi-gá.

Jèsús dánèhé-gá cuéhé víhí ñáyiú
(Mt. 4:23-25)

¹⁷ Te Jèsús cuánuu-gá yucu núú ñí sáá-gá-án, te ní ngava-gá ñí núú ndàá ndihi cue téé xica cuu ndihi-gá, te xíáⁿ ñí ngúnutñí-gá. Te xíáⁿ ndécú dàva-gá cue téé xica cuu ndihi-gá ndihi vai ñáyiú ndètu ñahá-yu xii-gá, te ñáyiú-án vèxi-yu nchaa ñúú cáá dístítú Jùdeá, ndihi ñúú Jerusàlén, te ndècu ñáyiú véxi ndàa yuhu lamár yatni ñúú Tìrú, ndihi ñúú Sìdón. Te nchaa ñáyiú-án ñí quexió-yu cuíní-yu cundedóho-yu nchaa tnúhu càháⁿ Jèsús, ndihi cuendá sá cuíní-yu ndúha-yu nchaa cuéhé tnàhá-yu. ¹⁸ Te tnàhá ñáyiú yìhi ñaha espíritú cundihí yucu ñávãha. ¹⁹ Te ncháá-yu cuíní-yu dacàá-yu ndahá-yu tendàhá-yu Jèsús ní cùu cuendá sá ñí níhí-yu tnúhu sá ndècu ndihi-gá tnúhu ndee iní quidé tãtna-gá nchaa ñáyiú cùhú.

Cuendá ñáyiú ío váha táhú-xi
(Mt. 5:1-12)

²⁰ Te Jèsús ní ndacoto-gá núú cuè téé xica cuu ndihi-gá, te ní xáhaⁿ-gã:

—Váha táhú nchaa nchòhó cue ñáyiú ndàhú, chi nduu táhú-ndó cùndecu-ndo núú táxí tnùní Yá Ndiòxí.

²¹ Váha táhú nchaa nchòhó ñáyiú ío cuíní cundedóho tnúhu Yá Ndiòxí chi ío víi ío váha cuu iní-ndó.

Váha táhú nchaa nchòhó ñáyiú ndàhyú sá ndihú iní-ndó, chi sáá nduu te cudí iní-ndó ñí caa ñí quíhíⁿ.

²² Váha táhú nchaa nchòhó ñáyiú na cùu úhú iní ñáhá tnàha ñáyiú-xi, chi sáá nduu te vá dáñá-gã-yu quíhu-ndo vèñúhu, te cúcuéhé ñáhã-yu xii-ndo, te cachí-yu sá ñà díú ñáyiú váha cùu-ndo, te ducaⁿ càda ñahá-yu xii-ndo sã cuendá yúhú Téé cùu

ñaní tnàhá-ndó nchaa-ndo. ²³ Te òré ducaⁿ na càda ñahá-yu xii-ndo te cudí víhí-ní iní-ndó cùndecu-ndo, chi sáá nduu nduu táhú-ndó sã ío váha càa ndecu andíu cùndecu ndihi-ndo nduu na nasaá-ndó yacáⁿ cùndecu-ndo, chi òdu-ni ducaⁿ ñí xóo cada ñaha cuè ñaní tnàhá-yu xii cue téé ní xóo cáháⁿ tnúhu Yá Ndiòxí ní xíndecu ndéé sanaha.

²⁴ Te ndàhú ní cuu nchaa ñáyiú cuica ñà túú sàndáá iní ñáhá xii Yá Ndiòxí, chi vitna ío váha ndècú-yu, dico sáá nduu te nduu ndàhú-yu.

²⁵ Te ndàhú ní cuu tucu nchaa ñáyiú ñà túú tnàhí ná cùmãní xii-xi vitna, chi sáá nduu quíní-yu tnúndòho tnúhu ndàhú.

Te ndàhú ní cuu nchaa ñáyiú cudí iní-xi ndècu ichi cuéhé ichi duha vitna, chi sáá nduu te ndàhyú-yu sá ndihú iní-yu.

²⁶ Te ndàhú ní cuu nchaa ñáyiú na càháⁿ váha dàva-gá ñáyiú cuendá-xi, chi ducaⁿ ñí xóo cáháⁿ váha-yu cuendá nchaa cue téé ní xóo dandàhú ñáhá xii ñáyiú ndéé sanaha, chi ní cachí-güedé sá càháⁿ-güedé tnúhu Yá Ndiòxí te ñà ndàá —càchí-gá xáhaⁿ-gã xii-güedé.

Cuu iní-ó nchaa ñáyiú cùu úhú iní ñáhá xii-ó
(Mt. 5:38-48; 7:12)

²⁷ Te Jèsús ní xáhaⁿ-gã xii nchaa ñáyiú xíndecu-án:

—Nchaa nchòhó ñáyiú xíndedóho ñaha càchí tnúhu-í xii-ndo sã cúú iní-ndó ñáyiú cùu úhú iní ñáhá xii-ndo, te cada-ndo sã vãha sá cúú-xí-yu cuèi nándí sá ná cáda ñahá-yu xii-ndo. ²⁸ Te cácaⁿ táhú-ndó núú Yá Ndiòxí cuendá ñáyiú càháⁿ úhú ñáhá xii-ndo, ndihi cuendá ñáyiú tèe ñaha cuéchi neñúú xii-ndo. ²⁹ Te núu ní canihá-yu xii-ndo ñí xito te cuíní tucú-yu canihá-yu, te dañá-ndo na canihá-yu, àdi núu na quèndeé-yu dóó ndíxí ndòdo-ndo, ndihi dúhnú-ndó, te dañá-ndo na cànehé-yu quíhíⁿ. ³⁰ Te núu xicáⁿ-yu ñí sá nándihí-yu núú-ndó te cuáñaha-ndo, àdi quèndeé-yu ñí ndachíuⁿ-ndo, te vá nándacáⁿ-ndó núu-yu.

³¹ Te nchaa sá vãha cuíní-ndó càda tnàha ñáyiú-ndo, te cada-ndo tnàhá-ndó ndihí-yu.

³² Chi núu nchòhó ná cùu iní-ndó mèe-ñí ñáyiú cùu iní ñáhá xii-ndo, te vá càchí-ndó sã ío váha quíde-ndo, chi tnàhá nchaa

ñáyiú ndècu ichi cuehé ichi duha ducaⁿ xĩquidé-yu. ³³ Àdi mee-ni ñáyiú quide ñaha sá vâha xii-ndo quide váha-ndõ-yu, te vá càchí-ndó sã ïo váha quide-ndo, chi tnàhá nchaa ñáyiú ndècu ichi cuehé ichi duha ducaⁿ xĩquidé-yu. ³⁴ Àdi mee-ni ñáyiú sàni iní-ndó nàcoto ñaha xii-ndo cuáñaha-ndo ñⁿ sá xicáⁿ-yu núú-ndó, te vá cání iní-ndó sã ïo quide váha-ndo, chi tnàhá ñáyiú ndècu ichi cuehé ichi duha dàsaⁿ nuú-yu ñⁿ sá néhé vâha-yu, te ndètu cahnu-ná-yu nacoto ñaha ñáyiú ní sáha núú-yu-áⁿ. ³⁵ Dico nchòhó xíní ñùhu-xi cuu iní-ndó ñáyiú cùu úhú iní ñáhá xii-ndo, te cada-ndo sã vâha sá cúú-xĩ-yu, te cuáñaha núu-ndo ñⁿ sá ná ndíhi-yu te núu xicáⁿ-yu núú-ndó, te vá cùndètu-ndo nacoto ñahá-yu xii-ndo. Te ducaⁿ te ío-gá cuéhé ñíhí-ndó cùndecu ndíhi-ndo, te cuu ndisa-ndo dèhe Dútú Ndiõxí, chi ío càhnu iní-gá sá cúú-xí nchàa ñáyiú ñá túú ndàcáⁿ táhú núú-gã cuendá nchaa sá vâha quide-gá, ndíhi sá cúú-xí nchàa ñáyiú ndècu ichi cuehé ichi duha. ³⁶ Te cunduu càhnu iní nchòhó tucu dàtná càhnu iní Tátá-ó Dútú Ndiõxí.

*Vá càháⁿ cuèhé-ó cuendá tnàha ñáyiú-o
(Mt. 7:1-5)*

³⁷ 'Te vá càháⁿ cuèhé-ndó cuendá sá quidé tnàha ñáyiú-ndo, te ducaⁿ te Yá Ndiõxí ñá túú nà tnúhu cúñaha-gã xii-ndo. Te vá cùñaha-ndo xii ñáyiú sá quíhíⁿ-yu ñⁿ xichi núú úhú núú ndàhú ndohó-yu cuendá nchaa sá ñà túú vâha quidé-yu, te ducaⁿ te Yá Ndiõxí vá cùñaha-gã xii-ndo sã tnàhá-ndó quíhíⁿ-ndó ñⁿ xichi núú úhú núú ndàhú ndoho-ndo. Te chí cáda càhnu iní nchaa sá quidè-yu, te ducaⁿ te Yá Ndiõxí cada càhnu iní ñáhá-gã xii-ndo tucu. ³⁸ Te chí cuáñaha xii ñáyiú núu ná cúú sã xíní ñùhú-yu, te dàtná chitu ñⁿ yicá súúní xidó coyo-ná, ducaⁿ tàxi Yá Ndiõxí xii-ndo. Te nánicuáa na càda-ndo cada váha-ndo sã cúú-xí tnàha ñáyiú-ndo, te ñiú-ni ducaⁿ càda ñaha Yá Ndiõxí xii-ndo —càchí Jèsús xãháⁿ-gã xií-yu.

³⁹ Te dàtnúni ní cani-gá ñⁿ cuendú núú-yu nàcuáa tecú tnúni-yu tnúhu-gá, te xãháⁿ-gã:

—Ñⁿ téé cuáa chi ñá ndácú-dè cuita nehe-dé ingá téé cuáa, chi núu ducaⁿ

na càda-güedé te ndi ndúú-güedé ngau-nihnu-güedé déhvá. ⁴⁰ Te ni ñⁿ landú yíhí scuèlá ñá túú cùnuu-gá-güexi dàcúxí mèstrú-güexi, te ndéé núu na cùtúha váha-güexi, te dàtnúni nútnahá-güexi téé dānehé ñáhá xii-güexi.

⁴¹ 'Te na càchí tnúhu-í xii-ndo sã nchàa cuéchi quide ñáyiú cùu-xi datná ñⁿ mihi líhli. ¿Te ná cuendá ndéhé-ndó ñⁿ sá ñà túú vâha quide tnàha ñáyiú-ndo, te mee-ndo vîhi-gá quidé-ndó-í? Te sá dúcáⁿ quide-ndo te cada iní-ndó sã ndéhé-ndó dàtná ñⁿ mihi líhli ñùhu núú tnàha ñáyiú-ndo, te mee-ndo ñùhu ñⁿ mihi cahnu-gá núú-ndó. ⁴² Te núu na nàcanu ichi-ndo tnàha ñáyiú-ndo cuendá sá ñà túú quide váha-yu ndécú-yu te mee-ndo vîhi-gá quidé-ndó ñá, te cada iní-ndó sã xãháⁿ-ndo xii-yu sá nátava-ndo mihi líhli ñùhu núú-yu, te mihi càhnu ñùhu núú méé-ndó ñà túú quide cuendá-ndó. ¿Te sá dúcáⁿ quide-ndo te ío dāndahú-ndó mèe-ndo sá quidé ndāá-ndó te ñá ndāá sá quidé ndāá-ndó! Te xini ñùhu-xi díhna-gá ñaño-ndo nchàa sá ñà túú vâha quide-ndo, te dàtnúni ducaⁿ te cutnúni váha iní-ndó nàcuáa nàcanu ichi-ndo tnàha ñáyiú-ndo.

*Ndi dñⁿ núú yutnu xini-ó nã yutnu cùu-xi
cuendá sá sãvidí-xi
(Mt. 7:17-20; 12:34-35)*

⁴³ 'Te ñá túú ni ñⁿ yutnu váha te quiní-ó cùuⁿ sãvidí sá ñà túú vâha, te ni ñⁿ yutnu sá ñà túú vâha, te quiní-ó cùuⁿ sãvidí váha, chi mee-ni sãvidí sá ñà túú vâha cùuⁿ. ⁴⁴ Te ndi dñⁿ núú yutnu xini-ó nã yutnu cùu-xi cuendá sá sãvidí-xi, chi ñá túú xini-ó cùuⁿ ngúxí ñⁿ tnu ñùu, te ni ñà túú xini-ó cùuⁿ ndéhé yoho yàha stilé díquí ñⁿ yoho yàha cutexínu. ⁴⁵ Te nchaa ñáyiú váha iní-xi càháⁿ-yu tnúhu váha, chi ñiú-ni tnúhu váha tnàhí-áⁿ ñùhú iní-yu, te nchaa ñáyiú ñá túú vâha iní-xi càháⁿ cuèhé-yu, chi ñiú-ni tnúhu cuèhé tnàhí-áⁿ ñùhú iní-yu, chi nchaa sá ñùhú iní-yu te xãháⁿ-yu.

*Ñⁿ vehe ndècu cimientú-xi ndíhi ñⁿ vehe ñá
túú cimientú-xi
(Mt. 7:24-27)*

⁴⁶ ¿Te ná cuendá càchí-ndó sã yùhú cùu-í Yaa cúú Xitohó-ndó te ñá túú quide-ndo nchaa nacúaa càháⁿ-í-í? ⁴⁷ Te na càchí tnúhu-í xii-ndo cuendá ñáyiú tùha ñaha xii-í,

chi ñáyiú-áⁿ sácúndedóho-yu nchaa tnúhu cãháⁿ-í te tñí-yu. ⁴⁸ Te ñáyiú-áⁿ cúú-yu dàtná ìⁿ téé ní dácáá ìⁿ vehe, chi téé-áⁿ ðìhna-gá ní xete-dé ndéé ní tnahá-dé yúú cáxíⁿ te dàtnúⁿ ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, dico ñá túú ní ndacu-xi cuido-xi, te ducaⁿ chi téé ní dácáá vèhe-áⁿ ñí tava-dé cimientú-xi núú yúú cáxíⁿ. Duha sãtnahá-xi cùu nchaa ñáyiú sácúndedóho tnúhu cãháⁿ-í te tñí-yu. ⁴⁹ Te ñáyiú sácúndedóho tnúhu cãháⁿ-í te ñá túú tñí-yu, ñáyiú-áⁿ cúú-yu dàtná ìⁿ téé ní dácáá ìⁿ vehe, te ñá túú ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, te íí-ni ní xido-xi vehe-áⁿ cuendá sá ñà túú ní quène cimientú-xi. Duha sãtnahá-xi cùu nchaa ñáyiú sácúndedóho tnúhu-í te ñá túú cuini-yu tñí-yu —càchí-gá xãháⁿ-gã xií-yu.

7

Jèsús quidé tátna-gá ìⁿ téé xínu cuechi núú ìⁿ téé cùu capitáⁿ

(Mt. 8:5-13)

¹ Te sátá ñí yáha ní cáháⁿ Jèsús ndihi ñáyiú, te cuáháⁿ-gá ñuú Capèrnaúm. ² Te yacáⁿ ndécú ìⁿ téé cùu capitáⁿ, te cùhú ìⁿ téé xínu cuechi núú-dé téé ío-gá cúú ìní-dé, te sa ndècu-ná-dé sá cùú-dé. ³ Te òré ní níhí tée cùu capitáⁿ-áⁿ tñúhu cuendá Jèsús, te ní tendaha-dé ìⁿ úú cue téé cùu sacuéhé núú ñáyiú isràél cuáháⁿ-güedé cáháⁿ ndàhú-güedé núú-gã núu vá cündèe ìní-gá quíhíⁿ-gá cada tátna-gá téé xínu cuechi núú-dé-áⁿ. ⁴ Te ní quexio-güedé núú ndécú Jèsús, te ní ngüíta-güedé cãháⁿ ndàhú víhí-güedé núú-gã, te xãháⁿ-güedé:

—Tée cùu capitáⁿ ní cachí-dé véxi-ndí núu vá cündèe ìní-n quíhíⁿ-n càda tátna-n ìⁿ téé xínu cuechi núú-dé chi cùhú-dé, te tàú ndisa-n càda-n nacuáa cãháⁿ capitáⁿ-áⁿ, ⁵ chi téé-áⁿ ío cùu ìní ñáhá-dé xii nchaa nchúhú ñáyiú isràél te ðiu-dé ní táuchíúⁿ-dè ní sáá veñúhu-ndí —càchí-güedé xãháⁿ-güedé xii-gá.

⁶ Te sátá dúcáⁿ te Jèsús ní xica-gá cuáháⁿ-gá ndihi-güedé, te òré tá cùyatni-gá vehe núú ndécú tée cùhú-áⁿ cuáháⁿ, te téé

cùu capitáⁿ-áⁿ ñí xãháⁿ-dè xii ìⁿ úú cue téé cãháⁿ ndihi-dé:

—Quíhíⁿ-ndó cũñaha-ndo xii Yaá cúú Mèstrú sá càchí-í sá ñà túú ñà cani ìní-gá, chi ñá túú tàú-í sá quíhu-gá ndéé xití vehe-í, ⁷ chi ñí sá cùnú ndúcú mèe-í-gá ñá túú ní cùyí-í. Núu xiáⁿ cúñaha-ndo xii-gá sá ná cãháⁿ-ni-gá sá ndüha téé xínu cuechi núú-í-a te ndüha-dé. ⁸ Chi yúhú ndécú cuè téé tàxi tñuní ñáhá xii-í, te ducaⁿ yúhú tucu ndècu cue sandadú táxi tñuní-í. Te òré xãháⁿ-í xii ìⁿ-dé quíhíⁿ-dé ìⁿ chiúⁿ te cuáháⁿ-dé, te òré xãháⁿ-í xii ìngá-dé quixi-dé te véxi-dé, te òré xãháⁿ-í xii téé xínu cuechi núú-í cada-dé ìⁿ chiúⁿ te quide-dé. Duha càchí-í cúñaha-ndo xii-gá —càchí-dé xãháⁿ-dè xii cue téé cãháⁿ ndihi-dé-áⁿ.

⁹ Te sátá dúcáⁿ ñí xãháⁿ-güedé xii Jèsús, te ní cuñúhu-gá nchaa tnúhu ní cáháⁿ téé cùu capitáⁿ-áⁿ, te ní nchócótó-gã núú nchaa ñáyiú nchícúⁿ ñáhá xii-gá cuáháⁿ, te ní xãháⁿ-gã:

—Na càchí tnúhu ndáá-í xii-ndo sã vátá quini-gá-í ní ìⁿ ñáyiú isràél, ñáyiú ío váha sãndáá ìní-xi Yá Ndiòxí dàtná sãndáá ìní ñáhá téé-áⁿ xii-gá —càchí-gá xãháⁿ-gã xií-yu.

¹⁰ Te òré ní ndexìo cue téé nèhe tnúhu-áⁿ ñí sáháⁿ núú Jèsús, te sa ní ndüha téé cùhú-áⁿ.

Jèsús dándòto-gá déhe ìⁿ ñaha quèé

¹¹ Te sátá dúcáⁿ ñí cuu te ní xica Jèsús cuáháⁿ-gá ìⁿ ñuú nání Nàín, ndihi cue téé xica cuu ndihi-gá, ndihi vãi ñáyiú. ¹² Te òré ní sáá-gá yuhu ñuú-áⁿ, te ní xiní-gá nchídó-güedé ìⁿ ndíyi cuáháⁿ chindúxi ñaha-güedé, te ndíyi-áⁿ cúú dèhe ìⁿ ñaha quèé, te ìⁿ ðii ducaⁿ-ni déhe-aⁿ ndècu ní cuu te ní xihí-dé. Te ío cuéhé ñáyiú cuáháⁿ chindúxi ñaha. ¹³ Te òré ní xiní ñáhá Jèsús xii-aⁿ ndàhyú-aⁿ te ní cundàhú ìní ñáhá-gã, te ní xãháⁿ-gã:

—Vá ndàhyú-n —càchí-gá xãháⁿ-gã xii-aⁿ.

¹⁴ Te ní dáyatni-gã càjá ñúhú ndíyi-áⁿ te ní dácáá-gá ndaha-gá te ní tendaha-gã càjá-áⁿ, te ní ngüíñí cue téé nchido ñaha-áⁿ. Te ní xãháⁿ-gã xii ndíyi-áⁿ:

—Tée cuechi, yúhú càchí-í sá ndácõo-n —càchí-gá xãháⁿ-gã xii ndíyi-áⁿ.

15 Te tée ní xíhí-án nǐ nucúnucóo-dé te ní ngúíta-dé càháⁿ-dé, te Jèsús ní nacuáha cuendá ñáhá-gǎ xii-dé ndaha ñáná-dě. 16 Te sá dúcáⁿ nǐ quide Jèsús ní xiní-yu te ío ní yùhú-yu, te ní xítñàhá-yu:

—Ío càhnu cuu Yá Ndiöxí chi ñⁿ tée càháⁿ tnúhu-gá ní quexìo núú ndécú-ó —càchí-yu xítñàhá-yu.

Te ní xítñàhá-tucú-yu:

—Yá Ndiöxí véxi-gá chindee ñàha-gá xii nchaa nchoo ñáyiú cùu cuendá-gá —càchí-yu xítñàhá-yu.

17 Te nchaa ñuú distritú Jùdeá, ndíhi dava-gá ñuú ní níhí-yu tnúhu nàcuáa ní quide Jèsús.

Cue tée ní tendaha té Juàá cuáháⁿ núú ndécú Jèsús

(Mt. 11:2-19)

18 Te cue tée xica cuu ndíhi té Juàá ní xáhaⁿ-güedě xii-dé nchaa sá nǐ quide-gá, núu ní cana-dé úú tñàhá-güedé 19 cuendá cúñaha-dě quíhíⁿ-güedé nducu tnúhu-güedé núú Jèsús, te núu sá díú-gǎ cúú-gǎ Crístú Yá ní tendaha Yá Ndiöxí véxi ñuyíú-a àdi sá cùndètu nahi-ni-güedé mei Yàá-án. 20 Te òré ní quexìo cue tée ní tendaha té Juàá núú ndécú Jèsús, te xáhaⁿ-güedě xii-gá:

—Té Juàá tée dàcuandute ñaha xii ñáyiú ní tendaha ñàha-dé xii-ndí véxi-ndí cácaⁿ tnúhú-ndí núú-n, núu sá díú-n cùu Crístú Yá quixi ñuyíú-a, àdi sá cùndètu-ndí mei Crístú càchí-dé —càchí-güedé xáhaⁿ-güedé xii-gá.

21 Te mei òré ní quexìo-güedé-án nǐ quide tátna Jèsús vai ñáyiú cùhú, te davá-yu càhú víhí tñàhá-yu, te ndí dííⁿ ndí dííⁿ núú cuèhé tñàhá-yu ñⁿ ñⁿ-yu, te cue ñáyiú yíhi ñaha espíritú cùndíhi yucu ñávàha ní queñuhu-gá espíritú-án yiquí cùñú-yu, te ío vai ñáyiú cuáa ní nacaáⁿ-gá núú-yu. 22 Te Jèsús ní xáhaⁿ-gǎ xii-güedé:

—Chí cuánuhú te cani-ndo cuendú núú té Juàá nchaa sá nǐ xiní-ndó quide-í, ndíhi nchaa nàcuáa ndùu tnúhu ní cáháⁿ-í ní xíndedóho-ndo. Te cúñaha-ndo xii-dé sá quidé tátna-í núú cuè ñáyiú cuáa, te quide tátna-í cue ñáyiú yacua, ndíhi cue ñáyiú tñàhá cuéhé sǎ dátèhyú nihnu-xi yiquí cùñú-yu, ndíhi cue ñáyiú doho, nchaa

ñáyiú-án quide tátna-í te ndùha-yu, te ndéé cue ñáyiú sa ní xíhí dándòto-í cúñaha-ndo xii-dé, te cúñaha tùcu-ndo xii-dé sá ndécuu-í dánèhé-í nchaa ñáyiú ndàhú tnúhu sá sánú ìchi ñaha xii-yu nàcuáa naníhí tàhú-yu. 23 Te cúñaha tùcu-ndo xii-dé sá ío váha táhú nchaa ñáyiú ñá túú quide sáa iní nchaa tnúhu càháⁿ-í, duha cúñaha-ndo xii-dé —càchí-gá xáhaⁿ-gǎ xii-güedé.

24 Te sátá nǐ yáha-güedé cuánuhú-güedé, te ní ngúíta Jèsús ní cáháⁿ-gá núú ñáyiú cuendá té Juàá, te xáhaⁿ-gǎ xii-yu:

—Nchòhó ní sándéhé-ndó ñⁿ tée ndécú xití yucu, te tée-án ñá túú sàni ñⁿ sàni úú iní-dé, chi ñá túú quide-dé dàtná quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné tǎchí. 25 Te ní ñá túú ní sándéhé-ndó ñⁿ tée nihnu dóó vǎha dóó vii càa. Te nchòhó xiní-ndó sá ñáyiú sàcuíhnu dóó vǎha dóó vii càa ñá túú nǎ cùmání xii-yu, te nchaa ñáyiú-án ndécú-yu vehe cue tée cùnuu yíndaha ñaha xii ñáyiú. 26 Dico nchòhó chi ní sándéhé-ndó ñⁿ tée càháⁿ tnúhu Yá Ndiöxí. Te ndáá sá díú tée càháⁿ tnúhu-gá cúú-dě dico cùnuu-gá-dé dàcúxí dàva-gá cue tée càháⁿ tnúhu-gá. 27 Te díu cuendá té Juàá-án càháⁿ-xi núú tùtú Yá Ndiöxí nàcuáa ní xáhaⁿ-gǎ xii Crístú, te duha ní xáhaⁿ-gǎ:

Tendaha-í ñⁿ tée cáháⁿ tnúhu-í codonù-dé núú-n cuendá dàtúha-dé ñáyiú cuendá quíndáa iní-yu tnúhu-n.

Duha ní xáhaⁿ-gǎ, te ducaⁿ nǐ ngódó tnùní núú tùtú-gá. 28 Te na càchí tnúhu-í xii-ndo sǎ ní ñⁿ cue tée ñuyíú-a ñá túú cùnuu-güedé dàtná cùnùu té Juàá tée dàcuandute ñaha xii ñáyiú. Te nchaa ñáyiú sa ta ndíhu ndaha ñàha Yá Ndiöxí vitna cuáháⁿ cùnùu-gá-ni tucú-yu dàcúxí té Juàá cuèi cùú-yu ñáyiú ñá túú cùnuu dàcúxí dàva-gá ñáyiú yíndaha-gá —càchí Jèsús xáhaⁿ-gǎ xii-yu.

29 Te sá dúcáⁿ nǐ cáháⁿ Jèsús, núu nchaa ñáyiú ní dàcuandute té Juàá ní cachí-yu sá ío váha quide Yá Ndiöxí, te díu-ni ducaⁿ nǐ cáháⁿ cue tée cuíhna iní-xi quide cobrá ñáhá xii ñáyiú cuendá impuèstú, cue tée ní dàcuandute-dé. 30 Dico cue tée cùu fariséu, ndíhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés, cue tée ñá túú ní dàcuandute té Juàá ñá túú ní tñàhá iní-güedé cada-güedé nchaa sá vǎha

cuìní Yá Ndiöxí. ³¹ Te Xítohá Jesucristú ní xáhaⁿ-gã xií-yu:

—Na cächí tnúhu-í xii-ndo nàcuáa sätnahá-xi cùu ñáyiú ndècu vitna. ³² Chi ñáyiú-áⁿ cúu-yu dàtná cue landú sácõo núú yáhu dàdiqui-güexi te níhi càháⁿ-güexi, te xítñaha-güexi: “Ní tiú-ndí yaá ndíhi vílu te ñá túú ní cuìní-ndó càta-ndo. Te ío yica ìní ní xita yuhu-ndí te ñá túú ní ndáhyú-ndó”, cächí-güexi xítñaha-güexi. Te ducaⁿ sätnahá-xi cùu ñáyiú ndècu vitna. ³³ Te té Juáá téé ní xóo dacuàndute ñaha xii ñáyiú ío ndàhú ní xóo caxi-dé, te ní ñà túú ní xõo coho-dé ndudí ndéhé yoho yàha stilé sá sà ní nduu-xi ndidí, te ní cächí-ndó sã ní xíndecu ndíhi-dé espíritú cúndíhi yucu ñávãha. ³⁴ Te sátá ní quexìo yúhú Téé cùu ñaní tnáhá-ndó nchàa-ndo, te xèxi-í xíhi-í ndécù-í te cächí-ndó sã cúu-í téé xèxi víhi te xíhi víhi-í. Te cächí tucu-ndo sã cúu-í téé xica cuu ndíhi cue téé cuihna ìní-xi quide cobrá ñáhá xii ñáyiú cuèndá impuèstú, ndíhi nchaa dava-gá cue téé ndècu ichi cuehé ichi duha, duha cächí-ndó. ³⁵ Te ñáyiú ní tnahá tnúhu ndíhi Yá Ndiöxí, ñáyiú-áⁿ quidè-yu nàcuáa cutnùní sá méé-gã ío ndècu ndíhi-gá sá xìní tnùní-gá —cächí-gá xáhaⁿ-gã xií-yu.

Jèsús ndécú-gã vehe ìn téé cùu fariséú téé nàni Xímú

³⁶ Te ìn téé cùu fariséú ní cáháⁿ-dé Jèsús vehe-dé caxi-gá, te òré ní quexìo-gá te cuànguihu-gá mèsá. ³⁷ Te xiáⁿ núcõo-gá ní sáá ìn ñadìhí te diu-ni ñaha ñuú-áⁿ cúu-áⁿ, te ndècu-aⁿ ichi díí ìní, te sá ní níhi-aⁿ tnúhu sá cuàngaxi Jèsús vehe téé cùu fariséú-áⁿ, núu nèhe-aⁿ ìn yoó chitu àcítí sàháⁿ tnámí. ³⁸ Te ní ngóo-aⁿ ìn xio dñi Jesús, te ní ngúita-aⁿ ndàhyú-aⁿ te ndíhi ndute núu-aⁿ ní naquete-aⁿ sáhá-gã. Te dàtnùní ní nadayìchí-aⁿ ndíhi idi díquí-aⁿ, te ní teyuhu-aⁿ sáhá-gã, te ní chíhi ñaha-aⁿ àcítí sàháⁿ tnámí-áⁿ. ³⁹ Te sá dúcáⁿ ní quide-aⁿ ní xìní téé cùu fariséú téé ní cáháⁿ ñáhá xii-gá-áⁿ núu ní sani ìní-dé: “Te núu dicó ndisa téé càháⁿ tnúhu Yá Ndiöxí cúu téé-a ña, te sa cutnùní ìní-dé yoo cùu ñaha tnándeé ñáhá xii-dé, àdi ná ñáyiú cùu-aⁿ, te dicó ìn ñaha ndècu ichi díí ìní cúu-áⁿ”, duha ní sani ìní-dé. ⁴⁰ Te Jèsús ní xáhaⁿ-gã xii-dé:

—Xímú, ndècu ìn tnúhu cachí tnúhu-í xii-n —cächí-gá xáhaⁿ-gã xii-dé.

Te téé cùu fariséú-áⁿ xáhaⁿ-dè xii-gá:

—Cachí tnúhu, Mèstrú —cächí-dé xáhaⁿ-dè xii-gá.

⁴¹ Te Jèsús ní xáhaⁿ-gã:

—Ní xíndecu ìn téé ní xóo dasaⁿ núu díhúⁿ, te ní xítaú úú tnàhá-güedé núu-dè. Te ìn-dé ní sàha-dé úhúⁿ cièndú díhúⁿ denàriú, te ìngá-dé ní sàha-dé údico úxí. ⁴² Te ñá ní níhi-güedè nacháhu-güedé núu-dè, te téé ní sánùu ñaha-áⁿ ní quide càhnu ìní-dé ndi ndúu-güedé. Te vitna cachí-ò tucu te núu ndèda càa-güedé cúu ìní ñáhá-gã-güedé xii-dé —cächí-gá xáhaⁿ-gã xii-dé.

⁴³ Te ní xáhaⁿ tè Xímú-áⁿ:

—Sánuu sá tèe tàú vài-gá díhúⁿ ìo-gá cúu ìní-dé téé ní sánùu ñaha díhúⁿ-áⁿ —cächí-dé xáhaⁿ-dè xii-gá.

Te ní xáhaⁿ Jèsús:

—Sá ndàá càháⁿ-n —cächí-gá xáhaⁿ-gã xii-dé.

⁴⁴⁻⁴⁶ Te Jèsús ní ndacoto-gá núu ñadìhí-áⁿ, te ní xáhaⁿ-gã xii té Xímú-áⁿ:

—¿Ndèhe-n nàcuáa quide ñadìhí-a ñã? Chi cuànguihu-í vehe-n, dico ñá túú ní tàxi-n ndute ndoo sáhà-í, te ní ñà túú ní teyuhu ñaha-n, te ní ñà túú ní chíhi-n acítí díquí-í, dico ñadìhí-a ní naquete-aⁿ ndíhi ndute núu-aⁿ sáhà-í, te ní nadayìchí-aⁿ ndíhi idi díquí-aⁿ, te nuu núu teyuhu-aⁿ sáhà-í, te ní chíhi-aⁿ acítí sàháⁿ tnámí sáhà-í. ⁴⁷ Te na cächí tnúhu-í xii-n sã ìo cùu ìní ñáhá-áⁿ xii-í, te núu xiáⁿ cutnùní ìní-ó sã cuèi ío vài sá cuèhé sá dúhá ní quide-aⁿ, dico Yá Ndiöxí sa ní quide càhnu ìní ñáhá-gã xii-aⁿ. Chi Yá Ndiöxí quidé càhnu ìní-gá ñáyiú cuèi vài àdi sacú cuèchi-yu, te núu sacú cuèchi-yu te sacú cúu ìní ñáhá-yu xii-í —cächí-gá xáhaⁿ-gã xii-dé.

⁴⁸ Te ní xáhaⁿ-gã xii ñadìhí-áⁿ:

—Sa ní quide càhnu ìní-í nchaa cuèchi-n —cächí-gá xáhaⁿ-gã xii-aⁿ.

⁴⁹ Te cue téé xínucóo ndíhi-gá xítñaha-güedé:

—¿Ná téé cùu téé-a núu nándi sá quidé-dè, te ndéé nchaa yíca cuèchi ñáyiú quide càhnu ìní-dé-í? —cächí-güedé xítñaha-güedé.

⁵⁰ Te Jèsús ní xáhaⁿ tùcu-gá xii ñadìhí-áⁿ:

—Sa ní cácu nihnu-n núu ùhú núu ndàhú vitna chí ní sándáá ìní ñáhá-n xii-í, te vitna

cuanùhú te ñá túú-gă ná cani iní-n —
càchí-gă xáhaⁿ-gă xii-aⁿ.

8

Ñáyiú ðìhí ní chindee ñàha xii Jesús

¹ Te sátá dúcáⁿ ñí cuu te Jèsús ní xica-gă
cuáháⁿ-gă titní víhí ñúú náhnú, ndihí ñúú
líhli dānehé-gă ñáyiú nàcuáa ndíhu ndaha
ñàha Yá Ndiòxí xii-yu. Te cuáháⁿ ndihí-gă
ndi ùxúú tnàhá cue téé xica cuu ndihí-gă,
² ndihí ìⁿ úú ñáyiú ðìhí ní quide tátna-gă
ní xíhí ñaha espíritú cündihí yucu ñávàha,
ndihí ñáyiú tnàhá dava-gă cuéhé ùhú ní cùu.
Te xiáⁿ tnàhá tucu ìⁿ ñaha nàni Mariá Mag-
dalèná, te ñaha-áⁿ ñí xíhí ñaha ùsá espíritú
cündihí yucu ñávàha xii-aⁿ ní cùu, te ní
quee ñaha-xi. ³ Te tnàhá ìⁿ ñaha nàni Juáná
ñadìhí ìⁿ téé nàni Chúza téé ní cunuu ñí xinu
cuechi vèhe té Hèrodés, ndihí ingá ñaha nàni
Susaná nchaa ñáyiú-áⁿ ñí chindee ñàhá-yu
xii-gă ndihí nchaa sá ndécú ndihí-yu, te
ðiu-ni ducaⁿ ñí quide vài-gă tucu ñáyiú
nchicúⁿ ñàhá xii-gă cuáháⁿ.

Nàcuáa quide téé cuángacáⁿ triú (Mt. 13:1-9; Mr. 4:1-9)

⁴ Te ío vài ñáyiú ndaa ñúú ní tacá-yu
núú ndécú Jèsús, te ní ngúíta-gă ní cani-gă
ìⁿ cuèndú núú-yu cuèndá tecú tnùní-yu
tnúhu-gă, te xáhaⁿ-gă xií-yu:

⁵ —Ìⁿ téé cuángacáⁿ-dé triú. Te òré
ní ngúíta-dé dāngoyo-dé triú-áⁿ te dava ní
quene ndava ní ngava ndéé ichi, te ní
xénihnu ñáyiú, te ní xiní tílaá te ní na-
datàcá-güedi. ⁶ Te dava ní ngava ñuhu yadi
núú yíhí vîhi yúú, te ní xínu-xi dico núú
sàcú-ni nduu te ní yíchí-xi, chi ñá túú còhyo
yîhi. ⁷ Te dava ní ngava núú yúcu ndíquíⁿ
tnu ñnu, te ìⁿnuu-ni ñí xínu-xi ndihí tnu
ñnu-áⁿ, te tnu ñnu-áⁿ ñí dánáá-xi nchaa triú
sá ñí xínu-áⁿ. ⁸ Dico dava triú-áⁿ ñí ngava-xi
núú ndécú ñuhu cocoⁿ, te xiáⁿ ní xínu-xi te
ní sahnu-xi, te ío váha ní cuu, chi núú ìⁿ-ní
triú te ní ngúihí yoco-xi ìⁿ cièndú triú-xi —
càchí-gă xáhaⁿ-gă xií-yu.

Te níhi ní cáháⁿ-gă ní xáhaⁿ tùcu-gă xií-yu:

—Nchaa nchòhó ñáyiú ní xindedóho
tnúhu ní cáháⁿ-í-a, te ío váha chí cuàha
cuèndá —càchí-gă xáhaⁿ-gă xií-yu.

Nàcuáa quèe-xi tnúhu ní cáháⁿ Jèsús (Mt. 13:10-17; Mr. 4:10-12)

⁹ Te cue téé xica cuu ndihí Jesús ní
xícáⁿ tnúhú-güedé núú-gă núu nása quèe-xi
cuèndú ní cani-gă núú ñáyiú. ¹⁰ Te ní
xáhaⁿ-gă xii-güedé:

—Nchòhó chi sa càchí tnúhu Yá Ndiòxí
xii-ndo ìⁿ sá vátá quíní-gă-ndó, chi càchí
tnúhu-gă nàcuáa cada-gă ndíhu ndaha-gă
ñáyiú, dico dava-gă ñáyiú càní-í mee-ni
cuèndú núú-yu, chi cuèi na quíní-yu nchaa
nàcuáa cuu dico ní vá cùtnùní iní-yu ná
cuèndá ducaⁿ cùu, àdi cuèi na cùndedóho-yu
dico ní vá tècú tnùní-yu —càchí-gă xáhaⁿ-gă
xii-güedé.

Jèsús càháⁿ-gă nàcuáa quèe-xi tnúhu *cuèndá téé cuángacáⁿ triú*

(Mt. 13:18-23; Mr. 4:13-20)

¹¹ Te xáhaⁿ tùcu-gă xii-güedé:

—Duha quèe-xi cuèndú ní cani-í
núú-ndó, chí triú ní sacáⁿ téé-áⁿ cúú-xí
dàtná tnúhu Yá Ndiòxí. ¹² Te triú sá ñí
quene ndava ní ngava ndéé ichi-áⁿ, xiáⁿ
cúú-xí dàtná ñáyiú ní quèe iní-xi tnúhu Yá
Ndiòxí, dico sàcúíhná cuáháⁿ-xi xòcani-xi
tnúhu-gă iní-yu cuèndá sá vā quèndáá
iní-yu, te vá nánihí tàhú-yu. ¹³ Te triú sá
ñí ngava ñuhu yadi núú yíhí vîhi yúú, xiáⁿ
cúú-xí dàtná ñáyiú ní xindedóho tnúhu Yá
Ndiòxí te díí ñí ní tní-yu tnúhu-gă, dico òré
ná dàcaháⁿ ñàhá yùcu ñávàha xii-yu nándi
cadá-yu, te dàña nihnú-yu tnúhu-gă chi ñá
nihí ndéé-yu canchicúⁿ nihnú-yu nàcuáa
càháⁿ tnúhu-gă. ¹⁴ Te triú sá ñí ngava
núú yúcu ndíquíⁿ tnu ñnu-áⁿ, xiáⁿ cúú-xí
dàtná ñáyiú ní tecú dóho-xi tnúhu Yá Ndiòxí,
dico cuèé cuèé ní nacuanaá-yu tnúhu-gă,
chi cuèndá mee-ni sá cúú-xí mèé-yu ñuhu
iní-yu, ndihí cuèndá sá ño sàni iní-yu cuu
cuicá-yu, ndihí cuèndá sá ño cùdíⁿ iní-yu
nchaa sá ío ñuyúú-a núu xiáⁿ àúⁿ ná cuu ní
xindedóho-yu tnúhu-gă. ¹⁵ Dico triú sá ñí
ngava núú ndécú ñuhu cocoⁿ, xiáⁿ cúú-xí
dàtná ñáyiú váha iní-xi ní xindedóho tnúhu
Yá Ndiòxí chi ñá túú dàña nihnú-yu, te ní
yùhu ní iní-yu quidè-yu nchaa nàcuáa càháⁿ
tnúhu-gă.

Nàcuáa quidè-yu iti (Mr. 4:21-25)

16 'Te ñá túú nì ìñ ñáiyu tènñuhú-yu ìñ iti te dàdàhu-yu, àdi chiváha-yu ìñ caha camá, chi tàxi ndecú-yu núú nñu cuendá cutnùnì núú nchàa ñáiyu ndècu vehe. 17 Te nì ìñ tnúhu sá ñã tècú tnùnì ñáiyu vitna vá càchí-ó sã vã tècú tnùnì-yu chi dacuèi sá tècú tnùnì-yu, te nì ìñ tnúhu sá càchí-ó cùu yuhu vitna vá cúu yùhu chi dacuítí sã quée tũu-xi núú ñáiyu.

18 'Te chí cùndedóho váha tnúhu na càháⁿ-í-a. Nchaa ñáiyu sàndáá iní ñáhá xii Yá Ndiöxí ío-gá cuita quindáá-gá iní ñáhã-yu xii-gá quíhíⁿ, te nchaa ñáiyu ñá túú sàndáá iní ñáhá xii-gá uuⁿ-gá cuita cuu sáa-gá iní-yu núú-gã quíhíⁿ —càchí-gá xáhaⁿ-gã xii-güedé.

Cue ñaní Jèsús ndihi nãná-gã
(Mt. 12:46-50; Mr. 3:31-35)

19 Te ní quexìo náná Jèsús ndihi cue ñaní-gá vehe núú ndecú-gã, te ñá ndácũ-yu càháⁿ ndihi ñáhã-yu xii-gá chi ío cuéhé ñáiyu ndècu núú ndecú-gã. 20 Te ìñ ñáiyu xĩndecu-áⁿ ñĩ dáyãha-yu tnúhu núú-gã, te xãhãⁿ-yu:

—Ní quexìo náná-n ndihi cue ñaní-n xĩnutnĩ-yu quehé, te cuínì-yu càháⁿ ndihi ñáhã-yu xii-n —càchí-yu xãhãⁿ-yu xii-gá.

21 Te ní xáhaⁿ-gã:

—Nchaa ñáiyu sàcùndedóho tnúhu Yá Ndiöxí te quidé-yu nchaa nàcuáa càháⁿ tnúhu-gá, ñáiyu-áⁿ cúũ-yu dàtná nãná-í ndihi dàtná cue ñaní-í —càchí-gá xáhaⁿ-gã xii ñáiyu ní dáyãha tnúhu núú-gã-áⁿ.

Jèsús nganí-gã táchí ndihi ndute làgúná
(Mt. 8:23-27; Mr. 4:35-41)

22 Te ìñ nduu ní quée Jèsús bàrcú ndihi cue téé xica cuu ndihi-gá, te ní xáhaⁿ-gã:

—Chí ná quíhíⁿ-ó ndàa ingá xio yuhu làgúná —càchí-gá xáhaⁿ-gã xii-güedé.

Te cuáhã-güedé ndihi-gá. 23 Te nini ñùhu barcú ichi cuáhã-xi núú ndute ní xidí Jèsús. Te ní ngüíta-xi níhi vìhi quene táchí te ta nàdachitú-xi ndute xití bàrcú-áⁿ cuáhãⁿ, te sa cuínì-nã-xi quée naa bàrcú-áⁿ xití ndute ni cùu. 24 Te ní sáhã-güedé núú cáá Jèsús xidí-gá, te ní xáhaⁿ-güedé xii-gá:

—¡Mèstrú, ndiquíú iní chí tà quée naa-o cuáhãⁿ! —càchí-güedé xãhaⁿ-güedé xii-gá.

Te Jèsús ní ndiquíú iní-gá te ní ndacóo-gá te ní tenàá-gá táchí-ãⁿ ndihi ndute làgúná-áⁿ, te ní ngüíñí-ni táchí-ãⁿ te ní nucúndecu nahi-nã ndute làgúná-áⁿ. 25 Te ní xáhaⁿ-gã xii-güedé:

—¿Náa ñá túú sàndáá iní ñáhá ndisa-ndo xii-í ãⁿ? —càchí-gá xáhaⁿ-gã xii-güedé.

Te ní cuñúhu-güedé sá dúcáⁿ ñĩ quide-gá ní xiní-güedé, te ní yùhú-güedé, te ní xitnàha-güedé:

—¿Te ná téé cùu téé-a núu ní càháⁿ-ni-dé te ní ngüíñí táchí te ní nucúndecu nahi-ni ndute làgúná-a-í? —càchí-güedé xitnàha-güedé.

Tée yìhi ñaha cue espíritú cùndìhi yucu ñávãha

(Mt. 8:28-34; Mr. 5:1-20)

26 Te ní sáa-gá ndihi-güedé yucu cue téé ñuu Gàdará, te yìhi ndáa-ni ndàa ingá xio làgúná-áⁿ cáá dístítú Galiléa. 27 Te òré ní quene Jèsús xití bàrcú te ní dáyátní ñàha ìñ téé ñuu-áⁿ xii-gá, te yìhi ñaha titní espíritú cùndìhi yucu ñávãha xii-dé. Te ní cunaha ñà túú-gã sácũhnu-dé dóo-dě, te ni ñà túú-gã sácũndecu-dé vehe-dé, chi da nchaa núú yĩndũxi ndíyì quide vehe-dé. 28 Te òré ní xiní-dé Jèsús te ní ngüíñí xití-dě núú-gã, te cue espíritú yìhí ñaha xii-dé-áⁿ ñĩ quide-xi níhi ní càháⁿ-dé, te xãhaⁿ-dě xii-gá:

—¿Ná cuendá véxi-ö Jèsús Déhe Dútú Ndiöxí sàdí-n ìchí-í-í? Te càháⁿ ndàhú-í núú-n sã vã dándòho ñaha-n xii-í —càchí-dé xãhaⁿ-dě xii-gã.

29 Te ducaⁿ ñĩ càháⁿ-dé cuendá sá Jèsús ní xáhaⁿ-gã xii nchaa espíritú cùndìhi yucu ñávãha yìhi ñaha sá ná quée ñaha-xi xii-dé. Te nchaa xíãⁿ ní xóo dacàháⁿ-xi iní-dé nãndi sã ñĩ xóo cada-dé ñuu ní xóo dacùtu ñaha-güedé cadèná xii-dé cuendá sã ñà túú-gã ná cada-dé, te ní xóo cundéé ñáhã-güedé, dico cuèi ducaⁿ dico ní xóo dandàva-ni-dé cadèná, te cue espíritú cùndìhi yucu ñávãha-áⁿ ñĩ xóo dacùnu ñaha-xi xii-dé ní xóo quíhíⁿ-dé xití yucu.

30 Te Jèsús ní xicáⁿ tnúhú-gã núú-dě, te xáhaⁿ-gã:

—¿Nása nãni-n-í? —cachí-gá xáhaⁿ-gã.

Te ní xáhaⁿ-dě:

—Vài Sandadú nánì-í —càchí-dé xáhaⁿ-dě xii-gá.

Te ducaⁿ nǐ xáhaⁿ-dě xii-gá cuendá sá ïo cuéhé espíritú cündìhi yucu ñávãha yìhi ñaha xii-dé. ³¹ Te nchaa espíritú-áⁿ nǐ cáháⁿ ndàhú-xi núú Jèsús sá vã téndàha ñaha-gá xii-xi quíhíⁿ-xi núú ùhú núú ndàhú. ³² Te ðiu-ni yatni yucu núú ndécú Jèsús-áⁿ yíhí vài cuchí xixexi-güedi, te nchaa espíritú-áⁿ nǐ cáháⁿ ndàhú-xi núú-gã sá ná dàña-gá quíhu-xi yiqui cùñú nchaa cùchí-áⁿ, te Jèsús ní xáhaⁿ-gã sá cúú quíhu-xi yiqui cùñú-güedi. ³³ Te ní quee ñaha nchàa espíritú-áⁿ xii téé-áⁿ, te ní quíhu-xi nchaa cùchí-áⁿ, te cùchí-áⁿ nǐ xinu-güedi duha ní quée-güedi ndàa núú dèhvã yuhu làgúná-áⁿ, te ní ngaunihnu-güedi xití ndute te ní ndihi-güedi ní cáhá.

³⁴ Te òré ní xiní cue téé xito cuchí-áⁿ nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé cuendú núú cuè ñáyiú ndècu xití ñuú, ndihi núú cuè ñáyiú ndècu xití yucu. ³⁵ Te nchaa ñáyiú ní níhí tñuhu ní queé-yu cuáháⁿ ndéhè-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xíhi ñaha cuè espíritú cündìhi yucu ñávãha-áⁿ núcõo-dé núú sàhá Jèsús, te ñihnu-ná-dé dóó-dé, te núcõo-dé dàtná ñáyiú váha, te ní yùhú-yu òré ní xiní ñáhã-yu xii-dé. ³⁶ Te nchaa ñáyiú ní xiní nàcuáa ní cuu ní ndúha téé yìhi ñaha cue espíritú cündìhi yucu ñávãha-áⁿ ní cùu ní caní-yu cuendú núú nchàa ñáyiú ní quexió-áⁿ nàcuáa ní cuu ní ndúha téé-áⁿ ndihi nàcuáa ní cuu cuendá nchaa cùchí-áⁿ. ³⁷ Te sá dúcáⁿ nǐ níhí-yu tñuhu nàcuáa ní cuu, núu nchaa ñáyiú ñuú Gàdará ío ní yùhú-yu te ní ngüíta-yu càháⁿ ndàhú-yu núú Jèsús sá ná nùhú-gá nùu ndèé ichi véxi-gá. Te sá dúcáⁿ nǐ cáháⁿ-yu núu cuáháⁿ-gá núú ndécú bàrcú. Te òré ndée-gá bàrcú-áⁿ nùhú-gá ³⁸ ní ngüíta téé ní xíhi ñaha cuè espíritú cündìhi yucu ñávãha càháⁿ ndàhú-dé núú-gã nùu vá cündèe iní-gá quíhíⁿ ndihi ñaha-gã xii-dé, dico Jèsús ní quide ndee iní ñáhã-ni-gã xii-dé, te ní xáhaⁿ-gã:

³⁹ —Cuanùhú vehe-n, te cani-n cuendú núú nchàa ñáyiú sá ïo càhnu cuu nchaa sá vãha ní quide ñaha Yã Ndiõxí xii-n —càchí-gá xáhaⁿ-gã xii-dé.

Te téé-áⁿ nǐ xica-dé cuánuhú-dé te ní ngüíta-dé ní cani-dé cuendú núú nchàa ñáyiú xíndecu ñihí ñuú sá ïo càhnu cuu nchaa sá vãha ní quide ñaha Jèsús xii-dé.

Cuendá déhe yoco tẽ Jàirú, ndihi cuendá ñá ñadìhi ní tnándeé dóó Jèsús

(Mt. 9:18-26; Mr. 5:21-43)

⁴⁰ Te òré ní ndexìo Jèsús ndàa ingá xio yuhu làgúná, te ñáyiú xíndecu xiáⁿ sa ndètu cahnu ñaha-ná-yu, te ío váha ní cáháⁿ ndihi ñahá-yu xii-gá òré ní nasáá-gá. ⁴¹ Te ñáyiú téé tãxi tñuní veñúhu ní quexìo-dé núú ndécú Jèsús, te téé-áⁿ nání-dé Jàirú, te ní ngüíhí xití-dé núú-gã càháⁿ ndàhú-dé, te xáhaⁿ-dě xii-gá:

—Véxi-í càháⁿ ndàhú-í núú-n nùu vá cündèe iní-n quíhíⁿ-ó vehe-í cada tátna-n dèhe yoco-í —càchí-dé xáhaⁿ-dě xii-gá.

⁴² Te ducaⁿ nǐ xáhaⁿ-dě chi ndècu ñáyiú dii-ni déhe yoco-dé, te ndècu-xi datná úxúú cuíá-xi, te càhú víhí tñahá-xi cùhú-xi te cuíní-xi cuú-xi. Te Jèsús ní xica-gá cuáháⁿ-gá ndihi téé-áⁿ, te ío vài ñáyiú nchìcúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu.

⁴³ Te tnuú nchaa ñáyiú-áⁿ ñútnàhá ñáyiú cùhú, te ñaha-áⁿ sà ní cuu úxúú cuíá sã cùhú-aⁿ ngòyo ñaha níhí xii-aⁿ, te ío cuéhé dìhúⁿ nǐ cuu dāndoñuhu-aⁿ chi ní nadico-aⁿ nchàa sá ndécú ndihi-aⁿ cuendá ní níhí-aⁿ dìhúⁿ nǐ queheⁿ nchaa ñáyiú ní quide tátna ñaha xii-aⁿ, dico ní ñáyiú-áⁿ ñá túú ní ndàcú-yu ndúha-aⁿ. ⁴⁴ Te ní sáháⁿ ndehe yatni-aⁿ ndàa sátá Jèsús, te ní tnándeé-aⁿ luha yuhu dóó-gã te òré-ni-áⁿ nǐ ndúha-aⁿ.

⁴⁵ Te Jèsús ní xicáⁿ tñuhú-gã núu-yu, te xáhaⁿ-gã:

—¿Ndèdacàa-ndo ní tnándeé ñáhá xii-í? —càchí-gá xáhaⁿ-gã xii-yu.

Te ncháa-yu ní xáhãⁿ-yu sá ní ñáyiú-áⁿ ñá túú ní tnándeé ñáhá xii-gá. Te té Pèlú ndihi cue téé cündìhi-dé ní xáhaⁿ-güedé xii-gá:

—Mèstrú, ndèhe-n sá vái ñáyiú nchìcúⁿ ñáhá xii-n, te xio xio dàdehnde ñahá-yu, te xicáⁿ tñuhú-gã-n yòo ní tnándeé ñáhá xii-n —cachí-güedé xáhaⁿ-güedé xii-gá.

46 Dico Jèsús ní xáhaⁿ-gã xií-yu:

—Dico ñu ñⁿ-ndo ñí tnándeé ñáhá xii-í, chi ní cutnùní iní-í sá ñⁿ ñáyiú cùhú ní tnándeé ñáhá xii-í te ní ndúha-yu —càchí-gá xáhaⁿ-gã xií-yu.

47 Te sáta ñí xiní ñaha-áⁿ sã ñí cutnùní iní Jèsús sá ñí tnándeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngüñí xití-áⁿ nùú-gã, te ní náhmá-aⁿ núú-gã, ndihí núú ncháa ñáyiú ná cuendá ducaⁿ ñí quide-aⁿ ní tnándeé-aⁿ-gá, ndihí cuendá sá òré-ni-áⁿ ní ndúha-aⁿ. 48 Te Jèsús ní xáhaⁿ-gã xii-aⁿ:

—Yòhó ñaha cùhú, ní sándáá iní ñáhá-n xii-í nùu ní ndúha-n, te cuanùhú vitna te ñá túú-gã ná cani iní-n —càchí-gá xáhaⁿ-gã xii-aⁿ.

49 Te càháⁿ dúcáⁿ-ní Jèsús ní sáá ñⁿ tée xinu cuechi vehe té Jàirú tée tàxi tnuní veñúhu, te xáhaⁿ tée xinu cuechi-áⁿ xii-dé:

—Sa ní xihí déhe-n, vá chíchìuⁿ-gá-n Mèstrú —càchí-dé xáhaⁿ-dë.

50 Te sá dúcáⁿ xáhaⁿ tée xinu cuechi-áⁿ xii té Jàirú ní tecú dóho Jèsús, núu ní xáhaⁿ-gã xii-dé:

—Vá ndihú iní-n, quindáá iní ñáhá-ni-n xii-í te ndúha déhe-n —càchí-gá xáhaⁿ-gã xii-dé.

51 Te òré ní sáá-gá vehe té Jàirú te ñá ní dàña-gá quihu ñáyiú cùtexínu, núu té Pèlú-ni ndihí té Jàcobó-ni, ndihí té Juáá-ni, ndihí tãtá ndihí nãná-ni xíchí ñí xihí-áⁿ cuãnguìhu ndihí-gá xití vehe. 52 Te ncháa ñáyiú sa xindecu vehe-dé-áⁿ xindáhyú-yu sá ndihú iní-yu cuendá sá ñí xihí-xi. Te Jèsús ní xáhaⁿ-gã xií-yu:

—Vá ndàhyú-ndó, chi dicó-ni xidí-xi ñá túú ní xihí-xi —càchí-gá xáhaⁿ-gã xií-yu.

53 Te ní sácú ndeé ñáhã-yu xii-gá, chi sá cúú-xí mée-yu chi ní xihí ndisa xíchí-áⁿ.

54 Te Jèsús ní tní-gá ndaha xíchí ñí xihí-áⁿ, te níhi ní cáháⁿ-gá, te xáhaⁿ-gã:

—Xíchí cuéchí, ndacóo —càchí-gá xáhaⁿ-gã.

55 Te xíchí-áⁿ ñí ndoto-xi, te òré-ni ní ndacóo-xi, te Jèsús ní xáhaⁿ-gã sá ná cuãñáhã-yu sá cáxí-xí. 56 Te tãtá-xi ndihí nãná-xi súúni ñí cuñúhu-yu sá dúcáⁿ ñí dándótó ñaha Jesús xii-xi, te ní xáhaⁿ-gã xií-yu sá vã yoo ñⁿ cúñáhã-yu sá dúcáⁿ ñí quide-gá.

9

Jèsús téndàha-gá ndi ùxúú cue tée xica cuu ndihí-gá quihíⁿ-güedé cáháⁿ-güedé tnúhu-gá (Mt. 10:5-15; Mr. 6:7-13)

1 Te Jèsús ní cana-gá ndi ùxúú cue tée xica cuu ndihí-gá, te ní sãñaha-gã xii-güedé tnúhu ndee iní cundecu ndihí-güedé cuendá queñuhu-güedé ncháa espíritú cündihí yucu ñávãha yìhi ñaha xii ñáyiú, ndihí cuendá sá cádá tãtna-güedé ncháa ñáyiú cùhú.

2 Te ní xáhaⁿ-gã xii-güedé sá quihíⁿ-güedé danèhé-güedé ñáyiú nàcuáa cada Yá Ndiõxí ndihu ndaha ñaha-gá xií-yu, te ducaⁿ càda tãtna-güedé cue ñáyiú cùhú. 3 Te cùmání-gã caca-güedé quihíⁿ-güedé, te ní xáhaⁿ-gã xii-güedé:

—Ñá túú tnàhí ná canehe-ndo cùu ichi-ndo, ni tãtnu, ni ñunu, ni sã cáxí-ndó, ni dñhúⁿ. Te ni vã canèhe-ndo ingá ichi dóó-ndó, chi ñu-ni dóó níhnú-ndó-áⁿ xiãⁿ tnàhí-ni. 4 Te ndèdani càa vehe na saá-ndó, te xiáⁿ cundecu-ndo ndeé ná sáá nduu ndeè-ndo. 5 Te núu ñá túú cuñí-yu queheⁿ cuendá ñáhã-yu xii-ndo, te ndee-ndo ñúú-áⁿ, te naquidi-ndo tìcá chúhmá ñí tníi sáhá-ndó cuendá sá ná cùtnuní iní-yu sá ñá túú quide váha-yu —càchí-gá xáhaⁿ-gã xii-güedé.

6 Te sáta dúcáⁿ ñí xáhaⁿ Jèsús xii-güedé, te ní quee-güedé cuáhãⁿ-güedé ncháa ñúú dácuaⁿ-güedé ñáyiú tnúhu Yá Ndiõxí, tnúhu sá càháⁿ nàcuáa naníhí tàhú-yu, te ducaⁿ ta quide tãtna-güedé ncháa ñáyiú cùhú cuáhãⁿ.

Nàcuáa ní cuu ní xihí té Juáá tée dàcuandute ñaha xii ñáyiú

(Mt. 14:1-12; Mr. 6:14-29)

7 Te té Hèrodés tée cùu gobiernú ní níhí-dë tnúhu ncháa nàcuáa quide Jesús, te quiyuhú iní-dé te sàni iní-dé yoo cùu-gá. Te ducaⁿ ñí sani iní-dé chi dava ñáyiú càchí-yu sá tã Juáá tée ní xóo dacuandute ñaha xii ñáyiú ní ndoto cùu-gá. 8 Te davá-yu càchí-yu sá tã Èliás cúú-gá, te davá-yu càchí-yu sá ñⁿ tée ní xóo cáháⁿ tnúhu Yá Ndiõxí ndeé sanaha vihi ní ndoto cùu-gá, càchí-yu. 9 Dico té Hèrodés ní cachí-dé:

—Yuhú ní táuchíuⁿ-í ní xehndé-güedé díquí tã Juáá. ¿Te yoo cùu tée dii cuendú-xi

nihí-a sá sũúni cuéhé nũú sã quidé-dě vái? —duha ní cachí-dé.

Te té Hèrodés ndúcú-dě nàcuáa cada-dé cuendá quini-dé Jèsús.

Jèsús dácàxi-gá úhúⁿ mĩl cue téé te ðĩⁿ ñáyiu ðĩhí ndihí landú

(Mt. 14:13-21; Mr. 6:30-44; Jn. 6:1-14)

¹⁰ Te nchaá cue téé ní táuchíúⁿ Jèsús cuáháⁿ cáháⁿ tnúhu Yá Ndiõxí núú ñáyiu ní ndexìo-güedé núú-gã te ní ngüita-güedé nácàni tnúhu-güedé nchaá nàcuáa ní quide-güedé. Te dätñuní ní xica-gá medii-ni-gá ndécá ñàha-gá xii-güedé cuáháⁿ ìⁿ xichi núú ñà túú ñáyiu ndècu, yatni núú cáá ñúú Bètsaidá. ¹¹ Dico òré ní nihí ñáyiu tnúhu sá cuáháⁿ Jèsús, te nchìcúⁿ-yu-gá cuáháⁿ, te òré ní quexió-yu núú-gã, te ní queheⁿ cuendá ñáhá-gã xií-yu, te ní dánèhé ñáhá-gã xií-yu nàcuáa ndíhu ndaha ñàha Yá Ndiõxí xií-yu, te ní quide tátna-gá nchaá ñáyiu cùhú.

¹² Te òré sa ní cuaa te ní natacá ndi ùxúú cue téé xica cuu ndihí-gá núú-gã, te ní xáhaⁿ-güedé xii-gá:

—Sa ní cuu dandàca-n nchaá ñáyiu-a, chi sa ní cuaa, te na quihíⁿ-yu nchaá vehe càa yatni iha, ndihí nchaá xití ñúú cáá yàtni iha cuaáⁿ-yu sá cáxí-yu, te ðiu-ni yàcáⁿ ndetátú-yu, chi núú ndécú-ó ìha ñà túú tnàhí ná ío —càchí-güedé xáhaⁿ-güedé xii-gá.

¹³ Te Jèsús ní xáhaⁿ-gá xii-güedé:

—Mee-ndo chĩ cuñaha sã ná càxí-yu —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Ñá túú nãgá ndécú ndihí-ndí, chi úhúⁿ duha-ná pàá, ndihí úú-nã chácá ndécú ndihí-ndí, te ðiu-ni núú quihíⁿ-ndí cuaaⁿ-ndí sá cáxí-yu —càchí-güedé xáhaⁿ-güedé xii-gá.

¹⁴ Te xĩnu dätñá úhúⁿ mĩl mee-ni cuè téé, te ðĩⁿ ñáyiu ðĩhí ndihí landú. Te Jèsús ní xáhaⁿ-gã xii cue téé xica cuu ndihí-gá:

—Chí cũñaha na ngõo ndi údico úxí ndi údico úxí-yu ìⁿ ìⁿ xichi —càchí-gá xáhaⁿ-gã xii-güedé.

¹⁵ Te ducaⁿ ñi quide-güedé, te ní ngóo-yu nchaá-yu. ¹⁶ Te dätñuní ní queheⁿ-gá ndi úhúⁿ pàá-áⁿ, ndihí ndi ndúú chácá-áⁿ. Te ní ndacoto-gá andiu, te ní ndacáⁿ

táhú-gã núú Yá Ndiõxí, te dätñuní ní táhú cuèchi-gá pàá-áⁿ ndihí chácá-áⁿ, te ní sáha-gá nchaá cue téé xica cuu ndihí-gá ní dácãhũ ñaha-güedé xií-yu. ¹⁷ Te nchaá-yu ní xexí-yu ní ndahá xití-yu. Te sátá ñi túhú cóhõ-yu te ní nadatácá-güedé nchaá sá ñi quendóo, te ní chítú ùxúú tnàhá tídihi mee-ni sã ñi quendóo.

Té Pèlú xáhaⁿ-dě xii Jèsús sá ðíú-gã cúú-gã Cristú

(Mt. 16:13-19; Mr. 8:27-29)

¹⁸ Te ìⁿ nduu ndècu mee Jesús ndihí cue téé xica cuu ndihí-gá, te càháⁿ ndihí-gá Yá Ndiõxí, te sátá ñi yáha ní cáháⁿ ndihí-gá Yá Ndiõxí, te ní xicáⁿ tnúhú-gã núú-güedé, te xáhaⁿ-gã xii-güedé:

—¿Yoo cùu yúhú càchí ñáyiu-va? —càchí-gá xáhaⁿ-gã xii-güedé.

¹⁹ Te ní xáhaⁿ-güedé xii-gá:

—Davá-yu càchí-yu sá cúú-n ndi Juáá téé ní xóo dacuàndute ñaha xii ñáyiu, te davá-yu càchí-yu sá cúú-n tẽ Èliás, te davá-yu càchí-yu sá ìⁿ téé ní xóo cáháⁿ tnúhu Yá Ndiõxí ndéé sanaha ñi ndoto cùu-n, duha càchí-yu —càchí-güedé xáhaⁿ-güedé xii-gá.

²⁰ Te ní xicáⁿ tnúhú tùcu-gá núú-güedé, te xáhaⁿ-gã xii-güedé:

—Te nchòhó, ¿yoo sàni iní-ndó cùu-í-i? —càchí-gá xáhaⁿ-gã xii-güedé.

Te té Pèlú ní xáhaⁿ-dě xii-gá:

—Yòhó cúú-n Cristú Déhe Dútú Ndiõxí —càchí-dé xáhaⁿ-dě xii-gá.

Jèsús càháⁿ-gá sá cáhni ñàha-güedé xii-gá
(Mt. 16:20-28; Mr. 8:30-9:1)

²¹ Te ní xáhaⁿ-gã xii-güedé sá vã yõo ìⁿ cúñaha-güedé yoo cùu-gá. ²² Te ní xáhaⁿ-gã xii-güedé:

—Yúhú Téé cùu ñaní tnàhá-ndó nchàa-ndo ío cuéhé sã ndóhò-í, chi daquèe tíhú ñáhá cuè téé cùu sacuéhé nũú ñáyiu isràel, ndihí cue dútú cùnũu, ndihí cue téé dàcuaha ñaha xii ñáyiu nchaá tnúhu ní chídó tnùní ndi Moisés, te sáá nduu te cahni ñaha-güedé xii-í, dico nduu úní sá cùú-í te ndoto-í —càchí-gá xáhaⁿ-gã xii-güedé.

²³ Te dätñuní ní xáhaⁿ-gã xii nchaá ñáyiu:

—Nchaá ñáyiu cuñi chitnahá ñáhá xii-í, te xini ñuhu-xi vá cadá-gã-yu sá sání iní mée-yu, te ìⁿ nduu ìⁿ nduu cada ndee

iní-yu cundecu túha-yu ndohó-yu cuendá-í, te cuéi na ndohó-yu dàtná ndoho-í. ²⁴ Te nchaa ñáiyu cuení sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáiyu ñá túú yùhú cuéi nándi sá ná yáha-yu cundecú-yu ñuyíú-a sá cuendá-í, te ñáiyu-án naníhí tàhú-yu. ²⁵ Te cuéi nchaandi túhú sá ío ñuyíú-a na nihí ñáiyu cundecu ndihí-yu, dico núu diu nchaa xiáⁿ ná càda cuíta nihnú-yu te ñá túú vèdana nàndíhi-xi sá dúcáⁿ ndècu ndihí-yu nchaa xiáⁿ. ²⁶ Te nchaa ñáiyu na cùcahaⁿ núu-xi cáháⁿ váha cuendá-í ndihí cuendá nchaa tnúhu-í, te tnàhá yùhú Téé cùu ñaní tnàhá-ndó nchàa-ndo cucahaⁿ núu-í núu-yu òré quixi tucu-í ndihí cue espíritu xínú cuèchi núu Tàtá-í Dútú Ndiöxí, te mee-gã cada cutnùní iní nchaa ñáiyu sá ío càhnu cuu-í. ²⁷ Te na càchí tnúhu ndáá-í xii-ndo sã ío dava nchòhó ñáiyu ndècu iha vitna vá cùu-ni-ndo, chi cundecu-ni-ndo ndéé quini-ndó sãá nduu ndíhu ndaha ñàha Yá Ndiöxí xii ñáiyu —càchí-gã xáhaⁿ-gã xií-yu.

Ní nadáma dóo Jèsús ndihí núu-gã
(Mt. 17:1-8; Mr. 9:2-8)

²⁸ Te ní cuu dàtná úná nduu sá dúcáⁿ ñí cáháⁿ Jèsús, te cuásaá-gã ñí yucu cáháⁿ ndihí-gã Yá Ndiöxí, te ndèca-gã té Pèlú, ndihí té Jàcobó, ndihí té Juáa cuásaá. ²⁹ Te ñini cáháⁿ ndihí-gã Yá Ndiöxí ní nadáma núu-gã ndihí dóo-gã, te dóo-gã-án sùúni ñí nduu cuixín víhí, te sùúni dàtásaⁿ-xi. ³⁰ Te òré-ni-án ñí xiní-güedé úú tnàhá cue téé càháⁿ ndihí-gã, te ñí-dé cúu-dé té Moisés, te ingá-dé cúu-dé té Èliás, ³¹ te sùúni dàtásaⁿ-xi ñí càndéé núu ndécú cue téé úú-án ndihí-gã, te xindatnúhu-güedé nàcuáa ndoho Jèsús cuú-gã ñuu Jerusàlén dàtná ní cachí meé-gã. ³² Te té Pèlú ndihí úú-gã-güedé cuení víhí-güedé cùdú-güedé, dico ní sahní iní-güedé ñá túú ní xidí-güedé, te ní dánèhé núu ñàhá-xí xii-güedé sá sùúni vaha càa núu ndécú Jèsús, ndihí úú cue téé càháⁿ ndihí-gã-án. ³³ Te òré sa ndùcu ndee cue téé úú-án caca-güedé núhú-güedé, te ní xáhaⁿ tã Pèlú xii-gã:

—Mèstrú, ¡váha ní cuu sá ndécú-ó ìha vitna! Te na dàcaa-ndí úní tnàhá vehe tnuvixiⁿ, ñí cuu cuendá-n, te ñí cuu cuendá té

Moisés, te ñí cuu cuendá té Èliás —càchí-dé xáhaⁿ-dë xii-gã.

Dico té Pèlú chi ñí mèe-dé ñá túú ní cùtnumí iní-dé nása ndùu tnúhu ní cáháⁿ-dë. ³⁴ Te ñini cáháⁿ-dë ní quexìo ñí vícò núú ndécú-güedé-án ñí dádähu ñaha-xi xii-güedé, te ní yùhú-güedé sá dúcáⁿ ñí quexìo vícò-án ñí dádähu ñaha-xi. ³⁵ Te xití vícò-án ñí tecú ní cáháⁿ Yá Ndiöxí, te xáhaⁿ-gã xii-güedé:

—Téé-a cùu-dé Déhe-í, téé ío cùu iní-í, te tñi-ndo nchàa tnúhu cáháⁿ-dë —duha ní xáhaⁿ-gã xii-güedé.

³⁶ Te sátá dúcáⁿ ñí cáháⁿ Yá Ndiöxí, te ní quide cuendá-güedé sá mèdii-ná Jèsús ndécú-gã xiáⁿ. Te vá yòo ñí xáhaⁿ-güedé nàcuáa ndùu nchaa sá ñí xiní-güedé-án.

Jèsús quidé tãtna-gã ñí téé cuechi yìhi ñaha espíritu cùndihí yucu ñávãha
(Mt. 17:14-21; Mr. 9:14-29)

³⁷ Te ingá nduu-án cuãnuu-gã yucu-án ndihí-güedé, te ío cuéhé ñáiyu cuáháⁿ tnahá ñàhá xii-gã. ³⁸ Te ñí téé ñùhu tnahá tnuú-yu-án ñí cáháⁿ níhi-dé, te xáhaⁿ-dë xii-gã:

—Mèstrú, ío cáháⁿ ndàhú-í núu-n núu vá cùndèe iní-n càda tãtna-n dëhe-í, chi ñí dñi duha-dé ndécú, ³⁹ te yìhi ñaha espíritu cùndihí yucu ñávãha xii-dé, te òré ná nàtni ñaha-xi xii-dé, te dàcana saa ñaha-xi, te ndàda ruúⁿ ñàhá-xí xii-dé, te tàva-xi tíñú yuhu-dé. Te ío dándoho ñaha-xi xii-dé, chi ndéé núu ñà cúu-gã, te dàña ñaha tnaa-xi xii-dé. ⁴⁰ Te sa ní cáháⁿ ndàhú-í núu cué téé xica cuu ndihí-n queñuhu-güedé-xi, dico ñá túú ní ndàcu-güedé —càchí-dé xáhaⁿ-dë xii-gã.

⁴¹ Te Jèsús ní xáhaⁿ-gã xii nchaa ñáiyu:

—¡Nchaa nchòhó ñáiyu ndècu ñuyíú-a ío sãá iní-ndó, chi ñá túú cuení-ndó quindáa iní-ndó Yá Ndiöxí! Te ní cuu vai nduu quide ndee iní-í nchaa sá quidé-ndó, ¿te ná ndéé ama vá dúcáⁿ-gã cada-ndo-i? —càchí-gã xáhaⁿ-gã xií-yu.

Te ní xáhaⁿ-gã xii téé cùhú déhe-xi-án:

—Taxi déhe-n ìha —cachí-gã xáhaⁿ-gã xii-dé.

⁴² Te òré cuáháⁿ téé cuechi-án núu-gã, te espíritu cùndihí yucu ñávãha-án ñí dándúa ñàhá-xí xii-dé, te sahní yihí ñàhá tucu-xi xii-dé ní cùu, dico Jèsús níhi ní cáháⁿ-gã

ní tenáa-gá espíritú-áⁿ, te ní quee ñaha-xi xii-dé, te ní nacuáha cuendá ñáhá-gã xii-dé tãtã-dé. ⁴³ Te nchaá-yu ní cuñúhu-yu sá dúcáⁿ ñí cuu, te ní cachí-yu sá ïo càhnu cuu Yá Ndiõxí.

Jèsús càháⁿ tucu-gá sá cùú-gá

(Mt. 17:22-23; Mr. 9:30-32)

Te ñini xicuñúhu-yu nàcuáa ní quide Jèsús, te ní xáhaⁿ-gã xii cue téé xica cuu ndihi-gá:

⁴⁴ —Nchòhó cundedóho váha-ndo tnúhu na càháⁿ-í-a, te vá ná cuànaa-ndo, chi yúhú Téé cùu ñaní tnáhá-ndó nchàa-ndo sáá ñⁿ nduu te cuáha cuendá ñáhá-güedé xii-í núú cuè téé cùu úhú iní ñáhá —càchí-gá xáhaⁿ-gã xii-güedé.

⁴⁵ Dico cue téé-áⁿ ñà túú ní tècú tnùnì-güedé nàcuáa ndùu tnúhu ní xáhaⁿ-gã xii-güedé, te ducaⁿ ñí yáha-güedé, chi ducaⁿ tnàhí ní cachí-gá sá vã tècú tnùnì-güedé, te ní yuhú-güedé cácaⁿ tnúhú-güedé núú-gã nása ndùu tnúhu ní xáhaⁿ-gã xii-güedé.

Cue téé ndùcu tnúhu núú tnáhá nũ ndédacàa-güedé ío-gá cúnùu

(Mt. 18:1-5; Mr. 9:33-37)

⁴⁶ Te cue téé xica cuu ndihi-gá ní ngüíta-güedé ndátnúhu-güedé nũ ndédacàa-güedé ío-gá cúnùu, ⁴⁷ dico Jèsús ní cutnùnì iní-gá nàcuáa sàni iní-güedé nũ ní cana-gá ñⁿ té lihli, te ní sanu tní ñaha-gã ñⁿ xio dñi-gá. ⁴⁸ Te ní xáhaⁿ-gã xii-güedé:

—Nchaa ñáyiu na quèheⁿ cuendá ñⁿ té lihli dàtná té lihli-a cuendá sá ñúhú iní ñáhã-yu xii-í ñá, te cada iní-yu sá yúhú ní queheⁿ cuendá-yu, te nchaa ñáyiu na quèheⁿ cuendá ñáhá xii yúhú, te cada iní-yu sá tnáhá Tãtã-í Dútú Ndiõxí Yaá ní tendaha ñàha xii-í véxi-í ñuyíú-a ní queheⁿ cuendá-yu. Te nchaa ñáyiu ío ndàhú iní-xi mee-ni xinu cuechí-yu, ñáyiu-áⁿ ïo-gá cúnùu-yu —càchí-gá xáhaⁿ-gã xii-güedé.

Ñáyiu ñá túú cùu úhú iní ñáhá cùndihi ñahá-yu xii-o

(Mr. 9:38-40)

⁴⁹ Te té Juàá ñu-ni ñⁿ téé xica cuu ndihi-gá ní xáhaⁿ-dè xii-gá:

—Mèstrú, ní xiní-ndí ñⁿ téé càcunehe ñaha-dé xii-n, te ndèñuhu-dé espíritú cùndihi yucu ñávãha yìhi ñaha xii ñáyiu, te nchúhú ñá túú ní dàña-gá-ndí ducaⁿ

càda-dé, chi ñá túú xica cuu ndihi ñaha-dé xii-o —càchí-dé xáhaⁿ-dè xii-gá.

⁵⁰ Te Jèsús ní xáhaⁿ-gã xii-dé:

—Daña-ndo na càda nahi-dé ní cùu, chi ñáyiu ñá túú cùu úhú iní ñáhá xii-o te cùndihi ñahá-yu —càchí-gá xáhaⁿ-gã xii-dé.

Jèsús càháⁿ-gá dóho té Jàcobó ndihi té Juàá

⁵¹ Te òré sa ta cùyatni ndaa Jèsús andiu, te ní xica-gá cuáhã-gã ñuú Jerusàlén, chi duuⁿ duuⁿ ní sani iní-gá sá quíhíⁿ-gã. ⁵² Te ní tendaha-gã cue téé yòdo nuu cuáhãⁿ, te ní quexìo-güedé ñⁿ ñuú, te ñuú-áⁿ yíndèhu-xi distritú Sàmariá, te ndùcu-güedé ñⁿ vehe cada túha-güedé òré quexìo-gã. ⁵³ Dico ñáyiu Sàmariá ñá túú ní cuìni-yu cuáñaha núú-yu vehe, chi cuendá sá ñí cutnùnì iní-yu sá ìchi yáha-ni-gã quíhíⁿ-gã ñuú Jerusàlén. ⁵⁴ Te sá dúcáⁿ ñí quidé-yu ñá túú ní cuìni-yu cuáñaha núú-yu vehe ndetatú-gá, núu ní xáhaⁿ té Jàcobó ndihi té Juàá cue téé xica cuu ndihi-gã xii-gá:

—Mèstrú, ¿cuìni-n càcãⁿ táhú-ó nũ Yã Ndiõxí cuendá dangáva-gã ñuhú danàa-gã ñáyiu ñuú-a dàtná ní quide té Èliás téé ní xóo cáháⁿ tnúhu Yá Ndiõxí ndéé sanaha-ãⁿ? —càchí-güedé xáhaⁿ-güedé xii-gã.

⁵⁵ Te Jèsús ní nchócótó-gã núú-güedé, te níhi ní cáháⁿ-gã dóho-güedé, te xáhaⁿ-gã:

—Nchòhó, chi ñá túú vãha iní-ndó te núu ducaⁿ càháⁿ-ndó. ⁵⁶ Chi yúhú Téé cùu ñaní tnáhã-ndó nchàa-ndo véxi-í sá dácãcu nihnu-í ñáyiu, te ñá díú véxi-í sá dácũta nihnu-í-yu —càchí-gã xáhaⁿ-gã xii-güedé.

Te sátá dúcãⁿ ñí xáhaⁿ-gã, te ní xica-gã cuáhãⁿ-gã ndihi-güedé ingã ñuú.

Ñáyiu cuìni chitnahá ñáhá xii Jèsús ní cùu
(Mt. 8:19-22)

⁵⁷ Te ñúhu Jèsús ichi ndihi-güedé, te ñⁿ téé ní xáhaⁿ-dè xii-gá:

—Mèstrú, cuìni-í canchicúⁿ ñáhã-í xii-n ndèni ní cuu na quíhíⁿ-n —càchí-dé xáhaⁿ-dè xii-gã.

⁵⁸ Te Jèsús ní xáhaⁿ-gã xii-dé:

—Nchaa ñúcuii chi ndècu yaú cúu vèhe-güedi saquihí-güedi, te nchaa quitì ndàva caa tacá-güedi díquí yutnu, dico yúhú Téé cùu ñaní tnáhã-ndó nchàa-ndo chi ñá túú ndéé cáá vèhe-í ñuyíú-a ndetatú-í —càchí-gã xáhaⁿ-gã xii-dé.

59 Te dătnùní ní xáhaⁿ tùcu-gá xii ingá-dé:
—Yòhó taquixi chitnahá ñáhá-n xii-í —
càchí-gá xáhaⁿ-gă xii-dé.

Dico té-e-áⁿ ní xáhaⁿ-dê xii-gá:

—Mèstrú, dañá na nùhú-í cundetu-í cuú
tătà-í te chindúxi-í-dé, te dătnùní quixi-í
chitnahá ñáhá dùcaⁿ-ná-í xii-n —càchí-dé
xáhaⁿ-dê xii-gá.

60 Te Jèsús ní xáhaⁿ-gă xii-dé:

—Daña ñăyiu ñá túú sàndáá iní ñáhá
xii-í ná chindúxi tñaha meé-yu, chi ñăyiu-áⁿ
cúú-yu dătná ñăyiu ní xíhí cuéi ndècu-ní-yu
núú ñuyú-a. Te yòhó taquixi, chi quíhíⁿ-n
dànehé-n ñăyiu nàcuáa cada Yá Ndiöxí
ndíhu ndaha ñàha-gá xii-yu —càchí-gá
xáhaⁿ-gă xii-dé.

61 Te ní xáhaⁿ tùcu ingá-dé xii-gá:

—Mèstrú, cuíní-í chitnahá ñáhà-í xii-n,
dico díhna-gá dañá na nùhú-í cada ndee
iní-í nchaa ñăyiu ndècu vehe-í, te dătnùní
quixi-í —càchí-dé xáhaⁿ-dê xii-gá.

62 Te Jèsús ní xáhaⁿ-gă:

—Nchaa ñăyiu ní sàndáá iní ñáhá xii-í,
te núu vá cànchícúⁿ nihnu ñáhá-yu ní
yùhu ní iní-yu, te cúú-yu dătná ñⁿ téé ní
tn^ñ ndaha làtú cutu-dé, chi té-e-áⁿ nùu
na ndàcoto-dé ndàa sàtá-dê òré xítú-dê, te
vá quíhíⁿ ndáa làtú-dé ducaⁿ sàtnahá-xi
cúú-yu. Te cue ñăyiu chi vá cúú ndáá-yu
nàcuáa ndíhu ndaha-gá dava-gá ñăyiu—
càchí-gá xáhaⁿ-gă xii-dé.

10

*Jèsús téndàha-gá únídico úxí cue téé quíhíⁿ
cáháⁿ tnúhu-gá núú ñăyiu*

1 Te sàtá dúcáⁿ ní cuu, te ní cáxi tucu
Xítóhó Jesucristú únídico úxí cue téé
codonù-güedé quíhíⁿ-güedé cáháⁿ-güedé
tnúhu-gá nchaa ñúú, ndíhi nchaa dava-gá
xichi núú quíhíⁿ-gá, te ndí ndúú ndí
ndúú-güedé tendaha ñàha-gá xii-güedé
quíhíⁿ-güedé. 2 Te cùmání-gă caca-güedé, te
ní xáhaⁿ-gă xii-güedé:

—Nchòhó xíní-ndó sã òré ná sàá yóó cuu
nchaa sá xítú ñăyiu, te ío vâi cuu. Te na
càchí tnúhu ndáá-í xii-ndo sã dătná vâi sá
xítú ñăyiu cùu, ducaⁿ ío vâi ñăyiu cùmání
cundedóho tnúhu Yá Ndiöxí te ío sacú
ñăyiu dàcuaha ñàha xii-yu tnúhu-gá, núu
xiáⁿ xíní ñùhu-xi cãcáⁿ-ndó nùú Yá Ndiöxí

cuendá sá ná dăcáháⁿ-gá iní ñăyiu cáháⁿ-yu
tnúhu-gá núú ñăyiu cùmání cundedóho
tnúhu-gá. 3 Te nchòhó cúú-ndó dătná
cue mbéé cue quiti cuáháⁿ núú yíhí cuè
quiti dééⁿ. Chi tendaha ñàha-í xii-ndo
quíhíⁿ-ndó nùú xíndecu nchaa ñăyiu cuihna
iní-xi. 4 Te vá cànèhe-ndo ñunu cuhuⁿ
ndachiuⁿ-ndo, ni núú cúhúⁿ díhúⁿ-ndó, te
ni vá cãdá tũha-gá-ndó chàú-ndó chi ðiu-ni
chàú yíhí-ndó-ãⁿ xiáⁿ-ni quíhi-ndo, te vá ío
cuyaa-ndo cáháⁿ ndíhi-ndo ñăyiu ñùhu ichi.
5 Te òré ná quèxio-ndo ñⁿ vehe, te duha
cúñaha-ndo xii ñăyiu dii vèhe-xi-áⁿ: “Yá
Ndiöxí chindee ñàha-gá xii-ndo ío váha cuu
iní-ndó cundecu-ndo”, duha cúñaha-ndo
xii-yu. 6 Te núu ñăyiu-áⁿ ní nduu táhũ-yu
sá cundècu váha iní-yu núú Yá Ndiöxí,
te cuu-xi sá váha sá cúú-xi-yu tnúhu
cúñaha-ndo-ãⁿ, dico núu ñá túú ní cáháⁿ
váha ndíhi ñáhá-yu xii-ndo, te cúñaha-ndo
sã vá cúú-xi sã váha sá cúú-xi-yu. Dico núu
ní cáháⁿ váha ndíhi ñáhá-yu xii-ndo, 7 te
ðiu-ni vehe-áⁿ cada vehe tnaa-ndo, te ñá
túú-gă ndéé nducu-ndo vèhe cundecu-ndo,
te caxi-ndo nchàa sá ná tàxí-yu, chi nchaa
cue téé quide chiuⁿ dacuití tàú-güedé sá
nihí-güedé sá cáxi-güedé cuendá nchaa
chìuⁿ quide-güedé. 8 Te núu ní sáá-ndó
ñⁿ ñúú núú ní queheⁿ cuendá ñáhã-yu
xii-ndo, te caxi-ndo nchàa sá ná tàxí-yu.
9 Te cada tátna-ndo cuè ñăyiu cùhú xíndecu
ñúú-áⁿ, te cúñaha-ndo xii-yu sá sà ní sáá
nduu ndíhu ndaha ñàha Yá Ndiöxí xii-yu.
10 Dico núu ní sáá-ndó ñⁿ ñúú núú ñà túú ní
queheⁿ cuendá ñáhã-yu xii-ndo, te tn^ñ-ndo
ìchi cuita cáháⁿ-ndó cuáháⁿ, te cúñaha-ndo
xii-yu: 11 “Ndéé tícá chúhmá ní tn^ñ sáhá-ndí
ñúú-ndó nàquidi-ndí, te duha quide-ndí
cuendá cutnùní iní-ndó sã ñà túú quide
váha-ndo ndècu-ndo. Dico cunaha-ndo
sã sà ní sáá nduu ndíhu ndaha ñàha Yá
Ndiöxí xii-ndo ní cùu”, duha cúñaha-ndo
xii-yu. 12 Te na càchí tnúhu-í xii-ndo sã
ná sáá nduu càda ndáá Yá Ndiöxí cuéchi
nchaa ñăyiu, te ñăyiu ñúú-áⁿ ío-gá ndohó-yu
dává-áⁿ dăcúxí ñăyiu ñúú Sòdomá —
càchí-gá xáhaⁿ-gă xii-güedé.

Cuendá ñăyiu dava ñúú ñá túú sàndáá iní

*tnúhu Xítoho Jesucristú**(Mt. 11:20-24)*

¹³ Te Jèsús xáhaⁿ-gã xii ñáyiú dava ñuú ñá túú sàndáá iní tnúhu-gá:

—Ndàhú nchòhó cue ñáyiú ñuú Coràzín! ;Te ndàhú nchòhó cue ñáyiú ñuú Bètsaidá! Chi núu dícó ñuú Tírú, ndíhi ñuú Sìdón ní quide-í nchaa sá vã yõo tnàhí ndàcu cada datná ní quide-í ñuú-ndó-áⁿ ñí xíní-ndó ñá, te sá ndéé ama-gá cuihnú-yu dóó ndàhú, te cunucóo-yu núú yáá cuèndá sá ndíxí cuèchi iní-yu sá ñà túú quide váha-yu ni cùu. ¹⁴ Dico sáá nduu te ío-gá dandòho ñaha Yá Ndiõxí xii-ndo dàcúxí ñáyiú ñuú Tírú, ndíhi ñáyiú ñuú Sìdón. ¹⁵ Te nchòhó ñáyiú ñuú Capèrnaúm quide iní-ndó sá sà cuánda-ndo àndiú, dico ñáhá chi núú ùhú núú ndàhú cundecu-ndo —duha ní xáhaⁿ-gã xii nchaa ñáyiú ñuú-áⁿ.

¹⁶ Te xáhaⁿ tùcu-gá xii cue téé tendaha-gã quíhíⁿ cáháⁿ tnúhu-gá-áⁿ:

—Nchaa ñáyiú na cùndedóho nchaa tnúhu cáháⁿ-ndó, te cada iní-yu sá yúhú càháⁿ-í ndèdóho-yu, te nchaa ñáyiú na dàquee tíhú ñáhá xii-ndo, te tnàhá yúhú daquee tíhú-yu, te nchaa ñáyiú ducaⁿ na dàquee tíhú ñáhá xii-í, te tnàhá Tãtà-í Dútú Ndiõxí Yáá ní tendaha ñaha xii-í véxi-í ñuyíú-a dàquee tíhú-yu —càchí-gá xáhaⁿ-gã xii-güedé.

Te ducaⁿ te ní xica-güedé cuáháⁿ-güedé.

Ní nasáá cue téé únídico úxí ní tendaha Jèsús ní sáháⁿ ní cáháⁿ tnúhu-gá núú ñáyiú

¹⁷ Te cue téé únídico úxí-áⁿ ñí nasáá-güedé te súúni cùdíⁿ iní-güedé, te xáhaⁿ-güedé xii Jèsús:

—Mèstrú, ndéé espíritú cùndíhi yucu ñávãha sàndáá iní ñáhá-xí xii-ndí òré cáci nèhe ñaha-ndí xii-n —càchí-güedé xáhaⁿ-güedé xii-gá.

¹⁸ Te Jèsús ní xáhaⁿ-gã:

—Ndáá càháⁿ-ndó chi yúhú ní xíní-í cùtnàhá ní xíta nihnu yucu ñávãha, chi dàtná ní ngava ñⁿ tasaⁿ ñí ngava-xi ñuyíú-a.

¹⁹ Te dàtná quidé-ndó òré xènihnu-ndo ñⁿ cóó, àdi ñⁿ nchacua ducaⁿ cada-ndo daquee tíhú-ndó yùcu ñávãha, te ñá túú ñà cada ñaha-xi xii-ndo, chi ní taxi-í tnúhu ndee iní ndécú ndíhi-ndo. ²⁰ Dico vá cùdíⁿ

iní-ndó cuèndá sá sàndáá iní ñáhá cuè espíritú cùndíhi yucu ñávãha xii-ndo, chi cùdíⁿ iní-ndó cuèndá sá sà yodo tnuní-ndó núú tùtú Yá Ndiõxí Yáá ndécú àndiú —cachí-gá xáhaⁿ-gã xii-güedé.

*Jèsús cùdíⁿ iní-gá**(Mt. 11:25-27; 13:16-17)*

²¹ Te òré-áⁿ súúni ñí quide díí iní ñáhá Espíritú Yá Ndiõxí xii Jèsús, te ní xáhaⁿ-gã xii Yá Ndiõxí:

—Yòhó Tãtà-í Dútú Ndiõxí, ío chìñuhu ñaha-í xii-n chi ñiú-n tàxi tnuní-n àndiú ndíhi ñuyíú-a, te dànehé-n cuè ñáyiú nchaa tnúhu váha, te ñiú-ni ñáyiú-áⁿ cùú-yu ñáyiú ñá túú cùtnuní iní-xi nchaa tnúhu càháⁿ cue téé túha, te nchaa tnúhu càháⁿ-n-áⁿ ñà túú ní dàtúu-n núú ñáyiú càchí sá ò túha, te ío váha sáá díquí-xi. Te ducaⁿ quide-n, chi ducaⁿ cuíní-n cùnduu —cachí-gá xáhaⁿ-gã xii Yá Ndiõxí.

²² Te xáhaⁿ tùcu-gá xii cue téé ní nasáá-áⁿ:

—Mee Tãtà-í Dútú Ndiõxí ní cachí-gá sá cùnúu-í núú nchaa-ndí túhú sá òó. Te vá yõo ñⁿ xíní nàcuáa sàni iní yúhú Déhe Dútú Ndiõxí, chi ñⁿ díí-ni mee-gã xíní-gá nàcuáa sàni iní-í. Te ducaⁿ ñⁿ dii-ni yúhú xíní-í nàcuáa sàni iní méé-gã, te nchaa ñáyiú càchí iní-í sá quíní-yu nàcuáa sàni iní Tãtà-í Dútú Ndiõxí te xitnùhu-í-yu, te vá yõo ñⁿ-gã xíní nàcuáa sàni iní-gá chi ñiú-ni ñáyiú ducaⁿ xitnùhu-í-áⁿ xíní-yu —càchí-gá xáhaⁿ-gã xii-güedé.

²³ Te ní nchócótó-gã núú xíndecu mee-ni cuè téé xica cuu ndíhi-gá, te ní xáhaⁿ-gã xii-güedé:

—Váha táhú nchòhó ndíhi nchaa ñáyiú ndèhe nchaa nacúáa quide-í vitna. ²⁴ Chi ío cuéhé cue téé ní xóo cáháⁿ tnúhu Yá Ndiõxí ndéé sanaha, ndíhi cue téé ní xíndaha ñaha xii ñáyiú ní cuíní-güedé cundehe-güedé nchaa sá ndéhé-ndó quide-í vitna, te ñá túú ní xíní-güedé, te ní cuíní-güedé cundedóho-güedé nchaa tnúhu càháⁿ-í ndèdóho-ndo vitna, te ñá túú ní xíndedóho-güedé —càchí-gá xáhaⁿ-gã xii-güedé.

Nàcuáa ní quide ñⁿ téé distritú Sàmariá

²⁵ Te ñⁿ téé dàcuaha ñaha xii ñáyiú nchaa tnúhu ní chídó tnuní ndí Moisés ní

ndacuĩní-dé xító ndèé-dé Jèsús nũu nása cunduu tnúhu cáháⁿ-gá, te xáhaⁿ-dẽ xii-gá:

—Mèstrú, ¿ná cúú sã cáda-í cuendá nduu táhù-í cundecu-í ndihi Yá Ndiõxí ni caa ni quíhíⁿ-i? —càchí-dé xáhaⁿ-dẽ xii-gá.

²⁶ Te Jèsús ní xáhaⁿ-gã xii-dé:

—Cuĩní-í cachí tnúhu-n nása càháⁿ-xi núú tütú ndíi Moisés —càchí-gá xáhaⁿ-gã xii-dé.

²⁷ Te xáhaⁿ-dẽ xii-gá:

—Ndíi Moisés càchí ndíi núú tütú ndíi: “Cuu iní-ndó Dütú Ndiõxí Yaá cúú Ndiõxí-ndó ni yuhu ni iní-ndó, te cani iní-ndó càda-ndo datná cuĩní mée-gã, te mee-ni tnúhu váha cani iní-ndó nàcuáa cuu vii cuu váha-ndo nũú-gã, te coo iní-ndó cùu iní-ndó-gã. Te cuu iní-ndó tnàha ñáyiundu datná cúú iní-ndó mée-ndo”, duha càchí ndíi núú tütú ndíi —càchí-dé xáhaⁿ-dẽ xii-gá.

²⁸ Te Jèsús ní xáhaⁿ-gã:

—Váha-ni càháⁿ-n, te núu cada-n nàcuáa càháⁿ-n ãⁿ, te nduu táhù-n cundecu-n ndihi Yá Ndiõxí ni caa ni quíhíⁿ —càchí-gá xáhaⁿ-gã xii-dé.

²⁹ Te sá dúcáⁿ nĩ xáhaⁿ Jèsús xii-dé nũu ndùcu-dé nàcuáa cada-dé cácu nihnu-dé núú tnúhu ní cáháⁿ-dé, te ní xícáⁿ tnúhú-dẽ núú-gã, te xáhaⁿ-dẽ:

—¿Yoo cùu tnaha ñáyiun-í-i? —càchí-dé xáhaⁿ-dẽ xii-gá.

³⁰ Te Jèsús ní cani-gá ñⁿ cuendú núú-dẽ nàcuáa tecú tnúni-dé tnúhu-gá, te xáhaⁿ-gã:

—Ñⁿ téé ní ndee-dé ñuú Jerusalén ñúhú-dẽ ichi cuánuu-dé cuáháⁿ-dé ñuú Jericó, te ní quee ñadúhú ichi-dé ní dúhú-güedẽ dóó níhnú-dẽ, ndihi nchaa sá néhé-dẽ, te ní caniha vihi-güedé, te nchito ñu-ná-dé ní dáñá ñàha-güedé te cuáháⁿ-güedé. ³¹ Te mei òré cátùu-dé-áⁿ ñúhú ñⁿ dütú ichi-áⁿ, te òré ní xiní ñáhá dütú-ãⁿ xii-dé, te ñⁿ xio-ni ní xócõ ndee-dé ní yáha-dé. ³² Te ñúhu tucu ñⁿ téé cùu levítá ichi-áⁿ, te òré ní xiní-dé téé-áⁿ cátùu-dé, te ñu-ni ducaⁿ nĩ quide-dé ñⁿ xio-ni ní xócõ ndee-dé ní yáha-dé. ³³ Dico ñⁿ téé ñⁿ distritú Sãmariá ñúhú tucu-dé ichi-áⁿ te òré ní xiní-dé téé-áⁿ cátùu-dé, te ní cundáhú iní ñáhá-dẽ. ³⁴ Te ní sáháⁿ-dé núú cátùu téé-áⁿ, te ní quide tátna-dé nchaa núú nĩ nícuèhé xii téé-áⁿ nĩ chihi-dé yúcú, te ní dácútú-dẽ. Te dätñuní ní dácáá ñàha-dé sátá quiti-dé, te ndèca ñàha-dé cuáháⁿ ñⁿ vehe núú sácõ

cue ñáyiundu sácúhuⁿ ichi, te yacáⁿ ní xito ñàha-dẽ. ³⁵ Te ñngá nduu òré ní nucúhuⁿ téé Samaritanú-áⁿ ichi, te ní tava-dé úú díhúⁿ denariú, te ní sáha-dé téé cùu xitohó vehe-áⁿ, te ní xáhaⁿ-dẽ: “Coto saú-n téé-a, te núu ñá ní tnàhá díhúⁿ sã nĩ taxi-í, te cuèi na dândoñuhu-gá-n díhúⁿ-n cuendá-dé, te òré ná quixi tucu-í te nacháhu-í”, duha ní xáhaⁿ téé Samaritanú-áⁿ xii téé dii vehe xíaⁿ. ³⁶ Te vitna cáháⁿ, te núu ndèdacáa cue téé úní-áⁿ cúú-güedé téé váha cùu iní-güedé tnàha ñáyiundu-güedé —càchí-gá xáhaⁿ-gã xii téé dàcuaha ñàha xii-í ñáyiundu-áⁿ nchaa tnúhu ní chídó tnúni ndíi Moisés.

³⁷ Te téé-áⁿ nĩ xáhaⁿ-dẽ xii-gá:

—Téé ní cundáhú iní ñáhá xii téé ní dancüèhé ñáhá cuè ñadúhú-ãⁿ, téé-áⁿ cúú-dẽ téé cùu iní tnàha ñáyiundu-xi —càchí-dé xáhaⁿ-dẽ xii-gá.

Te Jèsús ní xáhaⁿ-gã:

—Cuáháⁿ te ñu-ni ducaⁿ càda-n tnahá-n —càchí-gá xáhaⁿ-gã xii-dé.

Jèsús ndécú-gã vehe tá Mårta ndihi tá Mária

³⁸ Te Jèsús ñúhú-ni-gã ichi cuáháⁿ-gá ndihi cue téé xica cuu ndihi-gá, te ní sáá-gá ñⁿ ñuú líhli, te xíaⁿ nĩ quee ñⁿ xíchí nání Mårta ní cáháⁿ ñáhá-xi xii-gá vehe-xi. ³⁹ Te tá Mårta ndècu ñⁿ cùhú-xi nani-xi Mariá, te xíchí-ãⁿ nĩ ngóo-xi núú Jèsús ndèdóho-xi nchaa tnúhu cáháⁿ-gá. ⁴⁰ Te tá Mårta-áⁿ ndihi vihi-ni iní-xi quide-xi chiuⁿ-xi, te ní sáháⁿ-xi núú Jèsús, te ní xáhaⁿ-xi:

—Mèstrú, ¿náa ñá túú tnàhí sàni iní-n sã nĩ dándõ ndaha ñàha cùhú-í nchaa chiuⁿ-áⁿ? Cúñaha sàú ná quixi-xi chindee ñàha-xi —cachí-xi xáhaⁿ-xi xii-gá.

⁴¹ Dico Jèsús ní xáhaⁿ-gã:

—Yòhó Mårta, ñúhu tneñu vihi-n, te ndihú iní-n sã ño vài chiuⁿ-n ñuhu, ⁴² dico xini ñuhu vihi-gá-xi cundèdóho-n tnúhu cáháⁿ-í, chi tá Mária-a sa ndèdóho-xi tnúhu-í, te vá yõo ñⁿ ndacu xocani tnúhu-í sã nĩ ngúndecu ndihi-xi —càchí-gá xáhaⁿ-gã xii-xi.

11

Jèsús dánèhé-gá cue téé xica cuu ndihi-gá nàcuáa cáháⁿ ndihi-güedé Yá Ndiõxí (Mt. 6:9-15, 7:7-11)

¹ Te ñⁿ nduu càháⁿ ndihí Jèsús Yă Ndiöxí ñⁿ xichi, te sátá ñí yáha ní cáháⁿ ndihí-gá Yă Ndiöxí, te ní xáhaⁿ ñⁿ tée xica cuu ndihí-gá xii-gá:

—Mèstrú, danèhé ñáhá xii-ndí nása cáháⁿ ndihí-ndí Yă Ndiöxí dàtná ní quide ndí Juáa ní dánèhé ndí cue tée ní xica cuu ndihí ndí —càchí-dé xáhaⁿ-dë xii-gá.

² Te Jèsús ní xáhaⁿ-gá:

—Òré cáháⁿ ndihí-ndo Yă Ndiöxí, te cachí-ndó:

Yòhó tătă-ndí Dútú Ndiöxí Yaá ndécú àndiu, nchaa ñáyiú na càháⁿ-yu sá cúú-n Yàá ío yíñùhu.

Te xicáⁿ táhú-ndí núú-n sá ná sàá nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndiu.

³ Te xicáⁿ táhú-ndí núú-n sá táxí-n sá cándèca iní-ndí ñⁿ nduu ñⁿ nduu.

⁴ Te cada càhnu iní-n nchaa yícá cuëchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

Te vá dáñá-n dàcáháⁿ ñáhá yùcu ñávàha xii-ndí cada-ndí sá ñà túú vàha, chi coto ñaha-n xii-ndí cuèndá sá vă dúcáⁿ càda ñaha-xí,

duha cáháⁿ-ndó

—càchí-gá xáhaⁿ-gă xii-güedé.

⁵ Te Jèsús ní xáhaⁿ tùcu-gá:

—Te núu ndèdacàa nchóhó ndécú ñⁿ tée tnàha tnúhu ndihí-ndo, te dava niú cuáháⁿ-ndó vèhe-dé, te òré ní quexìo-ndo, te xáhaⁿ-ndo xii-dé: “Véxi-í núu vá cündèe iní-n tàxi nuu-n úní tnàhá pàá, ⁶ chi ñⁿ tée xini tnàhá ndihí-í ñúhú-dë ichi ní quexìo-dé vehe-í, te ñá túú tnàhí ná cuáñaha-í caxi-dé”, quesaha-ndo cüñaha-ndo. ⁷ Te tée-áⁿ cáháⁿ-dé ndéé xití vehe-dé, te cüñaha-dë xii-ndo: “Vá dásatú nihá-n chi ndèdí yuyèhe-í, te càa-í ndihí cue landú-í, te vá cúú ndácóo-í taxi-í sá cuiní-n”, quesaha-dë cüñaha-dë xii-ndo. ⁸ Te na càchí tnúhu-í xii-ndo sá cuéi cùu-dé tée tnàha tnúhu ndihí-ndo, dico ducaⁿ cüñaha-dë xii-ndo, dico dacuítí sá ndácóo-dé taxi-dé sá cuiní-ndó cuèndá sá vă dásatú-gá-ndó iní-dé. ⁹ Te yúhú càchí-í xii-ndo sá cãcáⁿ-ndó núu ná cuiní-ndó núú Yă Ndiöxí te taxi-gá.

Te vá dáñá ndèe-ndó cãcáⁿ-ndó núú-gă núu ná cuiní-ndó, te ducaⁿ te níhí-ndó. Te cada iní-ndó sá ñí quexìo-ndo vehe ñⁿ tnaha ñáyiú-ndo te ní cáháⁿ-ndó, te ñáyiú-áⁿ ñí tedóho ñàhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yă Ndiöxí tedóho ñaha-gă xii-ndo, te taxi-gá sá ná cãcáⁿ-ndó núú-gă. ¹⁰ Chi nchaa ñáyiú ducaⁿ xiquide te Yă Ndiöxí tedóho ñaha-gă xii-yu níhí-yu sá cuiní-yu. Te ñiú-ni ducaⁿ tùcu nchaa ñáyiú na cãcáⁿ núú-gă ñⁿ sá cuiní-yu, chi sãñaha-gă sá xicáⁿ-yu núú-gă. Te ñiú-ni ducaⁿ tùcu níhí nchaa ñáyiú ñá túú dàña ndéé xicáⁿ núú Yă Ndiöxí sá cuiní-yu, chi níhí-yu.

¹¹ Te nchòhó cue tée cùu tătă ñá túú cündee iní-ndó cuãha-ndo cuè déhe-ndo ñⁿ yúú caxi-güexi òré xicáⁿ-güexi ñⁿ pàá núú-ndó càxi-güexi, te ni ñà túú cündee iní-ndó cuãñaha-ndo ñⁿ cóo caxi-güexi òré xicáⁿ-güexi ñⁿ chácá núú-ndó càxi-güexi. ¹² Te ni ñà túú cündee iní-ndó cuãñaha-ndo ñⁿ nchacua caxi-güexi òré xicáⁿ-güexi ñⁿ ndíú núú-ndó càxi-güexi. ¹³ Te nchòhó cuéi ndéé dau sàá iní-ndó, dico sãha-ndo cuè déhe-ndo sá vãha xèxi-güexi òré xicáⁿ-güexi núú-ndó. Te núu nchòhó ducaⁿ quide-ndo, ñte uuⁿ-gá ducaⁿ quide Tătă-ndó Dútú Ndiöxí Yaá ndécú àndiu, chi taxi-gá Espiritú-gá cundecu ndihí-ndo te núu na cãcáⁿ-ndó núú-gă! —càchí-gá xáhaⁿ-gă xii-güedé.

Càchí-güedé sá ndécú ndihí Jesús yucu ñávàha

(Mt. 12:22-30; Mr. 3:20-27)

¹⁴ Te Jèsús ndèñùhu-gá espíritú cündihí yucu ñávàha yíhi ñaha xii ñⁿ tée ní quide ñíhí-xi, te òré ní ndee ñaha espíritú-áⁿ xii tée-áⁿ, te ní nacáháⁿ-dé. Te ío ní cuñúhu ñáyiú sá dúcáⁿ ñí quide-gá. ¹⁵ Te davá-yu ní xitnàhá-yu:

—Tée-a ndèñuhu-dé nchaa espíritú cündihí sácúíhná yíhí ñàha xii ñáyiú, chi ñiú-ni sácúíhná-áⁿ chindèe ñaha-xi xii-dé, te ñiú-ni-xi tàxi tnuní-xi nchaa espíritú-áⁿ —càchí-yu xitnàhá-yu.

¹⁶ Te davá-yu xito ndéé ñáhă-yu xii-gá, te xãhăⁿ-yu sá ná cãdá-gă ñⁿ sá vă yòo tnàhí ndàcu cada ñuyíú-a cundèhé-yu nàcuáa

cutnùní iní-yu núu ndáá sá Yă Ndiöxi ní tendaha ñaha-gá xii-gá véxi-gá ñuyúú-a. 17 Dico mee-gă sa ní cutnùní iní-gá nchaa nàcuáa sàni iní-yu, núu ní xáhaⁿ-gă xií-yu:

—Te nchòhó xìní-ndó sã nũu ìⁿ tée yìndaha ìⁿ nacióⁿ vá cúú ìⁿnuu-dé ndihì cue tée cùndihì-dé, te vá cúdĩi-dé cunuu-dě. Te diu-ni ducaⁿ sãtnahá tucu-xi cùu cue ñáyiu xĩndecu ìⁿ-ni vèhe, chi núu vá cúú ìⁿnuú-yu cundecú-yu, te vá cúdĩi-yu cundecu càhnú-yu. 18 Te ducaⁿ sãtnahá-xi cùu sàcuíhná, chi núu vá cúú ìⁿnuu-xi ndihì nchaa espíritú cùndihì-xi te vá cúdĩi-xi cundecu-xi taxi tnùnì-xi. Te duha càháⁿ-í chi nchòhó càchì-ndó sã sàcuíhná chĩndèe ñaha-xi xii-í queñuhu-í nchaa espíritú cùndihì-xi yihì ñaha xii ñáyiu. 19 Te núu yúhú quidé cuendá-ndó sã sàcuíhná chĩndèe ñaha-xi xii-í, te xini ñuhu-xi cada cuendá-ndó yòo chĩndee ñaha xii cue tée xica cuu ndihì-ndo queñuhu-güedé nchaa espíritú cùndihì-xi yihì ñaha xii ñáyiu. Te mee-güedě càchì-güedé sá nchòhó ñá túú càháⁿ ndáá-ndó sã dúcáⁿ càháⁿ-ndó. 20 Te ndáá sá Yă Ndiöxi chĩndèe ñaha-gá xii-í queñuhu-í nchaa espíritú cùndihì sàcuíhná yihì ñaha xii ñáyiu, te xíãⁿ cutnùní iní-ndó sã sà ní sáá nduu ndíhu ndaha ñaha Yá Ndiöxi xii-ndo.

21 Te núu ìⁿ tée ío ndee, te súúni ñĩ cáá-dě, te ndéé-dé vehe-dé cuendá sá vã cuíta, te ní quide túha-dé titní sá dëéⁿ, te ío váha nèhe váha-dé nchaa ndachìuⁿ-dé.

22 Dico núu quexìo ìngá tée ío-gá ñĩ cáá te ndee-gă-dé, te ngüíta-dé nãa-dé ndihì tée ndèé vehe-xi-áⁿ, te cada cànarí ñáhá tée-áⁿ xii tée ndèé vehe-xi-áⁿ, te quen-deé-dé nchaa sá dëéⁿ cùndèe iní-dé, te taxi tnùnì-na-dé nchaa xíãⁿ, ndihì nchaa sá ndécú ndihì-dé, te dàcáhũu-dé nchaa cue tée cùndihì-dé nchaa sá ná ñihí-dé.

23 Te nchaa ñáyiu ñá túú cùndihì ñaha xii-í, te cùu úhú iní ñáhã-yu, te nchaa ñáyiu ñá túú chĩndee ñaha xii-í, te dàquee tíhũ-yu chìuⁿ quide-í.

Espíritú cùndihì yucu ñávãha sá nánchòcáva xito cùu uú
(Mt. 12:43-45)

24 Te òré ná quèe ñaha ìⁿ espíritú cùndihì yucu ñávãha xii ìⁿ ñáyiu, te cuáháⁿ-xi

ndùcu-xi ìⁿ xichi núú cùndècu-xi te ñá ñihí-xi, te ní sani iní-xi: “Váha-gá núhú tucu-í núú ñĩ xĩndecu-í”, duha ní sani iní-xi. 25 Te cuánuhú-xi, te òré ní nasáá-xi, te ní xini-xi sá cáá ñĩ ñáyiu-áⁿ dàtná cáá-ñã ìⁿ vehe ní natihú, chi ní nduu vii-ná, vá yòo-gá ndécú. 26 Te sáta dúcáⁿ te ní xica-xi cuáháⁿ-xi cuándúcú-xi ùsá tnàhá espíritú cùndihì-xi sá nèhé víhí-gă xĩquide, te òré ní ñihí-xi cue espíritú-áⁿ te ndèca ñaha-xi cuáháⁿ cuendá ngúndecu ndihì-xi ñáyiu-áⁿ, te ñáyiu-áⁿ uuⁿ-gá nándi yáha-yu dàcúúxí ndèé dìhna —càchì-gă xáhaⁿ-gă xií-yu.

Cuendá ñáyiu cùu váha ndisa iní-xi

27 Te ñini càháⁿ Jèsús tnúhu-áⁿ nũú ñáyiu ní càháⁿ ñihì ìⁿ ñadìhì tnuú-yu, te xáhaⁿ-aⁿ xii Jèsús:

—¡Sá vãha táhú ñadìhì ní dácácú ñaha xii-n, te ní dácuéhnú ñaha-aⁿ! —cachì-aⁿ xáhaⁿ-aⁿ xii-gá.

28 Te Jèsús ní xáhaⁿ-gă:

—¡Váha-gá táhú nchãa ñáyiu sàcúndedóho nchaa tnúhu càháⁿ Yă Ndiöxi te sãndáá iní-yu! —càchì-gă xáhaⁿ-gă xii-aⁿ.

Ñáyiu ñá túú sãndáá iní ñáhá xii Jèsús cuìní-yu cada-gá ìⁿ sá vã yòo tnàhì ndàcu cada

(Mt. 12:38-42; Mr. 8:12)

29 Te ta tàcá vãi ñáyiu te dàdehnde tnaha-ná-yu, te ní ngüíta Jèsús xáhaⁿ-gă xii-yu:

—Nchòhó ñáyiu ndècu ñuyúú vitna, chi ío sáá iní-ndó, te cuìní-ndó càda-í ìⁿ sá vã yòo tnàhì ndàcu cada cuendá cuìní-ndó cùtnunì iní-ndó nũu ndisa sá Yă Ndiöxi ní tendaha ñaha-gá xii-í véxi-í. Dico ñá túú ñãgá cada-í quini-ndó, chi sa ñihí-ndó tnũhu nàcuáa ní yáha ndíi Jònás tée ní xóo càháⁿ tnúhu Yá Ndiöxi ndéé sanaha, te diu-ni ducaⁿ yáha yúhú tucu. 30 Chi nchaa ñáyiu ñuú Ñinivé ní cutnùní iní-yu sá Yă Ndiöxi ní tendaha ñaha-gá xii ndíi Jònás ní sáháⁿ ndíi ñuú-yu. Te ducaⁿ sãtnahá-xi cùu yúhú Tée cùu ñanì tnáhã-ndó nchãa-ndo, chi sáá nduu te cutnùní iní-ndó sã Yă Ndiöxi ní tendaha ñaha-gá xii-í véxi-í ñuyúú-a. 31 Te na sáá nduu càda ndáá Yă Ndiöxi cuèchi nchaa nchòhó ñáyiu ndècu ñuyúú-a, te dàvá-áⁿ quini-ndó ìⁿ ñadìhì ñaha ní xĩndaha ìⁿ nacióⁿ cáá ndàa xio cuha núú quené

nchĩcanchii. Te ñaha-áⁿ ïo xica nĩ xíndecu-aⁿ, te ní sáháⁿ-aⁿ ní xíndedóho-aⁿ nchaa tnúhu ní cáháⁿ ndíi Salòmón, chi ndíi-áⁿ ïo ní sáá sá xíní tnùní ndíi. Te ñaha-áⁿ cáháⁿ-aⁿ dàvá-áⁿ sá nchòhó ñáyiú ndècu vitna ñá túú ní quide ndáá-ndó. Dico vitna iha ndècu ndíhi ñaha-ndo xii yúhú, te ñu-í ío-gá cúnúu-í dàcúúxí ndíi Salòmón. ³² Te ñu-í nduu càda ndáá Yá Ndiöxí cuéchi nchaa nchòhó ñáyiú ndècu ñuyú-a vitna, dàvá-áⁿ tnàhá cue ñáyiú ní xíndecu ñuú Nñivé cundecú-yu núú Yá Ndiöxí, te tnàhá-yu cachí-yu sá ñà túú ní quide ndáá-ndó. Chi ñáyiú ñuú Nñivé-áⁿ nĩ ndixi túu iní-yu sá ñà túú quide váha-yu ndècú-yu te ní natuhá-yu ichi Yá Ndiöxí cútñàhá ní cáháⁿ ndíhi ñaha ndíi Jònás tnúhu-gá xii-yu. Dico vitna iha ndècu ndíhi ñaha-ndo xii yúhú tée cáháⁿ tucu tnúhu Yá Ndiöxí, te ñu-í ío-gá cúnúu-í dàcúúxí ndíi Jònás.

*Núú-ó cùu-xi datná ìⁿ ñuhú
(Mt. 5:15; 6:22-23)*

³³ 'Te ñá túú nĩ ìⁿ ñáyiú tènùhú ìⁿ lintérná, te taxi ndecú-yu ìⁿ núú yídähu, àdi chiváha-yu xití ìⁿ tídihi, chi tàxi ndecú-yu ìⁿ núú ññu cuendá nchaa ñáyiú quíhu vehe cutnùní núú-yu. ³⁴ Te núú-ndó cùu-xi datná ìⁿ ñuhú, chi ìⁿ sá ná quíní-ndó te ndixi túu iní-ndó nã cúú xĩáⁿ, te núú càváha núú-ndó, te ducaⁿ cùtnuní iní-ndó nã cúú sá ndécú núú-ndó, áⁿ te núú cùhú, te vá cùtnùní iní-ndó nã cúú sá ndécú núú-ndó. Te sá dúcáⁿ cùhú núú-ndó te cada iní-ndó sá ndécú-ndó dàtná ìⁿ núú néé. ³⁵ Te ío cada cuendá-ndó vã cání cuèhé iní-ndó cuendá tnúhu Yá Ndiöxí cuendá cutnùní iní-ndó nàcuáa cundecu-ndo, chi núu na càni cuehé iní-ndó cuendá tnúhu-gá, te cùu-ndo datná ìⁿ ñáyiú ñá túú cùtnuní núú-xí. ³⁶ Te núú càndoo canine iní-ndó, te mee-ni sá vãha ñùhu iní-ndó, te cùtnuní váha iní-ndó tnúhu ndáá dàtná cùtnùní váha núú-ndó òré càyú ñuhú, ducaⁿ cùtnuní iní-ndó —càchí-gá xáhaⁿ-gá xii-yu.

*Jèsús càháⁿ-gá cuendá cue tée cùu fariséu
ndíhi cue tée dàcuaha ñaha xii-í ñáyiú
(Mt. 23:1-36; Mr. 12:38-40; Lc. 20:45-47)*

³⁷ Te òré ní ndíhi tnúhu ní cáháⁿ Jèsús, te ìⁿ tée cùu fariséu ní cáháⁿ ñháá-dé xii-gá vehe-dé caxi-gá, te cuànguihu-gá vehe-dé, te ní ngóo-gá mèsá. ³⁸ Te tée cùu fariséu-áⁿ ïo ní cuñúhu-dé, chi Jèsús

ñá túú ní ndàha-gá nàcuáa sàni iní-güedé nduu vétú iní Yá Ndiöxí òré ní ngóo-gá caxi-gá dàtná quidé mèe-güedé. ³⁹ Te Jèsús ní xáhaⁿ-gá xii-dé:

—Nchòhó cue tée cùu fariséu xíní-ndó sá ío ñáyiú nàquete sáta-ni tásáⁿ ndíhi sáta-ni còhó, te xití-xi càndehe caduha-ni. Te ducaⁿ sãtnahá-xi cùu nchòhó, chi ndaha-ni-ndo nàquete-ndo, te iní-ndó ñà túú nduu ndoo, te nãndi dándahú-ndó tnàha ñáyiú-ndo, te quèheⁿ-ndo sá ndécú ndíhi-yu, te nãndi-gá nchaa sá cuèhé sá dúhá ñùhu iní-ndó quide-ndo. ⁴⁰ ;Te nchòhó cúú-ndó cuè tée ío ñĩ iní-xi! ;Te náa ñá túú cùtnuní iní-ndó sá Yá Ndiöxí Yaá ní cadúha yiqui cùñú-ó ñu-í-gá ní chihi-gá iní-ó-ãⁿ? ⁴¹ Te nchaa sá vãha ndècu ndíhi-ndo cuáha-ndo nchàa ñáyiú xini ñuhu na cundecu ndíhi-yu, te núu ducaⁿ na càda-ndo, te cuu-ndo ñáyiú sa ní nduu ndoo ní nduu nine iní-xi.

⁴² ;Te ndàhú ní cuu nchaa nchòhó cue tée cùu fariséu! Chi sãha-ndo Yá Ndiöxí núú úxí xichí yúcú nãní mëntá, ndíhi yúcú rüdá, ndíhi nchaa dava-gá núú yúcú quèe comidá, dico ñá túú quide ndáá-ndó, te ni ñà túú ñùhu iní-ndó Yá Ndiöxí. Dico tnúhu càháⁿ-í-a tàú-ndó càda-ndo, te ni vã dáñá ndéé-ndó càda-ndo nchaa dava-gá sá vãha.

⁴³ ;Te ndàhú ní cuu nchòhó cue tée cùu fariséu! Chi cuíní-ndó cùnucóo-ndo núú sácóo cue tée ío cùnuu xití veñúhu, te cuíní-ndó mèe-ni ndíhi tnúhu yñùhu cáháⁿ ndíhi ñaha ñáyiú xii-ndo nchàa núú xicá cùu-ndo.

⁴⁴ ;Te ndàhú ní cuu nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséu chi ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ìⁿ ñáyiú ní xihí te ní nguíndüxi, te ñá túú cùtnuní-gá ndéé yíndüxi-yu, te cuèi nà yáha ñáyiú dico ñá túú cùtnuní sá yíndüxi ndíyí. Te ducaⁿ sãtnahá-xi cùu nchòhó, chi nchaa ñáyiú ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchí-gá xáhaⁿ-gá xii-güedé.

⁴⁵ Te ní xáhaⁿ ìⁿ tée dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xǐcuèhé-n ǎⁿ —càchí-dé xáhaⁿ-dě xii-gá.

⁴⁶ Te Jèsús ní xáhaⁿ-gǎ:

—jNdàhú ní cuu tnàhá nchaa nchòhó cue tée dàcuaha ñaha xii ñáyiú nchaa tnúhu ní chídó tnùnǐ ndíi Moisés! Chi quíde-ndo datná quíde ñáyiú dàcuído ïⁿ tnaha ñáyiú-xi ïⁿ sá ïo véé, te mèé-yu ni lùha ñá túú cuíní-yu cuidó-yu. Te ducaⁿ sǎtnahá-xi quíde nchohó chi dànehé-ndó ñáyiú nàcuáa cadá-yu, dico mee-ndo chi ni lùha ñá túú cuíní-ndó càda-ndo nacuáa dànehé-ndó-yu.

⁴⁷ jTe ndàhú ní cuu tucu-ndo! Chi càdúha-ndo núú ñǐ nguíndǔxi cue téé ní xóo cáháⁿ tnúhu Yá Ndiǒxí ndéé sanaha cuèndá sá cúnaha-ndo núú yíndǔxi cue ndíi, te ñu-ni cue ñanǐ tnáhá-ndó ñǐ sahani-güedé cue ndíi. ⁴⁸ Te nchòhó sa nàha-ndo nacuáa ní quíde cue ñanǐ tnáhá-ndó, te càchí-ndó sǎ ñǐ quíde váha-güedé sá dúcáⁿ ñǐ sahani-güedé cue ndíi-án, te vitna càdúha-ndo núú ñǐ nguíndǔxi cue ndíi.

⁴⁹ Te Yá Ndiǒxí ïo sǎa nchaa sá xìnǐ tnùnǐ-gá, te ní cachí-gá sá dácàháⁿ-gá inǐ cue téé cuèndá cáháⁿ-güedé tnúhu-gá núú ñáyiú, te cada-güedé nchaa nàcuáa cuíní-gá, te dava-güedé cahni ñàhá-yu xii-güedé, te dava-güedé ïo dandòho ñahá-yu xii-güedé duha ní cachí-gá. ⁵⁰ Te nchaa ñáyiú ñuyíú vitna tnàhá-yu nacháhu-yu núú Yá Ndiǒxí cuèndá sá ñǐ sahani-güedé cue téé ní cáháⁿ tnúhu-gá ndéé cútnáhá ní ngáva ñuyíú. ⁵¹ Te ndéé ndíi Àbél téé ní sahani-güedé ndéé díhna nuu, ndíhi ndéé ndíi Zacàríá téé ní sahani-güedé ndéé núú ñǐ ndíhi-ná ndácáⁿ cuèndá ñáhá Yá Ndiǒxí núú ñáyiú ndècu ñuyíú vitna, te ñu ndíi-án ñǐ sahani-güedé meǐ tnúú veñúhu càhnu sá ïo cùnuu, ndíhi xító núú sácódó sǎ ndúú tǎhú Yá Ndiǒxí.

⁵² jTe ndàhú ní cuu tucu nchaa nchòhó cue téé dàcuaha ñaha xii ñáyiú nchaa tnúhu ní chídó tnùnǐ ndíi Moisés! Chi quíde-ndo datná quíde ïⁿ téé tàxi tnunǐ ïⁿ vehe, chi nacadí-dé te ñá dáñá-dě quíhu ñáyiú te ni mèe-dé ñá túú quíhu-dé. Te ducaⁿ sǎtnahá-xi quíde-ndo, chi dàcuaha-ndo tnúhu Yá Ndiǒxí te ñá túú cuíní-ndó quíndáa inǐ-ndó te ni ñà túú dànehé-ndó ñáyiú cuínǐ tñǐ tnúhu-gá nàcuáa tàú-xi

cunduu cuèndá naníhǐ tǎhú-yu —càchí-gá xáhaⁿ-gǎ xii-dé.

⁵³ Te òré ní ndee Jèsús vehe téé cùu fariséú-án, te cue téé dàcuaha ñaha xii ñáyiú nchaa tnúhu ní chídó tnùnǐ ndíi Moisés, ndíhi cue téé cùu fariséú ní cudééⁿ-güedé núú-gǎ, te ní nguíta-güedé nándǐ sá xicáⁿ tnúhú-güedé núú-gǎ cuèndá cuíní-güedé núu vá cuíta-gá ïⁿ tnúhu càháⁿ-gá ⁵⁴ cuèndá ducaⁿ ñíhǐ-güedé nàcuáa cada-güedé cacáⁿ cuéchi-güedé cuèndá-gá.

12

Jèsús càháⁿ-gá cuèndá cue téé dándahú méé-xí

¹ Te òré-án ñǐ tacá tǐtnǐ mǐl ñáyiú núú ndécú Jèsús, te súunǐ dìcò ngónchihi tnàha-ná-yu. Te ndèdòho-yu ní xáhaⁿ Jèsús xii cue téé xica cuu ndíhi-gá:

—Cada cuèndá-ndó vǎ cǎnchícúⁿ ñihu-ndo nàcuáa quíde cue téé cùu fariséú, chi cue téé-án ïo dándahú-güedé méé-güedé sá quíde ndǎá-güedé dico ñá ndǎá sá quíde ndǎá-güedé. ² Te nchaa tnúhu sá cúú yùhu ni cuu vá cúú yùhu-gá, chi nchaa dacuítǐ sǎ quée túu-xi núú ñáyiú. ³ Chi nchaa tnúhu càháⁿ dayuhu-ndo quèe túu-xi núú chítú núú tàcá, te nchaa tnúhu càháⁿ méé-ndó vèhe-ndo dacuítǐ sǎ ñíhǐ ñáyiú tnúhu.

Yá Ndiǒxí xínǐ ñùhu-xi yuhú-ó-gǎ (Mt. 10:26-31)

⁴ Te nchòhó cue téé ïo váha tnàhá tnúhu ndíhi-í ná càchǐ tnúhu-í xii-ndo sǎ vǎ yuhú-ndó cuè ñáyiú cuèi na càhni ñahá-yu xii-ndo, chi ñu-ni yiquǐ cùnú-ndó ndàcú-yu cahni-yu, te ñá túú nǎgá ndacú-yu cada ñahá-yu xii-ndo. ⁵ Te na càchǐ tnúhu-í xii-ndo sǎ Yá Ndiǒxí tàú-ndó yuhú-ndó-gǎ, chi mee-gǎ ïo cùnuu-gá, te ñu-gá quíde-gǎ sá vǎ cùndècu-gá ñáyiú ñuyíú, te daquíhǐⁿ ñáhá-gǎ xií-yu núú ùhú núú ndàhú, núú xǐáⁿ càchǐ tnúhu-í xii-ndo sǎ Yáa-án tàú-ndó yuhú-ndó-gǎ.

⁶ Te nchòhó xínǐ-ndó sǎ ndéé úhúⁿ tnàhá tǐlaá cùyǎhu-di núú ùú díhúⁿ, dico Yá Ndiǒxí ñá túú cùnaa-gá ni ïⁿ-güedi, chi nèhe cuèndá ñáhá-gǎ xii-güedi. ⁷ Te nchòhó ndéé ïⁿ ïⁿ idi díquí-ndó yíndehe, núú xǐáⁿ càchǐ-í sá vǎ yuhú-ndó, chi cùnuu-gá-ndó dàcúxǐ tǐlaá cuèi vǎi vihi-güedi.

Ñáyiú na dàtúu núú dàva-gá ñáyiú sá ndécú ndìhi-yu Xítóhó Jesucristú
(Mt. 10:32-33; 12:32; 10:19-20)

⁸ Te na cächí tñúhu-í xii-ndo sã núu na dàtúu-ndo núú dàva-gá ñáyiú sá ndécú ndìhi ñaha-í xii-ndo. Te ducaⁿ te tñhá yúhú Tée cùu ñaní tñhá-ndó nchàa-ndo datúu-í núú nchàa cue espíritú xínú cuèchi núú Yã Ndiõxí sá nchòhó ndécú ndìhi ñaha-ndo xii-í. ⁹ Dico núu na cùñaha-ndo xii ñáyiú sá ñà túú ndècu ndìhi ñaha-ndo xii-í, te ñu-ñi ducaⁿ càda yúhú Tée cùu ñaní tñhá-ndó nchàa-ndo, chi cùñaha-í xii cue espíritú xínú cuèchi núú Yã Ndiõxí sá ñà túú ndècu ndìhi ñaha-í xii-ndo.

¹⁰ Te ndédani cãa ñáyiú na cãháⁿ cuèhé cuendá yúhú Tée cùu ñaní tñhá-ndó nchàa-ndo, te cada cãhnu iní ñhá Yã Ndiõxí xií-yu. Dico ñáyiú na cãháⁿ cuèhé cuendá Espíritú Yã Ndiõxí, te ñáyiú-áⁿ vã cáda cãhnu iní ñhá-gã xií-yu.

¹¹ Te òré ná càndeca ñaha-güedé xii-ndo quíhíⁿ veñúhu, àdi núú cuè té cùchiuⁿ, te ni vã cání iní-ndó núu nása cunduu tñúhu cùñaha-ndo xii-güedé, te ni vã cání iní-ndó núu ná tñúhu nadànchocáva-ndo núu ná tñúhu na cùñaha-güedé xii-ndo, ¹² chi òré-nã te mee Espíritú Yã Ndiõxí dacàhu iní ñhá-xí xii-ndo tñúhu cùñaha-ndo xii-güedé —cächí-gá xáhaⁿ-gã xii-güedé.

Cuendá ñⁿ té cuica

¹³ Te ñⁿ té ñúhu tñhá tnuú ñáyiú-áⁿ nã xáhaⁿ-dè xii Jèsús:

—Mèstrú, cùñaha xii ñaní-í sá ná chídava-dé sá ñí dándóo tãtã-ndí cuu cuendá-ndí —cächí-dé xáhaⁿ-dè xii-gã.

¹⁴ Te Jèsús ní xáhaⁿ-gã xii-dé:

—¿Te ná cuendá ducaⁿ cãháⁿ-n? Te ñá díú chiuⁿ-áⁿ vèxi-í cada-í, chi ñá díú tée cùchiuⁿ cuu-í —cächí-gá xáhaⁿ-gã xii-dé.

¹⁵ Te xáhaⁿ-gã xii nchaa ñáyiú xíndecu-áⁿ:

—Nchaa nchòhó ñáyiú ndèdóho nchaa tñúhu cãháⁿ-í ío váha cada cuendá-ndó, te vã cání iní-ndó nãndi nducu-ndo cùndecu ndìhi-ndo, chi cuèi vãi vihi na nihí-ndó cùndecu ndìhi-ndo, dico vã chíndèe ñaha-xi cudíi-ndo cùndecu-ndo ñuyú-a —cächí-gá xáhaⁿ-gã xií-yu.

¹⁶ Te dãtnùní ní ngüíta-gã cání-gã ñⁿ cuendú núu-yu cuendá tecú tñúni-yu tñúhu-gã, te xáhaⁿ-gã:

—Ñⁿ té cuica sùúni ñí cuu nchaa tatá ní xitu-dé núú ñúhú-dè. ¹⁷ Te ní ngüíta-dé sání iní-dé: “¿Te nása cada-í? Te ñá túú ndèe nataxúha-í nchaa sá ñí xitu-í”, duha ní sani iní-dé. ¹⁸ Te dãtnùní ní sáha váha tucu-dé cuendá nãcuáa cada-dé, te ní cachí-dé: “Duha na cùnduu, dangoyo-í yacá-í, te ndada cãhnu-gá-í, te xití-xi nataxúha-í nchaandi túhú sá ñí xitu-í, ndìhi nchaa dáva-gá sá ndécú ndìhi-í. ¹⁹ Te sátá dúcáⁿ, te cachí-í: Ío vãi sá ndécú ndìhi-í, te cudíi-xi cuèhé cuiá, te vitna ndetatú-í, te coho-í te caxi-í cada-í, te nãndi-gã cada-í cuendá cudíi iní-í cundecu-í, duha quesaha-í”, cächí-dé. ²⁰ Dico Yã Ndiõxí ní xáhaⁿ-gã xii-dé: “Yòhó, ñá túú nãndíhi sá sání iní-n, chi yúhú cächí-í sá ñú vitna cuú-n, te nchaa sá ndécú ndìhi-n ¿yoo cuu sá váha xii-aⁿ-i?”, cächí-gá xáhaⁿ-gã xii-dé. ²¹ Duha yáha nchaa ñáyiú nãndi sání iní-xi cundecu ndìhi-xi ñuyú-a, dico ñáyiú-áⁿ ío ndáhú-yu chi ñá túú ñã nduu táhú-yu núú Yã Ndiõxí cundecu ndìhi-yu —cächí Jèsús xáhaⁿ-gã xií-yu.

Yã Ndiõxí xító-gã nchaa ñáyiú sãndáa iní ñhá xii-gã

(Mt. 6:25-34)

²² Te ní xáhaⁿ Jèsús xii cue té xica cuu ndìhi-gã:

—Te na cächí tñúhu-í xii-ndo sã vã ío caní iní-ndó núu nása cundecu-ndo, àdi nása nihí-ndó sã cãxí-ndó, àdi nása nihí-ndó dõo cuihnu-ndo. ²³ Chi cùnuu-gã méé-ndó dàcúxí sã nchító-ndó, te ducaⁿ yiqui cuñú-ndó cùnuu-gã-xi dàcúxí dõo sãcuñhnu-ndo. ²⁴ Te chí cuãha cuendá nãcuáa quide cue tícacá, chi ni ñà túú chihí-güedi tatá cuu itú natahu-güedi te ni ñà túú ndèe núnñi yacá-güedi, te nihí-güedi xèxi-güedi, chí Yã Ndiõxí xító ñaha-gã xii-güedi. ¿Te nchòhó cùnuu-gã-ndó dàcúxí nchàa cue quiti ndava! ²⁵ Te cuèi nãndi sá sání vihi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuèdicó ñⁿ yiqui-gã. ²⁶ Te núu ni sã lúhá xãⁿ ñá ndácú-ndó càda-ndo, ¿te ná cuendá ío sání iní-ndó cuendá nchaa sá cuñí-ndó nihí-ndó cùndecu ndìhi-ndo?

²⁷ Te chí cáda cuendá nãcuáa sãhnu ñⁿ tnu itá, chí ni ñà túú quide chiuⁿ-xi, te ni ñà túú quèheⁿ-xi idi. Te na cächí tñúhu-í

xii-ndo sã ndĩ Salòmón ío vii ní cáa nchaa sã ní xíndecu ndĩhi ndĩ, dico vii-gá tucu càa nchaa itá dácúxí nchàa sã ní xíndecu ndĩhi ndĩ. ²⁸ Te cùhú sã ío vitna tnaa-ni cùdí-xi te sãhmí-yu, te cuèi ducaⁿ dico ío vii càdúha Yá Ndiõxí nchaa cùhú-ãⁿ. ;Te nchòhó ío cùnuu-ndo dacúxí nchàa cùhú-ãⁿ, núu xiãⁿ ío xìto ñaha-gá xii-ndo, te dicó yica cùu iní-ndó sàndáá iní-ndó-gã! ²⁹ Te vá ïo can-chicúⁿ nihnu-ndo sã cóhó sã cáxí-ndó, te ni vã dándihú-ndó ìní-ndó nõu nása cada-ndo nihí-ndó. ³⁰ Chi nchaa ñáyiu ñã túú sàndáá iní ñáhá xii Yá Ndiõxí ducaⁿ mée-ni sã cóhó sã cáxí-yu xica nchicúⁿ nihnú-yu. Dico mee Tátá-ó Dütú Ndiõxí sa naha-gá nándi cùu sã xíní ñuhu-ndo, te taxi-gá. ³¹ Te cada-ndo nchàa nacuáa càháⁿ Yã Ndiõxí Yaá yíndaha ñaha xii-ndo, te ducaⁿ te taxi-gá nchaa sã xíní ñuhu-ndo.

Cuèndá sã vãha nduu táhú-ó nõu Yã Ndiõxí
(Mt. 6:19-21)

³² 'Te vá yùhú nchòhó cue téé ndècu ndĩhi-í cuèi ío sacú-ndó, chi Tátá-ó Dütú Ndiõxí ní cachí-gá sã ndúú táhú-ndó cùndecu-ndo núú ndécú-gã taxi tnùní-ndó tnàhá-ndó. ³³ Te chí dicó nchàa sã ndécú ndĩhi-ndo, te chí cuãha nchaa ñáyiu ndàhú díhúⁿ-ndó ñáyiu xìni ñuhu, te cada váha-ndo cùndecu-ndo, te ducaⁿ te nduu táhú-ndó sã ïo-gá váha núú Yã Ndiõxí cùndecu ndĩhi-ndo, te xiãⁿ vá cúú tùhú tnàhí-gá-xi, te ni vã ndíhí nihnu-gá-xi, te ni ñadúhú vã ndácú-güedé duhu-güedé, te ni tĩquidi vá quéé-dí. ³⁴ Te núu xiãⁿ cúú cuèndá-ndó ñã, te diu-ni xiãⁿ ñúhú ìní-ndó, áⁿ te núu mee-ni sã ndécú ñùyíú-a ndècu ndĩhi-ndo, te diu-ni nchaa xiãⁿ ñúhú ìní-ndó.

Xìni ñuhu-xi quíhi iní-ó cùndecu-o

³⁵⁻³⁶ 'Te ío quíhi iní-ndó cùndecu-ndo, te cada-ndo dàtná quidé dàva cue téé xìnu cuechi sacùndecu túha-güedé cuèi nání òré-áⁿ ndétú-güedé patróóⁿ-güedé ná òré nasáá-dé sã cuáháⁿ-dé vico tnãndaha. Te núu niú te sa cúu cáyú-ni ñuhú-güedé sã cùndètu ñaha-güedé, chi òré ná nasáá-dé dacàsaⁿ-dé yuyèhe, te ndĩhi-ni nacaáⁿ-güedé ndíhu-dé. ³⁷ Te váha táhú nchaa cue téé xìnu cuechi-áⁿ, chi ndècu túha-ni-güedé ndétú-güedé ndéé òré ní nasáá patróóⁿ-güedé, te na

cáchí tnúhu ndáá-í xii-ndo sã òré ná nasáá patróóⁿ-güedé-áⁿ te chihi ñaha-dé mèsá xii-güedé, te ndacáⁿ ndee-dé dóo níhnú-dé núu yíquí-dé, te ngüíta-dé cani-dé cóhó-güedé cuèndá caxi-güedé. ³⁸ Te diu-ni ducaⁿ càda-dé cuèi dava niú, àdi tacuíhndá-gá, te núu ñã túú xidí-güedé òré nasáá-dé, te cue téé xìnu cuechi-áⁿ ïo váha tnahá-güedé. ³⁹ Te núu dicó ìⁿ téé cùu xitohó ìⁿ vehe xíní-dé ná òré quíhu ñadúhú vehe-dé ñã, te quíhi iní-dé te vá cùdú-dé, te vá dáñá-dé nacaáⁿ-güedé yuyèhe-dé quíhu-güedé duhu-güedé. ⁴⁰ Te nchòhó tucu nchaa-ni nduu quíhi iní-ndó cùndecu túha-ndo, chi na cuáháⁿ nduu ñã túú yíhi iní-ndó, te quixi tucu yúhú Téé cùu ñaní tnàhá-ndó nchàa-ndo —cachí-gá xáhaⁿ-gã xii-güedé.

Cue téé quíde ndáá ndĩhi cue téé ñã túú quíde ndáá

(Mt. 24:45-51)

⁴¹ Te té Pèlú ní xícáⁿ tnúhú-dé núú Jèsús, te xãhaⁿ-dè:

—Mèstrú, ¿te tnúhu ní cáháⁿ-n-ãⁿ cùu-xi mee-ni cuèndá nchúhú ãⁿ cuèndá nchaa ñáyiu? —càchí-dé xáhaⁿ-dè xii-gã.

⁴² Te Jèsús ní xáhaⁿ-gã:

—Càháⁿ-í cuèndá ñáyiu quíde váha dàtná quidé ìⁿ téé tàxi tnuní ñáhá xii cue ñáyiu xìnu cuechi ndecu vehe patróóⁿ-xi, chi téé-áⁿ ïo váha tècú tnùní-dé, te quíde-dé nchaa nacuáa càháⁿ patróóⁿ-dè, te dácaxi-dé cue ñáyiu xìnu cuechi òré tàú-xi caxí-yu.

⁴³ Te núu ducaⁿ quíde váha téé tàxi tnuní ñáhá xii cue ñáyiu xìnu cuechi-áⁿ ñã, te ío váha tnàhá-dé òré nasáá patróóⁿ-dè nõu ndéé cuáháⁿ-dé. ⁴⁴ Te na cáchí tnúhu ndáá-í xii-ndo sã téé quíde ndáá táxi tnùní ñáhá xii cue ñáyiu xìnu cuechi-áⁿ cũñaha-ñã patróóⁿ-dè xii-dé sã ncháándi túhú-ñã sã ndécú ndĩhi-dé quindaha-dè. ⁴⁵ Dico núu téé tàxi tnuní ñáhá xii cue ñáyiu xìnu cuechi-áⁿ ná càni iní-dé sã cúyàa patróóⁿ-dè vá nasáá ndĩhi-ni-dé ñã, te ngüíta-dé cani-dé nchaa ñáyiu xìnu cuechi, cuèi téé cuèi ñadíhí, te ngüíta-dé caxi-dé coho-dé, te dàxíni-dé mée-dè, ⁴⁶ te nduu ñã túú yíhi iní-dé te nasáá patróóⁿ-dè, te dandòho ñaha patróóⁿ-dè-áⁿ xii-dé, te daquíhíⁿ ñáhá-dè

xii-dé núú ndécú ñáiyu ñá túú ní quide ndáá.

47 Te dava cue tée xínu cuechi xiní-güedé nàcuáa cuíní patróón-güedé cada-güedé te ñá túú quide-güedé, te ni ñá túú cuíní-güedé cundecu túha-güedé cundetu-güedé patróón-güedé, te nchaa cue tée ducaⁿ xíquide dandòho ñaha patróón-güedé, chi ñáni vñi-güedé. 48 Te dava cue tée xínu cuechi ñá túú xiní-güedé nàcuáa cuíní patróón-güedé cada-güedé, te ní quide-güedé sá néñuú-güedé ñá sá ñá túú tàú-güedé cada-güedé ñá, te cue tée-án sacú-gá dandòho ñaha patróón-güedé, chi sacú-gá ñáni-güedé. Te ñáiyu cùtnuní iní-xi nàcuáa cuíní Yá Ndiöxí cadá-yu, te ñu-ni ducaⁿ tàú-yu cadá-yu nàcuáa cuíní-gá. Te ñáiyu vai-gá tècú tnùní nàcuáa càháⁿ-gá, te ñu-ni ducaⁿ vai nchaa sá càháⁿ-gá tàú-yu cadá-yu.

Ñá túú cùu ñnuu ñáiyu
(Mt. 10:34-36)

49 Te yúhú véxi-í ñuyíú-a cuendá cutnùní iní ñáiyu nàcuáa cada ñaha Yá Ndiöxí xii-yu, jte cuíní-í sá ndìhi-ni cada-gá nàcuáa sàni iní-gá! 50 Te yúhú ío vai tnúhu sàni iní-í, jchi sáá nduu te ío ndoho-í, te ñu-ni xiáⁿ cuhuⁿ iní-í ndéé ná sáá nduu dùcaⁿ yáha-í! 51 Te nchòhó vá cání iní-ndó sá yúhú véxi-í ñuyíú-a te cundecu ndìhi tnàha váha-ni ñáiyu, te ñáhá chi da ngüíta-yu vá cúú ñnuú-yu cundecú-yu. 52 Te ndéé není vitna ngüíta ñáiyu vá cúú ñnuú-yu cundecú-yu, te na càda-o cuendá te núu úhúⁿ ñáiyu xíndecu ñni vèhe, te vá cúú ñnuu-gá-yu, chi úní-yu ndatnúhu-yu te nàá-yu ndìhi úú-gá-yu, àdi ñáiyu úú-án ndatnúhu-yu te nàá-yu ndìhi ñáiyu úní-án. 53 Te dava cue tée cùu tátá vá cúú ñnuu-gá-güedé ndìhi déhe ducuⁿ-güedé, te ni dàva cue ñáiyu cùu náná vá cúú ñnuu-gá-yu ndìhi déhe yòcò-yu, te ni sànu-yu vá cúú ñnuu ndìhi-gá-yu. Te ducaⁿ cadá-yu chi davá-yu quindáá iní ñáhá-yu xii-í, te davá-yu vá quindáá iní ñáhá-yu —càchí-gá xáhaⁿ-gá xii-güedé.

Ñáiyu cùtnuní iní-xi nàcuáa quide-xi ñuyíú ndìhi andìu

(Mt. 16:1-4; Mr. 8:11-13)

54 Te Jèsús ní xáhaⁿ-gá xii nchaa ñáiyu xíndecu-án:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sá cúúⁿ dǎú, te ñu ducaⁿ ndisa quide-xi.

55 Te òré ná quène táchí ndàa xio datni nacuáa quène nchíanchii, te càchí-ndó sá ío cada ihni-xi, te ñu ducaⁿ ndisa quide-xi. 56 Te nchòhó ío váha cùtnuní iní-ndó nàcuáa quide-xi andìu ndìhi ñuyíú,

¿te ná cuendá quidé-ní-ndó sá ñá tècú tnùní-ndó nàcuáa quide Yá Ndiöxí vitna? Te sá dúcáⁿ quide-ndo-án ío dándahú-ndó mèe-ndo sá ío váha cùtnuní iní-ndó, chi ñá ndàa sá cùtnuní iní-ndó.

Nducu-o nàcuáa nucúndecu ndìhi váha-o ñáiyu cùu úhú iní ñáhá

(Mt. 5:25-26)

57 Te nchòhó, ¿ná cuendá ñá túú dándixi túu-ndo iní-ndó càda-ndo mee-ni sá váha sá tàú-ndó càda-ndo-i? 58 Te núu ío ñn-ndo ní sacáⁿ cuéchi ñáiyu cuendá-ndó cuendá ñn sá ní quide-ndo, te cuáháⁿ-ndó ndìhí-yu núú tée cùchiuⁿ, te nini ñuhu-ndo ndìhí-yu ichi, te nducu-ndo nàcuáa cada-ndo nàcáháⁿ cáhnú iní tnáhá-ndó ndìhí-yu cuendá sá vǎ cándeca ñaha-gá-yu quíhíⁿ núú tée cùchiuⁿ, chi núu ducaⁿ na càdá-yu te tée cùchiuⁿ-án nachihi ñaha-dé ndaha cue tée cùu poleciá, te cue tée-án chihi ñaha-güedé vecaá xii-ndo. 59 Te na càchí tnúhu-í xii-ndo sá núu na ngáva-ndo vecaá, te vá càcu-ndo te núu vá nácháhu-ndo nchàa sá tàú-ndó —càchí-gá xáhaⁿ-gá xii-yu.

13

Xìni ñuhu-xi natuha-o ichi Yá Ndiöxí

1 Te ñu-ni òré-án ní ngúnutnñí ñn úú ñáiyu núú Jèsús cání-yu cuendú núu-gǎ nàcuáa ní quide ñaha té Pilatú xii cue tée distritú Galileá cue tée ní sahni quiti nduu táhú Yá Ndiöxí, te mei òré ní sahni-güedé cue quiti-án ní táuchíúⁿ tè Pilatú cue sandàdú-dé ní sahni-güedé cue tée Galileá-án, te ní xica níñí-güedé núú ñuhú ndìhi níñí cue quiti-án, te ní nadácánuu-xi. 2 Te Jèsús ní xáhaⁿ-gá xii-yu:

—Te núu nchòhó sání iní-ndó sã sà dúcáⁿ nĩ yáha cue tée distritú Galileá-án te cùu-güedé cue tée ndècu vihi-gá cuéchi-xi dácúúxí cuè tée ñúu-güedé ñá. ³ Te na cächí tnúhu-í xii-ndo sã ñáhá. Te núu nchòhó vá ndíxí cuéchi iní-ndó cuèndá nchaa sá cuèhé sá dúhá quède-ndo ndecu-ndo ña, te tnàhá nchaa nchòhó cuíta nihnu-ndo te núu vá nátní-ndo ichi Yá Ndiöxí. ⁴ Te núu nchòhó sání iní-ndó sã ñáyiú sáhúⁿ úní ní xíhí ní táú ñáhá vèhe ducúⁿ Silòé ío-gá ndécú cuéchi-yu dácúúxí nchaa ñáyiú xĩndecu ñúú Jerusálén ñá, ⁵ te na cächí tnúhu tucu-í xii-ndo sã ñáhá. Te núu nchòhó vá ndíxí cuéchi iní-ndó cuèndá nchaa sá cuèhé sá dúhá quède-ndo ndecu-ndo ña, te tnàhá nchaa nchòhó cuíta nihnu-ndo te núu vá nátní-ndo ichi Yá Ndiöxí —cächí-gá xáhaⁿ-gã xií-yu.

Yutnu ngüxí ñá túú cùuⁿ sávidí-xi

⁶ Te Jèsús ní caní tucu-gá ñⁿ cuèndú núu-yu nàcuáa tecú tnúni-yu tnúhu-gá, te xáhaⁿ-gã:

—Ñⁿ tée nùtní ñⁿ yutnu ngüxí núú ñúhú-dě, te cuáháⁿ ndéhé-dě nùu ní cuuⁿ sávidí-xi ní cùu, te ní ñⁿ ñá túú ní cùuⁿ. ⁷ Te ní xáhaⁿ tée-án xii tée ndèé ñuhu-dé: “Nàha-n sá vitna ní cuu úní cuía quíxí còto-í yutnu ngüxí-a te ñá túú xini-í ní ñⁿ sávidí-xi. Te quehndé-n vitna, chí àúⁿ ñá cuu nùtní-xi quède tneñu-xi núú ñuhu-án”, cächí-dé xáhaⁿ-dë xii tée ndèé ñuhu-dé-án. ⁸ Te tée ndèé ñuhu-án ní xáhaⁿ-dë: “Pàtróón, dañá na cuñhu-xi cuía vitna-ná, te na nàdatayá-í ñuhu núú sáhá-xi, te chihi-í saháⁿ. ⁹ Te ducaⁿ te cudana cuuⁿ sávidí-xi, àdi núu ñá túú ní cùuⁿ sávidí-xi ña te téhndé-ñá-xi”, cächí-dé xáhaⁿ-dë xii pàtróón-dé —cächí-gá xáhaⁿ-gã xií-yu.

Jèsús quidé tãtna-gá ñⁿ ñadìhí ní nduu cueyi sãtá-xi nduu ndètátú ñáyiú

¹⁰ Te ñⁿ xito cùu-xi nduu ndetátú ñáyiú, te yìhí Jèsús ñⁿ veñúhu dànehé-gá ñáyiú. ¹¹ Te xíáⁿ ndécú ñⁿ ñadìhí ní cuu sáhúⁿ úní cuía sã cùhú-aⁿ yìhí ñaha espíritú cùndìhí yucu ñávãha xii-aⁿ, te xíáⁿ ní ndada cueyi-xi sãtá-aⁿ, te ñá dañá-gã-xi nucúnutnì ndáá-aⁿ. ¹² Te òré ní xini ñáhá Jèsús xii-aⁿ te ní cana ñaha-gã, te xáhaⁿ-gã:

—Yòhó ñaha cùhú, ndúha-n cuèhé tnàhá-n —cächí-gá xáhaⁿ-gã xii-aⁿ.

¹³ Te ní dácáá-gá ndaha-gá ní tendaha ñaha-gá xii-aⁿ, te òré-ni-án ní ndúha-aⁿ te ní nucúnutnì ndáá-aⁿ, te ní ngüíta-aⁿ ní cachí-aⁿ sá ïo cãhnu cuu Yá Ndiöxí. ¹⁴ Dico tée tàxi tnuni veñúhu ní cudééⁿ-dë sá dúcáⁿ nĩ quide Jèsús ní quide tãtna-gá ñaha cùhú-án nduu ndètátú-yu, te ní xáhaⁿ-dë xií-yu:

—Íó ínú nduu tàú-ó càda chiuⁿ-o, te ndédani càa nduu-án quixi-ndo cùtãtna-ndo, dico ñá díú nduu cuu-xi nduu ndetátú-ó —cächí-dé xáhaⁿ-dë xií-yu.

¹⁵ Te ní xáhaⁿ Jèsús:

—Nchòhó chí ío dandahú-ndó mée-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó ãⁿ? ¹⁶ Te ñadìhí-a cùu-aⁿ ñaní tnàhá ndíi Àbrahám, te dicó-ni sá yùcu ñávãha quède duha cùhú-aⁿ ní cuu sáhúⁿ úní cuía, ¿te náa ñá túú xini ñuhu-xi cutãtna-aⁿ cuèi cùu-xi nduu ndetátú-ó ãⁿ? —cächí-gá xáhaⁿ-gã xii-dé.

¹⁷ Te sá dúcáⁿ nĩ cáháⁿ Jèsús, núu nchaa cue tée cùu úhú iní ñáhá xii-gá ní cucahaⁿ núu-güedé, dico nchaa dava-gá ñáyiú chí xícudí iní-yu xĩndéhë-yu nchaa sá vã yòo tnàhí ndàcu cada quide-gá.

Cuèndá ndíquíⁿ yutnu nàni mostázá (Mt. 13:31-32; Mr. 4:30-32)

¹⁸ Te ní xáhaⁿ-gã xií-yu:

—Na càni-í ñⁿ cuèndú núu-ndó nàcuáa tecú tnúni-ndó nàcuáa cada-xi òré ndíhu ndaha ñaha Yá Ndiöxí xii-ndo. ¹⁹ ñⁿ tée ní queheⁿ-dë ndíquíⁿ yutnu nàni mostázá te nèhe-dé cuáháⁿ ní sacáⁿ-dë núú ñúhú-dë te ní xínu-xi, te ní sañhu-xi ní cuu dúcúⁿ-xi, te cue quiti ndàva núú tàchí cãdũha-güedi tacá-güedi núú dìté-xi —cächí-gá xáhaⁿ-gã xií-yu.

Nàcuáa quide levadurá (Mt. 13:33)

²⁰ Te ní xáhaⁿ tucu Jèsús xií-yu:

—Te na cächí tnúhu tucu-í xii-ndo nàcuáa cada tucu Yá Ndiöxí òré ndíhu ndaha ñaha-gá xii-ndo. ²¹ ñⁿ ñadìhí ní queheⁿ-aⁿ levadurá ní chihi-aⁿ úní arròbá yuchi triú,

te levadurá-án nǐ quide-xi ní ndaa nihíi yusa-án —càchí-gá xáha-n-gǎ xií-yu.

Yuyèhe cuiñi

(Mt. 7:13-14, 21-23)

²² Te ichi ñuhu Jesús cuáhán-gá ñuú Jerusálén, te nchaa ñuú náhnú, ndíhi nchaa ñuú líhli ta yáha-gá ducaⁿ ta dànehé-gá ñáyiú tnúhu-gá cuáhán. ²³ Te ñⁿ ñuú-án nǐ xáhaⁿ ñⁿ téé xii-gá:

—Mèstrú, cuíní-í cacáⁿ tnúhu-í ñⁿ tnúhu núú-n, ¿ndáá sá ïo sacú ñáyiú náníhi tǎhú-ǎn? —càchí-dé xáha-n-dě xii-gá.

Te Jesús ní xáha-n-gǎ xii-dé ndíhi nchaa ñáyiú:

²⁴ —Cada-ndo sǎ náníhi tǎhú-ndó, te tñⁿ-ndo ichi Yá Ndióxi, te ichi-gá-án cúú-xí dàtná ñⁿ yuyèhe cuiñi, te càchí tnúhu-í xii-ndo sǎ ïo cuéhé ñáyiú cachí iní-yu quíhu-yu yuyèhe cuiñi-án dico vá ndácũ-yu.

²⁵ Te na càni tucu-í ingá cuèndú núú-ndó nàcuáa tecú tñⁿ-ndó tñⁿhu càhán-í. Te òré ná ndàcuíñi téé cùu xítóhó vehe, te nacadí-dé yuyèhe, te nchaa nchòhó ñáyiú na quèndóo quehé dacàsaⁿ-ndo yuyèhe, te quesaha-ndo cñⁿaha-ndo xii-dé: “Tǎtá, nacaán yuyèhe na quíhu-ndí”, quesaha-ndo cñⁿaha-ndo xii-dé. Dico téé cùu xítóhó vehe-án cñⁿaha-dě xii-ndo: “Ná túú xíní-í nchòhó ndéé ñáyiú cùu-ndo”, duha cúñaha-dě xii-ndo. ²⁶ Te dàtnúní ngúíta nchòhó cúñaha-ndo xii-dé: “Nchúhú ní xexi ndíhi ñaha-ndí, te ní xíhi ndíhi ñaha-ndí xii-n, te nchaa ichi ní xóo dacuáha ñaha-n xii-ndí”, quesaha-ndo cñⁿaha-ndo xii-dé.

²⁷ Dico cachí tucu téé cùu xítóhó vehe-án cñⁿaha-dě xii-ndo: “Sa ní cachí-í sá ñà túú xíní-í ndéé ñáyiú cùu-ndo. Te chí xócuíñi nchòhó ñáyiú ndècu ichi cuehé ichi duha núú ndècu-í”, quesaha-dě cúñaha-dě xii-ndo. ²⁸ Te na sáá nduu dùcaⁿ cada-xi te quíní-ndó tè Àbrahám, ndíhi té Isàac, ndíhi té Jàcób, ndíhi nchaa cue téé ní xóo cáhán tnúhu Yá Ndióxi, te nchaa cue téé-án ndécú-güedé núú ndécú-gǎ táxi tñⁿ-gá, te nchòhó quee tíhú-ndó núú-gǎ sá tñⁿhu ñà túú ní cuíní cada ndáá, te dàvá-án ndáhyú-ndó te cuu rúhñú-nǎ núhu-ndo sǎ sàtú iní-ndó cuèndá sá ndóhó-ndó. ²⁹ Te dàvá-án quíhu nchaa ñáyiú ndi cùmí xio ñuyíú núú ndécú Yá Ndióxi táxi tñⁿ-gá

caxí-yu ndíhi-gá, te cundecú-yu ndíhi-gá. ³⁰ Te dava ñáyiú nchícúⁿ ñà túú cùnⁿuu ndecu ichi Yá Ndióxi vitna, ñáyiú-án sáá nduu te ío cunúú-yu. Te dava ñáyiú cùnⁿuu ndecu ichi-gá vitna, ñáyiú-án sáá nduu te vá ïo-gá cunúú-yu —càchí-gá xáha-n-gǎ xií-yu.

Jesús ndáhyú-gá cuèndá ñáyiú ñuú Jerusálén

(Mt. 23:37-39)

³¹ Te ñⁿ ni nduu-ǎn nǐ quexio ñⁿ úú cue téé cùu fariséú núú ndécú-gǎ, te xáha-n-güedé xii-gá:

—Quee-n ïha quíhíⁿ-n núu ndéé quíhíⁿ-n, chí téé cùu Herodés cuíní-dé cahni ñaha-dě xii-n —càchí-güedé xáha-n-güedé xii-gá.

³² Te Jesús ní xáha-n-gǎ:

—Chí cuáhán te cúñaha-ndo xii téé nèhe mañá-án sǎ càchí-í sá ná cùndedóho váha-dé ñⁿ tnúhu càhán-í, chí cùmání ñⁿ úú-gá nduu cundecu-í xocàni-í nchaa espíritú cùndíhi yucu ñáváha yíhi ñaha xii ñáyiú, te cada tátana-í nchaa dava-gá ñáyiú cùhú, te ducaⁿ te ndíhi chiuⁿ-í, duha cúñaha-ndo xii-dé.

³³ Dico dacuítí sǎ cúhún-í ichi ñⁿ úú-gá nduu, te ducaⁿ te sáá-í núú quíhíⁿ-í, chí vá cúú tñⁿhí cuú ñⁿ téé càhán tnúhu Yá Ndióxi ingá ñuú, chí mei ñuú Jerusálén cuú-güedé —càchí-gá xáha-n-gǎ xii-güedé.

³⁴ Te ní xáha-n-gǎ xii ñáyiú ñuú Jerusálén:

—Nchòhó chí sàhni-ndo nchaa cue téé càhán tnúhu Yá Ndióxi, cue téé ní tendaha-gǎ véxi, te mee-ni ndíhi yúú sáhní-ndó-güedé. ¡Te titní xito ní cuíní-í nadatácá ñáhà-í xii-ndo dàtná nádàtacá ñⁿ nchuxi cuè déhe-di sàquíhi-güedi xiti ndíxiⁿ-di, dico ñà ní cuíní-ndó, te ducaⁿ-ni sàni iní-í ndéé vitna! ³⁵ Te chí cùndedóho tucu ingá tnúhu na càhán-í-a: Yá Ndióxi dañá ñaha-gá xii-ndo. Te na càchí tnúhu tucu-í xii-ndo sǎ vǎ quíní ñáhá-gǎ-ndó xii-í, dico sáá nduu te quíní ñáhá tucu-ndo, te nduu-ǎn cachí-ndó sǎ ïo càhnu cuu yúhú Yaá ní tendaha Dùtú Ndióxi véxi ñuyíú-a —càchí-gá xáha-n-gǎ xií-yu.

14

Jesús quidé tǎtna-gá ñⁿ téé ñuhu cuiñu

¹ Te duha ní cuu ñⁿ nduu, nduu ndètatú ñáyiú chí ñⁿ téé cùu fariséú cùnⁿuu ní càhán-dé Jesús vehe-dé caxi-gá, te cue

tée ndècu vehe-dé ndéhé-güedě nũu nása cada-gá. ² Te xíáⁿ ndécú tnáhá ìⁿ tée cùhú ñúhú-dě cuiñu. ³ Te Jèsús ní xícáⁿ tnúhú-gă núú cuè tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi núú cuè tée cùu fariséú, te xáhaⁿ-gă:

—¿Cuu cada tátna-o ìⁿ ñáyiú cùhú nduu ndétatú-ó àⁿ ñáhá? —càchí-gá xáhaⁿ-gă xii-güedé.

⁴ Dico cue tée-áⁿ ñà túú tnàhí ni cáháⁿ-güedé. Te ní dácáá-gă ndaha-gă ní tendaha-gă tée cùhú-áⁿ ñí quide tátna ñaha-gă xii-dé, te ní xáhaⁿ-gă sá ná nùhú-dé vehe-dé. ⁵ Te ní xícáⁿ tnúhú-gă núú nchaa cue tée-áⁿ, te xáhaⁿ-gă:

—¿Te núú nchòhó ná ngáúñhnu ìⁿ búrru-ndo àdi ìⁿ ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndetátú-ndó-áⁿ? —càchí-gá xáhaⁿ-gă xii-güedé.

⁶ Te ñá túú ní ñíhí-güedě tnúhu na dànocháva-güedé.

Ñáyiú càháⁿ-yu quíhíⁿ vico tnándaha

⁷ Te ndèhe Jesús nàcuáa xíquide nchaa ñáyiú ndècu vico sá sũúni ñí nacáxi-yu xilé sácõo nchihi cue tée cùnuu-gă conchihí-yu òré cuánguñhú-yu mèsá caxí-yu, núú ní xáhaⁿ-gă xii-yu:

⁸ —Òré ná càháⁿ ñáhá ìⁿ ñáyiú xii-ndo ìⁿ vico tnándaha, te vá cóó-ndó nũú xilé sácõo cue tée cùnuu-gă, chi núú ducaⁿ na càda-ndo, te cudana quexìo dava-gă ñáyiú cùnuu-gă dàcúúxí nchòhó. ⁹ Te ñáyiú ní càháⁿ ñáhá xii-ndo-áⁿ quixí-yu te cúñahá-yu xii-ndo: “Chí cuñaha xilé núcõo nchihi-ndo-áⁿ ná cõnchihi ñáyiú ní quexìo-a”, quesàhá-yu cúñahá-yu xii-ndo. Te cuñí-ndó ñáhá cuèi cùcahaⁿ núú-ndó ndàcuñí-ndó quíhíⁿ-ndó ngõo-ndo nũú xilé xĩnutnĩ ndéé núú ñí ndíhi-ná ndàa sátá-xi.

¹⁰ Te yúhú càchí-í sá òré ná càháⁿ ñáhá-yu xii-ndo, te ngóo-ndo nũú xilé xĩnutnĩ ndéé núú ñí ndíhi-ná ndàa sátá-xi chi cuendá òré ná quèxio ñáyiú ní càháⁿ ñáhá xii-ndo, te cúñahá-yu xii-ndo: “Nchòhó cue ñáyiú càháⁿ ndíhi-í, chí yáha núú xilé sácõo cue tée cùnuu-gă coo-ndo”, duha cúñahá-yu xii-ndo. Te ducaⁿ te cada nínu ñaha nchaa ñáyiú yìhi ndíhi-ndo mesá. ¹¹ Te nchaa ñáyiú na càda nínu mee-xi, te ñáyiú-áⁿ ñà

túú cùu nínu-yu, te nchaa ñáyiú ñà túú quide nínu mee-xi, ñáyiú-áⁿ cúú ñínu-yu —càchí-gá xáhaⁿ-gă xii-yu.

¹² Te dătnùní ní xáhaⁿ-gă xii tée ní càháⁿ ñáhá xii-gă:

—Te yòhó òré cuñí-n càda-n ìⁿ vico, te vá càháⁿ-n mèe-ni cue tée càháⁿ ndíhi-n, ni cuè ñaní-n, ni cuè ñáyiú cùu ñaní tnáhá-n, ni cuè ñáyiú cuica ndècu yatni ndíhi-n, chí ñáyiú-áⁿ ducaⁿ càdá-yu ìⁿ nduu càháⁿ ñáhá-yu xii-n te ndéyáhu-ni sá ñí quidé-n-yu. ¹³ Te ñáhá chí òré ná càda-n ìⁿ vico, te càháⁿ-n ñáyiú ndàhú, ndíhi ñáyiú ñà cúú càca, ndíhi ñáyiú yacua, ndíhi ñáyiú cuàá. ¹⁴ Te núú ducaⁿ na càda-n, te cuu-xi ìⁿ sá vâha xii-n, chí ñáyiú-áⁿ vâ ñíhí-yu nacoto ñáhá-yu xii-n, dico na cùú-n te sáá nduu ndòto-n ndíhi nchaa ñáyiú ní quide ndáá ní xindecu ichi Yá Ndiõxí, te dàvá-áⁿ taxi-gă sá ndúú tàhú-n —càchí-gá xáhaⁿ-gă xii-dé.

Nàcuáa xíquide ñáyiú òré càháⁿ ñáhá ìⁿ tée cada vico

(Mt. 22:1-10)

¹⁵ Te sá dúcáⁿ ñí càháⁿ Jèsús ní tecú dóho cue tée yìhi mesá-áⁿ, núú ní xáhaⁿ ìⁿ-dé xii-gă:

—Ío vâha táhú nchaa ñáyiú na càxi nchaa sá cuáha ñaha Yá Ndiõxí nduu na sàá-yu cundecú-yu núú ndécú-gă táxi tnùní-gă —càchí-dé xâhaⁿ-dě xii-gă.

¹⁶ Te Jèsús ní xáhaⁿ-gă xii-dé:

—Íⁿ tée quide-dé vico, te ní dátècú tnúhu-dé cuèhé víhí ñáyiú quíhíⁿ-yu caxí-yu.

¹⁷ Te òré sa ní cuu-ná sá caxí-yu, te ní xáhaⁿ-dě xii tée xĩnu cuechi núú-dě sá quíhíⁿ-dé cúñaha-dě quíhíⁿ-yu caxí-yu, chí sa ndècu túha nchaa sá caxí-yu. ¹⁸ Dico nchaa-yu ní xáháⁿ-yu xii-dé sá ná cádá càhnu iní tée càháⁿ ñáhá-áⁿ, chí ñà túú cùyáchí-yu quíhíⁿ-yu vico-áⁿ.

Te tée ní càháⁿ ndíhi tée xĩnu cuechi-áⁿ dĩhna ní xáhaⁿ-dě: “Íchí ñí saaⁿ-í ìⁿ pedàsú ñuhu, te quíhíⁿ ndéhè-í tnaví, núú xíáⁿ càháⁿ ndàhú-í núú-n sã cũñaha-n xii tée càháⁿ ñáhá-áⁿ xii-í sá ná cádá càhnu iní-dé chí ñà túú cùyáchí-í”, càchí-dé xâhaⁿ-dě. ¹⁹ Te ingá-dé ní xáhaⁿ-dě: “Ní saaⁿ-í úhúⁿ yundá ndicutu sa xítu, te cue quití-áⁿ quíhíⁿ-í coto ndeé-í-güedi vitna, núú xíáⁿ càháⁿ ndàhú-í núú-n sã cũñaha-n xii tée càháⁿ ñáhá-áⁿ”

xii-í sá ná cáda càhnu iní-dé chi ñá túu cùyáchí-í”, càchí-dé xáhaⁿ-dë. ²⁰ Te ingá tucu-dé ní xáhaⁿ-dë: “Íchí ñí tnándaha-í núu xiáⁿ vá cùyáchí-í quíhíⁿ-í”, càchí-dé xáhaⁿ-dë. ²¹ Te òré ní nasáá téé xínu cuechi-áⁿ, te ní nacani tnúhu-dé núu patróóⁿ-dë nchaa nàcuáa ní xáhãⁿ-yu. Te ní cudééⁿ téé cùu patróóⁿ-ãⁿ, te ní xáhaⁿ-dë xii téé xínu cuechi núu-dë-áⁿ: “Yáchí cuáhãⁿ nanducu-n nchaa ñáyíu ndàhú, ndihí nchaa ñáyíu ñá cúu càca, ndihí nchaa ñáyíu yacua, ndihí nchaa ñáyíu cuàá, te ndëni ní cuu na nàníhí-n-yu te candècá-n-yu quixi”, càchí-dé xáhaⁿ-dë. ²² Te sáta ní nasáá téé xínu cuechi-áⁿ, te ní xáhaⁿ-dë xii patróóⁿ-dë: “Patróóⁿ, sa ní quide-í chiúⁿ ní táhú-n, dico ndècu-gá núu cóo-yu”, càchí-dé xáhaⁿ-dë. ²³ Te téé cùu patróóⁿ-dë-áⁿ ñí xáhaⁿ-dë: “Cuáhãⁿ tucu ndëni ní cuu te cada yica-n na quixí-yu quíhu-yu cuendá ná chítú vehe-í. ²⁴ Te na càchí tnúhu-í xii-n sá ñí ñáyíu ní cáháⁿ-í dīhna vá cúú-gã caxí-yu sá sà ní quide túha-í caxí-yu ní cùu”, cachí téé-áⁿ xáhaⁿ-dë xii téé xínu cuechi núu-dë — càchí-gá xáhaⁿ-gã xii téé-áⁿ.

Ndoho-o cùndecu-o ichi Xítoho Jesucristú
(Mt. 10:37-38)

²⁵ Te ío cuéhé ñáyíu nchícúⁿ-yu Jèsús, te ní xáhaⁿ-gã xií-yu:

²⁶ —Te núu dava nchòhó cuení-ndó chitnahá ñáhã-ndó xii-í, te cuu iní ñáhã ndisa-ndo. Te cuéi na dàndóo-ndo tátã-ndó, ndihí nánã-ndó, ndihí ñadihí-ndó, ndihí déhe-ndo, ndihí ñaní-ndó, ndihí cúha-ndo, te caní iní-ndó sã cuéi na cùú-ndó sã cuendá-í, te ducaⁿ te cuu ndisa-ndo cué ñáyíu tnàhá tnúhu ndihí-í. ²⁷ Te nchaa ñáyíu vá cáncchícúⁿ nihnu ñaha xii-í cuendá sá yùhú-yu ndohó-yu dàtnã ndoho-í, ñáyíu-áⁿ vá cúú-yu ñáyíu tnàhá tnúhu ndihí-í. ²⁸ Te núu ñí nchòhó ná càni iní-ndó dàcaa-ndo ñí vehe ducúⁿ, ¿te náa ñá díú dīhna-gá cada cuendá-ndó núu ndëdau díhúⁿ cuu, ducaⁿ te cutnùní iní-ndó núu tnàhá díhúⁿ-ndó càa vehe-áⁿ àdi ñáhã? ²⁹ Chi núu vá dúcãⁿ càda-ndo, te na ngüita-ndo tàusaha-ndo te vá xínu cada-ndo, te nchaa ñáyíu na cùndehe ñaha xii-ndo, te cáháⁿ cuéhé-yu cuendá-ndó. ³⁰ Te cachí-yu: “Téé-ãⁿ ní ngüita-dé dácãa-dé ñí vehe te ñá ní ndàcu-dé xínu”, cachí-yu. ³¹ Àdi te núu ñí

téé yìndaha ñaha xii ñáyíu cuení-dé nàa-dé ndihí ingá tucu téé yìndaha ñaha xii ñáyíu, ¿te náa ñá díú dīhna-gá cada cuendá-dé te núu ndacu-dé ndihí úxí mīl cue sandàdú-dé nàa-güedé, ndihí ócò mīl cue sandàdú ingá tucu téé yìndaha ñaha xii ñáyíu cùu úhú iní tnàhá ndihí-dé-ãⁿ? ³² Àdi te núu xito-dé sá vá ndácú-dé ñá, te òré vátã cùyãtni ñaha-gá téé cùu úhú iní tnàhá ndihí-dé-áⁿ, te tendaha-dë ñí téé quíhíⁿ-dé quíhu-dé tnúhu ndàhú núu téé-áⁿ cuendá sá vá nàa-güedé. ³³ Te duha càháⁿ-í chi núu nchòhó vá cáda ndèe iní-ndó dàña-ndo nchaa sá ndécú ndihí-ndo cuendá chitnahá ñáhã-ndó xii-í, te vá cúú-ndó cué ñáyíu tnàhá tnúhu ndihí-í.

Ñí ñí nduu víxiⁿ
(Mt. 5:13; Mr. 9:50)

³⁴ Te ñí chi ío váha, dico núu na ndùu víxiⁿ-xi, ¿te nása-gá cada-o nàndíhi-o te núu ducaⁿ-í? ³⁵ Chi ñá túú-gã nándíhi-xi ñí sá dàcã ñuhu, te ñí sá dàcã sahãⁿ, chi cuendá-ñã dāngoyo-o. Te nchaa nchòhó ñáyíu ní xíndedóho tnúhu ní cáháⁿ-í-a xini ñuhu-xi ío váha cuáha-ndo cuendá — càchí-gá xáhaⁿ-gã xií-yu.

15

Cuendá ñí mbéé quiti ní xita
(Mt. 18:10-14)

¹ Te cue téé cuihna iní-xi quide cobrá ñáhã xii ñáyíu cuendá impuéstú ndihí cue dava-gá ñáyíu ndècu ichi cuehé ichi duha ní quexió-yu núu ndécú Jèsús cuendá cund-edóho-yu tnúhu càháⁿ-gã. ² Te ní ngüita cue téé cùu fariséú, ndihí cue téé dàcuaha ñaha xii ñáyíu nchaa tnúhu ní chídó tnùní ndíi Moisés xicáhãⁿ cuéhé-güedé cuendá-gã, te càchí-güedé:

—Téé-a quèheⁿ cuendá-dé ñáyíu ndècu ichi cuehé ichi duha, te xèxi ndihí ñaha-dé xií-yu —càchí-güedé xitnaha-güedé.

³ Te Jèsús ní caní-gã ñí cuendú nàcuáa tecú tnùní-güedé tnúhu-gã, te xáhaⁿ-gã xii-güedé:

⁴ —Ñí téé ndècu ñí ciendú mbéé-dé, te ní xita ñí-di, te nchòhó sa cùtnuní iní-ndó nàcuáa cada téé-áⁿ, chi dàndóo-dé cúmidícó sãhúⁿ cúmi-di ñí yucu, te cùnúndúcú-dé quiti ní xita xiáⁿ ndèé ndéé naníhí-dë-di. ⁵ Te òré ní naníhí-dë-di te ní dácãá-dë-di chíó-dë ní docó-dé-di sá cúdí iní-dé. ⁶ Te òré

ní nasáá-dé vehe-dé, te ní dátàcá-dé nchaa cue téé càháⁿ ndihí-dé, ndihí nchaa ñáyiú ndècu yatni ndihí-dé, te ní xáhaⁿ-dè: “Chí ná cùdíí ìní-ó vìtna, chi ní naníhì-í mbèè-í quiti ní xíta ní cùu”, cachí-dé xáhaⁿ-dè xii-yu. ⁷ Te yúhú càchí-í sá ïo-gá cùdíí ìní Yă Ndiöxí ndihí cue espíritú xínú cuèchi núú-gă nũu ñáyiú ndècu ichi cuehé ichi duha na ndixi cuèchi iní-yu cuendá nchaa sá ñà túú vâha quidé-yu ndècú-yu te tnií-yu ichi-gá, dàcúúxí cùmídícó sâhúⁿ cúmí ñáyiú sa ní tuha ichi-gá, chi ñà túú-gă xíní ñũhu-xi ndixi cuèchi iní-yu chi sa ndècú-yu ichi-gá —càchí-gá xáhaⁿ-gă xii-güedé.

Cuendá dîhúⁿ nî xíta

⁸ Te ní caní Jêsús ingá cuendú núú-güedé, te xáhaⁿ-gă:

—Íⁿ ñadîhí ndécú ndihí-aⁿ úxí dîhúⁿ cuixíⁿ, te ní dâcuíta-aⁿ ñá te ní teñuhú-aⁿ itî, te ní ngüíta-aⁿ nâtihu-aⁿ vehe, te súúní vâha vâha ní nanducu-aⁿ ndèé ní naníhí-aⁿ. ⁹ Te òré ní naníhí-aⁿ, te ní dátàcá-aⁿ nchaa ñáyiú dîhí càháⁿ ndihí-aⁿ ndihí nchaa ñáyiú ndècu yatni ndihí-aⁿ, te ní xáhaⁿ-aⁿ: “Chí ná cùdíí ìní-ó vìtna chi ní naníhì-í dîhúⁿ-í sá ní xíta ní cùu”, cachí-aⁿ xáhaⁿ-aⁿ xii-yu. ¹⁰ Te yúhú càchí-í sá dúcáⁿ ïo cùdíí ìní nchaa espíritú xínú cuèchi núú Yă Ndiöxí, núú ñáyiú ndècu ichi cuehé ichi duha na ndixi cuèchi iní-yu cuendá nchaa sá ñà túú vâha quidé-yu, te tnií-yu ichi-gá —càchí-gá xáhaⁿ-gă xii-güedé.

Cuendá ñá túú ní quide vâha

¹¹ Te ní caní tucu Jêsús ingá cuendú núú-güedé, te xáhaⁿ-gă:

—Íⁿ téé ndècu úú déhe ducuⁿ-dé, ¹² te téé lihli-gá ní xáhaⁿ-dè xii tâtá-dè: “Táu, taxi-n tãhú sã cúú cuendá-í”, càchí-dé xáhaⁿ-dè. Te tâtá-dè-áⁿ nî sãñaha-dè ndí dííⁿ núú-güedé sá cúú cuendá-güedé. ¹³ Te núú sàcú-ni nduu, te déhe-dé téé lihli-gá-áⁿ nî nadico-dè nchaa sá nî sãñaha tâtá-dè, te ní xica-dé cuáháⁿ-dé ñá nũú xícá, te yácáⁿ ní tnií-dé ñá ichi cuèhé ichi duha, te ní ndihí dîhúⁿ-dè ní dándóñũhu-dé ndihí cue téé càháⁿ ndihí-dé, ndihí nchaa ñáyiú dîhí xĩndecu ichi díí ìní. ¹⁴ Te ní ndihí ndoo dîhúⁿ-dè ní dándóñũhu-dé, te núú sàcú-ni nduu ní sáá tnamá ñũú núú ndécú-dè-áⁿ, te ñà nihí-gá-dé sá caxí-dè, te xihí-dé docó.

¹⁵ Núú ní xica-dé cuáháⁿ ndúcú chiúⁿ-dé núú ñá téé diu-ni ñũú xíaⁿ, te téé-áⁿ nî sáha chiúⁿ ñaha-dé ñá xichi núú ñũhú-dè coto-dé cùchí. ¹⁶ Te súúní xihí-dé docó te cuení-dé caxi-dé nchaa sá sãha-yu cùchí-áⁿ ní cùu, dico ñà túú ní sãñahá-yu xii-dé. ¹⁷ Te uuⁿni ní sani váha iní-dé, te ní cachí-dé: “Ío cuéhé cue téé xĩnu cuechi vehe tâtá-í te ío cuéhé sã xéxí-güedé ndécú, te yúhú duha ndòho-í docó iha! ¹⁸ Te ndacuñí-í te núhú-í vehe tâtá-í, te cúñaha-í xii-dé: Táu, ñà túú ní quide váha-í núú Yă Ndiöxí te ní ñà túú ní quide váha-í núú-n, ¹⁹ te ñà túú-gă tàú-í sá cúú-í déhe-n vìtna, te cada ñaha-ñá-n xii-í dàtná ñá téé xĩnu cuechi núú-n”, duha ní sani iní-dé cúñaha-dè xii tâtá-dè. ²⁰ Te sátá dúcáⁿ nî sani iní-dé, te ní natni-dé ichi cuánuhú-dé vehe tâtá-dè, te xica-gă cuánuhú-dé ní xíní ñáhá tâtá-dè xii-dé te ní cundáhú iní ñáhá-dè. Te xĩnu tâtá-dè-áⁿ nî sáháⁿ nútnahá ñáhá-dè, te ní numí ñaha-dè, te ío váha ní càháⁿ ndihí ñaha-dè. ²¹ Te ní xáhaⁿ déhe-dé-áⁿ xii-dé: “Táu, ñà túú ní quide váha-í núú Yă Ndiöxí te ní ñà túú ní quide váha-í núú-n, te ñà túú-gă tàú-í sá cúú-í déhe-n vìtna”, cachí-dé xáhaⁿ-dè.

²² Dico tâtá-dè-áⁿ nî xáhaⁿ-dè xii cue téé xĩnu cuechi núú-dè: “Chí queñũhu ndihí-ni dóo vâha-gá cuáha-ndo déhe-í-a na cuihnu-dé, ndihí ñá dehé ná quihí díquí ndáhá-dè, ndihí chàú váha na quihí-dé. ²³ Te quihíⁿ ngueheⁿ-ndo ñá ndicutu numa quiti caváha-gá, te cahni-ndo-di, te na càda-o vico, te na càxi-o-di. ²⁴ Chi déhe-í-a ní sani iní-í sá nî xihí-dé ní cùu, te ñáhá chi ndècu vívú-dè, te ní sani tucu iní-í sá nî xíta-dé ní cùu te ní nasáá méé-dè”, càchí-dé xáhaⁿ-dè xii cue téé xĩnu cuechi núú-dè-áⁿ. Te ní ngüíta-güedé ní quide-güedé vico.

²⁵ Te déhe-dé téé sàcuéhé-gă cuáháⁿ-dé yucu, te òré cuándixi-dé tá nduu yatni-dé vehe, te ní tecú dóho-dé ío yaá cúú vico. ²⁶ Te ní cana-dé ñá téé xĩnu cuechi, te ní xícáⁿ tñuhú-dè núú-dè ná cuendá ducaⁿ ío yaá. ²⁷ Te téé xĩnu cuechi-áⁿ nî xáhaⁿ-dè: “Ñaní-ñ téé cuáháⁿ ní cùu ní nasáá-dé, te tâtá-n nî táuchíúⁿ-dè ní xihí ñá ndicutu nùma quiti caváha-gá cuendá sá nî nasáá váha-dé”, càchí-dé xáhaⁿ-dè.

²⁸ Dico ñaní-dé téé sàcuéhé-áⁿ nî cudééⁿ-dè, te ní cachí-dé sá vâ ndũhu-dé vehe cundecu-dé vico-áⁿ ní cùu, dico ní quee tâtá-güedé ní càháⁿ ndáhú-dé núú-dè

cuendá ndíhu-dé. ²⁹ Te ní xáhaⁿ-dě xii tătă-dé: “Táu, cundedóho váha saú-n tnúhu na càháⁿ-í-a, yúhú ío cuéhé cuíá nǐ cuu xínu cuechi-í núú-n, te ni ñⁿ xito ñá túú quide sáá iní-í núú-n, te ni ñⁿ chivá líhli ñá túú tàxi-n-di caxi díí iní-í-di ndíhi cue téé càháⁿ ndíhi-í. ³⁰ Te vitna ní nasáá déhe-n téé ní sáháⁿ ní dándóñùhu díhúⁿ-n ndíhi nchaa ñáyiú xíndecu ichi díí iní. Te ní sahní-n ñⁿ ndícutu numa quití caváha-gá sá cuendá-dé”, càchí-dé xáhaⁿ-dě xii tătă-dé. ³¹ Te ní xáhaⁿ tătă-dé xii-dé: “Yòhó déhe-í ducaⁿ-ni ndècu ndíhi ñaha-n xii-í, te nchaa sá ndécú ndíhi-í cúú-xí cuendá-n. ³² Te vitna dacutíí tàú-xi sá cádá-ó vico, te cudíí iní-ó, chi ñaní-n-áⁿ nǐ quide-í cuendá sá nǐ xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, càchí-dé xáhaⁿ-dě xii déhe-dé téé sàcuéhé-gǎ-áⁿ —duha cuáháⁿ cuendú ní cani Jèsús núú-güedě.

16

Nàcuáa ní quide ñⁿ téé tàxi tnuní ñáhá xii cue téé xínu cuechi

¹ Te Jèsús xáhaⁿ-gǎ xii cue téé xica cuu ndíhi-gá:

—Ní xíndecu ñⁿ téé cuica, te ducaⁿ nǐ xíndecu ñⁿ téé ní taxi tnuní ñáhá xii cue téé ní xínu cuechi núú-dě. Te téé-áⁿ nǐ xiní ñáhá ñáyiú dùhu-dé díhúⁿ téé cùu patróóⁿ-dě, te cuáháⁿ-dé dándóñuhu-dé, te ní xáháⁿ-yu xii téé cùu patróóⁿ-dě sá dúcáⁿ quide-dé. ² Te téé cùu patróóⁿ-dē-áⁿ nǐ cana ñaha-dě xii-dé, te ní xáhaⁿ-dě: “¿Ná cuendá duha càháⁿ ñáyiú cuendá-n? Yáchí chi na tàxi cuendá-n nchaa chiuⁿ ní quide-n, chi vitna te vá táxí tnuní-gá-n cué téé xínu cuechi núú-í”, càchí-dé xáhaⁿ-dě. ³ Te téé tàxi tnuní ñáhá xii cue téé xínu cuechi-áⁿ nǐ sani iní-dé: “¿Te nása cada-í vitna na quèhndé patróóⁿ-í chiuⁿ-í? Chi ñá cundèe-gá-í cada-í chiuⁿ véé, te cùcahaⁿ núú-í cácaⁿ ndàhú-í. ⁴ Dico duha cada-í cuendá queheⁿ cuendá ñáhá ñáyiú vehé-yu òré ná quèhndé duuⁿ-ná patróóⁿ-í chiuⁿ-í”, duha ní sani iní-dé. ⁵ Te sáta dúcáⁿ te ní cana-dé ñⁿ ñⁿ cue téé tàú núú patróóⁿ-güedě. Te téé díhna ní xícáⁿ tnúhú-dě núú-dě, te xáhaⁿ-dě: “¿Ndéé dau tàú-n núú patróóⁿ-í?”, càchí-dé xáhaⁿ-dě. ⁶ Te téé-áⁿ nǐ xáhaⁿ-dě: “Tàú-í ñⁿ ciendú bàrríl acití”, càchí-dé

xáhaⁿ-dě. Te téé tàxi tnuní ñáhá xii cue téé xínu cuechi-áⁿ nǐ xáhaⁿ-dě: “Iha náu reciú-n-á, te ndadúha ingá sá údico úxí taxi-n”, càchí-dé xáhaⁿ-dě. ⁷ Te dǎtnuní ní xícáⁿ tnúhú tucu-dé núú ìngá-dé, te xáhaⁿ-dě: “Te yòhó, ¿ndéé dau tàú-n-í?”, càchí-dé xáhaⁿ-dě. Te téé tàú-áⁿ nǐ xáhaⁿ-dě: “Ñⁿ ciendú ngohnchi triú tàú-í”, càchí-dé xáhaⁿ-dě. Te téé tàxi tnuní ñáhá xii cue téé xínu cuechi-áⁿ nǐ xáhaⁿ-dě: “Iha náu reciú-n-á, te cadúha ingá sá cùmídícó-nǎ taxi-n”, càchí-dé xáhaⁿ-dě. ⁸ Te téé cùu patróóⁿ-áⁿ nǐ cachí-dé sá ío váha ñùhu díquí téé dùhu-áⁿ nàcuáa cada-dé cundecu váha-dé. Te nchaa ñáyiú xíndecu ichi cuéhé ichi duha, ío-gá váha ñùhu díquí-yu nàcuáa cada-yu cundecu váha-yu ndíhi nchaa ñáyiú cundíhí-yu dàcúúxí ñáyiú ndècu ichi Yá Ndiöxí.

⁹ Te yúhú càchí-í sá cádá-ndó sǎ vǎha ndíhi nchaa sá ndécú ndíhi-ndo ní cuáha ñuyúú yícá cuèchi-a, te ducaⁿ te coo cue téé ío váha tnahá tnúhu ndíhi-ndo, te òré ná ndíhi nchaa sá ío ñuyúú-a, te Yá Ndiöxí queheⁿ cuendá ñáhá-gǎ xii-ndo, te cundecu-ndo ndíhi-gá ni caa ni quíhíⁿ.

¹⁰ Te núu ñⁿ téé quide ndáá cuèi ñⁿ chiuⁿ líhli na càda-dé, te diu-ni ducaⁿ quide ndáá-dé cuèi ñⁿ chiuⁿ cahnu na cada-dé. Dico téé ñá túú quide ndáá, chi cuèi chiuⁿ líhli àdi chiuⁿ cahnu na cada-dé dico ñⁿ-ni quide-dé. ¹¹ Te núu nchòhó vá cádá-ndó sǎ vǎha ndíhi nchaa sá nǐ cuáha ñuyúú yícá cuèchi-a ña, te Yá Ndiöxí vá táxí-gǎ sá vǎha ndècu ndíhi-gá xii-ndo. ¹² Te núu vá cádá ndáá-ndó còto-ndo nchaa sá táxí núu tnahá ñáyiú-ndo, te vá yòo taxi sá ndúú tàhú-ndó.

¹³ Te ni ñⁿ téé xínu cuechi vá ndácú-dě cunu cuechi-dě núú úú patróóⁿ, chi téé-áⁿ cuu váha iní-dé núú ñⁿ patróóⁿ-dē te tní-dé nchaa tnúhu càháⁿ patróóⁿ téé cùu váha iní-dé núú-xi-áⁿ. Te núú ìngá tucu patróóⁿ-dē vá cúú váha iní-dé, te ni vá tní-dě tnúhu càháⁿ patróóⁿ-dē-áⁿ. Te ducaⁿ sǎtnahá-xi cùu nchòhó chi vá ndácú-ndó cunu cuechi-ndo núú Yá Ndiöxí te cuhuⁿ iní-ndó nchaa sá ío ñuyúú-a —càchí-gá xáhaⁿ-gǎ xii-güedé.

¹⁴ Te nchaa cue téé cùu fariséú ío ñùhu iní-güedé nchaa sá ío ñuyúú-a, te xíndedóho-güedé nchaa tnúhu càháⁿ Jèsús,

te ní cáháⁿ yíhí-güedé cuendá-gá. ¹⁵ Te Jèsús ní xáhaⁿ-gã xii-güedé:

—Nchòhó cúú-ndó cuè téé ío váha càháⁿ núú ñáyiú cuendá-ní sá cuíni-ndó cáháⁿ váha-yu cuendá-ndó, dico Yá Ndiöxí xini ndáá-gá nàcuáa càa iní-ndó ìⁿ ìⁿ-ndo, te nchaa sá càhí cue ñáyiú ñuyíú-a sá ío nàndíhi, Yá Ndiöxí dáquèè tíhú-gã.

Cuendá nchaa tnúhu ní chídó tnùnì ndí Moisés

¹⁶ Te nchaa tnúhu ní chídó tnùnì ndí Moisés cúnú-xi ní cuu, ndíhi nchaa tnúhu ní chídó tnùnì cue téé ní xóo cáháⁿ tnúhu Yá Ndiöxí ndéé sanaha. Dico cútnàhá ní ngúíta té Juáá téé ní xóo dacuàndute ñaha xii ñáyiú ní cáháⁿ-dé tnúhu-í, ndéé dàvá-áⁿ ñà túú-gã ní cúnú nchaa tnúhu ní chídó tnùnì ndí Moisés ndíhi nchaa tnúhu ní chídó tnùnì cue téé ní xóo cáháⁿ tnúhu Yá Ndiöxí ndéé sanaha. Te ñu-ni ndéé dàvá-áⁿ ní quesaha ta tècú tnùnì ñáyiú nàcuáa ndíhu ndaha ñaha Yá Ndiöxí xii-yu, te vai ñáyiú ío sàni iní-yu vitna nàcuáa cadá-yu ndíhu ndaha ñaha Yá Ndiöxí xii-yu. ¹⁷ Te nchaa tnúhu ní chídó tnùnì ndí Moisés ío ndáá càháⁿ-xi, te ndíhi-gá naa andíu ndíhi ñuyíú dàcúxí sá ndíhi ìⁿ ìⁿ tnúhu-áⁿ cada-xi nàcuáa càháⁿ-xi.

Jèsús càháⁿ-gá cuendá ñáyiú dàña tnaha (Mt. 19:1-12; Mr. 10:1-12)

¹⁸ Te núú ìⁿ téé na dàña tnaha-dé, ndíhi ñadíhi-dé, te tnándaha tucu-dé ndíhi ingá-yu, te nèhé víhí quide-dé te núú ducaⁿ na càda-dé, te téé na tnándaha ndíhi ñaha ní dáña yì-xi, te ñu-ni ducaⁿ ñà túú cùu-xi sá váha te núú ducaⁿ na càdá-yu —càhí-gá xáhaⁿ-gã xii-güedé.

Cuendá ìⁿ téé nàni Lázarus ndíhi cuendá ìⁿ téé cuica

¹⁹ Te xáhaⁿ tùcu-gá xii-güedé:

—Ní xindecu ìⁿ téé cuica, te ní xóo cuihnu-dé mee-ni dóó váha dóó vii càa, te nchaa nduu súúni váha ní xóo cada-dé vico vehe-dé. ²⁰ Te ní xindecu tucu ìⁿ téé ndàhú ní xínani-dé Lázarus, te téé-áⁿ ní cuhú-dé ní xindeé-dé nitùhú-dé ndíhi, te ìⁿ nduu ìⁿ nduu ní xóo taxinucóo ñaha-güedé xii-dé yuyèhe téé cuica-áⁿ. ²¹ Te téé ndàhú-áⁿ ní xóo cuú-dé docó, te ní xóo cuíni-dé caxi-dé nchaa sá ñà túú-gã ní xóo yáha caxi téé cuica-áⁿ, te ñà túú ní xóo níhí-dé. Te cuèi

iná ní xóo quíhíⁿ-di ní xóo nayuu-di nchaa núú ndíhi ndéé-dé-áⁿ. ²² Te ní sáá ìⁿ nduu te ní xíhí téé ndàhú-áⁿ, te cue espíritú xínú cuèchi núú Yá Ndiöxí ndéca ñaha-xi xii-dé cuánda núú ndécú té Àbrahám cundecu-dé. Te ní sáá nduu ní xíhí téé cuica-áⁿ tnàhá-dé, te ní chindúxi ñaha-güedé xii-dé. ²³ Te ní sáá-dé núú xindecu nchaa ñáyiú ní xíhí ñà túú ní quide ndáá núú Yá Ndiöxí te xíaⁿ ío ndòho-dé ndécú-dé, te ní ndonehe núú-dé te xica ní xini-dé té Àbrahám ndíhi té Lázarus-áⁿ xindecu-güedé. ²⁴ Te níhi ní cáháⁿ-dé, te xáhaⁿ-dè: “Yòhó tātá Àbrahám, cundàhú iní ñàhá xii-í, te cúñaha xii té Lázarus ná dandaxiⁿ-dé díquí ndàhá-dé, te na quixi-dé dandaxiⁿ-dé yàa-í, chi ío ndòho-í ñùhú-í núú ñùhú núú càyú-a”, càhí-dé xáhaⁿ-dè xii té Àbrahám. ²⁵ Dico té Àbrahám ní xáhaⁿ-dè: “Ndàhú yòhó ñani tnàhá-í, dandacu iní sá ío váha ní xindecu-n ñuyíú, te té Lázarus ío ndàhú ní ndòho-dé ní xindecu-dé. Te vitna ní nucúndecu váha-dé iha, te yòhó ndòhó-n vitna. ²⁶ Te ñà díú-ní sá xǎⁿ tucu, chi cuádava ndècu ìⁿ déhvá cúnú ñùhú nèhu-xi núú ndécú-ó, te cuèi nchaa ñáyiú xindecu iha na càhí iní-yu quixi-yu núú ndécú-ndó dico vá ndácú-yu, te ní nchòhó vá ndácú-ndó quixi-ndo núú ndécú-ndí”, càhí-dé xáhaⁿ-dè. ²⁷ Te ní xáhaⁿ téé cuica-áⁿ: “Te núú ducaⁿ te càháⁿ ndàhú-í núú yòhó tātá Àbrahám vitna sá téndàha-n té Lázarus ná quíhíⁿ-dé vehe tātá-í, ²⁸ chi ndècu úhúⁿ-gá ñani-í, te na cúñaha-dé xii-güedé sá vǎ cadá-güedé dàtná ní quide-í cuendá sá vǎ quíxi-güedé tnàhá-güedé núú ndécú-í ndòhó-í-a”, càhí-dé xáhaⁿ-dè. ²⁹ Te té Àbrahám ní xáhaⁿ-dè: “Mee-güedé ndécú ndíhi-güedé nchaa tnúhu ní chídó tnùnì ndí Moisés, ndíhi nchaa tnúhu ní chídó tnùnì cue téé ní xóo cáháⁿ tnúhu Yá Ndiöxí ndéé sanaha, te nchaa tnúhu-áⁿ ná tnè-güedé nàcuáa càháⁿ-xi”, càhí-dé xáhaⁿ-dè xii-dé. ³⁰ Te ní xáhaⁿ tùcu téé cuica-áⁿ: “Tātá Àbrahám, dico vá cadá cuendá-güedé nchaa tnúhu-áⁿ, dico núú ìⁿ ñáyiú ñà túú-gã ndécú ñuyíú ìⁿ ñáyiú ndècu ndíhi-n quíhíⁿ-yu cáháⁿ ndíhi ñàhá-yu xii-güedé nàcuáa nduu tnúhu váha, te ndixi cuèchi iní-güedé nchaa sá ñà túú quide váha-güedé ndécú-güedé, te cada váha-güedé”, càhí-dé xáhaⁿ-dè xii-dé.

³¹ Dico té Àbrahám ní xáhaⁿ-dë: “Te núu ñá túú cuìní-güedé tñi-güedé tñúhu ní cáháⁿ ndíi Moisés, ndíhi tñúhu ní cáháⁿ cue téé ní xóo cáháⁿ tñúhu Yá Ndiöxí ndéé sanaha ña, te diu-ni ducaⁿ càda-güedé cuèi ìⁿ ñáyiú ní xíhí ná ndòtó-yu cùñàhá-yu nàcuáa ndùu tñúhu váha, chi vá quìndáá iní-güedé”, càchí té Àbrahám xáhaⁿ-dë xii téé cuica-ãⁿ —càchí Jèsús xáhaⁿ-gã xii cue téé cùu fariséú.

17

Quihi iní-ó vã cùndècu-o ichi cuehé ichi duha

(Mt. 18:6-7, 21-22; Mr. 9:42)

¹ Te Jèsús ní xáhaⁿ-gã xii cue téé xica cuu ndíhi-gá:

—Dacuití sã cóo cuè téé dacàháⁿ-güedé ñáyiú cadá-yu nándi sá cuèhé sá dúhá, j dico ndàhú ní cuu cue téé ducaⁿ na dàcaháⁿ ñáhá xii-yu cadá-yu nándi sá cuèhé sá dúhá! ² Chi váha-gá sá nùu na dàcutu ndéé ñáyiú ìⁿ yúú yódó dücúⁿ-güedé te dàquée ñáhá-yu xii-güedé xití ndute làmár, te ñá díú sã cùndècu-güedé dacàháⁿ-güedé ñáyiú cadá-yu nándi sá cuèhé sá dúhá, cuèi ñáyiú ndàhú iní-xi dandàhú-güedé. ³ Te ío quihi iní-ndó cùndècu-ndo.

“Te núu ìⁿ ñaní tnáhá-ndó quide-dé ìⁿ sá ñà túú tàú-dé cada-dé sá cúú-xí-ndó te cáháⁿ-ndó dôho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sã ñí quide-dé. ⁴ Te cuèi úsá xito na càda-dé nándi sá ñà túú tàú-dé cada-dé sá cúú-xí-ndó ìⁿ nduu, te núu na quixi-dé úsá xito núú-ndó, te cachí-dé sá vã dúcáⁿ-gã cada-dé, te xini ñuhu-xi cada cahnu iní-ndó-dë —càchí-gá xáhaⁿ-gã xii-güedé.

Ñáyiú sàndáá ndisa iní-xi

⁵ Te ní xáhaⁿ cuè téé xica cuu ndíhi Jèsús xii-gá:

—Chindee ñaha xii-ndí cuendá ducaⁿ te quìndáá-gá iní-ndí sá Yá Ndiöxí ndácú-gã quidé-gã nchaá sá váha —càchí-güedé xáhaⁿ-güedé xii-gá.

⁶ Te ní xáhaⁿ Jèsús:

—Te núu nchòhó quìndáá ndisa iní-ndó sũúni cuèdicó luha líi dàtná cuìní-ndó cà ìⁿ ndíquiⁿ yutnu nàni mostázá, te ducaⁿ te cuu cùñaha-ndo xii ìⁿ yutnu: “Quene-n

iha te quíhíⁿ-n cuìhnu-n xití làmár”, duha cùñaha-ndo. Te ducaⁿ càda-xi te núu na quìndáá ndisa iní ñáhá-ndó xii-í —càchí-gá xáhaⁿ-gã xii-güedé.

Nàcuáa tàú ìⁿ téé xinu cuechi cada-dé

⁷ Te xáhaⁿ tùcu-gá xii-güedé:

—Te núu ìⁿ nchòhó ndécú ìⁿ téé xinu cuechi núú-ndó, te cuáháⁿ-dé yucu cuángada chiúⁿ-dé, àdi cuáháⁿ-dé yucu coto-dé quiti, te òré ní nasáá-dé vehe sá ñí sáháⁿ-dé yucu, te vá cùñaha nchòhó cue téé cùu patróóⁿ-dë xii-dé: “Yáchí nehé caxi-n dítá”, vá dúhá cùñaha-ndo. ⁸ Chi nchòhó cue téé cùu patróóⁿ-dë cùñaha-ndo xii-dé: “Cundihí iní cada túha sá cùdini-í, te díhna-gá-í caxi-í dítá te dàtnùní caxi-n”, duha cùñaha nchòhó cue téé cùu patróóⁿ xii-dé. ⁹ Te òré ná ndíhí chiúⁿ ní táhú nchòhó cue téé cùu patróóⁿ cada téé xinu cuechi núú-ndó, te ñá túú tàú-ndó ndàcáⁿ táhú-ndó nùú tée xinu cuechi núú-ndó. ¹⁰ Te duha càháⁿ-í chi núu òré ná ndíhi nchaá chiúⁿ ní táhú Yá Ndiöxí cada-ndo, te cachí-ndó: “Nchúhú cúú-ndí cue téé xinu cuechi núú Yá Ndiöxí, dico ñá túú tàú-gá ndacáⁿ táhú-gã núú-ndí, chi mee-ni chiúⁿ ní táhú-gã ní quide-ndí”, duha cachí-ndó —càchí-gá xáhaⁿ-gã xii-güedé.

Jèsús quidé tãtna-gá úxí cue téé tnàhá cuéhé sã dátèhyú nihnu-xi yiqui cùñú ñáyiú

¹¹ Te ñuhu Jèsús ichi cuáháⁿ-gã ñuú Jerusàlén, te ní yáha-gá núú ràyá distritú Sàmariá ndíhi distritú Galileá. ¹² Te ta cùyatni-gá ìⁿ ñuú líhli cuáháⁿ, te ní sátnahá ñáhá úxí tnàhá cue téé cùhú xii-gá, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngunu tñi-güedé, ¹³ te níhi ní cáháⁿ-güedé, te xáhaⁿ-güedé xii Jèsús:

—jMèstrú, cundàhú iní ñáhá xii-ndí! —càchí-güedé xáhaⁿ-güedé xii-gá.

¹⁴ Te òré ní xiní ñáhá Jèsús xii-güedé, te ní xáhaⁿ-gã:

—Chí cuáháⁿ núú dütú ná cùndehe ñaha-dé xii-ndo —càchí-gá xáhaⁿ-gã xii-güedé.

Te ní xica-güedé cuáháⁿ-güedé, te ichi-ni ñuhu-güedé cuáháⁿ-güedé ní ndúha-güedé cuéhé tnàhá-güedé. ¹⁵ Te nchaá-güedé ní cutnùní iní-güedé sá ñí ndúha-güedé, dico

ɨⁿ-ni-dé ní nacuico-dě, te ní ngüíta-dé níhi ní cáháⁿ-dé, te ní cachíⁿ-dé sá ɨo càhnu cuu Yá Ndiöxí. ¹⁶ Te ní ngüíñí xítíⁿ-dě núú Jèsús, te ní nuu núú-dě ndàa núú ñúhú ndàcáⁿ táhú-dě núú-gă. Te téⁿ-áⁿ cúú-dě téⁿ distritú Sàmariá. ¹⁷ Te Jèsús ní cachíⁿ-gá:

—Úxí tñàhá-güedé ní ndúha cuéhé tñàhá-güedé. ¿Te ndèé ndécú dàva-gă-güedé-í? ¹⁸ ¿Te náa ɨⁿdii-ni téⁿ ingá ñuú-a ní nacuico-dě ndàcáⁿ táhú-dě núú Yá Ndiöxí, te càchíⁿ-dé sá ɨo càhnu cuu-gă ñă? — càchíⁿ-gá.

¹⁹ Te ní xáhaⁿ-gă xii téⁿ-áⁿ:

—Ndacuíñí te núhú-n, chi sa ní ndúha-n cuéhé tñàhá-n, chi ní sándáá iní-n Yá Ndiöxí —càchíⁿ-gá xáhaⁿ-gă xii-dé.

Nàcuáa yìndaha ñaha Yá Ndiöxí
(Mt. 24:23-28, 36-41)

²⁰ Te cue téⁿ cùu fariséú ní xícáⁿ tnúhú-güedé núú Jèsús núu ná ama ngüíta Yá Ndiöxí ndíhu ndaha-gă ñáyiu. Te ní xáhaⁿ-gă:

—Ñá túú nă cada-xi ñuyíú quini-ndó cuendá cutnùní iní-ndó sã ndíhu ndaha ñàha Yá Ndiöxí xii-ndo. ²¹ Te ni vã yòo cachí: “Iha ndècu-gă táxí tnùní-gă, àdi yacáⁿ ndécú-gă táxí tnùní-gă”, chi tnuú-ndó sã ndecu-gă ndíhi nchaa ñáyiu yìndaha-gă — càchíⁿ-gá xáhaⁿ-gă xii-güedé.

²² Te ní xáhaⁿ-gă xii cue téⁿ xica cuu ndíhi-gă:

—Te nchòhó chi sáá nduu, te cachí iní-ndó sã sũúni cuèdicó ɨⁿ nduu quini ñàhá-ndó xii yúhú Téⁿ cùu ñani tñàhá-ndó nchàa-ndo, dico vá quini ñàhá-gă-ndó xii-í. ²³ Te coo ñáyiu cúñàhá-yu xii-ndo: “Iha ndècu-gă, áⁿ yacáⁿ ndécú-gă”, quesàhá-yu cúñàhá-yu xii-ndo. Dico vá quindáá iní-ndó quíhíⁿ-ndó ndíhí-yu núú càchí-yu, te ni vã cání iní-ndó quíhíⁿ méé-ndó. ²⁴ Chi dàtná cuini-ndó quide-xi oré sáá ndúté àndíu, chi uuⁿni dàyehé-xi nihíi ñuyíú, ducaⁿ càda-xi nduu na quixi tucu yúhú Téⁿ cùu ñani tñàhá-ndó nchàa-ndo, te dàvá-áⁿ quini ñàhá nchàa-ndí túhú ñáyiu xii-í. ²⁵ Dico díhna-gă ndoho vîhi-í, te daquèe tíhú ñàhá ñáyiu ñuyíú-a xii-í. ²⁶ Te cadá-yu dàtná ní quide ñáyiu ní xindecu cútnàhá ní xindecu té Nöé, te diu-ni ducaⁿ sãtnahá-xi cada

nchaa ñáyiu ndècu vitna ndéé sáá nduu quixi tucu yúhú Téⁿ cùu ñani tñàhá-ndó nchàa-ndo. ²⁷ Chi caxi-ní-yu, coho-ní-yu, te caca cuu-ni cue téⁿ xica ndáhú, te tñàndaha-ní-yu, chi ducaⁿ ní quide-yu dàvá-áⁿ ndéé ní sáá nduu cuãnguee té Nöé xítí bàrcú, te ní ngüíta-xi ní cuuⁿ dáú ní cáhá-yu dàvá-áⁿ. ²⁸ Te diu-ni ducaⁿ ní quide tucu ñáyiu cútnàhá ní xindecu té Löt, chi xéxi-yu xihí-yu, te sàáⁿ-yu te nàdicó-yu, te xítítú-yu nándi sá xítítú-yu, te nchaa cue téⁿ xidacáá-güedé vehe. ²⁹ Te òré ní quee té Löt ñuú Sòdomá, te ní ngoyo ñuhú andíu, te dàcá yúú sũúni dicó ní nduu ñuhú-nă-xi, te ní xihí nchaandi túhú ñáyiu ñuú-áⁿ. ³⁰ Te diu-ni ducaⁿ sãtnahá-xi cada ñáyiu na sáá nduu quixi tucu yúhú Téⁿ cùu ñani tñàhá-ndó nchàa-ndo ñuyíú-a.

³¹ Te núu ɨⁿ ñáyiu càndodó-yu díquí vèhè-yu nduu-ãⁿ, te ni vá ndíhu-gă-yu quehéⁿ-yu ɨⁿ ndachíuⁿ-yu canehé-yu quíhíⁿ, te ñáyiu cuáháⁿ yucu, te ni vá nùhú-gă-yu vehé-yu. ³² Te chí dándacu iní nàcuáa ní yáha ñadíhí té Löt. ³³ Te nchaa ñáyiu cuini dàcácu nihnu mee-xi ñuyíú-a ña, te cuíta nihnú-yu, te nchaa ñáyiu na cùú sá cuendá-í, te naníhí tàhú-yu.

³⁴ Te na càchí tnúhu tucu-í xii-ndo sã nduu-áⁿ, te núu úú-yu càa ɨⁿ núú xító, te ɨⁿ-yu ndanchitá-yu ndaá-yu andíu, te ɨⁿ-yu quendóo. ³⁵ Te núu úú ñáyiu díhí nchícõ-yu ɨⁿ-ni vèhe, te ɨⁿ-yu ndanchitá-yu ndaá-yu andíu, te ɨⁿ-yu quendóo. ³⁶ Te núu úú cue téⁿ yíhi-güedé yucu, te ɨⁿ-dé ndànchita-dé ndaa-dé andíu, te ɨⁿ-dé quendóo —càchíⁿ-gá xáhaⁿ-gă xii-güedé.

³⁷ Te sá dúcáⁿ ní cáháⁿ-gă núu ní xícáⁿ tnúhú-güedé núú-gă, te xáhaⁿ-güedé xii-gă:

—Mèstrú, ¿te ndéé ducaⁿ càda-xi-í? —cachí-güedé xáhaⁿ-güedé xii-gă.

Te ní xáhaⁿ-gă:

—Te nchòhó xini-ndó sã ncháá núú yúcu yíqui cuñú ní xihí, te yacáⁿ tàcá cue ndíxíí xéxi-güedé —cachíⁿ-gá xáhaⁿ-gă xii-güedé.

18

Jèsús càháⁿ-gă cuendá ɨⁿ juéxi ndíhi cuendá ɨⁿ ñaha quèé

¹ Te Jèsús ní cani-gá ìⁿ cuèndú núú-güedé cuèndá sá vǎ ná tǔhú iní-güedé cáháⁿ ndihí-güedé Yǎ Ndiǒxí nchaa-ni òré. ² Te xáhaⁿ-gǎ:

—Ìⁿ ñuú ndécú ìⁿ juéxí, te ni ñà túú sàndáá iní-dé Yǎ Ndiǒxí, te ni ìⁿ tnúhu xáhaⁿ ñáyiú ñá túú cuìní-dé cada cuèndá-dé.

³ Te ñuú-áⁿ ndécú tùcu ìⁿ ñadihí ñaha quèé, te ní sáháⁿ-aⁿ càháⁿ ndàhú-aⁿ núú juéxí-áⁿ cuèndá cada ndáá-dé ìⁿ cuéchi. ⁴ Te titní xito ní cuu sáháⁿ-aⁿ càháⁿ ndàhú-aⁿ núú-dé te ñá túú cuìní-dé cada cuèndá-dé tnúhu càháⁿ-aⁿ ni cùu, te ndéé núú ñà cúú-gǎ te ní sani iní-dé: “Te cuèi ñá túú sàndáá iní-í Yǎ Ndiǒxí, te ni ñà túú quide cuèndá-í nchaa tnúhu càháⁿ ñáyiú cada-í, ⁵ dico na càda ndáá-í cuèndá ñaha quèé-a ndihí ñáyiú cùu úhú iní tnáhá ndihí-aⁿ, chi vá cùndèe-gá iní-í nuu núu quixi-aⁿ dasátú iní ñáhá xii-í”, duha ní sani iní téé cùu juéxí-áⁿ —càchí-gá xáhaⁿ-gǎ xii-güedé.

⁶ Te ní xáhaⁿ tùcu-gá xii-güedé:

—Cada cuèndá-ndó nàcuáa ní sani iní juéxí téé cuihna iní-xi-áⁿ. ⁷ Te Yǎ Ndiǒxí ío chindee-gá nchaa ñáyiú ní cáháⁿ-gá cundecu ndihí-gá, chi cuèi nduu cuèi niú càháⁿ ndihí ñáhá-yu xii-gá, te vá cùyàa-gá nachinaa-gá nchaa sá quidé ñaha nchaa ñáyiú cùu úhú iní ñáhá xii-yu. ⁸ Te ío ndihí ducaⁿ càda-gá. Te òré ná quixi yúhú Téé cùu ñani tnáhá-ndó nchaa-ndo, ¿te náa naníhí-gǎ-í ñáyiú sàndáá ndisa iní Yǎ Ndiǒxí-áⁿ? —càchí-gá xáhaⁿ-gǎ xii-güedé.

Nàcuáa quide ìⁿ téé cùu fariséú ndihí ìⁿ téé cùu cobradór

⁹ Te Jèsús ní cáháⁿ-gá núú ñáyiú nàcuáa quide ñáyiú sàni iní sá ío quide ndáá te dàquee tíhú-yu tnàha ñáyiú-yu, te xáhaⁿ-gǎ xii-yu:

¹⁰ —Úú cue téé cuáháⁿ-güedé veñúhu càhnu sá ío cùnuu cáháⁿ ndihí-güedé Yǎ Ndiǒxí, te ìⁿ-dé cúú-dé téé cùu fariséú, te ingá-dé cúú-dé téé cuihna iní-xi quide cobrá ñáhá xii ñáyiú cuèndá impuèstú.

¹¹ Te téé cùu fariséú-áⁿ nùtní-dé càháⁿ ndihí-dé Yǎ Ndiǒxí, te xáhaⁿ-dè xii-gá: “Yòhó Dútú Ndiǒxí ndàcáⁿ táhú-í núú-n, chi ñá túú quide-í dàtná quidé dàva-gá-güedé, chi dùhu-güedé, càháⁿ ndihí-güedé ñadihí te ñá

diú ñadihí-güedé cúú-yu, te nándi-gá nchaa sá cuèhé sá dúhá quide-güedé, te ni ñà túú quide-í dàtná quidé téé cuihna iní-xi quide cobrá ñáhá xii ñáyiú cuèndá impuèstú ndécú íha. ¹² Chi yúhú ñá túú tnàhí ná xéxì-í úú nduu xití samàná cuèndá sá càháⁿ ndihí ñaha-í xii-n, te nchaa sá ñihí-í te càhu-í úxí xichi, te ìⁿ xichi tàxi-í xii-n”, càchí-dé xáhaⁿ-dè xii Yǎ Ndiǒxí. ¹³ Dico téé cuihna iní-xi quide cobrá ñáhá xii ñáyiú cuèndá impuèstú-áⁿ chi xica lùha nutní-dé, te ni lùha ñá túú cùyí-dé ndonehe núú-dé andiú cuèndá sá ndíxí cuéchi iní-dé nchaa sá ñà túú vǎha quide-dé, te ndèdí ndaha-dé pèchú-dé sá ndihú iní-dé, te xáhaⁿ-dè xii Yǎ Ndiǒxí: “Yòhó Dútú Ndiǒxí cundàhú iní ñáhá xii-í, chi ío cuèhé sǎ ñà túú vǎha quide-í núú-n!”, càchí-dé xáhaⁿ-dè xii Yǎ Ndiǒxí. ¹⁴ Te na càchí tnúhu-í xii-ndo sǎ téé cuihna iní-xi quide cobrá ñáhá xii ñáyiú-áⁿ ní tedóho Yǎ Ndiǒxí nchaa tnúhu ní cáháⁿ-dé, te ní quide càhnu iní-gá nchaa sá ñà túú vǎha ní quide-dé, te cuánuhú-dé vehe-dé. Te téé cùu fariséú-áⁿ ñà túú ní tedóho ñaha Yǎ Ndiǒxí xii-dé. Chi nchaa ñáyiú na càda cahnu mee-xi ñuyíú-a te vá cúú-yu ñáyiú cùnuu, te nchaa ñáyiú ñá túú quide cahnu mee-xi, ñáyiú-áⁿ cunúú-yu —càchí Jèsús xáhaⁿ-gǎ xii-yu.

Jèsús quidé ù-gǎ landú

(Mt. 19:13-15; Mr. 10:13-16)

¹⁵ Te ìⁿ úú ñáyiú ndécá-yu landú líhli cuáháⁿ núú Jèsús chi cuìní-yu sá téndàha ñaha-gá xii-güexi, te òré ní xiní cue téé xica cuu ndihí-gá sá ndécá-yu landú-áⁿ cuáháⁿ núú-gǎ, te ní ngúíta-güedé ténàá ñáhá-güedé xii-yu, te xáhaⁿ-güedé sá vǎ dúcáⁿ càdá-yu. ¹⁶ Dico Jèsús ní cana ñaha-gǎ xii-güedé, te ní xáhaⁿ-gǎ:

—Chí dáñá ná quixi nahi landú líhli-áⁿ nùú-í-a, te vá càdí-ndó ìchi-güexi, chi dàtná cúú vǎha iní cue landú líhli-áⁿ ducaⁿ cùu vǎha iní cue ñáyiú yindaha ñaha Yǎ Ndiǒxí. ¹⁷ Te ña càchí tnúhu ndáá-í xii-ndo sǎ nùu vá quèndáá iní ñáhá-ndó dàtná quidé dàva landú líhli sàndáá iní ñáhá xii-í, te vá ndihú ndaha ñaha Yǎ Ndiǒxí xii-ndo, te vá ndúú táhú-ndó cundecu-ndo ndihí-gá ni caa ni quíhíⁿ —càchí-gá xáhaⁿ-gǎ xii-güedé.

*Ën tée cuica càháⁿ ndihí-dé Jèsús
(Mt. 19:16-30; Mr. 10:17-31)*

¹⁸ Te ìn tée cùnūu ní xicáⁿ tnúhú-dě núú Jèsús, te xáhaⁿ-dě xii-gá:

—Yòhó Mèstrú, cùu-n tée ío váha iní-xi, te cuíní-í nūu vá cùndèe iní-n càchí tnúhu-n nã cúú sã váha cada-í cuendá nduu táhù-í cundecu-í ndihí Yá Ndiõxí ní caa ní quíhíⁿ —càchí-dé xáhaⁿ-dě xii-gá.

¹⁹ Te Jèsús ní xáhaⁿ-gã xii-dé:

—¿Te cùnūníní iní-n nàcuáa ndūu tnúhu càháⁿ-n sã yúhú váha iní-ãⁿ? Chi ìnⁿ dīí-ni Yá Ndiõxí váha iní-gá. ²⁰ Te yòhó xiní-n nàcuáa ní cachí Yá Ndiõxí cada ñáyiu, te duha ní cachí-gá: “Nchòhó cue tée vá càháⁿ ndihí-ndo ñàdihí te núu ñá díú ñàdihí-ndó cùú-yu, te ducaⁿ-ni nchòhó cue ñáyiu dìhí tucu vá càháⁿ ndihí-ndo tée te núu ñá díú yì-ndo cuu-güedé, te vá cáhni-ndó tnàha ñáyiu-ndo, te ni vã dúhú-ndó sã ndécú ndihí-yu, te ni vã dácàcu-ndo cuéchi neñūú sã cúú-xí tnàha ñáyiu-ndo, te canehe-ndo sã yíñūhu núú tãtá-ndó ndihí núú nãná-ndó”, duha ní cachí Yá Ndiõxí cada ñáyiu —càchí Jèsús xáhaⁿ-gã xii-dé.

²¹ Te tée-áⁿ nĩ xáhaⁿ-dě xii-gá:

—Nchaa xíãⁿ ní ngüíta-í quidè-í ndéé cútnàhá cúú làndú-í —càchí-dé xáhaⁿ-dě xii-gá.

²² Te Jèsús ní xáhaⁿ-gã xii-dé:

—Dico cùmání ìngá núú sã cáda-n, vitna te quíhíⁿ-n te dico-n nchaa sã ndécú ndihí-n, te díhú-n cuãha táhú-n cuè ñáyiu ndàhú, te ducaⁿ te nduu táhú-n cundecu váha-n nūú ndécú Yá Ndiõxí táxí tnùn-í-gá, te na yáha ducaⁿ càda-n te quixi-n chìtnahá ñáhá-n xii-í —càchí-gá xáhaⁿ-gã xii-dé.

²³ Te sã dúcáⁿ nĩ xáhaⁿ Jèsús xii-dé, te ío ní cundìyí-dé, chi ío cuica-dě. ²⁴ Te sã nĩ xiní ñáhá Jèsús xii-dé cundìyí-dé, núu ní cachí-gá:

—Ío úhú quíndáá iní ñáyiu cuica Yá Ndiõxí cuendá ndíhu ndaha ñàha-gá xii-yu! ²⁵ Te yáchí-gá yáha ìnⁿ caméyu yaú ìnⁿ yiqui tìcú dácúxí sã quíndáá iní ìnⁿ ñáyiu cuica Yá Ndiõxí cuendá ndíhu ndaha ñàha-gá xii-yu —duha ní cachí-gá.

²⁶ Te nchaa ñáyiu ní tecú dóho-xi tnúhu ní cáháⁿ-gá ní xáhãⁿ-yu xii-gá:

—¿Te yoo naníhí tàhú te núu ducaⁿ vàiⁿ? —càchí-yu xáhãⁿ-yu xii-gá.

²⁷ Te Jèsús ní xáhaⁿ-gã xii-yu:

—Cue ñáyiu ñuyú-a chi vá ndácū-yu ná cadá-yu nàcuáa ndíhu ndaha ñàha Yá Ndiõxí xii-yu, dico mee-gã chi ndacu-gá ndíhu ndaha ñàha-gá xii-yu chi nchaa sã vãha ndacu-gá quidè-gã —càchí-gá xáhaⁿ-gã xii-yu.

²⁸ Te té Pèlú ní xáhaⁿ-dě xii-gá:

—Nchúhú ní dándõo-ndí nchaa sã ndécú ndihí-ndí, te ní tuha ñaha-ndí xii-n —càchí-dé xáhaⁿ-dě xii-gá.

²⁹ Te ní xáhaⁿ-gã xii ñáyiu:

—Na càchí tnúhu ndáá-í xii-ndo sã ncháá ñáyiu na dándõo vehe-xi, àdi tátá-xi, nãná-xi, ñan-í-xi, cúha-xi, ñàdihí-xi, déhe-xi cuendá sã cuíní-yu ndíhu ndaha ñàha Yá Ndiõxí xii-yu, ³⁰ te ío-gá cuéhé sã cuãñaha-gã xii-yu cundecu ndihí-yu, te ñá díú-ní xíãⁿ, chi tnàhá nduu táhū-yu cundecu ndihí ñàhá-yu xii-í ní caa ní quíhíⁿ ná sàà nduu —càchí-gá xáhaⁿ-gã xii-yu.

*Jèsús càháⁿ tucu-gá sã cáhni ñàha-güedé
xii-gá*

(Mt. 20:17-19; Mr. 10:32-34)

³¹ Te Jèsús ní taudìⁿ-gá ndi ùxúú cue tée xica cuu ndihí-gá tnuú ñáyiu, te ní xáhaⁿ-gã xii-güedé:

—Vitna te quíhíⁿ-ó ñūú Jerusalén, chi yacáⁿ cada-xi nchaa nàcuáa sa ní chídó tnùn-í cue tée ní xóo cáháⁿ tnúhu Yá Ndiõxí ndéé sanaha nàcuáa yáha yúhú Tée cùu ñan-í tnáhá-ndó nchaa-ndo. ³² Chi cuáha cuendá ñáhá-güedé xii-í núu cuè tée ñá túú cùu cue tée isràél, te cudíquí ndéé ñáhá-güedé xii-í, te cúcuéhé ñáhá-güedé, te tìú díí ñáhá-güedé xii-í. ³³ Te caniha-güedé ndihí ñii, te dātnùn-í cahni ñaha-güedé xii-í, dico nduu ún-í sã cùú-í te ndoto-í —càchí-gá xáhaⁿ-gã xii-güedé.

³⁴ Dico ní ìnⁿ tnúhu ní cáháⁿ-gá ñá túú ní tècú tnùn-í-güedé, chi ío yídáhu tnúhu ní cáháⁿ-gá nūu xíãⁿ ní ìnⁿ ñá túú ní tècú tnùn-í-güedé.

*Jèsús quidé tãtna-gá núú ìnⁿ tée cuáá ñūú
Jerico*

(Mt. 20:29-34; Mr. 10:46-52)

35 Te òré tá cùyatni Jesús ñuú Jericó cuáháⁿ, te yuhu ìchi cuáháⁿ-gá-áⁿ núcõ ñⁿ téé cuáá xicáⁿ ndàhú-dé. 36 Te òré ní tecú dóho-dé xicáháⁿ vâi ñâyiu xiyáha-yu, te ní xicáⁿ tnúhú-dé núú ñâyiu ndècu ndìhi-dé ná cuendá ducaⁿ vâi-yu yáha. 37 Te ní xáhãⁿ-yu sá Jèsús téé ñuú Nazàrét ñúhú-dé ichi. 38 Te níhi ní cáháⁿ-dé, te xáhaⁿ-dë xii-gá:

—Jèsús ñaní tnáhá ndï Dàvíí, cundàhú iní ñáhá xii-í! —càchí-dé xáhaⁿ-dë xii-gá.

39 Te ñâyiu xixódó núú núú Jèsús ní tenàá ñáhã-yu xii-dé, te xáhãⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xáhaⁿ-dë xii-gá:

—Yòhó téé cùu ñaní tnáhá ndï Dàvíí, cundàhú iní ñáhá xii-í! —càchí-dé xáhaⁿ-dë xii-gá.

40 Te Jèsús ní ngüñí-gá, te ní táuchíuⁿ-gá ní sángueheⁿ ñaha cuè téé ndìhi-gá. Te òré ní quexìo-dé núú-gá, te ní xicáⁿ tnúhú-gá núú-dë, te xáhaⁿ-gá:

41 —¿Ná cuñí-n càda ñaha-í xii-n-í? —càchí-gá xáhaⁿ-gá xii-dé.

Te téé cuáá-áⁿ ñí xáhaⁿ-dë:

—Mèstrú, cuñí-í cada tátna-n núu-í cuendá cundehe-í —càchí-dé xáhaⁿ-dë xii-gá.

42 Te Jèsús ní xáhaⁿ-gá:

—Sa ní ndúha núu-n chi ní sándáá iní-n Yá Ndiõxí —càchí-gá xáhaⁿ-gá xii-dé.

43 Te òré-ni-áⁿ ñí ndúha núú-dë, te ní chinchícúⁿ-dé Jèsús, te ní cachí-dé sá ïo càhnu cuu Yá Ndiõxí. Te nchaa ñâyiu ní xiní nàcuáa ní cuu ní ndúha núú-dë tnàhá-yu ní cachí-yu sá ïo càhnu cuu Yá Ndiõxí.

19

Jèsús ndìhi ñⁿ téé nàni Zaqueú

1 Te Jèsús ní sáa-gá ñuú Jericó, te ta yáha-gá xití ñuú-áⁿ cuáháⁿ. 2 Te ñuú-áⁿ ndécú ñⁿ téé cuica nàni-dé Zaqueú, te cùnuu-dé táxí tnùní-dé cue téé cündìhi-dé, cue téé cuihna iní-xi quide cobrá ñáhá xii ñâyiu cuendá impuèstú. 3 Te téé-áⁿ cuñí-dé quini-dé Jèsús òré-áⁿ ní cùu te ñá ní ndàcu-dé, chi ío cuéhé ñâyiu, te ñá túú dùcúⁿ-dé. 4 Te xìnu-dé ní ngódó núú-dë te ní sáa-dé díquí ñⁿ yutnu sìcómorú nùtní yatni yuhu ìchi núú yáha Jèsús cuendá cuñí-dé quini ñáhá-dë xii-gá. 5 Te òré tá yáha Jèsús

xíáⁿ, te ní ndonehe núú-gá díquí yutnu núú cándodo-dé-áⁿ, te ní xáhaⁿ-gá xii-dé:

—Zaqueú, tanùu ndìhi díquí yutnu-áⁿ, chi tnavíí quexìo-í vehe-n ndètátú-í —càchí-gá xáhaⁿ-gá xii-dé.

6 Te té Zaqueú-áⁿ ñí nuu ndìhi-dé díquí yutnu-áⁿ, te ío ní cudíí iní-dé ní queheⁿ cuendá-dé Jèsús vehe-dé. 7 Te sá ñí xiní ñâyiu ní quexìo Jesús vehe-dé, te nchaa-yu ní ngüíta-yu càháⁿ cuéhé-yu cuendá-gá, te xitnàhá-yu:

—Tée-a cuánguihu-dé vehe ñⁿ téé ndècu ichi cuehé ichi duha —càchí-yu xitnàhá-yu.

8 Te té Zaqueú-áⁿ ñí ndacuñí-dé tnuú-yu, te xáhaⁿ-dë xii Jèsús:

—Yòhó Mèstrú, na cuáha-í ñâyiu ndàhú cuádava nchaa sá ndécú ndìhi-í. Te núu yoo ní dándàhú-í ní dúhù-í, te codo ùní-gá tnàhá sá ñí dúhù-í-yu nacuáñaha-í xii-yu —càchí-dé xáhaⁿ-dë xii-gá.

9 Te Jèsús ní xáhaⁿ-gá xii té Zaqueú:

—Vitna ní naníhí tàhú-n ndìhi nchaa ñâyiu xindecu vehe-n, chi tnàhá-n cùu-n ñaní tnáhá ndï Àbrahám. 10 Te yúhú Téé cùu ñaní tnáhá-ndó nchaa-ndo véxi-í nándücu-í ñâyiu ní xíta nihnu cuendá dàcácu nihnu-í-yu núú ùhú núú ndàhú —càchí-gá xáhaⁿ-gá xii-dé.

Nàcuáa ní quide-güedé ndìhi díhúⁿ cuáaⁿ (Mt. 25:14-30)

11 Te nchaa ñâyiu-áⁿ ñí sani iní-yu sá ndìhi-ni ndìhu ndaha ñaha Yá Ndiõxí xii-yu cuendá sá ñí cuyatni Jèsús ñuú Jerusalén, te xíãⁿ núu ní ngüíta Jèsús ní caní-gá ñⁿ cuendú núu-yu cuendá tecú tnùní váha-yu tnúhu-gá. 12 Te xáhaⁿ-gá xii-yu:

—Ní xindecu ñⁿ téé cùu ñaní tnáhá ñâyiu cùnuu, te cuáháⁿ-dé ingá ñuú xicá cuendá yacáⁿ cuáha ñaha-güedé chiúⁿ coo-dé, te dàtnùní ndixi-dé quindaha-dë titní ñuú.

13 Te cùmání-gá quee-dé quihíⁿ-dé, te ní cana-dé úxí cue téé xìnu cuechi núú-dë, te ní sáñaha-dë ndí dííⁿ núu-güedé ñⁿ caa ñⁿ caa díhúⁿ cuáaⁿ, te ní xáhaⁿ-dë: “Chí cáda ndàhú ndìhi díhúⁿ-áⁿ ndeé ná sáa nduu nàsáá-í”, càchí-dé xáhaⁿ-dë xii-güedé.

14 Dico nchaa ñâyiu ñuú quindaha-dé-áⁿ ñà túú tnàhá iní-yu sá quindaha ñaha-dé, núu ní tendàhá-yu cue téé nèhe tnúhu cuáháⁿ

núu cuè té cuañaha chiùn coo-dé-án, te ní xáhán-yu sá cñaha-güedě sá ñà túu tnàhá iní-yu sá tē-án quindaha ñaha-dé xií-yu. 15 Dico dacuitíi sá ñi sáha-güedé tē-án chiùn coo-dé sá díu-dě quindaha-dě ñáyi nchaa ñuú-án, te ní nacuíco-dě cuánuhú-dě ñuú-dé. Te òré ní nasáá-dé vehe-dé, te ní tendaha-dě ñi tē ní sánúcana ñaha xii cue tē xinu cuechi núu-dě, cue tē ní dándõ ndaha-dě díhú cuendá cacán tnúhú-dě núu-güedě ñi ñi-güedé ñu ndèe dau ní chídó-xí díquí díhú sá ñi dándõ ndaha ñaha-dé-án. 16 Te tē ní ndèxio díhna xáhán-dě: “Pàtróón, ní quide-í ndáhú ndíhi díhú-n sá ñi dándõ ndaha ñaha-n xii-í, te sá ñi ní taxi-n te ní chídó-xí ùxí-gá tnàhá te náu-a naquehe cuendá-n”, cächí-dé xáhán-dě. 17 Te tē cùu patróón-dě-án ñi xáhán-dě: “Ío váha tē xinu cuechi cuu-n chi ío váha ní quide-n, te sá ñi quide váha-n ndíhi sacú díhú sá ñi dándõ ndaha ñaha-í xii-n, te xíá ñu yúhú cächí-í sá táxi tnùnín ùxí ñuú vitna”, cächí-dé xáhán-dě. 18 Te ní ndexio ingá-dé, te ní xáhán-dě: “Pàtróón, ní quide-í ndáhú ndíhi díhú-n sá ñi dándõ ndaha ñaha-n xii-í, te sá ñi ní taxi-n te ní chídó-xí ùhú-gá tnàhá te náu-a naquehe cuendá-n”, cächí-dé xáhán-dě. 19 Te ní xáhán tē cùu patróón-dě-án xii-dé: “Te yòhó taxi tnùnín ùhú ñuú”, cächí-dé xáhán-dě xii tē xinu cuechi-án. 20 Te dātnùnín ní ndexio tucu ingá-dé, te xáhán-dě: “Pàtróón, náu díhú-n-á, te naquehe cuendá-n chi ní taxúha-í ní chidúcú nuu-í ñi pāñú te ñá túu ní quide-í ndáhú ndíhi díhú-n, 21 chi ní yúhú ñáhà-í xii-n, chi cùu-n ñi tē díi, te nàquehe-n ñi sá ñà túu ní tàxi ndecu-n, te nàtahu-n ñi xichi núu ñà túu ní chihí-n tatá”, cächí-dé xáhán-dě xii pàtróón-dě. 22 Te ní xáhán pàtróón-dě xii-dé: “Yòhó cúu-n ñi tē cuihna iní-xi xinu cuechi núu-í, te díu-ni nchaa tnúhu cáhán-n-án cächí tnùnín-xi nàcuáa cuu ndáa cuéchi-n. Te núu sàni iní-n sá cúu-í ñi tē díi, te nàquehe-í ñi sá ñà túu ní tàxi ndecu-í, te nàtahu-í ñi xichi núu ñà túu ní chihí-í tatá, 23 te núu duca ña, ¿te ná cuendá ñà túu ní càhu iní-n dāsa nuu-n díhú ñi taxi-í, te cuñaha-n chāhu-yu díquí-xi, te òré ná nasáá-í vehe-í, te sa ngódó lùha-gá díquí-xi naquehe cuendá-í ní cùu-í?”, cächí-dé

xáhán-dě xii tē xinu cuechi-án. 24 Te ní xáhán tē cùu patróón-án xii cue tē xíndecu xíá: “Chí quèndéé díhú cuáán néhé tē-a, te cuáha-ndo tē nèhe úxí tucu díhú cuáán-án”, cächí-dé xáhán-dě xii-güedé. 25 Te ní xáhán-güedě: “Pàtróón, dico sa nèhe-dé úxí díhú cuáán”, cächí-güedé xáhán-güedé. 26 Te ní xáhán tē cùu patróón-án: “Na cächí tnúhu-í xii-ndo sá cuè ñáyi ió xii-xi te níhí-gā-yu cundecu ndíhí-yu, te cue ñáyi sacú ndécú ndíhi cuita ndíhi nihnu nchaa sá ndécú ndíhí-yu”, cächí tē cùu patróón-án xáhán-dě xii-güedé. 27 Te xáhán tucu-dé xii-güedé: “Nchaa ñáyi cùu úhú iní ñáhà xii-í ñà tnàhá iní-yu quindaha-í-yu, te chí cándecá-yu taquixi iha, te cahni-ndõ-yu núu-í-a”, cächí tē cùu patróón-án xáhán-dě xii-güedé —duha cuáhán cuendú ní cani Jèsús núu ñáyi.

Jèsús cuánguihu-gá ñuú Jerusàlén

(Mt. 21:1-11; Mr. 11:1-11; Jn. 12:12-19)

28 Te sátá dúcán ñi cáhán-gá, te ní nucúhu ichi-gá cuáhán-gá ñuú Jerusàlén. 29 Te òré sa ní cuyatni-gá ñuú Bètfaqé, ndíhi ñuú Bètaniá te xíá cáa yùcu nani Olivú, te ní xáhán-gā xii úu cue tē xica cuu ndíhi-gá:

30 —Chí cuáhán ñuú cáa yàtni yacá, te òré quexio-ndo yacá, te naníhí-ndó ñi búrru ndètní-di, te vátá yõ ñi-gá codo ñaha xii-di, te nandaxi-ndo-di te candeca-ndo-di quixi.

31 Te núu yoo na cacán tnúhu núu-ndó ñà cuendá nándaxi-ndo-di, te cuñaha-ndo xii-yu sá yúhú Yaá xicá cùu ndíhi-ndo xini ñuhu-í-di —cächí-gá xáhán-gā xii-güedé.

32 Te cue tē-án ñi xica-güedé cuáhán-güedé, te nchaa-ni nàcuáa ní xáhán Jèsús duca ñi cuu, 33 chi mei òré nándaxi-güedé búrru-án ñi quexio cue ñáyi cùu xitohó-di xicá tnúhu-yu núu-güedé, te xáhán-yu:

—¿Ná cuendá nándaxi-ndo búrru-ndí-í? —cächí-yu xáhán-yu.

34 Te ní xáhán-güedé xií-yu:

—Nà ndaxi-ndí-di chi Yaá xicá cùu ndíhi-ndí xini ñuhu ñaha-gá xii-di —cächí-güedé xáhán-güedé xií-yu.

35 Te ndèca-güedé-di cuáhán núu ndécú Jèsús, te òré ní quexio-güedé ndíhi-di núu ndécú-gā te ní sacá ndodo-güedé dóo-güedé sátá-di, te ní ngódó ñáhá-gā

xii-di. ³⁶ Te ío cuéhé ñáyiú ta sàcáⁿ-yu dóo-yu ichi cuáháⁿ-gá cuendá núú dǒo-yu-áⁿ yáha-gá ndihí quiti yodo-gá. ³⁷ Te ní nucuíta nuu-gá ichi tindúú yucu Olívú tá cùyatni-gá ñuú Jerusàlén cuáháⁿ, te nchaa ñáyiú sàndáá iní ñáhá xii-gá nchícúⁿ ñáhá-yu te ní ngúíta-yu níhi càháⁿ-yu sá cúdǐ iní-yu, te càchí-yu sá ío càhnu cuu Yá Ndiǒxí cuendá sá ñi xini-yu nchaa sá vǎ yoo tnàhí ndàcu cada ní quide-gá. ³⁸ Te càchí-yu:

—Ío càhnu cuu Yaá véxi quindaha ñaha xii-o, te diu-gá cúu-gǎ Yaá ní tendaha Yá Ndiǒxí véxi quide núú-gǎ! ¡Te ío càhnu cuu mee-gá! ¡Te andiu ña túú tnàhí ná cúu! — duha càchí-yu.

³⁹ Te ñⁿ úú cue téé cùu fariséú ñúhú tnàhá tnuú ñáyiú-áⁿ ñi xáhaⁿ-güedé xii Jèsús:

—Mèstrú, cúñaha nchaa ñáyiú ndihí-n na càdí-yu yuhú-yu —càchí-güedé xáhaⁿ-güedé xii-gá.

⁴⁰ Dico Jèsús ní xáhaⁿ-gǎ xii-güedé:

—Te na càchí tnúhu-í xii-ndo sǎ ñuú ñáyiú-a na càdí-yu yuhú-yu ña, te nchaa yúú cǎháⁿ níhi-xi dàtná ñⁿ ñáyiú —càchí-gá xáhaⁿ-gǎ xii-güedé.

⁴¹ Te òré ní cuyatni-gá ñuú Jerusàlén te ní xini-gá, te ní ndáhyú-gá cuendá nchaa ñáyiú dii ñúú-xi-áⁿ sǎ ndihú iní-gá. ⁴² Te ní xáhaⁿ-gǎ xii cue ñáyiú-áⁿ:

—Ío cuu váha iní-í te núu dícó nchòhó tecú tnùní-ndó vitna ñⁿ tnúhu sá cádá váha ñaha xii-ndo, chi ña túú-gǎ ná cuu cundecu-ndo, te núu na təcú tnùní-ndó. Dico ña təcú tnùní-ndó, chi ío yidáhu tnúhu-a. ⁴³ Te sáá nduu tnündòho tnúhu ndàhú sá cúu-xi-ndó, te nchaa cue téé dava-gá ñuú cúu úhú iní tnáhá ndihí-ndo quixi-güedé chidoco ñaha-güedé xii-ndo, te ñi càndéé núú ndécú-ndó-ǎⁿ dacàa-güedé ndóho cuendá xíaⁿ quihí váha-güedé nàá ndihí ñaha-güedé xii-ndo, te vá dáñá-güedé cunu-ndo. ⁴⁴ Te cahni ñaha-güedé xii-ndo, te ndihí nchaa vehe-ndo dǎngoyo-güedé ndéé cimiéntú-xi, chi ña túú ní cuini-ndó nàcuáha-ndo cuendá òré ní quixi coto ñaha Yá Ndiǒxí xii-ndo —duha ní xáhaⁿ-gǎ xii ñáyiú ñuú-áⁿ.

Jèsús ña túú tnàhá iní-gá nàcuáa quidé-yu veñúhu
(Mt. 21:12-17; Mr. 11:15-19; Jn. 2:13-22)

⁴⁵ Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xǐndecu cue ñáyiú quide ndáhú ndihí cue ñáyiú xísaaⁿ. Te ní queñuhu ñaha Jèsús xii-yu quehé. ⁴⁶ Te ní xáhaⁿ-gǎ xii-yu:

—Núú tütú Yá Ndiǒxí càháⁿ-xi nàcuáa ní càháⁿ-gá, te duha ní cachí-gá: “Vehe-í cúu-xi núú càháⁿ ndihí ñaha ñáyiú xii-í”, duha ní càháⁿ-gá càchí-xi núú tütú-gá. Dico nchòhó quidé-ndó vehe-gá vehe ñadúhú —càchí-gá xáhaⁿ-gǎ xii-yu.

⁴⁷ Te Jèsús nchaa nduu dǎnehé-gá ñáyiú xití veñúhu, dico cue téé cùu dútú cùnùu, ndihí cue téé dǎcuaha ñaha xii ñáyiú nchaa tnúhu ní chídó tnùní ndii Moisés, ndihí cue téé cùnuu ñuú-áⁿ ndúcú-güedé nàcuáa cada-güedé cahni ñaha-güedé xii-gá.

⁴⁸ Dico ña ñihí-güedé nàcuáa cada-güedé, chi cuendá nchaa ñáyiú ío cúdǐ iní-yu ndèdòho-yu nchaa tnúhu càháⁿ-gá.

20

Jèsús ndécú ndihí-gá tnúhu ndee iní
(Mt. 21:23-27; Mr. 11:27-33)

¹ Te ñⁿ nduu yihí Jèsús xití veñúhu càhnu sá ío cùnuu danehé-gá ñáyiú tnúhu sá càháⁿ nàcuáa naníhí tǎhú-yu. Te ní quexio cue téé cùu dútú cùnùu ndihí cue téé dǎcuaha ñaha xii ñáyiú nchaa tnúhu ní chídó tnùní ndii Moisés, ndihí cue téé cùu sacuéhé núú ñáyiú isràél, ² te ní xáhaⁿ-güedé xii-gá:

—Cuini-ndí cachí tnúhu-n xii-ndí nása nduu tnúhu ndee iní ndécú ndihí-n núu quide-n nándi sá quidé-n. ¿Te yoo ducaⁿ ñi taxi tnúhu ndee iní-áⁿ xii-n? —càchí-güedé xáhaⁿ-güedé xii-gá.

³ Te Jèsús ní xáhaⁿ-gǎ:

—Yúhú tnàhá-í cuini-í cǎcáⁿ tnúhu-í ñⁿ sá cǎcáⁿ tnúhu-í núu-ndó, te cachí tnúhu-ndo. ⁴ Te chí càchí tnúhu xii-í yoo ní táuchíúⁿ ñi dǎcuándüte ndii Juáa ñáyiú. ¿Yá Ndiǒxí ǎⁿ cué téé ñuyíú-a ní táuchíúⁿ dùcaⁿ ní quide ndii? —càchí-gá xáhaⁿ-gǎ xii-güedé.

⁵ Te ní ngúíta-güedé xǐtnàha-güedé:

—¿Nása cúñaha-o? Chi núu nà cúñaha-o sǎ Yá Ndiǒxí ní táuchíúⁿ dùcaⁿ ní quide ndii Juáa ña, te quesaha-dé: “¿Ná cuendá ña túú ní sàndáá iní-ndó tnúhu ní càháⁿ ndii vǎⁿ?”, quesaha-dé. ⁶ Ádi te núu nà cúñaha-o sǎ cué ñáyiú ñuyíú-a ní táuchíúⁿ dùcaⁿ ní

quide ndí ña, te nchaa ñáyiú cuáha ñáhá-yu yúú xii-o, te cahni ñáhá-yu, chi càchí-yu sá ndáá sá Yá Ndiöxí ní táuchíúⁿ-gã ní cáháⁿ ndí Juáá tnúhu-gá núú ñáyiú —càchí-güedé xitnáha-güedé.

⁷ Te ní xáhaⁿ-güedé xii-gá sá ña túú xini-güedé yoo ní táuchíúⁿ dùcaⁿ ní dácuaⁿndüte ndí Juáá ñáyiú. ⁸ Te ní xáhaⁿ Jèsús xii-güedé:

—Te núu ducaⁿ te ni yühú vá càchí tnúhu-í xii-ndo yòo ní taxi tnúhu ndee ìní duha quide-í —càchí-gá xáhaⁿ-gã xii-güedé.

Cuendá cue tée cuihna ìní-xi
(Mt. 21:33-44; Mr. 12:1-11)

⁹ Te sáta dúcáⁿ te ní ngüíta Jèsús ní caní-gá ñⁿ cuendú núú ñáyiú nácuaa tecú tnúhu-yu tnúhu-gá, te xáhaⁿ-gã xií-yu:

—Ñⁿ tée ní xitu-dé mee-ni yòho yaha stilé núú ñúhú-dě. Te ní sáá ñⁿ nduu quingaca cuu xica-dě vai nduu te ní dándóo ndaha-dě sá ñⁿ xitu-dé-áⁿ xii ñⁿ úú cue tée cáháⁿ ndihí-dé cuendá cada chiúⁿ-güedé, te ní ndatnúhu-güedé sá òré ná cùu te cuu cuendá dava-güedé te ducaⁿ te ní quee-dé cuáháⁿ-dé. ¹⁰ Te sáta ñⁿ sáá nduu ñⁿ cuu nchaa ndéhe yoho yaha stilé sá ñⁿ xitu-dé-áⁿ, te ní xáhaⁿ-dě xii ñⁿ tée xinu cuechi núú-dě: “Cuáháⁿ cácaⁿ-ñⁿ sá cúú cuendá-í núú cué tée ní dándóo ndàha-í nchaa yoho yaha stilé sá ñⁿ xitu-í”, càchí-dé xáhaⁿ-dě. Te tée xinu cuechi-áⁿ ñⁿ xica-dé cuáháⁿ-dé, dico cue tée ndéé nchaa yoho yaha stilé-áⁿ ñⁿ tñⁿ-güedé tée xinu cuechi-áⁿ te ní caniha-güedé, te ní nacuícúⁿ ñáhá-güedé xii-dé, te ñá túú tnàhí ná ní sãñaha-güedé. ¹¹ Te dätñuní tée cùu xitohó nchaa yoho yaha stilé-áⁿ ñⁿ tendaha tùcu-dé ingá tée xinu cuechi núú-dě cuáháⁿ-dé, dico ñⁿ-ni ducaⁿ ñⁿ quide ñaha-güedé xii-dé, chi ní xicuéhé ñáhá-güedé, te ní caniha-güedé te ní nacuícúⁿ ñáhá-güedé, te ñá túú tnàhí ná ní sãñaha-güedé. ¹² Te tée cùu xitohó nchaa yoho yaha stilé-áⁿ ñⁿ tendaha tùcu-dé ingá-dé cuáháⁿ-dé, te ñⁿ-ni ducaⁿ ñⁿ quide ñaha tùcu-güedé, chi ní dánicuéhé ñáhá-güedé, te ní nacuícúⁿ ñáhá-güedé.

¹³ Te tée cùu xitohó nchaa yoho yaha stilé-áⁿ ñⁿ sani ìní-dé: “¿Nása cada-í vitna? Váha-gá tendaha-í déhe-í téé ío cùu ìní-a núhú-dé, chi cudana te òré

quiní ñáhá-güedé xii-dé, te canehe-güedé sá yíñuhu núú-dě”, duha ní sani ìní-dé.

¹⁴ Dico òré ní xini cue téé quide chiúⁿ-áⁿ dèhe xitohó nchaa yoho yaha stilé-áⁿ, te ní xitnáha-güedé: “Tée-áⁿ téé véxi nduu táhú ñuhu-a ndihí nchaa sá cáá núú-xi, dico cahni-o-dě te mee-o nduu tahú-ó sã ndúú táhú-dě”, càchí-güedé xitnáha-güedé. ¹⁵ Te ní queñuhu ñaha-güedé ñⁿ xio yuhu ñuhu-áⁿ, te ní sahani ñaha-güedé xii-dé —duha cuáháⁿ cuendú ní caní Jèsús núú-yu.

Te dätñuní ní xáhaⁿ tùcu-gá xií-yu:

—¿Te nchòhó sa cùtnuní ìní-ndó nácuaa cada ñaha xitohó ñuhu-áⁿ xii cue téé-áⁿ ñⁿ? ¹⁶ Chi núhú-dé te cahni-dé cue téé-áⁿ, te dándóo ndaha-dě ñuhu-dé xii cue téé cùtnuní ìní-dé cada ndáá —càchí-gá xáhaⁿ-gã xií-yu.

Te sá dúcáⁿ ñⁿ cáháⁿ-gá, núu ní cachí-yu:

—¿Sá vã càchí Ndiöxí sá dúcáⁿ yáha-o! —càchí-yu.

¹⁷ Te Jèsús ní ndacoto-gá núú-yu, te ní xáhaⁿ-gã:

—Chí càchí tnúhu nása quèe-xi nácuaa cáháⁿ-xi núú tütú Yá Ndiöxí, núú càchí-xi: Yúú sã ñⁿ dáquéé tñhú cue téé dàcaa vehe ní saa-xi cùu-xi yúú cúnú vitna.

Duha càchí-xi núú tütú-gá. ¹⁸ Te nchaa ñáyiú ñá túú cuení tñⁿ tnúhu-í, te ndohó-yu dätñá ñⁿ ñáyiú tnàhnú duuⁿ òré ndúá-yu núú yúú, àdi núu na tàú ñáhá-xí te dácachi duuⁿ ñaha-xi —cachí-gá xáhaⁿ-gã xií-yu.

Cuendá impuèstú

(Mt. 21:45-46; 22:15-22; Mr. 12:12-17)

¹⁹ Te cue téé cùu dütú cúnú, ndihí cue téé dàcuaha ñaha xii ñáyiú nchaa tnúhu ní chidó tnúni ndí Moisés ní cuini-güedé tñⁿ-güedé Jèsús òré-ni-á ní cùu, chi ní cutñuní ìní-güedé sá cuendá-güedé ní cáháⁿ-gá, dico ní yühú-güedé cuendá sá ïo vai ñáyiú. ²⁰ Te ní ndúcú-güedé nácuaa cada-güedé tñⁿ ñaha-güedé xii-gá, te ní tendaha-güedé cue téé cuáháⁿ ngoto dayuhu ñaha xii-gá, te cuáháⁿ-güedé dätñá cue téé váha ìní-xi, te ndùcu-güedé nácuaa cada-güedé núu cáháⁿ-gá ñⁿ tnúhu sá ña túú tàú-gá cáháⁿ-gá cuendá ducaⁿ te candeca ñaha-güedé xii-gá quíhíⁿ cuáha cuendá ñáhá-güedé núú tée cúnú. ²¹ Te ní xáhaⁿ-güedé xii Jèsús:

—Mèstrú, ñihí-ndí tnúhu sá dánèhé-n ñáyiú mee-ni tnúhu váha, te cuèi ndédani càa ñáyiú ìⁿ-ni càháⁿ-n ndihí-yu, te càháⁿ ndáá-n nàcuáa càháⁿ Yá Ndiöxí cundecu-o ñüyíú-a. ²² Te cachí tnúhu xii-ndí nüú váha-ni cháhu-ndí té Cèsár téé ío cùnūu cuendá impuèstú àⁿ ñáhá —càchí-güedé xáhaⁿ-güedé xii-gá.

²³ Dico Jèsús ní cutnùní iní-gá sá xító ndéé ñáhá-güedé xii-gá, núú ní xáhaⁿ-gá xii-güedé:

²⁴ —Chí dánèhé ñáhá xii-í ìⁿ díhúⁿ cuèixíⁿ te cachí tnúhu-ndo nüú yoo núú-xi ndéé, ndihí yoo diu-xi ndéé —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tē Cèsár ndéé ndihí diu-dé —càchí-güedé xáhaⁿ-güedé xii-gá.

²⁵ Te ní xáhaⁿ tucu-gá xii-güedé:

—Te núú ducaⁿ te chí nàcuáha té Cèsár sá cúú cuendá-dé, te sá cúú cuendá mée Yá Ndiöxí, te xíaⁿ nacuáha-ndo-gá —càchí-gá xáhaⁿ-gá xii-güedé.

²⁶ Te ñá ní ndàcu tnahí-güedé datìcánuu ñaha-güedé xii-gá núú tnúhu càháⁿ-gá, chi òré ní càháⁿ-gá, te da ní cuñúhu-güedé nchaa tnúhu ní càháⁿ-gá, te váha-gá ní sadí-güedé yuhu-güedé.

Cuendá nchaa ñáyiú ndoto

(Mt. 22:23-33; Mr. 12:18-27)

²⁷ Te sátá dúcáⁿ te ní sáá ìⁿ úú cue téé cùu saducéú núú ndécú Jèsús. Te cue téé-áⁿ ñá túú sàndáá iní-güedé sá ndótó cuè ñáyiú ní xihí, te ní xáhaⁿ-güedé xii-gá:

²⁸ —Mèstrú, ndíi Moisés càchí ndíi núú tütú ndècu vitna sá nüú ìⁿ téé na cùú, te quendóo ñadìhí-dé te ñá túú dèhe-dé ní xöö ndihí-aⁿ, te téé cùu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndihí-aⁿ cuendá ñaní-dé téé ní xihí-áⁿ. ²⁹ Te ní xindecu úsá tnahá cue téé mee-ni ndí ñaní-güedé. Te téé díhna ní níhí ñadìhí-dé, dico ñá túú ní cùdí-dé cundecu-dé chi ní xihí-dé, te ni ìⁿ déhe-dé ñá túú ní xöö ndihí ñadìhí-dé-áⁿ. ³⁰ Te téé cùu uú ní naqueheⁿ-dé ñaha ní quendóo quèé-áⁿ dico ní xihí tucu-dé, te ni ìⁿ tucu déhe-dé ñá túú ní xöö ndihí ñaha-áⁿ. ³¹ Te téé cùu uní ní naqueheⁿ tucu-dé ñaha ní quendóo quèé-áⁿ, te diu-ni ducaⁿ ní

xihí-dé, te ní xínu ndí úsá-güedé ní cándeca ñaha-güedé xii ñaha-áⁿ, dico ni ìⁿ-güedé ñá túú ní xöö déhe-güedé ndihí-aⁿ, te ní ndihí-güedé ní xihí. ³² Te ndéé núú ní ndihí-ná ní xihí tnahá ñadìhí-áⁿ. ³³ Te na sàá nduu ndòto-güedé ndihí ñaha-áⁿ ¿Te ndédacàa-güedé ñadìhí-güedé cuu-aⁿ-i? Chi ndí úsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchaa ñáyiú ñuyíú-a tñandahá-yu.

³⁵ Dico nchaa ñáyiú ní nduu táhú ndoto díhna nuu ñáyiú-áⁿ cundecú-yu ndihí Yá Ndiöxí ni caa ni quíhíⁿ, te yacáⁿ ñá túú-gá sá cándeca tnahá-yu. ³⁶ Te ni ñá túú-gá tnúhu xihí, chi cuu-ná-yu datná cue espíritú xínú cuèchi núú Yá Ndiöxí cuendá sá ní ndotó-yu, chi cùú-yu déhe-gá. ³⁷ Te ndéé ndíi Moisés ní chídó tnùní ndíi núú tütú ndíi sá ncháá ñáyiú ní xihí ndotó-yu, te diu-ni xíaⁿ càháⁿ-xi cuendá tnutàú nchìcúⁿ ñuhú, te diu-ni xíaⁿ càchí tucu-xi sá Yá Ndiöxí cúú-gá Ndiöxí ndíi Àbrahám, ndíi Isàác, ndihí ndíi Jàcób. ³⁸ Te cue téé-áⁿ chi cuèi ní xihí-güedé sá cúú-xi nchòhó, dico sá cúú-xi Yá Ndiöxí chi ndècu vívú-ni-güedé. Chi cùttnuní iní-ó sá Yá Ndiöxí cúú-gá Ndiöxí mee-ni cuè ñáyiú xindecu vívú, te ñá túú cùu-gá Ndiöxí cue ñáyiú ñá túú ndècu vívú. Te sá cúú-xi mèe-gá chi nchaa ñáyiú ndècu ndihí-gá ndécú vívú-yu cuèi sa ní xihí-yu núú ñuyíú-a —càchí-gá xáhaⁿ-gá xii-güedé.

³⁹ Te ìⁿ téé dàcuaha ñaha xii ñáyiú nchaa tnúhu ní chídó tnùní ndíi Moisés ní xáhaⁿ-dè xii Jèsús:

—Mèstrú, váha-ni càháⁿ-n —càchí-dé xáhaⁿ-dè xii-gá. ⁴⁰ Te ñá túú-gá ní cùyí-güedé cacáⁿ tnúhú-güedé ni ìⁿ tnúhu núú-gá.

Yoo déhe-xi cùu Cristú

(Mt. 22:41-46; Mr. 12:35-37)

⁴¹ Te Jèsús ní xáhaⁿ-gá xii-güedé:

—¿Te nása càchí-tu-yu sá Crìstú Yaá tendaha Yá Ndiöxí quixi ñuyíú-a cùu-gá déhe ndíi Dàvíí? ⁴² Te mee ndíi Dàvíí-áⁿ ní cachí ndíi núú librú Salmú:

Dútú Ndiöxí ní xáhaⁿ-gá xii Yaá cúú Xìtohó-í: “Ngóo xio cùha-í,

43 te yúhú cada-í te nchaa sá cúu ùhú iní ñáhá xii-n canehe-xi sá yíñùhu núu-n.”

Duha ní xáhaⁿ Dütú Ndiõxí xii Yaá cúu Xitohó-í cächí ndii núu librí Sãlmú. 44 ¿Te nása cùu Cristú déhe ndii Dàvií, te mee ndii ní cachí ndii sá cúu-gã Xitohó ndii-i? — cächí Jèsús xáhaⁿ-gã xii-güedé.

Jèsús cãháⁿ-gã cuendá cue tée dàcuaha ñaha xii ñáyiu nchaa tnúhu ní chídó tnùnii ndii Moisés

(Mt. 23:1-36; Mr. 12:38-40; Lc. 11:37-54)

45 Te òré ndátnùhu Jèsús ndihi cue tée xica cuu ndihi-gã xíndedóho ñaha ñáyiu, te xáhaⁿ-gã xii-güedé:

46 —Cada cuendá-ndó vã cádá-ndó nãcuáa quide cue tée dàcuaha ñaha xii ñáyiu nchaa tnúhu ní chídó tnùnii ndii Moisés, chi tnàhá iní-güedé cuihnu-güedé dóo nání sã sácũhnu cue tée cùnuu. Te nchaa núu tàcá ñáyiu cuini-güedé sá ndihi tnúhu yíñùhu cáháⁿ ndihi ñàhá-yu xii-güedé, te nãcãxi-güedé xilé sãcõo nchihi cue tée cùnuu-gã xití veñúhu conchihi-güedé, te ducaⁿ-ni quide-güedé cuèi òré quihu-güedé mèsá caxi-güedé òré ndécú-güedé ìⁿ vico, chi mee-ni núu sãcõo cue tée cùnuu-gã cuini-güedé coo-güedé. 47 Te quèndeé-güedé vehe nchaa ñáyiu dihi ñáyiu quèé, te ío naha cãháⁿ ndihi-güedé Yã Ndiõxí cuendá cuini-güedé cáháⁿ váha-yu cuendá-güedé. Te sá dúcãⁿ quide-güedé te sáá nduu te ío-gã ndoho-güedé núu ùhú núu ndàhú dàcúxí dàva-gã ñáyiu —cächí-gã xáhaⁿ-gã xii-güedé.

21

Díhúⁿ nduu táhú Yã Ndiõxí ní dáquëe ìⁿ ñaha ndàhú ñaha quèé

(Mr. 12:41-44)

1 Te Jèsús ní xiní-gã xití veñúhu xídáquëe cue tée cuica díhúⁿ nduu táhú Yã Ndiõxí xití alcanciá. 2 Te ní xiní-gã tnàhá ìⁿ ñaha ndàhú ñaha quèé ní dáquëe-aⁿ úu díhúⁿ còbrí, 3 te ní xáhaⁿ Jèsús xii cue ñáyiu xíndecu-áⁿ:

—Na cächí tnúhu ndáá-í xii-ndo sã ñàha ndahú ñaha quèé-a ío-gã nándihi díhúⁿ ní dáquëe-aⁿ xití alcanciá nduu táhú Yã Ndiõxí dàcúxí díhúⁿ ní dáquëe dàva-gã-yu. 4 Chi nchaa ñáyiu-áⁿ ní dáquëe-yu mee-nã sá ñi

ndóo-ná, dico ñaha quèé-a cuèi ndàhú-aⁿ dico ní dáquëe-aⁿ nihí díhúⁿ sã cuááⁿ-áⁿ sã caxí-áⁿ ní cùu —cachí-gã xáhaⁿ-gã xii-yu.

Jèsús cächí-gã sá ngóyó veñúhu

(Mt. 24:1-2; Mr. 13:1-2)

5 Te ìⁿ ùú ñáyiu xícháhaⁿ-yu cuendá veñúhu càhnu sá ío cùnuu sá ío vii càa nchaa yúu yíhí, ndihi cuendá nchaa sá ñi sãñaha táhú ñáyiu yíhí xití-xi. Te Jèsús ní xáhaⁿ-gã xii-yu:

6 —Sáá nduu te nchaa sá cúñùhu-ndo-a vã cùnduu-gã-xi dàtná cáá-xí vitna, chi ñi ìⁿ-gã yúu vã códo nchihi tnaha-gã-xi chi ndihi ngoyo —cächí-gã xáhaⁿ-gã xii-yu.

Nãcuáa cada-xi nduu ta cüyatni naa ñuyúu

(Mt. 24:3-28; Mr. 13:3-23)

7 Te cue tée xíndecu-áⁿ ñi xicãⁿ tnúhú-güedé núu Jèsús, te xáhaⁿ-güedé xii-gã:

—Mèstrú, ¿te ná nduu dùcaⁿ cada-xi ngoyo veñúhu, àdi nándi cùu sá cádá-xí cuendá cutnùnii iní-ndí sá sã ta cuyatni nduu ducaⁿ cada-xi-i? —cachí-güedé xáhaⁿ-güedé xii-gã.

8 Te Jèsús ní xáhaⁿ-gã xii-güedé:

—Ío quihi iní-ndó cùndecu-ndo, te vá dàhá-ndó mèe-ndo dandahú ñáhá ñáyiu xii-ndo. Chi ío cuéhé cue tée coo ñuyúu-a, te danàni-güedé méé-güedé dàtná nání-í te cachí-güedé: “Yúhú cúu-í Crístú Yaá ní tendaha Yã Ndiõxí véxi ñuyúu-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nãcuáa ní cáháⁿ-í”, duha cachí-güedé. Dico vá quèndáá iní-ndó, te ñi vá túhá-ndó-güedé.

9 Te òré ná nihí-ndó tnùhu sá titní nãcióⁿ xíñáá-güedé te dàva ñuu xíñáá-güedé ndi mèe-güedé, te vá yúhú-ndó chi dacuití sã dúcãⁿ càda-xi, dico vátá sàá-gã nduu nãa ñuyúu òré ducaⁿ càda-xi —cachí-gã xáhaⁿ-gã xii-güedé.

10 Te xáhaⁿ tucu-gã xii-güedé:

—Nchaa cue tée ìⁿ nãcióⁿ nãá-güedé ndihi cue tée ingá nãcióⁿ, te titní ñuu ngüíta-güedé nãá-güedé. 11 Te titní xichi ñuyúu ñihi vihi tnãa, te titní tucu xichi ñuyúu coo tnamá, te titní tucu xichi ñuyúu quixi

cuéhé, te titní núú sǎ cáda-xí àndiu, te yùhú ñáiyu.

12 Te òré cúmǎní-gǎ cada-xi nchaa nàcuáa càháⁿ-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedé xii-ndo quíhíⁿ xití veñúhu-güedé cada ndáá-güedé cuéchi-ndo, te chihi ñaha-güedé veaá xii-ndo, te candeca ñaha-güedé quíhíⁿ núú cuè téé cùnūu yindaha nacióⁿ àdi núú dàva-gá cue téé cùnūu sá cuendá-í. 13 Te òré ducaⁿ na càda ñaha-güedé xii-ndo, te òré-áⁿ tàú-xi cáháⁿ váha-ndo cuendá-í núú-güedé. 14 Te vá cání iní-ndó nūu nása cunduu tnúhu cúñaha-ndo xii-güedé cuendá cácu nihnu-ndo. 15 Chi yúhú dacàhu iní ñáhà-í xii-ndo tnúhu cúñaha-ndo xii-güedé, te taxi-í sá vǎtá quini tnúni-gá-ndó, te ni ñáiyu cùu úhú iní ñáhá xii-ndo vá nihí-gá-yu tnúhu cúñáhá-yu xii-ndo. 16 Te ndéé tǎtá-ndó, ndíhi ñaní-ndó, ndíhi cue ñáiyu cùu ñaní tnáhá-ndó, ndíhi cue ñáiyu càháⁿ ndíhi váha-ndo cuáha cuendá ñáhǎ-yu xii-ndo nūú cuè téé cùchiuⁿ, te dava-ndo càhni ñaha-güedé xii-ndo. 17 Te ío cuéhé ñáiyu cuu úhú iní ñáhǎ-yu xii-ndo sǎ cuendá-í. 18 Dico Yá Ndióxi ío coto ñaha-gǎ xii-ndo chi ndéé idi díquí-ndó còto-gá. 19 Te núu na càda ndee iní-ndó càncicúⁿ nihnu ñaha-ndo xii-í, te nduu táhú-ndó cùndecu-ndo ndíhi Yá Ndióxi ni caa ni quíhíⁿ.

20 Te nduu na quini-ndó ñùhu doco sandadú ni càndéé yuhu ñúú Jerusálén, te sa cutnùni iní-ndó sǎ sǎ ní cuyatni nduu dànaa-güedé ñúú-áⁿ. 21 Te dàvá-áⁿ nchaa ñáiyu xǐndecu distritú Jùdeá xíni ñùhu-xi cunú-yu quíhíⁿ-yu xití yucu, te nchaa ñáiyu xǐndecu ñúú Jerusálén queé-yu xití ñúú-áⁿ, te ñáiyu ñá túú xǐndecu ñúú-áⁿ vǎ ndíhu-gá-yu. 22 Chi dàvá-áⁿ cuu-xi nduu tnúndòho tnúhu ndàhú, te ducaⁿ càda-xi chi ducaⁿ ndéé tnuni núú tütú Yá Ndióxi nàcuáa dandòho ñaha-gá xii-yu. 23 Te ndàhú ní cuu nchaa ñáiyu ñíhí ñúhú dèhe-xi, ndíhi nchaa ñáiyu ndéca déhe vitna sàdi na sáá nduu dùcaⁿ cada-xi! Chi ío cuéhé tnúndòho tnúhu ndàhú coo núú ndécú-yu dàvá-áⁿ, te xǎⁿ cuu-xi ñíhí tnúndòho tendaha Yá Ndióxi quixi sá cúú-xí-yu. 24 Te dava cue téé cuú-güedé cahni ñaha-güedé,

te dava-güedé tñi ñaha-güedé candeca ñaha-güedé quíhíⁿ nchaa ñúú xícá, te cue téé dava-gá ñúú cunūu-güedé ñúú Jerusálén, te mee Yá Ndióxi cachí-gá te núu ná daha nduu cunūu-güedé ñúú-áⁿ.

Nàcuáa cada-xi òré quixi tucu Téé cùu ñaní tnáhá cuè ñáiyu

(Mt. 24:29-35, 42-44; Mr. 13:24-37)

25 Te cada-xi ñíhí sá vǎtá quini-gá ñáiyu núú nchícanhii, ndíhi núú yóó, ndíhi núú nchàa chódíni, te ñuyíú-a coo tnúhu ndíhú iní-xi te vá cutnùni iní-yu nása cáda-yu cuendá sá ío dusaⁿ càda ndute lamár òré candaundéé tnáhá-xí. 26 Te nchaa ñáiyu cuneé-yu sá yùhú-yu, ndíhi sá ndíhú iní-yu cuendá nchaa sá cáda-xí ñuyíú-a, te quidi-xi àndiu. 27 Te sǎtá dúcáⁿ te quini-ndó yùhú Téé cùu ñaní tnáhá-ndó nchàa-ndo quee-í àndiu quixi-í ichi xití vícò, te dàvá-áⁿ quini ñáhá nchàa ñáiyu sá ío cùnūu-í te ndàcu-í quide-í nchaa sá vǎha. 28 Te òré ná ngüita-xi ducaⁿ càda-xi, te cuita cundee-gǎ iní-ndó quíhíⁿ, te quíhi iní-ndó chi sa ní cuyatni víi-nǎ nduu cácu nihnu-ndo vǎ cùndecu-gá-ndó nūú ñuyíú yícá cuéchi-a — càchí-gá xáhaⁿ-gǎ xii-güedé.

29 Te ní cani-gá ñíhí cuendú núú-güedé nàcuáa tecú tnuni váha-güedé tnúhu-gá, te xáhaⁿ-gǎ xii-güedé:

—Chí cùndèhe yutnu ngúxi ndíhi nchaa dava-gá yutnu. 30 Chi nàtahú ndaha-xi, te òré ducaⁿ quide-xi te càchí-ndó sǎ sǎ ní cuyatni nuu cahni. 31 Te diu-ni ducaⁿ sǎtnahá-xi cùu oré ná quini-ndó càda-xi nchaa nacuáa càháⁿ-í, te sá dúcáⁿ te cutnùni iní-ndó sǎ sǎ ní cuyatni nduu ndíhu ndaha ñaha Yá Ndióxi xii-ndo.

32 Te na càchí tnúhu ndáá-í xii-ndo sǎ òré vǎtá cúú-gá cue ñáiyu xǐndecu ñuyíú-a vitna, te cada-xi nchaa nàcuáa ní cáháⁿ-í. 33 Te àndiu ndíhi ñuyíú-a chi ndíhi nihnu-xi, dico tnúhu-í chi vá ndíhí nihnu-xi, chi cùu-xi tnúhu ndáá.

34 Te quíhi iní-ndó vǎ cùndecu-ndo ichi cuehé ichi duha, te vá cúú-ndó ñáiyu quíhu, te vá cúhúⁿ iní-ndó mèe-ni nchaa sá ío ñuyíú-a, chi núu ducaⁿ na càda-ndo te nacuanaa-ndo sǎ sáá nduu càda-xi nacuáa ní cáháⁿ-í. Te uuⁿni sáá nduu-áⁿ, 35 te cada-xi dàtná cuini-ndó quide ñíhí

trampá chi uuⁿni ngáva-xi, te ducaⁿ càda-xi nchaa ñáyiú xĩndecu ñuyíú-a, chi uuⁿni sáá nduu-ãⁿ. ³⁶ Te nchòhó cundecu túha-ndo te ío cáháⁿ ndihí-ndo Yã Ndiõxí cuendá ndacu-ndo yãha-ndo nchaa tnúndòho quixi ñuyíú-a, te ducaⁿ te nasáá-ndó cundecu-ndo núú ndécú yùhú Tée cùu ñaní tnáhá-ndó nchaa-ndo —cachí-gá xáhaⁿ-gã xii-güedé.

³⁷ Te nduu ndùu ní xóo danèhé Jèsús ñáyiú tnúhu-gá xití veñúhu càhnu sá ïo cùnùu, te niú niú ní xóo quíhíⁿ ngúdú-gá xití yucu Òlívú. ³⁸ Te nehé nehé ní xóo quíhíⁿ nchaa ñáyiú veñúhu-áⁿ ñí xóo cund-edóho-yu nchaa tnúhu càháⁿ-gá.

22

Ndùcu-güedé nàcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnáhá vico pascuá, te vico-áⁿ xéxí ñáyiú pàá sá ñà túú yìhi levadurá. ² Te cue téé cùu dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedé nàcuáa cada-güedé cahni-güedé Jèsús, te dícó-ni sá xiyùhú-güedé ñáyiú.

³ Te yucu ñávãha ní dácáhu ìní ñáhá-xí xii té Jüdás déhe té Iscarioté, te núú tnáhá téé-áⁿ cúú ùxúú tnáhá cue téé xica cuu ndihí-gá ní cùu. ⁴ Te té Jüdás-áⁿ ñí sáháⁿ-dé ní ndatnúhu-dé ndihí cue téé cùu dútú cùnùu, ndihí cue téé tàxi tnuní ñáhá xii cue téé quide cuendá veñúhu nàcuáa cada-dé cuáha cuendá-dé Jèsús núú-güedé. ⁵ Te ío ní cudíí ìní-güedé, te ní xáhaⁿ-güedé xii-dé sá cuãñaha-güedé díhúⁿ, ⁶ te ní xáhaⁿ-dē sá cúú quèheⁿ-dé díhúⁿ-ãⁿ, te ní ngüíta-dé ndúcú-dē nàcuáa cada-dé cuáha cuendá-dé Jèsús núú-güedé òré ñã túú ñáyiú.

Cùdini Jèsús ndihí cue téé xica cuu ndihí-gá
(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sáá nduu ñí quesaha vico xexí-yu pàá sá ñà túú yìhi levadurá, te diu-ni nduu-ãⁿ sáhní-güedé ñⁿ mbëé líhli xéxí-yu. ⁸ Te Jèsús ní xáhaⁿ-gã xii té Pèlú ndihí té Juáá:

—Chí cuáháⁿ chi cada túha-ndo núú cùdini-o sacuaa nduu vico pascuá —càchí-gá xáhaⁿ-gã xii-güedé.

⁹ Te ní xicáⁿ tnúhú-güedé núú-gã, te xáhaⁿ-güedé xii-gá:

—¿Te ndéé cáá vèhe cuiní-n càda túha-ndí-i? —càchí-güedé xáhaⁿ-güedé xii-gá.

¹⁰ Te ní xáhaⁿ Jèsús xii-güedé:

—Chí cùndedóho na càchí tnúhu-í xii-ndo nàcuáa cada-ndo. Òré quihu-ndo xití ñúú núú quíhíⁿ-ndó, te naníhí-ndó ñⁿ téé tànehe ñⁿ yoó ndute, te téé-áⁿ candéndaha-ndo-dē quíhíⁿ, te núú ndēdacàa vehe na ndíhu-dé te xíaⁿ quíhu-ndo. ¹¹ Te cúñaha-ndo xii xitohó vehe-áⁿ: “Yaá cúú Mèstrú càchí-gá núú ndēdacàa xichi xití vehe-n cuãñaha ñúu-n xii-gá cùdini-gá ndihí cue téé xica cuu ndihí-gá sacuaa nduu vico pascuá”, duha cúñaha-ndo. ¹² Te dàtnùní danèhé ñáhá-dē xii-ndo ñⁿ quartú cáhnú càa núú ñínu, chí vehe yòdo tnaha cuu-xi, te sa ní quide túha-dé nchaa sá ná ndíhi, te nchòhó dícó-nã sá cùdini-o cada túha-ndo —càchí-gá xáhaⁿ-gã xii-güedé.

¹³ Te ní xica-güedé cuáháⁿ-güedé, te nchaa-ni nàcuáa ní xáhaⁿ Jèsús xii-güedé ní cuu, chí nchaa sa ndècu túha, te ní quide túha-güedé sá cùdini-güedé ndihí-gá sacuaa nduu vico pascuá-áⁿ.

¹⁴ Te sátá ñí tnahá òré cùdini Jèsús ndihí cue téé ní táuchíúⁿ-gã cáháⁿ tnúhu-gá núú ñáyiú, te cuánguìhu ndihí ñaha-gã xii-güedé mèsá. ¹⁵ Te xáhaⁿ-gã xii-güedé:

—¿Ducaⁿ-ni ïo sàni iní-í sá cùdini ndihí ñaha-í xii-ndo sàcuua nduu vico pascuá òré cùmãní-gã sáá nduu ndòho-í te cuú-í! ¹⁶ Te na càchí tnúhu-í xii-ndo sã vã dúhá-gã caxi ndihí ñaha-í xii-ndo ndùu vico pascuá, chí ndéé òré ná sáá nduu nàsáá-ndó núú táxi tnùní Yã Ndiõxí cundecu-o, te dàvá-áⁿ cada iní-ndó sã dàtná sá cáxí tùcu-o chí ío váha cuu iní-ó cundecu-o —cachí-gá xáhaⁿ-gã xii-güedé.

¹⁷ Te ní queheⁿ-gã ñⁿ vàsú ñúhú ndùdí ndéhé yoho yàha stilé, te ní ndacáⁿ táhú-gã núú Yã Ndiõxí, te dàtnùní ní xáhaⁿ-gã xii-güedé:

—Chí quèhéⁿ vàsú ñúhú ndùdí ndéhé yoho yàha stilé-a, te coho-ndo lùha luha

nchaa-ndo. ¹⁸ Te na cächí tnúhu tucu-í xii-ndo sã vítná-nã duha xihí ndihí ñaha-í xii-ndo ndúdí ndéhé yoho yaha stilé-a te vá cóhó ndihí ñaha-gá-í, dico na sãá nduu nãníhí tnáhá-ó nũú ndécú Tãtà-í Dútú Ndiöxí táxí tnùní-gá, te dàvá-án cada iní-ó sã dàtná sã cóhó ndihí ñaha tucu-í xii-ndo, chi ío cudí iní-ó —cächí-gá xáhaⁿ-gã xii-güedé.

¹⁹ Te sátá nĩ túhú cóhó-güedé ní cudíni-güedé, te ní queheⁿ-gá pãá te ní ndacáⁿ táhú tucu-gá núú Yã Ndiöxí, te dàtnùní ní táhú cuèchi-gá, te ní dácãhũ ñaha-gã xii-güedé, te xáhaⁿ-gã:

—Pãá-a cùu-xi datná yiqui cùnũ-í, chi cahni ñaha-güedé xii-í sã cuendá-ndó, te ducaⁿ-ni càxi-ndo paá-a cuendá ndacu iní ñáhá-ndó xii-í —cächí-gá xáhaⁿ-gã xii-güedé.

²⁰ Te ñu-ni ducaⁿ nĩ quide-gá ndihí vãsú ñúhú ndúdí ndéhé yoho yaha stilé, chi ní queheⁿ-gá te òré sãñaha-gã xii-güedé coho-güedé, te ní xáhaⁿ-gã:

—Ndudí ñúhú vãsú-a cada iní-ndó sã cúu-xí dàtná níñí-í sã catí òré cahni ñaha-güedé xii-í. Te sã dúcáⁿ catí níñí-í xíãⁿ cutnùní ndáá sã Yã Ndiöxí cada-gá ingá núú sã vãha sã cúu-xí-ndó.

²¹ 'Dico vítna chi iha tnáhá téé cuãha cuendá ñáhá xii-í núú cuè téé cùu úhú iní ñáhá yihí-dé mèsá. ²² Te yúhú Téé cùu ñaní tnáhá-ndó nchaa-ndo ñuhu ichi-í cuáháⁿ-í cuú-í dàtná ní cachí Yã Ndiöxí. ¡Dico ndáhú ní cuu téé ducaⁿ na cuãha cuendá ñáhá xii-í núú cuè téé cùu úhú iní ñáhá! —cächí-gá xáhaⁿ-gã xii-güedé.

²³ Te ní ngüíta-güedé ndúcú tnúhu núú tnáhá-güedé nũu ndéda càa-güedé ducaⁿ càda cuãha cuendá ñáhá xii-gá núú cuè téé cùu úhú iní ñáhá.

Xíndatnúhu-güedé ndédacàa-güedé cunuu-gã

²⁴ Te sátá dúcáⁿ te ní ngüíta-güedé xíndatnúhu-güedé nũu ndédacàa-güedé tàú-güedé cunuu-güedé. ²⁵ Dico Jèsús ní xáhaⁿ-gã xii-güedé:

—Nchaa cue téé yíndaha ñaha xii ñáyiu ío tàxi tnuní-güedé, te mee-güedé cuíní-güedé sã càháⁿ váha ñáyiu cuendá-güedé. ²⁶ Dico nchòhó vá dúcáⁿ càda-ndo, chi núu ñⁿ-ndo cùnuu te cada-ni-ndo sã ñà túú cùnuu-ndo, àdi cuu-ndo ñⁿ téé tàxi tnuní ñáhá xii cue téé xínu cuechi, te cada-ni-ndo sã cúu-ndó

ñⁿ téé xínu cuechi-án. ²⁷ Te vá cächí-ó sã téé xínu cuechi cunuu-gá-dé, chi téé quíhu mèsá cùnuu-gá-dé. Dico yúhú ndécú ndihí ñaha-í xii-ndo dàtná ñⁿ téé xínu cuechi.

²⁸ 'Te nchòhó ducaⁿ-ni ndècu ndihí ñaha-ndo xii-í, te tàyaha ndihí ñaha-ndo xii-í nchaa sã tàyaha-í véxi. ²⁹ Te Tãtà-í Dútú Ndiöxí ní cachí-gá sã táxí tnùní-í, te yúhú cächí-í xii-ndo sã sãá nduu te tnáhá-ndó tàxi tnuní-ndó. ³⁰ Te dàvá-án caxi-o coho-o càda-o núú táxí tnùní-í, te yacáⁿ ngüíta-ndo càda ndáá-ndó cuèchi ndi ùxúú xichi ñáyiu isràél —cächí-gá xáhaⁿ-gã xii-güedé.

Jèsús càháⁿ-gá sã té Pèlú cüñaha-dé xii ñáyiu sã ñà túú xini ñáhá-dé xii-gá

(Mt. 26:31-35; Mr. 14:27-31; Jn. 13:36-38)

³¹ Te Xítohó Jesucristú ní xáhaⁿ-gã xii té Xímú:

—Yòhó Xímú, cundedóho váha ñⁿ tnúhu na càháⁿ-í-a, chi dàtná cuíní-n quide táchi triú sàcáⁿ-xi duha sàcáⁿ-xi dácáⁿ, ducaⁿ quèsaha yucu ñávãha cada ñaha-xi xii-ndo. Chi coto ndeé ñáhá-xi xii-ndo te núu ndisa sãndáá iní ñáhá-ndó xii-í. ³² Dico yúhú xicáⁿ táhú-í núú Yã Ndiöxí cuendá-n, cuendá sã vã dáñá ndeé-n quíndáá iní ñáhá-n xii-í. Te òré ndixi túu iní-n sã ñà túú ní quide váha-n, te quíhíⁿ-n cuãha-n cuè téé cùndihí-n tnúhu ndee iní cuendá canchicúⁿ nihnu-ni-güedé ichi Yã Ndiöxí —cächí-gá xáhaⁿ-gã xii-dé.

³³ Te ní xáhaⁿ-dè xii-gá:

—Mèstrú, sa ndècu túha-í sã quíhíⁿ ndihí ñaha-í xii-n vècaá, àdi cuéi na cùu ndihí ñaha-í xii-n —cächí-dé xáhaⁿ-dè xii-gá.

³⁴ Te Jèsús ní xáhaⁿ-gã:

—Pèlú, na cächí tnúhu-í xii-n sã cùmání-gã cana ñⁿ líhi te úní xito càháⁿ-n núú ñáyiu sã ñà túú xini ñáhá-n xii-í —cächí-gá xáhaⁿ-gã xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gã xii-güedé:

—Te cutnähá ní tendaha ñaha-í xii-ndo nĩ sáháⁿ-ndó chiúⁿ-í, chi ñá túú ní cànehe-ndo nì ñⁿ sã cúhúⁿ díhúⁿ-ndó, te ni ñⁿ sã cúhúⁿ ndàchiuⁿ-ndo ñá túú ní cànehe-ndo. Te chí cächí tnúhu núú ío ñⁿ sã ní cùmání xii-ndo —cächí-gá xáhaⁿ-gã xii-güedé.

Te ní xáhaⁿ-güedé:

—Ñáhá, chi ni ñⁿ sã ñà túú ní cùmání xii-ndí —cächí-güedé xáhaⁿ-güedé xii-gá.

³⁶ Te ní xáhaⁿ-gǎ:

—Te vitna núu ndècu ndihi-ndo sá sácùhuⁿ díhúⁿ-ndó, àdi sá sácùhuⁿ ndachìuⁿ-ndo te canehe-ndo. Te núu ñá túú ndècu ndihi-ndo machití, te nadico-ndo dǒó tìcachi nihnu-ndo te cuaaⁿ-ndo. ³⁷ Te na càchí tñúhu-í xii-ndo sǎ dàcuítí sǎ yǎha-í nàcuáa càháⁿ-xi núú tútú Yǎ Ndiǒxí núú càchí-xi: “Íⁿ-ni nǐ quide ñaha-güedě xii-gǎ, ndihi cue téé ndècu cuéchi-xi”, duha càchí-xi núú tútú-gǎ. Te ñá díú-ní xiǎⁿ yáha-í chi nchaandi túhú nàcuáa càháⁿ-xi núú tútú-gǎ yáha-í —càchí-gǎ xáhaⁿ-gǎ xii-güedě.

³⁸ Te xǎhaⁿ-güedě:

—Mèstrú, iha ndècu úú machití —càchí-güedě xǎhaⁿ-güedě xii-gǎ.

Te ní xáhaⁿ-gǎ:

—Chí náví-nǎ yuhu-ndo, vá càháⁿ-gǎ-ndó —càchí-gǎ xáhaⁿ-gǎ xii-güedě.

Jèsús càháⁿ ndihi-gǎ Yǎ Ndiǒxí yucu Òlívú (Mt. 26:36-46; Mr. 14:32-42)

³⁹ Te Jèsús ní quee-gǎ cuáháⁿ-gǎ yucu Òlívú, chi ducaⁿ tñahí quide-gǎ. Te cue téé xica cuu ndihi-gǎ nchicúⁿ ñáhá-güedě xii-gǎ cuáháⁿ. ⁴⁰ Te òré ní quexìo-gǎ xiáⁿ, te ní xáhaⁿ-gǎ xii-güedě:

—Chí càháⁿ ndihi Yá Ndiǒxí cuendá sá vǎ dácàháⁿ ñáhá yùcu ñávǎha xii-ndo càda-ndo sá ñà túú tàú-ndó càda-ndo —càchí-gǎ xáhaⁿ-gǎ xii-güedě.

⁴¹ Te sátá dúcáⁿ te ní quee dìⁿ-gǎ tnuú-güedě cuáháⁿ-gǎ ìⁿ xio, te sa ñùnchií luha ní xica ndehe-gǎ núú ndécú-güedě, te xiáⁿ nǐ ngüíñí xítí-gǎ càháⁿ ndihi-gǎ Tǎtá-gǎ Dútú Ndiǒxí. ⁴² Te xáhaⁿ-gǎ:

—Táu, te núu dìcò cachí-n te taunihnu ñaha-n xii-í cuendá sá vǎ ndóhò-í ná sǎá òré, dico vá cáda-n nàcuáa càchí iní méè-í, chi cada-n nàcuáa càchí iní méé-n —càchí-gǎ xáhaⁿ-gǎ xii Tǎtá-gǎ Dútú Ndiǒxí.

⁴³ Te sátá dúcáⁿ te ní quexìo ìⁿ espíritú xínú cuèchi núú Yǎ Ndiǒxí ní sǎñaha-gǎ-xi tñúhu ndee iní xii-gǎ. ⁴⁴ Te òré súúní ndihú iní-gǎ, te uuⁿ-gǎ súúní nǐ yuhu nǐ iní-gǎ càháⁿ ndihi-gǎ Dútú Ndiǒxí, te tnéé-gǎ cáá dàtná cáá ñíñí te ngóyó núú ñúhú.

⁴⁵ Te sátá nǐ yáha ní càháⁿ ndihi-gǎ Tǎtá-gǎ Dútú Ndiǒxí, te ní ndacuíñí-gǎ

cuánuhú-gǎ núú nǐ dándǒo-gǎ cue téé-áⁿ, te òré ní nasáá-gǎ te xixídí-güedě cuendá sá ìo cuéhé tñúhu sàni iní-güedě cuendá-gǎ. ⁴⁶ Te xáhaⁿ-gǎ xii-güedě:

—¿Ná cuendá xidí-ndó? Chí ndácǒo, te càháⁿ ndihi-ndo Yǎ Ndiǒxí cuendá sá vǎ dácàháⁿ ñáhá yùcu ñávǎha xii-ndo càda-ndo sá ñà túú tàú-ndó càda-ndo —càchí-gǎ xáhaⁿ-gǎ xii-güedě.

Ní tñi-güedě Jèsús ndécá ñaha-güedě cuáháⁿ

(Mt. 26:47-56; Mr. 14:43-50; Jn. 18:2-11)

⁴⁷ Te càháⁿ dúcáⁿ-ní Jèsús ní quexìo vai cue téé, te ìⁿ téé xica cuu ndihi-gǎ nání Júdás cúnúu-dé yódó núu-dé núú-güedě ní quexìo ndéé núú-gǎ, te ní teyuhu ñaha-dé xii-gǎ, te núú tñahá téé-áⁿ cúú ùxúú cue téé xica cuu ndihi-gǎ. ⁴⁸ Te ní xáhaⁿ Jèsús xii-dé:

—Júdás, ¿te yòhó cuáha cuendá ñáhá-n xii yúhú Téé cùu ñaní tñahá-ndó nchàa-ndo núú cuè téé cùu úhú iní ñáhá xii-í càháⁿ-n núu duha tàyuhu ñaha-n-áⁿ? —càchí-gǎ xáhaⁿ-gǎ xii-dé.

⁴⁹ Te sátá nǐ xiní nchaa cue téé cùndihi Jèsús nàcuáa cùu cue téé ní quexìo-áⁿ, núú ní xicáⁿ tñuhú-güedě núú-gǎ, te xǎhaⁿ-güedě xii-gǎ:

—Mèstrú, ¿cùu nàá-ndí ndihi-güedě ndihi machití-a ñá? —càchí-güedě xǎhaⁿ-güedě xii-gǎ.

⁵⁰ Te ìⁿ-dé ní xehndé-ni-dé lóho xio cùha ìⁿ cue téé ní quexìo-áⁿ, te téé-áⁿ xínú cuèchi-dé núú dütú cúnúu-gǎ, te ní quen-deé duuⁿ lóho-dé. ⁵¹ Te Jèsús ní xáhaⁿ-gǎ xii-güedě:

—Chí dáñá-güedě, vá dúcáⁿ càda-ndo —càchí-gǎ xáhaⁿ-gǎ xii-güedě.

Te ní dácàá-gǎ ndaha-gǎ ní tendaha-gǎ núú nǐ xindeé lóho téé-áⁿ, te ní nduu váha dàtná-ni càa. ⁵² Te nchaa cue téé cùu dütú cúnúu, ndihi cue téé tàxi tñuní nchaa cue téé quide cuendá veñúhu sá ìo cúnúu, ndihi cue téé cùu sacuéhé núú ñǎyiu isràél, nchaa cue téé-áⁿ vèxi tñi ñaha-güedě xii-gǎ, te ní xáhaⁿ-gǎ xii-güedě:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécú-í, dàtná quidé-ndó ìⁿ ñadúhú quidé ñaha-ndo xii-í.

⁵³ Te ducaⁿ-ni nǐ xiní-ndó nǐ xindecu-í xití veñúhu càhnu sá ìo cúnúu ní xóo danéhé-í ñǎyiu, te ní lùha ñá túú ní cùu tñándeé

ñáhá-ndó xii-í òré-án, te vitna ní sáá òré ducaⁿ càda-ndo, te cada sácuihná nàcuáa cùu iní-xi —càchí-gá xáhaⁿ-gã xii-güedé.

Té Pèlú càháⁿ-dé núú ñàyiú sá ñà túú xini-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Te ní tñi-güedé Jèsús, te ndèca ñaha-güedé xii-gá cuáháⁿ vehe téé cùu dútú cùnùu-gá, te té Pèlú xica xica-ni nchicúⁿ ñáhá-dě xii-gá cuáháⁿ. ⁵⁵ Te òré ní quexìo-güedé xíáⁿ te ní dátñáhá-güedé ñuhú quehé vehe-án, te ní càndéé yuhu nùhú-án ñí ngóo teté-güedé, chi quide víxiⁿ-xi, te tñáhá té Pèlú ní ngóo teté ndihí ñaha-dě xii-güedé. ⁵⁶ Te xíáⁿ ndécú ñí xíchí xínú cuèchi vehe-án, te òré ní xini-xi nùcòo teté tñáhá té Pèlú, te ní ndacoto-xi núú-dě, te ní xáhaⁿ-xi xii-güedé:

—Tñáhá téé-a xica cuu ndihí-dé téé ndèca-güedé cuánguihu-áⁿ —càchí-xi xáhaⁿ-xi xii-güedé.

⁵⁷ Dico té Pèlú ñá túú ní nñuu-dé, te xáhaⁿ-dě xii-xi:

—Yúhú ñá túú xini-í téé-áⁿ —càchí-dé xáhaⁿ-dě xii-xi.

⁵⁸ Te tna tnaa-ni ní cuu, te ní xini ñáhá tucu ñí-dé, te xáhaⁿ-dě:

—Yòhó tñáhá-n xica cuu ndihí-n téé ndèca-güedé cuánguihu-áⁿ —càchí-dé xáhaⁿ-dě xii-dé.

Dico té Pèlú ní xáhaⁿ-dě:

—Ñáhá, ñá díú yúhú xicá cùu ndihí-í-dé —càchí-dé xáhaⁿ-dě.

⁵⁹ Te sa ní cuu dátñá ñí òré te càchí tucu ingá-dé:

—Ndáá sá téé-a xica cuu ndihí-dé téé ndèca-güedé cuánguihu-áⁿ, chi tñáhá-dé cúú-dě téé distritú Galiléa —càchí-dé xáhaⁿ-dě xii-güedé.

⁶⁰ Te té Pèlú ní xáhaⁿ-dě xii téé-áⁿ:

—Yúhú ñá túú cùnùní iní-í nása ndùu tñuhu càháⁿ-n —càchí-dé xáhaⁿ-dě.

Te ni vátá xñu ducaⁿ-gã tñuhu càháⁿ-dé ní cana-ni ñí líhi. ⁶¹ Te Xitohó Jesucristú ní nchócótó-gã núú-dě, te òré-ni-áⁿ ñí ndacu iní-dé tñuhu ní xáhaⁿ-gã xii-dé sá cùmání-gã cana ñí líhi, te úní xito cáháⁿ-dé sá ñà túú xini ñáhá-dě xii-gá. ⁶² Te té Pèlú ní quee-dé tnuú-güedé cuáháⁿ-dé ñí xio, te ní ndáhyú víhí-dě ní ndixi cuéchi iní-dé.

Cùdiquí ndeé-güedé Jèsús
(Mt. 26:67-68; Mr. 14:65)

⁶³⁻⁶⁴ Te cue téé ndèé ñáhá xii Jèsús ní cudíquí ndeé ñáhá-güedé xii-gá, te ní dádáhu-güedé núú-gã, te ní caniha-güedé xii-gá, te xáhaⁿ-güedé:

—¡Cáháⁿ ná cótó yòo ní caniha xii-n! —cachí-güedé xáhaⁿ-güedé xii-gá.

⁶⁵ Te cuéhé víhí-gã tñuhu cuéhé ní xáhaⁿ-güedé xii-gá.

Jèsús ndécú-gã jündá
(Mt. 26:59-66; Mr. 14:55-64; Jn. 18:19-24)

⁶⁶ Te sátá ñí tñundaá, te ní tacá cue téé cùu sacuéhé nñú ñàyiú israhél, ndihí cue téé cùu dútú cùnùu, ndihí cue téé dàcuaha ñaha xií-yu nchaa tñuhu ní chídó tñùní ndí Moisés, te ndèca-güedé Jèsús cuáháⁿ núú cádá-güedé jündá, te òré ní quexìo-güedé ndihí-gá núú cádá-güedé jündá-áⁿ, te ní xáhaⁿ-güedé xii-gá:

⁶⁷ —Cuini-ndí cachí tñuhu-n xii-ndí nñu díu-n cùu-n Cristú Yaá ní tendaha Yá Ndiòxí véxi ñuyíú-a —càchí-güedé xáhaⁿ-güedé xii-gá.

Te ní xáhaⁿ-gã xii-güedé:

—Te núu na càchí-í sá díú-í cúú Cristú ñá, te ní vá quindáá iní-ndó, ⁶⁸ àdi te núu ñí sá ná càcáⁿ tñuhu-í núú-ndó, te ní vá càchí tñuhu-ndo, te ní vá dáñá ñàha-ndo. ⁶⁹ Dico vitna ní cuyatni nduu ngóo yúhú Téé cùu ñaní tñáhá-ndó nchaa-ndo xio cuha Dútú Ndiòxí Yaá ío cùnùu —cachí-gá xáhaⁿ-gã xii-güedé.

⁷⁰ Te dátñùní nchaa-güedé ní xicáⁿ tñuhú-güedé núú-gã, te xáhaⁿ-güedé xii-gá:

—¿Te yòhó cúú-n Dèhe Yá Ndiòxí te núu ducaⁿ vání? —càchí-güedé xáhaⁿ-güedé xii-gá.

Te ní xáhaⁿ Jèsús:

—Ndáá sá díú Dèhe-gá cúú-í dátñá càchí méé-ndó-áⁿ —càchí-gá xáhaⁿ-gã xii-güedé.

⁷¹ Te ní xitñaha-güedé:

—Ñá túú-gã xini ñuhu-xi cue téé cáháⁿ nñu ndáá sá ndècuéchi-dé àdi ñá túú ndècuéchi-dé chi yuhu mee-dě ní cáháⁿ-dé vitna ní xindedóho-o —càchí-güedé xitñaha-güedé.

23

Jèsús ndécú-gǎ núú tǎ Pilatú

(Mt. 27:1-2, 11-14; Mr. 15:1-5; Jn. 18:28-38)

¹ Te nchaa-güedé ní ndacuíñi-güedé, te ndéca-güedé Jèsús cuáháⁿ núú tǎ Pilatú, ² te núú tǎe-áⁿ ní ngüíta-güedé sàcáⁿ cuéchi-güedé cuendá-gá, te xǎhaⁿ-güedé:

—Ní naníhí-ndí tǎe-a dándahú-dé ñáiyu ñuú-ó, chi xǎhaⁿ-dǎ xii-yu sá vǎ chǎhu-gá-yu impuèstú xii té Cèsár tǎe ío cùnuu, te cǎchí-dé sá díú-dǎ cúú-dǎ Crístú Yaá ní tendaha Yǎ Ndiõxí véxi ñuyíú-a te yíndaha-dé ñáiyu cǎchí-dé —cǎchí-güedé xǎhaⁿ-güedé xii-dé.

³ Te té Pilatú ní xícáⁿ tnúhu-dé núú-gǎ, te xǎhaⁿ-dǎ xii-gǎ:

—¿Ndáá sá díú-n cùu-n tǎe yíndaha ñaha xii ñáiyu isràél-áⁿ? —cǎchí-dé xǎhaⁿ-dǎ xii-gǎ.

Te Jèsús ní xǎhaⁿ-gǎ xii-dé:

—Díu-í yíndaha-í-yu —cǎchí-gǎ xǎhaⁿ-gǎ xii-dé.

⁴ Te té Pilatú ní xǎhaⁿ-dǎ xii nchaa ñáiyu, ndíhi cue tǎe cùu dútú cúnùu:

—Yúhú cútñuní iní-í sá ñà túú ní ñⁿ cuéchi tǎe-a —cǎchí-dé xǎhaⁿ-dǎ xii-yu.

⁵ Dico níhi-gǎ ní cǎháⁿ-güedé, te xǎhaⁿ-güedé:

—Cǎchí-ndí sá ío dusaⁿ xíquide ñáiyu cuendá nchaa sá dánèhé ñáhá-dǎ xii-yu, te ní quesaha-dǎ ndéé distritú Galileá, te ní yáha-dé ñíhí distritú Júdeá dánèhé-dé ñáiyu, te vitna ní sáá-ni-tu-dé ndéé ndíha dǎnehé-dé-yu —cǎchí-güedé xǎhaⁿ-güedé xii té Pilatú.

Jèsús ndécú-gǎ núú tǎ Hèrodés

⁶ Te sá dúcáⁿ ñí tecú dóho té Pilatú ní cacu nehé-yu distritú Galileá, núu xǎáⁿ ní xícáⁿ tnúhú-dǎ núú-yu núu tǎe Galileá cúú-gǎ. ⁷ Te ní xǎháⁿ-yu sá díú tǎe yácáⁿ cúú-gǎ, núu xǎáⁿ ní na dàyáha ñaha-dǎ xii-gǎ ndaha té Hèrodés tǎe cùu gobiernú distritú Galileá chi nduu-áⁿ ndécú-dǎ tnáhá-dé ñuú Jerusalén-áⁿ. ⁸ Te òré ní xiní té Hèrodés-áⁿ Jèsús te ío ní cudíí iní-dé, chi ní cunaha dùcaⁿ-ni cuiní-dé quiní ñáhá-dǎ xii-gǎ te ñà túú tnáhí xiní ñáhá-dǎ xii-gǎ ní cùu, chi cuendá-ni tnúhu ñíhí-dé cuendá-gá, te ndètu-dé sáá ñⁿ nduu quiní ñáhá-dǎ xii-gǎ,

te cada-gǎ ñⁿ sá vǎ yǎo tnáhí ndàcu cada cundehe-dé ní sani iní-dé. ⁹ Te vǎi sá ñí xícáⁿ tnúhú-dǎ núú Jèsús, dico ní ñⁿ tnúhu ñà túú ní cǎháⁿ-gǎ. ¹⁰ Te xíaⁿ xíndecu tnáhá cue tǎe cùu dútú cúnùu, ndíhi cue tǎe dàcuaha ñaha xii ñáiyu nchaa tnúhu ní chídó tnùní ndíi Moisés, te cue tǎe-áⁿ sùúní ío iní-güedé sàcáⁿ cuéchi-güedé cuendá-gǎ.

¹¹ Te té Hèrodés ndíhi cue tǎe cùu sandadú-dé ñà túú ní cùu váha iní-güedé núú Jèsús, te ní cudíquí ndéé ñáhá-güedé xii-gǎ, te ní dácúhnu ñaha-güedé dóó vǎha xii-gǎ dàtná cáá dǎo sácúhnu cue tǎe sàquíndaha ñaha xii ñáiyu. Te dàtnùní té Hèrodés ní dánùhú ñáhá tucu-dé xii-gǎ ndaha té Pilatú.

¹² Te nduu-áⁿ ñí tnáhá tnúhu té Pilatú ndíhi té Hèrodés, chi cùu úhú iní tnáhá-güedé ní cùu.

Cǎchí-güedé sá cǎhni-güedé Jèsús

(Mt. 27:15-26; Mr. 15:6-15; Jn. 18:39-19:16)

¹³ Te té Pilatú ní nadatácá-dé nchaa cue tǎe cùu dútú cúnùu ndíhi dava-gǎ cue tǎe cùnuu, ndíhi nchaa ñáiyu ñuú-áⁿ, ¹⁴ te ní xǎhaⁿ-dǎ:

—Nchòhó ndécá-ndó tǎe-a véxi ní taxi cuendá-ndó-dǎ iha, te cǎchí-ndó sǎ ío dusaⁿ quide ñáiyu cuendá nchaa sá dánèhé ñáhá-dǎ xii-yu, te núú-ndó ndùcu tnúhu-í núú-dǎ nùu ná ní quide-dé. Dico yúhú cútñuní iní-í sá ñà túú ní ñⁿ cuéchi-dé dàtná cǎháⁿ-ndó-áⁿ. ¹⁵ Te cuéi té Hèrodés díu-ni ducaⁿ cǎháⁿ-dé sá ñà túú cuéchi-dé nùu ní techiúⁿ ñaha tucu-dé cuándixi-dé iha. Te vitna sa ní cutñuní iní-ó sǎ ñà túú tàú-xi cǎhni-o-dǎ chi ñà túú cuéchi ní quide-dé.

¹⁶ Te na dǎndohó-ni-í-dé te dácácu-í-dé —cǎchí-dé xǎhaⁿ-dǎ xii-yu.

¹⁷ Te ndi tnáhá nduu víco pascuá te dacuítí sǎ dácácu té Pilatú-áⁿ ñⁿ cue tǎe yíhi vécáá, chi ducaⁿ tnáhí quide-dé. ¹⁸ Dico ncháá-yu ní cuáá-yu, te xǎháⁿ-yu xii-dé:

—¡Queñuhu tǎe nàni Jesús-áⁿ, te cǎhni-n-dǎ! ¡Te dácácu-n tǎ Barrábás! —cǎchí-yu xǎháⁿ-yu xii-dé.

¹⁹ Te té Barrábás-áⁿ ñí sanu ichi-dé ñáiyu ñuú íngá ichi, te ní ngüíta-yu ndíhi-dé ní cuu úhú iní-yu cue tǎe cúchiuⁿ, te ní sahani-dé ndíyi núu xǎáⁿ ní chihi ñaha-güedé vécáá xii-dé. ²⁰ Te té Pilatú cuiní-dé dácácu-dé Jèsús nùu xǎáⁿ cǎháⁿ ndíhi ñaha

tùcu-dé xií-yu ni cùu, ²¹ dico uuⁿ-gá níhi ní cuáá-yu, te ní xáhãⁿ-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xáhãⁿ-yu xii-dé.

²² Te xito cuu úní ní xáhaⁿ tẽ Pilatú:

—¿Te ná cúú cuèchi ní quide-dé te núu ducaⁿ cuíní-ndó càda-í-dé-i? Te yúhú cútnuní iní-í sá ñà túú cuèchi ní quide-dé núu xíãⁿ ñá túú tàú-xi cahni-o-dẽ, te na dàndoho-ni-í-dé te dàcácu-í-dé —càchí-dé xáhãⁿ-dẽ xií-yu.

²³ Dico níhi-ni càháⁿ-yu xáhãⁿ-yu sá ná càta caa ñaha-dé xii-gá núú cùrúxí, te ñáyiu-áⁿ ndihí nchaa cue téé cùu dútú cúnùu xicáhãⁿ níhi-güedé ndihí-yu ndéé ní xínu iní té Pilatú cada-dé nàcuáa càchí iní-yu. ²⁴ Te ní xáhaⁿ-dẽ xií-yu sá cúú càda-dé nàcuáa xáhãⁿ-yu. ²⁵ Te ducaⁿ te ní dácãcu-dé té Barrábás téé ní sanu ichi ñáyiu ñuú ingá ichi, te ñu-ni-dé ní sahani-dé ndíyí núu xíãⁿ ní xíhi-dé vecaá, te dàtnuní ní táuchíuⁿ-dẽ cada-güedé Jèsús nàcuáa xáhãⁿ-yu.

Sàta caa-güedé Jèsús núú cùrúxí

(Mt. 27:32-44; Mr. 15:21-32; Jn. 19:17-27)

²⁶ Te ndèca-güedé Jèsús cuáhãⁿ núú cátá càa ñaha-güedé xii-gá, te ichi cuáhãⁿ-güedé ndihí-gá ní tñi-güedé ñⁿ téé ñuú Cirené nání-dẽ Ximú ñúhú-dẽ ichi duha cuándixi-dé ní sáhãⁿ-dé yucu, te ní dácuidó ñaha-güedé xii-dé cùrúxí nchídó Jèsús, te ní ngüíta nchicúⁿ-dé sátá-gã.

²⁷ Te ío cuéhé ñáyiu nchicúⁿ ñáhã xii-gá cuáhãⁿ, te vãi ñáyiu ñihí ío níhi ndàhí-yu sá ndihú iní-yu cuendá Jèsús. ²⁸ Te Jèsús ní nchócótó-gã núu-yu, te ní xáhaⁿ-gã:

—Nchòhó ñáyiu ñihí ñuú Jerusalén, vá ndàhyú-ndó cuendá-í chí ndàhyú cuendá méé-ndó ndihí cuendá déhe-ndo. ²⁹ Chi sáá nduu quèsaha ñáyiu: “Sá vãha táhú nchaa ñáyiu ñá túú càcu déhe-xi, ndihí nchaa ñáyiu vátá quíní-gá cuhuⁿ déhe-xi, chi ni ñà túú xíní-yu dacadí-yu”, duha quesáhã-yu. ³⁰ Te dàvá-áⁿ cùñaha ñáyiu xii nchaa tñdúú ndihí nchaa núú xìquí: “Chí tácuⁿ ngónchihí ñaha-ndo xii-ndí”, duha cúñahã-yu. ³¹ Te núu yúhú téé quide ndáá duha quide ñaha-güedé xii-í vitna, te

ndèé-gá cada-güedé nchaa ñáyiu ndècu ichi cuehé ichi duha —càchí-gá xáhaⁿ-gã xií-yu.

³² Te ndèca tucu-güedé úú tñahá cue téé ndècu ndisa cuéchi-xi cuáhãⁿ cuendá cahni ñaha-güedé xii-güedé ndihí Jèsús. ³³ Te òré ní quexìo-güedé ndihí-gá ñⁿ xichi núu nání Yìqui Díquí Ndíyí, te xíãⁿ ní sata caa ñaha-güedé xii-gá núú cùrúxí, ndihí úú cue téé ndècu ndisa cuéchi-xi-áⁿ, te ñⁿ-dé ní sata caa-güedé xio cùha-gá te ingá-dé ní sata caa-güedé xio dàtni-gá ñu-ni núú cùrúxí tucu. ³⁴ Te ní xáhaⁿ-gã xii Tátã-gã Dútú Ndiõxí:

—Táu, cada càhnu iní sá quidé-güedé, chi ñá túú cùtnuní iní-güedé ná cúú sã quidé-güedé —càchí-gá xáhaⁿ-gã.

Te cue téé cùu sandadú ní xito ndéé-güedé núu ndèdacàa-güedé cuu cuendá-güedé dóó-gã. ³⁵ Te nchaa ñáyiu xíndecu-áⁿ ndéhẽ-yu nàcuáa quide-güedé Jèsús, te nchaa cue téé cùnùu ní cudíquí ndéé ñáhã-güedé xii-gá, te ní xítnaha-güedé:

—Te dava ñáyiu ní ndacu-dé ní dácãcu nihnu-dé, te vitna na dàcácu nihnu-dé méé-dẽ, te núu ndisa sá Crístú Yaá ní tendaha Yã Ndiõxí véxi ñuyú-a cùu-dé —càchí-güedé xítnaha-güedé.

³⁶ Te tñahá cue téé cùu sandadú ní cudíquí ndéé ñáhã-güedé xii-gá, chi ní sãndehe yatni-güedé núú táca-gã sãñaha-güedé ndudí íá còho-gá ní cùu, ³⁷ te ní xáhaⁿ-güedé xii-gá:

—Te núu yòhó cúú-n tẽe yìndaha ñaha xii ñáyiu israhél, te dàcácu nihnu mee-n —càchí-güedé xáhaⁿ-güedé xii-gã.

³⁸ Te ní taxi ndecu-güedé ñⁿ sá ndèé lètrã ndàa díquí-gã te ndèé úní núú tñùhu, tñùhu grìégú, ndihí tñùhu làtín, ndihí tñùhu hèbreú, te duha quèe-xi ndi nuní núú tñùhu-áⁿ “Téé-a cùu-dé téé yìndaha ñaha xii ñáyiu israhél”, duha quèe-xi.

³⁹ Te ñⁿ téé ndècu ndisa cuéchi-xi, téé ní sata caa-güedé ñiñi-gá xìcuèhé ñáhã-dẽ xii-gã, te xáhaⁿ-dẽ:

—Te núu yòhó cúú-n Crístú Yaá ní tendaha Yã Ndiõxí véxi ñuyú-a, te dàcácu nihnu mee-n, te dàcácu nihnu ñaha xii nchúhú tñahã-ndí tucu —càchí-dé xáhaⁿ-dẽ xii-gã.

40 Dico ingá tée cùndihí-dé tée tàcaa ingá xio òrè-gá ní tenàá ñáhá-dě xii-dé, te xáhaⁿ-dě:

—¿Te náa ñá túú ndàcu iní-n Yă Ndiöxí vitna duha càa-o ndoho-o ndihí tée nani Jesús-a ñă? 41 Chi nchoo tàú ndisa-o sá dúhá ndoho-o nacháhu-o cuèchi-o, dico Jèsús-a chi ñá túú cuèchi-dé —càchí-dé xáhaⁿ-dě xii tée tàcaa ndihí-dé-áⁿ.

42 Te dàtnùnì ní xáhaⁿ-dě xii-gá:

—Jèsús, ndacu iní ñáhá-n xii-í òré ná quìxi-n taxi tnuní-n ñùyíú-a —càchí-dé xáhaⁿ-dě xii-gá.

43 Te Jèsús ní xáhaⁿ-gă:

—Na càchí tnúhu ndáá-í xii-n sã méi ndùu vitna cundecu ndihí ñaha-í xii-n nùú ñí nduu táhù-í cundecu-í —càchí-gă xáhaⁿ-gă xii-dé.

Ní xihí Jèsús

(Mt. 27:45-56; Mr. 15:33-41; Jn. 19:28-30)

44 Te òré ní cuu cuádava nduu. Te ní cunee nihí ñuyíú, te ducaⁿ-ni càa ní cuu ndéé caá únì sacuaa. 45 Chi ñá túú-gă ní dàyehé nchíanchii te ní ndátá dóó cúú còrtiná veñúhu càhnu sá ò cùnnu ní quée dava ndáá. 46 Te níhi ní cáháⁿ Jèsús, te xáhaⁿ-gă xii Tătá-gă Dútú Ndiöxí:

—Táu, naqueheⁿ cuendá-n espíritú-í —càchí-gă xáhaⁿ-gă xii Tătá-gă.

Te tnúhu-ná-áⁿ ñí cáháⁿ-gă te ní xihí-ni-gá.

47 Te òré ní xiní tée cùu capitáⁿ sá dúcáⁿ ñí cuu, te ní ndacu iní-dé Yă Ndiöxí, te ní cachí-dé:

—Sá ndáá ndisa sá tée-a cùu-dé ñí tée ío quide ndáá ndécú ñùyíú-a ní cùu —duha ní cachí-dé.

48 Te chitu ñáyiú ní tacá xíáⁿ chi cuíní-yu cundehé-yu nása cada-güedé Jèsús. Te sátá ñí yáha ní xiní-yu nàcuáa ní quide ñaha-güedé xii-gá, te ní ndihí-yu ní ndaca ta caní-yu pèchú-yu cuánuhú sá ndihú iní-yu.

49 Dico ndècu tnahá cue ñáyiú xiní tnahá ndihí Jesús, ndihí ñáyiú òrè ní chinchícúⁿ ñáhá xii-gá ndéé distritú Galileá, te ñáyiú-áⁿ xica-ni xíxínutní-yu xíndéhé-yu nchaa nàcuáa ní quide ñaha-güedé xii-gá.

Chindúxi-güedé Jèsús

(Mt. 27:57-61; Mr. 15:42-47; Jn. 19:38-42)

50 Te ndècu ñí tée ñuú Arimàtea nání-dě Chèé, te ñuú-áⁿ yíndèhu-xi distritú Jùdeá, te ío váha iní-dé te quide ndáá-dé núú Yă Ndiöxí, te tnahá-dé cúú-dě chiúⁿ te ní xíndecu-dé jùndá cue tée israhél. 51 Te ñá ní tnahá tnahí iní-dé nàcuáa ní cáháⁿ-güedé núú jùndá nàcuáa cada-güedé Jèsús. Te tée-áⁿ ndétú-dě sáá nduu ndihí ndaha ñaha Yă Ndiöxí xii-dé ndihí ñáyiú. 52 Te tée-áⁿ ñí sáháⁿ-dé núú tē Pilatú te ní xáhaⁿ-dě sá nùu vá cùndèe iní-dé dañá-dě chindúxi-dé yiqui cùñú Jèsús. Te tē Pilatú-áⁿ ñí sáha-dé tnúhu. 53 Te ní nunehe-dé yiqui cùñú-gá núú cùrúxí, te ní chidúcúⁿ-nduu-dé ñí dóó cuixíⁿ, te ní chihi-dé ñí yaú nchíí yiqui naha càva, te vátá yōo ñí-gă nguíndúxi yaú-áⁿ. 54 Te cùu-xi nduu vispré nduu ndètátú ñáyiú, núu xíquide túha-ná-yu sá cúú ingá nduu.

55 Te nchaa ñáyiú òrè ní chinchícúⁿ ñáhá xii Jesús ndéé distritú Galileá ndèndáhá-yu tē Chèé ní sáháⁿ núú nchíí yaú-áⁿ, núu ní xiní-yu nàcuáa ní sacáⁿ-dé yiqui cùñú-gá xití yaú-áⁿ. 56 Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndihí pomadá, te ní ndetátú-yu ingá nduu-áⁿ ñí quidé-yu nàcuáa càháⁿ tnúhu Yă Ndiöxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

1 Te ndumìngú nehé víhí-ní cuáháⁿ tucu ñáyiú òrè ní núú nchíí yaú ní chihi-güedé yiqui cùñú Jèsús, te nehé-yu nchaa sá sáháⁿ tnámí ñí quide túha-yu-áⁿ cuáháⁿ, te tnahá tucu ñí úú-gá tnahá òrè ní chihí-yu nchícúⁿ ñáhá xii-yu cuáháⁿ. 2 Te òré ní quexió-yu yuhu yaú-áⁿ te ní xiní-yu sá yúú ndèdí ñí xio-ná ndécú, 3 te ní quíhu-yu xití yaú-áⁿ, dico ñá túú-gă yiqui cùñú Jèsús yíhí. 4 Te ñá ní cùtnuní tnahí iní-yu ndéé ichi cuáháⁿ yiqui cùñú-gá, te ní xiní-yu úú espíritú xínú cuèchi núú Yă Ndiöxí xínutní-xi òrè ní yuhú-yu te ñá túú ní cùyíú-yu cundehé-yu cue espíritú-áⁿ, te cue espíritú-áⁿ ñí xáhaⁿ-xi xii-yu:

—¿Ná cuendá nándücu-ndo Jesús Yaa ndécú vívú núú yíndüxi ñáyiú ní xihí-í? ⁶ Te ñá túú-gã yiqui cùñú-gã ndécú ìha chi sa ní ndoto-gã, te chí dándàcu iní nàcuáa ní cáháⁿ-gã cútnàhá ní xíndecu-ndo ndìhi-gã distritú Galileá, ⁷ chí ní cachí-gã sá méé-gã cúú-gã ñaní tnáhá-ndó nchàa-ndo, te dacuítí cuãha cuendá ñáhá-güedé xii-gã núú cuè téé ndècu ichi cuehé ichi duha, te cata caa ñaha-güedé xii-gã núú cùrúxí, te núú cùrúxí-áⁿ cuú-gã dico nduu úní sá cùú-gã te ndoto-gã, duha ní cachí-gã xii-ndo.

⁸ Te òré-áⁿ ñí ndacu iní-yu tnúhu ní cáháⁿ Jèsús. ⁹ Te sátá dúcáⁿ te ní naquehén-yu ichi cuánuhú-yu, te ní caní-yu cuendú núú ndì úxí ñí cue téé ní táúchíúⁿ Jèsús cáháⁿ tnúhu-gã, ndìhi núú dàva-gã ñáyiú. ¹⁰ Te ñáyiú ducaⁿ nàha tnúhu cuánuhú núú-güedé-áⁿ cúú tã Màriá Magdaléná, ndìhi tá Juáná, ndìhi tá Màriá náná tã Jàcobó, ndìhi dava-gã ñáyiú dìhí. ¹¹ Dico cue téé-áⁿ ñí sani iní-güedé sá dicó cáhú iní-yu tnúhu xáhãⁿ-yu xii-güedé ñuu ñá túú ní sàndáá iní-güedé nàcuáa ní xáhãⁿ-yu.

¹² Dico té Pèlú ní quee-dé xínú-dé cuáháⁿ cuándéhé-dé yaú núú ñí chihi-güedé yiqui cùñú Jèsús, te ní sáá-dé te ní ngáundeyi-dé xító ñihni-dé xití yaú-áⁿ te ní xiní-dé sá méé-nã dóó ñí xiducúⁿ nuu-gã yúcu ñí xio, te ío ní cuñúhu-dé sá dúcáⁿ ñí cuu, te ní natñi-dé ichi cuánuhú-dé vehe núú xíndecu-güedé.

Ichi ñuú Emàús (Mr. 16:12-13)

¹³ Te dñu-ni nduu-ãⁿ ñúhú úú cue téé ní xica cuu ndìhi Jèsús ichi cuáháⁿ-güedé ñí ñuú nání Emàús, te sàcúhuⁿ-güedé dàtná úú òré ichi ndéé ñuú Jerusàlén, te ndéé ñuú Emàús. ¹⁴ Te ta ndàtnúhu-güedé cuáháⁿ nchaa nàcuáa ní cuu, ¹⁵ te nini dùcaⁿ xicáháⁿ-güedé, te Jèsús ní natnahá ñáhá-gã xii-güedé te ndèca tnaha-gã ndìhi-güedé cuáháⁿ. ¹⁶ Te cuèi ndèhe ñaha-güedé xii-gã dico dàtná ñí sá ndèdí núú-güedé, chí ñá ná quíni ñáhá-güedé xii-gã ní cùu. ¹⁷ Te Jèsús ní xicáⁿ tnúhú-gã núú-güedé, te xáhaⁿ-gã:

—¿Ná tnúhu xicáháⁿ-ndó ñùhu-ndo ichi núú ducaⁿ ío cùu ndiyí-ndó-í? —càchí-gã xáhaⁿ-gã xii-güedé.

¹⁸ Te ñí téé nàni Cleofás ní xáhaⁿ-dè xii-gã:

—¿Te ná cuendá nchaa ñáyiú íchí ñí sáá ñuú Jerusàlén xiní-yu nchaa nàcuáa ní cuu, te ñí dñi-ná yòhó ñá túú xiní-n-í? —càchí-dé xáhaⁿ-dè xii-gã.

¹⁹ Te ní xáhaⁿ-gã xii-güedé:

—¿Te ná ní cuu-í? —càchí-gã xáhaⁿ-gã xii-güedé.

Te ní xáhaⁿ-güedé xii-gã:

—Cuendá Jèsús téé ñuú Nazàrét càháⁿ-ndí, chí téé-áⁿ cúú-dé ñí téé càháⁿ tnúhu Yá Ndiòxí, te ío váha nduu tnúhu càháⁿ-dé ní cùu, te quide-dé sá vã yòo tnàhí ndàcu cada nacuáa cudíí iní Yá Ndiòxí ndìhi ñáyiú ní cùu. ²⁰ Te cue téé cùu dútú cúnúu, ndìhi cue téé cúnúu taxi tnuní ñáhá xii-ndí ní sáha cuendá ñáhá-güedé xii-dé núú tã Pilatú te ní sata caa ñaha-güedé te núú cùrúxí-áⁿ ñí xihí-dé. ²¹ Dico vitna sa ní cuu úní nduu sá ñí xihí-dé, te nchúhú ní sani iní-ndí sá tée-áⁿ dàcácu nihnu ñaha-dè xii nchúhú ñáyiú isràèl núú nchàa tnúndòho tnúhu ndàhú ndécú-ndí. ²² Dico ío cùñúhu-ndí cúú, chí ñí úú ñáyiú dìhí ní tuha ñaha xii-dé ndécú ndìhi-ndí ní sáháⁿ ngotó-yu ndéxuehe tàcuíhndá-gã yaú núú ñí chihi-güedé yiqui cùñú-dé, ²³ te ní nasáá-yu càchí-yu xii-ndí sá ñá túú-gã yiqui cùñú-dé yihí xití yaú-áⁿ. Te ní xiní-yu espíritú xínú cuèchi núú Yá Ndiòxí, te ní xáhaⁿ-xi xii-yu sá ndécú vívú-dé. ²⁴ Te sátá dúcáⁿ te ñí úú cue téé cùndìhi-ndí ní sáháⁿ ndéhé-güedé yaú-áⁿ, te ní xiní-güedé sá ndàá cúú-xí nchàa tnúhu ní cáháⁿ ñáyiú dìhí-áⁿ, dico ñá túú ní xiní-güedé téé-áⁿ —càchí-güedé xáhaⁿ-güedé xii-gã.

²⁵ Te Jèsús ní xáhaⁿ-gã xii-güedé:

—Ío cùmání sá xiní tnùní-ndó, chí ío cuèé sàndáá iní-ndó tnúhu ní cáháⁿ cue téé ní xóo cáháⁿ tnúhu Yá Ndiòxí ndéé sanaha! ²⁶ ¿Te náa ñá túú tau-xi sá ndóhó Cristú òré cùmáñi-gã sáá nduu ndàa-gã andíu núú ndécú Dútú Ndiòxí cundecu-gã-ã? —càchí-gã xáhaⁿ-gã xii-güedé.

²⁷ Te ní ngúita-gã xáhaⁿ-gã nàcuáa quèe-xi nchaa tnúhu càháⁿ-xi núú tütú Yá Ndiòxí cuendá-gã, te díhna-gã ní cáháⁿ-gã nàcuáa

ndùu nchaa tnúhu yòdo tnuní núú tütú ndí Moisés, te dàtnuní ní cáháⁿ-gá nàcuáa ndùu nchaa tnúhu yòdo tnuní núú tütú nchaa cue téé ní xóo cáháⁿ tnúhu Yá Ndiöxí ndéé sanaha.

²⁸ Te òré ní quexìo-güedé yuhu ñúú núú cuàháⁿ-güedé-áⁿ, te Jèsús ní quide-ni-gá sá yáha-gá quíhíⁿ-gá ingá xichi ni cùu. ²⁹ Dico ní cáháⁿ ndàhú-güedé núú-gã sá quèndòo-gá xíáⁿ ndetatú-gá ndíhi-güedé, te xáhaⁿ-güedé xii-gá:

—Quendóo ndíhi ñaha xii-ndí iha ndetatú-n chi sa ní cuaa, te tnavíi cundiquⁿ —càchí-güedé xáhaⁿ-güedé xii-gá.

Te xíáⁿ cáá ñⁿ vehe cuánguñhu-güedé ndetatú-güedé ndíhi-gá. ³⁰ Te òré sa yíhi-güedé mèsá ndíhi-gá cùdini ndíhi ñaha-güedé, te ní queheⁿ-gá pàá te ní ndacáⁿ táhú-gã núú Yá Ndiöxí, te ní táhú cuèchi-gá te dàtnuní ní dácãhñu ñaha-gã xii-güedé. ³¹ Te òré-áⁿ ñí naquiní ñáhá-güedé xii-gá ní cùu, dico uuⁿni ní ndóñúhú-gã. ³² Te ní xítñaha-güedé:

—Te ndáá sá sùúní cùdíí ìní-ó òré tá ndàtnúhu-o ndíhi Jesús véxi ichi, te ta dànehé ñáhá-gã xii-o nchaa nacuáa quèe-xi tnúhu càháⁿ-xi núú tütú Yá Ndiöxí —càchí-güedé xítñaha-güedé.

³³ Te ñá túú-gã ní xíndetu-güedé chi ndíhi-ni ní natnii-güedé ichi cuánuhú-güedé ñúú Jerusálén, te ní nasáá-güedé núú xíndecu ndi ùxí ñⁿ cue téé ní táúchíúⁿ Jèsús cáháⁿ tnúhu-gá, ndíhi dava-gá ñáyíu. ³⁴ Te cue téé xíndecu-áⁿ xáhaⁿ-güedé:

—Ndáá sá ñí ndoto Yaá cúú Mèstrú, chi ní xiní ñáhá tẽ Xímú —càchí-güedé xáhaⁿ-güedé.

³⁵ Te cue téé ní nasáá-áⁿ ñí caní-güedé cuèndú nàcuáa ní cuu ichi, ndíhi nàcuáa ní cuu ní naquiní-güedé Jèsús òré ní táhú-gã pàá ní dácãhñu ñaha-gã xii-güedé.

Jèsús ní quexìo-gá núú xíndecu cue téé ní xica cuu ndíhi-gá

(Mt. 28:16-20; Mr. 16:14-18; Jn. 20:19-23)

³⁶ Te càháⁿ dúcáⁿ-ní-güedé nàcuáa ní cuu ní quexìo Jesús ní ngúnutnii-gá ndéé tnuú-güedé, te xáhaⁿ-gã xii-güedé:

—Yá Ndiöxí chíndèe ñaha-gá xii-ndo ìo váha cùu ìní-ndó ndècu-ndo —cachí-gá xáhaⁿ-gã xii-güedé.

³⁷ Te da ní yùhú-güedé, te ní sani ìní-güedé sá dicó ñⁿ espíritú cúú sã ndéhé-güedé ní cùu. ³⁸ Dico Jèsús ní xáhaⁿ-gã xii-güedé:

—¿Ná cuèndá yùhú-ndó, te sàni ñⁿ sani úú ìní-ndó-í? ³⁹ Chí cùndèhe ndaha-í ndíhi sáhá-í te quiní-ndó nã ñíu-ni-í. Te chí téndàha ñaha xii-í te cundehe-ndo, te núu ñⁿ espíritú ndécú yìqui cuñú-xi dàtná ndécú ndíhi yùhú —càchí-gá xáhaⁿ-gã xii-güedé.

⁴⁰ Te sáta dúcáⁿ ñí xáhaⁿ-gã te ní dánhé ñáhá-gã xii-güedé ndaha-gã ndíhi sáhá-gã.

⁴¹ Te ío ní cuñúhu-güedé, te ní cudíí ìní-güedé sá ndécú-gã tnuú-güedé dico sàni ñⁿ sani úú ìní-güedé, te ní xáhaⁿ Jèsús xii-güedé:

—¿Ndècu ndíhi-ndo luha sá cáxí-ó ìha ñá? —càchí-gá xáhaⁿ-gã xii-güedé.

⁴² Te ní sáñaha-güedé xii-gá luha chácá ñí chíhó, ndíhi dítá ñúñú ñúhú ndúdí, ⁴³ te ní queheⁿ-gã te ndèhe-güedé ní xexi-gá. ⁴⁴ Te dàtnuní ní xáhaⁿ-gã:

—Nchaa sá ñí yáha-í-a cùu-xi sá ñí cachí tnúhu-í xii-ndo cùtnáhá ndécú ndíhi ñaha-gá-í xii-ndo, chi ní cachí-í sá dàcuítí cada-xi nchaa nacuáa càháⁿ-xi núú tütú ndí Moisés, ndíhi núú tütú ndéé tnúhu ní cáháⁿ cue téé ní xóo cáháⁿ tnúhu Yá Ndiöxí ndéé sanaha, ndíhi núú libré Sãlmú —càchí-gá xáhaⁿ-gã xii-güedé.

⁴⁵ Te òré-áⁿ ñí sáñaha-gã sá xiní tnùní-güedé, te ní tecú tnùní-güedé nchaa tnúhu càháⁿ-xi núú tütú Yá Ndiöxí. ⁴⁶ Te ní xáhaⁿ-gã xii-güedé:

—Ducaⁿ ndéé tnuní núú tütú Yá Ndiöxí sá dàcuítí sã yùhú Crístú cuú-í, te nduu úní ndoto-í. ⁴⁷ Te ñíhí ñuyú cùtènuu tnúhu ní cáháⁿ-í, dico díhna nuu-gã ñúú Jerusálén ngüíta-yu cacunehe ñáhá-yu xii-í, te cáháⁿ-yu nàcuáa ní dánhé-í-yu, te cùñáhá-yu xii cue ñáyíu sá ná dándixi túu-yu ìní-yu sá ñã túú quide váha-yu, te dàñá-yu nchaa ichi cuèhé ichi duha ndécú-yu, te natnii-yu ichi Yá Ndiöxí, te ducaⁿ te cada càhnu ìní-gá nchaa yíca cuèchi-yu. ⁴⁸ Te vitna nchòhó cuu-ndo cue téé cáháⁿ ndáá nchaa nàcuáa ní cuu chi ní xiní núú-ndó. ⁴⁹ Te yùhú tendaha-í Espíritú

Yă Ndiöxí quixi cundecu ndihi-ndo, chi ducaⁿ nĩ cachí-gá. Dico chí cundècu-ni ñuú Jerusàlén-áⁿ ndèé ná quèxio Espíritú Yă Ndiöxí ngúndecu ndihi-ndo cuèndá chindee ñàha-xi xii-ndo cada-ndo nchaa nacuáa ní cáháⁿ-í —càchí-gá xáhaⁿ-gá xii-güedé.

Jèsús cuánda-gá andiu
(Mr. 16:19-20)

⁵⁰ Te Jèsús ní queñuhu ñaha-gá xii-güedé ñuú Jerusàlén ndécá ñàha-gá cuáháⁿ ñuú Bètaniá, te xíaⁿ nĩ ndonehe-gá ndaha-gá núú nĩnu, te ní xícáⁿ táhú ñàha-gá xii-güedé núú Yă Ndiöxí. ⁵¹ Te sátá nĩ xícáⁿ táhú ñàha-gá xii-güedé núú Yă Ndiöxí, te ní quee-gá tnuú-güedé cuánda-gá andiu. ⁵² Te ní ngüíta-güedé ní cachí-güedé sá ïo càhnu cuu Jesús, te ní natni-güedé ichi cuánuhú-güedé ñuú Jerusàlén, te súní cùdíí ìní-güedé ñúhú-güedé ichi. ⁵³ Te nchaa nduu ní xíndecu-güedé veñúhu càhnu sá ïo cùnunu ní ndacáⁿ táhú-güedé núú Yă Ndiöxí, te ní cachí-güedé sá ïo càhnu cuu-gá. Duha ní cuu dàvá-áⁿ.

TNÚHU NÍ CHÍDÓ TNÛNÍ TÉ JUÁÁ

Déhe Yá Ndiöxí ní cuu-gá ññá yiu

1 Cùmání-gã ngáva ñuyúú, te sa ndècu ndihí Yá Ndiöxí Déhe-gá. Te ññá-ni x̄ccuu-gá. Te Déhe-gá-áñ ññá cuu-gá dàtná ññá tnúhu, chí ní cachí tnúhu-gá nàcuáa càa Tátá-gã Dútú Ndiöxí. 2 Te sa ndècu-gá ndihí Dútú Ndiöxí te ní ngáva ñuyúú. 3 Te ññá-ni tnúhu mee Dútú Ndiöxí ní cuu ní cadúha Déhe-gá nchaa sá ío ñuyúú. Te núu ñá túú Déhe-gá ñá, te ñá túú ñá coo ñuyúú-a ní cùu. 4 Te ññá-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o. 5 Te tnúhu-gá ní xité nuu-xi núú ndécú nchaa ñá yiu ññáhu ichi cuehé ichi duha. Te ñá yiu-áñ cùú-yu dàtná cue ñá yiu ndècu ññá núú nées, te ññá-ni-yu cachí iní-yu xocàní-yu tnúhu-gá dico vá ndácú-yu.

6-7 Te ní xindecu ññá té ní xínani-dě Juáá, te té-áñ ññá táuchíúñ Yá Ndiöxí sá càháñ-dé tnúhu-gá núú ñá yiu. Te ní xáhañ-dě xii-yu sá v̄xi Déhe-gá ñuyúú-a, te dandixi túu-gá iní-yu cuendá cutnùní iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. 8 Te ñá díú mée té Juáá ní dandixi túu-dé iní-yu cuendá cutnùní iní-yu nàcuáa ndùu cuendá Yá Ndiöxí, chí cuendá-ni ní xica cuu-dé ní càháñ-dé sá Déhe Yá Ndiöxí véxi-gá dandixi túu-gá iní-yu. 9 Te ndáá ndisa sá mée-gã dándixi túu-gá iní ñá yiu ñuyúú-a cuendá cutnùní iní-yu nàcuáa ndùu cuendá Yá Ndiöxí.

10 Te ní xindecu-gá ñuyúú-a, te ñá yiu ñuyúú-a ñá ní cùnùní iní-yu yoo cùu-gá, te ññá-ni mee-gã ní cadúha-gá ñuyúú-a ní quide-gá chiuñ ní táhú Dútú Ndiöxí. 11 Te ní quixi-gá ñuyúú ññá cadúha mee-gã, dico cue ñá yiu ñuyúú-a ñá ní cùu váha iní-yu núú-gã. 12 Dico davá-yu ní sándáá iní ñá há-yu xii-gá, te ní nduu táhú-yu ní nduu déhe ñaha Yá Ndiöxí xii-yu. 13 Te ñá túú ní ndùu déhe ñaha-gã xii-yu sá cùú-yu déhe ñá yiu ñuyúú-a, àdi sá ndécú tátá-yu, ñá ñá-yu chí mee Yá Ndiöxí ducañ ññá cuiní-gá cunduu sá ndúú dèhe ñaha-gã xii-yu.

14 Te Déhe-gá ní quixi túu-gá ñuyúú-a, te ní cuu-gá ññá yiqui cùúú ní xindecu ndihí ñaha-gã xii nchoo cuè ñá yiu ní xica cuu túu ndihí-gá. Te ní xini-ó sá ío càhnu cuu-gá cuendá sá ññá dìi díi-ni-gã cùú-gã Déhe Yá Ndiöxí, te ío cùndahú iní ñá há-gã chindèe ñaha-gã xii nchoo ñá yiu ndècu ñuyúú-a, te ío ndáá càháñ-gá. 15 Te duha ní càháñ té Juáá cuendá Déhe Yá Ndiöxí ní xáhañ-dě xii ñá yiu:

—Cuendá téé iha ní càháñ-í ndéé càni-gá ní cachí-í sá quixí ññá téé quixi. Te téé-áñ cùnùu-gá-dé, chí díhna-gá-dé sa ndècu-dé dàcùúxí yùhú —duha ní xáhañ-dě xii-yu.

16 Te ío váha iní Yáá-áñ chí xito ñaha-gã xii-o nchaa-o ññá nduu ññá nduu. 17 Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ñchi ñaha xii-o nacuáa cundecu-o, dico Déhe-gá Xitohó Jesucristú ní cachí-gá sá ío cùu iní ñá há Yá Ndiöxí xii-o. Te ní càháñ-gá nchaa dava-gá tnúhu ndáá. 18 Te ñá ññá ñá yiu xini túu-yu Yá Ndiöxí. Dico ññá dìi ní Déhe-gá Yáá ndécú ndihí-gá càchí tnúhu-gá nàcuáa càa-gá.

Té Juáá téé dàcuandute ñaha xii ñá yiu càháñ váha-dé cuendá Xitohó Jesucristú

(Mt. 3:11-12; Mr. 1:7-8; Lc. 3:15-17)

19 Te cue téé israhél ndécú ññá Jerusalén ní tendaha-güedé cue dútú ndihí cue téé cùu levítá cuháñ-güedé núú ndécú tē Juáá ndúcú tnúhu-güedé núú-dě ññá ná téé cùu-dé. 20 Te ní càháñ ndáá-dé ní xáhañ-dě xii-güedé:

—Yùhú, ñá díú Cristú Yáá ní tendaha Yá Ndiöxí véxi ñuyúú-a cùu-í —càchí-dé xáhañ-dě.

21 Te ní xáhañ tucu-güedé:

—¿Te yoo cùu yohó váíñ? ¿Á yohó cùu-n tē Èliás? —càchí-güedé xáhañ-güedé xii-dé.

Te ní xáhañ tē Juáá:

—Yùhú, ñá díú tē Èliás cùu-í —càchí-dé xáhañ-dě.

Te xáhañ tucu-güedé:

—¿Te yohó cùu-n tē ní cachí cue téé ndéé sanaha quixi càháñ tnúhu Yá Ndiöxí-áñ? —càchí-güedé xáhañ-güedé xii-dé.

Te ní xáhañ-dé:

—Ni ñá díú tē-áñ cùu-í —càchí-dé xáhañ-dě xii-güedé.

22 Te ní xáhañ tucu-güedé:

—¿Te ná tée cùu yohó váiⁿ?, cuèndá ducaⁿ nàcani tnúhu-ndí núú cuè tée ní tendaha ñàha xii-ndí véxi-ndí, te cáháⁿ duuⁿ-n núu ná tée cùu-n —cachí-güedé xàhaⁿ-güedé xii-dé.

²³ Te ní xáhaⁿ tẽ Juàá:

—Yúhú cùu-í tée xica cáháⁿ xití yucu nàcuáa ní cáháⁿ ndí Chàíá, chi ndí-áⁿ ní cachí ndí: “Chí dáñá ìchi cuehé ìchi duha ndècu-ndo te tñi-ndo ìchi váha, chi véxi Yaá ío cùnuu”, duha ní cachí ndí —càchí té Juàá xàhaⁿ-dẽ xii-güedé.

²⁴ Te cue tée ndècu tnúhu núú tẽ Juàá núu ná tée cùu-dé, cue tée-áⁿ ní tendaha ñàha cue tée cùu fariséú xii-güedé. ²⁵ Te ní xáhaⁿ tùcu-güedé xii té Juàá:

—¿Ná cuèndá dácuañdute-n ñáyiu te núu ñá díú Crístú cúu-n, te ni ñá díú tẽ Èliás, te ni ñá díú tẽ véxi cáháⁿ tnúhu Yá Ndiõxí cúu-n váiⁿ? —càchí-güedé xàhaⁿ-güedé xii-dé.

²⁶⁻²⁷ Te ní xáhaⁿ tẽ Juàá:

—Yúhú ní ngódó núu-í dácuañdute-í ñáyiu. Dico nchícúⁿ ñⁿ tée véxi, te tée-áⁿ cùnù-gá-dé dácúxí yùhú, chi yúhú cùu-í ñⁿ tée duuⁿ duuⁿ ñá túú tau nandaxi cuèdicó ñi chàu-dé dico quide-í chùuⁿ-dé. Te tée-áⁿ sa ñùhu tnahá-dé tnuú-ndó dicó-ni sá ñá túú xini-ndó-dẽ —càchí-dé xàhaⁿ-dẽ.

²⁸ Duha ní cuu ñuú Bètábará ñuú cáa ndàa ingá xio yúte Jordán, yacáⁿ ní xindecu té Juàá ní dácuañdute-dé ñáyiu.

Jèsús quidé càhnu iní-gá nchaa yíca cuèchi ñáyiu

²⁹ Te nduu tnèé ní xini té Juàá Jèsús véxi yatni-gá núú ndécú-dẽ ndíhi ñáyiu. Te ní xáhaⁿ-dẽ xií-yu:

—Chí cündèhe tée-áⁿ, chi tée-áⁿ cúu-dẽ Crístú Yaá ní tendaha Yá Ndiõxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu ñuyíú. Te cùu-dé dàtná ñⁿ mbéé quiti ío váha iní-xi. ³⁰ Te ñuú tée-áⁿ ní cachí-í sá cànchícúⁿ-dé quixi. Te cùnuu-gá-dé dácúxí yùhú, chi díhna-gá-dé sa ndècu ní cachí-í xii-ndo. ³¹ Te ni yùhú ñá túú xini-í-dé ní cùu, dico xica cuu-í dácuañdute-í ñáyiu cuèndá nchaa ñáyiu isràel quini ñáhà-yu xii-dé —càchí-dé xàhaⁿ-dẽ xií-yu.

³² Te ní xáhaⁿ tùcu-dé:

—Ní xini-í Espiritú Yá Ndiõxí ní quee-xi andíu véxi cuuⁿ-xi ngúndecu ndíhi ñàha-xi

xii-dé, te dàtná cáa lõmá cáa Espiritú-áⁿ véxi cuuⁿ-xi. ³³ Te yúhú ñá túú xini-í-dé ní cùu, dico Yá Ndiõxí Yaá ní tendaha ñàha xii-í xicá cùu-í dácuañdute-í ñáyiu, Yaá-áⁿ ní cachí tnúhu-gá sá tée na quini-í ngúndecu ndíhi Espiritú-gá sá véxi cuuⁿ andíu, te tée-áⁿ taxi-dé Espiritú-gá cundecu ndíhi-o. ³⁴ Te yúhú ní xini-í-dé te xini ndáá-í sá Dèhe Dútú Ndiõxí cúu-dẽ. Te xiáⁿ càchí tnúhu-í xii-ndo —càchí té Juàá xàhaⁿ-dẽ xií-yu.

Cue tée díhna nuu xica cuu ndíhi Jèsús

³⁵ Te nduu tnèé-áⁿ ñuú-ni xiáⁿ ndécú tẽ Juàá ndíhi úú cue tée xica cuu ndíhi-dé. ³⁶ Te ní xini-dé Jèsús ñuhú-gá ìchi, te ní xáhaⁿ-dẽ xii cue tée xica cuu ndíhi-dé-áⁿ:

—Chí cündèhe tée-áⁿ, chi tée-áⁿ cúu-dẽ Crístú Yaá ní tendaha Yá Ndiõxí véxi ñuyíú-a. Te cùu-dé dàtná ñⁿ mbéé quiti ío váha iní-xi —càchí-dé xàhaⁿ-dẽ.

³⁷ Te sá dúcáⁿ ní cáháⁿ té Juàá núú cuè tée úú ndíhi-dé-áⁿ núu ní chinchícúⁿ-güedé Jèsús. ³⁸ Te ní nchócótó-gá ndàa sáta-gá, te ní xini-gá sá nchícúⁿ ñáhá-güedé xii-gá. Te ní xáhaⁿ-gá xii-güedé:

—¿Ná nánducu-ndo? —cachí-gá xáhaⁿ-gá xii-güedé.

Te ní xáhaⁿ-güedé:

—¿Ndèé ndécú-n, Ràbí? —càchí-güedé xàhaⁿ-güedé xii-gá.

Te Ràbí-áⁿ queé-xi Mèstrú tnúhu mee-güedé. ³⁹ Te ní xáhaⁿ Jèsús xii-güedé:

—Chí nèhé te quini-ndó —càchí-gá xáhaⁿ-gá.

Te ní xica-güedé cuáháⁿ-güedé, te ní quexio-güedé núú quidé vèhe-gá. Te ndècu-ni-güedé ndíhi-gá ní cuaa, chi dàtná òré caa cúmí sacuaa ní sáa-güedé.

⁴⁰ Te úú cue tée-áⁿ ní tñi-güedé tnúhu ní cáháⁿ té Juàá, te ní chinchícúⁿ-güedé Jèsús. Te núú úú cue tée-áⁿ, ñⁿ-dé nání-dẽ Ndríxí, te ñaní-dé cúu tẽ Xímú, àdi Pelú chi úú ñuú-dé. ⁴¹ Te té Ndríxí-áⁿ ní nanducu-ni-dẽ ñaní-dé te ní xáhaⁿ-dẽ:

—Ní naníhi-ndí tée cùu Mesías —càchí-dé xàhaⁿ-dẽ.

Te Mesiás-áⁿ queé-xi Crístú tnúhu mee-güedé, Yaá ní tendaha Yá Ndiõxí véxi ñuyíú-a. ⁴² Te ndèca té Ndríxí ñaní-dé cuáháⁿ núú ndécú Jèsús. Te òré ní xini ñáhá Jèsús xii té Xímú, te ní xáhaⁿ-gá:

—Yòhó cúú-n tẽ Xĩmú déhe té Jònás, te vitna danàni ñaha-í Céfás xii-n —càchí-gá xáhaⁿ-gã.

Te Céfás-ã quée-xí Pèlú tnúhu mee-güedë.

Jèsús ní cáháⁿ-gá té Lìpé ndihí té Natanàél

⁴³ Te nduu tnèé ní sani iní-gá quihíⁿ-gá distritú Galileá. Te ní naníhí-gã ñⁿ tée nani Lìpé, te ní xáhaⁿ-gã xii-dé:

—Néhé ná quihíⁿ-ó nũú quihíⁿ-í-a —càchí-gá xáhaⁿ-gã.

⁴⁴ Te té Lìpé-án cúú-dë tée ñuú Bètsaidá. Te ñu-ni ñuú yàcáⁿ cúú ñuú té Ndrìxí ndihí té Pèlú. ⁴⁵ Te té Lìpé ní naníhí tnáhá-dë ndihí té Natanàél, te ní xáhaⁿ-dë:

—Ní naníhí-ndí tée dii cuendú-xi ní chídó tnùní ndíi Moisés ndihí dava-gá cue tée ní xóo cáháⁿ tnúhu Yá Ndiõxí ndéé sanaha. Te tée-án nání-dë Jèsús déhe té Chèé, tée ñuú Nazàrét —càchí-dé xáhaⁿ-dë.

⁴⁶ Te ní xáhaⁿ tẽ Natanàél xii té Lìpé:

—¿Te náa ío váha càa ñuú Nazàrét nũu da yàcáⁿ quee tée cáháⁿ tnúhu Yá Ndiõxí? —càchí-dé xáhaⁿ-dë.

Te ní xáhaⁿ tẽ Lìpé:

—Néhé ná quihíⁿ-ó te quiní-n —càchí-dé xáhaⁿ-dë.

⁴⁷ Te òré ní xiní Jèsús té Natanàél tá cùyatni-dé cuáháⁿ, te ní cáháⁿ-gá cuendá-dé te ní cachí-gá:

—Tée véxi-ã cúú-dë mei tẽe isràél, te ñá ñⁿ ndùu dandahú-dé ñáyiú —càchí-gá xáhaⁿ-gã.

⁴⁸ Te ní xáhaⁿ tẽ Natanàél xii Jèsús:

—¿Te nása náquiní ñáhá-n? —càchí-dé xáhaⁿ-dë.

Te ní xáhaⁿ Jèsús:

—Yúhú sa ní xiní ñáhà-í xii-n òré ndécú-gã-n càha yutnu ngúxí-ãⁿ te ní tẽ Lìpé vátá caná ñàha-gá-dé xii-n òré-án —càchí-gá xáhaⁿ-gã xii-dé.

⁴⁹ Te sá dúcáⁿ ñí cáháⁿ-gá, núu ní xáhaⁿ tẽ Natanàél xii-gá:

—Mèstrú, yòhó cúú-n Dèhe Dútú Ndiõxí yíndàha-n ñáyiú isràél —càchí-dé xáhaⁿ-dë xii-gá.

⁵⁰ Te Jèsús ní xáhaⁿ-gã:

—Cuendá sá ñí xiní ñáhà-í xii-n càha yutnu ngúxí xiãⁿ iní ñáhá-n, dico cuéhé-gã núu sã quiní-n —càchí-gá xáhaⁿ-gã xii-dé.

⁵¹ Te ní xáhaⁿ tùcu-gá:

—Na càchí tnúhu ndáá-í sá sàá nduu, te quiní-ndó nàcááⁿ andiu. Te quiní-ndó cuè espíritú xínú cuèchi núú Yá Ndiõxí sá ndàa nuu-xi guide-xi núú cùndècu yúhú Tée cùu ñani tnáhá-ndó nchàa-ndo —cachí-gá xáhaⁿ-gã xii-güedë.

2

Vico tnãndaha ío ñuú Cànaá

¹ Te nduu úní sá dúcáⁿ ñí cuu te ní xóo ñⁿ vico tnãndaha ñuú Cànaá, ñⁿ ñuú yíndèhu distritú Galileá. Te yàcáⁿ ní xíndecu nãná Jèsús. ² Te tnáhá Jèsús ndihí cue tée xica cuu ndihí-gá ní cáháⁿ-yu cuáháⁿ-gá ndihí-güedë vico-án. ³ Te òré ní ndihí vínú, te ní xáhaⁿ nãná Jèsús xii-gá:

—Ñá túú-gã vínú ndécú ndihí-yu —càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Náá, ñá túú xini ñuhu-xi da yúhú cúñaha-n cuendá vínú-án, chi vátá tnáhá-gá òré quiní-yu yoo cùu yúhú —càchí-gá xáhaⁿ-gã xii-aⁿ.

⁵ Te ní xáhaⁿ-aⁿ xii ñáyiú xínu cuechi:

—Cada-ndo nchàa nacuáa na càháⁿ Jèsús —càchí-aⁿ xáhaⁿ-aⁿ.

⁶ Te yàcáⁿ nútñí íñú quídí yúú te quée dàtná ñⁿ ciendú lítrú ndute ñⁿ ñⁿ quídí-án. Te ndute-án nándíhí ñáyiú isràél ndáhá-yu te nàqueté-yu cóhó-yu chi ducaⁿ tnáhí quidé-yu nàcuáa sàndáá iní-yu Yá Ndiõxí. ⁷ Te ní xáhaⁿ Jèsús xii nchaa cue tée xínu cuechi:

—Nadachítú-ndó ndute ndí nchaa quídí-án —càchí-gá xáhaⁿ-gã xii-güedë.

Te ní nadachítú-güedë. ⁸ Te ní xáhaⁿ-gã:

—Vitna te tava-ndo lùha, te canehe-ndo quihíⁿ cuáha-ndo tẽe quide vico —cachí-gá xáhaⁿ-gã xii-güedë.

Te ducaⁿ ñí quide-güedë ní tava-güedë luha nèhe-güedë cuáháⁿ ní sáha-güedë tée quide vico. ⁹ Te ní xito ndéé tée quide vico-án, te sa ní nduu-xi vínú, te ñá túú ní xíní-dé ndéé véxi-xi, dico mee cuè tée xínu cuechi sa naha-güedë núú ñí tava-güedë. Ducaⁿ te tée quide vico-án ñí cana-dé tée tnãndaha. ¹⁰ Te ní xáhaⁿ-dë:

—Nchaa ñáyiú quide vico queñuhú-yu díhna-gá vínú váha. Te sa vati vínú váha xihí-yu, te dàtnúí queñuhú-yu vínú ndàhú. Te yòhó díhna-gá vínú ndàhú ní queñuhu-n,

te ndéé núú nǐ ndihi-ná ní queñuhu-n vǐnú váha —càchí téé quǐde vico-áⁿ xáhaⁿ-dě xii téé tnǎndaha-áⁿ.

11 Te sá nǐ nadatiu Jesús ndute-áⁿ nǐ nduu-xi vǐnú cúú-xí ìⁿ chiuⁿ díhna nuu sǎ vǎ yǒo tnǎhí ndàcu cada ní quǐde-gá ñuú Cànaá, ìⁿ ñuú yǐndèhu distritú Galileá, te chiuⁿ ní quǐde-gá-áⁿ cúú-xí ìⁿ chiuⁿ cahnu vihi, núu xiǎⁿ nǐ cutnùní iní-yu sá ìo càhnu cuu-gá, te ní sándáá iní ñáhá nchaa cue téé xìca cuu ndihi-gá.

12 Te sátá nǐ yáha vico, te ní xica Jèsús ndihi nǎná-gǎ, ndihi cue ñaní-gá, ndihi nchaa cue téé xìca cuu ndihi-gá cuáháⁿ-yu ñuú Capernaúm. Te yàcáⁿ ní xíndecú-yu ìⁿ ùú nduu ndihi-gá.

Jèsús ñá túú tnǎhá iní-gá nàcuáa quǐde ñáyiu xití veñúhu
(Mt. 21:12-13; Mr. 11:15-18; Lc. 19:45-46)

13 Te ta cùyatni cada ñáyiu isràél vico pàscuá, te ní xica Jèsús cuáháⁿ-gá ñuú Jerusálén. 14 Te sátá nǐ sáa-gá yàcáⁿ, te ní xica-gá cuáháⁿ-gá veñúhu càhnu sá ìo cùnuu, te xití veñúhu-áⁿ nǐ xiní-gá ndécú ñáyiu dìcò-yu ndicutu, mbéé ndihi lõmá, te tnǎhá ñáyiu dàma díhúⁿ núcòo-yu ní xiní-gá. 15 Te ní queheⁿ-gá ìⁿ ùú yoho, te ní cáunuu tnǎha-gá, te ní dáyùhu-gá ñáyiu ní queé-yu quehé veñúhu, ndihi ndicutú-yu ndihi mbéé-yu. Te cue ñáyiu dàma díhúⁿ-ǎⁿ ní dǎngòyo-gá díhúⁿ-yu, te ní dándùá-gá mèsá-yu. 16 Te ní xáhaⁿ-gǎ xii cue ñáyiu dìcò lõmá:

—¡Queñuhu-ndo nchàa quiti-a xití veñúhu-a! ¡Vá cádá-ndó vèhe núú yǎhu núú cúú vèhe Tàtá-í Dútú Ndiòxí! —càchí-gá xáhaⁿ-gǎ xií-yu.

17 Te xiǎⁿ ní ndacu iní cue téé xìca cuu ndihi-gá sá dúcáⁿ yòdo tnuní núú tütú-gá, te càchí-xi: “Ìo cùyica iní-í chi ñá cuìní-yu canehe ìi-yu vehe Tàtá-í”, duha càchí-xi núú tütú-gá.

18 Te ní xáhaⁿ cuè téé isràél xii-gá:

—¿Ná cúú sǎ vǎ yǒo tnǎhí ndàcu cada, cada-n cuèndá cutnùní iní-ndí sá cúú dùha taxi tnuní ñáhá-n xii-ndí-í? —càchí-güedé xáhaⁿ-güedé xii-gá.

19 Te ní xáhaⁿ Jèsús:

—Chí dǎngòyo veñúhu-a, te není xití úní nduu te sa nadaxínu-í —càchí-gá xáhaⁿ-gǎ xii-güedé.

20 Te ní xáhaⁿ tucu cue téé isràél:

—Údico ìñú cuíá nǐ xíndecuu-güedé ní sáa veñúhu-a, te yòhó cuìní-n nàdaxínu-n xití úní-ni nduu —càchí-güedé xáhaⁿ-güedé xii-gá.

21 Dico sá nǐ cáháⁿ-gá chi ñá díú cuèndá veñúhu ní cáháⁿ-gá chi cuèndá yiqui cùñú-gá ní cáháⁿ-gá. 22 Núu sátá nǐ xíhí-gá, te ní ndoto-gá, te òré-áⁿ nǐ ndacu iní cue téé ní xica cuu ndihi-gá nàcuáa ní cáháⁿ-gá, núu xiǎⁿ ní sándáá iní-güedé tnúhu yòdo tnuní núú tütú-gá. Te ducaⁿ te ní sándáá iní-güedé tnúhu ní cáháⁿ-gá.

Jèsús xiní-gá nàcuáa càa iní nchaa ñáyiu

23 Te òré ndécú Jèsús vico pàscuá, te ìo vǎi ñáyiu ní sándáá iní ñáhá xii-gá cuèndá ìo tǐtní sá vǎ yǒo tnǎhí ndàcu cada ní quǐde-gá ní xiní-yu. 24 Dico Jèsús ñá ní cáháⁿ-gá nchaa tnúhu ñuhu iní-gá, chi sa ní cutnùní iní-gá sá ñá túú cùu váha iní-yu. 25 Te ñá túú xini ñuhu-gá ìⁿ ñáyiu cúñaha nàcuáa càa iní nchaa tnǎha ñáyíu-yu, chi mee-gǎ sa nǎha ndáa-gá nàcuáa càa iní-yu ncháa-yu.

3

Jèsús ndihi té Nicòdemú

1 Ní xíndecu ìⁿ téé cùu fariséú ní xínani-dě Nicòdemú, te ní cuu-dé ìⁿ téé cùnuu núú ñáyiu isràél. 2 Te téé-áⁿ nǐ sáháⁿ-dé niú ní cáháⁿ ndihi-dé Jèsús, te ní xáhaⁿ-dě:

—Mèstrú, yúhú ndihi dava-gá-güedé sa nǎha-ndí sá Yǎ Ndiòxí ní tendaha ñaha-gá xii-n vèxi-n dǎnehé ñáhá-n xii-ndí, chi núu ñá túú Yǎ Ndiòxí ndécú ndihi-n, te vá ndácú-n càda-n nchaa sá vǎ yǒo tnǎhí ndàcu cada quǐde-n —cachí-dé xáhaⁿ-dě.

3 Te ní xáhaⁿ Jèsús:

—Na càchí tnúhu ndáa-í xii-n sǎ ncháa ñáyiu vá ná càcu saa tucu, te vá ndihu ndaha ñaha Yǎ Ndiòxí xií-yu —càchí-gá xáhaⁿ-gǎ xii-dé.

4 Te ní xáhaⁿ tǎ Nicòdemú:

—¿Te nása cada ìⁿ ñáyiu sa ní yii te cacu-ni tucú-yu? ¿Náa ndíhu tucú-yu xití nǎná-yu te cacu tucú-yu xito cùu uú-ǎⁿ? —càchí-dé xáhaⁿ-dě xii-gá.

⁵ Te ní xáhaⁿ Jèsús:

—Na càchí tnúhu ndáá-í xii-n sã nchaa ñáyíu na ndùu ndoo nduu nine iní-xi cuú-yu ñáyíu ní na càcu saa ndíhi ndute ndíhi Espíritú Yã Ndiöxí, ñáyíu-án ndíhu ndaha ñàha-gá xii-yu. ⁶ Te nchaa ñáyíu càcu ñuyíú-a, chi déhe ñáyíu ñuyíú-a cùú-yu. Te ñáyíu ní nduu ndoo ní nduu nine iní-xi, ñáyíu-án nĩ nduu táhũ-yu Espíritú Yã Ndiöxí te tàxi tnuní ñáhá-nã Espíritú-gá xii-yu. ⁷ Te vá cùñũhu-n tnũhu ní cáháⁿ-í-a, chi nchaa ñáyíu ní sándáá iní ñáhá xii-í ní nduu ndoo ní nduu nine iní-yu, te ñáyíu-án cùú-yu dàtná ñáyíu ní nacacu saa. ⁸ Táchí ndèni xiáⁿ tècú dóho-o xico-xi, dico ñá túú xini-ó ndéé ichi véxi-xi, te ní ñá túú xini-ó ndéé ichi cuáháⁿ-xi. Ducaⁿ sãtnahá-xi cùu Espíritú-gá ndécú ndíhi ñáyíu ní nduu ndoo ní nduu nine iní-xi —càchí-gá xáhaⁿ-gã xii-dé.

⁹ Te dàtnùní ní xicáⁿ tnúhú tùcu té Nicòdemú núú-gã, te xáhaⁿ-dè xii-gá:

—¿Te nása ndùu tnúhu càháⁿ-n dùcaⁿ caháⁿ-n? —càchí-dé xáhaⁿ-dè xii-gá.

¹⁰ Te ní xáhaⁿ Jèsús:

—Yòhó cúú-n ìⁿ tée cùtnuní iní-xi, chi dàcuaha-n ñáyíu isràél, ¿te ñá tècú tnùní-n tnũhu càháⁿ-í-u? ¹¹ Te na càchí tnúhu ndáá-í xii-n sã nchũhú càháⁿ-ndí ìⁿ sá nĩ tecú tnùní-ndí, te càháⁿ ndáá-ndí cuendá ìⁿ sá nĩ xini-ndí. Dico nchòhó ñá tècú tnùní-ndó tnũhu càháⁿ-ndí. ¹² Te ñá sándáá iní-ndó tnũhu càháⁿ-í cuendá nchaa nàcuáa cùu ñuyíú-a, te uuⁿ-gá cada-ndo nũu cáháⁿ-í cuendá nchaa nàcuáa cùu andíu.

¹³ Vá yõ ìⁿ sã andíu, te cani-xi cuendú nàcuáa càa. Chi ìⁿ dii díi-ni yúhú véxi cuuⁿ-í andíu, te cùu-í ñaní tnáhá-ndó nchaa-ndo. Te diu-ni yàcáⁿ ndaa-í cundecu-í. ¹⁴ Te dàtná ní ndanehe ndíi Moisés cóo nĩ sata caa ndíi-di xiti yucu, ducaⁿ càda ñaha-güedé cata caa ñaha-güedé núú cùrúxí xii yúhú Tée cùu ñaní tnáhá-ndó nchaa-ndo ìⁿ nduu, ¹⁵ te ducaⁿ yãha-í cuendá nchaa ñáyíu na quindáá iní ñáhá xii-í te nduu táhũ-yu cundecú-yu ndíhi Yã Ndiöxí ni caa ni quíhíⁿ —càchí-gá xáhaⁿ-gã xii-dé.

Yá Ndiöxí ío cùu iní-gá ñáyíu ñuyíú-a

¹⁶ Te Yá Ndiöxí ío cùu iní-gá ñáyíu ñuyíú-a. Te ìⁿ dii-ni Déhe-gá ndécú, te ní tendaha ñàha-gá ní quixi-gá ñuyíú-a, te

núu na quindáá iní ñáhá ñáyíu, te vá cuíta nihnú-yu, chi nduu táhũ-yu cundecú-yu ndíhi-gá ni caa ni quíhíⁿ. ¹⁷ Te Yá Ndiöxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyíu, chi ní tendaha-gã Déhe-gá ní quixi-gá sá dácacu nihnu-gá ñáyíu ñuyíú-a núú ùhú núú ndàhú.

¹⁸ Nchaa ñáyíu sándáá iní ñáhá xii Déhe-gá, te vá cuíta nihnú-yu. Te nchaa ñáyíu ñá túú sándáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sándáá iní-yu Déhe Dútú Ndiöxí. ¹⁹ Chi ní quixi Déhe-gá ñuyíú-a ní dándíxí tũu-gá iní-yu cuendá cutnùní iní-yu nàcuáa ndùu cuendá Yã Ndiöxí te tníⁿ-yu ìⁿ ichi váha ni cùu, te ñá ní tnáhá iní-yu, chi ní cudíⁿ-gã iní-yu nchaa sá cuèhé sá dúhá dácúxí sã vãha, núu xiáⁿ tá xita nihnú-yu cuáháⁿ. ²⁰ Te nchaa ñáyíu quide nchaa sá cuèhé sá dúhá ñã tnáhá iní-yu cutnùní iní-yu nàcuáa ndùu cuendá Yã Ndiöxí, te ñá tníⁿ-yu tnúhu-gá cuendá yùhú-yu nduu tnùní nchaa sá quidè-yu. ²¹ Te nchaa ñáyíu ñùhu ichi ndáá cuìní-yu cutnùní iní-yu nàcuáa ndùu cuendá Yã Ndiöxí, te cùtnuní sá chindèe ñaha-gá xii-yu, chi quide váha-yu.

Té Juàá tée dàcuandute ñaha xii ñáyíu càháⁿ váha tucu-dé cuendá Jèsús

²² Te sátá dúcáⁿ nĩ cuu, te ní quee Jèsús cuáháⁿ-gá ndíhi cue tée xica cuu ndíhi-gá distritú Jùdeá. Te yàcáⁿ ní xindecu tnaa-gá ndíhi-güedé ní xóo dacuandute-güedé ñáyíu.

²³ Te ndècu té Juàá ìⁿ xichi núú nání Ènón yatni ñuú Sàlém dácuaandute-dé ñáyíu, chi yàcáⁿ ío váha ñùhu ndute, núu xiáⁿ ní xóo quíhíⁿ ñáyíu yàcáⁿ ní xóo cuanduté-yu. ²⁴ Duha ní cuu cùtnáhá vátá ngává-gã té Juàá vecaá.

²⁵ Te ní cacu ìⁿ cuendú ní cáháⁿ cue tée xica cuu ndíhi té Juàá ndíhi ìⁿ úú cue tée isràél, núu ndèdacàa sá vãha-gá cada ñáyíu cuendá nduu ìⁿ-yu. ²⁶ Te ní sáháⁿ-güedé núú ndécú tè Juàá ní xáhaⁿ-güedé:

—Mèstrú, tée ní quixi núú nĩ xindecu-n ndàa ingá xio yúte Jòrdán, tée dii cuendú-xi ní cáháⁿ-n, tée-àⁿ dácuaandute-dé tnáhá-dé ñáyíu. Te ío vãi ñáyíu ní chinchícúⁿ ñáhá xii-dé —càchí-güedé xáhaⁿ-güedé xii-dé.

²⁷ Te ní xáhaⁿ tè Juàá:

—Te vá yõo ñⁿ ndàcu cada ñⁿ chiuⁿ nacuáa cuu váha iní Yá Ndiõxí, te núu ñá túú mèe-gá chindèe ñaha-gá xií-yu. ²⁸ Te nchòhó sa nàha-ndo sá yùhú ní cáhán ndáá-í sá ñà díú Crìstú cúu-í, dico mee Yá Ndiõxí ní tendaha ñaha-gá yódó nùu-í véxi núú Yáá-án. ²⁹ Te nchòhó xìní-ndó sã ñⁿ tée tnãndaha te xíchí tnãndaha ndihí-ná-dé cùndihí-dé. Te tée ní xica ndáhú ïo cùdíí ìní-dé ndèdóho-dé nchaa tnúhu càhán tée tnãndaha-án. Te ducaⁿ sãtnahá-xi cùu yùhú, chi ïo cùdíí ìní-í sá vái ñáyiu ta chinchícúⁿ ñáhá xii Jesús cuáhán. ³⁰ Te uuⁿ-gá cuita cuu vai ñáyiu cutnùní iní-xi sá ïo cùnuu-gá, te yùhú cuita ndóo ndee-í quíhíⁿ —càchí-dé xãhaⁿ-dè xii-güedé.

Crìstú véxi cuuⁿ-gá andiu

³¹ Te ñⁿdii díi-ni Crìstú Yáá véxi cuuⁿ andiu cùnuu-gá núú ñùyíu-a. Te nchaa ñáyiu ndècu ñuyíu-a cùu-yu ñáyiu ñuyíu iha, te càhán-yu sá cúu-xí ñùyíu-a. Dico Crìstú Yáá véxi cuuⁿ andiu ³² càhán-gá ñⁿ sá ñi xini-gá, te càhán-gá ñⁿ sá ñi tecú dóho-gá. Te ñá túú cuini-yu quindáá iní-yu tnúhu càhán-gá. ³³ Te nchaa ñáyiu tñi tnúhu càhán Yáá véxi cuuⁿ andiu-án càhán-yu sá tnúhu Yá Ndiõxí cúu-xí ñⁿ sá ndáa. ³⁴ Te Déhe-gá Yáá véxi cuuⁿ andiu càhán-gá mee-ni tnúhu-gá. Te ñá ùhú iní-gá ní sãñaha-gã Espiritú-gá ndécú ndihí Déhe-gá. ³⁵ Te Dútú Ndiõxí ïo cùu iní-gá Déhe-gá, núu ní xãhaⁿ-gã sá méé-gã taxi tnùní-gá nchaandi túhú sá ïo. ³⁶ Te nchaa ñáyiu na quindáá iní ñáhá xii Déhe-gá, ñáyiu-án cundecú-yu ndihí-gá ni caa ni quíhíⁿ. Te nchaa ñáyiu vá quindáá iní ñáhá xii Déhe Yá Ndiõxí ïo dandòho ñaha-gá xií-yu.

4

Jèsús ndihí ñⁿ ñaha Sãmariá

¹ Te ní níhí cue tée cùu fariséu tnúhu sá vai-gá ñáyiu ta chinchícúⁿ ñáhá xii Jesús. Te ducaⁿ vai-gá-yu ta dàcuandute-gá cuáhán dàcúúxí tã Juáa. ² Te cuëi ñá díú mèe-gá dácuaⁿndute ñaha-gá xií-yu, dico cue tée xica cuu ndihí-gá dácuaⁿndute ñaha-güedé xií-yu. ³ Te ní níhí Jèsús tnúhu nãcuáa càhán cue tée cùu fariséu, núu ní ndee-gá distrítú Jùdeá cuánuhú tucu-gá distrítú Galiléa.

⁴ Te ichi ñùhu-gá ní nayáha-gá distrítú Sãmariá. ⁵ Te ní sáa-gá ñⁿ ñuú nání Sicár te ñuú-án yíndèhu-xi distrítú Sãmariá. Te xián cáa yàtni ñuhu núu ñi sáha táhú ndii Jácób déhe ndii ndii Chèé. ⁶ Te yàcán cáa dòco ní cuu cuendá ndii Jácób. Te cùu-xi datná cuádava nduu ñùhu Jesús ichi, te ïo ní xáú-gá ñuú ní sáa-gá yuhu dòco-án ñi ngóo-gá ndétátú-gá. ⁷⁻⁸ Te ní xica cue tée xica cuu ndihí-gá cuáhán-güedé xití ñuú Sicár cuánguaaⁿ-güedé sá cáxi-güedé. Te yuhu dòco-án núcõo-gá ní sáa ñⁿ ñadìhí ñaha distrítú Sãmariá véxi quèhnu-aⁿ ndute, te ní xãhaⁿ Jèsús:

—Taxi táhú luha ndute na còho-í —càchí-gá xãhaⁿ-gã.

⁹ Te ní xãhaⁿ ñadìhí-án:

—¿Ná cuendá da núu-í xicán-n ndute coho-n? Te yòhó cúu-n tée isràél, te yùhú cúu-í ñaha Sãmariá —càchí-aⁿ xãhaⁿ-aⁿ xii-gá.

Te ducaⁿ ñi xãhaⁿ-aⁿ, chi ñá túú ndècu váha ñáyiu isràél ndihí ñáyiu distrítú Sãmariá. ¹⁰ Te ní xãhaⁿ Jèsús xii-aⁿ:

—Ñá cútnùní iní-n nã taxi Yá Ndiõxí xii-n, te ni ñá cútnùní iní-n yòo xicán ndute núu-n. Te núu dícó xini-n yòo cuu yùhú á, te da mee-n cãcán-n ndute núu-í coho-n, te yùhú taxi-í ndute cundecu ndihí-n núu cuáhán núu véxi —càchí-gá xãhaⁿ-gã.

¹¹ Te ní xãhaⁿ tucu ñadìhí-án:

—Tátá, ni sá quèhnu-n ndute ñá túú nèhe-n, te doco-a cùnú víhí, te ñá túú ndèé quíngueheⁿ-n ndute taxi-n coho-í.

¹² Ndii Jácób ñani tnáhá-ndí ní xíndecu ndèé sanaha ñi cadúha ndii doco-a ñi tóo ndute ní xihí ndii, ndihí nchaa déhe ndii, ndihí nchaa quiti ndii, te ní ndóo cùu cuendá-ndí. ¿Te násai, te yòhó cùnùu-gá-n dàcúúxí ndii-án? —càchí-aⁿ xãhaⁿ-aⁿ xii-gá.

¹³ Te ní xãhaⁿ Jèsús:

—Nchaa ñáyiu xihí ndute doco-a, te vá cúu vètú dúcán iní-yu chi dayichí ñáhá-ni tucu-xi ndute-a. ¹⁴ Dico nchaa ñáyiu na còho ndute na cuãñaha-í, te vá ñⁿ ndùu-gá dayichí ñáhá-xí ndute-án xií-yu, chi ndute cuãñaha-í cúu-xí ndute váha-gá. Te dàtná quée ñihni ndute xití doco-a, nchaa-ni nduu ñùhu ñá túú yìchí, ducaⁿ sãtnahá-xi cada-xi chi candeca-xi iní-yu ni caa ni

quíhíⁿ, te núu na còhó-yu ndute cuáñaha yùhú —càchí-gá xáhaⁿ-gã xii-aⁿ.

¹⁵ Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vã dáyichí ñáhá tnàhí-gá-xi ndute. Te vá quíxí-gã-í quixi quéhnu-í ndute doco-a —càchí-aⁿ xáhaⁿ-aⁿ xii-gá.

¹⁶ Te ní xáhaⁿ Jèsús:

—Cuáháⁿ cuángãna yì-n, te quixi-ndo iha —cachí-gá xáhaⁿ-gã xii-aⁿ.

¹⁷ Te ní xáhaⁿ-aⁿ:

—Ñá túú yì-í —càchí-aⁿ xáhaⁿ-aⁿ xii-gá.

Te ní xáhaⁿ tùcu Jesús:

—Ndáá càháⁿ-n sã ñà túú yì-n. ¹⁸ Dico ní cuu úhúⁿ tée cãndeca-n, te tée ndèca-n vitna chi ñá díú yì-n cuu-dé, te ndáá càháⁿ-n sã ñà túú yì-n —cachí-gá xáhaⁿ-gã xii-aⁿ.

¹⁹ Te sá dúcáⁿ ñí xáhaⁿ-gã ñuu ní xáhaⁿ tùcu-aⁿ:

—Tátá, yúhú sání iní-í sá yòhó cúu-n ìⁿ tée càháⁿ tnúhu Yá Ndiòxí. ²⁰ Te cue ñaní tnáhá-ndí ní xindecu ndéé sanaha ñí xóo cada càhnú-yu Yá Ndiòxí tìndúú-a, dico nchòhó ñáyíu isràél càchí-ndó sã ndéé ñuú Jerusàlén cada càhnu-o-gá —càchí-aⁿ xáhaⁿ-aⁿ xii-gá.

²¹ Te ní xáhaⁿ Jèsús xii-aⁿ:

—Ìⁿ tnúhu na càháⁿ-í-a, te quindáá iní-n. Sa ta cùyatni sáá nduu sã ñà díú-gã mee-ni tìndúú-a, te ni ñà díú-gã mee-ni ñuú Jerusàlén cada càhnu-ndo Tátá-ó Dütú Ndiòxí, chi ndèni ní cuu cada càhnu-ndo-gá. ²² Te nchòhó cue ñáyíu Sãmariá chi ñá cùtnùní iní-ndó ñá cúú sã quidé càhnu-ndo, dico nchúhú ñáyíu isràél, chi cùtnuní iní-ndí ná cúú sã quidé càhnu-ndí. Chi ìⁿ tée isràél véxi-dé dàcácu nihnu-dé ñáyíu cuendá vá quíhíⁿ-yu núú ùhú núú ndàhú. ²³ Te není vitna ngüíta-yu cada càhnu ndisá-yu Tátá-ó Dütú Ndiòxí, te cadá-yu ni yùhu ni iní-yu sá cúú-xí-gã, chi mee-gã ducaⁿ cuiní-gá cadá-yu cada càhnú-yu-gá. ²⁴ Te Yá Ndiòxí chi ìⁿ espíritú cúú-gã. Te nchaa ñáyíu na càda cahnu ñaha, te cadá-yu ni yùhu ni iní-yu sá cúú-xí-gã te cadá-yu dàtná càháⁿ tnúhu-gá —càchí-gá xáhaⁿ-gã xii-aⁿ.

²⁵ Te ní xáhaⁿ ñàdihí-áⁿ:

—Xìní-í sá quíxí tée cùu Mesiás, tée càchí-güedé nání Crìstú. Te tée-ãⁿ ná sàá-dé,

te cachí tnúhu ndáá-dé nàcuáa cuu —càchí-aⁿ xáhaⁿ-aⁿ xii-gá.

²⁶ Te ní xáhaⁿ Jèsús:

—Diu tée-áⁿ cúú yùhú tée ndàtnúhu ndihí-n —càchí-gá xáhaⁿ-gã xii-aⁿ.

²⁷ Te òré-áⁿ ñí ndexìo cue tée xìca cuu ndihí-gá, te ní cuñúhu-güedé sá ndàtnúhu-gá ndihí ñàdihí-áⁿ. Dico ni ìⁿ-güedé ñá ní xicáⁿ tnúhú-güedé núú-gã ñuu ná cuendú ndàtnúhu-gá ndihí ñàdihí-áⁿ.

²⁸ Ducaⁿ te ní dándöo ñàdihí-áⁿ yoó ndute-aⁿ xiáⁿ, te ní xica-aⁿ cuánuhú-aⁿ ñuú cùtnúhu-aⁿ ñáyíu cuendá Jèsús. ²⁹ Te ní xáhaⁿ-aⁿ:

—Chí nèhé ná quíhíⁿ-ó, chi quiní-ndó ñá cúú ìⁿ tée núcóo yuhu dòco-áⁿ ñuu ñá díú Crìstú Yaá ní tendaha Yã Ndiòxí véxi ñuyíú-a cùu-dé ñuu ní càháⁿ ndáá-dé nàcuáa cùu ndecu-í —càchí-aⁿ xáhaⁿ-aⁿ xii-yu.

³⁰ Te sá ñí níhí ñáyíu ñuú-áⁿ tnúhu, xiáⁿ ní xicá-yu cuáháⁿ-yu. ³¹ Te òré vátá sàá-gá-yu xiáⁿ ñí xáhaⁿ cuè tée xìca cuu ndihí-gá xii-gá:

—Mèstrú, cudèhñu na cudehñu-o —cachí-güedé xáhaⁿ-güedé xii-gá.

³² Te ní xáhaⁿ-gã:

—Ndècu ìⁿ sá cáxì-í, ìⁿ sá ñà túú xìní nchòhó —càchí-gá xáhaⁿ-gã xii-güedé.

³³ Te cue tée xìca cuu ndihí-gá xìtnàha-güedé:

—Váa ió ñáyíu ní quixi nehe sá ñí xexi-gá ñuu duha càháⁿ-gá —càchí-güedé xìtnàha-güedé.

³⁴ Te ní xáhaⁿ-gã:

—Dàtná cuiní-ndó cùu vétú iní-ó òré xéxí-ó, ducaⁿ cùu vétú iní-í quidè-í nchaa nàcuáa ní càháⁿ Yã Ndiòxí Yaá ní tendaha ñaha xii-í véxi-í ñuyíú-a, te chiuⁿ-gá ío cùdíí iní-í dandihí-í. ³⁵ Te nchòhó càchí-ndó sã cùmání cùmí-gã yóó te cuu itú. Dico yúhú càchí-í sá cùndehe-ndo ñáyíu-ãⁿ, chi sa ndècu túha-yu, dàtná cúú-ñá itú sá sã ní cuu-ná natahu-o cùu-yu, chi sa ndècu túha-ná-yu cundedóho-yu tnúhu-í.

³⁶ Te dàtná cúú ñáyíu nàtahu itú chi sa cúhuⁿ yáhu-yu, ducaⁿ sãtnahá-xi cùu ñáyíu na càháⁿ tnúhu-í, chi cuáñaha-í sá ndúú tãhú-yu na sàá nduu. Te nchaa ñáyíu na tñì tnúhu-í te nduu tãhú-yu cundecu-í ndihí-yu ni caa ni quíhíⁿ. Te dàtná cúú ñáyíu ní chihí tatá-xi, ndihí ñáyíu ní natahu

itú-xi cùdí-ñă iní-yu. Ducaⁿ sătnahá-xi cùu ñăyiu na cãháⁿ tnúhu-í. ³⁷ Chi ndáá quée-xí nàcuáa cuáháⁿ ñⁿ cuendú sá cãchí-xi; “Tucu tée ní chihí tata, te tucu tée ní natahu”, duha cuáháⁿ cuendú-áⁿ. ³⁸ Te yúhú tendaha ñaha-í xii-ndo quíhíⁿ-ndó cãháⁿ-ndó tnúhu-í núú sà ní yáha-güedé ní cãháⁿ-güedé tnúhu-í. Te nchòhó quíhíⁿ-ndó dícó-nă nduu cuendá-ndó chiuⁿ-áⁿ — cãchí-gá xáhaⁿ-gã xii-güedé.

³⁹ Te ío cuéhé ñăyiu ñuú-áⁿ ñí xíndedóho-yu cuendú ní cani ñadihí-áⁿ nũ-yu sá Jèsús ní xáhaⁿ-gã nchaa nàcuáa quide-aⁿ, te xíãⁿ ío vâi-yu ní sándáá iní-yu Jèsús. ⁴⁰ Te ní quexió-yu núú ndécú-gã, te ní cãháⁿ ndàhú-yu núú-gã sá quéndõo-gã ñuú-yu, núú xíãⁿ ní xíndecu-gã ndihí-yu úú nduu. ⁴¹ Te ío cuéhé-gã-yu ní sándáá iní-yu tnúhu ní cãháⁿ méé-gã. ⁴² Te ní xáhãⁿ-yu xii ñadihí-áⁿ:

—Vitna te ñă díú mèe-ni tnúhu ní cãháⁿ-n ní sándáá iní-ndí-gã, chi ní cãháⁿ méé-gã ní xíndedóho-ndí vitna núú ní sándáá ndisa iní-ndí sá díú-gã cúú-gã Crístú Yaá ní tendaha Yă Ndiõxí véxi ñuyíú-a dâcâcu nihnu-gã ñăyiu núú ùhú núú ndàhú — cãchí-yu xáhãⁿ-yu xii-aⁿ.

Jèsús quidé tãtna-gã déhe ñⁿ téé ndèè chíúⁿ núú gobièrnú

⁴³ Te nduu úní ní nucúhuⁿ Jèsús ichi cuáháⁿ-gã distritú Galileá. ⁴⁴ Te cuáháⁿ-gã yacáⁿ, chi mee-gã ní cachí-gã sá nũ ñⁿ téé na cãháⁿ-dé tnúhu Yă Ndiõxí ñuú núú ñí cacu-dé, te ñă túú nèhé-yu sá yíñùhu núú-dé. ⁴⁵ Te òré ní sáá-gã distritú Galileá, te ío váha ní cuu iní ñáhã-yu xii-gã, chi cuendá tnàhá-yu ní xíndecu ndihí-gã vico pascuá ñuú Jerusálén. Te yacáⁿ ní xiní-yu nchaa sá ñí quide-gã.

⁴⁶ Te ní sáháⁿ tucu-gã ñuú Cãnaá ñⁿ ñuú yíndèhu distritú Galileá, núú ñí nadatiu-gã ndute ní nduu-xi vínú. Te ñuú Capèrnaúm ndécú ñⁿ téé ndèè chíúⁿ núú téé cùu gobièrnú, te téé-áⁿ cùhú ñⁿ déhe-dé. ⁴⁷ Te ní níhí-dé tnúhu sá ñí ndee Jèsús distritú Júdeá ní ndexió-gã distritú Galileá, núú ní sáháⁿ-dé núú ndécú-gã, te ní cãháⁿ ndàhú-dé núú-gã sá quíhíⁿ-gã cada tátna-gã

déhe-dé, chi sa ndècu-na-dé sá cùú-dé. ⁴⁸ Te ní xáhaⁿ Jèsús xii-dé:

—Nchòhó, chi vá quíndáá iní ñáhá-ndó xii-í te núú vá cãdà-í ñⁿ sá vã yõo tnàhí ndàcu cada quini-ndó —cãchí-gã xáhaⁿ-gã xii-dé.

⁴⁹ Te ní xáhaⁿ tucu téé cùhú déhe-xi-áⁿ xii-gã:

—Tãtá, cundee iní-n ná quíhíⁿ-ni-o cãda tátna-n dèhe-í ná cuu-dé, chi cãhú víhí tnàhá-dé —cãchí-dé xáhaⁿ-dè xii-gã.

⁵⁰ Te ní xáhaⁿ Jèsús:

—Cuanùhú te quini-n ñă ní ndúha déhe-n —cãchí-gã xáhaⁿ-gã xii-dé.

Te ní sándáá iní-dé tnúhu ní cãháⁿ Jèsús, te cuánuhú-dé. ⁵¹ Te ñùhu-dé ichi cuánuhú-dé ní sánú tnàhá ñáhá cuè téé xínu cuechi núú-dé. Te ní xáhaⁿ-güedé sá sã ta ndúha déhe-dé cuáháⁿ.

⁵² Te ní xicáⁿ tnúhú-dé núú-güedé ná òré cúú-xí ñí ngúíta-xi ta quètaú cuéhé-dé. Te ní xáhaⁿ-güedé:

—Icu dàtná òré caá ñⁿ sacuaa ní nchíco-dé cahni —cãchí-güedé xáhaⁿ-güedé xii-dé.

⁵³ Te tãtá téé cùhú-áⁿ ñí ndacu iní-dé sá díú òré ní quètaú cuéhé-dé ní cãháⁿ ndihí-dé Jèsús ní xáhaⁿ-gã sá ndúha déhe-dé. Te xíãⁿ nũu ndi nchàa téé-áⁿ vehe-dé ní sándáá iní-yu Jèsús.

⁵⁴ Te sá ñí quide-gã-áⁿ cúú ùú xito quide-gã sá vã yõo tnàhí ndàcu cada. Te sá ñí quide-gã xito cùu uú-áⁿ cúú-xí sã ñí quide-gã cútnàhá ní ndee-gã distritú Júdeá cuánuhú-gã distritú Galileá.

5

Jèsús quidé tãtna-gã ñⁿ téé cùhú ñⁿ xichi núú nání Bètesdá

¹ Te sãtá dúcáⁿ ñí cuu, te ní tnàhá nduu ñí quide ñăyiu isràél ñⁿ vico. Te ní sáháⁿ Jèsús ñuú Jerusálén. ² Te ñí cãa xico yuhu ñuú-áⁿ ñúhú dòco, te titní yèhe-xi ndecu. Te ñⁿ yèhe-xi-áⁿ nání Yùyehe Mbée, te yatni xíãⁿ caá ñⁿ tanquí ndute dàna-ní-yu Bètesdá tnúhu mèé-yu tnúhu hèbreú, te yuhu tànquí-áⁿ caá ùhúⁿ corrèdór. ³ Te xití corrèdór-áⁿ xíndecu cuéhé ñăyiu cùhú, ñăyiu cuáá, ñăyiu yacua, ñăyiu ñă cúú-gã candá nihnu, ndètú-yu candá ndute-áⁿ. ⁴ Chi níhí-yu tnúhu sá ãma nihnu cùuⁿ ñⁿ espíritú xínú cuèchi núú Yă Ndiõxí, te dâcandá-xi

ndute ñùhu tanquí-áⁿ. Te ñáyiú díhna nuu nà quée xití ndute-áⁿ, te òré-ni ndúha-yu. ⁵ Te yacáⁿ ñútnàhá ñⁿ téé ní cuu ócó sáhúⁿ úní cuíá sã cùhú-dé. ⁶ Te ní xiní Jèsús cáá-dě, te ní cutnùní iní-gá sá ñí cuu cuéhé cuíá cùhú-dé, te ní xáhaⁿ-gã:

—¿Cuíní-n ndúha-n-ãⁿ? —càchí-gá xáhaⁿ-gã xii-dé.

⁷ Te ní xáhaⁿ tée cùhú-áⁿ:

—Tãta, vá yõo ñihí-í dàquée ñaha xì-í xití tànquí-a òré càndá ndute, chi òré cuíní-í quée-í, te ingá-ni tucú-yu quènduú-yu núu-í cuángueé-yu —càchí-dé xáhaⁿ-dě xii-gá.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gã xii-dé.

⁹ Te òré-ni-áⁿ ñí ndúha tée cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-ãⁿ cúu-xí nduu ndetatú ñáyiú, ¹⁰ núu ní xáhaⁿ cuè tée israhél xii tée ní cuhu-áⁿ:

—Vitna cùu-xi nduu ndetatú-ó núu vá cúu cuído-n yuu-n —cachí-güedé xáhaⁿ-güedě xii-dé.

¹¹ Te ní xáhaⁿ-dě:

—Mee tée ní quide tátna ñaha xì-í ní cachí-dé sá ndácàni-í yuu-í, te caca-í —càchí-dé xáhaⁿ-dě xii-güedé.

¹² Te ní xáhaⁿ-güedě:

—¿Te ná cúu tée ducaⁿ ñí cachí sá ndácàni-n yuu-n te caca-n-i? —càchí-güedé xáhaⁿ-güedě xii-dé.

¹³ Dico tée ní cuhú-áⁿ ñà túú ní cùtnuní iní-dé ná cúu tée ní quide tátna ñaha xì-dé, chi Jèsús òré-ni ní xica-gá cuáháⁿ-gá tnuú nchaa ñáyiú chitu xñdecu xíaⁿ. ¹⁴ Te sátá dúcáⁿ te ní naníhí tnáhá Jèsús ndihí tée ní quide tátna-gá-áⁿ xití veñúhu càhnu sá ño cùnuu, te ní xáhaⁿ-gã xii-dé:

—Ní xiní-n ñá ní ndúha-n-va. Te vitna vá cáda-gã-n nãndí sá cuéhé sá dúhá, chi núu na càda-ni-n ña, te quixi ingá cuéhé, te vihi-gá ndoho-n —càchí-gá xáhaⁿ-gã xii-dé.

¹⁵ Ducaⁿ te ní xica tée ní cuhú-áⁿ cuángúñaha-dě xii cue tée israhél sá Jèsús ní quide tátna ñaha-gã xii-dé. ¹⁶ Núu sátá ñí níhí cue tée israhél tnúhu, te ní cuu úhú iní-güedé Jèsús. Te ní cuíní-güedé cahni ñaha-güedě xii-gá cuendá sá dúcáⁿ ñí quide tátna-gá nduu ndetatú-güedé. ¹⁷ Te ní xáhaⁿ Jèsús xii-güedé:

—Tãtà-í Dútú Ndiõxí quidé chiúⁿ-ni-gá núu xíaⁿ quidé chiúⁿ-í tnáhá-í —càchí-gá xáhaⁿ-gã xii-güedé.

¹⁸ Te ní cudéeⁿ-güedě sá ñã ní cãnehe íi-gã nduu ndetatú-güedé, te ní cuíní-güedé cahni ñaha-güedě, te uuⁿ-gá ní cuíní-güedé cahni ñaha-güedě xii-gá sá ñí cachí-gá sá Tãtà-gã cúu Dútú Ndiõxí, chi ní sani iní-güedé sá cuíní-gá nùtnahá-gá Yã Ndiõxí núu xíaⁿ ío ní cudéeⁿ-güedě.

Jèsús Déhe Yá Ndiõxí táxí tnùní-gá

¹⁹ Te ní xáhaⁿ tucu Jèsús xii-güedé:

—Na càchí tnúhu ndáá-í xii-ndo sã yùhú chi ní ñⁿ sá ñã ndácù-í cada mee-í núu ñã túú mée Tãtà-í dánéhé ñáhá-gã xii-í nàcuáa cada-í, chi nchaa sá quidé Tãtà-í quidé-í tnáhá-í. ²⁰ Te Tãtà-í ío cùu iní ñáhá-gã xii-í núu dānehé ñáhá-gã nchaa nàcuáa quide-gá. Te vitna ndècu vai-gá chiúⁿ tahu-gá cada-í, chiúⁿ sá vátá quíní-gá-ndó càda-í nàcuáa cuñúhu vihi-ndo. ²¹ Chi Tãtà-í dandòto-gá ñáyiú ní xihí. Te yùhú cada-í te nduu táhú nchaa ñáyiú càchí iní-í cundecu ndihí ñáhá-yu xii-í ni caa ni quíhíⁿ. ²² Te na sàá nduu te ñá díú Tãtà-í cada ndáá-gá cuéchi ñáyiú, chi ní cachí-gá sá yùhú cada ndáá-í ²³ cuendá nchaa ñáyiú canehé-yu sá yíñùhu núu-í dàtná nehé-yu sá yíñùhu núu Tãtà-í Yaá ní tendaha ñaha xii-í véxi-í ñuyíú-a. Te nchaa ñáyiú ñá túú nèhe sá yíñùhu núu yùhú, te ni núu Tãtà-í ñá túú nehé-yu sá yíñùhu.

²⁴ Te na càchí tnúhu ndáá-í xii-ndo sã nchaa ñáyiú na cùndedóho tnúhu na càháⁿ-í, te núu na quíndáá iní-yu Dútú Ndiõxí Yaá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu táhú-yu cundecú-yu ndihí-gá ni caa ni quíhíⁿ. ²⁵ Te vitna na càchí tnúhu ndáá-í xii-ndo sã nchaa ñáyiú ndècu ichi cuehé ichi duha cùu-yu dàtná ñⁿ ñáyiú ní xihí, te vitna ní sáá nduu cùndedóho-yu tnúhu càháⁿ yùhú Déhe Dútú Ndiõxí, te nchaa ñáyiú na quíndáá iní-xi, te naníhí tãhú-yu. ²⁶ Te dàtná quidé mée Tãtà-í dácácu nihnu-gá ñáyiú, ducaⁿ ñí cachí-gá cada-í dácácu nihnu-í-yu. ²⁷ Te ní cachí tucu-gá sá sáá ñⁿ nduu, te cada ndáá-í cuéchi nchaa ñáyiú ñá túú quide ndáá, chi yùhú táxí tnùní-í, te cùu-í ñaní tnáhá-ndó

nchàa-ndo. ²⁸ Te ni vǎ cúñũhu-ndo tnũhu càháⁿ-í, chi sáá nduu te nchaa ñáyiú ní xíhí tecú dóho-yu tnũhu càháⁿ-í. ²⁹ Te ndoto nchaa ñáyiú ní quide váha cundecu ndihí-í-yu ni caa ni quíhíⁿ, te ndoto tnàhá nchaa ñáyiú ní quide cuèhé ní quide duha, te ñáyiú-án quíhíⁿ-yu núú ùhú núú ndàhú.

Yá Ndiõxí chindèe tnũhu-gá Jèsús

³⁰ 'Te yúhú, chi ni ìⁿ sá ñǎ ndácù-í cada mee-í nũu ñá díú mèe Yá Ndiõxí táuchíuⁿ-gá nàcuáa cada-í. Te quide ndáá-í cuéchi ñáyiú nàcuáa tàxi tnuní-gá cada-í, te yúhú ñá túú quide-í sá cúú ìní mèe-í chi Tǎtà-í ní táuchíuⁿ-gǎ nàcuáa cada-í. ³¹ Te núu na càháⁿ-í sá mèe-í táxi tnùn-í, te vá quindáá iní-ndó. ³² Chi Yá Ndiõxí chindèe tnũhu ñaha-gǎ xii-í, te yúhú xìn-í sá tnũhu càháⁿ-gá cuendá-í cúú-xí ìⁿ sá ndáá. ³³ Te nchòhó ní téchíuⁿ-ndó cuè téé ní sáháⁿ ní ndúcú tnũhu-güedé núú tǎ Juáá nũu ná tnũhu càháⁿ-dé cuendá-í, te téé-ǎn ní càháⁿ ndáá-dé nàcuáa nduu cuendá-í. ³⁴ Dico yúhú, chi ñá túú xìn-í ñuhu-í ìⁿ ñáyiú ñuyíú-a chindee tnũhu ñahá-yu xii-í, dico té Juáá ní càháⁿ váha-dé cuendá-í, te xǎⁿ càchí tnũhu tucu-í cuendá quindáá iní-ndó, te naníhí tǎhú-ndó. ³⁵ Te dàtná cuiní-ndó cùu ìⁿ ití ndéñuhú te dàyehé-xi, ducaⁿ sǎtnahá-xi ní cuu té Juáá, chi sacú-ni nduu ío ní cudí iní-ndó tnũhu ní càháⁿ-dé. ³⁶ Te váha-ni ní càháⁿ té Juáá, dico yúhú chi ndècu nchaa sá tá quide-í véxi nàcuáa ní táuchíuⁿ Yá Ndiõxí cada-í, te nchaa xǎⁿ cúú-xí ìⁿ sá cútnùn-í iní-ndó sǎ mèe Yá Ndiõxí ní tendaha ñaha-gǎ xii-í véxi-í ñuyíú-a. ³⁷ Te diu-ni-gá chindèe tnũhu ñaha-gǎ xii-í, dicó-ni sá mèe-ndó ñà túú cuiní-ndó càda cuendá-ndó tnũhu càháⁿ-gá, te ni ñà túú xìn-í-ndó nàcuáa càa-gá. ³⁸ Te ñá túú quèe iní nchòhó tnũhu càháⁿ-gá, chi ñá túú sàndáá iní ñahá-ndó xii yúhú Déhe-gá. ³⁹ Te dàcuaha vihi-ndo tutú ndéè tnũhu-gá, chi sàni iní-ndó sǎ xǎⁿ-ni dacuàha-ndo te naníhí tǎhú-ndó. Te váha-ni quide-ndo, chi diu tutú-án càháⁿ-xi cuendá-í. ⁴⁰ Te nchòhó ñá túú cuiní-ndó quindáá iní ñahá-ndó xii-í cuendá naníhí tǎhú-ndó.

⁴¹ 'Te yúhú, ñá túú xìn-í ñuhu-í sá cáda càhnu ñaha-ndo xii-í. ⁴² Dico sa xìn-í nàcuáa sàni iní-ndó chi ñá túú cùu iní-ndó

Yá Ndiõxí. ⁴³ Te yúhú véxi-í ñuyíú-a chi Tǎtà-í ní tendaha ñaha-gá, te nchòhó ñá túú cuiní-ndó tnũhu càháⁿ-í, dico núu quixi ìⁿ téé càháⁿ cuendá mèe-xí, chi quindáá iní-ndó. ⁴⁴ Te ná váha nchòhó ná tnũhu càháⁿ-í, te xio xio-ni quide cahnu tnaha-ndo, te ñá túú quide cuendá-ndó sǎ tnũhu váha càháⁿ Yá Ndiõxí cuu xii-ndo. ⁴⁵ Te vá cán-í iní-ndó sǎ yúhú ndàcáⁿ cuéchi-í núú Tǎtà-í nàcuáa quide-ndo, chi ndíi Moisés ní chídó tnùn-í ndíi núú tütú Yá Ndiõxí nàcuáa quide-ndo sǎ ñá túú quide váha-ndo, te mee-ndo sàni iní-ndó sǎ naníhí tǎhú-ndó cuendá tnũhu ní càháⁿ ndíi. ⁴⁶ Chi núu nchòhó sàndáá ndisa iní-ndó tnũhu ní càháⁿ ndíi Moisés ñá, te ducaⁿ te quindáá iní-ndó yúhú ní cùu, chi ndíi-ǎn ní chídó tnùn-í ndíi nàcuáa cada-í ñuyíú-a vitna. ⁴⁷ Te núu ñá túú sàndáá iní-ndó tnũhu ní chídó tnùn-í ndíi, te diu-ni ducaⁿ càda ñaha-ndo xii-í vá quindáá iní-ndó tnũhu càháⁿ-í —càchí-gá xáhaⁿ-gǎ xii-güedé.

6

Jèsús dácàxi-gá úhúⁿ mǐ ñáyiú

(Mt. 14:13-21; Mr. 6:30-44; Lc. 9:10-17)

¹ Te sáta dúcáⁿ nǐ cuu, te ní quee Jèsús cuáháⁿ-gá ingá xio yuhu làgúná Galileá, àdi Tiberiás chi úú diu-xi. ² Te ío cuéhé ñáyiú nchícúⁿ ñahá xii-gá cuáháⁿ cuendá sá nǐ xini-yu nchaa sá vá yòo tnàhí ndàcu cada ní quide-gá, chi ní quide tátna-gá nchaa ñáyiú cùhú. ³ Te ní sáá Jèsús ndihí cue téé xica cuu ndihí-gá ìⁿ núú tìndúú, te xíaⁿ nǐ ngóo-gá ndihí-güedé. ⁴ Te ta cùyatni coo vico pascuá, vico quide ñáyiú isràel. ⁵ Te ní xini-gá sá ío vai ñáyiú nchícúⁿ ñahá xii-gá cuáháⁿ, te ní xáhaⁿ-gǎ xii té Lìpé:

—¿Ndèe quíhíⁿ-ó quǐnguaaⁿ-o sǎ cáxi nchaa ñáyiú-a? —càchí-gá xáhaⁿ-gǎ xii-dé.

⁶ Te ducaⁿ nǐ xáhaⁿ-gǎ xii-dé cuendá sá cuiní-gá quini-gá nása cunduu tnũhu càháⁿ-dé, dico mee-gǎ sa xini-gá nàcuáa cada-gá. ⁷ Te ní xáhaⁿ tǎ Lìpé xii-gá:

—Te cuèi úú ciendú díhúⁿ denariú ná dàndòñuhu-o cuaaⁿ-o paá, te ni vǎ tnàhá caxí-yu luha luha —càchí-dé xáhaⁿ-dǎ xii-gá.

8 Te té Ndríxí ingá tée xica cuu ndihi-gá, ñaní té Xímú, àdi Pelú chi úú òu-dé, ní xáhaⁿ-dè:

9 —Iha ndècu ìⁿ té líhli nèhe-dé úhúⁿ pàá cebàdá te úú chácá, dico ndéé tnahá xéhé, te cuéhé víhí ñáyiú —càchí-dé xáhaⁿ-dè xii-gá.

10 Te ní xáhaⁿ Jèsús xii-güedé:

—Chí cūñaha nà ngóo-yu nchaá-yu —càchí-gá xáhaⁿ-gá.

Te ñáyiú-áⁿ ní ngóo-yu, te càa vihi ité núú ní ngóo-yu-áⁿ, te xínu dàtná úhúⁿ mīl mee-ni cuè tée, te òⁿ ñáyiú òⁿ ndihi landú. 11 Te ní queheⁿ Jèsús pàá, te ní ndacáⁿ táhú-gá núú Yá Ndiòxí, te ní sáñaha-gá pàá-áⁿ xii cue tée xica cuu ndihi-gá, te cue tée-áⁿ ní dácãhñu-güedé ní xexi nchaá ñáyiú xixúcu-áⁿ. Te òⁿ ducaⁿ ní quide-gá chácá, te ní dácãhñu tucu-güedé-òⁿ ní xexi ñáyiú ní ndahá xití-yu. 12 Te òⁿ ní túhú cóhò-yu, te ní xáhaⁿ Jèsús xii cue tée xica cuu ndihi-gá sá ná nàqueheⁿ-güedé nchaá sá ní quendóo cuendá sá vã quíhíⁿ-xi núú míhí.

13 Te cue tée-áⁿ ní naqueheⁿ-güedé nchaá sá ní quendóo, te ní chítú ùxúú tídihi núú ùhúⁿ-ni pàá cebàdá. 14 Te sá ní xiní-yu ní nadacàyá-gá sá ní xexí-yu, xíáⁿ ní ngüita-yu ní xítnahá-yu:

—Ndáá sá tée-a sa ió cuendú sá quíxí-dè ñuyíú-a cáháⁿ-dè tnúhu Yá Ndiòxí —càchí-yu xítnahá-yu.

15 Te ní cutnùní iní Jèsús sá cádá yicá-yu candeca ñàhá-yu xii-gá quíhíⁿ cuendá cundecu-gá quindaha ñàhá-gá xii-yu ni cùu, núú xíáⁿ ní xica tucu-gá cuáháⁿ-gá xití yucu mee òⁿ chícúú-gá.

Jèsús xicá-gã núú ndute

(Mt. 14:22-27; Mr. 6:45-52)

16 Te òⁿ ní cuu ndiquíⁿ, te cuáháⁿ cue tée xica cuu ndihi-gá yuhu làgúná. 17 Te ní queé-güedé bàrcú cuáháⁿ-güedé ñuú Capèrnaúm cáá ndàa ingá xio yuhu làgúná, te sa ní cuu ndiquíⁿ, te ñá túú Jèsús quexìo queé-gá bàrcú ñúhú-güedé-áⁿ. 18 Te ní ngüita-xi quène táchí ñíhi, te níhi dàcandau ndéé tnahá ndùte làgúná-áⁿ. 19 Te sa ní cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cùyatni-gá bàrcú

ñúhú-güedé véxi-gá núú nduté, te ní yùhú-güedé. 20 Te ní xáhaⁿ Jèsús xii-güedé:

—Yúhú véxi-í, vá yùhú-ndó —càchí-gá xáhaⁿ-gá xii-güedé.

21 Te ió ní cudíí iní-güedé sá ní quexìo-gá cuánguee-gá bàrcú, te òⁿ-ni ní quexìo-güedé ndihi-gá ndéé ingá xio yuhu làgúná núú cuáháⁿ-güedé.

Ñáyiú nànducu ñaha xii Jèsús

22 Te ingá nduu-áⁿ xíndecu-ni nchaá ñáyiú ní quendóo yuhu làgúná. Te ní quide cuendá-yu sá ìⁿ òⁿ-ná bàrcú nútní-áⁿ ní cùu ñá túú-gã, chi cue tée xica cuu ndihi Jèsús ní queé-güedé bàrcú-áⁿ cuáháⁿ-güedé. Te ní níhí-yu tnúhu sá ñà túú ní queé tnahá Jèsús. 23 Te òⁿ-ni nduu-áⁿ ní quee ìⁿ úú bàrcú ñuú Tiberiás ní sáá-xi yatni núú ní xexí-yu pàá sá ní ndacáⁿ táhú Jèsús núú Yá Ndiòxí. 24 Te ní xiní-yu sá ñà túú Jèsús ndihi cue tée xica cuu ndihi-gá, núu ní queé-yu bàrcú-áⁿ cuáháⁿ-yu ñuú Capèrnaúm cuánúndúcú ñàhá-yu xii-gá.

Jèsús cúú-gã dàtná ìⁿ sá nchító-ó

25 Te ní sáá-yu ingá xio yuhu làgúná, xíáⁿ ní naníhí-yu Jèsús, te ní xáháⁿ-yu xii-gá:

—Mèstrú, ¿ná òⁿ ní sáá-n iha? —cachí-yu xáháⁿ-yu xii-gá.

26 Te ní xáhaⁿ Jèsús:

—Na càchí tnúhu ndáá-í sá nchòhó nánducu ñaha-ndo xii-í cuendá-ni sá ní xexi-ndo ní ndahá xití-ndó, dico ñá díú cuendá sá ní quide-í sá vã yóo tnahí ndàcu cada nanducu ñaha-ndo. 27 Te vá cádá cuendá-ndó sã méé-ní sã cáxí-ndó càda chiuⁿ-ndo chi xíáⁿ vá cudíi-xi. Chi ió-gá xíní ñúhu-xi cada cuendá-ndó tnúhu Yá Ndiòxí te tní-ndo, te naníhí tãhú-ndó. Te tnúhu-áⁿ cachí tnúhu yúhú Tée cùu ñaní tnahá-ndó nchàa-ndo, te xíáⁿ candeca-xi iní-ndó òⁿ caa òⁿ quíhíⁿ, chi mee Dütú Ndiòxí ní cachí-gá sá dúcáⁿ càda-í —càchí-gá xáhaⁿ-gá xii-yu.

28 Te ní xáháⁿ-yu:

—¿Nása cada-ndí cuendá ngúnu ichi-ndí nàcuáa cuìní Yá Ndiòxí cunduu-í? —càchí-yu xáháⁿ-yu xii-gá.

29 Te ní xáhaⁿ Jèsús xii-yu:

—Yá Ndiòxí cuìní-gá sá quindáá iní ñàhá-ndó xii yúhú, tée ní tendaha-gã véxi ñuyíú-a —càchí-gá xáhaⁿ-gã xii-yu.

³⁰ Te ní xáhaⁿ tùcú-yu xii-gá:

—¿Ná cúú sã vã yõo tnàhí ndàcu cada, cada-n cùndehe-ndí cuèndá quíndáá iní ñáhá-ndí xii-n-i? ¿Àdi nágá cúú sã cáda-n cuèndá cutnùnì iní-ndí sá ndáá càháⁿ-n-í? ³¹ Chi cue ñanì tnáhá-ó ñí xíndecu ndéé sanaha ñí xexí-yu pàá nánì mànáá xití yucu dàtná yódó tnùnì núú tùtú Yã Ndiõxí núú càchí-xi: “Yá Ndiõxí ní sãñaha-gã sá ñí xexí-yu, te ní cuuⁿ túu-xi andiu”, duha càchí-xi núú tùtú-gá —càchí-yu xãhãⁿ-yu xii-gá.

³² Te ní xáhaⁿ Jèsús:

—Na càchí tnúhu ndáá-í xii-ndo sã ñã díú ndí Moisés ní sãñaha ndí pàá ní cuuⁿ andiu ñí xexí-yu, chi mee Tãtã-í ní sãñaha-gã sá ñí xexí-yu. Te sá táxí-gã vitna cùu-xi ³³ datná pàá véxi cuuⁿ andiu càndeca-xi iní-ndó ñí caa ñí quíhíⁿ —càchí-gá xáhaⁿ-gã xii-yu.

³⁴ Te ní xãhãⁿ-yu xii-gá:

—Tãtã, mee-ni pàá-áⁿ taxi-n càxi-ndí —càchí-yu xãhãⁿ-yu xii-gá.

³⁵ Te ní xáhaⁿ Jèsús:

—Yúhú cùu-í dàtná ñí sá xexí-ndó càndeca-xi iní-ndó. Te duha ndúu tnúhu càháⁿ-í, chi nchaa ñáyíu na quíndáá iní ñáhá xii-í, te vã ndóhó-gã-yu docó te vã ndóhó-gã-yu ndute. ³⁶ Dìcò-ñí sá nchòhó ñã túú sàndáá iní ñáhá-ndó cuèi xìnì ñáhá-ndó xii-í. ³⁷ Te nchaa ñáyíu na càchí Tãtã-í nduu cuèndá-í nasaá-yu núu-í, te ñáyíu-áⁿ vã dáquèe tíhù-í-yu. ³⁸ Te ñã díú yúhú sá véxi cuuⁿ-í andiu te quíde-í nchaa sá cúú iní mèe-í, chi véxi cuuⁿ-í sá cáda-í nchaa nàcuáa ní táuchíúⁿ mèe Tãtã-í Dútú Ndiõxí Yá ní tendaha ñàha xii-í véxi-í ñuyíú-a. ³⁹ Te cuìnì-gá sá ncháá ñáyíu ní cachí-gá nduu cuèndá-í vã dáñà-í-yu cuíta nihnú-yu, te na sáa nduu te díu-ni-í dandòto-í-yu. ⁴⁰ Chi ducaⁿ ñí cachí Dútú Ndiõxí cunduu sá ncháá ñáyíu na tnã tnúhu càháⁿ-í, te quíndáá ndisa iní ñáhã-yu xii yúhú Déhe-gá, te nduu táhũ-yu cundecú-yu ndíhì Yá Ndiõxí ñí caa ñí quíhíⁿ, te yúhú dandòto-í-yu na sáa nduu —càchí-gá xáhaⁿ-gã xii-yu.

⁴¹ Te ñã ní tnáhá iní ñáyíu isràél tnúhu ní cáháⁿ Jèsús ñúu ní ngúíta-yu ní cáháⁿ cuèhé-yu cuèndá-gá cuèndá sá ñí xáhaⁿ-gã

sá mèe-gã cúú-gã dàtná sá xexí-ó véxi cuuⁿ andiu. ⁴² Te ní xítnáhá-yu:

—¿Náa ñã díú tẽe-a cùu-dé Jèsús déhe té Chèé? Nchoo xìnì-ó tãtã-dè, te xìnì-ó nãná-dè, ñã cachí-tu tẽe-a sá andiu véxi cuuⁿ-dè! —càchí-yu xítnáhá-yu.

⁴³ Te ní xáhaⁿ Jèsús xii-yu:

—Vã càháⁿ cuèhé-gá-ndó cuèndá-í, chí dáñã. ⁴⁴ Vã yõo quíndáá iní ñáhá xii yúhú ñúu ñã túú mèe Tãtã-í táxí cuèndá ñáhá-gã xii-yu. Te díu-gá ní tendaha ñàha-gã xii-í véxi-í, te yúhú dandòto-í-yu na sáa nduu. ⁴⁵ Te núú tùtú cue tẽe ní xóo cáháⁿ tnúhu Yá Ndiõxí ndéé sanaha càchí-xi: “Yá Ndiõxí danèhé ñáhá-gã xii-yu tnúhu-gã”, duha càchí-xi. Te nchaa ñáyíu na cùndedóho nchaa tnúhu càháⁿ Dútú Ndiõxí, te cutúha-yu nàcuáa càháⁿ-gã, te ñáyíu-áⁿ quíndáá iní ñáhã-yu xii yúhú.

⁴⁶ Te vã yõo xìnì ñáhá xii Dútú Ndiõxí chí ñíndì-ni yúhú xìnì-í-gã, chí núú ndécú-gã ní quee-í véxi cuuⁿ-í —càchí-gá xáhaⁿ-gã xii-yu.

⁴⁷ Te xãhãⁿ tùcu-gá:

—Na càchí tnúhu ndáá-í xii-ndo sã nchaa ñáyíu na quíndáá iní ñáhá xii-í, te naníhì tãhú-yu. ⁴⁸ Te yúhú cùu-í dàtná ñí sá xexí-ndó càndeca-xi iní-ndó, te ducaⁿ sãtnahá-xi cùu-í chí yúhú cada-í te nduu táhú-ndó cùndecu-ndo ndíhì Yá Ndiõxí ñí caa ñí quíhíⁿ. ⁴⁹ Te cue ñanì tnáhá-ó ñí xíndecu ndéé sanaha ñí xexí-yu pàá nánì mànáá xití yucu, dico ní sáa nduu te dacuítí ñí xihí-yu. ⁵⁰⁻⁵¹ Te yúhú càháⁿ-í cuèndá mèe-í, chí véxi cuuⁿ-í andiu. Te cùu-í dàtná ñí sá nchító-ndó, te nchaa ñáyíu na càxi te càndeca-xi iní-yu ñí caa ñí quíhíⁿ te vã cuíta nihnu-gã-yu. Te sá táxí-í xii-ndo xíãⁿ cúú-xí yìquì cuñú-í, te cùu-xi cuèndá nchaa ñáyíu nihí ñuyíú cuèndá nduu táhũ-yu cundecú-yu ndíhì Yá Ndiõxí ñí caa ñí quíhíⁿ —càchí-gá xáhaⁿ-gã xii-yu.

⁵² Te ní ngúíta ñáyíu isràél xítnáhá-yu:

—¿Nása cada-tu tẽe-a núu càchí-tu-dé sá yìquì cuñú-dé taxi-dé caxi-o-i? —càchí-yu xítnáhá-yu.

⁵³ Te ní xáhaⁿ Jèsús:

—Na càchí tnúhu ndáá-í xii-ndo sã ñúu na càda iní-ndó sã dàtná sá cáxí-ndó yìquì cuñú yúhú Tẽe cùu ñanì tnáhá-ndó

nchàa-ndo, te cada tucu iní-ndó sã dàtná sá cóhó-ndó ññí-í ñá, te xiãⁿ quée-xí sã quèndáá iní ñáhá-ndó ñi yuhu ñi iní-ndó te naníhí tàhú-ndó, te núu ñáhá te cuíta nihnu-ndo. ⁵⁴ Nchaa ñáyiú na càda iní-xi sá dàtná sá cãxí-yu yiqui cùñú-í te cohó-yu ñíñí-í, ñáyiú-áⁿ naníhí tàhú-yu te yúhú dandòto-í-yu na sàá nduu. ⁵⁵ Chi yiqui cùñú-í ndihí ñíñí-í cúú-xí mèe-í, ⁵⁶ Te nchaa ñáyiú na càda iní-xi sá dàtná sá cãxí-yu yiqui cùñú-í te cohó-yu ñíñí-í, te ñáyiú-áⁿ ññ-ñá cuu-í ndihí-yu chi cundecu ndihí-í-yu. ⁵⁷ Te yúhú nchìto-í chi ducaⁿ nchìto Tàtá-í Yaá ní tendaha ñàha xii-í véxi-í ñuyúú-a. Te diu-ñi ducaⁿ nchàa ñáyiú na quèndáá iní ñáhá xii-í te cundecu ndihí-í-yu ñi caa ñi quíhíⁿ. ⁵⁸ Te yúhú cúú-í dàtná ññ sá nchító-ndó véxi cuuⁿ andiú, dico ñá díú pàá sá nání mànáá ní xèxi cue ñaní tnáhá-ó ñi xíndecu ndéé sanaha, chi ní xexí-yu pàá te dacuèi ní xihí-yu. Te nchaa ñáyiú na quèndáá iní ñáhá xii yúhú Yaá véxi cuuⁿ andiú, te cundecu ndihí-í-yu ñi caa ñi quíhíⁿ —càchí-gá xáhaⁿ-gã xii-yu.

⁵⁹ Nchaa tnúhu-a ní cáháⁿ-gá xití veñúhu ñáyiú ñúú Capèrnaúm.

Jèsús càchí tnúhu-gá nàcuáa naníhí tàhú-ó

⁶⁰ Te sá dúcáⁿ ñi cáháⁿ-gá ñúu vai ñáyiú nchìcúⁿ ñáhá xii-gá ní xítñàhá-yu:

—Vá tníí cuítì-o tnúhu càháⁿ-dé chi ñá díú tnúhu sá cúú vãha iní-ó càháⁿ-dé —càchí-yu xítñàhá-yu.

⁶¹ Te ní cutnùnì iní Jèsús sá ñà túú càháⁿ váha-yu cuèndá tnúhu ní cáháⁿ-gá, núu ní xáhaⁿ-gã xii-yu:

—¿Náa ñá tnàhá iní-ndó nàcuáa càháⁿ-í-a? ⁶² Te uuⁿ-gá cada nchòhó ñúu quini-ndó yúhú Téé cùu ñaní tnáhá-ndó nchàa-ndo ndaa-í núú ñi xíndecu-í díhna. ⁶³ Te espíritú ndécú ndihí yiqui cuñú-ó, xiãⁿ ndécá ñàha-xi xii-o, te núu ñá túú xiãⁿ, te yiqui cùñú-ó ñà túú nandíhí-xi. Dico núu nchaa tnúhu càháⁿ-í-a quée-xi iní-ndó ñá, te quini-ndó ñá xéhé candeca ñàha-xi xii-ndo núú cuáháⁿ núú véxi. ⁶⁴ Te dava nchòhó chi ñá túú sàndáá iní-ndó —càchí-gá xáhaⁿ-gã xii-yu.

Te ducaⁿ ñi xáhaⁿ-gã chi sa nàha-gá nándi cùu ñáyiú vá quèndáá iní ñáhá xii-gá. Te ducaⁿ sá nàha-gá ndédacàa téé cuáha cuèndá ñáhá xii-gá núú cuè téé cùu úhú iní ñáhá. ⁶⁵ Te ní xáhaⁿ tùcu Jèsús xii-yu:

—Te duha càháⁿ-í chi sa ní cachí tnúhu-í xii-ndo sã vã yòo ññ cuìní tníí tnúhu-í te núu ñá túú Tàtá-í Dútú Ndiòxí sánú ìchi ñàha-gá xii-yu —càchí-gá xáhaⁿ-gã xii-yu.

⁶⁶ Te òré-áⁿ ìo vai ñáyiú nchìcúⁿ ñáhá xii-gá ní xócòo-yu ñá ní xica cuu-gá-yu ndihí-gá. ⁶⁷ Te xiãⁿ ní xáhaⁿ Jèsús xii ndi ùxúú cue téé xica cuu ndihí-gá:

—¿Cuìní-ndó dandóo ñàha-ndo tnàhá-ndó-ãⁿ? —càchí-gá xáhaⁿ-gã xii-güedé.

⁶⁸ Te ní xáhaⁿ tẽ Xímú, àdi Pelú chi úú diu-dé:

—Mèstrú, ñá túú-gã ndéé quíhíⁿ-ndí, chi nchúhú nàhá-ndí sá tnúhu mee-n cùu-xi sá vãha candeca-xi iní-ndí ñi caa ñi quíhíⁿ.

⁶⁹ Chi nchúhú sa ní sàndáá iní ñáhá-ndí xii-n chi nàha-ndí sá yòhó cúú-n Crístú Déhe Dútú Ndiòxí yaá ndécú àndiú —cachí-dé xáhaⁿ-dẽ xii-gá.

⁷⁰ Te ní xáhaⁿ Jèsús:

—Nàha-ndo sá yúhú ní cáháⁿ ñáhà-í xii ndi ùxúú-ndó xica cuu ndihí ñàha-í xii-ndo, dico ññ-ndo quíhu ñàha yùcu ñávãha xii-ndo —càchí-gá xáhaⁿ-gã xii-güedé.

⁷¹ Duha ní cáháⁿ Jèsús cuèndá té Jùdás déhe té Xímú Iscàrioté ññ téé ñùtnahá núú ùxí ññ cue téé xica cuu ndihí-gá, chi sa nàha-gá sá tẽ-ãⁿ cuáha cuèndá ñáhá-dẽ xii-gá ññ nduu núú cuè téé cùu úhú iní ñáhá.

7

Cue ñaní Jèsús ñá túú sàndáá iní-güedé nàcuáa ndiú tnúhu càháⁿ-gá

¹ Te sàtá dúcáⁿ ñi cuu, te ní xica cuu Jèsús distritú Galileá, te ñá ní sãháⁿ-gá distritú Jùdeá, chi yàcáⁿ cuìní cue téé isràél cahni ñàha-güedé xii-gá ní cùu. ² Te ní cuyatni nduu càdá-yu vico, vico sá dánàni-yu Vico Vehe Tnuvixiⁿ. ³ Te ní xáhaⁿ cuè ñaní Jèsús xii-gá:

—Váha-gá quíhíⁿ-n distritú Jùdeá te vá cùndecu-n iha, chi yàcáⁿ cada-n nchàa sá quidé-n iha cuèndá quini nchaa ñáyiú cùndihí ñàha xii-n ndecu yacáⁿ. ⁴ Chi núu cuìní-ó quini nchaa ñáyiú ná chiuⁿ cada-o

te vá cádá dàyuhu-o. Te yòhó cuéhé nùú sǎ quídé-n, te cada-n na quìní nchaa ñáyiu — cǎchí-güedé xǎhaⁿ-güedé xii-gá.

⁵ Ducaⁿ ñí cǎháⁿ cue ñaní-gá, chi ni mée-güedé ñá túú sǎndáá iní-güedé nǎcuáa ndùu tnúhu cǎháⁿ-gá. ⁶ Te ní xǎhaⁿ Jèsús xii-güedé:

—Vátá tnàhá-gá òré quíhíⁿ-í dico nchòhó ndèdani cǎa oré cuu quíhíⁿ-ndó. ⁷ Chi nchaa ñáyiu ñùhu ichi cuéhé ichi duha chi ñá túú cùu úhú iní ñáhǎ-yu xii nchòhó. Dico yúhú chi cùu úhú iní ñáhǎ-yu xii-í cuendá sǎ cǎháⁿ-í sǎ quídé-yu nchaa sǎ cuéhé sǎ dúhá. ⁸ Te chí cuáháⁿ nchòhó vico chi yúhú vá quíhíⁿ-ni-í chi vátá tnàhá-gá òré quíhíⁿ-í —cǎchí-gá xǎhaⁿ-gǎ xii-güedé.

⁹ Te ducaⁿ ñí xǎhaⁿ-gǎ te ní ndóo-gá Galiléa, te cue tée-áⁿ cuáháⁿ-güedé.

Jèsús ndécú-gǎ ñí vico chiñuhú-yu Yá Ndiòxí

¹⁰ Dico sǎtá cuáháⁿ cue ñaní-gá, te ní xica-gá cuáháⁿ-gá tnàhá-gá dicó-ni sǎ dàyuhu cuáháⁿ-gá. ¹¹ Te ñáyiu isràél ñáyiu xǐndecu vico nǎnducú-yu Jèsús, te xǐtnàhá-yu:

—¿Ndéé ndécú Jèsús? —cǎchí-yu xǐtnàhá-yu.

¹² Te nchaa ñáyiu xǐndecu vico xǐndatnúhu-yu cuendá-gá. Te davá-yu xǐtnàhá-yu sǎ ño váha iní-gá, te davá-yu xǐtnàhá-yu sǎ ñá díú tée váha cùu-gá, chi dǎndahú-gá ñáyiu.

¹³ Dico mee-ni xǐcǎháⁿ nǎhí-yu, chi xǐyùhú-yu cue tée cùnnoo núu-yu.

¹⁴ Te ta ngúhuⁿ dava vico, te cuánguìhu Jèsús veñúhu cǎhnu sǎ ño cùnnoo, te ní ngúíta-gá dácuàha-gá ñáyiu. ¹⁵ Te ñáyiu isràél ní cuñúhu vǐhí-yu sǎ ño váha cǎháⁿ-gá, te ní xǐtnàhá-yu:

—¿Ná cuendá ío váha ñùhu-tu díquí tée-a tnúhu cǎháⁿ-dé te ñá túú ní dàcuaha-dé-i? —cǎchí-yu xǐtnàhá-yu.

¹⁶ Te ní xǎhaⁿ Jèsús:

—Ñá díú cuendá mée-í cúu-xí sǎ dǎnèhé ñáhǎ-í xii-ndo, chi cuendá Dútú Ndiòxí Yá ní tendaha ñàha xii-í véxi-í cúu-xí. ¹⁷ Te núu ío dava-ndo ñí yuhu ñí iní-ndó cuìní-ndó cǎda-ndo nǎcuáa cuìní Yá Ndiòxí cunduu, te cutnùní ndáá iní-ndó sǎ tnúhu dàcuaha ñàha-í xii-ndo cùu-xí cuendá mée Dútú

Ndiòxí, te ñá díú cuendá mée-í cúu-xí. ¹⁸ Te tée cuìní sǎ cádá cǎhnu ñàha ñáyiu xii-dé, tée-áⁿ cǎháⁿ-dé nǎcuáa véxi iní mée-dé. Dico yúhú cuìní-í sǎ cádá cǎhnú-yu Dútú Ndiòxí Yá ní tendaha ñàha xii-í véxi-í ñuyíu-a, te cǎháⁿ ndáá-í te ñá túú dàcuandehnde-í.

¹⁹ Te ndíi Moisés ní taxi ndíi tnúhu sǎ sǎnú ìchi ñàha xii-ndo nǎcuáa cundecu-ndo, te ñí ducaⁿ ñá túú sǎndáá iní-ndó nǎcuáa cǎháⁿ tnúhu-áⁿ. ¿Te ná cuendá cuìní-ndó cǎhni ñàha-ndo xii-í? —cǎchí-gá xǎhaⁿ-gǎ xii-yu.

²⁰ Te ní xǎháⁿ-yu xii-gá:

—Yucu ñávàha dàcoto ñàha xii-ó, chi vá yǒo ñí cuìní cǎhni ñàha xii-n —cǎchí-yu xǎháⁿ-yu xii-gá.

²¹ Te ní xǎhaⁿ Jèsús xii-yu:

—Sǎ ñí quide-í ñí sǎ vá yǒo tnàhí ndàcu cada nduu cuu-xi nduu ndetatú-ó, xǐáⁿ ío ní cuñúhu ñàha-ndo xii-í. ²² Te ndíi Moisés ní cǎchí ndíi sǎ cuàha-yu seña ñí cue landú tée, dico ñá díú mée ndíi ni cǎhu iní ndíi chi ducaⁿ tnàhí ní xóo cada cue ñaní tnàhá-ó dàvá-áⁿ, núu xǐáⁿ nchòhó sǎha-ndo seña ñí landú tée cuèi cùu-xi nduu ndetatú-ó. ²³ Te ducaⁿ quide-ndo cuendá sǎ ñá túú nǎ cumání-ndó nùú tnúhu sǎ sǎnú ìchi ñàha xii-ndo ní dǎndóo ndíi Moisés. ¿Te ná cuendá cúdeéⁿ-ndó nùu-í sǎ ñí quide tátna-í tée cùhú nduu ndetatú-ó-í? ²⁴ Te váha váha cada cuendá-ndó, te vá cuendá-ni cǎháⁿ-ndó sǎ yúhú ndècuéchi-í chi ñá túú xìní-ndó —cǎchí-gá xǎhaⁿ-gǎ xii-yu.

Jèsús xǎhaⁿ-gǎ xii-yu núu véxi-gá

²⁵ Te dava ñáyiu ñuú Jerusálén ní ngúíta-yu xǐtnàhá-yu:

—¿Ná ñá díú tée-áⁿ nǎndùcu-güedé cǎhni-güedé?, ²⁶ núu náí-dé nútñí núu chítú nùú tàcá-áⁿ cǎháⁿ-dé, te vá yǒo cùyíi cúñaha xii-dé ñí tnúhu. Cudana te cue tée cùchiuⁿ sǎndáá iní-güedé sǎ díú-dé cúu-dé Crístú Yá ní tendaha Yá Ndiòxí véxi ñuyíu-a. ²⁷ Dico nchoo xìní-ó ndéé ichi véxi tée-áⁿ, dico Crístú ná quixi-gá chi vá yǒo ñí quini ndéé ichi quixi Yá-áⁿ —cǎchí-yu xǐtnàhá-yu.

²⁸ Te yíhi Jesús xití veñúhu cǎhnu sǎ ño cùnnoo danehe-gá ñáyiu, te ní tecú dóho-gá tnúhu cǎháⁿ-yu. Te níhi ní cǎháⁿ-gá, te xǎhaⁿ-gǎ xii-yu:

—¡Ná quiní-tu nchòhó ndèé ichi véxi yúhú! Yúhú véxi-í dico ñá díú sã cúú iní mée-í, chi Yá Ndiöxí Yaá quidé nchàa-ndi túhú sã vãha ní tendaha ñàha-gá xii-í véxi-í, te nchòhó ñá túú xìní-ndó-gã. ²⁹ Te yúhú xìní-í-gá chi núú ndécú-gã ní quee-í véxi-í, te diu mee-gã ní tendaha ñàha-gá véxi-í — cãchí-gá xáhaⁿ-gã xií-yu.

³⁰ Te sã dúcãⁿ ñí cãháⁿ-gá, núu cuíní-güedé tñi ñaha-güedé xii-gá quíhíⁿ-gá vecaá ní cùu, dico vá yõo ñⁿ ní cùyi^ñ tñi ñaha xii-gá chi vátá sãá-gá òré tñi ñaha-güedé. ³¹ Dico vai-yu ní sãndáá iní ñáhã-yu xii-gá, te ní xitnãhá-yu:

—¿Nágá cúú sã cádá Crístú ná quixi-gá-i?, te té-a ío cuéhé núú sã tá quide-dé véxi. Vãa diu té-a cùu-dé Crístú Yaá ní tendaha Yá Ndiöxí véxi ñuyíú-a — cãchí-yu xitnãhá-yu.

Cue téa cùu fariséu cuíní-güedé quíhíⁿ Jèsús vecaá

³² Te ní níhí cue téa cùu fariséu tñihu nãcuãa cãháⁿ ñáyiu cuendá Jèsús, núu ní ndatnúhu-güedé ndihí cue dútú cúnúu, te ní techiⁿ-güedé cue téa quide cuendá veñúhu cuáhãⁿ-güedé cuátñi ñaha-güedé xii-gá ní cùu. ³³ Te ní xáhaⁿ-gã xii-güedé:

—Sacú duha nduu cundecu ndihí ñaha-í xii-ndo, te núhú tucu-í núú ndécú tãtã-í Yaá ní tendaha ñàha xii-í véxi-í ñuyíú-a. ³⁴ Te cuéi na nãnducu ñaha-ndo dico vá ná ñihí ñáhã-ndó chi vá sãá-ndó núú cündecu-í — cãchí-gá xáhaⁿ-gã xii-güedé.

³⁵ Te ní ngüita ñáyiu isrãel xitnãhá-yu:

—¿Ndèé quíhíⁿ-tu téa te vá ná ñihí-ó-dé-i? ¿Àdi quíhíⁿ-dé na chitnãhá-dé ñáyiu isrãel ñáyiu nchiténuu nchaa ñuu xicã cuendá danèhé-dé ñáyiu griégú? ³⁶ ¿Nãsa cãháⁿ-tu-dé duha cãháⁿ-dé: “Nanducu ñàha-ndo te vá nãnihí ñáhã-ndó chi vá sãá-ndó núú cündecu-í”, cãchí-tu-dé? — cãchí-yu xitnãhá-yu.

Nãcuãa cada Espíritú Yã Ndiöxí iní-ó

³⁷ Te nduu ñí yãha-nã vico cùu-xi nduu cahnu vihi, te nduu-ãⁿ ñí ngúnu tñi Jèsús tnuú ñáyiu, te níhí ní cãháⁿ-gá, te xáhaⁿ-gã xií-yu:

—Núu ío dava-ndo yichí-ndó ndüte, te quixi-ndo núu-í, te coho-ndo. ³⁸ Duha cãháⁿ-í chi nchaa ñáyiu na quindáá iní ñáhã xii-í, te cada-xi iní-yu dàtnã ñⁿ núú

xicã ndüte, nchaa-ni nduu xica ñá túú yichí, ducaⁿ càda-xi iní-yu núú cuáhãⁿ núú véxi dàtnã cãháⁿ-xi núú tütú Yã Ndiöxí — cãchí-gá xáhaⁿ-gã xií-yu.

³⁹ Te ducaⁿ ñí cãháⁿ-gá cuendá sã quixí Espíritú Yã Ndiöxí ngündecu ndihí nchaa ñáyiu na quindáá iní ñáhã xii-gá, chi sãá nduu ndãa-gá andiu càda cahnu ñaha Tãtã-gã xii-gã, te dàvã-ãⁿ te quixi Espíritú Yã Ndiöxí cundecu ndihí-yu.

Ñã ní cùu ñⁿnuú-yu cuendá tñihu ní cãháⁿ Jèsús

⁴⁰ Te dava ñáyiu ní xíndedóho tñihu ní cãháⁿ Jèsús ní xitnãhá-yu:

—Ndãá sã tãe-a cùu-dé téa cãchí-yu quixi cãháⁿ tñihu Yá Ndiöxí — cãchí-yu xitnãhá-yu.

⁴¹ Te dava tucú-yu xitnãhá-yu:

—Tãe-a cùu-dé Crístú Yaá ní tendaha Yã Ndiöxí véxi ñuyíú-a — cãchí-yu xitnãhá-yu.

Te dava-gã tucú-yu xitnãhá-yu:

—¿Nãa ndãa distritú Galileã quixi Crístú Yaá tendaha Yã Ndiöxí quixi ñuyíú-a? ⁴² Chi núú tütú Yã Ndiöxí cãchí-xi sã Crístú Yaá tendaha Yã Ndiöxí quixi ñuyíú-a cuu-gã ñⁿ ñaní tñáhã ndi Dãvií, te quee-gã ñuu Bèlén ñuu mée ndi Dãvií, duha cãháⁿ-xi núú tütú Yã Ndiöxí — cãchí-yu xitnãhá-yu.

⁴³ Te xíãⁿ núu ñá ní cùu ñⁿnuú-yu cuendá Jèsús. ⁴⁴ Te davã-yu cuíní-yu tñi-yu Jèsús quíhíⁿ-gã vecaá ní cùu, dico ní ñⁿ-yu ñá túú ní cùyi^ñ-yu tñi ñàhá-yu xii-gã.

Cue téa cùchiuⁿ ñã túú sãndáá iní-güedé Jèsús

⁴⁵ Te cue téa cuáhãⁿ tñi ñaha xii Jèsús ní cùu ní ndexiö-güedé núú cuè téa cùu fariséu ndihí núú cuè dútú cúnúu. Te xáhaⁿ cuè téa cùnuu-ãⁿ:

—¿Nã cuendá ñá ní cãndeca-ndo tãe-ãⁿ quixi? — cãchí-güedé xáhaⁿ-güedé.

⁴⁶ Te cue téa ní sãháⁿ chiⁿ ní xáhaⁿ-güedé: —Ni ñⁿ téa ñá túú xìní-ndí cãháⁿ dàtnã cãháⁿ téa-ãⁿ — cãchí-güedé xáhaⁿ-güedé.

⁴⁷ Te ní xáhaⁿ cuè téa cùu fariséu: —¿Nãa tñáhã nchòhó ní sãndáá iní-ndó tñihu ndehnde cãháⁿ téa-ãⁿ? ⁴⁸ ¿Nãa ñá túú xìní-ndó sã ní ñⁿ cue téa tãxi tñuní nchúhú, te ní ñⁿ nchúhú cue téa cùu fariséu ñá túú sãndáá iní-ndí téa-ãⁿ ñã? ⁴⁹ Nchaa ñáyiu tũha ñaha xii téa-ãⁿ ñá túú sãndáá iní-yu

nàcuáa càháⁿ tnúhu sá sánú ìchi ñaha xii-o, dico cuíta nihnú-yu sá dúcáⁿ quidé-yu — càchí-güedé xáhaⁿ-güedé xii cue téé-áⁿ.

50 Te té Nicodemú téé ní sáháⁿ niú ní ndatnúhu-dé ndihi Jèsús cúú-dé tnàhá-dé ìⁿ téé fariséú, te ní xáhaⁿ-dè xii-güedé:

51 —Tnúhu sá sánú ìchi ñaha xii-o nacuáa cundecu-o càchí-xi sá ndèé cundedóho-o nása càháⁿ téé tàú cuéchi cuèndá cutnùní iní-ó ná ní quide-dé, te dàtnùní càháⁿ-ó núu ndisa ndècuéchi-dé àdi ñá túú ndècuéchi-dé —càchí-dé xáhaⁿ-dè.

52 Te ní xáhaⁿ-güedé:

—Cùu ní cachí sá tnàhá-ò cúú-n téé distritú Galileá núu ducaⁿ càháⁿ-n. Dacuáha tutú yódó tnùní tnúhu Yá Ndiòxí te quiní-n nàcuáa càháⁿ-xi sá ní ìⁿ téé véxi distritú Galileá ñá túú càháⁿ-dè tnúhu Yá Ndiòxí —càchí-güedé xáhaⁿ-güedé.

53 Ducaⁿ te ndi díⁿ cuānuhú-güedé vehe-güedé.

8

Ìⁿ ñadìhí ndécú vîhi cuéchi-xi

1 Te Jèsús cuáháⁿ-gá yucu Òlívú. 2 Te sátá ní túndaá nduu tnèé, te cuáháⁿ tucu-gá veñúhu càhnu sá ìo cùnuu. Te ío cuéhé ñáyiú ní chítú níhnú-yu núú-gá, te ní ngóo-gá ní dánèhé ñáhá-gá xií-yu. 3 Te ní quexìo cue téé dàcuaha ñaha xií-yu nchaa tnúhu ní chídó tnùní ndí Moisés, ndihi cue téé cùu fariséú, te ndèca-güedé ìⁿ ñadìhí ní sáá, te ñaha-áⁿ ní xiní ñáhá-yu càháⁿ ndihi-aⁿ ìⁿ téé dico ñá díú yèi-aⁿ cuu-dé, te ní sanutnì ñaha-güedé xii-aⁿ tnuú nchaa ñáyiú xìndecu núú Jèsús. 4 Te ní xáhaⁿ-güedé xii Jèsús:

—Mèstrú, ñadìhí-a ní xiní ñáhá ñáyiú xii-aⁿ càháⁿ ndihi-aⁿ ìⁿ téé dico ñá díú yèi-aⁿ cuu-dé. 5 Te tnúhu ní chídó tnùní ndí Moisés càchí-xi sá yúú cahni-o nchaa ñáyiú dìhí duha quide. Te yòhó, ¿nása càchí-n cùnduu-í? —cachí-güedé xáhaⁿ-güedé xii-gá.

6 Duha ní càháⁿ-güedé chi cuèndá sá cuiní-güedé coto ndeé ñáhá-güedé xii-gá núu nása càháⁿ-gá cuèndá núcóo nchihi ñaha-güedé xii-gá ní càháⁿ-güedé. Te ní ngúnu ndeyi-gá te ní ngúita-gá téé-gá ndihi díquí ndáhá-gá lètrá núú ñúhú. 7 Te xicáⁿ tnúhú-ní tucu-güedé núú-gá núu ní ndonehe núú-gá, te ní xáhaⁿ-gá:

—Ndèdani càa nchohó te núu ñá túú ñá cuéchi quide-ndo te díhna nuu-gá-ndó chí cuáha-aⁿ yúú —càchí-gá xáhaⁿ-gá xii-güedé.

8 Te ní ngúnu ndeyi tucu-gá téé tucu-gá lètrá núú ñúhú. 9 Te sá dúcáⁿ ní xáhaⁿ-gá xii-güedé te ní ndixi túu iní-güedé sá ñá túú quide váha mee-güedé tnàhá-güedé, núu da ìⁿ da ìⁿ-güedé ní ndee, te díhna-gá cue téé cùu sacuéhé ní ndee te ní ngúita nchicúⁿ dava-gá-güedé. Te sátá ní ndihi-güedé ní ndee, te ní quendóo mee-ñá Jèsús ndihi ñadìhí-áⁿ. 10 Te ní ndonehe núú Jèsús te ní xiní-gá sá ní ndihi-güedé cuáháⁿ te mee-ñá ñadìhí-áⁿ ní ndóo-aⁿ, te ní xáhaⁿ-gá xii-aⁿ:

—¿Ndèndi cuáháⁿ cue téé càchí sá ní quide-n cuéchi? ¿Ní ìⁿ-güedé ñá ní cùndee tnúhu-güedé quíhíⁿ-n càstiú-va? —càchí-gá xáhaⁿ-gá xii-aⁿ.

11 Te ní xáhaⁿ-aⁿ xii Jèsús:

—Ñáhá, chi ní ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ní yúhú vá dáquihíⁿ ñáhà-í castiú xii-n. Te vitna te núhú-n te vá cadá-gá-n nàndi sá cuéhé sá dúhá —càchí-gá xáhaⁿ-gá xii-aⁿ.

Jèsús dándixi túu-gá iní-ó

12 Te ní càháⁿ tucu Jèsús núú ñáyiú, te xáhaⁿ-gá xií-yu:

—Yúhú cúú-í dàtná ìⁿ ñuhú dáyèhe-í ñuyíú-a, te nchaa ñáyiú na chìtnahá ñáhá xii-í, te vá cùndecu-gá-yu ichi cuéhé ichi duha, chi yúhú dándixi túu-í iní-yu cuèndá cutnùní iní-yu nàcuáa ndùu cuèndá Yá Ndiòxí, te cundecu-í ndihí-yu ní caa ní quíhíⁿ —càchí-gá xáhaⁿ-gá xií-yu.

13 Te ní xáhaⁿ cuè téé cùu fariséú xii-gá:

—Medi-n càháⁿ-n sá cúú-n téé váha, te vá yòo ìⁿ-gá chindèe tnúhu ñaha xii-n núu ná téé cùu-n, dico xíáⁿ ñá túú nàndìhí-xi —càchí-güedé xáhaⁿ-güedé xii-gá.

14 Te ní xáhaⁿ Jèsús:

—Cuèi càháⁿ-í cuèndá mèe-í dico nàndìhí tnúhu càháⁿ-í. Chi yúhú nàha-í ndèé ichi véxi-í, te xini-í ndèé ichi núhú-í, dico nchòhó chi ñá túú xini-ndó ndèé ichi véxi-í, te ní ñá túú xini-ndó ndèé ichi quíhíⁿ-í. 15 Te nchòhó chi cuèndá-ni càháⁿ-ndó cuèndá ñáyiú núu quide váha-yu àdi ñá túú quide

váha-yu. Te yúhú ñá túú càháⁿ-í cuendá ñáyiú núu quide váha-yu àdi ñá túú quide váha-yu. ¹⁶ Àdi núu càháⁿ-í dico ìⁿ tnúhu ndáá càháⁿ-í chi ñá díú-ní mèe-í càháⁿ, chi tnàhá Tàtá-í Yaá ní tendaha ñàha xii-í véxi-í ñuyíú-a càháⁿ-gá chindèe tnúhu ñaha-gă xii-í. ¹⁷ Te tnúhu sá sánú ìchi ñaha xii-ndo cachí-xi sá núu na cùndecu úú cue tée càháⁿ ndáá-güedé nàcuáa cùu ìⁿ sá cùndáá, te núu ìⁿ-ni tnúhu na càháⁿ-güedé ndi ndùú-güedé te xíãⁿ nándíhi-xi, duha càchí tnúhu-áⁿ. ¹⁸ Te ñu-ni ducaⁿ cùu-xi yúhú chi càháⁿ-í ìⁿ tnúhu ndáá sá cúu-xí mèe-í, te ñu-ni dàtná càháⁿ-í càháⁿ Tàtá-í Yaá ní tendaha ñàha xii-í véxi-í ñuyíú-a —càchí-gá xáhaⁿ-gă xii-güedé.

¹⁹ Te ní xáhaⁿ-güedé xii-gá:

—¿Te ndèé ndécú Tàtá-n-í? —càchí-güedé xáhaⁿ-güedé.

Te ní xáhaⁿ Jèsús:

—Te núu dìcò xìní-ndó yòo cuu yúhú-á te ducaⁿ te quini-ndó Tàtá-í. Te ni yúhú ñá túú xìní-ndó yòo cuu-í núu xíãⁿ ñá túú xìní-ndó Tàtá-í —càchí-gá xáhaⁿ-gă xii-güedé.

²⁰ Duha ní càháⁿ Jèsús ñini dàcuaha-gă ñáyiú xití veñúhu núu ndécú àlcaniá díhúⁿ. Te vá yòo ìⁿ ni cùyii tñi ñaha xii-gá chi vátá sàá-gá òrè tñi ñaha-güedé.

Ñáyiú ñá túú sàndáá iní ñáhá xii Jèsús vá ndácú-yu quíhíⁿ-yu núu nùhú-gá cundecu-gá

²¹ Te ní xáhaⁿ tùcu Jèsús xii-güedé:

—Yúhú nùhú-í te nanducu ñàha-ndo te vá nánihí ñáhá-ndó, te cuú-ndó núu yíca cuèchi-ndo, chi vá ndácú-ndó sàá-ndó núu nùhú-í cundecu-í —càchí-gá xáhaⁿ-gă xii-güedé.

²² Te ní xitnàha cue tée isràél:

—¿Te náa cahni-dé mèe-dé núu càchí-dé sá vã ndácú-ó sàá-ó núu quíhíⁿ-dé-ãⁿ? —càchí-güedé xitnàha-güedé.

²³ Te ní xáhaⁿ Jèsús xii-güedé:

—Nchòhó chi cue tée ñuyíú-a cùu-ndo, núu ío ñùhu iní-ndó sã ío ñuyíú-a. Te yúhú chi tée núu ñinu cùu-í núu xíãⁿ ñá túú sã ío ñuyíú-a ñùhu iní-í. ²⁴ Te xíãⁿ núu càchí-í sá cùu-ndó núu yíca cuèchi-ndo, chi ñá cuini-ndó quindáá iní-ndó sã yúhú véxi cuuⁿ-í andiú, te núu xíãⁿ ñu-ni núu yíca cuèchi-ndo cùu-ndó —càchí-gá xáhaⁿ-gă xii-güedé.

²⁵ Te ní xícaⁿ tnúhú-güedé núu-gă, te xáhaⁿ-güedé:

—¿Te ná cúu yòhó núu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gă:

—Sa ní cachí tnúhu-í xii-ndo ndèé díhna —càchí-gá xáhaⁿ-gă xii-güedé.

²⁶ Te xáhaⁿ tùcu-gá:

—Ndècu cuéhé tnúhu càháⁿ-í cada ndáá-í cuendá nchòhó. Te Tàtá-í Yaá ní tendaha ñàha xii-í véxi-í ñuyíú-a càháⁿ-gá tnúhu ndáá, te tnúhu càháⁿ yúhú ñuyíú-a cùu-xi tnúhu ní càháⁿ-gá ní xindedóho-í —càchí-gá xáhaⁿ-gă xii-güedé.

²⁷ Te mee-güedé ñá túú ní tècú tnùni-güedé sá cuendá Dútú Ndiõxí ní càháⁿ Jèsús. ²⁸ Te ní xáhaⁿ-gă xii-güedé:

—Òré ná catá càa ñaha-ndo xii yúhú Téé cùu ñani tnáhá-ndó nchàa-ndo núu cùrúxí cahni ñaha-ndo, te òrè-ãⁿ cutnùni iní-ndó yòo cuu-í, te ñá túú quide-í sá cúu iní mèe-í, chi yúhú càháⁿ-í nàcuáa ní dánèhé ñáhá Tàtá-í ²⁹ Yaá ní tendaha ñàha xii-í véxi-í. Te ñu-ni ndécú ndihi ñaha-gă xii-í, te ñá túú dàña nihnu ñaha-gă chi quide-í nchaa nàcuáa cùu iní-gá —càchí-gá xáhaⁿ-gă xii-güedé.

³⁰ Te sá dúcáⁿ ñi càháⁿ-gá núu ío vai ñáyiú ní sàndáá iní ñáhá xii-gá.

Ñáyiú sàndáá iní ñáhá xii Yá Ndiõxí ndihi ñáyiú ndècu ichi cuéhé ichi duha

³¹ Te ní xáhaⁿ Jèsús xii ñáyiú isràél ñáyiú ní sàndáá iní ñáhá xii-gá:

—Te núu vá dáña ndèé-ndó càda-ndo nchaa nacuáa càháⁿ-í, te cuu ndisa-ndo cuè téé tnàhá tnúhu ndihi-í, ³² te tecú tnùni-gá-ndó tnúhu ndáá, te ducaⁿ te cácu nihnu-ndo —càchí-gá xáhaⁿ-gă xii-yu.

³³ Te ní xáhaⁿ-yu:

—Nchúhú cúu-ndí cue ñani tnáhá ndi Abrahám, te ni ìⁿ nduu ñá túú ndèé sácündedí nihnu-ndí ndoho tnahá-ndí núu cáchí-ò sá dàcácu nihnu ñaha-n xii-ndí —càchí-yu xáhaⁿ-yu xii-gá.

³⁴ Te ní xáhaⁿ Jèsús xii-yu:

—Na càchí tnúhu ndáá-í xii-ndo sã nchàa ñáyiú quide nchaa sá cuéhé sá dúhá tàxi tnuni ñáhá-nã-xi xii-yu. ³⁵ Te cue ñáyiú xinu cuechi te vá cúu ìⁿ-ná cuú-yu ndihi ñáyiú dii vèhe-xi xinu cuechí-yu, dico cue déhe ñáyiú dii vèhe-xi-ãⁿ chi ìⁿ-ni cùu ndihi

ñaha-güexi xii-yu. ³⁶ Te núu yúhú Yáa cúú Dêhe Yá Ndiöxí dâcâcu nihnu ñaha-ï xii-ndo núu nchâa yíca cuêchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xini-í sá nchòhó cúú-ndó ñani tnáhá ndíi Àbrahám, te dicó-ni sá ñã tnáhá iní-ndó tnúhu càháⁿ-í núu xiãⁿ cuini-ndó càhni ñaha-ndo. ³⁸ Te yúhú càháⁿ-í nâcuâa ní dânehé ñáhá Tâtâ-í, te nchòhó quidé-ndó nâcuâa càháⁿ tâtâ-ndó —câchí-gá xáhaⁿ-gã xii-yu.

³⁹ Te ní xáháⁿ-yu:

—Ndíi Àbrahám cúú tâtâ-ndí —câchí-yu xáhãⁿ-yu xii-gá.

Te ní xáhaⁿ Jèsús:

—Núu ndisa ñani tnáhá ndíi Àbrahám cúú-ndó, te cada-ndo nâcuâa ní xóo cada ndíi ni cùu. ⁴⁰ Te yúhú cuêi càháⁿ-í ìⁿ tnúhu ndáá nâcuâa càháⁿ Yá Ndiöxí câchí tnúhu-gã xii-í, te cuini-ndó càhni ñaha-ndo. ¡Dico ndíi Àbrahám chi ñã túú dùcaⁿ ni quide ndíi! ⁴¹ Te nchòhó quidé-ndó nâcuâa quide tâtâ-ndó —câchí-gá xáhaⁿ-gã xii-yu.

Te ní xáháⁿ-yu:

—Nchúhú, ñã túú yâyacáⁿ ndécú tâtâ-ndí, chi ìⁿndíi Yá Ndiöxí cúú tâtâ-ndí —câchí-yu xáhãⁿ-yu xii-gá.

⁴² Te ní xáhaⁿ Jèsús:

—Núu dicó Yá Ndiöxí ndisa cùu Tâtâ-ndó te cuu iní ñáhá-ndó xii-í ní cùu chi yúhú ní quee-í núu ndécú-gã véxi-í ñuyú-a. Te ñã túú véxi-í sá cúú iní mée-í, chi mee-gã ní tendaha ñaha-gã véxi-í. ⁴³ Te ñã túú tècú tnúni-ndó tnúhu càháⁿ-í chi ñã túú tnáhá iní-ndó. ⁴⁴ Te nchòhó chi tâtâ-ndó cùu yucu ñávãha núu cudíi iní-ndó quide-ndo nchaa nâcuâa cùu iní-xi, chi ndée òré ní ngáva ñuyú ducaⁿ-ni ndècu-xi dacáhãⁿ-xi iní-ndó sàhni tnaha-ndo. Te ñã ìⁿ ndúu cáháⁿ-xi ìⁿ tnúhu ndáá chi ñã túú xica-xi ichi ndáá, chi mee-ni ichi tnúhu ndehnde xica-xi chi ducaⁿ iní-xi. Te ñu-xi dâcahu-xi iní-ndó dâcuandehnde-ndo. ⁴⁵ Te yúhú càháⁿ-í tnúhu ndáá te ñã túú cuini-ndó quindáá iní ñáhá-ndó. ⁴⁶ ¿Te ndédacâa nchòhó xini-ndó sã quidè-í ìⁿ sá cuéhé sá dúhá-í?, te yúhú ñã túú nã quidè-í chi càháⁿ ndáá-í, ¿te ná cuèndá ñã túú cuini-ndó quindáá iní-ndó tnúhu càháⁿ-í? ⁴⁷ Te nchaa ñáyiu ndècu ichi Yá Ndiöxí, ñáyiu-áⁿ sácúndedóho-yu nchaa tnúhu càháⁿ-gã. Te nchòhó chi ñã

díu ichi Yá Ndiöxí ndécú-ndó núu ñã túú sácúndedóho-ndo tnúhu càháⁿ-gã —câchí-gá xáhaⁿ-gã xii-yu.

Díhna-gá Crístú sa ndècu dacúúxi ndíi Àbrahám

⁴⁸ Te ní xáhaⁿ ñáyiu isràél:

—Váha-ni càháⁿ-ndí sá tée samaritanú cúú-n, te yucu ñávãha ndècu ndíhi-n —cachí-yu xáhãⁿ-yu xii-gá.

⁴⁹ Te ní xáhaⁿ Jèsús:

—Yúhú, ñã túú yùcu ñávãha ndècu ndíhi-í, chi Tâtâ-í quidé càhnu-í, te nchòhó da cùu úhú iní ñáhá-ndó xii-í —câchí-gá xáhaⁿ-gã xii-yu.

⁵⁰ Te xáhaⁿ tùcu-gá:

—Yúhú, ñã túú câchí-í sá cádá càhnu ñaha-ndo, dico Dútú Ndiöxí cuini-gã sã cádá càhnu ñaha-ndo xii-í. Te mee-gã cáháⁿ-gã núu ndédacâa-ndo quide váha, te ndédacâa-ndo ñã túú quide váha. ⁵¹ Te na câchí tnúhu ndáá-í xii-ndo sã nchâa ñáyiu na tníi tnúhu càháⁿ-í te vá cuíta nihnú-yu —câchí-gá xáhaⁿ-gã xii-yu.

⁵² Te ní xáhaⁿ tùcu ñáyiu isràél:

—Vitna te ní xini ndáá-ndí sã yùcu ñávãha ndècu ndíhi-n, chi ndíi Àbrahám ndíhi nchaa cue tée ní xóo cáháⁿ tnúhu Yá Ndiöxí ndée sanaha ní xihí-güedé, te yòhó câchí-tu-n sã ncháá ñáyiu na tníi tnúhu càháⁿ-n te vá cùu-gã-yu. ⁵³ ¿Náa ío-gã càhnu cuu-ó dâcúúxi ñani tnáhá-ndí ndíi Àbrahám-ãⁿ? Tée-áⁿ dai ní xihí-dé ndíhi cue tée ní xóo cáháⁿ tnúhu Yá Ndiöxí ndée sanaha. ¿Te yòhó nágá-tu cùu-n te vá cùu-n càháⁿ-n-í? —cachí-yu xáhãⁿ-yu.

⁵⁴ Te ní xáhaⁿ Jèsús:

—Te núu dicó mée-í quidé càhnu-í mée-í ñã, te ñã túú nândíhi sã quidè-í núu ducaⁿ. Dico Tâtâ-í quidé càhnu ñaha-gã xii-í, te ñu-ni Yáa-áⁿ câchí-ndó cùu Ndiöxí-ndó. ⁵⁵ Te nchòhó chi ñã túú xini-ndó-gã. Te yúhú chi xini-í-gã. Te núu na câchí-í sã ñã túú xini-í-gã te dâcuandehnde-í dàtná ndehnde mée-ndo. Te yúhú chi xini ndisa-í-gã te tníi-í nchaa tnúhu càháⁿ-gã. ⁵⁶ Te ndíi Àbrahám ñani tnáhá-ndó ní xindecu ndée sanaha ío ní cudíi iní ndíi sã quini ñáhá ndíi xii-í, te ní sáá nduu ní xini ñáhá ndíi xii-í núu ío ní cudíi iní ndíi —câchí-gá xáhaⁿ-gã xii-yu.

57 Te ní xáhaⁿ ñáyi israhél xii Jèsús:

—Ni vátá cùhúⁿ-gã-n ùdico úxí cuíá-n te càchí-n sã ní xiní-n ndii Àbrahám, te ní cunaha vîhi ní xihí ndíi-áⁿ—càchí-yu xãhãⁿ-yu xii-gá.

58 Te ní xáhaⁿ Jèsús:

—Te na càchí tnúhu ndáá-í xii-ndo sã cùmání-gã cundecu ndíi-áⁿ ñuyíú-a te yúhú sa ndècu-gá-í—càchí-gá xáhaⁿ-gã xii-yu.

59 Te sá dúcáⁿ ní cáháⁿ-gá nõu xiãⁿ ní quehéⁿ-yu yúú cuãha ñàháⁿ-yu xii-gá ní cùu, te ní nguivãha-gá núu-yu te ní quee-gá xití veñúhu cuáhãⁿ-gá.

9

Jèsús quidé tãtna-gá ñⁿ tée cuàá

1 Te núú xicá cùu Jèsús ní naníhí-gã ñⁿ tée cuàá, te sa ducaⁿ tnàhí càa núú-dě ní cacu-dé. 2 Te ní xáhaⁿ cuè tée xica cuu ndihi-gá xii-gá:

—Mèstrú, ¿ná cuendá dàcáⁿ cuàá tée-ãⁿ ní cacu-dé? ¿Sá cuendá nchaa yicá cuèchi tãtã-dě, ãⁿ sã cuendá nchaa yicá cuèchi nãná-dě, ãⁿ sã cuendá nchaa yicá cuèchi mee-dě dàcáⁿ cáá-dě ní cacu-dé? —càchí-güedé xãhaⁿ-güedé xii-gá.

3 Te ní xáhaⁿ Jèsús:

—Ni ñã díú sã cuendá nchaa yicá cuèchi mee-dě, te ni ñã díú sã cuendá nchaa yicá cuèchi tãtã-dě, te ni ñã díú sã cuendá nchaa yicá cuèchi nãná-dě, chi mee Yã Ndiõxí ní cuiní-gá sá dúcáⁿ cùnduu-dé sáá-dé ñuyíú-a cuendá sã ñuyíú-a quini ñáyi nãsa cada ñaha Yã Ndiõxí xii-dé ndúha núú-dě. 4 Te vitna ió-gá nduu cùyica sá cadà-í nchaa chiúⁿ ní táhú Yã ní tendaha ñaha xii-í véxi-í ñuyíú-a, chi sáá nduu te vã ndácú-gã-í cada-í chiúⁿ-gá. 5 Te nini ndècu-gá-í ñuyíú-a te dândixi túu-í iní nchaa ñáyi cuendá cutnùní iní-yu nãcuáa nduu cuendá Yã Ndiõxí—càchí-gá xáhaⁿ-gã xii-güedé.

6 Te sátá dúcáⁿ ní cáháⁿ-gá, te ní sati-gá díi-gá núú ñúhú te ní dácá-gã luha ñuhu ní cuãha ndéhyú, te ndéhyú-ãⁿ ní dácánùu-gá ndúú xio núú tée cuàá-áⁿ. 7 Te ní xáhaⁿ-gã xii-dé:

—Quíhíⁿ-n nãquete-n núú-n ndùte tanquí Silóé—càchí-gá xáhaⁿ-gã xii-dé. Te Silóé-ãⁿ queé-xí tnúhu mée-yu: Tée xica chiúⁿ.

Te ní sáhãⁿ tée cuàá-áⁿ ní naquete-dé núú-dě, te òré ní ndexìo-dé te sa ndèhe-dé. 8 Te nchaa ñáyi ndècu yatni núú ndécú-dě ndihi nchaa ñáyi xiní ñáhã xii-dé núú xicáⁿ ndàhú-dé ní xitnãháⁿ-yu:

—¿Nãa ñã díú tée-ãⁿ ní xóo cácãⁿ ndàhú-dé?—càchí-yu xitnãháⁿ-yu.

9 Te davá-yu càchí-yu sá díú-dě, te davá-yu càchí-yu sã ñã díú-dě, dico ducaⁿ càa-dé, càchí-yu xitnãháⁿ-yu.

Dico mee-dě ní xáhaⁿ-dě xii-yu sá díú-dě.

10 Te ní xicáⁿ tnúhú-yu núú-dě, te xãhãⁿ-yu:

—¿Nãsa ní cuu núu ní ndúha núú-n ndèhe-n vitna?—cachí-yu xãhãⁿ-yu xii-dé.

11 Te ní xáhaⁿ-dě:

—Tée nani Jèsús-ãⁿ ní cadúha-dé luha ndéhyú te ní dácánùu-dé núú-í, te ní táuchíúⁿ-dě ní sáhãⁿ-í tànquí Silóé ní naquete-í núú-í, te òré-ãⁿ ní cuu cundehe-í—càchí-dé xãhaⁿ-dě xii-yu.

12 Te ní xicáⁿ tnúhú tucú-yu núú-dě, te xãhãⁿ-yu:

—¿Te ndèé ndécú tée-áⁿ?—càchí-yu xãhãⁿ-yu xii-dé.

Te ní xáhaⁿ-dě:

—Ñã túú xiní-í—càchí-dé xãhaⁿ-dě xii-yu.

Cue tée cùu fariséú ndátnúhu-güedé ndihi tée ní ndúha núú-xi

13 Te ndèca-güedé tée ní ndúha núú-xi-áⁿ cuáhãⁿ núú cuè tée cùu fariséú. 14 Te cuendá sã nduu ndetatú-yu ní cadúha Jèsús ndéhyú ní dácánùu-gá núú tée-ãⁿ te ní ndúha, 15 xiãⁿ nõu ní xicáⁿ tnúhú cuè tée cùu fariséú núú-dě, te xãhaⁿ-güedé:

—¿Nãsa ní cuu ní ndúha núú-n?—càchí-güedé xãhaⁿ-güedé xii-dé.

Te ní xáhaⁿ-dě xii-güedé:

—Ñã tée ní dácánùu-dé ndéhyú nõu-í te ní sáhãⁿ-í ní naquete-í, te ní cuu ndèhe-í vitna—càchí-dé xãhaⁿ-dě xii-güedé.

16 Te dava cue tée cùu fariséú ní xitnãha-güedé:

—Ñã díú Yã Ndiõxí ní tendaha ñaha-gá xii tée-ãⁿ véxi-dé nõu duha quide-dé nchaa sã vã yõo tnàhí ndacu cada, te ñã túú sãndáá iní-dé canehé íi-dě nduu ndetatú-ó—càchí-güedé xitnãha-güedé.

Te dava-güedé ní xitnãha-güedé:

—¿Nása ndacu-dé cada-dé sá vǎ yǎo tnàhí ndàcu cada te núu cùu-dé tée yíca cuèchi? — cǎchí-güedé xǎhà-güedé.

Te ñá túú ní cùu ìⁿnuu-güedé tnúhu ní cǎháⁿ-güedé. ¹⁷Te ní xícaⁿ tnúhú tucu-güedé núu tée ní ndúha núu-xi-áⁿ, te xǎhaⁿ-güedé:

—Te yòhó, ¿nása cǎchí-n cuendá tée ní quide tátna núu-n te ní ndúha? — cǎchí-güedé xǎhaⁿ-güedé xii-dé.

Te ní xáhaⁿ-dè:

—Yúhú cǎchí-í sá ìⁿ tée cǎháⁿ tnúhu Yá Ndiǒxí cúu-dé —cǎchí-dé xǎhaⁿ-dè xii-güedé.

¹⁸ Dico cue tée isràél ñá ní sàndáá iní-güedé sá cuàá-dé ní cùu, chi cuendá sa ní ndúha núu-dé ní xiní ñáhá-güedé, te xǎⁿ núu ní cana-güedé tátá-dé ndíhi nǎná-dé, ¹⁹ te ní xícaⁿ tnúhú-güedé núu-yu, te xǎhaⁿ-güedé:

—¿Diu tée-a déhe-ndo tée cǎchí-ndó cuàá-dé ní cacu-dé-áⁿ? ¿Te nása ní cuu ní ndúha núu-dé? —cǎchí-güedé xǎhaⁿ-güedé xii-yu.

²⁰ Te ní xáhaⁿ tátá-dé ndíhi nǎná-dé:

—Diu déhe-ndí cúu-dé te sa cuàá ndisa-dé ní cacu-dé, ²¹ dico ñá túú xiní-ndí nása ní cuu ní ndúha núu-dé, te ni ñà túú xiní-ndí yoo ní quide tátna. Chí cǎcáⁿ tnúhú núu méé-dé xǎⁿ núu sa sàcuéhé-dé, te na cǎháⁿ-dé núu nása ní cuu ní ndúha núu-dé —cǎchí-yu xǎháⁿ-yu xii-güedé.

²² Duha ní cǎháⁿ tátá-dé ndíhi nǎná-dé ní xǎháⁿ-yu xii-güedé cuendá sá yúhú-yu cue tée cùnuu núu ñáyiú isràél, chi cue tée-áⁿ sa ní ndatnúhu-güedé ní cuu ìⁿnuu-güedé sá núu ndédacàa ñáyiú na cǎháⁿ sá Jesús cúu-gǎ Cristú Yaá ní tendaha Yá Ndiǒxí véxi ñuyíú-a, te vǎ dáñá-gǎ-güedé quíhu-yu veñúhu. ²³ Núu xǎⁿ ní xáhaⁿ tátá-dé ndíhi nǎná-dé sá ná cǎcáⁿ tnúhú-güedé núu méé-dé chi sa sacuéhé-dé.

²⁴ Te xǎⁿ núu ní cana tucu-güedé tée ní ndúha núu-xi-áⁿ, te ní xáhaⁿ-güedé:

—Cǎháⁿ-n ìⁿ tnúhu ndáá chi Yá Ndiǒxí ndéhé ndíhi-gǎ nàcuáa ní cuu ní ndúha núu-n, chi nchúhú xiní-ndí sá dícó ìⁿ tée ndècu yíca cuèchi-xi cùu tée cǎchí-n ní quide tátna núu-n —cǎchí-güedé xǎhaⁿ-güedé xii-dé.

²⁵ Te ní xáhaⁿ-dè:

—Yúhú, ñá túú xiní-í te núu tée ndècu yíca cuèchi-xi cùu-dé àdi ñáhá. Dícó-ni sá xiní-í

sá cuàá-í ní cùu te vitna ní cuu cundehe-í —cǎchí-dé xǎhaⁿ-dè xii-güedé.

²⁶ Te ní xícaⁿ tnúhú tucu-güedé núu-dé, te xǎhaⁿ-güedé:

—¿Nása ní quide ñaha-dé xii-n te ní ndúha núu-n-í? —cǎchí-güedé xǎhaⁿ-güedé xii-dé.

²⁷ Te ní xáhaⁿ-dè:

—Yúhú sa ní cǎháⁿ-í te ñá túú quide cuendá-ndó. ¿Te ná cuendá cuíní-ndó cǎchí tnúhu-ni tucu-í? ¿Á tnáhá-ndó cuíní-ndó quindáá iní-ndó tnúhu cǎháⁿ-dé? —cǎchí-dé xǎhaⁿ-dè xii-güedé.

²⁸ Te ní cudééⁿ-güedé núu-dé, te ní xáhaⁿ-güedé xii-dé:

—Te núu yòhó cuíní-n chinchícúⁿ-n tée-áⁿ te cuáháⁿ, dico nchúhú chi canchicúⁿ nihnu nahi-ni-ndí nàcuáa ní cǎháⁿ ndíi Moisés. ²⁹ Te nchúhú chi nàha-ndí sá Yá Ndiǒxí ní cǎháⁿ ndíhi-gǎ ndíi Moisés, dico tée cǎchí-n-áⁿ chi ni ñà túú xiní-ndí ndèé tée cùu-dé —cǎchí-güedé xǎhaⁿ-güedé xii-dé.

³⁰ Te ní xáhaⁿ tée ní ndúha núu-xi-áⁿ:

—¿Te náa ñá díú nchòhó cǎchí-ndó sǎ ìo túha-ndo? Te núu ducaⁿ cǎháⁿ-ndó sǎ ñà túú xiní-ndó ndèé tée cùu-dé, te diu-dé ní quide tátna-dé núu-í ní ndúha —cǎchí-dé xǎhaⁿ-dè xii-güedé.

Te xǎhaⁿ tucu-dé:

³¹ —Xiní-ó sǎ Yá Ndiǒxí ñá túú tédóho-gǎ tnúhu cǎháⁿ ñáyiú quide nchaa sá cuéhé sá dúhá, chi nchaa ñáyiú quide cahnu ñaha xii-gǎ te quidé-yu nchaa nàcuáa cùu iní-gǎ, te ñáyiú-áⁿ tédóho-gǎ tnúhu cǎháⁿ-yu. ³² Te ñá ìⁿ ndúu cǎháⁿ ñáyiú cuendá ìⁿ tée cada tátna núu ìⁿ ñáyiú cuàá ndèé ní cacu-xi te ndúha. ³³ Te núu ñá díú mèe Yá Ndiǒxí ní tendaha ñaha-gǎ xii tée-áⁿ véxi-dé ña, te vǎ ndácú-dé cada tátna-dé núu-í ní cùu —cǎchí-dé xǎhaⁿ-dè xii-güedé.

³⁴ Te ní xáhaⁿ-güedé:

—Dico yòhó ndèé yatni vǎi cuèchi sa ta quide-n véxi, ¿te vitna nacanu ichi ñaha-n xii-ndí cǎháⁿ-n-áⁿ? —cǎchí-güedé xǎhaⁿ-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gǎ-güedé níhí tnáhá ndíhi ñaha-dé xii-güedé.

Ñáyiú ñá túú ndíxi túu iní cuendá nchaa sá cuéhé sá dúhá quidé-yu

³⁵ Te ní níhí Jèsús tnúhu sá nǐ queñuhu-güedé tée ní cuhú núú-xi-án tnuú-güedé cuendá sá vǎ tnàhá tnúhu ndíhi ñaha-gǎ-dé xii-güedé, te ní naníhí ñáhá-gǎ xii-dé te ní xáhaⁿ-gǎ:

—¿Sàndáá iní-n Dèhe Yá Ndiǒxí-ǎn? — cǎchí-gǎ xáhaⁿ-gǎ.

³⁶ Te ní xáhaⁿ tǎe ní cuhú núú-xi-án:

—Mèstrú, cachí tnúhu núu ndèé ndécú tǎe-án cuendá quíndáá iní-í-dé —cǎchí-dé xáhaⁿ-dǎ xii-gǎ.

³⁷ Te ní xáhaⁿ Jèsús:

—Sa xìní-n-dǎ chi díu-dé cúu yǎhú tée ndàtnúhu ndíhi-n —cǎchí-gǎ xáhaⁿ-gǎ xii-dé.

³⁸ Te ní ngüíñí xítí-dǎ núu-gǎ, te ní xáhaⁿ-dǎ:

—Xítóhó Jesucristú, sàndáá iní ñáhà-í xii-n —cǎchí-dé xáhaⁿ-dǎ xii-gǎ.

³⁹ Te ní xáhaⁿ tùcu Jèsús:

—Yúhú véxi-í ñuyíú-a cada ndáá-í cuéchi ñáyíu. Te nchaa ñáyíu ñá túú quíde váha cúu-yu dàtná ñá ñáyíu cuáá, dico nchaa ñáyíu cutnuni iní-xi sá ñà túú quíde váha, te núu na quíndáá iní-yu tnúhu cǎháⁿ-í, te cada iní-ndó sǎ dàtná sá nǐ nacaáⁿ núu-yu chi tní-yu tnúhu cǎháⁿ-í. Te ñáyíu cǎchí sá quíde váha vá núu núu-yu cuéchi-yu chi quesàhá-yu sá ïo ndáá quíde-yu, ñáyíu-án cúu-yu dàtná ñá ñáyíu cuáá, chi vá ndíxí tǔu iní-yu sá ñà túú quíde váha-yu ndécú-yu, te vá tní-yu tnúhu cǎháⁿ-í —cǎchí-gǎ xáhaⁿ-gǎ xii-dé.

⁴⁰ Te sá dúcáⁿ nǐ cǎháⁿ-gǎ, núu ní cǎháⁿ ñá úú cue tée cúu fariséú, te xáhaⁿ-güedé:

—¿Te náa tnàhá nchúhú cuáá-ndí cǎháⁿ-n-ǎn? —cǎchí-güedé xáhaⁿ-güedé xii-gǎ.

⁴¹ Te ní xáhaⁿ Jèsús:

—Te núu dicó nchòhó cuáá-ndó ñá, te vá cúndecu cuéchi-ndo ní cúu, dico cǎchí-ndó sǎ ndéhé-ndó ñá sá quíde-ndó te ñá ndáá, núu xǎáⁿ ïo ndècu cuéchi-ndo.

10

Jèsús cǎháⁿ-gǎ cuendá cùrrálí mbǎé

¹ Te na cǎchí tnúhu ndáá-í xii-ndo sǎ ñá tǎe ñá túú quíhu ndàa yuyehe ñá cùrrálí mbǎé, te cùtèxínu-ni na cuídó-dé, tǎe-án cúu-dǎ ñádúhú. ² Dico tǎe quíhu ichi yèhe

cùrrálí-güedi, tǎe-án cúu-dǎ xítóhó-güedi.

³ Te tǎe ndèé yèhe cùrrálí-güedi nacaáⁿ-dǎ te cuánguihu xítóhó-güedi te ní cǎháⁿ-dǎ, te ní nucúhuⁿ ndudú ñáhá-güedi xii-dé. Te ní cǎháⁿ díú-dǎ-güedi te ní queñuhu-dǎ-güedi cùrrálí. ⁴ Te sáta nǐ quee-güedi cùrrálí, te ní ngódó núu-dǎ núu-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túú chinchicúⁿ-güedi ñá tǎe tǎtú, chi núcúhuⁿ ndudú-güedi sá ñà díú xítóhó-güedi cúu-dǎ, núu xǎáⁿ xínú-güedi núu-dǎ —cǎchí-gǎ xáhaⁿ-gǎ xii-güedé.

⁶ Duha ní cǎháⁿ Jèsús cuendá sá cuení-gǎ dacuàhá-yu tnúhu-gǎ ní cúu, dico ñá ní tǎcu tnùní-yu nása ndúu tnúhu ní cǎháⁿ-gǎ.

Jèsús cúu-gǎ dàtná ñá tǎe

⁷ Te ní xáhaⁿ tùcu Jèsús xii-güedé:

—Na cǎchí tnúhu ndáá-í xii-ndo sǎ yǎhú cúu-í dàtná ñá yèhe cùrrálí núu ndíhu cue mbǎé. ⁸ Te nchaa cue tǎe sa yòdo nuu-gǎ ní quixi ní dándàhú-güedé ñáyíu cúu-güedé dàtná ñádúhú dùhu-güedé cue mbǎé ní cúu, dico ñá ní quíde cuendá ñáhá-güedi xii-güedé, chi ní cutnuni iní-güedi sá ñà díú xítóhó-güedi cúu-güedé. ⁹ Te yúhú cúu-í dàtná yuyèhe cùrrálí cue mbǎé. Te ducaⁿ sǎtnahá-xi cúu-í chi nchaa ñáyíu na tǎha ñaha xii-í te naníhí tǎhú-yu. Te cúu-yu dàtná cue mbǎé quiti xǎquee cùrrálí-xi cuáháⁿ-güedi núu cáá ité caxi-güedi, te dàtnùní cuándihu-ná-güedi cùrrálí, ducaⁿ sǎtnahá-xi cúu-yu.

¹⁰ Ñádúhú òré véxi-dé chi dùhu-dé, sǎhni-dé te dànaa-dé mbǎé, dico yúhú chí véxi-í cuendá sá naníhí tǎhú-ndó te ïo cudí iní-ndó cunu cuechi-ndo núu Dùtú Ndiǒxí ní caa ní quíhí. ¹¹ Te yúhú cúu-í dàtná ñá tǎe ïo nèhe cuendá mbǎé-xi, chi tǎe-án cuéi na cúu-dǎ sá cúu-xi mbǎé-dǎ cuendá-ñá sá ná cǎcu-güedi. ¹² Te núu ñá tǎe na còto ñaha xii-güedi, te tǎe-án cuendá-ni sá ñáhú yǎhu-dé xító-dǎ-güedi. Te núu na quíní-dé sáá ñá quiti dééⁿ te dàña-dé-güedi xínu-dé, te ndíhi-güedi xité nuu ñaha quiti dééⁿ-ǎn, chi ñá díú mèi xítóhó-güedi cúu-dǎ. ¹³ Chi cuendá-ni sá ñáhú yǎhu-dé xító-dǎ-güedi núu ñá túú ná ndíhú iní-dé cuéi na dàndíhi ñaha quiti

cuihna. ¹⁴ Te yúhú cùu-í dàtná ìn tée ío váha xìto mbéé-xi, chi tée-án da ìn da ìn-di xìní-í-dé nàcuáa ndáa-di, te ducaⁿ xìní ñáhá-güedi xii-dé. Te ducaⁿ sãtnahá-xi cùu yúhú ndihì nchaa ñáyiu sàndáá iní ñáhá xii-í, chi yúhú xìní-í-yu te ducaⁿ mèe-yu xìní ñáhá-yu xii-í.

¹⁵ 'Te diu-ni ducaⁿ cùu-í ndihì Tãtã-í, chi xìní ñáhá-gã xii-í te xìní-í-gá. Te sáá nduu cùu-í cuendá nchaa ñáyiu sàndáá iní ñáhá xii-í. ¹⁶ Te ndècu-gá ñáyiu vátá quindáá iní ñáhá-gã xii-í. Te xìní ñuhu-xi cundèdóho-yu tnúhu-í te quindáá iní ñáhá-yu cuendá ìn-nã ichi cuú-yu, te ducaⁿ cùndecu ìn-ná tée coto ñaha xii-yu cuu-dé dàtná ìn tòlí-yu, te tée coto ñaha xii-yu-án cuú yúhú.

¹⁷ 'Te Tãtã-í ío cùdúú iní ñáhá-gã xii-í cuendá sá sàá ìn nduu te cuú-í, te cuú-í chi ducaⁿ càchí iní-í, te ñá díú sã cuú iní ñáyiu ñuyíú-a cuú-í, te cuú-í dico ndoto-í. ¹⁸ Te vá yóo ìn te ndacu cahni ñaha xii-í, te núu ñá díú sã cuú iní mèe-í cuú-í. Te dàtná-ni cùu iní-í sá cùu-í te diu-ni ducaⁿ ndòto-í chi ducaⁿ ñí cachí Tãtã-í Dútú Ndiöxí cunduu —càchí-gá xáhaⁿ-gã xii-güedé.

¹⁹ Te sá dúcáⁿ ñí cáháⁿ-gá te ñá ní cùu ìn nuu tucu ñáyiu isràél. ²⁰ Te davá-yu ní xítñahá-yu:

—¿Ná cuendá sàndáá-tu iní-ndó tnúhu càháⁿ tée-án, te yucu ñávãha ndècu ndihì-dé, lúcú tée-án? —càchí-yu xítñahá-yu.

²¹ Te davá-yu ní xítñahá-yu:

—¿Náa xìní-ndó ìn tée ndècu ndihì yucu ñávãha duha váha càháⁿ-dé? ¿Náa xìní-ndó núu ndacu yucu ñávãha cada tátña-xi núu ìn tée cuáá te ndúha? —càchí-yu xítñahá-yu.

Ñáyiu isràél dáquèe tíhũ-yu Jèsús

²² Te ndi tnahá cuía ndádá càhnú-yu vico veñúhu càhnu sá ío cùnuu ñúú Jerusálén, te mei yóo quidé vixiⁿ-xi quidé-yu vico-án.

²³ Te corrèdór veñúhu-án nání-xí Sàlomón, te xíaⁿ xicá cùu Jèsús. ²⁴ Te ní chítú níhnú ñáyiu isràél núu-gá, te ní xáháⁿ-yu:

—¿Ná ndéé òré cachí tnúhu ndáá-n, te núu sá Crístú Yáá ní tendaha Yã Ndiöxí véxi ñuyíú-a cùu-n, àdi ná tée cùu-n?, cáháⁿ-ni-n —càchí-yu xáháⁿ-yu xii-gá.

²⁵ Te ní xáháⁿ Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái núu sã quidè-í

sá ñí táuchíúⁿ Tãtã-í cada-í, te cùu-xi ìn sá cùtnúni iní-ndó ñá tée cùu-í. ²⁶ Dico nchòhó ñá sàndáá iní-ndó, chi ñá túú cùu-ndo ñáyiu ní chitnahá ñáhá xii-í. ²⁷ Chi nchaa ñáyiu ní chitnahá ñáhá xii-í cùu-yu dàtná cue mbéé quiti xíndecu ndihì xítóhó-xi chi núcúhuⁿ ndudú-güedi xítóhó-güedi, te ducaⁿ nàquiní ñáhá-ni xítóhó-güedi xii-güedi. Ducaⁿ sãtnahá-xi cùu nchaa ñáyiu ní chitnahá ñáhá xii-í. ²⁸ Te yúhú cada-í te nduu táhũ-yu cundecu ndihì ñáhá-yu xii-í ni caa ni quihíⁿ te vá ìn nduu-gá cuíta nihnú-yu, te ni vá yóo ìn ndacu naquendeé ñáhá xii-yu ndaha-í. ²⁹ Chi Tãtã-í ní taxi cuendá ñáhá-gã xii-yu. Te ío cùnuu-gá núu xíaⁿ vá yóo ìn ndacu naquendeé ñáhá xii-yu ndaha-gá. ³⁰ Yúhú ndihì Tãtã-í Dútú Ndiöxí ìn-ni cùu-ndí —càchí-gá xáhaⁿ-gã xii-yu.

³¹ Te ní queheⁿ tucu ñáyiu isràél yúú cuáha ñáhá-yu xii-gá ní cùu.

³² Te ní xáháⁿ-gã xii-yu:

—Ío cuéhé sã váha ní quide-í núu-ndó ñí chindee ñaha Tãtã-í Dútú Ndiöxí. ¿Te ndédacáa sá ñá tñahá iní-ndó núu cuíni-ndó cuáha ñaha-ndo yúú xii-í-í? —càchí-gá xáhaⁿ-gã xii-yu.

³³ Te ní xáháⁿ ñáyiu isràél:

—Ñá díú cuendá nchaa sá váha ni quide-n cuíni-ndí cuáha ñaha-ndí yúú xii-n, chi ìn dii-ni sá ío càháⁿ úhú-n cuendá Yã Ndiöxí. Te dicó ìn tée ñuyíú-a cùu-n te càchí-n sá cùu-n Ndiöxí —càchí-yu xáháⁿ-yu xii-gá.

³⁴ Te ní xáháⁿ Jèsús:

—Núú tùtú Yã Ndiöxí sá ndécú ndihì-ndo cáháⁿ-xi nàcuáa ní cáháⁿ-gá, te duha ní cachí-gá: “Nchòhó quidé-ndó núu-í”, duha ní cachí-gá. ³⁵ Te ñaha-o sá vá cùu quèndé nihnu-o tnúhu yòdo tnuní núú tùtú Yã Ndiöxí, chi mee-gã ní cachí-gá sá cádá-yu núu-gã, te vá càchí-ó sã ñá ndáá. ³⁶ Te núu ducaⁿ ñí cáháⁿ-gá sá núu-gã quidé nchaa ñáyiu ní sàndáá iní ñáhá xii-gã ñá, ¿te ná cuendá cùdèéⁿ-ndó núu yúhú sá càchí-í sá cùu-í Déhe-gá? Te mee Yã Ndiöxí ní tendaha ñaha-gá xii-í véxi-í ñuyíú-a sá cádá-í chiuⁿ-gá. ³⁷ Te núu ñá túú quide-í nàcuáa ní táuchíúⁿ Tãtã-í cada-í ñá, te vá quindáá iní ñáhá-ndó. ³⁸ Te núu quide-í ñá, te cuéi vá quindáá iní ñáhá-ndó xii mee-í dico

quindáá iní-ndó nchàa chiuⁿ quide-í. Ducaⁿ te cutnùní ndáá iní-ndó sã Yã Ndiõxí ndécú ndìhi-í te ìⁿ-ni cùu-ndí —càchí-gá xáhaⁿ-gã xii-yu.

³⁹ Te ní cuiní-güedé tñi ñaha tùcu-güedé xii-gá quíhíⁿ-gá vecaá ní cùu, dico ní xinu núu ñáhá-gã xii-güedé.

⁴⁰ Te ní xica-gá cuáháⁿ-gá ndàa ingá xio yúte Jòrdán núu ñí xóo dacuàndute ndí Juáá ñáyiu ndéé díhna, yàcáⁿ ní xíndecu-gá. ⁴¹ Te yàcáⁿ ío vãi ñáyiu ní sáháⁿ ní cáháⁿ ndìhi ñaha xì-gá, te ní xítñahá-yu:

—Ndí Juáá, cuèi ñá túú ní quide ndí sá vã yõ tñahí ndàcu cada dico ndáá ní cáháⁿ ndí, chi dàtná-ni ní cáháⁿ ndí quide té-a —càchí-yu xítñahá-yu.

⁴² Te yàcáⁿ ío vãi-yu ní sándáá iní ñáhã-yu xii-gá.

11

Ní xíhí té Lăzarú

¹ Nnú Bètaniá ní xíndecu ìⁿ té ní xínani-dě Lăzarú. Te càhú víhí ñí tñahá-dé ní cùhú-dé, te ní xíndecu ndìhi-dé cue cúha-dé tá Màriá ndìhi tá Mărta chi xíaⁿ ñúu-yu. ² Te tá Màriá-áⁿ cúu-xí xíchí ñí sódó àcití sáháⁿ tñamí sáhá Jèsús, te ní nadayìchí-xi sáhá-gã ndìhi idi díquí-xi. Te cuendá sá cùhú cúha-yu té Lăzarú, ³ núu ní tendàhá-yu ñáyiu nàha tñúhu cuáháⁿ núu Jèsús, te xáhãⁿ-yu xii-gá:

—Mèstrú, té ío cùu iní-n ìo càhú tñahá-dé cùhú-dé —càchí-yu xáhãⁿ-yu xii-gá.

⁴ Te sá dúcáⁿ cãa tñúhu ní sáá, núu ní xáhaⁿ Jèsús xii-yu:

—Dico cuéhé-ãⁿ chi vá cùu-désá cùu dúcáⁿ-dë, chi Yã Ndiõxí cuiní-gá sá quíní-yu nchaa sá cádá-gã cuendá chiñuhu ñáhá-yu xii-gá, te ñu-ni ducaⁿ chiñuhu ñáhá-yu xii yúhú Déhe-gá —càchí-gá xáhaⁿ-gã xii-yu.

⁵ Te cuèi ío cùu iní ñáhá Jèsús xii té Lăzarú ndìhi cue cúha-dé ⁶ dico òré ní níhí-gã tñúhu, te ní cuyaa-gã úu-gá nduu núu ndécú-gã. ⁷ Te ní xáhaⁿ-gã xii cue té xica cuu ndìhi-gá:

—Na quíhíⁿ tucu-o dìstrítú Jùdeá —càchí-gá xáhaⁿ-gã xii-güedé.

⁸ Te ní xáhaⁿ cuè té xica cuu ndìhi-gá xii-gá:

—Mèstrú, vitna-ni cuiní cue té isràèl xíndecu yàcáⁿ cuáha ñaha-güedé xii-n yúu

ní cùu, ¿te cuiní-ni tucu-n quíhíⁿ-n-ú? —càchí-güedé xáhaⁿ-güedé xii-gá.

⁹ Te ní xáhaⁿ Jèsús:

—Úxúú òré cúu ìⁿ nduu, te núu nduu na càca cuu-o, te ñá túú ñã candaundeé-ó chi cùtnuní núu-ó chi ditó. ¹⁰ Dico núu núu ná càca cuu-o, te ìo ná candaundeé-ó chi vá cùtnuní núu-ó —càchí-gá xáhaⁿ-gã xii-güedé.

¹¹ Te ní xáhaⁿ Jèsús:

—Té Lăzarú té ío váha tñahá tñúhu ndìhi-o ñí xídí-dé dico quíhíⁿ-ó chi ndo-cani-o-dě —càchí-gá xáhaⁿ-gã xii-güedé.

¹² Te ní xáhaⁿ-güedé xii-gá:

—Mèstrú, te núu xídí-dé te vãa sa ta ndüha-dé cuáháⁿ —càchí-güedé xáhaⁿ-güedé xii-gá.

¹³ Duha ní cáháⁿ Jèsús, chi té Lăzarú sa ní xíhí-dé te cue té xica cuu ndìhi-gá ní sani iní-güedé sá ñí xídí ndisa-dé. ¹⁴ Te Jèsús ní xáhaⁿ ndáá-gã xii-güedé:

—Sa ní xíhí té Lăzarú. ¹⁵ Váha-gá sá ñã ní sáháⁿ-í quíngoto-í-dé, chi ndècu ingá chiúⁿ cada-í quíní-ndó, te quindáá iní ñáhá-gã-ndó xì-í, te vitna na quíhíⁿ-ó núu ndécú yiqui cuñú ndí —càchí-gá xáhaⁿ-gã xii-güedé.

¹⁶ Te té Măxí té xáhaⁿ-güedé cuächí ní xáhaⁿ-dë xii dava-gã-güedé:

—Na quíhíⁿ-ó nchàa-o chi yàcáⁿ cuú-ó ndìhi-dé —càchí-dé xáhaⁿ-dë xii-güedé.

Jèsús càháⁿ-gá sá cuèi na cùu ñáyiu dico ndotó-yu cundécú-yu ndìhi-gá

¹⁷ Te òré ní sáá Jèsús ñúu Bètaniá, te ní xáhãⁿ-yu sá sã ní cuu cúmí nduu ní xíhí té Lăzarú. ¹⁸ Te ñúu-áⁿ cáá yàtni-ni-gã ñúu Jerusàlén, dàtná cuádava-ná òré cuhuⁿ-o ìchi te saá-ó. ¹⁹ Núu xíaⁿ vãi ñáyiu isràèl ní sáháⁿ-yu ní cáháⁿ ndìhí-yu tá Mărta ndìhi cùhú-xi tá Màriá, te ní sãñahá-yu tñúhu ndee ìní sá dúcáⁿ ñí xíhí cúha-yu. ²⁰ Te ní níhí tá Mărta tñúhu sá ñúhú Jèsús ichi cuáháⁿ-gã núu ndécú-yu núu ní sáháⁿ-xi ní sátnahá-xi-gã, te cùhú-xi tá Màriá ní ndóo-xi vehe. ²¹ Te òré ní naníhí tá Mărta Jèsús, te ní xáhaⁿ-xi xì-gá:

—Mèstrú, te núu dícó ní xíndecu-n ìha te vá cùu cúha-ndí ní cùu. ²² Te cuèi vitna

te núu ná sá ná càcáⁿ-n núú Yá Ndiöxí te taxi-gá xii-n —càchí-xi xǎhaⁿ-xi xii-gá.

²³ Te ní xáhaⁿ Jèsús:

—Vá ndihú iní-n chi ndoto cúha-n —càchí-gá xáhaⁿ-gǎ xii-xi.

²⁴ Te ní xáhaⁿ tá Mǎrta:

—Ndáá chi sa xini-í sá ndótó-dě ná quǐtnahá nduu ndòto nchaa ñáyiú ní xihí —càchí-xi xǎhaⁿ-xi xii-gá.

²⁵ Te ní xáhaⁿ Jèsús:

—Yúhú dandòto-í-yu cuendá cundecú-yu ni caa ni quíhíⁿ ná sáá nduu. Te nchaa ñáyiú na quíndáá iní ñáhá xii-í, te cuèi na cùu-yu dico ndotó-yu cundecu-í ndihí-yu ni caa ni quíhíⁿ. ²⁶ Te nchaa ñáyiú ndècu vívú ñuyíú-a te núu na quíndáá iní ñáhǎ-yu xii-í, te cundecu ndihí-í-yu ni caa ni quíhíⁿ. ¿Sàndáá iní-n tnúhu-a ñá? —càchí-gá xáhaⁿ-gǎ xii tá Mǎrta.

²⁷ Te xǎhaⁿ-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yá Ndiöxí, Yaá ní tendaha-gǎ véxi ñuyíú-a —càchí-xi xǎhaⁿ-xi xii-gá.

Jèsús ndàhí-gá núú ní nguíndüxi té Lǎzarú

²⁸ Sátá dúcáⁿ ní cáháⁿ-xi te ní sáháⁿ ngana-xi cúhú-xi tá Màriá, te dayuhu ní xáhaⁿ-xi:

—Yácáⁿ ní quexìo Mèstrú, te càna ñaha-dé xii-n —càchí-xi xǎhaⁿ-xi.

²⁹ Te sá dúcáⁿ xǎhaⁿ cǔhú tá Màriá sá cáná ñaha Jesús xii-xi, núu ndihí-ni ní xica-xi cuáháⁿ-xi núú ndécú-gǎ. ³⁰ Te Jèsús vátá quǐhu-gá xití ñuú, chi ndècu-ni-gá núú ní sáháⁿ tnahá ñáhá tá Mǎrta. ³¹ Te ñáyiú isràél ndécú sǎñaha tnúhu ndee iní xii tá Màriá ndihí cúhú-xi ní sani iní-yu sá cuáháⁿ-xi núú yíndüxi cúha-xi ndáhyú-xi ní cáhǎⁿ-yu, núu nchícúⁿ-yu-xi cuáháⁿ.

³² Te ní sáá tá Màriá núú ndécú Jèsús te ní nguíhí xití-xi núú-gǎ, te xǎhaⁿ-xi xii-gá:

—Mèstrú, te núu dicó ní xíndecu-n iha te vá cùu cúha-ndí ní cùu —cachí-xi xǎhaⁿ-xi xii-gá.

³³ Te sá ní xiní Jèsús ndáhyú tá Màriá ndihí ñáyiú isràél nchícúⁿ ñáhá cuáháⁿ, xíáⁿ ío ní cuyica iní-gá. ³⁴ Te ní xáhaⁿ-gǎ xii-yu:

—¿Ndèé ní taxi ndecu-ndo yìqui cuñú-dé-í? —càchí-gá xáhaⁿ-gǎ xii-yu.

Te ní xáhǎⁿ-yu:

—Mèstrú, néhé ná quíhíⁿ-ó te quiní-n —càchí-yu xáhǎⁿ-yu xii-gá.

³⁵ Te ní ndáhyú-gá tnahá-gá. ³⁶ Te ní xitnaha ñáyiú isràél:

—Súúni cùu iní-dé ndíi ni cùu —cachí-yu xitnaha-yu.

³⁷ Te davá-yu xitnaha-yu:

—Tée-a ní quide tátna-dé núú tée cuáá te ní ndúha. ¿Te nása ní cuu núu ñá túú ní quide tátna-dé té Lǎzarú cuendá sá vǎ cùu-dé ní cùu-í? —cachí-yu xitnaha-yu.

Jèsús dándòto-gá té Lǎzarú

³⁸ Te ío ní cuyica tucu iní Jèsús òré ní quexìo-gá yuhu yàú núú ní chihi-güedé yìqui cuñú té Lǎzarú. Te yuhu yàú-áⁿ ndèdí ñⁿ yúú. ³⁹ Te ní xáhaⁿ Jèsús xii-yu:

—Chí xócàni yúú-áⁿ —càchí-gá xáhaⁿ-gǎ xii-yu.

Te ní xáhaⁿ tá Mǎrta cúha tée ní xihí-áⁿ:

—Mèstrú, sa tucu sáháⁿ-dé chi sa ní cuu cúmí nduu sá ní xihí-dé —càchí-xi xǎhaⁿ-xi xii-gá.

⁴⁰ Te ní xáhaⁿ Jèsús:

—¿Náa ñá díú ní cachí-í sá núu na quíndáá iní-n, te quiní-n sǎ ío càhnu cuu Yá Ndiöxí? —càchí-gá xáhaⁿ-gǎ xii-xi.

⁴¹ Te ní xócání-yu yúú ndèdí yuhu yàú-áⁿ. Te ní ndacoto-gá andíu, te ní xáhaⁿ-gǎ xii Tátá-gǎ Dútú Ndiöxí:

—Táu, ndàcáⁿ táhù-í núu-n sǎ ní tédoho-n tnúhu ní cáháⁿ-í. ⁴² Te yúhú sa ñaha-í sá ncháá-ni òré ndèdóho ñaha-n xii-í, dico duha càháⁿ-í cuendá sá ná tècú dóho nchaa ñáyiú ndècu iha cuendá quíndáá iní-yu sá díú-n ní tendaha ñaha-n xii-í véxi-í ñuyíú-a —càchí-gá xáhaⁿ-gǎ xii Dútú Ndiöxí.

⁴³ Te sátá dúcáⁿ ní cáháⁿ-gá ndihí Yá Ndiöxí, te níhi ní cáháⁿ-gá xáhaⁿ-gǎ xii tée ní xihí-áⁿ:

—¡Lǎzarú, tandèe xíaⁿ! —càchí-gá xáhaⁿ-gǎ xii-dé.

⁴⁴ Te ní ndee tée ní xihí-áⁿ yaú-áⁿ, te ndùtu dóo cuíhí ndàha-dé ndihí sáhá-dé, te dàhu tucu ñⁿ dóo núú-dé. Te ní xáhaⁿ Jèsús xii-yu:

—Chí nándàxi-dé te daña-ndo-dé ná cáca-dé —càchí-gá xáhaⁿ-gǎ xii-yu.

Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

45 Te nchaa ñáyi nchícúⁿ ñáhá xii tá Màriá cuáháⁿ ío vai-yu ní sándáá iní-yu Jèsús sá ñí xiní-yu nàcuáa ní quide-gá. 46 Dico davá-yu ní sáháⁿ-yu núú cuè tée cùu fariséú, te ní caní-yu cuèndú núú-güedé nàcuáa ní quide Jèsús. 47 Te cue tée cùu fariséú ndihí cue dútú cúnùu ní nataká-güedé ní xóo-güedé jùndá, te ní xítñaha-güedé:

—¿Nása cada-o?, chi tée-ãⁿ ío vai sá vã yõo tnàhí ndàcu cada quide-dé. 48 Te núu na dàña ío te nchaa ñáyi quindáá iní ñáhã-yu xii-dé, te quixi cue tée ñuú Rómá dangoyo-güedé veñúhu-o te danàa-güedé nchaa ñuú-ó —càchí-güedé xítñaha-güedé.

49 Te ñⁿ cue tée-áⁿ nání-dě Caifás, te cùnùu-gá-dé núú dàva-gá cue dútú cuiá-ãⁿ, te ní xáhaⁿ-dě xii-güedé:

—Nchòhó ni lùha ñá túú cùtnuní iní-ndó. 50 Te ní ñã sãha-ndo cuèndá sá vãha-gá tnahá-ó, te núu na cùú ñⁿ-ni tée cuèndá nchaa ñáyi israhél, te ñá díú sã dánàa ñaha-güedé xii-yu —càchí-dé xáhaⁿ-dě xii-güedé.

51 Dico té Caifás chi ñá díú sã cúú iní méé-dě ní cãháⁿ-dë, chi cuèndá sá cuiá-ãⁿ ní cùnùu-dë núú cuè dútú, núu xiãⁿ Yã Ndiõxí ní dácáhu iní ñáhá-gã nàcuáa cãháⁿ-dë sá Jèsús cuú-gá sá cúú-xí nchaa ñáyi israhél.

52 Te ñá díú cuèndá mee-ni ñáyi-áⁿ cuú-gá, chi cuú-gá tnàhá cuèndá nchaa ñáyi ní sándáá iní ñáhá xii-gá, ñáyi nchítenuu nihí ñuyíú, te ñⁿ-nã cuú-yu ndihí-gá. 53 Núu ndéé nduu-ãⁿ ñí ndatnúhu cue tée cùnùu núú ñáyi israhél nàcuáa cada-güedé cahni-güedé Jèsús.

54 Te xiãⁿ ñuú ñá ní xica cuu-gá Jèsús quini ñáhá ñáyi israhél, te ní quee-gá cuáháⁿ-gá ñuú Efraín, ñⁿ ñuú cáa yàtni yucu, yacáⁿ ní ngúíñí-gá ndihí cue tée xica cuu ndihí-gá.

55 Te ta cùyatni nduu cadá-yu vico páscaá. Te cuéhé ñáyi ní queé-yu ñuú-yu cuáháⁿ-yu ñuú Jerusalén cuèndá sá sã ndihí-yu ncháa-yu nduu íí, te tnahá nduu vico páscaá. 56 Te yacáⁿ nándúcú-yu Jèsús ní cùu te ñá túú-gã òré-áⁿ, te ní naníhí tnáhã-yu xití veñúhu, te xítñahá-yu:

—¿Nása sàni iní-ndó-í? ¿Quixi Jèsús vico ãⁿ ñáhã? —càchí-yu xítñahá-yu.

57 Te cue tée cùu fariséú ndihí cue dútú cúnùu sa ní xáhaⁿ-güedé xii ñáyi sá ñuú ndëda-ni càa-yu xiní-yu núú ndécú Jèsús te na cãháⁿ-ni-yu cuèndá tñi ñaha-güedé xii-gá.

12

*Ñⁿ ñadìhí chíhí-áⁿ Jèsús acití
(Mt. 26:6-13; Mr. 14:3-9)*

1 Íñú-gá nduu cùmání tnahá vico páscaá, te ní sáháⁿ Jèsús ñuú Bètaniá, ñuú té Lázaru tée ní dándótó-gã. 2 Te xiãⁿ ñí cadúha-yu sá ñí cudini Jesús. Te tá Màrta ní sani-xi cóhó, te té Lázaru yíhí-dě mèsá ndihí Jèsús, ndihí dava-gá-güedé xéxi-güedé. 3 Te tá Màriá néhé-xí cuádava lítrú acití sáháⁿ tnámí sã ò ndèyáhu, te acití-áⁿ ñí cuáha mee-ni yúcú nãrdú, te ní sódó-xi sáhá Jèsús, te ní nadayichí-xi ndihí idi díquí-xi sáhá-gã. Te nihí xití vehe ní xité nuu dicó acití-áⁿ. 4 Te té Jüdás déhe té Ximú Iscarioté ñu-ni ñⁿ tée xica cuu ndihí-gá, té cuáha cuèndá ñáhá xii-gá núú cuè tée cùu úhú iní ñáhá ñí xáhaⁿ-dë xii-gá:

5 —¿Ná cuèndá ñá ní cùyáhu acití-a sá ùní cièndú díhúⁿ denariú cuu cuèndá ñáyi ndàhú? —càchí-dé xáhaⁿ-dë xii-gá.

6 Dico sá dúcáⁿ ñí cãháⁿ té Jüdás chi ñá díú sã ndísá ñuhu iní-dé ñáyi ndàhú chi dicó-ni ñⁿ ñádúhú cúú-dë, chi ñu-dé néhé cuèndá-dé díhúⁿ-güedé nchaa-güedé te ní xóo duhu ñaha-dé xii-güedé. 7 Te ní xáhaⁿ Jèsús:

—Daña, vá dásatú-n iní xíchí-a na tàxúha nahi-xi acití-a, chi nandíhí ndéé òré ná nguindúxi-í. 8 Chi nchòhó chi cuhuⁿ tnahá-ni ñáyi ndàhú tnuú-ndó, dico yúhú chi vá ncháá nduu cundecu ndihí ñaha-í xii-ndo —càchí-gá xáhaⁿ-gã xii-dé.

*Tnahá té Lázaru cuini-güedé cahni
ñaha-güedé xii-dé*

9 Te vai ñáyi israhél ní nihí-yu tnúhu sá ndécú Jèsús ñuú Bètaniá. Te ní sáháⁿ-yu cuèndá quini-yu-gá, te quini-yu tnàhá té Lázaru tée ní dándótó-gã. 10 Te cue dútú cúnùu ní ndatnúhu-güedé ní cuu ñⁿ-nuu-güedé cuèndá sá cãhni-güedé tnàhá té Lázaru ní cùu, 11 chi ñu cuèndá té-áⁿ

nĩ cuu cuéhé ñáyi israél tá dàña ni-
hnú-yu-güedé cuáháⁿ cuendá sá nĩ sándáá
iní-yu Jèsús.

Jèsús cuánguihu-gá ñuú Jerusàlén

(Mt. 21:1-11; Mr. 11:1-11; Lc. 19:28-40)

¹² Te nduu tnèé-áⁿ vai ñáyi ní quexì
ñuú Jerusàlén cuendá cundecú-yu vico, te
ní níhi-yu tnúhu sá Jèsús sáá-gá tnàhá-gá
cundecu-gá vico-áⁿ, ¹³ núu ní xehndé-yu
ndaha yùtnu ñúú, te nèhé-yu ní sáháⁿ ní
sátnahá ñáhá-yu xii-gá. Te níhi ní cáháⁿ-yu,
te càchí-yu:

—Ío càhnu cuu Yá Ndiòxí! Te ducaⁿ-ni ío
càhnu cuu Yaá ní tendaha-gã véxi quindaha
ñaha xii-o —duha ní cachí-yu.

¹⁴ Te Jèsús ní níhi-gã ìⁿ búrru, te
yòdo-gá-dí cuáháⁿ. Te ducaⁿ nĩ cuu chi ní
quee ndáá-xi nàcuáa càháⁿ-xi núu tùtú Yá
Ndiòxí núu càchí-xi:

¹⁵ Vá yùhú nchòhó cue ñáyi ndècu ñuú
Sión,

chi iha véxi téé yindaha ñaha xii-ndo
yodo-dé ìⁿ búrru.

Duha càchí-xi núu tùtú-gá. ¹⁶ Dico cue téé
xica cuu ndihí Jesús ñá ní ndàcu iní-güedé
nàcuáa càháⁿ-xi núu tùtú Yá Ndiòxí nàcuáa
cada Jèsús. Dico sátá cuãndaa-gá andiu
cada cahnu ñaha Tátá-gã xii-gá, te ní ndacu
iní-güedé sá dúcáⁿ yòdo tnuní nàcuáa
cada-gá, te ducaⁿ nĩ cuu.

¹⁷ Nchaa ñáyi ní xindecu ndihí Jèsús òré
ní dándótó-gã té Lázaru, ya yacáⁿ ní caní-yu
cuendú núu ñáyi nàcuáa ní quide ñaha-gã
xii-dé. ¹⁸ Te vai-yu ní sáháⁿ-yu núu ndécú
Jèsús cuendá sá nĩ níhi-yu tnúhu ní quide-gá
sá vã yòo tnàhí ndàcu cada. ¹⁹ Te cue téé cù
fariséu ní xitnaha-güedé:

—Ní xito-ndo nã ñá túú nàndihí
sá quidé-ó-vá, chi nchaa ñáyi ní
chinchícuⁿ ñáhá-yu xii-dé —càchí-güedé
xitnaha-güedé.

*Ñáyi ñá túú cùu ñáyi israél nánducú-yu
Jèsús*

²⁰ Te tnàhá ñáyi ñá túú cùu ñáyi israél
ní sáháⁿ-yu vico ñuú Jerusàlén ní quide
càhnú-yu Yá Ndiòxí. ²¹ Te ñáyi-áⁿ nĩ
sáháⁿ-yu núu tẽ Lìpé téé ñuú Bètsaidá, te
ñuú-áⁿ yíndèhu-xi distritú Galileá. Te ní
xáháⁿ-yu xii-dé:

—Tátá, vá cündèe iní-n càchí tnúhu-n
núu ndèé ndécú Jèsús, chi cuiní-ndí cáháⁿ
ndihí-ndí-gá —càchí-yu xáháⁿ-yu xii-dé.

²² Te té Lìpé ní naníhí-dẽ té Ndríxi
te ní xáhaⁿ-dẽ nàcuáa càháⁿ-yu, te ndí
ndúu-güedé ní sáháⁿ-güedé ní xáhaⁿ-güedé
xii Jèsús nàcuáa càháⁿ-yu. ²³ Te ní xáhaⁿ
Jèsús xii-güedé:

—Vitna ní cuyatni òré cada càhnu ñaha
Tátá-í xii-í, te quini-yu sá ío càhnu cuu yúhú
Tée cùu ñaní tnàhá-yu nchaa-yu. ²⁴ Te na
càchí tnúhu ndáá-í xii-ndo sã núu ìⁿ tatá
vá ngává-xí núu ñuhú tẽhyú-xi ña, te diu-ni
ducaⁿ cùnduu-xi cundecu-xi. Dico ìⁿ tatá
ná ngává núu ñuhú xinu déhe-xi, te xíáⁿ
nádàcayá tnàhá-xí, te mee-xi tẽhyú-xi. ²⁵ Te
nchaa ñáyi ío ñuhu iní-xi cundecu ñuyíú-a
ñá túú ñuhu iní-yu Yá Ndiòxí, te ñáyi-áⁿ
cuíta nihnú-yu. Te nchaa ñáyi ío ñuhu
iní ñáhá xii Yá Ndiòxí, ñáyi-áⁿ cundecú-yu
ndihí-gá ni caa ni quíhíⁿ. ²⁶ Te nchaa ñáyi
cuiní cunu cuechi núu-í xini ñuhu-xi natuha
ñahá-yu xii-í, te nduu táhú-yu cundecú-yu
núu ñuhú-í cundecu-í. Te nchaa ñáyi na
cùnu cuechi núu-í, te cada càhnu ñaha Tátá-í
xii-yu —càchí-gá xáhaⁿ-gã xii-güedé.

Jèsús càháⁿ-gá sá cáhni ñaha-güedé xii-gá

²⁷ Te ní xáhaⁿ tucu-gá:

—Ío ndihú iní-í. Te cùñaha-í xii Tátá-í
taunihnu ñaha-gã núu dícó sá cúú, dico
vá cúú chi cuendá tnàhí-a véxi-í —càchí-gá
xáháⁿ-gã xii-güedé.

²⁸ Te ní xáhaⁿ-gã xii Tátá-gã Dútú Ndiòxí:

—Táu, cada nàcuáa ní sani iní-n cùnduu
cuendá sá ná cáda càhnu ñaha ñáyi xii-n —
càchí-gá xáhaⁿ-gã.

Te ducaⁿ te ní tecú ní cáháⁿ Yá Ndiòxí
ndéé andiu, te càchí-gá:

—Sa ní quide-í nàcuáa cachí ñáyi sá ío
càhnu cuu-í. Te cada tucu-í cuendá cada
càhnu ñaha-gá-yu xii-í —càchí Yá Ndiòxí
xáháⁿ-gã xii Déhe-gá.

²⁹ Te nchaa ñáyi xindecu ní tecú dóho-yu
ní cáháⁿ-gá, dico ñá túú ní sani iní-yu sá
mèé-gã ní cáháⁿ, chi davá-yu ní xitnàhá-yu
sá ñuhu ní cáháⁿ, te davá-yu ní xitnàhá-yu
sá ìⁿ espíritu xínú cuèchi núu Yá Ndiòxí ní
cáháⁿ. ³⁰ Te ní xáhaⁿ Jèsús xi-yu:

—Ñá díú cuendá yúhú ní cǎháⁿ Yǎ Ndiǒxí, chi ní cǎháⁿ-gá cuendá sá nchòhó cund-edóho-ndo. ³¹ Te vitna ní sǎá nduu càda ndáá Yǎ Ndiǒxí cuéchi nchaa ñáyiú ñuyíú-a, te ducaⁿ te vá cúnùu-gá yucu ñǎvǎha. ³² Te na càta caa ñaha-güedé xii-í núú cùrúxí, te xíáⁿ cuú-í te níhí-yu tnúhu ni caa xico ñuyíú, te quindáá iní-yu tnúhu-í —càchí-gá xáhaⁿ-gǎ xii-yu.

³³ Duha ní cǎháⁿ-gá cuendá cutnùní iní-yu nàcuáa ndoho-gá òré cuú-gá. ³⁴ Te ní xáhǎⁿ-yu xii-gá:

—Nihí-ndí tnúhu sá núú tütú yódó tnùní tnúhu Yǎ Ndiǒxí cǎháⁿ-xi sá Crìstú Yaá tendaha-gá quixi ñuyíú-a cundecu-gá ni caa ni quíhíⁿ. ¿Te yòhó nása cǎháⁿ-tu-n sǎ ìⁿ téé cùu ñaní tnáhá nchaa ñáyiú ñuyíú-a cahni ñaha-güedé núú cùrúxí? Te cachí tnúhu-n nǎ cúú téé-áⁿ —càchí-yu xáhǎⁿ-yu xii-gá.

³⁵ Te ní xáhaⁿ Jèsús:

—Yúhú cúu-í dàtná ìⁿ ñuhú dáyèhé ñuyíú-a, dico sacú-ni nduu ndècu ndihi ñaha-í xii-ndo. Te caca-ndo ichi ndáá vitna dáyehé-gá-í núú-ndó chi na cùnee te vá cùtnùní-gá núú-ndó ndèé ichi quíhíⁿ-ndó. ³⁶ Quindáá iní ñáhá-ndó xii-í vitna ndècu ndihi ñaha-gá-í xii-ndo dándixi túu-í iní-ndó, cuendá cutnùní iní-ndó nàcuáa ndùu cuendá Yǎ Ndiǒxí, te cuu-ndo dèhe-í —càchí-gá xáhaⁿ-gǎ xii-yu.

Te sáta dúcáⁿ ñí cǎháⁿ Jèsús, te ní quee-gá cuáháⁿ-gá ìⁿ núú vǎ ná nihí ñáhǎⁿ-yu xii-gá.

Ñáyiú isràél ñá cuíní-yu quindáá iní-yu Jèsús

³⁷ Te cuèi ío vǎi sá vǎ yòo tnàhí ndàcu cada ní quide Jèsús ní xiní-yu, dico ni dùcaⁿ ñá túú ní sàndáá iní-yu-gá. ³⁸ Te ducaⁿ ñí quidé-yu chi dacuítí ñí quee ndáá-xi nàcuáa ní chídó tnùní ndíi Chàíá ndíi ní cǎháⁿ tnúhu Yǎ Ndiǒxí ndéé sanaha núú tütú-gá núú càchí-xi:

Yòhó Yaá cúú Xìtohó-í, vá yòo ìⁿ sàndáá iní tnúhu cǎháⁿ-ndí.

Te vá yòo ìⁿ cùtnuní iní-xi sá ío cǎhnu cuu-n. Duha ní chídó tnùní ndíi Chàíá núú tütú-gá.

³⁹ Te ñá ní sàndáá iní-yu chi ní quee ndáá-xi nàcuáa ní chídó tnùní tucu ndíi Chàíá núú tütú Yǎ Ndiǒxí nàcuáa cǎháⁿ Jèsús:

⁴⁰ Mee Yǎ Ndiǒxí ní quide-gá sá vǎ tècú tnùní-yu,

chi ní dádǎhu ndodo iní ñáhá-gǎ xii-yu, chi ío sǎá iní-yu núu ñá ní cuíní-gá-yu quindáá iní ñáhǎ-yu xii-gá.

Te ni vǎ túhá ñáhá-yu xii yúhú cuendá dacăcu nihnu-í-yu.

⁴¹ Duha ní chídó tnùní ndíi Chàíá nàcuáa cǎháⁿ Jèsús chi ní xiní ndíi sá ío cǎhnu cuu-gá.

⁴² Te cuèi ducaⁿ ñí cuu dico titní cue téé cùnuu núú ñáyiú isràél ní sàndáá iní ñáhá-güedé xii-gá. Dico ñá túú ní xòo cǎháⁿ ndáá-güedé chi ní xóo yúhú-güedé sá vǎ dáñá-gǎ cue téé cùu fariséú quíhu-güedé veñúhu. ⁴³ Chi ní xóo cudíí-gǎ iní-güedé sá cǎháⁿ ñáyiú dàcúxí tnúhu cǎháⁿ Yǎ Ndiǒxí.

Ñáyiú ñá túú sàndáá iní tnúhu Jèsús cuíta nihnú-yu

⁴⁴ Jèsús níhi ní cǎháⁿ-gá, te càchí-gá:

—Nchaa ñáyiú na quindáá iní ñáhá xii-í, te ñá díú-ní mèe-í quindáá iní-yu, chi tnàhá Tǎtà-í Yaá ní tendaha ñàha xii-í véxi-í ñuyíú-a quindáá iní-yu. ⁴⁵ Te ñáyiú xiní ñáhá xii yúhú xiní-yu tnàhá Tǎtà-í. ⁴⁶ Te yúhú véxi-í dándixi túu-í iní ñáyiú ñuyíú-a cuendá cutnùní iní-yu nàcuáa ndùu cuendá Yǎ Ndiǒxí, te nchaa ñáyiú na quindáá iní ñáhá xii-í te vá cùndècu-gá-yu ichi cuèhé ichi duha. ⁴⁷ Te núu òo davá-yu ndèdóho-yu nàcuáa cǎháⁿ-í te ñá túú tní-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dácuíta nihnu-í-yu, chi véxi-í sá dácăcu nihnu-í-yu. ⁴⁸ Te nchaa ñáyiú na cùyíchí iní ñáhá xii-í te ñá túú quide cuendá-yu nàcuáa cǎháⁿ-í, te ñáyiú-áⁿ ná sǎá nduu te cuíta nihnú-yu chi ñá ní tní-yu tnúhu ní cǎháⁿ-í. ⁴⁹ Te yúhú ñá túú cǎháⁿ-í tnúhu véxi iní mèe-í, chi mee Tǎtà-í Yaá ní tendaha ñàha xii-í véxi-í ñuyíú-a ní cachí tnúhu-gá nàcuáa cunduu tnúhu cǎháⁿ-í danèhé-í ñáyiú. ⁵⁰ Te yúhú xiní-í sá tnúhu ní táuchíúⁿ Tǎtà-í cǎháⁿ-í cúú-xí ìⁿ sá vǎha sá cúú xii-ndo chi nduu táhú-ndó cundecu-ndo ndihi-gá ni caa ni quíhíⁿ, núu xíáⁿ cǎháⁿ-í nchaa nàcuáa ní táuchíúⁿ-gǎ —càchí-gá xáhaⁿ-gǎ xii-yu.

13

Jèsús náquète-gá sáhá cuè téé xica cuu ndihi-gá

¹ Te cùmání-gã tnahá vico pàscuá, te Jèsús sa nàha-gá sá sà ní cuyatni òré dándoo-gá ñuyíú-a, te ndaa-gá núú ndécú Tătá-gã. Te ío ní cuu iní-gá nchaa ñáyiu ní sándáá iní ñáhá xii-gá, te ní quide ndisa-gá sá ñi cuu iní ñáhá-gã xií-yu.

²⁻⁴ Te ní quíhu yucu ñävãha díquí tẽ Jùdás déhe té Xímú Iscarioté, te ní sani iní-dé nàcuáa cada-dé cuáha cuendá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá méé Yã Ndiòxí Yaa cúu Tătá-gã ní sãñaha-gã tnúhu ndee iní xii-gá sá cáda-gã núú-gã, te nàha-gá sá díú núú Tătá-gã ní quee-gá véxi-gá ñuyíú-a. Te sáá nduu nàsáá tucu-gá núú Tătá-gã. Te cùdini Jèsús ndihí cue téé xica cuu ndihí-gá ní cùu, te ní ndacuíñí-gá yuhu mèsá, te ní taunuu-gá ñi dóo níhnú-gã, te ní queheⁿ-gá ñi dóo ní dácútú-gã núú yíquí-gã. ⁵ Te ní chihi-gá ndute ñi tĩná, te xiáⁿ ñi naquete-gá sáhá cuè téé xica cuu ndihí-gá, te ndihí dóo ndútú núú yíquí-gã-áⁿ ñi nadayìchí-gá sáhá-güedé.

⁶ Te òré naquete-gá sáhá tẽ Xímú, àdi Pelú, ní cùu ní xáhaⁿ-dẽ xii-gá:

—Mèstrú, ¿te yòhó naquete-n sãhà-í-u? —càchí-dé xáhaⁿ-dẽ xii-gá.

⁷ Te ní xáhaⁿ Jèsús:

—Vitna ñá cùtnùní iní-n sã quidè-í-a dico sáá nduu te cutnùní iní-n —càchí-gá xáhaⁿ-gã xii-dé.

⁸ Te ní xáhaⁿ tẽ Pèlú:

—Yúhú chi vá ñi ndùu te naquete-n sãhà-í —càchí-dé xáhaⁿ-dẽ xii-gá.

Te ní xáhaⁿ Jèsús:

—Te núu vá náquète-í sáhá-n áⁿ, te vá cáda-gã-n cuendá sá ndécú ndihí ñaha-í xii-n —càchí-gá xáhaⁿ-gã xii-dé.

⁹ Te ní xáhaⁿ tẽ Pèlú:

—Te núu ducaⁿ te vá méé-ní sãhà-í naquete-n, chi naquete-n tnàhá ndaha-í ndihí díquí-í —càchí-dé xáhaⁿ-dẽ xii-gá.

¹⁰ Te ní xáhaⁿ Jèsús xii-dé:

—Téé íchí ñi xichí chi xini ñuhu-xi sá sáhá-na-dẽ ndoo, te ducaⁿ te nduu ndoo-dé nihí-dé. Te nchòhó sa càndoo-ndo cuéi ñá ncháá-ndó càndoo —cachí-gá xáhaⁿ-gã xii-dé.

¹¹ Te ducaⁿ ñi cáháⁿ Jèsús chi sa nàha-gá sá ñi cuè téé-áⁿ cuáha cuendá ñáhá-güedé

xii-gá núú cuè téé cùu úhú iní ñáhá, xiáⁿ núu ní xáhaⁿ-gã sá ñà túú càndoo-güedé nchaa-güedé.

¹² Te sáta ñi naquete-gá sáhá-güedé, te ní ndécuihnu-gá dóo-gã, te ní nucóo-gá yuhu mèsá, te ní xáhaⁿ-gã xii-güedé:

—¿Te ní cutnùní iní-ndó sã ñi quide ñaha-í xii-ndo-ãⁿ? ¹³ Te nchòhó váha-ni cáháⁿ-ndó sã cùnùu-í, te dãnani ñaha tucu-ndo Mèstrú xii-í, te ndáá cáháⁿ-ndó. ¹⁴ Te núu yúhú cúu-í Mèstrú, te cùu tucu-í téé cùnùu te nàquete-í sáhá-ndó, te diu-ni ducaⁿ càda nchòhó tucu naquete sáhá tnàhá-ndó. ¹⁵ Yúhú sànu ichi ñaha-í xii-ndo nàcuáa cada-ndo. ¹⁶ Te na càchí tnúhu ndáá-í xii-ndo sã ñi ñi téé xinu cuechi ñá túú cùnùu-dé dácúúxí pàtróoⁿ-dẽ, te ñi ñi téé xica chiuⁿ ñá túú cùnùu-dé dácúúxí tẽ tendaha ñaha xii-dé cuáháⁿ-dẽ chiúⁿ. Te ducaⁿ sãtnahá-xi cùu yúhú ndihí nchòhó. ¹⁷ Te núu ní cutnùní iní-ndó nàcuáa ní quide ñaha-í xii-ndo ña, te ducaⁿ càda tnaha-ndo te cuu váha iní ñáhá Yã Ndiòxí xii-ndo.

¹⁸ Yúhú, ñá túú cáháⁿ-í cuendá-ndó nchàa-ndo, chi yúhú sa nàha-í nàcuáa sàni iní ñi ñi nchòhó cue téé ní nanducu nihnu-í tnuú nchaa ñáyiu ñuhu ichi cuehé ichi duha ní càchí-í chitnahá ñáhá-ndó xii-í. Chi dacuití sã queé ndáá-xi nàcuáa cáháⁿ-xi núú tütú Yã Ndiòxí núú càchí-xi: “Téé xèxi ndihí ñaha xii-í ngóo-dé cuu úhú iní ñáhá-dẽ”, duha càchí-xi núú tütú-gá. ¹⁹ Te cùmání-gã sáá nduu càda ñaha-dé sá sání iní-dé, núu xiáⁿ càchí tnúhu-í xii-ndo nàcuáa cada-dé, chi na sáá nduu-ãⁿ te cutnùní iní-ndó sã yúhú cúu-í Crístú Yaa ní tendaha Yã Ndiòxí véxi ñuyíú-a. ²⁰ Te na càchí tnúhu ndáá-í xii-ndo sã nchàa ñáyiu na queheⁿ cuendá ñáhá xii cue téé tendaha-í cáháⁿ tnúhu-í, te cada iní-yu sá tnàhá yúhú ní queheⁿ cuendá-yu. Te nchaa ñáyiu na queheⁿ cuendá ñáhá xii-í, te cada iní-yu sá tnàhá Tătá-í Dútú Ndiòxí Yaa ní tendaha ñaha xii-í véxi-í ñuyíú-a ní queheⁿ cuendá-yu —càchí-gá xáhaⁿ-gã xii-güedé.

Jèsús càchí-gá sá tẽ Jùdás cuáha cuendá ñáhá-dẽ xii-gá núú cuè téé cùu úhú iní ñáhá (Mt. 26:20-25; Mr. 14:17-21; Lc. 22:21-23)

²¹ Te sáta dúcáⁿ ñi cáháⁿ Jèsús te ío ní ndíhú iní-gá, te ní xáhaⁿ-gã xii-güedé:

—Na càchí tnúhu ndáá-í xii-ndo sã díú-ní ìⁿ nchohó cuáha cuèndá ñáhá-ndó xii-í núú cuè téé cùu úhú iní ñáhá —càchí-gá xáhaⁿ-gã xii-güedé.

²² Te ní ngüíta cue téé xica cuu ndihi-gá ndéhe ìⁿ ndehe ìⁿ núú tnáhá-güedé, chi ñá ní cùtnuní iní-güedé ndèdacàa-güedé cuèndá-güedé ní cáháⁿ-gá. ²³ Te ìⁿ téé-áⁿ ïo cùdíí iní ñáhá Jèsús, te ndècu yatni-dé dñi-gá cùdini-dé ndihi-gá. ²⁴ Te té Xímú, àdi Pelú chi úú dñu-dé, ní guide-dé sèñá núú téé ndècu yatni dñi-gá-áⁿ sá càcáⁿ tnúhú-dé núú-gã nñu ndèdacàa-güedé cuèndá-güedé ní cáháⁿ-gá. ²⁵ Te téé-áⁿ ní sáháⁿ ndehe yatni-gá-dé dñi Jesús, te ní xáhaⁿ-dè xii-gá:

—Mèstrú, ¿ndèdacàa-ndí cuèndá-ndí ní cáháⁿ-n-í? —càchí-dé xáhaⁿ-dè xii-gá.

²⁶ Te ní xáhaⁿ Jèsús:

—Na chindóyo-í luha pàá, te téé na cuáha-í te téé-áⁿ cúú-dè —càchí-gá xáhaⁿ-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscarioté. ²⁷ Te òré ní queheⁿ-dé pàá, te ní ngúndecu ndihi ñaha dñuⁿ-ná yucu ñávaha xii-dé. Te ní xáhaⁿ Jèsús:

—Sá ñí sani iní-n càda-n te cada ndihi-ni-n —càchí-gá xáhaⁿ-gã xii-dé.

²⁸ Te ní ìⁿ cue téé cùdini ndihi-gá ñá ní tècú tnùnigüedé nása ndùu tnúhu ní xáhaⁿ-gã xii té Jùdás. ²⁹ Te dava-güedé ní sani iní-güedé sá sã cuèndá sá ndécú ndihi-dé sá ñúhú dñhúⁿ, te váa ïo ìⁿ sá cuááⁿ-dè nàndihi-güedé vico, àdi dñhúⁿ cuáha-dé ñáyiu ndàhú xáhaⁿ-gã ní cáháⁿ-güedé. ³⁰ Te sa ní cundiquiⁿ ní queheⁿ cuèndá té Jùdás pàá caxi-dé, te òré ní níhí-dè pàá-áⁿ te ní quee-dé cuáháⁿ-dé.

Jèsús càchí tnúhu-gá nàcuáa cada-o

³¹ Te sáta ñí quee té Jùdás cuáháⁿ-dé, te ní xáhaⁿ Jèsús xii dava-gá-güedé:

—Vitna te quiní-ndó ndihi nchaa ñáyiu sá ïo càhnu cuu yúhú Téé cùu ñani tnáhá-ndó nchàa-ndo, te òré-áⁿ cutnùní iní-ndó sã ïo càhnu cuu tucu mee Yá Ndiöxí. ³² Te núu yúhú quidé càhnu-í Yá Ndiöxí, te dñu-ni ducaⁿ càda cahnu ñaha-gá xii yúhú, te ñá túú-gã titní nduu te ducaⁿ càda-gá. ³³ Te nchòhó cue déhe-í na càchí tnúhu-í sá sàcú

duha-ná nduu ndècu ndihi ñaha-í xii-ndo. Te nchòhó nanducu ñaha-ndo xii-í dico vá ná níhí ñáhá-ndó dàtná ní xáhaⁿ-í xii ñáyiu israél, te dñu-ni ducaⁿ càháⁿ-í núú-ndó sã vã ndácú-ndó quíhíⁿ-ndó nñú quíhíⁿ-í. ³⁴ Te duha sànu ichi ñaha tucu-í xii-ndo nàcuáa cada-ndo sã cúú iní tnáhá-ndó ìⁿ ìⁿ-ndo dàtná yúhú cúú iní ñáhá-í xii-ndo. ³⁵ Te núu na cùu iní tnáhá-ndó ìⁿ ìⁿ-ndo ña, te ducaⁿ te cutnùní iní nchaa ñáyiu sá cúú-ndó cuè téé ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú vá nñuu-dé sá xicá cùu ndihi ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xímú, àdi Pelú chi úú dñu-dé, xii Jèsús:

—Mèstrú, ¿ndèé quíhíⁿ-n-í? —càchí-dé xáhaⁿ-dè xii-gá.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quíhíⁿ núú quíhíⁿ-í, dico na sàá nduu te dai sáá-n nñú cùndecu-í —càchí-gá xáhaⁿ-gã xii-dé.

³⁷ Te ní xáhaⁿ tẽ Pèlú xii-gá:

—Mèstrú, ¿te ná cuèndá nñu vá ndácú-í cànchicúⁿ ñáhá-í xii-n quíhíⁿ vitna-í? Chi yúhú ñá túú tnàhí yùhú-í cuèi na cùú-í sá cuèndá-n —càchí-dé xáhaⁿ-dè xii-gá.

³⁸ Te ní xáhaⁿ Jèsús:

—¿Te ndáá sá xèhndé iní-n sã cuèi na cùú-n cuèndá-í-u? Te na càchí tnúhu ndáá-í xii-n sã cùmání-gã cana líhi, te úní xito cáháⁿ-n sã ñà túú xini ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó nñú ndécú Yá Ndiöxí

¹ Te ní xáhaⁿ-gã xii-güedé:

—Te ñá túú nã cani iní-ndó. Quindáá iní-ndó Yá Ndiöxí, te quindáá iní-ndó yúhú. ² Chi núú ndécú Tàtà-í ïo nñe núú cùndecu-o, chi núu ñáhá ñá te sa cachí tnúhu-í xii-ndo ni cùu. Te vitna na nùhú-í te cada túha-í núú cùndecu-ndo. ³ Te dàtnùní quixi tucu-í te candeca ñaha-í xii-ndo quíhíⁿ cuèndá ìⁿ-ni xìchi cundecu-o. ⁴ Te sa nàha-ndo ndéé quíhíⁿ-í te sa xini-ndó ìchi —cachí-gá xáhaⁿ-gã xii-güedé.

⁵ Te ní xáhaⁿ tẽ Măxí xii-gá:

—Mèstrú, ñá túú xìní-ndí ndèé quíhíⁿ-n te da ichi-ná quiní-ndí —càchí-dé xáhaⁿ-dẽ xii-gá.

⁶ Te ní xáhaⁿ Jèsús:

—Yúhú cúu-í dàtná ìⁿ ichi te càháⁿ-í tnúhu ndáá, te yúhú cada-í te naníhí tǎhú-ndó. Te ìⁿ dǐi díi-ni yúhú cada-í te sáá-ndó nǔú Yă Ndiǒxí cundecu-ndo te núu na quíndáá iní ñáhá-ndó xii-í. ⁷ Te núu dǐcò cútnùní ndisa iní-ndó yòo cuu-í-áⁿ, ducaⁿ te cutnùní iní-ndó yòo cuu Tǎtǎ-í ní cùu. Dico vitna dàtná sá nǐ xini núu-ndó Dǔtú Ndiǒxí Yaá cúu Tǎtǎ-í cada iní-ndó, chi ní xini-ndó yúhú —càchí-gá xáhaⁿ-gǎ xii-dé.

⁸ Te ní xáhaⁿ tẽ Lìpé xii-gá:

—Mèstrú, danèhé ñáhá xii-ndí Dútú Ndiǒxí chi na cùu váha iní-ndí —càchí-dé xáhaⁿ-dẽ xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xini ñáhá-n xii-í? Te sa ní cuu vai nduu ndecu ndihí ñaha-í xii-ndo, chi ñáyiú xini ñáhá xii-í te xini-yu tnàhá Tǎtǎ-í. ¿Te ná cuendá yòhó càchí-n sǎ dánèhé ñáhá-í xii-ndo Tǎtǎ-í? ¹⁰ ¿Náa ñá túú sàndáá iní-ndó sǎ yúhú ndécú-í ndihí Tǎtǎ-í? Te mee-gǎ ndécú ndihí ñaha-gá xii-í. Te nchaa tnúhu càháⁿ-í núu-ndó ñá túú càháⁿ-í sá véxi iní mée-í, chi Tǎtǎ-í Yaá ndécú ndihí ñaha xii-í chindèe ñaha-gá quidè-í chiúⁿ-gá. ¹¹ Te quíndáá iní-ndó sǎ yúhú ndécú-í ndihí Tǎtǎ-í, te ducaⁿ mée-gá ndécú ndihí ñaha-gá xii-í. Te núu ñá túú sàndáá iní-ndó tnúhu càháⁿ-í-a, te dandacu iní-ndó nchaa chiuⁿ ta quide-í véxi, te quíndáá iní ñáhá-ndó. ¹² Te na càchí tnúhu ndáá-í xii-ndo sǎ nchaa ñáyiú na quíndáá iní ñáhá xii-í, te cadá-yu chiúⁿ quide-í te càhnu-gá chiúⁿ cadá-yu chi yúhú núhú-í núu ndécú Tǎtǎ-í cundecu-í nàcuáa níhí ndée-gǎ-yu cundecu-yu. ¹³ Te nchaa sá ná càcáⁿ-ndó te taxi-í te núu na quíndáá iní ñáhá-ndó xii-í, te nchaa cada-í cuendá cutnùní iní ñáyiú sá ìo càhnu cuu Tǎtǎ-í Dútú Ndiǒxí. ¹⁴ Te yúhú cada-í nchaa sá cuini-ndó càcáⁿ tǎhú-ndó nǔú-í, te núu na quíndáá iní ñáhá ndisa-ndo xii-í.

Jèsús càchí-gá sá tэндàha-gá Espiritú Yă Ndiǒxí quixi cundecu ndihí-o

¹⁵ Te núu nchòhó cúu ìní ñáhá-ndó xii-í te tnii-ndo nchaa tnúhu càháⁿ-í. ¹⁶ Te yúhú cacáⁿ tǎhú-í núu Tǎtǎ-í sá tэндàha-gá Espiritú-gá quixi cundecu ndihí-ndo cànu ichi ñaha-xi xii-ndo nacúaa cundecu-ndo, te chindee ñaha-xi xii-ndo ni caa ni quíhíⁿ. ¹⁷ Te nchaa ñáyiú ndècu ichi cuehé ichi duha ñá túú xini-yu Espiritú Yă Ndiǒxí te ni vǎ cúu cundecu ndihí-yu. Dico nchòhó sa xini-ndó Espiritú-gá te ndècu ndihí ñaha-xi xii-ndo. Te sáá ìⁿ nduu te cunuu Espiritú-gá iní-ndó. ¹⁸ Te yúhú vá dáñá ñihnu ñaha-í xii-ndo, chi quixi tucu-í cundecu ndihí ñaha-í xii-ndo. ¹⁹ Te sácú duha-ná nduu ndècu-í te vá quiní ñáhá-gǎ ñáyiú xii-í, dico nchòhó chi quiní ñáhá-ní-ndó xii-í. Te ducaⁿ-ni cundecu-ndo ichi váha chi cundecu ndihí ñaha-í xii-ndo ni caa ni quíhíⁿ. ²⁰ Te dàvá-áⁿ cutnùní iní-ndó sǎ ndécú-í ndihí Tǎtǎ-í, te ducaⁿ nchòhó cundecu ndihí ñaha-ni-ndo xii-í. ²¹ Te nchaa ñáyiú dàcuaha tnúhu-í te tnii-yu, ñáyiú-áⁿ quidè ndísá-yu sá cúu ìní ñáhá-yu xii-í. Te ducaⁿ Tǎtǎ-í cúu ìní ñáhá-gǎ xii-yu, te ducaⁿ-ni yúhú cúu ìní-í-yu tucu, te ducaⁿ te cùtnuní iní-yu sá ndécú ndihí-í-yu —càchí-gá xáhaⁿ-gǎ xii-dé.

²² Te ní càháⁿ ìⁿ tée nani Judás dico ñá díú tẽ Jüdás déhe té Ximú Iscarioté ní càháⁿ, chi ingá té Jüdás ní xáhaⁿ-dẽ xii-gá:

—Mèstrú, ¿nása cada-n cuendá cutnùní iní-ndí sá cundècu ndihí ñaha-n xii-ndí, te ñáyiú ñúhu ichi cuehé ichi duha vá cundècu ndihí-n-yu-i? —càchí-dé xáhaⁿ-dẽ xii-gá.

²³ Te ní xáhaⁿ Jèsús xii-güedé:

—Nchaa ñáyiú cùu iní ñáhá xii-í te tnii-yu tnúhu càháⁿ-í, te ñáyiú-áⁿ cúu ìní ñáhá Tǎtǎ-í xii-yu, te yúhú ndihí Tǎtǎ-í ndécú-ndí ndihí-yu. ²⁴ Te nchaa ñáyiú ñá túú cùu iní ñáhá xii-í te ñá túú tnii-yu tnúhu càháⁿ-í. Te nchaa tnúhu ní càháⁿ-í ní xindèdóho-ndo chi Tǎtǎ-í Yaá ní tendaha ñaha xii-í véxi-í ñuyúú-a ní dácáhú ìní ñáhá-gǎ xii-í, te ñá díú mée-í ní càhu iní-í tnúhu càháⁿ-í.

²⁵ Duha ndùu tnúhu càháⁿ-í núu-ndó vitna ndecu ndihí ñaha-gá-í xii-ndo. ²⁶ Dico Yă Ndiǒxí tendaha-gǎ Espiritú-gá quixi-xi cada-xi núu-í taxi-xi tnúhu ndee ìní xii-ndo, te diu-xi chindee ñaha-xi xii-ndo te danèhé ñáhá-xí xii-ndo nchaa sá cúmǎní quiní-ndó,

te diu-ni-xi dandacu iní ñáhá-xí xii-ndo nchaa nacuaa ní cáháⁿ-í.

²⁷ Te yúhú chindee chítuu ñaha-í xii-ndo ïo váha cuu iní-ndó cundecu-ndo datná yúhú ïo váha cùu iní-í ndécù-í, chi sa ta cùyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vá cadà-í dàtná quidé ñáyiú ñùhu ichi cuehé ichi duha. Te ni vǎ ndihú iní-ndó, te ni vǎ yúhú-ndó. ²⁸ Te sa ní xíndedóho-ndo ní cáháⁿ-í sá nùhú-í, te quixi tucu-í cundecu ndihí ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá nùhú-í núu ndécú Tǎtà-í, te cudíí iní-ndó ní cùu, chi ïo càhnu cuu-gǎ dàcúxí yúhú. ²⁹ Te sa ní cachí tnúhu-í sá nùhú-í, te na sàá òré nùhú-í núu ndécú Tǎtà-í, te quindáá iní ñáhá-ndó xii-í.

³⁰ Te ñá túú-gǎ vǎi tnúhu ndatnúhu ndihí ñaha-í xii-ndo chi sa véxi yucu ñávaha sá táxí tnùní ñuyú-a, dico vá táxí tnùní ñáhá-xí xii yúhú. ³¹ Te cada-í nchaa nàcuáa ní táuchíúⁿ Tǎtà-í cuendá cutnùní iní nchaa ñáyiú ñuyú-a sá yúhú ïo cùu iní-í-gǎ. Te vitna chí ndácuíñí ná quihíⁿ-ó —càchí-gǎ xáhaⁿ-gǎ xii-güedé.

15

Cuendá yoho yàha stilé ndihí nchaa dité-xi

¹ Te ní xáhaⁿ tucu-gǎ xii-güedé:

—Yúhú cùu-í dàtná yoho yàha stilé, te Tǎtà-í cúu-gǎ dàtná ìⁿ tée xito yoho yaha stilé-áⁿ. ² Te nchaa ñáyiú ní sándáá iní ñáhá xii-í cúu-yu dàtná dité nchaa yoho yàha stilé-áⁿ. Te tée xito yoho yaha stilé-áⁿ xèhndé-dé nchaa dité-xi sá ñá cuini-gǎ-xi cuuⁿ ndéhé-xi, te ndàda ndoo-dé nchaa dité-xi sá cúuⁿ cuendá cuuⁿ-gǎ. ³ Te ducaⁿ sǎtnahá-xi cùu nchohó, chi sa ní xócuíñí nchaa sá cuèhé sá dúhá ndècu ndihí-ndo, chi ní sándáá iní-ndó tnúhu ní cáháⁿ-í. ⁴ Te cuu ìⁿnuu-ndo cundecu ndihí ñaha-ndo xii-í, te núu ducaⁿ na càda-ndo, te cundecu ndihí ñaha-í xii-ndo. Chi núu ìⁿ yutnu vídí ná quèndéè dité-xi, te dité-xi sá ní quen-deé-áⁿ vǎ cúuⁿ-gǎ sávídí-xi chi duuⁿ duuⁿ ní xíta-xi. Ducaⁿ sǎtnahá-xi cùu nchohó chi vá ndácú-ndó càda-ndo chiuⁿ-í, te núu vá cündècu ndihí ñaha-í xii-ndo.

⁵ 'Chi yúhú cúu-í dàtná yutnu vídí-áⁿ, te nchòhó cúu-ndó dàtná nchaa dité-xi. Te nchaa ñáyiú cùu ìⁿnuu ndihí ñaha xii-í,

te ndècu ndihí-í-yu, te ndácú-yu quidé-yu chiuⁿ-í. Te núu vá cúu ìⁿnuu ndihí ñaha-yu xii-í, te vá ndácú-yu cadá-yu chiuⁿ-í. ⁶ Te nchaa ñáyiú vá cúu ìⁿnuu ndihí ñaha xii-í, te yàha-yu dàtná yàha ìⁿ dité yutnu vídí sá ñá túú cùuⁿ sávídí-xi, chi xèhndé-güedé yìchí-xi, te sàhmi-güedé.

⁷ 'Cuu ìⁿnuu ndihí ñaha-ndo xii-í, te vá nàcuànaa-ndo nacuaa ní cáháⁿ-í. Te núu ducaⁿ na càda-ndo, te nání cuini-ndó cǎcáⁿ-ndó nùu-í te taxi-í. ⁸ Te núu nchòhó ná cadá vǎha-ndo cundecu-ndo, te ïo cada càhnu-ndo Tǎtà-í, te ducaⁿ cutnùní sá ndísá cùu-ndo cue tée ní chitnahá ñáhá xii-í. ⁹ Te yúhú ïo cùu iní ñáhá-í xii-ndo dàtná cúu iní ñáhá Yǎ Ndióxi xii-í. Te cada-ni-ndo mèe-ni sá vǎha cuendá cudíí iní ñáhá-gǎ-í xii-ndo. ¹⁰ Te núu na quindáá iní-ndó càda-ndo nchaa nacuaa ní cáháⁿ-í, te ïo cuu iní ñáhá-í xii-ndo, chi yúhú ducaⁿ ïo sándáá iní-í Tǎtà-í quidè-í nchaa nàcuáa ní cáháⁿ-gǎ, te xǎⁿ nùu ïo cùu iní ñáhá-gǎ xii-í.

¹¹ 'Duha càháⁿ-í núu-ndó cuendá cudíí ndisa iní-ndó dàtná cudíí iní mèe-í. ¹² Te duha nduu tnúhu càháⁿ-í cuendá sá cúu iní tnáhá-ndó ìⁿ ìⁿ-ndo datná cúu iní ñáhá-í xii-ndo. ¹³ Te núu ní xíhó sǎ cúu-xí ìⁿ tée ïo váha tnáhá tnúhu ndihí-o, te xǎⁿ cutnùní iní ñáyiú sá ïo cùu iní-ó-dé. ¹⁴ Te nchòhó cuu-ndo cuè tée ïo váha tnahá tnúhu ndihí-í te núu na càda-ndo nchaa nacuaa càháⁿ-í. ¹⁵ Te vá cùñaha-gǎ-í xii-ndo sá cúu-ndó cuè tée xínu cuechi núu-í, chi ni ìⁿ tée xínu cuechi ñá túú xini-dé ná quidé pàtróoⁿ-dè. Te yúhú càchí-í xii-ndo sǎ cúu-ndó cuè tée ïo váha tnáhá tnúhu ndihí-í, chi ní cachí tnúhu-í nchaa nàcuáa ní cáháⁿ Tǎtà-í. ¹⁶ Te ñá díú nchòhó ní càháⁿ ñáhá-ndó xii yúhú, chi yúhú ní cáháⁿ ñáhá-í xii-ndo. Te yúhú tauchiuⁿ-í quihíⁿ-ndó càda-ndo nchaa nacuaa ní cáháⁿ-í, chi tnúhu-áⁿ vǎ ndihí ñhnu-xi. Te ducaⁿ nchaa sá ná cǎcáⁿ-ndó nùu Tǎtà-í Yǎ Ndióxi te taxi-gǎ, te núu na quindáá iní ñáhá-ndó xii-í. ¹⁷ Te yúhú càháⁿ-í dóho-ndo sǎ cúu iní tnáhá-ndó ìⁿ ìⁿ-ndo.

Ñáyiú ndècu ichi cuehé ichi duha cùu úhú iní-yu Jesús ndihí nchaa ñáyiú sándáá iní tnúhu-gǎ

¹⁸ 'Te nchaa ñáyiú ndècu ichi cuehé ichi duha ñá cúu quini ñáhá-yu xii-ndo, te sa

nàha-ndo sá dǐhna-gá yúhú ní ngúíta-yu ducaⁿ ñà cúu quíní ñáhã-yu xii-í. ¹⁹ Te núu dǐcò tnhá nchòhó ndécú-ndó ichi cuehé ichi duha ña, te cuu iní ñáhã-yu xii-ndo dàtná cúu iní tnhá-yu ndi mèe-yu ni cùu. Te yúhú ní nanducu ñhnu ñaha-í xii-ndo tnhú ñáyi ndècu ichi cuehé ichi duha, núu xiãⁿ ío cùu úhú iní ñáhã-yu xii-ndo cuendá sá ñà túú-gã chítnhá-ndó-yu. ²⁰ Te dandacu iní-ndó nàcuáa ní cáháⁿ-í sá ñi ñⁿ téé xínu cuechi ñá túú cùnuu-dé dàcúúxí pàtróóⁿ-dè. Te yúhú cúu úhú iní ñáhã-yu, te ñi-ni ducaⁿ càda ñahá-yu xii nchòhó. Te núu dǐcò ní tnhí-yu tnhú ní cáháⁿ-í ñá, te ñi-ni ducaⁿ tnhí-yu tnhú cáháⁿ-ndó ñhú-yu ni cùu. ²¹ Te ducaⁿ càda ñahá-yu xii-ndo sá cuendá-í, chi ñá xini-yu Tàtá-í Yaá ní tendaha ñaha xii-í véxi-í ñuyúú-a.

²² Te vaa vá cùndècu cuéchi-yu ni cùu, te núu ñá túú yúhú ní cáháⁿ-í núu-yu, te vitna vá cúu tnhá cachí-yu sá ñà túú cuéchi-yu. ²³ Chi nchaa ñáyi cùu úhú iní ñáhã xii-í, te cùu úhú iní-yu tnhá Tàtá-í. ²⁴ Te vaa ni ñⁿ cuéchi-yu vá cùndècu ni cuu, te núu dǐcò ñá túú ní xini-yu nchaa sá ñi quide-í sá vã yòo tnhá ndacu cada. Te cuéi ní xini-yu dǐco dai cùu úhú iní ñáhã-yu xii-í ndihi Tàtá-í. ²⁵ Te duha quidé-yu chi dacuítí quèe ndáa-xi nàcuáa yòdo tnhú núu tnhú Yá Ndióxi sá dácuahá-yu, chi cáhí-xi sá ñà túú ñá cuéchi-í te cuu úhú iní ñáhã-yu xii-í.

²⁶ Te Espiritú Tàtá-í Dútú Ndióxi sá ndécú ñhú-gã tendaha-í quixi chindee ñaha-xi xii-ndo, te canu ichi ñaha-xi nàcuáa cundecu-ndo, te Espiritú-áⁿ cáháⁿ ndáa-xi cuendá cutnhú iní nchaa ñáyi yoo cùu-í. ²⁷ Te nchòhó tnhá-ndó cáháⁿ váha-ndo cuendá-í cuendá cutnhú iní-yu yoo cùu-í, chi naha-ndo sá ndèe òré ní ngúíta-í quidè-í chiuⁿ Tàtá-í ní chitnahá ñáhã-ndó xii-í — cáhí-gá xahaⁿ-gã xii-güedé.

16

¹ Te ní xahaⁿ tucu-gá xii-güedé:

—Duha cáháⁿ-í cuendá ná nanchòcava iní-ndó ñhú-ndó ichi cuehé ichi duha. ² Chi vá dáñã-gã-güedé quihu-ndo venúhu, te ni vá cúu-gã quini ndeé ñáhã-güedé xii-ndo. Te sáa ñⁿ nduu te cahni ñaha-güedé xii-ndo, te xiãⁿ cuu cahaⁿ-güedé sá quidé-güedé chiuⁿ Yá Ndióxi. ³ Te ducaⁿ

càda-güedé chi ñá túú xini-güedé Tàtá-í, te ni ñà túú xini ñáhã-güedé xii yúhú. ⁴ Te duha nduu tnhú cáháⁿ-í núu-ndó, chi na sáa òré te ndacu iní-ndó nchaa tnhú sá sá ní cachí tnhú-í xii-ndo nàcuáa cada ñaha-güedé xii-í.

Nchaa chiuⁿ quide Espiritú Yá Ndióxi

Te ñá túú ní cáhí tnhú-í xii-ndo ndèe dǐhna chi ndècu ndihi ñaha-í xii-ndo. ⁵ Dǐco vitna sa ta cùyatni nduu núhú-í núu ndécú Tàtá-í Yaá ní tendaha ñaha xii-í véxi-í ñuyúú-a. Te ni ñⁿ nchòhó ñá túú xicáⁿ tnhú-ndó ñhú-í ñu ndèe quihíⁿ-í. ⁶ Chi mee-ni sá ndihú iní-ndó sá dúcáⁿ ñi cáháⁿ-í. ⁷ Te na cáhí tnhú ndáa-í xii-ndo sá váha-gã sá cúu-xi-ndó ñu núhú-í, chi tendaha-í Espiritú Yá Ndióxi quixi cundecu ndihi-ndo chindee ñaha-xi, chi núu vá núhú-í te vá quixí Espiritú-gá cundecu ndihi-ndo chindee ñaha-xi xii-ndo. ⁸ Te na quixi Espiritú-gá te dandixi túu-xi iní nchaa ñáyi ndècu ichi cuehé ichi duha sá ñà túú quide váha-yu. Te dacàhu iní ñáhã-xi sá ndécú ñⁿ ichi váha ichi ndáa. Te Espiritú-gá-áⁿ cada-xi nàcuáa cutnhú iní-yu sá Yá Ndióxi cada ndáa-gá cuéchi-yu. ⁹ Te ducaⁿ te cutnhú iní-yu sá ndécú cuéchi-yu, chi ñá túú sandáa iní ñáhã-yu xii-í. ¹⁰ Te ducaⁿ te cutnhú iní-yu nàcuáa nduu cuendá ichi váha ichi ndáa, chi yúhú núhú-í núu ndécú Tàtá-í, te nchòhó vá quini ñáhã-gã-ndó. ¹¹ Te ducaⁿ te cutnhú iní-yu sá Yá Ndióxi cada ndáa-gá cuéchi-yu, chi sa ní cáháⁿ-gá sá yúcú ñávaha sá táxi tnhú ñuyúú-a quihíⁿ-xi núu úhú núu ndàhú.

¹² Te vai-gá tnhú ndècu cachí tnhú-í xii-ndo, dǐco nchòhó chi vá cùndèe iní-ndó cùndedóho-ndo nchaa vitna. ¹³ Te na quixi Espiritú Yá Ndióxi, Espiritú cáháⁿ ndáa cuíti, te Espiritú-áⁿ danèhé ñáhã-xi nchaa tnhú váha tnhú ndáa. Te vá dacàhu iní ñáhã-xi xii-ndo sá véxi iní mée-xi chi dacàhu iní ñáhã-xi nchaa sá cáháⁿ Yá Ndióxi, te cachí tnhú-xi nchaa nàcuáa cada-xi ndèe núu cuaháⁿ núu véxi-gá. ¹⁴ Te Espiritú-gá-áⁿ cada cànno ñaha-xi xii yúhú chi ndècu ndihi-xi tnhú-í, te danèhé ñáhã-xi xii-ndo. ¹⁵ Te nchaa sá ndécú ndihi Tàtá-í ndécú ndihi-í tnhá-í, núu xiãⁿ cáhí-í sá Espiritú-gá danèhé ñáhã-xi nchaa tnhú-í xii-ndo.

Nchaa ñáyiú ndìhú iní-xi nduu dǐí iní-yu na quixi tucu Jesú

16 Te ìḡ ùú-nǎ nduu ndècu-í te vá quìní ñáhá-gǎ-ndó xii-í, dico núú sàcú-ni nduu te quìní ñáhá tucu-ndo xii-í, te ducaⁿ chi núhú-í núú ndécú Tǎtà-í —càchí-gǎ xáhaⁿ-gǎ xii-güedé.

17 Te sá dúcáⁿ ñí cáháⁿ-gǎ nǔu ní ngüíta ìḡ ùú cue téé xica cuu ndìhi-gǎ xitnáha-güedé:

—¿Nása ndùu-tu tnúhu cáháⁿ-gǎ sá càchí-gǎ sá ìḡ ùú-nǎ nduu ndècu-gǎ te vá quìní-gǎ-ó-gǎ, dico núú sàcú-ni nduu te quìní tucu-o-gǎ-i?, chi núhú-gǎ núú ndécú Tǎtà-gǎ —càchí-güedé xitnáha-güedé.

18 Te xitnáha tucu-güedé:

—¿Nása cuáháⁿ-tu tnúhu-ǎⁿ sá sàcú-ni nduu? Te ñá tècú tnùn-ó nása ndùu tnúhu cáháⁿ-gǎ —càchí-güedé xitnáha-güedé.

19 Te Jèsús ní cutnùn-í iní-gǎ sá cuìní-güedé cácaⁿ tnúhú-güedé núú-gǎ nása ndùu tnúhu ní cáháⁿ-gǎ, núu ní xáhaⁿ-gǎ:

—Cuèndá sá ñí cachí-í sá ìḡ ùú-nǎ nduu ndècu-í te vá quìní ñáhá-gǎ-ndó xii-í, dico núú sàcú-ni nduu te quìní ñáhá tucu-ndo xii-í ní cachí-í, ¿xíⁿ ndúcú tnúhu núú tnáhá-ndó-ǎⁿ? —càchí-gǎ xáhaⁿ-gǎ xii-güedé.

20 Te ní xáhaⁿ tucu-gǎ:

—Te na càchí tnúhu ndáá-í xii-ndo sǎ nchòhó ndìhú víhí iní-ndó te ndáhyú-ndó, dico nchaa ñáyiú ndècu ichi cuehé ichi duha chi da cudǐí iní-yu. Dico nchòhó ñáyiú ndáhyú chi sáá nduu te nduu dǐí iní-ndó. 21 Chi dàtná cuìní-ndó cùu ìḡ ñadìhí ñaha ní tnahá nduu cacu déhe-xi vǎi sani iní-aⁿ sá quidé ùhú ñáhá-xí. Dico na yáha cacu déhe-aⁿ, te ñá túú-gǎ ndácú iní-aⁿ sá ñí quide ùhú ñáhá-xí xii-aⁿ chi mee-nǎ sá cúdǐí iní-aⁿ déhe-aⁿ. 22 Ducaⁿ sǎtnahá-xi cùu nchohó vitna chi ndìhú iní-ndó sǎ nùhú-í, dico quixi tucu-í quixi coto ñaha-í xii-ndo, te òré-áⁿ te cudǐí ndisa iní-ndó, te vá yǒ ìḡ-gǎ dandìhú iní ñáhá xii-ndo davá-áⁿ.

23 Te dàvá-áⁿ ñá túú-gǎ ná nducu tnúhu-ndo nùu-í. Te na càchí tnúhu ndáá-í xii-ndo sǎ Tǎtà-í taxi-gǎ nchaa sá ná cácaⁿ-ndó nùú-gǎ nǔu na quìndáá iní ñáhá-ndó xii-í. 24 Te ndéé vitna vátá dúcáⁿ-gǎ cada-ndo cácaⁿ-ndó. Dico cácaⁿ-ndó nùú-gǎ nǔu ná cuìní-ndó te

taxi-gǎ cuèndá cudǐí ndisa iní-ndó —càchí-gǎ xáhaⁿ-gǎ xii-güedé.

Xitohó Jesucristú ní cunuu tnúhu-gǎ núú yucu ñáváha

25 Te xáhaⁿ tucu-gǎ xii-güedé:

—Mee-ni ñí chidáhu ndodo-í tnúhu ní cáháⁿ-í núú-ndó, dico sáá nduu te vá chidáhu-gǎ-í tnúhu cáháⁿ-í, chi cáháⁿ ndáá-na-í cuèndá Tǎtà-í. 26 Te dàvá-áⁿ cácaⁿ-ndó nùú Tǎtà-í nǔu ná cuìní-ndó te taxi-gǎ, te núu na quìndáá iní ñáhá-ndó xii yúhú Déhe-gǎ. Te ñá túú-gǎ xini ñúhu-xi sá yúhú cácaⁿ-í núú-gǎ cuèndá-ndó chi cácaⁿ mée-nǎ-ndó. 27 Chi mee Tǎtà-í ío cùu iní ñáhá-gǎ xii-ndo cuèndá cùu iní ñáhá-ndó xii-í, te sàndáá iní-ndó sǎ nùú-gǎ ní quee-í véxi-í. 28 Te yúhú ní quee-í núú Tǎtà-í véxi-í ñuyíú-a, te vitna dándóo-í ñuyíú-a te núhú-í núú ndécú-gǎ —càchí-gǎ xáhaⁿ-gǎ xii-güedé.

29 Te ní xáhaⁿ cuè téé xica cuu ndìhi-gǎ:

—Vitna chi cáháⁿ ndáá-nǎ-n, ñá túú-gǎ chidáhu-n tnúhu cáhá-n. 30 Te vitna ní xini-ndí sá ío váha cùtnuní iní-n nchaa nacuaá cùu, te cùtnuní iní-n nchaa nacuaá sàni iní nchaa ñáyiú. Te ñá túú xini ñúhu-xi nágá nducu tnúhu-yu núú-n chi nchaa sa ní dátúu-n nùu-yu. Te xíⁿ nǔu sàndáá iní-ndí sá nùú Yǎ Ndiǒxí ní quee-n véxi-n —càchí-güedé xáhaⁿ-güedé xii-gǎ.

31 Te ní xáhaⁿ Jèsús:

—¿Te vitna sàndáá iní-ndó-ǎⁿ? 32 Vitna ní sáá nduu ñí sáá òré sá ncháá nchòhó cuténuu-ndo cǎa ìḡ cǎa ùú cuu-ndo, te dándóo mee ñàha-ndo xii-í. Dico ñá díú mee dii-í quendóo chi ndècu ndìhi-í Tǎtà-í. 33 Duha cáháⁿ-í cuèndá cuu váha iní-ndó cùndecu-ndo, chi ñuyíú-a cuu ùhú iní ñáhá-yu xii-ndo, dico ni vǎ yúhú-ndó chi yúhú sa ní dáquée tǐhú-í nchaa sá cuèhé sá dúhá ío ñuyíú-a —càchí-gǎ xáhaⁿ-gǎ xii-güedé.

17

Jèsús xicáⁿ táhú-gǎ núú Tǎtà-gǎ Dútú Ndiǒxí cuèndá cue téé xica cuu ndìhi-gǎ

1 Te sátá dúcáⁿ ñí cáháⁿ Jèsús te ní nda-coto-gǎ andiú, te ní xáhaⁿ-gǎ xii Tǎtà-gǎ Dútú Ndiǒxí:

—Táu, vitna ní sáá nduu càda cahnu ñaha-n xii-í cuèndá ducaⁿ càda cahnu ñaha-í

xii-n. ² Chi mee-n ñi cachí-n sã táxi tnùn-í nchaa ñáyiú-ñuyíú-a, te dâcacu nihnu-í nchaa ñáyiú ní cachí-n nâníhí tãhú. ³ Te cundecu ndihí-õ-yu ni caa ni quíhíⁿ, chi sândáá iní ñáhã-yu sã ííⁿ ðì dî-ñi yòhó cúú-n Ndiõxí ndisa, te ducaⁿ xìní ñáhã-yu xii yúhú Jesucristú téé ní tendaha-n véxi ñuyíú-a.

⁴ Te yúhú ní chiñuhu ñaha-í xii-n ñuyíú-a, te ní xínu chiúⁿ ní cachí-n càda-í. ⁵ Táú, vitna na nãsáá-í núú-n te cada càhnu ñaha-n xii-í ðàtná ní xóo cada càhnu ñaha-n xii-í ndéé cútñahá vátá ngãva-gá ñuyíú.

⁶ Te nchaa ñáyiú ní nanducu nihnu-n tnuú nchaa ñáyiú ndècu ichi cuehé ichi duha, ní taxi cuendá-n-yu, te ní xáhaⁿ-í xii-yu yoo cùu-n. Te cuendá-n cùú-yu, te ní taxi cuendá-n-yu, te ní sândáá iní-yu tnúhu-n. ⁷ Te vitna ní cutnùn-í iní-yu sã ncháá tnúhu ndècu ndihí-í ðiu-ñi mee-n ñi taxi-n. ⁸ Te ní dánèhé-í-yu nchaa tnúhu sã ní dánèhé ñáhã-n xii-í, te ní sândáá iní-yu. Te ní cutnùn-í iní-yu sã núú-n ñi quee-í véxi-í, te ní sândáá iní-yu sã yòhó ní tendaha ñaha-n xii-í véxi-í ñuyíú-a.

⁹ Te yúhú càháⁿ ndàhú-í núú-n cuendá nchaa ñáyiú ní taxi cuendá-n. Te ñá túú càháⁿ ndàhú-í núú-n cuendá ñáyiú ndècu ichi cuehé ichi duha, chi cuendá nchaa ñáyiú ní taxi cuendá-n càháⁿ-í, chi cuendá-n cùú-yu. ¹⁰ Te nchaa sã cúú cuendá-í cúú-xí cuendá-n, te nchaa sã cúú cuendá-n cùu-xi cuendá-í tnàhá-í. Te xíquide càhnu ñahã-yu xii-í.

¹¹ Te yúhú vá cundècu-gá-í ñuyíú-a, dico mèe-yu chi cundecu-ní-yu, te yúhú ndixi-í núú ndécú-n. Táú, yòhó ío yíñùhu ndecu-n, te yúhú càháⁿ ndàhú-í núú-n sã ní yùhu ni iní-n còto-n nchaa ñáyiú ní taxi cuendá-n, ñáyiú ní sândáá iní tnúhu-í cuendá sã ííⁿ-ní ìchi cuú-yu cundecú-yu ðàtná ííⁿ-ni cùu nchoo. ¹² Chi òré ndécú-í ndihí-yu ñuyíú-a ní xito-í-yu nãcuáa cùu iní-n, te ni ííⁿ-yu ñá túú ní xíta nihnu, chi ííⁿ-ni té Jùdás ní xíta nihnu tnàhí-dé, te ducaⁿ ñi cuu cuendá sã ñi quee ndáá-xi nãcuáa yòdo tnuní núú tütú-n.

¹³ Te vitna sa ndixi-í núú ndécú-n, dico ñini ndècu-gá-í ñuyíú-a duha càháⁿ-í cuendá sã cúú iní-yu ðàtná cúú iní mèe-í. ¹⁴ Te yúhú ní dánèhé-í-yu tnúhu-n, dico nchaa

ñáyiú ndècu ichi cuehé ichi duha cùu úhú iní ñáhã-yu xii-yu cuendá sã ñá túú-gã ndécú-yu ichi cuehé ichi duha-áⁿ ðàtná yúhú ñá túú ndècu-í ichi-áⁿ. ¹⁵ Te ñá túú càhí-í sã xócàní-n-yu ñuyíú-a, dico càháⁿ ndàhú-í núú-n sã dácãcu ñihnú-n-yu núú yucu ñávãha. ¹⁶ Te yúhú ñá túú ndècu-í ichi cuehé ichi duha, te ducaⁿ mèe-yu ñá túú-gã ndécú-yu ichi cuehé ichi duha. ¹⁷ Te ío na cundecu yíhí ñuhu-gá-yu núú-n dâcuahá-yu tnúhu-n, chi cùu-xi ííⁿ tnúhu ndáá. ¹⁸ Te ðàtná ní tendaha ñaha-n xii yúhú véxi-í tnuú nchaa ñáyiú ndècu ichi cuehé ichi duha, ducaⁿ càda-í tendaha-í-yu quíhíⁿ-yu càháⁿ-yu tnúhu-í tnuú nchaa ñáyiú ndècu ichi cuehé ichi duha. ¹⁹ Te yúhú ndécú yíñùhu-í núú-n, te cada ñaha-n xii-í nãcuáa cùu iní-n sã cuendá-yu, te ducaⁿ te cundecu yíñùhú-yu núú-n dâcuahá-yu tnúhu-n.

²⁰ Te ñá díú cuendá mee-ni ñáyiú sa ní sândáá iní-xi càháⁿ ndàhú-í núú-n, chi tnàhá cuendá nchaa ñáyiú na quíndáá iní ñáhã xii-í ndéé ìdá-gá núu na cùndedóho-yu tnúhu càháⁿ ñáyiú na tëndaha-í. ²¹ Te xicáⁿ táhú-í núú-n sã ncháá-yu ííⁿ-nã ichi na cùú-yu, te ííⁿ-nã caní iní ndihí ñahã-yu xii-o ðàtná cúú nchòo ííⁿ-ni cuu-o. Te ducaⁿ ííⁿ-ná cuu-o ndihí-yu cuendá sã ná quíndáá iní nchaa ñáyiú ndècu ichi cuehé ichi duha sã díú-n ñi tendaha ñaha-n xii-í véxi-í ñuyíú-a. ²² Te nchaa sã vãha ní taxi-n ndècu ndihí-í ní dánèhé-í-yu cuendá sã ííⁿ-nã cuú-yu cundecú-yu ðàtná ndécú nchòo. ²³ Te yúhú cundecu ndihí-í-yu, te yòhó cundecu ndihí ñaha-n xii yúhú cuendá ííⁿ-nã cuu ndisá-yu cundecú-yu. Te ducaⁿ te cutnùn-í iní nchaa ñáyiú ndècu ichi cuehé ichi duha sã díú mèe-n ní tendaha ñaha-n xii-í véxi-í ñuyíú-a, te cùu iní-n-yu ðàtná cúú iní ñáhã-n xii yúhú.

²⁴ Táú, mee-n ñi taxi cuendá-n-yu, te cuíní-í sã cundecú-yu núú cundècu-í cuendá quíní-yu sã quidé càhnu ñaha-n xii-í chi ducaⁿ-ni cùu iní ñáhã-n xii yúhú ndéé cútñahá vátá ngãva-gá ñuyíú. ²⁵ Táú, yòhó ío yíñùhu ndecu-n. Te ñáyiú ndècu ichi cuehé ichi duha ñá túú xìní ñáhã-yu xii-n, dico yúhú chi xìní ñáhã-í xii-n, dico ñáyiú ní sândáá iní ñáhã xii-í sa xìní-yu sã díú-n ñi

tendaha ñàha-n xii-í véxi-í ñuyíú-a. ²⁶ Te sa xáhaⁿ-í xii-yu yoo cùu-n, te ñi-u-ni ducaⁿ càda-í cuendá cuu iní tnáhã-yu dàtná cúú ìní ñáhá-n xii-í, te ducaⁿ cùndecu-í ndihí-yu — cächí-gá xáhaⁿ-gã xii Tátá-gã Dútú Ndiöxí.

18

Ní tñi-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Lc. 22:47-53)

¹ Te sátá dúcáⁿ ñí cáháⁿ Jèsús, te ní quee-gá ndihí cue téé xica cuu ndihí-gá cuáháⁿ-güedé ndàa ingá xio yuhu yúú Cèdrón. Te yacáⁿ cáá ñí lahuertá, te xití lahuertá-áⁿ cuãnguïhu Jèsús ndihí cue téé xica cuu ndihí-gá. ² Te té Jùdás déhe té Xímú Iscarioté téé ní sáha cuendá ñáhá xii-gá núú cuè téé cùu úhú iní ñáhá sa xini-dé lahuertá-áⁿ chi titní xito ní sáháⁿ Jèsús ndihí-güedé xíaⁿ. ³ Núu ndáá ichi xíaⁿ ñí sáá té Jùdás ndihí vai sandadú, ndihí cue téé quide cuendá veñúhu ní techiúⁿ ñaha cue dútú cùnùu, ndihí cue téé cùu fariséú. Te xinehe-güedé machití ndihí ñí úú-gá sá dééⁿ, te yòtnuú-güedé lintérná ndihí ití ní sáá. ⁴ Te Jèsús sa nàha-gá nchaa nàcuáa cada ñaha-güedé xii-gá núu ní sáháⁿ tuha ñaha-gã xii-güedé, te ní xáhaⁿ-gã:

—¿Yoo nànducu-ndo? —cachí-gá xáhaⁿ-gã xii-güedé.

⁵ Te ní xáhaⁿ-güedé:

—Jèsús téé ñuú Nazàrét nánducu-ndí — cächí-güedé xáhaⁿ-güedé xii-gá.

Te ní xáhaⁿ Jèsús:

—Yúhú ducaⁿ nàni-í, te náu-í ndécú-á te núu yúhú nánducu-ndo —cachí-gá xáhaⁿ-gã xii-güedé.

Te tnáhá té Jùdás téé ní sáha cuendá ñáhá xii-gá ndihí-güedé. ⁶ Te òré ní xáhaⁿ Jèsús sá díú-gã cúú tée nànducu-güedé, te ní nacaca dùma-güedé te ní nduá-güedé ndéé ñuhu. ⁷ Te ní xicáⁿ tnúhú tùcu Jèsús núu-güedé yoo nànducu-güedé. Te ní xáhaⁿ tùcu-güedé sá Jèsús téé ñuú Nazàrét nánducu-güedé, ⁸ núu ní xáhaⁿ-nã Jèsús:

—Sa ní cáháⁿ-í sá díú yúhú ducaⁿ nàni-í, te núu yúhú nánducu-ndo, te dañà-ndo nchaa cue téé iha na nùhú-güedé —cächí-gá xáhaⁿ-gã xii-güedé.

⁹ Duha ní cuu chi ní quee ndáá-xi nàcuáa ní cáháⁿ méé Jèsús chi ní cachí-gá sá ncháá ñáyiú ní sáha cuendá ñáhá Yã Ndiöxí cundecu ndihí-gá vá cuíta nihnú-yu. ¹⁰ Te té Xímú, àdi Pelú chi úú ñi-u-dé, néhé-dé ñí machití, te ní tava-dé machití-áⁿ ñí-xi te ní xehndé-dé lóho xio cùha ñí téé nàni Malcú ní quéndeé duuⁿ. Te téé-áⁿ xínú cuèchi-dé núú dútú cùnùu-gá. ¹¹ Te ní xáhaⁿ Jèsús xii té Pèlú:

—Nataxúha machití-áⁿ núú ñúhú-xí, chi dacuítí sã ndóhò-í nàcuáa ní cachí Tátá-í cunduu —cächí-gá xáhaⁿ-gã xii-dé.

Jèsús ndécú-gã núú dútú cùnùu-gá

(Mt. 26:57-58; Mr. 14:53-54; Lc. 22:54)

¹² Te cue sandadú ndihí cue téé cùnùu-gá núu-güedé, ndihí cue téé quide cuendá veñúhu ní tñi-güedé Jèsús, te ní dácútú ñàha-güedé. ¹³ Te ndéca ñaha-güedé xii-gá cuáháⁿ núú ndécú tã Ànás, te té Ànás-áⁿ cúú-dé tátá ñadihí té Caiías. Te té Caiías-áⁿ ñí cuu-dé dútú cùnùu-gá cuía-áⁿ. ¹⁴ Te ñi-u-ni téé-áⁿ ñí xáhaⁿ-dë xii ñáyiú israhél sá vaha-gá sá ñí-ní tée na cùu-dé sá cuendá-yu ncháá-yu.

Té Pèlú càháⁿ-dé núú ñáyiú sá ñà túú xini-dé Jèsús

(Mt. 26:69-70; Mr. 14:66-68; Lc. 22:55-57)

¹⁵ Te té Pèlú, àdi Xímú chi úú ñi-u-dé, ndihí ingá tucu-dé nàcuáa xica cuu ndihí-güedé Jèsús nchicúⁿ ñáhá-güedé xii-gá cuáháⁿ. Te ñí téé-áⁿ xini tnáhá-dé ndihí dútú cùnùu-áⁿ núu nchicúⁿ-dé tnáhá-dé Jèsús cuãnguïhu ndéé núú cáá vèhe téé cùnùu-áⁿ. ¹⁶ Dico té Pèlú ní ndóo-dé yuyèhe ndaa quehé, núu ní ndee téé ndihí té Pèlú-áⁿ ñí cáháⁿ ndihí-dé ñaha ndéé yuyèhe, te ndéca-dé té Pèlú cuãnguïhu. ¹⁷ Te ní xáhaⁿ ñàha ndéé yuyèhe-áⁿ xii té Pèlú:

—¿Náa ñá díú yòhó tnáhá-n xica cuu ndihí-n téé ndéca-güedé cuãnguïhu-a? — cächí-aⁿ xáhaⁿ-aⁿ xii-dé.

Te ní xáhaⁿ tã Pèlú:

—Ñáhá, ñá túú tée-áⁿ xicá cùu ndihí-ú — cächí-dé xáhaⁿ-dë xii-aⁿ.

¹⁸ Te ío víxiⁿ quide-xi núu cue téé xinu cuechi, ndihí cue téé quide cuendá veñúhu ní dátñáhá-güedé ñuhú, te xínutñi teté-güedé ndihí té Pèlú.

Dútú cúnùu nducu tnúhu-dé núú Jèsús
(Mt. 26:59-66; Mr. 14:55-64; Lc. 22:66-71)

¹⁹ Te dútú cúnùu ní xicáⁿ tnúhú-dé núú Jèsús nùu nándi cùu cue téé xica cuu ndihí-gá, te nándi sá dánèhé ñáhá-gã xii-güedé. ²⁰ Te ní xáhaⁿ-gã:

—Yúhú càháⁿ ndodo-í núú nchàa ñáyiú cuëi xití veñúhu càhnu sá ïo cùnùu, te cuëi xití nchaa dava-gá veñúhu núú tàcá nchaa ñáyiú isràél ducaⁿ-ni dānehé-í-yu, te ñá túú dàyuhu càháⁿ-í. ²¹ Núú vá càcáⁿ tnúhú-n nùú-í. Càcáⁿ tnúhú nùú nchàa ñáyiú sàcúndedóho tnúhu càháⁿ-í, te na càháⁿ-yu núú nása ndùu tnúhu càháⁿ-í chi xini-yu —càchí-gá xáhaⁿ-gã xii-dé.

²² Te sá dúcáⁿ ñí càháⁿ Jèsús nùu ïⁿ téé quide cuendá veñúhu nùtní-dé tnàhá-dé te ní cani-dé ïⁿ déhndé nùú-gã. Te ní xáhaⁿ-dë:

—¿Ná cuendá ducaⁿ càháⁿ-n nùú dútú cúnùu-í? —càchí-dé xáhaⁿ-dë xii-gá.

²³ Te ní xáhaⁿ Jèsús xii-dé:

—Te núú nèhé ní càháⁿ-í te càháⁿ-n nása ndùu tnúhu ní càháⁿ-í, te yúhú càháⁿ váha-í te ducaⁿ càniha-n —càchí-gá xáhaⁿ-gã xii-dé.

²⁴ Te ndùtu yoho-ni Jèsús ní dánùhú ñáhá tē Ànás xii-gá ndaha té Caifás dútú cúnùu-gá.

Té Pèlú càháⁿ tucu-dé núú ñáyiú sá ñà túú xini-dé Jèsús

(Mt. 26:71-75; Mr. 14:69-72; Lc. 22:58-62)

²⁵ Te té Pèlú nùtní teté-ni-dé, te ní xáhaⁿ-güedé xii-dé:

—¿Náa ñá díú tnàhá yòhó xicá cùu ndihí téé ndèca-ndí véxi-ãⁿ? —càchí-güedé xáhaⁿ-güedé xii-dé.

Te ní xáhaⁿ tē Pèlú:

—Ñáhá, ñá túú tēe-áⁿ xicá cùu ndihí-ú —càchí-dé xáhaⁿ-dë xii-güedé.

²⁶ Te ïⁿ ñaní tnàhá tēe ní xehndé té Pèlú lóho-xi-áⁿ xínú cuëchi-dé tnàhá-dé núú dútú cúnùu. Te tée-áⁿ ñí xáhaⁿ-dë xii té Pèlú:

—¿Náa ñá díú tnàhá-n ndihí-n-dé ní xini ñáhá-í òré ní tní-ndí-dé xití lahuèrtá? —càchí-dé xáhaⁿ-dë xii-dé.

²⁷ Te té Pèlú ní xáhaⁿ tucu-dé sá ñà díú-dë, te òré-áⁿ ñí cana ïⁿ líhi.

Jèsús ndécú-gã núú tē Pilatú

(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiúⁿ téé cùu gobiernú. Te sa ta cùditó-ni-gá cuáháⁿ nùu ñá ní cuini cue téé isràél quíhu-güedé xití vechiúⁿ téé cùu gobiernú-áⁿ. Te núú ní quíhu-güedé vechiúⁿ-áⁿ ñá, te vá cúú-gã quíhu-güedé cudini-güedé vico pascuá ní cùu chi ducaⁿ tnàhí quide-güedé. ²⁹ Núú té Pilatú téé cùu gobiernú ní quee-dé vechiúⁿ-dé ní càháⁿ ndihí ñaha-dë xii-güedé, te ní xáhaⁿ-dë:

—¿Ná cuëchi ní quide tée-a núú ndèca-ndo-dé véxi? —càchí-dé xáhaⁿ-dë xii-güedé.

³⁰ Te ní xáhaⁿ-güedé:

—Te núú dìcò ñá túú cuëchi-dé-áⁿ te vá càndèca-ndí-dé quixi núú-n ní cùu —càchí-güedé xáhaⁿ-güedé xii-dé.

³¹ Te ní xáhaⁿ tucu té Pilatú xii-güedé:

—Chí càndèca-dé cuánùhú, te cada ndáá-ndó cuëchi-dé nàcuáa càa leí méé-ndó —càchí-dé xáhaⁿ-dë xii-güedé.

Te ní xáhaⁿ-güedé:

—Dico nchúhú ñáyiú isràél chi ñá túú dùcaⁿ taxi tnuní leí sá càhni-ndí —càchí-güedé xáhaⁿ-güedé xii-dé.

³² Te ducaⁿ ñí cuu chi dacuítí ñí quee ndáá-xi nàcuáa ní càháⁿ méé Jèsús cada-xi cuú-gá. ³³ Te cuándihu té Pilatú vechiúⁿ-dé, te ní cana-dé Jèsús ní xicáⁿ tnúhú-dé núú-gã, te xáhaⁿ-dë:

—¿Yòhó yíndàha-n ñáyiú isràél-ãⁿ? —càchí-dé xáhaⁿ-dë xii-gá.

³⁴ Te ní xáhaⁿ Jèsús:

—¿Te xiãⁿ càháⁿ-n sã véxi iní méé-n, àdi ió ïⁿ ñáyiú ní cachí tnúhu xii-n cuendá-í? —càchí-gá xáhaⁿ-gã xii-dé.

³⁵ Te ní xáhaⁿ tē Pilatú xii-gá:

—Ñá díú tēe isràél cùú-í nùu ducaⁿ càháⁿ-n, chi cue ñaní tnàhá-n cuè téé isràél ndihí cue dútú cúnùu ní taxi cuendá ñáhá-güedé xii-n iha. ¿Te ná ní quide-n? —càchí-dé xáhaⁿ-dë xii-gá.

³⁶ Te ní xáhaⁿ Jèsús:

—Ñá díú tēe ñuyiú-a cùu-í te ní ñà túú véxi-í taxi tnuní-í ñuyiú-a, chi núú dìcò iha taxi tnuní-í áⁿ te cue téé xica cuu ndihí-í nàá-güedé ndihí cue téé isràél cuendá sá

vã tníi ñaha-güedé xii-í ní cùu, dico ñá túú vëxi-í sá táxí tnùn-í ñuyíú-a —càchí-gá xáhaⁿ-gã xii-dé.

³⁷ Te ní xáhaⁿ tẽ Pilatú:

—¿Te tée yìndaha ñáyíu cùu-ó vání? —
càchí-dé xáhaⁿ-dẽ xii-gá.

Te ní xáhaⁿ Jèsús:

—Te dàtná càchí-n-ãⁿ yìndaha ndisa-í ñáyíu, chi yúhú véxi-í ñuyíú-a te iha ní cacu-í te càháⁿ-í mee-ni tnúhu ndáá. Te nchaa ñáyíu na cùdí ìní-xi tnúhu ndáá, te tedóho-yu nchaa tnúhu càháⁿ-í —càchí-gá xáhaⁿ-gã xii-dé.

³⁸ Te ní xáhaⁿ tẽ Pilatú:

—¿Te ná cúú-tu tnúhu ndáá-áiⁿ? —
càchí-dé xáhaⁿ-dẽ xii-gá.

Càchí-güedé sá cáhni-güedé Jèsús

(Mt. 27:15-31; Mr. 15:6-20; Lc. 23:13-25)

Te sátá ñí yáha ní xícáⁿ tnúhú tẽ Pilatú núú Jèsús, te ní quee tucu-dé quehé, te xáhaⁿ-dẽ xii cue tée isràél:

—Ñá túú nã cuéchi tée-a. ³⁹ Te váha-ni chi ducaⁿ tnàhí quide nchohó sá ndì tnahá nduu vico pascuá cuiní-ndó sã dácácu-í ñⁿ tée yìhi vecaá. Te núu cuiní-ndó te na dácácu-í tée yìndaha ñaha xii-ndo —càchí-dé xáhaⁿ-dẽ xii-güedé.

⁴⁰ Te sá dúcáⁿ ñí càháⁿ-dé, núu nchaa-güedé níhi ní càháⁿ-güedé, te xáhaⁿ-güedé:

—¿Vá dácácu-n tẽ-áⁿ, té Barrábás dácácu-n! —càchí-güedé xáhaⁿ-güedé xii-dé.

Te té Barrábás-áⁿ ñí cuu-dé ñⁿ ñadúhú.

19

¹ Te té Pilatú ní táuchíúⁿ-dẽ ní tnⁱⁱ ñaha cuè sandadú xii Jèsús, te ní caniha-güedé xii-gá ndìhi ñⁱⁱ. ² Te diu-ni cue tée-áⁿ ñí cadúha-güedé ñⁿ coroná iñu ní chihi-güedé díquí-gã, te ní dáquⁱⁱ nuu ñaha-güedé xii-gá ñⁿ dóó tícuèhé víhí. ³ Te ní sáháⁿ ndehe yatni-gá-güedé núú-gã, te ní xáhaⁿ-güedé:

—¿Ío càhnu cuu yohó tée yìndaha ñaha xii ñáyíu isràél! —càchí-güedé xáhaⁿ-güedé cúdíquí ndeé ñáhá-güedé xii-gá.

Te ní cani-güedé déhndé núú-gã.

⁴ Te ní quee tucu té Pilatú quehé te ní xáhaⁿ-dẽ xii nchaa ñáyíu xíndecu quehé:

—Te cundehe-ndo-dẽ ná ndeé ñùhu-í-dé iha, chi yúhú sáha-í cuendá sá ñà túú cuèchi-dé —càchí-dé xáhaⁿ-dẽ xii-yu.

⁵ Te ní ndeñuhu ñaha té Pilatú xii Jèsús xití vechiúⁿ-dé te ñùhu ñⁿ coroná iñu díquí-gã, te ñihnu-gá dóó tícuèhé víhí-ãⁿ. Te ní xáhaⁿ tẽ Pilatú xii-yu:

—¿Nái-dé-a! —càchí-dé xáhaⁿ-dẽ xii-yu.

⁶ Te ní xiní ñáhá cuè dútú cùnùu ndìhi cue tée quide cuendá veñúhu. Te ní cuáá-güedé, te xáhaⁿ-güedé:

—¿Cata caa-dé! ¿Cata caa-dé núú cùrúxí! —càchí-güedé xáhaⁿ-güedé xii-dé.

Te ní xáhaⁿ tẽ Pilatú:

—Váha-gá núu candeca mee-ndo-dẽ quíhíⁿ cata caa-ndo-dẽ núú cùrúxí, chi yúhú cùtnùn-í iní-í sá ñà túú na cuèchi-dé —càchí-dé xáhaⁿ-dẽ xii-güedé.

⁷ Te ní xáhaⁿ cuè tée isràél:

—Lèi ndécú ndìhi nchúhú càchí-xi sá dài cuú-dé, chi càchí-dé sá Déhe Yá Ndiòxí cúú-dé —càchí-güedé xáhaⁿ-güedé xii-dé.

⁸ Te sá dúcáⁿ ñí xáhaⁿ-güedé xii té Pilatú, te vaa-gá ní yùhú-dé. ⁹ Núu cuándìhu tucu-dé vechiúⁿ-dé, te ní xáhaⁿ tucu-dé xii Jèsús:

—¿Te yòhó ndeé tée cùu-n-i? —càchí-dé xáhaⁿ-dẽ xii-gá.

Dico Jèsús ñá túú ní càháⁿ-gá.

¹⁰ Núu ní xáhaⁿ tẽ Pilatú xii-gá:

—¿Te vá càchí tnúhu-n núu ndeé tée cùu-n-u? ¿Náa ñá túú xiní-n sã yùhú táxí tnùn-í, te cuu-ni tauchiúⁿ-í cata caa ñaha-güedé xii-n núú cùrúxí cuú-n, te cuu-ni dácácu ñaha-í xii-n-ãⁿ? —càchí-dé xáhaⁿ-dẽ xii-gá.

¹¹ Te ní xáhaⁿ Jèsús:

—Yòhó ñá túú sã táxí tnùn-í ñáhá-n xii yúhú ní cùu núu ñá túú Yá Ndiòxí ní cuiní-gá sá dúcáⁿ cùnduu, te tée ní taxi cuendá ñáhá xii-í núú-n tẽ-áⁿ ño-gá ndècuèchi-dé dácúxí yòhó —càchí-gá xáhaⁿ-gã xii-dé.

¹² Te òré-áⁿ ñí ngüíta té Pilatú ndúcú-dé nàcuáa cada-dé dácácu-dé Jèsús ní cùu, dico cue tée isràél ní ngüíta-güedé ní cuáá-güedé, te xáhaⁿ-güedé:

—Te núu na dácácu-n tẽ-áⁿ, te ñá díú tẽ tnàhá tnúhu ndìhi té Cèsár cúú-n. Chi ndèda-ni càa tée na càchí sá cúú-dẽ tée yìndaha ñaha xii ñáyíu cùu úhú iní-dé té

Cèsár. Te té Jèsús-án càchí-dé sá táxi tnùnì-dé —càchí-güedé xàhaⁿ-güedé xii-dé.

¹³ Te sá dúcáⁿ nǐ xáhaⁿ-güedé xii té Pilatú nǔu ní quee-dé ndihì Jèsús cuáháⁿ ndihì ñaha-dé corrèdór núú nǐ quee mee-ni yúu vâha núú ñúhú, te xiáⁿ nání-xí Găbatá tnúhu hèbreú. Te xiáⁿ ndécú xilè sácõo nchihi té Pilatú xèhndé-dé cuéchi ñáyiú, núu ní nucóo-dé núu xilè-dé òré ní quexìo-dé ndihì Jèsús. ¹⁴ Te cùu-xi datná cuádava nduu, nduu vìspré vico pàscuá. Te ní xáhaⁿ tē Pilatú xii ñáyiú isràél:

—¡Nái tée yìndaha ñaha xii-ndo-a! — cachí-dé xáhaⁿ-dē xii-yu.

¹⁵ Te ní cuáá-yu, te xǎhǎⁿ-yu:

—¡Cahni-dé! ¡Cahni-dé! ¡Cata caa-dé núu cùrúxí! —càchí-yu xǎhǎⁿ-yu.

Te ní xáhaⁿ tē Pilatú:

—¿Te yúhú cata caa-í tée yìndaha ñaha xii-ndo-u? —cachí-dé xáhaⁿ-dē xii-yu.

Te cue dútú cúnùu ní xáhaⁿ-güedé:

—Nchúhú ñá túú-gǎ tée yìndaha ñaha xii-ndí, chi ñndì-ni té Cèsár yìndaha ñaha-dé xii-ndí —càchí-güedé xáhaⁿ-güedé xii-dé.

¹⁶ Te té Pilatú ní xáhaⁿ-dē ní queheⁿ cuendá-güedé Jèsús ndécá ñaha-güedé cuáháⁿ cata caa ñaha-güedé núu cùrúxí.

Sàta caa-güedé Jèsús núu cùrúxí

(Mt. 27:32-44; Mr. 15:21-32; Lc. 23:26-43)

¹⁷ Te ní quee Jèsús nchídó-gǎ cùrúxí cuáháⁿ ñndì xichi núu nání Yìquì Dìquì Ndÿyì. Te tnúhu hèbreú queé-xí Gōlgotá. ¹⁸ Te yácáⁿ ní sata caa ñaha-güedé xii-gǎ núu cùrúxí-án. Te xio xio dñi-gǎ ní sata caa-güedé úú cue tée ndècu ndisa cuéchi-xi ñu-ni núu cùrúxí tucu. ¹⁹ Te ní táuchíúⁿ tē Pilatú ní taxi ndecu-güedé ñndì sá ndèé lètrá núu cùrúxí tá càa-gǎ, te duha càchí lètrá-án: “Jèsús tée ñuú Nazàrét, tée yìndaha ñaha xii ñáyiú isràél”, duha càchí-xi. ²⁰ Te vai ñáyiú isràél ní xiní-yu nàcuáa càháⁿ lètrá-án, chi yatni-ni yuhu ñuú ní sata caa ñaha-güedé xii-gǎ núu cùrúxí. Te lètrá-án càháⁿ-xi tnúhu hèbreú, te càháⁿ-xi tnúhu griégú, te càháⁿ-xi tnúhu làtín. ²¹ Te ní xáhaⁿ cuè dútú cúnùu xii té Pilatú:

—Vá táuchíuⁿ-n tee-güedé lètrá càháⁿ-xi “Tée yìndaha ñaha xii ñáyiú isràél” ní cùu, vâha-gǎ tauchíuⁿ-n tee-güedé lètrá càháⁿ-xi

“Tée càchí yìndaha ñaha xii ñáyiú isràél ní cùu” —cachí-güedé xáhaⁿ-güedé xii-dé.

²² Te ní xáhaⁿ tē Pilatú:

—Nàcuáa ní táuchíuⁿ-í ní tee-güedé te ducaⁿ quèndóo-xi —càchí-dé xáhaⁿ-dē xii-güedé.

²³ Te sátá nǐ sata caa ñaha cuè sandadú xii Jèsús núu cùrúxí, te cúmí xichi ní quide-güedé dóo-gǎ, te ñndì ñndì xichi dóo-gǎ ní càhñu cue sandadú-án. Te ndècu ñndì dóo-gǎ dóo cáni ña túú ní tǐcu. ²⁴ Te cuendá dóo-án ní xitnaha cue sandadú-án:

—Vá ndátá-ó dǒo-a, vâha-gǎ nǔu na còto ndéé-ó cuendá quini-ó ndèdacàa-o cuu cuendá-ó —càchí-güedé xitnaha-güedé.

Te ducaⁿ nǐ quide-güedé chi ní quee ndáa-xi nàcuáa càháⁿ-xi núu tütú Yǎ Ndiöxí núu càchí-xi: “Títñí xichi ní càhñu-güedé dóo-í. Te ní xito ndéé-güedé cuendá cutnùnì iní-güedé ndèdacàa-güedé níhí-güedé dóo-í”, duha càchí-xi núu tütú-gǎ. Te sá dúcáⁿ càháⁿ-xi núu tütú Yǎ Ndiöxí nǔu xiǎⁿ ducaⁿ nǐ quide cue sandadú-án.

²⁵ Te yatni dñi curúxí núu tácaà Jesús núnñi nǎná-gǎ, ndihì cùhú-xi, ndihì tá Màriá ñadihì té Clèofás, ndihì tá Màriá Magdalèná. ²⁶ Te ní xiní Jesús nǎná-gǎ núnñi-aⁿ dñi ñndì tée ní xica cuu ndihì-gǎ, tée ío cùu iní-gǎ, te ní xáhaⁿ-gǎ xii nǎná-gǎ:

—Nǎá, tée núnñi-án nduu-dé dàtná déhe mee-n —càchí-gǎ xáhaⁿ-gǎ xii-aⁿ.

²⁷ Te ní xáhaⁿ-gǎ xii tée ní xica cuu ndihì-gǎ-án:

—Ñaha-án nduu-aⁿ dàtná nǎná méé-n —càchí-gǎ xáhaⁿ-gǎ xii-dé.

Núu ndéé dàvá-án nǐ nduu nǎná ñahá tē-án xii nǎná-gǎ.

Ní xihí Jèsús

(Mt. 27:45-56; Mr. 15:33-41; Lc. 23:44-49)

²⁸ Te ní cutnùnì iní Jèsús sá nǐ ndihì chiúⁿ ní táhú Tátá-gǎ Dútú Ndiöxí ní quide-gǎ nǔu ní cachí-gǎ:

—Yichí-í ndute —càchí-gǎ.

Te duha ní càháⁿ-gǎ chi ní quee ndáa-xi nàcuáa càháⁿ-xi núu tütú Yǎ Ndiöxí.

²⁹ Te ndècu ñndì lítú ññu ndudí íá. Te sá dúcáⁿ nǐ càháⁿ-gǎ sá yichí-gǎ ndute, núu xiǎⁿ ní queheⁿ-güedé càchí te ní chindóyo-güedé xití ndudí íá-án, te ní chinenu-güedé díquì ñndì

dité yutnu nàni hisópó, te ní ndocani-güedé ní chihi-güedé yuhu-gá. ³⁰ Te sáta ní xihi-gá ndudí íá-áⁿ, te càchí-gá:

—Vitna ní dǎxǐnu cava-í nchaa chi^u ní cachí Tàtá-í cada-í —duha ní cachí-gá.

Te ní xócuíta dúcúⁿ-gǎ ndàa núú-gǎ, te ní xíhí-ni-gá.

Íⁿ sandàdú ní caáⁿ-dé yiqui naha Jèsús ndihi ìⁿ pùyá yíhí caá núú-xi

³¹ Te cuendá sá nduu vispré vico pascuá cúu-xí nũu ñá ní cuení cue téé isràél cundecu-ni yiqui cùñú-gá núú cùrúxí ndihi yiqui cùñú cue téé ní sata caa-güedé diñi-gá, chi cuendá nduu tnéé-áⁿ cúu-xí nduu ndetatú ñáyi^u, te ío quide cahnú-yu nduu-áⁿ, núu ní xáhaⁿ-güedé xii té Pilatú sá táuchiuⁿ-dé quíhíⁿ cue téé cáhnú-güedé díhíⁿ Jèsús ndihi díhíⁿ cue téé tàcaa ndihi-gá, te xocàni-güedé yiqui cùñú-gá ndihi yiqui cùñú-güedé yàcáⁿ. ³² Te sáta dúcáⁿ te ní sáháⁿ cue sandàdú ní sáhnú-güedé díhíⁿ cue téé tàcaa xio xio diñi Jesús. ³³ Te òré ní cuyatni-güedé núú-gǎ, te ní xiní-güedé sá sà ní xíhí-gá nũu ñá ní sáhnú-güedé díhíⁿ-gá.

³⁴ Dico ìⁿ sandàdú-áⁿ ní cúxi-dé pùyá néhé-dě ìⁿ xio yiqui naha-gǎ, te yíhí caá núú-xi núu ní caáⁿ-xi yiqui naha-gǎ ní quee níhí ndihi ndute cuí. ³⁵ Te yúhú té Juàá téé ní cadúha tutú-a ní xiní-í nàcuáa ní cuu ní xíhí Jèsús, te xíáⁿ nũu càháⁿ ndáá-í cuendá quíndáá iní-ndó. ³⁶ Te ducaⁿ ní cuu ñá ní sáhnú-güedé díhíⁿ Jèsús, chi ní quee ndáá-xi nàcuáa càháⁿ-xi núú tütú Yá Ndiòxí núú càchí-xi: “Vá càhnú-güedé ni ìⁿ yiqui-gá”, duha càchí-xi. ³⁷ Te ducaⁿ ní quide-güedé Jèsús ní caáⁿ-güedé yiqui naha-gǎ, chi ingá xichi núú tütú Yá Ndiòxí càchí-xi: “Sáá nduu te quini-güedé ìⁿ téé ní dánícuèhé-güedé”, duha càchí-xi.

Chìndúxi-güedé Jèsús

(Mt. 27:57-61; Mr. 15:42-47; Lc. 23:50-56)

³⁸ Te sáta dúcáⁿ ní cuu, te té Chèé téé ñuu Arimateá tnahá-dé ní sándáá iní-dé tñuhu Jèsús dico dayuhu, chi ní xóo yúhú-dé cue téé cunuú núú ñáyi^u isràél. Te téé-áⁿ ní xáhaⁿ-dě xii té Pilatú nũu vá dáñá-dě canehe-dé yiqui cùñú Jèsús quíhíⁿ chindúxi-dé, te té Pilatú ní xáhaⁿ-dě xii-dé

sá cúu cànehe-dé yiqui cùñú Jèsús quíhíⁿ, núu ní sáháⁿ-dé ní nuu nehe-dé yiqui cùñú-gá núú cùrúxí nchídó-dě cuáháⁿ.

³⁹ Te té Nicòdemú téé ní sáháⁿ niú ní cáháⁿ ndihi-dé Jèsús ndéé díhna, téé-áⁿ néhé-dě ócò úxí kílú yuchi ní cuáha mee-ni yúcú sá nání mìrrá ndihi yúcú sá nání àloés. Te ío váha tñami saháⁿ. ⁴⁰ Te ní naníhí tnahá-dě ndihi té Chèé, te ní chidúcúⁿ nuu-güedé yiqui cùñú Jèsús mee-ni dǒó vǎha, te nàcuáa ta dùcuⁿ nuu-güedé yiqui cùñú-gá dóó-áⁿ, te ducaⁿ ta chido-güedé yuchi sáháⁿ tñami-áⁿ núú dǒó-áⁿ chí ducaⁿ tnahí quide ñáyi^u isràél òré chindúxi tnahá-yu. ⁴¹ Te yatni núú ní sata caa-güedé Jèsús caá ìⁿ lahuertá. Te xití lahuertá-áⁿ nchí^u ìⁿ yaú cava duha cuáháⁿ ndáá-xi, te vátá yǒo ìⁿ-gá nguíndúxi xíáⁿ. ⁴² Te cuendá sá ní cuyatni tnahá nduu ndetatú ñáyi^u isràél nũu xíáⁿ yaú cava nchí^u yatni-ni xíáⁿ ní chihi-güedé yiqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumìngú tacuìhndá-gá cuáháⁿ tá Màriá Magdaléná cuáháⁿ ngoto-xi yaú núú ní chihi-güedé yiqui cùñú Jèsús, te ní sáá-xi ní xiní-xi sá ñá túú-gǎ ndèdí yúú yèhe yaú-áⁿ. ² Núu xínu-xi cuánuhú núú ndécú tǎ Xímú, àdi Pelú chí úú diu-dé, ndihi ingá téé ní xica cuu ndihi-gá téé ío cùu iní-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñá xiní-ó ndéé ní taxi ndecu-güedé —càchí-xi xǎhaⁿ-xi xii-güedé.

³ Te ní quee té Pèlú ndihi ingá téé-áⁿ cuáháⁿ ndéhé-güedé yaú núú ní chihi-güedé yiqui cùñú-gá. ⁴ Te ndúú-güedé xínú-güedé cuáháⁿ ní cùu, dico ingá téé-áⁿ ní cuu níhi-gá sáhá-dé cuáháⁿ-dé nũu díhna-gá-dé ní sáá-dé yuhu yaú núú ní chihi-güedé yiqui cùñú Jèsús ní cùu. ⁵ Te ní ngáundeyi-dé xító nihni-dé xití yaú-áⁿ, te ní xiní-dé mee-nǎ dóó vǎha sá ní xidúcúⁿ nuu-gá yúcú, dico ñá ní quíhu-dé. ⁶ Te sáta ní sáá té Pèlú te cuánguìhu-dé xití yaú-áⁿ, núu tnahá-dé ní xiní-dé nchaa dóó ní xidúcúⁿ nuu-gá yúcú-áⁿ. ⁷ Te ní xiní-dé

sá dǒó nǐ xíndútú dǐquí-gǎ ñá túú càtuu jundú-xi ndihí dóó nǐ xíducúⁿ nuu-gá chi ní nadúcúⁿnuu-ná cǎtúu ìⁿ xio. ⁸ Te nchìcúⁿ tucu téé ní sáá díhna-gá-áⁿ cuǎnguihu xítí yaú-áⁿ, te ní xiní-dé sá dǒó-nǎ yúcu, te ñá túú-gǎ yíqui cùñú Jèsús nǔu ní sándáá iní-dé sá nǐ ndoto-gá. ⁹ Chi vátá tècú tnùnì-gá-güedé nàcuáa càháⁿ-xi núú tütú Yǎ Ndiǒxí núú cǎchí-xi sá Jèsús ndoto-gá. ¹⁰ Te ní xícó ndì ndúú cue téé ní sǎngoto yaú núú nǐ chihi-güedé yíqui cùñú Jèsús ní cùu cuánuhú-güedé vehe-güedé.

Jèsús ní naníhí tnáhá-gǎ ndihí tá Màriá Magdalèná

(Mr. 16:9-11)

¹¹ Te ní sáá tucu tá Màriá yuhu yaú núú nǐ chihi-güedé yíqui cùñú Jèsús te ní ngüíta-xi ndàhyú-xi, te ní ngáundeyi-xi xìto nihni-xi xítí yaú-áⁿ. ¹² Te xítí yaú-áⁿ nǐ xiní-xi úú espíritú xínú cuèchi núú Yǎ Ndiǒxí xǐxíhnu-xi mee-ni dóó cuìxíⁿ xǐndecu-xi núú nǐ cǎa yíqui cùñú-gá. Te ìⁿ-xi nùcúo núú nǐ cǎa dǐquí-gǎ, te ìⁿ-xi nùcúo núú nǐ cǎa sáhá-gǎ. ¹³ Te espíritú-áⁿ nǐ xáhaⁿ-xi xì tá Màriá:

—¿Ná cuèndá ndàhyú-n? —cǎchí-xi xáhaⁿ-xi.

Te ní xáhaⁿ tǎ Màriá:

—Ndàhyú-í chi nèhe-güedé yíqui cùñú Yaá cúú Xítóhó-í cuáháⁿ, te ñá túú xíní-í ndéé ní taxi ndecu-güedé —cǎchí-xi xáhaⁿ-xi xì cue espíritú-áⁿ.

¹⁴ Te tnúhu-ni-áⁿ nǐ cǎháⁿ-xi te ní nchócótó-xí ìⁿ xio, te ní xiní-xi Jèsús nútní-gá dico ñá túú ní cùtnuní iní-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuèndá ndàhyú-n? ¿Yoo nànducu-n? —cǎchí-gá xáhaⁿ-gǎ xii-xi.

Te mee-xi nǐ sani iní-xi sá tǎe xìto lahuertá-áⁿ cúú tǎe-áⁿ, núú ní xáhaⁿ-xi:

—Tǎta, te núu yòhó néhé-n yíqui cuñú Jèsús cuáháⁿ, te cǎháⁿ-n ndéé ní taxi ndecu-n chi cuèndá naqueheⁿ-í canehe-í núhú —cǎchí-xi xáhaⁿ-xi.

¹⁶ Te ní cǎháⁿ díú ñàha-gá xii-xi, te xáhaⁿ-gǎ:

—¿Màriá! —cǎchí-gá xáhaⁿ-gǎ xii-xi.

Te ní ndacoto-xi núú-gǎ, te ní cǎháⁿ-xi tnúhu hèbreú, te xáhaⁿ-xi:

—¿Rabóni! —cǎchí-xi xáhaⁿ-xi. Te tnúhu-áⁿ quée-xí Mèstrú.

¹⁷ Te ní xáhaⁿ Jèsús:

—Daña vá ngání ñàha-n chi vátá ndáá-gǎ-í núú ndécú Tǎtà-í. Te núhú-n cùñaha-n xii cue téé ío váha ní tnáhá tnúhu ndihí-í sá ndáa-í núú ndécú Tǎtà-í Dútú Ndiǒxí, te díu-gá cúú Tǎtà-ndó nchaa-ndo, te díu-ni-gá cúú Ndiǒxí-ndó —cǎchí-gá xáhaⁿ-gǎ xii-xi.

¹⁸ Te ní natnii tá Màriá Magdalèná ichi cuánuhú-xi cúñaha-xi xii cue téé ní xica cuu ndihí-gá sá nǐ xiní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gǎ xii-xi.

Ní quexìo Jèsús núú xǐndecu cue téé ní xica cuu ndihí-gá

(Mt. 28:16-20; Mr. 16:14-18; Lc. 24:36-49)

¹⁹ Te díu-ni ndumìngú sandiquiⁿ ní nat-acá cue téé ní xica cuu ndihí-gá, te xǐndedí nihnu-güedé vehe sá xǐyùhú-güedé cue téé cùnnoo núú ñǎyiu isràél. Te ní quíhu Jèsús ndéé tnuú-güedé ní ngúnutnii-gá, te ní xáhaⁿ-gǎ:

—Yá Ndiǒxí chíndèe ñàha-gá xii-ndo ìo váha cùu iní-ndó ndècu-ndo —cǎchí-gá xáhaⁿ-gǎ xii-güedé.

²⁰ Te ní dánèhé ñáhá-gǎ ndaha-gá ndihí yíqui naha-gǎ xii-güedé. Te ío ní cudíí ìní-güedé sá díú ndisa-gá ní xiní ñáhá-güedé.

²¹ Te ní xáhaⁿ tucu Jèsús xii-güedé:

—Yá Ndiǒxí chíndèe ñàha-gá xii-ndo ìo váha cùu iní-ndó ndècu-ndo. Te dàtná ní tendaha ñàha Tǎtà-í Dútú Ndiǒxí xii-í véxi-í ñuyíú-a, te ducaⁿ tëndaha ñàha-í xii-ndo quíhíⁿ-ndó cǎháⁿ-ndó tnúhu-í núú ñǎyiu —cǎchí-gá xáhaⁿ-gǎ xii-güedé.

²² Te ní chiyócó-gǎ núú-güedé, te ní xáhaⁿ-gǎ:

—Chí ndúú tàhú Espíritú Yǎ Ndiǒxí cun-decu ndihí-ndo. ²³ Te nchaa ñáyiu na quíndáá iní-xi tnúhu-í te cúñaha-ndo xii-yu sá nǐ quide càhnu iní Yǎ Ndiǒxí nchaa cuéchi-yu. Te nchaa ñáyiu vá quíndáá iní tnúhu-í te cúñaha-ndo xii-yu sá vǎ cǎdá càhnu iní-gá cuéchi-yu —cǎchí-gá xáhaⁿ-gǎ xii-güedé.

Té Mǎxí càháⁿ ndihí-dé Jèsús

24 Te núú ùxúú cue téé ní xica cuu ndihi-gá, te ìn-dé nání-dě Mǎxí téé ní xóo danàni-güedé Cuächí, te téé-án ñà túú-dě ndécú ndihi-güedé òré ní sáhán Jèsús. 25 Te dava-gá cue téé ní xica cuu ndihi-gá ní xáhaⁿ-güedě xii-dé:

—Ní xiní-ndí Jèsús —càchí-güedé xǎhaⁿ-güedě.

Te ní xáhaⁿ tǎ Mǎxí:

—Te vá quíndáá iní-í, chi ndéé quíni-í ndaha-gá núú ñí quée nduyú, te dàquíhu-í díquí ndáhà-í núú ñí caáⁿ nduyú-án, te dàquíhu ndàha-í yíquí naha-gǎ núú ñí caáⁿ, ducaⁿ te quíndáá iní-í —càchí-dé xǎhaⁿ-dě xii-güedé.

26 Te núú ùná tucu nduu ní natacá tucu cue téé ní xica cuu ndihi Jèsús ìn vehe, te nduu-án tnhá té Mǎxí ndécú ndihi-güedé. Te cuèi ndèdí nihnu-güedé vehe-án, te ní quíhu Jèsús ndéé tnuú-güedé, te ní xáhaⁿ-gǎ:

—Yá Ndiòxí chíndèe ñaha-gá xii-ndo ìo váha cùu iní-ndó ndècu-ndo —cachí-gá xáhaⁿ-gǎ xii-güedé.

27 Te ní xáhaⁿ-gǎ xii té Mǎxí:

—Cundehe ndàha-í te dàquíhu-n díquí ndáhà-n núú ñí quée nduyú, te dàquíhu-n ndàha-n yíquí naha-í-a cuèndá quíndáá iní-n te vá cání ìn caní úú iní-n —càchí-gá xáhaⁿ-gǎ xii-dé.

28 Te ní xáhaⁿ tǎ Mǎxí xii-gá:

—jYòhó cúu-n Xítóhó-í! jYòhó cúu-n Ndiòxí-í! —càchí-dé xǎhaⁿ-dě xii-gá.

29 Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhà-n xii-í te ní sándáá iní-n, dico cùdí-gǎ iní nchaa ñáyu ñá túú ní xini núú ñáhà xii-í, te ní sándáá iní-yu —càchí-gá xáhaⁿ-gǎ xii-dé.

Quíndáá iní-ó tñhu yòdo tñuní núú tütú-a

30 Te vai-gá sá vǎ yòo tnhá ndàcu cada ñá túú yòdo tñuní núú tütú-a ní quide Jèsús núú cuè téé ní xica cuu ndihi-gá. 31 Dico dava-gá ní ngódó tñuní núú tütú-a cuèndá sá quíndáá iní-ndó sǎ Jèsús cúu-gǎ Crístú Déhe Dútú Ndiòxí, te naníhí tǎhú-ndó te núu na quíndáá iní-ndó-gǎ.

21

Úsá cue téé ní xica cuu ndihi Jèsús ní xiní ñáhà-güedě xii-gá

1 Te ingá nduu tucu xíndecu cue téé ní xica cuu ndihi Jèsús yuhu làgúná ñuú Tiberiás, te ní sáhán-gá núú xíndecu-güedé-án. Te duha ní cuu ní xiní ñáhà-güedě xii-gá. 2 Te ndècu té Xímú, àdi Pelú chi úú diu-dé, ndihi té Mǎxí téé ní xóo cúñaha-güedě Cuächí, ndihi té Natanàel téé ñuú Cànaá, te ñuú-án yíndèhu-xi distritú Galileá, te tnhá ndi ndúú déhe té Zebèdeú, ndihi úú-gá tucu cue téé ní xica cuu ndihi-gá. 3 Te ní xáhaⁿ tǎ Pèlú xii-güedé:

—Quíhí-í quítní-í chácá —càchí-dé xǎhaⁿ-dě xii-güedé.

Te ní xáhaⁿ-güedé:

—Tnhá nchúhú canchicún ñáhà-ndí xii-n quíhíⁿ tucu —càchí-güedé xǎhaⁿ-güedě xii-dé.

Te ní xica-güedé cuáhán-güedé ní sáa-güedé núú ndécú bàrcú, te ní quée-güedé xití bàrcú-án cuáhán-güedé. Te niú-án ñá ní ñhí tnhá-güedé chácá. 4 Te sa ta cùditó-nǎ cuáhán ní xiní-güedé Jèsús yuhu làgúná, dico ñá ní cùtnuní iní-güedé sá díu-gǎ. 5 Te ní xáhaⁿ-gǎ xii-güedé:

—Cue téé cuechi, ¿ní ñhí-ndó chácá caxi-o ñá? —càchí-gá xáhaⁿ-gǎ xii-güedé.

Te ní xáhaⁿ-güedé:

—Vèdana chácá ñà túú ní ñhí-ndí —càchí-güedé xǎhaⁿ-güedě xii-gá.

6 Te ní xáhaⁿ Jèsús:

—Chí dáquèe ñunu-ndo ndàa xio cuha barcú chi ñhí-ndó-dí —càchí-gá xáhaⁿ-gǎ xii-güedé.

Te ducaⁿ ñí quide-güedé, te òré natáva-güedé ñunu xití ndute, te ñá cùndèe-gá-güedé natava-güedé cuèndá sá ñí chítú chácá xití-xi. 7 Te téé ní xica cuu ndihi-gá téé ìo cùu iní-gá ní xáhaⁿ-dě xii té Pèlú:

—jDiu Xítóhó Jesucristú! —càchí-dé xǎhaⁿ-dě xii-dé.

Te sá ñí tecú dóho té Pèlú sá dúcán càhá-dé núu ní ndiúnuu-dé dóo-dě, chi dóo sá yímàa-ni-dé ñíhnú-dě ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáhán-dé núú ndute-án ñí

quene-dé ndéé ñuhu yìchí. ⁸ Te dava-gá cue téé ndihí té Pèlú ñu-ni cue téé ní xica cuu ndihí Jèsús ní quendóo-güedé dàtná ñⁿ ciendú-gá mètrú te quene-güedé yuhu ndüte. Te tañuhu-ni-güedé ñunu-güedé chitu chácá ní quene-güedé ndéé yuhu ndüte. ⁹ Te òré ní quene-güedé ñuhu yìchí, te ní xiní-güedé càyú ñuhú, te núú ñuhú-áⁿ ñuhú ñⁿ chácá ndihí ñⁿ pàá. ¹⁰ Te ní xáhaⁿ Jèsús xii-güedé:

—Quíhíⁿ ngueheⁿ-ndo ñⁿ úú chácá quiti íchí ní tñi-ndo —càchí-gá xáhaⁿ-gá xii-güedé.

¹¹ Núú té Pèlú ní sáháⁿ-dé núú ndécú bàrcú, te ní quée-dé xití-xi ní cándeé-dé ñunu ñuhu chácá tañuhu-dé ní quene ndéé ñuhu yìchí, te chitu chácá náhnú, te ñuhu ñⁿ ciendú údico úxí úní-dí xití ñunu-áⁿ, te cuèi ducaⁿ vai-dí ñuhu dico ñá ní ndátá ñunu-áⁿ. ¹² Te ní xáhaⁿ Jèsús:

—Chí nèhé cadí iní-ndó —càchí-gá xáhaⁿ-gá xii-güedé.

Dico ní ñⁿ cue téé ní xica cuu ndihí-gá-áⁿ ñá ní xicáⁿ tnúhú-güedé núú-gá ñuu yoo cùu-gá, chi sa ní cutnùní iní-güedé sá díú Jèsús cúu-gá. ¹³ Te Jèsús ní sáháⁿ-gá ní queheⁿ-gá pàá ní sáñaha-gá xii-güedé caxi-güedé, te dàtnùní ní queheⁿ tucu-gá chácá ní sáñaha-gá xii-güedé.

¹⁴ Vitna cùu úní xito sá xiní ñáhá cue téé ní xica cuu ndihí-gá sáta ní ndoto-gá.

Jèsús càháⁿ ndihí-gá té Pèlú

¹⁵ Te sáta ní túhu cóhó-güedé ní sadi iní-güedé te ní xicáⁿ tnúhú Jèsús núú té Xímú, àdi Pèlú chi úú ñu-dé, te xáhaⁿ-gá:

—Xímú, déhe té Jónás, ¿cùu iní-gá-n yùhu dàcúxí dàva-gá cue téé-a ñá? —càchí-gá xáhaⁿ-gá xii-dé.

Te ní xáhaⁿ té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dè xii-gá.

Te ní xáhaⁿ Jèsús:

—Te núú ducaⁿ, te dacàxi-n cue mbéé lihli-í —càchí-gá xáhaⁿ-gá xii-dé.

Te cue mbéé-áⁿ cúu-güedé ñáyiú cùu cuendá-gá.

¹⁶ Te ní xáhaⁿ tùcu-gá xii té Pèlú:

—Xímú, déhe té Jónás, ¿cùu iní ñáhà-n xii-í-u? —càchí-gá xáhaⁿ-gá xii-dé.

Te ní xáhaⁿ tùcu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dè xii-gá.

Te ní xáhaⁿ-gá:

—Te núú ducaⁿ, te coto-n cuè mbéè-í —càchí-gá xáhaⁿ-gá xii-dé.

¹⁷ Te xito cùu úní ní xáhaⁿ tùcu-gá xii té Pèlú:

—Xímú, déhe té Jónás, ¿cùu iní ñáhà-n-áⁿ? —càchí-gá xáhaⁿ-gá xii-dé.

Te té Pèlú ío ní cundiýí-dé sá dúcáⁿ ní cuu úní xito xicáⁿ tnúhú-gá núú-dé ñuu ndisa sá cúu iní ñáhà-dè xii-gá, te ní xáhaⁿ-dè:

—Mèstrú, yòhó nchaa sa xiní-n, te sa cùtnuní iní-n sá cúu iní ñáhà-í xii-n —càchí-dé xáhaⁿ-dè xii-gá.

Te ní xáhaⁿ Jèsús:

—Te núú ducaⁿ, te dacàxi-n cue mbéè-í.

¹⁸ Te na càchí tnúhu ndáá-í xii-n sá cùtnàhá cuechi-gá-n ní xóo ndécuihnu mee-n dóo-n, te ní xóo quíhíⁿ-n ndèni ní xóo cachí iní-n, dico na yì-n te dacàá-n ndàha-n, te ingá téé dacuihnu ñaha xii-n dóo-n te cada yica-dè candeca ñaha-dè xii-n quíhíⁿ ñⁿ núú ñá túú tnàhá iní-n —càchí-gá xáhaⁿ-gá xii-dé.

¹⁹ Te sá dúcáⁿ ní càháⁿ Jèsús cúu-xí sá ní dátècú tnúhu ñaha-gá xii té Pèlú nàcuáa cada-xi cuú-dé, te ducaⁿ càda cahnu-dé Yá Ndiöxí, te ní xáhaⁿ-gá xii-dé:

—¿Canchicúⁿ ñáhà-n xii-í! —càchí-gá xáhaⁿ-gá xii-dé.

Téé ío cùu iní-gá

²⁰ Te ní nchócótó té Pèlú ndàa sáta-dè, te ní xiní-dé sá nchícúⁿ ñáhá ingá téé xica cuu ndihí-gá cuáháⁿ, téé ío cùu iní-gá téé ní xínucóo ñiñi-gá òré ní cudini ndihí ñaha-gá xii-güedé, te ñu-ni téé-áⁿ ní xicáⁿ tnúhú-dé núú-gá dàvá-áⁿ ñuu ndèda càa téé cuáha cuendá ñáhá xii-gá núú cuè téé cùu úhú iní ñáhá. ²¹ Te òré ní xiní té Pèlú sá nchícúⁿ ñáhá tèe-áⁿ, te ní xicáⁿ tnúhú-dé núú Jèsús, te xáhaⁿ-dè:

—Mèstrú, te téé-áⁿ, ¿ná cúu sá yàha-dé-í? —càchí-dé xáhaⁿ-dè xii-gá.

²² Te ní xáhaⁿ Jèsús:

—Te núú yúhú cuñí-í sá cùndècu-ni-dé ndéé ná quixi tucu-í ñuyíú-a, ¿te yòhó ná cuendá-n ñuu xicáⁿ tnúhú-n? Yòhó canchicúⁿ ñáhà-ni xii-í —càchí-gá xáhaⁿ-gá xii-dé.

²³ Te ní xinu tnúhu núú nchàa ñáyiú sàndáá iní tnúhu-gá sá tǝe-ǎⁿ vǎ cùú-dé. Dico Jèsús ñá túú dùcaⁿ ní xáhaⁿ-gǎ sá vǎ cùú-dé, chi ní xáhaⁿ-gǎ: “Núu yúhú cuìní-í sá tǝe-ǎⁿ cundecu-ni-dé ndéé ná quìxi tucu-í ñuyíú-a, ¿te yòhó ná cuèndá-n?”, duha ní xáhaⁿ-gǎ xii té Pèlú.

²⁴ Te ði-u-ni yúhú té Juáá tée ní sani iní-yu sá vǎ cùú càháⁿ ndáá-í nchaa nàcuáa ní cuu, te ducaⁿ ní tee-í núú tütú-a, te cùtnuní iní-ndó sǎ tnúhu ndáá cúú-xí.

²⁵ Te ndècu vai-gá núú sǎ ñǎ quide Jèsús. Te núu ðicó ní ngǔndee nchaandi túhú ñá, te vǎa ni te ñihí ñuyíú te vǎ tnàhá núú-xi cundecu librú, te núu ðicó ní ngǔndee nchaa. Te ducaⁿ na cùnduu. Te ío chí cádá ndèe iní-ñǎ vitna.

NCHAA NÀCUÁA NÍ QUIDE CUE TÉE NÍ TAÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

*Jèsús ní cachí tnúhu ndáa-gá sá quíxi
Espiritú Yá Ndiõxí cundecu ndihi ñáyi*

¹ Te duha ní cáháⁿ té Lùcá ní xíi-dé té Těofilú: Yúhú sa ní chídó tnùn-í núú librú ndéé díhna nchaa sá ní quide Jèsús, ndihi nchaa sá ní dácuahá-gã ñáyi. Te ní chídó tnùn-í nchaa sá ní quide-gá ndéé nduu ní quesaha-gã quidé chiuⁿ-gá, ² ndihi nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue tée ní cáháⁿ-gá dacuàha ñaha xii ñáyi tnúhu-gá, te mee Espiritú Yá Ndiõxí ní chindee ñaha-xi xii-gá ní xáhaⁿ-gã nàcuáa cada-güedé. ³ Te sáta ní xíhí-gá te ní ndoto-gá, te ní xíndecu-gá údico nduu. Te titní xito ní sáháⁿ-gá núú ní xíndecu-güedé, te ducaⁿ ní quide-gá cuèndá quini-güedé sá ndáa ní ndoto-gá, te ní xáhaⁿ-gã nàcuáa quide Yá Ndiõxí ndihu ndaha-gã ñáyi.

⁴ Te ñⁿ nduu ndècu ndihi ñaha-gá xii-güedé, te ní xáhaⁿ-gã:

—Vá quéé-ní-ndó ñúú Jerusàlén, chi cundetun-ndo quíxi Espiritú Yá Ndiõxí cundecu ndihi-ndo, chi sa ní cachí tnúhu-í sá dúcáⁿ ní cáháⁿ Tátá-ó Dütú Ndiõxí Yaá ndécú àndiu nacuáa cunduu. ⁵ Te ndáa sá ndí Juáa ní dácuaándute ñaha ndí xii-ndo, dico vitna ñá túu-gã cuéhé nduu, te quexio Espiritú Yá Ndiõxí cundecu ndihi-ndo —càchí-gá xáhaⁿ-gã xii-güedé.

Jèsús cuándaa-gá andiu

⁶ Te òré ní xíndecu-güedé ndihi Jèsús, te ní xáhaⁿ-güedé xii-gá:

—Mèstrú, cuíni-ndí cachí tnúhu-n ñuu sa ta cùyatni nduu chindee-n ñáyi ñúú Israèl cuèndá taxi tnùn-í tucú-yu ñúú-yu —càchí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túu xini ñuhu-xi cunaha nchóhó xiáⁿ, chi Tátá-ó Dütú Ndiõxí náhá-gã ná

nduu càda-gá nchaa sá ní cáháⁿ-gá. ⁸ Te òré quexio Espiritú Yá Ndiõxí cundecu ndihi-ndo, te cuyi-ndo ní yuhu ní iní-ndó quíhíⁿ-ndó cáháⁿ-ndó tnúhu-í núú ñáyi ñúú Jerusàlén ndihi núú ñáyi distritú Júdeá ndihi núú ñáyi distritú Sàmaríá. Te ducaⁿ-ni cáháⁿ-ndó quíhíⁿ-ndó ní caxico ñuyú —càchí-gá xáhaⁿ-gã xii-güedé.

⁹ Te sáta dúcáⁿ ní cáháⁿ-gá, te ndèhe-güedé ní ndanchita-gá cuándaa-gá andiu cuändihu-gá xití vícò, te ñá túu-gã ní xini ñáhá-güedé xii-gá. ¹⁰ Te ndèhe vihi-güedé andiu núu ndéé quini ñáhá-güedé xii-gá yòtnúhu, te ní quexio cunu úu cue tée ñihu dóo cuixíⁿ núu ndécú-güedé. ¹¹ Te xáhaⁿ-güedé:

—Nchòhó cue tée Galiléa, ¿ná cuèndá ndéhe-ndó àndiu? Te dàtná-ni càa Jesús cuándaa-gá andiu vitna, te ducaⁿ-ni cunduu-gá quíxi tucu-gá —càchí cue tée ñihu dóo cuixíⁿ-áⁿ xáhaⁿ-güedé.

Cuèndá sá ñá túu-gã ndí Júdás ñuu ní nanducu-güedé té Mátíá ní nucúnutní-dé núu ndí

¹² Te ní ndee-güedé yucu Òlívú cuánuhú-güedé ñúú Jerusàlén, te ní xúhuⁿ-güedé cuèdicó cuádava òré ichi. ¹³ Te òré ní ndexio-güedé ñúú-áⁿ, te cuándaa-güedé cuártú ndéé núu ñinu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juáa, té Ndríxí, té Lìpé, té Mǎxí, té Bartolómé, té Mátéu, té Jàcobó déhe té Àlféu, ndihi té Xímú tée ní cundihu cue tée canànistá, ndihi té Júdás ñani té Jàcobó. ¹⁴ Te ní naníhí tnáhá-güedé nchaa-güedé yacáⁿ ndihi tá Màriá náná Jèsús, ndihi cue ñani-gá ndihi dava-gá cue ñáyi díhí. Te ñⁿ-ni ní cuú-yu ní cáháⁿ ndihí-yu Yá Ndiõxí.

¹⁵ Te ñⁿ nduu ní xíndecu dàtná ñⁿ cièndú ócò mee-ni ñáyi sàndáa iní tnúhu Jèsús, te ní ngúnutní té Pèlú núu-yu, te ní xáhaⁿ-dè xii-yu:

¹⁶⁻¹⁷ —Nchòhó cue ñáyi ndècu ndihi-í ichi Xítohó Jesucristú, na càni-í cuèndú núu-ndó nàcuáa ní chídó tnùn-í ndí Dávíí tée ní xíndecu ndéé sanaha nàcuáa ní cáháⁿ Espiritú Yá Ndiõxí cuèndá té Júdás. Te dacutíí dùcaⁿ ní cuu, chi tnáhá té Júdás ní

xíndecu ndihí-o, te ní xinu cuechi-o ndihí-dé núú-gã sá díhna, te ducaⁿ ñi quide-dé ní sáha cuendá-dé Jèsús núú cuè téé cùu úhú iní ñáhá xii-gá. ¹⁸ Te ní cháhu ñaha-güedé xii-dé cuendá sá ñi sáha cuendá ñáhá-dé xii-gá. Te ní sáháⁿ-dé ñi xichi ní sata caa-dé méé-dé, te ní ngava-dé, te ní cahndí duuⁿ xití-dé te xíaⁿ ñi xihí-dé. Te ní naqueheⁿ-güedé díhúⁿ sã ñi cháhu-güedé ndíi, te ní nacuaaⁿ-güedé ñuhu núú ñi ngava ndíi-áⁿ. ¹⁹ Te nchaa ñáyiu Jerusálén ní ñihí-yu tnúhu, te ní dánání-yu ñuhu-áⁿ Aceldamá. Te tnúhu mée-yu quèe-xi: Ñuhu núú ñi sati níñí. ²⁰ Te duha ní cáháⁿ ndíi Dàvií ní chídó tnúní ndíi núú librú Sãlmú ní dándóo ndíi: “Nà ndóo nahí vehe-dé, vá yóo ñi quíhíⁿ cundecu”, duha ní cáháⁿ ndíi. Te ingá tucu tnúhu ní cachí ndíi: “Na nànducu-güedé ingá téé nucúnutñi núú ndíi”, duha ní cáháⁿ ndíi Dàvií —càchí té Pèlú xãhaⁿ-dè xii-yu.

²¹⁻²² Te ní xáhaⁿ tùcu-dé:

—Te ducaⁿ ñi cáháⁿ ndíi Dàvií, te vitna xini ñuhu-xi nanducu-o ñi téé nucúnutñi-dé núú ndíi Jüdás, te xini ñuhu-xi diu-ni ñi téé ní xica cuu ndihí Xítóhó Jesucristú cútnáhá ní xica cuu-o ndihí-gá, ñi téé ní xiní ndéé òré ní dácuaⁿndüte ñaha ndíi Juáa xii-gá, te ndéé òré cuándaa-gá andiu. Te téé nanducu-o cùndecu-dé cáháⁿ-dé nàcuáa ní cuu ní ndoto-gá —càchí té Pèlú xãhaⁿ-dè xii-yu.

²³ Te ní cacunehe-güedé úu tnàhá-güedé nũ ndèdacàa-güedé nduu táhú-güedé nucúnutñi-güedé núú ndíi. Te ñi-dé nání-dé Chèe Barsábás, àdi Justú chi úu diu-dé, te ingá-dé nání-dé Màtiá. ²⁴ Te ní cáháⁿ ndihí-güedé Yã Ndiõxí, te xãhaⁿ-güedé xii-gá:

—Yòhó Dútú Ndiõxí xiní-n iní nchaa ñáyiu, te mee-n nàha-n núú ndèda càa núú úu cue téé-a tnàhá iní-n ²⁵ cáháⁿ-güedé tnúhu-n nũ ñáyiu, te téé-áⁿ nucúnutñi-dé núú ndíi Jüdás, chi cuáháⁿ ndíi núú úhú núú ndàhú núú tàú-xi quíhíⁿ ndíi —càchí-güedé xãhaⁿ-güedé xii-gá.

²⁶ Te ní xito ndéé-güedé, te ní cutnúní sá téé nàni Matíá quendóo-dé ndihí úxí ñi cue téé ní táuchíúⁿ-gã dacuàha ñaha xii ñáyiu tnúhu-gá.

2

Ní quexìo Espiritú Yã Ndiõxí cundecu ndihí ñáyiu

¹ Te ní sáa nduu còo vico Pentecostés te xíndecu nchaa ñáyiu ñi-ñi xichi. ² Te ní tecú dóho-yu uuⁿni ní ñihí andiu, dàtná quidé ñi táchí ñihí vìhi ní quide-xi, te ducaⁿ ñi cuu ndéé xití vehe núú ndécü-yu nchaá-yu. ³ Te ní xiní-yu dàtná cáa itá ñuhú cáa sã ndécú xití vehe, te ní xité nuu-xi ní ngoyo ndodo-xi díquí-yu nchaá-yu. ⁴ Te ducaⁿ ñi quide-xi òré ní quexìo Espiritú Yã Ndiõxí ní ngúndecu ndihí-yu nchaá-yu. Te ní ngúita-yu ní cáháⁿ-yu tnúhu cue ñáyiu ñá túú cùu ñáyiu isràél, te nchaa xíaⁿ ní quide Espiritú Yã Ndiõxí.

⁵ Te vãi ñáyiu isràél xíndecu nchaa dava-gá ñuú ní tacá-yu ñuú Jerusálén, te ñáyiu-áⁿ ño ndùcu ndéé-yu dácuaⁿhá-yu nchaa ndudú sá dácuaⁿhá tnahí-yu. ⁶ Te òré ní tecú dóho-yu ñihí, te ní sáháⁿ-yu ní xíndedóho-yu tnúhu càháⁿ méé-yu ñi ñi ñuú-yu, chi ndi díñ ndi díñ tnúhu càháⁿ ñáyiu ndècu-áⁿ. ⁷ Te xíaⁿ ño ní cuñúhu ñáyiu véxi dava-gá ñuú, te ní xítñáhá-yu:

—Ñáyiu ducaⁿ xicáháⁿ cúu-yu ñáyiu distritú Galileá. ⁸ ¿Te nása ní quidé-yu ní cutúha-yu nàcuáa càháⁿ-ó ñi ñi-ò ndéé líhli-o? ⁹ Te iha véxi ñáyiu dava nacióⁿ, chi véxi ñáyiu Pàrtiá, véxi ñáyiu Mèdiá, véxi ñáyiu Èlám, véxi ñáyiu Mesopòtamiá, véxi ñáyiu Jùdeá, véxi ñáyiu Capadociá, véxi ñáyiu Pòntó, véxi ñáyiu Àsiá, ¹⁰ véxi ñáyiu Frigiá, véxi ñáyiu Pànfiliá, véxi ñáyiu Ègiptú, véxi ñáyiu Áfricá ñáyiu ndècu ndéé núú-gã-xi ñuú Cirené. Te tnàhá ñáyiu ñuú Rómá véxi, te ñáyiu-áⁿ chi ñá díú mèe-ni ñáyiu isràél cúu-yu nchaá-yu, dico ñi-ñi cùu sá dácuaⁿhá-yu. ¹¹ Te véxi ñáyiu Crétá, véxi ñáyiu Àrabiá. Te nchaa-o sa ndèdóho-o càháⁿ-yu nàcuáa cuáháⁿ tnúhu mee-o ñi ñi-ò. Te nchaa ñáyiu xicáháⁿ tnúhu-o càháⁿ-yu cuendá nchaa sá vã yóo tnàhí ndàcu cada ní quide Yã Ndiõxí —càchí-yu xítñáhá-yu.

¹² Te ní cuñúhu vìhí-yu, te ñá ná sàa iní-yu nása ní cuu, te xítñáhá-yu:

—¿Nása ní cuu duha càháⁿ-yu tnúhu-o? —
càchí-yu xĩtnàhá-yu.

13 Te davá-yu ní sácú ndeé yíchí ñáhă-yu,
te xĩtnàhá-yu:

—Xĩxĩni ñáyiú-áⁿ nõu ñá náhá-yu tnúhu
càháⁿ-yu —càchí-yu xĩtnàhá-yu.

Tnúhu ní xáhaⁿ tẽ Pèlú xii cue ñáyiú

14 Te ní ngúnutnĩi té Pèlú ndihĩ úxí ìⁿ cue
tée ní táúchíúⁿ Jèsús dacuàha ñaha xii ñáyiú
tnúhu-gá, te níhi ní cáháⁿ-dé, te xáhaⁿ-dẽ
xii-yu:

—Nchaa nchòhó ñáyiú distritú Jùdeá
ndihĩ nchòhó ñáyiú ñuú Jerusàlén, cund-
edóho váha-ndo tnúhu na càháⁿ-í-a. 15 Ñá
ndàá tnúhu càháⁿ-ndó, chi ñá túú xĩni-ndí te
ducaⁿ càháⁿ-ndó, chi davitna cùu-xi caá ìⁿ
dátneé, vátá tnàhá-gá òré coho ñáyiú ndidí.
16 Te yúhú ná càchí tnúhu-í xii-ndo vitna
nacuáa ní xáhaⁿ Yă Ndiõxí xii ndíi Jòél tée
ní xóo cáháⁿ tnúhu-gá ndéé sanaha nàcuáa
cada ñaha-gă xii ñáyiú, te ndíi-áⁿ ñĩ chídó
tnùnĩ ndíi nàcuáa ní cáháⁿ-gá. 17 Te duha ní
xáhaⁿ-gă xii ndíi:

Cùmání-gă sáa nduu nàa ñuyíú, te cuáñaha-ĩ
Espíritú-í cundecu ndihĩ nchaa ñáyiú
na quĩndáa iní ñáhá xii-í.

Te cue déhe-yu cáháⁿ-yu tnúhu-í,
te cue tée cuechi dacòto núú ñáhá-xí
xii-güedé,
te ducaⁿ-ni cuè tée ni sàhnu cáháⁿ
saní-güedé,
te ñu-ni cuendá nchaa sá quidè-í ducaⁿ
dàcoto núú ñáhá-xí xii-güedé.

18 Te nchaa ñáyiú xĩnu cuechi núu-í
cáháⁿ-yu tnúhu-í, te cuáñaha-ĩ
Espíritú-í cundecu ndihĩ-yu.

19 Te ndéé andũ, yàcáⁿ vài sá cadà-í nàcuáa
cuñúhu vñhĩ-yu,
te núú ñuyíú-a cada-í ìⁿ sá vátá quĩnĩ
tnàhĩ-gá-yu,
te ngoyo níñĩ te ngoyo ñuhú te quene vñhĩ
ñúhmá.

20 Te vá dáyèhé-gá nchícanchii,
cuu nee ñuyíú te cuu ticuèhé núú yóo dàtná
ticuèhé níñĩ.

Te davá-áⁿ sáa nduu quixi Yaá cúú
Xĩtohó-yu,
te nduu-ãⁿ cuu-xi ìⁿ nduu càhnu vihi, chi
cada-gá nchaa sá ñà túú xĩnĩ-yu, te
cuñúhu vñhĩ-yu.

21 Te òré xíaⁿ te nchaa ñáyiú càháⁿ ndihĩ
ñaha xii Yaá cúú Xĩtohó-yu-áⁿ naníhĩ
táhú-yu.

Duha ní xáhaⁿ Yă Ndiõxí xii ndíi Jòél ní
chídó tnùnĩ ndíi.

22 'Te nchòhó ñáyiú isràèl, cundedóho
váha-ndo tnúhu na càháⁿ-í-a cuendá Jèsús
tée ñuú Nazàrét. Te Jèsús ní quide-gá chiúⁿ
Yă Ndiõxí, chi mee Yă Ndiõxí ní chindee
ñaha-gá ní quide Jèsús ná daha núú chiúⁿ,
núú xíaⁿ ní ndacu-gá ní quide-gá nchaa
sá vă yóo tnàhĩ ndàcu cada, te xíaⁿ ní
cuñúhu vñhĩ-ndo. Te sa nàha-ndo nacuáa
ní quide-gá cùtnàhá ní xica cuu-gá ñuyíú.

23 Te ndíi Jùdás ní taxi cuendá ñáhá ndíi
Jèsús xii nchòhó cue tée ní cuu úhú iní
ñáhá xii-gá, te ní ndúcú-ndó cuè tée úhú
iní-xi ní tñi ñaha-güedé xii-gá te ní sata caa
ñaha-güedé núú cùrúxí, te núú cùrúxí-áⁿ ñĩ
xihĩ-gá. Dico sa ní cutnùnĩ iní Yă Ndiõxí
sá dúcáⁿ càda-ndo Jèsús, te mee Yă Ndiõxí
ní cachí-gá sá dúcáⁿ ndòho Jèsús. 24 Te
ñu-ni mee Yă Ndiõxí ní dándótó-gă Jèsús,
chi sa ní cáháⁿ-gá sá òré cuú-gá te vá cúú
dúcáⁿ-gă. 25 Te ndíi Dàvií tée ní xĩndaha
ñaha xii cue ñanĩ tnàhá-ó ñĩ xĩndecu ndéé
sanaha ñĩ chídó tnùnĩ ndíi nàcuáa ní cáháⁿ
Jèsús, te duha ní cáháⁿ-gá:

Cùtnunĩ iní-í sá ncháa ndùu ndecu ndihĩ-í
Yă Ndiõxí, te ío chĩndee ñaha-gá xii-í,
te ñá túú tnàhĩ sá yúhú-í.

26 Te ío ndàcáⁿ táhú-í núú Yă Ndiõxí chi
cùdíi iní-í, chi sa nàha-í sá cùú-í dico
ndoto-í,

27 chi vá dáñá-gă quihĩⁿ dúcáⁿ àlmá-í núú
ndécú ñáyiú ní xihĩ,

te vá dáñá-gă téhyú yiqui cùñú-í chi cùu-í
Déhe-gá, te yúhú sa nàha-í sá cúú iní
ñáhá-gă xii-í.

28 Te sa ní cachí tnúhu-gá nàcuáa cada-í cun-
decu-í ichi váha, te cuendá sá ndécú
ndihĩ ñaha-gá xii-í nõu ío cùdíi iní-í.

Duha ní cáháⁿ Jèsús, te ducaⁿ ñĩ chídó tnùnĩ
ndíi Dàvií.

29 'Te nchòhó cue ñanĩ tnàhá-í, na càchí
tnúhu ndáa-í xii-ndo cuendá ndíi Dàvií tée
ní xĩndecu ndéé sanaha vñhĩ, chi ní xihĩ-dé,
te ní chindúxi ñaha-güedé, te nàha-o tnavíi
núú ñĩ chindúxi ñaha-güedé. 30 Te ndíi Dàvií
ní xóo cáháⁿ ndíi tnúhu Yă Ndiõxí, te sa nàha
ndíi sá Yă Ndiõxí ní cáháⁿ ndáa cuiti-gá

sá díú-ní ìⁿ tnaaha ndíi taxi tnùní-dé ñáyiú isràèl ndéé cuèé-gá dàtná ní xóo taxi tnùní méé ndíi cùtnàhá ní xíndecu ndíi, te téé taxi tnùní-áⁿ cúú Crístú chí cùu-gá ìⁿ tnaaha ndíi.

³¹ Te sa ní cutnùní iní ndíi sá ndótó Crístú, núu xíáⁿ ní chídó tnùní ndíi sá vâ dáñá Yá Ndiöxí sá quíhíⁿ dúcáⁿ àlmá-gá cundecu-xi núú ndécú ñáyiú ní xíhí, te vâ dáñá-gá téhyú yiqui cùñú-gá.

³² Te ndáá chí Yá Ndiöxí ní dándótó-gá Jèsús, te nchúhú ní xiní-ndí sá ñí ndoto-gá.

³³ Te ní xáhaⁿ Yá Ndiöxí xii Jèsús sá cùndecu ndíhi ñaha-gá, te taxi tnùní Jèsús ní caa ní quíhíⁿ. Te Yá Ndiöxí ní sáñaha-gá Espíritú-gá ní ngúndecu ndíhi-gá nàcuáa ní xáhaⁿ-gá, te díu Jèsús ní quide-gá nchaa sá ñí xiní-ndó vitna ndíhi nchaa sá ñí xíndedóho-ndo. ³⁴ Te ndíi Dàvíí ñá túú ní ndàa túu ndíi andíu ndíhi yiqui cuñú ndíi, te òré ndécú-gá ndíi ñuyíú-a ní cachí ndíi: Dútú Ndiöxí ní xáhaⁿ-gá xii Yaá cúú Xítohó-í:

“Ngóo xio cùha-í,

³⁵ te yúhú cada-í te nchaa sá cúú ùhú iní ñáhá xii-n canehe-xi sá yíñuhu núú-n.”

Duha ní xáhaⁿ Dútú Ndiöxí xii Yaá cúú Xítohó-í cachí ndíi.

³⁶ Te nchòhó ñáyiú isràèl cùu-ndo ndí mee-í, te cuíní-í cundedóho váha-ndo ìⁿ tnúhu na càháⁿ-í-a. Jèsús ní sata caa-ndo-gá núú cùrúxí, dico Yá Ndiöxí ní cachí-gá sá Jèsús dacácu nihnu-gá ñáyiú, te vâ cání ìⁿ caní úú iní-ndó, chí díu-gá cùnù-gá núú nchàa ñáyiú —càchí té Pèlú xáhaⁿ-dë xii-yu.

³⁷ Te ñáyiú ní xíndedóho tnúhu ní cáháⁿ té Pèlú ní ndixi túu iní-yu nàcuáa quidé-yu ndécú-yu, te ní xáháⁿ-yu xii-dé ndíhi dava-gá cue téé ní táuchíúⁿ Jèsús dacuàha ñaha xii-yu tnúhu-gá:

—Nchaa nchòhó cue ñaní tnáhá-ndí, ¿nása cachí-ndó cùnduu, nása cada-ndí vitna? —càchí-yu xáháⁿ-yu xii-güedé.

³⁸ Te ní xáhaⁿ tē Pèlú xii-yu:

—Daña-ndo nchàa sá cuèhé sá dúhá quide-ndo, te cada càhnu iní Yá Ndiöxí nchaa yíca cuèchi-ndo. Te cuandute-ndo cuèndá quini-yu sá ñí natuha-ndo ìchi Jesús, te ducaⁿ te taxi Yá Ndiöxí Espíritú-gá cundecu ndíhi-ndo, ³⁹ chí cuíní-gá taxi-gá Espíritú-gá xii mee-ndo ndíhi déhe-ndo, te

cuañaha-gá Espíritú-gá xii nchaa ñáyiú ní càa xico ñuyíú, ñáyiú cáháⁿ-gá cundecu ìchi-gá ndéé ìdá-gá —càchí té Pèlú xáhaⁿ-dë xii-yu.

⁴⁰ Te titní-gá tnúhu ní xáhaⁿ-dë nàcuáa cada-yu, te xáhaⁿ tùcu-dé:

—Daña-ndo nchàa sá cuèhé sá dúhá quide-ndo, vâ cada-ndó sá quidé dàva-gá-yu —càchí-dé xáhaⁿ-dë.

⁴¹ Te nchaa ñáyiú ní sándáá iní-xi tnúhu ní cáháⁿ té Pèlú ní sanduté-yu, te díu-ni nduu-áⁿ ñí cuu dàtná úní mîl ñáyiú ní sándáá iní-xi ní xíndecu ndíhi ñáyiú xídácúhá tnúhu Yá Ndiöxí. ⁴² Te ío ní xíndedóho-yu tnúhu ní cáháⁿ cue téé ní táuchíúⁿ Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá náhá-yu sá dúcáⁿ ñí quide Jèsús cùtnàhá vátá cáhni ñaha-gá-güedé xii-gá, te ní xóo cáháⁿ ndíhi-yu Yá Ndiöxí.

Nàcuáa ní quide nchaa ñáyiú ní sándáá iní tnúhu Jèsús ndéé díhna nuu

⁴³ Te ncháa-yu ní cuñúhu vîhí-yu, chí cue téé ní táuchíúⁿ-gá dacuàha ñaha xii-yu tnúhu-gá ní quide-güedé titní núú sá vâ yóo tnàhí ndàcu cada, te xíáⁿ ní cutnùní iní-yu sá méé Yá Ndiöxí chíndée ñaha-gá xii-güedé.

⁴⁴ Te nchaa ñáyiú sándáá iní tnúhu Jèsús càháⁿ ndíhi tnàha váha-yu, te cuèi-ni nchaa ndachíuⁿ nandíhi-yu ndècu cahnu. ⁴⁵ Te ní dícõ-yu nchaa ndachíuⁿ sá ñà túú xini ñuhú-yu, te ní níhí-yu díhúⁿ te ní sáñáhá-yu xii nchaa ñáyiú ñá ñihí. ⁴⁶ Te ìⁿ nduu ìⁿ nduu ní xóo quíhíⁿ ndíhi tnàhá-yu veñúhu càhnu sá ío cùnuu. Te ní xexi ndíhi tnàhá-yu vehé-yu. Te ío ní cudíí iní-yu chí ìⁿ-ni ní cuú-yu ncháa-yu. ⁴⁷ Te ío ní ndacáⁿ táhü-yu núú Yá Ndiöxí, te nchaa dava-gá ñáyiú ní cáháⁿ váha-yu cuèndá ñáyiú-áⁿ. Te mee Yá Ndiöxí ní quide-gá ní sándáá iní vâi-gá ñáyiú, te ní xíndecú-yu ndíhi dava-gá ñáyiú xídácúhá tnúhu-gá.

3

Quide tátna-güedé ìⁿ téé yacua

¹ Te ìⁿ nduu òré caá úní sacuaa, òré xícáháⁿ-yu ndíhi Yá Ndiöxí cuáháⁿ té Pèlú ndíhi té Juáa veñúhu càhnu sá ío cùnuu

sácúú-xí ñáiyu isràél. ² Te ndècu ìn tée yacua, te ducaⁿ-ni càa-dé ní cacu-dé. Te sàháⁿ ndihì ñàhá-yu veñúhu càhnu sá ïo cùnunu, te sácóo-dé ìn xio yuyèhe veñúhu sá nání Yèhe Vii Caa, chi ducaⁿ nàni-xi, te xicáⁿ ndàhú-dé núú nchàa ñáiyu sàháⁿ veñúhu. ³ Te ní xiní-dé té Pèlú ndihì té Juàá cuánguihu-güedé veñúhu, te xicáⁿ ndàhú-dé núú-güedé. ⁴ Te ní ndacoto-güedé núú-dé, te ní xáhaⁿ tē Pèlú xii tée yacua-àⁿ:

—Cundehe ñàha xii-ndí —càchí té Pèlú xáhaⁿ-dē xii-dé.

⁵ Te ní xindéhé ñàha-dé xii-güedé, chi ní cáháⁿ-dē sá ïo ìn sá cuañaha-güedé. ⁶ Te ní xáhaⁿ tē Pèlú:

—Ñá túú tnàhí díhúⁿ néhè-í dico chindee ñàha-í xii-n, te Xítohó Jesucristú Yaá ní xíndecu ñuú Nazàrét, ndacu-gá cada tátna ñaha-gã xii-n, ndacuíñí te caca-n —càchí-dé xáhaⁿ-dē.

⁷ Te té Pèlú ní tnì-dé ndaha cùha tée yacua-àⁿ, te ní ngüíta-dé ndàcàni ñaha-dé, te òré xíaⁿ ñi naníhí ndéé-dé, te ní ndúha sàhá-dé. ⁸ Te ní ndacuíñí cunu mee-dé te ní xica-dé, te ní cachí-dé sá ïo càhnu cuu Yá Ndiöxí cuendá sá ñi ndúha-dé, te ta sàndava-dé cuánguihu ndihì ñaha-güedé veñúhu. ⁹ Te nchaa ñáiyu xíndecu-áⁿ ñi xiní-yu sá ñi nduu váha-dé, te ndèhé-yu ndàcáⁿ táhú-dé núú Yá Ndiöxí. ¹⁰ Te ní naquiní ñàhá-yu xii-dé sá díú tēe xicáⁿ ndàhú tēe ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vñí-yu sá ñi ndúha-dé.

Té Pèlú ní cáháⁿ-dé corredór sá néhé ñuú ndí Salòmón

¹¹ Te sátá veñúhu càa corredór sá néhé ñuú ndí Salòmón. Yàcáⁿ ndécú tē Pèlú ndihì té Juàá ndihì tēe ní ndúha sàhá-xi, te ñá cuíní tēe ní ndúha sàhá-xi-áⁿ dañà-dē quíhíⁿ-güedé dandóo ñaha-güedé xii-dé. Te chítú-yu ní quexio coyó-yu núú ndécú-güedé, te ní cuñúhu vñí-yu sá ñi ndúha sàhá tēe cùhú-áⁿ. ¹² Te té Pèlú ní xiní-dé ní quexio coyó-yu, te ní xáhaⁿ-dē xii-yu:

—Nchòhó ñáiyu isràél, ¿ná cuendá ndéé dúcáⁿ ndèhe ñaha-ndo xii-ndí te cùñúhu-ndo sá ñi ndúha tēe yacua-áiⁿ? Nchòhó cáháⁿ-ndó sá méé-ndí ní quide tátna-ndí-dé sá ïo váha iní-ndí, dico ñàhá

chi ñá díú mèe-ndí ní quide tátna-ndí-dé. ¹³ Chi Yá Ndiöxí ní ndadúha ñaha-gã xii-dé, chi ñuú-gá cúú Ndiöxí ndí Àbrahám ndihì ndí Isàac ndihì ndí Jàcób, te ñuú-ni cue tēe-áⁿ cúú ñàni tnàhá-ó ñi xíndecu ndéé sanaha vñi. Te ñuú-ni Ndiöxí-áⁿ ñi xáhaⁿ-gã xii Déhe-gá Jèsús sá táxi tnùnì-gá nchaa sá ïo andíu ndihì nchaa ñáiyu ndècu ñuyú-a, dico mee-ndo ñi sàha cuendá-ndó Jèsús núú tēe cùchiuⁿ. Te té Pilatú ní cuíní-dé dacàcu-dé Jèsús ní cùu, te mee-ndo ñá ñi cuíní-ndó. ¹⁴ Te Yá Ndiöxí ní cachí-gá sá ïo váha iní Jèsús te ñá túú tnàhí cuéchi-gá. Te mee-ndo ñá túú ní cuíní-ndó cãcu-gá ñuú ní xáhaⁿ-ndo xii té Pilatú sá váha-gá dacàcu-dé ìn tēe ndècu vñi cuéchi-xi, te vá dacàcu-dé Jèsús. ¹⁵ Te ní xáhaⁿ-ndo sá cáhni-güedé Jèsús Yaá quidé nchìto-o ndecu-o, dico Yá Ndiöxí ní dándótó ñaha-gá, te ní xiní-ndí sá ndàá ní ndoto-gá. ¹⁶ Te nchúhú sa nàha-ndí sá díú Xítohó Jesucristú ní ndadúha-gá tēe yacua, te ná-dé nútnì-a. Te ducaⁿ ñi quide-gá chi ní sàndáá iní ñàhá-dé xii-gá, te vitna ní xiní-ndó sá ndàá ní ndúha-dé.

¹⁷ Te nchòhó ndihì cue tēe cùnunu ní sahani-ndo Xítohó Jesucristú, chi ñá ñi cùtnunì iní-ndó sá ñi quide-ndo. ¹⁸ Te cue tēe ní xóo cáháⁿ tnúhu Yá Ndiöxí ndéé sanaha ñi chídó tnùnì-güedé nàcuáa ní xáhaⁿ Yá Ndiöxí xii-güedé sá Cristú quixi-gá ñuyú-a, te ndoho vñi-gá, te xíaⁿ ñuú ducaⁿ ñi cuu ïo ní ndoho-gá. ¹⁹ Te vitna te dañà-ndo nchàa sá cuèhé sá dúhá quide-ndo. Te quindáá iní-ndó Yá Ndiöxí, te ducaⁿ te cada càhnu iní-gá nchaa sá ñá túú váha ní quide-ndo ñuyú-a, te canu ichi ñaha-gã xii-ndo ìn ichi váha. ²⁰ Te ní tendaha-gã Cristú ní quixi-gá ñuyú-a, chi mee Yá Ndiöxí ní cachí-gá sá díú Cristú taunihnu ñaha-gã xii-ndo. ²¹ Te dacuití cùndecu-gá andíu ndéé ná sàá nduu nàtaxi ndecu-gá nchaa sá ndécú ñuyú nàcuáa sàni iní méé-gã. Te ñuú ducaⁿ ñi cáháⁿ Yá Ndiöxí ñuú ducaⁿ ñi chídó tnùnì cue tēe ní xóo cáháⁿ tnúhu-gá ndéé sanaha. ²² Te ndí Moisés ní xáhaⁿ ndí xii cue ñàni tnàhá-ó ñi xíndecu ndéé sanaha: “Yá Ndiöxí tendaha-gã ìn tēe quixi-dé cáháⁿ-dē tnúhu-gá dàtná cuíní-ndó ñi quide ñaha-gã xii yúhú, te tēe-áⁿ cuu-dé ìn ñàni tnàhá-ndó.

Te cundedóho váha-ndo nchàa tnúhu cáháⁿ-dé. ²³ Te nchaa ñáyiú vá quíndáá iní tnúhu cáháⁿ-dé, te cuíta nihnú-yu chi vá quíhíⁿ-yu núú quíhíⁿ ñáyiú sàndáá iní tnúhu Yá Ndióxi”, duha ní xáhaⁿ ndíi Moisés xií-yu —càchí té Pèlú xáhaⁿ-dē xií-yu.

²⁴ Te ní xáhaⁿ tùcu té Pèlú xií-yu:

—Ndií Sàmuel ndíi nchaa cue té nchìcúⁿ-gá ní xóo cáháⁿ tnúhu Yá Ndióxi ndéé sanaha ñí cáháⁿ-güedé nàcuáa cada-xi vitna. ²⁵ Te Yá Ndióxi ní cáháⁿ-gá ndíi cue té ní cáháⁿ tnúhu-gá ndéé sanaha. Te ní quide ndáá-gá ndíi nchaa ñaní tnáhá-ó ñí xíndecu ndéé sanaha nàcuáa cada-gá naníhí tàhú-ó. Te duha ní xáhaⁿ-gá xii ndíi Àbrahám: “Ío nduu cacu ñíⁿ tnàha-n, te té-áⁿ cada-dé te naníhí tàhú ñáyiú ñuyíú-a”, duha ní xáhaⁿ-gá xii ndíi Àbrahám. ²⁶ Núu xiáⁿ ní tendaha-gá Déhe-gá ní quixi-gá núú ndécú-ndó cuèndá dañ-ndo nchàa sá cuèhé sá dúhá quide-ndo, te naníhí tàhú-ndó —càchí té Pèlú xáhaⁿ-dē xií-yu.

4

Té Pèlú ndíi té Juàá ndécú-güedé ndaha té cùchiuⁿ

¹ Te té Pèlú ndíi té Juàá càháⁿ dúcáⁿ-ni-güedé ndíi ñáyiú, ní quexìo cue dútú ndíi té taxi tnuní ñáhá xii cue té quide cuèndá veñúhu càhnu sá ïo cùnuu, ndíi cue té cùu saducéú. ² Te ní cudééⁿ-güedé nchaa-güedé núú tē Pèlú ndíi té Juàá sá xáhaⁿ-güedé xii ñáyiú sá ndótó ñáyiú ní xíhí dàtná ní ndoto Jèsús. ³ Te ní tní ñaha-güedé ní chihi ñaha-güedé vecaá xii-güedé, te ñá ní quide ndáá té cùchiuⁿ cuèchi-güedé nduu-áⁿ chi sa ní cuaa. ⁴ Te ío vài ñáyiú ní sàndáá iní-yu tnúhu ní cáháⁿ-güedé, te ñáyiú-áⁿ ndíi ñáyiú sa ní sàndáá iní-xi ndéé cãni-gá ní xínu dàtná úhúⁿ mĩ mee-ni cuè té, te ñíⁿ ñáyiú ñíi ndíi landú.

⁵ Te nduu tnéé-áⁿ ñíu-ni ñúú Jerusalén-áⁿ ñí tacá cue té yíndaha veñúhu, ndíi cue té cùu sacuéhé núú ñáyiú isràél ndíi cue té dàcuaha ñaha xii-yu nchaa tnúhu ní chídó tnuní ndíi Moisés. ⁶ Te tnàhá dútú cùnù-gá té nani Anás ndécú ndíi té Caifás, ndíi té Juàá, ndíi té Lijandrú ndíi dava-gá ñaní tnáhá dútú cùnù-gá-áⁿ

ndécú. ⁷ Te ní xáhaⁿ-güedé xii cue té xínu cuechi núú-güedé:

—Chí cuàháⁿ queñuhu-ndo tē Pèlú ndíi té Juàá vecaá, te na quixi-güedé iha —càchí-güedé xáhaⁿ-güedé.

Te ní quexìo té Pèlú ndíi té Juàá núú cuè té cùnuu, te cue té cùnuu-áⁿ ñí xícáⁿ tnúhú-güedé núú-güedé, te xáhaⁿ-güedé:

—¿Nása ní quide-ndo cuèndá té yacua-áⁿ? ¿Yoo ní táuchíúⁿ dùcaⁿ cada-ndo? —cachí-güedé xáhaⁿ-güedé.

⁸ Te ndècu ndíi té Pèlú Espiritú Yá Ndióxi, núu xiáⁿ ní xáhaⁿ-dē xii-güedé:

—Nchòhó cue té cùchiuⁿ ndíi nchòhó cue té cùu sacuéhé núú ñáyiú isràél, ⁹ te núu cuèni-ndó quíni-ndó nása ní quide-ndí ní ndúha té yacua-áⁿ, ¹⁰ te cundedóho-ndo ñíⁿ tnúhu na cáháⁿ-í-a. Xíni ñihu-xi cundedóho nchaa ñáyiú isràél cuèndá quíni-yu nàcuáa ní cuu ní ndúha té-áⁿ. Xítohó Jesucristú Yaá ní xíndecu ñúú Nazàrèt ní quide tátna-gá sáhá tē yacua ní ndúha, te ñíu-ni-gá ní sata caa-ndo núú cùrúxí te núú cùrúxí-áⁿ ñí xíhí-gá, te ní dándótó ñaha Yá Ndióxi xii-gá. ¹¹ Te núú tütú Yá Ndióxi càchí-xi: “Cristú cúu-gá dàtná ñíⁿ yúú ndécú xíquí ñíⁿ vehe. Te yúú càchí-yu sá ñà túú nàndíi, te ñíu xiáⁿ ní nàndíi-xi ní ngúnutnñí-xi xíquí véhé”, duha càchí-xi núú tütú-gá. Te ducaⁿ sãtnahá-xi cùu Jesús, chí càchí-ndó sã ñà túú nàndíi-gá, ¹² dico Yá Ndióxi ñá túú ndéé ní taxi ndecu-gá ingá tée dàcácu nihnu ñaha xii-o núú ùhú núú ndàhú, chí ñíⁿ díi-ñí Déhe-gá Xítohó Jesucristú dacácu nihnu ñaha-gá xii-o —càchí té Pèlú xáhaⁿ-dē xii-güedé.

¹³ Te té Pèlú ndíi té Juàá ñá túú tũha-güedé, te cùñúhu cue té cùchiuⁿ sá ïo ñíⁿ xíndáa-güedé. Te ní cutnùní iní cue té cùchiuⁿ-áⁿ sã Jèsús ní xica cuu ndíi-güedé, núu xiáⁿ ñá túú tnàhí yùhú-güedé càháⁿ-güedé. ¹⁴ Te cuèndá ndécú ndíi té Pèlú ndíi té Juàá té ní ndúha sáhá-xi, núu xiáⁿ ñá ní ñíhí cue té cùchiuⁿ tnúhu cáháⁿ-güedé. ¹⁵ Te ní xáhaⁿ-güedé xii té Pèlú ndíi té Juàá sá quée-güedé quehé cuèndá ndóo mee-güedé ndatnúhu-güedé. ¹⁶ Te ní xítnàha-güedé:

—¿Nása cada-o úú cue té-áⁿ?, chí nchaa ñáyiú ñúú Jerusalén nàhã-yu sá ñí

quide tátna-güedé ñⁿ té yacua, te xiãⁿ xĩcuñúhu vihi ñáyiu. Te vá cúú cächí-ó sã ñã ndáá, chi vai ñáyiu ní xiní nàcuáa ní cuu. ¹⁷ Te dayùhú-ó-güedé te cúñaha-o sã vã càháⁿ-gá-güedé tnúhu Jèsús, chi núu ñáhá te quĩndáá-gá iní-yu —cächí-güedé xĩtnàha-güedé.

¹⁸ Te ní cana tucu-güedé té Pèlú ndihí té Juàá, te xãhaⁿ-güedé sã vã dácuàha-gá-güedé ñáyiu tnúhu Jèsús. ¹⁹ Te té Pèlú ndihí té Juàá ní xãhaⁿ-güedé:

—Chí cuãha cuèndá, te núu sã cächí nchòhó cada-ndí àdi sã càháⁿ Yã Ndiõxí cada-ndí. Te cada càhnu iní-ndó chi vá cúú càda-ndí sã cächí-ndó, chi cada nahi-ni-ndí sã cächí Yã Ndiõxí. ²⁰ Chi dacuítí cãháⁿ-ndí nàcuáa ní cãháⁿ Jèsús, te cãháⁿ-ndí nchaa sã ñĩ xiní-ndí ní quide-gá —cächí-güedé xãhaⁿ-güedé.

²¹ Te cue té cùchiuⁿ níhi-gá ní cãháⁿ-güedé xãhaⁿ-güedé sã cáda càstiú ñáhá-güedé núu vá dáñá-güedé sã dácuàha-güedé ñáyiu. Te ducaⁿ te ní dáñá ñaha-güedé cuánuhú-güedé, chi ñá ní ñhí-güedé nása cada-güedé cada castiú ñáhá-güedé, chi nchaá-yu ndàcáⁿ táhũ-yu núu Yã Ndiõxí sã ñĩ ndúha té yacua. ²² Te té ní quide tátna-güedé-áⁿ ndécú-dé vihi-gá údico cuiá-dé, te ío ní cuñúhu-yu sã ñĩ ndúha-dé.

Ñáyiu sãndáá iní tnúhu Jèsús xicáⁿ táhũ-yu núu-gã sã vã yùhú-yu cãháⁿ-yu tnúhu-gá

²³ Te ní ndee té Pèlú ndihí té Juàá cuánuhú-güedé núu ndécú cuè té cùndihí-güedé, te ní nacani tnúhu-güedé nàcuáa ní xãhaⁿ cuè dútú cùnùu ndihí cue té cùu sacuéhé núu ñáyiu isràél. ²⁴ Te sátá ñĩ xĩndedóho-yu tnúhu ní cãháⁿ-güedé, te ñⁿ-ni tnúhu ní cãháⁿ-yu nchaá-yu ndihí Yã Ndiõxí, te ní xãháⁿ-yu xii-gá:

—Yòhó Dútú Ndiõxí, ní cadúha-n àndiũ, ní cadúha-n ñuyíú, ní cadúha-n lámár, ní cadúha-n nchàandi túhú sã ío ñuyíú. ²⁵ Te ndí Dàvií ní sãndáá iní ndí tnúhu ní cãháⁿ-n, te ní chídó tnùní ndí nàcuáa ní xãhaⁿ-n cãháⁿ ndí, te ñi-ni Espíritú-n ñĩ chindee ñaha-xi xii ndí ní chídó tnùní ndí, te duha ní chídó tnùní ndí: Ñáyiu ñá túú cùu ñáyiu isràél ío cùdèéⁿ-yu núu Yã Ndiõxí,

te cuñí-yu nàá-yu ndihí-gá, dico vá ndácũ-yu chi mee-gã cùnùu-gá.

²⁶ Te cue té yĩndaha nacióⁿ ndihí cue té cùchiuⁿ tacá-güedé nàá-güedé ndihí Dútú Ndiõxí ndihí Crístú Yáá ní quixi ñuyíú-a.

Duha ní chídó tnùní ndí Dàvií nàcuáa ndùu tnúhu ní cãháⁿ-n —cächí-yu xãháⁿ-yu xii Yã Ndiõxí.

²⁷ Te xãhaⁿ tùcú-yu xii-gá:

—Ndáá ní cãháⁿ ndí Dàvií chi ñi-ni ñuú iha ní tacá té Hèrodés ndihí té Pònciú Pilatú ndihí ñáyiu ñá túú cùu ñáyiu isràél ndihí ñáyiu isràél ní cãháⁿ cuèhé-yu cuèndá Jèsús. Te Yòhó Dútú Ndiõxí, Déhe-n cùu Jesús núu ío váha iní-gá, te ní sãha chiuⁿ-n-gá, te ío úhú ní cuu iní ñáhá ñáyiu xii-gá. ²⁸ Te ní quidé-yu nàcuáa ní sani iní-n cáda-yu ndéé sanaha, ndéé cùtnàhá ní ngáva ñuyíú. ²⁹ Te Yòhó Dútú Ndiõxí sa ñaha-n nása càháⁿ cue té cuñí cada úhú ñáhá xii-ndí. Te quide-ndí chiúⁿ tahu-n, te vitna chindee ñaha-n xii-ndí cuèndá sã vã yùhú-ndí cãháⁿ-ndí tnúhu-n. ³⁰ Te cada tátna-n ñáyiu cùhú, te chindee ñaha-n xii-ndí, te cada-ndí nchaa sã vã yõo tnàhí ndàcu cada nacuáa cuñúhu vihi-yu. Te xiní-ndí sã méé Jèsús chindee ñaha-gá xii-ndí, chi quide-gá chiúⁿ tahu-n —cachí-yu xãháⁿ-yu xii Yã Ndiõxí.

³¹ Te sátá ñĩ yãha ní cãháⁿ-yu ndihí Yã Ndiõxí, te ní quidi-xi vehe núu xĩndécú-yu, te òré-áⁿ ñĩ cutáhú tucú-yu nchaá-yu Espíritú-gá. Te ní cãháⁿ-yu tnúhu Yã Ndiõxí, te ñá túú tnàhí ni yùhú-yu.

Cuèndá nchaa ndachiuⁿ cánehe chiúⁿ-yu

³² Te nchaa ñáyiu ní sãndáá iní tnúhu Yã Ndiõxí ñⁿ-ni tnúhu ní cãháⁿ-yu nchaá-yu. ñⁿ-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnàhá-yu nchaa sã xiní ñuhú-yu, te ni ñⁿ-yu ñá túú ní cãháⁿ-yu sã ndàchiúⁿ-yu ñⁿ-ni-yu cùu nchaa sã ndécú ndíhi-yu. ³³ Te cue té ní táuchíúⁿ Jèsús dacuàha ñaha xii-yu tnúhu-gá ío váha ní cãháⁿ-güedé nàcuáa ní cuu ní ndoho Xitohó Jesucristú. Te ío ní chindee ñaha Yã Ndiõxí ní cãháⁿ-yu tnúhu-gá, te ñá túú ní cãháⁿ cuèhé dava-gá-yu cuèndá ñáyiu dàcuaha tnúhu-gá. ³⁴ Te ñá túú tnàhí ni cùndahú-yu díhúⁿ, chi nchaa

ñáiyu ndècu ndihì ñuhu-xi, ndihì nchaa ñáiyu càa vehe-xi ní nadìcò-yu, te da ìⁿ da ìⁿ ndachìúⁿ-yu ní nadìcò-yu òré xíní ñùhú-yu díhúⁿ. ³⁵ Te ní sáñàhá-yu xii cue téé ní táúchíúⁿ Jèsús dacuàha ñaha xií-yu tnúhu-gá, te cue téé-áⁿ ñí dácãhñu-güedé nchaa ñáiyu xìni ñuhu. ³⁶ Te distritú Chèpré ndécú ìⁿ téé nàni-dé Chèé ñani tnáhá ndíi Léví, te ní xóo cunu cuechi-dé veñuhu ñáiyu isràél. Te cuèndá sá sáñaha-dě tnúhu ndee ìní xií-yu, xiáⁿ núu ní dánání ñaha-güedé Vée xii-dé. ³⁷ Te téé-áⁿ ñí nadico-dě luha ñuhu-dé, te nèhe-dé díhúⁿ cuáháⁿ núu cue téé ní táúchíúⁿ-gã dacuàha ñaha xií-yu tnúhu-gá.

5

Té Ananiás ndihì tá Sàfirá ñá túú ní quide ndáá-yu

¹ Te ndècu ìⁿ téé nàni Ananiás, te ñadìhí-dé nání-áⁿ Sàfirá, te ñáiyu-áⁿ ñí nadìcò-yu luha ñuhú-yu. ² Te ní taxúha-dé sacú díhúⁿ, te sacú-gá néhé-dě cuáháⁿ ní sáñaha-dě xii cue téé ní táúchíúⁿ Jèsús dacuàha ñaha xii ñáiyu tnúhu-gá, te ní dándahú ñáhá-dě xii-güedé, chi ní xáhaⁿ-dě sá ñihí ní sáñaha-dě, te naha ñadìhí-dé sá dúcáⁿ ñí quide-dé. ³ Te ní xáhaⁿ tẽ Pèlú xii-dé:

—Ananiás, ¿ná cuèndá ducaⁿ ñí quide-n ñí dáñá-n ñí quíhu sácúíhná ìní-n? Te ní dácúándèhnde-n núu Espíritú Yã Ndiõxí, te ní taxúha-n sácú díhúⁿ ñí ñihí-n cuèndá ñuhu-n. ⁴ ¿Te ñuhu-áⁿ cuèndá sá ñùhú mèe-n, àdi díhúⁿ-áⁿ cuèndá sá díhúⁿ mèe-n cùu-xi, te cuu-ni cada-n nàcuáa cächí ìní-n càhaⁿ-n ñá? ¿Ná cuèndá ducaⁿ ñí quide-n? ¿Ná ní quide-xi ìní-n núu ní dácúándèhnde-n núu Yã Ndiõxí? Chi ñá díú-ní mèe-ni ñáiyu ni dándahú-n —cächí té Pèlú xáhaⁿ-dě xii-dé.

⁵ Te òré ní ndihì tnúhu ní xáhaⁿ tẽ Pèlú, te uuⁿni ní nduá-dé te ní xihí-ni-dé. Te nchaa ñáiyu ní ñihí tnúhu sá ñí xihí-dé, te ní yùhú víhí-yu. ⁶ Te ní quixi ìⁿ úú cue téé cuechi, te ní ndanehe ñaha-güedé ní sacáⁿ ñáhá-güedé núu yuu, te ní ducuⁿ nuu ñaha-güedé yuu-áⁿ, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

⁷ Te ní cuu úú uní òré, te ní quexìo ñadìhí téé ní xihí-áⁿ, te vátá quíní-gá-aⁿ sá ñí xihí yíi-aⁿ. ⁸ Te ní xáhaⁿ tẽ Pèlú xii-aⁿ:

—Cuíní-í cachí tnúhu ndáá-n. ¿Ndèdau ní dícó-ndó ñùhu, ní dícó-ndó nàcuáa ní cachí yíi-n áⁿ? —cächí té Pèlú xáhaⁿ-dě xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ —cachí-aⁿ xáhaⁿ-aⁿ.

⁹ Te ní xáhaⁿ tẽ Pèlú:

—¿Ná cuèndá ducaⁿ ñí chitnàha tnúhu-ndo dùcaⁿ ní quide-ndo ñí cuíní-ndó dándahú-ndó Espíritú Yã Ndiõxí? Quíní-n, chi sa cuándixi cue téé ní sáháⁿ ní chindúxi yíi-n, te yòhó tnàhá-n càndeca ñaha tucu-güedé xii-n quíhíⁿ vitna —cächí-dé xáhaⁿ-dě xii-aⁿ.

¹⁰ Te òré-áⁿ ñí nduá-aⁿ núu tẽ Pèlú, te ní xihí-ni-aⁿ. Te cuándihu cue téé cuechi-áⁿ xití vehe, te ní xiní-güedé sá sà ní xihí-aⁿ, núu ní xido ñaha tucu-güedé cuáháⁿ chindúxi-güedé-aⁿ díñi yíi-aⁿ. ¹¹ Te ní yùhú víhí ñáiyu ní sándáá ìní tnúhu Yã Ndiõxí, ndihì dava-gá ñáiyu ní ñihí tnúhu nàcuáa ní cuu.

Ní quide-güedé titní núu sã vã yõo tnàhí ndàcu cada te ío ní cuñúhu ñáiyu

¹² Te cue téé ní táúchíúⁿ Jèsús dacuàha ñaha xií-yu tnúhu-gá titní víhí sã vã yõo tnàhí ndàcu cada ní quide-güedé, te ní cuñúhu víhí-yu. Te nchaa ñáiyu ní sándáá ìní-xi tnúhu Jèsús ní xóo tacá-yu corrèdór néhé diù ndíi Salòmón. ¹³ Te nchaa ñáiyu ñá túú dàcuaha tnúhu-gá ñá ní cùyíi-yu chitnahá-yu ñáiyu ní sándáá ìní-xi tnúhu-gá, dico nchaá-yu ní cáháⁿ váha-yu cuèndá ñáiyu ní sándáá ìní-xi tnúhu-gá. ¹⁴ Te vai téé, vai ñadìhí ní sándáá ìní-yu tnúhu-gá. ¹⁵ Te cuèndá sá ñí ñihí-yu tnúhu sá quidé tãtna cue téé ní xica cuu ndihì Jèsús, núu xiáⁿ ní queñuhú-yu nchaa ñáiyu cùhú ichi, te davá-yu ní quide túha-yu camá te davá-yu ní quide túha-yu yuu, núu núu nchaa xiáⁿ tá sácáⁿ-yu cue ñáiyu cùhú-áⁿ cuáháⁿ, te xiáⁿ cáã-yu ndètú-yu, chi ní sani ìní-yu sá òré yáha té Pèlú te cuèdicò cuándahú-dě yáha ndodo ñaha-xi xií-yu te ndúha-yu. ¹⁶ Te ní quixi ñáiyu ñuú yatni Jerusalén ndécã-yu ñáiyu cùhú, ndihì ñáiyu yíhì ñaha espíritú

cúndihí yucu ñávaha ní quixi, te nchaá-yu ní ndúha.

Ío ní quide úhú-güedé té Pèlú ndihí té Juàá

17-18 Te dútú cúnú-gá ndihí cue té cùu saducéu cue té cùndihí-dé ní cudééⁿ-güedé sá ïo chítú-yu dàcuaha tnúhu Jèsús, núu xiáⁿ ní tñi-güedé cue té ní táuchíuⁿ Jèsús dacuaha ñaha xií-yu tnúhu-gá ní chihí ñaha-güedé vecaá. 19 Te xití niú-áⁿ ní quexìo ìⁿ espíritú xínú cuèchi núú Yá Ndiöxí ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

20 —Quíhíⁿ-ndó veñúhu càhnu sá ïo cùnúu te cúñaha-ndo xii ñáyiú nàcuáa cada-yu naníhí tàhú-yu —càchí espíritú-áⁿ xáhaⁿ-xi xii-güedé.

21 Te sá dúcáⁿ ní xáhaⁿ-xi núu sátá ní túndaá, te ní sáháⁿ-güedé veñúhu càhnu sá ïo cùnúu sá cúu-xí ñáyiú isràél ní dácuáha ñaha-güedé xií-yu.

Te dútú cúnú-gá ndihí cue té cùndihí-dé ní nadatàcá tnáhá-güedé ndihí nchaá cue té cùu sacuéhé núú ñáyiú isràél ndihí cue té cùchiuⁿ, te ní tendaha-güedé sandádú cuáháⁿ queñuhu-güedé cue té yìhí vecaá ní cùu. 22 Te ní quexìo-güedé yèhe vecaá, te ní xiní-güedé sá nì ìⁿ-gá cue té dàcuaha ñaha xii ñáyiú tnúhu Jèsús ñá túú-gä-güedé yíhí. Te cuánuhú-güedé 23 ní xitnúhu-güedé cue té cùchiuⁿ, te xáhaⁿ-güedé:

—Ní sáháⁿ-ndí ní sándéhé-ndí vecaá, te ndéé chóo-ní, te xíndecu-ní sandádú cue té xíndéé yèhe vecaá. Te ní nacaáⁿ-ndí vecaá, te vá yõo ìⁿ-gá yíhí —càchí-güedé xáhaⁿ-güedé.

24 Te sá dúcáⁿ ní xáhaⁿ-güedé, te cuáháⁿ iní cue dútú cúnú ndihí té tàxi tnuní cue té xíndéé veñúhu càhnu sá ïo cùnúu, te ní xitnáha-güedé:

—¿Nása cada-xi vitna duha càa ní cuu ní xinu cue té yìhí vecaá-i? —càchí-güedé xitnáha-güedé.

25 Te ní quexìo ìⁿ té ní xáhaⁿ-dè:

—Cundedóho-ndo na càchí tnúhu-í ìⁿ tnúhu. Cue té ní chihí-ndo vecaá ndécú-güedé veñúhu càhnu sá ïo cùnúu dacuaha-güedé ñáyiú —càchí-dé xáhaⁿ-dè.

26 Te cue té ndéé veñúhu ndihí té tàxi tnuní ñáhá xii-güedé cuánguaca ñaha-güedé, te ñá túú ní quide úhú ñáhá-güedé, chi

ní yùhú-güedé cuáha yúú ñáhá ñáyiú dii ñùú-xi-áⁿ. 27 Te ní ndexìo ndihí ñaha-güedé núú cuè té cùu sacuéhé ndihí núú cuè té cùchiuⁿ. Te dútú cúnú-gá ní ngüita-dé ténáá ñáhá-dé xii-güedé, te xáhaⁿ-dè:

28 —Te náa ñá díú ní cachí-ndí sá vã dácuaha-gá-ndó ñáyiú tnúhu Jèsús te dàcuaha-ni-ndó-yu, te vitna nchaá ñáyiú ñuú Jerusàlén ní níhí-yu tnúhu nàcuáa càháⁿ-ndó. ¿Te ná cuendá ducaⁿ quide-ndo, te càchí-ndó sã nchühú ndécuéchi-ndí ní sahani-ndí Jèsús-i? —càchí dútú cúnú-gá xáhaⁿ-dè xii-güedé.

29 Te té Pèlú ndihí dava-gá cue té ní táuchíuⁿ Jèsús dacuaha ñaha xií-yu ní xáhaⁿ-güedé xii cue té cùchiuⁿ:

—Nchúhú, Yá Ndiöxí cúnú-gá sandáá iní-ndí tnúhu càháⁿ-gá dàcúxí tnúhu càháⁿ ñáyiú. 30 Te nchòhó ní sata caa-ndo Jèsús núú cùrúxí te núú cùrúxí-áⁿ nì xihí-gá, dico ní dándótó ñaha Yá Ndiöxí xii-gá. Te Yá Ndiöxí ní sandáá iní cue ñani tnáhá-ndí ní xíndecu ndéé sanaha.

31 Te Yá Ndiöxí ní xáhaⁿ-gä sá cùndècu Jesús xio cùha-gá cuendá taxi tnuní-gá te dacäcu nihnu-gá ñáyiú isràél núú ùhú núú ndàhú. Te ducaⁿ-ni dacäcu nihnu-gá nchaá ñáyiú na dàña nchaá sá cuèhé sá dúhá, te cada càhnu iní-gá nchaá yíca cuèchi-yu. 32 Te ní xiní-ndí nàcuáa ní quide-gá, núu xiáⁿ cání-ndí cuendú núú nchàa ñáyiú, te Espíritú Yá Ndiöxí chíndèe ñaha-xi xii-ndí càháⁿ-ndí tnúhu-gá. Te diu-ni Espíritú-gá ní sáñaha-gä xii nchaá ñáyiú ní sandáá iní-xi tnúhu-gá —càchí té Pèlú ndihí dava-gá-güedé xáhaⁿ-güedé xii cue té cùchiuⁿ.

33 Te sátá dúcáⁿ ní xáhaⁿ-güedé xii cue té cùchiuⁿ, te ní cudééⁿ-güedé, te ní ndatnúhu-güedé sá cáhni ñaha-güedé.

34 Te ìⁿ té cùu fariséu tnàha-dé cúu-dé chiúⁿ, te nàni-dé Gamaliél, te cùu-dé mèstrú dácuaha-dé ñáyiú nàcuáa ní chídó tnuní ndii Moisés, te ío yíñùhu caháⁿ ndihí ñáhá-yu xii-dé. Te ní ngúnutñi-dé, te ní xáhaⁿ-dè sá ná quèe tnaa té Pèlú ndihí dava-gá-güedé quehé. 35 Te ní xáhaⁿ-dè xii cue té cùchiuⁿ:

—Nchòhó cue té isràél, xini ñuhu-xi sá cání vaha iní-ndó nása cada-ndo ndihí cue té-áⁿ. 36 Chi ní cunaha ní xíndecu ìⁿ té ní

xínani Tèudás, te ní cachí-dé sá cúnù-dé, te ní cundihi-dé dàtná cúmí ciendú cue téé, te ñá ní cuñí-güedé cuu ñnuu-güedé ndihi cue téé cùchiuⁿ. Te ní sahani ñaha cuè téé cùchiuⁿ-án xii téé Tèudás, te ní ndihi cue téé ní xica cuu ndihi-dé ní xité nuu-güedé, te ñá túú-gã ní quide-güedé nàcuáa ní sani iní-güedé cada-güedé. ³⁷ Te sátá nì xihí téé-án, te ní tnahá nduu nùcódó tnùnì ñáiyu. Te dàvá-án nì xindecu ñn téé distritú Galileá ní xínani-dé Jùdás. Te titní-güedé ní chitnahá ñahá-güedé xii-dé. Te tnahá-dé ní sahani ñaha tucu cue téé cùchiuⁿ, te nchaá cue téé ní xica cuu ndihi-dé ní xité nuu-güedé. ³⁸ Te na càchí tnúhu-í sá dáñá-ndó cuè téé-án, te ní ñà túú ñágá tnúhu cúñaha-ndo xii-güedé, chi núu chiúⁿ mee-güedé quidé-güedé te cuíta-güedé, ³⁹ dico núu chiúⁿ Yá Ndiöxí quidé-güedé, te vá ndínihnu chiuⁿ quide-güedé. Te núu quide-güedé chiúⁿ Yá Ndiöxí, te vá nàá-ndó ndihi-güedé, chi Yá Ndiöxí nàá ndihi-ndo sá dúcáⁿ xiquide-ndo —càchí té Gamaliél xáhaⁿ-dè xii cue téé cùchiuⁿ.

⁴⁰ Te nchaá-güedé ní cáháⁿ sá tnúhu ndáá càháⁿ-dé. Te dàtnùnì ní nacana tucu-güedé té Pèlú ndihi dava-gá-güedé te ní caniha-güedé, te ní cáháⁿ níhi-güedé, te xáhaⁿ-güedé sá vã càháⁿ-gá-güedé tnúhu Jèsús, te dàtnùnì ní dáñá ñaha-güedé cuánuhú-güedé. ⁴¹ Te ío ní cudíⁿ iní-güedé, chi mee Yá Ndiöxí ní cachí-gá sá dúcáⁿ ndòho-güedé dacuàha-güedé ñáiyu tnúhu Jèsús. ⁴² Te ñn nduu ñn nduu ní dacuáhá-güedé ñáiyu xití veñúhu càhnu sá ío cùnuu ndihi nchaá vehé-yu. Te ní xáhaⁿ-güedé xii-yu sá Jèsús cúú-gã Crístú Yaá ní quixi ñuyíú-a.

6

Ní ndúcú-güedé úsá cue téé cundecu dacáhñu sá cáxí ñáiyu

¹ Te diu-ni dàvá-án nì sándáá iní vai ñáiyu tnúhu Jèsús. Te cue ñáiyu griégú ní cáháⁿ cuèhé-yu cuendá ñáiyu isràél, sá ñáiyu dìhí ñáiyu quèé ñáiyu càháⁿ tnúhu griégú ñá túú tnahá sá cáxí-yu, chi ñá túú sãñaha ñnuu-güedé. ² Te cue téé úxúú ní táuchíúⁿ Jèsús dacuàha ñaha xii-yu tnúhu-gá, cue

téé-án nì cana-güedé nchaá ñáiyu sándáá iní tnúhu Jèsús. Te ní xáhaⁿ-güedé xii-yu:

—Nchúhú chi vá cúú dacáhñu-ndí sá cáxí-yu, chi mee-ni tnúhu Yá Ndiöxí càháⁿ-ndí. ³ Te nchòhó cue téé ndècu ndihi-ndí ichi Xitohó Jesucristú cáháⁿ ndihi-ndo úsá cue téé xindecu iha, cue téé càháⁿ ndihi ñahá-yu mee-ni tnúhu yíñùhu, cue téé ndècu ndihi Espiritú Yá Ndiöxí, mee-ni cuè téé cùtnuní váha iní-xi. Te cue téé-án cuàha-ndí-güedé chiúⁿ cada-güedé dacáhñu-güedé sá cáxí-yu. ⁴ Te nchúhú mee-ni Yá Ndiöxí cáháⁿ ndihi-ndí, te mee-ni tnúhu-gá dacuàha-ndí-yu —càchí-güedé xáhaⁿ-güedé xii-yu.

⁵ Te nchaá-yu ní tñí-yu tnúhu ní cáháⁿ-güedé, núu ní ndúcú-yu cue téé cada chiúⁿ-án. Te ñn-dé nání-dè Tèvá, te ío váha sándáá iní-dé Yá Ndiöxí, te ndècu ndihi-dé Espiritú-gá. Te duha ní xínani dàva-gá-güedé: té Lìpé, té Pröcoró, té Nicànór, té Timón, té Pàrmenás, té Lǎxí téé ñuú Antiòquia téé ní sándáá iní-xi sá dacuàha ñáiyu isràél te vitna ní sándáá iní-dé tnúhu Jèsús. ⁶ Te úsá cue téé-án nì sáháⁿ-güedé núu cuè téé úxúú ní táuchíúⁿ Jèsús dacuàha ñaha xii-yu tnúhu-gá, te cue téé úxúú-án nì cáháⁿ ndihi-güedé Yá Ndiöxí, te ní sacáⁿ ndodo-güedé ndaha-güedé díquí cuè téé úsá-án.

⁷ Te ñáiyu ní sándáá iní tnúhu Jèsús cuáháⁿ-yu titní xichi càháⁿ-yu tnúhu-gá. Te vai-gá ñáiyu ta sándáá iní-yu tnúhu-gá cuáháⁿ, te ní xindecú-yu ndihi dava-gá ñáiyu dacuàha tnúhu-gá ñuú Jerusàlén. Te titní dútú nì sándáá iní-güedé tnúhu-gá.

Ní tñí-güedé té Tèvá

⁸ Te té Tèvá ní quide-dé titní núu sã vã yõ tnahí ndàcu cada, te ní cuñúhu vñí-yu sá dúcáⁿ nì quide-dé, te ducaⁿ nì quide-dé chi ndècu ndihi-dé Yá Ndiöxí chindèe ñaha-gá. ⁹ Te ní xindecu cue téé ní xóo cunu cuechi núú ñn téé tàxi tnuní, te téé tàxi tnuní-án ñá ní xõo dañá tnahí-dé quee-güedé núu chíúⁿ-dè, te ní xinu-ná-güedé. Te sátá xǎⁿ, te ní dácáá-güedé veñúhu-güedé, te veñúhu-án sáháⁿ ñáiyu ñuú Cirené, ñáiyu ñuú Alejándriá, ñáiyu ñuú Ciliciá, ndihi ñáiyu distritú Àsiá. Te nchaá ñáiyu-án nì

nàá ndihí-yu té Těvá. ¹⁰ Te ñá ní ñihí-yu tnúhu cáháⁿ-yu, chi ío váha ní sáá díquí-dě nàcuáa ní xáhaⁿ-dě xii-yu, chi Espiritú Yá Ndiöxí ní chindee ñàha-xi xii-dé. ¹¹ Te ní cháhu-yu cue téé ní dácúandèhnde tnúhu ní cáháⁿ té Těvá núu-yu. Te ní xáhaⁿ-güedě sá càháⁿ cuèhé-dé cuendá ndii Moisés ndihí cuendá Yá Ndiöxí. ¹² Te cuendá sá dúcáⁿ ní dácúandèhnde-güedé núu ní sándáá iní-yu, te ní cudééⁿ-yu núú tē Těvá. Te ní cudééⁿ cue téé cùu sacuéhé, te tnáhá cue téé dàcuaha ñaha xii-yu nchaa tnúhu ní chídó tnùní ndii Moisés ní cudééⁿ-güedě. Te ní sáháⁿ-güedé ní tnii-güedé té Těvá ndécá ñàha-güedé cuáháⁿ núú quidé cue téé cùchiuⁿ jundá, ndihí cue téé cùu sacuéhé. ¹³ Te ndécá-yu cue téé dàcuandehnde cuáháⁿ núú quidé-güedě jundá, te ní quesaha-ni tucu-güedé càháⁿ cuèhé-güedé, te xáhaⁿ-güedě:

—Tée-a mee-ni càháⁿ cuèhé-dé cuendá veñúhu sá ío cùnuu, veñúhu ní cuu íi, te càháⁿ cuèhé-dé cuendá nchaa sá ní chídó tnùní ndii Moisés. ¹⁴ Te ní tecú dóho-ndí cächí-dé sá Jèsús téé ñuú Nazàrét dangòyo-dé veñúhu càhnu sá ío cùnuu te vá dáñá-gá-dé cada-ndí nàcuáa ní cachí ndii Moisés cada-ndí—cächí-güedé xáhaⁿ-güedě.

¹⁵ Te nchaa cue téé ndècu jundá ní ndacoto váha-güedé núú tē Těvá. Te ní dáyèhé-xi núú-dě dàtná quidé-xi núú espíritú xínú cuèchi núú Yá Ndiöxí.

7

Té Těvá xáhaⁿ-dě sá ñà túú cuèchi-dé

¹ Te ní xáhaⁿ dùtú cùnùu-gá xii-dé:

—¿Ndáá tnúhu càháⁿ-güedé cuendá-n-ã?
—cächí-dé xáhaⁿ-dě.

² Te té Těvá ní xáhaⁿ-dě xii-güedé:

—Nchòhó cue ñaní tnáhà-í ndihí nchòhó cue téé cùu sacuéhé, cundedóho-ndo ñⁿ tnúhu na càháⁿ-í-a. Yá Ndiöxí ío cùnuu-gá, te ní cáháⁿ ndihí-gá ndii Àbrahám nacióⁿ Mesopotamiá cùtnáhá vátá quíhíⁿ-gá ndii cundecu ndii ñuú Hàrán. ³ Te ní xáhaⁿ-gá xii ndii: “Daña-n nchàa ñaní tnáhá-n, te daña-n ñuhu-n, te quíhíⁿ-n ñⁿ xichi núú dánèhé ñáhà-í cundecu-n”, duha ní xáhaⁿ Yá Ndiöxí xii ndii Àbrahám. ⁴ Te sáta dúcáⁿ ní xáhaⁿ Yá Ndiöxí xii ndii Àbrahám, te ní ndee ndii ñuú Càldeá, te cuáháⁿ ndii

cundecu ndii ñuú Hàrán. Te sáta ní xíhí tātá ndii, te ní xáhaⁿ Yá Ndiöxí quixi ndii cundecu ndii núú ndécú-ó vītna. ⁵ Te Yá Ndiöxí ñá túú ní sãñaha-gã ni lùha ñuhu cuu cuendá ndii núú ñí xíndecu ndii. Te ní xáhaⁿ ndáá Yá Ndiöxí xii ndii sá cuãñaha-gã ñuhu cuu cuendá ndii, te na cùú ndii, te ndóo ndihí nchaa ñaní tnáhá ndii cacu túu ndéé cuéé-gá. Te ducaⁿ ní xáhaⁿ-gã cuèi vátá cùndècu-gá ni ñⁿ déhe ndii. ⁶ Te ní xáhaⁿ tucu Yá Ndiöxí xii ndii Àbrahám sá díú-ní ñaní tnáhá ndii quíhíⁿ-yu núú xicá cùndecú-yu cúmí cièndú cuía, te vá dáñá-yu queé-yu núú chíuⁿ-yu, te ío dandòho ñaha-güedé núú cùndècu-yu. Duha ní xáhaⁿ Yá Ndiöxí xii ndii, te ndáá ducaⁿ ní cuu. ⁷ Te ní xáhaⁿ tucu Yá Ndiöxí xii ndii Àbrahám: “Yúhú dandòho-í nchaa ñáyiu na dândoho ñaha xii cue ñaní tnáhá-n. Te dàvá-áⁿ te ndee cue ñaní tnáhá-n núú cùndècu-yu, te quixí-yu chiñuhu ñáhá-yu xii-í iha”, duha ní xáhaⁿ Yá Ndiöxí xii ndii Àbrahám, te ndáá ducaⁿ ní cuu. ⁸ Te Yá Ndiöxí ní quide ndáá-gá ndihí ndii Àbrahám, te ní xáhaⁿ-gã xii ndii sá cuãha-güedé seña ñii nchaa landú téé cuendá cunáhá-yu nàcuáa ndùu sá ní quide ndáá-gá ndihí ndii Àbrahám. Núu xíãⁿ núú ùná nduu sá ní cacu té Isàac déhe ndii Àbrahám, te ní sáha ndii seña ñii-dé. Te diu-ni ducaⁿ ní quide tucu té Isàac déhe-dé té Jàcób, te diu-ni ducaⁿ ní quide té Jàcób, chi úxúú déhe-dé ní xíndecu, te nchaa-güedé ducaⁿ ní quide-dé. Te ndi úxúú cue téé-áⁿ ní cuu-güedé ñaní tnáhá-ó.

⁹ Te ñⁿ déhe té Jàcób ní xínani-dě Chèé. Te ñá ní cùu váha iní cue ñaní-dé núú-dě, núu ní dícó ñàha-güedé ní queheⁿ ñaha cue téé cuáháⁿ nacióⁿ Ègiptú, te Yá Ndiöxí ñá ní daña ñaha-gá xii-dé cuíta nihnu-dé. ¹⁰ Te ní chindee ñàha-gá xii-dé ní cacu-dé cùtnáhá ní ndoho vihi-dé. Te téé yìndaha Ègiptú ío ní cudíí iní-dé té Chèé, te ní cutnùní iní-dé sá ío váha túha té Chèé, te ducaⁿ ní cutnùní iní-dé, chi Yá Ndiöxí ní chindee ñàha-gá xii té Chèé. Te ní xáhaⁿ tēe yìndaha Ègiptú xii té Chèé sá díú tē Chèé coo-dé gobièrnú Ègiptú, te taxi tnùní-dé nchaa ñáyiu xínu cuechi núú tēe yìndaha Ègiptú-áⁿ.

¹¹ Te ní quíhu tnamá nihii nacióⁿ Ègiptú ndihí nacióⁿ Cànaá, te ío ní ndohó-yu.

Te nchaa ñani tnáhá-ó nĩ xíndecu ndéé sanaha ñá ní xóo níhí-gã-yu sá cáxi-yu. ¹² Te ní níhí tẽ Jácób tnúhu sá ío triú Ègiptú, núu ní tendaha-dẽ cue déhe-dé ní sáháⁿ-güedé ní sânguaaⁿ-güedé triú-áⁿ, te dàvá-áⁿ nĩ sáháⁿ cue ñani tnáhá-ó xito díhna nuu nacióⁿ Ègiptú. ¹³ Te xito cùu uú cuáháⁿ-güedé, te ní xáhaⁿ tẽ Chèé sá ñani-dé cúu-güedé. Te tée yíndaha Egiptú ní cutnùní iní-dé sá díú-ní ñani té Chèé cúu-güedé. ¹⁴⁻¹⁵ Te ní cana té Chèé tãtã-dé té Jácób ndihí nchaa ñani tnáhá-dẽ. Te cùu-xi datná únídico sáhúⁿ-yu ndèca té Jácób cuáháⁿ nacióⁿ Ègiptú núu ndécú tẽ Chèé, te xiáⁿ nĩ quexió-yu ní ngóo-yu. Te yacáⁿ ní xihí té Jácób ndihí nchaa déhe-dé cue ñani tnáhá-ó. ¹⁶ Te sáta nĩ cuu titní cuía, te ní natava-güedé yiqui ndíi Jácób ndihí nchaa déhe ndíi nchido-güedé cuáháⁿ ñuu Sìquém. Te ndíi Àbrahám sa ní cuu titní-gá cuía sá nĩ nacuaaⁿ ndíi ñuhu núu cuè déhe ndíi Hámór. Te xiáⁿ nchíi yaú ní nachindúxi-güedé yiqui-áⁿ.

¹⁷ Te cútnàhá vátá natáva-gá-güedé yiqui cue ndíi, te sa ta tnàhá yatni cada Yá Ndiõxí nàcuáa ní xáhaⁿ-gã xii ndíi Àbrahám cada-gá sá cúu-xí ñáiyu isràél ndécú Ègiptú, te ta cãyá víhí-yu cuáháⁿ. ¹⁸ Te dàvá-áⁿ chi ingá tée yíndaha nacióⁿ Ègiptú, te ñá túú-gã ní xiní-dé nása ní xóo cada ndíi Chèé. ¹⁹ Te tée yíndaha Egiptú ñá ní quide ndáá-dé, chi ío ní dándóhó-dẽ ñani tnáhá-ó nĩ xíndecu dàvá-áⁿ. Te ní táuchíúⁿ-dẽ sá xócuíñí-yu dándóo-yu déhe yiquiⁿ cuendá ndihí-güexi cuú. ²⁰ Te dàvá-áⁿ nĩ cacu té Moisés, te ío ní cudíi iní ñáhá Yá Ndiõxí xii-dé. Te ní xíndecu ndihí ñaha ñaná-dé ndihí tãtã-dé úní-ní yóo. ²¹ Te ndèca ñahá-yu cuáháⁿ ingá xichí, te yacáⁿ ní dándóo ñahá-yu xii-dé, te ní naníhí ñáhá dẽhe yoco tée yíndaha Egiptú, te ní xito-xi-dé datná xító-xí ñni déhe mee-xi nĩ xito-xi-dé ndéé ní sahnu-dé. ²² Te ní cutúha-dé nchaa sá xiní cue tée ègiptú, te ío váha ní sáa díquí-dẽ tnúhu cáháⁿ-dé ndihí nchaa sá cadá-dẽ.

²³ Te cútnàhá ndécú-dẽ údico cuía-dẽ, te ní cachí-dé sá quihíⁿ-dé cáháⁿ ndihí-dé cue ñani tnáhá-dẽ ñáiyu isràél. ²⁴ Te ní xiní-dé ní caniha ñni tée ègiptú xii ñni tée

isràél, te ñá ní cùndee iní-dé cundehe-dẽ núu ní sáháⁿ-dé ní chindee-dẽ tée isràél, te ní sahani-dé tée ègiptú, ²⁵ chi ní cachí Yá Ndiõxí sá díú-dẽ dacãcu-dé ñani tnáhá-dẽ ñáiyu isràél núu cuè tée ègiptú. Te ní sani iní-dé sá cutnùní iní-yu nàcuáa ní xáhaⁿ Yá Ndiõxí xii-dé, dico ñá túú ní cutnùní iní-yu. ²⁶ Te nduu tnéé ní xiní-dé nàá úú cue tée isràél, te ñá túú ní tnàhá iní-dé nàá-güedé núu ní xáhaⁿ-dẽ xii-güedé: “¿Ná cuendá ducaⁿ xínáá-ndó? ¿Ná ñá díú ndimee-ndo núu ducaⁿ xínáá-ndó?” Duha ní xáhaⁿ tẽ Moisés xii-güedé. ²⁷ Te tée ndècuéchi ní sáháⁿ-dé ní chindaha ñihnu-dé té Moisés ñni xio, te ní xáhaⁿ-dẽ: “¿Ná cúu yohó núu véxi-n tãxi tnuní ñáhá-n? ²⁸ Te tnàhá-ñi tucu yúhú cahni-n datná ní sahani-n tée ègiptú icu càhaⁿ-n á”, duha ní xáhaⁿ-dẽ xii té Moisés. ²⁹ Te sá dúcáⁿ nĩ cáháⁿ tée isràél núu ní yúhú té Moisés ní xinú-dé cuáháⁿ-dé ní sáa-dé nacióⁿ Mèdián. Yacáⁿ ní ngóo-dé, te yacáⁿ ní tnándaha-dé, te ní cacu úú déhe tée-dé.

³⁰ Te sáta nĩ xinú údico cuía, te ní sáháⁿ té Moisés ñni xio yucu Sinái. Te yacáⁿ ní xiní-dé ñni tnutáú nchícúⁿ ñuhú, te xití itá ñuhú-áⁿ nĩ xiní-dé yihí ñni espíritú xinú cuèchi núu Yá Ndiõxí. ³¹ Te òré ní xiní-dé sá yihí-xí xití itá ñuhú-áⁿ, te ní cuñúhu vñhi-dé sá nĩ xiní-dé espíritú-áⁿ xití itá ñuhú-áⁿ, te ní sãndehe-gá-dé, te ní xíndéhe váha-dé. Te ní tecú dóho-dé ní cáháⁿ Yá Ndiõxí, te xáhaⁿ-gã xii-dé: ³² “Yúhú cúu-í Ndiõxí ní cáháⁿ ndihí cue ñani tnáhá-n ndéé sanaha, ndíi Àbrahám ndihí ndíi Isàác ndihí ndíi Jácób, ndihí dava-gá cue ñani tnáhá-n. Nchaa cue ndíi-áⁿ ní xóo cáháⁿ ndihí-í.” Duha ní xáhaⁿ-gã xii té Moisés. Te ní quidi ñaha-xi xii té Moisés sá nĩ yúhú-dé, te ñá ní cùyi-gá-dé cundehe-dẽ tnutáú nchícúⁿ ñuhú-áⁿ. ³³ Te Yá Ndiõxí ní xáhaⁿ-gã xii-dé: “Queñuhu chàu-n, chi núu ñuhú nĩ cuu íi nútñi-n. ³⁴ Te yúhú ndéhè-í sá ío ndòho nchaa ñáiyu cùu cuendá-í, ñáiyu ndècu nacióⁿ Ègiptú. Te ní tecú dóho-í sá ío ndàhú xicáháⁿ-yu, núu xiáⁿ véxi-í cãchí tnúhu-í sá ñuhú-n nacióⁿ Ègiptú cuendá ndeñuhú-n-yu yacáⁿ.” Duha ní xáhaⁿ Yá Ndiõxí xii té Moisés.

³⁵ Te ñá ní sãndáá iní-yu té Moisés ndéé díhna, chi ní xáháⁿ-yu: “¿Ná cuendá véxi-n tãxi tnuní ñáhá-n xii-ndí?” Duha ní

xáhãⁿ-yu xii té Moisés. Te ðiu-ni té Moisés ní tendaha ñaha Yá Ndiõxí ní sáhãⁿ-dé dacãcu-dé ñáyiu isràél nacióⁿ Ègiptú cuèi ñá ní sãndáá iní ñáhãⁿ-yu xii-dé. Dico ní taxi tnùnì-dé-yu, chi ducaⁿ ñí xáhãⁿ-gã òré ní xinì-dé espíritú xínú cuèchi núú-gã xití tnutàù nchìcúⁿ ñuhú. ³⁶ Te té Moisés ní ngúíta-dé ní quide-dé sá vã yõo tnàhí ndàcu cada, te ní cuñúhu vîhí-yu sá dúcãⁿ ñí quide-dé, te ducaⁿ ñí quide-dé Ègiptú ndihì Lãmár Tícuèhé. Te ní ngódó núú-dé núú-yu ní queé-yu Ègiptú cuáhãⁿ-yu ìⁿ ichi xití yucu núú vã yõo tnàhí ndècu, te ní xíhì-yu údico cuíá xití yucu-áⁿ, te xíáⁿ ñí xóo cada-dé sá vã yõo tnàhí ndàcu cada. ³⁷ Te ðiu-ni té Moisés ní xáhãⁿ-dè xii cue ñanì tnáhã-dè dàvã-áⁿ: “Yá Ndiõxí cada-gã te coo ìⁿ ñanì tnáhã-ndó ndèé cuèé-gã, te téé-áⁿ cãháⁿ-dé tnúhu-gã núú-ndó dàtnã cuinì-ndó ñí cachí-gã quidé yùhú, te ío xini ñuhu-xi cundedóho-ndo tnúhu cáháⁿ-dé”, duha ní xáhãⁿ tè Moisés xií-yu dàvã-áⁿ. ³⁸ Te ðiu-ni té Moisés ní xíndecu ndihì-dé ñáyiu isràél xití yucu, te ní sáá-dé yucu Sinài, te xíáⁿ ñí quixi ìⁿ espíritú xínú cuèchi núú Yá Ndiõxí ní cáháⁿ ndihì ñaha-xi xii-dé, te yàcãⁿ ní dácúháã ñaha-xi tnúhu-gã, te ðiu-ni tnúhu-áⁿ ñí ndóo dàcuaha-o.

³⁹ Te cue ñanì tnáhã-ó ñí xíndecu ndéé sanaha ñã ní sãndáá iní-yu té Moisés, te ñã ní ndèé iní ñáhãⁿ-yu xii-dé, chi ní cuinì-yu nuhú tucú-yu ñuu Ègiptú cundecú-yu. ⁴⁰ Te òré ndécú tè Moisés yucu ní xáhãⁿ-yu xii ñanì-dé té Àrón: “Cadúha-n ìⁿ úú ndiõxí díhúⁿ cuáãⁿ codonùu núú-ó cùhuⁿ-o ichi, chi ñã túú cùtnunì iní-ó ndèé ichi cuáhãⁿ té Moisés, téé yòdo nuu núú-ó ndùu ní quee-o Ègiptú”, duha ní xíí-yu té Àrón. ⁴¹ Te dàvã-áⁿ ñí cadúha-güedé ìⁿ chëhlu mee-ni díhúⁿ cuáãⁿ, te ní sahani-güedé ìⁿ úú quitì nchìto ní quide càhnu-güedé chëhlu-áⁿ. Te ío ní cudíí iní-yu quitì-áⁿ, chi ní cachí-yu sá díú-ní ndiõxí cúú-dí. ⁴² Te sá dúcãⁿ ñí quidé-yu, xíãⁿ ní dáñã ñaha Yá Ndiõxí xií-yu. Te ní dáñã-gã ní xóo cada càhnú-yu nchícanchii, ndihì yóó, ndihì nchaa chódíní. Te duha ní chídó tnùnì ìⁿ téé ní xóo cáháⁿ tnúhu Yá Ndiõxí ndéé sanaha nàcuáã ní xáhãⁿ-gã xii ñáyiu dàvã-áⁿ:

Nchòhó ñáyiu isràél, ní cuu údico cuíá

yíhí-ndó yùcu,

te ní sahani-ndo quitì-ndo ní quide càhnu ñaha-ndo xii-í cáháⁿ-ndó, dico ñáhã chi ní sahani-ndo-güèdè ní quide càhnu-ndo sá ñí cadúha mee-ndo.

⁴³ Te ní cadúha-ndo ìⁿ veñúhu líhli,

te ní sanutnì-ndo Mòlóc sá càchí-ndó cùu ndiõxí-ndó xica nchido-ndo xití yucu,

te ní cadúha-ndo ìⁿ chódíní, te quitì-ãⁿ càchí-ndó sã cúú-dí ndiõxí Rènfan, te ndi ndùú sá ñí cadúha-ndo-ãⁿ ñí quide càhnu-ndo.

Te cuendá sá dúcãⁿ ñí quide-ndo te yúhú queñuhu ñaha-í xii-ndo quíhíⁿ-ndó cùndecu-ndo ingã xio nacióⁿ Babiloniá.

Duha ní xáhãⁿ Yá Ndiõxí xií-yu, te ducaⁿ ñí chídó tnùnì téé ní xóo cáháⁿ tnúhu-gã.

⁴⁴ Te xití yucu-áⁿ ñí dácáã-güedé ìⁿ veñúhu vehe dóó. Te vehe-áⁿ ñí cuu-xi ìⁿ sá cùtnunì iní-yu sá Yá Ndiõxí ndécú ndihì ñaha-gã xií-yu. Te vehe-áⁿ ñí dácáã-güedé nàcuáã ní xáhãⁿ Yá Ndiõxí xii té Moisés, chi ní dánèhé ñáhã-gã xii-dé nàcuáã dacàa-güedé. ⁴⁵ Te sátá ñí xíhì nchaa cue téé-áⁿ, te ní ndóo ndihì nchaa déhe-güedé veñúhu-áⁿ. Te ní xido tucu-güedé veñúhu-güedé cuáhãⁿ-güedé, te cuáhãⁿ ndihì-güedé té Jòsué núú cùndécú-yu. Te sátá ñí quexió-yu, te ní dácúnú-yu ñáyiu dii ñùú-xi-áⁿ chi mee Yá Ndiõxí ní chindee ñaha-gã xií-yu. Te sátá ñí ndihì nchaa ñáyiu ní xica nchido veñúhu dóó-ãⁿ ñí xíhì, te ní ndóo ndihì dava-gã-yu. Te ducaⁿ-ni ndècu-xi ní cacu té Dàvíí, téé ní xíndaha ñaha xií-yu. ⁴⁶ Te Yá Ndiõxí ní cudíí víhì iní-gã té Dàvíí. Te ní xicãⁿ tnúhú-dé núú-gã ñuu cuu dacàa-dé veñúhu cuu cuendá-gã, chi ìⁿ-ni Yá Ndiõxí ní xóo cada càhnu té Dàvíí ndihì té Jàcób, ñanì tnáhã-ó ñí xíndecu ndéé sanaha vîhì-gã.

⁴⁷ Te Yá Ndiõxí ñã ní dàña-gã dacàa té Dàvíí veñúhu-gã dico déhe-dé té Salòmón, chi ní dáñã-gã ní dácáã-dé veñúhu cuu cuendá-gã

⁴⁸ cuèi ñã túú sàcùndecu-gã veñúhu dàcaa cue téé ñuyú-a, chi ndèni xíãⁿ ndécú-gã chi espíritú cúú-gã. Te duha ní chídó tnùnì téé ní xóo cáháⁿ tnúhu Yá Ndiõxí ndéé sanaha nàcuáã ní cáháⁿ-gã:

49 Yúhú táxí tnùní-í andiu ndìhi ñuyíú, te xíáⁿ nũu nchòhó vá ndácú-ndó chìhi ñaha-ndo xítí veñúhu dàtná quidè-yu sá càchí-yu cùu ndiòxí-yu ní cadúha-yu.

Te ñá túú xìni ñuhu-í núú ndétàtú-í, 50 chi yúhú ní cadúha-í nchaa sá ò ñuyíú-a. Duha ní cáháⁿ Yá Ndiòxí, te diu-ni ducaⁿ ñí chídó tnùní téé ní xóo cáháⁿ tnúhu-gá — duha ndũu nchaa tnúhu ní xáhaⁿ tè Těvá xii-güedé.

51 Te ní xáhaⁿ tùcu-dé:

—Nchòhó, ío sáá iní-ndó chi quide-ndo datná quidè ñáyíu ñá túú cùu ñáyíu is-ràél chí ñá túú tédóho-ndo tnúhu càháⁿ Yá Ndiòxí, chí ñá cuíní-ndó quindáá iní-ndó tnúhu-gá, mee-ni cùu úhú iní-ndó Espíritú-gá dàtná ní xóo cada cue ñaní tnáhá-ndó ñí xíndecu ndéé sanaha. 52 Chi cue téé-áⁿ ío ní xóo dandòho-güedé nchaa cue téé ní xóo cáháⁿ tnúhu Yá Ndiòxí ndéé sanaha. Te ní sahani-güedé nchaa cue téé ní cáháⁿ sá quixí Crístú ñuyíú-a, te Yaá-áⁿ ñá túú cuèchi-gá. Te diu-ni ducaⁿ ñí quide-ndo Crístú cútnáhá ní quixi-gá ñuyíú-a, chí ní sáha cuendá-ndó-gã núú cuè téé ní cuu úhú iní ñáhá xii-gá ní sahani ñaha-güedé. 53 Te ndècu ndìhi-ndo tnúhu ní chídó tnùní ndíi Moisés nàcuáa ní xáhaⁿ espíritú xínú cuèchi núú Yá Ndiòxí xii ndíi, te ní dùcaⁿ ñá túú sàndáá iní-ndó tnúhu-áⁿ nũu ní sahani-ndo Jèsús. Te diu-ni tnúhu-áⁿ ndécú ndìhi-ndo ndéé vitna —càchí té Těvá xáhaⁿ-dè xii-güedé.

Ní sahani-güedé té Těvá

54 Te sá dúcáⁿ ñí xáhaⁿ tè Těvá xii-güedé, te ní cudééⁿ víhí-güedé núú-dè, núu ní quide rúhñú-güedé núhu-güedé sá sàtú iní-güedé.

55 Te té Těvá ndécú ndìhi-dé Espíritú Yá Ndiòxí, te ní ndacoto váha-dé andiu, te ní xiní-dé súúní dàtásáⁿ-xi núú ndécú Yá Ndiòxí, te ní xiní-dé Xítóhó Jesucrístú núnñi-gá xio cùha Yá Ndiòxí. 56 Te ní xáhaⁿ tè Těvá xii-güedé:

—Chí cùndèhe andiu chí yúhú ndéhè-í Xítóhó Jesucrístú núnñi-gá xio cùha Yá Ndiòxí, te diu-gá cúú-gã ñaní tnáhá-ndó nchaa-ndo —cachí-dé xáhaⁿ-dè.

57 Te ní sadí-güedé dóho-güedé cuendá sá ñá ní tnáhá iní-güedé cundedóho-güedé tnúhu càháⁿ-dè, te uuⁿi ní cuáá-güedé, te

ní taxi ndaha ñaha-güedé xii-dé 58 ndécá ñaha-güedé cuáháⁿ ndéé ñí xio yuhu ñúú, te yacáⁿ ní sáñaha-güedé yúú xii-dé. Te ndècu ñí téé cuechi nani-dé Sàulú, te téé-áⁿ ñí quide cuendá-dé dóo-güedé cuendá ní nune ndaha-güedé ní sáñaha-güedé yúú xii té Těvá. 59 Te òré sáñaha-güedé yúú, te ní cáháⁿ ndìhi-dé Xítóhó Jesucrístú te xáhaⁿ-dè:

—Yòhó Xítóhó Jesucrístú, naqueheⁿ-n iní-í —càchí-dé xáhaⁿ-dè xii-gá.

60 Te ní ngüíñí xítí-dè, te níhi ní cáháⁿ-dè, te xáhaⁿ-dè:

—Yòhó Xítóhó Jesucrístú, vá técuèchi-n cuè téé-a sá dúhá quide ñaha-güedé xii-í —càchí-dé xáhaⁿ-dè xii-gá.

Te xíáⁿ-nã ní cáháⁿ-dè, te ní xíhí-dé.

8

Té Sàulú chíhí-dè ñáyíu sàndáá iní-xi tnúhu Jèsús vecaá

1 Te té Sàulú ní nduu vétú iní-dé sá ñí sahani-güedé té Těvá.

Te diu-ni nduu-áⁿ ñí cuu níhi cuendá nchaa ñáyíu sàndáá iní-xi tnúhu Jèsús ñúú Jerusàlén. Te ní ndìhi-yu ní xité nuu cuáháⁿ-yu distritú Jùdeá ndìhi distritú Sàmariá. Te cue téé ní táuchíúⁿ Jèsús dácuàha ñaha xii-yu tnúhu-gá ní ndóo-güedé ñúú Jerusàlén. 2 Te nchaa cue téé càháⁿ ndìhi Yá Ndiòxí ní chindúxi-güedé ndíi Těvá. Te ío ní ndáhyú ñáyíu ní sàndáá iní tnúhu Jèsús sá ñí xíhí ndíi. 3 Te té Sàulú ío dandòho-dé-yu, chí ndí vehe ndí vehe cuáháⁿ-dè cuátni-dé cuèi téé cuèi ñadìhí ndécá-dè cuáháⁿ vecaá.

Càháⁿ-yu tnúhu Yá Ndiòxí distritú Sàmariá

4 Te nchaa ñáyíu ní xité nuu cuáháⁿ-yu càháⁿ-yu tnúhu Jèsús nchaa núú quéxió-yu.

5 Te té Lìpé cuáháⁿ-dè distritú Sàmariá càháⁿ-dè tnúhu Xítóhó Jesucrístú Yaá ní tendaha Yá Ndiòxí ní quixi ñuyíú-a. 6 Te ío vai núú sã vã yòo tnàhí ndàcu cada ní quide-dé, te ní cuñúhu víhí-yu, te ní xíndedóho váha-yu nchaa tnúhu ní cáháⁿ-dè.

7 Te vai ñáyíu yíhi ñaha espíritú cùndìhi yucu ñávaha ní queñuhu-dé nchaa espíritú-áⁿ yiqui cùñú-yu, te ní cana saa-xi òré ní ndee-xi yiqui cùñú-yu cuáháⁿ-xi, te ní ndúha-yu. Te vai ñáyíu cùhú ñá cúú-gã candá nihnú-yu ndìhi ñáyíu yacua ní

quide tátna-dé, te ní ndúha-yu. ⁸ Te sá dúcáⁿ ní cáháⁿ-dé tnúhu Jèsús te ní quide tátna-dé-yu, xiáⁿ ío ní cudíí iní ñáyiu ñuú-áⁿ.

⁹ Te ñu-ni ñuú-áⁿ ndécú ñⁿ téé nàni Xímú, te téé-áⁿ xíní-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáyiu distritú Sàmariá sá dúcáⁿ quide-dé, te ní cachí-dé sá díú-ní-dě cúnùu. ¹⁰ Te nchaa ñáyiu cuèi ñáyiu cuica te cuèi ñáyiu ndàhú ío nèhé-yu sá yíñùhu núú-dě, te xitnàhá-yu:

—Tée-áⁿ ío chìndee ñaha Yá Ndiöxí xii-dé núu vai núú sá quidé-dě —càchí-yu xitnàhá-yu.

¹¹ Te ní sándáá iní-yu nàcuáa ní xóo cada ndúu-dé, te ní xóo cuñúhu vñí-yu, te ní cuu naha dùcaⁿ-ni dandahú ñáhá-dě xii-yu. ¹² Te té Lìpé ní cáháⁿ-dé tnúhu Xítóhó Jesucristú, te ní xáhaⁿ-dě xii-yu sá Yá Ndiöxí cuíní-gá ndíhu ndaha ñaha-gá xii-yu. Te cuèi téé cuèi ñadìhí ní sándáá iní-yu tnúhu-gá, te ní sanduté-yu. ¹³ Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndíhi té Lìpé, te ní cuñúhu-dé chi titní núú sá vñ yóo tnàhí ndàcu cada ní quide té Lìpé, te ní cuñúhu vñi nchaa ñáyiu.

¹⁴ Te dava-gá cue téé ní táuchíúⁿ Jèsús dacuàha ñaha xii ñáyiu tnúhu-gá ní níhí-güedě tnúhu sá ñáyiu distritú Sàmariá ní sándáá iní-yu tnúhu Yá Ndiöxí. Te ní tendaha-güedě té Pèlú ndíhi té Juàá cuáháⁿ-güedé distritú Sàmariá. ¹⁵ Te ní quexio-güedé, te ní cáháⁿ ndíhi-güedé Yá Ndiöxí ní xicáⁿ-güedé Espiritú-gá quixi cundecu ndíhí-yu. ¹⁶ Chi ni ñⁿ-yu vátá sàá-gá Espiritú-gá cundecu ndíhí-yu, chi òré ní sanduté-yu, te mee-ni Jèsús ní cacunehe-güedé. ¹⁷ Te òré ní sacáⁿ ndodo-güedé ndaha-güedé díquí-yu, te ní quexio Espiritú-gá ní ngúndecu ndíhí-yu.

¹⁸ Te ní xíní té Xímú nàcuáa ní quide-güedé ní quexio Espiritú-gá ní ngúndecu ndíhí-yu, te cuíní-dé cuáñaha-dě díhúⁿ xii té Pèlú ndíhi té Juàá ní cùu. ¹⁹ Te ní xáhaⁿ-dě:

—Chindee ñaha-ndo cuendá nděda-ni càá-yu cacáⁿ ndodo-í ndaha-í díquí-yu, te níhí-yu Espiritú Yá Ndiöxí cundecu ndíhí-yu —càchí-dé xáhaⁿ-dě xii-güedé.

²⁰ Te té Pèlú ní xáhaⁿ-dě xii-dé:

—Yòhó cuíta nihnu-n ndíhi díhúⁿ-n, chi cuíní-n cuàaⁿ-n sá vñaha quide Yá Ndiöxí.

²¹ Yòhó vá cúú càda-n chiuⁿ quide-ndí, chi ñá túú ndècu váha iní-n núú Yá Ndiöxí.

²² Te vá dúcáⁿ cáháⁿ-n, chi ío nèhé cáháⁿ-n sá dúcáⁿ cáháⁿ-n. Te cáháⁿ ndàhú-n núú Yá Ndiöxí sá ná cadá càhnu iní-gá tnúhu ní cáháⁿ-n. ²³ Te yúhú sa xíní-í sá ío úhú iní-n, chi mee-ni sá cuèhé sá dúhá chido nuu-n quide-n —cachí té Pèlú xáhaⁿ-dě xii té Xímú.

²⁴ Te ní xáhaⁿ tè Xímú xii-güedé:

—Cáháⁿ ndàhú-ndó núú Yá Ndiöxí sá ñá túú nã tnàhá-í sá dúcáⁿ ní cáháⁿ-í —càchí-dé xáhaⁿ-dě.

²⁵ Te té Pèlú ndíhi té Juàá ní cáháⁿ-güedé tnúhu Yá Ndiöxí núú ñáyiu ñuú-áⁿ. Te ní xáhaⁿ-güedé nchaa nàcuáa ní quide Jèsús ní xíní-güedé òré ní xica cuu-gá ñuyíú-a. Te ní tñi-güedé ichi cuánuhú-güedé ñuú Jerusàlén, te ní yáha-güedé titní ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndíhi ñⁿ téé ñuú Etiòpiá

²⁶ Te ñⁿ espíritú xínú cuèchi núú Yá Ndiöxí ní quexio-xi ñuú Jerusàlén ní xáhaⁿ-xi xii té Lìpé:

—Cada túha-n chi quée nuu-n ñuú Gàzá, dico mee-ni xití yucu cuáháⁿ ichi —càchí-xi xáhaⁿ-xi xii-dé.

²⁷ Te ní xica-dé cuáháⁿ-dé, te ní natnahá-dé ñⁿ téé nacióⁿ Etiòpiá ñúhú-dě ichi. Te cùu-dé tesorèrú xínú cuèchi-dé núú ñⁿ ñadìhí ñaha yíndaha nacióⁿ Etiòpiá, te ñaha-áⁿ nání-áⁿ Cándacé. ²⁸ Te téé etiòpiá-áⁿ ní sáháⁿ-dé ñuú Jerusàlén ní cáháⁿ ndíhi-dé Yá Ndiöxí, te ñùhu-dé ichi cuánuhú-dé ñuú-dé ñúhú-dě carretà, te dàcuaha-dé tnúhu ní chídó tnùní ndíi Chàíá téé ní xóo cáháⁿ tnúhu Yá Ndiöxí ndéé sanaha. ²⁹ Te ní xáhaⁿ Espiritú Yá Ndiöxí xii té Lìpé:

—Quíhíⁿ tuha-n càrretá-áⁿ —càchí Espiritú-gá xáhaⁿ-xi xii-dé.

³⁰ Te té Lìpé ní sàtuha-dé carretà-áⁿ, te ní tecú dóho-dé nàcuáa cáháⁿ téé etiòpiá-áⁿ, téé ñùhu carretà-áⁿ dácuaàha-dé nàcuáa ní chídó tnùní ndíi Chàíá. Te ní xáhaⁿ tè Lìpé xii téé etiòpiá-áⁿ:

—¿Tècú tnùní-n nchàa tnúhu dàcuaha-n-áⁿ? —càchí té Lìpé xáhaⁿ-dě xii-dé.

31 Te ní xáhaⁿ t̃ee etiòpiá:

—¿Nása tecú tnùnì-í te v́a ỹoo dànehé ñáhá xii-í? Ta quène iha coo-n chi danèhé ñáhá-n —càchí-dé xáhaⁿ-dè xii té Lìpé.

Te cuásáá té Lìpé núu carrètá ní ngóo-dé.

32 Te ndèdóho-dé nàcuáa dàcuaha tée etiòpiá-án nàcuáa ní chídó tnùnì ndíi Chàia núu tütú Yá Ndiöxí núu càchí-xi:

Dàtná quidé ñⁿ mbéé cada-dé òré can-deca ñaha-güedè xii-dé quíhíⁿ cahni ñaha-güedè chi ñá túú nã cada-dé, dàtná cuínì-ndó quide mbéé òré dèté-di ñá túú ndàhí-di ducaⁿ càda-dé òré cahni ñaha-güedè chi ni v́a càháⁿ-dé.

33 Te mee-ni cùdiquí ndeé ñáhá-güedè xii-dé, te ni v́a ndúcú tnùhu-güedé núu-dè ñuu ndáá ndècuéchi-dé.

Te ío cuu nduu cuihna iní cue ñani tnáhá-dè, chi cahni ñaha-güedè xii-dé ñuyíú-a.

Duha càháⁿ tutú ní dácuáhá t̃ee etiòpiá ní xíndedóho té Lìpé.

34 Te ní xáhaⁿ t̃ucu tée Etiòpiá xii té Lìpé:

—Cundee iní-n càchí tnùhu-n ỹoo cuncenehe tée ní cáháⁿ tnùhu Yá Ndiöxí ndeé sanaha, núu càháⁿ-dé cuendá méé-dè àdi caháⁿ-dé cuendá ingá ñáyiú —càchí tée etiòpiá-án xáhaⁿ-dè xii té Lìpé.

35 Te té Lìpé ní cani-dé cuendú núu t̃ee etiòpiá nàcuáa ní cáháⁿ ndíi Chàia nàcuáa cada Jèsús òré quixi-gá ñuyíú-a. Te ní xáhaⁿ-dè nàcuáa nduu tnùhu Jèsús ndíhi nàcuáa ní quide-gá. 36 Te ñùhu-güedé ichi cuáháⁿ-güedé ní naníhí-güedé ñⁿ xichi núu ñúhú ndùte, te ní xáhaⁿ t̃ee etiòpiá:

—Iha ñùhu ndute, ¿te v́a cúu cuàndute-í iha-án? —càchí-dé xáhaⁿ-dè xii té Lìpé.

37 Te xáhaⁿ t̃e Lìpé:

—Te núu sàndáá ndisa iní-n Jèsús, te cuu cuandute-n —càchí-dé xáhaⁿ-dè.

Te ní xáhaⁿ t̃ee etiòpiá:

—Sàndáá ndisa iní-í sá Dèhe Yá Ndiöxí cúu Xítohó Jesucristú —càchí-dé xáhaⁿ-dè.

38 Te ní ngani-dé carrètá, te ní nuu-güedé ndí ndúu-güedé, te cuánguee-güedé xití ndute, te ní dácuándute ñaha té Lìpé xii-dé.

39 Te òré ní nene-güedé xití ndute, te ndèca ñaha Espíritú Yá Ndiöxí xii té Lìpé cuáháⁿ. Te ñá túú ní xini t̃ee ní sandute-án ndeé ichi cuáháⁿ té Lìpé. Te ío ní cudí iní-dé sá ñ natuha-dé ichi Yá Ndiöxí, te cuándaa-dé

núu carrètá-dé cuánuhú-dé. 40 Te ní quexìo té Lìpé ñuu Azotó, te ndi tnahá ñuu ndi tnahá ñuu cuáháⁿ-dé càháⁿ-dé tnùhu Yá Ndiöxí, te ní yáha-dé cuáháⁿ-dé ní quexìo-dé ndeé ñuu Cèsareá.

9

Té Sàulú ní tuha-dé ichi Xítohó Jesucristú (Hch. 22:6-16; 26:12-18)

1 Te té Sàulú mee-ni càháⁿ cuèhé-dé cuendá ñáyiú ní sàndáá iní tnùhu Jèsús, te cuínì-dé cahni ñaha-dè xií-yu. Te ní sáháⁿ-dé núu dütú cùnù-gá, 2 te ní xáhaⁿ-dè sá cádüha dütú-ãⁿ ñⁿ tutú canehe-dé quíhíⁿ cuáha-dé cue tée xíndeé nchito veñúhu ñuu Dàmascú, chi cuínì-dé tñi-dé nchaa ñáyiú dàcuaha tnùhu Xítohó Jesucristú candeca ñaha-dè quíhíⁿ ñuu Jerusàlén. 3 Te ní xica-dé cuáháⁿ-dé tá cùyatni-dé ñuu Dàmascú, te uuⁿni ní quee ñuhú andíu, te ní dáyèhé-xi ndeé núu nútñi-dé. 4 Te ní nduá-dé ndeé ñuhu, te ní tecú dóho-dé càháⁿ ñⁿ sá càháⁿ núu ñinu, te xáhaⁿ-xi xii-dé:

—Yòhó Sàulú, ¿ná cuendá cúu ùhú iní ñáhá-n xii-í te dándoho ñaha-n? —cachí sá càháⁿ-án xáhaⁿ-xi xii-dé.

5 Te ni xáhaⁿ-dè:

—¿Ná cúu yòhó sá càháⁿ-án-i? —càchí-dé xáhaⁿ-dè.

Te ní xáhaⁿ sã càháⁿ xii-dé:

—Yúhú cúu-í Jèsús tée cúu úhú iní-n. Te ío dándoho-n mee-n, chi dàtná quidé ndícutu quide-n, chi quiti-án ñuu na cūxi-güedé-di puyá te sãha-di patadá núu-xi, te quide úhú-di mee-di. Te ducaⁿ sãtnahá-xi cúu yohó chi ñá túú sàndáá iní ñáhá-n xii-í —càchí sá càháⁿ-án xáhaⁿ-xi xii-dé.

6 Te té Sàulú ní quidi ñaha-xi xii-dé sá ñ yuhú-dé, te ní xáhaⁿ-dè:

—Xítohó Jesucristú, ¿te ná cuínì-n càda-í-i? —càchí-dé xáhaⁿ-dè.

Te Jèsús ní xáhaⁿ-gá xii-dé:

—Ndacóo, te quíhíⁿ-n ñuu-ãⁿ, te yacáⁿ tecú tnùhu-n nã cúu sã cáda-n —càchí-gá xáhaⁿ-gá xii-dé.

7 Te cue tée cuáháⁿ ndíhi té Sàulú ní tecú dóho-güedé càháⁿ ñⁿ sá càháⁿ, dico v́a ỹoo tnàhí ni xini-güedé, te ní yuhú víhí-güedé, te ñá túú tnàhí ni càháⁿ-güedé. 8 Te ní ndacóo té Sàulú, te ñá ní cúu-gá cundehe-dè, chi ní cuaa-dé, te ní tñi-güedé ndaha-dé ndéca

ñaha-güedé cuáháⁿ ñuú Dàmascú. ⁹ Te yacáⁿ ní xíndecu-dé úní nduu, te ñá ní cùu tnahí cundehe-dě, te ñá túú nã ní xèxi-dé, te ñá túú ní xìhi-dé ndute.

¹⁰ Te ndècu téé sàndáá iní tnúhu Jèsús ñuú Dàmascú, nání-dě Anàniás, te ní sáháⁿ Jèsús núú sàní-dé, te ní xáhaⁿ-gã xii-dé:

—¡Anàniás! —càchí-gá xáhaⁿ-gã.

Te ní xáhaⁿ-dě:

—¿Yúhú càháⁿ ndìhi-n-ãⁿ? —càchí-dé xáhaⁿ-dě.

¹¹ Te ní xáhaⁿ-gã:

—Ndacuíñí, te quíhíⁿ-n ìⁿ chiuⁿ ichi núú dánani-güedé Ichi Ndáá, te yacáⁿ nanducu-n vehe té Jüdás, chi vehe téé-áⁿ ndécú ìⁿ téé ñuú Tàrsú nání-dě Sàulú, te téé-áⁿ sa càháⁿ ndìhi ñaha-dě xii-í. ¹² Te téé-áⁿ ñí dácótó ñaha-xi sá ñí xíní ñáhá-dě xii-n ñí quexio-n núú ndécú-dě, te ní sacáⁿ ndodo-n ndàha-n díquí-dě, te ducaⁿ te ní nacaáⁿ núú-dě ní dácótó ñaha-xi xii-dé —càchí-gá xáhaⁿ-gã.

¹³ Te té Anàniás ní xáhaⁿ-dě:

—Yòhó Xítohó Jesucristú, càchí tnúhu-í xii-n sã ñí níhí-í tnúhu nàcuáa quide-dé sá ïo quide úhú-dé ñáyíu càháⁿ ndìhi-n ñuú Jerusàlén. ¹⁴ Chi nèhe-dé tutú ní sãñaha cuè dútú cúnùu cuendá níhí-dě nàcuáa cada-dé tñí-dé nchaa ñáyíu sàndáá iní ñáhá xii-n —càchí-dé xáhaⁿ-dě xii-gã.

¹⁵ Te Jèsús ní xáhaⁿ-gã xii-dé:

—Quíhíⁿ-n ndàtnúhu-n ndìhi-dé, chi cuíní-í cada-dé chiuⁿ-í, quíhíⁿ-dé càháⁿ-dé tnúhu-í núú cuè ñáyíu isràél, ndìhi núú cuè ñáyíu ñá túú cùu ñáyíu isràél, ndìhi núú cuè téé yíndaha ñaha xii-yu. ¹⁶ Te yúhú cúñaha-í xii-dé sá ndóhó vñi-dé cuendá-í —càchí-gá xáhaⁿ-gã xii té Anàniás.

¹⁷ Te cuáháⁿ té Anàniás vehe núú ndécú té Sàulú te ní sacáⁿ ndodo-dé ndaha-dé díquí té Sàulú, te ní xáhaⁿ-dě:

—Yòhó té Sàulú téé ndècu ndìhi-í ichi Xítohó Jesucristú, ñuú Xítohó Jesucristú Yaá ní càháⁿ ndìhi ñaha xii-n ichi ní tendaha ñaha-gã véxi-í cuendá cacáⁿ táhù-í núú-gã cuendá-n te ndúha núú-n, te dàtnúni quixi Espiritú-gã cundecu ndìhi-n —càchí-dé xáhaⁿ-dě.

¹⁸ Te dàtná sá ñí xócání-ó ìⁿ sá ndèdí núú-dě ní quide ñaha-xi xii-dé, te ní nacaáⁿ núú-dě, te ní sandute-dé. ¹⁹ Te ní xexi-dé, te

ní naníhí ndéé-dě, te titní nduu ní xíndecu ndìhi-dé ñáyíu ní sàndáá iní tnúhu-gã ñuú Dàmascú.

Té Sàulú dácúaha-dé ñáyíu tnúhu Yá Ndiöxí ñuú Dàmascú

²⁰ Te sátá ñí ndúha núú-dě, te ní sáháⁿ-dé veñúhu cue ñáyíu isràél ní xáhaⁿ-dé sá Jèsús cúú-gã Déhe Yá Ndiöxí. ²¹ Te nchaa ñáyíu ní xíndedóho tnúhu ní càháⁿ-dé, te ní cuñúhu vñi-yu, te ní xítñahá-yu:

—Díu téé-ãⁿ ní sahani-dé ñáyíu ní xóo chiñuhu ñaha xii Jèsús ñuú Jerusàlén. Te ní quixi-dé iha ní cuíní-dé tñí ñaha-dě xii-yu candeca ñaha-dě quíhíⁿ núú cuè dútú cúnùu ni cuu —cachí-yu xítñahá-yu.

²² Te ïo iní-gã té Sàulú xáhaⁿ-dě xii-yu sá díú Jèsús cúú-gã Crístú Yaá ní tendaha Yá Ndiöxí ní quixi ñuyíu-a, te xíãⁿ ñá ní ñíhí ñáyíu isràél ndécú ñuú Dàmascú tnúhu càháⁿ-yu, te ní cuñúhu vñi-yu.

Té Sàulú ní dáxió-dě núú ñáyíu isràél

²³ Te sátá ñí cuu titní nduu, te ní ndatnúhu cue téé isràél sá cáhni-güedé té Sàulú. ²⁴ Te té Sàulú ní níhí-dě tnúhu nàcuáa càháⁿ-güedé cada ñaha-güedé xii-dé, te cuèi nduu cuèi níú néhé cuendá-güedé yuyèhe núú ñúdòco ndóho yuhu ñuú cuendá cuíní-güedé tñí ñaha-güedé xii-dé te cahni ñaha-güedé. ²⁵ Te ìⁿ níú ndécá ñaha cue téé ní sàndáá iní-xi tnúhu Jèsús cuáháⁿ ndéé núú ñúdòco ndóho yuhu ñuú. Te ní sáá-güedé núú ndóho, te ní chihi ñaha-güedé xii-dé xítí tídihi te ní dándèe ñaha-güedé núú ñúhú, te ní quene-dé cuáháⁿ-dé.

Te Sàulú ndécú-dě ñuú Jerusàlén

²⁶ Te té Sàulú ní nasáá-dé ñuú Jerusàlén, te cuíní-dé chitnahá-dé ñáyíu sàndáá iní tnúhu Jèsús, te ní yùhú-yu chi ní càháⁿ-yu sá dándàhú ñáhá-dě sá sàndáá iní-dé Jèsús.

²⁷ Te té Bèé ndécá-dě té Sàulú cuáháⁿ núú ndécú cuè téé ní táuchíúⁿ Jèsús dácúaha ñaha xii-yu tnúhu-gã. Te ní cani té Bèé cuendú núú-güedé nàcuáa ní cuu ní naníhí tñahá té Sàulú ndìhi Jèsús ichi, te ní càháⁿ ndìhi ñaha-gã xii-dé. Te ní xáhaⁿ tùcu té Bèé nàcuáa ní càháⁿ té Sàulú tnúhu Jèsús núú ñáyíu Dàmascú, te ñá túú tñahí ni yùhú-dé ní càháⁿ-dé, càchí té Bèé xáhaⁿ-dě

xii-güedé. ²⁸ Te ní xíndecu té Sàulú ndihí ñáyiú xídacuáhá tnúhu-gá ñuú Jerusàlén. Te ní ndicuu ndicuu-dé ní cáháⁿ-dé tnúhu Jèsús, te ñá túú tnàhí ní yùhú-dé ²⁹ ní cáháⁿ ndihí-dé ñáyiú isràél ñáyiú càháⁿ tnúhu griégú. Te ñáyiú-áⁿ nǐ ngüíta-yu ndàtnúhu-yu sá cáhni ñàhá-yu xii-dé. ³⁰ Te ñáyiú sàndáá iní tnúhu-gá ní níhí-yu tnúhu nàcuáa cuíni ñáyiú càháⁿ tnúhu griégú cada ñàhá-yu xii té Sàulú, núu ní sàndeca ñàhá-yu xii-dé ñuú Cèsareá, te yàcáⁿ ní tendaha ñàhá-yu cuánuhú-dé ñuú Tàrsú.

³¹ Te sátá xiáⁿ te ní sanaá-yu ñá túú-gá ní xóo cada úhú-yu nchaa ñáyiú sàndáá iní tnúhu Jèsús nihíi distritú Júdeá, ndihí distritú Galileá, ndihí distritú Sàmariá. Te ní níhí ndéé-yu ní quidé-yu nàcuáa ní xáhaⁿ Yá Ndiöxí cada-yu, te ío ní xíndecu yiñùhú-yu núú-gá, te Espiritú-gá ní chindee ñàha-xi xii-yu, te vài-gá ñáyiú ní sàndáá iní-yu tnúhu-gá.

Té Pèlú ní quide tátna-dé té Èneás

³² Titní xichi ní sáháⁿ té Pèlú ní cáháⁿ-dé tnúhu Yá Ndiöxí. Te ñⁿ nduu ní sáháⁿ-dé ñuú Lidá ní cáháⁿ ndihí-dé ñáyiú sàndáá iní ñàhá xii Jesús. ³³ Te yàcáⁿ ní naníhí-dé ñⁿ té nàni Eneás, te ní cuu úná cuía cùhú-dé, te ni lùha ñá cúú-gá candá nihnu-dé. ³⁴ Te ní xáhaⁿ té Pèlú xii-dé:

—Èneás, Xítohó Jesucristú cada tátna ñàha-gá xii-n tnàvíi. Ndacóo te ndocani-n yùu-n —cachí-dé xàhaⁿ-dë.

Te òré-ni ní ndacóo-dé. ³⁵ Te nchaa ñáyiú ñuú Lidá ndihí ñáyiú ñuú Sàrón ní xiní-yu sá nǐ ndúha-dé, te ní sàndáá víhí iní-yu Xítohó Jesucristú.

Ní ndoto tá Dòrcás

³⁶ Te ñuú Jòpé ndécú ñⁿ ñadhí sàndáá iní-aⁿ tnúhu Jèsús, te nàni-aⁿ Tabitá, te tnúhu griégú xàháⁿ-yu Dòrcás, te ío váha ní xóo cada-aⁿ chi ío váha iní-aⁿ, te ní xóo chindee-aⁿ ñáyiú ndàhú. ³⁷ Te váha-ni ndècu-aⁿ ni cuu, te ní tñi ñàha cuèhé nǐ xihí-aⁿ, te ní nadacùchi ñàhá-yu, te ní chihi ñàhá-yu ñⁿ cuàrtú ndécú ndéé núu nǐnu. ³⁸ Te ñáyiú ní sàndáá iní tnúhu Jèsús ñuú Jòpé ní níhí-yu tnúhu sá ndécú tè Pèlú ñuú Lidá. Te yatni-ni càa ñuú-áⁿ, te ní tendàhá-yu úú cue té cuáháⁿ-güedé núu ndécú-dë cuèndá cúñaha-güedé candeca

ñàha-güedé xii-dé quíhíⁿ núu ndécú-yu. Te ní xáhaⁿ-güedé xii té Pèlú:

—Yáchí ná quíhíⁿ-ó ñuú-ndí, chi yàcáⁿ cáná ñàhá-yu quíhíⁿ-n tnàvíi —càchí-güedé xàhaⁿ-güedé xii té Pèlú.

³⁹ Te té Pèlú ní xica-dé cuáháⁿ-dé ndihí cue téé-áⁿ ñuú Jòpé, te òré ní quexio-güedé ndihí-dé, te cuásaá ndihí ñàha-güedé cuàrtú ndéé núu nǐnu. Te nchaa ñáyiú dihí ñáyiú quèé ní tacá ndéé ñàhá xii ndíyi-áⁿ xíndáhyú-yu, te ní dánèhé ñàhá-yu nchaa dóo ní cadúha ñàha ní xihí-áⁿ. Chi ní xóo cadúha-aⁿ dícúⁿ, te ní xóo cadúha-aⁿ dío òré ní xíndecu-aⁿ ñuyúú-a, te nchaa xiáⁿ ní dánèhé ñàhá-yu xii té Pèlú. ⁴⁰ Te té Pèlú ní xáhaⁿ-dë sá quèé-yu nchaa-yu quehé, te ní queé-yu. Te ní ngüíñí xiti-dë te ní cáháⁿ ndihí-dé Yá Ndiöxí, te dàtnùní ní ndacoto-dé núu cándòdo ndíyi-áⁿ, te ní xáhaⁿ-dë:

—Tàbitá, ndacóo —càchí-dé xàhaⁿ-dë.

Te ní ndacoto-aⁿ núu tè Pèlú te ní ndacóo-aⁿ. ⁴¹ Te ní tñi-dé ndaha-aⁿ ní nacanutñi ñàha-dë. Te ní cana-dé nchaa ñáyiú dihí ñáyiú quèé ndihí nchaa ñáyiú sàndáá iní tnúhu Jèsús cuèndá quini-yu sá nǐ ndoto-aⁿ. ⁴² Te nchaa ñáyiú ñuú Jòpé ní níhí-yu tnúhu nàcuáa ní quide té Pèlú ní ndoto ñàha ní xihí-áⁿ, te vài-yu ní sàndáá iní-yu Xítohó Jesucristú. ⁴³ Te titní nduu ní xíndecu té Pèlú vehe té Xímú téé dàcuitá ñi.

10

Té Pèlú ndihí té Còrneliú

¹ Te ndècu ñⁿ téé nàni-dé Còrneliú ñuú Cèsareá te cùu-dé capitáⁿ, te ndècu ndihí-dé ñⁿ cièndú sandàdú. Te cue téé-áⁿ nání-güedé Sandàdú Itàlianú. ² Te téé cùu capitáⁿ ío váha iní-dé, te mee-dë ndihí ñadhí-dé ndihí nchaa landú-dé ío nèhé-yu sá yíñùhu núu Yá Ndiöxí, te sàha-dé ñáyiú ndàhú ñáyiú isràél dítúⁿ, te ío càháⁿ ndihí-dé Yá Ndiöxí. ³ Te ñⁿ nduu dàtná òré caá úní sacuaa ní dácótó núu ñàhá-xi xii-dé sá ñi sáháⁿ ñⁿ espíritú xínú cuèchi núu Yá Ndiöxí núu-dé, te ní xáhaⁿ-xi:

—Còrneliú —càchí-xi xàhaⁿ-xi xii-dé.

⁴ Te ní xiní-dé ndi ndúú xio núu-dé espíritú-áⁿ. Te ío ní yùhú-dé. Te ní xáhaⁿ-dë: —¿Ná chíúⁿ vëxi-n? —càchí-dé xàhaⁿ-dë.

Te xàhaⁿ-xi:

—Ío cãháⁿ ndihí-n Yã Ndiõxí, te ñáyiú ndàhú sãñaha-n dñhúⁿ-n, te nchaa xĩãⁿ sa nãha-gá. ⁵ Te vitna tendaha-n cuè téé na quĩhĩⁿ-güedé ñuú Jòpé quíngana-güedé ñⁿ téé nãni Xímú, àdi Pelú chi úú diu-dé, te candeca ñaha-güedé quixi. ⁶ Te òré quexìo-dé te cachí tñuhu-dé nchaa dava-gá sá cuíní Yã Ndiõxí cada-n. Te ndècu-dé vehe ingá tucu téé nãni Xímú téé dàcuitá ñⁿ, te vehe téé-áⁿ cáá ñⁿ xio yuhu lamár —càchí-xi xãhaⁿ-xi xii-dé.

⁷ Te sátá cuãháⁿ espíritú-áⁿ, te té Còrneliú ní cana-dé úú tñahá cue téé xínu cuechi núú-dé ndihí ñⁿ sandádú xínú cuèchi tucu núú-dé, te tñahá sandádú-áⁿ ío cãháⁿ ndihí-dé Yã Ndiõxí. ⁸ Te té Còrneliú ní cani-dé cuendú núú-güedé nãcuáa ní cãháⁿ espíritú xínú cuèchi núú Yã Ndiõxí. Te ní tendaha ñaha-dé xii-güedé cuãháⁿ-güedé ñuú Jòpé.

⁹ Te nduu tnéé-áⁿ ñúhú-ní-güedé ichi cuãháⁿ-güedé, te cùu-xi datná òré cauxúú nduu ta cùyatni-güedé ñuú-áⁿ, te òré-áⁿ ñí sáá té Pèlú díquí véhé cãháⁿ ndihí-dé Yã Ndiõxí. ¹⁰ Te òré-áⁿ sa xihí-dé docó cuíní-dé caxi-dé, te ñini càdúha-yu sá caxí-dé ní dácótó núú ñáhá-xí ¹¹ sã ñí xíní-dé ñⁿ sá ndécú àndiú, te càa datná cáá ñⁿ dóo cáhnú nchícúⁿ yoho ndi cùmí xíquí-xi véxi cuuⁿ núú ñúhú. ¹² Te núú dõó-áⁿ yódó cõõ ndihí quiti ndava ndihí nchaa núú quiti ndéé cùmí sãhá-xi. ¹³ Te ní tecú dóho-dé cãháⁿ ñⁿ sá cãháⁿ, te xãhaⁿ sã cãháⁿ-áⁿ xii-dé:

—Pèlú, ndacuíñí cahni-n ndèda-ni càa quiti-a caxi-n-di —cachí sá cãháⁿ-áⁿ xãhaⁿ-xi xii-dé.

¹⁴ Te té Pèlú ní xãhaⁿ-dè:

—Vá cáhni-í-di chi càchí tñuhu sá sánú ichi ñaha xii nchúhú ñáyiú isràèl sá vã cúú càxi-ndí nchaa quiti-a chi cuu cuèchi, te vátá caxí-gã-í-di ñí ñⁿ xito —cachí-dé xãhaⁿ-dè.

¹⁵ Te ní cãháⁿ tucu sá ñí cãháⁿ-áⁿ, te xãhaⁿ-xi:

—Vá cúú càchí-n sã vã cúú càxi-n-di, chi mee Yã Ndiõxí ní cachí-gá sá díú nchaa quiti-a cuu caxi-o vitna —cachí sá ñí cãháⁿ-áⁿ xãhaⁿ-xi xii-dé.

¹⁶ Te ñucaⁿ ñí cãháⁿ sá ñí cãháⁿ-áⁿ ñí xito, te dàtnúni cuãndaa tucu dóó-áⁿ andiú.

¹⁷ Te té Pèlú ñã ní cùtnuní iní-dé ná cuendá ducaⁿ ñí dácótó núú ñáhá-xí xii-dé, núu

xĩãⁿ ío cuéhé ñí sani iní-dé. Te òré-áⁿ ñí quexìo cue téé ní tendaha té Còrneliú ndéé yuyèhe, chi ndi vehe ndi vehe cuãháⁿ-güedé ndúcú tñuhu-güedé ndéé cáá vèhe té Xímú téé dii vèhe-xi ndecu té Pèlú. ¹⁸ Te ní cãháⁿ ñihí-güedé, te xãhaⁿ-güedé:

—Ñá túú cùdana iha ndecu ñⁿ téé nànducu-ndí nání-dé Xímú, àdi Pelú chi úú diu-dé —càchí-güedé xãhaⁿ-güedé.

¹⁹ Te té Pèlú vãi sani iní-dé sá ñí dácótó núú ñáhá-xí xii-dé. Te òré-áⁿ ñí xãhaⁿ Espíritú Yã Ndiõxí xii-dé:

—Cundedóho-n ñⁿ tñuhu na cãháⁿ-í-a. Ní quexìo úní cue téé nànducu ñaha xii-n.

²⁰ Yáchí, cuandèe chi quĩhĩⁿ-n ndihí-güedé, te vá yùhú-n chi yùhú ní xãhaⁿ-í véxi cuaca ñaha-güedé xii-n —càchí Espíritú-gá xãhaⁿ-xi xii té Pèlú.

²¹ Te ní xica-dé cuãndee-dé núú ndécú cuè téé xica nanducu ñaha xii-dé, te xãhaⁿ-dè xii-güedé:

—Yùhú cúú tée nànducu-ndo-áⁿ. Náu-í-a núú ná chíúⁿ cuíní ñáhá-ndó —càchí-dé xãhaⁿ-dè xii-güedé.

²² Te xãhaⁿ-güedé:

—Tée cùu capitáⁿ téé nãni Corneliú ní tendaha ñaha-dé véxi-ndí, te téé-áⁿ ío váha iní-dé, chi ío sàndáá iní-dé Yã Ndiõxí, te nchaa ñáyiú isràèl ío váha cãháⁿ-yu cuendá-dé. Te ñⁿ espíritú xínú cuèchi núú Yã Ndiõxí ní xãhaⁿ-xi xii-dé sá cáná ñaha-dé xii-n quĩhĩⁿ-n vèhe-dé dacuãha-n-dé tñuhu Yã Ndiõxí —càchí cue téé ní tendaha té Còrneliú xãhaⁿ-güedé xii té Pèlú.

²³ Te ní xãhaⁿ tẽ Pèlú sá quĩhu-güedé vehe-dé, te candeca tñaha-güedé ndihí-dé quĩhĩⁿ ndéé nduu tnéé. Te nduu tnéé-áⁿ ñí xica-güedé ndécá tñaha-güedé ndihí té Pèlú cuãháⁿ, te tñahá ñⁿ úú cue téé sàndáá iní tñuhu Jèsús ñuú Jòpé cuãháⁿ ndihí ñaha-güedé xii-dé.

²⁴ Te ndéé ingá nduu ní quexìo-güedé ñuú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndihí ñadihí-dé ndihí nchaa landú-dé ndihí cue téé ío váha tñahá tñuhu ndihí-dé, chi ní cana ñaha-dé ní nítnáhã-yu ndihí-dé cundetú-yu té Pèlú. ²⁵ Te sátá ñí quèxio té Pèlú vehe té Còrneliú, te ní quee-dé quehé, te ní ngüíñí xiti-dé núú tẽ Pèlú chíñuhu ñaha-dé ní cùu.

²⁶ Te té Pèlú ní xãhaⁿ-dè:

—Ndacuíñí vá nguñí xítí-n nùu-í chi ñá díu Ndiöxí cùu-í, dícó ñí tée ñuyú-a cùu-í —càchí té Pèlú xáhaⁿ-dë xii-dé.

²⁷ Te ta cáháⁿ té Pèlú ndíhi té Còrneliú cuánguihu-güedé xítí vehe, te chitu ñáyiú xixíhi xítí vehe. ²⁸ Te ní xáhaⁿ tē Pèlú xií-yu:

—Sa ñaha-ndo sá càchí tnúhu sá sánú ichi ñaha xii nchúhú ñáyiú isràél sá vǎ cùu quixi-ndí vehe ni ñí nchohó ñáyiú ñá túu cùu ñáyiú isràél te ni vǎ cùu tnàhá tnúhu ndíhi ñaha-ndí xii-ndo. Dico Yá Ndiöxí ní cachí-gá sá vǎ cùu cáháⁿ-í sá vǎ cùu cáháⁿ ndíhi-í ñáyiú ñá túu cùu ñáyiú isràél, chi cuu cuéchi. ²⁹ Núu xíáⁿ ndíhi-ni véxi-í òré ní quexio tnúhu sá cáná ñaha-ndo. Te cachí tnúhu-ndo ñá cuendá cáná ñaha-ndo —cachí té Pèlú xáhaⁿ-dë xií-yu.

³⁰ Te té Còrneliú ní xáhaⁿ-dë:

—Ní cuu cúmi nduu, te diu-ni dàtná òré iha cùu-xi, te yúhú ndècu-í diu-ni vehe-í, te ñá túu tnàhí ná xéxi-í cáháⁿ ndíhi-í Yá Ndiöxí, te òré-áⁿ ñí quexio ñí espíritu xínú cuèchi núu-gǎ ñíhnú-xí dǒo cuixíⁿ dóo chàhnchí. ³¹ Te càchí-xi: “Còrneliú, ní xíndedóho Yá Ndiöxí tnúhu ní cáháⁿ-n ndíhi-gá, te xíní-gá sá sǎñaha-n díhúⁿ xii ñáyiú ndáhú. ³² Te ñuú Jòpé ndécú ñí tée nani Xímú, àdi Pelú chi úu diu-dé, te ndècu-dé vehe ñí tée nani tucu Xímú tée dàcuitá ñí, te càa vehe-dé ñí xio yuhu làmár, te cana-n-dë ná quixi-dé ndatnúhu-n ndíhi-dé”, duha ní cáháⁿ espíritu xínú cuèchi núu Yá Ndiöxí. ³³ Núu xíáⁿ ndíhi-ni ní cana ñaha-í xii-n. Te táxáhu xii-n sǎ véxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiöxí, te cuíní-ndí cachí tnúhu-n nchaa tnúhu ní cachí Yá Ndiöxí cáháⁿ-n —càchí té Còrneliú xáhaⁿ-dë.

Té Pèlú ní ndatnúhu-dé ndíhi ñáyiú ní tacá vehe té Còrneliú

³⁴ Te té Pèlú xáhaⁿ-dë xií-yu:

—Vitna ní xíní-í sá Yá Ndiöxí cáháⁿ ndíhi-gá ñáyiú cuéi ndéda-ni càa ñuú, te ñí-ñí quide-gá ndíhi nchaa-yu. ³⁵ Te nchaa ñáyiú nèhe sá yíñùhu núu Yá Ndiöxí, te xíquide váha-yu, te nchaa-yu cùu váha iní ñáhá-gǎ xii-yu. Te ñá túu quide cuendá-gá cuéi ná ñáyiú ñuú cúu-yu. ³⁶ Te Yá Ndiöxí ní tendaha-gǎ Xítoho Jesucristú ní sáháⁿ-gá ní xíndecu-gá nacióⁿ Isràél, te ní xáhaⁿ-gǎ

xií-yu ñí tnúhu váha nàcuáa cuu váha iní-yu. Te diu-ni mee Jèsús cùnùu-gá núu ñáyiú ní càa xico ñuyú. ³⁷ Te ñaha-ndo sá díhna-gá ndí Juáá ní cáháⁿ ndí tnúhu Yá Ndiöxí núu ñáyiú, te ní dácuándute ñaha ndí xií-yu. Te dàtnúni ní nguíta Jèsús ní cáháⁿ-gá tnúhu-gá distritú Galileá, te dàtnúni ní sáháⁿ-gá ñíhí nacióⁿ Isràél ní cáháⁿ-gá tnúhu-gá núu ñáyiú. ³⁸ Te sa ñaha-ndo sá Yá Ndiöxí ní sǎñaha-gǎ Espiritú-gá xii Jèsús tée ñuú Nazàrét ndécú ndíhi-dé chíndèe ñaha-xi xii-dé. Te ñaha-ndo sá ñí xica cuu Jèsús ní quide tátna-gá nchaa ñáyiú yíhi ñaha espíritu cùndíhi yucu ñáváha. Te ío vǎi-gá sá váha ní quide ñaha-gǎ xií-yu, te ducaⁿ ñí quide-gá, chi Yá Ndiöxí ní chindee ñaha-gá. ³⁹ Te mee-ndí ní xíní-ndí nàcuáa ní quide Jèsús ñuú Jerusalén ndíhi ñíhí nacióⁿ Isràél. Te ní sata caa ñaha-güedé xii-gá núu cùrúxí te yácaⁿ ní xíhí-gá. ⁴⁰ Te núu ùní nduu ní dándótó ñaha Yá Ndiöxí xii-gá. Te ní cuíní-gá sá cùndecu Xítoho Jesucristú titní nduu sátá ñí ndoto-gá cuendá cáháⁿ ndíhi ñaha-gǎ xii-ndí nchaa-ndí nàcuáa ní xica cuu-ndí ndíhi-gá. ⁴¹ Te ñá ncháá ñáyiú ní xíní ñáhá xii-gá, chi mee-ni nchúhú cue tée ní cachí-gá sá cáháⁿ ndáá-ndí sá ñí ndoto-gá, chi ní xíndecu ndíhi-ndí-gá, te ní xíhi ní xexi-ndí ndíhi-gá, núu cáháⁿ ndáá-ndí sá ñí ndoto-gá. ⁴² Te ní cachí-gá sá nchúhú quíhíⁿ-ndí cùñaha-ndí xii ñáyiú sá méé Yá Ndiöxí ní táuchíuⁿ-gǎ sá Jèsús cada ndáá-gá cuéchi nchaa ñáyiú ndècu vívú ndíhi cuéchi nchaa ñáyiú ní xíhí. Te ducaⁿ ñí xáhaⁿ Yá Ndiöxí xii Jèsús, te diu-ni ducaⁿ ñí cachí Jèsús cáháⁿ-ndí. ⁴³ Te cue tée ní cáháⁿ tnúhu Yá Ndiöxí ndéé sanaha ñí cáháⁿ-güedé sá quixí Jèsús, te ní cachí-güedé sá ncháá ñáyiú na quíndáá iní ñáhá xii Jèsús, te cada càhnu iní-gá nchaa cuéchi-yu —càchí té Pèlú xáhaⁿ-dë xií-yu.

Ní quexio Espiritú Yá Ndiöxí ní ngúndecu ndíhi cue ñáyiú ñá túu cùu ñáyiú isràél

⁴⁴ Te mei òré cáháⁿ-dë ndédóho-yu ní quexio Espiritú Yá Ndiöxí ní ngúndecu ndíhi nchaa ñáyiú-áⁿ. ⁴⁵ Te cue tée isràél cuáháⁿ ndíhi té Pèlú, cue tée ní sándáá iní tnúhu Jèsús ní cuñúhu vǎi-güedé sá ñí quexio

Espiritú Yă Ndiöxí ní ngúndecu ndihí-yu, chi cuendá sá ñà díú ñáyiú isràél cúu-yu núu xíăⁿ ní cuñúhu-güedé. ⁴⁶ Te ní cutnùní sá ñi quexìo Espiritú Yă Ndiöxí ní ngúndecu ndihí-yu, chi ní ngúíta-yu càháⁿ-yu tnúhu sá dácàhu iní ñáhá Espiritú-gá, tnúhu sá ñà túú xìní-yu càháⁿ-yu. Te ní ndacáⁿ táhú-yu núú Yă Ndiöxí cuendá nchaa sá ñi quide-gá. ⁴⁷ Te dătnùní ní xáhaⁿ tē Pèlú:

—Vitna te cuandute ñáyiú ní natuha ichi Xítóhó Jesucristú chi sa ndècu ndihí-yu Espiritú Yă Ndiöxí dătná cuiní-ndó ndècu ndihí nchoo, núu xíăⁿ vá cúú càchí dava-gá ñáyiú sá vă cúú cuànduté-yu —càchí-dé xăhaⁿ-dē xii-yu.

⁴⁸ Te dătnùní ní xáhaⁿ-dē xii ñáyiú:

—Vitna te cuandute-ndo, te òré-áⁿ te cacunehe-ndo Xítóhó Jesucristú —càchí-dé xăhaⁿ-dē xii-yu.

Te dătnùní ní càháⁿ ndàhú-yu núú tē Pèlú cundecu ndihí ñaha-dē xii-yu ñⁿ úú nduu.

11

Té Pèlú ní cani-dé cuendú núú ñáyiú sándáá iní tnúhu Jèsús ñúú Jerusálén

¹ Te cue tée ní táuchíúⁿ Jèsús dacuàha ñaha xii ñáyiú tnúhu-gá, ndihí cue ñáyiú ní sándáá iní tnúhu-gá, ñáyiú ndècu distritú Júdeá ní níhí-yu tnúhu sá ñáyiú ñà túú cùu ñáyiú isràél ní sándáá iní-yu tnúhu Yá Ndiöxí. ² Te òré ní ndexìo té Pèlú ñúú Jerusálén, te ñáyiú isràél ñáyiú ní cachí sá cáda nchaa nacuáa ní càháⁿ ndíi Moisés ní satnuhu ñáhá-yu xii-dé. ³ Te ní xáháⁿ-yu xii té Pèlú:

—¿Ná cuendá ní sáháⁿ-n ndéé ndiáçáⁿ ní càháⁿ ndihí-n ñáyiú-ăⁿ, te ñà túú quidé-yu dătná quidé nchòo-i? Te ní sáháⁿ-n yàcáⁿ ní xexi-n ndihí-yu —càchí-yu xăhăⁿ-yu xii-dé.

⁴ Te té Pèlú ní cani-dé cuendú nacuáa ní cuu núú ñi sáháⁿ-dē, te xăhaⁿ-dē:

⁵ —Ní xindecu-í ñúú Jòpé. Te òré càháⁿ ndihí-í Yă Ndiöxí, te ní dácótó ñaha-xi xii-í sá vèxi cuuⁿ ñⁿ dóo cáhnú àndiú, te ndùtu ndi cumí xiquí-xi, te ní ngava-xi núú ndécù-í.

⁶ Te ní xindéhé văha-í, te ní xiní-í nchaa quiti yòdo núú-xi. Te ñⁿ xichi yòdo quiti cúmí sáhá-xi, te ñⁿ xichi yòdo quiti dééⁿ, te ñⁿ xichi yòdo cóo, te ñⁿ xichi yòdo quiti ndava.

⁷ Te ní tecú dóho-í càháⁿ ñⁿ sá càháⁿ, te

càchí-xi: “Pèlú, ndacuíñí cahni-n ndēda-ni càa quiti-a caxi-n-di”, cachí sá ñi càháⁿ-áⁿ.

⁸ Te ní xáhaⁿ-í: “Vá càhni-í-di chi càchí tnúhu sá sánú ìchi ñaha xii nchúhú ñáyiú isràél sá vă cúú càxi-ndí nchaa quiti-a”, xăhaⁿ-í.

⁹ Te ní tecú dóho-í càháⁿ-ni tucu núú ñinu, te càchí sá càháⁿ-áⁿ: “Vá cúú càchí-n sá vă cúú càxi-n-di, chi mee Yă Ndiöxí ní cachí-gá sá díú nchaa quiti-áⁿ cuu caxi-o”, càchí sá càháⁿ-áⁿ. ¹⁰ Te ñucaⁿ ñi càháⁿ sá ñi càháⁿ-áⁿ ùní xito, te dătnùní cuàndaa dóó-ăⁿ ndihí nchaa quiti-áⁿ andiú. ¹¹ Te òré-ni ní quexìo úní cue tée vehe núú ndécù-í.

Te cue tée-áⁿ ñi tendaha ñaha ñⁿ tée ñúú Cèsareá nándùcu ñaha-güedé xii-í. ¹² Te mee

Espiritú Yă Ndiöxí ní cachí-xi sá quihíⁿ-í ndihí-güedé, te ní cachí-xi sá ñà túú ñà cani iní-í. Te tnàhá ñúú cue tée ndècu iha ní sáháⁿ ndihí ñaha-güedé xii-í, te nchaa-ndí

ní sáháⁿ-ndí vehe té Còrneliú ñúú Cèsareá.

¹³ Te ní cani-dé cuendú nacuáa ní cuu ní sáháⁿ ñⁿ espíritú xínú cuèchi núú Yă Ndiöxí vehe-dé, te ní quihu-xi ndéé xití vehe-dé,

te ní xáhaⁿ-xi xii-dé: “Tendaha-n cuè tée na quihíⁿ-güedé ñúú Jòpé quingana-güedé ñⁿ tée nani Xímú, àdi Pelú chi úú diu-dé.

Te candeca ñaha-güedé quixi. ¹⁴ Te tée-áⁿ

cachí tnúhu-dé nása cada-n nánihí tãhú-n ndihí ñadihí-n, ndihí landú-n, ndihí nchaa ñáyiú xínu cuechi vehe-n”, duha ní xáhaⁿ espíritú-áⁿ xii té Còrneliú. ¹⁵ Te òré ní ngúíta-í càháⁿ ndihí-í-yu ní quexìo Espiritú

Yă Ndiöxí ní ngúndecu ndihí-yu dătná ní quide-xi cútnahá ní taxi Yá Ndiöxí Espiritú-gá ndéé díhna ní ngúndecu ndihí nchoo. ¹⁶ Te ní ndacu iní-í nacuáa ní càháⁿ Xítóhó Jesucristú, te duha ní cachí-gá:

“Té Juáá ní xóo dacuàndute-dé ñáyiú, dico yúhú sãñaha-í Espiritú Yă Ndiöxí cundecu ndihí-yu”, duha ní cachí-gá. ¹⁷ Te Yá Ndiöxí ní sãñaha-gã Espiritú-gá cundecu ndihí ñáyiú ñà túú cùu ñáyiú isràél dătná ní quide-gá cútnahá ní sándáá iní-ó tnúhu

Jèsús, núu xíăⁿ vá càchí-í sá vă cúú càda-í ñⁿ sá cuiní Yă Ndiöxí cada-í —càchí té Pèlú xăhaⁿ-dē xii-yu.

¹⁸ Te sátá dúcáⁿ ñi xáhaⁿ tē Pèlú, te ñà túú-gã ná tnúhu ni càháⁿ-yu, te ío ní cudíí iní-yu nchaa nacuáa ní quide Yá Ndiöxí, te ní xitnãhá-yu:

—Tnàhá nchaa ñáyiú ñà túú cùu ñáyiú is-

ràel naníhí tàhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuíni Yá Ndiöxí cunduu —càchí-yu xitnàhá-yu.

Ñáyiú sàndáá iní tnúhu Jèsús ñuú Antiòquiá

¹⁹ Te sáta nǐ sahní-güedé té Těvá, te ní cuíni-güedé cada úhú-güedé nchaa ñáyiú ní sàndáá iní-xi tnúhu Jèsús, te ní xíté nuú-yu ndi tnahá ñⁿ ñⁿ ñuú. Te davá-yu cuáháⁿ-yu ndéé distritú Fèniciá ndíhi distritú Chìpré ndíhi ñuú Antiòquiá. Te ní cáháⁿ-yu tnúhu Jèsús núu mee-ni ñáyiú isràél, te ñá ní xitnùhu-yu dava-gá-yu. ²⁰ Te dava-gá ñáyiú distritú Chìpré ndíhi ñáyiú ñuú Cìrené ní sáháⁿ-yu ñuú Antiòquiá. Te ñá díú mēe-ni ñáyiú isràél ní cáháⁿ ndíhí-yu, chi tnahá ñáyiú ñá túú cùu ñáyiú isràél ní xáháⁿ-yu tnúhu Jèsús. ²¹ Te ní chindee ñàha-gá xii ñáyiú càháⁿ tnúhu-gá, te vài-gá-yu ní sàndáá iní-yu-gá chi ní tuhá-yu ichi-gá.

²² Te ñáyiú ndècu ñuú Jerusalén ñáyiú ní sàndáá iní tnúhu Jèsús ní níhí-yu tnúhu nàcuáa ní cuu, núu xiáⁿ ní tendàhá-yu té Bèé cuáháⁿ-dé ñuú Antiòquiá. ²³ Te òré ní quexìo té Bèé, te ní xiní-dé nàcuáa ní quide ñàha-gá xii-yu sá nǐ naníhí tàhú-yu, núu xiáⁿ ío ní cudíí iní-dé. Te ní dácáhu iní ñáhá-dě, te ní xáhaⁿ-dě:

—Ío nducu ndèe-ndo cada-ndo nchaa sá càchí Yá Ndiöxí cada-ndo —càchí-dé xáhaⁿ-dé xii-yu.

²⁴ Te té Bèé cúú-dě ñⁿ téé váha iní-xi, te ndècu ndíhi-dé Espiritú Yá Ndiöxí, te ío sàndáá iní-dé tnúhu Jèsús. Te vài vihi ñáyiú ní tuhá-yu ichi-gá.

²⁵ Te dātñuní cuáháⁿ té Bèé ñuú Tàrsú cuánúndúcú-dě té Sàulú. ²⁶ Te òré ní naníhí ñáhá-dě, te ndèca ñàha-dé cuáháⁿ ñuú Antiòquiá, te yàcáⁿ ní xíndecu-güedé ñⁿ cuía ndíhi ñáyiú ní sàndáá iní tnúhu Jèsús, te vài-yu ní dácúáhá ñàha-güedé tnúhu-gá. Te ñuú ñuú Antiòquiá ní dánání ñàhá-yu Cristiànú xii nchaa ñáyiú sàndáá iní tnúhu Jèsús.

²⁷ Te ndéé dàvá-áⁿ nǐ quee ñⁿ úú cue téé càháⁿ tnúhu Yá Ndiöxí ñuú Jerusalén cuáháⁿ-güedé ñuú Antiòquiá. ²⁸ Te ñⁿ-dé nání-dě Àgabú, te ní chindee ñàha Espiritú Yá Ndiöxí xii-dé, te ní sáháⁿ-dé núu nchaa ñáyiú sàndáá iní tnúhu-gá, te ní xáhaⁿ-dě

xii-yu sá quíxí ñⁿ tnamá nihí ñuyíú. Te ducaⁿ nǐ cuu sáta nǐ ngúnutnǐ té Clàudiú téé yíndaha cuéhé nàcióⁿ. ²⁹ Núu xiáⁿ nchaa ñáyiú sàndáá iní tnúhu Jèsús ñuú Antiòquiá ní ndatnúhu-yu sá chíndéé-yu nchaa ñáyiú sàndáá iní tnúhu-gá ndécú distritú Júdeá cuendá vá ndóhó vñhí-yu docó. Te nàcuáa ní níhí-yu, te ducaⁿ nǐ sacáⁿ tnáhá-yu. ³⁰ Te ní tacá díhúⁿ-áⁿ, te nèhe té Bèé ndíhi té Sàulú cuáháⁿ, cuáha-güedé cue téé yíndaha ñáyiú sàndáá iní tnúhu-gá.

12

Sáta nǐ xíhí té Jàcobó, te ní ngava té Pèlú vecaá

¹ Te ndéé dàvá-áⁿ nǐ ngúta té Hèrodés téé yíndaha ñàha xii ñáyiú isràél ní quide úhú-dé ñⁿ úú ñáyiú sàndáá iní tnúhu Yá Ndiöxí. ² Te ní táuchíúⁿ-dē ní tñi-güedé té Jàcobó ñaní té Juáá, te ní sahní ñàha-güedé ndíhi machítí. ³ Te ío ní cudíí iní dava ñáyiú isràél cuendá sá nǐ sahní ñàha-güedé xii té Jàcobó, núu xiáⁿ ní tendaha tucu té Hèrodés sandadú-dé ní sáháⁿ tñi tucu-güedé té Pèlú. Te ducaⁿ nǐ quide-dé cútnàhá ní xóo vico ní xexí-yu pàá sá ñà túú yñhi levadurá. ⁴ Te ní naníhí-güedé té Pèlú, te ní tñi ñàha-güedé ndécá ñàha-güedé cuáháⁿ vecaá. Te té Hèrodés ní táuchíúⁿ-dē cuáháⁿ sáhúⁿ ñⁿ sandadú cundeé-güedé té Pèlú. Te ní xáhaⁿ-dě:

—Cundeé-ndó ndí cúmí ndí cúmí-ndó téé-áⁿ —càchí-dé xáhaⁿ-dě xii-güedé.

Te té Hèrodés ní sani iní-dé queñuhu-dé té Pèlú vecaá òré ná yáha vico cuendá cahni ñàha-güedé cáháⁿ-dē ní cùu. ⁵ Te ní xñhi-ni té Pèlú vecaá, te ní xíndéé cuaa ñàha sandadú xii-dé. Te cue ñáyiú sàndáá iní tnúhu Yá Ndiöxí ío ní xícáⁿ táhü-yu núu-gá cuendá sá ñà túú nǐ cada ñàha-güedé xii-dé.

Yá Ndiöxí ní dácacu-gá té Pèlú vecaá

⁶ ñⁿ niú-gá quíhi té Pèlú vecaá ní cùu, te nduu tñéé tauchíuⁿ té Hèrodés quíhíⁿ sandadú queñuhu ñàha-güedé xii-dé vecaá cuendá quini nchaa ñáyiú nása cada ñàha-güedé ní cùu. Te té Pèlú cáá-dě xidí-dé xití vecaá, te ndí ndúú dúcúⁿ ndáhá-dě ndútú càdená, te xio xio dñi-dé ndécú sandadú, te dava-gá sandadú xíndéé-güedé

yèhe vecaá. ⁷ Te ní quexìo ìⁿ espíritú xínú cuèchi núú Yă Ndiöxí xítí vecaá núú cáá tē Pèlú xìdì-dé, te uuⁿni ní dáyèhé-xi xítí ve-caá, te ní dānguǐhi ñaha-xi xì-dé, te xăhaⁿ-xi xì-dé:

—Yáchí, ndàcáo —càchí-xi xăhaⁿ-xi xì-dé.

Te ní ndacáo-dé, te ncha cadèná ndútú dűcúⁿ ndáhá-dé ní nandáxí. ⁸ Te ní xáhaⁿ tucu espíritú-áⁿ xii-dé:

—Yáchí, nucuǐhnu dóó-n, te ndíhu-n chàu-n —càchí-xi xăhaⁿ-xi xì-dé.

Te ní ndíhu nuu-dé dóó-dě, te ní xáhaⁿ tucu espíritú-áⁿ:

—Candixi dóó-n, te na quǐhíⁿ-ó —càchí-xi xăhaⁿ-xi xì-dé.

⁹ Te té Pèlú ní chinchícúⁿ-dé espíritú-áⁿ, te ñá ní cùtnuní iní-dé ñuu ndáá ìⁿ espíritú xínú cuèchi núú Yă Ndiöxí ducaⁿ quide àdi ñáhá, te dácoto ñaha-xi xii-dé ní sani iní-dé. ¹⁰ Te nděndaha-ni-dě espíritú-áⁿ cuáháⁿ ní yáha-dé nàcuáa xǐnutnǐ sandádú, te ta yăha-gá-dé núú ndécú dāva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáháⁿ ndéé xítí ñuu, te ní nacaáⁿ méé yèhe-áⁿ, te ní quee-dé cuáháⁿ-dé ndihí espíritú-áⁿ. Te ní tnahá-dé ìⁿ tnuú, te yacáⁿ ní dándöo ñaha espíritú-áⁿ xii-dé. ¹¹ Te dātnùní ní nene váha saní núú-dě, te ní cutnùní iní-dé, te ní cachí-dé:

—Ndáá sá Yă Ndiöxí ní tendaha-gă espíritú-áⁿ ní quixi-xi ní dácăcu ñaha-xi xii-í cuendá sá vâ cáhni ñaha té Hèrodés. Te dava ñăyiu isrâel ío ní cudǐí iní-yu cuendá sá ñi cuiní té Hèrodés cahni ñaha-dě xii-í —duha ní cachí-dé sáta ñi cutnùní iní-dé.

¹² Te sáta ñi cutnùní iní-dé sá ñi cácu-dé, te cuáháⁿ-dé vehe ìⁿ ñaha nâni Mariá năná tē Juáá, àdi Mácú chi úú ñuu-dé, te xíaⁿ ndécú vai-yu cāháⁿ ndihí-yu Yá Ndiöxí.

¹³ Te té Pèlú ní quexìo-dé ndéé yuyèhe ní dácásáⁿ-dě, te ní quixi ìⁿ xíchí nání Ròdé ní quixi ndehe-xi nă cúú ñăyiu dăcasaⁿ. ¹⁴ Te ní nucuúhuⁿ ndudú-xi sá díú tē Pèlú, te ní cudǐí víhí iní-xi, dico ñá ní nacaáⁿ-xi yuyèhe. Te ní quene cunu-xi cuáháⁿ ngúñaha-xi xii-yu sá nútnǐ tē Pèlú yuyèhe ndaa quehé. ¹⁵ Te ñá ní sandáá iní-yu tnúhu ní cāháⁿ-xi, te xăhăⁿ-yu xii-xi:

—¡Ná tnúhu vîhi cāháⁿ-öⁿ xíchí lűcú! —càchí-yu xăhăⁿ-yu.

Te xăhaⁿ-xi să ndáá nútnǐ-dé, te xăhăⁿ-yu:

—Ñá díú tē Pèlú chi espíritú sá xító ñaha xii-dé cúú să cāháⁿ —càchí-yu xăhăⁿ-yu xii-xi.

¹⁶ Te òré ducaⁿ xǐtnáhá-yu, te té Pèlú ní dácásáⁿ tucu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tē Pèlú, te ní cuñúhu vîhí-yu. ¹⁷ Te ní guide-dé ndaha-dé núú-yu cuendá cadí-yu yuhú-yu. Te ní ngúita-dé ní cani-dé cuendú năcuáa ní guide ñaha Yă Ndiöxí xii-dé sá ñi dácăcu ñaha ìⁿ espíritú xínú cuèchi núú-gă xii-dé vecaá, te ní xáhaⁿ-dě xii-yu:

—Cúu-ndo tē Jăcobó ndihí dava-gă ñăyiu sandáá iní tnúhu Jèsús năcuáa ní guide ñaha Yă Ndiöxí xii-í —càchí-dé xăhaⁿ-dě xii-yu.

Te sáta dúcáⁿ ñi xáhaⁿ-dě, te ní quee-dé cuáháⁿ-dé ingá xichi.

¹⁸ Te sáta ñi túndaá, te ní ngúita ncha sandádú cāháⁿ ìⁿ cāháⁿ ìⁿ-güedé, te xǐtnaha-güedé:

—Ñá túú-gă té Pèlú yíhí vècaá, ¿te nása cada-o-i? —càchí-güedé xǐtnaha-güedé.

¹⁹ Te té Hèrodés ní tendaha-dě titnǐ sandádú cuáháⁿ-güedé cuánúndúcú ñaha-güedé, te ñá ní nânihí ñáhá-güedé xii-dé. Te dātnùní ní cana-dé sandádú cue tē ní xindeé ñáhá xii tē Pèlú, te ní tenáá ñáhá-dě xii-güedé, te ní xáhaⁿ-dě xii dava-gă cue sandádú-dé:

—Cahni-ndo cuè tē-ăⁿ —càchí té Hèrodés xăhaⁿ-dě.

Te dātnùní ní quee té Hèrodés distritú Jűdeá cuáháⁿ-dé ñuu Cèsareá, yacáⁿ ní ngúndecu-dé.

Ní xíhí té Hèrodés

²⁰ Té Hèrodés ní cudééⁿ-dě núú ñăyiu ñuu Tírú ndihí núú ñăyiu ñuu Sidón. Te xíaⁿ ní ndatnúhu-yu ní cuu ìⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihí ñáhá-yu xii-dé, te ní ndatnúhu ndihí-yu té Blástú. Te tē-áⁿ cúú-dě chiúⁿ guide-dé núú tē Hèrodés, te ní chindee tnúhu ñaha-dě xii-yu, chi ní cāháⁿ ndáhú-yu núú tē Hèrodés sá vâ cádá ũhú ñáhá-dě xii-yu. Te ducaⁿ ñi quide-yu cuendá ñuu té Hèrodés-áⁿ queé să xéxi-yu. ²¹ Te ní xáhaⁿ tē Hèrodés ná nduu quǐhíⁿ-yu ndatnúhu ndihí ñaha-dě xii-yu, te nduu-ăⁿ ñi quíunuu-dé ìⁿ dóo

váha, ñⁿ sá sácuiñhu tée tàxi tnuní. Te ní ngóo-dé núú xilé váha, xilé sá sácóo nchihi tée tàxi tnuní, te ní ngüíta-dé ní cáháⁿ sàhú-dé dóho-yu. ²² Te uuⁿni ní cuáá-yu te cächí-yu:

—¡Tée-a cáháⁿ-dé dico ñá díú tõe ñuyíu-a cùu-dé chi ndiöxí cúu-dé! —cächí-yu xitnàhá-yu.

²³ Te ñuú-ñi òrè-áⁿ ñí yáha ñⁿ espíritú xínú cuèchi núú Yá Ndiöxí, te ní sáñaha-xi cuèhé xii té Hèrodés. Te ducaⁿ ñí tnahá-dé chi mee-dé ñá ní xáhaⁿ-dè sá ñáyiu cùu-dé, te ní cáháⁿ-yu sá ndiöxí cúu-dé. Te nchìto-gá-dé ní sanú ñáhá tìndácú xii-dé, te dàtnùní ní xihí-dé.

²⁴ Te ío tìtní xichi ní sáháⁿ ñáyiu sàndáá iní tnúhu Yá Ndiöxí ní cáháⁿ-yu tnúhu-gá, te ío chitú-yu ní sàndáá iní-yu tnúhu-gá.

²⁵ Te té Bèé ndihi té Sàulú ní ndihi chiùⁿ-güedé, te ní ndee-güedé ñuú Jerusàlén cuáháⁿ-güedé ndihi té Juàá, àdi Mácú chi úú diù-dé.

13

Té Bèé ndihi té Sàulú cuáháⁿ-güedé dácuàha-güedé ñáyiu tnúhu Yá Ndiöxí nchaa ñuú xicá

¹ Te ñuú Antiòquiá ndécú ñⁿ úú cue tée cáháⁿ tnúhu Yá Ndiöxí núú nchaa ñáyiu ní sàndáá iní-xi tnúhu-gá. Te ndècu tucu ñⁿ úú cue tée cùu mestrú dácuàha ñaha-güedé xii-yu tnúhu-gá. ñⁿ-dé nání-dè Bèé, te ñⁿ-dé nání-dè Xímú, te té Xímú-áⁿ xáhaⁿ-güedé Nègrú chi tnuu-dè. Te ñngá-dé nání-dè Lùciú, te tée-áⁿ cúu-dé tée ñuú Cirené. Te ñngá-dé nání-dè Sàulú, te ñngá tucu-dé nání-dè Manàén. Te té Manàén-áⁿ ndihi té Hèrodés tée cùu gobiernú Galileá ío váha ní xóo cáháⁿ ndihi tñaha-güedé cùtnàhá ní cuu lìhli-güedé. ² Te ñⁿ nduu ñá túú nã ní xèxi ñáyiu ní sàndáá iní tnúhu Yá Ndiöxí cuèndá mee-ni-gã ní cáháⁿ ndihí-yu, te ní xáhaⁿ Espíritú Yá Ndiöxí xii-yu:

—Tendaha-ndo tõe Bèé ndihi té Sàulú quíhíⁿ-güedé dava-gá ñuú cada-güedé chiùⁿ tahu-í, chi ducaⁿ cuíní-í cunduu —cächí Espíritú-gá xáhaⁿ-xi xii-yu.

³ Te ní cáháⁿ ndihi tucú-yu Yá Ndiöxí, te ñá túú tñahí ná ní xèxi tucú-yu, te ní sacáⁿ ndodo-güedé ndaha-güedé díquí

tõe Bèé ndihi té Sàulú. Te sáta dúcáⁿ ñí quide-güedé, te ní quide ndee iní ñáhã-yu xii-güedé.

Té Bèé ndihi té Sàulú cuáháⁿ-güedé distritú Chìpré cáháⁿ-güedé tnúhu Yá Ndiöxí

⁴ Te té Bèé ndihi té Sàulú ní quee-güedé cuáháⁿ-güedé cuèndá ducaⁿ cuíní Espíritú Yá Ndiöxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yàcáⁿ ní quee-güedé bàrcú cuáháⁿ-güedé distritú Chìpré. Te ñuú-áⁿ cáá xití làmár chi ndècu ñuhu yichí xití ndute.

⁵ Te ní quexìo-güedé mei ñuú Salàminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñáyiu isràél cáháⁿ-güedé tnúhu Yá Ndiöxí. Te cuáháⁿ ndihi-güedé té Juàá cuèndá chindee ñaha-dé xii-güedé. ⁶ Te ní tñi-güedé ichi cuáháⁿ-güedé ñuú Páfós cáá ndaa ñngá xio Chìpré, te yàcáⁿ ní naníhí tñahá-güedé ndihi ñⁿ tée isràél nání-dè Barjèsús, te tée-áⁿ xìní-dé cada ndùu-dé, te cächí-dé sá cáháⁿ-dé tnúhu Yá Ndiöxí dico ñá ndàá.

⁷ Te tée-áⁿ quidé chiùⁿ-dé ndihi té Sèrgiú, àdi Páblú chi úú diù-dé, te cùu-dé gobiernú Chìpré, te ío túha-dé. Te ní cana-dé té Bèé ndihi té Sàulú, chi cuíní-dé cundedóho-dé tnúhu Yá Ndiöxí. ⁸ Te tée quide nduu-áⁿ ñá ní dàña-dé cáháⁿ-güedé tnúhu-gá, chi ñá ní cuíní-dé sá tõe cùu gobiernú-áⁿ tuha-dé ichi Yá Ndiöxí. Te ducaⁿ ñí quide té Barjèsús, tée xáhaⁿ-güedé Èlimás. ⁹ Te tñahá tucu té Sàulú ndécú úú diù-dé chi xáhaⁿ tucu-güedé Páblú, te ndècu ndihi-dé Espíritú Yá Ndiöxí. Te ní xíndéhé ñí ñáhã-dé xii tée quide nduu-áⁿ.

¹⁰ Te ní xáhaⁿ-dè:

—Yòhó, chi dàtná quidé yùcu ñávãha quide-n chi mee-ni dàndahú-n ñáyiu. Yòhó cúu-n dèhe sácuiñná, chi nchaa tnúhu váha cuíní Yá Ndiöxí cáháⁿ-yu, te yòhó ñá dáñá-n. ¹¹ Te vitna quini-n nàcuáa cunduu, chi taxi Yá Ndiöxí ñⁿ castiú xii-n chi vá cùtnùní-gá núu-n càca cuu-n ñⁿ úú nduu —cächí-dé xáhaⁿ-dè xii tée quide nduu-áⁿ.

Te òrè ducaⁿ ñí xáhaⁿ tõe Páblú xii-dé, te òrè-ni ní cuaa-dé, te ñá túú ní cùtnùní tñahí-gá núu-dè, te ní xóo nducu-nã-dé ñáyiu ní xóo cuita nehe ñaha xii-dé. ¹² Te tée cùu gobiernú ní xìní-dé nàcuáa ní quide té

Päblú, te ío ní cuñúhu-dé. Te ní tnahá iní-dé tnúhu Jèsús, núu xiǎⁿ ní sándáá iní-dé.

Té Päblú ndihi té Bèé ndécú-güedě ñúú Antióquia Pìsidiá

¹³ Te té Päblú ndihi dava-gá cue téé xìca cuu ndihi-dé ní queé-güedé bàrcú, te ní quee-güedé ñúú Páfós cuáháⁿ-güedé ñúú Pèrgé, te ñúú-áⁿ yíndèhu-xi distritú Pànfiliá. Te té Juàá ní nacuico-dě ní dándõo ñaha-dě xii-güedé cuánuhú-dé ñúú Jerusalén. ¹⁴ Te dava-gá-güedé ní quee-güedé ñúú Pèrgé cuáháⁿ-güedé ñúú Antióquia, te Pìsidiá yíndàha-xi ñúú-áⁿ. Te nduu xíndetatú-yu, te ní sáháⁿ-güedé veñúhu ñáiyu isràél, te ní ngóo-güedé xití veñúhu. ¹⁵ Te cue téé ndècu veñúhu ní queheⁿ-güedé tutú yódó tnùnì nchaa tnúhu sá ñí chídó tnùnì ndíi Moisés ndihi tutú yódó tnùnì nchaa tnúhu sá ñí chídó tnùnì dava-gá cue téé ní xóo cáháⁿ tnúhu Yá Ndiöxí ndéé sanaha, te ní dácuhá-güedě ní xíndedóho cue ñáiyu, te dätñuní cue téé yíndaha veñúhu-áⁿ ñí xáhaⁿ-güedě xii té Päblú ndihi dava-gá-güedé:

—Nchòhó cue téé cùu ñanì tnáhá-ndí, te núu cuínì-ndó cáháⁿ-ndó tnúhu Yá Ndiöxí, te cuu cáháⁿ-ndó tnávíi cuendá cutúha-yu —càchí-güedé xáhaⁿ-güedě.

¹⁶ Te té Päblú ní ndacuíní-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dě:

—Te nchòhó ñáiyu quide nchaa nacuaá cáháⁿ Yá Ndiöxí ndihi nchaa nchòhó ñáiyu isràél, cundedóho-ndo nchàa-ndo ñíⁿ tnúhu na cáháⁿ-í-a. ¹⁷ Te cuèi ndéé sanduu te cuèi vitna chindee ñaha-ní Yá Ndiöxí xii nchaa ñáiyu isràél, te ní nacáxi ñaha-gá xii-yu te ní chindee ñaha-gá cuendá cáyá-yu, chi cuínì-gá sá cúu vái-yu, te ducaⁿ ñí quide-gá cùtnáhá ní xíndecú-yu nacióⁿ Ègíptú. Te dätñuní ní dácäcu ñaha-gá xii-yu ñúú-áⁿ, chi mee-gá nchaa ndäcu-gá quidé-gá. ¹⁸ Te ní xíndecú-yu ñíⁿ xichi núu ñà túú tnàhí sàcúndecu ñáiyu údico cuíá, te xití údico cuíá-áⁿ ñí cundee iní-gá nchaa sá ñí quidé-yu. ¹⁹ Te Yá Ndiöxí ní chindee ñaha-gá xii ñáiyu isràél, te ní dánáá-yu úsá nacióⁿ, chi cuendá ní cuínì-gá

cuu cuendá-yu ñuhú-áⁿ. ²⁰ Te dätñuní ní cachí Yá Ndiöxí sá díu-ní cuè téé cùchiuⁿ taxi tnunì-güedé nchaa ñáiyu, te ducaⁿ ñí quide-güedé dätñá cúmì ciendú dava cuíá. Te sátá xiǎⁿ, te ní xíndecu té Sàmuel téé ní cáháⁿ tnúhu Yá Ndiöxí. ²¹ Te dává-áⁿ ñí cuínì ñáiyu isràél sá cùndècu ñíⁿ téé quíndaha ñaha-dé xii-yu, te Yá Ndiöxí ní cachí-gá sá tē Sàul quíndaha-dě-yu, te téé-áⁿ ñí cuu-dé déhe té Cís, te té Benjamín téé ní xíndecu ndéé sanaha-gá ní cuu ñanì tnáhá-dě. Te té Sàul ní xíndaha-dě ñáiyu údico cuíá. ²² Te Yá Ndiöxí ñá ní cuínì-gá cundecu-ni-dé quíndaha-dě ñáiyu, chi ní cuínì-gá sá tē Dàvíi ndíhu ndaha-dě cue ñáiyu isràél, te ní cachí-gá: “Ío váha ní tnahá iní-í nàcuáa quide té Dàvíi déhe téé Isàí, te cada-dé nchaa nàcuáa cúñaha-í xii-dé”, duha ní cachí Yá Ndiöxí —càchí té Päblú xáhaⁿ-dě xii-yu.

²³ Te ní xáhaⁿ tucu té Päblú:

—Diu-ni ñanì tnáhá tē Dàvíi cúu Jèsús. Te Yá Ndiöxí ní tendaha-gá Jèsús ní quixi-gá ñuyú-a cuendá nchaa ñáiyu isràél ná quíndáá iní ñáhá xii Jesús naníhí tàhú-yu, chi ducaⁿ ñí cachí Yá Ndiöxí cunduu. ²⁴ Te cùtnáhá vátá ngüita-gá Jèsús cáháⁿ-gá tnúhu Yá Ndiöxí, te ní cáháⁿ té Juàá núu ñáiyu isràél sá xínì ñuhu-xi dañá-yu nchaa sá cuèhé sá dúhá, te cuanduté-yu. ²⁵ Te sa ta cùyatni-ni-gá cuú-dé, te ní xáhaⁿ-dě xii-yu: “Nchòhó càchí-ndó sá yùhú cùu-í Crístú Yáá ndétú-ndó dico ñáhá, chi ñá díu yùhú cùu-í Crístú, chi davitna quixi Crístú Yáá tendaha Yá Ndiöxí quixi ñuyú-a. Te yùhú cùu-í ñíⁿ téé duuⁿ duuⁿ ñá túú tàú nandaxi cuèdicó chàu-gá dico quide-í chiuⁿ-gá”, duha ní cáháⁿ te Juàá —càchí té Päblú xáhaⁿ-dě xii-yu.

²⁶ Te ní xáhaⁿ tucu té Päblú:

—Cundedóho tucu-ndo ñngá tnúhu na cáháⁿ-í. Nchòhó tnáhá-ndó cùu-ndo ñanì tnáhá ndíi Abrahám, te xínì-ndó sá Yá Ndiöxí cùnùu-gá. Te diu-ni-gá cuínì-gá sá ncháá-ndó cundedóho-ndo tnúhu-gá, chi cùu-xi tnúhu sá cáháⁿ nàcuáa naníhí tàhú-ndó. ²⁷ Te nchaa ñáiyu ndècu ñúú Jerusalén ndihi nchaa cue téé cùnùu ñá ní cùtnuní iní-yu ndihi-güedé sá Yá Ndiöxí ní tendaha-gá Jèsús ní quixi-gá ñuyú-a. Te ñá ní sàha-yu cuendá sá díu Jèsús ní

cacunehe cue téē ní cáháⁿ tnúhu Yá Ndiöxí ndéé sanaha cuēi ní dácuaáhã-yu tnúhu-gá veñúhu-yu ndi tnahá úná nduu, nduu ndètatú-yu. Te ní cachí-yu sá ndècuéchi Jèsús, te ní xáhãⁿ-yu sá cáhni ñaha-güedé xii-gá. Te xiãⁿ sa ñaha cue téē ní xóo cáháⁿ tnúhu-gá ndéé sanaha sã dúcáⁿ càháⁿ-yu. ²⁸ Te cuēi ñá túú nã ní quide-gá te ní xáhãⁿ-yu xii té Pilatú téē cùu gobiernú sá táuchiuⁿ-dé cahni ñaha-güedé xii-gá. ²⁹ Te xiãⁿ núu ní sata caa ñaha-güedé xii-gá núú cùrúxí. Te ní quide-güedé nchaa nàcuáa ní chídó tnùnì cue téē ní cáháⁿ tnúhu Yá Ndiöxí ndéé sanaha. Te sátá nì xihí-gá, te ní nunehe ñaha-güedé xii-gá núú cùrúxí, te nchìdo ñaha-güedé cuáhãⁿ, te ní chihi ñaha-güedé ìⁿ xití yaú. ³⁰ Te Yá Ndiöxí ní dándótó-gã Jèsús. ³¹ Te titní xito ní sáhãⁿ Jèsús núú ndécú ñáyiú ní xica cuu ndihí-gá, ñáyiú ní quee distritú Galileá ní sáhãⁿ-yu ndihí-gá ñuú Jerusálén. Te vitna nchaa ñáyiú-áⁿ xáhãⁿ-yu xii dava-gá ñáyiú isràél nàcuáa ní cuu ní ndoto-gá.

³² Te nchúhú càháⁿ-ndí nàcuáa cada-ndo naníhí tàhú-ndó, chi Yá Ndiöxí ní xáhãⁿ-gã xii cue ñanì tnahá-ó nì xíndecu ndéé sanaha sã téndàha-gá Déhe-gá Jèsús quixi-gá ñuyíú-a. ³³ Te ní quixi-gá ní xihí-gá, te ní dándótó ñaha Yá Ndiöxí xii-gá, te núu xiãⁿ naníhí tàhú-ó núu na quìndáa iní-ó-gã. Te ìⁿ téē ní cáháⁿ tnúhu Yá Ndiöxí ndéé sanaha nì chídó tnùnì-dé núú sàlmú cúú ùú nàcuáa ní cáháⁿ Yá Ndiöxí ní xáhãⁿ-gã xii Déhe-gá, te duha ní xáhãⁿ-gã: “Yòhó cúú-n Dèhe-í, te vitna cutnùnì iní ñáyiú sá yùhú cúú-í Tátá-n”, duha ní xáhãⁿ-gã xii Jèsús. Te ñu-ni ducaⁿ nì chídó tnùnì téē ní cáháⁿ tnúhu-gá ndéé sanaha. ³⁴ Te ingá xichi tucu núú tütú-gá ní chídó tnùnì ìⁿ téē ní xíndecu ndéé sanaha nàcuáa ní xáhãⁿ-gã xii Déhe-gá, te duha ní xáhãⁿ-gã: “Mee-ni sã vaha cada ñaha-í dàtná ní xii-í té Dàvií”, duha ní xáhãⁿ-gã. Te ducaⁿ nì chídó tnùnì téē ní xíndecu ndéé sanaha nàcuáa ní cáháⁿ Yá Ndiöxí, chi òré ní xihí Jèsús te ní dándótó ñaha-gá cuèndá sã vã tíú yìqui cuñú-gá. ³⁵ Te núu xiãⁿ duha ní chídó tnùnì ìⁿ téē ní xíndecu ndéé sanaha núú librí Sàlmú nàcuáa ní xáhãⁿ-dè xii-gá: “Vã dañá-n sã tíú yìqui cuñú Déhe-n chi ío vaha quide-gá”, duha ní chídó tnùnì téē ní xíndecu ndéé

sanaha —càchí té Pãblú xáhãⁿ-dè xií-yu.

³⁶ Te xáhãⁿ tùcu-dé:

—Te té Dàvií ní quide-dé nchaa chiúⁿ ní táhú Yá Ndiöxí cada-dé, te dàtnùnì ní xihí-dé. Te ní chindúxi ñaha-güedé xii-dé yatni nàcuáa yìndúxi cue ñanì tnahá-dè ndéé sanaha-gã, te xiãⁿ nì téhyú yìqui cuñú-dé. ³⁷ Te Jèsús chi ñá ní téhyú yìqui cuñú-gá, chi ní dándótó ñaha Yá Ndiöxí xii-gá. ³⁸ Te cuñí-í cachí tnúhu-í xii-ndo cuèndá cutnùnì iní-ndó nchaa-ndo sã cadá càhnu iní Yá Ndiöxí nchaa cuéchi-o, chi ní xihí Jèsús cuèndá naníhí tàhú-ó. ³⁹ Te nchaa ñáyiú na quìndáa iní ñáhã xii Jèsús te cada càhnu iní-gá nchaa sã ñà túú vaha ní quidé-yu, chi núu mee-ni tnúhu ní chídó tnùnì ndíi Moisés ná quìndáa iní-yu te vá naníhí tàhú-yu. ⁴⁰⁻⁴¹ Te ío coto-ndo mée-ndo cuèndá sã vã yáha-ndo dàtná ní cachí Yá Ndiöxí yáha cue ñáyiú ñá túú ní quide vaha ní xíndecu ndéé sanaha. Te nàcuáa ní cáháⁿ-gá ní chídó tnùnì ìⁿ téē ní cáháⁿ tnúhu-gá ndéé sanaha, te duha ní xáhãⁿ-gã xií-yu dàvá-áⁿ:

Cundedóho nchaa nchòhó ñáyiú cuèhé yuhu-xi na càháⁿ-í ìⁿ tnúhu te quini-ndó nã cuñúhu-ndo,

yuhú quidè-í vai núú sã ío vaha vitna ndècu-ndo ñuyíú-a,

te cuēi na còo ñáyiú cachí tnúhu xii-ndo nàcuáa ndùu nchaa sã vaha-áⁿ, dico nchòhó vá quìndáa iní-ndó,

te sã dúcáⁿ càda-ndo vá quìndáa iní-ndó, te dàcuíta nihnu-ndo mée-ndo.

Duha ní xáhãⁿ-gã xií-yu te ducaⁿ nì chídó tnùnì téē ní cáháⁿ tnúhu-gá ndéé sanaha —càchí té Pãblú xáhãⁿ-dè xií-yu.

⁴² Te òré ní ndee té Pãblú veñúhu ñáyiú isràél ndihí cue téē xica cuu ndihí-dé, te ní cáháⁿ ndàhú ñáyiú yìhi veñúhu núú-dè sã quihíⁿ-dé núú ùná nduu, te ñu-ni tnúhu ní cáháⁿ-dé cáháⁿ tucu-dé òré quexio-dé.

⁴³ Te sátá nì túhú veñúhu-yu, te vai ñáyiú isràél ndihí ñáyiú ní chitnahá ñáhã xií-yu nchicúⁿ nihnu quide nàcuáa quidé-yu càháⁿ ndihí-yu Yá Ndiöxí cuáhãⁿ ndihí-yu té Pãblú ndihí té Bèé. Te ní xáhãⁿ-güedé xií-yu sã vã dañá ndéé-yu canchicúⁿ nihnú-yu tnúhu sã càháⁿ nàcuáa quide Yá Ndiöxí sã cúú-xí-yu.

44 Te núú ùná nduu, nduu ndètatú-yu ní quexìo vai vihi ñáyiú, chi níhìí ñuú ní quexìo ndedóho-yu tnúhu Yá Ndiöxí. 45 Te cuendá sá ïo vai ñáyiú ní quexìo, núu xíãⁿ ní cuu cuédú íní ñáhá ñáyiú isràél xii té Páblú, te ní xícuèhé ñáhá-yu xii-dé. Te ní xáhãⁿ-yu xii-dé sá dándàhú ñáhá-dě xii-yu ndihí tnúhu càháⁿ-dé. 46 Te té Páblú ndihí té Bèé ñá túú ní yùhú ñáhá-güedě xii-yu. Te ní xáhaⁿ-güedě:

—Xìni ñuhu-xi díhna-gá nchòhó ñáyiú isràél càháⁿ ndihí-ndí tnúhu Yá Ndiöxí, te mee-ndo ñã cuíní-ndó cùndedóho-ndo. Te sá dúcáⁿ quide-ndo, te vá nánihí tàhú-ndó, te ni vã càháⁿ-gá-ndí tnúhu Yá Ndiöxí núú-ndó, dico càháⁿ-ndí núú dàva-gá ñáyiú cuèi ñá díú ñáyiú isràél cúü-yu, 47 chi ducaⁿ ñí táuchíúⁿ Yá Ndiöxí cada-ndí. Te ní cachí-gá:

Cuíní-í cundecu-ndo dàtná ìⁿ tée yòtnuú ñuhú cundecu-ndo càháⁿ-ndó tnúhu-í núú nchàa ñáyiú ñá túú cùndihí-ndo ñáyiú ndècu níhíí ñuyíú, te naníhí tàhú-yu, duha ní càháⁿ-gá —càchí té Páblú ndihí té Bèé xáhaⁿ-güedě xii-yu.

48 Te ñáyiú ñá túú cùu ñáyiú isràél ío ní cudíí ìní-yu sá dúcáⁿ ñí càháⁿ-güedě, te ní xítnàhá-yu sá ïo váha cuáháⁿ tnúhu Yá Ndiöxí. Te mee Yá Ndiöxí sa nàha-gá nándi cùu ñáyiú naníhí tàhú, te ñu-ni ñáyiú-áⁿ ñí sàndáá ìní-yu. 49 Te nchaa xichi xíãⁿ ñí sáháⁿ-yu ní càháⁿ-yu tnúhu-gá. 50 Te cue tée isràél ní ndatnúhu-güedě ndihí cue tée cùnuu, ndihí cue ñáyiú ñíhí cùnùu, te ñáyiú ñíhí-áⁿ ñà túú tnàhí cùmání-yu veñúhu. Te ní xáhaⁿ-güedě sá cáda ùhú-yu té Páblú ndihí té Bèé, te dàtnùní cuícúⁿ ñáhá-yu xii-güedě, te ducaⁿ ñí quidé-yu. 51 Te ní casaⁿ ñuhu té Páblú ndihí té Bèé sáhá-güedě ní naquidi-güedě tícá chúhmá ñí tníí sáhá-güedě. Te ducaⁿ ñí quide-güedě cuendá cutnùní ìní-yu sá ñà túú ní quide váha-yu. Te dàtnùní ní quee-güedě cuáháⁿ-güedě ñuú Ìconiú. 52 Te ñáyiú ní sàndáá ìní-xi tnúhu Jèsús ío váha ní cuu ìní-yu cuendá sá ñí naníhí tàhú-yu, te nchaaⁿ-yu sa ndècu ndihí-yu Espiritú Yá Ndiöxí.

14

Té Páblú ndihí té Bèé ndécú-güedě ñuú Ìconiú

1 Te ní quexìo té Páblú ndihí té Bèé ñuú Ìconiú. Te ní sáháⁿ-güedě veñúhu ñáyiú isràél, te ío váha ní càháⁿ-güedě tnúhu Yá Ndiöxí, te vai ñáyiú isràél ndihí ñáyiú ñá túú cùu ñáyiú isràél ní sàndáá ìní-yu tnúhu-gá. 2 Te dava ñáyiú isràél ñá ní sàndáá ìní-yu, te ní càháⁿ cuèhé-yu cuendá té Páblú ndihí té Bèé cuendá sá vã quìndáá ìní ñáyiú ñá túú cùu ñáyiú isràél. 3 Te ní xíndecu-güedě títñí nduu, te ñá túú tnàhí ni yùhú-güedě ní dácuáhá-güedě ñáyiú tnúhu Yá Ndiöxí. Te mee-gá ní chindee ñàha-gá ní quide-güedě títñí núú sã vã yòo tnàhí ndàcu cada, te ío ní cuñúhu-yu. Te ducaⁿ ñí quide-gá cuendá cutnùní ìní-yu sá ndàá càháⁿ-güedě sá méé-gã ío cùu ìní ñáhá-gã xii-yu, te naníhí tàhú-yu núu na quìndáá ìní-yu tnúhu-gá. 4 Te ní quee dava ñáyiú ñuú Ìconiú, davá-yu cùndihí-yu ñáyiú isràél ñáyiú ñá túú sàndáá ìní tnúhu Jèsús. Te davá-yu cùndihí-yu cue tée ní táuchíúⁿ Jèsús càháⁿ tnúhu-gá. 5 Te ñáyiú isràél ndihí dava-gá ñáyiú ñá túú sàndáá ìní-xi ní cuu ìⁿnuú-yu ndihí cue tée cùnuu sá cání-yu-güedě, te cuáha yúú ñáhã-yu xii-güedě. 6 Te té Páblú ndihí té Bèé ní níhí-güedě tnúhu sá cuíní-yu canihá-yu, núu xíãⁿ dayuhu ñí quee-güedě cuáháⁿ-güedě ñuú Lìstrá ndihí ñuú Dèrbé. Te ndi nduú ñuú-áⁿ yíndèhu-xi Licaoniá. Te ní sáháⁿ-güedě dava-gá ñuú lìhli càa yatni xíãⁿ. 7 Te nchaa ñuú-áⁿ ñí càháⁿ-güedě tnúhu Jèsús.

Ñuú Lìstrá ní sáhayúú ñáhã-yu xii té Páblú

8 Te ñuú Lìstrá ndécú ìⁿ tée yacua, mee-ni nùcòo-dé chi ducaⁿ tnàhí càa-dé ní cacu-dé. 9 Te ndedóho-dé tnúhu càháⁿ té Páblú, te ní cutnùní ìní té Páblú sá ïo sàndáá ìní tée yacua-ãⁿ sã Yá Ndiöxí cada tátna ñaha-gã xii-dé, núu xíãⁿ ní xíndéhé ñàha váha té Páblú xii-dé. 10 Te té Páblú ní càháⁿ níhi-dé, te ní xáhaⁿ-dě:

—Ndacuíñí cunutñí váha-n —càchí-dé xáhaⁿ-dě.

Te ní ndacuíñí cunu-dé te ní xica-ni-dé. 11 Te òré ní xini-yu sá tã Páblú ní quide tátna-dé tée yacua-ãⁿ, te nchaaⁿ-yu ní

cáháⁿ-yu tnúhu mée-yu tnúhu Licàoniá. Te ní cáháⁿ níhi-yu, te xitnàhá-yu:

—Cue téé-áⁿ sànuu sá ñáyiú cùu-güedé dico ñáhá, chi ndiöxí cúu-güedé te ní quexìo-güedé ñuyíú-a —càchí-yu xitnàhá-yu.

¹² Te ní cachí-yu sá tē Bèé cúu-dē ndiöxí dánàní-yu Jüpitér, te té Pāblú cúu-dē ndiöxí dánàní-yu Mèrcuriú, chi cuendá téé-áⁿ cúu-dē téé càháⁿ. ¹³ Te càa ñⁿ veñúhu yuhu ñúú-áⁿ núú quidé càhnú-yu ndiöxí sá dánàní-yu Jüpitér. Te dútú yíndàha veñúhu-áⁿ ndécá-dē ñⁿ úú ndicutu cuáháⁿ quehé veñúhu, te ñúhu itá dúcúⁿ-güedi. Te cue quití-áⁿ cahni-dé cada càhnu-dé ndihí-yu té Bèé ndihí té Pāblú ní cùu, chi ducaⁿ quidé-yu quide cahnú-yu ndiöxí-yu. ¹⁴ Te té Bèé ndihí té Pāblú ní níhi-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuendá cutnùní iní-yu sá ñá tnàhá iní-güedé nàcuáa sàni iní-yu cadá-yu. Te xinu-güedé cuanguihu-güedé tnuú-yu, te níhi ní cáháⁿ-güedé, te xáhaⁿ-güedé:

¹⁵ —¿Ná cuendá ducaⁿ cuíní-ndó càda-ndo? Te ñu-ni tnàha ñáyiú-ndo cùu-ndí, dicó-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vā cadá-gá-ndó nàcuáa quide-ndo, te quindáá iní-ndó Yá Ndiöxí, chi ñⁿdii-ni Yá Ndiöxí ndécú. Te ñu-gá ní cadúha-gá andíu ndihí ñuyíú-a ndihí lámár ndihí nchaandi túhú sá ío ñuyíú-a. ¹⁶ Te ndéé sanaha ñí dáñá Yá Ndiöxí ní quidé-yu nàcuáa cuáháⁿ iní méé-yu. ¹⁷ Te ní xóo cada-gá sá vāha cuendá cutnùní iní-yu sá ío vāha iní-gá. Te ñu-gá dácùuⁿ-gá dáú, te tàxi-gá sá nchító-ó chi xító-gá nchaa tatá xítú-ó, te xíáⁿ cúdíⁿ iní-ó ndècu-o ñuyíú-a —càchí té Pāblú ndihí té Bèé xáhaⁿ-güedé xii-yu.

¹⁸ Te cuéi ducaⁿ ñí xáhaⁿ-güedé nchaa tnúhu-áⁿ, dico ío úhú ní sándáá iní-yu ñá ní sàhní-yu ndicutu-áⁿ chi cuendá ducaⁿ tnàhí quidé-yu sàhní-yu ndicutu òré quidé càhnú-yu ndiöxí-yu.

¹⁹ Te ñuú Antiòquiá ndihí ñuú Ìconiú xíndecu dava ñáyiú isràél, te ní queé-yu cuáháⁿ-yu ñuú Lìstrá núú ndécú tē Pāblú. Te xíáⁿ ñí quexìo-yu te ní xáháⁿ-yu xii ñáyiú dii ñuú xíáⁿ sá càhní-yu té Pāblú. Te ní

sáha yúú ñáhá-yu xii-dé, te ní cáháⁿ-yu sá ñí xíhí-dé, te ní tñi ñaha-güedé xii-dé, te tñuhu ñaha-güedé xii-dé cuáháⁿ ñⁿ xio yuhu ñúú ní sá dáquéné ñaha-güedé. ²⁰ Te ní quexìo cue ñáyiú sándáá iní tnúhu Jèsús núú cātùu-dé-áⁿ, te ní nadúcúⁿ ndèé ñáhá-yu xii-dé, te ñini xínutñi-yu-áⁿ ñí ndacóo-dé cuánuhú ndihí ñaha tucu-dé xii-yu xití ñuú. Te nduu tñéé-áⁿ ñí ndee-dé ndihí té Bèé cuáháⁿ-güedé ñuú Dèrbé.

²¹ Te ní cáháⁿ-güedé tnúhu Yá Ndiöxí ñuú-áⁿ, te ío vai ñáyiú ní sándáá iní-yu tnúhu-gá. Te dātñùní ní quee-güedé cuáháⁿ tucu-güedé ñuú Lìstrá, ndihí ñuú Ìconiú, ndihí ñuú Antiòquiá. ²² Te ní xáhaⁿ-güedé xii-yu sá vā dáñá ñihnú-yu tnúhu Jèsús. Te sá dúcáⁿ ñí cáháⁿ-güedé, te vñi-gá ní cudíⁿ iní-yu cadá-yu nàcuáa cuíní Yá Ndiöxí cadá-yu, te ní xáhaⁿ-güedé:

—Dacuití cùndecu-o ñuyíú-a ndoho-o, te dātñùní ducaⁿ te nacuaca ñaha Yá Ndiöxí xii-o —càchí-güedé xáhaⁿ-güedé xii-yu.

²³ Te ní sáháⁿ-güedé ndi tnahá ñⁿ ñⁿ xichi núú ndécú ñáyiú dacuaha tnúhu Yá Ndiöxí, te ní taxi ndecu-güedé cue téé quindaha ñaha xii-yu, te ní cáháⁿ ndihí-güedé Yá Ndiöxí, te ñá túú tnàhí ná ní xèxi-güedé cuendá sá ñí cáháⁿ ndihí-güedé-gá. Te ní xáhaⁿ-güedé sá Yá Ndiöxí coto ñaha-gá xii-yu chi ñu-ni-gá ní sándáá iní-yu.

Té Pāblú ndihí té Bèé cuáháⁿ tucu-güedé ñuú Antiòquiá Siríá

²⁴⁻²⁵ Te dātñùní ní quee té Pāblú ndihí té Bèé cuáháⁿ-güedé, ní yáha-güedé distritú Pìsidíá. Te ní quexìo-güedé ñuú Pèrgé, xíáⁿ ñí cáháⁿ-güedé tnúhu Jèsús. Te ñuú-áⁿ yíndèhu-xi Panfilíá. Te dātñùní cuáháⁿ-güedé ñuú Àtalíá. ²⁶ Te yacáⁿ ní quee-güedé bàrcú cuánuhú tucu-güedé ñuú Antiòquiá. Te ñuú-áⁿ cúu-xí ñuú núú ñí xícaⁿ táhú-yu núú Yá Ndiöxí cuendá sá chíndèe ñaha-gá xii-güedé chiuⁿ quide-güedé. Te cuendá sá ñí ndihí chiuⁿ-güedé nchaa ñuú núú ñí sáháⁿ-güedé, núú xíáⁿ cuánuhú-na-güedé. ²⁷ Te ní ndexìo-güedé ñuú-áⁿ, te ní cana-güedé nchaa ñáyiú sándáá iní tnúhu-gá, te ní cani-güedé cuendú núú-yu nchaa nàcuáa ní cuu núú ñí sáháⁿ-güedé, te xáhaⁿ-güedé:

“Yá Ndiöxí ío ní chindee ñàha-gá xii-ndí ní cáháⁿ-ndí tnúhu-gá núú nǐ sáháⁿ-ndí, te mee-gǎ ní quide sá tnàhá ñáyiú ñá túú cùu ñáyiú isràél ní xíndedóho-yu tnúhu-gá cuèndá quíndáá iní-yu”, cǎchí-güedé xǎháⁿ-güedé xií-yu. ²⁸ Te vǎi nduu ní xíndecu-güedé ñuú Antiòquiá ndihí nchaa ñáyiú ní sándáá iní tnúhu Jèsús.

15

Ní nataká ñáyiú sándáá iní tnúhu Jèsús ñuú Jerusálén

¹ Te ní quee ñⁿ úú cue tée distritú Jùdeá cuáháⁿ-güedé ñuú Antiòquiá, te ní sáá-güedé, te ní xáhaⁿ-güedé xii ñáyiú sándáá iní tnúhu Jèsús sá ñuú vǎ cuáha-güedé sèñá ñⁿ nchaa cue tée dàtná ní cachí ndí Moisés, te vǎ nánihí tàhú-güedé. ² Te sá dúcáⁿ nǐ cáháⁿ cue tée-áⁿ, te ní ngüíta té Pǎblú ndihí té Bèé ní tenàá-güedé cue tée-áⁿ, chí dandàhú ñáhá-güedé cuìní-güedé ní cùu. Te nchaa ñáyiú sándáá iní tnúhu-gá ní cachí-yu sá quíhíⁿ té Pǎblú ndihí té Bèé ndihí ñⁿ úú-gá-güedé ñuú Jerusálén. Te yàcáⁿ cada-güedé ñⁿ jùndá ndihí mee-ni cuè tée ní táuchíúⁿ Jèsús cǎháⁿ tnúhu-gá, ndihí cue tée yíndaha ñáyiú sándáá iní tnúhu-gá ñuú-áⁿ, te jùndá-áⁿ cada ndáá-güedé tnúhu ní cáháⁿ cue tée ní sáá ñuú Antiòquiá.

³ Te nchaa ñáyiú sándáá iní tnúhu-gá ní quide ndee iní ñáhá-yu xii-güedé, te ní tní-güedé ichi cuáháⁿ-güedé. Te ní yáha-güedé distritú Fèniciá ndihí distritú Sàmariá, te yàcáⁿ ní caní-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiöxí, te ní cudíí víhí iní nchaa ñáyiú ní xíndedóho-áⁿ.

⁴ Te té Pǎblú ndihí té Bèé ní ndexìo-güedé ñuú Jerusálén, te ío ní cudíí iní-yu sá ní ndexìo váha-güedé. Te ndècu dava-gá cue tée ní táuchíúⁿ Jèsús dácuaⁿha ñaha xií-yu tnúhu-gá, ndihí cue tée yíndaha ñaha xií-yu, ndihí dava-gá ñáyiú sándáá iní tnúhu-gá, te ní caní-güedé cuèndú núu-yu nàcuáa ní quide Yá Ndiöxí ní chindee ñàha-gá xii-güedé ní quide-güedé chiuⁿ-gá. ⁵ Te ndècu ñⁿ úú cue tée ní tuha ichi Yá Ndiöxí, te cue tée-áⁿ cúu-güedé cue tée farisèú, te ní ndacuíñí-güedé, te ní xáhaⁿ-güedé.

—Dacuítí xini ñuhu-xi sá cuáha-güedé sèñá ñⁿ cue tée cùmání cue tée ñá túú cùu ñáyiú isràél, te cùñaha-ndo sǎ ná cádá-güedé nchaa nàcuáa ní chídó tnùní ndí Moisés —cǎchí cue tée cùu farisèú-áⁿ xǎháⁿ-güedé xii-güedé.

⁶ Te cue tée ní táuchíúⁿ Jèsús dácuaⁿha ñaha xii ñáyiú tnúhu-gá, ndihí cue tée yíndaha ñáyiú sándáá iní tnúhu-gá ní quide-güedé jùndá cuèndá ní ndatnúhu-güedé nása cunduu. ⁷ Te vǎi vihi tnúhu ní cáháⁿ-güedé. Te té Pèlú ní ndacuíñí-dé, te ní xáhaⁿ-dè xii-güedé:

—Nchòhó cue tée ndècu ndihí-í ichi Xítohó Jesucristú, chí cùndedóho ñⁿ tnúhu na cǎháⁿ-í-a. Sa nàha-ndo sá nǐ cachí Yá Ndiöxí sá díu-í cáháⁿ-í tnúhu Jèsús núú ñáyiú ñá túú cùu ñáyiú isràél cuèndá sá quíndáá iní-yu, te naníhí tàhú-yu. ⁸ Dico Yá Ndiöxí sa nàha-gá nása cǎa iní ñⁿ ñáyiú. Te cùtnuní iní-ó sǎ cúu iní ñáhá-gǎ xii cue ñáyiú ñá túú cùu ñáyiú isràél, chí ní sáñaha-gǎ Espiritú-gá ndécú ndihí-yu dàtná cuìní-ndó nǐ taxi-gá ndécú ndihí nchoo. ⁹ Chí Yá Ndiöxí ñⁿnuu-ni cùu iní ñáhá-gǎ xii-o nchàa-o ndihí cue ñáyiú ñá túú cùu ñáyiú isràél, chí tnàhá-yu ní xócání-gǎ nchaa sá cuèhé sá dúhá nǐ xóo cadá-yu ndéé òré ní sándáá iní-yu Jèsús. ¹⁰ ¿Te ná cuèndá nchòhó cuìní-ndó cǎa ñáyiú ní sándáá iní tnúhu-gá ñⁿ sǎ ñá tnàhá iní-gá sá cádá-yu? Te cuìní-ndó dándoho-ndó-yu. Te ní nchò te ní cue ñaní tnáhá-ó nǐ xíndecu ndéé sanaha ñá ní ndàcú-yu cadá-yu nchaa xiáⁿ. ¹¹ Te vǎ dúcáⁿ cǎháⁿ-ndó, chí sa nàha-ndo sá Yá Ndiöxí ní cundàhú iní ñáhá-gǎ xii-o, te dió ducaⁿ nǐ quide-gá sá nánihí tàhú-ó nchàa-o. Te díu-ni ducaⁿ nǐ quide-gá ñáyiú ñá túú cùu ñáyiú isràél, te ní naníhí tàhú-yu —cǎchí té Pèlú xǎháⁿ-dè xii-güedé.

¹² Te dàtnuní té Bèé ndihí té Pǎblú ní ngüíta-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xáhaⁿ-güedé xií-yu nàcuáa ní chindee ñàha Yá Ndiöxí xii-güedé, te ní quide-güedé vǎi núú sǎ vǎ yóo tnáhí ndàcu cada, te ducaⁿ te ní cutnùní iní ñáyiú ñá túú cùu ñáyiú isràél sá ndáá cǎháⁿ-güedé. ¹³ Te òré ní ndihí cuèndú ní cáháⁿ-güedé, te té Jàcobó ní xáhaⁿ-dè:

—Nchòhó cue téé ndècu ndihí-í ichi Xítohó Jesucristú, chí cùndèdóho ìⁿ tnúhu na càháⁿ-í-a. ¹⁴ Té Xímú, àdi Pelú chí úú diu-dé, ní cani-dé cuèndú nàcuáa ní quide Yá Ndiòxí ndéé díhna ní dáquéé d^hⁿ-gá ñáyiu ñá túú cùu ñáyiu isràél tnuú nchaa ñáyiu ñá túú ndècu ichi-gá, cuèndá cuìní-gá chiñuhu ñàhá-yu xii-gá. ¹⁵ Te dàtnùní ní cáháⁿ-dé nàcuáa ní cáháⁿ Yá Ndiòxí ndéé sanaha. Te duha ní chídó tnùní cue téé ní xóo cáháⁿ tnúhu-gá ndéé sanaha nàcuáa ní cáháⁿ-gá, te duha ní cachí-gá:

¹⁶ Dàtná cuìní-ndó cùu ìⁿ vehe ní sáá te ní ngoyo te dàndaa-güedé xito cùu uú, ducaⁿ sãtnahá-xi cada-xi ìⁿ nduu,

chí ñaní tnáhá ndíi Dàvíí ní xóo cáháⁿ ndihí ñàhá-yu xii-í ní cùu, te ní dáña ndéé-yu ichi-í,

te na quixi-í te natuha ñaha tùcú-yu.

¹⁷ Te ducaⁿ te vài ñáyiu ñá túú cùu ñáyiu isràél nandùcú-yu ichi-í te cáháⁿ ndihí ñàhá-yu.

¹⁸ Duha ní cáháⁿ Yá Ndiòxí, te ducaⁿ ní chídó tnùní cue téé ní xóo cáháⁿ tnúhu-gá ndéé sanaha —càchí té Jàcobó xãhaⁿ-dè xii-güedé.

¹⁹ Te xãhaⁿ tùcu-dé:

—Yúhú càchí iní-í sá vã cúú dàsatú-ó iní nchaa ñáyiu ta sàndáá iní-xi tnúhu Yá Ndiòxí, ñáyiu ñá túú cùu ñáyiu isràél, te ìⁿ úú-ni tnúhu cúñaha-o nàcuáa cada-yu. ²⁰ Dico xini ñuhu-xi daquihíⁿ-ó tùtú cúñaha-o sã vã cáxí-gã-yu nchaa sá nchító-ó ndùu táhú nchaa sá càchí-yu cùu ndiòxí-yu. Te cúñaha-o sã vã càháⁿ ndihí cue téé ñadhí te núu ñá díú ñadhí-güedé cúú-yu, te ni cuè ñáyiu díhí vã càháⁿ ndihí-yu téé te núu ñá díú yí-yu cùu-güedé, te vã cáxí-yu cuñú quiti cuèhné, te vã cáxí-yu níñí. ²¹ Te ducaⁿ cúñaha-o, chí ndi tnahá ñuú núú ndécü-yu, te xíndecu ñáyiu isràél dácuahá-yu tnúhu ní chídó tnùní ndíi Moisés, te ndi tnahá nduu ndètatú-yu dàcuahá-yu tnúhu ndíi veñuhu-yu —càchí té Jàcobó xãhaⁿ-dè xii-güedé.

²² Te dàtnùní cue téé ní táuchíúⁿ Jèsús dacuaha ñaha xií-yu tnúhu-gá, ndihí cue téé yíndaha ñáyiu sàndáá iní tnúhu-gá ní cachí-güedé sá ndúcú-güedé ìⁿ úú-gá cue téé quihíⁿ ndihí té Pãblú ndihí té Bèé ñuú Antiòquia, te diu-ni ducaⁿ ní cáháⁿ

dava-gá ñáyiu ndècu ichi-gá. Te úú cue téé ní ndúcú-güedé, ìⁿ-dè nání-dè Silás, te ìⁿ-dè nání-dè Jùdás, àdi Barsabás chí úú diu-dé, te cùnuu-güedé ndi ndùú-güedé. ²³ Te ní cadúha nchaa cue téé cùnuu tutú canehe-güedé quihíⁿ, te duha càháⁿ-xi:

“Cóvãha díí-ndó nchàa-ndo. Nchúhú cue téé ní táuchíúⁿ Jèsús cáháⁿ-ndí tnúhu-gá, ndihí cue téé yíndaha cue ñáyiu sàndáá iní tnúhu-gá quide ndee iní ñàhá-ndí xii nchòhó cue ñáyiu ndècu ndihí-ndí ichi-gá cuèi ñá díú ñáyiu isràél cúú-ndó. Te nchòhó ñáyiu xíndecu ñuú Antiòquia, ndihí nchòhó ñáyiu ndècu distritú Sìriá, ndihí nchòhó ñáyiu ndècu distritú Ciliciá, càchí tnúhu-ndí xii-ndo sã ²⁴ ní níhí-ndí tnúhu sá ìⁿ úú cue téé ndècu iha ní quixi-güedé núú ndécú-ndó, te ñá túú chiuⁿ ni tahu-ndí quixi-güedé. Te sá ìⁿ tnúhu ní cáháⁿ-güedé ní xãhaⁿ-güedé xii-ndo sã ngündecu seña ñi-ndo, te canchicúⁿ nihnu-ndo nchàa nacuáa ní chídó tnùní ndíi Moisés, te xíãⁿ ní sani ìⁿ ní sani úú iní-ndó, chí ñá túú xini-ndó núu ndáá tnúhu càháⁿ-güedé àdi ñá ndáá. ²⁵ Te ní ndatnúhu-ndí nàcuáa cunduu sá téndaha-ndí úú cue téé quixi-güedé ndihí té Bèé ndihí té Pãblú, cue téé ío cùu iní-ndí, te cue téé-áⁿ cáháⁿ-güedé nàcuáa cáháⁿ-ndí-a. ²⁶ Te diu-ni té Bèé ndihí té Pãblú ní sãháⁿ-güedé ní cáháⁿ-güedé tnúhu Xítohó Jesucristú nchaa xichi. Te ndi tnahá cuaháⁿ-güedé cuìní-yu cahni ñàhá-yu xii-güedé. ²⁷ Te tendaha-ndí té Jùdás ndihí té Silás quixi-güedé tnahá-güedé cachí tnúhu váha-güedé nàcuáa cuaháⁿ tnúhu càháⁿ-ndí. ²⁸ Te diu-ni ducaⁿ càháⁿ-ndí càchí tnúhu-ndí nàcuáa càháⁿ Espiritú Yá Ndiòxí cada-ndo, chí nchúhú vã càháⁿ-ndí sá cádá-ndó nchàa sá ní cáháⁿ ndíi Moisés cada ñáyiu, chí ío úhú, te vã yóo ndacu cada. Te vitna na càháⁿ-ndí ìⁿ úú-ni tnúhu nàcuáa cada-ndo. ²⁹ Vã cáxí-ndó sã nchító-ó ndùu táhú nchaa sá càchí ñáyiu cùu ndiòxí-yu, te vã cáxí-ndó níñí, te vã cáxí-ndó cuñú quiti cuèhné, te vã càháⁿ ndihí cue téé ñadhí te núu ñá díú ñadhí-güedé cúú-yu, te ni cuè ñáyiu díhí vã càháⁿ ndihí-yu téé te núu ñá díú yí-yu cùu-güedé. Te núu na càda-ndo nchaa nacuáa càháⁿ-ndí-a, te cada

váha-ndo. Te vitna ío cada ndee ìní-ndo nchàa-ndo-na.” Duha ní chídó tñùní-güedé nùú tütú ní tendaha-güedé cuáhán.

³⁰ Te ní quide ndee ìní-yu cue tée quíhín ñuú Antiòquiá, te ducaⁿ te ní xica-güedé cuáhán-güedé. Te òré ní quexìo-güedé ñuú-án, te ní cana-güedé nchaa ñáyiú sàndáá ìní tñúhu Jèsús, te ní sáñaha-güedé tutú xií-yu. ³¹ Te ní dácuáhã-yu tutú ní sáñaha-güedé-án, te ní cudíí víhí ìní-yu chi ío váha càháⁿ tutú-án. ³² Te té Jùdás ndihí té Silás tñàhá-güedé ní nduu táhú-güedé cáháⁿ-güedé tñúhu sá dácàhu ìní ñáhá Yá Ndiòxí. Te ní xáhaⁿ-güedé vài tñúhu nàcuáa cadá-yu, te víhi-gá ní cudíí ìní-yu cadá-yu nàcuáa càháⁿ Yá Ndiòxí cadá-yu. ³³ Te ní xíndecu-güedé ìⁿ úú nduu ndihí-yu, te dātñùní ní quide ndee ìní ñáhã-yu xii-güedé cuendá sá nùhú-güedé nùú vèxi-güedé, te mee-ni tē Jùdás cuánuhú-dé. ³⁴ Te té Silás ní xáhaⁿ-dē sá vã nùhú-ni-dé. ³⁵ Te té Pãblú ndihí té Bèé ní ndóo-güedé ní cáháⁿ-güedé tñúhu Yá Ndiòxí ñuú Antiòquiá, te vài-gá tucu ñáyiú Antiòquiá ní cáháⁿ-yu tñúhu-gá.

Xito cùu uú cuáhán té Pãblú càháⁿ-dē tñúhu Yá Ndiòxí nùú ñáyiú

³⁶ Te sátá ñí cuu cuéhé nduu, te ní xáhaⁿ tē Pãblú xii té Bèé:

—Na quíhín-ó nchàa ñuú nùú ñí sáhán-ó ñí cáháⁿ-ó tñúhu Yá Ndiòxí cáháⁿ ndihí-o nchàa ñáyiú ní tuha ichi-gá cuendá quini-ó nùu ndècu váha-yu —càchí-dé xáhaⁿ-dē.

³⁷ Te té Bèé ní xáhaⁿ-dē sá quíhín ndihí-güedé té Juáá, àdi Mácú chi úú diu-dé. ³⁸ Dico té Pãblú ñá ní dàña-gá-dé quíhín té Juáá, chi ní dándöo ñaha-dē xii-güedé cútnàhá ní xíndecu-güedé Pànfiliá, te ní nacuico-dē cuánuhú-dé, te ñá túú-gã ní sáhán ndihí ñaha-dē xii-güedé. ³⁹ Xíãⁿ ní cuu ní tenáa tñàhá tē Bèé ndihí té Pãblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáhán-güedé Chìpré. ⁴⁰ Te té Pãblú ní xáhaⁿ-dē xii té Silás sá quíhín ndihí ñaha-dē, te ñáyiú sàndáá ìní-xi tñúhu Jèsús ní cáháⁿ ndihí-yu Yá Ndiòxí sá chíndèe ñaha-gá xii-güedé. ⁴¹ Te ní xica-güedé cuáhán-güedé te ní yáha-güedé ñihí distritú Sìriá ndihí distritú Cìliciá. Te ní cáháⁿ-güedé tñúhu Jèsús nùú nchàa

ñáyiú ní sàndáá ìní tñúhu-gá, nùu xíãⁿ ío-gá ní cudíí ìní-yu cadá-yu nàcuáa càháⁿ Yá Ndiòxí.

16

Tñàhá té Timùteú cuáhán ndihí-dé té Pãblú ndihí té Silás

¹ Te té Pãblú ndihí té Silás cuáhán-güedé ñuú Dèrbé ndihí ñuú Lìstrá, te ñuú Lìstrá yacáⁿ ndécú ìⁿ tée nàni Timuteú. Te tée-án sàndáá ìní-dé tñúhu Jèsús, te tñàhá náná-dē sàndáá ìní-aⁿ tñúhu-gá, te ñaha is-ràél cúú-án, te tée griégú cúú tātá-dē.

² Te nchaa ñáyiú ní sàndáá ìní tñúhu-gá ñáyiú ndècu ñuú Lìstrá, ndihí ñáyiú ñuú Ìconiú, nchaa ñáyiú-án cudíí ìní-yu nàcuáa quide-dé. ³ Te ní cuini té Pãblú sá tñàhá té Timùteú quíhín ndihí-dé dava-gá ñuú, nùu xíãⁿ díhna-gá señá ní sáha té Pãblú ñíí té Timùteú, chi ñá ní tñàhá ìní té Pãblú sá càháⁿ cuéhé ñáyiú is-ràél cuendá té Timùteú. Te nchaa ñáyiú is-ràél ndécú ñuú-án xini-yu sá tē griégú cúú tātá-dē, te ñá díú tēe is-ràél cúú-dē, te xíãⁿ ní sáha té Pãblú señá ñíí té Timùteú. ⁴ Te ndi tñahá ñuú ndi tñahá ñuú cuáhán-güedé càháⁿ ndihí-güedé nchaa ñáyiú ní sàndáá ìní tñúhu Jèsús. Te ní xáhaⁿ-güedé nàcuáa càháⁿ tutú ní cadúha cue tée ní táuchíúⁿ Jèsús dacuàha ñaha xií-yu tñúhu-gá, ndihí cue tée yíndaha ñáyiú sàndáá ìní tñúhu-gá ñuú Jerusalén. ⁵ Te cuendá ducaⁿ ñí sáhán-güedé nchaa ñuú nùú ndécú ñáyiú sàndáá ìní tñúhu-gá ní dácuáhã ñaha-güedé xií-yu, nùu xíãⁿ tá cùu túha-gá-yu tñúhu Yá Ndiòxí, te vài-gá-yu ní tuhá-yu ichi-gá.

Ní dácótó ñàha-xi xii té Pãblú sá ñí xini-dé ìⁿ tēe distritú Macèdoniá

⁶ Te ñá ní dàña Espiritú Yá Ndiòxí quíhín-güedé cáháⁿ-güedé tñúhu-gá distritú Àsiá, nùu ní sáhán-güedé distritú Frigiá ndihí distritú Galaciá cáháⁿ-güedé tñúhu-gá. ⁷ Te ní sáá-güedé yuhu distritú Misiá. Te quíhín-güedé distritú Bitiniá ní cùu, dico ñá ní dàña Espiritú Yá Ndiòxí quíhín-güedé yacáⁿ. ⁸ Te ní yáha-güedé Misiá, te ní quexìo-güedé ñuú Tróas, te yacáⁿ ní nanitnàhá-ndí ndihí-dé. ⁹ Te ìⁿ niú ní dácótó-xí nùú tē Pãblú sá ñí xini-dé ìⁿ tēe

distritú Macèdoniá nútñi-dé, te ní xáhaⁿ tée-áⁿ xii té Páblú: “Cada ndee iní-n quíhíⁿ-n Màcedoniá chi dacuàha ñaha-n nchaa sá xini-n”, cächí-dé xáhaⁿ-dë, ní dácótó ñaha-xi xii té Páblú. ¹⁰ Te cuendá sá dúcáⁿ ñí dácótó ñaha-xi xii té Páblú núu ní ndatnúhu-ndí quíhíⁿ-ndí Macèdoniá, chi ní cutnúni iní-ndí sá cáná ñaha Yá Ndiöxí quíhíⁿ-ndí cáháⁿ-ndí tnúhu-gá núú ñáyiú yàcáⁿ.

Té Páblú ndihi té Silás ndécú-güedë ñuú Filipú

¹¹ Te ní quée-ndí bàrcú ñuú Tròás, te cuáháⁿ ndáá-ndí ñuú Samòtraciá, te yàcáⁿ ní quexìo-ndí, te ní yáha-ni-ndí cuáháⁿ-ndí. Te nduu tnée ní quexìo-ndí ñuú Nèápolis. ¹² Te yàcáⁿ ní quene-ndí bàrcú, te xica-na-ndí cuáháⁿ-ndí ñuú Filipú te ñuú-áⁿ yíndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí. Te ñuú Filipú-áⁿ ño cùnuu-xi, chi ío chitu ñáyiú ròmá ní ngóo-yu. ¹³ Te nduu ndètátú-yu ní quée-ndí ñuú cuáháⁿ-ndí ñⁿ xio yuhu yùte, chi yàcáⁿ sàháⁿ-yu càháⁿ ndihí-yu Yá Ndiöxí. Te òré ní quexìo-ndí, te ní naníhí tnáhá-ndí ndihi mee-ni ñáyiú dìhí, te ní cáháⁿ-ndí tnúhu Yá Ndiöxí ní xíndedóho-yu. ¹⁴ Te ndècu ñⁿ ñaha nanj Lidiá ní xíndedóho-aⁿ nàcuáa ní cáháⁿ-ndí, te ñaha ñuú Tiàtirá cúú-áⁿ, te dìco-aⁿ dóó muradú, te ío càháⁿ ndihi-aⁿ Yá Ndiöxí. Te ñuú-ni mee Yá Ndiöxí ní chindee ñaha-gá ní sándáa iní-aⁿ tnúhu ní cáháⁿ té Páblú. ¹⁵ Te ní sandute-aⁿ ndihi landú-aⁿ, ndihi nchaa ñáyiú xínu cuechi núú-aⁿ, te ní cachí-aⁿ xii-ndí:

—Te núu ní cutnúni iní-ndó sá ñí sándáa ndisa iní-í tnúhu Jesús, te cundecu tnaa-ndo vèhe-í —cächí-aⁿ xii-ndí.

Te ní quide yica-aⁿ ñí xíndecu-ndí vehe-aⁿ.

¹⁶ Te ñⁿ nduu ñùhu-ndí ichi cuáháⁿ-ndí núu càháⁿ ndihí-yu Yá Ndiöxí, te ní naníhí-ndí ñⁿ xíchí ñúhú ichi, te yìhí ñaha espíritú cündìhí yucu ñávãha xii-xi. Te xíãⁿ ní quide ní cáháⁿ-xi nchaa sá vã yõ tnàhí cùtnuní iní-xi núu nchàa ñáyiú ní sángándihí ñaha xii-xi. Te ñáyiú dii vèhe-xi xínu cuechi-xi ío vãi díhúⁿ ní níhí-yu chi ní cháhu nchaa ñáyiú ní sángándihí ñaha xii-xi.

¹⁷ Te xíchí-ãⁿ ñí chinchícúⁿ ñáhá-xí xii-ndí

ndihi té Páblú ndëndaha ñaha-xi cuáháⁿ, te ní cáháⁿ níhi-xi xáhaⁿ-xi xii dava-gá ñáyiú:

—Cue tée-a xínu cuechi-güedé núu Yá Ndiöxí, chi ío càhnu cuu-gá, te cächí tnúhu-güedé nása cada-ndo naníhí tãhú-ndó —cächí-xi xáhaⁿ-xi xii-yu.

¹⁸ Te titní xito ní yáha-ndí ducaⁿ-ni ñí cáháⁿ-xi. Te ñá ní cundee-gá iní té Páblú sá dúcáⁿ càháⁿ-xi, núu ní nanchocuíhnu-dé núu nútñi-xi, te ní xáhaⁿ-dë xii espíritú cündìhí yucu ñávãha yìhí ñaha xii-xi:

—Ío càhnu cuu Xitohó Jesucristú, núu xíãⁿ cächí-í sá xócuíñí-n vã quíhí-gã-n yìquì cuñú xíchí-a —cächí-dé xáhaⁿ-dë.

Te òré-ni ní quée espíritú cündìhí yucu ñávãha-áⁿ yìquì cuñú-xi.

¹⁹⁻²⁰ Te ñáyiú dii vèhe-xi xínu cuechi-xi-áⁿ ñí cutnúni iní-yu sá vã níhí-gá-yu díhúⁿ cuendá tnúhu càháⁿ-xi, núu ní tñí-yu té Páblú ndihi té Silás ndécá ñáhá-yu cuáháⁿ núu cuè tée cùchiuⁿ Romá, te xáhãⁿ-yu xii-güedé:

—Cue tée-a cùu-güedé cue tée isràél, te ío dusaⁿ xíquide-güedé ñuú-ó. ²¹ Te cuíni-güedé cada-o nàcuáa quide-güedé, te vã cúú dùcaⁿ cada-o chi ñáyiú nacióⁿ Rómá cúú-ó —cächí-yu xáhãⁿ-yu xii cue tée cùchiuⁿ.

²² Te uuⁿni ní cáháⁿ ncháa-yu, te xáhãⁿ-yu sá ñá túú quide váha té Páblú ndihi té Silás. Te cue tée cùchiuⁿ ní cãndeé-güedé dóó té Páblú ndihi dóó té Silás ní ndátá-güedë, te ní táuchíuⁿ-güedë caniha-güedë ndihi tñudì xii-güedé. ²³ Te ní caniha-güedë, te dãtnuní ní chihi ñaha-güedë vecaá. Te ní xáhaⁿ-güedë xii tée ndëchito vecaá sá cáda cuèdadú víhí-dë cuendá ná canú-güedë vecaá. ²⁴ Te cuendá sá dúcáⁿ ñí cáháⁿ-güedé, núu tée ndëchito vecaá ní dáyãha ñaha-dë ñgá cuàrtú ndécú xití vecaá, te ní chihi-dé sáhá-güedë yaú nduhu, te ní quide tñi-dé.

²⁵ Te dava niú ní cáháⁿ ndihi té Páblú ndihi té Silás Yá Ndiöxí, te ní xita-güedé ndudú ní quide càhnu ñaha-güedé xii-gá. Te dava-gá cue tée yìhí vecaá ní xíndedóho-güedé nàcuáa ní xita-güedé. ²⁶ Te uuⁿni níhí víhí ní tnáa ní quidi-xi ndéé cimientú vecaá, te ní nacaáⁿ nchaa yèhe vecaá, te ní ndihi cadená ndútú cuè tée yìhí vecaá ní nandáxi. ²⁷ Te ní ndiquíú cúnú iní

tée ndëñchito vecaá, te ní quide cuëndá-dé nchíí nchaa yèhe vecaá. Te ní tava-dé machití-dé cahni-dé méé-dé ní cùu, chi ní cáháⁿ-dë sá ní ndihí cue tée yíhi vecaá ní xinu ní cùu. ²⁸ Te té Páblú ní cáháⁿ níhi-dé, te xáhaⁿ-dë xii tée ndëñchito vecaá:

—Vá dúcáⁿ càda-n cahni-n mee-n, chi nchaa-ni-ndí yíhí —càchí-dé xáhaⁿ-dë xii tée ndëñchito vecaá.

²⁹ Te dätñuní ní xícáⁿ tée ndëñchito vecaá ñuhú, te xinu-dé cuánguihu xití vecaá núu yíhí tē Páblú ndihí té Silás, te quèdi ñaha-ná-xi xii-dé ní quexio-dé ní ngüñí xití-dë núu-güedë. ³⁰ Te dätñuní ndécá ñaha-dé xii-güedé ní ndee vecaá, te ní xícáⁿ tnúhú-dë núu-güedë, te xáhaⁿ-dë:

—Nchòhó cachí tnúhu-ndo ñasa cada-í naníhí tàhú-í —càchí-dé xáhaⁿ-dë.

³¹ Te ní xáhaⁿ-güedë:

—Quindáá iní-n ndihí ñadihí-n, ndihí landú-n, ndihí nchaa ñáyiú xinu cuechi núu-n tnúhu càháⁿ Xítohó Jesucristú, te naníhí tàhú-ndó —càchí-güedé xáhaⁿ-güedë.

³² Te ní dácuáhá ñaha-güedé xii tée ndëñchito vecaá ndihí nchaa ñáyiú ndècu vehe-dé tnúhu Yá Ndiöxí. ³³ Te diu-ni òré-áⁿ ní naquete-dé sátá-güedé núu ní ñáni, te dätñuní ní sandute-dé ndihí-yu. ³⁴ Te ndèca ñaha-dé cuáháⁿ vehe-dé ní sáñaha-dë sá ní xexi-güedé, te ní cudíí víhí iní tée ndëñchito vecaá ndihí nchaa-dé vehe-dé sá ní tuhá-yu ichi Yá Ndiöxí. Te cuándihu tucu té Páblú ndihí té Silás vecaá.

³⁵ Te nduu tnéé ní xáhaⁿ cuè tée cùchiuⁿ xii poleciá cuáháⁿ-güedé cùu-güedé tée ndëñchito vecaá queñuhu-dé úú cue tée cuánguihu ndedí nduu ìcu núhú-güedé.

³⁶ Te tée ndëñchito vecaá ní xáhaⁿ-dë xii té Páblú ndihí té Silás:

—Cue tée cùchiuⁿ ní cachí-güedé sá queé-ndó nùhú-ndó, chi ñá túú-gã ná cada-güedé, chi sa ní yáha cuëndá-ndó —càchí tée ndëñchito vecaá xáhaⁿ-dë xii-güedé.

³⁷ Te té Páblú ní xáhaⁿ-dë xii cue tée cùu poleciá:

—Tée ròmá cùu-ndí, te vá cùu dùcaⁿ-ni cunduu, chi ní caniha-güedé tnudíi xii-ndí, te ní xiní-yu ncháa-yu. Te ñá túú tnàhí ní xicáⁿ tnúhú-güedé nùu ndáá ndècuéchi-ndí àdi ñáhá, chi cuëndá-ni ní chihí ñaha-güedé

vecaá xii-ndí. Te vitna cuení-güedé dacăcu ñaha-güedë núhú-ndí cuëndá sá vã yõo quini ñáhá nùhú-ndí cáháⁿ-güedë, dico vá cùu dùcaⁿ cada ñaha-güedé xii-ndí. Chí cuáháⁿ cùñaha-ndo na quixi mee-güedé queñuhu ñaha-güedë —càchí té Páblú xii-dé cue poleciá.

³⁸ Te cue tée cùu poleciá cuánuhú-güedé núu ndécú cuè tée cùchiuⁿ, te ní xáhaⁿ-güedé nàcuáa ní cáháⁿ té Páblú. Te sá dúcáⁿ ní xáhaⁿ pòleciá sá tée ròmá cùu-güedë, xiáⁿ ní yùhú-güedé. ³⁹ Te ní sáháⁿ cue tée cùchiuⁿ yehe vecaá, te ní xáhaⁿ-güedé sá cáda càhnu iní-güedé sá ní chihí ñaha-güedé vecaá, te ní ndeñuhu ñaha-güedé vecaá. Te ní cáháⁿ ndàhú-güedé núu cuè tée ní xíhi vecaá sá ndéé-güedé ñuú-áⁿ nùhú-güedé. ⁴⁰ Te ní ndee-güedé vecaá, te cuáháⁿ-güedé vehe tá Lidíá, te ní ndatnúhu-güedé ndihí nchaa ñáyiú ní sándáá iní-xi tnúhu Jèsús, te ní xáhaⁿ-güedé xii-yu nàcuáa cada-yu, te ío ní cudíí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiú ñuú Tesalónica

¹ Te ní yáha-güedé ñuú Ànfípolis ndihí ñuú Apòloniá, te ní quexio-güedé ñuú Tesalónica, te yàcáⁿ cáá ñiⁿ veñúhu ñáyiú isràel. ² Te ní sáháⁿ té Páblú veñúhu-áⁿ, chi ducaⁿ tnàhí quide-dé, te ndi tnahá nduu ndetatu-yu ní sáháⁿ-dë veñúhu-áⁿ ùní xito. Te ní ndatnúhu ndihí ñaha-dë xii-yu nàcuáa ní chídó tnùní cue tée ní xóo cáháⁿ tnúhu Yá Ndiöxí ndéé şanaha. ³ Te ní xitnúhu ñaha-dé nàcuáa ní cáháⁿ cue tée-áⁿ sá Cristú Yaá tendaha Yá Ndiöxí quixi ñuyúú-a ndoho víhi-gá, te cuú-gá, te ndoto-gá, te xáhaⁿ-dë:

—Te diu Jèsús cùu Cristú Yaá ní tendaha Yá Ndiöxí ní quixi ñuyúú-a, núu xiáⁿ càchí tnúhu-í vitna —càchí té Páblú xáhaⁿ-dë xii-yu.

⁴ Te dava ñáyiú isràel ní sándáá iní-yu tnúhu ní cáháⁿ té Páblú, te ní níhí tnáhá-yu ndihí-dé, ndihí té Silás. Te vai ñáyiú griégú ñáyiú càháⁿ ndihí Yá Ndiöxí ní sándáá iní-yu tnúhu Jèsús. Te ndècu titní ñáyiú dñí ñáyiú cùnuu, te ñáyiú-áⁿ tnàhá-yu ní sándáá iní-yu tnúhu-gá. ⁵ Te dava ñáyiú

israél ñá túú ní cùu váha iní-yu núú tē Páblú ñúu ní ndúcü-yu cue tēe cuihna iní-xi tuhío-güedé cada chiü-güedé, chi ndi cuihnu ndi cuihnu-ni-güedé, te nchaá-yu ndihi cue tēe-áⁿ ndi coyo ndi coyó-yu xícuáá-yu. Te sátá ñi tecú dóho dava-gá-yu, te ní sáháⁿ tuhá-yu, te ío ní quide dùsáⁿ-yu. Te nísáháⁿ-yu vehe té Jàsón, te ní quide yicá-yu ní quihu-yu vehe-dé nándücú-yu té Páblú ndihi té Silás cuendá queñuhu ñáhá-yu núu nchàa ñáiyu. ⁶ Te ñá ní náníhí ñáhá-yu xii-güedé, núu xíáⁿ ní tñí-yu té Jàsón ndihi ñⁿ úú-gá cue tēe sándáá iní tñúhu Jèsús, te tãñuhu ñáhá-yu xii-güedé cuáháⁿ núu cuè tēe cùchiuⁿ. Te òré ní quexió-yu núu ndécú cuè tēe cùchiuⁿ, te ní ngüíta-yu ní cuáá-yu, te xáháⁿ-yu xii-güedé:

—Ní quexío cue tēe-áⁿ ñúú-ó, te ío dusaⁿ quide-güedé, te ducaⁿ-ni quide-güedé nchaa ñúu núu xicá cùu-güedé. ⁷ Te té Jàsón-áⁿ ní xáhaⁿ-dē sá cúu cùndecu-güedé vehe-dé, te ñá túú sándáá iní-güedé nàcuáa càháⁿ té Cèsár tēe yìndaha cuéhé nàcióⁿ, te càchí-güedé sá ndécú ñngá tēe cùnuu-gá tucu nàni-dé Jèsús —càchí-yu xáháⁿ-yu xii cue tēe cùchiuⁿ.

⁸ Te sátá dúcáⁿ ñi càháⁿ-yu, te ní cudééⁿ víhí cuè tēe cùchiuⁿ ndihi dava-gá ñáiyu ndédóho. ⁹ Te vài díhúⁿ ñi xicáⁿ cue tēe cùchiuⁿ núu tē Jàsón ndihi dava-gá cue tēe cuáháⁿ ndihi-dé cuendá té Páblú ndihi té Silás, te núu na ndēe-güedé núhú-güedé, te nacuañaha cuè tēe cùchiuⁿ díhúⁿ-güedé.

Té Páblú ndihi té Silás ndécú-güedé ñúu Bèréa

¹⁰ Te òré ní cundiquíⁿ, te ní quide ndee iní ñáhá ñáiyu sándáá iní tñúhu Jèsús xii té Páblú ndihi té Silás, te ní xica-güedé cuáháⁿ-güedé ñúu Bèréa. Te díu-ni nduu ñi sáá-güedé yacáⁿ ní sáháⁿ-güedé veñúhu ñáiyu israél. ¹¹ Te váha-gá iní ñáiyu ñúu Bèréa dàcúúxí ñáiyu ñúu Tesalónica, chi ío ní cudíⁿ iní-yu ní xíndedóho-yu tñúhu Jèsús, te ñⁿ nduu ñⁿ nduu ní dácuáhá-yu tñúhu ní chídó tñuní cue tēe ní xóo càháⁿ tñúhu Yá Ndióxi ndéé sanaha cuendá cuení-yu quini-yu núu ndáá càháⁿ té Páblú ndihi té Silás. ¹² Te titní ñáiyu israél ní sándáá iní-yu tñúhu-gá ndihi titní cue tēe griégú

ndihi ñáiyu díhí ñáiyu cùnuu ní sándáá iní-yu. ¹³ Te dava ñáiyu israél ndécú-yu ñúu Tesalónica, te ñáiyu-áⁿ ñi níhí-yu tñúhu sá ndécú tē Páblú ndihi té Silás ñúu Bèréa càháⁿ-güedé tñúhu Yá Ndióxi, núu xíáⁿ ní sáháⁿ-yu ñúu Bèréa ní dácuándèndé-yu núu nchàa ñáiyu vátá dácuàha-gá. Te ñáiyu-áⁿ ñi sándáá iní-yu tñúhu ndehnde te ní cudééⁿ víhí-yu núu-güedé. ¹⁴ Te òré-áⁿ ñi xáhaⁿ ñáiyu sándáá iní tñúhu-gá xii té Páblú sá quihíⁿ-dé yuhu làmár, te ní xica-dé cuáháⁿ-dé, te té Silás ndihi té Timùteú ní quendóo-güedé ñúu Bèréa. ¹⁵ Te ñⁿ úú-güedé cuáháⁿ ndihi-güedé té Páblú, te ndèca ñaha-güedé cuáháⁿ ndéé ñúu Àtenás, te ní xáhaⁿ tē Páblú xii-güedé:

—Núu na nùhú-ndó, te cúu-ndo tē Silás ndihi té Timùteú ná quixí ndihi-ni-güedé nanítnáhá-ndí iha —càchí-dé xáháⁿ-dē. Te ní xica-güedé cuánuhú-güedé.

Té Páblú ndécú-dé ñúu Àtenás

¹⁶ Te ñúu Àtenás ndétú tē Páblú quihíⁿ té Silás ndihi té Timùteú. Te yacáⁿ ní xiní-dé sá ío cuéhé sá càchí-yu cùu ndióxí-yu ndècu te ñá ndáá sá díú ndióxí cúu-xí, te xíáⁿ ñá túú ní cùu váha iní-dé, chi ñá tñáhá iní-dé nàcuáa quide-yu. ¹⁷ Te ní sáháⁿ-dé veñúhu ní càháⁿ ndihi-dé ñáiyu israél ndihi dava-gá ñáiyu càháⁿ ndihi Yá Ndióxi. Te ñⁿ nduu ñⁿ nduu sàháⁿ-dé xití ñúu càháⁿ-dé tñúhu-gá ndihi nchaa ñáiyu xica cuu yacáⁿ. ¹⁸ Te cue tēe cùu epicureú ndihi cue tēe cùu estoicú, cue tēe-áⁿ ñi ndatnúhu-güedé ndihi té Páblú, te dava-güedé xitnàha-güedé:

—¡Ná tñúhu vñi càháⁿ tēe lùcú-áⁿ! —càchí-güedé xitnàha-güedé.

Te dava-güedé xitnàha-güedé:

—Sàni iní-ndí sá càháⁿ-dé cuendá ndióxí sá vátá quini-gá-ó —càchí-güedé xitnàha-güedé.

Te ducaⁿ xitnàha-güedé, chi càháⁿ té Páblú tñúhu Jèsús, te ní càháⁿ-dé nàcuáa ní dándótó ñaha Yá Ndióxi xii-gá, xíáⁿ núu ducaⁿ xitnàha-güedé. ¹⁹ Te ndèca ñaha-güedé xii té Páblú cuáháⁿ ñⁿ xichi núu nání Àreópagú, te ní xáhaⁿ-güedé xii-dé:

—Cachí tñúhu ndáá-n ñasa cuáháⁿ tñúhu càháⁿ-n, chi na cùtñuní ndáá iní-ndí, ²⁰ chi ducaⁿ-ni càháⁿ-n tñúhu sá ñà túú sàcúndedóho-ndí, te cuení-ndí cachí tñúhu

ndáá-n năsa ndùu tnúhu-áⁿ cuendá cutnùnì váha iní-ndí —càchí-güedé xăhaⁿ-güedé xii-dé.

²¹ Te nchaa ñáyiú ñuú Àtenás ndihì ñáyiú dava-gá ñuú, mee-ni tnúhu saa cuiní-yu cáháⁿ-yu, nchaa sá vătă cündedóho-gá-yu cuiní-yu cundedóho-yu.

²² Te té Păblú ní ngúnutnîi-dé núú xîxúcu-yu nchaa-yu, te xăhaⁿ-dĕ:

—Nchòhó cue ñáyiú ñuú Àtenás, cund-edóho-ndo nchàa tnúhu na càháⁿ-í-a. Ío quide cahnu nchohó sá càchí-ndó cùu ndiòxí-ndó. ²³ Te vitna ní quexìo-í ñuú-ndó, te ní xiní-í sá yăyacáⁿ ndécú nchàa sá càchí-ndó cùu ndiòxí-ndó càháⁿ ndihì-ndo. Te ní xiní-í ìⁿ xichì núú ndéé tnunì quidé càhnu-ndo Yá Ndiòxí Yaa ñá túú xiní-ndó, te ñu-ni ducaⁿ càháⁿ lètrá ndéé tnunì xiáⁿ, te càchí-xi: “Iha quide cahnu-ndí Ndiòxí sá ñá túú xiní-ndí”, duha càháⁿ lètrá-áⁿ. Te quide cahnu-ndo Yá Ndiòxí cáháⁿ-ndó, dico ñá túú xiní-ndó năsa càa-gá, te yúhú xiní ndáá-í năcuáa càa Yá Ndiòxí, chi ñu-ni Yá Ndiòxí càháⁿ ndihì-í, te ñu tnúhu-gá càháⁿ-í vitna.

²⁴ Te ñu Yá Ndiòxí ní cadúha-gá ñuyíú-a ndihì nchaa sá ío, núú ñu-gá cúú Xítohó ñuyíú-a ndihì andiú. Te ñá túú xinì ñuhu-gá vehe dàcaa ñáyiú ñuyíú-a cundecu-gá. ²⁵ Te ñá túú xinì ñuhu-gá ñáyiú chindee ñàhá-yu xii-gá, chi mee-gă quidé-gă nchító-ó ndècu-o te tàxi-gá yócó tăchí-ó ndihì nchaa sá xinì ñuhu-o.

²⁶ Te ndéé sanaha ñí cadúha-gá ìⁿ ñu-ni téé, te ñu-ni ñíñí-dĕ cúú ñáyiú ndècu nîcaxico ñuyíú. Te ñu-ni mee Yá Ndiòxí ní xăhaⁿ-gă nchaa núú cündécú-yu, te mee-gă ní cáháⁿ-gá ná daha cuiá cudíi nchaa năcióⁿ ndihì mèé-yu. ²⁷ Te cuiní-gá sá ncháá ñáyiú nanducu ñàhá-yu cáháⁿ ndihì ñàhá-yu xii-gá, te mee-gă ndécú tŭha-gá sá càháⁿ ndihì ñaha-gă xií-yu ìⁿ ñu-ni. ²⁸ Te ñu-ni Yá Ndiòxí xító ñàha-gá xií-yu núú cùdíi-yu ndécú-yu te càndá-yu. Te duha ní cáháⁿ ìⁿ ñanì tnàhá-ndó, téé ní cutnùnì iní-xi ní xîndecu ndéé sanaha, te ní xăhaⁿ-dĕ xií-yu: “Nchaa-o cùu-o déhe Yá Ndiòxí”, duha ní xăhaⁿ-dĕ xií-yu. ²⁹ Te núú déhe Yá Ndiòxí cúú-yu nchaa-yu, te vá cúú cáháⁿ-yu sá Yá Ndiòxí cúú să ñí cadúha-yu ndahá-yu.

Te sá ñí cadúha-yu cùu ndiòxí-yu-áⁿ, dava cùu-xi díhúⁿ cuááⁿ, dava cùu-xi díhúⁿ cuixíⁿ, dava cùu-xi yúú. Te mèé-yu ní cahu iní-yu năcuáa cunduu sá cúú ndiòxí-yu. ³⁰ Te cùtnàhá ñá túú ní cùtnunì iní-yu sá nèhé ní quidé-yu ní cadúha-yu nchaa xiáⁿ, te ñá túú ní quide cuendá Yá Ndiòxí sá dúcáⁿ ñí quidé-yu. Te vitna càchí Yá Ndiòxí sá dáñá nchàa ndi túhú-yu nchaa sá cuèhé sá dúhá quidé-yu. ³¹ Te Yá Ndiòxí nàhá-gă ná nduu cündecu nchaa ñáyiú núú-gă, te mee-gă sa nàha-gá ndëndida càa ñáyiú ní quide váha, te ndëndida càa ñáyiú ñá túú ní quide váha. Te mee-gă ní xăhaⁿ-gă xii Déhe-gá Yaa nánì Jèsús cùñaha-gă xií-yu núú ndëndida càa-yu ní quide váha te ndëndida càa-yu ñá túú ní quide váha. Te mee Jèsús cáháⁿ ndáá cuiti-gá, te sa nàha-o sá ncháá xiáⁿ cada Jèsús, chi ñu cuendá-áⁿ ñí dándótó ñàha Yá Ndiòxí xii-gá —càchí té Păblú xăhaⁿ-dĕ xií-yu.

³² Te òré ní cáháⁿ té Păblú sá ñí ndoto Jèsús, te dava ñáyiú ñá ní tnàhá iní-xi tnúhu ní cáháⁿ-dé ní cáháⁿ yíchí-yu. Te davá-yu ní xăháⁿ-yu xii-dé:

—Te ñngá xito quixi-n, te cáháⁿ tucu-n tnúhu ní cáháⁿ-n vitna —cachí-yu xăháⁿ-yu xii-dé.

³³ Te ní xica-dé cuáháⁿ-dé. ³⁴ Te dava ñáyiú ní xîndedóho tnúhu ní cáháⁿ té Păblú ní sándáá iní-yu Jèsús, te ní chindee tnúhu ñàhá-yu xii-dé. Te ìⁿ téé cùchiuⁿ Areópagú nánì-dĕ Nîxú ndihì ìⁿ ñadihí nánì-áⁿ Dămarís, tnàhá-yu ní sándáá iní-yu tnúhu-gá ndihì dava-gá-yu.

18

Té Păblú ndécú-dĕ ñuú Còrintú

¹ Te té Păblú ní quee-dé ñuú Àtenás cuáháⁿ-dé ñuú Còrintú. ² Te yacáⁿ ní naníhì tnàhá-dĕ ndihì ìⁿ téé isrâél nánì-dĕ Àquilú, te téé-áⁿ cúú-dĕ téé distritú Pòntó, te ní xîndecu-dé ndihì ñadihí-dé tá Priscilá ñuú Rómá. Te té Cèsár téé yîndaha cuéhé năcióⁿ, téé nàni Claudiú ní xăhaⁿ-dĕ sá vă cúú-gă cundecu ñáyiú isrâél ñuú Rómá, te xiáⁿ núu ní ndee té Àquilú ndihì ñadihí-dé cuáháⁿ-yu ñuú Còrintú. Te sácú-ni nduu ní cuu sá ñí quexìo-yu ñuú-áⁿ, te ní sáháⁿ té Păblú ní ndatnúhu ndihì ñaha-dĕ xií-yu vehé-yu. ³ Te

ní xáhãⁿ-yu sá cùndècu-dé cada chiùⁿ ndihì ñahá-yu, chi ìⁿ-ni chiùⁿ quide-dé ndihí-yu, te ní xóo dacàá-yu vehe dóó. Te núu xíãⁿ ní xíndecu ndihì ñaha tẽ Pãblú ní quide chiùⁿ ndihì ñaha-dé xii-yu. ⁴ Te núu ùná núu ùná nduu, nduu ndètatú-yu, ní xóo quíhíⁿ-dé veñúhu ñáyiu isràél. Te ní ndatnúhu-dé ndihì ñáyiu isràél ndihì ñáyiu ñá túú cùu ñáyiu isràél, te ní xáhaⁿ-dẽ sá quíndáá iní-yu tnúhu Jèsús.

⁵ Te té Silás ndihì té Timùteú ní quee-güedé distrítú Macèdoniá cuáhãⁿ-güedé núu ndécú tẽ Pãblú. Te òré ní quexiò-güedé, te ní cáháⁿ-ni té Pãblú tnúhu Yá Ndiõxí núu ñáyiu isràél, te xáhaⁿ-dẽ xii-yu sá Jèsús cúu-gã Crístú Yaá ní tendaha Yá Ndiõxí ní quixi ñuyíú-a. ⁶ Te sá dúcãⁿ ñĩ cáháⁿ-dé núu ní nãá ndihì ñahá-yu xii-dé, te ní cáháⁿ cuèhé-yu cuendá-dé, núu xíãⁿ ní naquidi-dé dóó-dẽ. Te ducaⁿ ñĩ quide-dé cuendá sá cútnùní iní-yu sá ñã ní tnàhá iní-dé nàcuáa ní cáháⁿ-yu, te ní xáhaⁿ-dẽ xii-yu:

—Yúhú ñá túú cuèchi-í, te núu ní xíta ni-hnu-ndo, xíãⁿ quèndóo cuèchi mee-nã-ndó. Te vitna quíhíⁿ-í cáháⁿ ndihì-í ñáyiu ñá túú cùu ñáyiu isràél, te vá nándücu-gá-í nchòhó ñáyiu isràél cáháⁿ ndihì ñaha-í xii-ndo —càchí-dé xáhaⁿ-dẽ xii-yu.

⁷ Te ní xica-dé cuáhãⁿ-dé vehe ìⁿ tée nàni Justú, te tée-áⁿ ndécú yàtni-dé núu cáá veñúhu, te tnàhá-dé càháⁿ ndihì-dé Yá Ndiõxí. ⁸ Te té Crispú tée yíndaha veñúhu-áⁿ ñĩ sándáá iní-dé Jèsús ndihì ñadìhí-dé ndihì landú-dé. Te vãi ñáyiu ñuu Còrintú ní sáhãⁿ-yu ní xíndedóho-yu tnúhu-gá, te ní sándáá iní ñáhãⁿ-yu xii-gá, te ní sanduté-yu. ⁹ Te ìⁿ niú ní cáháⁿ saní té Pãblú sá ñĩ xáhaⁿ Yá Ndiõxí xii-dé:

—Cáháⁿ-ni-n tnúhu-í, te vá yùhú-n nchaa tnúhu cuèhé tnúhu duha càháⁿ ñáyiu, ¹⁰ chi yúhú chindee ñaha-í xii-n, te vá yõo ìⁿ cada úhú ñáhãⁿ xii-n, te vãi-gá ñáyiu ñuu-áⁿ quíndáá iní-yu tnúhu-í —càchí-gá xáhaⁿ-gã núu saní-dé.

¹¹ Te ñuu Còrintú ní xíndecu té Pãblú ìⁿ cuíá dava, te mee-ni tnúhu Yá Ndiõxí ní xóo dacuàha-dé ñáyiu.

¹² Te ndècu-gá-dé ñuu-áⁿ ñĩ ngóo té Gàlìón chiùⁿ taxi tnuní-dé distrítú Acáyá. Te dàvá-áⁿ ñĩ cudééⁿ ñáyiu isràél núu tẽ Pãblú,

te ní tni ñahá-yu xii-dé ndécá ñahá-yu cuáhãⁿ núu cuè tée cùchiuⁿ. ¹³ Te ní xáhãⁿ-yu xii té Gàlìón tée cùu gobiernú:

—Tée-a ní quexiò-dé ñuu-ó xica cuu-dé te cuiní-dé dandàhú ñahá-dẽ chitnahá-ndí-dé cada-ndí nàcuáa quide-dé quidé càhnu-dé Ndiõxí-dẽ, te dañã-ndĩ vá cádá-gã-ndí nàcuáa càháⁿ tnúhu sá sánú ìchi ñaha xii-o nàcuáa cundecu-o cuiní-dé —càchí-yu xáhãⁿ-yu xii tée cùu gobiernú.

¹⁴ Te té Pãblú cuiní-dé cani-dé cuèndú ní cùu, te ní ngúita té Gàlìón càháⁿ-dé, te xáhaⁿ-dẽ xii-yu:

—Nchòhó ñáyiu isràél, cundedóho-ndo tnúhu na càháⁿ-í-a. Te núu ndècu núu ìⁿ cuèchi ní quide-dé àdi ní sahani-dé ìⁿ ndíyì, te cuu cundáá-xi iha, te cáháⁿ-ndó núu nándi cùu sá ñĩ quide-dé, ¹⁵ àdi dico-ni sá ìⁿ tnúhu ní cáháⁿ-dé, te yáchí-gá chí cuáhãⁿ yacãⁿ ndatnúhu-ndo núu méé-ndó, chi mee-ni sã ñã túú quide-dé nàcuáa càháⁿ tnúhu sá sánú ìchi ñaha xii-ndo càháⁿ-ndó, te yúhú ñã túú tnàhá iní-í cada ndáá-í nchaa xíãⁿ —càchí-dé xáhaⁿ-dẽ.

¹⁶ Te ní cudééⁿ-dẽ, te ní ndeñuhu ñaha-dẽ xii-yu vechiùⁿ. ¹⁷ Te ñáyiu ñá túú cùu ñáyiu isràél ní tni-yu té Sòstenés tée yíndaha veñúhu ñáyiu isràél, te ndèhe té Gàlìón tée cùu gobiernú ní canihá-yu xii-dé, dico ñã túú tnàhí ná tnúhu ni càháⁿ-dé taunihnu-dé tée ní caní-yu-áⁿ.

Té Pãblú cuáhãⁿ tucu-dé ñuu Antiòquia, te yacãⁿ ní xica tucu-dé cuáhãⁿ-dé dava-gá ñuu càháⁿ-dé tnúhu Yá Ndiõxí

¹⁸ Te titní-gá nduu ní xíndecu té Pãblú ñuu Còrintú, te ní quide ndee iní-dé nchaa ñáyiu ní sándáá iní-xi tnúhu Jèsús, te ní tni-dé ìchi cuáhãⁿ-dé distrítú Sìriá ndihì té Àquilú ndihì ñadìhí té Àquilú-áⁿ tã Priscilá, te ní quexiò-yu ñuu Cèncreá. Te cùmání-gã tni-yu ìchi quíhíⁿ-yu ñuu Éfesú, te ní deté díquí tẽ Pãblú, chi ducaⁿ ñĩ xáhaⁿ-dẽ xii Yá Ndiõxí sá ndèé xínu ìⁿ chiùⁿ ní saní iní-dé cada-dé cuendá-gá, te dàtnùní deté-dé. Te ní quée-yu bàrcú cuáhãⁿ-yu.

¹⁹ Te ní quexiò-yu ñuu Éfesú, te yacãⁿ ní xáhaⁿ tẽ Pãblú sá cùndècu té Àquilú ndihì ñadìhí-dé, te mee-dẽ quíhíⁿ-dé dava-gá ñuu. Te cùmání-gã caca-dé quíhíⁿ-dé, te ní sáhãⁿ-dé veñúhu ñáyiu isràél ní ndatnúhu

ndihi ñaha-dě xií-yu. ²⁰ Te ní xáhãⁿ-yu sá cùndècu-dé titní nduu, te ñá ní cuìní-dé cundecu-dé. ²¹ Te ní xáhaⁿ-dě:

—Núhú-í chi dacuití xini ñuhu-xi cundecu-í vico coo ñuú Jerusálén, te quixi tucu-í te núu Ndiõxí ná càchí-gá, te vitna chí cáda ndèe iní —càchí-dé xáhaⁿ-dě xií-yu.

Te ní quée-dé bàrcú cuáháⁿ-dé. ²² Te ní quexìo-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusálén, te ní ndexìo-dé, te ní dándáçõ váha-dé ñáyu ndècu ichi Yá Ndiõxí, te dătnùní ní xica-dé cuáháⁿ-dé ñuú Antiòquia.

²³ Te yacáⁿ ní xindecu-dé titní nduu, te dătnùní ní tñi-dé ichi cuáháⁿ-dé. Te ní sáháⁿ-dé ñihí distritú Gàlaciá ndihi distritú Frigíá. Te ndi tnahá ñuú ní sáháⁿ-dé ní cáháⁿ-dé ndihi ñáyu sândáá iní tñuhu Yá Ndiõxí, te ní ndúcú ndée-gă-yu ní quidé-yu nchaa năcuáa ní xáhaⁿ-dě cadá-yu.

Té Àpolós càháⁿ-dé tñuhu Yá Ndiõxí ñuú Éfesú

²⁴ Te dàvá-áⁿ ñi quèxio ñiⁿ tée isràél ñuú Éfesú, te nani-dé Àpolós, te cùu-dé tée ñuú Alejandriá, te ío váha túha-dé tñuhu Yá Ndiõxí, te ío váha ñuhu díquí-dě năcuáa cáháⁿ-dé, ²⁵ chi sa xini-dé năcuáa ní xóo cáháⁿ ndí Juáa cùtnahá ní xóo dacuândute ndí ñáyu. Te ío ní cudí iní-dé ní cáháⁿ-dé nchaa năcuáa ní cuu cuendá Jèsús, dico vátá dăcuàha-gá-dé nchaa tñuhu ní cáháⁿ mée Jèsús. ²⁶ Te ní sáháⁿ-dé veñúhu ñáyu isràél, te yacáⁿ ní cáháⁿ-dé ñi yùhu ñi iní-dé. Te ndècu té Àquilú ndihi ñadíhí-dé tá Priscilá ndedóho-yu tñuhu ní cáháⁿ-dé, te ní xáhãⁿ-yu sá quíhíⁿ-dé vehé-yu, te ní sáháⁿ-dé, te ní xitñuhu ñahá-yu xii-dé dava-gá tñuhu Yá Ndiõxí sá ñà túu xini-dé.

²⁷ Te ní cachí té Àpolós sá quíhíⁿ-dé distritú Acáyá, núu xiãⁿ ní cadúha ñáyu ñuú Éfesú ñi tutú canehe-dé quíhíⁿ ndaha ñáyu sândáá iní tñuhu-gá xindecu Acáyá. Te xáhãⁿ-yu núu tütú-yu: “Cáháⁿ váha-ndo ndihi té Àpolós núu ní quexìo-dé”, càchí-yu xáhãⁿ-yu núu tütú-yu. Te ní xica-dé cuáháⁿ-dé, te ní quexìo-dé Acáyá. Te nchaa ñáyu sândáá iní tñuhu-gá yacáⁿ, ñi-ni mee Yá Ndiõxí ní chindee ñaha-gá ní sândáá iní ñahá-yu

xii-gá. Te té Àpolós ío váha ní cáháⁿ-dé tñuhu Yá Ndiõxí núu-yu, te xiãⁿ ío ní ndúcú ndée-gă-yu ní quidé-yu chiúⁿ-gá. ²⁸ Te té Àpolós ní ndatnúhu-dé ndihi ñáyu isràél, te ní xindedóho dava-gá-yu. Te ío váha ní cani-dé cuendú nchaa năcuáa ní xóo cáháⁿ cue tée ndée sanaha sá quíxí Cristú ñuyíu-a. Te ní cáháⁿ ndáá-dé ní xáhaⁿ-dě sá díu-ní Jèsús cúu-gă Cristú Yaá ní tendaha Yá Ndiõxí ní quixi ñuyíu-a. Te ñáyu isràél xindatnúhu-yu sá ñã ndáa năcuáa cáháⁿ-dé, dico ñá ní ñihí-yu tñuhu cùñahá-yu xii-dé, chi ío váha ñuhu díquí-dě tñuhu cáháⁿ-dé.

19

Té Păblú ndécú-dě ñuú Éfesú

¹ Te cùtnahá ndécú-gă té Àpolós ñuú Còrintú, te ní xica té Păblú cuáháⁿ-dé tá yăha-dé mee-ni xití yucu cuáháⁿ, te ní sáa-dé ndée ñuú Éfesú. Te ñuú-áⁿ ñi naníhí tnahá-dě ndihi cue tée sândáá iní tñuhu Jèsús. ² Te ní xicáⁿ tñuhú-dé núu-güedé, te xáhaⁿ-dě:

—¿Sa ní quexìo Espiritú Yá Ndiõxí ní ngúndecu ndihi-ndo ndée òré ní sândáá iní-ndo Jèsús-ãⁿ? —càchí-dé xáhaⁿ-dě xii-güedé.

Te ní xáhaⁿ-güedé:

—Ñá túu xini-ndí sá ío Espiritú Yá Ndiõxí —càchí-güedé xáhaⁿ-güedé xii-dé.

³ Te ní xáhaⁿ tucu-dé:

—¿Nása ní cáháⁿ tée ní dăcuândute ñaha xii-ndo-i? —cachí-dé xáhaⁿ-dě xii-güedé.

Te ní xáhaⁿ-güedé:

—Ní cáháⁿ-dé năcuáa ní xóo cáháⁿ ndí Juáa —càchí-güedé xáhaⁿ-güedé xii-dé.

⁴ Te ní xáhaⁿ tē Păblú:

—Ndí Juáa ní dăcuândute ñaha ndí xii ñáyu, chi ní cuini-yu sá dáñã-yu nchaa sá cuèhé sá dúhá quidé-yu. Te ní xáhaⁿ ndí xii-yu: “Quindáá iní-ndo tñuhu Jèsús chi dacuití quixi-gá ñiⁿ nduu”, duha ní xáhaⁿ ndí Juáa xií-yu —càchí té Păblú xáhaⁿ-dě xii-güedé.

⁵ Te sá dúcáⁿ ñi cáháⁿ té Păblú xáhaⁿ-dě xii-güedé, núu xiãⁿ ní sandute-güedé năcuáa ní dándõo tñuhu Jèsús. ⁶ Te ní sacáⁿ ndodo té Păblú ndahá-dé díquí-güedé, te òré-ni ní quexìo Espiritú Yá Ndiõxí ní ngúndecu ndihi-güedé, te ní ngúta-güedé

ní cáháⁿ-güedé tnúhu sá dácàhu iní ñáhá Espiritú-gá, tnúhu sá ñà túú xìní-güedé cáháⁿ-güedé, te ní cáháⁿ-güedé tnúhu Yá Ndiöxí nàcuáa ní dácáhú iní ñáhá Espiritú-gá xii-güedé. ⁷ Te cùu datná úxúú tnàhá-güedé.

⁸ Te té Pàblú ní sáháⁿ-dé veñúhu ñáyiu isràél ní cáháⁿ ndihí-dé-yu, te úní yóó nǐ xínu ní xica cuu-dé veñúhu-yu. Te ío váha ñuhu díquí-dé tnúhu cáháⁿ-dé, núu xiáⁿ ní cuyí-dé ní cáháⁿ-dé, te ní xáhaⁿ-dē sá quindáá iní-yu tnúhu Jèsús, te ducaⁿ te ndíhu ndaha ñaha Yá Ndiöxí xii-yu. ⁹ Te davá-yu ío sàá iní-yu ñá ní cuiní-yu quindáá iní-yu, te ío ní cáháⁿ cuèhé-yu cuendá Jèsús xití veñúhu núu dàva-gá-yu. Te té Pàblú ní ndee-dé veñúhu cuáháⁿ-dé ndihí ñáyiu sàndáá iní tnúhu Jèsús. Te ìⁿ nduu ìⁿ nduu ní sáháⁿ-dé scuèlá té Tiranú ní dácuhá ñaha-dé xii-yu. ¹⁰ Te úú cuíá ducaⁿ nǐ sáháⁿ-dé scuèlá ní dácuhá-dē ñáyiu. Te nchaa ñáyiu isràél ñáyiu ndècu nihí distritú Àsiá ndihí nchaa ñáyiu ñá túú cùu ñáyiu isràél ní xindedóho-yu tnúhu Jèsús. ¹¹ Te té Pàblú ío ní chindee ñaha Yá Ndiöxí xii-dé ní quide-dé vǎi núú sǎ vǎ yóo tnáhi ndàcu cada. ¹² Te pǎnú díquí-dé ndihí dóó cándèé núú yíquí-dé ní xicáⁿ-yu nèhé-yu ní sáháⁿ núú ndécú ñáyiu cùhú, te xiáⁿ ní tñi ñáyiu cùhú ndihí ñáyiu yíhi ñaha espíritú cündihí yucu ñávàha, te ní ndúha-yu.

¹³ Te ñuú Isràél véxi cue téé tatna xica cuu-güedé quidé tǎtna-güedé ñáyiu yíhi ñaha espíritú cündihí yucu ñávàha. Te ní ngüíta-güedé ní cacu nèhe-güedé Jèsús cuendá quee espíritú-áⁿ yíquí cùñú-yu, te ní xáhaⁿ-güedé:

—Xocuñí-n, chi cǎchí Jèsús sǎ vǎ cündècu ndihí-gá-n téé-a. Te diu-ni Jèsús cácu nèhe té Pàblú òré cǎháⁿ-dé tnúhu-gá —cǎchí-güedé xáhaⁿ-güedé xii espíritú-áⁿ.

¹⁴ Te úsǎ tnàhá-güedé ducaⁿ nǐ xóo cada-güedé. Te tǎtá-güedé ní xínani-dē Èsevǎ, te téé-áⁿ nǐ cuu-dé dútú cúnú. ¹⁵ Te sǎ dúcǎⁿ nǐ cáháⁿ-güedé, te ní xáhaⁿ espíritú cündihí yucu ñávàha-áⁿ xii-güedé:

—¿Te ná cúú nchòhó nǔu dayùhú ñáhá-ndó? Te xìní-í Jèsús, te xìní-í yoo cùu té

Pàblú, te nchòhó ñá túú xìní ñáhà-í xii-ndo —cǎchí espíritú-áⁿ xáhaⁿ-xi xii-güedé.

¹⁶ Te téé yíhi ñaha espíritú cündihí yucu ñávàha-áⁿ nǐ ndanchita-dé ní tñi-dé cue téé quide tǎtna-áⁿ, te ní ndihí dóó-güedé ní ndátá-dē, te ní dánicuèhé ñáhá-dē xii-güedé, te ní xinu-güedé cuáháⁿ-güedé. ¹⁷ Te nchaa ñáyiu isràél ndécú ñuú Éfesú ndihí dava-gá ñáyiu ndècu diu-ni ñuú-áⁿ nǐ níhi-yu tnúhu nàcuáa ní cuu, te ío ní yùhú-yu, te vǎi-yu ní cachí sǎ ío cǎhnu cuu Xítòhó Jesucristú.

¹⁸ Te dava ñáyiu ní sàndáá iní-xi tnúhu Jèsús ní sáháⁿ-yu núú ndécú té Pàblú, ndihí núú ndécú nchaa ñáyiu ní sàndáá iní tnúhu-gá ní nǎhmá-yu nàcuáa ní xóo cada-yu. ¹⁹ Te titní ñáyiu nǐ xóo cada ndùu nehé-yu tutú-yu ní sáháⁿ núú ndécú nchaa ñáyiu sàndáá iní-xi tnúhu-gá, te yacáⁿ ní ndada cuendá-yu sǎ ío yahu ní sáha-yu tutú-yu, chi ndéé údico úxí mǐl díhúⁿ cuixíⁿ ní sáha-yu núú ncháá. Te ncháá-yu ní sahmí-yu tutú-yu. ²⁰ Te sátá nǐ cáyú nchaa tutú-áⁿ, te vǎi-gá ñáyiu ní tuhá-yu ichi Yá Ndiöxí, te ní sáha-yu cuendá sǎ ío xini ñuhu tnúhu Yá Ndiöxí.

²¹ Te ní cachí té Pàblú sǎ quihíⁿ-dé distritú Macèdoniá ndihí distritú Acáyá, te dǎtnúní núhú-dé ñuú Jerusalén, te ducaⁿ te dǎtnúní quihíⁿ-dé ñuú Rómá. ²² Te ndècu ndihí-dé té Timùteú ndihí té Èrastú cue téé chindee ñaha xii-dé. Te té Pàblú ní xáhaⁿ-dē xii-güedé sǎ códó nùu-güedé quihíⁿ Macèdoniá, te ní xica-güedé cuáháⁿ-güedé, te mee-dē ní quendóo-dé.

Ñáyiu Éfesú ío dusaⁿ quidé-yu ñuú-yu

²³ Te dàvá-áⁿ ío ní cudéⁿ-yu núú nchaa ñáyiu ní tuha ichi Yá Ndiöxí. ²⁴ Te ìⁿ téé ñuú Éfesú nání-dē Demètriú. Te téé-áⁿ nǐ xóo canehé chiúⁿ-dé mee-ni díhúⁿ cuixíⁿ ní xóo cadúha-dé veñúhu líhli, dǎtná cuiní-ndó cǎa veñúhu Diáná sǎ cúú ndiöxí-yu. Te vǎi díhúⁿ nǐ xóo níhi-dē ndihí cue téé ní xóo cada chiúⁿ ndihí-dé. ²⁵ Te ní cana-dé cue téé quide chiúⁿ ndihí-dé, ndihí nchaa cue téé quide chiúⁿ ndihí díhúⁿ cuixíⁿ, te ní xáhaⁿ-dē xii-güedé:

—Nàha-ndo sǎ ío váha níhi-ó díhúⁿ cuendá chiúⁿ quide-o. ²⁶ Te nàha-ndo sǎ cǎchí té Pàblú sǎ ñá díú ndiöxí cúú sǎ nǐ

cadúha ñáyiú ñuyíú-a. Te ducaⁿ cãháⁿ-dé ñuú-ó, te ducaⁿ-ni cãháⁿ-dé ñihí distritú Àsiá, te ío-gá vai ñáyiú sãndáá iní tnúhu cãháⁿ-dé. ²⁷ Te ío úhú ñuú na cuíta chiúⁿ quide-o, vá yõo-gá cuaaⁿ sá cadúha-o. Te ngüíta-yu cãháⁿ-yu sá veñúhu Diáná ñá túú cãváha, te vá cáda cãhnu-gá-yu sãndú-ó. Te ñaha-ndo sá ío cãhnu cuu Dianá, chi nchaa ñáyiú distritú Àsiá quidé cãhnu ñahá-yu ndihí ñáyiú xíndecu ni cãa xico ñuyíú —cãchí té Demètriú xãhaⁿ-dẽ xii-güedé.

²⁸ Te sá dúcáⁿ ñí cãháⁿ té Demètriú, xíãⁿ ní cudééⁿ-güedé núú tẽ Pãblú, te uuⁿni ní cuáá-güedé te cãchí-güedé:

—Ío cãhnu cuu Dianá sãndú ñáyiú Éfesú! —cãchí-güedé.

²⁹ Te nchaa ñáyiú ñuú Éfesú ndí coyo ndí coyó-yu xíçãháⁿ-yu. Te tñahá úú cue tée distritú Macèdoniá xíçá cùu-güedé ndihí té Pãblú, ñⁿ-dé nání-dẽ Gãyú, te ñⁿ-dé nání-dẽ Arístarcú. Te ní tñi-güedé úú cue tée-áⁿ, te cuánguihu coyo ndihí ñaha-güedé vehe núú quidé-güedé jundá. ³⁰ Te té Pãblú cuiní-dé quihu-dé tñahá-dé vehe-áⁿ cãháⁿ ndihí ñaha-dẽ ní cùu, te ñá ní dàña cue tée ní sãndáá iní tnúhu-gá. ³¹ Te ñⁿ úú cue tée cùnuu distritú Àsiá ní cãháⁿ váha-güedé cuendá té Pãblú, te ní xãhaⁿ-güedé xii ñⁿ tée xínu cuechi núú-güedé ní sãháⁿ-dé ní xãhaⁿ-dẽ xii té Pãblú sá vã quihu-dé vehe núú quidé-güedé jundá. ³² Te uuⁿni ní cuáá-yu nchaá-yu, te ñá ñⁿ-ní tñúhu ni cãháⁿ-yu, chi ndí ñⁿ-ní tñúhu ní cãháⁿ-yu ñⁿ ñⁿ-yu. Te chitu-gã ñáyiú ñá ní cùtnuní iní-yu ná cuendá ní dátacá ñahá-güedé xití vehe-áⁿ, chi ñá ñⁿ-ní tñúhu ni cãháⁿ-yu. ³³ Te davá-yu ní cãháⁿ-yu sá cuéchi té Lijandrú cúú-xí, chi ní xãhaⁿ ñáyiú isràél xii-dé sá cãháⁿ-dé yuhú-yu chindee tñúhu ñaha-dẽ xii-yu. Te ní quide-dé ndaha-dé núú-yu sá cùndedóho-yu tnúhu cãháⁿ-dé chindee tñúhu ñaha-dẽ xii-yu yòtnúhu. ³⁴ Te ní cutnùní iní-yu sá tẽ isràél cúú-dẽ, te uuⁿni ní cuáá tucú-yu, ñá ní dàñá-yu cãháⁿ-dé, te cãchí-yu:

—Ío cùnuu Dianá sãndú ñuú Éfesú! —cãchí-yu. Te dàtná úú òré ñⁿ-ni tñúhu ní cãháⁿ-yu.

³⁵ Te tée cùu secretariú-ñi-gá ní cãháⁿ-dé, te dàtnùní cuéé cuéé ní sadí-yu yuhú-yu. Te ní xãhaⁿ-dẽ xii-yu:

—Nchaa-ndo cùndedóho-ndo ñⁿ tnúhu na cãháⁿ-í-a. Ío cùnuu Dianá, te nchaandí túhú ñáyiú sa ñahá-yu sá nchãá-ó ío nèhe cuendá-ó veñúhu-ãⁿ. Te ñahá-yu sá nehé cuendá-ó sãndú-áⁿ, chi véxi cuuⁿ-gá andiu. ³⁶ Te vá yõo ñⁿ cãchí sá ñã ndáa. Te coto-ndo mée-ndo, te vá cuídó-ndó càda-ndo, te vá cuídó-ndó cãháⁿ-ndó. ³⁷ Te ná cuendá ndécá-ndó cué tée-áⁿ véxi, te ñá túú ñã ní quide-güedé, te ñá túú ñã ní dùhu-güedé veñúhu, te ñá túú cãháⁿ cuéhé-güedé cuendá Diáná. ³⁸ Te núu ìo yoo nãá ndihí ñaha xii té Demètriú ndihí cue tée quide chiuⁿ ndihí-dé, te quíhíⁿ-güedé cacáⁿ cuéchi-güedé núú cué tée cùchiuⁿ. Te cue tée cùchiuⁿ na cundoho-güedé ñuú quehndé-güedé cuéchi-yu àdi ñahá. ³⁹ Àdi ío-gá ná cuendú ñúhú iní-ndó, te cãháⁿ-ndó òré ná cóo jundá. ⁴⁰ Te ío úhú ñuú na ñihí tée tàxi tñuní ñahá xii-o tnúhu sá dúhá ío quide dusaⁿ-o, te cachí-dé sá ndècuéchi-o chi ñá túú sãndáá iní-ó-dẽ quesaha-dẽ. Te ñá túú tñahí ndùu váha-xi sá dúhá càda-o ni cuu, te vitna duha ní quide-o, te ñá cùtnùní iní-ó ñãsa cúñaha-o xii tée tàxi tñuní ñahá xii-o núu na càna ñaha-dé —cãchí tée cùu secretariú xãhaⁿ-dẽ xii-yu.

⁴¹ Te ní xãhaⁿ-dẽ sá ñuhú-yu te ní ndihí-yu cuánuhú.

20

Té Pãblú cuáhãⁿ-dé distritú Macèdoniá ndihí distritú Grèciá

¹ Te òré ñá túú-gã ní quide dusaⁿ-yu, te ní cana ñaha tẽ Pãblú xii nchaa ñáyiú sãndáá iní tnúhu Jèsús ní cãháⁿ-dé dóho-yu ñacuáa cadá-yu. Te ní quide ndee iní ñahá-dẽ xii-yu, te ní tñi-dé ichi cuáhãⁿ-dé distritú Macèdoniá. ² Te tayãha-dé cuáhãⁿ ñⁿ ñⁿ ñuú yíndèhu Macedoniá. Te cãháⁿ-dé dóho nchaa ñáyiú sãndáá iní tnúhu Jèsús ñacuáa cadá-yu, te ní cudí iní-yu cadá-yu ñacuáa cãháⁿ Yã Ndiõxí cadá-yu sá dúcáⁿ ñí cãháⁿ-dé dóho-yu. Té ní quexìo-dé distritú Grèciá. ³ Te xíãⁿ ñí xíndecu-dé úní yóó. Te xíãⁿ quèe-dé bàrcú quíhíⁿ-dé distritú Siriá ní cùu, te ní ñihí-dẽ tnúhu sá ndétú ñaha

ɛ̃n úu cue tée israél cahni ñaha-güedë xii-dé ní cùu, núu xiãⁿ ní tñi-dé ichi cuáháⁿ-dé ní yáha-dé ichi distritú Macèdoniá. ⁴ Te cuáháⁿ ndihi-dé té Sopàtér tée ñuu Bèrea, ndihi té Aristarcú, ndihi ɛ̃n tée nàni Segundú. Te ndi ndùú cue tée-áⁿ cúu-güedë cue tée ñuu Tesalónica. Te tnàhá té Gãyú tée ñuu Dèrbé, ndihi té Timùteú cuáháⁿ ndihi-dé, te tnàhá té Tìquicú ndihi té Trõfimú cuáháⁿ ndihi-dé, te úu cue tée-áⁿ cúu-güedë cue tée distritú Àsiá. Te nchaa cue tée-áⁿ cuáháⁿ ndihi-güedë té Pãblú. ⁵⁻⁶ Te ní quexìo-güedë ñuu Filipú, te yàcáⁿ ní naníhí ñàhá-güedë xii-ndí. Te té Pãblú ní tendaha-dë cue tée ndihi-dé cuáháⁿ-güedë ñuu Tròás, te ní xáhaⁿ-dë sá díu-ní yàcáⁿ cundetú ñaha-güedë xii-ndí. Te ní ndóo-í ndihi-dé, te ní xíndecu-ndí vico xèxí-yu pàa sá ñà túu yìhi levadurá. Te sàtá ñí yáha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexìo-ndí ñuu-áⁿ. Te yàcáⁿ ní naníhí tnàhá-ndí ndihi cue tée yòdo nuu cuáháⁿ ní xíndecu-ndí úsá nduu.

Té Pãblú cuáháⁿ ngándihi-dé ñáyiu ñuu Tròás

⁷ Te ɛ̃n nduu ndumìngú ní naníhí tnàhá-ndí ndihi nchaa ñáyiu ní sàndáá iní-xi tnúhu Jèsús ní xexi-ndí pàa ndihí-yu. Te ducaⁿ ñí quide-ndí, chi ní cachí Jèsús sá dúcáⁿ càda-o cuendá sá vã nácuànaa-o sá ñí xíhí-gá cuendá naníhí tãhú-ó. Te té Pãblú ní ngüíta-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tũndaá ingá nduu-áⁿ, te caca-dé quíhíⁿ-dé ingá xichi. ⁸ Te ndécú-yu vehe yòdo tnaha, te yìhí-yu ndéé cuàrtú cúu ùní núu ñnu, te càyú víhí ñùhú xití cuàrtú-áⁿ. ⁹ Te ɛ̃n tée sa ta cùu sacuéhé luha nàni-dé Eùticú núcõo-dé yèhe ventaná, cuiní-dé cúdú-dé, chi ní cunaha víhi caháⁿ té Pãblú, te ní tñi ñaha sàni xii-dé ní xídí-dé, te ní ngava-dé ndéé ñuhu. Te ní nuú-yu núu ñúhú cuendá ndacani ñàhá-yu, te sa ní xíhí-dé, chi ío dùcúⁿ ní ngava-dé. ¹⁰ Te tnàhá té Pãblú nchìcúⁿ-dé ní nuu. Te ní quexìo cunu-dé núu càtùu tée ní xíhí-áⁿ, te ní numi ñaha-ni-dé, te ní xáhaⁿ-dë xií-yu:

—Vá ndihú iní-ndó, chi ní ndoto-dé —
càchí-dé xãhaⁿ-dë xií-yu.

¹¹ Te dàtnùní cuãndaã ndihi ñaha tùcu-dé xií-yu cuàrtú núu yìhí-yu ní cùu, te yàcáⁿ ní xexi ndihi ñaha-dë xií-yu, dàtnùní ní ngüíta-dé vãi-gá tnúhu ní cáháⁿ-dé, te càháⁿ-ni-dé ní tũndaá, te dàtnùní ní xica-dé cuáháⁿ-dé. ¹² Te tée ní ngava-áⁿ ní sãnúndeca ñàhá-yu xii-dé ndéé vehe-dé, te ío ní cudí iní-yu sá ñí ndoto-dé.

Ní quee-güedë ñuu Tròás cuáháⁿ-güedë ñuu Miletú

¹³ Te té Pãblú ní cachí-dé sá quíhíⁿ-ndí ndihi bàrcú ndéé ñuu Àsón, te mee-dë caca saha-dë, te yàcáⁿ naníhí tnàhá-ndí ndihi-dé te quée-dé bàrcú, te ní quée-ndí bàrcú cuáháⁿ-ndí. ¹⁴ Te ní naníhí tnàhá-ndí ndihi-dé ñuu Àsón, te yàcáⁿ ní quée-dé bàrcú tnàhá-dé cuáháⁿ-ndí ñuu Mitlené. ¹⁵ Te ní quexìo-ndí ndéé ingá nduu yatni ñuu Quíú, te ndéé nduu tnéé ní quexìo-ndí ñuu Sãmú te yàcáⁿ ní yáha-ndí, te ní quexìo-ndí ñuu Trògiliú. Te ndéé nduu idá ní quexìo-ndí ñuu Miletú. ¹⁶ Te té Pãblú ñá ní cuiní-dé yáha-ndí ñuu Éfesú, chi ñá túu ní tnàhá iní-dé cuyaa-dë ichi, chi ío ndihí iní-dé cuendá cuiní-dé quiní-dé nõu vá ndácú-dë ndexìo-dé ñuu Jerusalén cundecu-dé vico Pentecòstés.

Té Pãblú càháⁿ ndihi-dé cue tée yìndaha ñaha xii ñáyiu sàndáá iní tnúhu Jèsús ñuu Éfesú

¹⁷ Te òré ndécú tã Pãblú ñuu Miletú, te ní cana-dé cue tée yìndaha ñaha xii ñáyiu sàndáá iní tnúhu Jèsús ñuu Éfesú sá quíhíⁿ-güedë núu ndécú-dë. ¹⁸ Te sàtá ñí quexìo-güedë, te ní xáhaⁿ-dë xii-güedë:

—Nàha-ndo nacuaa ní quide-í ndéé cútnàhá ní quexìo-í distritú Àsiá. ¹⁹ Chi ní quide-í nàcuáa ní cáháⁿ Yã Ndiõxí cada-í, ñá túu ní tũhío-í, te ñá túu ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tìtní xito ní cuiní ñáyiu israél cahni ñàhá-yu xii-í ní cùu, te ío ní ndoho-í ní cácu-í. ²⁰ Te sa nàha-ndo sá ncháándì túhú sa ní cachí tnúhu-í nàcuáa cada-ndo cuendá sá chíndèe ñaha Yã Ndiõxí xii-ndo. Te ní cáháⁿ-í tnúhu-gá núu-ndó nchaa-ndo, te ñu-ni ducaⁿ ñí quixi-í ndi tnàhá vehe-ndo ñí cáháⁿ-í tnúhu-gá núu-ndó. ²¹ Te ní xáhaⁿ-í

xii ñáyu isràél ndihí ñáyu ñá túú cùu ñáyu isràél sá dáñá-yu nchaa sá cuèhé sá dúhá quidé-yu te quindáá iní-yu tnúhu Xítohó Jesucristú. ²² Te dacuití quíhíⁿ-í ñuú Jerusàlén, chi Espíritú Yá Ndiöxí ní cachí-xi sá dáí quíhíⁿ-í, te ñá túú xíní-í nándi cada ñaha-güedé xii-í yàcáⁿ te núu na quèxio-í. ²³ Te ñⁿ ñⁿ ñuú núú sàháⁿ-í càchí tnúhu Espíritú-gá sá chíhí ñaha-güedé vecaá, te cada úhú ñáhá-güedé. ²⁴ Dico ñá túú tnàhí ná cuu cuèi na càhni ñaha-güedé xii-í, dico cuiní-í sá díí iní dandíhí-í nchaa sá ní cachí Xítohó Jesucristú cada-í. Te ní cachí Yá Ndiöxí sá càháⁿ-í núú ñáyu sá ïo cùu iní ñáhá-gã xii-yu, te naníhí tàhú-yu núu na quindáá iní-yu tnúhu-gá.

²⁵ Te sa ní cachí tnúhu-í xii-ndo nchàa-ndo sá núu na quindáá iní-ndo Yá Ndiöxí, te ndíhu ndaha ñaha-gá xii-ndo. Te na càchí tnúhu-í sá ní ñⁿ nduu-gá vá quini ñáhá-ndo xì-í ñuyú-a. ²⁶⁻²⁷ Te yúhú ñá túú cuèchi-í núu ío ñáyu vá naníhí tàhú, chi sa ní cachí tnúhu-í nchaa sá ní càháⁿ méé Yá Ndiöxí cada-ndo. ²⁸ Te coto-ndo mèe-ndo, te coto-ndo tnàhá ñáyu sàndáá iní tnúhu-gá, chi Espíritú-gá ní cachí-xi sá cúnúu-ndo núú-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu ducaⁿ càda-ndo cuendá, chi nàha-ndo sá Jèsús ní sati níñí-gã, te ní xíhí-gá cuendá naníhí tàhú-ó ndíhí-yu. ²⁹ Te yúhú sa cùtnuní iní-í sá òré ñá túú-gã-í ndécú, te quixi ñáyu dandàhú ñáhá xii-ndo cuendá daña-ndo tnúhu Yá Ndiöxí, te cada ñàhá-yu xii-ndo dàtná quidé ñáñá òré tníí-dí mbéé. ³⁰ Te ñⁿ ñⁿ ñuú cue téé ndècu ndihí-ndo, cue téé-án dacuàndehnde-güedé, te cudana davá-yu quindáá iní-yu chítnáhá ñáhã-yu xii-güedé. ³¹ Te xíãⁿ núu càchí tnúhu-í sá ïo quíhí iní-ndo cùndecu-ndo ndihí nchaa ñáyu sàndáá iní tnúhu-gá. Te nàha-ndo sá yúhú ní xíndecu-í úní cuíá ní càháⁿ-í tnúhu Jèsús núú ñáyu cuèi nduu cuèi níú. Te áma ní xóo ndáhyú-í, chi ñá ní cuiní-yu quindáá iní-yu ncháa-yu tnúhu ní càháⁿ-í —càchí té Páblú xàhaⁿ-dè xii-güedé.

³² Te xàhaⁿ tùcu-dé:

—Nchòhó cue téé ndècu ndihí-í ichi

Xítohó Jesucristú, ío cuiní-í sá méé Yá Ndiöxí chindee ñaha-gá xii-ndo. Te mee-gã ní càháⁿ-gá sá ïo cùdíí iní ñáhá-gã xii-ndo. Te naníhí tàhú-ndo ndihí nchaa ñáyu cùu cuendá-gá, te chindee ñaha-gá xii-ndo cuendá cada-ndo nchàa sá càháⁿ-gá. ³³ Te òré ní xíndecu ndihí ñaha-í xii-ndo, te ní díhúⁿ ní dõó ñà túú ní cùdíí iní-í. ³⁴ Te mee-ndo sá naha-ndo sá yúhú ní quide chiúⁿ-í, te ní níhí-í nchaa sá ní nandíhí-í ndihí cue téé xica cuu ndihí-í. ³⁵ Te sa ní xíní-ndo nàcuáa ní quide-í ní quide chiúⁿ-í, te ñⁿ ñⁿ ñuú càda chiúⁿ-ndo cuendá chindee-ndo nchàa ñáyu ndàhú, chi sa nàha-ndo nacuáa ní cachí Xítohó Jesucristú, te duha ní cachí-gá: “Cùdíí-gã iní-ó cuàha-ó ñáyu ndàhú sá xíní ñùhú-yu dàcúxí sá táxí-yu xii mee-o”, duha ní cachí-gá —càchí té Páblú xàhaⁿ-dè xii-güedé.

³⁶ Te sátá dúcáⁿ ní càháⁿ-dé, te ní ngüíñí xítí-dè ndihí dava-gá-güedé, te ní càháⁿ ndihí-dé Yá Ndiöxí. ³⁷ Te sátá ní túhú tnúhu ní càháⁿ-dé ndihí Yá Ndiöxí, te ní ndáhyú víhí-güedé sá quíhíⁿ-dé, te ní numi ñaha-güedé, te ní teyuhu ñaha-güedé. ³⁸ Te ní ndíhú víhí iní-güedé, chi ní xàhaⁿ té Páblú sá ní ñⁿ nduu-gá vá naníhí tnáhá-güedé càháⁿ ndihí tnàha-güedé. Te cuáháⁿ ndihí ñaha-güedé xii-dé núú ndécú bàrcú.

21

Té Páblú cuáháⁿ-dé ñuú Jerusàlén

¹ Te ní quide ndee iní-ndí nchaa cue téé cùnúu. Te ní quée-ndí bàrcú cuáháⁿ ndáá ichi-ndí ñuú Cõs. Te nduu tnèé ní sáháⁿ-ndí ñuú Ròdás, te ní yáha-ndí cuáháⁿ-ndí ñuú Pàtará. ² Te yàcáⁿ ní naníhí-ndí ñⁿ bàrcú ñùhú ichi-xi quíhíⁿ-xi distritú Fèniciá, xíãⁿ ní quée-ndí cuáháⁿ-ndí. ³ Te ichi cuáháⁿ-ndí ní xíní-ndí distritú Chìpré cáá cuàdava xítí làmár, te ní yáha-ndí, te ní quendóo ñuú-áⁿ xio dàtni-ndí. Te cuáháⁿ-ndí ñuú Tirú ñⁿ ñuú yíndèhu distritú Sìriá cuendá yàcáⁿ tava-güedé nchaa sá nchídó bàrcú. ⁴ Te yàcáⁿ ní naníhí tnáhá-ndí ndihí ñáyu ní sàndáá iní tnúhu Jèsús, te ní xíndecu-ndí úsá nduu ndihí-yu. Te ní xáhãⁿ-yu sá vã quíhíⁿ té Páblú ñuú Jerusàlén, chi Espíritú

Yă Ndiöxí ní xáhaⁿ-xi xii-yu sá ndóhó vihi-dé nūu na quihíⁿ-dé. ⁵ Te sáta ní yáha nduu úsá, te ní quee-ndí cuáháⁿ-ndí yuhu lámár. Te ní quee nchaa ñáyiú ní sándáá iní tnúhu-gá, téé, ñadhí, nchaa landú, nchaá-yu ní sándecca ñáhá-yu yuhu lámár, te òré ní quexio-ndí, te ní ngüíñí xítí-ndí ní cáháⁿ ndihí-ndí Yă Ndiöxí. ⁶ Te ní quide ndee iní tnáhá-ndí ndihí-yu, te dátñuní ní quée-ndí bàrcú, te ní naquehéⁿ-yu ichi cuánuhú-yu vehé-yu.

⁷ Te ní xica bàrcú ñúhú-ndí ní quee-xi ñuú Tírú cuáháⁿ-ndí ndihí-xi ñuú Tolèmaidá. Te xíaⁿ ní sáá-xi te ní quene-ndí, te ní sáháⁿ-ndí ní cáháⁿ ndihí-ndí nchaa ñáyiú sándáá iní-xi tnúhu Jèsús, te ní xíndecu-ndí ndihí-yu ñⁿ nduu. ⁸ Te nduu tnéé ní ndée tucu-ndí bàrcú cuáháⁿ-ndí ñuú Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lìpé cundecu-ndí ndihí-dé. Te téé-áⁿ ní xóo cada chiúⁿ ndihí-dé íñú-gá cue téé ní chindee ñàha xii ñáyiú sándáá iní tnúhu-gá ñuú Jerusàlén ní xóo cuáñaha-güedé sá ní xóo caxí-yu. Te dátñuní mee-nă tnúhu Yă Ndiöxí cáháⁿ-dé xíca cùu-dé. ⁹ Te té Lìpé-áⁿ ndècu cúmí dēhe ñíhí-dé, te ní ñⁿ-yu vátá ndúcú ñàha-gá téé xii-yu, te nchaá-yu cáháⁿ-yu tnúhu Yă Ndiöxí tnúhu sá dácáhu iní ñáhá mèe-gá. ¹⁰ Te xíaⁿ ní cuu titní nduu ndècu-ndí, te ní quexio ñⁿ téé nàni Agabú ñuú-áⁿ, véxi-dé distritú Jùdeá, te téé-áⁿ tnáhá-dé cáháⁿ-dé tnúhu Yă Ndiöxí. ¹¹ Te ní níhí-dé tnúhu núú ndécú-ndí nūu ní quixi-dé ní cáháⁿ ndihí ñàha-dé xii-ndí. Te ní xícaⁿ-dé cínchú té Păblú, te ní ngóo-dé, te ní ngüíta-dé ní dácútú-dé sáhá-dé ndihí ndaha-dé, te ní cachí-dé xii-ndí:

—Espiritú Yă Ndiöxí ní cachí-xi sá tēe dii cínchú-xi-a tñi ñàha cuè téé isràél ñuú Jerusàlén, te duha dacùtu ñàha-güedé xii-dé, te cuáha cuèndá ñáhá-güedé xii-dé núú cuè téé ñuú Rómá. Duha ní cáháⁿ Espiritú-gá —cachí té Agabú.

¹² Te sá dúcáⁿ ní cáháⁿ-dé, te ní xáhaⁿ-ndí nchaa-ndí sá vă quihíⁿ té Păblú ñuú Jerusàlén. ¹³ Te té Păblú ní cachí-dé:

—¿Ná cuèndá ndéé dúcáⁿ ndàhyú-ndó dāndihú iní ñáhá-ndó xii-í-í? Te ñá túú

nă cuu cuèi na dàcutu ñàha-güedé, àdi cuèi na càhni ñàha-güedé xii-í cuèndá sá cáháⁿ ndihí-í Jèsús, chi sa ndècu túha-í sá cùú-í —cachí-dé.

¹⁴ Te ñá túú ní sándáá iní-dé sá dúcáⁿ xáhaⁿ-ndí, núu xíaⁿ ñá túú-gá ná ní xáhaⁿ-ndí xii-dé sá vă quihíⁿ-dé, te ní xitñaha-ndí:

—Mee-ni-gă Yă Ndiöxí ná cùnaha-gá nása sàni iní-gá cada-gá —xitñaha-na-ndí.

¹⁵ Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñuú Jerusàlén. ¹⁶ Te cuáháⁿ ndihí-ndí ñⁿ úú cue téé Cèsareá, cue téé ní sándáá iní tnúhu Jèsús. Te ndècca ñàha-güedé xii-ndí cuáháⁿ vehe té Mnàson, te téé-áⁿ cùú-dé téé distritú Chìpré, te ndècu-dé ñuú Jerusàlén, te sa ní cuu vâi nduu ní sándáá iní-dé tnúhu-gá, te vehe téé-áⁿ ní xíndecu-ndí.

Té Păblú ndátñuhu-dé ndihí té Jàcobó

¹⁷ Te òré ní quexio-ndí ñuú Jerusàlén, te nchaa ñáyiú ní sándáá iní tnúhu Jèsús ní quixí-yu ní dándácō vâha ñáhá-yu, chi ní cudíí víhí iní-yu sá ní quexio-ndí. ¹⁸ Te nduu tnéé cuáháⁿ ndihí-ndí té Păblú cuèndá cáháⁿ ndihí-ndí té Jàcobó, te òré ní quexio-ndí núú ndécú-dé, te ndècu ndihí-dé nchaa cue téé yîndaha ñàha xii ñáyiú sándáá iní tnúhu Jèsús. ¹⁹ Te té Păblú ní dándácō vâha ñàha-dé xii-güedé, te ní xáhaⁿ-dē nàcuáa ní quide Yă Ndiöxí ní chindee ñàha-gá xii-dé ní cáháⁿ-dé tnúhu-gá núú ñáyiú ñá túú cùu ñáyiú isràél. ²⁰ Te sáta ní yáha ní cáháⁿ-dé, te ní ndácáⁿ táhü-yu núú Yă Ndiöxí cuèndá nchaa sá ní quide-gá. Te dátñuní ní xáhaⁿ-güedé xii té Păblú:

—Yòhó sa ñàha-n sá ní cuu titní mîl ñáyiú isràél ní sándáá iní-yu tnúhu Jèsús, te cachí-yu sá ïo xini ñuhu-xi cadá-yu nchaa nàcuáa cáháⁿ tnúhu sá ní chídó tñuní ndii Moisés. ²¹ Te ní níhí-yu tnúhu sá dácuaña-n ñáyiú isràél ñáyiú ndècu ñuú xíca cuèndá sá vă cadá-gă-yu nàcuáa ní cachí ndíi Moisés cadá-yu. Te xáhaⁿ-n xii-yu sá vă cuáha-gă-yu seña ñi landú-yu, te vă cadá-gă-yu dátñá ní xóo cada ñáyiú ndéé sanaha, duha dâcuaha-n ñáyiú ní níhí-yu tnúhu. ²² Te na níhí-yu tnúhu sá ndécú-n ìha, te tnàvíí ngüíta-yu cáháⁿ

cuèhé-yu cuèndá-n. ²³ Te na càchí tnúhu-ndí nàcuáa cada-n. Ndècu cùmí cue tée vátá cádá-gã-güedé nàcuáa ní cáháⁿ méé-güedé sá cádá-güedé cuèndá nduu vétú iní Yã Ndiöxí. ²⁴ Te quíhíⁿ-n ndíhí-güedé te cada-n nchàa nacuáa ní xóo cada ñáyi ndéé sanaha cuèndá nduu vétú iní Yã Ndiöxí. Te tava-n díhúⁿ cuu núú-güedé cháhu-güedé veñúhu, te ducaⁿ te dàtnùní ndacu deté díquí-güedé. Nchaa xíãⁿ cada-n, te quini ñáyi sá ñã ndáá tnúhu càháⁿ nchaa ñáyi càháⁿ cuèhé cuèndá-n. Te na cùtnuní iní-yu sá tnàhá-n quide-n nchaa nacuáa ní chídó tnùní ndí Moisés cadá-yu. ²⁵ Te sa ní quide ndáá-ndí cuèndá nchaa ñáyi ñuú xícá, nchaa ñáyi ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyi-áⁿ sã vã cáxí-yu nchaa sá nchító-ó ndúu táhú nchaa sá càchí-yu cùu ndiöxí ní cadúha cue ñáyi ñuyíú-a. Te ní xáhaⁿ-ndí sá vã cáxí-yu níñí, te vã cáxí-yu cuñú nchaa quiti cuèhné. Te vã càháⁿ ndíhí cue tée ñadíhí te núu ñá díú ñadíhí-güedé cùú-yu, te ní cuè ñáyi díhí vã càháⁿ ndíhí-yu tée te núu ñá díú yí-yu cùu-güedé. Duha ní tee-ndí núu tütú cuáháⁿ —càchí-güedé xáhaⁿ-güedé xii té Páblú.

Ní tñi-güedé té Páblú xití veñúhu ñáyi isràél

²⁶ Te nduu tnéé cuáháⁿ té Páblú ndíhí cùmí cue tée veñúhu càhnu sá ïo cùnuu núú ñáyi isràél cada-güedé nàcuáa ní xóo cada ñáyi ndéé sanaha cuèndá nduu vétú iní Yã Ndiöxí. Te ní quíhu-dé veñúhu càhnu sá ïo cùnuu-áⁿ ní xáhaⁿ-dè ná daha-gá nduu cùmání dandíhí-güedé nàcuáa ní xóo cada ñáyi ndéé sanaha, te dàtnùní cànehe-güedé sá ndúú táhú Yã Ndiöxí quíhíⁿ veñúhu.

²⁷ Te cùmání-gã cuu úsá nduu sá ní sáháⁿ-güedé veñúhu càhnu sá ïo cùnuu, te sa ndècu tucu té Páblú veñúhu. Te cue tée isràél véxi distritú Àsiá ní xiní-güedé té Páblú yíhí-dé veñúhu, te ní tñi ñaha-güedé xii-dé, te ïo ní cáháⁿ cuèhé-güedé cuèndá-dé núu dàva-gá ñáyi yíhí veñúhu cuèndá sá cúdèéⁿ-yu núu tẽ Páblú. ²⁸ Te níhí ní cáháⁿ-güedé, te xáhaⁿ-güedé xii-yu:

—¡Nchòhó ñáyi isràél, yáchí-ndó chì cuánùndaha ñaha-ndo! Chi tée-a yayacáⁿ

cuáháⁿ-dé càháⁿ-dé sá ñã túú nàndíhí-o, te càháⁿ-dé sá vã cádá-ó nchàa nacuáa càháⁿ tnúhu sá ní chídó tnùní ndí Moisés, te càchí-dé sá ñã túú nàndíhí veñúhu-a. Te ñã díú-ní xíãⁿ chí sa ní quíhu-dé veñúhu-a ndíhí cue tée ñã túú cùu ñáyi isràél, te sá dúcáⁿ ní quide-dé, te ñã túú-gã ní cànehe íí-dé xití veñúhu. Te veñúhu-a cùu-xi vehe Yã Ndiöxí —càchí-güedé xáhaⁿ-güedé xii-yu.

²⁹ Te ducaⁿ ní cáháⁿ-güedé chí ní sani iní-güedé sá ní quíhu ndíhí-dé té Tröfimú veñúhu-güedé, chí ní xiní-güedé xícá cùu ndíhí ñaha-dé xití ñuú. Te tée-áⁿ cúú-dé tée ñuú Éfésú, te ñã díú tõe isràél cúú-dé.

³⁰ Te chitu ñáyi ñuú-áⁿ ní tacá-yu ní tñi-yu té Páblú táñùhu ñahá-yu ní ndee veñúhu càhnu sá ïo cùnuu, te òré-ní ní nacadí-güedé yèhe veñúhu-áⁿ. ³¹ Te sa cahní-yu té Páblú ní cùu, te ní sáháⁿ ïⁿ úú-güedé núú ndécú tõe cùu capitáⁿ cùnùu-gá, te ní xáhaⁿ-güedé xii-dé sá ncháá ñáyi ñuú Jerusalén xinaá-yu. ³² Te òré-áⁿ cuáháⁿ tée cùu capitáⁿ cùnùu-gá ndíhí dava-gá cue tée nchícúⁿ-gá ndíhí sandádú-dé. Te òré ní xiní-yu ní quexìo coyo-güedé núú xixúcu-yu, te ní yùhú-yu ñã túú-gã ní càní-yu té Páblú. ³³ Te tée cùu capitáⁿ ní sátuha-dé té Páblú, te ní xáhaⁿ-dè xii cue sandádú-dé sá tñí ñaha-güedé dacùtu ñaha-güedé úú cadená. Te dàtnùní ní xícáⁿ tnúhú-dé núú-yu, te xáhaⁿ-dè:

—¿Ná cúú tõe-a? ¿Ná ní quide-dé? — càchí-dé xáhaⁿ-dè xii-yu.

³⁴ Te tée cùu capitáⁿ-áⁿ ñã ní cùtnuní iní-dé nùu ná cúú sã ní quide té Páblú, chí uuⁿ ní cuáá-yu. Te tucu càháⁿ ïⁿ, tucu càháⁿ ïⁿ-yu, núu xíãⁿ ní xáhaⁿ-dè cue sandádú-dé sá cándèca ñaha-güedé xii-dé quíhíⁿ cuàrtél núú ndécú-güedé. ³⁵⁻³⁶ Te nchícúⁿ ñahá-yu cuáháⁿ ní quexìo ndéé nàcuáa càa nchio cuíní-yu cahní ñahá-yu xii-dé ní cùu. Te níhí ní cáháⁿ-yu xáháⁿ-yu sá cahní ñaha-güedé, te xíãⁿ ní ndacani ñaha-güedé ndécá ñaha-güedé cuásaá nchio-ãⁿ.

Té Páblú xáhaⁿ-dè xii-güedé sá ñã túú cuèchi-dé

³⁷ Te cuánguihu-güedé cuàrtél ndíhí té Páblú ní cùu, te ní xáhaⁿ-dè xii tée cùu capitáⁿ cùnùu-gá:

—Càháⁿ ndàhú-í núú-n cùndetu-n na cuñaha-í ìⁿ úú tnúhu xií-yu —càchí-dé xàhaⁿ-dě.

Te téé tàxi tnuní-áⁿ nǐ xáhaⁿ-dě:

—¿Náa tnàhá yòhó càháⁿ-n tnúhu grìégú?

³⁸ Te ní càháⁿ-í sá tée ègiptú cúú-n, chi diu-n nǐ ndúcú-n cuè téé ní nàá ndihí tée cùchiuⁿ Cesár ní càháⁿ-í, chi diu ìⁿ tée yàcáⁿ ní ndúcú-dě cúmí mǐl cue téé ní sahní ndíyí. Te ndèca tnaha-güedé ní sáháⁿ xití yucu ní xíhi váha-güedé —càchí-dé xàhaⁿ-dě xii té Pàblú.

³⁹ Te té Pàblú ní xáhaⁿ-dě:

—Ná díú tée ègiptú cúú-í, chi tée isràèl cúú-í, chi diu-ni tée isràèl cúú tātà-í, te dícó-ni sá nǐ cacu-í ñuú Tàrsú ñuú cáhnú, te ñuú-áⁿ yíndèhu-xi distritú Ciliciá. Te cuíní-í cada ndee ìní-n dàña-n na caháⁿ ndihí-í-yu —càchí-dé xàhaⁿ-dě.

⁴⁰ Te ní xáhaⁿ tée cùu capitáⁿ cúnùu-gá sá cúú cáháⁿ té Pàblú, núu ní ngúnutnǐ-dé núú nchio, te ní quide-dé ndaha-dé sá cùndédóho-yu. Te ní sadí-yu yuhú-yu, te ní càháⁿ-dé tnúhu ñáyíu isràèl, te xàhaⁿ-dě xií-yu:

22

¹ —Chí cáda càhnu ìní nchòhó cue téé sa cuéhé ndihí nchòhó cue téé cuechi, na càháⁿ-í ìⁿ tnúhu cundédóho-ndo sá ñà túú cuéchi-í, chi ñà túú nǎ ní quide-í, te ni ñà túú nǎ tnúhu càháⁿ-í —càchí-dé xàhaⁿ-dě xii-güedé.

² Te cuendá sá dúcáⁿ nǐ càháⁿ-dé tnúhu mèé-yu núu tnàvíí-nǎ ní sadí-yu yuhú-yu ní xíndédóho-yu ní càháⁿ-dé, te xàhaⁿ-dě:

³ —Yúhú cúú-í tée isràèl, te ní cacu-í ñuú Tàrsú, te ñuú-áⁿ yíndèhu-xi Ciliciá. Te davitna líhli-í cùtnàhá ní quexìo-í ñuú Jerusalén ní dácúhá ñàha té Gamaliél. Te ní dácúhá-í nchaa tnúhu ní chídó tnùnì nchaa cue téé ndéé sanaha nàcuáa cada ñáyíu. Te yúhú ní cahu ìní-í ní quide-í titní núú chiúⁿ nacuáa cuu váha ìní Yǎ Ndiòxí ní càháⁿ-í, te diu-ni ducaⁿ quide nchóhó tucu.

⁴ Te ní sánú ndúcú-í nchaa ñáyíu sàndáá ìní-xi tnúhu Jèsús, cuèi tée, cuèi ñáyíu dìhí ní dácútù-í-yu, te ní chihi-í-yu vecaá, te ní níhì-í tnúhu ndee ìní sá cáhní-ndí-yu.

⁵ Te dútú cúnùu-gá ndihí cue téé cúnuu núú-ndó nàha-güedé sá ndàá càháⁿ-í chi mee-güedé ní taxi-güedé tutú cuñaha-í

xii ñáyíu isràèl ñáyíu ndècu ñuú Dàmascú cuendá cutnùnì ìní-yu ná chíúⁿ cuáháⁿ-í ní cùu. Te ñùhu-í ichi cuáháⁿ-í ñuú-áⁿ cuánúndúcú-í ñáyíu ní sàndáá ìní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñàhá-güedé xií-yu ní cùu.

Té Pàblú xàhaⁿ-dě xii ñáyíu nàcuáa ní cuu ní tuha-dé ichi Jèsús

(Hch. 9:1-19; 26:12-18)

⁶ Te ta cùyatni-í ñuú Dàmascú cuáháⁿ-í, te cùu-xi datná òré caúxúú nduu, te uuⁿni ní quee ñuhú andíu, te ní dáyèhé-xi ndéé núú núnǐ-í. ⁷ Te ní quide nee-xi núú-í, xíáⁿ ní nduá-í ndéé ñuhu. Te ní tecú dóho-í càháⁿ ìⁿ sá càháⁿ andíu, te càchí-xi: “Yòhó té Sàulú, ¿ná cuendá cúú úhú ìní ñàhá-n dándoho ñaha-n xii-í?”, càchí sá càháⁿ-áⁿ. ⁸ Te ní xáhaⁿ-í: “¿Ná cúú yòhó sá càháⁿ-áⁿ?”, xàhaⁿ-í. Te ní càháⁿ tucu ingá xito te càchí-xi: “Yúhú cúú-í Jèsús tée ní xíndecu ñuú Nazàrét, te ducaⁿ ïo dándoho ñaha-n xii-í”, càchí sá càháⁿ-áⁿ. Te xíáⁿ ní cutnùnì ìní-í sá díú Jèsús càháⁿ. ⁹ Te nchaa cue téé ndihí-í ní xíní-güedé ní dáyèhé ñuhú, te ní yuhú-güedé, dico ñà túú ní tècú dóho-güedé òré ní càháⁿ-gá. ¹⁰ Te ní xáhaⁿ-í xii-gá: “Yòhó Xítóhó Jesucristú, ¿ná cuíní-n càda-í?”, xàhaⁿ-í xii-gá. Te ní cachí-gá: “Ndacóo, te quíhíⁿ-n ñuú Dàmascú, yàcáⁿ tecú tnúhu-n nchaa nacuáa cuíní Yǎ Ndiòxí cada-n”, càchí-gá —càchí té Pàblú xàhaⁿ-dě xií-yu.

¹¹ Te ní xáhaⁿ tucu té Pàblú:

—Te cuendá sá nǐ dácúáá ñàha ñuhú xii-í nùu ní tnǐ cue téé ndihí-í ndaha-í ndéca ñàha-güedé cuáháⁿ ndéé ñuú Dàmascú.

¹² Te yàcáⁿ ndécú ìⁿ tée nàni Ananiás, te ïo vǎi sá nǐ chídó tnùnì ndíi Moisés cáda-yu quide-dé. Te nchaa ñáyíu ñuú Dàmascú ïo váha càháⁿ ndihí ñàhá-yu xii-dé. ¹³ Te ní quexìo-dé núú ndécú-í, te ní cachí-dé: “Yòhó té Sàulú, tée ndècu ndihí-í ichi Xítóhó Jesucristú, ndúha núú-n”, càchí-dé. Te òré-ni ní nacaáⁿ núú-í te ní xíní-í-dé. ¹⁴ Te dātñùnì ní cachí-dé: “Yǎ Ndiòxí ní càháⁿ ndihí-gá ñanì tnàhá-ó ní xíndecu ndéé sanaha. Te diu-gá ní caxi ñaha-gǎ xii-n cuendá quiní-n nchaa sá vǎha cuíní-gá cada-n. Te quiní-n Jèsús Yaá ñà túú cuéchi-xi, te diu-ni mee-gǎ càháⁿ ndihí

ñaha-gã xii-n. ¹⁵ Te cáháⁿ-n tnũhu Jèsús núú nchàa ñáyi, te cáháⁿ-n nchàa sá ñí xiní-n ndìhi nchaa sá ñí xíndedóho-n. ¹⁶ Tnàví, te quíhíⁿ-n cuàndute-n, te cáháⁿ ndihí-n Yá Ndiõxí cuendá cada càhnu iní-gá nchaa sá cuèhé sá dúhá ñí quide-n”, duha ní cachí té Ananiás xii-í —càchí té Pàblú xãhaⁿ-dẽ xii-yu.

Té Pàblú ní cani-dé cuèndú nàcuáa ní xãhaⁿ Jèsús cada-dé quíhíⁿ-dẽ ñúú núú xíndecu ñáyi ñá túú cùu ñáyi isràél

¹⁷ Te ní xãhaⁿ tucu té Pàblú:

—Te ní ndee-í cuàndixi-í ñúú Jerusàlén. Te ní sáháⁿ-í veñúhu càhnu sá ño cùnuu ní cáháⁿ ndihí-í Yá Ndiõxí, te ní dácótó núú ñáhá-xí sã méé Jèsús ní xiní-í xití veñúhu, ¹⁸ te ní cachí-gá: “Yáchí, quee-n ñúú Jerusàlén, chi ñáyi-a vá quíndáa iní-yu nàcuáa ní cachí-í cúñaha-n xii-yu cuèndá-í”, duha ní cachí-gá xii-í. ¹⁹ Te ní xãhaⁿ-í xii-gá: “Yòhó Xítóhó Jesucristú, sa xiní-n sã ncháa ñáyi nàhá-yu sá ñí sáháⁿ-í ndi tnahá ñí ndi tnahá ñí veñúhu nànducu-í ñáyi sàndáa iní tnúhu-n, te ní tñi-í-yu, ní chihi-í-yu vecaá, te ní táuchíuⁿ-í ní caniha-güedẽ xii-yu. ²⁰ Te cútnàhá ní sahani-güedé ndíi Tévá téé ní xóo cáháⁿ tnúhu-n, te tnàhá-í ndécú òré-áⁿ te ní xíndee-í dóo cue téé ní sahani ñaha xii ndíi. Te yúhú ní cáháⁿ-í sá ñí quide váha-güedé sá dúcáⁿ ñí quide-güedé”, duha ní xãhaⁿ-í xii-gá. ²¹ Te ní cachí tnúhu-gá xii-í: “Cuáháⁿ chi cuíni-í quíhíⁿ-n nchàa ñúú xicá núú xíndecu cue ñáyi ñá túú cùu ñáyi isràél cáháⁿ-n tnúhu-í”, càchí-gá —càchí té Pàblú xãhaⁿ-dẽ xii-yu.

Te Pàblú ndihí téé tàxi tnuní ñáhá xii cue sandadú

²² Te sá dúcáⁿ ñí cáháⁿ-dé, te ñá ní tnàhá-gá iní-yu cundedóho-yu tnúhu càháⁿ-dé. Te ñí-ni ñí cuú-yu ncháa-yu, te ní cuáa-yu, te xãháⁿ-yu:

—¡Chí cáhni-dẽ! ¡Ñá díú sã cúndecu-dé ñuyíú-a! —càchí-yu xãháⁿ-yu.

²³ Te mei òré ducaⁿ ñí cáháⁿ-yu, te ní ndátã-yu dóo-yu, te ní dáquénẽ-yu núú ñínu sá sätú iní-yu. Te ní quèhnu-yu ñuhu, te ní dácácòyó-yu núú ñínu sá ño sätú iní-yu. ²⁴ Te téé cùu capitáⁿ cùnù-gá ní xãhaⁿ-dẽ xii cue sandadú-dé:

—Chí dítá-dẽ ná quíhu-dé ndéé xití vehe, te cani-ndo-dẽ ñí, chi na quène yuhu-dé ná tnúhu ní cáháⁿ-dé núú ndéé dúcáⁿ cùdèⁿ-yu núú-dé —càchí-dé xãhaⁿ-dẽ xii-güedé.

²⁵ Te sáta ñí dácútú ñaha-güedé xii té Pàblú sá caní ñaha-güedé ní cùu, te ní xãhaⁿ-dẽ xii téé cùu capitáⁿ ndécú-ãⁿ:

—Te na càchí tnúhu-í sá vã cúú càniha-güedé ñí, chi téé ròma cúú-í, te vátá quíni ndáa-gá-ndó núú ndècuéchi-í àdi ñáhá —càchí-dé xãhaⁿ-dẽ xii téé cùu capitáⁿ.

²⁶ Te sá dúcáⁿ ñí cáháⁿ-dé, te ní sáháⁿ téé cùu capitáⁿ núú téé cùnuu-gá, te ní xãhaⁿ-dẽ:

—Vá cúú càni-o téé-ãⁿ, chi téé ròma cúú-dé —càchí-dé xãhaⁿ-dẽ.

²⁷ Te ní sáháⁿ téé cùu capitáⁿ cùnù-gá ndéé núú tẽ Pàblú, te ní xãhaⁿ-dẽ:

—Cáháⁿ ndáa-n núú ndisa téé ròma cúú-n —càchí-dé xãhaⁿ-dẽ.

Te ní xãhaⁿ tẽ Pàblú:

—Ndáa sá téé ròma cúú-í —càchí té Pàblú xãhaⁿ-dẽ xii téé cùnuu-áⁿ.

²⁸ Te ní xãhaⁿ téé cùnuu-áⁿ:

—Yúhú tnàhá-í cúú-í téé ròma, chi vãi díhú ñí cháhu-í —càchí-dé xãhaⁿ-dẽ.

Te té Pàblú ní xãhaⁿ-dẽ:

—Tnàhá-í cúú-í téé yacáⁿ tucu, chi tãtà-í cúú-dé téé ròma —càchí té Pàblú xãhaⁿ-dẽ xii téé cùu capitáⁿ cùnù-gá.

²⁹ Te uuⁿ ní nacaca sata cuè téé cuáháⁿ caniha xii-dé ní cùu. Te ní yúhú téé tàxi tnuní sá dúcáⁿ ñí xãhaⁿ tẽ Pàblú sá téé ròma cúú-dé, chi ní xãhaⁿ-dẽ ní dácútú ñaha-güedé xii-dé, núú xíãⁿ ní yúhu-dé.

Té Pàblú ní cáháⁿ ndihí-dé cue téé cùnuu oré ní quide-güedé jùndá

³⁰ Te téé tàxi tnuní sandadú ñá ní xiní-dé ná cuéchi ní dácáa ñáyi isràél díquí tẽ Pàblú, núú xíãⁿ nduu tnéé ní cana-dé cue dútú cùnù, ndihí cue téé cùchiuⁿ, ndihí cue téé cùu sacuéhé, te ní xãhaⁿ-dẽ sá cáda-güedé jùndá cuendá nducu tnúhu-güedé núú tẽ Pàblú ná cuéchi ní dácáa-yu díquí-dẽ. Te ní xãhaⁿ-dẽ xii cue sandadú sá nándaxi ñaha-güedé cadená ndútú-dẽ, te candeca ñaha-güedé quíhíⁿ núú cáda-güedé jùndá. Te ní sáháⁿ-güedé ní nandaxi ñaha-güedé xii-dé ndécá ñaha-güedé cuáháⁿ jùndá, te ní quexìo-güedé, te ní ngúnutñi-dé núú cuè téé cùchiuⁿ.

23

¹ Te yàcáⁿ ní xíndéhé vǎha té Pǎblú núu nchàa-güedé, te ní xáhaⁿ-dě:

—Cada càhnu iní nchòhó cue tée cùchiuⁿ, te ducaⁿ nchòhó cue tée cùu sacuéhé, véxi-í càchí tnúhu-í sá ñà túú cuèchi-í, chi mee Yǎ Ndiöxí náhá-gǎ nása ndècu-í ñuyíú-a, te ñá túú cùcahaⁿ núu-í núu-gǎ —càchí té Pǎblú xáhaⁿ-dě xii-güedé.

² Te té Ananiás tée cùu dútú cúnùu-gá ní xáhaⁿ-dě xii cue tée nùtní yatni ñíni té Pǎblú sá cání-güedé déhndé yuhu-dé. ³ Te té Pǎblú ní xáhaⁿ-dě xii dútú-ǎ:

—Yòhó, chi úhú tnàhí iní-n, chi ní ndúcú-n tée ní caniha xii-í, te ñá túú cuèchi-í, dico quiní-n ñá cada ñaha Yǎ Ndiöxí xii-n. Te yòhó ní cana ñaha-n ndùcu tnúhu-n nùu quide-í nchaa nàcuáa càháⁿ tnúhu sá ñí chídó tnùní ndí Moisés cada-o. Te mee-n ní ndúcú-n tée ní caniha, te ñá túú dùcaⁿ ní cáháⁿ ndí cada-o —càchí té Pǎblú xáhaⁿ-dě xii dútú cúnùu-gá-áⁿ.

⁴ Te cue tée xñutnì ñíni té Pǎblú ní xáhaⁿ-güedé xii-dé:

—Nèhé ní quide-n chi ní xícuèhé-n dútú cúnùu-gá tée xínu cuechi núu Yǎ Ndiöxí —càchí-güedé xáhaⁿ-güedé xii té Pǎblú.

⁵ Te té Pǎblú ní xáhaⁿ-dě xii-güedé:

—Cada càhnu iní-ndó chi ñá túú xìní-í sá dútú cúnùu-gá cúu-dě, chi núu tütú Yǎ Ndiöxí càchí-xi sá vǎ cúu càháⁿ cuèhé-ó cuèndá ñí tée cúnuu ñuú-ó yòtnúhu. Te yúhú ñá túú xìní-í sá tée cúnuu cuu-dé nùu ní sácóo-í ní cáháⁿ-í —càchí té Pǎblú xáhaⁿ-dě xii-güedé.

⁶ Te òré-áⁿ ñí cutnùní iní té Pǎblú sá dáva-güedé cündìhi-güedé cue tée cùu saducéú, te dava-güedé cündìhi-güedé cue tée cùu fariséú, te níhi ní cáháⁿ-dé ní xáhaⁿ-dě xii-güedé:

—Yúhú cùu-í tée fariséú, te tnàhá tǎtà-í ndìhi xii-í cúu-güedé cue tée fariséú tucu. Te tnàhá yúhú sàndáá iní-í sá ndótó nchaa ñáyiú ní xíhí, te núu xǎⁿ cuíní-ndó ndùcu tnúhu-ndo nùu-í cáná ñaha-ndo —cachí-dé xáhaⁿ-dě xii-güedé.

⁷ Te sá dúcáⁿ ñí cáháⁿ-dé xǎⁿ ní nàa ndìhi tnàha cue tée cùu fariséú ndìhi cue tée cùu saducéú, chi ñá ñí-í tnúhu ní cáháⁿ-güedé, chi ní ndí queheⁿ ndí queheⁿ-güedé sá ñí cáháⁿ-güedé. ⁸ Te cue tée cùu saducéú càchí-güedé sá vǎ ndótó

cuè ñáyiú ní xíhí, te cue tée cùu fariséú càchí-güedé sá ndótó-yu. Te cue tée cùu saducéú càchí-güedé sá ñà túú espíritú xínú cuèchi núu Yǎ Ndiöxí, te cue tée cùu fariséú càchí-güedé sá ió espíritú xínú cuèchi núu-gǎ. ⁹ Te ta cùdéeⁿ-güedé cuáháⁿ, te níhi-gá cúu ñí-güedé càháⁿ-güedé, te ñí ùú cue tée cùu fariséú cue tée dàcuaha ñaha xii ñáyiú nchaa tnúhu ní chídó tnùní ndí Moisés ní cáháⁿ níhi-güedé, te xáhaⁿ-güedé:

—Ñá túú cuèchi-dé, te cudana te ní cáháⁿ ndìhi-dé ñí espíritú xínú cuèchi núu Yǎ Ndiöxí te vá ngòó vá cúu vǎha iní-ó nùu-gǎ —càchí cue tée cùu fariséú xáhaⁿ-güedé xii-güedé.

¹⁰ Te cuèndá sá ió xǎnàa-güedé, xǎⁿ ní yúhú tée cùu capitáⁿ cúnùu-gá sá cáhni-güedé té Pǎblú, núu xǎⁿ ní xáhaⁿ-dě sá quíhíⁿ-güedé cúnúcuaca ñaha-güedé candeca ñaha-güedé nùhú cuàrtél.

¹¹ Te ndéé niú cúu ùú ní quexìo Xítóhó Jesucristú núu ndécú tǎ Pǎblú, te ní xáhaⁿ-gǎ:

—Ñí cunduu-n, vá yúhú-n, chi nàcuáa ní cáháⁿ-n ñí cacunehe ñaha-n xii-í iha, te ñí ducaⁿ cáháⁿ-n càcunehe ñaha-n xii-í quíhíⁿ-n ñuú Rómá —càchí-gá xáhaⁿ-gǎ xii-dé.

Cahni-güedé té Pǎblú ní cùu

¹²⁻¹³ Te nduu tnéé ní nataká vñhi-gá údico cue tée isràel ní ndatnúhu-güedé sá cáhni-güedé té Pǎblú, te ní xitnàha-güedé:

—Ní dítá vǎ cáxí-ó te ní ndùte vá cóhó-ó ndéé ndacu-o càhni-o té Pǎblú, te dàtnùní caxi-o dítá, te coho-o ndùte, chi sa ní sani iní-ó sǎ cádá-ó, te cuu cuèchi xii-o nùu vá cádá-ó —càchí-güedé xitnàha-güedé.

¹⁴ Te ní sáháⁿ-güedé núu ndécú nchaa dútú cúnùu ndìhi nchaa cue tée cùu sacuéhé, te ní xáhaⁿ-güedé:

—Ní cachí-ndí sá ní dítá vǎ cáxí-ndí ndéé nùu ní ndacu-ndí ní sahani-ndí té Pǎblú, chi sa ní sani iní-ndí sá cádá-ndí, te cuu cuèchi núu vá cádá-ndí. ¹⁵ Te duha cada-ndo ndìhi dava-gá cue tée cúnuu, chi cùñaha-ndo xii tée cùu capitáⁿ cúnùu-gá: “Quixi ndìhi-n tǎ Pǎblú núu ndécú-ndí cuèndá ndatnúhu ndìhi-ndí-dé, chi cuíní-ndí nducu tnúhu váha-gá-ndí ná cúu sǎ ñí quide-dé”, duha cùñaha-ndo xii tée tàxi tnuní sandádú. Te ducaⁿ-ni

cũñaha-ndo dândahú-ndó-güedě cuendá quixi ndihi-güedé té Păblú, te nchúhú sa cundetu-ndí-güedé ichi, chi quiní té Păblú ná cahni-ndí-dé —càchí-güedé xăhaⁿ-güedé xii cue tée cùchiuⁿ.

¹⁶ Te déhe cúha té Păblú ní níhí-dě tnúhu năcuáa cada-güedé ditó-dé. Te ní sáháⁿ-dě cuártél, te ní xăhaⁿ-dě xii ditó-dé năcuáa càháⁿ-güedé cada ñaha-güedě. ¹⁷ Te ní cana té Păblú ìⁿ tée cùu capitáⁿ, te ní xăhaⁿ-dě:

—Vá cundèe iní-n, quíhíⁿ ndihi-n tēe-a na càháⁿ ndihi-dé tée cùnuu-gá, chi ndècu ìⁿ cuendú cúñaha-dě cuiní-í —càchí té Păblú xăhaⁿ-dě xii tée cùu capitáⁿ.

¹⁸ Te dătnùní ní xica tée cùu capitáⁿ ndécá-dě dăxíⁿ tē Păblú cuáháⁿ núú ndécú tée cùnuu-gá, te òré ní quexio-güedé núú-dě, te ní xăhaⁿ tée cùu capitáⁿ xii-dé:

—Té Păblú tée yíhi vecaá ní cana ñaha-dě xii-í, te ní cachí-dé véxi-í ndihi tēe-a cuendá cachí tnúhu-dé ìⁿ cuendú cuiní-dé —càchí-dé xăhaⁿ-dě xii tée cùnuu-gá.

¹⁹ Te tée cùnuu-áⁿ nǐ tni-dé ndaha dăxíⁿ tē Păblú, te tănèhe ñaha-dé cuáháⁿ ìⁿ xio, te ní xícáⁿ tnúhú-dě núú-dě, te xăhaⁿ-dě:

—¿Ná cuendú cuiní-n căháⁿ-n? —càchí-dé xăhaⁿ-dě xii dăxíⁿ tē Păblú.

²⁰ Te ní xăhaⁿ-dě xii tée cùnuu-áⁿ:

—Cue tée isrâél ní ndatnúhu ndáá-güedé sá quíxí-güedě tneé cáháⁿ ndàhú-güedé núú-n cāndeca-n té Păblú quíhíⁿ jündá, te yácáⁿ cécáⁿ tnúhú ndáá-güedé núú-dě ná cúú sǎ nǐ quide-dé, càchí-güedé xǐtnàha-güedé. ²¹ Te vá quíndáá iní-n chi dícó dandàhú ñáhá-güedě, chi vîhi-gá údico-güedé ndátnúhu-güedé cundedí-güedé ichi cahni ñaha-güedě. Te xǐtnàha-güedé sá ni dítá vǎ caxí-güedě, te ni ndüte vá cóhó-güedě ndéé nùu ní ndacu-güedé ní sahani ñaha-güedě, te dătnùní caxi-güedé dítá, te coho-güedé ndute, chi sa ní sani iní-güedé sá cádá-güedě, te cuu cuéchi núu vá cádá-güedě, càchí-güedé xǐtnàha-güedé. Te cundecu túha-ná-güedé cundetu ñaha-güedě tneé, te núu na quíndáá iní-n cāndeca-n-dé quíhíⁿ jündá —càchí-dé xăhaⁿ-dě xii tée cùnuu-áⁿ.

²¹ Te vá quíndáá iní-n chi dícó dandàhú ñáhá-güedě, chi vîhi-gá údico-güedé ndátnúhu-güedé cundedí-güedé ichi cahni ñaha-güedě. Te xǐtnàha-güedé sá ni dítá vǎ caxí-güedě, te ni ndüte vá cóhó-güedě ndéé nùu ní ndacu-güedé ní sahani ñaha-güedě, te dătnùní caxi-güedé dítá, te coho-güedé ndute, chi sa ní sani iní-güedé sá cádá-güedě, te cuu cuéchi núu vá cádá-güedě, càchí-güedé xǐtnàha-güedé. Te cundecu túha-ná-güedé cundetu ñaha-güedě tneé, te núu na quíndáá iní-n cāndeca-n-dé quíhíⁿ jündá —càchí-dé xăhaⁿ-dě xii tée cùnuu-áⁿ.

²² Te tée cùnuu-áⁿ nǐ xăhaⁿ-dě:

—Cuanùhú, te vá yôo tnàhí cúñaha-n sǎ nǐ quixi-n nǐ cachí tnúhu-n năcuáa

càháⁿ-güedé cada-güedé té Păblú —càchí-dé xăhaⁿ-dě.

Ndēca-güedé té Păblú cuáháⁿ núú tē Juéli tēe cùu gobiernú

²³ Te tée cùnuu-gá ní cana-dé úú cue tée cùu capitáⁿ, te xăhaⁿ-dě:

—Tava-ndo úú ciendú sandàdú cue tée xica saha, ndihi únídico úxí sandàdú cue tée yòdo cuayú, ndihi úú ciendú sandàdú mee-ni cuè tée xïnehe lànzá. Te cada túha-ndo chi caca-ndo òré caá ìⁿ niú quíhíⁿ-ndó ñúú Cèsareá ndihi té Păblú. ²⁴ Te nducu-ndo cuèdicó ìⁿ úú cuayú codo-dě ndihi cue tée ndéé ñáhá xii-dé. Te cada cuedàdú-ndó-dě ichi, te candeca-ndo-dě quíhíⁿ quíndeca-ndo-dě núú tēe cùu gobiernú —càchí tēe cùnuu-áⁿ xăhaⁿ-dě xii cue tēe cùu capitáⁿ.

²⁵ Te tēe cùnuu-áⁿ nǐ cadúha-dé tutú cuendá quíhíⁿ ndaha té Juéli tēe cùu gobiernú. Te duha ní chídó tnùní-dé núú tutú cuáháⁿ:

²⁶ “Cóvâha díi-n, tătá gobernàdór. Ío cada cànno iní, yúhú nání-í Claudiú Lisiás. Yúhú ní tendaha-í ìⁿ tutú véxi ndaha-n cuendá quiní tnùní-n năcuáa ní cuu iha.

²⁷ Cue tēe isrâél ní tni-güedé ìⁿ tēe nàni Păblú cuiní-güedé cahni ñaha-güedě ní cùu, te ní níhí-í tnúhu sá tēe ròmá cúú-dé nùu ní sáháⁿ-í ndihi sandàdú-í ní dácăcu-ndí-dé. ²⁸ Te ní cuiní-í quiní-í ná cuendá tēe ñaha-güedé cuéchi xii-dé, núu xǐáⁿ ndécá-í-dé ní sáháⁿ núú nǐ quide cue tēe cùchiuⁿ isrâél jündá. ²⁹ Te yácáⁿ ní níhí-í tnúhu sá ñà túú nǎ cuéchi ni quide-dé, chi cuendá-ni sá nǐ níhí-güedě tnúhu sá ñà túú sàndáá iní-dé cada-dé nchaa sá nǐ xóo cada ñáyiú ní xíndecu ndéé sanaha nchícúⁿ nihnu-güedé quide-güedé, xǐáⁿ ní cudééⁿ-güedě núú-dě. Te ñà túú cuéchi cànno ni quide-dé nùu quíhíⁿ-dē vecaá àdi cahni-í-dé. ³⁰ Te ní níhí-í tnúhu sá cuè tēe isrâél ndúcú-güedé năcuáa cada-güedé cahni ñaha-güedé xii-dé, xǐáⁿ ní xăhaⁿ-í xii sandàdú-í sá cāndeca ñaha-güedé quixi xíaⁿ. Te ní xăhaⁿ-í xii cue tēe tēe ñaha cuéchi sá quíxí-güedě ndéé xíaⁿ cáháⁿ-güedé nùu ná cuéchi ní quide-dé. Te cada cànno iní-n chi duha-ni ndùu tnúhu càháⁿ-í, te cundee iní-n quèheⁿ cuendá-n-dě”, duha ní chídó tnùní tēe ní cadúha tutú cuáháⁿ ndaha té Juéli.

²⁷ Cue tēe isrâél ní tni-güedé ìⁿ tēe nàni Păblú cuiní-güedé cahni ñaha-güedě ní cùu, te ní níhí-í tnúhu sá tēe ròmá cúú-dé nùu ní sáháⁿ-í ndihi sandàdú-í ní dácăcu-ndí-dé. ²⁸ Te ní cuiní-í quiní-í ná cuendá tēe ñaha-güedé cuéchi xii-dé, núu xǐáⁿ ndécá-í-dé ní sáháⁿ núú nǐ quide cue tēe cùchiuⁿ isrâél jündá. ²⁹ Te yácáⁿ ní níhí-í tnúhu sá ñà túú nǎ cuéchi ni quide-dé, chi cuendá-ni sá nǐ níhí-güedě tnúhu sá ñà túú sàndáá iní-dé cada-dé nchaa sá nǐ xóo cada ñáyiú ní xíndecu ndéé sanaha nchícúⁿ nihnu-güedé quide-güedé, xǐáⁿ ní cudééⁿ-güedě núú-dě. Te ñà túú cuéchi cànno ni quide-dé nùu quíhíⁿ-dē vecaá àdi cahni-í-dé. ³⁰ Te ní níhí-í tnúhu sá cuè tēe isrâél ndúcú-güedé năcuáa cada-güedé cahni ñaha-güedé xii-dé, xǐáⁿ ní xăhaⁿ-í xii sandàdú-í sá cāndeca ñaha-güedé quixi xíaⁿ. Te ní xăhaⁿ-í xii cue tēe tēe ñaha cuéchi sá quíxí-güedě ndéé xíaⁿ cáháⁿ-güedé nùu ná cuéchi ní quide-dé. Te cada cànno iní-n chi duha-ni ndùu tnúhu càháⁿ-í, te cundee iní-n quèheⁿ cuendá-n-dě”, duha ní chídó tnùní tēe ní cadúha tutú cuáháⁿ ndaha té Juéli.

³⁰ Te ní níhí-í tnúhu sá cuè tēe isrâél ndúcú-güedé năcuáa cada-güedé cahni ñaha-güedé xii-dé, xǐáⁿ ní xăhaⁿ-í xii sandàdú-í sá cāndeca ñaha-güedé quixi xíaⁿ. Te ní xăhaⁿ-í xii cue tēe tēe ñaha cuéchi sá quíxí-güedě ndéé xíaⁿ cáháⁿ-güedé nùu ná cuéchi ní quide-dé. Te cada cànno iní-n chi duha-ni ndùu tnúhu càháⁿ-í, te cundee iní-n quèheⁿ cuendá-n-dě”, duha ní chídó tnùní tēe ní cadúha tutú cuáháⁿ ndaha té Juéli.

³¹ Te cue sandàdú ní quide-güedé nàcuáa ní xáhaⁿ tée tàxi tñuní ñáhá xli-güedé chi ní xica-güedé ndihí té Páblú òré caá ñⁿ niú, te ñu-ni niú-áⁿ ñi quexìo-güedé ñuú Antipatrís. ³² Te sáta ñi túndaá, te ní nacuico cuè tée xínehe lànzá ndihí dava-gá sandàdú xicá sàha cuánuhú-güedé cuártél, te mee-ná sandàdú cue tée yòdo cuayú cuáháⁿ ndihí té Páblú. ³³ Te òré ní quexìo-güedé ñuú Cèsareá, te ní sàha-güedé tée cùu gobiernú tutú néhé-güedé cuáháⁿ. Te ní quehen cuendá-dé té Páblú. ³⁴ Te sáta ñi dácuáhá tée cùu gobiernú-áⁿ tutú-áⁿ te ní xicáⁿ tñuhú-dé núú tē Páblú, te xáhaⁿ-dē:

—¿Ndéé tée cùu-n? —cachí-dé xáhaⁿ-dē.

Te ní xáhaⁿ tē Páblú:

—Tée Ciliciá cùu-í —càchí-dé xáhaⁿ-dē.

³⁵ Te ní xáhaⁿ tée cùu gobiernú-áⁿ:

—Òré quexìo cue tée tē ñaha cuéchi xii-n, te cáháⁿ-n nása ní cuu, chi níhí-í nàcuáa cada ndáá-í cuendá-n —càchí-dé xáhaⁿ-dē xii té Páblú.

Te ní xáhaⁿ-dē xii sandàdú sá cùndéé-güedé té Páblú vehe càhnu té Hèrodés.

24

Té Páblú xáhaⁿ-dē xii té Juéllí sá ñà túú cuéchi-dé

¹ Te sáta ñi cuu úhúⁿ nduu, te té Ananiás dútú cùnùu-gá cuáháⁿ-dé ñuú Cèsareá ndihí cue tée cùu sacuéhé ndihí ñⁿ tée nàni Tértulú tée cáháⁿ yuhu-güedé. Te cuáháⁿ-güedé núú tē cùu gobiernú cuáháⁿ dácuándèhnde-güedé núú-dē sá ndécuéchi té Páblú. ² Te ní ságuaca-güedé té Páblú. Te òré ní quexìo-dé núú-güedé, te ní ngüíta té Tértulú xáhaⁿ-dē xii té Juéllí nàcuáa cà cuéchi tē-güedé té Páblú:

—Ío càhnu cada iní tātá gobernàdór. Duha ndùu chiuⁿ ndéé iní ñáhá-ndí xii-n vèxi-ndí, núu nása cachí-n cùnduu. Táxáhu xii-n, chi ío váha ndécu nchaa ñáyiu, te ñá túú nàá-yu chi ío váha quide-n. ³ Te ío cùdíí iní-yu chi nchaa-ni nduu xíndecu váha-yu nchaá-yu, te ío táxáhu Ndiöxí xii-n sá dúcáⁿ quide-n. ⁴ Te cada càhnu iní, cuíní-í ndatnúhu-o ñⁿ úu-ni cuendú cuendá sá vā cùyàa-o dacuíta-í chiuⁿ-n. ⁵ Te ñⁿ tēe iha ío dàsatú iní ñáhá-dē, chi ndèni ní cuu cuáháⁿ-dé ndátnñhu-dé ndihí ñáyiu isràél dánáá-dé-yu. Te nèhé quidé-dē

chi cuáháⁿ-dé dácáháⁿ-dé nchaa ñáyiu cuendá quíndaá iní-yu tñuhu tēe ní xíndecu ñuú Nazàrét. ⁶ Chi ducaⁿ cáháⁿ cue tēe iha sá ñi sáháⁿ-dé veñúhu càhnu sá ío cùnùu, te cuíní-dé daquēe tñhú-dē veñúhu cuendá cuíní-dé xocàni-dé sá íi ndécú, núu xíáⁿ ní tñi ñaha-güedé ndécá ñaha-güedé cuáháⁿ núú cuè tēe cùchiuⁿ cuendá cácaⁿ tñuhú-güedé núú-dē núu ná cuendá ducaⁿ cuíní-dé cada-dé, chi ducaⁿ càa leí ndécú ndihí-güedé sá cáda ndáá-güedé núu ná ñⁿ sá cúu. ⁷ Te té Lisiú tēe cùu capitáⁿ cùnùu-gá ní quexìo-dé ndihí sandàdú, te ní dácúnú-güedé nchaa cue tēe nùtní ndihí té Páblú, te dàtnùní ní tñi ñaha-güedé xii-dé ndécá ñaha-güedé cuáháⁿ. ⁸ Te sáta xíáⁿ, te ní xáhaⁿ-dē sá quíxí-güedé ndéé ndíha cundáá cuéchi-dé. Te yòhó cundee iní-n càcáⁿ tñuhú-n núú-dē, te núu ndáá ducaⁿ ñi quide-dé àdi ñáhá —càchí té Tértulú xáhaⁿ-dē xii té Juéllí tēe cùu gobiernú.

⁹ Te dava-gá cue tēe isràél xínutñí xíáⁿ ñi cáháⁿ-güedé sá ndáá cáháⁿ té Tértulú. ¹⁰ Te tēe cùu gobiernú ní quide-dé ndaha-dé núú tē Páblú cuendá cáháⁿ-dé, te té Páblú ní xáhaⁿ-dē:

—Yòhó sa ní cuu titñí cuíá ndécú-n iha xehndé-n cuéchi nchaa ñáyiu xínáá, núu xíáⁿ ío cùdíí iní-í sá ndíha téhndé cuéchi tēe ñaha-güedé xii-í. Te cundee iní-n cùndedóho-n na càni-í cuendú nàcuáa ní cuu. ¹¹ Te nducu tñuhu-n te quini-n ná cáháⁿ ndáá-í, chi sa ní cuu úxúú nduu sá ñi sáháⁿ-í veñúhu càhnu sá ío cùnùu ñuú Jerusàlén ní cáháⁿ ndihí-í Yá Ndiöxí. ¹² Te ni ñà túú ní nàá-í ndihí ñáyiu xití veñúhu, te ñá túú ní xáhaⁿ-í nàá-yu ni ñⁿ xichi, te ni ñⁿ veñúhu líhli ní sáháⁿ-í ñá túú ná ní xáhaⁿ-í cadá-yu. ¹³ Te ni ñà túú quèñuhu-güedé cue tēe cáháⁿ ndáá te núu ndáá ducaⁿ ñi quide-í. ¹⁴ Te yúhú cáháⁿ ndáá-í sá cáháⁿ ndihí-í Yá Ndiöxí, chi ñu-ni Yá Ndiöxí ní xóo cáháⁿ ndihí ñáyiu ndéé sanaha, núu xíáⁿ ní tuha-í ichi-gá. Te cue tēe-a càchí-güedé sá ñà díú ñⁿ ichi váha ni tuha-í. Te yúhú sàndáá iní-í nchaa sá ñi chídó tñuní ndí Moisés ndihí dava-gá cue tēe ní xóo cáháⁿ tñuhu Yá Ndiöxí ndéé sanaha. ¹⁵ Te sàndáá tucu iní-í sá ndótó nchàa ñáyiu ní xihí, cuéi ñáyiu váha iní-xi, te cuéi ñáyiu úhú iní-xi, dico ndotó-yu. Te ducaⁿ ñi xóo quíndaá iní

nchaa ñáyiú ní xíndecu ndéé sanaha. ¹⁶ Te yúhú ío ndúcu ndee-í quidè-í nchaa sá càháⁿ Yá Ndiòxí cuendá sá vǎ cúú càhaⁿ núú-í núú-gǎ ndihí núú ñáyiú ñuyíú-a.

¹⁷ Te sa ní cuu titní cuía sǎ ñà túú-gǎ sàháⁿ-í ñuú Jerusálén, te ní sáháⁿ tucu-í néhè-í díhúⁿ ní taxi ñáyiú ñuú xícá cuendá cuañaha-í xii ñáyiú ñuú Jerusálén. Te ní ndúcù-í sá cuǎha táhù-í Yá Ndiòxí. ¹⁸ Te ní xíndecu-í veñuhu càhnu sá ío cùnuu ní quide-í nchaa nàcuáa ní xóo cada ñáyiú ní xíndecu ndéé sanaha cuendá nduu vétú iní Yá Ndiòxí. Te ñá túú chítú-yu ní sáháⁿ, te ní ñà túú nǎ ní cùu, te ní naníhí ñáháⁿ ìⁿ úú cue téé isràél xii-í, cue téé véxi distritú Àsiá. ¹⁹ Te quixi mee-güedé iha cáháⁿ-güedé, te núu sá ndáá ní xini-güedé sá yúhú ndècuéchi-í ní cùu, ²⁰ àdi ñáhá. Dico cachí tnúhu cue téé-áⁿ nása ní cuu òré ní xíndecu-í jündá-güedé núu ndècuéchi-í àdi ñá túú ndècuéchi-í. ²¹ Dico ñá túú cuéchi-í chí ìⁿdìi-ni tnúhu ní cáháⁿ-í ní xáhaⁿ-í xii-güedé sá sàndáá iní-í sá ndótó nchàa ñáyiú ní xíhí, te diu-ni núu xiǎⁿ càchí-güedé sá ndècuéchi-í —càchí té Pǎblú xáhaⁿ-dǎ xii té Juélí.

²² Te té Juélí sa xíní váha-dé nàcuáa cuáháⁿ tnúhu Jèsús, núu xiǎⁿ ñá ní cuíní-gá-dé ndatnúhu-dé ndihí té Pǎblú, te ní xáhaⁿ-dǎ:

—Sa ní cuu, cundetu-n na quèxio té Lìsiú téé cùu capitáⁿ cúnùu-gá, te òré-áⁿ cundáá cuendá-n —càchí té Juélí xáhaⁿ-dǎ.

²³ Te ní xáhaⁿ-dǎ xii téé cùu capitáⁿ:

—Cundeé-n tǎ Pǎblú-ǎⁿ, te núu nása càchí-dé cada-n, te dañá-n na càháⁿ ndihí-dé cue téé xíní tnáhá ndihí-dé núu cuañaha-güedé nchaa sá xíní ñuhu-dé àdi nása cada-güedé —càchí té Juélí xáhaⁿ-dǎ xii téé cùu capitáⁿ.

²⁴ Te ní cuu titní nduu, te ní sáháⁿ té Juélí vechiúⁿ ndihí ñadihí-dé, te ñaha-áⁿ nání-áⁿ Drùsilá, te ñaha isràél cúú-áⁿ. Te ní xáhaⁿ-dǎ sá quíngueñuhu-güedé té Pǎblú, te òré ní quèxio-dé vechiúⁿ, te ní cáháⁿ-dǎ núú-yu ncháa-yu sá quíndáá iní-yu tnúhu Xítóhó Jesucristú. ²⁵ Te ní xáhaⁿ-dǎ:

—Mee-ni sǎ vǎha cada-ndo. Te coto-ndo mèe-ndo, te vá cáda-ndó ñi ìⁿ sá cuéhé sá dúhá, chí ìⁿ nduu cáháⁿ Yá Ndiòxí ndédacàa ñáyiú váha iní-xi, te ndédacàa ñáyiú úhú iní-xi —càchí té Pǎblú xáhaⁿ-dǎ.

Te sá dúcáⁿ ní xáhaⁿ-dǎ, te ní yùhú té Juélí, te ní xáhaⁿ-dǎ:

—Vá cáháⁿ-gá-ó tnávíí, cuáháⁿ, te òré cúyächí-í, te cana ñaha-í xii-n —càchí-dé xáhaⁿ-dǎ.

²⁶ Te té Juélí ní quide-dé cuendá sá cuañaha tǎ Pǎblú díhúⁿ te vá ndíhu-gá-dé vecaá ní cùu, núu xiǎⁿ titní xito ní cana-dé té Pǎblú vechiúⁿ ní ndatnúhu ndihí tnàha-güedé, dico ñá túú ní chǎhu-dé. ²⁷ Te úú cuía ducaⁿ ní quide-güedé, te dǎtnùní ní xínu té Juélí chiúⁿ-dé, te ní ngúnutnǎi té Pòrsiú Fèstú. Te òré ní xínu té Juélí chiúⁿ-dé, te ní dándõo-dé té Pǎblú yíhí-ni-dǎ vecaá. Te ducaⁿ ní quide-dé cuendá ní cuíní-dé cudíu-dé núu cuè téé isràél.

25

Té Pǎblú càháⁿ ndihí-dé té Fèstú

¹ Te ní cuu úní nduu sá ní quèxio té Fèstú ñuú Cèsareá ní queheⁿ-dé chiúⁿ, te ní quee-dé cuáháⁿ-dǎ ñuú Jerusálén. ² Te yàcáⁿ ní naníhí tnáhá-dǎ ndihí nchaa dútú cúnùu ndihí nchaa cue téé tàxi tnuní ñáhá xii ñáyiú isràél, te xáhaⁿ-güedé xii té Fèstú sá ndáá ndècuéchi té Pǎblú. ³ Te ní cáháⁿ ndàhú-güedé núú-dǎ sá téndàha-dé sandádú-dé quíngueñuhu ñaha-güedé vecaá xii-dé ndéé ñuú Cèsareá te candeca ñaha-güedé quíhíⁿ. Te ducaⁿ ní cáháⁿ-güedé, chí ní ndatnúhu-güedé sá cáhni ñaha-güedé xii té Pǎblú ichi ni cùu. ⁴ Te té Fèstú ní xáhaⁿ-dǎ:

—Vá cúú quixi-dé ndéé ndíha. Na cùndetu-dé ñuú Cèsareá chí sacú-ni nduu cuyaa-í iha te dǎtnùní núhú-í yàcáⁿ.

⁵ Te yáchí-gá quíhíⁿ ndihí-í cue téé cùnuu-gá, te yàcáⁿ cuu cáháⁿ-ndó núu ndáá ndècuéchi-dé àdi cáháⁿ mée-dǎ núu ndáá ndècuéchi-dé àdi ñáhá, te cutnùní iní-ndó —càchí-dé xáhaⁿ-dǎ.

⁶ Te ní xíndecu té Fèstú úná úxí nduu ñuú Jerusálén, te dǎtnùní cuánuhú-dé ñuú Cèsareá. Te nduu tnéé cuáháⁿ-dǎ vechiúⁿ, te òré ní quèxio-dé, te ní xáhaⁿ-dǎ xii cue sandádú xínú cuèchi sá quíhíⁿ-güedé queñuhu-güedé té Pǎblú vecaá te candeca ñaha-güedé quíhíⁿ vechiúⁿ. ⁷ Te òré ní quèxio té Pǎblú vechiúⁿ, te sa ndècu cue téé isràél cue téé ní quee ñuú Jerusálén, te cuánguihu-güedé ndéé dìñi té Pǎblú ní

ngúnutní-güedé, te xăhaⁿ-güedě xii cue tée cùchiuⁿ sá ndècuéchi vîhi-dé, dico ñá túú ní cùndee tnúhu-güedé. ⁸ Te té Păblú ní xăhaⁿ-dě xii té Fèstú:

—Ñá túú ndècuéchi-í, ñá túú nă ní quide-í, chi ñá túú tnàhá iní-í cada-í ^hn sá cächí lèi sá vă cúú cada-o. Te ni xití veñúhu cànno sá ïo cùnno ñá túú nă quide-í, te ni té Cèsár tée yîndaha cuéhé nacióⁿ ñá túú cãháⁿ cuéhé-í cuendá-dé —cächí té Păblú xăhaⁿ-dě xii-dé.

⁹ Te té Fèstú ní cuini-dé cada-dé năcuáa cudîu-dé núú cuè tée isrâél ní cùu, núú xîăⁿ ní xăhaⁿ-dě xii té Păblú:

—¿Cundee iní-n quîhíⁿ-n ñúú Jerusàlén-ăⁿ? Te yàcáⁿ cundáa cuéchi sá sáa díquí-n —cächí té Fèstú xăhaⁿ-dě xii té Păblú.

¹⁰ Te xăhaⁿ tē Păblú:

—Dîu-ni ^hn vechîuⁿ tée cùchiuⁿ Cèsár ndécù-í iha, te dîu-ni iha cada ndáa-n nûu cuini-n ní cùu. ¿Te ná cuendá candeca ñaha-n quîhíⁿ ingá xichi? Yòhó tnàhá-n xini-n sá ñá túú nă quide-í ñá yiu isrâél.

¹¹ Chi núú dicó yúhú ní quide-í ^hn cuéchi cànno, te ñá túú nă cada-xi cuéi na cànno ñaha-ndo xii-í ní cùu. Te sa ní cutnùní iní-n sá ñá ndáa, chi mee-ni tnúhu ndehnde xícáháⁿ-güedé, te ñá túú ndúu váha-xi ducaⁿ cada-n cúñaha-n sá quîhíⁿ-í ndîhi-güedé ingá xichi. Te xîăⁿ cuini-í quîhíⁿ-í núú tē Cèsár tée yîndaha cuéhé nacióⁿ, te yàcáⁿ cãháⁿ mée-dě nûu ndáa ndècuéchi-í —cächí té Păblú xăhaⁿ-dě xii té Fèstú.

¹² Te ní ndatnúhu té Fèstú ndîhi cue tée chîndee tnúhu ñaha xii-dé, te dătnùní ní xăhaⁿ-dě xii té Păblú:

—Te sa ní cãháⁿ-n sá quîhíⁿ-n quîtnahá-n tē Cèsár te dîu-ni quîhíⁿ-n, te quini-n năsa cãháⁿ tē-ăⁿ yàcáⁿ —cächí-dé xăhaⁿ-dě xii té Păblú.

Té Păblú cãháⁿ ndîhi-dé té Àgripá tée yîndaha nacióⁿ Isrâél

¹³ Te sáta nî cuu cuéhé nduu, te ní quee té Àgripá tée yîndaha nacióⁿ Isrâél cuáháⁿ-dé ñúú Cèsareá ndîhi ñadîhí-dé, te ñaha-ăⁿ nání-ăⁿ Berenicé te òré ní quexiô-yu, te ní cãháⁿ ndîhí-yu té Fèstú. ¹⁴ Te sáta nî cuu titní nduu, te ní cãháⁿ té Fèstú cuendá té Păblú ní xii-dé té Àgripá:

—Ndècu ^hn tée ní dândöo té Juéli vecaá nání-dě Păblú. ¹⁵ Te cútnahá ní sáháⁿ-í

ñúú Jerusàlén ní nanítnahá-í ndîhi cue dútú cùnno ndîhi cue tée cùu sacuéhé nûú ñá yiu isrâél. Te ní dácáa díquí-güedé té Păblú cuéchi, te ní cachí-güedé sá táuchîuⁿ-í cahnî ñaha-güedé xii-dé ní cùu. ¹⁶ Te ní xăhaⁿ-í xii-güedé sá vă cúú, chi ñá túú ducaⁿ quide nchúhú cue tée rómá cùtexínu cada castiú-ndí ñá yiu, chi díhna-gá ndúcú tnúhu-ndí núú ñá yiu sáa cuéchi díquí-xi cuendá quini-ndí nûu năsa cãháⁿ mée-yu ndîhi ñá yiu sácáⁿ cuéchi cuendá-yu, te òré-ăⁿ cùtnùní iní-ndí nûu ndáa ndècuéchi-yu àdi ñáhá, te ducaⁿ te nihí-ndí năcuáa quide ndáa-ndí cuendá-yu, duha ní xăhaⁿ-í xii-güedé —cächí té Fèstú xăhaⁿ-dě xii té Àgripá.

¹⁷ Te ní xăhaⁿ tucu té Fèstú:

—Te sáta nî quexiô-güedé ndéé ndîha, te nduu tněé ní sáháⁿ-ni-ndí vechîuⁿ. Te ní xăhaⁿ-í sá quîngueñuhu-güedé té Păblú candeca ñaha-güedé quixi, te òré ní quexiô-dé, ¹⁸ te ní ngüita-güedé xăhaⁿ-güedé sá ndècuéchi-dé. Te ní sani iní-í sá ^hn cuéchi cànno tee ñaha-güedé dico ñáhá, chi dicó-ni sá ^hn tnúhu ní cãháⁿ-dé, xîăⁿ ducaⁿ nî quide-güedé. ¹⁹ Te ní tenáa ñáhá-güedé xii-dé, chi cächí-güedé sá ñá túú cãháⁿ váha-dé cuendá ndiôxi-güedé. Te tnàhá-ni cuendá ^hn tée nani Jesús cãháⁿ-dé, chi cächí-dé sá nî xihí tē-ăⁿ te ní ndoto-dé cächí-dé xăhaⁿ-dě xii-güedé, cächí-güedé.

²⁰ Te ñá ní cùtnùní iní-í năsa cúñaha-í xii-güedé cuendá téhndé cuéchi-dé. Te xîăⁿ ní xícáⁿ tnúhu-í núú tē Păblú nûu cundee iní-dé quîhíⁿ-dé ñúú Jerusàlén, te ndéé ndiácăⁿ cada ndáa-ndí cuendá-dé, te núu ndáa ndècuéchi-dé năcuáa cãháⁿ-güedé àdi ñáhá ní cùu. ²¹ Te dătnùní té Păblú ní cachí-dé sá cùndecu tnaa-dé vecaá te dătnùní quîhíⁿ-dé núú tē Cèsár, te tē-ăⁿ cada ndáa-dé cuendá-dé. Te cuendá sá dúcáⁿ nî cãháⁿ té Păblú, xîăⁿ nûu ní xăhaⁿ-í sá cùndéé ñáhá cuè sandadú xii-dé, nini na còto-í năsa cada-í quîhíⁿ-dé núú tē Cèsár, duha ní xăhaⁿ-í xii-güedé —cächí té Fèstú xăhaⁿ-dě xii té Àgripá.

²² Te té Àgripá ní xăhaⁿ-dě xii té Fèstú:

—Te tnàhá yúhú ïo cudîí iní-í cundedóho-í tnúhu cãháⁿ-dé —cächí-dé xăhaⁿ-dě.

Te ní xăhaⁿ tē Fèstú:

—Tneé cana-í-dé te cundedóho-n nása cãháⁿ-dé —cãchí-dé xãhaⁿ-dẽ.

²³ Te nduu tnée ní quexìo té Àgripá ndihi ñadìhí-dé tá Berènicé vechiùⁿ, te ío ní quide cãhnu ñaha-güedé xii-yu. Te cuánguihú-yu vechiùⁿ ndihi cue tée cùu capitáⁿ cúnùu-gá ndihi cue tée cùnùu ñuú Cèsareá. Te té Fèstú ní xãhaⁿ-dẽ sá quingueñuhu-güedé té Pãblú vecaá, te òré ní quexìo-dé, ²⁴ te ní xãhaⁿ tẽ Fèstú xii té Àgripá ndihi nchaa ñáyiu xĩndecu-áⁿ:

—Chí cündèhe tée iha chi tée-a cãchí cue tée isràél sá ndècuéchi-dé, te cútnàhá ní xĩndecu-í ñuú Jerusálén ní cachí-güedé sá ndáá ndècuéchi-dé, te ñuú-ducaⁿ cãháⁿ-güedé iha. Te nchaa-güedé ní cuáá-güedé te cãchí-güedé sá táuchìuⁿ-í cahni ñaha-güedé xii-dé ní cùu. ²⁵ Te sátá ñí ndihi cuèndú ní cãháⁿ-güedé, te ní cutnùnì iní-í sá ñà túú ñí ñí cuéchi cãhnu ñí quide-dé, núu ñà túú ní tàuchiùⁿ-í cahni ñaha-güedé xii-dé. Te mee-dẽ ní cachí-dé sá quihíⁿ-dé núu tẽ Cèsár tée yìndaha cuéhe nacióⁿ, te ní xãhaⁿ-í sá cúu quihíⁿ-dé. ²⁶ Te ñà túú ní xìnì váha-í nása ní quide-dé, núu xíãⁿ ñà ní ñihí-í nàcuáa cadúha-í tutú quihíⁿ ndaha té Cèsár, te xíãⁿ ní cana-í-dé véxi-dé iha cuèndá nchaa-ndo cãháⁿ ndihi-ndo-dẽ. Te ducaⁿ cãnuu cadìhna-gá yòhó tãtá Àgripá cácaⁿ tnúhu-n núu-dé núu nása cãháⁿ-dẽ, te òré-áⁿ cutnùnì iní-í nása cada-í cadúha-í tutú quihíⁿ ndaha té Cèsár. ²⁷ Chi sãni iní-í sá ñà túú ndùu váha-xi sá quihíⁿ ñí tée tàú cuéchi te núu vá códó tnùnì núu ñí tutú nàcuáa cãa cuéchi tàú-dé —cãchí té Fèstú xãhaⁿ-dẽ xii-güedé.

26

Te Pãblú cãháⁿ ndihi-dé té Àgripá

¹ Te dãtnùnì ní xãhaⁿ tẽ Àgripá tée yìndaha nacióⁿ Isràél xii té Pãblú:

—Te vitna cãháⁿ-n núu nása ní cuu cuèndá-n —cãchí-dé xãhaⁿ-dẽ.

Te té Pãblú ní ndacani-dé ndaha-dé sá cündedóho-güedé, te ní xãhaⁿ-dẽ xii té Àgripá tée yìndaha nacióⁿ Isràél:

²⁻³ —Tãtá Àgripá, ío cùdíí iní-í sá ñí naníhí tnáhá-ó vitna, chi yòhó ío váha xìnì-n nchãa nacuáa quide ñáyiu isràél quide cãhnú-yu Yá Ndiõxí, te ío váha xìnì-n nchãa tnúhu xĩtnàhá-yu. Te vitna cundee iní-n

cündedóho-n ñí úú tnúhu na cãháⁿ-í. Na cãchí tnúhu-í sá ñà ndáá ní quide-í nchaa sá cãháⁿ cue tée isràél.

Té Pãblú cãháⁿ-dé nàcuáa ní quide-dé cútnàhá vátá túhá-gã-dé ichi Yá Ndiõxí

⁴ Te sã nãha nchaa cue tée cùnùu núu ñáyiu isràél nàcuáa ní quide-í ñuú-í ndihi ñuú Jerusálén cútnàhá ní cuu landú-í. ⁵ Te mee-güedé nãhá-güedé sá ndéé lìhli-í ní chitnahá-í cue tée cùu farisèú. Te núu cuiní-güedé cãháⁿ-güedé sá tõe farisèú cùu-í àdi ñãhá dico nchaa-güedé sa nãha-güedé sá cuè tée-áⁿ ñí chitnahá-í. Te cue tée cùu farisèú-áⁿ ío cuiní-güedé cada-güedé nchaa nàcuáa nchìcúⁿ nihnu ñáyiu quide-yu. Te yúhú nchaa sá nchìcúⁿ nihnú-yu quide-yu-áⁿ ñí quide-í. ⁶ Te vitna ndècu-í iha, te cãháⁿ-n núu váha-ñí quide-í àdi ñãhá, chi cue tée-ãⁿ tée ñãha-güedé cuéchi xii-í cuèndá sá sãndáá iní-í sá ndótó nchãa ñáyiu ní xíhí. Te ñuú-ducaⁿ ñí xãhaⁿ Yá Ndiõxí xii nchaa ñãní tnáhá-ó ñí xĩndecu ndéé sanaha. ⁷ Te nchaa ñáyiu-áⁿ xĩndetú-yu nduu ndòto ñáyiu ní xíhí ní cùu. Te ñuú-ducaⁿ ndètu nchaa ñãní tnáhá-ó ndècu ñuyú-a ndéé vitna, te xíãⁿ núu cuèi nduu cuèi niú cãháⁿ ndihi-yu Yá Ndiõxí. Te sã sãndáá iní-í núu xíãⁿ ní cãháⁿ-í, te tõe ñaha cue tée isràél cuéchi xii-í. ⁸ ¿Te ná cuèndá nchòhó cue tée isràél ñà túú cuiní-ndó quindáá iní-ndó sã dãndòto Yá Ndiõxí nchaa ñáyiu ní xíhí? —cãchí té Pãblú xãhaⁿ-dẽ.

Té Pãblú cãní-dé cuèndú sá ñí xóo chihi-dé ñáyiu sãndáá iní tnúhu Jèsús vecaá

⁹ Te ní xãhaⁿ tùcu té Pãblú:

—Ndéé dàvá-áⁿ ñí quide úhú-í ñáyiu sãndáá iní-xi tnúhu Jèsús Yaá ní quee ñuú Nazàrét, te ní cãháⁿ-í sá váha-ñí ní quide-í sá dúcãⁿ ñí quide-í. ¹⁰ Te ñuú-ducaⁿ ñí quide-í ñuú Jerusálén. Te cue dútú cùnùu ní taxi-güedé ñí tutú cuèndá tní-í ñáyiu ní sãndáá iní tnúhu Jèsús, te vai-yu ní chihi-í vecaá. Te òré ní cãháⁿ-güedé sá cãhni-güedé ñáyiu-áⁿ, te tnáhá-í ní cãháⁿ-í sá cúu cãhni ñaha-güedé xii-yu. ¹¹ Te titní xito ní sãháⁿ-í nchaa veñúhu ñáyiu isràél, te ní caní-í-yu te ní xãhaⁿ-í sá dáñã-yu ichi Jèsús. Te cuèndá ío ní cudéè-í núu-yu, xíãⁿ ní sãháⁿ-í nchaa ñuú xíca ñí sãnúndúcù-í

dava-gá ñáyi sàndáá iní tnúhu-gá cuèndá dandóho ñaha-güedé xií-yu.

Té Păblú cǎháⁿ tucu-dé nása ní cuu ní tuha-dé ichi Yá Ndiöxí
(Hch. 9:1-19; 22:6-16)

¹² Te cuèndá xiǎⁿ ní xica tucu-í cuáháⁿ-í ñuú Dámascú, néhè-í tutú ní taxi cue dütú cúnüu cuáháⁿ, cuèndá sá ndácü-í tñi-í nchaa ñáyi sàndáá iní tnúhu Jèsús ní cüu. ¹³ Te òré caúxúu nduu ñuhu-í ichi cuáháⁿ-í, te uuⁿni ní quee ñuhú andüu ñí dáyèhé-xi ndéé núu nütñi-í ndihi cue téé ndèca tñaha ndihi-í, te níhi-gá ní dáyèhé-xi dàcüúxi nchicanchii. ¹⁴ Te nchaa-ndí ní nduá-ndí ndéé ñuhu, te ní tecú dóho-í cǎháⁿ ñí sá cǎháⁿ tnúhu ñáyi isràél, te cǎchí-xi: “Yòhó Sàulú, ¿Ná cuèndá cúu ùhú iní ñáhá-n xii-í dándóho ñaha-n? Te ío dándóho-n mee-n, chi dàtná cuini-n quide ndicutu quide-n chi quití-án òré cǔxi-güedé-di püyá te sǎha-di patadá núu-xi, te sá dúcáⁿ quide-di te quide úhú-di mee-di. Te ducaⁿ sǎtnahá-xi cüu yohó chi ñá túu sàndáá iní ñáhá-n xii-í”, cǎchí sá ñí cǎháⁿ-án. ¹⁵ Te ní xǎháⁿ-í: “¿Ná cúu yòhó sá ñí cǎháⁿ-ái?”, xǎháⁿ-í. Te cǎchí sá cǎháⁿ-án: “Yúhú cúu-í Jèsús Yaá cúu ùhú iní-n”, duha ní cachí sá cǎháⁿ-án. Te xiǎⁿ ní cutnùní iní-í sá Jèsús cǎháⁿ. ¹⁶ Te ní cachí-gá: “Ndacuíñi-n chi yúhú cǎháⁿ-í chi cuini-í quíhíⁿ-n càda-n chiuⁿ-í, chi quíhíⁿ-n cǎháⁿ-n núu ñáyi nàcuáa ní cuu ní xiní ñáhá-n xii-í vitna, te quixi tucu-í cǎháⁿ ndihi ñaha-í xii-n, te cǔñaha-n xii-yu nàcuáa cǎháⁿ-í. ¹⁷ Chi cuini-í quíhíⁿ-n cǎháⁿ-n tnúhu-í núu ñáyi isràél ndihi núu ñáyi ñá túu cüu ñáyi isràél, te coto ñaha-í xii-n cuèndá vá cǎhni ñáhá-yu xii-n. ¹⁸ Te cuini-í quíhíⁿ-n cǔñaha-n xii-yu sá dáñá-yu nchaa ichi cuèhé ichi duha ndècü-yu, te tuhá-yu ichi váha cuèndá vá quindáá iní-yu cadá-yu sá cǎháⁿ yucu ñávaha, te quindáá iní-yu cadá-yu nchaa nàcuáa cǎháⁿ Yá Ndiöxí. Te núu na quindáá iní-yu tnúhu cǎháⁿ-í, te cada cǎhnu iní-í nchaa cuéchi-yu, te naníhí tàhú-yu ndihi dava-gá ñáyi sa ní xócuñí nchaa sá cuèhé sá dúhá ñí xindecu iní-yu”, duha ní cachí-gá xii-í —cǎchí té Păblú xǎháⁿ-dè xii té Àgripá téé yindaha nacióⁿ Isràél.

Té Păblú quidé-dè nchaa nàcuáa ní xǎháⁿ Jèsús cada-dè

¹⁹ Te ní xǎháⁿ tucu té Păblú xii té Àgripá:

—Ñá túu dàña ndeé-í quidé-í nchaa nàcuáa ní cǎháⁿ Jèsús òré ní cǎháⁿ-gá andüu. ²⁰ Te díhna-gá ñáyi ñuú Dámascú ní cǎháⁿ-í tnúhu-gá núu-yu, te ní xǎháⁿ-í xii-yu sá dáñá-yu nchaa sá cuèhé sá dúhá quidé-yu, te cǎháⁿ ndihi-yu Yá Ndiöxí, te cadá-yu mee-ni sǎ váha cuèndá cutnùní iní dava-gá-yu sá ñí dáñá-yu nchaa sá ñá túu váha ní xóo cadá-yu. Te ducaⁿ-ni ní xǎháⁿ-í xii ñáyi ñuú Jerusàlén ndihi ñáyi nihí nacióⁿ Isràél ndihi nchaa ñáyi ñá túu cüu ñáyi isràél. ²¹ Te cuèndá sá dúcáⁿ ñí cǎháⁿ-í núu ní tñi ñaha cue téé isràél xii-í cǔtnáhá ní sǎháⁿ-í veñuhu cǎhnu sá ío cúnuu cǎhni ñaha-güedé ní cüu. ²² Te diu-ni mee Yá Ndiöxí ní chindee ñaha-gá xii-í núu ndècu-í iha tnáví cǎháⁿ-í tnúhu-gá, te mee-ni tnúhu-gá cǎháⁿ ndihi-í nchaa-yu, cuèi ñáyi cuica, te cuèi ñáyi ndàhú. Te ndíi Moisés ndihi dava-gá cue téé ní xóo cǎháⁿ tnúhu Yá Ndiöxí ndéé sanaha ñí cǎháⁿ-güedé nàcuáa cada-xi vitna, te diu-ni ducaⁿ cǎháⁿ-í nchaa-ni nduu. ²³ Te cue téé-án ñí cachí-güedé sá Cristú Yaá tendaha Yá Ndiöxí quixi ñuyú-a ndoho tñahá-gá, te cuú-gá, te dàtnùní ndoto-gá. Te ducaⁿ càda-xi nchaa ñáyi ní xihí ndotó-yu núu na sáa nduu chi ducaⁿ càda-xi ní cachí méé Yá Ndiöxí. Te cuèndá sá dúcáⁿ ñí ndoto-gá, xiǎⁿ cǔtnùní sá cúu naníhí tàhú ñáyi, cuèi ñáyi isràél, te cuèi ñáyi ñá túu cüu ñáyi isràél. Te dàtná-ni nduu tnúhu ní cǎháⁿ cue téé ní xóo cǎháⁿ tnúhu-gá ndéé sanaha-án, te diu-ni ducaⁿ cǎháⁿ yúhú tucu —cǎchí té Păblú xǎháⁿ-dè.

Té Păblú xǎháⁿ-dè xii té Àgripá sá quindáá iní-dé tnúhu Jèsús

²⁴ Te sá dúcáⁿ ñí cǎháⁿ té Păblú, te ní cǎháⁿ níhi té Fèstú, te xǎháⁿ-dè:

—Păblú, jío lùcú cǎháⁿ-n! Cuèndá ío vai ní dácuáhá-n, núu xiǎⁿ ndadá lùcú ñáhá-xi xii-n —cachí-dé xǎháⁿ-dè.

²⁵ Te ní xǎháⁿ té Păblú:

—Ñáhá, vá dúcáⁿ cǎháⁿ-n chi ñá díú sǎ lùcú-í duha cǎháⁿ-í, chi tnúhu ndáá cǎháⁿ-í. ²⁶ Te té Àgripá-a sa nàha-dé ndihi nchaa ñáyi isràél nàcuáa ní cuu, chi sa ní níhí-dé tnúhu ndihi dava-gá-yu nàcuáa ní cǎháⁿ-í,

núu xíáⁿ cúyíi-í cáháⁿ ndihi-í-dé —càchí-dé xăhaⁿ-dë xii té Fèstú.

²⁷ Te ní xáhaⁿ-dë xii té Àgripá:

—Yúhú sa xìní-í sá sàndáá iní-n tnúhu ní chídó tnùní cue téé ní xóo cáháⁿ tnúhu Yá Ndiòxí ndéé sanaha —càchí-dé xăhaⁿ-dë.

²⁸ Te ní xáhaⁿ tē Àgripá:

—¿Quide-n cuendá sá íiⁿ úú tnúhu ní cáháⁿ-n te quindáá iní-í tnúhu Jèsús cáháⁿ-n-ăⁿ? —càchí-dé xăhaⁿ-dë.

²⁹ Te ní xáhaⁿ tucu té Păblú:

—Cuéi vitna te cuéi ndéé cuéé-gá dico cuiní-í sá dàcuitíi sá quindáá iní-n tnúhu Jèsús. Te diu-ni ducaⁿ xicáⁿ táhú-í núu Yá Ndiòxí sá ncháá ñăyiu ndècu ndihi-o iha quindáá iní-yu tnúhu-gá dàtná cuiní-n ní quide yúhú, ducaⁿ càdá-yu. Dico-ni sá núu vá quihíⁿ-ni-yu vecaá dàtná cuiní-n ndòho yúhú —càchí-dé xăhaⁿ-dë xii té Àgripá.

³⁰ Te sáta dúcáⁿ ñi cáháⁿ-dé, te ní ngúnutnii té Àgripá téé yindaha nacióⁿ Israél, ndihi té Fèstú téé cùu gobiernú, ndihi tá Berènicé ndihi dava-gá ñăyiu xñucóo yatni. ³¹ Te ní tnahá-yu ndèca tnahá-yu cuáháⁿ ñi xio. Te ní xitnahá-yu:

—Téé-ăⁿ ñá túú ñă cuéchi ni quide-dé núu chihi ñaha-güedë vecaá àdi cahni ñaha-güedë —càchí-yu xitnahá-yu.

³² Te té Àgripá ní xáhaⁿ-dë xii té Fèstú:

—Cuéchi mee-dë chi ní cachí-dé sá quitnahá-dé té Cèsár, xíáⁿ núu ndíhu tucu-dé vecaá, te núu ñá túú dùcaⁿ ni cáháⁿ-dé, te cácu-dé ní cùu —cachí-dé xăhaⁿ-dë xii té Fèstú.

27

Té Păblú cuáháⁿ-dé ñuú Ròmá

¹⁻² Te ní ndatnúhu-güedé sá quihíⁿ té Păblú ndihi bàrcú nacióⁿ Italiá, te tnahá ñi tée nàni Aristarcú cuiní-dé quihíⁿ ndihi-ndí-dé, te cùu-dé téé ñuú Tesalónica, te ñuú-ăⁿ yindèhu-xi distritú Macèdoniá. Te ní sáha cuendá-güedé té Păblú ndihi ñi úú-gá cue téé xixíhi vecaá ní queheⁿ cuendá ñáhá tē Jülüü téé cùu capitáⁿ, téé yindaha nchaá sandadú nání Àugustú, te ní quée-ndí nchaá-ndí bàrcú ñuú Adràmitiú. Te ní xica bàrcú-ăⁿ cuáháⁿ-ndí ndihi-xi te cuíta yáha-ndí ñi úú ñuú yindèhu distritú Asiá quihíⁿ. ³ Te nduu

tnéé ní quexio-ndí ñuú Sídón. Te ío váha ní quide té Jülüü, chi ní dáñá-dë ní quene té Păblú ní sáháⁿ-dé ní cáháⁿ ndihi-dé cue téé ío váha tnahá tnúhu ndihi-dé núu cudana cundáhú iní ñáhá-güedë cuáhaha-güedë nchaá sá xíní ñúhu-dé. ⁴ Te dàtnùní ní ndéé tucu-dé bàrcú cuáháⁿ-ndí. Te ío níhi táchí te ñá ní dàña-xi caca ndáá bàrcú, te ní sáháⁿ bàrcú ndéé yatni yuhu distritú Chìpré, te distritú-ăⁿ cáá cuádava xití lámár, te xíáⁿ ñá túú cuéhé táchí ni yăha-ndí. ⁵ Te ta yăha-ndí cuáháⁿ, te ní yáha-ndí ñi xio yuhu distritú Cìliciá ndihi yuhu distritú Pànfiliá, te ní sáá-ndí ndéé ñuú Mírá ñi ñuú yindèhu distritú Lìciá.

⁶ Te ní quene téé cùu capitáⁿ cuándúcú-dë ingá bàrcú, te ní níhí-dë ñi bàrcú téé ñuú Alejándriá, ñúhú ichi-xi quihíⁿ-xi nacióⁿ Italiá. Te ní ndicuaca ñaha-dë xii-ndí cuáháⁿ-ndí ní quée-ndí bàrcú-ăⁿ, te ní xica-xi cuáháⁿ-xi. ⁷ Te ío cuéé cuáháⁿ bàrcú-ăⁿ, cuéhé nduu ní xúhuⁿ-xi ichi, te yica-ni ñi quexio-ndí yuhu ñuú Nidú, te ñá ní dàña-gá táchí quihíⁿ ndáá bàrcú núu ní xicó ndúú-xi. Te ní yáha-ndí ñi xio yuhu distritú Crètá núu ñá túú quene vihi táchí, te diu-ni cuádava tucu lámár cáá distritú-ăⁿ. Te ní yáha-ndí yuhu ñuú Salmón, te diu-ni Crètá yindàha-xi ñuú-ăⁿ. ⁸ Te ní yáha-ndí cuáháⁿ-ndí mee-ñá núú ràyá distritú Crètá, te ío ní ndoho-ndí ní sáá-ndí ñi xichi núú nání Puèrtú Váha, yatni vii-ni-gá ñuú Làseá.

⁹ Te ní cuyaa vihi-ndí ichi, ducaⁿ-ni cùu-ndí ní tnahá yóo cúúⁿ dăú táchí, te ío úhú yăha bàrcú núu na quihíⁿ-ni-xi. ¹⁰ Te ní xáhaⁿ tē Păblú xii-güedé:

—Nchaá-ndo cündedóho-ndo tnúhu na cáháⁿ-í-a. Ío úhú núu na càda yica-o quihíⁿ-ó ndihi barcú chi cuíta càrgá te cuíta bàrcú, te cuu-ni iní-xi tnahá-ni mee-o cùú-ó chi cáhá-ó núu na ngàunihnu-o xití ndute —càchí-dé xăhaⁿ-dë xii-güedé.

¹¹ Te téé cùu capitáⁿ ñá ní sàndáá iní-dé tnúhu ní cáháⁿ té Păblú. Dico tnúhu ní cáháⁿ téé dàcaca barcú ndihi xitohó-xi chi ní sàndáá iní-dé. ¹² Te ñá ní tnahá iní-güedé Puèrtú Váha cuendá sá ñi tnahá yóo cúúⁿ dăú táchí, te ñá túú dăhu váha táchí xíáⁿ, núu vâi-güedé ní cuiní-güedé yáha-güedé

quíhíⁿ-güedé sáá-güedé ndéé ñuú Fènicé ní cùu. Te yàcáⁿ cundecu-güedé yóó cúúⁿ dǎú táchí cuèi ñá túú cǎváha vihi, chi nchìi nàcuáa yáha bàrcú, te yàcáⁿ quíhu táchí, dico dǎhu-gá. Núu xǎⁿ ndéé ndíácǎⁿ nátàcá bàrcú yóó cúúⁿ dǎú táchí, te diu-ni Crétá yíndàha-xi ñuú-áⁿ.

Nitùhú làmár cúúⁿ dǎú táchí

¹³ Te duha ní quene nuu luha táchí, xǎⁿ ní sani iní-güedé sá ndácú-güedé quíhíⁿ-güedé, núu ní natava-güedé caá ndètní ndéé bàrcú, te ní xica-xi cuáháⁿ-xi ní yáha-ndí yatni vií yuhu dístítú Crétá. ¹⁴ Te tnaa-ni ní cuu sá ní xica bàrcú, te duha ní cunuu dǎú táchí ñⁿ xio yuhu ñuú-áⁿ ¹⁵ te nchìta ichi cuáháⁿ bàrcú. Te ñá ní ndàcu-gá-xi quíhíⁿ ndáá-xi nàcuáa cuáháⁿ-xi ní cùu, núu ní dáñá-ndí cuáháⁿ méé-nǎ bàrcú. ¹⁶ Te ní yáha-ndí ñⁿ ñuú nání Clàudá, te ñuú-áⁿ caá cuádava xítí làmár. Te ñⁿ xio yuhu ñuú núu ñá túú quène vihi táchí ní yáha-ndí, te bàrcú lìhli sá nchìcúⁿ sátá bàrcú cáhnú, chi ní ndacu-ndí ní taxúha-ndí xítí bàrcú cáhnú. ¹⁷ Te sátá ñⁿ ndacu-ndí ní taxúha-ndí bàrcú lìhli, te ní ducuⁿ nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núu ñùhú cùchí yuhu ñuú Sirté, núu xǎⁿ ní ndíhi dóo nchítá dǎquí bàrcú ní nuu nehe-güedé, chi dóo-ǎⁿ ío níhi chìndaha táchí, núu xǎⁿ cuáháⁿ bàrcú ñⁿ xio. Te ní dáñá-güedé ñá túú-gǎ ní dácaca-güedé, núu cuáháⁿ méé-nǎ-xi ta chìndaha táchí cuáháⁿ. ¹⁸ Te ío níhi dǎú táchí, te ñá ní cuìní tñàhí-xi yáha. Te nduu úú sá dúcáⁿ ñá túú-gǎ ní dácaca-güedé bàrcú te ní ngüíta-güedé ní dǎngöyo-güedé sá nchídó-xí cuèndá cuìní-güedé nduu ñamá-xi. ¹⁹ Te nduu úní ní dǎngoyo-güedé nchaa ndachìuⁿ cánehe chìuⁿ-güedé xítí bàrcú. ²⁰ Te cuéhé nduu ñá túú ní xìní-ndí ní chòdíní ní nchìcanchii, chi ío níhi ní cuuⁿ dǎú táchí, núu ní cáháⁿ-ndí sá vǎ cǎcu-ndí, chi ndíhi-ndí cáhá ní cáháⁿ-ndí.

²¹ Te ní cuu titní nduu ñá túú-gǎ xéxí-ndí, núu xǎⁿ ní ngúnutní té Pǎblú núu-güedé, te xǎhaⁿ-dè:

—Quíndáá iní-ndó tñuhu ní cáháⁿ-í, te cundecu nahi-o Crétá ní cùu. Te núu ní tñⁿ-ndo tñuhu-í, te vǎ dǎcuíta-o cǎrgá ndíhi dava-gá ndàchiuⁿ ni cuu. ²² Te vǎ yùhú-ndó

chi vǎ cùú ní ñⁿ-ndo dico bàrcú chi cuíta. ²³ Te nàha-ndo sá yùhú cǎháⁿ ndíhi-í Yǎ Ndiòxí te quède-í nàcuáa cǎháⁿ-gá. Te diu-ni mee-gǎ ní techìuⁿ-gá ñⁿ espíritú xínú cuèchi núú-gǎ ní quixi, ²⁴ te ní cachí-xi xii-í: “Vǎ yùhú-n chi vǎ cùú-n, dico dǎcuítí quíhíⁿ-n cǎháⁿ ndíhi-n tǎ Cèsár. Te ní ñⁿ tée ndíhi-n vǎ cùú, chi ío cùdíí iní ñáhá Yǎ Ndiòxí xii-n”, duha ní cáháⁿ espíritú xínú cuèchi núú-gǎ ní cachí tñuhu-xi xii-í. ²⁵ Núu xǎⁿ cǎchí tñuhu-í sá vǎ yùhú-ndó, chi sa cùtnuní iní-í sá cádá Yǎ Ndiòxí nàcuáa ní cáháⁿ espíritú xínú cuèchi núú-gǎ. ²⁶ Te mee tǎchí chindaha-xi bàrcú dǎquíhíⁿ-xi ndéé yuhu ndute —cachí té Pǎblú xǎhaⁿ-dè xii-güedé.

²⁷ Te sa ní cuu sáhúⁿ nduu sáhúⁿ niú sá ní ngüíta-xi cùuⁿ dǎú táchí, te ñá túú-gǎ dácaca-güedé bàrcú, chi mee-nǎ táchí tá chìndaha-xi bàrcú cuáháⁿ núu ndute làmár Adriá. Te sátá ní cuu dava niú, te ní quide cuèndá cue tée dácaca bàrcú sá tá cùyatni-güedé ñuhu yìhí.

²⁸ Te ní chicuáhá-güedé ná daha-gá mètrú néhé-xí sǎ cùnú xítí ndute cuèndá cutnùní iní-güedé sá tá cùyatni-xi ndéé yuhu làmár, te nèhe-xi ócò sáhúⁿ ñⁿ-ni-gá mètrú. Te ní xica tucu bàrcú luha-gá, te dǎtnùní ní chicuáhá tucu-güedé, te xǎⁿ néhé-xí ócò úsá-ni-gá mètrú. ²⁹ Te ní yùhú-güedé sá candaundeé-xi cava, te ní queheⁿ-güedé cúmí caá náhnú sǎ nchìcúⁿ yoho, te ní dǎquèe-güedé xítí ndute ndàa sátá bàrcú,

te dǎtnùní ní ngüíñí-xi ñá ní xica-gá-xi, te ní cuìní-güedé sá òré-ni túndaá ní cùu.

³⁰ Te cue tée dácaca bàrcú ní natava-güedé bàrcú lìhli dǎndéé-güedé núu ndute ní cùu, te ní cachí-güedé sá quíhíⁿ-güedé ndàa núu bàrcú dǎquèe-güedé úú-gǎ caá cuèndá cuita candeé-xi bàrcú cáhnú cuèndá sá vǎ cǎcá-xí. Te cuìní-güedé dandáhú-güedé dava-gá nchúhú cue tée ñuhu ndíhi-güedé bàrcú, chi ní ndatnúhu-güedé sá cúnú-güedé ní cùu.

³¹ Te té Pǎblú ní xǎhaⁿ-dè xii tée cùu capitáⁿ ndíhi dava-gá sandádú:

—Te núu na dǎndóo ñaha cuè tée dácaca bàrcú cunu-güedé, te vǎ cǎcu-o —cǎchí-dé xǎhaⁿ-dè.

³² Te sá dúcáⁿ ní xǎhaⁿ-dè núu ní sáháⁿ sandádú ní xehndé-güedé yoho nchìcúⁿ bàrcú lìhli dǎngáúnìhnu-güedé xítí ndute cuáháⁿ-xi.

³³ Te váha váha-ni ta tũndaá cuáháⁿ, te ní xáhaⁿ tẽ Pãblú:

—Sa ní cuu sáhúⁿ nduu ñá túú tñàhí xèxi-ndo sá ndihú iní-ndó. ³⁴ Te vitna yáchí-ndó, chi caxi-ndo cuendá naníhí ndéé-ndó, te vá yùhú-ndó chi ñá túú ñá tñahá ni ìⁿ-ndo —cachí-dé xáhaⁿ-dẽ xii-güedé.

³⁵ Te sátá dúcáⁿ nĩ cáháⁿ-dé, te ní queheⁿ-dé ìⁿ pàá, te ní ndacáⁿ táhú-dẽ núú Yã Ndiõxí, te núú-güedé nchaa-güedé ducaⁿ nĩ quide-dé, te dãtnùní ní táhú-dẽ luha ní xexi-dé. ³⁶ Te ducaⁿ te dãtnùní ní cuyì-güedé ní xexi-güedé nchaa-güedé.

³⁷ Te úú ciendú únídico sáhúⁿ ìⁿ-ndí ñúhú bàrcú núú tñahá té Pãblú, te nchaa-ndí ní xexi ndihí-ndí-dé. ³⁸ Te ní xexi-ndí ní ndahá xití-ndí. Te dãtnùní ní ngüíta-güedé ní tava-güedé nchaa ngohnchi triú ní dãngoyo-güedé xití ndute cuendá nduu ñamá-gá bàrcú.

Ní dáhu bàrcú xití làmár

³⁹ Te sátá nĩ tũndaá, te ñá ní cùtnuní-gá iní-güedé ndéé cúú-xí núú nĩ sáá-güedé, te ní xiní-güedé ìⁿ xichi núú nĩ xícó ndúú luha yuhu làmár, te vãi vihi cúchí dándáá-xí yùhu ndute, te xiáⁿ ñá túú dàcandá víhí tãchí ndute. Te ní ndatnúhu-güedé sá ndácú-güedé dacàca-güedé bàrcú quíhíⁿ-xi ndéé núú ñúhú cùchí. ⁴⁰ Te xiáⁿ núú ní sáháⁿ-güedé ní xehndé-güedé nchaa yoho nchìcúⁿ caá tácàndeé bàrcú ní ndóo xití làmár, te ní nadatàyá-güedé vítú sã dácúico-xi bàrcú, te ní nacata caa-güedé ìⁿ dóo díquí bàrcú, te ta chindhaha táchí cuáháⁿ yuhu làmár tá cùyatni-xi ñuhu yichí cuáháⁿ. ⁴¹ Te ndècu ìⁿ xichi ní natacá víhí cùchí xití ndute, te xiáⁿ nĩ nguíndüxi nihnu bàrcú-güedé, te ní cutìⁿ-xi xití cúchí, te ñá ní ñihí-gã-güedé nàcuáa cada-güedé nene-xi. Te ío níhi ní dácandá táchí ndute, te ní chúcú ndéé-xi ndàa sátá bàrcú, te ní ndihí ní táhú-xí. ⁴² Te cue sandádú ní xitnàha-güedé sá cáhni-güedé nchaa cue téé ní xihí vecaá cuendá sá vã quíhíⁿ-güedé núú ndute te cunu-güedé. ⁴³ Te téé cùu capitáⁿ ñá ní dàña-dé cahni-güedé cue téé ní xihí vecaá, chi ñá ní cùndee iní-dé cahni-güedé tñahá té Pãblú. Te ní xáhaⁿ-dẽ xii-güedé sá cuè téé xicuu cada quíhíⁿ núú

ndute te na yãha-güedé ndute quene-güedé yuhu làmár. ⁴⁴ Te dava cue téé ñá cúú càda, ní xáhaⁿ-dẽ nanducu-güedé vítú ñí àdi vítú nĩ táhú sã nĩ xihí bàrcú, te núú xĩáⁿ caundodo-güedé yãha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

28

Té Pãblú ndécú-dé ñúú Máltá cáá cuådava làmár

¹ Te sátá nĩ cácu-ndí ní nene-ndí ñuhu yichí, te ní níhí-ndí tñuhu nàcuáa nàni ñúú núú nĩ sáá-ndí, te ñúú-áⁿ nání-xí Máltá, te càa-xi cuådava làmár. ² Te ío quide víxiⁿ-xi cuendá ío cùuⁿ dáú. Te ñáyiu ñúú-áⁿ nĩ cundàhú iní ñáhã-yu xii-ndí, ní dãtnàhá-yu ñuhú te ní cana ñahá-yu ní sáháⁿ-ndí ní nacuídí-ndí. ³ Te té Pãblú dátacá-dé nducú, te tñahá-ni ìⁿ cóo dééⁿ nĩ tñì nihnu-dé-di, te òré cuáháⁿ ndaha-dé chucu-dé núú ñuhú, te ní ñáni-di cahni, te ní ndee-di xití nducú ní sãnduú-di ndaha-dé, te ní xexihaⁿ-di xii-dé. ⁴ Te nchaa ñáyiu ndèhé-yu sá tácàndeé-di ndaha-dé, te ní ngüíta-yu ní xitnàhá-yu:

—Váa ndíyì ní sahani téé-a, te ñá ní xihí-dé làmár, te dacuití sã cùú-dé vitna, chi sa naha Yã Ndiõxí ná ní quide-dé ñuyíú-a —càchí-yu xitnàhá-yu.

⁵ Te té Pãblú ní quidi-dé ndaha-dé ní ngaunihnu-di núú ñuhú, te ñá túú tñahí ná ní cùu núú nĩ xexi-di. ⁶ Te ñáyiu ñúú-áⁿ xĩndéhé-yu núu daquíhíⁿ-xi chùhúⁿ àdi nduá-dé cuú-dé. Te naha nĩ xĩndéhé ñahá-yu núu nása cada ñaha-xi xii-dé, te ñá túú tñahí ná ní quide ñaha-xi, te ní xitnàhá-yu:

—Váa ndiõxí cúú tẽe-a núu dácáⁿ ñá túú tñahí ná ní quide-xi ndaha-dé núú nĩ xexi cóo —càchí-yu xitnàhá-yu.

⁷ Te yatni núú dúcáⁿ nĩ xexihaⁿ cóo-ãⁿ cáá ñuhu xitu téé nàni Publiú, te téé-ãⁿ táxí tñuní-dé nihí ñúú cáá cuådava xití làmár núú ndécú-ndí nduu-ãⁿ. Te ío váha iní-dé chi ní cana ñaha-dé ní sáháⁿ-ndí ní xĩndecu-ndí úní nduu vehe-dé. ⁸ Te tátá té Publiú-ãⁿ cáá-dé cùhú-dé ñuhú-dé cahni, te tñahá-dé daxi. Te té Pãblú ní sáháⁿ-dé núú cáá-dé, te ní cáháⁿ ndihí-dé Yã Ndiõxí, te ní

sacáⁿ ndodo-dé ndaha-dé díquí tēe cùhú-áⁿ, te ducaⁿ-ni nǐ quide-dé, te ní ndúha tēe cùhú-áⁿ. ⁹ Te sátá dúcáⁿ nǐ quide té Páblú, te ní quixi nchaa ñáyiú cùhú núú ndécú-ndǐ, te ní quide tátna ñaha tē Páblú xií-yu te ní ndúha-yu. ¹⁰ Te òré ndécú-ndǐ xiáⁿ, te vai sá nǐ taxi táhú-güedē, te òré ní xica-ndǐ ní taxi tucu-güedē nchaa sá xíní ñuhu-ndǐ ichi.

Té Páblú ní quexìo-dé ñuú Ròmá

¹¹ Te yàcáⁿ ní xíndecu-ndǐ úní yóó, te sa ndècu ñⁿ barcú tēe ñuú Alejándriá òré ní quexìo-ndǐ, te ní xíndecu-xi ñihí yóó cúúⁿ dǎú táchí. Te núú-xi càndodo sandú sá dánani-güedē Cástór ndihí sàndú sá dánani-güedē Pólux, te xití bàrcú-áⁿ nǐ quée-ndǐ cuáháⁿ-ndǐ. ¹² Te ní quexìo-ndǐ ñuú Siràcusá, te yàcáⁿ ní xíndecu-ndǐ úní nduu. ¹³ Te ní xica tucu bàrcú cuáháⁿ-xi, te ní quexìo-ndǐ ñuú Règiú. Te nduu tnēe duha ní quene nuu táchí. Te ní xica bàrcú cuáháⁿ-xi, te ndéé nduu úú ní quexìo-ndǐ ñuú Pùteolí. ¹⁴ Te yàcáⁿ ní naníhí tnáhá-ndǐ ndihí ñáyiú sàndáá iní tnúhu Jèsús, te ní cachí-yu sá cùndècu-ndǐ úná nduu, núu xiáⁿ ní xíndecu-ndǐ úná nduu ndihí-yu. Te ní xica tucu bàrcú cuáháⁿ-xi, te ní quexìo-ndǐ ñuú Ròmá. ¹⁵ Te ñáyiú ròmá ñáyiú sàndáá iní tnúhu Jèsús, ní níhí-yu tnúhu sá cuáháⁿ-ndǐ, te ní quixí-yu ní quixi tnahá ñáhá-yu ichi. Te davá-yu ní naníhí-ndǐ ñuú Fòrú Àpiú, te davá-yu ní naníhí-ndǐ ñuú Úní Tàbernás. Te òré ní xiní té Páblú nchaa ñáyiú véxi tnahá ñáhá xì-ndǐ, te ndee ndèe ní cuu iní-dé, te ní ndacáⁿ táhú-dē núú Yá Ndiòxí sá dúcáⁿ nǐ quidé-yu. ¹⁶ Te sátá nǐ quexìo-ndǐ ñuú Ròmá, te cue tēe cùchiuⁿ ní xáhaⁿ-güedē xii té Páblú sá cùndècu ñⁿ-dé, te ní xíndecé ñáhá cuàa sandadú xii-dé.

Té Páblú càháⁿ-dé tnúhu Yá Ndiòxí ñuú Ròmá

¹⁷ Nduu úní sá nǐ quexìo té Páblú, te ní cana-dé cue tēe cùnuu núú ñáyiú isràél ndécú ñuú Ròmá, te ní sáháⁿ-güedē núú ndécú-dē, te ní xáhaⁿ-dē:

—Nchòhó cue tēe isràél, càchí tnúhu-í sá ñà túú nǎ ní quide-í ni ñⁿ ñáyiú cùtnahá ní xíndecu-í ñuú Jerusalén. Te ñà túú ní

cáháⁿ cuèhé-í sá quidē-yu nchaa nàcuáa ní xóo cada cue ñani tnáhá-ó nǐ xíndecu ndéé sanaha, te ñà túú nǎ ní quide-í te ní tñi ñaha-güedē ní sáha cuendá ñáhá-güedē xii-í núú cuè tēe ròmá, cue tēe ndècu yacáⁿ. ¹⁸ Te cue tēe-áⁿ nǐ ndúcú tnúhu-güedē ñuu ndáá ndècuéchi-í, te ní cutnùní iní-güedē sá ñà túú nǎ ní quide-í, te xiáⁿ cuíní-güedē queñuhu ñaha-güedē xii-í vecaá ní cùu. ¹⁹ Te ñiú-ni cue tēe isràél ñà ní dàña-güedē cácu-í, chí cuíní-güedē sá cáhni ñaha cue tēe ròmá, cue tēe xíndecu yàcáⁿ xii-í ní cùu, te xiáⁿ ñuu ní xáhaⁿ-í sá quixí-í càháⁿ ndihí-í té Cèsár cuendá iha cada ndáá mée-dē cuendá-í, te vá yóo ñⁿ tee-í cuéchi. ²⁰ Núu xiáⁿ ní cana ñaha-í xii-ndo cuendá cunaha-ndo nàcuáa ní cuu. Te ní xáhaⁿ-í sá sàndáá iní-í sá ndótó ñáyiú ní xihí, te ñiú-ni ducaⁿ càháⁿ dava-gá ñáyiú isràél, te sá dúcáⁿ nǐ càháⁿ-í, te ní chihí ñaha-güedē vecaá, te xíndecé ñáhá-güedē ndéé vitna —càchí té Páblú xáhaⁿ-dē xii-güedē.

²¹ Te ní xáhaⁿ-güedē xii-dé:

—Ñà túú tnahí tutú ní tendaha cue tēe distritú Jùdeá quixi cuendá-n. Te ní cuè tēe isràél ñà túú ní quixi-güedē càháⁿ cuèhé-güedē cuendá-n. ²² Te cuíní-ndǐ cund-edóho-ndǐ nása cunduu tnúhu càháⁿ-n, chí sa ní níhí-ndǐ tnúhu sá ncháá xìchi ío xícháⁿ cuèhé-yu cuendá nchaa ñáyiú sàndáá iní tnúhu Jèsús —càchí-güedē xáhaⁿ-güedē xii té Páblú.

²³ Te ní xáhaⁿ-güedē nduu cùyáchí-güedē te quixi-güedē cundedóho-güedē dava-gá cuendú càháⁿ té Páblú. Te ní tnahá nduu nǐ ndatnúhu-güedē quíhíⁿ-güedē núú quidé vèhe-dé, te vai-yu ní sáháⁿ-yu ní xíndedóho-yu tnúhu ní càháⁿ-dé, te ncháca nchaa ní càháⁿ ndihí-dé-yu. Te ní xáhaⁿ-dē xií-yu sá ndǐ Moisés ndihí dava-gá cue tēe ní xóo càháⁿ tnúhu Yá Ndiòxí ndéé sanaha ní chídó tnùní-güedē núú tütú-güedē sá díú-gǎ tendaha-gǎ Crístú quixi-gá ñuyíú-a. Te ní chídó tnùní-güedē nchaa nàcuáa cada-gá, te ñiú-ni nàcuáa càháⁿ tutú-güedē cada Crístú, te ducaⁿ nǐ quide-gá cùtnahá ní xica cuu-gá ñuyíú-a, núu xiáⁿ ní cutnùní sá díú Jèsús cúu-gǎ Crístú Yaá ní tendaha Yá Ndiòxí ní quixi ñuyíú-a. Te núu quindáá iní-yu, te ndíhu ndaha ñaha Yá Ndiòxí

xií-yu. ²⁴ Te davá-yu ní sándáá iní-yu tnúhu ní cáháⁿ-dé, te davá-yu ñá túú ní sándáá iní-yu. ²⁵ Te cuèndá sá ñă ííⁿ-ní tnúhu ni cǎháⁿ-yu, núu xǎⁿ cuìní-yu núhú-yu ni cùu. Te ní xáhaⁿ tǎ Pǎblú sá cùndètu tnaá-yu cáháⁿ-dé ìngá tnúhu, te xǎhaⁿ-dǎ:

—Ní xáhaⁿ Espíritú Yǎ Ndiǒxí xii ndíi Chàíá nǎcuáa cáháⁿ ndíi núú ncháa ñaní tnáhá-ó ní xíndecu ndéé sanaha. Te ní cáháⁿ Espíritú-gá ííⁿ sá ndáá ní xáhaⁿ-xi xii ndíi, te duha ní xáhaⁿ-xi:

²⁶ Quihíⁿ-n te cúñaha-n xii ñáyiu:

Nchòhó mee-ni cùndedóho-ndo tnúhu càháⁿ Yǎ Ndiǒxí, dico ni vǎ tǎcú tnùní-ndó.

Te cada-gá titní núú sǎ vǎ yǒo tnàhí ndàcu cada, dico ni vǎ cútnùní iní-ndó nǎcuáa ndùu sá cádá-gǎ,

²⁷ chi cuèndá sá ìo sàá iní-ndó, xǎⁿ ducaⁿ ñà túú sǎha-ndo cuèndá nása cuáháⁿ tnúhu càháⁿ-gá,

chi ñá cuìní-ndó cùndedóho-ndo, te ni ñă sándáá iní-ndó.

Te ni ñă cuìní-ndó dàña-ndo nchaa sá cuèhé sá dúhá quide-ndo

cuendá xocàni-gá nchaa xǎⁿ iní-ndó, duha cúñaha-n xií-yu.

Càchí Espíritú-gá xǎhaⁿ-xi xii ndíi. ²⁸ Te na càchí tnúhu-í sá quihíⁿ cue téé càháⁿ tnúhu Yǎ Ndiǒxí cáháⁿ-güedé tnúhu-gá núú ñáyiu ñá túú cùu ñáyiu isràél, chi ñáyiu isràél ñá túú cuìní-yu cùndedóho-yu. Dico ñáyiu ñá túú cùu ñáyiu isràél chi cùdíí ìní-yu cùndedóho-yu, núu xǎⁿ naníhí tàhú-yu —càchí té Pǎblú xǎhaⁿ-dǎ xií-yu.

²⁹ Te sátá ñí ndíhi cuèndú ní xáhaⁿ-dǎ, te ní ndéé-yu cuánuhú-yu ta ndàtnúhu-yu cuáháⁿ.

³⁰ Te úú cuía ñí xínu ní xíndecu té Pǎblú ííⁿ vehe ní cháhu-dé. Te ní xóo cáháⁿ vǎha-dé ndíhi nchaa ñáyiu ní xóo quihíⁿ vehe-dé.

³¹ Te ní xáhaⁿ-dǎ sá ndíhu ndaha ñàha Yǎ Ndiǒxí xií-yu núu quíndáá iní-yu tnúhu-gá, te vǎ yǒo ííⁿ ni sàdí yuhu-dé. Te mee-ni tnúhu Xítohó Jesucrístú ní cáháⁿ-dé núú-yu.

TUTÚ NÍ CADÚHA TĒ PĀBLÚ QUIHIⁿ NDAHA ÑÁYIU ÑUÚ RÒMÁ

Té Pāblú cadūha-dé tutú quihíⁿ ndaha ñáyiú xīndecu ichi Xítohó Jesucristú ndécú ñuú Rómá

¹ Yúhú té Pāblú xínú cuèchi-í núú Xítohó Jesucristú, chi mee Yá Ndiöxí ní cachí-gá sá cúu-í ñⁿ téé cāháⁿ tnúhu-gá núú ñáyiú, te tnúhu-gá cúu-xí tnúhu sá cāháⁿ nācuáa naníhí tǎhú-ó, núú ñuú-gá ní tendaha ñàha-gá xii-í xicáⁿ cūu-í cāháⁿ-í tnúhu-gá.

² Te ndéé sanaha ñí cachí Yá Ndiöxí sá dàcuítí sáa nduu ngūndecu ndihí ñáyiú tnúhu-gá. Te ducaⁿ ñí xáhaⁿ-gá xii cue téé ní cāháⁿ tnúhu-gá dàvá-áⁿ ñí chídó tnùní-güedé núú tütú-gá. ³ Te tnúhu-gá sá cāháⁿ-í-a cāháⁿ-xi ñuú-í cuèndá Xítohó Jesucristú Yaá cúu Déhe-gá. Te Déhe-gá-áⁿ cúu-gá ñⁿ ñáyiú, te cūu-gá ñaní tnáhá ndíi Dàvií. ⁴ Te cūu-gá Yaá ñá túú tnàhí cuèchi-xi. Te ní xihí-gá te ní ndoto-gá, te xíáⁿ cútnùní iní-ó sá cúu-gá Déhe Yá Ndiöxí, te ío cāhnu cuu-gá. ⁵ Te ñuú-í Xítohó Jesucristú ní quide-gá ní nduu tǎhú-í núú Yá Ndiöxí sá cāháⁿ-í tnúhu-gá núú cuè ñáyiú ñuyíú-a cuèndá quíndáá iní-yu tnúhu-gá te canchicúⁿ nihnú-yu cadá-yu ncha nācuáa cāháⁿ-xi, te ducaⁿ ío cuu cāhnu-gá. ⁶ Te tnàhá nchòhó cúu-ndó ñáyiú sa nchìcúⁿ nihnu quide-ndo ncha nācuáa cāháⁿ tnúhu-áⁿ, chi ní cachí Yá Ndiöxí sá nchòhó tnahá tnúhu-ndo ndihí Xítohó Jesucristú. ⁷ Te nchòhó ñáyiú xīndecu ñuú Rómá, ñáyiú ío cūu iní ñáhá Yá Ndiöxí, cadúha-í tutú-a daquixi-í ndaha-ndo. Te ñuú-í nchòhó cúu-ndó cuè ñáyiú ní cachí Yá Ndiöxí cada ndáá cundecu-ndo ñuú-gá. Te xicáⁿ tǎhú-í núú Tǎtá-ó Dütú Ndiöxí ndihí núú Xítohó Jesucristú sá ío na chindee chitúu ñaha-gá xii-ndo, te ducaⁿ ndí nduú-gá ná cada te ío váha cuu iní-ndó cūndecu-ndo.

Té Pāblú cuìní-dé quihíⁿ ngoto-dé cue ñáyiú xīndecu ichi Xítohó Jesucristú ndécú ñuú Rómá

⁸ Te díhna nuu-gá cāchí tnúhu-í xii-ndo sá ío ndácáⁿ tǎhú-í núú Yá Ndiöxí cuèndá sá ío sàndáá iní-ndó-gá, te ncha ñáyiú nihí-yu tnúhu sá dúcáⁿ quide-ndo. Te Xítohó Jesucristú dáyaha-gá ncha tnúhu cāháⁿ-í núú Yá Ndiöxí. ⁹ Te ndí tnahá òré cāháⁿ ndihí-í Yá Ndiöxí ducaⁿ-ñí xicáⁿ tǎhú-í núú-gá cuèndá-ndó, te mee-gá nāhá-gá sá cāháⁿ ndáá-í, te ñuú-í núú-gá xínú cuèchi-í ní yúhu ní iní-í, chi cāháⁿ-í nācuáa ní quide Déhe-gá Xítohó Jesucristú cuèndá naníhí tǎhú-ó. ¹⁰ Te xicáⁿ tǎhú-í núú Yá Ndiöxí sá ñuú mee-gá ná cāchí te sáá ñⁿ nduu quixi coto ñaha-í xii-ndo. ¹¹ Chi ío cuìní-í cundecu ndihí ñaha-í xii-ndo dānehé ñáhà-í ñⁿ úú tnúhu nācuáa ío-gá chindee ñaha Espiritú Yá Ndiöxí xii-ndo, te ducaⁿ ío-gá cuita nducu ndèe-ndo cada-ndo ncha nācuáa cuìní-gá. ¹² Te ío chí ná cuáha tnàha-o tnúhu ndee iní cundecu-o ñchi-gá, chi nchòhó ndihí yúhú ío sàndáá iní-ó-gá.

¹³ Te nchòhó ñáyiú ndècu ndihí-í ichi Xítohó Jesucristú na cāchí tnúhu-í xii-ndo sá dúcáⁿ-ní ío sàni iní-í quixi coto ñaha-í xii-ndo. Te cuìní-í sá òré quixi coto ñaha-í xii-ndo, te vá cuita chiⁿ quixi-í dàtná quidè-í òré sǎngoto-í ncha ñáyiú dava-gá ñuú ñá túú xíta chiⁿ-í chí ío váha sǎhúuⁿ-yu tnúhu cāháⁿ-í, dico ñá ndácú-í quixi-í quixi coto ñaha-í xii-ndo. ¹⁴ Te yúhú yídiquí-í cāháⁿ-í tnúhu Xítohó Jesucristú núú nchàa ñáyiú cāháⁿ tnúhu griégú, ndihí núú nchàa ñáyiú cāháⁿ dava-gá núú tnúhu, ndihí núú nchàa ñáyiú túha, ndihí núú nchàa ñáyiú ñá túú túha. ¹⁵ Te cuèndá sá dúhá yídiquí-í cāháⁿ-í tnúhu-gá, xíáⁿ ío cuìní-í dānehé ñáhà-í xii ncha nchòhó ñáyiú ñuú Rómá nācuáa ndúu tnúhu sá cāháⁿ nācuáa naníhí tǎhú-ó.

Ío cūnuu tnúhu Xítohó Jesucristú

¹⁶ Te yúhú ñá túú tnàhí cūcahaⁿ núu-í cāháⁿ-í tnúhu Xítohó Jesucristú, chi cūu-xi tnúhu ío cūnuu, chí Yá Ndiöxí ní cachí-gá sá ncháá ñáyiú na quíndáá iní-xi tnúhu-áⁿ te naníhí tǎhú-yu. Te ní cachí-gá sá díhnanuu-gá ñáyiú isráel ngūndecu ndihí-yu tnúhu-áⁿ te dǎtnùní ngūndecu ndihí ñáyiú ñá túú cūu ñáyiú isráel. ¹⁷ Te tnúhu-áⁿ dānehé ñáhà-xí xii-o sá cúu-o núú Yá Ndiöxí te núú mee-ni sá quíndáá iní-ó-gá

dàtná càháⁿ-xi núú tütú-gá núú càchí-xi: “Nchaa ñáyiú sàndáá iní ñáhá xii Yá Ndiöxí cúdíú-yu núú-gă, te ndècu ndihî ñahá-yu xii-gă”, duha càchí-xi núú tütú-gá.

Nchaa ñáyiú ndècu ñuyúú ndècuéchi-yu

¹⁸ Te ndéé andiú tëndaha Yá Ndiöxí sá ùhú quixi sá cúú-xí nchaa ñáyiú ñá túú quide ndáá núú-gă, ñáyiú quide nchaa sá cuèhé sá dúhá. Te cuèndá nchaa sá quidè-yu-áⁿ xíãⁿ ñá túú cuiní-yu tñí-yu tñúhu ndáá tñúhu Yá Ndiöxí cuèndá cuu-xi ñá sá vâha sá cúú-xí-yu. ¹⁹ Te cuèi ducaⁿ quidè-yu dico cùtnuní ndáá iní-yu nàcuáa ndùu sá sání iní Yá Ndiöxí ndihî nàcuáa ndùu sá quidè-gă dàtná cùtnuní iní nchaa dava-gá-yu, chi ñu-gá dánèhé ñáhá-gă xii-yu. ²⁰ Te ni vâ ndácú-ó quini núú-ó nâsa càa-gá, te ni vâ ndácú-ó quini-ó nâsa càa iní-gá, te ni vâ ndácú-ó quini-ó nâsa quide-gă táxi tñuní-gá nchaa nduu nchaa quíú. Te cuèi ducaⁿ dico ndéé cùtnàhá ní ngáva ñuyúú ní ngúita nchaa ñáyiú tècú tñuní váha-yu nàcuáa ndùu sá sání iní-gá ndihî nàcuáa ndùu sá quidè-gă te ducaⁿ tècú tñuní-yu cuèndá nchaa sá ñí cadúha-gá ndéhè-yu ío ñuyúú-a, núú xíãⁿ vá càchí-yu sá ñá túú cuèchi-yu. ²¹ Te cuèi ducaⁿ ní cùtnuní iní-yu cuèndá Yá Ndiöxí dico ñá túú cuiní-yu canehé-yu sá yíñùhu núú-gă nàcuáa tàú-xi cunduu. Te ni ñá túú cuiní-yu ndacáⁿ táhù-yu núú-gă cuèndá nchaa sá vâha quide ñaha-gá xii-yu, chi mee-ni nchaa sá ñá túú vèdana nàndíhi ñùhu iní-yu. Te quidè-yu dàtná quidè ñá ñáyiú ñá túú ndècu ndihî nchaa sá xini tñuní-xi. Te uuⁿ-gá uuⁿ-gá tá quidè-yu cuáháⁿ. ²² Te càchí-yu sá cúú-yu ñáyiú ío váha sáá sá xini tñuní-xi dico ñá ndáá, chi cúú-yu ñáyiú ío ñí ñíquí-xi. ²³ Te ñá túú cuiní-yu càháⁿ-yu sá ío càhnu cuu quíú, chi da nchaa sá ñí cadúha mèe-yu quide cahnú-yu. Te ní cadúha-yu nchaa sá nàhá ñáyiú ñá túú cùdí ndècu ñuyúú-a. Te ní cadúha-yu sá nàhá quiti ndáva, ndihî sá nàhá quiti sàcuíta ñuhu mee-xi, ndihî sá nàhá nchaa dava-gá quiti, nchaa xíãⁿ quidè càhnú-yu.

²⁴ Te xíãⁿ núu ní dáñá Yá Ndiöxí quidè-yu nchaa sá cuèhé sá dúhá sàni iní-yu. Te

xíãⁿ ío quide ndihî tnahá-yu sá cuèhé sá dúhá sàcúú-xí yiqui cuñú-yu. ²⁵ Te ducaⁿ quidè-yu chi ñá túú sàndáá iní-yu tñúhu ndáá tñúhu Yá Ndiöxí. Te mee-ni tñúhu ndehnde sàndáá iní-yu, te nèhé-yu sá yíñùhu núú dàva sá ñí cadúha-gá ío ñuyúú-a ndihî dava sá ndéé andiú te quide cahnú-yu, te ñá túú càchí-yu sá mèe-gă ío càhnu cuu-gá, dico mee-gă xini ñùhu-xi càháⁿ-yu sá ío càhnu cuu-gá ní caa ní quíhíⁿ. Te ndáá ndisa sá ío càhnu cuu-gá.

²⁶ Te sá dúcáⁿ ñá túú quide váha-yu núu xíãⁿ ní dáñá-ñá Yá Ndiöxí quidè-yu nchaa sá cuèhé sá dúhá sàni iní mèe-yu. Te dava ñáyiú ñíhî càháⁿ ndihî tnahá-yu ndi mèe ñíhî-yu te ñá túú quidè-yu nàcuáa ní nduu táhù-yu cadá-yu. ²⁷ Te ñu-ni ducaⁿ xiquide dava cue tée chi sàni cuehé sání dùha iní-güedé sá cúú-xí yiqui cuñú-güedé ndi mèe tnahá tée-güedé, chi càháⁿ ndihî tnahá ndi mee-güedé te ñá túú quide-güedé nàcuáa ní nduu táhù-güedé cada-güedé, te sá dúcáⁿ quide-güedé te ñá túú tñahí cùu váha iní-güedé ndécú-güedé, te ducaⁿ tñahí tàú-xi ndoho-güedé cundecu-güedé.

²⁸ Te ñá túú tñahí ñùhu iní-yu Yá Ndiöxí núu xíãⁿ duuⁿ duuⁿ ní dáñá ñíhnu ñaha-gá xii-yu sàni cuehé sání dùha iní-yu, te quidè-yu nchaa sá ñá túú tàú-yu cadá-yu. ²⁹ Te nchaa núú sá cuèhé sá dúhá cùnuu quidè-yu. Te cue tée càháⁿ ndihî-güedé ñáyiú ñíhî te ñá díú ñáñíhî-güedé cúú-yu. Te ñu-ni ducaⁿ xiquide cue ñáyiú ñíhî chi càháⁿ ndihî-yu cue tée te ñá díú yíi-yu cùu-güedé. Te mee-ni sá ñá túú váha quidè-yu sá cúú-xí tñaha ñáyiú-yu, te xihó-yu cundecu ndihî-yu sá ndécú ndihî dava-gá tñaha ñáyiú-yu, te ío sàni cuehé sání dùha iní-yu sá cúú-xí tñaha ñáyiú-yu, te ío cuédú iní-yu, te sàhni tnahá-yu, te ío plètú-yu, te dándahú tñahá-yu, te cùu úhú iní-yu cue tñaha ñáyiú-yu, te ío yiti yùhú-yu. ³⁰ Te càháⁿ cuèhé-yu cuèndá nchaa dava-gá tñaha ñáyiú-yu, te cùu úhú iní-yu Yá Ndiöxí, te xio xio cuiní-yu cunuu tñúhu-yu, te mee-ni sàni iní-yu sá ío váha cunduu-yu, te ío quide cahnú-yu mèe-yu, te ío sàni iní-yu sá cadá úhú-yu tñaha ñáyiú-yu, te ñá túú sàndáá iní-yu ní tãtä-yu ní nãñá-yu. ³¹ Te ñá túú

tècú tnùnì-yu sá vǎha, te ñá túú quidè-yu ñⁿ sá càháⁿ-yu, te ñá túú cùu iní-yu nì ñáyiú cùu ndi meé-yu, te ni dàva-gá tnàha ñáyiú-yu, te ñá túú quidè cahnu iní-yu ñⁿ sá cúmǎní nǔú tnáhǎ-yu, te ni ñà túú cùndahú iní-yu tnàha ñáyiú-yu. ³² Te Yá Ndiöxí ní cachí-gá sá ncháá ñáyiú ducaⁿ xǐquide quíhíⁿ-yu núú ùhú núú ndàhú. Te xìnì-yu sá Yǎ Ndiöxí daquìhíⁿ ñáhá-gǎ xií-yu núú ùhú núú ndàhú sá dúcáⁿ quidè-yu, dico uuⁿ-gá quidè-yu chi váha-gá cúú iní-yu cue ñáyiú quidè datná quidè mèé-yu.

2

Yá Ndiöxí cada ndáá-gá cuéchi nchaa ñáyiú ndècu ñuyíú

¹ Te nchòhó ñáyiú càchí sá ïo ndècu cuéchi dava-gá ñáyiú tnáhá-ndó ïo ndècu cuéchi-ndo cuèi nágá ñáyiú cùu-ndo, chi tnáhá-ndó quidè-ni-ndo nchaa nacuaá quidè dava-gá ñáyiú càchí-ndó ndècu cuéchi-xi, te sá dúcáⁿ càháⁿ-ndó sǎ ndécú cuéchi ñáyiú-áⁿ te dàcaa-ndo cuéchi díquí-ndó chi tnáhá-ndó quidè-ndo datná quidè-yu. ² Te nchoo xìnì-ó sǎ Yǎ Ndiöxí ïo váha cùtnuní iní-gá nàcuáa cada ndáá-gá cuéchi ñⁿ ñⁿ nchoo ñáyiú ndècu ñuyíú-a, chi daquìhíⁿ-gá nchaa ñáyiú quidè nacuaá ní cáháⁿ-í núú ùhú núú ndàhú. ³ Te nchòhó ñáyiú ñⁿ-ni quidè ndihí ñáyiú càchí mèé-ndó sǎ ndécú cuéchi-xi dacuítí sǎ ná chǎhu-ndo nǔú Yǎ Ndiöxí sá dúcáⁿ quidè-ndo. ⁴ Te ñá túú cùu váha iní-ndó sǎ Yǎ Ndiöxí cùndahú iní ñáhá-gǎ xii-ndo, te ni ñà túú cùu váha iní-ndó sǎ ïo cuìní-gá cada càhnu iní-gá nchaa sá ñà túú váha quidè-ndo, te ni ñà túú quidè cuendá-ndó sǎ Yǎ Ndiöxí quidè váha ñaha-gǎ xii-ndo cuendá cuìní-gá sá nchòhó ndixi túu iní-ndó sǎ ñà túú quidè váha-ndo ndècu-ndo. ⁵ Te nchòhó cúú-ndó ñáyiú ïo sǎá iní-xi, chi ñá túú cuìní-ndó ndixi túu iní-ndó sǎ ñà túú quidè váha-ndo ndècu-ndo, te xǎⁿ nǔu ïo-gá tá cùu vai tnúndòho sá cúú-xí-ndó. Te na sǎá nduu tnúhu ndòho tnúhu ndàhú te ïo ndòho-ndo, chi Yá Ndiöxí cada ndáá-gá nàcuáa ndùu cuéchi-ndo. ⁶ Te dàvá-áⁿ cada ndáá Yǎ Ndiöxí nchaa nàcuáa ndùu nchaa sá ñi quidè ñⁿ ñⁿ ñáyiú ndècu ñuyíú-a. ⁷ Te nchaa ñáyiú nchìcúⁿ nihnu-ni quidè mee-ni sá

vǎha, ñáyiú-áⁿ nduu táhǔ-yu cundecú-yu ndihí Yá Ndiöxí ni caa ni quíhíⁿ, te ducaⁿ quidè váha-yu chi cuìní-yu sá Yǎ Ndiöxí cuu váha iní ñáhá-gǎ xií-yu, te cuìní tucú-yu nduu táhǔ-yu núú ïo váha càa ndecu Yá Ndiöxí cundecú-yu ni caa ni quíhíⁿ. ⁸ Te ïo cùdéeⁿ-gǎ núú ncháa ñáyiú ñùhu iní mee-ni sǎ cúú-xí mèe-xi, te ñá túú sàndáá iní-yu tnúhu ndáá chi mee-ni sǎ cuèhé sá dúhá quidè-yu. ⁹ Te nchaa ñáyiú ducaⁿ xǐquide ïo ndíhú iní-yu. Te díhna-gá ñáyiú isràél ngüíta-xi ndohó-yu, te dàtnùnì ngüíta-xi ndoho nchaa ñáyiú ñá túú cùu ñáyiú isràél. ¹⁰ Te nchaa ñáyiú ní quidè váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ñi quidè váha-yu, te ïo váha cuu iní-yu cundecú-yu. Te díhna-gá ñáyiú isràél ñáyiú ní quidè váha ducaⁿ càda ñaha-gá xií-yu, te dàtnùnì ducaⁿ càda ñaha-gá xii ñáyiú ñá túú cùu ñáyiú isràél ñáyiú ní quidè váha.

¹¹ Te ñá túú quidè cuendá-gá cuèi náí ñáyiú cùú-yu. ¹² Te nchaa ñáyiú ndècu ndihí nchaa tnúhu ní chídó tnùnì ndíi Moisés, Yá Ndiöxí cada ndáá-gá cuéchi-yu nàcuáa càháⁿ nchaa tnúhu-áⁿ. Te nchaa ñáyiú ñá túú ndècu ndihí tnúhu ní chídó tnùnì ndíi-áⁿ, Yá Ndiöxí vá cáda ndáá-gá cuéchi-yu nàcuáa càháⁿ nchaa tnúhu-áⁿ. Dico nchaa ñáyiú quidè nándi sá cuèhé sá dúhá dàcuítí cuíta nihnú-yu cuèi ndècu ndihí-yu tnúhu ní chídó tnùnì ndíi Moisés àdi ñá túú ndècu ndihí-yu. ¹³ Te nchaa ñáyiú dícó-ni sàcúndedóho nchaa tnúhu ní cáháⁿ ndíi Moisés te ñá túú tnèi-yu, ñáyiú-áⁿ ñà túú cùdiú-yu núú Yǎ Ndiöxí, dico nchaa ñáyiú tnèi nchaa tnúhu ní cáháⁿ ndíi, ñáyiú-áⁿ càchí Yǎ Ndiöxí sá cúdiú-yu núú-gǎ, chi ñá túú-gǎ cuéchi-yu ndècu núú-gǎ. ¹⁴ Te nchaa ñáyiú ñá túú ndècu ndihí tnúhu ní chídó tnùnì ndíi Moisés, te núu quidè-yu nchaa nàcuáa ní cáháⁿ ndíi te cùu-xi ñⁿ sá sání tnàhí iní mèé-yu cadá-yu, te sá sání iní-yu-áⁿ cúú-xí ñⁿ tnúhu váha sá sánú ìchi ñaha xií-yu nàcuáa cada váha-yu cundecú-yu. ¹⁵ Te sá dúcáⁿ quidè-yu xǎⁿ cùtnùnì sá sání iní-yu dàtná càháⁿ tnúhu ní chídó tnùnì ndíi Moisés cada ñáyiú isràél, te ïo váha cùtnuní iní-yu nchaa nàcuáa

quidé-yu chi ndixi túu iní-yu òré ñá túú quide váha-yu. ¹⁶ Te sáá nduu te Yá Ndióxí cúñaha-gã xii Xítoho Jesucristú cada ndáá-gá nchaa cuéchi ñáiyu, nchaa sá sání iní méě-yu ndùu yuhu, te cada-gá dàtná càháⁿ tnúhu sá sánú ìchi ñaha xii-o nacuaá naníhí tàhú-ó, tnúhu sá dánèhé ñáhà-í xii-ndo.

Cuèndá ñáiyu isràél ndihi cuèndá nchaa tnúhu ní chídó tnùní ndí Moisés

¹⁷ Te nchòhó ñáiyu isràél nchaa-ndo cùu-ndo ndi mee-í, te càchí-ndó sã nchìcúⁿ nihnu-ndo quide-ndo nchaa tnúhu ní cáháⁿ ndí Moisés nũu xíáⁿ ndécú váha-ndo, te càchí-ndó sã ìo càhnu cuu-ndo sá ndécú ndihí-ndo Yá Ndióxí. ¹⁸ Te cùnùní iní-ndó nchàa nacuaá cùní Yá Ndióxí cada-ndo, te sá dúcáⁿ nchìcúⁿ nihnu-ndo quide-ndo nacuaá càháⁿ tnúhu-áⁿ xíáⁿ cùnùní iní-ndó nchàa sá ìo-gá váha xini ñuhu-xi cada-ndo. ¹⁹ Te càchí-ndó sã ìo váha xini-ndó cànuichi-ndo nchaa ñáiyu ñá túú cùnùní iní-xi, te càchí tucu-ndo sã ìo váha xini-ndó nà canu ichi-ndo nchaa ñáiyu ndècu ichi cuehé ichi duha. ²⁰ Te sànu ichi-ndo nchaa ñáiyu ío nì dǐquí-xi, ndihí nchaa ñáiyu vitna ta tècú tnùní nchaa sá váha, te ducaⁿ quide-ndo chi ndècu ndihí-ndo nchaa tnúhu ní chídó tnùní ndí Moisés, te tnúhu-áⁿ cúu-xí tnúhu ndáá, chi sànu ichi ñaha-xi xii-ndo nacuaá cada-ndo. ²¹ Te nchòhó dàcuaha-ndo ñáiyu nàcuáa cada-yu, te mee-ndo ñà túú dàcuaha-ndo cada-ndo nchaa nacuaá tàú-xi cunduu, te xàhaⁿ-ndo xii-yu sá vã cúú dùhú-yu te mee-ndo dùhu-ndo. ²² Te dàcuaha-ndó-yu sá cuè téé vá cúú càháⁿ ndihí-güedé ñáiyu dǐhí te núu ñá díú ñàdihí-güedé cúu-yu, te ducaⁿ-ni cuè ñáiyu dǐhí, vá cúú càháⁿ ndihí-yu téé te núu ñá díú yǐ-yu cùu-güedé. Te nchaa sá xàhaⁿ-ndo vã cúú càda ñáiyu te mee-ndo quide-ni-ndo, te xàhaⁿ-ndo xii-yu sá vã cànéhé-yu sá yǐñùhu núú nchàa sá càchí-yu cùu ndióxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. ²³ Te càchí-ndó sã ìo cùnuu nchaa tnúhu ní chídó tnùní ndí Moisés, te ñá túú quide-ndo nchaa nacuaá ní cáháⁿ ndí, te sá dúcáⁿ quide-ndo-áⁿ te dàquee tíhú-ndó Yá Ndióxí. ²⁴ Te quèe ndáá-xi nàcuáa càháⁿ-xi núú tütú Yá Ndióxí nàcuáa quide-ndo-áⁿ

nũú càchí-xi sá ncháá ñáiyu ñá túú cùu ñáiyu isràél càháⁿ cuèhé-yu cuèndá Yá Ndióxí sá cuèndá-ndó.

²⁵ Te nchòhó ñáiyu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñii-ndo, te váha-ni sá dúcáⁿ te núu quide-ndo nchaa nacuaá ní cáháⁿ ndí Moisés. Dico núu ñá túú quide-ndo nchaa nacuaá ní cáháⁿ ndí ña, te ñá túú nàndihí-xi sá cúu-ndó ñáiyu isràél cuèi ndècu seña ñii-ndo. ²⁶ Te nchaa ñáiyu ñá túú ndècu ndihí seña ñii-xi, te núu quidé-yu nchaa nàcuáa ní cáháⁿ ndí Moisés, te cúu-yu dàtná cue ñáiyu ndècu ndihí seña ñii-xi, chi quidé-yu nchaa nàcuáa ní cáháⁿ ndí. ²⁷ Te ñáiyu ñá túú ndècu ndihí seña ñii-xi, te núu na càdá-yu nchaa nàcuáa ní cáháⁿ ndí Moisés, te ñáiyu-áⁿ cachí-yu sá ñà túú quide ndáá nchaa nchòhó ñáiyu ndècu ndihí seña ñii-xi, chi ndècu ndihí-ndo nchaa tnúhu ní chídó tnùní ndí te ñá túú quide-ndo nacuaá càháⁿ tnúhu-áⁿ. ²⁸ Te nchòhó ñáiyu isràél, ñáiyu nchìcúⁿ nihnu-ni quide nchaa nacuaá ta quide tnahi-ndo véxi, ñá túú quide-ndo sá cúu-ndó ñáiyu isràél, te mee-ndo ndècu seña ñii-ndo dico ñá túú quide-ndo nacuaá tàú-xi cada nchaa ñáiyu ndècu seña ñii-xi, te mee-ni seña-áⁿ sàha-ndo ñii-ndo te ñá túú quide-ndo nacuaá cùní Yá Ndióxí cada-ndo. ²⁹ Te nchaa ñáiyu sàndáá ndisa iní-xi Yá Ndióxí, ñáiyu-áⁿ cúú ndisá-yu ñáiyu isràél, te sa ní nduu ndoo ní nduu nine iní-yu chi Espiritú Yá Ndióxí ducaⁿ nǐ quide-xi, dico ñá díú sã sàha-yu seña ñii-yu dàtná ní cachí ndí Moisés. Te ñáiyu-áⁿ cúú váha iní ñáhá Yá Ndióxí xii-yu cuèi ñá túú càháⁿ váha tnàha ñáiyu-yu cuèndá-yu.

3

¹ Te sá dúhá càháⁿ-í te ìo dava ñáiyu quesàhá-yu sá ííⁿ-ní cùu ñáiyu ñá túú cùu ñáiyu isràél ndihí nchoo ñáiyu isràél, te quesaha tucú-yu sá ííⁿ-ní quide tucu-xi cuèi na cuàha àdi vá cuàha seña ñii-yu. ² Dico yúhú càchí-í sá ncháá ñáiyu isràél ìo-gá cùnùú-yu, chi ìo titní núú sã váha ní quide ñaha Yá Ndióxí xii-yu, chi ní sáñaha-gã tnúhu-gá ndécú ndihí-yu. ³ Te davá-yu ñá túú cùní-yu cada ndáá-yu, dico

ñá díú sǎ xiǎⁿ te cùyica iní Yǎ Ndiǒxí ñá túú quide ndáá-gá. ⁴ Dico ñáhá chi xini ñuhu-xi sá ncháá ñáyiú cada cuendá-yu sá Yǎ Ndiǒxí cúú-gǎ Yaá quidé ndáá cuiti, te cuéi ncháá-yu na càchí-yu sá ñà túú quide ndáá-gá, dico mee-gǎ chi quide ndáá-ni-gá. Te núú tütú-gá càháⁿ-xi nàcuáa ní xáhaⁿ ñⁿ téé ní xindecu ndéé sanaha xii-gá, te duha ní xáhaⁿ-dǎ:

Yòhó Dútú Ndiǒxí, cùtnuní iní ñáyiú sá ïo ndáá càháⁿ-n,

te cùnūu nahi-ni tnúhu-n cuéi òré càchí ñáyiú sá ñà túú càháⁿ ndáá-n.

Duha ní xáhaⁿ tǎe ndéé sanaha-ǎⁿ xii-gá càchí-xi núú tütú-gá.

⁵ Te cuendá nchaa sá cuèhé sá dúhá quide ñáyiú, xiǎⁿ cútnuní iní-yu sá Yǎ Ndiǒxí cúú-gǎ Yaá ío váha quide ndáá, chi mee-gǎ ñá túú ducaⁿ quide-gá. Te cuéi ducaⁿ dico vá caní iní-yu sá Yǎ Ndiǒxí ñá túú quide ndáá-gá sá dándòho ñaha-gá xii-yu na sàa nduu, te núú ducaⁿ na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. ⁶ Te vá dúcáⁿ càni iní-yu, chi núú Yǎ Ndiǒxí ñá túú quide ndáá-gá ñá, te vá cúú càda ndáá-gá nchaa cuéchi cue ñáyiú ñuyúú-a te núú ducaⁿ.

⁷ Te núú yúhú ná càni iní-í càháⁿ-í ñⁿ tnúhu ndehnde, te sá tnúhu-áⁿ te caní tucu iní-í sá quidé càhnu-gá-í tnúhu ndáá tnúhu Yǎ Ndiǒxí, te sá dúcáⁿ ná càháⁿ-í te caní tucu iní-í sá vǎ cúú càháⁿ Yǎ Ndiǒxí sá ndécú cuéchi-í. ⁸ Te núú na càni tucu iní-í sá vǎha-gá cada-í nchaa sá cuèhé sá dúhá cuendá Yǎ Ndiǒxí cada-gá sá vǎha, dico ñá ndáá. Te ío ñáyiú càháⁿ cuèhé cuendá-í te càchí-yu sá díú-ní ducaⁿ dacuaha-í ñáyiú dico ñá ndáá sá dúcáⁿ dànehé-í-yu, te ñáyiú-áⁿ nacháhu-yu tnúhu càháⁿ-yu, chi ducaⁿ tàú-xi cunduu.

Nchaa ñáyiú ñuyúú-a ndècuéchi-yu

⁹ Te vitna càchí dava ñáyiú sá ïo-gá cùnūu nchoo cue ñáyiú isràél dàcúúxí dàva-gá ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sǎ nchàa ñáyiú ndècuéchi-yu cuéi ñáyiú isràél te cuéi ñáyiú ñá túú cùu ñáyiú isràél. ¹⁰ Te núú tütú Yǎ Ndiǒxí càchí-xi:

Vá yǒo ñⁿ quide ndáá,

¹¹ te ni vá yǒo ñⁿ tècú tnùní tnúhu váha, te ni vá yǒo ñⁿ nànducu nihnu Yǎ Ndiǒxí.

¹² Chi ncháá-yu ñá túú nchìcúⁿ nihnú-yu ichi váha, te ncháá-yu cùú-yu ñáyiú xindecu neñúú sá cúú-xí Yǎ Ndiǒxí.

Te ni ñⁿ-yu ñá túú quidé-yu ñⁿ sá váha.

¹³ Te cada iní-ndó sǎ yúhú-yu cùu-xi datná cúú ñⁿ yaú núú yíndüxi ndíyi núú ïo ndehe sàháⁿ,

te ducaⁿ sàtnahá-xi cùu yuhú-yu, chi ío càháⁿ cuèhé-yu, te mee-ni dándahú-yu nchaa tnàha ñáyiú-yu.

Te cada iní-ndó sǎ vènenú cóo yíhí yúhú-yu chi mee-ni càháⁿ úhú-yu cuendá tnàha ñáyiú-yu.

¹⁴ Te ío iní-yu càháⁿ úhú tnáhǎ-yu.

¹⁵ Te àúⁿ nǎ cuu àúⁿ nǎ xiǎⁿ xǎsahni tnàhá-yu.

¹⁶ Te nchaa núú xicá cùú-yu quide úhú iní-yu nchaa tnàha ñáyiú-yu nàcuáa ndihú iní ñáyiú-áⁿ.

¹⁷ Te ñá túú cuiní-yu cundecu ndihí tnàha váha-yu.

¹⁸ Te ñá túú sàni iní-yu canehé-yu sá yíñùhu núú Yǎ Ndiǒxí.

Duha quidé-yu càchí-xi núú tütú-gá.

¹⁹ Te cùtnuní iní-ó sǎ nchàa tnúhu ní chídó tnùní ndíi Moisés cúú-xí cuendá nchaa ñáyiú nchìcúⁿ nihnu nchaa tnúhu-áⁿ. Te tnúhu-áⁿ cúú-xí cuendá sá vǎ yǒo tnàhí cachí sá ñà túú cuéchi-xi, te ducaⁿ te nchaandi túhú ñáyiú cutnùní iní-yu sá ná chǎhu-yu nchaa sá quidé-yu núú Yǎ Ndiǒxí. ²⁰ Te ducaⁿ càda-xi chi ni ñⁿ ñáyiú vá càchí-ó sǎ vǎ cùndècu cuéchi-yu núú Yǎ Ndiǒxí cuendá-ni sá nchìcúⁿ nihnú-yu nchaa tnúhu sá ñí chídó tnùní ndíi Moisés, te tnúhu-áⁿ càchí tnúhu-xi cuendá-ni sá cútnùní iní-ó sǎ ndécú-ó ìchi cuehé ichi duha.

Te núu na quèndáá iní-ó Xìtohó Jesucristú te naníhí tàhú-ó

²¹ Te vitna ní cutnùní iní-ó sǎ ñà díú sǎ cáda-ó nchàa nacuáa ní càháⁿ ndíi Moisés cùdiu-o núú Yǎ Ndiǒxí, chi mee-gǎ quidé cùdiu-o núú-gǎ. Te núú tütú ndíi Moisés ndihí núú tütú cue téé ní xóo càháⁿ tnúhu Yǎ Ndiǒxí ndéé sanaha càháⁿ-xi nàcuáa cada ñaha-gǎ xii-o vitna. ²² Te ducaⁿ cùdiu-o núú Yǎ Ndiǒxí te núu na quèndáá iní-ó Xìtohó Jesucristú. Te diu-ni ducaⁿ cùdiu nchaa ñáyiú ñuyúú te núu na quèndáá iní ñáhǎ-yu xii-gá, chi ñⁿ-ni cùu-o nchaa-o sá cúú-xí Yǎ Ndiǒxí. ²³ Chi ncháá-yu ndècu cuéchi-yu, chi ñá

ĩⁿ-yu quidé-yu nàcuáa cáháⁿ Yă Ndiõxí sá cúu-yu ñáyiu quide váha. ²⁴ Dico Yă Ndiõxí ío váha iní-gá chi ní quide ñaha-gă xii-o ĩⁿ sá vâha, chi dîcô-ni ducaⁿ ñi quide-gă nàcuáa vá cùndècu-gă cuéchi-o nũú-gă, chi Xítohó Jesucrîstú ní sati níñí-gă te ní xíhí-gă, te ducaⁿ ñi yâha-gă cuendá sá vâ cùndècu-gă cuéchi-o. ²⁵ Te Yă Ndiõxí ní taxi ndecu-gă Xítohó Jesucrîstú núú ñáyiu ñuyúú-a, te ní xíhí-gă sá cuendá nchaa yícá cuéchi-yu, te ducaⁿ ñi cuu cuendá sá ncháá ñáyiu na quindáá iní ñáhá xii-gă te vá náchăhu-yu cuéchi-yu núú Yă Ndiõxí. Te Yă Ndiõxí ní quide ndee iní-gă nchaa sá cuéhé sá dúhá ñi quide cue ñáyiu ní xîndecu ndéé sanaha. Te xîáⁿ ní xíhí Xítohó Jesucrîstú cuendá cutnùnî iní-ó să Yă Ndiõxí cúú-gă Yáá ío váha quide ndáá cuéi ducaⁿ ñi quide ndee iní-gă nchaa sá ñi quide cue ñáyiu-áⁿ. ²⁶ Núu xîáⁿ vitna ní cutnùnî ndisa iní-ó să quidé ndáá-gă, te quide-gă sá cué ñáyiu vá cùndècu-gă cuéchi-yu núú-gă, te núu na quindáá iní-yu Xítohó Jesucrîstú.

²⁷ Te vitna vá càchí-ó să ío càhnu cuu-o cuendá sá ñà túú-gă cuéchi-o ndècu núú Yă Ndiõxí, te ducaⁿ ñà túú-gă cuéchi-o ndècu núú-gă cuendá sá sàndáá iní-ó Xítohó Jesucrîstú, te ñà díú să cuendá nchaa tnúhu ní cáháⁿ ndíi Moisés. ²⁸ Te cùtnunî iní-ó să ndèda-ni cà ñáyiu vá cùndècu-gă cuéchi-yu núú Yă Ndiõxí te núu na quindáá iní-yu Xítohó Jesucrîstú cuéi ní quidé-yu nchaa nàcuáa ní cáháⁿ ndíi Moisés àdi ñà túú ní quidé-yu.

²⁹ Te cùtnunî iní-ó să Yă Ndiõxí cúú-gă Ndiõxí nchaandi túhú ñáyiu, te ñà díú mèe-ni Ndiõxí ñáyiu isràél cúú-gă. ³⁰ Te ĩⁿdîi díí-gă cúú-gă Ndiõxí, te nchaa ñáyiu sàndáá iní ñáhá xii Xítohó Jesucrîstú te vá cùndècu-gă cuéchi-yu núú Yă Ndiõxí cuéi cúú-yu ñáyiu isràél àdi ñà túú cúú-yu. ³¹ Te ñà díú să sàndáá iní-ó Xítohó Jesucrîstú te cachí-ó să ñà túú nàndíhî nchaa tnúhu sá sánú ichi ñaha xii-o nàcuáa cada-o, te ñáhá chi sá dúhá sàndáá iní-ó-gă te xîáⁿ nchîcúⁿ nihnu-o quide-o nàcuáa cáháⁿ tnúhu-áⁿ.

4

Cuendá ndíi Àbrahám

¹ Te vitna na càchí tnúhu-í xii-ndo cuendá ndíi Àbrahám téé ní cuu ñanî tnáhá-ó ñi xîndecu ndéé sanaha. ² Te ndíi-áⁿ ñà túú ní xîndecu cuéchi ndíi núú Yă Ndiõxí, dico ñà díú cuendá ĩⁿ chîuⁿ ní quide ndíi ducaⁿ ñà túú ní xîndecu cuéchi ndíi núú-gă. Chi núu cuendá ĩⁿ chîuⁿ ní quide ndíi ducaⁿ ñà túú ní xîndecu cuéchi ndíi núú Yă Ndiõxí ñà, te cada càhnu ndíi mee ndíi ní cuu, dico ñà díú nũú Yă Ndiõxí cada càhnu ndíi mee ndíi te núu ducaⁿ ñi quide ndíi. ³ Te chí dándacu iní nàcuáa cáháⁿ-xî núú tûtú Yă Ndiõxí núú càchí-xi: “Té Àbrahám ní sàndáá iní-dé Yă Ndiõxí, te xîáⁿ ní cachí-gă sá cúdiu-dé núú-gă”, duha càchí-xi núú tûtú-gă. ⁴ Te sá cúhúⁿ yăhu ĩⁿ téé quide chiuⁿ, te vá càchí-ó să xîáⁿ cúú-xi ĩⁿ táhú să cúú-xi-dé chi yăhu tnàhí-dé cúú-xi. ⁵ Te vá yôo ĩⁿ ndàcu cada ĩⁿ chiuⁿ nàcuáa cudîu-xi núú Yă Ndiõxí. Te ñà túú ñà chîuⁿ xini ñuhu-xi cada ñáyiu te cudîu-yu núú-gă, chi xini ñuhu-ni-xi sá quindáá-ni iní-yu-gă. Te díu-gă càchí-gă sá ñáyiu ndècu ichi cuéhé ichi duha vá cùndècu-gă cuéchi-yu núú-gă, te núu na quindáá iní ñáhă-yu xii-gă. ⁶ Te díu-ni ducaⁿ ñi cáháⁿ ndíi Dàvíí, chi ní cachí ndíi sá ío váha táhú nchaa ñáyiu ní cachí Yă Ndiõxí cudîu núú-gă, dico ñà díú cuendá ĩⁿ chîuⁿ quidé-yu cudîu-yu núú-gă. ⁷ Te duha ní cachí ndíi:

Váha táhú nchaa ñáyiu quide cahnu iní Yă Ndiõxí nchaa cuéchi-xi,
te ñà túú-gă quidé cuendá-gă nchaa sá cuéhé sá dúhá ñi quidé-yu.

⁸ Váha táhú-yu chi Yă Ndiõxí càchí-gă sá ñà túú-gă cuéchi-yu.

Duha ní cachí ndíi Dàvíí.

⁹ Te ñà díú mèe-ni ñáyiu ngûndecu seña ñi-xi ducaⁿ váha táhú-yu, chi tnáhá ñáyiu ñà túú ngûndecu seña ñi-xi ducaⁿ váha táhú-yu. Te sa nàha-o sá Yă Ndiõxí ní cachí-gă sá cúdiu ndíi Àbrahám núú-gă cuendá sá ni sàndáá iní ñáhá ndíi xii-gă.

¹⁰ Te cunaha-ndo să díhna-gă ní cachí Yă Ndiõxí sá cúdiu ndíi Àbrahám núú-gă te dătnùnî ngûndecu seña ñi ndíi. ¹¹ Te ní ngûndecu seña ñi ndíi cuendá xîáⁿ cuu-xi ĩⁿ seña sá cúdiu ndíi núú Yă Ndiõxí. Te ndéé cùtnáhá vátá ngûndecu-gă seña ñi ndíi, te sa cúdiu ndíi núú-gă chi ní sàndáá

iní ñáhá ndíi xii-gá. Te sá dúcáⁿ ñà túú ndècu señá ñí ndíi cútnàhá ní sándáá iní ndíi Yá Ndiöxí xíáⁿ ní cuu ndíi dàtná ñⁿ díhí dütú nchaa ñáyiú sándáá iní ñáhá xii-gá, ñáyiú ñá túú ní ngündecu señá ñí-xi, te cùdiú-yu núú-gá. ¹² Te ndíi Àbrahám ní cuu tucu ndíi dàtná ñⁿ díhí dütú nchaa ñáyiú ní ngündecu señá ñí-xi, dico ñá díú cuendá-ni sá ñí ngündecu señá ñí-yu cùu ndíi díhí dütú-yu, chi cuendá sá sándáá iní-yu Yá Ndiöxí nchìcúⁿ nihnú-yu nàcuáa ní quide ndíi ní sándáá iní ñáhá ndíi xii-gá ndéé cútnàhá vátá ngündecu-gá señá ñí ndíi.

Yá Ndiöxí cada-gá nchaa nàcuáa ní cachí-gá te núu na quindáá iní-ó-gá

¹³ Te Yá Ndiöxí ní xáhaⁿ-gá xii ndíi Àbrahám sá ndúú tǎhú ndíi cunuu ndíi ñuyíú, ndíhi cue déhe ndíi, ndíhi nchaa dava-gá cue ñaní tnáhá ndíi vitna cacu túu. Te ducaⁿ ñí xáhaⁿ Yá Ndiöxí xii ndíi ndíhi cue ñaní tnáhá ndíi, chi ní sándáá iní ñáhá ndíi xii-gá núu xíáⁿ ní cudíu ndíi núú-gá. Te ducaⁿ ñí xáhaⁿ-gá xii ndíi dico ñá díú cuendá sá ñí quide ndíi nàcuáa ní xáhaⁿ Yá Ndiöxí xii ndíi Moisés cada ñáyiú ndéé cuéé-gá. ¹⁴ Te núu mee-ni ñáyiú nchìcúⁿ nihnu quide nàcuáa ní cáháⁿ ndíi Moisés ní ndúu tǎhú-yu cunúú-yu ñuyíú-a ni cùu ña, te ñá túú xini ñuhu-xi quindáá iní-ó Yá Ndiöxí, te ñá túú nandíhi tnúhu ní xáhaⁿ Yá Ndiöxí xii ndíi Àbrahám ní cùu te núu ducaⁿ. ¹⁵ Te núu ñⁿ ñáyiú ñá túú quide nàcuáa cáháⁿ tnúhu sá sánú ìchi ñaha xii-o nàcuáa cada-o te nacháhu-yu sá dúcáⁿ quidé-yu. Te núu ñá túú tnúhu sá sánú ìchi ñaha-xi xii-o nàcuáa cada-o ni cùu ña, te ñá túú cuéchi-o ni cùu.

¹⁶ Te ducaⁿ ñí xáhaⁿ Yá Ndiöxí xii ndíi Àbrahám nàcuáa cada-gá, chi cuendá sá ni sándáá iní ñáhá ndíi xii-gá. Te ducaⁿ ñí quide-gá chi ío váha iní-gá, dico ñá díú sǎ ñⁿ chiuⁿ ni quide ndíi ducaⁿ ñí xáhaⁿ-gá. Te sá dúcáⁿ ñí cuu te cùu-xi ñⁿ tnúhu ndáá sá cúú-xí nchaa ñaní tnáhá ndíi, ñáyiú sándáá iní ñáhá xii-gá dàtná ní sándáá iní ñáhá mèe ndíi xii-gá, te ñá díú mèe-ni cuendá nchaa ñaní tnáhá ndíi nchìcúⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ñí cuu ndíi dàtná ñⁿ díhí dütú cue ñáyiú sándáá iní ñáhá xii Yá

Ndiöxí. ¹⁷ Te núú tütú Yá Ndiöxí càháⁿ-xi nàcuáa ní xáhaⁿ-gá xii ndíi, te duha ní xáhaⁿ-gá: “Yòhó té Àbrahám ní quide ñaha-í xii-n dàtná ñⁿ díhí dütú cue ñáyiú xíndecu nihí ñuyíú.” Duha ní xáhaⁿ Yá Ndiöxí xii ndíi, càchí-xi núú tütú-gá. Te Yá Ndiöxí náhá ndáá-gá sá cádá-xí nàcuáa ní xáhaⁿ-gá xii ndíi Àbrahám, te diu-ni-gá cúú Yàá ní sándáá iní ndíi, te diu-ni-gá dándòto-gá ñáyiú ní xíhí, te diu-ni-gá quidé tá ngündecu nchaa sá vátá cündecu-gá ñuyíú-a.

¹⁸ Te Yá Ndiöxí ní xáhaⁿ-gá xii ndíi Àbrahám sá ío cuéhé déhe ndíi coo, te ío ní sándáá iní ndíi nàcuáa ní xáhaⁿ-gá dico ñá túú ní cùtnuní iní ndíi nása cada-gá, chi ío ní sahu ndíi. Te cuendá sá dúcáⁿ ío ní sándáá iní ndíi tnúhu ní xáhaⁿ-gá núu xíáⁿ ní cuu ndíi díhí dütú vai ñáyiú xíndecu nihí ñuyíú.

¹⁹ Te ndíi Àbrahám ñuhu ndíi ñⁿ ciendú cuía cùtnàhá ducaⁿ ñí xáhaⁿ Yá Ndiöxí xii ndíi, te ní cutnùní iní ndíi sá ñà túú tǎhú ndíi sá cóo déhe ndíi ndíhi ñadíhi ndíi ndíi Sǎrá, chi ndíi ndúú-yu sa ní sahu vèhí-yu, te cuéi ducaⁿ dico ní sándáá-ni iní ndíi nàcuáa ní xáhaⁿ Yá Ndiöxí. ²⁰ Te ñá túú ní sàni ñⁿ sàni úú iní ndíi nàcuáa ní xáhaⁿ Yá Ndiöxí cada-gá sá cúú-xí ndíi, chi da uuⁿ-gá váha ní sándáá iní ndíi nàcuáa ní xáhaⁿ-gá, te ní cachí ndíi sá ío càhnu cuu-gá. ²¹ Te ní cutnùní ndáá iní ndíi sá Yá Ndiöxí ndácú-gá quidé-gá nchaa sá càháⁿ-gá. ²² Te sá ni sándáá iní ndíi nàcuáa ní cáháⁿ Yá Ndiöxí, núu xíáⁿ ní cachí-gá sá cúú ndíi ñⁿ téé ñá túú cuéchi-xi núú-gá.

²³ Te ní ngódó tnùní núú tütú Yá Ndiöxí cuendá ndíi Àbrahám sá ñí cachí-gá sá ñà túú cuéchi ndíi núú-gá, te ñá díú-ní cuendá mée ndíi ni ngódó tnùní núú tütú-gá. ²⁴ Chi tnàhá cuendá-ó nchaa-o ní ngódó tnùní núú tütú-gá. Te càchí-gá sá ñà túú cuéchi-o núú-gá chi sándáá iní-ó-gá, te diu-gá cúú-gá Yá ní dándótó ñaha xii Xítohó Jesucristú Yá cúú Xítohó-ó. ²⁵ Te Yá Ndiöxí ní cachí-gá sá díú Xítohó Jesucristú cuú-gá cuendá nacháhu-gá nchaa cuéchi-o. Te ní xíhí-gá te ní ndoto-gá cuendá nchaa-o vǎ cündecu-gá cuéchi-o núú Yá Ndiöxí te núu na quindáá iní-ó-gá.

5

Ío váha tnàhá ñáyiú càchí Yá Ndiöxí sá ñà

túú cuéchi-xi

¹ Te vitna, ñá túú-gã cuéchi-o ndècu núú Yá Ndiöxí chi sàndáá iní-ó Xítohó Jesucristú, te ío váha ndècu ndìhi-o Yá Ndiöxí vitna sá cuèndá Xítohó Jesucristú. ² Te cuèndá sá ni sàndáá iní-ó Xítohó Jesucristú xiáⁿ ñu-gá ní quide ní ngúndecu váha-o núú Yá Ndiöxí, te ducaⁿ-ni cùndecu-o, te ío cùdíí iní-ó chi ndècu ndìhi-o tnúhu ndee iní sá sáá nduu ngúndecu-o núú ío váha càa ndecu Yá Ndiöxí. ³ Te ñá díú-ní sá cuèndá sá ndúú tãhú-ó cùndecu-o núú ndécú-gã cùdíí iní-ó, chi cùdíí iní-ó ndòho-o cuèndá-gá, chi cùtnuní iní-ó sá núu na ndòho-o cuèndá-gá te cunduu càhnu-gá iní-ó, ⁴ te núu cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núu cùu-o ñáyiu quide váha te uuⁿ-gá tá ngúndecu ndìhi-o tnúhu ndee iní cuáháⁿ sá cádá vãha ñaha Yá Ndiöxí xii-o. ⁵ Te núu ducaⁿ te vá ííⁿ ndùu ndixi cuéchi iní-ó sá ndécú ndìhi-o tnúhu ndee iní ngúndecu váha-o. Te Espiritú sá ñí taxi Yá Ndiöxí ndécú ndìhi-o xiáⁿ quidé-xí cùtnuní iní-ó sá ío cùu iní ñáhá Yá Ndiöxí xii-o.

⁶ Te nchoo ñà túú vèdana ná ní ndàcu-o cada-o cuèndá dàcácu nihnu-o mèe-o, dico Xítohó Jesucristú ní xihí-gá cuèndá-ó, ndìhi cuèndá nchaa dava-gá ñáyiu ñá túú tnàhá tnúhu ndìhi Yá Ndiöxí, te ní xihí-gá mei ndùu taú-xi cuú-gá. ⁷ Te cudana-ni núu xihí ííⁿ ñáyiu sá cuèndá ííⁿ ñáyiu quide ndáá, te áma xihí tucu ííⁿ-yu sá cuèndá ñáyiu quide váha tnàha ñáyiu-xi. ⁸ Te Yá Ndiöxí ní quide-gá sá nchóó cùtnuní iní-ó sá ío cùu iní ñáhá-gã xii-o, chi cùtnàhá ndécú-ó ìchi cuehé ichi duha te ní tendaha-gã Xítohó Jesucristú ní quixi-gá ñuyíú-a ní xihí-gá cuèndá-ó. ⁹ Te sá cuèndá sá ñí xihí Xítohó Jesucristú xiáⁿ ñá túú-gã cuéchi-o ndècu núú Yá Ndiöxí, te vitna ní cutnùní ndáá iní-ó sá vã dáquihíⁿ ñáhá-gã Yá Ndiöxí xii-o núú ùhú núú ndàhú sá cuèndá Xítohó Jesucristú. ¹⁰ Te cùtnàhá ñá túú tnàhá tnúhu-o ndìhi Yá Ndiöxí ní cùu ní xihí Xítohó Jesucristú Yaá cúú Dèhe-gá cuèndá cuu váha iní ñáhá-gã xii-o, te ducaⁿ te nduu tãhú-ó cùndecu-o ndìhi-gá ñí caa ñí quihíⁿ cuèndá sá ñí ndoto Xítohó Jesucristú. ¹¹ Te ndètu-o sáá nduu ngúndecu-o ndìhi-gá ñí caa ñí quihíⁿ, te ñá

díú-ní xiáⁿ quidé-ó chi tnàhá cùdíí iní-ó Yá Ndiöxí, chi Xítohó Jesucristú ní quide-gá ducaⁿ cùdíí iní-ó-gã, te ñu-ni Xítohó Jesucristú ní quide-gá ní nucúndecu váha-o ndìhi Yá Ndiöxí.

Nàcuáa ní quide ndíi Àdán ndìhi nàcuáa ní quide Xítohó Jesucristú

¹² Te ndíi Àdán ñá túú ní quide ndáá ndíi núú Yá Ndiöxí núu xiáⁿ ní ngúndecu nchaa sá cuèhé sá dúhá ñuyíú-a, te sá cuèndá nchaa sá cuèhé sá dúhá quide ñáyiu xiáⁿ xihí-yu, te nchaá-yu xihí-yu chi nchaá-yu quidé-yu nchaa sá cuèhé sá dúhá. ¹³ Te sa quide-gá-yu nchaa sá cuèhé sá dúhá te dàtnùní ní ngúndecu nchaa tnúhu sá ñí chídó tnùní ndíi Moisés nàcuáa ní xáhaⁿ Yá Ndiöxí cada ñáyiu, te nchoo cùtnuní iní-ó sá núu ñá túú tnúhu sá sánú ìchi ñaha xii-o nacuáa cada-o, te ñá túú cuéchi-o sànuu. ¹⁴ Te ndéé cùtnàhá ní xíndecu ndíi Àdán ní quesaha-xi xihí ñáyiu, te ducaⁿ-ni xihí-yu ndéé ní sáá nduu ñí xíndecu ndíi Moisés. Te ducaⁿ ñí xihí-yu chi ní quidé-yu nchaa sá cuèhé sá dúhá cuèi ñá túú ní quidé-yu nàcuáa ní quide ndíi Àdán, chi ndíi-án ñà túú ní sàndáá iní ndíi nàcuáa ní xáhaⁿ Yá Ndiöxí cada ndíi. Te ndíi Àdán ní cuu ndíi ííⁿ téé cùu cahnu ní xíndecu ñuyíú-a, te sá tá dúcáⁿ te ní quixi Xítohó Jesucristú te Yaá-án ío-gá càhnu cuu-gá.

¹⁵ Te sá ñí quide ndíi Àdán te vá càchí-ó sá ííⁿ-ní cùu-xi ndìhi sá ñí cachí Yá Ndiöxí nduu tãhú-ó vitna. Te sá ñá túú ní quide ndáá ndíi xiáⁿ nchaa ñáyiu xihí-yu, dico Yá Ndiöxí ío váha iní-gá chi ío váha ní quide-gá sá cúú-xí nchàa nchoo ñáyiu ndècu ñuyíú-a, chi dícó ducaⁿ ñí cachí-gá sá nánihí tãhú-ó, te ííⁿ-ni téé tnàhá-dé ío váha ní quide-dé sá cúú-xí-ó, te téé-án cúú-dě Xítohó Jesucristú. ¹⁶ Te sá ñí quide ííⁿ-ni ndíi Àdán ñá túú ííⁿ-ni cuu-xi ndìhi sá ñí quide Yá Ndiöxí sá cúú-xí-ó, chi ndíi-án ñá túú ní quide ndáá ndíi núú-gã. Te sá dúcáⁿ ñí quide ndíi te xiáⁿ ní cuu-xi cuéchi díhna nuu ñí quide ndíi, núu xiáⁿ ní cachí Yá Ndiöxí sá cuè ñáyiu quihíⁿ-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gã ní quide sá cuè ñáyiu naníhí tãhú-yu dícó-ni ducaⁿ, te ducaⁿ te vá cùndècu-gá cuéchi-yu núú-gã cuèi ío

vài cuéchi-yu. ¹⁷ Te sá dúcáⁿ ñà túú ní quide ndáá ñⁿdii-ni ndíi Àdán-áⁿ núú Yá Ndiöxí, xiáⁿ ní quide-xi xihí nchaa ñáyiu. Te sá cuendá sá ñi quide ñⁿdii-ni Xítoho Jesucristú xiáⁿ ío váha ní quide ñaha Yá Ndiöxí xii ñáyiu, chi dícó-ni ducaⁿ ñi nduu táhũ-yu cùdũ-yu núú-gã. Te nchaa ñáyiu ducaⁿ cùdũ núú-gã nduu táhũ-yu cunúu-yu ndihí Xítoho Jesucristú cuendá sá ñi quide-gá sá vâha sá cúú-xĩ-yu.

¹⁸ Te sá dúcáⁿ ñi quide ndíi Àdán ñà túú ní quide ndíi nàcuáa ní xáhaⁿ Yá Ndiöxí xii ndíi ñⁿ xito, núú xiáⁿ ní cachí-gá sá ncháá ñáyiu tàú-yu nacháhu-yu nchaa cuéchi-yu, dico Xítoho Jesucristú ní quide-gá ñⁿ sá vâha cuendá nchaa ñáyiu vá cùndècu-gá cuéchi-yu núú Yá Ndiöxí te núu na quindáá iní ñáhã-yu xii-gá, te ducaⁿ te cundecú-yu ndihí-gá ñi caa ñi quíhíⁿ. ¹⁹ Te sá ñà túú ní sàndáá iní ñⁿdii-ni ndíi Àdán nàcuáa ní xáhaⁿ Yá Ndiöxí xii ndíi, xiáⁿ ní nguínchicúⁿ nihnu nchaa ñáyiu quidé-yu nchaa sá cuèhé sá dúhá. Te ducaⁿ ñⁿdii-ni Xítoho Jesucristú ní quide-gá nàcuáa ní xáhaⁿ Yá Ndiöxí cuendá sá Yá Ndiöxí cachí-gá sá cúdũ-yu núú-gã.

²⁰ Te Yá Ndiöxí ní xáhaⁿ-gã xii ndíi Moisés nàcuáa cada ñáyiu, te sá cuendá tnúhu-áⁿ uuⁿ-gá ní nguíta nchaa ñáyiu quidé-yu nchaa sá cuèhé sá dúhá, te Yá Ndiöxí uuⁿ-gá cùndáhú iní ñáhã-gã xii-yu tucu. ²¹ Te sá cuendá nchaa cuéchi ñáyiu xiáⁿ xihí-yu, dico Yá Ndiöxí ío váha iní-gá chi dũ-gá ní cachí-gá sá ncháá ñáyiu na tnàhá tnúhu ndihí ñaha xii-gá cudiũ-yu núú-gã, te cundecú-yu ndihí-gá ñi caa ñi quíhíⁿ, te ducaⁿ chi Xítoho Jesucristú ní quide-gá sá vâha sá cúú-xĩ-yu.

6

Ñáyiu ñà túú-gã ndécú ichi cuehé ichi duha ndècu-yu cuendá Xítoho Jesucristú

¹ Te sá dúcáⁿ quide Yá Ndiöxí, te vá cání iní-ó cànchicúⁿ nihnu-ni-o ìchi cuehé ichi duha, chi ñà díú sã cànchicúⁿ nihnu-o ìchi-áⁿ te ngóo càni iní-ó sã ío-gá cundáhú iní ñáhã-gã xii-o. ² Te vá cúú cànchicúⁿ nihnu-o ìchi cuehé ichi duha, chi nchoo cùu-o datná cue ñáyiu sa ní xihí, núú xiáⁿ

vá cúú-gã cànchicúⁿ nihnu-o ìchi-áⁿ. ³ Te sa ñaha-o sá cuendá sá ñi sandute-o quèe-xi sá tnàhá tnúhu-o ndihí Xítoho Jesucristú. Te sá ñi sandute-o quèe tucu-xi sá cúú-ó datná ñáyiu ní xihí ndihí-gá. ⁴ Te ñà díú-ní sá ñi xihí-ó ndihí-gá chi quèe tucu-xi sá ñi nguíndũxi-o ndihí-gá te ní ndoto-o datná ní ndoto mee-gã ní dándótó ñaha Dútú Ndiöxí Yá ío càhnu cuu, te ducaⁿ ñi cuu cuendá sá vã cùndècu-gá-ó datná ní xíndecu-o.

⁵ Te núu ñⁿ-ni cùu-o ndihí Xítoho Jesucristú cuendá sá cúú-ó datná ñáyiu ní xihí ndihí-gá, te ndáá sá cúú-ó datná ñáyiu ní ndoto ní nguíndecu váha datná ní ndoto mee-gã ní nucúndecu váha-gã. ⁶ Te nchoo ñaha-o sá cúú-ó ñáyiu ío ndècu cuéchi-xi ní cùu, dico sátá ñi cuu-o datná ñáyiu ní xihí datná ní xihí Xítoho Jesucristú núú cùrúxí, te ndéé dàvá-áⁿ ñi dáñá-ó ncháa ichi cuehé ichi duha ndècu-o ni cuu, te ñà túú-gã cùnùu sá cuèhé sá dúhá iní-ó. ⁷ Chi nchaa ñáyiu ní xihí ñà túú-gã ndécũ-yu ichi cuehé ichi duha. ⁸ Te núu cùu-o datná ñáyiu ní xihí datná ní xihí Xítoho Jesucristú ñà, te cùtnuní ndáá iní-ó sã cùndècu-o ndihí-gá ñi caa ñi quíhíⁿ. ⁹ Te sa ñaha-o sá Xítoho Jesucristú ní xihí-gá te ní ndoto-gá te vá ñⁿ ndùu ñⁿ quíú-gã te cuú-gá, chi ñà túú nãgá sá cádá cùú-gá. ¹⁰ Te Xítoho Jesucristú ní xihí-gá ñⁿ xito-ni sá cuendá nchaa cuéchi nchoo ñáyiu ñuyú, te vá ñⁿ ndùu-gá cuú-gá, te ndècu-ni-gá sá cúú-xí Yá Ndiöxí. ¹¹ Núu xiáⁿ nchòhó cada iní-ndó sã datná sá ñi xihí-ndó vã cùndècu-gá-ndó sã cúú-xí ìchi cuehé ichi duha, chi ndècu-ná-ndó sã cúú-xí Yá Ndiöxí, chi ní tnàhá tnúhu-ndo ndihí Xítoho Jesucristú Yá cúú Xítoho-ó.

¹² Te núu xiáⁿ vá dáñã-gã-ndó cùnùu ní ñⁿ sá cuèhé sá dúhá iní-ndó cuendá sá vã cádá-gã-ndó ñi ñⁿ sá cuèhé sá dúhá sàni iní-ndó. ¹³ Te vá dáñã-ndó tàxi tnuní ñáhã ñi ñⁿ sá cuèhé sá dúhá-áⁿ xii-ndo cuendá sá vã cádá-gã-ndó, te chí dáñã ná tàxi tnuní ñáhã Yá Ndiöxí xii-ndo, te chí dáñã ná chindee ñaha-gã cada-ndo mèe-ni sá vâha, te ducaⁿ te cada iní-ndó sã cúú-ndó datná ñáyiu ní xihí te ní ndoto ndècu. ¹⁴ Te ducaⁿ càda-ndo chi vá ndácú-gã ñi ñⁿ sá cuèhé sá dúhá tàxi tnuní ñáhã-xí xii-ndo, chi Yá Ndiöxí cùndáhú iní ñáhã-gã chíndèe ñaha-gã

xii-ndo. Te ducaⁿ chi ñá túú-gã cúnù nchaa tnúhu sá ñí chídó tnùní ndíi Moisés cada ñáyiu.

Ñáyiu nchicúⁿ nihnu sá vãha

15 Te ñá díú sã cundàhú iní ñáhá Yã Ndiõxí xii-o chindee ñaha-gá ndihí sá ñá túú-gã cúnù nchaa tnúhu ní chídó tnùní ndíi Moisés, te cachí-ó sã cúú-ní cundecu-o ichi cuehé ichi duha. 16 Te nchoo xini-ó sã ñũu na cuãha-o tnúhu cunu cuechi-o núú ñáyiu cuení cunu cuechi-o núú-xi, te cùu-ná-ó ñáyiu xinu cuechi núú-yu te quide-o nchaa chiuⁿ tahu-yu. Te ducaⁿ sãtnahá-xi cùu nchaa ñáyiu quide nchaa sá cuehé sá dúhá chi tàxi tnuní ñáhá-nã-xi xii-yu, te ñiu nchaa xiãⁿ dácuíta nihnu ñaha-xi xii-yu, te ñiu-ni ducaⁿ sãtnahá-xi cùu nchaa ñáyiu sãndáá iní ñáhá xii Yã Ndiõxí chi tàxi tnuní ñáhá-gã xii-yu, te quidé-yu nchaa sá vãha nãcuáa cuení méé-gã cada-yu. 17 Te nchòhó ducaⁿ ñí xóo cada-ndo nchaa sá cuehé sá dúhá ní cùu, dico táxãhu xii Yã Ndiõxí chi vitna ñí yùhu ñí iní-ndó quide-ndo nchaa nacuáa càháⁿ tnúhu-gá sá ñí ngúndecu ndihí-ndo. 18 Te vitna ñá túú-gã táxi tnùní ñáhá ñí ñí sá cuehé sá dúhá xii-ndo, te quide-ná-ndó nchaa sá vãha tàchiuⁿ Yã Ndiõxí cada-ndo. 19 Te duha càháⁿ-í cuendá cue ñáyiu xinu cuechi cuendá sá nchòhó tecú tnùní-ndó nãcuáa ndùu tnúhu càháⁿ-í. Te nchòhó ní dáñá-ndó ñí taxi tnùní ñáhá nchaa sá cuehé sá dúhá xii-ndo, te ñá túú ní quide-ndo nacuáa ní cáháⁿ Yã Ndiõxí cada-ndo chi da vñhi-gá ní quide-ndo, te ñiu-ni ducaⁿ chí dáñá ná tàxi tnuní ñáhá Yã Ndiõxí xii-ndo vitna cuendá cada-ndo mée-ni sá vãha nãcuáa cuení méé-gã cada-ndo, te ducaⁿ te cuu-ndo ñáyiu quide ndáá cundecu núú-gã. 20 Te nchoo cùtnahá ní xóo cada-ndo nchaa sá cuehé sá dúhá ñá túú ní xóo cada-ndo ñí ñí sá vãha cuení Yã Ndiõxí cada-ndo. 21 Te dicó sácáⁿ-núú sãñaha nchaa sá cuehé sá dúhá-ãⁿ te núu na càda-o, te ñí ñí sá vãha vá ñihí-ó te núu na càda-o nchaa xiãⁿ, te ñiu nchaa xiãⁿ dácuíta nihnu ñaha-xi xii-o. 22 Te vitna ñá túú-gã cúú-ó ñáyiu ndècu ichi cuehé ichi duha, chi cùu-ná-ó ñáyiu quide nchaa nacuáa càháⁿ Yã Ndiõxí. Te sá dúhá quide-o cuu ndisa-xi ñí sá vãha sá cúú-xi-ó, te cùu-o ñáyiu quide ndáá ndécú-ó núú-gã vitna, te sáá nduu cundecu-o ndihí-gá ñí caa ñí quíhíⁿ. 23 Te nchaa sá cuehé sá dúhá dicó

dácuíta nihnu ñaha-xi xii-o, dico Yã Ndiõxí ní quide-gá sá dicó-ni ducaⁿ ndùu táhú-ó cundecu-o ndihí-gá ñí caa ñí quíhíⁿ, chi ní tnahá tnúhu-o ndihí Xítóhó Jesucristú Yaa cúú Xítóhó-ó.

7

Cuendá ñáyiu tnãndaha

1 Te nchaa nchòhó ñáyiu ndècu ndihí-í ichi Xítóhó Jesucristú sa ñaha-ndo nacuáa càháⁿ tnúhu sá dánèhé ñáhá xii-o nacuáa cada-o cundecu-o, chi tnúhu-áⁿ càháⁿ-xi dóho nchaa ñáyiu xñdecu vñvú ñuyúú-a. 2 Te nchaa ñáyiu ñihí sa ndècu yñ-xi, te ñiu tnúhu-áⁿ dánèhé ñáhá-xi xii-yu sá vã dáñã-yu yñ-yu, dico núu na cùú yñ-yu te ñá túú-gã ná càháⁿ tnúhu-áⁿ cuendá-yu. 3 Dico núu vátá cùú-gá yñ-yu te ñá túú ndùu váha-xi naquehéⁿ-yu ingá téé, dico núu na cùú yñ-yu te quendóo mée-yu, te ñá túú nãgá càháⁿ tnúhu sá dánèhé ñáhá xii-yu nãcuáa cada-yu te ducaⁿ te cuu naquehéⁿ-yu ingá téé, te ñá túú cùu-xi ñí cuechi. 4 Te nchòhó cue ñáyiu ndècu ndihí-í ichi Xítóhó Jesucristú cúú-ndó dàtná ñáyiu ní xihí dàtná ní xihí-gá. Te xiãⁿ ñá túú-gã táxi tnùní ñáhá nchaa tnúhu ní chídó tnùní ndíi Moisés xii-ndo. Te ducaⁿ ñí cuu cuendá nchòhó ngúndecu-ndo ndihí Xítóhó Jesucristú Yaa ní xihí ní cùu te ní ndoto-gá. Te ducaⁿ ñí cuu cuendá nchaa nchoo ñáyiu ndècu ichi-gá cada-o nchaa nacuáa càháⁿ Yã Ndiõxí. 5 Te nchoo ñí xñdecu-o ichi cuehé ichi duha, te tnúhu sá sánú ichi ñaha xii-o nacuáa cada-o cundecu-o cachí-xi sá ñá túú vãha cundecu-o ichi-áⁿ, te nchoo dà uuⁿ-gá ní quide-o nchaa sá cuehé sá dúhá sã dúcáⁿ càháⁿ tnúhu-áⁿ, te sá dúcáⁿ ñí quide-o te ta xita nihnu-o cuãháⁿ ní cùu. 6 Te vitna cada iní-ó sã cúú-ó dàtná ñáyiu ní xihí sá cúú-xi tnúhu sá dánèhé ñáhá xii-o nacuáa cada-o cundecu-o, chi ñá túú-gã cúnùu-xi, te vitna mee-nã Espiritú Yã Ndiõxí chindee ñaha-xi xii-o xinu cuechi-o núú-gã, te ñá díú cuendá nchaa tnúhu sá ñí ngúndéé ndéé ñihna cada ñáyiu xinu cuechi-o núú-gã vitna.

Nchaa sá cuehé sá dúhá ñũhu iní-í

7 Te cuéi duha càháⁿ-í dico vá cúú tñahí càháⁿ-ó sã tnúhu sá sánú ichi ñaha xii-o nacuáa cada-o cundecu-o ñá díú tnúhu váha

cùu-xi. Te yúhú ñá túú cùtnuní iní-í ná cúú nchàa sá cuèhé sá dúhá ní cùu te núu ñá túú tnùhu-án ní cächí tnùhu-xi xii-í, te ni ñá túú cùtnuní tucu iní-í nõu vâha àdi ñá túú vâha sá nchídó iní-í sá ndécú ndìhi tnaha ñáyi-u-o ni cùu te núu ñá túú tnùhu-án ní cächí-xi sá vâ cúú cùu iní-í sá ndécú ndìhi-yu. ⁸ Te tnùhu-án ñí dánèhé ñáhá-xí xii-í sá vâ cúú càda-í ni ñí sá cuèhé sá dúhá, dico sá cuèndá tnùhu-án uuⁿ-gá ducaⁿ ñí sani iní-í ní quide-í. Te núu ñá túú tnùhu sá sánú ìchi ñaha xii-o nacuaá cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. ⁹ Te cùtnàhá vátá nihí-gá-í tnùhu-án te ñá túú tnàhí ná sání iní-í ndécù-í ni cùu, dico sátá ni níhí-í tnùhu-án te ní cutnùní iní-í sá ndécú cuèchi-í, te ta xíta nihnu-í cuáháⁿ ní cùu. ¹⁰ Te núu ni quide-í nchaa nàcuáa càháⁿ tnùhu-án te sa ndéé ama-gá naníhí tàhú-í ní cùu, dico ñá túú ní quide-í nõu ní cutnùní iní-í sá tá xíta nihnu-í cuáháⁿ ní cùu. ¹¹ Te sá xíi tnùhu-án xiáⁿ uuⁿ-gá ní cunuu nchàa sá cuèhé sá dúhá ñí dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáháⁿ ní cùu.

¹² Te tnùhu sá sánú ìchi ñaha xii-o nacuaá cada-o cùndecu-o cuu-xi tnùhu ío yíñùhu ní taxi Yá Ndiöxí, te ñí ñí tnùhu-án cúú-xi mée-ni tnùhu vâha, te ni ñí tnùhu cuèhé tnùhu duha ñá túú ñùhu tnahá. ¹³ Te vâ cúú cächí-í sá tnùhu vâha-án ñí quide-xi ta xíta nihnu-í cuáháⁿ ní cùu, chi nchaa sá cuèhé sá dúhá ñí quide-í, xiáⁿ tá dàcuíta nihnu ñaha-xi xii-í cuáháⁿ ní cùu, te sá cuèndá tnùhu vâha-án ñí cutnùní iní-í sá quidè-í nchaa sá cuèhé sá dúhá, te xiáⁿ tá xíta nihnu-í cuáháⁿ ní cùu. Te sá cuèndá nchaa nàcuáa càháⁿ tnùhu sá sánú ìchi ñaha xii-o nacuaá cada-o cùndecu-o ní cutnùní iní-í sá xidó ndécú cuèchi-í ní cùu.

¹⁴ Te tnùhu-án ñí taxi Espiritú Yá Ndiöxí ndécú ndìhi-o cachí tnùhu-xi nàcuáa cada vâha-o. Te nchoo cùu-o mee-ni ñáyi-u yíca cuèchi, te tàxi tnuní ñáhá nchàa sá cuèhé sá dúhá xii-o ni cuu. ¹⁵ Dico nchoo tnàhá iní-ó càda-o nchaa sá vâha dico ñá túú quide-o, te da nchaa sá ñá túú tnàhá iní-ó càda-o quide-o, te ñá túú cùtnuní iní-ó ñá cuèndá ducaⁿ quide-o. ¹⁶ Te sá dúcáⁿ quide-o nchaa sá ñá túú tnàhá iní-ó, te xiáⁿ ndíxí tũu iní-ó sá tnùhu sá dúcáⁿ sanu ìchi ñaha xii-o nacuaá cada-o cùndecu-o cuu-xi tnùhu ío vâha. ¹⁷ Te cùtnuní iní-ó sá nchàa sá cuèhé

sá dúhá ñùhu iní-ó, xiáⁿ quidè-xí dùcaⁿ quide-o sá ñá túú vâha, te ñá díú sá cáhú iní mée-ó dùcaⁿ quide-o. ¹⁸ Te cùu-o cue ñáyi-u sàni cuehé sání dùha iní-xi, te cuini-ó càda-o nchaa sá vâha dico ñá túú nihí ndéé-ó càda-o. ¹⁹ Te cuini-ó càda-o nchaa sá vâha dico ñá ndácú-ó, te ñá túú cuini-ó càda-o datná quidè nchàa ñáyi-u ndècu ìchi cuehé ìchi duha, chi ñáyi-u-án mee-ni nchàa sá cuèhé sá dúhá quidè-yu, dico diu-ni nchaa xiáⁿ quidè-ó tnàhá-ó. ²⁰ Te sá dúcáⁿ quide-o nchaa sá ñá túú tnàhá iní-ó càda-o te ñá díú mée-o ducaⁿ cahu iní-ó quide-o, chi nchaa sá cuèhé sá dúhá ñùhu iní-ó xiáⁿ quidè-xí dùcaⁿ quide-o.

²¹ Te ducaⁿ tnàhí yâha-o òré cuini-ó càda-o sá vâha, chi da mee-ni nchàa sá cuèhé sá dúhá quide-o. ²² Te ío cùdí iní-ó càda-o nchaa nacuaá càháⁿ Yá Ndiöxí, ²³ te dicó-ni sá ncháá sá cuèhé sá dúhá ñùhu iní-ó, xiáⁿ quidè-xí ngàni ñaha-xi xii-o ñá túú quide-o sá vâha sàni iní-ó càda-o, te ducaⁿ yâha-o chi nchaa sá cuèhé sá dúhá-án cùnùu-xi taxi tnuní ñáhá-xí xii-o.

²⁴ Te ndàhú ní cuu nchoo! Chi vá yõo ñí ni ndàcu cada nacuaá vá táxi tnuní ñáhá-gá nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxáhu xii Yá Ndiöxí sá Xítohó Jesucristú ní quide-gá cuèndá sá vâ táxi tnuní ñáhá-gá ni ñí sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sàni iní-ó càda-o nchaa nacuaá càháⁿ Yá Ndiöxí, dico núu nchaa sá cuèhé sá dúhá ná cùnùu-xi taxi tnuní ñáhá-xí xii-o, te diu-ni nchaa xiáⁿ cada-o.

8

Ñáyi-u quide nchaa nacuaá càháⁿ Espiritú Yá Ndiöxí

¹ Te vitna nchaa nchoo ñáyi-u tnàhá tnùhu ndìhi Xítohó Jesucristú vá cuíta nihnu-gá-ó, chi ñá túú-gá ndécú-ó ìchi cuehé ìchi duha, chi mee-ná nchaa nàcuáa càháⁿ Espiritú Yá Ndiöxí quidè-ó. ² Te Espiritú Yá Ndiöxí-án táxi tnuní ñáhá-xí xii-o, te ducaⁿ chi ndècu ndìhi-o Xítohó Jesucristú, te sá dúcáⁿ tàxi tnuní ñáhá Espiritú-gá xii-o nõu xiáⁿ ñá túú-gá táxi tnuní ñáhá ni ñí-gá sá cuèhé sá dúhá xii-o, te ducaⁿ quide Espiritú-gá cuèndá sá vâ cuíta nihnu-o, te diu-ni Espiritú-gá quidè-xí cuèndá sá nchóo ndùu

táhú-ó cùndecu-o ndihí-gá ni caa ni quíhí.³ Te nchoo ñá ní ndàcu-o cada-o nchaa nacuáa càháⁿ tnúhu sá sánú ìchi ñaha xii-o nacuáa cada-o cùndecu-o, núu xiáⁿ tnúhu-áⁿ ñà túú ní ñihí ndéé-xí càda-xi cuendá sá nchóó vǎ cuíta nihnu-o. Dico Yá Ndiöxí ní tendaha-gǎ Déhe mee-gǎ ní quixi ñuyíú-a, te Yaá-áⁿ cúú-gǎ ìⁿ ñáyiu, te càa-gǎ dàtná cáá ñáyiu ndècu cuéchi-xi xǐndecu ñuyíú-a, te sá cuendá nchaa cuéchi nchaa nchoo ñáyiu xǐndecu ñuyíú-a ní quixi-gǎ, te ndéé dàvá-áⁿ ñí quide-gǎ cuendá sá vǎ táxí tnùní ñáhá-gǎ ni ìⁿ sá cuèhé sá dúhá xii-o. ⁴ Te ducaⁿ ñí quide-gǎ cuendá nchoo nchícúⁿ nihnu-o quide-o nacuáa càháⁿ tnúhu sá sánú ìchi ñaha xii-o nacuáa cada-o, chi ñá túú-gǎ cúnùu ni ìⁿ sá cuèhé sá dúhá ìní-ó, chi Espiritú Yá Ndiöxí-ñá táxí tnùní ñáhá-xí xii-o.

⁵ Te nchaa ñáyiu cúnuu nchaa sá cuèhé sá dúhá ìní-xi mee-ni xiǎⁿ ñúhú ìní-yu te quidé-yu. Dico nchoo ñáyiu quide nchaa nacuáa cuíni Espiritú Yá Ndiöxí ñúhú ìní-ó mèe-ni nacuáa càháⁿ Espiritú-gǎ-áⁿ te quide-o. ⁶ Te núu mee-ni nchaa sá cuèhé sá dúhá cúnuu ìní-ó, te cuíta nihnu-o, dico núu mee-ni nchaa tnúhu càháⁿ Espiritú Yá Ndiöxí cúnùu ìní-ó, te ío váha cuu ìní-ó cùndecu-o ndihí-gá ni caa ni quíhí. ⁷ Te nchaa ñáyiu ñúhu ìní mee-ni sǎ cuèhé sá dúhá cùu úhú ìní-yu Yá Ndiöxí, te ñá túú cuíni-yu cadá-yu nàcuáa càháⁿ-gǎ, te ni ñá ndácú-yu cadá-yu. ⁸ Te nchaa ñáyiu ducaⁿ cúnuu nchaa sá cuèhé sá dúhá ìní-xi-áⁿ ñá túú cùdiú-yu núu Yá Ndiöxí.

⁹ Te nchòhó chi ñá túú-gǎ cúnùu sá cuèhé sá dúhá ìní-ndó, chi mee-ñá nàcuáa càháⁿ Espiritú Yá Ndiöxí quidé-ndó, te ducaⁿ quide-ndo chi ndècu ndihí-ndo Espiritú-gǎ, te diu-ni Espiritú-gǎ-áⁿ ñí tendaha Xítóhó Jesucristú véxi ndècu ndihí-o, te nchaa ñáyiu ñá túú ndècu ndihí Espiritú sá ñí tendaha Xítóhó Jesucristú véxi ndècu ndihí-o ñá túú ndècu ndihí ñáhá-yu xii-gǎ. ¹⁰ Te núu ndècu ndihí-ndo Xítóhó Jesucristú, te cuéi na cùu yiqui cùñú-ndó sǎ cuendá nchaa sá cuèhé sá dúhá ío ñuyíú-a, dico ìní-ndó chi cundecu ndihí-xi Yá Ndiöxí chi ñá túú-gǎ cuéchi-ndo ndècu núú-gǎ. ¹¹ Te núu ndècu ndihí-ndo Espiritú Yá Ndiöxí Yaá ní dándótó ñaha xii Xítóhó Jesucristú, te diu-ni-gǎ cada

te ndoto yiqui cùñú-ndó sǎ tá xíta nihnu cuáháⁿ núu na cùú-xi, te ducaⁿ chi ndècu ndihí-ndo Espiritú-gǎ.

¹² Te nchòhó ñáyiu ndècu ndihí-í ichi Xítóhó Jesucristú, ñá túú-gǎ tàú-ndó cúnuu ni ìⁿ sá cuèhé sá dúhá ìní-ndó nàcuáa vǎ cùndecu-gǎ-ndó ìchi cuèhé ichi duha. ¹³ Chi núu na cúnuu sá cuèhé sá dúhá ìní-ndó te cuíta nihnu-ndo, chi quíhíⁿ-ndó núu ùhú núu ndàhú. Dico núu dañá-ndo mèe-ndo chindee ñaha Espiritú Yá Ndiöxí xii-ndo cuendá sá vǎ cúnùu-gǎ sá cuèhé sá dúhá ìní-ndó ñá, te nduu táhú-ndó cùndecu-ndo ndihí-gá ni caa ni quíhíⁿ te núu ducaⁿ na càda-ndo.

¹⁴ Chi nchaa ñáyiu quide nchaa nacuáa sànu ichi ñaha Espiritú Yá Ndiöxí cúu-yu déhe-gǎ. ¹⁵ Te Espiritú sá ñí taxi Yá Ndiöxí ndécú ndihí-o ñá túú quide-xi sá nchóó yùhú-ó cunu cuechi-o núú-gǎ, chi Espiritú-áⁿ quidé-xí sǎ nchóó cùu-o déhe-gǎ, te diu-ni Espiritú-áⁿ quidé xǎhaⁿ-o xii Yá Ndiöxí: “¡Yòhó Dútú Ndiöxí cúú-n Tátá méé-ndí!”; duha xǎhaⁿ-o xii-gǎ. ¹⁶ Te diu-ni Espiritú-gǎ-áⁿ tnàhá tnúhu-xi ndihí ìní-ó, te càháⁿ ndáá-xi sá nchóó cùu-o déhe-gǎ. ¹⁷ Te sá dúcáⁿ cùu-o déhe Yá Ndiöxí xiǎⁿ ní cachí-gǎ sá tnàhá-ó nduu táhú-ó sǎ ñí nduu táhú Xítóhó Jesucristú, te ducaⁿ nduu táhú-ó te núu na càda ndee ìní-ó ndòho-o datná ní ndòho Xítóhó Jesucristú, te núu ducaⁿ te ío cuu càhnu-o ndihí-gǎ ni caa ni quíhíⁿ.

¹⁸ Te yúhú càchí-í sá ñá túú ñá cada-xi cuéi ndòho-o cuendá-gǎ ndécú-ó ñuyíú-a, chi ío váha càa núu ndúú táhú-ó cùndecu-o na saá nduu. ¹⁹ Te nchaandi túhú sá ñí cadúha Yá Ndiöxí ní taxi ndecu-gǎ ñuyíú-a ndètu cahnu-ná-xi saá nduu càchí-gǎ sá ío càhnu cuu nchaa déhe-gǎ. ²⁰ Te nchaa sá ñí cadúha Yá Ndiöxí ní taxi ndecu-gǎ ñuyíú-a ní saá nduu ñá túú-gǎ cúú-xí sǎ vǎha sá cúú-xí-gǎ. Te ñá díú mèe sá ñí taxi ndecu Yá Ndiöxí ñuyíú-a ducaⁿ ni sàni ìní-xi cunduu, chi mee-gǎ ducaⁿ tnàhí ní cachí-gǎ cunduu sá saá nduu vǎ cúú-xí sǎ vǎha sá cúú-xí-gǎ, dico saá tucu nduu te nchaa xiǎⁿ cuu tucu-xi sá vǎha sá cúú-xí-gǎ. ²¹ Te nchaa sá ñí taxi ndecu-gǎ ñuyíú-a vǎ cùndùu-gǎ-xi dàtná cáá-xí vǐtna te ni vǎ dánàa-gǎ, chi nduu saa-xi te ngúndecu váha-xi dàtná ngúndecu váha nchaa cue

déhe-gá. ²² Te nàha-o sá ncháándì túhú sá nchító nǐ cadúha Yá Ndiǒxí ndécú ñùyíú-a ndòho-xi vitna datná ndóhó ìⁿ ñadihí sa ní tnahá òré cacu déhe-xi. ²³ Te ñá díú-ní nchàa sá dúcáⁿ nǐ cadúha-gá-ǎⁿ ducaⁿ ndòho-xi, chi tnahá nchoo dùcaⁿ ndoho-o ndecu-o ñùyíú-a tucu, te nchoo sà ní nduu táhú-ó Espíritú Yá Ndiǒxí Espíritú sá nǐ cachí méé-gǎ nduu táhú-ó dǐhnanuu. Te ío ndòho tnahá-ó ndècu-o ñùyíú-a te ndètu cahnu-ná-ó sǎá nduu ndàda saa-gá yiqui cùñú-ó, te cǎháⁿ-gá sá cúú-ó dèhe-gá. ²⁴ Te Yá Ndiǒxí ní quide-gá ní naníhí tàhú-ó nǔu xiǎⁿ ní ngúndecu ndihí-o tñuhu ndee iní ndétú-ó sǎá nduu càda-gá nàcuáa ní cachí-gá, te núu sa ndècu ndihí-o sá ndúú táhú-ó te vá cúú cǎháⁿ-ó sǎ cùndètu-o sá ndúú táhú-ó chí sa ndècu ndihí-o. ²⁵ Dico sá ndétú-ó ndúu táhú-ó cùu-xi sá vátá cùndècu ndihí-gá-ó, te xini ñuhu-ni-xi cada ndee-ni iní-ó cùndètu-o ndéé sǎá nduu ndúu táhú-ó sá dúcáⁿ nǐ cachí Yá Ndiǒxí nduu táhú-ó.

²⁶ Te Espíritú-gá chindee ñàha-xi xii-o nacuáa níhí ndéé-ó cùndecu-o, te nchoo ñà túú xini-ó cǎháⁿ ndihí-o Yá Ndiǒxí nàcuáa tàú-xi cunduu dico Espíritú-gá cǎháⁿ ndàhú-xi núú-gǎ cuendá-ó cuèi òré ñá nihí-ó tñuhu cǎháⁿ-ó cuendá nchaa sá ìo cuini-ó cǎcáⁿ-ó núú-gǎ. ²⁷ Te Yá Ndiǒxí sa nàha ndáá-gá nchaa nàcuáa sàni iní-ó, te ducaⁿ sà naha ndáá-gá nchaa nàcuáa sàni iní Espíritú-gá. Te Espíritú-gá cǎháⁿ ndàhú-xi núú-gǎ cuendá nchoo ñáyíu yìndaha-gá, te cǎháⁿ ndàhú-xi núú-gǎ nàcuáa cuini méé-gǎ cunduu.

Nchaa sá ná càda ñaha ñáyíu te vá ndácǔ-yu nadatùhú-yu iní-ó chí ndacu nahi-ni-o yǎha-o nchàa sá ná cáda ñahá-yu

²⁸ Te sa nàha-o sá Yá Ndiǒxí quidé-gǎ sá ncháá sǎ yǎha-o ndècu-o ñùyíú-a cùu-xi sá vǎha sá cúú-xi nchòo cue ñáyíu cùu iní ñáhá xii-gá, chí cùu-o ñáyíu ní cǎháⁿ-gá cundecu ndihí-gá datná ní cachí iní méé-gǎ. ²⁹ Te ndéé cùtnàhá vátá ngǎva-gá ñùyíú, te Yá Ndiǒxí sa nàha-gá nándì cùu ñáyíu cundecu ndihí-gá, te diu-ni ndéé dàvá-áⁿ nǐ cachí-gá sá ñáyíu-áⁿ cunduu váha iní-yu datná váha iní Déhe mee-gǎ, te ducaⁿ nǐ cachí-gá cuendá sá Déhe mee-gǎ-áⁿ cunuu-gǎ núú nchàa ñáyíu cundecu ndihí-gá. ³⁰ Te nchaa ñáyíu ducaⁿ nǐ cachí-gá cundecu ndihí-gá

ndéé cùtnàhá vátá ngǎva-gá ñùyíú cǎháⁿ ñáhá-gǎ xii-yu vitna, te nchaa ñáyíu ducaⁿ cǎháⁿ-gá cǎchí-gá sá ñà túú-gǎ cuèchi-yu ndècu núú-gǎ, te diu-ni ñáyíu-áⁿ cachí-gá sá ìo cǎhnu cuú-yu.

³¹ Te vitna ní cutnùnì iní-ó, te ñá túú nǎgá cani iní-ó, chí Yá Ndiǒxí ndécú ndihí ñaha-gá xii-o, te vá yòo ìⁿ-gá ndacu quehndé nihnu cuendá sá vǎ chindèe ñaha-gá xii-o. ³² Te Yá Ndiǒxí ñá túú ní cùdí iní-gá Déhe-gá sá cúú-gá cuendá nchaa nchoo ñáyíu xìndecu ñùyíú-a, te sá dúcáⁿ ndéé Déhe-gá ñá túú ní cùdí iní-gá xiǎⁿ cùtnùnì iní-ó sǎ táxi-gǎ nchaandi túhú sá xini ñuhu-o. ³³ Te vá yòo ìⁿ ndacu cacáⁿ cuèchi núú Yá Ndiǒxí cuendá nchaa ñáyíu ní cachí-gá cundecu ndihí-gá te núu ná cúú cuèchi-yu ndècu. Chí mee-gǎ cǎchí-gá sá ñà túú ndècu cuèchi-yu núú-gǎ. ³⁴ Te vá yòo ìⁿ ndacu daquihíⁿ ñáhá xii-o núú ùhú núú ndàhú, chí Xítóhó Jesucristú ní xihí-gá te ní ndoto-gá, te cuándaa-gá núú ndécú Dútú Ndiǒxí núcòo-gá xio cùha-gá, te ducaⁿ ìo cùnuu-gá, te yàcáⁿ cǎháⁿ ndàhú-gá núú Dútú Ndiǒxí cuendá-ó. ³⁵ Te vá yòo ìⁿ ndacu càda ñaha xii-o ìⁿ sá ñà túú vǎha cuendá sá vǎ cúú iní ñáhá-gǎ Xítóhó Jesucristú xii-o, te ni tñúndòho tñuhu ndàhú, te ni sá ndihú iní-ó ñǎ cùtnùnì iní-ó nǎsa cada-o cǎcu nihnu-o ìⁿ sá ná yǎha-o, te ni nchàa sá cáda ñàha ñáyíu sá cuendá-gá, te cuèi-ni sá vǎ nihí-ó sǎ cóhó sǎ cǎxí-ó, te cuèi-ni sá vǎ nihí-ó dǒó cuihnu-o, te cuèi ndècu-ná-ó sǎ yǎha-o ìⁿ sá yǎha-o, te cuèi sa ndècu-ná-ó sǎ cǎhni ñáhá-yu, dico Xítóhó Jesucristú vá dáña ndéé-gá sá cúú iní ñáhá-gǎ xii-o. ³⁶ Te quee ndáá-xi nàcuáa ní cǎháⁿ ìⁿ téé ní xóo cǎháⁿ tñuhu Yá Ndiǒxí ndéé sanaha nǐ ngódó tñùnì núú tütú-gá núú cǎchí-xi:

Yòhó Dútú Ndiǒxí nchaa-ni nduu nchaa-ni òré cuini ñáyíu cahni ñáhá-yu xii-ndí sá cuendá-n,

te cǎchí-yu sá cúú-ndí datná cue mbéé cue quiti sa ndècu túha-ná cahní-yu.

Duha ní cachí téé ní xóo cǎháⁿ tñuhu-gá-áⁿ, te ducaⁿ nǐ ngódó tñùnì núú tütú-gá. ³⁷ Te cuèi ducaⁿ nándì sá ná càda ñahá-yu xii-o, dico vá ndácǔ-yu nadatùhú-yu iní-ó chí ndacu nahi-ni-o yǎha-o nchàa sá dúcáⁿ ná càda ñahá-yu xii-o, te ducaⁿ chí Xítóhó Je-

sucrìstú Yaa ío cùu iní ñáhá xii-o ndecu ndihí ñaha-gá chíndèe ñaha-gá. ³⁸⁻³⁹ Te yúhú cútnùnì ndáá iní-í sá ñi ñi sá ío ñuyíú-a vá ndácú-xí càda-xi cuendá sá vǎ cúú iní ñáhá-gǎ Yǎ Ndiöxí xii-o, te ñi sǎ cùú-ó, te ñi sǎ cùndècu-o ñuyíú-a, te ñi ñi espíritú sá ío cùnuu cundihí yucu ñávǎha te ñi ñi dava-gá cue espíritú cùndihí-xi vá ndácú-xí càda-xi cuendá sá vǎ cúú iní ñáhá Yǎ Ndiöxí xii-o. Te ñi sǎ cúú ñuyíú-a vitna, te ñi sǎ cúú ndèe cuèé-gǎ, te ñi ñi sǎ ndécú àndiú, te ñi ñi sǎ ndécú ñuyíú-a, te ñi ñi sǎ ñi cadúha mee Yǎ Ndiöxí, ñi ñi xǎn vá ndácú-xí càda-xi cuendá sá vǎ cúú iní ñáhá-gǎ xii-o chi ndècu ndihí-o Xítohó Jesucrìstú Yaa cúú Xítohó-ó.

9

Yá Ndiöxí ní cachí-gá sá ñáyiú isràél cúú-yu ñáyiú canchicúⁿ ñhnu ñaha xii-gá

¹ Te yúhú càháⁿ ndáá-í chí cùu-í ñi tée ndècu ndihí Xítohó Jesucrìstú, te ndècu ndihí-í Espíritú Yǎ Ndiöxí ñu xǎn cútnùnì iní-í sá càháⁿ ndáá-í. ² Te nchaa-ñi nduu nchaa-ñi òré ío ndihú iní-í, te ducaⁿ-ñi ío quide úhú-xi iní-í ³ sá cuendá nchaa ñáyiú cùu ndi mee-í. Te núu dícó cúú-xí ñi sǎ chíndèe ñaha xii-yu nucúndecu váha-yu núu Yǎ Ndiöxí ñá, te dàña-í mée-í dàcuíta ñhnu ñaha Xítohó Jesucrìstú ñu dícó sá cúú. ⁴ Te nchaa ñáyiú cùu ndi mee-í-áⁿ cúú-yu ñáyiú isràél, te Yá Ndiöxí ní cachí-gá sá cúú-yu déhe-gǎ, te ní quide-gǎ nàcuáa ní cutnùnì iní-yu sá ío càhnu cuu-gǎ, te ní càháⁿ ndáá-gǎ núu-yu nàcuáa cada ñaha-gǎ xii-yu, te ní xáhaⁿ-gǎ xii ndíi Moisés ní chídó tñùnì ndíi nàcuáa cada-yu cundécú-yu. Te ní xáhaⁿ-gǎ xii-yu nàcuáa cada-yu cada càhnu ñahá-yu xii-gǎ, te ní xáhaⁿ tucu-gǎ xii-yu nchaa nàcuáa cada-gǎ ndéé cuèé-gǎ. ⁵ Te nchaa ñáyiú-áⁿ cúú-yu ñanì tñáhá nchaa cue tée ní cunuu ñi xíndecu ndéé sanaha, te ñi-ñi ñanì tñáhá-yu cùu Xítohó Jesucrìstú Yaa ní tendaha Dütú Ndiöxí ní quixi ñuyíú-a, te tñáhá-gǎ cúú-gǎ Ndiöxí te ío cùnuu-gǎ, te nchaa nduu nchaa quíú ío càhnu cuu-gǎ. Te ducaⁿ na cùnduu.

⁶ Te vá càchí-ó sǎ Yǎ Ndiöxí ñá túú ní quide-gǎ nchaa nàcuáa ní cachí-gǎ cada-gǎ cuendá sá ñá túú sàndáá iní ñáhá ðava ñáyiú isràél xii-gǎ. Te sá dúcáⁿ xíquide

davá-yu te ñá túú quide-yu nàcuáa tàú-xi cada-yu sá cúú-yu ñáyiú isràél. Te ñáyiú ducaⁿ xíquide-áⁿ cúú-yu ñáyiú ñá túú cùu cuendá ñáhá Yǎ Ndiöxí. ⁷ Te cuèi nchaa-yu cùú-yu ñanì tñáhá ndíi Àbrahám dico ñá túú quide-yu nchaa nàcuáa tàú-xi cunduu cada-yu sá cúú-yu ñanì tñáhá ndíi. Te Yá Ndiöxí ní xáhaⁿ-gǎ xii ndíi Àbrahám: “Nchaa cue ñanì tñáhá tǎ Isàác tée cùu déhe ducuⁿ-n, mee-ñi cuè ñáyiú-áⁿ cuu ñanì tñáhá-n”, duha ní xáhaⁿ-gǎ xii ndíi Àbrahám. ⁸ Te xǎn cútnùnì iní-ó sǎ ñá nchaa ñáyiú cùu ñanì tñáhá ndíi Àbrahám cúú-yu ñáyiú cùu cuendá Yǎ Ndiöxí, chí mee-ñi ñáyiú sàndáá iní nàcuáa ní càháⁿ-gǎ cada-gǎ, ñáyiú-áⁿ cúú cuendá-gǎ. ⁹ Te duha nduu tñuhu ní xáhaⁿ Yǎ Ndiöxí xii ndíi Àbrahám: “Sáá nduu te yúhú cada-í te coo ñi déhe-n ndihí ñadihí-n tǎ Sǎrá”, duha ní xáhaⁿ-gǎ xii ndíi.

¹⁰ Te ñá díú-ní xǎn ní quide Yá Ndiöxí, chí tñáhá ní ndatnúhu-gǎ ndihí ndíi Rèbecá cútnáhá vitna ñuhu úú déhe ndíi ndihí ndíi Isàác tée ní cuu ñanì tñáhá-ó ní xíndecu ndéé sanaha. ¹¹⁻¹³ Te cútnáhá vitna ñuhu-gǎ déhe ndíi Rèbecá, cútnáhá vátá cada-gǎ-güexi ní ñi sǎ cuèhé sá dúhá, te ñi ñi sǎ vǎha, ní xáhaⁿ Yǎ Ndiöxí xii ndíi: “Déhe-n tǎ díhna na càcu te tée-áⁿ tñi-dé nchaa tñuhu càháⁿ déhe-n tǎ cùu uú ná càcu”, duha ní xáhaⁿ-gǎ xii ndíi Rèbecá. Te ní quee ndáá-xi nàcuáa ní càháⁿ Yǎ Ndiöxí núu tütú-gǎ núu càchí-xi: “Té Jàcób ní cuu váha iní-í núu-dǎ, te té Esàú ñá túú ní cùu váha iní-í núu-dǎ”, duha càchí-gǎ núu tütú-gǎ. Te ducaⁿ ñi cuu chí ducaⁿ ñi cachí mée-gǎ cunduu sá càháⁿ-gǎ nchaa ñáyiú cuení mée-gǎ, te ñá díú cuendá ñi chiuⁿ quide-yu càháⁿ ñáhá-gǎ xii-yu.

¹⁴ Te vá cúú tñahí càháⁿ-ó sǎ Yǎ Ndiöxí ñá túú quide váha-gǎ sá dúcáⁿ quide-gǎ chí mee-gǎ ío ndáá quide-gǎ! ¹⁵ Te mee-gǎ ní xáhaⁿ-gǎ xii ndíi Moisés: “Cundáhú iní-í chindee-í mee-ñi cuè ñáyiú càchí iní-í”, duha ní xáhaⁿ-gǎ xii ndíi. ¹⁶ Te xǎn cútnùnì iní-ó sǎ cùndáhú iní-gǎ ñáyiú chí ducaⁿ cuení mée-gǎ cunduu, dico ñá túú cùndáhú iní ñáhá-gǎ xii-yu cuendá sá dúcáⁿ cuení-yu cada-gǎ, te ñi ñá túú cùndáhú iní ñáhá-gǎ xii-yu cuendá sá ío ndècu ndéé-yu quide-yu ñi sǎ quide-yu. ¹⁷ Te núu tütú Yǎ Ndiöxí càháⁿ-xi nàcuáa ní xáhaⁿ-gǎ xii tée

ní cuu Faràón téé ní xíndaha nàcióⁿ Ègiptú, te duha ní xáhaⁿ-gã: “Yúhú ní quide-í yíndàha-n ñáyiú cuendá cada-í titní núú sã cáda-í núú-n cuendá cutnùní iní-n sã ïo càhnu cuu-í, te ducaⁿ nchàa ñáyiú ñuyíú cutnùní iní-yu sá yúhú cùú-í Ndiöxí”, duha ní xáhaⁿ-gã xii téé ní cuu Faràón. ¹⁸ Te xíãⁿ cùtnùní iní-ó sã Yã Ndiöxí cùndàhú iní-gá mee-ni cuè ñáyiú càchí iní méé-gã, te ducaⁿ ndàda díi-gá iní nchaa ñáyiú càchí iní méé-gã ducaⁿ càda-gã.

¹⁹ Te sá dúhá càháⁿ-í te dava-ndo quèsaha-ndo: “Ná cuendá Yã Ndiöxí dácàa-gá cuéchi díquí ñáyiú núu ni ñⁿ-yu ñá ndácú-yu quehdé nihnú-yu cuendá sá vã cáda Yã Ndiöxí nàcuáa cuíní-gá”, quesaha-ndo. ²⁰ Te chí cuãha cuendá sá dícò ñáyiú ñuyíú-a cùu-ndo te ñá túú ndùu váha-xi sá nchòhó càháⁿ-ndó ñⁿ tnúhu sá ñà túú ndùu váha sá cùú-xí Yã Ndiöxí. Te duha na càháⁿ-í núú-ndó nàcuáa tecú tnùní-gá-ndó nàcuáa ndùu tnúhu càháⁿ-í. Te ñá túú xìní-ó sã ñⁿ quídi ñuhu cùñaha-xi xii ñáyiú ní cadúha ñaha xii-xi: “Ná cuendá duha ní cadúha ñaha-n xii-í”, cùñaha-xi. ²¹ Chi ñáyiú cadúha nchaa quídi-ánⁿ cuu-ni cadúha-yu ndihi ñuhu cuèi nása na cùnduu quídi cadúha-yu canehe chiúⁿ-yu, chi ñⁿ-ni ñuhu cadúha-yu quídi cánehe chiúⁿ-yu ndi tnahá nduu sàcòo-yu vico ndihi quídi sá cànehe chiúⁿ-yu nduu cùtexínu.

²² Te ñⁿ-ni ducaⁿ quide Yã Ndiöxí, chi cuíní-gá dandòho-gã ñáyiú ñá túú quide nchaa nacuáa nduu vétú iní-gá, te cada-gá nàcuáa cutnùní iní-yu sã ïo càhnu cuu-gã. Te sa ndècu túha-ná-yu sá quíhíⁿ-yu núú ùhú núú ndàhú, te cuèi ducaⁿ dico ío ta quide cahnu iní-gá cuáhán. ²³ Te ducaⁿ quide-gã cuendá cutnùní iní nchaa ñáyiú ñuyíú sã ïo váha quide-gã sá cùú-xí nchaa nchoo ñáyiú cùndahú iní-gá, chi ní cachí-gã sá nchóó cuè ñáyiú cùndahú iní-gá nduu táhú-ó cùndecu-o ndihi-gã núú ïo váha càa ndecu-gã. ²⁴ Te dava nchoo ñáyiú ní càháⁿ Yã Ndiöxí cùú-ó ñáyiú isràél, te dava-o cùu-o ñáyiú ñá túú cùu ñáyiú isràél. ²⁵ Te ní quee ndáá-xi nàcuáa ní xáhaⁿ Yã Ndiöxí xii ndii Òseás téé ní xóo càháⁿ tnúhu-gã ndéé sanaha ní chídó tnùní ndii núú tütú-gã núú càchí-xi:

Ñáyiú ñá túú cùu cuendá-í ní cùu te nduu cuendá-í-yu,
te ñⁿ-ni ñáyiú-ánⁿ ñà túú cùu váha iní-í núú-yu ni cùu, dico vitna cùu váha iní-í núú-yu.

²⁶ Te ñⁿ-ni ñⁿ núú dúcáⁿ ní cachí-í sá ñà túú ñáyiú cùu cuendá-í ñⁿ-ni ñⁿ-ánⁿ coo ñáyiú cuu déhe yúhú Dútú Ndiöxí Yaá ndécú tùu andiu.

Duha ní xáhaⁿ Yã Ndiöxí xii ndii Òseás ní chídó tnùní ndii núú tütú-gã. ²⁷ Te ndii Chàíá téé ní xóo càháⁿ tucu tnúhu Yã Ndiöxí ndéé sanaha ní càháⁿ ndii cuendá ñáyiú isràél, te duha ní cachí ndii: “Cuèi cuéhé víhí ñáyiú isràél dàtná cuéhé ñuhu cùchí làmár dico sacú-ni-yu vã quíní-yu tnúndòho tnúhu ndàhú. ²⁸ Te Yã Ndiöxí ío ndii cada-gã nchaa nàcuáa càháⁿ-gã ñuyíú”, duha ní cachí ndii. ²⁹ Te ní càháⁿ tucu ndii nàcuáa cada-xi ndéé cuéé-gã, te ní cachí ndii:

Yã Ndiöxí Yaá táxi tnùní nchaandi túhú sá ío andiu ndii ñuyíú ñà túú ní dànaa-gã nchaa ñáyiú isràél, chi núu ni ndihí-yu danàa ñaha-gã,
te nchoo cùu-o datná ní cuu nchaa ñáyiú ní xíndecu ñúú Sòdomá ndihi nchaa ñáyiú ní xíndecu ñúú Gòmorrá, te ndihi-o nàa datná ní naa nchaa ñáyiú-ánⁿ ní cùu.

Duha ní cachí ndii.

Ñáyiú isràél ñá túú sàndáá iní-yu tnúhu Xítóhó Jesucrístú

³⁰ Te sá cuendá xíãⁿ ñúu vitna càchí tnúhu-í xii-ndo sã cuè ñáyiú ñá túú cùu ñáyiú isràél ñá túú ní nànducu nihnú-yu nàcuáa cadá-yu cudiú-yu núú Yã Ndiöxí, dico vitna cudiú-yu núú-gã chi ní sàndáá iní-yu Xítóhó Jesucrístú. ³¹ Te ñáyiú isràél nchícúⁿ nihnú-yu tnúhu sá dánéhé ñáhá xii-yu nàcuáa cadá-yu cudiú-yu núú Yã Ndiöxí dico ñá túú cudiú-yu núú-gã chi ñá ndácú-yu cadá-yu nchaa nàcuáa càháⁿ-xi. ³² Te ducaⁿ ñà túú cudiú-yu núú Yã Ndiöxí chi ñá túú sàndáá iní-yu Xítóhó Jesucrístú, te sàni iní-yu sá sã cuendá mee-ni nchaa sá quidé mèé-yu cudiú-yu núú-gã, te sá dúcáⁿ quidé-yu te cùú-yu dàtná ñⁿ ñáyiú nguñenu ñⁿ yúú te nduá-yu. Te ducaⁿ sàtnahá-xi cùú-yu chi ñá túú cùu váha iní-yu núú Xítóhó Jesucrístú. ³³ Te quèe ndáá-xi nàcuáa

ní cǎháⁿ Yǎ Ndiǒxí #ⁿ xichi núú tütú-gá núú cǎchí-xi:

Yúhú táxí ndècu-í #ⁿ téé ñúú Sìón, te cuu-dé dàtná #ⁿ yúú, te yúú-ǎⁿ nguñenu ñáyiú te nduá-yu,

te nchaa ñáyiú na quíndáá iní ñáhá xii-dé, te vá ndíxí cuèchi iní-yu sá dúcáⁿ ní sándáá iní ñáhǎ-yu xii-dé.

Duha cǎchí-gá núú tütú-gá.

10

¹ Te nchòhó ñáyiú ndècu ndìhi-í ichi Xítóhó Jesucristú cǎchí tnúhu-í xii-ndo sǎ cǎháⁿ ndìhi-í Yǎ Ndiǒxí cuendá ñáyiú isràél, chi ío cuíní-í sá nánihí tàhú-yu. ² Te na cǎháⁿ ndáá-í cuendá-yu sá ío ndùcu ndeé-yu xínu cuechí-yu núú Yǎ Ndiǒxí, te dicó-ni sá ñà túú quidé-yu nàcuáa cuíní méé-gǎ cadá-yu. ³ Chi ñá túú quíde cuendá-yu nàcuáa cuíní Yǎ Ndiǒxí cada ñaha-gǎ xii-yu nàcuáa cudíú-yu núú-gǎ, te quíde-ni-yu nàcuáa sàni iní méé-yu cudíú-yu núú-gǎ te ñá túú cuíní-yu tní-yu tnúhu cǎháⁿ-gǎ nàcuáa cudíú-yu núú-gǎ. ⁴ Te Xítóhó Jesucristú ní quíde-gǎ cuendá sá vǎ cúnùu-gǎ nchaa tnúhu ní chídó tnùní ndí Moisés, te nchaa ñáyiú na quíndáá iní ñáhá xii-gǎ te ñu-gǎ cada te cudíú-yu núú Yǎ Ndiǒxí.

⁵ Te ndí Moisés cǎháⁿ ndí núú tütú ndí cuendá ñáyiú cuíní cudíu núú Yǎ Ndiǒxí cuendá sá nchícúⁿ nihnú-yu nchaa nàcuáa ní cǎháⁿ ndí. Te ní cǎchí ndí sá ncháá ñáyiú na càda nchaa nacuáa ní xáhaⁿ Yǎ Ndiǒxí xii ndí ní chídó tnùní ndí te naníhí tàhú-yu, te núú dicó ndacú-yu cadá-yu nchaa nàcuáa ní cǎháⁿ ndí. ⁶ Dico vitna núu na quíndáá iní-ó Xítóhó Jesucristú, te cudíu-o núú Yǎ Ndiǒxí. Te duha cǎchí tnúhu ní chídó tnùní ndí núú tütú-gǎ: “Vá cǎní iní-ndó sǎ xíní ñúhu-xi cada-ndo #ⁿ sá vǎ yóo tnáhí ndàcu cada sá cáá túu-ndo àndíu te cúñaha-ndo xii Cristú cuuⁿ-ndo ndìhi-gǎ núú ñùyúú-a. ⁷ Te ni vǎ cǎní tucu iní-ndó sǎ quíhíⁿ túu-ndo núú xíndecu nchaa ñáyiú ní xíhí te cada-ndo sǎ Cristú ndoto-gǎ”, duha cǎchí tnúhu-áⁿ sǎ vǎ dúcáⁿ cǎni iní-ó. ⁸ Te cǎchí tucu tnúhu-áⁿ: “Tnúhu Yǎ Ndiǒxí sǎ ndécú ndìhi ñaha-xi xii-ndo chi sàni iní-ndó cuendá tnúhu-áⁿ te cǎháⁿ-ndó”, duha cǎchí tnúhu-áⁿ. Te tnúhu sá ndécú ndìhi-ndo-áⁿ

cúu-xí tnúhu cǎháⁿ-ndí núú ñáyiú, te xini ñúhu-xi sá quíndáá iní-yu tnúhu-áⁿ. ⁹ Te núu na nñuu-ndo cǎháⁿ-ndó sǎ Xítóhó Jesucristú cúu-gǎ Xítóhó-ndó, te quíndáá iní-ndó nì yuhu ni iní-ndó sǎ Yǎ Ndiǒxí ní dándótó-gǎ Xítóhó Jesucristú, te naníhí tàhú-ndó te núu ducaⁿ na càda-ndo. ¹⁰ Te nchaa ñáyiú ducaⁿ sándáá iní te cǎháⁿ-yu sá Xítóhó Jesucristú cúu-gǎ Xítóhó-yu, ñáyiú-áⁿ cúdíú-yu núú Yǎ Ndiǒxí te naníhí tàhú-yu.

¹¹ Te núú tütú Yǎ Ndiǒxí cǎchí-xi sá nì #ⁿ ñáyiú sándáá iní ñáhá xii Xítóhó Jesucristú vá ndíxí cuèchi iní-yu sá dúcáⁿ sándáá iní ñáhǎ-yu xii-gǎ. ¹² Te sá cúu-xí Xítóhó Jesucristú chi #ⁿ-ni cùu ñáyiú isràél ndìhi ñáyiú ñá túú cùu ñáyiú isràél, chi ñu-gǎ cúu-gǎ Yaá cúnùu taxi tnuní-gǎ nchaa ñáyiú, te ío váha quíde-gǎ sá cúu-xí ncháa ñáyiú cǎháⁿ ndìhi ñaha xii-gǎ. ¹³ Te quèe ndáá-xi nàcuáa cǎháⁿ-xi núú tütú Yǎ Ndiǒxí núú cǎchí-xi: “Nchaa ñáyiú na cǎháⁿ ndàhú núú Xítóhó Jesucristú sá dácacu nihnu ñaha-gǎ xii-yu, te ñáyiú-áⁿ naníhí tàhú-yu”, duha cǎchí-xi núú tütú-gǎ. ¹⁴ Te ñáyiú-áⁿ vǎ nihí-yu nàcuáa cǎháⁿ ndàhú-yu núú-gǎ te núu ñá túú sándáá iní ñáhǎ-yu xii-gǎ, te ni vǎ nihí-yu nàcuáa cadá-yu quíndáá iní ñáhǎ-yu xii-gǎ te núu vátá cùndédóho-gǎ-yu tnúhu-gǎ, te ni vǎ nihí-yu tnúhu-gǎ te núu vá yóo quíhíⁿ cùtnuhu ñaha xii-yu. ¹⁵ Te ni vǎ yóo quíhíⁿ ducaⁿ cùtnuhu ñaha xii-yu tnúhu-gǎ te núu Yǎ Ndiǒxí vá téndàha-gǎ ñáyiú quíhíⁿ cùtnuhu ñaha xii-yu. Te núú tütú Yǎ Ndiǒxí cǎchí-xi: “Ío vii ío váha cùu iní-ó vèxi ñáyiú dǎnehé ñáhá xii-o nacuáa ndùu tnúhu sá cǎháⁿ nàcuáa naníhí tàhú-ó”, duha cǎháⁿ-xi núú tütú-gǎ.

¹⁶ Te ñá ncháá-yu cuíní-yu quíndáá iní-yu tnúhu-áⁿ. Te ní quee ndáá-xi nàcuáa ní xáhaⁿ ndí Chàíá xii Yǎ Ndiǒxí te duha ní xáhaⁿ ndí xii-gǎ: “Yóhó Dútú Ndiǒxí na nàcani tnúhu-í núu-n sǎ ío sacú-ni ñáyiú sándáá iní-yu tnúhu cǎháⁿ-ndí”, duha ní xáhaⁿ ndí xii-gǎ. ¹⁷ Te xini ñúhu-xi sá díhna-gǎ cùndédóho-yu tnúhu-áⁿ cuendá ducaⁿ te quíndáá iní-yu, te tnúhu-áⁿ cúu-xí tnúhu Xítóhó Jesucristú.

¹⁸ Te vá cúu cǎháⁿ-ó sǎ ñà túú ní nihí ñáyiú isràél tnúhu-gǎ, chi ncháá-yu ní nihí-yu tnúhu-gǎ, chi núú tütú Yǎ Ndiǒxí cǎchí-xi:

Cue tée ní cáháⁿ tnúhu Yá Ndiöxí ní cáháⁿ-güedé tnúhu-gá núú ñáyiú, te tnúhu-áⁿ ñí xité nuu-xi ñihí ñuyíú.

Duha càchí-xi núú tùtú-gá. ¹⁹ Te ni vâ càháⁿ-ó sã ñáyiú isràél ñá túú ní cùu tnuní iní-yu nàcuáa ndùu tnúhu-gá chi ní tecú tnùnì-yu. Te ndéé sanaha ñí chídó tnùnì ndíi Moisés nàcuáa ní xáhaⁿ Yá Ndiöxí xii ñáyiú isràél, te duha ní xáhaⁿ-gã xii-yu:

Yúhú cada váha-í nchaa ñáyiú ñá túú cùu ñáyiú isràél, ñáyiú ñá túú cùtnuní iní-xi nàcuáa cada váha cundecu núú-í,

te nchòhó cudééⁿ-ndó nüü-yu te cuu cuédú iní-ndò-yu.

Duha ní xáhaⁿ Yá Ndiöxí xii-yu te ducaⁿ ñí chídó tnùnì ndíi Moisés. ²⁰ Te ndíi Chàjá ñá túú tnàhí ni yúhú ndíi ní quide ndíi núú Yá Ndiöxí ní cáháⁿ ndíi tnúhu-gá, te ní cachí ndíi:

Ñáyiú ñá túú nànducu ñaha xii-í ní cùu ní naníhí ñáhã-yu xii-í,

te ni ñà túú ndùcu tnúhu ñáhã-yu xii-í ní cùu te ní xiní ñáhã-yu.

Duha ní cachí ndíi Chàjá ní cáháⁿ ndíi tnúhu Yá Ndiöxí. ²¹ Te ní quide tucu ndíi núú Yá Ndiöxí ní cáháⁿ ndíi tnúhu-gá cuendá ñáyiú isràél, te ní cachí ndíi: “Nchaa-ni nduu yìhì-í càháⁿ-í ñáyiú isràél te ñá túú cuiní-yu quindáa iní-yu chi ío sàá iní-yu”, duha ní cachí ndíi Chàjá ní cáháⁿ ndíi tnúhu Yá Ndiöxí.

11

Cuendá ñáyiú isràél ñáyiú naníhí tàhú

¹ Te cuèi ducaⁿ dico vá càháⁿ-ó sã Yá Ndiöxí dáquèe tíhú-gã ñáyiú isràél chi ñiú-ni ñáyiú-áⁿ cúú cuendá-gá, chi yúhú tnàhá-í cúú-í mei tée isràél, te ñaní tnàhá-í ní cuu ndíi Àbrahám tée ní xindecu ndéé sanaha vîhi-gá, te ñiú-ni ñaní tnàhá-í ní cuu tucu ndíi Benjàmín. ² Te ndéé sanaha dùcaⁿ ní cachí Yá Ndiöxí sá nchùhú ñáyiú isràél cúú-ndí ñáyiú cùu cuendá-gá, te ñá túú dàquee tíhú ñáhã-gã xii-ndí, te nchòhó sa xini-ndó nàcuáa càháⁿ-xi núú tùtú Yá Ndiöxí núú càchí-xi nàcuáa ní quide té

Èliás ní ndacáⁿ cuéchi-dé núú-gã cuendá ñáyiú isràél. ³ Te duha ní xáhaⁿ-dè xii-gá: “Yòhó Dútú Ndiöxí, ná nàcani tnúhu-í núú-n sã ñí sahní-yu cue tée càháⁿ tnúhu-n, te

ní dátanú-yu núú xihí quitì ndùu táhú-n, te yúhú-ñá ní cácu-í ndécù-í dico nànducu ñahá-yu chi tnàhá-í cuiní-yu cahni ñahá-yu xii-í”, duha ní xáhaⁿ-dè xii Yá Ndiöxí. ⁴ Te Yá Ndiöxí ní xáhaⁿ-gã xii-dé: “Sa ní dáquée ñiⁿ-í úsá mîl cue tée cùu cuendá-í, te ñá túú nèhe-güedé sá yíñùhu núú Bàál sá càchí-yu cùu ndiöxí-yu te ñá ndàá sá ndiöxí cúú-xí”, duha ní xáhaⁿ-gã xii té Èliás.

⁵ Te ducaⁿ sãtnahá-xi cùu vitna chi xindecu ñáyiú ní cáháⁿ-gá ní chìtnahá ñáhã xii-gá, te ducaⁿ ñí quide-gá chi ní cundàhú iní ñáhã-gã xii-yu. ⁶ Te ducaⁿ ñí cáháⁿ ñáhã-gã xii-yu sá cundàhú iní ñáhã-gã, te ñá díú cuendá ñiⁿ chiuⁿ quidé-yu ducaⁿ ñí cáháⁿ ñáhã-gã xii-yu, chi núú dícó cuendá ñiⁿ chiuⁿ quidé-yu ducaⁿ ñí cáháⁿ ñáhã-gã xii-yu ña, te ñá díú-gã sá cúú iní méé-gã ducaⁿ ñí cáháⁿ ñáhã-gã xii-yu te núu ducaⁿ.

⁷ Te na càchí tnúhu-í xii-ndo nàcuáa cùu vitna sá ñáyiú isràél cuiní-yu cudíú-yu núú Yá Ndiöxí dico ñá ndácù-yu, dico dava ñáyiú ní cáháⁿ-gã ñáyiú-áⁿ cudíú-yu núú-gã, te ñáyiú ducaⁿ ñà túú cùu núú-gã-áⁿ ío ní cuu sàá iní-yu núú-gã. ⁸ Te ní quee ndáá-xi nàcuáa càháⁿ-xi núú tùtú Yá Ndiöxí núú càchí-xi: “Yá Ndiöxí ní cachí-gá sá cúú-yu ñáyiú ío ñiⁿ díquí-xi, chi cuèi ndèhé-yu nàcuáa càháⁿ tnúhu-gá dico ñá cùtnuní iní-yu nàcuáa càháⁿ-xi, te cuèi ndèdóho-yu dico ñá túú quèe díquí-yu, te ducaⁿ-ni quidé-yu ndéé vitna”, duha càchí-xi núú tùtú-gá. ⁹ Te ndíi Dàvíí ní cachí ndíi:

Ñáyiú ío váha ndècu te cudíí iní-yu quidé-yu vico,

dico yáha-yu dátaná yáha ñiⁿ quitì ngáva trampá àdi ñiⁿ quitì ñá cùtnuní iní-xi quée xití ñunu,

chi cuíta nihnú-yu te nacháhu-yu nchaa sá quidé-yu.

¹⁰ Te cùu-yu ñáyiú ñá túú vèdana tècú tnùnì, te cùu tucú-yu dátaná ñiⁿ ñáyiú ío ndòho nchido ñiⁿ sá vèe.

Duha ní cachí ndíi Dàvíí.

Ñáyiú ñá túú cùu ñáyiú isràél naníhí tàhú-yu

¹¹ Te cuèi ducaⁿ dico vá càchí-ó sã sà dúcáⁿ ñà túú ní quide ndáá ñáyiú isràél te ní xita nihnu duúⁿ-yu, te ñáhã chi sá dúcáⁿ

nĩ quidé-yu te ní ngúndecu ndihí dava-gá ñáyiú tnúhu sá cãháⁿ nãcuáa naníhí tãhú-yu, te ñáyiú isràél quini-yu nãcuáa naníhí tãhú ñáyiú ñã túú cùu ñáyiú isràél, te tnàhá-yu cudíí iní-yu naníhí tãhú-yu. ¹² Te sá dúcáⁿ nĩ quide sáá iní-yu ñã túú ní quide ndáá-yu núú Yã Ndiõxí, te xíáⁿ ní cuu-xi ñⁿ sá váha sá cúú-xí ñáyiú nihí ñuyíú, dico sáá nduu te cada ñáyiú isràél nchaa nãcuáa cãháⁿ Yã Ndiõxí, te dàvá-áⁿ ïo-gá váha cuu xii nchaa ñáyiú nihí ñuyíú.

¹³ Te nchòhó ñáyiú ñã túú cùu ñáyiú isràél cãchí tnúhu-í xii-ndo sã Yã Ndiõxí ní cachí-gá sá cãháⁿ-í tnúhu-gá núú-ndó, te yúhú cãchí-í sá ïo càhnu cuu chiuⁿ quide-í. ¹⁴ Te duha cãháⁿ-í cuendá sá nõu cudana ió dava ñáyiú cùu ndi mee-í cudíí iní-yu cada váha ñaha Yã Ndiõxí xii-yu dàtná quidé váha ñaha-gã xii-ndo, te naníhí tãhú-yu. ¹⁵ Te sá cuendá sá nĩ quee tíhú ñáyiú isràél ní nacáháⁿ cáhnú iní tnáhá ñáyiú nihí ñuyíú ndihí Yã Ndiõxí, dico na sáá nduu núcúndecu váha ñáyiú isràél ndihí Yã Ndiõxí, te ío-gá váha tnáhá ñáyiú nihí ñuyíú, te ñáyiú-áⁿ cada iní-ó sã cúú-yu dàtná ñáyiú ní xíhí, dico dàvá-áⁿ cada tucu iní-ó sã cúú-yu dàtná ñáyiú ní ndoto chi núcúndecu váha-yu ndihí-gá. ¹⁶ Te núu sá lúhá-ní ñⁿ tílulú yusaⁿ cãváha te ñi-ni ducaⁿ cãváha nihí. Te núu cãváha yóho ñⁿ yutnu te ñi-ni ducaⁿ cãváha-xi nihí-xi. Te ñi-ni ducaⁿ sãtnahá-xi cùu ñáyiú isràél, chi ñani tnáhã-yu ní xíndecu ndéé sanaha nĩ cuú-yu ñáyiú ní cuu cuendá ñáhá Yã Ndiõxí, te ñi-ni ducaⁿ cùu cuendá ñáhá-gã xii mèe-yu ndéé vitna.

¹⁷ Te ió ñⁿ yutnu váha nani olívú, te dava dité yutnu-áⁿ nĩ téhndé te ní nucódó dité yutnu òlívú cùtexínu, te mee-ñã yutnu òlívú váha-áⁿ ïo váha quide-xi nchito dité yutnu òlívú cùtexínu-áⁿ. Te dité nchaa yutnu òlívú váha-áⁿ cúú-xí dàtná ñáyiú isràél, te nchaa dité-xi sá nĩ téhndé-áⁿ cúú-xí ñi-ni ñáyiú isràél ñáyiú ñã túú tnáhá tnúhu ndihí Yã Ndiõxí. Te dité yutnu òlívú cùtexínu sá nĩ nucódó tnáhá-áⁿ cúú-xí dàtná ñáyiú ñã túú cùu ñáyiú isràél tnáhá tnúhu ndihí Yã Ndiõxí. ¹⁸ Te vá caní iní-ndó sã sá dúcáⁿ ndècu váha-ndo ndihí Yã Ndiõxí te ío cùnũ-ndo dacúúxí ñáyiú isràél, te vá dúcáⁿ

càni iní-ndó chi sá cuendá nchaa ñani tnáhá ñáyiú isràél ní xíndecu ndéé sanaha ducaⁿ ndècu váha-ndo ndihí Yã Ndiõxí vitna, te ñã díú sã cuendá nchòhó ndécú ndihí váha ñáyiú-áⁿ Yã Ndiõxí vitna.

¹⁹ Te cudana sãni iní-ndó te cãchí-ndó sã ñáyiú isràél ní quee tíhũ-yu cuendá sá nchòhó nucuñí-ndó nõu-yu núcúndecu váha-ndo ndihí Yã Ndiõxí. ²⁰ Te ndáá sá nĩ quee tíhũ-yu chi ñã túú ní sãndáá iní ñáhã-yu xii-gá, te nchòhó ío váha cùu ndecu-ndo ndihí-gá chi ní sãndáá iní-ndó-gã, dico vá cãchí-ndó sã ïo càhnu cuu-ndo, te ío váha chí cuãha cuendá nãcuáa cundecu-ndo. ²¹ Te cue ñáyiú isràél cúú-yu ñáyiú cùu cuendá-gá ní cùu te ní dáquéé tíhú ñáhã-gã xii-yu cuendá sá ñã túú ní sãndáá iní ñáhã-yu xii-gá, te tnáhã nchòhó daquéè tíhú ñáhã-gã xii-ndo te núu na càda-ndo datná ní quide ñáyiú-áⁿ. ²² Te chí cáda cuendá sá Yã Ndiõxí ío váha iní-gá, dico cùdééⁿ-gã núú nchaa ñáyiú ñã túú sãndáá iní ñáhã xii-gá, dico sá cúú-xí nchòhó cue ñáyiú sãndáá iní ñáhã xii-gá chi ío váha iní-gá. Te ducaⁿ-ni cùnduu váha iní-gá sá cúú-xí-ndó te núu vá dáñá ndèé-ndó càda-ndo nacuáa cãháⁿ-gá cuendá sá ïo váha iní-gá, te núu ñáhã te tnáhã nchòhó quee tíhũ-ndó dàtná ní quee tíhú ñáyiú isràél, ñáyiú ñã túú ní sãndáá iní ñáhã xii-gá. ²³ Dico núu ñáyiú isràél ñáyiú ní dáquéé tíhú ñáhã Yã Ndiõxí quíndáá iní ñáhã-yu xii-gá te nduu cuendá ñáhã tucu-gá xii-yu, te ñáyiú-áⁿ cúú-yu dàtná dava dité yutnu òlívú sá nĩ téhndé te ní nucódó tnáhã tucu. Te ducaⁿ sãtnahá-xi cúú-yu te núu na quíndáá iní ñáhã-yu xii-gá. ²⁴ Te nchòhó cúú-ndó dàtná nchaa dité yutnu òlívú cùtexínu, chi ñã díú ñáyiú isràél cúú-ndó, te dité nchaa yutnu òlívú cùtexínu-áⁿ nĩ nucódó-xi núú dité yutnu òlívú váha-áⁿ. Te yáchí-gá núcúndecu váha ñáyiú isràél ndihí Yã Ndiõxí, chi cúú-yu dàtná nchaa dité yutnu òlívú váha sá nĩ téhndé te ní nucódó tnáhã tucu. Te ducaⁿ sãtnahá-xi cúú-yu te núu na quíndáá iní ñáhã-yu xii-gá.

Sáá nduu te naníhí tãhú ñáyiú isràél

²⁵ Te nchòhó ñáyiú ndècu ndihí-í ichi Xítohó Jesucristú, na cãchí tnúhu-í xii-ndo

ɛ̃n tñuhu ndùu yuhu ni cuu, cuendá sá vǎ cání iní-ndó sǎ ɔ-gǎ váha sǎá díquí-ndó dàcúxí ñǎyiu isràél, chi dava ñǎyiu isràél cúu sǎá iní-yu núú Yǎ Ndiǒxí ñini na ndihí ñǎyiu ní cachí Yǎ Ndiǒxí ngúndecu váha ndihí ñáhá-yu xii-gǎ, ñǎyiu ñǎ túú cùu ñǎyiu isràél. ²⁶ Te nduu na ndihí ñǎyiu-áⁿ ngúndecu váha-yu ndihí Yǎ Ndiǒxí, te dàvǎ-áⁿ naníhí tàhú ñǎyiu isràél chi quee ndáá-xi nàcuáa càháⁿ Yǎ Ndiǒxí núú tütú-gǎ núú càchí-xi:

Ndàa ñúú Sìón quixi Yaá cada naníhí tàhú nchaa ñǎyiu,

te ñu-ni Yaá-áⁿ cada-gǎ cuendá sǎ dáñǎ nchaa ñǎyiu isràél ichi cuèhé ichi duha.

²⁷ Te yúhú cada càhnu iní-í nchaa cuéchi ñǎyiu isràél, chi cada-í dàtná ní cachí-í ndéé sanaha.

Duha càchí Yǎ Ndiǒxí núú tütú-gǎ.

²⁸ Te sǎ cuendá tñuhu sǎ càháⁿ nàcuáa naníhí tàhú-ó xiǎⁿ cúu ùhú iní ñǎyiu isràél Yǎ Ndiǒxí, te sǎ dúcǎⁿ quidé-yu xiǎⁿ nchòhó ní níhí-ndó tñuhu sǎ càháⁿ nàcuáa naníhí tàhú-ndó. Te ní cachí Yǎ Ndiǒxí sǎ ñǎyiu isràél cuu cuendá-gǎ, te cùu iní ñáhá-ní-gǎ xii-yu, te ducaⁿ quide-gǎ chi ducaⁿ ñǎ xáhaⁿ-gǎ xii cue ñaní tnáhá-yu ní xíndecu ndéé sanaha. ²⁹ Te Yǎ Ndiǒxí ñǎ túú ndùu ùhú iní-gǎ ɛ̃n sǎ táxí-gǎ, te ñi ñǎ túú ndixi cuéchi iní-gǎ sǎ càháⁿ ñáhá-gǎ xii-o. ³⁰ Te nchòhó chi ñǎ túú sàndáá iní-ndó Yǎ Ndiǒxí ní cùu, dico vitna ñini ñǎ túú sàndáá iní ñáhá ñǎyiu isràél xii-gǎ, te ní cundàhú iní ñáhá-gǎ ní dácàcu nihnu ñaha-gǎ xii-ndo núú ùhú núú ndàhú. ³¹ Te vitna quidé-yu dàtná ní xóo cada nchòhó cútnàhá ñǎ túú ní xóo quíndáá iní-ndó-gǎ. Dico sǎá nduu te natuha ñáhá-yu xii-gǎ te dàcàcu nihnu ñaha-gǎ xii-yu sǎ cundàhú iní ñáhá-gǎ dàtná ní quide ñaha-gǎ xii nchòhó. ³² Te Yǎ Ndiǒxí ní dáñǎ-gǎ sǎ dúcǎⁿ cùnduu saá iní nchaa ñǎyiu cuendá cuíní-gǎ cundàhú iní ñáhá-gǎ xii-yu.

³³ Te súúní vǎha quide ñaha Yǎ Ndiǒxí xii-o, te ɔ vǎha xini-gǎ nchaa cuèi sǎ ɔ andiu te cuèi sǎ ɔ ñuyíú-a, te ducaⁿ ɔ vǎha sǎá nchaa sǎ xini tñuni-gǎ. Te ñǎ ndácú-ó cùtnuní iní-ó ñǎ cúu nchaa sǎ sání iní-gǎ cada-gǎ, te ñi ñǎ ndácú-ó cùtnuní iní-ó nàcuáa ndùu cuendá nchaa sǎ quidé-gǎ.

³⁴ Te núú tütú-gǎ càchí-xi: “Vǎ yóo ɛ̃n cùtnuní iní-xi nàcuáa sàni iní Yǎ Ndiǒxí, te ñi vǎ yóo ɛ̃n ndàcu dacahu iní ñáhá xii-gǎ nàcuáa càháⁿ-gǎ. ³⁵ Te Yǎ Ndiǒxí ñǎ túú quide yica iní-gǎ cada-gǎ sǎ vǎha sǎ cúu-xí ñǎyiu cuendá ɛ̃n sǎ sǎñáhá-yu xii-gǎ chi ñǎ túú dùcaⁿ quide-gǎ”, duha càchí-xi núú tütú-gǎ. ³⁶ Te ducaⁿ chi mee Yǎ Ndiǒxí ní taxi ndecu-gǎ nchaandi tühú sǎ ɔ ñuyíú, te ñu-ni mee-gǎ táxí tñuni-gǎ nchaa sǎ ñi taxi ndecu-gǎ, te nchaa cùu-xi cuendá-gǎ. Te vitna chí ná càchí-ó sǎ ɔ càhnu cuu-gǎ ñi caa ñi quíhíⁿ. Te ducaⁿ na cùnduu.

12

Cada-o nàcuáa nduu vétú iní Yǎ Ndiǒxí

¹ Te vitna nchòhó ñǎyiu ndècu ndihí-í ichi Xítohó Jesucristú càchí tñuhu-í xii-ndo sǎ Yǎ Ndiǒxí cundàhú iní ñáhá-gǎ xii-o chindee ñaha-gǎ, núu xiǎⁿ càháⁿ ndàhú-í núú-ndó sǎ dáñǎ-ndó mèe-ndo núú ndáhá-gǎ, te cada iní-ndó sǎ cúu-ndó dàtná ɛ̃n tàhú sǎ nchító-ó ñi nduu tàhú-gǎ. Te cuu-ndo ñǎyiu váha ñǎyiu cada nchaa nàcuáa nduu vétú iní Yǎ Ndiǒxí chi ducaⁿ tàú-ndó càda-ndo sǎ cúu-xi-gǎ. ² Te vǎ cànchicúⁿ nihnu-gǎ-ndó càda-ndo datná xíquide nchaa ñǎyiu ndècu ichi cuehé ichi duha ndècu ñuyíú-a, te vǎ cùhúⁿ-gǎ iní-ndó ichi cuehé ichi duha-áⁿ, chi mee-ñǎ sǎ vǎha cuhúⁿ iní-ndó, te ducaⁿ te cutnuni iní-ndó nchaa nàcuáa cuíní Yǎ Ndiǒxí cada-ndo, te nchaa sǎ cuíní-gǎ cada-ndo cùu-xi mee-ni sǎ vǎha, sǎ ɔ vǎha ndùu vétú iní-gǎ, te cùu-xi nchaa sǎ xini ñuhu-xi cada-ndo núú-gǎ.

³ Te sǎ cuendá chiúⁿ ní cundàhú iní ñáhá Yǎ Ndiǒxí ní taxi-gǎ xii-í xiǎⁿ núu na càháⁿ-í dóho-ndo vitna: Vǎ cání iní-ndó ɛ̃n sǎ ñǎ túú tàú-ndó càni iní-ndó te cucahaⁿ-ndo sǎ ɔ càhnu cuu-ndo. Te nchòhó ní sàndáá iní-ndó Yǎ Ndiǒxí núu chindee ñaha-gǎ xii-ndo, te vitna chí cuǎha cuendá núu ná daha núú chiúⁿ-gǎ ndacu-ndo càda-ndo.

⁴ Te nchoo tìtní xichi cùu yiquí cuñú-ó, te ñi dííⁿ ñi dííⁿ chiúⁿ quide-xi ɛ̃n ɛ̃n-xi.

⁵ Te ducaⁿ sǎtnahá tucu-xi cùu nchoo ñǎyiu ndècu ndihí Xítohó Jesucristú chi cuèi ná daha tnáhá-ó dico ɛ̃n-ni cùu-o ndihí-gǎ, te ducaⁿ mèe-o tucu ɛ̃n-ni cùu-o.

⁶ Te mee Yǎ Ndiǒxí ní cundàhú iní ñáhá-gǎ xii-o ñi taxi-gǎ chiúⁿ tàú-ó càda-o ɛ̃n

ɨ̃n-o te chindee ñaha-gá xii-o, te xini ñuhu-xi cada-o nacuáa ndùu chiuⁿ ní taxi-gá cada-o. Te núu ní nduu táhú-ó nũú-gã sá cãháⁿ-ó tnũhu sá dácàhu iní ñáhá mée-gá xii-o te cáháⁿ-ó nàcuáa sàndáá iní-ó chindee ñaha-gá xii-o, ⁷ àdi ní nduu táhú-ó nũú-gã sá ïo váha chindee-o tnàha ñáyiu-o te ðiu-ni ducaⁿ càda-o, àdi ní nduu táhú-ó dànehé-ó ñáyiu tnúhu-gá te ðiu-ni ducaⁿ càda-o, ⁸ àdi ní nduu táhú-ó nũú-gã sá dácãháⁿ-ó ñáyiu canchicúⁿ nihnú-yu ichi-gá te ðiu-ni ducaⁿ càda-o, àdi ní nduu táhú-ó nũú-gã sá cuãñaha-o xii tnaha ñáyiu-o sã ñihí-ó ndècu ndihí-o te ðiu-ni ducaⁿ càda-o, dico ni yùhu ni iní-ó cuãñaha-o xii-yu, àdi ní nduu táhú-ó nũú-gã taxi tnùn-ó te ðiu-ni ducaⁿ càda-o, te ni yùhu ni iní-ó càda-o, àdi ní nduu táhú-ó nũú-gã chindee-o cuè ñáyiu ndècu ndihí tnúndòho tnúhu ndàhú te ðiu-ni ducaⁿ càda-o, te ío cudíí iní-ó càda-o chiuⁿ-áⁿ.

Nchaa nàcuáa tàú-xi cada nchaa ñáyiu ndècu ichi Xítoho Jesucristú

⁹ Te cuu iní tnáhá ndisa-ndo ɨ̃n ɨ̃n-ndo, te dañá-ndo nchaa sá cuèhé sá dúhá te cada-ndo mée-ni sá vãha. ¹⁰ Te ío cuu iní tnáhá-ndó, te cada-ndo cuendá sá ɨ̃n-ní ñáyiu cùu-ndo, te ɨ̃n ɨ̃n-ndo càni-gá iní-ndó cànehe yíñuhu núu tnáhá-ndó.

¹¹ Te nducu ndèe-ndo cada-ndo nchaa chiuⁿ tahu Xítoho Jesucristú vá tühío-ndo, te cada-ndo nì yuhu ni iní-ndó sã cúu-xí-gã.

¹² Te ío cudíí iní-ndó cùndecu-ndo chi ní ngùndecu ndihí-ndo tnũhu ndee iní sá cùndècu ndihí-ndo Xítoho Jesucristú, te cada càhnu iní-ndó cuèi nãndi na càda ñaha ñáyiu xii-ndo sã cuendá-gá, te vá dáñá ndèe-ndó cáháⁿ ndihí-ndo Yã Ndiõxí.

¹³ Te chindee tnàha-ndo te núu ïo daya nchòhó ñáyiu ndècu ichi-gá ïo ɨ̃n sá cúmãní xii-ndo, te ío váha cuu iní-ndó còto-ndo ñáyiu véxi vehe-ndo.

¹⁴ Te cácaⁿ táhú-ndó nũú Yã Ndiõxí cuendá nchaa ñáyiu nãndi quide ñaha xii-ndo, te cácaⁿ táhú-ndó nũú-gã sá ná chindee ñaha-gá xii-yu te ñá díú dà cácaⁿ táhú-ndó nũú-gã sá ná dàcuíta nihnu ñaha-gã xii-yu.

¹⁵ Te núu ïo ñáyiu cùdíí iní-xi te cudíí iní-ndó ndihí-yu, te núu ïo ñáyiu ndihú iní-xi te ndihú iní-ndó ndihí-yu.

¹⁶ Te cuu ɨ̃n nuu-ndo cùndecu-ndo, te vá cádá càhnu-ndo mee-ndo, te tnahá tnúhu-ndo ndihí nchaa ñáyiu ndàhú iní-xi, te vá cáni iní-ndó sã ïo-gá túha-ndo.

¹⁷ Te vá nãnchòcáva-ndo nãchinaa-ndo ɨ̃n sá quidé ñaha ñáyiu xii-ndo, te ío nducu ndèe-ndo cada-ndo mee-ni sá vãha nàcuáa cuu váha iní ñáyiu. ¹⁸ Te ío nducu ndèe-ndo cada-ndo sá ndácú-ndó cùndecu váha-ndo ndihí nchaa ñáyiu. ¹⁹ Te nchòhó ñáyiu ío cùu iní-í, vá cáni iní-ndó nãchinaa-ndo ɨ̃n sá cádá ñaha ñáyiu xii-ndo, chi cundetú-ndo sã méé Yã Ndiõxí ná nãchinaa-gá sá quidé ñahá-yu xii-ndo, chi quee ndáá-xi nàcuáa cáháⁿ Yã Ndiõxí núu tütú-gá núu càchí-xi: “Yúhú dandòho-í-yu chi nachinaa-í nchaa sá quidé-yu”, duha càchí-gá núu tütú-gá.

²⁰ Te xini ñuhu tucu-xi cada-ndo nacuáa cáháⁿ tucu-xi ingá xichí núu tütú-gá núu càchí-xi: “Te núu ñáyiu cùu úhú iní ñáhá xii-ndo ñá túú sã cóhó sã cáxí-yu te cuãñaha-ndo xii-yu, te núu ducaⁿ na càda-ndo te ío cucahaⁿ núu-yu”, duha càchí-xi núu tütú-gá. ²¹ Te núu ïo ɨ̃n sá quidé ñaha tnaha ñáyiu-ndo xii-ndo te vá nãnchòcáva-ndo nãchinaa-ndo sá quidé ñahá-yu xii-ndo, chi cada-ndo sã vãha sá cúu-xí-yu, te ducaⁿ te vá cádá-ndó sã ñà túú tàú-ndó càda-ndo núu Yã Ndiõxí dàtná quidé-yu.

13

¹ Te nchaa ñáyiu tàú-yu quindáá iní-yu nchaa cue téé cùchiuⁿ, chi Yã Ndiõxí ní cachí-gá sá cùndècu téé cùchiuⁿ ñuyíú-a, núu xiãⁿ xíndecu-güedé vitna. ² Te nchaa ñáyiu ñá túú sàndáá iní ñáhá xii cue téé cùchiuⁿ ñá túú tnàhá iní Yã Ndiõxí sá dúcaⁿ quidé-yu, chi mee-gã ní cachí-gá sá cùndècu-güedé. Te nchaa ñáyiu ducaⁿ ñà túú sàndáá iní ñáhá xii cue téé cùchiuⁿ nacháhu-yu sá dúcaⁿ quidé-yu. ³ Te nchaa ñáyiu quide váha ñá túú yùhú-yu cue téé cùchiuⁿ chi quide váha-yu, dico nchaa ñáyiu ñá túú quide váha chi xiyùhú-yu cue téé cùchiuⁿ. Te vitna núu nchòhó cuiní-ndó sã vã yùhú-ndó cuè téé cùchiuⁿ te chí cádá vãha, te ducaⁿ te cáháⁿ váha-güedé cuendá-ndó. ⁴ Te Yã Ndiõxí ducaⁿ ñí cachí-gá cundecu-güedé cuendá cada-güedé sã ñà túú ñá cuu cundecu-ndo, te núu ñá túú quide váha-ndo

ndècu-ndo te quiyùhú iní-ndó nǔú-güedě, chi ñá túú áúⁿ nǎ cuu ndècu ndìhi-güedé tnúhu ndee iní dandòho-güedé nchaa ñáyiú ñá túú quide váha, chi Yá Ndiöxí ducaⁿ nǐ cachí-gá cundecu-güedé sá dúcáⁿ càda-güedé dandòho-güedé nchaa ñáyiú ñá túú quide váha. ⁵ Núú xiǎⁿ ío xìni ñuhu-xi sá quíndáá iní-ndó nchàa cue tée cùchiuⁿ, te ñá díú sǎ yùhú-ndó dàndoho ñaha-güedé xii-ndo, chi cada-ndo sǎ cútnùní iní-ndó sǎ cúú-xí ìⁿ sá vǎha. ⁶ Chi ñu cuendá xiǎⁿ sàcáⁿ-ndó dǐhúⁿ nǔú cuè tée cùchiuⁿ, te ducaⁿ chi Yá Ndiöxí ducaⁿ nǐ cachí-gá cundecu-güedé te ñu-ná chiuⁿ ndeé-güedé ñúhú iní-güedé.

⁷ Te nacháhu-ndo nchàa sá tàú-ndó nǔú nchàa ñáyiú tàú-ndó nǔú-xi, te cuèi dǐhúⁿ tàú-ndó cuendá ñuhu-ndo nǔú cuè tée cùchiuⁿ àdi nágá dǐhúⁿ tàú-ndó nǔú-güedé te nacháhu-ndo nǔú-güedě. Te ío-gá canehe-ndo sǎ yǐñùhu núú nchàa ñáyiú cùnuu, te cǎháⁿ váha-ndo ndìhí-yu. ⁸ Te vá dácuidó-ndó ndùu nacháhu-ndo sǎ tàú-ndó nǔú tnàha ñáyiú-ndo, te cuu iní tnáhá-ndó ìⁿ ìⁿ-ndo. Te núú ducaⁿ quide-ndo ndecu-ndo ña, te quide-ndo nchaa nacuaá cǎháⁿ tnúhu sá sánú ìchi ñaha xii-o nacuaá càda-o cùndecu-o. ⁹ Te ñu duha ndùu tnúhu cǎháⁿ Yá Ndiöxí cuendá nchaa sá vǎ cúú càda-o: “Nchaa nchòhó cue tée vá cǎháⁿ ndìhi-ndo ñáyiú dǐhí te núú ñá díú ñàdìhí-ndó cùú-yu, te ducaⁿ-ni nchàa nchohó cue ñáyiú dǐhí tucu vá cǎháⁿ ndìhi-ndo tée te núú ñá díú yǐ-ndo cuu-güedé, te vá cǎhí-ndó tnàha ñáyiú-ndo, te vá dúhú-ndó sǎ ndécú ndìhí-yu, te vá dácàcu-ndo cuèchi neñúú, te vá xíhó-ndó sǎ ndécú ndìhí tnaha ñáyiú-ndo”, nchaa xéhe cǎhí Yá Ndiöxí sá vǎ cúú càda-o. Te tnúhu-a quide-o ndìhí nchaa dava-gá tnúhu sá sánú ìchi ñaha xii-o nacuaá càda-o cùndecu-o, te núú quide-o ìngá tnúhu sá cǎhí-xi: “Cuu iní-ndó nchàa tnaha ñáyiú-ndo dàtná cúú iní-ndó mèe-ndo”, duha cǎháⁿ tnúhu-áⁿ. Te nchaa dava-gá quidé-ó te núú quide-o nacuaá cǎháⁿ tnúhu-a. ¹⁰ Te nchaa ñáyiú cùu iní tnàha ñáyiú-xi te ñá túú quide úhú iní-yu tnàha ñáyiú-yu, te núú ducaⁿ cùu iní-yu tnàha ñáyiú-yu te quidé-yu nàcuáa cǎháⁿ tnúhu sá sánú ìchi ñaha xii-o nacuaá càda-o cùndecu-o.

¹¹ Te ducaⁿ xìni ñuhu-xi cada-ndo chi sa ní cutnùní iní-ndó nàcuáa ta xiça nduu cuáháⁿ ñuyíú-a, te ní sáa nduu sá ío xìni ñuhu-xi ndixi túu iní-ó càda-o nchaa nacuaá cǎháⁿ Yá Ndiöxí, chi vitna sa ní cuyatni-gá nduu nàcuaca ñaha Xítóhó Jesucristú xii-o dàcúúxí ndeé cútnàhá ní sándáá iní-ó tnúhu-gá. ¹² Te cada iní-ndó sǎ dàtná ìⁿ niú sá sá ta cuyatni túndaá, ducaⁿ sǎtnahá-xi cùu ñuyíú yǐcá cuèchi-a chi sa ta cùyatni nduu quixi tucu Xítóhó Jesucristú, te núú xiǎⁿ xíni ñuhu-xi dañ-a-o nchaa sá cuèhé sá dúhá te cada-o mèe-ni sá vǎha, te ducaⁿ te ni ìⁿ sá cuèhé sá dúhá vǎ cùnùu-xi taxi tnuní ñáhá-xí xii-o, te ducaⁿ te vá cúú-gǎ-ó dàtná ñáyiú ndècu núú nées chi cuu-ná-ó dàtná ñáyiú ndècu núú dító. ¹³ Te cada-o nchàa nacuaá tàú-xi cunduu cundecu-o dàtná tàú-xi cada ñáyiú ndècu ichi Xítóhó Jesucristú, te vá quìhíⁿ-ó vico cuehé vico duha, te vá cúú-ó ñáyiú quihu, te ni vǎ cǎháⁿ ndìhi-o ñáyiú dǐhí te núú ñá díú ñàdìhí-ó cùú-yu, te ducaⁿ-ni cuè ñáyiú dǐhí tucu vá cǎháⁿ ndìhí-yu tée te núú ñá díú yǐ-yu cùu-güedé, te ni vǎ cùndecu-o ichi díú iní, te ni vǎ nàá-ó ndìhí tnaha ñáyiú-o, te ni vǎ cúú-ó ñáyiú cuédú iní. ¹⁴ Te vitna nchòhó dañ-a-ndo mèe-ndo sá Xítóhó Jesucristú ná chindee ñaha-gá xii-ndo càda váha-ndo cùndecu-ndo datná quidé mèe-gá ndécú-gǎ, te vá cǎní-gǎ iní-ndó càda-ndo datná ní xóo cada-ndo cùtnàhá ní cunuu nchàa sá cuèhé sá dúhá iní-ndó.

14

Vá cuátnùhu tnaha-o nacuaá ndècu-o ichi Xítóhó Jesucristú

¹ Te núú ìⁿ ñáyiú ndècu ichi Xítóhó Jesucristú ñá túú tècú tnuní váha-yu nàcuáa cuíni Yá Ndiöxí cadá-yu, te queheⁿ cuendá-ni-ndó-yu te vá ténáá tnáhá-ndó ndìhí-yu. ² Chi ío ñáyiú sàni iní sá cúú vǎha iní Yá Ndiöxí sá cúú cǎxí-yu nání nihí-yu, te dava ñáyiú ñá túú cùtnuní váha iní-yu nàcuáa cǎháⁿ Yá Ndiöxí te mee-ni yúcú xéxi-yu. ³ Te ñáyiú xéxi nchaa núú sǎ nihí-yu te vá dáquèe tíhǔ-yu ñáyiú ñá túú xéxi, te ducaⁿ-ni ñáyiú ducaⁿ ñà túú xéxi-áⁿ vǎ cuátnùhú-yu nchaa ñáyiú ducaⁿ xéxi nchaa núú sǎ nihí-xi-áⁿ, chi tnàhá ñáyiú ducaⁿ xéxi nchaa núú sǎ nihí-xi-áⁿ

quéhéⁿ cuendá ñáhá Yă Ndiöxí xii-yu. ⁴ Te ñá túú ndècu ndihi-o tnúhu ndee iní cuatnúhu-o ñáiyu xínu cuechi, chi mee ñáiyu cùu patróⁿ-yu tàú-yu cáháⁿ-yu te núu cùndáá ñáiyu xínu cuechi núú-yu àdi ñá túú cùndáá-yu. Te ducaⁿ sãtnahá-xi cùu ñáiyu xínu cuechi núú Yă Ndiöxí, chi mee-gă cáháⁿ-gá te núu nása quidè-yu, te ñiu-ni mee-gă cada te cundáá-yu cundecú-yu núú-gă.

⁵ Te na cãchí tnúhu tucu-í xii-ndo sã lõ ñáiyu cãchí sã lõ dava nduu ío cãhnu cuu-xi, te lõ tucu dava ñáiyu cãchí-yu sã ñⁿ-ni cuu-xi nchaani nduu, te xini ñuhu-xi sã cùtnuní ndáá iní-yu sã ndáa cúu-xí nãcuáa cãháⁿ-yu ñⁿ ñⁿ-yu. ⁶ Te ñáiyu cánehe íi dava nduu quidè-yu sã néhè-yu sã yíñùhu núú Yă Ndiöxí, te ñáiyu cãchí sã ñⁿ-ní cùu-xi nchaani nduu quidè-yu sã néhè-yu sã yíñùhu núú Yă Ndiöxí tnàhá-yu. Te ñiu-ni ducaⁿ sãtnahá-xi cùu nchaani ñáiyu xèxi nchaani nani nihí-yu, chi quidè-yu sã néhè-yu sã yíñùhu núú Yă Ndiöxí, chi ndacáⁿ táhù-yu núú-gă cuendá nchaani sã nihí-yu. Te ñiu-ni ducaⁿ sãtnahá-xi cùu nchaani ñáiyu ñá túú xèxi nchaani núú sã nchító-ó chi quidè-yu sã néhè-yu sã yíñùhu núú Yă Ndiöxí, te ndacáⁿ táhù-yu núú-gă cuendá nchaani sã nihí-yu.

⁷ Te nchoo cuèi vitna ndècu vívú-ó àdi cuèi na cùú-ó dico ñá díú cuendá méé-ó cùú-ó. ⁸ Chi vitna ndècu vívú-ó te ndècu-o sã cúu-xí Xítóhó Jesucristú àdi cuèi na cùú-ó dico cuú-ó ñiu-ni sã cúu-xí-gă, núu xiãⁿ cuèi vitna ndècu vívú-ó àdi cuèi na cùú-ó dico ñiu-ni Xítóhó Jesucristú cúu cuendá ñáhá-gă xii-o. ⁹ Chi Xítóhó Jesucristú ní xihí-gá te ní ndoto-gá, te vitna cùu-gá Xítóhó nchaani ñáiyu, cuèi ñáiyu xíndecu vívú te cuèi ñáiyu ní xihí.

¹⁰ Te nchòhó, ñá túú ndùu váha-xi cuatnuhu tnàha-ndo nacuáa ndècu-ndo ichi Xítóhó Jesucristú, te ní ñá túú ndùu váha-xi daquèe tíhú tnàhá-ndó, chi nchaani-o sãa nduu cùndecu-o núú Xítóhó Jesucristú, te mee-gă cachí-gá te núu ní quide ndáa-ó àdi ñá túú ní quide ndáa-ó. ¹¹ Te Yă Ndiöxí cãchí-gá núú tütú-gá:

Yúhú Yă Ndiöxí ndécú-í cãchí tnúhu ndáa-í xii-ndo sã nchàa ñáiyu nguñí xití-yu

núu-í,

te nchaani-yu cáháⁿ-yu sã yúhú cùu-í Ndiöxí. Duha cãchí Yă Ndiöxí núú tütú-gá. ¹² Núu xiãⁿ nchaani-o ndi díⁿ nãcãni tnúhu-o núú Yă Ndiöxí nchaani sã ní quide-o.

Vá dácuíta nihnu tnàha-o

¹³ Núu xiãⁿ vá cuatnúhu tnàha-gá-ndó, te cada yica-ndo càda-ndo mee-ni sã vãha, te vá cáda-ndó ñⁿ sã ñà túú tàú-ndó càda-ndo cuendá sã vá cuíta nihnu dava ñáiyu ndècu ndihi-ndo ichi Xítóhó Jesucristú. ¹⁴ Te yúhú ndécú ndihi-í Xítóhó Jesucristú te cùtnuní ndáa iní-í sã ncháa núú sã cúu cãxi-o cuu-ni cãxi-o te vá cúu cuèchi. Te ñáiyu sãni iní sã vá cúu cãxi-yu te núu na cãxi-yu te cuu cuèchi xii-yu. ¹⁵ Te nchòhó, te núu cuendá sã xéxi-ndó nchàa núú sã cúu cãxi-ndo, cuendá xiãⁿ ñá túú-gá cúu vãha iní nchaani ñáiyu ndècu ndihi-ndo ichi Xítóhó Jesucristú, te ñá túú-gá quidè-ndó sã cúu iní ndisa-ndó-yu te núu ducaⁿ na càda-ndo, te núu ñⁿ sã sãni iní-ndó cãxi-ndo te cùtnuní iní-ndó sã xiãⁿ cada-xi cuíta nihnu ñáiyu ndècu ndihi-ndo ichi Xítóhó Jesucristú te vá cáxi-ndó xiãⁿ te núu ducaⁿ, chi Xítóhó Jesucristú ní xihí-gá cuendá-yu. ¹⁶ Te núu ñⁿ sã quidè-ndó sãni iní-ndó sã cúu-xí ñⁿ sã vãha, te ñáiyu cãchí-yu sã ñà túú vãha te vá cáda-ndó cuendá sã vá cáháⁿ cuèhé-yu cuendá-ndó. ¹⁷ Te sã yíndàha ñaha Yă Ndiöxí xii-o xiãⁿ ío xini ñuhu-xi cada ndáa-ó cùndecu-o, te cundecu váha ndihi tnàha-o, te cudí iní-ó cùndecu-o chi Espiritú-gá ndécú ndihi ñaha-xi xii-o, te nchaani xéhé ío-gá cùnùu dacúxí sã cóhó sã cáxi-ó. ¹⁸ Te nchaani ñáiyu ducaⁿ quide nchaani sã ío-gá xini ñuhu-xi, xinu cuechí-yu núú Xítóhó Jesucristú, te sã dúcãⁿ quidè-yu te ndùu vétú iní Yă Ndiöxí, te cùdiú-yu núú ñáiyu.

¹⁹ Te nchoo chí ná ndùu-o nacuáa cada-o cùndecu ndihi váha tnàha-o, te nducu tucu-o nacuáa cada-o chindee tnúhu tnàha-o nacuáa cuíta cundáa-gá-ó núú Xítóhó Jesucristú quíhíⁿ. ²⁰ Te ñá díú sã cuendá ñⁿ núú sã xéxi-ó, te dàquee tíhú-ó sã vãha ní quide ñaha Yă Ndiöxí xii tnàha ñáiyu-o. Te na cãchí tnúhu ndáa-í xii-ndo sã ncháa-ní núú sã cúu cãxi-o, te dicó-ni sã ñà túú ndùu váha-xi núu sã cuendá-ni sã cáxi-ó ñⁿ núú sã cúu cãxi-o cuíta nihnu ñⁿ tnàha ñáiyu-o. ²¹ Te váha-gá sã vá cáxi-ó cùñú

te vá cóhó ndídí, te ni ñà túú nǎgá cada-o te núu xító-o sá xǎⁿ cada te nguíta tnàha ñáyiú-o cǎdá-yu sá ñà túú vǎha, àdi xító-o sá xǎⁿ cada te nguíta-yu caní ìⁿ caní úú iní-yu cundecú-yu ichi Xítóhó Jesucristú, te vá cundǎá-gá-yu núú-gǎ te núu ducaⁿ na cǎda-o. ²² Te núu ìⁿ sá vǎha sàni iní-ó cǎda-o, te vá dátúu-o núú ñáyiú chi mee-ni núú Yǎ Ndiöxí dǎtúu-o. Te nchoo cùu-o ñáyiú ío váha táhú-xi te núu cùnnumí ndǎá iní-ó sá quidé ndǎá-ó núu nǎndi cùu sá quidé-ó, te cùnnumí iní-ó sá ñà díú ìⁿ cuéchi cùu-xi sá quidé-ó. ²³ Te núu nchoo sàni iní-ó sá quidé vǎha-o àdi ñà túú quide váha-o òré xéxí-ó ìⁿ núú sá xéxí-ó, te cuu cuéchi xii-o te núu ducaⁿ na cǎda-o. Te ducaⁿ cùu cuéchi xii-o chi ñà túú ìⁿ-ni sá sání iní-ó, chi nchaa núú sá quidé-ó sàni ìⁿ sani úú iní-ó núu váha-ni àdi ñà túú vǎha-ni, te cuu cuéchi xii-o sá dúcáⁿ quide-o.

15

Cada-o sǎ vǎha sá cúú-xí tnàha ñáyiú-o

¹ Te nchoo ñáyiú ío váha sǎndǎá iní ñáhá xii Xítóhó Jesucristú, xini ñuhu-xi cuǎñaha-o tnùhu ndee ìni xii ñáyiú ñà túú ñihí ndéé cundecu ichi-gá, te vá cǎdá-ó mèe-ni sá cúú-xí mèe-o. ² Te cada-o sǎ vǎha nǎcuáa cuu váha iní tnàha ñáyiú-o cuendá cuu-xi sá vǎha sá cúú-xí-yu, te ducaⁿ cuíta níhi ndéé-gǎ-yu quindǎá iní-yu Xítóhó Jesucristú. ³ Te Xítóhó Jesucristú ñà túú ní quide-gá mee-ni sá cúú vǎha iní méé-gǎ, te ní quee ndǎá-xi nǎcuáa cǎháⁿ-xi núú tütú Yǎ Ndiöxí nǎcuáa ní xáhaⁿ Xítóhó Jesucristú xii-gá, te cǎchí-xi: “Nchaa ñáyiú cùu úhú iní ñáhá xii-n ní xícuéhé ní xíduha ñáhá-yu xii-í”, duha cǎháⁿ-xi núú tütú Yǎ Ndiöxí nǎcuáa ní xáhaⁿ Xítóhó Jesucristú xii-gá. ⁴ Te ndéé sanaha ñi ngúndeé nchaa tnùhu Yǎ Ndiöxí núú tütú-gá, te ducaⁿ ñi ngúndeé cuendá dacuàha-o, te tnùhu-áⁿ dǎnèhé ñáhá-xí cunduú cǎhnu iní-ó cuéi nǎndi nà yáha-o cundecu-o ichi-gá, te sá xíi tnùhu-áⁿ te vá ndìhú-gá iní-ó cundecu-o, te díu-ni sá xíi tnùhu-áⁿ cundecu ndìhi-o tnùhu ndee ìni. ⁵ Te Yǎ Ndiöxí quidé-gǎ ndécú ndìhi-o tnùhu cǎhnu iní, te díu-ni-gá quidé-gǎ ñà túú ndìhú iní-ó ndècu-o. Te xicáⁿ táhù-í núú-gǎ sá díú-gǎ ná cǎdá te cuu ìⁿnuu-ndo cundecu-ndo datná

ní quide mee Xítóhó Jesucristú cútnàhá ní xíndecu-gá ñuyíú-a. ⁶ Te ducaⁿ nchaa-ndo cuu ìⁿnuu-ndo, te daníhí tnáhá-ndó yócó tǎchí-ndó te cǎchí-ndó sá ío cǎhnu cuu Yǎ Ndiöxí Yáa cúú Tǎtá Xítóhó Jesucristú.

Ñáyiú ñà túú cùu ñáyiú isràél ní ñihí-yu tnùhu Xítóhó Jesucristú

⁷ Te núu xǎⁿ chí quéhéⁿ cuendá tnáhá dǎtná ní quide Xítóhó Jesucristú ní queheⁿ cuendá ñáhá-gǎ xii-o, te núu ducaⁿ na cǎda-ndo te ío cuu cǎhnu Yǎ Ndiöxí. ⁸ Te na cǎchí tnùhu-í xii-ndo sá Xítóhó Jesucristú ní quixi-gá ní quide-gá sá vǎha sá cúú-xí ñáyiú isràél, te sá dúcáⁿ ñi quide-gá xǎⁿ cútnúni ndǎá iní-ó sá Yǎ Ndiöxí quidé-gǎ ìⁿ sá cǎháⁿ-gá, chi Xítóhó Jesucristú ní quide-gá nchaa nǎcuáa ní xáhaⁿ Yǎ Ndiöxí xii cue ñani tnáhá-ó ñi xíndecu ndéé sanaha. ⁹ Te ducaⁿ ñi quide Xítóhó Jesucristú sá vǎha sá cúú-xí ñáyiú isràél cuendá nchaa ñáyiú ñà túú cùu ñáyiú isràél cǎchí-yu sá ío cǎhnu cuu Yǎ Ndiöxí, te ducaⁿ quèsahá-yu chí ío cundahú iní ñáhá-gǎ chíndèe ñaha-gá xii-yu, te quee ndǎá-xi nǎcuáa cǎháⁿ-xi núú tütú Yǎ Ndiöxí núú cǎchí-xi:

Yúhú cǎchí-í sá ío cǎhnu cuu-n núú nchaa ñáyiú ñà túú cùu ñáyiú isràél,

te cata-í ndudú chiñuhu ñaha-í xii-n.

Duha cǎchí-xi núú tütú-gá ¹⁰ Te cǎchí tucu-xi núú tütú-gá:

Te nchòhó ñáyiú ñà túú cùu ñáyiú isràél ío chí cúdí ìni ndìhi ñáyiú isràél ñáyiú ndècu ndìhi-í.

Duha cǎchí-xi núú tütú-gá. ¹¹ Te cǎchí tucu-xi ìngá xichi núú tütú-gá:

Nchaa nchòhó ñáyiú ñà túú cùu ñáyiú isràél chí cǎháⁿ sá ío cǎhnu cuu Yǎ Ndiöxí, te nchaa ñáyiú na cǎháⁿ-yu sá ío cǎhnu cuu-gá.

Duha cǎchí-xi núú tütú-gá. ¹² Te ndíi Chàia cǎchí tucu ndíi núú tütú Yǎ Ndiöxí:

Coo ìⁿ ñani tnáhá ndíi Isàí téé ní xíndecu ndéé sanaha,

te téé-áⁿ taxi tnùnì-dé cue ñáyiú ñà túú cùu ñáyiú isràél,

te ñáyiú-áⁿ cundee cùu cǎhnu iní ñáhǎ-yu xii-dé.

Duha ní cǎháⁿ ndíi Chàia cǎchí-xi núú tütú-gá.

¹³ Te xicáⁿ táhù-í núú Yǎ Ndiöxí Yáa ní taxi tnùhu ndee ìni ndécú ndìhi-o sá méé-gǎ

ná càda ío cudíí ìní-ndó cùndecu-ndo, te ducaⁿ ìo váha cundecu iní-ndó nũú-gã chi sàndáá iní-ndó-gã, te ducaⁿ Espíritú-gá ná càda te uuⁿ-gá uuⁿ-gá cuita ngúndecu ndíhi-ndo tnũhu ndee ìní quíhíⁿ sá cáda váha ñaha-gã xii-ndo.

14 Te nchòhó ñáyiú ndècu ndíhi-í ichi Xítohó Jesucrístú cùtnuní ndáá iní-í sá nchòhó ío váha iní-ndó, te ducaⁿ ìo váha cùtnuní iní-ndó nchàa tnũhu váha, te ducaⁿ ìo dàsahú tnáhá-ndó nàcuáa cundecu-ndo. 15 Te dava tnũhu ní chídó tnùn-í nũú tütú-a cùu-xi tnũhu sá ìo càháⁿ-í dóho-ndo, te ducaⁿ nĩ tee-í cuendá sá nchòhó dandacu iní-ndó tnũhu-áⁿ, te ní tee-í chi Yá Ndiöxí ní cundáhú iní ñáhá-gã xii-í ní taxi-gá chiúⁿ quide-í 16 xínú cuèchi-í nũú Xítohó Jesucrístú càháⁿ-í tnũhu-gá nũú ñáyiú ñá túú cùu ñáyiú isràél. Te tnũhu-áⁿ cúu-xi tnũhu sá sánú ìchi ñaha xii-o nacuáa naníhí tãhú-ó, te ducaⁿ dànehé-í ñáyiú ñá túú cùu ñáyiú isràél tnũhu Yá Ndiöxí cuendá cúu-yu dàtná ìⁿ sá ndúú tãhú-gã, te Espíritú-gá quidé-xí cúu-yu ñáyiú cùu nũú-gã, te cùu váha iní ñáhá-gã xii-yu.

17 Te ío váha cùu iní-í cuendá nchaa chiúⁿ quide-í sá cúu-xi Yá Ndiöxí, chi Xítohó Jesucrístú ndécú ndíhi ñaha-gã xii-í. 18 Te mee-ni nàcuáa quide Xítohó Jesucrístú chindèe ñaha-gã xii-í xíáⁿ-ni càháⁿ-í, te sá dúcáⁿ quide-gá xíáⁿ ní sàndáá iní cue ñáyiú ñá túú cùu ñáyiú isràél tnũhu-gã. Te ducaⁿ chi ní chindèe ñaha-gã xii-í ní càháⁿ-í tnũhu-gã te ducaⁿ-ni nĩ chindèe ñaha-gã xii-í ní quide-í titní nũú sã nĩ quide-í nũú-yu ní xini-yu. 19 Te Espíritú Yá Ndiöxí ní quide-xi ní quide-í titní nũú sã vã yõ tnàhí ndàcu cada ní xini-yu te ío ní cuñúhu-yu. Te nchaa ñuú ní sáháⁿ-í ní càháⁿ-í tnũhu Xítohó Jesucrístú nũú ñáyiú cuèi ndéé ñuú Jerusàlén, te cuèi ndéé distritú Ìliricú, nũu nchaa ñuú-áⁿ nĩ sáháⁿ-í ní càháⁿ-í nũú-yu tnũhu sá càháⁿ nàcuáa naníhí tãhú-ó. 20 Te ducaⁿ ìo ndùcu ndee-í càháⁿ-í tnũhu sá càháⁿ nàcuáa naníhí tãhú-ó nũú vátá ñihí-gá-yu tnũhu cuendá Xítohó Jesucrístú, te ducaⁿ quide-í chi ñá túú cùn-í quíhíⁿ-í càháⁿ-í tnũhu-gã nũú sã xíndecu ñáyiú càháⁿ tnũhu-gã. 21 Te quide-í nàcuáa càháⁿ-xi nũú tütú Yá Ndiöxí nũú càchí-xi:

Ñáyiú vátá ñihí-gá tnũhu cuendá Yaá quixi ñuyú te ñihí-yu, te ducaⁿ tècú tnùn-í-yu tnũhu-gã. Duha càchí-xi nũú tütú-gã.

Té Pãblú cùn-í-dé quíhíⁿ-dé ñuú Rómá

22 Te sá dúcáⁿ càháⁿ-í tnũhu-gã nũu xíáⁿ ñá túú ní ndàcu-í quixi-í quixi coto ñaha-í xii-ndo cuèi ducaⁿ-ni sàni iní-í quixi coto ñaha-í. 23 Te ní cuu titní cuía ducaⁿ-ni sàni iní-í quixi coto ñaha-í xii-ndo, te vitna ní ndíhi-í nchaa iha ní càháⁿ-í tnũhu Xítohó Jesucrístú nũú nchàa ñáyiú. 24 Nũu xíáⁿ sání iní-í sá ndùu na quíhíⁿ-í nàcióⁿ Èspañá te yáha càháⁿ-í quini-í nása ndècu-ndo, te dàvá-áⁿ ìo cudíí ìní-ó cùndecu tnaa-o, te ducaⁿ te òré nucúhuⁿ tucu-í ichi te cada ndee ìní-ndó chindèe ñaha-ndo xii-í. 25 Te vitna quíhíⁿ-í ñuú Jerusàlén quínehe-í sá ndúú tãhú ñáyiú ndècu ichi Xítohó Jesucrístú xíndecu yàcáⁿ. 26 Te ñáyiú xíndecu ichi Xítohó Jesucrístú ndécú distritú Macèdoniá, ndíhi distritú Acãyá ní cuu ìⁿ-nũú-yu ní sacáⁿ tnáhã-yu sá ndúú tãhú ñáyiú ndàhú xíndecu ichi-gã ndécú ñuú Jerusàlén. 27 Te ducaⁿ tnàhí ní cudíí ìní-yu cadá-yu, te ducaⁿ tnàhí tàú-yu cadá-yu chindèe-yu ñáyiú xíndecu ñuú Jerusàlén. Te ñáyiú Macèdoniá ndíhi ñáyiú Acãyá-áⁿ ñá túú cúu-yu ñáyiú isràél. Te ñáyiú xíndecu ñuú Jerusàlén cúu-yu mee-ni ñáyiú isràél, te ducaⁿ tàú-yu cadá-yu chi sá cuendá ñáyiú isràél-áⁿ nĩ ñihí-yu tnũhu sá càháⁿ nàcuáa naníhí tãhú-yu, nũu xíáⁿ tàú-yu chindèe ñáhã-yu ndíhi nchaa sá ñihí-yu. 28 Te sátá ná yáha quínguáha cuendá-í-yu sá ndúú tãhú-yu, te ducaⁿ te dàtnuní quee-í quíhíⁿ-í nàcióⁿ Èspañá, te ichi yáha-í yáha càháⁿ-í nũú ndécú-ndó. 29 Te cùtnuní ndáá iní-í sá òré ná quèxio-í nũú ndécú-ndó, te Xítohó Jesucrístú ío chindèe ñaha-gã xii-í càháⁿ-í tnũhu-gã nũú-ndó nàcuáa ío váha cundecu-ndo ìchi-gã.

30 Te nchòhó ñáyiú ndècu ndíhi-í ichi Xítohó Jesucrístú càháⁿ ndàhú-í nũú-ndó sã ìo chindèe ñaha-ndo xii-í càháⁿ ndíhi-o Yá Ndiöxí cuendá-í, te ducaⁿ càda-ndo chi ndècu ndíhi-ndo Xítohó Jesucrístú. Te Espíritú Yá Ndiöxí quidé-xí cùu iní tnáhá-ó ìⁿ ìⁿ-o. 31 Te ío chí càcáⁿ tãhú nũú Yá Ndiöxí sá ná còto ñaha-gã xii-í, te ñá túú

nã cada ñaha nchàa ñáyiú ñá túú sàndáá iní ñáhá xii-gá xĩndecu distritú Jùdeá. Te cãcãⁿ táhú tùcu-ndo núú-gã sá ncháá sã cãnèhe-í quíhíⁿ nduu táhú ñáyiú ndècu ichi-gá ndécú ñùú Jerusàlén ío váha cuu iní-yu queheⁿ cuendá-yu. ³² Te ducaⁿ càda-ndo cuendá sá nõu Yá Ndiõxí ná cãchí-gá te ío cudíí iní-í òrè quexìo-í núú ndécú-ndó, te ío váha cuu iní-í cundecu ndihí ñaha tñàì xii-ndo. ³³ Te vitna xicãⁿ táhù-í núú Yã Ndiõxí Yaá quidé ïo váha cùu iní-ó ndècu-o sá ná chĩndee chitúu ñaha-gã xii-ndo nchàa-ndo. Te ducaⁿ na cùnduu.

16

Té Pãblú quidé ndèe iní-dé ñáyiú ndècu ñuú Ròmá

¹ Te yúhú tendaha-í tá Fèbè quixi-xi núú ndécú-ndó, te tñahá-xi ndècu-xi ichi Xítóhó Jesucristú, te quide-xi chiuⁿ Yá Ndiõxí sá cúu-xí ñáyiú ndècu ichi Xítóhó Jesucristú xĩndecu ñuú Cèncreá. ² Te cuiní-í sá ïo váha cuu iní-ndó quèheⁿ cuendá-ndó-xí, chi ndècu ndihí-xi Xítóhó Jesucristú, te cada-ndo nãcuáa tàú-xi cunduu dàtná tàú-xi cada ñáyiú ndècu ichi-gá, te ío chĩndee-ndo-xi te núu ná cúu sã xíní ñùhu-xi, chi tñahá-xi ío chĩndee-xi cue ñáyiú ndècu ichi Xítóhó Jesucristú, te tñahá yúhú ducaⁿ ïo chĩndee-xi.

³ Te cúñaha-ndo ïo na càda ndee iní té Àquilú ndihí ñadhí-dé tá Priscilá, chi ñáyiú-áⁿ ñi quide chiuⁿ-í ndihí-yu ní quide-ndí chiuⁿ Xítóhó Jesucristú. ⁴ Chi mèe-yu ní cácu cuú-yu sá cuendá sá ñi dácãcu ñahá-yu xii-í sá ñi yáha-í, núu xíãⁿ ío ndacãⁿ táhù-í núu-yu, te ñá díú-ní yúhú ducaⁿ ïo ndacãⁿ táhù-í núu-yu chi tñahá nchaa ñáyiú ñá túú cùu ñáyiú isràél xĩndecu ichi-gá xĩndecu nchaa xichí ducaⁿ ïo ndacãⁿ táhù-yu núú tã Àquilú ndihí núú ñadhí-dé tá Priscilá. ⁵ Te cúñaha tùcu-ndo sá ïo na càda ndee iní nchaa ñáyiú xĩndecu ichi Xítóhó Jesucristú tàcá vehe té Àquilú ndihí tá Priscilá dácuahá-yu tñuhu-gá, te cúñaha tùcu-ndo sá ïo na càda ndee iní té Epènetú chi tñahá-dé ío ñùhu iní-í-dé, chi tãe-áⁿ cúu-dẽ tée díhna nuu ñi sãndáá iní tñuhu Xítóhó Jesucristú distritú Acãyá. ⁶ Te cúñaha tùcu-ndo sá ïo na càda ndee iní tá Màriá xíchí ndécú ndihí-ndo, xíchí ïo ndècu ndee

xinu cuechi núú Xítóhó Jesucristú. ⁷ Te cúñaha tùcu-ndo sá ïo na càda ndee iní cue tãe cùu ndi mee-í té Andrónicú ndihí té Jùnias, chi tñahá-güedé ní xíhi ndihí ñaha-güedé xii-í vecaá, te ío cùdiu-güedé núú nchàa cue tãe ní táuchíúⁿ Jèsús cáháⁿ tñuhu-gá. Te díhna-gá-güedé ní sãndáá iní-güedé tñuhu Xítóhó Jesucristú dàcúuxí yúhú.

⁸ Te cúñaha-ndo sã ná càda ndee iní té Àmpliás chi tñahá-dé ío ñùhu iní-í-dé, te ndècu-dé tñahá-dé ichi Xítóhó Jesucristú. ⁹ Te cúñaha tùcu-ndo xii té Bãnú tãe cundihí ñaha xii-o quide-o chiuⁿ Xítóhó Jesucristú sá ná càda ndee iní-dé, te cúñaha tùcu-ndo xii té Èstaquis sá ná càda ndee iní-dé chi tñahá-dé ío ñùhu iní-í-dé. ¹⁰ Te cúñaha tùcu-ndo xii té Àpelés sá ïo na càda ndee iní-dé, chi tãe-áⁿ ïo váha cundáá-dé núú Xítóhó Jesucristú, te cúñaha tùcu-ndo xii ñáyiú xĩndecu vehe té Aristóbulú sá ïo na càda ndee iní-yu. ¹¹ Te cúñaha-ndo xii té Heròdión tãe cùu ndi mee-í sá ïo na càda ndee iní-dé, te cúñaha-ndo xii ñáyiú ndècu ichi Xítóhó Jesucristú xĩndecu vehe té Nãrcisú sá ïo na càda ndee iní-yu. ¹² Te cúñaha-ndo xii tñahá tá Trifená ndihí tá Trifosá sá ïo na càda ndee iní-yu, chi tñahá-yu quidé-yu chiuⁿ Xítóhó Jesucristú. Te tñahá tá Pãrsidá xíchí ndécú ndihí-o ichi Xítóhó Jesucristú cúñaha-ndo xii-xi sá ïo na càda ndee iní-xi, chi tñahá-xi ío ndècu ndee-xi quide-xi chiuⁿ Xítóhó Jesucristú. ¹³ Te cúñaha-ndo tñahá té Rũfú tãe ío váha sãndáá iní tñuhu Xítóhó Jesucristú sá ïo na càda ndee iní-dé ndihí nãná-dẽ, chi ñaha-áⁿ quidé iní-í sá cúu-áⁿ dàtná nãná-í. ¹⁴ Te cúñaha-ndo sã ïo na càda ndee iní té Àsincritú, ndihí té Flègonté, ndihí té Hãrmás, ndihí té Pãtrobás, ndihí té Hãrmés, ndihí nchaa dava-gá cue ñáyiú ndècu ndihí-o ichi Xítóhó Jesucristú xĩndecu ndihí-güedé. ¹⁵ Te cúñaha tùcu-ndo sá ïo na càda ndee iní té Filológó, ndihí tá Jülüá, ndihí té Nèrèú, ndihí cúha té Nèrèú, ndihí tá Òlimpás, ndihí nchaa dava-gá ñáyiú sãndáá iní tñuhu Xítóhó Jesucristú xĩndecu ndihí-yu.

¹⁶ Te ío yiñùhu cada ndee iní tñahá-ndó ñi ñi-ndo. Te nchaa ñáyiú tàcá nchaa iha dàcuaha tñuhu Xítóhó Jesucristú quidé ndèe iní ñahã-yu xii-ndo.

17 Te nchòhó ñáyiú ndècu ndihí-í ichi Xítohó Jesucristú càháⁿ-í dóho-ndo sã cáda cuendá-ndó ñúú íó ñáyiú quide nacuaáa vá cúú ñⁿnuu-ndo cundecu-ndo, chi ñáyiú-áⁿ sánú ichi ñahá-yu ñⁿ ichi ñá túú vâha, chi ñá túú ñⁿ-ni cuu-xi tnúhu càháⁿ-yu ndihí tnúhu sá ñí níhí-ndó ndècu ndihí-ndo, te ñáyiú ducaⁿ xĩquide vá ñihí tnáhá-gã-ndó ndihí-yu. 18 Chi ñáyiú-áⁿ ñà túú quidé-yu chiuⁿ sá cúú-xí Xítohó Jesucristú, chi mee-ni sã cúú-xí mée-yu quidé-yu, te mee-ni nchâa tnúhu sá ío vii ío váha cuáháⁿ càháⁿ-yu òré cuáháⁿ-yu dândahú-yu nchaa ñáyiú ío yáchí sândáá iní-xi ñⁿ tnúhu. 19 Te nchaa ñáyiú ñihí-yu tnúhu sá nchòhó sândáá iní-ndó tnúhu Xítohó Jesucristú, núú xíãⁿ ío cùdí iní-í. Te cuiní-í sá nchòhó ío váha cutnùní iní-ndó nacuaáa cada-ndo mée-ni sá vâha, te vá cání iní-ndó càda-ndo datná xĩquide nchaa ñáyiú ndècu ichi cuehé ichi duha. 20 Te Yá Ndiõxí Yaa quidé ío váha cùu iní-ó ndècu-o ío ndihí cada-gá cuendá sá sàcuíhná ñà túú-gã ná cada ñaha-xi xii-ndo, te xicáⁿ táhù-í núú Xítohó Jesucristú sá ío na chindee chitúu ñaha-gã xii-ndo.

21 Te té Timùteú té quide ndihí-í chiuⁿ Xítohó Jesucristú iha quide ndee iní ñáhá-dě xii-ndo, te tnáhá té Lùciú, ndihí té Jàson, ndihí té Sosipàtér cue té cùu ndi mee-í quidé ndèe iní ñáhá-güedě xii-ndo.

22 Te tnáhá yúhú té Tèrciú té càdúha tutú-a cuendá té Páblú quidé ndèe iní ñáhà-í xii-ndo, chi ñⁿ-ni cùu-o ndihí Xítohó Jesucristú.

23 Te tnáhá té Gãyú té dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiú dàcuahá-yu tnúhu Xítohó Jesucristú. Te tnáhá té Èrastú té yìndaha díhúⁿ ñùú quidé ndèe iní ñáhá-dě xii-ndo, te tnáhá té Cuártú té ndècu ndihí-o ichi Xítohó Jesucristú quidé ndèe iní ñáhá-dě xii-ndo.

24 Te xicáⁿ táhù-í núú Xítohó Jesucristú sá ío na chindee chitúu ñaha-gã xii-ndo nchâa-ndo. Te ducaⁿ na cùnduu.

Cáháⁿ-ó sã ío càhnu cuu Yá Ndiõxí

25 Te vitna chí ná càchí-ó sã ío càhnu cuu Yá Ndiõxí, chi mee-gã cada te ío-gá cuita níhí ndéé-gã-ndó cùndecu-ndo ichi Xítohó Jesucristú datná càchí tnúhu sá càháⁿ

nacuáa naníhí tàhù-ó, tnúhu sá dánèhé-í ñáyiú cuendá Xítohó Jesucristú, te nchaa tnúhu-a ñⁿ-ni cùu-xi ndihí nchaa tnúhu sá ñí cachí Yá Ndiõxí cuu yuhu ndèe cùtnáhá ní ngáva ñuyúú, te vitna ní quee túu-xi, 26 chi mee Yá Ndiõxí ní dátúu-gá núú-ó vitna, te càháⁿ-ndí nacuaáa ní chídó tnùní cue téé ní xóo cáháⁿ tnúhu Yá Ndiõxí ndéé sanaha. Te ducaⁿ tnúhu sá ndúú yùhu ni cuu ta xité nuu-xi ñihí ñuyúú cuáháⁿ, chi ducaⁿ ñí cachí Yá Ndiõxí Yaa ndécú nchâa nduu nchaa quíú cunduu cuendá sá quindáá iní ñáhá ñáyiú xii-gá, te tnií-yu nchaa tnúhu càháⁿ-gá.

27 ¡Te ñⁿdii-ni Yá Ndiõxí cúú-gã Yaa ío sàá sá xíní tnùní-xi! ¡Te nchaa-o chí ná càchí-ó sã ío càhnu cuu-gá, chi ndècu ndihí-o Xítohó Jesucristú, te ducaⁿ-ni càda-o ni caa ni quíhíⁿ! Te ducaⁿ na cùnduu. Te ío chí cáda ndèe iní-nã vitna.

TUTÚ DÍHNA NUU NÍ CADÚHA TÉ PÄBLÚ QUIHⁿ NDAHA ÑÁYIU ÑUÚ CÒRINTÚ

Té Päblú cadúha-dé tutú quíhⁿ ndaha ñáyiú xñdecu ichi Xítóhó Jesucristú ndécú ñúú Còrintú

¹ Yúhú té Päblú ní cáháⁿ ñáhá Yă Ndiöxí xii-í cuendá sá cáháⁿ-í tnúhu Xítóhó Jesucristú núú ñáyiú, chi ducaⁿ ní cachí Yă Ndiöxí cunduu. Te cadúha-í tutú-a ndíhi té Söstenés téé ndècu ndíhi-o ichi Xítóhó Jesucristú ² cuendá daquixi-í ndaha nchòhó ñáyiú xñdecu ichi Yá Ndiöxí ndécú ñúú Còrintú, chi nchòhó cúú-ndó ñáyiú cùu cuendá Yă Ndiöxí cuendá sá ndécú ndíhi-ndo Xítóhó Jesucristú. Te diu-ni-ndo cùu-ndo ñáyiú ní cáháⁿ ñáhá Yă Ndiöxí cuendá cundecu yíñùhu-ndo núú-gă, ndíhi nchaa dava-gă ñáyiú ndècu nchaa xichi, ñáyiú cachí sá ïo càhnu cuu Xítóhó Jesucristú. Te Yaá-áⁿ cúú-gă Xítóhó-yu, te diu-ni-gă cúú-gă Xítóhó nchoo tucu. ³ Te xicáⁿ táhù-í núú Tătá-ó Dütú Ndiöxí ndíhi núú Xítóhó Jesucristú sá ndi nduú-gă ïo na chindee chitúu ñaha-gă xii-ndo, te ïo váha cuu iní-ndó cundecu-ndo.

Yá Ndiöxí ïo chindee ñaha-gă xii-o cuendá sá ndécú-ó ndíhi Xítóhó Jesucristú

⁴ Te ducaⁿ-ni ïo ndácáⁿ táhù-í núú Yă Ndiöxí cuendá-ndó, chi mee-gă ïo chindee chitúu ñaha-gă xii-ndo sá cuendá Xítóhó Jesucristú. ⁵ Te cuendá sá ndécú-ndó ndíhi Xítóhó Jesucristú, núú xiáⁿ Yă Ndiöxí ïo chindee ñaha-gă xii-ndo sáá díquí-ndó nàcuáa cáháⁿ-ndó, ndíhi nàcuáa cùtnuní iní-ndó, ⁶ chi tnúhu sá ni ñíhí-ndó cuendá Xítóhó Jesucristú ní quee-xi iní-ndó. ⁷ Te xiáⁿ núu nchaa sá váha ñá túú tnàhí cùmání xii-ndo chi Yá Ndiöxí ïo chindee ñaha-gă. Te ducaⁿ quide-gă ñini nchòhó ñi yùhu ñi iní-ndó ndètu-ndo sáá nduu quixi tucu Xítóhó Jesucristú. ⁸ Te Yá Ndiöxí ducaⁿ-ni ïo chindee ñaha-gă xii-ndo cuendá sá vă yô teñaha cuèchi nduu na quixi tucu Xítóhó Jesucristú. ⁹ Te nchaa sá cáháⁿ Yă Ndiöxí

dacutíi quide-gă, te diu-gă cúú-gă Yaá ní cáháⁿ ñáhá xii-ndo cuendá cuu ñⁿnuu-ndo ndíhi Déhe-gă Xítóhó Jesucristú Yaá cúú Xítóhó-ó.

Ñá túú cùu ñⁿnuu ñáyiú ndècu ichi Xítóhó Jesucristú

¹⁰ Te nchòhó ñáyiú ndècu ndíhi-í ichi Xítóhó Jesucristú cáháⁿ-í dóho-ndo sá vă ndí díⁿ càni iní-ndó, te ïo cuu ñⁿnuu-ndo cundecu-ndo, te ñⁿ-ni càni iní-ndó, te ñⁿ-ni càda-ndo chi ducaⁿ cuini-gă cunduu. ¹¹ Te duha cáháⁿ-í dóho nchòhó ñáyiú ndècu ndíhi-í ichi Xítóhó Jesucristú, chi cue ñáyiú vehe té Clòé ní cachí tnúhu-yu xii-í sá ñà túú cùu ñⁿnuu-ndo ndecu-ndo. ¹² Te duha nduu tnúhu ní ñíhi-í nàcuáa cùu ndecu-ndo, chi dava-ndo cachí-ndó: “Yúhú cúú-í cuendá té Päblú.” Te dava-ndo cachí-ndó: “Yúhú cúú-í cuendá té Àpolós.” Te dava-ndo cachí-ndó: “Yúhú cúú-í cuendá té Pèlú.” Te dava tucu-ndo cachí-ndó: “Yúhú cúú-í cuendá Xítóhó Jesucristú”, duha cachí-ndó. ¹³ Te vá dúcáⁿ cáháⁿ-ndó chi ñá túú ñá daha Xítóhó Jesucristú ndécú chi ñⁿdíi-ni-gă. Te ñá díú yùhú té Päblú ní xíhí-í núú cùrúxí sá cuendá-ndó, te ñi ñà túú ní sandute-ndo cuendá sá yùhú cuu cuendá ñáhà-í xii-ndo. ¹⁴ Te táxăhu xii Yá Ndiöxí chi ñá díú nchaa-ndo ni dacuandute-í, chi té Crispú-ni ndíhi té Găyú-ni ní dăcuándute-í-güedé. ¹⁵ Te xiáⁿ núu vá cúú tnàhí cáháⁿ-ndó sá ñi sandute-ndo sá cúú cuendá ñáhà-í xii-ndo. ¹⁶ Te ní ndacu tucu iní-í sá tnàhá tucu ñáyiú cùu ndi mee té Estéfánás ní dăcuándute-í, te diu-ná ñáyiú-áⁿ te sànuu sá ñà túú-gă nágá ñáyiú ni dăcuandute-í. ¹⁷ Te Xítóhó Jesucristú ñá túú ní tendaha ñaha-gă xii-í sá dăcuandute-í ñáyiú, chi ní tendaha ñaha-gă xii-í sá cáháⁿ-í tnúhu-gă núú-yu, tnúhu sá cáháⁿ nàcuáa naníhí táhú-ó. Te ñá túú cáháⁿ-í dàtná cáháⁿ ñáyiú túha. Te ducaⁿ quide-í cuendá sá nchòhó quindáa váha iní-ndó tnúhu sá cáháⁿ nàcuáa ní xíhí Xítóhó Jesucristú núú cùrúxí. Chi núu na cáháⁿ-í dàtná cáháⁿ ñáyiú túha te nchòhó vá quindáa iní-ndó tnúhu-áⁿ nàcuáa tàú-xi cunduu.

Sá cuendá Xítóhó Jesucristú cùtnuní iní-ó sá ïo càhnu cuu Yá Ndiöxí

¹⁸ Te nchaa ñáyiú ta xíta ñihnu cuáháⁿ cachí-yu sá ñà túú nandíhi tnúhu sá cáháⁿ

nàcuáa ní xíhí Xítóhó Jesucristú núú cùrúxí, dico sá cúú-xí nchòo ñáyiú sa ní naníhí tàhú, chi tnúhu-áⁿ cúú-xí ñⁿ tnúhu sá ñí taxi Yá Ndiöxí ndécú ndíhi-o cuendá ndacu-gá cada-gá nchaa nàcuáa cuìní-gá iní-ó, ¹⁹ te quèe ndáá-xi nàcuáa càháⁿ-gá núú tütú-gá núú càchí-xi:

Yúhú cada-í te nchaa ñáyiú túha vá nándíhi-gá nchaa sá xìní tnùní-yu, te nchaa ñáyiú ío váha sàá díquí-xi vá nándíhi-gá nchaa nàcuáa sàni iní-yu. Duha càchí Yá Ndiöxí núú tütú-gá.

²⁰ Te xíáⁿ cútnùní iní-ó sá ncháá ñáyiú sàni iní-xi sá ño túha ndècu ñuyíú-a, ndíhi nchaa cue téé dàcuaha ñaha xií-yu nchaa tnúhu ní chídó tnùní ndí Moisés, ndíhi nchaa ñáyiú ío váha sàá díquí-xi càháⁿ cuendá nchaa sá ío ñuyíú-a, te nchaa ñáyiú-áⁿ càchí Yá Ndiöxí sá ñà túú nándíhi nchaa sá xìní tnùní-yu sá cúú-xí-gá. ²¹ Te Yá Ndiöxí ío váha cùtnuní iní-gá nàcuáa quide-gá, chi ñá túú dàña-gá cundecu ndíhi ñáhá-yu xii-gá sá cuendá nchaa sá ñí sáá díquí méé-yu, te ducaⁿ quide-gá chi cuìní-gá sá cùndedóho-yu tnúhu sá sání iní-yu ñá túú nándíhi. Te sá cuendá tnúhu-áⁿ te naníhí tàhú-yu te núu na quíndáá iní ñáhá-yu xii-gá.

²² Te cue ñáyiú isràél cuìní-yu quini-yu sá vǎ yǎo tnàhí ndàcu cada, te cue ñáyiú griégú nchícúⁿ nihnú-yu nchaa sá dácuaha ñáyiú ío túha. ²³ Dico nchoo yíhi-o càháⁿ-ó núú ñáyiú sá Xítóhó Jesucristú ní xíhí-gá núú cùrúxí. Te cue ñáyiú isràél ñá túú tnàhí tnàhá iní-yu cundedóho-yu tnúhu-áⁿ. Te cue ñáyiú ñá túú cùu ñáyiú isràél càchí-yu sá ñà túú vèdana nándíhi tnúhu-áⁿ. ²⁴ Dico sá cúú-xí nchaa ñáyiú ní càháⁿ ñáhá Yá Ndiöxí chi cuèi cùu-yu ñáyiú isràél àdi ñá túú cùu-yu, dico ñáyiú-áⁿ càchí-yu sá sǎ cuendá Xítóhó Jesucristú cútnùní iní-yu sá ño càhnu cuu Yá Ndiöxí te ndècu ndíhi-gá nchaa sá xìní tnùní-gá. ²⁵ Te sá quidé Yá Ndiöxí càchí ñáyiú ñuyíú-a sá ñà túú nándíhi, dico xíáⁿ ío-gá nándíhi dàcúúxí sǎ sání iní méé-yu. Te sá ñí xíhí Xítóhó Jesucristú núú cùrúxí, xíáⁿ càchí ñáyiú sá ñá túú ní ñíhí ndéé Yá Ndiöxí cada-gá sá ñí sani iní-gá cada-gá. Dico sá dúcáⁿ ñí

quide Yá Ndiöxí, xíáⁿ cúú-xí sǎ ño-gá ní ñíhí ndéé-gǎ ní quide-gá ñⁿ sá ñí sani iní-gá dàcúúxí sǎ sání iní méé ñáyiú ñuyíú-a. ²⁶ Te nchòhó ñáyiú ndècu ndíhi-í ichi Xítóhó Jesucristú, chí dándacu iní nàcuáa ndècu-ndo cútnàhá ní càháⁿ ñáhá Yá Ndiöxí xii-ndo, chí sacú-ni-ndo túha dàcúúxí ñáyiú ñá túú ndècu ichi-gá. Te ducaⁿ sàcú-ni-ndo tàxi tnuní-ndó, te ñu-ni ducaⁿ sàcú-ndó nèhe ñáyiú sá yíñuhu núú-ndó. ²⁷ Te ñáyiú ñá túú ndècu ichi Yá Ndiöxí càchí-yu sá ñà túú tnàhí túha dava-gá tnàha ñáyiú-yu, dico dava ñáyiú ñá túú túha-áⁿ càháⁿ ñáhá Yá Ndiöxí xií-yu cundecu-yu ichi-gá, te cundecu ndíhi ñaha-gǎ xií-yu, te ducaⁿ dándóo canúú-yu nchaa ñáyiú càchí sá ño túha. Te càháⁿ tucu-gá ñáyiú càchí dava-gá ñáyiú sá ñà túú tnàhí tàú cunuu cundecu-yu ichi-gá, te ducaⁿ cundecu ndíhi ñaha-gá xií-yu, te dándóo canúú-yu nchaa ñáyiú càchí sá táxi tnùní. ²⁸ Te ducaⁿ Yá Ndiöxí càháⁿ-gá ñáyiú ñá túú tnàhí cunuu cundecu ndíhi-gá, ndíhi ñáyiú quèe tíhú núú dàva-gá tnàha ñáyiú-xi, ndíhi ñáyiú càchí-yu sá ñà túú vèdana nándíhi, nchaa ñáyiú-áⁿ càháⁿ-gá cundecu ndíhi-gá, te ducaⁿ quide-gá cuendá dándóo canúú-yu nchaa ñáyiú càchí sá ño cunuu. ²⁹ Te núu xíáⁿ ní ñⁿ ñáyiú vá cúú càchí-yu sá ño càhnu cuú-yu núú Yá Ndiöxí. ³⁰ Dico nchòhó chi mee Yá Ndiöxí ní quide-gá ndécú-ndó ndíhi Xítóhó Jesucristú, te Xítóhó Jesucristú ní quide-gá ní cutnùní iní-ó sǎ Yá Ndiöxí cúú-gǎ Yá ndécú ndíhi nchaa sá xìní tnùní-gá. Te ñu-ni Xítóhó Jesucristú ní quide-gá cuendá sá nchóo vǎ cùndècu-gá cuéchi-o núú Yá Ndiöxí, te ducaⁿ cundecu yíñuhu-o núú-gǎ, te nduu táhú-ó cundecu-o ndíhi-gá ní caa ní quíhíⁿ. ³¹ Te sá dúcáⁿ quide-gá núu xíáⁿ xíní ñuhu-xi cada-o nàcuáa càháⁿ-xi núú tütú Yá Ndiöxí núú càchí-xi: “Vǎ càchí-ndó sǎ méé-ndó ño càhnu cuu-ndo, chí cachí-ndó sǎ Yá cúú Xítóhó-ndó ño càhnu cuu-gǎ”, duha càchí-xi núú tütú-gá.

2

Tnúhu sá càháⁿ nàcuáa ní cuu ní xíhí Xítóhó Jesucristú núú cùrúxí

¹ Te nchòhó ñáyiú ndècu ndíhi-í ichi Xítóhó Jesucristú sa nàha-ndo sá cùtnàhá ní

quixi-í ní cáháⁿ-í tnúhu Yá Ndiöxí núú-ndó, te ñá túú ní cáháⁿ-í dàtná càháⁿ ìⁿ ñáyiú ío váha sàá díquí-xi, àdi datná càháⁿ ìⁿ ñáyiú ío túha. ² Chi cútnàhá ní xíndecu ndìhi ñaha-í xii-ndo chi ní sani iní-í sá méé-ní cuendá Xítohó Jesucristú cáháⁿ-í núú-ndó ndìhi nacuaa ní cuu ní xíhí-gá, te ñu ducaⁿ ñi quide-í. ³ Te cútnàhá ní quexìo-í núú ndécú-ndó te ni ñá cútnùnì iní-í nása cada-í ní cuu, te ío ní quiyùhú iní-í ní cáháⁿ-í tnúhu-gá núú-ndó. ⁴ Te cútnàhá ní cáháⁿ-í nàcuáa ndùu tnúhu Xítohó Jesucristú núú-ndó, te nàha-ndo sá Espiritú Yá Ndiöxí ní chindee ñàha-xi xii-í ní cáháⁿ-í tnúhu-gá núú-ndó, te tnúhu-áⁿ ñi quée-xi iní-ndó. Te ñá túú ní cáháⁿ-í ìⁿ tnúhu càhnu núú-ndó tnúhu sá càháⁿ cue ñáyiú ío váha sàá díquí-xi. ⁵ Te ducaⁿ ñi cuu cuendá sá nchòhó quíndáá iní-ndó tnúhu Yá Ndiöxí chi ní quide-gá sá vaha sá cúu-xí iní-ndó, te ñá díú sá cuendá tnúhu sá càháⁿ ñáyiú càhí sá ío túha ducaⁿ ñi sándáá iní-ndó tnúhu-gá.

Espiritú Yá Ndiöxí quidé-xí cùtnunì iní-ó nàcuáa sàni iní-gá

⁶ Te nchoo càháⁿ-ó tnúhu càhnu núú ñáyiú sa ní níhí ndéé ndècu ichi Xítohó Jesucristú. Te tnúhu-áⁿ ñá túú càháⁿ ñáyiú ñá túú ndècu ichi-gá, te ni cuè téé yíndaha ñaha xií-yu ñá túú càháⁿ-güedé tnúhu-áⁿ chi cue téé-áⁿ naa-güedé. ⁷ Te tnúhu càhnu-áⁿ cúu-xí tnúhu Yá Ndiöxí, te mee-gá ní cachí-gá ndéé cútnàhá vátá ngáva-gá ñuyíú sá ncháá ñáyiú na quíndáá iní tnúhu-áⁿ te nduu táhù-yu cundecú-yu ndìhi-gá núú ío váha càa ndecu-gá ni caa ni quíhí. Te tnúhu-áⁿ ndúú yùhu-xi ni cuu. ⁸ Te ni ìⁿ cue téé yíndaha cue ñáyiú ñuyíú-a ñá túú tècú tnùnì-güedé tnúhu-áⁿ, chi núu dícó tècú tnùnì-güedé tnúhu-áⁿ te vá catá càa-güedé Xítohó Jesucristú núú cùrúxí cahni ñaha-güedé xii-gá ní cuu. Te ñu-ni Yaá-áⁿ ío càhnu cuu-gá. ⁹ Dico ducaⁿ ñi cuu chi ní quee ndáá-xí nàcuáa càháⁿ-xi núú tütú Yá Ndiöxí núú càhí-xi:

Yá Ndiöxí sa ní sani iní-gá nchaa nàcuáa cada-gá sá cúu-xí cuendá nchaa ñáyiú cuu iní ñáhá xii-gá.

Te sá ñi sani iní-gá cada-gá cúu-xí sá vátá quíni-gá ñáyiú te ni vátá cùndèdóho-gá-yu,

te ni ñá túú tnàhí cùtnunì iní-yu nása cada-gá.

Duha càhí-xi núú tütú-gá. ¹⁰ Te mee Yá Ndiöxí ní cachí-gá sá Espiritú-gá cada-xi te nchoo cùtnunì iní-ó nchaa nacuaa sàni iní-gá cada-gá, núu xíáⁿ ducaⁿ tècú tnùnì-ó vítna, chi Espiritú-gá xini-xi nchaandi túhú nàcuáa sàni iní-gá cada-gá.

¹¹ Te ñá ìⁿ ñáyiú xini ndáá-yu nàcuáa sàni iní ingá ñáyiú, chi mee ñáyiú-áⁿ xini ndáá-yu nchaa nàcuáa sàni iní-yu. Te ducaⁿ sàtnahá-xi cuu Yá Ndiöxí chi medii-ni Espiritú-gá xini-xi nchaa nàcuáa sàni iní-gá. ¹² Te nchoo chi Yá Ndiöxí ní taxi-gá Espiritú-gá ndécú ndìhi-o, te ñá díú ñuyíú-a ducaⁿ ni quèe espíritú ní ngúndecu ndìhi-o. Te ducaⁿ ñi taxi-gá Espiritú-gá ndécú ndìhi-o cuendá ducaⁿ cùtnunì iní-ó nàcuáa ndùu nchaa sá vaha sá dícó ducaⁿ ñi taxi-gá ndécú ndìhi-o. ¹³ Te cuendá nchaa sá vaha-áⁿ càháⁿ-ndí, te càháⁿ-ndí nàcuáa dàcahu iní ñáhá Espiritú Yá Ndiöxí xii-ndí, te ñá túú càháⁿ-ndí nàcuáa càhu iní ñáyiú ñuyíú-a càháⁿ-yu, te ñu-ni nchaa tnúhu dàcahu iní ñáhá Espiritú-gá xii-ndí càháⁿ-ndí, ñu-ni nchaa xíáⁿ dánèhé-ndí nchaa ñáyiú ndècu ndìhi tucu Espiritú-gá.

¹⁴ Te ñáyiú ñá túú ndècu ndìhi Espiritú Yá Ndiöxí ñá túú tnàhá iní-yu nàcuáa ndùu tnúhu dàtecú tnúhu ñaha Espiritú-gá xií-yu, te ni ñá túú tècú tnùnì-yu, te càhí-yu sá ñá túú nàndìhi-xi. Te ducaⁿ chi mee-ni nchaa ñáyiú ndècu ndìhi Espiritú-gá tècú tnùnì-yu nàcuáa ndùu tnúhu-áⁿ. ¹⁵ Te cue ñáyiú ducaⁿ ndècu ndìhi Espiritú Yá Ndiöxí cútnunì ndáá iní-yu ná cúu nchaa sá vaha, te vá yóo ìⁿ xini nchaa nàcuáa sàni iní-yu. ¹⁶ Te núú tütú Yá Ndiöxí càhí-xi: “Vá yóo ìⁿ xini nàcuáa sàni iní Yá Ndiöxí, núu xíáⁿ vá yóo ìⁿ ndacu ná danèhé ñáhá xii-gá”, duha càhí-xi núú tütú-gá. Te nchoo chi ìⁿ-ni sàni iní-ó ndìhi Xítohó Jesucristú.

3

Cue téé xíquide chiùn Yá Ndiöxí

¹ Te nchòhó ñáyiú ndècu ndìhi-í ichi Xítohó Jesucristú càhí tnúhu-í xii-ndo sá ñá ní níhí-í nàcuáa cada-í cáháⁿ-í tnúhu-gá núú-ndó dàtná càháⁿ-í núú nchaa ñáyiú quide nchaa nacuaa càháⁿ Espiritú Yá

Ndiöxí, chi ní cáháⁿ-í núú-ndó dàtná càháⁿ-í núú ncháa ñáyiú cùnūū ncháa sá cuèhé sá dúhá iní-xi, te ní quide ñaha-í xii-ndo dàtná cue ñáyiú íchí ñí sándáá iní tnúhu Xítohó Jesucristú, núú xíáⁿ ducaⁿ ñí cáháⁿ-í núú-ndó. ² Te ní quide ñaha-í xii-ndo dàtná ñí déhe yiquiⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ñí sá ñá túú tnàhí úhú tecú tnùní-ndó, te ñá túú ní dánèhé ñáhà-í xii-ndo ñí sá xítò-í sá vǎ tècú tnùní-ndó. Te quide cuendá-í sá díú-ní dùcaⁿ vǎ tècú tnùní-ndó ndèé vitna te núū na dánèhé ñáhà-í xii-ndo ncháa dava-gá tnúhu. ³ Te ducaⁿ chi quide-ni-ndo nacuaá sàni iní méé-ndó, chi ndècu-ni-ndo ichi cuédú iní, te nàá ndihí tnàha-ni-ndo, te ñá túú tnàhí cùu ñí nuu-ndo ndècu-ndo. Te xíáⁿ cútnùní sá méé-ní ncháa nacuaá sàni iní méé-ndó quide-ndo, te xiquide-ndo dàtná quidé ncháa ñáyiú ñá túú ndècu ichi Xítohó Jesucristú. ⁴ Te dava-ndo càchí-ndó: “Yúhú cùu-í cuendá té Pǎblú.” Te dava-ndo càchí-ndó: “Yúhú cùu-í cuendá té Àpolós”, duha càchí-ndó. Te sá dúcáⁿ càháⁿ-ndó xíáⁿ cútnùní sá quidé-ní-ndó mèe-ní ncháa nacuaá sàni iní méé-ndó.

⁵ Te yúhú té Pǎblú càchí tnúhu-í xii-ndo sǎ ñá túú cùnūū-í, te ní té Àpolós ñá túú cùnūū-dé chi dícó cue téé xínu cuechi núú Yǎ Ndiöxí cùu-ndí, te ní cáháⁿ-ndí tnúhu-gá núú-ndó, núú xíáⁿ ní sándáá iní-ndó. Te ndí dííⁿ ndí dííⁿ ndūū chiuⁿ ní táhú Yǎ Ndiöxí cada-ndí. ⁶ Te yúhú cùu-í dàtná ñí téé chihí tatá chi dàcaháⁿ ñáhà-í xii-ndo tūha-ndo ichi Yǎ Ndiöxí. Te té Àpolós cùu-dé dàtná ñí téé nàcuhñu chi téé-áⁿ ndécú-dé dánèhé ñáhà-dé xii-ndo tnūhu-gá. Te Yǎ Ndiöxí cùu-gǎ Yaá quidé sǎhnu tatá ní chihí-í-áⁿ, te duha càháⁿ-í chi diu-gá quidé-gǎ tá nihí ndéé-ndó ndècu-ndo ichi-gá. ⁷ Te núú xíáⁿ ní téé chihí tatá te ní téé nàcuhñu ñá túú cùnūū-güedé, dico Yǎ Ndiöxí ío cùnūū-gá chi diu-gá quidé-gǎ xínu tatá-áⁿ te sǎhnu-xi. ⁸ Te ñí-ñí cùu téé chihí tatá ndihí téé nàcuhñu. Te ducaⁿ sǎtnahá-xi cùu nchúhú cue téé xiquide chiuⁿ Yǎ Ndiöxí, te nàcuáa ndūū chiuⁿ ní quide-ndí te ducaⁿ cùndūū táhú taxi Yǎ Ndiöxí ndūū táhú-ndí. ⁹ Te nchòhó cùu-ndó dàtná ñí xichí núú ñí quée tatá, te nchúhú cùu ñí nuu-ndí quidé chiuⁿ-ndí xíáⁿ. Te ducaⁿ sǎtnahá-xi cùu-ndo chi cùu

cuendá ñáhà Yǎ Ndiöxí xii-ndo, te nchúhú cùu ñí nuu-ndí quidé-ndí chiuⁿ-gá.

Te cùu tucu-ndo datná ñí vehe sá vítá sáá, te ducaⁿ sǎtnahá-xi cùu-ndo chi Yǎ Ndiöxí quidé-gǎ tá sǎhnu nihnu-ndo ichi-gá cuáháⁿ. ¹⁰ Te yúhú cùu-í dàtná ñí téé cùnūū daciaa vehe te ní tava-í cimièntú-xi, te dííⁿ cue téé véxi dàcaa-güedé ndóho, te ñí ñí cue téé-áⁿ ío xínu ñuhu-xi cada cuendá-güedé nàcuáa dacaa-güedé. Núū ducaⁿ sǎtnahá-xi cùu yúhú chi Yǎ Ndiöxí ní taxi-gá chiuⁿ quide-í te chindee ñaha-gá, chi díhna-gá-í ní quixi-í ní cáháⁿ-í tnúhu Xítohó Jesucristú núú-ndó, te dííⁿ cue téé véxi dàcuaha ñaha-ná xii-ndo tnūhu-gá, te ñí ñí cue téé-áⁿ ío xínu ñuhu-xi cada cuendá-güedé nàcuáa dacuaá ñaha-güedé xii-ndo tnūhu-gá. ¹¹ Te cimièntú vehe-áⁿ cada iní-ó sǎ cùu-xí mèe Xítohó Jesucristú, te ducaⁿ chi yúhú ní dánèhé ñáhà-í xii-ndo ñí ngúndecu ndihí-ndo Xítohó Jesucristú, te vǎ yǎo-gá cundecu ndihí-ndo chi ñí díí-ni-gǎ ndécú. ¹² Te dava cue téé dàcaa-güedé vehe váha te chihí-güedé díhúⁿ cuááⁿ, ndihí díhúⁿ cuixíⁿ, ndihí yúú sǎ ío vii càa. Te dava-güedé dácaa-güedé vehe vítú, te dava-güedé dácaa-güedé vehe ité, te dava-güedé dácaa-güedé vehe tnuvixiⁿ. ¹³ Te sáá ndūū te ncháa vehe-áⁿ cǎyú-xi, te vehe vítú-áⁿ ndihí vehe ité-áⁿ ndihí vehe tnuvixiⁿ-áⁿ ndoo ndoo cǎyú, te ncháa vehe váha-áⁿ vǎ cǎyú-xi cuéi na yǎha ñuhú. Te ncháa cue téé ní dácaá vèhe váha-áⁿ cada iní-ó sǎ cùu-güedé ñáyiú ío váha quide chiuⁿ Yǎ Ndiöxí. Te ncháa cue téé ní dácaá vèhe vítú, ndihí cue téé ní dácaá vèhe ité, ndihí cue téé ní dácaá vèhe tnuvixiⁿ cada iní-ó sǎ cùu-güedé ñáyiú ñá túú cuíni cada chiuⁿ Yǎ Ndiöxí nàcuáa tàú-xi cundūū. Te sáá ndūū te cutnùní nàcuáa ndūū chiuⁿ ní quide ñí ñí ñáyiú, chi Yǎ Ndiöxí cáháⁿ-gá nàcuáa ndūū chiuⁿ ní quide ñí ñí ñáyiú ní quide chiuⁿ-gá. ¹⁴ Te cue ñáyiú ío váha xiquide chiuⁿ Yǎ Ndiöxí te cùdí chiuⁿ quidé-yu, te ñáyiú-áⁿ ñíhí-yu sá ndúú tǎhú-yu. ¹⁵ Te cue ñáyiú ñá túú quide chiuⁿ Yǎ Ndiöxí nàcuáa tàú-xi cundūū, te vǎ cùdí chiuⁿ ní quidé-yu chi cuíta te ndóo-ná-yu duha, dico mèe-yu chi naníhí tǎhú-yu.

¹⁶ Te yúhú càháⁿ-í dóho-ndo dàndacu-í iní-ndó sǎ cùu-ndó dàtná vehe Yǎ Ndiöxí,

chi Espiritú-gá ndécú ndìhi ñaha-xi xii-ndo. ¹⁷ Te núu yoo na dànaa ñaha xii nchohó ñáiyu cùu veñúhu-gá, te Yá Ndiöxí danàa ñaha-gá xii ñáiyu-án, te ducaⁿ càda-gá chi nchòhó cúú-ndó ñáiyu cùu cuendá-gá.

¹⁸ Te vá dándàhú-ndó mèe-ndo sá ìo túha-ndo. Te núu ìo dava-ndo sàni iní-ndó sá túha-ndo dàtná sání iní cue ñáiyu ñá túú ndècu ichi Yá Ndiöxí, te cada-ndo sá cúú-ndó dàtná ñáiyu ñá túú tnàhí túha, te ducaⁿ te cuu ndisa-ndo ñáiyu túha sá cúú-xí Yá Ndiöxí. ¹⁹ Te nchaa sá xìní tnùnì nchaa ñáiyu càchí sá ìo túha ñá túú ndècu ichi Yá Ndiöxí ñá túú nàndíhi-xi sá cúú-xí-gá. Te càchí-xi núu tütú-gá: “Nchaa ñáiyu càchí sá ìo túha te Yá Ndiöxí dandõo canúú ñáhá-gá xii-yu núu nchaa sá quidé-yu”, duha càchí-xi núu tütú-gá. ²⁰ Te càchí tucu-xi ìngá xichi: “Yá Ndiöxí cútnùnì iní-gá nchaa nàcuáa sàni iní ñáiyu càchí sá ìo túha. Te nchaa nàcuáa sàni iní-yu-án càchí-gá sá ñà túú vèdana nàndíhi-xi”, duha càchí-xi núu tütú-gá. ²¹ Núu xiáⁿ càháⁿ-í dóho-ndo sá vã càchí-ndó sá nchùhú cue téè dānehé ñáhá xii-ndo tnúhu-gá ìo càhnu cuu-ndí. Te nchaa sá ìo ñuyíú-a cùu-xi sá vāha sá cúú-xí-ndó. ²² Te cuèi yúhú ndìhi té Àpolós ndìhi té Pèlú ndécú-ndí sá cúú-xí-ndó, te cuèi nchaa sá ìo ñuyíú-a te cuèi nchaa nduu ndècu-ndo te cuèi sá cùú-ndó dico nchaa cùu-xi sá vāha sá cúú-xí-ndó. Te cuèi nchaa sá ndécú tnāvíí, te cuèi nchaa sá cóo ndèè cuèé-gá nchaa cùu-xi sá vāha sá cúú-xí-ndó. ²³ Te mee-ndo ndècu-ndo sá cúú-xí Xitohó Jesucristú, te mee Xitohó Jesucristú ndécú-gá sá cúú-xí Yá Ndiöxí.

4

Nàcuáa ndiùu chiuⁿ quide cue téè ní táuchíúⁿ Xitohó Jesucristú càháⁿ tnúhu-gá

¹ Te cada cuendá-ndó sá nchùhú dícó-ni cue téè xinu cuechi núu Xitohó Jesucristú cúú-ndí, te chiúⁿ-án ní taxi Yá Ndiöxí quidé-ndí càháⁿ-ndí tnúhu sá ní cachí-gá yíyùhu ni cuu. ² Te xini ñuhu-xi sá ncháá ñáiyu ducaⁿ ní sáñaha Yá Ndiöxí chiúⁿ quidé-yu cada ndáá-yu cada-yu chiúⁿ-án. ³ Te yúhú ñá túú quide cuendá-í núu nása ndiùu tnúhu càháⁿ-ndó cuendá-í núu cùu-í téè váha àdi ñá túú cùu-í. Te diu-ni ducaⁿ ñà túú quide cuendá-í núu nása-gá càháⁿ

nchaa dava-gá ñáiyu cuendá-í. Te ni mèe-í ñá túú càháⁿ-í núu cùu-í téè váha àdi ñá túú cùu-í. ⁴ Te sànuu iní-í sá ñà túú nã cúmānì-í núu Yá Ndiöxí, dico ñá díú sã xiáⁿ te cachí-í sá ñá túú cuèchi-í ndécú núú-gá, chi mee-gá náhá ndáá-gá te núu nása quide-í ndécú-í. ⁵ Te nchòhó vá càháⁿ-gá-ndó sá ñà túú cùndáá ñáiyu núu Yá Ndiöxí, chi vátá sáá-gá nduu cùndáá cuèchi-yu. Te na sáá nduu quixi tucu Xitohó Jesucristú te dàv-áⁿ dàtúu-gá nchaa sá quidé-yu, nchaa sá ñà túú xìnì-ó quidé-yu vitna, te ducaⁿ dàtúu-gá nchaa nàcuáa sàni iní-yu. Te Yá Ndiöxí càháⁿ váha-gá cuendá nchaa ñáiyu ní quide váha.

⁶ Te nchòhó ñáiyu ndècu ndìhi-í ichi Xitohó Jesucristú, càcunehe-í té Àpolós ndìhi yúhú núu-ndó dānehé ñáhà-í xii-ndo nàcuáa cada-ndo cuendá ducaⁿ cùu-xi ìⁿ sá vāha sá cúú-xí-ndó, ndìhi cuendá sá nchòhó canchicúⁿ nihnu-ndo càda-ndo mee-ni nchaa nàcuáa yòdo tnùnì núu tütú Yá Ndiöxí. Te ducaⁿ te vá càchí-ndó sá ìⁿ téè càháⁿ tnúhu Yá Ndiöxí ìo-gá càhnu cuu-dé dàcúúxí ìngá-dé. ⁷ Te nchòhó vá càchí-ndó sá ìo-gá cùnùu-ndo dacúúxí dàva-gá ñáiyu chi Yá Ndiöxí ní quide-gá ní ngúndecu ndìhi-ndo nchaa sá xìnì tnùnì-ndó. Te mee-gá ducaⁿ ní quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá méé-ndó ní quide-ndo dùcaⁿ ní ngúndecu ndìhi-ndo nchaa sá xìnì tnùnì-ndó.

⁸ Te nchòhó quidé-ndó sá ñà túú tnàhí-gá ná cúmānì-ndó núú Yá Ndiöxí, te quide-ndo sá ni ñhí-ndó nchaa sá cuìnì-ndó núú-gá ndécú ndìhi-ndo, te sànuu sá cúú-nã-ndó dàtná cue téè yìndaha ñáiyu, te nchùhú ñá túú cùu ìⁿnuu ndìhi ñaha-ndí xii-ndo quìndaha ndìhi ñaha-ndí xii-ndo ñáiyu, ìte váha-ni te núu dícó ndisa sá yìndaha-ndo ñáiyu chi tnàhá nchùhú ní tnahá ndìhi ñaha-ndí xii-ndo quìndaha-ó-yu te núu dícó cúú-xí ìⁿ sá ndáá dico ñáhá! ⁹ Te yúhú quidé cuendá-í sá nchùhú cue téè ní táuchíúⁿ Xitohó Jesucristú càháⁿ tnúhu-gá núu ñáiyu ní cachí Yá Ndiöxí sá cúú-ndí cue téè ñá túú nàndíhi sá cúú-xí dàva-gá ñáiyu. Te ní cachí tucu-gá sá cúú-ndí dàtná cue ñáiyu sa ní tnahá òré cuú-xi quíhíⁿ nacháhu cuèchi-xi,

te nchaa ñáyiú cùñúhu ñàhá-yu xii-ndí sá dúcáⁿ ndòho-ndí, te tnàhá nchaa espíritú cùñúhu ñaha-xi xii-ndí. ¹⁰ Te cuendá sá xínú cuèchi-ndí núú Xítohó Jesucristú, xiáⁿ cúú-ndí dàtná cue téé ñá túú vèdana nàndíhi sá cúú-xí ñáyiú. Te nchòhó quidé-ndó sá cúú-ndó ñáyiú ío túha ndècu ndíhi Xítohó Jesucristú. Te ñáyiú càchí-yu sá nchúhú cúú-ndí cue téé ñá túú ndàcu cada ìⁿ sá cádá sá cúú-xí Yá Ndiöxí. Te nchòhó quidé-ndó sá cúú-ndó ñáyiú ío váha ndàcu quide ìⁿ sá sání iní-ndó sá cúú-xí-gã. Te cue ñáyiú dàquee tihú ñáhã-yu xii-ndí, te nchòhó néhë-yu sá yíñúhu núú-ndó. ¹¹ Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiú quide úhú ñáhã-yu xii-ndí, te ni vèhe-ndí ñá túú ndèé cáá cùndecu-ndí. ¹² Te ío ndòho-ndí quidé chiúⁿ-ndí nihí-ndí sá xéxí-ndí. Te cue ñáyiú xícuehé ñáhã-yu xii-ndí dico xicáⁿ táhú-ndí núú Yá Ndiöxí cuendá-yu, te ñá cúú tnàhí quini ndeé ñáhã-yu xii-ndí dico quide cahnu iní-ndí nchaa sá quidé ñàhá-yu. ¹³ Te mee-ni tnúhu cuèhé tnúhu duha càháⁿ-yu cuendá-ndí dico sàcahnu iní-ndí te dàsahú-ndí-yu mee-ni tnúhu váha. Te càchí-yu sá cúú-ndí dàtná ìⁿ sá ñà túú-gã vèdana nàndíhi, te nchaa-ni nduu ducaⁿ càháⁿ-yu xáhãⁿ-yu xii-ndí.

¹⁴ Te yúhú duha càháⁿ-í núú tütú-a dàsahú ñáhà-í xii-ndo, dico ñá díú tnúhu sá cúú càháⁿ núú-ndó càháⁿ-í. Te duha càháⁿ-í dóho-ndo chi quide iní-í sá sùúni dàtná déhe mee-í cúú-ndó chi ío cùu iní ñáhà-í xii-ndo. ¹⁵ Te nchaa-o ndècu-o ichi Xítohó Jesucristú vitna, dico yúhú cúú-í téé díhna nuu ñí dánèhé ñáhá xii-ndo nacuaá ndùu tnúhu sá càháⁿ nàcuáa naníhí tàhú-ó, núú xiáⁿ cùú-í dàtná tãtã-ndó. Te cuèi vâi vihi cue téé na quixi-güedé danèhé ñáhã-güedé xii-ndo tnúhu-gã dico ìⁿ dii-ni yúhú cúú-í téé díhna nuu-gã ní dánèhé ñáhã xii-ndo tnúhu-gã. ¹⁶ Núú xiáⁿ càháⁿ-í dóho-ndo sá cãncíçúⁿ nihnu-ndo càda-ndo nchaa nacuaá quide-í.

¹⁷ Te xiáⁿ núu sa ní tendaha-í té Timùteú véxi coto ñaha-dé xii-ndo, te téé-áⁿ ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítohó

Jesucristú, te téé-áⁿ cachí tnúhu-dé xii-ndo nchaa nacuaá quide-í ndécú-í ichi-gã. Te diu-ni nàcuáa na càchí tnúhu-dé-áⁿ diu-ni ducaⁿ quide-í nchaa xichi núú tàcã ñáyiú dàcuaha tnúhu Xítohó Jesucristú. ¹⁸ Te dava nchòhó ío quide cahnu-ndo mee-ndo chi sání iní-ndó sã vã quixí-gã-í quixi coto ñaha-í xii-ndo. ¹⁹ Dico núu mee Yá Ndiöxí ná càchí-gã te ío ndíhi quixi coto ñaha-í xii-ndo, te dàvá-áⁿ quini-í te núu nása quide nchaa ñáyiú ducaⁿ ío xíquide càhnu mee-xi-áⁿ ndécú-yu ichi Xítohó Jesucristú. Te vá cádá cuendá-í tnúhu càháⁿ-yu chi chiúⁿ quidé-yu cada cuendá-í. ²⁰ Te vitna yìndaha ñaha Yá Ndiöxí xii-o, te chindee ñaha-gã xii-o quide-o nchaa sá váha sání iní-ó quide-o te ñá díú mèe-ni sá càháⁿ-ó. ²¹ Te ío chí cání iní núu ndèdacãa sá váha-gã cada-í òré ná quèxi-í núú ndécú-ndó, núu sá ténãá ñáhà-í xii-ndo àdi sá càháⁿ ndíhi ñaha-í xii-ndo ndíhi tnúhu vii tnúhu váha nàcuáa cutnùni iní-ndó sá cúú iní ñáhà-í xii-ndo.

5

Ìⁿ cuèchi càhnu vihi

¹ Te yúhú sa ní níhi ndãá-í tnúhu nàcuáa cùu ndecu-ndo, chi ìⁿ téé ndècu ndíhi-ndo ndeca-dé nãná chàhá-dé. Te xiáⁿ cúú-xí ìⁿ cuèchi càhnu vihi, chi ndéé nchaa ñáyiú ñá túú ndècu ichi Yá Ndiöxí càchí-yu sá vã cúú tnàhí ducaⁿ càda-o. ² ;Te nchòhó ío quide cahnu-ni-ndo mee-ndo xìndecu-ndo! ;Te tàú-ndó sã cùndíyí-ndó ndíxi cuèchi iní-ndó sã dúcáⁿ cùu ndecu-ndo ni cuu! Te téé ducaⁿ quide-áⁿ xini ñúhu-xi sá vã dàñã-gã-ndó nihí tnàhá ndíhi ñaha-dé xii-ndo ni cùu dico ñá túú dùcaⁿ quide-ndo. ³ Te yúhú ñá túú ndècu ndíhi ñaha-í xii-ndo dico dàtná tnúhu sá ndécú ndíhi ñaha-í xii-ndo chi ducaⁿ-ni ío ñúhu iní ñáhà-í xii-ndo. Te yúhú càchí-í sá nãchãhu téé-áⁿ cuèchi-dé sá dúcáⁿ quide-dé, te diu-ni ducaⁿ càháⁿ-í núú-ndó te núu dicó ndécú ndíhi ñaha-í xii-ndo. ⁴ Te òré nãtàcã-ndó càháⁿ ndíhi-ndo Yá Ndiöxí te diu-ni Xítohó Jesucristú ñá túú dàña ndéé-gã chindèe ñaha-gã xii-ndo, te òré-áⁿ cada-ndo nàcuáa cuini Xítohó Jesucristú cada-ndo, te cada iní-ndó sã tnàhá-í ndécú ndíhi ñaha-í xii-ndo. ⁵ Chi tàú-xi sá téé ducaⁿ quide-áⁿ daquèe tihú-ndó-dé, te ducaⁿ te

sácuíhná dandòho ñaha-xi xii-dé cuèi na cùu-dé, dico na sàá nduu te nduu táhú-dé cundecu-dé ndìhi Xítóhó Jesucristú.

6 Te nchòhó ñá túú ndùu váha-xi sá cächí-ndó sã ïo cãhnu cuu-ndo. Te xini-ndó sã cuèi luha-ni levadùrá ná quíhu yuchi cuáha pàá dándaa-xi cuèi luha-ni nà quíhu te nihí-ni yuchi sàháⁿ ndoho-xi. Te ducaⁿ sãtnahá-xi cùu nchohó chi núu ndècu ndìhi-ndo ìⁿ ñáyiu quide sá ñà túú váha te nchaa-ndo ñà túú-gã cúú váha iní-ndó ndècu-ndo. 7 Te xini ñuhu-xi sá cádá-ndó datná quidé cuè ñáyiu quide vico pascuá, chi ñá túú chihí-yu levadùrá yuchi cuáha pàá xéxi-yu nduu quidé-yu vico-áⁿ. Te sá quíhu pàá-áⁿ cada iní-ó sã cúú-xí nchaa sá cuèhé sá dúhá ñi xóo cada-ndo. Te vá cádá-gã-ndó ñi ìⁿ sá cuèhé sá dúhá, te ducaⁿ te cuu-ndo ñáyiu váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sã cúú-güedi datná Xítóhó Jesucristú nacuáa ní xihí-gá núú cùrúxi. 8 Te núu xiáⁿ xini ñuhu-xi sá vá cádá-gã-ndó ñi ìⁿ sá cuèhé sá dúhá sã ñi xóo cada-ndo, te ni vá cúhú-gã iní-ndó te ni vá cádá-gã-ndó, te ni yùhu ñi iní-ná-ndó cada-ndo mee-ni sá váha.

9 Te tutú sá sã ní dáquixi-í ndaha-ndo ñi cachí-í sá vá nihí tnáhá-ndó ndìhi cue ñáyiu ndècu ichi díí ìní. 10 Te sá dúcáⁿ cãháⁿ-í núú tütú ní dáquixi-í ndaha-ndo te vá cáni ìní-ndó sã yùhú cächí-í sá vá cúú-gã tnahá tnúhu-ndo ndìhi cue ñáyiu ndècu ichi cuehé ichi duha, ndìhi ñáyiu ndècu ichi díí ìní, ndìhi ñáyiu xihò nchaa sá ïó ñuyú, ndìhi ñáyiu dùhu sá ndécú ndìhi tnaha ñáyiu-xi, ndìhi ñáyiu quide cahnu sá cächí-yu cùu ndióxí te ñá ndàá sá ndiöxí cúú-xí chi dicó cue téé ñuyú-a ní cadúha nchaa xiáⁿ, chi núu ducaⁿ na càda-ndo vá tnáhá tnúhu-gã-ndó ndìhi-yu te xini ñuhu-xi sá vá cundècu-gã-ndó núú ndécú-yu. 11 Te ñá túú dùcaⁿ quee-xi nacuáa cãháⁿ-í núú tütú-í, chi yùhú cächí-í sá vá cúú tnáhá tnúhu-ndo ndìhi ñáyiu cächí sá ndécú ichi Xítóhó Jesucristú te ñá ndàá sá ndécú-yu ichi-gá. Te núu cùu-yu ñáyiu ndècu ichi díí ìní, àdi cuú-yu ñáyiu xihò nchaa sá ïó ñuyú-a, àdi cuú-yu ñáyiu quide

cahnu nchaa sá cächí-yu cùu ndióxí te ñá ndàá chi dicó cue téé ñuyú-a ní cadúha nchaa xiáⁿ, àdi cuú-yu ñáyiu yiti yùhu-xi, àdi cuú-yu ñáyiu quíhu, àdi cuú-yu ñáyiu dùhu sá ndécú ndìhi tnaha ñáyiu-xi, te nchaa ñáyiu ducaⁿ cächí sá ndécú ichi-gá te ñá ndàá te ducaⁿ xíquidé-yu, te ni vá cúú nihí tnáhá-ndó ndìhi-yu caxi-ndo ndìhi-yu. 12-13 Te ñá díú yùhú cúú-í téé cãháⁿ cuendá nchaa ñáyiu ñá túú ndècu ichi Xítóhó Jesucristú núu quide ndáá-yu àdi ñá túú quide ndáá-yu ndécú-yu, chi mee Yã Ndiöxí cãháⁿ-gá te núu nása quidé-yu ndécú-yu. Dico nchòhó chi tàú-ndó càda cuendá-ndó núu nása quide cue ñáyiu ndècu ndìhi-ndo ichi Xítóhó Jesucristú. Núu xiáⁿ xini ñuhu-xi daquee tíhú-ndó téé ducaⁿ ñà túú quide váha ndècu ndìhi-ndo-áⁿ, te vá dáñá-gã-ndó nihí tnáhá ndìhi ñaha-dé xii-ndo.

6

Nacuáa tàú-xi cada ñáyiu ndècu ichi Xítóhó Jesucristú te núu ñá túú ndècu ndìhi váha tnáhá-yu

1 Te dava nchòhó òré ñá túú ndècu ndìhi váha tnàha-ndo te cùyi-ndo cuáháⁿ-ndó núú cuè téé cùchiuⁿ ñá túú ndècu ichi Xítóhó Jesucristú sàcáⁿ cuèchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ tàú-ndó quíhíⁿ-ndó càcáⁿ cuèchi-ndo. 2 Te nchòhó sa nàha-ndo sá ncháá ñáyiu cùu cuendá Yã Ndiöxí sáa nduu cãháⁿ-yu te núu ní quide ndáá nchaa dava-gá ñáyiu àdi ñá túú ní quide ndáá-yu, te nchòhó tnáhá-ndó cùu-ndo ñáyiu ducaⁿ cãháⁿ, te núu ducaⁿ te cutnùní iní-ndó sã ndácú-ndó càda ndáá-ndó nchaa cuèchi sá ñá túú ùhú cundáá vitna ndècu-ndo ñuyú-a. 3 Te nchòhó sa nàha-ndo sá ncháá ndéé cue espíritú xínú cuèchi núú Yã Ndiöxí sáa nduu cãháⁿ-ó te núu nása quide-xi ndecu-xi. ¡Núu xiáⁿ cutnùní iní-ó sã úúⁿ-gã ndacu-o càda ndáá-ó nchaa cuèchi sá ïó ñuyú-a! 4 Te núu ïó dava-ndo ïó nása cùu ndecu-ndo te xinaá-ndó, te vá quíhíⁿ-ndó càcáⁿ cuèchi-ndo núú cuè téé ndèhe-ndo sá ñá túú ndècu-güedé ichi Yã Ndiöxí, dico nchòhó chi da núú cuè téé-áⁿ cuáháⁿ-ndó sàcáⁿ cuèchi-ndo. 5 Te duha cãháⁿ-í cuendá cucahaⁿ núú-ndó chi ñá túú quide váha-ndo sã dúcáⁿ quide-ndo. ¿Te náa dicó-nã ñá túú

tnàhí ìⁿ té cùtnuní iní-xi nàcuáa cada ndáá cuéchi-ndo ndècu ndìhi-ndo ichi Xítóhó Jesucristú-ãⁿ? ⁶ Te nchòhó, ñá túú quide váha-ndo, chi dava-ndo cuáháⁿ-ndó núú cuè téé ñá túú ndècu ichi Xítóhó Jesucristú sàcáⁿ cuéchi-ndo cuendá dava-gá cue ñáyiú ndècu ndìhi-ndo ichi-gá.

⁷ Te ñá túú quide váha-ndo sã dúcáⁿ nàá ndìhi tnàha-ndo te cuáháⁿ-ndó sàcáⁿ cuéchi-ndo, te váha-gá sã cáda càhnu iní-ndó cuèi náandi na càda ñaha tnaha ñáyiú-ndo xii-ndo cuéi dùhú-yu sã ndécú ndìhi-ndo dico cada càhnu-ni iní-ndó. ⁸ Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xí tnàha ñáyiú-ndo, chi cùu úhú iní-ndó-yu, te dùhu-ndó-yu, te ndéé mée-ndó nàcuáa ndècu-ndo ichi Xítóhó Jesucristú ducaⁿ quide tnaha-ndo.

⁹ Te nchòhó sa nàha-ndo sã ncháá ñáyiú ndècu ichi cuehé ichi duha vá ndúú tãhú-yu cundecú-yu núú ndécú Yã Ndiõxí táxí tnùní-gá, núu xiãⁿ vá cání iní-ndó sã ñáyiú-áⁿ nduu tãhú-yu cundecú-yu ndìhi-gá. Te ni cuè ñáyiú ndècu ichi díí ìní, te ni cuè ñáyiú quide cahnu nchaa sã càchí-yu cùu ndiõxí te ñá ndàá chi dícó cue téé ñuyíú-a ní cadúha nchaa xiãⁿ, te ni cuè téé càháⁿ ndìhi ñadìhí te ñá díú ñadìhí-güedé cùú-yu, te ni cuè ñáyiú dìhí càháⁿ ndìhi téé te ñá díú yíí-yu cùu-güedé, te ni cuè téé càháⁿ ndìhi tnàha téé-xi, ¹⁰ te ni cuè ñáyiú dùhu, te ni cuè ñáyiú xìho sã ndécú ndìhi tnaha ñáyiú-xi, te ni cuè ñáyiú quihu, te ni cuè ñáyiú càháⁿ úhú, te ni cuè ñáyiú dànícuehé tnàha ñáyiú-xi te dùhu ñahá-yu, te ni ìⁿ cue ñáyiú duha xíquide vá ndúú tãhú-yu cundecú-yu núú ndécú Yã Ndiõxí táxí tnùní-gá. ¹¹ Te dava nchòhó ducaⁿ ñí xóo cada-ndo ni cùu, te vitna ní cuu-ndo ñáyiú sa ní nduu ndoo ní nduu nine iní-xi, te ní cuu-ndo ñáyiú cùu cuendá Yã Ndiõxí, te ní cuu tucu-ndo ñáyiú ñá túú-gã cuéchi-xi ndècu núú-gã. Te ducaⁿ ñí quide ñaha Yã Ndiõxí xii-ndo sã váha sã cuendá Xítóhó Jesucristú, te ní ngúndecu ndìhi-ndo Espíritú Yã Ndiõxí.

Nàcuáa ndiú cuendá yiqui cùñú-ó

¹² Te càchí ñáyiú sã ncháá sã sání iní-ó cuu cada-o, te ndáá càháⁿ-yu dícó-ni sã

ñã ncháá cùu-xi sã váha sã cúu-xí-ó. Te núu cuíni nchaa sã sání iní-ó-ãⁿ taxi tnùní ñahá-xí te vá cáda-ó. ¹³ Te nchòhó sa xíní-ndó sã ncháá sã xéxí-ó cuánguee-xi xití-ó, te xití-ó ñí cuáha tnàhí-xi sã cùhúⁿ nchàa sã cáxí-ó, dico xití-ó ndìhi nchaa sã xéxí-ó chi naa-xi. Te Xítóhó Jesucristú néhé cuendá-gá yiqui cùñú-ó, te ducaⁿ yiqui cùñú-ó cùu-xi cuendá-gá, te ñá túú ní cuáha yiqui cùñú-ó sã cùndècu-xi ichi díí ìní. ¹⁴ Te dàtná ní quide Yã Ndiõxí ní dándótó-gã Xítóhó Jesucristú ducaⁿ càda ñaha-gá xii nchoo tucu chi dandòto ñaha-gá xii-o núu na cùú-ó, chi ndàcu-gá quidé-gã nchaa sã váha.

¹⁵ Te nchòhó sa nàha-ndo sã yiqui cùñú-ó cùu-xi cuendá Xítóhó Jesucristú chi ìⁿ-ni cùu-o ndìhi-gá, núu xiãⁿ ñá túú tnàhí ndùu váha-xi càháⁿ ndìhi-o ñáyiú ndècu ichi díí ìní, chi yiqui cùñú-ó cùu-xi cuendá Xítóhó Jesucristú, te núu ducaⁿ na càda-o te cada iní-ó sã cuendá-nã ñáyiú-áⁿ cúu yiqui cùñú-ó, núu xiãⁿ ñá túú tnàhí ndùu váha-xi ducaⁿ càda-o. ¹⁶ Te sa xíní-ndó sã núu ìⁿ téé na càháⁿ ndìhi-dé ìⁿ ñadìhí ndécú ìchi díí ìní te cada iní-ó sã ìⁿ-nã yiqui cùñú cùú-yu. Te ducaⁿ càháⁿ-xi núu tütú Yã Ndiõxí núu càchí-xi: “Ìⁿ téé na càháⁿ ndìhi-dé ìⁿ ñadìhí te ìⁿ-nã yiqui cùñú cùú-yu”, duha càchí-xi. ¹⁷ Te ducaⁿ sãtnahá-xi cùu nchaa ñáyiú tnàhá tnúhu ndìhi Xítóhó Jesucristú, chi ìⁿ-nã cùú-yu ndìhi-gá.

¹⁸ Te núu xiãⁿ càháⁿ-í dóho-ndo sã vã cùndècu-ndo ichi díí ìní, chi núu ducaⁿ na càda-ndo te ñá túú tnàhí sã váha cùu-xi sã cúu-xí yiqui cùñú-ndó chi ío dàcuíta nihnu-xi yiqui cùñú-ndó. Te nchaa dava-gá sã cuehé sã dúhá ñá túú quide-xi yiqui cùñú-ndó dàtná quidé xiãⁿ. ¹⁹ Te nchòhó sa cùtnuní iní-ndó sã yiqui cùñú-ndó cùu-xi datná ìⁿ vehe núu ndécú Espíritú Yã Ndiõxí. Te ducaⁿ sãtnahá-xi cùu yiqui cùñú-ndó chi ndècu-ndo ndìhi Espíritú-gá. Te mee-gã ní taxi-gá Espíritú-gá ndécú ndìhi-ndo, te ñá díú mèe-ndo cuu cuendá-ndó mèe-ndo chi Yã Ndiõxí cúu cuendá ñahá-gã xii-ndo. ²⁰ Te ducaⁿ cùu-ndo ñáyiú cùu cuendá Yã Ndiõxí chi Xítóhó Jesucristú ní nacháhu-gá nchaa yíca cuèchi-ndo. Te núu xiãⁿ xíní ñùhu-xi sã ñihíí ní ndúú-ndó càda-ndo

nacuáa cuu càhnu Yá Ndiòxí, te ducaⁿ tau-xi cada-ndo chi espíritú-ndó ndihí yiqui cuñú-ndó cùu-xi cuendá-gá.

7

Sáhú sã cúú-xí ñáyiú ní tnándaha

1 Te ní quexìo tutú sá ñí dáquíxí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó núú tütú-ndó. Te váha cada-xi te núu vá cándèca téé ñadìhí, te ducaⁿ-ni vâha cada-xi te núu ñáyiú ñíhí vá cándècá-yu téé. 2 Te dicó-ni sá núu ducaⁿ na càda-ndo te dava-ndo càni iní-ndó cùndecu-ndo ichi díí iní. Núu xíáⁿ xíní ñùhu-xi sá ncháá cuè téé ndi dííⁿ cùndecu ñadìhí-güedé, te ducaⁿ-ni tucu nchaa cue ñáyiú ñíhí ndi dííⁿ cùndecu yíi-yu. 3 Te càchí tnúhu-í xii-ndo sã ncháá cuè téé vá cúú càchí-güedé sá vâ cúú cãháⁿ ndihí-güedé ñadìhí-güedé, te ñu-ni ducaⁿ cuè ñáyiú ñíhí tucu, vá cúú càchí-yu sá vâ cúú cãháⁿ ndihí-yu yíi-yu. 4 Te nchaa cue ñáyiú ñíhí chi ñá díú mèe-ní-yu cùu cuendá-yu yiqui cùñú-yu chi tnàhá cúú cuendá yíi-yu, te ducaⁿ-ni nchàa cue téé tucu chi ñá díú-ní mèe-güedé cúú cuendá-güedé yiqui cùñú-güedé chi tnàhá cúú cuendá cue ñadìhí-güedé. 5 Te cue téé vá cúú càchí-güedé sá vâ cúú cãháⁿ ndihí-güedé ñadìhí-güedé. Te ni cuè ñáyiú ñíhí vá cúú càchí-yu sá vâ cúú cãháⁿ ndihí-yu yíi-yu. Àdi te núu ní ndatnúhu-yu sá vâ dúcáⁿ càdá-yu ñí ùú nduu cuendá sá cuñí-yu ío cãháⁿ ndihí-yu Yá Ndiòxí, dico nà yáha núu ná daha nduu ducaⁿ ñí ndatnúhu-yu sá vâ dúcáⁿ càdá-yu te naníhí tnàhá tucú-yu, chi núu ñáhá te cudana te vá cuácàhnu iní-yu te sácúíhná dacãháⁿ ñáhá-xí xii-yu cadá-yu sá ñá túú tau-yu cadá-yu.

6 Te tnúhu càháⁿ-í-a quèe-xi sá tée ndihí ñadìhí cuu candeca tnàhá-yu dico ñá túú quide yica-í sá dúcáⁿ càdá-yu. 7 Te yúhú sání iní-í sá núu dicó sá cúú te nchaa-ndo cùndecu-ndo datná ndécú-í, dico ñáhá chi mee Yá Ndiòxí ní cachí-gá nacuáa nduu táhú-ó ñí ñí-o cundecu-o, chi dava-o ñí cutáhú-ó núú-gã sá cùndècu ñadìhí-ó te dava-o ñáhá. 8 Te càchí tnúhu-í xii nchòhó

cue téé vátá ñíhí-gá ñadìhí-xi sá vâha-gá sá núu vá cùndècu ñadìhí-ndó datná yúhú. Te ducaⁿ-ni nchòhó cue ñáyiú ñíhí ñáyiú vátá ñíhí-gá yíi-xi sá vâha-gá sá núu vá cùndècu yíi-ndo. Te ñu-ni duha càháⁿ-í sá cúú-xí nchàa nchòhó ñáyiú ñíhí ní quendóo quèé sá vâha-gá sá núu vá cándèca-gá-ndó tée. 9 Te càchí tnúhu-í xii nchaa-ndo sã núu xito-ndo sá vâ cùndècè iní-ndó cùndecu mee-ndo te váha-gá sá núu tnándaha-ndo, te ñá díú sã mèe-ní càni cuehé cani duha iní-ndó cùndecu-ndo.

10 Te nchaa nchòhó ñáyiú sa ní tnándaha càháⁿ-í dóho-ndo, te ñá díú mèe-í duha càhu iní-í càháⁿ-í dóho-ndo chi Xítohó Jesucristú ducaⁿ dàcahu iní ñáhá-gã xii-í, chi mee-gã cuñí-gá cada-ndo nacuáa na càháⁿ-í-a. Te nchaa nchòhó cue ñáyiú ñíhí càháⁿ-í dóho-ndo sã vâ dáñá-ndó yíi-ndo. 11 Te núu ío dava-ndo sã ní dáñá-ndó yíi-ndo, te xini ñùhu-xi sá vâ cándèca-gá-ndó tée, chi cundecu mee-nã-ndó àdi núu ñáhá te naqueheⁿ tucu-ndo tée ní cuu yíi-ndo. Te nchaa nchòhó cue téé ndècu ñadìhí-xi càháⁿ-í dóho-ndo sã vâ dáñá-ndó ñáyiú cùu ñadìhí-ndó.

12 Te tnúhu na càháⁿ-í-a cùu-xi sá ñí sani iní mèe-í te ñá díú tnúhu sá ñí cachí Xítohó Jesucristú càháⁿ-í cúú-xí. Te núu dava nchòhó cue téé ndècu ichi Xítohó Jesucristú ndécá-ndó ñáyiú ñíhí ñáyiú ñá túú ndècu ichi-gá, te vá dáñá-ndó-yu te núu cùu váha iní-yu ndèca ñáhá-yu xii-ndo. 13 Te núu dava nchòhó cue ñáyiú ñíhí ñáyiú ndècu ichi Xítohó Jesucristú ndécá-ndó cuè téé ñá túú ndècu ichi-gá te vá dáñá-ndó-güedé te núu cùu váha iní-güedé ndécá ñàha-güedé xii-ndo. 14 Te núu ñí tée ñá túú sàndáá iní-dé Xítohó Jesucristú te ñadìhí-dé sàndáá iní ñáhá-án xii-gá, te tée-án ñí cuu-dé ñí tée sa ní cuyatni tnàhá tnúhu ndihí ñàha xii-gá sá cuendá ñadìhí-dé. Te ducaⁿ sãtnahá-xi cùu tucu ñadìhí ñá túú sàndáá iní ñáhá xii Xítohó Jesucristú te yíi-aⁿ sàndáá iní ñáhá-dé xii-gá, te ñàha-án sa ní cuyatni tnàhá tnúhu-aⁿ ndihí-gá sá cuendá yíi-aⁿ, te ñu-ni ducaⁿ sãtnahá-xi cùu cue landú-yu chi sa ní cuyatni tnàhá tnúhu-güexi ndihí-gá. Te núu vá dúcáⁿ cùu te cue landú-yu-án ío xica cùndecu-güexi

núu-gă. ¹⁵ Te núu ìⁿ tée ñá túú sàndáá iní ñáhá xì Xítóhó Jesucristú cuiní-dé dañá tnàha-dé ndìhi ñadìhí-dé ñaha sàndáá iní ñáhá xì Xítóhó Jesucristú, te ñu-ni na càda-dé nàcuáa sàni iní-dé. Te ñu-ni ducaⁿ tucu te núu ñadìhí ñaha ñá túú sàndáá iní ñáhá xì Xítóhó Jesucristú cuiní-aⁿ dañá-aⁿ tée sàndáá iní ñáhá xì-gá, tée cùu yì-aⁿ te ñu-ni na càda-aⁿ nacuáa sàni iní-aⁿ. Chi tée sàndáá iní ñáhá xì Xítóhó Jesucristú ñá túú tàú-dé cada yica-dé ñadìhí-dé cundecu ndìhi ñaha-aⁿ xì-dé te núu ñá túú cuiní-aⁿ. Te ñu-ni ducaⁿ ñadìhí ñaha sàndáá iní ñáhá xì-gá ñá túú tàú-aⁿ cada yica-aⁿ cundecu ndìhi ñaha yì-aⁿ xii-aⁿ te núu ñá túú cuiní-dé cundecu ndìhi ñaha-dé xii-aⁿ, chi Yá Ndiòxí cuiní-gá sá ncháá nchò ñáyiu ndècu ichi-gá cundecu váha-o vǎ nàá-ó. ¹⁶ Chi cue tée sàndáá iní tnúhu Xítóhó Jesucristú ñá túú cùtnuní iní-güedé te núu ndacu-güedé canu ichi-güedé ñadìhí-güedé ichi-gá àdi ñáhá te núu ñá túú sàndáá iní ñáhá-yu xii-gá, te ducaⁿ-ni cuè ñáyiu ñadìhí sàndáá iní tnúhu Xítóhó Jesucristú ñá túú cùtnuní iní-yu te núu ndacú-yu canu ichi-yu yì-yu ichi-gá àdi ñáhá te núu ñá túú sàndáá iní ñáhá-güedé xii-gá.

¹⁷ Te duha na càchí tnúhu-í xii-ndo, nchaa chiuⁿ ní nduu táhú-ndó nǎ Yá Ndiòxí quidé-ndó ndéé cùtnàhá ní cáháⁿ ñáhá-gǎ xii-ndo ní natuha-ndo ichi-gá te ñu-ni chiuⁿ-áⁿ cada-ndo cundecu-ndo. Te nchaa xichi núu tàcá ñáyiu dàcuaha tnúhu-gá ñu-ni duha càháⁿ-í dóho-yu. ¹⁸ Te nchaa cue tée ndècu seña ñì-xi dàtná ní cachi ndí Moisés, cue tée ní cáháⁿ Yá Ndiòxí ndécú ichi-gá, te ñu-ni ducaⁿ cùnduu-güedé cundecu-güedé, te nchaa cue tée ñá túú ndècu seña ñì-xi ní cáháⁿ-gá cundecu ichi-gá, ñu-ni ducaⁿ cùnduu-güedé cundecu-güedé vǎ cuǎha-güedé seña ñì-güedé. ¹⁹ Te ìⁿ-ni cùu-xi cuéi na cuǎha-o seña ñì-o àdi vǎ cuǎha-o. Te sá ìo-gá xíní ñùhu-xi cada-o xiǎⁿ cúu-xí sǎ cáda-ó ncháa nacuáa cuiní Yá Ndiòxí. ²⁰ Chi xìni ñùhu-xi sá cùndecu-ni-o datná ndécú-ó cùtnàhá ní cáháⁿ ñáhá Yá Ndiòxí xii-o ní ngúndecu-o ichi-gá. ²¹ Te núu cùu-ndo ñáyiu ñá túú tnàhí dàñá quee núu chíuⁿ pàtróoⁿ-xi cùtnàhá ní cáháⁿ ñáhá Yá Ndiòxí xii-ndo, te ñá túú ñá cani iní-ndó, dico núu dàñá ñaha patróoⁿ-ndó quee-ndo núu chíuⁿ-ndó te váha-ni quee-ndo nǎ

chíuⁿ-ndó. ²² Te sáta ní cáháⁿ ñáhá Xítóhó Jesucristú xii nchòhó ñáyiu ducaⁿ ñá túú tnàhí dàñá quee núu chíuⁿ pàtróoⁿ-xi-áⁿ, te ní cuu-ndo dàtná ñáyiu dàñá queé nǎ chíuⁿ pàtróoⁿ-xi sá cúu-xí-gǎ, te ducaⁿ chi ñá túú-gǎ ndécú-ndó ichi cuehé ichi duha. Te nchòhó ñáyiu dàñá queé nǎ chíuⁿ pàtróoⁿ-xi cùu-ndo datná ñáyiu ñá túú tnàhí dàñá quee núu chíuⁿ pàtróoⁿ-xi sá cúu-xí Xítóhó Jesucristú, te ducaⁿ chi xìnu cuechi-ná-ndó nǎ-gǎ. ²³ Te Yá Ndiòxí ní nduu cuendá ñáhá-gǎ xii-o chi Xítóhó Jesucristú ní nacháhu-gá nchaa yíca cuèchi-o sǎ ndécú nǎ Yá Ndiòxí ní cùu, te vǎ dáñá-ndó sǎ tnàha ñáyiu-ndo nàdatuhú iní ñáhá-yu xii-ndo vǎ cúnú cuèchi-ndo núu Xítóhó Jesucristú nàcuáa tàú-xi cunduu. ²⁴ Te núu xiǎⁿ càchí tnúhu-í xii nchaa nchòhó ñáyiu ndècu ndìhi-í ichi Xítóhó Jesucristú sá cùndecu-ni-ndo datná-ni ndècu-ndo ndéé cùtnàhá ní cáháⁿ ñáhá-gǎ xii-ndo, te ñu-ni ducaⁿ cundecu-ndo ichi-gá.

²⁵ Te càchí tnúhu tucu-í xii-ndo sǎ Xítóhó Jesucristú ñá túú càchí tnúhu-gá xii-í nǎ nása cáháⁿ-í cuendá nchaa ñáyiu vǎtá tnàndaha-gá. Te duha sàni iní-í cáháⁿ-í cuendá-yu, te nchòhó cuu quíndáá iní-ndó tnúhu càháⁿ-í chi Xítóhó Jesucristú chindèe chitúu ñaha-gǎ xii-í. ²⁶ Te yúhú càchí-í sǎ sǎ cuendá nchaa tnúndòho tnúhu ndàhú ìo ñuyíú-a vitna, te váha-gǎ sǎ ncháá ñáyiu te núu nása xíndecú-yu te ducaⁿ-ni na cùndecú-yu. ²⁷ Te nchaa cue tée ndècu ñadìhí-xi te ducaⁿ-ni na cundecu-güedé ndìhí-yu, te nchaa cue tée ñá túú ñadìhí-xi te ducaⁿ-ni na cùnduu-güedé vǎ ndúcú-güedé ñadìhí-güedé. ²⁸ Dico nchaa cue tée na ndècu ñadìhí-xi te ñá díú ìⁿ cuèchi cùu-xi sá dúcáⁿ ná ndècu-güedé ñadìhí-güedé, te ñu-ni ducaⁿ cùu tucu cue ñáyiu ñadìhí te núu na ñìhí-yu yì-yu chi ñá díú ìⁿ cuèchi cùu-xi sá dúcáⁿ ñìhí-yu yì-yu. Te núu cue tée na ñìhí-güedé ñadìhí-güedé te nándi ndohó-yu cundecú-yu ñuyíú-a, te núu xiǎⁿ duha càháⁿ-í cuendá sǎ vǎ ndúcú-güedé ñadìhí-güedé cuendá sǎ vǎ ndóhó-yu.

²⁹ Te nchaa nchòhó ñáyiu ndècu ndìhi-í ichi Xítóhó Jesucristú na càchí tnúhu-í xii-ndo sǎ ñá túú-gǎ vǎi nduu cumání te quixi tucu Xítóhó Jesucristú, núu xiǎⁿ xíní

ñuhu-xi sá ndèé vitna ngüita nchaa cue tée ndècu ñadihí-xi cada-güedé chiúⁿ Xítohó Jesucristú, te cada-güedé dàtná sá ñà túú ñàdihí-güedé. ³⁰ Te nchaa ñáyiú ndihú iní-xi te na càda-ní-yu sá ñà túú ndihú iní-yu cadá-yu chiúⁿ Yá Ndiöxí. Te nchaa ñáyiú cudií iní-xi te na càda-ní-yu sá ñà túú cudií iní-yu cadá-yu chiúⁿ-gá, te nchaa ñáyiú ndècu ndihi nándi sá ndécú ndihi te na càda-ní-yu sá ñà túú ñà ndécú ndihí-yu cadá-yu chiúⁿ-gá. ³¹ Te nchaa ñáyiú nèhe chiuⁿ nchaa sá ío ñuyíú-a te na càda-ní-yu cuendá sá ñà túú ñà néhé chiúⁿ-yu cadá-yu chiúⁿ Yá Ndiöxí, chi nchaa sá ío ñuyíú-a sa ñuhu-xi ichi cuáháⁿ-xi núú ndihí ñihnu-xi.

³² Te cuení-í sá vǎ cúhúⁿ iní-ndó nándi sá ío ñuyíú-a, te ni ñà túú tnáhi ná cani iní-ndó cundecu-ndo, chi nchaa cue tée ndècu ichi Xítohó Jesucristú xíndecu mee ío ñuhu iní-güedé cada-güedé chiúⁿ-gá nàcuáa cudiú-güedé núú-gǎ. ³³ Te nchaa cue tée sa ndècu ñadihí-xi cue tée ndècu ichi-gá ñuhu iní-güedé nàcuáa cada-güedé cundecu-güedé ñuyíú-a cuendá ducaⁿ cudiú-güedé núú ñadihí-güedé. ³⁴ Te diu-ni ducaⁿ cùu tucu cue ñáyiú dihi chi ñà túú ñⁿ-ni cuu ñáyiú sa ndècu yⁿ-xi ndihi ñáyiú vátá cundècu-gá yⁿ-xi, chi ñáyiú ndècu ichi Xítohó Jesucristú ñà túú ndèca tée ío ñuhu iní-yu cadá-yu chiúⁿ-gá nàcuáa ñihí ní ndúú-yu cundecu yíñuhú-yu núú Yá Ndiöxí, dico cue ñáyiú dihi ndécá tée ndècu ichi-gá ío ñuhu iní-yu nàcuáa cundecú-yu ñuyíú-a cuendá cudiú-yu núú yⁿ-yu.

³⁵ Te duha càháⁿ-í cuendá cúú-xí ñⁿ sá vǎha xii-ndo, te cudiú núú tnáhá-ndó, te cuu-ndo ñáyiú cada ndáá núú Xítohó Jesucristú, te mee-ni-gǎ cuhuⁿ iní-ndó. Te ñà díú sǎ dúhá càháⁿ-í te quide yica-í sá cáda-ndó nàcuáa càháⁿ-í.

³⁶ Te núú ío dava-ndo sàni iní-ndó sǎ ñà túú ndúu váha-xi sá ío cuu sacuéhé déhe yoco-ndo cundecú-yu ña, te núú sàni iní-ndó sǎ vǎha-gá candecá-yu tée te cada-ndo nàcuáa sàni iní-ndó, chi ñà díú ñⁿ cuéchi cùu-xi. ³⁷ Te núú dava-ndo ndècu déhe yoco-ndo, te vǎ yóo ñⁿ cada yica ñaha xii-ndo sá cándecá-yu tée. Te núú mee-ndo sàni váha iní-ndó nàcuáa cada-ndo, te núú

vǎ dásáⁿ-ndó déhe yoco-ndo càndeca ñaha tée te quide váha-ndo sǎ dúcáⁿ quide-ndo. ³⁸ Te nchaa ñáyiú dásaⁿ déhe yoco-xi càndeca ñaha tée te váha-ni quide-yu, te nchaa ñáyiú ñà túú dásaⁿ déhe yoco-xi càndeca ñaha tée te váha-gá tucu quide-yu sá dúcáⁿ quide-yu.

³⁹ Te nchaa ñáyiú dihi ndécú yⁿ-xi xini ñuhu-xi sá cundècu-ní-yu ndihi yⁿ-yu ñini ndècu vívú-güedé chi ducaⁿ càháⁿ tnúhu sá dánèhé ñáhá xii-o nacuáa cada-o cundecu-o, dico núu na cùú-güedé te cuu naquehéⁿ-yu ingá tée candecá-yu dícó-ni sá diu-ni tée ndècu ichi Xítohó Jesucristú. ⁴⁰ Te yúhú sání iní-í sá ío-gá váha cundecú-yu te núu vǎ nánducú-yu ingá tée candecá-yu, te duha càháⁿ-í chi Espiritú Yá Ndiöxí ducaⁿ dàcahu iní ñáhá-xi xii-í cáháⁿ-í.

8

Cuendá nchaa sá nchító-ó sǎñaha ñáyiú ndúu táhú nchaa sá càchí-yu cùu ndiöxí

¹ Te vitna na càháⁿ-í cuendá nchaa sá nchító-ó sǎñaha ñáyiú ndúu táhú nchaa sá càchí-yu cùu ndiöxí te ñà ndáa chi dícó ndaha cue tee ñuyíú-a ní cuáha nchaa xiǎⁿ. Te nchoo sa cùtnuní váha iní-ó cuendá nchaa xiǎⁿ, dícó-ni sá cuendá nchaa sá cùtnuní váha iní-ó xiǎⁿ quide càhnu-o mee-o, dico núu cùu iní-ó tnáha ñáyiú-o te canu ichi-ó-yu ichi váha. ² Te núu dava-ndo sàni iní-ndó sǎ túha-ndo dico cùu-ndo ñáyiú vátá cútúha-gá nàcuáa tàú-xi cunduu. ³ Te núu nchòhó cúú iní-ndó Yá Ndiöxí te mee-gǎ càháⁿ-gá sá cúú-ndó ñáyiú cùu cuendá-gá.

⁴ Te vitna na càchí tnúhu-í xii-ndo nàcuáa ndúu cuendá nchaa sá nchító-ó sǎñaha ñáyiú ndúu táhú nchaa sá càchí-yu cùu ndiöxí te ñà ndáa chi dícó ndaha cue tée ñuyíú-a ní cuáha nchaa xiǎⁿ. Te nchoo cùtnuní iní-ó sǎ ncháá sǎ càchí ñáyiú cùu ndiöxí cáduha-yu ñuyíú-a ñà túú cùu-xi ndiöxí, chi ñⁿ dii díí-ni Yá Ndiöxí ndécú. ⁵ Te cue ñáyiú ñuyíú-a càchí-yu sá cuéi andúu te cuéi ñuyíú-a ndècu titní ndiöxí. Te ndáa sá ndèni ní cuu ndècu espíritú sá càchí ñáyiú cùu ndiöxí te ñà ndáa sá ndiöxí cúú-xí, te nchaa xiǎⁿ táxi tnuní ñáhá-xi xii-yu. ⁶ Te nchoo cùtnuní ndáa iní-ó sǎ ñⁿ dii díí-ni Yá Ndiöxí ndécú te diu-gá cúú-gǎ Tátá-ó, te nchoo cùu-o ñáyiú cùu cuendá-gá. Te diu-ni mee-gǎ ní táuchíúⁿ-gǎ ní cuáha nchaa sá

ìò ñuyíú-a, te cùtnuní tucu iní-ó sã ñⁿdií díí-ní Xítóhó Jesucristú ndécú, te Yaá-áⁿ ñí quide-gá nchaa chiúⁿ ní táhú Dütú Ndiöxí ní cadúha-gá nchaandi túhú sá ìò ñuyíú. Te diu-ni mee Xítóhó Jesucristú quidé ndècu-o ichi-gá vitna.

⁷ Te ñá ncháá nchòhó ñáyiú ndècu ichi Xítóhó Jesucristú cùtnuní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá cãchí-yu cùu ndiöxí ní cùu. Te cuendá xiãⁿ nùu nàqueheⁿ-ni-ndo nchaa sá nchító-ó ndùu táhú nchaa sá cãchí-yu cùu ndiöxí-áⁿ xéxí-ndó, te sàni-ni iní-ndó sã quidé cahnu-ndo nchaa sá cãchí-yu cùu ndiöxí-áⁿ te ñá ndàá sá ndiöxí cúú-xí. Te núu sàni iní-ndó sã ñá túú vãha caxi-ndo sã dúcáⁿ ndùu táhú-xi-áⁿ te xèxi-ndo te xiãⁿ ñá túú cùu vãha iní-ndó cuendá sá dúcáⁿ quide-ndo. ⁸ Te ñá díú ncháa sá xéxí-ó quide-xi cudíu-o núú Yã Ndiöxí, chi ñⁿ-ni quide-xi cuéi na càxi-o àdi vá cáxí-ó chi ñí ñⁿ sá cáxí-ó vã chindèe ñaha-xi cudíu-o núú Yã Ndiöxí. Te cuéi vá cáxí-ó dico ñá díú xiãⁿ cada sá vã cudíu-o núú-gã. ⁹ Te cuu-ni caxi-ndo ncháa nãni nihí-ndó. Te dicó-ni sá càda cuendá-ndó sã ñá díú cuendá sá xéxí-ndó-ãⁿ cuíta nihnu dava ñáyiú ndècu ndihí-ndo ichi Xítóhó Jesucristú cadá-yu náandi sá cadã-yu nàcuáa vá cúú vãha iní Yã Ndiöxí chi ñáyiú-áⁿ ñá túú cùtnuní iní-yu. ¹⁰ Te nchòhó ñáyiú xìní vãha cuendá nchaa sá cãchí-yu cùu ndiöxí, te núu na quihíⁿ-ndó nùú ndécú ncháa xiãⁿ te ngóo-ndo càxi-ndo nchaa sá ñí cutáhú-xi, te quiní ñáyiú ndècu ndihí-ndo ichi Xítóhó Jesucristú, ñáyiú vátá cùtnuní-gá iní-xi nàcuáa ndùu cuendá nchaa sá dúcáⁿ cãchí-yu cùu ndiöxí-áⁿ, te cuéi sàni iní-yu sá ñá túú quide vãha-ndo sã dúcáⁿ quide-ndo te cudana te cada yìcá-yu caxí-yu tnàhá-yu nchaa sá dúcáⁿ ñí nduu táhú nchaa sá cãchí-yu cùu ndiöxí-áⁿ te ñá ndàá sá ndiöxí cúú-xí. ¹¹ Te núu ducaⁿ cùtnuní iní-ndó nàcuáa ndùu cuendá nchaa xiãⁿ te ducaⁿ quide-ndo, te sá dúcáⁿ quide-ndo-áⁿ te dàcuíta nihnu-ndo dãva-gá ñáyiú ndècu ndihí-ndo ichi Xítóhó Jesucristú, ñáyiú vátá cùtnuní-gá iní-xi nàcuáa ndùu cuendá nchaa xiãⁿ, te diu cuendá tnàhá ñáyiú-áⁿ ñí xíhí Xítóhó Jesucristú. ¹² Te sá dúcáⁿ quide-ndo-áⁿ cúú-xí ñⁿ cuéchi núú Xítóhó Jesucristú, chi quide-ndo nàcuáa xínu

iní-yu cadá-yu ñⁿ sá sání iní-yu ñá túú vãha, núu xiãⁿ ñá túú quide vãha-ndo sã cúú-xí-yu. ¹³ Te núu yúhú cùtnuní iní-í sá sã cuendá ñⁿ sá cáxi-í te ngóo ñⁿ ñáyiú ndècu ndihí-í ichi Xítóhó Jesucristú cadá-yu ñⁿ sá vã cúú vãha iní Yã Ndiöxí, te vãha-gá sá vã cáxi-gã-í xiãⁿ cuendá sá vã cadã-yu ñⁿ sá vã cúú vãha iní-gá.

9

Nchaa sá cúú càda cue téé ní táuchíúⁿ Xítóhó Jesucristú càháⁿ tnúhu-gá

¹ Te yúhú chi cuu cada-í nchaa sá sání iní-í, chi tnàhá-í ní táuchíúⁿ Xítóhó Jesucristú càháⁿ-í tnúhu-gá núú ñáyiú. Te yúhú ní xíní núu-í Xítóhó Jesucristú Yaá cúú Xítóhó-ó te nchòhó cúú-ndó ñáyiú ní sándáá iní tnúhu-gá sá càháⁿ-í te ducaⁿ chi ndècu ndihí-í-gá. ² Te ìò dava ñáyiú ñá túú sándáá iní-yu sá Xítóhó Jesucristú ní táuchíúⁿ-gã càháⁿ-í tnúhu-gá, dico nchòhó chi cùtnuní ndáá iní-ndó sã díú-gã ní tendaha ñaha-gá xii-í xíca cùu-í càháⁿ-í tnúhu-gá, te ducaⁿ chi yúhú ní càháⁿ-í tnúhu-gá núú-ndó te ní sándáá iní-ndó-gã te xiãⁿ cùtnuní sá díú-gã ní tendaha ñaha-gá xii-í xíca cùu-í càháⁿ-í tnúhu-gá núú ñáyiú.

³ Te duha ndùu tnúhu càháⁿ-í cuendá cundedóho nchaa ñáyiú sàtnuhu ñaha xii-í. ⁴ Chi yúhú cuu-ni caxi-í nchaa núú sã cúú càxi-o na taxi ñáyiú. ⁵ Te cuu-ni cundecu ñadihí-í te caca ndeca-í-yu nchaa núú xíca cùu-í càháⁿ-í tnúhu Yã Ndiöxí dàtná quidé dãva-gá cue téé càháⁿ tnúhu-gá, ndihí cue téé cùu ñaní Xítóhó Jesucristú, ndihí té Pelú. ⁶ Te tnàhá yúhú ndihí té Bèè cuu dañá-ndí chiúⁿ quide-ndí te cada-ndí dàtná xíquide dava-gá-güedé càháⁿ-güedé tnúhu Xítóhó Jesucristú. ⁷ Te nchoo xìní-ó sã ncháá cuè sandadú dacuítí sã ñúhú yãhu-güedé xínú cuèchi-güedé, te ñá túú dicó ducaⁿ xínu cuechi-güedé. Te ducaⁿ sãtnahá-xi cùu tucu ñáyiú xítu ñⁿ sá xítú chi dacuítí nihí-yu ñⁿ sá xítú-yu xèxi-yu, te ñá díú dicó ducaⁿ xítú-yu. Te ducaⁿ cùu tucu cue téé cùu toli chi quihni-güedé dícu quiti xito-güedé xihí-güedé te ñá túú dicó ducaⁿ xito-güedé-di. ⁸ Te vá cání iní-ndó sã sã dúhá càháⁿ-í te càhu iní mée-í duha càháⁿ-í, chi

tnúhu càháⁿ-í-a ìⁿ-ni quèe-xi ndihi tnúhu ní cáháⁿ ndíi Moisés. ⁹ Chi ndíi-áⁿ nǐ chídó tnùnǐ ndíi núú tütú ndíi nàcuáa ní xáhaⁿ Yá Ndióxi xii ndíi, te cächí-xi: “Vá chíhí-ndó ñunu yuhu ndicutu oré dánchezí-dí triú”, duha cächí-xi núú tütú ndíi. Te ñá díú sǎ dúcáⁿ nǐ cáháⁿ Yá Ndióxi te càháⁿ-gá mee-ni cuendá ndicutu-áⁿ. ¹⁰ Chi ní cáháⁿ-gá cuendá nchoo cuè ñáyiú ndècu ichi-gá, te ndáá sǎ díú cuendá-ó dùcaⁿ ní cáháⁿ-gá. Te nchaa cue téé xítu chihi tatá sàni iní-güedé sǎ díú tátá chíhí-güedé-áⁿ cuu sǎ cáxi-güedé, te ñu-ni ducaⁿ cùu tucu cue téé xǐcani triú chí càn-güedé cuendá quee caxi-güedé. ¹¹ Te ducaⁿ sǎtnahá-xi cùu nchúhú cue téé càháⁿ tnúhu Xítoho Jesucristú, chí dǎnehé ñáhá-ndí xii-ndo cuendá nchaa sǎ vǎha quide ñaha Yá Ndióxi xii-o, núu xǐáⁿ dai tàú-xi sǎ nchòhó chindee ñaha-ndo xii-ndí núu ná cúú sǎ xíní ñuhu-ndí. ¹² Te núu dava cue téé càháⁿ tnúhu Yá Ndióxi chíndèe-ndo-güedé, te uuⁿ-gá ducaⁿ tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tàú ndisa-ndo sǎ chíndèe ñaha-ndo xii-ndí dico ñá túú dùcaⁿ caháⁿ-ndí núú-ndó càda-ndo, te quide cahnu iní-ndí cuèi nǎndí sǎ tá yǎha-ndí véxi. Te ducaⁿ quide-ndí cuendá sǎ ñà túú nǎ cani iní ñáyiú cuendá-ndí te ducaⁿ cuíta cuténuu-gá tnúhu sǎ càháⁿ nàcuáa naníhí tàhú-ó quíhíⁿ. ¹³ Te nchòhó xíní-ndó sǎ ncháá cuè téé xínu cuechi veñúhu ñu-ni xǐáⁿ nihí-güedé xéxi-güedé, te ñu-ni cue téé-áⁿ xínú cuèchi-güedé núú xihí quití ndùu táhú Yá Ndióxi, te ñu-ni xǐáⁿ nihí tucu-güedé sǎ xéxi-güedé. ¹⁴ Te ñu-ni ducaⁿ sǎtnahá-xi cùu nchúhú cue téé càháⁿ tnúhu sǎ càháⁿ nàcuáa naníhí tàhú-ó, chí Xítoho Jesucristú ní cachí-gá sǎ díú-ní cuendá chiúⁿ quide-ndí níhí-ndí caxi-ndí. ¹⁵ Te ñá ìⁿ ndùu cáháⁿ-í núú-ndó càda-ndo nàcuáa tàú-xi cunduu sǎ cúú-xi-í, te vá cání iní-ndó sǎ sǎ dúhá càháⁿ-í te ìⁿ sǎ xicáⁿ-í núú-ndó. ¡Chi cuèi na cùú-í sǎ ndòhò-í te ñá díú sǎ càháⁿ ñáyiú sǎ sǎ cuendá sǎ càháⁿ-í tnúhu Xítoho Jesucristú nihí-í xéxi-í!

¹⁶ Te yúhú ñá túú quide cahnú-í mée-í sǎ càháⁿ-í tnúhu sǎ càháⁿ nàcuáa naníhí tàhú-ó, chí tàú tnàhá-í sǎ cadà-í chí ducaⁿ nǐ cachí Yá Ndióxi cada-í. ¡Te ndàhú ní cuu yúhú

te núu vá càháⁿ-í tnúhu-áⁿ! ¹⁷ Te ñá túú càháⁿ-í tnúhu-gá sǎ cúú iní mée-í chí mee-gǎ ní táuchíúⁿ-gǎ càháⁿ-í tnúhu-gá. Te núu càháⁿ-í tnúhu-gá sǎ cúú iní mée-í te tàú-í nihí-í sǎ ndúú tàhú-í ní cùu. ¹⁸ Dico sǎ sǎ ní nduu tàhú-í cúú-xi sǎ ìo cùdí iní-í sǎ dicó ducaⁿ càháⁿ-í tnúhu sǎ càháⁿ nàcuáa naníhí tàhú-ó. Te cuèi tàú-í queheⁿ-í sǎ táxi-ndó ndùu tàhú-í sǎ cuendá sǎ càháⁿ-í tnúhu Xítoho Jesucristú, dico ñá túú dùcaⁿ quide-í. ¹⁹ Te sǎ dúcáⁿ dicó ducaⁿ càháⁿ-í tnúhu sǎ càháⁿ nàcuáa naníhí tàhú-ó, xǐáⁿ ni ìⁿ ñáyiú ñuyíú-a vá cúú cächí-yu sǎ táxi tnùnǐ ñáhǎ-yu xii-í, te cuèi ducaⁿ dico mee-í ní sani iní-í sǎ cúú-í dàtná ìⁿ téé xínu cuechi núú nchaa ñáyiú cuendá ducaⁿ cuíta cuu vai-yu tuhá-yu ichi Xítoho Jesucristú quíhíⁿ. ²⁰ Te òré ñúhú tnàhí tnuú cue ñáyiú isràél te quide-í sǎ ìⁿ-ní cùu-í ndihí-yu cuèi ñá túú nchícúⁿ nihnu-í tnúhu ní cáháⁿ ndíi Moisés, te ducaⁿ quide-í cuendá sǎ ñáyiú-áⁿ quindáá iní-yu tnúhu càháⁿ-í te tuhá-yu ichi Xítoho Jesucristú. ²¹ Te òré ñúhú tnàhí tnuú nchaa ñáyiú ñá túú nchícúⁿ nihnu tnúhu ní cáháⁿ ndíi Moisés, te quide-ni-í sǎ quide-í dàtná quidé mée-yu cuendá quindáá iní-yu tnúhu càháⁿ-í, te tuhá-yu ichi Xítoho Jesucristú. Te cuèi ducaⁿ quide-í dico ñá túú dàña ndeé-í quide-í nchaa nàcuáa cùní Yá Ndióxi cada-o, te ducaⁿ chí nchícúⁿ nihnu-í quide-í nchaa nàcuáa càháⁿ Xítoho Jesucristú. ²² Te òré ndécù-í ndihi nchaa ñáyiú ñá túú cùtnuní váha iní-xi nàcuáa cundecu ichi Xítoho Jesucristú, te tnàhá-í quide-í dàtná quidé-yu cuendá sǎ ná tédòho-yu nchaa tnúhu càháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiú quide-í sǎ ìⁿ-ni cuu-í ndihí-yu cuendá ducaⁿ nihí-í nàcuáa cada-í te cundédòho-yu tnúhu càháⁿ-í te tníⁿ-yu ichi Xítoho Jesucristú te naníhí tàhú-yu. ²³ Te duha quide-í cuendá sǎ cuíta quindáá iní-yu tnúhu sǎ càháⁿ nàcuáa naníhí tàhú-ó quíhíⁿ, te ducaⁿ te tnàhá yúhú ìo váha cundecu-í dàtná càháⁿ tnúhu-áⁿ.

²⁴ Te nchòhó sa xíní-ndó sǎ ncháá cuè téé xínu quíhu màrcúhyú nchaa-güedé xínú-güedé, dico ìⁿ-ni-dé cúú tēe ndàcu ngodó núú te téé-áⁿ cúú tēe nihí sǎ ndúú tàhú-xi, te ducaⁿ xini ñuhu-xi cada nchòhó

tucu chi cada-ndo nchàa nacuáa cuení Yá Ndióxi cada-ndo cuendá ducaⁿ ñihí-ndó sã ndúú tãhú-ndó. ²⁵ Te nchaa cue tée xini dadiqui te váha váha quide cuendá-güedé nõu ná cúú sã cáda tneñu te xòcani-güedé cuendá sã ñã díú xiãⁿ cada te cuíta-güedé òré dadiqui-güedé. Te ducaⁿ quide-güedé cuendá cuení-güedé ñihí-güedé sã ndúú tãhú-güedé, te sã ndúú tãhú-güedé-áⁿ cúú-xi ñⁿ sã ndíhi ñihnu ñuyúú-a. Dico nchoo ndücu ndee-o quide-o nacuáa ñihí-ó sã ndúú tãhú-ó, te xiãⁿ cudíi-xi cundecu ndihi-o ñi caa ñi quíhiⁿ. ²⁶ Te yúhú quidè-í dàtná quidé cuè tée xinu, chi cue tée-áⁿ xini-güedé núú quèxiò-güedé, te quide tucu-í dàtná xiquide cue tée sa ní cutúha naá, te ñã túú quide-í dàtná quidé cuè tée vitna dàcuaha naá. Te ducaⁿ chi yúhú quidè-í nchaa nacuáa cuení Yá Ndióxi cunduu. ²⁷ Te yúhú ñã túú dàña-í taxi tñuní ñãhá ñi ñⁿ sã cuèhé sã dúhá xii-í chi yòtñi-í mée-í. Te ducaⁿ quide-í chi yúhú càháⁿ-í tñuhu Xitohó Jesucristú núú ñáyu, te cuení-í sã vã cuíta sã ñi cachí Yá Ndióxi nduu tãhú-í.

10

Cuendá nchaa sã ñi cadúha cue tée ñuyúú-a quide cahnu ñáyu

¹ Te nchòhó ñáyu ndècu ndihi-í ichi Xitohó Jesucristú na cachí tñuhu-í xii-ndo cuendá nchaa ñani tñahá-ndí ñáyu israhél ní xindecu ndéé sanaha, chi vitna tñahá nchòhó cúú-ndó dàtná cue ñani tñahá nchaa ñáyu-áⁿ chi ndècu-ndo ichi-gá. Te nchaa ñáyu-áⁿ ñi taxi ndecu Yá Ndióxi ñⁿ vícò ñi dánèhé ñãhá-xi xii-yu ichi quíhiⁿ-yu, te ní quée dava ndute lámár nání Mãr Tícuèhé te nchaá-yu ní yáha-yu. ² Te sã dúcáⁿ ñi cuu te nchaá-yu ñⁿ-ná ní cuú-yu ndihi ndíi Moisés, te ní xihí ndaha ñaha ndíi xii-yu. ³ Te nchaá-yu ní xexí-yu sã ñi sãñaha Yá Ndióxi xii-yu. ⁴ Te ducaⁿ nchaa tucú-yu ní xihí-yu ndute sã ñi sãñaha-gã xii-yu, ndute sã ñi quee yiqui ñaha cava. Te cava-áⁿ cada iní-ó sã cúú-xi dàtná Xitohó Jesucristú te ducaⁿ chi ndihi ñaha-gã xii-yu ichi cuáháⁿ-yu dàvá-áⁿ. ⁵ Dico ío vãi-yu ñã túú ní quidé-yu nacuáa càháⁿ Yá Ndióxi, te xiãⁿ ñã túú ní cuu váha iní ñãhá-gã xii-yu. Te sã dúcáⁿ ñi quidé-yu núú xiãⁿ òré

ñúhú-yu ichi cuáháⁿ-yu xii yucu ío vãi-yu ní xihí.

⁶ Te ducaⁿ ñi cuu cuendá nchoo vã cáncícúⁿ ñihnu-o càda-o nacuáa ní quidé-yu, chi ñáyu-áⁿ mee-ñi nchaa sã cuèhé sã dúhá ñi sani iní-yu ní quidé-yu. Te nchoo xini ñuhu-xi sã vã dúcáⁿ càda-o. ⁷ Te yúhú càháⁿ-í dóho-ndo sã vã quindáa iní-ndó te ñi vã cáda càhnu-ndo ñi ñⁿ sã cáchi-yu cuu ndiόxi ní cadúha cue tée ñuyúú-a dàtná ní quide cue ñani tñahá-ndí ní xindecu ndéé sanaha. Chi ñáyu-áⁿ ñi quidé-yu dàtná càháⁿ-xi núú tütú Yá Ndióxi núú cáchi-xi: “Nchaa ñáyu ní xexí-yu ní xihí-yu ní quidé-yu vico, ní quide càhnu-yu sã cáchi-yu cuu ndiόxi ní cadúha-yu te ñã ndáa sã ndiόxi cúú-xi”, duha cáchi-xi núú tütú-gá. ⁸ Te ñi vã cundècu-ndo ichi díi iní dàtná ní quide dava ñáyu-áⁿ, chi sã dúcáⁿ ñi quidé-yu te ní xihí ócò úní mĩl-yu ñⁿ-ni nduu. ⁹ Te vá cáni iní-ndó sã sã càhnu iní Yá Ndióxi te nándi sã cuèhé sã dúhá càda-ndo cuendá cuení-ndó quení-ndó nõu nása cada ñaha-gã xii-ndo, chi ñáyu ní xindecu ndéé sanaha-ãⁿ ducaⁿ ñi xóo cadá-yu, te ní xihí-yu ní xexihaⁿ cõó. ¹⁰ Te ñi vã càháⁿ cuèhé-ndó cuendá Yá Ndióxi, chi dava ñáyu ní xindecu ndéé sanaha-ãⁿ ducaⁿ ñi quidé-yu ní cáháⁿ cuèhé-yu cuendá-gá te ní quixi espíritú xinu cuèchi núú-gã ní sahni ñaha-xi xii-yu.

¹¹ Te ducaⁿ ñi cuu te ducaⁿ ñi ngúndeé núú tütú Yá Ndióxi cuendá dacuàha-o vitna ta cuyatni nduu naa ñuyúú-a. Te nchaa tñuhu sã ñi ngódó tñuní-áⁿ càháⁿ dóho ñaha-xi xii-o cuendá sã vã cáda-ó dàtná ní quide ñáyu-áⁿ. ¹² Te xiãⁿ nõu nchaa nchòhó ñáyu sãni iní sã ío váha cundáa ndécú ichi Xitohó Jesucristú cada cuendá-ndó sã dúcáⁿ-ní cundáa-ndó nõú-gã, te vá dáná cuendá-ndó càda-ndo sã ñã túú cuu váha iní Yá Ndióxi. ¹³ Te ñi-ñi dàtná quidé sãcuíhná dácàháⁿ-xi iní nchaa dava-gã ñáyu nándi quidé-yu, te ñi-ñi ducaⁿ quide ñaha-xi xii-ndo. Dico mee Yá Ndióxi cúú-gã Yaá quidé ndáa chi quide-gã nchaa sã càháⁿ-gã, te ñã dáña-gã sã sũúni cuídó sãcuíhná coto ndéé ñãhá-xi xii-ndo, chi není-ñi nacuáa cundee iní-ndó dàña-gã ducaⁿ quide ñaha-xi xii-ndo. Te ñi-ñi-gã chindee ñaha-gã xii-ndo cundee iní-ndó vã cáda-ndó cuéi nándi sã ná dàcahu iní ñãhá-xi xii-ndo.

14 Te xiãⁿ nõu cãháⁿ-í dóho nchòhó ñáyiu ío cùu iní-í sã vã quindãá iní-ndó nì ìⁿ sã cãchí-yu cùu ndiõxí te ñã ndãá chi dìcò ndaha cue tée ñuyú-a ní cuáha nchaa xiãⁿ, te ni vã cádá cãhnu-ndo. 15 Te duha cãháⁿ-í chi cùu-ndo ñáyiu tècú tnùnì, te mee-ndo ìo váha cuáha-ndo cuendá te núu váha-ni cãháⁿ-í àdi ñã túú vãha-ni. 16 Te nchoo ndacáⁿ táhú-ó nõú Yã Ndiõxí cuendá ndudí ndéhé yoho yãha stilé sã xihí-ó, te sã dúcãⁿ xihí-ó ndudí ndéhé yoho yãha stilé-án, te xiãⁿ ndacú iní-ó sã ìⁿ-ní cùu-o ndihì Xítohó Jesucristú cuendá sã ñi sãti ñiñí-gã ní xihí-gã núu cùrúxí, te ñu-ni ducaⁿ sãtnahá tucu-xi cùu paá sã xéxí-ó òré xihí-ó ndudí ndéhé yoho yãha stilé-án, chi sã dúcãⁿ xèxi-o paá-án xiãⁿ ndacú iní-ó sã ìⁿ-ní cùu-o ndihì Xítohó Jesucristú sã cuendá yiqui cùñú-gã. 17 Te cuèi vãi vihi-o dico ìⁿdii-ni paá xéxí-ó, te sã dúcãⁿ ìⁿdii-ni paá xéxí-ó xiãⁿ ndacú iní-ó sã ìⁿ-ní cùu-o ndihì Xítohó Jesucristú.

18 Te cada cuendá-ndó nãcuáa quide ñáyiu isrãél, chi ñáyiu-án xéxí-yu sã ndúú táhú Yã Ndiõxí. Te sã dúcãⁿ quidé-yu-án cùtnùnì iní-ó sã tnàhá tnúhu-yu ndihì-gã. 19 Te vã cánì iní-ndó sã sã dúhá cãháⁿ-í te cãchí-ndó sã cùnuu nchaa sã cãchí-yu cùu ndiõxí ní cadúha cue tée ñuyú-a chi ñã túú ñã cùú nì ìⁿ nchaa xiãⁿ. Te ñu-ni ducaⁿ cùu tucu nchaa sã sãñaha ñáyiu ndúu táhú-xi chi ñã túú cùnuu-xi, chi ìⁿ-ni cùu-xi ndihì nchaa dava-gã sã xéxí-ó. 20 Te yúhú cãchí-í sã sã dúcãⁿ quide nchaa ñáyiu ñã túú tnàhá tnúhu ndihì Yã Ndiõxí, te dìcò nchaa espíritú cùndihì yucu ñávãha sãñahá-yu sã ndúú táhú-xi sã dúcãⁿ quidé-yu. Te ñã díú Yã Ndiõxí sãñahá-yu sã ndúú táhú-gã. Te yúhú cuiní-í sã vã tnàhá tnúhu-ndo ndihì cue espíritú cùndihì yucu ñávãha. 21 Te ducaⁿ chi vã cùú tnàhá tnúhu-o ndihì cue espíritú cùndihì yucu ñávãha te tnahá tnúhu-o ndihì Xítohó Jesucristú, te ñã túú ndúu váha-xi ngóo cãxi-o coho-o sã ndúú táhú cue espíritú cùndihì yucu ñávãha-án, te ngóo cãda-o nacuáa ní dándõo tnúhu Xítohó Jesucristú coho-o ndudí ndéhé yoho yãha stilé, te caxi-o paá cada-o sã ndacú iní-ó sã ñi xihí-gã núu cùrúxí. 22 Te vã cánì iní-ó dùcaⁿ cada-o cuendá sã vã cùdèéⁿ Yã Ndiõxí, chi ñã túú ñã cãhnu cuu-o núu

cada-o ñãni véxi iní mée-ó, chi mee-gã ío cãhnu cuu-gã.

Cada-o nchaa nacuáa cuu cãhnu Yã Ndiõxí

23 Te ndãá sã nchãá sã cuiní-ó cãda-o te cuu cada-o dico ñã nchãá cùu-xi sã vãha sã cùú-xí-ó, te ni ñã nchãá-xí chindee ñaha-xi nacuáa ñihí ndéé-gã-ó cùndecu-o ichi Xítohó Jesucristú. 24 Te xini ñuhu-xi sã cádá-ó sã vãha sã cùú-xí tnàha ñáyiu-o te ñã díú mèe-ni sã cùú-xí mèe-o cada-o.

25 Te nchòhó cuu caxi-ndo nchaa cuñú sã cùyãhu cuñú sã xini caxi-ndo, te vã nducú tnúhu-ndo te núu cùu-xi cuñú sã ñi nduu táhú sã cãchí-yu cùu ndiõxí. Te ñã túú ñã canì iní-ndó cãxi-ndo, 26 chi ñuyú-a ndihì nchaa sã ío cùú-xí cuendá Yã Ndiõxí.

27 Te núu ìⁿ ñáyiu ñã túú ndècu ichi Xítohó Jesucristú cãháⁿ ñãhã-yu xii-ndo quihíⁿ-ndó cãxi-ndo díta vehé-yu, te núu sãni iní-ndó sã quihíⁿ-ndó te cuu quihíⁿ-ndó te caxi-ndo cuèi nái cùu sã táxi-yu dico vã cãcãⁿ tnúhú-ndó nõu-yu núu ndèe ní ñihí-yu, te ducaⁿ te cuu váha iní-ndó cãxi-ndo. 28 Te núu ìⁿ ñáyiu cãchí-yu sã xiãⁿ cùú-xí sã ñi nduu táhú sã cãchí-yu cùu ndiõxí te vã cãxí-ndó cuendá sã ñáyiu ducaⁿ cãháⁿ-án cuu váha iní-yu te ñã túú tnàhí ná canì iní-yu. 29 Te yúhú cãháⁿ-í cuendá nãcuáa sãni iní mée ñáyiu ducaⁿ cãháⁿ-án te ñã díú sã nãcuáa sãni iní mée-ndó quide-ndo.

Te dava-ndo cãchí-ndó: “Cuu-ni cada-o nchaa nacuáa sãni iní mée-ó cuèi dava-gã ñáyiu sãni iní-yu sã ñã túú ndúu váha-xi sã dúcãⁿ cãda-o”, duha cãchí-ndó. 30 Te cãchí tucu-ndo: “Ñã túú tàú-xi cãháⁿ cuèhé ñáyiu cuendá-ó sã cuendá nchaa sã xéxí-ó chi ndacáⁿ táhú-ó nõú Yã Ndiõxí òré xéxí-ó”, duha cãchí-ndó. 31 Te cuèi nãndi sã xini caxi-ndo ñihí-ndó xèxi-ndo àdi quide-ndo, te cada-ndo nãcuáa cãháⁿ váha ñáyiu cuendá Yã Ndiõxí. 32 Te vã cádá-ndó sã ñã túú tàú-ndó cãda-ndo cuendá sã vã cádá ñáyiu ìⁿ sã ñã túú cùu váha iní Yã Ndiõxí. Te ni sã cùú-xí cuè ñáyiu isrãél, te ni sã cùú-xí cuè ñáyiu ñã túú cùu ñáyiu isrãél, te ni sã cùú-xí cuè ñáyiu ndècu ichi-gã vã dúcãⁿ cãda-ndo sã cùú-xí-yu. 33 Te yúhú ío nducu ndee-í quidè-í nãcuáa cudú-í núu nchaa ñáyiu, te quide-í sã vãha sã cùú-xí-yu, te ñã

túú quide-í mee-ni sã cúú-xí mèe-í. Te ducaⁿ quide-í cuendá quíndáá iní-yu tnúhu Xítohó Jesucristú te naníhí tãhú-yu.

11

¹ Te chí cáncñicúⁿ nihnu cada-ndo nchaa nacuaá quide-í nchicúⁿ nihnu-í nchaa nãcuáa quide Xítohó Jesucristú.

Nãcuáa tàú-xi cada nchaa ñáyiú ðihí núú tàcá-yu dàcuahá-yu tnúhu Yá Ndiöxí

² Te nchòhó ñáyiú ndècu ndihí-í ichi Xítohó Jesucristú càchí tnúhu-í xii-ndo sã ïo cùdíí iní-í, chí ndàcu iní ñáhá-ndó xii-í, te quide-ndo nchaa nacuaá ní dánèhé ñáhà-í xii-ndo. ³ Te cuení-í sã nchòhó cutnùnì iní-ndó sã ñⁿdii-ni Yá Ndiöxí cúú-gã Yaá cùnùu taxi tnuní ñáhá xii Xítohó Jesucristú, te ducaⁿ Xítohó Jesucristú ñⁿdii-ni-gá cùnùu taxi tnuní-gá nchaa cue téé, te nchaa cue téé ðiu-ni mee-güedé cùnùu-güedé táxi tnùnì-güedé ñadìhí-güedé. ⁴ Te núu nchoo cuè téé na dàdáhu-o ðiquí-ó òré càháⁿ-ó núú ñáyiú tnúhu sã dácàhu iní ñáhá Yá Ndiöxí xii-o àdi òré càháⁿ ndihí-o-gã, te ñⁿ sácáⁿnúú cúú-xí te núu ducaⁿ na càda-o dadáhu-o ðiquí-ó. ⁵ Dico núu ñáyiú ðihí vá dàdáhu-yu ðiquí-yu òré càháⁿ ndihí-yu Yá Ndiöxí, àdi òré càháⁿ-yu tnúhu sã dácàhu iní ñáhá-gã xii-yu núú tnàhá ñáyiú-yu, te sácáⁿnúú cúú-xí te núu vá dàdáhu-yu ðiquí-yu, chí ñⁿ-ni cùu-xi te núu na dèté ndí-yu ðiquí-yu. ⁶ Te núu ñá túú cuení cue ñáyiú ðihí dàdáhu-yu ðiquí-yu te váha-gá sã ná dèté ndí-yu ðiquí-yu. Te núu cùcahãⁿ núú-yu sã dèté ðiquí-yu te váha-gá sã ná dàdáhu-yu ðiquí-yu. ⁷ Te nchoo cuè téé vá cúú dàdáhu-o ðiquí-ó òré càháⁿ ndihí-o Yá Ndiöxí ní òré càháⁿ-ó tnúhu sã dácàhu iní ñáhá-gã xii-o núú ñáyiú chí ðihna-gá-ó ñí cadúha ñaha Yá Ndiöxí xii-o, te ní taxi ndecu-gá nchaa sã xini tnùnì-ó dàtná ndécú nchaa sã xini tnùnì mée-gã. Te ducaⁿ ñí quide-gá chí cuení-gá sã nchóó càda-o nacuaá cáháⁿ nchaa dava-gá ñáyiú sã ïo càhnu cuu-gá, te cue ñáyiú ðihí quidè-yu nãcuáa cunuu nchòo cue téé. ⁸ Te Yá Ndiöxí ní cadúha-gá téé, dico ñá díú yiqui naha ñadìhí ní quenehe-gá ní cadúha-gá

tée chí yiqui naha téé ní quenehe-gá ní cadúha-gá ñadìhí. ⁹ Te sã cuendá téé ducaⁿ ñí cadúha-gá ñadìhí-áⁿ te ñá díú sã cuendá ñadìhí ní cadúha-gá téé. ¹⁰ Núu xíãⁿ tàú-xi sã ncháá ñáyiú ðihí dàdáhu-yu ðiquí-yu cuendá ducaⁿ cùnùnì sã ñá túú cùnùu-yu dàtná cùnùu nchoo cue téé. Te ducaⁿ xini ñuhu-xi cadá-yu sã cuendá nchaa espíritu xínú cuèchi núú Yá Ndiöxí. ¹¹ Te vitna nchoo ñáyiú ndècu ichi Xítohó Jesucristú, vá càchí-ó sã cuè téé ñá túú xini ñuhu-güedé cue ñáyiú ðihí chindee ñáhá-yu, te ní vá càchí-ó sã cuè ñáyiú ðihí ñá túú xini ñuhú-yu cue téé chindee ñàha-güedé xii-yu. ¹² Te ñⁿ yiqui naha téé ní queñuhu Yá Ndiöxí ní cadúha-gá ñadìhí, dico vitna chí ñáyiú ðihí dácàcú-yu téé. Te téé, ñadìhí ní cadúha Yá Ndiöxí, te ðiu-ni ducaⁿ ñí cadúha-gá nchaa dava-gá sã ïó.

¹³ Te mee-ndo càda cuendá-ndó te núu ndùu váha-xi sã vá dàdáhu cue ñáyiú ðihí ðiquí-yu òré càháⁿ ndihí-yu Yá Ndiöxí àdi ñáhá. ¹⁴ Te nchaa ñáyiú càháⁿ-yu sã ñá túú ndùu váha-xi sã cuè téé cunduu nàni idi ðiquí-güedé, chí ñⁿ sácáⁿnúú cúú-xí càchí-yu. ¹⁵ Te nchaa ñáyiú ðihí ñáyiú nàni idi ðiquí-xi càchí ñáyiú sã ñⁿ sã vãha cùu-xi sã cúú-xí-yu sã dúcáⁿ nàni idi ðiquí-yu. Te ducaⁿ chí Yá Ndiöxí ní cachí-gá sã dúcáⁿ cùnùu-yu cuendá quidáhu-xi ðiquí-yu. ¹⁶ Te núu ïó ñáyiú cuení dacáá cuendú cuendá sã ñí cáháⁿ-í-a, te na cùnahá-yu sã ncháá nchùhú cue téé càháⁿ tnúhu Xítohó Jesucristú ðiu-ni ducaⁿ sàni iní-ndí cada nchaa ñáyiú ðihí. Te ðiu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñá túú quide datná ní quide Xítohó Jesucristú cùnàhá ní cudìni-gá ndihí cue téé ní xica cuu ndihí-gá

¹⁷ Te nchòhó ñá túú quide váha-ndo ndècu-ndo núu xíãⁿ duha na càháⁿ-í dóho-ndo, chí nchòhó òré tàcá-ndó ñá túú quide váha-ndo chí ñá túú chindee tnaha-ndo cada-ndo sã vãha, chí da nàdatuhú iní tnàhá-ndó nãcuáa ndècu-ndo. ¹⁸ Te ðihna-gá na càchí tnúhu-í xii-ndo sã ñíhí-í tnúhu sã òré tàcá-ndó quide-ndo nacuaá ní cáháⁿ Xítohó Jesucristú, te ñá túú

cùu ìⁿnuu-ndo oré ducaⁿ quide-ndo nacuaá ní cáháⁿ-gá. Te dava sá cáháⁿ ñáyiú sàndáá iní-í te dava ñáhá. ¹⁹ ¡Te ndáá sá dúcáⁿ tnahí cada-xi vá cúú ìⁿnuu-ndo cuendá ducaⁿ cùtnuní nùu ndèdaca-ndo sandáá ndisa iní-ndó tñuhu Xítóhó Jesucristú te ndèdaca-ndo ñáhá! ²⁰ Te ndi tnahá òré tàcá-ndó quide-ndo datná ní quide Xítóhó Jesucristú cùtnahá ní cudini-gá ndihi cue téé ní xica cuu ndihi-gá, te ñá túú quide-ndo nacuaá tàú-xi cunduu chi cùtexínu-ni quide-ndo. ²¹ Chi òré tàcá-ndó quide-ndo nacuaá ní cachí Xítóhó Jesucristú, te dava-ndo ngódó núú-ndó dñha-gá-ndó xèxi-ndo sá néhé-ndó te ñá túú sá cùndètu tnahá-ndo, te ñá túú cáháⁿ tnahá-ndó nùu xiáⁿ dava-ndo ñà túú xèxi-ndo ndahá xiti-ndó, te dava-ndo xidó-ndó quide-ndo chi xini-ndo. ²² Te vá dúcáⁿ cada-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xiti-ndó, chi sá dúcáⁿ quide-ndo te dàquee tíhú-ndó nchàa dava-gá ñáyiú ndècu ndihi-ndo ichi Yá Ndiöxí, te dándóo canúú-ndó nchàa ñáyiú ndàhú sá dúcáⁿ quide-ndo. ¡Núu xiáⁿ vá cúú càchí-í sá cúú-ndó ñáyiú quide váha chi ñá túú quide váha-ndo sá dúcáⁿ quide-ndo ndecu-ndo!

Xítóhó Jesucristú ní dándóo tñuhu-gá sá cóhó-ó ndùdí ndéhé yoho yàha stilé te caxi-o pàá cuendá ndacu iní-ó sá ñí xihí-gá

(Mt. 26:26-29; Mr. 14:22-25; Lc. 22:14-20)

²³ Te datná-ni ní dánèhé ñáhá Xítóhó Jesucristú xii-í te ñu-ni ducaⁿ ñí dánèhé ñáhà-í xii-ndo, chi ñu-ni niú cùtnahá ní sáha cuendá ñáhá ndii Jüdás Iscarioté xii-gá núú cuè téé cùu úhú iní ñáhá ñí queheⁿ-gá pàá, ²⁴ te ní ndacáⁿ táhú-gá núú Yá Ndiöxí, te ní táhú cuèchi-gá, te ní xáhaⁿ-gá xii cue téé xica cuu ndihi-gá: “Chí quehéⁿ pàá-a caxi-ndo te cada iní-ndó sá cúú-xí datná yiqui cùñú-í, chi yúhú cuú-í sácuendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, càchí-gá xáhaⁿ-gá xii-güedé. ²⁵ Te sátá ñí yáha ní xexi-güedé pàá sá ñí sáñaha-gá, te ní queheⁿ-gá tásáⁿ ñúhú ndùdí ndéhé yoho yàha stilé, te ní ndacáⁿ táhú tucu-gá núú Yá Ndiöxí. Te ní xáhaⁿ-gá xii cue téé xica cuu ndihi-gá: “Chí cóhó ndùdí ndéhé yoho yàha stilé-a, te cada iní-ndó

sá cúú-xí datná ñíñí-í, te cuendá ñíñí-í sá catí òré cuú-í cùtnuní ndáá sá Yá Ndiöxí cada-gá ingá núú sá váha sá cúú-xí ñáyiú. Te ndi tnahá òré coho-ndo ndùdí ndéhé yoho yàha stilé-áⁿ te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xáhaⁿ-gá xii-güedé. ²⁶ Te ndi tnahá òré xéxi-ndó pàá te xihí-ndo ndudí ndéhé yoho yàha stilé, te xiáⁿ dátúu-ndo nùu ñáyiú sá Xítóhó Jesucristú ní xihí-gá cuendá-yu, te ducaⁿ-ni càda-ndo cundecu-ndo ndéé ná sáa nduu quixi tucu Xítóhó Jesucristú.

Nàcuáa cada-o òré caxi-o pàá ndihi òré coho-o ndùdí ndéhé yoho yàha stilé datná ní cachí Xítóhó Jesucristú

²⁷ Te dava-ndo ñà túú quide-ndo nacuaá cuení Yá Ndiöxí cada-ndo òré xéxi-ndó pàá ndihi òré xihí-ndó ndùdí ndéhé yoho yàha stilé, te sá dúcáⁿ quide-ndo-áⁿ te cucuèchi xii-ndo chi ñá túú nèhe-ndo sá yíñuhu sá cúú-xí yiqui cuñú Xítóhó Jesucristú, te ni ñà túú nèhe-ndo sá yíñuhu sá cúú-xí ñíñí-gá. ²⁸ Te ío váha cada cuendá-ndó te núu ndècu váha iní-ndó núú Xítóhó Jesucristú òré cùmání-gá caxi-ndo pàá ndihi òré cùmání-gá coho-ndo ndùdí ndéhé yoho yàha stilé. Te núu ndècu váha iní-ndó núú-gá te caxi-ndo te coho-ndo. ²⁹ Te dava nchòhó ñá túú sàni váha iní-ndó cuendá yiqui cuñú Xítóhó Jesucristú te xèxi-ndo pàá te xihí-ndo ndudí ndéhé yoho yàha stilé, te nacháhu-ndo sá dúcáⁿ ñà túú sàni váha iní-ndó. ³⁰ Te ñu sá dúcáⁿ quide-ndo núu xiáⁿ vèi-ndo cuhú, te ío ndàhú ndécú-ndó, te dava ñáyiú ndècu ndihi-ndo sa ní xihí-yu. ³¹ Dico núu ío váha sáha-o cuendá nàcuáa ndècu-o núú Yá Ndiöxí, te vá dúcáⁿ dándoho ñaha-gá xii-o. ³² Te òré ndéhé Yá Ndiöxí sá ñà túú quide ndáá-ó ndècu-o te dándoho ñaha-gá xii-o. Te ducaⁿ quide-gá cuendá sá vè cuíta nihnu-o, chi núu ñáhá te cuíta nihnu-o ndihi nchaa ñáyiú ndècu ichi cuehé ichi duha. ³³ Te núu xiáⁿ cáháⁿ-í dóho nchaa nchòhó ñáyiú ndècu ndihi-í ichi Xítóhó Jesucristú sá òré tàcá-ndó càda-ndo nacuaá ní quide Xítóhó Jesucristú cùtnahá ní cudini-gá ndihi cue téé ní xica cuu ndihi-gá, te cundetu tnahá-ndo nduu nchaa-ndo te dátñuní ducaⁿ càda-ndo. ³⁴ Te núu dava-ndo xihí-ndó dòcò te caxi duuⁿ-ndo vèhe-ndo te

dătnùní natacá-ndó, cuendá òré natacá-ndó te vá cádá-ndó ìⁿ sá ñà túú tàú-ndó càda-ndo cuendá sá vǎ dándòho ñaha Yá Ndiòxí xii-ndo. Te òré quixi coto ñaha-í xii-ndo te dāvá-án cachí tnúhu-í xii-ndo nchaa dava-gá sá cúmǎní.

12

Nàcuáa chindee ñaha Espiritú Yá Ndiòxí cada-o ìⁿ ìⁿ-o

¹ Te nchòhó ñáyiú ndècu ndìhi-í ichi Xítohó Jesucristú cuení-í cachí tnúhu-í xii-ndo nàcuáa chindee ñaha Espiritú Yá Ndiòxí xii-o ìⁿ ìⁿ-o cuendá cutnùní iní-ndó.

² Te nchòhó sa nàha-ndo sá cǔtnàhá yátá cǔndècu-gá-ndó ichi Xítohó Jesucristú ní xóo dandàhú ñáhá yùcu ñávǎha xii-ndo, te ní xóo quíndáá iní-ndó nchaa sá ñí cadúha cue ñáyiú ñuyíú-a nchaa sá cǎchí-yu cùu ndióxí te ñá ndàá sá ndiòxí cúú-xí, te nchaa xǎá ñá túú cǎháⁿ-xí. ³ Te cuení-í sá nchòhó cutnùní iní-ndó sǎ Espiritú Yá Ndiòxí ñá túú chindee-xi ní ìⁿ ñáyiú cuendá sá cǎháⁿ úhú-yu Xítohó Jesucristú. Te ní ìⁿ ñáyiú ñá túú cǎhu iní-yu cǎháⁿ-yu sá Xítohó Jesucristú cúú-gǎ Xítohó-yu te núu ñá túú Espiritú Yá Ndiòxí dácàhu iní ñáhá-xí xii-yu.

⁴ Te ndì dǐíⁿ ndì dǐíⁿ ndùu chiúⁿ ní cachí Espiritú Yá Ndiòxí cada-o, te diu-ni ìⁿdì-ni Espiritú-gá ndécú. ⁵ Te ndì dǐíⁿ ndùu chiúⁿ quide-o xinu cuechi-o núú ìⁿdì-ni Xítohó Jesucristú. ⁶ Te ndì dǐíⁿ ndì dǐíⁿ chindee ñaha Yá Ndiòxí xii-o nàcuáa cada-o chiúⁿ-gá, te diu-ni ìⁿ dǐi-gá ndécú chindee-gá nchaa ñáyiú. ⁷ Te Espiritú Yá Ndiòxí quidé-xí sǎ nchóo càda-o sá vǎha, te ducaⁿ chindee-o cue ñáyiú ndècu ndìhi-o ichi Xítohó Jesucristú. ⁸ Te dava-o ñí nduu táhú-ó nǔú Yá Ndiòxí sá Espiritú-gá cada te ndacu-o cǎháⁿ-ó tnúhu sá ìo cǎhnu cuu diu-ni tnúhu mee Yá Ndiòxí, te dava tucu-o ñí nduu táhú-ó cǔtnuní iní-ó nàcuáa cǎháⁿ tnúhu-gá te cǎháⁿ-ó nàcuáa cuení Espiritú-gá. ⁹ Te dava tucu-o ñí nduu táhú-ó sǎ ìo quíndáá iní-ó Xítohó Jesucristú cuendá cada-gá ìⁿ sá cuení-ó, te ducaⁿ chi Espiritú Yá Ndiòxí chindèe ñaha-xi xii-o. Te dava tucu-o ñí nduu táhú-ó sǎ cǎcǎⁿ táhú-ní-ó nǔú Xítohó Jesucristú cuendá ñáyiú cǔhú te ndúha-yu. ¹⁰ Te dava tucu-o ñí nduu táhú-ó sǎ ndácú-ó

càda-o nchaa sá vǎ yǎo tnàhí ndàcu cada, te dava tucu-o ñí nduu táhú-ó nǔú Yá Ndiòxí sá cǎháⁿ-ó tnúhu sá dácàhu iní ñáhá-gǎ xii-o, te dava tucu-o ñí nduu táhú-ó sǎ cǔtnuní iní-ó nǔú diu Espiritú Yá Ndiòxí chindèe ñaha-xi xii ñáyiú òré cǎháⁿ-yu tnúhu-gá àdi cue espíritú cǔndìhi yucu ñávǎha. Te dava tucu-o ñí nduu táhú-ó cǎháⁿ-ó tnúhu sá dácàhu iní ñáhá Espiritú Yá Ndiòxí xii-o tnúhu sá ñà túú xìní-ó, te dava tucu-o ñí nduu táhú-ó cǎháⁿ-ó nàcuáa quèe-xi nchaa tnúhu-án. ¹¹ Te ìⁿdì dǐi-ni Espiritú Yá Ndiòxí ducaⁿ chindee ñaha-xi, te diu-ni Espiritú-gá dácǎhñu ñaha-xi xii-o ndì dǐíⁿ nǔú chiúⁿ sá cuení méé-xí càda-o.

Nchaa-o ìⁿ-ni cuu-o ndìhi Xítohó Jesucristú

¹² Te nchoo ñáyiú ndècu ñuyíú-a tǐtní xichi cùu yǐqui cuñú-ó dico ìⁿ-ni cùu-xi, te diu-ni ducaⁿ sǎtnahá-xi cùu-o vitna ndecu-o ichi Xítohó Jesucristú chí ìⁿ-ni cùu-o ndìhi-gá. ¹³ Te dava-o cùu-o ñáyiú isràél, te dava-o ñà túú cùu-o ñáyiú isràél, te dava-o cùu-o ñáyiú ñá túú tnàhí dàná quee núú chíúⁿ pàtróoⁿ-xi, te dava-o cùu-o ñáyiú dàná quee nǔú chíúⁿ pàtróoⁿ-xi. Te mee Espiritú Yá Ndiòxí ní quide-xi sá ncháá-ó ìⁿ-ná cúú-ó ndècu-o ndìhi Xítohó Jesucristú. Te Yá Ndiòxí ní cachí-gá sá ncháá-ó cǔndecu ndìhi-o Espiritú-gá.

¹⁴ Te nchòhó xìní-ndó sǎ tǐtní xichi cùu yǐqui cuñú-ó te ñá dǐú ìⁿ-ni xichi cuu-xi. ¹⁵ Te cuèi sáhá-ó ndìhi ndaha-o ñá túú ìⁿ-ni cuu-xi dico vá cúú cǎchí-ó sǎ sáhá-ó ñà túú cùu-xi yǐqui cuñú-ó. ¹⁶ Te cuèi lóho-o ndìhi tǐnuu-o ñá túú ìⁿ-ni cuu-xi dico vá cǎchí-ó sǎ lóho-o ñà túú cùu-xi yǐqui cuñú-ó. ¹⁷ Te núu nihíí ní ndúú yǐqui cuñú-ó ní xǐndéé mee-ni tǐnuu-o, te ñá túú ndèe cundeé lóho-o cǔndedóho ní cùu te núu ducaⁿ, àdi núu nihíí yǐqui cuñú-ó ní xǐndéé mee-ni lóho-o te ñá túú ndèe cundeé dǐtní-ó ní cùu te núu ducaⁿ. ¹⁸ Dico mee Yá Ndiòxí ní taxi ndecu-gá ìⁿ ìⁿ xichi yǐqui cuñú-ó nàcuáa ní cachí iní méé-gǎ. ¹⁹ Te núu ìⁿ-ni sǎ ní xǐndecu nihíí yǐqui cuñú-ó, te vá cǔndùu-xi nàcuáa tàú-xi cunduu ní cùu te núu ducaⁿ. ²⁰ Dico tǐtní xichi cùu yǐqui cuñú-ó, te ìⁿ-ni cùu-xi nihíí-xi.

²¹ Te sa nàha-o sá vǎ cúú cǎchí-ó sǎ tǐnuu-o ñá túú xìnì ñuhu-xi ndaha-o, àdi

díquí-ó ñà túú xìni ñuhu-xi sáhá-ó. ²² Te nchoo sà naha-o sá dává xìchi yìqui cuñú-ó sã cãchí-ó sã ñà túú cùnūu ío-gá xíní ñuhu-xi. ²³ Te dava xichi yìqui cùnū-ó sã ñà túú quide cuendá cávíhí-ó nchàa xíãⁿ sá quidáhu dóo sácũhnu-o, te dava xichi yìqui cùnū-ó ñà cúú cùtúu chi dacuitíí sã quidáhu. ²⁴ Te nchaa xichi yìqui cùnū-ó sã cúú cùtúu ñà túú xìni ñuhu-xi quidáhu. Te Yá Ndiõxí ní taxi ndecu-gá nchaa xichi yìqui cùnū-ó nàcuáa tàú-xi cunduu. Te ní cachí-gá sá dává-gã xichi yìqui cùnū-ó núú vã cúú cùtúu quidáhu. ²⁵ Te ducaⁿ ñí quide-gá cuendá sá ñíⁿ-ní cùu yìqui cuñú-ó. Te ducaⁿ ndì tnahá ñíⁿ xichi yìqui cùnū-ó chindee tnahá-xi. Te ducaⁿ sãtnahá-xi cùu nchoo vitna ndecu-o ichi Xítóhó Jesucristú chi chindee tnahá-o. ²⁶ Te núu ñíⁿ xichi yìqui cùnū-ó ná tñáhúhú te ñíhí-ó quide úhú-xi, te núu ñíⁿ xichi yìqui cùnū-ó ío váha ndècu-xi te ducaⁿ ñíhí yìqui cùnū-ó cúú vãha-xi. Te ducaⁿ sãtnahá-xi cùu-o vitna ndecu-o ichi Xítóhó Jesucristú.

²⁷ Te nchoo ndècu ndíhi-o Xítóhó Jesucristú, te cùu-o datná yìqui cùnū-gá te ñíⁿ ñíⁿ-o cùu-o datná ñíⁿ xichi yìqui cùnū-gá. ²⁸ Te ducaⁿ sãtnahá-xi cùu-o chí Yá Ndiõxí ní taxi-gá ndí dííⁿ ndí dííⁿ chùuⁿ quide-o sá cúú-xí nchàa ñáyíu ndècu ichi-gá. Te díhna-gá cue téé caca cuu cáháⁿ tñúhu-gá núú ñáyíu ní taxi ndecu-gá, te dãtnúni ní taxi ndecu-gá cue téé cáháⁿ tñúhu-gá nàcuáa dàcahu iní ñáhá mèe-gá, te dãtnúni ní taxi ndecu-gá cue téé dānehé ñáhá xì ñáyíu tñúhu-gá núú tàcá-yu, te dãtnúni ní taxi ndecu tucu-gá cue téé ndàcu quide sá vã yõ tñáhí ndàcu cada. Te ní taxi ndecu tucu-gá cue téé xicáⁿ táhú-ní núú Xítóhó Jesucristú cuendá ñáyíu cùhú te ndúha-yu. Te ní taxi ndecu tucu-gá cue téé chindee cue ñáyíu ndècu ichi-gá. Te ní taxi ndecu tucu-gá cue téé yìndaha ñaha xii ñáyíu ndècu ichi-gá, te ní taxi ndecu tucu-gá cue téé cãháⁿ tñúhu sá dácàhu iní ñáhá Espíritú-gá tñúhu sá ñà túú xìní-güedé. ²⁹ Te ñá ncháá-ó cùu-o cue téé ní táuchíúⁿ Xítóhó Jesucristú cáháⁿ tñúhu-gá núú ñáyíu, te ñá ncháá-ó cùu-o cue téé cãháⁿ tñúhu sá dácàhu iní ñáhá Yá Ndiõxí xii-o. Te ñá ncháá-ó cùu-o cue téé dàcuaha ñaha xii-yu.

Te ñá ncháá-ó cùu-o cue téé quide sá vã yõ tñáhí ndàcu cada. ³⁰ Te ñá ncháá-ó cùu-o cue téé dícó-ní cácaⁿ táhú núú Xítóhó Jesucristú cuendá ñáyíu cùhú te ndúha-yu. Te ñá ncháá-ó cùu-o cue téé cãháⁿ tñúhu sá dácàhu iní ñaha Espíritú Yá Ndiõxí tñúhu sá ñà túú xìní-ó, te ñá ncháá-ó cùu-o cue téé cùtnuní iní-xi cáháⁿ nàcuáa nduu tñúhu-áⁿ. ³¹ Te ío nducu ndèe-ndo cada-ndo nàcuáa nduu táhú-ndó núú Yá Ndiõxí nchaa sá ío-gá cùnūu cada-ndo. Te vitna na dānehé ñáhá tucu-í xii-ndo nàcuáa cada-ndo, dico sá dānehé ñáhá-í-a ío-gá cùnūu-xi.

13

Cuu iní-ó tñaha ñáyíu-o

¹ Te núu nchoo xìní-ó cãháⁿ-ó tñúhu sá ío vii ío váha cuáháⁿ cãháⁿ ñáyíu ñuyíú-a, àdi xìní-ó cãháⁿ-ó tñúhu sá ío vii ío váha cuáháⁿ cãháⁿ cue espíritú xínú cuèchi núú Yá Ndiõxí, te núu xìní-ó cãháⁿ-ó nchàa tñúhu-áⁿ te ñá túú cùu iní-ó cuè tñaha ñáyíu-o ña, te ñá túú nāndíhi-xi sá xìní-ó cãháⁿ-ó tñúhu-áⁿ te cùu-o datná dava caá sá ío dusaⁿ quide. ² Te núu cùu-o ñáyíu cãháⁿ tñúhu sá dácàhu iní ñáhá Yá Ndiõxí, àdi cuu-o ñáyíu cùtnuní iní-xi nàcuáa cuáháⁿ nchaa tñúhu nduu yuhu ni cuu, àdi cuu-o ñáyíu ío váha cùtnuní iní-xi nchaa nàcuáa quide Yá Ndiõxí, àdi cuu-o ñáyíu ío váha sãndáá iní ñáhá xii Yá Ndiõxí nàcuáa ndacu-o cùu-o ñíⁿ yucu xocuíñí-xi núú ndécú-xí, te núu nchaa xíãⁿ xìní-ó càda-o te ñá túú cùu iní-ó cuè tñaha ñáyíu-o ña, te ñá túú vèdana nāndíhi-xi te núu vá cúú iní-ó tñaha ñáyíu-o cuèi na càda-o nchaa xíãⁿ. ³ Te cuèi nchaa sá ndécú ndíhi-o na dacáhñu-o, te cuèi na cuãha cuendá-ó mèe-o cáyú-ó sã cúú-xí Yá Ndiõxí, dico ñá túú vèdana chindee ñaha-xi xii-o sá dúcáⁿ càda-o te núu ñá túú cùu iní-ó cuè tñaha ñáyíu-o.

⁴ Dico núu cùu iní-ó cuè tñaha ñáyíu-o, te cãhnu iní-ó, te quide váha-o, te ñá túú cùu-o ñáyíu cuédú iní, te ni ñà túú cãháⁿ-ó núu cùu cahnu-o, te ni ñà túú sàni iní-ó càda cahnu-o mee-o, ⁵ te ni ñà túú ñúhu cuehé iní-ó, te ni ñà túú ndùcu-o mee-ni sá cúú-xí mèe-o, te ni ñà túú-gã cúdééⁿ-ó cuendá ñíⁿ sá cúú, te ni ñà túú-gã sácũhuⁿ iní-ó sã quidé ñaha tñaha ñáyíu-o xì-o. ⁶ Te ni ñà túú-gã cúdíí iní-ó nchàa sá ñà túú vãha quide ñáyíu, chi mee-nã cuendá nchaa sá vãha cùdíí iní-ó.

⁷ Te nchaa sá yãha-o sàcahnu iní-ó, te sàni váha iní-ó cuendá nchaa ñáyiú, te sàni iní-ó sã díú-ní nchaa sá váha cuu xii nchaa tnàha ñáyiú-o ndéé cuèé-gá, te ío quíde cahnu iní-ó cuèi nándi sá yãha-o, te nchaa xiãⁿ quidé-ó te núu cùu iní-ó cuè tnaha ñáyiú-o.

⁸ Te ni caa ni quíhíⁿ duha-ni cuu iní-ó cuè tnaha ñáyiú-o. Dico sáá nduu te vá cóó-gã ñáyiú cáháⁿ tnúhu sá dácàhu iní ñáhá Yã Ndiöxí, te ni vã cóó-gã ñáyiú cáháⁿ tnúhu sá dácàhu iní ñáhá Espíritú Yã Ndiöxí tnúhu sá ñà túú xini-yu, te ni vã cóó-gã ñáyiú túha dàtná túha ñáyiú vitna. ⁹ Te vitna ñá túú cùtnuní iní-ó nchaa nacuaá sàni iní Yã Ndiöxí chí sacú-ni cùtnuní iní-ó, te ducaⁿ sácú-ni cáháⁿ-ó nàcuáa ndùu tnúhu-gá, dico cáháⁿ-ó tnúhu-gá nàcuáa dácàhu iní ñáhá-gã xii-o. ¹⁰ Te na sáá nduu càda Yã Ndiöxí nchaa nàcuáa tàú-xi cunduu, te dàvá-áⁿ te nchaa sá càhí-gá ñá túú ndècu-xi nacuaá tàú-xi cunduu vá dúcáⁿ-gã cundecu-xi.

¹¹ Te yúhú cùtnàhá ní cuu landú-í ní xóo cada-í sá cùu-í landú, ní xóo cáháⁿ-í, ní xóo caní iní-í, te ní xóo tecú tnùn-í dàtná quidé cuè landú xíndecu vitna, dico sátá ñí cuu-í ìⁿ téé cùu sacuéhé te ñá túú-gã quidé-í dàtná ní xóo cada-í cùtnàhá ní cuu landú-í. ¹² Te ducaⁿ sãtnahá-xi cùu-o vitna ndecu-o ichi Xítohó Jesucristú, chí ñá túú cùtnuní váha iní-ó nàcuáa cùu cuendá Yã Ndiöxí, te cùu-o datná ñáyiú ndèhe ìⁿ núú yùtátá sã ñà túú túu váha núú-xi, te ducaⁿ sãtnahá-xi cùu-o chí ñá túú cùtnuní váha iní-ó nãsa cùu cuendá-gá, dico sáá nduu quini núú-ó-gã. Te nchoo sácú-ni cùtnuní iní-ó nàcuáa ndùu-gá vitna dico na sáá nduu te quini ndáá-ó nàcuáa càa nacuaá ndùu-gá dàtná xini ñáhá mèe-gá xii-o. ¹³ Te ni caa ni quíhíⁿ ducaⁿ-ni quíndáá iní-ó Yã Ndiöxí, te ducaⁿ-ni cùndecu ndihí-o tnúhu ndee iní cundecu-o ndihí-gá, te ducaⁿ-ni ío cuu iní-ó-gã ndihí tnàha ñáyiú-o. Te sá cúú iní-ó Yã Ndiöxí ndihí sá cúú iní-ó tnàha ñáyiú-o xiãⁿ ío-gá cùnùu-xi dácúúxí dàva-gá.

14

Ñáyiú cáháⁿ tnúhu sá dácàhu iní ñáhá Espíritú Yã Ndiöxí

¹ Te vá dáñá ndéé-ndó cùu iní-ndó tnàha ñáyiú-ndo, te cuhuⁿ iní-ndó sã ndùu táhú-ndó núú Yã Ndiöxí títní núú chiúⁿ

cada-ndo nacuaá chindee ñàha Espíritú-gá xii-ndo, te ío cuhuⁿ iní-ndó sã ndúú táhú-ndó cáháⁿ-ndó tnúhu sá dácàhu iní ñáhá Yã Ndiöxí xii-ndo. ² Te cue ñáyiú cáháⁿ tnúhu sá dácàhu iní ñáhá Espíritú Yã Ndiöxí tnúhu sá ñà túú xini-yu, te tnúhu cáháⁿ-yu-áⁿ cúú-xí sã cúú-xí Yã Ndiöxí te ñá díú sã cúú-xí ñáyiú chí ñá túú tècú tnùn-í-yu, te mee Espíritú Yã Ndiöxí quidé-xí dùcaⁿ cáháⁿ-yu tnúhu yíyuhu. ³ Te cue ñáyiú ní nduu táhú núú Yã Ndiöxí cáháⁿ tnúhu sá dácàhu iní ñáhá-gã xii-yu, te ñáyiú-áⁿ dácàháⁿ-yu ñáyiú nàcuáa cuita níhí ndéé-gã-yu cundecu-yu ichi-gá, te ducaⁿ cuñàhá-yu tnúhu ndee iní xii-yu òré ndihú iní-yu. ⁴ Te ñáyiú cáháⁿ tnúhu sá dácàhu iní ñáhá Espíritú Yã Ndiöxí xii-yu tnúhu sá ñà túú xini-yu-áⁿ, ñáyiú-áⁿ mee-ñí-yu níhí ndéé-yu ndècu-yu ichi-gá. Dico ñáyiú cáháⁿ tnúhu sá dácàhu iní ñáhá-gã xii-yu, cáháⁿ-yu tnúhu-áⁿ nàcuáa níhí ndéé dàva-gá ñáyiú nchícúⁿ nihnu ichi-gá.

⁵ Te yúhú ío cudíí iní-í te núu nchaa-ndo cáháⁿ-ndó tnúhu sá dácàhu iní ñáhá Espíritú Yã Ndiöxí xii-ndo tnúhu sá ñà túú xini-ndó. Dico ío-gá cudíí iní-í te núu nchaa-ndo cáháⁿ-ndó tnúhu sá dácàhu iní ñáhá-gã, chí ío-gá xini ñúhu-xi sá cáháⁿ-ndó tnúhu-áⁿ dácúúxí sã cáháⁿ-ndó tnúhu sá dácàhu iní ñáhá Espíritú-gá cáháⁿ-ndó tnúhu sá ñà túú xini-ndó. Dico ìⁿ-ni nùtnahá-xi quíde-ndo te núu nchòhó ñáyiú cáháⁿ tnúhu sá dácàhu iní ñáhá Espíritú-gá cáháⁿ-ndó nàcuáa quèe-xi tnúhu-áⁿ. Te ducaⁿ te nchaa ñáyiú ndècu ichi Yã Ndiöxí cuita níhí ndéé-gã-yu quíhíⁿ cundecu-yu ichi-gá. ⁶ Te núu yúhú quexìo-í núú ndécú nchòhó ñáyiú ndècu ndihí-í ichi Xítohó Jesucristú, te ngüíta-í cáháⁿ-í mee-ni tnúhu sá dácàhu iní ñáhá Espíritú Yã Ndiöxí xii-í tnúhu sá ñà túú xini-í, te ñá túú ñá sá váha cuu-xi sá cúú-xi-ndó. Dico cuu-xi sá váha xii-ndo te núu na cáháⁿ-í núú-ndó nchaa tnúhu sá dánèhé ñáhá Yã Ndiöxí xii-í tnúhu sá vátá dácuaá-gá-í, ndihí nchaa tnúhu sá sã xini-í, ndihí nchaa tnúhu sá dácàhu iní ñáhá-gã xii-í cáháⁿ-í, ndihí nchaa dàva-gá tnúhu-gá.

⁷ Te na càda-o cuendá sá núu ìⁿ téé tíú-dé vílu àdi caní-dé àrpá te núu ñá túú sàhnú-dé ndihí-xi ìⁿ yaá, te ñá cùtnuní iní-ó ñá yaá

cání-dě àdi ná yaá tiú-dé te núu ducaⁿ na càda-dé. ⁸ Te diu-ni ducaⁿ sãtnahá-xi cùu tucu téé cùu sandadú tiú cútú, chi núu vá tiú váha-dé nàcuáa tàú-xi cunduu òré quíhíⁿ-güedé nàá-güedé, te vá ngündecu túha dava-gá cue sandadú te núu ducaⁿ na càda-dé vá tiú váha-dé. ⁹ Te ducaⁿ sãtnahá-xi cùu nchohó te núu vá càháⁿ-ndó ìⁿ tnúhu nàcuáa tàú-xi cunduu núú ñáyiú te vá tècú tnùnì-yu tnúhu càháⁿ-ndó. ¡Chi àúⁿ nã cuu càháⁿ-ndó te núu ducaⁿ na càda-ndo! ¹⁰ Te ío titní núú tnúhu ío ñuyíú, te ìⁿ ìⁿ núú tnúhu-áⁿ cùtnunì iní ñáyiú nàcuáa quèe-xi. ¹¹ Te núu nchoo ñã tècú tnùnì-ó ìⁿ tnúhu càháⁿ ìⁿ ñáyiú, te quíde-ó-yu ñáyiú ñuú xicá chi ñã túú càháⁿ-yu tnúhu càháⁿ-ó, te diu-ni ducaⁿ quíde ñahá-yu xii nchoo tucu. ¹² Te xíãⁿ núu càchí tnúhu-í xii nchaa nchòhó ñáyiú ío cuìní nduu táhú núú Yã Ndiõxí sá Espiritú-gá chindee ñaha-xi xii-ndo cada-ndo ná daha núú chùⁿ, te ío nducu ndèe-ndo cada-ndo chiuⁿ sá ñí nduu táhú-ndó nàcuáa cuita níhí ndéé-gã ñáyiú ndècu ichi-gá quíhíⁿ.

¹³ Te núu càháⁿ-ndó tnúhu sá ñã túú xìnì-ndó, tnúhu sá dácàhu iní ñáhá Espiritú Yã Ndiõxí xii-ndo, te xìnì ñuhu-xi sá càcáⁿ táhú-ndó núú Yã Ndiõxí cuèndá sá ná chindee ñaha-gá xii-ndo càháⁿ-ndó núú ñáyiú núu nása quèe-xi tnúhu-áⁿ. ¹⁴ Chi núu nchoo na càháⁿ ndìhi-o Yã Ndiõxí ndìhi tnúhu sá ñã túú xìnì-ó, te ñí yùhu ñí iní-ó càháⁿ ndìhi-o-gã dícó-ni sá ñã tècú tnùnì-ó nàcuáa ndèu tnúhu càháⁿ-ó. ¹⁵ Te xíãⁿ núu xìnì ñuhu-xi càháⁿ ndìhi-o Yã Ndiõxí ñí yùhu ñí iní-ó nàcuáa chindee ñaha Espiritú-gá xii-o te càháⁿ-ó nàcuáa tecú tnùnì-ó, te diu-ni ducaⁿ càda-o òré xitá yùhu-o chiñuhu-o Yã Ndiõxí, chi ñí yùhu ñí iní-ó dùcaⁿ cada-o nàcuáa chindee ñaha Espiritú-gá xii-o, te cùtnunì iní-ó nàcuáa cuáháⁿ nchaa tnúhu càháⁿ-ó xità-o. ¹⁶ Chi núu nchoo na ndàcáⁿ táhú-ó núú Yã Ndiõxí ndìhi mee-ni tnúhu sá ñã túú xìnì-ó tnúhu sá dácàhu iní ñáhá Espiritú-gá xii-o, te ñáyiú ñã túú ní ndèu táhú càháⁿ tnúhu càháⁿ-ó ndèdóho ñahá-yu xii-o, te ñáyiú-áⁿ vã ndácũ-yu càháⁿ-yu tnúhu càháⁿ-ó ndàcáⁿ táhú-ó ndìhí-yu núú Yã Ndiõxí chi ñã túú tècú tnùnì-yu tnúhu càháⁿ-ó. ¹⁷ Te váha-ni quíde-o sá dúcáⁿ càháⁿ-ó ndàcáⁿ táhú-ó núú Yã Ndiõxí, te dícó-ni sá tnúhu-áⁿ

ñã túú chindee-xi ñáyiú nàcuáa cuita níhí ndéé-gã-yu cundecú-yu ichi-gá. ¹⁸ Te yúhú ío ndàcáⁿ táhú-í núú Yã Ndiõxí chi càháⁿ-í tnúhu sá ñã túú xìnì-í tnúhu sá dácàhu iní ñáhá Espiritú-gá xii-í, te càháⁿ-gá-í dácúúxí nchaa nchohó. ¹⁹ Te òré tàcá ñáyiú ndècu ichi Yã Ndiõxí dácuhá-yu tnúhu-gá, te càháⁿ-í tnúhu-gá núú-yu sá sá ní cutnùnì iní mèe-í nàcuáa ducaⁿ cùtnunì iní-yu nàcuáa ndèu tnúhu càháⁿ-í. Te tnàhá-gá iní-í càháⁿ-í úhúⁿ-ni tnúhu-áⁿ núú-yu dácúúxí sã càháⁿ-í úxí míl tnúhu sá ñã túú xìnì-í, tnúhu sá dácàhu iní ñáhá Espiritú Yã Ndiõxí xii-í càháⁿ-í.

²⁰ Te nchòhó ñáyiú ndècu ndìhi-í ichi Xitohó Jesucristú, vá cánì iní-ndó dàtná sání iní cue landú, chi canì iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú líhli vá cùndècu-ndo ichi cuehé ichi duha, chi cue landú-áⁿ ñã túú ndècu-güexi ichi-áⁿ. ²¹ Te núú tütú Yã Ndiõxí càháⁿ-xi nàcuáa ní càháⁿ-gá, te càchí-xi: “Cue téé ñuú xicá càháⁿ ndì dèⁿ núú tnúhu quíhíⁿ-güedé càháⁿ-güedé tnúhu-í núú ñáyiú isràèl cada-güedé núú-í, te cuèi ducaⁿ dico vá quíndáá iní-yu tnúhu-í”, duha ní cachí Yã Ndiõxí te ducaⁿ ñí ngúndéé núú tütú-gá. ²² Te tnúhu sá dácàhu iní ñáhá Espiritú Yã Ndiõxí xii-o tnúhu sá ñã túú xìnì-ó, xíãⁿ cúú-xí cuèndá sá cùtnunì iní cue ñáyiú ñã túú sàndáá iní tnúhu Yã Ndiõxí sá ñã túú cùu váha iní ñáhá-gá xii-yu. Dico sá cúú-xí cuè ñáyiú sàndáá iní tnúhu-gá ñã túú nã quíde-xí sã cúú-xí-yu. Te tnúhu sá dácàhu iní ñáhá Yã Ndiõxí xii-o, xíãⁿ cúú-xí cuèndá sá cùtnunì iní cue ñáyiú sàndáá iní tnúhu-gá sá ndécú ndìhi ñaha-gá xii-yu, dico ñã túú dùcaⁿ sani iní cue ñáyiú ñã túú sàndáá iní tnúhu-gá. ²³ Te núu ní tacá nchaa nchòhó ñáyiú ndècu ichi Yã Ndiõxí, te nchaa-ndo ñí ngüíta-ndo càháⁿ-ndó tnúhu sá dácàhu iní ñáhá Espiritú Yã Ndiõxí xii-ndo tnúhu sá ñã túú xìnì-ndó, te mei òré-áⁿ quexìo cue ñáyiú ñã túú sàndáá iní tnúhu-gá, ndìhi cue ñáyiú vátá quíni dana-gá tnúhu-gá núú ndécú-ndó, te ñáyiú-áⁿ quesàhá-yu sá lúcú-ndó te núu ducaⁿ càháⁿ-ndó tnúhu sá dácàhu iní ñáhá Espiritú-gá xii-ndo òré quexìo-yu. ²⁴ Dico núu nchaa-ndo càháⁿ-ndó tnúhu sá dácàhu iní ñáhá Yã Ndiõxí xii-ndo, te mei òré-áⁿ quexìo cue ñáyiú ducaⁿ ñã túú sàndáá iní-xi

tnúhu-gá, ndihi cue ñáyiú ducaⁿ ñà túú xini dana tnúhu-gá-án, te ñáyiú-án cutnùníní-iní-yu sá ndécú cuèchi-yu núú-gă, te nguíta-yu cuáha-yu cuendá sá ñà túú quide váha-yu ndécú-yu cuendá sá cãháⁿ-ndó tnúhu-gá ndèdóho-yu. ²⁵ Te nchaá sá cuèhé sá dúhá ní quidé-yu sãni iní-yu yìyuhu ndacu iní-yu, te nguíta-yu náhmá-yu nchaá sá ñà túú váha ní quidé-yu núú Yã Ndiõxí, te cachí-yu sá ïo cãhnu cuu-gá, te cachí tucú-yu sá ndàá ndécú ndihi-ndo-gá.

Cada-o nãcuáa tàú-xi cunduu

²⁶ Te vitna nchòhó ñáyiú ndècu ndihi-í ichi Xítóhó Jesucristú xini ñuhu-xi duha cada-ndo. Òré tàcã-ndó te dava-ndo càta yuhu-ndo chiñuhu-ndo Yã Ndiõxí, te dava-ndo dàsahú-ndó ñáyiú tnúhu-gá, te dava-ndo cãháⁿ-ndó nãcuáa dàquixi túu Yã Ndiõxí iní-ndó, te dava-ndo cãháⁿ-ndó tnúhu sá dácãhu iní ñáhã Espiritú Yã Ndiõxí xii-ndo tnúhu sá ñà túú xini-ndó, te dava-ndo cãháⁿ-ndó nãcuáa quèe-xi tnúhu-án. Te nchaá sá quidé-ndó ná cùu-xi nãcuáa chindee-xi ñáyiú nãcuáa cuita níhí ndéé-gã-yu cundecú-yu ichi-gá. ²⁷ Te òré cãháⁿ-ndó tnúhu sá dácãhu iní ñáhã Espiritú Yã Ndiõxí xii-ndo tnúhu sá ñà túú xini-ndó, te úú-ni-ndo àdi úní-ni tnãhá-ndó cãháⁿ-ndó tnúhu-án te vá úúⁿ-ní cãháⁿ-ndó chi ndéé ndihi ñⁿ-ndo te dàtnùní nguíta ingá-ndó cãháⁿ-ndó. Te xini ñuhu-xi sá ñⁿ ñáyiú cãháⁿ-yu nãcuáa quèe-xi tnúhu cãháⁿ-ndó-án. ²⁸ Te núu ñà túú ñáyiú tècú tnùní nãcuáa quèe-xi tnúhu cãháⁿ-ndó-án, te núú méé núú ñⁿ-ní-ndó cãháⁿ-ndó tnúhu-án cãháⁿ ndihi-ndo Yã Ndiõxí te vá cãháⁿ-ndó núú ñáyiú. ²⁹ Te òré cãháⁿ-ndó tnúhu sá dácãhu iní ñáhã Yã Ndiõxí xii-ndo te úú-ni-ndo àdi úní-ni tucu-ndo cãháⁿ, te dava-gã-ndó cundèdóho-ndo tnúhu-án te cãháⁿ-ndó núu váha-ni cãháⁿ-güedé àdi ñà túú váha-ni. ³⁰ Te núu ñⁿ-ndo ní dácãhú iní ñáhã Yã Ndiõxí xii-ndo ñⁿ tnúhu cãháⁿ-ndó, te núu ñⁿ-ndo sã cãháⁿ-ndó te nguíñí-ndó te quíhu tucu ingá-ndó cãháⁿ-ndó nãcuáa ní dácãhú iní ñáhã Yã Ndiõxí xii-ndo. ³¹ Te nchaá nchòhó ñáyiú ní nduu táhú cãháⁿ tnúhu sá dácãhu iní ñáhã Yã Ndiõxí, te vá úúⁿ-ní cãháⁿ-ndó chi díhna-gá ñⁿ-ndo cãháⁿ te dàtnùní cãháⁿ tucu ingá-ndó. Te ducaⁿ càda-ndo cuendá nchaá-ndo

tècú tnùní-ndó nãcuáa ndùu tnúhu cãháⁿ ñⁿ ñⁿ-ndo, te ducaⁿ te cudíi-gã iní-ndó cãchicúⁿ nihnu-ndo ìchi-gá. ³² Te nchaá ñáyiú cãháⁿ tnúhu Yã Ndiõxí sa nãha-ná méé-yu nãcuáa quidé-yu cãháⁿ-yu tnúhu-gá nãcuáa ñà túú quide cutexínu-yu. ³³ Te Yã Ndiõxí cúu-gă Yaá quidé ïo váha cùu ñⁿnuu-ndo ndecu-ndo, te ñà túú dàticá nuu ñaha-gã xii-ndo.

Te na cãchí tnúhu-í xii-ndo nãcuáa cãháⁿ-í nchaá núú tàcã cue ñáyiú ndècu ndihi-o ichi Xítóhó Jesucristú. ³⁴ Te yúhú cãchí-í sá vã cúu cãháⁿ cue ñáyiú dìhí òré tàcã-ndó dàcuaha-ndo tnúhu-gá, chi ñà túú dùcaⁿ cuini-gá cadá-yu, te quíndáá-ni iní-yu cadá-yu nãcuáa tàú-xi cunduu. ³⁵ Te núu ñⁿ sá cuini-yu nducu tnúhu-yu te ndéé òré nasáá-yu vehé-yu te nducu tnúhu-yu núú yí-yu, chi ñà túú ndùu váha-xi sá cãháⁿ-yu núú tàcã nchaá ñáyiú dàcuáha ndihí-yu tnúhu-gá.

³⁶ Te chí dándacu iní sá ñà díú nchòhó cúu-ndó ñáyiú ní ngúndecu ndihi tnúhu Yã Ndiõxí díhna nuu nãcuáa datècú tnúhu-ndo dàva-gá ñáyiú, te ni ñà díú mèe-ni nchòhó sa ní ngúndecu ndihi-ndo tnúhu Yã Ndiõxí vitna, núu xíãⁿ vá cãchí-ndó sã ïo cùnuu-ndo. ³⁷ Te núu dava nchòhó sání iní-ndó sã cãháⁿ-ndó nãcuáa dácãhu iní ñáhã Yã Ndiõxí xii-ndo àdi sani iní-ndó sã quidé-ndó nãcuáa chindee ñaha Espiritú-gá xii-ndo, te cuáha váha-ndo cuendá sá nchãá tnúhu cãháⁿ-í-a cùu-xi tnúhu sá ní cachí tnúhu mee Xítóhó Jesucristú cada-o. ³⁸ Te ndèda-ni càa ñáyiú ndècu ndihi-ndo te núu ñà túú sãndáá iní-yu tnúhu cãháⁿ-í, te vá cadá cuendá-ndó tnúhu cãháⁿ-yu.

³⁹ Te vitna nchòhó ñáyiú ndècu ndihi-í ichi Xítóhó Jesucristú, ïo cani iní-ndó cãháⁿ-ndó tnúhu sá dácãhu iní ñáhã Yã Ndiõxí núú ñáyiú, te dañã-ndo na cãháⁿ cue ñáyiú ní nduu táhú núú Yã Ndiõxí sã cãháⁿ-yu tnúhu sá dácãhu iní ñáhã Espiritú-gá xií-yu tnúhu sá ñà túú xini-yu. ⁴⁰ Te càda-ndo nchãa nãcuáa tàú-xi cunduu nãcuáa ñà túú nã cuu cundecu-ndo.

15

Ní ndoto Xítóhó Jesucristú

¹ Te vitna nchòhó ñáyiú ndècu ndihi-í ichi Xítóhó Jesucristú cuini-í sá dándacu

iní-ndó nàcuáa ní dánèhé ñáhà-í xii-ndo tnùhu sá càháⁿ nàcuáa naníhí tǎhú-ó, chi ðiu tnùhu-án ñí sándáa iní-ndó te nchícúⁿ nihnu-ndo. ² Te sá xíí tnùhu-án níhnú-ndó ìchi cuáháⁿ-ndó núú ndúú tǎhú-ndó cùndecu-ndo ndihí Yá Ndiöxí ní caa ní quíhíⁿ, te ducaⁿ ndùu tǎhú-ndó núú cùndecu-ndo ní caa ní quíhíⁿ ndihí Yá Ndiöxí te núu nchícúⁿ nihnu-ndo nàcuáa ní dánèhé ñáhà-í xii-ndo, te núu ñá túú nchícúⁿ nihnu-ndo te ñá túú ní sándáa iní-ndó nàcuáa tǎu-xi cunduu.

³ Te yúhú sa ní cachí tnùhu-í xii-ndo ìⁿ tnùhu sá ïo cùnuu ní níhí-í, chi ní cachí tnùhu-í xii-ndo sǎ Xítóhó Jesucristú ní xíhí-gá cuèndá nchaa yíca cuèchi-o, te ducaⁿ ní cuu chi ducaⁿ càháⁿ-xi núú tütú Yá Ndiöxí sá dúcáⁿ yǎha-gá. ⁴ Te ní chindúxi ñaha-güedě xii-gá te nduu úní ní dándótó ñaha Yá Ndiöxí xii-gá, te ducaⁿ ñí cuu chi ducaⁿ càháⁿ-xi núú tütú Yá Ndiöxí. ⁵ Te sátá ní ndoto-gá te ní quee túu-gá núú tē Pélú, te dǎtnùní ní quee túu-gá núú ðava-gá cue téé ní táuchíúⁿ-gǎ cáháⁿ tnùhu-gá. ⁶ Te sátá dúcáⁿ te dǎtnùní ní quee túu-gá núú ũhúⁿ cièndú cue ñáyiu ndècu ìchi-gá, te vǎi-yu xǐndecu-ní-yu vitna chi sacú-ni-yu ní xíhí. ⁷ Te dǎtnùní ní quee túu-gá núú tē Jàcobó, te sátá dúcáⁿ te dǎtnùní ní quee túu-gá núú nchaa cue téé ní táuchíúⁿ-gǎ cáháⁿ tnùhu-gá.

⁸ Te ndéé núú ñí ndihí-ná te ní quee túu-gá núú mée-í, te òré ní quee túu-gá núú-í te cùu-í dǎtná ìⁿ déhe yiquíⁿ vǎtá sáa-gá nduu càcu chi cùu-í ìⁿ téé ñá túú sàni váha iní-xi cuèndá-gá ní cùu. ⁹ Te yúhú ñá túú cùnuu-í dǎtná cùnùu cue téé ní táuchíúⁿ Xítóhó Jesucristú cáháⁿ tnùhu-gá. Te cùu-í ìⁿ téé ní táuchíúⁿ-gǎ càháⁿ tnùhu-gá, cuèi ñá túú tǎu-í sá càháⁿ-í tnùhu-gá, chi ní xóo cuu úhú iní-í cue ñáyiu ndècu ìchi Yá Ndiöxí. ¹⁰ Dico Yá Ndiöxí ío váha iní-gá chi ní quide ñaha-gǎ xii-í ìⁿ téé váha, chi ñá túú-gǎ quidè-í dǎtná ní xóo cada-í. Te ío cùndahú iní ñáhá-gǎ chǐndèe ñaha-gǎ xii-í dico ñá túú àúⁿ nǎ cuu chǐndee ñaha-gǎ, chi ío-gá vǎi chiuⁿ-gá ní cuu sa ta quide-í cuáháⁿ dǎcúúxí ðava-gá cue téé ní táuchíúⁿ-gǎ cáháⁿ tnùhu-gá te ñá díú mée-í ducaⁿ quide-í chi mee Yá Ndiöxí ío cùndahú iní ñáhá-gǎ chǐndèe ñaha-gǎ xii-í quidè-í chiuⁿ-gá. ¹¹ Te

ñá túú nǎ cada-xi cuèi ðava-gǎ-güedé sa ní cuu vǎi-gá chiuⁿ-gǎ quide-güedé àdi yúhú, chi ìⁿ-ni tnùhu càháⁿ-ndí te tnùhu-án cúu tnùhu ní sándáa iní-ndó.

Cue ñáyiu ní xíhí ndotó-yu

¹² Te nchúhú cue téé càháⁿ tnùhu Xítóhó Jesucristú càháⁿ-ndí sá ñí xíhí-gá te ní ndoto-gá, ¿te ná cuèndá ðava nchòhó càchí-ndó sǎ vǎ ndótó cuè ñáyiu ní xíhí? ¹³ Te núu ducaⁿ sàni iní-ndó sǎ vǎ ndótó cuè ñáyiu ní xíhí te ní Xítóhó Jesucristú ñá túú ní ndòto-gá te núu ducaⁿ. ¹⁴ Te núu ðicó Xítóhó Jesucristú ñá túú ní ndòto-gá ñá, te nchaa tnùhu sá dánèhé ñáhá-ndí xii-ndo ñá túú nǎndíhí-xi te núu ducaⁿ, te àúⁿ nǎ cuu sándáa iní-ndó-gǎ te núu ducaⁿ. ¹⁵ Te núu ðicó cúu-xí ìⁿ sá ndàa tnùhu sàni iní ðava-ndo ña, te dǎcuandehnde-ndí sá càháⁿ-ndí tnùhu Yá Ndiöxí núú-ndó te núu ducaⁿ, te ñá túú càháⁿ ndáa-ndí núú-ndó sǎ Yá Ndiöxí ní dándótó-gǎ Xítóhó Jesucristú, te núu ndáa nàcuáa sàni iní ðava-ndo sǎ vǎ ndótó cuè ñáyiu ní xíhí, dico ñá ndàa nàcuáa sàni iní-ndó. ¹⁶ Te núu vǎ ndótó cuè ñáyiu ní xíhí te ní Xítóhó Jesucristú ñá túú ní ndòto-gá. ¹⁷ Te núu Xítóhó Jesucristú ñá túú ní ndòto-gá ñá, te àúⁿ nǎ cuu sándáa iní-ndó-gǎ te núu ducaⁿ, te ndècu-ni cuèchi-ndo núú Yá Ndiöxí te núu ducaⁿ. ¹⁸ Te núu ndáa nàcuáa sàni iní-ndó ñá te cue ñáyiu ní sándáa iní ñáhá xii Xítóhó Jesucristú ñáyiu ní xíhí ní xíta nihnú-yu te núu ducaⁿ. ¹⁹ Te núu nchoo ndècu ndihí-o tnùhu ndee iní núú Xítóhó Jesucristú cuèndá-ni sá cùndecu-o ñuyíú-a ña, te cùu-o ñáyiu ío-gá duuⁿ duuⁿ ndàhú sá cúu-xí ðava-gǎ ñáyiu te núu ducaⁿ.

²⁰ Dico ndáa sá Xítóhó Jesucristú ní xíhí-gá te ní ndoto-gá núu xǐⁿ cùtnùní iní ðava-o sǎ ndótó cuè ñáyiu ní xíhí ñáyiu ní sándáa iní tnùhu-gá. ²¹ Te sá cuèchi ìⁿ ðii-ni téé ní xǐndecu ñuyíú-a xǐⁿ xíhí ñáyiu, te sá cuèndá ìⁿ ðii-ni tucu ìngá téé te ndoto cue ñáyiu ní xíhí. ²² Te nchaa ñáyiu xíhí-yu sá cuèchi ìⁿ téé, te téé-áⁿ cúu-dě ndíi Àdán téé díhna nuu ñí cuu ñaní tnáhá cuè ñáyiu ñuyíú. Te ðiu-ni ducaⁿ sǎ cuèndá ìⁿ ðii-ni téé te ndoto cue ñáyiu ní xíhí, te téé-áⁿ cúu-dě Xítóhó Jesucristú chi nchaa ñáyiu ndècu ndihí-gá ndotó-yu. ²³ Te díhna-gǎ

Xítohó Jesucrístú ní ndoto-gá xíáⁿ cútnùnì iní dava-o sã ndùu na quixi tucu-gá ñuyíú-a te dàv-áⁿ ndoto nchaa ñáyíu ní xíhí ñáyíu ní sándáá iní tnúhu-gá. ²⁴ Te dàtnùnì ducaⁿ te sáá nduu nàa nchaa sá ió ñuyíú, te Xítohó Jesucrístú danàa-gá nchaa ndi túhú sá cúnùu ió ñuyíú-a, chi danàa-gá nchaa ñáyíu ió cúnùu, ndihi yucu ñávãha, ndihi nchaa espíritú xínú cuèchi núú-xi. Te ducaⁿ te cúñaha-gã xii Tãtá-ó Dütú Ndiöxí taxi tnùnì-gá. ²⁵ Chi Xítohó Jesucrístú dacuítí taxi tnùnì-gá ndéé ná sáá nduu dànaa-gá nchaa sá cúú úhú iní ñáhá xii-gá. ²⁶ Te ndéé núú ñi ndihi-ná te danàa-gá sá quidé xíhí ñáyíu. ²⁷ Te ducaⁿ chi càháⁿ-xi núú tùtú Yã Ndiöxí sá méé-gã ní nachihi-gá nchaa sá ió ndaha Xítohó Jesucrístú cuèndá sá méé Xítohó Jesucrístú taxi tnùnì-gá, te vá yõo ìⁿ tàxi tnùnì ñáhá xii Yã Ndiöxí, chi mee Yã Ndiöxí cúú-gã Yaá ní nachihi-gá nchaa sá ió ndaha Xítohó Jesucrístú. ²⁸ Te díhna-gá ní xáhaⁿ Yã Ndiöxí xii Xítohó Jesucrístú Yaá cúú Dèhe-gá sá quíndàha-gá nchaa sá ió, te òré ná quíndaha Xítohó Jesucrístú nchaa sá ió, te cúñaha-gã xii Yã Ndiöxí taxi tnùnì ñáhá-gã xii-gá, te ducaⁿ te mee-nã Yã Ndiöxí taxi tnùnì-gá nchaandi túhú sá ió.

²⁹ Te núu ñá túú ndáá càháⁿ-í, ¿te ná cuèndá dava ñáyíu sànduté-yu cuèndá ñáyíu ní xíhí núu ñá túú ndáá sá ndótó ñáyíu ní xíhí?

³⁰ Te nchúhú ducaⁿ-ni sàni iní ñáyíu cahni ñáhá-yu xii-ndí, te núu vá ndótó ñáyíu ní xíhí te àúⁿ nã cuu ducaⁿ quíde cahnu iní-ndí ducaⁿ cuínì-yu cahni ñáhá-yu xii-ndí te núu ducaⁿ. ³¹ Te nchòhó ñáyíu ndècu ndihi-í ichi Xítohó Jesucrístú ió váha sàni iní-í cuèndá-ndó, chi ndècu-o ichi-gá. Te na càchí tnúhu ndáá-í xii-ndo sã ìⁿ nduu ìⁿ nduu ndéé iní ñáhá ñáyíu cahni ñáhá-yu xii-í. ³² Te núu dìcò ndáá sá vã ndótó ñáyíu ní xíhí dàtná càchí dava ñáyíu, te àúⁿ nã cuu ní xíndecu-í ñuú Éfesú ní cuu úhú iní ñáhá ñáyíu xii-í te núu ducaⁿ, chi ñáyíu-áⁿ ñi quidé-yu dàtná quidé ìⁿ quiti dééⁿ sã cúú-xi-í. Te núu ndáá sá vã ndótó ñáyíu ní xíhí ñá, te váha-gá núu cachí-ó dàtná càchí ñáyíu: “Vitna na còho-o te na càxi-o chi tneé idá cuú-ó”, duha càchí-yu.

³³ Te vá dáñá-ndó mèe-ndo dandahú ñáhá ñáyíu ndècu ichi cuehé ichi duha xii-ndo, te ngúita-ndo càni iní-ndó dàtná sání iní-yu. Chi quèe ndáá-xi nàcuáa càháⁿ tucu dava-gá ñáyíu, chi càchí-yu sá núu ñáyíu quíde váha na ñihí tnáhã-yu ndihi ñáyíu ndècu ichi cuehé ichi duha, te ngúita ñáyíu quíde váha-áⁿ cadá-yu tnáhã-yu nchaa sá cuèhé sá dúhá dàtná quíde ñáyíu-áⁿ. ³⁴ Te ió váha cuáha-ndo cuèndá nàcuáa cundecu-ndo, te vá cadá-gã-ndó dàtná quíde cuè ñáyíu ndècu ichi cuehé ichi duha. Te dava-ndo quíde-ndo datná quíde cuè ñáyíu ndècu ichi cuehé ichi duha chi ñá túú sándáá iní-ndó Yã Ndiöxí. Te duha càháⁿ-í cuèndá sá cúcàhaⁿ núú-ndó cuèndá nchaa sá ñá túú vãha quíde-ndo.

Nàcuáa ndoto ñáyíu ní xíhí

³⁵ Te cudana dava-ndo ndècu tnúhu-ndo núu nása ndoto ñáyíu ní xíhí, te nása cunduu yiqui cùñú-yu òré ndotó-yu. ³⁶ Te nchòhó ñáyíu ducaⁿ càháⁿ cúú-ndó ñáyíu ñá túú tnáhí cùtnùnì iní-xi, te duha na càháⁿ-í nàcuáa tecú tnùnì-ndó. Te núu ìⁿ tatá ná chíhí-ó te tèhyú méé-xí te xínu déhe-xi. ³⁷ Dico ñá díú sã sà ní xínu ta sàhnu cuáháⁿ ní cùxi-o, te diu-ñi ducaⁿ quíde-o cuéi triú ndihi nchaa dava-gá tatá xítú-ó. ³⁸ Te Yã Ndiöxí quíde-gã sácúnduu tatá xínu-áⁿ dàtná cuínì méé-gã cunduu. Te ndèda-ni càa tatá te diu-ñi-gá quíde-gã sácúnduu-xi nàcuáa tàú-xi cunduu. ³⁹ Te ndi dííⁿ ndáa nchaa yiqui cùñú, chi tucu càa yiqui cùñú nchoo cuè ñáyíu, te tucu càa yiqui cùñú nchaa quiti xíca núú ñúhú, te tucu càa yiqui cùñú nchaa quiti ndáva, te tucu càa yiqui cùñú nchaa chácá. ⁴⁰ Te ducaⁿ ñá túú ìⁿ-ni caa nchaa yiqui cùñú sá ió andi ndihi nchaa yiqui cùñú ñáyíu ió ñuyíú-a, te ducaⁿ ñá túú ìⁿ-ni ndáa vii nchaa sá ió andi ndihi ñuyíú-a. ⁴¹ Te ducaⁿ cùu tucu-xi nchícanhii chi tucu dàyehé-xi, te tucu dàyehé yóó, te tucu dàyehé nchaa chódínì, te ducaⁿ ñá túú ìⁿ-ni dayehé nchaa chódínì. ⁴² Te ducaⁿ sãtnahá-xi cùu ñáyíu ní xíhí te ndoto, chi tucu càa yiqui cùñú-yu sá nguíndúxi te tucu cunduu yiqui cùñú-yu òré ndotó-yu, te yiqui cùñú sá ndótó ndihí-yu-áⁿ vã ndihí ñihnu-gá-xi. ⁴³ Te yiqui cùñú ñáyíu xíhí ñá túú nàndíhi-xi, dico yiqui cùñú sá ndótó

ndihí-yu te ío váha cunduu. Te nchaa yiqui cuñú ñáyiú xihí ñá túú tnàhí-gá ndee-xi, dico yiqui cuñú ndoto ndihí-yu xiãⁿ ío cunduu ndee-xi. ⁴⁴ Te yiqui cuñú nchaa ñáyiú xihí cúú-xí cuendá ñuyíú-a, dico yiqui cuñú sá ndótó ndihí-yu xiãⁿ cundecu-ná-xi cuendá Espíritú Yá Ndiöxí. Te dàtná ío yiqui cuñú sá cúú-xí cuendá ñuyíú-a, te ducaⁿ ío yiqui cuñú sá cúú-xí cuendá mee-nã Espíritú Yá Ndiöxí.

⁴⁵ Te núú tütú Yá Ndiöxí càchí-xi: “Ndíi Àdán ndíi ní xíndecu ndéé díhna ní chihi Yá Ndiöxí iní ndíi”, duha càchí-xi núú tütú-gá. Te ingá tucu téé cùu-dé dàtná ndíi Àdán te téé-áⁿ cúú-dě Xítohó Jesucristú, te Yaá-áⁿ quidé-gã sá mée-ná Espíritú Yá Ndiöxí quidé-xí ndècu-o ichi-gá vitna. ⁴⁶ Te díhna-gá yiqui cuñú cuendá ñuyíú-a ní ngúndecu, te dàtnúni ngúndecu yiqui cuñú cundecu ndihí mee-nã Espíritú Yá Ndiöxí. ⁴⁷ Te téé díhna nuu ñí xíndecu ñuyíú-a chi ñuhu ní cadúha ñaha Yá Ndiöxí xii-dé, te téé-áⁿ cúú-dě ndíi Àdán, te ingá tucu téé ní cuuⁿ-dé andíu te téé-áⁿ cúú-dě Xítohó Jesucristú. ⁴⁸ Te nchaa ñáyiú càa yiqui cuñú-yu dàtná cáá yiqui cuñú téé Àdán téé ducaⁿ ñí cuáha ñuhu-áⁿ, te nchaa ñáyiú ní nduu táhú cundecu ndihí téé ducaⁿ vèxi cuuⁿ andíu-áⁿ, ñáyiú-áⁿ nduu yiqui cuñú-yu dàtná cáá yiqui cuñú ní nduu táhú-dě ndécú ndihí-dé vitna, te téé-áⁿ cúú-dě Xítohó Jesucristú. ⁴⁹ Te nchaa ñáyiú ñuyíú-a càa-yu dàtná-ni càa datná-ni nduu téé ducaⁿ ñí cuáha ñuhu-áⁿ. Te nchaa nchoo ñáyiú ní nduu táhú cundecu ndihí téé ducaⁿ vèxi cuuⁿ andíu-áⁿ nduu-o dàtná-ni càa datná-ni nduu téé-áⁿ tucu.

⁵⁰ Te nchòhó ñáyiú ndècu ndihí-í ichi Xítohó Jesucristú càchí tnúhu-í xii-ndo sã ncháá nàcuáa càa yiqui cuñú ñáyiú xíndecu vitna vá sàá-xi cundecu-xi núú ndécú Yá Ndiöxí táxi tnùnigá, chi ñuyíú-a ndihí nihnu-xi. Dico sá tàú-xi sáá núú ndécú-gã táxi tnùnigá xini ñuhu-xi cuu-xi sá cúdñi cundecu. ⁵¹ Te na càchí tnúhu-í xii-ndo ñí tnúhu sá yíyùhu ní cuu: Dava-o cùú-ó te dava-o cùndecu-ni-o, dico nchaa-o nàdáma yiqui cuñú-ó. ⁵² Te uuⁿni ducaⁿ nàdáma yiqui cuñú-ó òré cáháⁿ ñí cútú, te cútú-ãⁿ cáháⁿ-xi òré sa ta cùyatni naa ñuyíú. Te

òré cáháⁿ cútú-ãⁿ te ndoto nchaa ñáyiú ní xihí ñáyiú ní xíndecu ichi Xítohó Jesucristú, te ducaⁿ te vá ñíⁿ nduu ñíⁿ quíú-gã cuú-yu. Te nchaa ñáyiú ndècu vívú te nàdáma yiqui cuñú-yu tnàhá-yu. ⁵³ Te nchaa yiqui cuñú ndécú ndihí nchaa ñáyiú ndècu ñuyíú-a vitna ñá túú cùdí-xi chí xihí-xi, dico yiqui cuñú nduu táhú nchoo ñáyiú ndècu ichi Xítohó Jesucristú chí cùdí-xi ní caa ní quíhíⁿ chí vá cùú-gá-xi. ⁵⁴ Te òré ná nduu táhú-ó yiqui cuñú sá dúcáⁿ cùdí ní caa ní quíhíⁿ-áⁿ, te vá cùndècu ndihí-gá-ó yiqui cuñú sá ñà túú cùdí. Te dàvá-áⁿ te quee ndáá-xi nàcuáa cáháⁿ-xi núú tütú Yá Ndiöxí núú càchí-xi: “Vitna ñá túú-gã xihí ñáyiú chí mee-nã Yá Ndiöxí cùnù-gá táxi tnùnigá ñhá-gã xii-yu. ⁵⁵ Te ñá túú tnàhí-gá ná ndoho ñáyiú sá cuendá tnúhu xihí, chí vá cóo-gã tnúhu xihí”, duha càchí-xi núú tütú Yá Ndiöxí. ⁵⁶ Te cue ñáyiú ndècu ndihí-yu tnúhu sá sánú ichi ñaha xii-yu nàcuáa cadá-yu cundecu-yu dico uuⁿ-gá quídè-yu nchaa sá cuèhé sá dúhá. Te sá cuendá nchaa sá cuèhé sá dúhá quídè-yu-áⁿ, te xiãⁿ ní ngúndecu tnúhu xihí dándòho ñaha-xi xii-yu. ⁵⁷ Dico táxáhu xii Yá Ndiöxí chí ní taxi-gá tnúhu ndee iní ndécú ndihí-o sá sàá nduu te vá quíhí-gá-ó tnúhu xihí, te ducaⁿ chí ndècu ndihí-o Xítohó Jesucristú.

⁵⁸ Te xiãⁿ núú cáháⁿ-í dóho nchòhó cue ñáyiú ndècu ndihí-í ichi Xítohó Jesucristú chí ío cùu iní ñáhà-í xii-ndo, te cáháⁿ-í dóho-ndo sã cáncícúⁿ nihnu-ni-ndo ichi Xítohó Jesucristú cuèi nándi na càda ñaha ñáyiú xii-ndo sã cuendá-gá, te ío nducu ndèe-ni-ndo cada-ndo chiuⁿ-gá, chí sa nàha-ndo sá ncháá chiúⁿ quide-o cuendá-gá ñá túú àúⁿ nã cuu quide-o.

16

Nàcuáa sàcáⁿ tnáhá ñáyiú díhúⁿ

¹ Te na càchí tnúhu-í xii-ndo cuendá díhúⁿ sã sàcáⁿ tnáhá-ndó sã cúú-xí ñáyiú ñuú Jerusàlén, chí díu-ni duha ní dánèhé-í cue ñáyiú xíndecu ichi Xítohó Jesucristú ndécú ñíⁿ ñíⁿ xichi distritú Galaciá. ² Te duha cada-ndo ndi tnáhá nduu ndumìngú, te ñíⁿ ñíⁿ-ndo dàquee díhúⁿ-ndo sacú díhúⁿ nàcuáa chìndee ñaha Yá Ndiöxí xii-ndo ñihí-ndó cuendá òré quexì-í te sa cundecu túha

díhúⁿ-ăⁿ. ³ Te òré quexìo-í te mee-ndo cãxi-ndõ-yu núu ndëdacãa-yu sàni iní-ndó càda ndáá canehe díhúⁿ-ăⁿ quíhíⁿ ndaha ñáyiú xĩndecu ichi Xítohó Jesucristú ndécú ñúú Jerusalén. Te cadúha-í ìⁿ úú tutú canehé-yu quíhíⁿ cuendá cutnùnì iní ñáyiú ñúú Jerusalén nàcuáa ndùu chiuⁿ cuáháⁿ-yu. ⁴ Te núu xìni ñuhu-xi sá quíhíⁿ-í te candeca-í-yu quíhíⁿ.

Té Păblú sání iní-dé quíngoto-dé cue ñáyiú ndècu ichi Xítohó Jesucristú

⁵ Te yúhú sání iní-í yáha-í ìⁿ úú ñúú cáa dístítú Macèdoniá, te dàtnùnì ducaⁿ te sáá-í núú ndécú-ndó. ⁶ Te òré quexìo-í te cudana cundecu ndihí ñaha-í xii-ndo vài nduu, àdi cudana te cundecu ndihí ñaha-í xii-ndo ndèe yáha nchaa yóó quidé víxiⁿ-xi. Te sátá dúcáⁿ te cada ndee iní-ndó chĩndee ñaha-ndo xii-í òré nucúhuⁿ ichi-í te núu ndèe ichi na quíhíⁿ-í. ⁷ Te duha càháⁿ-í chi núu Yá Ndiòxí ná càchí-gá te cundecu ndihí ñaha tñaa-í xii-ndo òré quexìo-í te ñá díú dícó-ni ichi yáha-í. ⁸ Te cundecu-ni-í ñúú Éfesú-a ndéé tnahá vico Pentecostés. ⁹ Te ducaⁿ chi iha ío tédóho ñáyiú tnúhu Xítohó Jesucristú sá càháⁿ-í núú-yu. Núu xĩáⁿ ío váha quèe cuendá cada-í chiúⁿ-gá cuèi ío vài ñáyiú ñá túú tñahá iní-yu sá càháⁿ-í tnúhu-gá.

¹⁰ Te núu na quixi coto ñaha té Timùteú xii-ndo, te ío váha cuu iní-ndó cãháⁿ ndihí-ndo-dě cuendá ducaⁿ ñà túú ñà cani iní-dé cundecu ndihí ñaha-dě xii-ndo, chi tñahá-dé cúú-dě téé quide chiuⁿ Xítohó Jesucristú dàtná quidè-í. ¹¹ Te cuínì-í sá nì ìⁿ-ndo vá cánì cuèhé iní-ndó cuendá-dé, te chĩndee-ndo-dě nàcuáa cuu váha iní-dé òré quixi-dé quixi coto ñaha-dě xii-í, chi yúhú ndihí dava-gá ñáyiú ndècu ichi Xítohó Jesucristú ndétú-ndí-dé quexìo-dé.

¹² Te ío ní cãháⁿ ndàhú-í núú tē Àpolós téé ndècu ndihí-o ichi Xítohó Jesucristú cuendá quixi-dé ndihí dava-gá cue téé ndècu ndihí-o ichi-gá quixi coto ñaha-güedě xii-ndo dico ñá túú ní cuínì-dé quixi-dé vitna, dico quixi-dé ndéé cuèé-gá.

Tnúhu ndéé núú ñí ndihí-ná

¹³ Te ío quíhí iní-ndó cundecu-ndo ichi Xítohó Jesucristú, te vá dáñá ndèé-ndó

quíndáá iní-ndó-gã, te ío yíi cùnduu iní-ndó cundecu-ndo ichi-gá, te ío nducu ndèe-ndo canchicúⁿ nihnu-ndo ichi-gá. ¹⁴ Te ío váha cuu iní tñahá-ndó, te ducaⁿ ío váha cada tñaha-ndo te núu nándi cùu sá váha sàni iní-ndó càda-ndo.

¹⁵ Te nchòhó ñáyiú ndècu ndihí-í ichi Xítohó Jesucristú sa ñaha-ndo sá dñnanuu cuè ñáyiú cùu ndi mee té Èstéfanás ndécú dístítú Acáyá ní sándáá iní-yu tnúhu Xítohó Jesucristú. Te vitna ñá túú dàña ndéé-yu quidé-yu sá váha sá cúú-xí dàva-gá ñáyiú sándáá iní tnúhu-gá. ¹⁶ Te càháⁿ ndàhú-í núú-ndó sã quíndáá iní-ndó nchàa ñáyiú ducaⁿ xĩquide, ndihí nchaa dava-gá ñáyiú ío ndùcu ndee quide chiuⁿ ndihí-ndo cuendá Xítohó Jesucristú. ¹⁷ Te ío cùdí iní-í sá ñí quexìo té Èstéfanás, ndihí té Fortunátú, ndihí té Acàicú, chi cue téé-áⁿ ñí quide-güedé núú-ndó ñí quide-güedé nchaa sá ñà túú ndàcu-ndo cada-ndo cuendá-í ní cùu. ¹⁸ Te ío tàxi-güedé tnúhu ndee iní xii-í, te dñu-ni ducaⁿ tàxi-güedé tnúhu ndee iní xii nchòhó tucu, te núu xĩáⁿ xínì ñuhu-xi sá cànèhe-ndo sá yíñuhu núu nchàa cue téé duha xĩquide váha.

¹⁹ Te nchaa ñáyiú xĩndecu ichi Xítohó Jesucristú ndécú dístítú Àsiá quide ndee iní ñáhã-yu xii-ndo, te ío cada ndee iní-ndó càchí té Àquilú ndihí ñadìhí-dé tá Priscilá, te ducaⁿ quide ndee iní ñáhã túcu nchaa ñáyiú tàcá dácuaⁿha tnúhu Yá Ndiòxí vehé-yu xii nchaa nchòhó ñáyiú ndècu ichi-gá. ²⁰ Te cada ndee iní tucu-ndo càchí cue dava-gá ñáyiú ndècu ndihí-o ichi Xítohó Jesucristú. Te ñí yùhu ñí iní-ndó càda ndee iní tñahá-ndó ìⁿ ìⁿ-ndo.

²¹ Te vitna ndaha mee yúhú té Păblú téé-í tnúhu-a quide ndee iní ñáhã-í xii-ndo.

²² Te ñáyiú ñá túú cùu váha iní-xi núu Xítohó Jesucristú te na cuíta nihnú-yu. Te vitna nchaa-o chí ná càchí-ó sã Xítohó Jesucristú quixi tucu-gá.

²³ Te xicáⁿ tãhù-í núú Xítohó Jesucristú sá ná chĩndee chitúu ñaha-gã xii-ndo. ²⁴ Te ío cùu iní ñáhã-í xii-ndo nàcuáa ndècu-o ichi Xítohó Jesucristú, te ducaⁿ na cùnduu, te ío chí cádá ndèe iní-ñá vitna.

TUTÚ CÚÚ ÛÚ NÍ CADÚHA TÉ PÄBLÚ QUIHⁿ NDAHA ÑÁYIU ÑUÚ CÒRINTÚ

Té Păblú cādŭha-dé tutú quihⁿ ndaha ñáyiu xĩndecu ichi Xítohó Jesucristú ndécú ñúú Còrintú

¹ Yúhú té Păblú cāháⁿ-í tnúhu Xítohó Jesucristú chi ducaⁿ ñí cachí Yă Ndiöxí cunduu. Te cādúha-í tutú-a ndihi té Timùteú té ndècu ndihi-o ichi-gá cuendá daquixi-í ndaha nchòhó ñáyiu xĩndecu ichi Yă Ndiöxí ndécú ñúú Còrintú, te tutú-a cuu-xi tnàhá cuendá nchaa ñáyiu cùu cuendá Yă Ndiöxí xĩndecu nchaa ñúú yĩndèhu distritú Acáyá. ² Te xìcáⁿ tǎhù-í núú Tǎtá-ó Dǔtú Ndiöxí ndihi núú Xítohó Jesucristú sá ïo na chĩndee chitúu ñaha-gă xii-ndo, te ðiu-ni ndi ndùú-gá ná càda te ío váha cuu iní-ndó cùndecu-ndo.

Té Păblú cāháⁿ-dé nchaa nàcuáa ndòho-dé

³ Te chí ná cǎchí-ó sǎ ïo váha iní Dútú Ndiöxí Yaá cúú Tǎtá Xítohó Jesucristú, te ðiu-ni Dútú Ndiöxí cúú-gă Yaá ío cùndahú iní ñáhá xii-o, te ðiu-ni-gá cúú-gă Yaá táxi tnúhu ndee iní. ⁴ Te cuèi nǎndi ndòho-o ndecu-o dico ðiu-ni Dútú Ndiöxí táxi-gă tnúhu ndee iní xii-o, te ducaⁿ quide-gá cuendá sá nchóo cuǎñaha-o tnúhu ndee iní xii nchaa ñáyiu nǎndi ndòho ndecu, te ðiu-ni nchaa tnúhu ndee iní táxi-gă xii-o ðiu-ni nchaa tnúhu ndee iní-áⁿ cuǎñaha-o xii-yu. ⁵ Te Xítohó Jesucristú ío ní ndoho-gá, te ducaⁿ nchòo tucu ío ndòho-o, te ducaⁿ ïo vǎi tnúhu ndee iní ñihí-ó ndècu ndihi-o chi ndècu-o ndihi Xítohó Jesucristú. ⁶ Te nchúhú nǎndi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndihi-ndo te naníhí tǎhú-ndó. Te Yă Ndiöxí táxi-gă tnúhu ndee iní xii-ndí, te ducaⁿ quide-gá cuendá sá nchòhó tnàhá-ndó ñihí-ndó tnúhu ndee iní-áⁿ te naníhí tǎhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú. ⁷ Te nchúhú ío váha sǎni ndáá iní-ndí cuendá-ndó chi ndòho-ndo datná ndóhó-ndí, te ducaⁿ tàxi Yă Ndiöxí tnúhu ndee iní xii-ndo dàtná táxi-gă xii-ndí.

⁸ Te nchòhó ñáyiu ndècu ndihi-ndí ichi Xítohó Jesucristú cuini-ndí cachí tnúhu-ndí xii-ndo nàcuáa ní yáha-ndí cútnàhá ní xĩndecu-ndí distritú Àsiá chi dàvá-áⁿ ïo ní ndoho-ndí, te luha-ná te vá cùndèe iní-ndí yáha-ndí nchaa tnúndòho-áⁿ ní cùu chi ní xehndé iní-ndí sá vǎ cǎcu-ndí. ⁹ Chi ní sani iní-ndí sá ndíyi-ná cuu-ndí ní cùu, te ducaⁿ ñí yáha-ndí cuendá sá ïo-gá quindáá iní-ndí Yă Ndiöxí sá díú-gă taunihnu ñaha-gă xii-ndí, te ñá díú mèe-ndí taunihnu-ndí mée-ndí, te ðiu-gá cúú-gă Yaá dándòto cuèi ñáyiu sa ní xíhí. ¹⁰ Te ðiu-ni-gá ní taunihnu ñaha-gă ñá túú ní sǎhni ñaha ñáyiu xii-ndí, te ðiu-ni-gá táunihnu ñaha-gă xii-ndí cuèi vitna, te cùtnuní ndáá iní-ndí sá díú-ní-gă taunihnu ñaha-gă xii-ndí núú cuáháⁿ núú vèxi te vá cǎhni ñàha ñáyiu. ¹¹ Te nchòhó tnàhá-ndó chĩndee ñaha-ndo xii-ndí chi cāháⁿ ndihi-ndo Yă Ndiöxí cuendá-ndí, te ío vǎi ñáyiu cāháⁿ ndihi ñáhá-yu xii-gá cuendá-ndí, te ducaⁿ ïo vǎi ñáyiu ndàcáⁿ tǎhù-yu núú-gă cuendá nchaa sá váha quide ñaha-gă xii-ndí.

Té Păblú cāháⁿ-dé ná cuendá ñá túú ní náyaha-dé ñúú Còrintú

¹² Te ío váha cùu iní-ndí chi cùtnuní iní-ndí sá cúú-ndí cue té cùu ndáá dàtná cuini Yă Ndiöxí cunduu ndècu-ndí ñuyúú-a, te ðiu-ni ducaⁿ quide-ndí sá cúú-xi-ndó chi mee-gă cùndahú iní ñáhá-gă xii-ndí chĩndèe ñaha-gá, te ñá túú quide-ndí dàtná sání iní cue ñáyiu ñuyúú-a. ¹³⁻¹⁴ Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñà túú ùhú tecú tnùní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuini-ndí sá ïo-gá váha tecú tnùní-ndó cuendá sá òré ná quixi tucu Xítohó Jesucristú, te dàvá-áⁿ ïo cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuendá xíáⁿ núu ní sani iní-í yáha cāháⁿ-í úú xito núú ndécú-ndó cuendá ío cudí iní-ndó. ¹⁶ Chi ní sani iní-í sá òré quihíⁿ-í distritú Macèdoniá te yáha cāháⁿ-í núú ndécú-ndó, te òré ndixi tucu-í te nayáha cāháⁿ tucu-í, te òré nayáha cāháⁿ-í

te taxi-ndo sã cúu ìchi-í cuendá quíhíⁿ-í dis-
trítú Jùdeá, duha ní sani iní-í ní cùu. ¹⁷ Te
sá dúcáⁿ ñà túú ní quixi coto ñaha-í xii-ndo
te cudana sãni iní-ndó sã yùhú ñà túú
ní sãha váha-í cuendá nãcuáa ní sani iní-í
cada-í, àdi cudana ñáyiu ndècu ichi cuehé
ichi duha, chi cue ñáyiu-áⁿ tnaa càchí-yu
sá cúu càdá-yu ìⁿ sá sání ìní-yu cada-yu te
tnaa càchí-yu sá ñãhá. ¹⁸ Dico Yá Ndiöxí Yá
ío váha quide ndáá nãha ndáá náhá càxi-gá
sá nchùhú ñà túú dàma-ndí sá càháⁿ-ndí.
¹⁹ Te yùhú ndìhi té Silvanú ndìhi té Timùteú
dánèhé ñãhá-ndí xii-ndo cuendá Xítóhó Je-
sucristú Yá cúu Dèhe Yá Ndiöxí, te Xítóhó
Jesucristú cúu-gã Yá ñà túú dàma-gá tnúhu
càháⁿ-gá, chi cùu-gá Yá càháⁿ mee-ni tnúhu
ndáá tnúhu cuiti. ²⁰ Te ñiu-ni Xítóhó Jesu-
cristú cúu-gã Yá quidé nchàa nacuaa ní
cachí Yã Ndiöxí. Te sá cuendá sá dúcáⁿ
quide Xítóhó Jesucristú xiãⁿ càchí-ó sã ìo
càhnu cuu Yá Ndiöxí. Te nchaa-o na càchí-ó
sã díu-ni dùcaⁿ na cada-gá. ²¹ Te mee Yã
Ndiöxí quidé-gã ndécú-ni-ó ìchi Xítóhó Jesu-
cristú. Te ñiu-ni mee-gã ní cáháⁿ ñãhá-gã
xii-o cuendá cunu cuechi-o nùú-gã. ²² Te
Yá Ndiöxí ní quide-gá sá nchóo cùu-o ñáyiu
cùu cuendá-gá, te ní taxi-gá Espiritú-gá ní
ngúndecu ndìhi-o cuendá cutnùní iní-ó sã
ndáá cada ñaha-gã xii-o nãcuáa ní cachí-gá
cada-gá.

²³ Te Yá Ndiöxí náhá-gã sá yùhú càháⁿ
ndáá-í ná cuendá vátá quíxi-gã-í quixi
coto ñaha-í xii-ndo, te vátá quíxi-gã-í chi
ñà túú cuiní-í dandihú-í iní-ndó. ²⁴ Te
nchùhú ñà túú tàú-ndí cada yica ñaha-ndí
xii-ndo nãcuáa quíndáá iní-ndó Yã Ndiöxí,
chi sa sãndáá váha iní-ndó-gã, chi nchùhú
cuiní-ndí chindee tnúhu ñaha-ndí xii-ndo
nãcuáa ío-gá cudíí iní-ndó cùndecu-ndo.

2

¹ Te ní sani ndáá iní-í sá vã quíxi
ndìhi-ni-í quixi coto ñaha-í xii-ndo cuendá
sá vã dándihú-í iní-ndó. ² Te nchòhó
cúu-ndó ñáyiu tàxi tnúhu ndee ìní xii-í
cúdíí iní-í ndécú-í, te xiãⁿ nùu ñà túú
cuiní-í dandihú-í iní-ndó, chi núu ducaⁿ
na càda-í te vã cùndècu váha-gá iní-ndó
nãcuáa taxi-ndo tnúhu ndee ìní xii-í. ³ Te
xiãⁿ nùu ní tendaha-í tutú véxi ndaha-ndo

cuendá sá òré quixi coto ñaha-í xii-ndo, te
dává-áⁿ quini-í sá quidé-ndó nãcuáa cudíí
iní-í te ñà díu dà dandihú-ndó ìní-í òré
quexio-í, chi nchòhó tàú-ndó càda-ndo sá
yùhú cudíí iní-í. Te cutnùní ndáá iní-í sá
nùu yùhú cudíí iní-í te tnãhá nchòhó cudíí
iní-ndó cuendá sá dúcáⁿ cudíí iní-í. ⁴ Te
ndàhyú-í sá ndihú iní-í òré ní cadúha-í
tutú ní dáquixi-í ndaha-ndo, chi ío cuehé
sã sání iní-í, te ñà túú ní dàquixi-í tutú-áⁿ
ndaha-ndo cuendá sá dándihú iní ñãhá-í
xii-ndo, chi ní dáquixi-í cuendá sá nchòhó
cutnùní iní-ndó sã ìo cùu iní ñãhá-í xii-ndo.

*Nãcuáa tàú ñáyiu ñúú Còrintú cadá-yu
cuendá ìⁿ ñáyiu ñà túú quide ndáá*

⁵ Te na càchí tnúhu-í xii-ndo cuendá ìⁿ
tée ní quide ìⁿ sá ñà túú tàú-dé cada-dé
ndécú ndìhi-ndo, te ní quide ndàhú-xi luha
iní-í cuendá sá ñi quide-dé-áⁿ dico nchòhó
tnãhá-ndó ñi dándihú-dé luha iní-ndó,
te duha càchí-í sá lúhá-ni ñi dándihú-dé
iní-ndó cuendá sá vã cuidó-gá-í ná tnúhu
cáháⁿ-í. ⁶ Te nãcuáa ní ndatnúhu-ndo
ñi quide ndáá-ndó cuechi téé-áⁿ te sa
ndói-gá cuu nãcuáa ní quide-ndo-dé. ⁷ Te
vitna tàú-ndó càda cahnu iní-ndó sã ñi
quide-dé, te cuãñaha-ndo tnúhu ndee ìní
xii-dé chi núu ñãhá te vã ñihí ndéé-gã-dé
cada-dé sá vãha cuendá sá ndihú iní-dé.
⁸ Te xiãⁿ nùu càháⁿ ndàhú-í nùú-ndó sã
cádá tucu-ndo sá cúu iní-ndó-dé. ⁹ Te
ñiu-ni cuendá iha càháⁿ-í ìⁿ nùú tutú sã
sã ní dáquixi-í ndaha-ndo, te ducaⁿ ñi
quide-í xító ndéé ñãhá-í xii-ndo nùu ndisa
cuiní-ndó càda-ndo nchaa nacuaa càháⁿ-í.
¹⁰ Te ndéda-ni càa ñáyiu na càda cahnu
iní-ndó ìⁿ sá quidè-yu, te tnãhá yùhú
cada cahnu iní-í sá quidè-yu tucu. Te núu
ìó ìⁿ sá xini ñùhu-xi cada cahnu iní-í te
quide cahnu iní-í, te mee Xítóhó Jesucristú
náhá-gã sá dúcáⁿ quide-í, te ducaⁿ quide-í
cuendá sá nchòhó cuu-xi sá vãha xii-ndo.
¹¹ Te ducaⁿ te sãcuílná vã ñihí-xi ná cada
ñaha-xi xii-o, chi nchoo sã xini-ó nãcuáa
quide-xi.

Té Pãblú ndihú iní-dé ndécú-dé ñúú Tróás

¹² Te ní xica-í cuáháⁿ-í ñúú Tróás cuendá
yácáⁿ cáháⁿ-í tnúhu sá càháⁿ nãcuáa naníhí
tãhú-ó tnúhu Xítóhó Jesucristú, te òré ní
quexio-í te ní ñihí-í ìⁿ ichi cahnu cáháⁿ-í
tnúhu-gã. ¹³ Dico ñà túú ní cùu váha iní-í chi

ñá túú ní nàníhì-í té Títú té ndècu ndihì-o ichi Xítóhó Jesucristú, núu xíáⁿ ní quide ndee ìní tnáhà-í ndihì cue ñáyíu ñuú-áⁿ, te ní xica-í cuáháⁿ-í distritú Macèdoniá.

Dàquetihú-ó yùcu ñávãha chi ndècu ndihì-o Xítóhó Jesucristú

¹⁴ Te táxãhu xii Yá Ndiöxí chi ducaⁿ-ni sànu ichi ñaha-gá xii-ndí nàcuáa cunuu-ndí núu yucu ñávãha chi ndècu ndihì-ndí Xítóhó Jesucristú, te mee Yá Ndiöxí sáchìuⁿ ñaha-gá xii-ndí càháⁿ-ndí tnúhu-gá. Te cada iní-ó sã tnúhu-gá-áⁿ cúu-xí dàtná ìⁿ yúcu sã ïo váha sàháⁿ te ta xítenuu dicó-xi ndèni ní cuu cuáháⁿ. Te ducaⁿ sãtnahá-xi cùu tnúhu-gá chi nchúhú quidé-ndí nàcuáa ta xítenuu ndèni ní cuu cuáháⁿ. ¹⁵ Te cùu-ndí dàtná dicó ìⁿ yúcu sã ïo váha sàháⁿ, te nàcani cuendá Xítóhó Jesucristú núu Yá Ndiöxí, te dicó yúcu-áⁿ nchítá cuèi núu xíndecu cue ñáyíu sa ní naníhí tãhú, te cuèi núu xíndecu cue ñáyíu ta xíta nihnu cuáháⁿ. ¹⁶ Te sá cúu-xí cuè ñáyíu ta xíta nihnu cuáháⁿ-áⁿ, dicó yúcu-áⁿ cúu-xí dàtná ìⁿ sá sãhní ñaha xii-yu, dico sá cúu-xí cuè ñáyíu sa ní naníhí tãhú, dicó yúcu-áⁿ cúu-xí dàtná ìⁿ sá ndécá ìní-yu, ducaⁿ sãtnahá-xi cùu nchúhú. Te vitna chí cuãha cuendá núu ná cúu ñáyíu sàni iní-ndó ndàcu cada nacuáa ndùu tnúhu càháⁿ-í-a. ¹⁷ Chi nchúhú càháⁿ-ndí tnúhu Yá Ndiöxí dico ñá túú ndãhú quidé-ndí ndihì tnúhu-gá dàtná xíquide dava-gá-güedé, chi quide ndáá-ndí càháⁿ-ndí tnúhu-gá, te mee-gã ní cachí-gá sá dúcáⁿ càda-ndí te ndèhe-gá sá nchúhú quidé-ndí nàcuáa ní cachí-gá, chi ndècu ndihì-ndí Xítóhó Jesucristú.

3

Cuendá ingá núu sã vãha ní cachí Yá Ndiöxí cada-gá ñáyíu

¹ Te cuèi duha càháⁿ-ndí núu-ndó dico ñá túú xìni ñuhu-xi sá cñaha-ndí xii-ndo sã cúu-ndí cue té quide váha, te ni ñá túú xìni ñuhu-xi caçanehe-ndí ìⁿ tutú núu càháⁿ-xi sá cúu-ndí cue té váha danèhé ñáhá xì-ndo datná xíquide dava-gá-güedé, te ni ñá túú xìni ñuhu-xi sá nchòhó taxi-ndo ìⁿ tutú núu càháⁿ-ndó sã nchúhú cúu-ndí cue té quide váha. ² Te ñá túú xìni

ñuhu-xi ducaⁿ cada-ndí. Te cùtnuní ndáá iní-ndí sá nchòhó cúu-ndó dàtná ìⁿ tutú sá ïo váha càháⁿ cuendá-ndí. Te ducaⁿ sãtnahá-xi cùu-ndo chi nchaa ñáyíu nihí-yu tnúhu nàcuáa quide-ndo ndecu-ndo, te xíáⁿ cùtnuní iní-yu sá nchúhú cúu-ndí cue té quide váha. ³ Te nchòhó cúu-ndó cuendá Xítóhó Jesucristú, te cùu-ndo datná tutú-gá te tutú-áⁿ ñi táuchíuⁿ-gã xii-ndí ní cadúha-ndí, te mee-ni ndihì Espiritú Yá Ndiöxí ní ngúndeé tnúhu-áⁿ te ñá díú ndihì tindá ní ngúndeé. Te ñá díú ìⁿ núu yúu ní ngúndeé chi iní-ndó cùu-xi núu dúcáⁿ ñi ngúndeé tnúhu-áⁿ te ducaⁿ sãtnahá-xi cùu-ndo.

⁴ Te duha càháⁿ-ndí chi cùtnuní ndáá iní-ndí sá Yá Ndiöxí quidé vãha ñaha-gá xii-ndí, chi ndècu ndihì-ndí Xítóhó Jesucristú. ⁵ Te nchúhú chi ndàcu-ndí quidé-ndí sã vãha dico ñá díú mèe-ndí ducaⁿ ndàcu-ndí quidé-ndí, chi mee Yá Ndiöxí chíndèe ñaha-gá xii-ndí núu ndàcu-ndí quidé-ndí sã vãha. ⁶ Te mee Yá Ndiöxí ní quide-gá sá nchúhú ndacu-ndí cunu cuechi-ndí núu-gã cáháⁿ-ndí núu ñáyíu cuendá ingá núu sã vãha ní cachí-gá cada ñaha-gã xii-yu. Te sã vãha ní cachí-gá cada ñaha-gã xii-yu-áⁿ ñà túú ìⁿ-ni cuu-xi ndihì nchaa tnúhu sá ñi xáhaⁿ-gã xii ndí Moisés ní chídó tnùnì ndí, te ducaⁿ chi espíritú Yá Ndiöxí néhé chiuⁿ-xi nchaa tnúhu sá càháⁿ cuendá nchaa sã vãha-áⁿ. Te nchaa tnúhu ní chídó tnùnì ndí Moisés, dándixi túu-xi iní nchaa ñáyíu ndècu ndihì tnúhu-áⁿ sã cuíta nihnú-yu cuendá nchaa cuèchi-yu, dico cue ñáyíu ndècu ndihì Espiritú Yá Ndiöxí ñáyíu-áⁿ ndécú ndihí-yu tnúhu ndee ìní sã cãcu nihnú-yu.

⁷ Te tnúhu sá ñi cáháⁿ Yá Ndiöxí ndéé díhna nàcuáa cada ñáyíu ní ngúndeé-xi ìⁿ núu yúu quèhéⁿ. Te òré ní dátúu ndí Moisés nàcuáa càháⁿ tnúhu sá ñi cáháⁿ Yá Ndiöxí ndéé núu yúu-áⁿ núu cuè ñáyíu isràél, te súúnì ñi tásaⁿ núu ndí te ñá túú-gã ní cùu cundehé-yu núu ndí, te ducaⁿ-gã ducaⁿ-gã quidé-xi dátásaⁿ-xi núu ndí ni cùu ñá túú-gã ducaⁿ ni quide-xi. Te tnúhu ndéé núu yúu-áⁿ dándixi túu-xi iní cue ñáyíu sã cuíta nihnú-yu sá cuendá nchaa cuèchi-yu,

te ío váha ní quide-xi cútnàhá ní ngúndecu ndihí cue ñáyiú isràél tnúhu-áⁿ. ⁸ Te sá dúcáⁿ ñí quide-xi xíáⁿ cútnùní sá tnúhu càháⁿ Espíritú Yá Ndiòxí vitna uuⁿ-gá ducaⁿ ïo-gá váha quide-xi. ⁹ Te núu ducaⁿ ïo váha ní quide-xi cútnàhá ní ngúndecu ndihí cue ñáyiú isràél tnúhu sá dándìxi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gá ducaⁿ vâha quide-xi vitna ní ngúndecu ndihí-o tnúhu sá càháⁿ nâcuáa quide Yá Ndiòxí cuèndá sá vâ cúndecu-gá cuéchi ñáyiú núú-gã. ¹⁰ Te vá càchí-ó sã cútñàhá ní ngúndecu ndihí cue ñáyiú isràél tnúhu ndéé núú yúú-ãⁿ ïo-gá váha ní quide-xi, te ñáhá chi uuⁿ-gá váha quide-xi vitna cuendá tnúhu sá càháⁿ nâcuáa quide Yá Ndiòxí. ¹¹ Te núu ducaⁿ ïo váha ní quide-xi cútnàhá ní ngúndecu ndihí ñáyiú isràél tnúhu sá ñà túú ní cùdíi, te uuⁿ-gá ducaⁿ ïo váha quide-xi vitna ní ngúndecu ndihí-o tnúhu sá vâ ndíhí nihnu tnahí-gá.

¹² Te cùtnuní iní-ndí sá vâ ndíhí nihnu sá dúcáⁿ ïo váha quide-xi, núu xíáⁿ ío víi ío váha cùu iní-ndí càháⁿ-ndí tnúhu sá ñí ngúndecu ndihí-o. ¹³ Te ñà túú quide-ndí dàtná ní xóo cada ndíi Moisés, chi ndíi-áⁿ ñí xóo dàdáhu ndíi núú ndíi òré dátâsaⁿ-xi núú ndíi cuèndá sá vâ quíní cue ñáyiú isràél òré ñà túú-gã dátâsaⁿ-xi núú ndíi. ¹⁴ Te cue ñáyiú isràél ñà túú ní tècú tnùní váha-yu nâcuáa ní xóo danèhé ñáhá ndíi Moisés xií-yu, te cuèi ndéé vitna ñà túú tècú tnùní-yu òré dácuàhá-yu tnúhu sá ñí càháⁿ Yá Ndiòxí ndéé díhna nâcuáa cada-gá, te cada iní-ó sã dàtná sá ñí xidáhu núú ndíi Moisés yidáhu núú-yu cuèndá sá vâ cútnùní núú-yu cundèhé-yu te tecú tnùní-yu, dico núu tnahá tnúhu-yu ndihí Xítohá Jesucristú te tecú tnùní-yu. ¹⁵ Te cuèi ndéé vitna òré dácuàhá-yu nchaa tnúhu sá ñí chídó tnùní ndíi Moisés nchaa núú tùtú ndíi, te cada iní-ó sã dàtná sá ñí xidáhu núú ndíi yidáhu núú-yu chi ñà túú tècú tnùní-yu. ¹⁶ Dico cue ñáyiú na tûha ñaha xii Xítohá Jesucristú te tècú tnùní-yu tnúhu-gá. ¹⁷ Te Xítohá Jesucristú ñⁿ-ni cùu-gá ndihí Espíritú Yá Ndiòxí, te nchaa ñáyiú ndècu ndihí Espíritú-gá ñà túú-gã táxi tnùní ñáhá ñí ñⁿ sá ñà túú vâha xií-yu. ¹⁸ Te dàtná cúú ñⁿ yutatá sã dánèhé núú ñáhá-xí xii ñáyiú ñⁿ sá vâha, ducaⁿ

sãtnahá-xi cùu-o chi quide-o nacuéa càháⁿ ñáyiú sá ïo càhnu cuu Xítohá Jesucristú, te ducaⁿ uuⁿ-gá uuⁿ-gá tá cùndáá-ó ndècu-o ichi-gá dàtná quidé mèe-gá quidé ndáá-gá. Te Espíritú-gá quidé-xí dùcaⁿ ta cundáá-ó núú-gã cuáháⁿ.

4

¹ Te mee Yá Ndiòxí ní cundàhú iní ñáhá-gã xii-ndí ní taxi-gá chiuⁿ quide-ndí càháⁿ-ndí tnúhu-gá, núu xíáⁿ ñà túú tnàhí nàtúhú iní-ndí càháⁿ-ndí tnúhu-gá. ² Te nchúhú dàquee tíhú-ndí nchaandi túhú sá ñà túú vâha quide dayuhu ñáyiú, chi nchaa xíáⁿ cúú-xí ñⁿ sácáⁿ-núú sã cúú-xí-yu, te nchúhú ñà túú sàni iní-ndí dandàhú-ndí ñáyiú te ñí ñà túú sàni iní-ndí dama-ndí nâcuáa càháⁿ tnúhu Yá Ndiòxí, chi càháⁿ ndáá-ndí nâcuáa tàú-xi càháⁿ-ndí, te mee Yá Ndiòxí náhá-gã nâcuáa ndúu tnúhu càháⁿ-ndí núú ñáyiú, te ñáyiú-áⁿ cútnùní iní-yu sá nchúhú càháⁿ váha-ndí. ³ Te cue ñáyiú ñà túú tècú tnùní nâcuáa ndúu tnúhu sá càháⁿ nâcuáa naníhí tàhú-ó càháⁿ-ndí núú-yu, ñáyiú-áⁿ cúú-yu ñáyiú ta xíta nihnu cuáháⁿ. ⁴ Te cue ñáyiú-áⁿ cúú-yu ñáyiú ío sàá iní-xi chi ñà túú cuíní-yu quíndáá iní-yu tnúhu Xítohá Jesucristú, te xíáⁿ núu sâcuíhna cùnùu-xi núú-yu te nihí-xi nâcuáa quide-xi dadáhu ndodo iní ñáhá-xí xii-yu cuèndá sá vâ tècú tnùní-yu tnúhu sá càháⁿ nâcuáa naníhí tàhú-yu, te tnúhu-áⁿ cúú-xí tnúhu sá ïo váha chi càháⁿ-xi sá ïo càhnu cuu Xítohá Jesucristú, te cùu-gá dàtná mèe Tâtá-gã Dútú Ndiòxí. ⁵ Te nchúhú ñà túú càháⁿ-ndí cuèndá sá cúú-xí mèe-ndí núú-ndó chi càháⁿ-ndí cuèndá Xítohá Jesucristú, te càchí-ndí xii-ndo sã díú-gã cúú-gã Yáá ío cùnùu, te càchí-ndí xii-ndo sã mèe-ndí cúú-ndí dícó-ni cue téé xinu cuechi sá cúú-xí-ndó, te ducaⁿ quide-ndí nâcuáa cuu víi cuu váha iní Xítohá Jesucristú. ⁶ Te Yá Ndiòxí Yáá ní dáyhé ndéé cútnàhá nee ñuyú ní cùu, Yáá-áⁿ ñí cachí-gá sá Xítohá Jesucristú cada-gá nâcuáa tecú tnùní-ó sã ïo càhnu cuu mee Yá Ndiòxí. Te sá dúcáⁿ ñí quide-gá te cada iní-ó sã dàtná tnúhu sá ñí dáyhé-gá iní-ó.

Ío quíndáá iní-ó Yá Ndiòxí

⁷ Te nchúhú ndécú ndìhi-ndí tnúhu Xítóhó Jesucristú, te tnúhu-gá cúu-xí dàtná ìⁿ sá ìo váha ñuhu ìⁿ xití quídi ñuhu, te nchúhú cúu-ndí dàtná quídi-áⁿ. Te ducaⁿ sátnahá-xi cùu-ndí chi tnúhu-gá ìo càhnu cuu-xi te mee-ndí ñáhá, te ducaⁿ cùu nacuáa cutnùní sá méé Yá Ndiòxí quidé-gã nchaa sá váha te ñá díu mèe-ndí. ⁸ Te cuèi ìo ndòho-ndí ndécú-ndí dico nihí-ndí nàcuáa quíde-ndí tá yáha-ndí nchaa tnúndòho-áⁿ cuáháⁿ, cuèi áma sa ndètu vií-nã quehdé iní-ndí sá vã ndácú-ndí yáha-ndí nchaa tnúndòho-áⁿ, dico ndàcu-ndí yáha-ndí. ⁹ Te cuèi nànducu ñaha ñáyiu cuìní-yu ná cada ñàhá-yu xii-ndí dico ñá túú dàña ñaha Yá Ndiòxí xii-ndí, te cuèi cànihá-yu xii-ndí dico cãcu-ndí ñá túú sàhni ñàhá-yu. ¹⁰ Te ndèni ní cuu cuáháⁿ-ndí xícá cùu-ndí, te cãcu cãcu cahni ñàhá-yu xii-ndí dàtná ní quíde-yu Xítóhó Jesucristú, te ducaⁿ yáha-ndí cuendá cutnùní sá ndécú tũu Xítóhó Jesucristú andi^u te chindee ñaha-gá xii-ndí. ¹¹ Te nchúhú ñini ndècu-ndí ñuyíú-a te nchaa-ni nduu cãcu cãcu cahni ñaha ñáyiu xii-ndí sá cuendá Xítóhó Jesucristú, te ducaⁿ yáha-ndí ndécú-ndí cuendá cutnùní sá Xítóhó Jesucristú ndécú ndìhi ñaha-gá xii-ndí cuèi vá cudíi yiqui cùñú-ndí cundecu-xi. ¹² Te sá dúcáⁿ cãcu cãcu cahni ñaha ñáyiu xii-ndí xíãⁿ nchòhó uuⁿ-gá tá nihí ndéé-ndó cuáháⁿ ndécú-ndó ìchi Xítóhó Jesucristú.

¹³ Te ìⁿ téé ní xíndecu ndéé sanaha ñí chídó tnùní-dé núú tütú Yá Ndiòxí núú càchí-xi: “Yúhú ní sándáá iní-í Yá Ndiòxí nũu xíãⁿ ní cáháⁿ-í”, duha ní cachí téé-áⁿ. Te dàtná-ni ní sani iní téé-áⁿ ñí cáháⁿ-dé te ðiu-ni ducaⁿ sàni iní nchúhú tucu núu xíãⁿ càchí-ndí: “Sándáá iní-ndí Yá Ndiòxí nũu xíãⁿ càháⁿ-ndí”, duha càchí-ndí. ¹⁴ Te cùnuni iní-ndí sá nũu na cùú-ndí te Yá Ndiòxí dandòto ñaha-gá xii-ndí dàtná ní dándótó-gã Xítóhó Jesucristú, te tnàhá nchòhó ducaⁿ càda ñaha-gá xii-ndo, te dàvá-áⁿ candeca ñaha-gã xii-o quíhíⁿ nucúndecu-o nũú-gã. ¹⁵ Te nchúhú nándi cùu sá tá yáha-ndí véxi cuendá nchòhó ngúndecu váha-ndo, te ducaⁿ cuíta cáyá-gã ñáyiu ngúndecu váha sá xíí Yá Ndiòxí, te

ði-u-ni ducaⁿ cuíta cuu vai-gã ñáyiu ndacáⁿ táhũ-yu núú-gã te cachí-yu sá ìo càhnu cuu-gã.

¹⁶ Te xíãⁿ nũu nchúhú ñá túú tnàhí nàtúhú iní-ndí ndécú-ndí ichi Xítóhó Jesucristú, te cuèi yiqui cùñú-ndí tá xàú-xi cuáháⁿ dico iní-ndí chi uuⁿ-gá uuⁿ-gá tá nihí ndéé-xí cuáháⁿ. ¹⁷ Te nchaa sá ndòhó-ndí ñuyíú-a ñá túú càchí-ndí sá cúu-xí ìⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yá Ndiòxí ìo váha cada ñaha-gã xii-ndí nduu na sáá-ndí núú ndécú-gã, te ðiu-ni ducaⁿ càda ñaha-gã xii-ndí ñí caa ñí quíhíⁿ. ¹⁸ Te nchúhú ñá túú nchícúⁿ nihnu-ndí sá tũu ndèhe-ndí ìo ñuyíú-a, chi nchícúⁿ nihnu-ndí sá vátá quìní-gá-ndí ndécú àndi^u, te ducaⁿ quíde-ndí chi nchaa sá tũu ndèhe-ndí ìo ñuyíú-a vá cudíi-xi cundecu-xi, te nchaa sá ñá túú tũu ndècu andi^u xíãⁿ cudíi-xi cundecu-xi ñí caa ñí quíhíⁿ.

5

¹ Te yiqui cùñú-ó cùu-xi datná ìⁿ vehe, te vehe-áⁿ ñá túú cudíi-xi, te ducaⁿ sátnahá-xi cùu yiqui cuñú-ó chi vá cudíi-xi, te na sáá nduu vã cùndècu-gá-ó ndìhi yiqui cuñú-ó, te Yá Ndiòxí taxi-gã ìⁿ yiqui cùñú sáá sá cúu-xí-ó, te xíãⁿ cúu-xí dàtná ìⁿ vehe sá ñá túú ní càdúha cue ñáyiu ñuyíú-a, chi mee Yá Ndiòxí ní cadúha-gã vehe-áⁿ te vehe-áⁿ cudíi-xi cundecu-xi ñí caa ñí quíhíⁿ andi^u. Te ducaⁿ sátnahá-xi cùu yiqui cuñú sá táxí Yá Ndiòxí xii-o chi cudíi-xi cundecu-xi ñí caa ñí quíhíⁿ. ² Te nchúhú ndècu ndìhi-gá-ndí yiqui cùñú-ndí sá ndécú ndìhi-ndí vitna te sama cuìní-ndí sá ìo ndìhi taxi Yá Ndiòxí yiqui cùñú sáá cundecu ndìhi-ndí. ³ Chi mee-gã vá dáña-gã sá dúcáⁿ-ní cùnduu-ndí cundecu-ndí, chi dai taxi-gã yiqui cùñú sáá-ãⁿ xii-ndí. ⁴ Te ñini ndècu-ndí ndìhi yiqui cùñú-ndí vitna ìo sàni iní-ndí te ndìhú iní-ndí, dico ñá díú sã dúhá quíde-ndí te ñá túú-gã tnàhá iní-ndí cundecu-ndí ndìhi yiqui cùñú-ndí, chi cuìní-ndí sá Yá Ndiòxí ìo ndìhi taxi-gã yiqui cùñú sáá nduu táhú-ndí, chi xíãⁿ cudíi-xi ñí caa

ni quíhíⁿ te yiqui cùñú-ndí sá tá ndíhi ni-hnu cuáháⁿ-a vá cúdí-xi cundecu-xi. ⁵ Te ducaⁿ tnàhí ní cachí Yá Ndiöxí cunduu sá dúcáⁿ ndùu táhú-ó yiqui cuñú sáá-áⁿ, te ní taxi-gá Espíritú-gá ní ngúndecu ndíhi-o cuendá cutnùní iní-ó sá ndáá taxi-gá yiqui cùñú sáá-áⁿ nduu táhú-ó.

⁶ Te xiáⁿ nùu nchúhú nihí ndéé-ndí ndécú-ndí, te cùtnuní iní-ndí sá nini ndecu-ndí ndíhi yiqui cùñú-ndí sá ndécú ndíhi-ndí vitna te vátá sàá-gá-ndí cundecu-ndí mei nùu ndécú Xítohó Jesucristú. ⁷ Te ducaⁿ cùtnuní iní-ndí chi sàndáá iní-ndí Yá Ndiöxí ndécú-ndí ñuyíú-a cuéi ñá túú xíní-ndí-gá. ⁸ Te ío váha cùu iní-ndí ndécú-ndí, te sàni iní-ndí sá vâha-gá sá nùu vá cùndècu-gá-ndí ndíhi yiqui cùñú-ndí sá ndécú ndíhi-ndí vitna. Te ducaⁿ sàni iní-ndí chi váha-gá cundecu-ndí mei nùu ndécú Xítohó Jesucristú. ⁹ Te ío ndècu ndee-ndí quidé-ndí nàcuáa cuu vii cuu váha iní Xítohó Jesucristú vitna ndècu-ndí ñuyíú-a, te diu-ni ducaⁿ càda-ndí cuéi òré vá cùndècu-gá-ndí. ¹⁰ Te dacutíí sá ncháá-ó cùndecu-o núu Xítohó Jesucristú ìⁿ nduu, te dàvá-áⁿ mee-gá cáháⁿ-gá te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxi-gá nduu táhú-ó.

Nàcuáa ní cuu ní ngúndecu váha-o ndíhi Yá Ndiöxí

¹¹ Te nchúhú quíyùhú iní-ndí nàcuáa cada Xítohó Jesucristú, núu xiáⁿ càháⁿ-ndí tnúhu-gá núu ñáyiú cuendá xínu iní-yu tuha ñàhá-yu xii-gá. Te mee Yá Ndiöxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí. ¹² Te sá dúhá càháⁿ-ndí te vá cání iní-ndó sá nchúhú càháⁿ váha-ndí cuendá-ndí nàcuáa nchòhó cuu váha iní ñàhá-gá-ndó xii-ndí te ñàhá, chi duha càháⁿ-ndí cuendá sá nchòhó níhí-ndó tnúhu cáháⁿ váha-gá-ndó cuendá-ndí núu ñáyiú. Te ducaⁿ nihí-ndó tnúhu cúñaha-ndo xii cue ñáyiú quide nínu mee-xi, chi cue ñáyiú-áⁿ ñà túú quide

cuendá-yu nása ndècu iní-yu. ¹³ Te núu nchòhó sání iní-ndó sá lùcú-ndí cuendá nàcuáa quide-ndí ndécú-ndí te cùu-xi cuendá Yá Ndiöxí, àdi núu sàni iní-ndó sá ñà túú lùcú-ndí cuendá nàcuáa quide-ndí ndécú-ndí te cùu-xi sá vâha sá cúu-xí-ndó. ¹⁴ Te quide-ndí nàcuáa cuíni Xítohó Jesucristú chi cùtnuní iní-ndí sá ìo cùu iní-gá nchaa ñáyiú, te ducaⁿ xíní ndáá-ndí sá ní xíhí-gá cuendá ncháá-yu, te xiáⁿ nùu cada iní-ó sá dàtná tnúhu sá ncháá ñáyiú ní xíhí-yu ndíhi-gá. ¹⁵ Te ducaⁿ ní xíhí Xítohó Jesucristú cuendá nchaa ñáyiú chi cuíni-gá sá ncháá-yu cundecu-yu cada-yu nàcuáa cuíni méé-gá te vá cáda-yu nàcuáa cuíni méé-yu, chi mee-gá ní xíhí-gá te ní ndoto-gá cuendá cuu-xi sá vâha sá cúu-xí-yu. ¹⁶ Te xiáⁿ nùu nchúhú ñà túú-gá ná sání iní-ndí cuendá tnàha ñáyiú-ndí nùu nàndíhi-yu àdi ñà túú nàndíhi-yu dàtná ní xóo caní iní-ndí cùtnàhá ní xíndecu-ndí ichi cuéhé ichi duha, te dàvá-áⁿ ní xóo caní iní-ndí cuendá Xítohó Jesucristú dàtná sání iní cue ñáyiú ndècu ichi cuehé ichi duha vitna. ¹⁷ Te nchaa nchoo ñáyiú ní tnàhá tnúhu ndíhi Xítohó Jesucristú ní nduu-o dàtná ìⁿ ñáyiú saa, te ducaⁿ chi ñà túú-gá quidé-ó dàtná ní xóo cada-o cùtnàhá ní xíndecu-o ichi cuehé ichi duha, chi ní ngúíta-o quide-o mee-ná sá vâha te nchaa xiáⁿ cúu-xí sá sáá sá cúu-xí-ó chi vátá quíni-gá-ó càda-o.

¹⁸ Te ducaⁿ quide-o ndecu-o chi mee Yá Ndiöxí quidé-gá sá dúcáⁿ càda-o cundecu-o. Te Xítohó Jesucristú ní quide-gá ní ngúndecu váha-o ndíhi Yá Ndiöxí vitna, te ducaⁿ chi mee Yá Ndiöxí ducaⁿ tnàhí ní cachí-gá cunduu, te diu-ni mee Yá Ndiöxí ní taxi-gá chiuⁿ quide-ndí càháⁿ-ndí tnúhu-gá nàcuáa ngúndecu váha cue ñáyiú ndíhi-gá. ¹⁹ Te ducaⁿ chi mee-gá ní cachí-gá sá Xítohó Jesucristú cada-gá nàcuáa nucúndecu váha nchaa nchoo cué ñáyiú ndècu ñuyíú-a ndíhi Yá Ndiöxí. Te nchaa ñáyiú ní tuha ñaha xii-gá ñà túú-gá sání iní-gá sá ñáyiú-áⁿ nacháhu-yu cuéchi-yu núu-gá. Te mee Yá Ndiöxí ní taxi-gá chiuⁿ quide-ndí càháⁿ-ndí tnúhu-gá núu ñáyiú nàcuáa ngúndecu ndíhi ñaha váha-yu xii-gá. ²⁰ Te Xítohó Jesucristú ní cachí-gá sá nchúhú cáháⁿ-ndí tnúhu-gá

núú nchàa ñáyiu, te sá dúhá quide-ndí cãháⁿ-ndí tnúhu-gá te quide-ndí núú Yã Ndiõxí cãháⁿ-ndí yuhu-gá, te xíãⁿ núu cãháⁿ ndàhú-ndí núú-ndó sã tnàhá tnúhu-ndo ndìhi Yã Ndiõxí cuendá cundecu váha-ndo ndìhi-gá, te duha cãháⁿ-ndí chi ducaⁿ cãchí Xítóhó Jesucristú cada-ndí. ²¹ Te Xítóhó Jesucristú cúú-gã Yaá ñá túú tnàhí cuéchi-xi, dico Yã Ndiõxí ní quide ñaha-gã xii-gá dàtná ìⁿ ñáyiu ndècu cuéchi-xi, te ducaⁿ chi Xítóhó Jesucristú ní xido-gá cuéchi nchaa nchoo ñáyiu ñuyúú-a, te ducaⁿ ñí xido Xítóhó Jesucristú nchaa cuéchi-o cuendá sá núu na tnàhá tnúhu-o ndìhi-gá te cudìu-o núú Yã Ndiõxí, te ducaⁿ ñí cuu chi mee Yã Ndiõxí ducaⁿ ñí cachí-gá cunduu.

6

¹ Te nchoo ìⁿ-ni cùu-o quide chiuⁿ-o cuendá Yã Ndiõxí núu xíãⁿ cãháⁿ ndàhú-ndí núú-ndó sã vã dicó-ni ducaⁿ cùndedóho-ndo tnúhu Yã Ndiõxí, chi cada-ndo nàcuáa na chindee ñaha-ni-gá. ² Chi mee-gã cãchí-gá ìⁿ xichi núú tütú-gá núú cãchí-xi:

Sáá nduu te cundàhú iní ñáhà-í xii-ndo chindee ñaha-í cuendá naníhí tãhú-ndó,
te ní sáá nduu tàú-xi sá cùndàhú iní ñáhà-í xii-ndo chindee ñaha-í cuendá naníhí tãhú-ndó, núu xíãⁿ ní xíndedóho-í tnúhu ní cãháⁿ-ndó te ní chindee ñaha-í xii-ndo nàcuáa naníhí tãhú-ndó.

Duha cãchí-gá núú tütú-gá. Te vitna cùu-xi nduu cundàhú iní ñáhà Yã Ndiõxí chindee ñaha-gá, te cùu-xi nduu naníhí tãhú-ó.

³ Te nchúhú ñá túú quide-ndí ìⁿ sá ñà túú tàú-ndí cada-ndí sá cúú-xí ñáyiu, chi cuiní-ndí sá vã cãháⁿ cuèhé-yu cuendá chiùⁿ quide-ndí. ⁴ Te nchaa sá quidé-ndí cúú-xí nàcuáa cutnùní iní cue ñáyiu sá nchúhú xínú cuèchi-ndí núú Yã Ndiõxí, te ío quide cahnu iní-ndí cuendá nchaa sá ndóhó-ndí, chi nándi quide ñaha ñáyiu xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yãha-ndí véxi. ⁵ Te duha ta yãha-ndí véxi, núú cãniha ñáyiu xii-ndí, núú chíhí ñáhà-yu vecaá, núú cuáa ndeé ñáhà ñáyiu xii-ndí xícuèhé ñáhà-yu, te ío ndòho-ndí quidé-ndí chiùⁿ

Yã Ndiõxí, te áma xidí-ndí te áma ñá túú xidí-ndí, te áma ñihí-ndí sá xéxi-ndí te áma ñá túú ñihí-ndí. ⁶ Te quide ndáá-ndí ndécú-ndí, te cùtnuní váha iní-ndí nàcuáa cãháⁿ tnúhu Yã Ndiõxí, te quide cahnu iní-ndí cuèi nándi quide ñaha ñáyiu xii-ndí, te cùndahú iní-ndí tnàha ñáyiu-ndí, te quide-ndí nchaa sá váha nàcuáa chindee ñaha Espiritú Yã Ndiõxí xii-ndí, te ío ndisa iní-ndí cúú ìní-ndí cue tnàha ñáyiu-ndí. ⁷ Te dànehé-ndí ñáyiu mee-ni tnúhu ndáá, te nchaa chiùⁿ quide-ndí te quide-ndí nàcuáa chindee ñaha Yã Ndiõxí xii-ndí, te cuendá sá quidé ndáá-ndí ndécú-ndí núu xíãⁿ ñihí ndeé-ndí dáquèe tìhú-ndí nchaa sá cuèhé sá dúhá. ⁸ Te dava ñáyiu quide nínu ñáhà-yu xii-ndí, te davá-yu tnúhu cuèhé tnúhu duha cãháⁿ-yu xãhãⁿ-yu xii-ndí, te davá-yu xíçáhãⁿ váha-yu cuendá-ndí te davá-yu xíçáhãⁿ cuèhé-yu, te davá-yu cãchí-yu sá dándàhú-ndí ñáyiu dico ñá ndáá chi cãháⁿ ndáá-ndí. ⁹ Te davá-yu cãchí-yu sá ñà túú xìní-yu ná ñáyiu cùu-ndí, te davá-yu cãchí-yu sá xìní-yu yoo cùu-ndí, te davá-yu cuiní-yu cahni ñáhà-yu xii-ndí dico vátá cãhni ñaha-gá-yu chi ndècu-ni-ndí. Te ío ndòho-ndí ndécú-ndí ichi Yã Ndiõxí, te cuèi ndòho-ndí dico ñá túú cùu-xi sá cùú-ndí. ¹⁰ Te cuèi ndìhú iní-ndí dico ñá túú dàña ndeé-ndí sá cúú ìní-ndí, te cùu-ndí cue téé ndàhú dico sànu ichi-ndí vãi ñáyiu ichi Yã Ndiõxí cuendá ngúndecu váha-yu sá cuendá-gá, te cuèi ñá túú ñá ndécú ndìhi-ndí dico ñá túú ñá cùmãní xii-ndí.

¹¹ Te nchòhó ñáyiu ndècu ndìhi-í ichi Xítóhó Jesucristú ndécú ñúú Còrintú ío cùu iní ñáhà-ndí xii-ndo, te ñí yùhu ñí iní-ndí cãháⁿ-ndí nchaa tnúhu cãháⁿ-ndí sá cúú-xí-ndó. ¹² Te nchúhú chi ñí yùhu ñí iní-ndí cúú ìní ñáhà-ndí xii-ndo, dico nchòhó chi ñá túú dùcaⁿ quide-ndo sá cúú-xí-ndí. ¹³ Te yúhú cãháⁿ ndàhú-í núú-ndó dàtná quidé ìⁿ téé cùu tátá òré cãháⁿ ndìhi-dé cue déhe-dé sá ñí yuhu ñí iní-ndó cùu iní ñáhà-ndó xii-ndí dàtná quidé mèe-ndí cúú ìní ñáhà-ndí xii-ndo.

Nchoo cùu-o datná ìⁿ vehe Yá Ndiöxí

¹⁴ Te cue ñáyiú ñá túú sàndáá iní tnúhu Xítohó Jesucristú, te vá cúú ìⁿnuu-ndo ndihí-yu cada-ndo datná xíquidé-yu, chi ðìⁿ cuu nchaa sá vǎha te ðìⁿ cuu nchaa sá cuèhé sá dúhá, te ñúmí nchícanhii ndihí níú chi ñá túú ìⁿ-ni cuu-xi. Te ducaⁿ sǎtnahá-xi cùu nchaa sá vǎha ndihí nchaa sá cuèhé sá dúhá chi ñá túú ìⁿ-ni cuu-xi. ¹⁵ Te ðiu-ni ducaⁿ ñá túú ìⁿ-ni cuu Xítohó Jesucristú ndihí sácúíhná, te ðiu-ni ducaⁿ ñá túú ìⁿ-ni cuu ñáyiú sàndáá iní ñáhá xii Xítohó Jesucristú ndihí ñáyiú ñá túú sàndáá iní ñáhá xii-gá. ¹⁶ Te ðiu-ni ducaⁿ sǎtnahá tucu-xi cùu vehe Yá Ndiöxí ndihí nchaa sá cǎchí ñáyiú cùu ndióxí ní cadúha cue téé ñuyíú-a, chi vá cúú quíhi ni ìⁿ xǎⁿ xití vehe-gá. Te nchoo cùu-o datná vehe Yá Ndiöxí Yaá ndécú tǔu andiu, chi mee-gǎ cǎchí-gá núú tütú-gá núú cǎchí-xi:

Yúhú vá cúmǎní cundecu-í ndihí-yu ndèni ní cuu na cùndecú-yu,
te ðiu-ni yúhú cuu-í Ndiöxí-yu,
te mée-yu cuú-yu ñáyiú cùu cuendá-í.
Duha cǎchí-gá núú tütú-gá. ¹⁷ Te xǎⁿ nǔu cǎchí tucu-gá ingá xichi núú tütú-gá núú cǎchí-xi:
Chí tá quèe tnuú nchaa ñáyiú ñá túú sàndáá iní ñáhá xii-í,
te vá cǎní ìní-ndó càda-ndo ni ìⁿ sá cuèhé sá dúhá,
te ducaⁿ te queheⁿ cuendá ñáhà-í xii-ndo,
¹⁸ te yúhú cuu-í Tǎtá-ndó,
te nchòhó cuu-ndo cuè déhe ducuⁿ-í, ndihí cue déhe yoco-í,
duha cǎháⁿ yúhú Yaá ío cǎhnu cuu.
Duha cǎchí-gá núú tütú-gá.

7

¹ Te sá dúcáⁿ ío váha cǎháⁿ Yǎ Ndiöxí sá cúú-xí-ó nǔu xǎⁿ cǎháⁿ-í dóho nchòhó ñáyiú ío cùu iní-í sá dùuⁿ duuⁿ daña-o nchaa sá cuèhé sá dúhá, chi nchaa xǎⁿ ñá túú cùu-xi sá vǎha sá cúú-xí ìní-ó ndihí yiqui cuñú-ó, te cada-o nǎcuáa tàú-xi cunduu nǎcuáa cundáá-ó nǔu Yǎ Ndiöxí, te cada-o sá néhé-ó sá yǎñuhu núú-gǎ.

Cue ñáyiú ñuú Còrintú quidé vǎha-yu

² Te ni yùhu ni iní-ndó chì cúú ìní ñáhá xii-ndí, chi nchúhú vá yǎo ìⁿ quíde úhú iní-ndí, te ni vǎ yǎo ìⁿ dàcuíta nihnu-ndí,

te ni vǎ yǎo ìⁿ dǎndahú-ndí. ³ Te sá dúhá cǎháⁿ-í te vá cǎní ìní-ndó sǎ ìⁿ cuéchi dàcaa-í ðiquí-ndó, chì datná sa ní cǎchí-í xii-ndo sǎ yúhú ío cùu iní ñáhà-í xii-ndo, te cuéi vitna ndècu-gá-ó ñuyíú-a àdi cuéi na cùú-ó dico ðiu-ni ducaⁿ cùu iní ñáhà-í xii-ndo. ⁴ Te yúhú ío váha sàni iní-í cuendá-ndó, te ducaⁿ ío váha cǎháⁿ-í cuendá-ndó, te ío ndècu ndihí-í tnúhu ndee ìní cuendá-ndó, te ío cùdíí ìní-í sá cuendá-ndó cuéi nǎndí ndòho-í ndihí dava-gǎ-güedé ndécú-ndí.

⁵ Te nchúhú cùtnahá ní sáháⁿ-ndí distritú Macèdoniá, te ñá túú tnàhí ni ndetátú-ndí cuendá nchaa sá ñí yáhandi chi ío ní ndoho-ndí cuendá nchaa sá ñí quidé-yu, chi ío ní cuándeé ñáhǎ-yu xii-ndí, te ío ní sani iní-ndí nǔu nása-gá yáha-ndí ní cùu. ⁶ Dico Yá Ndiöxí ní taxi-gá tnúhu ndee ìní xii-ndí òré ní quexìo té Títú núú ndécú-ndí, te ðiu-ni Yaá-áⁿ cúú-gǎ Yaá sǎñaha-gǎ tnúhu ndee ìní xii cue ñáyiú ndihú iní-xi. ⁷ Te ducaⁿ ñí taxi Yá Ndiöxí tnúhu ndee ìní xii-ndí cuendá sá ñí quexìo té Títú núú ndécú-ndí, te ñá díú-ní sǎ cuendá ní quexìo-dé chi ní níhí tucu-ndí tnúhu ndee ìní cuendá ní caní-dé cuendú núú-ndí sá nchòhó ní sǎñaha-ndo tnúhu ndee ìní xii-dé, te ní cǎchí tnúhu-dé xii-ndí sá nchòhó ío cùní-ndó cǎháⁿ ndihí ñaha-ndo xii-ndí, te ní cǎchí tnúhu tucu-dé xii-ndí sá nchòhó ío ndihú iní-ndó cuendá nǎcuáa cùu ndecu-ndo ni cuu, ndihí cuendá sá ío sàni iní-ndó cuendá-í, te sá dúcáⁿ nduu cuendú ní caní-dé núú-ndí nǔu xǎⁿ ío ní cudíí ìní-í.

⁸ Te nchòhó ní ndihú iní-ndó cuendá tnúhu cǎháⁿ-í núú tütú sá ñí dáquixí-í ndaha-ndo, te òré ní níhí-í tnúhu sá ndihú iní-ndó te tnaa-ni ní ndixi cuéchi iní-í sá dúcáⁿ ñí quíde-í te dǎtnùní ñá túú-gǎ ní ndixi cuéchi iní-í. ⁹ Te vitna ní ndihú iní-ndó, te xǎⁿ ní quíde-xi ní ndixi cuéchi iní-ndó sǎ ñá túú quíde váha-ndo ndècu-ndo ni cuu, te ní cudíí ìní-í dico ñá díú cuendá sá ni ndihú iní-ndó ñí cudíí ìní-í chì cuendá sá ñí ndixi cuéchi iní-ndó, te ní ndihú iní-ndó nǎcuáa ní cuu váha iní Yǎ Ndiöxí, te xǎⁿ nǔu ní cuu-xi ìⁿ sá vǎha sá cúú-xí-ndó cuendá tnúhu ní cǎháⁿ-í te ñá túú ní cùu-xi ìⁿ sá cuèhé sá cúú-xí-ndó. ¹⁰ Te nchoo nǔu na ndihú iní-ó nǎcuáa cuu

váha iní Yă Ndiöxí, te ndixi cuéchi iní-ó te núu ñá túú quide váha-o ndècu-o, te sá dúcáⁿ quide-o te nàníhí tǎhú-ó, te vá ndihú iní-ó sǎ dúcáⁿ ñi quide-o, te dava ñáyiu xĩndecu ichi cuèhé ichi duha ndihú iní-yu dico ñá túú ndixi cuéchi iní-yu cuendá nchaa sá ñà túú váha quidé-yu, te sá dúcáⁿ quidé-yu te cuíta nihnú-yu. ¹¹ Te sá dúcáⁿ ñi ndihú iní-ndó nàcuáa ní cuu váha iní Yă Ndiöxí, te xiǎⁿ núu ndùcu ndee-ndo quide-ndo nchaa nacuáa tàú-xi cunduu, te vitna ñi yùhu ñi iní-ndó càháⁿ-ndó sǎ quidé váha-ndo, te ío cùdééⁿ-ndó núú méé-ndó sǎ ñà túú quide váha-ndo ndècu-ndo ni cuu, te yùhú-ndó ndècu-ndo cuendá sá ñà túú quide váha-ndo ni cùu, te ío ní xúhuⁿ iní ñáhá-ndó xii-í, te ní ndúcú ndéé-ndó ñi quide ndáá-ndó cuendá téé ndècuéchi ndècu ndihí-ndo, te sá dúcáⁿ ñi quide-ndo te xiǎⁿ ní cutnùní sá méé-ndó ñà túú cuéchi-ndo. ¹² Te ní cadúha-í tutú ní dáquixi-í ndaha-ndo, te ní quide-ndo nàcuáa ní cáháⁿ-í, te sá dúcáⁿ ñi quide-ndo xiǎⁿ ní cutnùní iní-ndó sǎ ío cùu iní ñáhá-ndó xii-í. Te Yă Ndiöxí náhá-gǎ sá díú-ní cuendá xiǎⁿ ní dáquixi-í tutú ndaha-ndo, te ñá díú-ní cuendá sá sání iní-í cuendá téé ndècuéchi ndècu ndihí-ndo, te ní ñà díú-ní cuendá ñáyiu ní dándihú téé ndècuéchi-án iní-xi ní cadúha-í tutú ní dáquixi-í ndaha-ndo. ¹³ Te cuendá sá quidé váha-ndo ndècu-ndo xiǎⁿ cúú-xí tñuhu ndee iní ndécú ndihí-ndí.

Dico ñá díú-ní xiǎⁿ chi tñàhá ío cùdíí iní-ndí cuendá sá ío cùdíí iní té Títú, te ducaⁿ cùdíí iní-dé chi nchòhó ní sáñaha-ndo tñuhu ndee iní xii-dé. ¹⁴ Te yúhú ñá túú cùcahaⁿ núú-í sá ñi cáháⁿ váha-í cuendá-ndó núú tǎ Títú cùtñàhá vátá quixí-gǎ-dé núú ndécú-ndó, chi ní cutnùní iní-dé sá ndáá càháⁿ váha-í nàcuáa quide-ndo datná cúú-xí sǎ ndáá nchaa tñuhu dàcuaha ñaha-í xii-ndo. ¹⁵ Te vitna ío-gǎ váha cùu iní té Títú cuendá-ndó, chi ndàcu iní-dé sá ncháá-ndó ío váha ní tñi-ndo nchaa tñuhu ní cáháⁿ-dé núú-ndó, te ndàcu tucu iní-dé sá ñi queheⁿ cuendá váha-ndo-dǎ, te ní dátùu-ndo núú-dǎ sá ío ní quiyùhú iní-ndó sǎ vǎ ndácú-ndó càda-ndo nchaa nacuáa tàú-xi cunduu. ¹⁶ Te ío cùdíí iní-í cuendá-ndó chi cùtnuní ndáá iní-í sá ñà túú dàña ndeé-ndó quide-ndo nchaa nacuáa

tàú-xi cunduu.

8

Ío váha cuu iní-ó chĩndee tñaha-o

¹ Te nchòhó ñáyiu ndècu ndihí-ndí ichi Xítóhó Jesucristú càchí tñuhu-ndí xii-ndo nàcuáa quide ñaha Yă Ndiöxí xii cue ñáyiu xĩndecu ichi-gǎ ndécú dístítú Macèdoniá, chi ío chĩndee ñaha-gǎ xii-yu cuendá sá quidé váha-yu ndécú-yu. ² Te cuéi ndòho vihí-yu ndécú-yu dico ío-ni cùdíí iní-yu, te cuendá xiǎⁿ núu ñi yùhu ñi iní-yu ní sacáⁿ tñáhǎ-yu díhúⁿ sǎ cúú-xí tñàhá ñáyíu-yu, te ñá túú tñàhí ní xĩnduu díi-yu cuéi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tñáhǎ-yu, chi ní quide yica iní-yu ní sacáⁿ tñáhá-gǎ-yu, te yúhú càchí tñuhu ndáá-í xii-ndo sǎ ñi yuhu ñi iní-yu ducaⁿ ñi quidé-yu. ⁴ Te ío ní cáháⁿ ndàhú-yu núú-ndí cuendá sá cuǎha-ndí tñuhu sá tñàhá-yu chĩndéé-yu dava-gǎ cue ñáyiu cùu cuendá Yă Ndiöxí. ⁵ Te ñá díú-ní nàcuáa ní sani iní-ndí ní quidé-yu, chi ní xidó-gǎ-yu ní quide váha-yu, te ducaⁿ chi mèé-yu ní sani iní-yu sá cadǎ-yu nchaa nàcuáa cuení Yă Ndiöxí, te dàtnùní ducaⁿ te ní cachí-yu sá cúú càdá-yu nchaa nàcuáa na cùñaha-ndí xii-yu. Te ducaⁿ ñi quidé-yu chi ducaⁿ ñi cuení méé Yă Ndiöxí cunduu. ⁶ Te sá dúcáⁿ ñi quide ñáyiu-án núu xiǎⁿ càháⁿ ndàhú-ndí núú tǎ Títú sá quixí tucu-dé núú ndécú-ndó cuendá dàxínu cava-dé chiuⁿ sá sǎ ní ngúíta-dé quidé-dǎ dátacá-dé díhúⁿ sǎ sǎ ní ngúíta-ndo sàcáⁿ tñáhá-ndó, te ducaⁿ quide-ndo chi cùndahú iní-ndó tñàhá ñáyiu-ndo. ⁷ Te nchòhó cúú-ndó ñáyiu ío ngòdónúú quide nchaa sá váha, te ío váha sàndáá iní-ndó Xítóhó Jesucristú, te ío váha cùtnuní iní-ndó nàcuáa càháⁿ tñuhu-gǎ, te ío váha dàcuaha-ndo ñáyiu tñuhu-gǎ, te ío ndùcu ndee-ndo quide-ndo mee-ñi sá váha, te ducaⁿ ío cùu iní ñáhá-ndó xii-ndí, te sá dúcáⁿ quide-ndo núu xiǎⁿ càháⁿ ndàhú-í núú-ndó sǎ ngòdó núú-gǎ-ndó càda-ndo sá cúú-xí tñàhá ñáyiu-ndo.

⁸ Dico yúhú ñá túú tàuchiuⁿ-í sá dúcáⁿ càda-ndo, chi cuendá-ni sá càchí tñuhu-í xii-ndo nàcuáa quide dava-gǎ cue ñáyiu ndècu ichi Xítóhó Jesucristú, chi cue

ñáyiú-án ni yùhu ni iní-yu quidé-yu sá vâha sá cúú-xí tnâha ñáyiú-yu, te câchí tnúhu-í xii-ndo nâcuáa quidé-yu cuendá cutnùní nûu nása cada-ndo nûu ndisa sá cúú iní-ndó cuè tnaha ñáyiú-ndo. ⁹ Te nchòhó sa xìní-ndó sá Xítóhó Jesucristú ío cùndahú iní ñáhá-gã xii-o, te ío váha ndècu-gá ní cùu te ní quixi-gá ñuyíú-a ní quide váha ñaha-gã xii-o, te ñuyíú-a ñá túú ní xíndecu váha-gá, te ducaⁿ ñí quixi-gá ñuyíú-a cuèi ñá túú ní xíndecu váha-gá cuendá sá nchóó ngündecu váha-o nûú ndécú-gã.

¹⁰ Te na câchí tnúhu-í xii-ndo nâcuáa sàni iní-í. Chiuⁿ sá ni yuhu ni iní-ndó ñí ngüita-ndo quide-ndo cuíá ni yáha chi cùu-xi sá váha sá cúú-xí-ndó nûu na dàxínu cava-ndo. ¹¹ Te dàtná-ni ni yùhu ni iní-ndó ñí tausaha-ndo chiuⁿ-án te ducaⁿ-ni ni yuhu ni iní-ndó dàxínu cava-ndo, te cacáⁿ tnáhá-ndó sá ndécú ndíhi-ndo nacuéa xito mee-ndo ndacu-ndo. ¹² Te núu nchòhó ni yùhu ni iní-ndó cacáⁿ tnáhá-ndó sá xító mèe-ndo ndacu-ndo ña, te cùu váha iní Yã Ndiõxí, chi mee-gã sa nâha-gá nása ndècu-o te ndùu vétú-ni iní-gá.

¹³ Te sá dúhá ndùu tnúhu càháⁿ-í te vá cání iní-ndó sá yùhú cuíní-í sá nchòhó ndoho-ndo cùndecu-ndo te dava-gá-yu ngündecu váha-yu sá cuendá-ndó. ¹⁴ Te vitna ndècu ndee iní-ndó nâcuáa ndacu-ndo chindee-ndo cue ñáyiú xini ñuhu, te nduu ñá túú ndècu ndee iní-ndó te cue ñáyiú-án chindee ñáhá-yu xii-ndo te núu ndècu ndee iní-yu, te ducaⁿ te ni nchòhó ñá túú ñá cumání xii-ndo te ni cuè ñáyiú-ã ñá túú ñá cumání xii-yu. ¹⁵ Te ducaⁿ te quee ndáá-xi nâcuáa càháⁿ-xi núu tütú Yã Ndiõxí núu câchí-xi: “Cue ñáyiú ío vai sá ni ñíhi ñá túú ní cùu sobrá xii-yu, te cue ñáyiú sacú ní níhi ñá túú ní cùmání xii-yu”, duha câchí-xi núu tütú-gá.

Té Titú ndíhi cue té cùndíhi-dé

¹⁶ Te ndacáⁿ tãhú-í núu Yã Ndiõxí chi mee-gã ní quide sá tã Titú ío ñùhu iní ñáhá-dé xii-ndo dàtná ñúhú iní ñáhá-í xii-ndo. ¹⁷ Te yùhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñá díú mèe-ni sá dúcáⁿ ñí xáhaⁿ-í xii-dé quixi coto ñaha-dé xii-ndo, chi mee-dé cùdñí tnáhí iní-dé quixi coto ñaha-dé xii-ndo.

¹⁸ Te tendaha-ndí ñí tée ndècu ndíhi-o ichi Xítóhó Jesucristú quixi-dé ndíhi té

Titú, te tée quixi ndíhi té Titú-án cúú-dé ñí tée ío váha càháⁿ cue ñáyiú xíndecu ichi Xítóhó Jesucristú cuendá-dé cuendá sá ío váha quide-dé chiuⁿ Xítóhó Jesucristú càháⁿ-dé tnúhu-gá tnúhu sá càháⁿ nâcuáa naníhi tãhú-ó. ¹⁹ Te cue ñáyiú xíndecu ichi Xítóhó Jesucristú ñá díú-ní sá càháⁿ váha-yu cuendá-dé, chi tnáhá ní cãxi ñáhá-yu xii-dé cuendá sá cacá cùu ndíhi ñaha-dé xii-ndí chindee ñaha-dé tacá sá cúú-xí ñáyiú ndàhú, te quide-ndí chiuⁿ-a cuendá ío cuu càhnu Yã Ndiõxí, te cue ñáyiú cutnùní iní-yu sá nchòhó ni yùhu ni iní-ndó quide-ndo nchaa sá váha sá cúú-xí cuè tnaha ñáyiú-ndo. ²⁰ Te cuíní-ndí sá vã càháⁿ cuèhé ñáyiú cuendá nâcuáa quide-ndí ndíhi sá ngãutnâha sá cúú-xí cuè tnaha ñáyiú-o, te ío vai cuu-xi. ²¹ Chi ndùcu ndee-ndí quidé-ndí nâcuáa càháⁿ váha Xítóhó Jesucristú cuendá-ndí, te quide tucu-ndí nâcuáa càháⁿ váha ñáyiú sá quidé váha-ndí.

²² Te tendaha tucu-ndí ingá tucu tée ndècu ndíhi-o ichi Xítóhó Jesucristú quixi-dé ndíhi cue tée úú quixi coto ñaha xii-ndo, te tée quixi ndíhi-güedé-án ñí cuu vai xito quide-dé nâcuáa cutnùní iní-ndí sá ío ndùcu ndee-dé quidé-dé sá váha, te vitna ío-gá cuíní-dé cada-dé sá váha vitna quixi-dé núu ndécú-ndó, chi cùtnuní ndáá iní-dé sá cúú-ndó cuè ñáyiú quide váha. ²³ Te câchí tnúhu-í xii-ndo sá tã Titú cúú-dé ñí tée cùndíhi-í quidé-ndí chiuⁿ Xítóhó Jesucristú, te tnáhá-dé cúú-dé ñí tée xínu cuechi núu-ndó càháⁿ-dé tnúhu-gá. Te câchí tnúhu tucu-í xii-ndo cuendá cue tée úú quixi ndíhi-dé, chi cue tée-án cúú-güedé cue tée tendaha cuè ñáyiú xíndecu ichi Xítóhó Jesucristú quixi coto ñaha xii-ndo. Te cue tée-án quidé-güedé nâcuáa cachí ñáyiú sá ío càhnu cuu Xítóhó Jesucristú. ²⁴ Te chí cádá sá cúú iní ndisa-ndo-güedé cuendá ducaⁿ na cùtnuní iní nchaa dava-gá ñáyiú xíndecu ichi Xítóhó Jesucristú sá ndáá ndisa ducaⁿ quide-ndo, te ducaⁿ cùtnuní iní-yu sá ndáá ndisa quide váha-ndo dàtná càháⁿ-ndí cuendá-ndó sá quidé váha-ndo.

9

Cuendá sá ngăutnàha sá cúú-xí cuè ñáyiú xĩndecu ichi Xítohó Jesucristú

¹ Te cuendá sá ngăutnàha sá cúú-xí cuè ñáyiú ndècu ichi Xítohó Jesucristú ñá túú-gă xíní ñùhu-xi cachí tnúhu-í xii-ndo núú tütú-a nàcuáa cada-ndo, ² chi sa cùtnuní iní-í sá ïo cuíní-ndó chindee-ndó-yu. Te ducaⁿ-ni ïo váha càháⁿ-í cuendá-ndó núú ñáyiú xĩndecu ichi Xítohó Jesucristú ndécú dístítú Macèdoniá, te xăhaⁿ-í xii-yu sá nchòhó ñáyiú xĩndecu ichi Xítohó Jesucristú ndécú dístítú Acăyá sa ní cuu ñⁿ cuíá ducaⁿ cuíní-ndó càcáⁿ tnáhá-ndó sá cúú-xí cuè ñáyiú ndàhú ndécú ìchi-gá. Te vai cue ñáyiú dístítú Macèdoniá cuíní-yu cacáⁿ tnáhă-yu sá cúú-xí cuè ñáyiú ndàhú ndécú ìchi Xítohó Jesucristú cuendá sá ñí ñíhí-yu tnúhu sá nchòhó ïo cuíní-ndó dùcaⁿ cada-ndo. ³ Te cuendá sá saní iní-ndó càda-ndo xiăⁿ tendaha-í cue téé ndècu ndihí-o ichi Xítohó Jesucristú quixi-güedé núú ndécú-ndó cuendá dātúha ñaha-güedé xii-ndo, cuendá sá vă quée ndèhnde-í núú ñáyiú sá ñí càháⁿ váha-í cuendá-ndó, te ducaⁿ cùndecu túha ndisa-ndo dātá sa ní càháⁿ-í núú-yu. ⁴ Chi na cuáháⁿ ndèe quixi-í ndihí ñⁿ úú cue ñáyiú dístítú Macèdoniá núú ndécú-ndó te quíní-yu sá ñà túú ndècu túha-ndo, te cucahaⁿ núú-í núú-yu sá ñí càháⁿ váha-í cuendá-ndó te núú ñá túú ndècu túha-ndo, te tnáhá-ndó cùcahaⁿ núú-ndó. ⁵ Te xiăⁿ núú ní saní iní-í sá váha-gá codonuu cue téé ndècu ndihí-o ichi Xítohó Jesucristú quixi coto ñaha-güedé xii-ndo cuendá chindee ñaha-güedé tacá sá ñí saní iní-ndó càcáⁿ tnáhá-ndó cuendá sá cùndècu túha-xi, te cuu-xi dātá ñⁿ táhú sá ñí quene cuu iní méé-ndó càcáⁿ tnáhá-ndó sá cúú-xí cuè tnaha ñáyiú-ndo. Te ducaⁿ te vá yoo cani iní-xi quesàhá-yu sá nchũhú ní quide yica-ndí ducaⁿ ñí sacáⁿ tnáhá-ndó.

⁶ Te nchòhó sa xíní-ndó sá ñáyiú na chìhi vai tatá te vai ñíhí-yu cùu, te cue ñáyiú na chìhi sacú tatá te sacú ñíhí-yu cùu. Ducaⁿ sãtnahá-xi cùu ñáyiú sàcáⁿ tnáhá sá cúú-xí tnàha ñáyiú-yu. ⁷ Te ñⁿ ñⁿ-ndo càcáⁿ tnáhá-ndó nàcuáa quene cuu iní méé-ndó, te ïo váha cuu iní-ndó dùcaⁿ cada-ndo te vá cádá-ndó cuendá-ñí sá quidé yica ñaha ñáyiú xii-ndo, chi Yá Ndiöxí cúú vâha iní-gá núú

nchàa ñáyiú cùdíí iní sàcáⁿ tnáhá sá cúú-xí cuè tnaha ñáyiú-xi. ⁸ Te Yá Ndiöxí ndacu-gá chindee ñaha-gá xii-ndo nàcuáa cundecu váha-ndo, chi dïu-gá cada te ñíhí-ndó nchàa núú sá xíní ñùhu-ndo cundecu ndihí-ndo, te ñá túú tnáhí-gá ná cumání xii-ndo, te mee-gă chindee ñaha-gá xii-ndo ñíhí-ndó ïo vai cundecu ndihí-ndo cuendá ducaⁿ chindee-ndo cue tnaha ñáyiú-ndo. ⁹ Te núú tütú Yá Ndiöxí càchí-xi ñⁿ xichi:

Ñⁿ ñáyiú ïo vai sá ñí sãñàhá-yu xii ñáyiú ndàhú,

te sá ñí quide ñáyiú-áⁿ ñí cuu-xi sá vâha sá vă yoo cùnaa.

Duha càchí-xi núú tütú-gá. ¹⁰ Te mee Yá Ndiöxí táxi-gă nchaa sá cúú tātá nchaa nchòhó ñáyiú xitu nándí sá xítú cuendá cuu sá cúú nchito-ndo, te dïu-gá cada te ïo vai sá ñíhí-ndó cùndecu ndihí-ndo, te ducaⁿ ïo-gá vai sá vâha cada-ndo sá cúú-xí cuè tnaha ñáyiú-ndo. ¹¹ Te Yá Ndiöxí taxi-gá vai núú sá cùndècu ndihí-ndo cuendá ducaⁿ ñí yuhu ñí iní-ndó vai cuáñaha-ndo sá cúú-xí tnàha ñáyiú-ndo. Te cuendá nchaa sá sàcáⁿ tnáhá-ndó quèheⁿ cuendá-ndí cuu xii tnàha ñáyiú-ndo, te cue ñáyiú-áⁿ ïo ndacáⁿ táhũ-yu núú Yá Ndiöxí cuendá sá dúcáⁿ sàcáⁿ tnáhá-ndó sá cúú-xí-yu. ¹² Te sá dúcáⁿ quide-ndo sacáⁿ tnáhá-ndó sá cúú-xí cuè ñáyiú cùu cuendá Yá Ndiöxí, te ñáyiú-áⁿ ñà túú-gă ná cumání xii-yu, te ïo ndacáⁿ táhũ-yu núú Yá Ndiöxí sá dúcáⁿ quide-ndo. ¹³ Te ñáyiú-áⁿ cutnùní iní-yu sá nchòhó quidé-ndó sá sàndáá ndisa iní-ndó tnũhu Xítohó Jesucristú, te cuendá xiăⁿ te ñáyiú-áⁿ chiñũhú-yu Yá Ndiöxí, te cuendá sá dúcáⁿ ñí yuhu ñí iní-ndó sàcáⁿ tnáhá-ndó sá cúú-xí-yu ndihí sá cúú-xí nchàa dava-gá ñáyiú, te cachí-yu sá ïo càhnu cuu Yá Ndiöxí. ¹⁴ Te ñáyiú-áⁿ càháⁿ ndihí-yu Yá Ndiöxí cuendá-ndó, te ïo cuu váha iní ñáhă-yu xii-ndo cuendá sá Yá Ndiöxí chĩndèe ñaha-gá xii-ndo quide-ndo sá vâha sá cúú-xí-yu ndihí dava-gá ñáyiú. ¹⁵ Te ïo ndàcáⁿ táhũ-ó núú Yá Ndiöxí cuendá sá ñí taxi-gá sá ïo váha ndècu ndihí-o, te ñí ñă cùtnùní iní-ó ñăsa cunduu tnúhu càháⁿ-ó cuendá sá vâha ní taxi-gá.

10

Té Păblú ndécú ndîhi-dé tnúhu ndee iní sá cãháⁿ-dé tnúhu Xítohó Jesucrístú

¹ Te Xítohó Jesucrístú ío cãhnu iní-gá, te cùndahú iní ñáhá-gã xii-o chîndee ñaha-gá, núu xiãⁿ yúhú té Păblú ducaⁿ quide-í cãháⁿ ndàhú-í núú-ndó nàcuáa cada-ndo. Te dava-ndo cãchí-ndó sã yúhú ío ndàhú iní-í òré ndécú ndîhi ñaha-í xii-ndo, te òré ñá túú ndècu ndîhi ñaha-í xii-ndo te ío ñîí cãá-í. ² Te cãháⁿ ndàhú-í núú-ndó sã cãdá-ndó nàcuáa vá cãháⁿ ñîí-í núú-ndó òré quixi-í quixi coto ñaha-í xii-ndo. Te cuiní-í sá ndîhi tnúhu ñîí iní-xi cãháⁿ ndîhi-í cue ñáyiú cãchí sá ñîí-ni cuu-í ndîhi cue ñáyiú ñá túú sàndáá iní tnúhu Xítohó Jesucrístú. ³ Te nchúhú cùu-ndí cue tée ñuyíú-a, dico ndùcu ndee-ndí quidé-ndí nàcuáa ndàcu-ndí dáquèe tíhú-ndí nchaa sá cuèhé sá dúhá, dico ñá díú mèe-ndí ducaⁿ ndàcu-ndí quidé-ndí, ⁴ te ni ñîí sá ío ñuyíú-a ñá túú chîndee ñaha-xi, chi mee Yã Ndiõxí chîndèe ñaha-gá xii-ndí dáquèe tíhú duuⁿ-ndí nchaa núú sã cuèhé sá dúhá. ⁵ Te xiãⁿ núu nihí-ndí tnúhu cãháⁿ-ndí sãdí-ndí yuhu cue ñáyiú cãháⁿ tnúhu sã ñá túú cùu váha iní Yã Ndiõxí, ñáyiú xiquide nínu mee-xi cãchí sá ñá túú nàndîhi tnúhu-gá. Te quide-ndí sá ñáyiú-án quindáá iní-yu tnúhu Xítohó Jesucrístú. ⁶ Te nchúhú sa ndècu túha-ndí sá dáquèetíhú-ndí cue ñáyiú ñá túú cuiní cada nàcuáa cuiní Xítohó Jesucrístú, dico díhna-gá xíní ñùhu-xi sá ncháá nchòhó ñáyiú cuiní cada nàcuáa cuiní-gá cundáá-ndó.

⁷ Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càn iní-ndó cuendá-ndí. Chi núu cùtnuní ndáá iní-ndó sã cúú-ndó cuendá Xítohó Jesucrístú, te ñu-ni ducaⁿ tàú-ndó càn iní-ndó cuendá-ndí tucu. ⁸ Te Xítohó Jesucrístú ní taxi-gá tnúhu ndee iní ndécú ndîhi-ndí sá dánèhé ñáhá-ndí xii-ndo nàcuáa cuíta cuehnu nihnu-ndo ìchi-gá quíhíⁿ, te ñá díú sã dánèhé ñáhá-ndí xii-ndo nàcuáa cuíta nihnu-ndo, te cuèi na chido-gá-í cãháⁿ-í cada nínu-í mèe-í cuendá tnúhu ndee iní ní taxi Xítohó Jesucrístú ndécú ndîhi-ndí, dico vá cúcãháⁿ núú-í chi cãháⁿ ndáá-í. ⁹ Te ñá túú cuiní-í sá nchòhó caní iní-ndó sã yúhú dáyùhú ñáhà-í xii-ndo nàcuáa ndùu

tnúhu cãháⁿ-í núú tütú-í. ¹⁰ Te dava-ndo cãchí-ndó sã ténáá ñáhà-í xii-ndo núú tütú-í, te mee-ni tnúhu cãhnu sá ío cùnuu cuu-xi, te cãchí tucu-ndo sã òré ndécú ndîhi ñaha-í xii-ndo te ñá túú cãá-í sá cúú-í ñîí tée cùu váha cùu dico iní-ndó, te cãchí tucu-ndo sã ñá túú tnàhá iní-ndó nàcuáa quide-í òré dácuàha ñaha-í xii-ndo. ¹¹ Te nchòhó ñáyiú ducaⁿ cãháⁿ cada cuendá váha-ndo sã dàtná-ni cãháⁿ-ndí núú tütú-ndí ñu-ni ducaⁿ quide-ndí òré ndécú ndîhi ñaha-ndí xii-ndo.

¹² Te nchúhú, vá cúú tnàhí cãháⁿ-ndí sá ñîí-ni cuu-ndí ndîhi cue ñáyiú cãháⁿ váha cuendá mèe-xí, chi ñáyiú-áⁿ sání iní-yu ná cúú sã váha te quidé-yu te xiãⁿ cãchí-yu sá ío váha quidé-yu, te cãchí-yu sá quidé váha-gá-yu dàcúxí tnàha ñáyiú-yu, te sá dúcáⁿ cãháⁿ-yu te quidé-yu dàtná quidé cue ñáyiú ñá túú tnàhí cùtnuní iní-xi. ¹³ Te dico nchúhú ñá túú xidó-ndí cãháⁿ váha-ndí cuendá-ndí, chi cãháⁿ váha-ndí cuendá-ndí dico nàcuáa ndùu chiuⁿ ní taxi Yá Ndiõxí cãháⁿ-ndí, chi mee-gã ní cachí-gá ndèe není sáá-ndí cãháⁿ-ndí tnúhu-gá, te ní sáá-ndí ndéé ñuú-ndó cãháⁿ-ndí tnúhu-gá. ¹⁴ Te vitna ndècu ndîhi-ndí tnúhu ndee iní sá tnàhá nchòhó cuu cãháⁿ ndîhi ñaha-ndí xii-ndo, chi díhna-gá nchúhú ní quixi-ndí ní cãháⁿ-ndí tnúhu Xítohó Jesucrístú ñuú-ndó, tnúhu sá cãháⁿ nàcuáa naníhí tàhú-ó, ¹⁵ Te nchúhú ñá túú quide cahnu-ndí mèe-ndí cuendá chiuⁿ quide dava-gá-güedé quesaha-ndí sá chíúⁿ mèe-ndí cúú-xí. Te cuiní-ndí sá nchòhó cuita quindáá-gá iní-ndó Xítohó Jesucrístú, te ducaⁿ te níhí-gã-ndí nàcuáa cada-ndí chiuⁿ-gá nchaa dava-gá xichi núú ní cachí-gá cada-ndí chiuⁿ-gá. ¹⁶ Chi cãháⁿ-ndí tnúhu-gá tnúhu sá cãháⁿ nàcuáa naníhí tàhú-ó, te yáha-gá-ndí ñuú-ndó quíhíⁿ-ndí nchaa dava-gá xichi cãháⁿ-ndí, te vá cãdá cãhnu-ndí mèe-ndí cuendá chiuⁿ sá sà ní quide dava-gá-güedé.

¹⁷ Te cue ñáyiú cuiní cada cãhnu mee-xi te vá dúcáⁿ cãdá-yu, chi mee Xítohó Jesucrístú ná càda cahnú-yu-gá. ¹⁸ Te nchaa ñáyiú na cãháⁿ váha Xítohó Jesucrístú cuendá-yu, ñáyiú-án cúdíú-yu núú-gã, te ñá túú cùdíú-yu núú-gã cuendá sá cãháⁿ

váha-yu cuendá méè-yu.

11

Cuendá té Păblú ndîhi cuendá cue téé cächí sá cãháⁿ tnúhu Yă Ndiöxí te ñã ndàá

¹ Te cuiní-í sá nchòhó cada ndee iní-ndó cùndedóho-ndo tnúhu na cãháⁿ-í, chi cãháⁿ-í dàtná cãháⁿ cue ñáyiu ñã túú cùtnuní iní-xi, te cuèi nása-gá ná cùnduu tnúhu cãháⁿ-í dico chí cádá ndèe iní cundedóho-ndo. ² Chi yúhú ío ñùhu iní ñáhà-í xii-ndo dàtná ñùhú iní ñáhá mèe Yă Ndiöxí xii-o, te ní cãháⁿ-í tnúhu Xítóhó Jesucristú núú-ndó ñuu xiãⁿ ní tnahá tnúhu-ndo ndîhi-gá vitna, te sá dúcáⁿ ñí quide-í te cada iní-ndó sã yúhú cùú-í dàtná ñí tée xica ndáhú te nchòhó cùú-ndó dàtná ñí xíchí cuéchí, te Xítóhó Jesucristú cùú-gã dàtná ñí tée tnándaha ndîhi xíchí cuéchí-ã. Te ducaⁿ càda iní-ndó chi na sàá nduu te yúhú na càni cuendá ñáhà-í xii-ndo ñúú Xítóhó Jesucristú, te cuu-ndo ñáyiu vá cùndècu tnahí-gá cuèchi-xi. ³ Te yúhú-í sá sàcuíhná dandàhú ñáhá-xí xii-ndo vá cání-gã iní-ndó càncicúⁿ nihnu-ndo ñí yuhu ñí iní-ndó ìchi Xítóhó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chi sàcuíhná ñí nduu-xi cóó ñí dandàhú ñáhá-xí xii-xi, chi sàcuíhná-ãⁿ ío váha ní xito-xi nàcuáa ní quide-xi ní dandàhú-xi tá Èvá-áⁿ. ⁴ Te nchòhó, quidé ndèe iní-ndó sàcùndedóho-ndo nchàa tnúhu cãháⁿ cue téé cãháⁿ ingá núú tnúhu cuendá Jësús tnúhu sá ñã túú dānehé ñáhá-ndí xii-ndo, te quide ndee tucu iní-ndó ndèdóho-ndo dānehé ñáhá-güedě xii-ndo cuendá ingá espíritú, te ñã díú cuendá Espíritú Yă Ndiöxí sá ñí ngúndecu ndîhi-ndo dānehé ñáhá-güedě xii-ndo, te quide ndee tucu iní-ndó ndèdóho-ndo dānehé ñáhá-güedě xii-ndo ingá núú tnúhu sá cächí-güedé cãháⁿ nàcuáa naníhí tãhú-ndó, te ñã díú nàcuáa ndùu tnúhu sá ñí sàndáá iní-ndó cuendá naníhí tãhú-ndó cãháⁿ-güedé. ⁵ Te cue téé ducaⁿ cãháⁿ-áⁿ cächí-güedé sá Yă Ndiöxí ní tendaha ñàha-gá xii-güedé xicá cùu-güedé cãháⁿ-güedé tnúhu-gá te ío cùnuu-güedé, dico ñã ndàá sá cãháⁿ-güedé tnúhu-gá. Te yúhú cùtnuní iní-í sá cuè téé-ãⁿ ñã túú cùnuu-güedé dàtná cùnuu yúhú. ⁶ Te cuèi ñã túú cãháⁿ-í dàtná cãháⁿ cue téé ío váha sàá

díquí-xi dico ío váha cùtnuní iní-í cuendá nchaa sá dācuàha-í, te yúhú sa quide-í nàcuáa cùtnuní iní-ndó sã ío váha cùtnuní iní-í nàcuáa ndùu nchaa tnúhu cãháⁿ-í.

⁷ Te cudana te sàni iní-ndó sã yúhú ñã túú ní quide váha-í sá ñí quide-í méè-í dàtná ñí tée ío ndàhú iní-xi, chi ñã túú ní xicáⁿ-í yáhu-í núú-ndó cuendá sá ñí cãháⁿ-í tnúhu Yă Ndiöxí tnúhu sá cãháⁿ nàcuáa naníhí tãhú-ó núú-ndó. ⁸ Te ní queheⁿ-í díhúⁿ ñí taxi dava-gá cue ñáyiu ndècu ichi Xítóhó Jesucristú, te díhúⁿ-ãⁿ ñí dāndóñùhu-í ní saaⁿ-í nchaa sá ñí xini ñùhu-í cùtnàhá ní cãháⁿ-í tnúhu Xítóhó Jesucristú núú-ndó. ⁹ Te cùtnàhá ní xindecu ndîhi ñàha-í xii-ndo te áma ní xóo cumání sã xíní ñùhu-í, te ñã túú ñã ní xicáⁿ-í núú ñí ñí-ndo. Chi cue ñáyiu xindecu ichi Xítóhó Jesucristú ndécú dìstrítú Macèdoniá ní quixí-yu ní taxi-yu sá cùmãní xii-í, te ñã túú tnahí ñí dāsátú iní ñáhà-í xii-ndo cãcáⁿ-í núú-ndó ñuu ná cùú sã xíní ñùhu-í, te ñíu-ñí ducaⁿ càda-í. ¹⁰ Te ñíu-ñí duha cãháⁿ váha-í cuendá-í te ñí ñí-ndo cue ñáyiu dìstrítú Acãyá vá ñíhí-yu tnúhu cùñàhá-yu xii-í cuendá cadí-yu yuhu-í. Te mee Xítóhó Jesucristú náhá-gã sá ndàá cãháⁿ-í dàtná cãháⁿ ndàá méé-gã. ¹¹ Te cudana te sàni iní-ndó sã sá dúhá cãháⁿ-í te ñã túú cùu iní ñáhà-í xii-ndo, dico ñáhá chi mee Yă Ndiöxí náhá-gã sá yúhú ío cùu iní ñáhà-í xii-ndo.

¹² Te nàcuáa-ñí ta quide-í véxi te ñíu-ñí ducaⁿ càda-í cuendá sá cuè téé cuiní cada nínu mee-xi cächí sá ñí-ñí cuu ndîhi ñàha-güedé xii-í vá ñíhí-güedé tnúhu cãháⁿ-güedé cächí-güedé sá ñí-ñí chiuⁿ quide ndîhi ñàha-güedé xii-í. ¹³ Te cue téé-ãⁿ cächí-güedé sá Yă Ndiöxí ní tendaha ñàha-gá xii-güedé xicá cùu-güedé cãháⁿ-güedé tnúhu-gá dico ñã ndàá, chi mee-ñí dāndahú-güedé ñáyiu ndîhi tnúhu cãháⁿ-güedé, te quide-güedé dàtná quidé cuè téé cãháⁿ tnúhu Xítóhó Jesucristú dico ñã ndàá sá cùú-güedé cue téé cãháⁿ tnúhu-gá. ¹⁴ Te vá cùñùhu-o sã dúcáⁿ quide cue téé-ãⁿ, chi mee sàcuíhná quidé-xí sã cùú-xí dàtná ñí espíritú xínú cuèchi núú ío váha càa ndecu Yă Ndiöxí dico ñã ndàá sá xínú cuèchi-xi xiáⁿ. ¹⁵ Te xiãⁿ vá cùñùhu-o sã cuè téé xínu cuechi núú-xi quide-güedé sá cùú-güedé cue téé quide váha chi ñã ndàá sá quidé vãha-güedé chi dāndahú-güedé ñáyiu. Te nàcuáa ndùu nchaa sá quidé-güedé te

ducaⁿ nàcháhu-güedé núú Yă Ndiöxi.

Té Păblú ío ndòho-dé cuendá sá cúú-dě té cãháⁿ tnúhu Xítóhó Jesucristú

16 Te yúhú cãháⁿ tucu-í dóho-ndo sã vã cání ìní-ndó sã yúhú cúú-í ìⁿ té cãháⁿ lúcú cãháⁿ duha, te núú dava-ndo dùcaⁿ saní ìní-ndó dico chí cádá ndèe ìní cundedóho-ndo tnúhu na cãháⁿ-í cuendá ducaⁿ tnàhá-í cada nínu-í mée-í. 17 Te vitna na cãháⁿ-í dàtná cãháⁿ ìⁿ téé ñá túú cùtnuní ìní-xi, chí tnúhu cãháⁿ-í ñá túú ìⁿ-ni cuu-xi ndìhi tnúhu Xítóhó Jesucristú, chí vitna cãháⁿ-í nàcuáa cada nínu-í mée-í. 18 Te ío cuéhé ñáyíu quíde nínu mee-xi cuendá nchaa sá ío ñuyíú-a te xǎⁿ nũu tnàhá-í cuení-í cada nínu-í mée-í. 19 Chí cùtnuní sá nchòhó quíde ndèe ìní-ndó sácúndedóho-ndo nchaa tnúhu cãháⁿ cue téé cãháⁿ lúcú cãháⁿ duha, te ducaⁿ quíde ndee ìní-ndó sácúndedóho-ndo tnúhu cãháⁿ-güedé chí cãchí-ndó sã ìo túha-ndo. 20 Te nchòhó, quíde ndee ìní-ndó tnì-ndo nchaa tnúhu cãháⁿ cue téé quíde yica ñaha xii-ndo sá cúnú cuèchi-ndo núú-güedě, te xìcáⁿ-güedé nándi sá xìcáⁿ-güedé núú-ndó, te tàxi tnuní ñàhá-güedě xii-ndo, te quíde-güedé sã ìo cùnū-güedé ndécú ndìhi ñaha-güedé xii-ndo, te cànìha-güedé xii-ndo, te cuèi nchaa xǎⁿ quíde ñàhá-güedé xii-ndo dico quíde ndee-ni ìní-ndó. 21 Te nchòhó cãchí-ndó sã cúú-ndí cue téé ñá túú ní cùyì cada nándi sá cádá, te ndáá chí ñá túú ìⁿ-ni cuu-ndí ndìhi cue téé ducaⁿ xǎquide.

Dico núú cue téé-án cúyì-güedé quíde nñu-güedé méé-güedě, te tnàhá-í cúyì-í ducaⁿ càda-í. Te sá dúhá cãháⁿ-í te cãháⁿ-í dàtná ìⁿ téé ñá túú cùtnuní ìní-xi. 22 Te núú quíde cahnu-güedé méé-güedě cuendá sá cãháⁿ-güedé tnúhu hèbreú, te yúhú tucu ñu-ni téé cãháⁿ tnúhu hèbreú cúú-í, àdi quíde cahnu-güedé méé-güedě cuendá sá cúú-güedě cue téé isràél, te yúhú tucu tnàhá-í cúú-í téé isràél, àdi quíde cahnu-güedé méé-güedě cuendá sá cúú-güedě ñaní tnàhá ndíi Àbrahám, te tnàhá yúhú cúú-í ñaní tnàhá ndíi Àbrahám tucu. 23 Àdi quíde cahnu-güedé méé-güedě cuendá sá sání ìní-güedé sá díú nũu Xítóhó Jesucristú xínú cuèchi-güedé, dico yúhú ío-gá xínú cuèchi ndisa-í núú-gã. Te sá

dúhá quíde cahnu-í mée-í te cãháⁿ-í dàtná ìⁿ téé ñá túú cùtnuní ìní-xi, te yúhú cúú-í ìⁿ téé ío-gá quíde chiuⁿ-gá dàcúúxí cuè téé-án, te vài xito ní cuu cànìha ñáyíu xii-í, te vài xito ní cuu chìhi ñàhá-yu vecaá xii-í, te vài xito ní cuu cãcu cãcu cahni ñaha ñáyíu xii-í. 24 Te cue ñáyíu isràél ní canìhá-yu xii-í úhúⁿ xito, te ndi tnahá ìⁿ ìⁿ xito ní canìhá-yu ní dáquèe-yu ócò sáhúⁿ cúmí ñì sàtà-í. 25 Te úní xito ní canìha tucu ñáyíu xii-í ndìhi carrutí, te ìⁿ xito ní sáha yúú ñàhá-yu xii-í, te ní cuu úní xito quèe naa bàrcú xití ndute òré sácúhuⁿ-í, te ìⁿ xito ío ní ndòho-í ní xíndecu-í ìⁿ nduu ìⁿ niú núú ndute làmár. 26 Te ío tìtní xichi ní cuu xìca cuu-í, te dava xichi ní cãcu cuidò ñaha ndute ñuhu xii-í, te dava xichi ní cãcu ñuⁿ ñàdúhú nchaa ndachiuⁿ-í, te dava xichi ní cãcu cada ñaha cuè ñáyíu cùu ndi mee-í ìⁿ sá cádá ñàhá-yu xii-í, te ñu-ni ducaⁿ ní cãcu cada ñaha tucu cue ñáyíu ñá túú cùu ndi mee-í ìⁿ sá cádá ñàhá-yu xii-í ní cùu, te cuèi xití ñuú te cuèi xití yucu cãcu cãcu cada ñaha ñáyíu xii-í ìⁿ sá cádá ñàhá-yu, te ñu-ni ducaⁿ cãcu cãcu quini-í tnúndòho oré ñùhù-í bàrcú cuáháⁿ núú ndute làmár. Te cue ñáyíu cãchí sá ndécú ìchi Xítóhó Jesucristú te ñá ndáá cãcu cãcu cada ñàhá-yu xii-í ìⁿ sá cádá ñàhá-yu. 27 Te ío ndòho-í cuendá chiuⁿ quíde-í chí ío xàú-í, te ní cuu vài xito ñá túú xidí-í, te tìtní xito ní cuu xìhí víhì-í docó, te tìtní xito ní cuu yìchí-í ndute, te tìtní xito ní cuu ñá túú tnàhí ná xéxi-í cuendá chiuⁿ quíde-í, te tìtní xito ní cuu ndòho-í sá vǎxiⁿ, te tìtní xito ní cuu ñá túú ñhí-í dóo cuihnu-í.

28 Te ñá díú-ní xǎⁿ chí ìⁿ nduu ìⁿ nduu ío sàni ìní-í cuendá nchaa ñáyíu ndècu ìchi Xítóhó Jesucristú xíndecu nchaa xichi. 29 Te ndèda-ni càa ñáyíu ñá túú ñhí ndéé cùndecu ìchi Xítóhó Jesucristú, te ío cùndahú ìní-í chí sànuu sá tnàhá-í ñá túú ñhí ndéé-í cundecu-í ìchi-gá sá dúcáⁿ quíde-yu. Te núú ìⁿ ñáyíu quíde-yu sá ìⁿ nchòhó ñáyíu ndècu ìchi Xítóhó Jesucristú quíde-ndó ìⁿ sá ñá túú tàú-ndó càda-ndo te vã cúú vãha ìní-í chí cudééⁿ-í. 30 Te núú xìni ñuhu-xi sá cádá cahnu-í mée-í, te cuu ducaⁿ càda-í te cãháⁿ-í mee-ni cuendá nchaa sá quíde nàcuáa ñá túú ñhí ndéé yìqui cuúú-í. 31 Te Dútú Ndiöxi Yáá cúú Tãtã Xítóhó Jesucristú

náhá-gã sá yǔhú cǎháⁿ ndáá-í núú-ndó, te diu-gá tàú-gá cachí-ó sǎ ïo cǎhnu cuu-gá ni caa ni quíhíⁿ. ³² Te cútnáhá ní xíndecu-í ñúú Dámascú te téé cùu gobiernú téé cùndihí téé yìndaha ñáyíu nàni Aretás ní taxi ndecu-dé cue téé ní xíndedí yuyèhe sá ñúhú dòco ñúú cuendá òré quee-í te tñi ñaha-güedë xii-í ní cùu. ³³ Dico yúhú ní queè-í ìⁿ xití tídihi, te cue ñáyíu cùndihí ñaha xii-í ní queñuhu ñáhá-yu ndàa ventaná nchii yìquì naha sǎ ñúhú dòco ñúú-án, te ducaⁿ te ní cácu-í ñá túú ní ndàcu-güedé tñi ñaha-güedë xii-í.

12

Té Pǎblú cǎháⁿ-dé sá ïo vii cǎa sá ñí dánèhé núú ñáhá Xítóhó Jesucristú xii-dé

¹ Te ñá túú ndéé nándǐhi-xi sá cǎháⁿ váha-o cuendá méé-ó, dico vitna xini ñuhu-xi ducaⁿ cada-í chi cǎháⁿ-í nàcuáa ní quide ñaha Xítóhó Jesucristú xii-í, chi ní quide-gá sá ñí cutnùní iní-í nàcuáa ndùu tñuhu-gá, te vai núú sǎ ñí dánèhé núú ñáhá-gã xii-í. ² Te yúhú xini-í ìⁿ téé sàndáá iní ñáhá xii Xítóhó Jesucristú, te sa ní cuu úxícúmí cuíá sǎ tée-án ñí sáá-dé ndéé andiù cùu uní, te ñá túú xini-í te núu ndihí yìquì cùñú-dé ní sáá-dé àdi ñáhá, chi ìⁿ dǐi dí-ñi Yá Ndiòxí náhá-gã te núu nása cǎa-dé ní sáá-dé. ³ Te yúhú cǎháⁿ ndáá-í cuendá téé-án, dico dàtná ní cachí-í sá ñá túú xini-í te núu ndihí yìquì cùñú-dé ní sáá-dé andiù àdi ñáhá, chi mee Yá Ndiòxí náhá-gã te núu nása cǎa-dé ní sáá-dé. ⁴ Te téé-án ñí sáá-dé ìⁿ xichí núú ïo váha cǎa andiù, te yàcáⁿ ní xíndedóho-dé tñuhu mee-ni sǎ cúu-xí cuendá méé-dé, te tñuhu-án vǎ cúu tñahí cǎháⁿ-dé núú ñí ìⁿ ñáyíu. ⁵ Te yúhú quidé ñínu-í téé-án, dico mee-í ñá túú cǎháⁿ váha-í cuendá-í cuendá cada nínu-í méé-í, chi cǎháⁿ-ni mee-ni cuendá nchaa sá quidé nàcuáa ñá túú ñihí ndéé yìquì cuñú-í. ⁶ Te núu dicó yúhú cuini-í te cuu cǎháⁿ váha-í cuendá-í cuendá cada nínu-í méé-í, te núu ducaⁿ na cǎháⁿ-í te ñá túú cùu-xi ìⁿ tñuhu neñúú cǎháⁿ-í, chi cùu-xi ìⁿ sá cǎháⁿ ndáá-í te núu na cǎháⁿ-í. Dico vǎ dúcáⁿ cǎa-í chi cuini-í sá nchòhó cada cuendá-ndó nàcuáa ndùu tñuhu cǎháⁿ-í ndihí nàcuáa quide-í, te ducaⁿ mée-ndo cǎháⁿ-ndó te núu ná téé cùu-í, te ñá díú sǎ yúhú cǎháⁿ váha-í

cuendá méé-í cuendá nchòhó cachí-ndó sǎ ïo cùnuu-í.

⁷ Te sá ñí dánèhé núú ñáhá Xítóhó Jesucristú xii-í cúu-xí sǎ xidó ïo váha, te cuendá sá vǎ cǎdá cǎhnu-í méé-í núu xiǎⁿ Xítóhó Jesucristú ní quide-gá duha ndòho yìquì cuñú-í vitna. Te sá dúcáⁿ quide ñaha-gá xii-í te xiǎⁿ sácuíhná ñí ñihí-xi ichi cǎhnu dandohó ñaha-xi xii-í. ⁸ Te ní cuu úní xito cǎháⁿ ndáhú-í núú Xítóhó Jesucristú sá ná cǎdá-gã nàcuáa vǎ ndóhó-gã yìquì cùñú-í. ⁹ Dico mee-gã cǎchí-gá xii-í: “Yúhú ïo cùndahú iní ñáhá-í xii-n chindee ñaha-í, te ñá túú ñá cùmání xii-n, te cùtnuní sǎ ïo-gá chíndèe-í cue ñáyíu ñá túú ñihí ndéé cùndecu”, duha ní cachí-gá xii-í. Te xiǎⁿ núu yúhú ïo cùdǐí iní-í sá ñá túú ñihí ndéè-í ndécù-í, chi diu cuendá xiǎⁿ Xítóhó Jesucristú ñá túú dàña nihnu ñaha-gá xii-í chíndèe ñaha-gá. ¹⁰ Te xiǎⁿ núu cùdǐí iní-í sá dúhá ñá túú ñihí ndéè-í ndécù-í, te cùdǐí tucu iní-í cuendá nchaa tñuhu cuèhé tñuhu duha cǎháⁿ ñáyíu cuendá-í, te cùdǐí iní-í cuendá nchaa sá ndóhò-í, te cùdǐí tucu iní-í cuendá sá quidé ñaha ñáyíu xii-í, te cùdǐí tucu iní-í cuendá nchaa dáva-gá sá ndóhò-í cuendá Xítóhó Jesucristú. Te òré ñá túú ñihí ndéè-í te Xítóhó Jesucristú chíndèe ñaha-gá xii-í ñihí ndéè-í.

Té Pǎblú ïo sàni iní-dé cuendá cue ñáyíu xíndecu ichi Xítóhó Jesucristú ndécú ñúú Còrintú

¹¹ Te cùu-í dàtná ìⁿ téé ñá túú cùtnuní iní-xi sá dúhá cǎháⁿ váha-í cuendá-í, te ducaⁿ quide-í chi mee-ndo quide-ndo sá dúcáⁿ cǎháⁿ-í, dico mee-ndo tàú-ndó cǎháⁿ váha-ndo cuendá-í ní cùu. Te dáva cue téé ïo quide cǎhnu-güedé méé-güedé, te cǎchí-güedé sá Xítóhó Jesucristú ní táuchíúⁿ-gã sá cǎháⁿ-güedé tñuhu-gá, dico yúhú cùnùu-gá-í dàcúúxí cuè téé-án cuèi ñá túú vèdana ná cùu-í ndécù-í ñuyúú-a. ¹² Te cútnáhá ní xíndecu ndihí ñaha-í xii-ndo ïo ní quide cǎhnu iní-í nándí sá ñí yáha-í ní quide-í chiiⁿ Xítóhó Jesucristú sá cúu-xí-ndó. Te ní chindee ñaha-gá xii-í ní quide-í tñi núú sǎ vǎ yòo tñahí ndàcu cada te ní cuñuhu-ndo, te sá dúcáⁿ ñí chindee ñaha-gá xii-í ní cutnùní iní-ndó sǎ yúhú cúu ndísa-í ìⁿ téé ní cachí Xítóhó Jesucristú sá cǎháⁿ-í tñuhu-gá. ¹³ Te yúhú ìⁿ-ni quide

ndihi ñaha-í xii-ndo ndihi nchaa dava-gá cue ñáyi ndècu ichi Xítohó Jesucristú, te dicó-ni sá yúhú ñá túú ní cuíní-í taxi-ndo sã xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ ñi quide-í ñá túú ní cuíní-í chindee ñaha-ndo te chí cáda càhnu iní ñáhá xii-í.

14 Te vitna sa ndècu túha-í sá quíxí-í núú ndécú-ndó, te sá quíxí còto ñaha tucu-í xii-ndo cùu-xi xito cuu úní sá quíxí-í, te cuíní-í sá vã dándihú-ndó iní-ndó ndècu-ndo sá táxi-ndó cùu xii-í, chi ñá díú xĩãⁿ ndèé iní-í chi mee-ndo ndèé iní-í quixi-í. Te duha càháⁿ-í chi nchòhó xíní-ndó sã cuè téé cùu tátá sãñaha-güedé sá cúú-xí cuè déhe-güedé te ñá díú cuè déhe-güedé sãñaha-güedé sá cúú-xí mèe-güedé. 15 Te yúhú ío váha cùu iní-í dandòñuhu-í sá ndécú ndihi-í nàcuáa ndacu-í chindee ñaha-í xii-ndo cùndecu váha-ndo sã cúú-xí Yã Ndiõxí chi ío cùdí iní-í, te cuèi na cùu-í sá cuendá-ndó, chi ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sànuu sá nchòhó ñá túú cùu iní ñáhá càvihi-ndo xii-í.

16 Te ñaha-ndo sá ñá túú ní dándihú-í iní-ndó nã taxi-ndo cùu xii-í, dico dava-ndo càchí-ndó sã ío váha ní xito-í nàcuáa ní quide-í nàcuáa ní dándahú ñáhà-í xii-ndo.

17 Te chí càháⁿ te núu yúhú ní dándahú ñáhà-í xii-ndo ndihi cue téé ní tendaha-í ní quixi coto ñaha xii-ndo. 18 Te ní càháⁿ ndàhú-í núú tẽ Títú ndihi núú ìngá tucu téé ndècu ndihi-o ichi Xítohó Jesucristú ní quixi coto ñaha-güedé xii-ndo. Te nchòhó cùtnùní iní-ndó sã tẽ Títú ñá túú ní dándahú ñáhá-dé xii-ndo, te ducaⁿ chi ñⁿ-ni sàni iní-ndí te ñⁿ-ni quide-ndí.

19 Te cudana te sàni iní-ndó sã sã dúhá càháⁿ-ndí te tàunihnu-ndí mée-ndí, dico ñá díú dùcaⁿ quee-xi tnúhu càháⁿ-ndí, chi càháⁿ-ndí nàcuáa tàú-xi càháⁿ-ndí chi ndècu ndihi-ndí Xítohó Jesucristú, te mee Yã Ndiõxí náhá ndáá-gá nàcuáa ndùu tnúhu càháⁿ-ndí, te nchaa sá càháⁿ-ndí cúú-xí cuendá nchòhó cue ñáyi ío cùu iní-ndí, te càháⁿ-ndí nàcuáa cùndecu váha-ndo ichi Xítohó Jesucristú. 20 Te ío sàni iní-í cuendá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nàcuáa cuu váha iní-í, te sá

dúcáⁿ te yúhú càháⁿ-í nàcuáa vá cúú vãha iní-ndó, te ducaⁿ ío sàni iní-í cuendá-ndó chi na cuáháⁿ òré quexio-í te nàá-ndó, àdi ndecu-ndo ichi cuédú iní, àdi cudééⁿ núú tnáhá-ndó, àdi ñá túú cùu ñⁿnuu-ndo ndecu-ndo, àdi càháⁿ cuèhé-ndó cuendá tnàha ñáyi-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. 21 Te ío sàni iní-í cuendá-ndó chi na cuáháⁿ òré quixi-í, te Yã Ndiõxí cada-gá te cuahaⁿ núú-í sá cuendá-ndó, te ío ndíhú iní-í cuendá-ndó te núu vátá dáñá-gã-ndó nchàa sá cuèhé sá dúhá ñi ngüíta-ndo quide-ndo ndéé sanduu, te vãi-ndo ní ngüíta-ndo dùcaⁿ quide-ndo, chi ndècu-ndo ichi díí iní te nándi-gá nchaa sá cuèhé sá dúhá quide-ndo, te ducaⁿ ío ndíhú iní-í te núu vátá dáñá-gã-ndó nchàa xĩãⁿ.

13

Tnúhu ndéé núú ñi ndihi-ná

1 Te sá quíxí-í vitna núú ndécú-ndó cùu-xi xito cuu úní sá quíxí còto ñaha-í xii-ndo. Te càchí tnúhu-í xii-ndo sã òré cundáa cuèchi-ndo te canehe núú úú àdi úní ñáyi càháⁿ ndáa nàcuáa ndùu cuèchi-ndo. 2 Te yúhú sa ní càháⁿ-í dóho-ndo cùtnáhá ní quixi-í ní quixi coto ñaha-í xii-ndo xito cuu úú, te díu-ni ducaⁿ càháⁿ tucu-í dóho-ndo vitna vátá quíxí tucu-gá-í quixi coto ñaha-í xii-ndo. Te nchòhó ñáyi ní cunduu ñi ngüíta quide nchaa sá cuèhé sá dúhá, tenáa ñáhà-í xii-ndo òré quexio-í te núu vátá dáñá-gã-ndó nchàa sá cuèhé sá dúhá quide-ndo te tnáhá nchaa dava-gá-ndó tènáa ñáhà-í xii-ndo. 3 Te nchòhó cuíní-ndó quíní-ndó núu ndáa sá quide-í núú Xítohó Jesucristú càháⁿ-í yuhu-gá, dico dàvá-án cùtnùní ndáa iní-ndó. Te Xítohó Jesucristú quide-gã nàcuáa cùtnùní iní-ndó sã ío càhnu cuu-gá te ñá túú quide-gá dàtná quide ñⁿ ñáyi ñá túú ñihí ndéé cùndecu. 4 Te Xítohó Jesucristú ní ndoho-gá dàtná ñⁿ ñáyi ñá túú ñihí ndéé cùndecu, chi ní sañi ñaha-güedé xii-gá núú cùrúxí dico mee Yã Ndiõxí ní quide-gá ní ñihí ndéé Xítohó Jesucristú ní ndoto-gá ndécú-gã vitna, te tnáhá nchúhú tucu ducaⁿ yãha-ndí ñá túú ñihí ndéé-ndí cùndecu-ndí, dico

mee Yă Ndiöxí chindèe ñaha-gá xii-ndí nihí ndéé-ndí ndécú-ndí cuendá sá ndécú ndihí-ndí Xítohó Jesucristú, te xíãⁿ nũu ndàcu-ndí quidé-ndí nàcuáa tàú-xi cunduu sá cúú-xí-ndó.

⁵ Te chí cádá cuendá váha te núu ndisa sá sàndáá iní-ndó tnũhu Xítohó Jesucristú, te núu ndáá sá ndécú-ndó ichi-gá te cùtnuní iní-ndó sã ndécú-ndó ndihí-gá. ⁶ Te cuiní-ndí sá nchòhó cutnùní ndáá iní-ndó sã nchũhú ndécú ndihí ndisa-ndí Xítohó Jesucristú. ⁷ Te nchúhú càháⁿ ndihí-ndí Yă Ndiöxí cuendá-ndó cuendá sá vã cádá-ndó nì ìⁿ sá cuéhé sá dúhá, te vã cãní iní-ndó sã sã dúcãⁿ càháⁿ ndihí-ndí-gá cuendá-ndó, te cuiní-ndí sá nchòhó cutnùní iní-ndó sã nchũhú ío ndècu yĩñuhu-ndí núú-gã, te ñáhã chí càháⁿ ndihí-ndí-gá cuendá-ndó chí cuiní-ndí sá nchòhó cada váha-ndo cundecu-ndo cuéi sàni iní-ndó sã nchũhú cúú-ndí cue téé ñá túú ndècu yĩñuhu núú-gã. ⁸ Te nchúhú mee-ni càháⁿ váha-ndí cuendá tnũhu ndáá tnũhu Yá Ndiöxí, te ñá túú càháⁿ-ndí ìⁿ tnũhu sá ñã túú tàú-xi càháⁿ-ndí cuendá tnũhu-áⁿ. ⁹ Te cùdíí iní-ndí sá ñã túú-gã xíní ñũhu-xi cada-ndí nàcuáa níhí ndéé-ndí tenáá ñáhã-ndí xii-ndo càháⁿ-ndí dóho-ndo, chí nchòhó sa ní níhí ndéé-ndó ndècu-ndo ichi-gá. Te nchúhú càháⁿ ndihí-ndí Yă Ndiöxí cuendá-ndó cuendá sá nchòhó cundáá-ndó cundecu-ndo ñá túú-gã ná cumání-ndó nũú-gã. ¹⁰ Te xíãⁿ nũu duha ndũu nchaa tnũhu tèe-í núú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sá òré ná cundecu ndihí ñaha-í xii-ndo te vá ío níhí càháⁿ-í dóho-ndo nàcuáa ndũu tnũhu ndee iní ní taxi Xítohó Jesucristú ndécú ndihí-í, chí ní taxi-gá tnũhu ndee iní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cãnúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiu ndècu ndihí-ndí ichi Xítohó Jesucristú ío quide ndee iní ñáhã-ndí xii-ndo, te ío chí ndúcú nàcuáa cada-ndo cundáá-ndó nũú Yă Ndiöxí cuendá sá ñã túú tnãhí-gá ná cumání-ndó nũú-gã, te ndee ndèe cada iní-ndó cundecu-ndo, te chí cúú ìⁿnuu cundecu ndihí tnaha, te ducaⁿ te Yá Ndiöxí

cundecu ndihí ñaha-gã xii-ndo chí ío cùu iní ñáhã-gã xii-o, te diu-gá quidé-gã ío váha cùu iní-ó ndècu-o. ¹² Te ndihí tnũhu yĩñũhu chí cádá ndèe iní tnáhã. ¹³ Te nchaa ñáyiu cùu cuendá Yă Ndiöxí ndécú ìha quide ndee iní ñáhã-yu xii-ndo.

¹⁴ Te xicãⁿ táhú-ndí núú Xítohó Jesucristú sá ío na chindèe chitúu ñaha-gã xii-ndo. Te mee Yă Ndiöxí ná cádá-gã nàcuáa cutnùní iní-ndó sã ío cùu iní ñáhã-gã xii-ndo, te Espíritú-gá cundee cùu cahnu iní-ndó cundecu-ndo. Te ducaⁿ na cunduu. Te ío chí cádá ndèe iní-ñã vitna.

TUTÚ NÍ CADÚHA TĚ PĀBLŪ QUIHⁿ NDAHHA ÑÁYIU DISTRĪTÚ GĀLACIÁ

Té Pāblū cādūha-dé tutú quíhⁿ ndaha nchaa ñáyiú sàndáá iní ñáhá xii Xítohá Jesucristú ndécú dīstrítú Gālaciá

¹ Te yúhú té Pāblū ní tendaha ñàha Xítohá Jesucristú, ndihí Dútú Ndiöxí véxi-í cāháⁿ-í tnúhu-gá. Te diu Yá Ndiöxí ní dándótó-gă Xítohá Jesucristú Yaá ní xihí ní cūu. Te cāchí tnúhu-í xii-ndo sã ñà díú ñáyiú ñuyíú-a ni tēndaha ñaha xii-í véxi-í, te ni Yá Ndiöxí te ni Xítohá Jesucristú ñá túú ní xāhaⁿ-gă xii ìⁿ ñáyiú quixí-yu cachí tnúhu-yu nācuáa cada-í. ² Te yúhú té Pāblū cādūha-í tutú-a ndihí nchaa dava-gă ñáyiú ndēcu ichi Yá Ndiöxí ndécú ndihí-í iha cuēndá daquixi-í ndaha nchòhó ñáyiú sàndáá iní ñáhá xii Xítohá Jesucristú ndécú dīstrítú Gālaciá. ³ Te xicáⁿ táhù-í núú Dútú Ndiöxí, ndihí núú Xítohá Jesucristú sá ïo na chīndee chitúu ñaha-gă xii-ndo, te ducaⁿ ndi nduú-gă ná cādá te ïo váha cuu iní-ndó cūndecu-ndo. ⁴ Te Xítohá Jesucristú ní xihí-gă sá cuēndá nchaa cuēchi nchoo cuē ñáyiú ndēcu ñuyíú-a. Te ducaⁿ ñi quide-gă, chí cuiní-gă sá vã cūndēcu-o ichi cuehé ichi duha. Te ducaⁿ ñi cuu, chí Dútú Ndiöxí ducaⁿ ñi cuiní-gă cunduu. ⁵ Te ïo chí ná ndācáⁿ táhù-ó núú Yá Ndiöxí cuēndá sá ïo cāhnu cuu-gă, te diu-ni ducaⁿ cāda-o ni caa ni quíhⁿ! Te ducaⁿ na cūnduu.

Mee-ni tnúhu Xítohá Jesucristú cúu-xí tnúhu sá cāháⁿ nācuáa naníhí tãhú-ó

⁶ Te ïo cūñúhu-í cúú chí ïo ndihí ní dáñá-ndó ichi Yá Ndiöxí. Te Yaá-áⁿ ñi cāháⁿ ñáhá-gă xii-ndo, chí Xítohá Jesucristú ïo ní cundáhú iní ñáhá-gă ní quide váha ñaha-gă xii-ndo, te vitna dàcuaha tucu-ndo ingá tnúhu, te cāchí-ndó sã xīãⁿ dācācu nihnu ñaha-xi xii-ndo núú ùhú núú ndàhú. ⁷ Dico ñáhá, chí ñá túú-gă tnúhu sá dācācu nihnu ñaha xii-o núú ùhú núú ndàhú. Te dīcō-ni sá ïo ñáyiú véxi dāticá nuu ñahá-yu xii-ndo dānehé ñáhá-yu tnúhu sá dācuíta nihnu ñaha xii-ndo, chí tnúhu-áⁿ ñà túú cūu-xi

tnúhu Xítohá Jesucristú. ⁸ Te yúhú cāháⁿ-í tnúhu Xítohá Jesucristú, dico núu ïo ñáyiú véxi dānehé ñáhá xii-ndo ingá tnúhu sá ñà túú ní dānehé ñáhá-í xii-ndo, te nchòhó cachí-ndó sã ñáyiú-áⁿ nacháhu-yu núú Yá Ndiöxí sá dūcáⁿ quidē-yu. Te cuēi yúhú, te núu na dāma-í tnúhu danēhé ñáhá-í xii-ndo, te diu-ni ducaⁿ cāháⁿ-ndó sã nāchāhu-í núú-gă te núu ducaⁿ na cāda-í. Adi te núu ìⁿ espíritú xínú cuēchi núú-gă véxi-xi cāháⁿ-xi ingá tnúhu sá ñà túú ní dānehé ñáhá-í xii-ndo nācuáa naníhí tãhú-ndó ñá, te diu-ni ducaⁿ cāháⁿ-ndó sã nāchāhu-xi núú Yá Ndiöxí te núu ducaⁿ na cāda-xi. ⁹ Te diu-ni duha sa ní dānehé ñáhá-í xii-ndo sã núu véxi ñáyiú dānehé ñáhá ingá tnúhu sá ñà túú ní dānehé ñáhá-í xii-ndo nācuáa naníhí tãhú-ndó ñá, te cachí-ndó sã ñáyiú-áⁿ nacháhu-yu núú Yá Ndiöxí sá dūcáⁿ quidē-yu, duha ní cachí-í xii-ndo.

¹⁰ Te duha ndūu tnúhu cāháⁿ-í chí nchòhó sa xíní-ndó sã yúhú cuiní-í sá Yá Ndiöxí cāháⁿ-gă sá quidē vāha-í ndécū-í, te ñá díú sã ñáyiú ñuyíú-a cachí-yu sá quidē vāha-í, àdi sá ïo cūdí ìnī-yu nchaa nācuáa quidē-í ndécū-í. Te núu na cāni iní-í cudū-í núú ñáyiú ñuyíú-a, te ñá túú cūu-í tēe xīnu cuechi núú Xítohá Jesucristú te núu ducaⁿ na cāda-í.

Nācuáa ní cuu ní ngūíta té Pāblū cāháⁿ-dé tnúhu Yá Ndiöxí

¹¹⁻¹² Te nchòhó ñáyiú ndēcu ndihí-í ichi Xítohá Jesucristú cāchí tnúhu-í xii-ndo sã tnúhu sá dānehé ñáhá-í xii-ndo nācuáa naníhí tãhú-ndó cūu-xi tnúhu sá ñi cachí tnúhu mee Xítohá Jesucristú xii-í, te ñá díú ìⁿ ñáyiú ñuyíú-a ni cāhu iní-yu tnúhu-áⁿ, àdi danēhé ñáhá-yu xii-í, chí mee Xítohá Jesucristú ní dānehé ñáhá-gă.

¹³ Te nchòhó sa nihí-ndó tnúhu nācuáa ní xóo cada-í cūtnáhá nchīcúⁿ nihnu-í nchaa nācuáa dàcuaha ñáyiú cūu ndi mee-í ñáyiú isràel ní cūu. Te dàvá-áⁿ ïo ní xóo cuu úhú iní-í nchaa ñáyiú ndēcu ichi Yá Ndiöxí, te nāndi sá ñi xóo cada-í-yu, te ní cuiní-í danāa-í-yu ni cūu. ¹⁴ Te yúhú ïo-gă ní xóo quene cáva-í ní xóo dācuāha-í nchaa sá dācuāha ñáyiú cūu ndi mee-í dācūxí ñáyiú ìⁿ-ni cuíà-í ndihí-yu ni cūu, te ïo-gă ní xóo cuiní-í cada ndāá-í canchicúⁿ nihnu-í nchaa nācuáa ní dānehé ñáhá cuē ñānī tñáhá-í ní xīndecu ndéé sanaha ni

cùu. ¹⁵ Te ndéé cútnàhá vátá cécú-gǎ-í Yǎ Ndiǒxí sa nèhe váha ñaha-gǎ xii-í cuendá sá cǎháⁿ-í tnúhu-gǎ, núu xǎⁿ ní cǎháⁿ ñáhǎ-gǎ xii-í quidè-í chiuⁿ-gǎ vitna, te sá dúcǎⁿ nǐ quide-gǎ te ío váha ní quide ñaha-gǎ xii-í. ¹⁶ Te òré ní cǎháⁿ ñáhǎ Yǎ Ndiǒxí xii-í te ní cachí tnúhu-gǎ cuendá Déhe-gǎ Xítóhó Jesucristú. Te ducaⁿ nǐ quide Yá Ndiǒxí cuendá sá cuini-gǎ sá cǎñaha-í xii ñáyiú ñǎ túú cùu ñáyiú isràél cuendá Yaá cúú Déhe-gǎ. Te cútnàhá ní cǎháⁿ ñáhǎ Yǎ Ndiǒxí xii-í, te vá yóo ìⁿ òúú-xi ní ndècu tnúhu-í nàcuáa cada-í. ¹⁷ Te nǐ ñǎ túú ní sǎháⁿ-í ñúú Jerusalén nducu tnúhu-í núú cuè téé díhna nuu nǐ tendaha Xítóhó Jesucristú cǎháⁿ tnúhu-gǎ núu nása cada-í, chi ndíhi-ni ní sǎháⁿ-í distritú Àrabiá ní xíndecu tnaa-í te dàtnùní cuánuhú tucu-í ñúú Dàmascú.

¹⁸ Te núú ùní cuíá sǎ nǐ cǎháⁿ ñáhǎ Yǎ Ndiǒxí xii-í, te ní sǎháⁿ tucu-í ñúú Jerusalén ní cǎháⁿ ndíhi-í té Pèlú, te ní xíndecu-í ndíhi-dé sǎhúⁿ nduu. ¹⁹ Te tnàhá té Jàcobó ñaní Xítóhó Jesucristú ní cǎháⁿ ndíhi-í. Te ñǎ túú ní xini-í dava-gǎ cue téé ní tendaha Xítóhó Jesucristú cǎháⁿ tnúhu-gǎ. ²⁰ Te Yá Ndiǒxí ndéhé ndí ndehe caxi-gǎ sá ncháá tnúhu téé-í núú tùtú-a sá cúú-xi-ndó cùu-xi ìⁿ sá ndáá.

²¹ Te sátá nǐ sǎháⁿ-í ñúú Jerusalén, te dàtnùní ní sǎháⁿ-í distritú Sìriá, ndíhi distritú Cìliciá. ²² Te nchaa ñáyiú xíndecu ichi Xítóhó Jesucristú ndécú distritú Jùdeá ñǎ túú xini ñáhǎ-yu xii-í ní cùu. ²³ Dico ní xóo níhi-yu tnúhu nchaa nàcuáa ní xóo cada-í, te ní cachí-yu: “Téé cùu úhú iní ñáhǎ xii nchaa nchoo ñáyiú ndècu ichi Xítóhó Jesucristú cǎháⁿ-dé tnúhu-gǎ núú ñáyiú cuendá quíndáá iní ñáhǎ-yu xii-gǎ, te díu-dé nándi sá quidè ñàha-dé, te cuini-dé danàa ñaha-dé cuendá sá vǎ cóo-gǎ ñáyiú quíndáá iní ñáhǎ xii-gǎ ní cùu”, duha ní cachí-yu cuendá-í. ²⁴ Te ní ngúita-yu ní cachí-yu sá ío cǎhnu cuu Yá Ndiǒxí cuendá sá ñǎ túú-gǎ quidè-í dàtná ní xóo cada-í.

2

Té Pǎblú ní níhi tnàhá-dě ndíhi dava-gǎ cue téé cǎháⁿ tnúhu Yá Ndiǒxí

¹ Te ní nútahá úxícúmí cuíá sǎ nǐ sǎháⁿ-í ñúú Jerusalén ní cǎháⁿ ndíhi-í té Pèlú, te dàtnùní ndécà-í té Bèé ní sǎháⁿ, te tnàhá

té Títú ní sǎháⁿ ndíhi-ndí-dé. ² Te ní sǎháⁿ-í chi mee Yǎ Ndiǒxí ní cachí-gǎ sá quíhiⁿ-í. Te yàcǎⁿ ní tacá mee-ni cuè téé cùnuu. Te ní xáhaⁿ-í xii-güedé nàcuáa ndùu tnúhu dānehé-í ñáyiú ñǎ túú cùu ñáyiú isràél cuendá naníhi tǎhú-yu. Te ducaⁿ nǐ quide-í cuendá cuini-í quini-güedé nàcuáa ndùu chiuⁿ quide-í, chi nàcuáhǎⁿ cachí-güedé sá ñǎ túú nándíhi-xi. ³ Te té Títú téé ndècu ndíhi-í chi ñǎ díú téé isràél cúú-dé, dico ñǎ túú ní quide yica-güedé cuáha-güedé sèñǎ ñí-dé. ⁴ Te ñáyiú cǎchí sá ndécú ichi Xítóhó Jesucristú te ñǎ ndáá sá ndécú-yu ichi-gǎ, ñáyiú-áⁿ nǐ chitnahá ñáhǎ-yu xii-ndí cuendá cuini-yu quini-yu nása quide-ndí ndécú-ndí ichi Xítóhó Jesucristú. Te ducaⁿ nǐ quidè-yu cuendá sá nchúhú sa ní cǎcu nihnu-ndí ñǎ túú-gǎ quidè-ndí nchaa nàcuáa ní cǎháⁿ ndí Moisés. Te cuini-yu sá núcuíta saa tucu-ndí cada-ndí nchaa nàcuáa ní cǎháⁿ ndí nucúndecu-ndí dàtná ní xíndecu-ndí cútnàhá vátá cǎcu nihnu-gǎ-ndí núú tnúhu-áⁿ ni cùu. ⁵ Te nchúhú ñǎ túú tnàhi ni dàña-ndí méé-ndí dandáhú ñáhǎ-yu xii-ndí. Te ducaⁿ nǐ quide-ndí, chi cuini-ndí sá ñǎ túú nǎgǎ tnúhu dácánuu ndíhi tnúhu sá cǎháⁿ nàcuáa naníhi tǎhú-ó ndècu ndíhi-ndo.

⁶ Te ni ìⁿ tnúhu sá vátá quini-gǎ-í ñǎ túú ní cǎchí tnúhu cue téé cùnuu núú ñáyiú cada-í. Dico yúhú chi ñǎ túú ní quide cuendá-í núu cùnuu-güedé àdi ñǎ túú cùnuu-güedé, chi núú Yǎ Ndiǒxí ìⁿ-ni cùu-o nchaa-o. ⁷ Te ní cutnùní iní-güedé sá Yǎ Ndiǒxí ní cachí-gǎ xii-í sá cǎháⁿ-í tnúhu-gǎ núú ñáyiú ñǎ túú cùu ñáyiú isràél dàtná ní quide-gǎ té Pèlú ní xáhaⁿ-gǎ cǎháⁿ-dé tnúhu-gǎ núú ñáyiú isràél. ⁸ Te ducaⁿ nǐ cutnùní iní-güedé, chi díu-ni Yá Ndiǒxí Yaá chíndèe ñaha xii té Pèlú cǎháⁿ-dé tnúhu-gǎ núú ñáyiú isràél, díu-ni Yaá-áⁿ chíndèe ñaha-gǎ xii-í cǎháⁿ-í tnúhu-gǎ núú ñáyiú ñǎ túú cùu ñáyiú isràél.

⁹ Te té Jàcobó, ndíhi té Pèlú, ndíhi té Juáá, cue téé ío cùnuu-gǎ ní cutnùní iní-güedé sá Yǎ Ndiǒxí ío chíndee ñaha-gǎ xii-í quidè-í chiuⁿ-gǎ. Te ío váha ní cǎháⁿ ndíhi ñaha-güedé xii-í, ndíhi té Bèé, te ní cuu ìⁿ-nuu-ndí sá nchúhú quíhiⁿ-ndí cǎháⁿ-ndí tnúhu Yá Ndiǒxí núú nchaa ñáyiú ñǎ túú

cùu ñáyiu isràél, te mee-güedë cáháⁿ-güedë tñúhu-gá núú ñáyiu isràél. ¹⁰ Te ñⁿ-ni tñúhu ní cáháⁿ-güedë dóho-ndí te ní cachí-güedë xii-ndí sá chindèe-ndí cue ñáyiu ndàhú, te sa ducaⁿ tnàhí sàni iní-ndí cada-ndí.

Té Pàblú càháⁿ-dé dóho té Pèlú ñuú Antiòquia

¹¹ Te cùtnàhá ní sáháⁿ té Pèlú ñuú Antiòquia yacáⁿ ní cáháⁿ-í dóho-dé, chi quide-dé ñⁿ sá ñà túú tàú-dé cada-dé ní cùu. ¹² Te quide váha-dé ní cùu chi xèxi-dé ndihí ñáyiu ñà túú cùu ñáyiu isràél, dico òré ní sáá ñⁿ úú ñáyiu cùndihí té Jàcobó, te òré-áⁿ ñà túú-gã ní cuíní-dé caxi-dé ndihí ñáyiu-áⁿ. Te ducaⁿ ñí quide-dé chi ní yùhú-dé cue ñáyiu nchícúⁿ nihnu quide nchaa nacuaá ní cáháⁿ ndíi Moisés sá vã càháⁿ váha-yu cuendá-dé. ¹³ Te tnàhá dava-gã ñáyiu isràél xñdecu ichi Yá Ndiòxí ñà túú quide váha-yu, chi quide-yu dàtná quidé tẽ Pèlú ní cùu, te ndéé tnàhá té Bèé ní ngüíta-dé ducaⁿ quide-dé ní cùu. ¹⁴ Te òré ní xiní-í sá ñà túú quide-güedë ndihí-yu nàcuáa càháⁿ tñúhu Yá Ndiòxí, te núú nchàa ñáyiu ndècu ichi Yá Ndiòxí ní xáhaⁿ-í xii té Pèlú: “Yòhó cúú-n tée isràél, te ñà túú quide-n nchaa nacuaá quide ñáyiu isràél, chi quide-ni-n datná quidé nchàa ñáyiu ñà túú cùu ñáyiu isràél. Te núu ducaⁿ quide-n, ¿te ná cuendá dánèhé-n ñáyiu ñà túú cùu ñáyiu isràél sá cáda-yu nchaa nàcuáa quide ñáyiu isràél?”, duha ní xáhaⁿ-í xii té Pèlú.

Ñⁿ-ni nàníhí tàhú-ó ndihí ñáyiu isràél núu na quindáá iní-ó Xítohó Jesucristú ndihí-yu

¹⁵ Te yùhú ndihí té Pèlú cúú-ndí ñani tnàhá ñáyiu isràél, te ñà túú ndècu-ndí ichi cuèhé ichi duha dàtná ndécú nchàa ñáyiu ñà túú cùu ñáyiu isràél. ¹⁶ Te xiní-ó sá vã cùndècu-gã cuéchi-o núú Yá Ndiòxí te núu na quindáá iní-ó Xítohó Jesucristú, te ñà díú sá cànchícúⁿ nihnu-o càda-o nchaa nacuaá ní cáháⁿ ndíi Moisés. Te tnàhá dava nchúhú ñáyiu isràél sàndáá iní-ndí Xítohó Jesucristú, te xiáⁿ cùtnùní iní-ndí sá ñà túú-gã cuéchi-ndí ndécú núú-gã, dico ñà díú sá ñí cànchícúⁿ nihnu-ndí ní quide-ndí nàcuáa ní cáháⁿ ndíi Moisés, chi cuendá sá sàndáá iní-ndí Xítohó Jesucristú. Te vã yòo

ñⁿ cachí-ó sá ñà túú ndècu cuéchi-xi núú Yá Ndiòxí cuendá sá nchícúⁿ nihnú-yu nchaa nàcuáa ní cáháⁿ ndíi Moisés.

¹⁷ Te núu cuíní-ó sá vã cùndècu cuéchi-o núú Yá Ndiòxí cuendá sá sàndáá iní-ó Xítohó Jesucristú, te xiáⁿ cùtnùní iní-ó sá ñà túú quide váha-o. ¿Te vã cúú tnàhí cani iní-ó sá Xítohó Jesucristú dánèhé ñáhá-gã xii-o sá vã cáda váha-o cùndècu-o! ¹⁸ Te yùhú càchí-í sá vã cànchícúⁿ nihnu-gã-ó nchàa nacuaá ní cáháⁿ ndíi Moisés, dico núu vitna càchí-í sá xiní ñúhu-xi cada-o nchaa nacuaá ní cáháⁿ ndíi ña, te ñà túú quide váha-í núú Yá Ndiòxí te núu ducaⁿ na càda-í. ¹⁹ Te yùhú duuⁿ duuⁿ ní cutnùní iní-í sá vã ndácú-í cada-í nchaa nàcuáa ní cáháⁿ ndíi Moisés núu xiáⁿ ní dáñà-í ñà túú-gã nchícúⁿ nihnu-í nchaa nàcuáa ní cáháⁿ ndíi cuendá sá cuíní-í cùndècu-í sá cúú-xi Yá Ndiòxí. ²⁰ Te Xítohó Jesucristú ní xihí-gã cuendá-í, dico dàtná tñúhu sá tnàhá-í ní xihí ndihí-gã, chi ñà cúú-gã cada-í nchaa nàcuáa sàni iní mèe-í, chi Xítohó Jesucristú-nã ndécú ndihí ñaha-gã xii-í táxi tñùní ñáhá-gã. Te vitna ndècu-í ñuyú-a, te ío sàndáá iní-í Xítohó Jesucristú Déhe Yá Ndiòxí, te chìndee ñaha-gã xii-í. Te ñu-ni Xítohó Jesucristú ío cùu iní ñáhá-gã xii-í núu ní xihí-gã núú cùrúxí sá cuendá-í. ²¹ Te vitna ñà túú dàquee tihú-í sá váha ní quide ñaha Yá Ndiòxí xii-í, chi núu ñí ndàcu-o vã cùndècu cuéchi-o núú Yá Ndiòxí cuendá sá nchícúⁿ nihnu-o quide-o nchaa nacuaá ní cáháⁿ ndíi Moisés ní cùu ña, te àuⁿ nã cuu ní xihí Xítohó Jesucristú ní cùu te núu ducaⁿ.

3

Vã dáñá ndèé-ó quindáá iní-ó tñúhu Xítohó Jesucristú

¹ Te nchòhó ñáyiu distritú Gàlaciá, ñáyiu sa xñdecu ichi Xítohó Jesucristú, ¿ná cuendá ío ñí iní-ndó ñà cuíní-ndó tñi-ndo nchaa tñúhu càháⁿ-gã?, ¿te yoo ní dádàhu ndodo iní ñáhá xii-ndo núu ducaⁿ quide-ndo? Te nàha-ndo sá ío váha ní dánèhé ñáhá-ndí xii-ndo nàcuáa ní cuu ní xihí Xítohó Jesucristú. ² Te vitna càháⁿ-ndó núu sá nchícúⁿ nihnu-ndo nchàa nacuaá ní cáháⁿ ndíi Moisés ní níhí-ndó Espiritú Yá Ndiòxí ndécú ndihí-ndo, àdi sá ñí sàndáá iní-ndó tñúhu Xítohó Jesucristú sá ñí dánèhé ñáhá-ndí xii-ndo ñí níhí-ndó

Espíritú-gá ndécú ndìhi-ndo. ³ Te nchòhó ío nì dīquí-ndó chi Espíritú Yá Ndiöxí tá quide váha ñaha-xi xii-ndo cuáháⁿ ní cùu. ¿Te náa vitna mee-nă-ndó cuiní-ndó càda-ndo nacuaá ta quide ñaha Espíritú-gá cuáháⁿ xii-ndo ni cùu-áⁿ? ⁴ Te sàni ìⁿ sàni úú iní-í cuendá-ndó sá àúⁿ nă cuu nândi yáha-ndo ndècu-ndo ichi Yá Ndiöxí. ⁵ Te xini-ndó sá Yá Ndiöxí ní taxi-gá Espíritú-gá ní ngúndecu ndìhi-ndo, te ní quide-gá sá vă yõo tnàhí ndàcu cada núú-ndó nì xini-ndó. Te ducaⁿ nì quide-gá, chi ní sándáá iní-ndó-gă, dico ñá dīú cuendá nchaa nàcuáa ní cachí ndí Moisés cada ñáyiú ducaⁿ nì quide-gá.

⁶ Te ndíi Àbrahám ducaⁿ ìo ní sándáá iní ndíi Yá Ndiöxí, núu xiáⁿ ní cachí-gá sá nì cudìu ndíi núú-gă sá dúcáⁿ nì quide ndíi. ⁷ Te càchí tnúhu ndáá-í xii-ndo sá ncháá ñáyiú sándáá iní ñáhá xii Yá Ndiöxí dàtná ní sándáá iní ñáhá ndíi Àbrahám xii-gá, ñáyiú-áⁿ ìⁿ-ni cùú-yu ndìhi ndíi núú-gă. ⁸ Te núú tütú Yá Ndiöxí ní ngódó tnùnì tnúhu váha, tnúhu sá nì xáhaⁿ Yá Ndiöxí xii ndíi Àbrahám, te duha ní xáhaⁿ-gă xii ndíi: “Nchaa ñáyiú nìhì ñuyíú cada váha-í-yu sá cuendá-n”, duha ní xáhaⁿ-gă xii ndíi. Te sá dúcáⁿ nì ngódó tnùnì núú tütú Yá Ndiöxí ndéé dàvá-áⁿ, te xiáⁿ cúnùnì sá sàá nduu, te cue ñáyiú ñá túú cùu ñáyiú isràél vá cúndècu-gá cuéchi-yu núú-gă te núu na quindáá iní ñáhă-yu xii-gá. ⁹ Te xiáⁿ núu nchaa ñáyiú sándáá iní ñáhá xii Yá Ndiöxí cada váha ñaha-gă xii-yu dàtná ní quide váha-gá ndíi Àbrahám, chi ndíi-áⁿ ducaⁿ nì sándáá iní ñáhá ndíi xii-gá.

¹⁰ Te nchaa ñáyiú cuiní cada nchaa nàcuáa ní cáháⁿ ndíi Moisés cuendá sá cuiní-yu sá vă cúndècu-gá cuéchi-yu núú Yá Ndiöxí, ñáyiú-áⁿ dañà nìhnu ñaha-gá xii-yu, chi vá ndácú-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tütú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndíi Moisés te dañà nìhnu ñaha-gá xii-yu. ¹¹ Te núu na cànchicúⁿ nìhnu-ni-o càda-o nacuaá ní cáháⁿ ndíi Moisés, te ñá túú vèdana chindee ñaha-xi xii-o nacuaá vá cúndècu-gá cuéchi-o núú Yá Ndiöxí. Te ndáá chi núú tütú-gá càchí-xi sá ncháá ñáyiú sándáá iní ñáhá xii-gá, ñáyiú ñá túú-gă cuéchi-xi ndècu ío váha ndècú-yu núú-gă.

¹² Te núu dícó ío ñáyiú quide nchaandi túhú nàcuáa ní cáháⁿ ndíi Moisés ñá, te ñá túú xini ñuhu-xi quindáá iní-yu tnúhu Xítohó Jesucristú, chi núú tütú Yá Ndiöxí càchí-xi sá núu dícó ío ñáyiú ndacu cada nchaa nàcuáa ní cáháⁿ ndíi Moisés ñá, te cundecu váha-yu núú Yá Ndiöxí.

¹³ Te tnúhu ní chídó tnùnì ndíi Moisés càchí-xi sá ìo ndècu cuéchi-o núú Yá Ndiöxí cuendá sá ñá ndácú-ó càda-o nchaa nacuaá ní cáháⁿ ndíi, te cuendá xiáⁿ tá dañà nìhnu ñaha-gá xii-o cuáháⁿ. Dico Xítohó Jesucristú ní xido-gá nchaa cuéchi-o cuendá sá vă dañá nìhnu ñaha-gá Yá Ndiöxí xii-o. Te càchí-xi núú tütú Yá Ndiöxí: “Ìⁿ tée na càta caa-güedé ìⁿ yutnu, te tée-áⁿ cùú-dé tée dañà nìhnu ñaha Yá Ndiöxí”, duha càchí-xi núú tütú-gá. ¹⁴ Te ducaⁿ nì yáha Xítohó Jesucristú, chi cuiní Yá Ndiöxí sá ndùu táhú nchaa ñáyiú ñá túú cùu ñáyiú isràél cundecu váha-yu dàtná ní nduu táhú ndíi Àbrahám ndécú váha ndíi. Te ducaⁿ nì yáha-gá cuendá nchaa nchoo ñáyiú sándáá iní ñáhá xii-gá ngúndecu ndìhi-o Espíritú Yá Ndiöxí sá nì cachí méé-gă taxi-gá.

Nàcuáa ní cachí Yá Ndiöxí cada-gá

¹⁵ Te nchòhó cue ñáyiú ndècu ndìhi-í ichi Yá Ndiöxí na càchí tnúhu-í xii-ndo nàcuáa quide cue ñáyiú ñuyíú-a cuendá tecú tnùnì-gá-ndó nàcuáa quide Yá Ndiöxí. Chi ñáyiú-áⁿ òré cuiní-yu cadá-yu ìⁿ sá cadă-yu, te dìhna-gá ndátnùhu-yu te òré cùú ìⁿnuú-yu, te sáha firmá-yu ìⁿ tutú te tutú-áⁿ vă yõo ìⁿ ndacu cáháⁿ sá vă nándìhi-gá-xi, te nì vă yõo-gá ndacu nágá tnúhu chido tnùnì núú-xí. ¹⁶ Te ducaⁿ nì quide Yá Ndiöxí ndìhi ndíi Àbrahám, chi ní xáhaⁿ-gă xii ndíi nàcuáa cada-gá, te tnúhu-áⁿ cùú-xí cuendá méé ndíi ndìhi cuendá ìⁿ ñanì tnáhá ndíi cundecu ñuyíú-a ndéé cuéé-gá. Te núú tütú-gá càchí-xi sá tnúhu-áⁿ cùú-xí cuendá ìⁿ-ni ñanì tnáhá ndíi te ñá dīú cuendá nchaá-yu. Te ñanì tnáhá ndíi tée cùu cuendá tnúhu-áⁿ cùú Xítohó Jesucristú. ¹⁷ Te na càchí tnúhu-í xii-ndo sá Yá Ndiöxí ní quide ndáá duuⁿ-gá ndìhi ndíi Àbrahám nàcuáa cada-gá. Te sa ní cuu cùmí cièndú ócò úxí cuiá sá dúcáⁿ nì xáhaⁿ Yá Ndiöxí xii ndíi Àbrahám, te dàtnùnì ní xáhaⁿ-gă xii ndíi Moisés chido tnùnì ndíi nàcuáa cada ñáyiú, te nchaa tnúhu ní chídó tnùnì ndíi Moisés ñá túú dàquee tíhú-xi

tnúhu sá nǐ xáhaⁿ Yá Ndiöxí xii ndíi Àbrahám nàcuáa cada-gá. ¹⁸ Te núu dìcò cuèndá nchaa tnúhu sá nǐ chídó tnùní ndíi Moisés ní nánihí tǎhú-ó ñá, te ñá túú-gǎ xíní ñùhu-xi cada cuendá-ó tnúhu ní xáhaⁿ Yá Ndiöxí xii ndíi Àbrahám cada-gá ní cùu te núu ducaⁿ. Te ndíi-áⁿ nǐ naníhí tǎhú ndíi chi ducaⁿ nǐ cachí Yá Ndiöxí cada ñaha-gǎ xii ndíi.

¹⁹ Te nchaa tnúhu ní cáháⁿ ndíi Moisés ní ngódó núú-xi nchicúⁿ nihnu ñáyiu cuèndá ducaⁿ cùtnuní iní-yu sá ndécú cuèchi-yu, te nchicúⁿ nihnu-ní-yu ndéé ní sáá nduu nǐ quexìo Yaá cúu ñàní tnáhá ndíi Àbrahám, chi Yaá-áⁿ ducaⁿ nǐ xáhaⁿ Yá Ndiöxí quixi-gá cada váha-gá nchaa ñáyiu. Te nchaa tnúhu ní chídó tnùní ndíi Moisés, chi Yá Ndiöxí ní tendaha-gǎ cue espíritú xínú cuèchi núú-gǎ ní sáháⁿ-xi ní xítnúhu ñaha-xi xii ndíi nàcuáa danéhé ndíi ñáyiu. ²⁰ Te Yá Ndiöxí ñá túú ní cáháⁿ-gá núú méé ñáyiu, chi ndíi Moisés ní cáháⁿ ndíi yuhu-gá núú-yu, dico cùtnáhá ní cáháⁿ ndíi-gá ndíi Àbrahám chi núú méé núú ñá ndíi ndíi-gá ní xáhaⁿ-gǎ xii ndíi nàcuáa cada-gá.

Nàcuáa ndíi nchaa tnúhu ní chídó tnùní ndíi Moisés

²¹ Te nchaa nàcuáa ní chídó tnùní ndíi Moisés, ndíi nchaa nàcuáa ní xáhaⁿ Yá Ndiöxí xii ndíi Àbrahám cada-gá, ñá túú dàquee tíhú tnáhá-xí. Te núu dìcò nánihí tǎhú ñáyiu nchicúⁿ nihnu nchaa nàcuáa ní cáháⁿ ndíi Moisés ñá te cudíu-yu núú-gǎ cuèndá-ni sá nchicúⁿ nihnú-yu nchaa nàcuáa ní cáháⁿ ndíi ni cùu. ²² Te núú tütú Yá Ndiöxí cǎchí-xi: “Nchaa nchòhó ñáyiu ndècu ñuyíu ndécú cuèchi-ndo”, duha cǎchí-xi. Te ducaⁿ cǎháⁿ-xi cuèndá quíndáá iní-ó Xítohó Jesucristú, te naníhí tǎhú-ó chi ducaⁿ nǐ cachí Yá Ndiöxí cada-gá.

²³ Te cùtnáhá vátá cùndècu ndíi-gá-ó tnúhu Xítohó Jesucristú, te nchicúⁿ nihnu-o nchaa nàcuáa ní cáháⁿ ndíi Moisés, te ní cutnùní iní-ó sǎ ño ndècu cuèchi-o ni cùu. Te ducaⁿ-ni nchicúⁿ nihnu-o ndéé ní sáá nduu nǐ quexìo Xítohó Jesucristú ñuyíu-a, te ní sándáá iní-ó-gǎ. ²⁴ Te nchaa tnúhu sá nǐ chídó tnùní ndíi Moisés ní sanu ichi ñaha-xi xii-o nàcuáa cada-o cùndècu-o, te ducaⁿ-ni sǎnu ichi ñaha-xi xii-o ndéé ní sáá nduu ní quexìo Xítohó Jesucristú ñuyíu-a. Te ducaⁿ nǐ cuu cuèndá quíndáá iní-ó-gǎ,

te vá cùndècu-gá cuèchi-o núú Yá Ndiöxí. ²⁵ Te vitna ní ngúndècu ndíi-o tnúhu Xítohó Jesucristú, te ñá túú-gǎ xíní ñùhu-xi canu ichi ñaha nchaa tnúhu ní chídó tnùní ndíi Moisés.

²⁶ Te vitna tnáhá nchaa nchòhó cúu-ndó dèhe Yá Ndiöxí, chi ní sándáá ini-ndó Xítohó Jesucristú. ²⁷ Te nchòhó ní sandute-ndo dàtná cǎchí-gá, te ndècu-ndo ndíi-gá, te quide-ndo nchaa nàcuáa ní cáháⁿ-gá ndécú-ndó, te ño ndècu yíñuhu-ndo núú Yá Ndiöxí dàtná ndécú yíñuhu mee Xítohó Jesucristú. ²⁸ Te vitna ñá-ni cùu-o nchaa-o ndècu-o ndíi Xítohó Jesucristú cuèi cùu-o ñáyiu israhél àdi ñá túú cùu-o, te cuèi cùu-o ñáyiu ñá túú tnáhí dàñá quee núú chíuⁿ pàtróoⁿ-xi àdi cuu-o ñáyiu dàñá queé núú chíuⁿ pàtróoⁿ-xi, te cuèi téé te cuèi ñadíhí ñá-ni cùu-o nchaa-o ndècu-o ndíi Xítohó Jesucristú. ²⁹ Te nchòhó ndécú ndíi-ndo Xítohó Jesucristú, te cùu-ndo datná cue ñaní tnáhá ndíi Àbrahám, chi ní nduu tǎhú-ndó cùndècu váha-ndo núú Yá Ndiöxí dàtná ní nduu tǎhú ndíi-áⁿ ndécú váha ndíi núú-gǎ, te ducaⁿ chi mee-gǎ ducaⁿ nǐ cachí-gá cunduu.

4

¹ Te nchòhó xíní-ndó sǎ ñá té líhli chi vátá ñágá cuáñaha tǎtá-dè cuu cuèndá-dé chi líhli-dé, te ñá-ni cùu-dé ndíi téé xínu cuechi, dico na sáá nduu cuèhnu-dé, te nduu tǎhú-dé nchaa sá ndécú ndíi tǎtá-dé.

² Te xitò-yu té líhli-áⁿ sáhnú-dé ndéé sáá nduu nǐ cachí tǎtá-dé sá cuáñaha-dé sá ndúú tǎhú-dé. ³ Te ducaⁿ sǎtnahá-xi cùu nchoo, chi nchicúⁿ nihnu-o nchaa nàcuáa ní cáháⁿ cue téé ní xíndècu ndéé sanaha ni cùu. ⁴ Te ní sáá nduu nǐ quide Yá Ndiöxí dàtná ní cachí-gá, te ní tendaha-gǎ Déhe-gá Xítohó Jesucristú ní quixi-gá ñuyíu-a, ní dácácú ñaha ñá ñadíhí te ní cuu-gá ñáyiu, te ní quide-gá nchaa nàcuáa ní cáháⁿ ndíi Moisés. ⁵ Te ducaⁿ nǐ tendaha Yá Ndiöxí Déhe-gá cuèndá sá vá cǎnchicúⁿ nihnu-gá-ó nchaa nàcuáa ní chídó tnùní ndíi Moisés cuèndá ducaⁿ te cuu-o dèhe Yá Ndiöxí.

⁶ Te Yá Ndiöxí ní taxi-gá Espíritú Déhe-gá Xítohó Jesucristú ndécú ndíi-ndo chi cùu-ndo dèhe-gá, te Espíritú-áⁿ chíndèe ñaha-xi xii-ndo te cǎchí-ndó: “Yòhó Dútú Ndiöxí cúu-n Tǎtá méé-ndí”, duha

càchí-ndó. ⁷ Te xiǎⁿ cútnùnì iní-ndó sǎ cúú-ndó dèhe Yá Ndiǒxí vitna, te ñá túú-gǎ cúú-ndó dàtná cue ñáyiú ñá túú tnàhí dàñá quee núú chíúⁿ pàtróóⁿ-xi. Te sá dúcáⁿ cùu-ndo déhe-gá, te Xítóhó Jesucristú taxi-gá nchaa sá vǎha ní cachí Yá Ndiǒxí nduu táhú-ndó.

Té Pǎblú ío sàni iní-dé cuèndá nchaa ñáyiú ndècu ichi Xítóhó Jesucristú

⁸ Te cútnàhá vátá quìndáá-gá iní-ndó tnúhu Yá Ndiǒxí ní xinu cuechi-ndo núú nchaa sá càchí-yu cùu ndiǒxí te ñá ndàá sá ndiǒxí cúú-xí. ⁹ Te vitna nchòhó càháⁿ ndìhi-ndo Yá Ndiǒxí, te mee-gǎ xini ñáhá-gǎ xii-ndo, te ñá túú ndùu vǎha-xi nanchòcáva iní-ndó càda tucu-ndo nacuaá ní xóo cada-ndo díhna, chi nchaa xiǎⁿ ñá túú vèdana nàndìhi-xi. ¹⁰ Te nchòhó cànehe íi-ni-ndo ndùu cachí-ndó íi, te òu-ni ducaⁿ quide-ndo dava yoó ndìhi dava cuíá, te ndì tnahá nduu sàcòo vico òu-ni ducaⁿ quide-ndo cànehe íi-ndó ndùu-áⁿ. ¹¹ Te ío sàni iní-í cuèndá-ndó, chi na cuáháⁿ àúⁿ nǎ cuu ní dánèhé ñáhá-í xii-ndo tnúhu Yá Ndiǒxí.

¹² Te càháⁿ ndàhú-í núú nchòhó ñáyiú ndècu ndìhi-í ichi Xítóhó Jesucristú sá cada-ndó dàtná quidè-í ñá túú nchìcúⁿ nihnu-í nchaa tnúhu ní càháⁿ ndíi Moisés, chi yúhú quidè-í vitna dàtná ní quide nchòhó ñá túú ní cǎnchicúⁿ nihnu-ndo nàcuáa ní càháⁿ ndíi. Te cútnàhá ní xindecu ndìhi ñaha-í xii-ndo nǎ quide vǎha ñaha-ndo xii-í. ¹³ Te sa nàha-ndo sá cùtnàhá ní càháⁿ-í tnúhu Xítóhó Jesucristú núú-ndó ndèe díhna ní cuhú-í, núú xiǎⁿ ní xindecu ndìhi ñaha-í xii-ndo nǎ càháⁿ-í tnúhu-gǎ núú-ndó. ¹⁴ Te cuéhé sǎ nǎ tnahá-í-áⁿ cúú-xí ìⁿ cuéhé sǎ vǎ yòo tnàhí cundee ìní-xi cundecu ndìhi ñaha xii-í ní cùu, dico nchòhó chi ío vǎha ní càháⁿ ndìhi ñaha-ndo xii-í, te ñá túú ní sàni cuehé ní sàni duha iní-ndó cuèndá-í, te ní càháⁿ ndìhi ñaha-ndo xii-í dàtná tnúhu sá yúhú cùú-í ìⁿ espíritú xínú cuèchi núú Yá Ndiǒxí àdi datná méé Xítóhó Jesucristú. ¹⁵ ¿Te ná ní tnahá-ndó núú ñá túú-gǎ sání vǎha iní-ndó cuèndá-í dàtná ní xóo cada-ndo ndèe díhna ío vǎha ní xóo caní iní-ndó cuèndá-í? Te na càchí tnúhu ndáá-í xii-ndo sǎ ío ní cuu iní ñáhá-ndó xii-í cútnàhá ní xindecu ndìhi ñaha-í xii-ndo, te nǎndì sá ndécú ndìhi-ndo taxi-ndo xii-í ní cùu, te núú dícó sá cúú te ndèe tìnùu-ndo

tava-ndo te taxi-ndo xii-í ní cùu. ¹⁶ ¿Te náa cùu úhú iní ñáhá-ndó xii-í vitna cuèndá sá càháⁿ-í tnúhu ndáá tnúhu Yá Ndiǒxí núú-ndó-ǎⁿ?

¹⁷ Te ío ñáyiú ío vǎha càháⁿ ndìhi ñaha xii-ndo, dico ñáyiú-áⁿ ñúhú cuéhé iní-yu, chi cuiní-yu sá vǎ cúú-gǎ càháⁿ ndìhi tnàha-o, chi mee-nǎ-yu cundecu ndìhi-ndo cuiní-yu. ¹⁸ Te vǎha quide ñáyiú càháⁿ ndìhi ñaha xii-ndo ndìhi tnúhu yíñùhu, te núú cuiní-yu cada-yu ìⁿ sá vǎha sá cúú-xí-ndó. Te ducaⁿ-ni na càdá-yu cuèi òré ñá túú ndècu ndìhi ñaha-í xii-ndo. ¹⁹ Te nchòhó ñáyiú ní sanu ichi-í ichi Xítóhó Jesucristú càchí tnúhu-í xii-ndo sǎ quidè-xí ìní-í dàtná quidè-xí ìní ìⁿ ñadìhí ñaha sa ní tnahá òré cacu déhe-xi, te ducaⁿ quide-xi iní-í, chi ío vǎi sani iní-í cuèndá-ndó dàtná ní xóo cada-í ndèe díhna, te ducaⁿ-ni càda-í ndèe ná sàa nduu càda-ndo nchaa nacuaá càháⁿ Xítóhó Jesucristú. ²⁰ ¿Te ío vǎha cada-xi te núú dícó tnavíi sa ndècu ndìhi ñaha-í xii-ndo cuèndá càháⁿ-í núú-ndó nàcuáa cada-ndo, te ñá cútnùnì iní-í nása cada-í cuèndá-ndó!

Cuèndá ndíi Àgár ndìhi ndíi Sǎrá

²¹ Te nchòhó ñáyiú cuiní canchicúⁿ nihnu nchaa tnúhu ní càháⁿ ndíi Moisés, ¿náa ñá túú tècú tnùnì-ndó nàcuáa càháⁿ-xi tnúhu ní chídó tnùnì ndíi? ²² Chi càchí tnúhu ní chídó tnùnì ndíi-áⁿ sǎ ndíi Abrahám ní xindecu úú déhe ducuⁿ ndíi, te ìⁿ-dé ní cuu déhe ndíi ndìhi ñadìhí méé ndíi ndíi Sǎrá, te ingá-dé ní cuu-dé déhe ndíi ndìhi ìⁿ ndíi ní xinu cuechi núú-yu ní xínani Àgár. ²³ Te sá dúcáⁿ nǎ cacu déhe ndíi Sǎrá, chi mee Yá Ndiǒxí ní cundàhú iní ñáhá-gǎ xii-aⁿ, chi ducaⁿ nǎ cachí-gǎ cada-gǎ. Dico ndíi ní xinu cuechi-ǎⁿ chi ducaⁿ tnàhí ní nduu táhú ndíi-áⁿ sǎ cóo déhe ndíi. ²⁴ Te na càchí tnúhu-í xii-ndo nǎ cúú sǎ nánèhé ndì ndùú cue ndíi dìhí-áⁿ. Te úú xito ní càháⁿ Yá Ndiǒxí nàcuáa cada-gǎ, te ìⁿ ndíi-áⁿ nánèhé ndíi nàcuáa ní càháⁿ Yá Ndiǒxí xito díhna nuu, te ingá tucu ndíi-áⁿ nánèhé ndíi nàcuáa ní càháⁿ tucu-gǎ xito cùu uú. Te ndíi Àgár-áⁿ nánèhé ndíi nàcuáa ní xáhaⁿ Yá Ndiǒxí xii ndíi Moisés yucu Sinài cada ñáyiú, te nchaa ñáyiú nchìcúⁿ nihnu nchaa tnúhu-áⁿ cúú-yu dàtná déhe ndíi Àgár téé ní xinu cuechi, chi téé-áⁿ ñá túú tnàhí ní dàñá-dé quee-dé núú chíúⁿ

pàtróón-dě, te ducaⁿ sãtnahá-xi cùú-yu chi nchicúⁿ nihnú-yu nchaa nãcuáa ní xáhaⁿ Yã Ndiõxí xii ndíi Moisés. ²⁵ Te tnúhu Àgár quée-xi: Yucu Sinàí, te yucu-áⁿ yíndèhu-xi nacióⁿ Àrabiá. Te ndíi Àgár-áⁿ nánèhé tucu ndíi cue ñáyiu ndècu ñuú Jerusàlén, chi ñáyiu-áⁿ ndécú-ní-yu dàtná ní xíndecu ndíi Àgár ndíhi déhe ndíi, chi cue ndíi-áⁿ ní cuu cue ndíi ñáyiu ñá túú tnàhí ni dàñá quee núú chíúⁿ pàtróón-xi, te ducaⁿ sãtnahá-xi cùú ñáyiu-áⁿ chi nchicúⁿ nihnu-ní-yu nchaa nãcuáa ní cáháⁿ ndíi Moisés. ²⁶ Dico nchoo ní nduu táhú-ó cùndecu-o ñuú Jerusàlén sáá núú ndécú Yã Ndiõxí, te vitna chi ñá túú-gã nchicúⁿ nihnu-o nchaa nãcuáa ní cáháⁿ ndíi Moisés. ²⁷ Te duha càháⁿ-í, chi núú tütú Yã Ndiõxí càchí-xi:

Yòhó ñaha ní nduu táhú vã cóó dèhe-xi ní cùu, vitna cana saa-n sã cùdí ñí-n cuèi vátá quíni-gá-n nãsa càcu ñⁿ landú.

Te cuèi ní cuu táhú-n sã vã cóó dèhe-n ni cùu dico ío-gá títí déhe-n còo dacúxí xíchí ní cuu táhú tnàhí sã cóó dèhe-xi. Duha càchí-xi núú tütú-gá. ²⁸ Te nchoo cuè ñáyiu ndècu ichi Xítóhó Jesucristú vitna cùu-o datná ndíi Isàác, chi ndíi-áⁿ ní cacu ndíi, chi mee Yã Ndiõxí ní cachí-gá sã cacú ndíi. Te ducaⁿ sãtnahá-xi cùu nchoo chi ní nduu-o dèhe-gá vitna chi ducaⁿ ní cachí tucu-gá cunduu. ²⁹ Te déhe ndíi Àgár ní nduu táhú tnàhí ndíi sã cacú ndíi ñuyú-a, te ndíi-áⁿ ní cuu úhú iní ndíi ndíi Isàác, te ndíi Isàác-áⁿ chi Espíritú Yã Ndiõxí ní quide ní cacu ndíi. Te ducaⁿ sãtnahá-xi cùu vitna, chi nchaa nchoo ñáyiu ndècu ndíhi Espíritú Yã Ndiõxí cúú ùhú iní ñáhá ñáyiu xii-o. ³⁰ Te núú tütú Yã Ndiõxí càchí-xi: “Chí nácuíⁿ xíchí xínú cuèchi ndíhi déhe-xi na ñuhú-yu, chi déhe xíchí xínú cuèchi-áⁿ ñá túú nã níhí-dě nduu táhú-dě, chi mee-ni dèhe ñaha ndècu vehe-xi nduu táhú-dě sã cuãñaha tátá-dě”, duha càchí-xi núú tütú-gá. ³¹ Te nchoo cuè ñáyiu ndècu ichi Xítóhó Jesucristú ñá túú-gã cúú-ó dàtná cúú dèhe ndíi ní xinu cuechi-ãⁿ, chi ní cuu-o vitna datná cúú ndíi ní nduu táhú nchaa sã ní sãñaha tátá-xi-áⁿ. Te ducaⁿ ní cuu, chi Yã Ndiõxí ní dácãcu ñaha-gã xii-o cuèndá sã vã cãchicúⁿ nihnu-gá-ó nchaa nãcuáa ní cáháⁿ ndíi Moisés.

5

Canchicúⁿ nihnu-ni-o ichi Xítóhó Jesucristú

¹ Te Xítóhó Jesucristú ní quide-gá nãcuáa vã cãní iní-ó sã nãníhí tàhú-ó te núu na cãchicúⁿ nihnu-o nãcuáa ní cáháⁿ ndíi Moisés, te ðiu-ni ducaⁿ cãni iní-ó cùndecu-o te vã ngõo cãni iní-ó sã nãníhí tàhú-ó te núu na cãchicúⁿ nihnu-o càda-o nãcuáa ní cáháⁿ ndíi, chi núu ducaⁿ na càda-o te ío dandòho-o mee-o datná ní xóo ndoho-o cùtnáhá vátá cùndecu-gá-ó ichi-a.

² Te yúhú té Pãblú cuíni-í sã cùndedòho-ndo ñⁿ tnúhu na càháⁿ-í-a. Te núu nchòhó cuáha-ndo sèñá ñⁿ-ndo cuèndá sã sãndáá iní-ndó nãcuáa ní cachí ndíi Moisés cada-ndo, te núu ducaⁿ na càda-ndo ña, te àúⁿ nã cuu ndècu-ndo ichi Xítóhó Jesucristú te núu ducaⁿ. ³ Te dàtná ní cachí-í xii-ndo, te ðiu-ni ducaⁿ càháⁿ tucu-í vitna sã ñuu ndèda-ni càa ñⁿ tée na cuáha-dé sèñá ñⁿ-dé, te xini ñuhu-xi sã dàcuítí tàú-dé cada-dé nchaa nãcuáa ní cáháⁿ ndíi Moisés. ⁴ Te nchaa nchòhó ñáyiu sãni iní sã ñá túú-gã cuèchi-xi ndècu núú Yã Ndiõxí cuèndá sã nchicúⁿ nihnu-ndo nchaa nãcuáa ní cáháⁿ ndíi Moisés, ñá túú-gã ndécú-ndó ndíhi Xítóhó Jesucristú, te ni Yã Ndiõxí ñá túú-gã cùndáhú iní ñáhá-gã xii-ndo càda váha ñaha-gã. ⁵ Dico nchaa nchoo ñáyiu sãndáá iní ñáhá xii-gã cùðiu-o núú-gã, chi chindee ñaha Espíritú-gá xii-o, te ndètu cahnu-ná-ó sáá nduu cùñaha núú Yã Ndiõxí xii-o sã cùðiu-o núú-gã. ⁶ Te nchoo cuè ñáyiu ndècu ndíhi Xítóhó Jesucristú ñⁿ-ni quide-xi cuèi na cuáha-o sèñá ñⁿ-o àdi vã cuáha-o, chi ñá túú chindee ñaha-xi xii-o nãcuáa cundecu váha-o ndíhi-gá. Te ñⁿ-dì díi-ni sã xíní ñuhu-xi quíndáá iní-ó Xítóhó Jesucristú, te núu ducaⁿ na càda-o te cuu iní-ó cuè tnaha ñáyiu-o.

⁷ Te nchòhó ío váha quide-ndo ndecu-ndo ichi Yã Ndiõxí ní cùu, te vitna cùñúhu-í sã ñá túú-gã sãndáá váha iní-ndó tnúhu-gá, te ducaⁿ quide-ndo chi ndècu ñáyiu sãnu ichi ñaha xii-ndo ñngá ichi. ⁸ Te ñá díú Yã Ndiõxí Yaá ní cáháⁿ ñáhá xii-ndo ducaⁿ ní cachí-gá cada-ndo sã vã quíndáá-gá iní-ndó tnúhu-gá. ⁹ Te nchòhó xíní-ndó sã ñuu luha levadùrá ná quíhu yuchi te dàndaa-xi. Ducaⁿ sãtnahá-xi cùu ñáyiu dàndahú ñáhá xii-ndo, chi cuíni-yu dàcuíta

nihnu ñàhá-yu xii-ndo nchàa-ndo. ¹⁰ Te yúhú cútñuní ndáá iní-í sá Xítohó Jesucristú chindee ñàha-gá xii-ndo cuendá sá ñá túú nágá tnúhu quindáá iní-ndó, dico nchaa ñáyiu ducaⁿ dándahú ñàhá xii-ndo nacháhu-yu núú Yá Ndiöxí nchaa sá quidé-yu cuéi ná-gá ñáyiu cùú-yu.

¹¹ Te càchí tnúhu-í xii nchòhó ñáyiu ndècu ndìhi-í ichi Yá Ndiöxí sá nùu dìcò dānehé-ni-í ñáyiu sá cuāha-yu sēñá ñii-yu dàtná ní cachí ndíi Moisés ñá, te vā yōo cuu úhú iní ñàhá xii-í ní cùu, te ni vā tūu úhú iní-yu cuendá sá ñí xihí Xítohó Jesucristú núú cùrúxí ní cùu. ¹² Te nchaa ñáyiu dàsatú iní ñàhá xii-ndo sá cuāha-ndo sēñá ñii-ndo, te vāha-gá sá ná cáda-yu mēe-yu ñⁿ tnúndòho, te ñá díú sá dúcáⁿ cànuichi ñàhá-yu xii-ndo cūndecu-ndo.

¹³ Te nchòhó ñáyiu ndècu ndìhi-í ichi Xítohó Jesucristú ñi-gá ní taunihnu ñàha-gá xii-ndo cuendá sá vā cáncñicúⁿ nihnu-gá-ndó nchàa nacuaá ní cáháⁿ ndíi Moisés, dico vā cání iní-ndó sá sá dúcáⁿ ñí taunihnu ñàha-gá xii-ndo, te cuu-ni cada-ndo nāndi sá cuèhé sá dúhá vèxi iní-ndó, dico cuu iní tnàhá-ndó ñⁿ ñⁿ-ndo te chindee tnàha-ndo. ¹⁴ Chi ducaⁿ càháⁿ Yá Ndiöxí sá cúú iní-ó cuè tnaha ñáyiu dàtná cúú iní-ó mēe-o. Te núu ducaⁿ na càda-o, te quide-o nchaa nacuaá tàú-xi cada-o dàtná càháⁿ nchaa tnúhu ní chídó tnùní ndíi Moisés. ¹⁵ Te núu nchòhó cúú úhú iní tnàhá-ndó ndècu-ndo, te ñá túú quide vāha-ndo te núu ducaⁿ quide-ndo, dico yúhú càchí-í sá vā dúcáⁿ-gá cada-ndo cūndecu-ndo cuendá sá vā dācuíta nihnu tnàha-ndo.

Nàcuáa sàni iní ñáyiu ndècu ichi cuehé ichi duha ndìhi nàcuáa sàni iní ñáyiu ndècu ndìhi Espiritú Yá Ndiöxí

¹⁶ Te na càchí tnúhu-í xii-ndo sá cáda-ndó nchàa nacuaá cuiní mēé Espiritú Yá Ndiöxí cada-ndo, te ducaⁿ te vā cání-gá iní-ndó càda-ndo nāndi nchaa sá cuèhé sá dúhá sàni iní mēé-ndó. ¹⁷ Chi nchaa xíáⁿ ñá túú tnàhá tnúhu-xi ndìhi Espiritú Yá Ndiöxí. Te ñi-ni ducaⁿ quide Espiritú Yá Ndiöxí, chi ñá túú tnàhá iní-xi nchaa sá cuèhé sá dúhá sàni iní-ndó. Te sá dúcáⁿ ñá túú tnàhá tnúhu tnàha-xi xíáⁿ ñá túú ñihí ndéé-ndó càda-ndo ñⁿ sá vāha sàni iní-ndó càda-ndo. ¹⁸ Te núu quide-ndo nchaa nacuaá sànu ichi ñàha

Espiritú Yá Ndiöxí, te ñá túú-gá táxi tnùní ñàhá nchàa tnúhu ní chídó tnùní ndíi Moisés xii-ndo.

¹⁹ Te nchaa ñáyiu xini-yu nchaa nàcuáa quide ñáyiu quide cuehé quidé dùha. Te dùha quidé-yu: Cue téé càháⁿ ndìhi-güedé ñáyiu dñí te ñá díú ñàdñí-güedé cúú-yu, te ñi-ni ducaⁿ xiquide cue ñáyiu dñí, te nāndi-gá nchaa sá cuèhé sá dúhá cuāháⁿ vèxi-yu quidé-yu. ²⁰ Te quide cahnú-yu nchaa sá càchí-yu cùu ndiöxí te ñá ndáá sá ndiöxí cúú-xí, te quide nduu tnahá-yu, te cùu úhú iní tnàhá-yu, te nāa-yu, te cùu cuiñú tnàhá-yu, te ío yáchí cúdēēⁿ-yu, te ndúcú-yu mee-ni sá cúú-xí mēe-yu, te ñá túú cùu ñⁿnuú-yu cundecú-yu, te quide dñⁿ tnahá-yu. ²¹ Te cùu cuedú iní-yu nchaa sá ndécú ndìhi dava-gá-yu, te sàhni tnahá-yu, te ío quihú-yu, te ndi cuu ndi cúú-yu quidé-yu nchaa sá cuèhé sá dúhá, te nāndi-gá nchaa sá cuèhé sá dúhá quidé-yu. Te sa càchí tnúhu-í xii-ndo sá nchāá ñáyiu ducaⁿ xiquide vā ndúú tñhū-yu cundecú-yu núú ndécú Yá Ndiöxí táxi tnùní-gá.

²² Dico Espiritú Yá Ndiöxí chindèe ñàha-xi xii-o cuu iní tnàhá-ó, te cùdñí iní-ó ndècu-o, te ío vāha cùu iní-ó, te càhnu iní-ó, te vāha iní-ó, te cūndahú iní tnàhá-ó, te quide ndáá-ó ndècu-o. ²³ Te ndàhú iní-ó, te quide-o nchaa nacuaá tàú-ó càda-o, te nchaa xíáⁿ chindèe ñàha Espiritú Yá Ndiöxí quidé-ó, te núu ducaⁿ quide-o, te vā yōo ñⁿ-gá cáháⁿ sá ñá túú quide vāha-o ndècu-o. ²⁴ Te nchoo cuè ñáyiu ndècu ndìhi Xítohó Jesucristú, sa nàha-o sá ñí xihí-gá núú cùrúxí sá cuendá-ó, núu xíáⁿ duuⁿ duuⁿ ní dáñá-ó nchàa ichi cuehé ichi duha, te ñá túú-gá táxi tnùní ñàhá ñí ñⁿ sá cuèhé sá dúhá sá ñí xóo cani iní-ó ní cùu. ²⁵ Te vitna ní ngūndecu ndìhi-o Espiritú Yá Ndiöxí chindèe ñàha-xi, te xini ñuhu-xi sá cáda-ó nàcuáa sànu ichi ñàha Espiritú-gá cada-o.

²⁶ Te vā cáda càhnu-o mee-o, te vā ndúcú-ó plètú, te ni vā cúú cuedú iní-ó sá ndécú ndìhi tnaha ñáyiu-o.

6

Chindee tnàha-o ñⁿ ñⁿ-o

¹ Te nchòhó ñáyiu ndècu ndìhi-í ichi Xítohó Jesucristú càchí tnúhu-í xii-ndo sá

nũu ññá yiu ndècu ndihì-ndo ichi-gá ní quidé-yu ññá sá ñà túú tàú-yu cadá-yu núú-gã, te nchòhó ññá yiu quide váha ndècu ndihì Espiritú Yá Ndiõxí cáhá-ndó dõho cue ññá yiu ducaⁿ xiquide-áⁿ cuendá nucúnu ichi-yu, te vii vii cáháⁿ ndihì-ndõ-yu, te ío coto-ndo mée-ndo cuendá sá vã cadá-ndó ññá sá ñà túú tàú-ndó càda-ndo núú-gã. ² Te ío chindee tnàha-ndo, te cuáha tnàha-ndo tnúhu ndee ìní cundecu-ndo cuendá nchaa sá yãha-ndo. Te núu ducaⁿ na càda-ndo, te quide-ndo nchaa nacúaa ní cáháⁿ Xítóhó Jesucristú cada-o.

³ Te núu ío ññá-ndo càchí-ndó sã ïo váha quide-ndo ndecu-ndo ichi Yá Ndiõxí te ñã ndãã ñã, te dicó dándahú-ndó mée-ndo sá dúcáⁿ quide-ndo. ⁴ Te ndi dññⁿ ndi dññⁿ càda cuendá-ndó nũu quide váha-ndo ndècu-ndo àdi ñã túú quide váha-ndo. Te núu quide váha-ndo ndècu-ndo ñã, te cudíí ìní-ndó sã cúú-xí mée-ndo, te vá cání ìní-ndó sã quidé váha-gá-ndó dàcúxí dàva-gá-yu. ⁵ Chi tàú-ó sã ndi dññⁿ ndi dññⁿ càda cuendá-ó nacúaa ndècu-o.

⁶ Te nchaa nchòhó ññá yiu dàcuaha tnúhu Yá Ndiõxí chindee-ndo cué tée dàcuaha ñaha xii-ndo tnúhu-gá cuãñaha-ndo nãndi sá xíní ññu-güedé.

⁷ Te vá dándahú-ndó mée-ndo cundecu-ndo, chi vá cúú cùdiquí ndeé-ó Yá Ndiõxí, chi nchòhó xíní-ndó sã nũu na càda váha-o cundecu-o, te cùu-xi ññá sá vãha sá cúú-xí-ó, dico núu vá cadá vãha-o ñã, te ío ndoho-o te núu ducaⁿ na càda-o. ⁸ Te núu quide-o nchaa sá cuéhé sá dúhá sãni ìní-ó, te ññu-ni xíãⁿ dàcuíta nihnu ñaha-xi xii-o, dico núu quide-o nchaa nacúaa sãnu ichi ñaha Espiritú Yá Ndiõxí xii-o, te cundecu ndihì-o Yá Ndiõxí ni caa ni quíhíⁿ. ⁹ Te xíní ññu-xi vá dáñã ndèé-ó càda váha-o cundecu-o, te ducaⁿ te sáá nduu càda váha ñaha Yá Ndiõxí xii-o, te núu vá ná tũhú ìní-ó càda váha-o cundecu-o. ¹⁰ Te cada-o sã vãha sá cúú-xí nchaa tnaha ññá yiu-o vitna ndecu-o ññuyíú-a, te ío-gá tàú-ó chindee-o cue ññá yiu ndècu ndihì-o ichi Xítóhó Jesucristú.

Tnúhu ndéé núú ññi ndihì-ná

¹¹ Te cundehe-ndo sã ndãã ndãã lètrá tée-í núú tütú-a sá cúú-xí-ndó. ¹² Te nchaa ññá yiu quide yicá sá cuãha-ndo seña ññi-ndo dàtná ní cachí ndi Moisés, ññá yiu-áⁿ cúú-yu ññá yiu cuení cudíu núu tnàha ññá yiu-xi. Te

ducaⁿ quidé-yu cuendá sá vã ndóhõ-yu cuendá nchaa tnúhu sá dánèhé ññá sã ññi xíhí Xítóhó Jesucristú núú cùrúxí. ¹³ Te ññi ññá yiu sa ní ngúndecu ndihì seña ññi-xi ñã túú quidé-yu nchaa nacúaa ní cáháⁿ ndi Moisés, dico mée-yu cuení-yu sá cuãha-ndo seña ññi-ndo. Te ducaⁿ quidé-yu chi quide cahnú-yu mée-yu núú nchaa dáva-gá ññá yiu. ¹⁴ Te yúhú chi ñã túú quide cahnú-í mée-í cuendá nchaa sá quidé-í, chi mee-ni sã ïo cùu váha ìní-í sá Xítóhó Jesucristú ní xíhí-gá núú cùrúxí cuendá-ó. Te ññu cuendá sá ññi xíhí-gá ñã túú-gã ndècù-í ichi cuéhé ichi duha, te ññi ñã túú-gã táxi tnúni ññá sã ññi sá cuéhé sá dúhá xii-í. ¹⁵ Te ñã túú ñã chindee ñaha-xi xii-o cuéi na cuãha-o seña ññi-o àdi vá cuãha-o, chi ndècu ndihì-o Xítóhó Jesucristú, te ní nduu-o dàtná ññá yiu saa, te xíãⁿ cúú-xí sã ïo-gá xíní ññu-xi. ¹⁶ Te xicáⁿ táhù-í núú Yá Ndiõxí sá nchãã nchòhó ññá yiu quide nchaa nacúaa càháⁿ-í-a cundecu nahì-ndo, nchòhó ññá yiu cùu cuendá Yá Ndiõxí dàtná ññá yiu israhél chi ññá yiu-áⁿ ññi cachí-gá sá cúú cuendá-gá. Te mee-gã ío cundahú ìní ññá sã xii-ndo chindee ñaha-gá.

¹⁷ Te není vitna cuení-í sá vã yõ ññá-gá chidacá nihnu ñaha xii-í cuendá chiuⁿ quide-í, chi yayacáⁿ sa ní nduu tìlòhó ññi-í cuendá sá ndóhõ-í cuendá Xítóhó Jesucristú.

¹⁸ Te nchòhó ññá yiu ndècu ndihì-í ichi Xítóhó Jesucristú xicáⁿ táhù-í núú-gã sã ïo na chindee ñaha-gá xii-ndo nchaa-ndo. Te ducaⁿ na cùnduu. Te ío chí cadá ndèe ìní-ñã vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ ÉFESÚ

Té Păblú cādūha-dé tutú quíhíⁿ ndaha ñáyiu xĩndecu ichi Xítóhó Jesucristú ndécú ñuú Éfesú

¹ Yúhú té Păblú ní tendaha ñàha Yá Ndiöxí càháⁿ-í tnúhu Xítóhó Jesucristú núú ñáyiu, chi ducaⁿ ñí cachí Yă Ndiöxí cunduu, te vitna cādúha-í tutú-a cuendá daquixi-í ndaha nchaa nchòhó ñáyiu cùu cuendá Yă Ndiöxí xĩndecu ñuú Éfesú, te ñu-ni nchòhó cúu-ndó ñáyiu sàndáá iní ñáhá xii Xítóhó Jesucristú.

² Te xicáⁿ táhù-í núú Dütú Ndiöxí Yaá cúu Tátá-ó, ndíhi núú Xítóhó Jesucristú sá ná chĩndee chitúu ñaha-gă xii-ndo, te ducaⁿ ndí nduú-gă ná cādá te ío váha cuu iní-ndó cundecu-ndo.

Espíritú Yă Ndiöxí chĩndèe ñaha-xi xii-o chi ndècu ndíhi-o Xítóhó Jesucristú

³ Te cachí-ó sã ío càhnu cuu Yá Ndiöxí Yaá cúu Tátá Xítóhó Jesucristú, te ndéé andiu quide Yá Ndiöxí nchaa sá vâha sá cúu-xí-ó cuendá sá ndécú ndíhi-o Espíritú-gă, te ducaⁿ quide-gă chi ndècu ndíhi-o Xítóhó Jesucristú. ⁴ Te ndéé cútnàhá vátá ngăva-gă ñuyú ñí cachí Yă Ndiöxí sá nchóó cùu-o ñáyiu cùu cuendá-gă, te ducaⁿ ñí cachí-gă sá cuendá Xítóhó Jesucristú cuendá sá nchóó cùu-o ñáyiu ñá túú tnàhí ná cumání cundecu núú-gă, te ducaⁿ te vá cundècu cuèchi-o. ⁵ Te Yá Ndiöxí ío cùu iní ñáhá-gă xii-o ñuú xĩⁿ ducaⁿ ñí cachí-gă ndéé cútnàhá vátá ngăva-gă ñuyú sã nchóó ndu-o déhe-gă. Te sá cuendá nchaa sá cādá Xítóhó Jesucristú sá cúu-xí-ó, xĩⁿ ducaⁿ ñí cachí Yă Ndiöxí, te ducaⁿ ñí cachí-gă chi ducaⁿ tnàhí ní sani iní-gă cunduu. ⁶ Te xĩⁿ ñuú xini ñuhu-xi sá nchóó càhí-ó sã ío càhnu cuu Yá Ndiöxí, chi ío cundahú iní ñáhá-gă chĩndèe ñaha-gă xii-o. Te ducaⁿ quide-gă chi ndècu ndíhi-o Xítóhó Jesucristú Yaá ío cùu iní-gă. ⁷ Te Yá Ndiöxí ío cùu iní ñáhá-gă xii-o ñuú xĩⁿ Xítóhó Jesucristú ní sati ñáñí-gă te ní xihí-gă cuendá

dacăcu nihnu ñaha-gă xii-o ñuú ùhú núú ndàhú, te ducaⁿ càda cahnu iní-gă nchaa yicá cuèchi-o. ⁸ Te Yá Ndiöxí ío cundahú iní ñáhá-gă chĩndèe ñaha-gă xii-o, nàcuáa ngũndecu ndíhi-o nchàa sá xini tnùn-í-ó te ducaⁿ te cuu-o ñáyiu tècú tnùn-í. ⁹ Te Yá Ndiöxí ní dánèhé ñáhá-gă xii-o nchàa sá ndúú yùhu, nchaa sá ñí sani iní-gă cada-gă. Te ducaⁿ ñí quide-gă chi ducaⁿ ñí sani iní-gă cunduu. ¹⁰ Te sá ñí sani iní-gă cada-gă te dacuítí sã cādá-gă ná sãá nduu, te na sãá nduu-áⁿ te mee-gă cada sá Xítóhó Jesucristú quindaha-gă nchaa sá ío andiu, ndíhi nchaa sá ío ñuyú-a.

¹¹ Te nchoo ñí nduu táhú-ó ñí nduu-o ñáyiu cùu cuendá Yă Ndiöxí chi ndècu ndíhi-o Xítóhó Jesucristú. Te ducaⁿ ñí cuu chi ducaⁿ tnàhí ní sani iní Yă Ndiöxí cunduu. Te nchaandi túhú sá quide-gă, quide-gă nàcuáa sãni iní mée-gă cunduu. ¹² Te ducaⁿ ñí cuu cuendá sá nchũhú ñáyiu díhna nuu ñí sãndáá iní tnúhu Xítóhó Jesucristú càháⁿ-ndí sá ío càhnu cuu mee Yá Ndiöxí cuendá nchaa sá vâha quide-gă. ¹³ Te nchòhó tucu cútnàhá ní xĩndedóho-ndo tnúhu ndáá tnúhu sá càháⁿ nàcuáa naníhí táhú-ó ní cuu ñíⁿnuu-ndo ndíhi Xítóhó Jesucristú chi ní sãndáá iní-ndó-gă. Te xĩⁿ cútnùn-í sá nchòhó ní nduu-ndo ñáyiu cùu cuendá Yă Ndiöxí, chi ní ngũndecu ndíhi-ndo Espíritú-gă sá ñí cachí-gă taxi-gă. ¹⁴ Te sá ndécú ndíhi-o Espíritú Yă Ndiöxí xĩⁿ cútnùn-í sá ndáá nduu táhú-ó cundecu-o ndíhi-gă ná sãá nduu nàcuaca ñaha-gă xii nchaa nchoo ñáyiu cùu cuendá-gă, te sá dúcáⁿ càda-gă ñuú xĩⁿ tàú-ó càhí-ó sã ío càhnu cuu-gă.

Té Păblú xicáⁿ táhú-dè núú Yă Ndiöxí cuendá cue ñáyiu ndècu ichi-gă

¹⁵ Te yúhú nihí-í tnúhu sá nchòhó ío váha sãndáá iní-ndó Xítóhó Jesucristú, te nchaa ñáyiu cùu cuendá Yă Ndiöxí ío cùu iní-ndó-yu. ¹⁶ Te xĩⁿ ñuú ñá túú dàña ndéé-í ndácáⁿ táhú-í núú-gă cuendá-ndó, te ío xicáⁿ táhú-í ¹⁷ núú Yă Ndiöxí Yaá cúu Tátá Xítóhó Jesucristú cuendá-ndó. Te ñu-ni Yá Ndiöxí cúu-gă Yaá ío càhnu cuu. Te xicáⁿ táhú-í núú Yă Ndiöxí sá mée-gă ná cādá sã Espíritú-gă chĩndee ñaha-xi xii-ndo cuendá cuu-ndo ñáyiu tècú tnùn-í, te na

càda-xi sá cùtnùnì iní-ndó nàcuáa sàni iní Yá Ndiöxí. ¹⁸ Te ducaⁿ xicáⁿ táhù-í núú Yá Ndiöxí cuendá-ndó, cuendá sá nchòhó tecú tnùnì-ndó nàcuáa nduu tnúhu ndee iní ní taxi-gá ní ngúndecu ndihì-ndo cùtnàhá ní cáháⁿ ñáhá-gă xii-ndo. Te ducaⁿ cùtnuní tucu iní-ndó sã ncháá sã ñí cachí-gá taxi-gá nduu táhú nchoo cuè ñáyiú cùu cuendá-gá cúú-xí mèe cuií-ni sá ìo-gá váha. ¹⁹ Te cùtnuní tucu iní-ndó sã Yá Ndiöxí ío càhnu cuu-gá quidé-gă nchaa núú sã vâha sá cúú-xí nchò ñáyiú sàndáá iní ñáhá xii-gá, chí quide-gá sá vã yôo tnàhí ndàcu cada sá cúú-xí-ó dàtná ní quide-gá ²⁰ ní dándótó-gă Xítóhó Jesucristú cùtnàhá ní xihí-gá. Te ní taxinucóo-gá Xítóhó Jesucristú xio cùha-gá táxi tnùnì-gá. ²¹ Te Xítóhó Jesucristú ío-gá cùnùu-gá dàcúúxí nchaa núú cuè espíritú, ndihì dàcúúxí nchaa cue tée yìndaha ñáyiú, ndihì dàcúúxí nchaa dava-gá cue tée cùnùu. Te cuèi vitna te cuèi ndéé núú cuàháⁿ núú vèxi ducaⁿ-ni ìo cunu-gă taxi tnùnì-gá. ²² Te mee Yá Ndiöxí ní quide-gá sá Xítóhó Jesucristú taxi tnùnì-gá nchaandi túhú sá ío, te ñi-ni mee Yá Ndiöxí ní cachí-gá sá ncháá ñáyiú cùu cuendá-gá quindaha ñàha Xítóhó Jesucristú. ²³ Te cada iní-ó sã ncháá ñáyiú cùu cuendá Yá Ndiöxí cúú-yu yiqui cùñú Xítóhó Jesucristú, chí ñⁿ-ni cúú-yu ndihì-gá, te mee-gă táxi tnùnì-gá nchaandi túhú sá ío.

2

Yá Ndiöxí ío cùndahú iní ñáhá-gă xii-o núú xíãⁿ ní dácăcu nihnu ñaha-gă

¹ Te nchòhó cúú-ndó dàtná ñáyiú ní xihí cuendá nchaa sá cuèhé sá dúhá quide-ndo ni cuu, dico vitna cada iní-ndó sã dàtná ní ndoto-ndo chí ní nduu táhú-ndó cùndecu-ndo ndihì Yá Ndiöxí ní caa ní quíhíⁿ. ² Te ducaⁿ ñí xíndecu-ndo ìchi cuehé ìchi duha, chí ní cáncicúⁿ nihnu-ndo nchaa sá cuèhé sá dúhá ío ñuyíú-a, te ní xóo cada-ndo nchaa nacuáa cáháⁿ sácúíhná, te ñi-ni sácúíhná-ãⁿ táxi tnùnì-xi nchaa dava-gá espíritú cùndihì-xi, te ñi-ni-xi ndècu ndihì-xi nchaa ñáyiú ñá túú cuíni tñi tnúhu cáháⁿ Yá Ndiöxí, te dàcaháⁿ ñáhá-xí xii-yu cuendá cundecu-ni-yu ìchi cuehé ìchi duha. ³ Te nchaa-o dùcaⁿ ní xóo cada-o dàtná quidé cuè ñáyiú-áⁿ, chí ní xóo cada-o nchaa sá cuèhé sá dúhá ñí xóo cani iní-ó,

te nándi-gá nchaa sá cuèhé sá dúhá ñí xóo cahu iní-ó ñí xóo cada-o, núu xíãⁿ tàú-ó sã dándòho ñaha Yá Ndiöxí xii-o ni cùu datná tàú-xi dándòho-gă nchaa ñáyiú ducaⁿ ndècu ìchi cuehé ìchi duha-áⁿ. ⁴ Te Yá Ndiöxí ío cùu iní ñáhá-gă xii-o núu xíãⁿ ní cundàhú iní ñáhá-gă xii-o ⁵ cuèi cùu-o datná ñáyiú ní xihí sá cuendá nchaa sá cuèhé sá dúhá quide-o ni cuu. Te ducaⁿ ñí quide-gá ní cundàhú iní ñáhá-gă xii-o cuendá cundecu-o ndihì Xítóhó Jesucristú vitna, te cuu ñⁿnuu-o ndihì-gá. Te sá cuendá-ni sá cùndahú iní ñáhá Yá Ndiöxí xii-o xíãⁿ ní quide-gá nàcuáa nchoo nànhí táhú-ó. ⁶ Te cada iní-ó sã dàtná ní quide Yá Ndiöxí cùtnàhá ní dándótó-gă Xítóhó Jesucristú cùtnàhá ní xihí-gá ducaⁿ ñí quide ñaha-gă xii-o chí ndècu-o ndihì-gá vitna. Te Xítóhó Jesucristú sa ndècu-gá andiú núú ndécú Yá Ndiöxí. Te cada iní-ó sã Yá Ndiöxí sa ní quide-gá sá nchóó ñí ngúndecu túu-o ndihì Xítóhó Jesucristú, chí ío váha ndècu-o vitna. ⁷ Te Yá Ndiöxí quidé vâha ñaha-gă xii-o vitna cuendá sá ná sàá nduu, te ñi-ni mee-gă cada te cùtnùnì iní nchaa ñáyiú sá ìo cùu iní ñáhá-gă xii-o, te ducaⁿ ìo chìndee chitúu ñaha-gă xii-o cuendá sá ndécú ndihì-o Xítóhó Jesucristú. ⁸ Te Yá Ndiöxí ío cùndahú iní ñáhá-gă xii-ndo núu xíãⁿ ní quide-gá sá nchòhó nànhí táhú-ndó. Te ducaⁿ ñí quide-gá chí ní sàndáá iní-ndó-gă. Te ñá díú sã cuendá ñⁿ chiuⁿ ni quide-ndo ducaⁿ ní nànhí táhú-ndó, chí mee Yá Ndiöxí ní cuíni-gá sá dícó-ni ducaⁿ nànhí táhú-ndó. ⁹ Te mee Yá Ndiöxí ní cachí-gá sá ñà díú cuendá ñⁿ chiuⁿ quide-o nànhí táhú-ó, te ducaⁿ ñí cachí-gá cuendá sá vã cádá càhnu-o mee-o. ¹⁰ Te Yá Ndiöxí ní quide ñaha-gă xii-o dàtná ñⁿ ñáyiú saa cuendá sá ñí tnahá tnúhu-o ndihì Xítóhó Jesucristú, te ducaⁿ ñí quide-gá cuendá sá cádá-ó mèe-ni sá vâha. Te Yá Ndiöxí ducaⁿ tnàhí ní sani iní-gá cunduu sá nchóó cùu-o ñáyiú cada mee-ni sã vâha.

Xítóhó Jesucristú quidé-gă ío váha cùu iní-ó ndècu-o

¹¹ Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiú isràél, te ní ñà túú quide-ndo datná quidé ñáyiú-áⁿ, chí ñáyiú-áⁿ sãha-yu sèñá

ñíi-yu, te dàquee tihũ-yu nchaa ñáyiú ñá túú ndècu seña ñii-xi. ¹² Te chí dándàcu iní nàcuáa ní xíndecu-ndo, chí dává-án ñà túú ní xíndecu-ndo ndihí Xítóhó Jesucristú, te ni ñà túú ní xõo cuu tnahá tnúhu-ndo ndihí ñáyiú israhél, te ni ñà túú ní xini tnúni-ndó nàcuáa ndùu tnúhu sá ñi cáháⁿ ndáá Yá Ndiõxí nàcuáa cada váha-gá ñáyiú, te ni ñà túú ní cuu-ndo ñáyiú quindaha-gã, te ni ñà túú ní xõo níhí-ndó tnúhu ndee iní sá cundècu-ndo ndihí-gá. ¹³ Te cuèi ní cuu-ndo ñáyiú ñá túú tnahá tnúhu ndihí Yá Ndiõxí ní cuu, dico vitna ní tnahá tnúhu-ndo ndihí-gá chí cuu ñnuu-ndo ndihí Xítóhó Jesucristú, cuendá sá ñi sati níñi-gã te ní xihí-gá te xiãⁿ ducaⁿ tnahá tnúhu-ndo ndihí Yá Ndiõxí vitna. ¹⁴ Te Xítóhó Jesucristú ní quide-gá sá nchóo ïo váha cuu iní-ó cundecu-o, te ñu-ni-gá ní quide cuendá sá vã dáquèe tihú ñáhá ñáyiú israhél xii ñáyiú ñá túú cuu ñáyiú israhél, te ducaⁿ ñn-ná cuú-yu cundecú-yu. ¹⁵ Te sá ñi xihí Xítóhó Jesucristú, xiãⁿ ñá túú-gã cúnúu nchaa tnúhu sá sánú ìchi ñaha xii ñáyiú nàcuáa cada-yu cundecú-yu ni cuu. Te ducaⁿ ñi xihí Xítóhó Jesucristú cuendá sá cuè ñáyiú israhél ndihí cue ñáyiú ñá túú cuu ñáyiú israhél ñn-nã cuú-yu cundecú-yu ichi-gá, te ducaⁿ te vá dáquèe tihú tnahá-gã-yu, te ïo váha cundecu ndihí tnahá-yu. ¹⁶ Te ducaⁿ ñi quide Xítóhó Jesucristú ní xihí-gá núú cùrúxí cuendá sá cuè ñáyiú cuu ñáyiú israhél ndihí cue ñáyiú ñá túú cuu ñáyiú israhél vá dáquèe tihú tnahá-gã-yu. Te ducaⁿ ñi xihí-gá cuendá ñn-nã cuú-yu tnahá tnúhu-yu ndihí Yá Ndiõxí nàcuáa cuu váha iní ñáhá-gã xií-yu.

¹⁷ Te cuèi cuu-ndo ñáyiú ñá túú tnahí xini ndáá cuendá Yá Ndiõxí ní cuu, dico Xítóhó Jesucristú ní quixi-gá ñuyú-a ní cáháⁿ-gá tnúhu váha nàcuáa ïo váha cuu iní-ndó cundecu-ndo ndihí Yá Ndiõxí. Te ñu-ni ducaⁿ ñi quide-gá sá cuú-xí nchaa ñáyiú sa xini cuendá Yá Ndiõxí, ñu-ni ñáyiú israhél. ¹⁸ Te cuèi cuu-o ñáyiú israhél àdi ñá túú cuu-o dico ñu-ni mee Xítóhó Jesucristú ní quide-gá sá ncháá-ó tnahá tnúhu-o ndihí Dútú Ndiõxí Yaá cuú Tátá-ó. Te ducaⁿ ñi tnahá tnúhu-o ndihí Yá Ndiõxí chí ní ngúndecu ndihí-o Espiritú-gá. ¹⁹ Te nchóhó ñáyiú ñá túú cuu ñáyiú israhél ní cuu-ndo

ñáyiú ñá túú tnahá tnúhu ndihí Yá Ndiõxí ní cuu, dico vitna chí ñn-nã ní cuu-ndo ndihí nchaa dáva-gá ñáyiú cuu cuendá-gá chí cuu-ndo déhe-gá. ²⁰ Te cada iní-ó sã cuè téé ní táuchíúⁿ Xítóhó Jesucristú cáháⁿ tnúhu-gá, ndihí cue téé ní xóo cáháⁿ tnúhu Yá Ndiõxí ndéé sanaha cuu-güedé dàtná cimientú ñn vehe, te nchóhó cuú-ndó dàtná ndóho sá sàá vehe-án, te cada tucu iní-ó sã Xítóhó Jesucristú cuú-gã ñn yúú cúnúu cuu cimientú vehe-án. ²¹ Te ducaⁿ ïo váha cuu ñn nuu nchaa ndóho-án ndihí yúú cúnúu-án, te ducaⁿ tucu ïo váha ta quèe tnahá nchaa ndóho-án cuãsaá. Te xiãⁿ cada iní-ó sã cuú-xí vehe Yá Ndiõxí, vehe sá ïo ní cuu íí. Te ducaⁿ sãtnahá-xi cuu nchaa ñáyiú ndècu ichi Xítóhó Jesucristú chí ní tnahá tnúhu-yu ndihí-gá, te ñn nduu ñn nduu ta cuu vii cuu váha-gá-yu núú Yá Ndiõxí cuáháⁿ. ²² Te tnahá nchóhó ducaⁿ sãtnahá-xi cuu-ndo chí ní ngúndecu ndihí-ndo Xítóhó Jesucristú, te ducaⁿ ta cuu vii cuu váha tucu-ndo núú Yá Ndiõxí cuáháⁿ, te cuu-ndo datná vehe Yá Ndiõxí chí ndècu ndihí-ndo Espiritú-gá.

3

Té Pãblú yíhí díquí-dě cáháⁿ-dé tnúhu Xítóhó Jesucristú núú ñáyiú ñá túú cuu ñáyiú israhél

¹ Te yúhú té Pãblú yíhí-í vecaá sá cuendá sá cáháⁿ-í tnúhu Xítóhó Jesucristú núú nchóhó ñáyiú ñá túú cuu ñáyiú israhél, núú xiãⁿ ñu cuendá-gá duha yíhí-í vecaá vitna. ² Te nchóhó sa naha-ndo sá Yá Ndiõxí ní cundáhú iní ñáhá-gã xii-í, te ní cachí-gá sá yúhú quíhí díquí-í cáháⁿ-í tnúhu Xítóhó Jesucristú núú-ndó, te cuendá sá cáháⁿ-í tnúhu-gá núú-ndó te cuu-xi sá vãha sá cuú-xí-ndó. ³ Te yúhú sa ní cachí tnúhu-í xii-ndo lùha nàcuáa ndùu tnúhu ndùu yuhu ni cuu, sá ñi cachí tnúhu Yá Ndiõxí xii-í. ⁴ Te òré dàcuaha-ndo tnúhu ndùu yuhu-án ní cuu te quiní-ndó sã yúhú tècú tnúni-í nàcuáa ndùu tnúhu-án, te tnúhu-án cáháⁿ-xi cuendá Xítóhó Jesucristú. ⁵ Te tnúhu-án cuú-xí tnúhu sá vã yõo tnahí xini ní cuu, dico cue téé ní táuchíúⁿ Xítóhó Jesucristú cáháⁿ tnúhu-gá, ndihí cue téé cáháⁿ nàcuáa dàcahu iní ñáhá Yá Ndiõxí ní níhí-güedé tnúhu ndùu yuhu-án, chí Espiritú Yá Ndiõxí ní xáhaⁿ-xi xii-güedé. ⁶ Te duha cáháⁿ tnúhu ndùu

yuhu-áⁿ ní cùu: “Cuèi ñáyiu ñá túú cùu ñáyiu isràèl te cuèi ñáyiu cùu ñáyiu isràèl dico ìⁿ-ni ndùu tãhũ-yu sã vãha núú Yã Ndiõxí, te núu na quindáá iní-yu tnúhu sã càháⁿ nãcuáa naníhí tãhũ-yu, te ìⁿ-nã cúu-yu cundecú-yu, te ducaⁿ ìⁿ-ni cada váha ñaha Yã Ndiõxí xii-yu te núu na cundecu ndihí-yu Xítohó Jesucristú”, duha ndùu tnúhu ndùu yuhu-áⁿ ní cùu.

⁷ Te Yá Ndiõxí ní cundàhú iní ñáhá-gã xii-í ní taxi-gã chiúⁿ quide-í càháⁿ-í tnúhu-gã, te mee-gã quidé-gã sã yúhú ndacu-í càháⁿ-í tnúhu-gã. ⁸ Te nchaa ñáyiu cùu cuendá Yã Ndiõxí cúu-yu ñáyiu ío-gã cúnùu cada-yu chiúⁿ-gã dàcúúxí yúhú, te cuèi ducaⁿ dico Yá Ndiõxí ní cundàhú iní ñáhá-gã xii-í ní taxi-gã chiúⁿ quide-í càháⁿ-í tnúhu-gã núu cuè ñáyiu ñá túú cùu ñáyiu isràèl. Te tnúhu-gã-áⁿ càháⁿ-xi sã sũúní ò váha cada ñaha Xítohó Jesucristú xii-o. ⁹ Te ducaⁿ ñí cachí Yã Ndiõxí sã càháⁿ-í tnúhu-gã cuendá danèhé-í nchaa ñáyiu. Te sã dánèhé-í-yu-áⁿ cúu-xí tnúhu ndùu yuhu sã ñí sani iní-gã ndéé sanaha nãcuáa cada váha-gã cue ñáyiu. Te ndéé dàvá-áⁿ ñí quesaha ndùu yuhu tnúhu-áⁿ ní cùu. Te ðiu-ni-gã cúu-gã Yáá ní cadúha nchaandí tũhú sã ío. ¹⁰ Te ducaⁿ ndùu yuhu tnúhu-áⁿ ní cùu cuendá sã ncháá espíritú cúnùu ndecu andíu quini-xi vitna nãcuáa quide nchaa ñáyiu ní tuha ñaha xii Yá Ndiõxí cuendá ducaⁿ cùnuni iní-xi sã ío váha cùnuni iní-gã nãcuáa cada-gã. ¹¹ Te Yá Ndiõxí ní sani iní-gã ndéé sanaha nãcuáa ní cuini-gã cada Xítohó Jesucristú, te ní sáá nduu ñí quide Xítohó Jesucristú nãcuáa ní cuini Yã Ndiõxí cada-gã. ¹² Te vitna cùu-ì-o càháⁿ ndihí-o Yã Ndiõxí cuendá sã ndécú ndihí-o Xítohó Jesucristú, te sãndáá iní-ó-gã. ¹³ Te núu xiãⁿ càháⁿ-í dóho-ndo sã cuèi duha ndòho-í vitna dico vá ná tũhú iní-ndó càchicúⁿ nihnu-ndo ìchi Xítohó Jesucristú. Te sã dúhá ndòho-í te cùu-xi sã váha sã cúu-xí-ndó, chi cuu-ndo ñáyiu cùu cahnu núú Yã Ndiõxí.

Xítohó Jesucristú ío cùu iní ñáhá-gã xii-o

¹⁴ Te sã cuendá nchaa sã ñí sani iní Dútú Ndiõxí quidé-gã xiãⁿ yúhú ngũíñí xiti-í núu-gã càháⁿ ndihí-í-gã, te ðiu-ni-gã cúu Yáá cúu Tãtá Xítohó Jesucristú. ¹⁵ Te mee Yã Ndiõxí ní cachí-gã sã ncháá espíritú

ndécú àndíu cunduu-xi datná ní cachí mee-gã cunduu-xi. Te ní cachí tucu-gã sã nchóo cùu-o ñáyiu, te cunduu-o datná cuini mee-gã cunduu-o. ¹⁶ Te xicáⁿ tãhũ-í núú Dútú Ndiõxí sã Espíritú-gã ná cáda nãcuáa cuita níhí ndéé-gã-ndó quíhíⁿ cundecu-ndo ìchi-gã, te ducaⁿ xicáⁿ tãhũ-í núu-gã cada Espíritú-gã chí ío càhnu cuu-gã. ¹⁷ Te xicáⁿ tãhũ tucu-í núú Yã Ndiõxí sã Xítohó Jesucristú ná cundecu ndihí ñaha-ni-gã xii-ndo chí sãndáá iní-ndó-gã, te ducaⁿ te vá dáñá ndéé-ndó ío cuu iní tnáhá-ndó. ¹⁸ Te xicáⁿ tãhũ tucu-í núú Yã Ndiõxí cuendá-ndó ndihí cuendá dava-gã ñáyiu cùu cuendá-gã, cuendá sã cùnuni iní-ndó sã sũúní cùu iní ñáhá Xítohó Jesucristú xii-o. ¹⁹ Te duha xicáⁿ tãhũ-í núú Yã Ndiõxí chí cuini-í sã ncháá-ndó tècú tnúni-ndó sã ío cùu iní ñáhá Xítohó Jesucristú xii-o cuèi vá ndácú càva-o quini-ó nãcuáa cùu iní ñáhá-gã xii-o. Te xicáⁿ tãhũ tucu-í núú Yã Ndiõxí sã ío na cundecu ndihí ñaha-gã xii-ndo, te ducaⁿ càchicúⁿ nihnu-ndo càda-ndo nchaa nãcuáa quide mee-gã.

²⁰ Te Yá Ndiõxí ío-gã vãi sã ndácú-gã táxi-gã dàcúúxí sã xicáⁿ-ó núu-gã, te cuèi ndéé nchaa sã ñá túú sãni iní-ó ñihí-ó te tàxi-gã, te ducaⁿ chí mee-gã ndécú ndihí ñaha-gã xii-o, te ndacu-gã quidé-gã nãndí sã váha sã cúu-xí-ó. ²¹ Te vitna nchaa nchoo ñáyiu ndècu ìchi Xítohó Jesucristú chí ná càchí-ó sã ío càhnu cuu Yá Ndiõxí, te ducaⁿ-ni càháⁿ-ó sã ío càhnu cuu-gã ñí caa ñí quíhíⁿ chí ndècu ndihí-o Xítohó Jesucristú. Te ducaⁿ na cùnduu.

4

Espíritú Yã Ndiõxí quidé-xí cùu ìⁿnuu-ó ndecu-ó

¹ Te yúhú té Pãblú yíhí-í vecáá sã cuendá Xítohó Jesucristú, te càháⁿ ndàhú-í núu-ndó sã cáda váha-ndo cundecu-ndo datná tãu-xi cada cue ñáyiu ní càháⁿ Yã Ndiõxí cundecu ndihí-gã. Te nchòhó tnáhá-ndó cùu-ndo ñáyiu ní càháⁿ ñáhá Yã Ndiõxí cundecu ndihí-gã. ² Te vá cáda càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó nãcuáa ducaⁿ cùndee iní-ndó núu ná cúu sã cúmãní núu tnáhá-ndó. ³ Te ío nducu ndèe-ndo cuu ìⁿnuu-ndo cundecu-ndo, chí Espíritú Yã Ndiõxí chindee ñaha-xi xii-ndo, te ducaⁿ

io váha cuu iní-ndó cùndecu-ndo chi cùu ìⁿnuu-ndo. ⁴ Te nchoo ñáyiú ndècu ichi Xítóhó Jesucristú ìⁿ-ni cùu-o, te ducaⁿ ìⁿ-ni Espiritú Yá Ndiöxí ndécú, te ðiu-ni ducaⁿ ìⁿ-ni tnúhu ndee iní ní ngúndecu ndi^hi-o cùtnàhá ní cáháⁿ ñáhá Yá Ndiöxí xii-o. ⁵ Te ìⁿ-ni Xítóhó Jesucristú ndécú tàxi tnuní ñáhá-gã xii-o, te ìⁿ-ni cùu-o sandáá iní-ó tnúhu-gá, te ìⁿ-ni ñ sandute-o. ⁶ Te ìⁿ-ni Dútú Ndiöxí cúu Yáá cúu Tátá-ó nchàa-o, te ðiu-gá cùnùu-gá yíndàha ñaha-gá xii-o nchàa-o. Te Yá Ndiöxí dácàháⁿ-gá iní-ó quide-o chiuⁿ-gá, te ducaⁿ ndècu ndi^hi ñaha-gá xii-o nchàa-o.

⁷ Te nchoo ndí ðíⁿ ndí ðíⁿ chindee ñaha Yá Ndiöxí xii-o quide-o nacuaa ndùu chiuⁿ ní cachí Xítóhó Jesucristú cada-o. ⁸ Te quèe ndáá-xi nacuaa càháⁿ-xi núú tütú Yá Ndiöxí núú càchí-xi:

Xítóhó Jesucristú cuándaa-gá andiu te ío cùnuu-gá,
chi nchaa cue espíritu cúu ùhú iní ñáhá xii-gá ñá túú ní ndàcu-xi naá ndi^hi ñaha-xi xii-gá,
te mee-gã ní cachí-gá nacuaa ndùu chiuⁿ nduu táhú ìⁿ ñáyiú cada-yu.
Duha càchí-xi núú tütú-gá.

⁹ Te sá dúcáⁿ càháⁿ-xi sá cuándaa-gá andiu xiáⁿ cùtnuní iní-ó sã ñí cuuⁿ-gá ñuyíú-a. ¹⁰ Te Xítóhó Jesucristú ní cuuⁿ-gá ñuyíú-a, te ðiu-ni-gá cuándaa-gá andiu cuendá ío cunuu-gã taxi tnuní-gá nchaandi túhú sá ío. ¹¹ Te ní dácãhñu-gá cue tée xinu cuechi núú-gã ìⁿ ñí núú chiuⁿ cada-güedé. Te ní cachí-gá sá dáva-güedé càháⁿ-güedé tnúhu-gá, te dáva-güedé ní cachí-gá sá càháⁿ-güedé nacuaa dàcahu iní ñáhá Yá Ndiöxí xii-güedé. Te dáva-güedé ní cachí-gá sá cúu-güedé cue tée datècú tnúhu cue ñáyiú nacuaa cada-yu naníhí tàhú-yu. Te dáva-güedé ní cachí-gá sá cúu-güedé cue tée quíndaha ñaha xii ñáyiú dacuàha ñaha-güedé xií-yu tnúhu-gá. ¹² Te ducaⁿ ñí cachí-gá cada cue tée-áⁿ cuendá canu ichi-güedé cue ñáyiú cùu cuendá Yá Ndiöxí cuendá ducaⁿ ñáyiú-áⁿ ñíhí-yu nacuaa cada-yu chiuⁿ-gá, te ducaⁿ cuíta níhí ndéé-gã-yu cundecú-yu ichi Xítóhó Jesucristú. ¹³ Te ducaⁿ ñí cachí Xítóhó Jesucristú cunduu ndéé sáá nduu cùu

ìⁿnuu-o quíndaa iní-ó tnúhu-gá, te ducaⁿ cùu ìⁿnuu-o tecú tnuní-ó nacuaa ndùu cuendá-gá chi ðiu-gá cúu-gã Déhe Yá Ndiöxí, te cuu-o ñáyiú ío quide ndáá dàtná quidé mèe Xítóhó Jesucristú. Te ducaⁿ te ñá túú tnàhí-gá ná cùmání-ó núú Yá Ndiöxí. ¹⁴ Te ducaⁿ te vá cúu-gã-ó dàtná cue landú vátá cùtnuní váha-gá iní-xi, te ni vã cádá-gã-ó dàtná quidé ndùte lamár, chi ndute-áⁿ òré quéné tãchí te cuáháⁿ-xi duha cuáháⁿ-xi dàcáⁿ, te ducaⁿ chi vá quíndaa-gá iní-ó tnúhu càháⁿ nchaa ñáyiú dandahú ñáhá xii-o, chi ñáyiú-áⁿ ío váha xitó-yu nacuaa dandahú ñáhá-yu xii-o chi càchí-yu sá càháⁿ-yu tnúhu Yá Ndiöxí dico ñá ndáá. ¹⁵ Te nchoo ío cuu iní tnáhá-ó, te vá dándahú tnáhá-ó, chi càháⁿ-ó mèe-ni sá ndáá. Te xini ñuhu-xi sá ìⁿ nduu ìⁿ nduu cuíta cada ndáá-gá-ó quíhíⁿ dàtná quidé ndáá méé-gã, te ðiu-ni-gá cúu-gã Yáá cùnùu cuu díhna tàxi tnuní ñáhá-gã xii-o. ¹⁶ Te ðiu-ni Xítóhó Jesucristú quidé ñaha-gá xii nchaa nchoo ñáyiú ndècu ichi-gá dàtná yiqui cùñú méé-gã, chi ìⁿ yiqui cùñú ío váha ní quèe tnàha ìⁿ ñí xichi, te ducaⁿ yíhí túchi yiqui cùñú-áⁿ yótní-xi nchaa nacuaa ní quèe tnàha. Te ducaⁿ sãtnahá-xi cùu nchoo chi ìⁿ-ni cùu-o ndecu-o ichi Xítóhó Jesucristú táxi tnuní ñáhá-gã xii-o. Te núu nchoo quide-o nchaa nacuaa tau-xi cunduu te cùu iní tnáhá-ó, te ducaⁿ ta ñíhí ndéé-gã-ó cuáháⁿ ndécú-ó ichi-gá.

Vá cádá-gã-ó dàtná ní xóo cada-o cùtnàhá ní xíndecu-o ichi cuehé ichi duha

¹⁷ Te vitna yúhú càháⁿ-í dóho-ndo quide-í núú Xítóhó Jesucristú sá vã cùndecu-gá-ndó dàtná xíndecu ñáyiú ñá túú sàndáá iní ñáhá xii Yá Ndiöxí, chi nchaa ñáyiú-áⁿ ñá túú vèdana nandíhí nchaa sá sání iní-yu. ¹⁸ Te ni ñá túú vèdana cùtnuní iní-yu nacuaa ndùu tnúhu ndáá tnúhu Yá Ndiöxí. Te ñáyiú-áⁿ ñá túú ndùu táhú-yu cundecú-yu nacuaa cùní Yá Ndiöxí, chi ñá túú vèdana tècú tnuní-yu te ducaⁿ chi ío sáá iní-yu. ¹⁹ Te ñá túú tnàhí-gá ná sání iní-yu ndécú-yu ichi cuehé ichi duha, te ío cùdíⁿ iní-yu ndécú-yu ichi díⁿ iní, te ñá díú-ni xiáⁿ chi nándí-gá nchaa sá cuehé sá dúhá quidé-yu ndécú-yu. ²⁰ Dico tnúhu Xítóhó Jesucristú sá ñí sàndáá iní-ndó chi ñá túú dùcaⁿ sanu ichi ñaha-xi

xii-ndo cada-ndo. ²¹ Te nchòhó ní cutnùní iní-ndó nàcuáa ndùu cuendá Xítohó Jesucristú, te dàcuaha-ndo tnúhu ndáá ñi-ndó tnúhu-gá nàcuáa ndècu-ndo ichi-gá. ²² Te vitna vá cání-gã iní-ndó càda-ndo datná ní xóo cada-ndo cùtnàhá ní xíndecu-ndo ichi cuehé ichi duha, chí núu nchaa-ni sá cuèhé sá dúhá-ãⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuíta nihnu ñaha-xi xii-ndo quíhíⁿ, chí núu nchaa-ni sá cuèhé sá dúhá-ãⁿ ná cùhuⁿ-ni iní-ndó te dàticá nuu ñaha-xi xii-ndo. ²³ Te nchòhó, xini ñuhu-xi sá vã dúcáⁿ-gã cani iní-ndó càda-ndo te tàú-ndó ndùu-ndo datná ñiⁿ ñáyiu ní cacu túu saa. ²⁴ Te nduu iní-ndó dàtná cuení méé Yã Ndiõxí cunduu, chí nduu-xi nàcuáa càa iní méé-gã, te ducaⁿ te cuu-ndo ñáyiu ío váha cada ndáá, te cuu ndisa-ndo ñáyiu ñá túú tnàhí ná cumání cundecu núú-gã.

²⁵ Te cuendá xíãⁿ núu càháⁿ-í dóho-ndo sã nchòhó vá dácuandehnde-gá-ndó dàtná ní xóo cada-ndo, te mee-nã sá ndáá cáháⁿ ndihí tnàha-ndo, chí ñiⁿ-ni cùu-o ndecu-o ichi Xítohó Jesucristú.

²⁶ Te núu cùdéeⁿ-ndó te cada cuendá-ndó sã vã cádá-ndó ñiⁿ cuéchi sá dúcáⁿ cùdéeⁿ-ndó, te vá dúcáⁿ-ní cùhuⁿ iní-ndó tnúhu sàtú iní-áⁿ. ²⁷ Te vá dáñá-ndó mèe-ndo dandahú ñáhá sàcúíhná xii-ndo.

²⁸ Te núu dava-ndo cùu-ndo ñadúhú te vá dúcáⁿ-gã cada-ndo, chí nducu-nã-ndó ñiⁿ chiuⁿ váha cada-ndo nàcuáa ducaⁿ ñihí-ndó sã chíndèe-ndo cue ñáyiu ndàhú ñáyiu ñá túú nã ndécú ndihí.

²⁹ Te vá càháⁿ-gá-ndó ní ñiⁿ tnúhu cuèhé, chí mee-nã tnúhu vii tnúhu váha cáháⁿ-ndó nàcuáa ducaⁿ ngũnu ichi cue ñáyiu ndèdóho ñaha xii-ndo, te núu ducaⁿ na càda-ndo te cuu-xi sá vãha sá cúú-xí ñáyiu ducaⁿ ndèdóho ñaha xii-ndo-áⁿ. ³⁰ Te vá cádá-gã-ndó ní ñiⁿ sá ñá túú tàú-ndó càda-ndo cuendá sá vã dándihú-ndó iní Espiritú Yã Ndiõxí, chí ñiⁿ Espiritú-gá ndécú ndihí-ndo, te xíãⁿ cutnùní iní-ndó sã sáá nduu nàcuaca ñaha-gá xii-ndo cùndecu-ndo ndihí-gá ní caa ní quíhíⁿ.

³¹ Te vá dásátú-gá-ndó iní tnàha ñáyiu-ndo, te ní vã cúhúⁿ iní-ndó tnúhu sàtú iní, te ní vã cúdéeⁿ-gã-ndó, te cuèi núu chítú núú tàcá vá càháⁿ cana-ndo cùcuèhé-ndó tnàha ñáyiu-ndo, te ní vã cuátnùhu-ndo tnaha ñáyiu-ndo, te ní vã cání cuèhé cani

duha iní-ndó cuendá tnàha ñáyiu-ndo. ³² Te cundàhú iní tnàhá-ndó, te cada tnàha-ndo sá vãha, te cada càhnu iní tnàhá-ndó núu ná cúú sã cúmání núú tnàhá-ndó dàtná ní quide Yã Ndiõxí ní quide càhnu iní-gá nchaa yíca cuèchi-ndo sã cuendá Xítohó Jesucristú.

5

Nàcuáa tàú-xi cundecu nchaa ñáyiu cùu déhe Yã Ndiõxí

¹ Te nchòhó cúú-ndó ñáyiu ío cùu iní ñáhá Yã Ndiõxí, te ñiⁿ déhe-gá cúú-ndó núu xíãⁿ xini ñuhu-xi canchicúⁿ nihnu-ndo càda-ndo datná quidé mèe-gá. ² Te ío cuu iní tnàhá-ndó cùndecu-ndo datná cúú iní ñáhá Xítohó Jesucristú xii-ndo, chí ñiⁿ-gá ní cachí-gá sá cúú-gá cuendá nchaa cuéchi-o te ní xihí-gá, te sá dúcáⁿ ní xihí-gá te ní cuu-gá dàtná ñiⁿ táhú sã cúú-xí Yã Ndiõxí, te ío váha ní cuu iní Yã Ndiõxí sá dúcáⁿ ní quide-gá.

³ Te sá cuendá sá nchòhó cúú-ndó ñáyiu cùu cuendá Yã Ndiõxí núu xíãⁿ nchaa nchòhó cue téé vá càháⁿ ndihí-ndo ñáyiu ñiⁿ te núu ñá díú ñàdihí-ndó cùu-yu, te ducaⁿ-ni nchaa nchòhó cue ñáyiu ñiⁿ tucu vá càháⁿ ndihí-ndo cuè téé te núu ñá díú yí-ndo cuu-güedé, te ní vã cání tnàhí iní-ndó cùndecu-ndo ichi díí iní, te ní vã xihó-ndó ní ñiⁿ sá ndécú ndihí tnaha ñáyiu-ndo, te ní ñiⁿ nchaa xíãⁿ vá cání iní-ndó càda-ndo, te ní vã cácu nèhe-ndo.

⁴ Te ní vã càháⁿ-ndó ñiⁿ tnúhu sá ní vã cúú cùndedóho ñáyiu, te ní vã càháⁿ-ndó ñiⁿ tnúhu cùtexínu, te ní dàva-gá nchaa tnúhu sá ñá túú vèdana nàndihí vá càháⁿ-ndó, chí nchaa tnúhu-áⁿ ñá túú tàú-xi cáháⁿ-ndó, te xini ñuhu-xi sá vãha-gá sá ndàcáⁿ táhú-ndó núú Yã Ndiõxí cuendá nchaa sá vãha quide-gá. ⁵ Te nchòhó sa xini ndáá-ndó sã ncháá cuè téé càháⁿ ndihí ñáyiu ñiⁿ te ñá díú ñàdihí-güedé cúú-yu, ndihí cue ñáyiu ñiⁿ càháⁿ ndihí cue téé te ñá díú yí-yu cùu-güedé, nchaa ñáyiu-áⁿ vã ndúú táhú-yu cundecú-yu núú ndécú Yã Ndiõxí ndihí Xítohó Jesucristú táxi tnùní-gá. Te ní cuè ñáyiu xíndecu ichi díí iní, te ní cuè ñáyiu xihó nchaa sá ndécú ndihí tnaha ñáyiu-xi vá ndúú táhú-yu cundecú-yu ndihí-gá núú ndécú-gã táxi tnùní-gá. Te tnúhu sá càchí-ó

xìho-o nchaa sá ndécú ndìhi tnaha ñáyiú-o, ìⁿ-ni cùu-xi ndìhi tnúhu sá càchí ñáyiú quide cahnú-yu nchaa sá càchí-yu cùu ndiòxí te ñá ndáá sá ndiòxí cúú-xí. ⁶ Te vâ quindáá iní-ndó nì ìⁿ tnúhu sá ñâ túú nàndìhi càháⁿ ñáyiú, chi ñáyiú-áⁿ ío dandòho ñaha Yá Ndiòxí xií-yu cuendá nchaa sá cuèhé sá dúhá quide-yu chi ñá túú sàndáá iní ñáhã-yu xii-gá. ⁷ Núu xiãⁿ càháⁿ-í dóho-ndo sã vã ñihí tnáhã-ndó ndìhi cue ñáyiú-áⁿ.

⁸ Te nchòhó ní cuu-ndo dàtná cue ñáyiú ní xíndecu núú néé chi ní xíndecu-ndo ìchi cuehé ichi duha, dico vitna ní ngúndecu-ndo ìchi Xítohó Jesucristú, te ñá túú-gã ndécú-ndó núú néé dàtná ní xíndecu-ndo ni cùu. Te vitna cada-ndo nchaa nacuaá tàú-xi cunduu chi ndècu-ndo ìchi-gá. ⁹ Te sá cuendá sá ndécú-ndó ìchi-gá núu xiãⁿ cúú-ndó ñáyiú váha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sá ndáá. ¹⁰ Te ío váha cada cuendá-ndó nchaa sá cúú váha iní Xítohó Jesucristú, te xiãⁿ cada-ndo. ¹¹ Te vâ cánciáⁿ nihnu-ndo tnáhã-ndó càda-ndo datná quidé cue ñáyiú ndècu ichi cuehé ichi duha, chi nchòhó tàú-ndó càháⁿ-ndó dóho nchaa ñáyiú ducaⁿ ndècu ichi cuehé ichi duha-áⁿ cuendá nchaa sá quidé-yu. ¹² Te cucahaⁿ núú-ndó vã càháⁿ-ndó cuendá ni ìⁿ sá cuèhé sá dúhá quide dayuhu nchaa ñáyiú-áⁿ. ¹³ Dico òré dándixi túu tnúhu Yá Ndiòxí iní-yu nàcuáa quidé-yu te cùtnuní iní-yu sá ñã túú quide váha-yu, te ducaⁿ ndìxi cuéchi iní-yu cuendá nchaa sá cuèhé sá dúhá quidé-yu. ¹⁴ Te núú tütú Yá Ndiòxí càchí-xi:

Nchòhó cúú-ndó dàtná ñáyiú xidí, te vitna ndiquíú iní-ndó,
te cùu tucu-ndo datná ñáyiú ní xihí, te vitna ndoto-ndo,
te Xítohó Jesucristú chindee ñaha-gá xii-ndo nàcuáa vâ cùndècu-gá-ndó ìchi cuehé ichi duha.
Duha càháⁿ-xi núú tütú-gá.

¹⁵ Te ío váha cada cuendá-ndó nàcuáa cada-ndo cùndecu-ndo, te vâ cada-ndó dàtná xíquide cue ñáyiú ñá túú tècú tnùnì, chi cada-ndo dàtná xíquide ñáyiú ío váha sàá díquí-xi. ¹⁶ Te ìⁿ nduu ìⁿ nduu cani iní-ndó càda-ndo nchaa nacuaá tàú-xi cunduu, chi vitna ío cùnuu nchaa sá cuèhé sá dúhá. ¹⁷ Te cuu-ndo ñáyiú tècú tnùnì cuendá ducaⁿ

cùtnuní iní-ndó nàcuáa cuiní Yá Ndiòxí cada-ndo, te vâ cada-ndó dàtná xíquide cue ñáyiú ñá túú tnáhí cùtnuní iní-xi nàcuáa cuiní Yá Ndiòxí cada-yu. ¹⁸ Te vâ cúú-ndó ñáyiú quihu chi núu ducaⁿ na càda-ndo te dàcuíta nihnu-ndo mèe-ndo, te dañã-ndo mèe-ndo sá Espiritú Yá Ndiòxí ná tàxi tnunì ñáhã-xi xii-ndo. ¹⁹ Te càháⁿ-ndó nàcuáa-ni cuáhãⁿ ndudú sá ñí xóo cata nchaa cue ñáyiú ndéé sanaha ñí xóo chiñuhú-yu Yá Ndiòxí. Te càháⁿ-ndó nàcuáa cuáhãⁿ ndudú sá chíñuhu-ndo Yá Ndiòxí, te cata-ndo. Te cuéi nchaa dava-gá ndudú ñiu-ni ducaⁿ càháⁿ-ndó te cata-ndo. Te ñi yùhu ñi iní-ndó càta-ndo nchaa ndudú-áⁿ chiñuhu-ndo Yá Ndiòxí. ²⁰ Te vâ dáñã ndéé-ndó ndácãⁿ táhú-ndó núú Tãtã-ó Dütú Ndiòxí cuéi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndìhi-ndo Xítohó Jesucristú.

Tàú-xi sá quindáá iní tnáhã cue ñáyiú ndècu ichi Xítohó Jesucristú

²¹ Te nchòhó ñáyiú ndècu ichi Xítohó Jesucristú tàú-xi sá quindáá iní tnáhã-ndó, te ducaⁿ càda-ndo chi nèhe-ndo sá yíñuhu núú Yá Ndiòxí.

²² Te nchaa nchòhó ñáyiú ñihí ndécú yí-xi, xini ñuhu-xi sá quindáá iní-ndó yí-ndo datná sàndáá iní-ndó Xítohó Jesucristú. ²³ Chi yí-ndo tàxi tnunì ñáhã-güedé xii-ndo dàtná quidé Xítohó Jesucristú táxi tnùnì ñáhã-gã xii nchoo cue ñáyiú ndècu ichi-gá. Te ñiu-gá cúú-gã Yaá ní dácãcu nihnu ñaha xii-o núú ùhú núú ndáhú, te cùu-o datná yíqui cùñú-gá. ²⁴ Te dàtná quidé nchòo ñáyiú ndècu ichi Xítohó Jesucristú sàndáá iní-ó tnè-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiú ñihí quindáá iní-ndó tnè-ndo nchaa tnúhu càháⁿ yí-ndo.

²⁵ Te tnáhã nchaa nchòhó cue téé tucu tàú-xi sá ío cuu iní-ndó ñãdihí-ndó dàtná quidé Xítohó Jesucristú cúú iní ñáhã-gã xii nchaa nchoo ñáyiú ndècu ichi-gá, chi mee-gã ní xihí-gá sá cuendá-ó sã cúú iní ñáhã-gã xii-o. ²⁶ Te ducaⁿ ñí quide-gá cuendá sá ncháá ñáyiú vitna ngúndecu ichi-gá cuu yíñuhú-yu núú Yá Ndiòxí, te ducaⁿ ndàda ndoo ndada nine-gá iní-yu sá cuendá sá quindáá iní-yu tnúhu Yá Ndiòxí, te cuanduté-yu. ²⁷ Te ducaⁿ ñí quide-gá

cuendá sá ncháá ñáiyu na ngündecu ichi-gá ío váha cundecú-yu núú-gã, te ducaⁿ vã cündècu-gá ni ñⁿ cuèchi-yu núú-gã, te ni ñⁿ-gá sá ñà túú-gã ná cumání-yu núú-gã chí ío cundecu yíñùhú-yu. ²⁸ Te sá dúcáⁿ quide Xítohó Jesucristú sá cúú-xí cuè ñáiyu ndècu ichi-gá, xíãⁿ tàú-xi sá nchòhó cue téé xíndecu ñadìhí-xi cuu iní-ndó ñadìhí-ndó, te coto-ndõ-yu dàtná xító-ndó yìquì cuñú méé-ndó, te cada iní-ndó sã ncháá cuè téé ío cùu iní ñadìhí-xi cùu iní-güedé méé-güedé chí ñⁿ-nã cúú-yu. ²⁹ Te nchoo sà naha-o sá ni ñⁿ ñáiyu ñá túú dàquee tíhú-yu yìquì cuñú-yu, chí da uuⁿ-gá chindèé-yu te xító-yu. Te ñⁿ-ni ducaⁿ quide Xítohó Jesucristú ndihí nchaa ñáiyu ndècu ichi-gá, ³⁰ chí cùu-o datná yìquì cuñú méé-gã, te ducaⁿ chí ñⁿ-ni cùu-o ndihí-gá. ³¹ Te tnúhu Yá Ndiõxí càchí-xi: “Sá cuendá xíãⁿ nũ nchaa cue téé na ñihí ñadìhí-xi te ñⁿ-ná cada-güedé tátá-güedé ndihí náná-güedé, te ñadìhí-nã-güedé cuu cuu ndihí-güedé, te ducaⁿ ñⁿ-ná cuu-güedé ndihí-yu”, duha càchí-xi. ³² Te tnúhu-a cùu-xi ñⁿ tnúhu càhnu vihi, te ducaⁿ sã tnàhá-xi cùu Xítohó Jesucristú ndihí cue ñáiyu ndècu ichi-gá. ³³ Te càháⁿ-ni tucu-í dóho nchaa nchòhó cue téé xíndecu ñadìhí-xi sá ío cuu iní-ndó ñadìhí-ndó te coto-ndõ-yu dàtná xító-ndó mèe-ndo, te ducaⁿ-ni nchaa nchohó ñáiyu ñihí tucu canehe-ndo sã yíñùhu núú yí-ndo.

6

¹ Te nchaa nchòhó cue landú, quindáá iní-ndó tátá-ndó ndihí náná-ndó chí ducaⁿ cuení Yá Ndiõxí cunduu, te ñⁿ-ni ducaⁿ tnàhí tàú-xi cada-ndo. ² Te Yá Ndiõxí ní cachí-gá sá cánèhe-ndo sã yíñùhu núú tátá-ndó ndihí núú náná-ndó. Te tnúhu-án cúú-xí tnúhu cùnuu ní càháⁿ-gá cada cue ñáiyu cuendá cada váha ñaha-gã xii-yu. ³ Te ní cachí-gá sá nũ ducaⁿ na càda-ndo te ío váha cundecu-ndo, te ducaⁿ ío naha cùdí-ndo cundecu-ndo ñuyíú-a.

⁴ Te nchaa nchòhó cue téé cùu tátá, vá dásatú-ndó ñihí cue déhe-ndo chí canu ichi-ndo-güexi nacuaá tàú-xi cunduu, te dacuaáha-ndo-güexi nchaa tnúhu váha nacuaá cuení Yá Ndiõxí cunduu.

⁵ Te nchaa nchòhó cue ñáiyu xínu cuechi, quindáá iní-ndó cuè ñáiyu dii chiúⁿ-xi quide-ndo, te canehe-ndo sã yíñùhu núú-yu, te ío váha cuu iní-ndó càda-ndo chiúⁿ-yu, te ducaⁿ ñⁿ yuhu ni iní-ndó càda-ndo. Te cada iní-ndó sã dàtná tnúhu sá chíúⁿ Xítohó Jesucristú quidé-ndó. ⁶ Te dava ñáiyu xínu cuechi, mee-ni òré ndéhe ñáiyu dii chiúⁿ-xi quidé-yu ío ndècu ndeé-yu quide chiúⁿ váha-yu cuendá cuení-yu cudíú-yu. Dico nchòhó vá dúcáⁿ càda-ndo, chí cuèi ndècu ñáiyu dii chiúⁿ-xi quide-ndo àdi ñá túú-yu dico cada chiúⁿ váha-ni-ndo, te cada iní-ndó sã dàtná tnúhu sá chíúⁿ Xítohó Jesucristú quidé-ndó, te cada-ndo ñⁿ yuhu ni iní-ndó nacuaá cuení Yá Ndiõxí cunduu. ⁷ Te ío váha cuu iní-ndó càda-ndo chiúⁿ-án, chí cada iní-ndó sã dàtná tnúhu sá chíúⁿ Xítohó Jesucristú quidé-ndó te ñá díú chiúⁿ cue ñáiyu ñuyíú-a. ⁸ Te nchòhó sa cùtnuní iní-ndó sã nacuaá ndècu chiúⁿ váha ní quide-ndo ñⁿ ñⁿ-ndo, te ducaⁿ cunduu sá táxí Xítohó Jesucristú nduu táhú-ndó cuèi cùu-ndo ñáiyu dañá queé nũ chíúⁿ patróoⁿ-xi àdi cuu-ndo ñáiyu ñá túú tnàhí dañá quee núú chíúⁿ patróoⁿ-xi.

⁹ Te nchaa nchòhó ñáiyu xíndecu ndihí ñáiyu xínu cuechi, tnàhá-ndó tàú-ndó càda váha-ndo sã cúú-xí cuè ñáiyu xínu cuechi núú-ndó, te vá cundècu nínu iní-ndó nũ-yu, te chí cuáha cuendá sá díú-ní Xítohó Jesucristú Yá ndécú àndiú taxi tnuní ñáhá-gã xii-ndo ndihí-yu, te sá cúú-xí mèe-gá chí ñⁿ-ni cùu-ndo núú-gã, te ñⁿ-ni càda ñaha-gã xii-ndo.

Yá Ndiõxí chindèe-gá cue ñáiyu ndècu ichi-gá cuendá sá vã ndácú sàcuíhná nà ndihí ñaha-xi xii-yu

¹⁰ Te vitna nchaa nchòhó ñáiyu ndècu ndihí-í ichi Xítohó Jesucristú càchí tnúhu-í xii-ndo sã ío nducu-ndo nacuaá cada-ndo ñihí ndéé-ndó cùu ñⁿ-nuu-ndo ndihí Xítohó Jesucristú, chí mee-gã ío càhnu cuu-gá, te chindee ñaha-gã xii-ndo. ¹¹ Te ñⁿ-ni nchaa sá ñⁿ nduu táhú-ndó nũ Yá Ndiõxí ñⁿ-ni nchaa xíãⁿ cuhuⁿ iní-ndó, chí xíãⁿ chindee ñaha-xi xii-ndo níhí ndéé-ndó cundecu-ndo cuendá sá vã dándàhú ñáhá sàcuíhná xii-ndo. ¹² Chí nchoo ñá díú cuè ñáiyu ñuyíú-a nà ndihí-o, chí ndihí cue espíritu

cúndìhi yucu ñávãha, te ðiu-ni nchaa espíritú-áⁿ cúnuu-xi cuéi núú ñinu quide-xi nchaa sá cuèhé sá dúhá, te ðiu-ni-xi cùnuu-xi ñuyíú-a sãnu ichi-xi cue ñãyiu quidé-yu nchaa sá cuèhé sá dúhá. ¹³ Te ío cuhuⁿ iní-ndó nchaa sá ñ nduu táhú-ndó núú Yã Ndiõxí cuendá ducaⁿ ñihí ndéé-ndó cundecu-ndo, te vá ndácú yucu ñávãha ná cada ñaha-xi xii-ndo oré cuíní-xi coto ndéé ñáhá-xí. Te sátá ná ðaquee tíhú-ndó yucu ñávãha te ñíi-ni cunduu-ndo cundecu-ndo ichi Yã Ndiõxí. ¹⁴ Te ducaⁿ cundecu-ni-ndo ichi Yã Ndiõxí cada-ndo ðàtná xíquide cue sandàdú, chi cue téé-áⁿ ío ñíi xíndáa-güedé. Te cáháⁿ-ndó mèe-ni tnúhu ndáá tnúhu Yã Ndiõxí, te cuu-ndo ðàtná cue sandàdú cue téé ndàda tíi xití-xi òré quíhíⁿ-güedé nàá-güedé. Te ducaⁿ sãtnahá-xi cuu-ndo te núu na càháⁿ-ndó mèe-ni tnúhu ndáá tnúhu Yã Ndiõxí. Te cada ndáá-ndó cundecu-ndo ichi-gá, te cuu-ndo ðàtná cue sandàdú cue téé xíxíhnu sá yídãhu ñaha xii-güedé òré nàá-güedé cuendá sá vã ñicuehé-güedé. Te ducaⁿ sãtnahá-xi cuu-ndo te núu na càda ndáá-ndó cundecu-ndo ichi-gá. ¹⁵ Te cundecu túha-ndo cáháⁿ-ndó tnúhu Xítóhó Jesucristú, tnúhu sá càháⁿ nàcuáa cuu váha iní ñãyiu cundecú-yu, te cuu-ndo ðàtná cue sandàdú cue téé ndíhu zapátú-xi quíhíⁿ-güedé nàá-güedé. Te ducaⁿ sãtnahá-xi cuu-ndo te núu na cundecu túha-ndo cáháⁿ-ndó tnúhu Xítóhó Jesucristú núú ñãyiu. ¹⁶ Te càhí tnúhu tucu-í xii-ndo sã ío quíndáa iní-ndó Yã Ndiõxí cuendá sá vã ndácú sàcuíhná nã cada ñaha-xi xii-ndo, te ducaⁿ te cuu-ndo ðàtná cue sandàdú cue téé xínehe vítú chínèe-güedé sáquídãhu ñaha-xi xii-güedé cuendá sá vã cuicúⁿ-güedé sá nchìcúⁿ ñuhú téé ñaha cue téé nàá ndìhi-güedé. Te ducaⁿ sãtnahá-xi cuu-ndo te núu na quíndáa iní-ndó Yã Ndiõxí. ¹⁷ Te ío cuhuⁿ iní-ndó sã ñí naníhí tàhú-ndó, te cuu-ndo ðàtná cue sandàdú cue téé ñuhu mbelú cáxíⁿ. Te ducaⁿ sãtnahá-xi cuu-ndo te núu na cùhuⁿ iní-ndó sã ñí naníhí tàhú-ndó. Te ío cuhuⁿ iní-ndó tnúhu Yã Ndiõxí, chi tnúhu-áⁿ ñí taxi Espíritú-gá ndécú ndìhi-ndo chindee ñaha-xi xii-ndo, te cuu-ndo ðàtná cue sandàdú cue téé xínehe machití cuáháⁿ-güedé nàá-güedé. Te ducaⁿ sãtnahá-xi cuu-ndo te núu na cùhuⁿ iní-ndó tnúhu Yã Ndiõxí. ¹⁸ Te vá ðãñá ndéé-ndó cáháⁿ ndìhi-ndo Yã Ndiõxí nàcuáa chindee

ñaha Espíritú-gá xii-ndo, te cácáⁿ táhú-ndó núú-gã núu ná cuíní-ndó, te ío cundecu túha-ndo cáháⁿ ndìhi-ndo-gã, te vá nátùhú iní-ndó cácáⁿ táhú-ndó núú-gã cuendá nchaa dava-gá cue ñãyiu cùu cuendá-gá. ¹⁹ Te tnàhá cuendá-í cácáⁿ táhú-ndó núú Yã Ndiõxí cuendá sá ná chindee ñaha-gá xii-í ñíhí-í tnúhu cáháⁿ-í òré càháⁿ-í tnúhu-gá, te ducaⁿ vã yùhú-í cáháⁿ-í nàcuáa ndùu tnúhu sá càháⁿ nàcuáa naníhí tàhú-ó núú ñãyiu tnúhu sá vãtá cúndèdóho-gá-yu. ²⁰ Te Yã Ndiõxí ní cachí-gá sá yùhú cuu-í ñíⁿ téé cada-í núú-gã cáháⁿ-í tnúhu-gá núú ñãyiu, te ðiu cuendá tnúhu-áⁿ yíhí-í vecaá vitna. Te ío cácáⁿ táhú-ndó núú Yã Ndiõxí cuendá-í cuendá sá yùhú cuyíⁿ ñí yùhu ñí iní-í cáháⁿ-í tnúhu-gá núú ñãyiu nàcuáa tàú-xi cunduu.

Tnúhu ndéé núú ñí ndìhi-ná

²¹ Te té Tiquicú téé ío cùu iní-í ndécú ndìhi-o ichi Xítóhó Jesucristú cúu-dé ñíⁿ téé ío váha quide ndáá xínú cuèchi-dé núú Xítóhó Jesucristú, téé-áⁿ cachí tnúhu-dé xii-ndo nàcuáa cùu ndecu-í ndìhi nchaa nàcuáa quide-í cuendá ducaⁿ cùtnuní iní-ndó. ²² Te cuendá xíãⁿ núu cuíní-í tendaha-í-dé quixi-dé núú ndécú-ndó cuendá cachí tnúhu-dé xii-ndo nchaa nàcuáa cùu ndecu-ndí iha, te ducaⁿ tàxi-gá-dé tnúhu ndee iní cundecu ndìhi-ndo.

²³ Te xicáⁿ táhú-í núú Tãtã-ó Dütú Ndiõxí ndìhi núú Xítóhó Jesucristú sá ncháa nchòhó ñãyiu ndècu ndìhi-í ichi-gá sá ðiù-gá ná cáda te ío váha cuu iní-ndó cundecu-ndo, te ducaⁿ ío cuu iní tnáhá-ndó, te ío quíndáa iní-ndó-gã. ²⁴ Te nchòhó ío cùu iní-ndó Xítóhó Jesucristú, te ñã túú ðãña ndéé-ndó cùu iní-ndó-gã. Te mee Yã Ndiõxí ío na chindee chitúu ñaha-gã xii-ndo. Te ducaⁿ na cunduu. Te ío chí cáda ndèe iní-nã vitna.

TUTÚ NÍ CADÚHA TĒ PĀBLÚ QUIHIⁿ NDAHA ÑÁYIU ÑUÚ FÌLIPÚ

Té Pāblú cadũha-dé tutú quíhíⁿ ndaha ñáyiú quide ndáá xĩndecu ichi Xítóhó Jesucristú ndécú ñuú Fìlipú

¹ Yúhú té Pāblú ndihí té Timùteú cúú-ndí cue téé xĩnu cuechi núú Xítóhó Jesucristú, te tẽdaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítóhó Jesucristú, ndihí cue téé chĩndee ñaha xii-ndo, ndihí nchaa dava-gá ñáyiú xĩquide ndáá ndécú ichi-gá ñuú Fìlipú. ² Te xicáⁿ táhù-í núú Tátá-ó Dütú Ndiõxí ndihí núú Xítóhó Jesucristú sá ná chĩndee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cũndecu-ndo.

Té Pāblú cǎháⁿ ndihí-dé Yǎ Ndiõxí cuendá nchaa ñáyiú ndècu ichi-gá

³ Te ndí tnahá òré ndácú iní ñáhà-í xii-ndo, te ndácáⁿ táhù-í núú Tátá-ó Dütú Ndiõxí sá ndécú-ndó ichi-gá. ⁴ Te ndí tnahá òré ducaⁿ quide-í te ío cùdí iní-í cǎháⁿ ndihí-í-gá cuendá-ndó. ⁵ Chi ndéé cútnáhá ní sándáá iní-ndó-gǎ ní ngúta-ndo tnahá-ndó quide váha-ndo ndècu-ndo cuendá sá quĩndáá iní ñáyiú tnúhu Xítóhó Jesucristú. ⁶ Te yúhú sàni ndáá iní-í sá Yǎ Ndiõxí Yaá ní quesaha chĩndee ñaha xii-ndo quide váha-ndo ndècu-ndo, te diu-ni-gá chĩndee ñaha-gá xii-ndo càda váha-ndo cũndecu-ndo ndéé ná sáá nduu quixi tucu Xítóhó Jesucristú. ⁷ Te ducaⁿ tnahí tàú-xi cani iní-í sá cúú-xí-ndó, chi ío cùu iní ñáhà-í xii-ndo. Te tnahá-ndó ío chĩndee chitúu ñaha Yǎ Ndiõxí xii-ndo ndècu-ndo, te diu-ni ducaⁿ chĩndee ñaha-gá xii-ndo tnahá-ndó cuẽi vitna yìhí-í vecaá, te diu-ni ducaⁿ chĩndee ñaha-gá xii-í cuẽi òré cuáháⁿ-í núú cuè ñáyiú ñá túú tnahá iní tnúhu-gá, chi ñihí-í tnúhu nãdanchocáva-í nõu ná tnúhu cǎháⁿ-yu cuendá-gá, te nchaa ñáyiú xǎhaⁿ-í xii-yu sá tnúhu-gá cúú-xí tnúhu ndáá cuiti. ⁸ Te mee Yǎ Ndiõxí nǎhá ndǎá-gá sá yúhú ío cùu iní ñáhà-í xii-ndo dàtná cúú iní ñáhá mée Xítóhó Jesucristú xii-o. ⁹ Te

xicáⁿ táhù-í núú Yǎ Ndiõxí sá díú-gǎ ná chĩndee ñaha-gá xii-ndo te uuⁿ-gá cuita cuu iní tnahá-gǎ-ndó quíhíⁿ, te ducaⁿ ío váha cuita cutnùní iní-ndó nchaa nacúaa sàni iní-gá cada-ndo, te ducaⁿ ío váha cuita cutnùní tucu iní-ndó nãcuáa cundecu-ndo. ¹⁰ Te ducaⁿ cùtnuní tucu iní-ndó nchaa sá ío-gá váha xini ñuhu-xi cada-ndo, te ducaⁿ te cuu-ndo ñáyiú cada mee-ni sá váha, te ducaⁿ ñá túú tnahí ná cùmání-ndó nõú Yǎ Ndiõxí ndéé ná sáá nduu quixi tucu Xítóhó Jesucristú. ¹¹ Te diu-ni Xítóhó Jesucristú chĩndee ñaha-gá xii-ndo càda-ni-ndo nchaa núú sá váha nacúaa cuini Yǎ Ndiõxí. Te sá dúcáⁿ ná càda-ndo te ío cada cǎhnu-ndo-gá, te nchaa dava-gá ñáyiú cǎháⁿ váha-yu cuendá-gá.

Xítóhó Jesucristú ío cũnuu-gá ndécú ndihí-gá té Pāblú

¹² Te nchaa nchòhó ñáyiú ndècu ndihí-í ichi Xítóhó Jesucristú na cǎchí tnúhu-í xii-ndo sá úúⁿ-gǎ tá xité nuu tnúhu-gá vitna yìhí-í vecaá. ¹³ Te nchaa cue téé cùu sandadú xĩndecu vechiⁿ núú ndécú tẽe cũnuu xiní-güedé sá sá cuendá sá cǎháⁿ-í tnúhu Xítóhó Jesucristú duha yìhí-í vecaá, te diu-ni ducaⁿ sá xiní nchaa dava-gá ñáyiú sá sá cǎháⁿ-í tnúhu-gá duha yìhí-í vecaá. ¹⁴ Te cuendá sá dúhá yìhí-í vecaá xǎⁿ ío-gá vǎi ñáyiú ndècu ichi Yǎ Ndiõxí ta cùtnuní-gá iní-yu sá cúú-gǎ ñⁿ Yaá ío quide ndáá, te uuⁿ-gá tá cùyíⁿ-yu cǎháⁿ-yu tnúhu-gá, te ñá túú tnahí-gá yúhú-yu cǎháⁿ-yu.

¹⁵ Te na cǎchí-í tnúhu ndáá-í xii-ndo sá dàva ñáyiú cǎháⁿ-yu tnúhu Xítóhó Jesucristú cuendá-ni sá cúú cuedú iní ñáhǎ-yu xii-í sá ío chĩndee ñaha-gá xii-í cǎháⁿ-í tnúhu-gá. Te ducaⁿ quide-yu chi cuini-yu nàá ndihí ñáhá-yu xii-í, dico davá-yu chi ío váha sàni iní-yu cǎháⁿ-yu tnúhu-gá. ¹⁶⁻¹⁷ Te ñáyiú-áⁿ cǎháⁿ-yu tnúhu-gá chi cùu iní ñáhǎ-yu xii-í, te sa nǎhá-yu sá sá cuendá sá cǎháⁿ váha-í cuendá tnúhu-gá núú ñáyiú ñá túú tnahá iní tnúhu-gá, cuendá xǎⁿ yìhí-í vecaá. Te dava-gá-yu cǎháⁿ-yu tnúhu Xítóhó Jesucristú cuendá-ni sá cuini-yu cuu sá váha xii mée-yu, te ñá díú sá cǎháⁿ-yu cuendá sá sání váha iní-yu. Te ducaⁿ quide-yu chi cuendá cuini-yu sá nãndi-gá cada ñaha-güedé xii-í.

18 Dico ío cudíí iní-í sá cãháⁿ-yu tnúhu Xítóhó Jesucristú cuèi cùu váha iní-yu àdi ñá túú cùu váha iní-yu cãháⁿ-yu.

Te ðiu-ni ducaⁿ cudíí iní-í núú cuàháⁿ núú véxi. 19 Te cùtnuní iní-í sá sã cuendá nchaa sá quidé ñàha-güedé xii-í, cuendá xiãⁿ cada váha ñaha Yã Ndiöxí xii-í, chi nchòhó ío cãháⁿ ndihi-ndo-gã cuendá-í, te Espíritú ní taxi Xítóhó Jesucristú ndécú ndihi-o ío chindee ñaha-xi xii-í. 20 Te cuiní-í sá ñà túú tnàhí ná cumani-í núú Yã Ndiöxí cuendá sá vã cúú cãháⁿ núú-í, te cùtnuní iní-í sá díú-gã chindee ñaha-gã xii-í. Te cuiní tucu-í sá ío cuyi-í cãháⁿ-í tnúhu-gã vitna dàtná tá quide-í véxi, te ducaⁿ ío cada nínu-í Xítóhó Jesucristú cuèi vitna nini ndècu-í ñuyíú-a te cuèi na cùú-í ducaⁿ-ni càda nínu-í-gã. 21 Te nini ndècu-í ñuyíú-a te Xítóhó Jesucristú ío cùnuu-gã ndécú ndihi ñaha-gã xii-í, te na sàá nduu cùú-í te ío-gã váha tnahá-í chi nucúndecu-í ndihi-gã. 22 Te núu na cùndecu-gã-í ñuyíú-a te cada-gã-í chiúⁿ sá cúú-xí Yã Ndiöxí, te ñá cùtnuní iní-í nása cada-í núu sá cùndècu-í àdi sá cùú-í. 23 Te ío vãi sani iní-í te cuiní-í cuú-í chi ío-gã váha cundecu-í núú ndécú Xítóhó Jesucristú. 24 Dico sá cúú-xí nchòhó chi ío xini ñuhu-xi cundecu-í. 25 Te cùtnuní ndáá iní-í sá ñⁿ tnúhu ndáá cãháⁿ-í, te cùtnuní tucu iní-í sá cùndècu-ni-í cundecu ndihi ñaha-í xii-ndo nchàa-ndo cuendá chindee ñaha-í xii-ndo cuíta quindáá-gã iní-ndó Xítóhó Jesucristú quíhⁿ, te ducaⁿ ío cudíí iní-ndó cùndecu-ndo. 26 Te ducaⁿ te uuⁿ-gã cachí-ndó sã ío cãhnu cuu Xítóhó Jesucristú cuendá sá ñí dácãcu ñaha-gã xii-í ndécú ndihi ñaha-í xii-ndo.

27 Te xini ñuhu-xi cada-ndo nchaa nacuaá cãháⁿ tnúhu Xítóhó Jesucristú. Te núu ní ndacu-í véxi coto ñaha-í xii-ndo, te dàvá-áⁿ quiní ndáá-í sá ndécú-ni-ndó ichi Xítóhó Jesucristú. Dico núu ñá túú ní ndàcu-í quixi coto ñaha-í xii-ndo ña, te ðiu-ni níhí-í tnúhu sá ndécú-ni-ndó ichi-gã, te níhí tucu-í tnúhu sá ñⁿ-ní cùu-ndo ndecu-ndo, te níhí tucu-í tnúhu sá ñⁿ-nuu nducu ndee-ndo caháⁿ-ndó tnúhu Yã Ndiöxí núú ñáyiú, tnúhu sá sàndáá iní-ndó. 28 Te ñá túú yuhú-ndó nchàa sá quidé ñàha ñáyiú cùu úhú iní ñáhá xii-ndo, te sá dúcáⁿ quide-ndo ñá túú yuhú-ndó nchàa sá quidé ñáhá-yu xii-ndo, te ndixi

túu iní-yu sá nchòhó ndécú-ndó ñⁿ ichi núú nanihí tãhú-ndó, te ñáyiú-áⁿ cuíta nihnú-yu, chi ducaⁿ ñí cachí Yã Ndiöxí cunduu. 29 Te mee Yã Ndiöxí ní taxi-gã tnúhu ndee iní sá quindáá iní-ó Xítóhó Jesucristú, te ñá díú-ní sã quindáá iní-ó-gã chi tnàhá ndoho-o cuendá-gã. 30 Te tnàhá nchòhó ndóhó-ndó cuendá-gã vitna, te nchòhó ní xiní núú-ndó nàcuáa ní ndoho-í, te vitna níhí-ndó tnúhu nchaa nàcuáa ndòho tucu-í.

2

Xítóhó Jesucristú ñá túú ní quide nínu-gã méé-gã dico Yã Ndiöxí ní quide nínu ñaha xii-gã

1 Te Xítóhó Jesucristú dácãhu iní ñáhá-gã xii-ndo nàcuáa cundecu-ndo, te cùu iní ñáhá-gã xii-ndo nàcuáa cuu váha iní-ndó cùndecu-ndo, te ndècu ndihi-ndo Espíritú Yã Ndiöxí, te ío cùndahú iní tnáhá-ndó. 2 Te xiãⁿ núu cãháⁿ-í dóho-ndo sã ío cuu ñⁿ-nuu-ni-ndo cùndecu-ndo nacuaá ío-gã cudíí iní-í, te ñⁿ-ni cùu iní tnáhá-ndó, te ñⁿ-ni càni iní-ndó, te ñⁿ-ni càda-ndo. 3 Te vá cadá nínu-ndo mèe-ndo nducu-ndo mee-ni sá cúú-xí mèe-ndo, chi cunduu ndàhú iní-ndó, te caní iní-ndó sã tnàha ñáyiú-ndo ío-gã cùnùu-yu dàcúúxí mèe-ndo. 4 Te ní vã cáni iní-ndó ndùcu-ndo mee-ni sá vãha sá cúú-xí mèe-ndo, chi nducu-ndo sã cúú-xí tnàhá cuendá tnàha ñáyiú-ndo.

5 Te ío váha caní iní-ndó nàcuáa cundecu-ndo dàtná quidé mèe Xítóhó Jesucristú. 6 Te ñⁿ-ni cùu Xítóhó Jesucristú ndihi Yã Ndiöxí. Te cuèi ducaⁿ dico mee Xítóhó Jesucristú ní sani iní-gã sá ñà túú cùyica cundecu-gã taxi tnùnigã ndihi Yã Ndiöxí. 7 Te ní dáñá-gã sá cùnùu-gã andiu te ní quixi-gã ñuyíú-a ní cuu-gã ñⁿ ñáyiú, te ní quide-gã dàtná quidé ñⁿ téé xinu cuechi. 8 Te ní cuu-gã ñⁿ téé dàtná ndáa cue téé xíndecu ñuyíú-a, te ní cuu-gã ñⁿ téé ío ndàhú iní-xi chi ñá túú ní quide nínu-gã méé-gã, te ní sàndáá iní-gã ní quide-gã nchaa nàcuáa ní xáhaⁿ Yã Ndiöxí xii-gã cùtnàhá ní quixi-gã ñuyíú-a. Te sá dúcáⁿ ñí sàndáá iní-gã xiãⁿ ní xíhí-gã núú cùrúxí. 9 Te xiãⁿ ío ní quide nínu ñaha Yã Ndiöxí xii Xítóhó Jesucristú cuendá ío cunuu-gã. Te ní xáhaⁿ Yã Ndiöxí xii Xítóhó Jesucristú sá cúú-gã Xítóhó nchaa ñáyiú ndècu ñuyíú-a. 10 Te ducaⁿ ñí quide Yã

Ndiõxí cuendá nchaa Espíritú ndécú àndiù, ndihí nchaa ñáyíu ndècu ñuyíú-a, ndihí nchaa ñáyíu ní xíhí ngüíñí xítí-yu ndihí nchaa espíritú-án te cachí-yu ndihí-xi sá ïo càhnu cuu Xítohó Jesucristú. ¹¹ Te nchaa-yu cachí-yu sá Xítohó Jesucristú cúú-gã Yaá táxi tñuní. Te sá dúcáⁿ càdá-yu, te quide cahnú-yu Dútú Ndiõxí.

Ñáyíu ndècu ichi Xítohó Jesucristú cúú-yu dàtná ñⁿ ñuhú

¹² Te xíáⁿ nñu nchaa nchòhó ñáyíu ïo cùu iní-í cuiní-í sá quindáá iní ñáhá-ndó xii-í dàtná ní quide-ndo cùtnàhá ní xíndecu ndihí ñaha-í xii-ndo, chi dàvá-án ñà túú tñahí ni dàña ndeé-ndó nì sándáá iní ñáhá-ndó xii-í. Te cuiní-í sá úúⁿ-gã quindáá iní ñáhá-ndó xii-í vitna ñà túú ndècu ndihí ñaha-í xii-ndo. Te ïo nducu ndèe-ndo cada-ndo nchaa nacuaá tàú-xi cunduu ndeé ná sáá nduu ndùu táhú-ndó cùndecu-ndo ndihí Xítohó Jesucristú, te ïo canehe-ndo sá yíñùhu núú-gã. ¹³ Te Yá Ndiõxí ïo váha dàcahu iní ñáhá-gã xii-ndo càda-ndo nchaa nacuaá cuiní mée-gã, te ñu-ni mee-gã chindèe ñaha-gã xii-ndo dùcaⁿ quide-ndo.

¹⁴ Te vá cání iní-ndó ñà tñuhu cáháⁿ-ndó cuendá ñáyíu, te nì ñà túú nãndi tñuhu cútnàha-ndo ndihí-yu, ¹⁵ te ducaⁿ te cuu-ndo ñáyíu ñà túú cuèchi-xi núú Yá Ndiõxí. Te nchòhó ñáyíu cùu déhe Yá Ndiõxí, ñà túú tñahí-gã ná cumání-ndó nñú-gã nini ndècu-ndo tnuú nchaa ñáyíu ndècu ichi cuehé ichi duha ñuyíú-a, ñáyíu cuihna iní-xi. Te cuu-ndo dàtná chódíní sá dáyèhé niú nee, ¹⁶ te ducaⁿ chi dàcuaha-ndo ñáyíu tñuhu Yá Ndiõxí tñuhu sá cáháⁿ nàcuáa naníhí tàhú-yu. Te núu ducaⁿ-ni na càda-ndo te òré ná sáá nduu càda ndáá Xítohó Jesucristú nchaa yíca cuèchi ñáyíu, te dàvá-án vã cúú cáhaⁿ núú-í, chi ñà túú dió ducaⁿ nì sàhni iní-í cada-í nchaa chiúⁿ ní táhú-gã. ¹⁷ Te nchòhó ïo váha quide-ndo ndecu-ndo ichi Yá Ndiõxí chi sándáá iní-ndó-gã, te yúhú cahni ñaha-güedé xii-í cuendá nchaa sá vãha quide-ó. Te xíáⁿ ïo cùdíí iní-í te cùdíí tucu iní-í dàtná cùdíí iní-ndó cuendá nchaa sá vãha quide-ndo. ¹⁸ Te ñu-ni ducaⁿ ïo chí cùdíí iní dàtná cùdíí iní mée-í cuendá nchaa sá yãha-í ndécú-í.

Té Timùteú ndihí té Epafròditú

¹⁹ Te núu Xítohó Jesucristú ná càchí-gã te ndihí-ni tendaha-í té Timùteú quixi-dé quixi coto ñaha-dé xii-ndo nàcuáa cudíí iní-ndó. Te òré ndixi-dé canaha-dé tñuhu ndixi núu nása cùu ndecu-ndo, te tñahá yúhú ïo cudíí iní-í tucu. ²⁰ Te núu ncháá cuè téé ndècu ndihí-í te ñⁿdii-ni té Timùteú-a cùu-dé téé ïo váha sàni iní-xi dàtná sàni iní-í, chi ñu tñahí-ni-dé ïo sàni iní-dé nñu nása ndècu-ndo. ²¹ Chi dava-gã-güedé mee-ni sá cúú-xí mée-güedé ïo sàni iní-güedé, te ñà túú sàni iní-güedé cada-güedé chiúⁿ tahu Xítohó Jesucristú. ²² Te nchòhó sa xini-ndó sã té Timùteú-a cùu-dé ñⁿ téé quide váha chi nãndi sá tá yãha-dé véxi te quide ndee iní-dé. Te cùu-dé dàtná ñⁿ déhe-í ndécú ndihí ñaha-dé xii-í xínú cuèchi-ndi núú Xítohó Jesucristú cáháⁿ-ndi tñuhu-gã núú ñáyíu. ²³ Te òré ná cùtnuní nñu nása cada ñaha-güedé xii-í te ndihí-ni tendaha-í-dé quixi coto ñaha-dé xii-ndo. ²⁴ Te sàni iní-í sá Xítohó Jesucristú cada-gã te tñahá mée-í ïo ndihí quixi coto ñaha-í xii-ndo.

²⁵ Te tñahá sàni iní-í sá ïo xini ñuhu-xi tendaha-í té Epafròditú téé ndècu ndihí-o ichi Xítohó Jesucristú ndixi coto ñaha-dé xii-ndo, chi tñahá-dé quidé-dé chiúⁿ-gã te quide ndee iní-dé tñahá-dé nãndi yãha-dé sá cuendá-gã, te ñu mee-ndo nì tendaha-ndo-dé véxi-dé cuendá coto ñaha-dé xii-í. ²⁶ Te ducaⁿ cuiní-í tendaha-í-dé ndixi-dé chi mee-dé ïo sàni iní-dé ndixi cáháⁿ ndihí ñaha-dé xii-ndo, te ïo ndihú iní-dé sá nì ñihí-ndó tñuhu sá cùhú-dé ní cùu. ²⁷ Te ndáá sá nì cùhú-dé chi luha ndiquíⁿ-ná cuú-dé ní cùu, dico Yá Ndiõxí ní cundàhú iní ñáhá-gã xii-dé ní quide tátna ñaha-gã te ní ndúha-dé. Te ñà díú-ni mée-dé ducaⁿ nì cundahú iní ñáhá-gã xii-dé chi tñahá yúhú ïo ní cundàhú iní ñáhá-gã xii-í, chi núu nì xíhí-dé te ïo-gã ndihú iní-í ní cùu. ²⁸ Te xíáⁿ ïo ndihí cuiní-í tendaha-í-dé ndixi-dé cuendá òré nasáá-dé núú-ndó te ïo cudíí iní-ndó, te ducaⁿ yúhú ñà túú-gã ná cani iní-í. ²⁹ Te òré nasáá-dé te ïo cudíí iní-ndó nàqueheⁿ cuendá-ndó-dé, te ducaⁿ ïo ndacáⁿ táhú-ndó nñú Xítohó Jesucristú cuendá-dé. Te ïo canehe-ndo sá yíñùhu núu nchaa cue téé quide datná quidé-dé. ³⁰ Chi téé-a sa luha ndiquíⁿ-ná cuú-dé ní cùu sá xínú cuèchi-dé núú Xítohó Jesucristú, te ní

sani iní-dé sá ñà túú nă cada-xi cuèi na cùu-dé ní quide-dé nchaa chiùⁿ sá cùmáni cada-ndo cuendá-í ní cùu.

3

Ñáyiù cùndáá núú Yă Ndiöxí

¹ Te vitna nchaa nchòhó ñáyiù ndècu ndihi-í ichi Xítohó Jesucristú càháⁿ ndàhú-í núú-ndó sã ïo cudíi iní-ndó sã yíndàha ñaha-gá xii-ndo. Te yúhú ñá túú cùu dusaⁿ-í tee tucu-í nchaa tnúhu sá sà ní dánèhé ñáhà-í xii-ndo, chi cùu-xi tnúhu sá ïo chindee ñaha-xi xii-ndo. ² Te ïo quíhi iní-ndó vã cáda cuendá-ndó ni ïⁿ tnúhu càháⁿ cue tée ïo cuihna iní-xi ñá túú tnàhí cuini cada sá vaha, chi cue tée-áⁿ néhé-güedé iní iná chi cächí-güedé sá ncháá cuè tée xini ñuhu-xi cuáha-güedé seña ñi-güedé cuendá ducaⁿ cùdu-güedé núú Yă Ndiöxí. ³ Dico nchoo chi cùdu-o núú Yă Ndiöxí cuèi dava-o sà ní ngúndecu seña ñi-o te dava-o ñáhá, chi Espiritú-gá chindèe ñaha-xi xii-o quide-o nchaa nacuaa tàú-xi cunduu cuendá cuu càhnu-gá. Te ïo cudíi iní-ó cächí-ó sã ïo càhnu cuu Xítohó Jesucristú, te ñá túú sàni iní-ó sã sã cuendá nchaa sá vaha quide-o cudíu-o núú Yă Ndiöxí. ⁴ Te núú dícó cuendá nchaa sá vaha quide-o cudíu-o núú Yă Ndiöxí, te yúhú sa ama-gá cudíu-í núú-gã cuendá nchaa sá ñi quide-í ní cùu te núú dícó ducaⁿ. Te ïo cue tée cächí-güedé sá cùdu-güedé núú Yă Ndiöxí cuendá nchaa sá vaha quide-güedé. Te yúhú uuⁿ-gã ducaⁿ càháⁿ-í núú dícó sá cúu chi yúhú ní xídó-gã-í ní quide-í dàcúxí dàva-gã-güedé. ⁵ Te núú ùná-ni nduu sá ñi cacu-í te ní sáha-güedé seña ñi-í, te yúhú cùu-í tée is-ràél, te mei ñàni tnàhá ndi Benjamín tée ní xíndecu ndéé sanaha cùu-í. Te càháⁿ-í tnúhu hëbreú tnúhu càháⁿ tãtà-í ndihi nãnà-í, te ní cundihi-í nchaa cue tée cùu fariséú, te ní cãchicúⁿ nihnu-í nchaa nacuaa ní càháⁿ ndi Moisés dàtná xiquide mee-güedé. ⁶ Te yúhú ní sani iní-í sá ïⁿ ichi ndáá ndécù-í ní cùu, te ïo ní cuini-í cunu cuechi-í núú Yă Ndiöxí, núú xiãⁿ nãndi sá ñi quide-í nchaa ñáyiù ndècu ichi Xítohó Jesucristú, te vá yõo ïⁿ ni xóo cúñaha ïⁿ tnúhu xii-í cachí-yu sá ñà túú quide-í nacuaa ní càháⁿ ndi Moisés ní cùu. ⁷ Te nchaa sá sání iní-í sá ïo nãndihi nchicúⁿ nihnu-í ní cùu, ní

cutnùni iní-í sá ñà túú tnàhí chindee ñaha-xi nacuaa cundáá-í núú Yă Ndiöxí, núu xiãⁿ duuⁿ duuⁿ ní xehndé iní-í sá vã chindèe ñaha-xi cuendá sá ñi cuini-í cundecu ndihi-í Xítohó Jesucristú. ⁸ Te nchaa sá cächí ñáyiù chindee ñaha cundáá-ó núú Yă Ndiöxí ní cutnùni iní-í sá ñà túú chindee ñaha-xi. Te yúhú ní cutnùni iní-í sá ïo-gã vaha tnàhá tnúhu-o ndihi Xítohó Jesucristú. Te nchaa sá sání iní-í chindèe ñaha xii-í ní cùu, ñá túú-gã sãndáá iní-í sá chindèe ñaha-xi vitna chi ní cutnùni iní-í sá ñà túú nãndihi-xi. Te ducaⁿ quide-í ñá túú-gã sãndáá iní-í nchaa xiãⁿ sá chindèe ñaha-xi, chi cuini-í sá úúⁿ-gã cuita tnàhá tnúhu-í ndihi Xítohó Jesucristú quíhiⁿ, ⁹ te cuu ïⁿ nuu-í ndihi-gã, te ducaⁿ-ni cundáá-í núú Yă Ndiöxí dàtná cundáá-í vitna, dico ñá díu cuendá sá nchicúⁿ nihnu-í nacuaa ní càháⁿ ndi Moisés ní cùu, chi cuendá sá sãndáá iní-í Xítohó Jesucristú. Te Yă Ndiöxí ní quide-gã cundáá-í núú-gã, te ducaⁿ chi ní sãndáá iní-í Xítohó Jesucristú. ¹⁰ Te cuini-í cutnùni iní-í nchaa nacuaa sãni iní Xítohó Jesucristú, te cuini-í sá ïo chindee ñaha-gã, te ñi-ni-gã cúu-gã Yaá ní xihí te ní ndoto-gã, te ducaⁿ cuini-í cada-gã cuendá cada-í nchaa nacuaa cuini-gã. Te cuini-í tnàhá-í ndoho-í dàtná ní ndoho-gã. Te yúhú cuini-í sá vã cáda-í ni ïⁿ sá ñà túú tnàhá iní Yă Ndiöxí, chi ñi cuendá-áⁿ ñi xihí Xítohó Jesucristú. ¹¹ Te cuini-í sá Yă Ndiöxí cachí-gã te tnàhá-í ndoto na sáa nduu ndòto nchaa ñáyiù sa ní xihí ní xíndecu ichi-gã.

Cada-o nchaa nacuaa tàú-xi cunduu cuendá ñi-ó sã ndúú tãhú-ó

¹² Te cùmání-gã cada-í nchaa nacuaa càháⁿ-í-a, te cùmání-gã cada-í nchaa nacuaa càháⁿ Yă Ndiöxí cuendá sá ñà túú-gã ná cùmání-í núú-gã. Te ïo ndècu nde-í nchicúⁿ nihnu-í quidè-í nacuaa ducaⁿ ñà túú-gã ná cùmání-í núú-gã, chi ñi cuendá-áⁿ ñi càháⁿ ñáhá Xítohó Jesucristú xii-í. ¹³ Te nchaa nchòhó ñáyiù ndècu ndihi-í ichi Xítohó Jesucristú cächí tnúhu-í xii-ndo sã cutnùni ndáá iní-í sá vitná cùmání-gã cada-í nchaa nacuaa ñá túú-gã ná cùmání-í núú-gã. Te ní ñi-í ïⁿ sá ïo xini ñuhu-xi cada-í te xiãⁿ quidè-í, te ñá túú-gã quidé cuendá-í nchaa sá ñi xóo cada-í, te ïo ndècu nde-í quidè-í nchaa

nàcuáa càháⁿ Yă Ndiöxí. ¹⁴ Te ndücu ndee vihi-í nchícúⁿ nihnu-í quidè-í nchaa nàcuáa càháⁿ-gá, te ñu-ni ducaⁿ càda-í ndéé ná sàá nduu sàá-í núú ndécú-gă taxi-gá sá ndúú tãhù-í. Te ducaⁿ tnàhí sa ní càháⁿ ñáhá-gă xii-o cündecu-o ndihí-gá, te ducaⁿ ñí càháⁿ ñáhá-gă xii-o sã cuendá Xítóhó Jesucristú chi tnàhá tnúhu-o ndihí-gá.

¹⁵ Te nchaa nchòhó ñáyiú quide váha ndècu ichi Yă Ndiöxí xini ñuhu-xi cani iní-ndó dàtná sání iní-í-a, àdi núú dava-ndo ñà túú sání iní-ndó dàtná sání iní-í-a, dico mee Yă Ndiöxí dandixi túu-gá iní-ndó te cutnùní iní-ndó nàcuáa cada-ndo. ¹⁶ Te xini ñuhu-ni-xi cada-o nchaa nàcuáa ta quide-o véxi.

¹⁷ Te nchaa nchòhó ñáyiú ndècu ndihí-í ichi Xítóhó Jesucristú càháⁿ-í dóho-ndo sã cãncícúⁿ nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchícúⁿ nihnu nchaa nàcuáa dãnehé ñáhà-í xii-ndo cuendá ducaⁿ càda-ndo tnàhá-ndó. ¹⁸ Te sa ní cuu vâi xito cachí tnúhu-í xii-ndo sã ió ñáyiú ñà túú tnàhí cùu váha iní-xi sá ñí xihí Xítóhó Jesucristú núú cùrúxí cuendá sá nánihí tãhù-ó. Te ndihí ndute núú-í dândacu iní ñáhà-í xii-ndo cuendá-yu. ¹⁹ Te sáá nduu te nchaa ñáyiú ducaⁿ xiquide-áⁿ cuíta nihnú-yu, chi mee-ni nchàa sá cuèhé sá dúhá ñuhu iní-yu te ñu-ni nchaa xíãⁿ cúnùu quidè-yu, te cucahaⁿ núú-yu cuendá nchaa sá quidè-yu núú dicó sá cúú, dico ñáhá chi da quide cahnú-yu mèé-yu cuendá nchaa xíãⁿ. Te mee-ni nchàa sá ió ñuyú-a ñuhu iní-yu. ²⁰ Dico nchoo chi andiú ndècu núú cúú ñúú-ó, te ndètu cahnu-o sáá nduu quixi tucu Xítóhó Jesucristú nacuaca ñaha-gă xii-o. Te ñu-ni-gá cúú-gă Yaá ní dácacu nihnu ñaha xii-o núú ùhú núú ndàhú. ²¹ Te yiqui cùñú-ó chi vá cùdii-xi cundecu-xi dàtná cáá-xí vitna, dico mee Xítóhó Jesucristú nadama-gá yiqui cùñú-ó te ndada-gá dàtná ní nduu yiqui cùñú mèé-gă cùtnàhá ní ndoto-gă. Te ducaⁿ càda-gá chi ndàcu-gá quidè-gă nchaa sá váha càchí iní-gá, te ducaⁿ tàxi tnuní-gá nchaandi túhú sá ió.

4

Ío cudíí iní-ó sã ndécú-ó ichi Xítóhó Jesucristú

¹ Te nchaa nchòhó ñáyiú ió cùu iní-í ndécú ndihí-í ichi Xítóhó Jesucristú ió cuiní-í càháⁿ ndihí ñaha-í xii-ndo. Te ió cudíí iní-í cuendá nchaa sá váha quide-ndo chi ñà túú ní xita chiúⁿ Yă Ndiöxí ní quide-í sá cúú-xi-ndó, te ñu-ni nchòhó ñáyiú ió cùu iní-í càháⁿ-í dóho-ndo sã cãncícúⁿ nihnu-ni-ndo ichi Xítóhó Jesucristú.

² Te yòhó tá Vòdiá ndihí yòhó tá Sintiqué càháⁿ ndàhú-í núú-ndó sã cúú ñíⁿnuu-ndo cundecu-ndo ichi Xítóhó Jesucristú. ³ Te yòhó tée cùndihí-í quide ndáá quidè nchaa chiúⁿ quide-í, càháⁿ ndàhú-í núú-n sã chindèe tnúhu-n úú ñáyiú dñí-áⁿ cuendá sá ná cùu ñíⁿnuú-yu cundecú-yu, chi cùtnàhá ní xindecu ndihí ñáhà-yu xii-í ió ní chindee ñáhà-yu xii-í, ndihí té Clémenté, ndihí nchaa dava-gá-yu ní quide-ndí chiúⁿ Xítóhó Jesucristú, te nchaa ñáyiú-áⁿ sa yòdo tnuní-yu núú tütú Yă Ndiöxí sá ndúú tãhù-yu cundecú-yu ndihí-gá ñí caa ñí quíhíⁿ.

⁴ Te nchaa-ni nduu ió cudíí iní-ndó sã ndécú-ndó ichi Xítóhó Jesucristú. ¡Te càháⁿ-ni tucu-í dóho-ndo sã cudíí ndisa iní-ndó! ⁵ Te ió váha cuu iní-ndó càháⁿ ndihí-ndo ñáyiú cuendá ná cùtnuní iní-yu sá cúú-ndó ñáyiú váha iní-xi, chi sa ta cùyatni nduu quixi tucu Xítóhó Jesucristú.

⁶ Te ñà túú tnàhí ná cani iní-ndó te núu nása cùu ndecu-ndo, chi càháⁿ ndihí-ndo Yă Ndiöxí cuendá sá ná chindee ñaha-gă xii-ndo. Te ió ndacáⁿ táhú-ndó núú-gă. ⁷ Te núu ducaⁿ na càda-ndo te Yă Ndiöxí cada-gá te ió váha cuu iní-ndó cündecu-ndo. Te nchoo ñáyiú ñà túú cùtnuní iní-ó nása quide-gá ndéé ducaⁿ ió váha cùu iní-ó, te ducaⁿ ió váha cùu iní-ó chi cùu ñíⁿnuu-o ndihí Xítóhó Jesucristú.

Mee-ni sã váha cuhuⁿ iní-ó

⁸ Te càháⁿ ndàhú tucu-í núú nchàa nchòhó ñáyiú ndècu ndihí-í ichi Xítóhó Jesucristú sá mèé-ní sã váha cuhuⁿ iní-ndó. Te xini ñuhu-xi cuhuⁿ iní-ndó mèe-ni nchaa tnúhu ndáá, ndihí nchaa tnúhu yíñuhu, ndihí nchaa tnúhu sá ió cudíí iní-ó, ndihí nchaa tnúhu sá ió vii ió váha cuáháⁿ, ndihí nchaa tnúhu sá ñà túú ñuhu tnàhá tnúhu cuèhé, ndihí nchaa tnúhu sá càchí ñáyiú váha, ndihí nchaa dava-gá tnúhu sá sání

iní méé-ndó sã ïo váha te ðiu-ni nchaa xiãⁿ cuhuⁿ iní-ndó.

⁹ Te cútnàhá ní xindecu ndihí ñaha-í xii-ndo ní dánèhé ñàhá-í nàcuáa cada-ndo te ní sándáá iní-ndó. Te xiãⁿ càháⁿ-í dóho-ndo sã vã ðáñá ndèé-ndó càda-ndo, te ðiu-ni ducaⁿ vã ðáñá ndèé-ndó càda-ndo nchaa nacuáa ní quide-í ní xini-ndó. Te núu ducaⁿ na càda-ndo te Yá Ndiõxí Yaá quidé ïo váha cùu iní-ó ndècu-o cundecu ndihí ñaha-gã xii-ndo.

Ñáyiú ñuú Filipú ndécú ichi Xítóhó Jesucristú sãñàhã-yu sá ndúú tãhú tẽ Pãblú

¹⁰ Te cùðíí víhí iní-í ndàcãⁿ táhù-í núú Xítóhó Jesucristú sã ní ndacu iní ñàhá-ndó xii-í, dico ñá ðíú sã ñã túú ñùhu iní ñàhá-ndó xii-í chi ðicó sã ñã ñihí-ndó nàcuáa cada-ndo chindee ñaha-ndo xii-í ní cùu. ¹¹ Te ñá ðíú sã ðúhá càháⁿ-í te cani iní-ndó sã càchí tnúhu-í xii-ndo sã ïó ðⁿ sã cúmãní xii-í, chi yúhú cùu váha-ni iní-í núu ïó xii-í àðì ñá túú ïó. ¹² Te xini-í cunduu ndàhú-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñá túú vèdana ná ndécú ndihí-o, te xini-í nàcuáa quide-xi oré xidó ndécú ndihí-o. Te ducaⁿ ñi cutúha-í quidè-í cuendá nchaa nàcuáa ta yãha-í véxi. ¹³ Te nchaa ndàcu-í quidè-í chi Xítóhó Jesucristú chindèe ñaha-gã xii-í. ¹⁴ Te nchòhó ïo váha ní quide-ndo ñi cundàhú iní ñàhá-ndó xii-í ní chindee ñàha-ndo vitna ndecu ndihí-í tnúndòho.

¹⁵ Te nchòhó cue ñáyiú ñuú Filipú sa nàha-ndo nacuáa ní cuu cútnàhá ní ngúita-í càháⁿ-í tnúhu Xítóhó Jesucristú distritú Macèdoniá, te cútnàhá ní ndee-í distritú-ãⁿ te ðiu tnàhí-ni nchòhó ní taxi-ndo sã ndúú tãhú-í, te nchaa ñáyiú ndècu ichi Xítóhó Jesucristú dava-gã xichi ñá túú tnàhí ni chindee ñahã-yu xii-í. ¹⁶ Te cuèi cútnàhá ní xindecu-í ñyú Tesalónicã titní xito ní tendaha-ndo sã ndúú tãhú-í sã ñi cutnùní iní méé-ndó ñi xini ñùhu-í. ¹⁷ Te vá caní iní-ndó sã sã ðúhá càháⁿ-í te cuini-í nãndi-gã taxi táhú-ndó, te duha càháⁿ-í chi Yá Ndiõxí ïo-gã vãi sã váha cada ñaha-gã xii-ndo sã dúcãⁿ quide-ndo. ¹⁸ Te ní xidó vãi nchaa sã xini ñùhu-í ndécú ndihí-í vitna, te ducaⁿ ïo vãi sã ndécú ndihí-í ní cuu chi ní tendaha tucu-ndo sã ndúú tãhú-í véxi ndihí té Epafrodítú. Te táhú-a cùu-xi datná ðⁿ táhú

sã ñi sãha-ndo mèe Yá Ndiõxí, te cùu vii cuu váha iní-gã sã dúcãⁿ ñi quide-ndo. ¹⁹ Te núu ná cùú sã xini ñùhu-ndo, te mee Yá Ndiõxí ïo vãi taxi-gã chi ïo vãi sã ndécú ndihí-gã, te ducaⁿ càda-gã chi ndècu ndihí-o Xítóhó Jesucristú. ²⁰ Te vitna nchaa-o chí ná càchí-ó sã ïo càhnu cuu Tátá-ó Dútú Ndiõxí ni caa ni quihíⁿ. Te ducaⁿ na cunduu.

Tnúhu ndée núú ñi ndihí-na

²¹ Te cúñaha-ndo sã ïo na càda ndee iní nchaa ñáyiú ndècu ichi Xítóhó Jesucristú, ñáyiú cùu cuendá Yá Ndiõxí. Te tnàhá nchaa ñáyiú xindecu ichi Xítóhó Jesucristú ndécú ndihí-í quidé ndèe iní ñàhá-yu xii-ndo. ²² Te nchaa ñáyiú cùu cuendá Yá Ndiõxí xini cuèchi vehe té Cèsár tée yindaha cuéhé nacióⁿ quidé ndèe iní ñàhá-yu xii-ndo, ndihí nchaa dava-gã ñáyiú cùu cuendá-gã.

²³ Te Xítóhó Jesucristú ïo na chindee chitúu ñaha-gã xii-ndo nchaa-ndo. Te ducaⁿ na cunduu. Te ïo chí cádá ndèe iní-ñã vitna.

TUTÚ NÍ CADÚHA TĒ PĀBLŪ QUIHIⁿ NDAHA ÑÁYIU ÑUÚ CÒLOSÁ

Té Pāblú cadúha-dé tutú quíhiⁿ ndaha ñáyiu xĩndecu ichi Xítohó Jesucristú ndécú ñuú Còlosá

¹ Yúhú té Pāblú ní tendaha ñaha Yá Ndiöxí càháⁿ-í tnúhu Xítohó Jesucristú núú ñáyiu chi ducaⁿ cuini méé Yá Ndiöxí cunduu, te cadúha-í tutú-a ndíhi té Timùteú ² cuendá daquixi-í ndaha nchòhó ñáyiu ñuú Còlosá, ñáyiu cùu cuendá Yá Ndiöxí, ñáyiu quide ndáá ndécú ichi Xítohó Jesucristú, te xicáⁿ táhù-í núú Tātá-ó Dütú Ndiöxí sá ïo na chĩndee chitúu ñaha-gá xii-ndo, te ducaⁿ ndi nduú-gá ná cádá te ïo váha cuu iní-ndó cùndecu-ndo.

Té Pāblú càháⁿ ndíhi-dé Yá Ndiöxí cuendá ñáyiu sàndáá iní ñáhá xii Xítohó Jesucristú

³ Te ducaⁿ-ni càháⁿ ndíhi-ndí Yá Ndiöxí Yaá cúú Tātá Xítohó Jesucristú ndácáⁿ táhú-ndí núú-gá cuendá nchaa nàcuáa quide-ndo ndecu-ndo, ⁴ chi nihí-ndí tnúhu sá ïo sàndáá iní-ndó Xítohó Jesucristú, te ducaⁿ ïo cùu iní-ndó nchaa ñáyiu cùu cuendá Yá Ndiöxí. ⁵ Te ducaⁿ quide-ndo chi sàndáá iní-ndó sá ndúú táhú-ndó cùndecu-ndo núú ndécú Xítohó Jesucristú, te tnúhu-áⁿ ñí nihí-ndó cùtnàhá ní xĩndedóho-ndo tnúhu ndáá tnúhu Xítohó Jesucristú. ⁶ Te tnúhu Xítohó Jesucristú tá xité nuu-xi nihí ñuyúu cuáháⁿ. Te vai ñáyiu ta sàndáá iní-yu cuáháⁿ, te ta quidé-yu mee-ni sá váha cuáháⁿ ndécú-yu ichi-gá. Te nchòhó chi ndéé cùtnàhá ní tecú dóho-ndo tnúhu-gá ní quesaha-xi ta cùu vai ñáyiu ñuú-ndó tá quide ndáá-yu núú-gá cuáháⁿ. Te dàvá-áⁿ ñí cutnùní ndáá ndisa iní-ndó sá Yá Ndiöxí ïo chĩndee chitúu ñaha-gá xii-ndo. ⁷ Te ducaⁿ ñí dánèhé ñáhá té Ēpafrás téé ïo cùu iní-ndí, chi tnàhá-dé ïo quide ndáá-dé xínú cuèchi-dé núú Xítohó Jesucristú quidé-dé núú-ndí dácuàha ñaha-dé xii-ndo tnúhu-gá. ⁸ Te càchí tnúhu-dé xii-ndí sá ïo cùu iní ñáhá-ndó

xii-ndí, te ducaⁿ quide-ndo chi Espiritú Yá Ndiöxí chĩndèe ñaha-xi xii-ndo.

⁹ Te ndéé cùtnàhá ní nihí-ndí tnúhu nàcuáa quide-ndo ndecu-ndo ndéé dàvá-áⁿ ñí ngüita-ndí ñá túú dàña ndee-ndí xicáⁿ táhú-ndí núú Yá Ndiöxí cuendá-ndó sá Espiritú-gá ná tàxi-xi nchaa-gá sá cùmání quini tnùní-ndó, te ducaⁿ te cutnùní váha-gá iní-ndó nàcuáa cuini Yá Ndiöxí cada-ndo. ¹⁰ Te sá dúcáⁿ te ndacu-ndo cada-ndo mee-ni sá váha dàtná cuini Xítohó Jesucristú cada nchaa ñáyiu ndècu ichi-gá. Te ducaⁿ ïo nduu vétú iní-gá te núu na cada-ndo nchaa núú sá váha. Te ducaⁿ ïo-gá cuita cutnùní iní-ndó nchaa nacuáa cuini Yá Ndiöxí cada-ndo. ¹¹ Te mee-gá cúú-gá Yaá ïo cùnuu, te ñuú-gá ïo chĩndee ñaha-gá xii-ndo, te cudí iní-ndó cuèi nándi na càda ñaha ñáyiu xii-ndo sá cuendá-gá, te ducaⁿ ïo cunduu càhnu iní-ndó. ¹² Te ndacáⁿ táhú-ó núú Dütú Ndiöxí chi ní quide túha ñaha-gá xii-o cuendá nduu táhú-ó cùndecu-o ndíhi nchaa dava-gá ñáyiu yĩndaha-gá xĩndecu núú cándòo canine ñá túú tnàhí-gá ni ñíⁿ cuèchi ïo. ¹³ Te ñuú-gá ní quide ní dáñá-ó nchaa ichi cuehé ichi duha núú táxi tnùní yucu ñávàha, te ní nachíhi ñaha-gá xii-o ndàha Déhe-gá Yaá ïo cùu iní-gá. ¹⁴ Te Déhe-gá ní xihí-gá cuendá sá nchóó càcu nihnu-o núú ùhú núú ndàhú, te ní quide càhnu iní-gá nchaa sá cuèhé sá dúhá ñí quide-o.

Ñáyiu cùu ñuú ndíhi Yá Ndiöxí cuendá sá ní xihí Xítohó Jesucristú

¹⁵ Te Yá Ndiöxí cúú-gá Yaá vá cúú quini-ó dico Xítohó Jesucristú chi ní quixi túu-gá ñuyúu-a, te ní quide-gá nchaa nàcuáa sàni iní-gá. Te dàtná-ni sàni iní-gá te ducaⁿ sàni iní Yá Ndiöxí, te Yaá-áⁿ ducaⁿ-ni ndècu-gá ndéé cùtnàhá vátá ngáva-gá ñuyúu. ¹⁶ Te Xítohó Jesucristú ní quide-gá núú Yá Ndiöxí ní cadúha-gá nchaa sá ïo andi ndíhi nchaa sá ïo ñuyúu-a, te ní cadúha-gá nchaa sá cúú quini núú-ó cùndehe-o, ndíhi nchaa sá vā quini tnàhí-o, ndíhi nchaa espíritú cùnuu vihi xinu cuechi núú Yá Ndiöxí, ndíhi nchaa dava-gá espíritú xínú cuèchi. Te nchaa ní cadúha Xítohó Jesucristú chi ducaⁿ ñí cachí Yá Ndiöxí cunduu. Te ducaⁿ ñí cachí Yá Ndiöxí cunduu cuendá nchaa cuu-xi mee-ni sá váha sá cúú-xi Xítohó

Jesucristú. ¹⁷ Te Xítoho Jesucristú ducaⁿ-ni ndècu-gá ndéé cútnàhá vátá ngáva-gá ñuyíú-a, te diu núú ndáhá-gã cándòdo ñuyíú-a, ndihi andiu, ndihi nchaandi túhú sá ío. ¹⁸ Te diu Xítoho Jesucristú cúnùu-gá yíndàha ñaha-gá xii ncha nchoo ñáyi ndècu ichi-gá, te diu-gá quidé-gã ndécú vaha-o núú-gã. Te núú ncháá ñáyi ndoto diu-gá cúú-gã Yaá ío càhnu cuu sa ní ndoto, te sá dúcáⁿ ñí ndoto-gá te xiáⁿ cúú-gã Yaá ío tàxi tnuní nchaandi túhú sá ío ñuyíú-a ndihi andiu. ¹⁹ Te ducaⁿ ío cúnúu-gá táxi tnùnì-gá chi ndáá sá ñí-ni cuu-gá ndihi Yá Ndiöxí. ²⁰ Te Xítoho Jesucristú ní xihí-gá núú cùrúxí, chi ducaⁿ ñí cuiní Yá Ndiöxí cunduu cuendá sá vã yõ ñí-gá cuu úhú iní ñáhá xii-gá cuéi ñáyi xíndecu ñuyíú-a, te cuéi cue espíritu ndécú àndiu. ²¹ Te nchòhó cútnàhá vátá cùndècu-gá-ndó ìchi Xítoho Jesucristú ñá túú tnàhí ñí xõ cáháⁿ ndihi-ndo-gã, chi mee-ni ñí xõ cuu úhú iní-ndó-gã, te mee-ni ncháa sá cuéhé sá dúhá ñí xõ cunuu ñí xõ cada-ndo ñí cùu, dico Xítoho Jesucristú ní quide-gá ní tnahá tnúhu-ndo ndihi Yá Ndiöxí vitna. ²² Chi diu cuendá-áⁿ ñí xihí Xítoho Jesucristú núú cùrúxí cuendá sá nchóó ndùu ndoo nduu ñine iní-ó ngúndecu-o núú Yá Ndiöxí, te ducaⁿ te ñá túú tnàhí-gá ná cumánì-ó núú-gã, te vã yõ ñí-gá cachí sá nchóó ndècu cuéchi-o. ²³ Te núú vã dáñá ndéé-ndó quíndáá iní-ndó Xítoho Jesucristú, te cundecu-ni-ndo ìchi-gá, te vã cánì iní-ndó dàña-ndo tnúhu ndee ñí ní taxi-gá ndécú ndihi-o. Te ncha tnúhu-gá-áⁿ tá xité nuu-xi ñihí ñuyíú cuáháⁿ, te diu-ni tnúhu-áⁿ càháⁿ yúhú té Páblú dánèhé-í ñáyi.

Té Páblú yíhí dǐquí-dě cáháⁿ-dé tnúhu Xítoho Jesucristú núú ñáyi ndècu ichi-gá

²⁴ Te vitna ío cùdíí ñí-í ndóhò-í cuendá-ndó, chi Xítoho Jesucristú ío ní ndoho-gá cuendá-ó, te tnàhá yúhú ndóhò-í cuendá ncha ñáyi ndècu ichi-gá, dico vitna cùmánì-gã ndoho-í cuendá-yu. ²⁵ Te Yá Ndiöxí ní cachí-gá sá yúhú quíhí díquí ñáhà-í xii ncha nchòhó ñáyi ndècu ichi-gá cuendá danèhé ñáhá vaha-í xii-ndo tnúhu-gá cuendá cuu-xi sá vaha sá cúú-xí-ndó. ²⁶ Te ncha tnúhu sá dánèhé ñáhà-í xii-ndo ñá túú ní tècú dóho ncha

ñáyi ní xíndecu ndéé sanaha, te mee-gã ní cuiní-gá sá ncháá nchòo ñáyi yíndaha-gá vitna cundecu ndihi-o tnúhu-áⁿ. ²⁷ Te mee-gã ní cachí-gá sá dátúu-gá ncha tnúhu sá ío víi ío váha cuáháⁿ núú ncháa ñáyi yíndaha-gá. Te tnúhu-áⁿ cúú-xí cuendá tnàhá ncha nchòhó ñáyi ñá túú cùu ñáyi israhél. Te tnúhu-áⁿ dánèhé ñáhá-xí xii-ndo sá Xítoho Jesucristú ndécú ndihi ñaha-gá xii-ndo. Te cuendá xiáⁿ ní ngúndecu ndihi-ndo tnúhu ndee ñí cundecu-ndo ndihi-gá ñí caa ñí quíhíⁿ.

²⁸ Te nchúhú mee-ni cuendá Xítoho Jesucristú càháⁿ váha-ndí, te dàsahú-ndí ñáyi nàcuáa cadá-yu. Te váha víhi danèhé-ndí ncha ñáyi nàcuáa tecú tnùnì-yu tnúhu-gá, te ducaⁿ danèhé-ndí-yu nàcuáa cundáá-yu núú Yá Ndiöxí, te ducaⁿ chi tnàhá tnúhu-yu ndihi Xítoho Jesucristú. ²⁹ Te cuendá xiáⁿ ío ndècu ndee-í quidé-í chùuⁿ Xítoho Jesucristú, te mee-gã ío chìndee ñaha-gá xii-í núu xiáⁿ ndácù-í quidé-í chùuⁿ-gá.

2

¹ Te cuiní-í sá nchòhó cutnùnì iní-ndó sã ío sàni iní-í cuendá-ndó, ndihi cuendá ncha ñáyi ndècu ñúú Laodiceá, ñáyi xíndecu ichi Xítoho Jesucristú. Te ducaⁿ-ni ío sàni iní-í cuendá ncha ñáyi vátá quíni ñáhá-gã xii-í. ² Te cuiní-í sá nchòhó ndihi ncha ñáyi-áⁿ ío nducu ndèe-ndo canchicúⁿ nihnu-ndo ìchi Xítoho Jesucristú, te ío cuu iní tnàhá-ndó, te ducaⁿ cùu ñí-nuu-ndo cundecu-ndo. Te cuiní-í sá nchòhó ndihi dava-gá ñáyi-áⁿ ío váha sá sá xini tnùnì-ndó cuendá tecú tnùnì-ndó ncháa nàcuáa ndùu cuendá Xítoho Jesucristú chi ío ndùu yuhu ñí cuu, dico vitna ní dátúu-gá núú-ó. ³ Te Xítoho Jesucristú néhé vaha-gá ncha tnúhu sá ío xini ñuhu-xi tecú tnùnì-ó. ⁴ Te duha càháⁿ-í chi cuiní-í sá vã quíndáá iní-ndó ñí ñí tnúhu càháⁿ ncha ñáyi cuiní dandàhú ñáhá xii-ndo cuéi ío váha càháⁿ-yu. ⁵ Te cuéi ñá túú ndècu ndihi ñaha-í xii-ndo dico ducaⁿ-ni ío ñuhu iní ñáhà-í, te ío cùdíí ñí-í chi ñíhí-í tnúhu sá ío cùu ñí-nuu-ndo ndecu-ndo, te ñá túú dàña ndéé-ndó sàndáá iní-ndó Xítoho Jesucristú.

⁶ Te dàtná-ñí ní sàndáá iní-ndó Xítoho Jesucristú, te ducaⁿ-ni quíndáá iní-ndó-gã canchicúⁿ nihnu-ndo ìchi-gá. ⁷ Te ñí yuhu

ni iní-ndó cànchicúⁿ nihnu-ndo ìchi-gá, te ducaⁿ cuita cutnuni-gá iní-ndó nchàa nacuáa càháⁿ-gá quíhíⁿ. Te vá dáñá ndèé tnàhí-ndo quíndáá iní-ndó nchàa tnúhu sá ní dánèhé ñáhá cuè téé càháⁿ tnúhu-gá xii-ndo. Te xini ñuhu-xi ndacáⁿ táhú vihi-ndo núú Yá Ndióxi cuendá nchaa tnúhu-áⁿ.

Ñáyiú ío váha tnàhá tnúhu ndihí Xítoho Jesucristú

⁸ Te ío quíhi iní-ndó cùndecu-ndo chi xica cuu ñáyiú cuení dandàhú ñáhá xii-ndo, te ñáyiú-áⁿ càháⁿ-yu mee-ni nchàa tnúhu ní cahu iní nchaa cue téé ñuyíú-a, te nchaa tnúhu-áⁿ ñá túú vèdana nàndíhi-xi. Te ducaⁿ quidé-yu chi nchicúⁿ nihnu-ni-yu nchaa nàcuáa ní xóo cada ñáyiú ní xíndecu ndéé sanaha. Te càháⁿ-yu nàcuáa sàni iní yucu ñávàha, te ñá túú càháⁿ-yu nàcuáa cuení méé Xítoho Jesucristú.

⁹ Te Xítoho Jesucristú cúú-gã ñáyiú dico ñá-ni cùu-gá ndihí Dútú Ndióxi. ¹⁰ Te nchòhó chi ñá túú tnàhí-gá ná cúmání-ndó núú-gã chi ndècu ndihí-ndo Xítoho Jesucristú. Te ío cùnuu-gá te tàxi tnuní-gá nchaa núú cuè espíritú cùnùu. ¹¹ Te mee-gã ní ndada ndoo ní ndada nine-gá iní-ndó chi ní ngúndecu ndihí-ndo-gã te ducaⁿ ñá túú-gã ndécú-ndó ìchi cuehé ichi duha, te cada iní-ndó sã ní ngúndecu ndihí-ndo ñá seña, chi ní ndada ndoo ní ndada nine-gá iní-ndó, dico ñá díú ñá-ni cuu-xi ndihí seña sá sãha cue téé israél ñá-güedé. ¹² Te nchòhó sa ní sandute-ndo te cada iní-ndó sã dàtná tnúhu sá ní xíhí-ndó ndihí Xítoho Jesucristú, te ní nguíndüxi-ndo ndihí-gá, te ní ndoto-ndo ndihí-gá, te ducaⁿ càda iní-ndó chi ñá túú-gã ndécú-ndó ìchi cuehé ichi duha. Te ducaⁿ chi sàndáá iní-ndó nchàa nacuáa quide Yá Ndióxi, te diu-gá ní dándótó-gã Xítoho Jesucristú. ¹³ Te nchòhó cútnàhá ndécú-ndó ìchi cuehé ichi duha cùu-ndo datná ñáyiú ní xíhí, chi ñá túú tnàhá tnúhu-ndo ndihí Yá Ndióxi ní cùu, te ni ñá díú ñáyiú israél cúú-ndó. Te Yá Ndióxi ní cachí-gá sá nchóó ío váha tnahá tnúhu-ndo ndihí Xítoho Jesucristú vitna. Te ducaⁿ ñá quide-gá chi sa ní quide càhnu iní-gá nchaa sá cuèhé sá dúhá ní xóo cada-o. ¹⁴ Te vitna duuⁿ duuⁿ ñá túú-gã cuéchi-o

ndècu núú-gã. Te nchoo ñá túú cuení-ó càda-o nacuáa càháⁿ-gá, te cuendá xíáⁿ ío ndècuéchi-o, te vai nacháhu-o núú-gã ní cùu. Te vitna ñá túú-gã ni ñá cuéchi-o ndècu núú-gã, chi diu cuendá-áⁿ ní xíhí Xítoho Jesucristú núú cùrúxi. ¹⁵ Te sá dúcáⁿ ní xíhí Xítoho Jesucristú núú cùrúxi, te duuⁿ duuⁿ ní dáquéé tñhú-gã sácuíhná ndihí nchaa espíritú cùndíhi-xi, te ní quendóo canúú-xi, te mee-gã ío cùnuu-gá táxi tnuní-gá.

Nanducu nihnu-o mee-ni sá váha càchí Xítoho Jesucristú

¹⁶ Te núu dava ñáyiú xícuèhé ñáhá-yu xii-ndo cuendá sá ñá túú xèxi-ndo xíhi-ndo datná quidé méé-yu te vá càda cuendá-ndó, te ni vá càda cuendá-ndó te núu xícuèhé ñáhá-yu xii-ndo cuendá sá ñá túú cànehe íí-ndó víco quide méé-yu núú cuiá núú cuiá, ndihí víco quidé-yu ndi tnahá yóó, ndihí cuendá sá ñá túú cànehe íí-ndó ndúu ndetatú-yu. ¹⁷ Te nàcuáa quidé-yu ndi tnahá òré quidé-yu nchaa víco-áⁿ, ndihí nàcuáa quidé-yu ndi tnahá nchaa nduu cànehe íí-yu-áⁿ, te cada iní-ó sã sá quidé-yu-áⁿ dánèhé núú ñáhá-xí nàcuáa cada Xítoho Jesucristú núú cuáháⁿ núú vèxi. ¹⁸ Te vá quíndáá iní-ndó ni ñá tnúhu càháⁿ ñáyiú càchí sá cuita nihnu-ndo cuendá sá ñá túú tní-ndo tnúhu càháⁿ-yu, chi càchí-yu sá ío xini ñuhu-xi cada cahnu-o nchaa cue espíritú xínú cuéchi núú Yá Ndióxi, te ni yùhu ni iní-ó cànehe-o sá yíñùhu núú-xi. Te ñáyiú-áⁿ càchí-yu sá ndáá càháⁿ-yu chi dàcoto ñaha saní-yu nàcuáa càháⁿ-yu, te ío quide cahnú-yu méé-yu cuendá nchaa sá saní iní méé-yu quidé-yu, te ñá túú vèdana nàndíhi nchaa sá quidé-yu. ¹⁹ Te nchaa ñáyiú ducaⁿ xíquide-áⁿ ñá túú tnàhá tnúhu-yu ndihí Xítoho Jesucristú. Te mee-gã cúú-gã Yaá cùnùu taxi tnuní ñáhá-gã xii nchaa nchoo ñáyiú ndècu ichi-gá, te chindee ñaha-gã xii-o ndècu-o ichi-gá, te mee-gã quidé-gã cúú ñá-nuu-o ndecu-o, te ta quide-o nchaa nacuáa cuení Yá Ndióxi cuáháⁿ.

²⁰ Te nchòhó cúú-ndó dàtná ñáyiú ní xíhí ndihí Xítoho Jesucristú cuendá sá vá cànchicúⁿ nihnu-gá-ndó nàcuáa càháⁿ ñáyiú ñá túú ndècu ichi-gá. Te núu ducaⁿ ñá, ¿te ná cuendá tní-ni-ndó tnúhu càháⁿ ñáyiú-áⁿ

te quide-ni-ndo datná quidě-yu? ²¹ Chi ñáyi-u-áⁿ cächí-yu sá ío sá ni vǎ cúú tē ndaha-o, te dava ni vǎ cúú cǎxi-o, te dava ni vǎ cúú tñi-o. ²² Te nchaá xǎⁿ, núú néhé chiuⁿ-ni-o ndihi nihnu-xi. Te nchaá sá dúcáⁿ cǎháⁿ-yu-áⁿ cúú-xí mēe-ni sá ni cahu iní mēe nchàa ñáyi-u ñuyú-a nacuáa cada-yu cundecú-yu. ²³ Te nchaá tñuhu cǎháⁿ-yu-áⁿ sánùu sá cúú-xí ñiⁿ tñuhu cǎháⁿ ñiⁿ tēe ío váha sàa díquí-xi, chi cächí-yu sá cáda cǎhnu-o Yá Ndiöxí nacuáa véxi iní mēe-ó, te cunduu ndàhú iní-ó dico ñá túú dānehé ñáhǎ-yu nacuáa tàú-xi cunduu. Te cächí tucú-yu sá cáda ũhú-ó mēe-o, chi ducaⁿ cuiní Yá Ndiöxí cada-o cächí-yu. Te nchaá xǎⁿ ñá túú vǎdana chindee ñaha-xi xii-o cuendá sá vǎ táxi tñuní ñáhǎ ni ñiⁿ sá cuéhé sá dúhá sàni iní-ó.

3

¹ Te nchòhó cada iní-ndó sǎ ñi xíhí-ndó ndihi Xítohó Jesucristú te ní ndoto-ndo ndihi-gá, núu xǎⁿ tàú-ndó cada-ndo nchaá sá váha datná cuiní mēe-gǎ chi mee-gǎ núcõo-gá xio cùha Dútú Ndiöxí chi tñáhǎ-gá ío cùnuu-gá. ² Te ío cuhuⁿ iní-ndó nchàa sá váha cächí Xítohó Jesucristú nduu táhú-ndó cundece ndihi-ndo, te vǎ cúhúⁿ iní-ndó mēe-ni nchaá sá ío ñuyú-a. ³ Te ducaⁿ cada-ndo chi cùu-ndo datná ñáyi-u ní xíhí ndihi Xítohó Jesucristú, chi ñá túú-gǎ ndécú-ndó ichi cuehé ichi duha. Te Yá Ndiöxí néhé cuendá ñáhǎ-gǎ xii-ndo chi tñáhǎ tñuhu-ndo ndihi Xítohó Jesucristú. ⁴ Te Xítohó Jesucristú cúú-gǎ Yaá ndécú ndihi ñaha xii-o vitna, te sáa nduu quee túu ndihi ñaha-gǎ xii-o àndiu, te tñáhǎ-ó ío cunuu-o ndihi-gá.

Duuⁿ duuⁿ dañá-o nchàa sá cuéhé sá dúhá ñuhu iní-ó te cada-o mēe-ni sá váha

⁵ Te duuⁿ duuⁿ dañá-ndo nchàa sá cuéhé sá dúhá ñuhu iní-ndó. Te nchaá nchòhó cue tēe vǎ cǎháⁿ ndihi-ndo ñáyi-u dñí te núu ñá díú ñādihí-ndó cùu-yu, te ducaⁿ-ni nchàa nchòhó cue ñáyi-u dñí tucu vǎ cǎháⁿ ndihi-ndo cué tēe te núu ñá díú yñi-ndo cuu-güedé, te nchaá-ndo vǎ cǎní-gǎ iní-ndó cada-ndo ni ñiⁿ sá cuéhé sá dúhá ndihi tñaha ñáyi-u-ndo. Te vǎ cǎní cuéhé caní duha-gá iní-ndó sǎ cúú-xí-ndó ndihi-yu, te

vǎ cǎní-gǎ iní-ndó ni ñiⁿ sá cuéhé sá dúhá, te ni vǎ xíhó-ndó ñiⁿ sá ndécú ndihi tñaha ñáyi-u-ndo, chi núu ducaⁿ na cada-ndo xiho-ndo sá ndécú ndihi-yu te ñiⁿ-ni cùu-ndo ndihi ñáyi-u chñuhu nchaá sá cächí-yu cùu ndiöxí te ñá ndàa sá ndiöxí cúú nchàa xǎⁿ. ⁶ Te nchaá ñáyi-u ducaⁿ xǎquide ío dandòho ñaha Yá Ndiöxí xii-yu na sàa nduu tñundòho tñuhu ndàhú, chi ñá túú sàndáa iní ñáhǎ-yu xii-gá. ⁷ Te nchòhó cùtnáhǎ ní xindece-ndo ichi cuehé ichi duha, te tñáhǎ-ndó ñi xóo cada-ndo datná quidé nchàa ñáyi-u-áⁿ. ⁸ Te vitna duuⁿ duuⁿ dañá-ndo nchàa sá ná cächí tñuhu-í-a: Vǎ cúdēēⁿ-gǎ-ndó, te ni vǎ cùnduu líhli-gá iní-ndó, te ni vǎ cúú ũhú-gá iní-ndó tñaha ñáyi-u-ndo, te ni vǎ cùcuéhé-gǎ-ndó-yu, te ni ñiⁿ-gǎ tñuhu cuéhé vǎ cǎháⁿ-ndó. ⁹ Te ni vǎ dácuàndehnde-gǎ-ndó, chi nchòhó sa ní dáñá-ndó nchàa ichi cuehé ichi duha, te ñá túú-gǎ sání cuéhé sání dùha iní-ndó ñá cada-ndo vitna datná ní xóo cada-ndo. ¹⁰ Te vitna nchòhó ní nduu-ndo ñáyi-u váha, te uuⁿ-gǎ tá cùtnuní iní-ndó nchàa nacuáa cuiní Yá Ndiöxí cada-ndo, te ducaⁿ ta nducu ndee-ndo quide-ndo mee-ni sá váha datná quidé mēe-gá. ¹¹ Te vitna ní ngundece ndihi-ndo Xítohó Jesucristú, te vǎ cáda cuendá-gǎ-ndó ñuu cùu-ndo ñáyi-u isràel àdi ñá túú cùu-ndo, te ni vǎ cáda cuendá-ndó ñuu cùu-ndo ñáyi-u ní ngundece sēñá ñi-xi àdi ñáhǎ, te ni vǎ cáda cuendá-ndó ñuu cùu-ndo ñáyi-u véxi ñuu xícá, te ni vǎ cáda cuendá-ndó ñuu cùu-ndo ñáyi-u cùu neñuu, te ni vǎ cáda cuendá-ndó ñuu cùu-ndo ñáyi-u ñá túú tñáhí dàñá quee núú chíúⁿ pàtróoⁿ-xi, te ni vǎ cáda cuendá-ndó ñuu cùu-ndo ñáyi-u dàñá quee núú chíúⁿ pàtróoⁿ-xi, chi Xítohó Jesucristú cùnùu-gá ndécú ndihi ñaha-gá xii-o nchàa-o.

¹² Te Yá Ndiöxí ní dáquēé dñiⁿ ñaha-gá xii-ndo cuendá cundece-ndo ndihi-gá, te vitna cùu-ndo ñáyi-u quide ndáa ndécú ichi-gá. Te mee-gǎ ío cùu iní ñáhǎ-gǎ xii-ndo ñuu xǎⁿ tàú-ndó cùndahú iní tñáhǎ-ndó, te ío váha cuu iní-ndó chindee tñaha-ndo, te cuu-ndo ñáyi-u ndàhú iní-xi, te ío vii ío váha cuu iní-ndó cundece ndihi tñaha-ndo, te ío cǎhnu cunduu iní-ndó cuendá nchaá sá quidé ñaha ñáyi-u xii-ndo. ¹³ Te ducaⁿ cǎnehe-ndo tñuhu cǎhnu iní núú

ndi mée-ndo nacuaa ndècu-ndo ichi-gá, te cada cahnu tucu iní-ndó núu ná cúú sá cúmání núú tnáhá-ndó. Te dàtná ní quide cahnu iní Xítohó Jesucristú nchaa sá ñà túú vâha ní xóo cada-ndo ducaⁿ càda-ndo cada cahnu iní-ndó nchaa sá cúmání núú tnáhá-ndó ndècu-ndo. ¹⁴ Te xini ñuhu vihi-xi sá ïo cuu iní tnáhá-ndó cùndecu-ndo, chi núu ducaⁿ na càda-ndo, te quide-ndo nchaa dava-gá sá càháⁿ-í, te ñà túú tnáhí-gá ná cúmání-ndó. ¹⁵ Te dañá-ndo sá Yá Ndiöxí ná chindee ñaha-gá nàcuáa ío váha cuu iní-ndó cùndecu-ndo, chi ñu cuendá-áⁿ ñi cáháⁿ ñáhá Yá Ndiöxí xii-ndo cuendá cuu ñnu-ndo ndíhi nchaa dava-gá ñáyiú ndècu ichi-gá, te ducaⁿ-ni ïo ndacáⁿ táhú-ndó núú-gã.

¹⁶ Te ío cuhuⁿ iní-ndó tnúhu Xítohó Jesucristú, te ío váha cuáha-ndo cuendá nàcuáa càháⁿ tnúhu-gá te ducaⁿ dānehé tnáhá-ndó. Te ío cáháⁿ dóho tnàha-ndo nacuaa cada-ndo cānchicúⁿ nihnu-ndo càda-ndo nchaa nacuaa càháⁿ tnúhu-gá, te cata-ndo ndùdú ndèé núú tütú Yá Ndiöxí, ndíhi nchaa dava-gá ndudú sá xini méé-ndó xita-ndo te nchaa xiãⁿ cata-ndo chinuhu-ndo Yá Ndiöxí. Te òré xitá-ndó te ñi yùhu ñi iní-ndó ndacáⁿ táhú-ndó núú-gã. ¹⁷ Te cuhuⁿ iní-ndó Xítohó Jesucristú òré sání iní-ndó càda-ndo ñiⁿ chiuⁿ àdi ná tnúhu cuñí-ndó càháⁿ-ndó, te ñu-ñi-gá cuhuⁿ iní-ndó. Te xini ñuhu-xi ndacáⁿ táhú-ndó núú Yá Ndiöxí, te ñu-ñi Xítohó Jesucristú chindee ñaha-gá xii-ndo ndacáⁿ táhú-ndó núú Tátá-ó Dütú Ndiöxí.

Nàcuáa tàú ñáyiú ndècu ichi Xítohó Jesucristú cadá-yu sá cúú-xi ndí meé-yu

¹⁸ Te nchaa nchòhó ñáyiú ñáyiú ndècu yí-xi quindáá iní-ndó yí-ndo, chi ducaⁿ tàú-xi cada nchaa ñáyiú ñáyiú ndécú ichi Xítohó Jesucristú. ¹⁹ Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cūcuéhé-ndó-yu. ²⁰ Te nchaa nchòhó ñáyiú ndècu tátá-xi ndíhi náná-xi quindáá iní-ndó-yu, chi núu ducaⁿ na càda-ndo te ndùu vétú iní Yá Ndiöxí. ²¹ Te nchaa nchòhó ñáyiú cùu tátá ndíhi náná vá dásátú-ndó iní cue déhe-ndo, chi núu ducaⁿ na càda-ndo te ñi vá quixí-gã iní-güexi cada-güexi sá vâha. ²² Te nchaa nchòhó ñáyiú xinu cuechi quindáá iní-ndó nchaa ñáyiú cùu patrón-ndó, te ñi yùhu ñi iní-ndó

càda-ndo nchaa chiuⁿ tahú-yu cuéi òré ndécú-yu àdi òré ñà túú-yu, te ñà díú òré-ñi ndèhé-yu cada-ndo cuendá-ñi sá cuñí-ndó cùñu-ndo núú-yu, chi cada-ndo sá néhé-ndó sá yíñùhu núú Xítohó Jesucristú. ²³ Te nchaa chiuⁿ sani iní-ndó càda-ndo te cada-ndo ñi yuhu ñi iní-ndó, te sá dúcáⁿ càda-ndo-áⁿ te cada-ndo cuendá sá xínú cuèchi-ndo núú Xítohó Jesucristú te ñà díú núú ñáyiú ñuyíú-a xinu cuechi-ndo. ²⁴ Te nchòhó sa ñaha-ndo sá Xítohó Jesucristú taxi-gá sá ndúú táhú-ndó te núu ducaⁿ na càda-ndo, chi cùu-ndo ñáyiú xinu cuechi núú-gã. ²⁵ Te nchaa ñáyiú quide nchaa sá cuéhé sá dúhá nàcháhu-yu núú Yá Ndiöxí cuendá nchaa sá quidè-yu, te mee-gã vá cadá cuendá-gá cuéi ná ñáyiú cùú-yu, chi nchá-yu nacháhu-yu nchaa sá ñà túú vâha quidè-yu núú-gã.

4

¹ Te nchaa nchòhó ñáyiú cùu patrónⁿ cuu-ndo ñáyiú váha, te cada-ndo nchaa nacuaa tàú-xi cunduu ndíhi nchaa ñáyiú xinu cuechi núú-ndó, te cunaha-ndo sá àndiu ndecu Yaá cúú Xítohó-ndó tàxi tñuní ñáhá-gã xii-ndo.

² Te nchaa nchòhó ñáyiú ndècu ichi Xítohó Jesucristú, vá dáña ndèé-ndó càháⁿ ndíhi-ndo Yá Ndiöxí, te ío cuhuⁿ iní-ndó-gã òré càháⁿ ndíhi-ndo-gã, te òré-áⁿ ïo ndacáⁿ táhú-ndó núú-gã. ³ Te cácaⁿ táhú-ndó tnáhá cuendá-ndí núú-gã cuendá sá díú-gã ná cadá te ndacu-ndí càháⁿ-ndí tnúhu-gá núú nchaa dava-gá ñáyiú, te ducaⁿ càháⁿ-ndí tnúhu Xítohó Jesucristú sá ñà túú ní xíndecu ndíhi nchaa ñáyiú ní xíndecu ndéé sanaha, te ñu cuendá tnúhu-áⁿ yíhí-í vecaá vitna. ⁴ Te cáháⁿ ndíhi-ndo Yá Ndiöxí cuendá càháⁿ-í nàcuáa tàú-xi cunduu te tecú tñuní-yu.

⁵ Te cada-ndo nchaa nacuaa tàú-xi cunduu sá cúú-xi nchaa ñáyiú ñà túú ndècu ichi-gá, te ducaⁿ-ni ïo nducu ndèe-ndo cada-ndo nchaa nacuaa tàú-xi cunduu. ⁶ Te cada cuendá-ndó sá ïo vii ío váha cunduu tnúhu càháⁿ ndíhi-ndó-yu, te càháⁿ-ndó ñiⁿ tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ñiⁿ ñiⁿ-yu.

Tnúhu ndée núú nĩ ndihí-ná

⁷ Te té Tiquicú tée ío cùu iní-ó ndècu ndihí-o ichi Xítóhó Jesucristú, tée-áⁿ cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xítóhó Jesucristú te ío váha quide ndáá-dé. ⁸ Te tendaha-ĩ-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee iní cundecu ndihí-ndo. ⁹ Te tnàhá tucu té Onésimú tée ío cùu iní-ó ndècu ndihí-o ichi Xítóhó Jesucristú quixi ndihí-dé, te diu-ni tée ñuú-ndó cùu-dé te tnàhá-dé ío váha quide ndáá-dé. Te ndi ndùú-güedé cachí tnúhu-güedé nchaa nàcuáa cùu iha.

¹⁰ Te té Arístarcú tée yìhi ndihí-í vecaá quidé ndèe iní ñáhá-dě xii-ndo ndihí té Măcú ñaní p̄mú tē Bèé. Te sa nàha-ndo nchaa nacuáa ní cáháⁿ-í cada-ndo quèheⁿ cuendá-ndó tē Măcú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuendá-ndó-dě. ¹¹ Te tnàhá tée nani Jesús, àdi Bustú chi úú diu-dé, quidé ndèe iní ñáhá-dě xii-ndo. Te cue tée-a cùu-güedé cue tée isràél ní chitnahá ñáhá-güedě xii-í càháⁿ-ndí núú ñáyiú nàcuáa ndíhu ndaha ñàha Yá Ndiõxí xií-yu, te ni ñⁿ-gá ñáyiú isràél ñá túú quide datná quidé-güedě. Te ío váha tàxi-güedé tnúhu ndee iní xii-í. ¹² Te tnàhá tée ñuú-ndó tē Ēpafrás quidé ndèe iní ñáhá-dě xii-ndo, te cùu-dé tnàhá-dé tée xínu cuèchi núú Xítóhó Jesucristú. Te ducaⁿ-ni nĩ yuhu nĩ iní-dé xicáⁿ táhú-dě núú Yá Ndiõxí cuendá-ndó cuendá sá cáncicúⁿ nihnu-ni-ndo ìchi-gá, te ducaⁿ te ío váha tecú tnùní-ndó nchaa nacuáa cuíní Yá Ndiõxí cada-ndo, te diu-ni ducaⁿ càncicúⁿ nihnu-ndo càda-ndo. ¹³ Te yúhú càchí tnúhu ndáá-í xii-ndo sã sũúni sàni iní-dé sá mée-ní sã vãha cuu xii-ndo cundecu-ndo ndihí nchaa ñáyiú xĩndecu ichi Xítóhó Jesucristú ndécú ñuú Laodiceá, ndihí nchaa ñáyiú xĩndecu tucu ichi-gá ndécú ñuú Hiérápolis. ¹⁴ Te tnàhá té Lùcá tée xini nchaa núú yúcú sã quidé tãtna quide ndee iní ñáhá-dě xii-ndo tée ío cùu iní-ó, te tnàhá tucu té Dêmás quidé ndèe iní ñáhá-dě xii-ndo.

¹⁵ Te cúñaha-ndo na càda ndee iní nchaa ñáyiú ndècu ndihí-o ichi Xítóhó Jesucristú ndécú ñuú Laodiceá, ndihí tá Mĩnfás, ndihí nchaa ñáyiú ndècu ichi-gá tàcá vehe-xi

dàcuahá-yu tnúhu-gá. ¹⁶ Te tutú cádũha-í-a tendaha-ĩ quixi ndaha-ndo, te òré ná ndihí dàcuaha-ndo te tendaha-ndo quĩhíⁿ ndaha ñáyiú xĩndecu ichi-gá ndécú ñuú Laodiceá cuendá dacuàhá-yu tnàhá-yu. Te diu-ni ducaⁿ dàcuaha-ndo tutú tendaha-ĩ quĩhíⁿ ndaha ñáyiú ñuú Laodiceá òré ná dândixí-yu ndaha-ndo. ¹⁷ Te na càchí tnúhu-í xii-ndo nàcuáa cúñaha-ndo xii té Arquipú, te duha cúñaha-ndo xii-dé: “Yá Ndiõxí ní taxi-gá chiúⁿ quide-n, te ío váha cada cuendá-n càda-n nchaa nacuáa ní cachí-gá”, duha cúñaha-ndo xii-dé.

¹⁸ Te yúhú té Păblú ndihí ndaha mee-ĩ tée-í ñⁿ úú tnúhu-a quide ndee iní ñáhá-í xii-ndo, te cunaha-ndo sã yúhú yíhí-í vecaá. Te Yá Ndiõxí ío na chĩndee chitúu ñaha-gã xii-ndo. Te ducaⁿ na cùnduu. Te ío chí cádá ndèe iní-nã vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA ÑÁYIU ÑŪÚ TESÀLÓNICÁ

*Té Pāblú ndihī cue té cūndihī-dé
cādūha-güedé tutú quihīⁿ ndaha ñáyiū xīndecu
ichi Xítohó Jesucristú ndécú ñūú Tesàlónicá*

¹ Yúhú té Pāblú cādūha-í tutú-a ndihī té Silvanú, ndihī té Timūteú cuendá daquixi-í ndaha nchòhó ñáyiū ndècu ndihī-ndí ichi Xítohó Jesucristú ndécú ñūú Tesàlónicá, chi cūu ñnūu-ndo ndihī Tātá-ó Dütú Ndiöxí, ndihī Xítohó Jesucristú. Te xicáⁿ táhù-í núú Dütú Ndiöxí, ndihī núú Xítohó Jesucristú sá ïo na chīndee chitúu ñaha-gă xii-ndo, te ducaⁿ ndi nduú-gá ná càda te ïo váha cuu iní-ndó cūndecu-ndo.

*Ñáyiū ñūú Tesàlónicá ïo váha sàndáá iní-yu
Yá Ndiöxí*

² Te ndi tnahá òré càháⁿ ndihī-ndí Yá Ndiöxí ndàcáⁿ táhú-ndí núú-gă sá ïo quide váha-ndo ndècu-ndo, te ducaⁿ xicáⁿ táhú-ndí núú-gă sá ná còto ñaha-gă xii-ndo. ³ Te ïo ndàcáⁿ táhú-ndí núú Tātá-ó Dütú Ndiöxí sá ñi yuhu ñi iní-ndó sàndáá iní-ndó-gă, te xīnu cuechi-ndo núú-gă, te cūu iní tnahá-ndó nàcuáa ndècu-ndo ichi-gá ñūu xíáⁿ ïo xīto tnahá-ndo. Te cūtnuní ndáá iní-ndó sá quixí tūcu Xítohó Jesucristú ñūu xíáⁿ ñá túú dàña ndeé-ndó ndètu-ndo-gă. ⁴ Te nchòhó ñáyiū ndècu ndihī-ndí ichi Xítohó Jesucristú sa nàha-ndí sá Yá Ndiöxí ïo cūu iní ñáhá-gă xii-ndo, te ñū-gá ní càháⁿ ñáhá-gă xii-ndo cuendá cūndecu-ndo ichi-gá. ⁵ Te cūtnàhá ní dānehé ñáhá-ndí xii-ndo tñūhu-gá, chi ñá díú sá cúú ñi méé-ndí ducaⁿ ñi dānehé ñáhá-ndí xii-ndo, chi mee Espiritú Yá Ndiöxí ní chīndee ñàha-xi ní càháⁿ-ndí ñi yūhu ñi iní-ndí tñūhu-gá núú-ndó. Te nàha-ndo sá cūtnàhá ní xīndecu ndihī ñaha-ndí xii-ndo ñi quide-ndí nàcuáa càháⁿ Yá Ndiöxí cuendá sá cúú-xí sá vāha sá cúú-xí-ndó.

⁶ Te nchòhó nchicúⁿ nihñu-ndo quide-ndo vitna datná quidé-ndí, chi

quide váha-ndo datná quidé mēe Xítohó Jesucristú, te díí ñi ní tñi-ndo ìchi-gá cuēi ní ndoho ní tnahá-ndó, chi mee Espiritú-gá ní chīndee ñàha-xi xii-ndo. ⁷ Te sá dúcáⁿ quide váha-ndo ñūú Yá Ndiöxí, xíáⁿ yīnchícúⁿ nihñu ñáyiū distritú Macèdoniá, ndihī ñáyiū distritú Acāyá xīquide váha-yu tñahá-yu, ñáyiū xīndecu ichi-gá. ⁸ Te ñū-ndo ñi sanu ichi-ndo ñáyiū distritú Macèdoniá, ndihī ñáyiū distritú Acāyá, te ñá díú-ñi ñáyiū nchaa ñūú-áⁿ chi nchaa ñáyiū dava-gá ñūú ñihí-yu tñūhu sá ïo sàndáá iní-ndó Yá Ndiöxí. Te ñá túú-gă ná tñūhu càháⁿ-ndí cuendá-ndó, chi nchaa-yu sa ñihí-yu tñūhu sá ïo váha quide-ndo ndecu-ndo. ⁹ Te mēe-yu xīcáháⁿ váha-yu cuendá-ndó sá ïo váha ní queheⁿ cuendá ñáhá-ndó xii-ndí cūtnàhá ní quixi-ndí díhna nuu. Te ní dáñá-ndó nchaa sá càchí-ndó cūu ndiöxí-ndó chi ñá díú ndiöxí cúú-xí, te ní tñi-ndo ìchi Yá Ndiöxí Yáá ndécú tūu andiū chi ñū-gá cúú-gă Ndiöxí ndisa, te xīnu cuechi-ndo núú-gă vitna, ¹⁰ te ndètu-ndo quixi tūcu Xítohó Jesucristú Déhe Yá Ndiöxí Yáá ndécú andiū, chi ñū-ni-gá ní quixi-gá ñūyíú-a ní xíhí-gá, te ní ndoto-gá ní dāndótó ñàha Yá Ndiöxí xii-gá. Te ñū-ni Xítohó Jesucristú dācācu nihñu ñaha-gă xii-o ñūú ùhú núú ndàhú, chi sàndáá iní-ó-gă.

2

*Nàcuáa ndiū chiuⁿ ní quide té Pāblú ñūú
Tesàlónicá*

¹ Te nchòhó ñáyiū ndècu ndihī-ndí ichi Xítohó Jesucristú nàha-ndo sá ñá díú àuⁿ nă cuu ñi quixi coto ñaha-ndí xii-ndo, chi ní sàndáá iní-ndó tñūhu Yá Ndiöxí. ² Te nàha-ndo sá cūtnàhá ní xīndecu-ndí ñūú Filipú ïo ní xūhuⁿ tñūhu cuèhé tñūhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñūú-ndó, te ñá túú ní yūhú-ndí ní càháⁿ-ndí tñūhu Yá Ndiöxí núú-ndó, chi mee-gă ní chīndee ñàha-gá xii-ndí cuēi ïo chitū ñáyiū ní cuu úhú iní ñáhá xii-ndí. ³ Te ñá túú ní dāndahú ñáhá-ndí xii-ndo chi mee-ñi tñūhu ndáá ní càháⁿ-ndí núú-ndó, te ñi ñá túú ñi ñi tñūhu cuèhé ñūhú ñi-ndí ní càháⁿ-ndí tñūhu-gá núú-ndó chi sa ní nduu ndoo ní nduu nine

iní-ndí. ⁴ Te mee Yă Ndiöxí ní cachí-gá sá cãháⁿ-ndí tnúhu-gá, te cãháⁿ-ndí nãcuáa cùu iní méé-gă, chi sa nãha-gá nãcuáa cãa iní-ndí, te ñá túú cãháⁿ-ndí nãcuáa cùu iní ñáyiu. ⁵ Te nãha-ndo sá ñà díú ìⁿ tnúhu cudíí ìní-ndó cùndecu-ndo ichi ñuyíú ní cãháⁿ-ndí núú-ndó cuëndá taxi-ndo dĩhúⁿ. Te Yă Ndiöxí sa nãha-gá sá cãháⁿ ndáá-ndí. ⁶ Te ñá ìⁿ ndùu ni quide-ndí ìⁿ sá cádá-ndí cuëndá-ni sá cádá cãhnu ñaha-ndo xii-ndí, àdi cada cahnu ñaha dava-gá ñáyiu, te cuëi tàù ndisa-ndí sá cádá cãhnu ñaha-ndo xii-ndí ní cùu, chi chiùⁿ Xítóhó Jesucristú quidé-ndí, te dìcò-ni sá nchũhú ñá túú ní cuìní-ndí sá dúcáⁿ càda-ndo. ⁷ Te ío vii ío váha ní cãháⁿ-ndí núú-ndó, dàtná quidé ìⁿ ñaha cuu náná vii vii cãháⁿ ndihí cue déhe-aⁿ dàcuehnu ñaha-aⁿ xii-güexi. ⁸ Te ducaⁿ ío cùu iní ñáhá-ndí xii-ndo, dico ñá díú-ní sã ñí cãháⁿ-ndí tnúhu Yă Ndiöxí núú-ndó, chi ndéé iní-ndí taxi-ndí ní dácótó ñaha-xi, te núu dìcò ní cùu-xi sá cúú, cuëndá sá ío cùu iní ñáhá-ndí xii-ndo. ⁹ Te nchòhó ñáyiu ndècu ndihí-ndí ichi Xítóhó Jesucristú nãha-ndo sá ío ní quide chiùⁿ-ndí cuëndá ní níhí-ndí sá ñí xexi-ndí. Te cuëi nduu cuëi níú ní quide chiùⁿ-ndí ní níhí-ndí sá ñí xexi-ndí ní cãháⁿ-ndí tnúhu Yă Ndiöxí núú-ndó cuëndá sá ñà túú ní cuìní-ndí chichìuⁿ ñaha-ndí xii-ndo.

¹⁰ Te nchòhó ñáyiu sãndáá iní tnúhu Yă Ndiöxí xìní ndáá-ndó sã cúú-ndí cue téé váha te ducaⁿ sã naha Yă Ndiöxí tucu, te ní xica-ndí ichi ndáá òré ní cãháⁿ-ndí tnúhu-gá núú-ndó te ñu-ni ducaⁿ quide-ndí vitna. Te vá yõ ìⁿ cãháⁿ sá ñà túú quide ndáá-ndí ndécú-ndí. ¹¹ Te nãha tucu-ndo sá ñí dácãháⁿ ñáhá-ndí xii-ndo, te ní taxi-ndí tnúhu ndee ìní xii-ndo nchãa-ndo, te dàtná quidé ìⁿ tátá ndihí cue déhe-dé ní quide-ndí. ¹² Te ní cachí-ndí xii-ndo sã cádá ndáá-ndó cùndecu-ndo nacuáa tàú-xi cada nchaa ñáyiu tnãhá tnúhu ndihí Yă Ndiöxí, chi mee-gă ní cãháⁿ ñáhá-gă xii-o cuëndá nduu táhú-ó cùndecu-o ndihí-gá núú ío váha cãa ndecu-gá táxí tnùní-gá.

¹³ Te xiãⁿ ío ndàcáⁿ táhú-ndí núú Yă Ndiöxí sá nchòhó òré ní tedóho-ndo tnúhu-gá ní cãháⁿ-ndí, te ní sãndáá iní-ndó

chi ní cutnùní iní-ndó sã díú tnúhu Yă Ndiöxí cúú-xí, te ñá díú tnúhu ñáyiu ñuyíú-a cùu-xi. Te ndáá sá cúú-xí ìⁿ sá ío váha sá cúú-xí nchòo cue ñáyiu ní sãndáá iní tnúhu-gá. ¹⁴ Te nchòhó ñáyiu ndècu ndihí-í ichi Xítóhó Jesucristú, ío ní ndoho ní tnãhá-ndó sã ñí quide ñaha ñáyiu ñuú-ndó. Te nchòhó ní ndoho-ndo dàtná ní ndoho nchaa ñáyiu tàcá dácuaⁿ tnúhu Xítóhó Jesucristú ndécú dístítú Jùdeá, chi tnãhá-yu ío ní dándóhó ñaha ñáyiu ñuú-yu. ¹⁵ Te ñu-ni ñáyiu dístítú Jùdeá-áⁿ ñí sahní-yu cue téé ní xóo cãháⁿ tnúhu Yă Ndiöxí ndéé sanaha. Te ñu-ni ñaní tnãhá-yu cùu cue ñáyiu ní sahní ñaha xii Xítóhó Jesucristú, te sátá xiãⁿ te ní ngüíta-yu ní cuu úhú iní ñáhã-yu xii-ndí, núu xiãⁿ ñá túú tnãhá iní Yă Ndiöxí nchaa sá quidé-yu, te ndéé nchaa dava-gá ñaní tnãhá-yu cùu úhú iní-yu. ¹⁶ Te ío chidácá nihnu ñáhã-yu xii-ndí òré cãháⁿ-ndí tnúhu Yă Ndiöxí núú ñáyiu ñá túú cùu ñáyiu isràél, te ducaⁿ quide ñáyiu-áⁿ cuëndá cuìní-yu sá vã cãháⁿ-ndí tnúhu-gá, sá cádá cuëndá naníhí tàhú ñáyiu ñá túú cùu ñáyiu isràél-áⁿ, te sá dúcáⁿ quidé-yu te ío ta cùu vai-gá cuëchi-yu cuáhãⁿ. Te Yă Ndiöxí ío cùdèéⁿ-gă núú-yu, te tendaha-gă ìⁿ tnúndòho quixi sá cúú-xí-yu te ío ndohó-yu.

Té Pãblú cuìní-dé quíngoto-dé ñáyiu xíndecu ichi Xítóhó Jesucristú ndécú ñuú Tesalónica

¹⁷ Te nchòhó ñáyiu ndècu ndihí-ndí ichi Xítóhó Jesucristú ní quee-ndí núú-ndó, te cuëi ní cuxica-ndí dico ducaⁿ-ni ñúhu iní ñáhã-ndí xii-ndo, te ío ñúhu iní-ndí sá quixí còto ñaha tucu-ndí xii-ndo. ¹⁸ Te yúhú té Pãblú ducaⁿ-ni ñúhu iní-í sá cuëdícó méé-í quixi-í, quixi coto ñaha-í xii-ndo, dico yucu ñávãha chidácá nihnu ñaha-xi xii-í. ¹⁹ Te nchoo ñáyiu ndècu ichi Xítóhó Jesucristú ndètu-ni-gá-ó quèxio-gá candeca ñaha-gă xii-o ndãa andíu cundecu-o ndihí-gá. Te cùdíí víhí ìní-ndí sá cuëndá-gá chi ní chindee ñaha-gá ní sanu ichi ñaha-ndí xii-ndo ìchi-gá, te ío vai ñáyiu cãháⁿ váha-yu cuëndá-ndí ná sãá nduu quixi tucu-gá. ²⁰ Te ducaⁿ ío vai ñáyiu cãháⁿ váha-yu cuëndá-ndí cuëndá sá ñí sanu ichi ñaha-ndí xii-ndo

ìchi-gá, te quide váha-ndo. Te xíáⁿ ío cùdíí ìní-ndí.

3

1-2 Te sa ní cunduu ñá túú-gã càháⁿ ndihì tñaha-o, núu xíáⁿ ñá ní cùndee-gá ìní-ndí ní tendaha-ndí té Timùteú ní quixi coto ñaha-dě xii-ndo, te nchúhú ní quendóo-ndí ñúú Àtenás, chi tñahá-dé xínú cuèchi-dé núú Yá Ndiöxí, ndihì núú Xítohó Jesucristú càháⁿ-dé tñuhu-gá núú ñáyiú. Te ní quixi-dé ní taxi-dé tñuhu ndee ìní xii-ndo cuendá sá ïo quindáá-ni ìní-ndó Xítohó Jesucristú, te canchicúⁿ nihnu-ni-ndo ní yuhu ní ìní-ndó ìchi-gá. 3 Te vá nátùhú ìní-ndó càncchicúⁿ nihnu-ndo ìchi-gá sá dúhá cùu úhú ìní ñáhá ñáyiú xii-o, te nchòhó sa ñaha-ndo sá dàcuítíí sã ndóhó vìhi-o cuendá-gá. 4 Te ndéé cùtñahá ndécú ndihì ñaha-gá-ndí xii-ndo ní cachí tñuhu ndáá-ndí sá ïo ndoho-o, te ducaⁿ ndisa quide-xi. 5 Te xíáⁿ núu ñá ní cùu váha-gá ìní-í chi cuendá ñá túú-gã ní ñhì-í tñuhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tñuhu-dé núú-ndó núu ndecu-ni-ndo ichi Xítohó Jesucristú, chi ní sani ñⁿ ní sani úú ìní-í sá cúu-xí-ndó, chi ná ndéé chidácá nihnu ñaha yùcu ñávãha xii-ndo te cuíta chùuⁿ ní quide-ndí sá cúu-xí-ndó ní cáhãⁿ-í.

6 Te ñáhá, chi ní ndexìo té Timùteú sá ní quixi-dé ñúú-ndó, te ñaha-dé tñuhu ní nasáá sá ní yuhu ní ìní-ni-ndo sàndáá ìní-ndó Yá Ndiöxí, te cùu ìní-ndó cuè tñaha ñáyiú-ndo. Te càchí-dé sá ïo ñùhu ìní ñáhá-ndó xii-ndí, te ío cuìní-ndó càháⁿ ndihì ñaha-ndo, te ñu-ni ducaⁿ ïo cuìní nchúhú càháⁿ ndihì ñaha-ndí xii-ndo tucu. 7 Te ío ndòho-ndí chi ío cùu úhú ìní ñáhá ñáyiú xii-ndí, dico sá ní ñhì-ndí tñuhu sá nchòhó ñáyiú ndècu ndihì-ndí ichi Xítohó Jesucristú ñá túú dàña ndéé-ndó sàndáá ìní-ndó Yá Ndiöxí, te xíáⁿ cúu-xí ñⁿ tñuhu càhnu ìní ní ñhì-ndí chi ní ñaníhí ndéé-ndí. 8 Te ní nduu vétú ìní-ndí sá ní ñhì-ndí tñuhu ndècu-ni-ndo ichi-gá. 9 Te òré càháⁿ ndihì-ndí Yá Ndiöxí, te ío ndàcáⁿ táhú-ndí núú-gã cuendá sá ñá túú dàña nihnu-ndo ichi-gá, núu xíáⁿ ío cùdíí ìní-ndí. 10 Te cuèi

nduu cuèi níu xíáⁿ táhú-ndí núú Yá Ndiöxí sá méé-gã ná càda te sáá ñⁿ nduu ñaníhí tñahá-ó cuendá danèhé ñáhá vãha-gá-ndí tñuhu-gá sá cúmãní-gã xii-ndo.

11 Te mee Tãtã-ó Dütú Ndiöxí, ndihì Xítohó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. 12 Te mee Xítohó Jesucristú ná chindee ñaha-gá xii-ndo, te ío-gá cuíta cuu ìní tñahá-gã-ndó nàcuáa ndècu-ndo ichi-gá ndihì nchaa dava-gá ñáyiú dàtná cúu ìní ñáhá-ndí xii-ndo. 13 Te xíáⁿ táhú tucu-ndí núú Tãtã-ó Dütú Ndiöxí sá ní yuhu ní ìní-ndó càncchicúⁿ nihnu-ni-ndo ìchi-gá, te ducaⁿ te cundáá-ndó núú-gã, te ñá túú-gã ná cumání-ndó òré ná sáá nduu quixi tucu Xítohó Jesucristú ndihì nchaa ñáyiú sa ndècu ndihì-gá.

4

Nàcuáa cuìní Yá Ndiöxí cada-o

1 Te nchòhó ñáyiú ndècu ndihì-í ichi Xítohó Jesucristú càháⁿ ndàhú-í núú-ndó sá cùndèdòho-ndo na càháⁿ-í nàcuáa nduu tñuhu càháⁿ Xítohó Jesucristú, chi mee-gã cuìní-gá sá cáda-ndó nàcuáa ní dánèhé ñáhá-ndí xii-ndo cuendá cuu váha ìní Yá Ndiöxí núú-ndó, te ducaⁿ-ni càda-ndo ndéé núú cuaháⁿ núú vèxi.

2 Te nchòhó sa ñaha-ndo nàcuáa ní càháⁿ-ndí núú-ndó, chi ní càháⁿ-ndí nàcuáa ní táuchíuⁿ Xítohó Jesucristú te ní cachí-gá sá 3 Yá Ndiöxí cuìní-gá sá cáda ndáá-ó cùndecu-o ichi-gá. Te nchoo cuè téé vá càháⁿ ndihì-o ñáyiú ñhì te núu ñá díú ñàdihí-ó cùu-yu, te ní cuè ñáyiú ñhì vá càháⁿ ndihì-yu téé núu ñá díú yí-yu cùu-güedé. 4 Te núu xíáⁿ nchaa nchòhó tñaha téé-í ndí ñⁿ cùndecu ñàdihí-ndó, te ñu-ni ducaⁿ nchòhó cue ñáyiú ñhì tucu ndí ñⁿ cùndecu yí-ndo, te mee-ni tñuhu yíñùhu càháⁿ ndihì tñaha-ndo. 5 Te vá cání cuèhé caní duha ìní-ndó dàtná quidé cuè ñáyiú ñá túú sàndáá ìní tñuhu Yá Ndiöxí. 6 Te ní ñⁿ-ndo vá cání ìní-ndó dàndahú-ndó tñaha téé-ndo càháⁿ ndihì-ndo ñàdihí-güedé. Te ducaⁿ-ni nchòhó cue ñáyiú ñhì tucu vá cání ìní-ndó dàndahú-ndó tñaha ñhì-ndó càháⁿ ndihì-ndo yí-yu. Chi núu ducaⁿ na càda-ndo, te Yá Ndiöxí ío dandòho ñaha-gá

xii-ndo dàtná ní cachí-ndí ndéé díhna. ⁷ Chi Yá Ndiöxí ní cáháⁿ ñáhá-gã xii-o cuendá sá cádá-ó mée-ni sá vâha, te ñá díú sã cuèhé sá dúhá. ⁸ Te nchaá ñáyiú na càda sáá iní-xi tnúhu càháⁿ-ndí, te quède sáá iní-yu núú Yá Ndiöxí, chi ñá díú tnúhu téé ñuyíú-a cùu-xi, chi tnúhu Yá Ndiöxí, Yaá ní taxi Espiritú-gá ndécú ndìhi-o cuu-xi.

⁹ Te nchòhó ñáyiú ndècu ndìhi-í ichi Xítóhó Jesucristú, ñá túú-gã xíní ñùhu-xi cachí tnúhu-í xii-ndo sã cúú iní tnáhá-ndó, chi Yá Ndiöxí sa ní dánèhé ñáhá-gã xii-ndo nàcuáa cuu iní tnáhá-ndó, ndìhi nàcuáa cuu iní-ndó dàva-gá tnàha ñáyiú-ndo. ¹⁰ Te ducaⁿ xíquide-ndo ndìhi nchaá ñáyiú ndècu ndìhi-ndo ichi Xítóhó Jesucristú ndécú dístítú Macèdoniá. Te càháⁿ ndàhú-ndí núú-ndó sã cádá ndáá-gá-ndó, te cuita cuu iní-gá-ndó cuè tnaha ñáyiú-ndo quíhíⁿ. ¹¹ Te cada ndee iní-ndó cùndecu ñucaxi iní-ndó, te cuhuⁿ iní-ndó chùuⁿ mee-ndo, te xiáⁿ cada-ndo dàtná ní dánèhé ñáhá-ndí xii-ndo. ¹² Te ducaⁿ te tnàhá nchaá ñáyiú ñá túú sàndáá iní tnúhu Yá Ndiöxí cáháⁿ váha-yu cuendá-ndó, te ducaⁿ te ñá túú tnàhí-gá ná cùmání xii-ndo.

Nàcuáa cada-xi òré quixi tucu Xítóhó Jesucristú

¹³ Te vitna na càchí tnúhu-ndí xii nchòhó ñáyiú ndècu ndìhi-ndí ichi Xítóhó Jesucristú cuendá nchaá ñáyiú sa ní xíhí, ñáyiú ní sàndáá iní tnúhu Yá Ndiöxí cuendá sá vã ndìhú iní-ndó cuendá-yu dàtná xíquide nchaá ñáyiú ñá túú yìhi iní-xi sá quíxí tucu Xítóhó Jesucristú ñuyíú-a. ¹⁴ Te nchoo sàndáá iní-ó sã ní xíhí Xítóhó Jesucristú te ní ndoto-gá ní dándótó ñàha Yá Ndiöxí, te sàndáá tucu iní-ó sã dàtná ní dándótó Yá Ndiöxí Xítóhó Jesucristú, ducaⁿ dándoto-gá nchaá ñáyiú ní xíhí ñáyiú ní sàndáá iní ñáhá xii-gá.

¹⁵ Te na càchí tnúhu tucu-ndí ingá tnúhu nàcuáa ní cáháⁿ Xítóhó Jesucristú, chi ní cachí-gá sá ná sàá nduu quixi tucu-gá te nchaá ñáyiú sàndáá iní tnúhu-gá ndécú vïvú ñuyíú-a vá códó nùú-yu núú ñáyiú ní xíhí ndaa andiú, chi jùndú candeca ñaha-gã xií-yu ndaa. ¹⁶ Chi Xítóhó Jesucristú quee túu-gá andiú, te cana-gá nchaá ñáyiú ní sàndáá iní tnúhu-gá, te òré-áⁿ Yá Ndiöxí

cada-gá te òré-áⁿ, cáháⁿ ìⁿ cútú te òré-ni-áⁿ ndoto nchaá ñáyiú ní xíhí, ñáyiú ní sàndáá iní tnúhu-gá. ¹⁷ Te dàtnùní nchaá nchoo ñáyiú xíndecu vïvú ñuyíú-a naníhí tnáhá-ó ndìhí-yu, te ndanchita-o ndìhu-o xítí vícò naníhí tnáhá-ó ndìhi Xítóhó Jesucristú, te candeca ñaha-gã xii-o ndàa andiú cundecu ndìhi-o-gá ni caa ni quíhíⁿ. ¹⁸ Núu xiáⁿ chí cuàha tnàha tnúhu ndee iní, te vá ndìhú iní-ndó chi naníhí tàhú-ndó nùú-gã.

5

¹ Te nchòhó ñáyiú ndècu ndìhi-í ichi Xítóhó Jesucristú ñá túú-gã xíní ñùhu-xi sá càchí tnúhu-í xii-ndo sã quíxí tucu-gá, te ni ñà túú-gã xíní ñùhu-xi sá càchí tnúhu-í xii-ndo nàsa cada-xi òré quixi-gá. ² Chi nchòhó sa nàha ndáá-ndó sã Xítóhó Jesucristú quixi-gá nduu ñà túú yìhi iní-ó, chi dàtná quidé ìⁿ ñadúhú cada-gá òré quixi-gá, chi nduu ñà túú nã yíhí iní-ó quixi tucu-gá. ³ Te sáá nduu te cachí nchaá ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñá túú-gã ná cùmání xii-o”, duha quesàhá-yu. Te ñáyiú-áⁿ òré ñá túú nã yíhí iní-yu, te quèxio tnúndòho tnúhu ndàhú sá cúú-xí-yu. Chi cada-xi dàtná quidé-xí ìⁿ ñáyiú dìhí ní tnàhá òré cacu déhe-xi, chi na iní-yu ní dátñhú ñáhá-xí te vá càcu-yu núú tnúndòhó-yu, te ducaⁿ sã tnàhá-xi yáha nchaá ñáyiú ñá túú ndècu ichi-gá, chi na iní-yu quexio tnúndòho sá cúú-xí-yu te vá càcu-yu núú tnúndòho-áⁿ. ⁴ Te nchòhó ñáyiú ndècu ndìhi-í ichi Xítóhó Jesucristú, ñá túú-gã ndécú-ndó ichi cuehé ichi duha, núu xiáⁿ sa yìhi-ná iní-ndó nduu quixi-gá te vá yáha-ndo dàtná yáha nchaá ñáyiú ñá túú ndècu ichi-gá, chi ñáyiú-áⁿ ñà túú nã yíhí iní-yu sá quíxí-gã. Te na iní-yu quexio-gá dàtná quidé ñadúhú na iní-ó quíhu-güedé vehe-o dùhu-güedé ducaⁿ càda-gá òré quixi-gá. ⁵ Te nchoo ñà túú-gã ndécú-ó ichi cuehé ichi duha, te ichi-áⁿ cúú-xí dàtná ìⁿ ichi nee ndècu-o ni cuu, te vitna sa ní ngúndecu-o ichi váha, te ducaⁿ chi Yá Ndiöxí ní dándíxí tũu-gá iní-ó cuendá cutnùní iní-ó nàcuáa nduu cuendá-gá. ⁶ Te xìni ñùhu-xi dandixi túu-o iní-ó, te cada váha-o cùndecu-o ichi-gá, te

vá cáda-ó dàtná quidé nchàa ñáyiú ñá túú sàndáá iní ñáhá xii-gá, chí ñáyiú-án ñá túú-gá quidé cuèndá-yu te núu quide váha-yu àdi ñá túú quide váha-yu ndècú-yu. ⁷ Te nchaa ñáyiú quide cuehé quidé dùha cuú-yu dàtná ñá ñáyiú xidí àdi xini, chí ñá túú quide cuèndá-yu nàcuáa cada-yu ñá sá vâha dàtná cuiní Yã Ndiöxí. ⁸ Te nchòhó ñáyiú sa ní cutnùní iní-xi nàcuáa ndùu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yã Ndiöxí, te cuu iní-ndó cuè tnahá ñáyiú-ndo te ducaⁿ te vá táxi tnùní ñáhá nì ñá sá cuèhé sá dúhá xii-ndo. Te ío cuhuⁿ iní-ndó sá cùndecu-ndo ndihí-gá nì caa nì quihíⁿ. ⁹ Chí Yã Ndiöxí ní cachí-gá sá vâ quihíⁿ-ó núú ùhú núú ndàhú, chí mee-gá nacuaca ñaha-gá xii-o cùndecu-ndo ndihí-gá, chí ní sàndáá iní-ó Xítóhó Jesucristú. ¹⁰ Te mee Xítóhó Jesucristú ní xihí-gá sá cuèndá nchaa yíca cuèchi-o, te ní ndoto-gá cuèndá nduu táhú-ó cùndecu-ndo ndihí-gá andiú na sàá nduu cuèi sa ní xihí-ó, àdi vátá cùú-gá-ó. ¹¹ Núu xíáⁿ chí cuâha tnàha tnúhu ndee iní, te chindee tnàha-ndo cundecu-ndo ichi-gá dàtná tá quide-ndo véxi.

Té Pãblú dáquíní sàhú-dé ñáyiú ndècu ichi Xítóhó Jesucristú

¹² Te nchòhó ñáyiú ndècu ndihí-ndí ichi Xítóhó Jesucristú, càháⁿ ndàhú-ndí núú-ndó sá cànèhe-ndo sá yíñuhu núú cuè téé cùnùu xinu cuechi núú Yã Ndiöxí, cue téé dānehé ñáhá xii-ndo nacuáa cundecu-ndo ichi-gá. ¹³ Te càháⁿ váha-ndo ndihí-güedé, te cuu iní-ndó-güedé, chí nàha-ndo sá chíúⁿ Yã Ndiöxí quidé-güedé. Te cundecu ndihí váha tnàha-ndo nchaa-ndo.

¹⁴ Te càháⁿ ndàhú tucu-ndí núú-ndó sá càháⁿ-ndó dôho nchaa ñáyiú ñá túú cuiní cada chiúⁿ, te ducaⁿ cuãñaha-ndo tnúhu ndee iní xii nchaa ñáyiú quíyuhu iní-xi canchicúⁿ nihnu ichi-gá, te chindee tucu-ndo nchaa ñáyiú vátá ngũnu ichi váha-gá, te cunduu càhnu iní-ndó núú-yu ncháá-yu.

¹⁵ Te cada ndee iní-ndó te núu ndècu tnaha ñáyiú-ndo cùu úhú iní ñáhá-yu xii-ndo, te vá tnàhá-ni-ndo cùu úhú iní-ndó-yu. Te mee-ni sá vâha cada-ndo sá cúú-xí nchaa tnaha ñáyiú-ndo.

¹⁶ Te nchaa nduu ío cudíí iní-ndó cùndecu-ndo. ¹⁷ Te ñá nduu ñá nduu càháⁿ ndihí-ndo Yã Ndiöxí. ¹⁸ Te ndacáⁿ táhú-ndó núú-gá te núu nándi cùu sá yâha-ndo ndècu-ndo, chí ducaⁿ cuiní-gá cada-o, te diu ducaⁿ ndùu tnúhu càháⁿ Xítóhó Jesucristú.

¹⁹ Te vá quèndé nihnu-ndo chiúⁿ quide Espiritú Yã Ndiöxí iní-ndó. ²⁰ Te vá cáda sàá iní-ndó núú cuè téé càháⁿ tnúhu Yã Ndiöxí nàcuáa dàcahu iní ñáhá-gá xii-güedé. ²¹ Te cada cuèndá váha-ndo nàcuáa càháⁿ-güedé, te tñi-ndo nchaa tnúhu váha càháⁿ-güedé.

²² Te dañá-ndo nchaa ichi cuehé ichi duha.

²³ Te mee Yã Ndiöxí quidé-gá ío váha cùu iní-ó ndècu-o ichi-gá. Te xicáⁿ táhú-í núú-gá sá ná càda íí ñáhá-gá xii-ndo, te na còto ñaha-gá xii-ndo ndihí iní-ndó cuèndá sá vâ cáda-gá-ndó nì ñá sá cuèhé sá dúhá, te diu-ni ducaⁿ na càda-gá sá cúú-xí-ndó ndéé ná sàá nduu quixi tucu Xítóhó Jesucristú ñuyúú-a. ²⁴ Chí Yã Ndiöxí Yáá ní càháⁿ ñáhá xii-o cada-gá nàcuáa ní càháⁿ-gá, te chindee ñaha-gá xii-ndo.

Té Pãblú quidé ndèe iní-dé ñáyiú xñdecu ichi Xítóhó Jesucristú ndècú ñúú Tesalónica

²⁵ Te nchòhó ñáyiú ndècu ndihí-í ichi Xítóhó Jesucristú, cácaⁿ táhú-ndó núú Yã Ndiöxí sá ná chindee ñaha-gá xii-ndí.

²⁶ Te cúñaha-ndo xii nchaa ñáyiú ndècu ndihí-o ichi Xítóhó Jesucristú sá nì yuhu nì iní-ndí quidé ndèe iní ñáhá-ndí xii-ndo ndihí-yu.

²⁷ Te vitna mee Yã Ndiöxí ndéhé-gá sá càháⁿ ndàhú-í núú-ndó sá dácuàha-ndo tutú-a núú nchaa ñáyiú ndècu ndihí-o ichi-gá.

²⁸ Te Xítóhó Jesucristú ío na chindee chitúu ñaha-gá xii-ndo núú cuàháⁿ núú véxi. Te ducaⁿ na cùnduu. Te ío chí cáda ndèe iní-ná vitna.

TUTÚ CÚÚ ÒÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ TESÀLÓNICÁ

Té Päblú ndihi cue té cündihi-dé cádúha-güedé tutú quíhíⁿ ndaha ñáyiú xñdecu ichi Xítoho Jesucristú ndécú ñúú Tesàlónicá

¹ Yúhú té Päblú cádúha-í tutú-a ndihi té Silvanú, ndihi té Timúteú cuendá daquixi-í ndaha nchòhó ñáyiú ndècu ndihi-ndí ichi Xítoho Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dütú Ndiöxí, ndihi Xítoho Jesucristú. ² Te xicáⁿ táhú-ndí núú Dütú Ndiöxí, ndihi núú Xítoho Jesucristú sá ná chindee chítúú ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cündecu-ndo.

Yá Ndiöxí cada ndáá-gá cuéchi nchaa ñáyiú ndècu ichi cuehé ichi duha na sàá nduu quixi tucu Xítoho Jesucristú

³ Te nchòhó ñáyiú ndècu ndihi-ndí ichi Xítoho Jesucristú, cächí tnúhu-í xii-ndo sá cúnàha-ndo sá ñà túú dàña ndee-ndí ndácáⁿ táhú-ndí núú Yá Ndiöxí cuendá-ndó, chi dacuítí dùcaⁿ taú-xi cunduu chi ío-gá tá sàndáá iní-ndó-gã cuáháⁿ, te ducaⁿ ùuⁿ-gá tá cùu iní tnáhá-ndó nàcuáa ndècu-ndo ichi Yá Ndiöxí. ⁴ Núu xíáⁿ nchúhú ío váha cáháⁿ-ndí cuendá-ndó núú nchaa ñáyiú sàndáá iní tnúhu Yá Ndiöxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gã, te ñá túú dàña ndeé-ndó nchícúⁿ nihnu-ndo ìchi-gá, te quide cahnu-ni iní-ndó cuèi nándi sá yàha-ndo ndècu-ndo ichi-gá. ⁵ Te sá dúcáⁿ quide váha-ndo ndècu-ndo xíáⁿ cútnùní nàcuáa cada ñaha Yá Ndiöxí xii-ndo na sàá nduu, chi nduu táhú-ndó cündecu-ndo núú táxí tnùní-gá, te ducaⁿ càda-gá chi cùu-gá Yaá quidé ndáá cuíti. Te vitna ndòho-ndo nacuáa ndíhu ndaha-gã dava-gá ñáyiú.

⁶ Te Yá Ndiöxí ío váha ndáá quidé-gã, chi mee-gã nachinaa-gá nchaa sá quidé ñaha ñáyiú cùu úhú iní ñáhá xii-ndo, ⁷ te nchoo ñáyiú ndòho cuendá Xítoho Jesucristú nucúndecu váha-o na sàá nduu núú túu-gá andíu, te tnàhá cue espíritú xínú

cuèchi núú Yá Ndiöxí cuuⁿ ndihi-gá, te cue espíritú-áⁿ quidé-xí nchaa núú chiúⁿ tahu-gá. Te òré nuu túu-gá andíu ndihi cue espíritú-áⁿ, te ío dàtásaⁿ-xi andíu. ⁸ Te dandòho-gá nchaa ñáyiú ñá túú tnàhá tnúhu ndihi Yá Ndiöxí, ñáyiú ñá túú sàndáá iní tnúhu Xítoho Jesucristú tnúhu sá cáháⁿ nàcuáa naníhí tàhú-yu. ⁹ Te nchaa ñáyiú-áⁿ ìo dandòho ñaha-gá xii-yu, chi ndohó-yu ni caa ni quíhíⁿ, te vá cündécú-yu núú ìo váha càa ndecu-gá táxí tnùní-gá. ¹⁰ Te ducaⁿ càda ñaha-gá xii-yu na sàá nduu, te dàvá-áⁿ ìo cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní cáháⁿ-ndí ducaⁿ càda-ndo, te nchaa-o ìo cuñúhu-o-gã dàvá-áⁿ.

¹¹ Te cuendá xíáⁿ núú ío xicáⁿ táhú-ndí núú Dütú Ndiöxí sá ná chindee ñaha-gá xii-ndo cündecu váha-ndo ìchi-gá dàtná cuíní mée-gã cundecu nchaa ñáyiú ní cáháⁿ-gá cundecu ndihi-gá. Te xicáⁿ táhú tùcu-ndí núú-gã sá ìo na chindee ñaha-gá xii-ndo càda-ndo nchaa sá váha sàni iní-ndó, ndihi cuendá chiúⁿ quide-ndo cuendá-gá, te ducaⁿ chi sàndáá iní-ndó-gã. ¹² Te núu ducaⁿ na càda-ndo, te cáháⁿ váha ñáyiú cuendá Xítoho Jesucristú, te tnàhá-ni nchòhó cáháⁿ váha-yu cuendá-ndó, chi mee Yá Ndiöxí ndihi Xítoho Jesucristú cündàhú iní ñáhá-gã chindèe ñaha-gá xii-ndo.

2

Té quixi dandàhú ñáyiú

¹ Te nchòhó ñáyiú ndècu ndihi-ndí ichi Xítoho Jesucristú cächí tnúhu-ndí xii-ndo nàcuáa cada-xi nduu na quixi tucu-gá, chi quixi-gá nacuaca ñaha-gã xii-o, núu xíáⁿ cáháⁿ-ndí dóho-ndo. ² Te ñá díú sã ííⁿ tnúhu tecú dóho-ndo te nguíta-ndo càni ííⁿ caní úú iní-ndó, te ni vã yúhú-ndó te núu véxi ííⁿ téé cächí-dé sá cáháⁿ-dé tnúhu Yá Ndiöxí, te cächí-dé sá sà véxi Xítoho Jesucristú, te vá quindáá iní-ndó tnúhu cáháⁿ-dé chi ñá ndáá, àdi véxi ííⁿ téé nèhe ííⁿ tutú núú-ndó te cächí-dé sá yúhú ní tendaha-í véxi, te núú tütú-áⁿ cáháⁿ-xi sá sà véxi Xítoho Jesucristú, te díu-ni vá quindáá iní-ndó nàcuáa cáháⁿ-xi, te ndèda-ni càa ñáyiú cáháⁿ-yu

dàv-áⁿ sã sã véxi-gá dico vá quindáá tnàhí iní-ndó. ³ Núu xiáⁿ dátũha ñaha-ĩ xii-ndo cuendá sá vã dáñá tnàhí-ndo mềe-ndo dandahú ñáhá ñáyiu. Chi cùmání-gã sáá nduu quixi tucu Xítohó Jesucristú, te nguíta nchaa ñáyiu cuu úhú iní-yu Yá Ndiöxí, te dàv-áⁿ quini-yu ìⁿ téé xidó quidé nchaa sá cuèhé sá dúhá, te téé-áⁿ quihíⁿ-dé núu ùhú núu ndàhú ni caa ni quihíⁿ. ⁴ Te ñu-ni téé-áⁿ vã ndëe iní-dé nchaa sá cãhí ñáyiu cùu ndiöxí-yu ndihí nchaa dava-gá sá quidé cahnú-yu, te cachí-dé sá ïo cùnno-dé, te quihu-dé ndéé xití veñúhu núu ndécú cuè ñáyiu chiñuhu ñaha xii Yá Ndiöxí coo-dé, te cúñaha-dě xii-yu sá cúú-dě Yá Ndiöxí.

⁵ Te dandacu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xindecu ndihí ñaha-ĩ. ⁶ Te nchòhó sa cùnuni iní-ndó nã cúú sã ngání ñaha xii téé-áⁿ núu ñá túú-dě vitna, dico na sáá nduu taú-xi quee-dé caca cuu-dé te dàv-áⁿ quini ñáhá nchaa ñáyiu. ⁷ Te ío titní núu sã cuèhé sá dúhá quide yucu ñávãha dicó-ni sá vátá quini-gá ñáyiu, dico ndècu ìⁿ sã ñã dáñá càda-xi nchaandi túhú nãcuáa cãhí iní-xi, dico sáá nduu xòcuñí sá ñã dáñá-ãⁿ te dàv-áⁿ càda-xi nchaa nãcuáa cãhí iní-xi. ⁸ Te sáá nduu quini-yu téé quide nchaa sá cuèhé sá dúhá-ãⁿ ñuyú-a. Te òré ná quixi túu Xítohó Jesucristú, te mee-ni sã dátãsaⁿ-xi, ndihí yócó yuhu-gá cuú téé-áⁿ. ⁹ Te sácuihná tendaha-xi téé-áⁿ quixi-dé, te cuañaha-xi tnúhu ndee ìní càda-dé nãndi sá cáda-dě. Te càda-dé sá ñã túú tnàhí ndàcu ni ìⁿ ñáyiu ñuyú-a càda-yu, dico mee-ni dandahú ñáhá-dě xii-yu caca cuu-dé. ¹⁰ Te nchaa núu sã cuèhé sá dúhá càda-dé dandahú-dé nchaa ñáyiu sa ñuhu ichi cuáháⁿ núu ùhú núu ndàhú, chi ñã túú ní cuini-yu quindáá iní-yu tnúhu ndáá tnúhu Yá Ndiöxí cuendá naníhí tàhú-yu. ¹¹ Te sá dúcáⁿ ñã túú ní cuini-yu quindáá iní-yu tnúhu ndáá, núu xiáⁿ daña Yá Ndiöxí dacáháⁿ yucu ñávãha iní-yu quindáá iní-yu nchaa tnúhu ndehnde ¹² cuendá cuíta nihnú-yu, te ducaⁿ yãha-yu chi ñã túú sãndáá iní-yu tnúhu ndáá cãháⁿ Yá Ndiöxí, chi mee-ni nchaa sá cuèhé sá dúhá cùdíí iní-yu quidé-yu, te cuíta nihnú-yu chi ducaⁿ ní cachí Yá Ndiöxí cunduu.

Ñáyiu ní cachí Yá Ndiöxí naníhí tàhú

¹³ Te nchòhó ñáyiu ndècu ndihí-ndí ichi Xítohó Jesucristú, ñáyiu ío cùu iní-gá cãhí tnúhu-ndí xii-ndo sã ñã túú dàña ndee-ndí ndàcáⁿ táhú-ndí núu Yá Ndiöxí cuendá-ndó, chi ducaⁿ taú-xi cunduu, chi Yá Ndiöxí ní cachí-gá ndéé cùtnàhá vátá ngãva-gá ñuyúú sã naníhí tàhú-ndó, te ñu Espiritú-gá dacáháⁿ-xi iní-ndó ndècu yíñuhu-ndo núú-gã, te sãndáá iní-ndó tnúhu ndáá cãháⁿ-gá núu xiáⁿ ní naníhí tàhú-ndó. ¹⁴ Chi cuendá tnàhí-a ní cãháⁿ ñáhá Yá Ndiöxí xii-ndo, te ducaⁿ ní naníhí tàhú-ndó chi ní sãndáá iní-ndó tnúhu Xítohó Jesucristú ní cãháⁿ-ndí núú-ndó, te sáá nduu te cundecu-ndo tnàhá-ndó núú ïo vãha caa ní nduu táhú Xítohó Jesucristú ndécú-gã.

¹⁵ Núu xiáⁿ nchòhó ñáyiu ndècu ndihí-ndí ichi Xítohó Jesucristú ío cãháⁿ-ndí dóho-ndo sã vã dáñá niñnu-ndo ichi-gá, te ni vã nãcuànaa-ndo nchaa tnúhu ní cãháⁿ-ndí núú-ndó cùtnàhá ní xindecu ndihí ñaha-ndí xii-ndo, te ñu-ni ducaⁿ càda-ndo nchaa tnúhu tëndaha-ndí véxi. ¹⁶⁻¹⁷ Te xicáⁿ táhú-ndí núú-gã sá ná dàcãháⁿ-gá iní-ndó cùndecu-ni-ndo ichi-gá, te ducaⁿ ïo na chindee ñaha-gá xii-ndo cãháⁿ-ndó mềe-ni tnúhu vãha, te càda vãha-ndo cùndecu-ndo nãcuáa cuu vãha iní-gá, chi mee Dütú Ndiöxí ío cùu iní ñáhá-gã xii-o, te ñu-gá ní taxi-gá tnúhu ndee ìní cundecu ndihí-o ní caa ni quihíⁿ, te ní cachí tnúhu tucu-gá ñngá tnúhu vãha sá cùndetu-o Xítohó Jesucristú.

3

Cãháⁿ ndihí-ndo Yá Ndiöxí cuendá-ndí

¹ Te nchòhó ñáyiu ndècu ndihí-ndí ichi Xítohó Jesucristú, ndéé núu ndíhí-ñã cãhí tnúhu-í xii-ndo sã cãháⁿ ndihí-ndo Yá Ndiöxí cuendá-ndí cuendá sã ná chindee ñaha-gá xii-ndí, te ducaⁿ ndihí-ni cuténuu tnúhu Xítohó Jesucristú nchaa xichi, te cudíí iní-yu tnúhu-gá dàtná quidé nchòhó. ² Te cãháⁿ ndihí tucu-ndo Yá Ndiöxí cuendá sã ná còto ñaha-gá xii-ndí, te ñã túú nã càda ñaha ñáyiu cuihna ìní-xi ndècu ichi cuèhé ichi duha xii-ndí, chi ñã nchãá-yu sãndáá iní-yu tnúhu-gã. ³ Dico Xítohó Jesucristú quidé-gã nchaa sã cãháⁿ-gã, te ñu-gá càda te nchòhó cundecu-ni-ndo

ichi-gá, te coto ñaha-gã xii-ndo cuendá sá ñà túú nã cada ñaha yucu ñávãha. ⁴ Te Xítoho Jesucristú quidé-gã cútnùní iní-ndí sá nchòhó quidé-ndó nchàa nacuáa ní dánèhé ñáhá-ndí xii-ndo, te ñu-ni ducaⁿ càda-ndo cundecu-ndo. ⁵ Te xicáⁿ táhú-ndí núú Yã Ndiòxí sá ná chindee ñaha-gã xii-ndo cùu iní-ndó-gã, te ñu-ni-gá ná chindee ñaha-gã xii-ndo cùnduu cahnu iní-ndó, chi Xítoho Jesucristú ducaⁿ ïo càhnu iní-gá.

Tàú-ó càda chiuⁿ-o

⁶ Te nchòhó ñáyiú ndècu ndihí-í ichi Xítoho Jesucristú, càháⁿ-í dóho-ndo sã mée-gã cuiní-gá sá vã nihí tnáhá-gã-ndó ndihí ndéda-ni càa ñáyiú càchí sá sàndáá iní tnúhu-gá, ñáyiú ñá túú cuiní cada chiuⁿ, chi ñáyiú ducaⁿ xiquide ñá túú cuiní-yu tñí-yu tnúhu sá ñí dánèhé ñáhá-ndí xii-ndo. ⁷ Te nchòhó sa xini-ndó nacuáa cada-ndo cundecu-ndo canchicúⁿ nihnu-ndo nacuáa quide-ndí. Te cútnáhá ní xindecu ndihí ñaha-ndí xii-ndo chi ni ñíⁿ nduu ñá túú ní tühío-ndí. ⁸ Te ni ñà túú dìcò ducaⁿ ni quèheⁿ-ndí sá ndécú ndihí ñáyiú caxi-ndí àdi canehe-ndí, chi cuèi nduu cuèi niú ío ní quide chiúⁿ-ndí ní nihí-ndí díhúⁿ ñí saaⁿ-ndí nchaa sá ñí nándihí-ndí cuendá sá ñà túú ní cuiní-ndí chichiuⁿ ñaha-ndí xii-ndo. ⁹ Te cuèi tàú ndisa-ndí cachí tnúhu-ndí xii-ndo sã chindèe ñaha-ndo xii-ndí ní cùu, dico ní quide chiúⁿ-ndí cuendá ní cuiní-ndí danèhé ñáhá-ndí xii-ndo nacuáa cada-ndo cundecu-ndo. ¹⁰ Te cútnáhá ní xindecu ndihí ñaha-ndí xii-ndo ñí cachí-ndí sá ncháá ñáyiú ñá túú cuiní cada chiuⁿ te vã cuãha-ndó-yu sá cáxí-yu. ¹¹ Te vitna nihí-ndí tnúhu sá ìo dava nchòhó ñá túú tnàhí quide chiuⁿ-ndo, chi àúⁿ nã cuu ndí cuu ndí cuu-ni-ndo núú ndécú dàva-gã tnàha ñáyiú-ndo. ¹² Te yúhú càháⁿ-í dóho nchaa nchòhó ñáyiú ducaⁿ ñà túú cuiní cada chiuⁿ sá càdá chiúⁿ-ndo cuendá nihí-ndó nchàa sá cóhó sã cáxí-ndó, te duha càháⁿ-í dóho-ndo, chi ducaⁿ cuiní Xítoho Jesucristú Yáá táxí tnùnì ñáhá xii-o cada-ndo, te òré cada chiúⁿ-ndo te vã ïo cada dusaⁿ-ndo.

¹³ Te nchòhó ñáyiú ndècu ndihí-í ichi Xítoho Jesucristú, vã dáñá ndéé-ndó càda-ndo mee-ni sá vãha. ¹⁴ Te núú ñíⁿ ñáyiú ndècu ndihí-ndo ñá túú cuiní-yu

tñí-yu tnúhu càháⁿ-ndí núú tütú-a, te cundehe-ni-ndo núú ndéda càa-yu, te vã nihí tnáhá-gã-ndó ndihí-yu cuendá sá ná cùcahaⁿ núú-yu, ¹⁵ dico vã cúú ùhú iní-ndó-yu, chi càháⁿ-ndó dõho-yu cada-ndo sã ndécú-ndó ìchi Xítoho Jesucristú ndihí-yu.

Tnúhu ndéé núú ñí ndihí-ná

¹⁶ Te mee Xítoho Jesucristú ío váha cùu iní-gá ndécú-gã, te xicáⁿ táhú-í núú-gã sá mée-gã ná càdá te ío váha cuu iní-ndó tnáhá-ndó cundecu-ndo cuèi nása-gá ná cundecu-ndo. Te mee-gã ná cundecu ndihí ñaha-gã xii-ndo nchàa-ndo.

¹⁷ Te vitna yúhú té Pãblú tée-í tnúhu-a quide ndee iní ñáhà-í xii-ndo, te ñu-ni duha càa nchaa letrá-í nchaa núú tütú càdúha-í. ¹⁸ Te xicáⁿ táhú-í núú Xítoho Jesucristú sá ïo na chindee chitúu ñaha-gã xii-ndo nchàa-ndo. Te ducaⁿ na cùnduu. Te ïo chí càdá ndèe iní-nã vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA TÉ TIMŪTEÚ

Té Pāblú cadúha-dé tutú quíhĪⁿ ndaha té Timùteú

¹ Yúhú té Pāblú ní tendaha ñaha Yá Ndiöxí cāháⁿ-í tnúhu Xítohó Jesucristú núú ñáyiú chi ducaⁿ ñí cachí Yá Ndiöxí cunduú, te diu-gá cúu-gă Yaá ní dácăcu ni-hnu ñaha xii-o núú ùhú núú ndàhú. Te tnàhá Xítohó Jesucristú ducaⁿ ñí cachí-gá sá cāháⁿ-í tnúhu-gá, te diu-gá ní taxi-gá tnúhu ndee iní xii-o sá cundecu-o ndihĪ-gá ñí caa ñí quíhĪⁿ. ² Te yòhó té Timùteú cúu-n ĩⁿ té ní sanu ichi ndisa-í ichi Xítohó Jesucristú chi ío váha ní sándáá iní-n-gă. Te cadúha-í ĩⁿ tutú daquixi-í ndaha-n. Te xicáⁿ táhù-í núú Tátá-ó Dütú Ndiöxí ndihĪ núú Xítohó Jesucristú sá ío na chindee chítúu ñaha-gă xii-n, te ducaⁿ ndi nduú-gá ná cádá te ío váha cuu iní-n cundecu-n.

Cuendá nchaa ñáyiú dāndahú tnàha ñáyiú-xi

³ Te nàha-ñ nacuáa ní cāháⁿ-í cútnàhá ní quee-í ñúú Éfesú véxi-í distritú Macèdoniá, chi ní cachí-í sá quéndōo-n ñúú-án cāháⁿ-n dōho nchaa ñáyiú dāndahú ñáhá cāchí sá cāháⁿ tnúhu Yá Ndiöxí te ñá ndáá sá cāháⁿ-yu tnúhu-gá, te diu-ni ducaⁿ cāháⁿ-í vitna cada-n cundecu-n. ⁴ Te cúñaha-n xii-yu sá vă cádá cuendá-yu nchaa cuendú ñihĪ-yu nacuáa ní xóo cada ñáyiú ní xindecu ndéé sanaha, te nchaa cuendú-án dīcó chínáá ñáhá-xí chi ñá túú vėdana nāndihĪ-xi, te ñí ñá túú chindee ñaha-xi cada-o nacuáa cuiní Yá Ndiöxí, chi mee-ni sá quindáá iní-ó-gă quidé-xí quide-o nchaa nacuáa cuiní-gă.

⁵ Te duha cāháⁿ-í cúñaha-n xii-yu cuendá sá ná cūu iní-yu tnàha ñáyiú-yu, te xini ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yá Ndiöxí, te vá cání ĩⁿ caní úú iní-yu, te núu ducaⁿ na cádá-yu te cuu iní ndisá-yu nchaa tnàha ñáyiú-yu. ⁶ Chi dava ñáyiú ñá túú-gă quidė-yu nchaa nacuáa cāháⁿ-í-a,

chi mee-nă nchaa cuendá sá ñá túú vėdana nāndihĪ xicāháⁿ-yu. ⁷ Te cuiní-yu cāháⁿ-yu nchaa tnúhu ní cāháⁿ ndi Moisés dico ñá ndácū-yu, chi cuēi ñí yūhu ñí iní-yu cāháⁿ-yu dico ñá tēcú tnūnĪ-yu nacuáa ní cāháⁿ ndi, te ñí tnūhu cāháⁿ mēē-yu ñá cútnūnĪ iní-yu nacuáa ndūu-xi.

⁸ Te sa nàha-o sá nchāá tnūhu ní cāháⁿ ndi Moisés váha, te núu na tēcú tnūnĪ-ó ñá cuendá ducaⁿ ñí ngūndecu nchaa tnúhu-án.

⁹ Te cūtnūnĪ iní-ó sá ñá díú sá cúu-xí nchāá ñáyiú quide váha ndecu ñuyiú-a ñí ngūndecu nchaa tnúhu-án, chi ní ngūndecu-xi sá cúu-xí nchāá ñáyiú ñá túú quide váha, ndihĪ cuendá nchaa ñáyiú ío sáá iní-xi, ndihĪ cuendá nchaa ñáyiú quide cuehé quidé dūha, ndihĪ cuendá nchaa ñáyiú ío ndecu cuēchi-xi, ndihĪ cuendá nchaa ñáyiú ñá túú nèhe vėdana sá yĪñūhu núú Yá Ndiöxí, ndihĪ cuendá nchaa ñáyiú ñá túú cāháⁿ váha cuendá ichi Yá Ndiöxí, ndihĪ cuendá nchaa ñáyiú sàhni tátá-xi ndihĪ nāná-xi, ndihĪ cuendá nchaa dava-gá ñáyiú sàhni tnaha, ¹⁰ ndihĪ cuendá nchaa cue té cāháⁿ ndihĪ ñáyiú dīhĪ te ñá díú ñāndihĪ-güedé cúu-yu, ndihĪ cuendá tucu nchaa ñáyiú dīhĪ cāháⁿ ndihĪ cue té te ñá díú yĪ-yu cūu-güedé, ndihĪ cuendá nchaa cue té cāháⁿ ndihĪ tnàha ndi mee té-xi, ndihĪ cuendá nchaa ñáyiú chiváha tnàha ñáyiú-xi cuendá sá cuiní-yu ñihĪ-yu díhúⁿ, ndihĪ cuendá nchaa ñáyiú ndehnde, ndihĪ cuendá nchaa ñáyiú cācunehe ndéé Yá Ndiöxí cuendá cuiní-yu cutnūnĪ iní tnàha ñáyiú-yu sá cāháⁿ ndáá-yu, te ñá ndáá sá cāháⁿ ndáá-yu, ndihĪ cuendá nchaa ñáyiú quide nchaa dava-gá sá ñá túú tàuchiuⁿ Yá Ndiöxí cadá-yu. Cuendá nchaa ñáyiú ducaⁿ xiquide ní ngūndecu nchaa tnúhu-án. ¹¹ Te nchaa tnúhu-án ĩⁿ-ni cūu-xi ndihĪ nchaa tnúhu sá ñí cachí Yá Ndiöxí cāháⁿ-í, te tnúhu-án cúu-xí tnūhu váha vĪhi, chi mee-gă ío váha iní-gă.

Té Pāblú ndácáⁿ táhú-dė núú Yá Ndiöxí sá ñí cundāhú iní ñáhá-gă xii-dė

¹² Te Xítohó Jesucristú ní cutnūnĪ iní-gá sá cádá ndáá-í cada-í nchaa chiuⁿ tahu-gă. Te ndácáⁿ táhú-í núú-gă sá ñí taxi-gă chiuⁿ-gă quidė-í, te ío chindee ñaha-gă xii-í. ¹³ Te ní taxi-gă chiuⁿ-gă quidė-í cuēi ní xóo cāháⁿ

cuèhé-í cuèndá-gá, te cuèi ní xóo cúu cuèhé cúu duha-í nchaa ñáyiú ndècu ichi-gá, te cuèi nándi-gá sá ñi xóo cada-í-yu dico ní cundàhú iní ñáhá Yă Ndiöxí xii-í, chi vátá quìndáá-gá iní-í Xítóhó Jesucristú cútnàhá ducaⁿ ñi xóo cada-í, te ni ñă cútnùní iní-í nchaa sá quidè-í ní cùu, te cuèi ducaⁿ ñi xóo cada-í, ¹⁴ dico Yă Ndiöxí ío ní cundàhú iní ñáhá-gă xii-í te chindee ñaha-gá. Te mee Xítóhó Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

¹⁵ Te ñihí-ó tnúhu sá Xítóhó Jesucristú ní quixi-gá ñuyíú-a cuèndá sá dácăcu nihnu-gá nchaa ñáyiú ndècu ichi cuehé ichi duha. Te tnúhu-áⁿ cúu-xí ñⁿ tnúhu ndáá, te xini ñuhu-xi quindáá iní nchaa nchoo ñáyiú ndècu ñuyíú-a. Te yúhú cúu-í tée ío-gá ndécú cuèchi-xi núú Yă Ndiöxí ní cùu. ¹⁶ Te Yă Ndiöxí ní cundàhú iní ñáhá-gă ní dácăcu nihnu ñaha-gă xii yúhú tée xidó ndécú cuèchi-xi ní cùu, cuèndá cutnùní iní nchaa ñáyiú sá Xítóhó Jesucristú ío càhnu iní-gá. Te sá dúcáⁿ ñi quide ñaha-gă xii-í, te xiăⁿ cutnùní iní-yu sá núu na quindáá iní ñáhă-yu xii-gá te cundecú-yu ndihí-gá ni caa ni quíhíⁿ. ¹⁷ Te nchaa-o chí ná cächí-ó sá ío càhnu cuu Yă Ndiöxí, te canehe-o sá yíñuhu núu-gă ni caa ni quíhíⁿ, chi mee-gă cúu-gă Yaá táxi tnùní nchaa nduu nchaa quíú. Te cùu-gá ñⁿ Yaá ñă túú xini núu-ó, te ñⁿdii díí-ni-gă ío ndècu ndihí-gá nchaa sá xini tnùní-gá.

¹⁸ Te yòhó té Timùteú tée cùu datná ñⁿ déhe mee-í sa nàha-n nacuaá ní cáháⁿ dava-gá cue tée cáháⁿ tnúhu Yă Ndiöxí cuèndá-n, te diu-ni ducaⁿ cáháⁿ-ú tucu, te cada-n nchaa nacuaá cáháⁿ tnúhu-áⁿ chi diu nchaa tnúhu-áⁿ canu ichi ñaha-xi xii-n cada-n nchaa nacuaá cuini Yă Ndiöxí. ¹⁹ Te ío quindáá iní-n Xítóhó Jesucristú, te cada váha-n cundecu-n nacuaá cundecu váha iní-n, chi dava ñáyiú ñă túú-gă ducaⁿ quidé-yu núu xiăⁿ ñă túú-gă sàndáá iní-yu nàcuáa cáháⁿ tnúhu-gá. ²⁰ Te diu-ni ducaⁿ ñi quide té Himèneú ndihí té Lijandrú ní dáñá ndèe-güedé ñă túú-gă sàndáá iní-güedé nàcuáa cáháⁿ tnúhu Xítóhó Jesucristú, te ní xáhaⁿ-í xii-güedé sá ná cùndoho-ná-güedé núu nása cada ñaha sàcuíhná xii-güedé,

te ducaⁿ ñi xáhaⁿ-í cuèndá sá vă cáháⁿ cuèhé-gá-güedé cuèndá Yă Ndiöxí.

2

Nàcuáa cáháⁿ ndihí-o Yă Ndiöxí

¹ Te na cächí tnúhu-í xii-n nchaa nacuaá cada-n. Te díhna-gá cächí tnúhu-í sá cáháⁿ ndihí-n Yă Ndiöxí cuèndá nchaa ñáyiú te núu nása cùu xindecú-yu, te cécáⁿ táhú-n núu-gă cuèndá-yu, te ducaⁿ ío ndacáⁿ táhú-n núu-gă cuèndá nchaa sá vâha quide ñaha-gá xii-yu. ² Te ducaⁿ cáháⁿ ndihí-n Yă Ndiöxí cuèndá nchaa cue tée cùnuu ndihí cuèndá nchaa dava-gá cue tée cùchiuⁿ cuèndá cada váha-güedé, te ducaⁿ nchòo ñă túú ñă cuu cundecu-o, te ñă túú tnàhí ná cani iní-ó cundecu-o, te ío cundecu yíñuhu-o núú Yă Ndiöxí, te cada-o nchaa nacuaá tàú-xi cunduu. ³ Te núu ducaⁿ na càda-o cáháⁿ ndihí-o Yă Ndiöxí cuèndá nchaa ñáyiú te quide váha-o, te ndùu vétú iní Yă Ndiöxí Yaá ní dácăcu nihnu ñaha xii-o núú ùhú núú ndàhú. ⁴ Te mee-gă cuini-gá sá ncháá ñáyiú tecú tnùní-yu nchaa tnúhu cáháⁿ-gá, chi cuini-gá sá nánihí tàhú-yu. ⁵ Te ñⁿ-ni Dútú Ndiöxí ndécú, te ñⁿ-ni Xítóhó Jesucristú, te medii-ni Xítóhó Jesucristú quidé-gă tnàhá tnúhu-o ndihí Yă Ndiöxí. ⁶ Te Xítóhó Jesucristú ní dáñá-gă mée-gă ní sahani ñaha-güedé xii-gá cuèndá sá cuini-gá sá căcu nihnu nchaa ñáyiú ndècu ñuyíú núú ùhú núú ndàhú. Te Yă Ndiöxí cuini-gá sá ncháá ñáyiú ñuyíú ndécú vitna níhí-yu tnúhu nàcuáa ní cuu ní xihí Xítóhó Jesucristú. ⁷ Te Yă Ndiöxí ní cachí-gá sá cáháⁿ-í tnúhu-áⁿ ndèni ní cuu núú xindecú ñáyiú ñă túú cùu ñáyiú israhél, te mee-ni tnúhu ndáá dánèhé-í-yu nàcuáa quindáá iní ñáhă-yu xii-gá, te yúhú cáháⁿ ndáá-í sá Yă Ndiöxí ní cachí-gá sá cáháⁿ-í tnúhu-gá chi ndècu ndihí-í Xítóhó Jesucristú, te ñă túú dândahú ñáhà-í xii-n.

⁸ Te yúhú cuini-í sá ncháá xichi cáháⁿ ndihí cue tée Yă Ndiöxí, te na cùnduu ndoo cunduu nine iní-güedé òré ndonehe-güedé ndaha-güedé cáháⁿ ndihí ñaha-güedé xii-gá, chi vá cúu cùdèéⁿ-güedé cuèndá nchaa sá quidé ñaha ñáyiú xii-güedé, te ni vă caní iní-güedé cúcuèhé tnàhá-güedé ndihí-yu. ⁹ Te cächí tnúhu-í xii-n sá ncháá ñáyiú díhí ná cùnduu dío-yu nàcuáa tàú-xi cunduu, te

vá cunduu cuehé cunduu duha dàtná cáá dño nchaa ñáyi ndècu ichi cuehé ichi duha, te na ndádá-yu díquĩ-yu nàcuáa tàú-xi cunduu, te vá ndádá cuèhé ndada duhá-yu, te vá cání ìní-yu cunduu vii-yu ndihí sá ïo ndèyáhu, te ni vǎ cání ìní-yu cuihnú-yu dóó sǎ ïo ndèyáhu. ¹⁰ Te mee-ni sǎ vǎha cada-yu, chi ducaⁿ tàú-xi cada nchaa ñáyi dñí ndécú ichi Yá Ndiöxí. ¹¹ Te òré tàcá-yu núú dácuahá-yu tnúhu Yá Ndiöxí, te cue ñáyi dñí-áⁿ na nàhi dacuahá-yu tnúhu-gá, te cada-yu nchaa nàcuáa càháⁿ cue téè dácuaaha ñaha xii-yu tnúhu-gá. ¹² Te yúhú càchí-í sǎ vǎ cúú dácuaaha ñáyi dñí cue téè, te ni vǎ cúú tàxi tnuní ñáhǎ-yu xii-güedé chi cunduu tnáví-ni yuhú-yu cundedóho-yu. ¹³ Te ducaⁿ xini ñuhu-xi cada-yu, chi Yá Ndiöxí ní cadúha-gá díhna-gá té Àdán te dàtnuní ní cadúha-gá tá Èvá. ¹⁴ Te ñá díú mèe té Àdán ní dándahú ñáhǎ sàcuíhnǎ xii-dé, chi tá Èvá ní dándahú-xi, te ñá túú ní quide váha-xi núú Yá Ndiöxí sǎ dúcáⁿ ní sándáá ìní-xi tnúhu ní cáháⁿ sàcuíhnǎ-ǎⁿ. ¹⁵ Dico ñáyi dñí ní nduu táhǎ-yu sǎ cóó dèhe-yu, te naníhí tàhú-yu te núú vá dáñǎ ndèè-yu canchicúⁿ nihnú-yu ichi Yá Ndiöxí, te cundecu yíñuhú-yu núú-gǎ, te cuu ìní-yu nchaa tnàha ñáyiú-yu, te cada-yu nchaa nàcuáa tàú-xi cunduu cundecú-yu.

3

Nàcuáa tàú cue téè yíndaha ñaha xii ñáyi ndècu ichi Yá Ndiöxí cada-güedé

¹ Te ío ñⁿ tnúhu càháⁿ ñáyi sǎ nõu ñⁿ téè cuíni quíndaha ñaha xii ñáyi ndècu ichi Yá Ndiöxí, te ñⁿ sǎ vǎha cuíni-dé cada-dé càchí-yu, te ndáá quèé-xí tnúhu càháⁿ-yu. ² Te yúhú càchí-í sǎ cuè téè ducaⁿ na quíndaha ñaha xii ñáyi te xini ñuhu-xi cuu-güedé cue téè quide ndáá cuèndá sǎ vǎ càháⁿ ñáyi cuèndá-güedé sǎ ñá túú quide ndáá-güedé. Te na cùu-güedé cue téè ndèca ñⁿ caa-ni ñadihí, te na cùu-güedé cue téè ñá túú quide cutexínu ndècu, te na cùu-güedé cue téè quide nchaa nàcuáa tàú-xi cunduu, te na cùu-güedé cue téè sǎñaha nõu vehe ndetatú nchaa ñáyi ñuhu ichi, te na cùu-güedé cue téè dànehé ñáhǎ vǎha xii ñáyi tnúhu Yá Ndiöxí. ³ Te vǎ

cúu-güedé cue téè quihu, te ni vǎ cúu-güedé cue téè ndècu pletú, te ni vǎ cúu-güedé cue téè dícó-ni ducaⁿ ñihí díhúⁿ, te ni vǎ cúu-güedé cue téè sàni ìní nǎá, te ni vǎ cúu-güedé cue téè ñuhu ìní mee-ni díhúⁿ. Chi na cùu-güedé cue téè váha ìní-xi te cunduu càhnu ìní-güedé. ⁴ Te na cùu-güedé cue téè ío váha sànu ichi ñadihí-xi ndihí landú-xi, te na cùu-güedé cue téè quide nàcuáa sándáá ìní ñáhǎ landú-xi cuèndá canehe-güexi sǎ yíñuhu núú-güedé. ⁵ Chi núu cùu-güedé cue téè ñá ndácú cànuichi ñadihí-xi ndihí landú-xi, te vǎ ndácú-güedé quíndaha-güedé cue ñáyi ndècu ichi Yá Ndiöxí. ⁶ Te vǎ cúu-güedé cue téè íchí ní sándáá ìní-xi tnúhu Yá Ndiöxí, chi na cuáhǎⁿ te cada nínu-güedé méè-güedé te cuíta nihnu-güedé dàtná ní xíta nihnu sàcuíhnǎ. ⁷ Te xini ñuhu-xi cuu-güedé cue téè càháⁿ váha ñáyi cuèndá-xi, cuèi ñá díú ñáyi ndècu ichi Yá Ndiöxí cuèndá sǎ vǎ cuátnúhu ñaha ñáyi xii-güedé, chi núu ñáhǎ te cudana te sàcuíhnǎ quesaha-xi tàxi tnuní ñáhǎ-xi xii-güedé.

Cue téè chindee ñaha xii cue téè yíndaha ñaha xii ñáyi ndècu ichi Yá Ndiöxí

⁸ Te tnàhá cue téè chindee ñaha xii cue téè yíndaha ñaha xii ñáyi ndècu ichi Yá Ndiöxí xini ñuhu-xi cuu-güedé cue téè quide nchaa nàcuáa tàú-xi cunduu, te vǎ cúu-güedé cue téè càchí sǎ càháⁿ ndáá te ñá ndáá, te ni vǎ cúu-güedé cue téè quihu, te ni vǎ cúu-güedé cue téè sàni ìní-xi dícó-ni ducaⁿ ñihí díhúⁿ. ⁹ Te xini ñuhu-xi cuu-güedé cue téè ñá túú dàña ndéè sándáá ìní tnúhu Yá Ndiöxí, te na cùu-güedé cue téè ío váha cùu ìní-xi cuèndá nchaa sǎ vǎha quide-güedé. ¹⁰ Te xini ñuhu-xi coto ndéè ñáhǎ xii-güedé te núu cùu-güedé cue téè quide váha, te núu cùu-güedé cue téè quide váha ña te cuu chindee-güedé cue téè yíndaha ñaha xii ñáyi ndècu ichi Yá Ndiöxí. ¹¹ Te tnàhá tucu nchaa ñáyi dñí ná càdá-yu nchaa nàcuáa tàú-xi cunduu, te vǎ cunduu yiti yuhú-yu, te ni vǎ cúu-yu ñáyi quide cutexínu ndècu, te na cùu-yu ñáyi ío váha quide ndáá. ¹² Te nchaa cue téè chindee ñaha xii cue téè yíndaha ñaha xii ñáyi ndècu ichi Yá Ndiöxí, xini ñuhu-xi cuu-güedé cue téè ndècu ñⁿ caa-ni

ñadihí-xi, te na cùu-güedé cue tée sànu ichi váha ñadihí-xi ndihi landú-xi. ¹³ Te núu na càda ndáá-güedé chindee-güedé cue tée yindaha ñaha xii ñáyu ndècu ichi Yá Ndiöxí, te canehé-yu sá yíñuhu núu-güedé, te ducaⁿ te vá cúu càháⁿ núu-güedé càháⁿ-güedé núu ñáyu tnúhu Xítohó Jesucristú sá sàndáá iní-güedé.

Ío càhnu cuu tnúhu càháⁿ Yá Ndiöxí

¹⁴ Te cuini-í ndihi-ni quixi coto ñaha-í xii-n dico díhna-gá cadúha-í tutú-a daquixi-í ndaha-n ¹⁵ chi na cuháⁿ cuyaa-í. Te xiáⁿ núu cadúha-í tutú-a daquixi-í ndaha-n cuendá cutnùní iní-n nãsa cada-n cùndecu-n ndihi nchaa ñáyu ndècu ichi Yá Ndiöxí. Te ñáyu-áⁿ cúu-yu dàtná ìⁿ vehe cùu cuendá Yá Ndiöxí Yaá ndécú nchaa nduu nchaa quíú, chi ndècu ndihi ñaha-gá xií-yu, te cúu-yu ñáyu càháⁿ váha cuendá tnúhu-gá. ¹⁶ Te cùtnuní ndáá iní-ó sá ío càhnu cuu tnúhu càháⁿ Xítohó Jesucristú, tnúhu sá càháⁿ nacuáa ndùu ichi ndecu-o, te duha càháⁿ tnúhu-áⁿ:
Te ní quixi Yá cúu Ndiöxí ñuyú-a ní cuu-gá ìⁿ ñáyu,
te Espíritú Yá Ndiöxí ní càháⁿ ndáá-xi sá cúu-gá ìⁿ Yaá ío váha quide ndáá,
te cue espíritú xínú cuèchi núu Yá Ndiöxí ní xíní ndáá-xi nchaa nacuáa ní quide Yaá ní quixi ñuyú-a.
Te ní xité nuu tnúhu-gá nihí ñuyú-a,
te ndèni ní cuu ní ngúita-yu sàndáá iní ñáhã-yu xii-gá,
te mee-gá cuánda-gá andiú.
Duha càhí tnúhu-áⁿ.

4

Ñáyu dañã nihnu vá quindáá-gá iní-yu Yá Ndiöxí

¹ Te Espíritú Yá Ndiöxí càháⁿ ndáá-xi sá sáa nduu dañã nihnu dava ñáyu ndècu ichi-gá vá quindáá iní ñáhã-gã-yu xii-gá, te ducaⁿ chi cue espíritú cùndihi yucu ñávãha dandáhú ñáhã-xí xií-yu, te mee-nã nchaa tnúhu càháⁿ nchaa ñáyu cùndihi nchaa espíritú-áⁿ cuhuⁿ iní-yu. ² Te nchaa ñáyu ducaⁿ cùndihi cue espíritú cùndihi yucu ñávãha-áⁿ cúu-yu ñáyu ío dandáhú méé-xí chi càhí-yu sá càháⁿ ndáá-yu te ñã ndáá, te ñã túu tnáhí-gá ná quidé-xí iní-yu

cuendá nchaa sá cuèhé sá dúhá quidé-yu. ³ Te ñáyu-áⁿ quesáhã-yu sá vã cúu càndeca tnaha ñáyu, te ní vá cúu càxi-yu dava núu sã xíní-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuini-gá sá ncháá nchòo ñáyu sàndáá iní tnúhu-gá ndacáⁿ táhú-ó núu-gã òré caxi-o. ⁴ Te nchaa sá ní cadúha Yá Ndiöxí cúu-xí sã váha te vá dáquèe tíhú-ó, te xini ñuhu-xi ndacáⁿ táhú-ó núu-gã cuendá nchaa xiáⁿ. ⁵ Te Yá Ndiöxí càhí-gá sá méé-gã quidé-gã cúu-xí sã váha sá cúu-xí-ó te núu na ndacáⁿ táhú-ó núu-gã.

Tée quide ndáá xínú cuèchi núu Xítohó Jesucristú

⁶ Te núu na dàcuaha-n ñáyu ndècu ndihi-o ichi Xítohó Jesucristú nchaa nacuáa càháⁿ-í-a ñã, te cuu-n ìⁿ tée quide ndáá xínú cuèchi núu-gã, te nducu ndèe-ni-n dacuaha-n tnúhu Yá Ndiöxí sá sàndáá iní-n, te canchicúⁿ nihnu-ni-n càda-n nchaa nacuáa càháⁿ-gá, te núu ducaⁿ nã cada-n, te níhí ndéé-n cùndecu-n ichi-gá. ⁷ Te vá cáda cuendá-n nchaa cuendú cuèhé cuendú duha càháⁿ ñáyu, ndihi nchaa dava-gá cuendú sá ñã túu nandíhi cuendá sá ñã túu nã cumáni-n cùndecu-n núu Yá Ndiöxí. ⁸ Te núu ìⁿ chiuⁿ cada-o te nacaá luha yiqui-o te nandíhi-xi luha, dico ío-gá nandíhi-xi te núu cada-o sã cùndecu yíñuhu-o núu Yá Ndiöxí. Te núu ducaⁿ na càda-o te cùu-xi ìⁿ sá váha sá cúu-xí-ó vitna, te ní caa ní quíhíⁿ ducaⁿ cùu-xi ìⁿ sá váha sá cúu-xí-ó. ⁹ Te xini ñuhu-xi sá ncháá-ndó quindáá iní-ndó nchaa tnúhu càháⁿ-í-a chí cùu-xi tnúhu ndáá. ¹⁰ Te vitna ío nducu ndee-o quide-o chiuⁿ Yá Ndiöxí Yaá ndécú nchaa nduu nchaa quíú te quide ndee iní-ó cuendá nchaa sá quidé ñaha ñáyu xii-o, chí sàndáá iní-ó sã díú-gã chindèe ñaha-gá xii-o. Te nchaa ñáyu cùndahú iní ñáhã-gã te chindee ñaha-gá xií-yu, dico ñáyu sàndáá iní ñáhã xii-gá ío-gá cùnùu-yu chindee ñaha-gá xií-yu, chí dàcácu nihnu ñaha-gã núu ùhú núu ndáhú.

¹¹ Te nchaa tnúhu-áⁿ cùñaha-n xií-yu, te càháⁿ-n dôho-yu sá ná cáda-yu nchaa nacuáa càháⁿ-xi. ¹² Te ío cada váha-n cùndecu-n cuendá sá vã yõo daquèe tíhú ñáhã xii-n cuendá sá cúu-n tée cuechi, te ío váha cada-n nchaa sá tau-n càda-n cuendá

ducaⁿ cànchicúⁿ nihnu nchaa ñáyiú ndècu ichi Yá Ndiöxí, te vii vii cáháⁿ ndihí-n-yu, te cuu iní-n-yu, te ío quindáá iní-n Yá Ndiöxí, te mee-ni sã vâha cani iní-n, te ducaⁿ càda-n cuendá canchicúⁿ nihnú-yu. ¹³ Te nini cùyaa-í quixi-í, te ío nducu ndèe-n cáháⁿ ndodo-n tnúhu Yá Ndiöxí núu-yu, te dacuahá-n-yu nacuáa càháⁿ tnúhu-gá, te cáháⁿ-n dôho-yu nacuáa cuu vii cuu vâha iní-yu cundecú-yu ichi Yá Ndiöxí. ¹⁴ Te vá dáñá ndèe-n càda-n nacuáa ndùu táhú ñí taxi Yá Ndiöxí ní ngúndecu ndihí-n cùtnàhá ní sacáⁿ ndodo cue téé yìndaha ñaha xii ñáyiú ndècu ichi Yá Ndiöxí ndaha-güedé díquí-n, te ní cachí tnúhu-güedé sá dúcáⁿ ñí cuiní Yá Ndiöxí cunduu.

¹⁵ Te ñí yùhu ñí iní-n càda-n nchaa nacuáa càháⁿ-í-a cuendá sá ná quini ñáyiú sá ío-gá vâha ta quide-n cuáháⁿ. ¹⁶ Te ío vâha cundehe-n nchaa nacuáa quide-n, ndihí nchaa nacuáa dânehé-n-yu, te vá dáñá ndèe-n dùcaⁿ cada-n. Te núu ducaⁿ na càda-n te nduu táhú-n cundecu vâha-n núu Yá Ndiöxí ñí caa ñí quíhíⁿ ndihí nchaa ñáyiú na tédóho nchaa tnúhu càháⁿ-n.

5

Nacuáa tàú-xi cada-o cundecu-o ndihí ñáyiú sàndáá iní tnúhu Yá Ndiöxí

¹ Te vá ténáá-n nchaa cue téé cùu sacuéhé chi vii vii cáháⁿ-n dôho-güedé, te cada iní-n sã dàtná tâtá-n cùu-güedé, te ñíu-ni ducaⁿ vii vii cáháⁿ-n dôho nchaa cue téé cuechi, te cada iní-n sã dàtná cue ñani-n cùu-güedé.

² Te ñíu-ni ducaⁿ vii vii cáháⁿ tucu-n dôho nchaa ñáyiú ñíhí ñáyiú cùu sacuéhé, te cada iní-n sã dàtná ñaná-n cùu-yu, te ñíu-ni ducaⁿ vii vii cáháⁿ tucu-n dôho nchaa ñáyiú ñíhí ñáyiú cuechi, te cada iní-n sã dàtná cue cúha-n cùu-yu, te ío cuu vâha iní-n òré ducaⁿ cáháⁿ-n dôho nchaa ñáyiú cuechi-ãⁿ.

³ Te canehe-n sã yíñùhu núu ñáyiú ñíhí ní quendóo quèé, te chindèe-n-yu núu ndàhú-yu. ⁴ Te núu ñí ñaha quèé ndécú cuè déhe-aⁿ àdi cue déhe ñani-aⁿ, te ío xini ñihu-xi cada-güexi nchaa nacuáa tàú-xi cunduu núu-aⁿ chi ducaⁿ cuiní Yá Ndiöxí cada-güexi. Te núu ducaⁿ na càda-güexi te nanchocáva-güexi quide-güexi sá vâha sá cúu-xí ñáyiú ní dacuéhnú ñaha xii-güexi. Te núu ducaⁿ na càda-güexi te quide vâha-güexi

te ío nduu vétú iní Yá Ndiöxí. ⁵ Te ñáyiú quèé ñáyiú ndàhú ndécú ichi Yá Ndiöxí sàndáá iní-yu sá díú-gã chindèe ñaha-gá xii-yu, te cuèi nduu cuèi niú ñá túú dàña ndeé-yu càháⁿ ndihí ñahá-yu xii-gá. ⁶ Te nchaa ñáyiú quèé cúdí iní quidé nchaa sá cuèhé sá dúhá cùu-yu dàtná ñáyiú ní xihí cuèi ndècu vívü-yu. ⁷ Te cúñaha-n xii nchaa ñáyiú sá ná cáda-yu nchaa tnúhu càháⁿ-í-a cuendá sá ñá túú ñá cumání-yu cundecú-yu, te ducaⁿ vâ yôo cáháⁿ cuèhé cuendá-yu. ⁸ Te ío xini ñihu-xi chindeé-yu cue tnàha ñáyiú-yu, dico ío-gá xini ñihu-xi chindeé-yu cue ñáyiú cùu ndí meé-yu ndècu ndihí-yu, te núu vá dúcáⁿ càda-yu te ñá túú-gã sàndáá iní-yu cada-yu nacuáa càháⁿ Yá Ndiöxí. Te sá dúcáⁿ ná càda-yu te vihi-gá quide-yu dacúxí ñáyiú ndècu ichi cuehé ichi duha.

⁹ Te chido tnúni-n mèe-ni ñáyiú quèé ñáyiú sa ndècu únidico cuía-xi àdi vihi-gá cuendá ñáyiú-áⁿ cada-yu nchaa nacuáa cuiní Yá Ndiöxí núu nchaa ñáyiú ndècu ichi-gá, te ñáyiú-áⁿ xini ñihu-xi cuú-yu mee-ni ñáyiú ní quide ndáá ní xindecu ndihí yí-xi. ¹⁰ Te na cùu-yu ñáyiú quèé quidé vâha cùu-yu núu nchaa ñáyiú, te na cùu-yu ñáyiú quèé xini canu ichi vâha cue landú-xi, te na cùu-yu ñáyiú sãñaha núu vehe ndetatú cue ñáyiú ñihu ichi, te na cùu-yu ñáyiú ndècu túha quide nani chiúⁿ cuendá cue ñáyiú ndècu ichi Yá Ndiöxí, te na cùu-yu ñáyiú chindee nchaa ñáyiú ndècu ndihí tnúndôho tnúhu ndàhú, te na cùu-yu ñáyiú ñá túú dàña ndeé quidé nchaa núu sã vâha.

¹¹ Te vá chidó tnúni-n ñáyiú quèé ñáyiú ñá túú ndècu únidico cuía-xi cada chiúⁿ Yá Ndiöxí, chi núu cuechi-gã-yu ñá, te vá cundáá-yu cada-yu chiúⁿ-gá, chi quesáhá-yu natnândaha tucú-yu. ¹² Te sá cuendá xíãⁿ te nacháhu-yu núu Yá Ndiöxí, chi vá cáda-gã-yu nacuáa ní cuu tnúhu cada-yu ní cùu. ¹³ Te ngúita-yu cani

iní-yu quíhíⁿ-yu ndí vehe ndí vehe caca nihní-yu, te nchaa ñáyiú ducaⁿ quide ío cùu cuhndú-yu, te cùyiti yuhú-yu, te ndèni ní cuu cuáháⁿ-yu chinee díquí-yu vehe tnàha ñáyiú-yu ndèhé-yu núu nása ndécú-yu, te ñá túú tàú-yu ducaⁿ càda-yu, te càháⁿ-yu

mee-ni tnũhu sá ñà túú nàndíhi. ¹⁴ Núu xiǎn cuíní-í sá ncháá ñáyiú quèé ñáyiú cuechi na nàtnándaha tucú-yu cuèndá cuú-yu ñáná, te ducaⁿ càdá-yu nchaa sá xíní ñũhu-xi cadá-yu vehé-yu, te núu ducaⁿ na càdá-yu, te nchaa ñáyiú cùu úhú iní ñáhá xii-o vá ñihí-gá-yu tnúhu cáháⁿ cuèhé-yu cuèndá tnúhu Yá Ndiöxí. ¹⁵ Te dava ñáyiú quèé ndécú ichi Yá Ndiöxí ní cùu ní dáñã-yu te ní tñí-yu tnúhu càháⁿ sácúíhná.

¹⁶ Te núu dava ñáyiú ndècu ichi Yá Ndiöxí ndécú ndihí-yu ññ ñaha quèé cúú ndí meé-yu ña, te tàú-yu chindee ñáhá-yu xii-aⁿ cuèndá sá vã ïo chi chiúⁿ-aⁿ nchaa ñáyiú ndècu ichi Yá Ndiöxí, te ducaⁿ te nchaa ñáyiú ndècu ichi-gá-áⁿ ñihí ndéé-gã-yu chindéé-yu dava-gá ñáyiú quèé ñá túú vèdana ndècu ndihí.

¹⁷ Te nchaa cue téé ïo váha quide yíndaha ñaha xii ñáyiú ndècu ichi Yá Ndiöxí ïo xini ñuhu-xi canehé sá yíhí ñũhu núú-güedé, te chindee ñaha xii-güedé. Te uuⁿ-gá tàú ñáyiú ducaⁿ càdá-yu sá cúú-xí ncháa cue téé ni yùhu ni iní càháⁿ tnúhu-gá. ¹⁸ Te núu tütú Yá Ndiöxí càchí-xi: “Vá chíhí-ndó ñũnu yuhu ndicutu oré danchihí-dí triú”, duha càchí-xi. Te càchí tucu-xi ingá xichi: “Ïñ téé quide chiúⁿ dacuítí tàú-xi sá cúhúⁿ yãhu-dé”, duha càchí-xi núu tütú-gá.

¹⁹ Te núu ïo ñáyiú véxi sàcáⁿ cuéchi núú-n cuèndá ññ téé yíndaha ñaha xii ñáyiú ndècu ichi Yá Ndiöxí ñá, te cada cuèndá-n tnũhu càháⁿ-yu te núu véxi-yu ndihí úú àdi úní ñáyiú càháⁿ ndáá nàcuáa ní cuu, áⁿ núu ñáhá te vá cadá cuèndá-n tnũhu càháⁿ-yu. ²⁰ Te núu cue téé yíndaha ñaha xii ñáyiú-áⁿ ndécú cuèchi-güedé, te cáháⁿ-n dõho-güedé núu ncháa ñáyiú ndècu ichi-gá cuèndá sá dává-gã-yu vá cúyíⁿ-yu ducaⁿ càdá-yu. ²¹ Te Yá Ndiöxí ndihí Xítoho Jesucristú náhá-gã ndihí cue espíritu xínú cuèchi núú-gã sá yùhú càháⁿ-í dóho-n sã cadá-n ncháa nàcuáa càháⁿ-í-a, te ññ-ni càháⁿ ndihí-n cuè téé xini tnáhá ndihí-n, ndihí cue téé ñá túú xini tnáhá ndihí-n. ²² Te vá ïo cundihí iní-n tàxi ndecu-n ññ téé quindaha ñaha xii ñáyiú, chi díhna-gá cada cuèndá-n te núu cùu-dé ññ téé quide ndáá, chi núu cuèndá-ni na tàxi ndecu-n-dé te vá cadá ndáá-dé, te yòho ndaa díquí-n cuèndá

nchaa sá cuèhé sá dúhá càda-dé, te ïo coto-n mèe-n vá cadá-n ni ññ sá cuèhé sá dúhá.

²³ Te ducaⁿ ïo mee-ni cùhú xití-n te vá cóhó-n mèe-ni ndute, chi tnáhá luha vínú ndéhé yoho yàha stilé coho-n cuèndá cada tátna-xi.

²⁴ Te dava ñáyiú cùtnuní nchaa sá cuèhé sá dúhá quidé-yu, te cùtnuní tucu sá náchãhu-yu na sáa nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sáa nduu cùndáa cuéchi-yu te dává-áⁿ cutnuni. ²⁵ Te ducaⁿ sãtnahá-xi cùu nchaa sá váha quide dává-yu chi cùtnuní, te cuéi ñá túú cùtnuní òré-ni dico dacuítí sã sáa nduu cùtnuní.

6

¹ Te nchaa ñáyiú ndècu tnuú quidé chiúⁿ ndihí ññ patróoⁿ xini ñuhu-xi ïo canehé-yu sá yíñũhu núú-dé cuèndá sá vã càháⁿ cuèhé ñáyiú cuèndá Yá Ndiöxí, te ni vã càháⁿ cuèhé-yu cuèndá tnúhu-gá. ² Te núu patróoⁿ cue ñáyiú xinu cuechi-áⁿ sàndáa iní-dé Yá Ndiöxí, te ñá díú sã dúcáⁿ sàndáa iní-dé Yá Ndiöxí te vá canehé-yu sá yíñũhu núú-dé, chi uuⁿ-gá tàú-yu cada váha-yu cunu cuèchí-yu núú-dé, te ducaⁿ na càdá-yu chi xinu cuechí-yu núú téé sàndáa iní ndihí-yu tnúhu Yá Ndiöxí. Te vá dáñã ndéé-n dānehé-n-yu nchaa nàcuáa càháⁿ-í-a, te cúñaha-n xii-yu sá ná càdá-yu.

Nduu vétú iní-ó cùndecu-o

³ Te ïo cue téé ñá túú tññ-güedé nàcuáa càháⁿ tnúhu Xítoho Jesucristú, te cue téé-áⁿ càchí-güedé sá càháⁿ ndáá-güedé dico ñá ndáá, chi ñá túú càháⁿ-güedé nàcuáa cuáháⁿ tnúhu-gá. Te nchaa tnúhu Xítoho Jesucristú cúú-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. ⁴ Te nchaa cue téé ducaⁿ xíquide quide cahnu-güedé méé-güedé dico ñá túú vèdana xini-güedé, te cue téé-áⁿ ñá túú ndècu váha iní-güedé chi nándi tnúhu sá ñà túú nàndíhi cuíní-güedé cùtnàha-güedé. Te ngüita-güedé cúú cuèdú iní tnáhá-güedé, te nàa ndihí tnáhá-güedé, te xicuèhé tnáhá-güedé, te ñá túú-gá cúú váha iní núú tnáhá-güedé. ⁵ Te cue téé-áⁿ mee-ni nàa-güedé chi ñá túú sàni váha iní-güedé, te ni ñá túú xini-güedé nàcuáa cuáháⁿ tnúhu ndáá tnúhu Yá Ndiöxí, te càchí-güedé sá ïo váha cundecu-güedé

ichi-gá chi sàni iní-güedé sá ïo vâi dîhúⁿ nîhí-güedé cundecu ndîhi-güedé. Te yúhú càháⁿ-í dóho-n sã vã nîhí tnáhá-n ndîhi nchaa cue téé ducaⁿ xîquide. ⁶ Te ndáá sá ìchi Yá Ndiöxí cúú-xí ìⁿ ichi sá ïo váha cundecu-o, dico xîni ñuhu-xi nduu vétú iní-ó nàcuáa ndècu-o ñuyíú-a. ⁷ Te nchoo cuè ñáyiú chi ñá túú vèdana nèhe-o ní quexìo ñuyíú-a, te ñu-ni ducaⁿ ñà túú vèdana canehe-o quíhíⁿ òré ná cùú-ó. ⁸ Te ío xîni ñuhu-xi nduu vétú iní-ó te núu ndècu-ni sá cúnchìto-o ndîhi dóó cuihnu-o. ⁹ Te ío ñáyiú ío cuíní-yu cuu cuicá-yu, te ñáyiú-áⁿ dácàhu iní ñáhá yùcu ñávãha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidè-yu, te nchaa sá quidè-yu-áⁿ ñà túú vèdana nándîhi-xi chi uuⁿ-gá ndádá ndàhú ñáhá-xi xii-yu, te dàcuíta nihnu ñaha-xi. ¹⁰ Chi nchaa ñáyiú ñùhu iní mee-ni dîhúⁿ, te xíãⁿ quidè-xí ngüíta-yu sàni iní-yu cadá-yu nándi sá cuèhé sá dúhá. Te ío ñáyiú ndècu ichi Yá Ndiöxí te sá tnùhu ducaⁿ ñùhu iní mee-ni dîhúⁿ ní dáñã-yu ñá túú-gã sàndáá iní ñáhã-yu xii-gã, te vitna ñá túú tnáhí-gã ndécú vãha iní-yu.

Cahni iní-ó càda-o nchaa nacuáa càháⁿ Yá Ndiöxí chi sàndáá iní-ó-gã

¹¹ Te yòhó téé quide chiuⁿ Yá Ndiöxí xîni ñuhu-xi vá cadá-n dàtná quidè nchàa ñáyiú ní cachí-í sá ñà túú quide ndáá, te vá dáñã ndèé-n càda ndáá-n cundecu-n, te cada-n nàcuáa nduu vétú iní Yá Ndiöxí, te ío quindáá iní-n-gã, te cuu iní-n nchàa tnaha ñáyiú-n, te cada càhnu iní-n nchàa sá ná yãha-n cundecu-n ichi-gá, te cunduu ndàhú iní-n. ¹² Te cahni iní-n càda-n nchaa nacuáa cuíní Yá Ndiöxí chi sàndáá iní-n-gã, te ío cuhuⁿ iní-n sã cundècu-n ndîhi Yá Ndiöxí ni caa ni quíhíⁿ, chi ñu cuendá tnáhí-áⁿ ní càháⁿ ñáhã-gã xii-n, te ní càháⁿ ndáá-n núú vâi ñáyiú sá ïo váha sàndáá iní-n-gã. ¹³ Te Yá Ndiöxí Yaá quidè nchìto nchaandi túhú sá ío ñuyíú naha-gá sá càháⁿ-í dóho-n vitna, te ñu-ni ducaⁿ naha tucu Xítohó Jesucristú Yaá ní càháⁿ tnúhu ndáá núú tẽ Pilatú ¹⁴ sá quindáá iní-n càda-n nchaa nacuáa càháⁿ Yá Ndiöxí, te nchaa tnúhu càháⁿ-gã cada-n nàcuáa vá dáquèe tíhú ñáhã ñáyiú xii-n, te ducaⁿ-ni càda-n ndéé ná sãá nduu quixi

tucu Xítohó Jesucristú. ¹⁵ Te quixi tucu-gá chi ducaⁿ ní cachí Yá Ndiöxí cunduu, te mee Yá Ndiöxí náhã-gã ná nduu quixi tucu Xítohó Jesucristú. Te Yá Ndiöxí ío váha cùu iní-gá te ìⁿ dîi díi-ni-gã ío-gá cúnùu-gá dàcúúxí cuè téé tàxi tnuní ìⁿ ìⁿ nàcióⁿ ndîhi nchaa dava-gá cue téé cùnùu, chi tàxi tnuní ñáhã-gã xii-güedé, te nchaa ñáyiú ndècu ñuyíú-a tàxi tnuní-gá. ¹⁶ Te ñu-gá cúú-gã Yaá ndécú nchàa nduu nchaa quíú, te ío càhnu cuu-gá chi dàtná dáyèhé nchícanhii dáyèhé-xi núú ndécú-gã, te vá yòo ìⁿ cùyí dayatni núú ndécú-gã, te ní ñã túú ní ìⁿ ñáyiú xíní ñáhã xii-gã te ní vã ndácú-yu quíní ñáhã-yu xii-gã. Te ío na cànehe nchaa ñáyiú sá yíñùhu núú-gã ní caa ní quíhíⁿ, te ducaⁿ ïo na tàxi tnuní-gã ní caa ní quíhíⁿ. Te ducaⁿ na cunduu.

¹⁷ Te càháⁿ-n dóho nchaa ñáyiú cuica ndècu ndîhi nchaa sá ío ñuyíú-a cuendá sá vã cadá càhnú-yu mèé-yu, te duuⁿ duuⁿ vá cundèé iní-yu ní ìⁿ sá ndécú ndîhí-yu chi vá cúdîi-xi, te càháⁿ-n dóho-yu sá ná cundèé iní-yu Yá Ndiöxí chi ñu-gã cúú-gã Yaá ndécú nchàa nduu nchaa quíú, te chitu núú ndáhã tàxi-gã nchaa sá xíní ñùhu-o, chi cuíní-gã sá ïo cuu váha iní-ó cundecu-o. ¹⁸ Te càháⁿ tucu-n dóho-yu sá ná cadá-yu mee-ni sã váha, te cuendá nchaa sá váha cadá-yu-áⁿ te cuú-yu ìⁿ ñáyiú cuica sá cúú-xí Yá Ndiöxí, te na cundecu túha-yu chindèé-yu cue ñáyiú ndàhú cuañàhá-yu sá xíní ñùhú-yu. ¹⁹ Te núu ducaⁿ na càdá-yu te Yá Ndiöxí cuañaha-gã sá ndúú tãhú-yu na sãá nduu, te ngúndecu váha-yu ndîhi-gã ní caa ní quíhíⁿ.

Tnúhu ndéé núú ní ndîhi-ná

²⁰ Te yòhó téé Timùteú càháⁿ-í dóho-n sã ïo cada cuendá-n vã dãma tnúhu ní taxi Yá Ndiöxí danèhé-n ñáyiú, te vá cadá cuendá-n nchàa cuendú cuèhé cuendú duha ío ñuyíú-a chi ñá túú nándîhi-xi, te ní vã cadá cuendá-n nchàa tnúhu xitnaha ñáyiú càchí sá xicá naha tnúhu cue téé túha chi ñá díú ìⁿ tnúhu ndáá cúú-xí. ²¹ Te ío ñáyiú ñá túú-gã sàndáá iní-yu tnúhu Yá Ndiöxí, chi ní quide cuendá-yu nchaa tnúhu xica naha ñáyiú-áⁿ.

Te Yá Ndiǒxí ná chìndee chitúu ñaha-gǎ
xii-n. Te ducaⁿ na cùnduu. Te ío cada ndee
ìní-nǎ vitna.

TUTÚ CÚÚ ÙÚ NÍ CADÚHA TÉ PÁBLÚ QUIHÍⁿ NDAHA TÉ TIMÙTEÚ

Té Páblú cádúha-dé tutú quíhíⁿ ndaha té Timùteú

¹ Yúhú té Páblú ní tendaha ñaha Yá Ndiöxí cáháⁿ-í tnúhu Xítohó Jesucristú núú ñáyiú, chi ducaⁿ ní cachí Yá Ndiöxí cunduu. Te cáháⁿ-í dàtná ní cachí Yá Ndiöxí sá ncháá nchòo ñáyiú ndècu ndihí Xítohó Jesucristú naníhí tàhú-ó. ² Te yúhú té Páblú cádúha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te ñu-í ní sanu ichi ñaha-í xii-n ìchi Xítohó Jesucristú, te xicáⁿ táhù-í núú Dütú Ndiöxí ndihí núú Xítohó Jesucristú sá ío na chindee chítúu ñaha-gã xii-n, te cundàhú iní ñáhà-gã, te ducaⁿ ndì nduú-gá ná cádá te ío váha cuu iní-n cùndecu-n.

Cáháⁿ váha-o cuèndá Xítohó Jesucristú

³ Te cuèi nduu cuèi niú ducaⁿ-ni cáháⁿ ndihí-í Yá Ndiöxí cuèndá-n, te ndàcáⁿ táhù-í núú-gã, te xínu cuechi-í núú-gã dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndáá-í núú-gã dàtná ní xóo cada-güedé. ⁴ Te ío sàni iní-í naníhí tnáhà-ó cuèndá ío cudíí iní-í, chi ndàcu iní-í sá ío ní ndáhyú-n sã ndihú iní-n cùtnáhá ní quide ndee iní-í tnáhà-ó. ⁵ Te nàha-í sá sàndáá ndisa iní-n Yá Ndiöxí dàtná ní ngüíta díhna-gã xítná-n tã Lòidá ndihí nãná-n tã Eùnicé quidé-yu, te cùtnuní ndáá iní-í sá díú tnáhà-n ío váha sàndáá iní-n-gã.

⁶ Te xíáⁿ dándàcu iní ñáhà-í xii-n cuèndá sá ío-gã nducu ndèe-n cada-n chiuⁿ ní nduu táhù-n núú Yá Ndiöxí cada-n, chi ní taxi-gá tnúhu ndee iní ní ngúndecu ndihí-n cùtnáhá ní sacáⁿ ndodo-í ndaha-í díquí-n sã díú chiúⁿ-gã cada-n. ⁷ Te Espiritú sá ní taxi Yá Ndiöxí ndécú ndihí-o ñá túú cùu-xi ñⁿ Espiritú sá cádá nàcuáa yùhú-ó, chi cùu-xi ñⁿ Espiritú sá táxí tnúhu ndee iní cada-o chiúⁿ-gã, te ñu-xi quide cuu iní tnáhà-ó ñⁿ ñⁿ-o, te ñu-ni tucu-xi quide cùtnuní iní-ó nàcuáa cada-o cùndecu-o. ⁸ Te xíáⁿ núú vá cùcàhaⁿ núú-n cáháⁿ váha-n

cuèndá Xítohó Jesucristú, te ní vã cùcàhaⁿ núú-n sã dúhá yíhi-í vecaá sá cuèndá-gã, te xíni ñuhu-xi sá tnáhà-n ndòho-n sá cuèndá tnúhu-gã, te cundee iní-n ndòho-n, chi Yá Ndiöxí chindee ñaha-gã xii-n. ⁹ Te Yá Ndiöxí ní dácàcu nihnu ñaha-gã xii-o núú ùhú núú ndàhú, te ní cachí-gá sá cádá-ó nchàa nacuáa cùní méé-gã cunduu, te ducaⁿ ní quide-gá chi ducaⁿ ní sani iní méé-gã cunduu sá cádá váha ñaha-gã xii-o, te ñá díú sã ío váha quide-o ndecu-o ducaⁿ ní quide-gã. Te ndéé cùtnáhá vátá ngáva-gã ñuyíú ní cachí-gá sá cádá váha ñaha-gã xii nchaa nchoo ñáyiú ní ngúndecu ndihí Xítohó Jesucristú vitna. ¹⁰ Te vitna cùtnuní iní-ó sã ío váha quide ñaha-gã xii-o, chi ní quixi Xítohó Jesucristú ñuyíú-a ní dácàcu nihnu ñaha-gã xii-o núú ùhú núú ndàhú, te Yaá-áⁿ ní quide-gá cuèndá sá vã cùú-gá-ó cùú dúcáⁿ-ó, chi ní cachí-gá sá cùndecu-o ní caa ní quíhíⁿ te núu na quíndáá iní-ó tnúhu-gã.

¹¹ Te ní cachí-gá sá cáháⁿ-í tnúhu-gá núú ñáyiú ñá túú cùu ñáyiú isràél te dacuàha váha-í-yu tnúhu-gã, te cuèi ndèni ní cuu ndécú-yu te quíhíⁿ-í cáháⁿ-í tnúhu-gá núú-yu chi ducaⁿ ní cachí-gã cunduu. ¹² Te cuèndá xíáⁿ nándi sá ndòhò-í vitna cuèndá-gã, dico ñá túú cùcàhaⁿ núú-í chi cùtnuní váha iní-í nàcuáa sàni iní Xítohó Jesucristú Yaá sàndáá iní-í, te yúhú ní dáña-í méé-í núú ndáhà-gã, te cùtnuní ndáá iní-í sá cótó ñaha-gã xii-í ndéé ná sàá nduu nàcuaca ñaha-gã.

¹³ Te vá dáña ndèe-n càda-n nchaa nacuáa cáháⁿ tnúhu váha ní dánèhé ñáhà-í xii-n, te ío quíndáá iní-n Yá Ndiöxí, te nchaa-o nàcuáa ndècu-o ndihí Xítohó Jesucristú ío cuu iní tnáhà-ó ñⁿ ñⁿ-o. ¹⁴ Te cada cuèndá váha-n sã vã dãma tnúhu Yá Ndiöxí sá ní taxi-gã ndécú ndihí-n, te Espiritú-gã sá ní taxi-gã ndécú ndihí-o chindee ñaha-xi xii-n.

¹⁵ Te yòhó sa xíni-n sã nchàa ñáyiú ndècu distritú Asiá, ñáyiú ní sàndáá iní tnúhu Xítohó Jesucristú ní dáña ñáhà-yu xii-í, te tnáhà té Fígeló ndihí té Hèrmógenés ní dáña ñaha-güedé xii-í. ¹⁶ Te xicáⁿ táhù-í núú Xítohó Jesucristú sá ná chindee-gã cue ñáyiú cùu ndì mee té Onèsíforó, chi ñu-dé ío vãi xito ní quixi-dé ní quide cuèndá ñáhà-dé

xii-í, te ní taxi-dé tnúhu ndee iní, te ñá túú ní cùcahaⁿ núú-dě sá yíhí-í vecaá. ¹⁷ Te cùtnàhá ní xíndecu-dé ñúú Rómá ducaⁿ-ni ní xóo nanducu ñàha-dé xii-í ndeé ndeé naníhí ñáhá-dě. ¹⁸ Te xìcáⁿ táhú tucu-í núú Xítóhó Jesucristú sá ná cùndahú iní ñáhá-gã xii-dé nduu na sàá cundáá cuéchi nchaa ñáyiu. Te yòhó sa xìní ndáá-n sã ïo ní chindee ñàha-dé xii-o cùtnàhá ní xíndecu-o ñúú Éfesú.

2

Tée quide ndáá xínú cuèchi núú Xítóhó Jesucristú

¹ Te yòhó tée cùu datná ìⁿ déhe mee-í ïo nducu ndeé-n cada-n nacuáa níhí ndeé-gã-n cùndecu-n ichi Xítóhó Jesucristú chi ñúu-gã chindee ñàha-gã xii-n. ² Te nchaa tnúhu sá ní dánèhé ñàhá-í xii-n ndìhì nchaa dava-gã ñáyiu, xíáⁿ danèhé-n dàva-gã cue tée quide ndáá cuèndá danèhé-güedé dava-gã ñáyiu.

³ Te cahni iní-n ndòho-n cunu cuechi-n núú Xítóhó Jesucristú dàtná cuìní-n ndòho ìⁿ sandadú sàhni iní-dé xínú cuèchi-dé. ⁴ Chi ni ìⁿ sandadú ñá túú nãgá sání iní-dé cada-dé òré xínú cuèchi-dé cuèndá cudù-dé núú tée tàxi tnuní ñáhá. ⁵ Te ñúu-ni ducaⁿ sàtnahá-xi cùu tucu ìⁿ tée dàdiqui, chi núu vá dádiqú-dé nàcuáa tàú-xi cunduu te vá nihí-dé sá ndúú táhú-dě. ⁶ Te núu ìⁿ tée xínu cuechi ïo nducu ndeé-dé quidé chiúⁿ-dé chíhí-dě tata, te ñúu-dé tàú-dé díhna-gã-dé níhí-dě sá cùhúⁿ yáhu-dé. ⁷ Te cani iní-n nchaa tnúhu càháⁿ-í-a, te Xítóhó Jesucristú chindee ñàha-gã xii-n te tecú tnùn-í-n nchaa.

⁸ Te ndacu iní-n sã Xítóhó Jesucristú ní cuu-gã ñaní tnáhá ndíi Dáví, te ní xíhí-gã te ní ndoto-gã, te ñúu ducaⁿ ndúu tnúhu dànehé-í ñáyiu. ⁹ Te ïo dándoho ñaha ñáyiu xii-í cuèndá sá càháⁿ-í tnúhu-gã, te quide ñahá-yu xii-í dàtná quidé-yu ìⁿ tée ní quide ìⁿ cuéchi càhnu, chi ní chihi ñàhá-yu ve-caá xii-í, dico tnúhu Yá Ndiòxí chi vá ndácú-yu nganí-yu. ¹⁰ Te xíáⁿ núu cuèi nándi cùu nchaa sá quidé ñàhá-yu xii-í, dico quide cahnu iní-í cuèndá sá nánihí táhú tnàhá nchaa dava-gã ñáyiu cuìní Yá Ndiòxí cundecu ndìhì-gã, chi nchaa ñáyiu na tnàhá tnúhu ndìhì Xítóhó Jesucristú

nduu táhú-yu cundecú-yu ndìhì-gã núú ïo váha càa ndecu-gã ni caa ni quíhíⁿ.

¹¹ Te xéhé cúú-xí ìⁿ tnúhu ndáá cuiti: Nchoo cùu-o datná ñáyiu ní xíhí ndìhì Xítóhó Jesucristú chi ñá túú-gã ndecú-ó ìchi cuehé ichi duha, te xíáⁿ núu cuèi na sàá nduu cùú-ó ñúyú-a, dico ñúu-ni cundecu-o ndìhì-gã.

¹² Te núu na cùndee iní-ó ndòho-o nándi sá ndóhó-ó sã cuèndá-gã, te sáá nduu te cunuu-o ndìhì-gã.

Te núu na càháⁿ-ó sã ñà túú xìní-ó-gã, te ñúu-ni ducaⁿ cùñaha-gã xii-o sã ñà túú xìní ñáhá-gã ná sàá nduu càda ndáá-gã cuéchi nchaa ñáyiu.

¹³ Te núu nchoo ñà túú quide ndáá-ó ndècu-o núú-gã ñá, dico mee-gã chi ïo ndáá quidé-gã, chi Yá Ndiòxí nchaa sá sání iní-gã quidé-gã.

Tée quide nacuáa ndúu vétú iní Yá Ndiòxí

¹⁴ Te dandacu iní-n nchaa ñáyiu ndècu ndìhì-o ichi Xítóhó Jesucristú nchaa tnúhu càháⁿ-í-a, te cùñaha-n xii-yu sá Xítóhó Jesucristú cuìní-gã sá ñà túú-gã nándi tnúhu cùtnàhá-yu, chi nchaa tnúhu càháⁿ-yu-áⁿ dácuíta nihnu-xi ñáyiu ndèdóho ñaha xii-yu, chi ñá túú vèdana nándìhì nchaa tnúhu-áⁿ. ¹⁵ Te ïo nducu ndeé-n cada ndáá-n cùndecu-n núú Yá Ndiòxí, te cada-n chiúⁿ-gã nàcuáa nduu vétú iní-gã, te càháⁿ ndáá-n tnúhu-gã, cuèndá sá vã cùcàhaⁿ núu-n núú-gã. ¹⁶ Te vá càdá cuèndá-n nchaa tnúhu sá ñà túú vèdana nándìhì càháⁿ ñáyiu cuèndá Yá Ndiòxí, chi nchaa ñáyiu càháⁿ tnúhu-áⁿ ndìhì nchaa ñáyiu sàcùndedóho ñaha xii-yu uuⁿ-gã quidé-yu nchaa sá cuèhé sá dúhá. ¹⁷ Te nchaa tnúhu-áⁿ cùtènuu-xi dàtná quidé ìⁿ cuèhé sã ñàni ñaha xii ñáyiu xité nuu-xi nihíi yíqú cùñú-yu. Te tnàhá té Himèneú ndìhì té Filetú càháⁿ-güedé tnúhu-áⁿ quidé-güedé dàtná quidé ñáyiu-áⁿ. ¹⁸ Te cue tée-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiòxí, chi càhí-güedé sá ncháá nchòo ñáyiu ndècu ichi Yá Ndiòxí cúú-ó dàtná cue ñáyiu sa ní ndoto, dico na cùú ndisa-o te vá ndótó-gã-ó càhí-güedé. Te dava ñáyiu ní dáñá-yu sá sàndáá iní-yu tnúhu Yá Ndiòxí sá dúcáⁿ càháⁿ-güedé. ¹⁹ Te cuèi ducaⁿ quide davá-yu, dico Yá Ndiòxí ní taxi ndecu-gã

cue ñáyiú ni yùhu ni iní ndécú ìchi-gá, te cùtnuní sá ndécú ndìhi ñaha-gá xií-yu, chi ìⁿ xichi núú tütú-gá càchí-xi sá méé-gă xìní-gá cue ñáyiú cùu cuendá-gá. Te ìngá tucu xichi núú tütú-gá càchí-xi sá ncháá ñáyiú sàndáá iní ñáhá xì Xítóhó Jesucrìstú xìní ñùhu-xi sá vă cùndècu-gá-yu ichi cuèhé ichi duha.

²⁰ Te ñáyiú cuica chi ndècu ndìhi-yu vehé-yu cóhó să ñi cuáha mee-ni dîhúⁿ cuááⁿ, ndìhi cóhó să ñi cuáha mee-ni dîhúⁿ cuixíⁿ, te nchaá cóhó-ăⁿ cúú-xí dàtná cue ñáyiú ñá túú ñă cúmăní núú Yă Ndiöxí. Te ndècu ndìhi tucú-yu cóhó să ñi cuáha mee-ni ñùhu, ndìhi cóhó să ñi cuáha mee-ni yùtnu, te nchaá cóhó-ăⁿ cúú-xí dàtná cue ñáyiú ñá túú quide ndáá núú Yă Ndiöxí.

²¹ Te nchaá ñáyiú ío ndècu yîñuhu núú Yă Ndiöxí cúú-yu ñáyiú ñá túú ñihí tnáhá ndìhi cue ñáyiú ñá túú quide ndáá núú-gă, te cue ñáyiú ndècu yîñuhu núú-gă-ăⁿ ñà túú tnàhí quée cáva-yu quidé-yu nchaá chiúⁿ tahu-gá.

²² Te ío cada cuendá-n vă cádá-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiöxí, te quindáá iní-n-gă, te cuu iní-n ncháa tnaha ñáyiú-n, te cundecu nahi-n, chi ducaⁿ tàú-xi cada-n ndìhi nchaá dava-gá ñáyiú sa ní nduu ndoo ní nduu nine iní-xi ñáyiú càháⁿ ndìhi ñaha xì Yá Ndiöxí. ²³ Te vă cádá cuendá-n ñiⁿ tnúhu xîtnàha ñáyiú chi ñá túú vèdana nàndîhi-xi, chi núu na càda cuendá-ó te dîcò dánáá ñáhá-xí. ²⁴ Chi nchaá cue téé xînu cuechi núú Yă Ndiöxí xìní ñùhu-xi càháⁿ váha-güedé ndìhi nchaá ñáyiú, te danèhé ñáhá vâha-güedé tnúhu-gá, te cunduu càhnu iní-güedé te vă nàá-güedé. ²⁵ Te vii vii càháⁿ-güedé dóho nchaá ñáyiú sàá iní-xi, ñáyiú ñá túú tnàhá iní tnúhu ndáá tnúhu Yá Ndiöxí, te ducaⁿ te cudana Yá Ndiöxí cada-gá te ndixi túu iní-yu sá ñà túú quide váha-yu ndécú-yu te quindáá iní-yu tnúhu-gá. ²⁶ Te ducaⁿ te cutnùní iní-yu sá sàcuíhná cùnùu-xi taxi tnuní ñáhá-xí xií-yu, chi dàcahu iní ñáhá-xí xií-yu quidé-yu nchaá nàcuáa cùu iní-xi ni cùu.

3

Nàcuáa cada ñáyiú òré sa ta cùyatni sáá nduu quixi tucu Xítóhó Jesucrìstú

¹ Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quixi tucu Xítóhó Jesucrìstú, chi dàvá-ăⁿ ío cada úhú-xi. ² Chi ngüíta ñáyiú cuhuⁿ iní-yu mee-ni sá cúú-xí mèé-yu, te cuhuⁿ iní-yu mee-ni dîhúⁿ, te ío cada càhnú-yu mèé-yu, te cunduu yíchí iní-yu, te càháⁿ cuèhé-yu cuendá Yă Ndiöxí, te vă quindáá-gá iní-yu ni tătă-yu ni nănă-yu, te ni vă ndácáⁿ táhú núú tnáhă-yu cuendá nchaá sá vâha cada tnáhă-yu, te cadá-yu mee-ni să ñà túú tnáhá iní Yă Ndiöxí. ³ Te vă cúú iní tnáhá ndì meé-yu, te nàá-yu te vă cuánàá-yu, te tee tnáhă-yu cuéchi neñúú, te vă cuánàá-yu cadá-yu nchaá sá cuèhé sá dúhá sàni iní-yu, te ío cunduu cuihna iní-yu, te vă tnáhá iní-yu nchaá sá vâha. ⁴ Te dayuhu cuáha cuendá tnáhă-yu núú cuè téé cùchiuⁿ, te ío cunduu yîñ iní-yu cadá-yu nándî sá ñà túú vâha, te ío cada nínu-yu mèé-yu, te mee-ni ncháa sá cúúⁿ iní-yu cadá-yu, te vă cúúⁿ iní-yu nanducu ñihnú-yu Yá Ndiöxí. ⁵ Te quesáhă-yu sá tnáhă-yu ndécú-yu ichi Yá Ndiöxí dico vă cádá-yu nchaá nàcuáa càháⁿ-gá.

Te yúhú càchí tnúhu-í xii-n să vă ñihí tnáhă-n ndìhi nchaá ñáyiú ducaⁿ quide. ⁶ Te dava ñáyiú-ăⁿ quîhîⁿ-yu dava vehe núú xîndecu ñáyiú, te ngüíta-yu dandâhú-yu ñáyiú dîhí ñá túú xìní dana cuendá Yă Ndiöxí, te ñáyiú dîhí-ăⁿ cúú-yu ñáyiú ndècu vihi cuéchi-xi, chi ío cùdîñ iní-yu quidé-yu nchaá nâni sá cuèhé sá dúhá sàni iní-yu. ⁷ Te cuèi ío dàcuahă-yu, dico ñá túú cùtnuní iní-yu nása cuáhăⁿ tnúhu ndáá tnúhu Yá Ndiöxí. ⁸ Te ñáyiú ducaⁿ dandahú ñáhá xìi cue ñáyiú dîhí-ăⁿ ñà túú càháⁿ váha-yu cuendá tnúhu Yá Ndiöxí, chi quidé-yu dàtná ní quide ndîi Jănés ndìhi ndîi Jămbrés chi cue ndîi-ăⁿ ñà túú ní cùu váha iní cue ndîi núú ndîi Moisés cuendá tnúhu ní càháⁿ ndîi. Te ñáyiú-ăⁿ cúú-yu ñáyiú sâni iní mee ñine-ni nchaá sá cuèhé sá dúhá, te cuèi càchí-yu sá sàndáá iní-yu Yá Ndiöxí dico ñá ndáá sá sàndáá iní ñáhă-yu xii-gá. ⁹ Dico vă ndácú-gă-yu dandâhú-yu vâi ñáyiú, chi nchaá ñáyiú cutnùní iní-yu sá ío ñî dîquî-yu, te ñá túú càháⁿ ndáá-yu dàtná ní quide cue téé úú ñá túú ní tnáhá iní

tnúhu ní cáháⁿ ndíi Moisés.

Té Păblú dásàhú-dé té Timùteú

¹⁰ Te yòhó quidé-n nchàa nacuáa ní dánèhé ñáhà-í xii-n, te ní xiní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyíú-a, te xiní-n sã ïo sàndáá iní-í Yă Ndiöxí, te ïo càhnu iní-í, te cùu iní-í nchaa ñáyiu, te xiní tucu-n sã ïo quide cahnu iní-í cuèi nándi sá yăha-í ndécù-í dico ñã túú dàña ndeé-í ichi-gá. ¹¹ Te ïo vâi sá quidé ñaha ñáyiu xii-í dándòho ñahá-yu sá ndécù-í ichi Xítóhó Jesucristú, te sa naha tucu-n datná ní quide ñahá-yu xii-í cùtnàhá ní xindecu-í ñuú Antiòquiá, ndihí ñuú Ìconiú, ndihí ñuú Lìstrá, chi ïo ní dándòhó ñahá-yu xii-í sá cuendá-gá. Dico Xítóhó Jesucristú ïo ní xito ñaha-gã xii-í te ní chindee ñaha-gá cuèi nándi cùu sá ñi yáha-í. ¹² Te na càchí tnúhu ndáá-í xii-n sã ïo vâi sá ñã túú vâha cada ñaha ñáyiu xii nchaa ñáyiu cuení sá ñã túú ñã cumání núú Yă Ndiöxí cuendá sá ndécú ndihí-yu Xítóhó Jesucristú. ¹³ Dico dava ñáyiu càchí-yu sá cáháⁿ-yu tnúhu Yă Ndiöxí te ñã ndàá sá cáháⁿ-yu tnúhu-gá, ñáyiu-áⁿ uuⁿ-gá cuita cada-gá-yu nchaa sá cuèhé sá dúhá quihíⁿ, te ducaⁿ-ni ïo dandàhú tnáhá-yu.

¹⁴ Te yòhó chi ïo váha ní sándáá iní-n tnúhu Yă Ndiöxí sá dacuàha-n, te vitna càháⁿ-í dóho-n sã vã dáñá ndèé-n quindáá iní-n tnúhu-áⁿ, te yòhó sa naha-n ná cúú ñáyiu ní dánèhé ñahá xii-n tnúhu-gá. ¹⁵ Te yòhó chi ndéé cùtnàhá cúú làndú-n ñi ngúita-n dâcuaha-n tnúhu ndèé núú tûtú Yă Ndiöxí, te diu-ni nchaa tnúhu-gá canu ichi ñaha-xi xii-n te naníhí tãhú-n, chi sándáá iní-n Xítóhó Jesucristú. ¹⁶ Te nchaa cue téé ní tee tnúhu Yă Ndiöxí, chi diu-ni mee-gã ní dácáhu iní ñahá-gã xii-güedé nàcuáa tee-güedé, te tnúhu-gá ïo váha dacuàha-o nchaa dava-gá ñáyiu, te càháⁿ-xi dóho-o sã vã cündecu-gá-ó ichi cuehé ichi duha, te núu ñã túú quide ndáá-ó ndècu-o te nàcanu ichi ñaha-xi, te dânehé ñahá-xi nàcuáa cada-o cündáá-ó núú Yă Ndiöxí. ¹⁷ Te diu-ni tnúhu-gá dátúha ñaha vâha-xi xii nchoo cuè ñáyiu ndècu ndihí-gá cuendá cada-o nchaa núú sã vâha.

4

¹ Te Xítóhó Jesucristú quixi-gá taxi tnùn-í-gá ñuyíú-a, te cada ndáá-gá cuèchi nchaa ñáyiu sa ní xihí, ndihí cuèchi nchaa ñáyiu xindecu vïvú. Te mee-gã ndihí Yă Ndiöxí náhá-gã sá ïo càháⁿ-í dóho-n vitna ² sá ïo dacuàha-n ñáyiu tnúhu-gá, te vã dáñá ndèé-n dâcuahá-n-yu ndèda-ni càa oré cuèi ñã túú cuení-yu cundedóho-yu, te nchaa ñáyiu ñã túú cuení cada ndáá cúñaha ndáá-n nchàa nacuáa quidé-yu. Te cúñaha tucu-n xií-yu sá vã dúcáⁿ-gã cadá-yu, te cáháⁿ-n dóho-yu cuendá cada ndáá-yu cundecú-yu. Te ïo cunduu càhnu iní-n òré cáháⁿ-n dóho-yu, te ïo dacuàhá-n-yu tnúhu-gá. ³ Chi sáá nduu te vã càchí-gá-yu cundedóho-yu nchaa tnúhu sá sánú ichi ñaha cundecu váha-o núú Yă Ndiöxí, chi mee-nã nchaa sá cúdí iní méè-yu cundedóho-yu, te ndúcú-yu cue téé dánèhé ñahá xií-yu nchaa tnúhu cùu iní-yu-áⁿ. ⁴ Te vã cadá cuendá tnàhí-gá-yu tnúhu ndáá tnúhu Yă Ndiöxí, chi mee-nã tnúhu sá ñã túú nándihí cada cuendá-yu. ⁵ Dico yòhó ïo quihí iní-n cündecu-n, te cahni iní-n cuèi nándi na ndòho-n, te dacuàha-ni-n ñáyiu tnúhu Yă Ndiöxí, ñáyiu vátá quindáá iní ñahá-gã xii-gá, te cada-ni-n nchàa chiuⁿ ní tãhú-gã cada-n.

⁶ Te yúhú sa ñuhu ichi-ná-í quihíⁿ-í núú ndécú Yă Ndiöxí cundecu-í, chi sa ní cuy-atni cahni ñaha-güedé xii-í cuendá sá xínú cuèchi-í núú-gã. ⁷ Te ní quide-í nchaa chiuⁿ ní tãhú Yă Ndiöxí cada-í te vitna ní xínu cava nchaa chiuⁿ ní tãhú-gã-áⁿ ní quide-í, te ñã túú ní dàña ndeé-í ní sándáá iní-í-gá, te ducaⁿ-ni sándáá iní-í-gá ndéé vitna. ⁸ Te vitna sa ndècu túha-ná sá ndúú tãhú-í cuendá sá quidé ndáá-í núú Yă Ndiöxí, te Xítóhó Jesucristú taxi-gá tãhú-áⁿ nduu tãhú-í ná sàá nduu, chi cùu-gá #ⁿ Yaá quidé ndáá cuiti, te ñã díú-ní yúhú taxi-gá tãhú-áⁿ cuu cuendá-í, chi tnàhá nchaa ñáyiu ndètu cahnu-ná sáá nduu quixi tucu-gá ñuyíú-a cuañaha-gã tãhú-áⁿ nduu tãhú-yu.

Chiuⁿ tahu té Păblú cada té Timùteú

⁹ Te cuení-í sá ïo ndihí quixi-n quixi coto ñaha-n xii-í. ¹⁰ Chi té Dêmás ñã túú-gã quidé cuendá ñahá-dé xii-í, chi mee-nã nchaa sá ïo ñuyíú-a ïo cùdí iní-dé. Te ní dándò

ñaha-dě cuáháⁿ-dé ñuú Tesalónicá, te té Crèscenté cuáháⁿ-dé cundecu-dé distritú Gàlaciá, te té Titú cuáháⁿ-dé cundecu-dé distritú Dalmaciá. ¹¹ Te ìⁿdìi-ná té Lùcá ndécú ndìhi ñaha-dé xii-í, te cúñaha-n xii té Mácú quixi-n ndìhi-dé, chi téé-áⁿ ndacu-dé cada-dé ìⁿ chiúⁿ-í. ¹² Te té Tìquicú ní tendaha-í-dé cuáháⁿ-dé ñuú Éfesú. ¹³ Te òré quixi-n te yáha-n vèhe té Càrpú cáá ñuú Tròás canehe-n ìⁿ dóó tìcachi ní dándõ-í vehe-dé quixi, ndìhi nchaa librú-í, te tnàhá nchaa dava-gá tutú-í ndécú vèhe-dé canehe-n quixi chí xíáⁿ ío-gá xíní ñùhu-í. ¹⁴ Te té Lijandrú té cùu rerú ío vài sá ñà túú vǎha ní cuu quide ñaha-dé xii-í, dico mee Yǎ Ndiõxí náhá-gǎ nása cada ñaha-gǎ xii-dé cuèndá sá dúcáⁿ quide-dé. ¹⁵ Te vá nihí tnáhá-n ndìhi-dé chí ío càháⁿ cuèhé-dé cuèndá nchaa tnúhu càháⁿ-ó.

¹⁶ Te cútnàhá ndécá ñaha-güedé xii-í ní sáháⁿ núú cuè té cùchiuⁿ xito díhna nuu, chí mee dìi ní sáháⁿ te ñá túú ní sáháⁿ ni ìⁿ cue té cùndìhi-í, chí nchaa-güedé ní dándõ ñaha-güedé xii-í, te yúhú xicáⁿ táhù-í núú Yǎ Ndiõxí sá vǎ cáda cuèndá-gá sá dúcáⁿ nǐ quide-güedé. ¹⁷ Dico Xítóhó Jesucrístú ní chindee ñaha-gá xii-í, chí ní taxi-gá tnúhu ndee ìní ní cáháⁿ-í tnúhu-gá nàcuáa tàú-xi cunduu núú cuè téé-áⁿ ndìhi núú nchaa ñáyiú, dico ñá díú ñáyiú isràél cúú-yu, te ñu-gá ní dácăcu nihnu ñaha-gǎ xii-í ñá túú ní sàhni ñaha-güedé. ¹⁸ Te mee Xítóhó Jesucrístú coto ñaha-gǎ xii-í te ñá túú nǎ cuu cuèi nándi sá ná cáda ñaha ñáyiú xii-í te ñu-ni-gá coto ñaha-gǎ xii-í ndéé ná sàá nduu sǎá-í andiú nǔú ndécú-gǎ táxi tnùní-gá. Te nchaa-o chí ná càchí-ó sǎ ío càhnu cuu-gá ni caa ni quíhíⁿ. Te ducaⁿ na cunduu.

Tnúhu ndéé núú nǐ ndìhi-ná

¹⁹ Te ío cúñaha-n na càda ndee ìní tá Priscá, ndìhi té Àquilú, ndìhi cue ñáyiú cùu ndi mee té Onèsíforó. ²⁰ Te té Èrastú ní quendóo-dé ñuú Còrintú, te té Trófimú ní dándõ-í-dé ñuú Miletú chí cùhú-dé. ²¹ Te ío cundìhí ìní-n quixi-n oré vátá sàa-gá yóo quidé vǐxiⁿ-xi. Te ío cada ndee ìní-n càchí té Èúbulú, ndìhi té Pudenté, ndìhi té Lǐnú, ndìhi tá Claudiá, ndìhi nchaa dava-gá ñáyiú sàndáá ìní tnúhu Xítóhó Jesucrístú.

²² Te xicáⁿ táhù-í núú Xítóhó Jesucrístú sá ná cundecu ndìhi ñaha-gá xii-n ndìhi nchaa dava-gá-yu. Te ducaⁿ ío na chindee chitúu ñaha-gǎ xii-ndo nchàa-ndo. Te ducaⁿ na cunduu. Te ío chí cáda ndèe ìní-nǎ vitna.

TUTÚ NÍ CADÚHA TÉ PÄBLÚ QUIHIⁿ NDAHA TÉ TÌTÚ

Té Păblú cadŭha-dé tutú quíhíⁿ ndaha té Títú

¹ Yúhú té Păblú xínú cuèchi-í núú Yă Ndiöxí, te diu-gá ní tendaha ñaha-gá xii-í cãháⁿ-í tnúhu Xítohó Jesucristú núú ñáyiu cuëndá quíndáá iní nchaa ñáyiu ní cachí Yă Ndiöxí naníhí tãhú, ndihí cuëndá sá tècú tnùní váha-yu tnúhu-gá, te ñáyiu na quíndáá iní tnúhu-gá cada ndáá-yu cundecú-yu ichi-gá. ² Te yúhú dácuaaha-í-yu tnúhu-gá cuëndá cundecu ndihí-yu tnúhu ndee iní sá cundècu ndihí-yu Yă Ndiöxí ni caa ni quíhíⁿ, chi ndéé cútnàhá vátá ngăva-gá ñuyú-a ní cachí-gá sá cundècu ndihí ñaha-gá xii-yu, te ñá túú dândahú ñáhã-gã, chi quide-gá #ⁿ sá cãháⁿ-gá. ³ Te ní sáá nduu ñí cachí-gá sá ñihí-yu tnúhu nãcuáa cuáhãⁿ tnúhu-gá, te diu-ni tnúhu-ãⁿ ñí cachí Yă Ndiöxí Yaá dácãcu nihnu ñaha xii-o núú ùhú núú ndàhú sá dácuaaha-í-ñáyiu. ⁴ Te tutú-a cadúha-í cuëndá daquixi-í ndaha yòhó té Títú, té ní sanu ichi ndisa-í ichi Xítohó Jesucristú, chi #ⁿ-ni tnúhu sãndáá iní-ó. Te xicãⁿ táhù-í núú Tãtã-ó Dütú Ndiöxí sá ío na chĩndee chítúu ñaha-gã xii-n, te diu-ni-gá ná càda te ío váha cuu iní-n cundecu-n. Te xicãⁿ táhú tùcu-í núú Xítohó Jesucristú Yaá dácãcu nihnu ñaha xii-o núú ùhú núú ndàhú sá díú-ní dùcaⁿ na cada ñaha-gá xii-n.

Chìuⁿ quide té Títú distritú Crětá

⁵ Te yúhú ní dándõo ñaha-í xii-n distritú Crětá, chi cuini-í cada-n nchãa chiuⁿ cumání, te cuini-í taxi ndecu-n cuè té quíndaha ñaha xii cue ñáyiu sãndáá iní tnúhu Yă Ndiöxí xĩndecu #ⁿ #ⁿ ñuú yĩndèhu distritú-ãⁿ, te cada-n nãcuáa ní cachí-í cada-n. ⁶ Te cue té cada chìuⁿ-ãⁿ xíní ñùhu-xi cuu-güedé mee-ni cuè té ío váha quide ndáá nãcuáa vá yõ cáháⁿ dóho-güedé, te na cùu-güedé cue té ndècu #ⁿ dii-ni ñadihí-xi. Te ducaⁿ nchãa landú-güedé ná cùu-güexi landú sãndáá iní ñáhã xii

Yă Ndiöxí cuëndá sá vã yõ cuatnuñaha xii-güexi quesahá-yu sá ío sãá iní-güexi te quide-güexi nãndi sá ñã túú tàu-güexi cada-güexi. ⁷ Chi xini ñuhu-xi sá nchãá cuè té quíndaha ñaha xii ñáyiu sãndáá iní tnúhu Yă Ndiöxí ío cundecu yĩñùhu-güedé, chi ducaⁿ tàu-xi cada nchaa cue té quide chiuⁿ Yă Ndiöxí, te xini ñuhu tucu-xi sá vã cúu-güedé cue té ñí iní-xi, te ni vã cúu-güedé cue té lĩhli iní-xi, te ni vã cúu-güedé cue té quíhu, te ni vã cúu-güedé cue té plètú, te ni vã cúu-güedé cue té dicó-ni ducaⁿ ñíhí díhúⁿ. ⁸ Te xini ñuhu-xi cuu-güedé cue té sãñaha nùu vehe ndetatú cue ñáyiu ñùhu ichi, cue té quide váha sá cúu-xi tnãha ñáyiu-xi, cue té ío váha cùtnuní iní-xi nãcuáa cada cundecu ñuyú-a, cue té quide ndáá xĩndecu, cue té quide nchaa nãcuáa ndùu vétú iní Yă Ndiöxí, cue té xito mee-xi ñã túú quide cutexínu. ⁹ Te na cùu-güedé cue té ío váha sãndáá iní tnúhu váha tnúhu Yă Ndiöxí sá ñí dãnèhé ñáhã-í xii-ndo cuëndá ducaⁿ te cue té-ãⁿ ndacu-güedé cáháⁿ-güedé dóho ñáyiu cuëndá cáda-yu nchaa nãcuáa cãháⁿ Yă Ndiöxí, te níhí-güedé tnúhu cáháⁿ váha-güedé núú nchãa ñáyiu dàquee tíhú tnúhu Yă Ndiöxí, te mee-ni cuè té ducaⁿ quide váha taxi ndecu-n quíndaha-güedé ñáyiu sãndáá iní tnúhu-gá.

¹⁰ Te na càhí tnúhu-í xii-n sã vái ñáyiu sãá iní-xi ío, te cãháⁿ-yu mee-ni tnúhu sá ñã túú nãndíhí, te dândahú-yu tnãhá ñáyíu-yu, te ñáyiu isrãél ío-gá vãi-yu ducaⁿ xĩquide. ¹¹ Te nchaa ñáyiu ducaⁿ xĩquide xini ñuhu-xi nducu-o tnúhu cúñaha-o xii-yu cuëndá cadí-yu yuhú-yu, chi dãnèhé-yu dava-gá ñáyiu #ⁿ sá ñã túú tàu-yu dácuaaha-yu, te ducaⁿ quidè-yu cuëndá-ni sá ñihí-yu díhúⁿ, te ío títní xichi ní cuu dândahú-yu nchaa ñáyiu xĩndecu #ⁿ-ni vèhe.

¹² Te ní cachí #ⁿ té ío váha sãá díquí-xi ndècu mei ñuú distritú Crětá sá nchãá ñáyiu ñuú-dé-ãⁿ ío ndèhndé-yu, te ío cuihna iní-yu, te ío vãi xexí-yu, te cùhndú-yu. ¹³ Te ndáá ní cáháⁿ-dé chi ducaⁿ quidè-yu, te xĩãⁿ ío cáháⁿ-n dóho-yu cuëndá sá ná quíndáá váha iní-yu tnúhu Yă Ndiöxí. ¹⁴ Te cúñaha-n xii-yu sá vã cáda cuëndá-yu nchaa tnúhu ndehnde cãháⁿ ñáyiu isrãél, te ni vã cáda

cuendá-yu nchaa tnúhu càháⁿ ñáiyu ñá túú cuení quindáá iní tnúhu Yá Ndiöxí.

¹⁵ Te nchaa sá ñí cadúha Yá Ndiöxí ío ñuyíú-a cùu-xi mee nine-ni sá vâha sá cúú-xí nchaa ñáiyu sa ní nduundoo ní nduu nine iní-xi ndècu ichi Yá Ndiöxí. Dico nchaa sá ñí cadúha-gá ñá túú cùu-xi sá vâha sá cúú-xí nchaa ñáiyu ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sá cuèhé sá dúhá ñúhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu. ¹⁶ Te càchí-yu sá sàndáá iní-yu Yá Ndiöxí, dico nchaa sá quidè-yu-áⁿ càchí tnùnì-xi sá ñá ndáá. Te Yá Ndiöxí chi duuⁿ duuⁿ ñá túú tnàhá iní-gá nchaa nàcuáa quidè-yu, chi ío sáá iní-yu, te ñá túú quidè-yu ni ñⁿ sá vâha.

2

Tnúhu váha tnúhu Yá Ndiöxí

¹ Te yòhó òré danèhé-n ñáiyu, te danèhé-n-yu mee-ni nàcuáa càháⁿ tnúhu váha tnúhu Yá Ndiöxí. ² Te nchaa cue téé cùu sacuéhé ná càda cuendá-güedé vá cáda cùtexínu-güedé cundecu-güedé, te na cundecu yíñuhu-güedé, te na cuâha váha-güedé cuendá nàcuáa cada-güedé cundecu-güedé, te na quindáá váha iní-güedé Yá Ndiöxí, te na cùu iní-güedé tnàha ñáiyu-güedé, te na cùnduu cahnu iní-güedé cuèi nándi sá ná yâha-güedé. ³ Te vitna càháⁿ tucu-í sá cúú-xí nchaa ñáiyu dìhí ñáiyu cùu sacuéhé sá ná cùndecu yíñuhú-yu, te vá cúú-yu ñáiyu yiti yùhu-xí, te ni vâ cúú-yu ñáiyu quihu, te na dànehé-yu nchaa dava-gá ñáiyu cada váha-yu. ⁴ Te na dàsahú-yu nchaa ñáiyu dìhí ñáiyu cuechi cuendá ná cùu iní-yu yíi-yu, ndihí cue landú-yu, ⁵ ndihí cuendá sá ná càni váha iní-yu nàcuáa cundecú-yu, ndihí cuendá sá vâ càni iní-yu cadá-yu ni ñⁿ sá cuèhé sá dúhá, ndihí cuendá sá ná càda-yu nchaa chiùⁿ ñuhu vehé-yu, ndihí cuendá sá cáda váha-yu nchaa tnàha ñáiyú-yu, ndihí cuendá sá ná cáda-yu nchaa nàcuáa càháⁿ yíi-yu, te ducaⁿ xìni ñuhu-xi cadá-yu cuendá sá vâ yòo càháⁿ cuèhé cuendá tnúhu Yá Ndiöxí. Duha cúñaha-n xìi cue ñáiyu dìhí

ñáiyu cùu sacuéhé cuendá ducaⁿ dàsahú-yu nchaa ñáiyu dìhí ñáiyu cuechi.

⁶ Te yòhó càháⁿ-n dõho nchaa cue téé cuechi cuendá sá ná càni váha iní-güedé nàcuáa cundecu-güedé, ⁷ te cada-n mète-ni sá vâha cuendá ducaⁿ càchicúⁿ nihnu-güedé cada-güedé, te òré danèhé-n-güedé te ío váha cuu iní-n dànehé-n-güedé, te ndihí tnúhu yíñuhu càháⁿ ndihí-n-güedé. ⁸ Te càháⁿ-n mète-ni tnúhu váha, te ducaⁿ te vá yòo ñⁿ càháⁿ cuèhé cuendá tnúhu càháⁿ-n, te nchaa ñáiyu cùu úhú iní ñáhá xìi-o cucahaⁿ núú-yu, te vá nihí-yu tnúhu càháⁿ cuèhé-yu cuendá-ó.

⁹ Te ío càháⁿ-n dõho nchaa cue téé xìnu cuechi sá ná quindáá iní-güedé cada-güedé nchaa chiùⁿ tahu patróon-güedé nàcuáa cudíu-güedé núú cuè téé-áⁿ, te vá càháⁿ sáá iní-güedé. ¹⁰ Te vá càni iní-güedé duhu-güedé, te cada ndáá-güedé cuendá sá ñá túú ñá caní iní ñáhá cuè patróon-güedé, te ducaⁿ te cutnùnì iní ñáiyu sá tnúhu Yá Ndiöxí ío váha dànehé ñáhá-xí nàcuáa cada-o cundecu-o, te diu-gá cúú-gá Yá dácacu nihnu ñaha xìi-o núú ùhú núú ndàhú.

¹¹ Te nchoo ñí cutnùnì iní-ó sá Yá Ndiöxí ío cùndahú iní-gá nchaa nchoo ñáiyu ndècu ñuyíú-a, te ní taxi-gá tnúhu ndee iní sá nánihí tàhú nchaandi túhú ñáiyu te núu na quindáá iní ñáhá-yu xii-gá. ¹² Te ní càchí-gá sá dáñá-ó nchaa ichi cuehé ichi duha chi ñá tnàhá iní-gá cundecu-o ìchi-áⁿ, te vá ío cuhuⁿ iní-ó nchaa sá ío ñuyíú-a, te ní càchí tucu-gá sá ío caní iní-ó nàcuáa cundecu-o vitna ndecu-o ñuyíú-a te cada ndáá-ó cundecu-o cuendá nduu vétú iní-gá. ¹³ Te cundetu-o sáá nduu càhnu vihi, nduu quixi tucu Xítohó Jesucristú Yá cúú Ndiöxí-ó, te diu-gá ní dácacu nihnu ñaha-gá xii-o núú ùhú núú ndàhú. Te nduu-áⁿ ío cudíi iní-ó. ¹⁴ Te mee-gá ní xihí-gá chi ducaⁿ ñí cuiní-gá cunduu, te ducaⁿ ñí quide-gá cuendá nchoo vâ cùndècu-gá-ó ichi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáiyu quindaha-gá, te ni yùhu ni iní-ó càda-o mee-ni sá vâha.

¹⁵ Te nchaa tnúhu-áⁿ danèhé-n-yu te cúñaha-n xìi-yu nàcuáa cadá-yu, te càháⁿ-n dõho-yu te núu ñá túú quide ndáá-yu. Te cada-n sá cúú-n ñⁿ téé xìnu cuechi núú Yá

Ndiöxí, te vá dáñá-n mène-n daquee tíhú ñáhá ñáyiú xii-n.

3

Nchaa sá tàú ñáyiú ndècu ichi Yá Ndiöxí cadá-yu

¹ Te cúñaha-n xii-yu sá ná quíndáá iní-yu cadá-yu nchaa nàcuáa càháⁿ nchaa cue téé cùchiuⁿ, te tàú-yu chindee ñáhá-yu xii-güedé nchaa chiúⁿ váha quíde-güedé.

² Te vá càháⁿ cuèhé-yu cuèndá ñáyiú, te vá cùndùu pletú-yu, te na cùú-yu ñáyiú ndàhú iní-xi, te na cùndahú iní-yu nchaa tnàha ñáyiú-yu.

³ Te tnàhá-ó nǐ xóo cada-o dàtná quíde ñáyiú-áⁿ vitna, chi ío nǐ ñáyiú-ó chi ñá təcú tnùn-í-ó nàcuáa càháⁿ tnúhu Yá Ndiöxí ní cùu, te ío ní xínduu sáá iní-ó nùú-gá, te ní xíndecu-o ñⁿ ichi sá ñà túú tàú-ó cùndecu-o ní cuu, te nándi sá cuèhé sá dúhá ío ñuyíú-a ní xóo cudíí ñí-ó nǐ xóo cada-o chi ní xóo taxi tnùn-í ñáhá-xí xii-o, te ní xóo cada cuèhé ní xóo cada duha-o ní cùu, te ní xíndecu-o ñchi cuedú iní, te cuèndá nchaa sá nǐ xóo cada-o-ǎⁿ xíáⁿ ío ní xóo cuu úhú iní ñáhá ñáyiú xii-o, te ducaⁿ-ni nchòo tucu ní xóo cuu úhú iní-ǎ-yu. ⁴ Te Yá Ndiöxí Yaá ní dácăcu nihnu ñaha xii-o núú ùhú núú ndàhú ní dándíxí tũu-gá iní-ó nàcuáa cutnùn-í iní-ó sǎ ío váha iní-gá, te cùu iní ñáhá-gǎ xii nchaa nchoo ñáyiú ndècu ñuyíú-a. ⁵ Te Yá Ndiöxí ní dácăcu nihnu ñaha-gǎ xii-o nùú ùhú núú ndàhú, dico ñá díú cuèndá ñⁿ sá váha quíde-o ndecu-o ñuyíú-a ducaⁿ nǐ quíde-gá, chi mee-gǎ ducaⁿ tnàhí ní cùndahú iní ñáhá-gǎ xii-o. Te ní nduu ndoo ní nduu nine iní-ó, te ní cuu-o dàtná ñⁿ ñáyiú saa, chi Espíritú Yá Ndiöxí ducaⁿ nǐ quíde ñaha-xi xii-o. ⁶ Te Espíritú-gá ní taxi-gá nǐ yùhu nǐ iní-gá ndécú ndíhi-o, te ducaⁿ nǐ quíde-gá chi ní sándáá iní-ó Xítohó Jesucristú Yaá ní dácăcu nihnu ñaha xii-o núú ùhú núú ndàhú. ⁷ Te ío cùndahú iní ñáhá-gǎ xii-o nùu sa ní quíde ndáá-gá cuéchi-o te ní cuu-o dèhe-gá, núu xíáⁿ vitna ndètu-ná-ó sáá nduu ndùu táhú-ó cùndecu-o ndíhi-gá nǐ caa nǐ quíhiⁿ.

⁸ Te tnúhu ní cáháⁿ-í-a cùu-xi tnúhu ndáá cuíti, te cuín-í sá nǐ yuhu nǐ iní-n cáháⁿ-n tnúhu-gá núú-yu cuèndá sá ncháá

ñáyiú sándáá iní ñáhá xii Yá Ndiöxí nducu ndèé-yu cadá-yu mee-ni sǎ váha, te tnúhu-áⁿ cúú-xí mène-ni tnúhu váha, te ío váha sá cúú-xí-yu. ⁹ Te vá cadá cuèndá-n ncháa tnúhu sá ñà túú nándíhi xítnàha ñáyiú, te vá cadá cuèndá-n ñáyiú nándi càháⁿ cuèndá nchaa sá nǐ xóo cada cue ñáyiú ní xíndecu ndéé sanaha, te vá cadá cuèndá-n ncháa tnúhu xítnàha ñáyiú xícuehé tnàhá cuèndá tnúhu ní chídó tnùn-í ndíi Moisés, chi nchaa tnúhu xítnàhá-yu-áⁿ ñà túú tnàhí nándíhi-xi, te dàcuíta ñaha-xi xii-o.

¹⁰ Te núu ío ñáyiú ní ngúita-yu nándi tnúhu càháⁿ-yu cuèndá sá vǎ cúú ñⁿnuu cue ñáyiú ndècu ichi Yá Ndiöxí ñá, te ñáyiú-áⁿ cáháⁿ sàhú-n dõho-yu ñⁿ úú xito, te núu vá tnǐ-yu tnúhu càháⁿ-n ñá, te vá nǐhí tnàhá-gǎ-n ndíhi-yu. ¹¹ Te ducaⁿ càda-n, chi ñáyiú-áⁿ duuⁿ duuⁿ ñá túú-gǎ cuín-í-yu cadá-yu sá váha, chi mee-nǎ sá cuèhé sá dúhá tnàhá iní-yu cadá-yu, te cùtnun-í iní mée-yu sá ñà túú quíde ndáá-yu, te sáá nduu te nacháhu-yu nchaa sá quíde-yu.

Nàcuáa cada té Titú

¹² Te cuín-í tendaha-í té Àrtemás quixi-dé núú ndécú-n àdi té Tiquicú, te òré ná quèxio ndéda-ni càa ñⁿ cue téé-a núú ndécú-n, te ío nducu ndèe-n quíhiⁿ-n ñùú Nicópolis núú quíhiⁿ-í cundecu-í, chi yàcáⁿ cuín-í quíhiⁿ-í cundecu-í yóo quíde víxiⁿ-xi. ¹³ Te ío cuáñaha-n ncháa sá xín-í ñùhu té Zénás téé ío váha xín-í nchaa nàcuáa càháⁿ léi, ndíhi té Àpolós cuèndá sá ñà túú nǎ cumán-í xii-güedé ichi. ¹⁴ Te cuín-í sá ncháá ñáyiú ndècu ndíhi-o ichi Yá Ndiöxí cada váha-yu, te cuáñàhá-yu ñⁿ sá xín-í ñùhu ñáyiú, te ío váha chiúⁿ cadá-yu te núu ducaⁿ na càdá-yu.

Tnúhu ndéé núú nǐ ndíhi-ná

¹⁵ Te vitna ío cada ndee iní-n càchí nchaa ñáyiú ndècu ndíhi-í iha, te cúñaha-n sǎ ío na càda ndee iní nchaa ñáyiú cùu iní ñáhá xii-o, ñáyiú sándáá iní ñáhá xii Yá Ndiöxí. Te Yá Ndiöxí ío na chindee chitúu ñaha-gǎ xii-ndo ncháa-ndo. Te ducaⁿ na cùnduu. Te ío chí cadá ndèe iní-nǎ vitna.

TUTÚ NÍ CADÚHA TÉ PÄBLÚ QUIHIⁿ NDAHA TÉ FILEMÓN

*Té Păblú cādŭha-dé tutú quíhíⁿ ndaha té
Filèmon*

¹ Te yúhú té Păblú té yìhi vecaá sá cuendá Xítóhó Jesucristú cādŭha-í ìⁿ tutú ndihí té Timùteú cuendá daquixi-í ndaha yòhó té Filèmon, te ío cùu iní ñáhà-í xii-n chi tnàhá-n quide-n chiⁿ Yá Ndiöxí. Te tutú-a tëndaha-í quixi ndaha-n ² ndihí ndaha ñaha nàni Apiá ñaha ndècu ndihí-o ichi Xítóhó Jesucristú, ndihí ndaha té Àrquipú, chi tnàhá-dé quidé-dě chiⁿ Yá Ndiöxí, ndihí ndaha nchaa ñáyiú tàcá vehe-n dàcuahá-yu tnúhu-gá. ³ Te xicáⁿ táhù-í núú Tátá-ó Dŭtú Ndiöxí ndihí núú Xítóhó Jesucristú sá ìo na chindee chitúu ñaha-gă xii-ndo, te ducaⁿ ndi nduú-gá ná cádá te ío váha cuu iní-ndó cùndecu-ndo.

*Té Filèmon ío sàndáá iní-dé Xítóhó Jesu-
cristú te cùu iní-dé tnàha ñáyiú-dé*

⁴ Te ndi tnàhá òré càháⁿ ndihí-í Yá Ndiöxí cuendá-n ndàcáⁿ táhù-í núú-gă. ⁵ Chi nihí-í tnúhu sá ìo sàndáá iní-n Xítóhó Jesucristú, te cùu iní-n cuè ñáyiú ndècu ichi-gá. ⁶ Te xicáⁿ táhù-í núú Yá Ndiöxí sá dàtná-ni sàndáá iní-n-gă ducaⁿ-ni dànehé-n ñáyiú cuendá ducaⁿ ngũnu ichí-yu tnàhá-yu, te cutnùní iní-yu nàcuáa ndũu nchaa sá vâha tàxi Xítóhó Jesucristú xii-o, te tnàhá-yu nduu táhũ-yu nchaa sá vâha-áⁿ. ⁷ Te yòhó té Filèmon cúú-n tēe ndècu ndihí-í ichi Xítóhó Jesucristú càchí tnúhu-í xii-n sã ìo cùdŭí iní-í cuendá sá ìo váha quide-n ndecu-n, chi cùu iní-n nchaa ñáyiú ndècu ichi Yá Ndiöxí, te uuⁿ-gá nihí ndéè-í sá dúcáⁿ quide-n, te diu-n ìo sáhã-n-yu tnúhu ndee ìní ndécú ndihí-yu.

Té Păblú chíndèe tnúhu-dé té Ònésimú

⁸ Te yúhú té Păblú ní taxi Xítóhó Jesucristú tnúhu ndee ìní ndécú ndihí-í sá táxi tnùní ñáhà-í xii-n te tahu-í chiⁿ cada-n, dico vá táxi tnùní ñáhà-í xii-n, ⁹ chi váha-gá sá càháⁿ ndàhú-í núú-n sã cádá-n nchaa nacuáa càháⁿ-í chi ío cùu iní ñáhà-í xii-n.

Chi yúhú sa ta yì-í cuáháⁿ, te yìhi-í vecaá cuendá sá càháⁿ-í tnúhu Xítóhó Jesucristú. ¹⁰ Te càháⁿ ndàhú-í núú-n sã ñà túú nã caní iní-n cuendá té Ònésimú, chi ní cuu-dé vitna dàtná ìⁿ déhe-í, chi ní sàndáá iní-dé tnúhu Yá Ndiöxí ní xáhaⁿ-í xii-dé vitna yìhi-í vecaá.

¹¹ Te nàha-n sá cùtnàhá ní xindecu ndihí-n-dě ñà túú ní quide ndáá-dé, dico vitna ío váha quide-dé ndécú ndihí-í-dé, te diu-ni ducaⁿ càda-dé òré cundecu ndihí tucu-n-dě. ¹² Te vitna tendaha-í-dé ndixi-dé cundecu tucu-n ndihí-dé, te òré queheⁿ cuendá-n-dě, te cada iní-n sã yúhú ní queheⁿ cuendá-n. ¹³ Te vitna yìhi-í vecaá sá cuendá tnúhu Xítóhó Jesucristú, te cuiní-í ngani-í-dé cunu cuechi-dě núú-í cuendá cada-dé núú-n ní cùu. ¹⁴ Dico ñà túú ní ngani-í-dé, chi vátá ndátnũhu ndihí ñaha-gă-í xii-n nũu nása cachí-n cunduu. Te ñà cùndèe iní-í cada yica-í cada-n ìⁿ sá vâha sá cúú-xi-í, chi cuiní-í sá mée-n càni iní-n nũu cuu àdi sá vã cúú. ¹⁵ Te ní cunduu ñi quee té Ònésimú vehe-n, te cudana te mee Yá Ndiöxí ducaⁿ ñi cachí-gá cunduu cuendá dacuàha-dé cada váha-dé. Te ndixi tucu-dé cundecu ndihí ducaⁿ-nã-n-dě. ¹⁶ Te vã cúú-gă-dé dàtná ìⁿ tēe xinu cuechi chi ní cuu-dé dàtná ìⁿ ñani-ó chi ní sàndáá iní-dé Yá Ndiöxí, te yúhú ío cùu iní-í-dé, dico yòhó uuⁿ-gá cuu iní-n-dě, chi cùu-dé ìⁿ tnàha ñáyiú-o, te ndècu-dé ichi Yá Ndiöxí.

¹⁷ Te ìⁿ-ni cùu-o ndecu-o ichi Yá Ndiöxí nũu xiãⁿ càháⁿ ndàhú-í núú-n sã quéhéⁿ cuendá-n-dě dàtná quéhéⁿ cuendá-n yúhú òré quèxiò-í vehe-n. ¹⁸ Te núú iò ìⁿ sã ñi cumání-dě núú-n ñà túú ní quide ndáá-dé cùtnàhá ní xindecu-n ndihí-dé, àdi ió ìⁿ sã tàú-dé te vá ndàcáⁿ cuendá-n nũú-dě, chi yúhú ndacáⁿ cuendá-n nũú-í. ¹⁹ Te ndaha mee yúhú té Păblú cādŭha-í tutú-a càchí tnúhu-í xii-n sã ná chãhu-í nchaa sã ñi quide-dé. Dico dandàcu saú iní-n sã yúhú ní sanu ichi ñaha-í xii-n ichi Xítóhó Jesucristú. ²⁰ Dico yòhó tēe ndècu ndihí-í ichi Xítóhó Jesucristú cada ndee ìní-n càda-n tnúhu ndàhú càháⁿ-í núú-n chi ndècu-o ichi-gá. Te ducaⁿ càda-n nacuáa cuu-xi dàtná ìⁿ tnúhu ndee ìní sá cúú-xi-í, chi ndi ndũú-ó ndècu-o ichi-gá.

²¹ Te cùtnuní iní-í sá cádá-n nchaa nacuáa càháⁿ-í, te cùtnuní tucu iní-í sá ìo-gá vâi sã vâha cada-n dàcúúxi tnũhu ndàhú

càháⁿ-í núú-n, núu xíăⁿ tëndaha-í tutú-a véxi ndaha-n. ²² Te vitna cuñí-í cada túha-n ìⁿ vehe cundecu-í, chi sàni iní-í sá quíxí còto ñaha-í xii-ndo, te ndètu-í sáá nduu-ăⁿ chi nchòhó xicáⁿ táhú-ndó núú Yă Ndiöxí cuëndá-í.

Tnúhu ndée núú nǐ ndihí-ná

²³ Te ío cada ndee ìní-n càchí té Ěpafrás téé yìhí ndihí-í vecaá sá cuëndá tnúhu Xítóhó Jesucrístú. ²⁴ Te ío cada ndee ìní tucu-n càchí té Măcú, ndihí té Arístarcú, ndihí té Dēmás, ndihí té Lùcá, chi tnàhá cue téé-ăⁿ quìde-güedé chiúⁿ Xítóhó Jesucrístú.

²⁵ Te Xítóhó Jesucrístú ío na chìndee chítúu ñaha-gă xii-ndo nchàa-ndo. Te ducaⁿ na cùnduu. Te ío chí cádá ndèe iní-nă vitna.

TUTÚ QUIHIⁿ NDAHA CUE ÑÁYIU HÈBREÚ

Dútú Ndiöxí ní cachí-gá sá Dêhe-gá cada núú-gă

¹ Te ndéé sanaha, Yá Ndiöxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchàa ñaní tnáhá-ó ní xindecu ndéé dâvâ-áⁿ te ñiu ducaⁿ ñi quide-güedé. Te titni xito ducaⁿ ñi xáhaⁿ-gă xii-güedé ní cáháⁿ-güedé tnúhu-gá. Te ndi ñiiⁿ ndi ñiiⁿ ñi xitnũhu ñaha-gă xii-güedé nâcuâa cáháⁿ-güedé tnúhu-gá núú-yu. ² Te sátá ñi cuu vâi nduu ta yâha cuáháⁿ, te ní sâá nduu ñi cachí Yá Ndiöxí sá Dêhe-gá cada núú-gă cáháⁿ tnúhu-gá núú-ó. Te ñiu-ni mee-gă ní táuchíúⁿ ñi cadúha Dêhe-gá ñuyíú ndihi nchaa sá ió, te ní cachí-gá sá ncháá cùu-xi cuendá Dêhe-gá. ³ Te Dêhe Yá Ndiöxí ío càhnu cuu-gá dàtná càhnu cuu mee-gá, te dàtná-ni sâni iní méé-gă ñiu-ni ducaⁿ sâni iní Dêhe-gá chi tnàhá-gá cúú-gă Ndiöxí, te sá cuendá tnúhu càháⁿ Dêhe-gá xiáⁿ ndécú-ni nchàa sá ió ñuyíú, te ducaⁿ chi ío càhnu cuu Dêhe-gá, te ñiu-ni Dêhe-gá ní quide nâcuâa vá cündècu-gá cuèchi-o. Te sátá dúcáⁿ te ní ngóo-gá xio cùha Tâtá-gă Dútú Ndiöxí Yáá ío cùnunu ndecu andiu.

Dêhe Dútú Ndiöxí ío-gá cùnunu-gá dàcúúxi cuè espíritú xínú cuèchi núú-gă

⁴ Te Dêhe Yá Ndiöxí ío-gá cùnunu-gá dàcúúxi cuè espíritú xínú cuèchi núú-gă, te ducaⁿ chi ní nduu táhú-gă núú Tâtá-gă Dútú Ndiöxí sá ío-gá cunuu-gă dàcúúxi cuè espíritú-áⁿ. ⁵ Chi Yá Ndiöxí ñá túú ní xâhaⁿ-gă xii ñi ñiⁿ cue espíritú xínú cuèchi núú-gă dàtná ní xáhaⁿ-gă xii Dêhe-gá, te duha ní xáhaⁿ-gă: Yòhó cúú-n Dêhe mee-í, te ducaⁿ-ni cündècu-n núú ndécú-í. Duha ní xáhaⁿ-gă. Te ní cachí tucu Yá Ndiöxí: Yúhú cúú-í Tâtá Yáá-áⁿ, te mee-gă cúú-gă Dêhe-í.

Duha ní cachí-gá. ⁶ Te cútnàhá ní tendaha-gă Dêhe-gá Yáá ío cùnunu ní quixi-gă ñuyíú-a, te ní cachí-gá:

Tàú-xi sá ncháá cuè espíritú xínú cuèchi núú-í chiñuhu-xi Dêhe-í.

Duha ní cachí-gá. ⁷ Te Yá Ndiöxí ní cáháⁿ-gá cuendá cue espíritú xínú cuèchi núú-gă, te ní cachí-gá:

Yúhú quidè-í sá ncháá cuè espíritú xínú cuèchi núú-í cúú-xí dàtná táchí, te ñiu-ni cue espíritú-áⁿ quidè-í sá cúú-xí dàtná itá ñuhú.

Duha cächí-gá. ⁸ Dico Dêhe-gá chi ñá túú dùcaⁿ ní xáhaⁿ-gă, chi duha ní xáhaⁿ-gă:

Yòhó tnàhá-n cùu-n Ndiöxí dàtná cúú yúhú Yáá cúú Tâtá-n,

te ducaⁿ-ni tàxi tnuní-n ñi caa ñi quíhíⁿ, te ío váha ndáá quidè-n tàxi tnuní-n.

⁹ Te dàquee tihú-n nchàa sá cuèhé sá dúhá, te cùu iní-n nchàa sá vâha, núú xiáⁿ yúhú Yáá cúú Tâtá-n ñi quide-í sá ío-gá vii ío-gá váha cuu iní-n, dàcúúxi nchàa dava-gă ñáyiú ndècu ndihi-n.

Duha ní xáhaⁿ-gă xii Dêhe-gá. ¹⁰ Te ní xáhaⁿ tucu Yá Ndiöxí xii Dêhe-gá:

Yòhó cúú-n Yáá ío cùnunu, chi ndéé cútnàhá ñá túú vèdana ná ío te ní cadúha-n ñuyíú ndihi andiu.

¹¹ Te andiu ndihi ñuyíú chi naa-xi, dico yòhó chi cundecu-ni-n ñi caa ñi quíhíⁿ.

Te andiu ndihi ñuyíú chi ndihi-xi dàtná ndíhí ñiⁿ dóó,

¹² te dàtná cùnini-n quide ñáyiú ndihi ñiⁿ dóó òré ndácáⁿ tnáhnũ-yu tàxi ndecú-yu ñiⁿ xio, ducaⁿ càda-n ñuyíú ndihi andiu,

te dàtná nádâma dóó ñáyiú ducaⁿ càda tucu-n ñuyíú ndihi andiu.

Te yòhó dàtná-ni càa-n ndecu-n vitna ducaⁿ-ni cünduu-n cundecu-n ñi caa ñi quíhíⁿ, chi vá yíi tnàhí-n.

Duha ní xáhaⁿ Yá Ndiöxí xii Dêhe-gá. ¹³ Te Yá Ndiöxí ñá túú ní xâhaⁿ-gă xii ñi ñiⁿ cue espíritú xínú cuèchi núú-gă dàtná ní xáhaⁿ-gă xii Dêhe-gá, te duha ní xáhaⁿ tucu-gă:

Ngóo xio cùha-í taxi tnuní-n,

te yúhú cada-í te nchaa sá cúú úhú iní ñáhá xii-n canehe-xi sá yíñuhu núú-n.

Duha ní xáhaⁿ-gă xii Déhe-gă. ¹⁴ Te nchaa espíritú xínú cuèchi núú Yă Ndiöxí mee-ni chiùⁿ-gă quidé-xí, chi tëndaha-gă cue espíritú-áⁿ cuáháⁿ-xi nchaa núú ndécú cuè ñáyiu ní nduu táhú cundecu ndihi-gă chindee ñàha-xi xií-yu.

2

Vá dáñá ndèé-ó tnũhu sá càháⁿ nàcuáa naníhí tàhú-ó

¹ Te sá cuendá sá ïo cùnūu Xítóhó Jesucristú, núu xiáⁿ ío xìni ñuhu-xi cada cuendá-ó nchàa tnũhu càháⁿ-gă sá sà ní xindedóho-o cuendá sá vă dáñá ñihnu-o. ² Te cue espíritú xínú cuèchi núú Yă Ndiöxí ní cáháⁿ-xi tnũhu-gă ndéé sanaha, te tnũhu ní cáháⁿ cue espíritú-áⁿ cúu-xí să ndàá cuiti. Te nchaa ñáyiu ñá túú ní cuini tni nchaa tnũhu ní cáháⁿ cue espíritú-áⁿ, te ni ñà túú ní cuini-yu cundedóho-yu, nchaa ñáyiu-áⁿ ñi nacháhu-yu nàcuáa ndūu nchaa cuéchi ní quidé-yu ñiⁿ ñiⁿ-yu. ³ Te sá dúcáⁿ ñi yáha cue ñáyiu-áⁿ, xiáⁿ cútnúni ndáá iní-ó să vă cãcu ñihnu-o te núu na dàña ñihnu-o tnũhu sá càháⁿ nàcuáa naníhí tàhú-ó, tnũhu sá ïo cùnūu, chi nacháhu-o te núu ducaⁿ na càda-o. Te díhna-gă Xítóhó Jesucristú ní cáháⁿ-gă tnũhu-áⁿ te nchaa ñáyiu ní xindedóho nchaa nàcuáa ndūu tnũhu-áⁿ ñi cáháⁿ ndáá-yu tnũhu-áⁿ nũú-ó. ⁴ Te tnàhá Yă Ndiöxí cundihí-gă nchaa ñáyiu-áⁿ quidé-gă nàcuáa cutnúni iní-ó să tnũhu-áⁿ cúu-xí tnũhu ndáá, chi quide-gă titni núú să vă yõ tnàhí ndàcu cada te ío cùnũhu-o. Te Espíritú Yă Ndiöxí quidé-xí nàcuáa nduu táhú-ó ndi díⁿ nũú chiùⁿ cada-o nàcuáa cuini méé-gă. Te sá dúcáⁿ quide Yă Ndiöxí nchaa xiáⁿ, xiáⁿ cútnúni iní-ó să tnàhá-gă càháⁿ-gă sá tnũhu-áⁿ cúu-xí tnũhu ndáá.

Xítóhó Jesucristú ní xinduu yiqui cùnũ-gă dàtná cáayiqui cuñú nchoo cuè ñáyiu ñuyúú-a

⁵ Te Yă Ndiöxí vá táxi ndècu-gă cue espíritú xínú cuèchi núú-gă taxi tnúni-xi ñuyúú sáá să vátá quini-gă-ó, te diu cuendá xiáⁿ càháⁿ-í. ⁶ Te núú tütú Yă Ndiöxí cächí-xi:

Yòhó Dútú Ndiöxí ñá túú ñá cúu cuè ñáyiu ñuyúú nũu ndacu iní-n-yu, àdi chin-deé-n-yu.

⁷ Te yòhó ní cachí-n să nchàa ñáyiu ñuyúú-a vá cùnūu-yu dàtná cùnūu cue espíritú xínú cuèchi núú-n,

dico ní cachí-n să sàá nduu te ío cùnūu-yu tnàhá-yu, te mee-n càháⁿ-n să ïo càhnu cuú-yu,

te ní cachí tucu-n să táxi tnúni-yu nchaa sá ñi cadúha-n.

⁸ Te ducaⁿ nchàandi túhú sá ío quindàhá-yu. Duha cächí-xi núú tütú-gă. Te sá dúcáⁿ ñi cachí Yă Ndiöxí sá quindàha ñáyiu ñuyúú nchaa sá ío, xiáⁿ cútnúni sá ncháandi túhú sá ío taxi tnúni-yu, dico vátá sàá-gă nduu dúcáⁿ quini-ó càda-xi. ⁹ Te nchoo sa nàha-o sá tnáá-ni ñi quide Yă Ndiöxí cuendá sá vă cùnūu Xítóhó Jesucristú dàtná cùnūu cue espíritú xínú cuèchi núú-gă. Te ducaⁿ ñi quide Yă Ndiöxí chi ní cundàhú iní-gă nchaa ñáyiu ñuyúú-a, chi ní cachí-gă sá Déhe-gă cúu cuendá ncháa-yu, te Xítóhó Jesucristú ío ní ndoho-gă òre ní xihí-gă, núu xiáⁿ ní nduu táhú-gă cùnūu vihi-gă vitna. Te mee Yă Ndiöxí cächí-gă sá ïo càhnu cuu Déhe-gă.

¹⁰ Te Yă Ndiöxí ní cadúha-gă nchaandi túhú sá ío nàcuáa ní cachí iní méé-gă, te sá dúcáⁿ ñi quide-gă nũu xiáⁿ váha-ni sá ñi cachí-gă sá Xítóhó Jesucristú nandi ndoho-gă te cuú-gă cuendá ducaⁿ ñà túú tnàhí-gă ná cùmání-gă núú Yă Ndiöxí. Te sá dúcáⁿ ñi cuu núu xiáⁿ ní níhí Yă Ndiöxí nàcuáa cada-gă càndeca-gă nchaa ñáyiu cùu déhe-gă quihíⁿ núú ïo váha càa cundecu-yu ndihi-gă ni caa ni quihíⁿ. Te Xítóhó Jesucristú cúu-gă Yaá ní quide nàcuáa nduu táhú cue ñáyiu cundecu-yu ndihi Yă Ndiöxí.

¹¹ Te Xítóhó Jesucristú cúu-gă Yaá quidé ndècu yihnu ñáyiu núú Yă Ndiöxí ñáyiu sàndáá iní ñáhá xì-gă, te Xítóhó Jesucristú ndihi cue ñáyiu-áⁿ ñiⁿ-ni Yàá cúu Tătá-yu ndihi-gă, núu xiáⁿ Xítóhó Jesucristú Yaá cúu Déhe Dútú Ndiöxí ñá túú cùcahaⁿ núú-gă càháⁿ-gă sá ñàni-gă ndihi cùha-gă cúu nchàa ñáyiu-áⁿ. ¹² Te quèe ndáá-xi nàcuáa càháⁿ-xi núú tütú Yă Ndiöxí núú cächí-xi nàcuáa ní xáhaⁿ Xítóhó Jesucristú xii Tătá-gă Dútú Ndiöxí, te duha ní xáhaⁿ-gă:

Cáháⁿ váha-í cuendá-n nũú nchàa cue téè cùu datná ñani-í ndihi núú nchàa cue

ñáyiú ðihí cúú ðàtná cúha-í,
te cata-í ndudú chiñuhu ñaha-í xii-n núú
tàcá-yu.

Duha yòdo tnuní núú tùtú-gá nàcuáa ní
xáhaⁿ Dèhe-gá xii-gá. ¹³ Te ingá tucu xi-
chi núú tùtú Yá Ndiöxí càháⁿ-xi nàcuáa ní
cáháⁿ Xítohó Jesucristú cuendá-gá, te duha
ní cachí-gá:

Yúhú nchaa-ni nduu quindáa iní-í Tàtá-í
Dútú Ndiöxí.

Duha càchí-xi núú tùtú Yá Ndiöxí nàcuáa ní
cáháⁿ Xítohó Jesucristú. Te ingá tucu xichi
núú tùtú Yá Ndiöxí càháⁿ-xi nàcuáa ní cáháⁿ
tucu Xítohó Jesucristú, te duha ní cachí-gá:

Iha ndècu ndihí-í nchaa ñáyiú cùu déhe
Tàtá-í Dútú Ndiöxí, te ðiu-ni ñáyiú-áⁿ
ní taxi cuendá Tàtá-í cuu cuendá-í.

Duha càchí-xi núú tùtú-gá nàcuáa ní cáháⁿ
Xítohó Jesucristú.

¹⁴ Te sá cuendá nchaa ñáyiú cùu déhe Yá
Ndiöxí cúú-yu yiqui cùñú, núu xiáⁿ ducaⁿ
tnàhá Xítohó Jesucristú ní cuu-gá yiqui
cùñú, te ducaⁿ ní cuu-gá yiqui cùñú cuendá
cuú-gá, te sá dúcáⁿ cùú-gá te ndacu-gá
daquèe tíhú-gá sácuíhná, te ðiu sácuíhná-áⁿ
quidé-xí xihí ñáyiú. ¹⁵ Te ducaⁿ ní quide-gá
cuendá sá cuè ñáyiú ñuyú-a vá yùhú-gá-yu
sá cùú-yu, chi nchaa-ni nduu yùhú-yu
sá cùú-yu. ¹⁶ Te na càchí tnúhu ndáá-í
sá Xítohó Jesucristú ní quixi-gá cuendá
chindee-gá cue ñáyiú cùu ñani tnàhá ndíi
Àbrahám, te ñá díú cuendá sá chindèe-gá
cue espíritú xínú cuèchi núú Yá Ndiöxí.
¹⁷ Te cuendá xiáⁿ núu dai ní xini ñuhu-xi
sá cúú-gá ñáyiú cuendá yàha-gá nándi sá
yàha-gá ðàtná yàha cue ñáyiú cùu ndi
mee-gá cuendá ducaⁿ cùu-gá dútú ïo cùnuu
te cuu ndáá-gá núú Yá Ndiöxí, te cundàhú
iní-gá nchaa ñáyiú te cuú-gá cuendá sá vá
cúndècu-gá cuèchi-yu núú Yá Ndiöxí. ¹⁸ Te
mei òré ndóhó Xítohó Jesucristú ní xito
ndéé ñàhá sàcuíhná xii-gá te núu ndisa sá
vá cáda-gá ni ñⁿ sá ñà túú tàú-gá cada-gá,
te sá dúcáⁿ ní ndoho-gá xiáⁿ núu ndácú-gá
chindèe-gá nchaa ñáyiú ducaⁿ yàha.

3

*Xítohó Jesucristú ïo-gá cùnùu-gá dàcúúxi
ndíi Moisés*

¹ Te nchòhó cúú-ndó ñáyiú ndècu ndihí-í
ichi Xítohó Jesucristú ñáyiú cùu cuendá Yá

Ndiöxí, te tnàhá-ndó cùu-ndo ñáyiú ní cáháⁿ
ñàhá-gá cuendá cundecu-ndo ndihí-gá. Te
yúhú càchí tnúhu-í xii-ndo sá ïo váha cada
cuendá-ndó nàcuáa nduu cuendá Xítohó Je-
sucristú, chi ðiu-gá cúú-gá Yaá ní tendaha
ñàha Dútú Ndiöxí ní quixi-gá ñuyú-a, te
ðiu-gá cúú-gá Dútú ïo cùnuu chi quide-gá
núú Yá Ndiöxí. Te ðiu-ni cuendá Xítohó
Jesucristú càháⁿ tnúhu sá ní sàndáa iní-ó.

² Te mee Yá Ndiöxí ní sáha chiúⁿ-gá Xítohó
Jesucristú, te ïo ndáa quidé-gá chiúⁿ-áⁿ sá
cúú-xí Yá Ndiöxí, te ðiu-ni ducaⁿ ní quide
ndíi Moisés ní quide ndíi chiúⁿ ní táhú Yá
Ndiöxí, te ïo ndáa ní quide ndíi chiúⁿ-gá sá
cúú-xí nchaa ñáyiú cùu cuendá-gá, te cue
ñáyiú-áⁿ cúú-yu ðàtná vehe mee-gá. ³ Te ñⁿ
tée dàcaa ñⁿ vehe váha ïo càhnu-gá cúú-dé
dàcúúxi vèhe dacao-dé. Te ducaⁿ sàtnahá-xi
cùu Xítohó Jesucristú chi ïo-gá càhnu cuu-gá
dàcúúxi ndíi Moisés. ⁴ Te nchoo sà naha-o
sá ncháa vèhe dacuítí ndècu cue téé ní
dácáa, dico sa nàha tucu-o sá Yá Ndiöxí
quidé-gá ndécú nchaa sá ïo ñuyú-a. ⁵ Te
ndíi Moisés-áⁿ ïo ndáa ní quide ndíi chiúⁿ
ní táhú Yá Ndiöxí ní quide ndíi sá cúú-xí
nchaa ñáyiú cùu cuendá-gá. Te sá dúcáⁿ
ní quide ndíi xiáⁿ ní cuu ndíi ñⁿ téé ní
xinu cuechi núú Yá Ndiöxí. Te ní xáhaⁿ
ndíi xii nchaa ñáyiú cùu cuendá-gá nàcuáa
cáháⁿ-gá ndéé cuèe-gá. ⁶ Dico Xítohó Jesu-
cristú cúú-gá Déhe mee Yá Ndiöxí, te cùu-gá
Yaá ïo quide ndáa yíndàha-gá nchaa ñáyiú
cùu cuendá Yá Ndiöxí. Te tnàhá-ó cùu-o
ñáyiú cùu cuendá-gá, te ðiu-ni ducaⁿ cùu
cuendá ñàhá-gá xii-o te núu na càchicúⁿ
nihnu-ni-o càni ndáa iní-ó cuendá-gá ndéé
ná sàa nduu ngündecu-o ndihí-gá.

*Cue ñáyiú cùu cuendá Yá Ndiöxí ïo váha
cùu iní-yu ndécú-yu ndihí-gá*

⁷ Te núú tùtú Yá Ndiöxí yódó tnùní nàcuáa
ní cáháⁿ Espíritú-gá, te duha ní cachí-xi:

Te núu nchòhó ndèdóho-ndo nchaa tnúhu
cáháⁿ Yá Ndiöxí vitna,

⁸ te vá cúndùu sáa iní-ndó ðàtná ní xínduu
sáa iní ñáyiú ní dàquèe tíhú tnúhu Yá
Ndiöxí, ñáyiú ní xíndecu xití yucu,

chi ñáyiú-áⁿ ní xito ndéé-yu Yá Ndiöxí núu
nása cada ñaha-gá xií-yu.

Duha ní cachí Espíritú-gá. ⁹ Te cächí tucu Espíritú Yá Ndiöxí nàcuáa ní cáháⁿ méé-gã, te duha ní cachí-gá:

Xití yucu ní xito ndéé ñáhá cuè ñani tnáhá-ndó nǐ xíndecu ndéé sanaha xii-í,

te ducaⁿ nǐ quide ñáhá-yu cuèi ní xiní-yu nchaa sá nǐ quide-í ndi ùdico cuía nǐ xíndecú-yu xití yucu-áⁿ.

¹⁰ Te sá dúcáⁿ nǐ quidé-yu núu xiãⁿ ní cudéèⁿ-í núu-yu,

núu xiãⁿ ní cáháⁿ-í cuèndá-yu, te ní cachí-í:

“Ñáyiú-a quide-ní-yu nchaa sá ñà túú tàú-yu cadá-yu te ni ñà túú cuini-yu cadá-yu nchaa nàcuáa sàni iní-í,

te ni ñà túú cuini-yu cadá-yu nàcuáa càháⁿ-í”,

duha ní cáháⁿ-í cuèndá-yu.

¹¹ Te xiãⁿ núu ní cudéèⁿ-í núu-yu te ní xáhaⁿ ndáá-í xii-yu sá vǎ ndúú tǎhǔ-yu cundecu váha-yu núu ndécú-í.

Duha ní cachí Yá Ndiöxí cächí Espíritú-gá.

¹² Te nchòhó ñáyiú ndècu ndihi-í ichi Xítóhó Jesucristú, càháⁿ-í dóho-ndo sǎ ïo cada cuèndá-ndó vǎ cáni cuèhé iní-ndó te ngóo-ndo vǎ quíndáá-gá iní-ndó Yá Ndiöxí te dañá-ndo ichi-gá, te diu-gá cúu-gǎ Yaá ndécú nchàa nduu nchaa quíú. ¹³ Te ïⁿ nduu ïⁿ nduu ïo chí cuǎha tnàha tnúhu ndee iní cundecu-ndo nini ndecu-ndo ñuyíú-a cuèndá sá vǎ xǐnu iní-ndó càda-ndo nándi sá cuèhé sá dúhá, te ducaⁿ te vǎ cúu sàá iní-ndó núu Yá Ndiöxí. ¹⁴ Te vǎ dáñá ndèé-ó càni ndáá iní-ó nàcuáa cada ñaha Yá Ndiöxí xii-o, te dàtná-ni ní sani iní-ó ndéé cútnáhá ní tuha-o ichi Yá Ndiöxí, te diu-ni ducaⁿ càni iní-ó ndéé ná sàá nduu vǎ cúndècu-gá-ó ñuyíú-a, te núu ducaⁿ na càda-o te cùu ïⁿnuu-o ndihi Xítóhó Jesucristú.

¹⁵ Te duha càháⁿ-xi ïⁿ xichi núu tùtú Yá Ndiöxí:

Te núu nchòhó ndédóho-ndo nàcuáa càháⁿ Yá Ndiöxí vitna,

te vǎ cùndùu sàá iní-ndó dàtná ní xínduu sàá iní cue ñáyiú ní dáquée tǐhú tnúhu-gá ndéé sanaha.

Duha cächí-xi núu tùtú-gá. ¹⁶ Te cue ñáyiú ducaⁿ nǐ xínduu sàá iní-xi cùu-yu ñáyiú ní ndeñuhu ndíi Moisés nacióⁿ Ègiptú, te ñáyiú-áⁿ nǐ xíndedóho-yu tnúhu ní cáháⁿ Yá Ndiöxí te ní quide sàá iní-yu ní dáquée

tǐhǔ-yu tnúhu-gá. ¹⁷ Te ndi ùdico cuía nǐ xúhuⁿ-yu ichi ïo ní cudéèⁿ Yá Ndiöxí núu-yu cuèndá sá nǐ quidé-yu nándi nchaa sá cuèhé sá dúhá, te ñáyiú-áⁿ nǐ xihí-yu xití yucu.

¹⁸ Te nchaa ñáyiú-áⁿ ñà túú ní cuini-yu tni-yu tnúhu ní cáháⁿ Yá Ndiöxí núu xiãⁿ ní cáháⁿ ndáá-gá sá vǎ ndúú tǎhǔ-yu cundecú-yu núu ïo váha càa ndecu-gá. ¹⁹ Te xiãⁿ núu nchoo cùtnuní iní-ó sǎ nchàa ñáyiú-áⁿ ñà túú ní ndùu tǎhǔ-yu cundecu váha-yu núu ndécú-gǎ, chi ñà túú ní sàndáá iní-yu tnúhu ní cáháⁿ-gá.

4

¹ Te vitna ndècu ndihi-gá-ó tnúhu Yá Ndiöxí tnúhu sá dǎnehé ñáhá xii-o sá cúu cùndecu váha-o núu ndécú-gǎ, te tàú-xi quiyùhú iní-ó chi na cuáháⁿ te vǎ ndúú tǎhǔ-ó cùndecu váha-o núu ndécú-gǎ. ² Te tnàhá nchoo nǐ ngúndecu ndihi-o tnúhu sá càháⁿ nàcuáa naníhí tǎhǔ-ó dàtná ní xíndecu ndihi cue ñáyiú ndéé sanaha, dico ñáyiú-áⁿ chi ñà túú vèdana ni nándihi-xi cuèi ní xíndedóho-yu tnúhu-áⁿ chi ñà túú ní sàndáá iní ñáhǎ-yu xii-gá. ³ Dico nchoo cùu-o ñáyiú ní sàndáá iní tnúhu Yá Ndiöxí, núu xiãⁿ nduu tǎhǔ-ó cùndecu váha-o núu ndécú-gǎ, te ní quee ndáá-xi nàcuáa càháⁿ-gá núu tùtú-gá núu cächí-xi:

Yúhú ní cudéèⁿ-í núu-yu, te ní cáháⁿ ndáá-í sá vǎ ndúú tǎhǔ-yu cundecu váha-yu núu ndécú-í.

Duha ní cachí-gá. Te cuu nduu tǎhǔ-yu cundecu váha-yu núu ndécú Yá Ndiöxí ní cùu, chi sa ní xǐnu cava nchaa chiúⁿ ní quide-gá sá nǐ cadúha-gá ñuyíú. ⁴ Te núu tùtú Yá Ndiöxí càháⁿ-xi nàcuáa ní quide-gá nduu úsá, te duha cächí-xi:

Yá Ndiöxí ní quide chiúⁿ-gá ínú nduu ní quide-gá nchaa chiúⁿ-gá te ní nde-tatú-gá nduu úsá.

Duha cächí-xi núu tùtú-gá. ⁵ Te cächí tucu-xi núu tùtú Yá Ndiöxí nàcuáa ní cáháⁿ-gá cuèndá cue ñáyiú ndéé sanaha, te duha ní cachí-gá:

Cue ñáyiú-a vǎ ndúú tǎhǔ-yu cundecu váha-yu núu ndécú-í ndétátú-í.

Duha ní cachí-gá. ⁶ Te ñáyiú ní xíndedóho tnúhu sá càháⁿ nàcuáa naníhí tǎhǔ-ó ndéé sanaha, ñà túú ní ndùu tǎhǔ-yu cundecu váha-yu núu ndécú Yá Ndiöxí ndétátú-gá,

te ducaⁿ chi ñá túú ní sàndáá iní ñáhă-yu xii-gá, dico ío-gá ñáyiu nduu táhú cundecu váha núú ndécú-gă ndétátú-gá. ⁷ Te ní xica cuéhé nduu sá dúcáⁿ ñà túú ní sàndáá iní ñáhă ñáyiu-áⁿ xii-gá, te dàtnùní ní cáháⁿ ndíi Dàvíi yuhu-gá nàcuáa cada-gá vitna, te ñu-ni nàcuáa sa yòdo tnuní ñu-ni ducaⁿ chido tnuní tucu-í nàcuáa ní cáháⁿ ndíi yuhu-gá, te duha ní cachí-gá:

Te núu nchòhó ndèdòho-ndo tnùhu càháⁿ-í te vá cádá sáá iní-ndó.

Duha ní cachí-gá. ⁸ Te ndíi Jòsué ní sanu ichi ndíi ñáyiu núú quíhíⁿ-yu cundecu váha-yu, dico ñá díú cuendá xíáⁿ ní cáháⁿ Yă Ndiôxí, chi cuendá nàcuáa cada-gá vitna ní cáháⁿ-gá. ⁹ Núu xíáⁿ sáá nduu ndùu táhú nchaa ñáyiu cùu cuendá Yă Ndiôxí ngúndecu váha-yu núú ndécú-gă ndétátú-gá. ¹⁰ Te nchaa ñáyiu ducaⁿ na ndùu táhú cundecu váha núú ndécú Yă Ndiôxí ndétátú-gá, te tnàhá-yu ndetátú-yu cuendá nchaa sá váha ní quidé-yu dàtná ndétátú méé-gă. ¹¹ Te xini ñuhu-xi sá nchóó ïo nducu ndèe-o nducu-o nàcuáa cada-o cuendá nduu táhú-ó ngúndecu váha-o núú ndécú Yă Ndiôxí ndétátú-gá, chi na cuáháⁿ dava-ndo càda-ndo datná ní quide cue ñáyiu ñá túú ní sàndáá iní ñáhă xì-gá, te vá ndúú táhú-ndó cundecu váha-ndo núú ndécú-gă te núu ducaⁿ na càda-ndo.

¹² Te tnùhu Yă Ndiôxí cúu-xí dàtná ñⁿ sá nchító-ó chi quide-xi nándi sá quidé-xí, te cùu-xi datná ñⁿ sá dèéⁿ víhí-gă dàcúxí ñⁿ yuchí sá ndèé úú xio núu-xi. Te ducaⁿ sãtnahá-xi cùu tnùhu-gá chi quée-xi iní-ó, te dândixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o. ¹³ Te ni ñⁿ sá ní cadúha Yă Ndiôxí vá cáni iní-ó sá ndácú-xí nguiváha-xi núú-gă, chi nchaandi túhú sá sání iní-ó ndècu túu-xi núú-gă, te ñu núú Yàá-áⁿ na càni cuendá-ó nchàa sá quidé-ó.

Xítóhó Jesucristú cúu-gă Dútú ïo cùnnu

¹⁴ Te Xítóhó Jesucristú cúu-gă Dútú ïo cùnnu ndecu ndihí-o, te ñu-gá cúu-gă Dèhe Dútú Ndiôxí, te Yàá-áⁿ cuãndaa-gá andiu ní nucúndecu-gá núú Yă Ndiôxí, núu xíáⁿ tàú-xi sá cáncicúⁿ nihnu-ni-o quíndáá iní-ó-gă. ¹⁵ Te mee Yàá-áⁿ ïo cùnnu-gá cúu-gă dútú-ó ndècu ndihí-o, te ío na cùndahú iní ñáhă-gă xii-o cuendá sá ñá nihí

ndéé-ó cùndecu-o. Te ducaⁿ càda-gá chi ní yáha-gá dàtná yáha mee-o, chi nchaa sá ní yáha-gá-áⁿ ní cuu-xi sá cádá-gă nándi nchaa sá cuéhé sá dúhá ní cùu dico ni ñⁿ ñá túú ní quide-gá. ¹⁶ Núu xíáⁿ tàú-ó sá nchóó ní yuhu ní iní-ó cáháⁿ ndihí-o Yă Ndiôxí Yáá ïo cùndahú iní ñáhă xì-o chindee ñaha-gá, te ducaⁿ càda-o te cùndahú iní ñáhă-gă chindee ñaha-gá xii-o ndèda-ni càa oré xini ñuhu-o-gá.

5

¹ Te nchaa cue dútú cùnnu núú ñáyiu isràel ñu-ni ñáyiu cùu-güedé, te ducaⁿ ní ngúndecu-güedé cuendá cada-güedé chiúⁿ sá cúu-xí Yă Ndiôxí cuendá-yu, chi ñu cue téé-áⁿ ní xóo nacani cuendá-güedé núú-gă quiti ní xóo cahni-güedé ní xóo nduu táhú-gă, te ducaⁿ ní xóo cada-güedé cuendá sá cádá càhnu iní Yă Ndiôxí cuéchi-yu, te ducaⁿ ní xóo nacani cuendá tucu-güedé núú-gă nchaa dava-gá sá ní xóo níhí-güedé ní xóo nduu táhú-gă. ² Te nchaa cue dútú-áⁿ ní xóo cundee ïni-güedé nchaa sá ní xóo cada nchaa ñáyiu ñá túú ní quide ndáá ñáyiu ñá túú cùtnuní iní-xi, te ducaⁿ ní xóo cada cue dútú-áⁿ chi tnàhá-güedé ñá túú ní xóo níhí ndéé-güedé cundecu-güedé cuendá nchaa sá ní xóo yáha-güedé. ³ Te sá cuendá sá dúcáⁿ ñà túú ní xóo níhí ndéé-güedé núu xíáⁿ dai ní xini ñuhu-xi sá tnàhá-güedé cuáha-güedé Yă Ndiôxí sá ndúú táhú-gă cuendá méé-güedé dàtná quidé-güedé cuendá ñáyiu.

⁴ Te ni ñⁿ téé vá ndácú-dè cuu-dé dútú cùnnu cuendá-ni sá càchí iní méé-dè te núu ñá díú mèe Yă Ndiôxí ducaⁿ cuíni-gá sá cúu-dè dútú cùnnu datná ní quide-gá ndíi Àrón. ⁵ Te cuéi Xítóhó Jesucristú chi ñá díú mèe-gá ní quide-gá méé-gă ñⁿ dútú cùnnu nàcuáa cada nínu-gá méé-gă, chi mee Tãtá-gă Dútú Ndiôxí ducaⁿ ní cachí-gá sá cúu-gă Dútú cùnnu, te ducaⁿ chi Yă Ndiôxí ní xáhaⁿ-gă:

Yòhó cúu-n Dèhe-í, te cuíni-í sá dúhá-ni cùndecu-n núú ndécú-í. Duha ní xáhaⁿ-gă xii Xítóhó Jesucristú. ⁶ Te núú tütú Yă Ndiôxí yódó tnuní nàcuáa ní xáhaⁿ tucu-gá xii Xítóhó Jesucristú, te duha ní xáhaⁿ-gă:

Yòhó cúú-n dütú cundecu ni caa ni quíhíⁿ, te cùu-n datná ní cuu ndíi Melquisèdec. Duha ní xáhaⁿ-gã xii Xítohó Jesucristú. ⁷ Te cùtnàhá ní xíndecu Xítohó Jesucristú ñuyíú-a te níhi ní xóo cáháⁿ ndihi-gá Yã Ndiöxí te ní xóo cáháⁿ ndàhú-gá núú-gã, te ní xóo ndáhyú-gá òré ducaⁿ ñi xóo cáháⁿ ndihi-gá Yã Ndiöxí, te ducaⁿ ñi quide-gá chi nàha-gá sá Yã Ndiöxí cúú-gã Yaá ndacu dàcácu nihnu ñaha xii-gá cuendá sá vã cùú dúcáⁿ-gã. Te Yã Ndiöxí ní xíndedóho-gá nchaa tnúhu ní cáháⁿ Xítohó Jesucristú cuendá sá ñi quide-gá nchaa nàcuáa ní xáhaⁿ Yã Ndiöxí cada-gá. ⁸ Te sá cuendá nchaa sá ñi ndoho Xítohó Jesucristú xiãⁿ ní cutnùní iní-gá cada-gá nchaa dava-gá sá vãha nàcuáa cuení méé Yã Ndiöxí cada-gá. Te ducaⁿ ñi cuu cuèi cùu-gá Déhe Yã Ndiöxí. ⁹ Te sá dúcáⁿ ñi quide-gá nchaa nàcuáa cuení méé Yã Ndiöxí, xiãⁿ nũu vitna cùu-gá Yaá dácácu nihnu nchaa ñáyíu sàndáa iní ñáhá xii-gá núú ùhú núú ndàhú. ¹⁰ Te mee Yã Ndiöxí ní cachí-gá sá Xítohó Jesucristú cúú-gã dütú cùnùu datná ní cunuu ndíi Melquisèdec cùtnàhá ní cuu ndíi dütú ñuyíú-a.

Cuendá ñáyíu cuení dañá nihnu ichi Yã Ndiöxí

¹¹ Te vài-gá tnúhu ndècu cáháⁿ-í nàcuáa ndùu cuendá Xítohó Jesucristú, ndihi ndíi Melquisèdec, te dicó-ni sá nchòhó ío cuèé tècú tnùnì-ndó, te yúhú ío ùhú ñihí-í nàcuáa cáháⁿ-í nàcuáa tecú tnùnì-ndó.

¹² Te nchòhó sa ní cuu cuèhé nduu ndècu-ndo ichi Xítohó Jesucristú, te tàú-ndó dānehé-ndó cuè ñáyíu ndècu ichi-gá tnúhu-gá nũu dicó sá cúú, dico xini ñuhu-ni-xi sá cùndècu ñáyíu danèhé ñáhá tnúhu-gá xii-ndo, tnúhu sá ñi dācuáhá-ndó ndèé díhna sá ñà túú ùhú tecú tnùnì-ndó. Te sá dúcáⁿ quide-ndo núu xiãⁿ cúú-ndó dàtná cue landú vitna sàdi camá, landú vátá cúú-gã caxi dítá. ¹³ Chi nchaa ñáyíu cùu datná landú vitna sàdi, ñáyíu-áⁿ cúú nèñuú-yu ñà túú cùnùnì iní-yu nàcuáa càháⁿ tnúhu sá càháⁿ nàcuáa cada ndáa-yu cundecú-yu. ¹⁴ Te nchaa sá vátá cúú-gã caxi cue landú yíquíⁿ xiãⁿ cúú-xí cuendá cue ñáyíu sacuéhé, te xiãⁿ cúú-xí dàtná tnúhu sá dācuàha ñáyíu sa ní níhí ndèé ndècu ichi-gá,

ñáyíu sa ní cutnùní váha iní-xi nāndi cùu nchaa sá cuèhé sá dúhá, ndihi nāndi cùu nchaa sá vãha.

6

¹ Te xiãⁿ nũu vitna xini ñuhu-xi dācuaha-o dava-gá tnúhu Yã Ndiöxí cuendá ducaⁿ te cuu-o ñáyíu tècú tnùnì nchaa tnúhu-gá. Te xini ñuhu-xi sá nchāá tnúhu Xítohó Jesucristú sá ñi dācuáhá-ó ndèé díhna vá dācuàha-gá-ó dàtná ní dācuáhá-ó chi sa tècú tnùnì-ó. Te ñà túú-gã xini ñuhu-xi dācuaha-o datná ní dācuáhá-ó ndèé díhna nācuáa cada-o ndixi cuèchi iní-ó cuendá nchaa sá cuèhé sá dúhá quide-o, sá tá dācuíta nihnu ñaha xii-o cuáháⁿ ní cùu. Te ducaⁿ vã dācuàha-gá tucu-o dàtná ní dācuáhá-ó ndèé díhna nācuáa cada-o quindáa iní-ó Yã Ndiöxí, ² ndihi cuendá nācuáa ní dācuáhá-ó nācuáa cuandute-o, ndihi cuendá nācuáa cada-o càcáⁿ ndodo-o ndàha-o díquí ñáyíu ní sàndáa iní ñáhá xii-gá. Te ducaⁿ ñà túú-gã xini ñuhu tucu-xi dācuaha-o datná ní dācuáhá-ó ndèé díhna cuendá nācuáa ndoto cue ñáyíu ní xihí, ndihi cuendá nācuáa ní dācuáhá-ó sã Yã Ndiöxí dāquíhíⁿ-gá ñáyíu núú ùhú núú ndàhú ni caa ni quíhíⁿ. ³ Te núu Yã Ndiöxí ná càchí-gá, te cuita dācuàha-gá-ó nchāa dava-gá tnúhu sá cūmāní quíhíⁿ.

⁴ Te cue ñáyíu sa tècú tnùnì tnúhu Yã Ndiöxí, ñáyíu sa xini nchaa nācuáa ndùu nchaa sá vãha quide ñaha Yã Ndiöxí xii-o ndihí-yu, ñáyíu sa chindee ñaha Espiritú Yã Ndiöxí, ⁵ ñáyíu sa cùnùnì iní-xi sá ño váha tnúhu Yã Ndiöxí, ñáyíu sa xini nācuáa ta quide Yã Ndiöxí véxi nchaa sá vã yõ tnàhí ndācu cada, ⁶ te núu ñáyíu-áⁿ ná ngüíta tucú-yu daquèe tíhú duúⁿ-yu tnúhu Yã Ndiöxí, te vá ndácú-gã-ó nà canu ichi-ó-yu nācuáa ndixi cuèchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùu-yu dàtná cue téé ní sahani ñaha xii Xítohó Jesucristú Déhe Yã Ndiöxí núú cùrúxí. Te sá dúcáⁿ ná càdá-yu te ngóo dava-gá ñáyíu cáháⁿ cuèhé-yu cuendá Xítohó Jesucristú. ⁷ Te nchaa ñáyíu cùu-yu dàtná ñuhu, chi ñuhu-áⁿ ndi tnahá òré cúúⁿ dāú te xihí-xi ndute, te dava ñuhu váha cùu sá xítú ñáyíu, te sá cúú nũú ñuhu-áⁿ ño nāndihí-xi, te mee Yã Ndiöxí quidè-gã

cúú sǎ vǎha núú ñúhú-ǎⁿ. ⁸ Dico núú da iñu na ndaa núú ñuhu-áⁿ te ñá túú vèdana nàndíhi-xi te núú ducaⁿ, te Yá Ndiöxí vá cúú vǎha iní-gá cuendá ñuhu-áⁿ sǎ dúcáⁿ dà iñu ndaa núú-xi, te iñu-áⁿ ndíhi-xi cáyú. Te ducaⁿ sǎtnahá-xi cùu ñáyiú dàquee tíhú tnúhu Yá Ndiöxí chi ñá túú cùu váha iní-gá núú-yu.

Níhí-ó sǎ ndétú-ó ndiúu táhú-ó

⁹ Te cuèi duha càháⁿ-í dico nchòhó cue ñáyiú ío cùu iní-í, chi cùtnuní ndáá iní-í sǎ vǎ cáda-ndó dàtná xǐquide dava-gǎ ñáyiú, te mee-ni sǎ vǎha cuu xii-ndo chi cùu-ndo ñáyiú sa ní naníhí tàhú. ¹⁰ Te ducaⁿ chi Yá Ndiöxí cúú-gǎ Yaá ío váha quide ndáá, te vá dáná ndòdo iní-gá nchaa sǎ vǎha quide-ndo, te ni vǎ dáná ndòdo iní-gá nàcuáa quide-ndo cuu iní-ndó-gǎ, te sǎ dúcáⁿ quide-ndo cuu iní-ndó-gǎ xǐǎ chindèe-ndo cue ñáyiú ndècu ndíhi-ndo ichi Xítohó Jesucristú, te ducaⁿ-ni ta quide-ndo véxi ndéé vitna. ¹¹ Te cuíní-í sǎ ñⁿ ñⁿ-ndo nducu ndee-ndo cada-ndo nacuáa cuíní Yá Ndiöxí dàtná tá quide-ndo véxi, te ñⁿ-ni ducaⁿ càda-ndo ndéé ná sǎá nduu ndiúu táhú-ndó cùndecu-ndo ndíhi-gǎ núú ndécú-gǎ, te ducaⁿ te níhí-ndó nchàandi túhú sǎ ndétú-ndó ndiúu táhú-ndó cùndecu ndíhi-ndo ni caa ni quíhíⁿ. ¹² Te yúhú cuíní-í sǎ nchòhó vá túhí-ndo càda-ndo nchaa nacuáa cuíní Yá Ndiöxí, te cada-ndo dàtná quidé ñáyiú sàndáá iní tnúhu-gǎ, ñáyiú càhnu iní-xi. Te sǎ dúcáⁿ quidé-yu xǐǎ ñíhí-yu nchaa sǎ ñí cachí Yá Ndiöxí nduu táhú-yu.

¹³ Te cútnahá ní xáhaⁿ Yá Ndiöxí xii ndíi Àbrahám nàcuáa cada-gǎ, te ní cacunehe-gǎ méé-gǎ nàcuáa cutnùní iní ndíi sǎ ndáa cada-gǎ nàcuáa ní xáhaⁿ-gǎ xii ndíi, te vá yóo ñⁿ ní càcunehe-gǎ cuendá sǎ quíndáá iní ndíi tnúhu ní cáháⁿ-gǎ. Te ducaⁿ ñí quide-gǎ chi ñⁿ dǐi díi-ni mee-gǎ ío cùnuu-gǎ. ¹⁴ Te duha ní xáhaⁿ-gǎ xii ndíi Àbrahám: “Yòhó té Àbrahám na càchí tnúhu ndáá-í xii-n sǎ ío chindee ñàha-í xii-n, te cáyá cuéhé víhí ñàní tnáhá-n”, duha ní xáhaⁿ-gǎ xii ndíi. ¹⁵ Te ndíi Àbrahám ío ní quide ndee iní ndíi ní xíndetu ndíi, te ducaⁿ te Yá Ndiöxí ní quide-gǎ nàcuáa ní xáhaⁿ-gǎ cada-gǎ sǎ cúú-xí ndíi. ¹⁶ Te núú ñⁿ ñáyiú càháⁿ ñⁿ tnúhu ndáá cuíti te càcu nehé-yu Yá Ndiöxí cuendá

quíndáá iní tnàha ñáyiú-yu tnúhu càháⁿ-yu, te òré ducaⁿ na càháⁿ-yu te ñá túú-gǎ sǎ dácáá ñáyiú càháⁿ ndíhí-yu cuendú. ¹⁷ Te ducaⁿ ñí quide Yá Ndiöxí ní cáháⁿ ndáá-gǎ sǎ cáda-gǎ nàcuáa ní cachí-gǎ, te ducaⁿ ñí cáháⁿ-gǎ cuendá nchaa ñáyiú ní cachí-gǎ nduu táhú sǎ cáda-gǎ nàcuáa cutnùní iní-yu sǎ quidé-gǎ ñⁿ sǎ càháⁿ-gǎ, te ni ñá túú nàdáma-gǎ ñⁿ sǎ càháⁿ-gǎ. ¹⁸ Te nchoo ñí natuha-o Yá Ndiöxí cuendá dàcácu ñíhnu ñaha-gǎ xii-o núú ùhú núú ndàhú, te ní níhí-ó tnúhu ndee iní ndécú ndíhi-o cuendá sǎ vǎ dáñá ndèé-ó cùndetu-o sǎá nduu ndiúu táhú-ó cùndecu-o ndíhi-gǎ. Te ducaⁿ ñí níhí-ó tnúhu ndee iní chi Yá Ndiöxí ní cáháⁿ ndáá-gǎ sǎ cáda-gǎ nàcuáa ní cachí-gǎ, te ñá túú dàndahú ñàhá-gǎ, te ni ñá túú nàdáma-gǎ ñⁿ sǎ ñí cachí-gǎ cada-gǎ. ¹⁹ Te tnúhu ndee iní ndécú ndíhi-o xǐǎ quidé-xí cùtnuní ndáá iní-ó sǎ ndúú táhú-ó cùndecu-o ndíhi Yá Ndiöxí núú ndécú-gǎ, te ducaⁿ cùtnuní ndáá ndisa iní-ó sǎ cuendá Xítohó Jesucristú Yaá ndécú núú Yá Ndiöxí. ²⁰ Te ducaⁿ ñí nucúndecu Xítohó Jesucristú núú Yá Ndiöxí cuendá ducaⁿ càncicúⁿ ñíhnu-o càda-o, te ducaⁿ ñí nucúndecu-gǎ núú Yá Ndiöxí chi cùu-gǎ dútú cùnùu datná ní cunuu ndíi Melquisèdec ñuyíú-a, te ducaⁿ-ni cùu-gǎ dútú cùnùu ni caa ni quíhíⁿ.

7

Xítohó Jesucristú cúú-gǎ dútú dàtná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyiú ñuú Sàlém, te ní cuu ndíi dútú ñí xinu cuechi ndíi núú Dútú Ndiöxí Yaá ío cùnuu. Te ndíi Melquisèdec-áⁿ ñí xicáⁿ táhú ndíi núú Yá Ndiöxí cuendá ndíi Àbrahám cútnahá ní sáháⁿ ndíi Àbrahám-áⁿ ñí nàá ndíi ndíhi cue dava-gǎ cue téé yíndaha ñáyiú. Te cue téé-áⁿ ñá túú ní ndàcu-güedé nàá-güedé ndíhi ndíi Àbrahám-áⁿ chi ní xíta-güedé. ² Te nchaa sǎ ñí níhí ndíi Àbrahám-áⁿ núú ñí nàá ndíi, te ní quide ndíi úxí xichi te ñⁿ xichi núú ùxí-áⁿ ñí sǎñaha ndíi xii ndíi Melquisèdec. Te ñiú ndíi Melquisèdec-áⁿ quée-xí: Téé ío váha quide ndáá yíndaha ñaha xii ñáyiú, duha quée-xí. Te ní xóo danàni ñahá-yu xii ndíi Téé yíndaha ñuú Sàlém, duha ní xóo

danàni ñahá-yu. Te tnúhu Sàlém-áⁿ quée-xí: Ñuú ndécú nàhi, duha quèe-xi tnúhu-áⁿ. Núu xiáⁿ quée tucu-xi nacuáa nàni ndíi Tée yìndaha ñuú ndécú nàhi, duha quèe tucu-xi ñuú ndíi. ³ Te ñá túú tnúhu núu yoo cùu tátá ndíi ndíhi náná ndíi, te ni ñà túú tnúhu núu yoo cùu xíi ndíi ndíhi xítná ndíi, te ni ñà túú tnúhu núu nándi cùu ñáyiu ní cuu ñaní tnáhá ndíi ní xíndecu ndéé sanaha-gã, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-áⁿ ducaⁿ-ni ní cuu ndíi dútú ní xíndecu ndíi, te ducaⁿ sãtnahá-xi cùu Xítohó Jesucristú déhe Yá Ndiöxí chi cuu-gá dútú ní caa ní quíhíⁿ.

⁴ Te vitna chí cuãha váha cuendá sá ndíi Melquisèdec ní cuu ndíi ñⁿ tée io ní cuu càhnu ní xíndecu ñuyíu-a, chi ndíi Àbrahám tée ní cuu ñaní tnáhá-ó ní xíndecu ndéé sanaha ní quide ndíi úxí xichi nchaa sá ní níhí ndíi núú ní nàá ndíi. Te ñⁿ xí-chi núú ùxí-áⁿ ní sãñaha ndíi xii ndíi Melquisèdec. ⁵ Te ndíi Moisés ní chídó tnùní ndíi nàcuáa cada nchaa dútú, cue tée ní cuu ñaní tnáhá ndíi Lèví sá cuè tée-áⁿ queheⁿ-güedé ñⁿ xichi núú ùxí xichi sá níhí cue ñáyiu isràél ñáyiu cùu ñaní tnáhá-güedé cuu cuendá-güedé. Te ducaⁿ quide-güedé cuèi ñaní tnáhá-güedé ndíhi-yu ní cuu ndíi Àbrahám. ⁶ Te cuèi ñá díú ñaní tnáhá ndíi Melquisèdec cúu ndíi Àbrahám dico ní queheⁿ ndíi Melquisèdec-áⁿ ñⁿ xichi núú ùxí xichi nchaa sá ní níhí ndíi Àbrahám. Te ndíi Melquisèdec-áⁿ ní xicáⁿ táhú ndíi núú Yá Ndiöxí cuendá ndíi Àbrahám. Te ñuú ndíi Àbrahám-áⁿ ní xáhaⁿ Yá Ndiöxí xii ndíi sá cáda váha ñaha-gã xii ndíi. ⁷ Te sa cùtnuní iní-ó sã ñuú ñⁿ tée na càcáⁿ táhú-dé núú Yá Ndiöxí cuendá ñⁿ ñáyiu, te tée-áⁿ cúnùu-gá-dé. ⁸ Te cue dútú ñáyiu isràél quéhéⁿ-güedé ñⁿ xichi núú ùxí xichi nchaa sá níhí-yu cùu cuendá-güedé, te cue tée-áⁿ cuú-güedé. Te núú tütú Yá Ndiöxí càchí-xi sá ndíi Melquisèdec ndécú-ní ndíi, te ducaⁿ càháⁿ-xi chí ñá túú tnúhu sá ní xíhí ndíi. ⁹⁻¹⁰ Te sá dúcáⁿ ní sãñaha ndíi Àbrahám sá ní nduu táhú ndíi Melquisèdec, te xiáⁿ cada iní-ó sã sá ndecu ndíhi ndíi Àbrahám cue ñaní tnáhá ndíi Lèví cue tée cùu dútú, cue tée queheⁿ ñⁿ xichi núú ùxí xichi nchaa sá níhí ñáyiu isràél cuèi vátá cacú-gã-güedé. Te cada iní-ó sã tnáhá-güedé

ní sáha-güedé ndíi Melquisèdec ñⁿ xichi núú ùxí xichi nchaa sá ní níhí ndíi Àbrahám núú ní nàá ndíi. Te ducaⁿ càda iní-ó chí cue tée-áⁿ cúu-güedé ñaní tnáhá ndíi Àbrahám cuèi vátá cacú-gã-güedé dává-áⁿ.

¹¹ Te sá cuendá cue dútú cue tée cùu ñaní tnáhá ndíi Lèví ní ngúndecu ndíhi cue ñáyiu isràél tnúhu sá sánú ìchi ñaha xii-yu nàcuáa cada-yu cundecú-yu. Te ñaní tnáhá ndíi Àrón cúu cue dútú-áⁿ. Te núu dícó cue dútú-áⁿ ní ndàcu-güedé cada-güedé nàcuáa cudíu ñáyiu isràél núú Yá Ndiöxí, te ñá túú-gã xíní ñuhu-xi ngúndecu ingá dútú dàtná ndíi Melquisèdec ní cùu. Te dútú-áⁿ ñà túú ní cùu-dé dàtná ní cuu cue ñaní tnáhá ndíi Àrón. ¹² Te núu cue dútú cue tée cùu ñaní tnáhá ndíi Lèví-áⁿ ní ngúndecu ingá dútú. Te sá dúcáⁿ ní ngúndecu ingá dútú xiáⁿ dacuití ní xini ñuhu-xi sá dãma nàcuáa nduu tnúhu sá sánú ìchi ñaha xii-yu nàcuáa cada-yu cundecú-yu. ¹³⁻¹⁴ Te ñuú ndíi cuendá dútú-áⁿ sa níhí-ó tnúhu, te dútú-áⁿ cúu Xítohó Jesucristú, te ñá díú ñaní tnáhá ndíi Àrón cúu-gã chí ñaní tnáhá ndíi Jüdá cúu-gã. Te nchaa-o tà xíní ndáá-ó sã ñaní tnáhá ndíi Jüdá cúu-gã, te ndíi Moisés ñá túú tnáhí ná ní càchí ndíi cuendá cue ñaní tnáhá ndíi Jüdá sá cúu-güedé dútú, chí ní ñⁿ-güedé ñá túú ní cùu-güedé dútú ní cùu.

¹⁵ Te vitna cùtnuní ndáá iní-ó nàcuáa ní cuu, chí Xítohó Jesucristú cúu-gã ingá dútú dàtná ní cuu ndíi Melquisèdec. ¹⁶ Te ñá díú cuendá tnúhu sá sánú ìchi ñaha xii ñáyiu nàcuáa cada-yu cundecú-yu ducaⁿ ní cùu-gá dútú, chí ní cuu-gá dútú cuendá sá cúu-gã Yaá cundecu ní caa ní quíhíⁿ chí vá ñⁿ nduu te ndíhi nihnu-gá. ¹⁷ Te duha ní xáhaⁿ Yá Ndiöxí xii-gá:

Yòhó cúu-n dütú dàtná ní cuu ndíi Melquisèdec,

te cundecu-n nchaa nduu nchaa quíu. Duha ní xáhaⁿ Yá Ndiöxí xii-gá. ¹⁸ Te xiáⁿ ñuú nchaa tnúhu ndéé díhna, tnúhu sá ní xíndecu ndíhi cue dútú ñà túú-gã cúnùu-xi vitna chí ñá túú-gã xíní ñuhu-xi te ni ñà túú nã chíndèe ñaha-xi. ¹⁹ Te ñuú ndíi tnúhu-áⁿ cúu-xí tnúhu sá ní chídó tnùní ndíi Moisés canu ìchi ñaha xii ñáyiu nàcuáa cada-yu cundecú-yu. Te tnúhu-áⁿ ñà túú vèdana ní quide-xi nacuáa chindee-xi ñáyiu

cudiú-yu núú Yă Ndiöxí. Dico vitna ní ngúndecu ndihí-o tnũhu ndee ìní sá ïo-gá váha dàcúúxí tnũhu ndéé díhna, chi ndècu ndihí-o Xítohó Jesucristú Yaá cúú dütú-ó. Te Yaá-áⁿ quidé-gă tnàhá tnũhu-o ndihí Yă Ndiöxí vitna.

²⁰ Te Yă Ndiöxí ní cáháⁿ ndáá cuiti-gá sá Xítohó Jesucristú cuu-gá dütú. ²¹ Dico ñá túú dùcaⁿ ní cáháⁿ-gá cuendá cue ñaní tnàhá ndíi Lèví cue téé ní cuu dütú, cuèi mei òré ní chisaha-güedé ní cuu-güedé dütú. Te cútnàhá ní chisaha Xítohó Jesucristú cúú-gă dütú, te Yă Ndiöxí ní xáhaⁿ ndáá cuiti-gá xii-gá, te duha ní xáhaⁿ-gă:

Yúhú Dütú Ndiöxí càháⁿ ndáá cuiti-í te vá dàmà-í tnũhu càháⁿ-í:

“Yòhó cúú-n dütú dàtná ndíi Melquisèdec, te cundecu-n ñi caa ñi quíhíⁿ.”

Duha ní xáhaⁿ Yă Ndiöxí xii Xítohó Jesucristú. ²² Te Xítohó Jesucristú quidé-gă nàcuáa cutnùní ndáá iní-ó sá Yă Ndiöxí cada-gá ñgá núú sá váha sá cúú-xí-ó dàtná ní cachí-gá, te xíáⁿ cúú-xí sá ïo-gá váha dàcúúxí tnũhu ní cáháⁿ-gá ndéé díhna. ²³ Te ío cuéhé cue ñaní tnàhá ndíi Lèví ní cuu-güedé dütú, te ducaⁿ cuendá sá ñá túú ní cudi-güedé cundecu-güedé chi ní ndihí-güedé ní xíhí. ²⁴ Dico Xítohó Jesucristú chi vá cùú-gá, chi cundecu-gá ñi caa ñi quíhíⁿ nũu xíáⁿ diu-ni-gá cuu-gá dütú, te vá yòo ñⁿ-gá cuu dütú cada núú-gă. ²⁵ Te núu xíáⁿ Xítohó Jesucristú dácăcu ni-hnu ñaha-gă xii nchoo ñăyiu núú ùhú núú ndàhú, nchoo ñăyiu sàndáá iní ñàhá xii-gá, te diu-ni nchoo cùu-o ñăyiu tnàhá tnũhu ndihí Yă Ndiöxí, te vá ñⁿ ndùu-gá te cuíta ni-hnu-o. Te ducaⁿ chi Xítohó Jesucristú ñá túú xòcuí-í-gá núú Yă Ndiöxí càháⁿ ndàhú-gá cuendá-ó.

²⁶ Te Xítohó Jesucristú cúú-gă Yaá cúú dütú cùnùu xini ñuhu-o cundecu ndihí-o, te diu-gá cúú-gă Yaá chindèe chitúu ñaha xii-o, te cùu-gá Yaá ío quide ndáá núú Yă Ndiöxí, te cùu-gá Yaá cándòo canine chi ñá túú tnàhí cuéchi-gá. Te ñá túú tnàhí quide-gá dàtná quidé nchàa cue ñăyiu ndècu ichi cuehé ichi duha, te cùu-gá Yaá ní nucúndecu andiù nũú ndécú Yă Ndiöxí te yàcáⁿ táxí tnùní-gă. ²⁷ Te ñá túú quide-gá dàtná ní quide cue dütú ñi cunuu ñi xindecu, chi cue dütú-ăⁿ ñⁿ nduu ñⁿ

nduu ní xóo cahni-güedé quiti ní xóo nduu táhú Yă Ndiöxí, te díhna-gá cuendá nchaa cuéchi mee-güedé ducaⁿ ñi xóo cada-güedé te dàtnùní ducaⁿ ñi xóo cada tucu-güedé cuendá nchaa cuéchi ñăyiu. Dico Xítohó Jesucristú chi ñⁿ xito-ni ní xíhí-gá sá cúú-xí nchàa ñăyiu chi ducaⁿ ñi sani iní-gá, te vá ñⁿ ndùu-gá ducaⁿ càda tucu-gă. ²⁸ Te sá cuendá nchaa tnũhu ní chídó tnùní ndíi Moisés xíáⁿ ní xindecu cue téé ní cuu dütú cùnùu, te cue téé-áⁿ ñi cuu-güedé cue téé yíca cuéchi-xi. Te sá tá dúcáⁿ ñi chídó tnùní ndíi Moisés nàcuáa cada ñăyiu, te ní xica cuéhé víhí ndùu te dàtnùní ní cáháⁿ ndáá cuiti Yă Ndiöxí sá Dèhe-gá cuu-gá dütú cùnùu. Te Yaá cúú Dèhe-gá-áⁿ ñi quide-gá nchaa nàcuáa tàù-xi cunduu, te diu-ni ducaⁿ càda-gá ñi caa ñi quíhíⁿ.

8

Xítohó Jesucristú cúú-gă dütú cùnùu

¹ Te Xítohó Jesucristú Yaá cúú dütú cùnùu ndecu ndihí-o cuánda-gá andiù, te ní ngóo-gá xio cùha Dütú Ndiöxí Yaá ío cùnùu, te tnàhá-gá cùnùu-gá. Te diu cuendá-a cùu-xi sá ïo-gá cùnùu ta cáháⁿ-ndí véxi. ² Te núú ndécú Yă Ndiöxí cúú-xí nũú ìí víhí. Te cada iní-ó sá cúú-xí ñⁿ vehe te xíáⁿ ndécú Xítohó Jesucristú cúú-gă dütú, te vehe-áⁿ ñi dácáá mèe Yă Ndiöxí te ñá díú cuè téé ñuyíu-a. ³ Te sá cuendá nchaa tnũhu ní chídó tnùní ndíi Moisés xíáⁿ ní xindecu cue dütú cùnùu cuendá sá cáhni-güedé quiti nduu táhú Yă Ndiöxí, te nacani cuendá-güedé núú-gă nchaa dava-gá sá ñihí-güedé nduu táhú-gă. Te xíáⁿ nũu dai ní xini ñuhu-xi sá tnàhá Xítohó Jesucristú cuáñaha-gă ñⁿ sá ndúú táhú Yă Ndiöxí, te táhú-ăⁿ cúú-xí mèe-gá chi ní xíhí-gá ní cuu-gá dàtná ñⁿ táhú sá cúú-xí Yă Ndiöxí. ⁴ Te núu ñi xindecu-ni Xítohó Jesucristú ñuyíu-a te vá cúú-gă dütú ní cùu, chi sa ndècu cue dütú sáñaha nchàa sá ndúú táhú Yă Ndiöxí dàtná càháⁿ nchaa tnũhu ní chídó tnùní ndíi Moisés. ⁵ Te nchaa sá quidé cuè dütú ñăyiu isràèl nũtnahá-xi luha nchaa sá quidé Xítohó Jesucristú Yaá cúú dütú cùnùu ndecu andiù. Te quèe ndáá-xi nàcuáa ní xáhaⁿ Yă Ndiöxí xii ndíi Moisés cútnàhá tá cùyatni ngúíta ndíi dacàa ndíi vehe-gá, te duha ní xáhaⁿ-gă: “Ío váha cada

cuendá-n nàcuáa dacàa-n vehe-í dàtná cáá sã ní dánèhé ñhàhà-í xii-n xití yucu”, duha ní xáhaⁿ-gã xii ndíi. ⁶ Dico vitna chi Xítóhó Jesucristú cúú-gã dútú cúnùu, te ío-gá càhnu nduu chiuⁿ quide-gá dàcúxí cuè dútú cue ñáyiu isràél. Te ñu Xítóhó Jesucristú cúú-gã Yaá quidé tnhá tñuhu-o ndíhi Yá Ndiöxí, te ducaⁿ chi Yá Ndiöxí ío-gá váha ndùu tñuhu ní cáháⁿ-gá xito cùu uú dàcúxí tñuhu ní cáháⁿ-gá ndéé díhna, te ducaⁿ ío váha ndùu tñuhu ní cáháⁿ-gá xito cùu uú chi ní cachí-gá sá ñgá núú sã ío-gá váha cada ñaha-gã xii-o vitna.

⁷ Te núu nàcuáa ní cachí Yá Ndiöxí cada ñaha-gã xii-o ndéé díhna ní quide-xi nchaa nacuaa tàú-xi cunduu nàcuáa nduu táhú-ó cundecu váha-o núú-gã ñá, te ñá túú xini ñuhu-xi cáháⁿ tucu-gá sá cádá-gã ñgá núú sã váha sá cúú-xí-ó vitna ni cuu. ⁸ Te Yá Ndiöxí ñá túú ní cùu váha iní-gá núú ñáyiu isràél núu xíáⁿ ní cáháⁿ-gá cuendá-yu, te duha ní cachí-gá:

Yúhú cúú-í Dútú Ndiöxí, te duha ndùu tñuhu na cáháⁿ-í: Sáa nduu te cada-í ñgá núú sã váha sá cúú-xí cuè ñani tnhá ñáyiu isràél, ndíhi cue ñani tnhá ndíi Jüdá ñu-ni ñáyiu isràél.

⁹ Te tñuhu sá cáháⁿ-í-a ñá túú ñⁿ-ni cuu-xi ndíhi tñuhu sá ní xáhaⁿ-í xii cue ñáyiu ní cuu ñani tnhá-yu ní xíndecu ndéé sanaha càda-í-yu,

te ñu-ni dàvá-áⁿ ní quide yica-í ní ndeñuhu-í-yu nacióⁿ Ègíptú,

te ñá túú ní cuini-yu tñⁿ-yu tñuhu ní xáhaⁿ-í xii-yu cuendá ducaⁿ càda váha-í-yu,

te xíáⁿ núu ní dáñá ñhnu-í-yu ñá túú-gã ní quide cuendá-í-yu.

¹⁰ Te na sáa nduu te duha ndùu tucu ñgá núú sã váha cada-í cue ñáyiu isràél.

Te yúhú cada-í nàcuáa cutnùni váha iní-yu nàcuáa cuini-í cadá-yu,

te ducaⁿ ñi yuhu ni iní-yu cadá-yu.

Te yúhú Yá Ndiöxí quindaha-í-yu,

te mèé-yu cuú-yu ñáyiu cùu cuendá-í.

¹¹ Te dàvá-áⁿ chi ni ñáyiu cùu ndi meé-yu,

te ni cuè dava-gá ñáyiu vá cutnùhu tnhá-yu sá nátùha ñhá-yu xii-í,

chi dàvá-áⁿ nchaa ñáyiu cundecu ndíhi ñhàhà-yu xii-í,

cuèi ñáyiu cùnùu te cuèi ñáyiu ñá túú cùnùu.

¹² Te dàvá-áⁿ cada càhnu iní-í nchaa sá cuèhé sá dúhá quidé-yu,

te vá ñⁿ ndùu-gá ndacu iní-í nchaa sá quidé-yu.

Duha ní cachí Yá Ndiöxí cuendá ñáyiu isràél. ¹³ Te sá dúcáⁿ ní cáháⁿ Yá Ndiöxí sá cádá-gã ñgá núú sã váha sá cúú-xí ñáyiu xíáⁿ cutnùni sá tñuhu sá ní cáháⁿ-gá díhna ñá túú-gã xini ñuhu-xi. Te cada iní-ó sá tñuhu-áⁿ cúú-xí ñⁿ sá ní cunaha ndècu te ñá túú-gã nándíhi-xi te cuíta-ná-xi, ducaⁿ sãtnhá-xi cùu tñuhu sá ní cáháⁿ-gá ndéé díhna.

9

Cuendá vehe Yá Ndiöxí

¹ Te tñuhu sá ní cáháⁿ Yá Ndiöxí ndéé díhna cùu-xi cuendá nàcuáa cada ñáyiu isràél chiñuhu ñhàhà-yu xii-gã, ndíhi cuendá vehe-gá caa ñuyú-a. ² Te ñáyiu isràél ní dácaá-yu vehe Yá Ndiöxí, te vehe-áⁿ ní

cuu-xi vehe dóo te ní xúhuⁿ nehu xití-xi. Te cuartú díhna ní xínani-xi cuartú ní cuu íí, te xíáⁿ ní xíndecu ñⁿ sá ndéé dité-xi sá ní cándodó ñⁿ caa candíl núú dité-xi, te ní

xínutnii ñⁿ mèsá ní xóo códo páa ní xóo nduu táhú Yá Ndiöxí. ³ Te cuartú cúú úú ní xínani-xi cuartú ní cuu íí víhí-gã. ⁴ Te xití

cuartú-áⁿ ní xínutnii ñⁿ sá ní cuáha mee-ni díhúⁿ cuáaⁿ te núú xíáⁿ ní xóo cahmí-güedé dúsa sá sáháⁿ tñámí. Te ñu-ni xíáⁿ ní xíndecu tucu ñⁿ càjá ní cuu mee-ni díhúⁿ

cuáaⁿ te xití càjá-áⁿ ní xúhuⁿ ñⁿ lítu ní cuáha mee-ni díhúⁿ cuáaⁿ, te xití lítu-áⁿ ní xúhuⁿ mánáá sá ní xóo caxí-yu dàvá-áⁿ. Te ñu-ni

xití càjá-áⁿ ní xúhuⁿ tñudii ndíi Àrón sá ní saa itá-xi, ndíhi yúú sã ní xíndéé tñuhu ní cáháⁿ Yá Ndiöxí nàcuáa cada ñáyiu. Te duha ní xínani càjá-áⁿ: Càjá sá ñhú tñuhu ní cáháⁿ Yá Ndiöxí sá cúú-xí ñáyiu, duha ní

xínani-xi. ⁵ Te núú càjá-áⁿ ní cándodó úú tnhá sá ní cadúha-yu, te xíáⁿ cáá-xí dàtná cáá espíritú xínú cuèchi núú Yá Ndiöxí. Te cuendá úú xíáⁿ ní cutnùni iní-yu sá ío càhnu

cuu Yá Ndiöxí, te sá ní cadúha-yu-áⁿ ndéé ndíxíⁿ-xi, te ndíxíⁿ-xi-áⁿ dñhu-xi xio xio núú quidé càhnu iní Yá Ndiöxí nchaa yíca cuèchi ñáyiu, dico vá cúú-gã cáháⁿ-í cuendá nchaa

dava-gá xíáⁿ vitna.

6 Te nchaa xiáⁿ ní xíndecu xití vehe Yá Ndiöxí, te cue dútú ní xóo quihu-güedé #ⁿ nduu #ⁿ nduu xití cuàrtú díhna ní xóo cada-güedé nàcuáa tàù-güedé cada-güedé sá cúu-xí Yá Ndiöxí. 7 Te cuàrtú cúu ùú-áⁿ chi mee-ni dütú cúnùu ní xóo quihu-dé #ⁿ xito-ni ndi tnahá cuíá. Te ndi tnahá òré ducaⁿ ní xóo quihu dútú cúnùu-áⁿ te ní xóo canehe-dé níñí ní xóo quihu ní xóo nduu táhú Yá Ndiöxí. Te ducaⁿ ní xóo cada dútú-áⁿ cuèndá sá Yá Ndiöxí cada càhnu iní-gá nchaa yíca cuèchi mee-dé, ndihi nchaa yíca cuèchi ñáiyu. 8 Te sá dúcáⁿ mée-ni dütú cúnùu ní xóo quihu-dé xití cuàrtú ní cuu í-gá-áⁿ, xiáⁿ Espíritú Yá Ndiöxí quidé-xí cùtnuní iní-ó sá ñini ducaⁿ ní xíndecu vehe-áⁿ ní xóo cada-yu nàcuáa ní xóo cúñaha Yá Ndiöxí cada-yu. Te xiáⁿ cùtnuní sá vátá sàá-gá nduu cáháⁿ ndihí-yu Yá Ndiöxí nàcuáa tàù-xi cunduu. 9 Te sá dúcáⁿ ní xíndecu vehe-áⁿ, ndihi sá dúcáⁿ ní xóo cada nchaa cue dütú-áⁿ, xiáⁿ cùtnuní iní-ó nàcuáa quide Yá Ndiöxí vitna, chi nchaa quití ní xóo cahni cue dütú-áⁿ ní xóo nduu táhú Yá Ndiöxí, ndihi nchaa dava-gá sá ní xóo nduu táhú-gá ñá túú ní quide-xi nàcuáa nduu ndoo nduu nine iní cue ñáiyu nàcuáa cutnùní iní-yu sá ñà túú-gá cuèchi-yu ndècu núú Yá Ndiöxí. 10 Te sá dúcáⁿ ní xóo cada nchaa dütú-áⁿ ní níhí tnahá-xí ndihi nchaa tnúhu sá dánèhé ñáhá xí ñáiyu ná cúu sá cáxi-yu ndihi ná cúu sá cúu còhó-yu ndihi nàcuáa ndàhá-yu. Te tnúhu-áⁿ ní cuu-xi mee-ni sá ní sanu ichi ñaha xí-yu nàcuáa cundecú-yu ñuyíú-a. Te tnúhu-áⁿ ní nándíhi-xi ndéé ní sáá nduu ní nadama Yá Ndiöxí tnúhu-áⁿ cuèndá sá vá dúcáⁿ-gá cada-yu cundecú-yu.

11 Te Xítohó Jesucristú ní quixi-gá ñuyíú-a, te diu-gá cúu-gá Yaá cúu dütú cúnùu, te xiáⁿ núu quide-gá nchaa sá vaha sá cúu-xí-ó. Te vitna ní nucúndecu-gá núú ío víi ío váha càa, te núú ndécú-gá-áⁿ ñà túú cùu-xi #ⁿ vehe sá ní dácáa cuè téé ñuyíú-a. 12 Te cada iní-ó sá Xítohó Jesucristú cuànguihu-gá xití cuàrtú núú ní cuu í víhí dàtná ní xóo cada dütú cúnùu ní xíndecu ndéé sanaha, chi ní nucúndecu-gá núú ndécú Yá Ndiöxí. Dico ñá túú ní quide-gá dàtná ní xóo cada dütú cúnùu ní xíndecu ndéé sanaha, chi dütú-áⁿ òré ní xóo

quihu-dé xití cuàrtú ní cuu í-gá-áⁿ, te ní xóo canehe-dé níñí chivá ndihi níñí chèhlu ní xóo quihu. Dico Xítohó Jesucristú chi níñí méé-gá ní sati ní xíhí-gá núú cùrúxí, te xiáⁿ duuⁿ duuⁿ cuáháⁿ-gá ní nucúndecu-gá núú ndécú Yá Ndiöxí. Te sá dúcáⁿ ní quide-gá xiáⁿ ní naníhí tàhú-ó. 13 Te nchaa ñáiyu ní xóo cada nàcuáa vá cúu-gá-yu ñáiyu ní cuu í, ñáiyu-áⁿ ní xóo códó ñáhá cuè dütú níñí ndicutu, ndihi níñí chivá, ndihi yáa cùnú chèhlu quití sàhni-güedé cuèndá nduu íi tucú-yu. 14 ¡Dico níñí Xítohó Jesucristú chi ío-gá nándíhi-xi sá cúu-xí nchò ñáiyu xíndecu vitna! Te cuèndá níñí-gá-áⁿ, chi Espíritú Yá Ndiöxí sá ndécú nchaa nduu nchaa quiú ní cuu #ⁿnuu-xi ndihi Xítohó Jesucristú sá cúu cùu-gá cuèndá cuu-gá dàtná #ⁿ táhú sá cúu-xí Yá Ndiöxí cuèi cùu-gá Yaá ñá túú tnahí cuèchi-xi, te ní sati níñí-gá te ní xíhí-gá. Te cuèndá xiáⁿ ní cutnùní iní-ó sá Yá Ndiöxí ní quide càhnu iní-gá nchaa sá ñà túú váha ní quide-o, te ní nduu ndoo ní nduu nine iní-ó. Te ducaⁿ ní nduu ndoo ní nduu nine iní-ó cuèndá sá ndécú-ó cunu cuechi-o núú Yá Ndiöxí Yaá ndécú nchaa nduu nchaa quiú.

15 Te Xítohó Jesucristú ní quide ndáá-gá núú Yá Ndiöxí cuèndá cue ñáiyu ndècu ñuyíú-a. Te cuèndá xiáⁿ Yá Ndiöxí cada-gá íngá núú sá váha sá cúu-xí-yu dàtná ní cachí-gá, te ducaⁿ càda-gá sá cuèndá nchaa ñáiyu ní cáháⁿ-gá cundecu ndihí-gá, chi ñáiyu-áⁿ nduu táhú-yu cundecu ndihi váha ñáhá-yu xii-gá ní caa ní quihíⁿ chi ducaⁿ ní cachí-gá, te ducaⁿ chi Xítohó Jesucristú ní xíhí-gá núú cùrúxí cuèndá sá Yá Ndiöxí cada càhnu iní-gá nchaa yíca cuèchi-yu, nchaa cuèchi sá ní quide-yu cùtnàhá ní cunuu tnúhu sá ní cáháⁿ-gá díhna. 16 Te nchoo xini-ó sá núu #ⁿ téé na càdúha #ⁿ tutú nàcuáa cada ñáiyu dàcáñu-yu nchaa sá ndécú ndihí-dé, te tutú-áⁿ xini ñùhu-xi ndéé ná váha nduu cùu-dé. 17 Te ñá túú tàù-xi cada ñáiyu nàcuáa càháⁿ-xi núú tütú-áⁿ ñini ndècu téé ní cadúha, dico sátá ná váha cuú-dé te cada-yu nàcuáa càháⁿ-xi. 18 Te cuèi tnúhu ní cáháⁿ Yá Ndiöxí ndéé díhna nàcuáa cada váha-gá ñáiyu, te diu-ni ndihi níñí ní cundáá-xi chi ní sàhni-güedé quití

te ní satí níñí-güedi. ¹⁹ Te ndí Moisés ní cáháⁿ ndodo ndí núú ncháa ñáyiú nàcuáa ní cachí Yá Ndiöxí cada-yu, te nàcuáa-ni nduu tnúhu ní chídó tnùní ndí núú tütú ndí ní cáháⁿ ndí, te ní dácá ndí ndute níñí chëhlu ndíhi níñí chívá lïhli, te ní queheⁿ ndí ñⁿ dité yutnu nani hisópó ndíhi luha idi ticuèhé, te ní chindóyo ndí níñí-áⁿ. Te ní sódo ndí núú tütú ndéé tnúhu Yá Ndiöxí sá ñí chídó tnùní ndí-áⁿ, te tnáhá cue ñáyiú xíndecu-áⁿ ñí chúcú ndí. ²⁰ Te ní xáhaⁿ ndí Moisés xí-yu: “Cuendá níñí-a ní cundáá sá Yá Ndiöxí cada ñaha-gá xii-ndo sá vâha chi ducaⁿ ñí cachí-gá cada-gá sá cúu-xí-ndó”, duha ní xáhaⁿ ndí xí-yu. ²¹ Te diu-ni ducaⁿ ñí quide tucu ndí ní chúcú ndí níñí vehe-gá ndíhi nchaá sá nándíhi-güedé òré chíñùhu-güedé Yá Ndiöxí ndécú xítí vehe-gá-áⁿ. ²² Te tnúhu ní chídó tnùní ndí Moisés càchí-xí sá mée-ní níñí chucu-güedé nchaá sá cãnehe chiùⁿ-güedé òré chíñùhu-güedé Yá Ndiöxí, te sacú-nã te ndíhi ndoo nchaá xíⁿ chucu-güedé níñí ñí cùu. Te dacuítí ñí xini ñuhu-xi sã cáti níñí cuendá ducaⁿ càda cahnu iní Yá Ndiöxí nchaá yíca cuéchi ñáyiú.

Xítóhó Jesucristú ní xíhí-gá núú cùrúxí cuendá sá vã cùndècu-gá cuéchi-o núú Yá Ndiöxí

²³ Te sá cuendá sá ñí xíhí Xítóhó Jesucristú núú cùrúxí, xíⁿ ñá túú-gã cuéchi-o ndècu núú Yá Ndiöxí. Te cuendá nchaá sá ñí xíhí xítí vehe-gá sá ñí dácáá ñáyiú isràél xíⁿ cùtnùní iní-ó nàcuáa quide-xi núú ndécú-gã. Te dacuítí ñí xini ñuhu-xi sã cáhni-güedé cue quítí ní cachí Yá Ndiöxí cuendá nduu íí nchaá sá ñí xíhí xítí vehe-gá-áⁿ. Te cuéi ducaⁿ ñí sahani-güedé cue quítí-áⁿ dico ñá túú ní quide-xi nacuáa ngúndecu váha-o núú Yá Ndiöxí. Dico Xítóhó Jesucristú ní xíhí-gá, te sá ñí xíhí-gá xíⁿ ní quide-gá nàcuáa ngúndecu váha-o núú Yá Ndiöxí. ²⁴ Te Xítóhó Jesucristú cuándaa-gá andíu núú ndécú Yá Ndiöxí càháⁿ ndàhú-gá cuendá-ó, te Xítóhó Jesucristú chi ñá díú ñⁿ vehe ní dácáá cuè téé ñuyíú-a cuánguïhu-gá. Te vehe Yá Ndiöxí sá ñí dácáá cuè ñáyiú isràél ñuyíú-a ndéé sanaha, ndíhi nchaá nàcuáa ní xóo cada-güedé xítí vehe-gá-áⁿ xíⁿ cùtnùní iní-ó

nàcuáa quide-xi núú ndécú-gã. ²⁵ Te dútu cùnùu núú ñáyiú isràél ní xóo quíhu-dé núú cuíá núú cuíá xítí cuàrtú ní cuu íí víhí-gã-áⁿ, te ní xóo canehe-dé níñí ñí xóo quíhu xítí cuàrtú-áⁿ dico ñá díú níñí mée-dě. Dico Xítóhó Jesucristú chi ñá túú ducaⁿ ni quide-gá chi ñⁿ xito-ni ní satí níñí-gã te ní xíhí-gá. ²⁶ Chi núu ni xíhí-gá nuu núu te ndéé cùtnáhá ní ngáva ñuyíú ducaⁿ ngüïta-gá cada-gá ní cùu, te vitna ta ndíhi nduu cuáháⁿ ní quixi-gá ñuyíú-a ní xíhí-gá ñⁿ xito-ni cuendá cuu-gá dàtná ñⁿ táhú sã cúu-xí Yá Ndiöxí, te ducaⁿ ñí quide-gá cuendá sá vã cùndècu-gá cuéchi ñáyiú núú Yá Ndiöxí. ²⁷ Te nchoo cuè ñáyiú ñuyíú-a chi ñⁿ xito-ni cuú-ó te dàtnùní ducaⁿ te cada ndáá Yá Ndiöxí cuéchi-o. ²⁸ Te ducaⁿ sãtnahá-xi cùu Xítóhó Jesucristú chi ñⁿ xito-ni ní xíhí-gá cuendá sá vã cùndècu-gá cuéchi ñáyiú núú Yá Ndiöxí, te ducaⁿ ñí cuu ní xíhí-gá chi mee-gã ducaⁿ ñí cachí-gá cunduu. Te quixi tucu Xítóhó Jesucristú ñuyíú-a dico ñá díú-gã sá cáda-gã cuendá sá vã cùndècu-gá cuéchi ñáyiú núú Yá Ndiöxí, chi quixi-gá nacuaca-gá nchaá ñáyiú ndètu ñaha xii-gá cuendá cundecú-yu ndíhi-gá ní caa ñí quíhíⁿ.

10

¹ Te nchaá tnúhu ní xáhaⁿ ndí Moisés xii ñáyiú isràél cada-yu, nchaá tnúhu-áⁿ ñí quide-xi ní cutnùní luha iní-yu nàcuáa cada Yá Ndiöxí cada váha ñaha-gã xii-o vitna. Dico ñá díú mèi nacuáa ní xáhaⁿ ndí Moisés xii ñáyiú quide Yá Ndiöxí vitna chi dãma quide-gá. Te nchaá tnúhu ní cáháⁿ ndí Moisés ñá túú ní ndàcu-xi cada-xi nacuáa cundáá nchaá ñáyiú tûha ñaha xii Yá Ndiöxí cuéi ní xóo cahni-güedé quítí ní xóo nduu táhú-gã núú cuíá núú cuíá. ² Te núu dicó sá ñí xóo cahni-güedé quítí ní xóo nduu táhú Yá Ndiöxí ní quide-xi nacuáa nduu ndoo nduu nine iní cue ñáyiú, te vá cáhni-gã-güedé cue quítí-áⁿ nduu táhú-gã ní cùu, te ducaⁿ te cutnùní iní-yu sá ñá túú-gã cuéchi-yu ndècu núú Yá Ndiöxí ní cùu. ³ Te sá dúcáⁿ ñí xóo cahni-güedé quítí ní xóo nduu táhú Yá Ndiöxí núú cuíá núú cuíá, xíⁿ ní xóo ndacu iní cue ñáyiú nchaá sá cuèhé sá dúhá ñí xóo cada-yu. ⁴ Te ducaⁿ chi

níñí ndicutu-áⁿ ndihi níñí chivá-áⁿ ñà túú ní xóo ndacu-xi cada-xi nàcuáa vá cündècu cuéchi-yu núú Yá Ndiöxí.

⁵ Te xiáⁿ nõu cùtnhá ní quexìo Xítóhó Jesucrìstú ñuyíú-a ní xáhaⁿ-gã xii Yá Ndiöxí: Yòhó Tàtá-í, ñá túú ndùu vétú váha iní-n sá sáhní-güedé quiti ndùu táhú-n,

te ni ñá túú ndùu vétú váha tucu iní-n cuendá nchaa dava-gá sá táxi-güedé ndúú táhú-n,

núu xiáⁿ ní quide túha-n yìqui cuñú-í cuendá yúhú cuú-í te nduu táhú ñáhá-n xii-í.

⁶ Te ni ñá túú ndùu vétú váha iní-n cuendá quiti sáhní-güedé ndúú táhú-n te ni ñá túú ndùu vétú váha iní-n cuendá nchaa dava-gá sá táxi-güedé ndúú táhú-n cuendá sá vã cündècu-gá cuéchi ñáyiu núú-n.

⁷ Núu xiáⁿ yúhú ní cachí-í xii yòhó Tàtá-í Dútú Ndiöxí sá yúhú véxi-í ñuyíú-a cada-í nchaa sá cuíní-n cada-í dàtná yódó tnùnì cuendá-í núú tütú-n.

Duha ní xáhaⁿ Xítóhó Jesucrìstú xii Tàtá-gã Dútú Ndiöxí. ⁸ Te Xítóhó Jesucrìstú díhna-gá ní xii-gá Yá Ndiöxí Yaá cúú Tàtá-gã: “Yòhó Tàtá-í ñá túú ndùu vétú váha iní-n cuendá quiti sáhní-güedé ndúú táhú-n, ndihi cuendá quiti sáhní-güedé ndúú táhú tucu-n cuendá sá vã cündècu-gá cuéchi ñáyiu núú-n, ndihi cuendá nchaa dava-gá táhú sá táxi-güedé xii-n ñá túú ndùu vétú váha iní-n cuendá nchaa xiáⁿ”, duha ní xáhaⁿ Xítóhó Jesucrìstú xii Tàtá-gã Dútú Ndiöxí. Te ducaⁿ ñí xáhaⁿ-gã cuéi núú tütú ndii Moisés yódó tnùnì sá dúcáⁿ cada-güedé. ⁹ Te sátá dúcáⁿ te ní xáhaⁿ tucu-gá xii Tàtá-gã Dútú Ndiöxí: “Yòhó Tàtá-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuíní-n”, duha ní xáhaⁿ-gã xii Tàtá-gã. Te sátá dúcáⁿ ñí cáháⁿ Xítóhó Jesucrìstú xiáⁿ ní cutnùnì sá ñá túú-gã xínì ñùhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xítóhó Jesucrìstú ní xihí-gá ní cuu-gá dàtná ñí táhú sá cúú-xí Yá Ndiöxí, te ducaⁿ ñí cuu chi ducaⁿ tnàhí ní cachí Yá Ndiöxí cunduu. ¹⁰ Te Xítóhó Jesucrìstú ní quide-gá nàcuáa ní cuínì Yá Ndiöxí cada-gá, chi ní xihí-gá núú cùrúxí chi ducaⁿ ñí cuínì méé-gã cunduu, te ñí xito-ni ní xihí-gá sá cuendá nchaa ñáyiu, te cuendá xiáⁿ nõu ndècu yiñuhu-o núú-gã vitna.

¹¹ Te cue dútú ñáyiu isràél chi ñí nduu ñí nduu ní xóo cahni-güedé quiti ní xóo nduu táhú-gã, te ñá túú ní dàma-güedé nàcuáa ní xóo cada-güedé. Te nchaa sá ñí xóo cada-güedé-áⁿ ñá túú ní quide-xi nàcuáa vá cündècu-gá cuéchi ñáyiu núú Yá Ndiöxí.

¹² Dico Xítóhó Jesucrìstú ní cachí-gá sá cúú cùú-gá, te ní xihí-gá núú cùrúxí cuendá nchaa yíca cuéchi nchaa nchoo ñáyiu ndècu ñuyíú-a. Te sátá dúcáⁿ te dàtnùnì ní ngóo-gá xio cùha Dútú Ndiöxí táxi tnùnì-gá, te vá ñí ndùu ñí quíú-gã te cuú-gá. ¹³ Te diu-ni xiáⁿ cundecu-gá cundetú-gá ndéé sáá nduu cànehe nchaa sá cúú ùhú iní ñáhá xii-gá sá yiñuhu núú-gã. ¹⁴ Te cuendá sá ñí xihí Xítóhó Jesucrìstú ñí xito-ni xiáⁿ ní cuu-gá dàtná ñí táhú sá cúú-xí Yá Ndiöxí, xiáⁿ ní quide-xi sá ncháá ñáyiu cùu cuendá-gá ñá túú-gã ná cumánì-yu núú-gã ñí caa ñí quíhíⁿ. ¹⁵ Te mee Espiritú Yá Ndiöxí cáháⁿ ndáá-xi nàcuáa ní cáháⁿ-gá cuendá-ó, te duha ní cáháⁿ-gá:

¹⁶ Sáá nduu te cada-í nchaa ñáyiu nàcuáa na cáháⁿ-í-a,

te cada-í nàcuáa cutnùnì iní-yu tnúhu sá dánèhé-í-yu tnúhu sá cánúichi ñaha xií-yu nàcuáa cada-yu cundecú-yu,

te cada tucu-í sá tníñ-yu nchaa tnúhu-áⁿ.

Duha ní cachí-gá. ¹⁷ Te ní cachí tucu-gá:

Te vá ñí ndùu ñí quíú-gã ndacu iní-í sá quidé sáá iní-yu tnúhu-í,

te ni vã ñí ndùu ñí quíú-gã te ndacu iní-í nchaa sá cuèhé sá dúhá quidé-yu.

Duha ní cáháⁿ Yá Ndiöxí cáhí Espiritú-gá.

¹⁸ Te sátá dúcáⁿ quide cahnu iní Yá Ndiöxí nchaa cuéchi-o, núu xiáⁿ ñá túú-gã xínì ñùhu-xi cuú quiti nduu táhú-gã cuendá nchaa sá cuèhé sá dúhá quide-o.

Tàú-ó sã tnàhá tnúhu-o ndihi Yá Ndiöxí

¹⁹ Te cue dútú ñí xóo cunuu nõu ñáyiu isràél cue téé-áⁿ ñí xóo quíhu-güedé xití cuártú ní cuu íí víhí-gã. Dico nchoo cué ñáyiu ndècu ichi Xítóhó Jesucrìstú vitna tàú-ó sã ñí yuhu ñí iní-ó tnàhá tnúhu-o ndihi Yá Ndiöxí. Te cuu tnàhá tnúhu-o ndihi-gá chi Xítóhó Jesucrìstú ní sati níñí-gã te ní xihí-gá núú cùrúxí. ²⁰ Te cada iní-ó sã dõó sã ñí xíndedí nàcuáa ní xóo quíhu-güedé

xítí cuàrtú ní cuu íí víhí-gǎ-áⁿ nǐ xócuíñí, te ducaⁿ càda iní-ó chi Xítóhó Jesucristú ní xíhí-gǎ cuendá nchoo ñhí-ó nàcuáa cada-o ngũndecu váha-o sǎ cúu-xí-gǎ. ²¹ Te ñu-gǎ cúu-gǎ Yaá cúu ñtú-ó, te ñu-gǎ cúu-gǎ Dútú cúnùu ndecu-gǎ núu ndécú Yǎ Ndiòxí. ²² Núu xǎⁿ xíní ñùhu-xi sǎ ño tnahá tnúhu-o ndíhi Yǎ Ndiòxí, te vá cání ñⁿ cani úú iní-ó, te ío váha quindáá iní-ó-gǎ chi ñu-gǎ ní ndada ndoo ní ndada nine-gǎ iní-ó cuendá nchoo cùtnuní iní-ó sǎ ñà túú-gǎ cuéchi-o ndècu núu-gǎ. Te ní sandute-o cuendá sǎ dúcáⁿ nǐ nduu ndoo ní nduu nine iní-ó. ²³ Te nchoo càháⁿ ndáá-ó sǎ ndécú ndíhi-o tnúhu ndee iní sǎ ndúú tǎhú-ó cùndecu ndíhi-o Yǎ Ndiòxí, te xini ñùhu-xi sǎ vá dáñá ndèé-ó cànchicúⁿ nihnu-o tnúhu ndee iní-áⁿ chí Yǎ Ndiòxí cada-gǎ nàcuáa ní cachí-gǎ sǎ cúu-xí-ó. ²⁴ Te xini ñùhu-xi cuhuⁿ iní tnáhá-ó te chindee tnàha-o nàcuáa ducaⁿ cùu iní tnáhá-gǎ-ó, te cada-o mèe-ni sǎ váha. ²⁵ Te nchoo vá dáñá ndèé-ó nàtacá-ó núu dácuàha-o tnúhu Yǎ Ndiòxí, te vá cáda-ó dàtná xǐquide davá-yu ñá túú-gǎ cùníní-yu quixí-yu núu dácuàha-o tnúhu-gǎ. Chi xini ñùhu-xi sǎ cuàha tnàha-o tnúhu ndee iní canchicúⁿ nihnu-o íchi-gǎ, te uuⁿ-gǎ ducaⁿ tàú-xi cada-o vitna ta cuyatni nduu quixi tucu Xítóhó Jesucristú ñuyíu-a.

²⁶ Te cue ñáyíu sa ní tecú tnùní nàcuáa càháⁿ tnúhu Yǎ Ndiòxí te núu na ngũta-yu ñucùuⁿ cadá-yu nándi sǎ cuèhé sǎ dúhá, te àúⁿ nǎ cuu ní xíhí Xítóhó Jesucristú cuendá-yu, te ní vá yõ ñⁿ-gǎ cuú cuendá sǎ vá cùndècu-gǎ cuéchi-yu núu Yǎ Ndiòxí. ²⁷ Te núu ducaⁿ na cadá-yu nándi sǎ cuèhé sǎ dúhá, te ío quiyùhú iní-yu nàcuáa cada ñaha Yǎ Ndiòxí xí-yu. Chi nchaa ñáyíu cùu úhú iní ñáhá xii-gǎ daquíñíⁿ ñáhá-gǎ xii-yu núu ñùhú núu càyú núu ño ndohó-yu. ²⁸ Te nchaa ñáyíu ní xóo daquèe tǐhú tnúhu ní cáháⁿ ndíi Moisés, te núu ndècu úú àdi úní ñáyíu càháⁿ ndáá sǎ dúcáⁿ nǐ dáquèe tǐhú-yu tnúhu ní cáháⁿ ndíi, te vá yõ ní xóo cundàhú iní ñáhá xii nchaa ñáyíu ducaⁿ nǐ xóo cada chi ní xóo cahni ñaha-güedè. ²⁹ Te núu ducaⁿ nǐ ndoho cue ñáyíu ducaⁿ nǐ dáquèe tǐhú tnúhu ní cáháⁿ ndíi Moisés-áⁿ, te uuⁿ-gǎ ndoho cue ñáyíu dàquèe tǐhú ñáhá xii Xítóhó Jesucristú Yaá cúu Dèhe Yǎ Ndiòxí ñu-ni ñáyíu càchí sǎ ñà túú nándíhi

níñí-gǎ. Te níñí-gǎ-áⁿ nǐ sati, te ní xíhí-gǎ, te ducaⁿ nǐ cuu cuendá cada Yǎ Ndiòxí ingá núu sǎ váha sǎ cúu-xí nchòo ñáyíu ndècu ñuyíu-a dàtná ní cachí-gǎ cada-gǎ. Te ñu-ni cuendá níñí-gǎ-áⁿ nǐ nduu ndoo ní nduu nine iní cue ñáyíu-áⁿ ní cùu, te ñu-ni ñáyíu-áⁿ càháⁿ úhú-yu Espiritú Yǎ Ndiòxí sǎ chindèe chitúu ñaha xii-o. ³⁰ Te nchoo sǎ naha-o sǎ Yǎ Ndiòxí càchí-gǎ ñⁿ xichi núu tütú-gǎ: “Yúhú cada-í te nacháhu ñáyíu nchaa sǎ quidè-yu, te duha càháⁿ-í chí nachinaa-í cuendá nchaa sǎ quidè-yu-áⁿ”, duha càchí-gǎ. Te sa naha tucu-o nàcuáa càháⁿ-xi núu tütú-gǎ núu càchí-xi: “Yǎ Ndiòxí cada ndáá-gǎ cuendá nchaa sǎ quidè ñáyíu cùu cuendá-gǎ”, duha càchí-xi núu tütú-gǎ. ³¹ Te ío ndàhú ndoho cue ñáyíu na dàndoho ñaha Yǎ Ndiòxí, te ñu-gǎ cúu-gǎ Yaá cúnùu nchaa nduu nchaa quíú!

³² Te chí dándàcu iní nàcuáa ní quide-ndo cùtnáhá vitna cuu saa ní tecú tnùní-ndó tnúhu Yǎ Ndiòxí, chí davá-áⁿ nǐ quide càhnu iní-ndó cuèi nándi sǎ ní yáha-ndo cuendá-gǎ. ³³ Te dava-ndo nǐ quide úhú ñáhá ñáyíu xii-ndo núu chítú núu tàcá, te nándi tnúhu cuèhé tnúhu duha ní xáháⁿ-yu xii-ndo. Te dava-ndo nǐ cuyí-ni-ndo nǐ xindecu ndíhi tnàha-ndo cuèi nándi ní ndoho dava-gǎ-ndó. ³⁴ Te ní cundàhú iní-ndó cuè ñáyíu yèhi vecaá, te cuèi ní quendeé ñáyíu sǎ ndécú ndíhi-ndo dico ñá túú ní ndíhú iní-ndó chí ní cudí-ni iní-ndó. Te ducaⁿ nǐ quide-ndo chí sa naha-ndo sǎ ndúú tǎhú-ndó sǎ ño-gǎ váha, te xǎⁿ cundecu ndíhi-ndo ní caa ní quíhíⁿ. ³⁵ Te xǎⁿ vá dáñá ndèé-ndó quindáá iní-ndó nàcuáa ní cachí Yǎ Ndiòxí cada ñaha-gǎ xii-ndo, chí sáá nduu te ío váha cada ñaha-gǎ xii-ndo. ³⁶ Te nchòhó xíní ñùhu-xi ío cada ndee iní-ndó càda-ndo nchaa nàcuáa càháⁿ Yǎ Ndiòxí, te ducaⁿ te nduu tǎhú-ndó sǎ ní cachí-gǎ nduu tǎhú-ndó cùndecu ndíhi-ndo ní caa ní quíhíⁿ. ³⁷ Te Yǎ Ndiòxí càchí-gǎ núu tütú-gǎ:

Ta cùyatni víi-nǎ nduu quixi Yaá quixi ñuyíu-a, te vá cùyàa-gǎ.

³⁸ Te nchaa ñáyíu cùndáá núu-í ñá túú dàña ndeé-yu sàndáá iní ñáhá-yu xii-í, te cuendá xǎⁿ cundecu-ní-yu ichi-í,

dico núu na dàñá-yu ichi-í te vá cúu vǎha iní-í núu-yu.

Duha càchí Yǎ Ndiǒxí núu tùtú-gǎ.

³⁹ Dico nchoo chi ñá túú cùu-o ñáiyu ducaⁿ xǐquide dàñá-ó ìchi Yǎ Ndiǒxí, chi cùu-o ñáiyu nchìcúⁿ nihnu-ni sàndáá iní-ó-gǎ, te sá dúcáⁿ te nduu táhú-ó cùndecu-o ndìhi-gǎ ni caa ni quíhíⁿ, te ñá túú cùu-o ñáiyu dàña nihnu ichi-gǎ te xǐta nihnú-yu.

11

Ñáiyu sàndáá iní ñáhá xii Yǎ Ndiǒxí

¹ Te núu sàndáá ndisa iní-ó Yǎ Ndiǒxí te ducaⁿ cùtnuní ndáá iní-ó sǎ ñihí-ó sǎ cuíní-ó núu-gǎ. Te núu sàndáá iní-ó-gǎ te ducaⁿ cùtnuní ndáá tucu iní-ó sǎ càháⁿ ndáá-gǎ cuèndá nchaa sá ñà túú xìní-ó. ² Te ducaⁿ ñi quide ñáiyu ní xíndecu ndéé sanaha ío ní sàndáá iní-yu Yǎ Ndiǒxí te xǐǎⁿ núu ío váha ní cuu iní ñáhá-gǎ xii-yu.

³ Te núu nchoo sàndáá ndisa iní-ó Yǎ Ndiǒxí te cùtnuní ndáá iní-ó sǎ sǎ cuèndá tñúhu ní cáháⁿ-gǎ ní cuáha andi^u ndìhi ñuyíú-a. Te cùtnuní iní-ó sǎ ñà díú sǎ cuèndá ìⁿ sá tñu ndèhe-o ío ñuyíú-a ní cuáha andi^u ndìhi ñuyíú-a.

⁴ Te ndíi Àbél ío ní sàndáá iní ndíi Yǎ Ndiǒxí núu xǐǎⁿ ío-gǎ ní cuu iní-gǎ sá ñi sáñaha ndíi ní nduu táhú-gǎ dàcúúxí sǎ ñi sáñaha ndíi Càin xii-gǎ ní nduu táhú-gǎ. Te ndíi Àbél-áⁿ ñi cutnùní iní ndíi sá ñi cudíu ndíi núu Yǎ Ndiǒxí cuèndá sá ñi queheⁿ cuèndá-gǎ sá ñi sáñaha ndíi ní nduu táhú-gǎ. Te cuèi ñá túú-gǎ ndíi ndècu ñuyíú-a dico yòdo tñuní sá ñi sàndáá iní ndíi Yǎ Ndiǒxí cuèndá ducaⁿ càda-o canchicúⁿ nihnu-o.

⁵ Te té Ènóc téé ní xíndecu ndéé sanaha ñà túú ní xíhí-dé chi ní nacuaca ñaha túu Yǎ Ndiǒxí xii-dé cuèndá sá ñi sàndáá iní ñáhá-dé xii-gǎ. Te vá yòo ni nànihí ñáhá xii-dé chi mee-gǎ ní nacuaca ñaha-gǎ xii-dé. Te núu tùtú Yǎ Ndiǒxí càchí-xi sá cùtnàhá vátá nàcuàca ñaha-gǎ xii té Ènóc, te ní quide-dé mee-ni nàcuàca ní cuu váha iní ñáhá-gǎ xii-dé. ⁶ Te nchaa ñáiyu ñá túú sàndáá iní ñáhá xii Yǎ Ndiǒxí ñà ndácú-yu cadá-yu nàcuàca cudíu-yu núu-gǎ, chi nchaa ñáiyu cuíní tuha ñaha xii-gǎ xíní ñùhu-xi sá quìndáá iní-yu sá ndécú-gǎ, te quìndáá

iní-yu sá núu na nànducu nihnu ñáhá-yu xii-gǎ te cuáñaha-gǎ xii-yu sá ndúú tǎhù-yu.

⁷ Te Yǎ Ndiǒxí ní dátùha-gǎ ndíi Nǒé nchaa nàcuàca cada-gǎ. Te ní quide ndíi nchaa nàcuàca ní xáhaⁿ Yǎ Ndiǒxí cada ndíi, te ní cadúha ndíi ìⁿ bàrcú cuèndá xití bàrcú-áⁿ quèe ndíi ndìhi nchaa ñáiyu vehe ndíi cuèndá cácu nihnú-yu. Te ducaⁿ ñi quide ndíi chi ní sàndáá iní ndíi Yǎ Ndiǒxí. Te sá dúcáⁿ ñi sàndáá iní ndíi-áⁿ Yǎ Ndiǒxí xǐǎⁿ ní cutnùní sá ncháá ñáiyu ío ndècu cuèchi-yu, chi ñá túú ní cǎnchicúⁿ nihnú-yu cadá-yu nàcuàca ní quide ndíi. Te sá dúcáⁿ ñi quide ndíi ní sàndáá iní ndíi Yǎ Ndiǒxí xǐǎⁿ ío ní cundáá ndíi núu-gǎ.

⁸ Te Yǎ Ndiǒxí ní xáhaⁿ-gǎ xii ndíi Àbrahám sá quèé ndíi ñuu núu ndécú ndíi quíhíⁿ ndíi ìngá xichi cundecu ndíi. Te ní quide ndíi nàcuàca ní xáhaⁿ Yǎ Ndiǒxí chi ní quee ndíi cuáháⁿ ndíi núu cuáñaha Yǎ Ndiǒxí cundecu ndíi. Te òré ní quee ndíi núu ndécú ndíi te ñà túú ní cùtnuní iní ndíi ndéé cúu núu cuáháⁿ ndíi cundecu ndíi. Te ducaⁿ ñi quide ndíi chi ní sàndáá iní ndíi Yǎ Ndiǒxí. ⁹ Te sá dúcáⁿ ñi sàndáá iní ndíi Yǎ Ndiǒxí núu xǐǎⁿ ní xíndecu ndíi núu ñi sáñaha-gǎ cundecu ndíi, te cuèi ducaⁿ dico ñà túú ní quide ñuu ndíi xǐǎⁿ. Te ní xóo cundecu ndíi vehe cùtexínu vehe dóó. Te díu-ni ducaⁿ ñi quide ndíi Isàác ndìhi ndíi Jàcób chi tnhá cue ndíi-áⁿ ñi cachí Yǎ Ndiǒxí sá ndúú tǎhù cue ndíi xǐǎⁿ cundecu cue ndíi. ¹⁰ Te ducaⁿ ñi quide ndíi Àbrahám chi ní xíndetu ndíi ndéé ní sáá nduu ndùu táhú ndíi cundecu ndíi núu ndécú Yǎ Ndiǒxí. Te núu ndécú-gǎ-áⁿ cúu-xi ñuu ní cadúha mee-gǎ, te ñuu-áⁿ cudíi-xi ni caa ni quíhíⁿ.

¹¹ Te ndíi Sǎrá, sa ní xídó cuíá ndíi sá cóo dèhe ndíi chi sa ní sahnú vñhi ndíi, dico Yǎ Ndiǒxí ní quide-gǎ te ní xóo ìⁿ déhe ndíi. Te ducaⁿ chi ní sàndáá iní ndíi Yǎ Ndiǒxí te ní cutnùní ndáá iní ndíi sá cadá-gǎ nàcuàca ní xáhaⁿ-gǎ xii ndíi. ¹² Te cuèi ío ní sahnú ndíi Àbrahám ndìhi ñadìhí ndíi, ndíi Sǎrá dico dacuítí ñi nduu táhù-yu ní xóo ìⁿ déhe-yu. Te xǐǎⁿ núu ío cuéhé ndíquín yává ndíi Àbrahám ní cáyá dàtná cuéhé chòdíní ndéé andi^u, ndìhi dàtná cuéhé ñuhu cúchí làmár, chi ni vǎ yòo ìⁿ ndacu cahu ñaha xii-yu sá cuèhè-yu.

¹³ Te cue ndíi-áⁿ ducaⁿ-ni ñi sàndáá iní cue ndíi Yǎ Ndiǒxí ndéé ní sáá nduu ñi xíhí

cue ndíi. Te cue ndíi-áⁿ ñà túú ní ndùu táhú cue ndíi quini cue ndíi nchaa nàcuáa ní cachí Yá Ndiöxí cada-gá, dico ní cutnùni ndáá iní cue ndíi-áⁿ nàcuáa cada-gá núu cuaháⁿ núu vëxi. Te ío ní cudíí iní cue ndíi, te ní cachí cue ndíi sá dícó-ni ichi yáha cue ndíi ñuyú-a, chi ñá díú ñuyú-a cundecu ducaⁿ cuè ndíi. ¹⁴ Te sá dúcáⁿ ndùu tnúhu ní cáháⁿ cue ndíi-áⁿ, xiáⁿ ní cutnùni sá cuini cue ndíi ingá xichi núu cundècu cue ndíi. ¹⁵ Te ni ñà díú ñúu núu ñi quee cue ndíi ni cuini cue ndíi núhú cue ndíi. Chi núu ducaⁿ ni sani iní cue ndíi te núhú cue ndíi ni cùu. ¹⁶ Dico ñáhá chi cuini cue ndíi quíhíⁿ cue ndíi ñⁿ xichi núu vâha-gá cáá cundecu cue ndíi. Te núu dúcáⁿ ño-gá váha càa-áⁿ cúu-xí ñúu núu ndécú Yá Ndiöxí, te sá dúcáⁿ ñi sani iní cue ndíi xiáⁿ ñúu ío váha cùu iní Yá Ndiöxí càchí-gá sá ñà túú cùcahaⁿ núu-gã cúu-gã Ndiöxí cue ndíi-áⁿ, te cutnùni iní-ó sá ndáá sá dúcáⁿ càháⁿ-gá chi ní quide túha-gá ñⁿ xichi núu cundècu cue ndíi-áⁿ.

¹⁷ Te ndíi Àbrahám ní xíndecu ñⁿdii-ni déhe ndíi ndíhi ñadíhí ndíi, te cútnàhá ní xito ndéé ñáhá Yá Ndiöxí xii ndíi ní xicáⁿ-gá déhe ndíi, ndíi Isàác cuendá nduu táhú ñáhá-gã xii ndíi. Te ní xáhaⁿ ndíi sá cúu ndùu táhú-gã déhe ndíi, te ducaⁿ ñi quide ndíi chi ní sándáá iní ñáhá ndíi xii-gá. Te sa ndècu túha ndíi sá cuañaha ndíi déhe ndíi xii-gá cuèi mee Yá Ndiöxí ní xáhaⁿ ndáá-gá xii ndíi ¹⁸ sá sã cuendá ndíi Isàác te ngúndecu cue ñaní tnáhá ndíi. ¹⁹ Te ducaⁿ ñi quide ndíi Àbrahám, chi ní cutnùni ndáá iní ndíi sá Yá Ndiöxí ndácú-gã dándoto-gá cuèi ñáyiu sa ní xíhí. Te sá dúcáⁿ ñi xáhaⁿ ndíi xii Yá Ndiöxí sá cúu ndùu táhú-gã déhe ndíi, te xiáⁿ cada iní-ó sá sà ní xíhí ndíi Isàác te ní ndoto tucu ndíi ní nucúndecu ndíi ndíhi tãtá ndíi, ndíi Àbrahám.

²⁰ Te ndíi Isàác ní xicáⁿ táhú ndíi núu Yá Ndiöxí cuendá sá cáda vâha-gá cue déhe ndíi, ndíi Jácób ndíhi ndíi Esàú núu cuaháⁿ núu vëxi. Te ducaⁿ ñi quide ndíi chi ní sándáá iní ndíi Yá Ndiöxí. ²¹ Te sa ta cùyatni-ná nduu cùu ndíi Jácób, te ní xicáⁿ táhú ndíi núu Yá Ndiöxí cuendá cue déhe ñaní ndíi déhe ndíi Chéé. Te yítuu-ná ndíi tatnu ndíi ní chiñuhu ndíi Yá Ndiöxí. Te ducaⁿ ñi quide ndíi chi ní sándáá iní ñáhá ndíi xii-gá. ²² Te cútnàhá sa ta cùyatni vii-ñá nduu cùu ndíi Chéé, te ní cachí

ndíi sá cuè ñáyiu isràél sáá nduu quèé-yu núu xíndecú-yu-áⁿ. Te ní cáháⁿ tucu ndíi nàcuáa cada-yu yiqui cùñú ndíi na sáá nduu quèé-yu núu ndécú-yu-áⁿ. Te ducaⁿ ñi quide ndíi chi ní sándáá iní ndíi Yá Ndiöxí.

²³ Te cútnàhá ní cacu ndíi Moisés te ní chiváha ñaha ñaná ndíi ndíhi tãtá ndíi úní yóó. Te ducaⁿ ñi quide cue ndíi-áⁿ chi ní sándáá iní cue ndíi Yá Ndiöxí. Te ní quide cuendá cue ndíi-áⁿ sã ío váha càa ndíi Moisés déhe cue ndíi, te ñà túú ní yùhú cue ndíi nàcuáa ní cáháⁿ téè cùu Faraón sá cáhni-dé cue landú. ²⁴ Te sátá ñi sañu ndíi Moisés te duuⁿ duuⁿ ní cachí ndíi sá vã cáháⁿ ñáyiu sá déhe yoco téè cùu Faraón cúu ñaná ndíi. Te ducaⁿ ñi quide ndíi chi ní sándáá iní ndíi Yá Ndiöxí. ²⁵ Te ducaⁿ ñi quide tucu ndíi chi ní tnahá-gá iní ndíi ndoho ndíi ndíhi nchaa ñáyiu cùu cuendá Yá Ndiöxí dàcúxí sã cudíí iní ndíi cundecu tnaa ndíi ichi cuèhé ichi duha. ²⁶ Chi ní sani iní ndíi sá vâha-gá ndoho ndíi cúcuèhé ñáhá cuè ñáyiu xii ndíi sá cuendá Yaá quixi ñuyú-a dàcúxí sã cundècu ndíhi ndíi nchaa sá ío Ègiptú. Te ducaⁿ ñi quide ndíi chi ní xúhuⁿ iní ndíi sá Yá Ndiöxí cuañaha-gã sá ndúu táhú ndíi. ²⁷ Te ndíi Moisés ní quee ndíi nacióⁿ Ègiptú te ñà túú ní quide cuendá ndíi sá ío cùdééⁿ téè cùu Faraón núu ndíi. Te ducaⁿ ñi quide ndíi chi ní sándáá iní ndíi Yá Ndiöxí. Te ní quide càhnu iní ndíi cuendá nchaa sá ñi yáha ndíi, te ní quide iní ndíi sá Yá Ndiöxí ndécú ndíhi ñaha túu-gá xii ndíi cuèi ñà túú ní xini núu ñáhá ndíi xii-gá. Te ducaⁿ ñi sani iní ndíi chi Yá Ndiöxí ndécú ndíhi ñaha-gá xii ndíi.

²⁸ Te ndíi Moisés cúu ndíi téè ní tausaha ñi quide vico pàscuá ndíhi cue ñáyiu isràél, te dàvá-áⁿ ñi táuchíuⁿ ndíi ní sañi-yu mbéé te níñi quiti-áⁿ ñi dácánúu-yu yuyèhé-yu. Te ducaⁿ ñi quide ndíi chi ní sándáá iní ndíi Yá Ndiöxí. Te ducaⁿ ñi quide tucu ndíi cuendá sá espíritú sá ñi tendaha Yá Ndiöxí cahni-xi mee-ni déhe téè déhe díhna cue ñáyiu Ègiptú, te vá cáhni-xí ñi ñⁿ déhe cue ñáyiu isràél. ²⁹ Te ndute làmár sá nání Mâr Tícuèhé ní quèe dava-xi ní natúu ñuhu yìchí ní níhí ñi yáha cue ñáyiu isràél. Te ducaⁿ ñi cuu chi ní sándáá iní-yu Yá Ndiöxí. Te cue téè Ègiptú tnahá-güedé nchícúⁿ-güedé cuaháⁿ

dico ñá túú ní ndàcu-güedé yáha-güedé chi ní ndihí-güedé ní cáhá.

³⁰ Te cue ñáyiú isrâél ní dúcúⁿ ndèè-yu úsá nduu ñuú Jericó te ní ngoyo nchaa sá ñúdòco. Te ducaⁿ ñí cuu chi ní sándáá iní-yu Yá Ndiöxí. ³¹ Te ñí ñaha ní xíndecu ichi díí iní ní xínani-aⁿ Ràháb, ñaha-áⁿ ñà túú ní xíhí-aⁿ dàtná ní xíhí nchaa ñáyiú ío ní cuu sáá iní-xi núú Yá Ndiöxí, chi ní cuu váha iní-aⁿ núú cuè téé ní tendaha cuè ñáyiú isrâél ní sángoto dayuhu ñuú-aⁿ. Te ducaⁿ ñí quide-aⁿ chi ní sándáá iní-aⁿ Yá Ndiöxí.

³² Te núu dicó sá cúú te cáháⁿ-í cuèndá ndíi Gedèón, ndihí cuèndá ndíi Bàrác, ndihí cuèndá ndíi Sànsón, ndihí cuèndá ndíi Jèfté, ndihí cuèndá ndíi Dàvíí, ndihí cuèndá ndíi Sàmuél, ndihí cuèndá nchaa cue téé ní xóo cáháⁿ tnúhu Yá Ndiöxí ndéé sanaha, te nchaa cuèndá cue téé-áⁿ cãháⁿ-í te núu dicó cùyáchí-í dico ñá túú cùyáchí-í. ³³ Te nchaa cue ndíi-áⁿ ní sándáá iní cue ndíi Yá Ndiöxí núu xíáⁿ ní xóo ndacu cue ndíi ní xóo nàá cue ndíi ndihí nchaa ñáyiú dava-gá ñuú. Te nchaa ñáyiú-áⁿ ñà túú ní xóo ndacú-yu nàá-yu ndihí cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gá xii cue ndíi. Te cuèi nchaa cue quiti dééⁿ ñà túú ní ndàcu-güedé ná cada ñaha-güedé xii cue ndíi. ³⁴ Te ní xóo ndacu cue ndíi ní xóo ndahvá cue ndíi ñuhú sá vã yóo tnàhí ndàcu ndahvá, te ní cácu cue ndíi vá yóo ní ndàcu cahni ñaha xii cue ndíi. Te cue ndíi-áⁿ ñà túú ñihí ndéé cuè ndíi ní cùu, dico ní ñihí ndéé cuè ndíi chi Yá Ndiöxí ní chindee ñaha-gá xii cue ndíi, te nchaa ndíi-áⁿ ío ní ñihí ndéé cuè ndíi ní nàá cue ndíi ndihí nchaa ñáyiú ní cuu úhú iní ñáhá xii cue ndíi, te nchaa ñáyiú ducaⁿ ñí xóo nàá ndihí cue ndíi-áⁿ ñà túú ní xóo ndacú-yu nàá ndihí ñáhá-yu xii cue ndíi chi ní xóo cunú-yu. Te ducaⁿ ñí cuu chi ní sándáá iní cue ndíi Yá Ndiöxí. ³⁵ Te dava ñáyiú díhí ní nduu táhü-yu ní ndoto cue ñáyiú ní xíndecu ndihí-yu ní nucúndecu ndihí ñaha tucú-yu.

Te dava ñáyiú ío ní dándóhó ñaha tnaha ñáyiú-yu te ní xíhí-yu, dico ñá túú ní dàñá-yu ichi váha nàcuáa cácu niñnú-yu núu tnàha ñáyiú-yu, te ducaⁿ chi ní cuiní-yu sá ndótó-yu ndéé cuèé-gá nàcuáa ngúndecu váha-yu núu ndécú Yá Ndiöxí. ³⁶ Te dava

cue ndíi ío ní ndoho cue ndíi chi ío ní cudíquí ndéé ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñáhá-yu, te ní chihi ñáhá-yu xii cue ndíi vecaá. ³⁷ Te dava cue ndíi ní sahani ñáhá-yu ndihí yúú. Te dava cue ndíi ní chidava ndáá ñáhá-yu ní xehndé ñáhá-yu ndihí sièrrá. Te dava cue ndíi ní xito ndéé ñáhá-yu te núu ndisa sá sándáá iní cue ndíi Yá Ndiöxí, te dava cue ndíi ní sahani ñáhá-yu ndihí machití. Te mee-ni ñí mbéé ndihí ñí chívá, ní xóo cuu dóo cue ndíi. Te mee-ni ñí cue quiti-áⁿ ñí xóo cuu dóo cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndáhú ní cuu cue ndíi. Te ío ní xóo dandihú-yu iní cue ndíi, te nándi sá ñí xóo cada ñáhá-yu xii cue ndíi ní xóo dandòho ñáhá-yu. ³⁸ Te cue ndíi-áⁿ ío-gá ní xínduu váha iní cue ndíi dácúxí nchaa dava-gá ñáyiú. Te nchaa cue ndíi-áⁿ ñí xica cuu cue ndíi cuèi nchaa núu ñà túú vã yóo tnàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchíi yaú ní xóo cundecu cue ndíi. ³⁹ Te ío ní cudíu cue ndíi núu Yá Ndiöxí cuèndá sá ní sándáá iní ñáhá cuè ndíi xii-gá. Te cuèi ducaⁿ ñí quide cue ndíi dico ñá túú ní xíní cue ndíi nchaa sá ní cachí Yá Ndiöxí cada-gá. ⁴⁰ Te ducaⁿ ñí cuu chi ñí sá ío-gá váha ní cachí Yá Ndiöxí cada-gá. Te sá dúcáⁿ ío-gá váha ní cachí-gá cada-gá cúú-xí cuèndá nchoo ndihí cuèndá cue ndíi-áⁿ cuèndá sá ñà díú mèe-ni cue ndíi-áⁿ cundáá cue ndíi núú-gã, chi tnàhá nchoo cundáá-ó núú-gã.

12

Ío cuhuⁿ iní-ó Xítohó Jesucristú

¹ Te cue ñáyiú ní xíndecu ndéé sanaha ñí quidé-yu nàcuáa ní cutnùní sá ñí sándáá iní-yu Yá Ndiöxí. Te cada iní-ó sã ncháá ñáyiú-áⁿ xíndéhé ñáhá-yu xii-o vitna. Núu xíáⁿ xíní ñúhu-xi sá vã cadá-ó ní ñí sá cuèhé sá dúhá chi díu nchaa xíáⁿ quidé-xí ñà túú cundáá-ó núú Yá Ndiöxí. Te vá cadá cuèndá-ó nchaa sá quidé tneñu iní-ó nàcuáa ndacu-o càda-o nchaa nacuáa cãháⁿ-gá. Te ío càhnu cunduu iní-ó cànchicúⁿ nihnu-o càda-o nchaa nacuáa ní cachí-gá cada-o cundecu-o ñuyíú-a. ² Te ío cuhuⁿ iní-ó Xítohó Jesucristú, chi díu-gá ní quide ní sándáá

iní-ó Yă Ndiöxí, te ðiu-ni ducaⁿ quide-gá cuëi vitna te cuëi ndée núu cuáhánⁿ núu vëxi ðiu-ni ducaⁿ càda-gá sá quindáá iní-ó Yă Ndiöxí. Te Xítohó Jesucristú ío ní quide ndee iní-gá ní ndoho-gá te ní xíhí-gá núu cùrúxí, te ñá túú ní quide cuendá-gá cuëi ìⁿ sácáⁿ núu cúu-xí sá dúcáⁿ ní ndoho-gá. Te ducaⁿ ní quide-gá chi sa nàha-gá sá ná yàha sá dúcáⁿ ndòho-gá te ío cudí^í iní-gá. Te vitna núcóo-gá xio cùha núu núcóo Yă Ndiöxí te tàxi tnuní-gá.

³ Te xini ñuhu-xi sá ío cada cuendá-ndó nàcuáa ní quide Xítohó Jesucristú chi Yaá-áⁿ ío ní quide càhnu iní-gá nchaa sá ní ndoho-gá ní quide ñaha nchaa ñáyiu ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuendá sá vǎ túu dusaⁿ-ndo, te ni vǎ nátùhú iní-ndó càda-ndo nchaa nacuáa càháⁿ-gá. ⁴ Te nchòhó dáquèe tihú-ndó nchaa sá cuehé sá dúhá dico vátá cáhni ñaha-gá-yu xii-ndo sá dúcáⁿ quide-ndo. ⁵ Te ndacu iní-ndó nàcuáa càháⁿ Tătá-ó Dütú Ndiöxí dásàhú ñáhá-gǎ xii nchoo cuè ñáyiu cùu dèhe-gá. Te duha càchí-gá núu tütú-gá:

Nchòhó cue dèhe mee-í, vǎ cání iní-ndó sǎ àúⁿ nǎ cuu dándoho ñaha-í xii-ndo,

te ni vǎ nátùhú iní-ndó òré càháⁿ-í dóho-ndo nàcuáa cada-ndo cùndecu-ndo.

⁶ Chi mee-í dándoho-í nchaa ñáyiu cùu iní-í cuendá sá cùndáá-yu núu-í,

te quide úhú-í-yu, te ðiu-ní-yu cùu-yu ñáyiu càchí-í cúu dèhe-í.

Duha càchí-gá núu tütú-gá. ⁷ Te ío cada ndee iní-ndó sǎ dúcáⁿ dándoho ñaha Yă Ndiöxí xii-ndo, chi quide-gá sá cúu-gǎ Tătá-ó. Te ñá túú ní ìⁿ tée cùu tátá te cachí-ó sǎ ñá túú sànu ichi-dé cue dèhe-dé nàcuáa tàú-xi cunduu. ⁸ Te núu Yă Ndiöxí ñá túú dándoho ñaha-gá xii-ndo dàtná dándoho-gá cue ñáyiu càchí-gá cúu dèhe-gá, te ñá díú dèhe mee-gǎ cúu-ndó te núu ducaⁿ, chi cùu-ndo datná cue ñáyiu ñá túú cùtnuní yoo cùu tátá-xi. ⁹ Te nchoo sǎ naha-o sá cùtnàhá ní cuu landú-ó ní sanu ichi ñaha tátá-ó nàcuáa tàú-xi cunduu, te ducaⁿ ní xóo canehe-o sǎ yíñùhu núu-güedé te ðiu-ni ducaⁿ nèhe-o sǎ yíñùhu núu-güedé vitna. Te núu ducaⁿ ní sándáá iní-ó tátá-ó, te ío-gá xini ñuhu-xi quindáá iní-ó Tătá-ó Dütú Ndiöxí cuendá ducaⁿ ndùu táhú-ó

cùndecu-o ndihi-gá ni caa ni quíhíⁿ, chi ðiu-gá cúu-gǎ Yaá ní chihi iní-ó. ¹⁰ Te cùtnàhá ní cuu landú-ó, ñá túú tìtní nduu ni càniha tátá-ó ní sanu ichi ñaha-güedé xii-o nàcuáa ní cuu iní mée-güedé. Te Yă Ndiöxí ducaⁿ dándoho ñaha-gá xii-o sànu ichi ñaha-gá cuendá cúu-xí sǎ vǎha sá cúu-xí-ó, te ducaⁿ quide-gá cuendá nchoo càda ndáá-ó dàtná quidé mée-gá. ¹¹ Te òré véxi ìⁿ tnúndòho sá cúu-xí-ó te ñá túú cùdí^í iní-ó chi dándihú iní ñáhá-xí xii-o. Te nchaa ñáyiu ngúnu ichi sá cuendá nchaa tnúndòho-áⁿ te ngüita-yu quide ndáá-yu, te ío vǎha cùu iní-yu ndècú-yu.

Vǎ dáquèe tihú-ó tnùhu Yă Ndiöxí

¹² Te núu xǎⁿ ío chí ndúcú ndèe-gá canchicúⁿ nihnu-ndo ichi Xítohó Jesucristú, te vǎ dicó yica cùu iní-ndó cànchicúⁿ nihnu-ndo ichi-gá. ¹³ Te cada váha-ndo cùndecu-ndo ichi-gá cuendá nchaa ñáyiu sàni ìⁿ saní úú iní-xi níhí ndéè-yu cundecú-yu ichi-gá te vǎ ná tùhú iní-yu canchicúⁿ nihnú-yu.

¹⁴ Te nducu-ndo nàcuáa cada-ndo cùndecu váha-ndo ndihi cue taha ñáyiu-ndo, te ío cada váha-ndo cùndecu-ndo nacuáa cundáá-ndó núu Yă Ndiöxí chi núu vǎ dúcáⁿ càda-ndo te vǎ ndúú táhú-ndó cùndecu-ndo ndihi-gá. ¹⁵ Te ío váha cada cuendá-ndó nàcuáa cada-ndo cùndecu-ndo, chi núu ñáhá te vǎ chindèe ñaha-gá Yă Ndiöxí xii-ndo. Te ío váha cada cuendá tucu-ndo nàcuáa cundecu-ndo vǎ cání cuehé iní-ndó cuendá Yă Ndiöxí, chi núu ducaⁿ na càda-ndo te dava-gá ñáyiu ndècu ndihi-ndo ichi-gá tnhá-yu ngüita-yu ducaⁿ càdá-yu, te vǎ cùndècu váha-gá-ndó ndihí-yu ichi-gá. ¹⁶ Te cada cuendá tucu-ndo sǎ vǎ cùndècu-ndo ichi díí iní, te ni vǎ dáquèe tihú-ndó ní ìⁿ sǎ cúu cuendá Yă Ndiöxí dàtná ní quide ndíi Esàú, chi sǎ cuñaha tátá ndíi-áⁿ nduu táhú ndíi ní cùu ní dama ndíi ìⁿ cóhó comidá. ¹⁷ Te nchòhó sa naha-ndo sǎ cùtnàhá ní cuini ndíi Esàú cácaⁿ táhú tátá ndíi núu Yă Ndiöxí cuendá nchaa sǎ ndúú táhú ndíi ní cùu, te ñá túú ní xicáⁿ táhú tátá ndíi núu Yă Ndiöxí nàcuáa cuini mée ndíi ní cùu. Te ní ndáhyú víhí ndíi, te cuëi ducaⁿ ní quide ndíi dico ñá túú ní ndàcu-gá ndíi náníhí ndíi táhú sǎ ní dama ndíi comidá.

18 Te cue ñáyiú isràél ní sátuhá-yu ìⁿ yucu núú càyú ñuhú, te nchòhó ñá túú ndéé ducaⁿ sàháⁿ tuha-ndo ìⁿ yucu núú càyú ñuhú dàtná ní quide cue ñáyiú-áⁿ. Te cútnàhá ducaⁿ ñí sátuhá-yu yucu-áⁿ te ní cunee vìhi ñihí yucu-áⁿ, te ní quene táchí ñíhi. 19 Te ní tecú dóho-yu ní cáháⁿ ìⁿ cútú, te ní tecú tucu dóho-yu ní cáháⁿ Yă Ndiöxí ní cáháⁿ ndìhi ñaha-gă xii-yu. Te nchaa ñáyiú ní tecú dóho-xi ní cáháⁿ-gá te ní cuini-yu sá vă cãháⁿ-gá. 20 Te ducaⁿ ñí quidé-yu chi ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ìⁿ quiti nà yáha xití yucu-a, te cahni-ndo-di ndìhi yúú àdi ndìhi ìⁿ yutnu puyá”, duha ní cachí-gá. 21 Te sá dúcáⁿ ñí quide-xi ní xiní-yu xiáⁿ ío ní dáyùhú ñáhá-xí xii-yu. Te tnàhá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiú-áⁿ ñí sáháⁿ tuhá-yu yucu-áⁿ, dico cada iní-ndó sã sã ní tuha-ndo yùcu Siôn sá ndécú núú ndécú Yă Ndiöxí, ndìhi ñuú-gá ñuú Jerusalén sá cáa àndiú te ñiú-gá cúú-gă Yaá ndécú nchàa nduu nchaa quíú. Te ñiú-ni xiáⁿ xindecu cuéhé víhi cuè espíritú xínú cuèchi núú-gă 23 chíñùhu ñaha-xi xii-gá. Te nchòhó cúú-ndó cuè ñáyiú cùu cuendá Yă Ndiöxí, te ní tnàhá tnúhu-ndo ndìhi nchaa dava-gă ñáyiú cùu cuendá-gá, ñáyiú yòdo tnuní núú tütú-gá ndécú àndiú, te ñiú-ni ñáyiú-áⁿ cuãñaha-gă xii-yu sá ndúú tãhù-yu. Te nchòhó ní tuha-ndo Yă Ndiöxí Yaá cada ndáá yicá cuèchi nchaa ñáyiú. Te cada iní-ndó sã ñí tnàhá tnúhu-ndo ndìhi cue ñáyiú ní quide ndáá ní xindecu ichi Yă Ndiöxí ñuyíú-a. Te ñáyiú-áⁿ ñà túú tnàhí-gá ná cúmãñi-yu vitna ndécú-yu núú-gă. 24 Te ní tnàhá tnúhu-ndo ndìhi Xítóhó Jesucristú Yaá ní quide nàcuáa cada Yă Ndiöxí ingá núú sã vãha sá cúú-xí nchàa nchoo ñáyiú ndècu ñuyíú-a, chi ní sati ñíñí-gă te ní xihí-gá núú cùrúxí. Te ñíñí Xítóhó Jesucristú ñá túú ìⁿ-ni cuu-xi ndìhi ñíñí ndíi Àbél, chi ñiú cuendá ñíñí-gă-áⁿ ñí quide cãhnu iní Yă Ndiöxí nchaa cuèchi-o.

25 Núú xiáⁿ ío cada cuendá-ndó vă dáquèe tihú-ndó tnùhu cãháⁿ Yă Ndiöxí,

chi nchaa ñáyiú ní xindecu ndéé sanaha dùcaⁿ ní quidé-yu ní dáquèé tihù-yu tnúhu ní cáháⁿ-gá ñuyíú-a sá cúú-xí-yu. Te ñá túú ní cãcu-yu chi ní nacháhu-yu sá dúcáⁿ ñí quidé-yu. Te uuⁿ-gá tucu nchoo chi vă cãcu-o te núú ducaⁿ na dàquee tihú-ó tnùhu cãháⁿ Yă Ndiöxí ndéé andiú sã cúú-xí-ó. 26 Te cútnàhá ní cáháⁿ Yă Ndiöxí ndéé sanaha te ní quidi-xi ñuyíú. Te vitna cãchí-gá: “Yúhú quidi tucu-í ingá xito ñuyíú, te ñá díú mèe-ni ñuyíú ducaⁿ quidi-í chi tnàhá andiú quidi-í”, cãchí-gá. 27 Te sá dúcáⁿ cãháⁿ-gá sá ingá xito tucu ducaⁿ cãda-gá xiáⁿ cùtnuní sá ncháandí tihú sá tũu ndèhe-o danaa-gá. Te nchaa sã ñà túú ndéé tũu quini-ó ñuyíú-a xiáⁿ vă quidi-xí te ni vă náá-xí. 28 Te núú ñí cachí Yă Ndiöxí nduu tãhú-ó cùndecu-o chi mee-gă táxi tnuní-gá xiáⁿ, te ni vă quidi-xí te ni vă náá-xí. Te xiáⁿ ío xini ñuhu-xi ndacáⁿ tãhú-ó núú-gă, te yíñùhu yíñùhu cunu cuechi-o núú-gă nàcuáa cuu vãha iní-gá, te ducaⁿ cùhuⁿ iní-ó sã ío cãhnu cuu-gá. 29 Te Tãtá-ó Dütú Ndiöxí cúú-gă dàtná ìⁿ ñuhú chi danàa-gá nchaa sã ñà túú quide nacuáa cuu vãha iní-gá.

13

Nàcuáa tàú-xi cada-o cuendá cuu vãha iní Yă Ndiöxí

1 Te nchaa nchòhó ñáyiú ndècu ichi Xítóhó Jesucristú, vă dáñá ndéé-ndó cùu iní tnàhá-ndó nàcuáa ndècu-ndo ichi-gá.

2 Te cunaha-ndo sã núu ío ñáyiú ñuhu ichi ní quexió-yu vehe-ndo te cuãñaha-ndo vehe ndetatú-yu, te cuãñaha-ndo sã cãxí-yu. Chi davá-yu ndéé espíritú xínú cuèchi núú Yă Ndiöxí ní sáháⁿ vehé-yu ní queheⁿ cuendá-yu te ñá túú ní cùtnuní iní-yu sá díú espíritú xínú cuèchi núú-gă cúú-xí.

3 Te ndacu tucu iní-ndó cuè ñáyiú xixíhi vecaá, te cada iní-ndó sã tnàhá-ndó yíhi-ndo vecaá ndìhi-yu. Te ndacu tucu iní-ndó nchàa ñáyiú ío ndòho, te cada iní-ndó sã tnàhá-ndó ndòho-ndo ndìhi-yu.

4 Te nchaa ñáyiú na cãchí-yu sá ìⁿ sã vãha cùu-xi sá ìⁿ téé ndìhi ìⁿ ñadihí ná ñihí tnàhá-yu candeca tnàhá-yu. Te nchòhó cue téé vă cání iní-ndó cãháⁿ ndìhi-ndo ñadihí te núú ñá díú ñadihí-ndó cùu-yu. Te ducaⁿ-ni

nchòhó cue ñáyiú ðíhí tucu vá cání ìní-ndó cǎháⁿ ndíhi-ndo tée te núú ñá díú yíi-ndo cuu-güedé, chí Yá Ndiöxí dandòho-gá nchaa ñáyiú ndècu ichi díí ìní.

⁵ Te vá cúhúⁿ ìní-ndó mèe-ni díhúⁿ. Te núú nándi cùu nchaa sá ndécú ndíhi-ndo te díu-ni nchaa xiǎⁿ sa nduu vétú ìní-ndó, chí Yá Ndiöxí ní cachí-gá: “Ni ñⁿ nduu vá dáñá ñihnu ñaha-í xii-ndo, chí nchaa-ni nduu chindee ñaha-í”, duha ní cachí-gá. ⁶ Te xiǎⁿ núu nchoo ñi yuhu ñi ìní-ó cǎháⁿ-ó ñⁿ ñⁿ-o, te cachí-ó:

Yá Ndiöxí cúú-gǎ Yaá chíndèe ñaha xii-í,
núú xiǎⁿ ñá túú yùhú-í cuéi nándi cǎháⁿ
ñáyiú cada ñáhá-yu xii-í.

Duha cachí-ó.

⁷ Chí ndácú ìní cue tée ní sanu ichi ñaha xii-ndo ichi Xítohó Jesucristú cue tée ní cǎháⁿ tnúhu Yá Ndiöxí núú-ndó, te ío váha chí nácuáha cuendá nàcuáa ní quide nchaa cue tée-áⁿ ñi xíndecu-güedé ndéé ní sáá nduu ñi xíhí-güedé. Te ío quindáá ìní-ndó Yá Ndiöxí dàtná ní xóo cada cue tée-áⁿ.

⁸ Te dàtná-ni ní quide Xítohó Jesucristú ndéé sanaha díu-ni ducaⁿ quide-gá vitna, te díu-ni ducaⁿ càda-gá ndéé núú cuaháⁿ núú vèxi. ⁹ Te vá dáñá-ndó mèe-ndo dandahú ñáhá ñáyiú dacáháⁿ ñáhá xii-ndo natuha-ndo ingá ichi, ñáyiú dànehé tnàha ñáyiú-xi nándi sá ñi cutúha-yu, te nchaa xiǎⁿ ñá túú ñⁿ-ni caháⁿ-xi ndíhi tnúhu sá ndécú ndíhi-ndo. Te Yá Ndiöxí chíndèe ñaha-gá xii-o nàcuáa níhí ndéé-ó cùndecu-o ichi-gá, te ducaⁿ te cuu-xi sá váha sá cúú-xí-ó, te ñá díú cuendá ñⁿ sá xéxí-ó ñihí ndéé-ó ndècu-o ichi-gá. Te dava ñáyiú cǎchí-yu sá dává núú comidá cuu caxi-o te dava ñáhá nàcuáa níhí ndéé-ó cùndecu-o ichi-gá, dico ñá ndáá sá sá dúcáⁿ vá cǎxí-ó nchàa núú comidá níhí ndéé-ó cùndecu-o ichi-gá.

¹⁰ Chí Xítohó Jesucristú ní xíhí-gá cuendá-ó núú cùrúxí, te nchaa ñáyiú nchícúⁿ ñihnu-ni quide nchaa nàcuáa ní quide nchaa dútú ñi xinu cuechi núú Yá Ndiöxí ndéé sanaha, ñáyiú-áⁿ vá cúú tnàhá tnúhu-yu ndíhi Xítohó Jesucristú Yaá ní xíhí núú cùrúxí sá dúcáⁿ quidé-yu. ¹¹ Chí dútú cùnùu-gá ní xíndecu ndíhi cue ñáyiú isràel, tée-áⁿ ñi xóo canehe-dé ñíñí nchaa quiti ní xóo cahni-dé ní xóo quíhu ndéé xití cuartú ní cuu íi-gǎ. Te ducaⁿ ñi xóo cada dútú-ǎⁿ

cuendá cada càhnu ìní Yá Ndiöxí nchaa yíca cuéchi ñáyiú, te cuñú nchaa quiti-áⁿ ñi xóo cahmi-güedé ñⁿ xio yuhu ñúú. ¹² Te ducaⁿ ñi yáha Xítohó Jesucristú chí ndéé ñⁿ xio yuhu ñúú ní sahani ñaha-güedé xii-gá. Te cuendá níñí-gǎ sá ñi sati núú cùrúxí núú ñi xíhí-gá, ní nduu ndoo ní nduu nine ìní cue ñáyiú sàndáá ìní ñáhá xii-gá. ¹³ Te vitna chí ná tùha-o Xítohó Jesucristú te cada ndee ìní-ó ndòho-o datná ní ndoho-gá. ¹⁴ Te ñuyú-a ñi ñⁿ xichi ñá túú ndéé cáá ñⁿ ñúú cudí ñi caa ñi quíhíⁿ cuendá cundecu-o, dico ducaⁿ-ni ñùhu ìní-ó ñⁿ xichi núú ndúú tǎhú-ó cùndecu-o ñi caa ñi quíhíⁿ.

¹⁵ Te núú xiǎⁿ xíni ñùhu-xi sá vá dáñá ndéé-ó chíñuhu-o Dútú Ndiöxí chí Xítohó Jesucristú ní quide-gá nàcuáa ndacu-o tnàhá tnúhu-o ndíhi Yá Ndiöxí, te òré cǎháⁿ ndíhi-o-gǎ te nuu núú ndacáⁿ tǎhú-ó núú-gǎ. Te nchaa tnúhu cǎháⁿ-ó òré cǎháⁿ ndíhi-o-gǎ cúú-xi dàtná ñⁿ tǎhú sǎ cúú-xí-gǎ. ¹⁶ Te vá dáñá ndéé-ndó càda-ndo mee-ni sá váha cundecu-ndo, te ducaⁿ chindee tnaha-ndo ñⁿ ñⁿ-ndo ndíhi sá ndécú ndíhi-ndo. Te núú ducaⁿ na càda-ndo te cani ìní-ndó sǎ cúú-xi dàtná ñⁿ tǎhú sǎ ío váha cùu ìní Yá Ndiöxí.

¹⁷ Te quindáá ìní-ndó càda-ndo nchaa nàcuáa cǎháⁿ cue tée yíndaha ñaha xii-ndo nàcuáa ndècu-ndo ichi Xítohó Jesucristú, chí díu cue tée-áⁿ quidé cuendá ñáhá-güedé xii-ndo nàcuáa cundecu váha-ndo núú-gǎ. Te sáá nduu nàcani tnúhu-güedé núú-gǎ núu ní quide váha-güedé àdi ñá túú ní quide váha-güedé ní xíndecu ndíhi ñaha-güedé xii-ndo. Te núú ducaⁿ na càda-ndo quindáá ìní-ndó-güedé te cudí ìní-güedé cundecu ndíhi ñaha-güedé xii-ndo, te vá ndíhú ìní-güedé. Te núú vá dúcáⁿ càda-ndo te vá cúú-xi sǎ váha xii-ndo nchàa sá quidé-güedé sá cúú-xí-ndó.

¹⁸ Te cǎháⁿ ndàhú-í núú-ndó sǎ cǎháⁿ ndíhi-ndo Yá Ndiöxí cuendá-ndí. Te nchúhú cùtnùní ndáá ìní-ndí sá ñá túú ñá cùmǎní-ndí núú Yá Ndiöxí, te ducaⁿ chí ndùcu-ndí nàcuáa quide-ndí cundáá-ndí núú-gǎ. ¹⁹ Te cǎháⁿ ndàhú tucu-í núú-ndó sǎ ío cǎcáⁿ tǎhú-ndó núú Yá Ndiöxí cuendá sá mée-gǎ ná cáda te ío ndíhi quixi coto ñaha tùcu-í xii-ndo.

Tnúhu ndéé núú nǐ ndihí-ná

²⁰ Te Yá Ndiǒxí Yaá quidé cùu vâha iní-ó ndècu-o, Yaá-áⁿ nǐ dándótó-gă Xítóhó Jesucristú. Te Xítóhó Jesucristú-áⁿ cúu-gă dàtná ìⁿ toli ío-gă quéné cǎva xító mbéé. Te ducaⁿ sǎtnahá-xi cùu-gă cuendá sá nǐ sati níñí-gă te ní xihí-gă, te ducaⁿ nǐ cuu cuendá sá nǐ quide ndáá-gă ndihí Yá Ndiǒxí sá cádá-gă ingá núú sǎ vâha sá cúu-xí nchòo cue ñáyiú ndècu ñuyíú-a. Te nàcuáa ní quide ndáá-gă ndihí Yá Ndiǒxí te ðiu-ni ducaⁿ càda-xi núú cuáháⁿ núú vèxi. ²¹ Te xicáⁿ táhù-í núú Yá Ndiǒxí sá mée-gă ná chindee ñaha-gă xii-ndo cuendá cada-ndo mée-ni sá vâha nàcuáa cuiní mée-gă, te mee-gă ná cádá ñaha-gă xii-o nchàa sá vâha sá sání ìní-gă. Te ðiu-ni ducaⁿ na tàuchiuⁿ-gă cada Xítóhó Jesucristú sá cúu-xí-ó, duha xicáⁿ táhù-í núú-gă. Te vitna nchaa-o chí ná càchí-ó sǎ ìo càhnu cuu Xítóhó Jesucristú nǐ caa nǐ quíhíⁿ. Te ducaⁿ na cùnduu.

²² Te càháⁿ ndàhú-í núú nchòhó ñáyiú ndècu ndihí-í ichi Xítóhó Jesucristú sá cádá càhnu iní-ndó nàcuáa ndùu nchaa tnúhu càháⁿ-í dásàhú ñáhà-í xii-ndo, chí ñá túú vâi tnúhu chido tnuní-í núú tütú-a sá cúu-xí-ndó.

²³ Te càchí tnúhu-í xii-ndo sǎ tǎ Timùteú téé ndècu ndihí-o ichi Xítóhó Jesucristú ní cácu-dé ñá túú-gă yíhí-dě vecaá. Te núu na quèxio ndihí-dé núú ndécù-í te quixi-í ndihí-dé núú ndécú-ndó quixi coto ñaha-ndí.

²⁴ Te cúñaha-ndo sǎ ìo na càda ndee iní nchaa cue téé yìndaha ñaha xii-ndo nàcuáa ndècu-ndo ichi Yá Ndiǒxí. Te ducaⁿ cǔñaha tucu-ndo xii nchaa dava-gă ñáyiú cùu cuendá-gă sá ìo na càda ndee iní-yu. Te cue ñáyiú nàcióⁿ Itàliá ñáyiú ndècu ndihí-o ichi-gă càchí-yu sá ìo cada ndee ìní-ndó.

²⁵ Te Yá Ndiǒxí ío na chindee chitúu ñaha-gă xii-ndo nchàa-ndo. Te ducaⁿ na cùnduu. Te ío chí cádá ndèe iní-nǎ vitna.

TUTÚ NÍ CADÚHA TĚ SÀNTIAÚ

Té Sàntiaú cadúha-dé tutú quíhíⁿ ndaha ñáyiú isràél nchíté nuu nihí ñuyíú

¹ Yúhú té Sàntiaú xínú cuèchi-í núú Yá Ndiöxí ndihí núú Xítohó Jesucristú, te tée-í tnúhu-a quide ndee iní ñáhà-í xii nchòhó ñáyiú isràél nchíté nuu nihí ñuyíú-a.

Yá Ndiöxí táxí-gã sá xini tnùnì-ó

² Te nchòhó ñáyiú ndècu ndihí-í ichi Xítohó Jesucristú, ío cudíí iní-ndó cundecu-ndo cuéi náí cùu sá ùhú véxi cuendá-ndó, ³ chi ducaⁿ te cutnùnì iní-ndó sá sàndáá ndisa iní-ndó-gã, te cunduu càhnu iní-ndó cuéi náí ná yáha-ndo. ⁴ Te cunduu càhnu-ni iní-ndó te ducaⁿ te cuu-ndo ñáyiú váha, te cundáá-ndó núú Yá Ndiöxí, te ducaⁿ te ñá túú-gã ná cumánì-ndó núú-gã.

⁵ Te núu cùmánì sá xini tnùnì-ó, te cécáⁿ-ó núú Yá Ndiöxí te mee-gã taxi-gã, chi ío váha iní-gã, te ñá túú cùnini iní-gã núú-ó.

⁶ Te ni yùhu ni iní-ó cécáⁿ-ó núú-gã, te quindáá ndisa iní-ó sá táxí-gã sá cúmání quini tnùnì-ó, te vá cánì ñⁿ canì úú iní-ó. Chi nchaa ñáyiú sàni ñⁿ sàni úú iní-xi cùú-yu dàtná ndute làmár cuáháⁿ-xi duha cuáháⁿ-xi dàcáⁿ nàá-xi òré quéné tãchí. ⁷ Te nchaa ñáyiú ducaⁿ sàni iní-xi, te vá cánì iní-yu sá nihí-yu sá xicáⁿ-yu núú-gã. ⁸ Chi nchaa ñáyiú sàni ñⁿ sàni úú iní-xi ñá cùtnùnì iní-yu ndédacàa sá sání iní-yu cadá-yu.

⁹ Te nchaa ñáyiú ndàhú ñáyiú ndècu ichi-gã, xini ñuhu-xi ñá túú-gã ná canì iní-yu, mee-nã cudíí iní-yu, chi Yá Ndiöxí chindèe ñaha-gã xií-yu. ¹⁰ Te nchaa ñáyiú cuica xini ñuhu-xi cundecu váha iní-yu núú Yá Ndiöxí cuéi náí ná yáha-yu. Chi ñáyiú-án cùú-yu dàtná itá nchaa cùhú sá ñá túú cùdíí naha. ¹¹ Chi òré ní cuu níhi càhni nchícanhii, te ní dádì-ni-xi nchaa cùhú cuíí-ãⁿ te ní cóyo-ni nchaa itá-xi, te ñá túú-gã cáá vìi. Te ducaⁿ sàtnahá-xi cùu ñáyiú cuica chi núú chíúⁿ-ní-yu xihí-yu.

Nchaa ñáyiú quide càhnu iní-xi nchaa sá yáha-yu

¹² Te váha táhú nchaa ñáyiú quide càhnu-ni iní-xi cuéi nándì sá yáha-yu ndécú-yu ichi Yá Ndiöxí, chi òré ná ndihí nchaa xíáⁿ yáha-yu, te cuáñaha Yá Ndiöxí ñⁿ coróná váha vìhi cundecu ndihí-yu, te ndáá chi ducaⁿ càháⁿ Yá Ndiöxí sá táxí-gã xii nchaa nchoo ñáyiú ñùhu iní ñáhá xii-gã.

¹³ Te nchaa ñáyiú sàni iní-xi cada nándì sá cuèhé sá dúhá, te vá cánì iní-yu sá Yá Ndiöxí táúchiuⁿ-gã ducaⁿ cadá-yu, chi Yá Ndiöxí ñá quíú te canì iní-gã cada-gã ñⁿ sá cuèhé sá dúhá, te ni ñá túú tàuchiⁿ-gã sá dúcáⁿ cadá-yu. ¹⁴ Te cuìní-yu cadá-yu nchaa sá cuèhé sá dúhá chi ducaⁿ vèxi iní-yu. ¹⁵ Te nchaa ñáyiú ío ñùhu iní nchaa sá cuèhé sá dúhá te quidé-yu, te núu na càda-ni-yu te cuíta nihnú-yu.

¹⁶ Te nchòhó ñáyiú ío cùu iní-í ndécú ndihí-í ichi Xítohó Jesucristú, vá dáñá-ndó mèe-ndo dandahú ñáhá ñáyiú xii-ndo.

¹⁷ Chi nchaa sá váha véxi-xi núú Yá Ndiöxí Yaá ndécú àndíu, chi díu mee-gã ní cadúha-gã àndíu ndihí nchaa chódinì, ndihí yóó, ndihí nchícanhii. Te Yá Ndiöxí ñá túú ndì queheⁿ ndi queheⁿ-gã sá cánì iní-gã, te ni ñá túú cùu-gã dàtná ñⁿ cuándáhú cuáháⁿ-xi duha cuáháⁿ-xi dàcáⁿ, chi ñⁿ-ni sá sání iní-gã. ¹⁸ Te Yá Ndiöxí ní cuini-gã sá cùú-ó dèhe-gã, te ndáá sá cùú-ó dèhe-gã chi sàndáá iní-ó tnùhu-gã. Te nchoo ñáyiú sàndáá iní-xi tnùhu-gã cùnùu-gã-ó chi ní nduu-o dèhe-gã.

Ichi ndáá cuíi

¹⁹ Te nchòhó ñáyiú ío cùu iní-í ndécú ndihí-í ichi Xítohó Jesucristú, cund-edóho-ndo ñⁿ tnùhu na càháⁿ-í-a. Te cuìní-í sá cundecu túha-ndo cundedóho-ndo tnùhu Yá Ndiöxí, te canì váha iní-ndó nàcuáa càháⁿ-ndó, te cunduu càhnu iní-ndó te vá cùdèéⁿ-ndó. ²⁰ Chi núu na cùdèéⁿ-ó te ñá túú quide váha-o núú Yá Ndiöxí.

²¹ Te dañ-ndo nchaa sá cuèhé sá dúhá ío ñuyíú-a. Te quindáá iní-ndó tnùhu Yá Ndiöxí ndécú ndihí-ndo, te vá cùndùu sáa iní-ndó, te ducaⁿ te naníhí táhú-ndó.

²² Te quindáá iní-ndó tnùhu-gã te vá cuendá-ni cundedóho-ndo, chi núu na cundedóho-ndo te vá tníí-ndó ñá, te dícó-ni dandahú-ndó mèe-ndo te vá naníhí táhú-ndó. ²³ Chi nchaa ñáyiú dícó-ni

sàcúndedóho tnúhu-gá te ñá túú sàndáá iní-yu, ñáiyu-áⁿ cúu-yu dàtná ìⁿ ñáiyu sàcúndehé-ní núú-xi núú yùtátá. ²⁴ Chi nini ndèhé-yu ní xiní-yu núú-yu, te ní xócání-yu te ní nacuanaa-ní-yu nàcuáa càa núú-yu. Te ducaⁿ sàtnahá-xi cùu ñáiyu sàcúndedóho tnúhu Yá Ndiöxí, te ñá túú tñí-yu. ²⁵ Te nchaa ñáiyu dàcuaha ndisa tnúhu ní dándõ Yá Ndiöxí nihnu-ní-yu ichi-gá, chi ñá díú ìⁿ sá vèe cùu-xi. Te ñáiyu-áⁿ ñà túú dícó-ni sàcúndedóho-yu chi quide ndáá-yu núú-gã, te cùdí^í iní-yu xĩndecú-yu.

²⁶ Te nchaa ñáiyu càchí sá ndécú ìchi ndáá te cùtexínu-ní càháⁿ-yu, te xĩáⁿ dícó-ni dándahú-yu mèe-yu sá ndécú-yu ichi ndáá. ²⁷ Te núu ndècu-o ichi ndáá cuiti ichi Dútú Ndiöxí, te chindee-o nchàa ñáiyu ní ndóo ndàhú, ndihí ñáiyu quèe ndécú ndihí tnúndòho tnúhu ndàhú, te vá cádá-ó nãndi sá cuèhé sá dúhá ió ñuyíú-a.

2

Ìⁿnuu-ni cùu iní-ó nchàa tnahá ñáiyu-o

¹ Te nchòhó ñáiyu ndècu ndihí-í ichi Xítohó Jesucristú Yaá cùnùu, ìⁿnuu-ni càháⁿ ndihí váha-ndo nchàa tnahá ñáiyu-ndo. ² Te núu núú nátàcá-ndó chĩñuhu-ndo Yá Ndiöxí ní sáá ìⁿ tée ío váha càa dóo nihnú-dě, te ní sáá tucu ìⁿ tée nihnu dóo ndàhú, ³ te núu tée nihnu dóo vãha-ni-áⁿ néhé-ndó sã yĩñuhu núú-dě, te taxinucóo-ndo-dě ìⁿ núú xilé váha, te tée ndàhú-áⁿ daxòcáo-ndo-dě ìⁿ xio àdi canucóo-ndo-dě núú ñúhú, ⁴ te núu ducaⁿ na càda-ndo te ñá túú quide váha-ndo. Chi ìⁿ-ni-dé cúú ìní-ndó, te ìⁿ-dè ñá túú cùu iní-ndó.

⁵ Te nchòhó ñáiyu ío cùu iní-í ndécú ndihí-í ichi Xítohó Jesucristú, chí cùndedóho tucu tnúhu na càháⁿ-í-a. Yá Ndiöxí càháⁿ-gá vãi ñáiyu ndàhú cuendá tnahá tnúhu ndihí ñáhá-yu xii-gá, te ndècu váha-gá-yu dàcúxí ñáiyu cuica ñáiyu ñá túú sàndáá iní tnúhu-gá, chí ní cachí-gá sá ncháá ñáiyu na cùu iní ñáhá xii-gá nduu táhũ-yu cundecú-yu ndihí-gá ni caa ni quíhíⁿ. ⁶ Te nchòhó, ñá túú nèhe-ndo sá yĩñuhu núú ñáiyu ndàhú, chí núú ñáiyu cuica-ni nèhe-ndo sá yĩñuhu. ¿Te náa ñá cùtnùní iní-ndó sã ñáiyu cuica dándohó ñaha-gá-yu xii-ndo, te cãndeca ñáhá-yu sàháⁿ núú cuè

tée cùchiuⁿ-áⁿ? ⁷ Te diu-ní-yu ío càháⁿ cuèhé-yu cuendá Xítohó Jesucristú, te nchòhó sa ní nduu-ndo dèhe-gá.

⁸ Te ìⁿ ndudú cùnùu-gá ní càháⁿ Yá Ndiöxí ní ngódó tnùní núú tütú-gá càchí-xi sá cúú ìní-ó tnàha ñáiyu-o dàtná cúú ìní-ó mèe-o. Te núu ducaⁿ na càda-o te quide váha-o. ⁹ Dico núu ñá túú cùu iní ìⁿnuu-o cuè tnahá ñáiyu-o, te cuu cuèchi xii-o chí ñá túú quide-o nacuáa càháⁿ Yá Ndiöxí. ¹⁰ Te núu ìⁿ ñáiyu ndàunihnu ìⁿ sá càháⁿ Yá Ndiöxí, te dava-ni quidè-yu ña, te ñáiyu-áⁿ ñà túú quidè-yu nàcuáa càháⁿ ndudú Yá Ndiöxí. ¹¹ Te Yá Ndiöxí ní cachí-gá sá tée ndècu ñadihí-xi vá càháⁿ ndihí-dé ìngá ñadihí. Te diu-ni-gá ní cachí-gá sá vã cáhni-ó tnàha ñáiyu-o. Te cuèi ñá túú càháⁿ ndihí-o ìngá ñadihí, te núu sàhni-o tnahá ñáiyu-o te ñá túú quide-o nacuáa càháⁿ ndudú Yá Ndiöxí. ¹² Te nchoo xini ñuhu-xi càháⁿ-ó tnúhu váha te cada ndáá-ó, chí ñá díú ìⁿ sá vèe cùu-xi sá ní cachí Yá Ndiöxí cada-o. Te mee-gã ní cachí-gá sá cádá ndáá-gá cuèchi-o na sáá nduu. ¹³ Te nchaa ñáiyu ñá túú cùndahú iní tnàha ñáiyu-xi, te vá cùndahú iní ñáhá-gã xii-yu na sáá nduu càda ndáá-gá cuèchi-yu. Te nchaa ñáiyu cùndahú iní tnàha ñáiyu-xi te Yá Ndiöxí cùndahú iní ñáhá-gã xii-yu na sáá nduu-ãⁿ.

Quĩndáá iní-ó Yá Ndiöxí te cada váha-o

¹⁴ Te nchòhó ñáiyu ndècu ndihí-í ichi Xítohó Jesucristú, te núu càchí-ó sã sàndáá iní-ó Yá Ndiöxí te ñá túú quide-o sá váha, te ñá túú ndèe nãndĩhi-xi, chí vá nãnihí tàhú-ó te núu ducaⁿ na càda-o. ¹⁵ Te núu ndèhe-o ìⁿ tnahá ñáiyu-o ñà túú dõõ-yu àdi ñá túú sã cùnchító-yu, ¹⁶ te xãhaⁿ-o: “Núhú-n te nducu-n dõó cuihnu-n te nducu-n sã cáxíⁿ”, xãhaⁿ-o, te ñá túú nã sãñaha-o, te sá dúcãⁿ quide-o te ñá túú quide váha-o. ¹⁷ Te núu càchí-ó sã sàndáá iní-ó Yá Ndiöxí te ñá túú quide váha-o ndècu-o, te vèdana nãndĩhi-xi.

¹⁸ Te ío ñáiyu càchí-yu sá sàndáá iní-yu Yá Ndiöxí, te ío ñáiyu càchí-yu sá mèe-ní sã váha quidè-yu. Te yúhú càchí-í sá nũu ñá túú quide-o sá váha, te ñá túú sàndáá iní-ó Yá Ndiöxí. Te nchoo quide-o sá váha núu xĩáⁿ cùtnùní iní-ó sã sàndáá iní-ó-gã. ¹⁹ Te ío ñáiyu càchí sá ìⁿdii-ni Yá Ndiöxí ndécú,

te váha-ni càháⁿ-yu. Te tnàhá yucu ñávàha ndìhi nchaa espíritú cùndìhi-xi xini-xi sá ndécú ñⁿdii-ni Yá Ndiòxí, te yùhú-xi dico ñá túú tñi-xi tnúhu-gá. ²⁰ Te ío ñi ñíquí-ó te núu na càchí-ó sá sàndáá iní-ó Yá Ndiòxí, te vá cádá-ó sá vaha. ²¹ Te ñani tnàhá-ó ndíi Àbrahám téé ní xíndecu ndéé sanaha ní ngúndecu váha ndíi núú Yá Ndiòxí, chi ní xito ndéé ñáhá-gá xii ndíi núu ndisa sá cáhni ndíi déhe ndíi té Isàác nduu táhú-gá ní cùu, te dàvá-áⁿ ní cutnùní iní-gá sá ío sàndáá iní ñáhá ndíi xii-gá, núu ñá ní dàña-gá cahni ndíi déhe ndíi. ²² Te naha-o sá ndíi Àbrahám ñá díú-ní sá méé-ní sá ní sàndáá iní ñáhá ndíi xii-gá, chi ní tñi ndíi tnúhu-gá. ²³ Te ducaⁿ ní quee ndáá-xi nàcuáa càháⁿ-xi núu tütú Yá Ndiòxí núu càchí-xi: “Ndíi Àbrahám ní sàndáá iní ndíi ní quide ndíi nchaa nàcuáa ní xáhaⁿ Yá Ndiòxí, te ní ngúndecu váha ndíi núú-gá, te ní cachí-gá sá cúu ndíi ñⁿ téé ío váha tnàhá tnúhu ndíhi-gá”, duha càchí-xi núu tütú-gá.

²⁴ Te xíáⁿ cùtnùní iní-ó sá ñá díú mèe-ni sá quíndáá iní-ó Yá Ndiòxí, chi núu na càda-o nàcuáa cuu váha iní-gá te ngúndecu váha-o núú-gá ²⁵ dàtná ní quide-gá tá Ràháb ñⁿ ñadìhí ní xíndecu ndéé sanaha, chi xíchí-áⁿ ní xíndecu-xi ichi díi iní, dico ní tuha-xi ichi Yá Ndiòxí te ní ngúndecu váha-xi núú-gá, chi ní chindee-xi cuè téé isràél cue téé ní xica chiúⁿ-gá, te ní sanu ichi ñaha-xi xii-güedé ñⁿ ichi núu vā nánihí ñáhá cuè téé cùu úhú iní ñáhá xii-güedé. ²⁶ Te nchaa ñáiyu càchí sá sàndáá iní Yá Ndiòxí, te ñá túú quidé-yu nàcuáa càháⁿ-gá ñáiyu-áⁿ cúu-yu dàtná ñⁿ ñáiyu ní xíhí. Chi ñá túú-gá ndíxí tũu iní-yu nchaa sá cuèhé sá dúhá quidé-yu. Duha sàtnahá-xi cùu nchaa ñáiyu ñá túú cuíni tñi tnúhu càháⁿ Yá Ndiòxí.

3

Nàcuáa quide yaa-o

¹ Te nchòhó ñáiyu ndècu ndíhi-í ichi Xítohó Jesucristú, vá ncháá-ndó càni iní-ndó cùu-ndo mestrú dacuàha-ndo ñáiyu tnúhu Yá Ndiòxí chi íí cáá-xí. Chi na quítnahá nduu nàcuáha-o cuèndá núú-gá, te núu ñá túú ní quide ndáá-ó ñá, te vá cúu vaha iní-gá núú-ó. ² Te nchaa-o ío cuèhé sá ñá túú vaha quide-o. Te nchaa

ñáiyu ñá túú càháⁿ tnúhu cuèhé tnúhu duha cùu-yu ñáiyu ñá túú ñá cùmáni chi ío ndáá quidé-yu. Te xini-yu cotñi-yu mèe-yu, te quide váha-yu núú Yá Ndiòxí. ³ Te dàtná cuíni-ndó cùu ñⁿ quiti te núu na chihí-o frenú yuhu-di, te cotñi-o-di te ngúnu ichi-di, te ducaⁿ sàtnahá-xi cùu ñáiyu sàcòtni mee-xi, chi ñá túú càháⁿ-yu tnúhu cuèhé tnúhu duha. ⁴ Te dàtná cuíni-ndó cùu barcú cuèi nàhnu vihi-xi, dico òré quéné ñíhi táchí te tùndaha-xi ñⁿ xio, dico téé dàcaca ndacu-dé dáquihíⁿ-dé-xi ndíhi ñⁿ yutnu sá dánani-güedé tímú ndàa núu càchí iní-dé quihíⁿ-xi. ⁵ Te ducaⁿ cùu tucu yaa-o chi ío líhli-xi dico ío cuèhé tnúhu càháⁿ-ó ndíhi-xi. Te ducaⁿ-ni sàtnahá-xi cùu tucu sá lúhá ñùhú chi sàhmi-xi ñⁿ yucu. ⁶ Te diu-ni ducaⁿ sàtnahá-xi cùu yaa-o chi ío cuèhé tnúhu cuèhé tnúhu duha càháⁿ-ó ndíhi-xi, te dàcuíta nihnu ñaha-xi xii-o. Te ío cuèhé cuèchi quide-o ndíhi-xi cuèndá sá ñuyíú-a ñùhu tnahá ñùhú tñi yucu ñávàha dàticá nihnu ñaha-xi. ⁷ Te ndacu-o càda masú-ó nchàa núu quiti ío ñuyíú cuèi quiti dééⁿ quiti xica núu ñùhú, te cuèi quiti ndàva, te cuèi cóo, te cuèi quiti ñùhu xití ndute làmár, chi ducaⁿ quide dava cue téé ñuyíú-a. ⁸ Dico yaa-o chi vá yòo ñⁿ ndàcu cada masú ñáhá xii-xi nàcuáa càháⁿ-ó mèe-ni tnúhu váha ndíhi-xi, chi mee-ni tnúhu cuèhé tnúhu duha cùnūu-gá càháⁿ-ó ndíhi-xi. Te cùu-xi datná ñⁿ venènú chi dàti-xi iní-ó. ⁹ Te diu-ni ndíhi yaa-o quide cahnu-o Dútú Ndiòxí Yaá cúu Tàtá-ó, te diu-ni ndíhi yaa-o caháⁿ úhú-ó cuè tnahá ñáiyu-o. Te xini ñuhu-xi vá dúcáⁿ càda-o, chi mee-gá ní chihí-gá sá xini tñi-ó ndíhi iní-ó, dàtná cáá mèe-gá ñùhú iní-gá. ¹⁰ Te diu-ni yuhu-o quèe tnúhu váha càháⁿ-ó, te diu-ni yuhu-o quèe tnúhu cuèhé tnúhu duha. Te nchòhó ñáiyu ndècu ndíhi-í ichi Xítohó Jesucristú cunaha-ndo sá ñá túú ndùu váha-xi ducaⁿ càda-o. ¹¹ Te ñá túú xini-ndó sá ñⁿ núu quèé ñihni ndute, te quèe ndute váha te quèe ndute úá-áⁿ. ¹² Te nchòhó ñáiyu ndècu ndíhi-í ichi Xítohó Jesucristú, te ñá túú xini-ndó sá ñⁿ yutnu ngúxí, te cùuⁿ aceitúná, àdi xini-ndó sá ñⁿ yoho yaha stilé te cùuⁿ ngúxí. Te ducaⁿ cuèi ñⁿ núu quèé ñihni ndute, vá cúu quèe ndute váha te quee

ndute úhá. Te ducaⁿ sãtnahá-xi cùu yuhu-o chi vá cúú càháⁿ-ó tnũhu váha te cáháⁿ-ó tnũhu cuèhé tnũhu duha.

Nchaa sá vãha xìní tnùnì-ó tàxi Yá Ndiõxí

¹³ Te núu ndècu ñáiyu túha tnuú-ndó ñáiyu cùtnuní iní-xi, te xìni ñuhu-xi mee-ni sá vãha cadá-yu, ducaⁿ te cutnùnì iní-ó sã túha ndisá-yu, te vá cadá càhnú-yu mèe-yu. ¹⁴ Te núu nchoo cuèdú iní-ó te cuìnì-ó cùnuu-o núu tnàha ñáiyu-o, te vá càchì-ó sã túha-o, chi ñá túú quide ndáá-ó te núu ducaⁿ na càda-o. ¹⁵ Chi ñá díú xĩáⁿ ní dànehé ñáhá Yá Ndiõxí, chi ñuyú iha ní cacu ni-hnu-xi cuèndá sá yùcu ñávãha dàcahu iní ñáhá-xí. ¹⁶ Te núu ndécú ñáiyu cuèdú iní ñáiyu cuìnì cunuu, te yàcáⁿ mee-ni ndáhú nàá xĩndecú-yu, te ñá túú quide váha-yu, chi mee-ni nchàa sá cuèhé sá dúhá quidé-yu. ¹⁷ Te núu ní taxi Yá Ndiõxí sá xìní tnùnì-ó, te cada váha-o, te cáháⁿ ndìhi váha-o nchàa tnaha ñáiyu-o, te tni-o tnũhu váha càháⁿ-yu, te cundáhú iní-ó-güè-yu te chindee-õ-yu, te vá cánì ñⁿ canì úú iní-ó, te ío cunduu ndáá iní-ó. ¹⁸ Te núu cuìnì-ó ñà túú ñã cuu cundecu-o ñuyú-a, te cada váha-o sã cúú-xí tnàha ñáiyu-o cuèndá sá ñà túú ñã cuu cundecu-o ndìhì-yu. Te ducaⁿ te nguínchicúⁿ dava-gá tnàha ñáiyu-o càda váha-yu.

4

Vá cúú cùndecu-o ichi Yá Ndiõxí te cada-o nãndì sá cuèhé sá dúhá

¹ ¿Te xìní-ndó ñã cuèndá nàá ñáiyu te xĩsahni tnàhá-yu-ãⁿ? Te nàá-yu sá tnũhu cuèdú iní, chi ñu-ni xĩáⁿ ñúhú iní-yu, te ñá túú ndècu váha iní-yu. ² Chi cuìnì-yu cundecu ndìhì-yu ñⁿ sá ñà túú ndècu ndìhì-yu, te ñá túú ñìhì-yu núu xĩáⁿ xĩcuu cuèdú iní tnáhã-yu, te xĩcuèhé tnáhã-yu, te càni tnahá-yu, te xĩsahni tnàhá-yu. Te ñá túú ñìhì-yu sá cuìnì-yu chi ñá túú xìcáⁿ-yu núu Yá Ndiõxí. ³ Te cuèi xìcáⁿ-yu ñⁿ sá cuìnì-yu núu-gã te ñá túú sãñaha-gã, chi ñá túú xìcáⁿ-yu ñⁿ sá cúú xìi-yu sá vãha, chi ñⁿ sá ná ndìhi-yu núu cadã-yu nchaa sá cuèhé sá dúhá xìcáⁿ-yu, núu xĩáⁿ ñã ñìhì-yu. ⁴ Te nchaa ñáiyu ducaⁿ xĩquide ío cùu sáá iní-yu núu Yá Ndiõxí. Te nàha-ndo sá nchàá ñáiyu cùdí iní-xi cundecu ichi cuèhé ichi duha cùu úhú iní-yu

Yá Ndiõxí, chi vá cúú cùndecu-o ichi cuehé ichi duha, te cundecu-o ìchi-gã. ⁵ Te ñá túú díó ducaⁿ càháⁿ-xi núu tütú Yá Ndiõxí núu càchì-xi: “Yá Ndiõxí ní taxi-gã Espiritú-gã ndécú ndìhi-o. Te Espiritú-gã-áⁿ cuìnì-xi sá mèe-ní-gã cuhuⁿ iní-ó”, duha càchì-xi núu tütú-gã. ⁶ Te Yá Ndiõxí ío chindee ñaha-gã cuèndá cada ndáá-ó núu-gã dàtná càchì tucu-xi núu tütú-gã núu càchì-xi: “Yá Ndiõxí ñá túú cùu váha iní-gã núu nchàa ñáiyu quide cahnu mee-xi, dico chindee-gã cue ñáiyu ndàhú iní-xi”, duha càháⁿ-xi núu tütú-gã. ⁷ Te cada-ndo nàcuáa càháⁿ Yá Ndiõxí. Te vá cadá-ndó nàcuáa cuìnì yucu ñávãha, ducaⁿ te xóo cóo ndéé ñáhá-xí xì-ndo. ⁸ Te tni-ndo tnũhu càháⁿ Yá Ndiõxí te cundecu ndìhi ñaha-gã xii-ndo. Te nchaa nchòhó ñáiyu ndècu ichi cuehé ichi duha dañ-a-ndo ìchi-áⁿ te cada váha-ndo. Te nchaa nchòhó ñáiyu sàni iní cunu cuechi núu Yá Ndiõxí te quide-ni-ndo nchaa sá cuèhé sá dúhá, te ñá túú quide váha-ndo núu ducaⁿ, chi xìni ñuhu-xi sá càcáⁿ-ndó núu Yá Ndiõxí sá ná ndádá ndòo ndada nine-gã iní-ndó. ⁹ Te ndixi cuèchi iní-ndó nchàa sá quidé-ndó ndéé ndáhyú ndisa-ndo sã ndìhú iní-ndó, te ñá díú dà cudí iní-ndó. ¹⁰ Te nãhmá-ndó núu Yá Ndiõxí nchaa sá ñi quide-ndo, te nguñdecu váha-ndo núu-gã.

Vá càháⁿ-ó nchàa sá quidé tnàha ñáiyu-o

¹¹ Te nchòhó ñáiyu ndècu ndìhi-í ichi Xítohó Jesucristú, vá cuátnũhu tnaha-ndo, chi nchaa ñáiyu sãtnuhu tnaha dícó-ni ndàa nuú-yu ndèhe tnahá-yu, te ñá túú càháⁿ váha-yu cuèndá tnũhu Yá Ndiõxí sá sánú ìchi ñaha xìi-yu nàcuáa cundecú-yu, chi dàquee tíhũ-yu tnũhu-áⁿ. Te núu càchì-ndó sã ñà túú càháⁿ váha tnũhu Yá Ndiõxí, te xĩáⁿ queé-xí sã ñà túú sãndáá iní-ndó tnũhu càháⁿ-gã, te cuìnì-ndó cùnuu tnũhu-ndo núu tnũhu-gã. ¹² Te mee Yá Ndiõxí ní cachì-gã nàcuáa cada-o, te ñu-ni mee-gã càháⁿ-gã te núu ní quide váha-o, àdi ñá túú ní quide váha-o. Te ñu-ni mee-gã dàcácu ni-hnu ñaha-gã xii-o núu úhú núu ndàhú, te ñu-ni-gã daquìhìⁿ ñáhá-gã xii-o núu úhú núu ndàhú-áⁿ te núu vá cadá váha-o. Te nchoo ñà túú ñã cúú-ó, te núu mee-ni nchàa sá quidé tnàha ñáiyu-o cùndehe-o.

Ñá túú cùtnuní iní-ó nãsa túndaá-ó ìngá nduu

13 Te dava nchòhó càchí-ndó sã vítna àdi tneé quíhíⁿ-ndó ìⁿ ñuú, te yacáⁿ cundecu-ndo ìⁿ cuiá cada-ndo ìⁿ ndáhú te níhí-ndó díhúⁿ. 14 Te ni ñã xìní-ndó nã cúú sã yãha-ndo vítna àdi tneé. Te nchoo cùu-o datná ìⁿ vícò núhú, chi vícò-ãⁿ tnàvíí ndéhé-ó te tna tnaa-gá sa ní ndóñúhú-xí. Ducaⁿ sãtnahá-xi cùu nchoo chi ìⁿ ùú nduu duha vèxi-o ñuyú-a te ndoñuhu-o. 15 Te núu sàndáá iní-ó Yã Ndiòxí te duha cáháⁿ-ó: “Te núu Ndiòxí ná càchí-gá sã cùndecu tnaa-o ñuyú-a te cada chiⁿ-o”, duha cachí-ó. 16 Dico mee-ndo chi ío ñí iní-ndó cuíní-ndó cùnuu tnúhu-ndo núú Yã Ndiòxí, te ñá túú ndùu váha-xi sã dúcáⁿ quide-ndo. 17 Te núu xìní-ó càda-o sã váha te ñá túú quide-o, te cùu-xi ìⁿ cuéchi núú-gã.

5

Tnúhu sá dátũha ñaha xìi nchaa ñáyiu cuica ñá túú sàndáá iní tnúhu Yã Ndiòxí

1 Te nchòhó ñáyiu cuica ñáyiu cuihna iní-xi cundedóho-ndo tnúhu na càháⁿ-í-a. Vítna ngúita-ndo ndíhú iní-ndó, te ndáhyú víhí-ndó, chi quixi ìⁿ tnúndòho cuendá-ndó te ndoho víhi-ndo. 2 Te nchaa sã ndécú ndíhi-ndo ndíhi cuita tíu quíhíⁿ, te quee tíquidi dóo-ndó, 3 te díhúⁿ-ndó caxi cudi ñúhu. Te xíáⁿ cuita naquiní ndeé-ndó tnúndòho sã ñá túú quide váha-ndo. Te ndíhi-ndo ndíhi díhúⁿ-ndó sã ñí taxúha-ndo, chi vítna sa ta cùyatni sáá nduu ndíhi ñuyú-a. 4 Te nchaa cue téé ní quide chiⁿ núú chíúⁿ-ndó ñí ndatnúhu-ndo ndíhi-güedé nàcuáa cháhu-ndo-güedé ní cùu, te ñá túú ní chãhu-ndo-güedé nàcuáa ní xáhaⁿ-ndo xì-güedé, núu xíáⁿ ío ndècuéchi-ndo. Te Yã Ndiòxí Yaá ndécú àndíu ní tecú dóho-gá nàcuáa càháⁿ-güedé sã ñí dándàhú-ndó-güedé. 5 Te nchòhó ñáyiu cuica, sã ndécú váha-ni-ndo cùndee iní-ndó, núu quide-ni-ndo nchaa sã vèxi iní-ndó. Te cùu-ndo datná ìⁿ quítí nùcuíhnu mee-ni xèxi-dí, te sáá nduu sãhni-güedé-dí. Te ducaⁿ sãtnahá-xi cùu nchohó chi ndècu váha-ndo vítna, te sáá ìⁿ nduu nàcháhu-ndo nchaa sã quidé-ndó núú Yã Ndiòxí te núu vá quíndáá iní-ndó-gã. 6 Te quide úhú iní-ndó

sãhni-ndo cue ñáyiu quide ndáá núú Yã Ndiòxí, te ñá túú nã quidè-yu.

Cunduu càhnu iní-ó te cáháⁿ ndíhi-o Yã Ndiòxí

7 Te nchòhó ñáyiu ndècu ndíhi-í ichi Xítohó Jesucristú, cada ndee-ni iní-ndó cùndetu-ndo ndéé ná quixi tucu-gá ñuyú-a, te cada-ndo dàtná quidé nchaa ñáyiu chihi tatá chi sàcúndetú-yu ndéé cúúⁿ dáú te chíhí-yu. Te cùndee-ni iní-yu sàcúndetú-yu ndéé cúúⁿ-gã dáú te cùu itú-yu, te ndúdí iní-yu. 8 Te ducaⁿ càda nchohó tucu cada ndee iní-ndó cùndetu-ndo, chi sa ta cùyatni nduu quixi tucu Xítohó Jesucristú. 9 Te duha ndùu tnúhu càháⁿ-í núú nchòhó ñáyiu ndècu ndíhi-í ichi Xítohó Jesucristú, vá ndàcáⁿ cuéchi núú tnáhá-ndó te núu nása cùu ndecu-ndo, chi ñá cuéhé-gá nduu cùmání te quixi Cristú nacuaca ñaha-gã xii-o cùndecu-o núú Yã Ndiòxí, te mee-gã cada ndáá-gá cuéchi-o. 10 Te nchòhó ñáyiu ndècu ndíhi-í ichi Xítohó Jesucristú, ndacu iní-ndó nàcuáa ní quide nchaa cue téé ní xóo cáháⁿ tnúhu Yã Ndiòxí ndéé sanaha sã ío càhnu ní xínduu iní-güedé cuéi nándi ní ndoho-güedé. 11 Te cùtnuní iní-ó sã cúú-ó ñáyiu ío váha táhú-xi te núu na càda cahnu iní-ó nchaa sã ná yãha-o cuendá Yã Ndiòxí. Te naha-ndo sã ndíi Jób ducaⁿ ñí quide ndíi, chi nándi sã ñí yáha ndíi te ní quide càhnu iní ndíi. Te sátá ñí yáha ní ndoho ndíi, te ío cuéhé sã ñí sãñaha Yã Ndiòxí xii ndíi. Chi ío váha iní-gá te ío cùndahú iní-gá nchaa ñáyiu ío càhnu iní-xi.

12 Te nchòhó ñáyiu ndècu ndíhi-í ichi Xítohó Jesucristú, chí cùndedóho tucu tnúhu na càháⁿ-í-a, chi ío xini ñuhu-xi. Vá cácu nèhe-ndo Yã Ndiòxí òré cuíní-ndó sã cùtnuní iní ñáyiu sã ndáá cada-ndo ìⁿ sã càháⁿ-ndó. Te ñí vá cácu nèhe-ndo sã càchí-yu cùu ndíoxí cadũha cue téé ñuyú-a. Te núu ìⁿ sã xicáⁿ tnaha ñáyiu-ndo núú-ndó te cùñaha-ni-ndo te núu cuu àdi sã vã cúú. Te vá cácu nèhe-ndo Yã Ndiòxí, ducaⁿ te vá dándòho ñaha-gã xii-ndo.

13 Te núu ndòho-ndo te cáháⁿ ndíhi-ndo Yã Ndiòxí, àdi te núu ndècu váha-ndo te cudí iní-ndó te chíñuhu-ndo-gã, 14 àdi núu cùhú-ndó te cana-ndo cuè téé yíndaha ñaha xii-ndo nacuáa ndècu-ndo ichi Yã Ndiòxí cuendá tee-güedé acítí díquí-ndó,

te cácaⁿ táhú-güedë núú-gã cuendá-ndó dàtná ní cachí méé-gã cunduu. ¹⁵ Te núu quindáá ndisa iní-ndó sã ndũha-ndo, te ndúha-ndo chi Yá Ndiõxí cada tátna ñaha-gã xii-ndo, àdi núu ní quide-ndo ñⁿ sá ñà túú tàú-ndó càda-ndo núú-gã te cada càhnu iní-gá cuéchi-ndo. ¹⁶ Te xini ñuhu-xi cútnũhu tnàha-ndo oré ñá túú cundáá-ndó nũú Yá Ndiõxí cuendá chindee tnũhu tnàha-ndo cáháⁿ ndihi-ndo-gã te xocani-gã cuéhé-ndó, te cada càhnu iní-gá nchaa sá ñà túú vãha ní quide-ndo te núu cundecu váha iní-ndó. Te nchaa ñáyiú ndècu váha iní-xi núú Yá Ndiõxí na càcáⁿ-yu ñⁿ sá cuini-yu núú-gã te nihí-yu, chi sàá tnũhu-yu núú-gã. ¹⁷ Te té Èliás, téé ní xindecu ndéé sanaha ñí cáa-dé dàtná cáá nchòo. Te ní cáháⁿ ndihi-dé Yá Ndiõxí ñí yũhu ñí iní-dé ní xáhaⁿ-dë xii-gá sá vã dácúuⁿ-gá dáú, te ní tñi-gá tnũhu ní cáháⁿ-dé, te ñá ní dácúuⁿ-gá dáú ùní cuía dava. ¹⁸ Te dătnùní ducaⁿ te ní cáháⁿ ndihi tucu té Èliás-áⁿ Yá Ndiõxí sá dácúuⁿ-gá dáú te ní cuuⁿ, te ní cuu tucu nchaa sá ñí xitu-güedé.

¹⁹ Te nchòhó ñáyiú ndècu ndihi-í ichi Xítohó Jesucristú, te núu dava-ndo sã ndecu-ndo ichi Yá Ndiõxí ní cùu te ní dáñá-ndó, te ndècu tucu dava-ndo nadaxĩnu iní tnáhá-ndó núcúndecu tucu-ndo ichi-gá, ²⁰ te núu ducaⁿ na càda-ndo te dácácu nihnu tnàha-ndo núú ùhú núú ndàhú, te mee Yá Ndiõxí cada càhnu iní ñáhá-gã xii-ndo cuèi ío cuéhé cuéchi ní quide-ndo.

TUTÚ DÍHNA NUU NÍ CADÚHA TÉ PÈLÚ

Té Pèlú cadúha-dé tutú sá cúú-xí cuè ñáyiú sàndáá iní ñáhá xii Yá Ndiöxí

¹ Yúhú té Pèlú ní tendaha ñaha Xítoho Jesucristú xicá cùu-í cãháⁿ-í tnúhu-gá, te cadúha-í tutú-a sá cúú-xí nchòhó ñáyiú xinchíté nuu ndècu distritú Pòntó, ndihí distritú Gàlaciá, ndihí distritú Capàdociá, ndihí distritú Àsiá, ndihí distritú Bitiniá. ² Chi Dútú Ndiöxí ní cachí-gá sá cúú-ndó dèhe-gá ndéé cùtnàhá vátá ngäva-gá ñuyíú, te Espiritú-gá ní quide-xi ndècu yíñuhu-ndo núú-gã vitna. Te ní cachí-gá sá cúú-ndó dèhe-gá cuendá tñi-ndo nchãa tnúhu cãháⁿ Xítoho Jesucristú, ndihí cuendá nduu ndoo nduu nine iní-ndó, chi ñi cuendá-án ñí xíhí Xítoho Jesucristú. Te xicáⁿ táhù-í núú Yá Ndiöxí sá ïo na chindee chitúu ñaha-gã xii-ndo cuèi vitna te cuèi núú cuáháⁿ núú vèxi, te ñi-ni-gá ná cadá te ïo váha cuu iní-ndó cùndecu-ndo.

Tnúhu ndee iní sá ndécú ndihí ñáyiú sàndáá iní ñáhá xii Yá Ndiöxí

³ Te vitna chí ná cãchí-ó sã ïo cãhnu cuu Yá Ndiöxí Yaá cúú Tãtá Xítoho Jesucristú, chi ñi-gá ïo ní cundàhú iní ñáhá-gã xii-o núu xíãⁿ ní quide-gá sá nchóó ñí nduu-o dàtná ñí ñáyiú saa vitna. Te ducaⁿ ñí quide ñaha-gã xii-o cuendá sá Xítoho Jesucristú ní xíhí-gá te ní ndoto-gá. Te cuendá sá ñí nduu-o dàtná ñí ñáyiú saa, xíãⁿ ní ngúndecu ndihí-o tnúhu ndee iní ⁴ sá cùndècu ndihí-o-gá ñí caa ñí quíhíⁿ, chi ducaⁿ ñí cachí-gá cunduu. Te yacáⁿ vá quini-gá-ó ñí ñí sá cuèhé sá dúhá, te ïo cudíí iní-ó cùndecu-o ndihí-gá ñí caa ñí quíhíⁿ. ⁵ Te sá sàndáá iní-ó Yá Ndiöxí, núu xíãⁿ coto ñaha-gã xii-o ndèé ná sãá nduu nàqueheⁿ cuendá ñáhá-gã chi ïo cãhnu cuu-gá.

⁶ Te xíãⁿ ïo cudíí iní-ndó ndècu-ndo, te cuèi nãndi ndòho-ndo ndecu-ndo dico sacú-ñi nduu ducaⁿ ndòho-ndo. ⁷ Te òrè ná cadá cãhnu iní-ndó yãha-ndo nchãa sá ná cada ñaha ñáyiú xii-ndo, te ducaⁿ te cutnùní sàndáá ndisa iní-ndó Yá Ndiöxí, te sá dúcáⁿ sàndáá iní-ndó Yá Ndiöxí ïo-gá

váha dàcúxí dñhúⁿ cuááⁿ chi xíãⁿ ñã túú cùdí-xi. Te cuèi ducaⁿ dico xito ndéé nãhí-ní-güedé núu ndisa cùu-xi dñhúⁿ cuááⁿ. Te ducaⁿ sãtnahá-xi cùu nchohó cuendá nchaa sá ndóhó-ndó, te na sãá nduu quixi tucu Xítoho Jesucristú te cùñaha-gã xii-ndo: “Ïo váha ní quide-ndo, te vitna ïo cãhnu cuu-ndo, te tãú-ndó nùcùndecu váha-ndo”, duha cùñaha-gã xii-ndo.

⁸ Te vitna ïo cùu iní-ndó Xítoho Jesucristú cuèi vátá quini-gá-ndó-gã, te ducaⁿ ïo sàndáá iní-ndó-gã, te ïo cudíí iní-ndó te súúní ñí ñã cùtnùní iní-ndó nãsa cunduu tnúhu cãháⁿ-ndó sã dúcáⁿ ïo cudíí iní-ndó ⁹ cuendá sá ñí naníhí táhù-ndó, chi ñí sàndáá iní-ndó-gã.

¹⁰ Te cue téé ní xóo cãháⁿ tnúhu Yá Ndiöxí ndéé sanaha ñí cachí-güedé nãcuáa cada-gá cundàhú iní ñáhá-gã xii-o vitna. Te cue téé-án ïo váha ní dàcuáhá-güedé nãcuáa cada Yá Ndiöxí dàcácu nihnu ñaha-gã xii-o vitna. ¹¹ Te Espiritú Xítoho Jesucristú ní ngúndecu ndihí cue téé-án ñí xãhaⁿ-xi xii-güedé nãcuáa ndoho-gá, te ní xãhaⁿ tucu-xi xii-güedé sá sãtá ná yãha ndoho-gá te ïo cunuu-gã ndihí Yá Ndiöxí. Te ïo ní sani iní-güedé núu ná nduu sãá ducaⁿ cada-xi, ndihí nchaa nãndi-gá cúú sã cadá-xi. ¹² Te Yá Ndiöxí ní xãhaⁿ-gã xii-güedé sá nchãá tnúhu váha cãháⁿ-güedé vá cúú-xí cuendá mée-güedé, chi cuendá nchoo cuè ñáyiú ndècu ñuyíú-a vitna cùu-xi. Te ñi-ni tnúhu-án cúú tnúhu cãháⁿ nchúhú cue téé cãháⁿ tnúhu Yá Ndiöxí núú-ndó. Te Espiritú sá ñí taxi Yá Ndiöxí ndécú ndihí-o chindee ñaha-xi xii-ndí cãháⁿ-ndí tnúhu-gá. Te cue espíritú xínú cuèchi núú Yá Ndiöxí ïo cuini-xi quini ndáá-xi nchaa nãcuáa cuáháⁿ tnúhu-án.

Yá Ndiöxí cãchí-gá sá cadá-ó mée-ni sá vãha

¹³ Te sá dúcáⁿ ïo váha ní quide ñaha Yá Ndiöxí xii-ndo xíãⁿ xíni ññhu-xi ïo váha cuáha-ndo cuendá nãcuáa cundecu-ndo te vá cãní iní-ndó cada-ndo ñí ñí sá cuèhé sá dúhá, te ïo quindáá iní-ndó sã Yá Ndiöxí cada váha ñaha-gã nduu na quixi tucu Xítoho Jesucristú. ¹⁴ Te ïo tñi-ndo nchãa tnúhu cãháⁿ Yá Ndiöxí, te vá cùhúⁿ-gã iní-ndó nãndi sá cuèhé sá dúhá sã ñí xúhuⁿ iní-ndó cùtnàhá vátá cùndècu-gá-ndó ìchi-gá te ñí vã cadá-ndó. ¹⁵ Te cada-ndo

mèe-ni sá vǎha cundecu-ndo dàtná quidé mèe Yá Ndiöxí Yaá ní cáháⁿ ñáhá xii-o cundecu-o ndihí-gá. ¹⁶ Te cǎchí-gá núú tütú-gá: “Cada-ndo mèe-ni sá vǎha cundecu-ndo, chi ducaⁿ quide yúhú”, duha cǎchí-gá núú tütú-gá.

¹⁷ Te Yá Ndiöxí cada ndáá-gá cuéchi nchaa ñáyiú, te vá cádá cuendá-gá cuéi náí ñáyiú cùú-yu, te nchòhó cǎchí-ndó sǎ díú Tǎtá-ndó cùu-gá te ndáá, núu xǎá xíní ñùhu-xi canehe-ndo sá yíñùhu núu-gǎ ndi nchaa nduu cundecu-ndo ñuyíú-a. ¹⁸ Te ñu-gá ní dǎcǎcu nihnu ñaha-gǎ xii-ndo ñⁿ ichi sá ñà túú nàndíhi ní sanu ichi ñaha cué ñaní tnáhá-ndó ní xindecu ndéé sanaha ní cùu, te nchòhó sa nàha-ndo sá sǎ dúcáⁿ ní quide ñaha Yá Ndiöxí ní dǎcǎcu nihnu ñaha-gǎ xii-ndo ìchi-áⁿ ñà túú ní chǎhu-gá ní ñⁿ díhúⁿ cuááⁿ, te ní ñⁿ díhúⁿ cuixíⁿ sá ndíhí nihnu ñuyíú-a cuendá-ndó. ¹⁹ Chi Xítóhó Jesucristú ní quixi-gá ní sati níñí-gǎ, te ní xíhí-gá núú cùrúxí cuendá sá nchóó nàníhí tàhú-ó, te cùu-gá dàtná ñⁿ mbéé quiti ío váha iní-xi, quiti cǎndoo canine. ²⁰ Te ducaⁿ ní ndoho Xítóhó Jesucristú, chi ducaⁿ tnáhí ndéé tñuní ndoho-gá ndéé cútnáhá vátá ngǎva-gá ñuyíú. Te ducaⁿ ní yáha-gá cútnáhá ní quixi-gá òré vitna cùmání sǎá nduu nàa ñuyíú-a cuendá nchoo cùu-xi sá vǎha xii-o vitna. ²¹ Te nchòhó sa níhí-ndó tñùhu nàcuáa ní yáha Xítóhó Jesucristú cútnáhá ní quixi-gá ñuyíú-a, núu xǎá sàndáá iní-ndó Yá Ndiöxí. Te Yá Ndiöxí ní dándótó-gǎ Xítóhó Jesucristú, te sátá ní dándótó ñàha-gá te ní cachí-gá sá ío cǎhnu cuu Xítóhó Jesucristú. Te sá dúcáⁿ ní cuu, xǎá ío sàndáá iní-ndó Yá Ndiöxí, te ní taxi-gá tñùhu ndee ìní ndécú ndihí-ndo sá sǎá nduu cùndecu-ndo ndihí-gá ní caa ní quíhíⁿ.

²² Te Espíritú Yá Ndiöxí ní quide-xi te ní sàndáá iní-ndó tñùhu-gá, te xǎá ní nduu ndoo ní nduu nine iní-ndó, te cùu iní tnáhá ndisa-ndo nacúaa ndècu-ndo ichi Yá Ndiöxí, te xini ñuhu ndisa-xi sá ío ní yùhu ní iní-ndó cùu iní tnáhá-ndó ñⁿ ñⁿ-ndo. ²³ Te nchòhó ní nduu-ndo dàtná ñⁿ ñáyiú saa sá cuendá tñùhu Yá Ndiöxí, te tñùhu-áⁿ candeca-xi iní-ndó ní caa ní quíhíⁿ, te vá ñⁿ ndùu ndihí nihnu-xi, te ñà díú cuendá ñáyiú ñuyíú-a ní

ndùu-ndo ñⁿ ñáyiú saa chi cuendá tñùhu-gá.

²⁴ Chi núú tütú Yá Ndiöxí cǎchí-xi:

Nchaa ñáyiú ndècu ñuyíú-a cùú-yu dàtná cùhú, chi cùhú-ǎⁿ tnaa-ni cùdíi-xi te xihí-xi, ducaⁿ sǎtnahá-xi cùú-yu.

Te nchaa sá ndécú ndihí-yu cùu-xi datná ñⁿ itá cùhú-ǎⁿ, chi itá-áⁿ tnaa-ni tucu cùdíi-xi te ndàhvá-xi, ducaⁿ sǎtnahá-xi cùu nchaa sá ndécú ndihí-yu.

²⁵ Dico tñùhu Yá Ndiöxí chi vá náá tnáhí-xi, chi duha-ni ndècu-xi, te ñu-ni duha cundecu-xi ní caa ní quíhíⁿ.

Duha cǎchí-xi núú tütú-gá. Te ñu tñùhu-áⁿ ní dǎnèhé ñáhá nchùhú cue téé cǎháⁿ tñùhu Yá Ndiöxí xii-ndo.

2

¹ Te xǎá xíní ñùhu-xi dañà-ndo nchaa núú sǎ cuèhé sá dúhá, te dañà-ndo ìchi tñùhu ndehnde, te dañà-ndo vǎ dándàhú-gá-ndó mèe-ndo sá quidé vǎha-ndo, te dañà-ndo ìchi cuedú íní, te dañà-ndo nchaa tñùhu yiti.

² Te cada-ndo cuendá sá cùú-ndó dàtná cue landú yíquíⁿ vitna sadi camá, chi landú-áⁿ mee-ni sǎdi-güexi te sǎhnu-güexi. Te cada iní-ndó sǎ dúcáⁿ càda-ndo chi xini ñuhu-xi sá ío cuhuⁿ iní-ndó dǎcuaha-ndo tñùhu Yá Ndiöxí, chi xǎá cùú-xi mèe-ni tñùhu váha, te ducaⁿ te cuita cuehnu nihnu-ndo ìchi-gá quíhíⁿ ndéé ná sǎá nduu cùndecu-ndo núú ndécú-gǎ. ³ Te ducaⁿ xini ñuhu-xi cada-ndo, chi nchòhó sa ní cutnùní ndisa iní-ndó sǎ Yá Ndiöxí ío váha iní-gá.

Xítóhó Jesucristú cùú-gǎ dàtná ñⁿ yúú

⁴ Te ío nanducu nihnu-ni-ndo Xítóhó Jesucristú Yaá quidé nàcuáa naníhí tàhú-ó. Te ñu-gá ní cuu-gá dàtná ñⁿ yúú sǎ ñà túú nàndíhi sá cùú-xi ñáyiú ñuyíú-a, chi ní dáquéé tihú ñáhǎ-yu xii-gá. Dico Yá Ndiöxí ní cachí-gá sá Xítóhó Jesucristú cùú-gǎ dàtná ñⁿ yúú sǎ ío-gá váha, chi ío cùnuu-gá. ⁵ Te nchòhó sa ní naníhí tàhú-ndó, te ío-gá chí nándùcu nihnu Yá Ndiöxí cuendá cuu ñⁿnuu-ndo cùndecu-ndo ndihí Espíritú-gá. Te núu ducaⁿ na càda-ndo te cuu-ndo dàtná yúú vǎha dàcaa-güedé dava vehe, te cuu tucu-ndo dàtná cue dútú ní xinu cuechi núú Yá Ndiöxí ndéé sanaha, nàcuáa ñà túú nǎ cùmání-ndó núú-gǎ, chi nchaa cue téé-áⁿ ní xóo cuáha ñaha-güedé sá ní xóo nduu táhú-gǎ. Te nchòhó vitna

tàu-ndó càda-ndo nchaa nacuaa càháⁿ-gá, te nduu vétú iní-gá. Te ducaⁿ càda-ndo chi ndècu-ndo ndihì Xítóhó Jesucristú. ⁶ Te Yá Ndiöxí cächí-gá núú tütú-gá: Yúhú taxi ndecu-í ìⁿ Yaá ñuú Sìón, te cuu-gá dàtná ìⁿ yúú vâha sá sánútnî-güedé xíquí cimientú ìⁿ vehe, chi yúhú ní cachí-í sá Yàá-áⁿ ïo cunuu-gá.

Te nchaa ñáyiu quindáá iní ñáhá xii-gá vâ ìⁿ nduu ndixi cuéchi iní-yu sá dúcáⁿ sàndáá iní ñáhá-yu xii-gá.

Duha cächí-gá núú tütú-gá. ⁷ Te nchòhó ñáyiu sàndáá iní ñáhá xii Xítóhó Jesucristú ïo cùu iní-ndó-gá, te nchaa ñáyiu ñá túú sàndáá iní ñáhá xii-gá quidè-yu dàtná càháⁿ-xi núú tütú Yá Ndiöxí núú cächí-xi: Yúú sâ ñí dáquéé tîhú cue téé dàcaa vehe, xíáⁿ cúu-xí yúú sâ ïo-gá nándîhi vitna.

Duha cächí-xi núú tütú-gá. Te yúú-áⁿ cada iní-ó sâ cúu-xí Xítóhó Jesucristú, chi ní dáquéé tîhú ñáhá-güedé xii-gá. ⁸ Te cächí tucu-xi ïngá xichi núú tütú Yá Ndiöxí:

Yúú-áⁿ nguñenu ñáyiu te ndüá-yu.

Duha cächí-xi núú tütú-gá. Te tnúhu-áⁿ quée-xí sâ ïo quide sáá iní ñáyiu núú-gá, chi ñá túú cuiní-yu tñî-yu tnúhu càháⁿ-gá, te ducaⁿ tnàhí ndèé tnuní sá ncháá ñáyiu ñá túú cuiní tñî tnúhu càháⁿ-gá, te ïo cùu sáá iní-yu núú-gá.

Ñáyiu ndècu ndihì Yá Ndiöxí

⁹ Te nchoo cùu-o ñáyiu sa ní dáquéé dîⁿ ñaha Yá Ndiöxí xii-o cuendá cundecu-o ndihì-gá, te cùu-o dütú xínú cuèchi-o núú-gá, te mee-gá cúu-gá Yaá ïo cùnuu, te cùu-o ñáyiu quide ndáá xîndecu ichi-gá te cùu tucu-o ñáyiu yîndaha-gá. Te ducaⁿ ñí quide ñaha-gá xii-o cuendá sá cûñaha-o xii nchaa ñáyiu sâ ïo càhnu cuu-gá, te ïo vâi núú sâ vâha quide-gá, te dîu-gá ní quide ní dáñá-ó ncháa ichi cuehé ichi duha ndècu-o ní cuu, te ní sanu ichi ñaha-gá xii-o ìⁿ ichi vâha, te vitna cùtnuní iní-ó sâ ïo càhnu cuu-gá. ¹⁰ Te nchoo cùu-o ñáyiu ñá túú ndècu ndihì Yá Ndiöxí ní cùu, dico vitna ní ngúndecu ndihì-o-gá, te dàvá-áⁿ vâta sâá-gá nduu càda vâha ñaha-gá xii-o, dico vitna sa ní sáá nduu quide vâha ñaha-gá xii-o, chi ïo cùndahú iní ñáhá-gá.

Cada vâha-o cùndecu-o cunu cuechi-o núú Yá Ndiöxí

¹¹ Te nchòhó ïo cùu iní ñáhá-í xii-ndo, te cächí tnúhu-í xii-ndo sâ nchóó cùu-o datná cue ñáyiu ndècu tnaduha ìⁿ ñuú, te ducaⁿ sâtnahá-xi cùu-o chi tnaa-ni ndècu-o ñuyú-a, te sáá nduu nduu táhú-ó cùndecu-o núú ndécú Yá Ndiöxí táxí tnùnî-gá, te xíáⁿ càháⁿ ndàhú-í núú-ndó sâ vâ cadá-ndó ñí ìⁿ sâ cuèhé sâ dúhá sâni iní-ndó, chi nchaa xíáⁿ ñá túú cùu-xi sâ vâha sâ cúu-xi-ndó. ¹² Te cada vâha-ndo cùndecu-ndo núú ncháa ñáyiu ñá túú ndècu ichi Yá Ndiöxí, te cuéi na càháⁿ ñáyiu sâ nchòhó nchicúⁿ nihnu-ndo ìchi cuehé ichi duha, dico quini-yu nchaa sâ vâha quide-ndo, dico na sáá nduu dândixi túu Yá Ndiöxí iní-yu sâ ñá túú quide vâha-yu ndécú-yu, te dàvá-áⁿ cachí-yu sâ quidé vâha-ndo ndècu-ndo, te cada càhnú-yu Yá Ndiöxí.

¹³ Te Xítóhó Jesucristú cuiní-gá sâ nchòhó ïo quindáá iní-ndó ncháa cue téé cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuéi mee téé cùnuu vihi-gá yîndaha ñaha xii ñáyiu. ¹⁴ Te ducaⁿ-ni quindáá iní-ndó ncháa dava-gá cue téé cùnuu, chi Yá Ndiöxí ducaⁿ ñí cachí-gá cunduu sâ cué téé-áⁿ cada ndáá-güedé nchaa cuéchi ñáyiu quide cuehé quidé dùha ndecu, te cáháⁿ vâha-güedé cuendá nchaa ñáyiu xîquide vâha ndècu. ¹⁵ Te Yá Ndiöxí cuiní-gá sâ cadá vâha-ndo cùndecu-ndo cuendá nchaa ñáyiu ïo ñí dîquí-xi càháⁿ cuèhé cuendá-ndó sâ ndécú-ndó ìchi Yá Ndiöxí vâ ñihí-gá-yu tnúhu cáháⁿ-yu.

¹⁶ Te nchòhó, Yá Ndiöxí ní quide-gá sâ cúu-ndó ñáyiu cuu cada nàcuáa véxi iní mée-xí, dico ñá díú sâ dúcáⁿ ñí quide ñaha-gá xii-ndo, te ngóo-ndo càni iní-ndó càda-ndo nândî sâ cuèhé sâ dúhá, chi cada-ndo sâ cúu-ndó ñáyiu xînu cuechi núú Yá Ndiöxí. ¹⁷ Te canehe-ndo sâ yîñuhu núú ncháa ñáyiu, ndihì núú téé cùnuu vihi yîndaha ñaha xii-yu, te cuu iní tnáhá ndî mee-ndo nacuaa ndècu-ndo ichi Yá Ndiöxí, te ïo canehe-ndo sâ yîñuhu núú-gá.

Nchaa nàcuáa ndoho-o cùndecu-o ichi Xítóhó Jesucristú

18 Te nchaa nchòhó ñáyiú xínu cuechi canehe-ndo sã yíñùhu núú cuè patróoⁿ-ndó, te quindáá iní-ndó càda-ndo nchaa chiuⁿ tahu-güedé. Te ìⁿ-ni càda-ndo núú cuè téé váha iní-xi, ndihí núú cuè téé ío cuihna iní-xi. 19 Te núú nchòhó ná càda ndee iní-ndó ndòho-ndo nchaa sã ñà túú tàú-ndó ndòho-ndo cuendá sã cuiní-ndó cundáá-ndó núú Yã Ndiõxí ñá, te ío nduu vétú iní-gá. 20 Te núú nchòhó ní quide-ndo ìⁿ cuéchi, te sàhni iní-ndó dándòho ñaha ñáyiú xii-ndo, ¿te ná sã váha cùu xíãⁿ-í? Dico núú nchòhó ná cáda ndèe iní-ndó ndòho-ndo nchaa sã cáda ñaha ñáyiú xii-ndo sã cuendá sã quidé-ndó sã váha ña, te núú ducaⁿ na càda-ndo te cùu-xi ìⁿ sã váha núú Yã Ndiõxí. 21 Te Yã Ndiõxí ní cachí-gá sã cáda ndèe iní-ó ndòho-o nándi ndòho-o sã cuendá sã quidé-ó sã váha, chi ío ní ndòho Xítòhó Jesucristú cuendá-ó, te ducaⁿ tàú-ó cànchicúⁿ nihnu-o càda ndee iní-ó ndòho-o nándi ndòho-o, chi ducaⁿ ní quide-gá. 22 Te mee-gã ñá túú quide-gã ní ìⁿ sã cuèhé sã dúhá, te ní ìⁿ tnúhu ndehnde ñà túú càháⁿ-gá. 23 Te òré ní xóo cúcuèhé ñáhá-güedé xii-gá, te ñá túú ní xóo danchòcáva-gã tnúhu cuèhé, te òré ní xóo dándòho ñaha-güedé xii-gá, te ñá túú ní xãháⁿ-gã xii-güedé sã ío ná cada ñaha-gã, chi núú ndáhá Yã Ndiõxí ní xóo nachihí-gã mée-gã, ndihí nchaa sã sání iní-güedé cada ñaha-güedé xii-gá. Te Yã Ndiõxí cúú-gã Yaá ío váha cada ndáá cuéchi nchaa ñáyiú na sàá nduu. 24 Te Xítòhó Jesucristú cúú-gã Yaá ní xíhí núú cùrúxí cuendá nchaa cuéchi nchoo ñáyiú ndècu ñuyíú-a. Te ducaⁿ ní xíhí-gã cuendá nchoo dùuⁿ duuⁿ dañá-o nchaa ichi cuehé ichi duha, te cada ndáá-ó cundecu-o ichi-gá. Te ní dánícuèhé ñáhá-güedé xii-gá, te sã dúcáⁿ ní ndòho-gá xíãⁿ ní ngúndecu váha nchoo vitna. 25 Te nchoo cùu-o datná cue mbéé cue quiⁿ ní xíta ní cùu, dico vitna ní tuha-o Xítòhó Jesucristú, te Yaá-áⁿ cúú-gã dàtná ìⁿ toli xító ñaha-gã xii-o vitna cuendá sã vã cuíta nihnu-o.

3

Nàcuáa tàú ñáyiú tnándaha cadá-yu cundecú-yu

1 Te nchaa nchòhó ñáyiú ðihí ní tnandaha ío quindáá iní-ndó yíⁿ-ndo cuendá sã núu

ñá túú sàndáá iní-güedé tnúhu Yã Ndiõxí te quindáá iní-güedé cuendá sã ndéhé-güedé quidé ndáá-ndó ndècu-ndo, te ní ñà túú xíni ñuhu-xi cáháⁿ-ndó tnúhu-gã núú-güedé. 2 Chi ndèhe mee-güedé sã nchòhó quidé ndáá-ndó ndècu-ndo, te nèhe-ndo sã yíñùhu núú Yã Ndiõxí. 3 Te vá cání iní-ndó mèe-ni cunduu vii-ndo, te ndada-ndo ðiquí-ndó nàcuáa tàú-xi cunduu, te vá cání iní-ndó nándi canehe-ndo, te ní vã cání iní-ndó cuihnu-ndo mee-ni dóó váha sã ío vii ndáa. 4 Chi iní-ndó xíni ñuhu-xi cunduu vii cunduu váhá-xi núú Yã Ndiõxí cuéi vitna te cuéi núú cuáháⁿ núú véxi, te cuu-ndo ñáyiú ío càhnu iní-xi, te núú ducaⁿ na càda-ndo te ío cuu váha iní Yã Ndiõxí. 5 Te ducaⁿ ío vii ío váha ní xínduu iní nchaa ñáyiú ðihí ní xíndecu ndéé sanaha, te ñáyiú-áⁿ ío ní sàndáá iní-yu Yã Ndiõxí te ní cudíu-yu núú-gã, te ní tníⁿ-yu nchaa tnúhu ní cáháⁿ yíⁿ-yu. 6 Te ducaⁿ ní xóo cada ndíi Sãrá ní xóo quindáá iní ndíi yíⁿ ndíi, ndíi Àbrahám, te ní cánehe ndíi ðihí-áⁿ sã yíñùhu núú yíⁿ ndíi. Te núú nchòhó quidé váha-ndo ndècu-ndo te ñá túú yùhú-ndó nã cada ñaha tnàha ñáyiú-ndo xii-ndo, te núú ducaⁿ quide váha-ndo ndècu-ndo te quide-ndo datná ní quide ndíi Sãrá.

7 Te nchòhó cue téé ndècu ñadihí-xi ío váha cuáha-ndo cuendá nàcuáa cundecu váha-ndo ndihí-yu, te ío vii cáháⁿ ndihí-ndò-yu, chi ñáyiú-áⁿ íi-gã-yu dàcúúxí nchòo cue téé, te ducaⁿ càda-ndo chi ndí ndíu-ndó ndúu táhú-ndó cundecu-ndo ndihí Yã Ndiõxí, te núú ducaⁿ na càda-ndo te òré cáháⁿ ndihí-ndo Yã Ndiõxí te tedòho ñaha-gã xii-ndo.

Ñáyiú quide sã váha ndòhó-yu

8 Te càchí tnúhu tucu-í xii-ndo sã ío cuu ìⁿnuu-ndo cundecu-ndo, te cundáhú iní tnáhá-ndó ìⁿ ìⁿ-ndo, te cuu iní tnáhá tùcu-ndo nacuaá ndècu-ndo ichi Yã Ndiõxí, te cuu-ndo ñáyiú ndáhú iní-xi. 9 Te núú ìⁿ sã ñà túú váha quide ñaha ñáyiú xii-ndo, te ñá díu-ní dùcaⁿ nanchocáva-ndo càda-ndó-yu, àdi xícuèhé ñáhã-yu xii-ndo, te vá ná danchocáva-ndo ðiu-ni tnúhu cuèhé, chi cácaⁿ táhú-ndó núú Yã Ndiõxí cuendá sã ná cáda váha ñaha-gã xii-yu, te ducaⁿ càda-ndo chi Yã Ndiõxí ní cáháⁿ ñáhá-gã

xii-ndo cuendá sá cáda vâha ñaha-gã xii-ndo tnâhá-ndó. ¹⁰ Te núú tûtú Yã Ndiöxí cãchí-xi:

Nchaa ñáyiú cuení cundecu váha ndi nchaa nduu nini cundecú-yu ñuyíú-a, xini ñuhu-xi sá vã cãháⁿ-yu tnúhu cùtexínu, te ni vã dácuañdehndé-yu.

¹¹ Te xini ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sã vâha,

te ío ndúcú-yu nãcuáa cadá-yu cundecu váha-yu ndihi tnâha ñáyiú-yu te ñu-ni ducaⁿ cãchicúⁿ nihnú-yu cadá-yu.

¹² Te Yá Ndiöxí xító-gã nchaa ñáyiú quide ndáa núú-gã

te tedóho-gã nchaa tnúhu cãháⁿ-yu, dico nchaa ñáyiú ñá túú cuení cada ndáa, ñáyiú-áⁿ ñà túú cùu váha iní-gã núú-yu.

Duha cãchí-xi núú tûtú-gã.

¹³ Te vá yõ níhí ndéé càda ñaha xii-o ñⁿ sá ñà túú vâha te núu mee-ni sã vâha na càda-o cundecu-o. ¹⁴ Añi núú ná cúú sã ná cáda ñaha ñáyiú xii-o sã cuendá sá quidé vâha-o ndècu-o ña, te sá dúcáⁿ ná cáda ñahá-yu xii-o cùu-xi ñⁿ sá vâha sá cúú-xí-ó núú Yã Ndiöxí. Te na cãchí tnúhu-í xii-ndo sã vã yùhú-ndö-yu, te ni vã cúndiyí-ndó cuendá nchaa sá ná càda ñahá-yu xii-ndo. ¹⁵ Te nèhe-ndo sá yíñuhu núú Xítóhó Jesucristú. Te ío cundecu túha-ndo ñanehé-ndó ñáyiú véxi ndècu tnúhu núú-ndó nãcuáa ndùu tnúhu ndee iní ní taxi Xítóhó Jesucristú ndécú ndihi-ndo, te cuu vii cuu váha iní-ndó cãháⁿ ndihi-ndö-yu, te cãháⁿ-ndó núú-yu mee-ni tnúhu yíñuhu nacuaáa cùu váha iní Yã Ndiöxí. ¹⁶ Te ío cada váha-ndo cundecu-ndo cuendá sá vã cúndiyí-ndó, te núu ducaⁿ na càda-ndo, te nchaa ñáyiú xicuehé ñahá xii-ndo cuendá sá quidé vâha-ndo ndècu-ndo ichi Xítóhó Jesucristú quendóo canúú-yu ndihi nchaa tnúhu cãháⁿ-yu, chi nchòhó quidé vâha-ndo ndècu-ndo. ¹⁷ Te váha-gã sá ndóhó-ó cuendá sá quidé-ó sã vâha te núu mee Yã Ndiöxí ducaⁿ cuení-gã cunduu, te ñá díú sã ndóhó-ó cuendá sá ñà túú quide-o sã vâha.

¹⁸ Te Xítóhó Jesucristú ní xihí-gã sá cuendá nchaa cuéchi nchaa nchoo ñáyiú ndècu ñuyíú-a, te ñⁿ xito-ni ducaⁿ ñi xihí-gã

te ducaⁿ te vá cùú tnâhí-gã, te mee-gã cúú-gã Yaa ñá túú tnâhí cuéchi-xi, te ducaⁿ ñi ndoho-gã cuendá nchaa cuéchi ñáyiú ndècu ñuyíú-a ñáyiú ñá túú cuení cada ndáa núú Yã Ndiöxí, te ducaⁿ ñi cuu cuendá sá núcundecu váha-yu núú Yã Ndiöxí te núu na quindáa iní ñahã-yu xii-gã. Te mee-gã ní xihí-gã dico Espiritú-gã chi ní xindecu-ni-xi, ¹⁹ te Espiritú-gã ní sãháⁿ-xi ní cãháⁿ-xi tnúhu Yá Ndiöxí núú nchaa espíritú ñáyiú ndècu núú ùhú núú ndàhú. ²⁰ Te ñáyiú-áⁿ cúú ñáyiú ní xindecu ndéé sanaha cùtnâhá ní xindecu ndíi Nöé, chi ñáyiú-áⁿ ío ní quide sãá iní-yu núú Yã Ndiöxí. Te Yá Ndiöxí ío váha iní-gã, chi ní dácacá-gã nduu ñi xindecu ndíi Nöé ní cadúha ndíi bàrcú cuendá ndétú-gã ndixi cuéchi iní-yu sá ñà túú quide váha-yu ndècú-yu ni cùu. Te dàvã-áⁿ ñi ndaa ndute ñuyíú te ní cácu úná duha ná tnâhá ñáyiú, chi ní quée-yu xití bàrcú-áⁿ, te ñá túú ní cãhá-yu. ²¹ Te sá dúcáⁿ ñi cácu ñáyiú úná-áⁿ ñà túú ní cãhá-yu ndute ní ndaa ñuyíú dàvã-áⁿ. Te xíãⁿ quée-xí sã cuándute ñáyiú vitna, te naníhí tàhú-yu te núu na quindáa iní-yu tnúhu ndáa tnúhu Yá Ndiöxí. Te ñá díú sã cuándute-o te nduu ndoo nduu nine yiqui cùñú-ó te naníhí tàhú-ó, chi xini ñuhu-xi náhmá-ó núú Yã Ndiöxí nchaa yíca cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítóhó Jesucristú ní xihí-gã cuendá-ó te ní ndoto-gã. ²² Te Yaa-áⁿ cuãndaa-gã andiu, te ní ngóo-gã xio cùha Yá Ndiöxí, te taxi tnuní-gã nchaa espíritú cùnùu ndihi nchaa dava-gã cue espíritú xínú cuéchi.

4

Cada-o nãcuáa cuení mée Yã Ndiöxí

¹ Te Xítóhó Jesucristú ní ndoho-gã cùtnâhá ní xindecu-gã ñuyíú-a, te vitna nchòhó cundecu túha-ndo ndòho-ndo cuendá-gã, chi nchaa ñáyiú ndòho nãndi sá ndóhó cuendá-gã dàñá-yu nchaa sá cuéhé sá dúhá. ² Te ducaⁿ ñà túú-gã ndécú-yu ichi cuéhé ichi duha, chi mee-ñã nãcuáa cãháⁿ Yã Ndiöxí quidé-yu ndècú-yu ñuyíú-a. ³ Te nchòhó sa nãha-ndo sá ío cuéhé núú sã cuéhé sá dúhá ñi xóo cada-o cùtnâhá vátã cundècu-gã-ó ichi Yá Ndiöxí, chi ní xóo cada-o nchaa sá cuéhé sá dúhá cùdíí iní

nchaa ñáiyu ñá túú sàndáá iní tnúhu-gá, te dàvá-án ñí xóo cada-o nchàa núú sá cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáiyu quihu, te ní xóo cundecu-o víco núú ñí xóo cada-o nchàa sá ñà túú vâha, te ní xóo níhí tnáhá-ó ndìhi nchaa tnaha quihu-o, te ní xóo chiñuhu-o nchàa sá càchí-yu cùu ndióxí te ñá ndàá sá ndiöxí cúú nchàa xíáⁿ, te nándi-gá nchaa sá cuèhé sá dúhá ñí xóo cada-o dàvá-án. ⁴ Te ñáiyu-án cúññuhu-yu vitna sá ñà túú-gã nihí tnáhá-ó ndìhi-yu cada-o nchàa sá cuèhé sá dúhá quidé-yu, te xíáⁿ càháⁿ cuèhé-yu cuèndá-ó vitna. ⁵ Dico sáá nduu te ñáiyu-án ñahmá-yu nchaa sá quidé-yu núú Xítoho Jesucristú, chi ñu-gá sa ndècu túha-gá sá cáda ndáá-gá cuéchi nchaa ñáiyu sa ní xíhí, ndìhi cuéchi nchaa ñáiyu xíndecu vívú. ⁶ Te cue ñáiyu sa ní xíhí ní xíndedóho tnúhu Xítoho Jesucristú, te cuèi ní xíhí-yu dàtná xíhí dava-gá ñáiyu, dico espíritú-yu chi ní nduu táhú-xi ndècu váha-xi dàtná ndécú Yá Ndiöxí.

⁷ Te vitna ta cùyatni danaa Yá Ndiöxí ñuyíú-a núú xíáⁿ ío váha cuáha-ndo cuèndá nàcuáa cundecu-ndo, te cáháⁿ ndìhi-ndo-gã. ⁸ Te xini ñuhu-xi sá ío cuu iní tnáhá-ndó ñí ñí-ndo, chi núú ducaⁿ na cùu iní tnáhá-ndó ñí ñí-ndo, te vá cání-gã iní-ndó càda cuèndá-ndó nchàa sá ñà túú vâha quide ñaha ñáiyu xii-ndo, ⁹ te nchòhó ñáiyu xíndecu vehe-xi cuáha nùu-ndo vehe xii cue ñáiyu ñuhu ichi na ndetatú-yu, te ío váha cuu iní-ndó dùcaⁿ cada-ndo. ¹⁰ Te Yá Ndiöxí ní taxi-gá ndí dííⁿ núú táhú ndécú ndìhi-ndo ñí ñí-ndo, te nàcuáa ndùu táhú ñí nduu táhú-ndó ñí ñí-ndo te ducaⁿ chindee tnaha-ndo, te vá dáñá ndèé-ndó càda-ndo nchaa nacuáa tàuchiuⁿ Yá Ndiöxí cada-ndo, te chindee ñaha-gá xii-ndo. ¹¹ Te dava nchòhó ñáiyu càháⁿ tnúhu Yá Ndiöxí núú ñáiyu, xini ñuhu-xi cáháⁿ-ndó nàcuáa ndùu tnúhu-gá núu-yu, te dava nchòhó ñáiyu quide nchaa núú chiuⁿ chindee tnaha ñáiyu-xi, xini ñuhu-xi cada-ndo sá Yá Ndiöxí chindèe ñaha-gá xii-ndo, te ducaⁿ càda-ndo nchaa núú sá vâha, chi Xítoho Jesucristú tnáhá-gá chindèe ñaha-gá xii-ndo, te ducaⁿ ío cuu càhnu Yá Ndiöxí. Te vitna tàú-ó càháⁿ-ó sá ío càhnu cuu Xítoho Jesucristú, chi ñu-gá cùnùu-gá nchaa nduu nchaa

quíú, te ducaⁿ na cùnduu.

Ndoho tnahá-ó cùndecu-o ichi Xítoho Jesucristú

¹² Te nchòhó ñáiyu ío cùu iní-í, vá cúññuhu-ndo sá ío ndòho-ndo ndecu-ndo ichi Xítoho Jesucristú, chi sá dúcáⁿ ndòho-ndo-án cútnùní ndisa sá sàndáá iní-ndó-gã, te vá cání iní-ndó ñà cuèndá ducaⁿ ndòho-ndo. ¹³ Chi da cudíí iní-ndó te núu ndòho-ndo datná ní ndoho Xítoho Jesucristú, te ducaⁿ sùúní cùdíí iní-ndó òré ná quixi tucu-gá ñuyíú-a te dàvá-án quini-ndó sá ío càhnu cuu-gá. ¹⁴ Te núu xícuèhé ñáhá ñáiyu ndècu ichi cuehé ichi duha xii-ndo cuèndá sá ndécú-ndó ichi Xítoho Jesucristú, te xíáⁿ cúú-xi ñí sá vâha sá cúú-xi-ndó núú-gã, te ducaⁿ chi Espiritú Yá Ndiöxí sá ío cùnùu ndecu ndìhi ñaha-xi xii-ndo, te nchaa ñáiyu ndècu ichi cuehé ichi duha-án càháⁿ cuèhé-yu cuèndá Xítoho Jesucristú, dico nchòhó càchí-ndó sá ío càhnu cuu-gá. ¹⁵⁻¹⁶ Te núu nchòhó dándòho ñaha ñáiyu xii-ndo sá cuèndá sá ndécú-ndó ichi Xítoho Jesucristú ñà, te vá cúú càháⁿ núú-ndó, chi ndacáⁿ táhú-ndó núú Yá Ndiöxí cuèndá sá ndécú-ndó ichi-gá. Te cuèi ndòho-ndo ndecu-ndo, dico ñà túú cùu-ndo ñáiyu sàhni ndíyi te ni ñà túú cùu-ndo ñáiyu dùhu, te ni ñà túú cùu-ndo ñáiyu quide cuehé quidé dùha, te ni ñà túú cùu-ndo ñáiyu chindee tnúhu tnaha ñáiyu-xi ñí sá ñà túú tàú-ndó càda-ndo.

¹⁷ Te vitna sa quèsaha Yá Ndiöxí cada ndáá-gá nchaa sá quidé nchò ñáiyu ndècu ndìhi-gá, te núu ducaⁿ te ndèé-gá cada-gá nchaa ñáiyu ñà túú sàndáá iní ñáhá xii-gá òré ná sáá nduu dùcaⁿ cada ñaha-gá xii-yu. ¹⁸ Te nchòhó xini-ndó sá ñáiyu quide váha ndècu ichi Xítoho Jesucristú ndòho tnahá-yu ndécú-yu, dico sáá nduu te nduu táhú-yu cundecú-yu ndìhi-gá. Te núu ducaⁿ ndòho nchaa ñáiyu quide váha ñà, ¿te nása-gá yáha nchaa ñáiyu ndècu ichi cuehé ichi duha na sáá nduu càda ndáá Yá Ndiöxí cuéchi-yu-i? ¹⁹ Te nchaa nchòhó ñáiyu ndòho nacuáa cuíni Yá Ndiöxí xini ñuhu-xi sá vâ dáñá ndèé-ndó càda váha-ndo cùndecu-ndo, te ío quíndáá iní-ndó sá xító ñaha-gá xii-ndo. Te ñu-gá cúú-gã Yaá ní cadúha ñaha xii-o, te quide-gá ñí sá càháⁿ-gá.

5

Nàcuáa tàú-xi cada ñáyi ndècu ichi Xítohó Jesucristú

¹ Te yúhú càháⁿ-í dóho nchaa nchòhó cue té yíndaha nchaa dava-gá ñáyi ndècu ichi Xítohó Jesucristú, chi tnàhá yúhú yíndàhá-í ñáyi ndècu ichi-gá, te sàndáá iní-í tnúhu-gá, te ní xini-í nchaa nàcuáa ní ndoho-gá, te sáá nduu te tnàhá-í cunuu-í ndihi-gá. ² Te ío canehe cuendá-ndó nchaa ñáyi ndècu ichi Yá Ndiöxí yíndàhá-ndo te cada-ndo dàtná quidé cuè toli, chi cue té-áⁿ ïo váha xito-güedé mbéé-güedé. Te canehe cuendá-ndó-yu sá cúú iní méé-ndó te ñá díú sã ío ïⁿ ñáyi cada yica ñàhá xii-ndo, te ní ñà díú sã cuíní-ndó cùhuⁿ yáhu-ndo, chi ní yùhu ní iní-ndó còto-ndó-yu, chi ducaⁿ cuíní Yá Ndiöxí cunduu. ³ Te vá cádá-ndó sã ïo cunuu-ndo núú-yu, chi cada-ndo mèe-ni sá váha cuendá ducaⁿ càncicúⁿ nihnú-yu cádá-yu tnàhá-yu. ⁴ Te òré ná quixí tùcu Xítohó Jesucristú Yá néhé cuendá ñàhá xii-o nchaa-o ñuyíú-a, te taxi-gá sá ïo váha nduu táhú-ó, te cunuu-o ndihi-gá ní caa ní quíhíⁿ.

⁵ Te nchòhó ñáyi ndècu ichi Xítohó Jesucristú càháⁿ-í dóho-ndo sã ïo quíndáá iní-ndó cuè té yíndaha ñàhá xii-ndo nacuáa ndècu-ndo ichi-gá, te nchaa-ndo tàú-ndó quíndáá iní tnàhá-ndó ïⁿ ïⁿ-ndo, chi núú tùtú Yá Ndiöxí càchí-xi ïⁿ xichi: Nchaa ñáyi quide cahnu mee-xi ñá túú cùu váha iní Yá Ndiöxí núú-yu,

dico nchaa ñáyi ndàhú iní-xi te chindee ñàhá-gá xii-yu.

Duha càchí-xi núú tùtú-gá. ⁶ Te dañà-ndo mèe-ndo núú ndàhá Yá Ndiöxí, chi mee-gã ïo cunuu-gá. Te núu ducaⁿ na càda-ndo, te sáá nduu te cada nínu ñàhá-gã xii-ndo.

⁷ Te nchaa sá yàhá-ndo ndècu-ndo te nachihi-ndo ndàhá Yá Ndiöxí, chi mee-gã xító ñàhá-gá xii-ndo.

⁸ Te ío váha cuáha-ndo cuendá cundecu-ndo, te quíhí iní-ndó chi sácúíhná xicá cùu-xi cuíní-xi dacuíta nihnu ñàhá-xi xii-o, chi ío cùu úhú iní ñàhá-xí, te cùu-xi datná ïⁿ quítí dééⁿ xicá ndùcu sá cáxí-xí. ⁹ Te ío quíndáá iní-ndó Xítohó Jesucristú, te vá dáñá-ndó mèe-ndo dandahú ñàhá sácúíhná

xii-ndo càda-ndo nacuáa cuíní-xi, chi nàhá-ndo sá ncháá ñáyi ndècu ichi Xítohó Jesucristú xíndecu nihí ñuyíú ndóhó-yu dàtná ndóhó nchòo ndecu-o ichi-gá. ¹⁰ Dico sacú-ni nduu duha cundoho-o te dàtnú ní ñá túú-gã ná cumání-ó cundecu-o núú Yá Ndiöxí, te dàvá-áⁿ vã cání ïⁿ caní úú iní-ó cundecu-o ichi-gá. Te ío-gá ngúndecu ndihi-o tnúhu ndee iní cada-o nchaa nacuáa càháⁿ-gá, te ducaⁿ càda-o chi mee Yá Ndiöxí ío chindee ñàhá-gá xii-o, te diu-ni Yá-áⁿ ïo cùu iní ñàhá-gã xii-o, chi ní cáháⁿ ñàhá-gã xii-o cundecu-o núú ïo váha càda ndecu-gá cundecu-o ní caa ní quíhíⁿ, te ducaⁿ ní quide-gá chi ní sàndáá iní-ó Xítohó Jesucristú. ¹¹ Te ío ndacáⁿ táhú-ó núú Yá Ndiöxí chi ío càhnu cuu-gá, te cunuu-gá nchaa nduu nchaa quíú. Te ducaⁿ na cunduu.

Tnúhu ndéé núú ní ndihi-ná

¹² Te té Silvanú xini-í sá cúú-dé ïⁿ té quide ndáá ndécú ichi Xítohó Jesucristú, te diu-dé ní cáháⁿ ndàhú-í núú-dé ní tee-dé ïⁿ úú tnúhu sá ní xáháⁿ-í xii-dé núú tùtú-a cuendá daquixi-í ndàhá-ndo, te núú tùtú-a càchí tnúhu ndáá-í xii-ndo sã Yá Ndiöxí ío cùu iní ñàhá-gã, te chindee ñàhá-gá xii-ndo ndècu-ndo, te càchí tnúhu tucu-í xii-ndo sã ïo quíndáá iní-ndó sã ndáá ducaⁿ quide ñàhá-gá xii-ndo.

¹³ Te cue ñáyi ndècu ñuú Babiloniá, ñáyi ndècu ichi Yá Ndiöxí, diu-ni ñáyi ní cachí Yá Ndiöxí sá nánihí tàhú dàtná cúú nchòhó, ío quide ndee iní ñàhá-yu xii-ndo, te tnàhá té Mácú té cùu datná ïⁿ déhe-í quidé ndee iní ñàhá-dé xii-ndo. ¹⁴ Te ndihi tnúhu yíñùhu cada ndee iní tnàhá-ndó ïⁿ ïⁿ-ndo, te xicáⁿ táhú-í núú Yá Ndiöxí sá ïo na cundecu nahi nchaa nchòhó ñáyi ndècu ndihi Xítohó Jesucristú. Te ducaⁿ na cunduu. Te ío chí cádá ndèe iní-nã vitna.

TUTÚ CÚÚ ÙÚ NÍ CADÚHA TÉ PÈLÚ

Té Pèlú cadúha-dé tutú quíhíⁿ ndaha ñáyiú sàndáá iní tnúhu Yá Ndiöxí

¹ Yúhú té Xímú, àdi Pelú chi úú òu-í, xínú cuèchi núú Xítohó Jesucristú, chi mee-gá ní tendaha ñàha-gá xii-í xícá cùu-í càháⁿ-í tnúhu-gá. Te cadúha-í tutú-a sá cúú-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te ducaⁿ chi Tàtá-ó Dútú Ndiöxí ní dácàháⁿ-gá iní-ó ní sàndáá iní-ó-gá, chi cùu-gá Yaá ío váha quide ndáá ndíhi Xítohó Jesucristú Yaá dácàcu nihnu ñaha xii-o núú ùhú núú ndàhú. ² Te xicáⁿ táhù-í núú Yá Ndiöxí sá ùuⁿ-gá uuⁿ-gá ná cuita chindee chitúu ñaha-gá xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gá chi ta cùtnuní-gá iní-ndó nàcuáa ndùu cuendá-gá, te ducaⁿ ta cùtnuní tucu iní-ndó nchàa nacuáa ndùu cuendá Xítohó Jesucristú Yaá cúú Xítohó-ó.

Nàcuáa quide ñáyiú ndècu ichi Xítohó Jesucristú

³ Te Yá Ndiöxí ío càhnu cuu-gá chi chindee ñaha-gá xii-o quide ndáá-ó ndècu-o datná cuíni mée-gá, te ducaⁿ chi cùtnuní iní-ó nàcuáa sàni iní Xítohó Jesucristú Yaá ní cáháⁿ ñáhá xii-o. Te òré ní cáháⁿ ñáhá-gá xii-o te ní cutnùní iní-ó sá ío càhnu cuu-gá te ío váha quide-gá. ⁴ Te ducaⁿ ní cutnùní tucu iní-ó nàcuáa ní cáháⁿ-gá cada ñaha-gá xii-o, te tnúhu ní cáháⁿ-gá-áⁿ ío càhnu cuu-xi te ío váha, te nchoo ní sàndáá iní-ó tnúhu-áⁿ nùu xíáⁿ ñá túú-gá ndécú-ó ichi cuehé ichi duha te ni ñá túú-gá sání iní-ó càda-o nándi sá cuèhé sá dúhá, te ní cuu vii ní cuu váha iní-ó vitna. ⁵ Te sá dúcáⁿ quide-gá te xíáⁿ ío nducu ndèe-ndo cada-ndo nchaa nacuáa càháⁿ-í-a, te nchòhó sàndáá iní-ndó-gá dico ñá díú mèe-ni xíáⁿ chi tnàhá xíní ñuhu-xi cada ndáá-ndó cùndecu-ndo. Te núu quide ndáá-ndó ndècu-ndo te xíni ñuhu-xi tecú tnùní-ndó tnúhu-gá. ⁶ Te núu tècú tnùní-ndó te cùu-ndo ñáyiú xíní cotnⁿⁱ mee-xi, te núu cùu-ndo ñáyiú sàcòo tnⁿⁱ mee-xi te xíni ñuhu-xi cunduu cahnu iní-ndó cuèi nándi sá ná yàha-ndo

cùndecu-ndo, te núu càhnu iní-ndó te xíni ñuhu-xi cada ndáá-ndó cùndecu-ndo datná cuíni mée Yá Ndiöxí cada-ndo. ⁷ Te núu quide ndáá-ndó ndècu-ndo, te xíni ñuhu-xi ío cuu iní tnàhá ndí mee-ndo nacuáa ndècu-ndo ichi-gá, te núu cùu iní tnàhá ndí mee-ndo te xíni ñuhu-xi cuu iní-ndó nchàa dava-gá tnàha ñáyiú-ndo.

⁸ Te núu sa ducaⁿ quide-ndo ndecu-ndo te uuⁿ-gá cuita ducaⁿ càda-ndo quíhíⁿ núú cuàháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xíndecu, te cuita cutnùní-gá iní-ndó nchàa nacuáa sàni iní Xítohó Jesucristú quíhíⁿ. ⁹ Te nchaa ñáyiú ñá túú cuíni ducaⁿ càda cuú-yu ñáyiú ñá túú tnàhí ndíxi túu iní-xi sá Yá Ndiöxí sa ní ndada ndoo ní ndada nine-gá iní-yu cuendá nchaa sá cuèhé sá dúhá ní xóo cadá-yu, te ñáyiú-áⁿ cúú-yu dàtná ìⁿ ñáyiú cuáá àdi datná ìⁿ ñáyiú ñá túú cùtnuní váha núú-xi, te ducaⁿ sàtnahá-xi cùú-yu cuendá sá dúcáⁿ quidé-yu. ¹⁰ Te xíáⁿ nùu yúhú càháⁿ-í dóho nchaa nchòhó ñáyiú ndècu ichi Xítohó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndiöxí ní cáháⁿ ñáhá-gá xii-ndo, te ducaⁿ ní quide-gá chi ducaⁿ ní cachí-gá cada-gá. Te vá ìⁿ ndùu cani iní-ndó dàña-ndo ichi-gá, te núu vá dáñá ndèe-ndó càda-ndo nchaa nacuáa càháⁿ-í-a. ¹¹ Te núu ducaⁿ na càda-ndo cundecu-ndo, te ío vii ío váha cada Yá Ndiöxí queheⁿ cuendá ñáhá-gá xii-ndo òré ná sàá-ndó nùú ndécú Xítohó Jesucristú táxi tnùní-gá nchaa nduu nchaa quíú, te òu-ni Yaá-áⁿ cúú Xítohó-ó te ní dácàcu nihnu ñaha-gá xii-o núú ùhú núú ndàhú.

¹² Te ducaⁿ-ni quíhí-í dandàcu iní ñáhà-í xii-ndo nchàa tnúhu càháⁿ-í-a cuèi sa xíní-ndó tnúhu-áⁿ, te cuèi sàndáá váha iní-ndó nchàa tnúhu ndáá dácùaha-ndo. ¹³ Te yúhú quidé cuendá-í sá ío tàú-xi cáháⁿ-í dóho-ndo nìni ndecu-í ñuyíú-a cuendá sá vâ nàcuànaa-ndo nacuáa cada-ndo cùndecu-ndo. ¹⁴ Chi Xítohó Jesucristú ní cachí-gá sá ñá túú-gá vâi nduu cundecu-í ñuyíú-a te cuú-í. ¹⁵ Te ío nducu ndèe-í nducu-í nàcuáa cada-í cuendá quendóo ndíhi-ndo nchàa tnúhu càháⁿ-í-a, te cuèi na yàha cuú-í dico vá nàcuànaa-ndo cada-ndo nchaa nacuáa càháⁿ tnúhu sá dánèhé ñáhà-í xii-ndo vitna.

Cue téé ní xini núú sǎ ïo càhnu cuu Xítóhó Jesucristú

16 Te sa ní dánèhé ñáhá-ndí xii-ndo sǎ ïo càhnu cuu Xítóhó Jesucristú. Te ní cachí tnúhu tucu-ndí nàcuáa cada-gá òré quixi tucu-gá, te tnúhu-án cúú-xí tnúhu ndáá cuiti te ñá díú tnúhu sá ní sani iní cue ñáyiú ñuyíú-a cùu-xí, chi nchúhú ní xini núú-ndí nàcuáa ní quide-xi cùtnàhá ní cutnùní iní-ndí sǎ ïo càhnu cuu Xítóhó Jesucristú. 17 Chi dàvá-án ïo váha ní quide Tátá-ó Dútú Ndiöxí ní quide càhnu-gá Xítóhó Jesucristú, te diu-ni dàvá-án ní cáháⁿ Dútú Ndiöxí ndéé andiú ní xáhaⁿ-gǎ xii Xítóhó Jesucristú: “Yòhó cúú-n Dèhe-í téé ïo cùu iní-í, te ïo cùdí iní ñáhà-í xii-n”, duha ní xáhaⁿ Yá Ndiöxí xii Xítóhó Jesucristú. 18 Te nchúhú ní tecú dóho-ndí ní cáháⁿ Yá Ndiöxí ndéé andiú cùtnàhá ducaⁿ ní xáhaⁿ-gǎ xii Xítóhó Jesucristú, chi tnàhá-ndí ndécú-ndí ndíhi-gá yucu núú dúcáⁿ ní quide càhnu ñaha Yá Ndiöxí xii-gá.

19 Te ndècu ndíhi-o nchaa tnúhu ní cáháⁿ cue téé ní xóo cáháⁿ tnúhu Yá Ndiöxí ndéé sanaha te nchaa tnúhu-án cáháⁿ-xi nchaa nàcuáa cada-xi vitna, te cùtnuní iní-ó sǎ tnúhu ndáá cúú-xí, te xini ñuhu-xi cada cuendá váha-ndo nchaa nacuáa cáháⁿ tnúhu-án, chi tnúhu-án cúú-xí dàtná ìⁿ ñuhú dáyèhé-xi ndéé òré véxi túndaá quéné chòdíní cáhnú dáyehé-dí. Te ducaⁿ sátnahá-xi cùu tnúhu-án chi quide-xi nacuáa cutnùní iní-ó cuendá Xítóhó Jesucristú. 20 Te xini ñuhu-xi sǎ ïo-gá cada cuendá-ndó sǎ ñà túú ñáyiú tecú tnùní ní ìⁿ tnúhu sá ní chídó tnùní cue téé ní cáháⁿ tnúhu Yá Ndiöxí ndéé sanaha, te núu Yá Ndiöxí vá cádá-gǎ nàcuáa cutnùní iní-yu nàcuáa cáháⁿ nchaa tnúhu-án. 21 Te cue téé-án ïo ní xíndecu yíñùhu-güedé núú Yá Ndiöxí, te nchaa tnúhu sá ní cáháⁿ-güedé-án ñà túú cùu-xi tnúhu sá ní cahu iní méé-güedé, chi Espiritú Yá Ndiöxí ní dácáhu iní ñáhá-xí xii-güedé nàcuáa cunduu tnúhu cáháⁿ-güedé.

2

Cue téé càchí sǎ cáháⁿ tnúhu Yá Ndiöxí te ñá ndáá

1 Te ndéé sanduu chi ní xíndecu cue téé ní xóo dandàhú ñáhá xii ñáyiú isráel càchí sǎ cáháⁿ tnúhu Yá Ndiöxí te ñá

ndáá sǎ cáháⁿ-güedé tnúhu-gá, te diu-ni ducaⁿ tucu cundecu cue téé dandàhú ñáhá xii-ndo vitna, chi cachí-güedé sǎ cáháⁿ-güedé tnúhu Yá Ndiöxí te ñá ndáá. Te cue téé-án ïo yídáhu cáháⁿ-güedé, te nchaa tnúhu cáháⁿ-güedé-án dacuíta nihnu ñaha-xi xii-ndo te núu na tédóho-ndo, chi cue téé-án vǎ nñuu-güedé sǎ Xítóhó Jesucristú ní xíhí-gá cuendá-güedé. Te sǎ dúcáⁿ càda-güedé ïo-gá ndíhi dacuíta nihnu-güedé méé-güedé. 2 Te vǎi ñáyiú xínu iní-yu cadá-yu nándi sǎ cuèhé sǎ dúhá cuendá sǎ dúcáⁿ càda cue téé-án, te cuendá xíáⁿ ngóo ñáyiú cáháⁿ úhú-yu cuendá ichi Yá Ndiöxí. 3 Te mee-ni tnúhu sǎ ní cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sǎ cúú-xí tnúhu ndáá te ñá ndáá cuendá-ni sǎ cuáñaha-ndo díhúⁿ xii-güedé, chi diu-ni xíáⁿ tnàhí cuhuⁿ iní-güedé, dico Yá Ndiöxí sa ní cunaha ndècu túha-gá cuendá cada ndáá-gá cuèchi-güedé, te na sǎá nduu te cuíta nihnu duuⁿ-güedé, chi Yá Ndiöxí vá nàcuànaa-gá ìⁿ sǎ ní cachí-gá cada-gá.

4 Te Yá Ndiöxí ñá túú ní quide cahnu iní-gá sǎ ní quide cue espíritú ñá túú ní cuíní cada ndáá xínú cuèchi núú-gǎ ní cùu, chi ní dáquihíⁿ ñáhá-gǎ xii-xi ìⁿ xichi núú ïo ndòho-xi ndecu-xi, te xíáⁿ cundedí nihnu-xi ndéé sǎá nduu cuíta nihnu duuⁿ-ná-xi. 5 Te Yá Ndiöxí ñá túú ní quide cahnu tucu iní-gá nchaa sǎ ní quide ñáyiú ñuyíú díhna, chi dàvá-án ní dándáá-gǎ ndute ñuyíú ní cáhá nchaa ñáyiú ndècu ichi cuehé ichi duha te ìⁿ ddi-ni té Nòé ndíhi úsá-gá tucu cue ñáyiú cùu ndi mee-dé ní dácäcu nihnu-gá. Te té Nòé-án cúú-dé téé ní cáháⁿ dóho-yu nàcuáa cada váha-yu cundecú-yu ní cùu te ñá túú ní cuíní-yu. 6 Te Yá Ndiöxí ní dǎngává-gǎ ñuhú ní dánáá-gǎ ñáyiú ñuú Sòdomá ndíhi ñáyiú ñuú Gòmorrá te mee-nǎ yáá ní nduu ñuú-án. Te sǎ dúcáⁿ ní cuu xíáⁿ cùtnùní iní-ó nàcuáa cada ñaha Yá Ndiöxí xii nchaa ñáyiú ñá túú quide váha. 7 Dico té Lót téé ní quide ndáá ní xíndecu ìⁿ ñuú-án dàvá-án chi ní dácäcu nihnu ñaha-gǎ xii-dé. Te nchaa ñáyiú ñuú núú ní xíndecu-dé-án ïo ní xínduu cuihna iní-yu, te mee-ni ichi díí iní ní xíndecú-yu, te sǎ dúcáⁿ ní xóo cadá-yu xíáⁿ ïo ní ndíhú iní té Lót. 8 Te

ɛ̃n nduu ɛ̃n nduu ní xóo cada ndàhú-xi iní té Lõt-án cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndìhi cuendá nchaa sá cuèhé sá dúhá n̄ xóo cadá-yu ní xóo quini-dé, te mee-dé ní cuu-dé ɛ̃n téé ní xínduu vii ní xínduu váha iní-xi núú Yá Ndiõxí. ⁹ Te sá dúcáⁿ n̄ yáha té Nõé ndìhi té Lõt, xíáⁿ cútnùní iní-ó sá Yá Ndiõxí ío chindee-gá cue ñáyiú quide ndáá ndécú ìchi-gá cuendá sá v̄ cáda-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiõxí càchí-gá sá ncháá ñáyiú ndècu ìchi cuehé ìchi duha sa ndècu túha-yu sá quihíⁿ-yu núú ùhú núú ndàhú nduu nà yáha cundáá cuèchi-yu.

¹⁰ Te uuⁿ-gá cada ñaha Yá Ndiõxí xii nchaa cue téé ndècu ìchi díí iní, te dàquee tíhú-güedé nchaa tnúhu sá sánú ìchi ñaha xii-o nacuaá cada-o cùndecu-o, te cù-güedé cue téé ñí iní-xi, te yí iní-güedé, te ñá túú yùhú-güedé cáháⁿ úhú-güedé cuendá nchaa espíritú cùnù. ¹¹ Te cue espíritú xínú cuèchi núú Yá Ndiõxí ío cùnù-xi dacúxí cuè téé-án, dico ñá túú cù^yɛ̃-xi cáháⁿ-xi dàtná càháⁿ cue téé-án òré ndàcáⁿ cuèchi-xi núú Yá Ndiõxí cuendá nchaa sá quidé cuè espíritú cùndìhi yucu ñáváha.

¹² Te nchaa cue téé dandàhú ñáhá xii-ndo-án cúú-güedé dàtná cue quiti, chi cue quiti-án ñá túú ndècu sá xìní tnùnì-güedi, chi cue quiti-án n̄ cacu-güedi sá tníí-ó-güedi te cahni-o-güedi. Te ducaⁿ sätnahá-xi cùu nchaa cue téé-án, chi càháⁿ cuèhé-güedé cuendá ndédani càa espíritú cuèi ñá túú xìnì-güedé ná espíritú cúú-xí, te d̄i^u-ni mee-güedé dácuíta nihnu-güedé méé-güedé sá dúcáⁿ quide-güedé, ¹³ te sáá nduu te nacháhu-güedé nchaa sá quidé-güedé-án, te cuèi nduu cuèi niú cúdíí iní-güedé quidé-güedé nchaa núú sá cuèhé sá dúhá sàni iní-güedé. Te òré nàtacá-ndó càda-ndo ɛ̃n vico chiñuhu-ndo Yá Ndiõxí te chitnahá ñáhá-güedé xii-ndo, te cada dusaⁿ-güedé sá cúdíí iní-güedé sá dándàhú ñáhá-güedé xii-ndo, te dicó sácáⁿnúú cuáha ñaha-güedé xii-ndo dùcaⁿ na cada-güedé.

¹⁴ Te nchaa cue téé-án òré xìnì-güedé ɛ̃n ñáyiú d̄ihí te ndìhi-ni sàni iní-güedé cáháⁿ ndìhi ñaha-güedé xii-yu, te ñá túú ndùu vétú iní-güedé cuendá nchaa sá cuèhé sá

dúhá quide-güedé chi uuⁿ-gá uuⁿ-gá sání iní-güedé cada-güedé. Te cuáháⁿ-güedé dándàhú-güedé nchaa ñáyiú ñá túú nihí ndéé càda ndáá cuendá canchicúⁿ nihnú-yu nchaa tnúhu càháⁿ-güedé. Te mee-ni ncháa sá ndécú ndìhi tnahá ñáyiú-güedé cúú iní-güedé, te cue téé-án cúú-güedé cue téé duuⁿ duuⁿ sa ní xíta nihnu núú Yá Ndiõxí. ¹⁵ Chi cùu-güedé cue téé v̄ cáni-gá iní-xi cada ndáá, te nchicúⁿ nihnu-ná-güedé quidé-güedé nàcuáa ní xóo cada ndíi Bàlaám déhe ndíi Bèór, chi ndíi Bàlaám-án n̄ xóo tnahá iní ndíi cada ndíi chiúⁿ cuehé nàcuáa ní xóo níhí ndíi díhúⁿ. ¹⁶ Te Yá Ndiõxí ní quide-gá ní cáháⁿ búrru ndíi ní tenáá ñáhá-dí xii ndíi cuendá sá v̄ cáda ndíi ɛ̃n cuèchi sàni iní ndíi cada ndíi ni cùu. Te sá dúcáⁿ n̄ cuu xíáⁿ ní nguítuu ndíi ñá túú ní quide ndíi ɛ̃n sá ñá túú nàndìhi sàni iní ndíi ni cùu.

¹⁷ Te nchaa cue téé ducaⁿ x̄iquide cùu-güedé dàtná ɛ̃n doco yìchí, te cùu tucu-güedé dàtná ɛ̃n vícò sá xídó tàchí te ñá túú d̄au nchídó-xí, te sa ndècu túha ɛ̃n xichi núú ìo nee quihíⁿ-güedé cundecu-güedé ni caa ni quihíⁿ. ¹⁸ Te cue téé-án càháⁿ-güedé dàtná càháⁿ ɛ̃n téé ío cùu cahnu dico ñá túú vèdana nàndìhi nchaa tnúhu càháⁿ-güedé, te cue téé-án dándàhú-güedé nchaa ñáyiú íchí n̄ dáñá ìchi cuehé ìchi duha, te x̄ahaⁿ-güedé xii-yu sá cúú-ní càda-yu nchaa sá cuèhé sá dúhá quide nchaa ñáyiú ndècu ìchi díí iní, ¹⁹ te x̄ahaⁿ tucu-güedé sá cúú-ní càda-yu náni véxi iní-yu cuèi sá v̄aha te cuèi sá cuèhé, dico mee-güedé chi mee-ni sá cuèhé sá dúhá cùnùu quide-güedé. Te nchaa ñáyiú ñá ndácú dàña nándi sá cuèhé sá dúhá cúú-yu dàtná ɛ̃n ñáyiú xinu cuechi ñá túú tnàhí dàñá quee núú chíúⁿ pàtróoⁿ-xi. Te ducaⁿ sätnahá-xi cùu-yu chi ñá ndácú-yu dàñá-yu nándi sá cuèhé sá dúhá quidé-yu. ²⁰ Te núu ñáyiú sa ní dáñá ncháa ìchi cuehé ìchi duha cuendá sá n̄ cútnùní iní-yu nàcuáa ndùu tnúhu Xitohó Jesucristú, Yáá ní dácácu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ìchi cuèhé ìchi duha, te mee-ná sá cuèhé sá dúhá tàxi tnuní ñáhá-xí xii-yu, te núu ducaⁿ te v̄a-gá tucu cadá-yu dácúxí dàtná ní xóo cadá-yu cútnahá vátá cútnùní-gá iní-yu nàcuáa ndùu tnúhu-gá.

21 Te váha-gá sá vǎ ngǔnu ichí-yu ichi ndáá ní cùu te ñá díú sǎ sà ní ngúnu ichí-yu te ní dáñǎ-yu nchaa tnúhu-gá sá sà ní níhí-yu ndècu ndihí-yu sànu ichi ñaha-xi nacuáa cundecú-yu ní cùu. 22 Te ñáiyu ducaⁿ xǐquide quèe ndáá-xi nàcuáa cuáháⁿ ñⁿ cuèndú sá cǎchí-xi: “Iná ní nacaxi-dí sá ñí ndusaⁿ-dí, te cùchí quítí ichí ní xichi ndute cãndoo cuáháⁿ-ni tucu-dí cuchi ñuhu-dí núu ndèhyú”, duha cuáháⁿ cuèndú-áⁿ.

3

Xítohó Jesucristú quixi tucu-gá

1 Te nchaa nchòhó ñáiyu ío cùu iní-í cùtnuní iní-í sá ío váha sàni iní-ndó, te xéhé cúu-xí tütú cúu úu cǎdúha-í sá cúu-xí-ndó, te ñⁿ-ni cǎháⁿ-í dándàcu iní ñáhà-í xii-ndo nchàa tnúhu sá sà ní xíndedóho-ndo. 2 Chi cuíní-í sá vǎ nàcuánaa-ndo nchaa tnúhu ní cǎháⁿ nchaa cue tée ní xóo cǎháⁿ tnúhu Yá Ndiöxí ndéé sanaha, te ní vǎ nàcuánaa-ndo nchaa tnúhu ní cǎháⁿ cue tée ní cǎháⁿ tnúhu Xítohó Jesucristú Yaá ní dǎcǎcu níhnu ñaha xii-o núu úhú núu ndáhú, chi díu nchaa tnúhu-áⁿ sánú ichi ñaha-xi xii-o nacuáa cada-o cùndecu-o.

3 Te ío-gá xíní ñuhu-xi cutnuní iní-ndó nàcuáa cada-xi òré vátá sǎá-gá nduu quixi tucu Xítohó Jesucristú ñuyíú-a, te cǎchí tnúhu-í xii-ndo sǎ cùndècu ñáiyu cuhuⁿ iní mee-ni nchàa sá cuéhé sá dúhá te mee-ni xiǎⁿ cadá-yu, te cǎháⁿ cuéhé cǎháⁿ duhá-yu cuèndá tnúhu Yá Ndiöxí. 4 Te cachí-yu: “Ñá ndáá sá quixí Xítohó Jesucristú ñuyíú-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna díu-ni duha ní quesaha-xi quide-xi ndéé cùtnàhá ní ngáva ñuyíú, te díu-ni duha quide-xi ndéé cùtnàhá ní xíndecu cue ñaní tnáhá-ó ndéé sanaha, te díu-ni duha quide-xi ndéé ní sǎá nduu ní xihí-güedé, te díu-ni duha quide-xi ndéé vitna”, duha cǎháⁿ-yu. 5 Te ñucùuⁿ cadá-yu vá cadá cuèndá-yu sá Yá Ndiöxí ní cǎháⁿ-gá te ní ngúndecu andíu ndihí ñuyíú-a, te díu-gá ní quide ní quene ñuhu yìchí xítí ndute ní ngúndecu-xi ñⁿ xio. 6 Te ñⁿ xito ní dándáá Yá Ndiöxí ndute ñuyíú-a ní dánáá-gǎ nchaa sá ío. 7 Te Yá Ndiöxí ní cachí-gá sá cùndècu-ni ñuyíú-a ndihí andíu ndéé ná sǎá nduu cadá-gá nchaa nàcuáa ní cǎháⁿ-gá sá cúu-xí

nchàa ñáiyu ndècu ichi cuéhé ichi duha, te dàvá-áⁿ danàa-gá nchaa ñáiyu-áⁿ chi cáyú andíu ndihí ñuyíú-a.

8 Te nchaa nchòhó ñáiyu ío cùu iní-í, ío cuhuⁿ iní-ndó tnúhu na cǎháⁿ-í-a, chi Yá Ndiöxí ñá túu sàni iní-gá dàtná sání iní mée-ó, te ñⁿ nduu cùu-xi datná úxí cièndú cuíá, te úxí cièndú cuíá-áⁿ cúu-xí dàtná ñⁿ nduu sá cúu-xí-gǎ. 9 Te Yá Ndiöxí ñá túu dàna ndodo iní-gá vá cadá-gǎ ñⁿ sá cǎháⁿ-gá dàtná cǎchí cue ñáiyu sá dáná ndòdo iní-gá cada-gá ñⁿ sá cǎháⁿ-gá, chi ñucùuⁿ tnahí dǎcaca-gá nduu cuèndá sá ío cùndahú iní ñáhá-gǎ xii-o, te cuíní-gá sá nchàá ñáiyu ndixi túu iní-yu sá ñá túu quide váha-yu ndècú-yu te tuhá-yu ichi-gá, te ducaⁿ quide-gá chi cuíní-gá sá vǎ cuíta nihnu ní ñⁿ-yu.

10 Te dàtná quidé cue ñadúhú quíhu-güedé ñⁿ vehe dùhu-güedé òré ñá túu yìhí iní xítohó vehe-áⁿ, te ducaⁿ cada Xítohó Jesucristú chi nduu ñá túu yìhí iní ñáiyu ñuyíú-a quixi tucu-gá, te dàvá-áⁿ cada-xi andíu dàtná quidé-xí òré níhi víhi cǎháⁿ ñuhu, te díu-ni òré-áⁿ ndoñuhu àndíu, te cáyú nchaa chódíní, te cáyú tucu tnàhá ñuyíú-a ndihí nchaa sá ío.

11 Te vitna nchòhó sa xíní-ndó sǎ náá ñuyíú-a te xiǎⁿ ío xíní ñuhu-xi cada váha-ndo cùndecu-ndo, te cada-ndo nàcuáa cuíní mée Yá Ndiöxí cunduu. 12 Te ío nducu ndèe-ndo ducaⁿ cada-ndo cuèndá ducaⁿ ndihí-ni sǎá nduu cadá-gá nchaa nàcuáa cǎháⁿ-gá, te ducaⁿ nchòhó cundecu túha-ndo sǎá nduu-áⁿ. Te díu-ni nduu-áⁿ ndoñuhu àndíu chi cáyú-xi, te díu-ni ducaⁿ ndòñuhu tucu nchaa chódíní chi ndihí-dí cáyú. 13 Te nchoo ndètu-o sǎá nduu cùndecu-o ñⁿ ñuyíú sǎá, te quíní-ó ñⁿ andíu saa datná ní cachí Yá Ndiöxí, te yàcáⁿ chi mee-nǎ cue ñáiyu quide váha cundecu.

14 Te nchòhó ñáiyu ío cùu iní-í, níni ndètu-ndo sǎá nduu dùcaⁿ cada-xi ío nducu ndèe-ndo cada-ndo mee-ni sá váha cundecu-ndo ichi Yá Ndiöxí, te cundecu nahi-ndo, te cada-ndo nchàa nacuáa vá cùndècu cuéchi-ndo núu-gǎ. 15 Te ío cada cuèndá-ndó sǎ dǎcaca-gá nduu dùcaⁿ cada-gá chi cuíní-gá sá nchàá ñáiyu naníhí tǎhú-yu. Te té Pǎblú tée ío cùu iní-ó ndècu ndihí-o ichi Xítohó Jesucristú díu-ni nàcuáa

càháⁿ-í-a ðiu-ni ducaⁿ ñí tee-dé ìⁿ núú tütú ní dáquíxí-dě ndaha-ndo, te ní tee-dé nàcuáa ní dácáhu íní ñáhá Yá Ndiǒxí xii-dé. ¹⁶ Te ðiu-ni ducaⁿ càháⁿ-dé nchaa dava-gá núú tütú cádũha-dé, te dava tnúhu càháⁿ-dé ío úhú tecú tnùní-ó, núú xíáⁿ ñáyíu ñá túú cùtnuní váha íní-xi, ñáyíu ío yáchí sàndáá íní-xi ìⁿ tnúhu, ñáyíu-áⁿ tècú tnùní dátñí-yu nchaa tnúhu ní chídó tnùní-dé, ndíhi nchaa dava-gá tnúhu yòdo tnuní núú tütú Yá Ndiǒxí, te sá dúcáⁿ quidé-yu te dacuíta nihnú-yu mèé-yu.

¹⁷ Te nchòhó ñáyíu ío cùu íní-í, sa cùtnuní íní-ndó nàcuáa quide dava ñáyíu, núú xíáⁿ ío xìni ñuhu-xi quíhi íní-ndó cùndecu-ndo cuendá ducaⁿ cùndecu-ni-ndo ichi-gá, te vá dáñá-ndó mèe-ndo dandahú ñáhá nchaa cue téé ndècu ichi cuehé ichi duha, chí cue téé-áⁿ ñà túú sàni váha íní-güedé cuendá tnúhu Yá Ndiǒxí. Te núú na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ìchi-gá dàtná ndécú-ndó vitna. ¹⁸ Te nchòhó uuⁿ-gá uuⁿ-gá cuita cutnùní-gá íní-ndó quíhíⁿ nchaa nàcuáa ta chìndee ñaha Xítóhó Jesucristú xii-ndo cuáháⁿ. Te ducaⁿ ìo-gá cuita cutnùní íní-ndó nchàa nacuáa sàni íní-gá, te ðiu-gá cúú-gá Yaá ní dácácu nihnu ñaha xì-o núú ùhú núú ndàhú. Te chí ná càchí-ó sá ìo càhnu cuu-gá cuéi vitna té cuéi ndéé núú cuáháⁿ núú vèxi. Te ducaⁿ na cùnduu. Te ío chí cáda ndèe íní-ñá vitna.

TUTÚ DÍHNA NÍ CADÚHA TÉ JUÀÁ

Tnúhu sá cãháⁿ nãcuáa naníhí tãhú-ó

¹ Te yúhú té Juàá cãchí tnúhu-í xii-ndo cuendá Crìstú Yá cãháⁿ nãcuáa cundecu ndíhi-o Yã Ndiöxí. Te Crìstú-áⁿ sa ndècu-gá ndéé cútñahá ní ngáva ñuyúú. Te yúhú ní xiní núu-í ndíhi cue téé ní xica cuu ndíhi-í nãcuáa càa nacuáa ndùu-gá. Te ní xíndedóho-ndí tnúhu ní cãháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúú-gã. ² Te ní quixi túu-gá ñuyúú-a, te ní xiní-ndí-gá, te xiãⁿ cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gá ndíhi Tãtá-gã Dútú Ndiöxí ní cùu, te ní quixi-gá ñuyúú-a ní xíndecu-ndí ndíhi-gá. Te ní cachí tnúhu-gá xii-ndí sá ndúú tãhú-ó cundecu ndíhi-o Yá Ndiöxí ní caa ní quíhíⁿ te núu na quíndáá iní-ó-gã. ³ Te xiãⁿ dátúu-ndí núu-ndó nchàa sá ñí xiní-ndí, ndíhi nchaa sá ñí xíndedóho-ndí cuendá cuu ñⁿnuu-o nchàa-o datná nchúhú cúú ñⁿnuu-ndí ndíhi Tãtá-ó Dútú Ndiöxí, ndíhi Déhe-gá Xítohó Jesucrìstú. ⁴ Te xiãⁿ núu tèe-í nchaa tnúhu-a cuendá cudí iní-ó nchàa-o.

Yá Ndiöxí cúú-gã datná ñⁿ ñuhú

⁵ Te nchaa tnúhu ní dánèhé ñáhá Xítohó Jesucrìstú xii-ndí, xiãⁿ dánèhé ñáhà-í xii-ndo. Te ní cachí-gá sá Yã Ndiöxí cúú-gã datná ñⁿ ñuhú dáyèhé-gá iní-ó, te ducaⁿ sãtnahá-xi cùu-gá chi ío váha quide-gá, te ñá túú quide-gá ní ñⁿ sá cuèhé sá dúhá. ⁶ Te núu cãchí-ó sã ndécú-ó ìchi Yá Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núú-gã. ⁷ Te núu na càda váha-o datná quidé mèe-gá, te cuu ñⁿnuu-o nchàa-o. Te ndada ndoo ndada nine-gá iní-ó, chi cada cãhnu iní-gá nchaa sá cuèhé sá dúhá quide-o, chi ñⁿ cuendá-áⁿ ñí xíhí Déhe-gá Xítohó Jesucrìstú núú cùrúxí.

⁸ Te núu cãchí-ó sã ñà túú quide-o ní ñⁿ sá cuèhé sá dúhá, te dãndahú-ó mèe-o, te ñá túú quide ndáá-ó núú Yã Ndiöxí.

⁹ Te núu na nãhmá-ó nchàa yíca cuèchi-o

núú-gã, te mee-gã cada cãhnu iní-gá, te ndada ndoo-gá iní-ó, cuendá cada ndáá-ó cundecu-o ìchi-gá, chi mee-gã ío váha quide-gá te ío ndáá quidé-gã, ducaⁿ ñí cãháⁿ-gá te ducaⁿ quide-gá. ¹⁰ Te núu na cãchí-ó sã ñà túú quide-o ní ñⁿ sá cuèhé sá dúhá, te quide-o Yá Ndiöxí ñⁿ ñãndéhné, dico ñá túú ndèhné-gá. Te ñá túú ndècu tnúhu-gá iní-ó te núu ducaⁿ na càda-o.

2

Xítohó Jesucrìstú cãháⁿ ndàhú-gá cuendá-ó

¹ Te nchòhó ñáyiu cùu datná déhe-í, chido tnuní-í nchaa tnúhu-a cuendá sá vã cáda-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nãndí sá cuèhé sá dúhá, te ndècu ñⁿ Yá cãháⁿ ndàhú cuendá-ó núú Yã Ndiöxí. Te Yá-áⁿ cúú-gã Xítohó Jesucrìstú Yáá quidé ndáá. ² Te ní xíhí-gá sá cuendá nchaa yíca cuèchi-o cuendá ngúndecu váha-o núú-gã te núu na quíndáá iní-ó-gã. Te ñá díú-ní sã cuendá yíca cuèchi nchoo ñí xíhí-gá, chi tñahá cuendá nchaa yíca cuèchi ñáyiu ní càa xico ñuyúú.

³ Te núu cada-o nchàa nacuáa cãháⁿ Yã Ndiöxí, te cutnùní iní-ó sã ndécú-ó ìchi-gá. ⁴ Te núu cãchí-ó sã ndécú-ó ìchi-gá te ñá túú quide-o nacuáa cãháⁿ-gá, te dàcuandehnde-o, te ñá túú quide ndáá-ó núú-gã. ⁵ Te núu sãndáá ndisa iní-ó tnúhu-gá, te quide-o nchaa nacuáa cãháⁿ-gá, te ducaⁿ te cùu iní ndisa-o-gã, te cùtnuní ndáá iní-ó sã ndécú-ó ìchi-gá. ⁶ Te núu cãchí-ó sã ndécú-ó ìchi Yá Ndiöxí, te xini ñuhú-xi cada ndáá-ó cundecu-o ñuyúú-a datná ní quide ndáá Xítohó Jesucrìstú cútñahá ní xíndecu-gá ñuyúú-a.

Ndudú sáá

⁷ Te nchòhó ñáyiu ndècu ndíhi-í ìchi Xítohó Jesucrìstú, ñá túú chido tnuní-í ñⁿ tnúhu saa sã cúú-xí-ndó, chi ñⁿ ni tnúhu sá ñí ngúndecu ndíhi-ndo ndéé díhna, tnúhu ní xíndedóho-ndo ndéé cútñahá ní sãndáá iní-ndó-gã, xiãⁿ chídó tnùní-í. ⁸ Te tnúhu-a cùu-xi datná ñⁿ tnúhu saa tèe-í dãndacu iní ñáhà-í xii-ndo nãcuáa ní quide Xítohó Jesucrìstú cútñahá ní quixi-gá ñuyúú-a ní quide váha-gá, te tñahá nchòhó ní tnúu-ndo tnúhu-gá te quide váha-ndo tñahá-ndó. Te

vitna ìⁿ nduu ìⁿ nduu ta cùu vai ñáyiu ta dàña nchaa sá cuèhé sá dúhá cuáháⁿ, chi Xítohó Jesucristú tá dándixi túu-gá iní-yu cuendá cutnùní iní-yu nàcuáa nduu cuendá Yá Ndiöxí.

⁹ Te núu càchí-ó sã quidé vâha-o, te cùu úhú iní-ó tnàha ñáyiu-o, te xíãⁿ ñá túú quide ndáá-ó, chi ndècu-ni-o ichi cuehé ichi duha sá dúcáⁿ quide-o. ¹⁰ Te núu na cùu iní-ó tnàha ñáyiu-o datná cúu ìní ñáhá mèe Yá Ndiöxí xii-o ña, te quide ndáá-ó núú-gã, te vá cánúichi-o tnaha ñáyiu-o ìⁿ ichi cuehé ichi duha. ¹¹ Te núu cùu úhú iní-ó tnàha ñáyiu-o, te ñá túú quide vâha-o núú Yá Ndiöxí, chi ndècu-ni-o ichi cuehé ichi duha, te ñá túú cùtnuní iní-ó sã quidé-ó. Chi cùu-o datná ìⁿ tée ndècu núú néé chi ñá cùtnùní núú-dě ndèé ichi quíhíⁿ-dé. Ducaⁿ sãtnahá-xi cùu nchoo chi ñá cùtnùní iní-ó ndèé ichi quíhíⁿ-ó te núu ducaⁿ na càda-o cuu úhú iní-ó tnàha ñáyiu-o.

¹² Te nchòhó ñáyiu cùu datná déhe-í, yúhú chídó tnùní-í tnúhu-a ìⁿ núú tùtú càchí tnúhu-í xii-ndo sã ñí quide càhnu iní Yá Ndiöxí nchaa cuéchi-ndo, chi ñíu cuendá-áⁿ ñí xíhí Xítohó Jesucristú. ¹³ Te nchòhó ñáyiu sacuéhé, yúhú téè-í tnúhu-a sá cúu-xi-ndó chi càháⁿ ndihí-ndo Jèsús, te Yaá-áⁿ sa ndècu-gá ndéé cùtnahá ní ngáva ñuyíú. Te nchòhó ñáyiu nchícúⁿ-gá téé tucu-í tnúhu-a sá cúu-xi-ndó chi ñá túú sàndáá iní-ndó tnúhu càháⁿ yucu ñávâha.

Te nchaa nchòhó ñáyiu cùu datná déhe-í, tèe tucu-í tnúhu-a sá cúu-xi-ndó, chi sa càháⁿ ndihí-ndo Tãtã-ó Dütú Ndiöxí. ¹⁴ Te nchòhó ñáyiu ñí sãhnu, yúhú chídó tnùní-í tnúhu-a ìⁿ núú tùtú chi càháⁿ ndihí-ndo Jèsús, te Yaá-áⁿ sa ndècu-gá ndéé cùtnahá ní ngáva ñuyíú. Te nchòhó ñáyiu nchícúⁿ-gá, yúhú chídó tnùní-í tnúhu-a chi ío ñíhí ndéé-ndó ndècu-ndo, chi tnì-ndo tnúhu càháⁿ Yá Ndiöxí. Te ñá túú sàndáá iní-ndó tnúhu càháⁿ yucu ñávâha.

¹⁵ Te vá cùhúⁿ iní-ndó ñí ìⁿ sá cuèhé sá dúhá ío ñuyíú-a, te ñí vã cání ìní-ndó càda-ndo. Chi núu na cùhuⁿ iní-ó nchàa sá cuèhé sá dúhá ío ñuyíú-a ña, te ñá túú Tãtã-ó Dütú Ndiöxí ñúhú iní-ó te núu ducaⁿ na càni iní-ó. ¹⁶ Te nchaa ñáyiu ñuyíú-a quidé-yu nchaa sá cuèhé sá dúhá, chi ñíu nchaa xíãⁿ cúdíⁿ iní-yu cadá-yu. Te nchaa sá cuèhé sá dúhá sàni iní-yu, ndihí nchaa

sá xíní-yu quidé-yu. Te xíquide nínu-yu mèe-yu cuendá nchaa sá ndécú ndihí-yu. Te nchaa sá ñá túú vâha ní cacu nihnu-xi ñuyíú-a. ¹⁷ Te nchaa sá ñá túú vâha ío ñuyíú-a, ndihí nchaa sá sání cuèhé sání dùha iní-yu cuita ndihí nihnu-xi quíhíⁿ. Te nchaa ñáyiu tnì tnúhu càháⁿ Yá Ndiöxí cundécú-yu ndihí-gá ñí caa ñí quíhíⁿ.

Tnúhu ndáá tnúhu Yá Ndiöxí ndihí tnúhu ndehnde

¹⁸ Te nchòhó ñáyiu cùu datná déhe-í, sa ñíhí-ndó tnúhu sá quíxí ìⁿ tée cunuu-gã-dé cuu úhú iní-dé Cristú. Te sa xíndecu-gá ñáyiu cùu úhú iní ñáhá xii-gá, núu xíãⁿ cùtnùní iní-ó sã sã ta cuyatni nduu naa ñuyíú-a. ¹⁹ Te ñáyiu-áⁿ ñí xíndecu ndihí ñáhá-yu xii-o, te ñí queé-yu cuáháⁿ-yu chi ñá túú ní cùu ìⁿnuu-o ndihí-yu. Chi núu dícó ní cùu ìⁿnuu-o ndihí-yu te cundecu ndihí ñáhá-yu xii-o ñí cùu. Te duha ní cuu cuendá cutnùní ndáá iní-ó nchàa-o sá ñá túú cùu ìⁿnuu-o ndihí-yu, chi ñá túú sàndáá iní-yu Yá Ndiöxí.

²⁰ Te Xítohó Jesucristú ní taxi-gá Espíritú Yá Ndiöxí ndécú ndihí-o, núu xíãⁿ tècú tnùní-ó tnúhu-gá. ²¹ Te cuendá sá xíní-ndó tnúhu ndáá tnúhu Yá Ndiöxí núu xíãⁿ téè-í tnúhu-a, te ñá díú ìⁿ sá ñá cùtnùní iní-ndó cùu-xi. Te sa nàha-ndo sá ñí ìⁿ tnúhu ndehnde ñá túú ñùtnahá-xi núú tnúhu Yá Ndiöxí, chi mee ñíne-ñí tnúhu ndáá cúu-xí.

²² Te nchaa ñáyiu càchí sá ñá díú Jèsús cúu Cristú Yaá ní tendaha Yá Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te ñíu-ní-yu càchí-yu sá ñá díú Dèhe Yá Ndiöxí cúu Jèsús, te sá dúcáⁿ quidé-yu te cùu úhú iní-yu Yá Ndiöxí ndihí Déhe-gá Jèsús. ²³ Te nchaa ñáyiu ñá túú sàndáá iní sá Dèhe Yá Ndiöxí cúu Jèsús, ñáyiu-áⁿ ñá túú ndécú-yu ichi Tãtã-ó Dütú Ndiöxí. Te nchaa ñáyiu càháⁿ sá Dèhe Yá Ndiöxí cúu Jèsús, ñáyiu-áⁿ ndécú-yu ichi Tãtã-ó Dütú Ndiöxí.

²⁴ Te nchaa tnúhu Yá Ndiöxí ní tecú dóho-ndo ndèé díhna, tnúhu-áⁿ cuhuⁿ iní-ndó. Te núu nchaa tnúhu-áⁿ ná cùhuⁿ-ñí iní-ndó, te cundecu ndihí-ndo Yá Ndiöxí ndihí Déhe-gá cuèí vá cùndecu túu-ndo ndihí-gá ñuyíú-a. ²⁵ Te Jèsús ní cachí-gá sá ndúú tãhú-ó cundecu ndihí-o-gá ñí caa ñí quíhíⁿ andíu.

26 Te cuendá nchaa ñáyiú dándahú ñáhá xii-ndo ní chídó tnùn-í tnúhu-a, 27 dico nchòhó chi ndècu ndíhi-ndo Espíritú Yá Ndiöxí sá ñí taxi Xítohó Jesucristú. Núu xiáⁿ ñá túú xini ñuhu-ndo ñáyiú danèhé ñáhá xii-ndo, chi mee Espíritú-gá dánèhé ñáhá-xí nchàa sá vâha. Te nchaa sá dánèhé ñáhá-xí xii-ndo cuu-xi sá ndàá, te ñá díú ñⁿ tnúhu ndehnde. Te vitna chí cáncñícúⁿ nihnu-ni ichi Yá Ndiöxí dàtná ní sanu ichi ñaha mée Espíritú-gá xii-ndo.

28 Te nchòhó ñáyiú cùu datná déhe-í, chí cáncñícúⁿ nihnu-ni ichi Xítohó Jesucristú, chi cuendá òré ná quíxi tucu-gá ñuyíú-a te vá yùhú-ndó te ñí vá cúú càhaⁿ núú-ndó núú-gã. 29 Te nchòhó sa nâha-ndo sá mée-gã quidé ndàá-gã, te sa xini-ndó sã ncháá ñáyiú quide ndàá cúú-yu déhe Yá Ndiöxí.

3

Ñáyiú cùu déhe Yá Ndiöxí

1 Te chí cuâha cuendá sá ño cùu iní ñáhá Tãtã-ó Dütú Ndiöxí xii-o cuendá sá cúú-ó déhe-gã, chí ducaⁿ ñí cachí-gã, te déhe ndisa-gã cúú-ó. Te núu xiáⁿ ñáyiú ndècu ichi cuehé ichi duha ñá cúú quini ñáhã-yu xii-o, chí ñá túú xini-yu nâcuâa ndùu cuendá Yá Ndiöxí. 2 Te nchòhó ñáyiú ío cùu iní-í, vitna cùu-o déhe Yá Ndiöxí, te vátá cùtnuní váha-gã iní-ó nâsa cunduu-o ndèé núú cuáhãⁿ núú vëxi. Dico sa cùtnuní iní-ó sã òré ná quíxi tucu Xítohó Jesucristú te nduu-o dàtná cáá mée-gã, chí quini-ó-gã nâcuâa-ni càa nâcuâa-ni ndùu-gã. 3 Te nchaa ñáyiú sa ndètu ñaha xii-gã sa ta ngündecu túha-yu cuáhãⁿ, chí ta ndùu ndoo nduu nine iní-yu cuáhãⁿ dàtná cáá ndòo caa nine mee-gã.

4 Te nchaa ñáyiú quide nándi sá cuehé sá dúhá ñá túú quide váha-yu núú Yá Ndiöxí, chí ní cachí-gã sá vã dúcãⁿ càda-o. 5 Te sa nâha-ndo sá ñí quíxi túu Xítohó Jesucristú ñuyíú-a cuendá cada càhnu iní-gã nchaa sá cuehé sá dúhá quide-o, chí mee-gã ñá túú quide-gã ñí ñⁿ sá cuehé sá dúhá. 6 Te nchaa ñáyiú ndècu ichi Yá Ndiöxí ñá túú ñùhú-yu ichi cuehé ichi duha. Te nchaa ñáyiú ñùhu ichi cuehé ichi duha ñá túú xini-yu nâcuâa ndùu cuendá Xítohó Jesucristú te ñí ñá túú xini-yu nása càa-gã. 7 Te nchòhó ñáyiú cùu datná déhe-í, vá dáñá-ndó mée-ndo

dándahú ñáhá ñáyiú ndècu ichi cuehé ichi duha, chí càchí-yu sá cúú cùndecu-o ichi Yá Ndiöxí te cada-o nándi sá cuehé sá dúhá dico ñá ndàá. Te nchaa ñáyiú quide váha quide ndàá-yu dàtná quidé mée Jesús. 8 Te nchaa ñáyiú ndècu ichi cuehé ichi duha ndècu ndíhi-yu yucu ñávãha, chí ducaⁿ quide mee-xi ndéé cùtnáhá vátá ngãva-gã ñuyíú. Te xiáⁿ ní quíxi Jèsús Déhe Yá Ndiöxí ní dáquée tñhú-gã nchaa sá quidé yucu ñávãha.

9 Te nchaa ñáyiú ní natuha ichi Yá Ndiöxí ní nduú-yu déhe-gã, te ñá túú-gã quidè-yu nándi sá cuehé sá dúhá chí ní ndada ndoo ní ndada nine-gã iní-yu. Núu xiáⁿ ñá túú-gã quidè-yu nándi sá cuehé sá dúhá, chí ní ngündecu ndíhi ñaha-gã xií-yu. 10 Te cùtnuní iní-ó nándi cùu ñáyiú cùu déhe Yá Ndiöxí, te cùtnuní iní-ó nándi cùu ñáyiú cùu déhe yucu ñávãha. Te nchaa ñáyiú ñá túú quide ndàá, te cùu úhú iní-yu tnâha ñáyiú-yu, te ñáyiú-áⁿ ñá díú déhe Yá Ndiöxí cúú-yu.

Cuu iní tnáhã-ó ñⁿ ñⁿ-o

11 Te ndéé òré ní natuha-o ichi Yá Ndiöxí ní tecú dóho-o sá cúú iní-ó tnâha ñáyiú-o. 12 Te vá cùndùu úhú iní-ó dàtná ní quide ndíi Càin, chí ndíi-áⁿ ñí xindecu ndíi ndíhi yucu ñávãha núu xiáⁿ ní sahni ndíi ñaní ndíi. Te ducaⁿ ñí quide ndíi chí ní xindecu ndíi ichi cuehé ichi duha, te ñaní ndíi ní xindecu-dé ichi váha.

13 Te nchòhó ñáyiú ndècu ndíhi-í ichi Xítohó Jesucristú, vá cádá cuendá-ndó sã cúú úhú iní ñáhã nchàa ñáyiú ndècu ichi cuehé ichi duha xii-ndo. 14 Te cunaha-ndo na càchí tnúhu-í xii-ndo sã núu na cùu iní-ó tnâha ñáyiú-o, te cùtnuní iní-ó sã sã ní dáñã-ó ichi sá tá dàcuíta nihnu ñaha xii-o cuáhãⁿ ní cùu, te vitna ní tñi-o ichi váha. Te nchaa ñáyiú ñá túú cùu iní tnâha ñáyiú-xi ñùhu-ní-yu ichi cuáhãⁿ-yu núú úhú núú ndáhú. 15 Te nchaa ñáyiú ñá cúú quini ndéé tnâha ñáyiú-xi cùú-yu dàtná ñⁿ ñáyiú sahni ndíyi. Te nchòhó sa nâha-ndo sá ñí ñⁿ ñáyiú sahni ndíyi ñá túú ndècu ndíhi-yu tnúhu ndee iní sá nánihí tãhú-yu. 16 Te Xítohó Jesucristú ní xihí-gã cuendá nchaa yicã cuèchi-o, núu xiáⁿ cùtnuní iní-ó sã ño cùu iní ñáhã-gã xii-o. Te xiáⁿ cùtnuní iní-ó nâcuâa cada-o cùu iní-ó tnâha ñáyiú-o,

te cuëi na cùú-ó cuendá sá cúú-xí ñⁿ-yu, cuendá-nã sá ná dácácu nihnu-õ-yu núú tnũndõho ndecú-yu. ¹⁷ Te núú ndècu ndihì-o sá cóhó sã cáxí-ó ndihì nchaa sá nándihì-o, te ndècu ñáyiu ndàhú ñá túú vèdana ná ndécú ndihì, te ñá túú chindee-ó-yu, te ñá túú cùu iní-ó Yã Ndiõxí te núú ducaⁿ na càda-o. ¹⁸ Te nchòhó ñáyiu cùu datná déhe-í vá cuendá-ni cùnàha càháⁿ-ndó sã cúú iní tnáhá-ndó, chi cuu iní tnáhá ndisa-ndo te coto tnàha-ndo.

Vá yùhú-ó nũú Yã Ndiõxí

¹⁹ Te núú ducaⁿ na càda-o, te cutnùnì iní-ó sã ndécú-ó ìchi ndáá ìchi Yã Ndiõxí, te ñá túú-gã ná quihì iní-ó nũú-gã. ²⁰ Te núú ndihú iní-ó cuendá ñⁿ sá ñí guide-o, te sa nàha Yã Ndiõxí te núú ní guide váha-o àdi ní guide cuèhé-ó, chi sa nàha ndáá-gã nàcuáa càa iní-ó. ²¹ Te nchòhó ñáyiu ío cùu iní-í, na càchí tnúhu-í xii-ndo, te núú ñá túú nã sání iní-ó te ñá túú nã quidé-ó, te vá yùhú-ó nũú Yã Ndiõxí. ²² Te nchaa sá vãha na càcáⁿ-ó nũú Yã Ndiõxí, te mee-gã taxi-gá chi tnè-o tnúhu càháⁿ-gã, te quide-o nchaa nacuáa cùu iní-gã. ²³ Te ní cachí Yã Ndiõxí sá quindáá iní-ó Dèhe-gá Xítóhó Jesucrístú, te cuu iní-ó tnàha ñáyiu-o datná ní cachí-gã. ²⁴ Te nchaa ñáyiu tnè tnúhu-gã ndécú-yu ìchi-gã, te ndècu ndihì ñaha-gã xii-yu. Te cùtnunì iní-ó sã ndécú-ó ndihì-gã chi ní taxi-gã Espíritú-gã ndécú ndihì-o.

4

Ñáyiu ndècu ndihì Espíritú Yã Ndiõxí ndihì ñáyiu cùu úhú iní ñáhá xii Xítóhó Jesucrístú

¹ Te nchòhó ñáyiu ío cùu iní-í, vá cùtexínu quindáá iní-ndó tnúhu càháⁿ nchaa ñáyiu càchí sá ndécú ndihì Espíritú Yã Ndiõxí. Chi díhna-gã cada cuendá váha-ndo te núú càháⁿ ndáá-yu nàcuáa càháⁿ tnúhu Yã Ndiõxí, chi ío vai ñáyiu ñuyú-a cachí-yu sá càháⁿ-yu tnúhu-gã dico ñá ndàá. ² Te duha cutnùnì iní-ó nãndi cùu ñáyiu ndècu ndihì Espíritú Yã Ndiõxí. Nchaa ñáyiu càháⁿ ndáá sá Xítóhó Jesucrístú ní quixi-gã ñuyú-a te ní cuu-gã ñⁿ yiqui cùñú, ñáyiu-áⁿ cúú-yu ñáyiu cùu cuendá Yã Ndiõxí. ³ Te nchaa ñáyiu ñá túú càháⁿ nàcuáa càa Jesús cùtnáhá ní quixi-gã ñuyú-a ñáyiu-áⁿ dándahú ñáhã-yu,

chi ñá túú cùú-yu ñáyiu cùu cuendá Yã Ndiõxí. Te diu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáyiu cuu úhú iní ñáhá xii-gã, dico yùhú càchí tnúhu-í xii-ndo sã sã ndecú-yu.

⁴ Te nchòhó ñáyiu cùu datná déhe-í, ndècu ndihì-ndo Yã Ndiõxí, te ñá dáñá-ndó dándahú ñáhá nchaa ñáyiu càchí sá càháⁿ tnúhu-gã te ñá ndàá. Te ñá túú sàndáá iní-ndó chi Yã Ndiõxí Yaá ndécú ndihì-ndo taxi tnunì víhí-gã dácúxí yùcu ñávãha ndècu ndihì nchaa ñáyiu ñúhu ìchi cuhé ìchi duha. ⁵ Te nchaa ñáyiu dándahú ñáhá sã càháⁿ tnúhu Yã Ndiõxí ndécú-yu ìchi cuhé ìchi duha, te mee-ni cuendá nchaa sá ío ñuyú-a càháⁿ-yu. Te tédóho ñaha nchaa dava-gã ñáyiu ndècu diu-ni ìchi cuhé ìchi duha. ⁶ Te nchoo cùu-o ñáyiu cùu cuendá Yã Ndiõxí. Te nchaa ñáyiu xĩndecu ìchi-gã tnè-yu tnúhu càháⁿ-ó, te nchaa ñáyiu ñá túú ndècu ìchi-gã ñá túú tnè-yu tnúhu càháⁿ-ó. Te duha te cùtnunì iní-ó nãndi cùu ñáyiu càháⁿ ndáá, te cùtnunì tucu iní-ó nãndi cùu ñáyiu dándahú ñáhá.

Cuu iní-ó tnàha ñáyiu-o datná cúú iní ñáhá mèe Yã Ndiõxí xii-o

⁷ Te nchòhó ñáyiu ío cùu iní-í, xini ñuhu-xi cuu iní tnáhá-ó datná cúú iní ñáhá mèe Yã Ndiõxí xii-o, chi mee-gã táxi-gã sá xini tnùnì-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùú-yu déhe Yã Ndiõxí, te cùtnunì ndáá iní-yu sá ndécú ndihì ñaha-gã xii-yu. ⁸ Te nchaa ñáyiu ñá túú cùu iní tnàha ñáyiu-xi ñá túú ndècu ndihì-yu Yã Ndiõxí. Te nchaa ñáyiu ndècu ndihì Yã Ndiõxí, ñáyiu-áⁿ sãñaha-gã sá xini tnùnì-yu cuendá cuu iní-yu tnàha ñáyiu-yu. ⁹ Te cùtnunì iní-ó sã cúú iní ñáhá Yã Ndiõxí xii-o nchaa-o, chi ní tendaha-gã ñⁿdii díi-ni Déhe-gá Xítóhó Jesucrístú ní quixi-gã ñuyú-a cuendá sá díú-gã cada te naníhí tàhú-ó, te núú na quindáá iní-ó tnúhu-gã. ¹⁰ Te ío cùu iní ñáhá Yã Ndiõxí xii-o nchaa-o. Te ñá díú sã méé-ó cùu iní-ó-gã, chi díhna-gã méé-gã sa cùu iní ñáhá tnàhí-gã xii-o, núú xíãⁿ ní tendaha-gã Déhe-gã ní quixi-gã ñuyú-a ní xihí-gã sá cuendá nchaa yicá cuèchi-o.

11 Te nchòhó ñáyiú ío cùu iní-í, xini ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o. 12 Te ni ñⁿ nchoo ñáyiú ndècu ñuyíú-a ñá túú xini-ó nacuáa càa Yá Ndiöxí, dico nchoo ñáyiú ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xiãⁿ cúú ìní tnáhá-ó ñⁿ ñⁿ-o, te cùtnuní iní-ó sã cúú ìní ndisa-o-gã. 13 Te cùtnuní iní-ó sã ndécú-ó ìchi-gá, te ndècu ndìhi ñaha-gá xii-o, chi ní taxi-gá Espiritú-gá ndécú ndìhi-o. 14 Te yúhú ndìhi dava-gá cue téé ní xica cuu ndìhi-gá càháⁿ-ndí sá ní xiní-ndí Jèsús Déhe Yá Ndiöxí ní quixi-gá ñuyíú-a, chi Tãtá-ó Dütú Ndiöxí ní tendaha ñaha xii-gá ní quixi-gá cuendá dàcácu nihnu-gá nchaa nchoo ñáyiú ndècu ñuyíú-a núú ùhú núú ndàhú. 15 Te nchaa ñáyiú càháⁿ ni yùhu ni iní-xi sá Dèhe Yá Ndiöxí cúú Jèsús, ñáyiú-án ndécú-yu ichi-gá te ndècu ndìhi ñaha-gá xií-yu.

16 Te sàndáá iní-ó ni yuhu ni iní-ó sã Yá Ndiöxí cúú ìní ñáhá-gã xii-o, chi ducaⁿ iní-gá. Te nchaa ñáyiú cùu iní ñáhá xii Yá Ndiöxí ndécú ndìhi ñaha-gá xií-yu. 17 Te núu ndisa cùu iní-ó Yá Ndiöxí te vá yùhú-ó òré ná sàá nduu tàud^ñ ñaha-gá xii-o tnùú nchaa ñáyiú ndècu ichi cuehé ichi duha, chi quide ndáá-ó ndècu-o núú-gã ñuyíú-a dàtná ní quide mee Jèsús. 18 Chi nchaa ñáyiú cùu iní ñáhá xii Yá Ndiöxí ñá túú-gã yùhú-yu, te núu cùu iní ndisá-yu-gá. Te núu yùhú-yu te xiãⁿ sa ndòhó-yu, chi ñùhú-yu ichi cuáháⁿ-yu núú ùhú núú ndàhú, chi nchaa ñáyiú yùhú ñá túú cùu iní ndisá-yu Yá Ndiöxí.

19 Te cuu iní-ó Yá Ndiöxí, chi mee-gã ndée cútnáhá vátá quindáá-gá iní-ó tnùhu-gá sa cùu iní ñáhá-gã xii-o. 20 Te nchaa ñáyiú càchí sá cúú ìní-yu Yá Ndiöxí, te cùu ùhú iní-yu tnàha ñáyiú-yu, ñáyiú-án dácuàndehndé-yu. Te núu ñá túú cùu iní-yu tnàha ñáyiú-yu ndècu ñuyíú-a ña, te uuⁿ-gá quidè-yu Yá Ndiöxí Yaá ñá túú xini núú-yu. 21 Te càchí-gá núú tnùhu-gá sá ñáyiú na cùu iní ñáhá xii Yá Ndiöxí, te ducaⁿ-ni cùu iní-yu tnàha ñáyiú-yu.

5

Nchaa ñáyiú ní ndacu ní dáñá ìchi cuehé

ichi duha

1 Te nchaa ñáyiú sàndáá iní sá Jèsús cúú-gã Crìstú Yaá ní quixi ñuyíú-a, ñáyiú-án cúú-yu déhe Yá Ndiöxí. Te cùu iní-yu Tãtá-ó Dütú Ndiöxí, te cùu iní-yu Déhe-gá. 2 Te núu cùu iní-ó Yá Ndiöxí te quide-o nacuáa càháⁿ-gá, te cùtnuní iní-ó sã cúú ìní tnáhá ndisa-o nacuáa ndècu-o ichi-gá. 3 Te núu cùu iní-ó Yá Ndiöxí te tnè-o tnùhu càháⁿ-gá, chi cùtnuní iní-ó sã ñà díú ñⁿ sá ùhú cúú-xí dàtná càchí ñáyiú. 4 Te nchaa nchoo ñáyiú cùu déhe-gá sa ní dáñá-ó ichi cuehé ichi duha, chi ní sàndáá iní-ó Jèsús núu xiãⁿ ní ndacu-o ní dáñá-ó ìchi-án. 5 Te nchaa ñáyiú sàndáá iní sá Dèhe Yá Ndiöxí cúú Jèsús ní ndacú-yu ní queé-yu ichi cuehé ichi duha.

Nacuáa ní càháⁿ Yá Ndiöxí cuendá Jèsús

6 Te Xítohó Jesucristú ní quixi-gá ñuyíú-a, te ní sandute-gá. Te ñà díú-ní xiãⁿ, chi ní xihí-gá sá cuendá nchaa yíca cuechi-o. Te Espiritú Yá Ndiöxí càháⁿ-xi mee-ni sã ndáá, chi càháⁿ Espiritú-gá-án sã Jèsús cúú-gã Crìstú Yaá ní quixi ñuyíú-a. 7 Te úní testíú ndécú àndiu, Tãtá-ó Dütú Ndiöxí, ndìhi Déhe-gá Xítohó Jesucristú, ndìhi Espiritú-gá. Te ñⁿ-ni tnùhu càháⁿ ndi nùní testíú-án. 8 Te ducaⁿ cùu-xi ñuyíú-a tucu, chi càháⁿ Espiritú Yá Ndiöxí sá Jèsús cúú-gã Crìstú. Te ní sandute-gá, te ní xihí-gá sá cuendá nchaa yíca cuechi-o. Te xiãⁿ cútnuní ndáá iní-ó sã díú Jèsús cúú-gã Crìstú. 9 Te núu tnè-o tnùhu váha càháⁿ ñáyiú, te váha-gá tnè-o tnùhu càháⁿ Yá Ndiöxí, chi càháⁿ ndáá-gá sá Dèhe-gá cúú Jèsús. 10 Te nchaa ñáyiú sàndáá iní sá Jèsús cúú-gã Déhe Yá Ndiöxí, ñáyiú-án cútnuní iní-yu sá cúú-xi ñⁿ sá ndáá. Te nchaa ñáyiú ñá túú sàndáá iní tnùhu càháⁿ Yá Ndiöxí quidè-yu-gá ñⁿ ñándéhdé, dico ñá túú ndèhnde-gá, chi mèé-yu ñá túú sàndáá iní-yu sá Dèhe-gá cúú Jèsús dàtná càchí mèé-gá. 11 Te Yá Ndiöxí càchí tnùhu ndáá-gá sá cùndècu-o ndìhi-gá ni caa ni quíhíⁿ. Te duha càháⁿ-gá chi sàndáá iní-ó Dèhe-gá. 12 Te nchaa ñáyiú na quindáá iní ñáhá xii Déhe-gá cundécú-yu ndìhi-gá ni caa ni quíhíⁿ. Te nchaa ñáyiú ñá túú sàndáá iní ñáhá xii Déhe-gá vá cùndécú-yu ndìhi-gá.

Sáhu ndéé núú nǐ ndìhi-ná

¹³ Te cuèndá sá sàndáá iní-ndó Dèhe Yá Ndiǒxí núu xǎá chídó tñùnì-í tñúhu-a cuèndá cutnùnì iní-ndó sá cùndècu ndìhi-o-gá nǐ caa nǐ quíhíⁿ.

¹⁴ Te ñá túú tñúhu yùhú cáháⁿ ndìhi-o Yá Ndiǒxí, chi tedóho ñaha-gǎ xii-o núu ìⁿ-ná sá ná càcáⁿ-ó núú-gǎ dàtná cuìní méé-gǎ. ¹⁵ Te cùtnunì iní-ó sá táxí-gǎ sá xìcáⁿ-ó núú-gǎ, chi nàha-o sá tedóho ñaha-gǎ xii-o núu na càcáⁿ-ó nàcuáa cùu iní-gá.

¹⁶ Te núu xìnì-ó ñǎyiu ndècu ichi Yá Ndiǒxí te quidé-yu sá ñà túú vǎha núú-gǎ, te ndèhe-o sá ñà túú ní xíta nihnu duúⁿ-yu, te cáháⁿ ndìhi-o Yá Ndiǒxí cuèndá-yu, te dàcácu nihnu ñaha-gǎ xií-yu te núu na nùcúnu ichi váha-yu. Chi ió ñáyiu xidó quidé nǎndì sá ñà túú vǎha te xíta nihnu duúⁿ-yu, te vá càháⁿ ndìhi-gá-ó Yá Ndiǒxí cuèndá-yu.

¹⁷ Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácuita nihnu ñaha dùuⁿ.

¹⁸ Te nàha-o sá nchóó ñǎyiu cùu déhe Yá Ndiǒxí ñá túú-gǎ sání iní-ó càda-o nǎndì sá cuèhé sá dúhá. Te ducaⁿ chi mee Jèsús déhe Yá Ndiǒxí xító ñaha-gá xii-o, núu xǎá ñá ndácú-gǎ yucu ñǎvǎha dàxínu iní ñáhá-xí xii-o cada-o sá ñà túú vǎha.

¹⁹ Te nchoo nàha-o sá ndécú ndìhi-o Yá Ndiǒxí. Te nchaa ñáyiu ndècu ichi cuehé ichi duha tàxi tñunì ñáhá-nǎ yucu ñǎvǎha xií-yu.

²⁰ Te nàha tucu-o sá ñùyíú-a ní quixi Jèsús Déhe Yá Ndiǒxí ní taxi-gá sá xìnì tñùnì-ó cuèndá cutnùnì iní-ó sá méé-gǎ cúú-gǎ Ndiǒxí-ó. Te ndècu ndìhi-o mee-gá ndìhi Déhe-gá Jèsús, te ìⁿdì díí-ni mee-gá cúú-gǎ Yá Ndiǒxí, te ndècu dava-gá sá nácuàca ñaha-gá xii-o cùndècu-o ndìhi-gá nǐ caa nǐ quíhíⁿ. ²¹ Te nchòhó ñáyiu cùu datná déhe-í, vá quíndáá iní-ndó nchàa sá càchí-yu cùu ndiǒxí, chi dícó ndaha cue téé ñuyíú-a ní cuáha nchaa xǎáⁿ. Te ducaⁿ na cùnduu. Te ío chí cádá ndèe iní-nǎ vitna.

TUTÚ CÚÚ ÒÚ NÍ CADÚHA TÉ JUÁÁ

Tnúhu Yá Ndiõxí ndihí nàcuáa cuu iní tnáhá-ó

¹ Te yúhú té Juáá té yìndaha ñaha xii ñáyiú sàndáá iní tnúhu Jèsús, tè-í tnúhu-a ìⁿ núú tütú daquìxi-í ndaha yòhó ñaha ní cáháⁿ ñáhá Yá Ndiõxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiõxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhá-ndí xii-ndo.

² Te cùu iní ñáhá-ndí xii-ndo chi ndècu ndihí-ndo tnúhu ndáá tnúhu Yá Ndiõxí, te ducaⁿ-ní cùndecu-o ndihí tnúhu-áⁿ ní caa ní quíhíⁿ. ³ Te xìcáⁿ táhù-í núú Tátá-ó Dütú Ndiõxí, ndihí núú Déhe-gá Xítóhó Jesucristú sá ná chindèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xìcáⁿ táhù-í núú-gá chi ndècu ndihí-o tnúhu ndáá tnúhu Yá Ndiõxí, te cùu iní-ó-gá.

⁴ Te ío cùdíí iní-í, chi ní naníhì-í ìⁿ ùú déhe-n, te quidé-yu nàcuáa sànu ichi ñaha tnúhu ndáá dàtná ní táuchíúⁿ mèe Tátá-ó Dütú Ndiõxí. ⁵ Te vitna yòhó ñaha ní cáháⁿ ñáhá Yá Ndiõxí, cächí tnúhu-í xii-n sã xíní ñùhu-xi cuu iní-ó tnàha ñáyiú-o. Te ñá díú ìⁿ tnúhu saa cùu-xi, chi diu-ni tnúhu sá ní ngúndecu ndihí-o ndèe cútnàhá ní tuha-o ìchi Yá Ndiõxí. ⁶ Te núu cùu iní-ó Yá Ndiõxí, te cùu iní-ó tnàha ñáyiú-o dàtná ní cachí méé-gá, te tñi-o nchaa tnúhu càháⁿ-gá. Te ní cachí-gá sá cúú iní-ó-gá, te cuu iní-ó tnàha ñáyiú-o. Te tnúhu-a ní tecú dóho-o ndèe cútnàhá ní tuha-o ìchi-gá.

Cue téè dándahú tnàha ñáyiú-xi

⁷ Te ío vai ñáyiú dándahú ñáhá xìca cuú-yu ñuyíú-a, te cächí-yu sá ñã ndáá sá Xítóhó Jesucristú ní cuu-gá ìⁿ ñáyiú ndisa. Te nchaa ñáyiú duha càháⁿ dácuàndehndé-yu, te cùu úhú iní-yu Jèsús. ⁸ Te quíhi iní-ndó sã vã dándahú ñáhá ñáyiú-áⁿ xii-ndo cuèndá sá vã cuíta chiúⁿ Yá Ndiõxí ní quide-o. Te òré

ná quíxí tucu Jèsús ñuyíú-a te taxi-gá nchaa sá váha cùu iní méé-gá cùndecu ndihí-o.

⁹ Te nchaa ñáyiú dàña tnúhu Xítóhó Jesucristú, te nàtní-yu ingá ichi, ñáyiú-áⁿ ñà túú ndècu ndihí-yu Yá Ndiõxí. Te nchaa ñáyiú ñã túú dàña tnúhu Xítóhó Jesucristú ndècu ndihí-yu Yá Ndiõxí ndihí Déhe-gá Xítóhó Jesucristú. ¹⁰ Te núu véxi ñáyiú núú ndécú-ndó cächí-yu sá càháⁿ-yu tnúhu Yá Ndiõxí te ñã ndáá, te vá cuãha-ndo tnúhu danèhé ñáhã-yu xii-ndo, te ni vã cuãha-ndõ-yu tnúhu ndee iní cuèndá chiúⁿ quidé-yu. ¹¹ Chi núu na càháⁿ ndihí váha-ndõ-yu, te dàtná tnúhu sá chindèe-ndó-yu quidé-yu nchaa sá cuèhé sá dúhá.

Tnúhu ndéé núú ní ndihí-ná

¹² Te ío vai-gá tnúhu cuíní-í cachí tnúhu-í xii-ndo, dico vá téé-gá-í chi cuíní-í quixi-í núú ndécú-ndó ndàtnúhu-o cuèndá cudíí víhí iní-ó nchàa-o.

¹³ Te nchaa cue déhe cúhú-n, ñáyiú ní cáháⁿ ñáhá Yá Ndiõxí quidé ndèe iní ñáhã-yu xii-n.

TUTÚ CÚÚ ÒNÍ NÍ CADÚHA TÉ JUÀÁ

Càháⁿ váha-yu cuèndá té Gǎyú

¹ Te yúhú té Juàá téé yìndaha ñaha xii ñáyíu sàndáá iní tnúhu Jèsús, chìdo tnuní-í tnúhu-a ìⁿ núú tütú sá cúú-xí yòhó té Gǎyú téé ío cùu iní-í, chí ndècu ndìhì-n tnúhu ndáá tnúhu Yá Ndiòxí.

² Te yòhó téé ío cùu iní-í, xìcáⁿ táhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhù-n, chí sa nàha-í sá ndécú váha-n nǔú Yá Ndiòxí. ³ Te ío ní cudíí ìnì-í òré ní sáá ñáyíu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá òu-ni tnúhu-gá te tñì-n nchaa nacúáa càháⁿ tnúhu-áⁿ. ⁴ Te ío cudíí ìnì-í ní níhì-í tnúhu sá ncháá-ní ñáyíu ní sanu ichi-í ichi Yá Ndiòxí ndécú-nǎ-yu ichi-gá, te quìde-ní-yu nchaa nàcuáa càháⁿ-gá.

⁵ Te yòhó téé ío cùu iní-í, ío váha quìde-n núú Yá Ndiòxí, chí chìndee-n nchaa ñáyíu véxi dava-gá ñuú xìcá, ñáyíu sàndáá iní tnúhu Yá Ndiòxí. ⁶ Te nchaa ñáyíu-áⁿ càháⁿ-yu núú tàcá ñáyíu càháⁿ ndìhì Yá Ndiòxí iha sá ío cùu iní-n nchàa tñaha ñáyíu-n dàtná càháⁿ Yá Ndiòxí. Te yúhú càháⁿ ndàhù-í núú-n sǎ cádá ndè-ni iní-n chìndee-n nchaa ñáyíu-áⁿ nchaa sá xíní ñùhù-yu ichi. Te núu ducaⁿ na càda-n te quìde-n nacúáa cùu iní Yá Ndiòxí, te xìnu cuechi-n tñahá-n nǔú-gǎ. ⁷ Chí nchaa ñáyíu-áⁿ nǎ tñí-yu ichi cuáháⁿ-yu càháⁿ-yu tnúhu Jèsús. Te ñà túú tñí-yu ní ìⁿ sá sǎñaha ñáyíu ñà túú ndècu ichi Yá Ndiòxí. ⁸ Te núu xǎⁿ nchoo xìni ñuhu-xi chìndee-o nchaa ñáyíu xìnu cuechi núú-gǎ ñáyíu càháⁿ tnúhu-gá, te ducaⁿ te cutnùnì iní-ó sǎ tñahá-ó xìnu cuechi-o ndìhì-yu núú-gǎ.

Ñà túú quìde váha té Diótrefés

⁹ Te yúhú ní tendaha-í tutú cuáháⁿ núú tàcá ñáyíu chìñuhù-yu Yá Ndiòxí, dico ìⁿ téé ndècu-áⁿ nání-dě Diótrefés, te ñà sàndáá iní-dé nchaa tnúhu càháⁿ-í, chí cuìní-dé cunuu-dě núú-yu. ¹⁰ Te òré quixi-í te cada ndáá-ó nchàa tnúhu cuèhé tnúhu duha càháⁿ-dé cuèndá-í. Te ñà díú-ní xǎⁿ

quidé-dě, chí nchaa ñáyíu véxi ingá ñuú càháⁿ tnúhu Yá Ndiòxí ñà túú càháⁿ ñáhá-dě vehe-dé, te ní ñà dáñá-dě càháⁿ ndìhì ñaha dàva-gá ñáyíu xii-yu. Te nchaa ñáyíu cuìní càháⁿ ndìhì ñaha xii-yu, te quèñuhu ñaha duuⁿ-ni-dé ñà dáñá-gǎ-dé níhì tñahá-yu ndìhì nchaa ñáyíu tàcá dácuaⁿha tnúhu Yá Ndiòxí.

¹¹ Te yòhó téé ío cùu iní-í, vá cùndècu-n ichi cuehé ichi duha dàtná quidé nchàa dava-gá ñáyíu, cada-n mèe-ni sá váha. Chí nchaa ñáyíu quìde váha ndécú-yu ichi Yá Ndiòxí. Te nchaa ñáyíu quìde nchaa sá cuèhé sá dúhá ñà túú ndécú-yu ichi Yá Ndiòxí.

Nchaa ñáyíu càháⁿ váha-yu cuèndá té Demètriú

¹² Te nchaa ñáyíu càháⁿ váha-yu cuèndá té Demètriú, chí quìde ndáá-dé dàtná càháⁿ Yá Ndiòxí. Te tñahá yúhú càháⁿ-í cuèndá-dé sá ío váha quìde-dé, te nchòhó sa nàha-ndo sá yùhú càháⁿ ndáá-í.

Tnúhu ndéé núú nǎ ndìhì-ná

¹³ Te vǎi-gá tnúhu cuìní-í cachí tnúhu-í xii-n ní cùu, dico ñà ní tèe-gá-í, ¹⁴ chí cuìní-í quixi ndìhì-í, te càháⁿ-ó nǔú nǔú-ó.

¹⁵ Te ío cada ndee ìnì, te xìcáⁿ táhù-í núú Yá Ndiòxí sá ná cùndècu váha-n ñà túú nǎ cuu cundècu-n. Te nchaa cue ñáyíu xínì tñahá ndìhì-o ndècu iha quìde ndee ìnì ñáhá-yu xii-n. Te yòhó cúñaha-n nchàa ñáyíu xínì tñahá ndìhì-í ndécú xǎⁿ ná càda ndee ìnì-yu. Te ío cada ndee ìnì-nǎ vitna.

TUTÚ NÍ CADÚHA TĒ JUDÁS

Té Jùdás cádúha-dé tutú quíhíⁿ ndaha ñáyíu ní cachí Yă Ndiöxí nduu cuendá-gá

¹ Yúhú té Jùdás ñaní té Jàcobó xínú cuèchi-í núú Xítóhó Jesucrístú, te cádúha-í tutú-a sá cúú-xí nchòhó ñáyíu ní cachí Yă Ndiöxí Yaá cúú Tătá-ó ndùu cuendá-gá, ñáyíu ío cùu iní-gá. Te dàtná-ni xító ñaha-gá xii-ndo vitna ñu-ni ducaⁿ còto ñaha-gá xii-ndo ndéé ná sàá nduu quíxi tucu Xítóhó Jesucrístú ñuyíu-a. ² Te xicáⁿ táhù-í núú Yă Ndiöxí sá ïo-gá ná chindee chitúu ñaha-gá xii-ndo, te na cùtnuní-gá iní-ndó sá ïo cùu iní ñáhá-gá xii-ndo, te ducaⁿ ïo váha cuu iní-ndó cùndecu-ndo.

*Ñáyíu ñá túú càháⁿ tnúhu ndáá tnúhu Yă Ndiöxí
(2 Pedro 2:1-17)*

³ Te nchòhó ñáyíu ío cùu iní-í, ducaⁿ-ni ïo sàni iní-í cadúha-í ñⁿ tutú sá cúú-xí-ndó cuendá danèhé ñáhà-í xii-ndo nàcuáa ní cuu ní naníhí tàhù-ó dico ñá túú cádúha-í, dico vitna quide cuendá-í sá xíní ñùhu-gá-xi càháⁿ-í núú tütú-í sá nchòhó ío cundehe-ndo tnúhu càháⁿ-ndó ndíhí ñáyíu, te càháⁿ-ndó nàcuáa ndùu tnúhu sàndáá iní mée-ndó, chi ñu-ni tnúhu-áⁿ ní càháⁿ Yă Ndiöxí sá cúú-xí nchàa ñáyíu ndècu ichi-gá. Te vitna ñá túú-gá ná tnúhu càháⁿ-gá sá cúú-xí-yu, chi sa ní càháⁿ duuⁿ-gá. ⁴ Te duha càháⁿ-í núú tütú-a sá cúú-xí-ndó, chi ñíhí-í tnúhu sá xicá cùu ñáyíu chìtnahá ñáhá xii-ndo, te ni ñà túú xíní-ndó ñá ñáyíu cùu-yu, te ñáyíu-áⁿ cúú-yu ñáyíu cùu úhú iní ñáhá xii Yă Ndiöxí. Te ñⁿ xichi núú tütú Yă Ndiöxí càchí-xi sá ñáyíu-áⁿ quíhíⁿ-yu núú ùhú núú ndàhú, te ñu-ni ñáyíu-áⁿ càchí-yu sá ïo váha iní Yă Ndiöxí ñúu xíáⁿ cuu-ni cadá-yu nchaa sá cuèhé sá dúhá. Te dàquee tíhù-yu Yă Ndiöxí Yaá ío cùnuu, ndíhí Xítóhó Jesucrístú.

⁵ Te nchòhó sa xíní váha-ndo nàcuáa ní quide Yă Ndiöxí ndéé sanaha dico dándacu iní ñáhà-í xii-ndo, chi dàvá-áⁿ ní queñuhu-gá ñáyíu isràél nàcióⁿ Ègíptú, te dava ñáyíu-áⁿ ñà túú ní sàndáá iní ñáhà-yu

xii-gá te ní dánáá ñàha-gá xii-yu. ⁶ Te nchaa espíritú ñá túú ní cuíní cada ndáa cunu cuechi núú Yă Ndiöxí ní quee-xi núú ndécú-xí, te mee-gá ní sadí nihnu ñaha-gá xii-xi ñⁿ xichi núú néé te vá càcu-xi, chi sáá nduu te nayáha-xi cundecu-xi núú ùhú núú ndàhú ni caa ni quíhíⁿ. ⁷ Te dándacu iní ñáhá tucu-í xii-ndo nàcuáa ní yáha ñáyíu ñúú Sòdomá, ndíhí ñáyíu ñúú Gòmorrá, ndíhí nchaa ñáyíu ñúú ní cáa yatni xíáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo càháⁿ ndíhí tnàha ndí mee-güedé, te ñu-ni ducaⁿ ní xóo cada cue ñáyíu ñíhí tucu. Te sá dúcáⁿ ní quidé-yu núú ní dányóyó Yă Ndiöxí ñuhú ñúú-yu ní dánáá ñàha-gá xii-yu. Te xíáⁿ cùtnuní iní-ó sá nchàa ñáyíu ñá túú cuíní cada váha núú-gá quíhíⁿ-yu núú ùhú núú ndàhú ni caa ni quíhíⁿ.

⁸ Te ñu-ni ducaⁿ quide ñáyíu chìtnahá ñáhá xii-ndo cuíní-yu dandàhú ñáhà-yu, chi càchí-yu sá dácòto ñaha saní-yu nàcuáa cadá-yu, núu xíáⁿ nándí nchaa sá cuèhé sá dúhá quidé-yu sá cúú-xí yíqui cuñú-yu, te dàquee tíhù-yu nchaa nàcuáa càháⁿ Yă Ndiöxí cada-o, te càháⁿ úhú-yu cuendá nchaa espíritú cùnùu. ⁹ Te mee espíritú cùnùu-gá xínú cuèchi núú Yă Ndiöxí nání Mìguél ní nàá-xi ndíhí sàcuíhná cuendá yíqui cùnùu ndí Moisés. Te espíritú-áⁿ ñà túú ní cùyí-xi càháⁿ úhú-xi sàcuíhná-áⁿ, chi ní xáhaⁿ-ni-xi: “Mee Yă Ndiöxí nahá-gá te núu nása cada ñaha-gá xii-n”, duha ní xáhaⁿ-xi. ¹⁰ Te nchaa ñáyíu ducaⁿ dandahú ñáhá xii-ndo-áⁿ càháⁿ cuèhé-yu cuendá nchaa sá vátá cùtnuní-gá iní-yu nása ndùu, te quidé-yu dàtná quidé cuè quíti chi cue quíti-áⁿ quidé-güedí nání véxi iní-güedí, te ni ñà túú cùtnuní iní-güedí nchaa sá quidé-güedí. Te ducaⁿ sà tnahá-xi cùu-yu, chi nchaa sá cuèhé sá dúhá véxi iní-yu quidé-yu, te sá dúcáⁿ quidé-yu xíáⁿ tá xíta nihnú-yu cuáháⁿ.

¹¹ ¡Te ndàhú ní cuú-yu chi ío ndohó-yu!, chi quidé-yu dàtná ní quide ndí Càín. Te nándí sá quidè-yu cuendá sá cuíní-yu díhúⁿ dàtná ní xóo cada ndí Bàlaám. Te ío cùu sáá iní-yu núú Yă Ndiöxí dàtná ní xóo cada ndí Còré, núu xíáⁿ tá xíta nihnú-yu cuáháⁿ. ¹² Te

dìcò sácáⁿnúú sǎha ñàhá-yu xii-ndo òré nàtácá-ndó quìde-ndo vico chiñuhu-ndo Yá Ndiòxí. Te òré xéxí ndìhi ñahá-yu xii-ndo te mee-ni sǎ cúú-xí mèe-yu quìde cuendá-yu, te ñá túú nèhé-yu sǎ yíñuhu núú Yá Ndiòxí. Te cúú-yu dàtná ìⁿ vícò sǎ cuáháⁿ-xi duha cuáháⁿ-xi dàcáⁿ te ñá túú dǎú nchídó-xí, ducaⁿ sǎ tnahá-xi cúú-yu. Te cùu tucú-yu dàtná ìⁿ yutnu vídí sǎ ñà túú tnahí cùuⁿ sávídí-xi, te nchaa yutnu ducaⁿ ñà túú cùuⁿ sávídí-xi te tñuhu-güedé ndéé yóho-xi te xihí duuⁿ-xi. Te ducaⁿ sǎtnahá-xi cúú-yu, chi ñá túú quìde váha-yu. ¹³ Te cùu tucú-yu dàtná ndute làmár, chi ndute-áⁿ òré càndá-xi te quecòo tíñú-xi ìⁿ xio. Te cùu tucú-yu dàtná ìⁿ chódíní cuáháⁿ-di duha cuáháⁿ-di dàcáⁿ. Te ducaⁿ sǎtnahá-xi cúú-yu, chi ñá túú cuíní-yu cada váha-yu. Te ñáyíu-áⁿ daquìhíⁿ ñáhá Yá Ndiòxí xií-yu ìⁿ xichi núú néé núú sǎ ndecu túha cundecú-yu ni caa ni quíhíⁿ.

¹⁴ Te ndíquíⁿ yává ndíi Àdán téé cùu usá ní xínani Ènóc ní dácáhú ìní ñáhá Yá Ndiòxí xii-dé ní cáháⁿ-dé ñíu-ni cuendá nchaa ñáyíu-áⁿ. Te ní cachí-dé: “Na càchí tñuhu-í xii-ndo sǎ Yá Ndiòxí quixi-gá ndìhi cuéhé víhí espíritú xínú cuèchi núú-gǎ. ¹⁵ Te dàvá-áⁿ cada ndáá-gǎ cuèchi nchaa ñáyíu te daquìhíⁿ-gǎ nchaa ñáyíu ndècu ichi cuehé ichi duha núú ùhú núú ndàhú, te ducaⁿ càda ñaha-gǎ xií-yu, chi mee-ni sǎ cuéhé sǎ dúhá quidé-yu, te càháⁿ ùhú ñáhǎ-yu xii-gǎ”, duha ní cachí te Ènóc. ¹⁶ Te ñáyíu-áⁿ ò yica ìní-yu chi ñá túú ndùu vétú ìní-yu nàcuáa ndècú-yu ñuyíú-a, te sàtnuhú-yu tñaha ñáyíú-yu te mee-ni sǎ cuéhé sǎ dúhá sàni ìní-yu quidé-yu, te quìde cahnú-yu mèe-yu, te mee-ni càháⁿ váha-yu núú tñaha ñáyíú-yu cuendá cuíní-yu sǎ cáda vǎha ñaha ñáyíu-áⁿ xií-yu.

Té Judás càháⁿ-dé dóho ñáyíu ndècu ichi Yá Ndiòxí

¹⁷ Te nchòhó ñáyíu ío cùu ìní-í, càháⁿ ndàhú-í núú-ndó sǎ ò cuhuⁿ ìní-ndó tñuhu sǎ sǎ ní dǎnehé ñáhá cuè téé ní tendaha Xítohó Jesucrístú càháⁿ tñuhu-gǎ núú ñáyíu. ¹⁸ Te sa nàha-ndo sǎ ñí cachí-güedé sǎ cùmání-gǎ quixi tucu Xítohó Jesucrístú ñuyíú-a, te coo ñáyíu cáháⁿ cuéhé cáháⁿ duha cuendá tñuhu-gǎ. Te ñáyíu-áⁿ cada-yu mee-ni sǎ cuéhé sǎ dúhá vèxi ìní mèe-yu.

¹⁹ Te ñáyíu-áⁿ cúú-yu ñáyíu càháⁿ nándi tñuhu sǎ ñà túú nándìhi cuendá sǎ vǎ cúú ìⁿnuu-ndo cundecu-ndo, te mee-ni sǎ cuéhé sǎ dúhá ñuhu ìní-yu, te ñá túú ndècu ndìhí-yu Espíritú Yá Ndiòxí.

²⁰ Te nchòhó ñáyíu ío cùu ìní-í, ío dacuàha-ndo tñuhu Yá Ndiòxí sǎ ñí sándáá ìní-ndó cuendá ducaⁿ cuita cuehnu nihnu-ndo ichi-gǎ quíhíⁿ, te cáháⁿ ndìhi-ndo Yá Ndiòxí nàcuáa dàcahu ìní ñáhá Espíritú-gǎ xii-ndo. ²¹ Te ío coto-ndo mèe-ndo cundecu-ndo cuendá cuu váha ìní ñáhá Yá Ndiòxí xii-ndo, te cundetu-ndo sǎa nduu quixi Xítohó Jesucrístú ñuyíú-a nacuaca ñaha-gǎ xii-ndo cundecu-ndo ndìhi-gǎ ni caa ni quíhíⁿ, chi Yaá-áⁿ ò cùndahú ìní ñáhá-gǎ xii-o.

²² Te ñáyíu sàni ìⁿ sàni úú ìní-xi cúñaha-ndo xií-yu nàcuáa cada-yu cundecú-yu ichi Yá Ndiòxí. ²³ Te nchaa ñáyíu ta xíta nihnu ñuhu ichi cuáháⁿ núú ùhú núú ndàhú, ío cundìhí ìní-ndó cùñaha-ndo xií-yu tñuhu Yá Ndiòxí cuendá sǎ ná càcu nihnú-yu, te cundàhú ìní-ndó-yu, te quíhí ìní-ndó vǎ cáda-ndó tñahá-ndó nàcuáa quidé-yu, chi daquèe tíhú-ndó nchaa sǎ cuéhé sǎ dúhá quidé-yu-áⁿ.

Nàcuáa ndacáⁿ táhú-ó núú Yá Ndiòxí

²⁴ Te Yá Ndiòxí chindee ñaha-gǎ xii-ndo cuendá sǎ vǎ cùndècu-ndo ichi cuehé ichi duha, te cunduu ndoo cunduu nine ìní-ndó càndeca ñaha-gǎ xii-ndo quíhíⁿ cundecu-ndo núú ò váha càa ndecu-gǎ, te ío cudíⁿ ìní-ndó. ²⁵ Te Yá Ndiòxí ío ndècu ndìhi-gǎ nchaa sǎ xíní tñùní-gǎ te ñíu-gǎ ní dácácu nihnu ñaha-gǎ xii-o núú ùhú núú ndàhú, te ducaⁿ ñí quide ñaha-gǎ xii-o chi ndècu ndìhi-o Xítohó Jesucrístú. Te ío ndacáⁿ táhú-ó núú Yá Ndiòxí, chi ío càhnu cuu-gǎ ndècú-gǎ táxí tñùní-gǎ, te súúní vǎha ìní-gǎ, te ndàcu-gǎ quidé-gǎ nchaa sǎ vǎha, te ducaⁿ-ni ò càhnu cuu-gǎ ndéé cùtnahá vátá ngǎva-gǎ ñuyíú, te ducaⁿ-ni ò càhnu cuu-gǎ ndéé vitna, te ñíu-ni ducaⁿ ò càhnu cuu-gǎ ni caa ni quíhíⁿ, duha xini ñuhu-xi ndacáⁿ táhú-ó núú-gǎ. Te ducaⁿ na cùnduu. Te ío chí cáda ndèe ìní-nǎ vitna.

NCHAA SÁ NĪ XINÍ TÉ JUÁÁ NDIHI NCHAA SÁ NĪ TECÚ DÓHO-DÉ

Xítóhó Jesucrístú xáhaⁿ-gã xii té Juáá nchaa nàcuáa cada-xi ñuyíú

¹ Te Yá Ndiöxí ní xáhaⁿ-gã xii Xítóhó Jesucrístú nchaa sá tá cùyatni vií-nã cada-xi ñuyíú-a cuendá sá cũñaha-gã xii cue téé xínu cuechi núú-gã, te Xítóhó Jesucrístú ní tendaha-gã ñⁿ espíritú xínu cuèchi núú-gã ní quixi-xi ní cachí tnúhu-xi nchaa tnúhu-áⁿ xii yúhú té Juáá téé xínu cuechi núú-gã, te nchaa tnúhu-áⁿ ndéé núú tütú-a. ² Te yúhú càchí tnúhu ndáá-í xii-ndo nàcuáa ní cáháⁿ Yá Ndiöxí, te cáháⁿ ndáá tucu-í cuendá Xítóhó Jesucrístú, ndihi cuendá nchaa sá ñ xini-í.

³ Te váha táhú ñáyiú dàcuaha nchaa tnúhu ndéé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tñi nacuáa cáháⁿ-xi, chi sa ta cùyatni vií-nã nduu càda-xi nchaa nacuáa cáháⁿ-xi.

Té Juáá cádüha-dé tutú quíhíⁿ ndaha ndi ùsá xichi cue ñáyiú ndècu ichi Yá Ndiöxí

⁴ Te yúhú té Juáá cádüha-í tutú daquixi-í ndi ùsá xichi núú ndécú nchòhó ñáyiú ndècu ichi Yá Ndiöxí ndécú distritú Àsiá. Te mee-gã ná chindee chitúu ñaha-gã xii-ndo, te ío váha cuu iní-ndó cùndecu-ndo. Te cuèi ndéé sanaha ñu-ni-gá ndécú, te ñu-ni-gá ndécú cuèi vitna, te ducaⁿ-ni cùndecu-gá cuèi ndéé núú cuháⁿ núú vëxi, te ñu-ni ducaⁿ ío na chindee chitúu ñaha ndi ùsá cue espíritú ndécú núú-gã xii-ndo, te ío váha cuu iní-ndó cùndecu-ndo. ⁵ Te ñu-ni ducaⁿ na càda tucu Xítóhó Jesucrístú, te ñu-ni-gá cúú-gã Yaá cáháⁿ ndáá, te ñu-ni-gá ní xihí-gá te díhna-gá ní ndoto, te dàtnùní ndéé cuèé-gá te ndoto cue ñáyiú ní xihí, te ñu-ni-gá táxi tñuni-gá nchaa cue téé yindaha ñaha xii ñáyiú ndècu ñuyíú-a. Te ío cùu iní ñáhá-gã xii-o, te mee-gã ní sati níñí-gã te ní xihí-gá núú cùrúxí sá cuendá nchaa sá cuèhé sá dúhá quide-o, te ní ndada ndoo ní ndada nine-gá iní-ó, ⁶ te vitna ní quide ñaha-gã xii-o dàtná cue téé yindaha

ñáyiú, te ní quide ñaha tucu-gá xii-o dàtná cue dútú xínu cuèchi-o núú Tátá-gã Dútú Ndiöxí. Te vitna nchaa-o chí ná càchí-ó sã ío càhnu cuu Xítóhó Jesucrístú, te ío cùnuu-gá, te ducaⁿ-ni na cùnuu-gá ni caa ni quíhíⁿ. Te ducaⁿ na cùnduu.

⁷ Te cundehe-ndo àndiu! Chi ichi xití vico quixi Xítóhó Jesucrístú, te nchaa ñáyiú ndècu ñuyíú-a quini ñáhã-yu xii-gã, te tñhá nchaa ñáyiú ñⁿ-ni cùu ndihi ñáyiú ní dánicuèhé ñáhã xii-gã quini ñáhã-yu, te nchaa ñáyiú xindecu ndihi ñuyíú, ñáyiú ñá tütú cùu váha iní ñáhã xii-gá ndihú iní-yu òré quini ñáhã-yu xii-gã, te ndáá sá dúcáⁿ càda-xi.

⁸ Te Yá Ndiöxí càchí-gá: “Yúhú ío cùnuu-í chi ñu-ni sa ndècu ndéé cùtnáhá ní ngáva ñuyíú, te ñu-ni-í cundecu ndéé ná sàa nduu nàa-xi ndihi nchaa sá ío, chi yúhú cundecu-í ni caa ni quíhíⁿ”, duha càchí Yá Ndiöxí Yaá ndácú quide nchaandi tühú sá váha. Chi ñu-ni-gá sa ndècu ndéé cùtnáhá ní ngáva ñuyíú, te ñu-ni-gá ndécú-gã vitna, te ducaⁿ-ni cùndecu-gá ni caa ni quíhíⁿ.

Té Juáá ní xini-dé Xítóhó Jesucrístú Yaá ío cùnuu

⁹ Te yúhú té Juáá téé ndècu ndihi-ndo ichi Xítóhó Jesucrístú, tñhá-í ndòhò-í cuendá-gá dàtná ndòhò-ndó, te tñhá-í nduu táhú-í cundecu ndihi ñaha-í xii-ndo núú ndécú Yá Ndiöxí táxi tñuni-gá. Te ío quide cahnu iní-ó cuèi nándi yáha-o ndècu-o sá cuendá Xítóhó Jesucrístú. Te yúhú ní ngava-í vecaá ñⁿ ñuú nání Pãtmós, te ñuú-áⁿ cáá xití ndute lámár. Te ducaⁿ ñi cuu cuendá sá cáháⁿ-í tnúhu Yá Ndiöxí, te cáháⁿ váha-í cuendá Xítóhó Jesucrístú. ¹⁰ Te ñⁿ nduu ndumìngú nduu nàtacá-ó chihuhu-o Yá Ndiöxí ní quide ñaha Espíritú-gá xii-í nàcuáa càchí iní-xi, te ní tecú dóho-í níhi ní cáháⁿ ñⁿ sá ñi cáháⁿ ndàa sàtà-í te dàtná níhi cáháⁿ ñⁿ cútú ducaⁿ níhi ní cáháⁿ-xi. ¹¹ Te càchí sá cáháⁿ-áⁿ:

—Yúhú sa ndècu-í ndéé cùtnáhá ní ngáva ñuyíú, te ñu-ni-í cundecu-í ndéé ná sàa nduu nàa-xi ndihi nchaa sá ío, te chido tñuni-n ñⁿ núú tütú sá ná dànehé núú ñáhã-í xii-n, te daquihíⁿ-n tütú-áⁿ ndi ùsá xichi núú xindecu cue ñáyiú ndècu ichi Yá Ndiöxí xindecu distritú Àsiá, ndaha

ñáyiú ñuú Éfesú, ndaha ñáyiú ñuú Èsmirná, ndaha ñáyiú ñuú Përgamú, ndaha ñáyiú ñuú Tiàtirá, ndaha ñáyiú ñuú Sárdís, ndaha ñáyiú ñuú Filàdelfiá, ndaha ñáyiú ñuú Laodiceá, nchaa ñáyiú ñuú-áⁿ daquihíⁿ-n tütú-áⁿ ndahá-yu —càchí sá càháⁿ-áⁿ.

¹² Te ní nchócuñhu-í ndéhè-í nñu ná cúú sá càháⁿ-áⁿ, te ní xiní-í xñutnñi úsá tñahá sá ñí cuáha mee-ni dñhúⁿ cuááⁿ sá ndèé dité-xi, te núú dité-xi-áⁿ yíndodo ñⁿ caa candíl. ¹³ Te cuádava tnuú nchaa xíáⁿ ní xiní-í nñutñi Yaá cáá dàtná cáá nchaa nchoo ñáyiú ndècu ñuyíú-a, te ñihnu-gá ñⁿ dóó cání càa-xi ndéé núú sáhá-gá, te yídúcúⁿnuu ñⁿ sìnchú ní cuáha mee-ni dñhúⁿ cuááⁿ pèchú-gá. ¹⁴ Te idi díquí-gá cuixíⁿ quiyí dàtná cuixíⁿ idi dava mbéé, àdi yúhá sá quée òré quidé vñxiⁿ-xi, te tinùu-gá quidé-xí dàtná quidé-xí òré sàá itá ñuhú. ¹⁵ Te sáhá-gá súúní dàtásaⁿ-xi dàtná dàtásaⁿ sá nání bróncé òré càyú-xi ducaⁿ dàtásaⁿ-xi sáhá-gá, te dónaha tñuhu càháⁿ-gá quidé-xí dàtná quidé-xí dñndaha tññí víhí yùte. ¹⁶ Te xio ndaha cùha-gá núndaha-gá úsá tñahá chódíní, te mei yùhu-gá quéné ñⁿ yuchí cáhnú ndèé úú xio núú-xi, te núú-gá quidé-xí dàtná quidé-xí nñú nchicanhii òré súúní ngòyo cahni.

¹⁷ Te sá dúcáⁿ càa Yaá-áⁿ ñí xiní-í nñu xíáⁿ ní yùhú-í ní nduá-í núú-gá, te ní cuu-í dàtná ñⁿ téé ní xíhí sá dúcáⁿ ño ní yùhú-í, dico mee-gá ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñiu-ni yùhú sa ndècu-í ndéé cùtnahá ní ngáva ñuyíú, te ñiu-ni yùhú cundecu-í ndéé ná sàá nduu nàa-xi ndihí nchaa sá ño. ¹⁸ Te yùhú cùu-í Yaá ní xíhí te ní ndoto-í, te vitna ndècu vívù-í, te ducaⁿ-ni cùndecu-í ñi caa ñi quíhíⁿ. Te yùhú cùnùu-í núú nchaa ñáyiú ní xíhí te ñiu-ni-í cùnùu-í núú ndécü-yu. ¹⁹ Te chido tñùn-í nchaa sá ñí xiní-n-áⁿ ñⁿ núú tütú, ndihí nchaa nàcuáa cùu vitna, ndihí nchaa sá cádá-xí ndéé núú cuáháⁿ núú vèxi-gá.

²⁰ Te na càchí tñuhu-í xii-n nàcuáa quèe-xi ndi usá chódíní ñí xiní-n yòtnñi-í xio ndaha cùha-í, ndihí nàcuáa quèe-xi ndi usá sá ñí cuáha mee-ni dñhúⁿ cuááⁿ, sá ndèé dité-xi te yíndodo ñⁿ caa candíl núú dité-xi-áⁿ. Te ndi úsá chódíní-áⁿ, xíáⁿ cúú-xí sá cùtnùn-í iní-ó

sá ndécú úsá cue téé xinu cuechi núú Yá Ndiöxí, te ndi usá cue téé-áⁿ ndécú-güedé ndi usá xichi núú ndécú ñáyiú ndècu ichi Yá Ndiöxí. Te cuendá ndi usá sá ndèé dité-xi-áⁿ, xíáⁿ cúú-xí sá cùtnùn-í iní-ó sá ndécú úsá xichi ñáyiú ndècu ichi Yá Ndiöxí —duha càchí Yaá càháⁿ-áⁿ.

2

Tñuhu sá cúú-xí ñáyiú xñndecu ichi Yá Ndiöxí ndécú ñuú Éfesú

¹ Te ní cachí tucu Yaá càháⁿ-áⁿ xii-í sá chídó tñùn-í nchaa tñuhu sá vítná càháⁿ-gá ñⁿ núú tütú, te tendaha-í quíhíⁿ ndaha téé xinu cuechi núú Yá Ndiöxí ndécú ñuú Éfesú sá cúú-xí cue ñáyiú xñndecu ichi-gá ndécú ñuú-áⁿ, te duha ní cachí-gá: “Yúhú cúu-í Yaá núndaha úsá chódíní xio ndaha cùha-í, te xica cuu-í núú ndécú ndi usá sá ñí cuáha mee-ni dñhúⁿ cuááⁿ, sá ndèé dité-xi te yíndodo ñⁿ caa candíl núú dité-xi.

² Te yùhú xiní-í nchaa nàcuáa quide nchóhó ñáyiú xñndecu ichi Yá Ndiöxí ndécú ñuú Éfesú, te xiní-í sá ño ndècu ndee-ndo quide chiuⁿ-ndo cuendá-gá, te ño quide cahnu iní-ndó ndècu-ndo quide-ndo chiuⁿ-gá. Te xiní-í sá ñà túú tñahí tñahá iní-ndó nàcuáa quide nchaa ñáyiú ndècu ichi cuehé ichi duha. Te xiní tucu-í sá xító ndèé-ndó cue téé càchí sá ñí tendaha-í véxi càháⁿ tñuhu-í te ñá ndàá sá càháⁿ-güedé tñuhu-í, te ducaⁿ te cùtnùn-í iní-ndó sá ñá ndàá sá càháⁿ-güedé tñuhu-í. ³ Te xiní tucu-í sá ño ndòho-ndo quide-ndo chiuⁿ cuendá-í, te ducaⁿ ño quide cahnu iní-ndó cuèi nándi yáha-ndo, te ñá túú cùu dusaⁿ-ndo quide-ndo chiuⁿ-áⁿ.

⁴ Dico ñá túú cùu váha iní-í chi nchòhó ñá túú-gá quidé-ndó dàtná ní xóo cada-ndo cùtnahá vitna cùu vií-ni ní sándáá iní ñáhá-ndó xii-í, chi vitna ñá túú-gá cúú iní ñáhá vñhi-ndo datná ní xóo cada-ndo dàvá-áⁿ. ⁵ Te chí dándacu iní nàcuáa ní xóo cada-ndo cùtnahá vitna cùu saa ní sándáá iní ñáhá-ndó xii-í, te ndixi cuèchi iní-ndó sá ñà túú-gá quidé vñha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhña. Te nchòhó cada iní-ndó sá ndécú ndihí-ndo ñⁿ sá ñí cuáha mee-ni dñhúⁿ cuááⁿ, sá ndèé dité-xi te yíndodo ñⁿ caa candíl núú dité-xi. Te núu vá ndíxí cuèchi iní-ndó nàcuáa quide-ndo ndècu-ndo ña, te quixi-í

xocàni-í xiáⁿ, te ducaⁿ sãtnahá-xi cada ñaha-í xii-ndo te núu vá ndíxi cuèchi iní-ndó nãcuáa quide-ndo ndecu-ndo, te ducaⁿ te vá yõ-gá nãtacá chiñuhu ñaha xii-í ñuú-ndó.

⁶ Dico quide váha-ndo ñⁿ xichi chi dàquee tihú-ndó nchãa sã quidé cuè ñáyiu cùu nicolaitás, te yúhú tnàhá-í dáquèe tihù-í nchaa sã quidé ñáyiu-áⁿ. ⁷ Te nchòhó cada cuendá váha-ndo nãcuáa xãhaⁿ-í xii Espiritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espiritú-gá xãhaⁿ-xi xii-yu: Cúñaha-n xii nchaa ñáyiu sã núu na càda ndee iní-yu yáha-yu náandi sã ná yãha-yu sã cuendá-í, te yúhú cada-í te nduu táhú-yu cundecu váha-yu núu ndécú Yã Ndiõxí, duha xãhaⁿ-í xii Espiritú-gá cúu-xi ñáyiu”, duha càchí Yaá càháⁿ-áⁿ. Te nchaa tnúhu-áⁿ ñi chídó tnùn-í sã cúu-xi ñáyiu xĩndecu ichi Yã Ndiõxí ndécú ñuú Éfesú.

Tnúhu sã cúu-xi ñáyiu xĩndecu ichi Yã Ndiõxí ndécú ñuú Èsmirná

⁸ Te ní cachí tucu Yaá càháⁿ-áⁿ xii-í sã chídó tnùn-í nchaa tnúhu sã vítná càháⁿ-gá ñⁿ núu tütú, te tendaha-í quíhíⁿ ndaha tée xĩnu cuechi núu Yã Ndiõxí ndécú ñuú Èsmirná sã cúu-xi cuè ñáyiu xĩndecu ichi-gá ndécú ñuú-áⁿ, te duha càchí-gá: “Yúhú ndécú-í ndéé cútñahá ní ngáva ñuyú, te ñu-ni-í cundecu-í ndéé ná sãá nduu nãa-xi ndihí nchaa sã íó, te ñu-ni-í ní xihí te ní ndoto-í ndécú-í vitna. ⁹ Te yúhú xini-í nchaa nãcuáa quide nchohó ñáyiu ndècu ichi Yã Ndiõxí ndécú ñuú Èsmirná. Te xini-í sã ío ndòho-ndo ndecu-ndo sã cuendá-í, te xini tucu-í sã ío ndáhú-ndó dico cùu-ndo ñáyiu xĩndecu váha núu Yã Ndiõxí. Te xini tucu-í sã ío càháⁿ cuèhé ñáyiu isràél cuendá-ndó, dico ñã túú quidé-yu nãcuáa tàú-yu cadá-yu sã cúu-yu ñáyiu isràél, chi cùu-yu ñáyiu xĩnu cuechi mee-ni núu sãcuíhná. ¹⁰ Dico nchòhó vá yúhú-ndó cuèi náandi cùu nchaa sã ná ndòho-ndo cuendá-í, chi sãcuíhná cada-xi te ngava dava-ndo vècaá, te ducaⁿ càda-xi chi cuíni-xi coto ndéé ñáhá-xi xii-ndo núu ndisa sã vá ná túhú iní-ndó sã nchicúⁿ nihnu-ndo ichi Yã Ndiõxí. Te ndòho-ndo úxi nduu dico vá dáñá ndéé-ndó cãchicúⁿ nihnu-ni-ndo ichi-gá cuèi na cùu-ndó sã cuendá-gá, te yúhú cada-í te nduu táhú-ndó cundecu-ndo

ndihí-gá ni caa ni quíhíⁿ. ¹¹ Te nchaa nchòhó cada cuendá váha-ndo nãcuáa xãhaⁿ-í xii Espiritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi, te duha ndùu tnúhu xãhaⁿ-í xii Espiritú-gá xãhaⁿ-xi xii-yu: Cúñaha-n xii nchaa ñáyiu sã núu na cundee iní-yu yáha-yu náandi sã ná yãha-yu sã cuendá-í te vá cuíta nihnú-yu na sãá nduu cuíta nihnu nchaa dava-gá ñáyiu, duha xãhaⁿ-í xii Espiritú-gá cúu-xi ñáyiu”, duha ní cachí Yaá càháⁿ-áⁿ. Te nchaa tnúhu-áⁿ ñi chídó tnùn-í sã cúu-xi ñáyiu xĩndecu ichi Yã Ndiõxí ndécú ñuú Èsmirná.

Tnúhu sã cúu-xi ñáyiu xĩndecu ichi Yã Ndiõxí ndécú ñuú Pèrgamú

¹² Te ní cachí tucu Yaá càháⁿ-áⁿ xii-í sã chídó tnùn-í nchaa tnúhu sã vítná càháⁿ-gá ñⁿ núu tütú, te tendaha-í quíhíⁿ ndaha tée xĩnu cuechi núu Yã Ndiõxí ndécú ñuú Pèrgamú sã cúu-xi cuè ñáyiu xĩndecu ichi-gá ndécú ñuú-áⁿ, te duha càchí-gá: “Yúhú cúu-í Yaá néhé ñⁿ yuchí cáni te ndéé úu xio núu-xi. ¹³ Te yúhú xini-í nchaa nãcuáa quide nchohó cue ñáyiu xĩndecu ichi Yã Ndiõxí ndécú ñuú Pèrgamú, te xini tucu-í sã ndécú-ndó núu ío cunuu yucu ñávãha, te ñã túú dàña ndéé-ndó nchicúⁿ nihnu-ndo ichi-í, te ducaⁿ ío sãndáá iní ñáhá-ni-ndó xii-í, te ñu-ni ducaⁿ ñi quide-ndo cútñahá ní sahani-güedé té Àntipás núu ndécú-ndó ñu-ni núu dúcáⁿ ío cunuu yucu ñávãha. Te ndí-áⁿ ñi quide ndáá ndíi ní xĩndecu ndíi ichi-í chi ní càháⁿ váha ndíi cuendá-í. ¹⁴ Dico ñã túú cùu váha iní-í cuendá ñⁿ úu sã quidé-ndó, chi ndècu ndihí-ndo ñáyiu nchicúⁿ nihnu-ni nchaa nãcuáa ní càháⁿ ndíi Balaám. Chi ndí-áⁿ ñã túú ní quide váha ndíi chi ní dácáhú iní ndíi ingá tée ní xĩnani Bálac nãcuáa cada-dé canu ichi-dé cue ñáyiu isràél ingá ichi sã ñã túú váha, chi ní xãhaⁿ tẽ Bálac-áⁿ xii-yu sã cáxi-yu nchaa sã ndúú táhú nchaa sã ñi cadúha cue tée ñuyú-a ñanani ñáyiu ndiõxí te ñã ndáá sã ndiõxí cúu-xi, te ní dácáhú iní ñáhá-dẽ xii-yu sã cundécú-yu ichi ñi iní. ¹⁵ Te ndècu ndihí tucu-ndo ñáyiu nchicúⁿ nihnu sã dácuaha cue ñáyiu cùu nicolaitás. Te nchaa sã dácuaha ñáyiu-áⁿ dáquèe tihù-í, ¹⁶ te nchòhó chí dándixi cuèchi iní sã ñã túú quide váha-ndo ndècu-ndo, chi núu ñáhá te

quixi-í nàa-í ndihí cue ñáyiú-áⁿ ndihí yuchi cání sã quéné yùhu-í. ¹⁷ Te nchaa nchòhó cada cuendá váha-ndo nàcuáa xãhaⁿ-í xii Espiritú Yá Ndiõxí xãhaⁿ-xi xii cue ñáyiú ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espiritú-gá xãhaⁿ-xi xii-yu: Cúñaha-n xii nchaa ñáyiú sã núu na càda ndee iní-yu yáha-yu nándi sã ná yãha-yu sã cuendá-í, te yúhú cuãñaha-í sã ndúú yùhu xii-yu caxi-yu ìⁿ sã vãtã quini-gá-yu caxi-yu. Te xíãⁿ cúu-xí mànáá sã ñí xóo caxi cue ñáyiú ní xĩndecu ndéé sanaha, te cuãñaha tucu-í ìⁿ caa yúú cuixiⁿ xii-yu, te núu yúú-ãⁿ cundeé ìⁿ diu saa. Te diu-áⁿ vã yóo tnàhí xini chi ìⁿ dii díi-ni ñáyiú na quèheⁿ cuendá diu-áⁿ quini-yu, duha xãhaⁿ-í xii Espiritú-gá cúu-xi ñáyiú”, duha càchí Yá cáháⁿ-áⁿ. Te nchaa tnúhu-áⁿ ñí chídó tnúni-í sã cúu-xí ñáyiú xĩndecu ichi Yá Ndiõxí ndécú ñúú Përgamú.

Tnúhu sã cúu-xí cuè ñáyiú xĩndecu ichi Yá Ndiõxí ndécú ñúú Tiàtirá

¹⁸ Te ní cachí tucu Yá cáháⁿ-áⁿ xii-í sã chídó tnúni-í nchaa tnúhu sã vítná cáháⁿ-gá ìⁿ núu tütú, te tendaha-í quihíⁿ ndaha tẽe xinu cuechi núu Yá Ndiõxí ndécú ñúú Tiàtirá sã cúu-xí cuè ñáyiú xĩndecu ichi-gá ndécú ñúú-áⁿ, te duha càchí-gá: “Yúhú cúu-í Déhe Yá Ndiõxí, te càa tinuu-í dàtná cáá itá ñuhú, te sãhá-í cáá dàtná cáá sã nání bróncé òré ñuhú-xi núu ñuhú càyú-xi. ¹⁹ Te yúhú xini-í nchaa nàcuáa quide nchòhó ñáyiú xĩndecu ichi Yá Ndiõxí ndécú ñúú Tiàtirá. Te xini tucu-í sã ìo cùu iní-ndó Yá Ndiõxí te sãndáá iní-ndó-gá. Te xini tucu-í nàcuáa ndùu chiuⁿ quide-ndo sã cúu-xí-gã. Te xini tucu-í sã ìo quide cahnu iní-ndó cuèi nándi cùu sã yãha-ndo ndècu-ndo. Te xini tucu-í sã ìo-gá ndúcú ndèe-ndo quide váha-ndo vitna dacúxí cùtnàhá vitna cùu saa ní sãndáá iní-ndó Yá Ndiõxí. ²⁰ Dico ñá túú cùu váha iní-í cuendá ìⁿ sã quidé-ndó, chi ñá túú tnàhí ná sání iní-ndó ndècu ndihí-ni-ndo ñáyiú nchicúⁿ nihnu nchaa nàcuáa dànehé ñáhá ñaha nani Jezabél. Te ñaha-áⁿ càchí-áⁿ sã cáháⁿ-aⁿ tnúhu Yá Ndiõxí dico ñá ndáá sã cáháⁿ-aⁿ tnúhu-gá, te cuáháⁿ-aⁿ dàndahú-áⁿ nchaa ñáyiú xinu cuechi núu-í ndihí nchaa sã dánèhé ñáhá-áⁿ cuendá cundecú-yu ichi díi iní, te caxi-yu nchaa sã ndúú táhú

nchaa sã ñí cadúha cue tée ñuyúú-a dãnani ñáyiú ndiõxí te ñá ndáá sã ndiõxí cúu nchàa xíãⁿ. ²¹ Te ní cuu vai nduu ta dacaca-í ndécú-áⁿ cuendá ndixi cuèchi iní-áⁿ sã ñá túú quide váha-aⁿ ndècu-aⁿ, te cuèi ducaⁿ quide-í dico ñá túú cuini-áⁿ dañ-aⁿ ñí ìⁿ sã cuèhé sã dúhá quide-aⁿ. ²² Te vitna yúhú ìo dandòho-í-aⁿ chi tni ñaha cuèhé xii-aⁿ, te diu-ni ducaⁿ ìo dandòho-í nchaa ñáyiú quide datná quidé-áⁿ te núu vá ndixi cuèchi iní-yu sã ñá túú quide váha-yu ndècu-yu, te dàñá-yu nchaa sã cuèhé sã dúhá quidé-yu. ²³ Te nchaa ñáyiú cùndihí ñaha xii ñaha-áⁿ cahni-í-yu, te ducaⁿ te nchòhó ndihí dava-gá nchaa ñáyiú xĩndecu ichi Yá Ndiõxí ndécú nchàa xichi cutnuní iní-ndó ndihí-yu sã yúhú cúu-í Yá xini ndáá nchaa nàcuáa sání iní ñáyiú, ndihí nchaa nàcuáa quide-xi iní-yu. Te nchòhó nàcuáa ndùu sã quidé-ndó ìⁿ ìⁿ-ndo te ducaⁿ cùnduu sã táxi-í nduu táhú-ndó. ²⁴ Te dava nchòhó ñáyiú ndècu ñúú Tiàtirá, ñáyiú ñá túú nchicúⁿ nihnu nàcuáa dànehé ñáhá ñaha nani Jezabél-áⁿ ñá túú xini-ndó ñá cúu sã càchí ñáyiú ndùu yuhu dacahu iní ñáhá yùcu ñávãha. Te nchòhó, ñá túú ñágá cachí tnúhu-í xii-ndo càda-ndo ²⁵ diu-ná sã ìo nducu ndèe-ndo cada-ndo nchaa nàcuáa cáháⁿ tnúhu sã ndécú ndihí-ndo, te ducaⁿ-ni càda-ndo ndéé òré quixi tucu-í. ²⁶ Te nchaa nchòhó ñáyiú na càda ndee iní yáha nándi sã ná yãha sã cuendá-í, te núu na càda-ni-ndo nchaa nàcuáa cuini-í cada-ndo ndéé nduu vã cùndecu-gá-ndó ñuyúú-a, te yúhú taxi-í tnúhu ndee iní xii-ndo sã táxi tnúni-ndó nchàa ñáyiú ñuyúú ²⁷ dàtná ní quide mee Tãtã-í Dútú Ndiõxí ní taxi-gá tnúhu ndee iní ndécú ndihí-í, te ducaⁿ càda ñaha-í xii-ndo tàxi-í tnúhu ndee iní xii-ndo cuendá ìo taxi tnúni-ndó, te cada iní-ndó sã cáda-ndó cuè ñáyiú dàtná quidé-xi ìⁿ quidi òré tàhú-xi càchi duuⁿ-xi, te ducaⁿ chi nchòhó cada-ndo sã ncháá ñáyiú ñá túú quide váha cuíta nihnú-yu. ²⁸ Te cada iní-ndó sã dàtná dáyhé chódini quiti quèné òré sa ta tũndaá-ñá cuáháⁿ ducaⁿ càda-xi òré ná sãá nduu ngũta-xi cada váha-xi, te ducaⁿ chi yúhú cada-í nàcuáa nduu táhú-ndó cùndecu ndihí ñaha-ndo xii-í núu ìo váha càa ndecu-í. ²⁹ Te nchaa nchòhó cada cuendá váha-ndo nàcuáa xãhaⁿ-í xii Espiritú Yá Ndiõxí xãhaⁿ-xi xii cue ñáyiú

ndècu ichi-gá xĩndecu nchaa xichi”, duha cãchí Yaá cãháⁿ-áⁿ. Te nchaa tnúhu-áⁿ nĩ chídó tnùn-í sá cúú-xí ñáyiú xĩndecu ichi Yá Ndiöxí ndécú ñúú Tiàtirá.

3

Tnúhu sá cúú-xí ñáyiú xĩndecu ichi Yá Ndiöxí ndécú ñúú Sãrdís

¹ Te ní cachí tucu Yaá cãháⁿ-áⁿ xii-í sá chídó tnùn-í nchaa tnúhu sá vítná cãháⁿ-gá ñⁿ núú tütú, te tendaha-ĩ quíhíⁿ ndaha téé xĩnu cuechi núú Yá Ndiöxí ndécú ñúú Sãrdís sá cúú-xí cuè ñáyiú xĩndecu ichi-gá ndécú ñúú-áⁿ te duha cãchí-gá: “Yúhú cúú-í Yaá ndécú ndíhi ndi usá espíritú cúú cuendá Yá Ndiöxí, te ñiú-ni-í cúú-í Yaá ndécú ndíhi ndi usá chódíní. Te yúhú xini-í nchaa nãcuáa quide nchohó ñáyiú xĩndecu ichi Yá Ndiöxí ndécú ñúú Sãrdís, te xini-í sá cúú-ndó dàtná ñáyiú ní xihí cuèi cãchí ñáyiú sá ñãhá. ² Te chí cuãha cuendá nãcuáa quide-ndo ndecu-ndo vitna, te nducu ndèe-ndo cada-ndo ñⁿ úú-gá nchaa sá vãha nchícúⁿ nihnu-ndo vitna, chí sa ndètu vii-nã dañã-ndo nchãa-ndi túhú sá vãha quide-ndo ni cuu, te quide cuendá-í sá ñã túú quide-ndo nchaa nacuaa cuini Yá Ndiöxí cada-ndo. ³ Te chí dándacu iní nãcuáa cãháⁿ tnúhu sá nĩ xĩndedóho-ndo cùtnãhá ní tuha-ndo ichi Yá Ndiöxí, te canchicúⁿ nihnu-ndo cada-ndo nacuaa cãháⁿ tnúhu-áⁿ, te ndixi cuèchi iní-ndó sã ñã túú quide vãha-ndo ndècu-ndo, te núú vá nãcuãha-ndo cuendá nãcuáa quide-ndo ndecu-ndo ñã, te cada-í dàtná quidé ñadúhú, chí òré ñã túú ñã yihí iní-ndó quèxio-í núú ndécú-ndó. ⁴ Dico ndècu ndíhi-ndo ñⁿ úú ñáyiú cãndoo caa nine iní-xi, chí ñáyiú-áⁿ nĩ nduu táhú-yu cuihnú-yu dóo cuixíⁿ cuendá cundecu ndíhi-í-yu, te ducaⁿ chí cùdiú-yu núú-í. ⁵ Te nchaa ñáyiú na càda ndee iní-xi yãha nãndi sá ná yãha sá cuendá-í, te ñáyiú-áⁿ nduu táhú-yu cuihnú-yu dóo cuixíⁿ, te vá náquète-í ñiú-yu núú tütú núú yódó tnùn-í cue ñáyiú ní nduu táhú cundecu ndíhi-í ni caa ni quíhíⁿ, te cúñaha-ĩ xii Tãtà-í Dútú Ndiöxí ndíhi cue espíritú xĩnú cuèchi núú-í sá ñáyiú-áⁿ cúú-yu ñáyiú cùu cuendá-í. ⁶ Te nchaa nchòhó cada cuendá vãha-ndo nãcuáa xãháⁿ-ĩ xii Espíritú Yá

Ndiöxí xãháⁿ-xi xii cue ñáyiú ndècu ichi-gá xĩndecu nchaa xichi”, duha cãchí Yaá cãháⁿ-áⁿ. Te nchaa tnúhu-áⁿ nĩ chídó tnùn-í sá cúú-xí ñáyiú xĩndecu ichi Yá Ndiöxí ndécú ñúú Sãrdís.

Tnúhu sá cúú-xí cuè ñáyiú xĩndecu ichi Yá Ndiöxí ndécú ñúú Filãdelfiá

⁷ Te ní cachí tucu Yaá cãháⁿ-áⁿ xii-í sá chídó tnùn-í nchaa tnúhu sá vítná cãháⁿ-gá ñⁿ núú tütú, te tendaha-ĩ quíhíⁿ ndaha téé xĩnu cuechi núú Yá Ndiöxí ndécú ñúú Filãdelfiá sá cúú-xí cuè ñáyiú xĩndecu ichi-gá ndécú ñúú-áⁿ, te duha cãchí-gá: “Yúhú cúú-í Yaá ío vãha quide ndáá te ñã túú tnãhí cuèchi-í. Te díhna-gá ndíi Dãvíí ní taxi tnùn-í ndíi ñáyiú, te vitna yúhú táxi tnùn-í-yu, te yúhú cãháⁿ-í te núú ndëndida càa ñáyiú ndíhu ndaha-ĩ te ndëndida càa ñáyiú vá ndíhu ndaha-ĩ. ⁸ Te yúhú xini-í nchaa nãcuáa quide nchohó ñáyiú xĩndecu ichi Yá Ndiöxí ndécú ñúú Filãdelfiá, te yúhú ní quide-í nãcuáa ní nihí-ndó ñⁿ ichi cahnu quide-ndo chiuⁿ-í, te vá yõo ñⁿ cada nãcuáa vá nihí-gá-ndó nãcuáa cada-ndo chiuⁿ-í. Te cuèi ñã túú ío nihí ndéé-ndó cundecu-ndo ichi Yá Ndiöxí dico tnñ-ndo nchaa tnúhu cãháⁿ-í, te ni ñⁿ xito ñã túú cãháⁿ-ndó sã ñã túú ndècu ndíhi ñãha-ndo xii-í. ⁹ Te nchaa ñáyiú quide nchaa nacuaa cuini yucu ñãvãha, ñáyiú-áⁿ cúú-yu ñáyiú isrãél, te cuèi cúú-yu ñáyiú isrãél dico ñã túú quidé-yu nãcuáa tàú-yu cadá-yu, te yúhú cada-í sá ncháá ñáyiú-áⁿ canehé-yu sá yíñúhu núú-ndó, te cutnùn-í iní-yu sá yúhú ío cùu iní ñãhá-í xii-ndo. ¹⁰ Te ío quide ndee-ni iní-ndó nchícúⁿ nihnu-ndo quide-ndo nchaa nacuaa ní cãháⁿ-í, te xiãⁿ coto ñãha-ĩ xii-ndo ñã túú ñã tnahá-ndó ndùu na quixi nchaa tnúndòho tnúhu ndàhú ñuyíú-a. Te òré quexio nchaa tnúndòho-áⁿ ñuyíú-a te dàvá-áⁿ cutnùn-í nãcuáa ndùu sá quidé ñⁿ ñⁿ ñáyiú. ¹¹ Te ío ndíhi quixi tucu-í. Te vá dáñã ndéé-ndó càda-ndo nchaa sá vãha nchícúⁿ nihnu-ndo quide-ndo cuendá sá vá cuíta sá nĩ cachí Yá Ndiöxí nduu táhú-ndó. ¹² Te nchaa nchòhó ñáyiú na càda ndee iní yãha nãndi sá ná yãha sá cuendá-í, te yúhú cada-í sá nchòhó ío cuu cãhnu-ndo cundecu-ndo núú ndécú Tãtà-í Dútú Ndiöxí, te vá ñⁿ ndùu-gá xocuíñí-ndó núú ndécú-gã. Te

cada iní-ndó sã dâtná sá chídó tnùnî-í ðiù Tâtâ-í Dútú Ndiõxí ññ-ndo chi ducaⁿ-ni cundecu-ndo ndihî-gá, te cada tucu iní-ndó sã dâtná sá chídó tnùnî-í nâcuáa nani ñuú-gá ññ-ndo, chi ðiu ñuú-gá-án cundecu-ndo, te ñuú-áⁿ nánî-xí Jêrusalén Sáá, duha nani ñuú-gá. Te ñuú-áⁿ quee-xi andiu núú ndécú Yã Ndiõxí Yaá cúú Tâtâ-í quée-xi ñuyíú. Te cada tucu iní-ndó sã dâtná sá chídó tnùnî-í ðiù mee-í ññ-ndo, te xiãⁿ cúú-xí ññ ðiu saa, te ducaⁿ càda iní-ndó chi cundecu ndihî ñaha-ndo xii-í. ¹³ Te nchaa nchòhó cada cuendá váha-ndo nâcuáa xãhaⁿ-í xii Espiritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ nî chídó tnùnî-í sá cúú-xí ñáyiu xĩndecu ichi Yã Ndiõxí ndécú ñuú Filadelfiá.

Tnúhu sá cúú-xí ñáyiu xĩndecu ichi Yã Ndiõxí ndécú ñuú Laodiceá

¹⁴ Te càchí tucu Yaá càháⁿ-áⁿ xii-í sá chídó tnùnî-í nchaa tnúhu sá vítná càháⁿ-gá ññ núú tùtú, te tendaha-í quihîⁿ ndaha téé xĩnu cuechi núú Yã Ndiõxí ndécú ñuú Laodiceá sá cúú-xí cue ñáyiu xĩndecu ichi-gá ndécú ñuú-áⁿ, te duha càchí-gá: “Yúhú cúú-í Yaá quidé núú Yã Ndiõxí, te cúú-í Yaá quidé ndáá chi càháⁿ ndáá cuítî-í nâcuáa càháⁿ Yã Ndiõxí. Te yúhú cúú-í Yaá ní quide ní ngúndecu nchaa sá ñî cadúha Yã Ndiõxí. ¹⁵ Te yúhú xĩnî-í nchaa nâcuáa quide nchòhó ñáyiu xĩndecu ichi Yã Ndiõxí ndécú ñuú Laodiceá, te xĩnî-í sá ñà túú cuinî-ndó cànciçúⁿ nihnu-ndo nchaa nâcuáa càháⁿ-í, te ñî ñà túú cuinî-ndó dàña duuⁿ-ndo. Te váha-gá sá dúúⁿ dùuⁿ cada-ndo nchaa nâcuáa càháⁿ-í àdi núú ñáhá te duuⁿ duuⁿ dañá-ndo. ¹⁶ Te sá dúcáⁿ quide-ndo ñà túú cuinî-ndó dùuⁿ duuⁿ-ni cada-ndo nâcuáa càháⁿ-í, te ñî ñà túú cuinî-ndó dùuⁿ duuⁿ-ni dañá-ndo te sáá nduu vã cundèe-gá iní-í cuendá nchaa sá quidé-ndó-ãⁿ, te daquèe tíhú ñáhà-í xii-ndo. ¹⁷ Te càchí-ndó sã cuicá-ndó, te ío váha ta yãha-ndo nchaa nduu cuáháⁿ, te ñà túú tnàhí ná cúmãní xii-ndo, te ñà túú cùnuni iní-ndó sã cúú-ndó dâtná cue ñáyiu ío ndàhú yãha, te cúu-ndo datná ñáyiu ndàhú, ñáyiu ío cundahú iní ñáhá tnàha ñáyiu-xi, te cúu-ndo datná cue ñáyiu cuáá, te cúu tucu-ndo datná cue ñáyiu ndàhú ñà túú tnàhí dóo-xi. ¹⁸ Te na càchí tnúhu-í xii-ndo

sã cadá-ndó dâtná xĩquide cue ñáyiu sàaⁿ ññ sá ñî cuáha mee-ni dĩhúⁿ cuááⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo dâtná xĩquide cue ñáyiu sàaⁿ dóo cuixíⁿ sácuiñnu-yu cuendá sá vã cúú-yu dâtná ñáyiu ndàhú ñà túú dóo-xi, te cada tucu-ndo dâtná quidé cue ñáyiu sàaⁿ yúcu quèe núú-xi nâcuáa cutnùnî váha núú-yu, te duha càháⁿ-í xãhaⁿ-í xii-ndo chi cuinî-í sá nãtuha ñaha-ndo xii-í, te ío váha cundecu-ndo sã cúú-xí Yã Ndiõxí. ¹⁹ Te càháⁿ-í dóho nchaa ñáyiu cúu iní-í òré ñà túú quide ndáá-yu, te dândoho-í-yu, núu xiãⁿ cuinî-í sá nchòhó ndixi cuéchi iní-ndó sã ñà túú quide váha-ndo ndècu-ndo. ²⁰ Te na càchí tnúhu-í xii-ndo sã yúhú cúú-í dâtná ññ téé nùtnñ yuyèhe ndaa quehé te càháⁿ-í ñáyiu yihî xití vehe, te núu na càda cuendá-yu sá càháⁿ-í te nacaáⁿ-yu yuyèhe te quíhu-í xití vehe cudini-í ndihî-yu, te duha càháⁿ-í chi cuinî-í cundecu ndihî ñaha-í xii-ndo. ²¹ Te nchaa nchòhó ñáyiu na càda ndee iní-xi yãha nãndî sá ná yãha sá cuendá-í, te yúhú taxi-í xii-ndo ññ xichi núú ndécú-í cundecu-ndo te cunuu-ndo tnàhá-ndó dâtná cùnùu-í, chi yúhú ducaⁿ ñî quide ndee iní-í ní yãha-í nãndî sá ñî yãha-í te vitna ní nduu táhù-í ndécú-í núú ndécú Tâtâ-í Dútú Ndiõxí cùnùu-í. ²² Te nchaa nchòhó cada cuendá váha-ndo nâcuáa càháⁿ Espiritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ñî chídó tnùnî-í sá cúú-xí ñáyiu xĩndecu ichi Yã Ndiõxí ndécú ñuú Laodiceá.

4

Nâcuáa chiñuhu ñáyiu Yã Ndiõxí andiu

¹ Te sátá ñî yãha ducaⁿ ñî cuu te ní xĩnî-í nchí andiu, te ní càháⁿ tucu Yaá ní càháⁿ ndihî ñaha xii-í dĩhna, te Yaá-áⁿ ñî càháⁿ níhi-gá dâtná càháⁿ níhi ññ cútú, te ní cachí-gá xii-í:

—Taquène iha te na dânehé ñáhà-í xii-nd nchaa nâcuáa cada-xi ndéé núú cuáháⁿ núú vèxi —càchí-gá.

² Te òré-ñî-áⁿ ñî quide ñaha tùcu Espiritú Yã Ndiõxí xii-í nâcuáa càchí iní-xi, te ðiu-ni òré-áⁿ ñî xĩnî-í nùtnñ ññ xilè váha andiu te càa datná cáá xilè sácõo nchihî cue ñáyiu ío cùnuu, te núú xilè váha-áⁿ núcõo Yaá táxi tnùnî. ³ Te Yaá-áⁿ cáá-gã dâtná cáá

yúu chàhnchí yúu vâha sá nání jâspé, te cãa tucu-gá dàtná cáa yúu vâha sá nání còrnalíná, te ñuhu doco ñaha ñⁿ cóo yáhnchí xii-gá, te tâsaⁿ-di dàtná tâsaⁿ ñⁿ yúu vâha sá nání èsmeraldá. ⁴ Te ní xiní tucu-í nútñ^ñ ócò cùmí xilé váha ñi càndéé núú núcõo-gá, te núú xilé-án xñucóo ócò cùmí cue téé cùu sacuéhé te xixíhnu-güedé mee-ni dóo cuixíⁿ, te ñⁿ caa coróná sá ñi cuáha mee-ni díhúⁿ cuááⁿ xixúhuⁿ díquí-güedé. ⁵ Te núú núcõo Yáá táxí tnùní-án sàá nduté, te càháⁿ ñuhu te xica chihí-xi dónaha, te càyú úsá iti núú núcõo-gá, te sá úsá iti-án xǎⁿ cútnùní sá ndécú úsá espíritú cúu cuendá-gá. ⁶ Te ndècu ñⁿ sá ndécú ndàa núú-gǎ te xǎⁿ cáa dàtná cáa làmár, te dàtná cáa vîdriú cáa ñihí.

Te ñi càndéé díñi Yáá núcõo-án xñnutñ^ñ cùmí quiti te titñi víhí tñnuu-güedi ndéé ndàa sátá-güedi ndihí ndàa núú-güedi. ⁷ Te quiti díhna nuu cãa-di datná cáa ndìcaha, te quiti cùu uú cáa-dí dàtná cáa ndìcutu, te quiti cùu uní néhé-dí núú tée, te quiti cùu cumí cáa-dí dàtná cáa yàcolo oré cuáháⁿ-di núú tàchí. ⁸ Te ndi cùmí quiti-án ndéé ññú ndíxíⁿ-güedi ñⁿ ñⁿ-güedi, te ñihí xití ndíxíⁿ-güedi ndihí ndàa sátá ndíxíⁿ-güedi ndéé tñnuu-güedi, te nduu niú chíñuhu-güedi Yá Ndiõxí, te xǎhaⁿ-güedi xii-gá:

Yòhó Dútú Ndiõxí ducaⁿ-ni ta quide ndáá-n vèxi, te ducaⁿ-ni quide ndáá-n cuéi vitna, te ñi-ñi ducaⁿ càda ndáá-n núú cuáháⁿ núú vèxi,

te cùu-n Yáá quidé nchàa-ndi túhú sá vâha, te ñi-ñi-n sá ndecu-n ndéé cútnáhá ní cuáha ñuyíú,

te ñi-ñi-n ndècu-n cuéi vitna, te ñi-ñi-n cùndecu-n cuéi ndéé núú cuáháⁿ núú vèxi.

Duha xǎhaⁿ cué quiti-án xii Yáá núcõo núú xilé váha-án chíñuhu ñaha-güedi.

⁹ Te cue quiti-án ño ndàcáⁿ táhú-güedi núú Yáá núcõo núú xilé váha-án cuendá nchaa sá quidé-gǎ. Te Yáá-án cúu-gǎ Yáá ndécú nchàa nduu nchaa quíú. Te cue quiti-án càchí-güedi sá ño càhnu cuu-gá te nèhe-güedi sá yíñuhu núú-gǎ. Te ndi tnahá òré ducaⁿ càháⁿ-güedi, ¹⁰ te ndi òcò cùmí cue téé cùu sacuéhé xñucóo-án ngüññí xití-güedé núú Yáá núcõo-án, chi ñi-ñi-gá cúu-gǎ Yáá

ndécú nchàa nduu nchaa quíú te chíñuhu ñaha-güedé xii-gá, te tàva-güedé coróná ñuhú díquí-güedé te tàxi ndecu-güedé núú-gǎ, te xǎhaⁿ-güedé xii-gá:

¹¹ Yòhó cúu-n Dútú Ndiõxí Yáá cúu cuendá ñáhá xii-ndí,

te ño càhnu cuu-n, te ño váha quide-n,

te nèhe-ndí sá yíñuhu núú-n, chi ducaⁿ tàú-xi cada-ndí,

chi yòhó cúu-n Yáá ní cadúha nchaandi túhú sá ño,

te ducaⁿ ñi ngúndecu nchaa xǎⁿ chi mee-n dùcaⁿ ní sani iní-n càda-n.

5

Cuendá Yáá cáa dàtná cáa ñⁿ mbéé quiti ní dánñcuèhé-güedé ndihí cuendá ñⁿ tutú

¹ Te ní xiní tucu-í sá Yáá núcõo núú xilé váha-án núndàha-gá ñⁿ tutú ní nacaúnuu xio ndaha cùha-gá, te ndéé lètrá ndàa sátá-xi ndihí ndàa xití-xi, te úsá tnahá tutú líhli ñuhu seyú ndéé sátá tütú-án cuendá sá vǎ dáñá-xi nàcaá. ² Te ní xiní-í ñⁿ espíritú xínú cuèchi núú Yá Ndiõxí, te ndéé víhi-xi te níhi càháⁿ-xi, te càchí-xi:

—¿Yoo tàú-xi xocàni nchaa tutú líhli ñuhu seyú ndéé sátá tütú-a te nadacàa-xi? —càchí espíritú-án.

³ Dico ñi àndi, te ñi núú ñùyíú-a, te ñi ndàa xití ñuhu ñá túú ñⁿ ñáyíu tàú-xi nadacàa tutú-án te cundèhé-yu. ⁴ Te yúhú ní ngüíta-í ndàhyú víhí-í cuendá sá ñà túú ñi ñⁿ ñáyíu tàú-xi nadacàa tutú-án cundèhé-yu. ⁵ Te ñⁿ cue téé cùu sacuéhé xñucóo xíaⁿ ñi cachí-güedé xii-í:

—Vá ndàhyú-gá-n, te cada cuendá-n chi Yáá ño cùnuu cuu ndi mee cue ñáyíu cùu ñaní tnahá ndí Jùdá, ñi-ñi Yáá cúu ñaní tnahá ndí Davíí, Yáá-án cúu-gǎ Yáá ní ndacu ní yáha nchaa nándi sá ñi yáha, núu xǎⁿ ñi-ñi-gá tàú-gá xocàni-gá nchaa tutú líhli ñuhu seyú ndéé sátá tütú-án te nadacàa-gá —duha càchí téé cùu sacuéhé-ǎⁿ.

⁶ Te tnuú ndi òcò cùmí cue téé cùu sacuéhé xñucóo-án, ndihí tnuú ndi cùmí quiti xñnutñ^ñ-án, ndihí núú núcõo Yáá táxí tnùní-án ñi xiní-í nútñ^ñ ñⁿ Yáá cáa dàtná cáa ñⁿ mbéé quiti ní dánñcuèhé-güedé te ní xihí-di ñi cùu te ní ndoto-di, te ndéé úsá ndiqui-di, te ndéé úsá tñnuu-di, te sá úsá

tinùu-di-áⁿ cútnùnì sá ndécú ùsá espíritú cúú cuèndá Yǎ Ndiǒxí, ducaⁿ càa Yaá-áⁿ nǐ xiní-í. Te cue espíritú-áⁿ nǐ tendaha-gǎ xícá cùu-xi nǐ caa xico ñuyíú. ⁷ Te Yaá cáá dàtná cáá ìⁿ mbéé quiti ní dánicuèhé-güedé-áⁿ nǐ sáháⁿ-gá núú Yàá núcõo núú xilé váha-áⁿ. ⁸ Te òré ní queheⁿ-gá tutú-áⁿ te ndi cùmí quiti xĩnutnǐ xíaⁿ nǐ ngüíñí xítí-güedi núú-gǎ, te ducaⁿ nǐ ngüíñí xítí tucu ndi ócò cùmí cue téé cùu sacuéhé xĩnucóo-áⁿ, te ndi dǐⁿ nǔú-güedé xĩnehe-güedé yaá sá nání àrpá, te xĩnehe tucu-güedé ndi dǐⁿ nǔú-güedé ìⁿ caa tǐcùú ní cuáha mee-ni dǐhúⁿ cuááⁿ, te chitu dǔsa sá sáháⁿ tnámí. Te ñúhmá dǔsa sá sáháⁿ tnámí-ǎⁿ cúú-xí dàtná nchaa tnúhu càháⁿ nchaa ñáyiu ndècu ichi Yá Ndiǒxí òré càháⁿ ndihì ñàhá-yu xii-gá. ⁹ Te xita-güedé ìⁿ ndudú sáá ndihì cue quiti-áⁿ chíñùhu ñaha-güedé xii-gá, te càchí-güedé ndihì cue quiti-áⁿ:

Yòhó tàú-n queheⁿ-n tutú-a te xocàni-n nchaa tutú lǐhli ñùhu seyú ndèé sátá-xi,

chi yòhó ní sati níñí-n te ní xíhí-n, te cuèndá xíaⁿ ní nduu cuèndá Yǎ Ndiǒxí cue ñáyiu ìⁿ ìⁿ nacióⁿ, ndihì ñáyiu xĩndecu ìⁿ ìⁿ ñuú, ndihì ñáyiu càháⁿ ndi dǐⁿ ndi dǐⁿ nǔú tnúhu, ndihì ñáyiu xĩndecu ìⁿ ìⁿ xichi.

¹⁰ Te ní quidè-n-yu dàtná cue téé yìndaha ñáyiu, te ní quide tucú-n-yu dàtná cue dútú sǎ cúú-xí Yǎ Ndiǒxí.

Te sáá nduu te taxi tnùnì-yu ñuyíú-a. Duha càháⁿ cue téé-áⁿ ndihì cue quiti-áⁿ chíñùhu-güedé ndihì-güedi Yaá-áⁿ.

¹¹ Te sátá dúcáⁿ te ní tecú dóho-í ní cáháⁿ cuéhé víhí espíritú xínú cuèchi nǐ candéé núú núcõo Yaá táxí tnùnì-áⁿ, ndihì núú xĩnutnǐ ndi cùmí cue quiti-áⁿ, ndihì núú xĩnucóo cue téé cùu sacuéhé-ǎⁿ, te ní xiní-í sá sũú ní cuéhé víhí espíritú-áⁿ xĩndecu xíaⁿ, ¹² te níhi ní cáháⁿ cue espíritú-áⁿ, te càchí-xi:

Yòhó Yaá cáá dàtná cáá ìⁿ mbéé quiti ní dánicuèhé-güedé te ní xíhí ní cùu te ní ndoto,

te yòhó ío càhnu cuu-n, te ndècu ndihì-n nchaandi túhú,

te ío ndècu ndihì-n sá xiní tnùnì-n,

te ndàcu-n quide-n nchaa sá cuìn-n,

te nèhe-ndí sá yíñùhu núú-n, te ío váha quide-n,

te chíñùhu ñaha-ndí xii-n, chi ducaⁿ tàú-ndí cada-ndí chi ío càhnu cuu-n.

Duha càchí nchaa cue espíritú-áⁿ xǎhaⁿ-xi xii-gá chíñùhu ñaha-xi.

¹³ Te ní tecú dóho-í ní cáháⁿ nchaandi túhú sá nǐ cadúha Yá Ndiǒxí ndécú àndiu, ndihì nchaa sá ndécú ñuyíú, ndihì nchaa sá ndécú xítí ñuhu, ndihì nchaa sá ñúhú xítí ndute làmár, te xícachí-xi:

Yòhó Yaá núcõo núú xilé váha, ndihì yòhó Yaá cáá dàtná cáá ìⁿ mbéé quiti ní dánicuèhé-güedé táxí tnùnì-ndó, te nèhe-ndí sá yíñùhu núú-ndó,

te ducaⁿ ío ndàcáⁿ táhú-ndí núú-ndó, chi ío váha quide-ndo te ío cùnuu-ndo,

te ñu-ni duha cáháⁿ váha-ndí cuèndá-ndó nǐ caa nǐ quíhíⁿ.

Duha càchí nchaa sá nǐ cadúha Yá Ndiǒxí.

¹⁴ Te ndi cùmí cue quiti xĩnutnǐ-áⁿ càchí-güedi:

—¡Ducaⁿ na cùnduu! —cachí-güedi.

Te ndi ócò cùmí cue téé cùu sacuéhé xĩndecu-áⁿ nǐ ngüíñí xítí-güedé chíñùhu-güedé Yaá ndécú nchàa nduu nchaa quíú.

6

Cuèndá úsá tutú lǐhli ñùhu seyú

¹ Te sátá dúcáⁿ te ní xiní-í sá Yàá cáá dàtná cáá ìⁿ mbéé quiti ní dánicuèhé-güedé-áⁿ nǐ xócání-gǎ ìⁿ tutú lǐhli ñùhu seyú ndèé sátá tütú sá nǐ nadúcúⁿ nuu-áⁿ, te ní tecú dóho-í ní cáháⁿ ìⁿ quiti cùmí xĩnutnǐ-áⁿ, te níhi ní cáháⁿ-di dàtná càháⁿ ñúhu, te càchí-di:

—¡Taquìxi cundehe-n! —cachí-di.

² Te òré-ni-áⁿ nǐ xiní-í ìⁿ cuáyú cuixíⁿ yódó ñàha ìⁿ sá yódó ñàha xii-di, te sá yódó ñàha xii-di-áⁿ néhé-xí ìⁿ arcú sá cúú tnùxií-xi, te ní nduu táhú-xi ìⁿ coróná, te ní ndacu-xi ní cunuu-xi te ducaⁿ-ni ta cùnuu-xi cuáháⁿ.

³ Te òré ní xócání-gǎ tutú lǐhli cùu uú ñúhú sèyú ndèé sátá tütú sá nǐ nadúcúⁿ nuu-áⁿ, te ní tecú dóho-í ní cáháⁿ tucu ingá quiti cùu uú xĩnutnǐ-áⁿ, te càchí-di:

—¡Taquìxi cundehe-n! —cachí-di.

⁴ Te òré-ni-áⁿ nǐ xiní tucu-í ìⁿ cuáyú tícuéhé ní quee-di cuáháⁿ-di, te yòdo ñàha ìⁿ sá yódó ñàha xii-di, te sá yódó ñàha xii-di-áⁿ nǐ níhí-xi tnúhu ndee ìní sá dáticánuu-xi

ñáyiú vá cúndècu ndihí tñaha váha-gá-yu, te ngúita ñáyiú cahni tñahá-yu, te ní nduu táhú-xi ñⁿ yuchí cáhnú vñhi.

⁵ Te òré ní xócání tùcu Yaá-áⁿ ingá tutú lñhli cùu uní ñúhú sèyú ndèé sátá tùtú sá ñí nadúcúⁿ nuu-áⁿ, te ní tecú dóho-í ní cáháⁿ quiti cùu uní xñnutñí xíáⁿ, te càchí-dí:

—¡Taquixi cundehe-n! —cachí-dí.

Te òré-ni-áⁿ ñí xiní tucu-í ñⁿ cuàyú tñúú te yòdo ñaha tucu ñⁿ sá yódó ñaha xii-dí, te sá yódó ñaha-áⁿ núndàha-xi úú yaxiⁿ libré. ⁶ Te ní tecú dóho-í ní cáháⁿ ñⁿ sá ñí cáháⁿ tñúú cue quiti xñnutñí-áⁿ, te càchí-xi:

—Ñⁿ cuàrtú-nă tríú níhí-ndó să ñⁿ dñhúⁿ denàriú, te úní cuàrtú-nă cebàdá níhí-ndó să ñⁿ tùcu dñhúⁿ denàriú, dico acítí ndihí ndudí ndéhé yoho yàha stilé chí vá ndihí ñhnu —duha càchí sá cáháⁿ-áⁿ.

⁷ Te òré ní xócání tùcu Yaá-áⁿ tutú lñhli cùu cumí ñúhú sèyú ndèé sátá tùtú sá ñí nadúcúⁿ nuu-áⁿ, te ní tecú tucu dóho-í ní cáháⁿ tucu ingá quiti cùu cumí xñnutñí-áⁿ, te càchí-dí:

—¡Taquixi cundehe-n! —cachí-dí.

⁸ Te òré-ni-áⁿ ñí xiní tucu-í ñⁿ cuàyú yàhá, te yòdo ñaha tucu ñⁿ sá yódó ñaha xii-dí, te sá yódó ñaha xii-dí-áⁿ nání-xí Să xihí, te xíáⁿ sáhní-xí ñáyiú, te sátá xíáⁿ nchícúⁿ sá nèhé núú ndécú ñáyiú ní xihí. Te cúmí xichi cùu ñuyíú, te sá sáhní ñaha xii ñáyiú-áⁿ ñí níhí-xi tñúhu ndee ìní danàa-xi ñáyiú ñⁿ xichi ñuyíú, te davá-yu cahni ñaha-xi ndihí yuchí, te cada-xi sá cóo tñamá te cuú-yu, te cada tucu-xi sá cóo cuèhé cahni-xi ñáyiú, te ñu-ni tucu-xi cada sá ncháá quiti dééⁿ cahni-dí ñáyiú.

⁹ Te òré ní xócání tùcu Yaá-áⁿ tutú lñhli cùu uhúⁿ ñúhú sèyú ndèé sátá tùtú sá ñí nadúcúⁿ nuu-áⁿ, te òré-áⁿ ñí xiní-í nútnñí ñⁿ núú sácódó să ndúú táhú Yă Ndiöxí, te ndàa caha xíáⁿ ní xiní-í xñndecu nchaa àlmá ñáyiú ní sahní-güedé núú ñuyíú să cuendá tñúhu Yă Ndiöxí, ndihí sá cuendá sá ñí cáháⁿ váha-yu cuendá-gá. ¹⁰ Te nchaa àlmá-áⁿ ñihí xícáháⁿ-xi, te xăháⁿ-xi xii Yă Ndiöxí:

—Yòhó Dútú Ndiöxí cúú-n Yàá ñá túú tñahí cuèchi-xi, te ñá túú tñahí quée cáva-n quide-n ñⁿ sá cáháⁿ-n. ¿Te ná ndèé ama dandòho-n ñáyiú ndècu ñuyíú nachinaa-n cuendá sá ñí quide ñahá-yu xii-ndí-í? —càchí cue àlmá-áⁿ xăháⁿ-xi xii-gá.

¹¹ Te sátá dúcáⁿ te nchaa cue àlmá ñáyiú-áⁿ ñí níhí-xi dóó cuixíⁿ ní quée cuñhu-xi, te ní xitñúhu ñaha xii-xi sá ná ndètatú-xi te cundetú tñaa-xi ndèé ná xñnu cava cuú ñáyiú nàcuáa ndèé tñuní dàtná ní xihí cue ñáyiú dii àlmá-xi cùu-xi. Te ñáyiú sa ní xihí-áⁿ ñⁿ-ni cùu-yu ndihí ñáyiú vitna cuú-áⁿ chí mee-ni chiúⁿ Xítóhó Jesucristú quidè-yu, te ñu-ni ichi-gá ndécú-yu.

¹² Te òré ní xócání tùcu Yaá-áⁿ tutú lñhli cùu iñú ñúhú sèyú ndèé sátá tùtú sá ñí nadúcúⁿ nuu-áⁿ, te ní xiní-í súúni ñihí ní quidi-xi ñuyíú, te ní cutnuu ñihí núú nchicanchii dàtná ñⁿ dóó tñúú, te ní cuu tñcuèhé níñí ñihí núú yóó. ¹³ Te ní xiní-í ní ngoyo chódíní ñuyíú-a dàtná ngóyó ngüxí yihí òré quéné táchí ñihí. ¹⁴ Te ní xiní-í ní nadúcúⁿ nuu andíu dàtná nádúcúⁿ nuu ñⁿ tutú te ní ndóñúhú-xí, te nchaa tñdúú ñí xica ndehe-xi núú ndécú-xí, te ducaⁿ ñí xica ndehe tucu nchaa tñdúú yèchí ndécú xití ndute làmár. ¹⁵ Te nchaa cue téé yindaha ñáyiú ní nguívàha-güedé, ndihí nchaa dava-gá cue téé ío tàxi tñuní, ndihí nchaa ñáyiú cuica, ndihí nchaa cue téé tàxi tñuní sandàdú, ndihí cue sandàdú cue téé ío váha sáa díquí-xi nàcuáa cada-güedé nàa-güedé, ndihí nchaa ñáyiú ñá túú tñahí dàñá quee núú chíúⁿ pàtróoⁿ-xi, ndihí nchaa ñáyiú dàñá quée núú chiúⁿ pàtróoⁿ-xi. Te dava ñáyiú-áⁿ ñí nguívàha-yu xití yaú, te davá-yu ní nguívàha-yu nchaa tñúú cava. ¹⁶ Te xăháⁿ-yu nchaa tñdúú ndihí nchaa cava:

—Chí tácuúⁿ chiváha ñaha-ndo xii-ndí cuendá sá vă quini ñahá Yàá ío tàxi tñuní núcòo núú xilé váha, ndihí cuendá sá vă dándòho ñaha Yàá cáá dàtná cáá ñⁿ mbéé quiti ní dñncuèhé-güedé, chí Yaá-áⁿ ío cùdèéⁿ-gă núú-ndí —duha càchí nchaa ñáyiú-áⁿ xăháⁿ-yu xii nchaa tñdúú-áⁿ ndihí nchaa cava-áⁿ.

¹⁷ Te vitna ní sáa nduu ío cùu cahnu nduu tñúndòho tñúhu ndahú, te vá yóo ñⁿ cundee ìní-xi yàha nchaa tñúndòho-a.

7

Ñáyiú isràél ñáyiú naníhí tàhú

¹ Te sátá xíáⁿ te ní xiní-í cúmí tñahá espíritú xínú cuèchi núú Yă Ndiöxí xñnutñí-xi ndí cùmí xio ñuyíú, te cue

espíritú-áⁿ ñi ngani-xi táchí cuendá sá vǎ cuícó-gǎ-xi ni lámár, te ni dǐquí yutnu, te ni ñⁿ xichi ñuyúú vǎ cuícó-gǎ-xi. ² Te cue espíritú-áⁿ ndécú ndihí-xi tnúhu ndee íní danàa-xi sá íó lámár ndihí sá íó ñuhu yìchí, te ní xiní tucu-í ingá espíritú xínú cuèchi núú Yǎ Ndiòxí ní quee nchita-xi ndàa nacuaa quène nchícanhii, te nùndaha-xi seyú Yǎ Ndiòxí Yaá ndécú nchàa nduu nchaa quíú, te níhi ní cáháⁿ-xi xǎhaⁿ-xi xii ndi cumí cue espíritú-áⁿ:

³ —Vǎ dánàa-ndo sá íó lámár, te ni vǎ dánàa-ndo yutnu, te ni ñⁿ sá íó ñuyúú vǎ dánàa-ndo, chi cundetú-ndo ndéé ná tàxi ndecu-ndí ñⁿ sèñá tneé nchaa ñáiyu xínu cuechi núú Tǎtá-ó Dǔtú Ndiòxí —duha càchí espíritú-áⁿ xǎhaⁿ-xi xii ndi cumí espíritú xǐnutnǐ ndi cùmí xichi ñuyúú.

⁴ Te ní tecú dóho-í ní cáháⁿ ñⁿ sá ñi cáháⁿ, te ní cachí-xi sá núú ndí ùxúú xichi cue ñáiyu isráel te ní xínu ñⁿ cièndú údico cùmí mǐl-yu ní ngúndecu sèñá tneé-yu. ⁵ Te núú ñⁿ cièndú údico cùmí mǐl ñáiyu-áⁿ, te ní xínu úxúú mǐl cue ñaní tnáhá ndíi Jùdá ní ngúndecu sèñá tneé-yu, te úxúú mǐl cue ñaní tnáhá ndíi Rùbén, te úxúú mǐl cue ñaní tnáhá ndíi Gǎd, ⁶ te úxúú mǐl cue ñaní tnáhá ndíi Àsér, te úxúú mǐl cue ñaní tnáhá ndíi Neftalí, te úxúú mǐl cue ñaní tnáhá ndíi Manàsés, ⁷ te úxúú mǐl cue ñaní tnáhá ndíi Mìó, te úxúú mǐl cue ñaní tnáhá ndíi Lèví, te úxúú mǐl cue ñaní tnáhá ndíi Isàcár, ⁸ te úxúú mǐl cue ñaní tnáhá ndíi Zabùlón, te úxúú mǐl cue ñaní tnáhá ndíi Chèé, te úxúú mǐl cue ñaní tnáhá ndíi Benjàmín, nchaandi túhú ñáiyu-áⁿ ñi ngúndecu sèñá tneé-yu.

Cuéhé víhí ñáiyu ñihnu dóó cuixíⁿ

⁹ Te sátá xǎⁿ te ní xiní-í cuéhé víhí ñáiyu, ñáiyu ñⁿ ñⁿ nacióⁿ, ndihí ñáiyu ñⁿ ñⁿ ñúú, ndihí ñáiyu càháⁿ ndi dǐⁿ ndí dǐⁿ núú tnúhu, ndihí ñáiyu ní xíndecu ñⁿ ñⁿ xichi, te nchaa ñáiyu-áⁿ xǐnutnǐ-yu ndàa núú Yàá táxí tnùní núcõo núú xilé váha, ndihí núú Yàá cáá dàtná cáá ñⁿ mbéé quiti ní dánícuèhé-güedé, te vá yõo ñⁿ ndàcu cahu ñaha xii-yu chi cuéhé víhí-yu, te nchaá-yu xǐxíhnu-yu mee-ni dõó cuixíⁿ, te nùndahá-yu nchaá-yu ñⁿ caa ndàha yutnu

ñúú. ¹⁰ Te nchaá-yu níhi xǐcáháⁿ-yu, te càchí-yu:

Yaá táxí tnùní núcõo núú xilé váha cùu-gá Ndiòxí-ó,

te diu-gá ndihí Yaá cáá dàtná cáá ñⁿ mbéé quiti ní dánícuèhé-güedé ní dácacu ñihnu ñaha-gǎ xii-o núú ùhú núú ndàhú.

Duha càchí nchaa ñáiyu-áⁿ. ¹¹ Te nchaa espíritú xínú cuèchi núú Yǎ Ndiòxí ní nadúcúⁿndéé-xi xǐnutnǐ-xi ñi càndéé núú núcõo Yaá núcõo núú xilé váha, ndihí núú xínucõo cue téé cùu sacuéhé, ndihí cue ndí cùmí quiti xǐnutnǐ-áⁿ, te nchaa-xi ní ngüíñí xítí-xí te ní ngúnu ndeyí-xi núú Yàá núcõo núú xilé váha-áⁿ, te nchaa-xi ní ngüíta-xi chĩñuhu ñaha-xi xii-gá, ¹² te càchí-xi:

Na càháⁿ ndáá-ndí núú yòhó Tǎtá-ndí Dútú Ndiòxí sá ío càhnu cuu-n, te ndàcu-n guide-n nchaa sá váha cuìní-n, te ío váha guide-n, te ndècu ndihí-n nchaa sá xiní tnùní-n,

te chĩñuhu ñaha-ndí xii-n, te ducaⁿ ndàcáⁿ táhú-ndí núú-n cuendá nchaa sá quidé-n, te nèhe-ndí sá yíñuhu núú-n,

te tnúhu càháⁿ-ndí-a cùu-xi tnúhu ndáá, te diu-ni duha càháⁿ-ndí ndéé núú cuaháⁿ núú vèxi.

Duha càchí nchaa cue espíritú-áⁿ xǎhaⁿ-xi xii Yaá núcõo núú xilé váha-áⁿ.

¹³ Te ñⁿ cue téé cùu sacuéhé xíndecu-áⁿ ñi xicáⁿ tnúhú-dé núú-í, te càchí-dé:

—¿Yóndi cùu ñáiyu dàcáⁿ xǐxíhnu dóó cuixíⁿ-áⁿ, te ndéé véxi-yu núú dàcáⁿ xíndáá-yu-i? —càchí-dé.

¹⁴ Te yúhú ní xáhaⁿ-í:

—Tǎtá, ñá túú xiní-í, dico mee-n xiní-n —duha ní xáhaⁿ-í xii-dé.

Te dàtnùní ní cachí tnúhu-dé xii-í ná cúú ñáiyu-áⁿ, te càchí-dé:

—Nchaa ñáiyu-a cùu-yu ñáiyu ní quee núú íó víhí tnúhu ndòho tnúhu ndàhú sá vǎ cùndéé iní-ó te véxi-yu iha, te cùu-yu ñáiyu sa ní nduu ndoo ní nduu nine iní-xi cuendá sá ñi satí níñí Yàá cáá dàtná cáá ñⁿ mbéé quiti ní dánícuèhé-güedé, cuendá xǎⁿ vitna ní ndihí-yu ní nduu cuixíⁿ dóó xǐxíhnu-yu. ¹⁵ Te núú xǎⁿ vitna ní nduu táhú-yu ndécú-yu núú ndécú Yǎ Ndiòxí Yaá táxí tnùní núcõo núú xilé váha, te cuèi nduu cuèi niú xínú cuèchí-yu

núú-gǎ vitna, te diu-gǎ xító ñaha-gǎ xií-yu. ¹⁶ Te vitna ní sáá-yu núú-gǎ cundécú-yu te vá ndóhó-gǎ-yu docó, te ní vǎ quíní-gǎ-yu ndohó-yu yíhí-yu ndute, te ní vǎ quíní-gǎ-yu ndohó-yu cahni nchíanchii, te ñá túú-gǎ ná cahni ndohó-yu. ¹⁷ Te ducaⁿ chi Yaá cáá dàtná cáá ìⁿ mbéé quiti ní dánicuèhé-güedé ndécú-gǎ núú nútnǐ xilè váha núcóo Yá Ndiöxí Yaá táxí tnùní, Yaá-áⁿ coto ñaha-gǎ xií-yu dàtná quidé ìⁿ toli oré xító-dě mbéé-dě, te candeca ñaha-gǎ xií-yu quíhíⁿ núú tǎo ndute, te ndute-áⁿ cúú-xí ndute candeca iní-yu, te Yá Ndiöxí cada-gǎ sá vǎ quíní-gǎ-yu tnúhu ndàhyú — duha ní cachí tnúhu téè cùu sacuéhé-ǎⁿ xii-í.

8

Cuèndá tǐcùú sá ñǎ cuáha mee-ni dǐhúⁿ cuááⁿ

¹ Te sátá dúcáⁿ te Yaá cáá dàtná cáá ìⁿ mbéé quiti ní dánicuèhé-güedé ní xócání-gǎ tutú líhli cùu usá ñúhú sèyú ndéè sátá tütú sá ñǎ nadúcúⁿnuu-áⁿ, te òré-áⁿ ñǎ cunahi sùúⁿí nàvii-ñǎ ní cuu andi^u dàtná cuádava òré. ² Te ní xiní-í usá tnàhá espíritú xínú cuèchi núú Yá Ndiöxí xǐnutnǐ-xi núú núcóo-gǎ, te ní níhí-xi ìⁿ caa cütú xǐnehe-xi. ³ Te dàtnùní ní xiní tucu-í ìngá espíritú xínú cuèchi núú-gǎ ní quexìo-xi nehe-xi ìⁿ tǐcùú ní cuáha mee-ni dǐhúⁿ cuááⁿ te ñúhu vai dúsa sá sàháⁿ tnámí, te ní ngúnutnǐ espíritú-áⁿ núú ndécú sǎ ñǎ cuáha mee-ni dǐhúⁿ cuááⁿ núú sácódo sǎ ndúú tǎhú Yá Ndiöxí, te xǐǎⁿ nútnǐ-xi ndàa núú-gǎ, te dúsa sá sàháⁿ tnámí-áⁿ cahmi espíritú-áⁿ núú sácódo sǎ ndúú tǎhú-gǎ-áⁿ cuèndá ñúhmá dúsa-áⁿ cundihi-xi nchaa tnúhu càháⁿ ñáyiu càháⁿ ndihí ñaha xì-gǎ, nchaa ñáyiu cùu cuèndá-gǎ. ⁴ Te nùndaha espíritú-áⁿ tǐcùú ñúhú dúsa sá sàháⁿ tnámí cáyú, te quène ñúhmá nútnǐ-xi núú Yá Ndiöxí, te ñúhmá-ǎⁿ cundǐhi-xi nchaa tnúhu càháⁿ ñáyiu càháⁿ ndihí ñaha xì-gǎ, nchaa ñáyiu cùu cuèndá-gǎ. ⁵ Te ní queheⁿ espíritú-áⁿ tǐcùú te ní dáchitú-xi ñuhú yódó núú sácódo sǎ ndúú tǎhú Yá Ndiöxí, te ní xítenuu-xi ñuyú, te òré ducaⁿ ñǎ quide-xi te ní càháⁿ víhí ñúhu, te ío dusaⁿ ñǎ quide-xi ñuyú, te ní sáá nduté, te níhi víhi ní tnáa.

Ndi ùsá espíritú ní tiú-xi ìⁿ caa cütú xǐnehe-xi

⁶ Te ndi ùsá cue espíritú xǐnehe ìⁿ caa cütú-ǎⁿ ñǎ ngúndecu túha-xi cuèndá tiú-xi.

⁷ Te espíritú díhna nuu ñǎ tiú-xi cütú néhé-xí, te ñuyú-a ní ngoyo ñǎ ñǎ dácánuu-xi ndihí ñuhú ndihí níñí, te luha-ná te cuu dava ñuyú ñǎ cáyú, te luha-ná te cuu dava tucu nchaa yutnu ío ñuyú ñǎ cáyú, te luha-ná te cuu dava tucu nchaa cùhú ío ñuyú ñǎ cáyú.

⁸ Te espíritú cúú ùú ní tiú-xi cütú néhé-xí, te dàtná cáá ìⁿ tǐndúú cáá ìⁿ sá ñǎ ngava xití làmár te nchícúⁿ ñuhú, te luha-ná te cuu dava ndute làmár-áⁿ ñǎ nduu-xi níñí. ⁹ Te luha-ná te cuu dava nchaa quiti xǐxúhuⁿ xití làmár-áⁿ ñǎ xǐhí-güedi, te luha-ná te cuu dava nchaa bàrcú ní quée naa-xi xití ndute.

¹⁰ Te espíritú cúú ùní ní tiú-xi cütú néhé-xí, te ní ngava ìⁿ chódíní càhnú ndéè andi^u ñuyú te nchícúⁿ ñuhú-di, te ñuhú-áⁿ cáá dàtná cáá ñúhú ití. Te luha-ná te cuu dava nchaa yúte ní ngava chódíní-ǎⁿ, te luha-ná te cuu dava tucu nchaa núú quènihni ndute ní ngava-di. ¹¹ Te chódíní-ǎⁿ nání-dí: Yúcú Ùá. Te ndute xǐca nchaa yúte-áⁿ ndihí nchaa ndute quènihni-áⁿ ñǎ cuu úa-xi dàtná yúcú ùá, te ío cuéhé ñáyiu ní xǐhí sá dúcáⁿ ñǎ cuu úa ndute-áⁿ.

¹² Te espíritú cúú cùmí ní dácàháⁿ-xi cütú néhé-xí, te luha-ná te cuu dava nchíanchii ñá túú ní dáyehé-xi, te ducaⁿ lùha-ná tucu cuu dava yóo ñá túú ní dáyehé-di, te ducaⁿ lùha-ná te cuu dava tucu nchaa chódíní ñá túú ní dáyehé-güedi, te luha-ná te cuu dava nduu ñá túú ní dáyehé nchíanchii, te ducaⁿ lùha-ná te cuu dava niú ñá túú ní dáyehé yóo ndihí nchaa chódíní.

¹³ Te sátá dúcáⁿ te ní xiní-í xícó ìⁿ espíritú xínú cuèchi núú Yá Ndiöxí núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyiu xǐndecu ñuyú òré ná dácàháⁿ úní-gǎ cue espíritú cùmání cütú xǐnehe-xi, chí sa xǐndecu túha-ná-xi sá dácàháⁿ-xi! — duha càchí espíritú-áⁿ.

9

¹ Te espíritú cúú ùhúⁿ ní tiú-xi cütú néhé-xí, te òré-áⁿ ñǎ xiní-í ní quee ìⁿ espíritú andi^u te càa-xi datná cáá ìⁿ chódíní, te

ní ngava-xi ñuyíú, te ní níhí-xi ìⁿ ndacaá néhé-xí cuendá nacaáⁿ-xi yuyèhe yaú cùnú víhí. ² Te ní nacaáⁿ-xi yaú-áⁿ te ní ngúíta-xi ní quene ñúhmá dàtná quéné ñúhmá ìⁿ xítnú cáhnú vîhi, te ní quene táchí ñí xítenuu-xi ñúhmá-áⁿ te ní sadí-xi núú nchìcanchii, te ní cunee ñuyíú. ³ Te xítí ñúhmá-áⁿ ñí quene tíca làngóstá, te ní xítenuu-di ñuyíú, te dééⁿ-güedi dàtná dééⁿ nchacua. ⁴ Te ní ngúndecu ndihi-güedi tnúhu ndee ìní cuendá sá dándòho-güedi mee-ni ñáyíu ñá túú ndèé sèñá Yă Ndiöxí tneé-xi, te ñá túú nă cada-di nchaa yutnu ndihi nchaa cúhú. ⁵ Te ñá túú tnúhu ndee ìní ndécú ndihi-güedi sá cáhni-güedi ñáyíu, chi mee-ni sá dándòho ñaha-güedi xií-yu úhúⁿ yóó. Te òré ní ngúíta-güedi dándòho ñaha-güedi xií-yu te tãhú tnúhú núú dáquëe-güedi iñu-güedi dàtná quidé-xí núú dáquëe nchacua iñu-güedi. ⁶ Te ñáyíu-áⁿ xicáⁿ tãhú-yu sá ndíhi cuú-yu cuendá sá ìo ndòhó-yu dàquëe ñaha nchaa quiti-áⁿ iñu-di xií-yu te ñá cuini-xi cuú-yu, te ìⁿ nduu ìⁿ nduu sàni iní-yu cuú-yu te ñá túú cuini-xi cuú-yu chi ñá túú tnúhu xihí sá cúú-xí-yu.

⁷ Te nchaa tíca làngóstá-áⁿ xindáa-güedi dàtná ndáa nchaa cuàyú cue téé cuáháⁿ nàá, te díquí-güedi ñúhu ìⁿ sá cáá dàtná cáá còroná ní cuáha mee-ni dñhúⁿ cuááⁿ, te núú-güedi càa datná cáá núú cuè téé. ⁸ Te idi díquí-güedi càa datná cáá ìdi díquí ñáyíu dñhí, te núhu-güedi càa datná cáá núhu ndicaha. ⁹ Te yidúcúⁿnuu-güedi ìⁿ sá cáá dàtná cáá càá, te ndíxíⁿ-güedi quide-xi datná quidé-xí núú vëxi cuéhé víhí càrretá sá tãñúhu cuayú cuáháⁿ-güedé ndihi-güedi núú nàa-güedé. ¹⁰ Te ndèé iñu núú lùhmá-güedi dàtná ndèé iñu núú lùhmá nchacua, te iñu núú lùhmá-güedi-áⁿ dáquëe-güedi ñáyíu dándòho ñaha-güedi xií-yu, te ducaⁿ-ni càda-güedi dándòho ñaha-güedi xií-yu ndèé xínu úhúⁿ yóó. ¹¹ Te nchaa tíca làngóstá-áⁿ táxí tnùnì ñáhá espíritú sá táxí tnùnì yaú cùnú víhí, te espíritú-áⁿ nánì-xí Àbadón tnúhu hëbreú, te tnúhu griégú nánì-xí Àpolión, te ndi ndùú tnúhu-áⁿ quéé-xí: Sá dánàa ñáyíu.

¹² Te tnúndòho-a cuu-xi tnúndòho díhna

nuu, te vitna cùmání úú-gá.

¹³ Te espíritú cúú iñú ní tíú-xi cútú néhé-xí. Te núú Yă Ndiöxí nútní ìⁿ sá ñí cuáha mee-ni dñhúⁿ cuááⁿ núú sácódó sá ndúú tãhú-gă, te ndi cùmí xíquí-xi xñdecu ìⁿ caa ndiquí, te ní tecú dóho-í ní cáháⁿ ìⁿ sá ñí cáháⁿ nihnu ndi cùmí ndiquí-áⁿ. ¹⁴ Te sá càháⁿ nihnu ndiquí-áⁿ xãhaⁿ-xi xí espíritú cúú iñú sá ñí tíú cútú-áⁿ:

—Cuáháⁿ nandaxi-n ndi cumí espíritú ndútú ndècu yúte càhnu nani Eúfratés — càchí sá càháⁿ-áⁿ xãhaⁿ-xi xí espíritú-áⁿ.

¹⁵ Te sá tá dúcáⁿ te ní nandáxí ndi cùmí cue espíritú-áⁿ cuendá cahni-xi cuéhé víhí ñáyíu, te sa yatni dàtná cuádava ñáyíu xñdecu ñuyíú cahni-xi, te ducaⁿ chi sa ndècu túha tnàhí cue espíritú-áⁿ ndétú-xí sáà òré, àdi nduu, àdi yóó, àdi cuíá ducaⁿ càda-xi cahni-xi ñáyíu. ¹⁶ Te ní xiní-í nchaa cue sandàdú cündíhi-xi xixódó-güedé cuàyú, te ní níhí-í tnúhu sá xínu úú ciëndú millón-güedé.

¹⁷ Te duha xindáa cue cuàyú-áⁿ ndihi cue téé yòdo ñaha-áⁿ ñí xiní-í: Te cue téé-áⁿ yidúcúⁿ nuu ìⁿ sá yidúcúⁿnuu pèchú-güedé, te luha ticuéhé te luha cuì datná cuì andíu, te luha cuááⁿ, te nchaa cuàyú-áⁿ cáá díquí-güedi dàtná cáá díquí ndicaha, te yuhu-güedi quène ñuhú ndihi ñúhmá, ndihi àzufre nchìcúⁿ ñuhú. ¹⁸ Te ìo cuéhé ñáyíu ñuyíú ñí xihí chi luha-ná te cudavá-yu ní xihí sá cuendá ñuhú-áⁿ ndihi ñúhmá-áⁿ ndihi àzufre-áⁿ. ¹⁹ Te ndihi núú lùhmá-güedi ndihi yuhu-güedi dándòho-güedi ñáyíu, te núú lùhmá-güedi nèhe-xi díquí còó, te diu-ni dàtná cáá còó cáá ñihí lùhmá-güedi.

²⁰ Te nchaa dava-gá ñáyíu ní cácu ñá túú ñí xihí núú nchaa tnúndòho-áⁿ ñá túú ní cuini-yu dñhá-yu ichi cuéhé ichi duha ndécú-yu, chi quide cahnu-ní-yu nchaa espíritú cündíhi yucu ñávãha, ndihi nchaa sá càchí-yu cùu ndióxí ní cadúha cue téé ñuyíú-a, te dava xíãⁿ ní cuáha mee-ni dñhúⁿ cuááⁿ, te dava ní cuáha mee-ni dñhúⁿ cuixíⁿ, te dava ní cuáha sá nánì bròncé, te dava ní cuáha mee-ni yúú, te dava ní cuáha mee-ni yutnu, te nchaa xíãⁿ ñá túú cùtnunì núú-xi, te ñí ñá túú tècú dóho-xi, te ñí ñá ndácú-xí càca-xi. ²¹ Te ñí sá sáhnì tnàhá-yu, te ñí sá sáhnì ndùu tnahá-yu, te ñí sá ndécú-yu ichi

díí ìní, te ní sà dúhú ndàchiuⁿ tnahá-yu ñá túú ní cuíní-yu dàñá-yu.

10

Íⁿ espíritú xínú cuèchi núú Yă Ndiöxí néhé-xí ìⁿ librú

¹ Te sáta dúcáⁿ te ní xíní tucu-í ìⁿ espíritú cúnúu xinu cuechi núú Yă Ndiöxí ní quee-xi andiu, te yìhi-xi xití vícò cuãnguee-xi ñuyúú te ndàa díquí-xi ndècu ìⁿ cóó yáhnchí, te núú-xi súúní chàhnchí dàtná chàhnchí núú nchìcanchii, te ndi ndúú díhíⁿ-xi càa datná cáá ìtá ñuhu. ² Te nùndaha-xi ìⁿ librú líhli ní nandicá, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí. ³ Te espíritú-áⁿ ñhi vîhi ní cáháⁿ-xi, te ní quide-xi dàtná quidé ìⁿ ndicaha oré cánásaa-di, te òré ducaⁿ ñhi vîhi ní cáháⁿ-xi te úsá xito ní cáháⁿ ñuhu. ⁴ Te sáta ñí yáha ní cáháⁿ ñuhu-áⁿ úsá xito, te chidó tñùní-í ìⁿ núú tütú nàcuáa ní cáháⁿ-xi ní cùu, te mei òré-áⁿ ñí tecú dóho-í ní cáháⁿ ìⁿ sá ñí cáháⁿ andiu te cächí-xi:

—Vá chidó tñùní-n nàcuáa ní cáháⁿ ñuhu-áⁿ, iní méé-ní-n ná cùhuⁿ —duha cächí sá ñí cáháⁿ-áⁿ.

⁵ Te espíritú sá nùtní ìⁿ xio sáhá-xi núú ndute làmár-áⁿ ndihí ìngá xio sáhá-xi núú ñuhu yìchí-áⁿ ñí xíní-í ní ndonehe-xi ndaha cùha-xi, ⁶ te cächí-xi:

—Yá Ndiöxí Yaá ndécú nchàa nduu nchaa quíú Yaá ní cadúha ñuyúú, ndihí andiu, ndihí làmár, ndihí nchaa sá ió, Yaá-áⁿ náhá ndáá-gá sá yùhú càháⁿ ndáá-í, te vá cùyàa vihi ⁷ te cada-xi nchaa nàcuáa ndùu tñuhu ndùu yuhu ní cáháⁿ-gá, tñuhu ní xáhaⁿ-gá xii cue téé ní xinu cuechi nùú-gá, cue téé ní xóo cáháⁿ tñuhu-gá ndéé sanaha, chi òré ná tíú espíritú cúú ùsá cútú néhé-xí, te òré-áⁿ cada-xi nchaa nàcuáa ndùu tñuhu ndùu yuhu sá ñí xáhaⁿ-gá xii nchaa cue téé-áⁿ —duha cächí espíritú-áⁿ.

⁸ Te sáta dúcáⁿ te ní tecú tucu dóho-í ní cáháⁿ tucu sá ñí cáháⁿ andiu-áⁿ, te cächí-xi xii-í:

—Cuáháⁿ te queheⁿ-n librú líhli sá ñí nandicá nùndàha espíritú-áⁿ, espíritú sá nùtní ìⁿ xio sáhá-xi núú ndute làmár, te ìⁿ xio sáhá-xi núú ñuhu yìchí —duha cächí sá ñí cáháⁿ-áⁿ.

⁹ Te yùhú ní sáháⁿ-í núú ndécú espíritú-áⁿ xicáⁿ-í librú líhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cuvídí òré xihí-n ndudí ñúñú, dico xití-n chi cada úá-xi —cächí-xi.

¹⁰ Te ní queheⁿ-í librú líhli nùndaha espíritú-áⁿ ní xexi-í, te yuhu-í ní quide vídí-xi dàtná vídí ndudí ñúñú, dico sáta ñí ngava-xi xití-í te ní quide úá-xi. ¹¹ Te ní cachí tucu espíritú-áⁿ xii-í:

—Dacuití cáháⁿ tucu-n nàcuáa cächí Yă Ndiöxí cuèndá ñáyiu titní víhí nàcióⁿ, ndihí cuèndá ñáyiu titní víhí ñúú, ndihí cuèndá ñáyiu càháⁿ ndí dííⁿ ndí dííⁿ núú tñuhu, ndihí cuèndá cue téé yìndaha ñáyiu.

11

Cuèndá úú cue téé càháⁿ nàcuáa cächí Yă Ndiöxí

¹ Te ní níhí-í ìⁿ tnuyoo nàcuáa chicùhá-í ìⁿ sá chicùhá-í, te ní cáháⁿ ìⁿ sá ñí cáháⁿ, te cächí-xi:

—Ndacuíñí te chicùhá-n vèhe Yă Ndiöxí, te chicùhá tucu-n nùú sácódó sã ndúú tãhú-gã, te cahu-n nã daha tñàhá ñáyiu chiñuhu ñaha xii-gá xìndecu. ² Dico vá chicùhá-n ndàa quehé vehe-gá, chi xíaⁿ ñí nduu cuèndá cue ñáyiu ñá túú cùu ñáyiu is-ràél, te ñáyiu-áⁿ nduu nuu-nã-yu núú ní cuu ñúú-gá, te cada-yu dàtná cächí iní méé-yu, te údico úú yóo ducaⁿ càdá-yu. ³ Te yùhú tendaha-í úú tñàhá cue téé cáháⁿ yuhu-í nàcuáa cächí Yă Ndiöxí, te úxúú cièndú únídico nduu ducaⁿ càháⁿ-güedé yuhu-í cada-güedé núú-í, te cuihnu-güedé dóó tñúú sã sácúhnu cue ñáyiu ndihú iní-xi —duha cächí sá càháⁿ-áⁿ.

⁴ Te ndi ndúú cue téé-áⁿ cúú-güedé dàtná úú yutnu òlívú sá xìnutní núú Yă Ndiöxí, ndihí dàtná úú sá ndèé dité-xi, sá yìndòdo ìⁿ caa candíl núú dité-xi ndècu tucu núú-gã, te diu-gá cúú-gã Yaá yìndàha ñuyúú. ⁵ Te ñáyiu na càni iní-xi ná cada ñaha xii-güedé te yuhu-güedé quene ñuhu cahmi ñaha-xi xii-yu, te ducaⁿ càda-güedé cahni-güedé nchaa ñáyiu na cùu úhú iní ñáhá xii-güedé.

⁶ Te ndi ndúú-güedé ndécú ndihí-güedé tñuhu ndee ìní cada-güedé sá vã cúúⁿ dãú, te ducaⁿ càda-güedé ñini càháⁿ-güedé nàcuáa cächí Yă Ndiöxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyiu

titní núú tnùhu ndòho, te ducaⁿ càda-güedé ná daha xito cächí iní méé-güedé. ⁷ Te nà yáha sá cáháⁿ-güedé nàcuáa ní cachí Yá Ndiöxí, te dāvá-áⁿ quene ìⁿ quití dééⁿ yàú cùnú víhí sã ïo nèhé cáá, te quití-áⁿ ngüíta-di nàá-di ndihí ndi ndùú cue téé-áⁿ te cahni ñaha-di xii-güedé. ⁸ Te yiqui cùnú cue téé-áⁿ cautùu-xi ìⁿ tnuú ñuú cahnú ñuú ní sahani-güedé Xitohó Jesucristú núú cùrúxí, te ñuú Yaá-áⁿ cúú Xitohó-ó ndihí-güedé, te cächí ñáyíu sá ñuú-áⁿ cúú-xí dàtná ñuú Sòdomá ndihí nacióⁿ Ègíptú. ⁹ Te úní nduu dava cautùu yiqui cuñú-güedé xíáⁿ, te ñáyíu nchaa nacióⁿ, ndihí ñáyíu nchaa ñuú, ndihí ñáyíu cáháⁿ ndí dñíⁿ ndí dñíⁿ núú tnùhu, ndihí ñáyíu xíndecu nchaa xichi quini-yu yiqui cuñú-güedé, te vá dáñá-yu nguindüxi. ¹⁰ Te nchaa ñáyíu-áⁿ nduu vétú iní-yu sá dúcáⁿ cùú cue téé cáháⁿ nàcuáa cächí Yá Ndiöxí-áⁿ, te ío cudíⁿ iní-yu, te nándí sá cuáha táhú tnáhã-yu sá cudíⁿ iní-yu sá dúcáⁿ ñí xihí-güedé, te ducaⁿ chi ñuú-güedé ní quide ío ní ndohó-yu. ¹¹ Te sátá ná yáhá úní nduu dava sá dúcáⁿ cùú-güedé te Yá Ndiöxí dandòto ñaha-gá xii-güedé, te ndacóo-güedé, te nchaa ñáyíu na quini sá ndótó-güedé te yuhú víhí-yu. ¹² Te ndi ndùú cue téé-áⁿ tecú dóho-güedé cáháⁿ ìⁿ sá cáháⁿ ndéé andi, te cuñaha-xi xii-güedé:

—Chí táquene iha —duha cuñaha sã cáháⁿ-áⁿ xii-güedé.

Te cue téé-áⁿ quñhu-güedé ìⁿ xití vícò caa-güedé andi, te nchaa ñáyíu cùú úhú iní ñáhá xii-güedé quini ñáhã-yu xii-güedé caa-güedé andi. ¹³ Te òré-áⁿ ñihí víhi tnáa ñuyíú, te úxí xichi cùu-xi ñuú núú cùndecu-güedé-áⁿ te ìⁿ xichi ñuú-áⁿ naa, te cuú úsá mñí ñáyíu, te nchaa dava-gá ñáyíu cácu vá cùú yuhú víhí-yu, te cachí-yu sá ïo cahnú cuu Yá Ndiöxí Yaá ndécú andi.

¹⁴ Te tnúndòho-a cuu-xi tnúndòho cuu úú yáha, te vitna sa ndetu víi-nã tucu sáa tnúndòho cuu uní.

Espíritú cúú úsá tíú-xi cútú néhé-xí

¹⁵ Te espíritú cúú úsá ní tíú-xi cútú néhé-xí, te òré-áⁿ ñí tecú ñihí ní cáháⁿ titní sá ñí cáháⁿ andi, te cächí-xi:

Nchaa sá cúú cuendá nchaa ñáyíu ñuyíú táxí tnúni-yu ní cùú ní nduu cuendá Tãtã-ó Dütú Ndiöxí táxí tnúni-gá, Te tnáhã Yaá ní tendaha-gã ní sáháⁿ ñuyíú táxí tnúni-gá nchaa xíáⁿ,

te ñuú-gá taxi tnúni-gá ní caa ní quíhíⁿ.

Duha ní cáháⁿ nchaa sá ñí cáháⁿ-áⁿ. ¹⁶ Te ndi òcò cúmí cue téé sacuéhé xínucóo núú xilé váha ní ngüíñí xití-güedé núú Yá Ndiöxí, te ní nuu núú-güedé ndaa núú ñuhú te ní ngüíta-güedé chíñùhu ñaha-güedé xii-gá, ¹⁷ te cächí-güedé:

Ío ndacáⁿ táhú-ndí núú yòhó Dütú Ndiöxí, Yaá ndacú quide nchaandi túhú sá vãha, te ñuú-ni-n ndècu-n ndéé cùtnáhã ní ngáva ñuyíú, te ñuú-ni-n ndècu-n vitna, te ñuú-ni-n cùndecu-n ndéé núú cuáháⁿ núú véxi, te ío cahnú cuu-n te ní ngüíta-n ïo-gá táxí tnúni-n.

¹⁸ Te nchaa ñáyíu xíndecu ñuyíú xícudéⁿ-yu núú-n, te vitna ní sáa nduu dandohó-n-yu chi ñá túú cùú váha iní-n ñuú-yu, te cada ndáa-n cuéchi nchaa ñáyíu sa ní xihí,

te ní sáa tucu nduu cuñaha-n sã ndúú táhú nchaa ñáyíu ní xinu cuechi núú-n ñí cáháⁿ-yu tnúhu-n, ndihí nchaa dava-gá ñáyíu cùú cuendá-n, chí ñáyíu-áⁿ néhë-yu sá yíñùhu núú-n, te cuéi ñáyíu cùnuu ndihí ñáyíu ñá túú cùnuu cuñaha-n sã ndúú táhú-yu, te ní sáa tucu nduu dànaa-n nchaa ñáyíu sàhni tnaha ñáyíu-xi.

Duha cächí ndi òcò cúmí cue téé sacuéhé-áⁿ xãhaⁿ-güedé xii Yá Ndiöxí.

¹⁹ Te ní xiní-í ní nacaⁿ yuyèhe vehe Yá Ndiöxí andi, te xití vehe-gá-áⁿ ñí xiní-í ndécú càjá ñuhú sã yódó tnúni nàcuáa ní cundáa cada-gá sá cúú-xí ñáyíu, te òré-áⁿ ñí xiní-í ní sáa nduté, te ní cáháⁿ ñuhú te ío dusaⁿ ñí quide-xi, te ñihí víhi ní tnáa, te súúni cahnú dáú ñíñí ñí cuuⁿ.

12

Cuendá ìⁿ ñadíhí ndihí cuendá ìⁿ quití dééⁿ nání dragón

¹ Te ío víhi ní quide-xi ìⁿ sá ñí quide-xi andi, te ní xiní-í ìⁿ ñadíhí te dóo níhnú-áⁿ

quide-xi datná quidé-xí nũú nchĩcanchii, te ndaa núú sàhá-aⁿ quide-xi datná quidé-xí nũú yõó, te ñũhu ñⁿ coroná díquí-aⁿ te ndèé úxúú chódíní. ² Te ñũhu déhe-aⁿ te càna saa-aⁿ sá quidé ùhú ñáhá-xí xii-aⁿ chi sa ndètu vii-nã cacu déhe-aⁿ. ³ Te dàtnùnì ní quide tucu-xi sá ñí quide-xi andiù, te ní xiní-í ñⁿ quiti càhnu quiti ticuehé, quiti dééⁿ nání dràgón, te ndèé úsá díquí-di ndihi úxí ndiqui-di, te ñⁿ caa coroná ñũhú ñⁿ caa díquí-di-án. ⁴ Te quiti-án luha-ná te cuu dava nchaa chódíní dãngòyo-di ñuyúú ndihi lúhmá-di, te quiti-án ñí ngúnu tñi-di núú ñaha ndètu vii-nã cacu déhe-xi-án cuendá caxi-di déhe-aⁿ òré cacu ni cùu. ⁵ Te ñaha-án ñí cacu déhe-aⁿ te téé cùu-dé, te té líhli-án ño cunuu-dé taxi tñuní-dé nchaa ñáyiù ñuyúú, te mee Yã Ndiõxí ní nacuaca ñaha-gã xii té líhli-án cuendá cundecu ndihi ñaha-dé xii-gá núú ndécú-gã táxí tñuní-gá. ⁶ Te ñadìhí-án ñí xinu-aⁿ cuáhá-aⁿ xití yucu núú ñí quide túha Yá Ndiõxí cundecu-aⁿ cuendá xiáⁿ ñhí-aⁿ caxi-aⁿ, te ducaⁿ ñhí-aⁿ sá cáxí-án ùxúú cièndú únídico nduu chi ducaⁿ nduu cundecu-aⁿ xiáⁿ.

⁷ Te sátá dúcáⁿ te andiù ñí xiní-í espíritú cùnùu xinu cuechi núú Yã Ndiõxí nání Mìguél, ndihi nchaa dava-gá espíritú cundìhi-xi, te nchaa espíritú-án nàá-xi ndihi quiti dééⁿ nání dràgón ndihi nchaa espíritú cundìhi-di. ⁸ Te quiti-án ñà túú ní ndàcu-di ndihi nchaa espíritú cundìhi-di, te ñá túú ní ñhí-gã-di núú cundècu-di andiù ndihi nchaa espíritú cundìhi-di-án. ⁹ Te cue espíritú xinú cuèchi núú Yã Ndiõxí-án ñí dãngává-xí quiti dééⁿ nání dràgón-án ndihi nchaa espíritú cundìhi-di ñuyúú, te quiti-án cúu-dí mèi sácúhná àdi sá càchí-ó cùu yucu ñávãha, te diu xiáⁿ ní dándàhú-xi ñáyiù ñhí ñuyúú, te diu-ñi xiáⁿ ní nduu-xi cóó ñí dándàhú-xi ñáyiù ndéé sanaha.

¹⁰ Te ní tecú dóho-í ñíhi ní cáháⁿ tucu ñⁿ sá ñí cáháⁿ andiù, te càchí-xi:

—Vitna te Yá Ndiõxí ní quide-gá ñí ngúndecu ñáyiù ndihi-gá, te ío càhnu cuu-gá, te ío tàxi tñuní-gá, te tñahá Crìstú Yáá ní tendaha Yã Ndiõxí ní quixi ñuyúú-a ío tàxi tñuní-gá, te ducaⁿ chi sa ní xócúhí sácúhná sã sũúú nùnúu sacáⁿ cuèchi núú Tãtá-ó Dütú Ndiõxí cuendá nchaa ñáyiù ndècu

ndihi-o ichi-gá, te nduu niù ducaⁿ sàcáⁿ cuèchi-xi núú-gã cuendá-yu ni cùu. ¹¹ Dico ní ndacú-yu ní cunúú-yu núú sácúhná sã dúcáⁿ sàcáⁿ cuèchi cuendá-yu-án ní cùu, te ducaⁿ ñí cunúú-yu sá cuendá Yáá cáá dàtná cáá ñⁿ mbéé quiti ní dancuèhé-güedé, chi Yáá-án ñí sati ñíhí-gã te ní xihí-gá sá cuendá-yu, te ducaⁿ ñí cunuu tucú-yu sá cuendá sá sàndáá iní ñáhã-yu xii Yáá-án, te ñá túú ní yùhú-yu cuú-yu sá cuendá-gá. ¹² Te vitna ío chí cúdñí ñí nchaa nchòhó espíritú xinú cuèchi núú Yã Ndiõxí, ndihi nchaa nchòhó ñáyiù ndècu andiù, dico ñndàhú ní cuu nchaa ñáyiù xĩndecu ñhí ñuyúú! Chi sũúú cùdèéⁿ sácúhná ñí ngava-xi te nándi cada ñaha-xi xii-yu, te ducaⁿ chi cùnùnì iní-xi sá sácú duha-ná nduu cudí-xi cundecu-xi —duha càchí sá ñí cáháⁿ andiù.

¹³ Te sátá ñí quee quiti dééⁿ nání dràgón-án andiù ñí ngava-di ñuyúú quiti cùu mèi sácúhná-ãⁿ, te quiti-án ñí chinchícú-di ñadìhí ñaha ní cacu déhe téé-xi-án. ¹⁴ Te ñadìhí-án ñí nduu táhú-aⁿ ní quene úú ndíxí-aⁿ, te càa datná cáá ndíxíⁿ ñⁿ yacòlo cahnu vihi cuendá ndava-aⁿ núhú-aⁿ yucu núú ñí cachí Yã Ndiõxí cundecu-aⁿ, te yacáⁿ cundecu-aⁿ úní cuíá dava cuendá sá vã ñhí ñáhá quiti dééⁿ quiti nání dràgón-án te xiáⁿ ñhí-aⁿ sá cáxí-án, te quiti-án cúu tucu-di datná ñⁿ cóó dèéⁿ. ¹⁵ Te quiti-án ñí quene cuèhé ndute yuhu-di, te ndute ní quene yuhu-di-án ñí cuu-xi ñⁿ yúte, te ducaⁿ ñí quide-di cuendá ndute-án cuido-xi ñadìhí-án ní cùu. ¹⁶ Te ñũhu yìchí ní chindee-xi ñadìhí-án, chi ní ndátá te ní quee naa-ñi ndute ní quene yuhu quiti-án. ¹⁷ Te sátá dúcáⁿ ñí quide-xi xiáⁿ ní cudééⁿ víhí quiti-án nũú ñadìhí-án, te ní xica-di cuáhá-di núú xĩndecu nchaa dava-gá cue déhe ñadìhí-án cuendá nàá ndihi ñaha-di, te ñáyiù-án cúu-yu ñáyiù tñi nchaa tñuhu càháⁿ Yã Ndiõxí, te nchícúⁿ nihnú-yu nchaa tñuhu sá càháⁿ váha cuendá Xitohó Jesucrìstú.

13

Cuendá úú quiti

¹ Te yùhú ní ngúnu tñi-í yuhu làmár, te ní xiní-í ní quene ñⁿ quiti te ndèé úsá díquí-di

te úxí ndiqui-di, te núú ìí ìí ndiqui-di-áⁿ ndécú ìí caa coroná. Te ìí ìí díquí-di-áⁿ ndèé tnúhu sá càháⁿ úhú-xi cuendá Yá Ndiòxí. ² Te quití-áⁿ cáá-dí dàtná cáá cuiñí, te sáhá-di càa datná cáá sáhá òso, te yuhu-di càa datná cáá yùhu ndicaha. Te quití dééⁿ nání dràgón ní sáñaha-di tnúhu ndee ìní xii quití-áⁿ cuendá taxi tnùní víhí-dí, te dràgón-áⁿ nǐ sáñaha-di núú ndécú-dí tàxi tnuní-di xii quití ní quene xití làmár-áⁿ, te ducaⁿ nǐ quide-di cuendá sá nihí ndéé quití-áⁿ cunuu-di. ³ Te ìí díquí quití ní quene xití làmár-áⁿ càhú víhí càa ní nícuèhé, te sa ndètu vií-nǎ cuú-di sànuu dico ní ndúha-di, te nihí ñuyú nǐ nihí ñáyiú tnúhu sá dúcáⁿ nǐ cuu, te ío ní cuñúhu-yu te ní tuhá-yu quití-áⁿ. ⁴ Te nchaa ñáyiú-áⁿ nǐ cachí-yu sá ío càhnu cuu quití dééⁿ quití nàni dragón-áⁿ cuendá sá nǐ sáñaha-di tnúhu ndee ìní sá táxi tnùní quití ní quene xití làmár-áⁿ, te ní ngúíta-yu ní chiñuhú-yu quití ní quene xití làmár-áⁿ, te càchí-yu:

—Vá yõ ìí nǔtnahá ñáhá xii quití-a, te ni vǎ yõ ìí ndacu nàá ndihí ñaha xii-di —cachí-yu.

⁵ Te ní nihí-di tnúhu ndee ìní sá càháⁿ úhú-di Yá Ndiòxí, te cada càhnu-di mee-di, te údico úú yóo ducaⁿ nǐ nihí-di tnúhu ndee ìní-áⁿ cunuu-di. ⁶ Te ducaⁿ nǐ quide-di ní cáháⁿ úhú-di Yá Ndiòxí ndihí cuendá nchaa sá quidé-gǎ, te ðiu-ni ducaⁿ nǐ cáháⁿ úhú-di núú ndécú-gǎ, te ní cáháⁿ úhú tucu-di nchaa ñáyiú ndècu ndihí-gǎ andiu. ⁷ Te ducaⁿ nǐ nihí-di tnúhu ndee ìní sá nàá-di ndihí nchaa ñáyiú cùu cuendá Yá Ndiòxí, te ducaⁿ nàá ndihí ñaha-di xii-yu ndéé òré vá ndácú-gǎ-yu nàá ndihí ñáhá-yu xii-di, te tnàhá ní ngúndecu ndihí-di tnúhu ndee ìní sá táxi tnùní-di ñáyiú nchaa nàcióⁿ, ndihí ñáyiú nchaa ñuú, ndihí nchaa ñáyiú càháⁿ ndí dííⁿ ndí dííⁿ núú tnúhu, ndihí ñáyiú xíndecu nchaa xichi. ⁸ Te cue ñáyiú nihí ñuyú nǐ cachí-yu sá ío càhnu cuu quití-áⁿ, te ñáyiú-áⁿ cúu-yu ñáyiú ñá túú yòdo tnuní núú tütú Yaá cáá dàtná cáá ìí mbéé quití ní dánícuèhé-güedé Yaá ní xihí ní cùu te ní ndoto. Te ndéé cúnahá ní ngáva ñuyú sa yòdo tnuní ñáyiú nanihí tàhú, dico ñáyiú càchí sá ío càhnu cuu quití-áⁿ ñà túú yòdo

tnuní-yu núú tütú-gǎ.

⁹ Te nchaa nchòhó ñáyiú xíndedóho chí cúndedóho váha nchaa nàcuáa cuáháⁿ tnúhu-áⁿ. ¹⁰ Te nchaa ñáyiú na chíhi tnaha ñáyiú-xi vecaá te sáá nduu te quíhíⁿ-yu tnàhá-yu vecaá, te nchaa ñáyiú sàhni tnaha ñáyiú-xi ndihí yuchí te ðiu-ni ndihí yuchí cuú-yu tnàhá-yu, te xíáⁿ núu ío xini ñuhu-xi sá ncháá ñáyiú cùu cuendá Yá Ndiòxí cunduu càhnu ìní-yu, te quíndáá ìní ñáhá-yu xii-gǎ.

¹¹ Te ní xiní tucu-í ingá quití ní quene-di núú ñuhu yìchí, te ndéé úú ndiqui-di te càa datná cáá ndiqui canerú, te càháⁿ-di dàtná càháⁿ quití dééⁿ nání dràgón. ¹² Te dàtná ndécú ndihí quití ní quene xití làmár-áⁿ tnúhu ndee ìní sá táxi tnùní-di ducaⁿ ndècu ndihí quití ní quene ñuhu yìchí-áⁿ tnúhu ndee ìní taxi tnùní-di cada-di núú quití ní quene xití làmár-áⁿ, te quití ní quene ñuhu yìchí-áⁿ nǐ quide yica-di sǎ ncháá ñáyiú xíndecu nihí ñuyú chiñuhú-yu quití ní quene xití làmár-áⁿ, quití càhú víhí nǐ tnahá ní nícuèhé te ní ndúha-di. ¹³ Te quití ní quene xití ñuhu yìchí-áⁿ nǐ quide-di titní núú sǎ vǎ yõ tnàhí ndàcu cada, te nchaa ñáyiú ní xiní-yu sá ndéé andiu nǐ dǎngóyó-dí ñuhú ñuyú. ¹⁴ Te sá dúcáⁿ nǐ ngúndecu ndihí-di tnúhu ndee ìní ní quide-di nchaa xíáⁿ ní quide-di núú quití ní quene xití làmár-áⁿ, te sá dúcáⁿ nǐ quide-di te xíáⁿ ní dándàhú-di nchaa ñáyiú xíndecu nihí ñuyú, te ní xáhaⁿ-di xii-yu sá ndúcú-yu ìí sá cadúha-yu nàcuáa-ni càa nacuáa-ni nduu quití ní quene xití làmár-áⁿ, quití càhú víhí nǐ tnahá ní nícuèhé díquí-xi-áⁿ nǐ quée machití te ñá túú ní xihí-di chí ní xíndecu-ni-di. ¹⁵ Te quití ní quene xití ñuhu yìchí ní ngúndecu ndihí tucu-di tnúhu ndee ìní sá chíhí-dí ìní sá nǐ cadúha-yu-áⁿ, sá nǐ natavá-yu dàtná cáá quití ní quene xití làmár-áⁿ, te ducaⁿ nǐ quide quití-áⁿ cuendá cáháⁿ sá nǐ cadúha-yu-áⁿ, te xíáⁿ cada-xi cuú nchaa ñáyiú ñá túú ní cuíni chiñuhu ñaha xii-di. ¹⁶ Te quití ní quene xití ñuhu-áⁿ quidé-dí sǎ ncháá ñáyiú ngúndéé ìí tnuní ndaha cùhá-yu àdi tneé-yu, te ducaⁿ nǐ quide-di cuéi ñáyiú cunuu te cuéi ñáyiú ñá

túu cùnū, te cuèi ñáyū cuica te cuèi ñáyū ndàhú, te cuèi ñáyū ñá túú dàñá quee núú chíúⁿ pàtróóⁿ-xi, te cuèi nchaa ñáyū dàñá quée núú chíúⁿ pàtróóⁿ-xi nchaa-yu ducaⁿ ñi ngúndeé tnuní ñi-yu. ¹⁷ Te ní quide-di sá ncháá ñáyū ñá túú ndèé tnuní ñi-xi vâ cúú cuááⁿ-yu sá càchí iní-yu te ñi vâ cúú dícó-yu ñi sá cuiní-yu dícó-yu, te tnuní-áⁿ cúú-xí diu quiti ní quene xití làmár-áⁿ àdi númerú-di. ¹⁸ Te xini ñuhu-xi sá ncháá ñáyū ío váha cùnūníní iní-xi ío váha cuáha-yu cuendá nacuáa quée-xi númerú quiti-áⁿ, te númerú-áⁿ cúú-xí ñiñú ciendú únídico ñiñú, te cùu-xi cuendá ñi ñáyū ñuyíú.

14

Cuendá ñi ciendú údico cúmí mĩ ñáyū

¹ Te sátá dúcáⁿ te ní xiní-í Yáá cáá dàtná cáá ñi mbéé quiti ní dánicuèhé-güedé núnñi-gá ñi yucu ñuú nání Sión ndécú àndiū, te nutñi-gá ndiñi ñi ciendú údico cúmí mĩ ñáyū, te tneé-yu ndèé diu-gá ndiñi diu tátá-gã Dútú Ndiöxí. ² Te ní tecú dóho-í ní quide-xi àndiū dàtná quidé-xi núú xicá cuèhé víhí ndüte, te quide tucu-xi datná quidé-xi òré níhi vñhi caháⁿ ñuhu, te quide tucu-xi datná quidé-xi òré cuèhé víhí ñáyū caní-yu àrpá. ³ Te ní tecú dóho-í xixita yuhu sã xitá yuhu núú Yáá núcõo núú xilé váha, ndiñi núú ndi cùmí cue quiti xñnutñi-áⁿ, ndiñi núú nchaa cue téé cùu sacuéhé xñnucóo-áⁿ, te xixita-xi ñi ndudú sáá. Te mee-ñi cuè ñáyū ñi ciendú údico cúmí mĩ-áⁿ quée díquĩ-yu ndudú-áⁿ, te ñáyū-áⁿ cúu-yu ñáyū ní dácãcu nihnu ñaha Yáá cáá dàtná cáá ñi mbéé quiti ní dánicuèhé-güedé núú ñáyū ndècu ichi cuehé ichi duha xñndecu ñuyíú, te vâ yõ ñi-gá quée díquí-xi ndudú sáá-ãⁿ chi mee-ñi ñáyū ní cácu nihnu-áⁿ quée díquĩ-yu. ⁴ Te ñáyū ní cácu nihnu-áⁿ cúu-yu ñáyū ñá túú ní xñndecu ichi díñi ñi, te cùu-yu ñáyū càndoo canine iní-xi, te ndèni ní cuu cuáháⁿ Yáá cáá dàtná cáá ñi mbéé quiti ní nícuèhé-áⁿ, te ducaⁿ-ni ndèndaha ñahá-yu xii-gá cuáháⁿ, te ñáyū-áⁿ ñi cácu nihnú-yu núú nchaa ñáyū ñuyíú, ñáyū ndècu ichi cuehé ichi duha, te ñáyū ní cácu nihnu-áⁿ cúu-yu ñáyū díhna nuu ñi nduu táhú Yá Ndiöxí cuu cuendá-gá

ndiñi Yáá cáá dàtná cáá ñi mbéé quiti ní dánicuèhé-güedé. ⁵ Te cùu-yu ñáyū ñá túú càháⁿ ñi ñi tnúhu ndehnde, te càndoo canine iní-yu ndécú-yu núú núcõo Yá Ndiöxí táxi tnúní-gá.

Cuendá úní cue espíritu xínú cuèchi núú Yá Ndiöxí

⁶ Te sátá dúcáⁿ te ní xiní-í ñi espíritu xínú cuèchi núú Yá Ndiöxí xicó-xi cuádava àndiū, te ndècu ndiñi-xi tnúhu sá càháⁿ nacuáa naníhí tàhú-ó, tnúhu sá ñá túú tnàhí ndiñi nihnu te tnúhu-áⁿ danèhé espíritu-aⁿ nchaa ñáyū ndècu ñuyíú, ñáyū nchaa nacióⁿ, ndiñi ñáyū nchaa ñuú, ndiñi nchaa ñáyū càháⁿ ndi díñi ndi díñi núú tnúhu, ndiñi ñáyū xñndecu nchaa xichi. ⁷ Te níhi ní cáháⁿ-xi te càchí-xi:

—Nchaa nchòhó ñáyū ndècu ñuyíú canehe-ndo sã yññuhu núú Yá Ndiöxí, te cachí-ndó sã ío càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gã chi diu-gá ní cadúha-gá àndiū, ndiñi ñuhu yìchí, ndiñi làmár, ndiñi nchaa ndóhyo —duha càchí espíritu-áⁿ.

⁸ Te nchicúⁿ tucu ingá espíritu xínú cuèchi núú Yá Ndiöxí, te càchí-xi:

—Vitna ní naa ñuú Babilonía ñuú ío cùnū, te ducaⁿ ñi naa chi cue ñáyū ñuú-áⁿ ñi quidé-yu ní xita nihnu nchaa ñáyū ñiñi ñuyíú, chi ní sanu ichi ñahá-yu ichi cuèhé ichi duha —duha càchí espíritu-áⁿ.

⁹ Te nchicúⁿ tucu ingá espíritu xínú cuèchi núú Yá Ndiöxí te níhi càháⁿ-xi, te càchí-xi:

—Nchaa ñáyū chññuhu ñaha xii quiti ní quene xití làmár, ndiñi sá ñi natava ñahá-yu nacuáa càa-di-áⁿ, ñáyū ní dàñá mèe-xi ní ngúndeé tnuní ndahá-yu àdi tneé-yu, ¹⁰ ñáyū-áⁿ sùúní dándoho ñaha Yá Ndiöxí xii-yu chi ío cùdèéⁿ-gã, te ducaⁿ ío dandòho ñaha-gá xii-yu chi daquihíⁿ ñahá-gã xii-yu núú ñuhú núú ñuhú àzufré càyú-xi, te núú cuè espíritu xínú cuèchi núú-gã ducaⁿ dándoho ñaha-gá xii-yu, ndiñi núú Yáá cáá dàtná cáá ñi mbéé quiti ní dánicuèhé-güedé.

¹¹ Te ñi caa ñi quihíⁿ quene ñuhmá núú dúcáⁿ cùndecú-yu ndohó-yu-áⁿ, te cuèi nduu cuèi niú ducaⁿ ndòhó-yu. Te ducaⁿ ndòho nchaa ñáyū chññuhu ñaha xii quiti ní quene xití làmár, ndiñi sá ñi natava ñahá-yu nacuáa càa-di-áⁿ, te diu-ñi ñáyū-áⁿ cúu-yu

ñáyiú ní ngúndeé tnuní ndaha-xi àdi tneé-xi —duha càchí espíritú-áⁿ.

12 Te xíáⁿ xíní ñùhu-xi sá ncháá ñáyiú cùu cuendá Yá Ndiöxí cunduu càhnu iní-yu, chi ñu-ní-yu cùu-yu ñáyiú tñè nchaa tnúhu càháⁿ-gá, te ni yùhu ni iní-yu sàndáá iní-yu Xítóhó Jesucrístú.

13 Te sáta dúcáⁿ te ní tecú dóho-í ní cáháⁿ ñⁿ sá ñí cáháⁿ andiú, te càchí-xi:

—Chido tnùní-n ñⁿ núú tütú nàcuáa na càháⁿ-í-a. “Není vitna ío váha táhú nchaa ñáyiú sàndáá iní tnúhu Xítóhó Jesucrístú te xihí-yu” —duha càchí sá ñí cáháⁿ-áⁿ.

Te Espíritú Yá Ndiöxí ní cáháⁿ-xi, te càchí-xi:

—Ndáá, chi ndetatú-yu chi ñá túú-gá nágá chiúⁿ ndohó-yu cadá-yu, te Yá Ndiöxí sa nàha-gá nchaa nàcuáa ndùu chiúⁿ ní quidé-yu —duha càchí Espíritú-gá.

Nchaa sá cúú núú ñúhú

14 Te sáta dúcáⁿ te dàtnùní ní xíní-í ñⁿ vícú cuixíⁿ, te núú vícú-áⁿ ñí xíní-í núcõo ñⁿ Yaá, te càa-gá dàtná cáá ñⁿ téé ñuyíú, te díquí-gá ñúhú ñⁿ coroná ní cuáha mee-ni díhúⁿ cuááⁿ, te nùndaha-gá ñⁿ yuchí ndíquí te súúni dééⁿ. 15 Te ní xíní-í ñⁿ espíritú xínú cuèchi núú Yá Ndiöxí ní quee-xi xití vehe-gá, te níhi ní cáháⁿ-xi xáhaⁿ-xi xii Yaá núcõo núú vícú-áⁿ:

—Sa ní cuu nàquehndé-n nchàa sá ñí cuu ñuyíú ndihi yuchí ndíquí-n, chi sa ní cuu núcõo tnàha-xi —duha càchí espíritú-áⁿ xáhaⁿ-xi xii Yaá-áⁿ.

16 Te Yaá núcõo núú vícú-áⁿ ñí dáyáha ndodo-gá yuchí ndíquí-gá núú ñuyíú ñí nataxi tnàha-gá nchaa sá ñí cuu.

17 Te ní xíní tucu-í ingá espíritú xínú cuèchi núú Yá Ndiöxí ní quee-xi xití vehe-gá sá cáá àndiú, te nùndaha-xi tnahá-xi ñⁿ yuchí ndíquí dééⁿ. 18 Te ní xíní tucu-í ní quee tucu ingá espíritú xínú cuèchi núú Yá Ndiöxí núú nútníⁿ núú sácõdó sá ndúú táhú-gá, te ndècu ndihi-xi tnúhu ndee ñí táxí tnùní-xi ñuhú, te espíritú-áⁿ ñíhi ní cáháⁿ-xi xáhaⁿ-xi xii espíritú néhé yùchí ndíquí dééⁿ-áⁿ:

—Ngúita naquehndé-n ndihi yuchí ndíquí-n ndéhé yoho yàha stilé sá ío ñuyíú chi sa ní cuu nàtehndé —duha càchí

espíritú-áⁿ xáhaⁿ-xi xii espíritú néhé yùchí ndíquí-áⁿ.

19 Te espíritú néhé yùchí ndíquí-áⁿ ñí dáyáha ndodo-xi yuchí ndíquí-xi núú ñuyíú ñí nàquehndé-xi nchaa ndéhé yoho yàha stilé, te ní chihi-xi ñⁿ xichi núú ñí chihi-xi cuendá xíáⁿ quihni-xi quee ndudí-xi, te sá dúcáⁿ ñí quide-xi xíáⁿ cùtnùní iní-ó sá ío cùdééⁿ Yá Ndiöxí núú ñáyiú ñuyíú. 20 Te ndéhé yoho yàha stilé-áⁿ ñí quihni-xi ñⁿ xio yuhu ñúú, te ndudí ndéhé yoho yàha stilé-áⁿ ñí nduu-xi níñí te ní quee-xi núú quíhni ñihnu espíritú-áⁿ. Te úní cièndú mǐl mètrú ní xica níñí-áⁿ, te dàtná ñⁿ mètrú dava ní sáá cuehnu níñí-áⁿ ñí xica-xi.

15

Úsá tnúndòho

1 Te ío vǐhi ní quide-xi ñⁿ sá ñí quide-xi andiú te ní cuñúhu vǐhi-í, te ní xíní-í úsá tnàhá espíritú xínú cuèchi núú Yá Ndiöxí, te ñⁿ ñⁿ cue espíritú-áⁿ ndécú ndihi-xi tnúhu ndee ñí dandòho-xi ñáyiú ñuyíú, te nà yáha nchaa tnúndòho-áⁿ, te vá cùdééⁿ-gá Yá Ndiöxí núú-yu dandòho ñaha-gá xii-yu.

2 Te ní xíní-í ñⁿ làmár te ndute làmár-áⁿ cáá dàtná cáá vǐdriú, te dácánuu-xi ndihi ñuhú, te yuhu làmár-áⁿ xǐnutnǐ nchaa ñáyiú ní ndacu ní dáquéé tǐhú ñáhá xii quiti ní quene xití làmár-áⁿ, te ducaⁿ ñí ndacú-yu ní dáquéé tǐhú-yu sá ñí natava ñáhá-yu nàcuáa càa-di-áⁿ, te ducaⁿ ñí ndacu tucú-yu ní dáquéé tǐhú tucú-yu númerú-di sá cúú dàtná diú-di, te nchaa ñáyiú-áⁿ ñí nduu táhú-yu núú Yá Ndiöxí àrpá xǐnehé-yu cuendá caní-yu. 3 Te xǐxita-yu ndudú sá ñí xita ndí Moisés ndí ní xinu cuechi núú Yá Ndiöxí ndéé sanaha, te xita tucú-yu ndudú Yaá cáá dàtná cáá ñⁿ mbéé quiti ní dánícuèhé-güedé, te càchí-yu:

Yòhó Dútú Ndiöxí ío càhnu cuu-n, chi quide-n nchaa sá vǎ yò tnàhí ndacu cada,

te cùu-n Yaá ndacú quide nchaandi túhú sá vǎha,

te ío ndáá quidé-n te ío ndáá càháⁿ-n, te yǐndaha-n nchaa ñáyiú ñihí ñuyíú.

4 Te nchaa ñáyiú néhé-yu sá yǐñùhu núú-n, te ncháá-yu càchí-yu sá ío càhnu cuu-n,

chi ìⁿdìí díí-ni yòhó cúú-n Yàá ío vâha quide ndáá,
te nchaa ñáyiú ñihí ñuyíú natacá-yu
chiñuhu ñàhá-yu xii-n,
te ducaⁿ càdá-yu chi ndèhé-yu nchaa sá
vâha quide-n.
Duha càchí ñáyiú-áⁿ xìxítá-yu.

⁵ Te sáta dúcáⁿ te ní xiní-í ní nacaáⁿ
yuyèhe vehe Yá Ndiòxí andiú, te xití
vehe-gá-áⁿ ndécú sá ndéé tnúhu-gá. ⁶ Te
xití vehe-gá-áⁿ ñi quee úsá tnàhá espíritú
xínú cuèchi núú-gã, te ìⁿ ìⁿ-xi ndècu
ndihí-xi tnúhu ndee ìní dandòho-xi ñáyiú,
te xixíhnu-xi mee-ni dõó vâha, te súúni vâha
cândoo, te chàhncí, te yidúcuⁿnuu cínchú
ní cuáha mee-ni díhúⁿ cuááⁿ pèchú ndi úsá
cue espíritú-áⁿ. ⁷ Te ìⁿ quití cúmí xìnutnì
núú nútñì xilé vâha ní sáñaha-di ìⁿ caa sá
nàhá tícuú ní cuáha mee-ni díhúⁿ cuááⁿ
xii ìⁿ ìⁿ espíritú-áⁿ, te xití nchaa tícuú-áⁿ
ñúhú ìⁿ sá ñúhú te xíãⁿ cútnùní sá Yá Ndiòxí
dandòho-gá ñáyiú ñuyíú, te diu-gá cúú-gã
Yaá ndécú nchaa nduu nchaa quíú. ⁸ Te
xití vehe-gá-áⁿ ñi chítú ñùhmá, te ducaⁿ
ñi quide-gá cuendá cutnùní ìní ñáyiú sá
ío càhnu cuu-gá táxí tnùnigá, te vá yõo ìⁿ
cuu quíhu xití vehe-gá-áⁿ ndéé ndihí ndi
úsá tnúndòho cada ndi usá cue espíritú-áⁿ
ñuyíú.

16

Tnúndòho cada-xi ñuyíú

¹ Te sáta dúcáⁿ te ní tecú dóho-í níhi ní
cáháⁿ ìⁿ sá ñi cáháⁿ xití vehe Yá Ndiòxí, te
xãhaⁿ-xi xii ndi usá cue espíritú-áⁿ:

—Chí cuáháⁿ coyo-ndo sã ñúhú xití
nchaa tícuú néhé-ndó-ãⁿ núú ñuyíú, chi
sá ñúhú-ãⁿ cúú-xí tnúndòho tendaha Yá
Ndiòxí sá cúú-xí nchaa ñáyiú ñuyíú —duha
càchí sá càháⁿ-áⁿ.

² Te espíritú díhna ní sáháⁿ-xi ní coyo-xi
sá ñúhú xití tícuú néhé-xí-ãⁿ ñuyíú, te nchaa
ñáyiú ñuhu tnuní quití ní quene xití làmár
ñáyiú ní chiñuhu sá ñi natava ñàhá-yu
xii-di, nchaa ñáyiú-áⁿ ñi quené-yu ndihí
tèhyú te súúni dandòho ñaha-xi xii-yu.

³ Te espíritú cúú ùú ní coyo-xi sá ñúhú xití
tícuú néhé-xí núú làmár, te ndute làmár-áⁿ
ñi nduu-xi níñi te càa-xi datná cáá níñi

ñáyiú sa ní xihí, te nchaa quití ñuhu xití
làmár-áⁿ ñi xihí-güedi.

⁴ Te espíritú cúú ùní ní coyo-xi sá ñúhú
xití tícuú néhé-xí nchaa yúte ndihí nchaa
núú quèñihni ndute, te ndute nchaa yúte-áⁿ
ndihí nchaa ndute quèñihni-áⁿ ñi nduu-xi
níñi. ⁵ Te sáta dúcáⁿ te ní tecú dóho-í ní
cáháⁿ ìⁿ espíritú xínú cuèchi núú Yá Ndiòxí,
espíritú yíndàha ndute, te xãhaⁿ-xi xii Yá
Ndiòxí:

—Yòhó Dútú Ndiòxí cúú-n Yàá quidé
ndáá cuítí núú duha quide-n tendaha-n
tnúndòho-a, te diu-ni-n cùu-n Yaá ndécú
ndéé cútnàhá ní ngáva ñuyíú, te diu-ni-n
cùu-n Yaá ndécú vitna te ñá túú tnàhí
cuèchi-n. ⁶ Chí cue ñáyiú ñuyíú ñi dácacã-yu
níñi nchaa ñáyiú ní cáháⁿ tnúhu-n ndihí
nchaa dava-gá ñáyiú cùu cuendá-n, te ní
sahní-yu nchaa ñáyiú-áⁿ, te vitna ní dátúú-n
ndute ní nduu-xi níñi te ducaⁿ-ni càa
ndute-áⁿ xihí-yu, te ducaⁿ tàú-xi ndohó-yu
cuendá sá ñi sahní-yu cue ñáyiú cùu
cuendá-n —duha càchí espíritú-áⁿ xãhaⁿ-xi
xii-gã.

⁷ Te ní tecú tucu dóho-í ní cáháⁿ ìⁿ sá ñi
cáháⁿ núú nútñì núú sácódó sã ndúú tãhú
Yá Ndiòxí, te xãhaⁿ-xi xii-gã:

—Ndáá sá yòhó Dútú Ndiòxí Yaá ndácú
quide nchaandi túhú sá vâha dandòho-n
ñáyiú nàcuáa tàú-xi cunduu —duha càchí sá
cáháⁿ-áⁿ xãhaⁿ-xi xii-gã.

⁸ Te espíritú cúú cùmí ní coyo-xi sá ñúhú
xití tícuú néhé-xí núú nchíanchii cuendá
nchíanchii-áⁿ cahmi-xi nchaa ñáyiú ñuyíú.
⁹ Te ncháá-yu ní ndoho vihí-yu ní cáyú-yu,
te cuèi ducaⁿ ñi ndohó-yu dico ñá túú ní
cuíní-yu ndixi cuèchi ìní-yu cuendá nchaa
sá ña túú vâha quidé-yu, te ñi ña túú ní
càchí-yu sá ío càhnu cuu Yá Ndiòxí chí
da ní cáháⁿ úhú-yu cuendá-gá, te diu-gá
cúú-gã Yaá ducaⁿ ñi tendaha tnúndòho-áⁿ
sá cúú-xi-yu.

¹⁰ Te espíritú cúú ùhúⁿ ní coyo-xi sá ñúhú
xití tícuú néhé-xí núú ndécú quití ní quene
xití làmár-áⁿ táxí tnùnigá, te nchaa núú
táxí tnùnigá ní cuu nee, te nchaa ñáyiú
ñuyíú ndéé yàá-ná-yu nàcaxi niñú-yu sá
ndóhó-yu. ¹¹ Dico ñi dùcaⁿ ñá túú ní
cuíní-yu dàñá-yu ñi ìⁿ sá cuèhé sá dúhá
quidé-yu, chí da ní cáháⁿ úhú-yu cuendá

Yă Ndiöxí Yaá ndécú àndiü sá cuendá sá dándòho ñaha ndihyi tëhyú ndèé-yu-áⁿ ndihi nchaa dava-gá sá yăha-yu.

12 Te espíritú cúú iñú ní coyo-xi sá ñúhú xití tícúú néhé-xí xití yúte càhnu nani Eúfratés, te ndute yúte-áⁿ ñí yíchí cuendá yăha cue téé yìndaha ñáyiü xìndecu ndàa xio nacuáa quène nchícanhii.

13 Te ní xiní-í ní quee ìⁿ espíritú cùndìhi yucu ñávàha yuhu quití dééⁿ nání dragón, te ní xiní tucu-í ní quee tucu ingá espíritú cùndìhi yucu ñávàha yuhu quití ní quene xití làmár, te ní xiní tucu-í ní quee tucu ingá espíritú cùndìhi yucu ñávàha yuhu téé dándahú ñáyiü càchí sá càháⁿ tnúhu Yá Ndiöxí te ñá ndàá, te ndi nùní espíritú-áⁿ xìndáa-xi dàtná cáá làhvá. 14 Te ndi nùní espíritú-áⁿ quidé-xí sã vã yõ tnhí ndàcu cada, te xica datacá-xi nchaa cue téé yìndaha ñaha xii ñáyiü xìndecu ñihí ñuyíú cuendá nàá-güedé mei ndùu cachí Yă Ndiöxí coo tnúndòho cahnu vihi-gá, te ðiü mee Yă Ndiöxí cúú-gã Yaá ío càhnu cuu. 15 Te Yaá cúú Xìtohó-ó ñí cachí-gá: “Cunaha-ndo chi nduu ñà túú yìhi iní-ndó quixi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiü xìndecu túha, chi cùu-ndo datná cue ñáyiü xìndecu túha xìxìhnu-ni dóó-xi cuendá sá vã cúcàhⁿ núú-yu dàtná cúcàhⁿ núú cue ñáyiü ñá túú ñihnu dóó-xi, te duha càháⁿ-í cuendá sá nchòhó cundecu túha-ndo òré quexìo-í”, duha càchí-gá. 16 Te ndi nùní cue espíritú cùndìhi yucu ñávàha-áⁿ ñí dátacá-xi nchaa cue téé yìndaha ñaha xii ñáyiü, te ní taxi ndecu ñaha-xi ìⁿ xichi núú nání Àrmagedón, duha nani xiáⁿ tnúhu hèbreú.

17 Te espíritú cúú ùsá ní coyo-xi sá ñúhú xití tícúú néhé-xí núú tàchí, te ní tecú dóho-í níhi ní càháⁿ Yaá núcõo núú xilé váha xití vehe-gá, te càchí-gá:

—Xéhé-nã cúmãní te xínu cava nchaa tnúndòho tnúhu ndàhú —duha càchí-gá.

18 Te sáta dúcáⁿ te ní sáá nduté te ní càháⁿ ñúhu, te súúni dùsaⁿ ní quide-xi, te níhi vihi ní tnáa ñuyíú, te ndéé cùtnàhá ní ngúndecu ñáyiü ñuyíú te vátá ìⁿ xito-gá níhi tnáa dàtná ní quide-xi. 19 Te ñuú cáhnú ío cùnuu nani Babiloniá ní quée dava-xi ní cuu-xi

úní xichi, te nchaa ñuú cáá ñihí ñuyíú ñí ngoyo nchaa vehe, chi Yá Ndiöxí ní ndacu iní-gá nchaa sá cuéhé sá dúhá quide nchaa ñáyiü ñuú Babiloniá-áⁿ, te ducaⁿ ñí quide ñaha-gã xií-yu chi ío cùdééⁿ-gã núú-yu. 20 Te nchaa tìndúú ñí ndóñúhú-xí cuèi nchaa tìndúú ñuhu yìchí ndécú xití làmár. 21 Te ní xiní-í ní cuuⁿ ñiñi ñàhnu vihi ní ngaundodo-xi cue ñáyiü ñuyíú, te nchaa ñiñi-áⁿ vëe-xi dàtná údico kílú, te cue ñáyiü ñuyíú ñí càháⁿ úhú-yu cuendá Yă Ndiöxí sá dúcáⁿ ñí dácúúⁿ-gã ñiñi ñàhnu vihi-áⁿ, chi ní cuu-xi ìⁿ tnúndòho cahnu vihi sá cúú-xi-yu.

17

Ñadìhí ndécú ichi dǐ iní

1 Te núú ùsá espíritú néhé tícúú-áⁿ, te ìⁿ-xi ní quixi-xi núú ndécú-í, te càchí-xi xii-í:

—Néhé ná quìhíⁿ-ó dènehé ñáhà-í xii-n nchaa tnúndòho sá ndóhó ñadìhí ñaha ndècu ichi dǐ iní, te ñaha-áⁿ cùnùu-aⁿ nucóo-aⁿ núú ñúhú vihi ndute. 2 Te ñaha-áⁿ ndécú dǐ iní-aⁿ ndihi nchaa cue téé yìndaha ñaha xii ñáyiü xìndecu ñihí ñuyíú, te nchaa dava-gá ñáyiü ñuyíú ío iní-yu nchìcúⁿ nihnú-yu quidé-yu nchaa nàcuáa quide ñaha-áⁿ —duha càchí espíritú-áⁿ.

3 Te òré ducaⁿ quide ñaha Espíritú Yă Ndiöxí xii-í nàcuáa càchí iní-xi, te ìⁿ espíritú xínú cuèchi núú-gã ndécá ñaha-xi xii-í cuáháⁿ ìⁿ xití yucu, te xití yucu-áⁿ ñí xiní-í ìⁿ ñadìhí yódó-áⁿ ìⁿ quití ticuehé, te ndéé ùsá díqui-dí te úxí ndiqui-dí, te ñihí-dí ndéé tnuní-dí mee-ni tnúhu sá càháⁿ úhú cuendá Yă Ndiöxí. 4 Te ñadìhí-áⁿ ñihnú-áⁿ dóo muradú ndihi dóo tícuehé, te mee-ni sã ñí cuáha díhúⁿ cuááⁿ, ndihi yúú vãha sá nání pèrlá, ndihi nchaa dava-gá núú yúú vãha, mee-ni nchaa xiáⁿ ní cuáha sá yíhí lõho-aⁿ, ndihi sá ñúhú dúcúⁿ-aⁿ, ndihi sá ñúhú dúcúⁿ ndáhá-áⁿ, te nùndaha-aⁿ ìⁿ tícúú ní cuáha mee-ni díhúⁿ cuááⁿ te ñúhu mee-ni sá cuéhé sá dúhá, te xiáⁿ cùtnùní iní-ó sã cúú-áⁿ ìⁿ ñadìhí ñaha ndècu ichi cuehé ichi duha. 5 Te tneé-aⁿ ndéé tnuní ìⁿ tnúhu, te càchí-xi: “Ñuú Babiloniá ñuú ío cùnùu, cada iní-ndó sá cúú-xí mèi ñadìhí-a, te ðiü ñadìhí-a cùu-aⁿ ñaha sanu ichi ñaha xii nchaa ñáyiü dǐhí ñáyiü ndècu ichi dǐ

iní, te nándi-gá nchaa sá cuèhé sá dúhá sànu ichi-aⁿ nchaa ñáyiú cadá-yu”, duha càháⁿ tnúhu ndèé tnuní tneé ñadìhí-áⁿ. Te vá yòo tècú tnùnì ná cuendá ducaⁿ càháⁿ tnúhu-áⁿ. ⁶ Te ní cutnùnì iní-í sá díú ñàha-áⁿ ñí dácácá-áⁿ ñíñí ñáyiú cùu cuendá Yá Ndiòxí ní sahní ñaha-aⁿ xí-yu, te ñáyiú ní xíhí-áⁿ cúu-yu ñáyiú ní cáháⁿ váha cuendá Xítóhó Jesucristú, te sá dúcáⁿ ñí quide-aⁿ te ní nduu-aⁿ dàtná ìⁿ ñáyiú quihu. Te ío ní cuñúhu-í sá dúcáⁿ ñí cuu ní xiní-í. ⁷ Te sátá dúcáⁿ te espíritú xínú cuèchi núú Yá Ndiòxí-áⁿ càchí tucu-xi xii-í:

—Vá ndèé dúcáⁿ cuñúhu-n, chi vitna na càchí tnúhu-í xii-n nàcuáa quèe-xi cuendá quiti ndèé úsá díquí-xi ndihí úxí ndiqui-xi-áⁿ, ndihí nàcuáa quèe-xi cuendá ñadìhí ñaha yòdo ñaha xii-di-áⁿ. ⁸ Te quiti ní xiní-n-áⁿ cúu-dí ìⁿ quiti sa ní xíndecu te vitna ñá túú-gá-di ndècu, te sáá nduu te quene-di yaú cùnú vihí sá ìo nèhé cáá, te dàtnùnì sáá nduu te quíhíⁿ-di núú ùhú núú ndàhú ñi caa ñi quíhíⁿ, te cue ñáyiú xíndecu ñuyíú cuñúhu vihí-yu quiti-áⁿ chi cùu-di ìⁿ quiti sa ní xíndecu ñí cùu te sáá nduu cùndecu tucu-di, te ñáyiú ducaⁿ cuñúhu ñaha xii-di-áⁿ ñà túú yòdo tnuní-yu núú tütú núú yódó tnùnì cue ñáyiú naníhí tàhú, chi ndèé cùtnàhá vátá ngáva-gá ñuyíú ducaⁿ sa yòdo tnuní cue ñáyiú naníhí tàhú.

⁹ Te nchaa ñáyiú tècú tnùnì xìni ñuhu-xi cani váha iní-yu cuendá tnúhu-a. Te ndi úsá díquí quiti-áⁿ cada iní-ó sá cúu-xí úsá tíndúú núú núcò ñadìhí-áⁿ. ¹⁰ Te ndi úsá díquí quiti-áⁿ cada iní-ó sá cúu-xí úsá tnàhá cue téé yíndaha ñaha xii ñáyiú, te úhúⁿ cue téé-áⁿ ñà túú-gá cùnùu-güedé vitna, te ìⁿ téé-áⁿ cùnùu-dé vitna te ingá-dé vátá sàá-gá nduu cùnùu-dé, te na sàá nduu dùcaⁿ cunuu-dé te sacú-ñi nduu cunuu-dé. ¹¹ Te quiti ní xíndecu ñí cùu te ñá túú-gá-di ndècu vitna, cùu-di datná téé cùu uná yíndaha ñaha xii ñáyiú, te ìⁿ-ni cùu-di ndihí cue téé úsá yíndaha ñáyiú-áⁿ, te quiti-áⁿ sáá nduu cuíta nihnu-di quíhíⁿ-di núú ùhú núú ndàhú ñi caa ñi quíhíⁿ.

¹² Te ndi ùxí ndiqui quiti-áⁿ cada iní-n sá cúu-xí ùxí tnàhá cue téé quíndaha ñaha xii ñáyiú, dico vátá sàá-gá nduu

cùnùu-güedé quíndaha ñaha-güedé xii-yu. Te cue téé-áⁿ ñíhí-güedé tnúhu ndee iní taxi tnùnì-güedé ndihí quiti-áⁿ, dico tnaa-ñi taxi tnùnì-güedé ndihí quiti-áⁿ. ¹³ Te ndi ùxí cue téé-áⁿ cuu ìⁿnuu-güedé taxi tnùnì-güedé, te chindee-güedé quiti-áⁿ cuendá cuu ìⁿnuu-güedé ndihí-di cuendá taxi tnùnì-gá-di. ¹⁴ Te cue téé-áⁿ nàá-güedé ndihí Yaá cáá dàtná cáá ìⁿ mbéé quiti ní dancuèhé-güedé dico vá ndácú-güedé nàá-güedé ndihí-gá chi cuíta-güedé. Te diu-gá cúu-gá Yaá ío cùnùu taxi tnuní cuèi nchaa téé yíndaha ñaha xii ñáyiú, te ducaⁿ-ni tàxi tnuní-gá cuèi nchaa dava-gá-yu. Te mee Yá Ndiòxí ní cachí-gá nándi cùu nchaa ñáyiú cundecu ndihí Yaá cáá dàtná cáá ìⁿ mbéé quiti ní dancuèhé-güedé-áⁿ, te diu-ñi ñáyiú-áⁿ cúu-yu ñáyiú ní cáháⁿ-gá te cùu-yu ñáyiú quide ndáá ndécú ichi-gá —duha càchí espíritú xínú cuèchi núú-gá.

¹⁵ Te ní cachí tucu espíritú-áⁿ xii-í:

—Ndute ñùhu núú núcò ñadìhí ñaha ndècu ichi díí iní-áⁿ, ndute-áⁿ cada iní-n sá cúu-xí ñáyiú nchaa nàcìón, ndihí ñáyiú nchaa ñuú, ndihí ñáyiú xíndecu nchaa xichi, ndihí ñáyiú càháⁿ ndí dííⁿ ndí dííⁿ núú tnúhu. ¹⁶ Te dàtná ní cachí-í sá ndi ùxí ndiqui quiti ní xiní-n-áⁿ cúu-xí ùxí tnàhá cue téé quíndaha ñaha xii ñáyiú, te cue téé-áⁿ cuu úhú iní-güedé ñadìhí ñaha ndècu ichi díí iní-áⁿ, te ñí vã cáda cuendá ñáhá-gá-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé. ¹⁷ Te mee Yá Ndiòxí ducaⁿ dàcaháⁿ-gá iní cue téé-áⁿ cuendá cada-güedé nàcuáa cuíní méé-gá, te xíáⁿ núu cuu ìⁿnuu-güedé cuendá cúñaha-güedé xii quiti-áⁿ cada-di núú-güedé taxi tnùnì-di, te ducaⁿ-ni càda-di núú-güedé taxi tnùnì-di ndèé ná sàá nduu càda Yá Ndiòxí nàcuáa ní cachí-gá. ¹⁸ Te ñadìhí ñaha ní xiní-n-áⁿ cada iní-n sá cúu-áⁿ ñuú cáhnú ñuú ío cùnùu, te ñuú-áⁿ ndécú téé ío-gá cùnùu taxi tnuní nchaa cue téé yíndaha ñaha xii ñáyiú xíndecu ñuyíú —duha ní cachí espíritú xínú cuèchi núú Yá Ndiòxí xii-í.

Ní naa ñuú Babiloniá

¹ Te ducaⁿ te dātñuní ní xiní tucu-í ingá espíritú xínú cuèchi núú Yă Ndiöxí, te ndéé andiú nì dātāsaⁿ-xi te ní dáyèhé-xi ñuyíú, te espíritú-án ïo cūnuu-xi. ² Te níhi ní cáháⁿ-xi, te cāchí-xi:

—Ní sáá nduu nàa ñuú cáhnú ñuú cūnū nani Babiloniá, te xíáⁿ-nă natacá nchaá núú espíritú cūndìhi yucu ñávăha cundecu-xi, te vá quée-gă-xi xíáⁿ, te ñu-ni xíáⁿ natacá nchaá quiti ndăva núú tàchí nchaá quiti ndehe quide, quiti ñă túú tnàhá iní ñáyíu te xíáⁿ-nă cundecu-güedi. ³ Te ducaⁿ chi ñáyíu ñuú-án sánú ìchí-yu nchaá ñáyíu ñihí ñuyíú ichi cuèhé ichi duha, te ducaⁿ-ni xīnchícúⁿ nihnu nchaá ñáyíu ñuyíú xīquidé-yu, te nchaá cue téé cūnuu yīndaha ñaha xii ñáyíu, cue téé-án cúú ñnuu-güedé ndihí nchaá ñáyíu ñuú-án quidé-güedé ndihí-yu nándi sá cuèhé sá dúhá. Te nchaá ñáyíu dīco nándi sá dīcō quèheⁿ ñáyíu ñuú-án ïo cūu cuicá-yu, te ducaⁿ quèheⁿ nchaá ñáyíu ñuú Babiloniá-án nchaá sá dīcō ñáyíu-án cuendá xíáⁿ cānehé-yu ndécú-yu ichi cuèhé ichi duha —duha cāchí espíritú-án.

⁴ Te sātá dúcáⁿ te ní tecú dóho-í ní cáháⁿ ñⁿ sá ñí cáháⁿ andiú, te cāchí-xi:

—Nchaá nchòhó ñáyíu cūu cuendá-í quee-ndo ñuú Babiloniá cuendá sá vă cūndēcu-ndo tnahá-ndó ìchí cuèhé ichi duha dātñá ndécú ñáyíu ñuú-án, te ducaⁿ te vá quini-ndó tnūndòho tnúhu ndàhú sá quixí cūu xii ñáyíu-án. ⁵ Chi ío cuèhé cuèchi-yu ní cuu ndēcu núú Yă Ndiöxí, te mee-gă năhá-gă năcuáa ndūu nchaá sá quidé-yu. ⁶ Te nchòhó ñáyíu cūu cuendá-í, chí nānchòcáva dandòho-ndo ñáyíu-án dātñá quidé mēe-yu dāndohó-yu cue ñáyíu, te úú xito nānchòcáva-ndo dāndohó-ndó-yu, te ducaⁿ cāda-ndo cuendá ío-gá ndohó-yu. ⁷ Te ío quide cahnú-yu mēe-yu, te ío cūdí iní-yu quidé-yu nchaá núú sá cuèhé sá dúhá, te sá dúcáⁿ xidó-yu quidé-yu nchaá sá cuèhé sá dúhá nūu xíáⁿ nchòhó ío dandòho-ndó-yu, te ducaⁿ chi ñáyíu ñuú-án sání iní-yu, te cāchí-yu: “Nchúhú cúú-ndí dātñá ñⁿ ñadìhí ñă túú quée, ñaha ío cūnuu yīndaha ñaha xii ñáyíu. Te ducaⁿ sātñahá-xi cūu-ndí chi nchaá-ni

nduu ío váha cūu iní-ndí ndécú-ndí, te ni vă sáá ñⁿ nduu te ndihú iní-ndí”, duha cāchí ñáyíu ñuú-án. ⁸ Te sá cuendá nchaá sá quidé-yu-án nūu xíáⁿ ñⁿ-ni ndūu sáá tnūndòho sá cúú-xí-yu, te ío ndohó-yu chi ñuú-yu coo tnamá, te coo cuèhé cahni ñaha-xi xii-yu, te ío ndihú iní-yu, te cáyú ñuú-yu, te ducaⁿ ndòhó-yu chi Dútú Ndiöxí ío cūnuu-gá, te ñu-gá ducaⁿ dāndohó ñaha-gá xii-yu —duha cāchí sá ñí cáháⁿ andiú-án.

⁹ Te nchaá cue téé cūnuu yīndaha ñaha xii ñáyíu ío ndáhyú-güedé sá ndihú iní-güedé òré ná quini-güedé quene ñúhmá cáyú ñuú cue ñáyíu Babiloniá, chi ñu cue téé-án cúú-güedé cue téé cūu ñnuu ndihí-yu quide-güedé nchaá núú sá cuèhé sá dúhá ndihí-yu, te ducaⁿ chi ío tnàhá iní-güedé cundecu-güedé ndihí-yu ichi dí iní. ¹⁰ Te cue téé-án xica-nă cundecu-güedé cundehe-güedé năcuáa ndohó nchaá ñáyíu ñuú-án sá yùhú-güedé nchaá tnūndòho-án, te cachí-güedé:

—jNdàhú nchòhó ñáyíu ñuú cáhnú ñuú cūnū nani Babiloniá! Chi uuⁿni ní sáá nchaá tnūndòho tnúhu ndàhú sá cúú-xí-ndó —duha cachí-güedé.

¹¹ Te nchaá ñáyíu dīco nchaá sá nāndìhi ñáyíu ñuú Babiloniá tnàhá-yu ío ndáhyú-yu sá ndihú iní-yu chi vá yōo-gá cuaaⁿ nchaá sá dīcō-yu. ¹² Te dīcō-yu nchaá sá ñí cuáha mee-ni dīhúⁿ cuáaⁿ, ndihí nchaá sá ñí cuáha mee-ni dīhúⁿ cuixíⁿ, te dīco tucú-yu sá ñí cuáha mee-ni yūú văha yúú nání pērlá, ndihí nchaá dava-gá sá ñí cuáha dava-gá yúú văha, te dīcō-yu tnàhá dóó sēdá, ndihí ingá núú dōó văha sá nání līnú, ndihí dóó murádú, ndihí dóó tícuèhé te mee-ni dōó văha cūu-xi, te dīco tucú-yu tnàhá yutnu sá sàháⁿ tnámí, te dīco tucú-yu sá ñí cuáha sá nání mārříl, te dīco tucú-yu sá ñí cuáha mee-ni yutnu váha sá ïo ndèyáhu, te dīco tucú-yu sá ñí cuáha mee-ni cāá, ndihí sá ñí cuáha mee-ni sá nání brōncé, ndihí sá ñí cuáha mee-ni yūú văha yúú nání mārřmól. ¹³ Te dīco tucú-yu canelá, ndihí yúcu sá sàháⁿ tnámí, ndihí dúsa sá sàháⁿ tnámí, ndihí yúcu sá nání mīrrá, te dīco tucú-yu ingá núú dūsa sá sàháⁿ tnámí nani olivánú, te dīco tucú-yu ndudí ndéhé yoho yàha stilé,

ndihi acítí yutnu nàni olívú, ndihi yuchi triú váha, te dîco tucú-yu nchaa dava-gá núú triú, te dîcô-yu tnàhá mbéé, ndihi cuàyú, ndihi nchaa dava-gá quití tatá, te dîco tucú-yu tnàhá carrètá, te dîco tucú-yu tnàhá ñáyiu xînu cuechi, ñáyiu ñá túú tnàhí dàñá quee núú chíúⁿ pàtróóⁿ-xi. ¹⁴ Te nchaa ñáyiu dîco-áⁿ cǔñàhá-yu xii ñáyiu ñuú Babiloniá:

—¡Nchaa sá ïo cǔdǔí ìní-ndó cǔndecu ndihi-ndo ni cuu vá ndácú-gǎ-ndó ñíhí-ndó vitna, te nchaa sá sání ìní-ndó sǎ ïo váha càa ndecu ndihi-ndo ndihi nchaa dava-gá sá ndécú ndihi-ndo ní ndihi nihnu-xi vitna, te ni ñⁿ nduu-gá vá ñíhí-ndó ni ñⁿ xǎⁿ cundecu ndihi-ndo! —duha cǔñaha ñáyiu-áⁿ xii-yu.

¹⁵ Te nchaa ñáyiu ní cuu cuica ñí xóo dîco nándi nchaa sá ñí xóo dîco ñí queheⁿ cue ñáyiu ñuú Babiloniá, nchaa ñáyiu-áⁿ xica-ñǎ cundecú-yu cundehé-yu sá yùhú-yu cuendá nchaa tnúndòho sá yǎha cue ñáyiu ñuú-áⁿ, te ïo ndáhyú-yu sá ndihú ìní-yu sá dúcáⁿ ndòho ñáyiu-áⁿ. ¹⁶ Te cǔñaha tùcú-yu:

—¡Ndàhú nchòhó ñáyiu xǐndecu ñuú cǎhnú ñuú nání Babiloniá! Chi nchòhó cúú-ndó dàtná ñⁿ ñadìhí ñaha ñihnu dóo vǎha dóo murádú, ndihi dóo tícuèhé, te mee-ni sǎ ñí cuáha díhúⁿ cuááⁿ, ndihi mee-ni sǎ ñí cuáha yúú vǎha yúú nání pèrlá, ndihi sá ñí cuáha dava-gá yúú vǎha sá ïo vii ndǎa mee-ni nchàa xǎⁿ ní cuáha sá yíhí lôho-aⁿ, ndihi sá ñúhú dǔcúⁿ-aⁿ, ndihi sá ñúhú dǔcúⁿ ndáhá-áⁿ. ¹⁷ ¡Te uuⁿni ní ndihi nihnu nchaandi túhú sá ndécú ndihi ñadìhí-áⁿ, te ducaⁿ sǎtnahá-xi cǔu nchohó ní cǔu! —duha cǔñàhá-yu xii cue ñáyiu ñuú Babiloniá.

Te nchaa cue téé dàcaca barcú ndihi nchaa cue téé tàxi tnuní bàrcú-áⁿ, ndihi nchaa ñáyiu ñuhu xití bàrcú-áⁿ, ndihi nchaa dava-gá cue téé nándi chiuⁿ quide ndecu lamár, nchaa ñáyiu-áⁿ xica cǔndecú-yu ¹⁸ te quini-yu òré quene ñúhmá cǎyú ñuú cue ñáyiu Babiloniá, te níhi cǎháⁿ-yu, te cachí-yu:

—Ni ñⁿ ñuú ñá túú nǔtnahá-xi ñuú Babiloniá —duha cǎháⁿ-yu.

¹⁹ Te nchaa ñáyiu-áⁿ chidó-yu ñuhu díquǐ-yu, te ngúita-yu ndáhí-yu sá ndihú

ìní-yu, te níhi cǎháⁿ-yu, te cachí tucú-yu:

—¡Ndàhú nchòhó ñáyiu xǐndecu ñuú cǎhnú ñuú nání Babiloniá! Chi ïo cuica-ndo ni cǔu, te diu-ndo ní quide ní cuu cuica nchaa ñáyiu ndècu ndihi barcú, te vitna uuⁿni ní naa-ndo ndihi ñuú-ndó —duha cachí-yu.

²⁰ Te nchaa nchòhó ñáyiu ndècu andiu ïo chí cǔdǔí ìní sá dúcáⁿ dàndoho Yá Ndiòxí nchaa ñáyiu ñuú Babiloniá-áⁿ, te diu-ni ducaⁿ chí cǔdǔí ìní nchaa nchòhó cue téé ní cachí Xítóhó Jesucristú cǎháⁿ tnúhu-gá, te diu-ni ducaⁿ chí cǔdǔí ìní nchaa nchòhó cue téé cǎháⁿ tnúhu Yá Ndiòxí nàcuáa dàcahu ìní ñáhá-gǎ xii-ndo, te diu-ni ducaⁿ chí cǔdǔí ìní nchaa dava-gá nchòhó ñáyiu cǔu cuendá-gá cuendá sá dúcáⁿ dàndoho-gá nchaa ñáyiu ñuú-áⁿ. Te ducaⁿ càda ñaha-gá xii cue ñáyiu-áⁿ cuendá nchaa sá quidé ñàhá-yu xii-ndo.

²¹ Te sátá dúcáⁿ te ní xiní-í ñⁿ espíritú xínú cuèchi núú Yǎ Ndiòxí, te espíritú-áⁿ ïo ndee-xi te ní queheⁿ-xi ñⁿ yúú cǎhnú dàtná cǎhnu yódó te ní dáquèe-xi xití ndute lamár, te cǎchí-xi:

—Dàtná ní quide-í ní dáquèe-í yúú xití ndute ducaⁿ càda-xi ñuú cǎhnú ñuú Babiloniá, chí ñáyiu ñuú-áⁿ ïo ndihi naá-yu ndihi ñuú-yu, te vá ñⁿ nduu ñⁿ quíú-gǎ quini ñáhá ñáyiu xii-yu. ²² Te ni ñⁿ-gá ñáyiu cǎni arpá, te ni ñⁿ-gá ñáyiu tǔú vǐlu, te ni ñⁿ-gá ñáyiu tǔú cútú, te ni ñⁿ-gá yaá vá cóo ñuú-áⁿ, te ni ñⁿ-gá cue ñáyiu xiní cada ñⁿ núú chiuⁿ vá cóo-gǎ, te ni vǎ yǒo-gá canehe chiuⁿ yúú cúú yódó mulínú. ²³ Te ni ñⁿ-gá ñuhú vá cǔndècu ñuú-áⁿ, te ni ñⁿ nduu-gá vá cóo víco tnándaha, te ñáyiu ñuú-áⁿ ñáyiu quide ndáhú cúú-yu ñáyiu ïo-gá cuicá-yu dàcúxí ñáyiu quide ndáhú xǐndecu nihí ñuyíú, dîco ncháá-yu naá-yu chí quide nduú-yu te ïo dàndahú-yu cue ñáyiu ñuyíú sǎ dúcáⁿ quidé-yu.

²⁴ Te diu-ni ñuú-áⁿ ñí dácácǎ-yu níñí cue téé ní cǎháⁿ tnúhu Yá Ndiòxí, te diu-ni ducaⁿ ñí quidé-yu nchaa dava-gá cue ñáyiu cǔu cuendá-gá, te diu-ni-yu quide xísahni tnàha ñáyiu ñuyíú —duha cǎchí espíritú-áⁿ.

19

¹ Te sáta dúcáⁿ te ní tecú dóho-í níhi ní cáháⁿ cuéhé víhí ñáyiú andiú, te cächí-yu:

¡Ío càhnu cuu Yá Ndiöxí!, chi diu-gá cúú-gã Yaá ní dácäcu nihnu ñaha xii-o núú ùhú núú ndàhú, te ío cùnuu-gá, te mee-ni sã vãha quide-gá,

² te mee-gã ío váha ndáá quidé-gã quidé ndáá-gá cuéchi nchaa ñáyiú,

chi diu-gá ní dáquihíⁿ-gá ñadìhí ñaha ndècu ichi díí iní núú ùhú núú ndàhú,

chi diu-aⁿ ní sanu ichi-aⁿ ñáyiú ñuyíú ichi cuéhé ichi duha,

te ducaⁿ ní dáquihíⁿ ñáhá-gã xii-aⁿ núú ùhú núú ndàhú chi nàchinaa-gá sá ní sahani-aⁿ cue ñáyiú ní xinu cuechi núú-gã.

Duha cächí-yu.

³ Te cächí tucú-yu:

—¡Ío càhnu cuu Yá Ndiöxí!, chi nchaa nduu nchaa quíú ducaⁿ-ni quène ñúhmá núú ñúhú ñaha-áⁿ càyú-aⁿ —duha cächí-yu.

⁴ Te ndi òcò cúmí cue tée cùu sacuéhé xíndecu-áⁿ ní ngüíñí xítí-güedé núú Yá Ndiöxí núú núcòo-gá táxí tnùní-gá, te tnàhá cue quiti cúmí xínutñí-áⁿ ní ngüíñí xítí-güedé núú-gã, te cue tée-áⁿ cächí-güedé ndihí cue quiti-áⁿ:

—Sá ndáá sá ío càhnu cuu Yá Ndiöxí — duha cächí-güedé ndihí cue quiti-áⁿ.

⁵ Te sáta dúcáⁿ te ní tecú dóho-í ní cáháⁿ ñí sá ní cáháⁿ mei núú nútñí xilé váha núcóo Yá Ndiöxí, te cächí sá càháⁿ-áⁿ:

Nchaa nchòhó ñáyiú xínu cuechi núú Yá Ndiöxí, diu-ni nchòhó ñáyiú nèhe sá yíñùhu núú-gã,

càháⁿ-ndó sã ío càhnu cuu-gá cuéi cùnuu-ndo àdi ñá túú cùnuu-ndo.

Duha cächí sá càháⁿ-áⁿ.

Íⁿ vico cùu datná vico tnãndaha

⁶ Te sáta dúcáⁿ te ní tecú dóho-í ní cáháⁿ cuéhé víhí ñáyiú andiú, te òré ducaⁿ ní cáháⁿ-yu te ní quide-xi datná quidé-xi núú xicá cuéhé víhí ndùte, te ní quide tucu-xi datná quidé-xi òré càháⁿ níhi víhi ñúhu, te cächí-yu:

¡Ío càhnu cuu Dútú Ndiöxí Yaá cúú Tãtá-ó!

Te ío cùnuu-gá táxí tnùní-gá, te quide-gá nchaandi túhú sá váha.

⁷ Te ío chí ná cùdíí iní-ó, te chí ná cächí-ó sã ío càhnu cuu Yá Ndiöxí,

chi vitna ní sáá nduu càda Yaá cáá datná cáá ñⁿ mbéé quiti ní dánicuéhé-güedé ñⁿ vico, te cùu-xi datná vico tnãndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-áⁿ, te cada iní-ó sã ñáyiú-áⁿ cúú-yu datná ñⁿ ñadìhí xíchí tnãndaha ndihí-gá,

⁸ te ñáyiú-áⁿ ní nduu táhú-yu cuihnú-yu dóo váha dóo chàhnchí sá ío váha càndoo. Duha cächí-yu.

Te sá dúcáⁿ ní nduu táhú ñáyiú cùu cuendá Yá Ndiöxí dóo váha nìhnú-yu, xiãⁿ cútnùní iní-ó sã cúú-yu ñáyiú quide ndáá núú-gã.

⁹ Te ñⁿ espíritú xínú cuéchi núú Yá Ndiöxí ní cachí tnúhu-xi xii-í, te cächí-xi:

—Chido tnùní-n ñⁿ núú tütú nàcuáa na càháⁿ-í-a: “Váha táhú nchaa ñáyiú ní cáháⁿ ñáhá Yá cáá datná cáá ñⁿ mbéé quiti ní dánicuéhé-güedé cundecú-yu vico, te vico-áⁿ cúú-xi datná vico tnãndaha cada-gã”, te duha chido tnùní-n chi tnúhu-a cùu-xi tnúhu ndáá tnúhu Yá Ndiöxí —duha cächí espíritú-áⁿ.

¹⁰ Te ní ngüíñí xítí-í núú espíritú-áⁿ cuendá chiñuhu-í-xi ni cùu, te ní cachí-xi:

—Vá dúcáⁿ càda-n, chi tnàhá-í dícó xínú cuéchi-í núú Yá Ndiöxí datná quidé-n xínu cuechi-n núú-gã ndihí nchaa dava-gá ñáyiú ndècu ndihí-n ichi-gá, ñáyiú nchícúⁿ nihnu quide ni yuhu ni iní nchaa nàcuáa càháⁿ Xítohó Jesucristú, te núu xiãⁿ cächí-í sá vã dúcáⁿ càda-n, chi mee Yá Ndiöxí chiñuhu-n —duha cächí espíritú-áⁿ.

Te nchaa cue tée càháⁿ tnúhu Yá Ndiöxí càháⁿ-güedé nàcuáa ndùu tnúhu càháⁿ Xítohó Jesucristú.

Cuendá Yaá yódó ñⁿ cuayú cuixíⁿ

¹¹ Te ní xiní-í nchii andiú, te ní xiní-í ní quee ñⁿ Yaá yódó-gã ñⁿ cuayú cuixíⁿ. Te Yaá-áⁿ nání-gã Yaá quidé ndáá cuiti, duha nàni-gá. Te quide-gá nchaa sá càháⁿ-gá, te ío váha quide ndáá-gá cuéchi nchaa ñáyiú, te nchaa ñáyiú nàá ndihí ñaha xii-gá ío váha xini-gá nàcuáa cada ñaha-gã xií-yu chi ío ndáá quidé-gã. ¹² Te tinúu-gá dáyèhé-xi datná dáyèhé ñuhú, te titní coróná ñúhú

dĩquí-gã, te nèhe-gá ìⁿ sá ndèé diu-gá, te vá yõ ìⁿ cùtnuní ini-xi nása cuáháⁿ tnúhu-áⁿ, chi ìⁿdìi díi-ni mee-gã náhá-gã nàcuáa càháⁿ-xi. ¹³ Te Yaá-áⁿ níhnú-gã ìⁿ dóó nǐ cuu mee-ni nǐñí, te Yaá-áⁿ càchí tnúhu-gá nchaa nàcuáa sàni iní Yã Ndiõxí, núu xiáⁿ nání-gã Tnúhu Yá Ndiõxí. ¹⁴ Te sátá-gã nchicúⁿ nchaa espíritú xínú cuèchi núú Yã Ndiõxí, te cue espíritú-áⁿ cúu-xí dàtná sandadú, te xíxíhnu-xi dóó cuìxíⁿ dóó vãha sá cándò, te xíxódó-xi cuàyú cuìxíⁿ. ¹⁵ Te yuhu Yaá yódónu-áⁿ quéné ìⁿ yuchí cáhnú, te ndihí yuchí-áⁿ dánícuèhé-gá nchaa ñáyíu xĩndecu ñuyíú, te ío dandòho ñaha-gá xií-yu, te dàtná quidé tée quìhni ndéhé yoho yàha stilé ducaⁿ sãtnhá-xi cada ñaha-gã xií-yu, chi ío dandòho ñaha-gá xií-yu cuendá sá ío cùdééⁿ-gã. Te mee-gã ío cùnū-gá táxi tnùnigá, te quide-gá nchaandi túhú sá vãha. ¹⁶ Te sátá dõó níhnú Yáá-áⁿ ndihí núú ticácáⁿ-gã yódó tnùnigá nàcuáa nani-gá, te duha càháⁿ-xi: “Tée ío cùnū taxi tnuní ñáhá xii nchaa cue tée yĩndaha ñaha xii ñáyíu ndihí nchaa dava-gá ñáyíu”, duha ndèé tnuní sátá dõó-gã-áⁿ ndihí ticácáⁿ-gã-áⁿ.

¹⁷ Te dàtnuní ní xiní-í ìⁿ espíritú xínú cuèchi núú Yã Ndiõxí nùtnǐ-xi núú nchĩcanchii, te níhi ní cáháⁿ-xi, te xãháⁿ-xi xii nchaa quiti ndava núú tàchí:

—Nchaa nchòhó quiti ndava, chí táquixi chí caxi-ndo nchaa sá nǐ quide túha Yã Ndiõxí, ¹⁸ chí caxi-ndo cùnū nchaa cue tée yĩndaha ñaha xii ñáyíu, ndihí cuñú nchaa cue tée tàxi tnuní ñáhá xii cue sandadú, ndihí cuñú nchaa cue tée ío ñí xĩndáa, ndihí cuñú nchaa cuàyú, ndihí cuñú nchaa cue tée ní xódó ñaha xii-güedi, ndihí cuñú nchaa dava-gá ñáyíu, ñáyíu ñá túú tnàhí ní dàñá quee núú chíúⁿ pàtróóⁿ-xi, ndihí cuñú nchaa ñáyíu ní dàñá nǐ quee núú chíúⁿ pàtróóⁿ-xi, ndihí cuñú nchaa ñáyíu cùnū, ndihí cuñú nchaa ñáyíu ñá túú cùnū, te nchaa cuñú-áⁿ caxi-ndo —càchí espíritú-áⁿ xãháⁿ-xi xii nchaa quiti-áⁿ.

¹⁹ Te sátá dúcáⁿ te ní xiní tucu-í quiti ní quene xití làmár, ndihí nchaa cue tée yĩndaha ñaha xii ñáyíu, ndihí nchaa cue tée cù sandadú-güedé ní naníhí tnáhá-güedé

ndihí quiti-áⁿ cuendá cuu ìⁿnuu-güedé ndihí-dí nàá-güedé ndihí Yaá yódó cuàyú-áⁿ, ndihí nchaa cue espíritú cúu sandadú ndihí-gá. ²⁰ Te cue espíritú cúu sandadú ndihí Yaá-áⁿ nǐ tni-xi quiti-áⁿ, ndihí tée ío dandahú ñáhá xii ñáyíu càchí sá càháⁿ tnúhu Yá Ndiõxí te ñá ndáa sá càháⁿ-dé tnúhu-gá, te diu-ni tée-áⁿ nǐ quide-dé titní núú sá vã yõ tnàhí ndacu cada núú quiti-áⁿ. Te sátá dúcáⁿ nǐ quide tée-áⁿ xiáⁿ ní dándahú-dé ñáyíu ní sándáa iní-yu ní quée-yu tnuní quiti-áⁿ, te ní chiñhú-yu sá nǐ dándácú ñáhá-yu xii-dí, te cue espíritú-áⁿ nǐ dáquée-xi quiti-áⁿ núú ñuhú núú ñuhú àzufré càyú-xi, ndihí tée ducaⁿ dandahú ñáhá xii ñáyíu-áⁿ, te xiáⁿ cuhuⁿ tée-áⁿ ndihí quiti-áⁿ, te ío ndoho-dé ndihí-dí. ²¹ Te ndihí yuchí cáhnú sã quéné yuhu Yaá yódó cuàyú-áⁿ nǐ sahani-gá nchaa dava-gá cue tée cùndihí quiti-áⁿ, te nchaa cue quiti ndava ní chítú xití-güedi ní xexi-güedi cuñú nchaa cue tée-áⁿ.

20

Úxí ciendú cuía

¹ Te sátá dúcáⁿ te ní xiní-í ìⁿ espíritú xínú cuèchi núú Yã Ndiõxí ní quee-xi andíu, te nũndaha-xi ndacaá nacaáⁿ-xi yèhe ìⁿ yaú cùnú víhí núú cùndecu sácúihná, te nũndaha tucu-xi ìⁿ cadená cáhnú. ² Te espíritú-áⁿ nǐ tni-xi quiti dééⁿ nání dràgón, te diu-ni quiti-áⁿ cúu-dí mèi yucu ñávãha sá nání sácúihná, te diu xiáⁿ ní nduu-xi cóo ndèé sanaha. Te espíritú-áⁿ nǐ dácútú ñaha-xi xii-dí, te ducaⁿ-ni cùndutu-dí ndèé xínu úxí ciendú cuía. ³ Te sátá nǐ dácútú ñaha espíritú-áⁿ xii-dí te ní dáquée ñaha-xi xii-dí yaú-áⁿ chí diu yaú-áⁿ tàú-dí quée-dí cundecu-dí. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuendá sá vã quéné-gã-dí dandahú-dí cue ñáyíu ñuyíú, te xiáⁿ cundedí nihnu-dí ndèé xínu úxí ciendú cuía. Te sátá ná yãha úxí ciendú cuía-áⁿ te nandáxí-dí te quene-dí yaú núú ñuhú-dí-áⁿ caca cuu tnaa-dí ìⁿ úú nduu.

⁴ Te dàtnuní ní xiní-í xĩnutnǐ titní xilé vãha, te xiáⁿ xĩnucóo nchaa ñáyíu ní ngũndecu ndihí tnúhu ndee ìní cada ndáa cuèchi nchaa ñáyíu, te ní xiní-í xĩndecu tnàhá cue ñáyíu ní xehndé-güedé dúcúⁿ-xi

cuendá sá ñí cáháⁿ-yu tnúhu Yá Ndiöxí, ndihi cuendá sá ñí cáháⁿ váha-yu cuendá Xítohó Jesucristú. Te ñá-yu-áⁿ cúu-yu ñá-yu ñá túú ní chihúhú-yu quiti ní quene xití lámár-áⁿ, te ni ñà túú ní chihúhú-yu sá ñí dándácú ñá-yu ní natava ñáhá-yu xii-di, te ni ñà túú ní dàñá-yu mée-yu quée-yu tnuní quiti-áⁿ chi ni tnée-yu te ni ndáhá-yu ñá túú ní dàñá-yu quée tnuní-di. Te ní xiní-í ní ndoto cue ñá-yu-áⁿ cuendá tnáhá-yu cunú-yu taxi tnuní-yu ndihi Xítohó Jesucristú úxí ciendú cuía. ⁵ Te dava ñá-yu ní xihí ñá túú ní ndótó-yu, chi ndée yáha úxí ciendú cuía te dàtnuní ndotó-yu. Te ñá-yu ní xiní-í ní ndoto-áⁿ cúu-yu ñá-yu ní ndoto díhna nuu. ⁶ Te ío váha ní tnahá nchaa ñá-yu ní nduu táhú ñí ndoto díhna nuu!, chi cue ñá-yu-áⁿ ío cùdú-yu núu Yá Ndiöxí, te nchaa ñá-yu-áⁿ vǎ quíhíⁿ-yu núu ùhú núu ndáhú, te ñá-yu-áⁿ cúu-yu dútú ndécú-yu núu Yá Ndiöxí ndihi núu Xítohó Jesucristú, te ñá-yu-áⁿ cúnú-yu dàtná cúnú Xítohó Jesucristú, te cunuu ndihi ñáhá-yu xii-gá úxí ciendú cuía.

⁷ Te sátá ná yáha úxí ciendú cuía-áⁿ te sácúhna quee-xi núu yíndedí nihnu-xi-áⁿ, ⁸ te ngúita tucu-xi dandáhú-xi nchaa ñá-yu xíndecu nihí ñuyú, te cuéi ñá-yu ñuu Gög, te cuéi ñá-yu ñuu Mágóg ducaⁿ quíhíⁿ-xi dandáhú ñáhá-xi xii-yu, te datácá-xi nchaa ñá-yu cuendá nàa-yu, te cuéhé víhí-yu dàtná cuéhé ñuhu cúchí lámár. ⁹ Te nchaa ñá-yu-áⁿ tñí-yu ichi quíhíⁿ-yu ñí ichi sá cuáháⁿ núu cáá ñí yodo cahnu vihi, te sáa-yu núu xíndecu ñá-yu cùu cuendá Yá Ndiöxí, te ñá-yu-áⁿ chidócó-yu cue ñá-yu cùu cuendá-gá-áⁿ ndihi ñuu-yu, te ñuu-áⁿ ío cùu iní-gá, dico mee Yá Ndiöxí dangoyo-gá ñuhú cahmi-gá nchaa ñá-yu ducaⁿ chidoco ñaha xii ñá-yu cùu cuendá-gá-áⁿ, te nchaa ñá-yu-áⁿ cuú. ¹⁰ Te sácúhna sǎ dúcáⁿ dandáhú ñáhá xii ñá-yu chidoco ñaha xii ñá-yu cùu cuendá Yá Ndiöxí-áⁿ dàquée ñaha-gǎ xii-xi núu ñuhú núu ñuhú àzufré càyú-xi, te ñá-yu-áⁿ sa ñuhu quiti ní quene xití lámár, ndihi téé ní dándáhú ñá-yu ní xáhaⁿ-dǎ xii-yu sá cáháⁿ-dǎ tnúhu Yá Ndiöxí te ñá ndáá sá cáháⁿ-dǎ tnúhu-gǎ, te xíáⁿ cuhuⁿ-xi ndoho-xi ni caa ni quíhíⁿ ndihi

quiti ní quene xití lámár, ndihi téé cǎchí sá cáháⁿ tnúhu Yá Ndiöxí te ñá ndáá sá cáháⁿ-dǎ tnúhu-gǎ.

Cùndáá cuéchi ñá-yu

¹¹ Te ní xiní-í núnú ñí xilé váha xilé cuixíⁿ, te núu xilé-áⁿ núcóo ñí Yaá. Te ndèhe Yaá-áⁿ ni ndóñuhú àndiu ndihi ñuyú-a, te ducaⁿ ni ndóñuhú-xi chi vá cùndecu-gǎ-xi. ¹² Te sátá dúcáⁿ te ní xiní-í nchaa ñá-yu ní xihí ní cùu, ñá-yu cúnú ndihi ñá-yu ñá túú cúnú xínutñí-yu núu Yá núcóo núu xilé váha-áⁿ, te Yaá-áⁿ cúu-gǎ Yá Ndiöxí, te òré-áⁿ ñí nandicá nchaa tutú núu yódó tnuní nchaa nàcuáa nduu sá ñí quide ñí ñá-yu-áⁿ, te ní nandicá tucu ingá tutú núu yódó tnuní nchaa ñá-yu ní naníhí tǎhú, te nchaa ñá-yu ní xihí ní cùu xínutñí-yu núu Yá Ndiöxí cundáá cuéchi-yu, te nchaa nàcuáa nduu nchaa cuéchi-yu yodo tnuní núu nchaa tutú-áⁿ ducaⁿ cùndáá. ¹³ Te nchaa ñá-yu ní xihí xití ndute lámár, ndihi nchaa ñá-yu ní xihí núu ñuhu yíchí nchaa ñá-yu-áⁿ cundáá cuéchi-yu nàcuáa ní quidé-yu ñí ñí-yu. ¹⁴ Te vitna te vá cùu-gǎ ñá-yu chí ñá túú-gǎ tnúhu xihí, te nchaa ñá-yu ñuhu núu ñuhú núu càyú ñá-yu-áⁿ cúu-yu ñá-yu ní xíta nihnu ni caa ni quíhíⁿ. ¹⁵ Te ducaⁿ chi nchaa ñá-yu ñá túú yodo tnuní núu tütú núu yódó tnuní nchaa ñá-yu naníhí tǎhú ní dáquée ñaha Yá Ndiöxí xii-yu núu ñuhú núu càyú.

21

Andiu sàa ndihi ñuyú sáa

¹ Te sátá dúcáⁿ te ní xiní-í andiu sàa ndihi ñuyú sáa, te andiu sà ndécú díhna ndihi ñuyú sà ndécú díhna ní ndóñuhú-xi, te tnáhá lámár ní ndóñuhú-xi. ² Te yuhú té Juáa ní xiní-í ñuu Jerusàlén sáa ñí quee-xi núu ndécú Yá Ndiöxí, te ñuu-áⁿ cúu-xi ñuu méé-gǎ, te ío vii càa chí càa datná cáá ñí ñadihí xíchí tnǎndaha. ³ Te ní tecú dóho-í níhi ní cáháⁿ ñí sá ñí cáháⁿ andiu, te cǎchí-xi:

—Chí cùndédóho ñí tnúhu na cáháⁿ-í-a: Yá Ndiöxí ndécú ndihi-gǎ cue ñá-yu vitna, te ducaⁿ-nǎ cundecu ndihi ñaha-gǎ xii-yu, te ñá-yu cùu-yu ñá-yu cùu cuendá-gǎ, te vá ñí nduu ñí quíu-gǎ te dáña ñaha-gǎ xii-yu. ⁴ Te mee Yá Ndiöxí cada-gǎ sá ñá túú tnáhí-gǎ ná caní iní-yu cundecu-yu, te ni vǎ

quíní-gá-yu tnúhu xihí, te ni vă quíní-gá-yu tnúhu ndàhyú, te ni vă quíní-gá-yu tnúhu ndìhú iní-xi, te ni vă quíní-gá-yu tnúhu cùhú, chi nchaa sá nĩ xini-yu ñuyú dǐhna vá quíní-gá-yu vitna —duha cächí sá nĩ cáháⁿ-áⁿ.

⁵ Te Yaá núcõo núú xilé váha-áⁿ nĩ cachí tnúhu-gá xii-í, te cächí-gá:

—Yúhú quídè-í nàcuáa nduu saa nchàa sá cùndècu vitna. Te vitna chido tnùnín-ñ ñⁿ núú tütú nchaa tnúhu sá nĩ cáháⁿ-í-a, chi nchaa tnúhu-a cùu-xi tnúhu ndáa cuiti —duha cächí-gá.

⁶ Te dǎtnùníní ní cachí tnúhu tucu-gá xii-í:

—Sa ní xínu cava nchaa chiⁿ ní sani iní-í cada-í, te diu-ni yúhú cùu-í Yaá sa ndècu ndéé cùtnàhá ní ngáva ñuyú, te diu-ni-í cundecu-í nĩ caa nĩ quíhíⁿ. Te nchaa ñáyiu cuíní tuha ñaha xii-í te cada iní-yu sá dǎtná ndute cùu-xi sá cuǎñaha tǎhù-í xii-yu candeca-xi iní-yu nĩ caa nĩ quíhíⁿ. ⁷ Te nchaa ñáyiu na cùndee iní yáha nándi sá ná yáha-yu sá cuendá-í, te ñáyiu-áⁿ nduu tǎhù-yu cundecu váha-yu, te yúhú cuu-í Ndiõxí-yu, te ducaⁿ mée-yu cuú-yu déhe-í. ⁸ Te nchaa ñáyiu na yúhú ndoho cuendá-í quíhíⁿ-yu núú ñùhú núú càyú ndihí ñáyiu ñá túú sàndáa iní ñáhá xii-í, ndihí ñáyiu quide nándi nchaa sá cuèhé sá dúhá, ndihí ñáyiu sàhni tnaha, ndihí ñáyiu ndècu ichi díí iní, ndihí ñáyiu quide nduu, ndihí ñáyiu chiñuhu nchaa sá cächí-yu cùu ndiõxí ní cadúha cue téé ñuyú-a, ndihí ñáyiu dàcuandehnde, nchaa ñáyiu ducaⁿ xíquide-áⁿ cuíta nihnú-yu chi quíhíⁿ-yu núú ñùhú núú ñùhú àzufré càyú-xi —duha ní cáháⁿ Yá Ndiõxí ní cachí tnúhu-gá xii-í.

Ñuú Jerusàlén sáa

⁹ Te núú ùsá espíritú xínehe tícùú ñùhú tnúhu ndòho, te ñⁿ-xi ní quixi-xi te cächí-xi:

—Taguixi, te na dǎnehé ñáhà-í xii-n nchàa ñáyiu cùu cuendá Yaá cáa dǎtná cáa ñⁿ mbéé quiti ní dǎnícuehé-güedé, ñáyiu-áⁿ cada iní-n sǎ cúu-yu dǎtná ñⁿ xíchí cuéchí vitna tnándaha, te ducaⁿ càda iní-n sǎ cúu-yu chi cundecú-yu ndihí-gá —duha ní cachí tnúhu espíritú-áⁿ xii-í.

¹⁰ Te òré quidé ñàha espíritú Yá Ndiõxí xii-í nàcuáa cächí iní-xi, te espíritú néhé

tícùú-áⁿ ndécá ñàha-xi xii-í cuáaá ñⁿ tindúú dúcúⁿ, te xíaⁿ nĩ dǎnehé núú ñáhá-xi xii-í ñuú Jerusàlén te ñuú-áⁿ nĩ quee-xi núú ndécú Yá Ndiõxí, te ñuú-áⁿ cúu-xi ñuú mée-gǎ. ¹¹ Te ñuú-áⁿ ïo càhnu cuu-xi chi ducaⁿ ïo càhnu cuu mee-gǎ, te dǎtása-xi dǎtná dǎtásaⁿ yúú váha sá nání jǎspé yúú cáa dǎtná cáa vidriú sá túu ingá xio ndàa sátá-xi. ¹² Te nĩ càndéé yuhu ñuú-áⁿ sùúní dúcúⁿ nchaa sá ñùhú dòco, te nchií úxúú yuyèhe-xi, te ndi tnahá ñⁿ ñⁿ yuyèhe-áⁿ xǐndecu ñⁿ caa espíritú xínú cuèchi núú Yá Ndiõxí. Te ndi tnahá ñⁿ ñⁿ yuyèhe-áⁿ yódó tnùníní diu ñⁿ caa xichi cue ñáyiu isràél. ¹³ Te úní yuyèhe-xi nchií ndàa xio nacuáa quène nchíanchii, te úní tucu yuyèhe-xi nchií ndàa nacuáa quée nchíanchii, te úní tucu yuyèhe-xi nchií ndàa xio cuha nacuáa quène nchíanchii, te úní tucu yuyèhe-xi nchií ndàa xio datni nacuáa quène tucu nchíanchii. ¹⁴ Te sá ñùhú dòco-áⁿ chi úxúú tnahá yúú cúú cìmentú-xi, te ndi tnahá ñⁿ ñⁿ yúú-áⁿ ndéé ñⁿ caa diu cue téé ní cáháⁿ tnúhu Yaá cáa dǎtná cáa ñⁿ mbéé quiti ní dǎnícuehé-güedé, te diu mee-gǎ ní táuchíúⁿ-gǎ ní cáháⁿ-güedé tnúhu-gá.

¹⁵ Te espíritú sá càháⁿ ndihí ñàha xii-í-áⁿ néhé-xi ñⁿ sá cání nĩ cuáha mee-ni dǐhúⁿ cuáaⁿ, te ndihí xíaⁿ chícùhá-xi ñuú-áⁿ, ndihí sá ñùhú dòco ñuú-áⁿ, ndihí nchaa yuyèhe-xi. ¹⁶ Te ñuú-áⁿ ñⁿ-ni nèhe-xi cuendá quèhéⁿ-xi ndihí cuendá càni-xi, te espíritú-áⁿ ní chícùhá-xi ndihí sá néhé-xi-áⁿ ñuú-áⁿ, te nèhe-xi ócò úú ciendú mìl mètrú sá cání te diu-ni ducaⁿ nèhe-xi cuendá quèhéⁿ-xi, te diu-ni ducaⁿ nèhe-xi sá dúcúⁿ nchaa vehe càa ñuú-áⁿ. ¹⁷ Te dǎtnùníní ní chícùhá-xi sá ñùhú dòco ñuú-áⁿ, te xíaⁿ néhé-xi ùnídico cúmí mètrú sá dúcúⁿ, te ní chícùhá-xi dǎtná chícùhá cue ñáyiu ñuyú-a.

¹⁸ Te sá ñùhú dòco-áⁿ nĩ cuáha mee-ni yúú váha yúú sá nání jǎspé, te nihí ñuú-áⁿ cúu-xi mée-ni dǐhúⁿ cuáaⁿ, te càa dǎtná cáa vidriú sá ïo váha càndoo te túu ndàa ingá xio. ¹⁹ Te ndi úxúú yúú cúú cìmentú sá ñùhú dòco-áⁿ ndéé ndí dííⁿ núú yúú vii càa sátá-xi, te yúú dǐhna ndéé mee-ni yúú váha sá nání jǎspé sátá-xi, te yúú cúú úú ndéé tucu ingá núú yúú váha sá nání zǎfirú sátá-xi, te yúú cúú ùnì ndéé tucu ingá núú yúú váha sá nání àgatá sátá-xi, te yúú cúú cùmí

ndèé ingá núú yúú vâha sá nání èsmeraldá sátá-xi. ²⁰ Te yúú cúú ùhúⁿ ndèé tucu ingá núú yúú vâha sá nání ònicé sátá-xi, te yúú cúú ìnú ndèé tucu ingá núú yúú vâha sá nání còrnalíná sátá-xi, te yúú cúú ùsá ndèé tucu ingá núú yúú vâha sá nání crìsólítú sátá-xi, te yúú cúú ùná ndèé tucu ingá núú yúú vâha sá nání bèrilú sátá-xi, te yúú cúú ìⁿ ndèé tucu ingá núú yúú vâha sá nání tòpacíú sátá-xi, te yúú cúú ùxí ndèé tucu ingá núú yúú vâha sá nání crìsopásá sátá-xi, te yúú cúú ùxí ìⁿ ndèé tucu ingá núú yúú vâha sá nání jácintú sátá-xi, te yúú cúú ùxúú ndèé tucu ingá núú yúú vâha sá nání àmatístá sátá-xi. ²¹ Te ndi ùxúú yuyèhe sá ñúhú dòco-án cúú-xí mèe-ni yúú vâha sá nání pèrlá, te ndùu ni yúú cúú ìⁿ ìⁿ yuyehe-án. Te tnuú cáhnú ndècu xiti ñuú-án cúú-xí mèe-ni díhúⁿ cuáán, te càa-xi datná cáá vídriú sá tûu ndàa ingá xio.

²² Te ní xiní-í sá ñà túú vèhe núú chíñùhu ñáyíu Dútú Ndiòxí cáá ñuú-án, chi mee-ná Dútú Ndiòxí Yaá quidé nchàa-ndi túhú sá vâha ndècu ñuú-án, ndihí Yaá cáá dàtná cáá ìⁿ mbéé quití ní dánícuèhé-güedé. ²³ Te ñuú-án ñà túú-gá xíní ñùhu-xi nchícanchii dayèhé-xi, te ni yóó ñà túú-gá xíní ñùhu-xi, chi mee-ná Yá Ndiòxí dáyèhé-gá ñuú-án ndihí Yaá cáá dàtná cáá ìⁿ mbéé quití ní dánícuèhé-güedé. ²⁴ Te cue ñáyíu nchaa ñuú cáá ñùyíú, ñáyíu ní naníhí tàhú xíndecu ñuú-án dáyèhé-gá núú-yu, te nchaa cue té yíndaha ñaha xí-yu nèhe-güedé sá yíñùhu sá cúú-xí ñuú-án, te quíde cahnu ñaha-güedé xii-gá. ²⁵ Te yuyèhe ñuú-án ñà túú tñàhí nàndedí, te ñuú-án ñà túú tñàhí cùndiquíⁿ. ²⁶ Te nchaa ñáyíu nèhé-yu sá yíñùhu sá cúú-xí ñuú-án te quíde cahnú-yu Yá Ndiòxí. ²⁷ Te ñuú-án vâ cúú cùndecu ni ìⁿ ñáyíu ndècu ichi cuehé ichi duha, te ni ìⁿ ñáyíu ndehnde, te ni ìⁿ ñáyíu quíde sá ñà túú cùu vâha iní Yá Ndiòxí vâ cúú cùndecú-yu ñuú-án, chi mee-ni ñáyíu naníhí tàhú ñáyíu yòdo tñuní núú tütú Yaá cáá dàtná cáá ìⁿ mbéé quití ní dánícuèhé-güedé, mee-ni ñáyíu-án cundecú-yu ñuú-án.

22

¹ Te sátá dúcáⁿ te ñuú-ni espíritú-án

ni dánèhé núú ñáhá-xí xí-í yúte núú ñúhú ndute candoo canine, te ndute-án candeca-xi iní ñáyíu ni caa ni quíhíⁿ, te ndute-án quée-xí mèi núú núcõo Yá Ndiòxí ndihí Yaá cáá dàtná cáá ìⁿ mbéé quití ní dánícuèhé-güedé. ² Te cuádava tnuú cáhnú yâha xiti ñuú-án cáá yúte-án, te xio xio yuhu yúte-án níhnú yùtnu cuuⁿ sávídí-xi, te sávídí nchaa yutnu-án cúú tucu-xi sá cándèca iní ñáyíu ni caa ni quíhíⁿ, te nchaa yutnu-án cúúⁿ sávídí-xi úxúú xito ìⁿ cuíá chi ndi tñahá yóó cúúⁿ sávídí-xi, te nchaa ndaha-xi cùu-xi tátna sá cúú-xí nchàa ñáyíu. ³ Te vâ yóo ìⁿ-gá cada ìⁿ sá ñà túú cùu vâha iní Yá Ndiòxí ñuú-án. Chi ñuú-án núcõo mee Yá Ndiòxí ndihí Yaá cáá dàtná cáá ìⁿ mbéé quití ní dánícuèhé-güedé xitaxi tñuní-gá, te nchaa ñáyíu xínu cuechi núú-gá cada cahnu ñáhá-yu xii-gá. ⁴ Te nchaa ñáyíu-án cundehe núú-yu Dútú Ndiòxí, te tñeé-yu cundéé ñuú-gá. ⁵ Te ñuú-án vâ quíní-gá-yu niú, te ni vâ cánèhe chiuⁿ-gá-yu ñuhú cutnúní núú-yu, te ni nchícanchii ñà túú-gá xíní ñùhu-xi dayèhé ñuú-án chi mee Dútú Ndiòxí dáyèhé-gá, te ni caa ni quíhíⁿ cunúú-yu cundecú-yu ñuú-án.

Sa ta cùyatni nduu quixi tucu Xítoho Jesu-crístú

⁶ Te sátá dúcáⁿ te ní cachí tñuhu espíritú xínú cuèchi núú Yá Ndiòxí-án xii-í:

—Nchaandi túhú tñuhu-a cùu-xi mee-ni tñuhu ndáa cuíti. Te Yá Ndiòxí Yaá dácàhu iní nchaa cue té càháⁿ tñuhu-gá nàcuáa càháⁿ-güedé ní tendaha-gá ìⁿ espíritú xínú cuèchi núú-gá ní quixi-xi ní dánèhé-xi nchaa ñáyíu xínu cuechi núú-gá nchaa nàcuáa cada-gá, te vâ cùyàa-gá ducaⁿ càda-gá —duha càchí espíritú-án.

⁷ Te ní càháⁿ Xítoho Jesucristú, te càchí-gá: —¡Ío ndihí quixi tucu-í!

’;Te ío vâha tñahá nchaa ñáyíu tñi nchaa tñuhu càháⁿ Yá Ndiòxí yódó tñuní núú tütú-a! —duha càchí-gá.

⁸ Te yúhú té Juáá ní tecú dóho-í nchaa nàcuáa ní ngódó tñuní núú tütú-a, te ní xiní núú-í nchaa nàcuáa cada-xi ndéé cuée-gá. Te sátá dúcáⁿ ni cuu te ní ngúíñí xítí-í núú espíritú sá ní dánèhé núú ñáhá nchàa xíⁿ cuendá chíñuhu-í-xi ni cùu. ⁹ Te ní cachí-xi:

—Vá dúcáⁿ càda-n, chi yúhú dìcò xínú cuèchi-í núú Yá Ndiòxí dàtná cúú yòhó ndìhi nchaa dava-gá ñáyiú ndècu ndìhi-n ichi-gá càháⁿ-ndó tñùhu-gá, ndìhi nchaa ñáyiú tñì nchaa tnúhu ndèé núú tütú-a, te xíáⁿ càchí-í sá vǎ dúcáⁿ càda-n, chi mee Yá Ndiòxí ducaⁿ chĩñuhu-n-gá —càchí espíritú-áⁿ xii-í.

10 Te ní cachí tnúhu tucu-xi xii-í, te càchí-xi:

—Vá chidáhu-n nì ìⁿ tnúhu Yá Ndiòxí ndèé núú tütú-a, chi sa ní cuyatni cada-xi nchaa nàcuáa ndèé tñuní. 11 Te dañá sǎ ncháá ñáyiú ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dàña-n nchaa ñáyiú quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiú quide váha te ducaⁿ-ni na càda váha-yu cundecú-yu, te nchaa ñáyiú quide nchaa nacuáa cùu váha iní Yá Ndiòxí te ñu-ni ducaⁿ na càdá-yu cundecú-yu —duha càchí espíritú-áⁿ.

12 Te ní cachí Xítohó Jesucristú:

—Cundedóho-n tñùhu na càháⁿ-í-a. Ío ndìhi quixi tucu-í, te canehe-í nchaa sá ndúú tǎhú ñáyiú quixi, te nàcuáa ndùu chiuⁿ ní quidé-yu ìⁿ ìⁿ-yu te ducaⁿ cùnduu sá cuáñaha-í nduu tǎhú-yu. 13 Te yúhú cúu-í Yaá sa ndècu ndèé cútnàhá ní ngáva ñuyíú, te ñu-ni-í cundecu-í ni caa ni quíhíⁿ —duha càchí-gá.

14 Te váha tǎhú nchaa ñáyiú sa ní nduu ndoo ní nduu nine iní-xi, chi ñáyiú-áⁿ nǐ nduu tǎhú-yu quíhu-yu xití ñuú-áⁿ, te caxí-yu sávidí yutnu nùtní-áⁿ te xíáⁿ candeca-xi iní-yu ni caa ni quíhíⁿ. 15 Te ñuú-áⁿ vǎ cúú quíhu ni ìⁿ ñáyiú ndècu ichi cuehé ichi duha, ni cuè ñáyiú quide nduu, te ni cuè ñáyiú ndècu ichi dǐí iní, te ni cuè ñáyiú sàhni tñaha ñáyiú-xi, te ni cuè ñáyiú chĩñuhu nchaa sá nǐ cadúha cue téé ñuyíú-a càchí-yu cùu ndiòxí, te ni cuè ñáyiú tñàhá iní dacuàndehnde, te ni ìⁿ ñáyiú ducaⁿ xíquide vá ndúú tǎhú-yu quíhu-yu xití ñuú-áⁿ.

16 Te ní cáháⁿ tucu Xítohó Jesucristú, te càchí-gá:

—Yúhú Xítohó Jesucristú ní tendaha-í espíritú xínú cuèchi núu-í cuendá cachí tnúhu-xi xii-n nàcuáa ndùu tnúhu cúñaha-n xii nchaa ñáyiú ndècu ndìhi-n ichi-í dácuaaha tnúhu-í ìⁿ ìⁿ ñuú. Te yúhú cúu-í mei ñàní tñàhá ndìi Dàvií, te cada iní-n sǎ cúu-í dàtná ìⁿ chódíní quiti quène datneé —duha càchí-gá.

17 Te nchaa ñáyiú cùu cuendá Xítohó Jesucristú Yaá cáá dàtná cáá ìⁿ mbéé quiti ní dánicuèhé-güedé, ñu-ni ñáyiú-áⁿ cúu-yu ñáyiú cada iní-ó sǎ cúu-yu ìⁿ ñadìhí xíchí tñàndaha ndìhi ñaha xii-gá, te ñáyiú-áⁿ ìⁿ-ni càháⁿ-yu ndìhi Espíritú Yá Ndiòxí, te xǎhǎⁿ-yu ndìhi Espíritú-gá xii nchaa dava-gá ñáyiú:

—Chí táquixi —cachí-yu xǎhǎⁿ-yu ndìhi Espíritú Yá Ndiòxí.

Te nchaa ñáyiú ducaⁿ ndèdóho tnúhu-áⁿ vitna, te xini ñuhu-xi ducaⁿ cáháⁿ-yu tñàhá-yu cúñàhá-yu xii nchaa dava-gá ñáyiú-áⁿ, te nchaa ñáyiú cuini tuha ichi-gá te na quixí-yu, te dìcò ducaⁿ cùu tǎhú-yu sá cándeca iní-yu ni caa ni quíhíⁿ.

18 Te nchaa nchòhó ñáyiú ndèdóho nchaa nàcuáa càháⁿ tnúhu Yá Ndiòxí ndèé núú tütú-a càháⁿ-í dóho-ndo. Te núu ìⁿ ñáyiú na còdo-gá tnúhu chido tñuní-yu núú tütú-a, te Yá Ndiòxí ío dandòho ñaha-gá xii-yu chí yáha-yu nchaa tñúndòho yodo tñuní núú tütú-a te núu ducaⁿ na càdá-yu. 19 Te núu ìⁿ ñáyiú na chidáhu dava tnúhu Yá Ndiòxí ndèé núú tütú-a te ñáyiú-áⁿ vǎ ndúú tǎhú-yu cundecú-yu ñuú-gá, te ni vǎ ndúú tǎhú-yu sá cándeca iní-yu ni caa ni quíhíⁿ dàtná yódó tñuní núú tütú-a.

20 Te Xítohó Jesucristú Yaá càháⁿ sá ncháá tñùhu-a cùu-xi tnúhu ndáá ní cáháⁿ-gá ní tecú dóho-í, te càchí-gá:

—Ndáá sá ío ndìhi quixi tucu-í —duha càchí-gá.

Te yúhú ní xáhaⁿ-í xii-gá:

—Ducaⁿ na cùnduu, taquixi yohó Xítohó Jesucristú —duha ní xáhaⁿ-í xii-gá.

21 Te Xítohó Jesucristú ío na chindee chitúu ñaha-gǎ xii-ndo ncháa-ndo. Te ducaⁿ na cùnduu. Te ío chí cádá ndèe iní-nǎ vitna.